

29, 112 / 3

A. xxxi Hof

5480

FRIDERICI HOFFMANNI

CONSILIARII REGIS BORUSSIÆ INTIMI,
ET ARCHIATRI,

PROFESSORIS MEDICINÆ PRIMARI IN ACADEMIA HALENSI,

OPERA OMNIA PHYSICO-MEDICA

Denuò revisa, correcta & aucta,

IN SEX TOMOS DISTRIBUTA;

QUIBUS CONTINENTUR

DOCTRINÆ SOLIDIS PRINCIPIIS PHYSICO-MECHANICIS,
& anatomicis, atque etiam observationibus clinico-practicis superstructæ;

*METHODO FACILI AC DEMONSTRATIVA DEDUCTÆ,
& per experientiam LVII. annorum stabilitæ.*

CUM VITA AUCTORIS,

Et ejus PRÆFATIONE de differente medicinæ & medicorum statu atque conditione,
& criteriis boni ac periti medici.

TOMUS QUINTUS.



GENEVÆ,

Apud FRATRES DE TOURNES.

M. DCCXLVIII.

1912

HOFFMANN



OF THE HISTORICAL MEDICAL LIBRARY

By the
Historical Medical Library
of the
University of
Cambridge
and
the
Museum of
Natural History
of the
University of
Oxford

Printed by
the
University Press
at
Cambridge

1912



CONSPECTUS

TOMI QUINTI.

Opuscula Physica varii argumenti.

| | | |
|-------|---|--------|
| I. | <i>Demonstrationes physicae-curiosae, experimentis & observationibus mechanicis ac chymicis illustratae.</i> | Pag. 1 |
| II. | <i>Observationes barometrico-meteorologicae & epidemicae, atque de ventorum natura & viribus.</i> | 15 |
| III. | <i>De salinis Halensibus commentatio, in qua plures simul physicae quaestiones, de fontium salforum origine ipsiusque salis differentiis, praeparatione & utilitate illustrantur.</i> | 47 |
| IV. | <i>De methodo compendiosa, plantarum vires & virtutes in medendo indagandi.</i> | 58 |
| V. | <i>De temporibus anni insalubribus.</i> | 63 |
| VI. | † <i>De siderum in corpora humana influxu medico.</i> | 70 |
| VII. | <i>De fato physico & medico, ejusque rationali explicatione.</i> | 77 |
| VIII. | <i>De annorum climactericorum rationali & medica explicatione.</i> | 89 |
| IX. | ✕ <i>De Diaboli potentia in corpora, per physicas rationes demonstrata.</i> | 94 |
| X. | <i>De temperamento, fundamento morum & morborum in gentibus.</i> | 103 |
| XI. | <i>De rationis instructae excellentia in rebus divinis & humanis.</i> | 111 |
| XII. | <i>De ratione sana, universae medicinae praeside.</i> | 114 |
| XIII. | <i>De atheo convincendo ex artificiosissima corporis structura.</i> | 125 |

Opuscula de aquis mineralibus earumque salutari virtute.

| | | |
|-------|---|-----|
| I. | <i>De elementis aquarum mineralium recte dijudicandis & examinandis.</i> | 131 |
| II. | <i>Scrutinium physico-medicum principiorum & virtutum in praecipuis medicatis Germaniae fontibus.</i> | 141 |
| III. | <i>De convenientia elementorum ac virium in thermis & acidulis.</i> | 152 |
| IV. | <i>Observationes & cautelae circa thermarum & acidularum usum & abusum.</i> | 160 |
| V. | <i>Disquisitio physico-medica, de thermis Carolinis, earum caloris causa, elementis, viribus, utilitate & usu.</i> | 170 |
| VI. | <i>Examen chymico-medicum fontis Sedlicensis amari in Bohemia noviter à nobis detecti, nec non salis ex eodem parati.</i> | 186 |
| VII. | <i>De fontis martiati Lauchstadiensis à nobis detecti viribus & usu.</i> | 195 |
| VIII. | <i>De aqua medicina universali.</i> | 201 |
| IX. | <i>De balneorum ex aqua dulci praestantissimo in affectibus internis usu.</i> | 208 |
| X. | <i>Observationes de acidulis, thermis & aliis fontibus salubribus, ad imitationem naturalium per artificium parandis.</i> | 214 |
| XI. | <i>De eximia virtute salis Carolinarum.</i> | 216 |
| XII. | <i>De connubio aquarum mineralium cum lacte longe saluberrimo.</i> | 222 |
| XIII. | † <i>De fontis Spadani & Schvvalbacensis convenientia.</i> | 229 |
| XIV. | * <i>De fontis Selterani virtute & praestantia.</i> | 234 |

CONSPECTUS TOMI QUINTI.

Opuscula diætetica, in quibus agitur

| | | |
|-------|---|----------|
| I. | <i>De medico sui ipsius.</i> | Pag. 239 |
| II. | <i>De methodo acquirendi vitam longam.</i> | 247 |
| III. | <i>De animo sanitatis & morborum fabro.</i> | 256 |
| IV. | <i>De magno venæ sectionis ad vitam sanam & longam remedio.</i> | 263 |
| V. | † <i>De diætetica sacræ scripturæ medicina.</i> | 270 |
| VI. | * <i>De prolonganda litteratorum vita per regulas diæteticas.</i> | 278 |
| VII. | † <i>De valetudine senum tuenda.</i> | 289 |
| VIII. | † <i>De militum valetudine tuenda in castris.</i> | 296 |
| IX. | <i>De præmatura morte & morbis præcavendis.</i> | 303 |
| X. | <i>De septem legibus sanitatis.</i> | 313 |
| XI. | <i>De peregrinationibus sanitatis causa instituendis.</i> | 320 |
| XII. | <i>De inedia magnorum morborum remedio.</i> | 328 |
| XIII. | <i>De medicina simplicissima & optima, motu, inedia, & aquæ potu.</i> | 334 |
| XIV. | <i>De vini Rhenani præstantia.</i> | 341 |
| XV. | † <i>De eccellente natura, virtute & usu vini Hungarici.</i> | 355 |
| XVI. | <i>De remediorum domesticorum præstantia.</i> | 363 |
| XVII. | <i>De pane grossiori Westphalorum, vulgo Bonpournickel.</i> | 372 |

NB. Dissertationes asterisco * designatæ, nunc primum in lucem prodeunt; quibus verò hoc signum † præfixum est, nondum in unum volumen redactæ fuerunt.





FRIDERICI
HOFFMANNI
OPUSCULA PHYSICA
VARII ARGUMENTI.

*DEMONSTRATIONES PHYSICÆ CURIOSÆ,
experimentis & observationibus Mechanicis ac Chymicis
illustratæ.*

P R Æ F A M E N.



IN lucem jam prodeunt demonstrationes nostræ physicæ curiosæ, ex intimiori Philosophiæ mechanicæ ac chymicæ fonte depromptæ, plusquam trecentis experimentis & observationibus rarioribus illustratæ. Aliquot jam elapsi sunt anni, ex quo, non sine insigni fructu animique voluptate, has ipsas selectissimis ingeniis, & ex illis compluribus illustrissimis, candide ac fideliter proposui atque exhibui. Non quidem institui nostri erit, hoc loco in laudes prolixas experimentalis naturalium philosophiæ decurrere; illud tamen obiter præterire non possumus: nullam ex omnibus scientiis esse, quæ humana mente dignior sit, ipsamque ad infiniti & summi entis potentiam cognoscendam magis adducat, quam hæc ipsa; & rursus quæ majorem animo delectationem, vitæque utilitatem ac eruditioni perfectionem addat atque conciliet, quam exquisita operum Dei, quæ in rebus corporeis apparent, notitia. Nihilo minus certe dolendum ac turpe dictum est, divinam hanc scientiam, ad quam excolendam mandatum à Deo habemus, non sine maxima impietate, ubivis ferme, præsertim in Germaniæ Academiis, negligi ac susque deque haberi. Plures inveniuntur, qui pro Philosophis haberi volunt, quibus plane incognita hæc doctrina est, & qui tantum inanibus abstractionibus & fictitiis terminis cerebrum repletum habent, ex quibus non nisi innumera dissidia, controversiæ, difficultates atque errores, teste veritatis magistra, experientia, propullulant, nullusque usus vel emolumentum in rem litterariam redundat; cum ex adverso philosophia naturalium sit fœcundissima mater utilissimarum artium ac omnis generis inventionum. At vero majorem adhuc reprehensionem meretur, quod illi, qui artem medicam excolunt, non majori solertia Physices studium tractent ac curæ cordique habeant; cum tamen tota Medicina nil nisi philosophia, seu scientia corporis humani sit & illarum rerum, quæ hoc ipsum variis modis afficere ac mutare possunt. Utique dolendum est graviter, dari etiamnum inter doctores quosdam, qui sibi & aliis persuadent, sine cognitione hujus scientiæ, & studium medicum recte tractari, & feliciter morborum sanationem

nationem suscipi posse, quod & antiquissimæ Medicorum auctoritati, & inviolabili veritati repugnat. Suscepi jam hoc laboris, & paratus sum semper defendere, omnem medicam praxin fallacem, infidam, confusam, difficilem & periculofam esse sine theoria, quæ tamen, si causas & originem quæras, ex fundamentis philosophiæ naturalis & observationibus circa humana corpora, petenda est. Hoc quidem asserendum esse non negamus, physicos libros à Veteribus conscriptos, qui principiis plerumque abstractis metaphysicis, inanibus ac vacuis terminis, nec non generalioribus positionibus abundant, parvum vel plane nullum, habuisse in re medica usum, unde etiam incrementa saluberrima ars nostra per multa secula capere non potuit. Aliter autem comparata est Recentiorum Physica, quam condere & stabilire ex scientia ac legibus motus, nec non accuratioribus circa corpora observationibus, undiquaque solertiissima ac perspicacissima ingenia passim contendunt. Non dissimulandum est, in Recentiorum etiam Physicorum systematibus, multa adhuc desiderari posse, utpote qui pluribus præjudiciis laborant, certæ sectæ adhærent & ultra modum generalioribus immorantur, specialibus summeque utilissimis neglectis. Accedit, quod plerumque observationum chymicarum sint rudes, cum tamen Chymia principia ac indolem mixtionis optime edoceat. Idcirco laboravi adhuc, qua potui, solertia, ut per divinam gratiam viresque mihi concessas, per fundamenta facilia ac cohærentia, aphorismis, quibus purâ ac nuda veritas optime perspicitur, deducta ex unico & catholico principio, nempe MOTU, conquisitis undiquaque notabilioribus ex Mechanica & Chymia experimentis, corporum phænomena auditoribus meis privatim explicarem atque evolverem, & hæc ipsa fundamenta ad corpus humanum, & consequenter ad medicinam, applicarem, & sic facillima ac perspicua methodo præcepta medicinæ traderem. Hæc ipsa Physices fundamenta publicæ luci exponere, jam apud animum meum constitui, eam maxime ob causam, ut difficillimæ alioquin arti medicæ lucem aliquam præferrem, ipsamque faciliorem redderem. Experimento enim edoctus multiplici scribo, & citra arrogantiam, illum, qui fundamenta præmittit in physicis, intra tres annos felicius progredi & majores profectus in solidiori medicina & praxi capere posse, quam alium Physices studii expertem, vix intra longissimum tempus. Hisce jam fundamentis mox edendis præmittere volui demonstrationes principales physicas, curiosis experimentis illustratas. Diu hæsitavi, utrum luci quædam exponere vellem ex Physica experimentalis, propter summam invidiam & communissimum eruditorum morbum, philautiam, qui nil, nisi quod ipsorum speculationibus & moribus congruit, rectum putant. Facile etiam prævideo, fore, qui jactantiæ me insimulabunt, quasi superbire tanto experimentorum numero velim; qua in re autem provoco ad illos, qui ingenium meum norunt, quod ab omni ambitione alienissimum est, cum semper assuetus sim, me meosque ingenii fœtus parvi ducere ac negligere, aliena contra suspicere & æstimare. Sique tali morbo laborarem, potuissem facilius solidiores multumque curiositatis spirantes, neque vulgares aut aliis notas, & à me, ut puto, primum notatas quasdam observationes, seorsim colligere & majore stilo illas publico commendare, meamque in inveniando laudem per obliquum adstruere: sed vana me nunquam vexat vel vexabit gloria. Impulit autem me ad præsentia edenda potissimum mei officii ratio, dum munere docendi Philosophiam naturalem fungor, ut, quid apud nos hic agatur, & quid adhuc docuerim, periti & prudentes rerum æstimatores possint perspicere. Denique ad hæc publicanda sollicitarunt me frequentius auditores optimi, qui, ut breviter recenserem illa, quæ oculis usurparunt, quæ auribus perceperunt, auctores mihi fuerunt, quo diuturnior postea apud ipsos illarum rerum exstaret memoria. Tandem etiam illud addere necessarium duxi, quoniam dum recensui varia experimenta, nec inventoris aut auctoris semper fuit adjecta mentio, ne quis existimet, mihi me talia imputare velle. Peritis enim hæc sufficienter nota sunt, & hi quoque facile illa, quæ mea sunt, judicabunt & separabunt. Et sicuti vitium inter eruditos maximum credo, non relinquere cuique suum ratione inventionis; ita impotentis etiam animi signum existimo, si quis jam notas res, & multo magis opiniones, quæ coincidere facile possunt, cum alienis cogitatis, venditet pro magnis inventis, illaque pro talibus ab aliis haberi contendat. His te, benevole Lector, valere jubeo, & ut nostris conatibus ex æquo faveas, & benignum de illis judicium feras, rogo.



DEMONSTRATIO I.

Datur fluidum summe activum & longe subtilius ipso aëre.

Experimenta.

1. **S**I tubus Torricellianus invertitur, maximo cum impetu argentum vivum ruit in vacuum, dum ferme nullam ibi reperit resistantiam: quod si autem in eodem tubo spatium relinquatur, aëre repletum, & tubus invertatur, tardissime argentum vivum descendit, ipsumque aërem condensat, qui forma bullularum juxta latera vitri transit & petit superiora.

2. Liquida, praesertim spiritiosa, indita phiolae longioris colli, admoto calore, admodum expanduntur, & majorem locum in hac occupant, propter ingressum fluidi tenuissimi, in poros liquidi factum.

3. In thermometro, quod constructum est ex globo vitreo, cui inditus tubus longus cum liquore, facta accuratissima clausura aërisque debita condensatione, quandocumque tantum leviter calida manus globo applicatur, subito liquor petit superiora.

4. Ex limatura martis indita phiolae, desuper affusa certa quantitate olei vitrioli & aquae, excuscatatur ingens motus, copiosaeque bullulae ex illa egrediuntur, vitrum incalescit, & quandocumque orificium phiolae digito tegitur ac postea aperitur, cum fragore insigni vapor egreditur.

5. Lacryma vitri, quando apex ejus frangitur, magno cum fragore in minutissimum pulverem resolvitur & dispergitur, quod fit ob fluidum aethereum, subito frigore, in elaboratione hujus corporis accedente, condensatum, & sub firmo cortice, eoque fornicato, vitri incarceratum, quod dato libero egressu, magna cum violentia sese extendit, omniaque dirumpit. Memoranda hic etiam quaedam sunt de effectibus fermentationis, quae instituitur in vasis clausis.

6. Quando lacryma vitri prius ignitur, ut poris corticis duri vitrei leniter calore apertis, aetheri incarceratione egressus concedatur, apice diffracto, non amplius exserit disruptionis istius violentae effectum.

7. Particula auri fulminantis, ferro imposita & candelae admota, maximum & stupendum fragorem edit, quoniam materia fluida mirae expansionis, quae nitro copiose infidet, in poris firmissimi metalli incarcerationa, calore admoto, violenta expansione claustra carceris rumpit & in aëre tremulum vibrativum motum efficit.

8. Pila parva aenea, aëre repleta & ubique firmiter clausa, si imponatur igni, intensissimo strepitu ac sono dirumpitur, & damnum non leve corporibus ambientibus inferre potest.

DEMONSTRATIO II.

Dantur corpuscula stupendae exiguitatis, peculiaris virtutis & effectus.

Experimenta.

1. Effluvia magnetis per vitrum mercurio repletum, item XXX. discos stanneos operando, movent acum ferream, libere in aëre suspensam.

2. Spiritus fumans sulphureus volatilis argentum, multis chartis & linteis involutum, fusco colore tingit.

3. Idem spiritus argentum, oleo prius inunctum & postea chartis involutum, non amplius tingit, & ingratum colorem ipsi affricat, dum oleum effluviis horum efficaciam ac virtutem plane infringit.

Frid. Hoffmanni Oper. Tom. V.

4. Aqua frigida, in aëolipila contenta igne resolvitur in ventum siccum & frigidum, qui flammam carbonum animat & excitat.

5. Adamas, solo attritu panni calefacta, attrahit arenam, quod etiam facit succinum.

6. Decem guttulae solutionis auri, si mensurae uni aquae fluvialis infundantur, & postea adjiciatur aequalis portio solutionis stanni, in momento exsurgit color rubineus, dispersus per totum corpus aquae. Hoc experimento simul ostenditur fundamentum praeparandi rubinum artificialem.

7. Una guttula olei cochleariae, vel etiam olei anisi, decem mensurae vini, vel aquae, ita imbui possunt, ut saporem & odorem hujus olei praeseferant.

8. Unum granum certi pulveris vegetabilis, uncias octo spiritus vini imbuiere potest elegantissimo purpureo colore.

DEMONSTRATIO III.

Dantur corpuscula minima, quae singulari textura, figura & forma gaudent.

Experimenta.

1. Microscopio praestantissimo, quod clare & distincte sistit objecta, exponuntur variae species arumarum, nec non minerarum, ubi figuram, magnitudinem, colorem ac pelluciditatem intueri licet. Item, ipsi objiciantur varia semina v. g. tabaci, hyoscyami, papaveris, ubi formam & texturam curiosam inspicere licet.

2. Linteum ex serico confectum videtur compositum ex crassis quasi chordis, inter quas satis ampla apparent interstitia.

3. Sub muscae alis varii conspiciuntur vermiculi, pediculi, & pes muscae, pilis magnis instructus, duos ungues habet exiles, ut in quolibet poros se insinuare possit, unde non mirum, si per vitra ambulare queat.

4. Pulex apparet sex pedibus instructus, posterioribus longioribus, quando salire vult, omnia crura simul extendit.

5. In papyro mirabilis textura, instar retis, apparet, & folia herbarum, nec non alae papilionum, aspectu mirabilia oculis sistunt.

6. Situs conspicitur ut copia exiguarum plantularum, capsulis seminalibus gaudentium: ex quarum aliis excussum quasi est semen, aliae nodosae & singulis suis caulibus distinctae sunt.

7. Aculeus muscae pungentis insignis magnitudinis apparet, & variis recurvis uncis instructus est.

8. Folium urticae acutissimis spiculis est plenum, ex quorum cuspidibus exsudat liquor.

9. Casei vermiculi, acari dicti, magni apparent, ubi & caput cum oculis, & pedes accurate distinguuntur.

10. In alio microscopio, quod lentem habet minimam, circulatio sanguinis in pediculo conspici potest: item, per aliud instrumentum, in cauda anguillae etiam sanguinis circulus.

11. In aceto, si debite vitro applicetur, spicula figurae anguillaris apparent.

DEMONSTRATIO IV.

Corpus crassum, grave, indolis fixioris, mediante aetheris admixtione & motu, in summum tenuitatis & volatilitatis statum deducitur.

Experimenta.

1. Sal commune cum oleo vitrioli lenissimo igne resolvitur

— solvitur in spiritum fumosum, qui aëris accessu ferme totus avolat in auras.

2. Idem spiritus, contentus in vitro amplioris orificii, admoto spiritu salis ammoniaci, exsuscitat vaporem visibilem intentissimum, qui in hypocausto nebulam crassam producere potest.

3. Sulphur vulgare accensum, in vaporem penetrantissimum resolvitur, qui in charta, oleo tartari imbuta, susceptus, præbet sal fixum in igne durans, quod ad mixturam spiritus vitrioli, protinus pristinum penetrantissimum vaporem sulphureum reddit.

4. Oleum vitrioli gravissimum extemporanea enchiresi resolvitur in vaporem, qui, admota candela, instar sulphuris vulgaris inflammatur similemque odorem exhibet.

5. Magisterium lunæ, cum sale communi præcipitatum, exhibet corpus, quod in igne fit volatile & dissipatur in auras.

6. Argentum, item aurum, solutione penetrantium liquorum sæpius tractatum, tandem resolvitur in liquorem, qui totus arenæ calore in aërem disjicitur.

7. Oleum vitrioli, mixtum cum opio, & in retorta vitrea destillatum, resolvitur in liquorem summe volatilem sulphureum, aciditatis pene expertem, hærente in collo retortæ sulphure artificiali, & in fundo ejus terra nigra insolubili.

DEMONSTRATIO V.

Corpora etiam solidissima suis gaudent poris & cavitatibus, majoris vel minoris diametri, quibus fluidum æthereum insidet.

Experimenta.

1. Metalla propter pororum diversitatem specifica gravitate inter se valde differunt, quod libra demonstrari potest.

2. Cuprum, orichalcum ex tempore argenteo niveo colore imbui, argentumque inaurari, pulveris affricu potest.

3. Mercurius cum saturno, mediante bismutho, ita sese miscet, ut etiam corium libere pertranseat.

4. Aqua regis solvit aurum, non autem aqua fortis: aqua fortis argentum, non autem aqua regis. Et quoniam aqua fortis lubentius dissolvit cuprum, argentum cupro præcipitatur, & ferrum præcipitat cuprum, hoc autem ad fundum dejicitur zinco; quoniam aqua fortis aggreditur facilius zincum quam ferrum, & hæc omnia propter pororum diversitatem.

5. Solo oris flatu in thermometro, ex tenuissimis vitreis tubulis parato, liquor contentus pro lubitu moveri potest.

6. Atramenti sympathetici effectus ostenduntur, ubi in charta liquore pinguntur literæ non visibiles, quæ occultantur sub magna copia chartarum, postea exterius applicatur spiritus, sic in momento visibiles & coloratæ redduntur.

7. Fragmenta coralliorum cera alba privari possunt rubedine per totum corpus dispersa.

DEMONSTRATIO VI.

Motus fluidi ætherei agitatissimus in poris corporum calorem producit.

Experimenta.

1. Oleum vitrioli rite paratum, & instar aquæ limpidum, adjecta debita quantitate glaciei, vel aquæ communis, ita incalescit, ut manibus non teneri possit.

2. Oleum vitrioli cum spiritu vini rectificatissimo,

vel oleo therebinthinæ, nec non spiritus noster igneus, cum eodem spiritu, vehementissima ebullitione, tantum calorem efficit, ut metus sit diffractionis vitri, quo mixtura continetur.

3. Aqua fortis, cum limatura martis mixta, intensissimum facit calorem, cum magna spuma & copiosissimorum flavorum fumorum emissionem.

4. Grana tria terræ humidæ nigra, adhuc humidæ, non sicca, manu detenta, tribus guttulis aquæ aspersis, vehementem calorem producant.

DEMONSTRATIO VII.

Flamma est motus æthereus vehementissimus, in poris terræ tenuissimæ exsuscitatus.

Experimenta.

1. Solo fortiori attritu chalybis & filicis ignis elicitur, quem testantur scintillulae, quæ charta exceptæ & per microscopium inspectæ, sunt nihil quam portiones ferri, vehementissima hac attritione fusæ & liquatæ.

2. Ferrum, leviter saltem prius præparatum, solo & repetito fortiori ictu atque percussione, cum malleo facta, absque ullius ignis accessu, candens rediditur.

3. Phosphorus Anglicanus solo attritu & motu accenditur, & flammam suppeditat lucidissimam, penetrantissime urentem.

4. Oleum caryophyllorum, æquali portione mixtum cum spiritu concentrato, singularis præparationis, à nobis igneo dicto, in momento, non secus ac si ignis admovetur pulveri pyrio, in ignem amplissimum lucidissimum resolvitur, siccissimo & levissimo cinere relicto.

5. Oleum majoranæ, terebinthinæ, anisi, succini, cum eodem spiritu si seorsim misceantur, nullam dant flammam, sed fortiter incalescunt & resolvuntur in liquorem crassum rubicundum, oleum terebinthinæ autem in nigricantem, instar picis, massam.

6. Venti ignei variis modis oculis fisci possunt, dum pulvis benzoës, massiches, vel seminis lycopodii, tubo vitreo, vel fistula tabaci exceptus, in candelæ flammam inflatur.

7. Spiritus vini rectificatissimus, in æolipila contentus, convertitur in ventum, qui admota candelæ flamma, jucundo spectaculo accenditur.

8. Limatura martis, mixta cum sulphure & aqua, ebullit, & massa nigra, aëri libero exposita, flammam concipit.

DEMONSTRATIO VIII.

Flamma libero & necessario aëris commercio eget; hinc aër ignis anima.

Experimenta.

1. In campana, cui aër evacuatus est, flamma candelæ mox exstinguitur, & carbones candidi impositi, mox amittunt suam urentem efficaciam.

2. Pulvis pyrius, in vacuo accensus per convexum vitrum non flammam amplius concipit, nec fragorem edit; sed tantum colliquescit & resolvitur in fumum, qui fundum vasis petit.

3. Globus plumbeus, involutus papyro, igne candelæ fundi potest, papyro illæso.

4. Ipsa charta, superposita igni, non accenditur, si nempe vasi argenteo accurate fuerit circumvoluta: ita etiam stramen concisum, vulgo *Heckerling*, in acervum positum, flamma non comburitur.

5. Sul-

5. Sulphur, aquae impositum, accenditur per vitrum causticum; nihilo minus verum est, sub aqua nec sulphur nec petroleum, nec camphoram ardere.

6. Fornaces singulariter construi possunt, ut dimidio ligni illud praestari possit, quod duplo hoc, respectu communicationis aeris, in effectum traducendum.

DEMONSTRATIO IX.

Radii solares, vitro prae grandi Tschirnhausiano excepti & concentrati, longe potentiores effectum exserunt quam ullus alius ignis.

Experimenta.

1. Quodvis lignum madidum, foco oblatum, in momento accenditur & flammam concipit.

2. Omnia metalla, in debita quantitate applicata, nempe cuprum, ferrum, argentum, aurum, in momento liquefacit, ferri autem laminam statim perforat. Notabile est, dum ferrum in fusione stat, quod radios & scintillas copiosissimas undiquaque emittat.

3. Lateres, pumicem, amianthum, talcum Moscoviticum, terram porcellanam, pulverem crucibulorum, fundit in globulos.

4. Omnes cineres vegetabilium reducit in vitrum, quale etiam conficit ex papyro.

5. Plumbum convertit in nitidissimum, & aurum cum terra porcellana mixtum, in purpureum vitrum.

6. Mineras quasvis in momento liquefacit, & pleasque in auras expellit.

7. Magnetem & haematiten in instanti convertit in ferrum, nec non mineram martis Hassiacam.

8. Silices calcinati non in fluorem redigi possunt: cum calce viva autem si misceantur, fluorem acquirunt.

9. Calces omnium metallorum, cum pulvere carbonum & nitro, redigit in sua priora metalla, sed cauta administratione ignis, alias calces volatilifando, in fumum dissipat.

10. Cancrum sub aqua positum coquit & rubicundum efficit.

DEMONSTRATIO X.

Lux est liber & celer aetheris in poris sulphureae substantiae motus, qui undulatione per corpora imperturbate transiens, efficit lumen.

Experimenta.

1. Ex spiritu nitri & creta, per debitam solutionem, coagulationem & sublimationem, praeparatur materia, quae soli exposita, & postea delata in tenebricosum locum, instar carbonis vivi apparet; quod cum non accidat tempore nocturno, indicio est lumen solare hac materia fuisse concentratum.

2. Lapis Bononiensis, debite calcinatus, praeparatus & libero aeri expositus, lucem spargit longe constantiorem & fortiolem praedicto phosphoro Balduini.

3. Singularis species talci, nostra inventionem praeparata, lucida reddi potest, non secus ac lapis Bononiensis, ita ut phosphori lucentis Germanici titulum mereatur.

4. Lapides, dicti malactites, virides, coerulei, violacei, hyacinthini, candefacti in loco obscuro, lucem spargunt claram & serenam. Idem faciunt adamantes crudi non politi.

5. Phosphorus Anglicanus in vacuo lucem perpetuo praebet, sed flammam difficulter concipit.

Frid. Hoffmanni Oper. Tom. V.

6. Idem phosphorus ad mixtionem certae materiae inflammabilitate privari, & quoad effectum lucentem mirum in modum multiplicari potest.

7. Idem phosphorus, prius praeparatus, oleo caryophyllorum reddi potest liquidus, quo innoxie, sine combustionis periculo, in facie, vestibibus, varia pingi possunt; quod autem non procedit cum oleo succini, vel seminum.

8. Phosphorus liquidus, phialae inditus, pro diversa admissione aeris, & vitri motione, figuras jucundissimo spectaculo exhibet &c.

DEMONSTRATIO XI.

Corpora quaecvis, nec solida, nec fluida, se invicem, quoad suam dimensionem penetrant.

Experimenta.

1. Ostendatur campanae urinatoriae inventum, in qua ligneus virunculus constitutus est, haec ponderibus appensis, dum in fundum aquae descendit, aer compressus ita aquae resistit, ut virunculus non reddatur madidus.

2. In campana vitrea, aquae immersa, candela ad certum tempus flammam potest exhibere, in mediis nempe aquis, quamdiu sufficientem habet aërem.

3. In siphonem bicuralem, uno crure cera obstructo, si infunditur argentum vivum, hoc non ad aequilibrium transit, sed in uno crure tantum haeret, propter aeris compressi resistantiam in crure altero: simul ac autem orificium aperitur, mercurius ad aequilibrium transit.

4. In thermometro, quod longiori tubulo, orificium apertum habente, instructum est, calore manus liquor thermometro inclusus non potest in altum ascendere, si orificium est clausum, ob impeditum aeris egressum: simul ac autem apertio fit, impetu quodam liquor in altitudinem fertur.

5. Instituatur explicatio, quare vitrum, aqua repletum, centum ducatos adhuc capere possit, nihilominus aqua non ex vitro effluat: item, cur maxima quantitas camphorae solvi possit in spiritu vini rectificatissimo, spiritus interim non insignem augmentum experiat.

DEMONSTRATIO XII.

Nullum corpus alterum penetrare potest, & omnia spatia repleta cum sint corporibus, hinc nullus motus fieri potest, nisi unum corpus alteri cedat, qua successione impedita, tollitur & motus.

Experimenta.

1. Producitur fons, qui ad imperium nostrum salit & salire definit, cujus constructionis fundamentum simul aperitur, ubi deprehenditur, fluxum aquae cessare, quando aer succedere nequit in ejus locum.

2. Siphone vitreo longiore, vulgo *Stechheber*, immisso dolio vini, vinum extrahi potest, quando orificium superius digito clauditur, & tunc nihil ex inferiori aperto effluit: simul ac autem aperto superiore orificio liber aeri concedatur ingressus, protinus ex inferiori effluit vinum.

3. Tenuissimo tubulo vitreo ex eodem fundamento mercurius ex alio vitro extrahi potest, ut libere suspendatur in aere.

4. Globo stanneo, poris copiosis referto, commodissime plantas pro lubitu irrigare possumus, ita, ut tan-

tum aquae emittat, quantum nos velimus.

5. Constructio curiosa infundibuli, quo solent agyrtæ uti, exponatur: ex hoc infundibulo, aqua repleto, aqua effluit tota, postea de novo aqua aliquot vicibus pro lubitu reddi potest.

6. Fons tantum reddit aquae salientis, quantum succedit aëris, & hinc mensæ imponi & elegantissimo spectaculo loco clepsydrae adhiberi potest.

7. Ex eodem fundamento lampas constructa ostenditur, ubi tantum olei effluit, quantum necesse est ad nutriendum ellychnium.

DEMONSTRATIO XIII.

Corpus in centro virium suarum motricium, seu in æquilibrio, constitutum, quiescit, quo magis autem à centro illud recedit, eo major fit motus.

Experimenta.

1. Explicantur potentia mechanicae fundamentales, nimirum tria vectis genera, planum inclinatum, trochlea, axis in peritrochlio.

2. In cuspide acus gravia corpora libere moveri possunt.

3. Situla magna, aqua plena, cultro jacenti in mensa appendi potest.

4. Ingens os bovinum stramine contorto dirumpi potest.

5. Exhibeatur machina, instructa rotis & una cochlea, qua puer facile centenarium attollere potest.

6. Exhibeatur machina magna, vesica instructa, qua flatu oris extensa, pondus XL. librarum in altum tolli potest.

7. Virunculus, in puncto existens, ponderibus onustus, ægerrime è loco suo dimovetur.

8. Monstratur applicatio potentiarum mechanicarum in machinis compositis e. gr. in muribus hinc inde discurrentibus, cochlea Archimedeae, cujus beneficio ingens quantitas aquae facili labore extrahitur, numeratore passuum, qui nobis non advertentibus, passus nostros, vel equi quo vehimur, indicat, porro in aratro constructo, quo disseminatio granorum majori laboris compendio & in minori quantitate fieri potest, item in mure hinc inde discurrente. Tandem etiam currus, quo sine equis vehi possit, ostenditur.

DEMONSTRATIO XIV.

Tempus est motuum æqualium numerus.

Experimenta.

1. Producuntur pendula varii generis, brevia & longa, & ostenditur, qua ratione his brevissima temporis intervalla possint mensurari.

2. Ostenditur quomodo pendulis altitudines, item profunditates maris imperscrutabiles, commode detegi possint, item porro, in quantum distet tonitru auditum in nubibus à nobis, vel locus ubi tormenta explosa visuntur, hisce etiam longitudines & distantiae locorum inveniri possunt, nec non in quantum pulsus arteriarum præternaturalis à naturali distinguatur, cognoscitur.

3. Ratio redditur quare pendula debent esse breviora circa polos, quam circa æquatorem.

DEMONSTRATIO XV.

Fluidum omne libram constituit naturalem, in qua solidum corpus positum, quod ejusdem

ponderis est cum fluido, neque ascendit; si autem specie gravius est, descendit, si levius, ascendit.

Experimenta.

1. Omne liquidum, tubo incurvato immissum, exacte servat semper æquilibrio, five in æquali horizontali linea est positum.

2. Quandocunque heterogenea fluida, five diversae gravitatis, sicuti argentum vivum & aqua, eidem tubo immittuntur, non eandem quidem servant lineam horizontalem, tamen æqualiter ponderant, adeo, ut ejusmodi instrumento liquorum specifica gravitas facili negotio indagari possit.

3. Virunculus vitreus, aquae impositus, cum ipsa consistit in æquilibrio, neque ascendit, neque descendit, qui tamen postea facili labore eo redigi potest; ut pro lubitu vel descendat, vel ascendat, aut in medio aquae hæreat.

4. Instrumentis ex succino, item vitro paratis, exactissime indagari potest bonitas aquarum, præsertim falsarum, quamvis falsis quantitas contineatur in liquido.

5. Simili instrumento, aliter tamen disposito, spiritus vini bonitas commode explorari potest.

6. Hydaspis *Wagenfeiliana* demonstratur, cujus beneficio homo per medias aquas ire potest, sine metu immersionis.

7. Omnia metalla, injecta mercurio, ipsi supernatant, solo auro excepto, quod fundum petit.

8. Curiosum est, per libram sub aqua positam metallorum, item minerarum bonitatem, an aurum argentumque contineant? explorari posse: ubi observamus, illa, quæ in aëre habent eandem gravitatem, si in aquis instituatur ponderatio, differre multum pondere, unde quodnam corpus altero specie gravius sit, cognoscitur.

9. Curiosum identidem est instrumentum, quo tres vel quatuor librae plumbi in aqua libere suspendi & detineri possunt, ut fundum non petant.

10. Tandem explicatur, cur corpora veneficarum plerumque non submergantur, sed supernatent, item, quæ in mari mortuo corpora humana non inferiora petant, & porro, cur in aqua dulci submersa, post mortem rursus in altum ferantur, nec non cur naves quæ in oceano natant, in fluvio submergantur, item, quam ob causam pulmones infantis in utero demortui, in aquam si ponantur, descendant; fin autem infans vitalis fuit, ipsi aquae supernatent, quo ipso infantidium ordinarie detegi solet.

DEMONSTRATIO XVI.

Nullum corpus per se est leve, sed etiam omne tenuissimum grave est.

Experimenta.

1. Vapor & fumus, qui in libero aëre sursum feruntur, in vacuo deprimuntur: quo ipso ad oculum ostenditur ætherem etiam gravitatis & depressionis corporum ad terram causam existere.

2. Globus vitreus, ex quo aër fuit evacuatus, minus ponderat, quam si aëre, præsertim condensato, repletus est.

3. In globo vitreo, pisis & aqua repleto, atque probe cera occluso, aliud est pondus elapsis octo diebus, quam erat ab initio, nempe gravius.

4. Corpus mortuum minus ponderat corpore vivo, quod in ave experiri licet, bilanx autem debet esse accuratissima.

5. Vitrum

5. Vitrum exile, certo fluido colorato repletum & in æquilibrio aquarum consistens, in aqua calida descendit, in frigida ascendit, vel tantum paucissimis guttulis aquæ, per compressionem vitro accedentibus, vel decedentibus, modo fundum petit, modo superiora.

6. Particulæ igneæ corporibus certis etiam addunt pondus; ita plumbum in minium redactum, stannum in cineres, capellæ ignitæ, lithargyrium recenter paratum, plus ponderant, quam si frigefacta fuerint & in aëre diu steterint.

7. Tubulus vitreus, inditus alio tubulo capaciorem, qui continet argentum vivum, affuso spiritu vini in hunc tubulum, qui respectu mercurii est longe levior, hic argentum vivum urgebit in ipsum tubulum, ut ascendat.

8. Aqua, quæ gravior est oleo, ab hoc sursum tenetur, si canalus vitreus, aqua repletus, oleo immitatur, in vitro oblongiori contento.

9. Scyphus vitreus, aqua repletus, inverti potest in medio aëre, ita ut ne guttula aquæ cadat in terram, levi accedente encheiresi.

DEMONSTRATIO XVII.

Fluida specie graviora descendunt per fluida minus gravia, & hæc in eorum locum rursus succedunt.

Experimenta.

1. Vitreus tubulus, mercurio repletus, in orificio prius obturato immittatur aquæ, postea hoc aperiat, tunc mercurius celerrime ex tubo in aquam descendet, aqua autem contra cum magna vehementia in tubum ascendet.

2. Ex eodem fundamento pulchro spectaculo visitur liquor cœruleus in tubulo contentus descendere, & ipso momento liquor rubicundus, in inferiori vase positus, intra, & per hunc ascendere, nulla facta colorum confusione.

3. Aqua in tubulo contenta descendit; vinum autem rubrum, vel spiritus vini, rubedine tinctus, in ejus locum ascendit.

4. Ostenditur ex eodem fundamento, quænam aqua altera sit purior, levior, quænam cerevisia tenuior, levior, item, quomodo vina, vel medicamenta, respectu aquæ, vel cerevisiæ, inter se differant, ratione subtilitatis & levitatis.

5. Liquores quatuor, diversissimi coloris, ita in vitro misceri possunt, ut non invicem confundantur, sed quisque peculiarem suum locum & stationem occupet.

DEMONSTRATIO XVIII.

Nullus motus corporum fit per attractionem, sed omnis pulsione fit, dum unum corpus, majori vi instructum, alterum minoris resistentiæ & vis impellit.

Experimenta.

1. Monstratur constructio præstantissimæ illius machinæ, nempe pneumaticæ antliæ, & explicatur quomodo contractio aëris ex vitris contingat, & cur postea ipsa firmissime cum disco, antliæ orificio imposita, cohæreant, ut non sine motu disruptionis possint amoveri, paucò autem aëre admisso, ipsa cohæsiō mox cesset.

2. Monstratur, qua ratione bonæ antliæ examen sit instituendum vel etiam siphonum; si enim hæc instrumenta non recte & accurate elaborata fuerint, experimenta non feliciter succedunt.

3. Aqua tubulo vitreo inclusa, etiam fortissima su-

ctione, sive per os, sive mediante antlia, non petit superiora, simul ac autem accessus detur aëri per minimum foramen in inferiori tubuli regione, protinus aqua rursus fertur in os fugientis.

4. Argentum vivum, etiam vehementissima suctione, non potest attrahi per tubum ultra pedis magnitudinem, neque per antliam ultra XXIX. pollices, cum tamen, si suction esset adæquata attractionis causâ, ultra etiam deberet fieri motus.

5. Explicationem meretur, cur calefactum vitrum v. g. cucurbita, adhæreat cuti humanæ, item poculum argenteum calefactum mortario, quod corio obductum est, ita nempe, ut hoc ipsum magni ponderis in altum cum poculo tolli possit. Mentio etiam fit quomodo respiratio in corpore nostro peragatur; quomodo suction tabaci ex fistula fiat, & infantes lac sugant è mammis.

6. Mediante tubo inverso, sive siphone bicrurali, aqua ex vitro per suctionem commode extrahi potest; quod si autem vas aqua repletum in vacuum ponatur, suctione etiam maxima adhibita, nihil effluet: ita enim in siphone, embolo retracto, ascendit aqua vel mercurius promptissime, in libero aëre si hæc consistunt; quando autem aer, aquæ incumbens, instrumento accommodato removetur, & postea extrahitur embolus, nunquam aqua vel argentum vivum, in siphonem ascendet.

DEMONSTRATIO XIX.

Aër fluidum grave est, & exercet potissimum gravitatem suam in corpora aëre vacua.

Experimenta.

1. Vitrum quadratum, antliæ orificio applicatum, retractione emboli aliquoties facta, cum fragore in minimas particulas diffingitur: quod phænomenon minime observare licet in vitro sphærico.

2. Embolus ex antlia pneumatica extractus, clave ita disposita, ne aër à tergo in antliam accedere queat, tanta vi ab externi aëris pondere reprimatur, ut etiam centenarii dimidium post se trahat.

3. Vesica orificio antliæ firmiter alligetur, hæc aëre evacuato, ita comprimitur ab externo aëris pondere, ut nullo modo ejus latera manu apprehensa à se invicem dimoveri queant.

4. Marmora exactissime polita, calefacta, sevo inuncta, sibi invicem imposita, ita elapsis aliquot horis cohærent, ut ab aliquot robustissimis viris non possint rursus à se invicem separari.

5. Hæmisphæria duo cuprea invicem sibi adaptentur, cera occlusis fissuris: hæc ipsa in libero aëre levi opera à se disjunguntur; aëre autem extracto, tam firmiter cohærent, ut non nisi à novem viris possint dimoveri.

6. Folles ab aëris commercio & introitu, aperturis ubique firmiter clausis, si defenduntur, maxima etiam vi non possunt diduci, sive latera illorum disjungi, propter maximum pondus aëris superincumbentis.

DEMONSTRATIO XX.

Cohæsiō corporum, subtractione aëris peracta, non adscribenda est virtuti vacui attractrici, vel singulari potentia ejus.

Experimenta.

1. Duo hæmisphæria arctissime post aëris evacuationem cohærentia, quæ à duobus viris non poterant sejungi, imposita campanæ & aëre externo mediante

antliae exercitio sublato, sine adjuncto pondere, mox sponte à se invicem secedunt.

2. Vitrum, quod in libero aëre adhæret orificio antliae, postea interno, qui in campana est, subtrahito, quando singulari enchirefi orificio applicatur, suctione de novo facta, adhæSIONem renuit.

3. Folles, qui ab omni aëris introitu defensi erant & in libero aëre non poterant aperiri, impositi vacuo, distrahebantur levi opera.

4. In vas vitreum, aqua repletum, ponebatur tubulus vitreus, qui tamen non attingebat superficiem aquae, postea omnibus exacte clausis, aër tam ex vase, quam ex tubulo omnis evacuabatur, & tunc ipse tubus intrudebatur in vitrum, aqua plenum, ita nulla aqua transibat in ipsum, quod tamen evenire debebat, si vacuum haberet vim attrahendi: simul ac autem aër fuit concessus, protinus replebatur tubulus aqua.

DEMONSTRATIO XXI.

Aër noster atmosphaericus determinato pondere gaudet.

Experimenta.

1. Argento vivo si tubus vitreus repleatur, postea inversus submergatur, tunc digito retracts, in argento vivo descendit hoc usque ad XXVII, vel XXVIII. pollices, & libere hæret in tubo. Idem etiam phaenomenon observatur sumto tubulo, majoris vel minoris diametri, siue longior sit, siue brevior, omnis enim elabatur mercurius; ad certam autem distantiam quidam remanebit.

2. Aqua in tubis vitreis, singulariter adaptatis, non ultra XXXII. pedes detineri potest sursum, quæ aquae quantitas ejusdem gravitatis est, cum æquali diametro XXVIII. pollicum mercurii.

3. Quando tubus sic dictus Torricellianus, mercurio repletus, vitro longiori includetur, & ex hoc aër per antliam auferetur, mercurius ex tubo descendet, neque ascendet sua sponte, si antlia fuerit exacte elaborata, alias successive, particulis aëreis per fissuras intrantibus, rursus in altum elevabitur.

4. Quando tubus Torricellianus imponitur vitro, & aqua superfunditur, tunc mercurii accensio in tubo erit major, pro diversitate aquae mercurio incumbens.

5. In locis profundioribus vel subterraneis mercurius altior est in barometro; in turri autem, vel montis vertice, depressior.

6. Mercurius in barometro vel ascendit, vel descendit, pro diversa natura ventorum, nostram atmosphæram afficientium: hinc in borea & serena tempestate ordinarie ascendit, austro autem flante ac tempestate pluviosa, ordinario inferiora petit: quo enim est liberior & rectilinea magis aëris expansio, eo plus subiecta corpora premit, & contra.

DEMONSTRATIO XXII.

Quamdiu corpora fluida sunt in æquilibrio, nullus motus fit vel gravitas sentitur, simul ac autem illud æquilibrium tollitur & pressio corporum inæqualis efficitur, motus incipit & gravitas sese exserit.

Experimenta.

1. Ex globo vitreo aër extrahatur, hujus postea orificio applicetur digitus: tunc epistomio aperto, firmiter digitus ejus orificio adhærebit.

2. Quando idem globus vitreus vacuus immittitur aquae, tunc epistomio aperto, magna cum celeritate & impetu aqua in dictum globum fertur, impletque ipsum, si ab omni aëre fuit exinanitus.

3. Ex tubo vitreo, si aër mediante antlia depleatur, ipseque immergatur, tunc clave aperta, mercurius insigni cum celeritate fertur in altum.

4. In phiolis probe calefactis & immixtis postea liquoribus coloratis, vel etiam mercurio, sponte ascendunt liquores aut mercurius ad certam altitudinem.

5. Explicationem meretur, quare in aëre medio si fumus, non percipiamus ejus gravitatem; item cur pisces & homines, constituti in aqua, non sentiant ejus pondus, nec non quando digitus cohæret cum antlia, non experiamur externi aëris pressuram.

DEMONSTRATIO XXIII.

Aër comprimi, siue in arctius spatium cogi potest.

Experimenta.

1. Quando ex antlia embolus retrahitur, epistomio prius aperto, ut aër accedat, postea clauso, ut impediatur aëris ex antlia egressus, tunc ipse embolus etiam maxima vi non rursus potest intrudi, sed semper repellitur ab aëre interno compresso.

2. Vesica suilla, firmissime alligata antliae orificio, aëre introrsum coacto, mirifice extenditur & magno cum fragore tandem rumpitur.

3. Ab aëre compresso mercurius in tubum vitreum adigi & cogi ad certam altitudinem potest.

4. Bombardæ pneumaticæ mirandi effectus monstrantur, & qua ratione aër compressus sese restituat, libera data via, cum maximo impetu, dum nempe plumbeus globus in principio per duos asseres, & postea, repetitis decem vicibus, ad minimum per unum commode trajici potest.

5. Ex eodem fundamento demonstratur fons artificialis, ubi aër compressus, data apertura, jucundo cum spectaculo ejicit aquam sub varia forma.

DEMONSTRATIO XXIV.

Aër noster atmosphaericus gaudet virtute elastica, i. e. compressione cessante externa, sese mirifice expandit: qua vi expansiva eisdem ferme effectus præstat, quam vi gravitatis.

Experimenta.

1. Vesica, in qua paucus aër existit, filo firmiter si constringatur & suspendatur in vacuo recipiente, tunc aëre extracto, in vesica internus mire se expandit & vesicam inflat: simul ac autem aër rursus in recipientem admittitur, vesica ad pristinum suum statum redit.

2. Similis vesica, in qua inclusus est paucus aër, plumbeo corpore inferius appenso oneretur, hæc post factam aëris extractionem, non modo intumescet, sed & hoc pondus in altum elevabit.

3. Vitrum repleatur mercurio, ita tamen, ut duo pollices aëre repleti maneant, tunc vitro inferatur tubus, qui submergatur in mercurio, postea vasculum vitreum firmiter claudatur, & hoc instrumentum campanæ submittatur aërque externus removeatur; ita videbis mercurium assurgere in tubulum ad XXVIII. ferme pollices, & tardissime, vel plane non, si antlia fuit perfecte constructa, relabetur: quo ipso ostenditur

ditur ætheris gravitas, & qua ratione elasticitas aëris compenſet ejus pondus.

4. Siphon ſumatur bicruralis vitreus, qui ad certam quantitatem repleatur mercurio, poſtea unum crus claudatur cera, alterum maneat apertum, imponatur hic ſiphon recipienti, & videbimus aëre ſubtracto, mercurium in crus apertum ex æquilibrio ſuo aſcendere, ab aëre alteri cruri incluſo & valde expoſo.

5. Tubus *Torricellianus* ita aptetur, ut in ſuperiori parte ſufficiens capacitas præſens ſit, & ipſa aperiri & etiam rursus claudi poſſit; immittatur tunc huic ſpatio veſica piſcis, & oriſicio firmato, repleatur tubus mercurio, & more ſolito invertatur, ſic aſcendet uſque ad conſuetam magnitudinem & veſica, in ſuperiori ejus parte relicta, prius quæ fuit flaccida, jam valde tumida apparebit.

DEMONSTRATIO XXV.

Animalia à nimia aëris interni, qui in ſanguine & humoribus eſt, expansione, conſeſtim concidunt & moriuntur.

Experimenta.

1. Aves, mures includantur vitro, & factis duabus ſuctionibus, miris torquebuntur agitationibus, convulſionibus, intumeſcent oculi, majores fient & extra orbitam prominebunt, & mox animalia moriuntur.

2. Idem experimentum poteſt fieri cum canibus, felibus, quæ animalia autem diutius ſubſiſtunt in vacuo, quam ipſa volatilia. Curioſum eſt, quando jam animam exhalare volunt, & aër provide rursus applicatur, mox reviviscunt; quodcumque autem nullus amplius in ipſis percipitur motus, nunquam reſtitutio ad vitam aëris admiſſione ſuccedit.

3. Animalia aquatica, ut piſces, ranæ, cancri, aeris detractiōe difficillime interficiuntur, & aſpectu jucundum eſt, quomodo piſces in aqua, aere ſubtracto, mox in altum aquæ evehantur, mox rursus ſubſidant, ſi intermittamus aeris evocationem.

4. Ex vitreo globo aer omnis per antliam expellatur, poſtea avis roſtro ſuo provide oriſicio globi applicetur; tunc epiſtomio aperto, conſpiciemus avem adhærere vitro & in momento, præmiſſis quibuſdam ſubſultibus, mori, & longe citius quam in campana vacua. Quod ſi thorax horum animalium aperitur, videmus pulmones ita compreſſos & coarctatos, ut ſub minima mole appareant.

DEMONSTRATIO XXVI.

Aër calore expanditur, frigore autem coarctatur.

Experimenta.

1. Thermometra varia producuntur, & primo vulgare, quod ex phiola longioris colli conſtat, ſpiritu vini rubicundo repletum, ubi obſervamus liquorem ſub calido aere deſcendere, ſub frigido autem aſcendere.

2. Exhibeatur Florentinum, quod conſtat ex graciſſiori phiola vitrea, ſpiritu vini ad mediam tubi partem repleta, in ſuperiori parte clauſa, ubi circa ejus uſum obſervandum; ne inſtrumentum hoc aeri nimis calido applicemus, alias ab incluſo aere valde expoſo facile diffingitur.

3. Phiola longioris & tenuioris colli ſumatur, colorato liquore ad medietatem repleatur, oriſicio ejus ſuperiori manente aperto, & poſtea calori applicetur; ita videmus, pro diverſa ratione caloris, vel frigoris, liquorem, ſi valde ſpituofus fuit, vel expandi & majus ſpatium acquirere, vel comprimi in majorem anguſtiam.

4. Curioſiſſima ſunt illa, quæ ex tenuiſſimis capillaribus quaſi canaliculis compoſita ſunt, ubi minima caloris vel frigoris alteratio maximos & valde ſenſibiles producit effectus.

5. Aliud ſiſtatur, nempe quod compoſitum eſt ex globo vitreo, cui intruſus tubulus & probo cum globo firmatus, ut aeris egreſſus impediatur, poſtea aer ſtatu comprimitur, ita liquor in calido loco in tubum aſſurgit, in frigido decidet, idque valde ſenſibiliter.

6. Aliud quod ex tenuiſſimo tubulo conſtat & ex globo clauſo, ubi leniſſimus digiti attactus protinus effectum producit, & liquorem intus contentum è loco ſuo dimovet.

7. Adhuc ſingulare, quod conſtructum eſt ex ſiphone incurvato, ubi unum crus vitro phiolæ clauſæ inhæret, alterum phiolæ apertæ, ubi obſervamus, in priore liquorem per calorem aſcendere, in altero autem deſcendere.

DEMONSTRATIO XXVII.

Aqua & aër incluſus & calore expoſus mirabilem exſerit potentiam.

Experimenta.

1. Globus parvus vitreus, cui ſpiritus vini incluſus eſt, quando carbonibus injicitur ignitis, maximo cum fragore diſrumpitur.

2. Pulveris fulminantis ex nitro, ſale tartaro & ſulphure parati, portio cochleari indita & carbonibus impoſita, maximum fragorem excitat.

3. Fons jucundiſſimus aſpectu producitur, ex quo ſi accenſæ candelæ ipſi admoventur, proſilit aqua, vel lac ex mammis virginis: ſi extinguntur candelæ, deſinit etiam fluxus.

4. Oſtenditur machinæ Papinianæ mirabilis effectus in celerrima coctione & emollitione corporum durorum, ubi dens apri, cornu cervi, ebur, intra dimidium horæ, pauciſſima carbonum quantitate, ita coqui poſſunt, ut inſtar caſei poſſint ſcindi.

5. Eadem machina caro bovina intra dimidium horæ in mucilaginem reſolvitur, piſa eodem temporis ſpatio abeunt in pulvem.

6. Miniſterio hujus machinæ brevi tempore optima juſcula gelatinofa ac ſanitati conducentia extrahi poſſunt, nec non infuſa & decocta longe efficaciora ex herbis parari, item cornua philoſophice calcinari.

DEMONSTRATIO XXVIII.

Aër copioſas humidas particulas in ſe completur.

Experimenta.

1. Quando ex bombardâ pneumatica una vice & impetu aer intruſus ejicitur, tunc inſtar ſumi exit & viſui noſtro ſe ſiſtit.

2. Nitrum fixum, nec non ſal ex creta & ſpiritu nitri paratum, item ſpiritus acidi concentrati, butyrum antimonii, oleum vitrioli, magnetes aeri ſunt, attrahunt multum aquæ ex ipſo aere, quæ per deſtillationem ſeparari poteſt, unde humiditas locorum ex effectū horum magnetum dignoſci poteſt.

3. Subjiciantur oculis varia hygroſcopia, v. g. ex chordis, quæ fidibus adhiberi ſolent, contexta, nec non longiora ex funibus, per totam ſtructuram domus decurrentia, & indice monſtrantia humiditatis & ſiccitatis gradus.

4. Aliud ſumme ſenſibile chorda naturali, in avena exſtante, paratum, monſtretur.

5. Hygroſcopium inventionis *Feuberianæ* accuratiſſimum.

Aliud

6. Aliud quod ex lignis est compositum.
 7. Machina composita ex thermometris, barometris & hygrometris ostenditur.

DEMONSTRATIO XXIX.

Aër particulas varii generis salinas in sinu fovet.

Experimenta.

1. Caput mortuum aluminis insipidum, sive alumen ustum & falsedine sua privatum, si per aliquot dies exponatur aëri libero & sereno, non modo manifesta falsedine rursus imbuitur, sed & ponderis augmentum capit.
2. Cineres clavellati soluti, diu aëri expositi, in sal nitrosum, quod cum spiritu vitrioli parum effervescent, degenerant, odore emergente aquae fortis.
3. Cineres clavellati, diu aëri expositi, in sal neutrum, tartaro vitriolato simile, degenerant, quod ab ipsis separari potest, & amaricantis est saporis, figurae sexangularis.
4. Minera martis Hassiaca, item marcasita Anglicana, quando aëri libero & pluviae diu exponitur, convertitur in vitriolum martis elegantissimum.
5. Syrupus violarum & papaveris rhœados, addito oleo tartari, viridis factus, amittit hunc colorem, si mixtura per aliquot dies stat in aëre libero, quod neutiquam accidit si in vacuo illud peragitur.

DEMONSTRATIO XXX.

Aër ad intimam mixtionem corporum valde est necessarius.

Experimenta.

1. Spiritus igneus, qui cum oleo tartari mixtus, in libero aëre luculentissimam producit flammam, nullam non modo producit, neque etiam intensiorem ebullitionem, si phiolae longioris colli indatur oleum caryophyllorum & superfundatur dictus spiritus.
2. Solutio veneris, certo menstruo facta, in vitro firmiter clauso, nullo singulari colore imbuta est; simulac autem aëri conceditur liber accessus, saturato coeruleo colore menstruum tingitur.
3. Putrefactio animalium, & vegetabilium impeditur in vacuo; hinc poma, pyra, pruna, salva sua textura & forma, in vacuo per aliquot annos durant.
4. Effervescencia, quae fit à limatura martis & oleo vitrioli; item ab argento & aqua forti, lentissima est in vacuo, celerrima in aëre libero.
5. Solutio veneris viridis, cum spiritu nostro igneo facta, si aëri exponitur libero, brevi tempore colorem induit coeruleum.
6. Aërem ingredi in quovis liquores spirituosos salinos patet, si campanae vitreae submittuntur & aër extrahitur per antliam, tunc enim incipiunt ebullire, seu bullulas emittere.

DEMONSTRATIO XXXI.

Aqua est liquor universalis solvens, multis tamen heterogeneis partibus imbutus.

Experimenta.

1. Puritas & levitas aquarum probatur per peculiarem lancem, gradibus distinctam, quae descensu suo indicat puritatem majorem vel minorem.
2. Respectiva haec puritas & levitas cognoscitur, quando aqua colore imbuitur, tubo vitreo infunditur, qui inversus imponitur alii aquae: si liquor descendit,

est gravior; si in tubulo manet, est levior ipsa aqua subiecta.

3. Adjectione olei tartari per deliquium indagari optime potest aquarum fontanarum natura. Si enim multum lactescit, indicium est multas particulas heterogeneas terrestres in ipsa existere, & contra.

4. Sacchari saturni solutio simili ratione patefacit contenta heterogenea aquarum. Si enim aquae turbidae fiunt, vel albæ, indicium est heterogeneitatis, si puræ & limpidæ manent, sicuti accidit in aqua pluviali; optimum indicium est puritatis. Quibus experimentis manifestatur acidum occultum vitriolicum latitare maxime in aquis fontanis.

5. Simul etiam mentio fiat qua ratione acidulae, thermæ examinandae sint per evaporationem in vase clauso; item per mixtionem cum variis liquoribus.

6. In aqua cujuscunque generis si solvitur sal commune, & ejus tanta quantitas inditur, ut nihil amplius capere queat, quando tunc novum sal v. g. alumen additur, hoc denuo dissolvit & soluto hoc ipso, ut nihil amplius accipere queat, si vitriolum adjiciatur, hoc rursus recipiet, & sic plures species capere poterit.

DEMONSTRATIO XXXII.

Effluxus aquarum in siphonibus fit ab inaequali pressione aquae & aereae columnae.

Experimenta.

1. Quandocunque sumitur siphon, ex duobus aequalibus cruribus constans, & infunditur aqua, ita, ne in uno crure plus contineatur quam in altero; & ipse siphon invertitur, ex utroque crure ne gutta excidet.

2. Siphones variae constructionis oculis subjiciuntur, in spiras contorti, recti, incurvati, duobus cruribus constantes, & simul ostenditur, fundamentum quare semel inchoante fluxu ex uno crure, effluxus ille continuo duret.

3. Curiosus est siphon, qui ex duobus cruribus compositus est, quae crura in extremitatibus suis excipiuntur globo vitreo, cui firmiter annexa sunt, & quando crus minus aquae imponitur, & per alterum longius aqua prius infusa effluit, tunc fons continuo & jucunde saliens exhiberi poterit.

4. Poculum curiosae speculationis est hoc, ubi nempe vinum vel aqua infunditur nec effluit: quandocunque autem ad certam magnitudinem effunditur, incipit effluxus per substratas canales & omne effluit liquidum, cum tamen in ipso poculo nulla cavitas oculis pateat, per quam in inferiores canales liquidum transire possit.

5. Curiosi siphonis, paulo ante memorati & dicti diabetis, structura in alio instrumento ostenditur.

DEMONSTRATIO XXXIII.

Aqua premit secundum altitudinem, non secundum molem, & quo columna aquae altior est, eo major est pressio in siphonibus.

Experimenta.

1. Quo profundius unum crus siphonis submergitur aquae, eo celerius aqua effluit per alterum, & vice versa.

2. Siphon Wirtembergicus, magnus & parvus, qui monstratur una cum fundamento, ubi simul detegitur inventionem nullius esse momenti.

3. Experimentum fiat, quo demonstratur, non tantum per crus longius, sed etiam per crus brevius siphonis, aquam effluere posse.

4. Non

4. Non tantum aqua, verum etiam argentum vivum, per siphonem evacuari potest ex vase.

5. Ostenditur siphon exiguus vitreus, unius cruris, infra exiguo canale & exilissimo foramine imbutus, qui si intruditur argento vivo, in instanti siphon repletur illo; ubi mirabile, quod tam exiguo temporis spatio per parvulum foramen tanta celeritate intraverit argentum vivum.

6. Siphunculi angustissimi capillares, liquoribus coloratis intrusi, illos sponte recipiunt.

7. Situla Helmontiana ostenditur & ejus effectus explicatur, cur nempe discus ligneus maneat in fundo aquae, qui alias ad superficiem aquae pergit.

8. Instrumento ex aere confecto demonstratur aquam secundum altitudinem premere, non secundum molem: unde una libra aquae ad altitudinem posita, resistere non modo potest mille aquae libris, sed & eadem sursum pellere.

DEMONSTRATIO XXXIV.

Fontes omnes artificiales vel ex lapsu aquae tendente ad æquilibrium, vel ex aëris vi elastica, post factam compressionem, vel ejus rarefactione per calorem, derivari merito debent.

Experimenta.

1. In simplici machina monstratur lapsus aquae, & qua ratione, si aqua fuerit repleta, in omnibus cameris & hypocauftis per totam domum obtineri possit ad lubitum aqua.

2. Fons Heronis, ex vase superiori & inferiore constans, per horam ferme emittit aquam jucundo spectaculo, præsertim quando variis figuris instructus fuerit.

3. Ex globo æneo, nec non ex alio magno ex laminis ferreis confecto, instructo sua patina, intruso prius per arthiam pneumaticam aëre, aqua cum maxima delectatione ejicitur, præsertim si hisce fontibus variæ figuræ fuerint appositæ.

4. Fons æneus, spiritu vini rectificato debite repletus & carbonibus impositus, projicit spiritum per varias figuras in aërem, hic, si adnota candela accensus, flammam concipit, jucundissima spectacula oculis sistit.

5. Agitur hic etiam de machinis, quibus aqua ejicitur, qua ignis extinguitur, & quomodo tales machinæ possint applicari in quavis domus parte.

DEMONSTRATIO XXXV.

Radii reflexi ea natura est, ut angulus incidentiæ aequalis sit angulo reflexionis.

Experimenta.

1. Objectum in speculo aliquo plano, oblique ad illud positum, non videtur, nisi in certo aliquo loco & sub eadem obliquitate.

2. Quando inspicimus speculum sphaericæ concavitate, ita ut facies consistat intra quartam diametri partem, tunc enormiter magnum caput apparet, oculi quasi bovini, & omnia miris modis ampliata.

3. Speculorum cylindricorum effectus monstratur, hinc ubi deprehendimus, quod figuræ nimis distractæ sint, ut oculis non appareant, in dictis speculis exhibentur apparentes & formæ suæ debitæ restituuntur.

4. Specula concava polita, & unum parabolicum ex cupro confectum, ostenduntur, & illorum effectus

in ligno accendendo, plumbo vel stanno liquefaciendo ostenditur.

5. Polemoscopium, quod tempore belli maxime inservit, vel etiam, quo aliquis in domo sua constitutus, actiones hominum in plateis evenientes, commode observare potest.

6. Camera catoptrica curioso spectaculo produci-
tur, ex speculis parallelis constans, ubi observatur, quod insigni modo multiplicentur subiecta & augeantur objecta in medio posita.

DEMONSTRATIO XXXVI.

Radii luminosi in diaphanis convexis refringuntur, majoresque angulos efficiunt, & in uno puncto, seu foco concentrantur, ubi rursus radiorum fit divaricatio.

Experimenta.

1. Hic modus microscopia conficiendi ex uno, duobus, vel tribus vitris convexis ostenditur, varia curiosa simul ipsis subijciendo.

2. Tuborum opticorum elaboratio ex duobus vel pluribus vitris exponitur, & simul modus monstratur, qua ratione mirum in modum multiplicari queant objecta.

3. Tubo duodecim pedum, annulus Saturni, satellites Jovis nocte serena optime sistuntur oculis.

4. Camera obscura portatilis, quæ duos pedes longa est, & qua imagines rectæ sistuntur, jucunda exhibet spectacula.

5. Camera obscura exhibetur sub variis vitris convexis, sub majori vel minori distantia. Hinc vitro convexo, quod focum habet decem pedum, in papyraceo pariete sistuntur objecta magnitudinis satis eximiae.

6. Demonstratur modus quomodo in camera obscura imagines rectæ sisti queant per duo vitra convexa, ubi tamen minor magnitudo objectorum observatur.

DEMONSTRATIO XXXVII.

Omnia diaphana convexa, radios luminosos solares concentrando in unum punctum, calorem intensum, immo flammam producunt.

Experimenta.

1. Vitro sphaerico, quod aqua limpida repletum est, pulverem pyrium accendere, sulphur colliquare, tabacum in fistula inflammare commode possumus, non secus ac si vitrum solidum convexum fuerit assumptum.

2. Glacie diaphana, convexam figuram habente, tempore hiemali, flammam jucundo spectaculo producere possumus.

3. Humore crystallino oculi bovini, punctum in papyro inuri potest.

4. Vitra convexa, duplicata, majoris vel minoris diametri, varia exhibentur, & illorum effectus in colliquandis metallis lapidibusque monstratur.

DEMONSTRATIO XXXVIII.

Imagines coloratæ, vitris infixæ, integro ac imperturbato suo colore, mirifica multiplicatione transferuntur in alia loca.

Experimenta.

Experimenta.

1. Laterna magica præstantissimis vitris instructa, ultra octoginta imagines exhibentur, mirabilis magnitudinis, splendidissimis coloribus fulgentes, ita ut ulnas quinque exsuperent.

2. Laterna magica instrui potest vel speculo concavo vel sphaerico vitro, aqua repleto, vel vitro alio convexo solido.

DEMONSTRATIO XXXIX.

Color est lux vario modo reflexa & refracta, pro diversa superficiecularum corporis habitudine.

Experimenta.

1. Iris amoenissima, insignis circuli in parietem transferri potest, per vitrum prismaticum & speculum cylindricum; nec non copiosae irides fisti in pariete, per vitrum crystallinum, compluribus angulis instructum.

2. Si vitra prismatica, sive polyedra, invicem combinantur, & loco fenestrationis usurpantur, totum conclave ornant pulcherrimis coloribus, smaragdinis, saphirinis aliisque, adeo, ut amoenitatem horum nulla pictoris manus assequi possit.

3. Liquores colorati, pro diverso positu ad solis radios, vel pro varia vasorum, quibus continentur, diametro, diversos spectantibus exhibent colores.

4. Infusio saturata florum tunicae, vel rosarum, vel balaustiorum, pro diversa admixtione liquorum acidorum, aut alcalinorum, distinctissimos colores producit, rubicundum, purpureum, brunum, viridem, flavescentem: sique infusioni florum balaustiorum adjiciatur momentum vitrioli, statim atramentosus exurgit color.

5. Singularis cortex cujusdam radices, infuso spiritu vini, item oleis, sive destillatis, sive expressis, producit elegantem colorem rubicundum: quodsi autem inditur spiritus salis ammoniaci vinosus in momento saturatus, color coeruleus pulcherrimus excitatur, qui brevi tempore transit in purpureum.

6. Solutio mercurii sublimati ab oleo tartari per deliquium, induit colorem aurantium: à spiritu salis ammoniaci lacteum: color uterque statim perit, affusa debita quantitate spiritus vitrioli, & mixturæ limpiditas pristina restituitur.

7. Oleum vitrioli, cum oleo caryophyllorum mixtum, in momento producit massam rubicundissimam.

8. Olei vitrioli albiissimi unciae duae, unica guttula olei rubicundissimo colore imbuti possunt.

9. Atramentorum sympatheticorum varia genera monstrantur.

10. Curiosum est, si vitra colorata variis modis combinantur, quod tunc sistatur alius color: ita si coeruleum vitrum cum flavo unias, excitatur color violaceus &c.

11. Corpora alba, propter intensam radiorum reflexionem, difficilius accenduntur quam nigra, utut humiditate imbuta sint: item in phiolis vitreis, nigro colore obductis, quæ ad thermometrum usurpantur, si soli exponantur, liquor longe celerius descendit, quam si phiola fuerit albo colore imbuta. Mentio hoc loco etiam est facienda, quare fructus citius maturitatem suam acquirant in hortis, si parietes fuerint nigri, quam si albi.

12. Talcum nigrum, igne candefactum, auri colorem acquirit.

DEMONSTRATIO XL.

Sonus est tremulus aëris motus, qui in corporibus duris & fornicatis mirifice augetur & propagatur.

Experimenta.

1. Horologium cum campana immittatur recipienti, cui aër subtrahatur, tunc vix observamus tinnitum campanæ, cum antea per totum conclave personaret.

2. Tubi stentorii aliquot species offerantur, per quos vox emissa in planitie ad dimidium milliare, immo ultra derivatur.

3. Utilissima est quoque inventio tubi acustici, qui auri applicatus, surdastros juvat, ut sonum percipere facillime possint.

4. Hujus generis est quoque major tubus acusticus, qui auri applicatur, quando quis sonum è longinquo, per tubum stentorium emissum, distincte percipere vult.

5. Consonantiarum & dissonantiarum rationes in monochordo & dichordo explicantur.

6. Structura mirabilis organi auditus, sive auris structuræ internæ & externæ, tam in corpore humano, quam aliis animantibus, exhibetur & demonstratur.

DEMONSTRATIO XLI.

Qualitates, vires, effectus corporum, dependent maxime à varia structura, dispositione ac mixtione partium, totum constituentium.

Experimenta.

1. Antimonium crudum non est venenum, quando autem cum una parte nitri miscetur, virulentiam exferit emeticam: si autem duæ partes nitri adduntur, debita ignis administratione, deponit omnem virulentiam & abit in medicamentum tutissimum diaphoreticum.

2. Mercurius sublimatus, summum venenum, mixtus cum debita quantitate mercurii vivi, privatur omni sapore, omni corrosivitate & effectus lethifero.

3. Gummi guttæ, colocynthis, fortissima & nocentissima purgantia sunt, si in tinctura tartari solvantur, emergit essentia resolvens, diaphoretica, quæ plane nullam virtutem amplius possidet, vel minimam tantum, purgantem.

4. Oleum vitrioli, spiritus nitri concentratus, summe caustica & noxia corpora sunt, quando ipsis instillatur in debita quantitate oleum tartari per deliquium, abeunt in medicamenta tutissima & præstantissima.

5. Antimonium diaphoreticum, sive cerussa antimonii, regulus antimonii medicinalis, addito carbonum pulvere, igne fusionis tractata, virulentam pristinam suam naturam acquirunt.

6. Panis, caro, alimenta gelatinosa, sunt optima nutrientia: destillata autem igne, exhibent liquorem oleosum, salino-acrem, qui calorem intensum corpori communicando, sudorem pellit & sapore ac odore ingratus est.

DEMONSTRATIO XLII.

Sapor & odor corporum ex mechanica ratione, seu mixtione ac dispositione certa ac determinata corpusculorum optime deducitur.

Experimenta.

1. Saccharum corpus dulce est, coloris albi, quod si igne colliquatur, amittit omnem suam dulcedinem, & in massam fatiscit viscosam, rubram, cujus drachma aliquot mensuras aquæ limpidæ colore tingit elegantissime flavo-citrino, instar vini Rhenani, vel Hispani.

2. Aqua fortis, affusa lythargyrio, dulcedinem acquirit: marti, stipticum saporem: lunæ, nauseabundam amaritatem.

3. Corallia soluta in aceto, vel alio liquore acido, amarescunt.

4. Amara

4. Amara intensissima, ut colocynthis, aloe, myrrha, soluta in lixivio & spiritu vini extracta, mirifice deponunt suam amaritatem.

5. Spiritus salis ammoniaci penetrantissimi odoris, affuso acido, omnem odorem amittit: si autem mixturæ additur calx viva, vel sal tartari, protinus pristinus odor nares ferit.

6. Spiritus sulphuris fumans, foetidissimi odoris, adjecto mercurio & prævia agitatione sufficiente, exuit foetorem suum. Spiritus nitri, aqua fortis, ingrati odoris est; si vero miscetur cum spiritu vini rectificato & destillatio instituitur, tunc liquor odoris suavissimi emergit: idem fit cum oleo vitrioli, ubi liquor odoris & saporis aromatici penetrantissimi provenit.

DEMONSTRATIO XLIII.

Frigus motu penetrantissimo rectilineo, aqueas partes coagulat, illasque in motu suo intestino sistit.

Experimenta.

1. Demonstratio fiat, quomodo brevissimo temporis spatio, aqua etiam in hypocausto calido, statim converti in glaciem possit, & quidem mediante sale communi, sale ammoniaco, sale tartari & spiritu vini rectificatissimo.

2. Nitrum & sal ammoniacum, injectum aquæ, æstatis tempore cerevisiam, nec non vinum in lagenis contentum, refrigerant ex tempore, præsertim si agitatio aquæ accedat.

3. Gradus frigoris in fluidis optime possunt explorari thermometro, quod unum canalem habet in sphaera vitrea. Tale si imponitur fluido, pro diverso statu frigoris, liquor vel attollitur, vel deprimitur.

4. Aquæ salinæ, quæ non magnam quantitatem salis communis possident, corroborari possunt frigore congelante, utpote ejusmodi frigus congeliat partes aqueas, nequaquam autem salinas, quæ concentratæ, dum glacies eximitur, lixivium salis efficiunt fortissimum.

5. Vina omnis generis spirituosiora, saporis melioris evadunt frigore, dum frigus congeliat partes aqueas, unde spirituosæ sulphureæ, à congelatione immunes persistentes, augent virtutem & saporem.

6. Eodem modo acetum vini fortius & præstantius fit per actum congelationis.

7. Ostenditur experimentum, qua ratione in frigore intensissimo hiberno, liquor destillari possit per alembicum, sine ullius caloris accessu.

DEMONSTRATIO XLIV.

Magnetis effluvia mirabilem potentiam exerunt in certa corpora, & phænomena curiosissima exhibent.

Experimenta.

1. Monstratur quomodo poli & puncta magnetis inveniri debeant & possint.

2. Magnes crudus præparari & armatura instrui & ratione virium corroborari debeat: item quomodo possit deperdi, & quinam magnetes aliis sint præferendi.

3. Mutua attractio aut fuga ipsorum magnetum inter se invicem: item, acus ferrea pro ratione polorum monstratur, & quomodo virtus magnetica instrumentis ferreis communicari, immo rursus demi possit.

4. Naviculæ metallicæ, aquæ innatantes, magnete pro lubitu moveri in omnes plagas possunt: & cu-

Frid. Hoffmanni Oper. Tom. V.

riosum est adspectu, quod ipsæ hæ naviculæ inter se invicem modo se attrahant, modo repellant.

5. Magnes acum ferream, in vacuo existentem, longe vehementius movet, quam si in libero aere posita sit.

6. Acus ferrea, sine contactu à magnete, in vitro, immo intra papyrum consistens, moveri & libere in aere suspendi potest.

7. Magnetis præstantissimi effectus monstrantur, dum nempe libras quinque ad minimum instrumentorum ferreorum, successive appensorum, firmiter tenet.

8. Falsum est magnetis effluvia impediri per corpora oleosa, utpote & acus oleo inuncta, vel ipso oleo infusa, extrahi potest per cultrum, magnetis efficacia roboratum.

9. Tandem versorii varia genera exhibentur, & simul de inclinatione & declinatione acus magneticæ à polis differitur.

DEMONSTRATIO XLV.

Lapides vario colore ac figura, forma, generati in terra, originem ducunt ex fluido, quod postea coagulatur.

Experimenta.

1. Ostenditur liquor, qui aqueo liquore affuso, degenerat in merum lapidem, & in quo muscæ, vel alia insecta, imposita & exempta, lapidescunt, seu lapidea crusta obducuntur.

2. Ostenduntur variæ species lapidum ex aquis, thermis, in speluncis subterraneis, & ex aqua stillatitia generatorum, nec non ligna in lapides mutata.

3. CrySTALLUS montana, seu *Quartz*, item *Drusen*, producuntur diversissima, tam ratione colorum rubicundi, purpurei, obscuro-flavi, amethystini, viridis, cœrulei; quam ratione figurarum, ubi vel pyramidalem, vel nitriformem, vel cubicam, vel sexangularem, octoedricam, planiformem, conicam, exhibent.

4. Eadem ratione lapidum species innumeræ, tam nobiliorum, quam ignobiliorum, producuntur; item lapides in variis animalibus geniti, nec non mineræ succini.

5. Item curiosæ sunt aspectu variæ species marmorum, tam Florentini, quam aliorum locorum, colorum varietate variaque figura rerum, quas exprimunt, delectabiles: Item lapides scissiles Islebienfes, Ilmenavienfes, merentur perlustrationem, in quibus pisces distincte sunt expressi & figurati.

6. Consideratione quoque digna sunt varia cornua, dicta Ammonis, varia structura, armatura, curvatura ornata, coloris albi, grysei, ferruginei, quorum nonnulla de marte participant.

7. Referendi quoque huc sunt lapides figura admirabiles, conchites, ostreites, strombites, cochleites, ammonites, astroites, entronchi, pisolites, ceraunii, glosopetræ, flores æris, variæ talci species, lapilli conchulas plures continentes, stalachites varii, item qui caryophyllum exprimunt, tesserae lusoriæ à terra erutæ, conchæ bivalvules lapideæ, muscus putrefactus & lapides varii tophacei, item marochtas, ætites, lapis Megaricus.

8. Spectant huc quoque dentes variorum animalium marinorum, item molares, nec non grandiorum animalium petrefacta, partim ex specu Baumanniana, partim ex aliis locis, nec non partes sceleti elephantini, Tonnæ reperti: item innumeræ terræ sigillatæ & medicamentosæ species.

DEMONSTRATIO XLVI.

Color gemmarum à metallico sulphure dependet.

Experimenta.

1. Perlustrari merentur variae species gemmarum, jaspidium, quae vel virides punctis rubris praeditae: item rubeae venis lacteis immixtae, jaspides virides & albi coloris: jaspides Freibergenses in quibus variae chalcedonii, carneoli, item amethystes simul conspiciuntur; carneoli, malachites, varii coloris, politae & crudae, item virides, nec non coeruleae, immo amethystini coloris, lucentes in tenebris, pseudoadamantes, aquae marinae, granati, in suis mineris, ex Misnia, Silesia, Bohemia, quarza amethystina, chalcedonii, opalii in suis mineris, oculi cati, achates, varias figuras exprimentes, item carneoli variarum figurarum.

2. Fundamentum praeparandi gemmas artificiales exponatur, & quidem rubinum ex auro ac stanno, sapphirum ex cobalto, smaragdum ex cupro & ferro, hyacinthum ex plumbo, opalum ex cornu cervi usto, antimonio diaphoretico; amethystum ex auro, granatum ex croco martis & minio. Mentio hic etiam fiat de nova methodo illustris *Tschirnhausii*, vitra in incredibili magnitudine parandi, & ex illis statuas, campanas & similia conficiendi.

DEMONSTRATIO XLVII.

Succus maris salino-terreus, calciformis, testacea producit in animalibus marinis domicilia, seu cochleas curiosissimas, tam ratione colorum, quam ratione structurae & figurae.

Observationes.

1. Merentur curiosam inspectionem conchae echinatae, striatae, villosae, hispidae, denticulatae, fasciatae, bivalvules, rotundae, excavatae, pyriformes: pectines varii, diversae magnitudinis, figurae & colorum, bivalvules, denticulatae, fasciatae, striatae; turbines, cylindrici, umbilicati, cylindroides & conici, variae magnitudinis, coloris & figurae, cochleae turbinatae, conchae anomiae venereae, inter quas nautili species, it. neritae purpureae, aculeatae, matres unionum majores, stellae marinae, echini marini, uvae marinae & varia halcyonia, barina exotica varia, cochleae exoticae.

DEMONSTRATIO XLVIII.

Metalla facile destruuntur, & in mineras suas reducuntur per principium sulphureum & salinum.

Experimenta.

1. Ultra bis mille species minerarum metallicarum, sulphurearum, salinarum, terrearum, ex Hungaria, Misnia, Norwegia, Tyrolia, silva Hercynia demonstrantur, & qua ratione illa ipsa separanda & sequestranda sint a scoriis suis per artem metallurgicam, item examen per capellam, ostenditur.

2. Characteres essentiales, quibus quodvis minerale dignosci potest, exponuntur.

3. Mediante sulphure, cuprum, plumbum, ferrum, stannum, argentum, mercurius, regulus antimonii, in suas mineras reducuntur.

4. Ipsum aurum quoque sulphure in pulverem & crocum verti potest, modo prius figatur in igne mediante sale alcalino, quod sulphur in igne detinet, secundum notissimum modum *Montesquideri* & *Glauberi*.

5. Fundamentum metallurgiae & docimasiae monstratur, quod consistit in separatione sulphuris à mineris, & debita liquefactione minerarum.

6. Variae species arborum metallicarum exhibentur, in sicco & liquido.

DEMONSTRATIO XLIX.

Terrae sulphureae inflammabiles alcalinae, nec non salia fixa, lapides & cineres vitrescibiles, metallorum calces ac scorias redigunt in metalla.

Experimenta.

1. Minerae argenteae, aureae, varii generis, nec non saturninae, cupreae, stanneae examinari debent, & ex iis metallum suum debito modo educi.

2. Nitrum, sulphur minerarum deflagrando, facillime producit ex ipsis metallum, praesertim argentum & aurum: pulveres carbonum, salia alcalina oleosa, mineras ferri, auri, cupri, stanni, si prius sulphure decenter per calcinationem fuerint orbata, optime reducunt in sua pristina metalla, spicula acida in poris calcium & scoriarum relicta absorbendo, & volatilisatione auferendo & abigendo.

3. Pulvis niger fusorius (Germ. *schvartzer Flus*) ex mineris argenteis, cupreis, vel stanneis non separat metallum, si adhuc sulphure scatent, quoniam sulphur hoc sale ligatur, quod postea operando in metallum, magis illud destruit & in pulverem convertit, hinc minerae sulphure prius orbatae sunt, antequam tractentur cum salibus.

DEMONSTRATIO L.

Animalia balsamicis liquoribus via humida & sicca à putredine optime conservari possunt.

Experimenta.

1. Monstrantur partes ferme omnes internae corporis humani, utriusque sexus, nempe intestina, ventriculus, quorum vasa cera rubra & viridi repleta, hepar, lien, mesenterium, cor, omentum, pulmones, partes genitales, quae curiose praeparatae per quatuor jam annos conservantur in liquore non pretioso, & tali forma apparent, quasi recenter fuerint à corpore exempta.

2. Haec partes omnes, etiam sicco modo balsamo obduratae, cera repletis vasis, monstrantur ubi curiosum oculum merentur vasa omnia pie matris, impleta liquore rubro.

3. Pes cum toto femore, etiam brachium cum manu, omnibus adhuc musculis praeparatis instructum, conservatur integrum & sine ulla corruptione in liquore, quem conservationis modum, Deo dante, mox in integro homine experiri volumus.

OBSERVATIONES BAROMETRICO- METEOROLOGICÆ ET EPIDEMICÆ HALENSES ANNI MDCC.

Præmissæ sunt curiosæ physicæ meditationes circa ventorum
causas, vires & operationes in corpora humana
ac Barometron &c. &c.

V I R O

ILLUSTRI ET EXCELLENTISSIMO

DN. GODFRIDO GUILLELMO
LEIBNITIO,

POTENTISSIMI ELECTORIS HANNOVERANO-
Brunsvicensis Consiliario intimo, Regiæ Prussicæ Societatis Scientiarum
Directori, Polyhistori consummatissimo,

FRIDERICUS HOFFMANNUS.

Vir Illustris atque Excellentissime.



CONCEDAS quæso, in conspectum Tuum prodire has meas lucubrationes barometrico - meteorologicas, quas ei, cujus instinctu jam in publicam lucem emittuntur, hoc est Tibi, potissimum exhibendas consecrandasque censui. Cœpi jam dudum velle, ut mirifico Tuo favori, uti par est, respondere, Tuamque mihi perspectam benevolentiam publico grati animi documento testari possem. Tu enim, VIR ILLUSTRIS, supra mea merita, multis modis me meosque tenues labores ornasti, sæpissimeque tum litteris Tuis cultissimis, tum gratissimo, quo nuper perfrui licebat, accessu, singularem & prolixam in me Tuam voluntatem declarasti, præsertim, dum me in Societatem Scientiarum, à Potentissimo nostro Rege conditam, cum paucis aliis receptum significares. Hujus itaque Societatis cum primus sit meus qualiscumque hic labor, Tibi, VIR ILLUSTRIS, summo & æquissimo rerum physicarum aestimatori, & Directori hujus collegii dignissimo, ipsum nuncupare, pietas exigebat. Equidem non Tuæ utilitatis causa meis cogitatis opus est, quippe supervacaneum duco soli lucem fœnerare, sive ejus ingenium, cujus stupendam vim in omni solidarum scientiarum genere diu admiratus veneratusque orbis est, in physicis & curiosis erudire: sed potius quia existimabas, posse hoc laboris aliis quodammodo prodesse, non potui quin eundem cum curiosis communicarem, Tuoque ac cæterorum, si, qui Tui existant æquales, exactiori judicio atque censuræ limatissimæ submitterem. Perspectum Tibi est, VIR ILLUSTRIS, quam sit arduum negotium, ventorum ortum ac indolem sciscitari, tempestatum ac morborum primas causas indagare, planetarumque ac siderum trajectiones & operationes quærere ac invenire, & ex hisce omnibus futurum aliquid vaticinari. Ignosces

igitur, si non cuncta à me tractata Tuis votis respondeant, perpendesque, non tam ad eruditos hæc mea, quam erudiendos tendere. Uti enim solemne mihi est, hos ad nobilissimas scientias instituere, sic ab illis discere, quoties majora spirant, nihil neque renuo, nec erubesco. Fateor majoris momenti rerum accessionibus, nec non nitidiore stilo potuisse adcurari singula: verum & temporis ratio, & alia non posthabenda negotia, exactiorem curam & meditationes exquisitiores turbarunt. Neque mihi unquam propositum est, ingenium & acumen ostentare, sed utilitati publicæ tantum litare, idque si aliqua ex parte consequutus ero, satis grandem operæ fructum videor laturus. Spectat huc illud, quod elegans rerum rusticarum scriptor COLUMELLA scribit, *boni venatoris esse, in magna sylva quam plurimas feras capere, nec cujusdam culpæ fuisse, si non omnes ceperit.*

Cæterum, VIR ILLUSTRIS, pro summo Tuo & exactissimo judicio, atque inusitata humanitate, quæ forsan in hoc opere deficiunt & desiderari possunt, imposte-
rum emendanda & supplenda, quæque magno usui futura & inquirenda adhuc sunt, ut mihi significare velis, enixe contendo. Interim vale pulcherrime, & musis meis favere, publicæque rei, quod facis egregie, prodesse, nunquam desiste.




PRÆFATIO.



Apienter divus HIPPOCRATES libro de natura hominis pronunciat: *Morbi oriuntur tum à victus ratione, tum à spiritu, cujus inspiratione vivimus.* Non immerito à veneranda antiquitate aer occultus vitæ cibus, spirituum pabulum, anima ore hausta, & auctor omnium, quæ corpori accidunt, habitus est. Probe enim perspiciebant, in aere maximam vim esse; vitam & integritatem actionum vitalium conservandi, & contra, totam œconomiam humani corporis pervertendi, si vitiosus esset & à sibi debita temperie desciverit. Testantur id morbi, qui populariter grassantur, & maximam mortalium partem inficiunt ac interficiunt, quorum origo à nulla alia causa, quam communi, ipsoque aëre à peritioribus ducitur ac derivatur, quum experientia addoceat, ab intemperantia & victu pleno chronicas & obstinatæ indolis affectiones magis, acutas autem, & quæ sub certis temporibus nascuntur & rursus abeunt, ab aëris tempestatibus propullulare. Quum autem aer, cujus usura perpetuo ad sanguinis spirituscentiam, calorem, ac circulationem summe est necessaria, mirum in modum alteretur, & rarissime similis naturæ conspiciatur, sed pro tempestatum ortu, diversam naturam, indolem ac vires acquirat; inde maxima solertia à Medicis hujus mutationis & tempestatum causæ quærendæ ac indagandæ sunt. Jam vero per diuturnam experientiam constitit, ventos esse, qui tempestates temporumque conversiones, aëris immutationes, & hinc dependentem fecunditatem in vegetabilibus, in animantibus salubritatem, unice fere ingenerant atque suscitant. Verissime hinc ARGOLUS lib. II. scribit: *Quotidiana experientia innotuit, temporum ac aëris mutationes, etiamsi habeant alias occultas causas, oriri ex ventis, quum ex eorum adflatus diversitate optime conspiciamus serenitates, pluvias, nebulas, nives, nubila aliaque circa aërem contingentia.* Quo circa optima ratione sapientissimi Veterum, & inter eos magnus HIPPOCRATES, sedulo inculcant, ut qui Medicinam in certo loco facere velint, non modo ejus loci naturam ac situm, victus rationem, sed præcipue ventorum & anni temporum vicissitudines, differentias & morbosas affectiones inde resultantes, accurate & sollicite annotent, ut deinde simili impendente anni temporumque constitutione, commoda atque incommoda certis individuis, magno ipsorum emolumento, præcipere ac prænunciare possimus. Profecto vehementer esset optandum, ut sapientissimum hoc Veterum institutum postera ætas rectius esset persequuta; ita non morborum accuratarum historiarum, quæ fundamentum totius rationalis medendi methodi ponunt, defectu laboraremus, non minimo certe nostræ artis medicæ dedecore ac detrimento. Quo circa & hisce temporibus plurimorum præstantium virorum ardentissimum fuit votum & desiderium, ut omnes, qui praxin exercent, qui ingenio ac peritia valent, & quivis in suo loco magna attentione & judicio ventorum, qui tempestatum subsequentium ac morborum præcipuæ causæ sunt, ortus singulis diebus, immo horis, notarent, consignarent, simul adjiciendo fidelem morborum grassantium narrationem. Ita utique futurum esset, ut
magna

magna laude ac gloria artis nostræ incrementa in majus meliusque proferri queant. Primus jam magno cum applausu id laboris suscepit præstantissimus Italus, RAMAZZINUS, qui nobis exhibuit constitutionis epidemicæ Mutinensis specimen, hujusque exemplum laudatissimo conatu jam sequi incipiunt in Germania nonnulli eximii viri. Ego quoque per aliquot annos idem egi, & singulis diebus, non modo aëris nostri Halensis statum, sed & mercurii in barometro, & spiritus vini in thermometro mutationes, variasque motiones diligenter notavi, & in diario consignavi, una cum grassantibus morbis, illorum indole ac sanationis modo, privatum meum in usum, quo in negotio eximiam mihi opem præstantes hac in urbe Viri & Medici periti tulerunt, cum impossibile sit, ut unus cuncta circa epidemicas affectiones observet. Quum autem *Illustris Vir & de solidis scientiis undiquaque promovendis multis meritis splendidissimus, LEIBNITIUS*, humanissimis me pluries litteris monuit & excitavit, ut in lucem boni publici causa ea ipsa ederem; hinc magni hujus viri dicto obtemperaturus, hoc in præsentia anni specimen superioris exhibeo. Et si Deus vitam ac vires ulterius concesserit, subsequenter annis similes observationes continuabo. Constitui autem semper curiosa quædam physica, quæ ad rem hanc pertinere videntur, præmittere. Aggressus in præsentia sum materiam præstantissimam de ventorum viribus in corpora humana & argentum vivum: ubi perplexas istas causas motuum mercurii in barometro pro viribus enodare suscepi, eamque sententiam, quam superiori anno in dissertatione extemporali labore publice proposui, jam evidentiorē reddidi, ex eodem fundamento; in quod singulari fato uno ferme tempore, quum neuter alterius præsciverit meditationes, in quo gaudeo, incidit honoratissimus meus Collega, diverso tamen paullulum tractationis modo. Inposterum etiam hisce ephemeridibus adspectus adjungam planetarum, ut horum mutua invicem collatione facta, appareat, an sidera præter solem & lunam in tempestatibus concitandis potentiam quamdam habeant, quam plane negare non auferim, utut communem Astrologorum methodum veritati minus respondere probe sciam. Cæterum, candide Lector, vale, & benigna mente lucubrationes has accipe.





CAPUT I.

De ventorum generatione, ortu ac causis.

Ventum aëris sensibilem ac progressivum motum esse, vel ex eo satis liquefit, quod artificialem ventum, motum aëri introducendo, sive per folles, sive flabella manualia facili negotio excitare possimus. Quin immo non dubitandum esse, quod ventus sit aëris motus, vel ad sensum patet, dum sæpenumero motus vehementia, quam venti suppeditant, & arbores dejiuntur, ac radicitus evelluntur, & ædificia infirmiora subvertuntur, itemque oceanus horrendis fluctibus concutitur. Quomodo autem in aere fluido, motus ejusmodi vehemens suscitetur, qui ventum efficiat, res certe implicita multis difficultatibus & subtilioris indaginis est. Qua de re antequam nostram exponamus sententiam, utile erit præmittere quædam circa aeris indolem ac proprietates noscendas, quo deinde eo felicius in inquirendis ventorum causis progredi queamus.

Videtur autem tota illa atmosphæra, quæ nos ambit, commode considerari & resolvi posse in tria quasi principia. Primum est æther, fluidum universalissimum, tenuissimum, mobilissimum, omnia corpora pervadens, illorumque vacua spatia occupans. Huic tenuissimo ac primo catholico fluido, omnis motus & progressivi & intestini, nec non illius, qui tam ex gravitate, quam elasticitate provenit, in omnibus corporibus, ipsoque aere nostro atmosphærico, causam assignare atque adscribere recentiores Philosophi assolent. Alterum principium sunt congeries numerosissima, indefinitæ naturæ, ut videtur, rigida, solida, flexibilibus, corpusculorum, quæ ita videntur comparata, ut comprimi, sive in arctius juxta se spatium, expresso quasi æthere, redigi queant; nec non cessante compressionis actu, ab æthere nisu ac pressione rursus dilatari, expandi, atque in amplius spatium deduci possint, prout nempe resistentia ambientium corporum id minus impedit. Et hujus indolis corpora vocantur peculiari nomine elastica, & aerem nostrum potissimum ingrediuntur.

Tertium principium est humidum, sive aqua, quæ beneficio ac interventu ætheris & principii elastici resoluta in tenuissimas atomos, vapores constituit, qui propter subtilitatem, tam elasticis, quam æthereis partibus atmosphærae nostræ intimius intermixti sunt, & ab hisce sustinentur, adeo ut aer nunquam fere sine vaporibus existat: unde etiam atmosphæra nomen enatum est. Non hic negandum, præter aqueas, etiam terreas, tenuissimas, salino-sulphureas diversissimæ naturæ exhalationes in aere contineri, quod ex diversa natura, effectibus aeris, fulgure, tonitru, usu & salubritate innotescit clarissime. Nihilo minus particularia tantum hæc sunt effluvia; universalia autem & ubique præsentia sunt aquea: utpote aqua majorem globi nostri partem constituit, ut magis aqua terram, quam terra oceanum complecti videatur. Accedit & illud, quod aqua ejus naturæ sit, ut accedente motu intestino calido, in particulas innumerabiles tenuissimas resolvi, disjungi & expandi possit, ut quasi humiditatem deposuisse & in siccum vaporem converti videatur, quemadmodum id curioso spectaculo æolipilæ exemplo apparet, ubi aqua calore sufficiente resoluta, in ventum frigidum, vividissime ignem excitantem, resolvitur. Hæc sunt præcipua aeris atmosphærici, quo corpora ambiuntur, quo fruuntur, essentiam constituentia principia.

Repetendum autem hic ex physicis est, atmosphæ-

ram nostram duabus maxime affectionibus & effectibus gaudere, qui sunt motus gravitatis & elasticitatis. Aerem corpus grave esse, hoc est, premere & motum habere deorsum, sive versus terræ centrum, evidentissime confirmatur variis & famosissimis experimentis. Ita ad sensum id patet, dum vasa aere repleta in balance accuratissime examinata, plus ponderant, quam si aer ex ipsis fuerit evacuatus. Vid. *Acta Soc. Regiæ Gallorum* p. 394. Deinceps manifesta aeris superincumbentis gravitas sentiri potest, quando ex magno spatio aeris certa portio demitur atque extrahitur: tunc enim aer incumbens versus illud spatium, in quo nullus vel paucus est inclusus, adeoque pauca resistentia, pressionem ac motum vehementem ac sensibilem exserit. Ita folium latera diduci nequeunt, si accuratissime omnia foramina cum fissuris fuerint clausa, hæmisphæria ænea arctissime cohærent, si aer ex ipsis evacuetur, neque dimoveri possunt, nisi atmosphæra incumbens, pondera alterius corporis proportionato superficiæ hemisphæricorum, & ipsa contra pressura auferatur. Ab eadem aeris pressura & gravitate illud dependet, quod vitra angulosa, vel planitie gaudetia, facillime exhausto aere, magno impetu ac fragore disrumpantur, & in particulas innumeras tenuissimas diffiliant. Quæ autem sphærica figura donata vitra sunt, à disruptionis hoc periculo plane sunt immunia. Sed ut ratio certissima dictorum effectuum appareat, & quod nulla alia sit horum phænomenorum origo, quam aeris externi pressura & gravitas, id ipsum ex curiosis sequentibus experimentis clarum fit: nempe notatu dignum est, in campana, ex qua aer fuit exhaustus, folles posse diduci, hæmisphæria decidere, vitra non amplius orificio claudi, nec corio antliæ cohærere planum, nec quadratum rumpi, vel siphone distracto, aquam in se recipere, quæcunque tamen, si fuerit aeris accessus, contingunt, quemadmodum id curiosis hunc in finem fabrefactis instrumentis oculis auditorum meorum per multos annos objeci.

Postremo clarissime & exquisite ipsius aeris pondus monstrat atque determinat famigeratissimus Torricelli tubus, qui ad XXIX. vel etiam ultra, pollices, sive Germanice, *Zoll*, mercurium in liquido aere suspensum tenet: ita ut ratione stationis suæ variet, prout nempe locus est altus, vel demissus situs, aer siccus, compressus, dilatatus aut humidus est. Quæ omnia tam clara ac evidetia sunt, ut nulla dubitatio possit amplius habere locum, nisi quis inania figmenta & conceptus inextricabiles admittere velit, & præfracte illa, quæ clara, perspicua & sufficienter comprobata sunt, negare. Altera proprietas aeris nostri atmosphærici est elasticitas: dicuntur autem elastica corpora, quæ comprimi possunt, & cessante compressione, in pristinum statum ac locum se recipiunt, & idem spatium, quod antea, occupant. Hujus generis est quoque aer noster, qui comprimi & in arctius spatium, æthere quasi expresso, cogi ac coarctari potest: ubi compressione, per alia corpora facta, desinente, æther mobilissimus perpetuo nisu corporis hujus superficiæ inhærens, vehementissima vi poros permeat, & in pristinum locum, immo in maximum spatium, nisi id alterius corporis resistentia impediat, ipsum explicat atque expandit. Hæc ætheris actio expansiva in aere, & elasticitas, similes ferme effectus producit ratione efficaciac ac motus, quam ejus gravitas, ita ut vis elastica aeris respondeat ponderi & gravitati naturali. Sic mercurius in tubulum perpauci aeris inclusi elatere, remoto aere externo, per antliam intrudi potest, ut ad pollices 28. & ultra suspensus hæreat. Nec rarum experimentum amplius est, dum modicus aer vesicæ inclusus in vacuo non modo vesicam mirifice expandit, sed una magnum pondus attollit. Plura experimenta collata videri possunt in *demonstrationibus meis Physico-Mechanico-*

nico - Curiosis. Et hæc aeris elasticitas causa est mirabilis pulveris pyrii, auri fulminantis, lacrymarum vitri, machinae Papinianæ, fontium artificialium aliorumque curiosorum instrumentorum effectus.

Denique hoc maxime circa aërem ejusque motum meretur attendi, scilicet quousque & quamdiu aeris fluidum constituentes partes æquabili unione, proportionem nec non æquali elasticitate sunt, adeoque in æquilibrio constitutæ, nullum fieri motum, quia, cum ubique æqualis vis pressiois & motus sit, & æqualis resistentia, motus fieri progressivus nequit, quoniam omnis motus localis causa ex destructo æquilibrio sive ex inæqualitate corporum juxta se positorum peti recte debet. Quodcumque itaque inæqualis sit aeris status, dum fortiter comprimitur in una regione, in altera expanditur, & sic levior redditur, non potest non inde inæqualis pressio, sive motus progressivus protinus subsequi. Quodcumque igitur ipsum aerem vel nimium in una parte rarefacit, in altera parte intense comprimit, hoc inæqualem situm, efficit, proportionem lædit & consequenter inæqualem resistentiam & pressionem partium aeris fluidarum excitando ventum producit. Placet jam hanc hypothesin staticam quodammodo clariorem reddere experimentis. Ex vitro quando evacuatur aer crassior, mediante antliæ exercitio, tunc epistomio aperto aer externus in hoc ipsum magna vi irrumpit, & vel aquam vel etiam ipsum argentum vivum ponderosissimum cum magno impetu intrudit. In phialam, ex qua mediante igne aer interior expulsus fuit, Mercurio vel aquæ immixtam, ascendit aqua vel Mercurius sua sponte ad notabilem altitudinem: unde jam perspicua est ratio, quare aer per inspirationem descendat in thoracem, ubi partim aer rarefactus est propter calorem sanguinis, partim etiam dilatatio costarum amplius spatium efficit. Quocirca quodcumque aeri & præsertim coacto rarefactionem inducit, illud ipsum & ventum protinus producere potest. Videmus id clarissime in igne, qui semper comitem habet ventum, unde quotidiana testatur experientia, omnis incendii comitem esse vehementem ventum, qui demum ab ipso incendio suscitatur, quum cuncta antea fuerint tranquilla. Elegans in hanc rem est locus in *historia ventor.* VERULAMII p. 402. traditur, temporibus, quum esset Gasconia Anglicanae ditionis, exhibitum esse Regi libellum supplicem, per subditos suos Burdegallie & consinium, petendo, ut prohiberetur incensio ericæ in agris Suffexie & Hamptonie, quia gigneret ventum circa finem Aprilis, vineis suis exitabilem. Quin imo res in vulgus nota est, quod in locis clausis, fornicatis, hypocaustis, quando tempore frigido intus accenditur ignis, aer per foramen angustum in conclave sæpe cum magno impetu intret, atque ventum efficiat. Ignis enim motu ætheris celerissimo & vehementissimo intestino aerem anteriorem propellit, rarefacit, expandit, sicque revera spatium levius minusque resistens efficit, in quod propria gravitate à tergo aer gravior incidit, sicque motum, qui ventus est suscitatur.

Quod itaque attinet ad ventorum productionem ac ortum, vero videtur valde simile, quod ventus nihil aliud sit, quam vapor motus, ubi principium materiale vapores constituunt aquei, formam autem dat ipse motus. Quemadmodum autem vapor ex calore & humido agnoscit natales suos, ita etiam in macrocosmo ex eadem profuit origine. Etenim vastissimum illud sidus sol, quod cuncta terræ spatia implet, calore suo actuosissimo in mare & aquas agendo innumera-bilium exhalationum copiam & agmen attollit & in aeris fluidum adducit, à quibus postea inæqualis pressio, pulsio atmosphaeræ efficitur. Quo circa non sine ratione à Philosophis sol ventorum princeps causa statuitur. Nec non plurimi ex recentioribus motus principium in ventis, sive quod impulsus faciat, in acces-

sione vaporum supervenientium, apte collocarunt, utpote experientia testatur, ortum ac patriam esse ibi ventorum, ubi magna aquarum copia reperitur, & densi vapores exsurgunt, unde etiam videmus, procellas & impetus ventorum in mare & crebriores esse, & magis pertinaces, quam in terram: immo & compertum est experientia, quod circa ingentes fluvios plerumque spiret lenis ventus. Quod autem aqua, calore in vapores resoluta, in ventum converti possit, validum & impetuosum, id evidentissime experimentum æolipilæ famolum demonstrat.

Quis itaque est, quin luculenter videat, nubes in aere suspensas, quæ nil nisi vapores aquei arctius collecti & coagmentati sunt, ventorum materiam præbere commode posse, idque maxime si sol radiis suis vividissimis in illas agit, ipsasque rursus in vapores explicat, qui per angustias delati, vel ad montes percussi, crescente impulsu, majorem potentiam adquirent. Vulgaris hinc est observatio, nubes densas ventis præcedere & ventos etiam nubes procreare, vapores undiquaque compellendo, qui deinde vel in imbres, aqua jus suum repetente, vel in ventos denuo solvuntur. Perspicuum exinde est, quare vernis mensibus & autumnalibus impetuosissimæ procellæ suboriri soleant, rarius æstate vel hieme, nisi hæc tepida & autumnno similis sit, utpote autumnno & vere vapores in atmosphaera inferiori potissimum hærent, nec nimis diffunduntur, sicuti fit ab æstivo calore, unde mox abeunt in nubes, mox in ventos vel imbres, mox cælum obscurum & nubilum fit, mox rursus perspicuum & serenum. At non tantum nubes dissolutæ ventos formant, sed nives quoque copiosissimæ in altissimorum montium jugis hærentes, sive aqua congelata in locis polo arctico vicinis, solis actione solutæ atque liquatæ, ventos creant, eosque satis frigidos ac validos. Ita solutio nivium circa mare glaciale diebus canicularibus in Italia & Græcia excitat gravissimos aquilones, docente id VERULAMIO in *Historia ventorum* p. 474. Et solutio nivium per solem altiore mense Aprilis, vel etiam quandoque sub principium Maii, in motibus præcellis Moraviæ, Bohemiæ, Misniæ, nive tectis, ventos producit in nostris regionibus valde frigidos, ab oriente spirantes, qui non leve detrimentum hortis adferre solent.

Datur etiam præter has dictas alia ventorum causa, quando videlicet una grandior & adstrictior nubes super alteram æque densam, celeri cadit vel ruit impetu: sic enim compressus & inter angustias has excussus aer instantissime ventos, quandoque tonitru comitatos producit, qui in vorticosum motum cineres in focus, & in plateis pulverem circumagere solent.

At vero quemadmodum vapores & venti, qui ex mari tanquam constanti fomite oriuntur, flatos, constantes & universales multis regionibus familiares ventos proferunt, ita qui ex particularibus fomitibus, nubibus, nivibus, vel stagnantibus aquis generantur, magis particulares, & certæ provinciæ proprii sunt.

Ulterius res maximæ difficultatis, & non ita facile expediendæ obscuritatis adhuc venit inquirenda, unde scilicet eveniat, ut hoc vel illo die hic vel ille ventus oriatur, unus alterum excipiat, & cur ex. gr. certa anni æstate aquilonares & occidentales largissime spirent venti, fructuum maturitati obsistentes, hieme autem australes, calidi, teporem, ingratum squalorem & insalubritatem adferentes.

Fateor hujus rei causas genuinas & ad hunc usque diem torquere ac fatigare nobilissima virorum ingenia, & rem indagatu perdifficilem esse. Quemadmodum autem solemnis ac vulgaris mos est, ut si certi phaenomeni atque effectus causas in naturalibus, non statim penetrare valemus & abstrusæ illæ atque occultæ videntur, mox confugiamus ad supernaturalia cælum &

fidera, in quibus revera magnum ignorantiae asyllum multi adhuc ponunt & quarunt; ita etiam circa praesens negotium passim id contingere, loquitur experientia. Sed quam perperam & qua ratione id fiat, docent infausa astrologorum judicia & praesagia, quae nunquam ferme, nisi casu & per accidens, eventibus respondent. Et quamvis novam quamdam methodum se invenisse nonnulli gloriantur etiam ex Anglia, quae praedicere ventorum ortus & tempestatum vicissitudines futuras prolixissime & certo promittunt; nihilo minus & ea via multoties me fefellit, qui ad aspectus planetarum cum observationibus aliquot annorum circa tempestates diligenter contuli, & rarius veritatem inveni. Reclamat etiam hisce moliminibus ipsa ratio: quis enim conabitur concipere Jovem vel Saturnum cum luna talem ad aspectum habente, in hoc vel illo mari, in hac vel illa plaga, elevare ac movere ad hunc illumve locum vapores, & quum tempestates & motus mercurii in barometro, & ventorum flatus, quandoque intra unius diei vel noctis spatium plus saepe quinque vicibus variant, neque iidem observentur in omnibus regionibus aeris flatus, quum experientia doceat, in una regione continuos per aliquot dies esse imbres, in altera autem caelum pulchre conspici serenum: quis genuinas allegabit causas specialissimorum horum effectuum? Non equidem negaverim, maximas sensui nec non rationi manifestas operationes in sublunaria habere solem, qui merito cor & anima universi, omnia calore fovens ac vivificans appellari debet. Neque luna quae sub vortice terrae continetur, & nobis proxima est, tam corpore suo vasto, quam elastica luce ab influxu & effectui in globum nostrum terraqueum, excludenda venit, utpote non modo maris aestus ac motus, id confirmare videntur, sed etiam docet a longissimo tempore experientia, quod circa praecipuas lunae quadras, conjunctionem nempe & oppositionem cum sole, sive novilunium & plenilunium, quaedam mirum tamen variantes mutationes, in aere & in barometro contingant, nec non circa agriculturam & plantarum vegetationem hoc tempore plura non spernenda observentur. Quae cuncta lunae, circa totius terrae ambitum intra viginti quatuor horas se moventi, variasque in aere compressiones, rarefactiones causanti, merito adscribuntur, utut non certo determinari ac definiri queant.

Brevibus illud planum ac perspicuum est circa ventorum negotium, quod compressio atque expansio aeris, & exinde resultans ejus inaequalis gravitas & pressio, princeps causa ventorum sit, materiam autem & fomitem horum subministrant exhalationes & impiiis aquae, directionem vero illorum efficiant fortuiti nubium concursus, aliorumque ventorum, montium & angustiarum occurus, solis & lunae positio, unde pro diversis anni temporibus, locorum natura ac situ, innumeris modis variant venti.

CAPUT II.

De ventorum natura, specialibus proprietatibus ac viribus.

UNIVERSALI sic praemissa, quantum ratione ac ingenio assequi licet, ventorum, quoad ortum suum notitia; res jam magis poscere videtur, ut ad cujusvis venti specialem indolem, vim ac efficaciam, animum atque curam nostram advertamus. Primum autem noti sunt quatuor isti cardinales, quorum quivis a certo mundi angulo spirat, & ab ortu dicitur subsolanus, a meridie auster, ab occasu zephyrus, a septentrione septentrio.

Inter binos autem cardinales unus adhuc positus est; ita qui est intra eum & austrum locatus, dicitur eu-

ro-notus, *Sud-Ost*; inter austrum & zephyrum, zephyro-notus, *Sud-West*; inter zephyrum & boream, zephyro-boreas, *Nord-West*; & inter boream & eum, euro-boreas, *Nord-Ost*.

Quia autem sol non eodem loco oritur & occidit, sed alius est ortus & occasus aequinoctialis, quibus subsolanus & favonius spirant, alius solstitialis & hibernus; quatuor adhuc ventos adjunxerunt, spirantes a quatuor punctis intersectionis, tropicorum & horizontis, seu a punctis ortus & occasus, solis aestivi atque hiberni. Illum enim, qui stat ab ortu aestivo, appellant caeciam; qui ab hiberno, vulturnum, sive eum; eum, qui venit ab occasu aestivo, eum: qui ab occasu hiberno, africanum. His addiderunt posteriores adhuc alios quatuor, qui spirant a polis zodiaci, punctisque oppositis, seu a lateribus polorum, circulisque polaribus, seu punctis in horizonte ab iis notatis, ita ut quilibet ventus cardinalis duos collaterales habeat, appellanturque eum, qui est inter septentrionem & ortum aestivum, boream; qui est inter septentrionem & occasum aestivum, thraciam sive circium; eum vero, qui sit inter austrum & occasum hibernum, libonotum, qui inter austrum & ortum brumalem phoenician. Atque hic vulgatissimus ventorum apud auctores numerus est. Plura vide in *PLIN. Hist. N. l. II. c. 46*.

De proprietatibus autem & viribus cujusvis venti seorsim dicturus ex propriis multorum annorum observationibus sum. Primo omnium autem supponere debeo, nullum ventum per se singulari & specifica qualitate ac virtute pollere, nisi quae a loci, unde oritur, natura, nec non medii, per quod transit, indole derivanda sit. Hinc prope notavit *KIRCHERUS in Mundo subterraneo pag. 233*. Ventum exspirantem ex montibus nive coopertis, sive ad septentrionem, sive ad austrum, orientem vel occidentem ortum suum habeant, semper esse frigidum, & contra humidum eum, qui paludes terrasque, stagnantibus aquis perfusas, transeat, ac semper calidum ac siccum, qui per arenosa deserta aestu solis adusta spiret.

Quod itaque ad septentrionales, illorumque naturam attinet, spirant hi ipsi ex terris gelu constrictissimis, a sole remotis & mare glaciale, partim montibus altissimos, glacie nivibusque tectos, pervadunt. Et quum sub coelo gelidissimo aer valde constrictus, condensatus ac compressus sit; nullum dubium est, quin hi venti a radiorum solarium ex meridionalibus locis reflexione obliqua ad polos in frigidis istis terris excitati secum ferant & in nostram atmosphaeram adducant aerem non modo valde condensatum & compressum, sed & ipsas rigidas glacieculas, quasi pruinosas, frigidissimas: qua de causa & ventus notabile frigus adferre fere semper solet, adeo, ut si per aliquot dies continuus sit, intolerabile, aestate vero valde sensibile frigus evadat. Quid autem frigus aliud est, quam aer valde compressus, cujus particulae juxta se in quiete haerent, & rectilineo motu corpora stringunt. Siccus hic ventus observatur, nam conspiciamus hoc spirante plateas squalore obseffas antea, mox humido quasi omni absunto exsiccari & purificari, simul & ipse aer exuit omnem humiditatem, caelum fit perspicuum, serenum, siccum, nebulae, nubes, vapores condensati dispelluntur, evanescent: quorum ratio haec esse videtur, quod aer compressus & condensatus, hisce ventis adductus in nostram atmosphaeram calidiorem, insita sua vi elastica mirifice se expandat, & ipsa hac expansione propellat, dimoveat corpora & vapores obstantes, illasque evehat, & sic gratissima serenitas restituatur. Ab hac virtute elastica expansiva aeris septentrionalis, alii quoque effectus in animantibus, vegetabilibus & corporibus morbosus, inferius recensendi, derivandi merito sunt.

Australis ventus ex percalidis & arenosis Africa locis venit, zonamque torridam, nec non mare mediterraneum percurrit: hinc ab omni retro tempore calidus & humidus animadversus fuit, utpote hieme frigus temperat, nivem solvit, ad pluvias atque nives disponit, aërem densum, humidum, calum crassum & nubilum reddit, omniaque humiditate & squalore ingrato complet. Etenim quemadmodum ex septentrione qui provenit aër constrictus, ad elasticitatem dispositus, gravis & motu vividus est, ita versa vice ex locis calidioribus nec non humidioribus oriens, valde rarefactus, expansus adeoque levis existit, unde in atmosphæra frigidiori vapores ab ipso inducti non modo statim condensantur, non secus, ac videmus in marmore gelido, in hypocaustum calidum adducto, adhærere humoris forma vapores, verum etiam levitate sua & nimia rarefactione occasionem dat, ut vapores in aëre antea libere suspensi, jam in rarefacto isto aere colligantur & ad se invicem proximius accedant, sicque in nebulas, nubes, vel pluvias tandem, vel hieme nives condensentur. Et probe hoc loco etiam notandum est, quod auster per se sit motu lenissimus, lentissimus, & circa terram maxime serpat, unde vapores ex alto expansi sese dimitunt ac descendunt ad atmosphæram inferiorem, septentrionales autem magis quasi ex alto ruunt, & majori motus efficacia, & nisu sese dilatandi instructi sunt: hinc humiditates magis sursum arripiunt & evehunt, quum expansione sua humidum in minimas partes dividunt, quas postea ceu specie leviores sustollunt, sicuti videmus in solutionibus metallorum &c. unde rectissime dicuntur aerem purgare, serenare.

Orientales venti ex terris exsiccatis & sole æstivo adustis proveniunt, & per vastissima Asiæ spatia ad nos accedunt, & si quam humiditatem habent, ibi deponunt. Hinc per se calidi & sicci sunt, & æstate quoque media æstum intensum anxium inferre solent, & pluvias quandoque, quæ ad aliquot dies perseverare solent. Perquam autem notatu dignum est, quod in medio veris in nostris regionibus, annua observatione id docente, plerumque intensum frigus adferant: quod, ut supra dictum, evenit, quum nives in Bohemia, Misniæ & Variscorum montibus altissimis jacentes, altiori sole facto, colliquant & frigidas istas partes in nostrum aerem advehant. Quantum autem frigus immittat atmosphæra nix vel glacies soluta, præclaro experimento inde demonstrari potest, quod spiritus vini rectificatus nivi adfusus tantum gelu efficiat, ut liquor aqueus in propinquo mox in glaciem convertatur. Venti hi hieme flantes plerumque serenum exserunt effectum, eandemque ferme efficaciam habent, quam aquilonares, quia eadem similique ratione aerem condensatum & frigidum ex montibus vicinis adferunt.

Æstate vero effectus plane contrarius est: æstus enim intenditur, sique multi vapores ab aliis ventis antea adducti in aere hærent, a levi & rarefacta talis modi aura perfacile colliguntur, ac digeruntur in nubes vel pluvias, quod nos vel aliquoties notavimus. Memorabile enim, quod hi venti plerumque sint constantes, nec ventos procellosos tumultuantes comites habeant, sed ut plurimum tranquillum, amœnum & sedatum cælum exhibeant.

Occidentales ex oceano Atlantico proficiscentes uberrimam vaporum aquosorum copiam ad nostras terras adducunt, qui magnas nubes ibi, siue aer noster antea fuerit frigidus, siue calidus, formare solent: unde imbres largas creant & frigus humidum inferunt. Curiosum autem est, nullum ventum magis impetuosum, validum & violentum esse, quam hunc ipsum, maxime omnium autem si junctus fuerit cum boreali & australi: hinc *Nordvest* & *Sudvest* ordinarie sunt procellosi, qui in mari maxima naufragia &

detrimenta excitare solent, & ratio in promptu est: humidum enim quod custodiunt occidentales, expansivo elatere borealium vel calore austratum valide resolutum in ventum sat fortem mutatur.

Quemadmodum autem quivis ex cardinalibus sua specifica indole gaudet: ita si duo hi venti miscantur, & ex plaga inter duos cardinales intermedia exspiret ventus, neutram quoque naturam induit, & mutatur exinde singularem efficaciam. Placet autem h. l. brevibus strictimque subnectere observationes, quas fecimus circa cujusvis venti effectus per singulos ferme anni menses diversos. Et quod primum attinet ad aquilonem siue *Nord-Nord-Ost*, hic ipse ex nostris observationibus brumalibus mensibus illustrem diei serenitatem, noctemque fidream cum gelu maximo efflare solet, adeo, ut quo major solet adesse serenitas, eo vehementius quoque sit frigus, quod etiam ad interiora conclavia penetrat.

Notabile est de hoc vento hieme surgente, quod pluries in principio cælum nebulosum reddat, id quod exinde videtur provenire, partim quod vapores omnes ex alto præcipitet & deorsum urgeat, partim etiam quod propter nimiam compressionem in superiore regione liberam vaporum, & humorum elevationem & adscensionem impediat, cum tamen successive mox serenitatem adducat gratissimam.

Mense Martio idem ventus pluvias & nebulas, zephyri & austri genetrices, opportunissime dissipat & cum serenitate frigus adspirat. In Aprili & Maii exordio noctes serenas, sed glaciales, plantis valde infensas, ingenerat, quo tempore etiam pluvias crassas & minaces nubes circumquaque pulsare affolet. Maii æstum admodum cohibet, & ita foecunditari atque hortorum fertilitati obstaculo est. Per totam æstatem gratissime æstum levat, quandoque autem tonitrua adfert. Autumno frigus serenum, claras noctes, in fine glaciales, mane pruinosum infert, & in principio quandoque crassum, imbricosum, ninguidum, nebulosum aerem facit, quem tamen mox ipse, vel etiam eurus subsequens, abigere solet.

Euro-boreas *Nord-Ost*, item cæcias *Ost Nord-Ost*, fere easdem vires possident, quam dictus aquilo, modo quod secundum nostras observationes remissius faciant frigus, & interdum etiam cæcias nivem producat, noctemque nubibus obscuret.

Circius *Nord Nord-West*, hiemali tempore frigus ingens, siccum, illustre, rigidum & nive vacuum facit, crassam quandoque in principio nebulam efflante & tristi cœlo succedente. Tempore verno mane nebulosum, dies algidos, nec pluvia vacuos inducit & persæpe gratissimus esse solet, nimium æstum temperando. In autumno frigidior, pluviosus, nec non nebulosus animadversus est.

Corus *West Nord-West*, in nostris terris frequentissimus, mensibus hiemalibus vehemens & aliosus est, & sæpius densam ac largam nivem, pluviasque largas spargit, grandinemque efflat. Et si ullus, sane hic nubes in cœlo propellere ac fugare solet, atque impetuositatem exercere. Martio densam ac raram pluviam per totam diem aliquoties visus est nobis effundere, non sine grandine vel nive intermixta. Sub Aprili mane glaciale facit, non destitutus nubeculis, solem & calorem impredientibus, quæ etiam cælum nocte occultant, & grandinem, immo pluviolas ac mane nebulas, sistit. Æstum in Majo levat, folique frequenter objectat nubes, & ingenerat maxime hujus mensis auroræ rorem copiosum cum nebula; circa vespæram quandoque pluvias densas cum grandine, ac vento suscitât, noctemque nubilam ac atram parit. Æstivis mensibus frigore jucundus est, præterea pluviosus, nubilique agens ac hinc inde distrahens, interdum nubes involvit horribiles, quas sequuntur imbres aque tonitrua.

In autumno tempestatem identidem grandinosam, pluviosam, glaciale, etiam & perquam ventosam facit, quod etiam praestat cæteris mensibus, majori tamen alioris gradu.

Similes & ferme eosdem effectus cum corò obtinet zephyro-boreas, qui identidem furibundus, in mari procellosus, aliosus, existit, nubesque excitare, multiplicare & hinc inde agitare solet.

Zephyrus, cujus potentia ac vis in nostris his regionibus manifesta est, brumali tempore ut plurimum saevus, aliosus est, & validissime flat. Si leviter spirat, serenitatem facit, ut plurimum tamen coelum caliginosum, nubilum pluviosum producit, spurcamque & inconstantem tempestatem profert.

Martii dies nubilas pluviosas vento impetuoso stipatas, diu perseverantes quandoque facit, subinde magnas & tristes nubes cumulando, si diu durat, tunc præter modum crescere solent aquæ: maxime si auster & phœnicias præcesserunt, qui atmosphæram valde levem efficiunt.

Aprili mense flocculos nivales, subtilem pluviam & egregium algorem infert, & nubes superiores & inferiores agit, quarum has velocius, illas segnius rotat: interdum etiam hoc tempore grandinosus est. Maio, Junio, Julio, Augusto grandes nubes, quas anxius æstus & pluviae densæ subsequi solent, inducit, calorem quoque cohibet: tempore autem autumnali ut plurimum furibundus est, cujus furorem imber tandem compefcit.

Novembri & Decembri pluvias diurnas cumulat, nivemque mollem nec satis siccam.

Quod ad africanum attinet, *West Sud-West*, ille & frequentius in nostris terris regnat, & Januario mense nonnunquam inquietus est, turpem squalorem & pluvias auget, finemque serenitati præcedenti imponit, nec non circa meridiem nubila producit, usitate autem remissum frigus infert & gelu non ita strictum producit; nonnunquam pluviosus & nivosus est, si perseverat, glaciem solvit. In Febuario serenitatem instabilem parit, pluviam, nivemque copiosam subfolano, aquilone, vulturno vel euro præcedente, producit, sique perseverat, fulgura cum tonitru proferre solet, sicuti factum anno *xciv.* & *Mersburgi* nuperime idib. Februarii *ccioccc.*

Martio serenitatem gignit inconstantem, nubilumque & pluvium coelum, inprimis antecedente zephyro. Aprili pluviam quandoque fundit, interdum etiam nubila distrahendo, solem facit liberiores.

Maio nubes densas, diurnos imbres emittentes, producere solet, fulmine & tonitru non raro comitatas. Junio æstus quasi suffocantem cum nubilis grandibus parit & pluvias quoque cumulat à zephyro primum adductas: id quod etiam Julio & Augusto mense notatur. Septembris & Octobris dies nebulis solet obducere, interdum mitis & serenus existere, præsertim quando ex frigida & sicca plaga venti præcesserint. Novembri pluviam vel nivem raram cum tempore efflat. Decembri vel humidam densam nivem spargit, coelum triste efficiendo, vel eandem cum pluvia dissolvit, inferendo teporem ingentemque squalorem. Eadem pene conditione cum africo, esse solet libonotus & zephyro-notus, tantum quod non tam permagna humiditate infesti sint.

De austro five noto, qui dicitur *ὁ νότος* *notos*, nempe à nebulis & humiditate, quomodo ad anni tempora se habeat, brevi etiam dicendum est. Et hic ipse brumalibus mensibus frigus emollit, glaciem vel nivem solvendo, & asperginem nivalem interdum addendo. Cæterum teporem gratum acri & tranquillum statum ingenerat. Vere amœnum, calidum, subnubilum tamen, coelum efficit, nec caret pluviolis. Æstivos dies calidos, serenos, amœnos, non tamen semper nubibus vacuos profert. In autumno rursus

coelum facit nubilosum, succedente pluvia, sapius etiam æstus uvis gratissimum ingenerat.

Subsolanus, & eurus, ut dictum est, brumali tempore serenissimus & gelidissimus esse solet, & priores veris dies glaciales & mane pruinosum adhuc reddit. Cæterum dies æstivos, si spirat, ardentissimos, noctes claras, sub mitissimo aëre progignit. In Septembri pruinas, noctesque serenas & aliosas efficere solet.

Octobri identidem serenus, sique diuturnus, glaciem, præsertim matutino tempore, adfert. Novembri autem jam gelu siccum & durum spirat.

Et hæ sunt præcipuæ à nobis aliquot abhinc annis notatæ & consignatæ ventorum qualitates & vires in nostris his locis, pro diversis anni temporibus multum inter se discrepantes.

C A P U T III.

Observationes speciales circa ventos ac illorum efficaciam tradit.

Particulares quasdam à nobismet notatas observationes, diligenter de ventis habitas, placet jam cum benevolo lectore candide communicare: ex quibus forsitan cum tempore uberiori observationum accessu regulæ tandem construi possunt, quæ magnam utilitatem ad prædicendas & dignoscendas tempestates, ut opinor, possunt fœnerari.

I. Observatum fuit, quod frigidi & sicci diuturniores hieme, gelu strictius & intolerabilius efficiant: & calidi venti, si diutius perseverant æstate, ut auster, libonotus, phœnicias, tanto ardentiores æstus producant. Autumno autem zephyrus, africanus, & zephyro-notus, diutius spirantes, aquas mirum augent. Quando autem verno tempore, & quidem Martio vel Aprili, dicti hi venti per longum tempus constantes sunt, & largas proferunt pluvias; certum pene indicium est, Junio mense aquarum diluvium hiñce in terris fieri: cujus rei abstrusæ alias, hæc videtur ratio subesse, quod tunc temporis, quo dicti hi venti apud nos pluviarum copiam emittunt, in montibus præcellis vicinis, Misniæ, Bohemiæ, Variscorum, largissimas nives sub cœlo frigidissimo dimittant, quæ calore æstivo celeriter dilutæ, noxia ista aquarum diluvia nostris in terris gignunt.

II. Venti pro diverso locorum situ ac conditione variam naturam ac vim acquirunt. Fundatur hæc differentia maxime in locorum altitudine & situ illorum declivi. Ita in editissimis montibus, ubi aer valde rarus est, africanus, zephyrus, corus, hieme nives, æstate pluvias copiosissime, idque magno cum frigore proferunt, cum in declivioribus locis vel tenuis tantum aspergo adsit, ac coelum nubilum, sicuti in Hercyniæ montibus id sæpenumero vidi. Ita etiam urbes, quæ montibus altissimis circa septentrionem septæ sunt, frequentius experiuntur pluvias, quam quæ liberam habent planitiem, quia ex australi plaga spirantes venti, nubes circa montes agunt & ibi colligunt, & propter frigus montanum, perfacile in pluvias colliquant. Memorabile enim est, quod hi loci, qui proxime adjacent excelsis montibus, uti apud nos Bructero, Hercyniæ sylvæ, frigidiores persentiant auram, quam qui longius ab iis remoti sunt. Merentur huc transferri, quæ habet *WAGNERUS in historia naturali Helvetiæ Sect. I. artic. 3.* sequentibus verbis. Tempestas in Alpibus sub eodem cœlo variat, quippe si circa mensum Augustum iter per eos instituas, uno die quatuor anni partes, æstatem, autumnum, ver, hiemem, videre ac ingredi licebit. In supremis enim Alpium verticibus cum perpetuæ sint nives, hiemem esse dixeris: in locis depressioribus, ubi pascua viridantia ac amœnas aspectu

aspectu violas, flores tussilaginis, herbas paralyfis pululantes videbis: ibique est vernum tempus. Infra hæc loca arbores, pira pomaque proferentes, sed quæ sero maturescunt, offendes, atque hic autumnus quasi suam habet sedem. Ad radices tandem montium, eorumque in convallibus, ubi radiorum solis major est reflexio, frumenta varii generis colligi conspicias, æstivumque calorem senties. Ita porro quando lacus à parte urbis ingens exstat, venti ab ea parte spirantes, frigiditatem inducunt, quamvis natura sua tales non sint: sic Genevæ frigus summum sentitur, quod partim frigidissimis vicinis montibus, partim etiam Lemano lacui adscribendum est. Præterea curiosum est, quod certis locis ac urbibus fremebundæ procellæ, fulmina ac tonitrua valde frequentia ac familiaria sint, cum in alio vicino loco Jupiter placidus sit, ac tranquilla omnia. Videtur id adscribi posse locorum situi. Hinc novi loca Mülhusæ, Eisfeldæ, & apud nos in pago *Erxleben*, Numburgi, quod tonitrua ibi frequentia sint, quia in declivi sita sunt, ut grandinosæ minaces nubes ibi, nec non in magna Thuringiæ silva hæreant, concurrant, & mutuo conflictu fulmen, tonitru turbinem excutiant. Hæc cuncta cum sint particularia, ventis, qualibus, proprie hi effectus adscribi non possunt, sed sicut quivis locus ac districtus peculiarem suum habet situm, propriasque exhalationes, ita etiam ventis per hæc additur specifica vis ac proprietas.

III. Constans eorum, qui maria frequentant, est observatio, quod caurus sive corus, qui à *χάυρον*, *per-turbo*, dicitur, & zephyro-boreas furibundi ac impetuosissimi sint, inque naufragiis ac procellis efficiendis frequentissimi, præsertim autumnali tempore; ex adverso africanus & zephyro-notus sub hieme tepida & vere, similes horrendos impetus in mare exercere soleant: quo spectat illud VIRGILII:

*Una eurus notusque ruunt, creberque procellis
Africus.*

Præterea etiam corus æstate ut plurimum grandines, tonitrua ac fulmina in aëre fabricare solent. Africanus autem cum tonitru affert imbres. Causa cur procellas gignant, hæc subministrari potest, quod sint humidi & una elastici, sive principium materiale, videlicet humores, & motum expansivum, quod maxime valet de coro, recondant. Et res sic videtur concipienda. Quando nubes aliqua extrinsecus compressa adest, quæ in sui medio continet multum elastici valde compressi aëris, qui mora impatiens, exitum dum quærit, varie inter nubis sinum compingitur, deflectitur, contorquetur, & impetu crescente, in eam nubis partem prorumpit, qua infirmior est. Et quia tamen nubes haud facile excutitur, fit, ut, quandam ejus portionem secum abripiat & convehat. Eaque de causa cernitur quædam nubis quasi columna deorsum vergens ac procidens, quæ in mare impacta, ipsum vi summa commoveat, quo nomine intelligitur procella, quæ sæpius quoque fulgur ac tonitru comitem habet, si plures exhalationes sulphureæ commixtæ fuerint. Confer. PLIN. *Hist. nat.* p. 404.

IV. Idem venti, scilicet africanus, zephyro-boreas, & corus sunt illi, qui nubes maxime cælo pulsare, fugare, easque congregare & cumulare solent. Unde sæpissime vel pluvias dispellunt & dissipant, vel compellunt & adferunt. Ubi tamen notabilis hæc cernitur differentia, quod quæ coro adducuntur pluviae, longe crassioris ac rudioris naturæ sint; longe subtilioris autem ac tenerioris, quas africanus advehit: unde post has longe major terræ fecunditas plantarum arborumque augmentum advertitur, quam post illas. Inde etiam nix a coro decedit longe asperior & stabilior, est africo rarior ac subtilior.

V. Perquam notatu dignum est, quod venti de indole ac natura sua propria quodammodo deflectant, si contrarii præcesserint, & in atmosphæra diu hæse-

rint. Ita sæpius vidimus, ventos alias serenos, septentrionales, adduxisse pluvias nubilumque cælum, quod tunc temporis maxime fit, quando diu regnarunt australes, africanus & zephyro-notus sine pluviis. Ita etiam annotavimus, si africanus subsequatur aquilonem, non modo nivem hieme, sed & fulgura cum tonitru, rarius tamen, orta esse. Et porro zephyrus præcedens sine pluviis, succedente euro, qui alias serenus est, pluvias largissimas effudit. Quod etiam quandoque valet, si austrum vel phæniciam carentem imbribus, presso sequatur pede occidentalis. Quæ cuncta ex eo proficiscuntur, quod frigidi venti vapores calidos & humidos in unum colligere ac densare apti sunt; calidi autem humiditatem in aere dispersam propter levitatem suam coire in guttulas efficiunt, quamobrem quum aer subito fit tepidior, vel etiam gelidior, pluvia futura ut plurimum denotatur. Ex dictis consequitur, quod mirandum amplius non sit, quare ventus ex certa plaga spirans, non statim prima die suam exserat efficaciam, sed secunda demum vel tertia. Quo circa si quis de ventorum effectibus iudicium recte formare, & futurorum præsagium exhibere velit, ille non modo eos ventos, qui jam spirant, sed & præcedentes diligenter animadvertere & speculari debet. Nam in principio ventus, v. g. frigidus, ad atmosphæram accedens calidam, quasi commixtione facta, neutram nanciscitur virtutem, & non statim in limine illam, quam in sinu suo fovet, sed demum successu temporis exserit.

VI. Firma ac stabilis est quoque hæc observatio, quod venti flantes ex septentrionali plaga, si tendant ad orientem, semper constantiores afferant tempestates, v. gr. serenitatem constantem, frigus diuturnum, cælum amœnum & placidum: quando vero ex septentrione mox vergunt ad occidentem, tunc brevi tempestas ista antecedens inverti atque mutari solet. Hinc in hieme serenitates, mox regelatio cum nubilo, vel etiam nivoso cælo, subsequitur. Ratio autem horum in promptu est, quod orientales & septentrionales, ratione indolis ac naturæ suæ, valde congenères atque affines sint: secus fit, si septentrionalem subsequatur occidentalis, vel mox australis; ubi ex diversa horum dissimilitudine & contraria natura, contrarius quoque effectus succedat necesse est.

VII. Certa quoque illa observatio est, quod eurus & subsolanus venti sint valde constantes, uti jam dudum id notavit PLINIUS, *hist. nat. l. II. c. 48. p. 203.* his verbis: *Ab ortu flantes diuturniores sunt ab occasu flantibus:* unde quæcunque tempestas subsolano solet evenire, hæc diutius etiam perseverat. Quare vidimus pluvias euri socios continuasse tamdiu, donec hic adspiraverit. Aquilo hiberno tempore satis etiam constans est, & gelu protrahit longum in tempus, præsertim si frequentes cum euro vicissitudines habeat. Ubi observavimus, si diu hi venti spiraverint, & strictissimum gelu induxerint, utut ex opposita parte calidi quandoque flaverint, remissius tunc quidem gelu factum, sed mox rursus intensum, utpote venti hi, si atmosphæra est frigore constrictissima, de efficacia sua in nostro aere multum remittunt, nisi diutius in uno tenore persistant, duramque glaciem dissolvant. Corus autem & zephyro-boreas admodum sunt tumultuantes in mare. Accedit etiam illud, quod aquilonares & orientales venti magis sint universales, & in dissitis regionibus similes ferme producant tempestates, quod ipsum de austro & zephyro pluviosis non in universum dicere licet: utpote sæpius videmus, præsertim vernis temporibus, in certa urbe pluvias, tonitrua, quæ dimidio miliaris abhinc plane non conspiciuntur, tantum quod cælum nubilum & ultra modum frigidum, pluvias in vicinia delapsas solenniter designant.

VIII. Teneri & illud meretur, quod sæpenumero

bini venti percipiantur, quorum unus terram adflat, & nubes inferiores pellit, alter superiores. Commode autem illud indagari potest, si respiciamus ad motus vexillarum sive bractearum, item ex fumorum è camino evolutorum, inclinationes, nec non nubium in coelo motu atque propulsione. Hinc nonnunquam observavi, quod bracteae etiam accuratissimae inclinent in alium locum, in contrarium autem ferantur nubes. Notavit id quoque VERULAMIUS, dum inquit *Hist. Vent. p. 451. auster flat quandoque integer & solitarius: at borea, caecia & coro flantibus, saepe contrarii & alii diversi venti simul spirant.*

C A P U T IV.

De mirabili potentia ventorum in argentum vivum tubo Torricelliano inclusum observationes aperit.

DEvolvitur jam ad phaenomenon mirabile, quod est argenti vivi in tubo Torricelliano (sic dicto ab inventore) inclusi, motus sive ascensus & descensus, prout varius ventus exoritur certamque regionem perflat. Antea vero, quam in genuinas hujus admirandi effectus causas penitus inquiramus, è re fore judico, ut clarior & illustrior sententia nostra fiat, praemittere observationes nostras barometricas, quas ab aliquot annis singulis diebus notavimus, ex quibus postea collatis & consideratis, abditas multas circa hoc negotium causas eruere, facillimum, ut arbitror, erit.

I. Constans & certa est observatio, quod ventis calorem & levitatem adspirantibus, cujus generis sunt euro-notus, phœnicias, auster, libonotus, zephyro-notus, africanus, mercurius in barometro ordinario fiat humilior, & ad aliquot gradus sese dimittat.

II. Perpetua ferme est regula, quod dominantibus ventis siccis, frigidis, elasticis, ex quorum censu sunt septentrio, aquilo, euro-boreas, caecias, zephyro-boreas, mercurius ex loco depressiori evehatur notabiliter in altum, & quidem ea lege, ut adscensio ab hisce ventis mercurii celeriter fiat, & versa vice, à calidis & levibus, supra nominatis, celerrimus quoque descensus: in universum autem verum est, quod magis repentinus sit descensus mercurii, lentior autem & nunquam tam celer adscensus.

III. Quo magis coelum perspicuum & liquide serenum, paucis nubibus obvolutum deprehenditur, spatium mercurii vivi in alto est, quod tamen plus observatur, si post nubila tristia & pluvias serenitas gratissima superveniat, tunc enim altiore locum petere solet.

IV. Annotatum quoque frequenter fuit, quod mensibus hiemalibus plerumque elevatior sit mercurius, quam reliquis anni, utut frigus adeo intensum non regnet, neque tamen semper gelu vehementissimo respondet mercurii ascensio: sed anno XCVIII, ubi hieme acerrimum gelu regnabat, mercurius tamen humilis valde erat.

V. Res quoque certae experientiae est, si coelum serenum mox turbidum fiat, nubibus concurrentibus, & ad pluviam vel nivem disponatur, quod tunc, his etiam jam praesentibus, mercurius ex sublimiori loco descendat ad humiliorem: ubi tamen, pluvias cessantibus, & quando coelum rursus coepit serenari, mox ad altiora sese recipit.

VI. Saepe numero tamen observavimus, quod coelo existente nebuloso ac nubilo, immo nivoso ac pluvioso, tempore praesertim autumnali, argentum vivum in sublimi loco positum fuerit, regnante ut plurimum zephyro, vel zephyro-borea, aut coro.

VII. Zephyrus pluviosus plerumque demittit mercurium: si autem praecesserit corus vel aquilo, & maxime si pluvias vacuus fuerit, saepius ad magnam altitudinem ipsum attollit, adeo ut zephyrus medio se habeat loco, argentum vivum nonnunquam attollendo, nonnunquam etiam deprimendo.

VIII. Subsolanus, eurus & euro-notus, cum temperati venti sint & constantes etiam; non nimium attollunt, nec mercurium dejiciunt, etiam quandoque sub frigore acerrimo hiemali, nisi humiditas in aëre simul adsit, sed medio loco se habent, & constantem etiam situm faciunt.

IX. Observatum quoque crebrius fuit, quod, quando diu perseverant venti sereni, ut sunt septentrionales & orientales, praesertim hieme, tunc mercurium elevat, & quidem paulatim, semper ad majorem gradum, postea autem etiam ipsum successive rursus demittant, iisdem ventis praesentibus & eadem tempestate permanente.

X. Diligenter quoque tenendum est, non ubivis locorum mercurii eandem esse stationem, utut iidem in aëre dominantur venti, sed ut loci situs erectior vel depressior est, aut is in libera planitie, aut montibus circumseptus est, aut inter fluvios jacet, variisque exhalationibus obnoxius: ita diversas non modo tempestatum vicissitudines, sed & mercurii stationes experitur, quae partiales & provinciales tamen sunt.

XI. Vix die integro argentum in eodem gradu persistit, sine aliqua elevatione aut depressione, per dimidium saltem gradum: sed haec tamen modica mutatio nullam peculiarem portendit varietatem in tempestatibus.

XII. Praecipue à nobis notatum fuit, quod pro diversa structura & compositione tuborum vitreorum, variet etiam gradus in ascensu & descensu mercurii. Ita in cadendo celerior mercurius est, si vitrum est capacius; tardior autem in ascendendo, & contra in angustioribus & gracilioribus tubis celerius ascendit, & difficilius cadit. Quin immo barometrum impositum vitro, ad cujus orificium aër libere potest accedere, longe expeditius pressuram aeris sentiendo, ad mutationes aeris dignoscendas multo aptius & accommodatius est, quam ubi vitrum, cui inhæret tubus, est clausum.

XIII. Recte fuit notatum à *Societate regia Parisiensi*, barometri altitudines majores esse de nocte quam de die. *vid. Histor. fol. 220.*

XIV. Maximopere observandum est, ventos variam stationem mercurii in barometro efficere, prout variae indolis venti praecesserunt. Quocirca qui curiosius vult praedicere tempestates futuras, ille non modo ventos praesentes, sed & praecedentes, considerare debet, alias indicium fallax erit. Eam ob causam etiam fit, ut venti non eandem naturam servant in attollendo vel deprimendo mercurio, si atmosphæra particulis, à diversae naturae ventis allatis, adhuc est onusta, quae subsequentium ventorum vires vel augent, vel imminuunt. Hinc saepiuscule notavimus, zephyrum attollere mercurium, antecedente diu aquilone brumali, zephyro-borea, vel zephyro-noto aut cauro. Item africanus nonnunquam, quamvis rarius & tantum in principio, altiore mercurii statum facit, praecedente cauro, borea, zephyro-borea.

XV. Praeterea cum à ventis, qui sine ullo dubio in progignendis tempestatibus maximam potentiam habent, mercurii motus in barometro mutationes tubinde experiatur; non sine ratione prudentiores judicant, ex motu mercurii in hoc tubo, tempestates futuras & imminentes praedici posse, maximo cum commodo, tam agriculturæ, quam navigationis aliarumque humanarum operationum, adeo ut hæc praesagia longe multumque astrologorum judiciis, quæ ex siderum contemplatione hauriuntur, praefenda sint. Nullum enim dubium

dubium est, & quotidianum experimentum ostendit, quod sæpissime mutatio mercurii in barometro præcipiat tempestates, ita ut quando adhuc cælum serenum est, mercurius celeriter demissus, certo prædicat pluvias, vel in ipsa urbe, vel in vicinia urbis. Non tamen semper, ut probe notat LANA *Magisterio naturæ & artis Tom. II. l. 2. p. 283.* eodem modo: aliquando enim duobus vel tribus diebus ante futuram pluviam argentum sensim deprimi incipit, nonnunquam vero paucis ante pluviam horis fit tota depressio brevi tempore. In primo casu pluvia diutius perseverat, nec ex improviso advenit, aut cum magno impetu, idque ut plurimum accidit hieme: at vero in secundo casu pluviae vel grandines repente ingruunt cum impetu, ac brevi cessant, quod plerumque contingit æstivo tempore. Verum non universalis regula est, quod in omnibus pluviis depressus debeat esse mercurius, sed pulchre & verissime scribit idem LANA l. c. *Observavimus non semel notabiles in aëre mutationes & novas pluvias, cum tamen in barometro argentum eandem altitudinem constanter servaret, ut vix ulla in eo depressio animadvertetur; vix tamen unquam pluvias contigisse meminimus, tunc temporis, quando argentum maximam suam altitudinem servabat. In hieme sæpissime notavi ventis diu regnantibus levibus, & mox superveniente aquilone, mercurium in barometro altum obtinuisse locum, inque thermometro ad aliquot gradus fluidum adscendisse, cum tamen nullum adhuc frigus extrinsecus perciperetur, sed demum XII. horis post, interea prædicere illud commode potuimus.*

XVI. Mirabile illud est, quod ventus, licet si impetuosissimus ac furibundus, non altiore tamen faciat mercurium; immo potius contrarium experti sumus, quod venti, excepto boreali & cauro, si vehementer furunt, descensum moveant hydrargyri ante quam eo loco percipiatur, ubi barometrum consistit. Hinc quæstio perutilis oritur: annon procellæ prævideri barometro possint? Pulchra sunt quæ illustri LEIBNITIUS hac de re proxime ad me perscripsit: Notaverat GERIKIUS, barometro prævideri posse procellas, itaque sæpe optaveram suaferamque, ut experimentum sumeretur in mare. Nunc tandem accepi etiam longinqua navigatione sumtum esse, & compertum, ad XII. circiter horas extendi prophetiam: quod tempus satis est, ut navis à scopulis aut fyrtribus recedens, aperto se credat mari, si portum attingere tam subito non potest, & ut præparæt sese contra vim tempestatis. Videtur probabile, cum corus vel zephyro-boreas plerumque impetuosissimas istas turbines, quibus naves & maria summa vi circumaguntur & concutiuntur, progignant, quod ipsis spirantibus, si mercurius successive se incipiat attollere, ultra modum præfagium, mea sententia, fiat procellosæ tempestatis: cum alias si pluvia impendet, à coro mercurius plerumque detrudatur.

XVII. Cum admiratione nuper legi ex relationibus publicis, Londini quemdam curiosum degere virum, qui ex barometro singulis quatuordecim diebus præsignificare statum aëris promittat, affirmetque ex quinque vicibus vix semel contingere errorem: quæ res si ita foret, certe inventio esset utilissima. At vereor, ne auctor æquo ditior sit pollicendo, utpote fateor, qui per aliquot annos jam tractavi barometron, talia me mihi persuadere non posse, cum notum sit, sæpe unica die, ventos & tempestates vel quatuor aut quinque vicibus mutari, & mercurii situm tunc quoque fieri diversum. Quis vero hæc prævidere vult ex positu mercurii, præcedentibus diebus? Cum autem una vera & firma experientia centum exquisitissimis ratiociniis prævaleat; hinc etiam in optatis foret, ut auctor boni publici causa hanc præclarissimam inventionem publicæ luci sisteret.

CAPUT V.

Causas motuum mercurii in barometro tradit.

Hisce itaque observationibus & phænomenis præmissis, operæ jam erit pretium, horum genuinas & veras causas paullo accuratius scrutari atque in eas inquirere. Et quamvis hucusque à clarissimis Viris ratio, cur mercurius in tubo vitreo suspensus hæreat, evidentissime fuerit detecta, quod scilicet à pondere superincumbentis aëris id fiat: nihilo minus ex ipso fundamento difficillime, nullaque cohærentia ducere ac derivare potuerunt, quæ sit vera hujus effectus causa, quod nempe cælo sereno & pluviis dimissis, sicque aëre leviori reddito mercurius in elatiorem locum se recipiat, & contra nubilo & pluvioso aëre impendente, adeoque pondere in atmosphæra aucto, mercurius descendat. Fatigavit, ut notum est, hujus negotii explicatio adhuc celeberrimos quosque Viros; adeo ut in utramque partem publice hæc invicem multumque ac copiose disputata sint: cum autem hæc nostri instituti ratio non sit, confutandis aliorum sententiis immorari, vel tempus controversi s'impendere, hinc tantum hoc loco nostram expromemus sententiam, & quid nobis hac in causa diu verosimile visum fuerit, & jam dudum discentibus dictum, meliori tamen jam ordine ac ratione, exponemus.

Certum autem est & indubitatae veritatis, mercurium suspensum hærare in tubo viginti aliquot pollicum (Germanice *Zoll*) altitudine, propter æquale pondus aëris, qui mercurio incumbit, ipsumque in vacuum spatium tubi in altum urget, vel demissius servat, prout nempe istud pondus vel augetur vel minuitur.

Quo circa quando barometer includitur vitro & superincumbens aër evacuatur ministerio antliæ pneumaticæ: tunc repente argentum vivum ad fundum usque descendit, nec rursus ascendit, nisi vel aër, aperto epistomio, intromittatur, vel per fissuras tenuissimas in antlia non curate satis elaborata, pederentim intus se recipiat. Ulterius quoque evidentiam hujus causæ adstruit positio barometri in aquam: tunc enim observavimus, quod quo altior sit columna aquæ, eo altiore quoque fieri situm argenti vivi in tubo, quoniam ab aquæ pondere cylindri aërei pressio augeatur.

Jam autem argumentantur: cum ab aëris gravitate mercurius ascendit, hinc aërem multis vaporibus aqueis invicem collectis onustum, sicuti fit quando pluvia inflat, tunc esse graviolem, seu plus ponderis habere; leviolem autem, quando destitutus est hisce vaporibus & cælum serenum: nihilo secius mercurium sub tali ponderosiori aëre humiliorem conspici; altiore sub sereno. At vero ut hæc inter se conciliemus, & fundamentum barometri stabiliamus; paucis dicendum est: primum quod aër, qui superincumbit mercurio, ipsumque sursum in tubo detinet, duplici modo debeat considerari, vel respectu gravitatis suæ specificæ, quæ ex mole & quantitate materiæ haurienda, vel respectu ipsius motionis & virtutis elasticæ. Etenim ex staticis & mechanicis notum est, quod celeritas motus, semper compenset pondus vel molem materiæ, five rem minoris molis celerissime motam, majori potentia motrice instructam esse, quam corpus majoris materiæ & molis in tardiori motu positum. Deinceps ex mechanicis compertum est, elasticitatem corporum tanta pollere efficacia, & idem præstare posse, quam illorum gravitatem, quemadmodum in horologiis aliisque machinis id perspicue liquet. Ita etiam aër, summa elastica vi instructus, eosdem effectus præstare potest,

quam alia gravissima corpora. Sic paucò aëris elatere mercurius in vacuo attolli potest in altum: in thermometris expansus paucus aër magnam aquæ quantitatem suppositam deprimit. Aër calore expansus in instrumento *Papiniano*, summa vi brevi tempore emollit ossa, & magno cum impetu & adstantium periculo quandoque ipsam machinam, nisi probe elaborata sit, disrumpit, sicuti meo periculo id semel expertus sum. Nitrum sal aëreum est elasticum, in quo multæ particulæ aëreæ concentratæ sunt, quando hæ ipsæ à principio sulphureo phlogisto expanduntur, prodigiosus sequitur effectus, teste pulvere pyrio.

Suppositis hisce, dicimus: mercurium in barometro, in cuius suprema regione vacuum ab aëre locus est, detineri in alto, non tantum ab aëris gravitate specifica & pondere, sed simul etiam à vi ejus pressoria elastica. Unde semper mihi placuit pulchra hujus phænomeni explicatio, quam tradit *LANA in Magisterio naturæ & artis Tom. II. lib. VI.* dum ait: *Tantum est pondus argenti in tubo nostro, quantum est pondus prementis aëris externi, & consequenter virium elasticarum, quibus aër externus compressus, dum conatur se dilatare, sursum propellit argentum in tubo, in cuius suprema parte nullus est aër, qui deorsum urgeat vi elastica ac pressione ipsum argentum.* Utpote in locum vacuum semper ipse aër non modo pondere suo magna vi ac nisu premit, sed & ratione virtutis elasticæ sese dilatare atque expandere circa vacuum locum conatur.

Cum itaque aër fluidum sit valde subtile & grave, quod mox instar spongiæ comprimi & rursus expandi potest, ipsaque hæc expansio non sine motus & impulsus efficacia fiat, facile exinde concipitur, aërem præter gravitatem suam, etiam elastica & expansiva virtute premere ac impellere omne fluidum, sive aqua sit, sive mercurius, ad locum, præsertim leviorē & minoris resistentiæ. Tanta virtute elastica pressoria præter ejus gravitatem, quæ ex mole fluit, gaudet aër, maxime flantibus ventis septentrionalibus, qui, ut supra notatum est, aëreas partes constrictas & condensatas afferunt, quæ in nostra atmosphæra calidiore solutæ atque dilatatæ, egregiam expansionem, quæ nunquam sine compressione ac impulsu aëris vicini fieri potest, acquirit. Ab hac elastica expansione, pendet quoque serenitatis causa, quam ordinario hi venti afferre solent. Dum enim vapores elastica hac vi subtilissime dividuntur, & in minutissimas atomos resolvuntur, quæ cum specie leviores sint ipso aëre, sursum in superiorem regionem ascendunt, & sic liquida serenitas evadit, qua existente, argentum vivum in barometro ut plurimum est in superiori loco, quia ubi serenitas, ibi etiam plerumque aëris expansio major fit.

Quod autem venti septentrionales singulari virtute pressiva agant in hæc inferiora, & præsertim in fluida, luculentissime quoque apparet in thermometris apertis. Notum enim est, quod ventis frigidis septentrionalibus spirantibus, liquidum in superiorem phialæ regionem ascendat, non eam ob causam, quod, uti nonnulli existimant, frigus immediate in aërem inclusum capiti phialæ agat, sed potius quod premendo liquorem sursum cogat, & sic hac compressione, aërem condenset & in arctius spatium cogat. Unde notamus, quod liquor in thermometro aperto, ubi caput phialæ superius est, ferme eodem cum barometro munere fungatur, ita, ut si in hoc argentum vivum ascendat, etiam in illo id fiat, & versa vice.

Ut autem ad quæstionem illam maximi momenti dissolvendam accedamus, quare nempe aëre pluvioso vel nebuloso existente, ubi accessu vaporum & aquæ, sine dubio pondus atmosphære accrescit & mercurius humiliorem locum servat, quam si aër fuerit pluviis liberatus; breviter dicimus: quod quidem tunc

temporis aëris gravitas major & pondus, ratione molis, utique gravius sit. Cum autem ut superius demonstratum est, non tantum à pondere & mole aëris, sed maxime à motu & nisu expansivo particularem aërearum, dependeat mercurii in barometro elevatio, nec non liquoris in thermometro ascensio, inde liquido sequitur, quod, si vis ista expansiva elastica in atmosphæra minor sit & cesset, sicuti fit sub ventis austrinis, aëre leviori vel tepidiore reddito, accumulatis multis vaporibus, aëreque tenuissimo calido inducto, pressio etiam atmosphære in corpora inferiora & imprimis mercurium, languidior ac debilior fiat, quamvis materiale pondus majus tunc videatur, quam sub aëre sereno & elastico, hinc mercurius propria gravitate sua sese recipit ad inferiora.

Ponimus itaque genuinam causam adscensionis & descensionis mercurii in tubo Torricelliano, maxime in vivido isto & expansivo particularum aërearum & vaporosarum motu ad terram; qui quoniam pro diversa ventorum ad nostrum aërem accessione, varique illorum sibi invicem succedentium, nec non pro loci situ, auctior, vel imbecillior est: hinc mutatio motus in mercurio ab ea causa originem suam ducit. At vero in superioribus dictum est, quod nonnunquam aëre nebuloso, nubilo, immo pluvioso existente, nec non flantibus ventis zephyro, vel zephyro-borea, mercurius in alto loco conspiciatur, quod etiam accidit sæpiissime circa auroram, solis ortum, nec non de nocte, ubi ut plurimum solet esse excelsior mercurius, quam circa tempus meridianum, cum tamen aër ob solis præsentiam tunc temporis magis sit expansus, constrictus autem & condensatus tempore vespertino vel nocturno. Ex quibus colligere aliquis apte posset, vapores in aëre coarctatos pondus aëris non debilitare. Ad ea autem reponimus: quod non universale sit aërem virtute elastica esse destitutum, si vapores sint in unum congregati, illud tantum pro vero judicamus, quod, si nimia humiditas in aëre congeratur, & sub ventis calidioribus, aër levis & nimis dissolutus ad nostram accedat atmosphæram, vis elastica, sive conatus ac nisu ex compresso arctoque loco se in ampliorem dilatandi, minor fiat atque languidior.

Quo circa utique elasticitas cum vaporibus congregatis locum habere potest, ut ut vapores congregati sæpius testentur de vi elastica cessante. Ex hisce fluit ratio, quare zephyrus & corus, qui venti humidi, simul tamen elastici sunt, mercurium in alto teneant, item cur zephyrus valde humidus, quando nempe atmosphæra, præcedentibus borealibus, elasticis particulis admodum onusta est, nonnunquam in excelsiorem locum urgeat hydrargyrum. Unde patet, si aër ponderosus est & gravis, nec simul elasticitate defraudatur, quod tunc vehementissime premit & comprimat non modo mercurium, sed & alia corpora, quam si elasticitas sola, vel pondus aëris materiale, sibi relictum, adfit.

Nunc clarissime intelligitur, quare post pluvias, accedente rursus serenitate, nec non si coelo nubilo, pluvioso ac nivoso, venti succedant septentrionales vel orientales, tunc argentum vivum sublimiora petat. Notari autem meretur, quod non sit universale, post desinentem pluviam vel nivem mercurium altiora petere: nam sæpius observavimus, austrum attulisse pluvias cum descensu mercurii, & imbres cessasse cum quadam serenitate secuta, austro vero permanente, nihilo minus in eodem gradu subsistebat mercurius, immo demissior fiebat, quoniam tunc temporis atmosphæra & elatere & humiditatis notabili pondere destituebatur. Diversa autem longe res est, si imbricosa tempora mox excipiat serenitas, à ventis elasticis, quales maxime sunt septentrionales puri, vel cum orientalibus mixti, causata.

Deinceps

Deinceps ex nostra proposita sententia valde perspicua ratio fit, quam ob rem ad ventorum septentrionalium & orientalium afflatum, diu perseverantem, diebus hiemalibus, mercurius prius successive elevetur, postea rursus sensim ex altiori gradu se demittat, & quidem ea de causa, quod venti hi, si diu durent, nimium humiditates dissipent, & hiemali tempore sub acerrimo frigore, nullos plane vapores elevent. Probe autem tenendum est, elasticitatem, quæ species motus est, in humido, tamen ratione quantitatis proportionato, exferere maximam vim ac potentiam pressoriam. Nam quemadmodum solus aer inclusus & calore expansus, non tantam efficaciam habet in vento efficiendo & impetu exercendo, quam si quædam aquæ portio conjuncta fuerit: ita etiam debilior elater est aeris si plane humiditate vaporosa caret, & ex adverso, nimia humiditas & exsuperans elateris efficaciam quoque cohibet ac impedit. Sicuti enim ad motum promte conficiendum proportio debet esse inter movens, siue vires motrices, & materiam mobilem, ita etiam hoc in negotio maxime id ipsum valet.

Mutatio status mercurii in barometro admodum variat, & intra diei & noctis spatium, sæpe per octo vices mutatur, quamvis tantum ad dimidium gradum, quoniam in atmosphæra nostra rarissime semper eadem vis premens & similis gravitas atque elasticitas deprehenditur, tum propter ventorum vicissitudines, tum propter solis perpendiculares radios, nec non vapores accedentes, decedentes, expansos vel condensatos diversissimos.

In locis & hypocaustis calidioribus decidit mercurius in barometro deorsum, siue ex statione superiori sese ad aliquot gradus demittit, in locis autem frigidioribus adscensionem affectat. Ex eo tamen non existimandum est, mercurii elevationem vel depressionem a calore & frigore dependere: nam nonnunquam gelidissimo tempore non ita altus est mercurius, cum tamen calido etiam sole in satis alto loco conspiciatur, quorum ratio hæc esse videtur, quod in hypocausto calefacto, aere facto leviori & raro, pressio totius cylindri aeris non tantæ efficaciam sit, quam in loco frigido, ubi aer idemtidem compressus superioris columnæ pressionem majori efficacia sustinere, & pressionem in hydrargyrum exercere potest.

Dubium hoc loco moveri posset, quod, si aeris expansio causam ministret suspensionis, immo ascensus mercurii in tubo, tempore æstivo & sub sole sereno, ubi aer supra modum expansus est, situs mercurii debeat esse altior in eodem instrumento, quod tamen neutiquam contingit. At vero ad hanc difficultatem diluendam perpauca dicendum est: non expansum aerem, qui levis & rarefactus est, & minoris pressuræ, esse causam ascensionis, sed elasticum, id est compressum, qui nititur se expandere & in pristinum statum restituere. Quemadmodum enim elateres in horologiis, si jam diducti atque explicati sunt, nullam amplius habent motus efficaciam: ita si ex statu compressionis tendunt ad statum expansionis, tunc egregie efficaciam suam motus produnt.

Postremo adhuc dubium quoddam restat, quare videlicet procellosis & impetuosus ventis, cum celeritate ex omnibus plagis locum aliquem pervagantibus, ubi summa aeris vis impulsus ac nisus est, mercurius non in altissimum evehatur locum? Causa autem videtur facilis esse explicatu: nimirum quod venti hi rarissime perpendiculariter in terram desuper ex aere spirant, sed potius obliqua via percurrunt; cujus naturæ maxime sunt africanus & zephyrus: deinceps est talis ventus tantum aeris commotio, certam partem aeris fluidi afficiens; hinc gravitati & elateri totius columnæ aeræ, quæ utique ad milliaria se extendit, nihil derogat.

Quandocunque autem occidentali violenti boreales

Frid. Hoffmanni Oper. Tom. V.

junguntur, quales frequentissime in mari sunt illi, qui furiosissimos illos typhones ex alto descendentes faciunt, tunc utique videtur valde probabile, dorsum premendo ipsos extollere mercurium, quæ tamen res ulteriori examini atque scrutinio commendanda est.

CAPUT VI.

De potentia ventorum in corpora humana, eorumque salubritate & incommodis.

QUUM à causis externis, & præcipue catholico isto aeris & ætheris fluido, perennis sanguinis & humorum liber ac æquabilis circulus, & sub hoc necessarium secretionum & excretionum negotium, immo tota vita ac sanitas pendeat, ex superioribus autem fufius demonstratum fuerit, ventos mirifice demutare aeris statum; nemo sane inficias ibit, ventos magnum jus ac potentiam habere in corpora nostra, ea tam firmando, roborando, quam morbida & imbecilliora reddendo. Ante vero quam hanc rem specialius aliquanto evolamus, perutile fore duco, gravissimorum, ac præcipue veterum sapientissimorum, testimonia, in subsidium vocare, ut quid illi de ventorum noxa atque salubritate senserint, apertius videamus. Deprehendimus autem in eorum clarissimis monumentis, & præsertim magni HIPPOCRATIS, duos hos ventos sibi è diametro oppositos, & viribus plane sibi contrarios, nempe boream & austrum, fortissimos semper fuisse creditos, qui animantium afficiant corpora. vid. *liber de morbo sacro, num. XV.* Et in eo ferme unanimis est Medicorum consensio, quod auster ventorum sit insaluberrimus, boreas autem ad conservanda corpora vitæ tamque tuendam aptissimus.

Primo itaque omnium allubescit, effectus quosdam speciales non tantum in animantia, sed etiam in alia corpora, exemplis & auctoritate suffultos, breviter strictimque recensere, & quidem initium faciendo ab austro. Notabile est, austrinis aerem nostrum pervagantibus, præsertim æstivo tempore, quando minantur pluvias, homines anxio quasi calore premi, largius sudare, respirationem fieri citatiorem, corporisque habitum intumescere. Animalia autem tam terrestria, quam aërea & aquatilia, varias insolitas & extraordinarias motiones, actiones, agitationes, vociferationes, clangores efficiunt, ex quibus etiam vulgus tempestates impendentes præsagire solet: qua de re latius videri meretur VERULAMIUS in *historia ventorum*. Porro sub statu aeris austrino, perhumido tepidoque, corporis habitus relaxatur, & densa quæ fuerunt, flaccescunt, cutis spongiosa ac rarior redditur, ad sudorem disponitur, vala sanguinea intumescunt, calceamenta & tibialia arctiora, funes longiores fiunt, atque coria molliora & laxiora, uno verbo: pori ab aëre denso & humido replentur, rigida partes emolliuntur & flaccidiores fiunt, quod evidentissime videmus in chordis instrumentorum musicorum, quæ si ventis hujusmodi humidis continguntur, ultra modum extenduntur. Arbores, quæ ad plagam australem sitæ sunt, non modo longe teneriorem corticem obtinent, sed etiam lignum habent succulentius laxiusque, nec ita compressum ac strictum, uti illud est, quod plagæ oppositæ septentrionali objicitur. Neque hoc loco transmittendum silentio est, illa ædificia, domos, turres, quæ spectant ad austrum & occidentem, longe celerius ruinam ac detrimentum pati putredinemque concipere, quam quæ ceteris expositæ sunt. Quin immo curiosum aspectu est, in præaltis nonnullarum urbium turribus, ubi ad quamvis plagam horologium aureis numeris pictum est, has, quæ

C 2 occidenti

occidenti & austro patent, exesas post breve temporis spatium ac quasi deletas esse, cum in cæteris, quæ spectant ad boream & orientem, pulchre adhuc & nitide appareant.

Ceterum austrina aëris constitutione, præsertim sub calore æstivo, cadavera facillime in tetram putrilaginem abeunt, sub autumnno vero, immo ipsa hieme, utut non putrilaginem foetidam concipiant, vappescunt tamen, corrumpuntur, & genuino suo sapore carnis destituuntur.

Agriculturæ auster præ cæteris opportunus est. Nullus enim ventus seminantibus transplantantibusque auspiciator est, quam hic ipse, quippe sub calido & humido seminum cortex mollescit, intestina motio & turgescencia, ad seminis efficaciam recludendam summe necessaria, tali tempore optime perficiuntur: insecta porro his dominantibus & generantur & propagantur libentius, & cariem putredinemque vegetabilia tunc temporis facilius accipiunt.

Præterea adjicienda etiam sunt illa, quæ dicti hi venti operantur in corporibus humanis. Placet autem aurea de his dicta HIPPOCRATIS aliorumque veterum in medium adducere: præcipuus quidem locus est *Aphorism. 5. sect. III.* dum inquit: *Austri auditum hebetant, illique graves sunt, caliginosi, & tenebrofi, nec non capitis gravitatem, segnitiam, seu lentitudinem & corporis laxitatem afferunt.* Quotiescunque itaque auster diu multumque dominatum tenuerit, hujusmodi fere symptomatibus ac morbis afficiuntur homines. *Et libro de humoribus sect. II. pag. 18.* scribit: *Austri auditus gravitatem afferunt, oculis caliginem offundunt, capitis gravitatem inducunt, membrorum torporem ac languorem faciunt. Quum hic invaluerit, hujuscemodi in morbis contingunt ulcera madentia, quæ os præsertim, pudendum aliasque partes occupant.* Et RHazes lib. III. c. 25. de ventis & aëre: *Ventus autem à polo veniens meridiano, à parte Subel, corpora dissolvit, sensus turbat, atque dolorem capitis & oculorum ægritudinem facit, epilepsiam quoque ante consuetam tempora accelerare facit, febres itidem parit, propter suam putredinem. Guttur tamen & pectori, & pulmone exasperationem non tribuit: est etiam plus omnibus ventis ægritudinem inferre paratus, & quam maxime si in æstate flaverit, vel in fine veris.* PLINIUS *hist. nat. l. II. cap. 48. p. 201.* prodit: *Minus esurire austro spirante creduntur animantia.* Et ARISTOTELIS *sect. XXVI. Probl. XLVI. p. 803.* Cur spirante aquilone avidiores sumus, quam austro? an quod aquilo frigidior sit. Et CELSUS lib. II. cap. 1. inquit: *Auster corpus efficit hebes, humidum & languidum.* Mirum certe est, quomodo auster præ ceteris ventis passim apud Medicos scriptores, immo apud poëtas, male audiat, qui tot probrosis epithetis illum fugillant. HORATIUS *l. II. Satyr. 6.* ventum hunc plumbeum appellat, quando dicit:

Nec mala me ambitio perdit, nec plumbeus auster.

Et in eo ferme omnes conveniunt Medici, quod gravitatem corpori afferat. Notavit hoc jam suo tempore GALENUS, qui scribit *de Theriaca ad Pis. c. II.* *Quendam ex suis sodalibus, in lecto cubantem, solitum divinare, quis ventus spiret, nam quoties gravari sibi caput sentiebat, statim dignoscebat, ventum austrum esse.*

Discussis hisce, progredimur ad effecta ventorum aquilonarium, & eorum, qui siccitatem, frigus, elasticitatem, & compressionem aëri nostro atmosphærico inferre solent: & quemadmodum hi ipsi è diametro oppositi sunt austrini calido-humidis, nec non diversa indole ac natura gaudent, ita contrarios quoque effectus in animantium aliaque corpora exferere, quivis rerum physicarum paullisper gnarus facillime poterit judicare. Et sicuti austrini poros relaxant, corpora emolliunt, humores liquant ac fundunt, itemque tonum partium in animalibus laxant, fibrasque illorum flaccidas reddunt, ita hi ipsi poros arctiores in univer-

sum omnium corporum efficiunt, illos coarctando ac constringendo, partes autem solidas rigidiores, firmiores & solidiores efficiunt, fluida condensant, comprimunt, & tonum in animantibus firmant ac roborant. Uno verbo: ad conservationem, durationem, tam inanimatorum, quam vivorum multum faciunt, illa defendendo ab omni corruptione, putredine & destructione nativæ suæ mixtionis, sive principiorum mixtum constituentium unionis. Eandem autem ob causam dicti hi venti agriculturæ & plantarum vegetationi non adeo accommodati sunt: hinc BODINUS *Theatr. naturæ l. II. p. 180.* scribit: *flantibus aquilonaribus, nec serere, nec plantare, nec arare licet.* Item: *sterilitas sequitur frugum, si aquilonares flaverint, sole scorpionem percurrente, quoniam salutare seminibus imbres cohibentur, siquidem sub calido & humido, quo vincula seminum optime relaxantur, & vis plastica explicatur, vegetabilium nutritio & augmentum optime procedit, quod rigidi, asperi & frigidi isti venti summopere cohibent poros & comprimendo & constringendo.* Et in universum hic notandum, quod agricolæ periti majora detrimenta & utilitates quoque ab ipsis ventis, quam ab aspectibus lunæ & astrorum petere ac expectare possint: unde tempestatum vicissitudo, varietas ac natura, ventorumque cognitio ipsis debet esse commendatissima. Notatu porro dignum est, quod illi agri ac horti, qui aquilonarium flatui libere sunt expositi, acri frigore atque asperis pruinis plus afficiantur, in maximum plantarum, vitium arborumque detrimentum, quam qui ab ipsis muniti ac septi sunt.

Arbores ipsæ ex illa parte, quæ ad clima septentrionale spectat, longe asperiores corticem, musco oblitum, lignumque compactius habent, quam ubi australi oppositæ plagæ objiciuntur.

Ceterum aquilo à venerabili antiquitate semper saluberrimus judicatus est. vid. PLIN. *hist. nat. loc. cit.* & ARISTOTELES illas urbes saluberrimas pronunciat, quæ solem orientem versus sitæ sunt, & ventis orientalibus ac borealibus expositæ. Et magnus noster HIPPOCRATES lib. de morbo sacro c. VII. p. 483. aquilonem ad sanitatem & corporis conservationem valde commendat, quippe *sect. III. aphor. 17.* hæc habet: *Aquiloniæ tempestates solida reddunt corpora, tum etiam firma, & ad motum expedita, & bene colorata, auditum acuunt, sed tamen alvos desiccant; quin oculos mordent, & si quis ante dolor in thorace exstiterit, eum acerbiores reddunt.* Et gravissimus auctor CELSUS ita sentit lib. II. c. 1. §. 20. *Ex tempestatibus aquilo tussim movet, fauces exasperat, ventrem adstringit, urinam suppressit, horrores excitat, item dolorem lateris & pectoris. Sanum tamen corpus spissat, mobilius atque expeditius reddit.* Huc quoque pertinet locus RHAZIS qui libro V. de re medica cap. 4. hunc in modum differit. *Ab aquilonaribus ventis ille custodiendus est, qui in pectore asperitatem sentit, vel tussim patitur, vel quibus pulmo aut pectus debile est: hic enim si aërem attraxerit frigidum, ad tussim vel ad sanguinem spuendum velociter pervenit.* VERULAMIUS autem de hoc vento hæc prodidit: *Flante borea, magis alacres, sani & avidiores ciborum evadimus.*

CAPUT VII.

Peculiares observationes medicas de ventorum noxa atque salubritate aperit.

Generatim sic perspecta ventorum natura damnosa & fructuosa, quam in corporibus humanis exserunt, placet jam speciatim procedere, & in praxi notatas mihi que occurrentes observationes quasdam, ventorum

torum efficaciam designantes, concisa quidem ratione, adducere, uberiores hujus rei tractationem in aliud adhuc commodius tempus rejiciendo.

I. Animadverti diligenter in praxi mea, quod diu dominantes ex austro & occidente venti, sub aëre denso perhumidoque, & mercurio in barometro diu hærente in inferiori statione, in prima ætate, id est infantia, copiosas feri evacuationes, tam per nares tussimque, quam alvum excitaverint: quo tempore etiam achores, tinea in capite, stillantes aures, oculorum defluxiones, incrementa maxima ceperunt. Et præterea curiose fuit annotatum, lumbricos in hac ætate magna in abundantia progenitos fuisse: ex quo fonte varii postea generis febres, è putridarum genere, tabes, nec non convulsivæ partium corporis affectiones, promanarunt. Hinc non sine ratione lumbrici ad epidemicos morbos sunt referendi, cum experientia addoceat, certis annis hos ipsos magis esse infensos & frequentes quam aliis.

II. Sub eadem tempestatis constitutione, ii, qui pituitosis referti sunt humoribus, nec non hectici, majorem membrorum lassitudinem viriumque languorem persentiunt, & quibus pedes tumere solent, vel qui inflatos ventres habent, tunc temporis plus quoque affliguntur, quam si fuerit cælum serenum. Quin immo glandularum eximii tumores, ut sunt scrophulæ, valde hoc tempore increscunt, & gravidæ, uterum longe inflatiorem & grandiolem, idque non sine incommodo, gerunt.

III. Qui ulcera manantia habent, nec non serofas putridas excretiones patiuntur, cujus generis sunt, albus fluor in foeminis, gonorrhœa, sive benigna, sive maligna, in viris, alvi creber fluxus, & ulcera, sive recentia sive inveterata fuerint, scabies humida, pustulæ in facie, sub cælo imbricoso nubilo, diu perseverante, non ita dolore affliguntur, sordes tamen largiores, quam sub cælo sereno siccoque, ejiciunt.

IV. Omnes nervorum & capitis imbecillitates atque affectus, qui ex humorum segnitie & obstructione suboriuntur, quorsum referre licet auditus gravitatem, visus hebetudinem, tumores capitis rheumaticos & œdematosos, paralyfes, memoriæ debilitatem, ingenii torporem ac hebetudinem, immo ipsum epilepticum insultum, sub mercurio humiliori, cælo austrino, plus justo humido, mirum in modum exasperantur, & ultra modum vires accipiunt.

V. Ulterius certissimæ experientiæ est, sub diuturna austrina humidaque aëris intemperie, præsertim ventis vacua, magnam ad putridorum morborum generationem proclivitatem fieri, unde frequentius videmus, præcedente paullo longius ejusmodi aëris statu, magno cum agmine prorumpere morbillos, catarrhales, malignas & petechizantes febres purpuratasque, quales per aliquot jam annorum decursum, eandem ob causam, liberaliter adhuc experti sumus, magnam hominum stragem undiquaque edentes.

VI. Neque hoc silentio prætereundum est, dominatum diu habentibus flatibus austrinis, densoque, tepido ac humido cælo, somnum fieri graviolem, multis anxietatibus & angoribus refertum, inquietum, turbulentum, nec non frequentiolem somni comitem existere, præsertim in dispositis, incubum. Insuper ejusmodi tempore appetitus solet esse imbecillior, nec tanta ventriculi in digerendis ac dissolvendis alimentis vis deprehenditur.

VII. Curiosum illud est, quod qui graviter in quadam parte, præsertim tendinosa ac fibrosa nerveaque, læsi ac sauciati sunt, præsertim in capite & pedibus, ita ut cicatrix vel nodus quidam durus relinquatur, ob fibras vasæque capillaria nervulosque à naturali suo tono ac ordinario situ detortos, quotiescunque tempestas mutari solet, v. g. ex serena in turbidam & contra, experiantur in ejusmodi partibus magnas molestias, pruritus, dolores, tractiones, punctiones, adeo ut calenda-

rium quasi perpetuum secum ferant, quo futuras tempestates exacte prænunciare possint. Experimentum hujus rei quotidianum suggerunt clavi pedum, plerumque tempestatum conversionem indicantes. Singularis mihi nuper contigit casus, ubi vir generosus, calculum in vesica gerens, tempestates exacte prædicere poterat, ex acerbitate dolorum, vel illorum levamento in vesica: nam si dolores sæviunt magis, indicium est appropinquatum ventorum borealium; si mitigantur, succedunt venti austrini & humidi. Ex quo satis intelligitur, quantam habeat potentiam aër, qui à ventis mutatur, in corpora nostra, illa variis modis alterando & demutando.

VIII. Ex frequenti & attenta observatione confirmatum habeo, quod illi, qui laborant arthritide, podagra, vel alio gravi & diuturno morbo, nec non febribus & morbis chronicis, vires non sufficienter recuperare & convalescere queant, quando mercurius in barometro est humilis ac depressus, & humida aëris intemperies diu invaluit: simul ac autem gratissima redire solet serenitas, & argenti vivi situs altior evadit, mox etiam insignis mutatio in ægrotantibus percipitur, necessariae cum transpiratione excretiones, eaque criticae, expeditiores fiunt, appetitus restituitur, & somnus fit placidior.

IX. Multoties annotavi in praxi mea, omnis generis dolores, tam cephalalgiam, quam podagram & odontalgiam, fieri acutiores atque graviores, nec non in pleuritide respirationem difficiliorem, majoremque in pectore angustiam, si frigidi, sicci elastici venti diu spiraverint, & exquisita ac perfecta serenitas observetur. Ex adverso omnes phthifici confirmati, & qui pectore laborant, item qui dolorum sævitia corripuntur, nec non hectici, hæmoptici, sub nubilo, pluvioso, humido cælo, melius degunt, nec tantam malorum sævitiam experiuntur, quam flantibus borealibus ventis. Qua de re consule superiorem locum adductum RHAZIS *cap. super. fin.* Idcirco etiam autumnus phthificis & ex labe pulmonum laborantibus valde funestus, quoniam sæpe aquilonius est, qualis effato ipsius HIPPOCRATIS secundum *lib. III. §. 14.* natura humidioribus opportunus, siccis autem & biliosis valde molestus.

X. Sciendum quoque illud est, sub ventis serenis, elaterem aëri conflantibus, & mercurio altiori, appetitum longe fieri erectiorem, alacritatem & vires ingenii omnesque mentis actiones augeri, totumque corpus alacre fieri, digestionem faciliorem & appetitum largiorem, somnum quoque placidissimum, quod multoties in me aliisque expertus sum. Ex adverso perhumidus idemque & densus diuturni aëris status turbat, & ingenium hebes ac desidiosum corpus facit: ideo LANA l. c. observavit, humana corpora, frigidiora & languidiora tunc temporis esse, quando argentum humilior subsidit.

XI. Quandocunque austrinos dies, eosque humidos, subito vehementes boreæ flatus excipiunt, maxime tempore hiemali & verno, multas destillationum pravas & noxias species excitant, præsertim quibus caput, ac signanter fauces, obsidentur: unde coryza, odontalgia, tussis, arthritides, multos ex debilioribus & tenerioribus graviter tunc temporis affligere solent. Sed hæc jam circa hoc argumentum sufficiant. Cum Deo alio tempore plura communicabimus.

EPHEMERIS

BAROMETRICO-

METEOROLOGICA

ANNI MDCC.

Monendum est lineam - numeris adjectam in hac ephemeride significare dimidium gradum.

JANUARIUS.

Dies | Hora | Vent. | Th. | Bar. | Tempestas.

| | | | | | |
|-------|--------|-------|----|-----|-------------------------|
| 1. | h. 8. | S | 60 | 24- | Regelatio |
| | II | S. W. | 59 | 24 | cum pluvia modica |
| | 4 | -- | 59 | 24 | adhuc |
| | II | -- | 60 | 24- | glaciale de nocte frig9 |
| Qu. 4 | h. 8. | WNW | 62 | 26 | Ventus impetuofus |
| | | | | | cum nive nocte |
| | IO | -- | 62 | 26- | Serenitas |
| | II | -- | 64 | 28- | Ventus modicus |
| 3 | h. 8. | -- | 64 | 28- | Tranquillum, nocte |
| | | | | | gelu |
| | I | -- | 63 | 28- | Nix densa humida |
| | IO | -- | 63 | 28 | Regelatio pauca |
| 4 | h. 8. | -- | 62 | 29 | adhuc |
| | II | -- | 62 | 29- | Pluvia tenuis |
| | II | -- | 63 | 31 | Nebula frigida, squalor |
| 5 | h. 8. | N. W. | 63 | 32 | Tempestas nubil. frigi- |
| | | | | | da nebula |
| | 12 | -- | 62 | 32 | Nix solvitur |
| | II | -- | 63 | 32 | Tranquillus aër |
| 6 | h. 8. | -- | 63 | 32 | Coelum nubibus te- |
| | | | | | ctum |
| | IO | -- | 64 | 32 | adhuc |
| 7 | h. 8. | -- | 64 | 32 | Tempus coenofum |
| | II | WNW | 64 | 32 | Ventus & frig. modi- |
| | | | | | cum |
| | I | W | 63 | 32 | adhuc |
| | II | -- | 64 | 31 | Tranquillum |
| 8 | h. 8. | -- | 63 | 31 | Nix tenuis, Lipsiæ plu- |
| | | | | | via & nox tota plu- |
| | | | | | viofa |
| | I | -- | 63 | 30- | Tempus coenofum |
| 9 | h. II. | -- | 62 | 29- | Ventus cum tristi coelo |
| | h. 8. | -- | 62 | 29 | Tempus coenofum ob- |
| | | | | | fcurum |
| | II | N. W. | 62 | 29 | adhuc |
| | II | -- | 62 | 30 | Nebula madens, tran- |
| | | | | | quillum |
| 10 | h. 8. | -- | 62 | 30 | Tempus coenofum ca- |
| | | | | | liginosum |
| N. L | 10 | N. NW | 62 | 30- | Pluvia tenuis, nebulosa |
| | I | -- | 61 | 30 | Item |
| | 4 | N. NW | 61 | 30- | nebula densa |
| | II | W | 62 | 30- | ventus modicus |
| 11 | h. 5. | N W | 61 | 30- | ventus modicus, fordi- |
| | | | | | da dies |
| 12 | h. 8. | S W | 62 | 30- | ventus modic. nebula |
| | | | | | humens |
| | 10 | | 61 | 30- | ventus invaluit, nec |
| | | | | | frig. vacuus |
| | 4 | | 60 | 29 | ventum impet. corus |
| | | | | | intermixt. efficit |

JANUARIUS.

Dies | Hora | Vent. | Th. | Bar. | Tempestas.

| | | | | | |
|-------|-------|----------|----|-----|---------------------------|
| | 12 | | 59 | 27 | tranquillum frigidius- |
| | | | | | culum |
| 13 | h. 8. | WNW | 57 | 25 | ventus validus |
| | 10 | | 56 | 24 | ventus impetuofus, |
| | | | | | phœbus, pluviae |
| | 8 | | 57 | 24 | ventus vehemens, plu- |
| | | | | | via stillans |
| | 9 | | 59 | 24 | pluvia minuta |
| | II | | 59 | 24 | ventus modicus |
| 14 | h. 8. | S. S. W | 57 | 24 | ventus |
| | II | W | 55 | 24 | ventum zephyrus effla- |
| | | | | | vit |
| | 6 | | 50 | 23 | impetuofior cum pluv. |
| | II | | 50 | 23 | ventus nullus, ast frigi- |
| | | | | | du |
| 15 | h. 8. | WNW | 50 | 22- | pluvia larga & vento- |
| | II | | 50 | 23- | ventosum (sum |
| | 3- | | 55 | 23- | ventus impetuofus et- |
| | | | | | iam Berolini |
| | II | | 57 | 22- | ventus modicus |
| 16 | h. 8. | N W | 59 | 22 | ventosum, gelu mo- |
| | 10- | | 59 | 23 | phœbus (dicum |
| | 4 | | 60 | 24 | ventosum |
| | II | | 62 | 25 | ventus modicus, nox |
| | | | | | inferena |
| 17 | h. 8. | W | 63 | 26- | nocte nix tenuis |
| | II | WNW | 63 | 26 | nix tenuis |
| | 2 | N W | 61 | 26 | nix tenuis, phœbus |
| | 4 | W S W | 61 | 26 | aura frigida |
| Q. 2. | II- | | 61 | 23- | frigus duravit plateas |
| 18 | h. 8. | S. O. | 55 | 22 | ventus impetuof. cum |
| | | | | | sole latente |
| | II | S. | 57 | 22 | nix tenuis |
| | 2 | S. W. | 56 | 22 | ventus impetuof. cum |
| | | | | | nive tenui |
| | 3 | S. O. | 56 | 22 | nix densa cum vento |
| | 3- | S. S. W. | 57 | 22 | nix nulla (impet. |
| | II | -- | 49 | 21 | placid. frigus, Lipsiæ |
| | | | | | nocte nix copiosa. |
| 19 | h. 8. | S. | 48 | 21 | aura lenis cum nubilo |
| | | | | | coelo |
| | 19 | W S W | 48 | 21 | sol emicuit, aura mitis, |
| | | | | | lutosum |
| | 2 | WNW | 49 | 21 | ventus mod. cum plu- |
| | | | | | via tenui |
| | 2- | -- | 48 | 21 | nix densa cum vento |
| | 5 | -- | 55 | 21 | nix nulla (modico |
| | II- | -- | 56 | 16- | tranquillum frigidum |
| 20 | h. 7. | -- | 58 | 19 | nox glacialis |
| | 10- | -- | 58 | 19 | aura mitis |
| 21 | h. 8. | S. | 57 | 19 | ventus modicus |

cali

Ephemeris Barometrico-meteorologica.

31

JANUARIUS.

Dies | Hora | Vent. | Th. | Bar. | Tempestas.

| | | | | | |
|------|-------|--------|----|----|---|
| | I | W | 56 | 19 | calidum, phœbus |
| | II | -- | 58 | 19 | nebula densa |
| 22 | h. 8. | S.S.W. | 58 | 21 | subnebulosum, lutulentum |
| | I | -- | 57 | 20 | Phœbus cum calore |
| | 12 | -- | 57 | 19 | nullum frigus |
| 23 | h. 8. | S. O. | 55 | 19 | lenissimum frigus |
| | I - | O | 56 | 18 | serenum frigidiusculum |
| PL | II | -- | 56 | 17 | nubilum |
| 24 | h. 8. | WNW | 56 | 17 | nocte nix tenuis, gelu subventosum, subfrigidum |
| | I | -- | 57 | 18 | |
| | 12 | -- | 50 | 21 | tranquilla & frigidiuscula tempestas |
| 25 | h. 8. | S. | 59 | 21 | similis præced. diei tempor. constitutio. |
| | 10 | -- | 58 | 20 | nec ventus, nec nix deficiebat |
| | 10 - | -- | 57 | 18 | aura frigida |
| 26 | h. 7. | -- | 56 | 15 | lenis regelatio |
| | 10 | W | 56 | 15 | sol emicuit & ventus oriebatur |
| | 2 - | N. W | 55 | 15 | pluvia pauca cadebat |
| | II | -- | 57 | 17 | nubes movebant, cum frig. intensione |
| 27 | h. 8. | N.NW | 58 | 19 | Similis tempestas |
| | 5 | -- | 60 | 22 | fenestræ incipiunt gelari |
| | 10 - | -- | 62 | 23 | gelu increfcit |
| 28 | h. | W | 62 | 24 | nox gelida omnia rigida fecit |
| | 12 - | W N | 62 | 25 | ningit, frigus permanet |
| | 4 | S. W | 62 | 25 | pergit nix |
| | II | -- | 63 | 27 | strictum gelu |
| 29 | h. 8. | W | 63 | 28 | nebula visitur |
| | 10 | S. W. | 63 | 28 | sol apparet cum coelo fer. auraque frig. |
| | II | W.S.W | 63 | 28 | tranquillus, frigidus tamen aër |
| 30 | h. 8. | S. | 62 | 27 | apparet gelu remissius |
| | 5 | -- | 62 | 26 | serenit. tranquilla frigida cum sole |
| Q. 4 | II - | -- | 61 | 25 | idem tempus |
| 31 | h. 8. | W S W | 61 | 24 | nocte nix larga, quæ adhuc durat |
| | 3 | W | 61 | 24 | nix liquefc. incipit & sol effulget |
| | II | -- | 62 | 27 | nix perstat cum glacie modica |

FEBRUARIUS.

| | | | | | |
|---|-------|-------|----|----|--|
| 1 | h. 8. | W | 63 | 27 | Nebula animadvertitur |
| | 2 | S | 62 | 27 | aliqualis frigor. remis. cum nivis sol. |
| | II | -- | 61 | 26 | fenestræ rursus gelu densantur |
| 2 | h. 8. | -- | 62 | 25 | idem gelu contin. cum solis splend. |
| | 9 | O | 62 | 25 | temperat. aër, nix diffuit & sol fulget |
| | 8 | -- | 61 | 24 | placidus & temperatus status |
| | 10 | -- | 61 | 24 | aura asper. & frigid. fit cum ser. nocte |
| 3 | h. 8. | W S W | 61 | 24 | serenitas continuat & nix liquefcit |
| | II | -- | 60 | 23 | nix liquefcit à solis |

FEBRUARIUS.

Dies | Hora | Vent. | Th. | Bar. | Tempestas.

| | | | | | |
|------|-------|----------|----|----|--|
| | IO - | -- | 57 | 20 | splendore placidus & temperatus aër |
| 4 | h. 8. | -- | 55 | 17 | nivis liquatio ulterior |
| | 12 | -- | 50 | 16 | splendor solis vagus |
| | II | -- | 55 | 16 | gratus tepor |
| 5 | h. 7. | W.S.W | 58 | 14 | mane glaciale |
| | 10 | -- | 50 | 14 | serenitas amoena cum sole |
| | 3 | -- | 49 | 14 | aura frigidiuscula Lī. pfiæ densa nix |
| | II - | -- | 50 | 14 | eadem |
| 6 | h. 7. | S. | 55 | 14 | mane glaciale cum amico sole |
| | 10 | -- | 55 | 14 | serenitas grata |
| | II - | -- | 56 | 15 | aura mitis |
| 7 | h. 7. | S.W. | 56 | 15 | lutum gelatum & sol apparet rursus |
| | I | -- | 55 | 16 | ningit per 3. hor. cum frigoris remissione |
| | II | -- | 57 | 16 | aura frigidior |
| 8 | h. 7. | -- | 57 | 17 | nox frigore non vacua |
| | I | W | 57 | 17 | coenum gelat. exhibuit splendor solis vagus |
| N.L | II - | -- | 55 | 15 | aura frigida |
| 9 | h. 7. | -- | 60 | 20 | nebula |
| | 10 - | -- | 59 | 21 | novilunium nivem largam producit |
| | II - | -- | 61 | 25 | gelu diuturnum |
| 10 | h. 7. | N. W. | 62 | 26 | rursus ningit |
| | 2 | -- | 61 | 26 | serenitas cum temperato calore |
| | II | -- | 61 | 25 | frigoris exaltatio à nocte serena |
| | h. 5. | O N. O | 61 | 25 | serenitas amica |
| | 12 | O. | 61 | 25 | serena & calida merid. |
| | II | -- | 62 | 25 | frigus resurgit |
| 12 | h. 7. | O.N.O. | 64 | 26 | nox valde glacialis omnia constrinx. |
| | 12 | O. | 63 | 26 | phœbus |
| | 10 - | -- | 63 | 26 | ventus paulo validus surgit & nox nub. |
| 13 | h. 5. | N. O. | 63 | 26 | fenestræ gelatæ sunt |
| | 3 | -- | 62 | 24 | serenum & siccum frigus aquilo affert. |
| | II | -- | 62 | 23 | intenditur idem: coelum latet |
| 14 | h. 7. | S. O. | 62 | 23 | gelu vehementius & phœbus |
| | 12 | -- | 62 | 23 | remitit |
| 15 | h. 5. | S. S. O. | 61 | 23 | nix mane volitabat |
| | II | S | 60 | 23 | nix largior, quæ tamen paulo post à sole merid. solvitur |
| | I | W S W | | | |
| Q. 2 | II | -- | 60 | 23 | subfrigidum |
| 16 | h. 7. | S | 59 | 22 | serenit. cum placida tempestate |
| | II | -- | 55 | 22 | aura temperata |
| 17 | h. 9. | S W | 55 | 21 | serenum coel. cum sole |
| | II | -- | 55 | 22 | moderatus aër cum modico vento |
| 18 | h. 7. | S O | 57 | 21 | pergit serenitas |
| | II | S S W | 56 | 21 | ventus surgit cum sole raro |

MARTIUS.

| | | | | | |
|---|-------|------|----|----|---------------------------------|
| 1 | h. 7. | S. W | 55 | 22 | Serenitas amoena & subcalida |
| | 1 | S | 57 | 22 | sudum ac gratum coel. serenitas |

C 4

Ephemeris Barometrico - meteorologica.

M A R T I U S.
Dies | Hora | Vent. | Th. | Bar. | Tempestas.

M A R T I U S.
Dies | Hora | Vent. | Th. | Bar. | Tempestas.

| | | | | | |
|------|-------|----------|-----|-----|---|
| | 5 | S. S. O. | 55 | 22- | ferenitas subfrigidula |
| | 10 | -- | 55 | 22- | Eadem |
| 2 | h. 7. | O | 55- | 22- | similis priori dies |
| 3 | h. 7. | -- | 55 | 22 | nebula humida |
| | 11 | -- | 57- | 21 | leve frigus |
| 4 | h. 7. | O.N. O | 55 | 20- | aër rursus nebulosus cum mod. frig. |
| P.L. | 10 | -- | 58- | 22- | tempestas commoda at- que frigida |
| 5 | h. 7. | -- | 55- | 22 | tempestas placida. |
| | I | N.N. C | 59 | 23 | p. L. nivem humidam adducit quæ mox solvitur. |
| | 11- | -- | 61 | 24 | definit nivis solutio à frig. moder. |
| 6 | h. 7. | -- | 61 | 24- | nix cum cœlo nubilo |
| | 12 | -- | 60 | 25 | nubibus cœl. obduct. |
| | 11 | -- | 61- | 25 | frigus sentitur |
| 7 | h. 7. | -- | 62 | 25 | nox glacialis fenestras duravit |
| 8 | h. 7. | -- | 62 | 25 | frigus pergit |
| | I | S. O | 61 | 25 | redit sol & frigus tem- perat |
| | 10- | -- | 62 | 25 | asperior aura |
| 9 | h. 7. | -- | 62 | 25 | ferenit. rursus conspi- cua glacies dis. |
| | 4- | W.S.W | 60 | 23- | aër modice nebulos. |
| | 11 | -- | 61 | 24 | cum tenui asperg. |
| | | | | | temperata & tranquil- la aura |
| 10 | h. 7. | -- | 61 | 24- | diluculum nubilosum |
| | 10 | -- | 60 | 25 | cœlum nebulosum |
| | 10- | -- | 61 | 26 | aura paulo frigida |
| 11 | h. 7. | -- | 61 | 26 | ferenitas grata & gla- cialis |
| | 5- | -- | 59- | 24- | eadem |
| Q. 4 | 11 | -- | 58- | 23 | aër aliosus inquietus |
| 12 | h. 7. | S. O. | 57 | 21 | ultima quadra ventum mutat |
| | 5- | S. S. O | 56- | 20 | frigus montes austr. |
| | | | | | Varisci effund. |
| | 11 | -- | 58 | 21 | crescit |
| 13 | h. 7. | N.N. C | 58 | 23 | ferenitas cum eodem frigore |
| | 10 | -- | 61 | 26- | hoc intenditur |
| 14 | h. 7. | -- | 61- | 27- | nebula rarior |
| | 3 | O. | 59- | 27- | frigus remissius cum ferenitate |
| | 10- | -- | 59 | 27- | nox clara |
| 15 | h. 7. | -- | 59- | 27- | ferenitas egregia |
| | 2 | -- | 57 | 26 | tempus vernum fere- num gratissimum ca- lidum |
| | 11- | -- | 58 | 25- | nitida nox |
| 16 | h. 7. | -- | 59 | 25- | eadem serenitas tranq. |
| | | | | | cum nullo ferm. frig. |
| | 4 | -- | 56 | 23- | pergit hæc cum calore |
| | 10- | -- | 57- | 23- | aër evadit frigidiusc. |
| | | | | | nox clara |
| 17 | h. 6. | -- | 57- | 23- | ferenitas pergrata |
| | 10 | -- | 55- | 21- | ventus modicus, alio- rum tempus |
| 18 | h. 6. | W.N.W | 57- | 22- | simile tempus |
| | 9 | -- | 58 | 23- | ventus nubila pulsat |
| | 11 | -- | 60 | 26 | aura frigidula |
| 19 | h. 7. | W | 60 | 27- | paulisper nebulosum |
| | 5 | N | 60 | 27- | aspergo pluviosa |
| N.L | 11 | -- | 60 | 27- | tranquillus aër, ast fri- gidus |
| 20 | h. 6. | N.N. O | 60 | 27- | cœlum nebulosum fri- gidum |

| | | | | | |
|-------|-------|--------|-----|-----|--|
| | 10 | N.N. O | 60 | 27- | Idem |
| 21 | h. 6. | -- | 60 | 27- | ferenitas subfrigida |
| | 10 | S. O. | 50. | 25. | frigus exspirat |
| 22 | h. 7. | N. O. | 57- | 25. | nebula densa, mane glaciale |
| | I. | S. O. | 55. | 24 | serena calida meridies |
| | 11 | -- | 56. | 23 | tranquillum tempus |
| 23 | h. 7. | N. W. | 57. | 24- | nebula rara, quæ mox à sole dissip. |
| | 11 | -- | 56. | 25- | nubes solem obscur. & pelluntur à ventis |
| | I. | -- | 57. | 25- | pluvia tenuis & pauca |
| | 11 | -- | 59. | 28 | omnia sedata |
| 24 | h. 7. | W | 61. | 28- | ferenit. comitata ven- to, cui succed. nubila |
| | 2. | N. W. | 61. | 29. | ferenitas à nubibus tur- bata |
| | 11. | -- | 63. | 30- | nox frigida valde gla- cialis |
| 25 | h. 6. | -- | 64 | 31. | ferenitas cum vento |
| | I. | N.N. C | 63. | 31. | cœlum clarum & ven- tus surgit impet. |
| | 10- | -- | 64 | 31. | frigus surgit eximium |
| 26 | h. 6. | -- | 64 | 31. | ferenitas cum acri frig. |
| | | | | | succedit vent. mod. |
| | | | | | nix rara |
| | 10- | -- | 64 | 30- | frigus intenditur |
| 27 | h. 7. | -- | 65. | 30- | mane durum gelu |
| P. L. | 10 | -- | 61. | 28- | idem tempus |
| 28 | h. 7. | -- | 62 | 28- | ferenitas cum vento frigido |
| | 10- | -- | 61. | 27- | lenior tempestas |
| 29 | h. 6. | -- | 61. | 27. | diluculum perfrigid. & clarum |
| | I. | O | 59. | 26. | ferenitas non fine vent. |
| | 10 | -- | 59. | 25. | egregia tempestas, sed glacialis |
| 30 | h. 7. | -- | 60. | 25. | pergit serenitas perfri- |
| | 10 | -- | 59. | 25. | eadem (gida |
| 31 | h. 6. | -- | 59. | 25. | eurus adhuc glacialis & serenus |
| | 10 | -- | 59. | 26. | clara & tranquilla tem- pestas |

A P R I L I S.

| | | | | | |
|------|-------|-------|----|-----|---|
| I | h. 7. | O | 61 | 27- | Serenit. exquisita non vacua glacie |
| | 11 | -- | 59 | 27 | Frigus mitescit, nox fuit clara |
| 2 | h. 6. | -- | 60 | 27- | Pulchrum cœlum fri- gidiusculum |
| P.L. | 11 | -- | 59 | 27- | Aura lenior, nox fere- na glacialis |
| 3 | h. 6. | S. O. | 59 | 27 | Status serenus & amœ- nus excepit matuti- nam glaciem |
| | 11 | -- | 55 | 26 | Frigus mitescere incip. |
| 4 | h. 5. | N. W. | 51 | 25 | aura ventosa algida |
| 5 | h. 6. | -- | 60 | 27 | mane frigidul. seren. |
| | I | N. O. | 57 | 27 | cum tenui glacie tempus vernum gra- tissimum |
| | 6 | -- | 57 | 26 | Grata serena nox |
| 6 | h. 6. | O. | 57 | 25 | Pergit gratum tempus |
| | I | W S W | 57 | 25 | eadem amœnitas calid. |
| | 6 | -- | 50 | 21 | nox calida desideratis- sima sine stellis |
| 7 | h. 6. | W.N.W | 57 | 22- | Cœlum à nubibus oc- cultatur |

Pluvia

Ephemeris Barometrico-meteorologica.

33

A P R I L I S.

Dies | Hora | Vent. | Th. | Bar. | Tempestas.

| | | | | | |
|------|-------|-------|-----|-----|---|
| 8 | I | W | 56 | 23 | Pluvia exoptata cadit |
| | h. 6. | WNW | 57 | 25 | Serenitas restituit. non fine glacie |
| | I | -- | 56 | 24 | Pluvia calida foecunda ruit |
| | 2 | O | 56 | 24 | Serenitas redit |
| 9 | h. 7. | -- | 56 | 22 | Coelum nubilum, nec pluviola destitut. |
| | 6 | -- | 50 | 19 | Coelum latet |
| 10 | h. 6. | -- | 55 | 18 | diluculum fine omni frigore vel glacie |
| | II | -- | 48 | 18 | Coelum fine nubibus, amoenum |
| Qu. | 6 | -- | 49 | 18 | Serenitas paululum turbatur |
| II | h. 7. | -- | 56 | 20 | Serenitas cum calore insigni |
| | II | -- | 50 | 20 | perstat |
| | 6 | -- | 48 | 19 | adhuc |
| 12 | h. 7. | -- | 49 | 19. | simile mane priori |
| | I | S. | 44 | 17 | calor gravior fit nubibus intermixtis |
| 13 | h. 6. | WNW | 48 | 17 | Coelum nubilosum |
| | 10 | S. W. | 47 | 18 | hoc sequitur pluvia |
| | 6 | W | 47 | 17. | manet |
| 14 | h. 8. | S. O. | 47 | 18. | subnubilum |
| | I | W | 44 | 16. | calor increfcit & vent. oritur validus |
| | 6 | -- | 45 | 16. | ventus modic. pluvia & coelum triste |
| 15 | h. 7. | -- | 45 | 15. | pluvia, & praeced. nocte vent. vehem. |
| | 10 | -- | 47 | 15. | pluvios. coelum cum vento leni |
| | 7 | O. | 47. | 17. | Serenitas grata revertit. cum nocte clara |
| 16 | h. 7. | W S W | 50 | 17. | Dilucul. frigidiusc. & ventus nubes agit. |
| | 7 | W | 47 | 15. | Nubil. coelum stellas recond.& Zeph. impet. |
| 17 | h. 7. | -- | 49 | 16. | Pluviosum & frigidum mane |
| | I | -- | 47 | 16. | Cess. pluv. sed sol latet |
| | 7 | W S W | 48 | 17. | Serenitas accedit & sol rubens occidit |
| 18 | h. 7. | N | 50 | 17. | pluvia rursus, eaque frigida |
| | I | W S W | 50 | 17 | Perseverat & vent. spir. |
| N. L | 6 | N. W. | 50 | 17. | Cessat pluv. manet vent. & nebula surgunt |
| 19 | h. 7. | | 55 | 19 | Novilunium frigus infert. |
| | I | | 50 | 19 | quod remittit, nubilo perman. coelo |
| | 7 | N. O. | 55 | 20 | Serenit. mediocris, paulo frigida |
| 20 | h. 7. | O | 56 | 22. | Serenū primo frigidul. postea calid. gratiff. |
| | I | -- | 50 | 21. | Subnubilum c. tepore |
| | 7 | -- | 55 | 22. | vesperi frigoris non expers. |
| 21 | h. 6. | N | 55. | 21. | serenitas coeli à nubibus impedita |
| | 2 | N W | 50. | 20 | nubes copios. nub. tristia, quæ pluunt. |
| | 7 | O | 50 | 20 | coelū nubibus occultat. |
| 22 | h. 7. | -- | 55 | 20 | cum nubilis soli colluctandum |
| | 2 | S. O. | 49 | 20 | nubilum coelum |
| | 7 | W | 55 | 20 | serenitatem comitatur |

A P R I L I S.

Dies | Hora | Vent. | Th. | Bar. | Tempestas.

| | | | | | |
|-----|-------|---------|-----|----|--------------------------|
| | | | | | pluvia |
| 23 | h. 7. | -- | 55 | 20 | paulo frigida aura, coe- |
| | 2 | -- | 48 | 20 | lo minus claro |
| | 4 | -- | 50 | 19 | per vices sol affulsit |
| | 7 | N W | 50 | 19 | pluvia larga sequitur & |
| | | | | | tonitru |
| | | | | | subsequitur serenitas & |
| | | | | | frigus mediocre |
| 24 | h. 7. | N W | 50 | 20 | clarum frigus |
| | 1 | S W | 50 | 17 | pluvia spargitur |
| | 7 | W | 50 | 17 | nubes stellas tegunt |
| 25 | h. 7. | WN. N | 40 | 17 | nubes circumcirca pel- |
| | | | | | luntur. |
| | 1 | W | 40 | 17 | id quod continuat |
| Qu. | 7 | -- | 45 | 17 | serenitas sequitur |
| 26 | h. 7. | -- | 49 | 17 | prima quadra lunæ gra- |
| | | | | | tiss. seren. infert |
| | 1 | S | 46 | 17 | meridies valde calida |
| | | | | | & pulchra |
| | 7 | W | 49 | 17 | nubes solem contri- |
| | | | | | stant. |
| 27 | h. 7. | S. | 49 | 17 | imbres cadunt |
| | 2 | O. | 45 | 15 | calor satis eximius |
| | 7 | -- | 46 | 15 | serenum calidum ves- |
| | | | | | peri |
| 28 | h. 6. | -- | 47. | 15 | sol affulget serenus |
| | 1 | S. | 49 | 13 | valde calida meridies |
| 29 | h. 7. | W. S. W | 49 | 13 | cœlum nubilum |
| 30 | h. 8. | N. N W | 50 | 18 | cœlum nubilum latens, |
| | | | | | frigidum. |

M A J U S.

| | | | | | |
|-------|-------|-------|-----|-----|---------------------------------------|
| I | h. 7. | N. W. | 31 | 24 | ventus vehemens nubila pulsant |
| | I | -- | 31. | 24 | serenitas cum non levi calore |
| | 5. | -- | 26. | 23- | vesperi percalidum |
| 2 | h. 7. | N | 36. | 25- | serenitas amoena calida |
| | 12 | N. O. | 32. | 24- | pergit |
| P. L. | 7 | O | 32. | 23. | adhuc |
| 3 | h. 7. | -- | 31. | 23. | idem coeli status clarus & calidus. |
| | I. | -- | 27. | 21. | calor continuat |
| | 6. | -- | 21. | 19. | fit gravior |
| 4 | h. 7. | -- | 28. | 19- | eadem serenitas, frigidula tamen |
| | I | -- | 23. | 17. | meridies summe calid. |
| | 6. | -- | 38. | 15. | permanet |
| 5 | h. 6. | S. O. | 35. | 16. | similis dies |
| | I | S. O. | 22. | 14- | in eodem statu pergit |
| | 6. | S. | 20. | 14 | serenit. incipiunt nubes immisceri |
| 6 | h. 7. | O | 23. | 15. | coelum rursus seren. cum gravi calore |
| | I. | -- | 20 | 14 | persistit |
| | 7. | -- | 21. | 14- | adhuc |
| 7 | h. 7. | -- | 22. | 16- | mane rursus amoenissimum & calidum |
| | I. | S. | 16. | 15. | sol liberior & calidior |
| | 7. | S. O. | 12. | 13. | gravior calor |
| 8 | h. 7. | -- | 18. | 19. | serenitas paululum nubeculis turbatur |
| | I. | -- | 13. | 18. | idem coelum |
| | 7. | S. W. | 16. | 13 | fit nubilum & caliginosum |
| 9 | h. 7. | -- | 21. | 18. | pluvia desideratissima conspicitur |
| | I | N. W. | 22 | 19 | perdurat |
| | 7 | N. O. | 21 | 20 | pluvia desinit |

serenitas

M A J U S.

Dies | Hora | Vent. | Th. | Bar. | Tempestas.

M A J U S.

Dies | Hora | Vent. | Th. | Bar. | Tempestas.

| | | | | | |
|-------|-------|-------|-----|-----|--------------------------|
| 10 | h. 7 | O.N.O | 24 | 21 | ferenitas mutabilis |
| | I | O | 26 | 19 | perfectior fit |
| Q. 4. | 7 | | 20 | 17 | perfectissima cum no- |
| | | | | | cte clara |
| 11 | h. 7 | | 23 | 18- | ferenitas integra cum |
| | I | S. O. | 15 | 17 | æstu |
| | 6 | | 18 | 14 | paululum nubibus in- |
| | | | | | terturbatur |
| 12 | h. 7 | O. | 21 | 17- | calor intenditur |
| | I | S. O. | 21 | 13 | coelum pure ferenum |
| | 7 | | 22 | 15 | ac sudum |
| 13 | h. 7. | O. | 21 | 18 | paucæ nubes surgunt |
| | I | S. O. | 16 | 16 | idem coelum |
| | 7 | | 15 | 14 | ferenitas rursus perfe- |
| | | | | | cta |
| 14 | h. 7. | O. | 18 | 18 | nubeculæ intermisc. |
| | I | S. O. | 28 | 18 | quæ permanent |
| | 7 | O. | 27 | 13 | ferenitas exquisita & |
| | | | | | perseverat (calida |
| 15 | h. 7. | S. O. | 31 | 12- | adhuc |
| | 5 | W | 27 | 19 | coelum nubilum red- |
| | 7 | N. W. | 22 | 15 | pluviosum (ditur |
| 16 | h. 7. | N. C. | 26 | 17 | ferenitas revertitur |
| | I | W | 22 | 16 | dies egregia |
| | 7 | S. W. | 23 | 22 | nubes accedunt |
| | | | | | & solis liberum fulgo- |
| 17 | h. 7. | O. | 26 | 17 | rem turbant |
| | I | S. O. | 22 | 16 | ferenum & sudum c. |
| N. L | 7 | | 21 | 18 | idem (gravi æstu |
| 18 | h. 7. | W | 24 | 16- | nubila assurgunt |
| | I | WNW | 21 | 15 | novilunium gratam |
| | 7 | W | 23 | 16 | pluviam larg. |
| 19 | h. 7 | S W | 25 | 17 | coelum nubibus invo- |
| | I | W | 22 | 16- | adhuc (lutum |
| | 7 | | 26 | 17- | continuat |
| 20 | h. 7 | S. W. | 26 | 19 | rursus |
| | I | S | 20 | 17 | mox fol, mox nubila |
| | 7 | S. W. | 22 | 16 | æstus pergravis |
| 21 | h. 7 | S | 23 | 17 | hic continuat |
| | I | N. W | 21 | 17 | nubes tonitru emitt. |
| | 7 | O | 22 | 17 | nubes circumpelluntur, |
| | | | | | non sine sole |
| 22 | h. 7 | S. O. | 24 | 18- | coelum fit sudum & |
| | I | N. O. | 19 | 14 | clarum |
| | 7 | S. W. | 21 | 18 | ferenitas modica |
| 23 | h. 7 | W | 24 | 18 | fol & nubila per vices |
| | I | N. W. | 26 | 19 | nubilum |
| | 7 | | 29 | 20 | nubila subsequitur plu- |
| | | | | | continuat pluvia (via |
| 24 | h. 7 | | 31 | 22 | ferenitas redit, non ta- |
| | I | | 28 | 22 | men absque nubib. |
| Q. 1. | 7 | | 31 | 24 | nubes cælo volvunt. |
| 25 | h. 7 | | 32- | 25 | ferenitas modica |
| | I | S | 26 | 21 | fit pura |
| | 7 | O | 27 | 20 | cæli status ferenus |
| 26 | h. 7 | S | 32 | 19- | calor increfcit |
| | I | W | 36 | 18 | ferenitas permanet |
| | 8 | | 32 | 16- | paululum turbatur |
| | | | | | adhuc |
| 27 | h. 7- | WNW | 21 | 10 | coelum fit nubil. cum |
| | I | | 22 | 13 | pluvia comite |
| 28 | h. 7 | O | 21 | 19 | nubes, ventus & pluvia |
| | 12 | | 21 | 15 | eadem tempestas & |
| | 7 | | 22 | 15- | coelum obscurum |
| 29 | h. 7 | | 23 | 14 | ferenitas grata perca- |
| | I | N. O | 24 | 10 | durat (lida |
| | | | | | nubes paucæ miscent. |
| | | | | | ferenitas |
| | | | | | permanet |

| | | | | | |
|----|------|----------|----|----|-----------------------|
| 30 | h. 7 | W. S. W | 23 | 10 | nubilum cœlum |
| | 12 | | 22 | 12 | perimodicus fol |
| | 7 | | 23 | 12 | pluvia modica delapsa |
| 31 | h. 7 | O. N. O. | 24 | 13 | calor continuat |
| | 12 | | 24 | 14 | tempus calidum sub- |
| | | | | | nubilum |
| | 7 | | 24 | 15 | idem |

J U N I U S.

| | | | | | |
|-------|-------|---------|----|-----|-------------------------|
| P. L. | | N. N. O | 26 | 18 | Æstus quodammodo |
| 1 | | | | | mitigatus |
| 2 | | | 25 | 21 | ferenus & gravior æstu |
| | | | | | præcedente |
| 3 | | WNW | 26 | 22 | amœna ferénitas |
| 4 | h. 7 | | 34 | 17- | nubilum cœlum & |
| | I | | | | paulo frigidulum |
| | 7 | S. W | 29 | 16 | ferénitas interpolata |
| 5 | h. 7 | O | 26 | 15- | eadem |
| | I | N. O. | 20 | 14 | adhuc & satis calida |
| | 7 | | 18 | 13- | calor exacerbatur |
| | | | | | idem |
| 6 | h. 7 | W S W | 22 | 14 | nubes cum imbris |
| | I | | 30 | 13 | adhuc durant |
| | 7 | | 28 | 12 | ferénitas nubibus in- |
| | | | | | terspersis |
| 7 | h. 7 | N | 33 | 13 | nubes cœlum obscu- |
| | I | N. W | 33 | 13 | constans (rant |
| | 7 | | 34 | 15 | parum pluit |
| 8 | h. 7. | W | 40 | 18 | pluvia satis larga |
| | I | | 41 | 19 | adhuc durat |
| Q. 4 | 7 | WNW | 39 | 20 | nubilum tempus |
| 9 | h. 7 | | 40 | 19 | ferénitatem puram red- |
| | | | | | dit ultima quadra |
| | | | 41 | 18- | ferénitas nubibus co- |
| | | | | | mitata |
| | 7 | | 42 | 19 | eadem tempestas |
| 10 | h. 7 | N | 41 | 20 | nubes |
| | I | WNW | 41 | 18 | nubes ferénitati inter- |
| | | | | | miscuntur |
| | 7 | | 42 | 18 | ferénitas non sine nu- |
| 11 | h. 7 | | 38 | 20 | eadem (bibus |
| | I | | 36 | 18 | eadem |
| | 7 | N | 33 | 20- | ferénitas pura |
| 12 | h. 7 | W | 37 | 22 | eadem |
| | I | | 35 | 20 | non sine nubibus feren. |
| | 7 | N | 35 | 20- | ferénitas & nubes |
| 13 | h. 7 | N. W | 36 | 23 | ferénitas jucunda |
| | I | N. O. | 40 | 20 | meridies eadem |
| | 7 | O | 41 | 19 | eurus noctem claram |
| | | | | | & ferénam attulit. |
| 14 | h. 7 | | 38 | 22 | amœna cœli ferénitas |
| | I | | 35 | 18 | constans mane |
| | | | | | meridies valde gravi |
| | 7 | | 33 | 18 | calore molesta |
| | | | | | vespertinus calor mo- |
| 15 | h. 7 | | 29 | 20 | deratior |
| | | | | | fol semper fulsit, nec |
| | I | | 28 | 16- | cœlum nub. (nus |
| | 7 | | 36 | 18 | anxius calor meridia- |
| 16 | h. 7 | | 36 | 18 | & vesperi & nox fer. |
| | | | | | paucæ nebulæ tur- |
| | I | | 20 | 16 | bant tot. diei feren. |
| N. L | 7 | | 15 | 13 | æstus gravior increfcit |
| | | | | | qui etiam per noctem |
| 17 | h. 7 | | 23 | 18 | sefe extend. |
| | I | | 21 | 16 | æstus & ferénitas gra- |
| | 7 | O | 24 | 18 | vissima pergit per |
| 18 | h. 7 | | 29 | 18 | totam diem |
| | | | | | Serenitas cum nubecu- |
| | | | | | lis |

Ephemeris Barometrico-meteorologica.

35

J U N I U S.

J U L I U S.

Dies | Hora | Vent. | Th. | Bar. | Tempestas.

Dies | Hora | Vent. | Th. | Bar. | Tempestas.

| | | | | | |
|------|-------|-------|----|-----|-------------------------|
| | I | | 20 | 44 | lis mixta |
| | 7 | S.W. | 26 | 17 | meridies anxium æ- |
| | | | | | stium produxit |
| | | | | | nubilum crassum cœ- |
| | | | | | lum, sine pluv. ca- |
| 19 | h. 7. | | 25 | 18 | dente |
| | | | | | nubila solem impedi- |
| | | | | | bant non sine calore |
| | | | | | & pluvia cad. |
| | I | | 25 | 16- | meridies vacua pluvia |
| | 7 | | 29 | 17 | vespera & nox tota |
| | | | | | densa, cum tenui |
| | | | | | pluv. |
| 20 | h. 7. | N.W. | 36 | 17 | sol non conspicuus sed |
| | | | | | aër pluv. |
| | I | | 40 | 17 | qui ad vesper. contin. |
| | 7 | | 40 | 17 | pluvia cessat, & frig. |
| | | | | | percipitur |
| 21 | h. 7. | | 33 | 18 | ferenit. nubibus divul- |
| | | | | | sis hic ventus restit. |
| | I | | 30 | 17 | sol liberius adfulsit |
| | 7 | | 28 | 16 | & calor non medioc. |
| 22 | h. 7. | | 29 | 17 | eadem fere (attulit |
| | I | | 32 | 17 | & similis dies præce- |
| | | | | | denti |
| Q. 2 | 7 | | 40 | 18 | vespera frigid. & nocte |
| | | | | | vix stella apparuit |
| 23 | h. 7. | | 40 | 17 | rursus eadem & cœli |
| | I | | 29 | 15 | & tempestatis con- |
| | | | | | stitutio |
| | 7 | | 31 | 16 | nox tota nubila |
| 24 | h. 7. | | 32 | 17 | tota hac die & nocte |
| | I | | 31 | 16- | sol calidus cum plu- |
| | 7 | | 33 | 17- | via alternabat |
| 25 | h. 7. | W.S.W | 32 | 16 | ferenit. non sine atris |
| | | | | | nubibus |
| | I. | | 32 | 15 | hanc sequebantur tri- |
| | 7. | | 33 | 14 | stes pluviae die no- |
| | | | | | cteque |
| 26 | h. 7. | | 40 | 16 | objiciebantur sibi co- |
| | I. | | 31 | 17 | piosa nubila, absque |
| | | | | | pluvia tamen |
| | 7. | | 33 | 17- | inferena nox sequuta |
| 27 | h. 7. | N. W. | 37 | 21 | cœlo nubilo ventus sur- |
| | | | | | gebat |
| | I. | W | 36 | 20 | zephyrus nubes pelleb. |
| | 7. | N. W. | 37 | 21 | nocte cœlum fere oc- |
| | | | | | cultabatur |
| 28 | h. 7. | N. W. | 40 | 21 | tota hac die, quandoq; |
| | I | | 32 | 19 | sol liberius fulsit, |
| | 7 | | 31 | 18 | mox ventus nub. |
| 29 | h. 7. | | 34 | 20 | agens, isti objiciebat, |
| | | | | | ut præced. similis |
| | | | | | dies & nox fuit |
| | I | | 33 | 20 | similis rursus in omni- |
| | 7 | | 34 | 21 | bis præcedenti dies |
| 30 | h. 7 | | 36 | 21- | nubila hinc inde, sicut |
| | I | W | 31 | 19 | in prioribus diebus |
| | 7 | N. O. | 33 | 18- | agitantur, & noctem |
| | | | | | etiam inferenam ef- |
| | | | | | ficiunt. |

J U L I U S.

P.L.

| | | | | | |
|---|-------|-------|----|-----|-----------------------|
| I | h. 7 | N. O. | 33 | 18- | Nubes agitabat arge- |
| | I | | 31 | 18 | stes, in terra autem |
| | 6 | | 34 | 20 | cœcias spirabat, & |
| | | | | | æstus non adeo mo- |
| | | | | | dicus sentiebatur |
| 2 | h. 7. | N. W. | 33 | 18 | Nubes grand.æstum vi- |

| | | | | | |
|------|-------|-------|----|-----|---------------------------|
| | I | S. | 28 | 17 | deb. levare merid. ab |
| | 7 | S. W. | 30 | 16 | austro valde æstuosa |
| | | | | | facta cœlum recon- |
| | | | | | debatur à nubibus |
| 3 | h. 7. | | 28 | 18 | |
| | I | | 29 | 17 | Similis in omnibus dies |
| | | | | | priori |
| | 7 | N. W. | 32 | 19 | |
| 4 | h. 7. | N | 36 | 22 | ferenitas exquisita in |
| | | | | | cœlo |
| | I | S. W. | 38 | 16 | africus nubes objicieb. |
| | 7 | | 30 | 17 | nocte non prorsus fe- |
| | | | | | renæ fuer. stellæ |
| 5 | h. 7. | W | 33 | 19 | modica pluvia visa fuit |
| | I | S. | 28 | 17 | solem restit. non tamen |
| | | | | | sine nubib. auster |
| | 7 | W | 31 | 18 | ferenitas melior quam |
| | | | | | prior nocte |
| 6 | h. 7. | O. | 32 | 19 | tota hæc dies & nox |
| | I | | 27 | 17 | fuit clarissima ferme |
| | 7 | | 26 | 16 | sine nubibus, & cum |
| | | | | | æstu satis gravi |
| 7 | h. 7 | N. W. | 32 | 19 | Tota hac die sol cali- |
| | I | | 26 | 16- | diss. mox fulsit, mox |
| | | | | | cessavit, nubibus ob- |
| | | | | | jectis. |
| | 7 | N. W. | 30 | 16 | Eurus serenitatem e- |
| 8 | h. 7 | O. | 25 | 17 | gregiam attulit, quæ |
| | I | | 26 | 16 | per diem & noctem |
| | 7 | | 22 | 14 | duravit, non sine ca- |
| | | | | | lore, qui tamen ho- |
| | | | | | ris antemerid. erat |
| | | | | | mitior |
| 9 | h. 7 | | 24 | 15 | Mane serenum |
| | I | S. W. | 21 | 13 | meridie africanus nubes |
| | | | | | adfer. cum æstu maj. |
| | 7 | W | 33 | 15 | zephyrus pluvias desi- |
| | | | | | deratiff. sparg. |
| 10 | h. 7 | N. W. | 31 | 19 | ferenitas pluvias diffi- |
| | | | | | patis rediit |
| | I | | 28 | 17- | post meridiem pergra- |
| | | | | | vis æstus adfligeb. |
| | 7 | | 24 | 20 | nox fuit serena |
| 11 | h. 7 | N. | 21 | 22 | mane serenum |
| | I | O. | 18 | 19 | eurus & serenitatem & |
| | 7 | | 22 | 20 | æstum continuavit, |
| | | | | | noctemque seren. |
| | | | | | reddidit. |
| 12 | h. 7 | N. O. | 26 | 20 | ferenitas sine nubibus |
| | | | | | frigidiuscula |
| | I | | 20 | 15 | meridies & nox fere- |
| | 7 | | 21 | 18- | na, non tamen sine |
| | | | | | nubibus & anxio |
| | | | | | æstu |
| 13 | h. 7 | | 18 | 17 | æstus gravis cum fere- |
| | I | S. W. | 14 | 12 | nit. egregia, quæ ta- |
| | 7 | O. | 16 | 12 | men post merid. ab |
| | | | | | africo nubilus tur- |
| | | | | | batur, & vesp. ac no- |
| | | | | | ctem nub. |
| 14 | h. 7 | | 14 | 16 | Africus serenit. variant. |
| | I | S. W. | 16 | 14 | & intersp. rarioribus |
| | 7 | | 14 | 13 | nubibus cum æstu |
| | | | | | perquam molesto ad- |
| | | | | | ducebat |
| 15 | h. 7 | | 26 | 13 | aër valde frigid. & cœ- |
| | | | | | lum nubilos. |
| | I | W | 16 | 14 | nullus sol, sed pluviae |
| N. L | h. 7 | N. W. | 21 | 16 | perpetuæ per totam |
| | | | | | fere noctem |
| | | | | | nubi- |

| J U L I U S. | | | | | A G O S T U S. | | | | | | | |
|--------------|-------|-------|-----|------|---------------------------|-------|-------|-------|-----|------|-------------------------|--------------------------|
| Dies | Hora | Vent. | Th. | Bar. | Tempestas. | Dies | Hora | Vent. | Th. | Bar. | Tempestas. | |
| 16 | h. 7. | | 22 | 17 | nubilum coelum adhuc | 1 | h. 7. | N. W. | 26 | 18 | Nubes grand. folis ful- | |
| | I | N. W. | 46 | 17 | meridies valde frigida | | I | | | 35 | 18 | gorem impediēb. |
| | 7 | N. O. | 23 | 17 | vespera cum magno | | | | | | | meridies non sine ca- |
| | | | | | calore | | | | | | | lore |
| 17 | h. 7. | O | 24 | 18 | ferenitas, pura sine nu- | | 7 | W | 37 | 16 | | circa noctem coelum |
| | I | S. O | 22 | 17- | bibus | | | | | | | nub. cum aëre hum. |
| | | | | | miscēb. nubes, quæ ta- | 2 | h. 7. | W S W | 36 | 15 | | tota hæc dies minus |
| | | | | | men levab. æstūm | | I | | | 37 | 14 | serena, sed magis |
| | 7 | W | 25 | 19 | tota nox nubibus obsc. | | 7 | | | 37 | 14 | nubila fuit, coelo |
| 18 | h. 7. | N. W. | 27 | 22 | ferenitas non continua | | | | | | | minante & parum |
| | I | | 26 | 21 | coelum nubilum | | | | | | | etiam spargente plu- |
| | 7 | | 27 | 22 | quod vesperi & noctu | | | | | | | vias |
| | | | | | etiam latuit | 3 | h. 7. | | | 34 | 15 | Adfulsit sol cum ca- |
| 19 | h. 7. | W | 29 | 24 | zephyrus serenitat. non | | I | | | 38 | 14 | lore immoderato |
| | I | S. W. | 26 | 20 | multum turb. | | 7 | | | 40 | 14 | meridies & vespera |
| | | | | | meridie nubes æstūm | | | | | | | transiit cum nubibus |
| | 7 | N. W. | 24 | 21 | intensum reddeb. | | | | | | | pluviis, nec non to- |
| 20 | h. 7. | | 46 | 21 | ferenitas à coro reflit. | | | | | | | nitr. audiebantur |
| | I | S. O. | 29 | 17 | mane subfrigidum | 4 | h. 7. | | | 38 | 14 | Tempestas rursus hu- |
| | 7 | | 19 | 15 | meridies inferena | | I | | | 36 | 14 | mida, nubila, plu- |
| | | | | | nox grata & parum se- | | 7 | | | 37 | 14 | viosa fuit, & solis |
| | | | | | rena | | | | | | | splendor minus fre- |
| 21 | h. 7. | | 11 | 16- | æstus pergit fatis sever. | | | | | | | quens |
| | I | | 16 | 13 | pomeridianis horis nu- | 5 | h. 7. | N. W. | 35 | 18 | | hac die rursus serenit. |
| | 7 | | 16 | 10 | bes accedentes tem- | | I | | | 37 | 17 | crassis nubibus im- |
| | | | | | perabant calor. | | | | | | | pediebatur |
| 22 | h. 7. | W.S.W | 18 | 14 | tota hæc dies nubilosa | | 7 | | | 38 | 18 | Vespera imbricosa fuit |
| | I | N.N.W | 10 | 15 | cum pluvia tenui, | 6 | h. 7. | W S W | 36 | 19 | | Amœna serenitas |
| | 7 | | 17 | 16 | nec non nox mixta | | I | | | 37 | 19 | Solem nubes prorsus |
| | | | | | fuit, non tamen de- | | | | | | | occultabant |
| N.L. | | | | | ficiente calore | | 7 | | | 36 | 18- | nocte coelum minus |
| 23 | h. 7. | W.N.W | 46 | 17 | mane subfrigidum | | | | | | | perspicuum |
| | I | W S W | 10 | 15 | meridie rediit serenit. | 7 | h. 7. | N. W. | 46 | 20 | | ferenitas nubibus desti- |
| | 7 | | 11 | 16 | & ipse calor, vento | | I | S. W. | 45 | 17 | | tuta |
| | | | | | nubes agitante | | | | | | | meridies parum nu- |
| 24 | h. 7. | W.N.W | 16 | 19 | mane nubilorum & | | | | | | | bila |
| | I | | 14 | 18 | frigoris non expers | | | | | | | idem coeli status |
| | 7 | | 16 | 19 | horis pomeridianis se- | 8 | h. 7. | | | 45 | 17 | hoc die serenitas fer- |
| | | | | | renitas calida nubi- | | I | | | 45 | 16 | me perfecta cum |
| | | | | | bis intermixta | | 7 | | | 45 | 16 | pergravi æstu jun- |
| 25 | h. 7. | | 14 | 19 | eadem tempestas qua- | | | | | | | cta fuit |
| | I | N. W. | 12 | 18 | lis præced. die. | 9 | h. 7. | N. W. | 48 | 19 | | mane nubes crassiores |
| | 7 | S. W. | 10 | 13 | eadem | | I | | | 45 | 16 | in coelum adductæ, |
| | | | | | | | | | | | | quæ ferme exspira- |
| 26 | h. 7. | | 19 | 16 | ferenitas egregia sine | | | | | | | bant meridie |
| | I | | 16 | 14 | nubibus | | 7 | | | 47 | 18 | coelum perspicuum & |
| | 7 | | 16 | 14 | nubes accedebant | | | | | | | gratum apparuit |
| | | | | | vespera paulo frigidior, | 10 | h. 7. | N. | 50 | 21 | | mane aër refrigeratus, |
| | | | | | nubilaque | | | | | | | serenus tamen |
| 27 | h. 7. | N | 16 | 19 | mane serenum gratum | | I | S. W. | 46 | 17 | | Africus nubes frequ. |
| | I | W.S.W | 12 | 17 | calor major cum fere- | | | | | | | coelo agitabat |
| | | | | | nitare moderata | | 7 | | | 35 | 15 | ferenitas restituebatur |
| | 7 | | 17 | 16 | nocte stellæ minus con- | | | | | | | & nocte clara |
| | | | | | spiciuæ | 11 | h. 7 | | | 36 | 17 | ferenitas sequitur, non |
| 28 | h. 7. | | 24 | 16 | mane coelum nubibus | | I | | | 36 | 15 | tamen privata nu- |
| | | | | | occultatum | | 7 | | | 36 | 13 | bibus & æstu anxio |
| | I | W.S.W | 20 | 16 | accedebant imbres, qui | 12 | h. 7 | O | 35 | 15 | | mane serenum |
| | 7 | | 21 | 17 | ad noctem usque du- | | I | W | 34 | 13 | | meridies nubila, sole |
| | | | | | rabant | | | | | | | prorsus non fulg. |
| 29 | h. 7. | N. W. | 25 | 19 | coelum rursus inclares- | | 7 | S. W. | 34 | 13 | | sequebantur tonitrua |
| | I | W | 28 | 18 | cebat | | | | | | | pluviosa |
| | 7 | | | | serenit. cum pluviosa | 13 | h. 7 | | | 35 | 16 | Serenitas ferme pura, |
| | | | | | asperg. altern. | | I | | | 24 | 15 | sole fulgente liberi- |
| P. L. | | | 20 | 18 | vespera & nox clarior. | | | | | | | us, adfuit per totum |
| 30 | h. 7. | W.S.W | 22 | 17 | sol rursus latuit usque | | | | | | | diem |
| | I | | 21 | 16 | ad vesperam | N. L. | 7 | | | 28 | 16- | mane paulo frigidiusc. |
| | 7 | | 20 | 15 | incipit serenari coelum, | 14 | h. 7. | W | 40 | 20 | | indicabat pluv. alibi |
| | | | | | non in totum | | | | | | | factas, & sol. parc. |
| 31 | h. 7. | | 29 | 14 | hac die & nocte nubes | | I | | | | | visus est |
| | I | | 20 | 14 | multæ in coelo con- | | | S. W. | 37 | 18- | | Sol viuis æstū augebat |
| | 7 | | 22 | 15 | spiciuæ. | | | | | | | nox |

Ephemeris Barometrico-meteorologica.

37

AUGUSTUS.

Dies | Hora | Vent. | Th. | Bar. | Tempestas.

SEPTEMBER.

Dies | Hora | Vent. | Th. | Bar. | Tempestas.

| | | | | | |
|-------|-------|-------|----|-----|---|
| | 7 | | 37 | 16 | nox minus pura & ferena fuit |
| 15 | h. 7 | W | 35 | 14 | parum pluebat coelo |
| | 1 | | 35 | 14 | obscurato ad occasum ferme solis & aestus plane cessavit |
| | 7 | WNW | 38 | 15 | |
| 16 | h. 7 | WNW | 40 | 19 | sol per vices fulgebat, & nubes ventus frigidus valde agitab. |
| | 1 | | 38 | 19 | |
| | 7 | | 35 | 20 | nocte stellæ apparuerunt |
| 17 | h. 7 | | 44 | 23 | serenitas egregia, frigidiuscula |
| | 1 | WNW | 43 | 21- | sol creber & calid. non tamen sine nubibus |
| | 7 | | 43 | 21 | obscuratum coelum |
| 18 | h. 7 | | 43 | 20 | pluvia delapsa |
| | 7 | S.O. | 41 | 19 | serenitas cum aestu renox fiderea (diit |
| 19 | h. 7 | O. | 45 | 21 | ferena amoena, aestuosa dies cum nocte fuit |
| | 1 | | 40 | 15- | |
| | 7 | | 39 | 17- | |
| 20 | h. 7 | WNW | 42 | 20- | Nubes grand. in coelo visabantur |
| Q. 2. | 1 | O.N.O | 43 | 18- | serenitas mediocris |
| | 7 | | 43 | 18 | permanet |
| 21 | h. 7 | | 44 | 20 | serenitas hac die fuit non perpetua, sed nubibus interpolata, non tamen anxie calida. |
| | 1 | O. | 36 | 17 | |
| | 7 | | 36 | 17 | |
| 22 | h. 7 | | 36 | 18- | Parciores hac die nubes tanto favorem reddiderunt aestum |
| | 1 | | 35 | 15 | |
| 23 | 7 | S.O. | 36 | 15 | Aestus anxius hoc die & pergravis, modica serenitate pergente |
| | h. 7 | S.W. | 37 | 16- | |
| | 1 | | 39 | 15 | |
| | 7 | S.O. | 45 | 15- | Vespera nubila cum frigore modico. |
| 24 | h. 7 | N.O. | 40 | 17 | Nubes hoc die frequentiores temperatum efficiebant aërem |
| | 1 | W | 41 | 17 | |
| | 7 | S.W. | 42 | 17 | |
| 25 | h. 7 | W | 43 | 16 | Coelum nubilosum minabatur & spargebat etiam nocte tenuem pluviolam. |
| | 1 | | 42 | 15 | |
| | 7 | | 43 | 15 | |
| 26 | h. 7. | WNW | 41 | 19 | Serenitas intercepta frequentius nubibus, hinc aestus fuit moderatus. |
| | 1 | | 41 | 17 | |
| | 7 | | 40 | 17- | |
| 27 | h. 7. | | 44 | 20 | Alfiosum mane |
| | 1 | | 41 | 20 | Ferme idem aëris & cæli status |
| | 7 | W | 43 | 20 | Coelum pluviam modicam frigidul. sparsit mane algidum triste & nubilum coelum pluviolum |
| 28 | h. 7. | | 44 | 19 | perfrigida tempestas |
| | 1 | | 45 | 19 | |
| | 7 | | 46 | 21 | |
| 29 | h. 7 | | 55 | 23 | Tota dies hæc alfiosa & nubila fuit, sine pluviis tamen |
| | 1 | | 43 | 22 | |
| | 7 | | 44 | 23 | |
| 30 | h. 7. | | 43 | 22 | Idem ferme cæli status, sicuti hesterno die, Lipsiæ autem |
| | 1 | S.W. | 43 | 21 | |
| | 7 | | 44 | 21 | |

| | | | | | |
|------------|-------|-------|----|-----|--|
| | | | | | pluvia. |
| 31 | h. 7. | W | 44 | 21 | Sol & pluvia alternatim se fitebant, vento flante frigido. |
| | 1 | | 45 | 21 | |
| | 7 | N. W. | 45 | 22 | |
| SEPTEMBER. | | | | | |
| 1 | h. 7 | N. W. | 55 | 23 | Serenum ac sudum coelum |
| | 1 | S. W | 53 | 21 | nubilum ac tepidum |
| | 7 | W | 53 | 21 | nox pluviosa |
| 2 | h. 7 | N. W. | 50 | 22 | amoena serenitas sine nubibus |
| | 1 | | 53 | 21- | circa meridiem & vesperam modica |
| | 7 | N | 54 | 22 | nubes fere nullæ coelum occuparunt. |
| 3 | h. 7 | S.O. | 55 | 23 | hinc aestus non mediocris per hunc diem animadversus |
| | 1 | | 53 | 20- | |
| | 7 | | 54 | 20 | |
| 4 | h. 7. | | 54 | 10 | ferena amenitas perseverat, & calor hesterno die major, nocte quoque existente clara. |
| | 1 | | 53 | 19- | |
| | 1 | | 54 | 19 | |
| 5 | h. 7 | | 54 | 19 | Idem cæli & serenitatis & caloris status |
| | | | 54 | 16 | |
| Q. 4 | 7 | | 51 | 16 | |
| 6 | h. 7 | | 52 | 17- | Coelum rursus serenissimum & calidissimum die nocteque |
| | 1 | S.O. | 50 | 14 | |
| | 7 | | 52 | 15 | |
| 7 | h. 7 | N.O. | 55 | 19 | Idem suavissimus cæli status. |
| | 1 | | 51 | 16 | |
| | 7 | | 52 | 17 | Orieb. nubes montos. |
| 8 | h. 7 | N. W. | 52 | 19 | Nubes frequentissimæ coelo adfuerunt, hinc aestum temperarunt, Constantinop. fulmen templum incendit |
| | 1 | | 54 | 17 | |
| | 7 | W | 53 | 18- | |
| | | N. W. | | | |
| 9 | h. 7 | | 55 | 21 | Serenitas fere sine nubibus |
| | 1 | | 52 | 19 | |
| | 7 | | 53 | 18- | |
| 10 | h. 7 | | 54 | 20- | Serenitatem interpolant nubes prægrandes & frequent. |
| | 1 | | 52 | 19 | |
| | 7 | | 53 | 20 | |
| 11 | h. 7 | O | 53 | 21 | Sol & aestus purus ac sincerus, temperatus tamen. |
| | 1 | | 52 | 21 | |
| | 7 | | 53 | 22 | |
| 12 | h. 7 | S. | 52 | 14 | Sudum & serenum coelum. |
| | | | | | |
| 13 | h. 7 | W S W | 55 | 17 | Crebras nubes hic ventus tota die advolvit, Lipsiæ hora tertia & tota nocte pluvia sparsa sunt, & Misn. tonitrua procellosa. |
| N.L. | 1 | | 54 | 15 | |
| | 7 | | 54 | 13- | |
| 14 | h. 7 | | 55 | 15 | Frigidus aër |
| | 1 | W | 55 | 17 | ventus validus surg. Lipsiæ pluvia |
| | 7 | | 57 | 19 | Serenitas cum nubibus & frigido aëre |
| 15 | h. 7 | | 60 | 21 | Nubilum, sed satis frigidulum |
| | 1 | W.S.W | 57 | 20- | serenitas, nubilosa tamen, cum calore restituitur. |
| | 7 | | 59 | 21 | |
| 16 | h. 7 | S.W. | 60 | 23 | serenitas nubibus per- |

S E P T E M B E R.

O C T O B E R.

Dies | Hora | Vent. | Th. | Bar. | Tempestas.

Dies | Hora | Vent. | Th. | Bar. | Tempestas.

| | | | | | |
|-------|-------|-------|----|----|---|
| | I | S | 57 | 21 | mixta frigida coelum plane nubilum calidius |
| | 7 | S | 57 | 21 | stellæ absconditæ |
| 17 | h. 7. | S. O. | 56 | 21 | ferenitas cum grato te- pore |
| | I | S. W. | 49 | 18 | eadem |
| | 7 | | 47 | 18 | vespera nubila cum pluvia, quæ Lipsiæ non fuit |
| 18 | h. 7. | | 46 | 18 | ferenitas maximam partem pura cum æstu mediocri |
| | I | | 40 | 16 | continuabat |
| | 7 | | 50 | 15 | circa VI. & noctem coelum nubilum |
| 19 | h. 7. | S. W. | 57 | 18 | frigidulus aër, sole minus claro |
| | I | | 56 | 17 | circa meridiem calor major |
| N. L. | 7 | W | 57 | 17 | Nox frigida ventosa, nec pluviola ca- dens |
| 20 | h. 7. | | 59 | 16 | dies hæc nubila frigi- dula fuit, & nocte |
| | I | | 57 | 16 | quoque stellæ non conspiciuæ |
| | 7 | | 50 | 15 | |
| 21 | h. 7. | | 52 | 21 | frigidus aër, nubilo- sum coelum |
| | I | | 51 | 20 | tenebricosa nox |
| | 7 | N. W. | 53 | 21 | nubilum cum pluvia |
| 22 | h. 7. | W | 52 | 21 | frigidulum |
| | I | S. W. | 51 | 18 | tepor non modicus |
| | 7 | W | 52 | 20 | pluviæ desinunt |
| 23 | h. 7. | N. W. | 55 | 24 | ferenitas nubilosa, per- frig. mane existit, |
| | I | | 53 | 23 | & perseverat per ceteras horas. Li- psiæ autem tota dies fuit pluviosa |
| | 7 | | 55 | 25 | |
| 24 | h. 7. | | 56 | 25 | sol desideret liberius adfulsit cum frigore |
| | I | | 53 | 24 | fatis sensibili |
| | 7 | | 54 | 23 | triste coelum & alios. |
| 25 | h. 7. | | 51 | 23 | per totum diem |
| 26 | h. 7. | | 52 | 24 | continuae nubes frigi- dæ sine sole |
| 27 | h. 7. | | 53 | 21 | sol adfulsit suaviss. & calidus |
| | I | | 50 | 20 | reliqua dies nubila & tepida |
| | 7 | | 59 | 20 | |
| 28 | h. 7. | | 50 | 19 | nubilum cum grato te- pore |
| | I | | 49 | 19 | Idem & africanus una spirabat |
| | 7 | | 50 | 19 | coelum mox nubilum, mox serenum |
| 29 | h. 7. | N. W. | 50 | 20 | ferenitas cum nubibus fatis calida, africo nubes simul agente |
| | I | N. W. | 59 | 20 | calor major |
| | 7 | N. W. | 50 | 20 | nox clara, postea ne- bulosa |
| 30 | h. 7. | S. O. | 50 | 12 | ferenitas insignis cum calore |
| | I | N. O. | 49 | 21 | temperabatur nubibus |
| | 7 | | 51 | 22 | nox rursus pulchre fe- rena. |

| | | | | | |
|-------|-------|----------|----|----|--|
| 1 | h. 7. | O. | 52 | 22 | Sol fere sine impedi- mento lucet per to- tum diem |
| | I | | 51 | 21 | |
| | 7 | | 51 | 20 | nox non adeo fuit fe- rena |
| 2 | h. 7. | | 52 | 21 | serenatum rursus cœ- lum frigidulum |
| | I | | 49 | 19 | nubila miscebantur, quæ nec noctem de- ferebant |
| | 7 | | 50 | 15 | |
| 3 | h. 7. | | 39 | 18 | nubila coelum obside- bant, nec tamen om- nem serenitat. & ca- lorem aufer. |
| | I | | 46 | 16 | |
| | 9 | | 47 | 17 | meridies & vespera multum calida |
| 4 | h. 7. | S. O. | 46 | 16 | ferenitas rursus fati- calida cum nubib. |
| | I | S. W. | 45 | 15 | coelum nubilum te- nui cum adspergi- ne |
| Q. 2. | 9 | S. O. | 45 | 16 | nubibus ferme omni- bus divulsis serenit. redit |
| 5 | h. 7. | | 50 | 16 | nubes paucae in cœlo visæ |
| | I | S. S. O. | 40 | 14 | æstus gravis animad- vertebatur |
| | 7 | S. O. | 40 | 15 | claritas noctis |
| 6 | h. 7. | S. W. | 45 | 17 | ferenitas frigidula |
| | I | S. W. | 49 | 17 | calor insignis cum |
| | 7 | | 49 | 18 | vento leni inter- mixto |
| 7 | h. 7. | W | 59 | 20 | ventus surgebat |
| | I | | 55 | 19 | qui erat jam validior cum magno æstu |
| 8 | 9 | | 55 | 20 | nox fere clara |
| | h. 7. | S. O. | 52 | 20 | solis splendor parcius, æstus levior & ven- tus sentiebatur |
| | 10 | W | 40 | 19 | vesperi nubilum cœ- lum seq. fulgure |
| 9 | h. 7. | W | 40 | 19 | Pluvia necessaria ad- huc durat |
| | I | | 40 | 19 | sol alluc. quæ postea nubibus imp. |
| | 9 | | 49 | 19 | nox caligine & nubi- bus plena |
| 10 | h. 7. | | 48 | 18 | Die hac & nocte cœ- lum prorsus triste, nubilum ac frigidu- lum fuit |
| | I | | 47 | 17 | |
| | 7 | | 46 | 17 | |
| 11 | h. 7. | N. N. O. | 47 | 17 | Primis horis nubila, reliquo diei tempo- re sol restituebatur & fati per noctem etiam frigidulus aër fuit |
| | I | | 45 | 18 | |
| N. L. | 9 | N. O. | 45 | 19 | |
| 12 | h. 7. | W. S. W. | 45 | 21 | Pluvia tenuis frigidula apparebat |
| | I | S. W. | 43 | 15 | sol inter nubes efful- sit sub calore |
| | 11 | W | 43 | 17 | nubes productæ cum pluvia |
| 13 | h. 7. | | 43 | 17 | coelum nubilum sine pluvia |
| | I | | 43 | 17 | pluviam meridies af- ferebat |
| 14 | 10 | N. W. | 46 | 21 | ferenitas & ventus fa- tis frigidus |

hac

Ephemeris Barometrico-meteorologica.

39

OCTOBER.

Dies | Hora | Vent. | Th. | Bar. | Tempestas.

| | | | | | |
|-------|-------|----------|----|----|---|
| | h. 7. | | 46 | 21 | hac die ferenitas sæpe |
| | I | S. W. | 44 | 20 | iterumque nubibus |
| | | | | | turbata |
| | 10 | W | 42 | 16 | atra nox |
| 15 | h. 7. | | 40 | 14 | coelum pluviosum |
| | I | | 43 | 15 | nubila, pluvia, & ferenitas alternabant |
| | 7 | N. W. | 43 | 15 | nox clarior |
| 16 | h. 7. | | 50 | 20 | tota die multæ nubes |
| | I | | 50 | 20 | folem sæpius tegebant, quibus tamen sol interlucebat, nocte existente obscura |
| | 7 | | 50 | 20 | |
| 17 | h. 7. | N. S. | 50 | 21 | Serenitas cum acri frigore, sine glacie |
| | I | S. W. | 50 | 21 | nubes admiscebantur |
| | II | | 50 | 18 | coelum plane obscurum fuit |
| 18 | h. 7. | W. S. W. | 51 | 15 | tota dies ferme pluviosa & algida fuit |
| 19 | h. 7. | | 52 | 14 | tepida & nubila dies |
| Q. 2. | | | 52 | 14 | |
| 20 | h. 7. | O. S. W. | 59 | 18 | ferenitas euri pruinas & glaciem attulit |
| | 12 | O. N. O. | 48 | 18 | grata apricitas |
| | 7 | O. | 50 | 18 | stellæ non visæ. Lipf. nox tota imbric. fuit |
| 21 | h. 7. | | 51 | 15 | pauca pluvia observabatur |
| | 12 | | 49 | 24 | nubila dies & nox |
| | 6 | | 50 | 24 | |
| 22 | h. 6. | N. W. | 50 | 24 | pluvia cœlo delapsa |
| | 12 | N. N. W. | 49 | 23 | coelum nubibus occultatum |
| | 6 | | 48 | 23 | etiam de nocte quæ Lipf. pluviosa fuit |
| 23 | h. 6. | N. O. | 48 | 21 | tota dies hæc pluviosa & nubilosa fuit, |
| | 12 | O. N. O. | 49 | 23 | & nubilosa fuit, |
| | 6 | | 50 | 24 | etiam per ipsam noctem |
| 24 | h. 6. | | 52 | 26 | per diem & noctem |
| | II | | 50 | 27 | coelum obscuratum |
| | 6 | O. | 50 | 27 | fuit nubibus, nulla tamen decedente pluvia |
| 25 | h. 6. | | 51 | 28 | continuavit etiam hoc |
| | 12 | | 50 | 25 | die nubilosum & |
| | 6 | | 50 | 27 | humidum tempus |
| 26 | h. 7. | | 50 | 27 | tristis rursus cœli facies, nec pluvia, nec |
| | I | | 49 | 26 | frigore destituta |
| P. L. | 6 | | 49 | 25 | nebula animadversa |
| 27 | h. 7 | W. S. W. | 47 | 24 | reliquis horis sol semper latuit |
| | 12 | | 46 | 24 | |
| | 6 | | 47 | 24 | plaga occidental. ferenari incipit |
| 28 | h. 7. | W. S. W. | 48 | 25 | nebula, quæ etiam crassissima fuit Lipf. æ |
| | I | | 48 | 25 | aprica & grata ferenitas per reliquum |
| | 7 | | 48 | 24 | diem & noctem |
| 29 | h. 7. | N. | 48 | 25 | nebula rursus conspicua |
| | 12 | | 50 | 25 | reliquis horis sol vix apparuit. Hac die |
| | 7 | | 49 | 25 | grandinosa procella circa Angliam |
| 30 | h. 7. | S. O. | 51 | 25 | rursus nebul. advertitur |

Frid. Hoffmanni Oper. Tom. V.

OCTOBER.

Dies | Hora | Vent. | Th. | Bar. | Tempestas.

| | | | | | |
|----|-------|-------|----|----|---------------------------------------|
| | 12 | | 49 | 24 | reliquo tempore nubi- |
| | 7 | S. O. | 50 | 24 | bilo & pluvioso existente talis etiam |
| | | | | | fuit nox |
| 31 | h. 7. | S. O. | 50 | 25 | tota hæc dies nubila, |
| | 8 | O. | 51 | 26 | humida & frigida fuit. |

NOVEMBER.

| | | | | | |
|-------|-------|----------|----|----|--|
| 1 | h. 7. | O. | 52 | 27 | Coelum obscurum & perfrigidum |
| | 12 | | 52 | 27 | |
| | 7 | | 52 | 27 | ferenitas in cœlo visitur |
| 2 | h. 7. | S. O. | 52 | 25 | sole perpaucum tempus frui licuit |
| | 12 | | 52 | 25 | reliqua dies & nox obscura, caliginosa & nubila fuit |
| | 7 | | 52 | 24 | |
| 3 | h. 7. | S. W. | 41 | 24 | glaciale mane repertum |
| | 12 | | 40 | 25 | grata apricitas minus frigida visa |
| Q. 2 | 7 | | 49 | 23 | nox caliginosa |
| 4 | h. 7. | | 47 | 20 | coelum nubilum, obscurum, pluvia intermixta tota die |
| | 12 | | 46 | 19 | noctequæ fuit |
| | 7 | | 45 | 19 | |
| 5 | h. 7. | N. W. | 46 | 20 | similis ferme in omnibus dies |
| | 12 | | 44 | 14 | |
| | 7 | | 45 | 19 | dies hæc ante meridiem nubila |
| 6 | h. 7. | | 42 | 17 | post meridiem pluviosa & ventosa fuit |
| | 12 | S. O. | 41 | 15 | sol nubibus calide interluxit |
| | 7 | | 40 | 13 | |
| 7 | h. 7. | | 41 | 16 | amœnus calor |
| | 12 | | 49 | 14 | circa vesperam & nocte nubila & pluv. |
| | 7 | | 48 | 15 | |
| 8 | h. 7. | | 41 | 17 | sol tota hac die, nec stella nocte apparuit, sed nubilum perpetuum |
| | 12 | S. | 41 | 16 | |
| | 7 | | 41 | 17 | |
| 9 | h. 7 | O. S. O. | 42 | 17 | nubilum & aliosum coelum |
| | 12 | | 41 | 16 | sol effulfit |
| N. L. | 7 | O. S. O. | 42 | 16 | Caligo & pluvia frequata |
| | | | | | |
| 10 | h. 7. | S. W | 46 | 20 | sol modicus |
| | 12 | | 45 | 19 | obscurum coelum |
| | 7 | | 46 | 20 | copiosa cum squalore pluvia |
| 11 | h. 7 | W. S. W. | 49 | 23 | nubilum adhuc |
| | 12 | | 49 | 25 | sol quandoque visus |
| | 7 | | 51 | 27 | pluvia vespert. & nocturna |
| 12 | h. 7 | | 51 | 27 | triste rursus & nubilum coelum |
| | 12 | | 49 | 26 | sol emicuit |
| | 7 | | 51 | 26 | caligo secuta |
| 13 | h. 7 | W | 54 | 30 | nubilum cum nebula pruinoso |
| | 12 | | 54 | 31 | sol per vices fulsit |
| | 7 | | 55 | 31 | ferenitas frigida stellas fecit apparentes |
| 14 | h. 7. | | 56 | 31 | nebula rursus crassa, cum frig. glaciali |
| | 12 | | 55 | 30 | reliquo diei tempore ex cœlo tristi nix humida decidebat |
| | | | 55 | 29 | |
| 15 | h. 7. | S. W. | 55 | 29 | nubibus obvolutum coelum |

D 2

Ephemeris Barometrico - meteorologica.

N O V E M B E R.

Dies | Hora | Vent. | Th. | Bar. | Tempestas.

| | | | | | |
|-------|-------|-------|----|----|--|
| | 12 | | 53 | 25 | coelum |
| | 7 | S. O | 55 | 25 | sol quandoque fulsit |
| 16 | h. 7 | | 55 | 30 | ferenitas apparuit |
| | | | | | mane glaciale & ferenum |
| | 12 | N. O. | 57 | 31 | continuat |
| | 7 | N | 58 | 31 | coelum nubilosum |
| 17 | h. 7 | | 59 | 32 | per totam hanc diem |
| | 12 | N. O. | 59 | 32 | obscuritas frigida |
| | 7 | | 59 | 33 | percipiebatur |
| 18 | h. 7 | S. O. | 58 | 32 | horis antemeridianis |
| | 12 | | 57 | 37 | sol quandoque fulsit cum frigore notabili |
| | 7 | | 57 | 31 | ferenum comparuit coelum |
| 19 | h. 7 | S. W. | 58 | 30 | nubilum & frigidum |
| | 12 | | 56 | 28 | interluxit sol |
| | 7 | S. W. | 55 | 27 | nox atra & obscura |
| 20 | h. 7 | | 43 | 24 | nubes abscondebant coelum cum frig. |
| | 12 | | 41 | 25 | hoc remittebat |
| | 7 | | 49 | 15 | ventus surgebat cum impetu |
| 21 | h. 7 | | 49 | 16 | nondum coelum nubibus, nec aer vento liber |
| | 12 | | 49 | 19 | solem per vices vidimus |
| | 7 | | 50 | 20 | omnia rursus nubila |
| 22 | h. 7 | | 51 | 19 | tota hac dies rursus |
| | 12 | | 59 | 20 | nubila & caliginosa |
| | 7 | | 50 | 22 | fuit |
| 23 | h. 7 | W.S.W | 46 | 15 | coelum nubilum per totam diem, horis antemerid. ventum & pluviam emittebat, quæ circa vesperam cessab. |
| | 12 | | 45 | 15 | |
| | 7 | | 47 | 16 | |
| 24 | h. 7 | | 52 | 14 | antemeridianis horis nulla pluvia |
| | 12 | | 42 | 14 | fed pomeridianis larga |
| | 7 | | 41 | 14 | |
| 25 | h. 7 | | 46 | 16 | Nubilum coelum sole interfulgente |
| | 12 | | 46 | 16 | pomeridie subsequebatur grata ferenit. |
| P. L. | 7 | S. O. | 46 | 16 | |
| 26 | h. 7 | | 47 | 17 | mane glaciale & pruinofum |
| | 12 | | 46 | 16 | ferenitas cum glacie subsistente |
| | 7 | | 46 | 14 | nubilum coelum intercurrente luna |
| 27 | h. 7. | | 46 | 14 | coelum subferenum & frigidulum |
| | 12 | W.S.W | 46 | 15 | sol serenus frigus mitigabat |
| | 7 | | 46 | 15 | nubilum coelum intercurrente luna |
| 28 | h. 7. | S. O. | 47 | 16 | tota hac dies rursus nubila, frigida & obscura fuit |
| | 12 | | 48 | 16 | |
| | 7 | | 48 | 16 | de nocte nix decidit non diu durans |
| 29 | h. 7. | N. W. | 49 | 18 | nebula densa conspiciabatur |
| | 12 | | 49 | 18 | meridies solem rursus detegebat |
| | 7 | | 51 | 20 | de nocte pauca nix delapsa |

N O V E M B E R.

Dies | Hora | Vent. | Th. | Bar. | Tempestas.

| | | | | | |
|----|------|-------|----|----|------------------------------|
| 30 | h. 7 | | 50 | 25 | mane nix flocculi volitabant |
| | 12 | N. W. | 50 | 26 | reliquum diei tempus |
| | 7 | N. O. | 50 | 27 | tenebris fuit obductum. |

D E C E M B E R.

| | | | | | |
|-------|-------|--------|----|----|---|
| 1 | h. 7 | N. O. | 40 | 25 | Dies obscura cum nive modica, circa meridiem cadente |
| | 12 | N | 49 | 27 | |
| | 7 | | 49 | 28 | nox nubila & glacialis |
| 2 | h. 7 | | 49 | 28 | nubila rursus |
| | 12 | O | 48 | 27 | solis radii per vices terram afficiebant |
| Q. 4 | 7 | | 49 | 27 | nox atra & nubila, Lipsiæ nix minuta |
| 3 | h. 7. | | 52 | 23 | tota hac dies nivosa |
| | 12 | O.N.O | 45 | 23 | fuit & frigida, sole minus claro |
| | 7 | | 46 | 23 | |
| 4 | h. 7. | | 49 | 24 | ferenum frigus cum paucis nubibus hac die fuit |
| | 12 | W | 48 | 28 | |
| | 7 | | 49 | 30 | coelum nocte latuit |
| 5 | h. 7 | W S W | 48 | 30 | tota dies nubila & obscura fuit, sine exquisito frigore |
| | 12 | | 46 | 30 | |
| 6 | h. 7 | | 47 | 29 | eadem tristis coeli facies, sicuti die hereterno |
| | 12 | | 48 | 25 | |
| | 7 | W | 49 | 28 | |
| 7 | h. 7 | W.S.W | 49 | 25 | obscura pluviosa & squalida tota dies |
| | 12 | | 48 | 26 | |
| | 7 | | 45 | 24 | eadem, sicuti antecedente die tempestas |
| 8 | h. 7 | | 44 | 24 | nubilum & obscurum rursus coelum |
| | 12 | | 43 | 23 | sol nubibus intermixtis |
| | 7 | WN W | 43 | 24 | sol penitus latet de nocte |
| 9 | h. 7 | | 44 | 24 | nubilum coelum cum aere frigido |
| | 12 | | 45 | 26 | |
| | 7 | | 45 | 27 | tepor |
| 10 | h. 7 | S. W. | 46 | 28 | pluvia magna |
| N. L. | 12 | S.S.W. | 45 | 28 | nubila & tepida dies |
| | 7 | W S W | 44 | 26 | sol quandoque interlucet |
| 11 | h. 7 | W | 43 | 24 | frigus intenditur, & pauciores nubes |
| | 12 | WN W | 42 | 24 | nox serena & frigida |
| | h. 8 | N.NW | 47 | 29 | mane glaciale cum tristi coelo |
| 12 | h. 9 | N. W. | 49 | 33 | turbidum & frigidum |
| | 6 | N. W. | 49 | 30 | mane |
| 13 | h. 6. | W.S.W | 49 | 27 | nix modica |
| | 12 | W.W. | 46 | 26 | pergit |
| | 6 | W S W | 46 | 25 | tristissima coeli facies |
| 15 | h. 7 | WNW | 47 | 25 | nix, quæ tamen mox solvitur |
| | 12 | | 46 | 25 | coelum de nocte absconditum |
| | 7 | | 47 | 25 | coelum nubibus tot. obduct. cum frig. intensione |
| 16 | h. 7 | S. O. | 47 | 25 | ferenitas egregia |
| | 12 | N.NW | 47 | 25 | frigus |
| | 7 | N. O. | 48 | 25 | glacialis nox |
| 17 | h. 7 | | 48 | 26 | |

frigus

D E C E M B E R.

Dies | Hora | Vent. | Th. | Bar. | Tempestas.

| | | | | | |
|----|-------|----------|----|----|--|
| | 12 | | 49 | 26 | frigus intensius sole latente |
| | 7 | | 49 | 26 | gelu moderatius |
| 18 | h. 7 | O. | 45 | 28 | coelum obscur. cum gelu moderato |
| | 12 | | 49 | 28 | pauca nix cum coeli tenebris |
| | 7 | | 49 | 28 | pergit caligo & surgit validus ventus |
| 19 | h. 7 | | 49 | 29 | eurus valide spirat cum frigore |
| | 12 | | 49 | 29 | ferenitas moderata |
| | 7 | | 49 | 29 | nubes propell. validius cum gelu sereno |
| 20 | h. 7 | | 48 | 28 | nubibus coelum obductum & frigidum |
| | 12 | | 46 | 26 | clara serenitas |
| | 7 | | 48 | 26 | coelum pulchre stellatum |
| 21 | h. 7. | | 48 | 26 | ferenitas perspicua, sed frigida |
| | 12 | | 47 | 26 | sine nubibus coelum ferenum |
| | 7 | O. | 48 | 26 | nubes coelum occupant |
| 22 | h. 7. | S. O. | 48 | 26 | nubilus aer per totum diem, modo quod meridie quandoque fulserit sol |
| | 12 | S. | 46 | 26 | |
| | 7 | | 46 | 25 | |
| 23 | h. 7. | S. S. W. | 47 | 24 | nubilum coelum cum paucis sole |
| | 12 | S. W. | 36 | 24 | tepor cum nubibus |
| | 7 | S | 45 | 23 | pluvia modica adven- |

D E C E M B E R.

Dies | Hora | Vent. | Th. | Bar. | Tempestas.

| | | | | | |
|-------|-------|----------|----|----|--|
| | | | | | titur |
| 24 | h. 7 | W. S. W. | 40 | 24 | frigus notab. remitt. ex coel. min. claro |
| | 12 | S. | 41 | 22 | glacies solvitur |
| | 7 | | 42 | 20 | succedit pluviola |
| 25 | h. 7 | | 49 | 18 | Tepidum mane cum nubibus |
| | 12 | W | 49 | 17 | succedit serenitas |
| | 7 | S | 48 | 16 | coelum rursus obscuratum |
| 26 | h. 7. | S. W. | 39 | 16 | tota dies nubila & tepida |
| | 12 | W | 48 | 16 | |
| P. L. | 8 | | 49 | 17 | |
| 27 | h. 7. | N. S. W. | 40 | 16 | nubilum & tepidum mane |
| | 12 | | 41 | 18 | accedit pluviola |
| | 7 | | 52 | 22 | triste adhuc coelum cum tranquillo aere |
| 28 | h. 7. | S. O. | 42 | 22 | coelum tota die turbidum |
| | 12 | O. S. O. | 41 | 21 | |
| | 7 | | 41 | 22 | |
| 29 | h. 7. | S. O. | 43 | 24 | nebula cum pruina & glacie |
| | 12 | | 43 | 23 | remittit gelu |
| | 7 | | 41 | 23 | coelum prorsus obscurum |
| 30 | h. 7. | | 42 | 20 | tota dies obscura, pluviosa, tepida |
| | 12 | | 51 | 29 | |
| | 7 | S. S. O. | 51 | 29 | |
| 31 | h. 7. | S. W. | 42 | 21 | tota rursus dies nubila, humida, tepida, cum vento circa noctem. |
| | 12 | | 42 | 22 | |
| | 8 | | 43 | 23 | |

CAPUT I.

Observationes de mercurii motu in barometro

ANNO SUPERIORI HABITÆ.

Quod ad mercurii motum in famoso *Torricelli* tubo attinet, fuit hic altus die quinto, sexto & septimo Januarii, spirante cauro; & observatione non indignum est, eo tempore coelum nubibus tectum, aërem perhumidum, nebulosum, immo nivolum fuisse, & frigus valde mitigatum: nihilo minus liquor in thermometro pertingebat fere ad sexagesimum quartum gradum, manifesto documento, quod aëris pressionem, non formali frigori, elevatio hæc adscribi debeat: satis enim frequenter animadverti, quando mercurius ad sublimiora se recipit, liquorem in thermometro idem facere, & versa vice.

Deinceps mercurius vigesimum octavum ferme gradum attingebat ejusdem mensis die 29. & 30. licet flatus austrini, coelo idemtidem non pure sereno, sed nubilus ac nebulis interpolato, minus frigido, regnarent: cujus rei non alia causa apparet, nisi quod præcedens aquilo, valde compressum & elasticum aërem efficiens, in advectos per zephyrum & africanum vapores aqueos, pressoriam suam vim ac impetum longe validius exercuit, quam si vaporibus destituta fuisset atmosphaera.

Die 1. Februarii à zephyro nivoso mercurius ad gradum XXVII. visus est elevatus, manifesta rursus

Frid. Hoffmanni Oper. Tom. V.

nota, non humiditatem & aquam per se facere, ut cadat argentum vivum.

Martio ab euro, aquilone, borea, zephyro-borea ad eximiam altitudinem, præfente frigore intenso atque sereno, ascendit mercurius, ita, ut pertingeret ad gradum XXX. Ex quo discimus, pressionem aëris elasticam, cum statu aëris sereno, frigus acutius producere, quam si aer fuerit multis vaporibus repletus.

Aprili, Maio, Junio, Julio, Augusto & Septembri anni hujus argentum vix ultra vigesimum gradum porrigebatur, sed maximam partem intra decimum & vigesimum versabatur, propter statum hujus anni hisce mensibus percalidum, serenum & amœnum.

Quod etiam notabile est, mercurius per totum ferme annum circa tempus matutinum, nec non liquor in thermometro, elatior, usque ad lineam unam, vel duas, circa meridiem autem ferme semper demissior fuit, nisi alterius indolis ventus id prohibuerit: quod ipsum designat, mane semper esse compressiorem atmosphaeram, & superficiem terræ magis premi, quam meridie, cum levior & explicatior est aer. Et porro perspicere licet ex præcedente ephemeride, mensibus hiemalibus & frigore adhuc stipatis, ordinario altiorum fuisse mercurium, quam ipsa æstate.

Altissimus fuit mercurius hoc anno die 18. Novembris in meridie, dum ad gradum XXXVII. elevatus fuit, quod rarius visum: coepit autem tam notabiliter scandere die undecimo, & elevatio hæc ad vigesimum usque perduravit: regnarunt autem tunc temporis venti, quod valde mirabile est, è diversis plagis spirantes, & primo africanus, postea zephyrus, tandem euro-notus, succedebant boreales & rursus euro-notus: tempestas fuit minus serena, sed partim nubila, frigida, nebulosa, solis radiis rarioribus interspersis. Ratio hujus præclari ac memorabilis phaenomeni hæc videtur,

detur, quod copiosum illud humidum, per zephyrum & africanum prius adductum, postea succedentibus orientalibus & borealibus, valide expansum, tantam vim pressoriam in hæc inferiora ipsumque mercurium exercuit.

Celerrima mercurii ascensio à XVI. ad XXII. gr. notata fuit die 16. Maii ab hora prima ad septimam, & quod dignum admiratione est, præstitum illud fuit à zephyro & zephyro-noto, nubes simul apportantibus, quorum effectus alias depressorius est. Tale exemplum etiam occurrit die 15. ejusdem mensis, ubi hora septima flante S. O. duodecimum gradum cum dimidio obtinuit: circa horam autem quartam post meridiem gradum XIX. affectus per zephyrum est, coelo pluvioso existente, ob nullam aliam, ut opinor, quam paullo superius adductam rationem. Singulare etiam fuit, eum intra duas horas à gradu XIX. ad XV. per N. W. fuisse, serenitate quamvis perspicua, præcipitatum.

Die 29. Maii hora septima delapsus fuit mercurius ad gradum IX. & quidem per ventum ficcum, alias evehentem vivum argentum, eum nempe & euro-boream: qualem quoque celerem præcipitationem attendere licuit ad diem 20. Novembris, hora undecima, ubi mox à gradu XXV. ad XVIII. usque cecidit, africo cum impetu exsurgente. Ceterum à zephyro-borea, qui ventum validissimum adducebat 2. & 3. Januarii, in altum evehebatur argentum: toto vero mense zephyrus fuit vehementissimus, & quidem die 13. & 14. ubi videbatur notabiliter mercurius depressus.

C A P U T II.

Observationes circa fœcunditatem superioris anni.

SI ullus annus ex decem præterlapsis frugifer & ab ubertate fructuum, frumentorum ac vini commendandus est; illum certe proxime præteritum exstitisse, non erit facile, qui non nobiscum affirmet. Cum enim superioribus annis summa ubivis frugum penuria & exhausta ferme publica ac privata horrea, & proventus uvarum exiguus, quæ ferme nusquam ad maturitatem, ob æstatem valde aquiloniam, pervenerunt, magnaue sterilitas ubique adefset; ecce benignissimum Numen hoc anno, novo vertente sæculo, uberrima fructuum copia omnia replet, ut tam fœcundus annus inter plures vix numerari potuerit. Rarissime enim visum est in nostris terris, quod tam celeriter ad maturitatem omnes pervenerint fructus: & quod magis mirandum, verni menses, Martius præsertim & Aprilis, ultra modum, & consuetudinem frigidi erant, nec glacie, præsertim mane, fuerunt vacui; paullo post autem Aprilis medium, totusque Majus, serenus, gratissimus erat & æstum pluviis desideratissimis sæpius miscebat & temperabat, ventis maximam partem regnantibus euro-noto & zephyro-noto, qui subinde aërem tenuem ac calidum reddendo, nutritionem in vegetabilibus egregie secundabant, & illorum augmentum, opportunissimas importando pluvias, promovebant.

Quoties enim in nostris regionibus Martius & Aprilis pluviosus existunt, & Majus siccus ac fervens subsequitur, nunquam frumenti inopia facile laboramus. Et notabile fuit, quod hoc anno omnes fere arbores, nulla specie excepta, largiter tributum suum solverint, & maturitate aliquot hebdomadas ab ordinario tempore anticipaverint. Secale & triticum abundantissimum erat & ab omni periculo, cui alias exponitur, immune præstitum: aræ quæ superioribus annis

paucis granis refertæ, nunc innumeris repletæ videbantur: lolio in agris, quod nutrimentum defraudat, perpaucis conspecto; hordeum vero & avena, ob pluvias paululum retardatas, tanta copia & perfectione non crevit; prata lætissima & viridantia magnam fœni copiam reddebant. Ceterum tota ferme æstate serenissimi fuerunt dies, cum calore non modico stipati, adeo, ut si una æstate, certe hac ipsa, propter limpidam & nitidissimam coeli perspicuitatem, nubibus vacuam, experimenta egregia cum prægrandibus vitris causticis instituere, nobis peropportunum fuerit, quod præcedentibus æstatibus perpaucis diebus; nubibus solem subinde impredientibus, licuit. Quin immo à longa retro memoria nullus fuit annus, quo semina exoticarum plantarum ad tam optatam maturitatem ficitatemque pervenerunt. Lignum vitium, quod potissimum præcedentibus annis permansit immaturum, hoc ipso maturitatem eximiam nactum est, sub plurium voto pulcherrimaque spe, fore, ut etiam hoc anno sit uvarum messis aurea. Aquarum noxias inundationes hoc anno experti non sumus, neque à pravorum insectorum copia calamitates in plantas ac animantes cernere licuit. Immunes etiam fuimus à grandinum nocivo dilapsu, nec non à roribus pruinisve rubiginosis, corrosivis, augmentum vegetabilium mirifice impredientibus, quibus improvisò, veluti fide-reo afflatu, sæpenumero exarescunt frumenta.

Et quum Augustus atque autumnus clarissimus fere semper existeret, & calida serenitas, paucis in principio diebus exceptis, etiam per Septembrem continuaret; non modo uvæ exuta acerbitate sua, gratissimum dulcorem, optimi vini sobolem, acquisiverunt, verum etiam secale & triticum Octobris mense, incredibilem ad altitudinem succrevit, & primo Octobris, auriculæ urfi, caryophylli, de novo in quibusdam hortis florere inceperunt, erucarumque semina, nidis inclusa, quæ sequenti anno reviviscere solent, viva jam apparuerunt: id quod tempori exquisite fœcundo merito adscribendum est.

Constitutio epidemica Halensis Anni

CIO MDCC.

PLacet jam illorum affectuum, qui apud nos hoc anno populariter grassati sunt, historiam, concisa, qua fieri potest brevitate, magnaue fidelitate exhibere, nec non rariora quædam, quæ à rerum medicarum peritis notari merentur, attingere. Quum autem epidemiales morbi non tam dependeant à præsentis tempestatis constitutione ac vicissitudine, sed prægressorum potius ventorum temporumque effecta atque producta sint, adeo, ut sæpenumero suavissimus & saluberimus coeli status plures morbos producat, quam aër densus, immotus, squalidus, vitiosus, quo non raro immunes ab ægritudinibus vivimus, quatenus nempe hic ingenerat morbos, ille autem ipsos excitat & in scenam ducit; hinc è re quoque nostra fore arbitror, præcedentis anni indolem ac genium breviter perlustrare, quo eo melius in causis morborum superiore anno regnantium evolvendis progredi queamus. Deinceps etiam diligenter animadvertendum est, cujus naturæ ac genii morbi præterito anno grassati fuerint. Sæpe enim contingit, ut sub dissimili aliquot annorum constitutionum facie, iidem morbi adhuc dominatum habeant, dum nempe partim per contagium parvum propagantur, partim etiam à plane irregulari & damnoſa tempestatis natura tanta labes ac dyscrasia fluidis corporis partibus inducta fuit, ut per plures annos mala exinde sequentia durent, neque statim subsequens melior anni status illud vitium corrigere, emendare vel plane extinguere queat.

Memorable hinc est, aliquot jam annos, immo ultra septem

septem præcedentes, insuetos fuisse, & à naturali, sibi debita constitutione ac temperie, multum descivisse, cum æstas ut plurimum, propter boreales ventos, humiditate ac notabili frigore, autumnii naturam ac faciem induerit, unde etiam factum, ut ad maturitatem fructus raro pervenire, vel uvæ gratam dulcedinem acquirere potuerint.

Insuper notandum, quod anno c1010ccxcix. inundatio aquarum in hisce terris maxima contigerit, quæ ut plurimum aërem vitare, & morborum seminarium constituere observata fuit.

Annus autem XCIX. lenissimam hiemem exhibuit & valde mutabile ratione tempestatum tempus. Mense Octobri & Novembri venti ex plaga australi & occidentali ferme continuo spirarunt, rarissime se intermiscentibus borealibus & orientalibus, qui aërem expansiva sua vi egregie serenare in commodum vitæ mortalium ac purgare assolent. Unde largæ accesserunt pluviae, nives, cum pruinis, nebulis, quæ tempus sordidum, squalidum, aërem densum, coelum obscurum, modico frigore stipatum, ingenerarunt.

Decembri autem corus & zephyro-boreas frequentissimus, satis potenter hydrargyrum sustulit, inconstantissimam autem tempestatem produxit. Si enim quodam mense admodum mutabilis tempestatum constitutio ac vicissitudo visa est: certe mense Decembri XCIX. ubi intra diem & noctem, gelu mox intensissimum, remissio ejus plenaria excepit, jam ventus impetuofus surrexit, mox aura clementissima visa, jam coelum pluviosum & obscurum, mox serenatum ac perspicuum videbatur. Et huic mensi conformis fuit etiam sequens ferme Januarius & Februarius, adeo ut hiems squalida, valde mutabilis, modice tantum frigida, sine penetranti vel constanti gelu, fuerit.

Morbi qui præcedentibus annis sæviorem in modum grassati sunt, fuerunt anno XCIX. foedæ variolæ, quæ adultis, & maxime præcipuis personis, infestæ, magnam stragem atque sævitiam multis funeribus ediderunt, sicuti id latius deduxi in *dissertatione*, qua *historiam variolarum* tunc temporis grassantium descripsi.

Anno XCIX. sub æquinoctium vernum in scenam prodiit febris malignitatis non expers, petechizans, cujus naturam atque ingenium similiter in peculiari *dissertatione* exhibui.

Annus autem superior, cujus constitutio, quoad singulos menses & dies in ephemeride præcedente abunde descripta legi potest, aluit maximam partem morbos, prioribus valde similes; & quamvis variolæ & morbilli parcius visi, non tamen penitus receptui caneabant, sed sparsim per omnes ferme menses adoriebantur disposita individua. Affectus autem, qui urbem & vicina loca Lipsiamque sæviter infestavit, fuit febris cum petechiis, quibus in fine successit, non infausito tamen eventu, purpura rubra, quæ si ob virium defectum non eruperit, vel retrocesserit, in gravissimum ægros præcipitavit periculum. Neque hic morbus pepercit infantibus, pueris, sed & provectioni ætati fuit infestus. Et in universum notatum fuit, quod supra quinquagesimum constitutis, nec non compluribus sicca melancholicæ individuis, non facile, vel plane nunquam, insensus fuerit, valde autem infestus naturis humidioribus, corporibus succulentis, sanguine plenis, spongiosa & laxa carne gaudentibus, unde foeminas gravidas, puerperas, pueros, juvenes, maxime exercuit. Et quum sine ullo dubio à principio quodam acri, caustico, salino-sulphureo, copiosa excrementitia bile, in succis corporibus nostris plus justo retenta ac præter naturam generata, à quibuscunque etiam externis caussis prima mali origo petenda sit, affectus foveatur ac sustentetur, unde factum, ut scorbuticos, hypochondriacos, cachecticos, qui congeneres cum principio hoc morboflo fluores in venis

alunt, cum primis offenderet, & sævitiam suam præ aliis in istis exerceret.

Præter febrem hanc petechialem purpuratam, tales morbi regnarunt, qui affinitatem quandam cum hac aluerunt, quales sunt, qui ex tenui caustico inflammatorio sale, spasmos, turbas, dolores, hinc inde proripiente, nascuntur, ut arthritides vagæ, hemicrania, quæ juvenes; podagra, chiragra, peripneumoniæ, quæ senes; pleuritides, tertianæ continuæ, ardentes biliosæ, quæ subjecta cholericæ; febres catarrhales, erysipelaceæ, coryzæ, tussis, diarrhoeæ, quæ variæ ætatis & complexionis homines; febres purpuratæ simplices & miliares, quæ impura corpora, hoc anno invaserint, adeo, ut, pæne nullus mensis hisce morbis fuerit vacuus, tantum quod ad varietatem temporum symptomata mitiora fuerint. Hoc mirabile visum, quod hoc anno, quamvis æstas fuerit ferventissima, qualis similis in multis præcedentibus non observata, morbus dysentericus non tantum in nostra urbe, sed in tota ferme Germania filuerit, vel paucissima tantum subjecta invaserit, præsertim cum largissimus fructuum & uvarum proventus, gula nunquam otiantes, ubivis existeret.

Silentio autem non prætermittendum est, quod ante vernale æquinoctium, febres nostræ exanthematicæ comitatæ fuerint deglutiendi difficultate, angina, & insolitis sudoribus frigidis, animique deliquiis, vomitu, secessibus, capitis dolore & inflammatione partim internarum, quorum ratio hæc esse videtur, quod sanguinis spiritusascentia, ob motum intestinum calidum aëris & ætheris debilem, tunc temporis sit imbecillima: hinc etiam funestiores hieme solent esse omnes morbi acuti.

Mensibus vernalibus dolores laterum punctorii, deliria, tussis, sputa viscida, peripneumoniæ, purpuratis & petechialibus nostris sæpiusculæ fuerunt associata. Aestate autem & autumno vomitus, alvi profluvia, tormina & murmura ventris, cardialgiæ, plus cum febribus nostris conjunctæ apparebant, adeo ut faustissimo omine circa diem septimum supervenientes alvi fluxus ut plurimum morbum solverint ac sustulerint. Et ratio horum, si quædam adjicienda est, hæc existimari poterit, quod tempore verno, ob inæqualitatem aeris, mox calidi, mox frigidi, nec non ob expansionem sanguinis tunc liberiores, ipse cum lymphâ in motu suo hinc inde sistatur, unde feri ac sanguinis stases ac decubitus solemnes fiunt. Aestus autem fervidissimus, qui sub medio Aprilis incipiebat, & ad autumnii usque medium fere perseverabat, ob sulphurearum sanguinis partium, auctiorem intestinum motum, magnam bilis salinæ tenuis copiam ingenerat, quæ per alvum, ceu opportunum suum evacuatorium, commode ejicitur.

JANUARIUS.

In ejus principio arthritides vagæ cum vomitu & tussi vehementi quosdam strenue exercebant. Et die VIII. erysipelate, ipsis consueto, aliquot subjecta laborarunt. Miles eo retrocedente factus est anginosus. Circa idem tempus mulier XL. annorum epilepsia uterina, ipsi chronina, gravissime corripiebatur. Nec non puer VII. annorum febricitabat cum vomitu, superveniebat delirium, narium hæmorrhagia, & abcessus glandularum colli. Utrum venti aquilonares cum zephyro intermixti ad excitationem horum affectuum ansam dederint, advertere licebit.

Die XXIV. mulier XXX. annorum, ex horrore primo gravem calorem, post abortum passâ, maligne febricitabat, cum cardialgia, corporis jactatione, delirio, dejecit nigra & perfrigerata brevi moriebatur. Hydrargyrum tunc temporis valde erat demissum mirisque ventorum lusus.

Die XXVI. Studiosus, XX. annorum, antea scabiosus, febricitabat, hæmorrhagia narium die V. succedebat, comatosus caput sibi divisum somniaverat, sine petechiis & purpura convaluit. Die XXVII. servus XXIV. annorum vehementer delirabat, post copiosam narium hæmorrhagiam erumpebant petechiæ & convalescebat.

Cæterum multæ febres cum petechiis & purpura subsequente notatæ fuerunt, & etiam sine illis.

F E B R U A R I U S.

Easdem aluit febres, & morbilli plures infantes & aliquot virgines easdem ædes inhabitantes adortæ sunt.

Die III. chiragræ dolores, alias consueti, generosum senem graviter affligerunt, & præter consuetudinem lecto affixerunt, quo tempore etiam generosus vir podagrico dolore vehementi, cum insigni languore, laborabat.

Notabile hoc mense fuit, quod foemina XXX. annorum ex terrore visi funeris, petechiis extincti, horrore perculsa, maligne febricitaret, perfrigerationibus corporis animique deliquiis intercurrentibus: die VII. erumpebant petechiæ, quæ cum sudoribus continuis stipatæ, foedo acore nares adstantium ferientibus, in purpuram rubram definebant, qua etiam morbus judicabatur.

Die VII. mulier gravida, septimo circiter mense, cum capitis, præcordiorum dorsique dolore, orthopnoica febricitabat: hæc foetum mortuum enitebatur, partes externæ frigida erant, interna ardebant, cum maxima siti, forsitan quod inflammatio esset interne maxima, successive autem convaluit. Observatu curiosum est, quod hoc mense inter viginti liberos, vix tres filii, omnes reliquæ puellæ, natæ sint, quæ res caussis suis cum destituta non sit, putaverim, non excludendas hic quoque tempestatum in conceptionis actiones esse, quæ non modo in sanguinem, sed & in semen, variis modis agere queunt.

M A R T I U S.

Die IV. V. & VI. surgentes ex oriente & borea venti, febres catarrhales, tussiles cum coryza attulerunt, quibus morbis omnis ætatis homines hinc inde correpti fuerunt.

Præterea memorabile fuit, quod juvenis XX. annorum febricitaret gravissime, & febris cum enormi alvi fluxu, vires plane deiciente inciperet: tandem superveniente purpura, & denique scabie restituebatur. Et puella rustica VI. annorum ex horrore cum gravissimo calore se jactabat, subsurda, vigil, delirans in somniis, præter sudores, purulentæ saniei per aures fluxu, judicabatur. Adolescentem annorum XV. qui ex horrore febricitabat, cum calore acuto, dolore capitis laterisque, s. pectoris, hinc dyspnoicum cum rubore genarum tussis ferina fatigabat, cum intercurrente perfrigeratione, venarumque jugularium palpitatione, floccos legebat, & quoties externa frigebant, gravissima sitis urebat, alias mitior, judicabatur per hæmorrhagiam narium & sudores.

Intra diem VIII. & XIII. auster prævalens frigoris remissionem, nec non nubilum ac nebulosum cælum effecit: sub quo dominabantur suffocativi catarrhi, & virgo generosa, cujus pulmonaria vasa concretione polyposa referta erant, tunc suffocatione moriebatur.

A P R I L I S.

Aprilis à III. ad VIII. diem frigidus & elasticos ventos satellites habuit, cum tempore tranquillo, sereno, frigidiusculo. Jam febres, quæ corripiebant virgines juvenculas & tenerioris constitutionis homines,

stomacho erant infestæ, utpote cum vomitu, appetitu prostrato, ructibus junctæ erant. Eodem tempore pleuriticae febres juvenes XX. & aliquot annorum, invadebant, cum dolore capitis, sputo cruento sociatæ, & solvebantur maxime per sudores, etiam narium hæmorrhagiam.

A die VIII. usque ad XII. constans ferme fuit subolanus, & aliquot infantes ex dentitione difficili patiebantur convulsiones, inter quos etiam puer IX. annorum paroxysmos epilepticos graves perpeffus est. A die XIII. usque ad XIX. zephyrus pluviosus & nubilum cælum maximam partem effecit. Laborarunt hoc tempore febre maligna duo viri præcipui, unus Theologus, alter Medicus, intra XL. annos constituti, naturæ debilioris, partim etiam hypochondriaci, macilentioris constitutionis, & mortui quoque circa diem nonum sunt, unus cum forti delirio, alter cum profusis sudoribus, qui mox in principio aderant.

M A J U S.

Inter initia hujus mensis febres pleuriticae, cum insigni capitis dolore, adolescentes & juvenes sanguine plenos adoriebantur: & febres acutæ benignioris naturæ identidem subjecta plethorica infestabant, & hæmorrhagia, parotidibus, in quibusdam alvi fluxu, plerumque autem sudoribus, solvebantur.

Febrium petechialium cum purpura succedente non erat mora, eaque magna sudoris profusione hoc mense plus stipatæ erant, quam aliis. Et notabilis fuit visus circa diem IX. Maii puellæ trium annorum, cui febricitanti purpura superveniebat, qua neglecta & non satis erumpente, die XVII. parotis cum somnolentia epilepsiam & paralyfin alterius lateris secum ferebat, nihilo minus purpura denuo erumpente, reconvalecebat.

Et puer tunc temporis IX. annorum ex auris dolore cum calore febrili cephalalgicus vigilque delirabat, judicabatur post copiosissimum sudorem, excretionem cruentam & purulentam saniei per nares. Et porro etiam nobilis XX. annorum, sanguineus, gravi dolore auris laborans, feri foetidi effluxum ex ipsa patiebatur. Ex quo discimus circa hoc tempus naturam in febribus maxime sanguinem ad caput, glandulas pone aures, & ipsam membranam aurium glandulosam propulsaesse.

Die XV. Galli filiola VIII. annorum febricitantis, cum parotide, somnolentia, delirio, ignorantia, calore acuto, loco purpuræ universa cutis, & maxime manus, una quasi petechia continua, at tactu non aspera, obducebatur, morbus solvebatur sudoribus. Et puellæ duorum annorum febricitanti identidem universa cutis rubedine obducebatur, quæ post sudores, die septimo accedentes, exuvias albas deponebat.

Observatu dignum est, quod hoc mense plures, & quidem sequioris sexus, personæ, de pruritu & dolore in iis locis, ubi tempore pestis bubones exstiterunt, fuerint conquestæ.

Circa finem Maii tertiana in ætate juvena visa fuit insigni anxietate, siti, tussi sicca & ictero comitata.

J U N I U S.

Per hunc mensem febres acutæ plures tenerioris & biliosæ complexionis personas aggrediebantur, præcebat ut plurimum iracundia, & juncti erant diarrhoeæ & vomitus biliosi, forsitan ob bilem acrem exsuperantem, à calore excessivo productam. Petechialibus & purpuratis accesserunt quoque in fine biliosi vomitus, maximam partem funesti: & foeminæ abortum patiebantur, nec non puerperæ purpuratis febribus afficiebantur, à quibus etiam non immunes fuerunt infantes.

Hoc mense purpuræ maximam partem jungebantur tormina & murmura ventris, alvi fluxus, vomitus, lateris

la teris dolores, tusses, sudores frigidi à primis decubitus horis fatigantes. In obesa cachectica muliere L. annorum purpura in pustulas solvebatur. Et virgo XVI. annorum cui menses non rite fluxerant, febre laborabat petechiali, maculae autem non in pectore & dorso, sed manibus & facie denudatis apparebant, deinde purpura pruriebat cum narium hæmorrhagia, sicque convalescebat. Et curiosum observatu fuit, quod posteaquam sana iam esset, maculae in manibus nudis & parum frigentibus apparuerint, & contra illis incalcescentibus, vel chirothecis munitis, disparuerint.

Aliquot infantes hoc mense exstinguebantur variolis, & virgo etiam pulcherrima ex confluentibus obibat, nec non Medicus febre petechiali, cui continua diarrhoea per totum morbi decursum erat juncta, moriebatur. Tertianæ continuæ, item alvi fluxus biliosi, pueros & juvenes strenue exeunte mense exercebant.

J U L I U S.

Continuarunt hoc mense ferme ejusdem generis morbi, sicuti præcedenti, maxime autem febres cum alvi fluxu & torminibus ventris, quibus etiam solvebantur & causam hisce morbis dedit plerumque iracundia vehemens; conspiciebantur quoque tertianæ continuæ. Et vir XXX. annorum laborabat morbillis, quos contraxerat extra urbem, anxiosa erat jactatio, ut ne per momentum quidem esset quietus, postea alvi fluxus superveniebat, cum per tres dies antea obstructa esset; & per noctem adeo augebatur ut XLV. vicibus deiceret: postea cessavit inquietudo, corporis jactatio, & sudores copiosi supervenientes, cum euphoria morbillos expulerunt. Purpura etiam hoc mense notabatur, sed non tam funesta, uti nec petechiales tantopere favientes erant.

A U G U S T U S.

Febres die septimo ut plurimum sponte sequebantur dejectiones graveolentes.

Infans anni unius cum dimidio, ultra hebdomadem alvi fluxu laborabat, & dejectiones tandem evadebant cruentæ, parva purpura apparebat, qua per industriam mutationem disparente, diarrhoea & passio cœliaca exacerbabatur, cum ventris torminibus calore acuto, pavore in somno, carnis colliquatione, sudoribus frigidis, fœcum maleolentia; purpura rursus expulsa, cessabant hæc symptomata, & post tres septimanas convaluit. Hoc mense multum remisit malignitas & pauci moriebantur, cum alvi fluxus prudenter medicina moderati, ut plurimum essent salutare.

Sequens casus notabilis fuit. Vir XXX. annorum laborabat acuta febre, sola utebatur theriaca, die nona superveniebat alvi fluxus & quotidie quater vel quinque deiciebat, die secunda petechiæ erumpebant & oculi strias rubras exhibebant, somnolentus erat dies noctesque, & sputum copiosum cruentum ejiciebat, restitutus laborabat suffusione, ac omnia nigra sibi apparere & quasi per araneorum tegmenta se videre quebatur, cessavit tandem hic affectus, sternutationibus sua sponte provenientibus.

S E P T E M B E R.

Hic mensis aluit ferme eosdem morbos, quales erant priores, nempe febres petechiales purpuratas, cum alvi fluxu junctas, & quodcumque exanthemata hæc ex terrore vel ira retrocedebant, extremæ partes frigebant, facies erat pallida, sequebatur animi defectio, tremor artuum, anxietas præcordiorum & sensus frigoris instar glaciei in alterutro latere: Facta pannis calidis frictione & convenientibus datis diaphoreticis, vel ipsæ petechiæ, vel purpura expulsa, symptomatum ac morbi vim plane imminuebant. Visa etiam hoc mense fuerunt varia tubercula albicantia postea rubicunda, item rossaliæ, vulgo *Rótheln*, quæ maculae rubræ sunt,

latissimæ & densissimæ, nec non exanthemata miliaria notabantur: Dolores quoque in febribus visi, quasi aciculis totum corpus pungeretur.

Ejusdem commatis purpurata febris puerperas strenue quoque affecit, & ubicunque lochia non rite fluxebant, funestum plerumque exsterebant effectum, etiam in personis vegetis, floridis.

Iracundia hoc mense, non secus ac Augusto & Julio, faciles alvi dejectiones, febrim cum vigilia & levi delirio movebat. Morbillis quoque hoc mense quidam infantes corripiebantur, ex quibus alii per leviorrem diarrhoeam, alii per sudorem evaserunt.

O C T O B E R.

Adduxit hic mensis arthritidem vagam, mensium & lochiorum fluxus diutius durantes, & in gravidis sanguinis stillicidia per uterum, etiam mense septimo: id quod observavimus in fœmina quadam Judæa gravida, sanguinei & vegeti habitus corporis, quæ per tres septimanas laborabat fluxu mensium, parco tamen; postea horrendis spasminis dorsi, ventris torminibus subsequenter, enormis admodum & non sistenda hæmorrhagia successit, & inde mors. Circa hunc casum singulare illud notavimus, quod quotiescumque sanguis sisteretur, & ex utero non efflueret, intensissima cordis oppressio fuerit secuta, & quamvis totum corpus sudore frigido manaverit, sitis tamen conjungeretur. Et fuit memorabile hoc mense & per totum autumnum dysentericum morbum, utut magnus fructuum proventus fuerit, penitus ferme filuisse, & nonnisi duo forsitan hic loci exempla scimus commemorare. Parcius quoque visæ fuerunt hoc mense petechiales, & quæ videbantur, multum de atrocitate sua remiserant.

N O V E M B E R.

Hujus mensis principium attulit febres catarrhales continuas cum tussi, faucium inflammatione, & in ejus medio diarrhoeæ infantes & viros quosdam exercebant. Die XVI. & XVIII. cum ex boreali plaga venti exciperent sibi oppositos, tusses, catarrhi, coryzæ pleno agmine varios variæque ætatis homines invaserunt: & curiosum fuit, quod circa hoc tempus in aliquot juvenibus & viris, quorum sex notavi, pustula valde molestant intra palpebras & anguli oculum fuerit suborta, quod peculiare excretionis genus in peculiari loco meretur attentam observationem. Circa finem hujus mensis febres, quæ catarrhales & pleuriticæ videbantur, subito degenerarunt in malignas. Ita invasit virum plethoricum XL. annorum horror cum capitis dolore, pectoris gravitate, ciborum inappetentia, accedebat coryza in naribus cum tussi, per octo dies deambulavit, sed caruit ferme somno & corporis languor aderat eximius, circa diem undecimum sudavit vehementius, de nocte deliravit, & petechiæ visæ fuerunt in corpore, die decimo quarto phreneticus obiit.

In fœminis sanguineis, cholericis, inflammatorias febres plures notavimus, qualis in persona egregia die decima quarto etiam fuit lethalis. Febres arthriticæ, cum maculis latis rossaliis, satis diuturne & cum tussi, urina rubicunda, sudoribus junctæ, scorbuticos & siccioris constitutionis homines satis pertinaciter affligerunt. Siccæ quoque ophthalmias, tusses violentas, in personis siccioribus, vinum paulo largius bibentibus, vidimus. Tonsillarum quoque tumores, & inflammationes notatæ.

D E C E M B E R.

Hoc mense paucissimæ visæ fuerunt febres petechiales & purpuratæ, sed similes cum Novembri morbi, nempe catarrhales febres, arthriticæ, scorbuticæ, tusses violentiores, hæmorrhagiæ uterinæ abortivæ conspectui se dabant.

OBSERVATIONES PRACTICÆ.

EX præcedente epidemiali superioris anni constitutione observationes perpauca utilissimas colligere operæ erit pretium.

I. Non indignum est observatione, quod febribus hujus anni exanthematicis purpuratis & petechialibus frequentissime sese conjunxerint sudores frigidi, fracidi, vapidum acorem spirantes, copiosi, adeo ut per aliquot dies & noctes perseveraverint, neque fuerint funesti, utut HIPPOCRATES *aph. 37. Sect. IV.* ipsos promalis & subsecuturæ mortis prodromis habuerit. At vero non semper sunt mortiferi teste experientia. Hoc quidem largimur, quod sudor frigidus, qui internæ visceris cujusdam inflammationis vel sphaceli comes est, & tantum particularis, & quando interiora calent & siti premuntur, exteriora frigent, plerumque sit funestus, non autem omnis ille quia defectu caloris & virium prostratione proficiscitur. Consentit hac in re *Cl. RAYGERUS in scholiis observat.* SPINDLERI *obs. 95.* qui ita scribit: *Vicissim sæpius & ego in morbi declinatione post XIV. dies, viribus bene constitutis & rite se habentibus, reliquisque bonis signis apparentibus, in calido corpore frigidos observavi sudores, post febres acutas & malignas bene judicatas, cum allevatione magna erupisse & ultra XXIV. horas durasse.* Quanquam autem hujus generis sudores non tendant ad mortem, indicant tamen magnam dissipationem caloris & virium. Hinc si unquam alias, certe tunc opus est succurrere analepticis, ex fonte diætetico magis quam pharmaceutico petitis, corpus linteis calidis crebrius detergere & fricare, ut per externa internus excitetur calor, ne æger in limine recuperandæ salutis constitutus deficiat.

II. Pessimi moris petechiæ cum purpura fuerunt, si urinæ fuerunt tenues & naturali similes, si sudores statim in principio invaserunt, & per totum morbi decursum continuarunt, si eruptio macularum paulo celerius, die tertio accidit. Et certum fuit lethalitatis signum si delirium magno sudori adfuerit, unde optime HIPPOCR. *in Coacis tit. IX.* delirium in spiritu & sudore lethale.

Ratio horum hæc videtur, quod ob spiritusascensionem sanguinis debiliorem, & hinc languorem virium & pulsum arteriarum exiliorem, tunc sanguinis circulatio valde tarda ac impedita sit, quo fit, ut particulæ aqueæ & serosæ cum sanguineis non rite & exacte misceantur, sed illæ secedentes, per excretoria solemnia, cutem & renes, insigni in copia evacuentur, quod pessimum utplurimum in omnibus acutis præbet indicium, utpote delirium plerumque subsequitur, dum sanguis crassus, sero defraudatus, per tubulos cerebri in motu suo impeditus, ibique stagnans, inflammationem & delirium producit.

III. In universum animadvertimus, præsertim hoc anno, semper tutius & melius fuisse cum ægris, quando alvus fuit lubrica & fluida, vel levis diarrhœa circa criticos dies accessit, quam si sicca & dura permanfit. Et tali modo petechiales & purpuratæ plurimæ sanatæ fuerunt, quod alias vulgari opinioni Practicorum

minus respondet, qui alvi fluxus, petechialibus succedentes, prorsus funestos proclamant, unde omnibus viribus ejusmodi fluxus sistere & compescere convenienti medicina moliuntur, id quod cum symptomatico & colliquativo, minime autem critico, recte procedit.

Et certe pessimus mos est, & multi hoc pacto moriuntur, quod non modo sistant sponte provenientes diarrhœas, sed & sudoriferis & alexipharmacis calidioribus curam absolvere intendant, quorum imprudenti usu utplurimum putrida, biliosa, crassa, acris materia, quæ debebat alvo excludi, & subcutaneis poris glandulisque minus respondet, retinetur, immo majori agilitate introducta, virulentior evadit.

Neque res nova est, quod alvi fluore, exanthematicis febribus superveniente, istæ curentur: jam dudum gravissimus auctor GALENUS *in sect. IV. epidemiorum §. 21.* multas fere pestilentes constitutiones alvi fluore judicatas recenset, & *libro de atra bile cap. IV.* scribit, non paucos in pestilentia æstate orta servatos fuisse, excretionem per inferiorem ventrem die septima, nona vel undecima. Porro præstantissimus *Italus GERHARDUS COLUMBA in libr. de febre pestilentiali* mirifice commendat excretionis alvinæ effectus in solutione harum febrium, ubi scribit pag. 121. in illa constitutione pestilenti fere omnes, quibus alvus copiose ejecit, licet cum signis cruditatis fuerit, tandem liberatos fuisse. *Procedente enim, pergit, alvi fluore, indies collectionis signa superveniebant, morbus evadebat clementior, & tandem alvi fluore perseverante, fideliter & integre ægri judicabantur.*

IV. Memorabile est, quod in febribus hoc anno grassantibus, tam exanthematicis, quam quæ sine exanthematibus conspiciebantur, clysteres & convenientia laxantia, præstantissimam & quasi divinam operam tulerint. Et inter illas emicuit elixir purgans acidum, quod petechiis & purpura jam præsentibus oblatum fuit faustissimo successu, & remissione gravissimorum symptomatum secuta. Quoniam autem de purgationis effectum in febribus acutis & petechialibus plenius egimus in dissertatione peculiari nuper habita, qua multorum auctoritate, experientia & ratiociniis hanc novam medendi viam roboravimus, benevolum lectorem ad hanc tractationem remittimus.

Ceterum in omnibus istis inflammatoriis, arthriticis, catarrhalibus, purpuratis febribus, quæ hoc anno uberius paullo grassatæ sunt, tutissimam medendi viam hanc deprehendimus: nimirum vel in principio securo emetico saburram bilis eduximus, fomitem quasi morbi præscindendo, reliquum vero temporis blanda & continua diaphoresi, quam suppeditabant liquores bezoardici temperati, ex spiritu nitri dulci, essentia scordii, liquore cornu cervi, scorzonæræ, nec non pulveres bezoardici nitrosi, cum & sine camphora, transegit. Neque omittebantur clysteres & selecta purgantia, bilis acrimoniam simul figentia. Hisce & talibus arthritides, pleuritides, febres petechiales, purpuram, & illis juncta symptomata, sine ulla venæ sectione, sudoriferis fortioribus, felicissime, bono cum Deo, expugnâvimus.

D E

SALINIS HALENSIBUS

C O M M E N T A T I O

I N Q U A

P L U R E S S I M U L P H Y S I C Æ Q U Æ S T I O N E S

D E

*FONTIUM SALSORUM ORIGINE IPSIUSQUE
salis differentiis, præparatione & utilitate illustrantur.*

P R Æ F A T I O.



N sole & sale Veterum sagaciores non sine ratione summam rerum conditarum inquisiverunt perfectionem. Solare enim sidus jure centrum universi, primum movens & perpetuum mobile dici meretur, ex quo vita, motus, duratio ac conservatio corporum, inprimis eorum, quibus animam inesse dicunt, promanat; adeo ut eandem in mundano hoc opere præster utilitatem, ac cor in hominis brutorumque animantium corpore. Etenim quamdiu motoria cordis machina reciprocum motum retinet atque exercet, tamdiu animal vivere dicitur, tamdiu omnes corporis partes nutriuntur, calore foventur, & tam ad motum, quam sensum, perquam aptæ existunt; simul ac vero hæc concussio penitus exspirat, mors subsequitur, immo, ipsa hæc ejus cessatio, mortis nomine insignitur. Pari ratione si paullo longius sol ab atmosphæra nostra recedit, & oblique tantum vim ac virtutem suam terræ impertit, lux fugit, motus intestinæque commotiones languent & calor abest; ad altiora autem eodem vergente, confestim quoque plus splendoris, plus caloris, incrementi, motus, vitæ ac sensus in universa rerum natura, maxime in vegetabilibus & animantibus, deprehenditur.

Post solem maxima quoque virtus, vis ac efficacia sali inest, quod ad conservationem, durationem, augmentum & propagationem admodum proficuum est. Numerantur autem tres potissimum ejus species, commune nempe & minerale illud, quod vitriolum dicitur, cum nitroso sale; quarum ambæ priores terræ fœtus sunt, posterius vero in aëre hospitatur. Quemadmodum itaque tria recensentur ita dicta naturæ regna, animale pura, vegetabile & minerale; ita illud inprimis perquam notatu dignum est, tria hæc cardinalia quasi salia, ad conservationem & incrementum corporum, tribus naturæ regnis comprehensorum, multum conferre. Nimirum plantis aliisque vegetabilibus proficuum inprimis est nitrosum in aëre sal, utpote quod, non solum cum pluvia descendit, sed etiam à subtili pingui superiore terra absorbetur, ulterius ad plantas deferitur eorumque augmentum mirifice promovet. Quæ mineralium classem ducunt, vitriolico inprimis abundant sale, id quod omnibus fere mineris, sulphuri, argillæ lapidibusque copiose junctum deprehenditur. Animantibus vero, maxime homini, præter aëreum nitrosum sal accommodatum est commune, cujus multiplex ad cibos condiendos, digestionem eorum promovendam & ad vitam sanitatemque tuendam non solum usus est, sed quod etiam ne corpus putredine corripiatur, validissime impedit. Hebræos sali nomen indidisse ferunt ab acredine, quod quasi mordeat & carnes ac pisces, ne olidi quippiam contrahant aut corrumpantur, conservet: Græcis autem vocatur *αἶς*, quo nomine quoque salum insigniunt, hanc forsitan ob rationem, quod apud ipsos salem ex aqua marina per solis calorem elicere moris fuit.

Quod

Quod si vero præstantissimam salis communis utilitatem contemplamur, tam eximia hæc est, ut nemo eodem nec in cibis, nec ipsa medicina, nec artificis quibusdam carere possit. Sane, cibi insipidi, & panis omniaque esculentia sine salis condimento nauseosa sunt; concoctio cum digestionem deficiente salis usura languet, necessariae superfluum excretionem quiescunt & corporis integritas vacillat: animantia sine salis usu pabulo non distenduntur, non grandescunt, non pinguescunt, sed mox intereunt; denique pisces, carnes, butyrum ac caseus non nisi salis ministerio à corruptione defenduntur. Proinde notatu dignum est, quod gentes polo admodum propinquæ, Lapponiam nempe, Novam Zemblam & Grønlandiam incolentes, quibus sal ob longinquitatem loci nimis caro stat pretio, & propterea rarioris & parcioris usus est, non adeo proceri corporis sint, viribus imbecilles & ad militiam inepti: contra vero septentrionales algidissimas non minus incolentes regiones populi, sale fruantes, uti Finni, robusti, viribus valentes & ad labores, imprimis bellicos, preferendos, aptissimi sint. Ipse sacer codex magnum salis constituit pretium, dum sacratissimus noster Salvator *Luc. XIV. 34.* salem bonam rem non solum appellat, sed etiam inviolabilia & nunquam infirmanda fœdera, cujus generis illud est, quod Deus per circumcisionem cum Judæis, & per sacri baptismatis lavacrum, nobiscum ixit, salis pacta nominantur. Moses ex divino mandato præcipit, ut omnia libamenta sale condirentur, nullumque eorum sine sale fœderis divini immolaretur, eoque, præter mysticum sensum, præstantiam & eximiam salis virtutem ad ciborum condimentum procul dubio innuere voluit. Similiter verbi divini ministri sal terræ vocantur, eo quod uti sal in corporis, ita doctrina eorum in animæ commodum cedere debeat. Sal quoque sapientiæ ac prudentiæ idemtidem comparatur, eamque ob causam nunquam sine sale sitis præcipit Christus. Etenim sicuti sal cibos sapos & palato acceptos reddit; ita etiam quæ summa ratione circumspicte perficiuntur, apud omnes in amore atque deliciis sunt.

Quum itaque sal homini tam utile tamque necessarium sit, admiranda profecto Summi Numinis sapientia, bonitas ac providentia est, quod non solum tam largum ejusdem apparatus produxerit, sed etiam in quamplurimis locis ejus proventum exstare voluerit, quo omnes fere gentes eodem frui possint. Quemadmodum enim præcipuum providentiæ divinæ in rerum natura documentum exhibet, quod omnia ea, quæ præ reliquis mortalium necessitati atque utilitati inserviunt, largiori longe copia prostant iis, quæ non adeo eximii usus sunt; ita illud imprimis in beatissimo salis proventu animadvertere licet, qui tam uber & sapientissime constitutus est, ut in remotis ab oceano locis, illud ipsum è terræ visceribus eruatur, in iis vero regionibus, quæ & marino & montano sale carent, fontes falsi liberali admodum vena saliant.

Ast quo luculentius divinæ bonitatis testimonium sal præbet, & quo major ejus utilitas atque præstantia est; eo magis mirari subit, quod ejus exploratio à Medicis rerumque naturalium scrutatoribus tam incuriose habita & frigide exulta sit, ut de marino, fossili atque fontano, ejus differentiis, indole ac viribus, vix quicquam prodiderint. Exemplo sint falsi nostri Halenses fontes, qui, licet unanimi Historicorum consensu, Germaniæ antiquissimi sint & salem purum, bonum ac saluberrimum largiantur, nihilo minus tamen admodum infrequens earum est mentio, & quæ de iis litteris consignata sunt, ita sunt comparata, ut magis ad politicum statum & varias publicas constitutiones pertineant, quam ad specialiore & physicam considerationem. Quare operæ pretium facturum me esse credidi, si ipse manum operi admove-rem, & ea, quæ de sale & salinis à longo jam tempore studiose collegi, & sedula percontatione, diuturna observatione & meditatione mihi comparavi, intelligenter traderem, meoque tum naturæ res magis inquirendi, tum etiam publico inserviendi studio, satisfacerem.

C A P U T I.

De Sale marino.

U Num idemque quidem sal illud commune est quod in rerum natura existit; attamen pro diversitate locorum, quæ illud præbent, & pro differente ratione, qua vel effoditur, vel coctione ex aqua elicitur, aut alio modo conficitur, in tres potissimum classes distinguere solet, sal nempe marinum, fossile atque fontanum. Et de marino quidem pervulgata hæc, sed erronea, invaluit opinio, ac si summus rerum conditor, in mundani hujus operis productione, marinæ aquæ falsisque scaturiginibus salem indiderit atque ingenerarit; cum tamen longe verisimilius sit, quod sal commune, tanquam corpus solidum, terræ sit foetus, ac diversæ plane indolis cum aqua, quæ fluida. Enimvero si sal à prima creatione aquis esset commixtum, nulla sane subesset ratio, quare falsuginis libra nunquam pluris salis contineat, quam eadem aquæ portio absorbere & capere valet, sex nempe uncias. Proinde si salinum quoddam elementum, sive sit alumen, vitriolum aut commune sal, aquæ connubium ingreditur, utique ad veritatem accommodate asseritur, aquam hoc ipsum in terræ visceribus liquasse, è subterraneis corporibus elambisse ac secundo flumine secum abstulisse, adeoque marinum æque ac fontanum sal terræ productum esse & fossilis salis foetus. Quamvis enim objicere quis posset, quum aquæ marinæ libra ad minimum salis semunciam comprehendat, difficile utique, si non plane impossibile, fore demonstrare, unde vastissimo & inexhausto oceano tam ingens salis copia obtigerit? attamen si contemplemur, terram sæpius immensam propemodum salis proferre copiam, Poloniæ, Transylvaniæ ac Hungariæ fodinarum testimonio, in proclivi utique est judicare, quod aquarum colluvies, cum tempore maximi illius diluvii, ex conclusis terræ recessibus prorumperet, superficiem telluris inundaret, quasdam illius partes impetuosè disjiceret & nonnullas plane submergeret, ad falsos quoque subterraneos tractus ac mineras pertigerit, eosdemque sensim ac successive colliquarit, adeoque marinæ aquæ falsedinem conciliarit. Eadem quoque ratio subesse videtur, quod mare non ubique eandem salis copiam vehit. Nimirum sinus Botnicus, mare Balthicum & Finnicus sinus parum salis, & libræ vehiculo vix drachmas duas custodiunt; occidentalis vero oceanus, ab Albi flumine ad Belgium usque, nec non canalus Angliam ac Belgium interluens, libra semunciam comprehendunt, ac denique Hispanicum & Mediterraneum mare unciam continent. Causam hujus differentię nonnulli ab auctiori solis calore in regionibus æquatori vicinis deducere contendunt; at vero solarium radiorum validiori operationi hoc adscribi, non posse ex eo elucescit, quod aqua marina sub ipsa æquinoctiali linea non magis falsa est ea, quæ longius ab eadem distat. Accedit, quod elevata per solis calorem aqua non tanta sit, ut reliqua duplo falsior evadere queat; quum licet per aliquot menses continuus æstus in hac plaga urgeat, nihilo minus tamen sedato fervore, iterum per aliquot mensium lapsum pluvia largiter decidere soleat. Proinde veritati congruum est, delitescere sub aqua matrices & salis fossilis mineras, in tractibus, quibus salum majori falsedine imbutum deprehenditur.

Præparatur autem marinum hoc sal non in septentrionis locis, nec etiam in Anglia atque Batavia, sed optimum conficitur in Hispania Almadæ & nitidissimum circa portum Gaditanum & in oppido St. Lucari. Præterea etiam elaboratur in Italia Anco-

Frid. Hoffmanni Oper. Tom. V.

næ, nec non in Lusitania, Setubaliæ ac Lisbonæ, in Gallia Rupellæ & Uliari, quod posterius tamen vilius nec adeo candidum, purum ac granosum est. Præparatio hoc modo adornatur. Tempore æstivo, Junio nempe, Julio & Augusto, sole acuto & pluviis raris, aquam marinam, æstu maritimo accedente, in cavernas, circumquaque argilla investitas atque munitas, derivant, & in iisdem flagrantissimo solis fervore humiditatem dissipari & salem ad fundum detrudi ac coagulari sinunt. Quod si itaque fervens tempestas diutius regnat, multum nitidissimi salis conflatur, cœlo autem substililo, longe minor salis quantitas extrahitur ejusque pretium exardescit. Gallicum hoc & Hispanicum sal longe lateque maritimo itinere, in Borussiam, Daniam, Pomeraniam, Scotiam, Angliam atque Belgium advehitur, unde in Indiam orientalem & occidentalem transfertur & hancum aliorumque piscium falsuræ inservit. Belgæ quoque hoc ipsum recoquunt & sal usui domestico & esculento magis accommodatum inde conficiunt, quo nomine nota inprimis est Dordraci constituta fabrica, quæ sal Coloniam Agrippinæ aliasque Rheno adjacentes urbes, Heidelbergam usque, dimittit.

C A P U T II.

De sale fossili.

S Al marinum locis maritimis & iis, quibuscum rerum commercia habent, inservit; remotis vero ab oceano regionibus, divina benignitas minerale subterraneum sal concessit, eoque nomine nota est præ cæteris Polonia, cum Hungaria, Transylvania, Armenia, Russia & Tartaria. Inprimis autem maxima ejus copia eruitur in Polonia, in pagis quos vernacula dicunt Bochnia & Veliska, sive Wieliska: & Bochniæ quidem ex quamplurimis fodinis extrahitur, quarum quædam præaltæ sunt & ad mille octingentas ulnas ima versus porriguntur, ita ut vix horæ spatio ad penetralia earum pertingere possis, quo descendunt scalis ligneis, quibus etiam jumenta deducunt. Intimiora speluncæ miris ambagibus & flexuosis calibus, platearum instar discurrentibus, urbem, quæ vix aliquot diebus peragrari potest, exacte referunt. Porticus atque cupiculi ita sunt elaborati, ut in utroque latere columnæ ex sale fabrefactæ, ne tegmen terreum delabatur, consistant, quæ gratissimum præbent spectaculum, maxime si affulgente luce, clarum percusso lumine reddunt fulgorem & candidissimæ crysalli speciem præbent. Saliunt quoque in hisce fodinis præter falsas venas, scatebræ dulcis aquæ, fossoribus potui inservientes, superfluum vero cochleis aliisque hunc in finem fabrefactis machinis foras dimittitur. Ipsum sal, saxæ molis forma proflans, in glebas majores discutiunt ac confringunt, easque Germanico nomine *Wände* appellant, quæ nonnunquam XL. aut L. centenariorum pondus æquant & tanta firmitate ac duritie pollent, ut sub dio expositæ, nec à pluvia nec humida tempestate liquecant. Hoc postea minutius contundunt, aut in moleninis terunt, tum doliis indunt & per Poloniam, Lithuaniam, Prussiam Polonicam, Moraviam & Silesiam distribuunt; ob rudiores vero & compactiores texturam, eximia ejus pars in finibus Silesiæ Tarnoviçi depuratur & usui, inprimis domestico, magis idoneum redditur. Constans salinatorum traditio est, moles istas falsas leviores longe esse in fodinis, quam si ad superiora protractæ fuerint; id quod etiam ii, qui aliquoties subterranea hæc promptuaria frequentarunt, asserunt. Nec est ut de veritate hujus rei dubitemus, quum experientiæ huic non solum CARTESI

E

senten-

sententia, qui causam gravitatis corporum, ætheris circulantis conatum centrifugum esse, expressis verbis tradit, suffragetur, sed etiam celeberrimus noster WOLFIUS, ex demonstratione HUGENII, in tractatu de vi centrifuga, supputationem fecerit, qua constat, molem, si sexcentis ulnis sub terra recondita centum libras pendit, è spelunca eductam, minimum centum cum duabus gravem esse.

Post has Poloniæ salis fodinas celebrantur quoque montes salis in Russia, quorum duo præcipui duobus circiter ab Astracano milliariibus distant & tantum salis apparatus custodiunt, ut si quotidie vel mille hominum, ligonibus, bidentibus aliisque instrumentis illud abraderent atque deciderent, exiguum tamen foret & nihili propemodum æstimandum, præ eximia ejus copia, narrante id pluribus PETRO PETREJO in descriptione Russiae. Tum etiam in Siberia Parmæ, nec non in regione Uffi, insignis admodum salis copia è terræ visceribus ejicitur ac longe lateque divenditur.

Porro Hungaria superior & Transylvania, & maxime quidem montes Carpathici, qui Hungariam atque Poloniam determinant, fossile hoc sal largiuntur. In Transylvaniæ comitatu Colossensi, & Derenburgi, ob fecundam salifodinam celebratissima urbe, nitidissimum pellucidum sal eruitur & eximium quotannis Principi reddit fructum, quemadmodum etiam Dardæ & Reesæ urbes illud præbent. In Hungaria superiori, imprimis comitatu Marmarasch, ex montibus Carpathicis tam largus salis hujus pellucidi ac puri proventus est, ut vel universæ Europæ sufficeret. Notandum vero est, salem in Hungaria ac Transylvania non tam alte in terræ visceribus reconditum esse uti in Polonia, sed montes, ex sale quasi congestos, in plano consistere, & ex his salem prout atque excindi, haud secus ac saxa è lapidicina.

Præterea Italiam venis quibusdam salinis præditam esse, & ex iis Pontifici quotannis sexaginta millia coronatorum redire, ferunt. Illud autem quod in Sicilia provenit, & incolis hujus insulæ in usum cedit, coloris quodammodo purpurei est.

Pari ratione de Tartaria constat, quod eximiam salis fossilis copiam proferat, nec non de Armenia, quod tamen saporis quodammodo amaricantis est.

Denique etiam Germania nostra non expers est montani hujus salis, sed illud ipsum in quamplurimis locis concedit, nempe in comitatu Tirolensi, Halæ ad Oenum, in Austria superiori, in pagis, quos vernacula dicunt *Hallstadt*, *Ischel*, *Lambach*, *Aussenfee*, nec non in Archiepiscopatu Salisburgensi, in oppido Hallein, unde in Bavariam, Carinthiam, Stiriam, Helvetiam & ad Grifones transportatur. Est autem hoc impurius & limosis terreisque partibus conspurcatum, ideoque cædunt illud in fodina ac postmodum aquam eo derivant, quæ aliquot hebdomadam decursu, eodem largiter imbuitur, ut libra sex uncias salis absorbeat. Foetam hanc sale aquam per canales in cortinas ferreas agunt & in iis coquant, eximendo singulis quatuor horis concretum sal, quod in dolia conferciunt & sal tabulatum conficiunt; id quod uberius descriptum exhibetur in *M. N. C. Dec. II. Anno IV. obs. 23.*

Jam dispiciendum erit, an, ut quorundam fert sententia, sal fossile iterum in speluncis excavatis generetur? Memorat D. GRASSIUS in *M. N. C. l. c.* fieri hoc Halæ, ad Oenum, & literæ ad eundem datæ ita habent: *si moles salinæ in fodinis ita persodiuntur, ut vir corpore non inclinato, immo duo viri junctim, porticus inoffenso pede pertransire possint, quinque aut sex annorum lapsu, ita à sale recrefcente angustantur, ut nix solus & cernuus easdem perreptare possit.* His suffragatur THURNEISSERUS lib. V. c. 39. fol. 132. *Deprehenditur, inquit, ibi (Halæ ad Oenum) terra quadam salsa, non aqua, uti Halæ Saxonum &*

Lüneburgi, sed aqua in fodinas intromittitur, quæ salem liquat & speluncas late excavat, donec eodem sufficienter imbuta, (quod extractione ponderis constat) per incilia ad ædificium coctioni dicatum agatur, ibique in cortinis ferreis cocta, coaguletur. Sal vero in foveis, è quibus exemptum, iterum renascitur. Idem quoque in Poloniæ salifodinis contingere quidam asserunt.

Ut vero quid nostri super hac re sit animi constet, hanc promimus sententiam: quemadmodum nullum, nec ex metallorum, nec mineralium, aut lapidum censu recrefcit; ita idem quoque de salibus, vitriolo & alumine tenendum est: sed aqua interiora terræ pervagans, in societatem suam admittit non solum lapidosam, sed etiam gypseam atque calcaream materiam, eandemque aliis in locis rursus apponit; id quod cum sale communi longe promptius atque facilius contingere potest. Quum enim subterranei tractus aquis redundant, illæ, quæ sale foetæ sunt, ad vacua loca penetrant illaque occupant; quo fit ut lentius dissipata humiditate, falsa materia concrefcant & relicta spatia iterum repleat, haud secus ac in specu Baumanniana, ex aqua rupes pervadente & lapidosis terreis particulis onusta, variæ figuræ lapides generantur.

CAPUT III.

De falsis Germaniæ fontibus.

SAL marinum commodissime ad loca dissita transferatur, ideoque frequentissimi usus est, & fossile quoque permultis regionibus ac gentibus in usum cedit, fontani vero longe minor his est proventus. Elicitur hoc ipsum ex fontibus falsis, quibus præ reliquis Germania nostra gaudet, & maxime quidem provinciæ, quæ ditioni ac potestati Augustissimi Borussiae Regis parent, ita, ut si quis calculum exacte subducere velit, quotannis decies centena millia salis centenarios in iisdem confici, constaret. Halæ Magdeburgicæ enim ad minimum trecenta & triginta millia, Stasfurti, centum & quinquaginta millia, Salzæ, nec non Palæo-Salzæ, centum & octoginta millia, & Söldorfi quindecim aut octodecim mille salis centenarii elaborantur. Præterea quoque Sulhæ, nec non in pago *Friedrichsthal* & Giebichenstein, eximia falsuginis levioris copia scaturit; neque dubium est, quin si hæ aliæque, non adeo multum salis custodientes aquæ, minori impendio fructuosiores reddi & ex iis sal præparari posset, pondus vel trecentorum mille salis centenariorum inde resultaturum foret: ut taceamus alias latentes adhuc scaturigines ipsumque reconditum in hoc tractu fossile sal. Confectum autem in memoratis salinis sal in Marchiam, Thuringiam, Misniam, Lusatiam, Voigtlandiam, Silesiam inferiorem, Franconiæ fines, comitatum Hohensteinensem, nonnunquam etiam Ducatum Megalopolitanum advehitur; & si ulterius, negotiatione per mare Balthicum instituta, in Sueciam quoque transportaretur, non sane infructuosa mercatura foret.

Si à Ducatu Magdeburgensi discedimus, Brunsvicenses quoque ditiones quamplurimis salinis dotatae sunt, quarum præcipuæ Lüneburgi reperiuntur. Innotuerunt hæ jam à septem sæculis, & eodem quo Rammelsbergenses & Goslarienses metallifodinæ, cultæ sunt tempore. Nimirum Anno DCCCCLXVIII. Henricus Auceps, Ottonis magni parens, has ipsas suscitari curavit: Otto vero decimas, sive vectigal ex annona salaria, cœnobio St. Michaëlis muneri obtulit. Et quum anno MCCCLXIX. imperante Joanne, nova ac liberalis vena in medio urbis profiliret multumque falsuginis præberet, magis adhuc salinæ hæ exsplendue-

splenduerunt, atque ex eo insignem obtinuerunt celebritatem. In plumbeis cortinis jam à sexcentis annis saltem coquere sueverunt, eo quod falsilago sale admodum foeta, eoque magis onusta quam Halensis, non diuturna coctione eget, sed mox coagulatur, neque tam copiose lapidosam materiam apponit. Confiunt quotannis centum circiter & octoginta salis centenarios, quos per Ducatum Lüneburgensem, & Megalopolitanum, Westphaliæ, Bremensæ territorium, nec non Borussiae partem distribuunt. Præter Lüneburgenses has salinas non incelebres sunt scatebræ, quæ in pagis *Salz-Güter* & *Julius-Halle* falluginem, non copioso quidem, sed præstantissimo sale imprægnatam, fundunt, & sub regimine Julii Ducis anno 1519. primam expertæ sunt culturam. Accedit sal quod in principatu Grubenhagenensi Salzæ Heldiorum paratur, cujus descriptionem LEZNERUS in *Chronico Einbeccensi* fufius prodidit. Denique ob salis præparationem nota etiam sunt loca alia plura imprimis hæc, *Salzdahl*, *Neustadt an der Hartzburg*, *Cernsdorf u. Salz-Düffort*; sed segniter in his procedit negotium, & sal quod elaboratur, vix patrio scaturiginum solo sufficit, excepta exigua quantitate, quam Halberstadiensis principatus, Hildesienfis episcopatus & Hercyniæ silvæ incolæ nanciscuntur.

In Hassia non ignotæ sunt Allendorffenses salinæ, quæ procul dubio antiquissimæ sunt & Cattis olim paruerunt, eo quod præter alia ibi exstantia antiquitatis rudera, quamplurimis septæ sunt ruinosis munimentis & ædibus, quas accolæ inhabitaverunt & fontem ab hostium incursionibus defenderunt, & inditum iis nomen est Sodem, à Germanica voce *sieden*. Fons in paludoso solo profunde admodum demittitur, & scatebra largum quidem, sed sale parcius foetum laticem emittit, eamque ob causam falsugini variis artificiis in casis salariis nimiam humiditatem demere debent. Sal vero bituminosis carbonibus, nec non subiecto ligno elicitur, & per Hassiam, Palatinatum & Rheno adjacentes regiones divenditur.

In Bavariæ oppido Reichenhalle, falsugo vena admodum liberali scaturit, ob ligni vero defectum, dimidia ejusdem pars in canalibus plumbeis per prærupta montium juga, fabrefactis hunc in finem machinis pressoriis, ad quatuor milliaria, Traunsteinium usque agitur, ibique coquitur.

In Sueviæ Halæ ad Kocheram salinæ admodum nitidæ constitutæ sunt, fonte nonaginta ulnas alto, sed sal in iis majoribus paulo impensis elaboratur, propter ligni penuriam, quod per rates eo advehitur.

In Thuringia, Franckenhusæ, jam tempore Friderici I. fons medius inter paludes & uligines suscitatus est, cujus latex largus quidem, sed non adeo falsus est. Sal deficiente ligno, fructuose sarmentis elaborant, illudque Thuringiæ vicinisque aliis locis impertiunt. Pari ratione Salzæ, quæ Duci Gothano paret, saltem coquunt, & licet liquamen sit levius & ipsa quoque coctio caro admodum stet pretio, quotannis tamen viginti mille ejus centenarios parant. Ejusdem quoque census est falsus Nauenheimensis fons ad Fridebergam, qui comiti Hanovienfi subiectus est, & jam eximiam salis copiam largitur.

Tum in Wetteravia, Homburgi, falsæ scatebræ saliant, quarum emendatio à Celsissimo Landgravio summo studio adornatur, teste WINCKELMANNO in *Chronico Hassiæ* pag. 71. Et in comitatu Niddensi ejusdem valoris fons est, cujus liquamen artificiose ad ipsam elaborationem præparatum sal granosum, candidum ac bonum præbet.

Turichemi, quod dicunt *an der Hardt* & ad Palatinatum tractum refertur, subsalsæ quædam sunt scaturigines, sicuti etiam in principatu Halberstadiensi, Ascaniæ, raro admodum exemplo, in prato fons deprehenditur, non adeo falsus, qui derelictui antehac ha-

Frid. Hoffmanni Oper. Tom. V.

bitus, jam denuo colitur & adhibitis ad salis coctionem carbonibus bituminosis, insignem ejus apparatus concedit.

In Martisburgensi episcopatu superiori memoria in pagis Liebenau, Koetschau & Teuditzsch salinæ quoque celebratæ sunt: & Teudicenses quidem ante CCL. annos aliquandiu cultæ sunt; sed quum expensæ redditus superarent, derelictui iterum habitæ sunt, quas anno 1514. Augustus Saxoniae Elector denuo suscitavit & fossa pro lignorum commodiore advectione instruxit, nihilo minus haud ita multo post rursus intercidit earum cultura, quam anno 1596. Lipsienses quidam mercatores tertia vicē susceperunt, qui salituram per artificium fructuosiorē reddunt & saltem jam conficiunt, Halensi nec candore nec virtute æquiparandum. Præterea etiam in vicis *Auleben*, *Kalten-eiff*, *Bosserne*, quædam scaturigines, salino elemento parumper imbutæ, incultæ jacent.

In comitatu Mansfeldensi non solum Arteræ, uber admodum salituræ, paulisper tepidæ, scatebra ex solo calcario prodit, quæ salis parum vehit; sed Erdebornæ quoque, vicino lacui falso pago, agitarunt quondam salis cocturam, de qua SPANGENBERGIUS in *Chronico Mansfeldensi* hæc memoriæ prodidit: Anno 1592. mense Februario, comes Güntherus cum Præsulibus & civitatibus de salinis ad lacum falsum transiit; id quod etiam confirmat ALBINUS in *der Berg-Chronicke*, pag. 308.

Marchia Brandenburgica etiam falsos quosdam emittit fontes, Pelizii, quos tempore Joachimi II. Electoris per multos annos haud exiguis sumtibus exercebant; quum vero torrentium affluxum inhibere ac divertere non possent, rem inchoatam destituerunt. Similiter in Marchia Uckerana, apud vicum *Besenbruck*, quædam falsuginis scatebræ, antehac cultæ, vacant. Præterea ad pagum Nauen scaturiginosus falsugine tractus est, cujus scatebræ jussu Friderici Wilhelmi exploratæ sunt, sed terram ob sabulosum deciduum solum ad octo tantum pedes tum egerere potuerunt, jam vero quadraginta pedum altitudo est, & fundamentum præbet arena bibula, comprehendens salituram pellucidam, cujus mensura sex salis drachmas vehit.

In Pomerania ulteriori Colbergæ, ad fluvium Perfante, salis coctura instituitur, quæ falsuginis largum quidem habet proventum, sed ob lignorum defectum nimis sumtuosa est: hinc commodum sibi parant, & Hispanicum ac Gallicum sal in salitura liquant, illud depurant & hoc modo majorem salis copiam eliciunt. Præterea etiam in vicis Trepnow & Doberpole salinæ, olim agitatæ, jam exoletæ sunt, id quod etiam iis evenit, qui in comitatu Rheinsteiniensi minus fructuose antehac cultæ sunt, nec non Oldensloënsibus in Holsatia, quarum tanta tempore Henrici Leonis fuit celebritas, ut etiam Lüneburgensibus æquipararentur.

Minoris pretii sunt salinæ, quæ in comitatu Marchiæ, Unnæ, in comitatu Lippenfi in pagis *Salz-Uffen* & Orba, Lüderæ in ditione Fuldensi, Werlæ in Coloniensi, nec non in Franconiæ oppidis Dalheim, Erpach & Cranach reperiuntur, & ob falsuginem quem fundunt leviolem, plerumque derelictui habentur.

Et ex his patere arbitror, amplissimum fontium salforum esse apparatus, quibus Germania nostra dotata est: quorum quidam ditiores, alii vero magis effecti sunt, haud secus ac metallifodinarum quædam multum, nonnullæ etiam parum largiuntur.

CAPUT IV.

De origine fontium falforum inprimis Halensium.

Pervulgata quidem, sed erronea Physicorum animis hæc huc usque inhæsit opinio; quod fluvii, scaturigines aliique minerales æque ac falsi fontes, originem ex oceano sortirentur. Autumarunt videlicet, aquam è maris barathro egredi & per salebras subterraneas tendendo, quasi percolari, ibidemque salinas, quas in connubio suo fovet, deponere partes, adeoque fossile sal producere; vel etiam ampliores terræ poros perlambendo, è conclusa vena in falsuginis scatebram eluctari. At vero, cum in quibusdam subterraneis tractibus, ingens fere salis montani sit affluentia, in aliis vero nemica ejusdem reperiunda, ex oceano ejus ortum arcescere absolum sane foret. Porro si è mari salis & fontium falforum esset origo, multo copiosior foret falsi fossilis proventus, & longe frequentiores falsuginis fontes, in maritimis locis, quam in his, qui ab eodem remoti sunt, quod tamen experientia refragatur. Denique si omnium scatebrarum ex mari origo est, nulla sane subministrari poterit ratio, quare falsugo nonnunquam sex aut quatuor salis uncias, interdum vero vix drachmas sex contineat.

Similiter aliorum etiam fontium perperam ex oceano incunabula ducuntur, eo quod momentosa admodum sunt argumenta, quæ contrarium adstruunt. Æstate enim flagrantissima & cœlo per aliquot menses impluvio, omnes propemodum scaturigines arefcunt & fluvii decrementum patiuntur. Tum constantis observationis est, semper non solum scatebras in valle ad radices objecti editioris loci salire, sed flumina quoque in acclivitate ex scaturigine oriri, & ad mare, quod depressiorem obtinet situm, declivi semper itinere tendere, absumentis in via fontibus aliis & rivis, nec non aquis quas nubes effundunt; quibus intumescunt & latius diffunduntur. Summa enim montium sublimiorum cacumina, ob aërem, nubes & vapores in arctius cogentem, non solum perpetua uligine mudent, sed accedunt etiam emissæ per pluviam & è nive discussa aquæ, quæ ob gravitatem suam subterraneos ductus atque salebrosos recessus petunt, argillam, saxa sabulumque pervadunt, ac tandem in collium convallibus prodeunt: quare quo magis montani apices pluvia perfunduntur, nivibus pruinisque obruuntur ac rore consperguntur, eo largius scaturigines laticem fundunt, eoque majus incrementum flumina capiunt. Sunt vero etiam nonnulli fontes, qui licet aliquandiu sol sit acutus & siccitas regnet, perpetuo tamen eadem quantitate undam emittunt; sed hi ex fluvio aut lacu, in eminentiori plaga constituto, nec tam facile siccescente, aquam nanciscuntur, quæ terram limosam laterariam offendens, ibi colligitur, & inde per varios mæandros, saxa & sabulum, flexuoso itinere pergit, & nonnunquam interjecta aliquot miliarium intercapedine, demum prodit, & si altum est comma, profundam, si vero humile, vadosam scaturiginem efficit.

Quod si itaque aqua, interiora terræ pervagans, communis aut alius mineralis salis venas præterlabitur, partes ejus liquefactas secum aufert, & ad superiora eluctans, fontes minerales, falsos & medicatos producit, quorum quidam largius, quidam parcius salino elemento imbuti sunt, prout nempe solum sale subterraneo magis vel minus redundavit, vel etiam aqua ejus majorem vel minorem copiam absorpsit. Hinc scite non minus quam vere PLINIUS *H. N. lib. XXXI. cap. 10.* asserit: eandem aquarum esse indolem, ac terræ quam perlabuntur. Neque proinde est ut du-

bitemus, quin iis in locis ubi falsi fontes scaturiunt, in terræ visceribus eximius salis apparatus reconditus sit, quum id ipsum pluribus rationum momentis confirmari possit, quorum præcipuum est, quod salifodinis plerumque junctæ sint falsuginis scatebræ. Constat id non solum Polonicarum exemplo, quæ præter adjacentes fontes, in ipsis fodinis falsum laticem emittunt, qui tamen incuriosius habetur, cum fossile sal ibi longe vilioris sit pretii, sed AVENTINI etiam *Annales Boiorum* fidem faciunt, quod in Baviaræ oppido Reichenhalle, eo in loco, ubi jam falsæ scaturigines proveniunt, olim salem effoderint. Et GEORG. AGRICOLA *de rerum subterranearum natura lib. IV. pag. 514.* Stasfurdenium salinarum mentionem injiciens, idem confirmat, *quin etiam*, inquit, *Stasfurdi sal in saxonibus fodi posset: nam æstivo tempore campi sale aspersi esse videntur, & semper effluunt falsæ.* Similiter Norvici, celebratissima ob salis præparationem Angliæ urbe, rupes quædam sunt, quæ non solum nitidissimum fossile sal præbent, sed etiam falsuginem eructant, de quibus pluribus *Acta Anglic. p. 881.* videantur. Porro si sal fossile in aqua dissolvitur & rursus coctione coagulatur, ejusdem indolis ac efficaciam sal emergit, quam quod è fontibus elicitur; quemadmodum etiam sal Polonicum hoc modo Tarnovici depuratur. Sal quoque tabulatum, quod Halæ ad Oenum, nec non Salisburgi, copiose paratur, sal fossile est, quod affusa aqua in liquamen conversum & postmodum à sordibus liberatum, igne submisso iterum in salem redactum est.

Inprimis autem memoratu dignum est, quod falsugo, quæ Allendorffii ad Werram deprehenditur, pro diversa anni tempestatumque conditione, diversæ indolis ac conditionis sit. Nimirum à bacchanalibus ad diem usque Jacobi, nec non cœlo per annum imbricoso ac substillo, uberior & sale magis onustus humor prodit, hiemali autem tempore annisque sitientibus, parcius nec adeo falsus profluit. Causa hæc subesse videtur. Tempestate pluviosa & humida, major aquæ copia à terra absunitur, latius in eadem diffunditur, altius quoque ad interiora ejus viscera penetrat & plus salis subterranei absorbet, adeoque uberiores falsuginis proventus gignit, quam aridis ac torridis temporibus.

Sed ne suspensum quendam teneat id, quo non nulli demonstratam hæcenus sententiam in dubium vocare conantur, asserentes: cum jam ab aliquot sæculis quædam è Germaniæ salinis excultæ sint, dudum utique debuiffe sal fossile absumi, si earundem origo ab hoc arcessenda esset; illud inprimis notandum est, quod iis in locis, ubi sal subterraneum provenit, amplissimus ejus apparatus & ingens copia latitet, ita ut salinæ venæ aliquot miliaria in longum latumque diffusæ ac dispersæ sint. Rarissime enim contingit, quod falsa una propullulante scaturigine, non in confiniis aut ad distantiam aliquot lapidum plures earum saliant; quemadmodum id salinæ Ducatus Magdeburgici luculenter testantur, quippe quæ aliquot miliarium spatio circumscribuntur, & interjecta haud ita magna intercapedine, Palæo-Salzæ, Mega-Salzæ, Suldorfi, Stasfurti & Halæ exstant, ne dicam, quod omnes urbis Halensis fontes aliquid salis in connubio suo habeant. Porro salinæ, quæ Ascaniæ, Erdebornæ, Franckenhusæ, Arteræ & in Martisburgensi episcopatu reperiuntur, non multum distant, & ob eandem falsuginis indolem, communicationem inter se habere videntur. Eodem etiam modo falsæ Baviaræ & comitatus Tirolensis scaturigines, sedecim circiter miliarium tractu continentur, & sibi invicem appositæ sunt; uti in Hallein, Reichenhalle, Hallstadt, Ischel, Lambach, Aussenfee, Halæ ad Oenum, ut adeo in aprico sit, venas salinas longissime porrigi, latissime explicari, nec adeo facile posse consumi.

Quapropter,

Quapropter, ut ad Halensium falforum scaturiginum contemplationem propius accedamus, extra omnem quoque dubitationis aleam positum est, eosdem sali subterraneo, ab affluente aqua dulci liquefacto, debere. Quum vero unus idemque semper humoris effluentis sit proventus, sive pluviosa, sive arida tempestas regnet, immo falsugo, si vacet fons, ad XXXVI. ulnas ascendat, quin penitus reflagnet: in proclivi est judicare, tum, quod conceptaculum, è quo initium ducit scatebra, aquam perennantem & nunquam exarescentem contineat, tum etiam, quod cum aquis pluvialibus aut torrentibus nullum, aut tantum exiguum intercedat ipsi commercium. Superius autem jam jam monui, scaturiginem, si æquabiliter semper redundat, ex fluvio quodam, aut in lacu confluyente aqua, originem fortiri: quare si circumjectum Halense solum contemplamur, Salæ fluvius statim se offert, qui non longe abest à salinis; sed ex hoc scatebræ originem arcessi posse, minus probabile est, eo quod interjectum inter fontes & flumen interstitium, tam exiguum est, ut terra salina in eo recondita, neququam sufficere potuisset falsugini, per aliquot sæcula tam liberaliter scaturienti, sed jam pridem consumi debuisset.

Hinc à remotiori & editiori loco ortus derivandus. Jam vero ad aliquot milliarium distantiam nullus, nec fluvius, nec lacus, sublimiorem situm obtinens, deprehenditur, ac falsus ille Seeburgensis lacus, qui duobus Hala distat lapidibus, dimidium milliare in longitudinem, ad ducentas & quod excurrit ulnas in latitudinem protenditur, & quibusdam in locis altissimus est. Confluit in hunc aqua tam ex quamplurimis dulcis aquæ scaturiginibus, quam etiam ex adjacente dulci lacu, & rursus per alveos quosdam effluit, ac tandem in rivum, Salza dictum, coit, qui in Salam effunditur. Una aquæ ex hoc lacu depromptæ mensura, tres salis drachmas comprehendit & mirandum est, saltem in eo nec augeri, nec imminui, licet ab aliquot annis quamplurimæ aquarum refusiones tractum hunc inundarint; adeo ut non immerito pro naturæ miraculo venditari possit, quod lacus falsus tam longe ab oceano remotus sit. Studiose itaque inquisivi, unde dulci hujus lacus aquæ falsedo concilietur? Quod si enim à sale fossili esset, prona admodum consequentia inde fluere, lacum hunc aut falsiorem fieri interdum, aut si non plus salis absorbere posset, ab affluente copiosius dulci aqua falsedine privari, quod tamen non contingit. Tandem post curatiorem disquisitionem ac perlustrationem deprehendi, quod priscis temporibus in hoc tractu fossile sal exstiterit, teste AGRICOLA, qui l. c. hæc prodidit: *salis montes multi & illustres sunt in orbe terrarum. Exstant tales in Germania, juxta Seeburgum & lacum falsum, qua itur versus septentrionem; sed non ceditur, quod ex hoc effluant fluvii, qui salis deferunt ramenta, & illi finitimæ regiones sint, quæ puteos habent falsos, è quibus artifices tam affluenter aquas hauriunt, ut fossili facile carere possint.* Accedit quod ante aliquot annos Erdebornæ, vicino lacui pago, salinæ jam exoletæ viguerint, quarum scatebræ hodiernum falsum laticem emittunt, ac in lacum effundunt ejusdemque aquam falsedine imbuunt, quæ semper eadem est, ob æquabilem jugiter per alveos aquæ emanationem. Ex hoc itaque lacu, qui sublimiori urbe nostra loco comprehenditur, quidam scaturiginum Halensium incunabula non incongrue petere annisi sunt; sed ad veritatem magis accommodatum esse videtur, quod non solum falsarum, sed etiam aliarum profundiorum aquæ dulcis in urbe Halensi scaturiginum, origo è flumine quodam alio arcessenda sit, eo quod iidem ex media, inter orientalem & septentrionalem plaga, proficiscuntur, quæ non solum eminentioris situs, sed etiam fluvio, Mulda nempe, quatuor ab urbe lapidibus, irrigua est. Dulcis

Frid. Hoffmanni Oper. Tom. V.

autem hæc est aqua, & solum falsa materia in subterraneis recessibus refertum pervadens, demum falsedine imbuatur, quæ eo uberius & acrior est, quo magis à coelestis aquæ & torrentium accessu libera existit. Quare si divitem falsilaginis venam illibatam servare velimus, eo cura dirigenda est, ut insipidæ aquæ appulsum arceamus, quod contingit, si liquamen falsum montosos tractus perlabitur, & argillæ, aut laterariæ terræ circumjectæ munimento, ab affluxu alius aquæ, tanquam in concluso flumine defenditur. Neque dubitandum est, quin eadem Halensium falsarum scaturiginum sit ratio, quarum una, *der Teutsche Brunn* dicta, lapidibus septa est, altera vero, quæ *Hackeborn* appellatur ex rupis sinu prorumpit; id quod lapis, qui scissilis instar, scaturiginem ambit, nec non ille, qui sub coctura cortinæ lateribus sese apponit, testantur. Præterea quam eximie hi fontes à commixtione dulcis aquæ defendantur, ante aliquot annos, cum novum in confiniis salinarum excitarent fontem, innotuit: terra enim ad LXX. ulnarum altitudinem egesta, nil nisi marga, lapidis instar sub terra indurata, deprehensa fuit, luculento testimonio, eandem tanquam promontorium oppositam esse eminentiori urbis loco, & impedire, quo minus defluentes hinc aquæ falsilaginem contaminent. Quid? quod ob eandem causam contingit, quod in civium cellis plerumque aqua stagnet, & solum Halense adeo irriguum sit, ut effossa quinque vix cubitorum profunditate terra, aqua profiliat. Multorum quidem huc usque in eo defixus fuit labor, ut modum excogitarent, quo aquæ alienæ accessum à falsugine non adeo falsa, averterent; sed quam difficulter id ipsum perficiatur experientia docet. Nec commodior datur ratio, quam ut in confiniis salinarum, & quidem in acclivitate illius regionis, qua torrentes decurrunt, putei, scatebris falsis profundiores, effodiantur, quo in iisdem confluant ac colligantur.

Denique commemorabile adhuc est, quod in locis quæ scaturigines salino elemento parcius imbutas emittunt, herba quædam singularis, saporem falsum obtinens, succrescat, quam ipse Stasfurdi, nec non in pagis Köttschau & Giebichenstein inveni. Vocatur hæc à Botanicis Kaly & multæ ejus numerantur species, quæ à TOURNEFORTIO pag. 247. enumerantur ac potissimum in littore maris Hispanici propullulant. Artifices eam redigunt in cineres, & inde sal alcali eliciunt, cujus in conficiendis vitris crystallinis eximius usus est, quem etiam in finem illud à Venetis adhibetur, teste VERULAMIO pag. 490. Asportatur quoque in Galliam, nec non Hamburgum, unde Neostadium in Marchia advectum, cum aliis mixtum, nitidissimis vitris conficiendis inservit.

CAPUT V.

De fontibus falsis Halensibus & falsuginis quantitate.

SAlsi itaque Halenses fontes in decliviori urbis regione, qua occidentem spectat, existunt, eamque ob causam locus, qui easdem una cum casis salariis comprehendit, Germanico nomine vocatur *das Thal*. Antiquissimus horum & profundissimus est is, qui antehac Vandalicus appellatus, jam nomine proprio *Gutgar* audit, quasi dicas bene coquens. Hic sublimius paulo reliquis constitutus, sepimento excepto, XLV. ulnas altus, in arctius semper spatium coit, circumpositis tam in superiori, quam media regione farmentis, ne circumjectæ terræ pondere comprimatur ac collabatur; interius vero circumquaque con-

tabulatus, ac in inferiori fundo craticula instructus est, per quam si pertica adigitur, nigricans & limosa coluvies subest. Scatebra jugiter in altum sputit falsuginem, quæ, si inferius sedimentum non conturbatur, perspicua atque pellucida est; quod si vero altius paulo ad XIV. ulnas liquamen affurgat, (quod XXIV. horarum decursu contingit) falsum illum liquorem, qui inter tabulationem ac sarmentorum rimas stagnans, fœculentus factus est, iterum absorbet & exinde paulisper obscuratur. Id vero præ reliquis hic fons præcipuum habet, quod falsilago nonnunquam turbulentiore existat, majorem spargat odorem ac effusa validius spumas agat, quam plerumque solet, quod ii, qui in ejus actione collocati sunt, tempestatum vicissitudini coelique mutationi tribuere satagunt.

Alter horum fontium, quem vocant Germanicum (*den Teutschen*) à priori occidentem versus ad quinquaginta passus remotus est & depressiorem situm obtinet, nihilo minus ad XXXVI. cubitos ima versus porrigitur. Vena ejus ex euro aquilonari plaga proveniens, falsuginem puram ac limpidam liberalissime fundit, adeo, ut nonnisi penitus exantlato fonte, incunabula ejus perspicere liceat, & vacante eodem, liquamen contentum XXIV. dierum spatio tantopere increseat, ut ob situm fontis humiliorem, transcendat sepimentum atque restagnet.

Ab hoc vix sex passuum intercapedine recedit tertius, quem peculiari denominatione vocant *Metritz*, cujus altitudo ad XXXIX. ulnas accedit, ubi ex gracili vena fœculentam ac turbidam undam emittit.

Quartus *Hackeborn* dicitur, & longius à reliquis disjunctus, in eminentiori plaga constitutus est, ac in petrosa caverna, effossus in fundo cuniculorum instar, laticem protrudit, profunditate ejus ad XL. ulnas protensa. Scaturigo parcius cæteris eructat falsuginem duriusculam, quæ fortiori quidem igne indiget, sed saltem bonum ac rigidum concedit.

Præter jam memoratos quatuor fontes, ante aliquot annos quartum elicere annisi sunt, qui præaltus ad CXXXVI. ulnas est: sed vena gracilis, nec sale adeo dives est.

Pervulgata de his fontibus plerorumque est opinio, quod primus secundo, hic vero tertio pabulum præbeat, adeoque unam tantum, in primo nempe fonte, esse scatebram, ex quo per commissuras ac terræ mæandros ad reliquos transcendat falsus latex; in quam procul dubio inducti sunt operariorum & experientiae testimonio, quo constat, si is, qui *Gutgar* dicitur, diutius & crebrius exercetur, alter, nempe *der Teutsche*, diminutionem patitur; contra vero si non exantlatur prior, posterior largius scaturit. Similiter si ex altero multum & diu hauriunt, tertius, qui *Metritz* audit, parcius, vacante vero illo, largius laticem emittit. At vero, licet de veritate hujus rei non dubitem, neutiquam tamen exinde conficitur, quod una tantum sit vena & scatebra, quæ tribus hisce fontibus falsuginem impertit, cum, uti ex sequentibus plenius innotescet, tam falsilago, quam sal ex iis elicatum, admodum inter se differant. Proinde non dubitandum est, quin quilibet fontium propria gaudeat scaturigine, licet quoque non negari possit, quod inter hos commercium quoddam intercedat, cui diminutio, quam exhausto uno, alter experitur, tribuenda est. Quum enim fluida æquilíbrio admodum gaudeant & graviter deorsum premant, contingit inde, ut aqua collecta, & in subterranea caverna in subline ob copiam elata, subjecta vacua & aëre repleta loca petat eademque occupet.

In determinanda vero falsuginis ex quatuor fontibus provenientis copia & affluentia, quæ aliquot abhinc annis jussu potentissimi Borussiae Regis curatius explorata est, Veteres, teste HOHNDORFFIO in *Halographia* prodiderunt, ex iis hebdomadis, quæ salis co-

cturæ tota impenditur, spatio, sedecim mille sexcentas & octoginta situlas educi posse; quod tamen ita intelligendum, non quod singulis septimanis hic capedinum numerus ex iis hauriatur, sed quod idem requiratur, ad reditus, quæ inde Regi, salinarum dominis & operariis cedunt, persolvendos, quemadmodum etiam superiori memoria, vacantibus per aliquot dies fontibus, totidem situlas extraxerunt. Quod si enim per singulas hebdomades exercentur, non pluris quam quindecim mille capedines largiuntur. Ejusmodi situla, ex constitutione Ernesti Archiepiscopi, anno MDCCCCLXXXII. promulgata, comprehendit octo amphoras, quæ hunc in finem fabricatæ, in locis quibusdam publicis asservantur, & duodecim mensuras Halenses, quarum quælibet duas falsilaginis libras continet, replent; adeoque una capedo duos falsuginis centenarios cum duodecim libris comprehendit, & ex novem harum quatuor salis glebas, quas dicunt *Stricke*, conficiunt. Quod si itaque jugiter per quinquaginta hebdomades, duabus nempe ad festorum dierum vacationem deductis, falsugo è fontibus exantlatur, 750000. capedinum numerus conflatur, è quibus 333332. salis glebæ elaborari possunt. Et quum ad duodecim tonnas, quæ ponderis genus, quod *Last* dicitur, conficiunt, complendas, triginta duo salis glebæ requirantur, utique apparet, quotannis ad minimum undecim mille ejusmodi pondera, sive trecentos & triginta mille salis centenarios, elaborari posse.

C A P U T VI.

De quantitate salis quem scaturigines in Halensibus aliisque salinis complectuntur.

Duplex eaque optima uti omnia fluida, ita etiam falsilaginem examinandi ratio est, quæ vel ignis ministerio, vel sine eo adornatur. Prius fit si certa quædam pondere, aut mensura determinata liquoris quantitas, igni committitur, ut humor, relicta materia solida, in auras diffugiât; posterius vero instrumento statico perficitur: cui scopo accommodari poterit hydrometer ex aurichalco conflatus, ad quem fabricandum, ipse celebri apud Lipsienses Mechanico, LEUPOLDO, primus auctor ac monstrator fui, vel etiam aliud instrumentum, hunc in modum parandum. Nimirum parva phiola ex vitro, succino aut ebore fabricata, injecto capiti ejusdem hydrargyro, aut plumbo granulato, ita concinnatur, ut aquæ pluviali immissa, æquilíbrio obtineat, sive ut collum ejus exacta æqualitate aquæ superiora tangat, nec emineat, nec submergatur: tum in collo ejus certi gradus describuntur, & injecto aquæ sale, quo usque affurgat annotatur, ex quo postmodum colligitur, quantum hæc vel illa falsilago salis comprehendat, quo major enim ejus est copia admixta, eo altius phiola collum effert. Ut vero hydrometer ejusmodi rite præparetur tenendum est: aquam ad experimentum non pondere, sed mensura exigi debere, ita nimirum, ut v. g. mensura pluvialis vasi indatur, immissoque eidem instrumento, salis drachmæ duæ adjiciantur, & quoad emineat collum observetur, simulque in eodem designetur. Porro duæ salis drachmæ rursus addantur, & eminentia lineola iterum describatur, illudque tandiu repetatur, quam aqua quinque salis uncias absorpserit. Sæpius enim minus recte conficiuntur lances hydrometricæ, & vel in æquales gradus dispescuntur, cum tamen iidem in inferiori parte in angustius coeant, vel etiam collum incondite effectum est, ut circuli in eodem, ob nimiam, qua se mutuo contingunt, propinquitatem, non sufficienter internosci queant. Non minus vitium est, si determinatum aquæ pondus

pondus e. c. libram recipimus, & admixta falis semuncia, gradum observamus in instrumento, eo quod confecta hoc modo lance, non exacte falis in aqua contenti pondus inquirere possumus, quum licet ponderata falsilagine, idem gradus quam in aqua sale imprægnata notetur, neutiquam eandem falis inesse eidem copiam exinde conficiatur. Quare & illud inprimis notandum est, quod hydrostatica ejusmodi instrumenta, certæ cuidam dimensionis & mensuræ accommodata fabricari debeant. Et quum mensurarum, pro diversitate locorum & regionum, diversa admodum sit ratio, commodissime per libræ pondus, quod ubique ferme idem est, supputatio, quantum nempe falis in humore contineatur, instituitur. Ex hoc enim fonte ingens inter eos, qui de salinis & quantitate falis in iis quædam prodiderunt, ortus est dissensus, ut aut non exacte institutum esse examen, aut ditiores olim fuisse venas statuendum sit: videlicet de nostris THOLDEN in *Haligraphia* memorat: quod fons, dictus *der Teutsche*, XII. uncias, alter *Gutgar* XI. cum drachma dimidia, tertius *Metritz* eandem quantitatem, & quartus *Hackeborn* X. uncias, unam & dimidiam drachmam falis in complexu suo foveat, cui calculo subscribit etiam UNZERUS in tractatu *de sale*, quum tamen curatius capto tentamine, longe minor resultet contentorum quantitas.

Proinde ingenue tradam, qua ratione ego examen falsuginis nostræ adornarim. Nimirum quum statera & pondus, quæ ad tentamina adhiberi solent, exactissima sint, hisce etiam falsuginem ponderando tentamento commisi, eoque compertum habui, quod XXV. falsilaginis libræ, ex fonte, quem vocant *den Teutschen* haustæ, falis quinque libras, tres uncias & septem drachmas, ex fonte *Gutgar*, itidem quinque libras duas uncias, ex fonte *Metritz*, quinque libras, ex fonte *Hackeborn* vero, quinque libras & duas falis uncias complectantur; adeoque prioris libra una custodit falis tres uncias & drachmas tres, secundi tres uncias & drachmas duas, tertii tres uncias, drachmam & triginta sex grana, quarti denique tres uncias & drachmas duas. Et quum una falsuginis mensura Halensis, è fonte, *Teutsch* appellato, duas libras & duodecim uncias pondere æquet, supputatione facta, falis novem uncias & drachmas tres eidem inesse constat; id quod etiam evaporatione facta comprobatum est: falsugo vero è quatuor fontibus confusa, novem uncias & duas drachmas largitur.

Præterea specificam falsilaginis, quæ ex quatuor fontibus educitur, gravitatem, comparatione simul cum aqua facta, exploravi hac ratione: vitrum quoddam primum aqua replevi & in trutina suspendi, ubi pondus ejus LXXXIX. libras & decem uncias æquabat, postmodum effusa aqua, falsuginem è fonte *Teutsch* eidem vitro infudi, & pondus ejus iterum exegi, eoque ad CII. libras accedente, animadverti, falsum liquamen duodecim libris, undecim unciis & duabus drachmis aqua gravius esse. Et quum liquamen fontium *Gutgar* & *Hackeborn*, æquipondium, nempe centum libras & duas drachmas obtineat, hoc duabus libris, quinque unciis & drachma ab ista præponderari, nec tam sale foetum esse constitit.

Porro experimentum feci, quænam similitudo aquæ cum falsugine intercedat: & dissolutis hunc in finem sex & dimidia falis unciis in aquæ sextario, salituram exinde productam remensus sum, eandemque nona parte auctiorem esse deprehendi, ita ut oppleta pristina mensura duæ adhuc superessent uncia.

Denique mentio adhuc injicienda aliarum Germaniæ salinarum, quas quidem omnes adire mihi non licuit: nihilo minus ea quæ ex civium & indigenarum narratione mihi innotuerunt, commemorare placeat. Videlicet ditissimam omnium & sale maxime onustam falsilaginem esse ferunt, quæ in Hungariæ

vicino Eperia pagò, Schower, nec non in vico Bavarico Reichenhalle provenit, cujus libra quatuor falis uncias cum semuncia & duabus drachmis largitur. Porro Lüneburgensis falsuginis libram quatuor falis uncias, Stasfurdensis tres, Mega-Salzensis duas cum dimidia uncias & drachmam, Palæo-Salzensis, nec non Suldorffensis, unciam cum drachma dimidia, Frankenhufanæ unciam & tres drachmas, Allendorffensis unciam cum semuncia, Ascaniensis, Colbergensis & Salzungensis unciam falis complecti constat.

CAPUT VII.

De Salis Halensis præparatione, ligni aliisque compendiis.

ÆDificium in quo Halæ falis præparatio adornatur, peculiari nomine dicitur in *Roth* & falsilago *die Soole*. In hoc terræ infossum est conceptaculum, *ein Soolfass*, quod CCXL. circiter falsuginis fitulas capit atque custodit. Porro in casa hac salaria focus est constructus, cui trabes duo oblique superpositi sunt, cum impactis ferreis cortinam sustinentibus uncis, quo possit commode demitti iterumque reponi.

Cortina, quæ sex ulnas cum dimidia in longitudinem, quatuor cum dimidia in latitudinem extenditur, ac dimidiæ profunditatem obtinet, si per integram hebdomadem sal in eadem coquitur, ter repurgatur hunc in modum: sustollendo demittunt eandem, & ante fores constituunt, suppositoque in latere baculo, stramen accensum subdunt; tum erecta illa, malleis materiam lapidosam, fundo adhærescentem & *Schöp* dictam, excutiant, ac tandem cineribus & sanguine bubulo eam obliniunt atque in statione pristina collocant.

Ad molem falis, quam vocant *ein Werck*, five duas glebas *zwey Stücke*, elaborandas, quatuor & dimidia falsuginis capedines five XXXVI. amphoræ requiruntur. Infusa hac liquaminis in cortinam copia, salinator fortem submittit ignem, & sanguinis bubuli tantum affundit, quantum calathus ad medietatem capit, quo sal exinde repurgetur. Ut primum ebullire incipit falsugo, spumas fortiter agit; haud secus ac carnes, quas sedulo despumant, & tum abjectis purgamentis, tam pellucidam atque perspicuam faciem induit, ut ipse fundus transpareat; quod horæ spatio contingit. Simul ac coire incipit & glebularum protrudit, flammam paulisper restinguunt & cortinæ supersternunt tres asseres, ne aura & ventus frigidior irruat, & ter horæ spatio aliquot zythi calathos infundunt, quo granosum evadat. Hoc facto, intactum sinunt tantisper, & carbones ad coagulationem perfectam (*zum Söcken*) addunt, superiora successive eximunt & qualis duobus, tignis impositis, induunt, quod dicunt *vollschütten*, iisque completis, ad aliquot spithamarum altitudinem cumulum addunt, donec omne sal fuerit extractum. Universum autem negotium quatuor horis absolvi potest, ideoque salinatores plerumque intra diem & noctem duodecim falis glebas (*Stücke*) conficiunt, licet MATTHESIIUS in *Sarepta* pag. 498. & THOLDEN *l. c.* tradant, quod prisca memoria quatuordecim elaborarint.

Ad tigna foco superstrata, ex destillante lixivio salino, concresecunt stiria, quæ una cum illo, quod guttatim delapsum in foco coagulatur & *Pot* appellatur, in usum animalium cedunt, eodem modo ac in Hungaria, Polonia, Russia, Transylvania, Borussia nec non Græcia falis fossilis frustra animantibus obijciuntur, ut ejus usus internam corruptionem & morbos arceat.

Materiam ignis hic loci subministrat aut lignum aut carbones bituminosi, quæ æquabilem semper flammam

servant; unde fit, quod sarmentis & stramine submissis, sal non tam bonæ notæ evadat.

Optimum autem & maxime acceptum sal, his potissimum dignoscitur indiciis, ut scilicet sit leviter spongiosum, candidum, leve, majora paulo grana obtinens & siccum; ignobile vero gravitate, compacta nimis mole, colore cinericio & madore sese prodit. Quapropter ut salinatores nitidum & præstans ejusmodi sal obtineant, has cautiones & præceptiones tenere oportet.

I. Sanguis bubulus non nimia pinguedine imbutus, sed penetrantis, volatilis odoris esse debet; eo quod omnis pinguedo salis coagulationem impedit, illudque molle ac farinulentum efficit; contra vero si is ipse multas fuscas, flavas & compactas spumas ejicit nitidissimus sal evadit. Nonnunquam enim falsugo limosa est, ideoque sanguine hoc bovillo, vel etiam albumine ovi, spuma concitanda est, quo cum eadem simul fordes, quibus conspurcata est, demantur.

II. Ad granulationem multum confert lenior ignis: quotidiana enim experientia compertum est, aucta nimis, inprimis circa finem, flamma, non tam copiosum, nec tam leve ac granosum sal fieri, ac si coctio leniter procedit.

III. Coagulationem quoque promovet si non cerevisia, sed zythus (*Breybahr*) aut Lobeiunensis cerevisia, quæ subacida est, aut quod melius adhuc est, vinum, sub coctione admiscetur. Quin immo periculum feci & infillavi rectificati vini spiritus unciam, loco cerevisiæ, quo insignem & notabilem immutationem ac coagulationem animadverti, sale candidissimo & admodum granoso evadente. Spiritus enim vini egregie facit ad omnium salium crystallisationem, eo quod unguinosam & unionem salinarum spiculorum impediens substantiam absorbet, & falsas è liquore in fundum dejicit particulas.

IV. Sal qui sub coctione concrevit, spatula provide eximendus est, ne nimia inde concitetur commotio & grana iterum disjungantur. Hinc *Acta Anglic. pag. 885.* præparationem salis Norvicensis, quæ conformis admodum nostræ est, tradentes, memorant: quod sal in minoribus paulo cortinis, bihorio circiter confectum, longe melius in aëre perduret eo, quod in profundioribus elaboratur & semper è lixivio extrahitur; licet hoc, illo sit mollius, magis granosum ac levius.

V. Commemorabile est, quod sal, repurgata ab adhærescente lapide cortina, primum coctum, non eandem bonitatem, levitatem, eundem nitorem idemque pondus adipiscatur, ac id, quod postmodum elaboratur. Tum enim flamma fortius ac propius falsuginem feriens, granulationem impedit, quippe quæ longe melius procedit, si lapide adhærescente interjecto, accessus quodammodo retinetur: neque tamen ut ad nimiam molem ac crassitiem lapidosa ista materia concreseat concedendum est; eo quod plus ligni, aut alius pabuli flammæ, ad coctionem requiritur.

Denique de ligni compendiis in salis præparatione quædam dicenda sunt. Et focus quidem opportunus jam est constructus, ut longe minor ligni copia salis coctioni sufficiat; neque dubium est, quin plura adhuc excogitari possint artificia. Nostra hac de re ita fert sententia: in qualibet casa salaria duos constitutos esse focos, cum cortinis duabus, quarum altera paulo minor, altera vero solitæ sit amplitudinis, latior tamen & fundo non adeo impresso. Hæc loco consueto reponenda erit, ut in ea sub continua, leniori tamen flamma, plenaria salis elaboratio perficiatur; illa vero post hanc sublimius constituenda, quo ignis, priori submissus, & ab eo excitatus calor, per focum ejus simul transeat & demum ex infuniculo egrediatur. Tum falsugo frigida huic infundenda, ut incalescat, eaque calefacta ac in majorem illum catinum derivata,

nova denuo affundenda, ut semper calida sit, nec novus ac fortis ignis ad ejus calefactionem admovendus sit.

Alia commodis lignique compendiis serviendi ratio est, si falsuginem leviolem & non adeo falsam artificiiis quibusdam, quæ dicunt *Leck-oder Gradier-Wercke*, tractant, & disjecta aëris beneficio nimia humiditate, eam sale magis onustam reddunt, quod solenne est Alendorffii, Nauenhemi, Niddæ, Salzungen, Lucenæ, Ascaniæ & alibi. Sed sumtus haud exigui impendendi sunt ædificio, in quo tamen vix tantum falsuginis præparari potest, quantum duabus cortinis coquitur. Præterea subjecti straminei fasciculi quotannis putrescunt, à sarmentis vero, loco illorum suppositis, sali amaricans sapor conciliatur. Imbres quoque conceptacula sæpius corrumpunt, & ros iterum sese liquamini insinuat, totumque negotium minus exoptato succedit, nisi siccitas per annum regnet, & commodissime tantum adornatur vento boreali & orientali spirante, vernali atque æstivo, non autem hiemali tempore.

Nonnulli eundem in finem falsilaginem frigori exponunt atque gelari sinunt, & aptissima est huic scopo illa, quæ duas aut unam cum dimidia salis uncias comprehendit: quæ enim tres, quatuor aut quinque uncias custodit, nunquam frigore densatur, dimidia vero aut una uncia facta, tota in glaciem abit. Sed negotium cum magna falsuginis copia non procedit.

CAPUT VIII.

De natura, indole ac viribus salis Halensis.

Transcendimus jam ad considerationem indolis ac virtutis salis nostri, quibus potissimum ab aliis salis communis speciebus dignoscitur atque distinguitur. Notissimum enim non solum est, maximam inter salia intercedere differentiam & unum præ alio pluris æstimari; sed experientia quoque constat, hoc, illo magis esse granosum, candidius, acrius, durabilius, salubrius & ad ciborum condimentum carniūque falsuram aptius. Ut igitur nostra hac de re innotescat sententia, hanc interponimus: sicuti in tota universi hujus compage, una tantum est aqua, unus per fermentationem paratus spiritus ardens, unus mercurius, unum volatile sal, unum acidum, nitrosum ac vitriolicum sal; ita pari ratione unum idemque sal commune est: sed quum plures alienæ, terreæ, lapidosæ, sulphureæ, calcariæ, minerales ac pingues particule cum hisce corporibus connubium ineant, diversa exinde emergit eorum indoles; & sal commune idem semper obtineret ingenium, si quis pingues, terreas calcareasque ab illo artificiose segregare nosset partes. Est autem inter communis salis species purissimum marinum & fossile depuratum sal, nec non illud fossilis genus, quod ob nitorem ac pelluciditatem gemmeum appellatur; illud vero quod effoditur & ex liquamine falso paratur, multum utique cum his differentiæ alit. Quum enim subterranei tractus varii generis salibus, lapidibus, terris & vaporibus referti sint, quæ multiplici ratione, tam ipsius salis connubium, quam aquæ venas salis perluentis societatem, adire possunt; facile constat, illud, quod depuratione ab his sordibus liberatum est, reliqua puritate antecellere, cujus notam præbent crystalli candidæ ac duræ. Nihilo minus tamen ex sale fontano, adeoque etiam nostro Halensi, candidum, purum, acre ac nitidum ejusmodi crystallinum sal facili negotio elaborari potest; per iteratam nempe solutionem ac coagulationem, qua pingues, sulphureæ & lixiviosæ adhuc commixtæ fordes ab eodem separantur. Nimirum aut falsugo ipsa in calido hypocausto fornaci imponitur, ut humor successive in auras avolet; aut sal

jam

jam elaboratum in crucibulo ignis ministerio in fluorem redigitur, tum in cœlesti pura aqua iterum dissolvitur, solutum per colatorium trajicitur, ac tandem concretioni exponitur.

Quum itaque diversa salium bonitas sit, differens quoque eorum est usus & dispar utilitas. Depuratum sal marinum & fossile, nec non sal gemmæ, omnium purissima sunt, fossile acerrimum & in aëre maxime durabile, fontanum vero & iterata coctione ex marino paratum, corpori humano maxime accommodatum est atque proficuum; eo quod per ignis torturam, rigidiores, asperiores & acutiores ejus partes infringuntur ac tenuiores mollioresque redduntur, ne tam acriter carneas corporis fibrillas ac membranas aggrediantur, non tam alte iisdem sese insinuant easque rodant, neque tam prompte scorbuto, ulceribus sanguinisque impuritati ansam & pabulum præbeant: quo nomine suspiciendum inprimis est nostrum sal, quod præter temperatam indolem, non solum in complexu suo fovet alcalinum amarum elementum, sed etiam facili negotio ex humorum vitalium connubio iterum ejicitur, iisdem non spissitudinem inducit, & promptissime per urinariorum meatuum excretoria ejicitur. Proinde in Germania, & maxime in nostris his regionibus, falis Lüneburgi & Halæ proventus omni æstimatione dignus est; quorum tamen prius durius est & acrius, id quod ex utriusque solutione, gustu explorata, innotescit, posterius vero ex plurimorum sententia ad ciborum, piscium, butyri aliorumque falsuram multo aptius est illo. Non quidem negandum est, Halense sal, ob alcalini connubium, humiditatem ex aëre in principio absorbere, & postmodum subsidere atque concidere, sed haud difficulter fluxile hoc elementum ab eodem separatur, si nempe liquamen falsum, quod à glebis destillat, nec non illud, quod finita coctione remanet, non rursus falsugini in conceptaculo admisceatur. Accedit, quod licet sal nostrum recenter paratum humiditatis quippiam ex aëre admittat; attamen si diutius in eodem detinetur, copiose ampliori & capaciiori vasi inditum, procedente tempore ficescit, compactum evadit ac durum, ut in aëre perduret & sine liquationis periculo navigiis vehi & aliorum transportari possit. Humiditas enim partim inferiora petit, partim etiam acidum vitriolicum sal, quod in aëre hospitur, calcareum & alcalinum elementum, quod humiditatem absorbet, in fixiorem ac constantiorem statum traducit.

Commemorabile est quod ex falso isto liquamine, quod guttatim à glebis decedit, per coctionem parari possit sal amaricantis saporis, quod XXIV. horarum spatio aëri expositum madescit ac liquefcit, & cujus ortus procul dubio sulphureæ & calcareæ terræ, quam falsugo perlabitur, tribuendus est. Quum enim ex acidi falis communis & terræ calcariæ connubio, amarum sal emergat; pleræque autem falsarum scaturiginum in nigricante aut bituminoso solo comprehendantur, aut terram calcariam, gypseam vel septiformem perluant; hinc fit, ut aquæ præterlabentes partes quasdam forbeant & secundo flumine secum auferant, quæ sal amarum, à LISTERO falis calcarii nomine insignitum gignunt, quod ob virtutem aperientem & discutientem non insalubre est, & in quamplurimis medicatarum aquarum deprehenditur.

Non minus memoratu dignum est, quod in fontibus, quos dicunt *den Teutschen und Hackeborn*, in fundo ad ipsius scatebræ ora compacti ac duriores falsi lapides, ex stratis quasi conflati, concrefcant, qui eandem sibi vindicant originem cum lapidosa illa materia, quæ cortinæ lateribus adhærescit, ac trium dierum spatio ad duodecim librarum pondus increfcit, calcariæ scilicet, à falsugine in subterraneis meatibus absorptæ terræ.

Tandem non prætereundum est, quod si falsugo

unius fontis sola, nec cum aliis commixta, igni committatur, elicited ex singulis seorsim sal, differentis quadammodo indolis sit. Nimirum illud quod ex fonte *Gutgar* appellato paratur, reliqua candore ac mollitie antecellit, ex fonte *Teutsch* productum, minora granula obtinet & compactum est, è fonte *Hackeborn* granosum, nitidum ac candidum est, ac denique id, quod fons *Metritz* largitur, non tam albi coloris est ac è reliquis. Accedit quod falsugo fontium *Gutgar* & *Metritz* longe citius ac promptius ebulliat, quam reliquorum, eo quod aquam vehunt lævem & mollem, quæ pinguem limosum solum transiit, illi vero asperiores & lapidosam, per calcariam & gypseam terram tendentem undam, trudunt. Hinc MATTHESIIUS in *Sarepta* pag. 497. asserit, quod falis coctura cum unius fontis falsilagine non commode adornetur & instituat: & Veteres sapienter constituerunt ac fanciverunt, ut ex confusa scatebrarum falsilagine, sal conficeretur.

CAPUT IX.

De efficacia ac utilitate falis communis, inprimis Halensis.

ASseruimus jam in præfatione hujus commentationis, quod sal commune jure inter rerum conditarum præstantissimas, utilissimas & optimas connumeretur; nunc specialius paulo, brevibus tamen, ejus indolem, vires ac usum indagabimus & explanabimus.

I. Præcipuum falis communis est, quod in crystallos cubicas concrefcant; sicuti nitrosum sal, prismaticam, & aluminosum sexangularem, sub coagulatione induit figuram.

II. Aqua communis nullum sal tanta copia absorbet quam commune; ita ut ejus libra sex falis uncias dissolvat, cum vix quatuor nitri uncia & minus adhuc aluminis & vitrioli pondus, in eadem liquefcant.

III. Omnia alia falia hominibus non adeo sunt proficua, sed sæpius noxia; commune autem, nisi abundantius ingeratur, quotidie innoxie assumi potest: quinimmo hoc sal ipsam plantarum substantiam ingreditur, teste herba *Kaly*.

IV. Aër salinis particulis refertus homini non infert detrimentum, exemplo eorum, qui in salifodinis Polonicis, jugiter continentibus diebus, immo nonnunquam noctu ac interdiu, labores obeunt & vegeti, sani atque obesi sunt. Ipse quoque vapor, qui in casis salariis ex sale atque calore exsurgit, suavis odoris est ac saluber, aperitiva & exsiccante virtute præditus, quare etiam salinatorum plurimi, robusti, sani ac validi sunt.

V. Eximia quoque falis virtus est, quam usu externo, arcendo putredinem, præstat. Veterum olim fuit mos, ut liberos recens natos muria abluerent, autumantes, corpus hac ratione firmari ac indurari, teste CÆLIO RHODIGINO in *S. lectionibus*, qui etiam memorat, Ægyptios mumiarum præparationes & cadaverum balsamationes falis ope adornasse & perfecisse. Neque ignotum est varia non solum carni ac piscium genera, si sale adspargantur, diu admodum conservari posse, inprimis in sicco minusque calido loco, sed etiam plantas & succosos fructus, per falsuram à corruptione defendi posse, uti sunt cucumeres, asparagus, fœli, cynaræ ac cepæ. Enim vero ad balsamationem humanorum cadaverum nihil æque aptum est & accommodatum, ac sal commune, aliis quibusdam salibus nuptum; qua methode, ipse ante aliquot annos, primarii cujusdam aulae viri cadaver, fervidissima æstate obturavi & illibaturn servavi. Et ipse omnes propemodum corporis humani partes, jam à decennio in

in liquore quodam, ex sale communi, aliis adhuc remixto, conflato, incorruptas ac tam vividas possideo atque affervo, ac si demum essent exemptæ.

VI. Non minor est utilitas, quam corpori humano & reliquorum animantium sal, interne adhibitum, concedit. Licet enim nunquam, nec in fluidis, nec solidis animalium partibus, ullum salis vestigium proprieprehendatur, sed illud ipsum semper iterum per alvi, sudoris ac urinæ evacuatoria è corpore proscribatur; nihilo minus tamen ejus usus ad morbos, qui ex humorum affluentia & corruptione oboriuntur, præcavendos, est sane præstantissimus. Videlicet, cum corpora animantium à putredine in quam admodum prona sunt, per jugem atque perennem sanguinis humorumque cursum defendantur, sal autem fibrillas stimulo, hunc non solum intendat, sed etiam ut superflua ac noxia eo promptius per alvum & ductuum urinam excernentium ostia foris dimittantur, & corpus à superfluis, acribus ac humidis partibus repurgetur, efficiat; nullum utique est dubium, quin sal, modice usurpatum, ab omnibus impuritatibus ipsoque scorbutocustodiat. Hinc etiam experientia compertum habemus, quod ii, qui parcius cibos sale condiunt, sæpius morbis tententur; ac longe facilius multoque magis sanguinis impuritatem contrahant, iis, qui eodem sufficienter utuntur. Ex adverso autem nimius salis usus admodum inimicus est atque damnosus, eo quod hoc ipsum intimius carnis poros subiens, fibras ejus rodit, corrodit humoribusque insensam spissitudinem infert: id quod iis, qui jam sanguinem lentescens & crassiores alunt, motu corpus non exercent & parcius bibunt, eo perniciosius est, & ad scorbutum, scabiem, ulcera atque dolores promptissimum parat aditum.

VII. Præter memoratam hæctenus salis in animantium corpora operationem, peculiaris & commemorabilis adhuc est illa, quam in aliis, quæ vita & nutritione destituuntur, exserit. Videlicet aurum, non nisi salis communis ministerio, potest dissolvi, & argentum, cupro contaminatum, ab ejus connubio, adjecto sale, per coctionem commodissime liberatur. Præterea ex fracidis vinariis vasis, putidus odor & ingruens

corruptio, salitura calefacta promptissime abstergitur & removetur. Quid? quod testimonio & experientia præcipui cujusdam, & in re familiari exercitatissimi viri, compertum habeo, curculiones, damnosa frumentis animalcula, funditus deleri, si granarium tempore vernali aliquoties salifugine eluatur: equos quoque exoptatissime ali & à morbosis insultibus immunes servari, si equile nonnunquam falso liquamine perfundatur & abstergatur, maxime si equi, pituitosis & catarrhosis contagiosis defluxionibus affecti, antehac in eodem fuerint detenti.

VIII. Accedit penetrantissimus, & præ omnium mineralium salium, maxime volatilis spiritus, qui ex sale cum argilla vulgari modo elaborari, vel etiam instillato sali, vitro indito, oleo vitrioli, inflar subtilissimi vaporis exsurgens, leni admodum igne admoto, in objectum receptaculum propelli potest, & non solum ciborum cupiditatem augendo, solutioni stomacho egregie subvenit, sed etiam ad viginti guttas libræ aquæ frigidæ instillatus, sitim & caloris vehementiam restinguit, bilis acrimoniam temperat, urinosum laticem movet, omnibusque, quibus sanguis exæscuat & bilis regurgitans intestina torquet, saluti est.

IX. Ultimo loco inter utilitates, quæ sali communi debentur, connumerandus adhuc est balnei ficci usus, in casis salariis, in iis illarum locis, quæ exsiccationi salis dicata sunt. Nimirum calidus ille, è sale exhalans vapor, sudorem validissime elicit, tumores discutit & catarrhos stagnantesque in carne & artubus humores resolvit atque dispellit, & proinde balneum constituit valde salubre, quod opportune tempore vernali & autumnali, vena prius incisa & expurgata leniori laxante prima regione, nec non epotis aliquot infusi Thée, aut herbæ veronicæ, quo humores diluantur, vasculis, adhibetur. Tenendum tamen est, quod peracta sudatione, studiose cavendum, ne frigidior aura corpori adspiret; nec non, quod corpore succo & sanguine farto, ira facile exardescens, & ventriculo ac intestinis sentina tenacis & visceri humoris scatentibus, circumspiciat ejus usus requiratur, quin immo nonnunquam plane nocentissimus sit.

D E

METHODO COMPENDIOSA,

Plantarum vires & virtutes in medendo indagandi.

Quemadmodum benignissima natura innumerabilem rerum copiam ac varietatem in sapientissimi conditoris venerationem liberalissime protulit: ita provido admodum ejus consilio factum est, ut singulas diversasque rerum species, quo facilius dignosci queant, propriis characteribus & peculiaribus notis quasi signatas conspiciamus. Magna ac pene immensa est animantium in illorum regno multitudo ac varietas, quorum alia in aquis, alia in aëre, suum & victum habent & domicilium: quodvis tamen eorum dotatum est certis notis & characteribus, quibus sane unum ab altero facillime discerni potest. In mineralium regno illud profecto mirabile, nec translatitia animadversione dignum videtur, quod & metallorum & mineralium mineræ, ratione locorum & subterraneorum tractuum, ubi eruuntur, peculiari colore, figura & proprio habitu instructæ sint, ut quilibet harum rerum apprimè gnarus, ex solo aspectu singulorum natales & incunabula possit dijudicare. Inter centum enim mineras, v. g. plumbeas, cupreas, argen-

teas, vix una reperitur, quæ alterius similitudinem exacte referat. Quod etiam valet de marmore, jaspide, aliisque pretiosis gemmis, quarum species ut diversissimæ, ita distinctissimæ apparent, ut hisce in rebus exercitato in facili & expedito sit, statim ad primum aspectum indicare, ubi hic vel ille jaspis, aut hoc v. illud marmor natum fuerit. Longe vero maxima & incredibilis est, in amplissimo illo vegetantium regno, plantarum, tam ratione generum, quam specierum, copia & varietas. Nihilo minus tamen & hic cernuntur satis significanter expressa sapientiæ divinæ vestigia, dum quodvis plantarum genus, singulasque earum species, certis quibusdam ac peculiaribus, quibus dignosci possint, characteribus insignitas observamus. Quæ exquisitior herbarum notitia, veteribus plane ignorata fuit, unde non mirari oportet, quemvis pro lubitu, huic vel illi plantæ certum attribuisse nomen, quæ arbitraria appellatio, non modo rem botanicam mirifice perturbavit, sed etiam hæctenus maximam in addiscendo peperit difficultatem. Quemadmodum

dum vero nostra ætate, omnes fere artes ac scientias longe subtilius excultas intuemur: ita etiam Botanicæ studium, olim rude admodum & incultum, nostris temporibus, ad ingentem perfectionis gradum pervenisse lætamur. Surrexerunt enim diversis in regionibus præstantes ingenio viri, qui conquistis omnibus adjumentis, contentissimo studio & mira accuratione in id incubuerunt, ut rem botanicam, ab exiguis profectam initiis, in majus meliusque proveherent. Posteaquam enim horum opera ad liquidum perductum est, cuivis plantæ certum insitum esse characterem, secundum quem singulæ ad certum genus referri debeant, omnes sane sublatae sunt, quibus hoc studium olim laboravit, difficultates, nec amplius operosa, sed potius perexpedita levique negotio parabilis est herbarum cognitio. Eminent in his rei herbariæ statoribus CÆSALPINUS Italus, qui primus omnium emicuit, & FABIVS COLUMNA; ex Anglis MORISONEM & RAYUM, ex Germanis HERMANNUM, AMMANNUM & RIVINUM, ex Gallis TOURNEFORTIUM inprimis veneramur, qui tamen laudati autores paululum in eo inter se discrepant, quod quidam pro fundamento hujus disciplinæ habeant capsulas seminales earumque figuram & habitudinem, alii vero, ex florum figura & petalorum numero, eam addiscendam esse contendunt. Nobis eorum sententia proxime ad veritatem accedere videtur, qui non unum sufficere characterem, sed plures simul spectandos esse asserunt, ita, ut totus plantæ habitus tam quoad capsulas seminales, quam flores, folia & radices, pro vero ac genuino hujus scientiæ fundamento ponendus videatur.

Quamvis autem nostris temporibus facta fuerit tam admirabilis ad omnem hujus disciplinæ excellentiam progressio, tamen mirari subit, quod hætenus perquam pauci eruditorum satis diligenter cogitaverint de invenienda ejusmodi methodo, qua specificæ & salutiferæ vires cujusvis plantæ facile indagari possint: quam ego rem profecto majoris utilitatis, ac exactiorem illam herbarum ratione generis & nominis imponendi notitiam, arbitror. Et licet nonnulli hoc in labore non sine laude desudaverint, dum partim ex ipsis characteribus, partim ex sapore & odore, hanc virium cognitionem petendam esse affirmarunt; tamen paulo curatiori studio non solum hanc viam fusius persequi, sed & novam quandam methodum, virtutes herbarum dijudicandi, hoc loco proponere instituimus.

Primum itaque asserimus, plantas, quæ similes gerunt characteres, viribus inter se multum ac sæpius convenire. Ita cinnamomi, cassiæ, malabathri, camphoriferæ arbores, unum eundemque præ se ferunt characterem, nec adeo magnum virium discrimen in iis deprehenditur. Zingiber, zedoaria, utraque galanga, costus Arabicus, canna Indica, zerumbeth Garciae de Orto, & simili characterem, & pari virtute gaudent. Sale enim, quo pollent, acri, viscidos & crassos humores incidunt, attenuant, atque adeo ad solvenda obstructionum claustra, in morbis longis, & ubi cruditas ingens est in primis viis proventus, mirifice conferunt.

Omnes fungi, hisque congeneres agarici, boleti, lycoperda, fungoides, eodem cognoscuntur characterem, omnesque ac singuli virulenta subtili quadam acrimonia solidis ac motricibus corporis nostri partibus vim hostilem minantur, neque internus eorum usus adeo tutus observatur.

Omnium muscorum, lichenum, & his congeneris lycopodii, equiseti, lunariæ, osmundæ, ophioglossi, & idem character & virtus valde similis eademque est; utpote manifesta siccandi & adstringendi pollent facultate. Dantur in plantis quædam in dorso semen ferentes, cujus generis sunt filix mas & foemina, lingua cervina, trichomanes, adianthum nigrum, ruta

muraria, polypodium, in quibus vis est splenetica, leniter, minus firmum viscerum, inque primis lienis, tonum, roborans.

Pulmonaria maculosa, lithospermum, cynoglossa, anchusa, buglossa, borrago, consolida major, post florem monopetalum, semina quatuor nuda proferunt, & ob terreum, quo abundant, elementum, glutinante & subadstringente virtute vulneribus consolidandis opitulantur.

Sunt plantæ, quæ semina plura reniformia, in formam caseoli congesta, post florem monopetalum proferunt, ut malvæ, althææ species, quæ succo turgentes glutinoso, tenuem humorum acrimoniam demulcendo, in morbis qui ab hac nascuntur, opem desideratissimam ferunt.

Parietaria, blitum, atriplex, chenopodium, bonus Henricus, mercurialis, spinachia, ejusdem characteris succum alunt nitrosum; hinc ad alvum solvendam & acrimoniam humorum deliniendam, plurimum conferunt.

Plantas verticillatas, quarum flos monopetalus irregularis, galeatus & labiatus existit, sale volatili oleoso ubertim esse instructas, nemo facile, qui has plantas igne chymico tractavit, inque usum adhibuit, in dubium vocare poterit. In harum numero sunt melissa, mentha, origanum, majorana, serpillum, rosmarinus, marum, hyssopus, chamædrys, chamæpitys, lavendula, salvia, nepetha, marrubium Creticum, quæ omnes inter cephalicas & nervinas herbas ad imbecille nervorum genus corroborandum, principem facile locum tuentur.

Sequuntur jam sic dictæ umbelliferæ, quæ semina nuda gemella post singulos gerunt flores, quas inter eminent carvum, angelica, levisticum, chærefolium, daucus, imperatoria, apium, anethum, coriandrum, anisum, pastinaca, quæ oleo & copioso subtili & vaporoso virtutis sedativæ abundant, per quod & humores crassos & flatu discutiendi facultate pollent eminente.

Denique benigna profert natura plantas, quarum capsula tripartita, post florem hexapetalum regularem conspicitur, ut omnes allii, ceparum, asphodelorum species, quæ duplex, quo agunt, agnoscunt elementum, quorum alterum est tenue acre sulphureum, alterum succus dulcis glutinosus. Ratione prioris fortiter excretoria stimulo, urinam & sudorem pellunt sanguinemque exagitant. Si vero sal acre subtilius coctione perit, remanet glutinosus succus, qui duritiem humorum emollit & abscessus maturat.

Ex compositis, quæ ex regularibus constant floribus, & sulphure constant vaporoso, & principio falso amaro gaudent, ad pellendos menses, & ad alvo excludendos lumbricos, non parum conferunt, ut sunt tanacetum, abrotanum, artemisia, mentha Saracenica. Quædam ex compositis ex meris semiflosculis confluctæ sunt, ut dens leonis, scorzonera, endivia, hieracium, cichorium, chondrilla, quæ lactescentes sunt plantæ & absterfivo sale præditæ.

Quoad arbores abies, pinus, larix, cupressus, arbor vitæ, cedrus de Libano, picea, balsamum de Tholu, sunt coniferæ & gerunt flores imperfectos amentaceos, à fructu remotos, & omnes ac singulæ hæ gaudent resinoso succo, ex quo destillatione subtile balsamicum oleum elicitur quod valde calefacit, urinam pellit, & morbis longis ac frigidis, fibras delassatas roborando viscidosque humores attenuando, usum præbet non contemnendum.

Sed missa hac via, quæ nos per characteres & signaturas externas, de convenientia virtutum instruit, progressum jam facimus ad aliam methodum, qua per compendium quasi, beneficio saporis & odoris, ad potissimas ac præcipuas plantarum in morbis arcendis & vincendis vires, facile pervenimus. Valde potentia

60 De methodo compendiosa vires plantarum indagandi.

in mixtione corporum ad producendas virtutes & vires elementa sale & sulphur esse, nemo facile, qui leviter saltem scientia physica & chymica tinctus est, ignorabit; quorum alterum, nimirum sal, sapore, sulphur autem, odore, optime dijudicatur, maxime quum per diversissimas mixtiones partium, principium hoc salinum sulphureum, & etiam ob id, sapor & odor mirifice variant. Placet autem circa hanc rem certas quasi constituere leges ac regulas, secundum quas ex sapore & odore de viribus plantarum certum ferri possit iudicium.

I. Omnes plantæ amaræ, propter sal, quod in se reconditum habent, alcalino-fixum, terreum, cum sulphure fixiori mixtum, virtute gaudent aperiente, incidente, obstructions & infarctus viscerum expediente, dum acidum & viscidum extinguunt, omnisque generis excretiones leniori stimulo adjuvant, hinc alvum servant apertam & perspirationem faciliorem reddunt, aque ideo in cachexia, scorbuto, hydropo, ictero, mensium suppressione, affectu hypochondriaco, quartana aliisque febribus intermittentibus, stomachi vitiis, cruditate acida, appetitu extincto & alvo adstrictiori opem ferunt plane egregiam. Hujus generis sunt absinthium, aristolochia, centaurium minus, carduus benedictus, carduus Mariæ, gentiana, scordium, fumaria, trifolium fibrinum, tanacetum, flores chamomillæ, radix cichorii, gentianæ, rhabarbari, aloë, china chinæ, extractum colocynthidis.

II. Quæ valde acrem saporem exhibent, fortemque odorem exspirant volatilem, qui etiam destillatione exhalat, vim habent antiscorbuticam, sanguinem vehementer commovent, menses pellunt, & in scorbuto, ut vocant, frigido, exulcerationibus, tumoribus, cachexia, immo etiam in vitiis stomachi, ex cruditatibus acido-viscidis subortis, præstantissimam exserunt efficaciam. Ad hanc classem spectant radix ari, acorus, beccabunga, cochlearia, caltha palustris, eruca, hydrolapathum, nasturtium aquaticum, nasturtium filiquosum, piperitis, sedum minus, persicaria acris, fenecio, piper, sinapi, allium, cepæ, raphanus rusticanus, calamus aromaticus.

III. Plantæ aromaticæ, quæ subtili grato oleo polent, potissimum nervis dicatæ sunt, siquidem universum genus nervosum corroborant, ejusque infirmitati subveniunt; unde in omnibus morbis, qui nascuntur ex virium imbecillitate & tono partium nervosarum laxato, v. g. in paralyti, apoplexia, epilepsia, rheumatismis, neque minus in ventriculi & uteri affectibus, in capitis aliarumque partium doloribus, inque arcendo membrorum externorum sphacelo & corruptione, tumoribus quoque discutiendis & sedandis fluxionibus, præstantissimum adjumentum commodant. Hoc in numero sunt abrotanum, mentha, melissa, rosmarinus, majorana, mentha Saracenica, origanum Creticum, calamus aromaticus, flores lavendulæ, flores chamomillæ Romanæ; ex aromatibus caryophylli, macis, nuxmoschata, cubebæ, cinnamomum, cardamomum, coriandrum, nigella.

IV. Quibus sapor inest acris oleosus, terebinthinaeo-aromaticus, eæ virtutem possident diureticam, cephalicam, roborantem, inque iis morbis, qui ex renum vitio generantur, maxime ad præservationem, insigniter profunt. Obtenent quoque virtutem vulnerariam, in gonorrhœa, fluore albo & externis cachecticorum læsionibus, satis conspicuam; quo nomine commendari merentur virga aurea, balsamina, botrys, sabina, chamæpitys, chamædryes, folia & flores hyperici, geranium Robertianum, folia & baccae lauri ac juniperi, radix valerianæ, serpentariæ Virginianæ, spica nardi, pinus, abies, mastix, olibanum, balsamum Peruvianum, terebinthina & ejus oleum, ex quibus maximæ virtutis essentia & balsama vulneraria liquida parari solent.

V. Sapor plantarum amarus & aromaticus manifestat vim tonicam, roborantem & carminativam, in ventriculi & intestinorum debilitate, in cachexia, febribus intermittentibus, digestionem depravatam, utilem inprimis ac proficuum. Ac tali quidem virtute excellent cortices chinæ atque chaccarillæ, citri, aurantiorum, cortex Winteranus, ligni sassafras, zedoaria, galanga, calamus aromaticus, cubebæ, cardamomum, flores chamomillæ Romanæ.

VI. Ex terreo amaro & subadstringente sapore judicare licet vim tonicam, vulnerariam, sistendis fluxionibus, febriumque paroxysmis cohibendis, singulariter idoneam; in horum censu sunt maxime cortex fraxini, tamarisci, capparum, lingua cervina, capillus veneris, scabiosa, chamædryes, tormentilla, pulmonaria arborea, bugula, urtica mortua, folia ceterach, herba thee, herba veronicæ, quæ, suffragante experientia, in diarrhœis, cachexia, scorbuto, vitiis lienis, febribusque intermittentibus maximam ferunt utilitatem.

VII. Vegetabilia, quorum adstringens sapor terreum subacidum prodit elementum, adstrictivam habent facultatem, atque ad compescendas varii generis fluxiones & coercendos febrium impetus, quam plurimum valent; renum quoque laxitati, quæ calculorum generationi favet, egregie prospiciunt. Inter hæc primas tenent radix tormentillæ, bistortæ, plantaginis, cortices quercus, cortex radicis acaciæ, granatorum, acetosæ, cynosbati, quinque folium, fragaria, equisetum, persicaria maculosa, flores balaustiorum, fructus acaciæ, persicorum, mespili, uvæ immaturæ, semen ly-copodii.

VIII. In quibus eminens acidus sapor deprehenditur, eæ refrigerant, sitim sedant & humores incalescant, atque in æstu febrili & ubi biliosi exsuperant humores, peculiarem usum inveniunt; ut sunt acetosa, acetosella, succus limonum, citri, aurantiorum, berberum, ribium, granatorum, cerasorum, tamarindi, poma acida, uvæ immaturæ.

IX. Species plantarum, quæ non adeo exquisitæ & eminenter sapiunt, sed partibus abundant aqueis, mucilaginosis, parum sapidis, quarum beneficio externe emolliunt, interne vero acrimoniam humorum demulcent ac temperant: in morbis quibus humorum subest acrimonia, in faucium exulceratione inflammatoria, tenesmo, stranguria, exulcerationibus ani, gonorrhœa, cum insigni fructu adhibentur. Tali principio maxime instructa sunt semina papaveris, psyllii, foenu græci, lini, cydoniorum, item quatuor frigida. Pertinent huc etiam radices althææ, nymphææ, symphyti, buglossæ, folia malvæ, borraginis, parietariæ, violarum, portulacæ, amygdalæ dulces, gummi Arabicum, cerasorum, tragacanthum.

X. Quorum mixtionem præter substantiam mucilaginosam, simul principium oleoso-sulphureum & vaporosum ingreditur, quemadmodum videmus in floribus verbasci, chamomillæ vulgaris, meliloti, millefolii, sambuci, croci, liliorum alborum, eæ ad emolliendos duros tumores & mitigandam dolorum acerbitatem egregie conferunt.

XI. Dulcis sapor vegetabilium nos certos reddit de mixtione eorum bene temperata, mucilaginoso-sulphurea, & hinc illorum usus recte transfertur ad eos morbos, quos salini, acres, pontici humores vel fovent, vel generant, sicut in tussi, catarrhis, pectoris affectibus, scabie, lepra, calculo & stranguria animadvertimus. Horum quasi classem ducunt radix glycyrrhizæ, ficus, jujubæ, sebesten, dactyli, passulæ, filiquæ dulces, pruna dulcia, mel, saccharum, semina anisi & fœniculi.

XII. Plantæ, quibus est sapor acris amaricans, virtute gaudent bezoardica & alexipharmaca; fibras enim motrices stimulando, sanguinis motum accelerant, sudo-

sudoremque ac diaphoresin promovent : hinc earum usus in morbis malignis inque præcavenda corruptio-
ne quam maxime commendandus est. Huc referri debent radix contrajervæ , dictamni , gentianæ , imperatoriz , petasitidis , angelicæ , carlinæ , serpentariæ Virginianæ , sarsaparillæ , zedoariæ , valerianæ , scordium , chamædryis , chamæpitys , carduus benedictus , scabiosa , centaurium minus , enula , ruta , lignum juniperi , guajaci , cortex ligni guajaci , cortices citri , aurantiorum.

Saporem odor excipit , qui , quum partes sulphureas volatiles manifestas reddat , ad indagandas salutares plantarum vires haud parum conferre videtur. Satis enim evidenti experientia docemur , ea , quæ gravem & alienum spirant odorem & caput expansivo vapore replent , non modo dolores levare , sed etiam torporem ac stuporem quendam sensibus mentique inducere , quatenus nimirum efferatos motus compoſunt ac temperant. Quo spectant omnes papaveris , solani , strammonei , hyoscyami , nymphææ , pæoniæ , lolii , mandragoræ & croci species. Qui vero grati & fragrantis sunt odoris flores , ob sulphur , quod exhalant , blandum , quo impetum fluidi nervei paululum refrænant , spasticis contractionibus nervosarum partium moderandis & placidæ quieti inducendæ viribusque deperditis instaurandis exoptatissimam operam commodant. In quorum numerum flores rosarum , liliorum alborum , primulæ veris , tiliæ , jasmini , acaciæ , ulmariz , fraxinellæ , aurantiorum , citri , liliorum convallium , hõrmini , salviæ , hort. basilici sunt referendi.

Ex seminum classe , quædam contrita gratioris odoris exhibent per destillationem aquas , quæ & virtute analeptica & anodyna se plurimum commendant , ut sunt nuclei persicorum , prunorum , cerasorum , armeniacorum , amygdalæ amaræ & hujus generis plura.

Exposita sic ea methodo ac via , quæ per characteres & signa externa , itemque per saporem & odorem vires ac virtutes eorum , quæ è terra nascuntur , aperit atque recludit , sequitur jam , ut aliam atque adhuc minus cognitam ac tentatam viam monstremus , qua identidem ad notitiam virium plantarum pervenire possimus. Hæc vero est illa , ut videlicet fundi & soli , quo plantæ quævis peculiari gaudent & sponte proveniunt , differentem naturam ac indolem , probe consideremus. Diligenti enim & attenta experientia docemur , non quamvis omnes plantas terram ferre , sed nonnullas in hac , quasdam in alia ægrius vel lætius provenire. Silvestres , respuunt plane fœcundum solum , quædam difficulter admodum in hortis consueto adoleſcunt incremento , quod de taxo , abiete , pino , myrtillis , lycopodio , equisetis , quæ ab omni cultura abhorrent , verum esse deprehendimus ? Quædam in aliud solum translata , naturam suam valde immutant , atque à nativa indole quasi degenerant. Ita apium palustre ingentis acrimoniæ , mitescit in pinguiorem terram delatum. Omnes ranunculi palustres sunt caustici , pratenses vero & montani acrimoniæ fere sunt plerumque expertes. Tormentilla montana minor , in locis uliginosis multo majoribus crescit augmentis , quod etiam valet de adiantho , de filice mare & fœmina , quæ in locis paludosis in humanam fere excreſcunt altitudinem. Plantago , serpillum , primulæ veris in locis subudis longe felicioris præventus sunt , quam in siccis & montosis , ubi tamen odoratiores animadvertuntur. Frumenta , ut secale , triticum , hordeum , in locis editioribus tenuiori vestiuntur cortice , & farinam & spiritum inflammabilem , mediante fermentatione , dant copiosorem. Præstantius esse butyrum , mel , lac & caseum , item nobiliorem lanam in locis mon-

tosis & frigidioribus , quam in humilioribus , omni dubitatione caret. In tractu Rhenano optimum vinum crescere notissimum est , quod tamen ratione præstantiæ & virtutis multum differre , idque unice à diversa soli habitudine dependere , ex eo apparet , dum sub eadem altitudine montium , situ ad solem , subque eadem specie & cultura vitium , admodum diversæ notæ vinum producit , quod clarissime conspicitur in Hochheim , Kõsthem & Cassel , locis sibi vicinis , vinâ quoad præstantiam differentia producentibus. Circa loca falsuginosa & maritima peculiare crescunt & sponte proveniunt plantæ , quæ in alia loca translata , minus germinant , ut sunt herba kali , salicornia , squilla , soldanella , esulæ maritimæ species , spergula marina , atriplex marina. Fundus siccus arenosus ex arboribus pinum , abietem , piceam , juniperum , taxum , ex plantis ericam , saxifragam , stœchadæ citrinam , chamæpityn , echium , benigne & liberaliter educat. In locis lapidosis & saxeis carlinam , pulsatillam , bupleuron , chamædryn , ivam molchatam , felicius provenire conspicimus. Loca argillacea & lutosa , legumina , pisæ , fabas , lentes , vicias , craccas *Vogelwicken* , fœcundo sinu alere videmus. In convallibus & umbrosis locis , fanicula , pulmonaria , hepatica , asarum , auricula urſi , vinca pervinca , alkekengi , laureola luxuriant ; & circa sepes umbrosas violarum , alſines specierum , nec non chelidioniorum frequentior præventus est. Ad margines & rivulos aquarum puriorum , petasites , armoracium , beccabunga , nummularia , lysimachia , ulmaria , nasturtium aquaticum ut & pimpinella frequentius pullulant.

Etenim quum ex terra & pluviali aqua , experimento BOYLE & HELMONTII accuratius instituto , suum incrementum & augmentum plantæ accipiant , terreumque elementum , præcipuum mixtionis & animalis & vegetabilis fundamentum , & omnium salium & sulphurum primordialis sit materia , ut destillationes , combustiones , resolutiones & combinationes chymicæ evidentissime ostendunt , & ingens quoque terrarum sit differentia ; recte concludere is videtur , qui à specifica & peculiari soli cujuscvis ingenio & indole ipsas herbarum vires deducere ac derivare fludet. Præsertim cum videamus eadem semina , pluribus differentis naturæ terris , eodem tempore commissa & eodem modo tractata , in incremento atque fœcunditate longe multumque à se invicem distare. Ad firmandam & stabiliendam hanc ipsam assertionem , placet tantum jam in medium proferre & aliquot exemplis clarioribus demonstrare , methodum hanc , qua ex soli differentia specifica virtus plantarum indagari possit , non insuper vel nihili habendam , sed potius ad ulteriorem indaginem esse commendandam. Observamus nempe in locis humilioribus , paludosis , & ubi humiditates facile stagnant & putrescunt , plurimas , quæ ibi nascuntur , plantas , sale subtiliori caustico virulento instructas esse , quod exterius cutim inflamat , veficas excitat ; intra corpus assumptum , sedes , vomitus , vel etiam urinam potenter movet & lumbricos necat , quo etiam hæ plantæ pecoribus , si largiter iis vescuntur , valde infestæ sunt. Hujus virtutis sunt arum aquaticum , apium palustre , alſine aquatica , anthora , aloë maritima , colocynthis , bryonia , cicuta aquatica , colchicum , cyclamen , clematites , dracunculi palustres , esula palustris , equisetum palustre , flammula jovis , hydropiper , gratiola , marrubium palustre , ros solis , senna , soldanella , frangula , zingiber , irides palustres , eupatorium , & id genus plures , quarum virtus potissimum in sale acri caustico consistit , quod in fibras nerveas intimæ admissionis eas arro-

animantium corporibus concitat. Equidem id minus profiteor, causticas plantas non in aliis locis præterquam in palustribus reperiri, ut videmus in esula, pulsatilla, helleboro nigro & albo, quæ etiam loca altiora & sicca amant, quamvis adhuc inquiri debeat, annon etiam in locis editioribus certæ dētur regiones & tractus, sub quibus putrida & humida terra sit recondita, quæ has acres deleterias plantas proferat. Contra nostram sententiam id etiam dubii moveri potest, quod loca palustria & humidiora plantas refrigerantes & semina ac fructus alant dulces ac nutrientes, quemadmodum in oryza, tribulis aquaticis, floribus nymphææ, plantagine aquatica animadvertimus. Sed tamen, licet hæc omnia verissima sint, si horum radices gustu explorentur, eas sapore valde acri esse præditas quisque facile experietur. Ad confirmandam nostram sententiam, etiam haud leve præsidium positum nobis in eo videtur, quod omnis generis fungi virulenti aliquid in se habeant reconditum, quod tamen potentius in aliis, in aliis mitius observatur. Ecquid vero notius est, quam quod hi ipsi ex succo nutritio radices arborum ob copiam exsudante & vi caloris putrefacto, vel etiam ex plantis putrefactis & stercorebus in putrilaginem fatiscentibus, incredibili copia & ubertate proveniant. Et quia autumnus ob cælum valde humidum & pluviosum, maxima fit plantarum corruptio, ideo etiam id tempus fungorum est feracissimum.

Ratio quare paludosa loca & aquarum putridarum stagnationibus obnoxia, tam virulentis plantis abundant, hæc vero nobis simillima videtur; omnis putredo & salium & partium sulphurearum fecunda genitrix est, quam velut indivulsus comes fœtor & ingratus etiam sapor sequitur. Aqua igitur diutius in terra stagnans solis calore incipit putrescere, unde, sicuti effluvia ex ejusmodi locis exhalantia, valde sanitati inimica sunt, ita non mirum est, si ejusmodi corruptæ terræ partes, intimam plantarum mixtionem constituentes, minus salubres vires ipsis ingenerant.

Deinde attentior observatio botanica & medico-practica illud nobis considerandum suppeditat, plantas, quæ in locis excelsioribus, vento & aperto cœlo expositis, suos natales habent, præ reliquis valde salubres & medicis usibus esse accommodatas, plurimasque in vulnerariis & quæ chronicis morbis succurrunt, primū & principem locum obtinere. Quo in numero sunt abrotanum, agrimonia, aristolochia, alchymilla, artemisia, arnica, abies, pinus, betonica, bellis, carlina, chamæpytis, chamædryas, calamintha montana, clinopodium, cichorium, centaurium minus, fraxinella, doronicum, daucus montanus, eupatorium, genista, hypericum, hyssopus, juniperus, matricaria, marrubium, origanum, pentaphyllum, pulmonaria, pimpinella, pilosella minor, pyretrum, serpillum, sideritis, sedum, scabiosa, succisa, sanicula, seseli, scorzonera, stœchas citrina, thymus, tormentilla, pyrola, polygala, virga aurea, vincetoxicum, veronica, verberna. Hæc omnes plantæ, utut non ex toto viribus sibi respondeant, ta-

men in eo convenire videntur, quod omnes ac singulæ ob principium terreum & temperate balsamicum, subamarum & roborans, quo instructæ sunt, solidis corporis nostri partibus & fibris motricibus relaxatis multum faveant; quibus robur addunt, & humorum ac sanguinis circuitum liberiores reddunt, quo obstructa vasa & excretoria optime referantur, secretiones quoque & excretiones expeditiores fiunt, unde in hisce magnam vim esse ad ægritudines corpore arcendas, neque minus ad eas tollendas, clarissime intelligitur. Longe vero alia est virtus & efficacia plantarum, quas terra fecunda, pinguis, stercore bene exculta, sponte proferre & fovere solet. Siquidem hæc potissimum ob principium sulphureum pingue, quod ex ejusmodi terra eliciunt, anodynam, & sedativam, ex parte etiam stupefacitivam, sive narcoticam virtutem, exhibent; atque adeo in demulcenda humorum acrimonia, in relaxandis nimium constrictis solidis, cum cautione adhibita, non spernendam præbent utilitatem. Ita in pinguibus & fecundis terris lubentissime crescunt, anisum, anethum, anagallides, fœniculum, buglossum, cynoglossum, chærefolium, crocus, coriandrum, ebulus, fœnum græcum, hyoscyamum, hominum, levisticum, lupulus, lilia, melilotus, mandragora, nicotiana, omnes papaveris, solani & stramonii species, herba paris, populus, sambucus, saponaria, valeriana, verbascum, ulmaria. Ecquis non videt, qui in artis exercitio vel leviter versatus est, harum plantarum vires maxime in eo convenire, quod ob principium sulphureum, pingue ac viscidum, in temperanda salium acrimonia, in effertis motibus compescendis, doloribus sedandis & tumoribus emolliendis, vim & facultatem exserant maximam. Ubi terræ sulphureæ sal quoddam nitrosum recondunt, ex quibus etiam ipsum nitrum elici solet, ibi atriplicem, bonum Henricum, mercurialem, parietariam, urticam, spinachiam, chenopodium, quæ omnes nitroio abstergente succo gaudent, lætissime germinare videmus. Agros vero pingues & probe stercoreatos, præsertim tempore præhumido, varias species loliorum, quæ stupefaciente vi caput replent, ubertim proferre, res in vulgus notissima est.

Sed hoc ulterius persequi & ratiociniis physico-chymicis illustrare, jam nec instituti, nec loci ratio, permittit. Ulteriorem vero hujus rei indaginem omnibus iis, qui solidæ Medicinæ & Physices studium amant & amplectuntur, etiam atque etiam commendatam volumus. Quamvis enim artis opera exercituum exquisitiori Botanices scientia facile carere posse, non diffiteor; ad præstantiam tamen & ornamentum artis, nec non ad delectationem & venerationem sapientissimi Conditoris, hoc studium plurimum conferre, nemo in dubium vocabit. Accedit, quod plures adhuc herbarum vires plane sint incognitæ, inque medendo ex vegetantium regno multo plus, quam ex reliquis naturæ promtuariis auxilii atque opis expectandum sit, modo quis rerum medicarum gnarus, aliquanto majori studio hanc scientiam tentare & excolere velit.

DE TEMPORIBUS ANNI INSALUBRIBUS.

PROOEMIUM.

Qualia
sunt tem-
pora tales
sunt morbi
constitu-
tiones.

Morbi epi-
demici
quid.

Quid Me-
dico circa
hos mor-
bos in-
cumbat.

Unde fiant
morbi.

Aër vitæ
pabulum
&c.

Ejus ac-
tiones.

Preclara sunt, quæ tradit HIPPOCRATES de humoribus §.7. Qualia sunt tempora, tales sunt morbi constitutiones ex ipsis, si tempora tempestive & ordinate se habuerint, morbos judicatu faciles faciunt, si vero variaverit tempus, similes & dissimiles erunt morbi, qui in hoc tempore oriuntur. *Confirmat hoc sapientissimum dictum ipsa experientia, veritatum medicarum optima parens. Nam singulis fere annis peculiare & certi in scenam producuntur morbi, qui aliis temporibus silent, nec amplius sunt conspicui. Communiter tales morbos Medici appellare solent epidemicos, populariter grassantes, & hi certe hujus sunt naturæ, ut maximam stragem edere, & plurimam partem hominum occidere soleant. Causam horum morborum rectissime venerandus noster Senex rejicit in anni tempora, quæ prout constitutionem suam naturalem servant vel ab ea descendunt, sanum corpus servant, vel egrotum efficiunt, variasque ægritudines producunt. Operæ hinc pretium erit, Medicum inquirere, quinam anni salubres vel insalubres sint, sive quinam morbi ex hac vel illa anni temporum constitutione sint orituri, & quibusnam subjectis isti sunt infensi? Certe magna existimatio ex solida hujus rei tractatione Medico magnumque incrementum medicinæ accedere poterit. Quid enim præclarior atque eximius excogitari potest, quam ex præcedentibus anni temporibus futuros morbos prædicere? Mirifice hac res certitudinem artis nostræ, nec non rationalis medicinæ mechanica & physica fundamenta stabiliora & firmitiora reddiderit.*

I. Verissime prodidit HIPPOCRATES lib. de natura §. 18. morbos partim ex diætis, partim ex spiritu quem attrahimus, fieri. Per spiritum intelligit aërem, quem lib. de flatibus nuncupat maximum in omnibus, quæ corpori accidunt, autorem: Dominam vitæ & fabrum morborum & lib. de flatib. item de morbo sacro ait, aërem sensum & motum præstare partibus. Certissimum hoc est, ex omnibus causis externis, quæ corpus nostrum afficiunt, ad vitam & sanitatem servandam, nihil magis necessarium & præstantius est ipso aëre, qui non inepte hinc à Veteribus vitæ pabulum, occultus vitæ cibus, anima ore hausta, & spiritus corporis nostri dictus est. Is ipse enim est fluidissimum ac activissimum elementum, quod sicuti omnibus corporibus, ita maxime animantibus intestinum fluiditatis & spirituscentiæ motum, qui fundamentum vitæ & progressionis sanguinis est, expansiva & elastica potentia tuetur atque conservat. Is solus est, qui præcipue robur, motum, tonum fibræ motricibus largitur. Is solus est, qui pondere suo pulmonum spongiosum & vesiculare corpus expandit & transitum sanguinis per hoc ipsum ex uno cordis sinu ad alterum conciliat, nec non nimiam expansionem humorum corporis nostri, exhalationem quoque excessivam moderatur, inque æquilibrio servat. Is solus est, qui pondere externo & expansione interna debitam systolen & diastolen musculorum ac fibrarum, ex qua omnis motus vitalis

Frid. Hoffmanni Oper. Tom. V.

suam mutuatur originem, in debito moderamine ac æquilibrio servat. Is denique ex omnibus rebus physicis naturam sive mechanismum corporis nostri, qui in debita coordinatione motuum nec non excretionum existit, illibatam servat. Non vero omnis aër id æque bene præstat, sed qui elasticus, qui purus, temperatus nullis pravis heterogeneis vaporibus vel humiditatibus est repletus.

II. Ex dictis clarissime intelligitur, quod, ubi aër à benigna & temperata indole recedit, ubi varias mutationes subit, alteratur & p. n. quasi constituitur, corpora humana poenas inde luant & damna contrahant gravissima. Oriuntur enim hinc epidemii morbi, qui multos homines uno tempore corripunt, & qui inde ad communem causam, quæ aër est, quo maxime utimur ad vitam & sanitatem, optime referuntur. Tales vero morbi sunt ferme omnis generis febres, inflammationes, dolores, spasmi, fluxiones, qui variis larvis & dissidentibus symptomatibus pro diversa temporum mutatione incidunt, corpora nostra affligunt, imo interficiunt.

III. Placet jam primo omnium determinare, quinam aëris status certo temporis anni spatio inclusus maxime prodest & noceat corpori nostro. Dicimus itaque aërem ficcum & serenum, adeoque & ficcum & serenum anni tempus esse saluberrimum; aërem verò vaporibus & humiditatibus repletum & præhumidum annum esse noxium, id quod jam excutere nostri erit instituti. Habemus hac in re auctoritatem HIPPOCRATIS, Medici omnium seculorum judicio sapientissimi optimique, qui sect. III. aphor. 15. hæc habet: *Ex anni constitutionibus in summa siccitates pluviosæ salubriores sunt, & minus lethales.*

Ratio quoque est in promptu, quo ficcior aër est minusque humidus, eo majori expansione & vi motrice expansiva præditus, eo agilior, subtilior, & penetrantior est, unde intestinum spirituscentiæ motum in minimis partibus accendere & continuare facilius potest. Siccus quoque & elasticus aër tonum & majus robur affert fibræ motricibus, à quibus vis impellens fluida corporis nostri pendet. Quapropter ad circulum sanguinis vitalem, ad excretionem adjuvandas, adeoque ad vitam & sanitatem servandam aptissimus talis est aër. Inde ex vi contrariorum certissime sequitur, quod ille aër, qui humiditatibus plenus, adeoque minus activus, minus mobilis, minus elasticus, non sufficiat debitæ spirituscentiæ & exhalationi humorum, item toni, robori, impulsui & elateri partium solidarum. Ex quo fit, ut circulatio & progressio humorum tardior, lentior post se trahat necessariam imminutionem actionum, quæ in excrementorum secretionem consistunt. Quæ omnia si sese non recte habent, mox functiones corporis nostri turbantur, p. n. fiunt, causæ morborum & motus morborum irregulares producuntur.

IV. Res postulat, ut hoc assertum ulteriori argumentorum pondere ac deductione confirmemus. Decisum ac definitum est inter physicæ & medicæ scientiæ peritos, ventos orientales esse saluberrimos, ex occidente vero & ex austro spirantes, admodum insalubres. Hi ipsi enim,

Intemperies aëris morbos varios inducit.

Quinam aër noceat & prodest.

Effectus aëris sereni.

Effectus aëris insalubris adferentis.

Quinam venti salubres & insalubres.

experientia teste, & consentiente HIPPOCRATE Parente artis medicæ *sect. II. aphor. 5. it. 17. gravem auditum & capitis gravitatem, vertiginemque in oculis pariunt, ventres humectant & torporem inducunt*, CELSUS *lib. II. cap. 1. de austro hæc profert: auster corpus efficit hebes, humidum & languidum, & RHazes lib. III. cap. 15. de ventis & aëre scribit: Ventus à polo veniens meridiano corpora dissolvit, sensus turbat, dolorem capitis & oculorum agritudinem facit, epilepsiam quoque accelerat, febremque excitat propter putredinem*. PLINIUS *in histor. natur. & ARISTOTEL. in problē. spirante austro minus esurire animantia perhibet*. HORATIUS austrum plumbeum vocat. E contra aquilonares venti corpora compingunt, roborant ad motum idonea & bene colorata meliusque audientia faciunt. Ratio, quare occidentales & australes venti insalubres, orientales vero & boreales salubres habeantur, est, quod illi ex oceano atlantico & mari mediterraneo flantes excessivis humiditatibus pleni sunt, unde elasticitas aëris perit, vitæ & animæ nostræ unicum fulcimentum. Contra boreales & orientales elasticum condensatum aërem & humiditatis nimiae expertem in atmosphæram nostram introducunt, unde vis expansiva motrix non tantum hominibus, sed & reliquis animantibus vigorem, robur & vim vitalem afflat. Notabile quoque est, quod mentis functiones semper sint solidiores, felicioresque sub serena aëris tempestate, quam sub pluviosa & humida, experientia id confirmante.

V. Porro humiditatem in aëre nostro noxiam demonstramus ex eo, quod eæ regiones, ea etiam loca saluberrima habeantur, quæ defensa sunt à ventis occidentalibus & australibus, patent vero auræ orientali & aquilonari. Deinde montosa & in editiori loco posita salubriora & minus epidemicis passionibus obnoxia, Vid. *I. I. Consult. 15*. SYLVATICI sunt iis, quæ in planitie posita & depressioris sunt situs. Ratio facilis est; aër enim in editioribus locis longe purior, defæcator, mobilior, vaporibusque minus repletus est, in humilibus vero locis aëris humiditates atque vapores ob gravitatem suam descendentes unitæ atmosphæram valde gravem humidamque reddunt.

VI. Porro humiditatem nocere nimiam, siccitatem vero esse magis vitalem & sanitatis parentem, docent nos abunde phlegmaticorum & cholericorum corpora. In illis ob excessum humidi motus fiunt tam progressivi, quam excretorii tardiores & segniores, unde eorum corpora minus vigoris habent, & mille malis obnoxia, & semper fere morbosa existunt. In cholericiis vero, ubi motus promptior, minorque humiditas locum habet, magnus corporis & animi vigor est, excretiones promptæ & faciles sunt, minorque in ipsis ad morbos dispositio deprehenditur. Sexus sequior, quod magis ad morbos dispositus sit, nullam aliam rationem agnoscimus, quam quod foeminarum flaccidiora & humidiora sunt corpora, unde solidorum motus & fluidorum progressio difficilior est, hinc foeminae omnem morbum bis patiuntur. Viri contra siccioris sunt naturæ, ideo magis vegeti, vitales & minus morbofi sunt. Autumnus maxime morbosus ob nullam aliam causam est, quam quoniam nimis humidus & inæqualis tunc aër est.

VII. Demonstravimus hæcenus, humidum nimium omne naturæ humanæ admodum esse infensum, jam argumentamur etiam exinde, annum præhumidum & valde pluviosum insaluberrimum existere. Confirmat id observatio attentæ & solida, qua pedocemur, quod gravissimi epi-

demici & putridi morbi sequantur tempestates humidas, squalidas & pluviosas. Quin imo ipsa pestis & contagiosi maligni morbi grassantes ex præhumida anni constitutione plerumque originem suam nanciscuntur. HIPPOCRATES *l. 3. epidem.* scribit, aliquando post diuturnas pluvias, ingentem subortam fuisse pestem, totam civitatem Abaton pervastantem, cujus sævitia nonnullis inhabitantibus pedes ac brachia deciderint. Idem testatur *l. 2. epidem.* suo tempore ex austrinæ constitutionis aëre in Cranone primum ichores & pustulas multas, postea & carbunculos propullulasse. GALENUS *de temp. cap. 4.* annum plus justo humidum pestis esse prænuncium scribit. WAGNERUS *in chronol. sua & SIGBERT. centur. 8.* tradunt, anno 801. sub Imperio Irènes Imperatricis Constantinopolitanæ à prægresso aëris humidissimi dominatu invaluisse gravissimam pestem, quæ maximum hominum numerum in Gallia & Germania præcipue juxta Rheni tractum abstulerit. CRENTHEM author est, anno 1221. à paschatis festo usque ad autumnus tempus humidam & pluviosam valde viguisse tempestatem, quam mox exceperit pestis tricennalis. SPANGENBERG *in chronolog. sua* ut & POMARIUS & ENTZELIUS tradiderunt, regnante Sigismundo Imperatore anno 1427. hyemis temperiem adeo humentem ac tepidam fuisse, ut circa diem Nicolai sextum Decembr. nonnullæ arbores, inter quas persica imprimis fuit, frondescere seque in flores induere, nec non cyanus in agris aliique flores coronarii passim in viridariis progerminare ac reviviscere visi sint, sed sequente æstate invaluisse pestem truculentam multa mortalium millia depascentem. Notum est, quod pestis familiarissima sit in Ægypto, & quod in hac regione gravissimi morbi contagiosi maxime regnent. Quandoque pestis in Cairo tam sæva est, & tantum numerum mortalium interficit, ut intra septem menses 500000. hominum intereant. Incipit autumnus & desinit æstate, & notabile est, quod circa solstitium æstivum mox desinat. Ratio est, quoniam tunc temperatus est æstus & flatus septentrionales aërem purgantes & ventilantes flare incipiunt, è contrario australes, quos vocant Camzios autumnus. Perquam notatu dignum est, quod scribit DAPPER *in descriptione Africae p. 127.* nunquam pestem in Ægypto oriri, nisi Nilus nimium increseat, & totas regiones inundet. Addit hanc rationem, quod quando Nili aqua stagnat super terram, tota illa paludosa fit, & accedentibus ventis australibus & æstu excessivo putridus aër fit. Deinde immodicis vaporibus aqueis ob evaporationem perpetuam Nili aër repletur, qui validissimus ad excitandam pestem. Subjicit hoc memorabile, quod nunquam pestis oriatur ex intemperato æstu, sed potius extinguatur. Alexandria autumnus plures mali moris febres cum vomitione viridis bilis epidemice grassantur ex nulla alia causa, quam ex putridis stagnantibus aquis sub domibus incolarum. Alexandrettæ autumnali tempore identidem variolæ mali moris contagiosæ invadere solent homines, quæ nullam aliam originem agnoscere solent, quam evaporationem aquæ putridæ Niloticæ. Nam quodcunque cornu ex Nilo, quod vocatur *Calech*, in civitatem Alexandrettam ducitur, & hæc aqua per totum annum immota stat, necessario putrescit & corrumpitur præsertim æstate, unde etiam omnes incolæ, qui accolunt huic brachio Nili, fugiunt ad alia loca, donec ex Nilo subsequente anno aliam aquam accipiat, qua de re legi meretur DAPPER *in descript. Africae p. 127. & 128.*

ex præhumida anni constitutione.

Multa exempla grassantis pestis.

Pestis familiarissima in Ægypto.

Illius causa.

Variolæ Alexandrettæ protuberant.

Ratio salubritatis & insalubritatis ventorum.

Quare humiditas aëris noceat.

Siccitas aëris prodest corporibus.

Fœmina sunt humida.

Viri sicciores.

Multa magni morbi oriuntur

Inunda-
tiones a-
quarum
suscitant
morbos
mali
moris.

VIII. Nam si quid aërem putridum redde-
re potest, certe est diluvium particulare, seu
inundatio maxima aquarum, dum aquae fla-
gnant putrescunt & putridos vapores in atmo-
sphæram transmittunt. Quapropter etiam obser-
vamus, nostris in regionibus aquarum inunda-
tiones frequentissime mali moris morbos, imo
ipsam pestilentiam suscitasse. BONFINIUS *decad. 1. lib. 3.* refert, anno 589. regnante Mauritio Im-
peratore anni oppido pluviosi & austrini con-
stitutionem plurimas aquarum inundationes secū
afferentem, secutam fuisse in Italia magnam pe-
stem, cujus tamen sævitia Romæ major, quam
in aliis locis extiterit. Et legitur in histor. Fri-
derici II. Imperat. anno 1227. ob continuas plu-
vias Tiberim Romæ excrevisse, & pestem hor-
rendam excitasse, à qua vix decimus quisque
evaserit. Eandem ab exhalationibus lacuum ma-
ritimorum DIODORUS SICULUS *in descript. pestis Carthaginens.* LIVIUS & VALERIUS MAXIMUS à
Tiberis excessu Romæ quoque observarunt. E la-
cium & puteorum morbidis exspirationibus pestē
productam fuisse Guainerius *cap. 4. de peste* tra-
dit. Febres tertianas epidemicas à nimia humidi-
tate & ab hac facta inundatione aquarum obser-
vavit *in ephemerid. Nat. Curios. Ann. 9.* RAMAZ-
ZINUS experientia & judicio præstantissimus Me-
dicus. *Sub æquinoctium*, inquit, & per inte-
grum octobris mensem pluviae copiose delapsæ im-
mensam aquae largiebantur quantitatem, quæ vix
contineri poterat hyeme humida nimbofa existen-
te cum exiguo frigore, nivibus mox tabescentibus
interspersis, circa æquinoctium insequentis anni
ingentes pluviae pariter ceciderunt per autum-
num & integram fere æstatem continuantes, quæ
postea inundationes aquarum effecerunt, & in illis
locis, ubi diu stagnarunt aquae, magna febrium
seges fuit observata, imprimis tertianæ rebelles
indiscriminatim homines occupantes, cujuscunque
sexus, ætatis, temperamenti & vitæ generis es-
sent. plura vid. l. c. quæ certe lectu sunt digna.

Varia ob-
servatio-
nes infalu-
britatis
aquarum.

IX. BENEDICT. SYLVATICUS *consil. 14. cent. 1.*
refert, quod duo anni fuerint austrini frigidi plu-
viosi cum maxima aquarum illuvie, unde etiam
morbi uniformes fuerint per totam fere Italiam.
Nempe populariter grassabantur febres spuriae,
ardentes, pediculares, morbillosae, variolosae,
viros maxime plethoricos corripiebant, præser-
tim si locorum humiliorum fuerant incolæ, &
veneri indulserant. COLERUS *decur. III. obs. 5.*
plures epidemios morbos observavit post Danu-
bii eruptiones crebras & imbres per plures dies
continuos. MONTANUS refert, prope Famaugu-
stam Cypri urbem locum esse, qui æstatis tempo-
re putrescat ac causa existat, quod aër putre-
scat, unde febres pestilentes oriuntur, infinitique
homines ob vaporum contagionem à paludibus
pereunt. Notissimum porro est, quod in om-
nibus istis urbibus ac regionibus, quæ à mari vel
fluminibus inundationes patiuntur, vel cinctæ
sunt maribus, frequentissimæ sint pestes, ut urbs
Venetiarum, Ancona, Roma, Smyrna, Con-
stantinopolis, Alexandria, Cairus & totus fere
Archipelagus experiuntur. Notat FORESTUS *l. VI. de feb. & morbis epidemicæ grassantibus p. 162.*
quod civitas Delphensis infalubris sit, quoniam in
loco profundiori sita est, aquas non currentes ha-
bet, fossis non amplis, sed angustis, per quas mo-
ventur, instructa; hinc fit, ut aquae stagnent æsti-
vo imprimis tempore, quæ sub canicula putref-
cunt & effluvia, quæ à transeuntibus sentiuntur
putrida sunt, adeo ut fere singulis 10. annis præ-
Frid. Hoffmanni Oper. Tom. V.

terlapsis incolæ vel peste vel pestilentialibus febris afficiantur.

X. Ante viginti & præterpropter annos orie-
batur Leidæ morbus contagiosus pestilentialis, qui
magnam hominum stragem edebat, ex nulla
alia causa, quam quod ex fluvio Rheni vete-
ri inundationes in hoc districtu factæ fuerant, unde aquae stagnantes, putrefactæ, diram hanc
luem procurarunt. PET. SALIUS *de pestilent. fe-
bri c. 20.* testatur, patriam suam exsiccatione aqua-
rum in fossis publicis stagnantium à febribus pe-
stilentialibus alias quotannis autumno grassantibus
fuisse liberatam. Anno 1698. postquam hic Ha-
læ hyemem valde placidam, lenem, humidam-
que ac clementem autumno similem, ventis au-
strinis stipatam & postea tempus vernum calore
ac humiditate abundans experti fuimus, tunc per
sex menses & ultra magna cum sævitia per hanc
urbem variolarum morbus grassabatur. Succe-
debat æquinoctio vernali petechizans febris ma-
ligna, contagiosa, quæ è medio non paucos su-
flulit. Ex professo tam variolarum quam febris
hujus historiam pertractavi in duabus peculiari-
bus Dissertationibus. Pecora quoque & oves, si
annus nimis est pluviosus, contagiosa lues valde
devastare solet.

Morbus
contagiosus.

Leidæ
grassans.

Variola-
rum mor-
bus Halæ
grassans.

XI. Manet itaque ex dictis statum atque fir-
mum, diuturnas tempestates, humiditas, australes
pluviosas corpori humano valde infalubres
esse, morbosque grassantes, malignos putridos
inducere, quod etiam confirmat incomparabilis
medicinæ Autor, HIPPOCRATES *aphor. 16. sect. III.*
item *aphor. 12.* A pluviarum multitudine, inquit,
sunt febres longæ, alvi fluxiones, putredines, comi-
tiales morbi, angina; in mulieribus abortus &
partus difficiles. Causa horum omnium jure me-
ritoque transfundenda in atmosphæram igna-
vam, languidam, elatere destitutam, quæ non
inservit spiritualcentiæ seu expansioni sangui-
nis & humorum intimæ, sed fibrarum tonum
relaxat, eas flaccidas reddit, unde progressio &
circulatio sanguinis debilitatur. Ubi vero tar-
dior sanguinis progressio, ibi secretiones & ex-
cretiones etiam retardantur, ibi sanguis crassus
viscidus & minus subtilis fit, & inde multi im-
puri humores in corpore accumulantur & ad
prædictos morbos, maxime omnium vero ad
putredinem dispositio fit. Contra nihil magis
præservat sanguinem à corruptione & ab omni
putredine ipsum defendit, quam circulatio libe-
ra expedita & transpiratio liberior atque evacua-
tionum promptitudo. Ita enim à copia particu-
larum mobilium activarumque corruptionem
minantium totum corpus liberatur. Quod si ve-
ro excretiones tardæ fiunt, invalide & languide
per tubulos procedit sanguinis fluor, excremen-
ta remanent, & mutua in se actione intesti-
num putredinosum motum totam crasin humo-
rum dissolventem producant, unde etiam om-
nes graves epidemici morbi, maligni, contagio-
si & pestilentes, imo pestis ipsa, à putredine
humorum ortum suum nanciscuntur.

Tempesta-
tes humi-
dæ sunt
infalubres.

Quid san-
guinem
præservet
à putredi-
ne.

XII. Pestem ipsam non inepte Veteres dixe-
re putredinem summam ac penetrantem. Deduxi
jam olim *in dissertat. de ulceribus*, naturam con-
tagii in omnibus morbis positam esse in putre-
dine. Putredo enim mirifice est sui multiplica-
tiva & parum fermenti putridi in vegetabilibus
& animalibus ulterius serpere & suum motum
communicare aliis corporibus aptum est. Pomum
putridum facile inficit reliqua, pauxillumque pu-
tridæ vappidæ materiæ in vitro relictum, vini

Dictum
veterum
de peste.

Putredi-
nis vis.

acetum, vappidum efficit. Quod etiam contingit, quando vappidum relinquitur in doliis, quod sese per vini ingentem copiam non nisi magna alteratione saporis, odoris, & virtutis diffundit. Caries in ossibus & dentibus mirifice sese multiplicat ob putredinosum motum. Dysenteria, lues venerea, scabies, variolæ, petechiales febres omnesque putridæ contagio infestæ sunt, non aliam ob causam, quam tenuissimam corporibus communicando putredinem, quæ postea mirifice sese extendit. Ipsam pestem ortum suum putredini debere, jam supra paulo fufius est demonstratum. Exoritur hæc calidissimis in regionibus, postquam in illis inundationes contigerunt aquarum diu stagnantium. Humidum æque ac calidum excessivum non inepte philosophi veteres & ARISTOTELES ipse salutarunt matrem putredinis. Et eam ob causam auster & africanus calidi & humidi pestem gignere & fovere dicuntur, præsertim ubi imbres accesserint. PLUTARCH. *περί πολυπράγμ.* p. 515. refert, Empedoclem Agrigento sterilitatem & pestem depulisse obstructis montis faucibus, per quas auster in campum inciderat. Et VARRO *l. 1. de R. R. c. 4. p. 12.* testatur, se Corcyram insulam à gravi peste liberasse, obstructis iis fenestris, quæ austrum spectant, iisque, quæ ad aquilonem vergunt, apertis.

Mater putredinis quid.

Generatio insectorum ex quo aere promovetur.

XIII. Quoniam calidus & humidus aer insectorum generationem mirifice promovet, hinc plerumque pestem futuram vel pessimi moris morbos succedentes prænunciare solet insolita copia insectorum, quæ amant propagari in talis modi stagnante quieto humido & vappido aere. Recte hinc dictum à VALERIOLA *obs. 1. l. 2. p. 95.* Insectorum & locustarum copia morbos epidemicos pronunciat. Autor est VERULAMIUS *cent. 9. p. 923.* annos infalubres fore & pestis suspitione infamari, quando ranarum, muscarum, locustarum multitudo est, quia hæc animalia oriuntur ex putredine. Imo ipsa etiam hæc infecta, quoniam sale acerrimo abundant, si moriuntur & putrescunt, effluviis putridis aërem replent, qui exinde magnam perniciosam & malignam vim acquirit. Habemus enim manifesta exempla, ubi propter exhalationes putridorum cadaverum infectus fuerit aer, & morbus malignus ortus. Refert PAULUS JOVIUS de prægrandi cete ad ripam maris rejecto & putrefacto, quod omnis Liguria fuerit contagio inde infecta. Similem legi historiam in PLUTARCHO *l. de industria animalium* de balæna ad ripam provinciae Buniidis rejecta, à cuius putredine pariter pestis incepit grassari pertinacissima. Sacrae pariter literæ huiusmodi contagii exemplum referunt, ex ranarum multitudine, quæ Ægyptum insigni afficiebant molestia, in aqua Nili coacervata, putredine aërem & aquam infectam fuisse. Vide sis PETR. à CASTRO *de Peste Neapolitana & Genuens. p. 43. 44.* Habemus quoque exemplum in recenti memoria. Anno videlicet 1692. incredibilis copia locustarum in aere volitantium visa est, quæ universam Thuringiam, Misniam, Vogtlandiam infestabant, inque terras descendentes segetibus & vegetabilibus maximum damnum inferebant. Ab hoc tempore coeperunt grassari in hisce regionibus multæ mali moris imo cum petechiis junctæ febres.

XIV. Demonstravimus hætenus clarissime, illa anni tempora præ aliis morbosa & infalubria esse, quæ nimia humiditate & squalore abundant, quæ ventis serenis aërem ventilantibus &

agitantibus sunt destituta, ubi cælum turbidum, nebulosum, pluviosumque diu existit, quia videlicet ad putredinem & humorum stagnationem animantium corpora disponere solent. At secundum nostram sententiam non semper sufficit ad producendos & alendos morbos tot & diversi generis, variaque facie certum sæpe districtum occupantes morbos epidemicos sola præhumida manifesta atmosphæræ constitutio, sed concurrunt etiam aliæ causæ ex secundis qualitatibus, potentiæ nempe acres salinæ corrosivæ sulphureæ in aere ipso ceu seminario cujuscunque generis effluviis productæ. Constat nempe experientia, in ipso aere generari multa corrosiva salia, quæ rore se maxime patefaciunt valde corrosivo, qui vegetabilibus infusus ipsa non modo corrumpit, sed etiam exedit & variegati coloris maculas arborum & plantarum foliis inducit, unde observatum, fructus talis modi rore conspersos, vel gramina quoque hocce infecta & hominibus & brutis summam noxam intulisse. Quapropter non inepte interitum vel etiam pestem, quæ grassatur in boves, sues, oves, &c. peritiores Physici non in tempus modo humidum putridum valde, sed etiam in rorem valde corrosivum rejiciunt. Ita anno 1693. & 1694. in Hassia rore valde corrosivo infecta sunt vegetabilia, unde coacervatim boves vaccæque succumbebant necatæ phthisi pulmonali. Pravam rubiginem, qua tanguntur fructus autumnales & vegetabilia, non exiguum operam ad morbosam annorum constitutionem conferre eximie deduxit RAMAZZINUS *de constitutione aeris* 1690. Veteres non immerito talem rubiginem pestem dixerunt vegetabilium. PLINIUS uredinem sive carbuncularem morbum vocat. Dysenterici morbi origo deducenda maximam partem ex rore est corrosivo maligno fructus horæos infestante. Nam sæpius in certo districtu grassatur hæc lues, in alio non; & quicumque pruna, pyra hoc rore infecta comederit, labitur in talem morbum, à quo si abstineret immunis esse poterat.

Quanam particula in aere generentur.

Morbi lethales ex rore corrosivo.

Morbi dysenterici origo.

XV. Unde vero deducenda sit virulenta roris natura, non immerito venit in disquisitionem. Statuimus nempe, aërem tantum non esse vehiculum, sed & seminarium diversi generis salium, in quo ipso varias species salium generari, vero admodum simillimum est. Contineri in aere sal quoddam universale sulphureum, in disfertat. *de generatione salium à me* habita fufius demonstratum est. Nitrum inflammabile non in terra recondi, sed genuinam solius aeris prolem esse, res est indubia. Demonstrant id terræ sulphureæ elotæ & orbatae omni nitroso sale. Quæ si per 3. vel 4. annos aëri libero expositæ fuerint, denuo hoc sale foecundantur. Alumen in ignem coniectum & in cineres albos conversum pauco tempore recipit rursus in poros suos aluminosum sal, quod etiam circa vitrioli caput mortuum valet. Verum enim vero non tantum salibus diversis imprægnata est atmosphæra, sed & sulphur ibi continetur vulgari quoad omnia simile. Demonstrant id fulgura, tonitrua, quæ sulphuris inflammabilis præsentiam exquisite docent. Quod vero de natura sulphuris vulgaris sit, patefacit odor suffocativa virtute pollens, quæ nares simili modo, ut sulphuris accensi fumus ferit. Physici vulgares hujus sulphuris ortum derivant ex exhalationibus sulphuris, quod in mineris & subterraneis locis continetur: at vero nostra sententia hi admodum falluntur.

Virulenta roris natura unde deducenda.

Aer infectus morbos malignos promouet.

Generatio
sulphuris
vulgaris.

Experi-
mentum
Boylei.
Experi-
mentum
alterum.

Tertium.

luntur. Sulphur enim minerale ejus est texturæ atque naturæ, ut difficillime evaporet, sed magna vi caloris imo igne opus sit, ut in substantia per vapores siccos abeat in auras. Tacemus, ipsum solis æstum etiam vehementissimum, ultra 2. vel 3. ulnas penetrare non posse in terram. Mineras vero sulphuris longe profundioris esse situs, easque sæpe in imis collocari res notissima metallurgis est. Sententia itaque mea est, ipsum sulphur vulgare non educi ex terræ visceribus, sed produci & generari in ipso aëre, quomodo autem hoc fiat, non adeo difficile conceptu est. Supponimus nempe, uti verissimum, in aëre sicuti in terra dari sal quoddam universale acidum simile acido vitrioli & sulphuris, quemadmodum id vel ex eo liquet, dum cineres clavellati diu aëri expositi in sal neutrum tartaro vitriolato vel arcano duplicato simile magna ex parte abeunt. Supponimus porro ex vegetabilium & animantium genere multas oleosas sulphureas pingues resinosas particulas calore solis in altum elevari. Hæ cum acido sulphureo concurrentes & intime mixtæ ac confermentatæ motu intestino calido solis accedente in perfectum sulphur minerale degenerant. Nota sunt experimenta valde curiosa physico-mechanica de productione & reductione sulphuris mineralis. Primum est BOYLEI vid. *Chymist. sept.* ubi ex mixtione olei terebinthinæ & vitrioli elicit verissimum sulphur minerale. Secundum est nostrum, ubi ex opio cum spiritu vitrioli commixto destillatione in retorta sublimavi in ejus collum sulphur colore, consistentia, inflammabilitate, sœtore exactissime sulphuri vulgari respondens. Tertium est Dn. STAHLII, qui ex tartaro vitriolato ite arcano duplicato mediante carbonum pulvere produxit verum sulphuris hepar, dum nempe acidum vitrioli in terram sulphuream carbonum agit & producit sulphuris schema, relicto sale alcali, quod componebat tartarum vitriolatum, cum quo ipsum sulphur abit, in hepar, ex quo perfecte sulphur vulgare elici potest. Quis dubitabit itaque, simili modo ex commixtione corpusculorum resinosorum, quæ in aëre exsuperant, cum acido universali aëreo produci verum sulphur vulgare, quod inflammatum fulguris & tonitru etiam causa existit.

Venenum
transit in
medicinam
&
contra.

Vires
roris.

XVI. In aëre diversissimæ sunt exhalationes terreæ sulphureæ, sal quoque inest universale acidum, nullum hinc dubium, quin pro diversa horum commixtione, mutuaque confermentatione, reactione & exaltatione diversæ species salium acres corrosivæ generentur. Comperitum est ex mechanica chymica, solam partium corporearum dispositionem, figuram adeoque texturam efficere formas, qualitates, virtutes in mixtis, adeo ut immutata textura venenum transeat in medicinam, medicamenta rursus veneni indolem adsumant. Horum vero salium aëreorum vehiculum sunt ros & pruina. Illa enim nocturno frigore unita cum particulis humidis descendunt & ima petunt. Facilis jam est ratio, quare omnis fere ros alvum stimulet atque irriter. Et Chymici ex rore spiritum penetrantem metalla dissolventem eliciunt. Nudis pedibus per campos & prata rorulenta ambulare, non proficuum est, pedes fiunt subinde ex eo scabri & maculis & pustulis persæpe pleni. Patet quoque ex dictis, qua de causa in præcalidis regionibus Hispania, Sicilia, Hungaria, India lethiferum ferre sit, dormire de nocte libero sub aëre. Præter frigus enim utique nocivum, noxia quoque & pernicialis est roris vis. Nostra itaque sententia est, à rore depravato & à naturali blanda indole

desciscente seu corrosivo facto, quique per alimenta sese insinuat & etiam ore exceptus subit vitalia, pendere genesis potissimarum epidemiarum afflictionum certo districtu grassantium, v. gr. dysenteriae, anginae, ophthalmiae, aphtharum, inflammationum faucium, alvi fluxus, tertianæ, quartanæ febris, purpuræ, variolarum, exanthematum, tussiumque, nam omnes hi morbi salis potentis corrosivi soboles sunt. Huic rori etiam adscribimus, quod in certis districtibus pereant & corrumpantur subinde vegetabilia, cum alio in loco salva & illibata maneant. Cæterum si sola tempestas excessive humida vel inæqualis esset causa constitutionis morbosæ epidemicæ, sequeretur etiam, ut ubicunque talis constitutio aëris vigeret, similes morbi grassarentur, quod tamen non accidit. Ex quo conijcimus, præter aëris qualitates primas manifestas alias salinas nempe in subsidium vocandas. Non absone de ortu epidemiorum morborum philosophatur SYDENHAM *sect. V. cap. 4. p. 219.* Verosimilius mihi videtur, hunc vel illum particularem aëris tractum effluviis repleti à minerali aliqua fermentatione, quæ aërem, per quem feruntur, particulis nunc huic animalium generi, nunc alteri exitialibus contaminantia, morbos variis terræ affectibus appropriatos eo usque propagant, donec exspiraverit subterranea illa halituum minera, quæ pariter in novam denuo fermentationem agi possit ex reliquiis nempe materiæ exolescentis.

XVII. Vitiatum vero rorem judicare optime possumus ex lue illa rubiginosa, quæ inficit fruges easque exurit & maculis rubris obducit, porrosque contrahit. Dehinc ros malignus generatur maxime post pluvias diuturnas & longum humidi aëris statum. Quandocunque enim vapores aquei uberius descendunt ex aëris regione, fit, ut æstu solis intenso salia aërea in se magis coëuntia corrosivam acrimoniam acquirant, quod impeditur per humidos vapores in aëre adhuc retentos, qui diluendo acrimoniam & cavendo intimam mixtionem benignum rorem servant. Quapropter observatione certa constat, rores perniciosos brutis vel vegetabilibus plus videri humidis & pluviosis temporibus præcedentibus quam siccis. Certum signum est virulenti roris, quando apes parcius mellificant vel propriis in sedibus extinguuntur, vel alio migrant. Bombyces quoque coacervatim pereunt, vel qui superflites sunt in ipso opificio semianimes & ignavi concidunt & major strages pecudum visitur, quemadmodum id doctissime RAMAZZINUS *l. c.* monuit. A cicadarum obmutescencia malas temporum constitutiones prænuntiari, scribit doctissimus MERCURIALIS *de pest. cap. 6.* qui anno 1577. observavit in agro Patavino, aut nullas aut rarissimas cicadas cecinisse, unde postea gravis subsecuta sit epidemica lues.

XVIII. Tandem etiam infalubria tempora æstimamus ex maxima inæqualitate & contraria constitutione aëris, ventorum, tempestatum certo anni tempore regnante, v. g. quando nimiam humiditatem siccitas & æstus aut intemperantem calorem frigus validum & rigida hyems subito excipit. Talis modi mutatio aëris per extrema corporibus valde infensa atque exitiosa est, & ideo foecunda morborum genitrix. Perite HIPPOCRATES *sect. III. aph. 1.* Mutationes temporum maxime pariunt morbos, & in temporibus magnæ mutationes frigoris & caloris & reliqua juxta rationem hoc modo. Idem in *sect. III. aph. 4.* In temporibus quum eadem die modo calor

Morbi varii ex eo
provenientes.

Ex quibus
ros vitiat
tus judicatur.

Signum
virulenti
roris.

Intemperies certi
temporis
annorum
est infalubris.

modo frigus sit, autumnales morbos expectare oportet. Inæqualis circulus sanguinis excretiones turbatas post se trahit, unde ex tali temporum constitutione uberrime proveniunt catarrhi, coryzæ, tussis, febres, inflammationes, dolores, arthritidis species, alvi fluxus, spasmi & hujus generis plura. Egregius & instar omnium in hisce est laudatissimus HIPPOCRATES in *sect. III. aphor.* qui tempora infalubria morbos parturientia ex inæqualitate & præcipiti mutatione aëris potissimum æstimat. Quatuor *aphorismi* hac de re notabiles merentur non modo recenser, sed & exponi. Sunt vero 11. 12. 13. & 14. Primus hic est: *Si hyems sicca & æquilonaris fuerit, ver autem pluviosum & australe, necesse est æstate febres acutas, lippitudines & dysenterias fieri mulieribus præsertim & viris natura mollioribus.* Ratio *aphorismi* hæc est: *hyems sicca & æquilonaris ob intensum frigus obstitat poros & transpirationem impedit, sanguinem densat, unde multæ sordes cum sanguine intime miscentur, succedens vero ver propter pluviosum & australem aërem nimis humidum & rarefactum tonum fibrarum labefaciat, hinc circulus humorum & ex eo pendentes excrementorum secretiones segnius procedunt.* Quare necesse est, ut sordes in sanguine cumulata æstate ob fervorem intensiorem in acrem & biliosam falsedinem degenerent, quæ febres ardentes acutas, tertianam duplicem, tertianam continuam, diarrhœas, febres purpuratas, lippitudines, dysenterias efficiunt in subiectis maxime humidioribus laxi & spongiosi corporis habitus, quoniam in hisce plus colliguntur cruditates, partiumque robur invalidum est. Observationem quoque meretur *Aphor. 12. ejusdem sectionis.* *Hyems si australis est & pluviosa clemensque fiat, ver autem siccum & æquilonare, mulieres, quibus partus ad ver instat, ex omni occasione abortiunt; quæ vero pariunt, imbecilles & morbosos pueros pariunt; aliis dysenteriae & lippitudines maxime sunt, senioribus defluxiones brevi perimentes.* Sub hyeme nempe tepida & humida magna colligitur feri & excrementorum in corpore copia, superveniente veris sicco & æquilonari statu atque natura fibras roborante & humores ad motum impellente & intus cogente, tunc in plethoricis, ut sunt gravidæ, fiunt abortus disruptis nempe vasculorum uterinorum oris à sanguinis impetu. Infantes vero, quos pariunt, morbofi fiunt, propter sanguinem multis impuritatibus plenum, qui foetum debite nutrire & ipsi robur addere nequit. Aliis lippitudines, dysenteriae, catarrhi, rheumatismi, arthritides fiunt ab impuris salibus excrementitiis ex transpirationis defectu congregatis & naturæ vigore ad exteriora proturbatis.

Explicatio
Aphorismi
12.

XIX. Sequitur *Aphorism. 13.* *Si æstas sicca fuerit & æquilonaris, autumnus autem pluviosus & australis, capitis dolores ad hyemem fiunt & tussis & rauedines ac gravedines, quibusdam etiam tabes.* Fibræ enim, à quibus tonus, motus & pressio sanguinis dependet, æstate nimis strictæ & sensibiles evadunt. Tempore accedente pluvioso & australi accumulatur ob tonum dejectum fibrarum, succorumque subtilitatem imminutam multæ humiditates fordida in vasis: (nam semper sub tali tempore fiunt excretiones remissiores & in primis transpiratio.) Accedentis vero hyemis frigus constringens poros & cutim summam premens, atque à peripheria ad interiora fluida pellens causa est lymphæ stagnantis, præsertim in faucibus & capite, unde catarrhi, coryzæ, tussis, rauedines, inflammationes oris

Explicatio
Aphorismi
13.

in dispositis, pulmonum exulcerationes, capitis etiam dolores & gravedines fiunt. Conflans observatio practica est, sub longo dominatu ex austro & occidente ventorum spirantium sub aëre denso & præhumido, hydrargyrum in barometro inferius hæreret. Si vero subito accedit ventus borealis, subnascuntur brevi coryzæ, tussis, rauedines, odontalgia, arthritici dolores, rheumatismi cum cutis horrore, extremorum frigore. Urinæ ardores per sæpe, una nocte frigidior humidior tempestatem excipiente visuntur, ut & reliqui hi dicti affectus.

Observatio
hydrargyri in
barometro.

XX. Ex dictis clare intelligitur *aphor. 14.* *Si æquilonaris & aquis expers autumnus fuerit, his, qui humiditas naturas habent, & mulieribus commodus erit; reliquis vero fiunt lippitudines sicca, febres acutæ & gravedines; quibusdam etiam atræbiles.* Etenim humidæ naturæ vehementius patiuntur & affliguntur sub humido & tepido coelo, melius vero degunt sub sicco & elastico, qui elaterem fibrarum roborat, ita enim circulus sanguinis & excretiones fiunt expeditæ. In præcalidis vero subiectis ob motum factum intestinum auctiorem salia impura in succis existentia evadunt acriora, unde tussis, lippitudines sicca, febres acutæ &c.

Aphorismus 14.
Hippocratis.

XXI. Tractavimus hætenus infalubritatem temporum, & ex ea deduximus grassantium morborum originem, sequitur jam, ut etiam brevibus indicemus ex contrariorum vi ac fundamento, quænam tempora ex omnibus sint salubria. Superius ostensum est, morbosas & exitiosas non modo hominibus, sed & brutis imo vegetabilibus esse diu perseverantes humiditas temporum constitutiones, præsertim stipatas lapsu acris maligni roris. Dictum quoque fuit, subitas mutationes aëris & tempestatum ab uno extremo in alterum non sanitati favere, sed eam labefactare magnopere, jam consequitur, ex anni constitutionibus *siccitates pluviosas esse salubriores*, uti aureus est *aph. HIPPOCRATIS 15. sect. III.* Deinde temporum status hi optime judicantur, ubi non mutatio tempestatum ab uno extremo in alterum observatur, & quando anni tempora suam naturalem, id est temperatam & constantem servant indolem, tunc salubria sunt, & morbi benigniores atque judicatu faciliores procedunt. Spectat huc eximius HIPPOCRATIS *aph. 8. sect. III.* *In constantibus, inquit, temporibus, si tempeste tempeste reddantur, morbi constantes & judicatu facillimi fiunt. In inconstantibus autem inconstantes & qui difficulter judicantur.* Elegans locus etiam hac de re apud HIPPOCRATEM est, qui ita scribit *lib. 1. cap. 1. v. 1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.* De annis hoc tenendum, qualis annus futurus sit salubris aut morbosus, & si in autumno aquæ fiant & hyems sit moderata, & neque valde clemens neque modum excedens frigiditate, & in vere ac æstate tempeste pluatur.

Quando
anni tem-
pora sint
salubria.

XXII. Illud constantis observationis est, quod, si annus est saluber & minus morborum ferax, frugifer simul & saluber sit vegetabilibus, aliisque animantibus. Optimæ messes fiunt frugum & fructuum, id quod observamus maxime, si frigidum & humidum ver, æstas calida, qualem jam annum habuimus. Fructus tunc fiunt abundantissimi & bene saporis, plures modiolos replent secale & triticum, farinam dant copiosiore & salubriore, oves dant lanam optimam & carnes saporiores sunt. Curiosum est, quod flores lavendulæ, spicæ, salviæ, duplicem portionem olei hoc anno per destillationem dederint plus quam aliis annis, ob nullam aliam causam,

Observatio circa
messes
frugum.

causam, quam quod solis æstus constans vegetabilium salia & sulphura melius foveat, maturet & perficiat.

Quanam sint optimæ constitutiones temporum. XXIII. Tandem optimæ constitutiones temporum sunt, quando orientales venti, puri, mixti cum septentrionalibus frequentes sunt, rariores autem australes & occidentales. Utpote illi ventilant, agitant egregie aërem ipsique elasticitatem elargiuntur, hi vero levem & humidam reddendo atmosphæram eam ignavam reddunt, quæ ad putredinem viventium corpora disponit.

Quo pacto afflictiones oriunde possint evitari. XXIV. Tandem quædam adjicienda videntur, quorum beneficio ex insalubribus tempestatibus oriundas afflictiones evitare possimus. Ut autem hac in re non sine ratione fundamentoque procedamus, opus maxime omnium erit, præservandi methodum dirigere secundum naturam & constitutionem temporum & inde resultantes varios noxios effectus. Dictum scilicet fuit in superioribus insalubres esse eos annos, qui pluviis & humiditatibus foedantur, deinde, in quibus visitur maligni roris erosiva qualitas, vegetabilibus reliquisque animalibus noxia, posthæc ubi tempestates valde inæquales & contrariæ invicem se excipiunt. Ex priori statu aëris ad putredinem & dissolutionem corruptivam sanguinis humorumque corpora præparantur, omnesque ii morbi incrementum capiunt, qui ex sero vel copia & qualitate peccante gignuntur. Hinc videmus, frequentes febres, malignas, petechiales, putridas, catarrhales, lentas, verminosas tunc grassari. Denique hydropici, cachectici, scorbutici pejus se habent, putredines in naturalibus partibus, in extremis capiunt incrementum, abortus mulieribus facile contingunt, graviora sunt puerperia, variolæ morbillique pessimum induunt morem. Adversus hos morbos si quis velit se defendere, sequentia sunt necessaria observatu. Primo humiditas aëris, quantum fieri potest, corrigenda est. HIPPOCRATES eum in finem optime usus est igne in libero aëre accenso, cui tantam potestatem etiam assignat, ut eo accenso pestilentiam abigi posse statuatur, comprobato hoc ipso felici cum successu Athenis. Utpote ignis motu celerissimo, quo pollet, humiditates absorbit & una motum & ventum parat, qui ad eventilandum aërem putridum & ignavum magnæ est virtutis.

Præstantia ignis adversus pestem.

Exhalationes quoque ex lignis vel gummatibus balsamicis emissæ virtute balsamica illum implent, ut spiritus inde haustus egregie succurrat debiliori sanguini ejusque spiritus ascensionis. Eum quoque in finem inconsumptis suadendus est tabaci usus, ut nempe aër humidus corrigatur. Et quia semper aër in editioribus locis & superioribus regionibus purior existit, neque adeo densus vaporibusque plenus est, ac in humilioribus locis, ideo ejusmodi tempestate humida regnante optimo consilio habitacula sunt petenda in eminentiore situ posita, satiusque est degere extra urbem ruri quam in urbibus, ubi tanta copia vaporum stagnans & ignava redditur atmosphæra. Dehinc regnante ejusmodi perniciosi languidi aëris statu, corporibusque redditis imbecillibus non sine fructu temperantia in omnibus rebus maxime in victu & venere meretur commendari, nimium enim tunc maxime nocet, quando natura ad excretionem minus vigoris habet expediendas. Roborare vero naturam & sollicitare ad motus excretionemque augendas tunc maxime utile est. Non datur vero præstantius roborans ipso vino, quod bonæ notæ temperatum subtile spirituosum & mediæ ætatis est,

Vinum optimum corroborans medicamentum.

qualia sunt Rhenana, quæ omnibus huic usui inservientibus palmam præripiunt. Horum temperans usus excitat naturam, promovet excretionem, calorem nativum fovet, omnemque ad putredinem dispositionem depellit. Ex medicamentorum classe clara sunt hoc nomine salia volatilia oleosa, quæ ob blandam balsamicam naturæ amicam vim & volatile sal motus & excretionem cujuscunque generis adjuvant, nervos roborant, totamque naturam erigunt. Purgantia sint parciore, nihilo minus alvus suam faciat officium necesse est. Commodissime præbentur talia, quæ balsamica vi simul sunt instructa, cujus indolis sunt elixir proprietatis cum & sine acido, pillulæ Ruffi, Avicennæ & polychrestæ nostræ. Venæ sectio fere nullius est usus, & sicut ad curationem horum affectuum, qui ex prava hac aëris constitutione oriuntur, plane inutilis est, ita etiam præservationi parum inservit. Huic rectius substituuntur diaphoretica transpirationem promoventia. Hac enim egregie purgatur sanguis à sordibus & quiescentiis superfluis. Laudem etiam merentur tincturæ alexipharmacæ bezoardicæ, medicamenta ex scordio, infusa hujus herbæ & veronicæ. Præsidio etiam esse possunt balsamica ex suavissimis resinis oleisque confecta, uti sunt elixir balsamicum nostrum & instar omnium balsamum nostrum liquidum dictum vitæ ad guttas aliquot inter cibos sumendum. Ejus quoque externus usus ad nares inundandas in os sumendum omnibus temporibus contagiosis humidis & insalubribus laudatissimus est.

Quæ pharmaca sunt eligenda.

XXV. Ordine jam provehimur ad eorum morborum præservationem, qui maxima ex parte corrosivo elemento in atmosphæram producto & cum rore in ima descendente debentur. In quam classem referimus epidemias dysenterias, diarrhœas, exanthematicas varias febres, purpuratas biliosas ardentes, semitertianas, variolas, morbillos, tussis convulsivas, ophthalmias, anginosas & putridas faucium inflammationes. Difficilis sane res est, qualitatem noxiam in tenuissimo principio radices agentem corrigere. Rara enim sunt ejusmodi alterantia, quæ ad virulentam noxiam materiam immediate per mixtionem corrigendam quippiam conferunt, sequentes vero regulæ, si earum ratio habeatur, non sine fructu erunt. *Primo* : fugiatur aër apertus matutino vespertinoque tempore ante orientem occidentemque solem, imprimis circa & post æquinoctia solstitiumque æstivum; *secundo* : nulli fructus assumantur nisi probe prius absterfi corticibusque nudati; *tertio* : liberalior usus sit infusorum cum aqua salubri factorum, ut acredo in sanguine eluatur & emunctiorum princeps transpiratio aperta servetur, quo exhalare, si quæ haustæ fuerint, peregrinæ partes possint; *quarto* : fructuum autumnalium parcissimus sit usus, temperata vero diaphoretica & diluentia tunc temporis utilia sunt.

Quomodo morbi prædicti sint præcave vendi.

Regula observanda. Aër apertus matutino & vespertino tempore fugiendus.

XXVI. Ex intemperato & inæquali aëre subitaque tempestatum mutatione nascuntur coryzæ, tussis, rheumatismi, dolores pleuritici, inflammationes varii generis, febres tertianæ, quartanæ, catarrhales alvique fluxiones. Tunc bonum ac utile est, æquali semper vestitu velari & omnem nimium aërem, quantum fieri potest, vitare, in publicum non prodeundo. Si status adest plethoricus, circa æquinoctia mittendus est sanguis, postea diaphoreticis & infusis calidis spiracula cutis aperta maneant: temperantia vero ad omnes arcendos epidemicos morbos est optimum remedium.

Morbi ex aëre inæquali provenientes.

SIDERUM IN CORPORA HUMANA INFLUXU MEDICO, DISSERTATIO PHYSICO-MEDICA INAUGURALIS

De Astrorum influxu in corpora humana.

PROOEMIUM.

SI quid est ex rebus naturalibus, quod summo unquam studio inter summos viros agitatum fuit, certe siderum in corpora influxus agitur. Quanta enim disceptatio contentioque inter Physicos ac Medicos nostri sæculi hac de re foveatur, non obscurum esse poterit iis, qui hanc doctrinæ partem attigerunt. Sunt qui hunc influxum negent plane ac explodant, ita tamen negent, ut solis vim ac efficaciam in corpora admittant atque tueantur. Dicunt enim, errantes & fixas stellas remotiores esse à globo nostro, quam ut luce sua, quam diffundunt in illum influere, nedum manifesta ratione in contenta operari possint. Solem contra solum esse adserunt, qui sublunaria adficiat, qui calore suo plantas atque animantia foveat enutriatque, cum de cæteris planetis non constans neque exploratus observetur effectus. At ut ipsi negamus omnino, hominum sortem, mores, fortunam ab astris solum esse deducendam; ita adfirmamus contra mirifica ac insigni sane potentia astra in corpora influere. Cui quidem sententiæ ex recentioribus non pauci accesserunt, ex quibus mihi Angli inprimis nominandi, qui ob insignem industriam, quam hac in re posuerunt, merito sunt admirandi. Hi omnes astrorum influentiam non in meteorologica solum, sed in corpus quoque humanum, quatenus illud morbis est expositum, acerrime propugnant statuuntque. Neque vero Veteres hoc ipsum latere potuit, qui astris attribuerunt plurimum, præcipuasque rerum causas, quæ in mundo accidunt, ex illis derivarunt. Atque illi tantum dederunt huic scientiæ, ut non sanitatem atque morbos solum, sed mores etiam ingeniaque hominum; quid? quod maximarum rerum bellorum regnorumque momenta inde explicarent. Res est proinde pulchra & non minori utilitate quam jucunditate commendanda, paulo diligentius influxus hujus veritatem explorare, & quid de illa sentiendum videatur, clarioribus complecti argumentis. Id quod laboris in præsentis nobis sumpsimus de astrorum influxu dissertaturi & hunc ipsum solida confirmaturi ratione.

§. I.

Magni semper æstimata fuit siderum scientia, & jam inde ab antiquo tempore magno in honore habita. Hæc à solertissima olim gente Ægyptiis nempe inventa & ad alios transmissa populos ubique diligentes ac religiosos sui cultores reperit. Neque ex longinquo repetendæ rationes, cur tanto honore atque dignitate priscae gentes hanc sint prosecuti, quod nempe facile videbant, quantum bonorum ex astris ac sideribus ad homines redundaret. Astronomia enim varios variorum siderum, sed certæ legi adstrictos progressus, situs, motus concursusque

complectitur, quæ omnia magnum maximi Dei opus illustant, tantique operis autorem prædicant ac contestantur. Benignitatem porro siderum omnia sublunaria experiuntur, dum foecundo illorum lumine excitantur atque sustinentur. Ex horum observatione terrarum mariumque situs locorumque intervalla describimus ac perscrutamur, & annorum, mensium, dierum ac horarum spatia metimur. Horum beneficio nec maris impotentiam extimuerunt homines, sed astronomia frequenti Phœnices primi ut Poëta canit:

Fragilem truci pelago commiserunt ratem.

Hujus munere solis atque lunæ defectus admiramur, & ad temporis momentum prælagimus. Nullum inde est dubium, quin diversus astrorum situs diversusque positus tempora annique qualitates variet, & exinde tam in plantis, quam in animantibus varias mutationes excitet. Quo magis interest prudentis Medici, astronomia etiam instructum esse, eo nempe fine, ut exinde grassantium morborum rationem possit explicare. Astronomiam requirimus in Medico, non vanam illam scientiam, si scientia dicenda est, & non potius ludibrium humanarum mentium, quæ cum multa superstitione, ex natalitio uti vocant themate, cujusvis hominis fortunam, morbos atque mortem conjicit ac auguratur. Næ illi, qui ad hanc animum adplicant, magno negotio nugas agunt, dum levissimam omnino artem, & quæ utilitate plane caret, tanta religione studioque colunt atque venerantur. Sed venerentur sane, si modo ipsa dignitas astronomiæ non exinde imminueretur. Quid enim boni divinatoria hæc ars attulit, nisi ut veram astrorum scientiam ex fastigio suo, in quo alias constituta fuit, male deturbaverit? Concedimus omnino, astra ceu causas remotas ad has etiam res aliquid conferre, illud vero nunquam adprobamus, ex istis solis certas res esse prædicendas. Inde enim est, quod jam plures ex Veteribus fuerint, qui hunc abusum agnoscerent ac improbarent. Eminent inter hos ALBERTUS suo tempore jure magnus qui *libro III. de mineral. tract. 3. c.3.* graviter omnino scribit: *Multi, qui ex astris divinant, sæpe mentiuntur & abominabilem suis mendaciis faciunt scientiam, cum alioquin bona utilisque sit.* Nec dissentit AVERRHONES in *Avicennæ cantibus*, dum ait: *Ars astrologiæ est debilis, & falsum est plurimum, quod in ea existit.* Cujus quidem rei pulcherrimam APOLLONIUS apud PHILOSTRATUM dat rationem: *At ego, inquit, astronomiæ scientiam atque omnem divinandi artem humane naturæ metas excedere puto, & an quispiam vere ipsam noverit, nescio.* Minus toleranda vero est illorum insolentia, qui dierum fastos vel annuas Kalendariorum tabulas conficiunt. Hi pulchri vates, si Diis placet, tanquam ex tripode prædicunt felices vel sinistros dies, & quod magis rideas, ad ridiculas plane res sinistram hanc diligen-

ligentiam conferunt. Leges in illorum libris quo die novas vestes induere, pecuniam numerare, vendere, emere, capillos vel barbam ponere bonum sit atque salutare. Neque intra hos terminos consistit illorum impudentia, sed profano etiam ore medicinae sacra contaminant, dum certos atque salutare dies Venae sectionibus, purgationibus ac medicamentorum usui praescribunt. O flagris dignum facinus, exclamat LANGIUS, Vir antiqua simplicitate atque eruditione, *ep. 35. P. 1.* quo innumeros perdunt aegros.

§. II.

Rejecta igitur hac superstitione & astrologorum fabulis, summa nobis cura providendum est, ne in alteram peccemus partem, astrorumque vires & virtutem plane desiruamus atque invertamus. Impietatis enim hocce fuerit, naturam naturaeque autorem Deum nempe parum recte intueri ac cognoscere. Ita enim nobis persuadendum est, non frustra coelum tot pulcherrimis sideribus luminibusque distinctum esse, neque frustra illa fulgere, sed maximis omnino commodis humanae gentis inservire. Quorum magnitudine ac copia inducti Veteres eo processerunt, ut divino plane cultu stellas venerati sint, aras illis constituerint, nihil denique neglexerint, quo impiam suam pietatem astris testarentur. Videbant nempe quanta esset potentia horum corporum, & ab his omnibus fere sublunariibus vigorem atque robur inspirari. Quo minus etiam mirandum puto, cur Veteres etiam Medici in morbis astra maxime respexerint, & horum observatione plurimum fuerint innixi. At, ut laudanda atque praedicanda est illorum diligentia, ita destituti accuratiore experientia atque observationum ubertate, minus recte declarare potuerunt, qua ratione astra operari possent. Et hoc ipsum est, quod in praesenti exhibebimus, & paulo majori cura demonstrare adnitemur, usum ab abusu, mendacia a veritate separaturi. Ad quod ipsum praestandum, opus esse videtur omnino, ut praeter summorum virorum auctoritatem, ratione quoque ac experientia opinionem nostram confirmemus ac communiamus. Est itaque nostra sententia, non solem & lunam solum, sed caetera etiam sidera planetas maxime operari in hac sublunaria, & quidem proxime per aetheream & atmosphaeram. Hac ab astris immutata, ac adfecta plantarum aequae ac animantium corpora variis modis mutat adficitque. Si enim certum est, ut infra etiam evincere conabimur, quod astra varias tempestates, varios motus atque ventos concitare possint, de facili exinde judicari potest, corpora etiam nostra ab iis posse commoveri. Unde quisque colligere potest, quanto commodo, quantoque ornamento hac scientia sit artem facientibus. Placet jam ex Divi Senis monumentis, quae eminent loca excerpere, cum ad illustrandam nostram sententiam, tum ad praestantiam hujus doctrinae demonstrandam. Primum vero sistit se locus elegans ex *lib. de aer. aq. & loc. p. 129.* edit. Lind. Si quis, inquit, temporum mutationes & astrorum ortus, occasus observaverit, quemadmodum singula horum eveniant, praenoscet utique & de anno, qualis hic sit futurus, & *lib. de signif. vitae & mort.* in praefat. Nemo se committere debet manibus ejus, qui nescit astronomiam, quia non est perfectus medicus. Et *lib. de aer. loc. & aq. p. 345.* Oportet & astrorum exortus considerare, praecipue canis, arcturi & pleiadum occasum. Morbi enim in his maxime diebus judicantur, alique perimunt, alii vero desinunt, aut in aliam speciem, aliumque statum transmutantur. In summa, anatomia oculus medicinae est dexter, astrorum scientia sinister, & qui astrologiam ignorat, inquit ALBO HAZEN, Hali filius Abenragel ex Hippocrate, est tanquam caecus baculo viam praetentans, huc illuc cespitans pro qualibet boni malique adparentia inani, ut fatuus trepidans.

§. III.

Quod vero astra operentur in aërem non minus elegans locus est, quem in libro de flatibus divinus Autor prodidit §. 5. Omne, inquit, quod inter caelum & terram est, spiritu repletum est, solis vero & lunae & astrorum omnium vires per spiritum prodeunt. Per το πνεύμα sive spiritum, ventos, aërem, & aetheream intelligit. Optime vero GALENUS astrorum influxum in hac sublunaria *lib. 2. Prorrheticor.* demonstrat. Si mutui stellarum aspectus operaretur nihil, soli duntaxat, qui fons luminis ac vitae est, concesso imperio in hac inferiora quatuor anni tempora singulis annis eandem faciem eandemque temperaturam servarent, cum sol non alium uno quam altero anno cursum suum peragere soleat, quod tamen non accidit. Juvat jam ex uberrimo experientiae fonte paulo fufius deducere, quae vis ac potestas sit astrorum in tempestatibus movendis. Ac primo quidem scire licet, quod non tam adpectus, quos luna cum planetis habet, intuendi sint, quam potius mutui planetarum reliquorum inter se adpectus, licet hic nec ipsa luna negligenda. Optime id adnotarunt Angli clarissimi GOAD & KOOK, & crebra nos experientia hac in re confirmavit.

§. IV.

Quandocunque Saturnus alium planetam Sole excepto, adspicit, sive sit cum ipso in conjunctione, sive oppositione, sextili, trigono & quadrato, aërem comprimit, ventos frigidos excitat, & ex septentrione maxime eos adducit. Hinc in hyeme strictum ac vehemens gelu gignit, noctes facit serenas, tempore vero verno, praesertim mense Majo tales adpectus inopinatum subitumque frigus inducunt, plantis imprimis exoticis perniciosum. Si vero Saturnus cum Venere societur, plerumque inde frigidae pluviae sunt expectandae; spirante simul frequenter vento occidentali & septentrionali.

§. V.

Jupiter ordinario ventosus observatur, cum quocunque planeta concurrat, praesertim verno tempore ac autumnali, ita ut raro procellosus atque impotentior ventus observetur, quin Jupiter cum planetis reliquis habeat adpectum. Ex pluviosis planetis primas tenet Venus, praesertim si cum Mercurio, Saturno & Jove jungatur. Sereni & qui calore atmosphaeram implent, praecipui sunt Sol & Mars, maxime mutua societate conjuncti, & tempore aestivo. Idem accidit, licet quidem benignius, si cum Jove & Mercurio jungantur.

§. VI.

Inconstantis est naturae Mercurius, qui inconstantium tempestatum autor est, adeo ut eodem die pluatur, eodemque adpareat serenitas, serenitati mox coelum nubilum ac turbidum succedat. Ventos parit, si cum Jove congregitur, pluvias, si cum venere miscetur. Notandum quoque, horum planetarum operationes multum differre pro situ Solis sive anni temporum. Nam hyeme Saturnus longe vehementius frigus excitat, quam aestate quidem, Sol & Mars hyemali tempore frigore clementiore agunt. Jupiter & Mercurius in ventis commovendis vere & autumnino magis quam aestate suam vim saevitiamque exerunt. Ex anni vero temporibus nullum frequentioribus patet tempestatibus & inconstantioribus, quam autumnale tempus. Quo fit, ut autumnus sit periculosissimus & plurimos opprimat, propter summam aeris & tempestatum inaequalitatem. Nam meridianis fere temporibus calor, nocturnis atque matutinis, simulque etiam vespertinis frigus est.

§. VII.

Non alienum jam erit exponere, quantum Luna faciat

ciat ad planetarum vires vel augendas vel imminuendas. Constat nempe exploratis observationibus, plenilunium adeo mirifice foenerare lucem suam reliquis planetis, ut illorum virtus mirum quantum inde augeatur atque excitetur. Et quod magis mirabile, eadem ratione fit, ut anticipent quandoque duobus vel tribus diebus, antequam adspectus ipse absolvatur. Lunæ porro potentia quanta sit, exinde facile adparet, quod sub singulis ejus quadris atmosphæra non mediocriter afficiatur atque commutetur. Non inepte inde Dominam dixerunt Veteres, quod nempe non obscure inde ratio tempestatum earumque mutationis constabat. Et res est vulgo etiam nota, quantopere Lunæ vicibus tempestas immutetur, ita quidem, ut accedente nova Luna semper vetus exolecat, nova vero capiat incrementum. Plura eaque pulchra hæc de re observata si quis desiderat, adeat Doctissimi KOOKS *meteorolog. §. astron.* item GOADS *tractat. meteorolog.* Illud omnino certissimum est, uti id etiam celeberrimus & peritissimus astronomus KEPLERUS adnotavit, plantarum adspectus mutationem meteoris adferre omnino, & in excitandis tempestatibus non parum valere. Ac utinam & accuratius eas determinare, gradumque ac rationem earum prædicere possemus, quod, cum observationum copia deficiat, non est in nostra potestate. Certe quam difficile, quam arduum sit, his de rebus judicare, vel exinde potest intelligi, quod qui præcedunt adspectus, præsentis ratione suæ efficaciam non parum alterant afficiuntque. Accedit loci situs, effluviarum natura, ipsum denique clima, quæ, si bene calculum ponas, non minores excitant mutationes.

§. VIII.

Astrorum vero adspectus non in meteora solum, sed in corpus etiam nostrum mirifica virtute agere, ipsa experientia, qua non melior veritatis est magistra, optime demonstrat. Argumento esse potest verum æquinoctium, & solstitium æstivum, circa quæ tempora intermittentium febrium impetus vel elanguescit, vel conquiescit plane ac extinguitur. Ipsa febris quartanæ contumacia, quæ raro alias evincitur, & autumnii maxime est filia, tunc sponte cedit, ac remediorum ope emollitur, æstivo nempe solstitio adpropinquante. Constat porro explorata experientia circa æquinoctium tam verum, quam autumnale maxime humores commoveri. Eodem tempore sanguis summam motus subit inæqualitatem, unde in consuetis crebræ ac frequentes accidunt hæmorrhagiæ. Infestum hocce tempus senibus imprimis, qui inde hæmorrhoidum vexantur fluxu, vel conatu certè naturæ ad sanguinem per hæc venarum ora expellendum. Sique ejusmodi excretiones non recte procefferint, in illis, qui sensibilibus sunt naturæ, varia ex spasmodis incommoda, dolores in abdomine & circa loca evacuando sanguini dicata observantur. Segnioribus vero naturis, item senioribus, non minus inde est periculum, quibus variæ stagnationes & infarctus in iis partibus sunt metuendi. Quo circa non sine ratione ac experientia faciunt illi, qui sanguinis missionem ante æquinoctium plethoricis & qui ejusmodi sanguinis profluvio adsueverunt, diligenter commendant ac injungunt. Hoc enim modo optime præcavetur malum, sanguinisque effusio, quæ alias instare videbatur, tuto, & celeriter propellitur. Sique sanguis per hæmorrhoides exitum adfectat, è pede, si per pulmones atque nares redditur, commodissime è manu sanguis est detrahendus.

§. IX.

Æquinoctia phthificis, hecticis & qui lentis malis contabescunt, maxime sunt inimica. In hæc tempora, si morbi longi incidunt, plerumque solvi solent, sive cum eventu sinistro sive cum felici atque expectato. Raro tamen contingit, ut qui cum ejusmodi conflictantur morbis, æquinoctiorum tempus superent, sed

plerumque circa illos dies mali vehementia evicti consumuntur.

§. X.

Solstitio hyemali humana natura est imbecillima, corpus languet, & ad secretionem ac excretionem minus promptum est. Quo fieri etiam solet, ut qui tunc acuto morbo laborare cœperunt, summo cum discrimine laborent, & frequenter moriantur. Nocet tunc vel levissimus error in victu atque vitæ genere admixtus & non raram morbis præbet occasionem. SANCTORIUS Vir Cl. IN TRACT. DE MEDICINA STATICA pulchre scribit, circa solstitium hyemale libram minus nos perspirare, quam alio tempore. Qua quidem observatione liquido demonstrat, laborare tunc inprimis perspirationem, laborare sanguinis motum, fibrarum motricium robore infraçto atque imminuto. Eadem ex ratione magnus noster HIPPOCRATES lib. de aër. aq. & loc. §. 30. medicamentorum usum circa solstitium plane interdicat hisce verbis: *Maxime autem observare oportet magnas temporum mutationes, ut neque in solstitiis medicinas libenter exhibeamus neque uramus quæ circa ventrem, neque secemus, priusquam prætereant dies decem aut plures & non pauciores.*

§. XI.

Dicendum jam de Solis in corpora effectu ac virtute, de qua tanto minus quis dubitaverit, quanto clarius hæc ipsa ex anni temporibus eorumque differentia manifestatur. Quantam mutationem subeat corpus nostrum vere, æstate, autumno & hyeme, notius est, quam ut longa opus sit narratione. Ex his temporibus unumquodque suos atque certos pati morbos cum experientia docet, tum ipse HIPPOCRATES passim in aphorismis suis in sectione III. exquisita tradit diligentia industriaque. Optime sect. III. aph. 19. scribit: *Morbi quidem omnes omnibus temporibus fiunt, quidam tamen magis in quibusdam. Ita vere insania, atræ biles, comitiales morbi & sanguinis fluxiones, angina, gravedines, raucedines, tusses, lepræ, impetigines, pustulae ulcerosæ, tubercula, morbi articulares grassantur.* Et sequentibus aphorismis cujusvis temporis mala peculiariter eleganter complectitur, ita, ut aphor. 21. æstatis aphor. 22. autumnii & aph. denique 23. hyemis incommoda ac morbos explicet.

§. XII.

Illud memorabile inprimis, quod mense Martio plures moriantur homines, quam ullo reliquo totius anni mense. Non cedit Martio malignitate sua October, qui non minorem numerum mortalium interimit. Ratio tam tristis anni temporis non alia est, quam aëris circa hæc tempora inæqualitas. Modo enim frigus est intentum, modo frigori miscetur calor; Pessima vero omnium est atmosphæra, tetrus vaporibus repleta, qui cum sursum exhalare nequeant, inferiora petunt, & millia secum adferunt incommoda. Inde subito mutatur valetudo, quæ cum hunc aëris statum ferre non possit, in varia morborum genera præcipitatur, tono nempe fibrarum pessime debilitato. Nam qualis aër, tale fibrarum robur, talis elater; qualis vero elater, talis fluidorum circuitus, qualis vero hic, tales excretiones sunt expectandæ. Quare circa hæc tempora, dum labascit excretio, humores inde fiunt impuri, hinc inde stagnant, & varios producant morbos. Partes enim infarciendo, ad lentas disponunt passionibus; copia vero distendendo, in activioribus subjectis spasmodicas efficiunt contractiones. Et hi spasmi januam hæmorrhagiis aperiunt, quæ si ullo tempore, hoc certe vigent ac proveniunt.

§. XIII.

Solis effectus, qui alias non satis prædicari potest, in

in hoc imprimis admirandus est, quod ad illius cursum morbi nunc quiescant, nunc impetum resumant. Ita diligenti constat experientia, sub ortu Solis febres synochas, circa meridiem tertianas adoriri, circa pomeridianum vero tempus quartanæ, & vesperi catarrhales solennem paroxysmum exerunt capiuntque incrementum. Idem tenendum de fluxionibus, doloribus gravativis, & tumoribus quæ mala circa vespertinum tempus maxime exacerbantur.

§. XIV.

Luna etiam magnas efficit mutationes in corporibus morbofis. Et primo de eclipsi dicendum, quam non sine damno multi ægri experiuntur. Refert JOAN. MATTH. FABER in *Append. dec. II. An. IIX. p. 49.* hanc historiam: *Illustris Vir melancholicus diem, eclipsin præcedentem, tristis & meditabundus transigebat, ipso vero puncto eclipseos nudo ense non per domum modo propriam, sed vicinas etiam & plateas discurrebat furioso simillimus, non in homines tantum, sed & scamna, & fores, & quicquid illi occurrebat, injurius.* Observatione dignum est, quod scribit Vir Nobilissimus RAMAZZINI de *constitutione annorum 1692. & 93.* quod post plenilunium, & multo magis silente Luna febris petechialis tunc grassans multo ferocior fuerit; eandem, novilunio accedente, semper mitiorem factam, eclipsi vero ingruente maximam partem ægrotantium abripuisse.

§. XV.

Quadræ Lunæ magnas in corporibus morbofis excitant mutationes. Ita epileptici insultus in nonnullis statim die ac hora redeunt ad certam Lunæ quadram, item novilunium ac plenilunium. Ipse sacer codex *σεληνιαζομένους* adpellat epilepticos & maniacos *Matth. IV. 24. & 47.* idque non aliam ob rationem, quam quod lunaribus mutationibus peculiariter sint obnoxii. Apud Bar. Limpurgicum servus erat juvenis, qui sub quodvis plenilunii tempus, radiis lucentibus caput per fenestram perpetuo exerere collumque viperæ instar circumrotare solebat, donec in ecstasi devergens aliquamdiu immotus procumberet. *Observ. Rumléri 66. ap. VELSCH. curat. & observat. cent.* Multos novi quibus circa plenilunium familiares sunt dolores capitis, ex calculo item cardialgici. Quod circa, vel post plenilunium insultu apoplectico correpti fuerint plures, V.C. WEPFFERUS multis exemplis demonstrat in *dissertatione de apoplexia p. 3. seqq.*

§. XVI.

Muliebrem sexum quantum adficiat Luna, vel exinde patet, quod menstruorum fluxus, à quo sanitas mulierum dependet, ab hac simul dirigatur atque foveatur, five sit novilunium five plenilunium. Inde ipse fluxus lunare vocatur tributum, & raro insignior Lunæ accidit mutatio, quin sanis feminis ferantur menstrua, five sit plenilunium, five novilunium. Hæc Lunæ vis in corpora, eo induxit Veteres, ut prava religione atque cultu illam adorarent, & fecunditatem publicis precationibus ab illa exorarent. Eadem Romanæ mulieres in partu plurimum se adjuvari credebant, ideoque Lucinam, quæ Luna est, religiose venerabantur, ut hanc sibi experirentur propitiam. Non alia ex ratione vero à parturientibus invocata videtur, quam quia proprium ejus munus est distendere rimas corporis, & laxare meatus, quod est ad partus celebrandos salutare. Vid. MACROB. *Saturnal. lib. VII. cap. 16.*

§. XVII.

In plenilunio tumores ventris, partiumque glandulosarum, & scrophulæ fiunt ampliores, decrescere vero Luna decrescunt ac imminuuntur. Elegans est historia, quam hæc de re CL. MAURIT. HOFFMANNUS *Dec. II. Frid. Hoffmanni Oper. Tom. V.*

An. VI. Observ. 161. Misc. Cur. memoriæ prodidit; Erat, inquit, puella 14. annorum matre epileptica pronata, Huic venter increcente luna paulatim intumescerebat, decrecente decrescerebat atque minor reddebatur. Interim sævis cruciatibus adfligebatur, quamdiu ventris fieret distensio. Simili fere ratione de ostreis conchyliisque tradit A. GELLIIUS *Noct. Attic. l. XX. c. 8.* illa crescente Luna augeri, ac uberiora fieri, senescente illa tabescere. Ad easdem Lunæ vices, alia etiam animantia augeri ac imminui, idem scriptum reliquit. HIPPOCRATES in ea est sententia, pleraque mulieres circa plenilunium præcipue concipere.

§. XVIII.

BENNET Vir singulari industria conspicuus in *theatro tabidorum p. 98. & 99.* adnotavit, primis Lunæ quadris, five cum illa se in cornua curvare cœpit, præsertim noctibus novilunium præcedentibus, illos exasperari morbos, qui à salina materia ortum trahunt. Igitur tunc maxime aculeos suos intendunt dolores, pruritus, & omnia exanthematum genera, cum summa laborantium molestia. Ultimis vero Lunæ quadris & cum orbem implevit hocce sidus, aqua & humores in corpore accumuluntur. Id quod omnes morbi, qui ex feri vitio suboriuntur manifesto docent. Ingravescit tunc coryza, lethargus, asthma, paralyfis & cachexia, omnes denique hujus commatis morbi, qui ex corrupto sero atque lymphæ derivantur.

§. XIX.

De Lunæ in corpus efficacia eleganter admodum GALENUS scribit *l. 3. Prorrheticor.* Quantam vim habeant sidera in hæc interiora, satis ex Lunæ impressionibus colligere est, ut ii, qui arthriticis, gallicisque destillationibus obnoxii sunt, satis experiuntur; prout enim Luna temperatos vel intemperatos planetas adspicit, faustos atque salutes, vel contra morbosos dies nunciat. Neque vero menstruus solum Lunæ motus evidentes efficit mutationes, sed & diurnus corpus manifeste adficit. Id quod, cum à multis observatum, tum à CAROLO PISONE clarissime his verbis comprobatur in *Hist. Natur. l. I. p. 24.* *Singulis sex horis, accedente mari morbum ingravescere ac dolores exacerbare, vicissim sex aliis, quibus mare recedit, remittere cruciatu, ipsi ægri contestantur. Quod in acutis æque ac minus acutis morbis, præsertim in iis, qui plenitudine & fluxionibus oriuntur, abunde adparet. Adeo ad crescentibus aquis astuque maris in plenilunium incidente, nonnulli cum infirmitate conflantur, plerisque autem pelago decrescere extingui, notum est.* Adjungit gravissimus autor rationem suo ingenio dignissimam, qua adferit omnino, omnia hæc à validissima astrorum influentia, occultisque cœli marisque qualitatibus plerumque dependere.

§. XX.

Silentio transmittimus mirabiles Lunæ effectus, qui in fecunditate plantarum, earumque incremento atque decremento satis superque elucet, testante id, cum botanicorum tum agricolarum solertia. Inter alia constans hæc observatio est, quod post novilunium arborum translatio, magna cum spe latissimi proventus, instituitur. Ubi quidem hæc in primis observatur differentia, quod quæ plena Luna inferuntur arbores, celerius ferant fructus, sed minores atque lapidosos. Contra quæ circa novilunium ponuntur, tardiores fundunt fructus, sed tarditatem pulchritudine præstantiaque copiarum, pomorumque compensant.

§. XXI.

Omnes porro plantæ, quarum flores expetimus, plena Luna, & quarum radices desideras, deficiente Luna, terræ optime committuntur. Ligna quoque cæsa

in plenilunio citius putrescunt, nec tam commode inferviunt ædificationi, quam quæ Luna decrescente excinduntur. Testatur id præter crebram experientiam MACROBIUS Saturn. lib. VII. c. ult. *Ligna, quæ luna vel jam plena, vel adhuc crescente, dejecta sunt, inepta fabricis sunt, quasi emollita per humoris conceptionem. Et agricolis curæ est frumenta de areis nonnisi luna deficiente colligere, ut sicca permaneant.* Idem pulchre ibidem scribit, carnes quæ per noctes plena lucente Luna portantur, facilius putrescere. De cujus rei causa prolixè ibidem disputat, humiditati hujus sideris insigni hoc effectu attributo.

§. XXII.

Procedimus jam, omiſſa Luna, ad ceteros planetas, de quorum potentia & vi in corpus nostrum, præsertim imbecillius, & in statu morboſo, peritissimi astrologi cum Veteres tum recentiores has sibi observationes collegerunt. Et quidem primum Martem & Saturnum planetas ratione effectus non admodum benignos judicarunt, quippe vel inter se, vel cum aliis juncti, humorum sanguinisque commotiones varias efficere, & malos procreare morbos ab omni memoria sunt crediti. Benigniores contra sunt Jupiter & Venus, sub quorum conjunctione vires corpori accrescere, feliciusque solvi ac sanari morbos multi tradiderunt. Mercurium vero indifferentem semper censuerunt, & eorum planetarum induere naturam, quibus sese adſociat. Inprimis hunc ipsum morbos ex ſero ortos egregie movere, non fine ratione arbitrantur.

§. XXIII.

Speciatim vero certas conjunctiones benignas five malignas crediderunt. Ita Solis & Jovis adſpectus infervire morborum chronicorum curæ, v. g. malo hypochondriaco, ſcorbuto, non inepte prædicarunt. Præterea venæ ſectionem, ac purgationem, ceterorumque medicamentorum uſum, ſub hoc adſpectu commendarunt. Porro adſpectus Jovis & Veneris, Solis & Mercurii, item Jovis & Mercurii lati ac ſalubres phthiſicis, hæcticis, iisque qui laborant febribus ardentibus & inflammatoriis, bonæque criſes ſub hoc adſpectu fieri dicuntur. Infausti contra ſunt adſpectus Martis & Mercurii, Martis etiam & Jovis, qui inflammationes, hæmoptyſes, excretiones ſanguinis, febres denique arduentes excitant, in quibus etiam morbis parum læti pollicentur.

§. XXIV.

Adſpectus Solis & Mercurii phlegmaticis & morbis ſeroſis expedit, conjunctio vero Martis & Solis bilem flavam commovere & exinde inflammationes ventriculi faucium ac cerebri ſuſcitare creditur. Quando vero Mars Mercurium adſpicit, tunc diſpoſitio fit ad arthritidem, dolores, præſertim à phlegmate & copia humorum proficiſcentes. Martis & Saturni adſpectus noxiùs dicitur cholericis melancholicis; item cardialgias, cephalalgias, phrenitides excitat & facile iram provocat ac animi commotiones. Saturni & Veneris conjunctio gravidis periculum portendit. Eadem movet tuſſem, coryzam, arthritidem, cephalalgias & paralyſes, infantibusque maxime infeſta dicitur. Martis & Veneris adſpectus minus propitii ſunt gravidis puerperisque, & exinde illis maxime reformidandi.

§. XXV.

Saturni & Jovis, item Saturni & Martis adſpectus graves caſus mortalibus prænunciant. Plerumque enim has ſiderum conjunctiones epidemii acuti, imo contagioſi morbi conſequentur. Loquuntur de ſerali horum ſiderum effectu atrociffimæ febres, vehementiffime ex-

inde per totam Europam ſæpius graſſatæ. Ex hoc planetarum adſpectu peſtis impendere plerumque periculum, multis observationibus oſtendit MATTH. ZEISIUS in orat. de cauſ. & period. peſtil. morb. Ita anno 1127. truculentiffimam ſæviſſe peſtem teſtatur, quæ imminenſis fere funeribus orbem exhauſerit, & hujus ortum ex conjunctione Saturni & Jovis astrologos inprimis deduxiſſe. Peſti 1348. graſſanti adſpectum Jovis, Saturni & Martis occaſionem præbuiſſe BOCCATIUS & GUIDO DE CAULIACO ſcriptis tradiderunt. Eandem anno 1478. ſævientem ad luminum eclipses & Saturni ac Martis conjunctionem retulit ſummus ſuo ſæculo Philoſophus MARSILIUS FICINUS. Itaque quoque celeberrimus TUBINGENſium Profeſſor CASP. BARTHOLI ex Saturni & Martis conjunctione 1628. autumnò æſtivo, & hyeme tepida præcurrente, peſtem annis ſequentibus univerſam prope Europam proſternentem prædixit, ſolenni diſputatione hac de re habita in illo loco. Sic domus Cæſareæ Archiater D. PAUL. DE SORBAIT conſilio medico MS. peſtem Viennenſem eorundem planetarum in geminis, egregia prædixit divinatione. Adde quæ ſuo tempore de dyſenteria epidemica ex eodem ſiderum poſitu 1624. & 1637. DAN. SENNERTUS l. III. Part. 2. Sect. 2. c. 7. obſervavit.

§. XXVI.

Quantum Lunæ, variisque planetarum poſitionibus, Veteres fere omnes quoad dies criticos attribuerint, paſſim in ipſorum ſcriptis celebratur. Neque quidem de nihilo eſt, utut in eo mihi admonendi videntur, quod Lunæ in conſtituendis diebus criticis, excluſa morbi & materiæ peccantis conditione, nimium confidant adſcribantque. Nam præter dicta, adſpectus ejus cum planetis maxime conſiderandos eſſe, in conſeſſo eſt. Placet hac de re eximium EUCHSTADII proponere locum quem lib. 2. eph. de diebus criticis adducit: *Quodſi, inquit, luna in principio morbi acuti vel nullum adſpectum cum planetis aliis habuerit, & in progreſſu ad mali planetæ radios, conjunctione, oppoſitione, vel tetragono pervenerit, vel ſtatim in principio maleficorum radiis leſa fuerit, tum ſi in progreſſu maleficos adſpectus denuo incurrat, miras videbis tragædias, & periculoſas in corpore turbationes, & non raro criſes lethales.* Ad ſolam itaque lunam inquit CL. MOEBIUS *astronomus & astrologus inſignis in Epiſt. Inſt. med. l. III. P. 3. c. 8.* non reſpiciendum, ſed vires ceterorum planetarum, quos Luna recipit, ſimul ſunt intuendæ.

§. XXVII.

Quod ipſam medendi rationem attinet, & ordinem, atque tempus remedia adplicandi, hac in re etiam ipſi Veteres aſtra minus neglexerunt. Compertum eſt, purgationes aut venæ ſectiones, tempore ſolſtitiorum aut æquinoctiorum, item Sole aut Luna deficiente, item præſente vel accedente maligno planeta v. g. Saturno cum Marte & Lunæ conjunctione illa hora, qua adminiſtratae fuerunt, non urgente neceſſitate, temere inſtitutas, plerumque ſiniſtre ceſſiſſe, uti id latius demonſtrat Dn. FRID. HOFFMANNUS *Parens digniſſimus in method. medend.* Circa ſolſtitia æſtiva medicamentorum uſum plane fugiendum eſſe, ſerio præcipit HIPPOCRATES loco ſuperius laudato. Vulnura luminaribus conjunctis, ſeu oppoſitis inſlicta, difficilius tardiusque coaleſcere, quivis obſervabit Chirurgus & LEVINUS etiam LEMNIUS commonuit. In omnibus ſturmis, Luna decrescente, medicamenta exhibita plus proficiunt, quam alio tempore. Si quis epilepſia vel nervorum capitiſque adfectu laborat, is ſingulis Lunæ mutationibus nervina, cephalica & epileptica adhibere debet, & non parum inde ſentiet levamenti. Quando vermibus inteſtina torquentur, Luna decrescente anthelminticorum uſus maxime eſt commendandus. Eodem tempore optime ſanguis mittitur, quem morem etiam per totam Helvetiam, cujus incolæ expetunt hoc remedium, ſollicite cuſtodiant.

Qui

Qui menses suppressos movere tentat, optime id fecerit, si circa novilunium vel plenilunium emmenagoga exhibeat. Bulbuli allii tres aut quatuor feliciter ab iis, qui calculo laborant, sumuntur singulis septimanis, semel eo die, qui proxime quatuor lunæ quadras præcedit; vid. FRID. HOFFMANN. *Clav. Pharmaceut. Schræd.* p. 406. Similiter etiam magnæ purgationes melius fiunt tribus vel quatuor diebus ante & post plenilunium.

§. XXVIII.

Hactenus ea adduximus, quæ jam dudum à priscis peritisque Medicis fuerunt observata circa astrorum influxum in corpora; jam restat, ut & nostrum iudicium sententiamque hac de re exponamus. Ut paucis vero rem expediamus, adfirmamus omnino, nos media incedere via. Neque enim nimium tribuimus astris, neque virtutem illis atque operationes plane detrahimus, sed merito distinguimus inter sanam & rationalem astrologiam, ac inter supersticiosam, fabulosam, ac empiricam. Certe negari non potest, multas superstitiones, fabulas, & quæ rationi, providentiæque divinæ repugnant, à nonnullis ex Veteribus fuisse tradita. Ecquis enim sanior mente præditus ferre poterit, eo vecordiam illos processisse, ut hominum mores, fortunam, morbos ac mortem inde sint hariolati. Jam vero quis non doleat astrologiam meteorologicam tam negligenter hactenus fuisse cultam, eamque mansisse mancam, dubiam, rectoque destitutam fundamento. Laborat hic inprimis Calendariorum fides, in quibus ejusmodi tempestates prædicuntur, quæ raro experientiæ respondent. Inde permoti complures ex recentioribus tam Physicis æque ac Medicis, contrariam plane inierunt viam, omni omnium astrorum, si à Sole discesseris, effectum & virtute pernegata. Cujus quidem rei eas adferunt causas, quod nempe longius distiti sint planetæ. At nec hæc ipsa distantia sufficit, ut communicationem cum globo terraqueo excludat. Hæc enim, si non impedit lucis in oculos influxum, multo minus impedit illius in aërem ac atmosphæram actiones. Præter hæc quis adeo vecors est, quin confiteatur plane, mirabiles hos planetarum motus, progressus & conjunctiones non frustra à divina providentia creatas esse atque institutas? Neque facile alia ratio inveniri poterit tantarum mutationum atque tempestatum, quæ in aëre contingunt, quam diversæ siderum ratione situs positusque operationes. Equidem effectus Solis sunt clarissimi, extraque omnem dubitationem positi, illi tamen sufficiunt tantæ temporum diversitati inde explicandæ. Frequenter enim experimur, altero anno hyemem tepidam, altero asperam ac inclementem esse, autumnum quandoque siccum, quandoque pluviosum, æstatem denique alio tempore humidam, alio ferventissimam omnino observamus. Quin imo, non eundem semper morem servant venti, sed pro diversitate siderum, diversam formam indolemque induunt. Qui à septentrione spirant, ordinario sunt frigidissimi, nonnunquam tamen, quod mirabile, ferocitatem hanc deponunt plane, & per longum sæpe tempus clementi modestoque flatu observantur. Orientales alioquin pluviosi summam sæpe adferunt serenitatem.

§. XXIX.

Omnis vero scrupulus, omnisque dubitatio, quæ de hoc influxu residere videtur, hoc inprimis eximitur quod sub duorum planetarum adspectu non mediocriter aër immutari observetur. Licet enim, quod optandum sane foret, minus accurate hanc mutationem prædicare ac determinare possimus, nihilo tamen secius experientia innixi illam non injuria asserimus. Temperare mihi non possum, quin hoc loco egregiam summorum Virorum operam *Dn. KOOKS Angli & Dn. SCHLITERS* hac in re collocatam dilaudem, qui post longam *Frid. Hoffmanni Oper. Tom. V.*

ac frequentem experientiam singularem aëris mutationem à planetarum situ tandem deprehenderunt. Nos ipsi per decem annos magna industria ephemerides confecimus meteorologicas & barometricas, singulis diebus semel iterumque tempestate ventorumque varietate, item mercurii in barometro situ diligenter adnotato. In his constantissime adseveramus, planetarum adspectum maxime superiorum, Saturni & Jovis item Martis, sive intra se, sive cum aliis conspirent, certas atque graves consequi in aëre turbationes, præsertim si plures adspectus simul uno tempore concurrant.

§. XXX.

Ad Lunæ vero quadras tempestatum fieri mutationem, non est ut multis confirmemus experimentis, cum id ipsum plebejis ac agricolis non ignoretur. Et de Lunæ quidem in nostrum globum efficacia, insigne sane testimonium maris æstuum judicaverim, qui communi Philosophorum suffragio lunæ vicibus adscribitur. Hæc enim, dum amplitudine sua maximum in æthere occupat spatium, inde evenit, ut globus terraqueus paulatim centrum suum egredi cogatur, indeque aquæ recedant, adfluantque iterum, terra in locum suum restituta.

§. XXXI.

Datur proinde astrorum influxus, & dari sane negaverit nemo, qui paululum adspexerit saltem, quantum plantæ, quantum animantia à Lunæ positu ac luce alterentur. Atque utinam observationum copia eodem tempore pluribusque in locis ista res curatius excoleretur, ne hac sterilitate quodcunque boni provenit, in primo flore stranguletur. Cui malo optime occurri poterit sufficienti observationum abundantia, ut diversis nempe locis, eodemque tempore, non tempestatis aërisque statum solum, sed & ventos mercuriique situm in barometro & caloris frigorisque gradus in thermometro probe exploremus. Pulchre huic rei inserviet novum inventum thermometri nostrum, quo modum invenimus in uno instrumento non minimas solum mutationes caloris atque frigoris, sed & proportionem calidi ac frigidi in aëre eodem pernoscenti, nullo intercedente effectum barometrico, qui aliis fere thermometris non sigillatis est familiaris.

§. XXXII.

Si proinde verum est, & verum etiam est, dari astrorum influxum, facillimum erit ostendere, corpora nostra graves inde experiri commutationes. Ecquis enim, nisi hospes plane sit in naturali medicaque scientia, ignorat, quanta aëris in nostrum corpus sit potentia ac virtus? Aër nempe est ex elementis maxime nobis necessarius, hoc spiritus, quo vita continetur, trahitur, hoc materialis uti adpellatur anima fovetur atque sustinetur, hoc denique cœlestis illa pars, quæ in nobis dominatur, in vinculo conservatur. Aër elatere suo in corpus corporisque succos admissus, motricium in musculis fibrarum motus causa jure meritoque celebratur. Idem solidis, quæ sanguinis circuitum tuentur, robur atque tonum elargitur. Aër porro pondere suo in æquilibrio conservat humores, ne intentioni motu nimis expansi systolen vasorum necessariam impediant. Eundem subito immutatum magnorum morborum esse autorem, prodidit HIPPOCRATES *lib. de flat.* Testes sunt epidemici morbi, quibus plurimi mortalium pereunt, quique non alia ex causa, quam ex aëris malignitate oriuntur. Qualis enim aër, talis sanguinis est circulus, qualis hic, talis valetudo. Serenus atque temperatus omnia tranquilla efficit, corpusque sanum & integrum præstat. Densus contra corpus reddit imbecillum, excretiones nempe lædendo, unde tono fibrarum debilitato, sanguinis motus atque ordo maxime perturbatur.

§. XXXIII.

Non abs re igitur magnus noster HIPPOCRATES passim in scriptis suis aërem ejusque vires prædicat ac admiratur. Imo diligenter observata præcedente tempestate, futuri anni constitutionem, atque morbos adeo feliciter prædicit, ut tam prudens ejus divinatio merito sit admirationi. Qua de re legi meretur egregius illius *liber de aëre, aquis & locis* item *de flatibus*; sique ulla in re ejus industria, quam in innumeris probavit rebus, laudem meretur, certe in hac unice meretur. Primus enim fuit, qui hanc doctrinam ab inferis velut excitavit, ac ad uberiorem revocavit contemplationem. Ac utinam, & plures pulcherrimum hoc institutum majori diligentia fuissent persecuti, & observationum copia hanc nobilissimam doctrinæ partem confirmassent! Aurea sunt verba, quæ in *libro de humoribus* §.7. sapientissimus Autor scribit: *Qualia vero sunt tempora, tales etiam erunt morbi & constitutiones ex ipsis.* Si tempora tempestive & ordinate se habent, morbos judicatu faciles faciunt. Vernaculi autem temporum morbi indicant mutationes, & prout variaverit tempus similes, aut dissimiles erunt morbi, qui hoc tempore exoriuntur.

§. XXXIV.

Nemo proinde erit, qui ex his, quæ proposuimus, non clarissime sit intellecturus, astrorum situs & positus, quoniam aërem variant, corpus etiam diverso modo variare. Nec in obscuro esse poterit, in mentem etiam omnino illa agere, mores ingeniumque variè adficiendo. Novit enim tum prudentissimus quisque Medicus, tum & in *nostra Diss. de temperamento fundam. morum & morbor.* proluxe hoc expositum, quod temperies motusque sanguinis & humorum animum, mores, ingeniique vires maxime formet & constituat. Jam vero constitutionem sanguinis ab aëre, qui ab astris excitatur, dependere, adeo certum est, ut nulla sane opus sit probatione. Inde sane adductos Veteres crediderim, ut astris non potentiam solum in corpus atque animum adscriperint, sed ex iisdem sortem hominum, faustosque vel infaustos rerum exitus, cum non mediocri superstitione divinaverint. In quo quidem adeo non recte fecerunt, ut potius ipsorum error jure sit reprehendendus.

§. XXXV.

Licet vero propter imbecillitatem intellectus nostri minus adsequi & capere queamus hujus influxus rationem, atque modum in corpora, nihil tamen hoc ipsum detrahit scientiæ ac veritati. Quot enim dantur res tum in medicina, tum in naturali scientia, quarum ratio non invenitur, de illis tamen minime ambigitur ac dubitatur. Vetus porro est canon philosophicus, à negatione modi & τὸ δὲ ὄντι ad τὸ ὄντι sive existentiam non esse concludendum. Tentandum tamen videtur, & tentabimus etiam, ut aliquo modo huic quoque dubitationi occurratur. Nobis ita videtur, id ipsum mediante rarefactione ac compressione, motusque directione ad hanc vel illam lineam fieri. Ita Saturnus in corpus atque atmosphæram operari videtur, ut comprimendo aërem, motumque ejus rectilineum constituendo, frigus atque ventos inde excitet. Sol & Mars, si in re incerta harrariolari licet, intestinum ac verticillarem motum, qui caloris est, producunt propagantque. Venus vero & Luna dum leviores reddunt aërem vaporum copiam accumulant, & pluviosi inde sunt planetæ. Luna secundum quadras vel nimium rarefacit aërem, unde corpora & succi turgescunt, nimiaque fit transpiratio, vel si novilunium est, vel deficit Luna, aër compressus inde varia excitat mala.

§. XXXVI.

Omnium planetarum nobilissimus, & qui maxime corpus sustinet, est Sol, cujus præstantia tanta est in conservanda sanitate, ut exinde medendi potestatem illi attribuerit antiquitas, quia nempe temperatus Solis calor omnium morborum fuga est. Apollo enim medicinæ Præses idem est ac Sol, inde adpellatus, quod mala pellat, ideo ceu *sospitalis ac medicus Deus* teste MACROBIO in Romanis etiam sacris cultus. Hujus cum Jove conjunctio, & Jovis cum Venere, item Jovis & Mercurii aspectus ea maxime mala levant, quæ à spasmo, & spasmodica fibrarum strictione proveniunt. Propitii inde sunt planetæ malo hypochondriaco, hysterico, phthisi & iis qui inflammationibus periclitantur. Nempe atmosphæram leviores reddendo, tonum fibrarum relaxant fordidumque impurarum juvant transpirationem. Eandem ob causam sub conjunctione Solis & Jovis commendatur omnis medicatio tam per venæ sectionem, quam purgationem, cæterorumque medicamentorum usus.

§. XXXVII.

Solis & Mercurii aspectus phlegmaticis conducit & morbis, qui à sero trahunt originem. Idem facit aspectus Solis & Martis, qui infaustus contra est choleris, dum intestinum sanguinis motum nimium accendit, & biliosos calidosque inde morbos, hæmorrhagias maxime producit. Non dissimili est operatione Martis & Mercurii conjunctio.

§. XXXVIII.

Veneris & Saturni aspectus, quia aërem comprimit, fibras tensas reddit, poros occludit, & ad spasmos, rheumatismos, febres, tussés, coryzas, item abortus corpora disponit ac præparat. Martis & Saturni aspectus quia sanguinem interne commovet, & externe perspirationem impedit, iram provocat, celeresque excitat adfectiones. Idem morbos ex bile secundat, eamque ob causam ad putredinem & pestem facillime viam solet aperire. Diuurnus Veneris Mercuriique aspectus, dum justo leviores sistit atmosphæram, ulcerum morborumque putridorum, vermium, aphtharum, febriumque catarrhalium injicit periculum. Saturni atque Jovis aspectus identidem tristem post se relinquit operationem. Jovis enim aspectus rarefacit humores, Saturnus vero externe comprimendo retardat perspirationem.

§. XXXIX.

Luna crescente tumores ampliari supra fuit demonstratum. Evenit hoc non alia ex ratione, quam quod partium solidarum tonum relaxat tam rarefactione, quam humiditate, unde perspiratio suspenditur, & humorum sanguinis & feri fit accumulatio. Luna vero decrescente perspiratio acquirit vires, & exinde tonus fibrarumque robur confirmatur. Et hæc est causa, cur optime medicamentorum usum homines tunc perferre possint, quippe eo tempore bona est evacuatio, bona etiam venæ sectio, quæ tunc maxime inservit præservationi.

§. XL.

Solstitiorum tempore abstinendum esse à validioribus purgantibus, ex eo adprobatur, quia sub æstivo maximus æstus, viriumque est dejectio, hyemali vero naturæ summa semper adest imbecillitas. Æquinoctia vero, cum propter humiditatem suam fibras relaxent, humores, qui ejiciendi erant, intra corpus remanent. Inde, si purgantia robustiora circa hocce tempus dederis, facile accidere potest, ut horum violentia ad has vel illas partes coacti humores periculosas excitent stagnationes. Quo majori ac intentioniori cura

cura providendum est Medico, ut hoc tempore rejiciat plane hæc medicamenta, lenioribus contra laxantibus, & quæ clementer alvum ducunt, tum utatur. Decrescente vero Luna, unice probanda sunt, quæ vermibus tumoribusque opponuntur, quia tunc majori robore suffulta natura, medicamentorum vires auget, egregioque illis est adjuvamento. Quo magis vero remedia à naturæ viribus juvantur, eo maturior felicioque eorundem operatio omnino debet expectari & contra.

§. XLI.

Illud vero inprimis sciri oportet, astrorum influxum ad eas morborum causas referendum esse, quæ corpus nostrum sive in sano sive in infirmo statu remote saltem adficiunt. Disponunt enim saltem astra ad hanc vel illam valetudinem, ad hanc vel illam corporis fibrarumque conditionem, non vero proxime & immediate morbum vel adfectum aliquem producant. Veterum hæc jam fuit cautio, qui astra inclinare, non necessitare, prudenter dictitarunt. Ad necessarium etiam effectum necessario & causa proxima requiritur, remotarum vero, ut fiat effectus, plures debent concurrere. Monendum porro, astra in corpus nostrum agere, non secundum modum activitatis, ut ita loquamur, sed secundum modum receptivitatis. Quæ quidem regula tanto magis hic etiam est attendenda, quanto di-

ligentius hæc ipsa de cunctis causis morbificis, morborumque, ac medicamentorum operatione memoriæ est insigenda. Eadem ex causa frequenter evenire videmus, ut non eodem modo corpora ab astris adficiantur, sed quandoque idem effectus alteri conducat, alteri sit nocumento. Postremo non prætereundum est, in imbecillis maxime naturis siderum influxum deprehendi. Hi enim propter laxum atque spongiosum habitum corporis & languidiorem sanguinis motum, illorum injuriæ inprimis patent, cum robustiores non facile ab iis patiantur.

§. XLII.

Ultimo demum loco probe tenendum & illud, necessitate urgente neque astrorum, neque aëris habendam esse rationem. Nemo enim à medica regula in morbis acutis, irato licet adversoque fidere deterreri debet, probe monente egregio Medico *Levino Lemnio O.N.M. l.2. c.32.* sic in angina, pleuritide, inflammationibus, neglecta astrorum contemplatione, mature ad venæ sectionem est decurrendum. Ut enim nauclerus ingruente tempestate, adverso etiam æstu adverso vento celerrime salutem prospicit, fidamque stationem adsequi velis remisque contendit; ita Medicus prudens, neglectis astris, prima occasione adhibet remedia ad tollendam morbi ferocitatem.

D E

FATO PHYSICO ET MEDICO

E J U S Q U E

RATIONALI EXPLICATIONE DISQUISITIO

I N Q U A

MULTA SUBTILIORIS INDAGINIS ARGUMENTA

De Fato Stoicorum, Spinozæ, Medico & Physico, de Fortuna, Providentia

Divina, Harmonia præstabilita, Miraculis, necnon Declinatione

fati curatius paulo tractantur & excutiuntur.

P R Æ F A T I O.



I ulla unquam paulo subtilioris indaginis materia, clarissimorum virorum certatim provocavit industriam, eorumque acutissima etiam torfit & exercuit ingenia; profecto ea est, quæ de fato, fortuna, infortunio, casu & causis eventuum in hoc universo, à priscis jam temporibus innotuit, & inter omnis ævi & sectæ Philosophos summa agitata fuit contentione. Quamvis autem in enucleando arduo hoc argumento, summi & magni nominis Philosophi tantopere desudarint, suasque de eodem meditationes innumeris propemodum scriptis divulgarent; re tamen propius inspecta, eos nihil quod solidum, stabile & dubitationis expers sit, proposuisse, ingenue dicendum est: ita prorsus, ut nonnisi dissidentes opiniones, miras dubitationes & obscuros terminos in illis, quos de fato concinnarunt libris, reperire liceat, & nodum Gordium, aut Sphynxis plane ænigma, sapientissimis quoque inenodabile, subesse, judicandum sit. Neque quisquam hæc ita esse mirabitur, qui curatius perpendet, Philosophorum antiquiores non solum vera Dei cognitione, sed etiam solida & exquisita rerum naturalium scientia plane non imbutos, & via ac methodo invenienti & demonstrandi veritatem destitutos fuisse. Quapropter sicuti omnes fere disciplinæ, ut Physica, Metaphysica, Medicina & scholastica Theologia, à Veteribus minus recte tractatæ atque excultæ fuerunt, eo quod multos obscuros, intricatos & dubios termi-

nos, quibus nil præter ignorantiam suam prodidere, ad evolvendas res adhibuerunt; ita etiam in moralibus, politicis ac naturalibus quasdam voces ex eodem inscitiae fonte profluxisse, dicendum est. Etenim tam deplorata quidem & misera mentis humanæ est conditio, ut omnes, qui veritatem amant & colunt, ingenue fateri debeant, eandem in rebus aliquanto sublimioribus dijudicandis & explicandis, imbecillem, truncam esse & mancā; nihilo secius tamen tanta corruptio tamque perversa superbia mortalium ingenio infidet, ut in rebus subtilioribus, quæ captum ipsius transcendunt, explanandis, hanc suam ignorantiam profiteri nolint, sed potius rerum abditarum modum & causas, confictis quibusdam speciosis, sed nihil significantibus terminis, prorupta eruere contendunt audacia. Notissimæ sanæ sunt in physicis sympathiæ, antipathiæ, virtutis attractricis, occultæ qualitatis, formæ substantialis, fugæ vacui, voces; in medicis naturæ, spiritus insiti & insui, archei, principii vitalis, errantis, sapientis, consensus partium, antipraxis, aliæque in cæteris disciplinis innumerabiles prope modum denominationes, quas hoc loco omnes commemorare nostri non est institutum, sufficiet si easdem ignorantiae & ignavi ingenii terminorum nomine insigniemus. Nec à veritate alienum erit, si frequentissima in metaphysicis, politicis & naturalibus facti, fortunæ & infortunii nomina ad eundem censum referemus. Quemadmodum enim termini & voces nihil aliud sunt quam idearum, cogitationum ac rerum signa, quibus mentis nostræ operationes exprimuntur & cum aliis communicantur; ita certe mera nomina, loco modorum, vel causarum quæ latent, allegare, inane prorsus est & fatuum. Quum itaque apud Philosophos, tam vetustioris quam recentioris ævi, non genuina, una eademque fati sit explicatio, ratio & applicatio, rem non projectæ operæ esse ducimus; si de subtili pariter ac curioso argumento, FATO nempe PHYSICO ET MEDICO, an illud detur, & à quibus causis dependeat? pervestigatius paulo agamus & uberius edisseramus: quo nostro proposito fine ut eo melius & ex voto potiamur, Veterum de fato & fortuna doctrinam qua fieri potest brevitate præmittere, minime alienum erit.

§. I.

ANte vero quam ipsam de fato tractationem aggre- diamur, evolvenda nobis in limine erit vocis fati claritas; ad quam obtinendam, ejus originem, sive radicem, & usum, sive significationem notam, tradere oportet. Radix itaque hujus vocis sine omni dubio est verbum fari, cujus participium perfectum passivum, fatum, idem est ac dictum, effatum, editum sive decretum; usu vero denotat necessitatem immutabilem: adeoque exin emergit decretum, sive editum, inevitabilis eventuum necessitatis. Indeclinabilis hujus necessitatis causas ut inquirerent Philosophi strenue utique allaborarunt, sed dissidentibus plane rationibus id perfecerunt. Saniores enim illorum, qui Deum omnium rerum fontem, ejusque fata & decreta immutabilia esse afferebant, causam absolutæ & fatalis necessitatis ad hunc referebant: alii vero, à sensu & cultu divino alieni, concatenatam, perpetuam, immo æternam causarum in universo seriem, omnium, quæ singulis destinato tempore bona vel mala eveniunt, originem esse, asseverabant; alii denique, Christiani nempe, hos eventus non quidem causis naturalibus earumque serie destitutos esse judicabant, sed DEUM, naturæ ordinis auctorem, sibi reservasse potestatem, ut eundem pro beneplacito suo immutare queat, existimabant.

§. II. Primum itaque meditationem nostram subibunt ii, qui fortunam, infortunium ipsumque fatum ad Deos referebant. Hos inter maxime eminent idolorum cultores, qui tot sibi fingeant Deos, quot diversæ conditionis bona mortalibus obtingere perspiciebant, illorumque singulis certos ac determinatos boni cujusdam effectus liberalissime tribuebant. Ita non modo sol cum omnibus planetis, sed etiam ignis, ex animalibus bos, ex volucrum numero ibis, apud Ægyptios in Deorum classem relati fuerunt; quibus in grati animi signum, cultum & honores divinos obtulerunt. Maxime vero omnium inter barbararum gentium

quamplurimas divinitatis nota inclaruit ipsa fortuna, quæ ad denotandam inconstantiam atque mobilitatem, sub virginis cœcæ, rotæ insistentis simulacro, religiose excepta fuit. Etenim non solum JUVENALIS *Sat. 10.* disertis pronunciat verbis:

Te facimus Fortuna Deam cæloque locamus.

Sed etiam TACITUS memorat, Ancum Martium & Servium Tullium Romæ huic Deæ templum dedicasse, Fortunamque auream in interiori principum cubiculo coluisse. Quum itaque Fortunam Deam crederent, eandem immutabilem & fatum inexorabile esse inde deducebant. Legem enim Numinis esse plane immutabilem, & quicquid etiam fausti vel infausti à Fortuna Dea mortalibus decretum sit, nullo modo mutari posse, sed placido potius & æquo animo ferendum esse, existimabant. Ineluctabile hoc fatum graphice sane pro more suo describit SENECA, *N. Q. Lib. II. c. 35.* *fata, inquit, jus suum peragunt, nec ulla misericordia flectuntur, non gratia, servant cursum irrevocabilem, ex destinato fluunt. Quemadmodum rapidorum aquæ torrentium in se non recurrunt, nec moratur quidem, quia priorem superveniens præcipitat; sic ordinem fati æterna series rotat, cujus hæc prima lex est: stare decreto.* Et CICERO de *divinat. lib. II. c. 6.* eandem in rem scribit: *quid est aliud fors? quid fortuna? quid casus? quid eventus? nisi cum sic aliquid cecidit, sic evenit, ut vel non cadere atque evenire, vel aliter cadere atque evenire, potuerit.* His quoque accedere videtur LIPSIUS, dum *ep. 43. cent. I.* *Hæc publica, ait, & æterna lex, cui quisquis repugnat, improbus est & refractarius. Ut athletis olim fors, non electio adversarium dabat, cum quo certarent: sic cuique nostrum vitæ suam conditionem fata, cum quibus luctemur. Hanc vincere oportet, i. e. ferre. Hujus pugne robur omne in patiendo est, & victoria in cedendo.*

§. III. Ex inevitabili hæc eventuum necessitate, quam Veteres fati nomine insigniverunt, Stoici moralis doctrinæ desumerunt fundamenta, quorum cardo in eo potissimum vertitur, ut quisque patienti & æquo

animo

animo ferat omnia, quæ in hominis potestate non sunt, i. e. quæ mutare non potest, cujus generis sunt publicæ & privatæ calamitates, fames, morbi, mors, inimici, infelix conjugium, inordinatæ temporum constitutiones, bella, servitutes, injuriæ & potentiæ principum, aliaque id genus plura. Et quemadmodum saniorum hujus sectæ scripta, SENECE nempe, EPICETI & ANTONINI, id satis planum faciunt atque testatum; ita memoratu inprimis hoc loco digna sunt SENECE verba:

*Duc Summe Pater altique dominator poli
Quocunque placuit, nulla parendi mora est.
Adsum impiger, fac nolle, comitabor gemens
Malusque patiar facere quod licuit bono.
Ducunt volentem fata, nolentem trahunt.*

Hac vocis fati significatione usus quoque est antiquissimus rerum medicarum scriptor, HIPPOCRATES, qui in *epistolis* p. m. 394. hæc habet: *omnibus hominibus amara necessitas incumbit, ut quæ à fato statuta sunt ferant; vi enim exsequitur quæ vult.*

§. IV. Quod si autem primam, ab omni inde ævo originem fatalis hujus eventuum in universo necessitatis, sollicitius paulo inquiramus, vetustissima historiarum monumenta nos edocent, Chaldæos, Assyrios atque Ægyptios, doctrinæ de fato inventores fuisse & propugnatores. Sicuti enim omnium scientiarum antiquissima est Astrologia, quam præter Chaldæos & Assyrios Ægyptii etiam studiose excoluerunt, maxime post tempora Abrahami, qui teste JOSEPHO *Antiquit. lib. I. c. 9.* primus ex Chaldæis eos Astronomiam docuit; ita statim sub ipsis artium & disciplinarum incunabulis, causam omnium, quæcunque hominibus vel fausta vel infausta accidebant, ad æthera & astra relegabant, illudque dicebant fatum. Fingebant nimirum planetas malignos & benignos, & unicuique horum peculiarem virtutem, influxum & operationem in sublunaria corpora, inque primis in hominis ingenium, inclinationes, animum ipsumque corpus assignabant, quæ potissimum eo ipso temporis articulo, quo homo in lucem ederetur, sese exfereret. Ex hac origine repetenda sunt deducta ex astris præfagia & thematis genethliaci perscrutatio, quibus mirifice sese extulerunt Chaldæorum sacerdotes, qui themate posito & genesi inspecta, quid homini per totum vitæ decursum sit eventurum, prænunciare se posse jactabant, quo factum, ut astrologi audirent fatidici. Invaluit postmodum antiquissima hæc, sed falsissima sententia, & omnes propemodum ætatis & sectæ Philosophos in eodem errorum murices præcipitavit. Ita PLATO, quo majorem ætate sua non habuit Græcia, in *Tim. 1054.* nec non ejus sectatores PROCLUS, PORPHYRIUS & SYRIUS non solum acerrimi fati fuerunt propugnatores, sed etiam illius sedem in astris esse asseruerunt: immo progressu temporis eo deventum est, ut impune asseverare liceret, vicissitudines rerum in universo contingere & fortunam variare, prout astra mutantur & non in eodem loco subsistant. Neutiquam vero defuere, qui, inprimis è Christianorum numero, hanc fatalem eventuum ex astris proveniente necessitatem, magno impugnarunt studio; quo nomine laudem merentur DIODORUS Tarfi episcopus & JOHANNES cognomine CHRYSOSTOMUS, quorum prior libros adversus astronomos, astrologos & fatum, posterior quinque homilias & tres epistolas de fato & providentia divina concinnarunt, nec non EUSEBIUS & AUGUSTINUS in libro de civitate Dei. Si enim tam stupenda fati in omnibus actionibus humanis & eventibus in universo est potentia, quam astra rebus & animatis & inanimatis insinuant, vanum utique erit & inane omnis moralis philosophiæ, omnis pietatis & doctrinæ cœlestis studium, & nihil, nisi quod omnia quæ accidunt sint indeclinabilia, & proinde patienti

animo ferenda, remanebit.

§. V. Considerato sic fato astrologico, sequitur jam ut Stoicorum, qui præcipui fatalis necessitatis defensores fuerunt, sententiam excutiamus. Ex hisce prodeat primum SENECA qui de *benefic. libr. IV. §. 7.* de fato tradit, quod nihil aliud sit, quam *series implexa causarum*: & ex mente CHRYSIPPI fatum est *naturalis quidam ordo & connexio rerum ab æterno, aliis ab aliis consequentibus, sed immutabili manente hujus complicatione.* Neque minus commemorabile est CICERONIS effatum, cujus AUGUSTINUS de *C. D. Libr. V. c. 9.* totidem verbis mentionem facit: *si præscita sunt omnia futura, hoc ordine venient, quo ventura esse præscita sunt. Et si hoc ordine venient, certus est ordo rerum; certus est ordo causarum.* Non enim aliquid fieri poterit, ubi non aliqua efficiens causa præcesserit. Si autem certus est ordo causarum, quo fit omne quod fit, fato fiunt omnia quæ fiunt. Quod si ita est, nihil est in potestate nullumque est arbitrium voluntatis. Nefarium autem in eo passi sunt Stoici lapsum, quod non solum voluntatem humanam, in se liberam, fatali huic alligaverint necessitati, (de quo infra latius disseremus) sed etiam ipsum Deum, qui fata scripsit, iisdem subicere conati sint, nec quicquam ab ipso in hoc causarum ordine immutari posse asseveraverint: id quod quam plurimis eorum confirmari potest testimoniis. Sic enim perhibet SENECA: *ipse ille omnium conditor ac rector scripsit quidem fata, sed sequitur, semel scripsit, semper paret.* Et idem auctor in *Q. N. Lib. II. c. 36.* negat, sapientis viri sententiam posse mutari, quanto minus Dei; quum sapiens quid sit optimum in præsentia sciat, divinitati vero omne præsens sit. Quin immo *Lib. I. de benefic.* hunc in sensum disputat: non posse Deum è factorum lege quicquam derogare, quia necesse sit ut eadem illi semper placeant, *neque ob hoc, inquit, ille minus liber & potens est, ipse enim est necessitas sua.* Gravissimum hunc errorem Stoicos exinde contraxisse judico, tum quod mundum æternum esse crediderint, tum etiam quod ejus materiam pure passivam, ab universali quodam movente & principio, quod animam mundi dixerunt, moveri, actuari & vivificari debere, ex mente PLATONIS, (qui teste PORPHYRIO, omnibus mundi partibus per partes mundi diffusis, animam conciliavit,) perhibuerint. Licet enim per animam mundi divinam quandam vim & potentiam denotare videantur; eandem tamen tam intime immiscent & alligant materiæ, ut revera nihil aliud innuant, quam naturam esse Deum, & Deum naturam, quemadmodum id SEXTUS EMPIRICUS & SENECA apertissime & expresse profitentur.

§. VI. Ex hisce Stoicorum placitis, nec non doctrina CARTESII, qui itidem materiam universi mere passivam esse asserbat, infelicissimo sane fidere prodierunt nefariæ illæ & execrabiles SPINOZÆ opiniones. Is easdem cum Stoicis in eo quidem inflavit tibus, quod omnia quæ fiunt & eveniunt in universo ex certa & concatenata causarum & effectuum serie & ordine derivaret, quia vero hanc causarum seriem actu infinitam asserbat, eamque pro una & absolute necessaria substantia venditabat, cujus partes & modi omnis generis res in universo sint: dilucide utique patescit, illum universum & ordinem in eo pro ipso Deo habuisse, & cuncta tam præsentia, quam præterita & futura, indeclinabili fatalis necessitatis jugo subjecisse. Qua perversa & vere pestilenti sententia, cum Dei existentia & providentia negatur, tum etiam omnis religio, cultus, preces, exhortationes & consilia uno quasi ictu concidunt penitusque exspirant: ut taceamus & miraculorum existentiam, & sacrarum litterarum veritatem eadem abrogari & tolli. Quum vero profanæ hujusmodi opiniones nostro ævo pro dolor! adeo invaluerint, ut eruditissimorum etiam virorum animis, qui nonnisi theologiam naturalem & moralem admit-

tunt, alius infixæ sint, nemo utique nobis vitio verteret, si nefariam SPINOZÆ sententiam & reliqua ex Stoicorum placitis, quæ veritatem subruere videntur, solido argumentorum robore convellere atque destruere conaremur: sed quoniam illud à præstantissimis viris factum esse novimus, in prolatis jam ab ipsis momenti recensendis non erimus longiores, sufficiet si unicum tantum h.l. adducemus & urgebimus. Nimirum abominandi hujus erroris origo in contingentis & necessarii termino inquirenda est; quorum vocabulorum claritas significatio & proprietas proinde erit evolenda. Necessarium itaque dicimus illud, quod non aliter sese habet, vel habere potest, sive quod immutari plane à nemine potest, cujus oppositum est impossibile, quo spectant omnes veritates geometricæ, arithmeticæ, morales & metaphysicæ, ut: totum majus est sua parte, causa prior est effectu &c. Contingens vero illud appellamus, quod aliter se habere & mutationem pati potest; cujus generis sunt omnia quæ à mente, ingenio & voluntate libera dependent, res nempe artificiales & alia in potestate hominum sita v. g. mensa rotunda potest etiam esse quadrata, & id genus plura.

§. VII. Quando itaque oritur quæstio: utrum universum ad entia absolute necessaria, an ad contingentia pertineat? facile constare arbitror, illud ipsum neutiquam ens absolute necessarium, quod à se est, & nullam, nec causam nec mutationem, admittit, esse; sed potius inter contingentia referri debere, eo quod ejus partium structura, ordo & dispositio etiam alio modo possibilis est. Ex quo hoc universum extra se aliam adhuc habere causam, quare hoc, non alio modo, sit constructum, conficitur, & divini Numinis existentia adversus Atheos, qui cœlesti doctrinæ præfractæ adversantur, validissime asseritur firmissimeque stabilitur. Solus enim Deus est ens illud absolute necessarium, à se existens, liberrimum, infinita sapientia, potentia & bonitate præditum, cujus nusquam circumscripta actio ex eo clarissime innotescit, quod ex pluribus, in intellectu suo possibilibus, mundis, præsentem hunc liberrime extra se in conspectum proferre & ad existentiam perducere decreverit. Præclare hanc in rem magnus nostri ævi Theologus CAMPEGIUS VITRINGA in *aphorism. doctr. Christ. p. 90.* scribit: *Voluntas Dei de nulla re statuere potest, nisi quæ intellectui ejus obversatur ut possibilis & voluntatis imperio subjecta.* Et alibi: *per decretum Dei intelligimus independentem divinæ voluntatis actum, quo res quasdam, quæ intellectui ipsius possibles obversabantur, ad futuram existentiam determinavit.* Infinita hæc Summi Numinis potentia ex immensi hujus universi creatione, sive productione extra se reali, qua conspicua facta sunt quæ antea non erant perspicabilia, dilucide patescit: ineffabilis vero sapientia ex admiranda illa partium universi ad certos fines obtinendos ordine, structura & nexu manifesto elucescit: & immensa denique bonitas evidentissime colligitur ex rerum conditarum finibus, dum omnia quæ in iis deprehendimus bona, ad earundem perfectionem tendunt & unice collineant. Ex tribus his essentialibus divinis proprietatibus, omnipotentia nempe, sapientia & bonitate, reliqua Dei attributa, ut justitia, misericordia, providentia, omniscientia, immutabilitas & æterna veritas, haud difficili negotio deduci & derivari possunt; quæ utique omnis genuinæ Dei cognitionis omnisque divini cultus ac venerationis inconcussa sunt fundamenta.

§. IIX. Demonstrata hoc modo & stabilita Summi Numinis & existentia & essentia, utique facillimum erit, perditissimum SPINOZÆ errorem, de fatali necessitate, quam in ipso rerum & causarum independente, absolute necessario & actu infinito ordine, fundatam esse putavit, deprehendere; ita ut neminem

latere possit, ipsum hoc universum pro Deo habuisse. Neque etiam difficile erit Stoicorum de fato errores paulo apertius intueri & pervidere, utpote qui necessitatem eventuum in certo rerum & causarum ordine ac serie quæsierunt quidem, sed hunc ipsum cum Deo tanquam ejus causa confuderunt, nec hæc probe discreverunt. Nos autem exquisitori, meliori & saniori tam divini Numinis cognitione, quam rerum naturalium scientia, instructi, de fato, de causis eventuum, de necessitate fatali & id genus pluribus terminis, quibus barbari & quamplurimi Veterum Philosophi usi fuerunt, rectius omnino sentire, eosdemque sine veritatis injuria rationi congruenter explicare possumus.

§. IX. His præmissis, ingenue & aperte profiteamur, per fatum nihil aliud esse intelligendum: quam necessitatem, aut si mavis, certitudinem quandam eventuum & effectuum, qui fuerunt, sunt & erunt in universo, à certo rerum & causarum ordine, nexu ac serie dependentem; atque adeo cum in rebus physicis & medicis, tum etiam in moralibus, politicis, quin immo ipsa in Theologia, fatum, sano sensu acceptum, admitti posse existimamus. Etenim summus ille & æternus rerum opifex nihil absolute in hoc universo voluit vel fieri decrevit, sed ut omnia ex sapientissimo, ab ipso tamen libere dependente rerum & causarum ordine, serie ac nexu, eveniant, constituit, hanc potissimum ob causam, ut cum immensa sua potentia, infinita simul sapientia, in regendis ab ipso conditis, eluceret. Quare vulgo quidem, sed recte dicitur, voluntatem Dei in gubernandis rebus universi non absolutam esse, sed ordinatam, quum certe nihil in hoc universo efficiatur & producat, sine præcedentibus causis efficientibus, nec ulla rerum mutatio concipi possit sine causa, quæ hanc rebus infert, & omnis effectus secundum canonem metaphysicum necessitetur à sua causa, immo proportionatus sit ejusdem viribus; hinc qualis effectus, talis causa, & vice versa. Ex quo apparet, effectus, ex causarum suarum potentia & viribus, non modo certos, sed & necessarios esse; necessitate quidem, uti nemo non intelliget, non absoluta, sed sic dicta hypothetica, sive ad conditionem causæ relata.

§. X. Quum vero causæ necessariorum effectuum productrices, non sint unius ejusdemque, sed diversæ naturæ ac virtutis, utique secundum illarum diversitatem & conditionem, hi quoque considerandi erunt & æstimandi. Nimirum obvius est in hoc universo ordo quidam causarum libere agentium, cum inde profluentibus eventibus atque effectibus; occurrit vero etiam ejusmodi nexus causarum, quæ in se non aliter, quam quidem operantur, agere possunt, sed ex necessitate quadam insita, à Deo tamen dependente, suos edunt effectus. Hunc censum subeunt res naturales sive corporeæ, quarum essentia in vi & potentia motrice, nitente & renitente, in spatium diffusa, consistit, & qua constantes semper effectus, secundum certum & sapientissimum ordinem, à summo rerum opifice constitutum, quem Recentiores motuum leges appellant, proferunt. Antiquiores hunc causarum ordinem naturam salutarunt, quam PLATO per artem Dei in materia definiebat, & ab eodem, tanquam primo principio, omnes effectus in macrocosmo non minus, quam in microcosmo derivarunt; naturalis vero & experimentalis Philosophiæ nostro hoc ævo quamplurimi instauratores, eundem Mechanismi nomine insigniunt, quem, uti in artefactis & automatis, ita etiam in naturalibus, nonnisi in certa determinatione motuum, à sapienti rerum, ratione magnitudinis, figuræ, situs & connexionis variarum dispositione, structura & coordinatione consistere demonstrant.

§. XI. Proinde quum in universo sapientissime institutus rerum corporearum, activa vi motrice instructarum, ordo observetur & nexus; minime addubitare licet,

licet, certos, immo necessarios, inde promanare effectus, quorum necessitatem, si quis cum ARISTOTELE fatum physicum dicere velit, is certe non errabit. Neque vero tantum Philosophi, sed etiam Theologorum perspicaciores, ejusmodi nexum & causarum naturalium ordinem in universo agnoverunt, quos inter primo loco commemorandus supra laudatus VITRINGA qui l. c. hæc prodidit: *per mundum intelligimus complexum omnium corporum, elegantissimo constructum ordine, & secundum leges aequaliter motum.* Nec non p. 94. *Est sapientia divina plane admiranda, quod circa tot & tam varias, easque diversi generis, & contrarias sæpe, naturæ & ingenii res, suo, sic sit versatus decreto, ut vastum hoc opus Dei, quale est hujus mundi compages, omnibus suis partibus perfectum prodiderit, elegantissimo constructum ordine & in omni suo motu secundum accuratissimas & optimas leges compositum.* Acutissimo huic viro magni itidem nominis Theologus GURTLEUS in *Institut. theol.* p. 381. assurgit: omnes, inquit, *Dei actiones fiunt in mundo pulchro ordine, statuto tempore & tendunt ad finem præfixum.* Sed testimonium omni exceptione majus ipse LIBER SAPIENTIÆ perhibet, quo adstruitur, *Deum omnia secundum numerum, pondus & mensuram*, i. e. secundum causas & leges mechanicas, *disposuisse.* Quod si vero quisquam luculentissimum & evidentissimum sapientissimæ in rerum natura constitutum Mechanices exemplum exposceret, constantissimus ille siderum cursus & motus, cujus varia phænomena, calculo subducto, vel in mille annos prædici possunt, ipsi abunde satisfaciet; quo etiam Regius PSALTES permotus, Ps. CXLIIX. II. *Deum stellas conservare, & ita ordinare, ut non aliter ire possint*, asserit.

§. VII. Vastissima hæc solis, lunæ & reliquorum planetarum corpora, à nostro quem incolimus globo, perquam quidem remota sunt; nihilo minus tamen iisdem nexum quendam cum hoc intercedere, non est quod dubitemus: quum influxus eorum, sive operatio in sublunaria, illud ipsum luculentissime testetur. Nemine enim latet, fulgentissimum non solum & stupendæ operationis solarem globum, calido suo & lucido motu universo hominum, animantium & vegetabilium generi, vigorem, vitam, motum, calorem, nutritionem & foecunditatem largiri, eoque remoto marcescere quasi omnia atque emori: sed lunare etiam sidus pro vario ad tellurem positu, in fluxu & refluxu maris, in tempestatum ac ventorum suscitatione, in decremento vel augmento vegetantium, haud exiguas efficere mutationes. Quid æquinoctia, quid solstitia in alterandis humanis valeant corporibus, iis potissimum qui in artis medicæ exercitio versantur, innotescit, apud quos quotidianæ propemodum experientiae est, quod capitis & nervorum affectiones, ut plurimum his temporum articulis exacerbantur, contumaces vero & chronicæ febres mitigentur, vel plane desinant. Præterea atroces istæ, quæ mortales nonnunquam affligunt calamitates, fames nempe, pestis & gravissimi alii epidemici, hominibus vel brutis infesti morbi, itidem sine omni dubio à vario siderum cursu, situ & influxu, nec non à globi nostri terraquæi motu ac diversissimæ indolis & virtutis effluviis derivandi sunt. Inde enim anni tempora præternaturalem sortiuntur statum, inde ventorum, qui ingentem atmosphæræ inferunt turbationem, ex variis plagis resuscitatur flatus, à quibus postea acerrimum & diuturnum frigus, intensissimus æstus, continua imbrum copia, foecundæ multorum malorum matres, originem nanciscuntur. Ex his itaque cuiusvis abunde constare arbitror, dari admirandam quandam inter sidera, globum terraqueum ejusque inquilinos connexionem, & ex hac mirificos & incredibiles fere, necessario provenire effectus, quos Veteres, hujus rerum ordinis minus gnari, fatali necessitati tri-

buere non veriti sunt.

§. XIII. Sicut vero nullus effectus nec eventus in tota rerum natura sine certo rerum nexu, causarum ordine & motuum inter se communicatione ac propagatione contingit; ita certissimæ & indubiæ veritatis est, tum macrocosmo, tum etiam microcosmo omnibusque corporibus organicis, primum quoddam & principale inesse movens, quod omnia quasi actuet, regat & gubernet. Proinde uti fulgentissimum solis sidus in mundi machina, ceu suprema rota, omnes planetarum hujus globi vortices movet ac circumrotat, & vivido suo igne ac calore cunctis motum, vitam & vigorem inspirat: ita microcosmicum illud vitale cordis viscus, perpetuo illo quem exercet contractionis & dilatationis motu, universam fluidorum & sanguinis massam jugiter circumagit, corporisque partibus nutritionem, vigorem ac robur infundit. Nam res certe consideratione digna, quin penitus admiranda est, humani, immo omnium animantium corporum compagem, ex materia in foetidissimam putredinem quam maxime prona, coagmentatam, solo cordis motu, & ab illo pendente sanguinis in circulum abeunte progressu, à præsentanea hac vindicari corruptione, quæ penitus eodem extincto, presso protinus subsequitur pede. Hæc perennis cordis concussio, omnibus quoque universi corporis functionibus præest, nec sine ea anima in sensuum & motuum voluntariorum exercitio suas operationes exserere, neque ulla corporis pars officio suo perfungi valet: quare quiescente in syncope ad tempus cordis & arteriarum motu, omnis & cogitatio, & sensus, & ratio perit; refocillato autem eodem, è vestigio redit. His accedit, quod prodiens hic è cordis machina motus, saluberrimum secretionum & excretionum negotium, quo arcentur insalubria, eliminantur noxia & corpus à morbis validissime defenditur, sustineat, adeoque Veterum naturam medicatricem constituat, qua sponte sæpe, sine Medici ope, graves ægritudines sanescunt.

§. XIV. Hæc hæctenus eo animo atque consilio fusius paulo prolata sunt, ut non solum eo clarius pateret quomodo series, nexus & ordo causarum ac rerum, quem fatum veterum Philosophi appellarunt, distincte concipi & rationali modo explicari possit; sed etiam ut nobis viam panderemus, cui insistentes, de nonnullis rerum naturalium non adeo obviis effectibus, claras atque perspicuas causas reddere queamus. Quum itaque nihil familiarius tam vulgi, quam etiam quorundam eruditorum sermone usurpetur, quam fatalem moriendi necessitatem hominibus & animantibus incumbere, ex summi Numinis decreto, iis post lapsum impositam; primum meditationis nostræ argumentum erit id, de quo omnes fere Philosophorum & Medicorum libri silent, videlicet ut dispiciamus, in quo hujus divini decreti & inevitabilis moriendi necessitatis ratio sit posita. Hujus genuinam causam in *Medicinæ rationalis systematicæ T. I.* dilucide primus fere tradere allaboravi, eamque non tam in fluidarum, quam solidarum machinæ nostræ partium, fibrarum nempe & membranarum cum ætate crescente crassitie, duritie & compactiore textura, inquirendam esse ratus sum; quum licet homo temperatissime ad exquisitissimæ diætæ regulas & præscriptum vitæ rationem instituat, & ab omni animi commotione sibi perquam solite caveat, mortem tamen subire debeat. Quemadmodum enim indubia experientia constat, cartilagine progressu temporis transire in ossa, hæc procedente ætate majorem induere duritiem omniumque annosorum animantium carnes solidiores esse quam juniorum, & proinde diuturniori egere coctione; ita exinde facile apparet, minima vasa, quo crassiores & compactiores eorum evadunt tunicae, eo angustiora reddi & magis occludi, ita ut tandem penitus coalescant & nihil amplius fluidi transmittant. Jam vero ad animum revocandum

dum firmiterque tenendum est, vitalem corruptibilis nostri corporis durationem, non solum perenni & jugi sanguinis ac benignorum humorum ad minima partium affluxu obtineri, sed etiam inutilium atque impurorum per varii generis, ex minimis & capillaribus tubulis conflata emunctoria, excretionem sustentari: proinde si in extrema senectute cerebri, medullæ spinalis & nervorum canales minimi, quos tenuissimum & summe mobile, partibus vires & robur addens fluidum perluit, solidescent, virium languor, corporis debilitas & caloris nativi defectus, familiaria senibus mala, ingruunt; si vero tubulosa corporis excernicula, præsertim in hepatis viscere, nec non in vasculoso & porosos corporis cortice, cute nempe, coarctari & obturari incipiunt, impuriore, salinæ, limosæ & sulphureæ sordes remanent, & delibatissimi vitales succi, qui nutritioni serviunt ac vires reficiunt, collutulantur & inficiuntur: hinc corpus tabescit, partes emarcescunt & varii generis mala, ex impuritate humorum oriunda, infestant, donec sensim sensimque ad ipsam mortem aditus patetur. Quæ quum ita sint, ad producendam vitam vix alia suppetit ratio & via, quam si optabile ejusmodi excogitaretur remedium, cujus ope fibrarum mollities & tubulorum ac meatuum, ex quibus tota ferme corporis nostri compages coagmentata est, alveoli, aperti servarentur; quod tamen sub præsentis elementorum & alimentorum intemperie ac insalubri constitutione, ne quidem sperandum est.

§. XV. Eandem considerationem meretur vitæ humanæ constitutus terminus, quem quod alii tardius, alii citius, nonnulli morbis afflicti, quidam non ita, attingant, ex quam plurimorum sententia ad fatum ejusque indeclinabilem necessitatem refertur, quum tamen veræ & physicæ hujus effectus subsint causæ. Etenim sciendum est, longam & à crebris morborum insultibus liberam vitam à duabus potissimum causis proficisci, quarum altera apta vasorum & fibrarum ad solidorum & fluidorum motum dispositione ac structura continetur, altera vero in victus inquirenda est ratione. Prior maxime nativa est, à virtute parentum seminali acquisita, & consistit in eo, ut non solum systema fibrarum nec nimis tenerum, nec nimis crassum ac tensum, sed etiam ut vasa non nimis exilia & angusta, sed magis patula atque aperta sint: attenta enim observatione compertum est, corpora spongiosa, valde exilibus & copiosis vasis dotata, plurimis morbis subjecta & brevioris vitæ esse, contra vero ea, quæ canalibus amplioribus & fibris tensis ac paulo firmioribus prædita sunt, non ex facili in morbos incidere, facilius sanescere & longiorem vivere vitam. His accedit, quod indubiæ experientiae suffragio constet, parentes in vigore ætatis constitutos, sanos, robustos & pacato animo præditos, firmioris naturæ liberos progignere; seniores vero imbecilliores, & qui intemperantius vivunt, generare & animo & corpore debiliores, in morbos proclives & minus vivaces. Posteriores longioris, vel brevioris vitæ, nec non firmioris aut adversæ valetudinis rationem, victus & rerum sic dictarum nonnaturalium usus subministrat. *Aër enim & victus est*, ut præclare tradit HIPPOCRATES *de flatibus*, quo vivimus, quo vita & sanitas conservatur, & quo etiam agrotamus ac morimur. Hinc à longo jam tempore observatum, eos qui ad centum & ultra annos sani ætatem extenderunt, non tantum à parentibus integræ valetudinis & longævus genitos, sed etiam simplici victu & aère puro usos fuisse, animum tranquillum gessisse & debito labore ac motu corpus exercuisse; illos autem qui otiosam & somnolentam transegerunt vitam, coelo non adeo benigno fructi sunt, ac ignorantia aut prava consuetudine ducti, ordinis ad vitam & sanitatem tuendam parum curiosi fuerunt, plurimis patuisse morbis, nec diu vitam

protraxisse. Hæ sunt præcipuæ longævitatæ, præmaturæ mortis, morborum & sanitatis physicæ & naturales causæ; quas quum non eum attulerimus in finem, ut sententiæ, quam venerandi Theologi de termino vitæ, à summo Numine constituto, & proinde à nemine superando, foveant, oblectemur: id tamen nobis affirmare integrum erit, nihil Deum circa hominis, temporalem pariter, ac æternam salutem, sine sapiente causarum efficientium ordine, cujus ipse auctor est, & ejus ab homine libero observatione, statuisse vel decrevisse.

§. XVI. Accedimus jam ad considerationem annorum qui decretorii, malefici & ad vitam succidendam pollentes putantur, & proinde climacterici dicuntur. In his omnis vetustas majorem quandam vim inesse credidit, eamque partim ex Pythagoræorum mente, in occulta numeri septenarii efficacia inquisivit, partim exemplo Assyriorum, à stellarum fato deduxit. Utut autem horum annorum efficacia, ad morbos producendos & ingentem corporibus humanis inducendam mutationem, non penitus neganda sit; id tamen etiam in confesso est, communem hanc assertionem, justis non subnixam rationibus, saniori egerè explicatione. Nimirum summum Numen non solum mundani hujus operis, sed maxime etiam corporis humani naturam, mirabili artificio coagmentavit, ac singula suis numeris, mensura, pondere, ordine & harmonia vinxit ac colligavit, ut certo gradu, certo tempore, ad certum finem, in tota rerum corporearum œconomia operationes perficerentur. Proinde quemadmodum corporis nostri compages certum requirit tempus ut formetur, ut ad exitum ex utero disponatur & ad perfectionem perducatur; ita etiam ejusdem in interitum mutatio, certo temporis indiget intervallo. Quum enim nulla in rebus corporeis mutatio sine motu & certa motuum quantitate fiat & absolvatur; tempus vero nonnisi mensura & duratio motuum sit: facile sane patescit, notabiles mutationes certis sese exserere temporibus, non quod tempora & anni id efficiant, sed quia ad effectum certi & determinati motus desiderantur, qui tempus constituunt. Inprimis autem constantis observationis est, ita machinam nostram ejusque partes esse constructas, ut septenarius numerus iis sit veluti crisis, cum quo notabilem semper & illustrem, nonnunquam cum sanitatis periculo junctam, mutationem subeant: sic ter septima hebdomade foetus sese movet in utero, sexies septima paratus est ad exitum, septimo mense infans dentire incipit, septimo ætatis anno infantia clauditur & dentes decidunt, decimo quarto menstrua puellis veniunt, semenque in virilibus testibus generari incipit, vigesimo primo debitam corpus nanciscitur staturam, & reliqui anni tantum ad robur ejusdem acquirendum & animi perfectionem impetrandam inserviunt: donec converso itinere, iterum ad decrementum ruat, & septimo septenario mensium fluxus cum generandi potentia cesset, nono vero senectus incipiat, vires notabiliter labascant, corpus contabescat, memoria debilitetur, sensuum vigor pereat, ad capitales chronicos morbos, ex viscerum obstruktionem oriundos, dispositio fiat, & hac denique sensim incrementa capiente, ipsa mors ingruat. Quapropter quum decretorii hi, per septem consurgentes temporum articuli, vitam humanam quasi per gradus agant: neutiquam dubitandum est, contingere sub iisdem in partium solidarum structura, fluidorum motu omnibusque corporis nostri functionibus, notabilem mutationem; licet eadem in quibusdam nonnunquam præcedente, nonnunquam insequente anno, eveniat. Accedit, quod firma experientia constet, climactericas has ætatis nostræ periodos, interdum vitæ fatales esse, nec sine grandi periculo decurrere. Videlicet infantes septimus mensis in haud leve discri-

discrimen adducit ob dentium eruptionem, quæ eos non solum gravissimis doloribus excruciare, sed etiam ita interdum affligere solet, ut pereant; id quod etiam de decimo quarto tenendum, quo prorumpentes canini, longiores & acutiores dentes, lethalia non raro concitant symptomata; quin immo dimidio primi septenarii, intra tertium nempe & quartum annum, molares si exitum affectant, lentis sæpius febribus tabescunt. Septimo anno non solum ob carnis gingivalis laxitatem os foetet, dentes nigri & cariosi evadunt ac tandem excidunt, sed etiam lumbrici circa hoc tempus uberius gignuntur & gravius corpus infestant: decimus vero quartus foeminino sexui maxime est infestus, quo mensibus erumpentibus, lividi coloris fiunt, lassitudo cum lento calore corpus occupat & ciborum exoritur fastidium. Præterea uti anni, vigesimus primus ad trigessimum quintum, juvenibus multum periculi important ex hæmoptysi & phthisi; ita quadragesimus nonus tantam foeminarum corporibus inducit mutationem, ut plerumque mensium fluxus penitus subsistat & inde varia hysterica pathemata cum cachexia oboriantur. Ætate ingravescente, sexagesimo tertio nempe anno, sanguinis progressus per viscera abdominis tardus fit & segnis, eaque propter in sanguineis & sensibilibus metus est apoplexiæ, vel asthmatis convulsivi, in aliis cachexiæ, calculi renum, podagræ & colicæ spasmodicæ, quæ sexagesimo nono ætatis anno quamplurimos necant. Decrepita ætas mala maxime patitur circa vesicam, dum stranguria, urinæ stillicidium, mictus cruentus, vesicæ calculus & exulceratio vires atterit & valde consumit, quibus accedit facillima hisce annis ad sphacelum, tam internarum quam externarum partium, dispositio, quam subita tandem mors excipit.

§. XVII. Eiusdem momenti quoque est illa de diebus criticis sive decretoriis medico-practica in morbis acutis observatio, eo quod iidem mutationem quandam in pejus aut melius afferunt, & pari ratione septenario numero continentur, nisi quod nonæ etiam quamplurimorum deferatur. Proinde mirabilium illorum effectuum rationem nonnisi in certo & determinato motuum numero, qui tempus constituit, inquirendum esse censeo; quum utique in confesso sit, certum cordis & arteriarum pulsuum desiderari numerum, ut causæ, quæ morbum facit, malignitas attemperetur & ad excretionem præparetur, vel alia statim concipiens materia, discutiatur ac resolvatur.

§. XIX. Notissimum porro est quosdam morbos ut insaniam, apoplexiam, epilepsiam, podagram, phthisin, hydropem, renum & vesicæ calculum, malum hypochondriacum, motus convulsivos spasmodicos, hæmorrhoidales motus, nonnullis familiis solennes, familiares & quasi fatales esse, quorum ratio plerumque quidem ex dispositione hæreditaria arcessitur, sed in quonam hæc ipsa consistat, id sane quamplurimos latet. Nolumus autem hic ideales animæ formatricis vires, tanquam causam admodum remotam adducere, sed sufficere poterit, si indicaverimus, ægritudines, quæ à parentibus in liberos transferuntur, in vitiata partium solidarum structura, quæ congruis & vitalibus motibus producendis ac continuandis minime idonea sit, fundatas esse & radicata. Læsa enim hujus vel illius visceris structura, ita ut vel nimia vasorum angustia fibrarumque laxitate, vel earundem nimia strictura & tensitate delinquat, certis ætatibus, quarum quævis ad morbos certos inclinatur, perquam facile stases & stagnationes, graviorum morborum foecundæ productrices, exoriuntur.

§. XIX. Hactenus in hoc fuimus occupati ut monstrarem complures insolitos & mirabiles in natura effectus, fati vocabulo, tanquam causæ, inaniter & pane superstitiose tribui, quorum genuinæ, adæquatæ & efficientes causæ indagari tamen possent & sup-

peditari: quum vero ad certum producendum effectum non una tantum & proxima causa, solentiori rerum physicarum scrutatori considerata, sed ulterius progrediendum sit & inquirendum, unde hæc oriatur, quæ hujus causæ causa, quænam huic originem præbeat adeoque gradatim quasi à causa ad causam ascendendum; rectius utique sensisse videntur cum ARISTOTELE Stoici, qui fatum per seriem & nexum causarum definiverunt, licet in eo acquieverint, neque ulterius naturalis effectus nexum & catenam causarum indagarint & exposuerint, & proinde ipsa hæc fati definitio nil nisi petitionem principii sapiat. Quod si enim quæstio incidat: à quibus causis hic vel ille in rerum natura effectus dependeat? reponunt à fato; si ulterius quæsieris: quid sit fatum? respondebunt: concatenatam causarum seriem, idem per idem hac ratione explicantes, haud secus ac Medicorum dialectici & metaphysici, qui, si quando interrogantur: quænam sit causa mirabilium motuum & functionum corporis nostri? dicunt: esse naturam; cujus si postulatur definitio, hanc tradunt: quod sit principium motus & quietis, & nil nisi verba loco rerum & causarum magno apparatu obtrudunt.

§. XX. Quum itaque, ut superius jam jam monuimus, nullus qui in rebus physicis observatur effectus, sine proportionato causarum nexu perficiatur & absolvatur, eo quod omnia in universo corpora, non secus ac in horologio partes, connexa sunt; è re utique erit & nostro instituto quam maxime accommodatum, ut dilucide tradamus hanc causarum seriem, eandemque ut à quovis intelligi & concipi possit, planius exponamus. Res vero tota clarior & illustrior dato apparebit exemplo, quod ex pathologicis desumemus. In febre biliosa ardente adest intensissimus, corpus & vires consumens calor, sitis inexhausta, anxietas, inquietudo, agrypnia & mentis error, cum alvo constricta ac tensa, & urina rubicunda & crassa. Quod si igitur præternaturalis hujus status & gravissimæ læsionis functionum causam quis scrutari velit, vix aliam, quæ proxime hæc symptomata producat, subesse deprehendet, quam circularem sanguinis & humorum motum intensiorem redditum & velociorem. Hoc enim præter modum aucto, non solum partes sulphureæ sæpius ac vehementius alliduntur & atteruntur, ut ingens exoriatur calor, qui humidum elementum, quo nutritio & robur sustinetur, consumit, & texturam partium sanguinis dissolvens, vires dejicit, sed etiam phantasia ob citatiorem per cerebri vasa transitum, turbatur & agrypnia producitur. Si ulterius quæstio movetur: unde velocior hic progressus ortum ducat? respondendum est: id fieri à celeriori arteriarum pulsu & vehementiori cordis motu; cujus causam si quis etiam exposcat, certe non alia suggerenda erit, quam spastica quædam contractio universi fibrosi & vasculosi machinæ nostræ systematis, quæ sub initium febris per horripilationem & rigorem, cutim aridam & contractam alvumque tensam sese exferens, cor cum arteriis validius constringit, & fortiores ac celeriores sanguinis, per angustiora vasa magis attritum & calidum, concitat motum. At si in hujus causæ scrutinio quis non subsistere velit, & spasticæ stricturæ scaturiginem percontetur, tunc certe ad motus & sensus in corpore fontem est ablegandus, cerebrum nempe & spinalem medullam una cum membranaceis suis involucris, quibus præter naturam affectis & idemtidem vehementius constrictis, tenuissimi, in celerrimo motu existentis fluidi, quo motum, sensum, robur & tonum fieri patet, in omnes partes fit effusio. Ex hoc alia emergit quæstio: unde in nervosis partibus oriatur strictura? sic diluenda: bilem nempe acriorem corruptam, primis in viis stagnantem, ad massam sanguinis, nec non cerebri ac spinalis medullæ membranas delatam, morbosam hanc suscitare

fuscitare commotionem; quæ peccans biliosa materia quum causa quoque non careat, accusanda utique erit tum transpiratio læsa & alvus clausa, tum ingesta incongrua esculenta & potulenta, præsertim si cum iis aer corrosivæ indolis simul deglutiatur. Porro sufflaminatæ perspirationis causa à valde frigido & humido aëre deducenda, hic vero à ventorum borealium flatu, quorum magna vis est transpirationem cohibendi, præsertim tempore æstivo, sole occiduo. Neque ventorum flatus sua destitutus est origine, cujus si iterum innotuerit causa, aliam procul dubio habebit productricem. Manifesto sane hoc exemplo convincimur, certum quendam & insolitum effectum, non ab una, sed innumerabili fere causarum serie dependere, ita prorsus, ut prior agens, necessarium suum producat effectum, qui quum nonnisi certi motus species sit, rursus agit, & fit causa alterius effectus, hic iterum vicem causæ sustinens, novi effectus origo est, & ita porro; quæ tamen indefinita causarum atque effectuum series, eo usque tantum progreditur, donec ad unum & per se necessarium ac independens principium perveniamus.

§. XXI. Egimus hæcenus de eventibus in universo naturalibus, qui ex immutabili necessitate, à causis physico-mechanicis, corporum nempe mole, figura, situ & motu dependent, quæ ex necessitate quadam insita, non aliter quam quidem operantur, agere possunt, & à Veteribus ad fatum relati sunt: etenim si Stoicorum saniorum scripta perlustramus, advertimus, illos physicos effectus, qui à rerum corporearum natura & motu pendent & immutabiles sunt, *κατὰ φύσιν* ad fatum revocasse, sive fati nomine insignivisse, notante id maxime A. GELLIO in *noct. Attic. Lib. XIII. cap. I.* reliquos vero malos fortunatos eventus, ad quos liberum hominis arbitrium concurrat, contingentes & fortuitos vocasse, illosque fortunæ, vel secundæ vel adversæ, quam ceu idolum venerati sunt, imputasse, quos hinc præter naturam & fatum contingere ipse CICERO memorat in *primo Antonianarum*. Jam itaque de ejusmodi malis sermonem instituemus, ad quorum proventum hominis voluntas potissimum confert momentum, & proinde haud immerito ad fatum physico-morale, si ita loqui licet, vel rectius, ad feriem causarum physicarum, cum moralibus junctarum, referuntur. Nimirum si quisquam sibi ipsi vel alteri violentas manus inferens, mortiferum vulnus infligat, & cordis ventriculos ac vasa sanguifera ampliora perfodiat, aut fundamentum nervorum in medulla oblongata & spinali graviter lædat: tunc utique fatalis & absolutæ necessitatis mors subsequitur, quæ non ingentem causarum physicarum exposcit seriem, sed in depravata & ad malam actionem determinata hominis voluntate fundamentum suum habet. Pari ratione si venenum corrosivum sufficiente mole propinatur, enormes ac plane horribiles spasmi oboriuntur, qui in nervosa ventriculi & intestinorum membranacea substantia initium sumentes, & universum partium systema sensim occupantes; totam motuum vitalium œconomiam subvertunt, & nisi cito præsentaneum offeratur antidotum, destruunt penitusque extinguunt. Præterea quot mala & ægitudines homines partim ignorantia, partim voluptatum illecebris ducti, per incongruum vitæ regimen & rerum minus salubrium usum sibi contrahunt? Vehementes animi commotiones, si recte calculum exigimus, quartam mortalium partem abripiunt iisque fatalem horam accersunt. Denique, turpe quidem dictum, sed verissimum est, Medicos, non quidem re, sed nomine tales, idiotas nempe, inter fatales mortis causas esse recensendos, quum haud è longinquo conquirenda sint exempla, quæ abunde fidem faciunt, multos sane ex imperitia eorum, qui vitæ & sanitatis custodes esse volunt, ante præ-

stitutum tempus fato cedere, qui tamen, peritioribus inter initia morbi in consilium adhibitis, servari & ad sanitatem reduci potuissent.

§. XXII. Quum itaque ex his quæ adduximus luculenter non possit non constare, ad hæc physico-moralia, sive mixta fata, plurimum utique hominis conferre voluntatem principemque eorundem esse causam: pretium certe erit operæ, ut pervestigatius paulo inquiramus, quomodo hæc ipsa ad fatales & immutabiles rerum humanarum eventus concurrat, quo exinde eo clarius innotescat, fati pure physici, & physici-moralis, respectu ordinis causarum, differentia. Videlicet omnes physicae sive corporeæ causæ ex necessitate quadam operantur, neque aliter, quam insita iis vis motrix vel natura fert, agere possunt, sed edunt effectus viribus causæ proportionatos; longe alia vero substantiarum incorporearum, spirituum & mentis humanæ est ratio, quippe quæ non ex necessitate operantur, neque ab ulla causa externa ad operandum coguntur, sive necessitantur, sed immediate ex se & libera sua natura agunt, ipsisque agere & non agere, vel hoc vel alio modo actiones exercere, concessum est: in qua libertate omnino mentis humanæ perfectio, nobilitas & præstantia præ rebus corporeis consistit, adeo ut hæc libertas sit quasi domina, ratio vero & intellectus tantum ministri & consilarii vices sustineant. Utut vero mens in se & sua natura ens liberum sit; attamen si se constanter ad actionem quandam determinat, tunc utique causa fit certi cujusdam, immo respectu virtutis activæ, quæ in causa continetur, necessarii effectus: neque ob id libertatem suam amittit, sed eandem tam ante, quam post operationem, retinet. Hinc recte non solum moralis philosophiæ doctores hanc inculcare solent regulam: quod prius erat voluntatis & libertatis, id ex post facto fit necessitatis; sed etiam omnia ea, quæ à mente humana ejusque libero arbitrio facta, sive bona, sive mala, proveniunt, illi, in cujus potestate hæc vel illa actio posita erat, imputantur, & bene acta præmiis compensantur, male vero acta poenis coercentur.

§. XXIII. Ex hoc ardua jam emergit quæstio: unde voluntas humana, in se indifferens & libera, determinationem & impulsu ad agendum accipiat? cui ut satisfaciamus hanc nostram proximis sententiam, asserentes: nec liberas hominum actiones ordine morali, quem nos Moralismum, ad differentiam Mechanismi in rebus corporeis, appellare solemus, à quo pendent, esse destitutas, qui tamen non in causis efficientibus, cogentibus & necessitatem imponentibus, sed potius in suadentibus, impulsivis & flectentibus, sive motivis, consistit. Argumenta vero, sive motiva, quæ ad voluntatis determinationem, ut causa evadat, faciunt, duplicis sunt generis: nimirum vel ex motu liquidi nervei & objectis sensualibus, adeoque phantasiæ fonte, proveniunt, vel etiam ex sana & multis doctrinarum veritatibus instructa, aut virtute verbi divini collustrata ratione, proficiscuntur. Illa tantum vitiosis cupiditatibus voluntatem incendunt & ad voluptates inclinant; hæc vero eandem ad verum bonum amplectendum disponunt, & hunc censum subeunt proprie deliberationes, meditationes, promissiones divinæ, sapientum consilia, monita & dehortationes, quibus verum & reale bonum demonstratur & ad imitationem proponitur, quo omnia & christianæ doctrinæ, & philosophiæ moralis præcepta collineant. Proinde in libera voluntatis potestate repositum est, utrum phantasiæ, quæ plurimorum vitiorum & malorum genitrix est, illecebris, an sanæ & rectæ rationis dictamini, quo virtutis moralis natura continetur, obtemperare velit.

§. XXIV. Ex dictis atque & adductis perquam clare constare arbitror, insignem inter fatum mere physicum,

cum, & physico-morale, intercedere differentiam: quum in illo innumerabilis propemodum causarum ordo deprehendatur, quarum operatio in potestate hominis sita non sit, ut eandem mutare vel impedire possit; hoc vero proxime quidem à causa physica dependeat, ita tamen ut eadem ab operatione entis liberi, à quo non ulterior fieri possit progressio, & cui libera concessa sit potestas in hunc vel illum effectum influere vel non, proveniat. Sed quid dicendum videtur de eorum dogmatibus, qui voluntati humanæ, in se liberæ, facultatem & influxum in res corporeas ipsumque hominis corpus penitus adimunt; eo quod mentis ceu spiritus in corpora actio ratione nec concipi possit nec intelligi, ac ingeniose proinde commentantur: divinum & præpotens Numen voluntatis humanæ actus ab æterno prævidisse & ineffabili prorsus sapientia, non solum causarum naturalium in universo ordinem, sed etiam corporis humani mechanismum, sive motuum in eo œconomiam, ita instruxisse, certamque harmoniam inter actus voluntatis & motus membrorum præstabilivisse, ut artuum motiones, ad finem quem voluntas intendit accommodatæ, iusto loco & debito tempore proveniant, quæ, etiamsi nullum mentis adesset arbitrium, eodem tamen ordine, loco, tempore eademque serie essent eventuræ. At vero pace illustri Auctoris & eorum qui presse ejus vestigia legunt, veritatis amore, non affectu quodam ductus, ingenue profiteor, hanc præstabilitam harmoniam eodem, si non meliori jure quam fatum, terminorum ignorantia catalogo esse inferendam, & tantum abesse, ut supposita hac harmonia, commercium animæ cum corpore explanate tradatur, ut potius eadem hujus nexus ignorantia revera nonnisi ingeniose tegatur & speciose incrustetur. Quum enim termini ignorantia, nostra quidem superius proposita sententia, nihil aliud sint quam speciosa nomina, quæ loco rerum & causarum efficientium allata, nullum realem & possibilem causalem conceptum involvunt, sed idem per idem explicant; id autem in quæstionem veniat: quomodo ad nutum voluntatis hi vel illi artus moveantur? sive, quod idem est, quare motus membrorum voluntatis actibus respondeant? facile sane patescit, idem per idem resolvi, si quis responderit, causam hujus consensus esse harmoniam, inter motiones artuum & voluntatis actum ab æterno præstabilitam. Præterea notissimum est, motus, qui in manibus, pedibus aliisque corporis nostri membris contingunt, ab influxu liquidum nervi in musculosam eorundem substantiam potissimum dependere, & tenuissimum hoc cerebri ac nervorum fluidum à sanguine, hunc vero ab aëre & ingestis suam mutuari originem; quod si itaque hoc fluidum ad mentis arbitrium linguam, hunc vel illum digitum, ut motum iis largiatur ingredi debet, cur ad has nec alias partes tendat, quædam utique suberit causa, quæ tamen nec in sanguine, nec in externis quibus vivimus rebus quæri & inveniri poterit. Et quum hic artuum motus secundum unius voluntatis variationem, ne dicam mille hominum, vel centies una tantum hora immutari possit; profecto nec sagacissimus perspicere & concipere valet, quæ ratione à solo nexu & ordine causarum physicarum, tam notabilis mutatio in corpore humano contingere queat: adeoque hæc harmonia præstabilita nullo modo, nec concipi, nec demonstrari, nec explicari potest. Neque causalem animæ in corpus influxum hanc ob rationem in dubium vocandum esse censemus, quod modus quo fiat ratione capi nequeat, quum neque ullius substantiæ in aliam, neque unius corporis in aliud actionem, nisi experientia edocti, percipere & intelligere possimus; quin potius firmissime persuasum habemus, apprime hoc loco applicari axioma metaphysicum: quo posito, ponitur statim & semper effectus, & quo remoto, statim & semper remo-

Frid. Hoffmanni Oper. Tom. V.

vetur effectus, id recte causa dici meretur. Denique nec similitudo illa, qua perspicuum hujus harmoniæ conceptum tradere laborant, quod nimirum duo horologia, ita ab artifice construi & effabricari possint, ut exactissime in determinando temporis momento, sine ullius in alterum influxu, conveniant, huic considerationi accommodata & congrua esse videtur, eo quod hac ipsa saltem inter res corporeas distinctas congruentia, non vero inter corporeas & morales, adstruatur & illustretur. Tacemus jam quamplurimas male sanas consequentias, in moralibus, politicis & physico-medicis eliciendas, si liberis entibus quisquam influxum causalem in corpus humanum plane abdicere velit. Sed nostri instituti jam non fert ratio, ut hæc pluribus excutiamus, id duntaxat addimus & profitemur, voluntatem humanam à Deo non otiosam & inertem, sed efficacem utique & potentem esse conditam, ut imperium quoddam haberet in certa corporis membra, & per hæc in alia quoque corpora operari possit. Neutiquam tamen hanc nostram assertionem ad sinistram quendam sensum detorqueri volumus, sed potius id firmiter tenendum esse inculcamus, voluntati mentis humanæ in dirigendis partium motibus, nec datum nec concessum esse, pro lubitu & arbitrio cordis, arteriarum, aliorumque secretionibus & excretionibus dicatorum tubulorum motum regere, minuere, vel augere, sed eandem hoc suum imperium in externis tantummodo exercere artibus, ut exsequi possit ea, ad quæ sese determinavit: ineffabilis enim Dei sapientia voluit, ut vita, sanitas, mors, morbi eorumque sanationes, non pure à mentis nostræ arbitrio penderent, sed à causis mere physico-mechanicis, quarum ipse auctor, præses ac rector est.

§. XXV. Quemadmodum vero voluntas humana, multorum malorum, miseriarum & calamitatum, prout ab imprudentia & à pravo regitur affectu, causa & fons est; ita etiam plurima bona, successus rerum prosperi ac fortunati, ab eadem, si prudentia, consilium & sana ratio eam gubernant, proficiuntur. Gentilium, qui vera Dei cognitione & causarum exquisitiori notitia destituti erant, omnium & faustorum & infaustorum quæ cuique & aliis eveniebant, causam ac fontem fortunam esse, communis & insita erat opinio: in cujus tamen significatione mirum variabant, dum alii pro Dea rerumque felicium & infeliciū rectrice eam habebant, contra alii eandem ut mulierem pingebant, quo ex hac pictura nihil aliud quam ignorantiam & inconstantiam illam esse constaret; quin immo ARISTOTELES eam sine oculis, sine judicio & sine prudentia esse asserbat. Hinc EURIPIDES *apud* ATHENAGORAM in apologia conqueritur:

*Sæpe mihi subivit cura
Animum, dubitavi anxie
Deus an Fortuna regat
Hominum inconstantem vitam,
In qua & opinato sapius
Et inique miseri sunt quidam,
In familiis etiam claris,
Aliqui, quod nemo sperasset,
Absque Deo fortunati.*

Verum enim vero nos etiam hanc ipsam fortunam, quam Veteres pro idolo habuerunt, ad Fauni, ut cum GELLIO loquar, & ignorantia asyla relegamus. Nam sicut nihil quod sit in hac rerum universitate, sine causa sufficiente & adæquata perficitur: ita etiam prospera & adversa quæ cuique accidunt, causis certis & quæ effectibus congruunt continentur, quæ tamen cognosci, intelligi & explicari debent. Nos itaque felicitatis & salutis humanæ, quatenus ab homine proficiuntur, causam esse judicamus prudentiam atque sanam

& rectam rationem, disponendi res per congrua media ad certum finem; & vicissim imprudentiam & depravatum affectum pro fonte & scaturigine infelicitatis & miseriae humanae agnoscimus, unde vetus est paroemia: quemlibet esse fortunae suae fabrum. Spectat vero huc maxime illud JUVENALIS:

Nullum Numen abest, si sit prudentia rebus:

& OVIDII de Pont. IV.

Crede mihi miseros prudentia prima relinquit,

Et sensus cum re consiliumque perit.

Eandem quoque in rem egregie faciunt hæc LIVII: *ubi omnia summa ratione & consilio acta fuerunt, fortuna etiam sequitur.* Et SALLUSTII verba in Catilin. *Vigilando, agendo, bene consulendo, prospere omnia cedunt.*

§. XXVI. Quod si enim curatius perpendimus, unde rerumpublicarum & multarum provinciarum prosperissimus status & integra salus dependeat, certe historiarum monumentis docemur, à Principe justo, prudente, bono & potente, qui publicas res gerit, eam esse arcessendam. Ad victoriam in bello reportandam summa prudentia imperatoris opus est: & si quis in oeconomia secundos exoptat successus, is utique harum rerum peritia & prudentia esse debet instructus. Pari ratione ut prospere & feliciter Medicorum in sanandis ægris labor succedat, non cæca fortuna, sed Medici prudentia opus est, quæ in eo consistit, ut ægotantis non minus, quam morbi naturam ac indolem, secundum omnium circumstantiarum rationes, paulo pervestigatius scrutetur, certas remediorum vires sciat & secundum leges ac regulas ea opportuno tempore, congrua dosi & debito ordine præscribat, ad causas, tanquam omnium symptomatum productrices, subigendas penitusque eradicandas. Communis quidem, sed pessima ac vana non modo vulgi, sed & hæud indoctorum opinio est, ad sanandos morbos, præter peritiam, etiam fortunam in Medico requiri, quæ ducti, eos solent eligere, qui pro felicioribus superstitione æstimentur & à magnatibus in consilium adhibentur. Neque fabula hæc, quod unus Medicus præ aliis magis fortunatus sit, nostro demum ævo, sed à primis jam temporibus sub ipsis artis incunabulis acta deprehenditur, ita ut primum & optimum artis salutaris parentem, HIPPOCRATEM lib. de loc. §. 58. contra hoc ruditatis tegmen strenue pugnasse, & fortunam Medici, nil nisi ejus peritiam esse, docuisse, constet. Meretur sane eximius hic de fortuna Medici locus, qui totus transcribatur; ita vero habet: *Qui recte medicinam novit, minime fortunam respicit aut expectat, sed & citra fortunam, & cum fortuna, recte faciet. Nam fortuna sui juris est, nec ullius imperio subest, neque optantis est ad ipsam pervenire; scientia vero imperata facere cogitur, & facile est ipsam assequi, si quis sciens uti velit. Deinde quid opus est medicinae fortuna? si enim morborum medicamenta clara sunt & manifesta, velut equidem arbitror, non expectant sane fortunam ad sanandos morbos, siquidem sunt medicamenta. Si vero cum fortuna ipsa exhibere potest, non magis medicamenta, quam ea quæ non sunt medicamenta, una cum fortuna exhibita, sanos faciunt. Quicumque vero fortunam ex medicina aut alia quapiam arte expellit, dicitque eos, qui probe rem aliquam sciunt, fortuna non uti, is contrarium mihi judicare videtur. Mihi enim soli hi fortunate assequi videntur, qui recte quid & male facere sciunt. Fortunate enim assequi, est recte facere; hoc autem qui sciunt, faciunt: non assequi autem, hoc est, si quis non sciat, hæc non recte faciet. Indoctus autem qui est, quomodo is fortunate assequi possit? si quid enim etiam assequitur, non memorabilem sane successum habebit. Qui enim non recte quid facit, non fortunate assequi poterit, quum reliqua, quæ æquum est facere, non faciat.*

§. XXVII. Neque vero negandum est præter pru-

dentiam & peritiam, non tam ad fortunam Medici in medendo, quam potius ad bonam existimationem & sui confidentiam comparandam, multum adhuc alia conferre, divina nimirum hæc omnia adgubernante providentia. Videlicet si in consilium vocatur ab iis qui multum auctoritate valent penes populum, si morbos non adeo malæ indolis epidemice grassantes v. c. intermittentes febres, catarrhales, variolas, morbillos, curandos nanciscitur, si ægris minus refractariis & præceptis exacte obtemperantibus medicinam facit, si forsan declinante morbo & superato jam periculo accitus, remedia propinat, & quod maximum est, si offendit naturas non adeo debiles, nec viribus exhausta corpora & minus integra viscera, sed talia, quæ gaudent firma & robusta natura. Quo fit, ut sæpe plures Medici non adeo periti insignem nominis & famæ celebritatem consequantur, adeoque fortunati evadant; alii vero, quamvis peritissimi, ejusmodi temporis aliarumque circumstantiarum, licet fortuitarum, opportunitate destituti, frequentissime à plebeiis non minus, quam etiam à viris sæpe præcipuis, ad judicandum tamen de Medici peritia ineptis, imperitioribus & hoc modo fortunatioribus postponantur. Etenim ad res fortunæ obtinendas non sola hominis providentia sufficit, sed multorum benevolentia opus est; & quicumque ea destituuntur, quanquam non careant rerum suarum peritia, minus tamen felices perpetuo ratione eventuum sunt.

§. XXVIII. Consideratis jam ea qua par fuit brevitate & perspicuitate, factis & effectibus qui in universo contingunt, nec non qua ratione iidem à causis suis dependeant, generentur ac producantur; reliquum est, ut paucis adhuc indicemus: an hæc causæ earundemque ordines ex se & à se subsistentiam habeant, vel an potius causam primam auctorem & directorem agnoscant? SPINOZA & ante eum abortivæ philosophiæ infausi parentes, fatuum fatum parturientes, hunc rerum & causarum nexum absolute necessarium & immutabilem esse putabant: saniores vero Philosophorum & imprimis Theologorum, eundem immutari posse, nec absolutæ necessitatis esse asserunt, quo potissimum providentiæ divinæ fundamentum continetur, eaque propter nos etiam, prout superius docuimus, fati & fatalis necessitatis terminos ita explicandos esse censemus, ut dicamus: omnia quæ fiunt & eveniunt in universo, in physicis, moralibus, politicis, immo certo respectu in theologicis, à certis & adæquatis causis dependere, quarum effectus sit immutabilis, licet illæ superioris directioni pareant. Hanc Summi Numinis providentiam Stoici quidem non negarunt, se eandem fato, sive causarum secundarum ordini, tam firmiter alligarunt, ut amplius ne ullam quidem in hoc causarum nexu à Deo fieri mutationem asseveraverint: quo factum est, ut precibus nihil plane tribuerent efficaciam; quemadmodum id pluribus patet ex MAXIMI TYRII dissertat. philosoph. p. m. 307. sqq. Etenim dicebant: quæ precamur aut ad providentiam Dei, aut ad fati necessitatem, aut ad cursum fortunæ referenda sunt; sed ad hæc omnia prece non est opus. Si enim Dei est providentia, ea optime scit citra preces, quæ nobis prosunt vel nocent, quia nos ipsi curæ sumus. Et ridiculæ sunt preces in fato; facilius enim flexeris tyrannum quam fatum, quod non superiorem agnoscit, nec flecti potest. Neque in rebus quæ à fortuna fiunt aliquid petendum est, quia fortuna est improvida, insana, sine ratione.

§. XXIX. Quum itaque ex perverso hoc & præposterio de providentia divina, fato, & fortuna sensu ac conceptu, tam perniciofa & execranda in verum Dei cultum redundarint consecraria; omni profecto cautione opus est, ne in nostram, quam auctore Christo suscepimus religionem, ullo modo injurii simus, & talis potius de Summi Numinis rerum omnium direc-

atione interponenda est sententia, quæ attributis divinis, sacris litteris & rectæ rationi conveniens sit & quam maxime accommodata. Potissimum itaque providentiæ divinæ momentum hoc esse asserimus: quod Deus non solum hos diversarum rerum ordines condiderit & illorum existentiam ac operationem sustineat & conservet; sed etiam eosdem ad infinitam suam majestatem, immensam sapientiam, summam bonitatem & nusquam circumscriptam potentiam demonstrandam, pro beneplacito suo nonnunquam immutavit & adhuc mutare, vires & causas eorum augere, suspendere & ad alium scopum dirigere valeat, adeoque extraordinarios & miraculosos effectus producat. Huic de miraculis sententiæ nonnulli objiciunt: facta hoc modo in causarum nexu insolita mutatione, ipsum hoc miraculum novo quodam esse abolendum, quo omnia in pristinum reducantur; porro, rebus omnibus corporeis tam arcte inter se connexis, non posse aliter fieri, quam ut aucta, suspensa vel impedita ordinaria causarum virtute, in vicinis & remotis partibus ingens quoque oboriatur mutatio: verum exigui admodum valoris & momenti hæc esse nemo non perspicit. Mutata enim à Christo in vinum aqua, & inductis aquæ partibus simili nexu, structura, figura & magnitudine, quam interiores vini partes obtinent, quid inde mutationis in vicinis aliis vel remotis partibus contigerit, ut opus fuerit ejus per novum miraculum abolitione, ego quidem nec capio nec intelligo? Pari ratione nullo modo demonstrari poterit, quicquam in omnibus aliis & contiguis & remotis partibus immutatum fuisse, quum hic ipse sacratissimus noster Salvator leprosum sanaret & valde glutinosi tenacibus humoribus, quibus obstructa erant emuntoria, ut teterrimæ & corporis structuræ valde inimicæ sordes remanerent, præpotenti sua virtute fluiditatem & motum conciliaret. Notissimum est Chymicos præstantissima sua arte tantopere partium texturam immutare posse, ut ex veneno medicinam, ex salubri mortiferum, ex frigido calidum, ex calido frigidum, ex sapido insipidum, ex insipido sapidum, prodeat, & alia id genus admiranda plane, quæ natura sponte non gignit, efficere posse: sed uti nihil exinde mutationis in universi partibus accidit, ita multo minus hoc evenire censendum est, si Deus, auctor, præses ac rector causarum ordinis, omnipotenti sua vi quicquam in eo mutet.

§. XXX. Proinde licet non negaverim, insolitas sæpe temporum anni constitutiones, vi ordinis & cursus rerum naturalium contingere; attamen nec ullo modo dubitari poterit, Deum nonnunquam sine talium causarum ministerio, extraordinario plane modo agere, & ad demonstrandam suam justitiam, probos confirmandos & improbe refractarios puniendos, in atmosphæra venenum, quod hominibus, bestiis aut vegetabilibus exitiale sit, efficere, cogendo aptas in aëre materias, tempestates, tonitrua, ventosque excitare, & densissimas diuturnas tenebras inducere posse, quemadmodum id tempore Mosis in Ægypto, nec non sub mortem Christi factum esse sacræ litteræ fidem faciunt uberrimam. Luculentissimum quoque hujus in universum domini documentum exhibet ingens illa mutatio, quæ post primorum parentum lapsum obtigit & tanta fuit, ut cum omnium rerum intemperie, disharmonia motuumque inæqualitate, morbos, mortem & communem depravationem induxerit. Simili miraculoso prorsus & omnipotenti modo, per totalem illam inundationem, universum causarum physico-mechanicarum ordinem & inde dependentem nexum effectuum, adeo in terrarum orbe Deus immutavit, ut deflectentibus à puriori sua ac simplici indole & alimentis & elementis, atque alienam plane vim & efficaciam induentibus, homines, qui ante diluvium nongentos fere annos attingerent, vix centum post illud superarent. Nec

Frid. Hoffmanni Oper. Tom. V.

exstantiora magni hujus & miraculosi in rerum natura effectus desunt vestigia ac rudera, quæ in subterraneis cavernis per varia strata & marina omnis generis animalia eorumque ossa, sceleta aliasque petrefactas partes, distinctissime apparentes, nostra etiam ætate, à rerum naturalium curiosis detecta & huic origini vindicata sunt: adeo ut ipsi etiam Sceptici stupendi hujus miraculi veritate, de divina sacrarum litterarum auctoritate validissime convincantur.

§. XXXI. Instituto hoc de iis quæ miraculose præter naturæ ordinem in universo fiunt eventibus, sermone, devolvimur ad quæstionem: an Deus in medicina faciat interdum extraordinarios adhuc effectus? & non diffitemur, naturam ex causarum ordine nonnunquam magnos & plane mirabiles producere effectus, nec tamen inficias ire possumus, haud raro plane insolitos & qui omnem captum humanum exsuperant in re medica occurrere casus, ut ægri re penitus conclamata, & comparentibus jam signis certissimam mortem præfagientibus, præter omnium spem atque expectationem eandem tamen effugiant & vitæ ac sanitati reddantur. Neque minus peculiarem plane Dei providentiam atque directionem in graviter vulneratis frequentius observare & admirari licet; dum in exemplis nobis aliquoties hic loci fuit, quosdam gladio perfoßos fuisse, iis in locis, quæ partes, vitali corporis conservationi immediate servientes, custodiunt, illæsis iisdem manentibus, adeo ut exquisitissima partium earumque situs notitia instructus, vix destinata opera, tam innoxie telum trajicere potuisset. Vilissimum sæpe & abjectum remedium chronicum & quam maxime inveteratum morbum dispulit penitusque subegit, quod in aliis eodem morbo decumbentibus, ne minimum quidem opis tulit: ut taceamus frequentissima eorum exempla, qui fortuito quasi & insperato quodam eventu, solo casu, gravissimo ex morbo periculo erepti, sanitatem recuperarunt, quorum plura narrat BOHNIIUS *de officio medici duplici pag. 18. seqq.* Et novimus ipsi quosdam assumpto ex errore veneno à pertinacissimis morbis esse liberatos. Ecquis igitur negare ausit, in fortuitis ejusmodi casibus & minus prævisis, divinam causarum & mediorum dispositionem ac directionem? cui nihil fortuitum, sed omnia ad certum finem sapientissime intenta sunt. Neque absolum est dicere; Deum adhuc in rerum natura & per naturam in productione monstrorum, ex sola virtute imaginatrice, & maxime in propagatione generis humani, patrare miracula: quum nulla ratione capi vel intelligi possit, quomodo corporis humani fabrica in unica liquoris seminalis guttula lateat, & quo pacto ovulum, ex ovario per tubam Fallopianam ad ipsum uterum accedat, aliaque id genus plura, quæ omnia luculentissime evincunt, divinam sapientiam longissime omnem humanum transcendere captum.

§. XXXII. Ultimo loco brevibus adhuc excutienda est hæc singularis momenti quæstio: num sæva quæ hominibus imminent fata evitari vel declinari possint? Negarunt id Stoici, autumantes, fata esse Deorum decreta, eaque propter immutabilia, nec, ut APULEJUS effert, aliter se habere ac Proconsulis tabulam, qua semel lecta, ne litterula quidem demi potuit vel adjici. At vero quum Deus nihil statuerit, voluerit vel decreverit in rebus humanis, sine præcedente ordine & certa successione causarum, ad quam non solæ causæ physicæ, quæ ex necessitate agunt & quas mutare homini integrum non est, requiruntur, sed frequentissime etiam hæ ipsæ cum causis libere agentibus, hominis nempe ingenio, ratione & voluntate mixtæ sunt, uti apparet in rebus moralibus, politicis & quæ ad sanitatem ac vitam tuendam, nec non ad ægritudines præcavendas spectant; ita nihil certe dubii superest, quin hominum prudentia, providentia, arte, ingenio, summa ratione & mira virtute sævientis fortunæ minæ,

miserandi casus, vis ac potestas superari, averti ac declinari queant: idque multo magis si devotis & assiduis precibus, quarum magna vis est ad imminetia fata & quævis atrocita mala avertenda, divinam opem, auxilium atque directionem in omnibus actionibus quis efflagitet. Et porro uti immoderatis animi affectibus & diætæ vitio plures fatales morbos, immo præmaturam mortem, ante vitæ terminum, quem robusta corporis sui structura & legitimo rerum nonnaturalium usu assequi possent, mortales sibi accersunt: ita omnia hæc mortis & morborum fata vitari ac declinari posse non est quod dubitemus. Denique omnium scientiarum, omnium doctrinarum & omnibus disciplinis excultæ rationis finis & scopus eo potissimum collineat, ut sævissima fata æternæ damnationis in theologicis, ruinarum & calamitatum publicarum in politicis, infelicitatis & miseriæ humanæ in moralibus, egestatis in œconomicis, morborum in medicinis, his ipsis studiis avertamus & declinemus; quum sine hoc fine obtinendo, omnis eruditionis & doctrinæ usus plane expiret atque supervacaneus sit.

§. XXXIII. Proinde non incongruum & à scopo nostro medico alienum erit, ut coronidis loco strictim edifferamus, qua ratione pessima quædam morborum imminetia, eaque sæpius funesta fata, declinari & evitari queant. Videlicet certa & indubia, prout superius jam monuimus, experientia constat, æquinoc-tium, inprimis vernale, multis ultimam eamque fatalem afferre horam, & præcipue sanguine abundantes, cacochymicos & ex hæmorrhoidum suppressione cachecticos senes, apoplecticis insultibus aggredi & hoc modo auferre; hypochondriacos vero & melancholico-maniacos, non modo circa tempora æquinoctialia, sed etiam circa solstitia, gravius laborare & atrocita perpeti pathemata. Ad prævertenda itaque hæc mala certius & aptius non est præsidium, quam in decenti sanguinis missione, ante æquinoctia & solstitia, maxime in partibus inferioribus instituta, quam postea externe frequens pediluviorum, interne diluentium & salubrium aquarum usus, excipere debet. Porro quum foeminino sexui quinquagesimus & subsequentes anni

maxime fatales existant, ob cessantem penitus sanguinis per uterum expurgationem, ita ut posthac easdem cachexia, scorbuticus languor, phlogoses, ventriculi & intestinorum spasmi alique spasmodici affectus infestare soleant: nihil sane ad præservandas moribidas hæc afflictiones magis exoptatam locat operam, quam sanguinis missio, primarum viarum à sordibus repurgatio & transpiratio non sufflaminata. Senibus nihil æque infestum ac frigus intensum, frequens acidorum usus & vita nimis sedentaria, quæ, inprimis si concurrant, senili ætati congruos & quasi proprios excludunt morbos, stranguriam, exulcerationem vesicæ, calculum, atrophiam, colicam, scabiem siccam, pruritus, tussis chronicas, rauces, noctes insomnes & hujus generis plura, ad quæ præcavenda abstinentia ab acidis, frigoris evitatio & commoda corporis exercitatio egregie faciunt. Virginibus anni post decimum quartum gravia mala minantur, eo quod menses erumpentes, si non recte procedunt, vel inordinata vivendi ratione cohibentur, gravem inferunt noxam, quæ proinde abstinentia ab otiosa vita, à cibis acidis, dulcibus, farinaceis & qui lentorem sanguini inferunt, frigido potu & omni refrigeratione declinanda ac evitanda est. Juvenes, si fatales ætati suæ morbos hæmoptysin & phthisin præoccupare velint, à vehementiori corporis & animi commotione, potu spirituofo, nec non frigido corpori calenti ingesto, sibi temperare debent. Denique ab ingruentibus & epidemice sævientibus morbis qui immunes esse percipiunt, CELSI monitum lib. I. cap. 10. perquam studiose teneant: *Tum vitare debet homo fatigationem, cruditatem, frigus, calorem, libidinem, multoque magis se continere. Si quæ gravitas est in corpore, tum neque mane surgendum, neque pedibus nudis ambulandum est, neque movenda alvus, atque etiam si per se mota est, comprimenda est*; adeoque omni cura atque studio evitent, quæ vires & robur corpori suffurantur, quæ transpirationem supprimendo, sordes excrementitias accumulunt, & commendatissimam habeant abstinentiam, qua cruditatum generatio avertitur & transpiratio opportune promovetur.



ANNORUM CLIMACTERICORUM

RATIONALI ET MEDICA EXPLICATIONE.

P R Æ F A T I O.



ANTIQUISSIMAM omnino esse, & per tot sæcula celebratam annorum climactericorum efficaciam, vel leviter versato in scholis Philosophorum & Medicorum obscurum amplius esse nequit, nostris vero temporibus non modo in dubium vocata à plerisque Medicis dictorum annorum vis, sed etiam pro commento superstitioso, & fabuloso Astrologorum pigmento habita fuit. Verum enim vero, sicuti illud, quod tam diuturna & constanti experientia adsertum fuit non rationibus evertendum, neque ob id maxime, quod inveniri rationes non possint, temere negandum: (nam quando agitur de rebus, quæ facti & experientiae sunt, prius certi esse debemus de re ac facti specie, postmodum rationes quærendæ:) Ita illud ipsum imprimis valet de climactericis annis, qui num habeant fundamentum in ipsa re & experientia, prius perspicendum, postea eorum explicatio evolvenda. Majores utique nostri cum in omni doctrinae genere, tum in medendi scientia fuerunt sapientes & cordati homines, quominus illud ipsum, quod constantis fuit experientiae apud ipsos, imo traditionis, non statim propter rationis, quibus explicatio fit, inconvenientiam, figmenta admixta, vel propter abusum, in dubium vocandum, vel ipsares aut fides & veritas rei perneganda, sed potius semper veritas facti inquirenda & melioribus explanationibus vindicanda est. Quapropter etiam diu hæsi circa hanc sententiam, annos hos climactericos non plane esse rejiciendos, præsertim magnos, quos tantopere animadverterunt Veteres, sed potius vindicandos & veram eorum naturam perscrutandam. Sumsi itaque hunc laborem & conabor ostendere, utique habere eos fundamentum in ipsa re, eorumque naturam atque cognitionem Medicis esse valde necessariam. Deus vero inexhaustus omnis boni, veritatisque fons, proposito nostro indulgentissime faveat!

Annus
Climacte-
ricus vul-
go Mordt-
jahr.

A pleris-
que pro
commento
habetur.

Non plane
tamen est
rejicien-
dus.

Verba
Augusti.

Salmasii
& Julii
Firmici
sententia.

§. I.

Acturus itaque de annis climactericis eorumque vim & potentiam vindicaturus, primo omnium, quæ sit vis & significatio hujus vocis, unde originem habeat, & quænam ejus sint synonyma, circumspiciendum videtur. Climacteres itaque sive flexo vocabulo græco ad indolem latinæ linguæ climacterici, originem suam petunt ἀπὸ τῆς κλίματ^{ος}, sive quod rectius ἀπὸ τῆς κλίμακ^{ος}, quod scalam vel gradum significat, vel interprete COLUMELLA Lib. V. cap. I. certam quandam mensuram, usu autem, optimo interprete, per climacterem certum vitæ humanæ tempus, vitæ fortunisque periculosum dixerunt, qua de re consuli potest VARRO d. hebdomad. it. GELLIUS L. III. cap. IO. Certus itaque annus, isque à nativitate septimus, habitus vel dictus fuit climactericus, sive scalaris, fatalis, decretorius, quoniam nempe successive quasi per scalas, ad hunc ipsum annum ascendimus, ubi mutatio vitæ & periculum quoddam imminet. Ex hisce vero, septenariis annis periculosus maxime æstimatus fuit & magnæ considerationis annus ætatis quadragesimus nonus, quinquagesimus sextus & sexagesimus tertius, qui heroicus, quoniam ipse maxime validus & aptus est ad mutationes instar strenui herois efficiendas. Græce etiam dictus fuit ἀνδρόλας, uti SALMASIUS vult, à Græco ἀνὴρ vir in genit. Ἀνδρὸς & κλάω frango, quoniam virum frangit & debilitat eoque tempore vires collabuntur.

§. II. Verum ne nimius sim in cura nominis.

Frid. Hoffmanni Oper. Tom. V.

num, filum hic abrumpo, & illud potius, quod tamen fieri potest compendio, dicam, quamnam sententiam habuerint Veteres, de hisce annis, & quidtribuendum sit climactericis. Quod quidem ex locis quibusdam eximiis Veterum copiose ac luculenter demonstrari potest; inter hos autem eminet maxime PLINIUS, quando L. VII. c. 49. climacteras appellat scansionem annorum occiduam legem, i. e. legem mortis, GELLIUS Lib. XV. noctium Atticarum cap. 7. in hæc verba de climactericis disserit: Observatum in multa hominum memoria expertumque est in senioribus plerisque omnibus, sexagesimum tertium vitæ annum cum periculo & clade aliqua venire, aut corporis animique morbi gravioris, aut vitæ interitus, aut animi ægitudinis. Memorabilia etiam sunt, quæ de Augusto Imperatore scripta leguntur: Cave mi Caje, quem semper medius fidius defidero, cum à me abest, sed præcipue diebus talibus, qualis est hodiernus, quem spero lætum sexagesimum quartum natalem meum, nam ut vides, climactericum communem seniorum omnium sexagesimum tertium evasimus, vid. Casparum Caldera de Heredia in Tribunali medico p. 348. Et SALMASIUS in lib. de anno climacterico pag. 2. scribit: Convenit inter omnes, climactericos dici annos vitæ, quibus periculum imminet, aut alicujus casus, quem vix evitare datur. JULIUS FIRMICUS L. XIV. Matheos cap. 14. scribit: sane, extra ceteros climacteres septeni anni ac noveni per omne vitæ tempus multiplicata ratione currentes, naturali quadam & latente ratione variis hominem periculorum

H 3

discrim-

Dicitur
& scalaris
fatalis &
decretorius.

Veterum
de hisce
annis sen-
tentia.

discriminibus semper afficiunt, unde & sexagesimus tertius annus, quia utriusque numeri summam pariter accipit, ἀνδρογῶνας appellatus fuit.

Numerus
septena-
rius præ-
sertim pro
Climacte-
rico habi-
tus.

§. III. Quamvis vero ex Veteribus nonnulli, & novenarios annos habuerint pro climactericis; universaliter tamen, magisque omnium unanimi consensu numerus septenarius habitus est. Deinde notandum etiam est, quod ab omni ætate divisio adornata fuerit horum annorum, ita ut distinguerent in leviores, periculi expertes, temperatos, transitorios, & graviores, nempe periculosos, formidolosos, difficiles imo quandoque lethales, ex illis annus 7. 14. 21. 28. 32. 35. habitus est, hos vero statuerunt, 49. 56. 63. 70.

§. IV. Vim ac potentiam horum annorum ferme concordī suffragio sapiens antiquitas deducere laboravit ex impari septenario numero. Et quanta fuit hujus numeri veneratio olim apud omnes philosophos, neminem eruditorum latere potest. PYTHAGORAS princeps philosophorum, qui scientiam suam ab Ægyptiis, Chaldæis, Phœnicibus traditam accepit, primus fuit, qui numeris ad divinarum & naturalium rerum cognitionem tantam adscripsit efficaciam. Isque PYTHAGORAS medicinam & musicam ante omnia sanitati conducere prædicabat, quia in hisce bella numerorum esset consonantia, qua animi item corporis, alias insanabiles ægritudines possint perfanari, quin imo asseribat, quod sacra per certam numerorum proportionem efficacia ad operationes reddantur, maxime autem septenario numero assignavit divinam efficaciam. Peripatetici hunc numerum virgineum nuncuparunt, alii Regem & perfectissimum; quia constat ex tribus & quatuor, qui ambo totum sunt sui numeri, & perfectum in suo genere, ejus autem perfectionem inde adferebant, dicentes: Numerus impar indicat spirituale, par corporeum autem, continet enim impar unionem & indivisibilitatem adeoque durationem & æternitatem, ut etiam divinæ essentiae symbolizet, unde dixerunt Deum impari numero gaudere, numerus vero par quoniam incipit dividi demonstrat materiam & creaturarum materialium essentiam, causaque corruptionis est. Hic itaque numerus conjunctus creditus est perfectus, eaque de causa veteres Poetæ, cum felicitatem eximiam prædicare volunt, dixerunt:

O terque quaterque beatus.

§. V. Coluerunt & maximè celebrarunt prisca hunc numerum, quoniam nimirum divinis mysteriis Deus eo usus est, hincque in gubernatione & œconomia rerum humanarum septimo numero multa notabilia continentur: ab ipso Deo septimus dies sanctus statutus est. Veteres ætates diviserunt in septem. Lunæ facies, septimo die, semiplena, bis septimo rotunda, ter septimo semidefecta & quadriseptimo defecta nascitur. Septem Plejades, septem epicycli, septem planetæ, septem metalla, septem dies in hebdomade statuti sunt, nec ipse Zodiacus septenario caret, nam in septimo mense fit solstitium æstivum à bruma, in septimo brumæ ab æstate, in septimo æquinoctium vernale & in septimo autumnale. Præterea ex VARRONIS sententia antiquissima septimo die conceptus fit, bis septimo figuræ redditur capax, ter septimo spina & caput formatur, ter septima hebdomade fit motus infantis & animæ vis sese exserit, sex septima nascitur, quin imo PLATO in *Timæo*, dicit, Deum, animam ex septem portionibus conflasse. Dein

septimus dies, teste magno nostro HIPPOCRATE & experientia criticus & decretorius est dies in febribus præsertim acutis, quo morbus mutatur & vel in pejus vel melius solvitur, vel in melius vel in deterius. Constantissimæ enim observationis est, quod natura in morborum solutione ac curatione, ni laceffita & impedita aliunde sit, observare soleat statuta ordinataque tempora & quidem septimum diem, si legitimæ & tutæ sint crises, nam si in altero numero vel nono vel duodecimo accidit singularis mutatio vel excretio, plerumque imperfecta vel mala esse solet crisis, quæ in septimo & decimo quarto, semper bonæ.

§. VI. Ex hisce prædictis non infimi momenti argumentis quæ luculenter declarant septenarii numeri potentiam & virtutem, defendere etiam veritatem conantur annorum climactericorum, qui in annum septimum incidunt. Verum enim vero constanter asserimus, nullam vim vel occultam quandam efficaciam inesse numeris agendi in corpus humanum, cum quantitas sit nullius effectus productiva, nec quicquam addat rebus numeratis, & tempus per se nihil aliud sit, quam certi motus duratio, quæ certis terminis intellectus clauditur, ad dimetiendos aliarum rerum motus, vel durationes: deinceps virtus sequitur essentiam rei, à qua dimanat, & diversitas vel identitas virtutis diversitatem vel identitatem denotat essentialis principii, sed hæc virtus annorum climactericorum, quæ mutationem inducit, non provenit à numero, numerus enim forma caret; porro numerus secundum sui rationes abstractus ab omni materia, est quoddam mathematicum, hinc nec activum nec passivum esse potest; causa itaque efficiens sive effectuum fons, qui adscribitur annis climactericis, neutiquam septenario numero, ut numero assignari poterit. Denique & experientia quotidiana docet, quod & alii anni vitæ periculum ipsamque mortem adferant. Quapropter pie & constanter, olim Maximilianus II. Imperator cuidam gratulanti, quod climactericum annum transcendisset respondit, omnes vitæ suæ annos sibi esse climactericos, & ipsum sexagesimum quartum & alios deinceps se magis æstimare, quam sexagesimum tertium, decretorios climactericos, periculosos, quia mortis diei sint propinquiore.

§. VII. Alii qui non contenti sunt hac explanatione, deducere climactericorum virtutem ex astrorum potentia & malignorum planetarum conjunctionibus præsertim Saturni allaborant, nempe hoc evenire, quando Saturnus singulis septem annis ad quadraturam, vel saltem ad contrarium suæ naturæ signum perveniat. Hæc omnia autem, quæ de stellis adferunt mathematici, imprimis astrologi, certe inania sunt & futilia figmenta, quæ refutare fusius non attinet, repugnat enim hic ipsa ratio, simul & experientia, vitam nostram & sanitatis fortunæque rationem dependere ab astris, vel ex quadam necessitate fatali, nos vivere aut mori. Antediluviani vixerunt annos nongentos, quod stellarum decretis minime tribuendum fuit, hinc etiam nostra vita, quæ hoc tempore concisa & circumscripta est, ab astris minime provenit, nec tamen operatio solis vel cujusdam planetæ mutata est. A dispositione autem parentum hæreditaria, à cœli ac soli varietate locorum ac climatum diversa indole, variaque victus ac potus ratione, discrepare hominum corpora & ingenia, & ad ægritudines has vel illas ipsa disponi, vitamque

Dies septi-
mus Hip-
pocrati est
criticus.

Definitio
temporis.

Numerus
forma ca-
ret.

Causa qua
adscribi-
tur annis
Climacte-
ricis neuti-
quam nu-
mero sep-
tenario
assignari
potest.

Christia-
num Max.
II. Impe-
rat. cui-
dam de
anno cli-
macterico
respondit.

Quidam
ab Astro-
rum poten-
tia clima-
cterico-
rum vir-
tutem de-
ducunt.

Alii à dis-
positione
parentum
hæredita-
ria.

ipsis

7. dies à
Deo san-
ctus statu-
tus.

Ex nume-
ro septena-
rio pluri-
ma enu-
merantur.

ipsis esse vel saniores vel longiores, res apud Medicos & Philosophos constantissimæ experientia & veritatis est, quin imo observamus, gemellos uno quasi puncto editos, diversæ naturæ ac temperamenti gaudere corporibus, illorumque mores, dispositionem ad morbos, illorum quoque fortunam, animum, actiones etiam sub accessione annorum sic dictorum climactericorum mirum differre.

§. VIII. Ex dictis itaque apparebit, mutationes, quæ contingunt humanis corporibus circa annos climactericos, non esse ipsis astris adscribendas vel à cœlo petendas, neque numero seu causæ efficienti, (cum potius hic signum sit mutationis, non autem causa,) tribuendas; ea propter cum efficacia horum annorum non penitus sit neganda, aliud fundamentum inquirendum est. Scilicet sapientissimum Numen, rerum omnium naturam mirabili artificio coagmentavit, ac singula, suis quibusdam numeris, mensura, pondere, ordine, harmonia vinxit, ut in tota œconomia rerum corporearum, omnes operationes staticæ, mechanicæ, certoque tempore perficerentur. Corpus humanum certum requirit tempus, ut formetur, ut ad exitum ex utero disponatur; certis temporibus corpus ad perfectionem debitam pervenit, certo temporis progressu fiunt morbi, temporibus quoque certis sanantur: nam causæ morbificæ antequam potentes sint ad agendum & ad morbum producendum, antequam etiam corrigantur & expellantur, certa deposcunt tempora. Cum enim omnis effectus in toto rerum corporearum universo, omnis mutatio non nisi per motum debitum, certum, sufficientem fiat, & absolvatur, tempus autem non nisi mensura & duratio motuum sit, facile adparet, alterationem & peculiarem mutationem, quæ visitur in corporibus, certis temporibus sese manifestare, non quod tempora, dies vel anni id efficiant, sed quia certi ad effectum vel mutationem necessarii & determinati motus requiruntur, qui constituunt tempus.

§. IX. Corpus nempe nostrum mirabili ordine ad perfectionem summam, ad quam potest pertingere ex benignissima voluntate Conditoris paulatim pervenit, inque omnibus viribus augetur. Et cum statutum sit, hominibus semel mori, etiam huic corpori indita est talis interitus causa, quæ etiam ordine & tempore fit, hujus vero perfectionis item defectionis & dispositionis ad interitum vis, statis temporibus annisque, maxime septenariis, visitur, ubi magna vel ad perfectionem vel ad defectionem mutatio accidit, quoniam sapientissimus rerum Conditor ex liberrimo beneplacito, causarum physicarum operationes & effectus notabiles certis alligavit motibus & temporibus, & maxime numero septenario adstrinxit. Cum ita Veteres deprehenderent, quod sub singulis septem annis, cuius corpori singulares accidant mutationes, dixerunt, istos annos climactericos, quibus homo quasi per scalam transit vel ad suam perfectionem, vel defectionem, id est, vires, hisce annis vel augentur, vel imminuuntur. Sunt enim hi anni velut gradus humanæ vitæ corporisque durationis; hoc namque non in eodem semper permanet statu, sed secundum illud notum AVERRHUIS dictum, à generationis puncto, tendit homo ad corruptelam. Pulchre scribit SENECA in *Epistola* 28. nemo nostrum idem est in senectute, qui fuit juvenis; nemo mane, qui pridie, corpora nostra rapiuntur fluminum more; quicquid vides currit cum tempore; nihil ex his quæ videmus, manet,

ego dum loquor ista, ipse mutatus sum. Corpus humanum transit ad perfectionem, transit etiam rursus ad interitum, hinc indita corpori nostro talis causa, cujus necessitate in viribus augetur, deficit & etiam interit. Et hæc est illa mortis & interitus pernicies, ut inquit VERULAMIUS *Lib. 3. cap. 10. de ætate*. Hæc intestina illa calamitas, quam nulla ars, nulla humana industria effugere, sed ne reprimere quidem possit, etenim si cui ab ortu temperato vel Æsculapius præsit, qui illum ab iis, quæ foris sunt, aut quæ intro sumuntur causis, salvum & incolumem sic tueatur, ut nullum inde corpus detrimentum capiat, is tamen à semet ipso suaque sponte magis magisque conficietur, consumeturque, donec extremum vitæ spiritum edat, illuc dum contendit, plurimas hoc interim spatio mutationes necessario sustinet, has qui annorum spatiis & interval- lis dimensi, primum discreverunt, simul ætates appellarunt: ut sit ætas id vitæ curriculum, quo luculenter corporis constitutio per se, suoque nutu mutatur.

§. X. Contingit itaque hæc mutatio uti diximus, septimo anno, ob quam mutationem, ætas etiam aliud accipit nomen. Ejusmodi mutatio accidit quibusdam non sine periculo sanitatis, quæ turbatio in motu sanguinis & humorum contingens, aliis est tuta, aliis noxia, prout nempe corpus sanum, vel debile est, vel jam dispositio, aut causa quædam ad morbos latet, vel immoderata animi passio, aut insalubris diuturna tempestas præcesserit, vel morbus quidam in corpore delitescit. Tales itaque causæ externæ si in corpora incidunt, quæ annos agunt climactericos, in quibus sensibilis ad defectionem corporis fit mutatio, sæpius lethum inferunt. Quod si vero corpora fuerint robusta, temperata & diætæ regulas bene observent, corporisque & animi bonus fuerit habitus, facile climacteres sine offensione superant; paucis: sub ætatibus transmutatio temperamentorum accidit, mechanismus corporis nostri, solidæ & fluidæ partes aliam accipiunt crasin ac motum. Omnem autem temperamenti mutationem secundum GALENUM *Lib. VI. Epidem. Sect. 3.* periculum insequitur.

§. XI. Ratio autem postulat, ut mutationes, quæ fiunt singulis septem annis in corpore notabiliores, sub certis ætatibus in medium adducamus. Nempe ter septima hebdomade infans folet sese movere in utero, in sex septima hebdomade paratus est ad exitum, septimo mense incipit dentire, septimo demum anno, cum prima ætas infantia clauditur, dentes decidunt, corporaque per hanc ætatem sunt humidissima. Sequitur post hanc pueritia, quæ ad decimum quartum annum extenditur, quo tempore foeminis menstrua veniunt, mammæ crescunt, pili in pube prodeunt & potentia accedit generandi. In masculis testes incipiunt separare semen à sanguine, quod titillationem efficit. Huic proxima est adolescentia, quæ clauditur vigesimo primo anno: nomen habet quoniam corpora, tunc ob humoris ubertatem plurimum adolescunt, corpus tum debitam acquirit longitudinem, barba apparet in mento. Adolescentiam excipit juvenus, quæ duplicato septenario absolvitur, & durat ad trigessimum quintum annum. Hæc ætas dicitur florida, cui propria est venustas, agilitas & in hac secundum HIPPOCRATEM, homo ad incrementum totius corporis, debitamque staturam pervenit, membra præsertim, ossa acquirunt legitimam soliditatem ac firmitatem. Sequitur postea quinta ætas, nempe virilis, à du-

Indita corpori nostro talis causa.

Quid sit ætas.

Hæc septimo quovis anno aliud accipit nomen.

Quia tum fit temperamentum in nobis transmutatio.

Mutationes quæ fiunt singulis septem annis ordine hic descriptæ.

Infantia. Pueritia.

Adolescentia.

Juventus.

Virilis ætas.

Aliæ rationes in medium proferuntur.

Hi anni sunt velut gradus humanæ vitæ.

plici septenario ad septies septem perdurans, recte dicitur à vi & viribus, quoniam tunc vis & robur animi & corporis maximum est, iudicium floret, & qui iis annis non pervenit ad prudentiam & sapientiam, ille nunquam ejus fiet particeps. Dicitur etiam ætas perfecta, matura, consistens: Germani dicunt *Funffzig Jahr stille Stahn*. In foeminis circa quadragesimum nonum annum cum jam incipiat vis corporis deficere, cessat potentia generandi, ordinario tum menses desinunt non sine magna motuum sanguinis turbatione. Sexta ætas dicitur prima senectus, quæ per bis septem extenditur ad sexagesimum tertium: deficit tunc roscidum nutritium humidum & siccior natura evadit, & contabescit corpus, caro fit dura, rugæ apparent in facie, memoria valde debilitatur, quæ ex humido viget, cura, sollicitudo, avaritia incipit, iudicium autem & prudentia crescit. Veteres hanc ætatem consiliariam dixerunt, senes enim aptissimi sunt ad consilia. Antiqui melancholiam crediderunt sedem esse sapientiæ, hinc orbis heroes melancholici: *Alexander* in bello & pace. *Socrates* quoque melancholicus. Et *SENECA de tranquillitate* 15. lib. 3. scribit: nullum magnum ingenium sine dementia fuit i. e. melancholiâ. Melancholici optimi fuerunt poëtæ, futura etiam prædicentes. Et bene *HERACLITUS*: aridus animus sapientissimus, siue etiam anima sicca sapientissima. Altera senectus debilis, imbecillis, decrepita dicta, vitam claudens, ultimum senium, ordinario ad septies decem i. e. septuagesimum annum, etiam *DAVIDE Regio* psalte teste profertur, ibi maxime est virium corporis & animi decrementum ac defectus, morbida debilitas & senectus ipsa morbus; clauditur ordinario hic spatium vitæ humanæ, paucissimi perveniunt ad 81. annum. Optime dixit *SALOMO Ecclesiastes c. ultimo à v. 2. usque ad 7.* tunc anni displicent: nulla pars facit suum officium, intellectus obscuratur, manus & pedes vacillant, dentes labuntur, oculi caligant, aures obsurdescunt, in capite fit calvities, crinesque decidunt; sanguis exsiccat, imbecillior fit circulatio, motus cordis tardus languidusque fit, nervorum robur perit. Itaque omnes ætates mutant temperamenta & actiones humanas. Merentur hic legi sequentia, quæ habet *CASPARUS CALDERA de Heredia, in tribunali medico, loc. supr. citato*, ubi dicit: oriuntur & manant temperamenta, tum à primigenia natura, tum ab ætate, quæ illi comes est individua, cumque id, quod à natura prodiit, comparate duntaxat, quod vero ab ætate, simpliciter dici soleat: consequitur, æstimandis temperamentis, ætati quam naturæ vim tribui majorem, & eam quæ ex ætate decursu fit, temperamenti speciem, ei tum victoria tum nomine præferri, quam natura ortusque contulit.

§. XII. Ex hisce dictis clarissime patebit, non sine summa ratione à veneranda antiquitate septenarium anni numerum observatum atque æstimatum fuisse, quoniam infinitus Conditor sapientissime voluit, ut sub certo tempore & septenario numero, non quidem ex ejus natura & operatione, quæ nulla est, sed ex necessitate harmoniæ & ordinis causarum corporearum, naturalium & mechanicarum, peculiaris mutatio corpori, & animo accederet ut incretaret ipsis vis, & ad perfectionem perveniret, inque in ea ad tempus maneret, postea vero successive decretaret. Hæc ipsa coordinatio & complexus incrementi & decrementi hominis sub certis ætatibus & temporibus maxime apparens, lu-

culentissime deprædicat sapientiam, ordinem, symmetriam, summum artificium ac reginæ Creatoris, quibus gubernat totum mundum ejusque partes, maximeque in eo corpora organica & viva. Ex præcedentibus etiam clarum fit, non in numero necessariam quandam fatalitatem certumque periculum, ratione vitæ metuendum, multo minus ipsum annorum numerum in casus fortunæ vel infortunii, aliquod jus & potentiam habere: hæc enim pure à providentia divina ab externis accidentibus causisque contingentibus, ut sunt accusationes, insidiæ malitiosorum hominum, peregrinationes periculosæ, damna, incendia, naufragia, vulnera, dependent, hæc enim adversa ex naturali illa per septenos aut novenos annorum circuitus, graduum ætatis distinctione neutiquam possunt provenire.

§. XIII. Quare autem sub sexagesimo tertio anno plures finem vitæ suæ impleant, ratio etiam non est quærenda in numero, quatenus est numerus, sed quatenus circa hoc tempus, virium præsentissimum fit decrementum, & senectus ultima incipit. Si itaque humor morbosus præsens, si virium debilitas, etiam ex aliis causis, si animi passio vehemens adsit, utique hisce concurrentibus, facile ad interitum pervenit corpus. Nam experientia loquitur, quod hoc anno plures etiam egregii viri extinguantur. Accedit, quod adpropinquante hoc tempore homines plurimum timeant sibi hunc numerum esse fatalem, periculosum & imminere malum corpori existimantes, inde inquieto & perturbato sunt animo, timent, tristantur, anguntur, idemque periculum semper ipsis imminere cogitant, sique vel leviter valetudo offendantur, diem fatalem imminere existimant. Jam vero cum nihil efficacius in corpus nostrum agat, ejusque vires destruat, inque morbum præcipitet, quam gravis animi affectio, ideo fieri potest, ut eo anno, infirmum fessumque ætate corpus curisque & mœrore confectum vel incurrat morbum, vel fatalem plane necessitatem, idemque tanto gravius periclitari, quanto vehementius adfectibus animi antea debilitatum fuit.

§. XIV. Ceterum posset hic objici, quod mutationes quæ fiunt ab ætate ad ætatem non sint insignes, quoniam non subitæ, sed paulatinæ, & intra limites sanitatis fiant adeoque tutæ, cum repentinas non tolerare possit natura. Verum enim vero utique mutationes sunt maxime insignes, an non enim insigne quod certo anno dentes decidant, quod pubertas accedat, menses præsto sint, deficient, corpus adolescat, certo tempore dentes erumpant? Insuper respondeamus, etiam mutationes, uti videmus in phthificis, hæcticis, maligna febre laborantibus, certis diebus vel horis ad ætatem periculi accedere. Potest hæc res eleganter illustrari æquinoctiorum & solstitiorum natura. Notum est, quod paulatim sol feratur ab uno cœli puncto ad alterum, nihilo minus tamen, quando ad æquinoctiale & solstitiale pervenit, mox insignes mutationes in macrocosmo inque corporibus nostris excitat. In vernali natura accipit robur & morbi diuturni vel in melius vel in pejus mutantur: phthifici hæctici evadunt vel moriuntur: intermittentium paroxysmi ad tempus desinunt. In solstitio æstivo, diuturnæ quartanæ, citra usum remediorum, vel plane expirant, vel si persistunt adhuc, post hoc tempus, totum autumnum & hyemem perdurare solent. Sub æquinoctio autumnali multæ commotiones sanguinis

Nulla in numero necessaria est fatalitas.

Hæc pure à providentia divina dependent.

Sub sexagesimo tertio anno plures finem vitæ impleant.

Qua ratione hoc fiat.

Objectiones refutantur.

Argumentis ab anni tempestatibus & à quibusdam morbis desumptis.

& humorum fiunt, consuetæ excretiones sanguinis v.g. per hæmorrhoides, per arteriam asperam revertuntur. Circa solstitium hybernæ natura est imbecillima, ubi omnes morbi acuti valde sunt periculosi & chronici paroxysmis gravissimis stipati. Quibus manifesto perspicimus, ut paulatim & accedat & recedat sol à solstitiorum & æquinoctiorum punctis, nihilo minus ipsis in punctis quando consistit, præsentissimas fieri mutationes.

§. XV. Uterius videmus in corpore nostro, ægroto etiam, certis temporibus fieri v.g. in variolis & morbillis excretiones, febres maxime inflammatorias die septimo vel in pejus vel in melius desinere, mensium quoque fluxus statim die vel mense accedentes in foeminarum corporibus, varia suscitare pathemata. Ex quibus patet, dispositionem ad mutationes fieri quidem successive, sed ipsam mutationem in instanti. Eodem modo se res habet cum climactericis, five annis ætatum, ubi anno septimo accedente, notabilis visitur vel in incremento vel decremento corporis humani mutatio. Quicquid autem sit, negandum non est, vim horum annorum etiam sese exserere in quibusdam anno præcedente, vel etiam proximo sequente. Uterius dubium quoddam, quo infringere volunt virtutem horum annorum excutiendum est. Aiunt quidam, mutationes has fieri intra limites sanitatis, adeoque absque periculo. Verum neutiquam valet consequentia, nam & intra limites sanitatis gravi mœrore & terrore corripitur homo, qui affectus mox gravem morbum, vel etiam mortem inferre potest. Equidem non aliquis moritur sanus, sed intra limites sanitatis mors disponitur.

§. XVI. Porro à ratione instituti nostri non alienum esse existimo, perpaucis subicere, quibusnam maxime incommodis vel ægritudinibus circa singulas ætatum mutationes, homines sint obnoxii. Et ut auspicemur à septimo mense circa dentitionem, notum est, gravissima pathemata circa hoc tempus semet exserere, siquidem, comitantur dentium eruptionem vigiliæ, febres, pavores in somno, diarrhœæ, asthmata, epilepsiæ, alvi adstrictiones, tormina, quæ si non prudenter, adjuvante natura, à Medico tractantur, facile infantes jugulant. Decimo quarto mense plerumque canini dentes prodeunt, qui quoniam longiores & acutiores sunt, gingivalem carnem magis dilacerant & vellicant, hinc magis periculosa & mortifera excitant symptomata. Dimidio septimo numero, nempe intra tertium & quartum annum molares ut plurimum exitum affectant, ubi lentæ febres sæpius non sine periculo sese associant. Septimo anno quando dentes decidunt, ob nimiam gingivalis carnis laxitatem, os foetet, vel dentes fiunt nigri & carioli. Complicantur quandoque diarrhœæ, appetitus prostratus, febres stomachales, à deglutita vitiata saliva, lumbrici quoque circa illud tempus uberius sese exserunt. Circa annum decimum quartum, in foeminis ante mensium eruptionem varia symptomata se aperiunt, macilentæ nempe fiunt, cephalalgias vexantur, nausea cibusque fastidio male habent, lividi coloris fiunt, lassitudo & gravativus dolor adest in pedibus, lentus accedit calor. Eodem tempore crescit corpus in longitudinem, quapropter multæ tensiones dolorificæ hinc inde in artubus sentiuntur. Vigesimo primo & vigesimo octavo accedente, foeminæ fiunt multum salaces, amatorii febribus corripiuntur, circa hoc tempus quoque ma-

res insolentiores sunt in appetenda venere, unde facile gonorrhœa, aut contagio venereo inficiuntur, corpus fit siccius, calidius, hinc frigidos potus & aërem frigidum amant, unde pleuritides, peripneumonias & alias febres inflammatorias, nec non ventriculi inflammationes incurrunt. Per id tempus usque ad trigessimum quintum annum juvenes ad hæmoptysin & phthisin inclinant. Viri anno quadragesimo secundo & nono, cum sanguis eorum sit fervidissimus, nisi parcius utantur calidis potibus, incurrunt in ardentibus, biliosas febres tertianas continuas, caustum. Annus etiam hic quadragesimus nonus maxime infensus est foeminarum sanitati, cessare tunc solent menses, unde varia pathemata hypochondriaca & hysterica per aliquot annos pati necesse habent cum lento calore. Sexagesimo autem tertio anno item septuagesimo, cum jam insignis adsit virium debilitas, morbi chronici, cachexia, asthma, hydrops, apoplexia, quartana febris, icterus niger, hæmorrhoides cœcæ minari solent periculum. Subsequens ætas, ob humidi benigni defectum, spirituum imbecillitatem, nervorum & fibrarum densitatem, ad visum, auditum imminutionem, vertiginem, paralytin, tumores œdematosos pedum, marasimum, stranguriam, vesicæ calculum, tremorem artuum, vacillationes pedum facile inclinant.

§. XVII. At vero non tantum septimo anno ætatis accedente, dispositio fit ad morbos, verum etiam per singularem ætatum annos, peculiaris morborum vis sese exserit, qua de causa cum hæc doctrina ad rationalem praxin multum conferat, pauca saltem adhuc hac de re monere allubescit. Primo omnium notatu perquam dignum est, dispositiones ad morbos, paulatim per ætates fieri, maxime secundum regiones corporis, adeo ut infantes & pueri plus laborent morbis capitis, adolescentes & juvenes affectibus thoracis, viri & senes morbis abdominis, decrepiti senes vitiis artuum & extremarum partium. Ita videmus, quod infantes & pueri corripantur achoribus, & tinea capitis, tumoribus parotidum, oculorum acibus defluxionibus, panno oculi, gutta serena, exulcerationibus aurium, faciei pustulis, in lingua aphthis, narium defluxionibus, & hæmorrhagiis, coryza, amygdalarum tumoribus, capitis doloribus, quin imo epilepsia, ceu morbo capitis, infantibus maxime familiari. Adolescentes & juvenes experiuntur facile siccas tusses, cordis palpitationes, luxationes vertebrarum, pleuritides, peripneumonias, hæmoptyses, phthisin, apostemata in pectore, & hecticam. Juvenes etiam & virilis ætatis homines valde proclives sunt ad omnis generis febres intermittentes, tertianas, quartanas, inflammatorias, biliosas, acutas, deliria, phrenitidem, febresque arthriticas. Sunt enim hæc febrium species maxime cordis & arteriarum affectiones, quæ partes locatæ sunt in thorace. In consistente virili ætate & senectute prima, cachexia, morbus niger, hydrops, dolores in lumbis, colicæ spasmodicæ, infarctus lienis, vomitus, præsertim in foeminis, cruenti, tensiones circa os sacrum, calculosæ passionis, internæ hæmorrhoides, magis conspiciuntur. Uterius procedente senectute, in partibus extremis videntur morbi, & hæc ætates maxime adoriuntur stranguria, urinæ stillicidium, calculus vesicæ, artuum tremores, dispositio ad sphacelum, podagra, paralytis, apoplexia. Ratio quare natura, hoc ordine gaudeat, ut incipiendo à capite progrediatur, disponendo partes ad morbosas

*Dispositio-
nes ad
morbos
fiunt se-
cundum
regiones
corporis.*

*Morbi u-
nicuique
ætatæ præ-
ceteris
proprii.*

*Hujus rei
ratio.*

con-

*Quibus
probat
quod anno
septimo ac-
cedente
notabilis
visitur vel
in decre-
mento vel
in incre-
mento cor-
poris hu-
mani mu-
tatio.*

*Quibus-
nam ma-
xime in-
commodis
circa sin-
gulas æta-
tum mu-
tationes
sint obnoxii
homines.*

constitutiones, usque ad extremos artus, hæc vero proxima est. Natura semper in ipso formando foetu, primum elaborat caput, deinde thoracem & abdomen: ita etiam intendit primo in nato homine, principaliores partes, nempe caput perficere idque ad debitam firmitatem & robur deducere, unde major ad eam partem in pueritia & infantia humorum & sanguinis fit affluxus. Cum autem facile, vel ob quantitatem vel qualitatem vitiosam, vel ob alias concurrentes etiam externas causas, circulatione debita impedita, stagnent & sistantur humores, fit, ut dicti propullulent affectus. Sub ætate adolescentiæ & juventutis, natura molitur elaborationem & perfectionem thoracis & in eo contentas partes nempe pulmones & cor, cui fini etiam affunditur copia largior sanguinis, qui quando minus recte per has partes movetur, sed sistitur & stagnat, nascuntur inde affectus circa has partes maxime. In virili ætate & senectute prima amplius fit abdomen, deinde etiam, quoniam natura non habet tantam efficaciam ad motum, colligitur in vasis venosis abdominis magna quantitas sanguinis,

quæ impeditius movetur, & ibi stagnans producit commemoratos adfectus. In extrema vero senectute ob defectum boni succi, nervorum rigiditatem & ineptitudinem ad motum, spirituum etiam & caloris defectum in extremis partibus, quos tarde cunctanterque sanguis perluit, facile stagnat sanguis & serum, coagulatio fit, pororum & nervorum obstructio, unde adducti morbi originem nanciscuntur.

§. XVIII. Coronidis loco perpauca addam, ^{De moribus, ad quos singulæ ætates inclinant.} quasi superpondii loco de moribus, ad quos singulæ ætates inclinant, nempe puerili & adolescenti ætati familiares sunt, somnolentia, negligentia, securitas, petulantia, otium, delectatio dulcium, usus variarum voluptatum. Juvenes magis sunt præcipites, loquaces, rixosi, iracundi, audaces, impatientes, ambitiosi, agiles. Viri evadunt constantiores, vigore agendi instructi sunt, vigiles, ambitiosiores. Senes sunt pertinaces, diffidentes, avari, superstitiosi, pensitabundi, solitudinem amant atque taciturnitatem.

D E

DIABOLI POTENTIA IN CORPORA,

DISSERTATIO PHYSICO-MEDICA CURIOSA.

PRÆLOQUIUM.

Non minus scite, quam vere, scriptum reliquit PLUTARCHUS *Sympos. lib. 5. c. 7.* *Quodammodo philosophiam tollunt, qui rebus mirabilibus fidem non habent. Oportet autem, quam ob causam aliquid fiat, id ratione tractare. Quod vero id fiat, ex historia est sumendum.* Quocum perpulchre consentiens PLINIUS *Hist. Nat. Lib. VII. Cap. I.* *Quemadmodum, inquit, multa fieri non posse, priusquam facta sunt, judicantur: Ita multa quoque, quæ antiquitus facta, quia nos ea non vidimus, neque ratione assequimur, ex iis esse, quæ fieri non potuerunt judicamus; quæ certe summa insipientia est.* Quibus sapientissimi & cordatissimi viri optima ratione eos reprehendunt, qui historias & res, quas vocant facti, eam ob causam pernegant, quia quomodo fiant, vel facta sint, minus assequuntur. Jamdudum hunc errorem animadvertentes Philosophi, utilissimum hunc canonem condiderunt: *Ab ignorance modi, non valet consequentia ad negationem existentie rei.* Dici vix potest, quam frequenter ab hac regula decedant, non tam Philosophi, quam ipsi etiam Medici, qui dum experientiam & observationes rationi debebant ordine præferre, & postea effectorum rationes scrutari, contraria via sæpenumero incedunt, & antequam, num aliquid fiat, nec ne? exploratum habent, protinus ad intellectum & rationem confugiunt, & ex ea id petunt atque exquirunt. Verum enim vero cum ratio hominis plurimorum effectuum naturalium æque ac spiritualium causis inveniendis atque detegendis plane inhabilis sit, & rarius judicium de rebus è genuinis principiis ac fundamentis deducatur, hinc ratio plerumque fallax & minus recta exsurgit. Quare consultius est, prius de veritate &

fide historica circumspicere, ubi agitur de effectibus, quam anticipatione intempestiva & præpostera ratione, in rerum existentiam & modum inquirere. Observavimus itaque, ex neglectu supra allatæ regulæ, ingentem dissentientium opinionum varietatem oriri, etiam, quando agitur de potestate malorum spirituum, adeo, ut sint qui nimium diabolo & incantationibus sagarum tribuunt, eaque, quæ ex mere necessariis & physicis causis fluunt, hisce adscribunt, cum alii contra plane nihil potentie diabolis concedant, immo operationes ejus in corpora penitus negent, eo quod, id rationis principiis consentaneum non esse judicant. At vero his breviter reponimus: cum ad facti cujusdam confirmandam veritatem bini aut terni testes omnium gentium consensu sufficiant, nos quidem suspicari non posse, cur ea demum neganda videantur, quæ omni hominum memoria ab universis gentibus credita, à Theologis pariter ac Philosophis & Medicis prudentissimis miro consensu observata, sacri codicis testimonio firmata, & tot denique magistratum edictis ac judiciis, ipsaque reorum confessione stabilita legimus. Certe in rebus facti sola auctoritate est nitendum, quæ tamen omnino rejicienda est in aliis, quas ratione & intellectu assequimur. Num autem majori unquam auctoritate historia factorum firmata, & roborata sit, quam ea, quæ docet varios effectus diaboli in corpora naturalia & hominis, merito anceps hæreo? Nihilo minus operæ pretium duco, probe perpendere illa ratiocinia, quibus adducti nonnulli alia omnia statuere non dubitant: Providendum enim, ne nimium, & ne nihil tribuamus diabolo, memores eorum, quæ à PLUTARCHO sapientissime monentur in *Vita Camilli* p. 132. *τοῖς τοιαῖσις καὶ τὸ πιστεύειν σφόδρα, καὶ τὸ λίαν ἀπιστεῖν ὁπίσφαλές ἐστι, διὰ τὴν ἀνθρωπίνην ἀσθένειαν, ὅπου*

ὅρον ἐκ ἑχθραν αὐτῆς, ἀλλ' ἐμφερομένην, ὅπως μὲν εἰς δαίμονιαν καὶ τύπον, ὅπως δὲ εἰς ὀλιγορσίαν τῶν θεῶν καὶ περιφρόνησιν, ἢ δ' εὐχάρεστα καὶ τὸ μὴ ἐν ἄλλαν ἀρεῖαν. Τὰ-
libus nimium credere, aut nimium diffidere periculo-
sum est, propter humanam infirmitatem, quæ fines non
habet, neque sui compos est, sed fertur interdum qui-
dem in superstitionem, interdum vero in neglectum &
contemptum rerum divinarum. Metus vero, & ne quid
nimis, optima sunt. Quapropter videndum Philosopho,
quid valeat & non valeat diabolus, & an omni tem-
pore & in omnibus subjectis id præstare possit? Sus-
cepimus inpræsentiarum hunc arduum & gravem labo-
rem, citra tamen ullam præoccupationem, vel ullius
injuriam. Neque hanc tractationem à foro nostro alie-
nam censemus: nam qualis sit differentia inter spiritum
& corpus, & quidnam corpora pati queant à spiriti-
bus, aut nequeant, nemo exactius, nostra sententia,
poterit ad liquidum perducere, quam Physicus & Me-
dicus. DEUS autem fons & auctor omnis lucis, &
destructor omnium tenebrarum, operumque diabolico-
rum, etiam hac in re ad nominis sui gloriam proximi-
que emolumentum nos deducat in omnem veritatem!

§. I.

ANtequam autem ad ipsam rem ejusque tractatio-
nem pressiores nos accingamus, & num dæ-
mon possit agere in corpora? disquiramus; ordo &
instituti ratio postulare videtur, ut primo omnium,
quid vocabulo diaboli velimus intellectum, in me-
dium adducamus. Est autem diabolus, communi
omnium, cum Theologorum, tum Physicorum &
Medicorum, consensu, spiritus creatus, finitus, no-
centissimus, certa potentia in creaturas, maxime in
hominem, præditus. Spiritum eum esse dicimus,
quoniam ejus natura atque essentia est ab extensione
& repletionem certi circumscriptique spatii remota, im-
penetrabilitatis & divisibilitatis expertus, denique quo-
niam intelligendi cognoscendique facultate, nec non
voluntate, est præditus. Creatus porro est, quia de-
pendentiam atque existentiam, id est, originem suam,
supremo illi ac infinito spiritui debet. Finitum etiam
& limitatum vocamus, non modo ratione essentiae
suae, sed & operationum, siquidem tum ipse, tum
universa ejus potentia, infiniti illius ac increati spiritus
imperio subest. Præterea nocentissimum diximus, cum
eo discrimine à beatis illis mentibus quam maxime se-
jungatur. Tam depravata enim est ejus voluntas, ut
liberrimo impetu in malum feratur, Deoque non mi-
nus, quam hominibus perpetuo reluctetur, nihil exi-
stimans cura ista ac cogitatione antiquius. Ex quo
colligere licet, cacodæmonem ad omnem malitiam,
fraudem, odium ac perditionem esse profligatissimum,
cum bonorum contra spirituum, summus sit amor sum-
maque benignitas. Sed & potentiam diabolo tribui-
mus. Cum enim nulla omnino sit res creata, quin
potentia sua gaudeat: diabolo sane illa tanto minus
videtur deneganda, quanto spirituum natura reliquis
creaturis est sublimior. Postremo & in homines po-
tentiam ejus sese exferere diximus: idque non tam
ratione mentis, pure & sine corporis commercio ope-
rantis, quam earum facultatum, quæ corporis utuntur
ministerio. Quapropter in eam animæ partem, quæ
phantasia dicitur, mira ejus est energia; nec minor in
ipsa corpora, tamen si eam limitibus suis divinitus cir-
cumscriptam esse, ultro fateamur.

§. II. Jam primo omnium eorum rationes expende-
mus, qui, licet esse diabolum, non inficientur, ip-
sum tamen in corpora quicquam posse, negant. De-
prehendimus vero ex Philosophis & Theologis maxi-
me eos, qui Philosophiam Cartesianam profitentur,
huic sententiæ pollicem premere. BALTH. BECKERUS
Theologiæ D. & Ecclesiastes Amstelodamensis, qui

in opere, quod *Mundum fasciatum* inscripsit, con-
fopitas eruditorum concertationes de spirituum opera-
tionibus denuo resuscitavit, eo prolapsus fiducia, ut
diabolo non minus, quam veneficis, omnem homi-
nes lædendi, aut in longinquos morbos conjiciendi,
potestatem adimeret. Verum enim vero, ut funda-
menta, quibus periculosa opinio innititur, confidere-
mus, res omnis tanquam ab ovo repetenda videtur.
Occasionem huic errori dedit ipse CARTESIUS, dum
Deum causam proximam atque immediatam motus,
in corporibus obvii, statuit. Ex qua perniciofa sen-
tentia (ut solet mira esse errorum fecunditas) novus
error natus est, videlicet, quod dæmones nihil in cor-
pora possint. Corpus enim sibi concipiunt tanquam
materiam, in se mere passivam omnisque actionis ex-
pertem, id est, extensam tantum & divisibilem. Ita-
que ut actionis capax sit, necesse est principium ali-
quod activum accedat, quod vim, vigorem ac vitam
ipsi inspiret. Porro hoc principium non materiale esse
posse existimant, (quum omne extensum non nisi
passivum sit,) nec finitum, quum nec id motum in
universo hoc tam vasto & tot corporibus repleto præ-
stare possit: hinc nihil superesse, nisi ut ipsum DEUM
immediatam omnis motus causam esse fateamur. At-
que ita perpulchre, ut ipsi opinati sunt, demonstratio-
nem de Deo adornarunt. At vero, si ulla senten-
tia in Theologia non minus ac Physica, innumeris
gravissimisque erroribus viam pandit, certe hæc ipsa
est, quam modo explicavimus. Demonstrari quidem
hac ratione potest, Deum esse, sed ita, ut inter Deum
& mundum parum relinquatur discriminis. Et hæc
sunt istæ fyrtes, in quibus BENEDICTUS SPINOZA
naufragium passus, omnem religionis sensum ami-
sit.

Ens enim quod nulla agendi vi pollet, nullam pro-
fecto figuram, nullam formam ac dispositionem potest
retinere. Quos effectus tamen, dum materiæ vulgo
tribuunt, creatoris rerumque creatarum essentiam at-
que effectus manifesto errore confundunt. Fingamus
bestiam fecisse pauperiem, aut hominem infortunio
mactasse: ecquis erit tam emotæ mentis, ut Deum
id fecisse, proximamque fuisse hujus damni causam
dicat? Ego vero expensis rebus omnibus, quæ huc
facere videntur, rationibusque subductis, hanc feci co-
gitationum mearum summam: Quod si enim virtus
illa corporibus indita, qua agunt, qua operantur,
qua movent alia corpora, esset essentialis divina, se-
queretur, quod DEUS sit principium activum cor-
pora constituens, quoniam à materia, ceu passiva, nul-
la actio, nulla operatio, proficisci potest. Creator est
substantia, sive vis quædam infinita, pure activa, &
causa ac fons virium omnium, quas in rebus creatis
deprehendimus. Creaturæ autem nihil aliud sunt,
quam vires quædam substantiales finitæ, ad agendum
& patiendum aptæ. Dependent videlicet originaliter
universæ creaturæ & vires, ipsis inditæ substantiales,
quæ fontes sunt earum operationum, ab ipso Deo, qui
omnipotenti suo verbo eas condidit, perpetuoque con-
servat ac sustinet. Acceperunt itaque corpora à Deo
virtutem internam moventem, quæ simul patitur, hoc
est, quæ actionem alterius corporis recipit. Falsum
itaque est earum vim immediate esse divinam. Res
autem longe clarius patebit, si eam conferamus cum
nostris cogitationibus. Hæc sunt, consentiente docto-
rum judicio, actus mentis, ex interna ejus virtute,
eque finita, provenientes. Sane enim Deus non est,
qui in nobis cogitat vel vult, sed mens nostra propria
cogitandi & volendi gaudet potentia. Nihilo minus
generali Dei concursu, ut cogitemus, opus est, siqui-
dem sine eo ne cogitemus quidem. Ita etiam cor-
pora moventur virtute propria, ad cujus conservatio-
nem universali divina opus est.

§. III. Ulterius, Deum non esse causam proximam,
quæ

quæ moveat corpora, non infimi ponderis argumento, à posteriori petito, potest declarari. Videlicet phantasia matris, foetum gerentis, à nullo sano homine unquam venditatur pro Dei actione immediata, sed omnium consensu est operatio animæ maternæ. Jam autem certum atque compertum constanti experientia est, perversam matris phantasiam, sæpenumero penitus turbare ac pervertere posse foetus formationis in utero negotium. Quod si vero Deus existimatur immediate formare foetum in utero, secundum placita Cartesianorum, sequitur exinde, quod actio matris possit turbare Deum in suo opere, id quod impium & à sana ratione alienum jure meritoque est existimandum. Quoniam igitur Cartesiani adhuc constanter in hac fuere sententia, Deum præstare immediate motum in corporibus; hinc eo principio adducti, non possunt sibi persuadere, diabolum agere in corpora eaque movere, cum nullam potentiam habeat in Deum, qui proxime auctor sit motus & ordinis in creaturis. Sed destructo hoc falso fundamento, cui subternitur eorum sententia, sicuti jam copiose & solide factum esse existimo, concidit simul uno ictu assertum illud præposterum, diabolum agere in corpora non posse.

§. IV. Proximum jam est, ut etiam reliqua, quibus ad tollendam diaboli vim in corpora utuntur, argumenta, perlustremus. Dicunt videlicet, spiritum non posse agere in corpora, quoniam substantia saltem est cogitans, intellectu & voluntate prædita, quæ nullam convenientiam habet cum motu corporum. Colligunt porro omnem motum fieri per contactum: inextensam autem substantiam corpora non tangere posse, hinc & diabolo efficaciam corpora movendi esse denegandam. Hisce respondemus: certissimum esse, nullum corpus moveri à se ipso, id est, unum corpus, consideratum in se, non posse efficere motum, sed ad minimum duo requiri. Motus enim est actio non unius corporis, sed duorum, ubi unum movet, alterum motum recipit. Ordinarie itaque communicat movens suam vim per contactum cum corpore mobili, & tali ratione unum corpus movet alterum. Quæstio vero est: num corpus moveri queat, sine alterius corporis actione, vel impressione virtutis in ipsum, & quidem per aliam substantiam immaterialem, nempe spiritum? Quam ob causam autem id non fieri possit, equidem non video. Nam si consideremus, cujus indolis sit vis ista, quæ corporibus in motu imprimitur, certe non alia est, quam immaterialis. Nihil enim corpus, quando celerrime impellitur, materialitatis ut ita dicam, recipit, nihil ipsi additur, vel moventi derogatur, nam unum corpus infinitum, id est, absque fine, sine diminutione virium suarum, motum provocare in aliis corporibus quiescentibus potest. Et ut verum fatear, vis illa substantialis, quæ omnium operationum, id est, motionum in corporibus causa & fons est, non alia quam immaterialis, dicenda videtur. Omnem enim substantiam & essentiam creaturarum colloco in immaterialitate. Cum itaque spiritus sit substantia immaterialis, summe activa; qua de causa vim suam non possit etiam cum corporibus communicare, non intelligo. Si qua forsitan exinde nascatur dubitatio, quod inter vires spirituum & corporum ingens discrimen sit, nullaque detur inter ea comunio: fingamus, & hoc ita se habere. Interim sufficit nobis, quod negari nequeat, spiritum excitare posse vim eam, quæ est in corporibus, motricem. Nam omnia corpora instructa sunt vi movente & mobili, quamvis DEUS talem legem tulerit, ut nonnisi vel excitata ad motum, vel facta communicatione virium ab alio corpore, moveantur. Sed quid opus est longa disputatione? Ubi rerum adsunt testimonia, exulent ratiocinia. Quid enim clarius ac magis obvium est, quam ad nutum & voluntatem animæ

nostræ spiritus animales movere hæc vel illa membra? Equidem ipsa anima non immediate movet musculos, manus vel pedes, sed ipsi spiritus sic dicti animales, elastica & subtili materia constantes, illud exsequuntur, unde influxu ipsorum per nervum obstructum cessante, etiam voluntas animæ efficacissima nihil peragere potest. Nihilo minus imperat potius mens, quæ spiritualis prosapiæ est, fluido nerveo, sive excitat & dirigit virtutem motricem. Ex quibus clarissime patet, spiritum utique solo suo desiderio & voluntate, (quæ actiones certe non sunt materiales, sed immateriales,) ad motum certum posse incitare corpora. Destructis itaque, vel certe multum labefactatis, eorum, qui Satanæ denegant operationem in corpora, fundamentis, proximum jam est, ut, quid diabolus possit & valeat in corporibus, & quid non possit, circumspiciamus.

§. V. Primum unanimis est saniorum sententia, diabolum nulla posse edere miracula. Antequam hoc demonstramus, opus erit, ut genuinam miraculi indolem, quanta poterimus brevitate, indagemus. Miraculum autem est effectus supernaturalis in ipsis corporibus, id est talis, qui cursum, qui ordinem, qui vires naturæ transcendit. Nam omnipotens rerum Conditor, non modo certam vim atque energiam ad agendum cuivis corpori indidit, sed & ex liberrima voluntate atque arbitrio voluit, ut actiones & reactiones corporum inter se certo ordine, quem legem Recentiores appellant, fierent; e. gr. omnis motus sit ab inæqualitate virium, seu quod idem est, corpus, quod moventis vice fungitur, majori efficacia motrice instructum esse debet, ac mobile. Porro corpora in æquilibrio constituta, quiescunt. Movens communicat cum mobili quandam vim motus. Motus celeritatis compensat pondus, sive motum gravitatis; & quæ sunt hujus generis plura. Secundum has leges motuum eduntur omnes, qui in universo conspiciuntur, effectus corporum. Quod si itaque occurrit effectus quidam, qui revera est supra istum ordinem, neque ex natura motus explicandus, quique non conformis est viribus corporibus inditis, dicitur ille stupendus sive miraculosus, v. gr. si corpus specie gravius, in fluido specie leviori non descendat; si foemina pariat sine mare: si ignis non accendat corpora igni concipiendo apta: si corpus mortuum & jam putridum ad vitam revocetur. Hæc vera dicenda sunt miracula, cum extra solitum naturæ cursum & ordinem producantur. Et hæc nemo efficere potest, nisi ipse DEUS, auctor naturæ, qui omnium virium creatarum centrum ac fons est, quique leges has sancivit, unde à nulla creatura hæc leges suspendi atque tolli possunt, præterquam à DEO, qui solus hac prærogativa gaudet. Et revera omnia miracula, quæ à DEO & Christo edita esse in scriptura sacra memoriam proditum est, ingeniose explicari possunt ex hoc principio, id est suspensione legum motus, qua de re latius videri potest D. CONNOR. in *Evangelio medico*. Excluditur itaque merito diabolus ab omnibus miraculosis & stupendis effectibus, quia nullum jus habet in ordinem naturæ. Tametsi enim aliquid facere queat, fieri tamen id nonnisi mediante hoc naturæ ordine potest.

§. VI. Primo igitur nascitur quæstio: num diabolus corpora humana per aërem transferre atque evertere queat ex uno loco in alium? Dicimus autem rotunde, in diaboli potestate id non esse positum: esset enim hoc verum miraculum. Nam quoniam corpus humanum, fluido aëris, vel bis centum ac ultravice præponderat, diabolus vel tollere corporis humani gravitatem, vel aërem efficere corpore hoc graviorem deberet; id quod esset miraculum. Equidem haud ignoro à Theologis quibusdam alia omnia statui, dum ex Novo Testamento proferunt exemplum

plum Salvatoris nostri à Satana statuti supra pinnaculum templi & in montem excelsum evecti. At vero perpulchre refutavit hoc ipsum eruditus & acutus Theologus reformatus WALÆUS in *comment. ad novum Testamentum*, dum docet, vocabulum παραλαμβάνει ordinarie in Novo Testamento non significare *gestare, circumferre, sed assumere, abducere, comitem sibi adungere aliquem* Matth. I, 24. παραλάβει τὴν γυναῖκα αὐτοῦ. Cap. XVII, 1. παραλαμβάνει ὁ Ἰησοῦς τὸν πέτρον & passim alibi. Et notat ORIGENES, Dominum secutum quasi athletam ad tentationem sponte proficiscentem, & veluti in hanc sententiam loquentem: Tu invenies me in omnibus fortiolem. Deinceps quæ vulgo traduntur de transvectione sagarum in montem Bructerum, meræ sunt fabulæ, insomnia & illusiones sagarum diabolicæ. Nobismet ipsis enim non ignota sunt exempla sagarum, quæ in vinculis publicis habitæ, custodiisque servatæ accuratissimis, si quando è gravi somno expergefierent, in remotissimis montibus una cum multis peregrinationis hujus focis se fuisse jactarunt. Spectat huc egregia historia relatæ à GODELMANNO in *Traçtat. de Magis lib. II. c. 4.* Mulier quædam Megalopolitana in crimen vocabatur, ac si conventiculis sagarum in Bruçtero sæpius interfuisset. Fidem rumori denegabat dominus nobilis, cui mulier ista serviebat. Exploraturus tamen rem, causam cognovit, & à muliere tulit responsum, cras eo sibi esse avolandum. Nobilis, adscitis Pastore & domesticis, mulierem diligenti custodia servabat, coram, quid de ea futurum sit, spectaturus. Sed misera illa unguento quodam se illinens, tam alto obruebatur somno, ut nec illa nocte, nec postridie posset excitari. Expergefacta demum, unâ cum aliis veneficis in Bruçtero se fuisse obstinate asseverabat, nec errorem hunc ex animo sibi evelli patiebatur.

§. VII. Secundo loco quæstio occurrit: num dæmon transmutare queat corpora, v. gr. an ex metallis ignobilioribus possit facere nobiliora, an ex rebus animatis organica & viva producere valeat? ad quam respondemus: neutiquam in potestate ejus hæc esse posita. Forma videlicet corporum consistit in certa & specifica partium, mixtum aliquod constituentium, dispositione, situ, figura ac magnitudine. Et transmutatio unius corporis in alterum fit, quando textura, schematismus & crasis partium, qua gaudet corpus, mutatur, & alterius texturam ac dispositionem partium & pororum induit. Ita videmus, alimenta mutari in chylum, hunc in sanguinem, in serum & lympham, hæc in ossa & carnem, carnem denique in putredinem abire. Non autem verisimile est, dæmonem ullius corporis essentiam intimam & constructionem ejus, partiumque connexionem exquisitè nosse, quamvis de eorum effectibus & corporum operationibus, quin eas sciat, non dubitemus. Si enim sciret mixtionem corporum, & ad ejus nutum serviret hæc rerum visibilium materia, diversissima corpora posset producere, quod tamen solius DEI opus est. Tanto minus corpora organica, vel principium eorum, nempe seminum quoddam, formare poterit. Nullius enim creaturæ, sed solius DEI est, ullum semen, quod natura non efficit, producere. Omnia autem organica & viva corpora, ex seminibus oriri ordinario naturæ cursu, certissimum est. Objiciunt quidem, Pharaonis magos, incantationibus suis fretos, virgas dæmonis ope transformasse in veros dracones, sicuti & Moses fecit. Verum non patiuntur rationes nostræ, ut iis adstipulemur. Negari non potest, Moysen, quo omnipotens DEUS legato ad Pharaonem usus est, divini verbi virtute virgam revera in vivum draconem, aquam in sanguinem transformasse, quo ipso edocuit, se à DEO, infinito illo rerum conditore, cujus solius est creare, & res vere transmutare, missum esse. Quando autem magos Ægyptios

divina hæc miracula imitatos esse scriptura refert: nemo profecto, qui paulo accuratius rem expendit, veram hanc fuisse metamorphosin intelliget: multoque putabit probabilius, magos carminibus suis fecisse præstigias, Regisque oculis veluti simulacrum quoddam serpentum objecisse. Unde & præstigiosos istos serpentes, egregio vanitatis eorum argumento, serpentes à Mose productus deglutiit, quemadmodum mendacium à veritate absorbetur. Idem censendum est de immutatione aquæ, quæ sine dubio pauca fuit in vase conservata, in rubicundum colorem, ut & de ranarum productione mere imaginaria; qua de re latius legi meretur WIERUS de *præstigiis demon. lib. 2. c. 8.*

§. VIII. Cæterum & hæc quæstio meretur ventilari: an diabolus verum possit assumere corpus? Negamus id de vero ac impenetrabili corpore, de imaginario autem & apparente concedimus. Ipse enim peritissimus artifex, atque ob diuturnam experientiam summus Physicus & Opticus, facillimo negotio ex commixtione diversorum corporum, præsertim fluidorum, variaque dispositione lucidi cum opaco, quoscunque vult, colores exprimit, ut, quæ nusquam sunt, tamen, quasi essent, ab hominibus conspiciantur. Sane conspiciamus nubes, quæ nonnisi vapores aquei inter se collecti ac coacti sunt, sæpius varia corpora repræsentare, adeo ut castella, palatia, umbrosi sylvarum tractus, lucis & umbræ mirifica mixtura, producantur. Nullum enim est dubium, quin extrinsecus talia efficere, & intrinsecus etiam phantasiâ hominum, in quam magnam habet potentiam, varie ludificari possit. Diabolus quidem hominum, & mortuorum, & adhuc viventium, formam assumere potest, variis sub simulacris. Sic in mulieris forma sese obtulit Curtio Rufo: senis macie ac squalore confecti specie Athenodoro Philosopho, referente PLINIO SECUNDO *lib. VII. Epist. 27.* Cassius Julium Cæsarem, jam mortuum, sive dæmonem, ejus imagine indutum, in prælio vidit, humano habitu augustiorem, equo in se impetum facientem. Vid. VALERIUS MAXIMUS *lib. I. c. 8.* Plura exhibet exempla FROMMANNUS in *Traçt. de Fascinatione pag. 786.* Pari-ter etiam brutorum formam assumere diabolus potest. Referendam quoque ad illusiones phantasiæ existimo evocationem Samuelis è terra, solito corporis habitu & vestitu, futura prædicentis, nisi, quæ nonnullorum Rabbiorum est sententia, omnia à muliere relatæ mera mendacia arte conficta fuerint.

§. IX. In disquisitionem jam venit: num diabolus doctos & prudentes homines facere queat? Nota enim sunt quæ vulgo tradi solent de spiritu eruditorum familiari. Veruntamen cum anima hominis lumine quodam intellectus insito constet, cujus auctor est ipse Deus, & hoc lumen in se summe sit bonum, non video, qua ratione in id agere diabolus, vel excitare ac perficere id ipsum, quod diximus, queat. Et cum prudentia, sapientia, sanæque rationis usus sint dona & bona, quibus perfectio spiritus humani absolvitur; ab essentia autem diaboli plane sit alienum, quidquam vere bonum efficere: (nam ejus operatio non nisi damnosa & summe noxia est,) colligo exinde, nequaquam à malo dæmone expectandum esse, ut vera doctrina, prudentia & judicio imbuere queat animam hominis. Objiciunt quidem, multa docere posse dæmones, de iis rebus ac actibus, quos exquisite norunt. Verum id rem nondum conficere videtur. Diabolum variis ideis objectis in phantasiâ agere posse, utraque manu largimur, nec dubitamus, quin sæpenumero sagis ac mancipiis suis varias species intelligibiles, variasque res ad speciem veri confictas, repræsentare queat: verum aliud est materia eruditionis, aliud ipsa forma; & aliud est veritas, aliud fictio. Pulchre scribit MAJOLUS *dierum canic.*

Tom. II. colloqu. 3. pag. 169. *Illæ quæ à Deo sunt in excellentibus ingeniis, rectis, & naturis heroicis, diabolo àμύμητα, non imitabilia sunt.* Nam tenebrarum princeps potius offundit tenebras, vel certe mille fraudibus & erroribus incrustat suam, quam largiri videtur, sapientiam. Omne donum bonum & perfectum descendit à Patre luminum. Alia autem quæstio est: num arte dæmoniaca juvari & amplificari queat memoria? Proferuntur hanc in rem varia exempla apud JORDANUM in libro de eo quod divinum est in morbis cap. 9. c. 34. Veruntamen timendum hic est, ne confundamus effectus quosdam naturæ extraordinarios cum operibus geniorum malorum. Memoria partim spectat ad animæ facultatem imaginativam, & hinc phantasiā habet pro fundamento, partim etiam ad dispositionem & conformationem filamentorum ac pororum cerebri. Si ergo dæmoni quædam potestas in memoriam concedenda est, eam demum intelligendam esse memoriam arbitramur, quæ phantasiæ utitur ministerio. Hanc enim, præsertim in impiis, impressis quibusdam à dæmone ideis, sublevari posse, admodum verisimile est. At hæc non est vera memoria, sed transitoria tantum, superficialis, ad certos duntaxat actus & ad certum tempus restricta: ad veram enim memoriam dispositio certa cerebri, quæ retinet firmiter idearum vestigia, requiritur. Nullo modo autem diabolus in conformationem ullius partis internæ habere potestatem constanter asseveramus.

§. X. Tandem & illud gravis momenti excutiendum est problema: an diabolus corpora solida, magna, animata & inanimata, sua virtute pro lubitu hinc inde loco movere possit? Hac in re, ut verum fateamur, omnem vim existimamus diabolo esse denegatam. Nam ex certis indubitatisque operationibus atque effectis tantummodo judicare Philosophus debet, quid creatura possit & non possit. Inde, cum non obvia sint luculentæ fidei exempla & testimonia, ex quibus appareat, quod diabolus sua vi corpora solida, compacta, insignis molis & gravitatis, huc vel illuc traduxerit, jure meritoque hunc effectum in dubium vocamus. Equidem ita comparata est natura spirituum, nullum ut corpus, si accurate loqui velimus, moveant. Non enim vera illa ac adæquata motus causa spiritus est, sed dirigere tantum certos motus corporum, vel certi generis corpora excitare potest ad motum, quod patet ex indole animæ nostræ, quæ non propria sua virtute ullum corpus extra suum domicilium movet, neque ipso in corpore in omnes partes idem jus movendi habet; (nam pro lubitu cordis, arteriarum, ventriculi, intestinorum motum vel suspendere, vel augere non potest,) neque etiam immediate & proxime voluntas animæ, vel ullum articulum vel musculum manus aut pedis movet, sed alio agente interveniente, cujus motum dirigere & cui imperare potest. Ex quo intelligimus, quoniam spiritus non sunt creaturæ, propria virtute moventes, ipsis non competere in corpora promiscuam, liberam & necessariam facultatem movendi, sed potius certis modis, conditionibus & limitibus restrictam.

§. XI. Multo minus autem hinc diabolus penetrationis dimensionum in corporibus causari potest, neque efficere, ut corpus majus transeat per spatium minus proportionatum, id quod omni naturæ, & omni physico principio repugnat. Utpote summum Numen universa in certa mensura, numero ac pondere constituit, & activitatem ac vires cuivis rei creatæ attribuit, quam divinam legem diabolus nullo modo mutare potest. Quicquid itaque de cuti impenetrabili, ipsisque gladiis & globulis obluctante, jactant, item, quod gladii aciem præsens diabolus obtundere ac recurvare, & globulos ad cutem protrusos repellere dicitur, mera sunt figmenta, destituta claris &

evidentibus documentis: ac evenit quandoque, aciem gladii adigi in os sterni, quod penetrare neutiquam potest. Contingit etiam, globulum non sufficienti pulveris pyrii virtute adactum, vel ob loci nimiam distantiam enervatum, non pervadere cutem, qui extraordinarii eventus non protinus in præstigias dæmonum sunt transfundendi. Ceterum pervulgatus est rumor, Lappos & Finnos callere talem artem, sed occasio erroris exinde nata fuit, quod docuerit experientia, non tam subito & facile, gravi utut percussione, durisque etiam instrumentis facta, ipsos occidi. Ratio autem est in proclivi: nam ob frigidum & constringentem, in quo degunt, aërem, hi populi ossa habent longe compactiora, solidiora, majora, quæ non tam facile perfringuntur, quam ea, quæ nostrarum regionum incolæ habent.

§. XII. Perspectis igitur iis, quæ denegata sunt malo dæmoni, operationibus in corpora naturalia, maximeque humana; jam ipsa res institutique ratio exigit, ut exposita sententia nostra, dicamus: quænam diabolus possit agere, siue quam potentia in corpora ipsumque hominem utatur? Primo omnium autem dicimus, cum diabolus sit spiritus, cujus voluntas nocentissima, intellectus autem penitus confusus, tenebris phantasmatum erroribusque corruptus sit, ipsum cum creaturis, quæ itidem sunt spiritus, majorem habere communionem, communicationem, commercium atque societatem, quam cum ipsis corporibus, quæ sunt naturæ ipsi heterogeneæ. Unde, si quis eo perversæ temeritatis proruat, ut neget diabolus: non poterit melius convinci, quam ut in se ipso, & impiorum hominum propensionibus atque actionibus, ipsum quærat ac demonstret. Quis enim negabit, in unoquoque hominum non quandoque nasci pravas, voluntatique divinæ adversas inclinationes, cogitationes & ad peccandum stimulos? quorum causam & originem non possumus adscribere DEO, qui omnis boni, omnis lucis, omnis vitæ atque salutis potius causa & fons est. Hic potius monita stimulosque ad bonum, & ad resistantiam mali suggerit fidelibus suis, ut pravas malorum spirituum suggestiones animadvertant, pulcherrimoque triumpho devincant. Nam ut rem clarius exprimamus. Deus hominem condidit bonum, ut ejus intellectus lux splendida & pura esset, qua bonum pervidere & à malo distinguere posset. Voluntatem quoque condidit liberam atque idoneam ad bonum sectandum & malum fugiendum. Si jam velimus inquirere in tristissimæ illius catastrophes & metamorphoseos causam, qua factum est, ut jam ipsius hominis intellectus errorum tenebris oppressus conspiciatur, & voluntas perpetuo ad malum feratur: injurius quis esset in Deum, si causam ipsi velit assignare, sed ipsa fatente revelatione & sana ac restituta ratione, auctor hujus corruptionis & miseriæ ipse diabolus est, à quo omne malum, ceu à fonte suo, derivatur. Videmus, proh dolor! inde luculentissime mali dæmonis actionem spirituales in hominem. Neque dubitandum, quin perpetui ejus influxus, & operationes in impios adhuc durent, ac ne ipsi quidem pii ac fideles ab earum impetu immunes sint.

§. XIII. Omnium autem optime nomina, quibus insignitur diabolus in S. Scriptura, ostendunt, omne malum in universo terrarum orbe, inque ipso homine, ex diabolo suam adsciscere originem. In HIOBO dicitur Behemoth, & Leviathan, cujus virtus existit in lumbis ejus, & robur illius in umbilico ventris sui: illecebris enim venereæ voluptatis, quæ circa lumbos & umbilicum præcipue sentitur ac perficitur, frequenter hominem impugnat. Exprimatur etiam hoc ipso ejus natura admodum potens & perversa, quæ omnem humanam naturam everteret, nisi divinæ omnipotentiae habenis coerceretur. Vid. integrum

HIOBI cap. 40. 41. In TOBIA dicitur Asmodeus, id est, spiritus coecitatis, destructor, peccati abundantia; in NOVO TEST. voce Syriaca Mammon, id est, cupiditas divitiarum: Diabolus Græcis, calumniator: Cacodæmon, id est, multas res perverse sciens; Hebræis Satan, hoc est, adversarius, qui omni bono resistit, qui omnibus nocet. In APOCALYPSI Hebraice Abaddon, Græce ἀπολλών, perditor sive perdens. Et passim in Novo & Veteri Testamento mendax, impostor, immundus, spiritus fornicationis, leo, qui aperto Marte nos invadit; draco, qui in occulto nobis insidiatur, serpens antiquus, propter occultum venenum, & occultas à longo tempore insidias. Spiritus furoris: Spiritus impurus: Spiritus, Princeps & DEUS hujus mundi: Rex super universos filios superbiæ, qui seducit totum terrarum orbem. Quibus nominibus, quæ rerum & operationum cujusdam substantiæ semper sunt characteres atque insignia, Deus in S. literis satis docet, quantos effectus, quantamque potentiam hic spiritus habeat in hominis nobiliorem partem, animam puta, quam funditus pessumdaret, nisi Dominum haberet & superiorem Deum.

§. XIV. Postquam consideravimus, quam ingentem & horribilem diabolus habeat potentiam in sui generis creaturas, nempe spiritus, quæ natura ipsi quasi essentialis & primaria est: utile jam erit, ut circumspiciamus, quod nostri maxime est instituti: quid valeat circa corpora? Ut igitur nostra fert opinio, ea potentia in corpora diabolo magis secundaria, quam primaria, simulque valde limitata & circumscripta est. Assignamus itaque ei potestatem in fluida corpora, & per hæc tandem in alia. Princeps autem fluidum catholicum, quod interjacet terræ & planetarum spatiis, & magna potentia pollet in omnis generis corpora, est aer & æther, quem vario modo dirigere, & cui imperare potest, ut hos vel illos subeat motus. Probamus id primo ex ipsa S. Scriptura. Dicitur enim ibi non sine ratione Princeps aeris, qui suum dominatum & suam potestatem in eo habet. *Ephes. II. v.* 2. Quæstio vero hæc potissimum in disquisitionem venit: num pro lubitu ipsum aerem movere possit? Dicimus autem rotunde, quod spiritus non sit causa adæquata motus in corporibus, atque adeo nec in aëre: sed potius quod certam potentiam atque dominium in fluida, quæ jam ipsa vi motrice instructa sunt, habeat. Apparet id clarissime in corpore nostro, in quo ipsum fluidum nerveum aëreo-elasticum, in lymphæ cerebri & nervorum ipsoque sanguine, est causa primaria motus in musculis. Nihilominus anima à Deo facultatem habet concessam, limitatam tamen & certam, duntaxat in quibusdam membris imperandi hisce spiritibus motum. Hoc modo etiam res sese habere videtur cum diabolo, qui non causa motus est in aëre, sed ipse aer mobili facultate jam est instructus: nihilo minus ipse habet quoddam imperium in aërem, eum ad certum motum determinandi, quod tamen etiam non sine singulari permissione Dei exercere potest. Hinc fluit, ipsum dæmonem utique, varias species corporum phantasticas, tam hominis quam animalium, ex aëre vaporoso, sub luce & umbra varie & artificiose collecto, commode induere posse: unde apparitiones spectrorum non sunt de nihilo, & vetustissimis monumentis, sacræ quoque scripturæ auctoritate, plurimisque per omnes ætates & regiones observationibus confirmatæ. Nec fundamento caret, diabolus, dum jus habet operandi in aërem, varios tumultus, strepitus, sonos, fragores edere atque excitare posse. Hæc enim nil esse, nisi varios tremulos & vibratorios aeris motus, ex physicis compertum est. Diabolus itaque facile aërem cogere & impellere, nec non ad corpora allidere potest, sicuti quis ore ex fistula aërem explodit. Porro cum imperium & dominatum habeat in aërem, non negari poterit, quod & ven-

tum, qui nonnisi motus aeris est, & fulmina, pluvias, grandinem, aliasque tempestates ciere possit, quibus vegetabilibus & frugibus nocet. VALVASOR in descriptione Carniolæ, exemplis demonstrat quamplurimis, sæpius ventos, pluvias, tonitrua à sagis excitata in hisce, quas describit, regionibus fuisse. Notum enim est, ex variorum vaporum commixtione & collisione, hæc meteora resultare. Pluvias autem facillima ratione terris immittere poterit, modo vapores, per aërem dispersos, ad frigidam aeris regionem, quam natura semper paratam habet, propellat, ubi postmodum frigore condensati, in aquæ guttulas resolvuntur.

§. XV. Deinceps generari infecta in aëre à dæmone posse, per naturales tamen causas, non dubitamus. Sæpissime accidit innumerabilem locustarum, araneorum, erucarum multitudinem, in certo quodam terrarum tractu reperiri frugesque deperdere, nec non ipsis animantibus nocere vicinis locis, quæ eadem cœli temperatura fruuntur, plane immunibus ab ipsis; ubi ratio certe difficillime invenitur. Quin immo, ut verum fatear, insolitas istas & pene extraordinarias temporum mutationes, ubi tempora anni plane desciscunt à sua natura, ventis & astrorum influxibus, (unde magna mala in vegetabilibus, animalibus & ipso homine fiunt, cum gravissimi morbi inde nascantur,) sæpenumero diabolus causari, si quis dixerit, non absurdum dicet. Spiritus equidem, qualis est diabolus, non est causa mechanica; nihilominus, ceu causa moralis, effectus profert mere mechanicos, non secus ac anima in corpore nostro. Pestis origo abstrusissima, nec non ejus certus terminus & duratio in quibusdam regionibus, ingenia etiam excellentissima mirum in modum fatigavit. Neque existimo, errorem commissum iri, si quis primam causam sæpius, in ipsum diabolus, varie agentem in aërem, refundere velit; utut, quod probe notandum, non omnis pestis aut morbi contagiosi & gravisantis origo ex eo principio petenda sit. Si enim in nostro microcosmo anima, ceu causa moralis, sola impressione & cogitatione mirifice corpori nocere & damnum inducere potest: qua de causa id diabolus nequeat, Dei permisso facere, certe non video.

§. XVI. Quæstio, dum hæc tractamus incidit: num dæmon etiam quoddam imperium habeat in ignem, adeo, ut ignem sistere in motu suo possit? Pervulgata est opinio, ad nonnullorum hominum verba & incantamenta sisti posse ignem, ut non ulterius serpat, germanice exprimitur *das Feuer versagen*. Tale artificium vulgo quoque crepant venatores in explosione bombardarum, siquidem efficere sibi videntur, ne accendant scintillulæ pulverem pyrium. Dicimus, naturales hic sæpius subesse causas, nam tempore pluvioso pulvis pyrius flammam à scintillis chalybis ægre concipit. Nihilominus & diabolus illud, permittente Deo, posse, à ratione non est alienum; nam si potentiam habet aeris motum sistendi, vaporesque humidos colligendi, utique & ipsam in flammam habet, siquidem aer est flammæ motor, anima atque director.

§. XVII. Ordine jam sequitur, postquam lustravimus ea, quæ in macrocosmo diabolus perpetrare potest, ut hæc etiam investigemus, quæ in corpore humano fabricare possit. Dicimus itaque, cum in materiam fluidam tenuissimam, quæ in macrocosmo est aer & æther, ipsi potestatem adscribamus, eodem modo quoque quoad microcosmum, in fluidum illud tenuissimum, animalium & corporis humani, potestatem ipsi esse concessam: idque maxime propterea, quoniam certo scimus, materiam spirituosam, quæ movet & regit omnes nostri corporis artus, nonnisi aërem esse subtilissimum, tenuibus sanguinis sulphureis particulis mixtum.

§. XVIII. Statuimus itaque diabolum posse agere in corpus, inque ipsam etiam animam, spirituum, ceu vocantur, animalium, ministerio, qui non modo animæ rationalis, quo agit, instrumentum existunt, sed & motum præstant reliquis corporis membris. Primo omnium considerabimus: qua ratione possit agere in animam? Dicimus autem in intellectum & voluntatem, ejus influxum esse spirituales, quoniam hæ facultates sunt mere spirituales. Quod autem attinet ad phantasiam, cum res sit partim immaterialis, partim etiam corporalis, siquidem nulla impressio externorum objectorum in sensoriis fieri potest, nullaue idea in mente exsurgere, nisi ministerio spirituum animalium; hinc ante omnia agit in phantasiam hominis, quatenus nempe spiritus in organis certis existentes, variis modis interne afficit, variasque impressiones, sive motuum species, in eos infert, unde intrinsecus variæ sensationes, variæque ideæ menti offeruntur. Quamobrem accidit, sagarum sensus à diabolo mirifice ac varie fascinari, v. g. ut res, quas extra se videre arbitrantur, intra sint. Quomodo autem ipsa phantasia humana decipi queat, ut perversissime judicet, firmiterque sibi persuadeat, res quasdam extra se existere ac operari, cum tamen nullæ adsint: vel ex natura insomniorum, deliriorum, quæ secundum HELMONTIUM, insomnia vigilantium sunt, clarissime apparet. Ita pleræque operationes diaboli in sagis sunt meræ illusiones phantasticæ, quales sunt earum translationes ad conventicula, ecstases, apparitiones, mutationes in varii generis bruta, & similia. Nam ut pressius rem significemus, pleræque actiones in magis sunt nonnisi insomnia dæmoniacæ, sive reales influxiones dæmonis in vigilantium phantasiam.

§. XIX. Verum enim vero, cum diabolo non infit potestas pro lubitu agendi in cuiusvis hominis phantasiam, sed uti alia creatura non absolute agit secundum modum activitatis, verum receptivitatis; hinc necesse est, ut adsit certa quædam dispositio in phantasia humana, qua præsentem, suas operationes suosque influxus longe feliciter persequi poterit. Deprehendimus itaque, omnia illa individua, quæ sanguinem alunt copiosum & crassum, & quandocunque is ipse tardius circulator per cerebri vasa, magis esse disposita atque idonea, ad actiones diaboli recipiendas, quam ea, quæ sanguinem tenuem, fluxilem, mobilem, floridum in venis habent. Ita certissima experientia comprobatur, eas ob causas melancholicæ temperaturæ homines, ætate senes, sexu aniculas, melancholia hypochondriaca laborantes, & victu duro, crasso, minus spirituosum fruantes, & sub cælo crasso frigidoque degentes, item nocturno tempore, ubi aer est crassus & densus, admodum esse obnoxiosos illusionibus istis dæmoniacis. Quare melancholia dicitur balneum diaboli; & incubus, qui non nisi sanguinis stasis est, in pulmonibus atque cerebro, malum dæmoniacum. Ex eo fluit ratio, cur in Italia, Gallia, inque iis locis, ubi homines laborant, vinum bibunt, rationis studio indulgent, conversationibus delectantur, vel parum, vel plane nihil, de sagis aut spectrorum apparitionibus audiamus. Contra in septentrionalibus regionibus præfrigidis, in Lappia, Finlandia, Suecia, in locis ubi cerevisiam bibunt tenuem vel nimis lupulatam, victuque utuntur duro, v. gr. pisces, fabis, pane crassiori, carne suilla, uti in Westphalia, ducatu Mecklenburgico, Pomerania, sagarum, incantationum, spectrorum aliarumque dæmoniacarum illusionum frequentissima occurrunt exempla; nam ingens Actorum inquisitionum copia in hisce locis obvia, undique id ipsum confirmat. Videlicet notatu hoc loco perquam dignum est, ipsum diabolum non semper pro lubitu etiam in ipsis sagis operari posse, nisi prius preparato ad id ipsorum sanguine; unde ex veneficarum actis olim ipse, cum degerem

in Westphalia, notavi, sagas prius semper, quandounque diaboli suggestionibus & operationibus sese tradituræ essent, se inunxisse, præsertim in carpis manuum ac plantis pedum, temporibusque, unguentis quibusdam somniferis, v. gr. ex mandragora, semine hyoscyami, lolii, cicuta, baccis solani somniferi, axungia taxi, vulpis, opio confectis. Quo facto, alto & profundo somno sepeliuntur, in quo diabolus suggestionibus suis, revelationibusque variis in phantasiam earum operationes exercet. Tunc etiam, cum ex longo rerum usu tempestates has vel illas orituras, vel illa mala proventura in hominibus, inque ipsis bestiis, prævidet, suggerit ipsis, hoc vel illud si facerent, tales tempestates subsequerentur. Nam diabolo solenne est, ut opera, quæ fiunt viribus naturæ, sibi assignet, atque hoc pacto magnam potentiæ opinionem penes sua instrumenta sibi conciliet. Clarissime ex hisce apparet, diaboli potentiam in homine malam, nocentem, illusoriam & adstrictam utique esse ad certas leges, ad certam corporis & sanguinis dispositionem. Probe tamen hic animadvertendum est ac cavendum, ne omnes illusiones phantasiæ, quæ fiunt in morbis, quæque fiunt à narcoticis, adscribamus diabolo, sed tunc demum, quando extraordinaria quædam simul occurrunt, & quando ea, quæ patiuntur in hisce insomniis, tendunt ad præsens malum inferendum proximo.

§. XX. Notum etiam est, qua ratione pii & fideles sapissime magnas tentationes, cum ingenti desperatione conjunctas, ab ipso diabolo patiantur. Observavimus, eas crebrius fieri circa confinia mortis, vel etiam certis in morbi intervallis: videlicet non semel, sed plus simplici vice vidimus, in hujusmodi morbis acutis, in quibus periodice ex spasmodis inferiorum partium sanguis pellitur ad caput, facie facta turgida & inflata, ut etiam quandoque sanguis ex naribus effluat, tentationes æstuosissimas, desperabundas esse, cum, remittente sponte paroxysmo, vel per medicamenta, mox omnia evanescent, & agroti spiritali gaudio gratiaque Dei rursus fruuntur, & superior tentatio revertitur, circulo sanguinis per caput turbato. Neutiquam vero talia possumus soli sanguini & naturæ adscribere, sed hoc dicimus, quod diabolus, favore naturæ & vitio sanguinis, spiritualiter etiam actiones suas instituat. Nam ipse ibi maxime est præsens in operando, ubi non recte sese habent res in natura, sed quando confusio, turbatio & corruptioprehenditur. Paucis: ubi malum accidit in natura, tunc occasionem agendi arripit, cum hoc sociat suas operas, & malum, ceu amicum suæ naturæ, semper amplectitur, suamque potestatem & dominatum ibi exserit; quæ res scitu maxime necessaria est non modo Medicis, sed & ipsis Theologis.

§. XXI. Proximum est, ut jam videamus an morbos possit inducere in corpus humanum diabolus? respondetur: utique. Tales autem potissimum, qui dicuntur morbi spirituum. Nam uti fluida corpora ante omnia sunt potissimum in ejus potestate, ea varie dirigendo; ita accidit id etiam in spiritibus corporis nostri. Spiritus autem, consensu prudentiorum Medicorum, & motus voluntarios & sensus præstant corpori nostro, quapropter omnes morbi magici & dæmoniaci versantur circa motum voluntarium vel sensus. Plerumque in iis motus visuntur ferocissimi, jactationes, circumvolutiones immanes corporis, ejusque partium robur immensum, convulsiones, spasmi, truculenti dolores, ex quibus sufficienter apparet, malum existere primario in spiritibus. Ita etiam morbi, quorum mentio reperitur in Novo Testamento, & quorum originem deducit Spiritus Sanctus ab ipso dæmone, sunt maxime furor, melancholia, epilepsia, variæque jactationes corporis & concussiones. Deinceps cum non modo diabolus

abolus possit spirituum motum augere, sed etiam flere; hinc videmus etiam, eundem, sacra scriptura teste, linguæ aphoniam, surditatem, contracturam &c. produxisse. Quo spectat etiam impotentia conjugal-
lis, quæ ex cessante spirituum influxu per penis musculos oritur, id quod per incantamenta induci posse etiam in vulgus notum est. Pertinet etiam huc cutis insensibilitas & hujus generis varia. Deinceps & ipse quoque sacer codex sufficienter declarat, ulcera pessimi moris à diabolo induci, quod procul dubio fit, dum cutis & fibrarum tonum destruit & relaxat, unde stagnans serum & lymphæ in foetidissimam putrilaginem abit, cujus manifestum exemplum habemus in HIOBO; quod factum non parabolam esse, egregie demonstravit SPANHEM I U S.

§. XXII. Verum enim vero complures, præsertim hodierno tempore, reperiuntur, qui plane hos morbos, quos scriptura à dæmone natos docet, pure naturali causæ adscribendos, & simplices morbos esse dicendos, autumant, quoniam à naturalibus causis similes morbos oriri posse animadvertunt. At vero, utut non negemus, tales morbos etiam proficisci posse à causis naturalibus; exinde tamen non fluit, diabolum tales non posse producere. Deinceps, occurrunt quædam in morbis istis, quorum scriptura meminit, magicis, quibus ii distinguuntur ab aliis morbis naturalibus. Primo enim expresse scriptura eos illatos fuisse à dæmone scribit. Quandocunque autem recenset alios morbos naturales, nunquam eorum causam refert ad dæmonem. Secundo, expulso dæmone, fugatus est morbus, quoniam ipse fuit causa. Quod autem expulsus verus dæmon fuerit, luculentum rei habemus testimonium, dum, annuente Servatore, ingentem suum gregem invasit, eosque omnes præcipitavit in mare. Tertio etiam in quibusdam subjectis quædam extraordinaria, quæ in aliis morbis naturalibus non visuntur, occurrerunt, v. gr. blasphemationes, vaticinia, stupendum corporis robur, quo catenas perruperunt, quæ omnia utique nostram confirmant rationem.

§. XXIII. Ceterum tamen non negandum est, morborum naturalium & supernaturalium quandoque magnam esse affinitatem, & sub leviorum morborum larva, dæmonem quandoque latere & blandam naturalis affectus opinionem excitare posse. Ejusmodi exempla recensita vide in FERNELIO lib. II. de abditis rerum causis cap. 60. Deinde quoque non semper, ubi inusitata & insolentia quædam visuntur in morbis symptomata, statim ad causas supra naturam positas & incantamenta est confugiendum. Conqueritur jam de eo ipse noster HIPPOCRATES in principio libri de morbo sacro, dum dicit: *Homines naturam & causam hujus morbi divinam esse putaverunt, præ inexperientia & admiratione, propterea quod reliquis morbis nulla re similis est.* Et paulo post: *Qui primi hunc morbum sacrum esse pronuntiaverunt, tales homines mihi esse videntur, quales etiam nunc sunt magi & expiatores, & circulatores, & quidam arrogantes, qui se vehementer pios esse simulant, & amplius quid scire. Hi itaque consilii ac mentis inopia obvelantes ac prætexentes divinitatem, quum nihil haberent, quod exhibitum prodesset, ut ne manifesta fieret ipsorum ignorantia, sacram hanc affectionem esse pronuntiaverunt: & rationibus idoneis collectis, curationem constituerunt sibi ipsis securam, expiamenta offerentes, & incantamenta.* Est enim morborum quorundam facies ferme admiranda, qua territus Medicus, etiam expertissimus, quandoque dubius hæret, utrum naturalis, an supernaturalis, agentis sint effectus isti. ALEXANDER BENEDICTUS lib. V. c. 6. refert, spinam aliquando in arcus Scythici modum retrorsum flecti, tanto

cum cruciatu, ut sæpe intra dies quatuor tollantur è medio. Uteri suffocatio tanto nonnunquam cum impetu prostrernit foeminas, ut defunctis fiant similes, & teste PARAEO lib. XXIII. c. 26. pro mortuis, etsi viverent, fuerint elatae. In saltu S. Viti homines, insano saltandi furore perciti, choreas ducere semper appetunt, & cum aliis tripudiare ad extremam virium defatigationem gestiunt: HORSTIUS *Epist. med. sect. 7. de admirand. convuls.* Morbus sacer, qui epilepsia HIPPOCRATI dicitur, præsertim à minera scorbutica ortus, gravissimis hominem quandoque convulsionibus, ac si fascino esset læsus, cruciat, notante D. DRAWIZIO in *schmertzmachenden Scharbock* pag. 90. Vidimus, inquit TH. WILLIS de *Morb. convulsivis* pag. m. 21. quosdam convulsionibus admirandis ac perpetuis affectos, ut necesse habuerint, membra huc illuc tractare & distorquere, saltare, humum manibus aut pedibus contundere aliasque gestulationes stupendas exercere, haud secus, ac si sagarum præstigiis læderentur. Exempla morborum plura, in quibus *δαυμασόν* habetur, apud D. SEBIZIUM videantur. Neque statim, quandocunque infecta quædam, uti bufones, lacertæ, ranæ ex ventriculo & per alvum ejiciuntur, id adscribendum erit præstigiis dæmoniacis. Exstant hujus rei apud auctores exempla quamplurima, ubi mere naturales causæ subsuerunt, qua de re legi meretur REINESIUS in *epist. ad Nesteros*, it. PAUL. SORBAIT *Misc. cur. Ao. II. obs. 130. item Dec. II. Ao. VIII. obs. 157.* itemque apud JOH. HELLVIGIUM *Obs. phys. medic. 80. & 92. cum scholiis SCHROCKII.* Varia enim animalculorum semina & ovula cum alimentis assumpta, salva sua textura, in corporis cavitatibus stagnantia, blando calore foveri, & tales bestiolas hinc procreari posse, non est absurdum.

§. XXIV. Quapropter ne in tam gravi & arduo negotio decipiamur, & probe morbos naturales, qui ex causis pure physicis & mechanicis, à magicis, qui ex altiori, supernaturali, & morali causa oriuntur, discernamus, opus est, subjicere hic quosdam characteres & criteria, ex quibus judicare præsentiam morbi magici possimus. Non sufficiunt autem hic solæ horrendæ vociferationes, gestuum deformationes, insolentes atque admirandæ corporis motiones, quippe hujusmodi symptomata spasmodicis & arthriticis morbis valde sunt familiaria, sed suspicionem generant veneficii, si sanus & robustus homo, subito, citra morbum præcedentem, gravissimis convulsionibus, membrorum mirificis agitationibus doloribusque torquetur. Secundo, si accedit blasphematio DEI, & verbi divini abusus, & obscœnarum rerum intermixtio. Tertio rerum secretarum & incognitarum, præsertim futurarum, vel remotissimis in locis gestarum, notitia, & revelatio, maxime cum rudes & indocti sint homines; ut liquet in Pythonissa Philippenfi *Act. XVI.* itemque viro illo, cujus meminit CAMERARIUS *Horarum subc. Cent. I. obs. 70.* qui nunquam à se visos proprio nomine compellavit, & ipsis ante actæ vitæ, itemque parentum & familiarum, quas nunquam viderat, res gestas narravit: & hæc quidem fecit cum sedatiori fuit animo, ubi autem commotior ipsum animus oppressit, falsa & obscœna intermiscuit; immo multa alia, lectu ibi digna, & prolixiora, quam quæ adducere velimus. Quarto peregrinarum linguarum scientia, quas nunquam audiverunt vel didicerunt. Quinto si robur exserant, quod vim omnem humanam superat. Et sexto, quod certissimum signum est, si varias monstrosas & heterogeneas res v. gr. clavos, crines, ligna, ceram, vitrum, spinas, filices, aciculas, frustula fistulæ nicotianæ, chartam, piscium ossicula, globulos stanneos, lanam contortam, dentes, cum gravissimis & horrendis doloribus

bus, ventris, per Vomitum maxime emittant; vel grana milii, stupas, plumas ex oculo; chartas, crines, bacus ex membro virili, ex auribus, & utero extrudant. Hujus commatis historias accuratissime descriptas, cum omnibus circumstantiis, tot testibus fide dignis presentibus, collegerunt varii Medici periti & docti, Veteres & Recentiores, diversis temporibus, & diversis locis. Legi ex his possunt LANGIUS lib. I. epist. 28. ANT. BENIVENIUS de abditis morborum causis cap. 8. SENNERTUS lib. V. Pr. Med. P. 9. c. 5. BALD. TIMÆUS à GÜLDENKLEE lib. VII. cas. Medic. lib. 24. SEBIZIUS discursu de casu adolescentis: quibus junge GREG. HORSTIUM in addit. ad Marc. Donati edit. novam pag. 716. CASP. à REIES camp. quest. 97. num. 10. Et instar omnium legi potest Clariss. MERKLINUS, qui vel sexaginta memorabiles historias morborum anagicorum in unum librum collegit & recensuit. Possemus etiam hic annectere ejusmodi casus, à fide dignissimis & oculatis testibus medicis nobiscum communicatos, si in longum protrahere sermonem nostrum animus esset, sique res dubitationibus penes Medicos adhuc esset obnoxia. Placet tantum mentionem hic injicere unius & alterius historiae, præ cæteris notatu dignæ. Memorabilis est, quam communicat LANGIUS lib. I. epist. 38. In quodam Eistetenfis Episcopi ditionis pago, Fugenstal, agricolam, cum crudelibus dolorum tormentis in altero hypochondriorum latere conficeretur, subito clavum ferreum, sub illæsa cute, manu apprehendisse, quem Chirurgus illic balneator novacula exciderit, nec tamen dolores cessasse, sed indies magis ineruduisse. Quare cum nullum aliud dolori remedium, quam mortem, superesse putaret, eum, arrepto cultro, guttur sibi abscidisse. Cadavere aperto, adstante ingenti hominum frequentia, & ventriculo inciso, lignum teres & oblongum, quatuor ex chalybe cultri, partim acuti, partim instar ferræ dentati, & duo ferramenta aspera reperta fuisse, quorum singula spithamæ longitudinem excedebant, adfuisse & capillorum instar globi involucrum. Nec prætermittendum duximus singularem & fide dignum, qui Ienæ anno MDCLXXXV. contigit, casum, ubi uxor Thuringica lanii cujusdam, caput vitulinum inter alia venale habebat; quod cum vetula quædam licitaretur, & quidem nullo ferme pretio, recusavit altera vendere. Verum vetula mutiens abiit, nemine mortalium mali quippiam propterea eventurum conjiciente. Nihilominus accidit, ut venditrix mox insequenti tempore magnum capitis dolorem sentiret, qua de causa (quia indies dolores intra cranium augebantur) experientissimus DN. D. SLEVOGTIUS h. t. Prof. Ienenf. in consilium fuit vocatus, qui contulit, quod potuit. Irritus vero labor erat, naturalia eaque ordinaria adhibere remedia, cum omnia in ægotante præter naturæ ordinem fierent. Excernebat enim misera illa aliquo die magnam cerebri copiam per aurem sinistram, sine ulla ruptura vel luxatione in ea commissis. Habebatur tale excrementum primum pro cerebro humano, re vero curatius considerata, & cum DN. D. STAHLIO, t. t. ibidem commorante, perpenſa, agnoscebatur vitulinum esse, idque eo certius, quo citius multa etiam officula, caput vitulinum constituentia, ejiciebantur. Fecit Satanas hos ludos per aliquot menses, quibus elapsis, uxor lanionis in integrum restituta & in hodiernum fortasse adhuc diem Ienæ inter vivos degit. Denique septimum indicium magici morbi est, quandocunque remedia, præsentissimæ cæteroquin virtutis, contra dolores, convulsiones, spasmos, omnem exuunt efficaciam, & nullum relinquunt effectum.

§. XXV. Diximus superiori loco, infallibilem morbi ab incantatione orti notam esse, quando multæ artificiosæ & peregrinæ res ex insuetis locis excludun-

tur. Conspicimus enim hoc pacto manifesto ipsius diaboli opera. Res certe est stupenda, & quæ excedit omnem humanum captum, unde valde difficile est, in modum penetrare quo diabolus talia conficiat. Plurimi quidem in ea opinione versantur, ac si diabolus tunc & ægrotorum & adstantium oculis præstigiis atque offutias objiciat: verum hic fascinatio, quæ saltem est turbata imaginatio, non habet locum, adsunt enim corpora vera, quæ immensos dolores & cruciatus pariunt, hi, post excretionem earum rerum evanescunt, immo sæpius adhuc in ipso secto cadavere post mortem talia reperiuntur, teste historia ex LANGIO modo citata. Quæstio tantum est: quomodo diabolus ejusmodi res aliunde, ipsis insciis, possit transferre in eorum corpora? Verum enim vero si, in re tam cognitu difficili, conjecturis indulgere licet, vero est simillimum, diabolum immediate non loco movere hæc corpora, sed hoc ipsum præstare, mediantibus sagis & veneficis. Existimo enim, diabolum, ad hujusmodi res mirabiles in corpora immittendas, loco instrumenti uti sagis, in quarum non modo voluntatem & phantasiam, sed in ipsos spiritus animales artusque potentiam habet. Hæ in illis actibus sese habent pure passive. Unde existimamus, ipsum diabolum regere, mira sagacitate ac artificio, earum artus, ut in corpora talia immittere possint. Quam prodigiosa & mirabilia opera, magna sagacitate & manuum celeritate, efficiant circulatores & agyrtæ, etiam in vulgus notum est. Ad confirmationem sententiæ maxime illud accedit, quod, facta accurata exploratio doceat, hos morbos à sagis plerumque domesticis & vicinis introductos esse, quæ, ceu instrumenta, si fuerint ad rogam damnatæ & concrematæ, morbi cessarunt, cum tamen dæmon semper superstes sit. Qua de re legi meretur JOH. BODINUS in confut. operis Wieri pag. 580. Deinceps existimamus, tunc temporis, quando gravi sopore sepulti jacent ægroti, id ipsum fieri. Ipse quoque diabolus efficere potest, ne homines hoc sentiant, vel videant. Legimus etiam exempla à MERCKLINO aliisque notata, ubi ipsi ægroti facti fuerunt, sagas noctu accessisse, & ipsos cruciasse. Ulterius memorabile est, si conferimus extraordinarias hæc historias, ut plurimum personas, quibus tales res, magico actu, fuerunt immissæ, fuisse infantes, pueros, adolescentes, foeminas juniores, in quibus solidæ partes cutisque valde flexiles & dilatabiles existunt.

§. XXVI. Essent jam quoque adjicienda quædam, quæ facerent ad curam talium morborum. Verum cum & propria in iis experientia desit, nec non modus operandi antimagicorum plane nobis sit incognitus, merito hæc prætermittimus. Notum alias est, quod nonnulla ex triplici regno desumpta, adversus magicos morbos undique celebrentur, & famosissima existant, ex quorum classe sunt herba lunariæ, flores hyperici, adianthum aureum, antirrhinum, betula, viscus coryli, verbena, stercus humanum, assa foetida, mercurius vivus, quorum applicatione per fumigationem, suppositionem, appositionem, balneationem, internoque etiam usu, sanare hos morbos tentant. Verum an successus respondeat, determinare hic non possumus. Cum Christo commendamus jejunium & preces: sique subjectum est melancholicum, venæ sectiones, motum, nitri, salium volatiliū & evacuantium usum suademus, persuasi, hisce sæpenu-mero spectrorum apparitiones, quibus nonnulli perpetuo exercentur, cessare; immo scribimus experti, nonnunquam cessasse. Si immodicæ artuum præstitiones vibrationes & contorsiones, antispasmodica non erunt sine insigni fructu atque effectu.

§. XXVII. Coronidis loco monendum est, dæmones hodie non tanto imperio tantaque potestate uti in rerum naturalium ordinem, ipsumque genus humanum, quanta

quanta olim polluerunt. Quod vel inde apparet, quod nostris temporibus spectra, obsessiones, incantationes, aliæque hujus generis præstigiæ, rariores sint, quam olim, quum Christo iter facienti ubique occurrerent. Cujus rei rationem optime expediunt antiqui Patres, qui miro consensu observant, dæmonum ludibria, ex quo Christus advenit, magna ex parte evanuisse.

Hinc ATHANASIUS de incarnatione Verbi DELI cap. 47. p. 88. Et vero, inquit, olim quidem omnia dolis oraculorum plena erant, falsaque hominum opinione, Delphorum, Dodonæ, Boetiae, Lyciae, Lybie, Ægypti & Cabirorum oracula, nec non Pythiae omnibus admirationi erant: nunc autem, ex quo Christus ubique prædicari cepit, penitus defecit illorum insania, nec ullus amplius inter eos vates reperitur. Olim dæmones, variis spectris, hominum mentes decipiebant, fontibusque & fluviis, lignis aut lapidibus insidentes stultos mortales præstigiis percellebant: jam vero, post divinum Verbi adventum, evanuerunt hujusmodi fallaciæ. Idem testatur JUSTINUS MARTYR, in Dialogo cum Tryphone Judæo p. 149. DIONYSIUS ALEXANDRINUS apud EUSEB.

lib. VII. H. E. cap. 10. Quin ex ipsis paganis PLUTARCHUS, dum singulari libro in causas deficientium oraculorum inquisivit, satis docuit, dæmones jam sua ætate pristinam, qua pollebant, potentiam, magna ex parte, perdidisse. Et ita merito fieri oportuit. Missus enim est Christus, ut Satanæ opera destrueret, humanumque genus in pristinam vindicaret libertatem. Hinc, ut clarius rem exprimamus, victus jam & magis ligatus est cacodæmon, ejusque operationes in humanum genus multo sunt hodie, quam olim, adstrictiores. Neque dubitamus, fore, ut in posterum ejus potentia ludibriaque magis magisque evanescant. Clarius enim lux veritatis ubique in animis hominum coepit exsplendescere, florent artes & scientiæ, rationis cultura ubique accuratissime suscipitur. Quin immo beatum istud millennium, quod multi tam anxie expectant, & de quo tanta sunt inter Theologos sententiarum divortia, sacra docente scriptura, Apocal. XX. 2. in nulla re alia consistit, quam in ligatione diaboli per mille annos.



D E

TEMPERAMENTO FUNDAMENTO

MORUM ET MORBORUM IN GENTIBUS.

P R O O E M I U M.

SI ulla ex omni scientiarum genere pulcherrima est, & utilitate tam Philosopho quam Medico se commendat, ea certe dicenda est, quæ cognitionem sui, omniumque gentium tractat. Maxima sapientiæ pars à veneranda antiquitate constanter olim habita est cognitio sui ipsius, nec sine ratione. Quid enim eximius, quid pulchrius, quam æconomiam sui corporis nosse, & ex hac futuras ægritudines, vel quid noceat, vel prosit sanitati, exquisitè scire? Excellentius vero est, ex illo nexu, qui est inter sanguinis motum & spiritualem animæ vim cognoscere sui ipsius, imo aliorum hominum propensiones, mores, affectus, ingenii vires, nec non virtutes & vitia. Verum enim vero quam nobilis & utilis hæc doctrina est, tam neglecta adhuc & ignorantiae tenebris immersa reperitur. Muneris esset eorum, qui moralium scientiam agitant, hæc solide scientieque scrutari, fundamento autem destituti, videlicet physico-medica doctrina de temperamenti nihil laude dignum hætenus præstiterunt. Medici itaque & philosophici potissimum negotii erit, virtutes vitiaque, aut potius virtutum vitiorumque semina singulis innata nationibus accurate subtiliterque ex sanguinis circulo, cæli rigore & clementia solique natura & victus ratione pensare. Suscepi itaque id laboris, & in præsentī dissertatione breviter strictimque, solide tamen, ut arbitror, exponam: fundamentum morum, morborum, & diversitatis animorum originaliter in sanguinis circulo, sive, ut veteres loqui amant, in temperamento contineri.

Cognitio sui ipsius ex omni scientiarum genere pulcherrima dicenda.

Quid oporteat medicos & philosophos circa virtutum vitiorumque semina singulis innata nationibus.

I. Diversissimos esse hominum mores, dissidentesque eorum ad virtutes & vitia propensiones, distinctas quoque ingenii vires, res extra omnem dubitationem posita est. Quis enim ignorat morum animorumque difformitatem in singulis fere hominibus? quem latet, singulas nationes & gentes virtutibus, vitiis, moribus, ingenioque distinctas esse? Neque recens observatio est, secundum ætates cujusvis hominis animum indolemque, nec non propensionem ad virtutes & vitia demutari. Aëris clementia & victus tenuis & laudabilis longe alios mores viresque ingenii ingenerat animo, quam crassa diæta cœlumque rigidum. Stupenda & maximi momenti hæc res est, animi vim atque sic variare, varietateque disponi pro physicarum causarum differenti ratione, id quod inquirere jam noster labor erit.

Hominum mores diversissimi & dissidentes eorum ad virtutem & vitia propensiones.

II. Ut autem hæc omnia clarius intelligantur, placet ab ovo repetere quasi ea, quæ ad negotium nostrum spectant. Agnoscimus nempe hominem esse creaturam mixtam i. e. consistere substantia duplici distinctissima, quarum altera est omnis materiæ atque extensionis experta, rerum conscia, libere agens, judicans, impressionum capacissima; altera est corpus organicum, artificiosissime secundum leges mechanico-staticas constructum ad varios motus edendos, qui vitales audiunt, durationem corpori ad corruptionem alias propenso præstantes. In intima & arctissima hac unionem principii spiritualis & organici corporis genuina hominis essentia versatur. Et quamvis distincta sit anima secundum operationes suas, quæ in cognitione, judicio agendique libertate consistunt, à corporis essentia atque operationibus, quæ motu

Homo est creatura mixta consistens duplici substantia distincta.

Corpus recipit ab anima multas impressiones & contra.

continentur, placuit tamen Divino conditori, ut corpus recipiat ab anima secundum ejus operationes multas impressiones, & rursus ipsa anima à motu corporis fluidarum maxime ejus partium. Manifestum documentum habemus operationis animæ in artuum motu, dum à certa cogitatione, idea & arbitrio hominis manus vel pedes certa mensura & proportionem determinata motus suos edunt. Testantur quoque animæ perversæ erroneæque cogitationes, vel animi passionibus, nec non impressiones phantasiæ, quanta turbatio motuum vitalium in corpore, imo, structura in partibus solidis immutatio succedat. Ex adverso certum est, motus sanguinis & humorum, qui à causis mere necessariis, physicis, corporis externis, aëre, æthere, alimentis dependent, varias & mirificas impressiones in anima efficere, ejusque operationes varie disponere atque determinare, quod ipsum jam in præsentis tractatione fufius explicare instituti nostri erit. Quomodo vero hæc operatio fiat spiritualis principii in corpus, & qua ratione idealis & immaterialis actus, sicuti est cogitatio, & judicium motus partium solidarum & fluidarum certa mensura & gradu disponere, & rursus, quomodo hi ipsi animam in suis operationibus adficere atque determinare possint, res ultra limites intellectus & captus humani posita est, interim tamen verissima.

Duplex in anima via
Prima.

Altera.

Locus Hippocratis in eum finem allegatus.

Quare anima in uno sit sapientior, quam in altero.

Diversa natura corporis diversos mores prodignit.

Quid per temperamentum intellexerint.

III. Admittimus vero in anima duplicem viam, qua datur ingressus eam disponendi, perficiendi & cultiorem reddendi. Prima est per impressiones immateriales, quæ fiunt institutione, consuetudine, educatione, unde harum rerum maxima vis est rectam rationem moresque optimos efformandi in homine. Altera via est per ipsum corpus nostrum ejusque fluidas in motu existentes partes, quæ quid valeant in immutandis hominum moribus & animis, ulterius excutiemus.

IV. Elegans locus, qui meretur trutinari circa hanc rem, extat apud HIPPOCRATEM l. I. de diæt. §. 21. Anima, inquit, eadem est in omnibus hominibus, corpus tamen uniuscujusvis differt, anima semper sibi similis est, & in majore & minore non alteratur, neque per naturam neque per necessitatem, corpus autem nunquam idem in ullo aliquo est, neque secundum naturam neque ex necessitate, propterea quod passim secernatur in omnia, partim misceatur ad omnia. Vult nempe sapientissimus Senex, unam eandemque esse essentiam animæ in omnibus hominibus, & eam in se nulli corruptioni vel alterationi materiali esse obnoxiam, cui corpus ex variis elementis compositum patet. Quod itaque anima in uno homine sapientior sit, quam in altero, id ejus essentia, quæ eadem natura in omnibus est, non tribuendum, sed vel institutioni sive rationi alterius, vel ipsi corpori, in quo habitat, est adscribendum. Optime enim HIPPOCRATES: Magni refert, quali in corpore animi locati sunt, multa enim in corpore existunt, quæ acuum mentem, multa quæ obtundunt.

V. Diversam naturam corporis diversos mores progignere, antiquissima Medicorum & Philosophorum est sententia. Quod mores sequantur temperamentum corporis, GALENUS peculiari libello tractavit. Quid vero intellexerint per temperamentum, quod etiam naturam & complexionem vocarunt, paulo accuratius explicandum est. Tenendum vero ante omnia est, aliud esse temperamentum mixti, aliud vivi corporis, illud omnibus etiam non organicis & inanimatis

competit, hoc tantum de vivis prædicatur organica structura & anima præditis. Etenim temperamentum mixti respicit tantum commixtionem elementorum sive partium corpus constituentium. Elementa videlicet Veteres quatuor statuebant, quæ & nos admittimus, modo pro igne fluidum æthereum activissimum ponatur, nec primariæ concretiones horum, sal nempe & sulphur, quæ Chymicorum principia audiunt, melioris explicationis ergo excludantur. Prout itaque corpora ex hisce varie mixta sunt, dicuntur temperata vel intemperata, calidum vel frigidum effectum producentia. Aliter vero res se habet cum temperamento vivi corporis, ubi non tam ad materiam sive elementorum commixtionem respiciendum est, sed potius ad ipsum motum tam progressivum quam intestinum, partiumque solidarum impulsu, qui dicti motus vitam absolvunt. Nam sine hisce vita subsistere nequit, hisque destructis cessat. Quandocunque itaque Veteres naturæ & temperamenti mentionem injiciunt, ipsisque certos assignant effectus, interpretandum hoc est de circulo sanguinis & humorum per varios minutissimosque corporis nostri tubulos. Hic enim præcipuus & vitalis ille motus est, ex quo ceu fonte omnes, qui fiunt in corpore effectus, explicari debent. In eo omnis natura & mechanismus corporis individui consistit.

VI. Tradito sic conceptu de temperamento hominis, intelligi jam facile poterit ille canon philosophico-medicus maximi momenti: quale temperamentum i. e. qualis circulus sanguinis & fluidorum in individuo, tales animi mores, inclinationes & ingenii vires. Sanguinem afficere animum & animam nostram, jamdudum HIPPOCRATES sapientissimus testatus est, qui lib. de flat. §. 20. inquit: Opinor inter omnia, quæ in corpore sunt, nihil magis ad prudentiam conferre quam sanguinem, qui ergo cum in constanti habitu persistit, consistit & prudentia; sanguine vero permutato, concidit etiam prudentia. Videmus id in temulentis per ebrietatem, ubi aucto repente sanguine percellitur animus & in animo prudentia, fiunt præsentium malorum obliviosi, & futurorum bonorum spe beantur. Et scribit porro: possem plura congerere, in quibus sanguinis permutationes animi quoque prudentiam permutant. Et in lib. I. de diæt. totus fere in eo est, ut demonstret ex temperatura vel intemperantia corporis animi sapientiam & desipientiam procedere, dum §. 29. prodidit: quando in corpore elementa temperamentum acceperunt, sapientissimi fiunt homines. Et notabile est, quod prodidit DEMOCRITUS in quadam ad HIPPOCRATEM epistola: Augescit, inquit, intelligentia præsentis sanguine, cujus providentiam habere, honestum est eos, qui recte sentiunt. At ubi corporis habitus ægrotat, nec mens ipsa alacritatem habet ad virtutis meditationem, morbus præsens animum vehementer obscurat, & intelligentiam in consensum trahit. Quid etiam manifestius est, quam in febribus vel à nimia vini spirituosæ copia rationem humanam turbare & prudentiam ad tempus perire, multasque aberrationes in intellectu fieri?

VII. Ut autem res clarius pateat, sciendum est, animam maxime instituire operationes suas secundum impressiones, quas accipit à circulo sanguinis, adeo ut convenientia quædam inter motus sanguinis & animæ observetur. In cholero, qui sanguinem calidum & tenuem in venis fovet, dum is celeriter per cerebri membranas circulatur, disponit ejus animum ad omnes celeres

Temperamentum mixti. Veteres quatuor statuebant elementa.

Temperamentum vivi corporis.

Hippocrates testatur sanguinem afficere animum & animam.

Sententia Democriti.

Est convenientia quædam inter motus sanguinis & animæ. Quod comi probat exemplum cholero.

celerēs præcipites impetuosasque actiones e. g. ad iram, audaciam, impatientiam, temeritatem, rixas, vehementiam in amore & odio, præcipitantiam in dictis & factis, seditionem & quæ sunt hujus generis alia. Quodcumque vero in sic dictis melancholicis sanguis crassior & spissior per cerebri membranarum vasa impeditius & difficilius tardiusque procedit, in animo exsurgunt ideæ, quæ cum tali specie motus similitudinem quandam sovent, unde ipsi trepidi, timidi, tristes sunt, tardi in expediendis negotiis, & in sententia dicenda perpetuo lenti, anxii, suspiciosi, diffidentes, & facile desperant de rerum successu. Porro valde dispositi sunt ad terrorem, timorem, utpote dicti hi affectus omnes convenientiam amant cum tardo & languido sanguinis motu. Aliter se res habet in iis corporibus, ubi fluores bene temperati fluidique blande & sine ulla molestia vel obstaculo fibras & vasa pertranseunt, cerebrique sinus percurrunt. Talis sanguinis motus reddit homines securos, nimia cura, angore vacuos, adeo ut etiam ad negligentiam, incuriam, inconsideratas actiones propendeant. Præterea læti hilares sunt, prompti alacres. Sanguis vero nimia ferrositate abundans & segniter circumvolutus pigros, somnolentos, otiosos, inertes, timidos etiam & torpidos homines format.

*Melan-
cholici.*

*Ut & ho-
mines hi-
lari inge-
nio.*

*Vitia deri-
vantur ex
tempera-
mento.*

*Differen-
tia ætatis
ad diversa
vitia pro-
clivis.*

*Ingenii
vires ex
eodem
fundamen-
to prove-
niunt, ac
vitia.*

VIII. Vitiorum præterea ex temperamento etiam derivare atque deducere expeditissimum est. Observamus, superbiam, arrogantiam, jactantiam, ambitionem quam maxime familiares esse cholerici, ubi cum fervore & celeritate trahitur sanguis per caput, utpote dicti hi affectus similiter fiunt cum quadam intensione & aucta vi animi. Quibus vero placide & tranquille & cum quodam delectationis sensu sanguis transfluit fibras sensoriaque corporis, hi mirifice amant omne, quicquid sensibus gratum acceptumque est, ideoque voluptates, delicias in victu & amictu sectantur, venere delectantur, comœdias, ludos, musicam, dulces & gratos cibos & vinum optimum æstimant. Ubicunque vero fluidorum per fibras & vasa cursus difficilis, tardus & cum quadam molestia fit, ibi tenax retinendi libido, quæ avaritiæ nomine venit, turpiter regnare solet. Perspicua jam ex dictis erit ratio, cur avaritia senectutis, voluptas juventutis, ambitio virilis ætatis perquam familiare vitium sit. Neminem enim Medicorum latet, in senibus viscidum & crassum esse sanguinem, tardumque ejus progressum, in juvenibus contra fluidum & facilem ejus circuitum, in viris impetuosum & celerem esse.

IX. Detectis sic vitiorum cardinalibus tribus fontibus ex temperamenti varietate, dispiciendum jam est, an ingenii vires similiter ex eodem fundamento depromi possint? Et certe res in aprico est. Conspicimus nempe, aptissimos ad studia, ad res celerrime comprehendendas inveniendas & proferendas adeoque excellentissimi ingenii esse eos, qui sanguinem subtilem spirituosum & talem, qui satis prompte & vegete movetur, in corpore alunt; utpote ii rerum ideas, quæ fundamentum scientiarum sunt, facillime capiunt, rursus inveniunt, easque combinare sciunt. Tali vero ingenio carent, sed judicio contrapollent melancholici, quibus sanguinis motus per cerebrum tardior. Hi enim pauciores sed fixiores habent ideas, majorique cura, patientia & industria eas invicem comparant & conferunt, in quo vera judicii ratio continetur. Non inepte inde à Veteribus & jam olim ab

ARISTOTELE dictum: melancholicos esse sapientissimos. Memoria vero abundant, pariori tamen judicio fruuntur ii, quos sanguineos vel phlegmaticos dicimus. Gaudet enim memoria sive retentio idearum temperato cerebro, i. e. temperato dulci roscido succo imbuto, unde judicium, quod in sicco habitat, non tanto in gradu in ipsis observatur. Clarissimum jam erit ex dictis, cur melancholici magis dispositi sint ad eas disciplinas, quæ judicio, patientia & assiduitate egent, v. gr. ad mathematicas scientias, philosophiæ naturalis & medicinæ, theologiæ profundioris & mysticæ studium, ad consilia danda in bello & pace, & ad jus administrandum. Patet porro ex dictis, cur cholerici ad exercitia corporis facienda, ad disciplinas militares addiscendas, ad disputandum, refutandum, dubitationes proferendas, reformandas doctrinas, libros conficiendos sint aptissimi. Sanguinei ob memoriæ felicitatem varii generis linguas celerrime addiscunt & ad genealogiæ, historiæ, geographiæ studium, recitationem concionum orationumque valde sunt idonei.

X. Non exiguus hujus doctrinæ usus quoque est ipsa in politica sive republica administranda. Prudenter enim ille Princeps facit, qui videlicet cameralibus negotiis & collegiis, quæ consulendi, deliberandi, judicandi potestate instructa sunt, præficit melancholicum. Ad obsequandas vero legationes, ad ducis militum munus, ad professoris officium, ad oratorem longe magis quadrabit cholericus. Ad aulicam vero, politicam vitam, ad concionatorem, historiæ doctorem aptissimi erunt sanguinei. Phlegmatici sanguinem serosum agilitate destitutum possident, hinc ad studia & ingenii virtutes atque bonas artes plane sunt inepti, unde tales homines ad militiam, ad servitia, ad operarias rudes artes sunt relegandi.

XI. Placet jam ulterius vitia & mores prave & bonos ex dictis temperamentis recensere. Observamus nempe melancholicos taciturnos, secretorum capaces, pertinaces tamen & suspiciosos, moribus graves, vitam sedentariam amantes, celebritatem fugientes, invidos, sortitiem amantes, delicias respuentes. Cholerici ad alios fallendos, circumveniendos valde apti, ingeniosi, non facile ferunt superiorem, ad seditionem, certamina, inimicitias prompti sunt, facile irascuntur, vindictæ cupidi, quem amant vehementer amant, quem odio habent vehementer hunc persequuntur. Sanguinei contra ad luxum, voluptates, ad magnificentiam, pecunias consumendas valde prompti, injuriarum obliviosi, benigni, mites, affabiles, suaves, in conversatione inconstantes, leves, petulantes, novarum rerum cupidi, arcanorum propalatores, potatores, lutores, veneri addicti, non suspiciosi, facile fidunt. Phlegmatici subdoli, timidi, sordidi, crudeles, suspiciosi, honorum non amantes, humilis & abjecti animi.

XII. Perspeximus hætenus mores & vitia, quatenus proveniunt ex sanguinis motu celeriore, tardiore, moderato & imbecilliore. Verum enim vero cum in mechanicis non modo ad virtutem moventis ipsiusque motus gradum respiciendum sit, sed & ad mobile & ad mobilis materiæ magnitudinem, hinc etiam non inconsultum erit, effectus circuli sanguinis, qui ab ejus copia vel ejus paucitate fit, in animo modificando describere. Nam uti longe alia est ratio aliisque effectus istius motus, ubi mobilis

*Melan-
cholici à
veteribus
sapientissi-
mi dicti.*

*Ad quæ
studia me-
lancholici
magis sunt
dispositi.*

*Ad quæ
cholerici.*

*Et san-
guinei.*

*Ad quæ
nam nego-
tia melan-
cholica sunt
eligendi.*

Cholerici.

*Sangui-
nei.
Phlegma-
tici.*

*Mores præ-
vi & boni
melancho-
licorum.*

*Cholerico-
rum.*

*Sangui-
neorum.*

*Phlegma-
ticorum.*

Effectus
cholericus
sanguine
abundan-
tis.

Melan-
cholici.

Sanguinei.

Ætas alte-
rat fibras
corporis.

Mores
puerorum
& adoles-
centium.

Juvenum
& viro-
rum.

Senum.

Ær & vi-
ctus di-
versos
alios inge-
nerant
animo mo-
res.

Quod af-
firmant
sententia
quorum-
dam.

Ær maxi-
me immu-
tat ingenia
& corpora.

major moles & copia est, quam ubi minor ejus quantitas: ita etiam in corpore redundat alia virtus in animum ex motu sanguinis copiosi, alia ex motu paucioris, ideoque observamus, si cholericus sanguine abundat, omnes ejus animi actiones vehementiores atque impotentiores esse. Quare majus robur, vigor, animositas, virtus, generositas, soliditas animo increfcit, quæ omnia remittunt, si exilior fit sanguinis in venis copia. In melancholicis copiosus & crassior sanguis hærens in cerebri anfractuosis tubulis, majorem fixitatem idearum, speculationem de rebus profundiorē majoremque constantiam imo pertinaciam producit, ac si parcius ejus quantitas, tunc timor locum habet. Passiones quoque magis in sanguineis crescunt sub copia sanguinis quam sub ejus defectu, utpote hic facit timidos, minus fortes, fluctuantes, inconstantes.

XIII. Ulterius edocet experientia, sub mutatione ætatis, quæ mirifice alterat fibras corporis, quæ motus instrumentum sunt, varias mutationes non modo in corporibus, sed etiam ratione morum, inclinationum, virtutum, vitiorumque contingere. Prima ætas ordinario multas actiones communes habet cum phlegmaticis & sanguineis. Pueri enim & adolescentes voluptatibus gaudent, cura sunt vacui, otio & somno indulgent, sunt negligentes, incauti, dulcibus delectantur, memoriaque gaudent. Ratio in procinctu est; partium quippe solidarum fibræ motrices, quæ fluida impellunt, laxiores & humidiores sunt, sanguis vero cum sero roscidus, dulce, temperatum & fluxile est. In juvenili & virili ætate crescit spirituum copia, humorum adest acrodo, fibræ musculorum strictiores, ficiiores, sensibilioresque evadunt, unde majori robore pollent fluida impellendi. Qua de causa ambitio, ardor animi, ingenii vigor, ad agendum promptitudo, audacia, superbia hac in ætate regnare solent. Senes vero ob fibrarum duritiem & immobilitatem spirituum & virium decrementum, humorumque crassitiem, circuitum sanguinis possident tardiorē, unde hi timidi, pertinaces, avari sunt, vitam item sedentariam diligunt, voluptatem spernunt, judicii robore abundant, somno carent.

XIV. At vero non tantum ætates, quæ magnam differentiam corpori inferunt, mutant hominum mores, verum etiam ipse ær, ipse victus diversus plane alios ingenerat animo mores & dissidentes propensiones. Unde curiosa est observatio, ratione plagarum & climatū mundi non modo corpora, sed & penitus mores ac animos gentium mirifice inter se differre. Ad comprobendam hanc sententiam, in medium placet adducere auctoritates clarissimorum virorum. VEGETIUS l. 1. c. 2. prodidit: *plagam cæli non tantum ad robur corporum, sed animorum quoque plurimum valere*. Cui non absimile BALDI JCTI dictum: *Ingenia hominum fieri deteriora vel meliora ex æris dispositione*. Eo spectat CURTIUS l. 8. *Ingenia ubique locorum situs formant, & POLYBIUS l. 4. Ita natura comparatum est, ut cælo habitationis consimiles evadamus*. Et ARISTOTELES Problem. 4. §. 14. *Optima temperies æris non corpori solum, verum etiam hominis intelligentiæ prodest, decessus autem omnes ut corporis, ita etiam mentis temperamentum pervertunt*. SENECA in consol. ad Helv. l. 1. c. 6. *Ingenia hominum ad similitudinem cæli sunt formata*.

XV. Aërem vero, qui sub climatibus & plagis variat, tanta gaudere potentia ingenia corporaque immutandi, rationi admodum conveniens

est. Aër enim sapienter scribente HIPPOCRATE lib. de flat. §. 4. *maximus est in omnibus, quæ corpori accidunt, & autor & dominus*, utpote spiritus ille est, quo vivimus & qui, ut HIPPOCRATES ait, *sensum & motum præstat membris & prudentiam cordi subministrat*, vid. lib. de morbo sacro §. 8. Nam principium illud, quod movet artus & musculos corporis, materiale, non aliud quam fluidum illud aëreo-æthereum elasticum magnæ potentiae est, quo nullum animal carere potest. Qualis itaque solet esse ær, tales & spiritus corporis, tales & partium solidarum & exinde fluidorum motus. Aër purus, serenus, liquidus, temperatus temperatum sanguinis efficit motum & temperaturam corpori conciliat. Aer nimis frigidus & constrictus condensat humores, duriores efficit solidas partes, adeoque robusta corpora gignit. Nimis subtilis rarefactus & calidus nimium dissipat humidum, exsiccat fibras, & corpora imbecilliora ficiioraque reddit. Cælum turbidum, ær crassus, humorum redundantiam impuritatem & motuum languorem causatur.

XVI. Ut autem hæc illustriora evadant, & melius stabiliatur nostra sententia, experientiam optimam veritatis parentem consulere placet. Et primum illos populos considerabimus, qui in plagis sibi oppositis, natura distinctissimis, habitant. Notum est ex physicis geographis, cælum septentrionalium regionum esse frigidissimum, aërem valde rigidum & condensatum, in plaga vero meridionali & juxta æquatorem aërem esse calidissimum valde subtilem atque rarefactum. Jam videbimus, quomodo differant corpora & ingenia in diversis hisce plagis ventia. Audiamus autem VITRUVIUM, qui in hac re declaranda imprimis egregius fuit. Hic lib. VI. c. 1. scribit: *sub septentrionibus nutriuntur gentes immanibus corporibus, candidis coloribus, directo capillo & ruffo, oculis cæcis, sanguine multo, quoniam ab humoris plenitudine cælique refrigerationibus sunt conformati. Qui autem sunt proximi ad axem meridianam (hyperbolice Zonam torridam vocant) subiectique solis cursui, brevioribus corporibus, colore fusco, crispo capillo, oculis nigris, cruribus invalidis, sanguine exiguo, solis impetu perficiuntur*. Hæc de corporis dispositione & habitu. De animo idem adjicit; *in meridianis regionibus propter sanguinis exiguam timidiores nasci, tolerantiores vero ardoris febrium, quod illa corpora cum fervore sint nutrita*. Et interjectis nonnullis: *propter tenuitatem cæli meridianæ nationes ex acuto fervore mente expeditius celeriusque moventur ad consiliorum cogitationes, septentrionales vero nationes infusa crassitudine cæli propter obstantiam æris humore refrigeratæ stupentes habent mentes*.

XVII. Recensemus vero inter septentrionales imprimis Suecos, Norwegos, Danos, Lithuanos, Livonos, Moscovitas, Anglos & Scotos. De hisce populis observamus, quod habeant corpora procera, obesa, robusta, coloris candidi ossaque magna. Aër quippe frigidus constrictus externe corpora ambiens, impedit exhalationem humidi & calidi, in quo vita & nutritio consistit. Præterea strictiores efficiendo poros solida & dura membra reddit, compingendo invicem partes, unde robur & durities fibræ accedit, pinguedo non dissipatur, sanguis colligitur, & succulenta fiunt corpora candidi coloris, qui frigiditatis signum est; nam nimius calor adurendo candorem extinguit.

XVIII. Propter ingens corporum robur, sanguinisque copiam & vires unitas, fortes

Qualis ær
tales spiri-
tus corpo-
ris.

Effectus
aëris di-
versi.

In plaga
septentrio-
nali frigi-
dissimus
aër in me-
ridionali
calidissi-
mus.

Sententia
Vitruvii
de corporis
dispositio-
ne.

Ut & de
animo.

Quinam
sint sep-
tentriona-
les gentes.

Eorum
corpora

Illorum
animi.

& bellicosi sunt hi populi, metus enim fit ex minori sanguinis copia & spirituum. Egregia sunt, quæ circa hanc rem annotat ARISTOTELES, l. 2. de part. c. 4. ita scribens: *Quorum animalium sanguis fibræ multis & crassis refertus, illa animosa & furibunda sunt; solida vero omnia, quando calefacta sunt, vehementissime calefaciunt. ex quo fit, ut tauri & apri animosi, iracundi furibundique sint, sanguis enim eorum fibræ refertus est.* Robur corporis sanguinis viriumque copia animo etiam infundunt robur, fervorem & audaciam, unde non meliores milites dantur populis, qui habitant ad septentrionem. Elegans locus est, quem BODINUS habet in *method. hist.* ita scribens: *Imperia versus austrum propagata semper fuerunt, vix ab austro versus septentrionem. Sic Assyrii Chaldaeos, Medi Assyrios, Græci Persas, Parthi Græcos, Romani Pænos, Gothi Romanos, Turcæ Arabes, Tartari Turcas frugerunt. At Romani ultra Danubium progredi noluerunt. Galli ab Anglis sæpe victi, Angli ab Scotis. Omitto Gothorum, Scytharum, Hunnorum incursiones & infinitis ea res probari potest exemplis. Atque illud est, quod Prophetæ toties ab aquilone bella minentur, quod intelligendum est de iis, qui à gradu 45 usque ad 75 habitant. Cæteri, qui ultra habitant, nimio frigore peruruntur: Addimus & hoc, quod horum populorum corpora aspera & dura ad injurias aëris & tempestates non facile alterentur, & hinc labores ac vigilias sustinere diutius possint. Sunt etiam ingenia eorum immanueta. Præclare SENECA de ira lib. 2. c. 16. In frigora septentrionemque vergentibus immanueta sunt ingenia suoque, ut Poëta inquit, simillima cælo.*

XIX. Præterea septentrionales gentes præ australibus, & qui præcalidas regiones incolunt, hoc habent peculiare, quod sint fœcundiores, longæviores quoque cæteris mortalibus. Notum est ex historicorum veterum monumentis, à septentrione versus austrum colonias ubique deductas & populos inde disseminatos. Fœcunditas enim ex sanguinis laudabilis copia oritur, qui si præsens est, & succum roscidum seminalem abundantem suppeditat, & in matribus nutritium optimum succum subministrat, longævitas vero ex fibrarum robore spirituumque ac virium copia pendet. Observatione dignissimum est, quod idem BODINUS l. 3. *theatri naturæ*, scribit, *in regionibus australibus mulieres quadruplo numero superare viros, in regionibus aquilonaribus virorum numerum aut superare fœminas aut illis æquare.* Ratio est, quia mares à robustioribus, fœminæ ab imbecillioribus procreantur. Sic HERCULES fertilissimus mares suscepit 72, unam tantum fœminam. ACHABUS Rex Samariæ 72 quoque liberos virilis sexus, GEDEON Hebræorum Princeps filios 71, nullam omnino fœminam procreavit.

XX. Notandum est, quod in septentrione nati & educati non ita sint malitiosi, quam australes & calidarum regionum incolæ. Certe malitia in proceritate corporis minus moratur. Non male olim Cæsar Antonium & Dolabelam obesiores minime timebat, Brutum vero & Cassium, à quibus occisus fuit, reformidabat. Quo fit, ut pene ab omni memoria Scythæ, Germani, Scoti, Helvetii ad custodiam Principum fuerint adhibiti. Rationem si quærimus, hæc dari poterit: Malitia perficitur multis subtilissimis inventionibus & artibus, ad quas texendas opus est ingenio, ingenium vero poscit spiritus subtilissimos, quibus ob inclementiam &

rigiditatem aëris nationes hæc destituuntur. Quicquid enim corporibus hic accedit, menti decedit. Nam paulo stupidiore & non valde ingeniosi sunt populi hi omnium consensu & experientia teste præ australibus ob spirituum & sanguinis crassitiem atque humores adustos. Eleganter enim ARISTOTELES l. 2. de part. anim. c. 2. dicit, *sanguinem crassiores & calidiores concurrere ad efficiendum robur, sed non ad intelligentiam, tenuem vero obtinere vim plenioris sentiendi & intelligendi.*

XXI. Percurramus jam etiam australium mores, qui sicuti regiones, plane sunt contrarii. Nam statum & firmum manet hoc, cœli positionem corporibus habitum & ingenium indolemque dare. Per australes vero intelligimus Afros, Barbaros, Arabes, Persas, Ægypti populos, & qui sub elevatione XXXV. gradus usque ad æquatorem habitant. Hæ gentes, quoniam fruuntur cœlo tenui & subtilissimo calidissimoque aëre, sanguinem valde acrem sulphureum adustum habent, ubi nimius ardor humidum roscidum ex corpore dissipat, & spirituosas partes, quæ stabilimentum virium sunt, consumit. Eam ob causam corpora minus plena & obesa sunt, sed parva, sicca, macilenta, debilia, coloris fusci, oculis nigris, crispo, duro & nigro capillo. Ossâ habent exiliora, tenuiora, quare ob imbecillitatem corporum minus ad militiam apti & laboribus injuriisque aëris sustinendis idonei, bellicosi & fortes non sunt, sed timidi ob paucitatem sanguinis & fibrarum, quibus vis est motrix, teneritudinem. LIPSIVS in not. Senec. ita scribit: *Hispani, Galli, Afri, Syriæque populi, molles bello, antequam legio visatur, cedunt, opportuni ad iracundiam & agendum illis corporibus & animis delicias, luxum, opus ignorantibus, da disciplinam, necesse erit nobis, Romanos repetere.*

XXII. Ulterius australes populi minus sunt fœcundi, quia calor nimius dissipat rorem dulcem, qui seminis materiam constituit, & infantis nutritioni inservit. Eam ob causam videmus, fœminas Indiæ, Africae, Ægypti non ultra duos vel tres parere liberos, quod etiam in australiore Hispaniæ parte accidit. Salaces vero sunt hi populi omnes, unde mares etiam in Hispania 16 etiam anno, & 14 fœminæ conjugium ineunt, & vaga libidine mire agitantur. Quæ salacitas fit ob acrimoniam lymphæ stimulantem humores, quippe ob æstum prænimium acres & falsi fiunt; nec inepte salacitas à sale derivatur. Inde olim sacerdotes Ægyptii castissimi omni sale abstinebant & insulso pane utebantur. Venus etiam dicitur cum spuma nata.

XXIII. Deinceps australes populi his moribus præditi. Sunt ad rem attentissimi, timidi, crudeles, tristes, solitarii, mollitiarum studio si, stupidi. Sanguis nempe nimio calore adustus crassus fit & iners, & spiritibus dissipatis motus fit tardior & imbecillior florum, unde fluit dictorum vitiorum origo. Sunt vero infidi, astuti, malitiosi, inconstantes ob spirituum nimiam tenuitatem & mobilitatem. LIVIUS l. 3. dec. 5. dicit, *Afram gentem ad omnem auram spe mobili & infida mente existere.* Et VIRGILIO l. 1. Æneid. Tyrii, qui Afri sunt, *bilingues i. e. fallaces* vocantur, ut explicat SERVIUS ad vers. illum: *Quippe domum timet ambiguum Tyriosque bilingues.*

Græci dicuntur ingenio & facundia præstantes, assentatores, leves, & infideles. Cappadoces, Cilices, Cretenses suapte ingenio fraudulentissimi

Quinam per australes intelligantur.

Quare illorum corpora minus sint obesa &c.

Quare australes minus sint fœcundi.

Salacitas derivatur à sale.

Mores australium.

Septentrionem incolentes sunt optimi milites.

Septentrionales gentes sunt longæviores & fœcundiores australibus.

Unde fœcunditas. Unde longævitas.

Quare septentrionales non ita sint malitiosi quam australes.

Unde malitia.

& mendaces, in quorum notam Græcum illud est *αἰσὶα κα' ππα κα' νισα*, ac de Cretensibus omni exceptione majorem habemus testem D. PAULUM in Ep. ad Tit. c. 1. Dixit quidam ex iis proprius ipsorum propheta: Cretenses semper mendaces, malæ bestię, ventres pigri, quod ex EPIMENIDE sumtum est.

XXIV. Mediarum regionum incolæ & qui sub zona temperata vivunt, maxime ii, qui sub elevatione poli gradus 53 usque ad 42. degunt, & in Europa inprimis Angli, Germani, Galli, Hispani, Itali, Græci, Hungari, Turcæ Europæi meliori ingenio fruuntur, & sapientiores reliquis nationibus sunt. Temperatura enim caloris & frigoris optimum habitum corporis & sanguinis efficit, & temperatus sanguis sapientiam etiam ipso HIPPOCRATIS effato conciliat. Quare observamus, studia & artes subtilissimasque disciplinas non alibi excelsius floruisse, quam dicto in climæte. Itali pictura, architectura, musica præstantissimi, Hispani profundæ speculationis sunt in moralibus & philosophicis, Angli in Theologia morali, Metaphysica & inventione artium mechanicarum, Galli præstantissimi oratores sunt, politici, Anatomici & Chirurghi, Germani optimi Chymici, Medici, Jurisconsulti, Mechanici, plurimas quippe inventiones ipsis debemus. Suffecerit tantum meminisse pulveris pyrii, typographiæ, tuborum optidorum, præstantissimorum experimentorum physicorum, chymicorum, e. g. phosphori, vitri rubini, artis metallurgicæ & fuloriæ, tormentorum bellicorum, medicamentorumque optimorum. In Græcia olim sapientiam habitasse notum est. Quapropter hæ regiones ob ritus humaniores, mira semper fecunditate ingenia protulerunt, legislatores sapientissimos, æquissimos judices, philosophos subtilissimos, principes mathematicos, disertissimos oratores; & præstantissimos poëtas.

XXV. Temperatæ quoque regiones ob cœli clementiam & aëris temperaturam disponunt egregie ad virtutes, quas mediocritas & temperies ex communi philosophorum sententia semper commendat. Quapropter Germani, Galli, Itali, Cumani mites, affabiles, boni & honesti, misericordes & aliis clementiores sunt. De Asia scribit LIVIUS l. 23. c. 34. Asia mitissimo cœlo, igitur & clementibus accolæ sunt ingeniis. Et THEVENOT. l. 1. p. 84. itin. Turcas non crudeles homines, sed mites, non avaros, sed principi fideles & temperantes æstimat. Italos inprimis Genuenses & Lucenses esse indolis ingenuæ modestos, humanos, affabiles, mites ingenio, subtile, Germanos misericordia & humanitate, candore, ingenio quoque omnes fere nationes superare, quis ignorat?

XXVI. Tandem etiam discrimen observatur inter populos, qui ad orientem & occidentem habitant. In oriente aër subtilior, siccior, serenior, in occidente est humidior, unde orientalium corpora ficciora, macilentiora & sensibilia sunt, pinguiora & crassiora occidentalium. Nam aër siccus & calidus acutiores reddit mentes, refrigeratus tardiores. Chineses ingenio acuto multis gentibus præferendos esse, illorum inventiones in opificiis mechanicis abunde testantur. Eosdem ob ingenium subtile magnos lufos & mercatores esse, notum est. Circa occidentales & omnes eos, qui insulas occidentales vel loca maritima colunt, notandum, quod crassiora corpora gerant, & ad rem nauticam, & naumachiam

aptissimi sint, testantibus id Suecis, Norwegis, Scotis, Anglis, Batavis, Lusitanis, Gallis. Inter hos vero omnes excellunt Batavi. Ratio nobis hæc videtur, quod cœlum humidius impressionem etiam animo faciat ad amorem maris & aquarum, ut lubentius fere ibi, quam in terris habitent, unde nautica arte excellunt omnes. Ingeniose FLORUS l. 2. c. 4. ait, *Alpina corpora humenti cœlo educata habent quiddam simile cum nivibus suis*. Videmus nempe populos versus orientem & meridiem degentes plane inidoneos esse ad navigationes, unde mari bellum gerere & classem navium instruere nesciunt. Robustiora occidentalium sunt corpora, nutritio enim amat humidum & animalia quoque, equi, boves, vaccæ sunt longe grandiora & obefiora, maximamque copiam lactis fundunt, testantibus id butyro & caseis Hollandicis, Suecicis, Anglicis, Frisiis, Cimbricis. Humoribus vero in corpore abundantia ut obtundit mentis vires, ita hi populi stupidiores sunt iis, qui versus austrum & orientem habitant, quod etiam valet de animalibus. Constat enim equos Hispanorum, Turcarum, Arabum, Persarum breviores quidem & macilentiores, sed longe celerioris activitatis ac docilitatis esse Danicis, Frisiis, Cimbricis. Neque climata tantum homines, sed ipsa quoque animantia efficiunt eorumque actiones disponunt.

XXVII. Maximam esse potentiam cœli & aëris in corpus, sanguinem ejusque motum adeoque in mentes hominum, demonstratum habet. Verum quum non modo aër sanguinis habitum & circulum disponat, sed & ipse victus; hinc nullum dubium, quin & hic ipse in mentem, ut in corpus agat, nec levem mutationem ibi efficiat. Multum enim confert ad motum progressivum circularem, qualis indoles & conditio fluidarum & mobilium partium sit, quæ materiam & nutrimentum à victu accipiunt. Victus enim durus ex induratis & salitis carnibus & piscibus, fabis, pisces, panem crassiore non alium nisi crassum, densum, viscidum sanguinem corpori ingenerat, unde ossa solidiora, crassiora, fibræ duriores fiunt, sed mens stupidior. Potest hinc dari ratio, quare non modo ob aëris rigiditatem, sed & victum duriorum septentrionales validiora corpora gerant, & hinc belliciores sint ipsis australibus.

XXVIII. Eam ob causam in Germania magna datur differentia hominum respectu corporum & animorum. Conspicimus nempe Pomeranos, Mecklenburgicos, Westphalos, Brunswicenses, Marchicos, Hassos, Julienses optimos esse Germaniæ milites, adeo ut à ducibus præ omnibus aliis æstimentur. Ratio in procinctu est. Fruuntur victu duriorum, qui corpus firmum & robustum reddit & laboribus aërisque injuriis tolerandis aptum; nec luxui assueti sunt, sed frugatiorum, inde bello optime inserviunt. Adimus & hoc, quod sanguis ex hoc victu promanans copiosus & crassus, fortes constantes hominum animos efficiat. Ineptiores bello observantur Misnici, Suevi, Austriaci, Thuringi, Silesii, quia sunt mollioribus tenerioribusque cibis assueti, otioque & somno dediti, qualis victus effœminatum animum teneriusque corpus reddit. Ex adverso vero animadvertimus, hos omnes acutioris & subtilioris ingenii esse quæ Pomeranos, Westphalos, Cimbros reliquosque.

XXIX. Ad sanguinis laudabilis copiam confert multum carniarum recentium & jusculorum inde

Inter eos excellunt Batavi.

Corpora occidentalium sunt robustiora.

Quare hi populi alii sunt stupidiores.

Victus magnam mutationem corporis efficit.

In Germania magna differentia hominum respectu corporum & animorum.

Ad sanguinis laudabilis

*Silesii ad
labores
non sunt
idonei.*

Quibus in
locis cres-
cat opti-
mum vi-
num.

Populi;
qui vino
utuntur,
sunt reli-
quis longe
ingenio-
siores.
Vires vini.

Vitia vini.

Quare
Turcæ &
Persæ sint
fideles.

Cerevisia
spiritus vi-
ni & taba-
cum de-
struunt vi-
tam.

XXXI. Cum itaque tanta sit vis aëris, alim-
entorum solidorum & fluidorum in corpora in-
geniaque hominum, facile exinde discimus, Bonadiata
bonam diætam, convenientem rerum non natu- *potest mu-*
ralium, imo medicamentorum usum ingenii etiam *tare inge-*
viri mutare posse. Rectissime concludit HIPPO- *nii vim.*
CRATES l. de diætâ I. §. 32. & sane hoc faciens
K (b. c.

K

(b. c.

copiam
multum
confert
carnium
esus.
Qualem
sanguinem
foveant
Hispani &

Australes.

Itali.

Alpinarum regionum ac-
colæ.

Angli &
Sveici.

*Anglorum sensit virtutem Gallia semper.
Ad Galli cantum non fugit iste Leo.*

Et HERODIANUS vocat illos gentem bellicosissimam atque avidissimam cædis l.3.c.14. §.14. Scoti quoniam tam delicato victui non assueti sunt, ut Angli, hinc uti vocant, sunt melancholici, in bello strenui & nunquam victi, factorum non minus ac injuriarum tenaces. Unde videre est, familias antiquissimas vadimonio mutuo ad difficultates redactas. De ingeniis exercitatissimis Scotorum judicium non erit arduum, qui Bellendenos, Cardanos, Barclajos, Burnetos, Ridæos, Sibaldos, Melinos, Lesleos, Magillos, Neperos & tot alios longe clarissimos musarum alumnos noverit. *Buchananum* certe nominasse suffecerit, qui solus etiam, si sterilis alias studiorum fuisset patria, illam divino ingenio illuminare potuisset. Asiaticis & Africanis est oryza, ex qua panem conficiunt, frequentissimis cibis, præterea carnibus leviter assatis & dulcibus fructibus utuntur, à spirituoso autem liquore omnes fere abstinent, & cum nimius æstus dissipet spirituosas sanguinis partes reliquasque adurat, hinc timidi, subdoli, molles, otiosi, ingenio stupidi, bello inepti & ad servitia

Frid. Hoffmanni Oper. Tom. V.

Frid. Hoffmanni Oper. Tom. V.

Scoti sunt
melancho-
lici.

Constitutio
corporum
Asiatico-
rum &
Africano-
rum.

Verba
Cartesii.

(*b. e. tali dieta & medicamentis utens*) *sanior & sapientior anima fuerit. Et ibid. sect. 36. §. 33. Potestque ex dieta & melior & deterior anima fieri. Pulchra sunt, quæ scribit in hanc rem* CARTESIUS *diff. de methodo §. 6. Animus adeo à temperamento & organorum corporis dispositione pendet, ut, si ratio aliqua possit inveniri, quæ homines sapientiores & ingeniosiores reddat, quam hætenus fuerunt, credo illam in medicina quæri debere.*

Explicatio
veterum
de tempe-
ramentis
nullius est
momenti.

Unde di-
versitates
naturæ
humana
sint dedu-
cenda.

Res exter-
na corpo-
rea non
passive tan-
tum se ge-
runt, sed
etiam acti-
ve.

Circuli
sanguinis
cognitio
non sufficit
ad expli-
candum
mores ho-
minum.

Ad quos
morbos
cholericis
inclinant.

XXXII. Ex dictis & adductis hætenus illud concludendum esse arbitror, primo, quod animi mores, ingenii vires, propensiones ad vitia & virtutes utique optima ratione ex statu sanguinis, prout ille differt temperie, mixtione & motu, deduci & explicari possint, adeoque ad hominum affectus exponendos opus sit doctrina physico-medica de natura humana. Secundo discimus ex superioribus, quod Veterum explicatio de temperamentis, dum ea distinguunt in sanguineum, phlegmaticum, melancholicum, cholericum & ex quatuor humorum vel elementorum mixtione ea deducunt, nullius sit momenti neque sufficiens, sed naturæ humanæ diversitates ex circulo sanguinis commodissime exponendæ sint. Qui circulus, prout differt respectu virium motricium seu spirituum, respectu vasorum, quæ viæ sunt motus, respectu fibrarum, quæ instrumenta sunt motus, fit ille vel celer vel tardus, vel temperatus, vel magnus aut parvus, debilis vel vehemens & pro differentia hujus motus differentia inclinationum & morum animo ingeneratur. Tertio ex præcedentibus etiam clarum est, res externas corporeas non passive se tantum gerere respectu animæ, nec mere sub imperio ejus esse: sed causas valde activas existere, quæ mirifice ex se & sua natura & necessitate quadam alterare non modo corporis, sed & animi habitum possint, unde exquisita rerum corporearum physica & mechanica scientia non modo ad medicinam rationalem, sed & philosophiam moralem sanio-rem summe est necessaria, adeo, ut Medicus hac destitutus pure empiricus, voce bono sensu accepta, maneat. Quarto: perperam agunt, qui existimant, circuli sanguinis cognitionem ad explicandos mores hominum esse sufficientem & tantum in conjectandis hominum affectibus ad temperamentum respiciendum esse. Nam utut non negemus, naturalium propensionum fundamentum in hac re consistere, attamen cum & educationis, consuetudinis, institutionis necnon dispositionis hæreditariæ magna sit in propensionibus corrigendis vis; hinc optime ille facit, qui deditus est studio sapientissimæ doctrinæ moralis, quæ animum hominis cognoscere docet, ut simul ad dictas res attendat & hæc invicem probe conferat; alias in prædicendo & conjiciendo mirum quantum decipitur.

XXXIII. Perspeximus hætenus, fundamentum morum in circulo sanguinis ejusque motu positum esse, jam instituti ratio exigit, ut brevissime etiam dicamus, qua ratione circulus humorum diversus disponat etiam ad ipsos morbos. Et ut exordiamur à cholericis seu iis, qui circulum sanguinis celerem & vehementem habent, constat observatione practica, quod ad morbos similis indolis, nempe cum impetu junctos inclinent, v. gr. ad tertianas, continuas, intermittentes, febres ardentes biliosas & cholicas, deinde ad inflammationes, pleuritidem, phrenitidem, erysipelas, anginam, ophthalmiam, hæmorrhagias narium, hæmopty-

sin & inde propullulantem phthisin hæcticam, inflammationem hepatis ventriculi ac intestinorum. Idem ad vomitum, diarrhoeas, colicam biliosam, purpuram, arthritidem vagam, cephalalgiam acutam proclives sunt. Et quoniam in ætate juvenili & virili, item in regionibus præcalidis & australibus, nec non à victu calido & aromatico, vini potu similis motus celer nempe sanguini conciliatur, hinc etiam fit, ut tam ætas juvenilis & virilis, quam præcalidum clima & victus similis ad eosdem morbos corpora disponant.

XXXIV. Melancholici, in quibus sanguis crassus difficulter movetur, propendent ad morbos chronicos, qui à tali causa foventur, nempe à tardiori sanguinis per caput viscera & abdomen progressu. Itaque proni sunt ad malum hypochondriacum, obstructions hepatis & lienis glandularum, viscerum obturationes, scorbutum, ulcera, alvi adstrictionem, calculum, podagram fixam & nodosam, melancholiam, hæmorrhoides cæcas & suppressas, hemicraniam, icterum nigrum, siccam scabiem, herpetem & pathemata hysterica spasmodica. Et iisdem quoque morbis afficiuntur septentrionalium regionum incolæ atque provectioris ætatis, nec non qui victu duro crassoque utuntur, acidiisque delectantur.

XXXV. Sanguinei ob temperatum sanguinis motum, victum lautio-rem, sedentariam vitam variasque voluptates colligunt sibi excessivam sanguinis copiam, quæ non sufficienter moveri potest, præsertim, cum præditi sint ut plurimum habitu corporis laxiore spongiosiore, vasorum multitudine, exilitate atque fibrarum musculosarum laxitate. Hinc sanguinis stagnationes fiunt in illis, & incurrunt inde inflammationes nempe ophthalmiam, pleuritidem, nephritidem, peripneumoniam, empyemata, abscessus, apostemata, narium hæmorrhagiam, phthisin, dolores lumborum, fluxum hæmorrhoidalem, dolores ex calculo articulorum, cephalalgias, odontalgias, otalgias, scabiem humidam, febres sanguineas fynochas, apoplexiam & asthma. Et similes quoque effectus conspiciuntur in iis, qui laute & intemperantius vivunt, temperatasque regiones incolunt.

XXXVI. Phlegmatici, quorum sanguinis motus, debilis, languidus & quibus serum magis quam sanguis in venis residet, ad catarrhos, rheumatismos, coryzam, alvi fluxum, *ἀνέμειον*, passionem colicam, sphacelum, cachexiam, anasarcam, hydropem ascitem, febres quotidianas, putridas, verminales, petechiales, animi deliquia, apoplexiam pituitosam, paralyfin, glandularum tumores, defluxiones serosas, epiphoram, & fluxiones oculorum, genitalium putredinem, gonorrhoeam, fluorem album valde sunt proclives. Adjuvant hæc mala ætas puerilis, aer valde humidus, cælum densum crassum, vaporibus repletum, tempestas diuturna humida & otiosa vita.

XXXVII. Clarissime perspicimus ex dictis, morborum dispositionem atque fundamentum petendum esse ex hominis natura vel temperamento, seu rectius ex mechanismo corporis, sive clarius ex circulo sanguinis. Verum enim vero opponere quis posset, quod plures dentur homines, qui tali temperamento præditi sint, & raro tamen quis inveniatur, qui tali malo corripiatur. Cui dubio respondemus, quod temperamenta quidem disponant ad morbos hos, exinde tamen minime sequi, ut causæ sint proximæ,

Quosdam
morbos
melancholici patiuntur.

In quosdam morbos incurrant sanguinei.

Ad quæ mala phlegmatici sunt proclives.

Morbosum dispositionem unde petenda.

Obiectio.

Responsio.

ximæ, quas pressio pede sequi debeant effectus. Una vero causa remota, quæ disponit corpus, non sufficit, sed plures simul conspirent necesse est in eundem effectum producendum. Quapropter si quis cholericus constitutus sit in ætate puerili, non incurrit hos morbos, si quis fuerit in ætate juvenili, non utitur vero aëre calido & à cibis calidis abstinet, neque tum incurrit morbos dicti temperamenti. Quod si vero dicto temperamento clima calidum, æstus, ætas juvenilis calidorumque usus associantur, tunc non evitabit morbos, qui adscribi solent huic temperamento.

Quomodo
medica-
menta sint

XXXVII. Postremo ex omnibus, quæ attulimus, clarissimum jam erit differre quoque

pro natura locorum, temperamentorum & victus, ^{propinanda.} ipsa medicamenta & alio opus esse in nimia sanguinis copia, in ejus motu præcipiti & vehementi, alio in tardo & debili & alio in Gallia, alio in Suecia, alio in Germania. Alio modo tractandi sunt, qui duro & crasso cibo, aliter, qui lautiore victu fruuntur. Unde patet, eos, qui medicinam universalem crepant, non intelligere naturam artis nostræ, sed inter rudes plane & deceptores numerandos, utpote in eo artis & scientiæ nostræ indoles posita est, ut distinguamus naturas hominum, morborum causas, remediorum vires & pro horum differentia prudenter ordinemus & dirigamus eorum usum.



D E

RATIONIS INSTRUCTÆ EXCELLENTIA IN REBUS DIVINIS ET HUMANIS.

O R A T I O

Dicta in actu solenni promotionis

AN. CIOIOCCIV.

Quoties in hoc loco publico coram vobis, splendidissimi Auditores, mihi nata fuit occasio differendi, illud semper inivi consilium, ut seligerem ex foro meo materiam, quæ utilitate, claritate & perspicuitate sese commendaret, captuique vestro esset accommodata. Atque in hoc expertum me fuisse vestrum favorem ac benevolentiam, neque injucundum differendi argumentum exstitisse, compluribus ex rationibus persuasus fui. Hodierno die, quum actus publici causa, & consuetudo & ratio postulet, verba ad vos facere, constitui ex alieno foro, quod mihi concedere velitis materiam, prænobilem pertractare: materiam in qua in qua fundamentum omnis eruditionis, & unicæ veritatis genuinum versatur. Dicam videlicet de excellentia rationis bene institutæ, ejusdemque tam in rebus divinis, quam in humanis usu multiplici. Quod argumentum, quoniam ad eos maxime pertinet, qui litterarum sacris operantur, qui eruditionem, veritatem ac sapientiam colunt: non injucundum vobis, vel infructuosum futurum, judico. Quapropter ut benevolentiam, attentionem & animum mihi dicturo, idque per brevissimum temporis spatium, accommodetis, est quod à vobis summo-pere peto atque contendo.

Non præterire vos posse arbitror, Auditores, quanta dissensio ac disceptatio adhuc fuerit, quanta etiamnum inter maximi nominis & auctoritatis viros vigeat, de humana ratione ejusque exercitio. Theologi in hac sunt sententia, penitus eam post lapsum esse corruptam, vitiosam, & nonnisi errores, tenebras, vitia pravæque cupiditates ex ista generari. Hinc homini, præfer-

Frid. Hoffmanni Oper. Tom. V.

tim in rebus sacro-sanctis, eam esse perniciosissimam, atque proinde fide penitus coercendam, omni contendunt asseveratione. Quidam ex adverso humanam rationem adeo evehunt atque extollunt, ut non modo pro regula & norma cunctæ veritatis habeant, sed & sufficere opinentur, dummodo id homines præstiterint, quod ratio dictitet, ad felicitatem, non temporariam tantum, sed æternam quoque, feliciter obtinendam. Et quamvis revelationes quasdam, ceu fundamentum salutis nostræ supra rationem esse largiantur, solaque fide apprehendendas; nihilo secius nec adversum istas rationi tenere, neque quæ in sacris litteris nobis injunguntur, pugnare cum ipsa, magna sane confidentia propugnant.

In tanto sententiarum dissidio, nemo profecto, quo se vertere debeat, statim reperiet. Faciemus autem nos periculum, an non perspicuitate quadam ac facilitate, quæ difficilia sunt in hac quæstione, evolvere & conciliare hæc invicem sic possimus, ut aperta exinde reluceat veritas. Sed statim hæc ita exordientem subit admiratio, sapientes viros adhuc litem agitare de eo, quod fons exiit omnis justis ac veri, omnisque scientiæ; & quod nondum, quid veri vel falsi insit in hac quæstione, recte statuerint vel deprehenderint. Dissensus vero, qui circa hanc quæstionem ubivis ferme est obviis, satis aperte declarat, hoc argumentum non ita, uti decebat, esse omnibus clarum atque explicatum. Dicam itaque strictim, ni vobis gravis mea dictio fuerit, sententiam meam, vobisque eam dabo æstimandam.

Mea vero semper constans fuit opinio, non indagari in his terris majus bonum, neque ul-

lum in hac universitate præstantius productum esse, quam illud, de quo nunc cœpi dicere, rationis lumen, quovis thesauro pretiosius. Infinitus DEUS, cujus sanctissimum Numen nobis merito venerabile est, nil nisi excellentissima, & infinita ratio est: ipsa vero ratio, quid est aliud, quam sapientia? Quid sapientia aliud, quam mirabilis ordo certum ad scopum tendens? Ordo vero complectitur rerum, quæ in ordinem disponuntur, notitiam, complectitur earum inter se proportionem, complectitur accuratam earum comparisonem, ut jungantur similia, dissimilia separentur. Sed hæc omnia continentur in ratione. Hæc enim omnia dirigit accurate per certam mensuram, numerum & tempus, ad destinatum finem.

Ita excellens DEI ratio, ordo & sapientia elucet luculentissime ex incomparabili totius universi fabrica, quæ nonnisi admirandum ordinem, *συμμετρίαν*, artificium summum, in salutem humani generis tendens, ostendit. Elucet porro summa DEI ratio ex artificiosissima machinæ hominis, omniumque organicorum corporum structura; quin immo omnia profunda, subterranea cœlestiaque non satis prædicare possunt infinitam ejus potentiam ac rationem incomparabilem. Ipse nihil non ratione providet, disponit, ordinat, nihil non ratione tractari atque intelligi vult, dixit TERTULLIANUS. Ordo, quo utitur benignissimum Numen ad lapsum & præcipitatum in miseras humanum genus in integrum restituendum, nonnisi maximam rationem explicat: nec gradus pœnarum damnatis inferendarum, nec felicitatis subsecuturæ fidelibus, erit sine rationis & sapientiæ æquilibrio.

Jam vero DEUM condidisse hominem ad imaginem suam nullus dissensionis locus est relictus: quomodo vero potuerit exactiorem sui imaginem animæ humanæ infundere, quam per ipsum rationis lumen, equidem non video. Neque dubitari poterit in primo homine rationis lumen fuisse abundantissimum, ut omnia condita accurate cognoverit, & comparisonem ac proportionem rerum inter se mutuam invenire potuerit exquisitissime. Optime enim sciebat, quid rectum & verum, quid bonum vel falsum esset.

Libertas autem arbitrii, non amplectentis bonum, tantum in causa fuit ejus corruptionis: nam cum semel constanter animum determinasset ad malum, abstulit justissimus DEUS eam imaginem, abstulit rationis lumen; unde non solum perpetua inclinatio ad malum & vitia, sed & tenebræ ac errores in animis hominum remanserunt. Proinde agnoscimus lubentissime, & profitemur liberrime, naturam humanam ita esse corruptam, ut sibi relictæ & naturalis, sine adminiculo, sine institutione & doctrina, sine lumine alieno, in negotiis humanis, œconomicis, physicis, civilibus, moralibus, plane nesciat, quid verum sit, quidque ad veram ejus felicitatem pertineat. Quis dubitabit itaque, longe magis in ipsis divinis, in mysteriis fidei & religionis, in cultu divino, in judicio de sacris ferendo, per se eam nihil comprehendere, nihil scire, sed plane depravatam, ineptam atque corruptam esse? Atque id est, quod divinæ litteræ locis tam illustribus frequentissime nobis inculcant. Nam quid miserabilius, quam homo sibi relictus, sine instructione, educatione, sine communicatione & sine cultura rationis?

Longe autem diversissime res habet cum ra-

tione humana, quæ probe instructa. Hanc si quis velit rejicere, certe is omnem scientiam, omnem veritatem ex mundo tolleret. Nullum enim aliud benignissimum Numen reliquit subsidium, rationem penitus post lapsum depravatam in pristinum restituendi, quam bonam & fidelem institutionem: utpote remansit lapsis mortalibus facultas quædam naturalis res comprehendendi, & comparandi has ipsas inter se invicem, inveniendique earum proportionem. Relicta quoque sunt principia actionum atque contemplationum, omnibus insita & irrefragabilia, ex quibus veritates apta connexionem duci ac derivari possunt. Relictum est lumen omnibus inscriptum, quod norma justis & injustis sit. Tandem reliquit universalem omnium hominum circa verum & justum consensum, adeo, ut, simul ac veritas fuerit rite demonstrata, protinus quisque ad assensum moveatur, & æterna de veritate sit convictus. Proinde non sine ratione sapientiores Veteres characterem omnis veritatis ponunt in plenaria assensione & convictione hominum.

Remanserunt hæc omnia ex divina gratia in miseriam prolapsis hominibus, ut horum beneficio emergant ex præcipitiis tenebrarum, & veritatis lucem rursus videant, tanquam imaginem, ad quam antea erant conditi. Quid vero sit illud lumen, non inepte venit in questionem? Dicimus itaque rationem sanam, lumen, quo res cognoscuntur, & rerum evidentiam veritatemque, unum idemque esse. Sicuti vero lumen omnia facit clara & perspicua tenebrasque expellit, ita lumen rationis & veritas, in clara & distincta rerum evidentia & cognitione versatur. Et quo plura clare ac evidenter scimus atque cognoscimus, eo lumen animæ majus, & mens, quo magis est instructa scientiis, quo cultior & expolita magis ratio, eo magis est illuminata. Quemadmodum vero porro luminis ea est indoles atque conditio, ut sese in disposito subiecto multiplicet in infinitum, sine diminutione sui: ita etiam tanta est vis ac *ἐνέργεια* omnis veritatis ac luminis, quod inest ratione, ut celerrime se multiplicet in intellectu humano, & sibi similem rationem ac veritatem ibi progignat. Uti itaque lumen producit aliud lumen: ita ratio generat rationem & veritatem. Neque statuendum esse videtur, multiplex esse lumen, quo veritates capimus: tantum differentia est respectu ipsarum rerum. Prout vero multas res accurate cognoscimus & distinguimus, clarissimeque rerum causas ac connexiones & proportionem perspicimus, eo majus lumen in intellectu accenditur, utpote hoc ipsum augeri & imminui posse, extra dubitationem positum est. Et quod attinet ad lumen gratiæ, quod à rationis lumine vulgo distinguere solent, vocatur hoc ipsum ille habitus, quo mens eximios facit progressus in religione, in divino cultu, in pia scientia. Sed, ut verum non dissimulemus, hoc ipsum proprie in se non est diversum lumen, potius luminis, ex verbo divino nati, operatio, quæ ipsam mentem animique interiora penetrat, movet, convertit, & eo dirigit, ut meditetur & æstimare discat ea, quæ ipsum reddunt sanctiorem. Proinde evidens & vera cognitio de rebus, ad religionem, ad pietatem spectantibus, in profano æque ac emendato animo, non differt luminis ratione, neque profani & pii cognitio diversum constituit cognitionis genus. Verum enim vero sum-

mus DEUS, accendit lumen in intellectu, rationemque instituit, erudit ac perficit, tam per verbi revelati claritatem, quam per λογισμὸν humanum, non alio fine, quam ut penetret exinde ad voluntatem, ibique operationem habeat summe salutarem.

Non sine magna ratione itaque Veterum sapientes rationem nuncuparunt lucem, ducem, normam ac regulam voluntatis, ut ducat & dirigat eam in bonum. Neque datur ordinario alius aditus animum hominis sanctum, pium atque devotum reddendi, quam per illuminatum intellectum. Contendit eo omnibus viribus sanctus Spiritus, ut præceptis saluberrimis, non nisi summam rationem spirantibus, instruat atque flectat peccatoris mentem ad bonum.

Quæ cum ita sint, non datur alia, nec melior via hominem convertendi, & ad fanio-rem frugem reducendi, quam per demonstrationem veritatis, & viæ ad bonum, idque per congrua ratiocinia, convictum animum tenentia. Nam is Theologus bene convertit, qui bene demonstrat & connectit divinas veritates; & qui hoc beneficio destitutus est, in cassum plerumque laborat. Deinceps maximum præbet ratio in Theologia usum, si enim veritas datur in rebus divinis, si porro hæreses sunt ac sectæ, nec non errores à veritate deflectentes, sicuti sunt; si autem veritas defendi, si errores ostendi debent; tunc judicate, quæso, Auditores, quo modo ex hoc labyrintho possit quis emergere, & rectam veri viam calcare, præterquam per rectæ rationis lumen, quæ didicit clare ac evidenter falsas res percipere & distinguere, falsas ideas disjungere, connexionem & proportionem invenire, ex veritate una aliam detegere, & idonee hanc proponere. Talis λογισμὸς, seu λόγος & ratio hominis, æternæ veritatis est, una est, simplex, nec corruptibilis, & infinitis modis sese multiplicat.

Uterius omnis eruditionis, omnis scientiæ ac prudentiæ natura, tam in politicis & naturalibus, quam sacris, unice continetur in rationis cultura, circa diversas tantum res; & universi errores, opiniones, dissensiones in disciplinis, nullam aliam agnoscunt originem, quam rationis neglectum: neque ullus doctus, eruditus, vel prudens est, qui non fruatur recta ratione. Porro in gubernandis moribus, in seligendo honesto, & evitando turpi, rationis lumen summa est norma atque regula. Dictitat ratio, Deum esse infinitæ sapientiæ & potentiæ, & infinitum amorem, & non aliud velle, quam ut ratione præditis creaturis semper bene sit. Neque aliud fundamentum & principium omnium legum, quæ cordibus nostris sunt inscriptæ, & quæ nobis sunt revelatæ, deprehendimus, quam publicum bonum & felicitatem singulorum; tendunt enim omnes ad salutem tam animæ, quam corporis, & ad tranquillitatem tam temporalem, quam æternam. Quoniam vero anima non potest esse perfecte felix, nisi unionem atque amicitiam habeat cum infinito atque benignissimo Ente; nec homo in hoc mundo constitutus, tranquille & commode vivere potest, nisi amicitiam habeat cum homine. Hinc ipsa natura & ratio subministrat & docet, societatis cum divinæ, tum humanæ, vincula, quæ sunt fides ac amor mutuus, sine quibus nulla societas, nulla amicitia, nulla

felicitas, nulla tranquillitas vel auxilium subsistere vel stabiliri potest. Amandus proinde est DEUS, amandus etiam est proximus, fidendum est DEO, fidendum est hominibus. Talem fidem mutuam, ac amorem mutuum tot saluberrimis præceptis, monitis, instinctibus suadet natura, ratio, scriptura. Quis non exinde clarissime perspicit, concinnam pulchramque harmoniam, quæ intercedit jus divinum, naturale & revelatum, & nunquam rationi adversa sunt ea, quæ in sacris litteris tradita sunt, & ad componendos mores vitamque instituentem spectant.

Descendit jam nostra meditatio ad ea, quæ externa sunt, & quæ faciunt ad temporalem nostram felicitatem. Attendite, quæso, Auditores, an ad rempublicam prudenter gubernandam ac conservandam aptius inveniatur medium, quam recta & sapiens ratio? Hæc leges cuivis statui aptas atque accommodatas invenit: Hæc noxam & damnum prævidet, eaque debito modo avertit. Hæc ad servandam felicitatem populi utilissimas conquirunt rationes mediaque. Eodem modo res habet in propria cujusvis hominis invenienda & conservanda felicitate, ubi quando non director est actionum, quas instituit, sana ratio, omnia abeunt in damnum & detrimentum. Porro neminem latere arbitror, quam nocentissimis affectibus & præpotentibus motibus, ex sanguine plerumque nascentibus, agitetur sæpenumero animus hominis, neque ad hos coercendos, subjugandos, exquisitius suppetit medium, quam sana ratio, & ex hac profluens virtus. Virtutem ad omnia esse utilem etiam ethnici intellexerunt. Omne autem virtutis fundamentum in eo est positum, ut quis vivat secundum dictamen rectæ rationis, & in firmo atque constanti proposito sit, ea omnia facienda, quæ recta ratio ipsi suadet, nec cupiditatibus suis ab hoc abduci se permittat. Jcti est leges salutis publicæ aptas invenire, eas explicare, & ad certa facta applicare. Id autem unice perficitur recto rationis usu, & frustra jura addiscit, qui non incipit à purgamentis rationis & intellectus sui. Medici munus est cognoscere & distinguere naturas hominum in statu sano & morbo, causas morborum investigare, remediorum vires scrutari, easque prudenter applicare. Sed in hisce omnibus opem unice debet expectare à sano judicio, rectæque rationis usu. Non dicam jam de omnibus iis, quæ in œconomicis & in physicis faciunt ad commodam vitam, ubi attenta ratio omne absolvit punctum.

Demonstrata sic rationis eminentia, devolvimur jam ad ea, quæ faciunt ad ejus culturam perfectionemque. Compendio autem dicimus, excoli rationem ratione. Uti enim lumen in apta materia suscitatur novum lumen; ita ratio peculiari multiplicativa vi accendit rationem. Patet hinc excellentia informationis, quæ partim hauritur ex auditu, partim ex lectione ac conversatione cum sapientibus atque eruditis viris. Maxime omnium huc faciunt præcepta Christianæ doctrinæ & sanioris Philosophiæ, quæ docent veras à falsis distinguere ideas, quæ tradit scientiam numeri, ordinis & proportionem, quæ mores hominis componit & actionum humanarum naturam æstimat, & scientiam motuum ac operationes mechanicas corporum explicat, ex quibus omnibus æternæ veritates emicant, quæ olim pro

dono ac invento Deorum habitæ sunt. Elucet itaque ex dictis, quod perperam ii agant, qui rationem ex fastigio planè dejiciunt, eamque quasi in exilium ex scholis & academiis agere contendunt, & ob id humanæ sapientiæ studium, & rationis culturam parvi faciunt, sine quibus tamen trunci, stupidi & inhabiles omnes sumus.

Verum enim vero nec diffitendum hoc loco est, rationem in divinis esse insufficientem, ejusque etiam abusum penes eruditos esse maximum. Nam ratio etiam optima non subministrat vera offensi Numinis expiamina; non restituit pacem peccatorum conscientiis; non vincit & subigit carnis illos stimulos & impetus; nec patientiam, humilitatem, mansuetudinem & constantiam in adversissimis infundit mentibus nostris: sed hoc facit Spiritus fidei, Spiritus amoris, maximum illud à DEO nobis datum lumen per verbum ejus, quod sicuti sol ad candelam, ita Spiritus ad rationem sese habet. Deinceps & ipsi homines rarius inveniunt, rarissime sequuntur ductum rectæ rationis. Mens enim eorum penitus occæcata, non attendit rationis lumini, non cupit ea discere, quæ insunt rationi, multo minus ea facere, quæ ratio propo-

nit sectanda. Et tali sensu scriptura, & rationem, & rationis voluntatem ac intellectum humanum, dicit esse corruptum: quod tamen nequitiam intelligendum de ratione recta, exculta & instructa; hæc enim lumen est à DEO nobis datum, ad verum & bonum cognoscendum. Unde scite & verissime dictum à Veteribus: *qui rationi paret, DEO paret.* Et sciri oportet, abuti sæpenumero hominem rationis thesauro, utpote in totum perversa voluntas male utitur ratione sua ad exsequendas voluptates & passiones suas; propter quod tamen ratio non culpanda est, sed potius ipse animus hominis. Nemo ignorat Arithmeticam esse divinam scientiam: si quis autem ea abutitur ad fallendum proximum, non eo nomine mala dici meretur, sed propter intentionem decipientis.

Manet itaque statum atque firmum, nihil dari in mundo præstantius instructa atque exculta ratione. Manet etiam firmum, quod Spiritus sanctus verbo suo perficiat potius rationem ac exaltet, quam eam destruat. Manet etiam firmum, quod lumen, tam à DEO, quam ab homine accensum, concessum sit ad sanandam mentis corruptionem, ut sanata sic in æternum felix sit.



D E

R A T I O N E U N I V E R S Æ

M E D I C I N Æ P R Æ S I D E.

P R O O E M I U M.

Lumen rationis est donum divinum.

Ipsæ Deus id nobis revelavit. Etiam gentiles hoc confitentur.

Nemo vero rationis excellentiam magis commendat quam Rex Salomo in Proverb.

Ipsæ Salvator noster stultitiam & imprudentiam summis mortalium miseriis annumerat. Veritas rectæ rationis soboles. Error rationis abusus dici meretur. Cœlestis

Rationis lumen homini à Deo concessum, divinum esse donum, quo nihil sit præstantius, omni tempore non modo sapientiores agnoverunt, sed etiam ipse Deus in Sacro Codice nobis id revelavit. In hujus confirmationem, ut aliorum innumera testimonia taceamus, unicum ex Gentilibus CICERONEM, in medium producere placet, qui lib. v. de Fin. cap. 13. in homine nihil esse ratione divinius affirmat; & lib. III. de Republ. Rectam rationem perpetuam & æternam, quia Deum sequitur appellat; & JUVENALIS Sat. x. habet: Nullum numen abesse, & frustra Fortunam Deam coli, si rebus adsit prudentia. Nemo vero rationis excellentiam majori opera commendare studet, quam Regum sapientissimus SALOMO in Proverb. ubi virum prudentem & ratione præditum caram vocat animam; & passim inculcat, omnia negotia infelicitè cedere, nec consilia persistere posse, nisi ducem habeant rationem, atque prudentiam. Ipsæ denique Sanctissimus noster Salvator Matth. VII. 22. stultitiam & imprudentiam summis mortalium miseriis annumerat. Neque si rem paulò curatius intuemur, quippiam in orbe universo animæ nostræ statum rectius perspicit, quam rationis usus. Veritas, quæ lux humani intellectus dicitur, nihil aliud est, quam rectæ rationis soboles, quæ rerum proprietates, distinctionem, ordinem, proportionem atque connexionem perspicuè demonstrat, quemadmodum contra error rectè confusio & abusus rationis dici meretur. Enim vero cœlestis doctrinæ veritates ratione humana multo sunt superiores; tantum autem abest, ut ipsi sint adverse, ut potius rationis lumen mirifice perficiant.

Ecquis est, qui ea, quæ Deus nobis tam ad fidem quam ad vitam pertinentia in verbo suo proposuit, rectè explicare, ab aliorum dubitationibus vindicare, & docere poterit, nisi id excultæ rationis fiat beneficio? Justi & æqui scientia, ejusque origo ab hominum cultiore ratione proficiscitur. Quid enim salutare Reipublicæ leges aliud sunt, quam regulæ, nostras actiones dirigentes, ex summa sapientum prudentia ac ratione adornatæ? Nec quisquam secundum leges rectè judicare, & forensia negotia hisce apte applicare potest, nisi ratione & prudentia fuerit instructus. Perfectissima disciplinarum Mathesis, unice in rationis cultura, atque exercitio consistit, dum rerum quantitates, magnitudinem, numerum, mensuram, pondus, proportionem, æqualitatem & inæqualitatem invenit & demonstrat, posteaque ad usum multiplicem & omnis vitæ utilitatem applicat. Qui Rempublicam gubernare, & multorum salutem prospicere cupit, is in omnibus difficillimis negotiis rationem ac prudentiam pro duce & consiliario habeat oportet. Inter diversissimarum indolium homines versari, vitamque beate ac tranquille traducere nemo sine singulari prudentia, quæ optima vitæ est dux & moderatrix, potis erit. Ut adeo rectè OVIDIUS L. IV. de Pont. vers. 12.

Crede mihi miseros prudentia prima relinquit, Et sensus cum re consiliumque perit.

Quum itaque tam excellens & ingens, recta ratio homini à Deo concessa, sit beneficium, & in omni veritatis inquisitione, omnibusque scientiis principem locum teneat; hinc quis usus, quis fructus, & quantum emolumentum inde in medicam artem redundet, merito venit dispiciendum. Communis usque eo invaluit inter doctos ac indoctos opinio, medendi artem atque professionem

doctrinæ veritates ratione humana sunt superiores non adversæ. Justi & æqui scientia ab hominum ratione proficiscitur.

Mathesis unice in rationis cultura atque exercitio consistit. Qui remp. publ. gubernare cupit rationem & prudentiam pro duce & consiliario habeat oportet.

Communis opinio artem medendi non

tam ratio-
ne quam
experien-
tia sustine-
ri.

In univer-
sa medici-
na longe
potiores
rectæ ra-
tionis
quam ex-
perientia
esse partes
deprehen-
dimus.
Quod ar-
gumen-
tum Auc-
tor apud
animum
persequi
constituit.

Ass Medici
ca variis
probris la-
cessitur,
quia ejus
funda-
mentum
experien-
tia sit fal-
lax, Medi-
cique ju-
diciū
difficile.

Variis il-
lud ratio-
ciniis ro-
borare an-
nituntur.
Præcipue
quod in-
gens omni
tempore
& loco
medico-
rum dis-
sensio ac
discrepan-
tia vigeat.
Quid por-
ro in me-
dicinæ
contemp-
tum ur-
geant.

Ut has ad-
versus me-
dicinæ
certitudi-
nem ad-
ductas dif-
ficultates
Medici di-
luerent se-
quentia
responde-
re solent.

Præcipu-
us medici-
næ cardo.

Artis Med.
funda-
menta esse
certissima.

non tam ratione, quam usu multiplici ac longa experientia sustineri; unde etiam experientissimi nomen Medicis tribuitur. Verum enim vero, utut experientia laudes detrahare animus noster neutiquam sit, re tamen paulo altius perpensa, deprehendimus in universa medicina, tam theoretica quam præcipue practica longe potiores rectæ rationis quam ipsius quidem experientia esse partes, adeo, ut sana Medici ratio præses ac directrix praxeos medicæ merito sit dicenda: quod pernobile argumentum paulo diligentius impræsentiarum persequi apud animum constituimus. Cui instituto ut infinita & perfectissima Divina Ratio faveat, & nostram longis parafangis inferiorem hoc in negotio clariorem reddat atque perficiat, est quod precibus efflagitamus humillimis.

§. I.

Sunt & fuerunt semper ex nobilium æque ac vulgi numero, qui artem nostram saluberrimam variis probris laceffere ac dehonestare non erubuerunt, inducti maxime hisce rationibus, quod videlicet *experientia*, cui ceu fundamento superstruitur, primo quoque medicinæ parente HIPPOCRATE testante *Aphor. I. Sect. I. admodum sit fallax*, cui tuto fidere nequeamus, *judiciū* vero Medici de iis quæ agere debeat, sit *difficile*, & eam ob causam longissimi temporis filia sit, cui nequeat comparari vita Medicorum brevis. Quod graviter dictum ulterius variis ratiociniis roborare annituntur, præcipue quidem quod ingens omni tempore & loco Medicorum, tam in theoria quam praxi dissensio ac discrepantia vigeat, ita ut tot fere opinionum ferax sit ævum, quot Medicorum, cum tamen una tantum sit veritas, certitudinis partus. Opinio vero ipso HIPPOCRATE fatente *lib. de leg. in medicina in crimen verti debeat*, quoniam perniciem affert maximam. Urgent porro in artis nostræ contemptum, quod plures sæpenumero ex plebejis atque rusticis, qui nulla Medicorum ope fruuntur, convalescant, & cum sanitate in gratiam citius redeant, quam qui Medicis, eorumque pretiosis atque copiosis remediis usi fuerunt; Addunt præterea, quod indocti & vulgus hominum, expertis & familiaribus quibusdam remediis in morbis profligandis sæpe sæpius plus valeant, quam doctissimi Medici exquisita sua methodo, & magnificis suis arcanis.

§. II. Ut itaque has non levis momenti adversus medicinæ certitudinem adductas difficultates Medici diluerent, respondere communiter soliti sunt: à Medicorum ignorantia ad artis incertitudinem atque non-existentiam haud esse concludendum, neque Medicos cum arte esse confundendos; Veritatem vero & certitudinem arti nostræ salutari inesse inde colligunt, quod duabus fulturis firmissimis experientia nempe, & ratione nitatur; neque negandum esse asserunt, dari ex alimentis & remediis, multa quæ ad sanitatem tuendam, vel morbos profligandos modo noceant, modo profint; utilia autem & noxia vitæ & sanitati nosse, præcipuum esse medicinæ cardinem, & horum cognitionem optime usu atque experientia comparari posse. Porro veras scire & cognoscere causas, cur sc. hæc vel illa noxam vel utilitatem in morbis afferant, à recta proficisci ratione affirmant. Et quoniam nec vera ac solida experientia, nec demonstrativa ratio fallere potest, hinc colligunt, artis nostræ fundamenta utique esse certissima & inconcussa, ex quibus veritas & certitudo in nostra arte optime possit stabiliri.

§. III. Equidem hæc omnia egregia sunt argumenta, quæ valide satis existentiam ac veritatem artis nostræ roborant. Verum si paulo curatius nostræ professionis faciem ac indolem modernam, ejusque communem & familiarem pertractationem intueamur, fatendum profecto est, de perfecta experientia, & solidis inde ratiociniis parum quempiam gloriari posse. Paucissimi enim intelligunt quid velint per experientiam, neque conceptum de hac possident, aut desiderantibus magnum suum fulcrum explicare possunt. Plurimorum experientia quam allegant imperitia & ignorantia est: rationes, quas in theoreticis pariter ac practicis asserere solent, minus sunt solidæ, incertæ atque inevidentes, & sæpe nihil nisi meræ opiniones, nugæ, speculationes, fictiones & probabiles conjecturæ, quæ nec explicari nec demonstrari possunt, ut etiam ex earundem summa diversitate & mira discrepantia, imbecillimas easdem esse & prorsus inanes, curate in eas inquirenti facile dispalescat.

§. IV. Ne autem hæc gratis & quasi in contemptum artis à nobis dicta esse videantur, eo al-laborabimus ut assertum nostrum sincerius & per singula capita excutiamus. Primum autem, quam instabilis & infirma practicorum quam allegant experientia sit, ex ingenti horum dissensu circa V.Snis usum licet observare, quod certe exemplis meretur uberius confirmari. Constat inter artis nostræ peritos, quod V.S. olim ab ERASISTRATO, & superioribus seculis à PARACELSO & Helmontianis, nostris vero temporibus, à plurimis Belgis Cartesianæ sectæ Medicis penitus è praxi proscrip-ta, imo pro infami remedio habita fuerit: neque desunt hodie, qui à ferro velut ab hoste metuentes, ad tranquilla horum castra, cruori suo parituri transeant, quorum si spectes rationes, potissimum in eo conveniunt, quod sanguis thesaurus vitæ ac virium sit, & quod plurimi sine V.Sne vitam longam & à morbis immunem duxerint; nec minus sine hoc remedio chronicæ pariter atque acutæ passiones perfanatæ fuerint. Contra vero ingens etiam eorum est numerus, tam inter V-teres quam inter Recentiores, qui experientia multifaria non minus quam rationibus fulti non dari præsentius nec excellentius in morbis cum sanandis tum præservandis præsidium V.Sne, asseverant. Utraque pars dissentientium affert experientiam & ab hac desumtas rationes. Illi à V.Snis usu in morbis vires dejectas, transpirationem impeditam & materiæ per peripheriam corporis eliminandæ reversionem ad interiora notarunt; inde præsertim noxam in acutis passionibus, periculosa symptomata, & dispositionem quoque ad morbos chronicos ac epidemicos grassantes suscipiendos observarunt. Hi rursus in contrarium abeuntes, se expertos docent, quod à V.Sne vires restitutæ, & transpiratio auctior facta, & materia nociva promptissime expulsa fuerit; præterea vero tutum quoque adversus morbos epidemicos & febres grassantes præservativam esse, frequenti observatione animadvertisse, & insuper eam à malo hypochondriaco, à calculo, à cachexia, & hydrope corpus defendere asseverant. Quot sunt Practici, qui in omni febre, sive benigna, sive maligna, sive intermittens, sive continua fuerit, vel exanthematica, ut purpura, variolæ, morbilli &c. V.S-nem reformidant? Alii contra in omni febre, quæcunque demum fuerit, V.Snem ceu summè necessarium præsidium commendant, experientia multiplici & longa inducti. Hic si observationes medicas prostantes consulere velimus, quot sunt quæ ad faciliorem, & meliorem expulsionem, vario-

Paucissimi
intelligunt
quid ve-
lint per
experien-
tiam.
Plurimo-
rum expe-
rientia est
imposita.

Ex ingenti
Practico-
rum dis-
sensu circa
V.Snis
usum ob-
servare li-
cet quam
infirma sit
eorum ex-
perientia.
A quibus
proscripta
& pro in-
fami re-
medio ha-
bita fuerit.
Horum
rationes.

Contra in-
gens eo-
rum est
numerus
qui non
dari præ-
sentius in
morbis
præsidium
V.Sne asse-
verant.
Utraque
pars dis-
sentien-
tium affert
experien-
tiam.

Partis
utriusque
rationes.

larum, morbillorum, aliorumque exanthematum, extollunt V.Snis administrationem?

Et multi-
faria ex-
empla pro
& contra
V.Snem.

§. V. Plures Practicorum V.Snis usum in intermittentibus febribus plane damnare solent, eo quod diuturniores & contumaciores inde factas fuisse observaverint. Ex adverso multos proferre licet, qui magna cum *inopria* hisce in febribus ea usi fuerunt, dum sc. sanguinis facta detractio- ne protinus æstus vehementia, gravis capitis dolor, & ingens circa præcordia anxietas, se remiserunt. Quanta præterea efficacia olim & ab omni tempore V.Sni in gravioribus internis inflammationibus mitigandis adscripta fuerit, ingentia practicum volumina testantur. Neque vero minus dantur haud incelebris nominis Medici, qui hoc remedii genus ceu inutile in hisce affectibus non modo respuunt, sed longe melius sine illo evadere posse ægrotantes existimant, & præter experientiam, quam allegant, hoc inprimis ratiocinio se fulciunt, quod sanguis incarceratus & coagulatus sive intra sive extra vasa existens, qui causa inflammationis est, neququam sanguinis missione tolli possit; quum tamen non desint mille exempla, cum in nostris climatibus, tum præcipue in Gallia, & Italia, ubi inflammationibus & inprimis in peripneumonia, non una quidem vel altera, sed quinta, sexta & septima vice per ejusdem morbi decursum non sine fructu & manifesto spirandi allevamento, vena fuerit adaptata. Quin imo plures practicum in eo conveniunt, quod vera angina ex sanguinis stasi subnata funesta sit, nisi statim ab initio sanguis è venis sublingualibus fuerit missus. In puerperis si febris urget, vel inflammationis metus est, novimus, non sine fausto successu V.Snem fuisse celebratam. Constat vero, maximam practicum partem id remedii genus, mirum quantum, in hoc casu reformidare. Deinde vulgaris est & recepta opinio, in gravidis ante medium gestationis tempus ab omni V.Sne esse abstinendum, quod plerumque sequatur abortus: suppetunt vero quam plurima exempla, ubi secundo & tertio mense sanguis fuit emissus, & vel quinquies id per tempus imprægnationis fuit repetitum, adeo felici cum successu, ut quæ multoties abortiverunt, sanam & perfectam prolem in lucem hac ratione produxerint.

Quod sanguis, qui causa est inflammationis neququam sanguinis missione tolli possit nonnulli tuentur. Contra alii quod manifesto allevamento vena tum fuerit adaptata.

Quod varia exempla demonstrant.

Idem fatum etiam alia evacuantia remedia experientia inconstantia nanciscuntur. Plures emeticis uti non verentur. Alii contra ab eorum usu valde metuunt. Et quare.

Romæ olim induci fuerunt publico pœnali edicto antimonialium emeticorum uum interdiceret. Quo in casu emetica prodesse possunt. Quod ta-

§. VI. Verum enim vero non V.S. solum, sed etiam alia ex evacuantium remediorum generibus, idem fatum ab experientia inconstantia nanciscuntur. Novimus plures haud infelicitis nominis practicos, qui singulis fere in morbis, etiam acutis, emeticis uti non verentur. Alii contra ab eorum usu valde metuunt, iisque vel rarissime, vel plane non utuntur, eo quod ventriculo noxam aut funestam inflammationem induxerint; denique saburram primarum viarum longe tutius abstergentibus & evacuantibus posse educi, existiment. Neque obscurum est, in calidioribus locis, Italiæ, Hispaniæ, Galliæ &c. eorum usum non semper feliciter succedere, adeo ut olim Romæ inducti fuerint, publico pœnali edicto antimonialium emeticorum usum interdiceret. In intermittentium contumacia expugnanda quidam practicum non satis ea possunt laudare, quod fomitem febrilem præsentissime extirpent. Alii contrarium tuentur, qui longe felicius vel tutius harum curationem absolvi posse statuunt, si salinis deterforiis obstructions referentur, & specificis, v. g. China China statim febriles impetus coercantur, præsertim cum pleræque intermittentes ex aëris & tempestatum vitio gignantur, & magis ex subtili causticâ a-

crimonia, quam copia, vel stagnatione humorum subnascantur. Ingens omni tempore fuit formido in morbis, ubi ad habitum corporis aliquid expellitur, criticis, evacuantia tam emetica quam purgantia præsertim eruptionis vel expulsionis tempore adhibere, propterea quod peccantem materiam magis in interioribus atque in centro retineant; hoc non obstante, sunt nostris temporibus practici, qui in variolis & morbillis ante eruptionem imo sub ipsa reiteratis vicibus & emetica & evacuantia propinare non verentur, ad experientiam crebri & fausti successus confugientes. In apoplecticorum insultu utrum emetica convenient nec ne, ingens adhuc lis atque contentio est inter practicos. Quidam hac vehementi commotione sanguinis & humorum impetum magis ad caput urgeri existimant: alii contra è capite stagnantes humores hoc modo detrahi commodissime judicant. Multis solenne est, post bilis commotionem ab iracundia factam emeticum ad ipsam deplendam exhibere; alii experientia inducti hoc remedii genus tali in casu seu perniciosissimum damnant ac respuunt.

§. VII. Purgantia validiora, helleborata, scammoniata, colocynthiaca, & olim HIPPOCRATIS tempore, & per longam seculorum seriem, in usu frequentissimo Medicis fuerunt; unde in officinis ingentem farraginem compositionum variarum purgantium, tam veterum, quam recentiorum adhuc proflare, ubivis ferme locorumprehendimus. Siquidem credebant his ipsis humoribus & copia & qualitate peccantes, tam præservandi quam curandi fine optime hac ratione posse educi. Sunt tamen & fuerunt semper, qui omnia valentiora evacuantia ceu perniciose damnarunt. Ipse ASCLEPIADES referente CELSO *lib. I. p. 29.* purgantia è foro medico expulit. E recentioribus PARACELsus, HELMONT, BONTEKOE, & qui ejus castra sequuntur, aciora hæc purgantia mortifera & infamia remedia appellare non erubescunt, eo quod semper fere noxia observata sint, vires dejiciendo, tonum ventriculi & intestinorum destruendo, & caustico inflammatorio sale fibrillas nerveas convellendo; neque res est de nihilo; cum certe plus damni quam emolumenti ab eorum usu sit expectandum, quâ de re legi meretur *Dissertatio nostra de purgantibus fortioribus è foro Med. proscribendis.* Ad hydropicorum aquas eliminandas tutus semper acium purgantium usus habitus fuit. Nihilominus confirmat experientia, morbum hunc ab eorum usu ingravescere, inque pejorem statum præcipitari. Quin imo observatum fuit, à frequentiori horum usu cachexiam & hydropem inductum fuisse. Noluerunt antiquiores in acutis & exanthematicis febribus ullo modo irritare alvum, vel clysterem admittere; usus tamen & experientia docuit, vanum hunc esse metum, cum alvi fluxu spontaneo sæpe hi morbi terminentur, & moderata facta ejus apertione longe felicius earum curationes succedant. Aloën in concitandis hæmorrhagiis, hæmoptysi, hæmorrhoidibus, mensibus, olim admodum reformidarunt: à longo vero jam tempore convicti sumus experientia, hanc ipsam convenienti dosi & methodo adhibitam, ad hæmorrhagias sistendas esse utilissimam. Infusum mannae, & cassiæ in nostris locis ferme proscriptum fuit, ceu languidum, effœtum; & quod tormina & flatus producat: contra olim Ægyptiorum Medici, Galli quoque, in ingenti copia ad uncias sex mannam & cassiam pro dosi præscribunt; & hæc infusa vel decocta, in pectoris præsertim affectibus, inque aliis morbis acutis & chronicis præ-

man alii refragantur. Qui felicius & tutius per specifica curationes absolvi posse statuunt. Ubi ad habitum corporis aliquid expellitur ingens est formido tum evacuatione adhibere. Attamen alii etiam tum temporis evacuatione propinare non verentur. Quidam emetica in Apoplexia convenire volunt, sed alii illa aspernantur. Post bilis commotionem ab iracundia parilis est ratio, nempe pro & contra ab utraque parte. Validiora purgantia ab Hippocratis tempore in usu fuerunt. Sunt tamen & semper fuerunt qui hæc ceu perniciose damnarunt.

Ad Hydropicorum aquas eliminandas tutus semper eorum usus habitus fuit. Antiquiores in acutis febribus alvum irritare noluerunt.

Aloën olim in concitandis hæmorrhagiis admodum reformidarunt. Sed experientia jam sumus convicti, ad hæmorrhagias sistendas esse utilissimam. Manna & Cassia

stan-

apud nos
ferme sunt
proscrip-
ta, sed non
æque apud
Gallos.
Variolas,
morbillos,
purpuram
atque pes-
tem, alexi-
pharmacis
esse tra-
ctandas,
olim com-
munis fuit
opinio.

Accurata
nihilomi-
nus experi-
entia
ostendit,
hæc om-
nia esse
nocentissi-
ma, & tu-
tiora esse
humectan-
tia imo re-
frigeran-
tia.

Salia vola-
tilia, oleo-
sa & aro-
matica
quondam
in pretio
habeban-
tur.

Quæ jam
flocci fa-
ciuntur.

Hæmor-
rhagias ta-
men non
augent,
cum experi-
entia
contra-
rium de-
monstret.

Spiritus
acidi ante
aliquot lu-
stra in Ger-
mania fre-
quentem
usum ha-
buerunt.

Postea
omnia fe-
re acida
remedia
è foro me-
dico fue-
runt pro-
scripta.

Opium &
Opiata di-
vinis lau-
dibus om-
ni tempo-

stantissimi effectus esse, experientia docet.

§. VIII. Communis tam vulgi quam Medicorum olim fuit opinio, variolas, morbillos, purpuram atque pestem expellentibus & alexipharmacis esse tractandas, quo videlicet illud quod vitæ sit inimicum, cito & celeriter per corporis peripheriam expellatur: unde tot in officinis prostant tincturæ bezoardicæ alexipharmacæ, spiritus volatiles, salia volatilia, ex viperis etiam desumpta, ac pulveres varii expulsiivi, sudoriferi, olea calidiora, camphorata, alexipharmaca, quorum usus in hisce morbis fuit frequentissimus. Et quamvis per multa secula hæc methodus medendi fuerit solennis, nihilo minus solida & accurata per plurium annorum decursum experientia ostendit, hæc omnia nocentissima esse, longe vero tutiora in expellendis variolis & morbillis esse quæ nimios motus sistunt, impetus arcent, humectant imo refrigerant: cujus generis sunt acidula, anodyna, terreaque fixa, emulsiones ex feminibus quatuor frigidis, & hujus generis plura. Denique omne regimen in his morbis temperatum calidiori nocentissimo longis parasangis esse præferendum usus quotidianus perdocuit.

§. IX. In recenti forsan adhuc versatur memoria, quanta æstimatio laus ac dignitas salibus volatilibus oleosis, sali volatili Cornu Cervi, spiritibus volatilibus oleosis vario modo aromatatis, confiterit, adeo ut pro panaceis præservandi & curandi sine hæc ipsa remedia habita & magno pretio vendita fuerint, eo quod credebant, circulationem sanguinis & humorum nec non inutilium partium excretionem egregie hisce promoveri, unde in morbis chronicis debellandis maximi semper fuerunt habita. Verum enim vero & hæc sua subierunt fata atque tempora, dum annotatum fuit, in compluribus chronicis passionibus ea plus damni quam emolumenti attulisse vehementer humorum massam commovendo. Hoc vero notatu dignum occurrit, quod hæmorrhagias salibus volatilibus augeri communiter assertum sit, cum tamen experientia demonstrat contrarium; utpote hæc moderata dosi exhibitæ, spasmos, qui hæmorrhagiarum fabri sunt, sistendo, hæmoptysin & nimium mensium fluxum in dispositis egregie cohibent atque coercunt.

§. X. Ante aliquot lustra in nostris Germaniæ locis quidam Chymiatři non modo acidos minerales spiritus, sed & alia acida refrigerantia ex vegetabilium classe in frequentem usum traxere, & non modo in acutis, sed chronicis etiam passionibus ea adhibuerunt, quo nomine famigeratissima fuit tinctura aperitiva *Mæbii*, quæ spiritus salis bene rectificatus & coloratus est; & maximo pretio hæc habita fuit, & à multis practicis in renum & vesicæ calculo, malo hypochondriaco, scorbuto fuit ordinata. Postea vero quam praxis Bontekoëana & Belgarum methodus curandi nostris terris innotuit, omnia acida fere remedia è foro medico proscripita fuerunt, utpote hi statuebant omnium morborum originem esse stagnationem & coagulationem humorum, consequenter acidum & viscidum, hinc curationem morborum iis quæ humores lentos & viscidos resolvebant, acidumque extinguiebant, unice moliebantur, eumque in finem acida ex remediorum classe penitus propellebant.

§. XI. Opium, & quæ ex hoc parantur remedia dicta laudana, anodyna, theriacalia, quorum præcipuum ingrediens est opium, divinis laudibus olim & omni tempore celebrata fue-

runt, imo inter panaceas relata, quasi omnium morborum antidota: neque ullus fere extitit ce- lebris nominis Medicus, qui non hoc remedii genus magni fecerit. Quidam de eo volumina composuerunt: nonnulli se nolle esse Medicos dixerunt, nisi opium existeret. Nihilo minus ab omni tempore fuerunt Medici, qui infar veneni illud reformidarunt, quod vitales motus & vires extinguat, sensibus torporem ac stuporem inferat. Et ex recentioribus, complures solidiores animadverterunt, quod ab opiatis cujuscunque generis & compositionis fuerint, tam in chronicis quam acutis passionibus, plus damni quam utilitatis corporibus accedat, utpote cum peccantem morbi materiam sive in qualitate sive in quantitate intus retineant ac figant, humorum stagnationes & stases, tantum abest ut removeant, ut potius augeant & salutare excretionem impendant: quibus rationibus permoti non dubitant asserere, theriacalia & opiata valde infida esse minusque secura remedia.

§. XII. Dudum est, ex quo medicamento- rum è Marte desumptorum usus in morbis chronicis debellandis, nominatim in malo hypochondriaco, cachexia, hydrope, mensium suppressione, ad contumaces viscerum obstructions expedien- das, mirifice fuit æstimatus, usque eo, ut innu- meras compositiones, in liquida & solida forma, quas ferrum ingreditur, in Medicorum scriniis & pharmacopoliis splendentes, ubique reperias. Ne- que tamen deesse plures novimus ex recentioribus, qui ancipitis & minus tutæ virtutis, ut omnia ex metallorum regno desumpta, martialia reme- dia judicant, quum adstrictione sua in chronicis morbis vasculorum obstructions magis firment, ac fibrosas nerveas partes ad spasmodicas contra- ctiones admodum disponant: & hoc usque ad- eo, ut dictis in morbis illa magis nocere quam prodesse, experientia practica sit commonstratum. Ulterius quanta dissensio, quanta contentio in- ter practicos circa corticis Chinæ usum hodie- num observatur? Hic à pluribus magnis Medi- cis, divinum adversus intermittentium contuma- ciam præsidium habetur, neque innumeris obser- vationibus hanc sententiam tueri desistunt. Quod si vero experientiam consulamus obviam atque peritorum Practicorum observationes perlustre- mus, innumera etiam occurrunt exempla, ubi infaustus eventus hujus usum fuit consecutus, dum vel peiores febrium recidivæ factæ fue- runt, vel gravior morbus, ut cachexia, hydrops, malum hypochondriacum, contractura artuum, asthma spasmodicum, & colica convulsiva fe- brem hoc remedio intempestive suppressam ex- ceperunt.

§. XIII. Pari modo ex Mercurio desumpta remedia ingentibus Medicorum dissensionibus obnoxia videmus. Et quamvis vetus illa & male fundata opinio, mercurialia & metallica esse venena, dudum expiraverit, solideque comper- tum sit dextre præparata & applicata non care- re insigni fructu & utilitate; nihilo tamen mi- nus censuram merentur illi, qui Mercurialia vel etiam Solaria, etiam rite præparata, tantis ex- tollunt laudibus, ut ea efficacissima & univer- salia pronuncient, quum certe fama sua longe sint minora. Quis enim nescit à mercurialibus, quocunque modo etiam præparata, correctæ vel rectificata fuerint, plurima incommoda, debili- tates generis nervosi, molestas salivationes, pa- ralyfes, & tremores ortos fuisse. At missa hæc facimus, certe enim volumen componendum es- set, si vel omnia remediorum capita persequi, &

re celebra-
ta fuerunt.

Nihilomi-
nus ab
omni tem-
pore fue-
runt Medi-
ci, qui in-
far vene-
ni illud
reformi-
darunt.

Martis &
Martiali-
um usus
ab his lau-
datur.

Culpatur
ab illis.

Quanta
contentio
circa cor-
ticis Chi-
næ usum
obser-
vatur?
A pluri-
mis divi-
num ad-
versus in-
termitten-
tium con-
tumaciam
præsidium
habetur.
Experien-
tiam vero
si consula-
mus innu-
mera oc-
currunt
exempla;
ubi infaus-
tus even-
tus hujus
usum fuit
subsecu-
tus.

Etiam re-
media ex
Mercurio
ingenti-
bus Medi-
corum dis-
sensionibus obno-
xia vide-
mus.
Censuram
illi meren-
tur qui
mercuria-
lia tan-
tis laudibus
extollunt.
Plurima
hoc

ex ii in-
commo-
da.
Circa vesi-
catorio-
rum &
fonticul.
circa thet-
mar. aci-
dular. &c.
usum,
quantus
inter Pra-
cticos vi-
get diffen-
sus?
Diffenti-
endi inter
Medicos
nullus
modus vel
finis.
Singuli ta-
men in sua
sententia
tuenda ad
experien-
tiam con-
fugiunt.
Debile igitur
est experientia
medicæ
fulcrum,
& cœca o-
pinio ma-
gis quam
certitudo
& veritas
in medi-
na regnat.
Quibus
experien-
tiam suam
defendere
soleant
medici.
Veræ ex-
perientia
descriptio.
Sed hæc
rara est
avis.
Potius
omnes ob-
servatio-
nes man-
cæ sunt &
mutilæ.
Medica-
mentorū
virtutes
parum
sunt cog-
nitæ.

hoc argumentum condignè tractare vellemus. Quibus enim ignotum est, quantus dissensus inter Practicos vigeat, circa Vesicatoriorum & Fonticulorum, circa Thermarum, Acidularum, & Lactis usum? & quomodo ad lectum cuiuscunque ægrotantis nullus fere modus vel finis dissentendi vel contradicendi sit inter Medicos, singuli tamen, quod mirum, in sua sententia tuenda ad summum illud experientiæ tribunal & idolum confugiant? Videmus hinc clarissime, quam imbecillum ac debile experientiæ, cui Medici innituntur, sit fulcrum, videmus porro, quod magis opinio cœca, quam certitudo & veritas regnet in medicina. Dolendum vero maximè omnium, quod singula hæc ita sint comparata, ut tyronem ab artis studio merito arcere, & potius horrorem illam addiscendi incutere queant. Et hæc utique est ratio, quare apud prudentes ingens contemptus & opprobrium Medicis & medicinæ semper accesserit.

§. XIV. Verum enim vero necesse etiam est ut audiamus, quæ ad hæc omnia reponere, & quibus experientiam suam defendere & vindicare soleant Medici. Dicunt nempe: experientiam esse omnis certitudinis & veritatis medicæ parentem, dummodo non superficialia, incompleta & imperfecta, sed solida & accurata fuerit, ad quam requiritur, ut omnes circumstantiæ, quæ ad veram morbi historiam pertinent, sint junctæ: quod si enim subjectum quod ægrotat, indoles morbi, ejusque causæ atque effectus probè fuerint cogniti, nec non ea quæ opem vel etiam noxam attulerunt, accurate annotata, tunc utique tales observationes sæpius repetitas fallere minime posse affirmant. Neque certe de nihilo hæc est assertio. At vero ubi prostant tales observationes, tales completæ morborum historiæ? ubi invenitur talis experientia? ubi notatus est talis remediorum effectus, in quo omnes & singulæ circumstantiæ fuerunt junctæ? si enim vel veterum vel recentiorum monumenta evolvis, rarissime talia invenies; potius omnes observationes mancæ sunt & mutilæ præcipuis omissis circumstantiis. Præterea piget & pudet proponere, quam parum veræ virtutes & dotes medicamentorum sint cognitæ, quamvis innumeras laudes, encomia & vires in Botanicorum, Chymicorum, & Pharmacopœorum libris jactatas & venditatas videas, quarum tamen paucissimæ fidem sustinent, & effectui respondent. Et nulla hic alia subest ratio, quam quod, si forsitan à tali medicamento assumpto bonus effectus sequutus fuerit, statim hujus causam medicamento assignaverint, nullo habitu respectu ac ratione historiæ morbi, ejusque circumstantiarum, sub quibus exhibitum fuit remedium.

§. XV. Verum enim vero quamvis non negandum sit experientiam bene instructam, & accuratæ morborum historiæ superstructam minimè esse fallacem, & maximopere in praxi medica commendandam, attamen dubitari meritò potest, num ad talem experientiam pervenire possibile sit. Non enim ignotum est, naturas & corpora hominum mirum in modum variare, differre etiam morbos, eorum indolem ac causas, & infinitas esse circumstantias, remediorum usum applicationem & effectum determinantes; unde videmus pro diversitate climatum, vitæ generis, ætatis, sexus, victus, aëris, anni temporum, tempestatum, aquarum, consuetudinum & dispositionis hæreditariæ variare morbos, variare methodum medendi, variare etiam ipsa remedia. Ita

idem purgans decem subjectis, ejusdem etiam ætatis & roboris exhibitum, diversissimas producit operationes; in quibusdam fortius, in aliis segnius movet alvum; nonnullis digestionem turbat, appetitum proflernit, anxietates parit, & vomitum simul concitat. Et idem homo, qui hoc tempore bene potuit hoc vel illud remedium ferre, alio tempore damnum inde experitur. Unde bene notatum à SYDENHAMIO: methodum febrem curandi, uno tempore prodesse, alio nocere.

§. XVI. Variant quoque morborum curationes pro diversis climatibus. Quis enim auderet enervantes Gallorum curas in febribus, per crebrius repetitas VSnes, purgationes & ptisanas in nostris locis temere in usum trahere? & nemo facile in Hispaniâ, Italiâ aliisque calidioribus locis, nostram in Germania medendi methodum, quod ad usum emeticorum, volatilium, & calidiorum imitabitur? Quare videmus, quam difficilis & operosa res sit, rectam medendi morbis methodum addiscere per observationes, etiam accuratissime conscriptas, quum mirum in modum discrepent circumstantiæ, quarum minima sæpe varietat remediorum applicationem. Profecto centum hominum ætates non sufficerent huic operoso negotio. Et antequam hac ratione, nempe per longam & annosioram experientiam, vera medendi methodus inveniretur, plures oporteret extinguere. Ulterius vero Medici pro defendenda experientia hoc argumento solent uti, quod ingens ille dissensus circa remediorum vires & applicationem non destruat ipsam experientiam, & ad stabiliendam hanc unice opus sit, ut respiciamus ad numerum eorum, qui medicamentum in morbo vel male vel prospere successisse affirmant: imo si mille fuerint qui bonum esse medicamentum pronuncient, centum vero qui contrarium asserant, tunc dicunt majori numero plus esse credendum quam aliis, qui contrarium observarunt minori numero. At vero, nec hæc argumentandi ratio difficultatem hanc expedit; utpote à numero & multitudine idem sentientium non adstruendum est veritatis criterium. Longissimo tempore Opiata magna in morbis remedia credita fuerunt, quum tamen experientia testetur, plus nocenti, quam emolumenti in morbis ab ipsis esse expectandum: Quot numero fuerunt Practici, qui calida expellentia volatilia, myrrhata in variolis & morbillis proficua judicarunt? quæ tamen certissime plus nocent quam prosunt. Lenientia & alvi fluxus in febribus acutis pro interdictis habentur & damnantur, cum tamen experientia contrarium testetur. Vehementiora purgantia per tot secula in frequentissimo fuerunt usu, quum tamen valetudinem magis destruant & morbum augeant quam auxilium ferant.

§. XVII. Quum itaque tam misera & desperata res sit, soli experientiæ credere & adhærere in praxi medica, hinc quæstio non immerito oritur, unde certitudinem & veritatem Medicus in suis curationibus mutuari debeat. Plerique Medicorum in eo dubio procul consentient, quod hoc passu ad alterum medicinæ fulcrum confugiendum sit, nempe ad rationem, quæ cum experientia sit conjungenda. At verò quamvis non animus sit hæc duo artis medicæ fulcrimenta infirmare, sed potius ea roborare ac firmare, placet tamen, eo, quod id modo perfecimus circa experientiam, demonstrare quoque quam lubrica, quam languida & imbecillis res sit Medicorum ratio, qua ceu fulcro inniti

adhuc

Pro diver-
sitate cli-
matum,
vitæ gene-
re &c.
Variant
ipsa reme-
dia.
Horum
exempla;

Variant
morbo-
rum cura-
tiones pro
diversis
climati-
bus
Difficilis
& operosa
res est, me-
dendi me-
thodum
addiscere
per obser-
vationes.

Centum
hominum
ætates
huic nego-
tio non
sufficerent.
Ingens ille
circa re-
mediorum
vires &
applicati-
onem
dissensus
non de-
struit ip-
sam experi-
entiam.
Argumen-
ta eorum
qui hoc
statuunt.

Longissi-
mo tem-
pore opia-
ta magna
in morbis
remedia
credita
fuerunt,
quum
tamen
experien-
tia contra-
rium tes-
tetur.
Quod
Practici
qui calida
in variolis
& morbil-
lis profi-
cua judica-
runt? quæ
tamen
plus no-
cent quam
prosunt.
Contra-
rium pla-
nè locum
habet in
lenienti-
bus & ca-
thartici-
soli expo-
rientia si
credere
non liceat,
quæ arit-
unde cer-
titudinem

Dubitari
merito po-
test, num
ad experi-
entiam
bene in-
structam
pervenire
possibile
sit
Natura &
corpora
hominum
mirum in
modum
variant,
differunt
etiam
morbi:

medicus in suis curationibus inutuari debeat. Ad rationem congruentem.

Quisque sibi persuadet, se recte ratione uti. Interdum fictiones pro veris rationibus haberi solent.

Paucissimi artem recte ratiocinandi norunt.

Vana Medicorum figmenta ac idola.

Quæ nil nisi toni sunt & soni, nil significantes.

Solidiori scientia instructi facile agnoscunt omnes mutationes & effectus fieri motu.

Hinc omnia in corpore nostro mechanice fieri & explicari de-

adhuc communis & perversus mos fuit. Qui rationem in auxilium firmandæ artis nostræ causâ advocant, id urgent maxime, ratione omnium morborum causas & remediorum effectus penetrandos esse, & quomodo hoc vel illud fiat in medicina, vel cur fausti nec non infauti curationum eventus proveniant, unice ratione intelligi posse. Quid vero per rationem, quæ veritatum medicarum norma sit accipi debeat, non minimæ difficultatis est; etenim quisque sibi persuadet, se recta ratione uti, se veras causas penetrare & firmis in demonstrando principiis niti, quum tamen tot diversæ causæ & rationes ejusdem effectus in medium proferantur, quot fere numero sint Medici, non obstante, quod una tantum sit veritas. Adeo opinioniones male fundatæ, imo fictiones, pro veris rationibus & demonstrationibus haberi solent. Quantus dissensus est circa principia, quibus Theoria & Praxis medica superstrui debet? Paucissimi artem recte ratiocinandi & unum ex altero deducendi, ex cognitis incognita elicendi, res invicem connectendi & distinguendi, aut errores ex veris & simplicissimis principiis demonstrandi norunt, sed sine ordine, sine deliberatione, sine intima rerum cognitione, ex sola saltem imaginatione, & sua persuasione philosophantur. Tædet certe pressius prosequi quot figmenta, quæ nec concipi, nec explicari, aut demonstrari possunt, à tot seculis ab ipsis dissentientibus Medicis in scenam producta fuerint; cujus commatis sunt ex Veteribus calidum innatum & humidum radicale, natura, anima, cujusque facultates, expultrices, attractrices, concoctrices, spiritus insitus & influus, naturæ prudentia, intentio, directio, energia, sympathia, antipathia, idiosyncrasia, antipraxis, vis plastica, quatuor qualitatium & humorum temperies & intemperies, hæcque vel cum materia, vel sine materia, Helmontii archæus, Chymicorum sal, sulphur, mercurius; diversi salium sapes, Gas, Blas, semina & fermenta morborum, ideæ morbosæ spiritibus insitæ, vel influæ, & nonnullorum lux & flammula vitalis, spiritus vitalis, lucidus & igneus Willisii, peregrinus æther, variæ crases & materiæ secundum figuram situm & magnitudinem dispositiones; quæ omnia & singula, nil nisi meri termini sunt, toni & soni, nihil significantes, quorum explicationem si desideras, nihil aliud nisi petitio principii exsurgit: manent itaque speculationis & imaginationis simulacra & figmenta, nec ullum usum habent in demonstrando. Qui solidiori Philosophiæ Mechanicæ & experimentalis scientia instructi sunt, facile agnoscunt, omnes in universo mutationes, omnes effectus fieri motu, qui unice res alterat, corrumpit, destruit, immutat, generat, producit, & omnium effectuum causa & fons est. Facile quoque hi perspicunt, omnes qualitates, omnes proprietates & vires corporum motu fieri, nec sine motu concipi posse. Ex quibus etiam recte argumentantur, omnia quæ contingunt in corporibus humanis, sive circa vitæ & sanitatis, sive circa morborum, eorumque præservationis vel sanationis negotium versentur, unice tantum absolvi motu; omniumque effectuum ac phænomenorum, quæ in corporibus animantium obtinunt, unicam & veram causam esse motum. Quare cum motus præcipuum sit mechanices principium, hinc omnia, sicuti in universo, ita etiam in corpore nostro mechanice fieri & explicari debere asseverant; & Physicum ac Medicum, non seclus ac Mechanicum, motuum omnis generis leges

exacte nosse debere, adeo, ut, quo plures cognitas habeat, eo felicius in demonstrandis effectuum causis progredi possit. Ex quo perspicue patet, quid intelligi debeat per Philosophiam & medicinam Mechanicam, & quam sit turpissimum hæc ipsa à novellis doctoribus quibusdam non tantum ignorari, sed impudenter etiam contemni, & susque deque haberi. Verum enim vero, quamvis circa hæc inter prudentiores amplius sit consensus quod scilicet in corpore animantium, præsertim hominis, omnia fiant, tam in statu sano, quam etiam quandoque in statu restitutionis, certo ordine, tempore, proportionem, ad certum finem; & quod subsit horum summa ratio, ars & sapientia, quæ ex certis mediis ad finem ducentibus proportionatis cognoscitur; nihilo tamen minus in diversas rursus recedunt sententias. Quidam dicunt harum rerum causam esse principium quoddam incorporeum, quod efficiat motus, quod sapientia, ratione, intentione & cognitione præditum, corpus struat, conservet, præservet & restituat, si vero hoc ab illa sapientia atque prudentia deficiat, tunc motus erroneos, frustraneos, & morbosos efficiant. Alii secundum mentem nostram dicunt motum esse mutationem status in corporibus, proveniente ab impulsu, mutua actione & reactione, nisu & renisu vario corporum; Nam vires quibus corpora agunt à Deo creatæ & per multiplicationem diffusæ sive extensæ veram naturam & essentiam corporum constituunt; quapropter motus causa non extra corpus, sed intra essentiam corporis est quærenda. Neque negamus in macrocosmo pariter ac in microcosmo, nec non in omnibus animantibus & plantis, à sapientissimo ordine, arte ac ratione in certum finem, sive machinas artificiosissimas esse productas, quæ nunquam clarius perscrutanda potentia & modo, propagantur & multiplicantur, in quas tamen omnes & singulas externa, solida & fluida, elementa, alimenta, medicamenta inducunt. Quas mutationes, ante omnia Physicus & Medicus tam à posteriori, quam à priori bene debet nosse, inquirere, explicare & postea in usum applicare.

§. XVIII. Non vero nostri instituti vel temporis ratio postulat hæc fusius adhuc & distinctius hic loci excutere, & ab aliorum objectionibus vindicare, sed leviter saltem illa attingere placuit, ut omnes intelligant, quanta dissensio adhuc circa prima principia Physica & medica vigeat inter Medicos. Enim vero non tantummodo inter Medicos dissensio circa principia theoriæ medicæ, sed & circa morborum generationem, causas eorumque curationem abundantissime visitur. Quidam plethoram pro causa omnium fere morborum habent, exclusa omni qualitate & potentia falsa & acri. Alii ne ullam quidem sanguinis præternaturalem abundantiam dari affirmant, sed potius ex perverso motu partium corporis nostri ipsique insensibilis qualitatibus morborum causas deducunt. Ex Recentioribus plures ex solo acido, specifico tamen, nec non viscido, omnium morborum chronicorum originem explicare allaborant. Quidam hæc esse insufficientia asserentes, adjecerunt potentias salinas, acres, falsas, causticas, volatiles & sulphureas biliosas; nonnulli nec hæc morborum explicationi sufficere judicantes, morborum specifica fermenta, semina, ideæ seminales, fermentationes hostiles, ætherem peregrinum, & diversas materiæ morbosæ texturas in societatem advocarunt. Sunt quoque qui omnes causas materiales negligunt & occasionales

bere asseverant.

Patet hinc quid intelligi debeat per Philosophiam & medicinam Mechanicam.

Quidam dicunt harum rerum causam esse principium quoddam incorporeum, quod efficiat motus. Alii motus causam non extra corpus sed intra essentiam corporis quærent. Rationes illorum.

Plethoram pro causa omnium fere morborum quidam habent. Alii ne ullam quidem sanguinis præternaturalem abundantiam dari affirmant. Plures ex acido viscido omnium morborum chronicorum originem explicare allaborant. Nonnulli morborum specia-

tantum

fica fermenta &c. in societatem advocant. Sunt qui in Archæo quærent.

Alii à causis mere Physicis hos motus præternaturales deduci debere asserunt.

Neque in explicandis remedium viribus & operationibus Symbolismus observatur. Quid veteres sibi de Remediis persuadebant.

Vanæ illorum circa hæc speculationes & figmenta. Etiam Recentiorum.

Ex quibus adductis intelligitur Medicorum rationem non secus atque eorum experientiam admodum in medicina esse imbecillum.

Ex corrupta vel ex solida nostra ratiocinatione hæc omnia profluunt. Sana recta & perfecta ratio cuncta quæ sit.

tantum asserunt, veras autem morborum causas in ipso Archæo seu principio vitali, in spiritu corporis nostri, seu in ipsa anima, corpus nostrum dirigente, quærent, quæ cognitione, prudentia & vigilantia instructa, contra & propter materiam corpori nostro infensam, præsertim sanguinem abundantem se propriis viribus & Marte proprio armet, & motu salutari critico, aut evacuatorio, aut febrili consumtorio, perniciosum vitæ humorem à corpore arcere & propellere molitur: quales motus salutaria potius naturæ conamina, quam vere morborum effectus dicendi essent. Alii qui simile quid concipere nequeunt, à causis mere physicis necessariis hos præternaturales motus proxime deduci debere asserunt, qui in se & per se ad turbationem, sæpius etiam ad destructionem œconomiae corporis & ejus perniciem tendunt, persæpe vero per accidens dirigente sic divina Artificis, qui corpus nostrum struxit, sapientia salutes fiunt, & in ipsius causæ morbificæ, à qua oriuntur, correctionem, vel expulsionem vel destructionem benigne terminantur.

§. XIX. Neque in explicandis remedium viribus & operationibus consensus & symbolismus observatur, sed plerique in diversas & contrarias sæpe abeunt sententias. Veteres peculiarem virtutem certis paribus dicatam remediis affingebant, unde emergebant pectoralia, stomachica, hepatica, cephalica, cordialia; vel etiam sibi persuadebant dari evacuantia, quæ peculiarem humorem v. g. bilem, pituitam, melancholicam è corporis sphaera attrahant & eliminant. Fuerunt qui medicamenta saltim operari in spiritu, illos irradiando vel etiam obfusando, aut terroris vel etiam iracundiæ ideam pervertendo, sibi imaginabantur, vel etiam, quod speciali ratione fermenta & semina morborum extinguere; quæ omnia si bene æstimamus, nihil nisi vanæ speculationes & figmenta quæ nec intelligi nec perspicue explicari possunt, merito dici debent. Ex Recentioribus vero surrexerunt, qui omnem remedium efficaciam in concilianda sanguinis & humorum fluiditate eorumque circulatione promovenda, unice ponebant. Sunt quoque qui remediis præcipuam virtutem in medendo derogant, & soli naturæ medicatrici sanandi & medendi vim adscribunt, infaustosque successus ejusdem erroribus, assignare non verentur. Sed utinam hæc omnia quæ gratis sic in medicina asseruntur, solide prius & explicentur & demonstrantur.

§. XX. Ex quibus omnibus dictis & adductis clarissime intelligitur tantopere à Medicis laudatam rationem, non secus atque eorum experientiam admodum imbecillum in medicina, tam Theoretica quam Practica, esse fulcrum: Ecquis enim est, qui ubi tantus opinionum & dissensionum numerus reperitur, certitudinem ac veritatem sibi poterit promittere? Verum enim vero quo tandem ex omnibus hisce, quæ nos premunt difficultatibus, emergamus, paucis dicimus: opinionem perversam & errorem, sicuti in omnibus aliis disciplinis, ita etiam in medicina, unice ex corrupta nostra ratiocinatione oriri, omnem vero veritatem & certitudinem ex solida & bene fundata ratiocinatione profluere. Sanam autem rectam & perfectam ratiocinationem eam statuimus, quæ firma nititur demonstratione, id est, quæ clare & distincte res distinguit, intelligit, explicat, connectit & debito ordine in adstruendis causis utitur; neque res separatas aut ordinem rerum & causarum inter se confundit, denique ex

notis ignota detegit, media fini convenientia invenit, suasque demum illationes multiplici experientia & constanti eventu confirmat. Plurimi profecto eruditorum artem recte ratiocinandi ignorant, unde in graves incidunt errores. Plures veritates singulares possident, sed eas postea adveniendas & eliciendas alias male applicant. Quam pauci norunt speculationes, opiniones, resque imaginationis à claro & perspicuo conceptu distinguere? Pauci etiam nominales definitiones & explicationes à realibus sciunt separare. Quot sunt qui nondum satis demonstrata vel explicata pro veris assumunt principia, ex quibus postea multa inconvenientia inferunt. Causarum ordo à plurimis turbatur, ita ut remotas causas pro causis proximis ponant & intermediarias cum principalibus confundant. Dantur, qui singularia nomina fingunt, ipsisque realem quandam tribuunt efficaciam, vel à recepta terminorum significatione abeunt, unde non mirum quod propter obscuritatem non possint intelligi. Et quod maximum, plures eruditorum hoc morbo laborant, quod ambitionis, philautiæ, contentionis, quam veritatis sint cupidiores; & dedecori sibi habeant, semel amplexam sententiam relinquere. Hic est fundus miseriæ medicæ, hic fons est tot hypotheseum, variarum opinionum, sectarum.

§. XXI. Quis igitur non intelligit medicinam medicinæ esse necessariam, quæ nostro quidem iudicio, non salubrior excogitari potest, quam quod rationem Medici ante omnia corrigere, emendare & proficere, qua potest fieri solertia ac dexteritate allaborent. Cultura vero rationis maxime continetur duobus, alterum est, ut intellectus compluribus veritatibus ex sensu experientia & observatione petitis in Physicis, Mechanicis, Chymicis, Anatomicis & Practicis imbuatur; alterum est ut veritates jam cognitæ bene connectere & in ordinem dirigere ratio discat: quod ultimum, saniorum iudicio, studio divinæ Matheseos maxime acquiritur. Hæc enim ut bene monet HIPPOCRATES *Epist. ad Thessalum Fil. non solum vitam illustrem, & ad multa commodam in humanarum rerum statu efficit, sed etiam animam acutiorē & clariorem reddit ad omnium, quorum usus in medicina expetitur, utilitatem consequendam.*

§. XXII. Quod si itaque Medicus artem recte ratiocinandi bene calleat, & plures veritates ex Physicis & Medicis singulares cognitæ habeat, tunc facile eas promovere potest ad axiomata inveniendæ, nec non ad incognitas veritates ex iis detegendas, & omnia obscura explicanda. Hic præsidii jam instructa Medici ratio facile perspiciet, experientiam omnem medicam in se non esse fallacem, neque ansam dare diversis opinionibus atque erroribus, sed præcipitantiam in iudicando esse horum unicam causam, quod nempe ea quæ observavimus v. g. à dato remedio sive faustos sive infaustos effectus, nimis præcipitanter ipsis datis remediis hos adscribamus. Nam quemadmodum in Physicis & Mathematicis, sensus in se nec fallunt nec falluntur, sed iudicium; quod nempe secundum sensuales perceptiones ad ipsarum rerum existentiam, naturam & causas statim argumentemur: Ita etiam experientia minime in se fallit, sed fallit nos præceptum nostrum iudicium. Communis enim & quasi innatus error est, quodcumque, ut supra jam monuimus, à dato remedio in morbo prosperum vel infaustum effectum observamus, quod statim huius causam ipsi remedio assignemus, cum tamen ad hunc vel illum effectum sæpe plures simul causæ concur-

Plurimi artem recte ratiocinandi ignorant.

Quorum ignorantia & errores ab Auctoribus indicantur.

Hic est fundus miseriæ medicæ.

Medicinam medicinæ esse necessariam.

Quibus cultura rationis maxime continetur.

Quo pacto Medici veritates facile promovere possint ad axiomata inveniendæ & omnia obscura explicanda.

Experientia minime in se fallit, sed fallit nos præceptum nostrum iudicium. Et quomodo.

concurrant, quæ nec cognoscuntur, nec perpenduntur. Quis enim nescit, pro diversitate humorum, pro differentia motuum, quibus fibræ & partes solidæ corporis assuetæ sunt, mirè variare remedium vires atque effectus? ut proinde, remedia non secundum activitatem suam, sed secundum receptivitatem subjecti agere, Veteres rectè inculcaverint.

Sana Medici ratio genuina est clavis experientia & optima opinionum conciliatrix.

§. XXIV. Sana itaque Medici ratio ac iudicium solidum genuina clavis est, & vera directrix experientia practica, & optima conciliatrix diversarum opinionum. Supra mentio facta est, ingentem inter Practicos, circa remedium efficaciam in morborum sanatione existere dissensionem, dum alter certam medendi methodum & certa remedium genera mirum extollit, alter eadem valde deprimit atque contemnit, utut singuli experientiam diuturnam pro fundamento assertionum suarum allegent. Hujus dissensus causas facile perspicit, Vir exquisita ratione præditus, & hinc discrepantes invicem Practicos haud difficili negotio conciliat. Et ut exemplis rem confirmemus, quando concertant Medici, utrum in variolis, in purpura, aliisque exanthematicis febribus V.Sio locum habeat nec ne, tunc per facile Medicus peritus decisionem dabit rationi convenientem, quod videlicet V.Sio administrata in talis modi morbis exanthematicum exitum promoveat, si subjectum sit juvenile, vino assuetum, sanguine turgat, vel effrænes motus in fibrarum systemate vigeant; contra vero quod in corpore segniori, spongioso, cachectico & ubi bonorum succorum defectus est, circa expulsionis præsertim tempus, nunquam suadenda sit. Ita etiam ratione controversia inter Medicos facile decidi poterit, num quisquam sanitatem vel longævitatē sibi promittere possit sine V.Sne? five, an V.Sio ad vitam sanam & longam multum conferat? Quod si quis itaque valde laborat, partiumque solidarum robore instructus est & vasa ampliora possidet, is certè sine V.Snis auxilio diu sanus vivere poterit. Si quis autem in vita tranquilla & otiosa, copiosos & boni succi cibos ingerit, corporis vero spongiosus est & laxioris, illi, nisi velit sibi subtrahere alimenta horumque bonitatem, opus utique erit sanguinis missionibus. Solenne est in Gallia in omni febre, vel etiam inflammatione per repetitas V.Snes, purgationes, clysteres, ptisanas vires valde enervare, & ita sanguinis ebullitiones æstusque vehementiā deprimere: hæc methodus in illis regionibus facilius tolerari potest, quam in nostris humidioribus & frigidioribus, ubi non tanta corporum agilitas, fibrarum sensibilitas, humorum fluiditas & sanguinis restauratio, sed fibrarum major adest crassities, humorum densitas; unde nimium per Venæ Sectionem imminuto virium robore, vel pereunt ægri, vel si remittit vehementia morbi, mox tamen majores fiunt recidivi, vel alii mali moris morbi succedunt. In intermittentibus quando disceptatur, an Venæ Sectio utilis sit nec ne, tunc Medicus adhibita ratione commodè quoque id poterit definire, videlicet non usum habere eam si in prima regione præsertim ventriculo & duodeno humorum corruptorum stagnet colluvies, vel in puro sanguine infarcta vasa & viscera sint. Si vero febris fuerit epidemica vel ex transpiratu prohibito nascatur, præterea corpus juvenile calidum & ingens æstus cum metu delirii præsens sit, quis dubitabit sanguinis evacuationem esse summe utilem?

§. XXV. In inflammationibus, num Venæ Sectio sit proficua nec ne, rationibus solidis Medicis.

cus facile quoque determinabit, si enim viscus, uti pulmo, inflammatum graviter fuerit; sique ingens circa hoc sanguinis stagnatio ex oppressione respirationis observetur, denique vasa sanguine repleta fuerint, tunc certe Venæ Sectio præsentissimum præstabit auxilium, quod subito respirationem liberiores reddat. In senibus vero & ubi plus feri impuri quam sanguinis in venis stagnat, utique sanguinem multum emittere & per crebras vices eum imminuere non tutum, sed periculosum erit. Disputaverunt olim Medici, num purgatio præcedere debeat Venæ Sectioni, vel Venæ Sectio purgationi? Non vero difficilis erit horum conciliatio, si inter purgantia & inter laxantia fiat distinctio. Hæc utilissimè semper missionibus sanguinis præmittuntur, ne biliosi humores in primis viis collecti succedant in locum sanguinis & vasa occupent: minime vero purgantia ante Venæ Sectionem instituendam locum habere possunt. Vidimus exempla ab imprudenter datis emetico-purgantibus in viris plethorico-hypochondriacis varia spasmodica nec non paralytica pathemata excitata, quæ V.Sne statim remiserunt. Neque enim aliter contingere potest, quam quod partibus à purgante fortiter commotis & spasmodice tandem constrictis, sanguinis copia ad cerebrum cum impetu deferatur, & ibi facta stagnatione & congestione, varia in genere nervoso excitet incommoda.

§. XXVI. Sunt nonnulli, qui emetica cum Asclepiade è praxi medica lubentissime expellerent, alii nolunt sine illis esse Medici. Medicus vero ratione imbutus hanc dubiam sententiam facile conciliabit, quod carere certe emeticis solidus Medicus nequeat, quoties considerat plurimorum etiam acutorum morborum fomitem plerumque subsistere in primis viis & flexura duodeni ceu succenturiato ventriculo, uti id D. Præses latius in *Dissert. de duodeno multor. mal. sede* deduxit. Nocent vero emetica si spasmodicæ partium crispaturæ & contracturæ urgent, sique plus acrimonia caustica subtili humores quam copia peccant, vel si ab animi impetu motus œconomia corporis fuerint turbati. Ubi vero à saburra & quantitate humorum stagnantium atonia partibus inducitur, tunc certe iis ablatis robur fibris debilitatis rursus sua sponte additur. Quæstio etiā decidenda occurrit, num vomitoria, vel etiam laxantia aut clysteres in variolarum vel morbillorum affectu tuta sint, an vero singularis potius noxa ab ipsis metuenda? At vero sana etiam Medici periti ratio horum usum & abusum facile determinabit: Nam certe corpora hisce affectibus correpta, quovis etiam tempore subinde hisce remediis exercere, conatus erit omni prudentia ac scopo vacuus, inde debilioribus subjectis non sine periculo; si vero indicium adfuerit saburræ acidæ biliosæ in ventriculo & duodeno existentis, præstat utique hanc moderato emetico cum laxante, v. g. manna decocto mixto prius evacuare, ita enim benignior certè & tolerabilior, sine ingenti quoque copia exanthematicum, succedet morbus. Quod vero alvum aperire, quandoque per decem dies occlusam, in hisce morbis renuunt, nec admittere volunt clysteres lenientes, nec temperata laxantia, hi certe non capiunt, quod nimia mora in intestinorum canali contenta colluvies biliosa mucosa pernicioles corruptiones induat, quæ postea gravioribus symptomatibus viam pandit apertissimam.

§. XXVII. Utrum in peste emetica usum habeant nec ne, nuperrimo tempore disputatum fuit, à dissidentem experientiam allegantibus. Ob-

In senibus vero sanguinem multum emittere non tutum, sed periculosum est.

Num purgatio præcedere debeat V.Sni vel hæc purgationi. Horum non est difficultas cum distinctione conciliatio.

Emetica nonnulli è Praxi medica lubentissime expellerent. Alii nolunt sine illis esse Medici.

Quos repugnantes Medicus ratione imbutus facile conciliabit. Emetica quando nocent vel profunt.

Quæstio deciditur num vomitoria &c. in variolis vel morbillis tuta sint.

Ac ratione & experientia confirmatur.

Utrum emetica in peste utum habeant inquiratur.

servatum tamen fuit mox in principio ea data profuisse, si vero jam malum in universum corpus & nervorum systema dispersum fuit, tunc inflammationem, quæ semper fere in peste præsens est, adauxerunt. Miasma enim pestilens tenuissimæ indolis cum saliva mixtum descendens ad œsophagum & ventriculum, ibi stagnantes & ad corruptionem proclives humores, facile in suam naturam confermentat, ubi utique hanc corruptionis virulentæ mineram antequam elaboretur, subito è corpore expellere tutissimum erit.

Antiquus
sudorife-
rorum in
exanthe-
matibus
usus iam
ferè cessat
& dam-
natur.

§. XXVIII. Quod attinet ad expellentia & sudorifera, horum magnus olim usus fuit in expellendis exanthematibus, nostris vero temporibus in totum ferè cessat & damnatur. Intergrum vero erit h.l. etiam asserere, sanam Medici rationem, modo dextrum horum usum suadere, modo ab eorundem abusu dehortari, de utriusque vero legitima indicatione pro diversa circumstantiarum indole prudenter decernere. Sic ubi nimiae vigent commotiones solidorum æque ac fluidorum in machina nostra, ubi irrequieta anxietas, intensus æstus, humorum abundantia, ubi calidiora hæc remedia veneni vicem subeunt, & utique magis è re erit tali casu propinare sedativa, quæ efferos sanguinis & humorum motus refrenent, utque hac ratione feliciter heterogeneous expulsio promoveatur.

Et qua de
causa.

Ita saniori quoque ac recta ratione decernimus non quadrare calidiora & expellentia iis morbis, ubi materia nondum est ad motum apta, neque ad discernendum vel excernendum prompta atque disposita. Statuit quoque ratio in morbis chronicis, ante solutionem plethoræ, sudorifera activiora neutiquam convenire, ne intensiori sanguinis & humorum peccantium circulo, per incongrua loca eruptionem materiæ moliens natura ingentes hæmorrhagias, extravasationes, humorum stagnationes & inflammationes, vel etiam paralyses & apoplexias in scenam producat. Si vero, excretionis tempore, & materia ad excernendum digesta & congrua natura nimis langueat & segnis sit ad expellendum, tunc utique prudentia Medici in eo versari debet, ut fidelem naturæ ministrum se gerat, eamque in opere suo deficientem, adjuvet.

Quomo-
do Opi-
atorum
res cum
nimis ho-
rum fau-
toribus
conciliari
queant.

§. XXIX. Similiter ut Opiatorum otores cum nimis horum remediorum fautoribus conciliemus, opus quoque & labor unicus rationis erit. Ecquis enim non intelligit, ubi motus in corpore deficiunt, ubi copia & lentescencia humorum peccantium est, eorumque stasis aut inflammatio metuenda; præterea pulsus debilis & languidus, ætas senilis, habitus corporis spongiosus, quod neutiquam tunc, quicumque demum etiam morbus fuerit, eorum usus sit conveniens. Contra vero ubi nimia dolorum & spasmodorum adest ferocia, ex animi affectu, vel principio subtilissimo, aut causa externa producta, vel ubi natura anomalis motionibus morbofis assueverit, præterea natura est sensibilibior, ætas juvenilis, & motuum concitata vehementia, ibi certè desideratissimam opem ferre solent.

Nec non
litigantes
de Chinæ
China, cum
Martialibus,
Roborantibus &
leniter Adstrictivis,
quorum abusus valde nocet,
dexter vero usus summè est proficiuus, nec tamen
discerni invicem, nisi per iudicium & prudentiam
Medici, possunt. Quis enim Chinæ Chinæ
excellenter virtutem, in sistendis febrilibus mo-
tibus; quis Martialibus in roborandis visceribus,
aperiendis obstructionibus & eliminandis super-

fluis vim derogare velit, si dextre adhibeantur, subtracta nempe è primis viis prius nimia humorum peccantium colluvie vel plethora solutâ, & ubi toni fibrarum remissio & laxitas advertitur. Contra vero, ubi in prima regione non solum, sed in ipsis quoque visceribus humorum abundantia fuerit; si tonus fibrarum vigeat, & spasmis constrictæ fuerint partes, plus certe nocent quam profunt, & ab eorum usu gravissimorum semper morborum catervam, tanquam ex Pandoræ pyxide confurgere dolebimus, dum materiam morbosam, quæ debebat excerni, intus continent atque coërcent.

§. XXXI. Mercurialia quod concernit horum pariter abusus damnat rectæ rationis consultatio, prout dextrum eadem adhibendi modum summopere suadet atque commendat. Quotus enim quisque est quem lateat mercurialia in pulveris forma deglutita facillimè salivationes excitare, quod partim glandularum salivalium mæandris celerrimè se insinuant, partim etiam tunici ventriculi impacta, ex concursu variorum humorum & salium corrosivam suam rursus nanciscantur indolem, unde illæ lacrymæ. Contra vero si in pilulas cogantur, effectus longe præstantior sponderi potest, dum per intestina prius devolvuntur quàm soluta fuerint, & si successive colliquata vim suam placidè dispergunt, & tandè foras, qua data porta ruunt. Præterea mercurialia nunquam interne dari debent, quoties prima regio acerbis salinis biliosis sordibus squallet, ne salinæ hæc particule mercurialibus affociantur, & corrosivum virus ipsis restituant, unde sæpius præsertim in hypochondriacis, scorbuticis, arthriticis, febribus biliosis, infantibus lacte corrupto adfectis noxam intulisse præsentissimam compertum est. Nec ubi genus nervosum vel cerebrum valde languet, fibrarum & vasorum tonus insigniter relaxatus, vel etiam nimis constrictus est, ceu in paralyti, epilepsia, apoplexia &c. fieri affolet, locum habent heroica hæc remedia, utpote quæ stimulando & animando systema fibrosum omnem lymphæ ac humorum massam turbando ingentes concitant motus. In huiusmodi casibus mercurialia, quæ certe alio tempore, loco, morbo & subiecto non modo tutissima sunt, sed etiam efficacissima, eximiam noxam asferre possunt corporibus, tot historiis & observationibus id testantibus. At ubi nihil vetat ea propinare, certe nulla potentius remedia contumaces oppilationes referant, & obstructiones, etiam in remotis & angustissimis capillaribus vasculis perfringunt ipsis mercurialibus: nulla efficacius viscidos crassos & lentos humores fundunt atque colliquant quam hæc ipsa: unde in rebellibus ac contumacibus affectibus, venerea lue, antiquis exulcerationibus, tumoribus duris dissolvendis, vermibus fugandis, & depuranda lymphæ massa divinam ferunt opem, dum modo dextra methodo & debito cum regimine adhibeantur.

Mercuria-
lium abu-
sum dam-
nat, usum
commen-
dat rectæ
rationis
consulta-
tio. In pul-
veris forma
deglutita
facillimè
salivatio-
nem exci-
tant. In forma
Pilulari
effectus
longè præ-
stantior
sponderi
potest.

Quo tem-
pore Mer-
curialia
rectè
dantur
internè.

Nulla po-
tentius re-
media
contuma-
ces oppi-
lationes
&c. refe-
rant.

§. XXXII. Tandem quis ignorat à fontium salubrium & nominatim Thermarum, Acidularumque usu noxam pariter atque levamen ægrotantibus accedere, ut profecto etiam circa horum selectum & prudentem applicationem Medici ratio cautè versari debeat. Quis etiam non à priori videt in gravi viscerum obstructione, induratione, corruptione &c. ut sit in hydrope & phthisi, vel etiam nimia cerebri & nervorum laxitate, ut in epilepsia & paralyti, vel feri etiam extravasatione, ut in hydrope thoracis & asthma convulsivo horum fere nullum esse usum, adeoque

A thermarum, acidularumque usu noxam pariter atque levamen ægrotantibus accedit.

Quorum exempla submittuntur.

Pro & contra.

adeoque plus detrimenti quam emolumenti inde expectari posse? Contra ubi obstructionum ea est ratio, ut possint superari, ubi humorum tenacitas resolvi & expelli potest, acidi falsive humores corrigi & dilui, confriatæ nervorum partes emolliri, ibi sane hi fontes summa sunt ad rebelles chronicas passiones arcendas vel sanandas præsidia. Non vero hujus loci vel temporis est hæc omnia specialius adhuc deducere, cum certe integrum volumen de hoc pernobilis argumento conscribi posset. Sufficit quod satis superque exemplis demonstravimus, sanam & rectam Medici rationem, omne fere in omni genere mendi ferre punctum. Quare etiam HIPPOCRATES lib. de art. Sect. 7. scribit: *Quæ profuerunt, ob rectum usum profuerunt, quæ vero nocuerunt, ob id, quod non recte usurpata sunt, nocuerunt.* Etenim ratio optime causas inquirat & scrutatur, cur medicamenta vel noceant vel profint, adeoque usum eorum vel abusum detegit; ideoque scite rursus pronunciat HIPPOCRATES l. c. *Quod Medicus omnia bene fundata ratiocinatione facere debeat, & quod opinio in medicina in crimen vertenda sit, quia perniciem affert.*

Hippocratis de hoc negotio dictum memorabile.

Medici ratio etiam in præcavendis morbis plurimum valet.

Quæ Medicus ultimus distinctè perspicit.

De omnibus cæteris rebus non naturalibus.

Alimenta quæ certis subjectis conveniunt, aliis eodem modo sunt proficua.

Neque remedia quæ huic

certis quibusdam morbis sunt exoptatissima, aliis individuis eodem morbo laborantibus conducunt. Nullus igitur Medicus observationibus, aut libris medicis diversis in locis scriptis, recte uti, & ea quæ continent ad sanitatis ac vitæ tutelam applicare potest, nisi summa ratione sit instructus. Sic enim à priori statim dijudicare poterit, quando circumstantiæ principales in observationibus sunt omissæ; atque illico perpendet, methodum medendi huic illive climati ex aëris, victus, diversitate & singulari corporum constitutione familiarem & utilem, non convenire diversis ab his regionibus, adeoque non esse facile imitandam. Quare semper exacto cum judicio, & clara distincta ac solida cum ratione legendi sunt Medicorum libri, & caute perscrutandæ sunt observationes aliorum, nisi in praxi postmodum quadrata rotundis miscere, & graviter impingere Medicus velit.

vel illi individui sunt exoptatissima, aliis individuis conducunt.

Exacto cum judicio legendi sunt Medicorum libri.

Ars medica per solidam ratiocinationem &c. magis increvit, quam per experientiam.

In asserti confirmationem produci- tur sanguinis circulatio.

Divinum hoc inventum veterum Chimeras & figmenta funditus evertit.

Neque minus recentiorum commenta hujus ope detecta & profligata sunt.

Quid optatum foret.

§. XXXV. Restat jam ut demonstramus, artem nostram per solidam ratiocinationem & sanam Philosophiam longe magis increvisse, quam per immensam atque infinitam experientiam. In confirmationem hujus asserti producere licet magnum illud, quo non datur in medicina superius, nec in mundo præstantius inventum, Sanguinis Circulationem, quam Anatomiae exquisitiori debemus. Hæc, ut primum quidem in scenam prodiit, tantam arti & scientiæ nostræ lucem affudit, ut inde Medici non solum longe penitus in abditam vitæ & sanitatis naturam penetraverint, & partium corporis nostri functiones & viscerum officia dextre magis, ac olim factum erat, explicaverint: sed etiam Veterum figmenta & somnia in meris verbis, sonis atque tonis nihil significantibus, ut supra jam innuimus, tradita, tandem sub felici hujus auspicio disparuerint, atque explosa sint. Hoc divinum inventum hodie tam firma fundamenta cum Physiologia tum Pathologiae & Therapiae subministravit, ut hujus cognitione omnes fictiones de medicamentis specificis certis partibus dicatis, hepaticis, splenicis, cordialibus, uterinis &c.; præterea omnes facultates concoctrices, secrete, retentrices, excrete, nec non electrices medicamentorum purgantium, uno quasi ictu ceciderint, & funditus eversæ sint. Neque minus Recentiorum commenta de medicina universali, de seminibus & fermentis specificis morborum, de electione venarum quoad scopum evacuatorium, hujus ope detecta & profligata sunt, & demonstratum præterea paucis & selectis quibusdam remediis omnium morborum curationes commode & efficaciter posse perfici. Non dicemus jam de aliis præstantissimis Anatomicis, Chymicis, Mechanicisque inventis, quæ non tantum in Theoria, sed etiam in Chirurgia, Pharmacia, & Medica Praxi tuto fideliter & jucunde gerenda operam præstant desideratissimam.

§. XXXVI. Optandum vero vehementer foret, ut in Mechanicis Hydraulicis, Staticis & Hydrostaticis plures leges motuum, fluidis pariter ac solidis elasticis, magis determinate nobis essent cognitæ, ut motuum in corpore nostro anomalias accuratius explicare & exactissime cognoscere liceret. Optandum præterea, ut melior esset oculorum acies, quo exilissimos illos cerebri, nervorum, fibrarumque canaliculos rimari, & fluidorum per illos motus pressius prosequi, & mixtiones atque texturas corporum attendere possemus; tunc certe desiderio nostro potius, longe adhuc nobiliorem futuram esse scientiæ nostræ medicæ faciem, sperare liceret. Neque mi-

Solida medica Theoria & Praxis potissimum in ratione & prudentia fundatur. nus egregia nostræ arti salutari accederent incrementa, si ejus antistites, in pulsum, qui de sanguinis atque humorum progressu testantur, negotio, tam in sanis quam subinde etiam ægrotis intensius paulo desudarent, nec non curatius ad excretionem, earumque modum, quantitatem ac pondus respicerent.

Qui inventis Anatomis, &c. usum atque præstantiam in Theoria & Praxi medica stabilienda derogant penitus ignorant in quo artis nostræ natura, perfectio &c. versentur. Methodus medendi specialis nihil est aliud quam Medici judicium. Qui acri pollent judicio, ad Praxin medicam admodum sunt idonei.

§. XXXVII. Quis itaque ex dictis & demonstratis hætenus non evidenter agnoscit, solidam Medici theoriam & praxin potissimum in ratione & prudentia fundari? Quis porro ambiget asserere, rationem Medici esse experientiæ & observationum directricem, imo clavem: atque experientiam rationali & physica theoria destitutam infidam esse, empiricam, mutilam atque mancā, & verum ignorantiae asylum? Patet ulterius ex antea adductis, illos qui inventis Anatomis, Physicis, Mechanicis atque Chymicis usum atque præstantiam in solida Theoria & Praxi medica stabilienda derogant, penitus ignorare, in quo nostræ artis natura, perfectio & incrementa versentur. Neque obscurum amplius esse potest, quod methodus medendi specialis nihil sit aliud quam Medici judicium: quo differentiam status morbi cognoscit, convenientia remedia invenit, inventa debito tempore ordine ac regimine applicat, & tandem ægrotantes ab iis omnibus, quæ ullo modo noxam inferre valent, sedulo dehortatur. Unde etiam fluit, quod qui acri judicio pollent; ad praxin medicam faciendam admodum sint idonei, & quod prudentia in judicando, felix atque fecunda mater sit omnis peritiæ, prout imperitia è contrario misera soboles est hebetis animi, & stolidæ in discernendo imprudentiæ.

§. XXXVIII. Exponere hæc omnia paulo clarius in præfenti Dissertatione voluimus, quum pauci ex Medicis, multo minus è vulgo, & artis nostræ rudibus intelligant, quid medicina sit, quæ ad ejus incrementa promovenda requirantur, quæ ejus sint fulcra atque fundamenta, & quæ Medicus discere, scire ac docere debeat? Vulgaris error est, experientiam omne punctum ferre in praxi medica, & Medici ratiocinationem in ea parum esse utilem, quum tamen, ut supra ostensum, ignorent veram rationis medicæ & experientiæ naturam; hinc etiam usum & abusum remediorum, in quo cardo medicinæ practicæ versatur, perperam distinguunt, sed vel ex prospero successu observato certa remediorum genera in cælum usque extollunt; contra vero si male aliquando cesserit eorundem usus, ea ipsa, mirum! rursus deprimunt & in orcum usque damnant, quum tamen ipsum remedium, quod in se est optimum, hujus infausti effectus non sit incusandum, sed Medici ignorantia, qui prudentia id recte applicandi est destitutus. Quare nostro judicio ii Medici qui absolute vel remedia nimium extollunt, vel ea ab aliis laudata sine discrimine & limitatione increpant atque contemnunt, parum certe videntur artis nostræ & veræ theoriæ & praxeos naturam penetrasse. Sed hæc pro hac vice sufficere censemus. Te vero L. B. rogamus ut memineris illius *Horatiani*:

----- Si quid novisti rectius istis,
Candidus imperti, si non, his utere
mécum.



Pauci ex Medicis intelligunt quid sit medicina &c.

Vulgaris est error, experientiam omne punctum ferre in praxi medica.

Quam ob causam.

Medici qui remedia nimium extollunt vel ea ab aliis laudata increpant, artis nostræ naturam parum videntur penetrasse.

D E

ATHEO CONVINCENDO

E X

ARTIFICIOSISSIMA MACHINÆ HUMANÆ STRUCTURÆ

ORATIO

HABITA D. XXVII. MART. AN. MDCXCIII. IN ALMA FRIDERICIANA,
CUM MUNUS PROFESSORIUM AUSPICARETUR.

*Perillustri Domine Cancellarie ,
Magnifice Domine Director ,
Viri maxime Reverendi, Excellentissimi, Consultissimi, Amplissimi, Experientissimi ,
Clarissimi, Professores ac Collegæ honoratissimi, Domini Patroni, Fautores ,
Amici summe devenerandi ,
Tuque ex delibatissimo juventutis flore adornata Dnn. Studiosorum corona.*



ON ulla res mente humana dignior eademque salubrior videtur, quam quæ circa venustum rerum creaturarum artificium suscipitur contemplatio. Etenim si quid inconcussæ felicitatis aut jucunditatis summum voveri, vel in hac vita acquiri potest, sane est profunda mentis descensio in abdita creaturæ cujusvis centra ac recessus secretissimos, ubi Majestatis Divinæ consummatissimam sapientiam ac bonitatem, & immensam ejus perfectionem apertius intuemur, admiramur ac veneramur. Ad profundissimum & inexhaustum omnis boni hic devolvimur fontem, & cornu copiæ amplissimum, ex quo omne quod veram tranquillitatem animo conciliare, quod ad genuinum virtutis ac pietatis fundamentum hominem ducere ac componere valet, uberrime fluit ac derivatur. Quod si enim ulla re, sane intimiori planiorique rerum creaturarum contemplatione, ad sapientissimi Conditoris ac Opificis nostri cognitionem adscendere nobis promptum ac facile est. Simulacrum & imago ejus, infinitæque omnes perfectiones, luculentissime in omnibus ejus operibus, illorumque plus quam mechanico artificio, emicant & exstant; horum sedula, non perfunctoria mentis contemplatione, summam mentem ac manum ejus sapientissimam undiquaque cognoscimus, simulque ad piissimum ejus cultum venerationemque accendimur ac incitamus. Et hæc præcipua ac regia via est, convincendi præfractissime Divini Numinis existentiam negantes, ut hoc modo consensus ipsis invitis, tanto perspecto rerum artificio ac mechanismo, extorqueri possit, dari summam mentem ac rationem, à qua hæc omnia fluant.

Et sane huic contemplationi ac meditationi summo studio ac opere insistendum ac invigilandum esse videtur, quia nullo non tempore exstiterunt, & adhuc (horrendum dictum est, at verissimum!) christiana luce jam clarius micante emergunt, qui ejurata ac ex-

cussa ex intimis mentis meditullis ac sensibus omni pietate ac religione, constanter ac frivole propugnare conantur, non existere revera tale ens summe bonum infiniteque perfectum, sed potius merum commentum, vaframentum ac technas esse Politicorum, qui ignarum ac simplicissimum vulgus hac arte in officio ac reverentia continere, ipsique terrorem incutere vellent, quo haberent obsequentio-rem ejus animum. Quumque primum illud ac summum boni fundamentum in dubium vocare contendunt, simul omne, quod huic superstructum est, intelligo S. Scripturæ auctoritatem, verum DEI cultum, animæ immortalitatem, cunctasque virtutes funditus evertere, ac de folio & dignitate sua dejicere conantur.

Verum enim vero ut nefandum & iniquissimum hoc assertum ex omnium hominum animis penitus eradicetur ac suffocetur, omnis vertenda est opera, omnisque lapis movendus. A nullo autem commodius ac felicius argumentum hoc tractari, & institutum nostrum in effectum traduci posse, persuasissimus sum, quam à Medico & rerum physicarum gnaro, utpote qui ipsius naturæ minister, longe altius provehitur ad introspecti-enda reconditi-ora divinæ sapientiæ arcana, quique, dum indefinenter versatur cum ejus operibus, cent-alem illorum indolem ac artificiosam structuram examinando ac investigando, DEUM, ceu sapientissimum naturæ Præsidem ac Magistrum, continuo agnoscit, ejusque perfectiones in artificiosissima corporum textura, illorumque conservatione circumquaque intuetur ac demiratur. Hanc ob causam & ego hoc argumentum enucleatius evolvendum ad manus sumsi, quum à Serenissimo ac Potentissimo Electore FRIDERICO III. Sapientissimo, Domino ac Principe meo Clementissimo, mihi nuperrime Medicinæ ac Philosophiæ naturalis, Professio publica & ordinaria in hac nova Academia quam ad immortalem Majestatis suæ gloriam, sævissimo bello jam circumquaque strepente, exstrui curavit, clementissime mihi demandata

ac oblata fuerit, brevius ac planius expositurus ac illustraturus simplici oratione, magisque veritatis, quam fidei venustatis, rationem habendo, quo modo evidentissimis argumentis, ex concinna ac admirabili structura organica machinae humanae, ejusque praecipua, & fere divina parte, mente, ipsius sanctissimi Numinis existentia, essentia, ejusque infinitae perfectiones luculentissime demonstrari possint, ut Athei, pertinacissime hoc pernegantes, nolint velint, ad assensum pertrahi ac cogi possint.

Uti autem institutum hoc summe pium ac utilissimum est: sic spem imbibi certissimam, fore, ut Auditores omnium ordinum honoratissimi, mihi breviter dicturo, faventes animos ac patientes & attentas aures benevole accommodare non dedignentur, id quod ea, qua convenit, devota animi submissione efflagito.

Equidem quocunque in hoc mundi theatro attentionem nostram dirigimus oculosque convertimus, ubique evidentissima Divinitatis exstant documenta, ut de omnibus, etiam minimis, totum hoc constitutibus principiis ac partibus, dici mereatur, quod olim HERACLITUS de humili ac levi casa dixisse fertur: etiam illic Deos commorari. Quodsi enim ex specu hac terrena oculos nostros attollimus ad immensa ac numerosissima caeli coruscantia sidera, ubique convenientissimus ordo, & pulcherrimus splendor deprehenditur, & quod maximum est, determinatos ac directos motus sidera haec semper caeca quasi obedientia exercent, & nunquam ex orbita sua aberrant. Quumque omnis foecunditatis, caloris, lucis & vitae principium ex praecipuo horum, puta sole, dependeat, hinc ita attemperatus ac ordinatus pro variis plagis ejus cursus est, quo ad varia terrae spatia beneficia haec accedere queant, ut non excogitari aptius quid possit. Tacemus ordinatos ac mere mechanicos animalium, v. gr. araneae in contexendis telis, apum in conficiendis favis, actus. Praeterea virtutum omnium theatrum animalia pandunt, ipsaque optima virtutis morumque academia sunt, quae non praeepto, sed efficacissimo exemplo docent. Quod autem haec omnia non a ratione ipsis indita proficiantur, exinde liquet, quia bruta haec semper haerent ac morantur in similibus, nec ad alia vel altiora provehantur, quare ab extrinseco, haec omnia dirigente principio, talia fluere apertissimum est. Quamvis itaque tota natura mere mechanica sit, ac mathematice omnia universi corpora constructa splendidissimum speculum sint, in quo benedicti rerum Parentis ac Conservatoris existentiam, ejusque consummatissimam bonitatem intueri licet, nulli tamen creaturae magis divinitatis suae semen ac sensum insculpsit ac inspersit, nullique majori artificio praefuit, quam homini: qui ob id perfectissimum Divinitatis specimen & exemplar, microcosmus, omnium mirabilium maximum, ac perfectionum divinarum complementum nuncupatur. Hunc jam penitus ac exactius considerabimus.

Constat ille ex duplici, & admodum in se diverso principio, nempe uno immateriali, spiritu, anima immortalis sive mente, altero materiali, corruptibili, receptaculo ac involucri coelestis hujus substantiae, puta machina, secundum normam ac leges mechanicas artificiosissime fabricata. Haec duo valde diversa principia, quod omnem rationis excedit captum, arctissimo vinculo ac commercio inter se sunt conjuncta ac copulata, beneficio spirituum animalium, seu vinculo, ut affecto uno, & alterum patitur; hinc in quibus luminosior, subtilior ac purior est spiritus, machinae nostrae rector, eo activior ratio, promptius judicium ac subtilius ingenium emergit: ex adverso quo impurior tinctura haec vitalis & hic archeus minus activus ac vegetus existit, eo magis stupiditas, torpor, tristitia animum occupant, ita ut ex hoc symbolico mentis

cum corpore vinculo ac unione, inclinationes animi, mores, vitae prolongationem, ejusque diminutionem, plurimorum morborum generationem, quam feliciter deducere ac derivare sciant Philosophi ac Medici.

Equidem ex hac dicta mentis cum corpore connectione intimaque unione, illi, qui praeposteris argutiis dediti sunt, argumentum petere conantur ad immortalitatem animae sustollendam, nempe: quia organicae sunt animae facultates, idcirco corpori eam alligari, quasi non possit subsistere sine illo, contendunt. Verum enim vero longe abest, quin potentiae animae functionibus, quae corpori serviunt, inclusae sint. Cogitationes nos distinguunt a brutis, longe aliud ac diversum quid sunt a corpore & ejus actionibus, utpote functionibus corporis cessantibus & deperditis, vigent tamen cogitationes, memoria, judicium; scire arithmeticam, numerare, subtrahere, metiri terrae & coeli spatia, comparare praesentia cum futuris & praeteritis, quid hoc commercii habet cum corpore? Quin etiam in somno, catalepsi, ecstasy, deliriis, ubi sphaera activitatis spirituum prorsus immutata, depressa ac laesa est, anima non otiaur, sed varias ideas procudit & fabricatur, multaque utilia & sublimia concipit, versat, de iis ratiocinatur & divinat. Porro in cogitatione, quae menti nostrae propria est, nulla concipi potest extensio, adeoque nulla divisio; solum etenim extensum est divisibile, quod soli materiae competit, quae ob id, quod potest dividi in partes, corruptioni exposita est. Jam autem nulla extensio cadit in cogitationem & mentem; hinc necessario illam immaterialem ac incorruptibilem aestimandam, esse distinctissimam a materia, quivis sanioris mentis facile assequi poterit. Anima itaque nostra, cum spiritus sit immaterialis ac incorruptibilis, nec existentiam suam habeat a se ipso, multo minus primum ac necessarium existens sit, alias aliarum rerum existentiae ab illa dependerent, agnoscimus merito causam quandam superiorem & priorem ipsa anima, quae cum non ignobilior esse possit suo effectu, hinc apertissime fluit, ens quoddam dari longe perfectius anima nostra immortalis, a quo haec dependentiam suam sortiatur.

Porro si attentius ac sollicitius consideremus nostras cogitationes, quas nemo negare potest, deprehendimus, infiniti ac perfectissimi entis ideam ac conceptum has in se complecti, dum perfectum illud est, ubi nulla cogitari potest imperfectio, & infinitum illud, quod non habet terminos, nec dividi potest in partes; illa autem idea, illa notio, cum non vi imaginationis, sed intellectus virtute formata sit, & omnibus hominibus communis, nec fieri possit, ut fallatur, hinc revera causam quandam proximam hujus ideae extra nos ponendam esse judicamus, quae cum non ignobilior esse possit suo effectu, hinc infinita perfecta causa hujus ideae externa esse debet, quae non nisi id est, quod vocamus Deum. Et hujus methodi ope quae omnes veritates mathematicae liquent, Dei existentia demonstrari potest, idque ex principiis & notionibus omnium mentibus inscriptis.

Et revera talis idea, talis conceptus & character Divinitatis omnium mentibus insculptus ac insitus est, ut nemo mortalium ad ignorantiae praetextum confugere queat. Hinc CICERONIS effato, *Lib. de natura Deorum: nulla gens tam barbara est, nulla natio tam effrata, cui non insideat haec persuasio*, DEUM esse: Immo nulla natio est, quae non perpetuo religionis semen aliquod retinuerit. Idololatria luculentum hujus rei est documentum, inque ea tacita quaedam confessio est, esse omnibus inscriptum Divinitatis sensum. Et in hoc consistit conscientia sive conceptus verus & clarus de ente infinito, qui convincit nos, illud existere: & quamvis audacissimi quidam ore negent Deum; animus tamen mire exhorrescit & trepidat, si indi-

si indicium aliquod iræ divinæ proferatur, tunc quasi ad strepitum folii perturbatur. Et hoc locum habet in profanæ mentis hominibus, qui anxietate conscientie mirum torquentur, hoc tacite confitentes, se revereri aliquod summum ens extra se, & in ipsis notionem occultam esse entis absoluti, summe perfecti, quæ notio deleri nunquam potest, unde non erubescimus affirmare cum acutissimo Theologo CALVINO: Non doctrinam de Deo esse talem, quæ in scholis demum discenda sit, sed cujus sibi quisque ab utero magister est, & cujus neminem oblivisci natura patitur, quamvis hic multi nervos omnes intendunt. Et quare non ex mentis essentia demonstrari possit Deus? cum ipsa mens secundum PLATONEM & DEMOSTHENEM Divinitatis particeps sit, & uti ex ARATO illud citat PAULUS *Act. XVII. 28. nos Dei progenies sumus.* Pythagorici, referente CICERONE *Lib. de Senectute*, dicebant, ex universa mente divina delibutos animos nos habere. Et uti divina essentia constat intellectu & voluntate, ratione intellectus Deus dicitur omniscius & omnipræsens, ratione voluntatis, misericors & justus; sic quoque anima nostra duabus facultatibus donata est, adeoque revera ad imaginem Dei creati sumus, quam imaginem per primævam labem corruptam & vitiatam, ut restauremus, huc omnis tendit Theologiæ scopus, nimirum ut intellectus illuminetur, ut voluntas sanctificetur: sic iterum ad Dei unionem accedimus & beati reddimur.

Hæc dicta sunt de præcipua hominis parte, mente videlicet, quomodo nimirum ex hac & ejus essentia à priori clarissime demonstrari possit existentia summi ac perfectissimi entis. Aggredior jam alteram hominis partem, nimirum coelestis & immortalis auræ & spiritus involucrum ac tabernaculum, corpus, ex cujus admirabili, & plus quam mechanica structura, partium ejus nexu, symmetria, connexionem, usu, pulchritudine, compositione ingeniosissima ac artificiosissima, luculentissimis testimoniis apparet, quis admirabilis hujus opifex & artifex, quæ sit ejusdem insuperabilis ac immensa bonitas, sapientia & potentia.

Quod si magnificam urbem intrantes, mirificas ædium substructiones avidissimis oculis lustramus, & exacte consideramus concinnam ac accuratam dispositionem lapidum, trabium, lignorum; si obstupefcimus ad machinas & horologia affabre perfecta, simulque incitamus & accendimur ad admirandum opificis artificium tacite celebrandum. Quis itaque potest sine insigni admiratione, & quasi stupore mentis, singularique cultu, & avido cognoscendi amandique desiderio, intueri ac perlustrare corpus humanum, illiusque abdita ac penetralia introspicere, ac simul internum ejus artificium cognoscere, quin simul in piissimum cultum, venerationem ac admirationem summi artificis, mens affurgat atque ascendat.

Verum placet exordiri de productione ac origine corporis humani admirabili. Sane tori attoniti stupeamus, inque ingentem admirationem trahimur, dum paulo pressius cogitamus, ex quam rudi, inculta & minutissima materiæ mole, tam mirabile corpus, cujus partes tam admirando & infando artificio coagmentatæ sunt, exsurgere possit, nimirum ex ovulo, tam minimo principio, si cum mole ex illo succrescente, scilicet corpore, conferatur. Admirationem sane omnem excedit, hominem, illud DEI operum caput ac complementum, ex puncto quasi generatum ac productum fuisse, præcipue quando consideramus, vix decimam partem, liquoris in ovulo contenti, aptam esse ac concurrere ad productionem & generationem corporis tam admirandi, adeo, ut cum SCALIGERO exclamare necessum habeamus: *Inter minima dari maxima, naturæ potentiam in exilissimis potissimum exstare, & summum hujus universi autorem, ex minimis ejusmodi initiis maximum apparere*

voluisse. Sic ex nihilo & puncto quasi generamur, & rudimenta accipimus. Videmus ex hisce omnipotentiam ipsius Numinis; hinc quod omnes sensus fatigat & eludit, & vix mente assequi possumus, illud præstat DEUS. Quare etiam dubitationi non amplius locus relinquendus videtur, posse etiam resuscitare nostra corpora Deum, & corpus incorruptibile nobis largiri, dum ex nihilo produxit tantam corporis molem. Porro si pensitamus minutissimum illum spiritum ovulo contentum, qui autor & fabricator est omnium nostrarum partium, quomodo vi plastica illas formet, & partem quamcunque affabre, ingeniose & mechanice construat ac contextat. Præterea si consideramus, quomodo ille spiritus principium primum sit omnis motus, vitalitatis, quomodo omnes humores, ipsumque purpureum rutilantem vitæ fontem, sanguinem, generet, tinctura vitali imbuat, illumque perenni ac incorrupto motu circulari volvat, quomodo in palæstris & officinis spirituum animalium, musculus, sensum ac motum efficiat, quomodo resideat quasi in corde, omnium viventium primo, cujus motu extincto, non aliter ac in horologio omnes partes quiescunt, suo vitali calore ac motu destituuntur, & vita amittitur. Tantæ autem subtilitatis ac tenuitatis spiritus hic potentissimus machinæ nostræ motor existit, ut sensuum omnium acutissimorum investigationi minus pateat, sed illos eludat & per impervias vias & strictissimos poros ac nervorum thorulos, ex cerebro, ceu sanctiori regimine, amandatus ad partes, illas omnes actuet, agitet & moveat, non secus ac lux unico momento totum hemisphærium pervadit & illustrat. Ex minutissimo tali principio nostra machina, vita, sensus, motus omnesque actiones animales originem suam ducunt, & subtilissimo quoque spiritu, omnes sensus fugiente, foventur & conservantur, quo vitiato & extincto, tota machina omnesque ejus actiones ac motus fatiscunt ac pereunt, sensusque cum vita amittitur. Et tamen prohi dolor! paucissimi mortalium id agnoscunt, alias non ita proterve vitiis ac pessimis voluptatibus, luxui, superbiam animum mentemque immergerent ac imbuerent, etenim consideratio nostræ originis & interitus, seu destructionis, quatenus minutissimo principio debetur, revera mentem nostram adducit ad summam submissionem & devotum entis supremi cultum.

Præterea artificiosissima pulcherrimi corporis nostri fabrica, constructa ac composita est ex partibus solidis & consistentibus, simulque ex fluidis ac liquidis, quæ illas ad motum impellunt ac agitant. Inter solidas præcipua sunt ossa, quorum plura quam ducenta numerantur; hæc ceu columnæ ac fulcra ipsius machinæ, tam arcte conjuncta & singulari symphyssi & diarthrosi compacta sunt, ut unum quasi videatur: quo etiam faciunt ligamenta & cartilagines, quorum ope arctissima fit conjunctio. Ne autem arida & sicca hæc corpora facile periculum fracturæ incurrant, temperatissima pinguedine, quæ illorum medulla est, imbuta sunt, qua delibuta, externis impetibus resistere possunt. Machina hæc ossium moveri ac impelli debuit, hinc natura prudentissimo consilio musculis plus quadringentis illam texit, quo in omnis positionis differentiam, sursum, deorsum, dextrorsum ad laevorsum, antrorsum & retrorsum moveri possit: hique muscoli prout vario modo ossibus traducuntur, singularem acquirunt figuram, & sunt vel bicipites, tricipites, bicornes, & hujusmodi. Musculi hi constant ex fibris cavis, sive tubulis, diversimode configuratis, & vel laxius vel arctius contortis ac contextis, ita ut parallelogrammum, obliquangulum, ad intumescentiam & inflationem, à vi elastica spirituum dependentem, & huic connexam contractionem efficiendam, aptissimum constituent, uti oculatissimi Anatomici, musculorum fabricam, ad regulas ac leges mathematicas contextam, sufficienter descripserunt ac detexerunt.

Partes hæ omnes solidæ & fibræ motrices carneæ ac tendinosæ, ut impellerentur, agitentur ac moverentur, necessum fuit à partibus fluidis. Inter has primas tenet purpurea sanguinea massa, quæ minutissimis corpusculis ac moleculis, ratione magnitudinis, figuræ, motus variis, conflata ac turgida, jugi circulari evolutione ac æquali motu per omnes machinæ partes cietur ac pellitur, ad illas sensu, motu & nutritione animandas ac vigorandas. Ad hunc summe necessarium vitalem circularem motum, omnia prudentissime à Deo instituta sunt, junctoque opere, amicissime in unum finem conspirant, thorax, pulmones, cor, arteriæ, venæ illarumque variæ configurationes, valvulæ, diaphragma, musculi intercostales &c. Nimirum ad motum hunc localem conficiendum opus erat elatere & pondere vi aëris, immo ad impulsum, absque quo nullus in rerum natura celebratur motus, efficiendum; proinde aëris tanta est necessitas, ut nullum animal eo carere possit. Quo autem mixtura hæc feri cum sanguine fiat, in hunc finem tota thoracis structura fornicosa tendit ac inservit. Nimirum ob diaphragmatis contractionem atque descensum & costarum elevationem, beneficio musculorum intercostalium, augetur ipsum thoracis cavum, sicque sublato aëris interni cum externo æquilibrio, aër ambiens, gravitate sua ac pondere irruit in asperam arteriam inque pulmones annexos, qui cum spongiosum rarissimum corpus sint, ex innumeris vesiculis & fistulis aëreis, detegente id ipsum MALPIGHIO, conflatum, facillime explicantur ac expanduntur, sicque materia aëris subtilioris ipsi sanguini, contento in minimis vasorum pulmonalium fistulis ac thorulis, permiscetur. Inspirationem hæc mox sequitur expirationis, ubi vi musculorum intercostalium ac abdominis, in fornicem suam redit ac cogitur diaphragma, atque resultantibus inde costis, concidit iterum thorax, sicque aër iterum exprimitur, locusque datur iterandæ novi aëris inspirationi: non aliter ac distensis ac expansis follium lateribus, ipse aër pondere suo in ipsum corpus follium illabatur, compressis follium parietibus, iterum extruditur atque expellitur.

Imprægnatus sic sanguis in pulmonibus moleculis aëreis elasticis, ex sinistro cordis ventriculo, per arteriæ aortæ ramosos canales, ad omnes corporis partes æquali quodam nisu constantique flumine defertur, & per illarum tubulos in venarum oscilla receptus, mediante illarum trunco, nimirum vena cava, à dextro cordis ventriculo recolligitur, reduciturque per vasa pulmonum ad eundem unde effluxerat, sinistrum cordis sinum, & hic motus dicitur circulatio. Primarium instrumentum hujus circuitus est cor, quod in medio thorace situm, antliæ pneumaticæ vicem gerit, quoniam sanguini ex venis in arterias transfundendo inservit ac destinatum est. Ut autem hoc felicius procederet, necesse fuit, ut motum perpetuum, & quidem reciprocum, unum dilatationis, quo sanguis recipi possit, alterum constrictionis, quo expelli iterum possit, exercere. Hunc in finem cordis fabrica ac structura mere musculosa est, nempe cor satis robusto gaudet tendine, in quem fibræ carneæ & nerveæ, multiplici flexu & spirali ductu sibi que opposito, omnes ad hunc usum mathematicè dispositæ inferuntur, quo nimirum propensio faciliior sit ad motum systoles, quæ fit, quando conus affurgit ad basin, & diastole; quando recedit & restituitur in priorem statum. Ut autem ista transfusio sanguinis ex venis in arterias, & rursus ex arteriis in venas, celebrari possit, appositi sunt duo magni tubuli, unus vena cava dicitur, & ex dextri ventriculi sinu exoritur, alter, arteria aorta magna, cordis sinistrae camerae originem suam debet: hæc innumeris rivulis ac brachiis omnes microcosmi partes irrigat, ubertim sanguine arterioso perfundit, iis innumerabiles venarum tubi incubant, qui in singulis par-

tibus dispersi sunt, ut sanguinem arteriosum ex illis in venam cavam, veluti in suum mare revocent.

Circularem hunc sanguinis motum porro adjuvant valvulæ, quibus cordis & vasorum cavitates instructæ sunt, & sunt tricuspidales, vel semicirculares: illæ ita sunt constructæ, ut admittant sanguinem in cor, & ob id sunt alligatæ venæ cavæ & venæ pulmonali; hæ autem semicirculares orificiis arteriarum appensæ sunt, claudunt accessum & impediunt, quo minus sanguis semel expulsus, in cor remeare possit.

Sancte DEUS! quis non hic admiratur, & quasi in ecstasi rapitur, si consideramus immensam tuam sapientiam in formanda cordis, pulmonum, venarum, arteriarum, valvularum structura, ubi omnia simul juncta conspirant in unius operis ministerium, videlicet ut sanguis continuo ac jugi motu circuletur per omnia membra, in qua circulatione tota nostra consistit vita, qua sublata, expirant statim actiones vitales. An potest aptius ac perfectius quid excogitari à sapientissimo artifice, mechanica ipsa fabrica cordis? Diu torfit ac fatigavit clarissima ingenia excogitatio perpetui mobilis, quod nondum ad perfectionem venit. Et ecce perpetuum verum mobile cor repræsentat, quod non solum jugi indefinentique motu per plures annos motum exserit, nullamque quietem habet, verum etiam quod temporis momenta exactissime mensuratur: utpote beneficio pendulorum, quorum motus solum debetur pulsui arteriarum in extremitatibus digitorum esistenti, horologia fere omnia tali modo concinnantur, & tempus aptissime dividitur ac mensuratur. Sic natura longissime superat artem.

Porro aggredimur ipsam œconomiam animale, & considerabimus, quam apte & concinne omnia hic ordinata ac disposita sint. Nimirum quo sanguis & serum vitale in nutritione & actionibus animalibus ac vitalibus absumentum refarciretur, opus erat materia, quæ huic fini inservire posset, nimirum chylo, qui proximum elementum sanguinis & quinta essentia ciborum est. Ut autem ille in ipso ventriculo & intestinorum volumine elaboretur, & ex variorum ciborum massa extrahatur, varia hic concurrunt & conspirant beneficia, à prudentissima natura tali modo disposita ac concessa. Videlicet ut extractio faciliteretur, præparatione ciborum opus erat, quæ ipsa masticatione in ore peragitur, dum ab incisoriis dentium cuneis, tanquam pistillis, crassiores ciborum boli in minutiores partes dividuntur, deinde planis molaribus commissi, & hinc inde linguæ motu agitati, velut sub mola quadam, conteruntur. Quemadmodum autem in Chymicis ad solutionem & extractionem duriorum corporum facilitandam irrigamus ac maceramus primo illa menstruo quodam: eodem modo saliva, continuo affluxu per innumeros ductus in es eructante, alimenta in oris cavitate primo subiguntur ac præparantur, ut faciliior deinde in ipso ventriculo solutio & secretio utilis ab inutili fieri possit. Uti autem porro in omnibus solutionibus chymicis, & essentiis extrahendis, necessario requiritur primo menstruum quoddam, seu liquor solvens, qui rerum extrahendarum poros laxet, particulasque dividat & dissolvat, sibi que appropriatas imbibat, deinde calor lenis ac blandus, qui poros relaxando, istam solutionem juvet: simili ratione naturalis spagyrica viget in ipso ventriculo & alimentorum magno isto canali, puta intestinis, dum liquor quidam lymphaticus, subtilissimo æthereo sale imbutus, spirituque animali, per numerosas nervorum propagines adducto, turgidus, magna quantitate ex ipsa tunica ventriculi & intestinorum glandulosa stillat, & funditur in cavitatem ventriculi, ut alimenta ore præparata, ulterius dividat & dissolvat, subtilissimasque, oleosas, sulphureas, dulces, gelatinosas particulas extrahat atque imbibat. Quum autem acidum, quo liquor iste ventri-

ventriculi turgēt, plus jūsto maffam ciborum in ventriculo imprægnēt; omneque acidum motui ac tenuitati sanguinis ac humorum maxime infensum fit, prudenti consilio ac instituto, natura ciborum maffæ, ex ventriculi pomoeriis exeunti, mox bilem, ceu correctivum, admiscet, quod fale suo volatili, alcalino, sulphureo, non solum superfluum acidum destruit & enervat, sed & visciditatem humorum frangit & corrigit, & blando stimulo tam chyli secretionem, quam fœcum naturalem excretionem adjuvat ac promovet. Ut autem hic secretus chylus, sive quinta essentia alimentorum, ad ipsum sanguinem ferri ipsique immisceri possit, innumeros fere ductus ac rivulos natura constituit in ipso mesenterio, qui chylum hunc percolatum ac secretum per villosam ac spongiosam intestinorum tunicam, recipiunt, & simul in commune receptaculum, ubi pene omnia lactea & lymphatica inferiora vasa concurrunt, effundunt; ubi deinde diaphragmatis allisu, pulsuque arteriarum & vi propria elastica, ulterius per ductum quendam, qui dicitur thoracicus, ad venam subclaviam sinistram, ubi permiscetur cum ipso sanguine, transvehitur; ut autem iste motus chyli per ductum thoracicum commodius succedat & promoveatur, valvulis instructus est, quæ impediunt, quo minus chylus iterum refluat, & versus ventriculum abripiatur. Chylus hic sanguini infusus, dum cordis pulsu per pulmones totumque corpus frequentius circumagitur, & longiori hac circulatione digestionem ab impuritatibus suis liberatur, successive convertitur partim in lympham, partim propter abundantiam oleosarum particularum in ipsum sanguinem, qui non nisi pinguior pars chyli est, magis resoluta, rarefacta & exaltata, in purpuream rutilantem tincturam mutata.

Denique quam angusta sunt penetralia & adyta vix penetranda ipsius cerebri ac capitis! hic quasi manu deducimur ad mentis nostræ palatia, ad singulos nimirum ejus montes, colles, acclivia & declivia, uno verbo: ad cerebri cerebellique pontem & concamerata opera, quibus ceu commissuris ac juncturis tota cerebri compages ac structura, corticalis medullarisque, quam diutissime perstat indemnis. Et quid diciturus sum de mentis satellitibus, h. e. sensuum organis, quorum beneficio plures veritates cognoscimus & exploramus? annon arguit immensam ac insuperabilem bonitatem ac sapientiam divinam, quod mens nostra externis satellitibus stipata sit, quorum quisque ita est conformatus, ut à certis objectis variam alterationem ac motum menti imprimat? Placet solummodo, quoniam nimis excresceret oratio, sensuum omnium præstantissimum, nimirum visum, paulo latius deducere. Ejus organon est oculus, hujus bulbus, instar cameræ obscuræ, mirifica arte, ex tribus humoribus totidemque membranulis conformatus est. Quemadmodum autem ad cameram obscuram, ubi species recto modo se repræsentare debent, primo requiruntur duæ lentes convexæ, secundo foramen rotundum, per quod radii transeunt, tertio conclave obscurum & tenebricosum, & quarto objectum, in quo radii colligi possunt: sic quoque in oculo deprehendimus mira arte humorem crystallinum & vitreum, qui summe pellucidi, sphaerica & convexa figura gaudent, ita ut non solum litteræ appareant majores, verum etiam ut radii solares, in majori bovillo humore crystallino in unum punctum concentrati, accendere materiam substratam possint. Deinde adest quoque in oculo foramen, per quod species transmittuntur, quod existit in uvea & vocatur pupilla. Denique tunica, uvea, & choroides, nigrore intus obductæ, conclave tenebricosum efficiunt, & tandem ipsa tunica retina expansa ipsam chartam repræsentat, in qua species depingi solent. Tacemus jam artificiosissimam auris, tam externæ quam internæ structuram, aliorumque organo-

rum, quæ nonnisi summa ac mirifica mechanica arte constructa sunt. Placet omnium eorum evolutionem ac fusiorem explicationem differre in tempus, ubi Deo dante demonstrationes has publice in subjectis humanis sumus exhibaturi. Quapropter hic merito filum orationis abrumpimus & subsistimus, sufficientissime edocti, ex ipsa perfectissima mentis essentia, & infinita ejus cogitatione, itemque ex artificiosissima & mechanica corporis ejusque partium structura, dari ENS infinite perfectum, immensa sapientia, bonitate & potentia præditum. Nonne enim omnipotentia satis elucet, ex nostri corporis origine? si consideramus, tam minutissimo principio tam magnam illius molem deberi. Annon ejus infinita perfectio clarissime demonstrari potest, dum consideramus mentem nostram infinite perfectum quid cogitare ac concipere posse? Annon ejus bonitas ac sapientia immensa luculentissime patet in tam concinna ac prudenti sollicitaque conformatione cujusque visceris ac partis, ita, ut nil sine singulari usu, sine ac consilio hinc appareat? Tandem cum tota machina infinitis ratione magnitudinis particulis, quæ sunt in sanguine, lymphæ nervorumque fluido, moveatur, & quævis particula singulari suo motu gaudeat, necessaria consequentia fluit, quoniam nihil à se ipso & sua natura movetur, infinitum quoque harum infinitarum particularum motorem esse, adeo ut contumacissimus Atheus hisce fundamentis motuum, quæ nullo modo negare potest, non possit non ad assensum trahi, & ad confirmandum magnum illud effatum: dari DEUM.

Nihil jam restat amplius, quam ut benignissimo DEO, opificii nostri textori ac fictori sapientissimo, æternas laudes ac gratias persolvamus, quod ex pulvere & luto, immo fere ex nihilo, talia ac tanta nobis finxerit præcordia, quanta nostris imis pectoribus condita gerimus, ex quibus perfectissima ejus bonitas, sapientia summa, ac insuperabilis potentia eluceat & hinc summis laudibus extollenda ac celebranda est. Quare non immerito cum DAVIDE in Conditoris laudes sic erumpimus: *Celebro te, eo quod suspiciendis operibus istis in admirationem traducor: Celebro mirabilia opera tua, quæ maxime novit animus meus. Non celata est vis mea tibi, ex qua factus sum in abdito artificiose confectus, velut in imis partibus terræ. Massam meam viderant oculi tui, & in libro tuo hæc omnia scripta erant, ex quibus die formabantur, quum nondum ullum ex eis exstaret. Nonne sicut lac fudisti me? & tanquam caseum coagulasti me? cute & carne, ossibus & venis induisti me.*

Præfari hæc placuit, cum divina sic disponente providentia, publicum & ordinarium munus docendi medicinam & Philosophiam naturalem in hac Academia, Serenissimi & Potentissimi ELECTORIS nostri clementissima voluntate, adeptus sum, quod ipsum benigno DEI auxilio, in quo unicum mihi præsidium ac solatium est, jam lubens ac intrepide capeffo, in id constanter omni animi mei cura incubiturus, ut mihi concredita dextre, diligenter, alacriter geram & expediam, in Summi ac boni DEI & Numinis gloriam, & proximi mei summum emolumentum. Cuncta enim, partim quæ ipsam Physicam, partim quæ Medicinam spectant, dirigere animus ad mysteria DEI & manibus ejus efficta opera cognoscenda, ut ex illa cognitione ascendamus mente ad ipsam cognitionem sapientissimi rerum Opificis, qui longe accuratius nobis patebit in altera illa, in beata vita. Supplici hinc prece adoramus Divinum Numen, velit non solum ex alto conatibus nostris laudatissimis assistere & ipsis addicere, verum etiam ELECTOREM NOSTRUM FRIDERICUM III. Sapientissimum, qui universo orbi ludum hic aperuit, & disciplinarum officinam constituit, in qua præclara ingénia ad æternam famam excudantur, diutissime servare, una cum potentissima Domo Branden-

denburgica, ejusque potentiam ita firmare, ut usque dum magna hæc mundi machina dissolvetur, Majestas domus Brandenburgicæ perseveret inconcussa, sævissimi belli æstus immanes procul à regni ejus finibus avertantur, ut sub potente ejus dextra, omnes provinciae & hæc urbs una cum Academia, quæ insigne sane patriæ decus est, florent & in omni perenni felicitate immotæ persistant.

Quod reliquum est, tuæ Excellentiae, Perillustris Dn. Cancellarie, & quod omnibus titulis præcellit humanissime, pro singulari tua humanitate, quæ non pro fastigio tuo te metitus es, sed patientibus auribus dignari tenui filo hanc contextam orationem volueris, æternum devinctus sum. Supremum Numen supplex veneror, ut canitiem tuam firma roboraret valetudine, tantumque bonum provinciae diu servet. Vobis quoque Magnifice, Excellentissimi, Consultissimi, Amplissimi, Auditores omnium ordinum honoratissimi, insignissimas grates ac laudes persolvo, quod non solum attentas aures mihi peroranti benevole accommodare volueritis, sed & quod favorem ac amorem indulgentissimum in studia ac conatus laudabiliter susceptos lu-

culentissime præsentia vestra declaraveritis. Nihil æque accendit & incitat diligentiam ac ausus ad eximia tendentes tam docentium, quam discantium, quam si viri doctrina atque auctoritate plurima pollentes, approbant variis benevolentiae documentis instituta ac ausus doctorum & studiosorum. Sic animosius decurrunt stadium suum sacris Musarum operantes, ac invigilantes. Ego uti officia ac beneficia hæc devota mente concipio: sic nihil magis mihi enitendum erit, quam ut submissa veneratione ac obsequii mei delatione, hæc & plura alia mihi præstita ex parte saltim rependam. Tandem ad vos accedo Collegæ honoratissimi, hujus Academiae clarissima fidera, comitate vestrorum officiorum obstrictissimus vivo, & quamvis nihil præcipui de me habeam promittere, illud tamen sancte vobis polliceor, nullam rem in hac vita academica mihi tam propositam fore, quam ut fidem, concordiam, candorem, amorem vobis approbem, & semper intactam ac illibatam servem. Sospitet vos benignissimus DEUS, & eruditas curas vestras actionesque omnes, solidis & veris studiis propagandis unice destinatas, omni benedictionum genere uberrime fœcundet!

D I X I.





FRIDERICI
HOFFMANNI
OPUSCULA DE AQUIS
MINERALIBUS EARUMQUE
SALUTARI VIRTUTE.

DE ELEMENTIS AQUARUM MINERALIUM
recte dijudicandis & examinandis.

P R O O E M I U M.



Ureum sanè, omnibusque, qui in certo regionis tractu certaue urbe medicinam faciunt; summopere commendandum est monitum, quod antiquissimus ille medicinæ parens, HIPPOCRATES, in principio *libri de aëribus, aquis & locis*, inculcat: *Quicumque*, inquit, *artem medicam integrè assequi velit, primo temporum anni rationem habere debet, deinde ventorum, qui cuiusvis regioni proprii. Neque negligentiorè se circa aquarum facultates cognoscendas exhibere convenit. Quemadmodum enim gustu differunt, & pondere ac statione: sic quoque virtute alia aliis longe præstant; has, si quis ad urbem sibi incognitam perveniat, diligenter oportet scrutari.* Nam si curatius rationes subducimus & calculum exigimus, sunt maxime aër & aqua, quæ motus, quibus vita & actionum integritas absolvitur, in corpore nostro administrant & tuentur. Quippe, vitæ & sanitatis fundamentum, non modo in spirituum natura; crasi ac motu convenienti, sed & in omnis generis corporis nostri humorum jugi ac inoffenso progressu ac circulatorio motu versatur; adeo, ut ipsa arctissime cum hoc sic dicto circulo sit connexa. Hoc salvo ac integro, sanitas viget & vita durat: & hoc vicissim vitiato aut destructo, morbus & mors præstolantur ac insidias struunt. Jam vero ex omnibus, quæ extrinsecus ad spirituum generationem & sanguinis cursum conferunt, & sic proxime ad sanitatem tuendam faciunt, quod majorem virtutem atque efficaciam habeat aër & aqua, est certe nihil. Hæc duo merito principatum obtinent inter ea, quæ incolumi-

tatem, & quæ morbos, in homine pariunt. Proximum enim spirituum elementum, ipso etiam HIPPOCRATE dudum id edifferente, subministrat aër: aqua autem sanguini omnibusque humoribus fluxilitatem, ad vitalem circulum desideratissimam; conciliat. Ex quo patet, quantum intersit, ut Medicus, non solum ejus loci in quo degit aërem & aquam cognoscat; sed etiam ut intelligat, diversarum aquarum aërisque cujusvis loci indolem ac proprietates, quo cœu medicinam has ipsas nonnunquam commendare queat. Siquidem Deus O. M. summas & longe præstantissimas in aquis recondidit fœterias vires, quarum tanta est excellentia tantaque utilitas, ut longe multumque omnibus aliis remediorum generibus sint superiores, & si ex vero dicere licet quod res est, universalior aqua non detur medicina. Hæc enim nullus sanus, nullus ægrotus carere potest, hæc omnè indicationum in medendo punctum complet, hæc calefacit, siccatur, refrigerat & humectat, omnesque in corpore excretiones æque promovet, ac immodicas compescit. Hæc efficacissime occlusa reſerat, & omne id præstat, quod à medicina universali, quam nonnulli in absconditis operose, frustra tamen, quarunt; sperari potest. Accedit luculentus experientiæ calculus, quæ innumeris exemplis evidentissime hoc nostrum assertum confirmat. Nunquam enim tam exoptati & stupendi in persanandis rebellibus morbis ab alio quodam remedio effectus patrantur, quam à salubribus aquis, quas benignissimum Numen gratis & largissime ex subterranea officina ubivis ferme terrarum misero mortali generi largitur. Foret itaque perutile, quin imo summopere necessarium, ut ii, qui custodes sanitatis audiunt & morbis mederi student, aquarum salutarium, passim scaturientium, genuinas & proprias vires imprimis probe & curate explorarent, quo

ægro-

ægrorum incommodis recte consulere possent. At vero, dolendum utique est, quod ea, quæ necessaria, quæ ad manus sunt, sicuti etiam in aliis accidit, solenniter negligantur, vel etiam plane non intelligantur. Etenim quampauci sunt Medici, qui fontium salubrium, tantum in patria Germania, nomina norunt, pauciores eos visitant, & paucissimi illorum naturam ac vires perfectas habent. Et quod magis mirandum est, quotidiana sunt exempla eorum, qui fontes foterios crebrius, immo quotannis, frequentant & frequentarunt, tam indocte tamen, tam insulse, de illorum elementis fabulantur & scribunt, ut chymicarum *ἐχρησθέντων* plane ignari, aurum, cuprum, argentum, antimonium, arsenicum, terram sigillatam, sal ammoniacum, bitumen, ambram, & sexcenta alia, ipsis inesse audacter affirmant, vel plurima salium in iis contentorum genera enumerent, quum tamen vix duo in ipsis possint inveniri. Nihil jam dicam de viribus atque effectibus, quos empirica plane ratione generatim iis adscribunt; nulla ægrotantium & causarum morbi ratione habita: quum tamen eos, qui rationales Medici audire percipiunt, oporteat scire, vires & effectus in medendo non tantum ex ipsis remediis, sed corporum in quæ agunt dispositione simul profuere. Unde consultius omnes facerent, qui de aquis agere & salubrem illarum virtutem exponere sibi sumunt, si non generalioribus tantum inhærescerent, sed commemoratis una debitis circumstantiis subnexisque observationibus particularibus, id præstarent. Quum itaque hos decumanos à plurimis in exploratione aquarum medicatarum committi errores indolens animadverterem, simulque maximum illum defectum in dignoscenda illarum virtute & utilitate perspicerem: utilissimum rei medicæ laborem suscepturum me fore ratus sum, si veram minerales aquas examinandi, earumque vires à priori indagandi methodum, solidis ac genuinis, physicis nempe & chymicis principiis, fultam, tradèrem & dilucide exponerem.

§. I.

Primo omnium igitur dum pranobilem hanc tractionem aggredior, præmonendum duco, per aquas salubres minerales, me non modo intelligere, celebres illos medicatos thermarum vel acidularum fontes, verum etiam alias aquas manifesti salini vel mineralis principii expertes quidem, nihilo minus tamen foterias. Et quoniam benigna rerum parens natura, uberem admodum aquarum & fontium salubrium & insalubrium cuiusvis ferme regioni concessit proventum, iisdemque diversissimas vires indidit: omnino, ut salutares à minus salubribus, utiles à noxiis, studiose discernamus, palmaria nostra esse debet intentio.

§. II.

Ut autem quisque rerum medicarum & physicarum gnarus, in tam affluenti aquarum copia, vel à priori statim dignoscere queat, quamnam sint roficuæ, quæ damnosæ? necessarium erit, ut fundamenta, ad quæ tanquam normam illarum examen institui possit, constituam, quibus jactis, facile postmodum erit, cuiusvis bonitatem perspicere atque determinare. Antequam vero hæc tradam, circumspiciendum prius & indicandum erit, in quo salubritatis, quæ de fontibus his prædicatur, indoles & natura potissimum contineatur. Id igitur salubre dicitur, quod actiones corporis secundum naturam neque lædit, neque imminuit, sed easdem constituit, perficit ac firmat. Et hujus indolis sunt ea, quæ causam harum functionum augent, conservant ac erigunt. Causa vero est ipsa corporis nostri natura, per quam hic maxime intelligimus, fluidissimum & subtilissimum illud elementum, quod spirituum nomine venit, & in universa humo-

rum massa continetur, maxime vero in canaliculosa & tubulosa cerebri ac spinalis medullæ compage separatur, & inde per porosam nervorum substantiam ad partes amandatum, solidis robur, tonum ac motum inspirat, fluidis autem fluxilitatem, motum intestinum & spiritualescentiam conciliat, humorumque texturam integram conservando, eos à corruptione ac putredine defendit. Hoc fluidum si debite comparatum est, vegetum, firmum ac sanum est corpus, omnesque in eo vitæ ministrantes actus rite & ex voto succedunt. Deinde quum actionum vitalium integritas non possit illibata consistere, nisi humores per minima & capillaria vascula vehendi, fluxiles sint ac satis tenues, nisi etiam per aperta secretoriorum & excretoriorum ductuum oscula inutilia separentur & foras dimittantur: quare omne id, quod humorum integritatem intemeratam servat, quod excretionem promovet & emunctoria patula reddit, jure meritoque saluterum nuncupatur. Ex adverso insalubre illud dici meretur & incolumitati inimicum, quod naturæ spirituum eorumque generationi repugnat, quod eorum motum inturbat, humores coagulat eosque crassos & viscidos reddit, quod tenuissimos & exilissimos meatus occludit & excretionum successum sufflammat atque retardat.

§. III.

Posteaquam igitur explicavi, in quo natura & ratio salubrium rerum contineatur; proximum jam est, ut indagem ea, quæ aquarum salubritatis vel insalubritatis existunt causa. Quo ut eo melius defungar, opus est, ut examinem varia aquarum contenta & elementa. Videtur quidem omnis aqua corpus liquidum, simplex & homogeneous, ex unius ejusdemque naturæ ac virtutis partibus constare, unde à Veteribus etiam pro elemento habita fuit. Ast re penitus inspecta, heterogenea potius est omnis aqua. Hinc pulchre *l. c.* dicit HIPPOCRATES: *aquæ multum inter se differunt & gustu, & pondere, & statione, & virtute aliis aliis præstant.* Quæ sane differentia luculenter arguit, non unius ejusdemque naturæ esse aquam, sed diversa vehere contenta, differentemque horum esse mixturem ac proportionem. Aqua enim, sicuti omne corpus naturale, nostra quidem sententia, composita primum est ex elemento fluidissimo, elasticæ & expansivæ virtutis, quod nonnisi materia æthereæ, mobilissima & tenuissima est, deinde ex humido, quod *κατ' ἔχον* aqueum elementum vocatur, ac denique ex ipso solido, sive terreo ac salino elemento. Æther causa est motus intestini, levitatis, spiritualescentiæ & vindicationis à putredine. Humidum autem quod maximam aquæ partem constituit, subtilissimæ materiæ vehiculum suggerit, & ex lubricis valdeque flexilibus compositum est particulis, quarum ope, poros corporum promte subit ac intrat, & terræ salisque ramenta absorbet arteque detinet. Etenim nulla in tota rerum natura aqua reperitur, quæ non in complexu suo sicca & solidæ materiæ quippiam foveat. Siquidem quævis aqua, utut multoties destillationi subiciatur, semper tamen in imo cucurbitæ siccæ & solidi momentum relinquit. Idem patescit & oculis sistitur, si aqua, etiam purissima, gelascit, & in glaciem concreta, calore rursus in aquam liquatur, subsidente tunc in fundo crassiuscula quadam terrea portione.

§. IV.

Differentia itaque aquarum earumque virtus ac salubritas merito depromenda & dijudicanda est, ex elementorum ipsas constituentium indole mutuaque mixture ac proportionem. Videlicet, multum dissident aquæ ratione spiritus, sive principii æreo-æthereo-elastici, quod parcius vel redundantius easdem incolit,

incolit, multo autem magis ratione elementi solidi salino-terrei. Quum enim plurimi fontes ex intimis terræ visceribus, varii generis salibus, mineralibus, terris & metallis refertis, prodeant; non potest aliter fieri, quin transeundo plures particulas tenuissimas ex ipsis solvant, inque poros suos recipiant. Hæc autem in quavis aqua curate nosse & probe distinguere, non inutilis certe Medici & Physici labor esse debet.

§. V.

Primo omnium autem in disquisitionem nostram veniunt, quanam sint bonitatis & salubritatis aquarum notæ. Dicimus itaque, omnium optimas, præstantissimas & quæ efficaciam in medendo spondent longe exoptatissimam, eas esse, quæ æthereo illo tenuissimo elemento copiosius perfusæ, id est, quæ spirituosæ sunt. Quanam autem hoc nomine præstabiles sint, certis quibusdam dignosci potest signis & characteribus. Hos inter primo loco connumeranda est levitas, quippe levis aqua, communi Medicorum consensu, optima censetur. Quemadmodum enim aer & æther omnis rarefactionis causa existit: ita etiam levitatis; quum leve dicatur, quod porosum, & rarum, grave autem, quod compactum & æthereo elemento destitutum est. Quod vero spirituosum aquas redundantius incolens principium easdem leves reddat, luculenter confirmat GÆRINGIUS in *descriptione Spadan.* pag. 15. hunc in sensum differens: *curiosum est, quod acidulæ illæ, quæ spiritibus, sive exhalationibus sulphureis, refertæ sunt, aliis acidulis, quæ carent spiritu, longe leviores sint: quod valet maxime de aqua Spadana, nempe illo fonte, qui dicitur Savenir, & dimidii milliarii spatio sejunctus est à pago. Hic longe levior est & validius venas penetrat citiusque vires suas perficit, quam fons pagi; unde etiam à scaturiginis loco sine virium amissione aqua transportari nequit, sed ad pagum vicinum solummodo translata, gravior efficitur, amissis nempe in itinere spiritibus, levitatis causa.* Id quod vero non tantum de Spadanis, sed de omnibus quoque acidulis, verissimum est & experientia confirmatum.

§. VI.

Specificam vero cujusvis aquæ levitatem indagare, res admodum curiosa est. Potest tamen id fieri, vel instrumento hydrometrico, quod STURMIUS in *colleg. curios.* describit; vel melius adhuc, per tubulum vitreum, aqua repletum, & aquæ alius generis immisum. Notum enim est, quod fluidum specie gravius, immisum in fluidum specie levius, descendat & hoc rursus ejus locum subeat. Ita e. c. aqua in tubulo contenta, vinoque immissa, descendit ex tubulo, & vinum tubulum occupat: ideoque jucundo admodum spectaculo specificum aquæ pondus explorari & oculis fisci potest, si illa, quam specie graviores judicamus, ad meliorem dignotionem, colore quodam, v. g. croco, prius inficitur ac tingitur. Ipse etiam celebri apud Lipsienses Mechanico, Dn. LEUPOLDO, primus auctor & monstrator fui ad fabricandum cylindrum hydrostaticum, ex aurichalco conflatum, quo jam inde à pluribus annis in exigendo liquidorum pondere usus sum. Sed, licet hæc lanx perquam accommodata sit examini vini, cerevisiæ, fontium aquæ communis & fæculiginis, earumque tam gravitatem, quam levitatem, in descriptis lineolarum gradibus exacte indicet: cautum tamen sit experimentum, in thermarum & ejusmodi aquarum, quæ copiosius æthereo elastico elemento afflatæ sunt, exploratione, quæ de re in inferioribus pluribus differendi erit occasio.

§. VII.

Porro VERULAMIUS aquam istam optimam judicat, quæ ad ignem æqualiter structum coctione ve-

Frid. Hoffmanni Oper. Tom. V.

locius avolat atque consumitur. Neque ratione destituitur experimentum: quippe, quo copiosius aquis innidulatur spirituosum elementum, & quo major hinc agitatio, expansio & rarefactio interna contingit, eo tenuiores & subtiliores sunt partes aquæ, eoque promptius & expeditius succedit exhalatio, quæ potissimum ab interno isto motu dependet. HIPPOCRATES *sect. V. aph. 26.* aquam, quæ cito calefcit & cito perfrigitur, levissimam & optimam esse judicat. Nec sine ratione. Calor enim nil nisi motus ætheris velocissimus est; hinc quo copiosorem in complexu suo alunt spirituosam illam tenuissimam ætheream materiam aquæ, eo citius incalescunt, sive in motum talem abripiuntur. Accelerata autem refrigeratio fervidæ aquæ, pariter levitatis indicium est; eo quod frigidus aer raræ & porosioris texturæ corpora facilius intrare, & calidum in iis motum sistere potest, quam in compactis, quæ minus patent allabenti perfrigeratæ auræ, ideoque diutius calorem servant.

§. IIX.

Præterea saluberrimæ & præstantissimæ judicantur illæ aquæ, quæ ex scatebra haustæ, copiosissimas bullulas, fundo vitri sese colligentes, ad superiora collectius emittunt, vel marginem vitri margaritarum instar iisdem investunt, ita, ut quo copiosius eadem emergant, eo præstantior quoque ipsa aqua ratione virtutis habenda sit. Sunt enim hæ bullulæ nihil aliud, quam subtilissima illa ætherea substantia, aquæ poros incolens, cujus expansionem, quum mitior æris atmospherici compressus cohibere nequeat, protinus quando movetur liquor, vinculis quibus antea irretiebatur, sese expedire & exitum affectare nititur. Hinc est, quod acidulæ in lagena ad tertias repleta asservatæ, & orificio obturato, fortiori agitatione conquassatæ, remoto sensim obturaculo, magno cum impetu, vel purum vaporem emittant, vel, si aqua aperturæ proximior sit, humidum ad eximiam altitudinem profiliat & late dispergatur. Tali enim quassatu incolens æthereum elementum in celerimum motum abripitur, & elatere atque expansione sua impedita, qua exitus datus, erumpit, partemque liquidi remorantis nonnunquam simul protrudit.

§. IX.

Idem quoque spirituosus elasticus æther in causa est, cur vitra vel lagenæ angustioris orificii, acidulis penitus repletæ, si arctius obturentur, sæpius diffringi soleant: id quod multoties contigisse vasis Egranis & Pyrmontanis oppletis animadverti. Et GRUNDELINUS de *acidulis Roitschensium*, eandem in rem pulchre p. 58. scribit: *contigit mihi, inquit, dum elapsa hieme magnum & crassum vitrum aliquot mensurarum, rite vesica bubula clausum & munitum, in cubiculo meo reservarem, ubi ab initio, turgentes spiritus, vesicam elevantes, duxerunt in eam figuram sphericam; postmodum vero, dum præter voluntatem meam magis solito calefactum fuerat, spiritus isti etiam magis excitati & rarefacti, plus spatii occupare volentes, exitum quæsi verunt, qui tamen per fortiorem clausuram impeditus est: hinc crassum hoc vitrum magno cum impetu disruptum est in frusta, cum omnium acidularum per cubiculum diffusionem.*

§. X.

Perpulchro etiam experimento bonitas & particularum elasticarum in aqua redundantia indagatur, quando vacuo, per antliam pneumaticam facto, aqua examinanda in vasculo supponitur. Tunc observamus, quod eæ, quæ sunt subtilis ac spirituosæ naturæ, aëre subtracto, mirifice ebulliant & numerosissimas in altum trudent bullulas. Curiosus hujus tentaminis mentionem facit in *M.N.C. Dec. III. an. II. obs. 292.*

M

excel-

excellentissimus BRUNNERUS, Medicus consummatissimus. Et certissimæ utique experientiae est, hac ratione in liquidis luculenter monstrari & oculis subjici posse, non modo earum subtilitatem, sed & particularum elasticarum quantitatem. Nam quæ multum alunt spiritus, uti sunt volatilia urinosa quæcunque, copiosissimas in vacuo antliae pneumaticæ rejiciunt bullulas, perpauca autem, quæ spirituosæ substantiæ expertes sunt. Hinc liquido patet, quod illæ aquarum, quæ in vacuo admodum bulliunt, longe subtilioris & spirituosioris indolis sint iis, quæ paucas emittunt bullulas. Nam origo harum bullularum nascitur, quando per externi aëris gravis atmosphaerici subtractionem, æquilibrium tollitur, ut incolens æthereum elementum liberius spatium nanciscatur, & vi connati sui elateris, prompte sese expandere & subducere possit.

§. XI.

Ut autem majori adhuc argumentorum robore stabiliamus ac demonstramus spirituascentiam, qua aquæ salutes dotatae sunt; placet eximia quædam hac de re observata subnectere. Videlicet, per experientiam compertum est, quod aquæ omnes ferme frigidae medicatae, inprimis acidulae, ad fontem haustae, unanimi fere Medicorum consensu, longe majoris sint efficaciae, quam si ad alia loca transferuntur. Ratio est in proclivi: dum enim sub vectura aquæ admodum interno motu agitantur, attenuatae intestina hac motione, apertiore viam pandunt subtilissimo, & spirituofo elemento, ut eo promptius dissipetur atque aufugiat. Deinde notandum est, quod necesse sit, ut exquisitè obturentur lagenarum mineralibus aquis repletarum orificia. Nisi enim hoc fiat, sapor & odor, cum omni præstabili virtute perit. Patet hoc exemplo Pyrmontensium, Egranarum, Swalbacensium, Antonianarum, Selteranarum omniumque acidularum, quæ, si libero aëris patent accessui, omnem saporem, & cum spirituofo elemento efficaciam, perdunt, relicto effœto & turbulento humore.

§. XII.

Colligimus hinc tertio, quod vitra & lagenæ non solum probe muniri, sed etiam parum vacui spatii in iis relinqui debeat, ne aër externus illud occupet & intus contento labem aspergat. Nihil enim tam celeriter liquidorum mixturam & crasin turbare & corrumpere potest, quam ipse aër externus atmosphaericus. Patet id luculenter exemplo vini cujusvis, quod asservatum in doliis semiplenis, mox vappidum fit & situm contrahit. Idem etiam evenit oleis destillatis aromaticis, quæ aëri objecta, majorem & crassiorem acquirunt consistentiam, & colorem magis saturatum nanciscuntur, mutato suavi eorum pristino odore, in terebinthinaceum & ingratum. Spiritus quoque volatiles & urinosi, ab aëris accessu, tincturam suscipiunt flavescens & rubicundam. Tanta aëris in humida est potentia, quippe qui, motu vivido instructus, facile illud, quod in liquidis mixtis est tenue, abripit & aufert, motuque suo intestino, intime unionem partium, à qua forma & sapor pendet, immutat & destruit. Id quod etiam valet de fontibus medicatis, quibus nihil tam adversum & inimicum est, quam aëris liber accessus; ita prorsus, ut efficacissimi illorum, huic expositi, penitus ab indole sua deficient, & postea vix dignosci possint, ob summam inductam inertiam.

§. XIII.

Quarto, in aëre calido facilius fontes medicati virtutem suam amittunt, quam in frigido: unde etiam noctu & frigido cœlo tutius ad alias regiones transferuntur aquæ medica virtute nobiles, quam æf-

tate & sole acuto. Eandem quoque ob rationem expedit, easdem potius circa auroram, quam meridiem potare. Externus enim calor, motum intestinum augendo, dissipat & in auras dispellit tenue efficacissimum earum elementum: frigus autem, pressione sua à circumferentia ad centrum, hoc ipsum magis unit, detinet & intus servat. Maxime omnium autem quinto commemorabile est, quod aquæ minerales, non modo diutius sub libero aëre detentæ, sed multo magis coctæ, omnem medicinale virtutem cum sapore & spiritu exuant. Immo, quod attentione perquam dignum, multi sunt fontes, qui, inspergo gallarum pulvere, atramentosum colorem recipiunt; simulac vero spirituofo substantia exhalavit, aut aqua igne incaluit, omnem tincturam recusant: manifesto indicio, abripi simul cum spiritu, minerale quoddam volatile principium. Patet hinc, uti probe SEBIZIUS, in tractatu, *de erroribus, in bibendis aquis committi solitis*, monet, quam perverse agant ii, qui ægris acidularum calefactarum usum commendant; quum hac ratione omnis ista desiderata virtus, quæ unice in elemento spirituofo continetur, deperdatur, & aqua cruda & minus utilis reddatur, quæ, licet calida non omni prorsus careat utilitate, plus tamen non præstat, quam quævis alia rudis & simplex calefacta aqua. Monendum tamen hoc loco est, quod, quum non omnes ægri, præsertim qui nervorum vitio laborant & solutioris stomachi sunt, frigidas, inprimis matutino tempore, ferre queant acidulas, consultius sit, lagenas medicatis aquis repletas & probe obturatas, ferventi & bullienti aquæ aliquandiu immittere, ut tepescant, nec frigore obsint.

§. XIV.

Egregia sexta est observatio: quod acidulae fere omnes, admixto vino Rhenano, aut quovis acidulo liquore, (non enim id succedit cum vinis oleosis dulcibus) ebulliant, præsertim si saccharum inspergatur & mixtura agitetur. Jucundo sic spectaculo, in conspectum prodeunt innumeræ bullulae, alte salientes, cum spuma alba & eructatione copiosorum vaporum, ut vinum sic aquæ nuptum, à multis cupide & summa cum oblectatione bibatur. Plurimi itaque notarunt, quod aquæ eo meliores sint, quo majorem concitent vino permixtae ebullitionem; & vicissim, quod inertes, fatuae, effœtae & spiritu destitutæ, si infuso vino, nulla plane mutatio & intestina motio oboritur. Causa autem hujus ebullitionis, est conflictus acidi vinosi, cum subtili terra alcalinae naturæ, quam connubio suo susceperunt acidulae. Nam omnes fere, quascunque illarum vidimus, cum acido fortiori mixtae, effervescentiam subeunt, luculento testimonio, alcalinum quoddam in ipsis latere elementum. Dum itaque acidum agit in alcali, contentæ in aqua spirituosæ partes commoventur, & in motum actæ, cum impetu exitum affectant, dumque in spumam coeunt, vaporem fortem expirant.

§. XV.

Nota septima est observatio: quod superior in lagenis aqua, longe efficacior sit, ad vires corporis roborandas & suscitandas cum vino ebullitionem, illa, quæ in ima vasis parte continetur; quum æthereum elementum, ob summam tenuitatem & exquisitam levitatem ac mobilitatem, semper ad superiora eluctetur. Denique non injucundum est spectatu, quando acidulae, recenter inprimis haustæ, vitro puro & pellucido excipiuntur, & hoc, obserato prius digito orificio, validius agitur, non solum spumescunt, sed etiam, uti superius memini, tam ipse aër, quam vicina collo aqua, cum sono è vase profiliunt. Fortiori enim hoc quassatu, elementum intus delitescens æthereum, in motum acceleratum urgetur, &

& partes aqueæ explicantur in bullulas, quarum coitus spumam efformat, quæ, vesiculis cessante motu concidentibus, evanescit, aut remoto sub ipsa agitatione digito, elastica ætherea substantia impetuose, qua patet via, enititur, objectumque humorem simul excutit.

§. XVI.

Clarissime, ut arbitror, ex hæcenus dictis innotescet: inesse utique medicatis & foteriis fontibus substantiam quandam valde subtilem & activam, elasticæ indolis, cui enumerata phænomena tribuenda & commemorati effectus in acceptis referendi sint. Hæc delibatissima illorum pars & quasi anima est, quæ ipsis virtutem inspirat illam mirabilem & spectatissimam, quam in persanandis multis contumacissimis ac rebellibus morbis exserunt. Nobilissimus hic spiritus est, qui præstabili sua facultate ac penetranti indole, ipso odore sese in sensus ingerit, dum non solum blando halitu nares ferit, sed etiam odore totum caput implet, ut eidem gravitas nonnunquam concilietur somnusque potantibus inducatur. Adeo elasticæ & expansivæ volatilis indolis spirituosum hoc principium est, ut in altum elatum, non modo caput oppleat, sed & tenerrimos arteriarum in eodem propagines tantisper diducat, ipsumque sanguinem rarefaciat, ut distensione hac cerebrum quodammodo comprimatur, & sanguini in conficiendo motu remora objiciatur. Hinc est, quod Egranæ acidulæ, æstiva & calida sicca tempestate, ad scaturiginem potari nequeant, sed transportari debeant Egram urbem, quæ dimidio milliari ab oris fontanis distat. Idem experientia testatur de Pymontanis, quæ in Germania omnium maxime spirituosum elementi affluentia instructæ sunt: quippe quæ, vel aliorum vehendæ, aut minimum in domicilium asportandæ, & tum demum bibendæ sunt. Si causam disquiramus, nulla alia suberit, quam, ut hac mora & in via vaporosa & subtilis illa substantia, nares feriens caputque gravans, tantisper exhalet & in auras disjiciatur.

§. XVII.

Aethereus & mineralis hic spiritus porro in causa est, quod perfusæ eodem aquæ, non tam refrigerent & debilitent corpus, quam potius calefaciant & roborent; ita, ut ventriculo & venis conceptæ, interposita aliqua mora, cupiditas ciborum augeatur, arteriæ crebrius & validius micent & facies vivido colore perfundatur. Idem quoque aquis irretitus subtilis spiritus, est efficax & generosum illud principium, quod eas summa agendi potentia instruit, dum expedite universum pervadit corpus, tenuitate sua per ultimas vasorum angustias strenue eluctatur, fibris motricibus & organorum robur addit stimulumque infert, ut pertinacius obstructa referentur, noxiumque æque ac superfluum, per omnis generis emunctoria, alvum nempe, urinarias vias, salivam, immo non raro per vomitum ex superioribus, prout varia naturarum est dispositio, eliminetur & exturbetur. Delicatissimum denique hoc elementum causa est, quod nonnullæ foteriæ aquæ, recenter exortæ, ab initio, stupendos effectus, omnibus aliis remediis denegatos, præstent. Experientiæ enim fide constat, quod, quidam è salutiferis fontibus, novissime prodeuntes, desperatas & immedicabiles ægri tudines, ut guttam serenam, surditatem, linguæ paraly sin, epilepsiam aliasque, discusserint penitusque abegerint. At virtus hæc non fuit perennis, neque diu duravit, sed successu temporis penitus exspiravit, ita prorsus, ut insequentibus annis, nullius plane usus fuerint fontes, primum tantopere celebrati.

§. XIX.

Jam vero nemo non exiget, ut tandem dicamus: cujus ergo sit indolis, cujus naturæ, spiritus ille de cujus virtute & efficacia hæcenus tam eximia ediximus? Ut igitur paucis nos expediamus, asserimus: esse hunc spiritum mineralem. Res ita est comparata. Aethereum illud valde mobile ac subtile fluidum, universalis est spiritus, fons & causa omnis spirituscentiæ, tam quæ in sic dicto regno vegetabili, quam animali & minerali deprehenditur. Quemadmodum vero æther suam sedem, vim atque virtutem maxime collocatam habet in sulphure, & hoc triplex est, pro trium regnorum diversitate; ita hinc fit, ut varie mutatus, pro diversitate sulphuris, differentem induat naturam, dissidentisque sit effectus. Intelligimus itaque per mineralem spiritum, substantiam valde tenuem, fluidam admodumque elasticam & volatilem, cum universali mineralium sulphureo ente combinatam, omnesque inferiores terrarum tractus pervagantem. Anima quasi est mineralium hic spiritus, variarumque mutationum & effectuum, qui in promtuario subterraneo contingunt, fons atque causa. Hic passim reperitur in omnibus mineris, sub forma vaporis penetrantis sulphurei, & reconditorum ærariorum lapidum & soli metalliferi testis ac proditor est. Hic præterlabentibus aquis in terræ visceribus sese ingerit, in iis sistitur easdemque medica virtute imbuit ac instruit.

§. XIX.

Neque desunt ex clarissimorum virorum acutissimorumque rerum naturæ scrutatorum numero, qui huic nostræ sententiæ calculum adjiciunt. Inprimis BECHERUS *Phys. subterr. sect. II. cap. 4.* existimat: minerales aquas non inde provenire, quod succi quidam à transfluente aqua solvantur; quum, si hoc fieret, loca subterranea, licet vastissima & mineralibus referta, continuâ tali elixivatione, elutriarentur: *sed potior pars*, inquit, *constat ex acido terræ centrali, perpetuo, inexhauribili, cui minima mineralium pars est admixta. Nam profecto eæ vires, quæ insunt istis aquis mineralibus, minime arcessendæ sunt, à contentis illis crassis mineralibus, sed potius ab incoercibili earundem spirituositate & volatilitate.* Et delicatissimus quoque hic spiritus præcipua & vera causa est, quod nulla, vel excogitatissima arte, acidulas, thermas aliasque medica virtute nobiles aquas parare possimus. Nam licet non adeo difficile sit, vulgarem aquam solidioribus maximeque salinis, quæ evaporatione sistuntur elementis imbuere; neutiquam tamen ita aptari possunt, ut nativas præstantia virtutis exæquent: quum spirituofo hoc principio destituantur.

§. XX.

Non minoris momenti & adhuc excutienda est quæstio: annon efficacissimum hoc mineralium aquarum elementum, ipsa arte, vel chymico quodam ministerio, separari, obtineri & hinc procul dubio in summam concentrari possit medicinam? Aegerime quidem negotium successurum fore ultro profiteor: non tamen dubito, quin, si spirituosæ ejusmodi aquæ recenter ex scatebra haustæ copia, magnæ cucurbitæ, munitis & obturatis studiose commissuris omnibus, lenissimo statim substrato igne, indatur, spiritus destillationis ope ex ea elici possit, magnarum procul dubio virium: id quod peritis omnibus & curiosis Chymiatri tentandum & perficiendum commendamus. Commemorabile enim hanc in rem jam est experimentum, cujus meminit DU CLOS *super aquis Gallie pag. 93.* Hic quum destillationi subjecisset aquam de Saint Mion en Auvergne, notavit: *id quod prima destillatione exigua in quantitate prodiit, aquam torna-solis*

cæruleam rubedine infecisse: quod ante destillationem, nec non continuatam, postea non factum est. Rationem huius phaenomeni si inquirimus, procul dubio hæc suggerenda erit, quod spiritus mineralis indolis fuerit acidiusculæ.

§. XXI.

Progredimur jam ad alterum fontium salubrium ingrediens, quod κατ' ἐξοχὴν aqua vocatur, omnia reliqua quantitate superat, & tam spirituofo, quam solido & salino elemento hospitium præbet. Hæc humiditate, copia & tenuitate sua integritati corporis conservandæ & revocandæ mirifice patrocinator: siquidem succos vitales perluit, lentos humores eliquat, morbofa & peregrina salia absorbet, & ad ipsa viscerum pénétralia provecta, inertes ibi & impactos humores attenuat, solutosque cum reliquis purgamentis per ductuum excernentium ostia everrit. Perutile itaque erit, aquam solum simplicem, sine spiritu, vel contentis salinis & mineralibus, medice hoc loco perpendere. Certissimum enim est, quod pro differentia locorum & soli ex quo scaturiunt fontes, longe multumque inter se distet diffideatque aqua, ut una præ alia præstantior sit atque salubrior.

§. XXII.

Primum itaque asserimus dari aquas duras, crudas & asperas, & vicissim molles, mites ac lenes, quarum illæ pravæ, hæ bonæ sunt. Inter crudas ac duras primum referimus aquam, quæ ex glacie liquatur. De hac pulchre prodidit HIPPOCRATES, libro de aërib. aquis & loc. §. 20. Illud, ait, quod in glaciata aqua clarum, leve & dulce est, excernitur ac disperditur, quod vero turbidissimum & ponderosissimum relinquitur. Hoc vero cognoveris hoc modo. Si enim voveris hiemis tempore, vasculum certa aqua mensura infusa, sub dio exponere, quo maxime congeletur: deinde postridie in locum calidum deportatum sinere, quo maxime glacies liquefcat, & ubi exsoluta fuerit, aquam metiri, reperies aquam multo pauciore.

§. XXIII.

Rationem, cur nivalis aqua & vegetabilibus & animalibus minus accommoda & potius nociva sit, optimam utique affert divus Celsus. Dum enim in glaciem concrevit aqua, ejus crasis & mixtio plane destruitur. Secedit quippe subtile principium à crasso, illudque quasi ad centrum pellitur; unde in qualibet glacie interius magnæ visuntur bullulæ, ex intus coacto aëre ortæ. Et hic unitus etiam rarefactivo elastico motu auget molem glaciei, ut amplius occupet spatium, quam prius tenuerat aqua, ex quo ratio ducenda, diffractionis à congelata aqua vitreorum nec non terreorum vasorum. Hinc, manifesto patet, qua ratione, secedente tenui liquido elemento, crassum postea, grave & ponderosum relinquatur, ut aqua, hoc modo depravata & corrupta, non possit non esse insalubris.

§. XXIV.

Maxime omnium vero nivalium ejusmodi aquarum usus, in gignendis glandularum, præsertim colli, tumoribus velificatur: qui valde familiares sunt gentibus ad radices montium nive tectorum habitantibus, imprimis fœminis, quæ appensum plerumque magnum gutturi tumorem gestant. Experiantur id malo suo, qui montes Pyrenæos, Alpinos nec non Hercyniæ, Helvetiæ & in Tirolensi Comitatu accolunt. Cavendum itaque est maxime ab iis aquis, quæ liquata glacie & discussis nivibus, magno impetu per alveos è montium cacuminibus decurrunt, & in convallium planitie salientes latices sæpe conspurcant atque corrumpunt.

§. XXV.

Deinde duræ, crudæ & graves illæ aquarum sunt, quæ in fodinis metallicis scaturiunt & ex præaltis rupibus prodeunt. Hæ enim ex ipsis fossilibus, mineris, calcariis, tophosis, nec non durioribus compactis lapidibus, cruda terrea & constringentia ramenta elambunt, & ejusmodi infestis qualitatibus imbuuntur, ut pauci easdem ferre possint, & earum usus, insuetis præsertim, magno sanitatis stet dispendio. De his egregium est magni naturæ consulti HIPPOCRATIS effatum, lib. cit. §. 13. Videlicet improbas & respueudas censet eas aquas, quarum fontes è petris scaturiunt: (duras enim eas esse necesse est) aut isthic ubi calidæ aquæ existunt, aut ferrum nascitur, aut æs, aut argentum, aut aurum, aut sulphur, aut alumen, aut bitumen, aut nitrum: non enim ex hujusmodi terra aquæ bonæ prodeunt, sed duræ & æstuosæ, quæ & difficulter minguntur, & ad alvi egestionem contrariæ sunt. Optima ratione hic mentionem facit experientissimus Senex aquarum insalubrium, quæ in thermarum confiniis saliant. Ipse enim verissimum id esse deprehendi: dum in Carolinis fontanas aquas crudas pessimæque conditionis esse animadverti, ut etiam cerevisia, quæ ibi coquitur, admodum insalubris sit, & tam per alvum, quam urinam, tardius & difficiliter secedat. Rejiciendum autem hoc vitium potissimum videtur in tophaceam & calcariam terram, qua solum circa has thermas mirifice est refertum.

§. XXVI.

Crudæ quoque & gravis eæ aquæ sunt indolis, quæ ex terra calcaria prorumpunt. Patet hoc ipsum, dum canales per quorum alveos decurrunt, tophaceæ materiæ glomeramine incrustant, vel in vase æneo decoctæ, latera ejusdem lapidescente crusta investiant. Paucis: omnes aquæ lapidescentes, cujus generis sunt, qui ex calcariis montibus prodeunt, crudæ ac duræ existunt. Perfacile enim solvitur & ab aqua imbibitur calcaria terra, quæ ipsam ponderosiores reddit, ut tardius per hypochondria primasque vias volvatur, neque tam facile ad extremas venarum angustias pertingat. Obvium imprimis hoc est in nostra hac urbe Halensi, in qua omnes fere fontes sale & calcaria terra sunt collutulati ac referti, ut hinc aqua quam fundunt minus salubris, & ad cerevisiæ cocturam minus sit apta.

§. XXVII.

Porro insalubres eæ aquæ sunt, quæ desides, palustres & in compluviis locisque paludosis colliguntur, nec non fontes, qui in planitie & campestri solo scaturiunt, & limum terramque pinguem & bituminosam in fundo obtinent. Hæ enim crassæ fiunt, turbidæ & foetentes, perduntque, utut pluvia nova subinde aqua ipsis inferatur, ab incumbente gravius sole, tenue & utilissimum elementum, eamque ob causam ad morbos chronicos putridos promptissimum parant aditum. Quas autem potissimum noxas inferant, quove morbos ingenerent, latius meretur videri HIPPOCRATES, lib. cit. §. 10. 11. 12.

§. XXVIII.

Saluberrimas vero & optimæ notæ aquas esse censemus, quæ sunt levissimæ, quæ dulces, quæ molles & tenues, ac expeditæ per omnia excretoria transeunt, quibus dotibus nobilitatæ imprimis sunt cœlestes. Rationem solidam non minus quam elegantem affert HIPPOCRATES lib. cit. §. 17. dum ait: primum sol quod tenuissimum ac levissimum est, in aqua educit ac sursum rapit, falsum autem & crassum ac grave in mari relinquitur. Nam pluvialis aqua vera est destillata, dum sol non tantum ex oceano, sed

sed omnibus etiam fluviis, nec non fontibus, levissimum & tenuissimum in altum evehit, radiis suis attenuat ac perficit, nec non universale, æthereum sulphureum sal ipsi immiscet, ut aqua ejusmodi non possit non promte per hypochondria omniumque in corpore canalium alveos secundo flumine decurrere ac ferri, & celeriter per ductus excretioni dicatos iterum egredi. Hinc coelestem hanc aquam tam ad nutritionem vegetabilium, quam ad cerevisiæ cocturam, infusa cum herbis paranda, nec non quotidianos alios domesticos usus, accommodatissimam & utilissimam esse, extra omnem dubitationis aleam positum est.

§. XXIX.

Verum enim vero solent nonnulli in contrarium asserere, quod aqua pluvialis cito putifcat, sicque indolem suam minus salubrem prodat. Sed indicium hoc est, plures inesse eidem particulas activas sulphureas, id quod etiam veritati respondet. Potest tamen etiam delapsa per pluviam aqua, ab hac labe defendi, si non ex stillicidiorum squalore, sed ex ipso aëre decidens colligitur, deinde, quando sedimentum, quod ad fundum dimittere solet, elapsis aliquot diebus transcolatione separatur, & ipsa aqua in vasis argillaceis, vel vitreis asservatur, non vero ligneis, è quibus, præsertim recentibus, plures particulas fermentescibiles, sulphureas extrahit, & corruptionem suscipit. Et hoc modo collecta & custodita, incorrupta & intemerata per multorum annorum decursum recondi potest. Spissum enim illud quod subsidet crassamentum, nostra quidem sententia, ex particulis unctuosius sulphureis, quæ motum intestinum putredinosum suscitant, colligitur, iisque remotis ac separatis, integra & illibata consistit remanentis purioris humidi textura.

§. XXX.

Notandum etiam hoc est, quod aquæ, quæ circa æquinoctium vernale & mense Maio, spirante orientali & australi vento, cum pluvia descendunt, longe subtilioris ac spirituosioris indolis sint, lætius quoque & celerius vegetabilia nutrant & foecundent, iis quæ flante ex oppositis plagis aura, decidunt. Et enim in plagis, quæ frigidissimæ, vel densis vaporibus refertæ sunt, non ita excoqui & attenuari possunt halitus, quam ubi acutior sol disfractos illos elevat & attrahit,

§. XXXI.

Deinde eas etiam aquas, tanquam optimas laudamus, quæ ex sublimi loco, collibus terreis, solo arenoso, tophoque & pura argilla emanant: dulces item quæ sunt, hoc est, omnis saporis expertes, limpidæ & perspicuæ, æstate frigidæ & hieme calidæ, & quæ ad solis ortum saliant. Quippe per puram ejusmodi & porosam terram, quæ ab humore non liquatur, colantur quasi & depurantur aquæ. Notum enim est, quod in Italia & Sicilia limosam & palustrem aquam, per lapidem, qui dicitur filtrum, incolæ trajicere & eandem hac ratione defæcare & perpurgare soleant. Nam lapis, dum per poros suos transmittit aquam, fordes retinet, & purum nitorem gratamque limpiditatem ipsi conciliat.

§. XXXII.

Ulterius ex effectu ac virtute, de tenuitate, bonitate & salubritate aquarum haud fallax desumi potest indicium. Norunt certe quam optime æconomi & patresfamilias, eas aquas valde molles, & leves esse, quæ saponem facile admittunt, & in fordibus linteorum extergendis sese approbant, nec non eas, in quibus celeriter pisa & legumina coquantur & penitus mollescunt. Et utique quæ hoc non præstant, duræ censendæ sunt & asperæ. Hinc summopere hoc

nomine commendari solet aqua pluvialis, quippe quæ, ad sordium deterfiones & leguminum & olerum coctionem, longe aptissima est & accommodata.

§. XXXIII.

Probantur porro maxime eæ aquæ, ex quibus bonæ & præstantes parantur cerevisiæ. Salubritas enim cerevisiarum, maximam partem ab aquarum bonitate pendet: unde accidit, ut in Vogtlandia, nec non Bohemia, optimas cerevisias & saluberrimas quoque ac diu durantes alant, quæ nec stomachum gravant, nec alvi secessum inturbant, sed sine mora per urinarias maxime vias discedunt. Idem testatur CLARAMONTIUS in tract. de aëre, aquis & locis Angliæ, fidem faciens, quod in plerisque regni hujus locis, turbidæ & insalubres sint cerevisiæ, propter pravas, limosas & crassas aquas. Pessimæ autem hæ sunt cerevisiæ, quæ flatuum proventui in ventre favent, cunctanter & tardius in corpore pertranseunt, calculos visceribus ingenerant, dentibus cariem inferunt & vitia faucium nec non gingivarum ingignunt.

§. XXXIV.

Præterea laudem merentur aquæ, quæ bonos & salubres pisces alunt, nec cito congelantur. Hæc enim de subtilitate partium & temperata ac salubri ipsius humoris indole, haud vanum præbent testimonium. Accedit, quod molles & subtiles aquæ, uti coelestes & fluviales plurimæ, ad calces metallorum à salibus depurandas sint aptissimæ, minus autem quadrent fontanæ duræ. Quin immo nullum gypsum, in aqua pluviali aut alia tenui subactum indurescit, sed ut fontana in usum vocetur, necesse est.

§. XXXV.

Denique non prætermittendum est, quod eæ aquæ debita non defraudandæ sint laude, quæ diu immunes persistunt à corruptione. Hoc enim subindicat, esse eas expertes impurarum & heterogenearum sordium, sed potius simplices, puras, & spirituofo elemento, quod corruptionem arcet, foetas. Hinc observavimus, quod aqua tam pluvialis, quam fluminea, à sordibus liberata prius, & post in subterraneis promptuariis recondita, amplioribusque vasis excepta, longe melius & diutius asservari possit, quam in minoribus & angustis vasculis & in calido aëre. Insignis etiam hanc in rem adduci meretur locus, quem prodidit BRUYERINI, in *Dynosophia* pag. 662. aquam, perhibens, *Tiberinam, Romani in usus cibarios potulentosque usurpant: & recenter haustam & è flumine invehitam, quamquam turbidam & cœnosam, plebs; at Magnates & procures, quique opibus abundant, solent in cellis vinariis grandia vasa fictilia habere, bina aut trina, scilicet ut quisque pro splendore fortunæ potest, & lautus videri postulat; quibus vasis aqua Tiberina largiter conditur atque reponitur, servanda, non in dies paucos, (quod mirum dictu est) sed menses annosque, sine culpa ac vitio.*

§. XXXVI.

Expositis sic & explanate traditis subtilissimo & spirituofo, æque ac humido & liquido aquarum elementis; tertium adhuc superest examini subjiciendum, videlicet solidum, quod itidem diversum est & ad medicam virtutem in iis multum confert. Dari enim aquas, quæ non modo de diversi generis salibus, sed etiam terris, partes absorpserunt, nemo rerum physicarum gnarus facile in dubium vocabit. Sed qua ratione & qua methodo, examen curate sit instituentum, & variæ hæ substantiæ eruendæ, in diversum abeunt auctorum sententiæ, & perpauca utilia ac vera apud eos, qui de fontibus salutaribus quædam pro-

diderunt, reperiuntur, quippe qui, plerumque Chymiae & Physicae experimentalis notitia destituti, subolere potius, opinione cernere & populari approbatione metiri, quam experimentorum & tentaminum ope contenta expiscari, scrutari ipsisque rerum ponderibus librare voluerunt. Operae itaque pretium erit, ut certa quaedam infallibilia signa & characteres proferam, quibus cujuscvis salis, mineralis metallique naturae indagari possit & dignosci.

§. XXXVII.

Primo autem merito notandus est communis ille error, dari medicatas aquas, quae aurum, argentum, plumbum, stannum, antimonium &c. in complexu suo foveant. Figmenta enim haec sunt & commenta. Quippe metalla nisi fuerint soluta & in sal conversa, non possunt aquarum connubium ingredi & cum ipsis misceri. Jam vero nullibi reperiundum est vitriolum auri, argenti, plumbi aut stanni, neque etiam antimonii vel arsenici. Ideoque nunquam etiam haec metalla & mineralia aquis insinuari & in iis deprehendi poterunt.

§. XXXIIX.

Ejusdem plane furfuris est pervulgata illa & probatissimis etiam quibusdam Chymicis scriptoribus solennis opinio, aquas existere nitrosas, & vero inflammabili nitro foetas. Pace enim horum virorum dicere liceat, nitrum inflammabile non esse sal fossile vel unquam è terrae visceribus erui: sed hoc potius dicendum esse sal aëreum, ex pingui alcalina terra, ipsoque aëre supra terram generatum & productum; ut adeo, quin purum nitrum aquis insit, plane dubitemus.

§. XXXIX.

Perperam non minus quam absurde, sal ammoniacum quibusdam aquis nonnulli adscribunt. Quis enim ignorat, ammoniacum hoc sal esse artis productum, ex mistura salis volatilis urinae, fuliginis, nec non acido salis communis conflatum? Neque alia fuit nativi & fossilis Veterum origo, quam quod sub arena ferventi, ex urina equorum aliorumque animantium, transeunte per terrae poros tenui aquosa portione, confectum fuerit & concreverit. Neque etiam sal illud sulphureum quod in Vesuvio & sulphureis Campaniae montibus efflorescit & volatilem spiritum continet, sal ammoniacum & huc referendum est.

§. XL.

Vicissim precario à quibusdam asseritur: sal alcali inter fossilia & in regno minerali non dari, sed per artificium tantum parari & vegetabilium esse prolem. Contrarium enim evidenter demonstrari & oculis subjici potest, dum non modo ex thermis, praesertim Carolinis & Emsensibus, verum etiam ex acidulis, maxime Selteranis & Buchensibus, purum sal alcali, sali tartari quoad omnes effectus simile, elici & praeparari potest. Neque enim, quod primus omnium ego observavi, purum acidum in acidulis delitescit, sed omnes, quotquot sunt & dicuntur, in omnibus Europae locis, sal alcali vehunt, ut potius alcalinae dicendae essent.

§. XLI.

Sed haec de confictis & falso medicatis aquis immeritis elementis; jam quae revera in societatem illarum transeunt & in iis continentur exponemus. Initium autem faciemus à metallis, inter quae, si utilitatem & usum spectamus, principatum obtinet mars, cujus vena, PLINIO etiam olim notante, omnium metallorum largissima est, & in Germania nusquam non occurrit: quin immo argillae omnesque rubicundae bo-

lares terrae nonnisi martialis prosapiae sunt. Nullum quoque ex metallorum censu est, quod tam promptè à quovis acido dissolvatur, quam ferrum; quin ipsa aqua, ob permixtum aethereum principium & universale sal, promptè illud aggreditur ejusque scobem imbibit. Unde ignitum ferrum in quavis aqua extinctum ramenta ipsi insinuat; testante id virtute roborante & adstrictiva, qua haec imbitur: ut adeo nullum prorsus sit dubium, quin aqua fontana quavis, martiales venas, vel terreas argillaceas rubras perlans, tenuissimas ferri partes elambat & secundo flumine secum auferat.

§. XLII.

Dici solent tales aquae ferratae, quibus Italia imprimis exuberat, & quarum passim mentionem injiciunt SENECA, *quaest. nat. lib. III. cap. 2.* PLINIUS, *Hist. nat. lib. XXXI. c. 2.* BENED. SYLVATICUS in *consil. medic.* & RAYM. FORTIS in *consult. medicis*, nec non ANDR. BACCIUS *lib. de thermis*. Neque nostras regiones martiatas talibus aquis natura defraudavit, neque extra famam sunt Bebranae in Thuringia, Freyenwaldenses in Marchia, Radebergenses in Misnia, nec non nostrae Halenses, maxime vero Lauchstadienses, quarum mirabilis ad varias passiones, efficacia, jam inde à multo tempore, non paucis iisque insignibus exemplis notata est. Cognoscuntur autem ejusmodi aquae ferratae partim ex sapore, quem linguae inprimunt, quodammodo constringente, partim ex ochra flavescente, qua ductus per quos feruntur obducunt eorumque ostia incrustant. Haec enim probe prius elota, siccata & extremo igne tosta, non solum martialem indolem prodit, dum magneti promptè accedit, sed etiam facta cum sale ammoniaco sublimatione, ex elatis in altum floribus, nitidissimam tincturam martialem largitur. Eandem martialem indolem conspectus arguit purpureus color, quem insperso gallarum pulvere suscipiunt, nec non flavus, quo ovum injectum & indusia in balneo imbuuntur, quippe qui non nisi tenerrimae martialis croci rubigini tribuendus.

§. XLIII.

Porro ex metallorum familia cuprum quandoque cum aquis connubium init, non tamen integrum, sed in vitriolum dissolutum. Testatum id faciunt plures in Hungaria fontes, inprimis Neusohlii, è quibus immisso ferro, purissimum descendit cuprum. Sed nullius interni in medicina haec aquae sunt usus, propter septicam & emeticam, quam venus nunquam non servat, virtutem: externo tamen usu, quibusdam in casibus, has non inutiles fore remur. Et praeter duo haec metalla, nulla alia è mineralibus aquis erui & denudari possunt, licet omnibus vestigiis indagentur. Mars autem, uti omnium maxime medica virtute gaudet & saluberrimum est metallum; ita etiam aquae quae illum complexu suo susceperunt, salubritate etiam praereliquis sunt magis commendabiles.

§. XLIV.

Progredimur ad salia, quae ab aquis affluentius in societatem admittuntur, quum humidum ipsis liquandis quam maxime sit accommodum. Primas autem ex iis tenet vitriolum. Etenim nullum sal magis catholicum & in subterraneis locis obvium est, quam hoc vitriolicum: quippe quod omnibus fere mineris adhærescit. Si ejus natales dispicimus, nascitur hoc ex sulphuris acido, quod omnium mineralium universale sal & ex ferri quidem substantia est, dum videlicet acidi sulphuris halitus, qui ex inferiori terrarum tractu sursum rapiuntur perlantes aquas contingunt, & ramentis terreo-martialibus per illas dispersis sese associant, & sic principium quoddam vitriolicum efficiunt. Discernitur vitriolum in aquis salubri-

lubribus omnium optime per mixtionem cum pulvere gallarum; siquidem exinde mox purpureum, si minor, mox atrum, si major copia inest, suscipiunt colorem.

§. XLV.

Observavimus autem, quod vitriolum illud quod aquæ in sinu foveat, sit duplex, volatile nempe & fixum. Sed in acidulis & thermis aliisque celeberrimis medicatis aquis, fixum tale vitriolum non hospitatur: quæ vero volatile & tenuissimum vitriolicum elementum custodiunt, optimi sunt fontes medicinales & mirabili virtute præstant. Apparet hoc ex eo, quando frigida aquæ, aut recenter haustæ, inspersis gallis nigrescunt, simul ac vero admoto igne calorem conceperunt, aut liberiori aëris afflatui patuerunt, omnem tincturam renuunt. Ex quo luculenter patet, quantum errent, qui solius exhalationis, vel destillationis beneficio, aquarum mineralium elementa eruere & in apicum ponere contendunt; quum chymico hoc ministerio, volatile illud minerale, in quo maxima virtus consistit, una cum desideratissimo spirituoso principio, aquis elabatur & diffletur.

§. XLVI.

Quod autem post evaporationem relinquitur vitriolum, hoc merito dicendum est fixum, & priori ratione virtutis longe inferius est. Dantur nimirum aquæ martiatæ, uti Lauchstadienses & Radebergenses, quæ momentum vitrioli fixi admittunt, peculiari encheiresi eliciendum, sed non sunt dicendæ acidulæ. Et tales aquæ non tantum cum gallis mixtæ induunt nigricantem colorem, verum etiam folia quercus, flores balaustrorum, cortices granatorum, extractum herbæ theæ & tormentillæ idem præstant, & tinctura quidem est constantior. Deinceps alius modus est, ex vitriolaceis illis aquis illud quod martiale est separare atque præcipitare. Videlicet drachma una concharum ustarum aquarum libræ est indenda & per aliquot dies rite asservanda & quandoque agitanda mixtura: tum subtilis flavescens ochra ad ima dejicitur. Vel melius adhuc, si ovum recens humori immittitur, per omnem ejus ambitum substantia flava flocculorum instar sese agglutinat, & postmodum decidens, fundum petit in eoque colligitur. Idem contingit si lagenæ ejusmodi aquis ad dimidiam repletæ sub dio exponuntur: tunc exhalante spirituoso elemento, ad ima defertur levissimus & tenuissimus croceus pulvis. Generosum enim illud principium, quum scobem illam martialem compedibus suis intra aquarum nexum detineat, discessu suo, ut aquæ vehiculum hæc deferat, efficit.

§. XLVII.

Non raro etiam salutares fontes salis communis participes sunt. Hujus indolis fuerunt olim fontes Hornhusiani & nuperius Stasfurdenfes. Et adhuc eodem foeti sunt Wisbadenses, nec non quos Ratzeburgi salire accepimus. Acquiritur commune hoc sal, leni facta destillatione & omnimoda liquoris exhalatione. Ita enim in fundo cucurbitæ remanet, & rite elotum, à rejectitiis partibus liberatum & crystallisationi expositum, in cubicam figuram concrefcit, carbonibus injectum crepitat, & aquæ forti inditum, eam armat, ut aurum solvat. Dignoscitur etiam sal commune exinde, si instillato restibili post resiccationem concremento oleo vitrioli, vapor exsurgit, instar spiritus salis nares feriens & acriter compungens. In aquis autem salis communis præsentia colligi potest, si indita solutione lunæ, turbantur & pulverem album ad ima rejiciunt.

§. XLIX.

Porro in aquarum salubrium sinu hospitatur sal alcali fixum. Deprehenditur hoc, prout ego primus asserui & demonstravi, in omnibus thermis æque ac acidulis: & inprimis copiosius elici potest ex Carolinis, Emsensibus, Selteranis & Buchensibus. His autem sese prodit indicium. Aquæ, instillatis acidis, inprimis vitrioli spiritu, effervescunt & conflictum edunt. Sal evaporationis ope ex iis paratum iterumque solutum, syrupum violarum viridi colore inficit, & cum spiritu vitrioli in tartarum vitriolatum convertitur. Præterea idem sal solutionem mercurii sublimati aurantio colore tingit, & sali ammoniaco admixtum, hujus volatile liberat, ut spiritus urinosus diffletur, & odore sese in sensus ingerat.

§. XLIX.

Præterea plurimi & præstantissimi in Germania sunt fontes, qui sal quoddam innominatum, & ferme etiam incognitum, inter acidum & alcali ambigens, & medium quasi temperamentum obtinens, vehunt. Auctoribus vulgo nitrum audit. Sed ne minimam quidem nitri umbram refert. Non enim est inflammabile, non in crystallisatione pyramidalem figuram suscipit, neque aquam fortem largitur. Dicendum igitur potius est sal neutrum, dum neque cum acido, neque alcali pugnat, sed salis Glauberiani notationem similitudinem habet, & frigoris quendam linguæ sensum imprimit. Hoc sale quam maxime foeti sunt Egrani & omnes illi fontes, quorum plures quam quinquaginta circa Egram scaturiunt; nec non Elsterani in Vogtlandia: omnium vero maxime is, qui ante aliquot annos in Bohemiæ pago, Sedlitz, detectus & ad usum à me primum traductus est, unacum contermino huic, ad pagum Seydschütz, fonte, quippe quorum libra medica, duas minimum ejusmodi salis drachmas largitur. Ejusdem quoque generis sal paratur ex aquis quibusdam Parisiensibus, quarum tres species ante plures annos mihi transmissæ, exhalatione facta, illud exhibuerunt.

§. L.

Primus, qui hujus salis mentionem fecit, est LISTERUS, in lib. *de aquis medicatis Angliæ*, & vocat illud nitrum calcarium, verba, quæ in cap. I. initio exstant ita habent: *Ad hæc salia quintum adjiciendum est genus, quamvis è minus cognitis, tamen quod omnium longe copiosissimum est, nimirum sal, sive nitrum calcarium.* Et pag. 13. hæc prodidit: *hujus salis minus cogniti, (etiamsi omnium fossilium, certe apud nos, frequentissimi) crystalli, tenues longæque sunt, iisque mediis quatuor latera parallelogramma sunt, at fere inæqualia: ex altera vero parte, ipse mucro ex binis planis lateribus triangularibus formatur.* Hoc sal originem procul dubio sortitur ex connubio acidi sulphurei & calcariæ terræ, quæ indolis est alcalinæ. Quando enim aquæ acido hoc sulphureo perfusæ, per calcariam terram, cujus uber admodum in subterraneis cryptis est apparatus, labuntur, imbibunt illam, & cum illa congregientes, sal amaricans constituunt. Luculenter id patet, & ex eo declarari potest, si acidum sulphuris vulgaris, cum alcali quodam commiscetur, quippe, pariter ex harum societate, sal sui generis, amaricans & abstersivum exsurgit. Sed de hujus salis natalibus ac genesi, inferius, in fontis & salis Sedlicensis examine, fufius sententiam nostram exponemus. Id tantum hoc loco non prætermittendum, quod reagentium ope difficulter admodum, vel plane non, hoc peculiaris ingenii sal erui & in aquis delitescens detegi possit, sed sola liquoris exhalatione & resiccatione, sese conspiciendum præbeat,

§. LII.

Perquirentibus autem nobis vera medicatarum aquarum elementa, exponendum etiam est & explorandum: an alumen in illarum societatem admittatur? Communis ita fert opinio, subnixa potissimum experimento, quod instillato aquis salubribus oleo tartari per deliquium, lacteo colore inficiantur, eodem modo, ac solutioni aluminis, infuso illo, nebula & albescent tinctura inducitur. Sed fallax utique est tentamen ejusque fides admodum sublesta, quum omnes calcariae & falsae aquae, admixto alcalino liquore, pellucidam faciem exuant & albescant, immo ipsa aqua calcis vivae limpida, turbetur & albo colore perfundatur. Tum deinceps experimento fides constaret, & de aluminis connubio non amplius dubitandum esset, si candidus ille, post alcalinorum mixturam praecipitatus pulvis, igni injectus intumesceret & in spongiosum magma transiret: id quod tamen non contingit. Quamvis igitur fateamur, nos nunquam in aquis soteriis alumen deprehendisse; non tamen inficias ibimus, quod iis in locis, ubi uber aluminis in subterraneis tractibus est proventus illudque copiose effoditur, fontes eodem imbuti scaturiant. Id enim testantur aluminosi illi Dibiae salientes latices. Sed nemo etiam iis medicam attribuet virtutem: quum potius interne nullius plane usus sint, & austeritate sua, nec non rodente facultate, non solum palato ingrati, sed corpori etiam inimici sint & nocivi. Largimur etiam, aluminis acidum, nonnunquam primordialiter aquis quibusdam insinuari; sed immutatur illud in hoc consortio, neque purum manet & simplex.

§. LIII.

Eadem ferme ratio est sulphuris. Constans plerumque & pervulgata Medicorum est sententia, omnes thermas sulphur in complexu suo alere; immo, ab ejus connubio, plurimi caloris in iis causam derivare sategunt. At hi fere sunt, qui thermas non frequentarunt, aut tanquam canis Nilum eas degustarunt; ideoque non mirum est, si eximie fallantur. Paucissimae enim calidarum hospitalium aquarum sunt, quae sulphur vehunt, & si Aquisgranenses, & paucas forsitan alias, exceperis, vix umbram ejus deprehendes. Sunt quidem plurimi, qui Carolinis, Wisbadensibus & Emsensibus, sulphur affingunt, lepidam somnii à colore croceo, quo indusia alba in balneo inficiuntur, rationem cogentes, sed longe alia hujus tincturae est ratio, & mihi tam felici esse non contigit, ut ex his plurimisque aliis sulphur eruere & denudare potuissem, licet summo studio & quaesitissimis artificiiis examen instituerim. Est quoque fons foetens & inurbani admodum, ovorum putridorum instar, odoris, in confiniis Francofurti ad Moenum, & qui ab ipso profluere putatur, in ipsa urbe, vernacula vocant, *den Faul-Brunn*. Hic egregia laxante virtute pollet, & in febribus ad sitim sedandam avide ab aegrotantibus hauritur: sed adornato curiose ejus examine, pariter nihil plane sulphuris in eo reperire licuit. Notae autem & characteres, qui

formalis sulphuris praesentiam produnt & arguunt, sunt: si aquae argentum fusco vel nigro inficiunt colore, & post omnimodam liquoris exhalationem, concrementum relinquunt inflammabile, quod cum sale tartari in hepar sulphuris transit.

§. LIV.

Ultimo loco disquirendum etiam est: an aquae terrarum consortio patiantur? Videtur quidem haec mixtio naturae esse contraria: sed, licet aqua non congruum sit terrae solvens; nihilo minus tamen, nulla illarum est, quae non de terreo elemento quippiam comprehendat. Quare nullum est dubium, quin terra ex praecipuis sit principiis, quae non modo salubres, sed etiam reliquas constituunt aquas. Differunt autem terrae aquarum sinu exceptae, eodem modo, ac illae, quae extra illum obviae sunt. Videlicet communissimae & frequentissimae sunt calcariae, quae optimae quidem non sunt notae, affluenter tamen thermas inhabitant, & falsuginis quoque laticibus sese insinuant, unde ex nostris Halensibus extrahitur durum quoddam & splendens concretum, lamellas amianthi referens. Melioris indolis sunt pingues argillaceae; quippe quae dulcem aquis conciliant saporem, easque molles ac mites reddunt. Ochracea denique substantia, licet à marte suum petat colorem, ab acido non tamen solvitur, quia lutosae & argillaceae naturae est, & virtutem roborantem, exsiccantem, quae maxime in balneo apparet, aquis impertit.

§. LV.

Difficilius haec terrae aquis immerisae deteguntur, & vix alia, quam per evaporationem, ratione, in apicum ponuntur. Et calcaria quidem, instillato oleo tartari per deliquium, aut solutione sacchari saturni, lacteum colorem producit, ac redundantius aquas incolens, maxime calidas, sub aëre frigidiusculo secedit, sese vasis & canalibus apponit, & injecta, brevi lapidosa crusta obducit: id quod inprimis contingit in Carolinis. Post exhalationem autem, partim ex effervescencia cum acido, partim etiam ex ustione, qua summam acquirit acredinem, innotescit. Ochraceam prodit, si sedimentum, quod post evaporationem & crystallisationem salium in filtro manet, flavi est coloris, qui sub calcinatione in rubrum vertitur, prout superius jam meminimus. Si vero in fontibus quippiam lapidosi continetur, id sese optime per elutriationem, factam cum sufficienti aquae affusione, qua omne terreum subtile solvitur, manifestat. Hoc enim ob gravitatem in fundo residet, nec facile è loco suo dimovetur.

§. LVI.

Sed haec de elementis aquarum mineralium recte discernendis & eruendis sufficiant. Id certe ex omnibus hisce intelligentium judicio luculenter patebit: pauca admodum esse, quae hospitalibus aquis revera insunt, & multa illis ab ignaris temere affingi.

SCRUTINIUM PHYSICO-MEDICUM
PRINCIPIORUM ET VIRTUTUM
IN PRÆCIPUIS MEDICATIS GERMANIÆ
FONTIBUS.

§. I.

SI quid aliud, certe medicati fontes, qui passim & in plurimis regionibus, ad ingens commune mortalium commodum, salutarem laticem fundunt, luculentissima divinæ providentiæ & admirandæ sapientiæ ac benignitatis documenta exhibent. Incomparabilem enim & plane divinam mineralibus hisce aquis, tam calidis, quam frigidis, inesse virtutem, ut in morbosis afflictionibus, tum avertendis & tempestive præscindendis, tum protelandis & persanandis, omnia, vel exquisitissima arte concinnata remedia, longissime exsuperent, nemo facile in dubium vocabit, nisi qui, ex supina quadam negligentia, in illarum cognitione rudis, insulsus ignotæ rei existimator est.

§. II.

Profecto, avidissime quidem & perquam cupide, etiam à non ineruditis, universalis quædam medicina, quæ curandi indicationibus quovis in morbo responderet, hucusque expetita fuit, & adhuc omni arte atque ingenio operose conquiritur: sed non est, cur frustraneam operam conterant, quum benignissimus naturæ rerum parens, per beatissimum aquarum mineralium proventum, optabile ejusmodi sanitatis præsidium nobis prorsus gratis elargiatur. Ecquis enim est, qui de ullo alio remedio, id vere prædicare, vel etiam tantum sperare poterit, quod cito, tuto, efficaciter, & sine omni virium diminutione, per omnis generis emunctoria, excrementitias, quæ morbos gignunt & fovent, sordes, foras è corpore educat atque proscribat, quam de foteriis aquis? utpote quæ, non solum congestam in ventriculo & intestinis recrementorum colluviem promptissime exturbant, sed etiam, feri falso-sulphurei per urinarios tubulos secesum egregie adjuvant, & per commune illud subcutaneum cribrum subtiliora purgamenta eliminant. Neque aquæ hæ medicinales evacuandi tantum facultate præstant, sed insignem etiam alterandi virtutem possident, ita, ut ne quicquam aliud melius & præstantius lentis ac tenacibus humoribus dissolvendis, acribus & salinis diluendis ac temperandis, acidis & austeris invertendis ac corrigendis, & obstructionibus minimorum vasorum referendis, aptius & accommodatius iisdem excogitari & inveniri possit. Accedunt desideratissimæ tonicæ & roborantes vires, quas salutiferi fontes, si solidæ partes nimium sunt resolutæ vel laxatæ, abunde complectuntur & summo cum fructu impertiunt. Et quod maximum est, præclaras has virtutes secure & sine omni subsequente noxa exserunt; ideoque tutissime, non tantum robustis & valentibus corporibus, sed etiam admodum imbecillis, è morbis brevi convalescentibus, puerperum egressis foeminis, gravidis etiam, nec non senibus, suaderi & propinari possunt. Præterea minerales aquæ, hoc præ aliis medica facultate instructis auxiliis peculiare sibi vindicant, quod omni ætati, temperamento, sexui etiam, convenient, & quovis anni tempore, nec hiemali excepto, tuto & utiliter adhiberi possint.

§. III.

Neque etiam prætereundum est id, quod in fontium indole & genio suo salutarium consideratione maxime mirandum est: nimirum, quod præcipui eorum, contrariis quasi videantur pollere viribus, dum, si excretiones nimix sunt, eas tuto sistunt atque compescunt; & vicissim, si defectu peccant, earum successum efficaciter & fructuose promovent. Quod si enim prima regio, per quam ventriculum maxime & primum intestinum, duodenum nempe intelligo, saburra biliosa obsidetur, eandem vomitu egregie deplent: contra vero, contumacem illam & enormem, hypochondriacos subinde affligentem vomitionem, illico componunt & quam efficacissime percurant. Similiter, si menstruus sanguinis in foeminis fluxus, aut solennis illa sanguinea in viris per hæmorrhoides excretio, minus legitime succedunt, sed subsistunt, tam præstans medicatorum fontium in proritandis his & revocandis est virtus, quam nullius medicamenti: nihilo minus tamen, si ani & uteri venæ plus justo cruoris fundunt; eadem minerales aquæ, ad cohibendum nimium profluvium, egregiam commodant opem.

§. IV.

Verum enim vero, præter incomparabiles has foteriis fontibus inditas dotes atque virtutes, divinum etiam & sapientissimum Numen eosdem præcipuo quasi præ omnibus aliis caractere & peculiari prærogativa notare atque insignire voluit, quo immensæ benignitatis in mortalium genus ubertas eo testatius elucesceret. Nimirum scaturigines medica facultate commendabiles, per multorum jam sæculorum decursum constanter, & perenni flumine undam suam emiserunt, neque unquam, sub ferventissima etiam tempestate, ut alii fontes, exaruerunt. Deinde eandem semper elementorum, sive ingredientium, & qualitatem, & quantitatem, sub certa mensura continent atque tuentur. Et tandem neque ex mineralium, neque metallorum censu, ea, quæ infensi & virulenti quippiam alunt, licet subterranei tractus iisdem admodum referti sint, absorbent & secum auferunt, sed potius, delectu quasi instituto, ea tantum, quæ partibus corporis nostri, tam solidis, quam fluidis, accommoda & amicissima sunt, è terræ visceribus elambunt & in societatem suam admittunt.

§. V.

Quum itaque tot ac tanta divina beneficia, pleno alveo per medicatas aquas in mortales deriventur, ut summa cum ratione à Veteribus sacræ appellatæ sint: miranda utique & non sine censura dimittenda est, crassa illa & supina tam Physicorum, quam Medicorum, veterum æque ac recentiorum quorundam, in recte cognoscendis & debite examinandis salutarium fontium principiis, operationibus & effectibus, negligentia & ignorantia. Nam si monumenta hoc de argumento divulgata evolvimus, maxima certe coëcutientium est turba, & omnes non satis explicite & significanter vera & genuina mineralium aquarum ingredientia exposuerunt & demonstrarunt; sed potius plane incongrua & naturæ adversa elementa pro arbitrio confinxerunt, & iisdem inesse tradiderunt, quo-

quorum tamen ne micam vel vestigium reperire licet. Hinc factum est, ut non solum ibi locorum degentes, sed etiam exteri Medici, quibus non data fuit copia fontes nostros foterios frequentandi eorumque aquas examinandi & harum elementa penitus scrutandi, eosdem valde intuitos & suspectos esse precario crediderint, eamque ob causam nonnisi valentibus, & robustis eorum usum suaserint, verentes, ne debiles & qui interiores partes non salvas & perfecte integras habent, ab his, tot mineralium, naturæ humanæ non adeo amicorum, consortio imbutis, & impetuose ac cum vehementia operantibus aquis, admodum læderentur, quin penitus interimerentur. Sed parum etiam hi ipsi sibi constiterunt, eo quod docente experientia, chronicis passionibus mirum quantum emaciatos, & quos nulla arte ad sanitatem reducere poterant, irritis demum omnibus, ad fontes medicinales, tanquam ultimum refugium, & ut ita dicere liceat, ultimum appellationis forum, ablegare sueverint: quasi vero illi, qui cum tam diuturnis conflictati fuerunt morbis, robustis & quoad viscera integris annumerari deberent. Quare ultro fateantur necesse est, qui adhuc eadem mentis caligine premuntur, insignem mineralibus fontibus juvandi inesse facultatem, quæ imbecillis corporibus neutiquam perniciofa, sed potius summopere proficua sit; licet ipsi ignorent, unde hæc dependeat & quam agnoscat causam.

§. VI.

Quodsi vero primam causam & originem, unde incerta hæc, dubia, fluctuans & falsa prorsus auctorum de salutifera aquarum mineralium facultate opinio, emanarit, sciscitemur: vix aliud quippiam accusari poterit, quam quod Philosophia physico-chymico-mechanica experimentalis plane destituti, genuina eorum ingredientia, tanquam operationum fontes, explorandi modum ignorarint, eaque propter sine omni solida ratione vel firma demonstratione, ex imaginaria tantum probabilitate, omnis generis contenta & elementa subolere voluerint iisque audacter assignarint.

§. VII.

Et frivola hæc opinio mirum invaluit, quin eo processit, ut nihil ferme ex metallorum & mineralium, terrarum, lapidum, salium & succorum familia esset, quod secundum illam non cum medicatis aquis conubium iniret. Potissima autem mineralium fontium ingredientia ubivis ferme ab auctoribus hæc recensentur: alumen, nitrum, vitriolum, sal commune, nitrum veterum, terra sigillata, ferrum, ochra, calx, bitumen & sulphur, quibus alii cuprum & arsenicum addunt: ast, quod certe mirandum, neque de nitro, phlogisto illo, neque de vitriolo, neque de alumine, neque de bitumine, neque etiam de sulphure vulgari, excepto unico tantum Aquisgranensi fonte, multo minus de cupro & arsenico, mica & vestigium ullum, exquisitissime etiam instituto examine, deprehendi ulloque modo demonstrari potest; sed longe diversa & alia sunt, quæ in sinu suo minerales fontes custodiunt, quorum ab iis, qui scriptis hoc argumentum exponere annisi sunt, nulla plane facta est mentio. Neque minus gravissimum in eo & Medici & Physici admiserunt errorem, quod ad unum omnes acidulas, fontes acidos esse, firmissime crediderint, eamque ob causam non solum lactis usum, propter coaguli metum, majorem in modum sub earum potatione prohibuerint, sed etiam quod eas, tanquam acido eminenter imbutas, non facile in chronicis sic dictis passionibus, quæ semper excessiva aciditate stipantur & exacerbantur, suaserint & ad usum præscripserint.

§. VIII.

Ego vero sicuti hunc nunquam non indui & fer-

vavi animum, ut nihil precario crederem, neque Medicorum dogmata populari approbatione metirer, sed omnia ipse subacto, quantum quidem valerem, iudicio curate expendere, ipsisque rerum ponderibus ac momentis librarem: ita eo minus ab utilissimo hoc mote in doctrina de aquis mineralibus discedendum esse ratus sum, quo major illarum est præstantia & in arte medica utilitas. Unde factum est, quum à receptis huc usque sententiis assensum cohiberem, & ipse Chymicæ experimentalis ope, fospitalium aquarum examen molirer, variisque institutis physicis, chymicis & staticis tentaminibus, in genuinam earum indolem, principia & facultatem inquirerem, ut mihi ultro innotesceret, commenta esse & figmenta pleraque, quæ ab auctoribus de foteriis fontibus prodita sunt, & adhuc traduntur. His autem perspectis, non potui, quin, ignava opinionum portenta strenue impugnarem, explosisque erroribus, ea, quæ medicatis aquis revera inesse deprehenderam, ingenue & dilucide exponerem, meamque sententiam solido argumentorum robore in plurimis scriptis stabilirem. Et quamvis is non sim, qui gloriam ex hoc qualicunque labore ambitiose aucupari velit; id tamen sine arrogantia nota dicere licebit: quod primus ego omnium fuerim, qui evidentissime & momentosis rationibus docuit, quod in acidulis minime acidum, qua tale, sed potius acido contrarium, alcalinum nempe, tam terreum, quam salinum elementum, quod cum acido promptissime confligat, reperiatur. Ipse etiam eodem fundamento innitens, primum inveni & exposui, quo pacto, aqua mineralis diuretica, mediante fortissimo acido, in purgantem transmutari possit, & hoc ipsum multoties felicissimo successu præstiti, ac Buchenses, spectantibus id & approbantibus viris præcipuis, in Egranas extemplo converti. Primus porro acidularum & thermarum ratione ingredientium & usus convenientiam, perspexi, monstravi & postmodum peculiari dissertatione fufius illustravi. Et hac cognitione instructus, divina sic adgubernante providentia, saluberrimos quosdam latices detexi; & derelictui antehac habitos, summo cum fructu ad usum traduxi. Id quod non solum exemplo Sedlicensis purgantis, falsi & amari in Bohemia, jam famosissimi, sed etiam martialis Lauchstadiensis in Misnia fontis, nec non tepidæ illius in Carolinis scatebræ, quæ Germanis *der Mühlbrunn* audit, & jam cum communi & fervidissimo fonte, *Prudel* vocato, de prærogativa certat, luculenter constat.

§. IX.

Quum vero non negandum sit, quod fontes medica virtute pollentes, tam thermales, quam sic dicti acidi, in multis Germaniæ regionibus scaturientes, multum ratione elementorum & principiorum, nec non puritatis aquarum differant, & alium quoque atque alium in his vel illis morbis, aut in his vel illis corporibus effectum exferant, ideoque majoris vel minoris in arte medica usus sint; operæ utique pretium esse, & ipsa salubrium aquarum dignitas atque præstantia exposcere videtur, ut eadem experimentalis methodo, in quoniam præcipuorum medicamentorum, nostris in regionibus salientium fontium, differentia versetur, à priori ostendatur, & tum ab experientia, effectum videlicet, peculiare cujusvis & propriæ vires confirmantur. Et hoc est, quod in hac physico-medica disquisitione plenius excutere, & curatius paulo persequi statutum nobis est atque propositum.

§. X.

Initium autem faciemus ab acidulis, & quidem PYRMONTANIS, quæ ob penetrabilem & expeditam maxime qua gaudent vim, principem inter reliquas locum tueri videntur. Omnia vero quæ cum ipsis institui-

tuimus tentamina, nec non observata phaenomena, ordine sigillatim enumerabimus, quo hisce collatis, de illarum viribus & usu rectius iudicium ferre possimus.

I. De Pymontanis igitur aquis hoc imprimis notatu dignum est, quod vasa vitrea, aequae ac terrea, ad fontem iisdem repleta & probe obturata, levi tantummodo calore accedente, vel agitatione facta, facillime cum impetu disrumpantur; id quod cum aliis acidulis non facile evenit. Quare si ad alia loca transportandae sunt, necesse est, ut lagenae non statim penitus oppleantur, sed ut vacuum in iis relinquatur spatium, & ipsae per aliquot horas apertae maneant, quo volatile illud & elasticum elementum tantisper exhalet.

II. Si ad fontem frigidae jejuno ventriculo matutino tempore hauriuntur & assumuntur, subtili & penetrante vapore sursum elevato, nares feriunt, ipsumque caput quasi temulentum reddunt.

III. Pymontanæ alvum aliquoties sollicitant, eoque copiosiores sedes cient, si non ad scatebram, sed ad remotiora loca delatae, bibuntur. Faeces vero post earum usum magis nigrae secedunt, quam post aliarum acidularum potationem contingere solet. Sed omnis hæc purgandi virtus perit, si eadem diutius libero aëri exponuntur, nec tum excrementa nigro colore tingunt.

IV. Si folia thee, flores balaustiorum, aut gallarum pulvis, in transparente vitro Pymontanis injiciuntur, primo coeruleus, brevi post purpureus & demum niger color in conspectum prodit: luculento indicio, nigrum colorem ex purpureo concentrato exsurgere & coeruleum non nisi purpureum dilutum esse. Sed instillato infectis hoc modo aquis vitrioli spiritu, omnis color protinus dispellitur.

V. Acido quovis affuso, sive sit fortius, ut vitrioli spiritus & aqua fortis, sive mitius, ut acetum, succus citri, vinum Rhenanum, manifesto ebulliunt, & copiosissimæ bullulae cum vapore emergunt & ad superiora eluctantur.

VI. Si vero liquores alcalini, sive fixi, ut oleum tartari per deliquium, sive volatiles, ut spiritus salis ammoniaci aquosus, cum Pymontanis confunduntur, nulla lucta vel effervescencia observatur, sed turbantur paulisper & albæ fiunt. Spiritu autem vitrioli instillato, & alcalino elemento eodem saturato, pristinam pelluciditatem recipiunt.

VII. Lac bubulum aequali mensurae parte acidulis Pymontanis admixtum, minime ab it in coagulum, sed potius fluidius redditur, & à corruptione acidæ, cui æstivo tempore alias promptissime patet, defenditur & præservatur: indubio testimonio, acidum in his nequam eminere.

VIII. Syrupus violarum si Pymontanis permiscetur, eandem intensius viridi inficit colore, qui immixtis aliquot spiritus vitrioli guttulis, prope evanescit.

IX. Libras quatuor medicas hujus aquae moderatissimo igni commisimus, & evaporatione peracta, materiae siccae scrupulos duos obtinuimus. Hujus dimidia parti in vitro conservali triginta guttas olei vitrioli instillavimus, quo facto, fortis contigit ebullitio, & extemplo vapor tenuissimus, nares acriter compungens, adscendit, haud secus ac sale communi & oleo vitrioli confusis, evenire solet. Alteri vero parti spiritum vitrioli simplicem affudimus, eumque conflictu edito, amaricantem & falsum factum esse animadvertimus, remanente multum adhuc calcariae terræ, quæ aqua elota, cum spiritu acido non amplius effervescebat.

X. Aliquot Pymontanarum libras in ampla argentea patina per viginti quatuor horas libero aëri exposuimus, & tantopere à pristina sua indole defecisse observavimus, ut vix eas dignosceres, ob summam

inductam inertiam. Nam gustu exploratae, mineralem, acrem & penetrantem saporem penitus perdiderant, & plane insipidae factae erant. Pellucidam quoque exuerant faciem & turbulentæ evaserant, demissa ad fundum subtili flavescente terra. Supernatans liquor affuso acido non amplius ebulliebat, nec insperso gallarum pulvere nigrescebat, nec etiam adjecto violarum syrupo viridiusculum referebat colorem.

Ex memoratis igitur experimentis & observatis phaenomenis, jam in proclivi est judicare: Pymontanas aquas spiritu minerali, purissimo, valde penetranti & elastico copiose admodum esse imbutas; ita, ut ab hoc potissimum spectatissima earum virtus derivanda sit. Tenuissimum enim hoc elementum, quamdiu particulis terreis calcariis adhærescit, alcalini principii indolem mentitur, subtiliori autem martiali terræ associatum, vitrioli ingenium æmulatur, & saporem exhibet vitriolicum, faeces nigras reddit, & inspersis gallis tincturam edit; eaque propter quamdiu hoc ipsum aquae poris innidulatur, sub forma principii salini alcalini & vitrioli subtilioris eandem summa agendi potentia instruit, eique in viscerum tono roborando, iis obstructis aperiendis, excretoriis stimulantibus, vim certe foenerat maximam. Aufugiente autem illo & deperdito, omnis simul aquarum efficacia perit atque expirat. Quare quum Pymontanæ affluentis & locupletis spirituosus hujus elementi materia nobilitatae, & ob id vehementioris tantisper operationis sint; facile patescit: earum usum magis corporibus carnosissimis & robustioribus, quam tenellis & mollioribus esse accommodum. Tutissime tamen etiam à debilibus usurpari possunt, si vel purae, refracta dosi bibuntur, vel cum alia fontana purissima aqua nuptae, ad usum propinantur. Summo quoque cum fructu cum dimidia lactis parte remiscuntur, & hoc pacto arthriticis & scorbuticis, ex multiplici nostra experientia, egregio sunt praesidio,

§. XI.

Post Pymontanas ob praestantissimam virtutem secundum locum merito suo tuentur EGRANÆ. Hæ utut non tam affluentis spirituosae materiae copia perfundantur & mitioris indolis sint: nihilo minus tamen ob hanc causam tutiori efficacia praestant, & nostris temporibus multo familiariori usu præ Pymontansibus celebrantur; adeo ut ad remotissimas etiam regiones immensa propemodum copia quotannis deferantur. Quanam igitur Egrani hujus fontis genuina sint elementa, & in quo à Pymontensi diffideat, curatius etiam disquirendum & tentaminibus quibusdam adstruendum erit.

I. Ut alcalinum Egranarum principium expiscaremur, affudimus ipsis vitrioli spiritum, & manifestam inde ebullitionem annotavimus, licet non tantam, quanta in Pymontanis fuerat & in Selteranis & Buchensibus esse solet.

II. Ad mixturam olei tartari per deliquium, limpidus permansit liquor & clarus, nulla pelluciditatis turbatione succedente; quum aliae fere omnes minerales aquae, instillatis alcalinis liquoribus, obscurentur & lactescentes fiant, ob salis communis, vel terræ calcariae connubium.

III. Si è scatebra hauriuntur, insperso gallarum pulvere purpurascunt: si vero ad remotiora loca transportantur, nisi vasa exquisitissime fuerint munita, nullam plane coloris ab hoc pulvere subeunt immutationem; argumento haud exiguo, quod parum vel nihil martialis terræ alant.

IV. Admixto violarum syrupo, viridiusculo colore paulisper perfusae sunt, indicio, alcalinum elementum in iisdem quodammodo esse superius.

V. Solutio vitrioli martis flocculos flavescentes

ad fundum dejecit; quorum tamen generatio non tam ipsi aquæ, quam potius vitriolo martis, humoris ope liquato, tribuenda est: eo quod acidum vitrioli martis, cum sale fontium alcalino congregiens, tenuissimas has martis particulas è nexu suo dimittit.

VI. Egranarum libram medicam, quæ, prout notum, duodecim uncias æquat, leniori ignis gradu in B.M. destillari curavimus, & chymico hoc ministerio primum obtinuimus phlegma insipidum prorsus, & tum materiæ siccæ remanentis grana xxiv. Huic affudimus oleum vitrioli, nullo prorsus effervescentiæ motu succedente, nec etiam volatili fumo emisso; eoque edocti sumus, ne quicquam de sale communi in ea recondi.

Ex hoc itaque Egranarum examine dilucide patescit: quod vis illa, qua eminent alvum ducens, copioso quod sovent sali amaro, cathartico & mediæ naturæ accepta referenda sit. Id quod etiam quotannis eximia copia artificiose per coctionem ex ipsis paratur & ad exterarum regiones dimittitur. Neque hoc sal alia quam Sedlicense & Ebshamense pollet efficacia, sed ad unciam in una aquæ medica libra liquatum, alvum ter aut quater summo cum levamine solvit. Præterea Egranæ ob aquæ quam vehunt subtilitatem, levitatem & puritatem, inprimis etiam commendabiles sunt; & hoc quoque nomine ipsis Pymontanis, quæ largo ochreæ & calcariæ terræ connubio scatent, antepondendæ. Quæ quum ita sint, utique & rationi & experientiæ congruenter inde concludere licet: quod Egranus fons ad viscidas, præsertim primarum viarum, sordes in hypochondriacis & cachecticis abstergendas, eluendas & per alvi secessum exturbandas, nec non ad tollendum & referendum vasorum sanguiferorum in visceribus infarctum, & ad lentos atque tenaces humores dissolvendos ac dissipandos, aptissimus sit & quam maxime accommodatus.

§. XII.

Succedunt jam SELTERANI fontes, ob insignissimam utilitatem longe lateque celebrati, qui in diocesi Trevirensi, in pago *Nieder-Seltz*, in confiniis urbis Limburgi, vena admodum benigna & larga saliant, & ob mitissimum quo agunt ingenium, etiam valde debilitatis, emaciatis & inprimis pulmonum labe affectis singulari cum emolumento præscribuntur. Quapropter ut hos etiam examini subjiciamus, & quæ illorum mixtionem ingrediuntur principia penitus scrutemur, instituti nostri ratio postulare videtur.

I. Cum quocunque acido sive fortiori, sive mitiori, promptissimam subeunt effervescentiam. Sique cum vino Rhenano, adjecto contuso saccharo, miscentur, ingenti cum strepitu ac fumo ebulliunt, copiosissimasque bullulas, ut tota mixtura lacteo quasi colore perfundi videatur, emittunt, haud secus ac cum Antonianis & Wildungensibus contingere solet.

II. Si cum æquali parte vini veteris Rhenani generosi confunduntur, obscurantur, & colorem ex bruno rufescentem induunt, eodem modo ac videmus, si oleum tartari per deliquium, vel spiritum salis ammoniaci urinosus concentratus, generosiori vino infunditur.

III. Sapor hujus aquæ non tam compungens, penetrans & subacidus est, quam aliarum acidularum, sed lixiviosi quippiam resipit.

IV. Injecto gallarum pulvere, non coeruleum, purpureum, multo minus atrum colorem reddunt: neque fæces alvinæ, sub earum potatione egestæ, atramento si quid referunt.

V. Instillata salis tartari solutione, lactescentem tincturam receperunt: nihil tamen præcipitati ad fundum descendit.

VI. Ex duabus libris medicis Selteranarum, lenioris exhalationis beneficio, drachmam unam & gra-

na duodecim materiæ salinæ impetravimus; quæ aqua iterum soluta & per chartam bibulam trajecta, lixivium præbuit, ex quo salis pure alcali scrupulos duos collegimus. Hujus salis solutioni immisimus aquam mercurii sublimati, & illico præcipitatum aurantii coloris, turpethum minerale, sensim fundo prolapsum est. Neque injucundum erat spectaculum quando intusum rhabbarbari hac solutione rubicundam tincturam fusciperet. Idem sal, cum sale ammoniaco remixtum, reclusa ejus compage & acido ligato, liberum & sui juris fecit spiritum volatilem, nares acriter compungentem.

VII. Duabus libris medicis harum aquarum vitrioli spiritum, ad punctum usque, ut aiunt, saturationis, confudimus, & postea leni igni ad evaporandum imposuimus, & post omnimodam liquoris exhalationem, salis medii, quod tartari vitriolati notatiorem similitudinem habuit, drachmam unam & dimidiam obtinuimus.

VIII. Nullæ nobis ex medicatarum aquarum numero notæ sunt, quæ tam facile foetida putredine corripiantur, ac Selteranæ. Hinc ut lagenæ prorsus opleantur, subere firmitus obturentur, picentur & curate muniantur necesse est.

IX. Si in ampliore vase Selteranæ liberiori aëris accessui patent, intra diei & noctis spatium, pristinum saporem penitus perdunt, & vere lixiviosum, ac si oleum tartari per deliquium instillatum fuisset, nanciscuntur: neque tamen quicquam flavescens materiæ subsidet.

Singula autem hæc phænomena, si attentius considerantur; clarissime innotescit: hunc fontem affluentem & locupletum salis alcalini puri materia esse refertum, ita ut non sit in Germania, qui tantam ejus copiam custodiat. Neque vero quicquam de sale calcario amariante, nec non martiali elemento, in connubio suo fovet: unde fit, ut parum alvum exerceat, sed urinosum maxime laticem moveat. Accedit, quod hic fons tenuissimo illo volatili & minerali spiritu parcius imbutus & afflatus, eamque ob causam non admodum vehementis sed mitissimæ indolis sit. Ex quibus junctim pensatis, id in usum medicum redundat, quod Selteranæ non modo innoxie, sed sæpius summo cum emolumento, à maxime etiam debilibus, inprimis scorbuticis, phthysicis & qui affectibus spasmodicis gravius detinentur, possint in usum vocari. Adhibentur autem vel solæ vel melius adhuc, cum lacte asinino, aut caprillo, remixtæ: quem usurpandi modum primus in therapiam felicissimo cum successu à viginti abhinc annis invexi, meumque ductum, exoptato non minus eventu, plures Medicorum sequuti sunt. Neque enim ad crudos & male coctos humores diluendos, & ad sanguinis & humorum dyscrasiam in arthriticis & podagricis temperandam & emendandam, nec non ad spasticas nervosarum partium tractiones laxandas & componendas, præsentius, certius & præstabilius, Selteranis cum lacte adhibitis, datur præsidium.

§. XIII.

Accedimus nunc ad notissimum in Germaniæ oris, & ob jucundissimum saporem palato maxime acceptum fontem, qui vernacula *der Tönnsteiner*, latina autem ANTONIANUS audit, & dispiciemus: utrum palato tantum oblectamento inserviat, an vero medico etiam quodam usu splendeat? Experimenta autem quæ eum in finem adornavimus, huc redeunt.

I. Id cum omnibus acidulis Antonianæ commune habent, quod cum acido ebulliant. Et hæc etiam ratio subest, quare vini & sacchari admixtione, cum magno strepitu & fumo, ob innumeras & collectius emissas bullulas, lactescentem quasi fermentationem efficiant.

II. Inspersis

II. Insperfis gallis tincturam recusant, & nativam claritatem integram & illibatam retinent: quod insigni documento est, eas non fovere martiales particulas, nec complexu suo quippiam vitriolici suscepisse.

III. Syrupus violarum iisdem eodem modo ac aliis acidulis paulisper viridem inducit colorem, in non exiguum alcalini principii argumentum.

IV. Si tartari oleum, quod per deliquium paratur, iis insillatur, protinus turbantur, & lacteo colore tinguntur, secedente ad fundum levi quodam sedimento; indicio, salis communis, vel calcarii quippiam, iis inesse.

V. Si quando paulo diutius in ampliori vase liberiori aëris afflatui patent, haud secus ac reliquæ acidulæ, acutum saporem perdunt & faciem pellucidam exuunt.

VI. Si in patina à stanno confecta prunis candentibus imponuntur, & decoquuntur, cuticula in superficie concrevit, variis coloribus variegata; quod neque cum Selteranis, neque aliis acidulis, evenire solet.

VII. Demum libras duas Antonianarum medicas leni igne exhalavimus, relictis, post omnimodam liquoris evaporationem, duobus materiæ siccæ scrupulis, eaque soluta iterumque debita ratione reficcata, unus salis, & unus terræ calcariæ, remansit scrupulus. Sali in vitro apto conservari aliquot olei vitrioli acerrimi adpersimus guttulas, & mox ingens suborta est ebullitio, cum denso & penetrantissimo vapore, ejusdem prorsus naturæ & indolis cum illo, qui ex salis communis & olei vitrioli mixtura exspirat.

Et his experimentis clarissime evictum esse censeo: Antonianas parum salis alcalini, plurimum vero calcariæ terræ & salis communis, nec non insignem spiritus mineralis copiam, in complexu suo alere, & quod proinde temperatissimæ indolis sint, ne nimium alvum subducant, aut urinæ fluxum proritent. Quocirca non dubitandum est, quin eadem in morbis, tam chronicis quam acutis, loco cerevisiæ, quæ rarissime ægrotantibus conducit, cum vel sine vino, non solum innoxie, sed etiam summo cum fructu, adhiberi possint. Neque leve est præsidium & auxilium, quod extracto longius usu, in malo hypochondriaco spondent.

§. XIV.

Quum WILDUNGENSES inultum affinitatis cum Antonianis alant, & vulgo ad usum magis diæteticum, quam medicinalem destinantur; jam etiam harum scrutinium pervestigatius paulo inire placet.

I. Manifestum alcalini inhospitantis elementi indicium præbet, quod admixtum iis acidum conflictu excipiant & leniter effervescent: tenuissimo autem quod afflatæ sint spiritu, ex eo innotescit, quod diutius aëri expositæ, mineralem & acidulis proprium amittant saporem.

II. Insillata salis tartari solutione, lactescente colore perfunduntur, levi ad fundum deturbato sedimento.

III. A gallis, vel floribus balaustrorum nullam plane tincturam recipiunt; violarum vero syrupus remissius tantum viridescit.

IV. Exhalatione instituta, libræ duæ medicæ salis alcalini grana quatuor, & terræ albißimæ, spiritu vitrioli solubilis, grana octo præbuerunt.

Hæc puto planum atque testatum faciunt, quod Wildungenses, inter acidulas hætenus commemoratas mitissimæ sint, & ob id commodissime potus ordinarii locum vel solæ, vel vino remixtæ, sustinere possint. Quamvis vero ad molestas chronicas afflictiones expugnandas & sordes primarum viarum ejiciendas, minus accommodæ sint: nihilo minus tamen ad acrimoniam humorum in scorbuticis & arthriticis temperandam & diluendam, largiori dosi & lon-

giori usu, non sine eximio emolumento adhiberi poterunt.

§. XV.

Accedimus ad SCHWALBACENSES, quæ frequentissimi pariter ac præstantissimi usus sunt, & quid de his observaverimus, strictim enumerabimus.

I. Si Schwalbacenses in lagenis laxius paulo obturatis custodiuntur, putiscunt & sedimentum flavum deponunt.

II. Insperfus recenter haustis gallarum pulvis, purpureum colorem reddit, & è scatebra potæ, facès quodam modo inficiunt, in non exiguum martialis elementi indicium.

III. Cum acidis effervescent, cum oleo tartari per deliquium turbantur & lactescunt, & liberiori aëris accessui expositæ, grato sapore & laxante virtute penitus privantur.

IV. Salina materia, quæ post duarum medicarum librarum exhalationem, reliqua fuit, ad lancem exacta, duos fere scrupulos æquavit, & tertiam ochreæ substantiæ partem continuit.

Quæ quum ita sint, quisque rerum physicarum & medicarum gnarus facile perspiciet: Schwalbacenses inter Egranas & Pyrmontanas medium quasi obtinere locum, & ob tenuissimum mineralem, quem conubio suo exceperunt spiritum, nec non ob martialis & subtilis vitriolici principii consortium, non modo excretiones per alvum, sed etiam per vias urinarias egregie promovere, simulque roborare: & hinc hypochondriacis & melancholicis magno usui atque auxilio esse.

§. XVI.

Mentio etiam injicienda est SPADANARUM. Quamvis vero nobis non affulserit occasio, harum examen suscipiendi, sed de his instar omnium legi possit HENRICUS ab HEER, qui tersissimum de iis tractatum, *Spadacrene* inscriptum, composuit: nolumus tamen celebratissimas has aquas sicco prorsus pede transire, sed partim ex laudato HENR. ab HEER, partim ex NICOLAI VALLERII *tentaminibus physico-chymicis*, ea depromere & commemorare, quæ ad scopum nostrum maxime faciunt.

I. Si Spadanæ aquæ ad dissita loca, optime etiam in lagenis clausæ, transportantur, post longiorem moram, exiguum terrestri materiæ quantitatem dimittunt, similem fere ochræ flavescenti.

II. Unum pulveris gallarum granum, mox integram aquæ Spadanæ unciam, colore satis intense purpureo tingit; sed si calefactæ eidem gallæ injiciuntur, omnem tincturam recusat.

III. Lacti affusæ, illud non coagulant; vino autem permixtæ, fumum calidum quasi bullientis aquæ excitant, odoreque gratissimo nasum, & bullis alte salientibus oculos recreant.

IV. Fons Spadanus inebriare quasi solet; sed ebrietas raro horæ quadrantem æquat, vel excedit.

V. Vitro eandem in altitudine Spadana & postea communi destillata aqua, repleto, & eadem balance ponderato, aqua communis trium unciarum, quatuor drachmarum & xli. granorum gravitatem exhibuit, Spadana autem ad trium unciarum, quatuor drachmarum & quadraginta tantum granorum pondus accessit.

VI. Libra medica Spadanarum, ex allegato à VALLERIO calculo, post lenem evaporationem, unum circiter cum dimidio granum pulveris albi dedit.

Quod si itaque memorata hæc ab auctoribus fide dignis observata & experimenta studiose pensitamus; haud difficulter apparet: Spadanas omnium fere acidularum esse subtilissimas & levissimas, adeo, ut pondere etiam aquæ communi destillatæ, VALLERIO

auctore, cedant. Quia verò exiguum terræ vel fixæ salinæ materiæ, plurimum vero spiritus catholici mineralis vehunt, insignissima has medicinali virtute instructas esse, prona admodum consequentia elicitur. Et has Spadanæ virtutes atque laudes omnium optime & plenissime delineavit HENR. ab HEER l. c. ubi earum usum potissimum in renum & vesicæ vitiis extollit, quando nimirum vel calculo, vel mucro tartareo, aut ulcere obsidentur. Ita enim pag. 81. habet: *fontis hujus ea propria ac singularis est facultas, ut vesicæ renumque dolores sopiat ac leniat.* Nec non pag. 83. dixi, inquit, *supra, mucum, aut humorem in vesica lentum, his aquis elui, addo scabiem in ejus corpore & collo, aut ulcus in sphinctere, ab iis abstergi mundarique & sæpe ad cicatricem perduc.* Et pag. 97. ita rationes subducit: *eadem (Spadana aqua) renum ulceribus & carnis in urinario meatu incremento, seu carnositati, utilissima est: tollit enim humorem, qui illum generat, ipsum desiccando; & si aquæ Spadanæ in meatum urinarium injectio fiat, ulcus cicatrizat suæque roborante vi, caruncula regenerationem ac recidivam impedit.* Hinc etiam earum usum laudat in gonorrhœa, aphthis, seu ulceribus gallicis, quæ os & linguam occupant. Præter has autem Spadanis quasi proprias virtutes, eadem aliis adhuc, cum reliquis acidulis communibus, nobilitantur, & ad lentos humores in canalium alveis incidendos, dissolvendos & in motum redigendos, neque minus ad falsos & acres diluendos & per congrua emunctoria eliminandos, egregii certe usus sunt.

§. XVII.

Progredimur ad CARBENSES acidulas quæ in Wetteravia, in territorio Friedbergensi, diu quidem scaturerunt, sed à non adeo longo tempore innotuerunt & frequentatæ sunt; & quænam ipsis elementa insint, nec non quibus insignitæ sint viribus paucis dispiciemus. Quum vero easdem inspiciendi & per varia tentamina explorandi nobis non data fuerit copia; ea tantum, quæ D. PITZLERUS, Friedbergensis Medicus, in peculiari de iisdem schediasmate commemoravit, exponemus. Hic autem tradit quod Carbenes acidulæ

I. Circa scatebræ ora, nec non in canalibus per quos feruntur, successu temporis, ingentem molem duri lapidis & ochræ apponant.

II. Quod insillato liquore alcalino, sive volatili, sive fixo, turbentur & pellucidam faciem exuant; dejecto ad fundum sedimento terreo-alcalino.

III. Quod sal enixum & terram fixam alcalinam post liquoris exhalationem largiantur, hac proportionem, ut ex quatuor libris, civilis ponderis, duo scrupuli & decem grana terræ fixioris, salis vero enixi tantum grana duodecim, remaneant.

IV. Quod, si paulo diutius in lagenis detineantur, ad fundum dimittant tenuissima ochræ ramenta.

V. Quod recenter haustæ, gallis inspersis, tincturam non recusent, sed colorem ex cœruleo brunum induant.

VI. Quod ingens & extraordinaria spiritus mineralis copia in iisdem delitescat. Nam si ampulla terrea, collo longius protenso instructa, ad dimidium iisdem repletur, & orificio pollice occluso, fortius agitur, æthereum hoc aquas incolens elementum, validiori quassatu in celerrimum motum abripitur, partes aqueæ in vesiculas explicantur, coitu suo spumam efformant, & ipse liquor, remoto obturaculo, magno cum strepitu & impetu profilit & ad decem vel octo passus dispergitur.

Quum vero Carbenes aquæ non solum urinam moveant, sed etiam alvum subducant, in proclivi utique est colligere: terram hanc, quam copiose alunt alcalinam, nonnisi calcariam esse; magnesiæ albæ exacte similem; quippe, quæ, testante supra laudato PITZLERO, cum oleo vitrioli promptissime effervescent. Neque

proinde dubitandum est, quin à calcaria hac terra alvum sollicitans virtus petenda sit: eo quod, si in primis viis acidum offendit, quod solenne est in hypochondriacis, in sal amarum, cathartica virtute præditum, transit, eodem modo ac de magnesiæ alba notum est. Et sicuti omnes medicatæ aquæ, quæ multum subtilioris calcarie terræ in connubium susceperunt, urinarias potissimum vias exercent, mucum in iis dissolvunt illumque cum urina extrudunt, generationem calculorum impediunt, & si qui præsto sunt, è sede sua dimovent: ita ejusmodi diuretica virtute, Carbenes aquas etiam præditas esse, à fide dignis viris relatum nobis est.

§. XVIII.

Denique in hoc acidularum examine non prætermittendæ sunt BUCHENSES, quæ uno tantum milliari à Carolinis distant & in tractu sagis nemoroso prorumpentes, Germanico nomine vocantur *der Buchsauerling*. Hæc autem cum ipsis cepimus experimenta, & hæc annotavimus.

I. Admixto vitrioli oleo, fortiter effervescent, & syrupum violarum notabili viridi colore inficiunt: injecto vero gallarum pulvere, nullam plane recipiunt tincturam.

II. Immissa vitrioli martis solutione, tenuissima martis ramenta, flocculorum instar, sensim fundo prolabantur.

III. Evaporatione instituta, ex duabus libris XXII. grana materiæ salino-alcalinæ obtinuimus: eaque de novo soluta, XVI. salis pure alcalini, & sex terræ grana impetravimus.

IV. Si elicitò è Buchensibus sali oleum vitrioli insillatur, vehemens quidem exoritur ebullitio; sed nullus plane vapor spiritus salis communis volatilis exspirat.

V. Buchenses etiam si liberaliori copia hauriantur, alvum tamen non solvunt, sed maxime diuresin proritando operantur; quod si verò spiritus vitrioli debita quantitate ipsis commiscetur, sal in iis emergit falsum, & ipsæ illico alium saporem aliamque virtutem, alviduam nempe, fortiuntur.

VI. Spiritu minerali copiose etiam imbutæ sunt, & exhalato illo, insipidæ fere redduntur; quum Selteranæ alcalino elemento pariter admodum foetæ, illo privata, saporem valde ixiviosum adsciscant.

Atque ex his liquido constare arbitror: Buchenses eximia puritate, levitate & subtilitate præstare, & eminenti salino alcalino, nec non affluenti spirituoso elemento imbutas & perfusas esse. Sed quia Egranæ & thermæ Carolinarum præstantissimæ aquæ Buchensibus finitimæ & nimis confines sunt, hæc ab accolis ferme neglectui habentur, & ipsi etiam ibi locorum medicinam facientes Medici easdem rarissime, & nonnisi sub usu balnei, in Carolinis in usum vocant. Mirandum tamen est, quod Buchenses, quum tam eximia medica facultate nobilitatæ, & tam Selteranis, quam Antonianis virtute, si non superiores, certissime tamen pares sint, & præterea in vasis rite obturatis, optime & commodissime asservari possint, non ad dissita & remotiora loca transferantur & dimittantur.

§. XIX.

Perspectis sic & per varia tentamina exploratis plurimis & præcipuis Germaniæ acidulis: ulterius nunc pergendum est, & potiorum quoque thermalium aquarum scrutinium suscipiendum, inferendo pariter ad indolem & virtutem eo plenius perspicendam, facta cum ipsis experimenta. Proinde hanc thermalium considerationem auspicabimur ab iis, quæ inter celebriores primum obtinent locum, CAROLINIS nempe. Quum vero harum naturam, elementa, operandi ratio-

rationem, virtutem & usum in sequentibus peculiari disquisitione fusius prosequi animus sit: breviter curtimque ea tantum hoc loco commemorabo, quæ ad convenientiam & differentiam, quæ inter Carolinas & alias thermas intercedit dignoscendam, maxime conferunt.

I. Quod itaque Carolinæ multum salis & materiæ alcalinæ in consortium suum susceperint, vel ex insigni, quam cuivis acido confusæ concitant effervescencia & acerrimi olei vitrioli contemperatione, innotescit.

II. Idem etiam patet ex eo, quod libræ duæ medicæ lenius evaporatione instituta, drachmam pulveris alcalini largiantur, qui prompte cum omni acido confligit, syrupum violarum prasino colore inficit, ex solutione mercurii sublimati flavum præcipitatum dejicit, & infuso rhæbarbari nitidissimum sanguineum colorem inducit.

III. Ex hac pulveris alcalini drachma, per iteratam solutionem & reficcationem, salis alcalini drachma dimidia, & terræ grana xvii. colliguntur: reliquis ponderi drachmæ decedentibus granis sub ipso chymico ministerio dispereuntibus.

IV. Commemorabile est quod elicited hoc è Carolinis alcalinum sal, si majori copia paratur & diutius libero aëris accessui exponitur, mediam quadantenus naturam induat, suscepto ex aëre universali illo sulphureo acido. Hinc si hoc modo comparatum cum tertia pulveris carbonum parte in crucibulo ignito funditur, massa hepatis sulphuris analogæ emergit, è qua soluta, purum sulphur, regeneratum nempe, præcipitari potest.

V. Quod vero Carolinæ, præter sal alcali, largam terræ ad calcis partim, partim ad ochræ martialis naturam accedentis copiam, præ omnibus aliis Germaniæ aquis, in societatem suam admittant, non solum lacteus ex tartari oleo, solutione sacchari saturni & lunæ instillatis, emergens color & prolapsus fundo sedimentum prodit: sed etiam ex eo patescit, quod ingenti propemodum lapidis durissimi, & jaspidem & marmor fere æmulantis mole, scaturiginis ostia; obiectosque asseres incrustent, & simili, molliori tamen & magis friabili glomeramine, canalium ligneorum per quos feruntur parietes; nec non balneorum alveos investiant.

VI. Eidem etiam origini debetur, quod thermalis aqua, in caldariis per xxiv. horas stagnans, albam cuticulam in superficie hærentem contrahat atque exhibeat. Et albus hic & subtilissimus thermarum cremor, qui dentibus dealbandis & detergendis, nec non ulceribus reficcandis & consolidandis apprime inservit, non secus ac terreo-lapidosum illud in ductibus concrementum, cum quovis acido pugnat & nonnihil etiam solvitur, dimidia tantum parte insolubili, crassiori & terrestriori relicta.

Jam si vires & operationem Carolinarum contemplamur, primo loco commemorandum esse censemus: quod eadem hoc præ omnibus ferme aliis thermis sibi proprium & quasi peculiare vindicent, quod calidissime etiam sunt, fortiter alvum vacuent & quandoque octo, decem vel etiam plures sedes provocent; quum alias liquida, actu nimis calida, dejectiones alvinas compefiant & ad sudorem eliciendum promptiora sint. Sed valida hæc purgandi vis neque ciborum appetentiam prostermit, neque etiam vires subtrahit. Deinceps memorabile est, quod à continuato per aliquot dies & hebdomades Carolinarum interno usu, pedes plerumque intumescant; qui tumor; tamen balneo, vel ter tantummodo adhibito, illico discutitur atque disparet. Porro monendum est, quod frigida & tepida earum potatio minus tuta sit, eo quod in corpore facillime stagnent, & per alvum aliaque excretoria ægerrime transeunt atque secedunt.

Frid. Hoffmanni Oper. Tom. V.

Neque etiam prætereundum, quod lavacro paulo calidius admissio, balneantes, præsertim ante internum thermalis aquæ usum, perquam facile in capitis dolores, cordis palpitationes, febres intermittentes, immo acutas, incidunt. Hos omnes vero ac singulos effectus, à copioso terreo calcario elemento, quo Carolinæ præ reliquis foetæ sunt, summa cum ratione ducimus ac derivamus. Nam cathartica illa & valide purgans earum virtus, vix aliam agnoscit causam, quam quod alcalina, terrea, calcaria, ipsas inhabitans materia, ab acido morbofo & residua ab alimentis in primis viis aciditate, soluta, in tertium quoddam sal degenerat, & haud secus ac magnesia alba purgantem effectum conspectius exserit: quemadmodum ex eodem fonte virtutis alvum ducentis genuinam originem in *commentatione de fonte Sedlicensi*, fusius exposui & solide demonstravi. Si vero terra hæc in primis viis non liquatur & solvitur, sed aquæ ea onusta & graves ad sanguinis massam volvuntur, difficilius utique per minimos poros & exilissima vascula, præsertim per caput commeant & circulantur, sed passim in canaliculorum alveis subsistunt, & non raro minus exoptatum successum inducunt. Quare ob hanc aquarum ruditatem & crassitiem opus est, ut non solum sub earum usu, sed maxime etiam finito illo, remedium quod alvum ducat offeratur, quo intus reflagrantium aquarum colluvies, ex intestinorum volumine ipsoque corporis habitu, ceu nociva, exturbetur. Et quum Carolinæ minus expedite, sed difficilius paulo per interiores & minimos tubulos ferantur, contingit; ut in solutioribus & debilioribus partibus, nec non affectis vel læsis visceribus stagnent, & extravasata corruptionem magis augeant. Hinc phthisici, vel hydrope pectoris laborantes, paralyti & hemiplegia olim tacti, & qui ferofius cerebrum obtinent, rebus suis melius consulunt, si à potatione harum aquarum plane abstinent, aut ad minimum circumspicito maxime usu easdem usurpant. Sed hæc omnia de fonte communi & æstuosissimo, vulgo *Prudel* dicto, intelligenda sunt & tenenda.

§. XX.

Nunc experimentalis hæc nostra contemplatio transcendit ad scrutinium fontis in Carolinis tepidi, qui extra urbem prope molendinum graciliori vena prodit, eaque propter Germanica denominatione *der Mühlbrunn* audit. Præstantissima hæc scatebra olim despiciatui & neglectui prorsus habita, neque ab ullo medicationis causa adhibita fuit, sed aquarii loco inservit, in quod equos lavatum agebant: viginti vero abhinc annis ob eximiam elementorum quam in ea deprehenderam præstantiam, ægrotantibus quibusdam ejus usum suasi, aliisque Medicis ut idem facerent auctor exstiti, & sic eandem ad usum magis magisque transuli; ita ut renitentibus primum ordinariis Medicis, ante aliquot annos à principibus tantum personis, externe & interne, summo cum fructu sit usurpata. Quamvis vero phænomena è varia liquorum mixtione prodeuntia, facta cum molendino fonte experimento, ferme, ex toto respondeant iis, quæ in examine communis observantur; nihilo minus tamen tepidus hic fons eam maxime ob causam commendabilis & pretiosus est, quod copiosiores alvi dejectiones communi illo provocet, & neque somnolentia, neque habitus subcutanei intumescencia, quod calidissimo nunquam non solenne est, utentes infestet. Longe tutius etiam & sine graviorum symptomatum metu, tepidæ hujus aquæ, tam potationis, quam balnei gratia adhibita, usum ferre possunt ii, qui tenerioris & exquisitius sentientis constitutionis sunt, & in quibus nervorum systema solennibus spasmodis conturbatur, nec non qui nimis hæmorrhagiis detinentur, quam æstuosi illius

fontis. Quod si vero genuinam hujus differentiae rationem scrutamur, nulla alia certe suggerenda erit quam, quod molendinus hic fons, terra illa calcaria, qua calidissimus iste mirum foetus est, penitus ferme destituatur, & hinc multo subtilior sit ac levior. Nam pretiosissima hæc scatebra, non solum ne minimum lapidosi spissamenti egerit & fontis canaliculumque lateribus apponit, sed etiam si libræ duæ ejus aquæ ad exhalandum seponuntur, drachmam quidem materiæ sicciore præbent, sed ex hac debita encheiresi tres scrupuli & tria purissimi salis grana, terrei autem corporis, pauca tantum, quinque circiter, grana, eliciuntur: quum contra, in eadem è fonte communi haustæ aquæ parte, salis tantum drachma dimidia, & terrei elementi minimum grana XVII. reperiuntur. Præterea hic fons præter alcalinum sal, neutrum etiam & amaricans sal, quod Egrani similitudinem exactissime refert, complectitur; id quod etiam facili negotio educi & oculis subjici potest, quando nimirum una hujus salis libra, in duabus aquæ libris dissolvitur & in amplioris orificii vitro calidæ fornaci imponitur: tunc enim jucundissimo spectaculo, medium hoc sal ceu gravius, fundo & lateribus vitri sese agglutinat, lixiviosum vero, aquæ contubernium non deferit.

§. XXI.

Veniendum jam nobis est ad examen & considerationem celebratissimarum AQUISGRANENSIVM thermarum, quæ multum conformitatis cum Carolinis alunt iisdemque congeneres ferme sunt. Aquisgranenses enim haud secus ac Carolinæ fervidissimæ sunt, & insignem lapidosæ materiæ molem eructant lateribusque alveorum apponunt. Flos etiam insipidus, instar cremoris Carolinarum, tepescentibus iis innatat, qui igni admotus, neque crepitat, neque liquefit, sed fixus manet. Præterea non solum dejectoria alvi facultas, aliis thermis non adeo familiaris, Aquisgranensibus cum Carolinis communis est, sed experimenta etiam cum utrisque instituta, & inde observata phenomena, non adeo discrepant, sed ferme eadem sunt. Aquisgranenses enim æque ac Carolinæ cum acidis pugnant, à lixivio albescunt & præcipitantur, à gallis non inficiuntur & post destillationem sal alcalinum, quodammodo neutrius generis, relinquunt, & quidem ex una libra medica, salis XXV. terræ autem V. grana. Peculiaris autem & Aquisgranensibus tantum propria virtus est, quod argentum fusco colore obducant, manifesto indicio, præter alcalinum elementum, etiam quippiam sulphuris communis in earum consortium transiisse: quemadmodum etiam in scaturigine balnei Cæsarei, in putei collo & testudine, genuini sulphuris flores calore sublimantur & concrefcunt, ut nonnunquam aliquot eorum libræ colligi possint. Præstant itaque hæ thermæ propter sulphuris, salis alcalini & medii copiosi connubium, præ omnibus aliis calentibus hospitalibus aquis, specialibus quibusdam & admirandis in corrigendis & perfanandis externarum partium vitiis dotibus ac facultatibus. Dum enim vitiosum tendinosus & nervosis partibus altius insidens humidum validissime discutunt & dissipant, tumorem, dolorem, tremorem, torporem & paralyfin artuum promptissime expugnant & profligant. Dum porro roborante & tonica sua virtute relaxatas & solutas nimis partes fulciunt & firmant, languorem & movendi impotentiam tollunt. Ligamentorum etiam in arthriticis indurationes emolliunt, contracturas perfanant, & omnes cutis sordes ac defædationes extergunt, eamque à subtus insidente acrimonia exesam & erosam consolidant. Conveniunt præterea morbis spasmodicis, qui partibus nervosis ac membranaceis incumbunt: & hinc iis, quibus præcordia dura, tumida ac veluti

tensa sunt, non contemnendum afferunt auxilium. Denique mulieres etiam hæ thermæ eximie solantur, steriles grata fœcunditate beant, uteri lubricitati medentur, abortus cohibent, & à fluxu menstruo defectis, vel lunare tributum male ad calculum solventibus, efficacissime opitulantur.

§. XXII.

Excipiunt Emsenses. Hæ pariter uberem admodum salis alcalini apparatus, & duarum quidem librarum medicarum pondere, drachmam, comprehendunt, elicetumque hoc ex iis sal cum spiritu vitrioli promte ebullit & in sal tertium concrefcit, quod tartari vitriolati indolem obtinet, & denuo in aqua solutum ac frigido aëri expositum, haud secus ac Glauberianum, in solidam, crassam & stabilem offam coagulatur. Porro Emsenses aquæ, affuso quovis acido, collectius emittunt bullulas, & lenem subeunt effervescentiam. Oleum tartari per deliquium his instillatum limpiditatem conturbat & lacteum colorem reddit. Syrupus violarum viriditate eas inficit. Et inspersus gallarum pulvis umbram & caliginem iisdem inducit. Quum igitur ex his abunde pateat: Emsenses exquisitioris subtilitatis, & terreis particulis orbatas, insignis puritatis esse, luculenter admodum constare arbitror, quod eadem tenerioribus & mollioribus maxime accommodæ, & in penitissimos viscerum recessus expeditissime transfusæ, ad inertes ibique impactos humores attenuandos, diluendos & solutos per ductuum urinam excernentium ostia prompte everrendos longe aptissimæ sint. Ob singularem etiam qua pollent levitatem, desidis ac lenti humoris decubitus eliquant, resolvunt, & dissipatis iis, laxas & debiles partes fulciunt ac roborant, & ob id contractis & paresi ac spasmo comprehensis egregio sunt præsidio.

§. XXIII.

Ab Emsensibus provehimur ad WISBADENSES, five martiatas thermas, quæ jam TACITI ævo claruerunt, & quid de his observavimus, trademus. Wisbadenses igitur infusis acidis liquoribus levissime effervescent; instillato vero liquore salis tartari, turbulentæ evadunt & albescunt: & exhalatione instituta, è libris duabus medicis, dimidia materiæ siccæ drachma restibilis est, quæ ad salis communis ingenium accedere videtur, eo quod, non solum carbonibus vivis injecta crepat, sed etiam adjectis aliquot vitrioli olei guttulis, intensam suscitatur ebullitionem & album penetrantissimum diffilat vaporem, ejusdem plane indolis cum illo, qui è salis communis & olei vitrioli mistura exspirat. Ex quo elicimus: has thermas præter alcalinum elementum etiam salis communis momentum complecti, & ab hoc alvum ducentem Wisbadensium facultatem merito derivandam esse censemus. Neque etiam sospitales hæ aquæ subtili ochra destitutæ sunt, sed eandem copiose admodum egerunt & scaturiginis ostia luteo coagmento, crustæ instar, obducunt. Quapropter non dubitandum est, quin Wisbadenses eximia agendi vi instructæ sint, & in multis morbis utilitatem præstent egregiam. Et quamvis olim nonnisi ad externum usum inservierint; nihilo minus tamen à viginti abhinc annis, internus quoque earum usus invaluit, & in pluribus morborum afflictionibus longe utilissimus deprehensus est.

§. XXIV.

Enumeratarum hætenus thermalium aquarum classi accensendæ adhuc sunt BOLLENSSES, haud ignobiles Ducatus Würtembergici thermæ, quarum virtutes & effectus, nec non adhibendi modum, integro libro complexus est Jo. BAUHINUS. Hinc quum nobis

& locus & occasio defuerint, harum examen ut aliarum suscipiendi; quædam à BAUHINO prodita huc transcribemus, & tum de earum operandi ratione nonnulla interferemus. Ita autem is *lib. I. cap. I. pag. 7.* tradit: *Harum aquarum quinquaginta uncias decoxi-mus; resultavit salis albißimi & levißimi, neutiquam acris, drachma dimidia. In cacabis vero, quibus aqua balnei hujus nostri incoquitur, accrescit lapis crustosus, spissus, durus, & qua cacabo adhæret parte, cinereus, reliqua albus, pulvere albo, sparsus, quam egroti balneantes, balneo egressi, salubriter ulceribus suis inspergunt.* Quum igitur Bolenfes thermæ intus haustæ vehementer alvum vacuent & urinosum quoque laticem moveant, & exterius usurpatæ, exsiccandi, roborandi & dis-cutiendi facultate polleant egregia: nulla certe alia effectrix præstantissimarum harum operationum ma-teria subministrari poterit, quam subtile calcarium terreum elementum, cujus hæ thermæ admodum feraces sunt. At vero ut non sine singulari cautio-ne & circumspectione calcariae ejusmodi aquæ interne & externe commendentur, auctor suasorque sum: quippe, si acidus & lentos prima in regione offendunt humores & ad spissescentem sanguinem pertingunt, egregiam utique collocant operam, & acidum abfor-bendo, ex acidi & calcariae terræ connubio, catharticam demum nanciscuntur virtutem, prout §. XVII. & XIX. monuimus. Contra vero, si aquæ calcariis particulis onustæ hauriuntur, nec ab acido solvuntur, pondere suo intestina gravant, tarde & cunctanter per vasa volvun-tur, neque tam facile ad extremas venarum angustias pertingunt, sed in corpore manentes, eidem oneri sunt, & debitas secretionis & excretionis sufflaminando, ad varias ægitudines inducendas promptissimum parant a-ditum.

§. XXV.

Haftenus in eo fuimus occupati, ut præcipuos quos-dam foterios fontes, qui plerumque & acidularum & thermarum nomine indicantur, & operatricem suam materiam maxima ex parte alcalino elemen-to debent, enumeraremus, & peruestigatius eorum contenta inquireremus: jam vero eadem ratione me-ditationis nostræ argumentum erunt, qui neque ther-marum, neque acidularum censum subeunt, sed di-versum plane & peculiare ingenium obtinent, & lon-ge aliis principiis insignes sunt. In horum nume-rum referendi primum sunt è salutarium fontium clas-se, qui virtutis suæ causam atque originem ad martia-lem profapiam referunt: & proinde à Veteribus aquæ martiatæ appellatæ sunt. Hoc nomine in patria no-stra haud extra famam sunt RADEBERGENSES prope Dresdam, LAUCHSTADIENSES in Misnia, BEBRANÆ in Thuringia, FREYENWALDENSES in Marchia, & WEISENBURGENSES in Franconia fontes. Et omnes hi, si curatius & observatius examini sub-jiciuntur, nulla alia effectrix eorum materia erui ac in aperto poni potest, quam tenerrimus martis cro-cus, commodissimo aquæ purissimæ & levißimæ hos-pitio exceptus. Nam neque tam profusa ac prompta spirituosi & tenuißimi inhospitantis principii in iis est diffusio, ac in aliis, neque etiam elementi alcali-ni participes sunt; quo fit, ut acidis confusis non ef-fervescant, & adjecto violarum syrupo viridescentem non induant colorem. Similiter in eo dispar earum cum plurimis medicatis aquis est ratio, quod insper-sis gallis, atro-purpureum colorem reddant, & diu-tius libero aëris accessui patentes, aut decoctæ, fla-vum sedimentum ad ima rejiciant. Peculiarem vero earum indolem & proprium iis martiale elemen-tum, ipsa fontium ejectamenta manifesto & oculos feriente indicio produnt. Nam ipsa non solum sca-turiginis ostia concretione lutea ochracea subinde in-crustata conspiciuntur; sed simile glomeramen ter-

reum etiam investit canalium parietes, per quorum alveos aquæ defluunt, & in receptaculorum & labro-rum fundis pariter post aliquot hebdomadam decur-sum tale coagmentum colligitur. Ochraceam vero hanc crustam nihil aliud esse, quam ferrum in sub-tilissimum pollen tenuatum, & naturalem martis crocum, ab artificialis similitudine non abludentem, ex eo patescit, quod non tantum calcinatione in ge-nuinum converti possit crocum, verum etiam quod, si admixto æquali portione eidem sale ammoniaco, denuo in crucibulo igni committatur, nitidissimi & fragrantissimi in sublime ferantur flores, qui affuso spiritu vini purissimo, egregiam martialem tincturam largiuntur: quemadmodum id pluribus in examine fontis Lauchstadiensis physico-medico exponemus. Si fa-cultatem martiatarum aquarum dispicimus: eadem tam aperiente, quam roborante virtute pollent, & interne æque ac externe haud exiguo cum fructu adhibentur. Et intus quidem haustæ, alvum non subducunt, sed corpus firmant, ventriculum roborant, appetentiam ex-citant & perquam commode iis in morbis, in quibus martialium medicaminum usus tutus & præstans est, suaderi & usurpari possunt. Exterius vero eminens & spectata earum operatio in balneis est, ad lassæ, torpen-tia, immobilia, dolore & spasmo affecta membra robo-randa & fulcienda, nec non ad ulcera extergenda & ad consolidationem deducenda. Et licet tepide tantum-modo in lavacro admittantur, nihilo minus tamen cor-pus calefaciunt, & accedente inprimis post balneum lecti calore, cutis meatus pandunt & sudorem eliciunt.

§. XXVI.

Pari ratione adhuc alii fontes indole & genio suo fa-lutares sunt, qui neque inter calcarias & alcalinas aci-dulas vel thermas, neque ferratas aquas connumerari possunt; sed sui generis sunt, & purum sal medium amaricans catharticum complexu suo susceperunt. Pro-ventus autem harum aquarum rarissimus est, & nul-læ huc usque in Germania innotuerunt, præter il-las, quas aliquot abhinc annis in agro SEDLICENSI Bohemiæ reperi, & inspectis cum cura elementis, ea-rum usum primus illustrius demonstravi & auspicato cum successu introduxi. Dignus autem visus mihi fuit nobilissimus hic fons, cujus geniurn, operatricem ma-teriam & usum, peculiari examine eruerem & ex-planarem; eamque ob causam hoc loco ejus consi-derationem omittere & eo rejicere licebit, ubi speciali meditatione, plenius & peruestigatius omnia excu-tere constitui. Quemadmodum vero effectrix virtu-tis in Sedlicensi fonte materia, est sal amarum, ex calciformi & acido elemento compositum; ita qui-dam etiam è medicatorum Germaniæ fontium familia sunt, qui diligenter explorati, præter sal calcarium, haud exiguam salis communis quantitatem alunt, cu-jus rei præclaro argumento est salutaris iste fons, qui olim HORNHUSÆ vixit, nec non is, qui RATZEBUR-GI adhuc salit magnamque utilitatis famam habet. Hujus ingenii & ejusmodi salinis spiculis armatæ aquæ, præstantissimi certe usus sunt & ad repurganda ventriculi & intestinorum à tenacibus & viscidis hu-moribus diverticula, in his quibus appetentia prostra-ta digestio vacillat & crudiatum sentina flatibus pro-gnendis & spasticis commotionibus in remotioribus etiam partibus suscitandis infesta est, opem commo-dant longe exoptatissimam. Sed non consultum est, ut eadem copiosius & longius extracto usu hau-riantur, ideoque iis in affectibus, qui altius visceri-bus innidulantur, & ab infarctu & obstructione eo-rum gignuntur & foventur, minus accommodæ sunt, eo quod longe major aquarum copia requiritur, quo hæc ex minimis canalibus conflata viscera peni-tus eluantur, & attenuati à sale intus stagnantes lenti humores,

humores, propellantur & tandem aquarum vehiculo eliminantur. Possunt tamen etiam huic scopo accommodari, si nempe affusa alia aqua, temperantur & diluuntur; id quod commodissime cum Sedlicensi imprimis succedit, si eidem dupla Toplicensis aquæ pars permiscetur.

§. XXVII.

Postremo supersunt adhuc medicatorum fontium quidam, qui examine curatissime etiam adornato, vix vestigium salis medii vel alcalini, nec non terræ mineralis aut martialis exhibent, sed ob aquæ quam vehunt summam puritatem, levitatem & subtilitatem pretiosi sunt. Horum classem ducunt tum calidi, tum frigidi nonnulli latices. Et inter illos insignem utilitatis celebritatem nactæ sunt TOPLICENSES calidissimæ aquæ, quibus mira similitudine accedunt FABARIÆ, sive PIPERANÆ in Rhætia, quæ demum mense Maio, quo sol acutior nivem in præaltis montibus liquat & discutere incipit, ad finem usque Septembris, salutarem humorem fundunt. Quamvis vero Toplicenses thermæ aquæ salis aut materiæ terreæ inopes sint & plane steriles; nihilo minus tamen hunc defectum naturæ benignitas ubertim compensavit humoris singulari puritate & exquisita levitate, quæ tanta est, ut non solum commixtis quibuscumque liquoribus, & acidis & alcalinis, nativam claritatem integram ac illibatam servant, sed etiam post omnimodam liquoris exhalationem, nihil solidæ materiæ relinquant, & immisso frigefactis iis instrumento hydrostatico, incredibili levitate ipsas quoque cœlestes aquas superent. Quum itaque neminem fugiat, quod in reliquis dotibus à quibus aquæ laudari possunt, puritas & levitas præcipuæ sint, quæ fontes peculiari quadam salubritatis nota insigniant: pro certo utique est, quod Toplicenses & Piperanæ, levissimæ & purissimæ aquæ, eximiis in medendo polleant facultatibus. Nam calens hospitalium harum aquarum lavacrum præstantissimi profecto usus est, non solum in variis externarum partium vitiis, & iisdem contractis, nimis arefactis, rigidis, torpentibus, tabidis, à robore & motu defectis, fibras duras emolliendo, corrugatas laxando, solutas firmando & debitum sanguinis ac liquidi nervei in languentes affluxum invitando, mirabilem edit efficaciam; sed egregie quoque solatur eos, quibus partes interiores, tendinosæ & nervosæ, ut in malo hypochondriaco, colica, asthma aliisque affectibus spasmodicis contingere solet, molestis tractionibus & distensionibus torquentur & gravius excruciantur, præsertim si non nimis calidum, sed tepidum magis, meo ex consilio in folio, domum delatis aquis, admittatur, eo quod non omnes excessivum balnei æstus ferre possunt. Quare etiam fons extra urbis pomeria saliens, vulgo *das Schwefel-Bad*, longe frequentioris & salubrioris usus est, licet, si temperatum calorem exceperis, ejusdem plane indolis sit, ac ille, qui in urbe scaturit. Et quum trita vetustate omniumque Medicorum suffragiis robusta sententia sit, quod leviores & puriores aquæ integritati corporis conservandæ & reducendæ mirifice patrocinentur, Piperanarum quoque internus usus nobili hujus rei exemplo sit: nullum utique est dubium, quin Toplicenses etiam refrigeratæ, intus haustæ, multis in morbis valde præstabilem laturæ sint opem, licet hic potandi mos nondum receptus sit, & eadem ad diluendum tantum vinum à quibusdam adhibeantur.

§. XXVIII.

Summa quoque partium tenuitas, exquisita puritas & maxima levitas vera & genuina causa est, quæ aliis etiam salutaribus aquis mirabilem prorsus vim inspirat, ut spectatissima in morbis sanandis polleant efficacia. Præclaro exemplo sunt laudatissimi

SCHLANGENBADENSES fontes, quibus naturæ favor Hassiam dotavit. Ex his nullum salinum, terreum, martiale, vel quodvis aliud minerale elementum, ulla arte elici potest, sed aquam tantum fundunt simplicem, purissimam tamen & levissimam: nihilo minus tamen tam potæ, quam lavando & balneando adhibitæ, insignibus & maxime præclaris splendent virtutibus.

§. XXIX.

Neque aliunde, quam ab aquæ bonitate, præstantissimam suam facultatem trahit saluberrimus ille, à D. STEURLINO descriptus SCHLEUSINGENSIS fons, quem Germani *den Wilhelms-Brunn*, vocant. Quem admodum enim puriores & optimæ aquæ his potissimum notis atque indiciis dignoscuntur: si vacuo antliæ pneumaticæ subjectæ, collectius bullulas rejiciunt, & oleo tartari per deliquium, nec non lunæ, vel sacchari saturni solutione instillatis, non turbantur, neque præcipitatum dimittunt: ita pari ratione Schleusingenses aquæ, omnes hos characteres conspiciendos præbent, & deposito in transitu & lapsu per arenarum & lapidum interstitia, quicquid absorpserunt impuri, ab admixtis variis reagentibus nullam prorsus experiuntur mutationem, & disjecta sub vaporis forma aqua, nihil plane terreæ substantiæ relinquunt. Quo rariores igitur purissimæ ejusmodi fontanæ aquæ sunt, eo majori etiam in pretio habendæ, ob insignissimam quam ad sanitatem tuendam, morbos arcendos, quin etiam chronicas quasdam passiones persanandas, afferunt utilitatem; siquidem expedito admodum itinere per minimas vasorum angustias commeant, ad intima viscerum penetralia pervadunt & eliquatis lentis humoribus, iterum per vasorum excrementum ostia promptissime egrediuntur.

§. XXX.

Jam ex omnibus his quæ fufius in hac salutarium aquarum contemplatione tradidimus atque deduximus, luculenter constare arbitramur: quod benignissimum & sapientissimum Numen, non unius ejusdemque, sed diversæ naturæ elementis, fontes medicatos benignissime instruxerit, quo pro differente morborum & naturarum indole, arcendis æque ac tollendis omnibus ac singulis vitiis, pares sint & accommodati. Nam si fordes primas vias obsidentes extergendæ & crassiora purgamenta per alvum exturbanda, calidos æque ac frigidos fontes faultrix natura protulit, qui huic scopo apprime satisfaciunt, & inter calidos quidem Carolinos & Aquisgranenses, inter acidulas Egranas, & inter falsos Sedlicenses & Ratzeburgenses. Si serosorum humorum colluvies per urinarios ductus evocanda, Selteranæ cum Emsensibus aquis commodissimam locant operam. Si dejectum viscerum robur fulciendum & restituendum, Pyrmontanæ omnibus palmam præripiunt. Si crassi & viscosi humorum decubitus expediendi, infarctus viscerumque obstructions eluendæ, relaxatæ fibræ firmandæ, & renes simul cum vesica à lento mucosum liberandæ sunt, Antonianæ, Wildungenses & Spadanæ exoptatissimam præstant efficaciam. Si salsa, acris & tartarea succorum in arthriticis & podagricis dyscrasia diluenda & emendanda, nervosarum partium læsio simul innoxie complacanda, puriores aquæ, ut Schlangenbadenses, Schleusingenses, vel Selteranæ etiam, præsertim cum lacte remixtæ, desideratissimam spondent opem. Et si denique biliosi & acres humores temperandi & curandi, ventriculi etiam & intestinorum tonus roborandus, martiatæ aquæ ex usu esse possunt.

§. XXXI.

Si externum hospitalium aquarum pensitamus usum: is pari etiam ratione, pro dissidente læsionum, corporum

rum & partium affectarum genio, discrepat, & peculiare ac diversæ etiam dotes sunt, quibus fontes nobilitati sunt. Quando enim exsuccæ nimis, tensæ, spasmus crispatae & duræ partium externarum fibræ, humectandæ, laxandæ, explicandæ & emolliendæ, Toplicensibus, Emsensibus, Piperanis, Schlangenbadensibus & Schleusingsensibus salutiferis aquis, nihil præstabilius est. Contra vero, si resolutus est vigor & partes debiles ac nimis humidæ, præclara & insignis martiatarum aquarum roborans & confirmans virtus est. Et quando tumores discutiendi, lenti ac desidis humoris decubitus dissipandi & resiccandi, cutis fordes ac defœdationes, in scabie, impetigine & ulceribus extergendæ ac consolidandæ, balnei in Carolinis & Aquisgranensibus usus summopere proficiuus est.

§. XXXII.

Excussis itaque variæ naturæ & principiorum, calidis & frigidis, dulcibus & salis fontibus, uniuscujusque elementa & operationum fontes per institutas mixtiones, destillationes & resiccationes, eorumque quæ post evaporationem remanserunt, examina sufficienter eruta & explanate satis tradita esse arbitramur; licet scrutinium non nimio reagentium supellectile & experimentorum apparatu aggressi simus. Notandus enim & tanquam inanis merito rejiciendus est Physicorum & Chymicorum quorundam mos, qui in mineralium aquarum examine experimentorum multitudine splendorem affectare videntur, & iisdem innumera propemodum, ad rem tamen nihil prorsus facientia, commiscere, & uti inprimis *cl. HÆRNE* & *VALLISNERIO* in more positum est, salis communis, nitri, vitrioli, aluminis, plumbi, argenti, cupri, sulphuris, auripigmenti & mercurii sublimati solutiones confundere solent. Nam supervacaneus est labor, & licet vel centena adhuc mineralibus aquis adjiciantur, nihil tamen, præter ea quæ adduximus, erui poterit & oculis subjici: id quod iis, qui vires corporum & facultates norunt, apprime cognitum est.

§. XXXIII.

De industria etiam omisimus tentamina, quæ nonnulli instrumentorum, seu cylindrorum staticorum ope, ad pondus contentorum explorandum instituere solent. Quamvis enim nosmet ipsi primum opinati simus, quod materialium in acidulis & thermis comprehensarum quantitas, ad hanc lancem eodem modo expendi possit, ac in vini, cerevisiæ, urinæ humanæ, fontium aquæ communis & falsuginis examine fieri solet: attamen re penitus expensâ & probe subducto calculo, compertum habuimus, quod omnia hoc modo adornata experimenta lubrica admodum sint atque fallacia. Nam multiplici observatione edocti sumus, quod hydrometer si in aqua à fonte recenti demergitur, admodum sursum feratur & gravitatem quandam mentiatur; contra vero, si postera die eidem aquæ immittitur, altius descendat, & aqua majorem præ se ferat levitatem. Et quum nemo, quantum quidem novimus, singulare hoc phænomenon annotarit, multo minus discusserit, non sine ratione in hanc ivimus sententiam: quod hæc cylindri elevatio ejusque ascensus, in aquis à fonte recenter haustis, à spirituofo illo subtili & expansivo aëreo-æthereo elemento, quod minerales aquas redundantius incolit, & majus in iis affectando spatium, in contrarium nititur, dependeat. Refugiente autem ab aquis hoc spiritu, tollitur etiam nifus, & instrumentum, cessante elastica vi, priori statione dimovetur atque altius mergitur. Ut adeo pateat, vim corporum elasticam eorum gravitatem compensare, siue æquales vires potentia elastica & gravitatis esse. Neque etiam justum

aquarum pondus per lancem hydrometricam indagari & contentorum copia accuratius perspicere potest, si expectamus, donec subtile illud principium aquis se subduxerit: quum eodem penitus dissipato, aquæ ut plurimum fiant turbidæ, & ochreæ partes, unionem mixti deferentes, ad ima deferantur, ut adeo pondus earum explorari nequeat. Multo minus autem instrumentum hoc hydrostaticum idoneum est ad thermalium aquarum pondus exigendum; quandoquidem omnes aquæ calore rarefactæ leviores fiunt & minoris gravitatis, quo fit, ut injecto calidis illis instrumento, eximiam levitatem referant, perfrigeratæ autem, cylindro ad superiora elevato, gravitatem longe majorem indicent.

§. XXXIV.

Denique differentibus nobis de medicatarum aquarum examine, hæc magni momenti quæstio solvenda etiam est ac decidenda; utrum videlicet incomparabilis illa mineralium aquarum in medendo virtus, ab iis, quæ per superius memorata experimenta eruta sunt fixioris naturæ elementis, dependeat, & salis, siue alcalino, siue neutro, & terræ, siue calcariæ, siue martiali, unice, vel maxima ex parte, accepta sit referenda? an vero præclaræ hujus & salutaris facultatis ratio ab alio quodam subtiliori principio, quod tantarum virium basis & anima sit, & tamen non facile in sensus cadat & in aprico poni possit, ducenda sit? Jam vero in præpatulo est, quod thermæ, nec non acidulæ omnes, diutius liberiori, præsertim calidiori, aëri exposita, vel evaporationi, aut destillationi subjectæ mirifice immutentur & pristinum saporem, pelluciditatem & claritatem, nec non cum gallis tingendi facultatem, una cum potissima sua saluberrima virtute perdant atque amittant. Accedit, quod licet omnia illa, quæ chymico ministerio educta fuerunt, salia, vel terræ, denuo cum aqua, etiam purissima, misceantur; neutiquam tamen prioris indolis & virtutis medicinalis aqua prodeat. Quapropter nullum utique est dubium, quin mineralibus aquis subtilioris indolis materia insit, quæ licet celerrime in auras diffletur & oculis minime subjici possit, nihilo minus tamen spirituscentiæ, virtutis expansivæ & elasticæ, innumeras bullulas concitantis, vasa disrumpentis, penetrantis & compungentis saporis & odoris, neque minus eximiae istius roborantis, & aperitivæ facultatis, fons atque origo sit. Et hinc etiam dilucide patescit, quod præstantissima hospitalium aquarum efficacia, ab intima unionem & commixtione hujus subtilissimi, siue spirituosissimi elementi, cum particulis fixioribus salino-terreis, ducenda ac derivanda sit; ita ut mutua horum secessione facta, spectatissima simul pereat virtus.

§. XXXV.

Cujus vero indolis atque originis agilissimum hoc & maxime generosum principium sit, altioris utique paulo est indaginis. Nos quidem in re tam difficili & ardua ita censemus: fluidum quoddam catholicum, purissimum & maxime penetrans æthereum, non modo per universum aëris, siue potius atmosphæræ, ambitum, sed etiam per omnes subterraneos tractus dispersum esse, quod pro diversa salium vel terrarum, quas offendit & quibuscum sese conjungit, natura, varias subinde induit formas, & vaporem, vel subtilissimum acidum, vel sulphureum constituit, aut etiam alcalinis & calcariis terris adhærescens, in neutrum sal, vel martialibus particulis terreis cohærens, in subtilissimum vitriolum convertitur. Quod si igitur genium spiritus quo minerales aquæ turgidæ sunt dispicimus: is ad acidi & sulphuris, purissimi tamen & subtilissimi, naturam accedere videtur, & idem plane esse cum illo, qui ex marcasitis sulphureis & martialibus

in acervum collectis, solet exspirare; quippe qui in terræ visceribus præterlabentibus aquis sese ingerit, in ipsis sistitur, iisdemque pro diversa terrestrium quæ vehunt elementorum indole, varias formas, variasque virtutes inducit atque conciliat. Et sane memorabile est, & ad hanc sententiam stabiliendam maxime facit: quod in tractibus, ubi thermæ vel acidulæ scaturiunt, plerumque in conterminis iis locis larga sulphureorum & acidorum vaporum sit diffusio, quos neque animalia, neque homines propius accedentes, sine suffocationis metu ferre possunt. Sic PECHLINUS *lib. III. obs. 44.* mentionem facit Swalbacensis cryptæ, Puteolanæ illi similis, vulgo Grotta di cane, quæ nebula quadam sulphurea & acida tantoperè perfusa est, ut injecta animalia etiam pereant. Simile quid narrat de Carolinis SUMMERUS in *Carolinarum descriptione*, pag. 7. nec non de Wildungensibus RAMLOVIUS in *der Beschrei-*

bung des Wildunger Sauer-Brunnens pag. 61. Et memoranda nobis à viro fide digno relata est observatio: quod nimirum fons in Ducatu Würtembergico, in silva nigra, *im Kinzinger Thal*, à longo jam tempore fluens, omni sapore ac virtute protinus orbatus fuerit, eam ob causam, quod vicinis in locis facta rupium apertura, vapor sulphureus & mineralis impetuosè eruperit; clauso vero & obturato iterum antro hiant, de novo pristinis viribus armatus prodierit. Verum enim vero, quum hoc spirituosum aquarum mineralium elementum, passim, in omnibus ferme de mineralibus aquis editis scriptis, tetigerim, & de eodem in subsequutura disquisitione, *de convenientia elementorum ac virium in thermis & acidulis*, copiosius agere constituerim: nolo diutius eidem exponendo hoc loco immorari; sed præcipuorum medicatorum Germaniæ fontium examini jam satisfactum esse reor.



D E

CONVENIENTIA ELEMENTORUM

AC VIRIUM IN THERMIS ET ACIDULIS.

§. I.

CUM multæ sunt eæque amplissimæ utilitates, quæ ex penitiori fontium foteriorum scrutinio redundant: tum vero præclarum & ad usum medicum insigne momentum est, quod exquisita illa, quam inter se alunt harmonia & convenientia, luculenter ipsa sub exploratione innotescat. Quamvis enim altum hac de re in Veterum monumentis sit silentium, neque vulgaris, per manus quasi tradita opinio, ita ferat: id tamen sanior quivis ultro largietur, esse utique affinitatem inter latices, qui ad ejusdem matris, terræ, gremium, ortum suum referunt. Altioris autem paulo indaginis est, mutuum hunc aquarum mineralium consymbolum quoad specialiora perquirere & perspicue evolvere; quo dilucide patefcat: affines & similes non solum illarum esse natales, sed etiam vires & elementa. Id quod quidem de variis acidularum generibus verum esse nobiscum censebunt plurimi: inter calidos autem & frigidos fontes, thermas scilicet & acidulas, ejusmodi similitudinem & convenientiam adstruere, paradoxon videbitur multis. Nihilominus tamen, facta paulo curatius inquisitione, & ratione bene putata, clarissime patet: eximiam quoque inter thermas & acidulas subesse æqualitatem & affinitatem, tam ratione originis & principiorum, quam etiam facultatum & virium. Hoc igitur ut demonstremus & perspicuis argumentis stabiliamus, nostri jam erit instituti; eumque laborem eo magis utilem fore plane confidimus, quo minus quisquam in eo industriam posuit.

§. II.

Ut autem ab ovo, ut aiunt, ordiamur, ipsa fontium adeunda erunt incunabula. De his multus & varius est Physicorum sermo. Sunt enim qui easdem in ipsius oceani voragine constituunt, omniumque, quotquot scaturiunt fontium, originem ex dissitissimo maris & terræ centro arcessunt atque derivant. Sed uti hæc, inprimis Veterum sententia, non modo omnibus legibus mechanico-staticis, sed etiam ipsi rationi refragatur: ita eandem merito tanquam perversam & erroneam improbandam & rejiciendam esse reor. Quin

potius clarissimo & sensibus obvio argumento constat: omnium fluviorum & scaturiginum in nostro hoc terraqueo globo ortum, ex suprema cœli & aëris regione esse petendum. Videlicet, pluviae, nives, nubes, nebulæ, ros ac pruina sunt, quæ fontibus non minus quam fluviis, materiam & alimentum suggerunt largissimum; adeo, ut quo copiosiores decidant imbres, eo magis augeri scatebras & flumina, & vicissim decrescere & exarescere omnes in tellure aquas, his per longum temporis spatium deficientibus, observemus. Accedit, quod omnium fere fontium in vallibus & depressioribus locis exstet scaturigo, dum aquæ vel ex vicinorum fluviorum, altiori plaga constitutorum, alveis secedentes, vel etiam in montium ac collium apices per pluviam delapsæ, per copiosissimos terræ poros ac mæandros repunt & tanquam per cribrum colantur, donec in solida ac tenaciora conceptacula, strata nempe lapidosa & argillacea, delatæ, ibique copiosius collectæ, impedito ulteriori descensu, ad superiora tandem eluctantur, & ex concluso flumine in salientem venam sese aperiunt. Hæc est genuina origo & generatio fontium. Fontes autem dum jugiter undam eructant, trudente semper posteriore priorem, rivulos primum dimittunt, qui imbrium delapsu & nivium discussione subinde aucti, terram secando alveos efformant, & longius evoluti, in itinere cum aliis coeunt & amplius sese in rivos & fluvios explicant. Et fluvii denique ejusmodi minores confluentes, grandiora ac majora efficiunt flumina, quæ latius diffusa, demum omnem, primum ex aëre delapsarum aquarum colluviem, in oceanum convehunt eidemque infundunt. Amœnissimorum vero, qui nonnunquam in summis montium cacuminibus saliant fontium origo, nubibus, in præaltis & frigidissimis his locis condensatis merito tribuenda est & adscribenda.

§. III.

Quum igitur omnium omnino fontium origo in altioribus montibus & collibus quærenda sit ac inve-nienda: jam quæ in horum cryptis reconduntur, & aquis perlabentibus mista, iis medicam virtutem conciliant, scrutanda erunt & eruenda. Quod vero metalla attinet, horum nobiliorum venæ, videlicet auri & argenti, in universo orbe sunt rarissimæ, neque ipsa metallorum

metallorum compactior, & firmiter compages aquarum poros subire, multo minus salubrem ipsis vim adde-
dere potest. Perlustranda itaque potius sunt ea, quæ
montes liberaliori apparatu suppeditant; disquirendo:
an ita sint comparata, ut aquis virtutem ac facultatem
quandam insinuare queant? Jam vero montes nostros
ex stratis variis compositos esse & congestos ad ocu-
lum patet. Horum potissima sunt sabulosa, lapidea &
calciformia, lutosa vel argillacea, ex quibus omnibus
calciformis materia lubentius ipsius in aquæ contuber-
nium recipitur. Deinceps inferiores terrarum tractus
ubertim ac redundanter locupletatæ sunt martialium
multisque sulphurearum marcasitarum stratis. Quem-
admodum enim tam universalis ferri est usus, ut eo-
dem nemo carere possit: ita etiam naturæ benignitas,
insignem & copiosum martialium venarum proven-
tum, omnibus fere terrarum tractibus & regionibus
elargita est. Sunt autem ferri participes non modo
lapides, sed & argillæ, luta, terræ flavescente & o-
chreo colore conspicuæ. Præterea sulphure quoque
montium cavernæ abundantissime scatent. Inprimis
in Germania & Italia multa sunt loca, ubi illud mi-
neralium genus, quod vocant *Schwefel-Kies*, ubertim
nascitur, & quod, si igne rite tractaveris, sulphur vul-
gare, quod purum & nativum in terra vix occurrit,
fundit. Genesis quoque vitrioli ex ipsis marcasitis, è
quibus passim præparatur, arcessenda. Denique Gas
illud minerale, seu vapor sulphureus, qui totum tellu-
ris ambitum pervadit, ejus viscera montiumque re-
cessus pervagatur, metallicis venis ac mineris muta-
tiones inducit, & subinde à metallicolis non sine sus-
focationis metu percipitur, nullum alium agnoscit or-
tum, quam quod marcasitæ sic dictæ sulphureæ, sive
pyrites, intestino motu, & mutua principiorum, qui-
bus constat, reactione, penetrantem ejusmodi volati-
lem, sulphureum & inflammabilem vaporem expirent
atque emittant.

§. IV.

Perspectis sic materiis, quæ in terræ abditis recon-
ditæ, in societatem aquarum venire possunt: nostrum
erit, ut curatiorem fontium, tam calidorum quam fri-
gidorum, explorationem adornemus, & perquiramus,
quænam instituto eorundem examine chymica elemen-
ta ac principia elici possint & revera in conspectum
veniant. Primum vero animadvertimus: omnes fere
aquas medicatas, quæ acidularum ac thermarum no-
mine insigniuntur, martialis terræ esse participes, quip-
pe quæ, non modo ex ipso sapore paululum adstrin-
gente cognoscitur, sed & ex appositione ochrei coagmen-
ti, circa scaturiginem & canalium, per quos aqua fer-
tur, parietes, judicatur. Nullum enim fontem me-
dicatum vidimus, nullas thermas, vel acidulas, quæ
non circa ora fontana, ochream, magis vel minus fla-
vescentem massam deposuerint, quæ bene elota & cal-
cinata non exhibuerit pulverem, cujus ramenta ma-
gneti promte accesserint. Horum classem inprimis
ducunt ex thermis Carolinæ, Aquisgranenses, Emsen-
ses, Wisbadenses, Toplicenses & Hirschbergenses, &
ex acidulis Pyrmontanæ, Egranæ, Swalbacenses, Wil-
dungenes, Gœppingenses, Spadanæ, Carbenes, fla-
vescentem ejusmodi substantiam circa scatebras largiter
ejicientes.

§. V.

Præter hos sunt etiam alii fontes purissimi frigidi,
saporis penetrantis expertes, qui licet inter acidulas
locum non mereantur; nihilo minus tamen spectatæ
in variis morborum generibus sunt virtutis. Hi omne
quicquid ab iis salubre expectari potest, debent mar-
tiali quo foeti sunt elemento. Et martialem hanc eo-
rum indolem luculenter testatur, præter ochraceum
glomeramen, quo scaturiginis ostia investiunt, non

solum sapor quem linguæ imprimunt subadstringens,
sed etiam atro-purpureus color, quem insperso gallarum
pulvere suscipiunt & pertinacius servant. Ex horum
familia sunt Freyenwaldenses, Bebranæ, Radeber-
genses, Lauchstadienses, nec non nostræ Halenses,
una cum celebribus in Italia Tetuccianis, Aponitanis,
Pisanis & Calderianis, Villensibus, aliisque aquis,
quæ omnes virtutem suam ad martialem profapiam
referunt, & quicquid in medendo præstant, partim
fibras à naturali tono dejectas firmando, partim di-
luendo, eluendo & evehendo crassos & salios humo-
res perficiunt. Ex quo utique conficitur: nullos fer-
me medicatos esse fontes, qui à martiali consortio sunt
immunes.

§. VI.

Deinde notatu perquam dignum est: quod insignis
ratione ingredientium in thermis & acidulis deprehen-
datur convenientia; dum utræque sal quoddam alcali-
næ naturæ, cum omnibus acidis pugnans simileque
cum aliis alcalinis effectus producat in sinu suo fo-
vent & complectuntur. De alcalini hujus salis in ther-
mis præsentia, qui amplius dubitet, est fere nullus,
postquam nostro hoc tempore, accuratius fontium ele-
menta indagare & eruere cœpimus. Inprimis autem
eodem admodum refertæ sunt Carolinæ, adeo, ut ex
mensura aquæ circiter drachma salis colligatur. Ne-
que minus Aquisgranenses eodem largius imbutæ sunt,
quippe ex una illarum libra grana XXV. elici possunt
salis alcalini, quod cum quovis acido conflictum edit,
in aëre deliquescit, syrupum violarum viridi colore in-
ficit & argenti solutionem præcipitat, prout fidem fa-
cit VALLERIUS in *tentamin. physico-chym.* pag. 119.
Porro Bollenenses in Ducatu Würtembergico sal alcali
manifesto conspiciendum præbent, quod cum acidis
confligit & solutiones menstruis acidis factas ex hu-
moris sinu deturbat. Emsenses quoque idemdem
ejusmodi sal concedunt, quod cum spiritu vitrioli ef-
fervescendo congreditur, & postea in sal neutrum in-
stat tartari vitriolati transit. Idem testatur de aquis
Burbonensibus in Gallia PASCALIUS de *aquis minera-
libus*, memorans: quod extractum ex iis sal, cum aci-
do in neutrum hermaphroditicum degeneret, tinctu-
ram coralliorum acidi ope paratam, dejiciat & lactis
coagulum dissolvat. Toplicenses denique & Hirsch-
bergenses, quicquid demum solidi custodiunt, alcalinæ
est indolis, licet tam parce iisdem inspersum sit, ut
mensuræ decem vix dimidiam drachmam suppeditent.

§. VII.

Verum enim vero, non solum thermæ, sed & ipsæ
acidulæ, quod mirum prima facie videtur, sal, quod
characterem alcalinæ naturæ in omnibus effectibus re-
fert, complectuntur. Pervulgata enim & per manus
quasi tradita, at erronea, opinio mentibus inhæret,
acidulas dici ab acido, quod ipsis insit; quum tamen
nullus fons ullibi reperitur, qui more acidorum cum
alcali ebulliat, lac coagulet; aut sulphuris solutionem
præcipitem det; sed omnes potius acidulæ, quod ante
nos nemo observavit, sal acido è diametro oppositum,
alcalinum videlicet, obtineant. Id quod quum exa-
mine instituto luculenter pateat: licebit potiores in
Germania acidulas lustrare earumque scrutinium inire.
Videlicet omnium validissimæ, & vehementioris ope-
rationis sunt Pyrmontanæ, iisque vulgo magna vitrioli,
nec non acidi mineralis portio, inesse creditur; cujus
tamen ne granum quidem concedunt & exhibent.
Contra vero id observatu innotescit: quod non solum
instillato oleo vitrioli vehementer ebulliant, & adjecto
violarum syrupo, pulchrum viridem colorem referant,
sed etiam post omnimodam liquoris exhalationem, ter-
reum quoddam calciforme crassamentum in fundo relin-

relinquant, quod itidem cum acido conflagando alcalinum manifestat ingenium. Si autem acido vitrioli prius fuerint liberalius imbutæ & saturatæ, evaporatione, sal neutrum, tartaro vitriolato, vel arcano duplicato conforme, in conspectum venit. Similiter Egranæ vitrioli spiritu, vel alio acido affuso, insignem cum copiosa bullularum eructatione edunt conflictum, à syrupo violarum immisso viridem suscipiunt tincturam, & oleo tartari per deliquium instillato, integram mixtionem & imperturbatum servant colorem. Porro Selteranæ, quæ insignem nostro tempore utilitatis famam nactæ sunt, cum acido non tantum fortiter pugnant, sed etiam adjecto violarum syrupo, viridi colore perfunduntur : & ex libra medica, lenioris exhalationis beneficio, drachma dimidia & grana sex materiæ salinæ colliguntur, quæ facta separatione, scrupulum salis exquisitè alcalini concedunt : si vero eidem aquæ mensuræ spiritus vitrioli ad punctum, ut aiunt, saturationis confunditur, sal exsurgit medium, cujus pondus ad drachmam dimidiam & quindecim grana accedit. Præterea nobili exemplo sunt Antonianæ, Swalbacenses, Wildungenses, Gebersweilenses, nec non Greisbacenses, Landsteinenses, fons ad Andernachum, *der Prudel-Brunnen*, *das Wild-Bad*, scaturigo prope Geislingen dicta *Überlingen*, Gœppingenses & Deinacenses ; quippe quæ omnes, uti partim propria, partim aliorum fide dignorum experientia compertum habemus, non modo cum acidis fortioribus, sed etiam vino Rhenano, subtili aciditate imbuta, effervescent atque ebulliunt, & igni ad exhalandum impositæ, terram tantum alcalinam, parum vero salis fixi, relinquunt. Accedunt Elsteranæ in Voigtlandia, nec non Buchenses in confiniis Carolinarum : quæ ambæ, facta acidi spiritus instillatione, non solum effervescentiam subeunt, sed etiam adjecta ejusdem sufficienti quantitate, sapore, virtute & effectu Egranas tam exacte referunt, ut dignosci invicem nequeant, quemadmodum ante aliquot annos in Carolinis, adstantibus plurimis Medicis aliisque præcipuis viris, experimentum cepi. Eadem ratio est Geismariensis in Hassia fontis, qui teste cl. BEAUMONT, in concinnato de eodem tractatu, à syrupo violarum viridem, & inspersis gallis, atro-rubicundam tincturam recipit, & non solum ipse cum acidis ebulliendo concreditur, sed etiam elicium ex eo sal eandem cum acidis pugnantem indolem exferit. Et licet in Suecia rarissimi alias sint medicati fontes ; nihilo minus tamen scaturit ibi fons dictus *der Westmannlandische Sauer-Brunnen*, quem cl. GRACCHIUS, Archiater Regis Sueciæ meritisissimus, latius descripsit, simulque sal alcalinum ipsi inesse doctè demonstravit.

§. VIII.

Posteaquam igitur acidularum & thermarum, tam quoad ochraceam substantiam, quam alcalinum elementum affinitatem exposui & demonstravi : nunc ulterius progredior ad subtile volatile minerale ingrediens, admirandarum virium & mirabilium effectuum, quibus foterii fontes pollent, præcipuam atque palmariam causam. Omnes enim, qui acidularum & thermarum nomine proprie insigniuntur fontes, eodem perfusi sunt & esse debent : quin immo, quo parcius hoc foveant, eo minorem quoque in corpore exserunt virtutem, & vicissim, quo magis eodem turgent, eo majori efficacia & utilitate præstant. Non difficile autem & operosum est ejus in aquis præsentiam cognoscere, sed manifestum indicium præbet, copiosior bullularum ex recenter haustis ascensus ; & collectior in margine vitri & superficie confusus, quarum origo elateri hujus spiritus, aquarum poris innidulantis & exitum affectantis, merito adscribenda est. Jucundius adhuc spectaculum est, si aëre regnante sereno puro & temperate calido, aut humore vitro pellucente

excepto fortius agitato, bullulæ alte saliant & agminatim exilire videntur. Quemadmodum vero temperato calore & quassatu æthereum hoc elementum expanditur & sub forma bullularum aquis elabitur : ita cœlo nubilo & frigido gravius incumbente, intus coëretur. Et hinc ratio patet, quare, qui integra virtute & efficacia salubres aquas ad remotiora loca transferre cupiunt, operam dare debeant, ut non solum tempestate frigidiori & sereno ac matutino tempore easdem vasis infundant eaque curatissime obturent, sed etiam nocturno magis frigidiusculo tempore, quam interdum & sole acuto, vehant atque asportent.

§. IX.

Est porro hic thermarum & acidularum spiritus indolis admodum penetrantis : unde tam nares blando halitus, quam linguam acuto sapore ipsumque caput ternulentia ferire solet. Et quoniam facillime ab aquarum societate recedit & aufugit ; instar regulæ tenendum est : quod potatio earum ad scatebram instituta, longe præstantior & efficacior sit ea, quæ in dissitis locis adornatur.

§. X.

Obinet præterea tenuissimum hoc elementum elasticam naturam. Elateris vero ea ratio est, ut mirifice ab incumbentibus extrinsecus aliis corporibus comprimi possit, cessante autem horum compressu, in pristinum locum sese iterum recipiat, ita tamen, ut renitens hæc restitutionis vis, semper ponderi gravanti priori quadret atque respondeat. Hinc est, quod elasticus hic spiritus frigore in arctius cogatur & valde concentratur, calore vero & motu intestino rarecat & expandatur, tanta vi, ut vitra aliaque compactiora vasa impetuose dirumpat. Et hoc fontium salubrium aëreo-elasticum elementum ejusque redundantia curiosorum oculis amœno aspectu sistitur, beneficio antliæ pneumaticæ. Scilicet suppositis eidem vasis variorum fontium aqua ad medium repletis vitreis, aëris incumbentis pondere subtracto, mirum ebulliunt, adeo ut nonnullæ, quæ copiosius hoc spiritu turgent, ipsa lagenarum ora transcendunt : id quod minime succedit cum vulgaribus aquis, tam subtili elemento orbatis.

§. XI.

Præterea notatu perquam dignum est, delibatissimum hunc mineralem spiritum, omnis ferme medicinalis virtutis, qua foterii fontes nobilitati sunt, nec non grati odoris, & acris, stimulantis ac præsertim vitriolacei illius atramentosi quem linguæ insinuant saporis, præcipuam esse causam atque originem. Quod ut luculenter confirmemus, placet in medium proferre examen Pymontanarum, nostro quidem judicio, omnes nobis cognitæ spirituosæ elementi redundantia superantium. Hæc autem sub exploratione curiosa occurrunt. I. Staticum vitreum instrumentum, quo específicas indagare soleo aquarum gravitates, in recenter haustas has immisum, sex punctula alba in cylindro notat, quum alias simplex communis aqua tantum quatuor designet. II. Ipsi si gallarum pulvis inspergitur, color atramentum referens exsurgit. III. Instillato vitrioli spiritu, effervescentia vehemens oboritur. IV. Admixto violarum syrupo, viridis tinctura excluditur. V. Gustu exploratæ, saporem valde penetrantem, acrem & viriolicum exhibent. VI. Motu & agitatione quassatæ innumeras bullulas rejiciunt. VII. Intus sufficienti copia haustæ, aliquot sedes cient, per urinæ ductus expedite feruntur & dejectam appetentiam revocant. Quod si vero Pymontanæ in amplam patinam effunduntur & per XXIV. horarum decursum liberiori & tantum temperato calori committuntur : en videbis mirabilia. I. Gravitas antea notata & conspicua perit, & cylinder staticus ad quatuor

tuor puncta albicantia demergitur, manifesto indicio, aquas eundem cum aqua simplici esse ponderis. II. Ab injectis gallis non amplius umbra & nigredo iis inducitur. III. Nec instillato vitrioli spiritu effervescencia exoritur. IV. Syrupus violarum non amplius viridiusculum profert colorem. V. Omnis sapor, odor & penetrantia exspiravit. VI. Potæ ventriculorum gravant & canalem alimentorum flatibus implent, distendunt & tardius secedunt. VII. Grata pelluciditas obscuratur & turbidæ fiunt, concrecente in superficie cuticula variegati coloris, & descendente ad ima sedimento calcario ferruginoso. Tanta tamque celeris est aquæ medicamentosæ & summarum virium catastrophe, in effectam, inutilem omnique virtute privatam. Cujus causam si rimamur, nulla alia, quam spirituosæ substantiæ, quæ antea largiter imbutæ erant, jacturâ, menti æque ac sensibus sese offert.

§. XII.

Par ratio aliorum mineralium est fontium, neque hac prerogativa tantum Pyrmontanæ gaudent, sed eadem plane phenomena similesque prorsus effectus circa Wildungenses, Schwalbacenses, Antonianas, Elsteranas, Buchenies, nec non Egranas & Selteranas observantur. Quippe si hæc liberiori auræ tepidioris afflatui exponuntur, perit pondus, exspirat gratus stimulanisque sapor & odor penetrans, omnemque purpurascentem à gallis, & viridescentem à syrupo violarum, tincturam recusant. Neque dubium est, quin eadem experimenta simili modo in aliis acidulis succedant.

§. XIII.

Denique non prætereundum est, quod mineralis hujus spiritus ea propria sit laus atque virtus, ut integram ac salvam aquarum crasin atque texturam conservet earumque corruptionem avertat. Curiosum quidem, sed tamen in vulgus notum est, aquas in lagenis quibus transvehi solent facile turbidas fieri, rejecto ad fundum sedimento; quinimmo corrumpi & fatuas atque inutiles reddi, si quando spatium in vasis relinquatur, vel ipsa non curate muniantur, ut circumfuso aëri pateat aditus. Inprimis facillime vitium contrahunt fontes, qui aquam leviolem & molliorem, (*ein weiches Wasser*) spiritus & activi interflui elementi hospitium, vehunt: exemplo Selteranarum, quæ corruptæ intolerabilem ferme foetorem exspirare solent. Ex quo luculenter patescit: liberum aërem, aquis nostris esse inimicissimum, quippe qui, discessum inquilini hujus spiritus facile efficit, quo præsentem aquis sua constat integritas & salva manet virtus. Custodire vero partium corpus constituentium, unionem ac mixtionem spirituosam posse substantiam, vel ex eo liquet: quod solus sulphuris communis vapor, vina etiam recentia, ab omni vappescentia, lentore & corruptione, vulgari experimento præservet. Quæ quum ita sint, nemini amplius dubium fore autumo, quin convictus credat: medicinalem & salutarem fontium vim, non tam à crassa quadam ac materiali substantia, quam potius à tenuissimo volatili elemento esse petendam; eaque propter arduum, quin vanum esse molimen, aquas loterias, ut nonnulli per imperitiam jactant, per artificium parare vellet, ut nativas virtute æquent. Quippe, tam diu irritus & frustraneus omnis erit labor; quamdiu spiritus quidam subtilissimus volatilis, elasticâ indole imbutus, fontiumque spiritui exquisitè similis, arte non poterit confici ac obtineri.

§. XIV.

Neque vero tantum acidulæ, sed etiam thermæ minerali hoc spiritu afflatæ sunt. Prodit autem ejus connubium inter alia bullularum ex recenter haustis thermalibus aquis emergentium copia, nec non sapor penetrans & compungens, una cum attramentoso &

purpureo, quem gallæ injectæ conciliant colore. In eo tamen inter acidulas & thermas differentia intercecit: quod in his, utpote frigidis, volatile hoc elementum diutius coërceatur; in illis vero ob calorem celerius in auras dissipatur. Quo magis necessarium est atque proficuum, sine mora longiori eas bibere, ne elabatur & absugiat id, quod est saluberrimum. Proinde non possum non vehementer improbare receptum alias in Carolinis morem; dum ampullis amplioris orificii aquas ad scatebram excipiunt, & leviter tantum linteis tectas, postea sæpius ad diffusa loca, ubi potaturi degunt, avehant; quo fit, ut multum subti is elementi in via exhalet & sese subducatur. Longe vero consultius est, aquam vasis angustioris orificii ope infundibuli immittere, ea firmiter claudere & sic usui servare. Ubi tamen semper tenere oportet: uti aquas omnis generis medicatas; ita maxime thermas, & sapore, & virtute, longe efficaciores deprehendi, quæ in superioribus, quam quæ in inferioribus vasis continentur: ideoque non sine ratione, ultra medium lagenas thermalibus aquis repletas non epotandas esse censeo. Succurrit in hujus rei notatu dignum experimentum, quod videlicet omnes in vasis asservatæ minerales aquæ, superiora occupantes in vacuo longe copiosius bullulas rejiciant inferioribus, quæ hanc etiam ob causam neque tam penetranti sapore, neque odore pollent. Hinc est, quod thermas, præsertim Carolinas, frigefactas, bibere non tutum sit, quippe quæ, calidæ haustæ, cito per universi corporis ductus feruntur; refrigeratæ autem, non modo tardissime secedunt, sed & flatibus progignendis, aliisque in abdominis regione producendis incommodis favent.

§. XV.

Quum igitur tenuissimus hic spiritus aethereo-elasticus, omnium mineralium aquarum delibatissima pars & quasi anima sit, qui ipsis virtutem inspirat mirabilem, unde spectatissimi earum effectus emanant: mirandum utique est, quod à Veteribus æque ac Recentioribus, qui de medicatis fontibus scripserunt, ejus natura ac virtus neque explanate tradita, neque pro dignitate exposita sit. Ex omnibus solus TABERNÆMONTANUS, insignis & cum cura in examine aquarum versatus auctor, multa utilia de eodem prodidit. Is enim in *Hydroph.* pag. 441. ita scribit: *Wann die Sauer-Brunnen warm getruncken werden; so verschwinden die mineralischen Geister, und wird also aus einem heilsamen, ein unheilsames und schädliches Wasser, davor sich man nüglich hüten soll: denn die Krafft dieser Wasser besteht einig und allein in der Spirituosität.* Porro asserit: matutino tempore fontem penetrantiorē observari: si vero transportetur, amitti virtutem illam penetrantem. Quo propius, pergit, *aqua bibitur à fonte, eo efficacior, quo remotius, eo fit languidiôr; adeo, ut aquæ Schwalbacenses, spatio centum passuum profluentes à fonte, omnem fere vim ac virtutem exuisse videantur, secureque pisces in iis degere possint, qui in aquis fonti propioribus mox extinguuntur.*

§. XVI.

Quamvis vero non diffitear, inter difficiles & perobscuras quæstiones non ultimam esse: unde tam hujus spirituosæ elementi, quam caloris in thermis ratio sit petenda? neque omni dubitatione careant opiniones huc usque de eadem in medium prolata; præ omnibus tamen arridet mihi nobilissimi Angli, Martini LISTERI, sententia, cui etiam cl. BERGERUM, in elegantissimo tractatu de *thermis Carolinis*, accedere video. Hic nimirum subterraneum, non minus, quam motus terræ & flammæ subinde erumpentes & quas ignivomi montes eructare solent, à marcasitis sulphureis, sive pyritibus in terræ intimioribus accensis, deduci debere asserit atque confirmat. Etenim huic asserto lucem affundit

affundit clarissimam illudque stabilit, notissimum illud chymicum experimentum, quo assumpta aequali & sulphuris communis & limaturæ martis, in subtilissimum pulverem redactorum parte, his commixtis & aspersa simul ad sufficientem humectationem usque aqua, tam calor quam ignis producitur. Videlicet: massa ita præparata intra XXIV. horarum decursum vehementer primum ebullit, incalescit, majus occupat spatium & colorem mutat; exempta deinde & in frustra diffracta, si in acervum congeritur & aëri circumfuso committitur, paulo post fumum & flammam emittit. Quum itaque marcasitæ, omnium Chymicorum consensu, ex marte & sulphure sint coagmentatæ, in proclivi est judicare: quod ubi ingens earum in subterraneis tractibus reconditur copia, & humidi cum aquis accessu, elementorum quibus constant dissolutio, & postea mutua inter se actio & reactio suscitatur, intensissimus oboriri & exsurgere possit calor & æstus; qui quam facillime, si quando per occultos terræ meatus liberior ab aëre motus accesserit, in apertam flammam erumpit. Solus enim aër est, qui ignem occultum in manifestam lucidamque flammam ciet. Hoc igitur subterraneo & in abstrusis terræ recessibus gliscente igne, præterlabentes aquæ incalescunt, & pro hujus differentia, situ & loco, propinquiore vel remotiori, magis vel minus infervescunt.

§. XVII.

Et his marcasitis sulphureis earumque mutua inter se actioni, tribuendus quoque est mineralis ille & sulphureus spiritus, quin immo ipsius salis alcalini & subtilis vitrioli ortum ab ipsis derivandum esse censeo. Vapor enim, qui ex accensis sulphureis marcasitis exspirat, naturæ est penetrantissimæ, simplicissimæ & summe elasticæ; unde etiam thermas æque ac acidulas prompte pervadit, in ipsis sistitur, colligitur ac coercetur. Quippe ea aquarum indoles est atque facultas, ut siccos subtilissimos halitus facile vincere, coercere ipsisque vehiculum & hospitium præbere possint; exemplo spiritus vitrioli, nitri, salis, qui nihil aliud sunt, quam sicci acidique vapores in humido concentrati.

§. XVIII.

Hic mineralis & sulphureus vapor loca subterranea frequentius pervagatur, & metallicis quandoque, non sine insigni vitæ periculo, occurrit. Memorabilis certe, ante aliquot annos, sed tragicus, hic loci contigit casus: quum metallurgus in suburbio puteum fodere molitus, & jam ultra viginti ulnas proventus, nullum aquæ vestigium deprehenderet, eamque ob causam, ad rimandum aquæ venas, magna opera & laboriose inferiora ingenti terebræ machina perfoderet, insigni cum strepitu siccus erupit vapor, arenas sursum projiciens. Cujus penetrantiam & deleteriam vim persentiscens operarius, adstantium auxilium implorat, sed frustra. Quamvis enim illico ipsum admotorum instrumentorum ope extrahere niterentur, mortiferi tamen halitus, ipsi, antequam ad superiora liberumque aërem eveheretur, cum spiritu vitam ademant, adeo, ut ad inum relapsus, interiret.

§. XIX.

Fontium vero calidorum, nec non frigidorum hæc mihi esse videtur ratio. Ubi aquæ paulo propius illud marcasitarum incendium præterlabuntur, calorem concipiunt; si vero in marcasitæ profundius locatæ sunt, neque tantus, quantus ad ignem suscipiendum requiritur, earum cumulus congestus est; sed ipsæ mutua actione & reactione tantum vaporem emittunt; contingit, ut hic exspirans halitus, per scissuras ac fissuras rupium, terræque poros raptus & sublatus, frigidis superius transeuntibus aquis sese insinuet, & sic acidulæ exsurgant. Unde jam perspicua fit ratio, qua-

re semper fere in confiniis thermalium aquarum acidulæ scaturiant: & circa thermas æque ac acidulas, plerumque largæ & copiosæ sulphureorum vaporum diffusio deprehendatur; id quod jam in præcedente *scrutinio præcipuorum medicamentorum Germaniæ fontium* §. XXXV. aliquot exemplis illustravimus & confirmavimus.

§. XX.

Incidit vero hoc loco non exigui momenti dubitatio: cur videlicet, si mineralis fontium spiritus vapor sulphuris debeatur, is non ejusdem cum sulphure vulgari tetri ac foedi odoris sit? Hanc vero ita facillime diluendam esse reor. Constituenda videlicet est differentia inter sulphur minerale commune, arte ex mineris elicatum, & inter illud, quod purum ac nativum in subterraneis tractibus reperitur. Nam vulgare sulphur, nonnisi ope ignis culinaris succensisque lignis vel carbonibus cogitur; quo fit, ut cum pura illa nativa sulphuris materia, etiam empyreumaticum, quo omnia ligna foeta sunt, oleum, in se recipiat. Nativum autem sulphur, ignis torturam nondum expertum, & empyreumatico contagio non temeratum, simplicissimæ ac purissimæ est indolis, omnisque specifici odoris expers. Id quod sequenti curioso experimento eximie illustratur. Quando una martialis in phiolam vitream uncia scobis injicitur, & boni ac puri olei vitrioli portio instillatur, & his permixtis, tres aquæ partes adsparguntur; protinus ingens cum spuma exoritur ebullitio, simulque vapor penetrans sulphureus, qui vix pollice coerceri potest, sursum fertur: quo paululum, obturato orificio, suppresso, & admota postea remoto digito candelæ flamma, magno cum impetu halitus erumpit & cum fragore fulguris instar flammam vibrat. Hic autem vapor, licet totus sit sulphureus, omnis tamen tetri sulphurei foetoris expers est. Neque dubium est, quin, si liberalem hujus spiritus copiam obtinere liceret, is, nostro minerali spiritui, ratione virium & effectuum, quam simillimus futurus sit.

§. XXI.

Evoluta sic atque perspecta mineralis spiritus viribus, genesi ac indole, è re fore existimo: ut redeam ad sal alcalinum, hujus etiam generationem indagaturus. Constans ac recepta adhuc in scholis Physicis æque ac Medicis, fuit opinio, sal alcali, tam volatile, quam fixum, formaliter & nativum in rerum natura non reperiri; sed tantum artis & ignis beneficio produci. Sed directe huic asserto refragatur ipsa observatio & experientia quotidiana, dum ex thermis & acidulis, sine ullius additione, decente encheiresi adhibita, fixum sal alcali satis copiose extrahi & colligi potest. Deinceps, nec illis, qui rerum geographicarum notitia vel tincti sunt, ignotum esse potest: quod in orientalibus quibusdam locis, præsertim in Ægypto, insignis salis alcalini, quod Veteres nitri nomine insigniunt, copia, è terræ visceribus eruatur, quo ad saponem & vitra conficienda artifices uti solent. Inprimis hac de re legi meretur *le Voyage du Levant* lib. II. pag. 780. ubi auctor scribit: *in deserto de St. Machaire, in Ægypto, invenitur lacus Natron, qui duo tantum milliaria ab hoc distat & valde notabilis est. Apparet enim tanquam fluvius glaciatus, in quo parum nivis jacet. Is lacus in partes duas divisus est: septentrionalis fit per aquam, quæ fluit ex terra, verum non observatur locus; meridionalis quæ per fontem scaturientem fit. Aqua alta est usque ad genua, & mox sese coagulat & natron sal perfectum fit per hanc aquam anni spatium. Aqua ipsa est rufa, sub qua sal est rubrum, latitudine sex vel septem digitorum. Sub hoc est sal nigrum, quo ununtur Ægyptii loco lixivii. Et id est natron veluti primum, sed solidum. Sub hoc est aqua fontana. De hoc lacu provenit,*

ut circa Pentecosten visitur, sal pyramidale. Porro Carolus CLUSIUS, de exotic. lib. II. tradit: in Cairo nitrum veterum adeo vulgare est, ut ejus decem libræ, vix uno maiain (est monetæ genus) æstimentur. Varius apud illos hujus est usus, & vasa eo inducunt, & siliquis acaciæ admixtis, coria parant.

§. XXII.

Quæstio igitur nostra indagine non indigna hic occurrit: utrum alcalinum, quod fontes medicati complectuntur, sal, ex terræ visceribus sit arcessendum? & an illud nitrum Veterum appellari mereatur? Plura vero, ne veritatem dissimulemus, sunt, quæ, quo minus in hanc sententiam descendere queamus, impediunt. Siquidem nusquam in terræ interioribus sal alcali siccum reperitur, neque illud alii fontes, nisi medicati & spiritu minerali afflati, subministrant. Accedit, quod BELLONIUS, observ. cap. 21. asserit: in Europa ne micam quidem veri nitræ exstare, quod in Ægypto tamen vilissima res sit.

§. XXIII.

Proinde restat, ut aliunde ejus genesin derivemus. Nostra autem sic fert sententia: sal alcalinum thermarum & acidularum esse foetum ac sobolem spiritus mineralis, qui, quando cum calcaria terra, quæ abundantissime fontanas aquas incolit, coit atque miscetur, propter subtile, quod in recessu fovet acidum, degenerat in sal, characterem salis alcalini exacte referens. Constat enim variis experimentis, è Chymia petitis, ex calce vivâ, creta, gypso, topho & omnis generis alcalinis terris, per mixturam acidorum spirituum, vel etiam tantummodo salis aluminosi, salis vitriolici, aut salis communis, alcalinæ indolis salia confici posse, quibuscum eadem, quam quæ cum sale fontium instituimus tentamina, succedunt. Quis vero neget, thermas, præsertim Carolinas, aliosque medicatos fontes frigidos, ingredi tophaceam materiam? quando perpendet: lapidescentem eorum vim & crustam tophaceam, qua ora fontana investiant, huic uni- ce esse tribuendam.

§. XXIV.

Neque tamen existimandum est: quod ex lapidibus, quos ignis vehementia in calcem urere solent, illud, quod aquis calcarium inest, repetendum sit. Prostant enim toti montium tractus, uti in Helvetia, Italia, Anglia, ex terra alba calcaria congesti, qui ob id aquas transeuntes contaminant & insalubres reddunt, ut strumarum generationi velificentur. Plurimæ quoque ex aquis nostris fontanis ejusmodi calcaria terra onustæ sunt, id quod luculenter patet, modo ipsis oleum tartari, quod dicunt per deliquium, instillatur; ita subito nebula perfunduntur, conturbantur & lacteo colore inficiuntur, secedente mox ad fundum materia alba.

§. XXV.

Est autem alcalinum quod aquæ foteriæ hospitio exceperunt sal, vel volatile, vel fixum. Per volatile hic non intelligimus urinosum, quale ex animantium partibus igne elicitur, sed ejusmodi, quod versatilis indolis est, & calore & coctione promte dissipatur. Tale reperitur in plurimis acidulis, quæ cum acidis pugnant, simul ac vero igne calorem conceperunt, aut coctionem expertæ sunt, falsum saporem exuunt & in imis vasis parum vel nihil salis alcalini, plurimum autem calcariae terræ relinquunt. Solæ excipiuntur, quantum quidem nobis cognitum est, Buchenses, Selternæ & Antonianæ, quæ salem fixum alcalinum post exhalationem largiuntur. In thermalibus vero plurimis aquis, affluens salis fixi, alcalinæ indolis, copia, post resiccationem in conspectum prodit.

Frid. Hoffmanni Oper. Tom. V.

§. XXVI.

Hujus rei causas si scrutamur, hæ potissimum subesse videntur. Quando marcasitæ sulphureæ vehementer incallescunt, magna spiritus sulphurei, non tantum subtilis & volatilis, sed etiam fixioris copia exhalat, qui, factæ cum terra calcaria connubio, arctiori vinculo concrefcit & conflatur sal fixum. Quando vero marcasitæ non tam eximio gradu calorem concipiunt, vapor tantum subtilior elevatur, qui aquas pererrans, cum terra ipsis innatante calcaria laxius congregitur, & tenerioris ac parum constantis naturæ connubium efficit, quod calore accedente, facile disjicitur iterumque rescinditur.

§. XXVII.

Eadem ferme ratio & eadem natales vitrioli illius subtilis, quod aquis quibusdam inesse diximus. Et enim in vulgus notum est, vitriolum ex spiritu acido sulphuris, sive vitrioli, & materia quadam martiali concrefcere. Jam vero id cujusvis intelligentis judicio jam ex superioribus luculenter patet, plerasque aquarum salubrium, insignem ferreæ & ochreæ materiæ apparatus fovere, qui partim ex sedimento, partim sapore dignoscitur. Quando igitur subtiles illi acidi sulphuris halitus sursum rapti, particulis martialibus per aquam dispersis occurrunt, iisdemque sese associant, nascitur ex eorum connubio principium quoddam vitriolicum, cujus complicatio eo minus est firma, quo facilius, spiritu avolante, hæ ipsa rescinditur atque destruitur. Neque enim stabilis connexio esse poterit, quum vapores isti sulphurei non solum indolis sint tenuissimæ & constans vinculum renuant, sed insuper etiam cum tenerioribus martis ramentis intercedente aquarum vehiculo cohæreant, quo fir- mior earum congressus impeditur, & enatum exinde elementum vitriolicum versatilis admodum naturæ est, ac facillime iterum à societate aufugit. Ex quo jam ratio elicitur: quare calefactæ acidulæ illi- co omnem saporem penetrantem & atramentosum exuant, nec amplius inspersis gallis tincturam recipiant. Fixum vero vitriolicum sal, quod ignis torturam ferat ac subsistat, nunquam in acidulis reperies; id quod nec LISTERUS, nec nosmet ipsi, licet omnibus vestigiis illud indagaverimus, invenire & eruere potuimus.

§. XXIX.

Mirum quidem & paradoxon quam plurimis videbitur, thermis, quarum pleræque sal alcali fixum obtinent, vitriolici quippiam inesse, autumantes, omne alcalinum sal vitrioli crasin destruere, eaque propter ambo hæc in uno nullo subsistere posse modo. Verum enim vero & hoc dubium haud difficulter dilui poterit. Quippe experientia & quotidiana observatio docet, sal alcalinum & vitriolicum una existere posse. Præclaro exemplo sunt omnes fere acidulæ, quæ vitriolicum non solum referunt saporem, sed etiam admixtis gallis, vel floribus balaustrorum, purpureo-atrum colorem suscipiunt, & his vitriolicum suum luculenter testantur elementum; nihilo minus tamen cum acidis eminentem concitant effervescentiam, & alcalinam indolem produnt. Idem etiam cum thermalibus Carolinarum aquis, licet remissiori paulo gradu, succedit; utpote quæ, manifesto vitriolici principii documento, sæces tingunt, & injecto gallarum pulvere, purpuram induunt. Neque observationi refragatur ratio; siquidem uno actu mineralis iste spiritus aquis innexus, partim cum alcalina terra concurrit, & sic alcalinum sal gignit, partim terræ martiali allabatur, & tenue ac subtile vitriolum excludit. Secus vero res comparata est, longeque alius subsequitur effectus, quando liquoribus, sale alcalino jam imbutis, demum vitrioli solutio in-

O

jicitur;

jicitur; vel vicissim, si vitriolicis aquis alcalinus liquor affunditur: quandoquidem ambo hæc hoc pacto illico conflictum edere & sese mutuo destruere incipiunt. Pro diversa itaque ratione temporis ac ordinis, horum mixtione, diversus utique ut consequatur effectus necesse est.

§. XXIX.

Atque ex his quæ hæcenus adduxi & fusius prosequutus sum luculentissime cuivis constare arbitror: eximiam & summam ratione elementorum thermas inter & acidulas subesse affinitatem & convenientiam. Jam ordo rerum dicendarum exigit, ut ad alterum hujus disquisitionis momentum deveniam, & eadem ratione ostendam ac demonstrem insignem illam conspirationem & similitudinem, quæ etiam quoad vires & operationes medicamentorum thermalium & sic dictorum acidulorum fontium obvia est. Hoc autem ut à priori evincam in proclivi est. Etenim ubi eadem agendi principia similiaque ingredientia; ibi eadem etiam operatio idemque effectus ut resultet necesse est. In utrisque vero, thermis æque ac acidulis, mineralis penetrantissimæ indolis spiritus, nec non partim subtile, volatile, partim fixum alcalinum sal hospitatur & offenditur; ideoque virtus & facultas æqualis respondebit.

§. XXX.

A posteriori ipsa experientia & constans observatio hanc convenientiam evidentissime adstruit. Quemadmodum enim generales & fundamentales indicationes, quibus universa & theoria & praxis medica innititur, huc potissimum redeunt: ut medens obstructa expediat, insensas ac nocentes materias corrigat, dejectum fibrarum robur fulciat, & tandem si opus est, noxia & inutilia è corpore proscribat: ita omnibus hisce, ex toto saluberrimi, tam thermarum, quam acidularum fontes, satisfaciunt. Siquidem ob elasticum, æthereum, penetrantem, quo afflatæ sunt aquæ foteriæ spiritum, nec non alcalini salis connubium ipsiusque liquidi aquosi copiam, humores in tubulorum alveis stagnantes incidunt, resolvunt, colliquant, eluunt veterumque obstructionum repagula laxant. Deinceps sale quo foetæ sunt alcalino, acidis & ponticos primis in viis stabulantes succos obtundunt & contemperant, viscidumque sanguinis mucum disrunt atque resolvunt. Aquarum copia crudos & male coctos diluunt iisque interfertas salinas acies imbibunt, hebetant ac dispergunt. Porro fontes hi medicati, ob spiritus elastici & subtilis vitrioli redundantiam, ipsum robur ac tonum labefactatum solidorum erigunt & firmanant, & sic reciprocum humorum cursum egregie adjuvant. Denique omnis generis excretiones vegete promovent, dum non solum elateris sui adnifu canales expandunt & occlusa emunctoria referant, stagnantes humores visceribus elidunt, ut congesta intus faburra corpus exoneretur, sed etiam salinis quibus aquarum interordinia referta sunt spiculis, nerveas sensibilibioris texturæ fibras ac membranas laceffunt ac vellicant, ut aucto harum motu, superflua & inutilia in organorum secretioni dicorum officinis separentur, exprimantur & soluta è corpore proscribantur. Hinc est, quod thermæ & acidulæ per omnis generis emunctoria, alvi secessum, urinæ emissaria, cutis meatus, salivales ductus, quin ex ipso stomacho per vomitum superflua & recrementitias sordes evehant atque exturbent; idque, quod mirabile, aliisque remediis plane negatum est, citra singularem irritationem viriumque dejectionem. Ut adeo pateat, divina prorsus & incomparabilia minerales aquas esse remedia, neque immerito à Veteribus sacros fontes appellatos, quippe quæ, non solum omnibus in medendo indicationibus respondent, sed insuper etiam & plethoræ, & cacochymia,

& perverso humorum motui, quæ tanquam solennes & fecundæ morborum genitricis removenda sunt, abunde satisfaciunt.

§. XXXI.

Placet vero jam paulo specialius, brevibus tamen, vitia percurrere, quibus thermarum & acidularum potus medetur. Is igitur dicatus est omnibus ventriculi morbis: siquidem ejus molestam inflationem & inde ortam præcordiorum anxietatem egregie tollit, sitim restinguit, appetitum emortuum suscitatur, stomachi gravitatem, cujus causa inhærescens crudorum & male coctorum humorum pondus est, feliciter submovet, neque minus nimiam ciborum appetentiam, exsuperantis plerumque acidi sobolem, promptè destruit, vomitusque viscidæ plerumque materiæ matutinos cohibet & abigit. Deinde acidulæ potæ intestinorum vitiis opitulantur; dum duram ac tensam alvum molliunt & laxant, ut munus suum obeat; flatulentias quoque ac spasmos in intestinorum volumine scenam adornantes & hypochondriacis admodum familiares sopiunt ac discutunt, pristinum robur fibris intestinalibus reddendo, sordes acido-viscidas & biliosas ex plicis & diverticulis anfractuosi hujus canalibus fructuose eluendo easque è latibulis suis trudendo penitusque eliminando. Thermæ ani lubricitatem & procidentiam, laxatis fibrillis robur addendo, resiccant ac reponunt, ac tenesmum, dissipato ibi deside humore, percurant. Porro eadem tam frigida, quam calida aquæ, dum oppilata in mesenterio, hepatis & lienis viscere vasa referant, ductusque biliosum humorem convehentes ab impactis exonerant & liberant, cachexiæ, scorbuti, icteritiæ, melancholiæ hypochondriacæ, hydropi, contumacibus quartanis febribus, nec non aliis intermittentibus, inprimis præmature, causa earum adhuc intus delitescente, suppressis, insigni cum levamine succurrunt.

§. XXXII.

Et quoniam enormes sanguinis excretiones, tam per vasa ventriculi brevia, quam hæmorrhoidales, uterinos & pneumonicos tubulos, viscerum vel infarctui, vel spasmodicæ constrictioni originem debent, facile patet: foterios hos fontes iis compescendis & in ordinem redigendis admodum esse idoneos, hac tamen semper cum cautione: ut prudenter & circumspecte eorum usus administraretur & institueretur. Vicissim, si consuetæ & ordinariæ per uterina aut hæmorrhoidum vasa sinceri sanguinis evacuationes non rite, nec justo succedant tempore, vel plane suppressæ fuerint, ilias malorum nascitur; cui superandæ & exstirpandæ præsentius & efficacius ipsis aquis mineralibus non opponi potest præsidium, quippe quæ, tam calida, quam frigida, roborante, resolvente & stimulante sua facultate easdem revocant, moderantur & ordini restitunt.

§. XXXIII.

Maxime omnium vero urinariis viis, tam in renibus, quam vesicæ, mineralium aquarum usus est accommodus, earumque vitia efficacissime corrigit atque emendat. Dum enim hæc diverticula mundant & mucum cum fordibus tartareis, in concreciones calculosas facile abituris, abstergunt, à calculo, cum renum, tum vesicæ, præservant, eumque jam intus delitescentem, ductus laxando & expandendo, ad expulsionem urgent. Dysuriam quoque & mordentem ex urina acridolorem, vesicam & sphincterem obsidentem, mucum eliquando & eluendo, tollunt & sopiunt.

§. XXXIV.

Præterea pulmonalia vasa ab infarctu liberant, eoque pacto respirationem in asthmate humido interclusam liberiores reddunt. Neque phthificis sunt insensæ, præ-

præsertim si ex viscerum obstructione, abortus fuerit morbus, eaque propter ad arcendum periculosum hoc malum MORTONUS in *phibiol. lib. II. cap. 2.* aquas medicatas Islingtonienses etiam atque etiam commendat; fidem faciens, quod saluberrimam illarum facultatem non tantum in multis aliis, verum etiam in semetipso, felicissime expertus sit. Omnibus vero in hoc effectu palmam præripiunt Selteranæ, præsertim æquali lactis caprilli portione remixtæ. Hæ enim lenitate sua apprime utiles sunt debilibus ejusmodi corporibus, & pulmonales tamen obstructions prompte expediunt, simulque humores acres & noxios per urinarias vias evocant, & omne, inprimis præservatoriæ curationis, in hoc morbo ferunt punctum.

§. XXXV.

Non minus eximiam salutes aquæ opem afferunt in arthriticis podagricis, nec non rheumatismo, falsisque acribus catarrhis & defluxionibus afflictis: quandoquidem impuritates, vitales succos conspurcantes, non modo diluunt, sed & per dicatas excretioni officinas ejiciunt. Et omnes hos quos enumeravimus præstantissimos effectus, thermas æque ac acidulas præstitisse, partim experientia firma, eaque quotidiana, partim auctoritate eorum, qui observationes de salubri aquarum mineralium facultate memoriæ prodiderunt, ipsaque ratione judice convincimur.

§. XXXVI.

Si externum aquarum hospitalium usum dispicimus: similiter eximiam inter thermas & acidulas vigere affinitatem & convenientiam deprehendimus. Etenim utraque balneando usurpatæ duos tumores emolliunt, cutis meatus pandunt, partes nervosas & musculosas, ob lentis & desidis humoris decubitus, à tono suo dejectas, mirifice firmant ac roborant, spasmo vero ac rigore prehenfas, solantur & laxant, eamque ob causam paralyticis, contractura, imbecillitate & languore, nec non dolore & tumore affectis membris, egregie opitulantur, cutis impuritates ac defœdationes extergunt, scabiem resiccant, impetiginem tollunt & lepram una abigunt.

§. XXXVII.

Quemadmodum igitur thermarum & acidularum conspirans usus est longe amplissimus & præstantissimus: ita utrisque communis etiam est noxa, quam imprudens & intemperatus earum usus infert. Videlicet neque acidularum neque thermalium aquarum potatio tuta est atque proficua, ubi viscera nimium sunt indurata & scirrhusa, ubi humores è vasorum alveis secesserunt vel eruperunt & cavitates capitis, thoracis & abdominis jamjam occuparunt, ubi ventriculus, pulmones, mesenterium & intestina exulcerata aut empyemate & abscessu exesa sunt atque affecta. Insalubris itaque & nocivus earum usus est iis, qui ad apoplexiam, epilepsiam & hemicraniam inveteratam proni, & memoriæ sensuumque, tam internorum, quam externorum, vigore destituuntur. Porro non consultum est, ut aquis mineralibus utantur, qui asthma convulsivo detinentur, polypum cordis gestant, hydrope pectoris impliciti, consummata phthisi confecti, vel cancris, depascentibus & late serpentibus ex lue venerea ulceribus afflictis sunt, vel etiam feminis fluxu attentantur. Cautus denique & maxime circumspectus esse debet eorum usus in omnis generis inflammationibus, tam internarum, quam externarum partium, nisi morbi vis am conquieverit atque remiserit.

§. XXXVIII.

Tandem mutuam acidularum & thermarum harmoniam quoque arguunt, regimen, diæta omnesque cautiones & regulæ, quæ in utrarumque usu æque flu-

Frid. Hoffmanni Oper. Tom. V.

diolse tenendæ sunt ac observandæ. Hæ autem potissimum huc redeunt. Antequam cura adornetur, si corpus succis & sanguine turgeat, sanguis è vena mittendus, ne ejus abundantia moli aquarum capiendæ ac regendæ obstet. Deinde primæ viæ à sordibus bene sunt repurgandæ, ne aquæ per vasa citato cursu raptæ, recrementa, in primæ regionis diverticulis latitantia, secum una abripiant, vel illa etiam humoris salutaris medicinalem facultatem impediunt atque eludant. Purgatio autem minime molienda validioribus, quæ tonum ventriculi & intestinorum destruunt, sed potius lenioribus mannatis, rhabarbarinis, salinis, quæ sine virium diminutione operationem suam exsequuntur. Et hæc alvina evacuatio non solum sub initio curæ, sed intermedio etiam tempore, & finita hac, suscipienda est. Neque nimia copia aquarum ventriculus simul obruendus est, sed hæc sub auspicio parcius & deinde largius hauriendæ. Conveniens quoque victus ratio habenda & servandæ exquisitæ diæteticæ leges, corpus etiam decenti motu exercendum, sollicitè semper evitando impetuosas omnes animi commotiones & ad tristitiam ac in mœrorem occasiones: ne his neglectui datis, utilissima fontis effecta destruantur. Subveniendum in omni aquarum potu ventriculo roborantibus & balsamicis, quo solennia illo labefactata mala arceantur & salutaris humor æqualiter & promptè per universum corpus dimittatur & distribuatur.

§. XXXIX.

Quamvis vero ex his junctim pensatis, nemini non clarum ac perspicuum fore credam, summam & exquisitam inter thermas & acidulas vigere affinitatem & convenientiam: nequiquam tamen negare auserim, subesse etiam inter utrasque differentiam quandam, licet hæc tanti non sit, ut cum harmonia afferta æquiparari possit. Videlicet differunt in eo, quod thermæ calore, & acidulæ actuali frigore, conspicuæ sint, eamque ob causam tam quoad curationem, quam ipsorum corporum habitum, probe sint discernendæ & cum judicio suadendæ. Discrepant quoque quod acidulæ salia magis alant volatilia, thermæ vero fixa. Porro quod subtile vitriolum uberius insit acidulis quam thermis, harum autem nonnullæ, sulphur commune foveant in substantia, exemplo Aquisgranensium. Et denique haud levis in eo acidularum & thermarum est differentia, quod hæc semper uberiores spiritus mineralis copiam alant præ illis, quæ ob calorem facillime eodem orbantur.

§. XL.

Ipsas quoque inter acidulas discrimen deprehenditur; quippe nonnullæ redundantius spirituosio elemento afflatæ sunt, ut Pymontanæ; aliæ parcius eodem imbutæ, ut Wildungenses & Antonianæ. Quædam præter sal alcalinum, sal etiam neutrum alunt, uti sunt Egranæ, quædam hoc etiam solum complectuntur, uti Ebshamensis fons in Anglia & Sedlicensis in Bohemia. Nonnullæ magis vel minus chalybeatæ sunt, quo nomine Pymontanæ inprimis, Egranæ & Carlsbenses celebrantur. Aliæ sal fixum in societatem admiserunt, cujus generis sunt Selteranæ, Buchenses & Geismarienses in Hassia. Diversa etiam omnium in genere tam thermalium, quam acidularum aquarum quodammodo indoles est, ratione humidi, cujus finu, quæ reliqua est pars medicamentosa, comprehenditur. Quippe vehunt quædam rudiores & ponderosiores aquas, uti Carolinæ, aliæ leviores & puriores, Toeplicensium & Emsensium exemplo. Ex acidulis Pymontanæ, duriores & graviorem fundunt humorem; molliorem vero & exquisitæ levitatis Selteranæ, Spadanæ, Wildungenses & Antonianæ obtinent.

§. XLI.

Et ex cognita hac ab intimius perspecta aquarum mineralium diversitate, multa eximia usibus medicis axiomata depromi & accommodari possunt. Potissima hæc sunt. Qui vasa angusta & fibras teneriores, admodum mobiles & exquisitius sentientes habent, & quibus nervorum systema imbecille & ad solennes spasmos proclive obtigit; his calidi fontes magis sunt accomodi & utiles quam frigidi. Deinde, robusta corpora, quibus firmior est fibrarum contextus, & obstructionum morbi que urget contumacia; ex acidulis & thermis fortiores & validiores earumque aquas paulo graviores melius ferre possunt, quam teneriora, sensibilia & spongiosa laxoque habitu prædita corpora, quibus thermæ & acidulæ subtiliores & quæ tenuiorem aquam trudent, utiliores magisque proficuae sunt. Quoad externum usum vero hoc conspectius est discrimen. Thermæ, quæ graviolem ac duriolem aquam nactæ sunt, fortiter repellunt, hinc facile febres, capitis dolores sitimque accendunt, & exterioribus incumbencia mala ad interiora urgent, eamque ob causam, exemplo Carolinarum, earum usus magna cum cautione administrandus est. Quæ vero mollem, mitem ac lenem undam trahunt, dura & rigida potius emolliunt, meatus pandunt excretionisque, quæ à centro ad circumferentiam tendunt, eliciunt & provocant.

§. XLII.

Denique de acidularum genio, discrimine & usu hæc adhuc monenda arbitror: inesse quidem iisdem præ thermis nobiliorem & præstantiorem facultatem, ob spiritus mineralis, quo valent, copiam. Leviores quoque eas ac subtiliores volvere aquas ipsis thermis, quæ calore quo imbutæ sunt, impuras & rudiores multas in terræ visceribus latentes materias facile colliquant & sorbent. Nihilo minus tamen plus damni ab acidulis,

quam thermis induci & procurari experientiæ testimonio constat. Culpam autem frequentioris hujus noxæ, merito in frigus, quod nonnullis corporibus insensissimum & potis iisdem, interioribus allabatur, rejiciendam esse puto. Quantum enim periculi & nocimenti, & hominibus & reliquis animantium generibus frigidus incutiat potus, notissimum & quotidianum est. In primis perfrigerata potio damnosa & maximo sanitatis dispendio stat iis, qui corpus labore & motu exæstuant, qui contractum & angustum pectus gerunt, solutioris stomachi sunt, quibus tonus intestinorum labefactatus est ac debiles nervi obtigerunt, cujus generis potissimum sunt senes & infantes. Eo majus autem inducitur damnum, si jejuno ventriculo frigida potatio instituitur, quippe ingurgitata in vacuum stomachum aquæ, nulliusque occursum contemperata, protinus sensibilioribus tunicis allabuntur iisdemque noxam afficiant. Unde auctor sum, ut omnis generis acidulæ, quæ matutinis horis hauriuntur, non frigidissimæ, prout è scatebra asportantur, sed paulisper tepesactæ, bibantur: ita enim spes est, fore, ut non modo longe præsentior in sanandis morbis effectus consequatur, sed & omne ex frigore metuendum damnum arceatur & evitetur. Quando tamen facile contingit, ut admodum calore, subtilissimus ille spiritus, delibatissima aquarum pars, iisdem elabatur & in auras disjiciatur; consultum utique fore judico, ut vasa acidulis repleta, semper antequam potatio adornetur, probe adhuc obturata, aquæ fervidissimæ aliquandiu imponantur, quo tepescant, & sic egelidæ, circiter ad medium tantum lagenæ epotentur: ita enim neque jactura nobilissimi spirituosi elementi, neque à frigore noxa timenda erit. Sed de iis, quæ circa acidularum æque ac thermarum usum, tam culpanda sunt, quam inculcanda, in sequentibus uberius & plenius agam; his autem affinitatem & convenientiam sufficienter erutam ac demonstratam esse arbitror.

OBSERVATIONES ET CAUTELÆ

CIRCA

THERMARUM ET ACIDULARUM
USUM ET ABUSUM.

PROOEMIUM.

EGregium certe & in omnium omnino mineralium aquarum usu studiosè tenendum est monitum, quod Joan. GRATIANUS, in disput. de viribus fontis Lælii acidi Recobarii, de acidularum potu sigillatim considerate inculcat: *dicere ausim, inquit, vix ad ullum aliud medicaminis genus exhibendum, tanta circumspectione atque tam accurata consideratione opus esse, quantam in præscribendis acidulis adhibeant Practici necessum est.* Etenim præstantissima quidem medicatarum aquarum est virtus & amplissimus usus: at in eo par illarum cum omnibus medicaminum generibus est ratio, ut quicquid denuo salutaris præstent, nonnisi rectè adhibitæ perficiant; perperam autem usurpatæ, damnum inducant, & gravius noceant. Is autem rectus est usus, qui exquisito nititur judicio, & omnium tam ægri, quam morbi circumstantiarum ratione curiose habita, adornatur singulisque prudenter accommodatur. Ad hunc vero felici cum successu instituendum, post exactam morbi, ejus causarum & corporis afflictæ dignotionem,

nihil magis confert & necessarium est, quam penitior cognitio tam facultatum & virium quibus foteriæ aquæ pollent, quam modi quo operationem suam exsequuntur. Hæc enim qui cognita habet atque perspecta, non solum exacte rationes subducit & exillarum censu, quas maxime aptas & proficuas fore putat, seligit, sed etiam ipsum usum ita disponit & circumspectè ita dirigit, ut exoptatus non possit non respondere effectus. Contra vero neutiquam certe mirandum est, si his neglectui datis, ii, qui imprudenti conamine hoc sanitatis præsidium in usum vocant, nisi casus felicem attulerit eventum, plus damni quam emolumenti eodem procurant. Nihilo secius tamen multis certe Medicorum salutes fontes sunt idolum; idolum inquam, de quo precario multa credunt & lepidi fabulantur, non solum quoad elementa & ingredientia, sed etiam quoad vires & facultates. Vide licet ea multorum animis insidet ignava superstitio, ut gravissima à mineralibus aquis metuant, & tantum in desperatis casibus ad easdem tanquam ad aram confugiant, ablegantes eo omnes, quos aut prava medicatione insanabili malo affecerunt, aut omni sua arte ad sanitatem reducere dubitant, quum tamen ipsi,

tam nocendi, quam juvandi rationem, nec perspexerint, nec ut intelligerent, unquam annisi sint. Ego vero, ex quo à plurimis annis non solum studiose in mineralium fontium elementa facto examine inquisivi, sed etiam ipse multos illorum frequentavi, & experientia optima magistra usus, earum effectus & virtutes in variis ægrotantibus solícite observavi & annotavi: ultro compertum habui, commenta esse hæc omnia, & salutares aquas præstantissimum & maxime innocuum esse sanitatis præsidium, quin nunquam utilissimo effectui destitui, si modo medens iisdem recte & opportune uti noverit. Quare neque inutilem, neque ingrátum me suscepturum fore laborem confisus sum, si ea, quæ in fontium foteriorum usu ab aliis minus caute & perite acta nocuisse, & quæ ipse multiplici experientia profuisse & felicem successum attulisse deprehendi, ingenue ediffererem, ac cautelas & observationes quasdam, circa acidularum & thermarum tam usum quam abusum, hoc in schediasmate exponerem ac dilucide commonstrarem.

§. I.

DE variis itaque circa fontes minerales acturus observationibus, antequam eas in medium proferam, necessarium erit, brevissimis tantum, quædam de ingredientibus & elementis, quibus constant & agunt hæc aquæ, prælibare, quo postea facilius fiat aditus, ad falsas aliorum opiniones, inde natales suos habentes, discutiendas. Scio equidem, esse nonnullos, inter quos præcipue nominandus, *Urb. HÆRNA*, qui in libro cui titulum fecit, *Brevis aquarum explorator*, incertas & suspectas plerasque huc usque notas explorationes, quæ ad harum aquarum naturam investigandam, instituuntur, sat ingeniose perstringit; nec negandum, difficilem esse talem cognitionem, quam desiderat, omnibus numeris absolutam, ob innumera in terræ visceribus, quæ aqua transluit, contenta, è quibus facile subtilissima quædam ramenta in suos recipere potest poros: nemo tamen cui methodus rite examinandi aquas est cognita, inficias ire poterit, etsi non omnia, præcipua tamen, & è quibus solis earum operationes optime explicantur, ingredientia, examine erui ac clarissime demonstrari posse. Si quis autem Veterum, hac de re consulit monumenta, is sane spe sua frustratus inanis recedere cogitur, & præter absconam confictorum elementorum farraginem, nihil solidi deprehendit. Neque etiam, quod certe mirandum, nostra adhuc ætate, cui tamen splendidissimum philosophiæ naturalis lumen affulget, defunt, qui vel vetustatis veneratione, vel contradicendi libidine, vel alia, nescio qua, causa commoti, antiquatis sententiis pertinacissime inhærent.

§. II.

Sed quum jam in superioribus quam insulsa sit precaria ejusmodi opinio abunde evicerim: licebit hæc tantisper supponere atque omittere, & inpræsentiarum ea tantum afferre, quæ ad uberiores confirmationem & errorum refutationem faciunt. Hos inter autem primo merito connumerandum est loco, pervulgatum illud commentum, quod fere omnes, qui de aquis medicatis aliquid litteris prodiderunt, amplectuntur, easdem continere vitriolum, ad naturam, quæ saniorum adhuc est sententia, vitrioli martis proxime accedens. Quod vero ad oculum vitriolum inhabitans demonstrent, phænomena aquæ minerali, ac solutioni vitrioli martis, aqua simplici factæ, communia, studiose allegant, sequentia: Videlicet I. & aquam mineralem, & vulgarem vitriolo imprægnatam, eodem propemodum sapore afficere linguam. II. Utramque aquam, à minori portione gallarum, acquirere purpureum colorem, intercedente differentia

Frid. Hoffmanni Oper. Tom. V.

hac tantum, ut purpureus aquæ mineralis color, ad rubrum, solutionis vero vitrioli, ad cæruleum magis accedat; quod tamen discrimen ochræ subrubræ, mineralibus aquis combinatæ, tribuendum censent. III. Aquam utramque à majori pulveris gallarum copia atramentofo ita tingi colore, ut nigredinem hanc, modo cum pelluciditate pristina, adjecto, alcali commutet, modo etiam acido instillato, denuo recuperet. IV. Aquam neutram conciliare lacti coagulum. V. Utramque parum ab oleo tartari per deliquium turbare & præcipitatum ad ima dimittere. VI. Terram subrubram, ab aqua minerali pariter atque illa, quæ vitriolo imbuta, post evaporationem relictam, itemque ochram sponte sua subsidentem, aliquot guttulis spiritus æque nitri ac vitrioli instillatis, notabilem, cum spuma fumoque suscitare ebullitionem, & huic similem quoque in vitriolo martis à spiritu nitri, non tamen à spiritu vitrioli, quum ab hoc ferrum in vitriolo martis jam tum perfectius, ac in aqua minerali ab acido esurino saturatum sit, annotari effervescentiam. VII. Denique sal, è terra insipida post exhalationem omnimodam superstita, convenienter extractum, colorem quidem pallidum, figuramque irregularem obtinere, eosdem tamen cum vitriolo martis exserere effectus. Hæc sunt palmaria argumenta quibus *Sam. DERHAM in descriptione aquarum mineralium, apud Ilmington repertarum Oxonii MDCLXXXV.* edita, confisus, satis vitriolaceam sospitalium aquarum naturam comprobata esse, sibi persuadet. Conf. *Act. Erud. Lips. A. MDCLXXXVI. p. 446.*

§. III.

At vero, quam imbecillis & ficulneis fundamentis hæc sententia superstructa sit, jam considerandum erit. Nolumus tamen omnia refellere, quippe quæ ita sunt comparata, ut ad confirmationem asserti nihil faciant: sed id tantum ex eorum numero expendemus quod præcipuum est, & quo diluto, reliqua sponte concidunt. Videlicet, vitriolacei quid reperiri in aquis mineralibus, nemo quidem facile in dubium vocabit, cui sensus adhuc sunt integri: sapor enim & tinctura, quam ab injectione omnium adstringentium assumunt, testes sunt omni exceptione majores; sed hoc potissimum in quæstione est: an hoc vitriolum tale sit, quale communis usus est in rebus variis mechanicis? id quod nullo modo, nec rationibus demonstrari, nec experientia probari poterit. Illud enim, quod in aquis medicatis latitat, volatile est; hoc autem, scilicet vulgare, fixum, & ambo naturam ac operationes inter se toto coelo exhibent diversas. Quippe multiplici experientia constat, coloris mutationem, quam ab injectis gallis hæc aquæ suscipiunt, in thermis levem esse ac vix notatu dignam, nisi id statim fiat ad ipsam scaturiginem. Quamprimum enim breve tantum tempus in vase, ad quod aer externus libere pertingere potest, thermalis aqua steterit, non amplius idem apparet phænomenon. In acidulis autem hæc tinctura major quidem est magisque in oculos incurrit & à purpureo ad nigredinem vergit, sed pari ratione perquam facile sapor æque ac color, accedente levi etiam calore vel liberioris auræ afflatu, illico fugatur. Sic aquæ Antonianæ, Egranæ, Schembergenfes, Spadanæ, Wildungenfes, Elsteranæ in Vogtlandia, & non procul à Thermis Carolinis distantes, Buchenses, facile hanc alterationem & mutationem ab externo aëre & commotionibus patiuntur. Nullæ vero diutius & pertinacius hanc tincturam & atro-purpureum colorem servant, quam Pymontanæ, & in Bohemia Tuppenfes, sub ditione Comitum de Lutau, à thermis Carolinis non ultra duo millia-ria remotæ, nihilo minus tamen, ambæ calori admotæ, aut aëris liberiori accessui expositæ, elapsis XXIV. horis, pariter umbram renuunt & omne vitrioli ve-

figium exuunt. Deinceps eandem volatilem vitrioli in aquis delitescens indolem, fixioris autem defectum conspectius arguit: quod nemo unquam eorum, qui pleno ore vitriolum crepant, vel contentissimo studio ex centum harum aquarum libris, tantum unicum vitrioli veri granum chymico quodam ministerio elicere & oculis exponere potuerit. Etenim licet HELMONTIUS Paradoxo IV. jactantius gloriatur, quod ex Spadanis destillationis ope vitriolum extraxerit: vana tamen & falsa hæc esse, inde luculenter patescit, quod nemo alius eadem methodo, vel quæsitissimo artificio, verum vitriolum eruere & adipisci possit. Id igitur potius ex versatili & parum constanti quam minerales aquæ recipiunt colore eliciendum erit: inesse quidem aquis aliquid martiale, quod cum spiritu sulphureo junctum, saporem & colorem vitrioli æmulatur, neutiquam tamen ad vulgaris naturam accedit & cum illo est comparandum. Multo autem minus hanc ob causam, iis fides habenda, qui audito vitrioli nomine, illud ex effectibus vulgaris nostri metientes, ipsas aquas suspectas reddere, immo infamare, non dubitant.

§. IV.

Huic adjungendus & alius est error, qui plerorumque animos obsedit; ac si aquæ minerales, inprimis quæ acidularum nomine insigniuntur, sal quoddam acidum, à quo non tantum nomen adipiscantur, sed & vires, quas in corpore exserunt, trahant, connubio suo susceperint. Est hæc sententia, in qua omnes superioris ævi de hoc argumento scriptores confidenter versantur, unicum si excipiamus Petrum GIVRIUM, qui jam anno MDCLXVII. Parisiis publicæ luci exposuit librum, cui titulus est, *Arcanum acidularum novissime proditum, in quo communis opinio, de aquarum mineralium aciditate, convellitur*: licet ipse hic libellus neutiquam inscriptioni respondeat, sed ut SENECEÆ verbis utar, *multum habeat inanitatis & vani; plus sonet, quam valeat*. In thermis quidem sunt & fuerunt, qui sal quoddam ex alcalinorum genere admittunt; de acidulis vero qui idem asseruerit & momentosis rationibus experimentisque demonstrarit, nemo fuit, antequam id à me factum. Et licet Henr. ab HEER in *Spadacr. cap. II. pag. 13.* luculentis verbis effervescentiam acidularum cum acidis prodiderit: *hanc*, inquit, *aquæ temperiem & Spadani & plerique Germaniæ fontes acidi servant, ut affuso vino, fumum calidum, quasi bullientis aquæ, quidem excitent, odoreque gratissimo nasum, bullis alte salientibus, visum, mire recreent*: nunquam tamen laudatissimo huic auctori, de alcalino in ipsis latitante elemento, suspicio oborta, sed eandem de acido principio retinuit & professus est sententiam. Plura autem sunt quæ alcalinum in acidulis delitescens elementum produnt & demonstrant, quæ superius jam in *disquisitione de elementis aquarum mineralium recte dijudicandis & examinandis* enumeravi & fufius evolvi, eaque propter hoc loco lubens prætermitto. Id tantum monendum esse reor: alcalinum acidulas inhabitans sal, nonnunquam solum esse, nonnunquam cum alio, ad medii, aut salis communis ingenium accedente, nuptum & sociatum.

§. V.

Præter salinum vero hoc aquarum mineralium elementum: aliud adhuc ipsis innidulatur nobilissimum principium, quod quidem oculis subjici & artificiose elici nequit; nihilo minus tamen earum delibatissima pars est, quod ipsas mirabili agendi potentia instruit; videlicet subtilissimum æthereo-elastikum. De ejus origine superius sententiam nostram passim exposuimus simulque monuimus, illius connubium disruptione vaporum, bullularum eructatione, penetranti sapore & compungente odore, nec non hydrometere & quod

aquis eo perfusis diu integritas constet, potissimum manifestari. Eidem vero tenuissimo spiritui etiam tribuenda sunt omnia ea, quæ Veteres de inebriantibus aquis tradiderunt, uti ex AGRICOLÆ libro *de natura eorum quæ effluunt ex terra L. II. cap. 2. & 11.* & Henr. ab HEER in *Spad. cap. II. p. 13.* evidenter cognosci potest. Inde quoque vera desumitur ratio, quare pisces loca scaturigini proxima, incolere nequeant; sed simul ac eo deferantur, spiritu præcluso jugulentur. Quin ipsos quoque homines, in majori copia prodiens è scaturiginis horum fontium ostio penetrans vapor, in præsentissimum vitæ discrimen adducit. De qua re haud supervacaneum erit ETTNERI transcribere verba *de acidulis Egranis cap. 1.* sic patrio sermone scribentis: *Wann der Râumer sich zu lange in dem Quelle verweilet, so benimmt ihm der starcke aufsteigende Geruch den Athem, wie der junge Most oder Wein und neues Bier im Gâhren und Brausen zuthun pfleget, dafs, wofern er nicht alsobald herausgezogen und gerettet würde, mûsste er von dem Qualm vergehen.* Deinde reperiuntur aquæ, quæ tam cito suam amittunt virtutem, ut & tantum vasis exceptæ, & ad alia loca translata, cum recentibus, ad ipsam scaturiginem haustis, nullam amplius, tam ratione saporis, odoris, quam aliarum virtutum, habeant convenientiam. Quod de aqua Charteriensi testatur HÆRNA, *Brevi aquarum exploratore*, quæ ob summam suam volatilitatem, quando Lutetiam Parisiorum portatur, saporem & virtutem perdit, id quod & Swalbacensibus, aliisque facile accidit. Accedit, quod multæ è mineralium aquarum censu, in primis Selternæ, si diutius in vase asservantur simulque aëri accessus patet, aufugiente spirituofo hoc elemento, odorem contrahant inurbanum, effœtum maximeque abominabilem. Idem clarius patescit in fonte, veris acidulis Egranis proximo, qui dicitur Germanis *der Wilde oder Bolder-Sâurling*. Hujus enim aqua admodum est impura & horrendum spargit odorem: quo etiam accolæ commoti, huic fonti adscribunt vim quandam venenosam & lethalem; inprimis quum rana injecta mirum in modum distendatur, aliaque animalcula vita spolientur. Unde supra quoque citatus HÆRNA, hanc aquam mortuam, ob defectum spirituofo principii, appellat, & alio loco, dysenteriam movere credit. Ast vana hæc est opinio. Fœtor enim ille aliunde non provenit, quam quod hic fons è terra prorumpit pingui & ad corruptionem aquis invehendam valde apta, nec à sordibus suis, ut alter ille, cujus major cura ob frequentem usum geritur, repurgatur. Accedit, quod & sal, quod evaporationis ope ex fœtente hac aqua elicitur, eandem plane habeat cum illo naturam, quod ex altero fonte paratur. Id quod etiam testatur & confirmat supra laudatus ETTNERUS, qui *cap. VIII.* de hoc fonte fufius agit.

§. VI.

Sed hæc de elementis aquarum mineralium carptim indicasse sufficiant: jam sub examinis incudem revocandæ sunt variæ virtutes, quas interius assumti foterii fontes exserunt. Hic vero se magnus talium effectuum sistit numerus, quales nullum unquam medicamentum, speciosissimum quoque & mire dilaudatum, præstare poterit: quibus omnibus haud obfcurè visis, multi eam arripiebant sententiam, dependere has singulares facultates à solis, quibus fœtæ sunt medicatæ aquæ, ingredientibus, eidemque tam firmiter inhærebant, ut ferme ipsius humoris, cujus sinu reliqua, quæ medicamentosa pars est, comprehenditur, obliviscerentur. Quum vero salia, vel pure alcalina, vel etiam neutra, immo ipse spiritus ille, quo afflatæ sunt tenuissimus, sine aqua, ad tales effectus edendos, minimè reperiantur sufficientia; gravissimis certe de causis in hanc ivimus sententiam: quod

quod aquarum mineralium virtus, tam in præscindendis, quam curandis morbis, præcipue & principaliter sit adscribenda aquæ, reliqua autem eidem nupta elementa, tantum loco stimuli inserviant. Si enim conservatio & sanitas corporis nostri, à perpetuo, æquabili & temperato fluidorum omnium in humana machina motu dependet circulari, morbus contra ab ordine hocce perverso atque turbato: quis non videt? id, quod hunc motum in debito suo tenore & itinere conservare, deflectentem vero, revocare potest, esse illud, quod sanitatem præsentem conservare, amissam vero restituere optime possit. Quo autem hic motus inoffenso cursu procedat, nihil magis requiritur, quam ut illud, quod movendum est, ad motum suscipiendum aptum reddatur & præparetur: id quod nulla re melius, quam fluidis aqueis perfici potest. Quum enim humores, qui in corpore nostro jugiter circumaguntur, maximam partem ex fluidis aqueis constare particulis, experientia probatum sit, nihil sane quod propius ad eorum naturam accedat, iisque convenientius sit, aqua, excogitari potest. Nec desunt exempla eorum, qui ex quotidiano aquæ usu, loco ordinarii potus sumto, vel ad canam & decrepitam pervenerunt senectutem, vel à gravissimis liberati sunt morbis. Aqua enim est, quæ omnes humores, quibus tum nutritionis, cum reliquarum functionum negotium absolvitur, in debito motu atque temperie conservare potest. Aqua est, quæ impedit, quo minus subtiliores terrestres, salino-sulphureæ partes, in humoribus existentes, putredinem inferant, corpusque labe irreparabili afficiant. Aqua est, quæ omnes viscidos humores, in minimis tubulis obhærescentes, eosque obstruentes, dissolvit atque diluit. Denique aqua est, quæ omnes excretiones adjuvat & promovet, quibus tam per alvum, urinam & sudorem, quam per alia loca, materia corpori inimica expellitur.

§. VII.

Et quid ulterius de iis aquis dicendum erit salubribus, in quibus vix ullum salini vel mineralis principii reperitur vestigium, quæque nihilo minus virtutis in medendo sunt longe spectatissimæ? Quo nomine celebrantur, Schleusingenses, Freyenwaldenses, Toplicenses, Bebrana, Fabaria & in Hassia Schlangenbadenses, aliæque quas jam silentio prætermitto, quippe harum salutaris effectus non aliunde, quam à levi & purissima aqua potissimum petendus ac derivandus est. Attamen quia ab ipsa aqua nihil præstari potest laude digni, nisi copiose hauriatur, & à parciore haustru, sæpe plus damni, quam emolumenti corpus nostrum accipiat, liberalior vero ingurgitatio facile naturæ oneri cedat, quod non facile sua sponte, neque accedente aliunde auxilio, superare & vincere potest, sed inde stagnationes & extravasationes suscitentur: ad præcavenda omnia hæc incommoda, nihil certe erit apertius, quam aquas salino & activo quodam stimulo acuere. Hoc enim non solum fibræ motrices, ad promptiorem edendum motum sollicitantur; sed & materia viscida crassa, tubulorum lateribus apposita, impedimentumque liberiori transitui obiciens, promptius dissolvitur & eluitur. Hinc utique maxima laus, nec exigua præstantissimæ utilitatis pars tribuenda est illis principiis, quæ aquarum mineralium consortium subierunt, salino-activis & spirituosus; cavendo tantum, ne plus iis adscribatur, quam re ipsa præstant ac demonstrari potest.

§. VIII.

Ex eadem falsa & erronea, quam de effectum aquarum mineralium nonnulli tuentur, opinione, alius, non minoris momenti error, traxit ortum. Sunt enim quamplurimi, etiam ex Medicorum ordine, qui, de ha-

rum aquarum salubritate iudicium laturi, eam nulla re melius, quam ex uberiori ingredientium mole, post evaporationem relicta, explorari & monstrari possent, autumant: nulla ratione habita, quod ignis neque hic fidus corporum sit analysta. Hujus quippe auxilio, tantummodo eruuntur & in apricum ponuntur fixiora, minime vero subtiliora: in quibus tamen haud exiguum salubritatis positum est momentum. Terrestris enim, tophæcea & calcaria materia, quæ multæ sunt onustæ, impedit magis aquarum mineralium laudabiles effectus, quam promovet, inprimis calore & spirituosio principio jam fugato. Hinc etiam ejusmodi aquæ frigescentæ & per aliquod temporis spatium aëri expositæ, in corpore nostro, si assumuntur, multas procreant molestias, neque ut aliæ, nativum genium adhuc perfecte obtinentes, tam promptè excernuntur. Qua de re nihil est, quod clarius perhibere possit testimonium, quam ambo notissimi fontes in Carolinis scaturientes. Ibi enim communis ille & calidissimus, qui furiosus dicitur, *Germ. der Prudel*, salit, qui facta leni evaporatione, ex libris duabus aquæ, pulveris alcalini circiter drachmam largitur. Jam si aquæ huic tempus, quo refrigerat, concedas; solidæ materiæ nihil quidem decedit: attamen experientia docet, ejusmodi aquam frigescentem & spirituosio suo principio cum calore naturali orbatam, non sine gravi incommodo assumi. Est vero ibidem alius fons, *Molendinus* dictus, *Germ. das Mühl-Bad*, antea quidem, ob temperatum temporem & parciorem calcariæ materiæ apparatus, neglectui datus, à me autem ante XXIV. annos variis tentaminibus exploratus, & perspecta ejus saluberrima indole, Medicis non modo, sed & illustribus personis, quoties has thermas frequentavi, ad usum summo & majori cum fructu commendatus. De quo tamen inferius, ubi de Carolinis thermis specialius singula exponemus, uberius dicendi erit occasio.

§. IX.

Quo graviores itaque & magis decumani multorum Medicorum de mineralium aquarum elementis & facultatibus sunt errores: eo minus certe mirandum est, quod ex erroneis his theoreticis opinionibus, mendosæ non solum, sed etiam maxime periculosæ, in praxin de fontium salubrium usu, pullularint sententiæ, quas ut jam etiam breviter stringamus, instituti nostri ratio postulat. Scilicet multi sunt, qui levi tantum audituuncula de salutaribus aquis respersi, nunquam vero easdem frequentarunt & coram utilissima earum effecta spectarunt, sed sexcenta & noxia multa iis inesse elementa insipide confinxerunt, non verentur earum usum pro auxilio vehementi atque drastico & ancipiti, vulgo *Pferde-Curen*, judicare & audacter proclamare; quodque nonnisi in corporibus robustis & quadratis inveniat locum: minime vero in iis, quibus natura sensibilius texturæque tenerioris obigit corpus. At vero vulgari huic & quasi civitati adscripto commento, quantum non ratio solum, sed & experientia repugnet, declarabunt sequentia. Quis enim est tam perfrictæ frontis, qui aquam puram remedium æstimare velit yehemens? quum eadem nihil aut fingi aut excogitari possit innocentius. Quid est porro in arte medica, quo securius uti possimus, salibus, in primis vero neutris, alcalinis? Quid magis violentiæ expers & à robore defectis proficuum, quam subtilis calciformis & martialis terra, aquæ purissimæ & levissimæ hospitio excepta, aut salis amico nupta? Quid denique, quod corpori nostro majus robur inspirare possit, quam subtile fluidum, insipidum & spirituosum? Quorum singulorum nomina, minime drasticonum eorumque, quæ corpori nostro inimica sunt, generi accenseri possunt,

possunt; & à quibus tum fluidorum, tum solidorum motus, aut turbari, aut intercipi possint. Nihilominus tamen hæc sunt activa ista principia, vigore & lenitate mixtissima, à quibus medicinales aquæ omnem suam facultatem trahunt. Hinc etiam est, quod minerales aquæ, quicquid agant, tranquille, placide & sine ullis molestiis perficiant. Sic moventur fædes, sic proritantur vomitus, sic provocatur urina. Nulla enim inde sentitur virium destructio, nec ulla appetitus dejectio, licet stomachus subvertatur & singulis diebus plus quam vices deponatur alvus; quin potius jam antea languidus & emortuus, revocatur. Urinosus latex copiose, sed sine acrimoniæ sensu, placide stillat. Et cutis meatus sese pandunt sudorque liberaliter prorumpit, sine ulla molestia viriumque languore. Quid? quod magis mirandum, vidimus personas utriusque sexus constitutionis tenerriam, quæ gravioribus morbis, febribus, hæmorrhagiis aliisque malis, quin immo scæminas, quæ puerperio nuper erant defunctæ, cum pallido faciei colore viriumque maxima infirmitate thermarum Carolinarum potum intrepide suscipientes, ne minimum quidem inde tulisse detrimenti. Secefferunt per singula excretoria aquæ quam optime, nec leve fuit solamen & virium incrementum, quod inde reportarunt. Hinc jam olim, pueros ac prægnantes his aquis tuto uti posse, luculenter probavit Hen. ab HEER in *Spadacr. p. 143. seq.* Hæc enim divina & plane singularis salubrium aquarum virtus est, ut in tenerioribus & sensibiliioribus subjectis, longe facilius sint operationis, quam in robustioribus: quo eadem, non tantam aquarum copiam ingerere teneantur, sed à portione mediocri ad votum commoveantur & expurgentur. Illud tamen dissimulandum non est, liberaliorem aquarum, saporis non admodum suavis, haustum, qui interdum ad decem ascendit libras, singulis diebus, intra aliquot horarum spatium infundendum, quandam molestiam ac tedium gignere iis, qui huic potui nondum fuerunt assueti: ex quo tamen nequitiam conficitur, uberiorem ejusmodi potationem esse dicendam *eine Pferde-Cur*, quum à copia hauriendæ aquæ, ad violentiam operationis, argumentatio ducatur longe injustissima.

§. X.

Quamvis autem minerales aquæ, si earum indolem & vires spectemus, remedium sint quam maxime innocens omnisque violentiæ expers, & ejusmodi scomma summopere insulsum: multoties tamen contingit, ut ipsorum medentium, qui earum operationem consiliis suis dirigere & pro circumstantiarum ratione dispensare nituntur, culpa, cura iisdem instituta fiat, *eine Pferde-Cur*. Perversus enim & undique à Medicis receptus mos est, usui harum aquarum, vel in ipso die, quo cura incipitur, vel diem ante, præmittere purgans quoddam drasticum: quo corpus, ut vesana eorum fert opinio, ad earum potationem & operationem reddatur aptius. Certe si absolum hoc molimen accuratius ponderamus, detrimentum inde corporibus infligitur, vix ullis auxiliis reparabile. Purgantium quippe fortiorum, ut sunt ea, quæ ex colocynthide, resina gialappæ, scammonio, elaterio, gummi guttæ, helleboris, aliisque conficiuntur, ea vis ac natura est, ut virulento suo & caustico, quo constant & agunt elemento, ventriculi & intestinorum robur, eorumque motum peristalticum, ob immediatum scilicet quem cum his habent contactum, plane pervertere & destruere possint. Quod quam intempestive hic fiat, inde patet, quia nihil est, quod magis ad optatum harum aquarum effectum requiritur, quam harum partium integer adhuc incorruptusque motus ac tonus. Longe vero periculosior & funestior validissimorum ejusmodi pharmacorum usus iis est, qui acidularum & fontium fri-

gidorum potum adornarunt. In his enim hæc omnia mala, ob frigus, augentur potius, quam imminuuntur; quum contra thermarum aquæ, ob calorem, noxam hanc & labem quodammodo diluere, constrictiones solvere, & deperditum motum quadantenus instaurare possint. Maximum autem damnum, à medicamentis his drastice proveniens, quodque magis in oculos incurrit, illud est, quod mox sequenti die, quo aquæ bibuntur, non tam promte, ut debebant, per omnis generis colatoria transeant & excernantur: ob constrictionem nimirum, quæ inde in intestinorum canali & contiguis partibus relinquitur: eodem prorsus modo, ac quotidianæ experientiæ testimonio constat, quod in aliis etiam hominibus, medicatis aquis non utentibus, post fortiorum purgantium usum, alvus sequentibus diebus, sicciior fiat, magisque quam antea constriungatur.

§. XI.

Verum enim vero, quemadmodum abusus in aliis rebus non tollit usum legitimum: sic & hic non omnia omnino damnamus purgantia, modo ea adhibeantur, quibus non tam vehemens, corporique nostro inimicum inest principium. Etenim summopere utique necessarium est, ut antequam mineralium aquarum usus instituatur, prima corporis regio expurgetur, præsertim in iis, quorum intestina tenacis & visceri humoris sentina scatent, quæ liberum aquarum transitum cohibendo, salutarem earum operationem non modo remoratur, sed varia etiam incommoda affert. Aut, si exterius tantum iisdem uti animus sit, idem ut perficiatur ex usu est, ne in motum acta & magis acri reddita intus delitescente corrupta & aliena materia, salutaris effectus impediatur, vel plane novi morbi inducantur: id quod inprimis omnes ii cum damno suo experiuntur, qui corpus minus præparatum incauti balneo in Carolinis committunt. Hinc summo jure horum loco commendanda sunt ea, quæ primarum viarum colluviem & sordes clementer abstergunt, & sine ulla molestia educunt. Ad quod obtinendum, nihil erit efficacius, quam infusum mannae, cum cremore tartari, aut rhabarbaro paratum: vel pro circumstantiarum ratione, semunciam vel drachmas sex salis Anglicani, Egrani aut Sedlicensis in mensura dimidia aquæ, quam potare constitutum est, primo die assumere, vel etiam quod mirifice prodest, Sedlicensis aquæ sedecim circiter uncias bibere. Quod si vero fæces induratae intestinis inhærent, tunc optimo quoque cum successu his superaddi possunt clysteres demulcentes: è quibus præ omnibus nobis arrident ii, qui parantur ex floribus vel radicibus emollientibus, decocto avenaceo, vel lacte & oleosis, adjecto sale. Cæterum moneo, in iis, quorum prima regio non humorum scatet insigniori colluvie, sufficere primo haustui aquarum mineralium drachmas tres salis cujusdam stimulantis superius laudati admiscere, quo aquarum transitus mirum quantum facilitatur. In cujus rei veritatem placet apponere verba H. ab HEER p. 94. *Spadacr.* quæ sic habent: *Si, qui corpore sat laxo fuerint, ut sunt qui bis, ter, indies secedunt, nullo medicamento prævio, Poubontii vel Geronsterii aquis, per se satis alvum jam incitatum promoturis, uti possunt.*

§. XII.

Non minori reprehensione dignus eorum censendus error est, qui, finita aquarum cura, purgantibus utuntur vehementissimis, nullo modo, vel de diversa corporum natura, vel regimine hic necessario, solliciti, quo sine ulla mora reliquæ aquarum è corpore exturbentur. Illud quidem certum & solerti experientia comprobatum est, quod aquæ tam copiose & longius extracto usu haustæ, in variis corporis partibus, in-

primis vero in intestinorum plicis, stagnare soleant, & quod eadem in his diverticulis nequaquam relinquenda, sed potius expellenda sint: ast hoc non imprudenter & cum virium jactura, sed potius blandis perficiendum. Qua de re circumspecti Medici est, ea hunc in finem discernere atque seligere, quæ huic vel illi corpori, ratione texturæ & roboris, in singulis maxime differentis, optime conveniunt. Non quidem hic omnem fortiorum tantisper medicamentorum usum rejicimus; sed ea tantum præponimus, quæ non virulento quodam principio agunt & validam tamen & expeditam operationem exserunt, cujus generis potissimum sunt mannata, auctiori dosi data cum salibus, & amara, ac inter hæc extractum rhabarbari, hellebori nigri rite præparatum, it. extractum aloës, utpote quæ longe facilius à liquoribus intestinorum soluta, in actum deduci possunt, nec ut resina gialappæ, scammonii, gummi guttæ, lateribus intestinorum adhærent, eademque laceffendo, vel acerbissimos dolores, vel etiam inflammationes lethales producere solent, inprimis si sola, nec cum amaris mixta, offerantur. Si quis vero nihilo fecius singularia hisce purgantibus fortioribus effici posse sibi persuadeat & firmiter usui eorum insistat, huic auctor suusque sum, ut ea in minori propinet dosi, & sequenti mane, per sal Ebshamenſe vel aliud neutrum, ad drachmam unam porrectum, hujus purgantis operationem promoveat. Notum enim est, quantopere ejusmodi salia intendunt atque augeant horum medicamentorum efficaciam, ita, ut unicum diagrydii vel resinæ gialappæ granum, cum decem vel quindecim granis salis neutrius mixtum, majorem in operando præstet virtutem, quam si gr. sex de his solis fuerint assumpta; nihilo minus hæc, quam nupta sic & purgantia & salina, facultas exserunt, tutissima est & non facile inde sanitatis periculum timendum. Sed fingamus; occurrere nobis quendam, natura & ventriculo robustiori dotatum, in quo magna stagnantium restet aquarum copia: tunc utique fortius quoddam eligendum erit purgans, idque etiam sine ulla noxa offerri poterit, modo cum regimine convenienti hoc præscribatur, id est omne frigus à corpore arceatur, calidus in quo degat assumens eligatur locus, & tam ante, quam post medicamenti operationem, juscula calida demulcentia, ut sunt avenacea, interponantur, ne ventriculus, his delinitus quasi, ab acrimonia arrodente caustica, tam facile læsionem accipere possit.

§. XIII.

Circa purgantium usum, adhuc alius occurrit error, à quo multi Medicorum, magni etiam nominis, qui hos fontes frequentant, non sunt immunes. Videmus enim plerisque unicam tantum purgantis formulam, in usum trahere, quam omnibus, sine ulla distinctione, offerunt, quasi natura ad unius medicamenti regulam corpora aptasset omnia. Alii, & quidem maxima pars, pilulas secum gerunt ex extracto hellebori, aloes vel diagrydio paratas, quibus alii resinam gialappæ addunt. Alii vero extractum aloes cum extracto colocynthidis acuere solent. His quidem non omnem derogamus usum: sed hoc tantum urgemus, quod pro tanta corporum differentia, ratione sexus, ætatis, temperamenti, & humorum in primis viis latitantium, non commodum ubique inveniant locum. Etenim ii, quibus ventriculi & intestinorum tonus est destructus, & qui immodicis alvi fluxibus sunt obnoxii, ut in hypochondriacis, gravidis, puerperis accidit, item ubi ex iracundia magna in primis viis colluvies acerrimorum humorum est producta, nullo medicamento melius, quam rhabarbarino, expurgantur. In iis, ubi acrimonia humores peccant, quorum corpora arthriticis, rheumaticis & catarrhalibus vexantur passionibus, &

quandoque in melancholicis & hypochondriacis, manna adjunctis salinis, effectus sunt exoptatissimi. Ubi bilis abundat, ad copiam & fervorem ejus infringendum simulque evocandum, nihil tamarindinatis erit præstantius. Quæ omnia vero inverso ordine adhibita, inversos quoque & plane sibi contrarios edere necessum est effectus. Ut adeo pateat, Veterum sententiam non ludibrio prorsus habendam esse, qua singulis humoribus singula etiam purgantia opponenda esse, statuebant, si modo non ultra fines ab experientia, ratione suffulta, positos, procedamus, de quo vero copiosius hic agere, ab instituto nostro erit alienum.

§. XIV.

Alia potius mihi de purgantium in aquarum mineralium usu oblatione disquirenti sese offert quæstio curiosa, quæ sæpe Medici & ægrotorum animos his aquis utentium ancipites tenet, atque crucem figit: num scilicet semper sit necessarium, una potus cura absoluta, ante, quam balneum ingrediantur, pharmaco sumto corpus expurgare? Cui ut satisfaciam, eorum subscribo opinioni, qui purgantia non semper balneo præmittenda esse, asseverant. Si enim bene & ad votum aquarum secessio respondit earum ingestioni, nec in pedibus, aut totius corporis ambitu, aquarum stagnantium vestigium amplius superest, & præterea curatio hæc tantum præservationis causa instituta est, quid est, cur tam crebra purgantium assumptione ventriculum totumque corpus fatigemus? Nihilo minus tamen, si verum fateri licet, sæpius Medici magis quæstui suo, quam ægrotorum hac in re serviunt salutem: liberaliter & officiose obtrudentes purgantia sua, quo auctis his, sostrum quoque increſcat. Longe vero aliter se res habet, quando aquæ eadem mensura, qua haustæ sunt, per excretoria non redduntur, sed in corpore stagnant ac moras neſtunt, vel si cum corporibus nobis res est hypochondriacis, quorum ventriculus magna viscidorum & acidorum, ob alimentorum digestionem depravatam, est obsessus saburra, tunc utique non dissuadenda, sed potius etiam atque etiam commendanda sunt alvum ducentia, nisi ea majoribus exponere velimus periculis corpora. Uti vero jam in superioribus inculcavi, sic & hic summa adhibenda est diligentia, ne fortioribus, sed levioribus naturæque magis amicis illud moliamur; è quibus semper summo cum fructu eliguntur, potus conveniens aquæ Sedlicensis, vel infusum mannatum, aut etiam pilulæ *Rusi*, *Aloëphanginæ*, & *Avicennæ*, vel ex harum ordine alia.

§. XV.

Excussis itaque ac discussis variis, de inepto & pernicioso purgantium usu, opinionibus, sequitur: ut jam de venæ sectione, quatenus ad thermarum & acidularum curam proficua est, quædam differam. Multi adhuc reperiuntur, qui *ERASISTRATI*, *HELMONTII*, aliorumque hujus farinæ hominum salivam lingentes, summa cum auctoritate, falsis & in ipsorum cerebro tantum enatis rationibus ducti, venæ sectionem tanquam remedium, quo nihil magis ad vitæ thesaurum & animæ vehiculum exhauriendum sit commodum, proscribunt & è foro medico ejiciendam pleno ore pronunciant. De cujus autem sententiæ valore fusius hic agere, nostrum non est; sufficit ostendisse, sanguinis missionem sæpenumero, ad aquarum potum rite & cum fructu suscipiendum, summe esse necessariam, eandemque nonnisi maximo cum ægrotorum damno omitti posse. Non quidem omnibus subjectis eam imperare convenit, sed tantummodo iis, quorum corpora nimia sanguinis & humorum copia sunt repleta. Qualia sunt foeminarum, in quibus mensum fluxus, vel à morbo, vel à graviditate, est inter-

interceptus, virorum, in quibus hæmorrhoidalis excretio est suppressa, &, quorum vasa in totius corporis ambitu sanguine turgida prominent, item, qui vino & lauto vivendi generi sunt addicti, nec non ii, qui faciem rubro & vivido colore perfusam gerunt, quosque accurate depingit CELSUS *L. II. cap. 2. Si plenior, ait, aliquis & speciosior & coloratior factus est, suspecta habere sua bona debet. Quæ quidem nec in eodem habitu subsistere, neque ultra progredi possunt, fere retro, quasi ruina quadam, revolvuntur.*

§. XVI.

Quo vero hujus remedii utilitas, ad harum aquarum potum, magis elucescat, nobiscum paulo altius considerabimus: an fluidorum qui in corpore nostro jugiter circumaguntur copia, aquarum operationes turbare & impedire possit. Ad facilem autem salutaris humoris per omnes corporis tubulos transitum, requiritur, ne vasa majori humorum copia sint oppleta, quam motus eorum impellere, trudere, subigere & vincere potest. Si enim hæc major est, tunc motus fit remissior & tantisper suspenditur, & sic totius sanguinis circulus, à quo tamen omnes excretiones dependent, impeditur ac sufflaminatur. Id quod haud obscure patet in corporibus plethoricis. In his enim ordinario arteriæ debilius atque languidius micant, quam primum vero sanguinis copia venæ sectione imminuitur, tunc pressio pede sequitur pulsus, multo quam antea fortior ac robustior. Quod si itaque, omnibus vasis jam sanguine tumefactis & inflatis, tanta accedit aquæ copia, tunc eadem non solum minus expedite per canales decurrit, sed stagnat & corrumpitur, sed etiam facile, ob aquarum molem à tergo prementem, excitari possunt sanguinis ad partes nobiliores congectiones, ex quibus deinde hæmorrhagiæ, dolores, inflammationes, infarctus viscerum, aliaque mala facile provenire possunt: ut sic ii, qui ejusmodi constitutum corpus obtinent, neglecto hoc remedio, in præsentissima vitæ adducantur pericula. Quando vero hæc subiecta, unum vel duos dies ante aquarum potum, venæ sectione minuunt sanguinis abundantiam, nequiquam jam recensita mala eis timenda sunt; sed aquarum usus exoptatissimos potius feret fructus. Id quod sæpius ii, qui cum prudentia fontium usui præsumunt, observarunt. Multi enim ibi inveniuntur, qui à prima aquarum cura pessime sese habuerunt, aquis non rite per convenientia excretoria exeuntibus, sed corpus mirum quantum aggravantibus & gravia incommoda inducentibus, ita; ut desistendum esse à potu jam crediderint & curam abruptendam; alio vero Medico in consilium adhibito, & admissa venæ sectione, non solum ab omnibus liberati sunt his molestiis, sed & alteram incipientes curam, maximam & incredibilem inde persenserunt utilitatem. Sic sæpe miseri ægrotantes gravissime luunt Medici imperitiam.

§. XVII.

Circa acidularum & frigidorum fontium mineralium potum, nonnullorum quoque hic proponenda erit opinio: qui se nimis scrupulosos in iis ordinandis gerunt, nec easdem iis suadere audent, qui, ob genus nervosum nimis debile, frigida terre nequeunt, & sic valetudini quam tutandam susceperunt gravius obsunt. Id quidem certum & experientiæ calculo confirmatum est, non solum ab externo frigore sæpe periculosissima in corpore nostro produci mala posse, neque etiam est, quod dubitemus, quin idem longe certius & magis contingat, si ad interiores partes, frigori ferendo nondum assuetas, ei conceditur aditus. Sunt enim multæ certe in promptu historiæ, hoc luculenter comprobantes, ex quibus autem tantum illam quæ in *M. N. C. Dec. I. A. VI. & VII. Obs.*

211. narratur, proferam, ubi ex totius corporis refrigeratione, visus privatio omniumque membrorum tremor secutus est. Et BARTHOLINUS in *Hist. Anat. Cent. I. hist. 76.* refert de viro, qui ex frigido clystere injecto, gravissimis ortis symptomatibus, æterno frigore obrutus, esse desiit. Porro, si auctoritatibus hic agere licet, audiamus CELSUM *L. I. cap. 9.* sic dicentem: *Frigus inimicum est seni, tenui, vulneri, præcordiis, intestinis, vesicæ, auribus, coxis, scapulis, naturalibus, ossibus, dentibus, nervis, vulvæ, cerebro.* At vero si quis hanc ob causam acidularum usum penitus rejicere vellet, is certe injurius esset in præstantissimum hoc remedium & stupiditatem suam nimium proderet. Quin potius, si quid ex jam recensitis malis ægrotorum infestat corpora, perfrigerata quidem nimis potio serio interdicens, & methodus potandi excogitanda & administranda, qua accommoda reddatur aqua imbecillis ejusmodi corporibus. Id quod, ut cum bonis ægrotorum rebus perficerem, à longo jam tempore solenne mihi fuit, potantibus imperare, ut vasa aqua acidularum frigida impleta, calidæ altius imponent, usque dum calorem corpori & palato assumerint magis convenientem: hac tantummodo cautela addita, ut subtili foramine, acu facto, vasorum obturacula pertunderent, ne contentus spiritus summe elasticus, à calore expansus, nullum exitum inveniens, vasa diffunderet. At inquis: hoc modo hæ aquæ spirituoso suo, de quo tanta prædicasti, & quæ earum quasi anima est, privantur principio? Ego vero, non intensam hic intelligo calefactionem, sed tantum leviolem, quæ ex acidulis, utpote majori præ thermis hujus spiritus copia abundantibus, non omne subtile auferre potest: inprimis quum lagenæ adhuc obturatæ maneant, nec liberior aëri pateat accessus, nec per exile foramen tam brevi tempore omnis omnino elabi possit is spiritus. Notum enim thermas, licet sint calidissimæ, non penitus destitutas esse hoc volatili principio. Et quid opus est verbis, ubi rerum adsunt testimonia.

§. XVIII.

His vero veluti in conspectum quendam, quatenus scire tam Medico, quam iis, qui potum aquarum subire volunt, necessarium est, adductis, nunc descendendum ad ipsos morbos, in quibus curandis mineralibus aquis superius nihil est. Ex his autem tantum persequar ejusmodi morborum genera, quibus maxima Medicorum pars plus obesse, quam prodesse aquas has medicatas, docet, paucis, tam ratione quam experientia subnixis, ostensurus, quam longe hic à veritatibus aberretur tramite. Inter notissimos autem morbos, à quibus minerales aquæ alienæ censentur, primo loco expendemus nimium mensium & hæmorrhoidum fluxum. Medici, quibus vera harum excretionum causa nondum est cognita atque perspecta, quique falsæ adhuc, de variis metallicis, vitriolaceis & stipticis harum aquarum ingredientibus, opinioni inhaerent; experientia quoque edocti, nihil esse, quod majora in his morbis excitare possit damna, quam adstringentium usum, interdum quoque thermarum vel acidularum potum: his singulis collectis, non tantum hic nihil juvare, sed potius magis nocere, aquarum medicatarum usum, interponunt judicium. Quum vero nobis ex divino illo circuli sanguinis invento, longe alia, de vera causa harum sanguinearum evacuationum, si excessu delinquant, illuxerit sententia, nec inanis amplius de ingredientibus stipticis nos terreat timor: eorum sententiam jure meritoque, ut vanam repudiamus. Si enim paulo accuratius in causam hæmorrhagarum enormium inquirimus, nihil eam esse aliud invenimus, quam liberioris progressus sanguinis in partibus quibusdam turbationem & impeditionem. Hoc autem non rite procedente, viscerum infar-

infarctus generantur atque obstructions, per quæ quum sanguis non, ut antea, tam prompte transire possit, & à tergo semper major appellatur copia, tunc in alia ut irrumpat loca necesse est: quæ scilicet vel jam hisce excretionibus sunt afflueta, vel ubi levissima sentitur resistentia, ibique viam sibi faciunt, & sic impetuosius & nimium erumpunt. Quare primaria utique ejus, qui his vitiis feliciter & cum ratione opitulari nititur, erit intentio, ut viscerum infarctus & obstructions referet, easque aperiat, circulumque sanguinis per ea rursus æquabilem ac liberum reddat: id quod nullo certe præsidio melius & efficacius perfici & præstari potest, quam aquis leni salino stimulo armatis; quippe quæ, copioso suo liquido humores diluunt, attenuant & ad motum aptos reddunt, salinis autem aciebus viscida dissolvunt, & canales, ut fortius & crebrius intus contentam molem premant atque protrudant, sollicitant. Diferentis verbis id de Spadanis testatur *Henr. ab HEER in Spadacr. cap. IX. pag. 83. inter cætera*, inquiens, *mensibus movendis hæ aquæ inprimis idoneæ sunt, quod millies experientia comprobavit. Et tamen nimium eorum fluxum, quovis alio medicamento feliciter sistunt.* Quo vero eo certius & majori cum fructu saluberrimus hic mineralium aquarum effectus impetretur, probe & accurate erit circumspiciendum: ne corporibus, hisce malis conflictantibus, major & intemperantior aquarum potus permittatur, sed potius acidulæ & thermæ temperatiores, nec nimis calidæ commendentur. Quantopere enim exquisita hæc dignotio & circumspectio necessaria sit, luculento inprimis exemplo sunt fontes ambo in Carolinis; siquidem ex molendini temperati usu optimus & quam maxime proficius subsequitur effectus, communis vero æstuius majus reddit damnum, ut malum majora inde capiat incrementa. Id vero serio monendum, ut si his in casibus & ægrotantibus nimis sanguinis profluvii detentis, aquarum mineralium potus instituitur, summopere ante, inter & post eundem evitentur purgantia aloëtica & fortiora omnia, quibus major sanguinis orgasmus producit: & potius, eorum loco, in usum vocentur leniora, & quæ simul roborantem virtutem habent, ut sunt amara, rhabarbarina & fennata.

§. XIX.

Quemadmodum vero harum aquarum virtus, in excretionibus hisce nimis, plane est eximia: sic & in harum suppressione, non minori splendent efficacia; de qua nemo amplius dubitat, nisi qui nunquam easdem vidit & frequentavit, sed in earum cognitione rudis insulsus ignotæ rei existimator est. Quum enim harum solennium & criticarum sanguinearum evacuationum suppressio & impeditus successus, non nisi vel ab obstructione, vel spastica constrictione vasculorum, quorum oscula alias sanguinem plorant, proveniant: idemtidem patet, ad easdem revocandas iterumque promovendas, apprime usui salubres aquas, quæ prompte ad tubulorum angustias provehuntur & non solum ibi obhærescentes & alveos obstipantes crassiores substantias incidunt, eliquant & elateris sui anisu elidunt, sed etiam humoris largi ope, crispas & strictas fibras laxant & stricturam tollunt, & sic ut cruor effundatur viam pandunt. Quod ut eo testatius innotescat, licebit in confirmationem inferre historiam notatu dignissimam, quam ante aliquot annos contigisse novimus, & ex quamplurimis feligere placuit. Vir scilicet quidam honoratior, annum quinquagesimum circiter agens, temperamenti sanguineo-cholerici, vitæ aulicæ, vinosæ & inordinatæ diætæ à multo tempore assuetus, incidit in podagram fluxumque hæmorrhoidalem, stata tempora tenentem, quorum tamen incommoda levissime per-

tulit, quamdiu venæ sectioni, justo tempore institutæ, indulgit. Ante vero aliquot annos, nescio quis Medicus, sanguinis missionem dissuadet, senectutis ingruentis prætextu usus, cui quum obtemperaret æger, tempore æstivo, horrendis colicis, cum durissima alvi obstructione, affligebatur doloribus. Medici ejus ordinarii, veram causam hujus doloris ne suspicantes quidem, in podagram retropulsam rejiciebant culpam, & venæ sectionem plane inutilem & suspectam, unanimi consensu, judicabant. Alius vero, rerum causas propius sciscitatus, statim ut vena in pede pertunderetur, invitis licet ordinariis, & clysteres emollientes subjungerentur, præcipiebat. Quo facto, dolorum vehementia præsentissime fracta, sensim in meliorem æger redactus est statum, donec tandem appetente ordinario tempore, ad thermas Carolinas transferri se curaret; ex quarum usu, tam interno, quam externo, hæmorrhoides cum podagra felici cum successu redierunt, colici autem dolores penitus remiserunt.

§. XX.

A sanguinis excretionibus nimis, transitum faciam ad lymphaticas & serosas, è quibus eæ, quæ corpus nostrum frequenter molestare consueverunt, in viris sunt gonorrhœa, & in foeminis fluor albus. De hoc morborum genere multi sunt & fuerunt in hac sententia, quod aquæ minerales iis minime conveniant, sed potius hi fluxus inde augeantur. *Henr. quidem ab HEER* jam suo tempore sat evidenter hujus rei falsitatem annotavit in *Spadacr. cap. IX. p. 80.* sic dicens: *Gonorrhœæ venereæ, quicquid alii dubitent, certo auxiliatur: quod & ego cum alias, tum hoc anno, in duobus Parisiensibus & alii observarunt: parastatarum dyscrasie hinc natæ etiam utilissima est. Tuto itaque qui morbo vel gallico, vel suo verius laborant, utantur.* Sed lepida sane est, quam de hac re ibidem sibi fingit ratio, ita pergens: *si enim metalla, fatentibus omnibus, vim specificam ad hunc morbum debellandum habent: hujus autem aquæ facultas tota ex metallis est: cui dubium, quin Adonidis nepotuli, propitiis his aquis usuri sint?* Alii, & quidem emunctioris nasi Medici, vanitatem hujus rationis videntes, suffragante quoque experientia, quæ docet, quod ab aquarum mineralium usu hi fluxus plerumque fiant copiosiores, pristinam deferentes sententiam, in contrariam ruebant; ignorantes, posse adhuc aliam veritati longe similiorē, de hac re erui rationem, ad quam vero, horum fluxuum veram originem nescientibus, iis pertingere non licuit. Nimirum quum hæc nostra ætas nos longe certiores de vera sede & causa fluxus seminis in viris & fluoris albi in foeminis inveterati, reddiderit, quod scilicet, ille plerumque ex imprudenti curatione benignæ gonorrhœæ originem trahat, dum glandulæ prostatæ aliæque in quibus seminis officina est, scirrhusæ & fistulosæ factæ; hic autem ab acri sub ferventiori & crebriori congressu generato, aut per impurum coitum insinuato humore proveniat, qui postea glandulas vaginales ipsasque lacunas glandulosas vitiat, ut non solum copiosius succo suo circumjectas partes irrigent, eundemque per inferius genitalium ostium dimittant, sed is etiam simili labe infectus, fibrillas lancinando arrodendo & exedendo, excoriationes & ulcera efficiat, quorum materia virulentum reddit fluxum: non minus liquido constat, ad abstergendas & contemperandas has sordes, glandulas induratas reserandas, à robore dejectas fulciendas & erosas has cum reliquis partibus consolidandas utilissimum esse aquarum mineralium usum. Hoc quidem certum est, quod eo tempore, quo aquæ potantur, hi fluxus incrementum capiant: absoluto autem potu, certior postea & constantior sanatio ac consolidatio est promittenda. His aquis vero semper adjungenda sunt medicamenta

balsamica, & lignorum decocta temperata, pro potu ordinario præscribenda: quibus omnibus mirum quantum hæc cura facilitari potest.

§. XXI.

Neque vero tantum in harum glandularum vitiis aquarum medicatarum usus summopere est laudandus, sed etiam in universo corpore constitutis glandulis, vel obstructis, vel à naturali defectis tono, ob aperientem, diluentem, resolventem & abstergentem facultatem, mirifice prodest. In cujus rei fidem curiosam aliquam observationem ante aliquot annos annotatam, adjungam. Fœmina, præcipuè in Lusatia familiæ, ætatis, quantum memini, triginta annorum, ante aliquot menses à Medico quodam poscit laxantem medicinam, non quod ægram se sentiret, sed morbum prævertendi gratia. Et ille quidem officiosus, electuarii forma aliquid exhibet, à cujus usu, non multo post, in ptyalissimum largum ac continuum, per octo fere menses durantem, incurrit, omnes vires penitus depascentem & corporis venustatem ac robur deturpantem. Thermas adit Carolinas, hisque per paucos dies, tam interne, quam externe usæ, debiteque expurgata, non solum salivæ molestum fluxum evanescere cum gaudio vidit, sed pristinas quoque vires non lento gradu recuperavit. In hac fœmina notabile illud accidit, quod omnibus optatæ curationis jam defuncta partibus, quum balneo nimis calenti diutius insideret, quam præceptum ipsi esset, subito ad pristinum malum relabi videretur. Et relapsa sine dubio fuisset, nisi Medicus cito succurrens, inferiora emunctoria laxando, majus malum antevertisset.

§. XXII.

Hunc errorem excipit alius, antecedenti non multum cedens, nec minori reprehensione dignus: scilicet aquarum mineralium potum noxam inferre pulmonibus, eorumque vitia pejora reddere solere. Cui sententiæ nihil aliud quam falsæ, de harum aquarum ingredientibus, opinio, & incongrua ac immatura experientia, quam de iis, quorum pulmones jam ulceribus corrupti ac consumti erant, desumebant, ansam dedit. Id quod deinde in omnibus pulmonum morbis fieri, sibi imaginabantur ignari. Pleraque autem pulmonum vitia à glandularum, quibus hoc viscus est refertissimum, obstructione & induratione oriri, ex quibus deinde tussis inveterata, phthisis, respiratio difficilis, asthma aliæque proveniunt, solers & accurata cadaverum, his morbis defunctorum, patefecit inspectio. In quibus singulis morbis unica medentis cura & intentio eo dirigenda, ut tubercula & scirrhi hic latitantes & morbum causantes, dissolvantur atque referentur. In superioribus autem jam satis superque, ut spero, ostendi, nulla re præsentius, quam aquarum potu, id effici posse. Ne vero acrimonia salina harum aquarum, quæ utique pulmonum substantiæ spongiosæ & subtili est inimica atque contraria, damnum inferre possit, summo cum fructu, non solum ad falsas in aquis delitescentes partes infringendas, sed & totius massæ sanguineæ acrimoniam temperandam atque obducendam, aquæ hæ commiscuntur lacti vel asinino, quod teste experientia optimum est, vel caprino. Nullum enim, quæ multorum falsa est opinio, ab acidulis lacti infertur coagulum, quin potius magis præcavetur. Nec desunt varia exempla, quibus aquarum salubrium in pulmonum vitiis usum ulterius corroborare possem, è quibus tamen illud, quod recentius animo obversatur, reliquis præfero. Virgo viginti annorum, temperamentum sanguinei, quæ faciem præ se ferebat pallidiusculam, & tributum lunare parce, & male ad calculum persolvebat, corripiebatur ante aliquot menses, feroci tussi,

tempore præsertim matutino & post meridiem, cujus vehementia ventriculum ita sæpe in consensum trahebatur, ut vomitu pituitæ parum, nec sine anxia difficultate, rejiceret. Alvus inter hæc dura & sicca erat. Hæc cum thermarum Carolinarum aquas triduo ad præscriptum & consilium bibisset, efficacia non obscura eluxit; quippe tussis molestia sopiebatur, ut brevi post, absoluto remedii justo usu, sana & hilaris ad suos remearet.

§. XXIII.

Sed quod de pulmonibus jam dixi, idem quoque factum reliqua viscera, in imo ventre sita, sustinuerunt omnia. Quam multi enim è Medicorum reperiuntur numero, quorum sermones & libri de maximo aquarum mineralium damno visceribus inflicto, pleni sunt atque referti, è quibus tantum produco AGRICOLAM, qui in libro de *natura eorum quæ effluunt ex terra* L. II. cap. 2. hæc omnia sat crasse explicat, cujus verba, ne L. B. stomachum commoveam, transcribere dubito. Monendum vero ante omnia, nobis non cum iis hic controversiam esse, qui de viscerum jam plenaria consumptione ac labe id intelligunt, vel ubi humorum jam adest extravasatio, ut in thorace & abdomine, à disruptis vel erosis vasibus, vel præsentibus apostematibus, quo in loco utique, ne major fiat extravasatio morsque acceleretur, ab his aquis est abstinendum. De quo singulare exemplum tradit Cl. BERGERUS in *descr. therm. Carol. cap. IX. p. 252*. Minime autem id de omnibus viscerum dicendum est morbis. Maxima quippe morborum, quæ lentis incrementis adolescunt & diu affligunt, pars, ab infarctu & obstructione harum partium, indeque sanguinis cursu impedito, originem sumit, ad quos præcavendos vel tollendos, aquis mineralibus convenientius est nihil. Hæ enim sunt, quibus viscerum robur conservatur obstructionesque referantur. Hinc optime antevertunt scorbutum, cachexiam curant, asthma præcavent, abortus & sterilitatem tollunt, podagram jam præsentem minuunt & imminuentem repellunt, hydropem avertunt, & calculorum generationem impediunt. Ex quibus clarissime intelligitur, quam inanis, insulsus, immo stolidus sit multorum Medicorum timor, quem de harum aquarum noxa foveant, licet iis non desint variæ similitudines, sat ingeniose fictæ, quibus, ad veritatis speciem obtinendam, opportune uti solent, quorum vero meritas laudes si audire cupiunt, adeant BAGLIVUM, considerate, & scite in eos perorantem, in *Prax. L. I. cap. 6. §. 4. Populares hæ similitudines magno in pretio à rudioribus habentur Medicis, qui morborum curationes instituunt non per leges dogmaticas & ex ipso naturæ penu eductas, sed potius ad normam effectæ alicujus, aut incomplete similitudinis*.

§. XXIV.

Hactenus ea proposui, quæ ad internum mineralium aquarum maxime usum pertinere visa sunt: nunc ad ea progrediar, quæ ad externum sunt referenda, quo & hic varii indicentur errores, à quibus sapissime sanorum & ægrotorum salus periclitatur. Quam varia enim & quam gravia ea sint mala, in quæ ab incauto balneorum mineralium usu, præcipitantur homines, pervulgatæ his in locis sunt querelæ: nullibi tamen frequentius audiuntur, quam in thermis Carolinis, quæ singulari præ aliis thermis hac gaudent virtute, ut non tam, ut aliæ, partes emolli-re soleant, quam potius ob contentam copiosam terrestrem & constringentem materiam, constringant, relaxata roborent porosque occludant, & sic effectum aliis balneis plane contrarium edant. De quo vero multi Medici minus solliciti, nulla habita, vel morborum, vel temperamentorum ratione, dum sine discrimine eas suadent, quantum corporibus damnum pro-

procurent, ne verbis quidem persequi possim. Inprimis maximam nocendi facultatem in iis exserunt, qui sunt sensibilibus naturæ, quorum corpora sunt impura, qui spasmodicis affectibus, qualis est hypochondriacus & colicus, laborant, quorum extrema corporis superficies variis exanthematibus est oblecta, qui articularibus morbis vexantur, in quibus menses vel hæmorrhoides fluunt, quibus caput dolet, cor palpitat, qui venereis morbis infestantur, & quæ hujus generis alia adhuc sunt mala. Quæ omnia nervosè ac erudite WEDELIUS in *Amœn. mat. med. L. I. S. III. cap. XI.* his verbis effert: *thermæ ubi robur addendum est articulis, ubi ligamenta & tendines suaviter in motum citanda, ubi exsiccandum, habent locum: cavendum tamen & in illis est, ne in extremum alterum membrum deducant, dum motum, exsiccando nimis, minorem fœnerare possunt.* Qua in re sæpius Medicis aliisque hominibus aqua hæret, mirantes, quod omnibus potustempore rite & ad votum respondentibus, ultimo demum balneo egressi, gravissimis corripiantur morbis, & omnia in pejus ruere videantur. Hujus autem tam inopinatæ mutationis causa, ex superioribus facile reddi potest. Eo enim tempore, quo ejusmodi homines potui aquarum adhuc indulgent, tantas in corpore nostro molestias balnea excitare nequeunt, quoniam internus calidarum usus constrictiones aliaque mala, à balneis producta, rursus resolvit atque emollit; idque, quod ab externis ad interna est repulsum, iterum expellit & è corpore rejicit, id quod vero potu finito amplius fieri nequit.

§. XXV.

Quoniam itaque tam anceps & periculosus thermarum Carolinarum usus est externus, (de his autem loquor aquis, quæ ex fonte sic dicto furioso scaturiunt, aqua enim ex molendino, utpote longe subtiliori, multo quoque tutius uti possumus) ob copiosam scilicet, quam vehunt tophaceam & adstringentem substantiam: hinc ægrorum rebus melius consulunt ii, qui non exactam & plenioram ejus cognitionem tenent, neque ejus usum pro circumstantiarum ratione discernere & dirigere norunt, si ejusmodi thermæ aquas ad usum præscribunt, quibus tam valida & minus tuta vis non inest. E quorum numero agmen ducunt thermæ Tœplices; quarum facultas in emolliendo, relaxando ac deobstruendo externas partes, summis merito laudibus est extollenda. Quippe accuratiori examine liquido patet, easdem vix quippiam calcarii in societatem suam admittere, eamque ob causam neque cum acidis configere, neque ab oleo tartari per deliquium turbari ac præcipitari, sed omnem omnino nobilissimam suam facultatem ab exquisita humoris levitate & singulari puritate trahere & sine metu damni exserere; eaque propter ad tumores duos emolliendos, membra rigida & spasmo comprehensa refocillanda & strictum ac corrugatum corporis corticem laxandum & referandum, usus sunt longe exoptatissimi. Securiore quoque virtute dotata sunt Emsenses & Wisbadenses, quæ identidem non adeo redundanter calcario elemento foetæ sunt, sed aquam puriorem & levioram vehunt. Quin immo eodem nomine, laudem merentur balnea, ex acidulis Egrænsis & aquis leniter martiatis confecta, ejusdemque virtutis alia, quæ silentio hic sunt prætereunda.

§. XXVI.

Porro quoad externum thermarum usum sæpe haud levis in eo admittitur error, quod balneum nimis calide & fervide usurpetur, & sic graviore noxa ægri afficiantur. Quum enim ab admisso exterius fervido calore sanguis incalascit, humores motu intestino vehementer agitentur & nimium expandantur: nihil certe aliud contingere potest, quam ut cordis palpitatio & anxietas præcordiorum oboriantur, dolor capitis & inquietudo suscitetur, ipsæque corporis vires frangantur ac dejiciantur. Et hoc damnum eo gravius eoque perniciosius est, quo magis corpus balneo calenti immisum succis & sanguine turgit & impuris humoribus scatet: inde enim exsuperans moles fortius in partes impingitur easque vitiat, fordes autem calore magis subtilisuntur & acriores ac peiores fiunt ut non possint non gravius corpori nocere. Quare semper ita balnei calor circumspicte est instruendus, ut tepidus tantum sit, & jugiter æqualis, eumque in finem, si longiori infessu opus, fervida subinde aqua affundenda, ne nimium refrigescat.

§. XXVII.

Ultimo loco pauca quædam de iis, quæ in diætâ bibentium delinquantur, dicenda restant. Quemadmodum enim nulla est medicina, quæ debito vivendi regimine neglecto, fructus proferre possit felices; sic & aquarum mineralium usus exquisitam hac in re desiderat curam. Multi autem in his locis inveniuntur, qui hic in alterutram peccant partem, dum alii nimium indulgent, alii nimium prohibent. Sunt quippe multi hac in re tam scrupulosi atque timidi, ut bibentibus omnem omnino acidorum, salforum, aromatum, aliorumque gratissimorum usum summo cum rigore interdican: quum tamen pro cuiuscunque consuetudine se hic gerere Medico maxime necessarium sit. Multi enim deprehenduntur, quorum à longo tempore ventriculus his ita est assuetus, ut eos cibos, in quibus ejusmodi condimenta non sunt, plane vel respuat, vel non bene digerat, ex quibus deinde variæ generantur cruditates. Alii, qui accuratorem ventriculi rationem habere nituntur, multa spiritiosa, carminativa & aromatica præcipiunt & suadent, à quibus tamen omnibus salutare excretionum negotium admodum turbatur: alvum enim inde fieri constrictiorem, vulgaris est experientia. Denique ægrotantes ipsi, sibi sæpius magnopere nocent nimia voracitate & animi affectuum intemperantia, dum evocatis è digestionis officina fordibus, appetitu auctiore facto, eidem obtemperant & ventriculum ciborum copia nimis aggravant, ut is ab aquis tantisper relaxatus, iisdem subigendis impar sit & cruditates excludantur, & ipsæ copiosius haustæ aquæ, longius in ejus cavo remorentur variisque inducendis incommodis velificentur. Animi autem impetuosarum commotionum quam pernicialis in corpus nostrum sit effectus, sanus quilibet novit & experitur, eo majorem itaque noxam corpori ægro & aquarum potu in motum jam actis humoribus ac fordibus, induci ab iisdem necessum est. Siquidem experientia teste, inde apoplexiæ, epilepsiæ, paralytici affectus aliaque id genus gravissima mala oboriuntur. Sed hæc de iis, quæ circa acidularum & thermarum usum & ab usum tenenda sunt, sufficiant, quibus coronidem impono saluberrimo SAVANAROLÆ præcepto: *Medicus bonus & prudens, oculos mentis diligenter apponere debet, antequam infirmis de transitu ad fontes & balnea consulat.*

DISQUISITIO PHYSICO-MEDICA.

D E

THERMIS CAROLINIS

EARUM CALORIS CAUSA, ELEMENTIS,

VIRIBUS, UTILITATE ET USU.

P R O O E M I U M.

Posteaquam haecenus in eo fui, ut explosis sterilibus Veterum opinionibus & lepidis commentis, ea, quæ in genere de elementis, viribus & usu mineralium aquarum scitu & cognitu necessaria erant atque utilia, traderem, & hæc jam sufficienter non minus, quam solide, exposuisse mihi videor: constitutum nunc est, ad specialiora descendere, & quorundam medicorum fontium scrutinium sigillatim inire. Quemadmodum vero omnes omnino fontes, indole & genio suo salutes, ad duplex potissimum genus reduci possunt, ut sint vel calidi, vel frigidi: ita antiquioris usus & in majori honore & admiratione nunquam non fuerunt ii, qui insito & nativo calore singularem suam indolem apertius prodiderunt & tantum non in sensus ingesserunt. Sane fabulosa & lumine divino nondum collustrata antiquitas eo perducta est, ut thermalibus aquis non solum divini quid inesse asseruerit & fontes eas fundentes sacros appellaverit, sed etiam, ut ipsos Deos in earum confiniis consedissee & domicilium constituisse crediderit, eamque ob causam his in locis supersticiosum cultum religiose & frequentissime exercuerit. Labentibus quidem temporibus, quod vesanæ erat superstitionis evanuit, & beatior lux animis affulsit: dignitas tamen & celebritas thermarum duravit & cum usu ad nostra usque tempora propagata est, quibus ad penitiorem earundem cognitionem insignis facta est accessio. Etenim à multo quidem ac longo tempore magni ingenii viri, omnibus conati sunt viribus, ut admiranda illa circa thermales aquas obvia eruerent & intimius pernoscerent; sed quam inauspicatus & sterilis eorum fuerit indagini insumptus labor, satis constat & passim à me est monitum. Quin, profecto neminem adhuc novi, qui genuinam rationem reddere potuerit perennis, quo persusæ sunt thermæ, caloris; vel qui ad veritatem accommodatè exposuerit, unde ex minerali regno proventus iste fiat salis alcalici, quo plurimæ earum foetæ sunt. Neque adhuc intelligenter traditum est, quomodo thermales aquæ, licet fortiter & efficaciter, sine virium tamen singulari deiectione, sedes cieant, nec non sudorem, urinam, vomitum provocent & sæpe contrarios etiam effectus edant. Quæ omnia licet difficillima sint exposita, non tamen desistendum nec desperandum est, quum nostræ ætati ea obtigerit felicitas, ut philosophiæ experimentalis variorumque tentaminum præstantissimorum ope, abscondita antea & miranda in rebus naturalibus plurima detegere & in apicum ponere possit. Sicuti autem calidi foterii fontes non unius ejusdemque indolis atque præstantiæ sunt, sed haud levis inter easdem intercedit differentia, tam ratione caloris, quo alios fervidissimos, alios tepidos esse constat, quam elementorum ipsiusque facultatis; ut alii alios virtute antecellant: ita certe in Germania nostra nullus ex illorum censu est, qui tantam nactus sit celebritatem, tam frequenter invisetur ac tam eximia & conspicua agendi potentia instructus sit, quam Carolinus ille in Bohemia. Hunc ego ipse sæpius & plus quam vices frequentavi, & accurate omnia quæ vidi,

audivi & observavi, notavi; instituendo varia cum ejus aqua experimenta, percontando ex Medicis ejus loci aliisque effecta, & propria multiplici experientia in diversis corporibus ac morbis operationem & virtutem spectando & animadvertendo. Quare dignæ omnino mihi visæ fuerunt celebratissimæ hæc thermæ, quas examini subjicerem & pervestigatius paulo explanarem, additurus, quæ ab aliis omissa sunt; emendaturus, quæ perperam exposita, & proprias meditationes & observationes collaturus: ita quidem, ut omni præjudicio damnato, nullam ullius auctoritatem vel metuerem vel respicerem, sed liberrimo animo & debita modestia, quæ rationi solidæ & experientiæ non fallaci responderent, ediffererem.

C A P U T I.

De causa caloris in thermis & speciatim Carolinis.

§. I.

Inter plura stupenda & singularia, quæ in thermalium scrutinio obvia sunt, nihil certe magis magnorum virorum torfit & fatigavit ingenia, quam calor ille actualis perennis, quem teste sensu in quibusdam è terræ visceribus salientibus scatebris deprehendimus. Nullibi ferme majus opinionum divortium & major Medicorum & Physicorum dissensio occurrit, quam in enodando hoc argumento atque phænomeno. Nolo tamen hoc loco omnes enumerare & excutere sententias, sed breviter tantum quasdam magis receptas stringere. Plurimi, præsertim Veterum, nunquam evanescentem hunc aquarum fervorem ex barathro Platonico & centro terræ cogere satagunt, autumantes, in hoc perpetuum ignem foveri & per rimas telluris apertasque vias dispergi. At vero tale quid phantasiæ ludibrium sapit, omnisque solidi ratiocinii vel conceptus expers est. Alii Solis operationi calorem thermalium aquarum tribuerunt: quum tamen Solis radii in terræ intima non penetrent, & thermæ eundem fervorem semper retineant; licet Sol noctu ab hæmisphæriis recesserit, & hiemali tempore debile micet & terra gelu constricta rigeat. Neque etiam ratio reddi poterit, si Soli calor esset adscribendus: cur non & alii fontes, ejus radiis similiter patentes, ferverent?

§. II.

Quidam, in Chymicorum scholis versati, ab effervescentia acidi & alcali, nec non calcis vivæ cum aqua congressu, mirabilis hujus phænomeni originem & causam arcessere annisi sunt. Verum, ut alia taceam, si calor iste ex acidi & alcali conflictu & connubio exsurgeret, necessarium utique esset, ut sal neutrum, quod semper ex horum commixtione conflatur, in thermis obvium esset, quod tamen non contingit. Et utut calcarii montes in tellure existant, neutiquam tamen eorum materia, nisi prius igne fuerit perusta, aquæ ullum concedit & insinuat calorem. Viva autem calx

calx rarissime in terræ cryptis visa & ex iis effossa est. Meliorem sententiam imbibisse persuasum habent ii, qui sub ipsa universi productione, aquis his inditum & insitum esse calorem putant: sed hi à veritate omnium maxime remotissimi mihi esse videntur. Si enim innatus est hic fervor, cur tam cito dispereat & ab aqua recedat non video? ut potius exinde prona admodum consequentia conficiatur, eundem à communicatione & accessu igneæ substantiæ dependere, eodem modo, ac in illis aquis, quæ igne admoto calorem concipiunt, eodemque remoto, perfrigerantur.

§. III.

Proinde non est quod dubitemus, quin aquæ frigidae calorem in terræ quæ perreptant visceribus contrahant, non vero terra ipsa ex aquarum fervore calida reddatur: quum sicuti extra terram ignis ope aqua calore imbuitur & calefit, eodem prorsus modo etiam in telluris recessibus reconditus occultus ignis præterlabentem humorem tepidum aut candentem efficiat. Quod vero ejusmodi ignis non precario asseratur, sed certo in mæandris terræ delitescat, tot ignivomi in diversis regionibus montes, motus immanes & tonitrua subterranea, horrenda flammarum fulgura & faxorum ac montium incendia clarissime testantur. Dispiciendum itaque est, qua ratione ignis in terræ visceribus generetur & quo pabulo tam diu & jugiter foveatur ac sustentetur.

§. IV.

Ut autem perobscura hæc & explanatu difficillima res clarissime exponatur: necessarium est, ut ex mechanico-physicis & chymicis repetamus, qua ratione origo ignis & flammæ productio contingat. Dicimus itaque: materiam & matricem, sive pabulum igni subministrari corporibus pinguibus & sulphureis. Hæc non tantum originem dant flammæ, sed & mox ac celeriter abripiuntur in ignem motum. Sulphura vero in ignem convertuntur, per motum celerrimum concitatissimum intestinum: ut adeo ignis nonnisi motus intestini velocissimi sit species, unionem & mixtionem corporis destruens ac diruens. Quare, qui ex frigidis corporibus ignem & flammam producere nititur; necesse habet, ut assumat materias sulphureas easdemque motu vehementissimo attritivo & collisione in celerrimam igneam commotionem cogat & redigat.

§. V.

Nobili exemplo est ferrum, metallum valde sulphureum, eamque ob causam præ omnibus aliis metallorum generibus ad calorem suscipiendum aptum; unde dum in fusione stat, innumeras stricturas rejicit, ejusque limatura candelæ flammæ inspersa & insufflata, illico lucidas scintillulas dispergit. Hoc sulphur martis, collisione in acceleratum motum abreptum manifestum ignem producit: hinc enim est, quod baculus ferreus, sola celeri & iterata cum malleo percussione, plane igneus & candens reddatur, ut urat & sulphur accendat. Eandem caloris & ignis genesin luculenter adstruit curiosum experimentum, quo lucidissima flamma in momento producitur, dum spiritus concentratissimus fumans debita encheiresi oleo caryophyllorum confunditur, & oleum hoc, sulphure denso copioso turgidum, spiritus hujus admixtione, in agitatissimum intestinum motum, qui ignis est, cietur.

§. VI.

Quando igitur in quæstionem venit: quænam prima ignis in subterraneis cryptis sit origo & quonam pabulo foveatur & sustentetur? ita sentiendum esse reor: quod hæc nulla alia ratione perficiantur, quam quod recondita in terræ recessibus sulphurea corpora, mutua inter se actione in vehementissimum motum agitata,

Frid. Hoffmanni Oper. Tom. V.

primum excludant ignem, qui deinde facile per appositas sulphureas, bituminosas maxime & facile inflammabiles materias, multiplicetur & latius propagetur. Proinde circumspiciendum est, quænam substantiæ in terræ promptuario absconditæ, ad ignem suscipiendum aptæ, reperiantur. Hæc vero, secundum nostram sententiam, potissimum sunt mineræ ferreæ nec non sulphureæ. Ferreis enim mineris magnos terrarum tractus refertos esse notissimum, itemque certissimum est, profundissimas cryptas totas repletas esse sulphureis & vitriolaceis mineris, cujus rei præclaro documento est sulphuris & vitrioli effossio, jam per mille fere annos Goslariæ, in monte, quem vocant *den Rammelsberg*, adornata ac celebrata.

§. VII.

Quin immo loca nonnulla Italiæ abundantissime sulphure scatent, & hæc insignis ejus copia, potissima causa est montium incendiorum, terræ motuum, hac in regione frequentissimorum. Probe hinc annotavit *Illustr. TSCHIRNHAUSEN, de medic. ment. pag. 112.* quod quatuor maxime annotaverit circa montes arduos, Vesuvium & Ætnam, hunc Siciliæ & illum Campaniæ notissimum montem, nempe primo sulphur commune inflammabile, secundo terram porosam, tertio aërem & quarto mare. Sulphur enim ibi accensum non modo horrenda illa incendia conflatur, sed etiam terram intensius calefaciendo, aquas perlabentes calidas reddit.

§. VIII.

Et hæc etiam ratio subest, quare in Italia, ubi sulphur in subterraneis tractibus ardet, thermæ aquæ copiose & affluenter saliant: id quod disertis verbis testatur *Laurentius GRILLUS in orat. de peregrinat. studii medicinal. ergo suscepta pag. 5.* ita scribens: *in agro Senensi supra XV. scaturigines habentur. IDEM ibid.* hæc memorat: *postea Puteolis vidi sulphuris vivi, quod in multis officinis desideratur, integros montes; quos olim Phlegreos appellarunt. Vidi & varias thermarum mixturas prope Bajas, & in sinu Bajano, prope lacum Avernum, vapores à terra prodeuntes, qui vim thermarum propemodum superant.* Invenitur quoque sulphur ejusmodi in quibusdam Germaniæ thermis, inprimis Aquigranensibus, de quibus jam superius meminimus: quod non solum argentum fusco colore obducant, sed etiam purissimum sulphur in balneo sic dicto Cæsareo in sublimem eructent & florum instar apponant.

§. IX.

Adstruximus itaque & sufficienter confirmavimus: sulphur esse materiam uti omnis ignis, ita etiam ejus, qui in subterraneis mæandris gliscet; sed qua ratione hoc sponte accendatur & ignem concipiat, hoc nondum est expositum. Nostra autem ita fert sententia: id fieri mutuo corporum sulphureorum congressu intestinaque inter se vehementissima commotione. Et ut paucis mentem exponamus, id contingere existimamus: quando sulphur solutum agit in terras & mineras martiales, vel terram bituminosam. Concipimus scilicet rem sequenti ratione. Quando in terræ visceribus sulphur cum bitumine, sive ligno fossilis, sale acido referto, nec non marcasitis inartialibus sulphureo-vitriolicis, est commixtum & in magnos cumulos acervatim congestum, & aqua ad hæc mineralia accedit, tum acidum vitrioli, quod in sulphure delitescit, liquatur, & actione sua in terram illam bituminosam & sulphureas martiales mineras, non modo intensissimum calorem suscitatur, sed etiam, si terra porosa est & aëri aditus sufficienter patet, luculentam excludit flammam.

§. X.

Evidentior res fiet sequenti experimento chymico. Quando una sulphuris vivi in pulverem redacti libra, cum tantumdem tenuioris martialis scobis exacte permiscetur, & his vitro inditis, aquæ tantum aspergitur, ut mixtura humida instar pultis fiat, massa hæc, elapsis duodecim horis, in spumam attollitur & internus calidissimus exoritur conflictus, ut ob calorem vitrum diffringatur, colore antea flavo, in nigrum degenerante, ipsoque magmate per calorem admodum compacto reddito. Hoc è vitro exemptum & in minora frustra comminutum, in acervum collectum aërique libero expositum, exiguo temporis spatio, non modo vehementius quam antea incalescit, sed & manifestam flammam cum fumo sulphureo eructat & vibrat.

§. XI.

Plura adhuc in promptu habemus momenta, quæ naturales ignis subterranei dilucide ostendunt. Videlicet non est ignotum, sed vulgari experimento constat, quod marcasitæ & glebæ sulphureæ, è quibus vitriolum conficitur, aëri humido & pluvioso subjectæ & commissæ, brevi tempore intensum æstum concipiant. Idem fit, quando remanentis, post sublimationem sulphuris ex marcasitis sulphureis, capitis mortui nigri fragmenta, in cumulum aggeruntur & auræ nimbosæ patent; quippe, hoc facto, fervorem contrahunt tantum, ut manus sine adustionis periculo proximius admoveri nequeat: id quod oculis & manibus perspicue patet in pago Bohemiæ, milliari à Carolinis sejuncto, dicto *Alt-Sattel*, ubi alumen, sulphur & vitriolum copiose & affluenter coquuntur.

§. XII.

Uterius subterranei æstus ortum & genuinam causam apertius testatur, commemorabile illud phænomenon, quod iis in locis, ubi aluminis coctio viget, uti Diebæ in Misnia & Commodæ in Bohemia, quotidianæ observationis est. Nimirum novimus, aluminis præparationem ita adornari, ut primum eruantur è terræ cryptis carbones fossiles, sive terra nigra bituminosa inflammabilis, in qua sal sulphureum acidum aluminosum delitescit. Hæc terra deinceps in acervum congeritur, & delapsis pluviis inspersa ac madefacta, non modo vehementius infervescit, sed etiam fumum, immo quandoque apertam flammam emittit, nullam aliam ob causam, quam quod acidum aluminis sulphureum, aqua liquatum, aggrediatur terram sulphuream bituminosam, & facta hinc mutua partium inter se actione & reactione, sulphur incalescat, vel accedente aëris motu, plane in ignem convertatur. Quia immo, curiosum non minus quam apprime huc faciens experimentum est, quo ex aluminis usti, cum materia quadam inflammabili sulphurea connubio, massa conficitur, quæ è vestigio in liberum aërem protracta, post calorem sponte ignem concipit & ardet.

§. XIII.

Enumeratis & suppositis hisce luculentis tentaminibus & observatis, ignis originem adstruentibus; non erit difficile, generationem & veras causas eruere ignis & caloris subterranei, qui fervoris in thermalibus aquis, terræ motuum & montium ignivomorum causa ac fons est. Scilicet, quando sulphur, per mutuam actionem mineralium variorum bituminosorum, ferreorum & vitriolico-sulphureorum, vehementissimo interno motu agitur, & aër in terræ cavernis conclusus, insufflando calorem adauget, ac intestinam collisionem & motionem magis excitat: luculentus exardere potest ignis, qui in cryptis subterraneis la-

tius serpens, terrarum tractus sæpe concutit, horrenda fulgura & tonitrua subterranea ciet ac nonnunquam ingentes terræ saxorumque obviorum moles in sublime agit ac longe protrudit. Sunt autem hæc phænomena potissimum solennia & obvia iis in locis, quæ mare alluit, & in quibus marina aqua cœco lapsu in subterraneos meatus irruens, aërem intus contentum in artius spatium cogit, & sic ventum excludit; eodem modo ac notum est, quod aquæ lapsu ventum per canales excitare possint, qui multis in locis follium vires sustinent. Contra vero ubi validior auræ afflatus deest, & loca longius ab oceano remota sunt, uti fit in Germaniæ interioribus, æstus quidem exoritur maximus, sed ignis quasi conclusus tantum gliscet, neque in manifestam flammam erumpit: nihilo minus calidissimas exhalationes longe lateque dispergit, qui terram suffervefaciunt & per ejus poros ac rimas transeunt, aquas perlabentes calore imbuunt & fervidas reddunt.

§. XIV.

Verum, haud levis prima fronte dubitatio hoc loco occurrit: qua scilicet ratione continuus & perennis per tot seculorum decursum calor, æquali semper fervore aquas inficiens in subterraneis specubus subsistere possit? Respondemus: rem conceptu non adeo esse difficilem, ut prima fronte videtur. Etenim minime existimandum est, parcum & exiguum esse memoratorum mineralium in terræ visceribus apparatus; sed inexhaustæ potius sunt profunditates sulphuris, bituminis & marcasitarum vitriolicarum. Nobili inprimis exemplo sunt fodinæ illæ, in Bohemiæ pago *Alt-Sattel*, ubi ultra duo sæcula sulphur, bitumen & vitriolum erutum atque confectum est: nec non Puteolis in Italia, ubi per multa sæcula alumen & sulphur excoctum fuit, & immensus tamen adhuc ejusmodi minerarum proventus superest. Deinceps quando in intimis terræ cryptis, aquæ transeuntis accessu, per mutuam illam mineralium actionem & reactionem, sulphur in concitatissimum & igneum motum vel semel abreptum est, ipsa hæc intestina motio circumcirca offendit simile pabulum, & sic facillime sese propagat similemque motum communicat cum pinguibus inflammabilibus, uti potissimum est terra bituminosa inflammabilis carbonum fossilium.

§. XV.

Porro crebriori observatu constat: omnem ignem occultum & liberiori aëris accessu præclusum, diutissime sine notabili pabuli absuntione & combustionem durare nec facile dissipari. Norunt certe, qui tristi spectaculo conflagrantibus ædibus interfuerunt, quod collapsis ex incendio trabibus & materie, ignis sub cineribus diu delitescere & gliscere possit, ut etiam sæpe post aliquot demum dies denuo exardescat. Idem præstant carbones fossiles, qui, si semel ignem conceperunt, per diu sub favilla eundem servant & retinent. Est quoque curiosa observatio, quod in machina Papiniana, quæ firmissime occlusa est, adeo, ut ipsi vapores aëris & aquæ calidi non possint elabi, subjectis paucissimis carbonibus vivis, carnes etiam duriores coqui possint, & ænea hæc machina iis imposita cito calefiat & diutissime contractum semel calorem retineat. Et ut in exemplum adducamus ipsum nostrum corpus: hoc poris oclusis, vel transpiratione prohibita, in febribus longe majori æstu jactatur, quam si vapores calidi per patulos cutis meatus ventilatione facta libere difflantur. Simili fere modo calidissimi sub terrâ halitus, dum non in aërem liberum dissipantur, sed elapsi recidunt & quasi in se redeunt ac resorbentur, facta hac in gyrum circulatione, longissime durant, nec tam cito absumentur.

§. XVI.

§. XVI.

Inprimis commemoratu dignum est diu occultati ignis exemplum, quod carbonarius ille prope Zwickaviam in Misnia mons suppeditat. Narrant videlicet accolæ, quod hic mons elapso sæculo à Suecis incensus sit & per longum tempus arserit, ut opus fuerit, rimas & antra dehiscencia injecta terra opplere & ignem sic suffocare: ante tria autem circiter lustra, dum meatus denuo fuerunt aperti, adhuc ardescere interiora observatum novumque exortum est incendium, ut rursus scissuras & hiatus occludere & oppilare coacti sint. Verum jam ante centum & quod excurrit annos montis hujus mentionem fecit Georg. AGRICOLA de ortu & caus. subterr. lib. II. cap. 20. it. de nat. eor. quæ effluunt ex terra lib. IV. cap. 17. ita perhibens: *mons in Misnia prope Zwickam semper ardet, in superficie decidentibus paullatim fossis, quas si quis intueatur, fornaces ardentes esse apparent, materia non prorsus admota, sed ex intervallo, quatuor pedum distans, ignem accendit. Et porro scribit: in multis locis Germaniæ ardentes vapores de nocte emittuntur, in Misnia vero ad Muldam fluvium, toto illo campestri tractu, qui est inter Zwickam & Glaucham. Meminit quoque hujus montis Laurent. GRYLLUS, l. c. pag. 71. Non procul, inquit, à Zwickavia urbe mons est, qui perpetuo incendio, non aliter quam temporibus Trajani Vesuvius in Campania, flagrat, & sulphureum quid, quod in medicina utile est, eructat.*

§. XVII.

Nullum quoque dubium est, quin in isto tractu ubi Carolinæ scaturiunt, olim exarserint ignes & adhuc occultentur, qui vaporibus calidissimis diffatis & per superficiem terræ dispersis, ex altis montibus decidentes aquas calefaciant. Egregiam hac de re fidem facit idem AGRICOLA de re metall. pag. 562. his verbis: *Præterea loca videntur adusta, ignes quondam arserunt, & ejus fomitem plerumque in visceribus adhuc continent. Sicut in Germania in agro Elbogano, inter Lessaviam & Culmam pagos, licet cernere. Ibi enim testaceæ terræ effodiuntur, exustæ nonnihil, nec mirum, quum ibidem sint acetosæ, & prope Sattel pagum foditur bitumen, atque etiam non longe ab oppido, quod ex Falconum planitie nomen invenit, in loco, cui ardens collis nomen est, à quo absunt calidæ Caroli IV. circiter octavum lapidem.*

§. XVIII.

Sed memorabilius & illustrius hac de re testimonium exstat in Bogisl. BALBINI, histor. regni Bohem. cap. XXXII. pag. 81. hæc memorantis: *Elbogensis districtus carbonibus fossilibus abundat, sed non utuntur, quod in silvosa regione lignorum sit satis. Ad Falckenaviam prope Egram fluvium, (ad pagum Königsvehr iter est, ubi sanctæ Cunigundis ecclesia visitur) mons, vel potius quoddam concavum, aut grandis crater occurrit, magnum olim malum vicinie daturus. Subterranei ignes viscera montis depascuntur, & si aurem penitus solo admoveas, quod ego feci, tantum intus murmur ventorum, aut flammarum exaudies, ut parvum quendam Vesuvium ipse sibi timor cogitatione depingat. Ardet mons ille noctibus, immo & diebus; quoties gravis aliqua aëris mutatio regioni impendet: jam & terra aliquem tremorem cum tristi mugitu non semel vicina illa sensit; fuisse eo in loco quondam ferri fodinas accolæ narrant. Sunt etiam eo in loco carbones fossiles permulti, sed nigri & fere jam in ipsa terra flammis absumti, quales per reliquam Bohemiam aliquando inveniri BOETIUS testatur. Quæ recensita verba, apertissime fidem faciunt, quod olim in hisce tractibus subterranea incendia arduerint & fuerint.*

§. XIX.

Et notatu perquam dignum est, quod ubi fontes nostri saliant, terra circumjecta calida observetur. Hæc

Erid. Hoffmanni Oper. Tom. V.

enim ratio subest, quare Carlsbadii, propter calorem subterraneum cellæ non possint effodi ac instrui, sed in vicinis montibus constituentur. Inde quoque est perspicuum, quare nix tempore hiemali, mox in vico diffuat, & omnibus circumcirca nive & frigore obtectis, non diu persistat, sed citius discutiatur. Præterea inveniuntur adhuc alia loca, extra urbis pomeria, prope molendinum, in quibus nix mox collescit: ut adeo pateat, universum hunc tractum, in quo Carlsbadium exstructum est, igne subterraneo delitescere suffervesieri, qui præterlabentem aquam propius contingens, eandem calore imbuit, longius vero ab eadem remotus, halitus tantum per mæandros dimittit & dispergit, qui aquis insinuat, iisdem medicam nobilissimam virtutem conciliant. Quod enim aquæ à terra, per quam fluunt, calorem & fervorem fortiantur, luculenter adstruit, quod complures existant, aquæ dulces calidæ, nulla prorsus minerali substantia foetæ, sed exquisitè puræ ac leves, cujus generis sunt in Italia balneum St. Joannis in agro Lucensi, nec non Pisanum, Senense & id quod dicunt de Cornetto. Eundem genium obtinent celebratissimæ illæ Piperanæ in Rhætia thermæ, quarum aqua, ex nive in montium jugis calore solis liquata, calida subterranea loca in transitu pervagans, calorem suscipit ac fervida erumpit.

CAPUT II.

De natura & contentis fontis in Carolinis communis, quem vocant den Prudel.

§. I.

Superiori capite fatis superque, uti arbitror, expositum est: quænam causa & origo sit caloris subterranei, qui tam in genere frigidas aquas calidas reddat & thermas constituat, quam speciatim fervorem Carolinis conciliet. Jam ordo rerum dicendarum exigere videtur, ut, quænam elementa & contenta mineralia salubria contineat communis ille in Carolinis fons, Prudel dictus, eruamus. Ut vero eo melius, & quasi à priori, ejus natales & cum solidioribus substantiis connubium perspicere & evolvere possimus: primo omnium prælibare quædam breviter strictimque de fontium origine opportunum visum est. Sunt nonnulli in hac opinione: causam fontium, præsertim perennium, esse circulationem aquæ in globo terraqueo; ita, ut hæc per alveos subterraneos juxta fabulum bulliens, volvatur ex mari in mare, ex oceano scilicet ad scaturigines fontium, inde in rivulos, ex rivulis in amnes, ex amnibus in oceanum, & hac ratione in orbem quasi agatur.

§. II.

Verum, utut non negemus, aquas dari subterraneas, ex in tellure non fecus ac in corpore humano, certas venas ac canales aquas vehentes existere, in quibus aquarum fluxus & refluxus contingat; minime tamen arbitramur, ad perennium fontium scaturiginem sufficere has aquas subterraneas. Sed potius nostra sententia ita fert: aquæ quidem terræ à prima statim productione universi sunt concessæ & in interioribus ejus recessibus ubique deprehenduntur, etiam in montium altissimorum abditis, sicuti metallurgi norunt: subterraneæ vero hæ aquæ alimentum & incrementum continuum suscipiunt ex pluvialibus, quæ à nubibus delapsæ, per porosam telluris substantiam repunt & colantur, donec tandem circa argillosa compactiora loca sistuntur & colliguntur, ac postea copiosius aggregatæ, viam sibi pandunt & in depressioribus locis, mon-

tium radicibus ac convallibus erumpentes, per certos canales & rivulos distribuuntur ac dimittuntur, prout jam superius meminimus. Et observamus, quod quo longior & magis continuus est montium tractus, immo quo montes sunt altiores, eo diuturniores & in altum magis profilientes scaturire fontes. Præclaro hujus rei exemplo sunt Piperanæ in Rhætia prope Curiam thermæ, vernacula, *das Pfeffer-Bad*: quippe quæ quotannis circa tertium Maii prodeunt, ac die decimo quarto circiter Septembris resiccantur ac fluere desinunt. Causa enim hujus annui & statim fluxus est, quod circa hoc tempus nives in altissimorum montium jugis restibiles auctiori solis calore liquecant, per mæandros terræ descendant, calore in his recessibus delitescente subterraneo, fervorem contrahant ac tandem ex concluso flumine in apertam venam sese evolvant.

§. III.

Quapropter nullum etiam est dubium, quin aqua fontis nostri Carolini ex subterraneis hydrophylaceis, & collectis cœlestibus aquis, montium rimas perrepantibus eorumque cavernas pervagantibus, suam petat originem. Inprimis vero longe videtur simillimum: quod ex sic dicto cervorum monte, quam vocant *den Hirschstein*, & qui ad aliquot milliaria porrigitur, primum incunabula ducant hæ aquæ, & per ejus cryptas transmissæ, calorem, immo mineralem & medicatam virtutem suscipiant. Quod enim aquæ nostræ ex hujus montis penetralibus dimittantur, ex eo haud fallaci suspitione concludendum esse reor: quia admota solo, ubi curia exstructa est, aure, inferius aquarum sub terra cum strepitu & murmure fluctuantium cursus, auditu percipi potest. Nec ignotum est incolis ac Pharmacopæo maxime hujus loci, quod subinde in ejus laboratorio calidi latices profilierint, qui vix compesci ac obturari potuerunt. Visitur quoque circa ejusdem montis radicem: item non procul à molendino, fons, ex durissimo saxo prorumpens, tepidus & subtilioris naturæ, quam celebris impetuofus: qui, quod non tam calidus sit, neque tantam copiam tophaceæ substantiæ contineat, hæc mihi videtur subesse ratio, quoniam anticipato alveo nimis cito effluit, nec per mæandros ignem & calcem custodientes, qui dubio procul sub vico & fluvio, cui Tepla nomen, existunt, transeat. Denique lapsum humoris, quem fons noster fundit, ex sublimi, conspectius arguit impetuosa ejus eructatio & per scatebræ ostium ejaculatio elatusque in aërem ascensus, ante plures annos ad decem, jam vero duarum circiter ulnarum altitudinem accedens; quippe qui, nonnisi accelerato aquarum ex alto casui & pressioni tribuendus est.

§. IV.

Jam res & ipse ordo postulat, ut fontem nostrum paulo specialius describamus, & ejus indolem ac elementa investigemus. Natale solum ipsi obtigit ager Elboganus, in confiniis Bohemiæ, ubi olim à CAROLO IV. Cæsare, anno MCCCCLXX. inventus, brevi mirum exsplenduit, & in rei memoriam, ab Augusti inventoris nomine, Carolinus nuncupatus est. Duo autem ibi consistunt montes, qui vallem spatiosam aperiant, in qua fons noster læto flumine in salientem venam sese explicat, non procul à Tepla fluvio, qui à calidis his aquis Bohemicum hoc nomen accepit: Tepla enim calidum Bohemis significat. Spuit hæc scatebra aquam fervidissimam, tanto calore præditam, ut ter vel quater intincta animantia, gallinæ, fues, glabrentur ac pennas & pilos amittant. Adjuncti sunt scatebræ oris & solo implantati ampliores tres tubi & canales, qui continuo largissimeque effundunt humorem, qui ex duorum alveis derivatur

per incilia alia plura lignea, huc & illuc tendentia, ad ædificia incolarum, balneaque, ut copiam ibi habeant pro lavando satis insignem. Ex unico vero canale impetuofius effunditur aqua & in altum ejaculatur, intervallo brevissimo interjecto, crassitie brachii, ubi eam petunt incolæ & hospites pro potu in urceis argillaceis, eum in finem confectis. Propter fervorem, ibi visuntur copiosissimi vapores & halitus in aërem elevati, præsertim cum aër densus & nebulosus est, & vapores condensati oculis patent, qui sicco & sereno cœlo regnante, rarius dissipati, non ita veniunt in conspectum, ut hinc incolæ ex densissimis his halitibus circa fontem, pluvias præfagiant.

§. V.

Hiscæ expositis, princeps noster labor esse debet, ut solerter examinemus, quanam elementa & contenta, à quibus virtus salubris petenda venit, foveant nostræ aquæ? Mirari autem hoc loco subit, ab omnibus ferme, qui de Carolinis quædam in publicum emiserunt, ingredientia plane aliena fuisse adducta, & vera minus clare evoluta ac demonstrata. Quippe falsissimum est, eas custodire sulphur minerale in substantia, alumen, nitrum, vitriolum; multo minus aurum vel cuprum in exilissima quantitate recipiunt, dilucide id confirmantibus experimentis chymicis eum in finem institutis. Nam argentum non fusco colore imbuunt, neque ad infusionem gallarum notabiliter nigrescunt, aut cum alcali effervescent. Nitrum vero inflammabile, cum sal sit aëreum, nec sub terra, nec in ulla aquarum reperitur. Verum Carolinæ nostræ custodiunt sal, & quidem tale, quod permultis mirum videbitur, dum artis tantum, non naturæ productum id esse à magnis Chymicis hodiernum creditum, nempe purissimum sal alcali. Hujus præsentiam satis insignem testatam facient experimenta à nobis adornata.

§. VI.

I. Thermæ hæ cum quocunque acido, sive sit mite, ut acetum, sive forte, ut spiritus salis, vitrioli aut nitri, effervescent, cum magna bullularum & exhalationum in aërem copia. Acidum valde corrosivum, uti est oleum vitrioli mox mitescit, obtunditur & exuit suam aciditatem. Fecimus experimentum cum hoc, & in uncias duas aquæ instillavimus ejus guttas decem, quibus saturatum fuit alcali, & evaporatione debita facta, nacti sumus sal neutrum, duplicato salis vel vitriolato tartaro non absimile. II. Affuso syrupo violarum thermæ hæ viridem colorem induunt, quod contingit, quando sal tartari in aqua solvitur, & huic solutioni idem syrupus infunditur. III. Quando pulvis rhabbarbari inspergitur hisce aquis, tunc rubicunda tinctura inde emergit, qualis etiam alias extrahitur ex rhabbarbaro, per menstrua alcalina. IV. Mercurii sublimati solutio nostris aquis instillata, gignit solutionem aurantii coloris: quæ omnia satis superque alcalinum sal patefaciunt.

§. VII.

Verum enim vero non hic substitimus, sed partim destillavimus, partim simplici inspissatione examinavimus has aquas, & ex libris duabus medici ponderis, obtinuimus drachmam materiæ salino-terreæ; quæ aquæ ope iterum liquata & per chartam emporeticam trajecta, concretione facta salis puri dedit drachmam circiter dimidiam. Hoc sal, teste sapore, proxime accedit ad ingenium salis tartari, intente alcalisati. Confligit enim cum quovis acido, & cum sale ammoniaco mixtum, penetrantissimum volatilem spiritum elicit. Cum sulphure maritatum & igne tractatum, transit in hepar, ex quo cum spiritu vini elegans sulphuris tinctura paratur. Quando tres partes

nitri,

nitri, cum parte una sulphuris, & hujus salis partibus duabus, miscentur, pulvis emergit, qui in cochleari impositus carbonibus vivis, horrendum fragorem instar sclopeti edit. Quæ omnia satis declarant, sal purum alcalinum contineri in thermis nostris. Monendum autem hoc loco de sale è Carolinis elicto alcalino est, quod si hoc ipsum, per aliquot menses libero aëris accessui pateat, illud quodammodo in mediam naturam transeat, non secus ac sal tartari & sal ex cineribus clavellatis, assumpto scilicet & absorpto ex aëre acido catholico. Hinc est, quod si ejusmodi sal in aqua dissolvatur & solutio fornaci calidæ imponatur, neutrum sal, tartari vitriolati notatiorem similitudinem exhibens, crystalliniforme, fundo & parietibus vitri sese apponat. Porro si hoc diutius in libero aëre detentum alcalinum ex Carolino fonte sal, cum pulveris carbonum quarta parte miscetur & igni in crucibulo hæc mixtura ut fluat imponitur, massa sanguinei coloris, instar hepatis sulphuris conflatur, ex qua non modo affuso spiritu vini purissimo rubicunda sulphuris tinctura parari, sed etiam asperso ejus cum aquæ factæ solutioni aceto, verum lac sulphuris ad ima dejici & confici potest.

§. VIII.

Ast non existimandum est, nostras thermas tantum imbutas esse alcalino sale, sed in aliis quoque hoc ipsum deprehenditur. Nam fecimus experimentum ante plures annos Darmsladii, præsentè Excell. Dn. HERTIO, cum sale ex incoctis Emsensibus thermis parato, quarum libræ sex medicæ concedunt drachmam unam hujus salis, quod identidem effervescebat cum spiritu vitrioli, sal neutrum producit, & omnibus requisitis & effectibus salis alcalini splendet. Notatum quoque hoc sal alcali est à celebri medico Dn. JUNGCKENIO in *descriptione aquarum Emsensium*: Aquisgranes effervescent quoque cum acido, & materia alba præcipitatur, in argumentum alcalini salis. Sunt vero etiam aliæ calidarum fospitalium aquarum, quæ alcalinum sal non vehunt: nam cepimus olim tentamen cum Wisbadensibus apud Moguntiam, & in illis nil nisi sal enixum instar salis communis invenire ac detegere potuimus, quæ nihilo minus eximia in medendo virtute pollent, & antiquissimi pariter ac spectatissimi usus sunt.

§. IX.

Progredimur jam ad alterum elementum nostrarum aquarum, quod est calcaria, tophacea terra, cujus quantitas non est exigua. Deponitur hæc & concrescit subinde in canalibus ligneis, per quorum alveos fertur aqua ad balnea. Neque facile inveniuntur aquæ in eo nostris æquiparandæ, quæ intra XXIV. horarum spatium omnia imposita, sive stramina sint, sive ligna, ovorum testæ, argillaceæ imagines, vel folia arborum, crusta lapidea obducunt. Ingentes quoque circa balnea conspiciuntur lapides, qui ex aquæ guttis stillantibus accreverunt, coloris flavi & fusci, jure meritoque stillatitii, vulgo *Tropff-Stein*, nuncupati. Verum non unius generis lapidosa materia est, quam thermalis hæc aqua vehit. Quippe curiosum est, quod sub terra, ubi scaturit fons, lapis gypseus durus, albus *σκληρόν* Græci vocant, eruatur & ibidem etiam progignatur. Nam aquæ ex montium penetralibus, in quibus spathi lapis uber est proventus, effluentes, elambunt & secum abripiunt quasdam ex eo partes, & calore ac ebullitione interveniente, in superficie terræ deponunt, & cortice quasi lapideo ita scaturiginem incrustant ac muniunt, ne aquæ alienæ ex Tepla fluvio proximo incurrant & commisceantur. Quando vero crusta hæc & munimen lapideum, violentia inundationis, vel glaciei tempore hiberno læditur vel diffringitur, uti ante aliquot annos factum esse memini,

tunc torrentes irruunt & aquæ peregrinæ ad scaturiginem accedentes, languidiorem fospitalis aquæ virtutem efficiunt, donec elapsis aliquot mensibus, cortex lapideus iterum accreverit & meatus apertos obturaverit, ut suas duntaxat undas fons trahat.

§. X.

Præterea alium lapidem adhuc continent & formant nostræ aquæ. Nam juxta ostium fontis, ubi ebullit & prorumpit aqua, quando alliditur asserebus circumpositis & substratis, concrescit ibi lapis elegantissimæ structuræ, ex variis lamellis & stratis superstratis coagmentatus, qui colorem obtinet variegatum, lateritium præsertim & fuscum, instar rubricæ, textura satis est firma atque compacta, ac politus & lævigatus, elegantissimas jaspides coloris varietate æmulatur. In superficie exteriori varias eminentias & tubercula quasi polita gerit; quale frustum insignis magnitudinis & adspectus jucundissimi nobiscum aliquoties tulimus. Ignitus autem hic lapis nihil sulphurei vel penetrantis odoris emittit, cum omni vero acido effervescebat, ejusque color tam intense rubicundus, ac varius, nec non compages densior firmior dependet à fortiori allisu aquarum ad objectos asseres, & debetur potissimum appositioni sub calore & motu violento magis arctiori & compressiori factæ, ex qua etiam, non tantum speciose, sed etiam ex vero, gemmarum in subterraneis locis ex fluido genesis erui potest & explicari.

§. XI.

Aliud lapidis genus in canalibus & ipsis balneis, de quo antea dictum est, conspicitur. Hic magis est friabilis quasi arenosus, tophaceus, flavi, ochrei coloris, naturæ fixæ. Nam igne etiam fortissimo nihil volatilis emittit, ebullit autem & solvitur spiritui acido injectus, manifesto documento alcalinæ naturæ. Circa hunc lapidem & ejus generationem hoc potissimum memorabile est, quod non ubique ejusdem deprehendatur consistentiæ vel structuræ; nam quo calidior & scatebræ propius per canales decurrit thermalis aqua, eo durior, rubicundior, sed parciore lapis iste generatur, quo magis autem tepidus & temperatus est humoris calor & quo longius à scaturigine porrigitur alveus, eo mollioris naturæ & coloris dilutioris lapis conflatur.

§. XII.

Denique reperitur adhuc alia species terræ subtilis, albæ, unctuosæ, levis in Carolinis. Hæc instar cremoris vel cuticulæ transparentis, folium crassitie æquans, aquis tepefactis in balneorum receptaculis ligneis contentis innatat & in superficie earum visitur, quando videlicet tarde aqua influit in balnea, & per viginti quatuor horas in caldariis immota stat. Melius succedit negotium & cuticulæ separatio ac appositio, si tempestas fuerit serena, neque pluviosa, nec nimis frigida & ventosa, januæ quoque ac valvæ probe clausæ, ne aër aquis impetuose allabatur, easdemque motu quodam concutiat. Hæc substantia tenuis calcaria exempta & siccata, albissima est, saporem habet instar ossis sepia, effervescebat cum acido, & loco dentifricii ad dealbandos dentes commode adhibetur. Externe quoque ejus usus egregius est ad siccanda ulcera: interne vero drachma assumpta dicitur urinam pellere.

§. XIII.

Hæc sunt contenta, quæ in communi & furioso Carolinarum fonte, accurato facto examine, deprehendimus. Mineralis vero vel metallici nihil invenire potuimus. Et licet odor circa scaturiginem obvius volatile quoddam principium salinum prodatur; non tamen urinosis quippiam redolet, sed similis odor ferme est illi, quando coquitur sal tartari cum ejus cremore mixtum

tum in aqua. Nullus etiam mineralis sulphuris halitus nares compungit, & thermalis aqua destillationi subiecta, nullum vel peculiarem saporem vel odoris vaporem præbet. Ex quibus omnibus clarissime elucescit, omnem Carolinarum virtutem ex sale alcalino, terra calcariæ indolis teneriori & crassiori, nec non ex ipsius aquæ qualitate & quantitate esse petendam ac derivandam.

C A P U T III.

De differentia & prærogativa fontis in Carolinis tepidi, vulgo des Mühl-Brunns.

§. I.

QUum vero ea, quæ de contentis & natura Carolinarum modo exposuimus, potissimum & sigillatim ad fontem communem & furiosum, quem vocant *den Prudel*, referenda sint; præter hunc autem alius adhuc ibidem scaturiat non minus celebris & frequentis usus, Germanis, *das Mühl-Bad*: utile omnino erit ac necessarium, ut differentia quæ inter utrumque intercedit, & quibus peculiaribus dotibus splendeat molendinus hic sic dictus fons, evolvamus & tradamus. Situm obtinet hic fons mox ad radices illius montis, cui urbs Carlsbadium inhæret, & à communi intra sclopeti jactum abest, nec ut ille solum subter flumen, Tepla dictum, perreptat, sed cis illud, non procul à molendino humorem effundit, eamque ob causam molendinus vocatur, vernacula *der Mühl-Brunn*. Præstantissima hæc scatebra diu admodum neglectui data in occulto jacuit, nec ab ullo tam interne, quam externe, medicationis causa adhibita fuit, sed primum aquarii vices sustinuit, in quod equos morbosos egerunt; postea vero quidam vilioris fortis periculum fecerunt, & balneando eodem usi sunt. Quum vero viginti abhinc & quod excurrit annis, primum Carolinas frequentarem, & facto accuratiori examine, in earum elementa ac vires curiosius inquirerem, hunc etiam disquisitioni subjeci, eademque instituta, illico deprehendi, saluberrima & salubriora furioso ejus esse principia & facultatem spectatissimam. Quare primus auctor existit permultis, quibus utilissimum fore hujus aquæ usum à priori noveram, ut eandem adhiberent; quod quum exoptatissimo cum successu fieret, exsplenduit magis magisque nobilissimi hujus fontis præstans virtus, ita, ut non solum repurgato scaturiginis ostio, domo superinstructa includeretur, quæ duobus balneis instructa est aliaque adhuc conclavia potantium usui destinata obtinet, sed etiam nunc frequentissime, tam interius quam exterius, à principibus maxime & præcipuis aliis personis, usurpetur, ac cum communi de prærogativa certet.

§. II.

Quod si vero hujus fontis elementa tanquam operationum veram causam curiosius rimamur, instituto quidem per variorum reagentium commixtionem, examine, non adeo magna differentia inter hujus & communis aquam observatur. Etenim ambo infusis acidis spiritibus, vitrioli intensius, & nitri ac salis mitius effervescent & ebulliunt; instillato tartari oleo, quod vocant per deliquium, turbantur & flocculos albos rejiciunt; admixta solutione sacchari saturni lactescunt & præcipitatum dimittunt; mercurii sublimati liquamen iis admixtum aurantium colorem suscitatur & præcipitat ex mixtura partes teneras; syrupus violarum viridem induit tincturam, gallæ autem insperæ neque umbram neque nigredinem inducunt, eodem plane modo prout superius de fonte communi

meminimus. Nihilo minus tamen plura sunt, quæ differentiam & peculiarem molendini hujus fontis indolem luculenter commonstrant & conspectius arguunt, jam seorsim consideranda.

§. III.

Videlicet caloris in molendino fonte remissior longe est gradus, quam in furioso communi, ita, ut comparatione instituta, ille tantum tepidus dici mereatur. Hinc est quod sensibiliores & delicatiores nautea & vomendi conatu crebrius post ejus potum attententur, eamque ob causam ut hoc incommodum arceretur, ii, qui sine fastidio tepidam hanc aquam bibere nequeunt, vasa eadem repleta ferventi & calidissimæ communis aquæ immittere solent, ut majore calore imbuatur minusque fastidiosa sit. Porro tepida hæc aqua scaturiginis, ex qua effunditur ostia, & canalium per quorum alveos fertur latera, crusta tophacea & lapidosa non ut communis investit: neque etiam in caldaria immissa & aliquandiu immota detenta, cuticulam teneram in superficie, quam vocant, *Bade-Schaum*, contrahit & exhibet.

§. IV.

Exhalatio tandem si adornatur, ex libris duabus hujus aquæ drachma magmatis salino-terrei colligitur, ex quo per iteratam solutionem colationem & coagulationem salis duo scrupuli & tredecim grana, & terræ grana circiter septem eliciuntur. Terra quidem eadem plane alcalinam & calcariam naturam exhibet ac illa, quæ ex communi resiccationis ope producit; sal vero extractum, licet alcalinam suam indolem eminentem per instituta tentamina abunde comprobet, nuptum tamen est, cum tantillo alius salis, quod ad medii naturam accedit & Egrani notatiorem similitudinem refert. Quod si enim salis ita parati portio, denuo in dupla aquæ parte liquefcit, & liquamen calidæ fornaci in vitro amplioris ostii, cujus generis est sic dictum conservale, imponitur, medium hoc sal, ceu gravius, fundum & parietes vitri occupat iisdemque adhærescit: lixiviosum vero & alcalinum, ab aqua non recedit, sed eidem implicitum manet.

§. V.

Et hæc puto planum atque testatum faciunt, diversitatem ac differentiam, quæ inter molendinum & communem in Carolinis fontem subest, in eo potissimum & unice esse quærendam: quod ille tepore ac moderato calore imbutus, pariori terrestri ac tophacea materia foetus sit, & præter alcalinum copiosum sal, neutrius momentum, complectatur: ex quibus certe haud tralatitia eidem accedit commendatio. Quum enim ponderosior & calcaria substantia adeo onusta ex communi aqua, non possit non tarde & cunctanter per corporis canales volvi, neque tam facile ad extremas venarum angustias pertingere; prima utique & palmaria molendini fontis in eo constituenda est prærogativa: quod longe promptius per vasa decurrat, intimius succos vitales perluat, & expeditius longe emunctoria subeat, transeat iterumque reddatur. Hinc etiam est, quod post ejus potum caput neque temulentia, neque somnolentia infestetur, sed idem quam antea vigor eademque alacritas animi perduret: neque etiam habitus subcutanei; inprimis pedum, intumescencia, bibentes terreat; quæ perquam solennis est post communis usum. Deinceps ob moderatum calorem ac teporem, quo molendini aqua perfusa, longe mitior & magis accommodata corporis integritati ejus usus est, quam quidem fervidissimæ, quæ humores cum intus contentis sordibus in vehementiorem motum impetuose ciendo, variis incommodis inducendis velificatur. Et denique ipsa salini elementi ubertas, omnis generis excretionum successum efficacissime

facissime promovet, imprimis ob neutrius connubium, quippe quod longe certius & tutius alvinam vacuationem suscitatur, quam calcaria furiosi terra, quæ nisi prius soluta fuerit in primis viis acidi accessu, potius constipat & officit, quam prodest.

§. VI.

Ut vero paulo specialius pateat, quibus in morbis, quibusque corporibus magis accommodus sit & utilis molendinus fons: non abs re erit, pauca quædam hunc in finem afferre. Et de usu quidem interno hæc monenda habeo. Omnes ii, qui cerebrum habent debile ac ferofius, teneriorisque & exquisitius sentientis constitutionis sunt, melius tepidam hanc aquam ferre possunt, quam calidissimam illam: id quod etiam tenendum de iis, qui solutioris sunt stomachi variisque inde pullulantibus morbis patent. Deinceps, id tanquam universale præceptum, de nostro hoc fonte inculcandum: quod omnes ii, qui magnam faburram acido-biliosam in primarum viarum diverticulis gerunt, & in quibus magis alvum, quam sudorem movere ex usu est, uti sunt podagrici, arthritici, hypochondriaci, hystericae ejusque generis alii, longe salubriorem & magis exoptatam facultatem ab eodem sperare possint, quam communi. Molendinus enim maxime alvum & urinam movet, furiosus autem corpus ejusque succos magis exæstuat, ac sudorem, & vehementius quidem, elicit, sicque sordes in prima corporis regione latitantes facile in motum agit, in massam sanguinis corporisque habitum impellit, ut inde non solum phlogoses, pruritus molestissimi, dolores capitis, erysipelata, purpurata aliaque exanthemata oboriantur, sed etiam paroxysmi podagrici & arthritici novi facile producantur. Neque denique ii, qui temperamenti sunt calidioris, & quorum sanguis ad motum acceleratum & enormes profusiones pronus est atque dispositus, variisque hæmorrhagiis & colliquativis sudoribus hanc ob causam obnoxii sunt ex hujus nostri fontis aqua, tam facile damno afficiuntur, quam à communi, quæ omnia hæc mala mirifice auget & exacerbat.

§. VII.

Quoad usum externum duplici pariter nomine molendinus fons communi est præferendus, tepore nempe & calcariæ substantiæ pariori connubio. Gravissima enim sunt damna quæ ab admisso nimis calido balneo resultant: quippe, eodem non solum humores corporis nostri in acceleratum & intestinum vehementem motum abripiuntur, sed etiam nimium expanduntur & rarefcunt, ut lipothymia infidentes attentent, vires deiciantur, impuritates augeantur, & è latibulis excussæ, subtiliores ac pejores reddantur, sanguinique non sine subsequente gravi ejus labe infnuentur. Quod si vero per aliquod tempus aqua ut refrigeretur seponitur, aufugit cum calore subtile & delibatissimum ejus elementum, ipsiusque humoris tenuiores & subtiliores partes exhalant, ut residuum minime per cutis meatus ad intimiora pervadere possit: imprimis quum eidem largus calcariæ constringentis materiæ apparatus insit, ut non tam cutis meatus pandat, quam potius occludat & subtus contentas sordes ad interiora reprimat, quæ, nisi corpus studiose ab earum noxia vi muniatur & defendatur, ægros in grave periculum adducunt. Sed molendini fontis ea præcipua laus atque facultas est, quod aquam vehat tepidam, subtiliorem, & constringentis terrestri materiæ mole careat, ut hinc ejus usus tam longe tutior, quam etiam plerisque morbis magis conveniens censendus sit: quum non modo partes à naturali robore dejectas egregie fulciat ac firmet, verum etiam ad duras emolliendas rigidasque laxandas facultate polleat longe saluberrima.

CAPUT IV.

De generatione salis alcalini in thermis.

§. I.

Salem alcalinum, ignis torturam sustinentem & in eodem fixum manentem, artis tantum esse productum, omnes ferme Chymici firma concepérunt opinione, & ita quidem, ut nonnisi in vegetabilium substantia delitescat ac reperiatur, quippe quæ igne perusta ac concremata, ex residuis ab ustione cineribus, aqua prius solutis & elotis, colatu per cribrum & exhalatione accedente, sal largiuntur fixum alcalinum, cujus generis est tartari, absinthii, lignorum & elicium ex omnibus vegetabilibus sal. Quod autem ab ipsa natura ejusmodi sal generetur, & in subterraneis cryptis, imo aquarum sinu, uber admodum ejus contineatur apparatus, huc usque, quantum quidem memini, nostris in regionibus, parum cognitum fuit ac notum.

§. II.

Simili modo inter non entia relatum fuit sal volatile, idque urinosum, ex terra & mineralium familia oriundum: nihilo minus tamen pervulgato huic & per manus quasi tradito asserto, ipsa experientia apertius refragatur. Etenim commemorabile certe hanc in rem est, quod in agro Ruppinenfi Marchiæ effodiatur terra alba argillacea, spongiosa & levis, ex qua calcem coquunt, tam eximia in copia, ut ejus tractus quadringentos pedes, in longum latumque, & latissime profunda versus, porrigatur. Missus mihi hujus terræ largus ante plures annos est Berolino apparatus, ejusque libram igni debito modo commisi, & chymico hoc ministerio, ex eadem primo spiritus unciam unam, deinde salis volatilis drachmam unam & tandem olei foetidi, eandem cum illo, quod è cornu cervi paratur, indolem referens, ferme drachmas duas obtinui, superflite capite mortuo gryseo & valde spongioso. Quin, hæc terra, carbonibus tantum injecta, volatilem & foetidum odorem diffilabat, non secus ac ossa animalium facere solent.

§. III.

Ad fixum vero alcalinum sal quod attinet, de eodem in terræ cavernis reperto ac delitescente, parum quidem constat: nihilo tamen secius ex fide digna illorum, qui orientales regiones, Græciam præcipue, Syriam & Ægyptum inviserunt, relatione compertum habeo: nitrum illud Veterum esse purissimum alcali, & hodiernum in Ægypto confici, incolas id vocare natron eodemque ad saponem & vitra conficienda solenniter uti. Præterea Smyrnæ reperitur terræ genus, perpetuo madens & sale alcalino penitus refertum, ex qua illud aquæ ope educitur, & quam proxime ad cinerum clavellatorum genium accedit, eamque ob causam Lutetiam Parisiorum magna in copia devehitur, ibique ad varios usus cinerum clavellatorum loco adhibetur. Id quod etiam testatur auctor libri *Voyage du levant lib. II. pag. 780.* nec non Carol. CLUSIUS, prout in antecedentibus jamjam exposui.

§. IV.

Porro eandem salis alcalini naturalem in terræ interioribus genesin & proventum, luculenter adstruit id, quod ex curatori mineralium fontium inquisitione nostra demum ætate innotuit. Videlicet nemini amplius ignotum esse poterit, celebratissimas Germaniæ thermas, uti sunt hæc nostræ Carolinæ, Aquisgranenses, Emsenses, Bollenenses aliasque, sal ejusmodi alcalinum

alcalinum fixum connubio suo suscepisse & facta exhalatione concedere. Quin immo, quod magis adhuc mirandum est, non tantum in thermis, sed etiam in acidulis sic dictis omnibus fontibus, ejusdem alcalinæ indolis sal delitescit, ut eadem hinc cum acidis pugnent, cum syrupo violarum viridem colorem efficiant, & elicium ex iis sal, omnes alcalini salis effectus, exhibeat ac commonstret. Confirmavimus autem id jam superius Buchensium, Selteranarum, Wildungensium & Antonianarum præclaro exemplo, eaque propter hoc loco ibi dicta omittimus, contenti, nemini amplius in re tam clara ac perspicua dubium alicujus momenti superesse posse.

§. V.

Quod si vero curiosius paullo alcalini hujus salis natales rimamur; id potissimum enodandum ac dilucide evolvendum occurrit: unde proveniat vel generetur sal alcali in terræ penetralibus & aquarum sinu, utrum scilicet sit nativum simplex, an vero compositum & ex aliorum connubio prognatum? Et certe, ut nihil dissimulemus, non possumus negare, posteriorem sententiam nobis magis arridere, nosque asserere: quod ex varia corporum inter se commixtione, sal alcalinum in terræ recessibus producat ac gignatur. Ita enim merito rationes subduci posse putamus: quemadmodum sal alcali fixum extra terram conficitur atque paratur: ita simili prorsus ratione ejus genesis in subterraneis cavis contingere verisimillimum est. Jam vero per experientiam & chymica plurima experimenta notissimum est, naturam, nunquam sponte in ullo regno hoc sal proferre, sed id demum ex commixtione & intimiori variarum rerum connubio emergere.

§. VI.

Videlicet latius jam olim & explanate satis tradidi atque deduxi in *dissertat. de salium generatione*, vegetabilium fixa alcalina salia, conflare ex commixtione salis acidi cum terra sulphurea alcalina, ministerio ignis, intime has substantias unientis. Nam eæ tantum plantæ, quæ acidum sal tartareum, vel principium oleosum & acidum custodiunt, insignem largiuntur hujus salis copiam. Demonstravi quoque, ex nitro, arcano duplicato, tartaro vitriolato, accedente terra inflammabili sulphurea carbonum, ignis ope, salia alcalifata concinnari posse. Quin immo acetum destillatum, vel ejus spiritus, nec non spiritus salis communis, juncta cum terreis alcalinis, quas corallia, lapides cancrorum, testæ ovorum aliaque ostracodermata complectuntur, facta solutione, degenerant in sal, quod tam in præcipitatione, quam solutione, effectus sistit salis alcalini. Eodem porro modo, quando vitriolum, vel etiam sal culinare cum calce viva miscetur, & ambo affusa sufficienti quantitate aquæ, decoquuntur, emergit sal, tam ratione saporis, quam effectus, pure alcalinus!

§. VII.

Quo circa neutiquam certe errabimus, si ex his experimentis atque productis, generationem alcalini salis in terræ visceribus eliciamus ac deducamus; & quidem hanc potissimum ob rationem, quia in ejus abditis similes deprehenduntur materiæ, ex quarum intimo connubio confici potest alcalina salina similis substantia. Adsunt enim in terræ cryptis lapides calcarii, quorum censum etiam subit spathum, copiosissimi: quin immo passim, & maxime in Helvetia, Anglia & Italia spatiosi tractus montani exstant, qui cretacea calcarea terra adeo referti sunt, ut transfluentes aquas eadem largiter imbuant ac insalubres reddant; ut adeo non necessarium sit, quo tam intensus in terra ignis confingatur, qui lapides perurat & molliores & liquationi obsequentes reddat. Adsunt porro

sulphurea, acida, mineralia & vitriolacea salia, inprimis subtilissimus ille acidulus ex marcasitis exspirans spiritus, qui longe lateque dispergitur & per rimas quaquaversum diffatur. Quæ ambo si invicem miscentur, præsertim accedente intensiori caloris gradu, partes magis rarefaciente ac subtilisante; cur non sal alcalinum simili modo, uti per artificium fieri solet, produci possit, nullas certe in contrarium invenio causas?

§. VIII.

Jam si hæc specialius paullo ad genesis salis alcalini in Carolinis applicemus, & curiosius rimemur: num in tractu isto, in quo Carolinæ saliant, ejusmodi substantiæ præsto sint, quæ ad generationem hujus salis requiruntur; deprehendimus utique, si in ullo loco, certe in hoc districtu, easdem redundanter adesse. Quemadmodum enim salium mineralium & spiritus istius tenuissimi, qui ex marcasitis sulphureis exhalat, præsentiam luculenter confirmat; quod semper ubicunque thermæ aquæ alcalino sale foetæ scaturiunt, in vicinia etiam acidulæ exstant & sulphur, vitriolum & alumen eruatur: ita omnino patrum Carolinarum solum his omnibus affatim dotatum esse constat. Et de vitriolicis, sulphureis & aluminosis quidem mineris, eorumque in nostrorum fontium confiniis largo apparatu, jam superius capite secundo fide nobis præstruximus & in testimonium adduximus Commodam & pagum *Alt-Sattel*, locos non adeo magna intercapedine à Carolinis sejunctos, una cum universo Falckenaviensi districtu. Acidularum autem in hoc tractu tam numerosus est proventus, ut vel centum sospitalibus nostris calidis aquis, contermini numerentur aciduli latices. Horum celebratissimi sunt Egrani, qui non modo quotannis, ibi ad bibendum confluentium frequentia, sed etiam transportatione ad exterarum regiones, virtutemque spectatissimam dudum nobilitati sunt. Deinde milliari à Carolinis salit in silva acidus fons, qui Carlsbadium advehitur & balneantibus potus loco inservit, eumque à loco ubi scatet fagus obsito, vocant *den Buchsäuerling*. Porro non procul à communi fonte, meridiem versus, in monte dicto *der Säuerlings-Berg*, ubi in planum descendit appositus mons, quem nuncupant *den Buch-Berg*, acidulæ effluunt. Quin immo quod mirandum est, pone ipsum craterem bullientis in Carolinis aquæ, in inferiori loco, erumpunt acidulæ tepidæ, quæ sapore non minus, quam nigricante ab inspersis gallis colore, mineralem suam & acidulis propriam indolem conspectius arguunt.

§. IX.

Non minus etiam alterum ingrediens & ad salis alcalini productionem necessarium elementum, in vicinia Carolinarum in promptu est, terra scilicet calcarea. Ut enim taceamus, quod distantia unius milliariis ab iisdem lapides in calcem optimam urantur: id tantum hoc loco inprimis commemorabile est: quod non procul à fonte ejusmodi calx affluenter reperiatur. Meretur certe in confirmationem adduci egregius locus ex SOMMERI libro *de thermis Carolinis* pag. 10. ita perhibentis: *Locus circa templum situs, plenus est exhalationum sulphurearum, ubi terra effoditur sub cœmeterio, ubi fovea in gratiam fontis calcarii effossa est. Copiosi adscedunt venenati vapores, tantæ efficacæ, ut & non pauca illapse bestię iisdem suffocate perierint: atque hæc spelunca parum differt ab illa, quæ in Campania ad Puteolos cernitur, & vulgo nomen ipsi tribuitur Apozolo, nec procul distat à lacu Agnano. Sub sepulcreto etiam lapilli quidam effodiuntur, pisis non dissimiles, in ingentia frustra coagmentati. Iisdem in locis multum calcis effoditur, & quidem variorum colorum, partim rubri, partim albi. Alibi cineritii coloris calx reperitur: aliis in locis mar-moris & lapidis arenosi formam præ se fert, qui colores debentur materiæ, quæ ab aquis advehitur.*

§. X.

§. X.

His itaque definitis jam atque deductis, veri videtur longe simillimum, salem illum alcalinum, qui in locis subterraneis gignitur & non adeo exili mole in aquis mineralibus calidis & frigidis, quas vulgo, sed minus recte, acidulas vocant, continetur, vix aliam fortiri originem ac genesin, quam ex intima acidi sulphurei, cum subtilioribus terræ, quæ alcalinæ est indolis, sive calcaria, sive alia sit, particulis, in terræ visceribus unione. Neque etiam est, ut quisquam, ob æqualem semper in thermalibus aquis, salis alcalini copiam, earumque perennem per trecentos annos effluxum, & calcariæ materiæ inde factam absumptionem, hæc in dubium vocet, quum humori, illo, quo per terræ meatus eodem semper cursu transfluit, certo tempore, certa & eadem tantum non solum salium & vaporum acido-sulphureorum, insinuari possit copia, qui cum certa tantum calcariarum particularum quantitate congregiuntur earumque connubio in sal alcalinum transeunt, sed is etiam non plus tophaceæ materiæ imbibat, quam in transitu elambere & hospitio suo excipere potest. Præterea inexhaustum etiam mineralium & terrarum in cryptis subterraneis est promtuarium & latissime patet, ita, ut si vel mille centenarios horum elementorum ex illo secum auferant aquæ, exilissima tamen hæc sit pars, respectu immensæ propemodum ibi reconditæ quantitatis. Sane Halenses nostræ salinæ, ultra mille annos, si fides historiis adhibenda, viguerunt & cultæ sunt, ac quotidie mille propemodum centenarios salis incolis largiuntur & exteris: nihilo minus tamen, jugiter adhuc eandem semper in eadem saluginis mensura salis concedunt quantitatem, licet calculo subducto, incredibilis ex terræ penu fossilis salis per aquameducta videatur copia, ut spatiosissimus tractus tantum vix capere possit.

CAPUT V.

De Carolinarum viribus, operandi ratione & in morbis variis usu.

§. I.

EXcussis sic qua fieri potuit exploratione fontium in Carolinis elementis atque contentis: descendendum nunc est ad vires, quæ ab iisdem dependent, inquirendo potissimum, qua ratione has exserant & quibus in morbis usum præstent longe exoptatissimum. Primaria vero & palmaria Carolinarum facultas est, quod fortiter & crebrius alvum subducant, ita, ut iisdem sufficienti in quantitate potis, alvus vel vicies ad evacuationem sollicitetur. Neque tamen, quod omnibus aliis validius paulo purgantibus nunquam non solenne & tantum non proprium est, ab crebrioribus his dejectionibus sanguis exæstuat, vires imminuuntur, & tonus ac robur ventriculi neque labefactantur, neque destruantur, sed potius via semel patefacta, viribus integritas fervatur, quin augetur, ipsæque appetitus in luculentum vigoris ventriculi testimonium, semper vegetus est & crescere solet.

§. II.

Tribuenda autem est nobilissima hæc & electissima fontium nostrorum virtus inprimis terræ calcariæ, qua largius foeti sunt. Quemadmodum enim rationis suffragio ipsiusque experientiae calculo constat, quod magnesia, quæ nil nisi flos calcis vivæ & insipidus fere calcarius pulvis est, laxantem, quin nonnunquam purgantem effectum edat; nullam aliam ob ratio-

nem, quam quod in ventriculum & primas vias delata, cum delitescantibus ibi acidis succis congregiatur & in sal amaricans transiens, virtutem alvum vacuantem adipiscatur: ita pari ratione non est quod dubitemus, quin calcaria illa sub potu Carolinarum ingesta terra, cum residuis à ciborum digestionem aciditibus in ventriculo connubium ineat, in sal tertium degeneret & sic purgantem virtutem consequatur. Hinc etiam est, quod si hæc terra in primæ regionis diverticulis accessu acidi non liquatur, ipsæ aquæ restagant, tardius per corpus volvantur, cunctanter per excretoria organa transeant, sed corpus aggravando, variis incommodis inducendis saveant. Accedit vero etiam alcalinum illud nec non neutrum in molendini aqua contentum sal, quæ purgantem effectum mirifice adjuvant & intendunt, ita, ut nativa hæc, & illud in corpore generatum sal acre amarum, obhærescentem in intestinorum plicis ac diverticulis mucum, cum recrementitiis sordibus resolvant, abstergant & spiculis suis sensibiles intestinorum tunicas fortius attentent atque sollicitent, quo eadem validius & crebrius sese contrahant, intus contenta citatius protrudant & sic frequentiores alvi dejectiones producant: inprimis, quum ipse ingurgitatus copiosus calidus humor, viscidus & spissos succos diluat eisdemque excretioni obsequentes & aptos reddat. Quod autem post validam & fortiolem à thermalibus aquis purgationem, nulla virium imminutio & toni intestinorum labefactatio exoritur, has ob rationes fieri arbitror: tum, quod salia hæc elemento agant corpori amico ac blando & mitius stimulent, quam quidem valida purgantia, virulento principio acrius arrodente instructa: tum etiam, quod ipsa calcaria & indole sua constriungens terra, simul fibris tantisper delassatis & crebriori motu laxatis, robur addat easdemque iterum fulciat.

§. III.

Altera, qua Carolinæ nobilitantur dos est, quod urinæ fluxum efficacissime proritent. Exserunt hanc virtutem potissimum, ubi pori sunt arctiores, fibræ etiam tensiores & striciores; operatio autem non tam cito & expedite succedit, quam ab infuso theæ, vel veronicæ, sed successive eadem absolvitur, & sæpius ad quintam pomeridianam usque extenditur; & ita quidem, ut primum secedant urinæ parum tinctæ & remissius citrinæ, deinde tenues & limpidæ, ac demum turbidæ & crassæ. Et curiosum non minus, quam memorabile est, quod urinæ hæc, diurno spatio ex eodem corpore redditæ, insigniter differant. Quod si enim remissius tinctis & limpidis, primo & medio tempore mictis, spiritus vitrioli instillatur, nullus conflictus nullaque effervescentia percipitur: contra ea, si turbidioribus & vespertinis horis excretis, spiritus iste admiscetur, pugna & ebullitio magna exoritur, non secus, ac si ipsis thermalibus aquis adjicitur, luculento indicio, tenuiorem primo humoris partem, ac postea crassiorem salinam substantiam per renales tubulos transiisse.

§. IV.

Jam si effectricem hujus diureticæ facultatis materiam indagamus, nulla alia suggerenda erit, quam sal tam alcalinum, quam neutrum, quod thermæ aquas incolit. Quum enim salium, tam neutrius quam inprimis alcalinæ indolis, ea propria sit laus ac virtus, ut non solum humores viscidos liquefaciant, resolvant & attenuent, sed etiam renales tubulos stimulent, ut urinofi seri citatior, major & expeditior per eosdem fiat sequestratio: ita Carolinas utique, largius alcalino salino elemento & ad neutrius genium suscipiendum apto imbutas, hanc ob rationem diuretico effectum polle- re, extra omnem positum est dubitationem.

§. V.

§. V.

Accedit tertia & spectata Carolinarum virtus, quae easdem transpirationem augere, sudorem movere & salivæ fluxum suscitare constat: id quod potissimum contingit eoque efficacius, quando aquæ potæ ægrius per ani secessum effluunt, ita ut quandoque potantes bis vel ter indusia mutare cogantur. Causam autem hujus effectus nonnisi in salinum earum elementum rejiciendam esse censeo: quippe hoc funduntur & fluxiliores redduntur corporis succi, & subcutaneæ non modo, aliæque salivalis humoris secretioni dicatæ glandulæ ad promptiorem separationem exstimulantur, sed etiam fibræ universi corporis motrices in acceleratum & validiorem motum cientur, ut fluida vehementius premant, citatius trudent & velocius circumagant, quæ ad secretorias & excretorias officinas crebrius appulsa, ibi deponunt jugiter & relinquunt partes per aperta meatuum ostia demum copiosius erumpentes. Notissima enim est virtus horum salium, inprimis diaphoretica; dum eum in finem in febribus intermittentibus, cachexia & hydrope summo usurpantur cum fructu. Succurrit tamen etiam in nostris fontibus actualis ille quo perfusi sunt calor, utpote, qui sanguinem & humores calefacit, eosdem in concitatiorem motum cogit & ad corporis corticem propellit, eodem modo ac notum est, quod post assumptum potum calidum, decoctum aut infusum theiforme, pulsus, auctiori facto sanguinis progressu, ipsaque perspiratio liberior & expeditior reddatur.

§. VI.

Præterea Carolinæ hanc etiam ob causam summo pere commendabiles sunt, quod acidum cicurent ejusque noxiam indolem efficacissime contemperent. Etenim non solum copiosum, sed etiam morbosum acidum sæpius in corpore, inprimis in ventriculi & intestini diverticulis, obhærescit, præsertim in melancholicis, hypochondriacis, hysteris, vitæ sedentariæ addictis, mensium suppressione laborantibus, quin immo dantur corpora, ubi omnia assumpta coalescunt, ut ventriculus ex Germanorum proverbio sit *wie ein Essig-Krug*. Hæc autem præternaturalis aciditas, quum digestionem turbet, ventriculum inflat, ructus, molestum in præcordiis sensum, alvi obstipationem & fæces albas gignat, variisque morbis inducendis velificetur: thermarum certe præclara est facultas, quod interius assumptæ, non solum copiosa sua calcaria terra, sed ipso etiam alcalino sale, aciditatem imbibant, obtundant, infringant, & cicurata illa neutrius salis naturam induendo, intestinis stimulum insinuent, quo acidi hi immutati succi sine damno per ani secessum exturbentur.

§. VII.

Accedit præstantissima aperitiva & incidens virtus, qua Carolinæ splendent, ad quam exsequendam aquæ copia, sal contentum ipsaque alcalina terra suum conferunt symbolum. Dum enim aqua copiosius ingurgitatur, crudos & male coctos, viscidos, ac crassos succos offendens, eosdem diluit, attenuat, fluxiles reddit, & altius impactos abstergit, ut in motum redacti, prompte per organa ejici possint. Dum porro sal quod vehunt alcalinum non tam lentorem crassorum humorum disjungit & incidit, quam potius tunicas alveorum, in quorum cavis lenti & viscidi succi subsistunt, lacescit & ad motum exstimulat, fit, ut eadem crebriori & validiori compressu intus contenta trudent & volvant, & sic obstructions expediantur. Dum denique calcaria alcalina terra acidum sorbet, quod antea minima constrinxerat, ipsisque succis spissitudinem induxerat, apprimè inservit reserandis obstructorum repagulis, inprimis quum simul virtus exsurgat stimulan, ipsosque sensibilium tunicarum parietes, ad contractionem & contentorum expulsionem sollicitans.

§. VIII.

Non minus hæc nobilissima thermarum Carolinarum facultas est, quod tonum viscerum roborent & relaxatas lassatasque fibras erigant ac firment, quo his ad motum animatis, omnia in corpore officio suo rite perfungantur, sanguis per omnes corporis partes vegetius transprimatur, omnes humores promptius per vasa volvantur, infusque cum his ventriculo aliisque robore ac vigore, omnes omnino functiones liberius & expeditius succedant. Dependet autem electissima hæc virtus potissimum à terreo illo calcario elemento, quo largius foetæ sunt thermæ nostræ aquæ; quippe quod humidum sorbendo & fibras leniter stringendo efficit, ut partes fibrosæ propius ad se invicem coeant, & ætiori contactu duriores & compactiores reddantur, quo dum elater intenditur, majus robur nanciscuntur majoremque vim acquirunt sese contrahendi & humores quos vehunt propellendi.

§. IX.

Denique non ultima Carolinarum laus est, quod ferme omnibus temperamentis & naturis conveniant, calidis & ficcis, æque ac humidis & frigidis. Nam dum poros aperiunt & perspirationem liberiores reddunt, sulphurearum & calidarum partium exhalatione, intestina motio languescit, calor remittit corpusque ab æstu liberatur. Frigidis vero & humidis succurrunt partim calore suo, fovente ac refocillante, partim roborante virtute, qua humidum redundans resiccant & ex corpore proscribunt. Et sicca corpora humida suo humectant, aquarum copia stricta emolliendo, tensa laxando, crispata solvendo, & moram necantes, omnes partes liquido perfundunt.

§. X.

Jam in prono & facili est judicare, multis morbis Carolinarum usum proficuum esse. Sunt vero potissimum ventriculi morbi quibus accommodus est. Videlicet sæpe contingit, ut interior stomachi tunica nervea mucro crasso & lento inviscetur, qui prohibito affluxu menstrui ad digestionem necessarij, intimam ciborum dissolutionem impedit, & cruditates, pressiones, inflationes, nauseam, sitim & appetitus prostrationem causatur: ad quem abstergendum & expellendum Carolinis nihil est aptius. Alii ob delitescentem in ventriculi cavo acidorum succorum copiam appetentia nimia & avida divexantur, quæ itidem non melius percuratur, quam ingestis copiosius aquis alcalino sale & calcaria terra imbutis, quæ acidum promte imbibunt & ex corpore eliminant. Porro admodum obvium est, ut caput, ob contentam in ventriculo crudorem & male coctorum humorum saburram & intercedentem consensum, gravius luat & diuturna cephalalgia afficiatur, quæ itidem non melius submoveri & persanari potest, quam iis, quæ causam tollendo & ventriculum à sordibus deplendo, eidem medentur.

§. XI.

Deinceps opitulantur quoque intestinorum morbis, eadem lubrica reddendo, & alvinæ excretionis successum ita fulciendo, ut etiam post earum usum non obstipetur. Inprimis auxilio sunt hypochondriacis, qui torminibus, & tensionibus molestis in abdominis regione afficiuntur & torquentur, dum flatus dispellunt, robur intestinis addunt, & acidus, viscidos ac biliosos humores, in intestinorum plicis obhærescentes, eliquant, abstergunt ac tandem exturbant, canales minutissimos, tam sanguineos, quam lymphaticos, nec non glandularum tubulos, aperiunt & liberum omnibus humoribus com meatum concedunt. Et utut potæ alvum crebrius sollicitent, ejus tamen nimium fluxum diuturnum sedant, & in tenesmo, procidentia ani & uteri,

tam

tam interno, quam externo usu, sese mirifice quoque commendant.

§. XII.

Porro etiam eximie profunt in morbis qui ex perperam curatis & suppressis febribus exoriuntur, & spastica strictura tenuium secretioni dicorum tubulorum in ventriculo, duodeno, mesenterio & hepate imprimis infesti sunt, quo fit, ut circulatione humorum turbata, eorumque repurgatione impedita, corpus, imprimis inferiores partes, intumescant, lividus color faciem occupet, icterus gignatur, menstruus sanguinis fluxus in foeminis, & hæmorrhoidalis in viris, supprimatur & quæ plura alia sunt incommoda. Quod si autem hæc mala & constrictiones organorum non tempestive removentur, facilis ad hydroperem, aut saltem ad molestissimum hypochondriacum malum, est transitus: quam in rem nihil certe magis ex usu est, quam mineralium aquarum, & imprimis Carolinarum usus, quippe quæ, non solum aquarum copia sordes eluunt, sed etiam ob sal contentum, intestina à sordibus repurgant, & imprimis crustam villosam à mucō lento ac spisso liberant, ut sanguinis materiam iterum transmittere possit, induratas porro in mesenterio glandulas molliunt, sanguinem fluxilem reddunt, ut liberior ejus per venæ portæ ramos ipsumque hepar fiat cursus, & biliosus humor ab eodem secernatur, sicque sublata causa, ipse morbus arceatur & abigatur.

§. XIII.

Neque in levi habenda est Carolinarum efficacia, quam in molestis torsionibus, pressionibus & tensionibus in abdomine sævientibus exferunt. Scilicet, quando sanguinis copia nimium increvit, vel retardato nimis & lentius procedente ejus cursu, non debite in colatoriis officinis à sordibus repurgatur, sed acrimoniam suscipit: fit, ut vasa, imprimis venæ portæ, per abdominis viscera dispersa, sanguinis mole infarciuntur, iisdemque nimium distentis, spastica oboriatur strictura & tensio. Quæ quum liberum sanguinis iter magis adhuc intercipiatur, is non potest non ad alia loca impetuosius ruere, & in primis ad caput & pectus ferri, ubi dolores, vertigines, languores, melancholias, somnia terrificæ & gravia, quin apoplecticum quandoque insultum causatur, vel ad pectoris regionem magis vergens, anxietates, palpitationes, sanguinis sputa, inflammationes & id genus plura excludit. Vel si sanguis copiosius & impetuosius ad renum tubulosum cribrum, vel vesicam adigitur, mictus ingruit cruentus, calculum, tam renum, quam vesicæ, haud raro insequenti tempore gignens. Nonnunquam etiam præcluso in lienem influxu, per vasa breviora sanguinis impetus regurgitat ad ventriculum & in ejus cavo effunditur. Ut vero omnia hæc mala arceantur, nihil certe magis utile & accommodum est, quam opportunus & sub initium institutus nostrarum thermarum potus, quæ sanguinem crassum diluendo fluidum reddunt & spasticas stricturas laxando & remittendo eidem viam pandunt, quo inoffenso cursu per omnes corporis partes æqualiter decurrere possit. Quod si autem sanguis jam præter consuetum ordinem per hæmoptysin, mictum vel vomitum cruentum ejicitur: tutius utique est à thermalibus aquis abstinere, ne hæmorrhagia augeatur magisque exagitetur, sed sanguis per congrua remedia ad sœtas & tutas vias derivandus est.

§. XIV.

Porro Carolinæ opem ferunt egregiam in renum & vesicæ vitiis. Sive enim renes, ureteres & vesica mucō tartareo & sabulo obsideantur, sive calculus & lapidosa materia in ureterum cavo subsistat & diros do-

lores suscitet, tam præclara Carolinarum est facultas, ut copiosius ad renales tubulos delatæ, intus contentas sordes & materias alienas eliquando & fluxiles reddendo ejiciant, spasticis autem stricturis ureterum resistendo, eosdemque laxando & ampliando, humoris ope obhærescentem in eorum alveo lapidem protrudant & elidant. Quin ipsam etiam generationem calculi ejusque incrementum anteverunt: dum humores diluunt & falsedinem & acrimoniam eorum contemperant, quo minus mucosæ & falsæ materie coire & concrementum lapidosum exoriri possit. Accedit & illud, quod thermæ hæc aquæ, si urina cum ardore & dolore stillet, exoptatissimam spondeant opem: nullam aliam ob causam, quam quod humoris largius poti ope, falsa tam sanguinis, quam lymphæ acrimonia contemperatur & infringitur, eademque per excretoria organaeducta, urina tenuior & nulla acri materia referta, exquisitius sentientem internam vesicæ & urethræ membranam non gravius exstimulat, sed sine doloris sensu excernitur.

§. XV.

Præterea quando universa sanguinis massa, multis recrementitiis, acribus & heterogeneis particulis onusta est, sive etiam spissitudinem contraxit, eodem per exteriores corporis partes difficilius comneante, oriuntur tumores, dolores artuum, cutis desœdationes, glandularum intumescentiæ, in collo præsertim, scabies, malum ischiadicum aliaque incommoda gravia. Ad hæc autem abigenda & persananda aquis thermalibus nihil certe est præstantius, utpote quæ, omne indicationis in eorum cura punctum complent, eidemque sine vehementia & virium noxa satisfaciunt. Scilicet aquæ copia lentorem eliquant, acridinem diluunt, quo minus nervosas partes lancinare & dolore afficere possit, & id, quod partibus jam altius impactum, perspiratione liberiori reddita, sensim discutiunt. Neque minus per alvi secessum & urinarios meatus sordes acres eliminant & ulteriorem earum generationem impediunt, quandoquidem elotis & repurgatis iisdem ventriculo & intestinis, purus, delibatus & simplex chylus sanguini affunditur. Et hæc etiam ratio subest, quare scorbuticum quam maxime contumax malum, nullo alio remedio, tam cito, tam secure & tam efficaciter extirpetur, quam usu nostrarum thermarum, cum debito in vita & victu regimine adornato. Quin immo novimus plures ulcera fordida diu gestasse, quæ tandem adhibitis tam interius, quam exterius Carolinis, penitus coiverunt & coaluerunt, nulla plane, quod alias solenne est, subsequente noxa, quia impuritates & recrementitiæ materiæ, alias per hoc ostium eliminari solitæ, partim per aquæ potum antea evocatæ, partim ad organa eorundem excretioni dicata iterum derivatæ sunt.

§. XVI.

Jam sic roborantem & firmantem Carolinarum facultatem dispicimus: eadem virtute splendent longe exoptatissima, in omnibus morbis, ubi tonus partium lassatus atque dejectus est, unde tumores dissipant, ventriculum fulciunt, nauseam emendant, appetitum erigunt, paralyticas partes eximie fovent, involuntarium urinæ ex sphincteris laxitate oriundum stillicidium compescunt aliasque plures præclaras operationes edunt. Imprimis etiam sterilitati mulierum, ex uteri laxitate & humiditate nimia proveniente, medentur. Quum enim uterus contorta & plurima alat in complexu suo sanguinea vasa, venosa æque ac arteriosa, fibris nimium remissis & laxis, sanguinis per labyrinthos hos & implicatos admodum canales cursus intercipitur, eoque sufflaminato, ipse uterus vitium contrahit & ad conceptionem

inepta redditur officina. Ut igitur lubricitas hæc tollatur, laxum adducatur & sanguini cursus reddatur, humidum reficcando & robur addendo, thermæ nostræ egregiam conferunt opem.

§. XVII.

Balnei in Carolinis utilitatem quod attinet, ejus facultas longe spectatissima est in tumoribus dissipandis, membris resolutis, paralyfi tactis, luxatis & à robore defectis firmandis, ulceribus, scabie aliisque cutis defœdationibus extergendis & consolidandis: quandoquidem calor quo perfusæ sunt, una cum constringente quam complexu susceperunt materia, altius in balneo insinuata, quod subtus offendunt, discutiunt, & reddito partibus tono, efficiunt, quo minus de novo ibi acris, lenti ac desidii humoris decubitus colligatur, sed per congruorum ostia è corpore dimittatur. Et has Carolinarum laudes compendio exhibet BAYERUS in epistolis à CRATONE collectis pag. 129. ita scribens: *Carolinæ ad miraculum usque membra debilia & luxata, nervosque læsos confortant, dolores articulorum leniunt, tumores ex affluxu humorum frigidorum, ut in me ipso expertus sum, dissipant & absumunt.* Idem testatur CRATO in epist. 257. *Carolinæ, inquit, efficaciores sunt Hirschbergensibus, ad membra resoluta & contracta, discutiunt dolores spinæ, coxendicum, articulorum; dissipant etiam copiosos tumores flatuosos & laxos, renumque & vesicæ tumores abigunt.*

CAPUT VI.

De noxa & abusu harum aquarum.

§. I.

Quamvis vero thermarum nostrarum usus incomparabilem in plurimis morbis, tam arcendis, quam persanandis, præstet utilitatem; monendum tamen est: quod non omnibus morbis omnibusque subjectis conveniat, sed debita cum cautione administrandus sit. Sunt enim non solum morbi in quibus irrita & frustranea est earum usurpatio, sed etiam, ejusmodi affectus, in quibus ob metum gravioris subsequuturi mali, vel morbi incrementi, ab iisdem abstinere tutius est & melius.

§. II.

In genere autem tenendum est, nihil valere Carolinarum usum in nimis diuturna & firmiori viscerum induratione, multo minus si in scirrhum jam transiit; quandoquidem hoc facto, nulla amplius spes superest, fore, ut aquæ perrumpant, & licet in principio difficiliter, postea tamen expeditius patefacta via, per tubulos commeent. Pari ratione incassum adhibentur, ubi vasis disruptis humor effluxit, & in capite, thorace vel abdomine jam restagnat; quippe nullum, vel quæsitissima arte confectum & summopere dilaudatum medicamentum, hoc in casu quippiam vere & constanter salutaris præstare potest. Idem fit, si ventriculus, intestina, hepar, pulmones, renes, pancreas, mesenterium vel aliæ nobiliores interiores partes, ulceribus obsidentur vel jam exesæ sunt. Porro perperam commendantur iis, in quibus metus est apoplexiæ, qui epilepsia infestantur & hemicrania diu affliguntur: eo quod sectione compertum est, in his plerumque serum ventriculos cerebri occupare, & propter partium & tubulorum debilitatem verendum est, ne aquarum graviorum accessu & retardato sanguinis cursu, serosus humor extra vasa confusus magis augeatur. Eadem etiam ratio subest, quare, si memoriæ vis, & sensuum externorum cum

ratione vigor & usus, simul & semel intercidit, thermarum usus, non accommodus, sed infructuosus, quin plane damnosus sit.

§. III.

Qui asthma convulsivo, polypo cordis & aqua in pectoris cavo natante stipato, detinentur, caveant sibi à thermarum usu, ne morbum exacerbent sibi que necem accerseant. Non minus hydrops, si jam eo processit, ut vasis lymphaticis ruptis, in abdominis cavitate humor effusus sit, thermarum potum non fert, eo quod aquæ copiosius haustæ, affluxum & tumorem augent, tantum abest, ut ad ejus diminutionem quicquam faciant. Similiter frustraneus prorsus earum est usus in phthisi, pulmonibus jam profundius exulceratis, nec non consummata hectica & quæ jam diu corpus attrivit. Quin immo SOMMERUS in *descript. therm. Carolin.* perite monet: nocere easdem siccis & calidis, phthificis & hecticis, sanguinis defectu laborantibus, tabidis, ira & tristitia affectis, qui venas angustas & parvas habent, nec non qui ex diuturno morbo convalescerent; cujus hanc esse causam reor; quod ob virium defectum languente humorum progressu, aquæ potæ non expedite per corpus volvantur iterumque exturbentur, sed moram neccientes, eidem oneri sint & damnum inferant.

§. IV.

Porro nunquam cum bonis ægrorum rebus propinquantur thermæ nostræ iis, qui fordida, serpentina & foetida ex infectione venerea ulcera gestant, vel virulento seminis fluxu laborant. Harum enim potu, fordes istæ perniciales, per ulcerum ora & seminis stillicidium antea è corpore secedentes, non sine gravi detrimento succorum laudabilium consortium iterum insinuantur, iisdemque universa humorum massa inficitur, non vero è corpore ita proscribuntur, ut ipse morbus sanescat. Quin immo crebriori observatu compertum habemus, hos, qui ante plures annos seminis fluxu detenti, ab eodem liberati sunt, post calidarum potum, molestissimo affectu denuo attentatos esse. Eandem quoque ob causam thermarum usus minus tutus est iis, qui antea enormes sanguinis profusiones experti sunt, & metus est, ne suscitata vel levi commotione & exæstuatione, iterum sanguis prorumpat & copiose effluat.

§. V.

Denique internus quoque Carolinarum usus, parum accommodus est, quin cum maximo sanitatis dispendio stat iis, qui durante insultu doloris arthritici, podagrici, chiragrici & qui id genus plures sunt, eundem suscipiunt. Nam quia sub dolorum tormentis, haud levis strictura partibus affectis inhæret: aquæ potæ non possunt libere cum reliquis in corpore succis circumagi & vim suam quaquaversum explicare, sed potius retinentur, & corpus aggravando gravius obsunt. Contra vero utilissime bibuntur, si dolorum sævitia penitus conquievit, ægotantes non nimis ætate graves & senectute enervati, ac præterea per exquisitam victus rationem aliaque congrua remedia ipsum curationis successum secundant. Et licet inchoato potu, solennes hi dolores repetere videantur, tamen & paucorum dierum nulliusque moranti sunt; neque ab eodem desistendum, quum aquæ, simul ac viam sibi patefecerint, fibras emolliant & ipsam modicam illarum stricturam, doloris causam solvant, ut is brevi sopiatur. Tenendum autem: quod, si erysipelacea inflammatio doloribus accesserit, suspendendus sit ad aliquot dies aquæ usus.

§. VI.

De balneo monendum: quod quum ob copiosum
terreum

terreum elementum, constringente & poros occludente facultate polleat, non adeo conveniens & salubris sit ejus usus his, qui spasmodicis tensionibus, vaga arthritide, podagra, convulsionibus & erysipelate detinentur, eo quod acre illud serum, articularum ligamentis incumbens, nec non erysipelatis materiam, ad interiores partes repellit, & sufflaminata perspiratione longe saluberrima, sordes augendo noxam infert. Imprimis THONERUS lib. IV. obs. 5. illustribus aliquot exemplis confirmat, quod balneum in thermis podagricis & arthriticis impense noceat, & pneumoniam, febrem, anorexiam & paralyfin suscitare possit. Aliud exemplum memoratu dignum relatum legimus in M. N. C. Dec. III. An. II. obs. 115. de dolore podagrico thermarum externo usu sedato quidem, sed subsequente subita morte, translata scilicet morbi causa ad alvum & vesicam. In colica quoque ipse PAYERUS l. c. pag. 29. balneum dissuadet his verbis: *caveat colicus, ne sedeat in balneo, quia in exitu intenditur colicus dolor, sicut in pluribus vidi.* Et idem Auctor pag. 64. ita differit: *ad balnea non absque discrimine mittendi sunt diversis morbis languentes: vidimus enim multos thermas ingressos, lethali gravamine periclitatos.* Paucis: balnea nocent impuris omnibus corporibus, eamque ob causam præmittenda est purgatio, vel potus thermalis aquæ.

§. VII.

Sunt etiam multi, inprimis qui hypochondriaco malo affliguntur, & hanc ob causam variis spasmodicis tractionibus & constrictionibus, anxietate, flatibus nec non doloribus ac torminibus in abdomine detinentur, vel levi saltem de causa horum vehementiam persentiscunt, quibus minus salubris & tutus est balnei usus: id quod etiam contingit in iis, qui strictoris alvi sunt & quibus potus tempore ægrius per corpus aquæ transferunt. Etenim licet thermalium aquarum potatio his ipsis feliciter admodum & cum insigni levamine successerit: attamen si ad balneum descendunt, illico pejus se habent, & perducto ad finem ejus usu, maximo damno maculantur. Melius igitur rebus suis hi consulunt, si quum auspicata & salubris fuit aquarum potatio, valetudinem non in aleam dent, sed à balneo abstineant, & dies eidem dicatos, quieti corporisque refectioni impendant.

§. VIII.

Quæ quum ita sint, prudentis utique & perspicacis erit Medici, ut exquisitam rationem habeat corporis cui tam externe, quam interne thermas nostras ad usum præscribit: dispiciendo potissimum ætatem, virium & temperamenti rationem, cui vitæ generi assuetus sit æger, quibus olim & haud ita pridem tentatus morbis, & quomodo ab iis liberatus, quænam animi sit dispositio, an is quietus & tranquillus, & quæ plura alia sunt. Ad hæc enim si non dirigitur curatio, non salutariter cedere, sed potius dispendiosa esse solet. Quare salutis suæ parum prospiciunt ii, qui neglectis Medicorum prudentum consiliis, ex arbitrio suo usum hunc moliuntur, quum ipsi, neque an proficius sit discernere, neque eundem singulis circumstantiis prudenter accommodare, longius extrahere, vel abrupte, sciant, neque variis sub ipsa cura obvenientibus symptomatibus succurrere possint.

§. IX.

Vehementer autem certe optandum esset, ut ipsi medentes, qui regimen Carolinarum administrare sibi sumunt, tantum haberent ingenii & habilitatis, quantum ad incomparabile hoc divinum munus, ægris ex æquo & cum fructu dispensandum, requiritur. Sed multo profecto horum præconceptis opinionibus occæcati, vel nescio quid metuentes, supervacaneum

Frid. Hoffmanni Oper. Tom. V.

fore putant laborem huic disquisitioni impendendum, sed contenti sunt, si levi de iisdem auditiuncula resperfi, nonnihil fermocinari norunt, licet hanc ob causam stolidum nonnisi consilium dare possint, in re ipsis ignota minusque perspecta. Ut igitur errata sua palpent & aquarum vires penitus cognoscant, frequentandi ipsis erunt soterii fontes, & ex vero omnes circumstantiæ in tot tamque diversis ibi confluentibus ægrotantibus observandæ & annotandæ: neque dubium est, quin si hoc fecerint, eandem inde reportaturi sint convictionem, quam STRAUSSUS in *descript. Carolin.* pag. 57. sibi contigisse ingenue profitetur. Non minus etiam ad præcavendum damnum, quod ex abusu aquarum redundat, multum certe faceret, si Medici, ibi locorum aut degentes, aut eo, quo iisdem uti solenne est tempore, ibidem medicinam facitantes, curiose, prolixius & candide notarent omnes casus, ubi thermarum usus vel obfuit, vel profuit; quo exinde magis elucescerent peculiare ejus dotes, neque à quovis per longam demum experientiam addisci deberent.

CAPUT VII.

De ratione potandi Carolinas.

§. I.

Thermæ quidem antiquioribus non fuerunt ignotæ teste BACCIO lib. de therm. lib. VII. cap. I. Et ipse HIPPOCRATES de aër. aqu. & loc. cap. 13. injicit mentionem aquarum calidarum, quibus insit sulphur, bitumen & nitrum. Sed usus earundem magis fuit externus & in deliciis maxime, quales erant desides Baiæ, inter Romanos celebratissimæ; de interno autem earum potu, exigua in Veterum monumentis sunt vestigia. Et de Carolinis etiam nonnullorum fert sententia: easdem interne demum ante septuaginta circiter annos in usum esse vocatas, & antea non nisi exterius usurpatas. Verum duo jam effluerunt sæcula, quum celebris Ellboganus Medicus Wencensl. PAYERUS de Carolinis scripsit, & quidem omnium optime & peritissime, earumque usum interne maxime commendavit, ita, ut eundem longe balneo anteponendum esse censuerit. Et revera, plus etiam ad potum, quam balneum idoneæ sunt, plus etiam in morbis internis efficiunt, quam externis.

§. II.

Necessarium igitur erit, ut quæ circa internum usum tenenda tradam, quo salutaris respondeat eventus. Antequam is inchoetur, corpus est præparandum, & prima regio blando laxante expurganda, ne aquæ moles, occluso per villosam tunicam transitu, restagnet, habitum corporis in tumorem attollat & nausea, anxietate & vomitu molesta sit. Nam licet ipsæ thermæ alvum aliquoties potæ sollicitent; nemo tamen incommoda illa, quæ neglecta præparatione ingruunt, lubens suscipiet, & expectabit donec aquæ viam sibi aperuerint: inprimis quum ipse humor salutaris, prius non sublatis sordibus, his utique conspurcetur & inquinatus ad sanguinem volvatur. Perficienda autem est hæc purgatio neutiquam validioribus & acrioribus, quæ tonum intestinorum & ventriculi, ad felicem curationis successum summopere necessarium, labefactando ac destruendo, graviter nocent; sed lenioribus & laxantibus, quo nomine laudem merentur salia digestiva & abstersiva, nec non mannata & rhabarbarina, pro varia ægrotantis corporis conditione & vigore, sufficienti in quantitate propinanda. Inprimis etiam ex usu esse possunt pilulæ balsamicæ temperatæ, quæ aloës aliquid complectuntur, aliquoties iterato deglutiendæ; quippe quæ,

non solum primarum viarum diverticula à sordibus liberant, sed etiam ventriculorum cum intestinis & vicinis partibus simul roborant.

§. III.

Porro ad felicem potationis effectum etiam sumopere necessarium est, quo sub inoffenso sanguinis & humorum per corporis compagem progressu, aquarum assumptarum, iisdem infundi, permixtarum ad omnes partes libere & sufficienti in copia diffundi, ac tandem per dicatos sordium excretioni tubulos iterum expelli possint. Quod quum farto sanguinis plenitudine corpore fieri nequeat: expedit utique, quo ante potum aquarum incisa vena, superfluum exantletur & liber commeatus procuretur, quin, si exundans nimis plethora adest, sanguinis missio utiliter iterato suscipi potest. An vero laxatio prius instituenda, quam venarum apertio, non adeo multum refert, sed sufficit nosse, alvum commoventibus sanguinem non esse subducendam. Nihilominus si nimia sanguinis redundantia urget, aliquot ante purgationem diebus venarum sectio admittenda, cavendo tantum, ne venarum sectio & alvi subductio simul contingant: quandoquidem debilitatis per sanguinis detractionem tantisper ventriculo & intestinis, verendum est, ut medicamentum exhibitum desideratum effectum exsequatur.

§. IV.

Præterea ad exoptatum curationis successum impetrandum confert, quo perspiratio libere & expedite succedat, eamque ob causam eandem æstivo potissimum inchoante & declinante tempore adornare moris est, licet aquis brumali non minus, quam æstivo tempore, eadem insit facultas. Animus ab omni ægritudine liberetur, officia & labores suspendantur, & potaturi exquisitum, tam in cibo, quam potu, sibi indicant temperamentum, omniaque ea studiose evitent, quæ ullo modo salutarem aquarum operationem turbare & impedire possunt.

§. V.

Ad ipsum potandi modum quod attinet, is quidem non ita præscribi ac delineari potest, ut omnibus quadret; sed discrepat utique pro varia virium, sensibilitatis & temperamentorum ratione, nec non diversa morborum quibus afflicti accedunt indole ac causa. Hinc est, quod alii largiorem, alii parciorem aquarum copiam bibere debeant, quidam brevi sanitatem recuperent, nonnulli longius extracto usu eandem adipiscantur. Quod si igitur corpus ad aquarum usum rite præparatum, elapso uno vel altero post purgationem die, inchoatur potus, cui quam maxime accommodum est tempus matutinum, quo firmato per somnum corpore, aquarum operatio ante prandium absolvatur. Qui è lecto se subducere nequeunt, cubantes bibant & stratorum calore madores eliciant; reliqui vero aquam deambulantes, vel melius sedentes, capiant, quippe sessu, non solum abdomen simulque ventriculus tantisper comprimitur, ut aqua citius, fulto sic motu peristaltico, intestinorum volumen trajiciant, sed etiam æqualis perspirationis successus servatur, qui moto sub deambulatione aëre, per allapsum ejus, facile pororum occlusioni, saltem in ea quam contingit parte, intercipitur.

§. VI.

Aqua ex scatebra hausta & asportata, nulla interposita mora, quantum quidem calor permittit, forbilletur, ne longiori mora delibatissima pars iisdem elabatur, aut si diutius steterit, inferiora in ollulis & lagenis sunt seponenda. Præstat autem sub initio aquam parcius, ac subsequenter diebus largius bibere, & tandem curatione peracta, converso ordine,

in copiam magis accisam definere. Quum enim omne insuetum naturæ mutationem inferat, minus consultum est, largam aquarum copiam prius ingerere, quam de expedito earundem transitu constet. Proinde tutius est, primo die XV. tantum vel XIX. ebibere ollulas, nisi majorem dosin firmitas minusque mobilis corporis constitutio suadeat. Insequenti vero tempore, plurimis ad XXX. usque quotidie ollulas, paucioribus ad XL. ascendere conducit. Optime legitima portio dignoscitur ex sedium numero & mole, quæ si sexies vel octies antemeridianis horis secedunt, simulque urina promte fluit, sufficientem aquarum copiam fuisse assumptam patet. Notandum tamen est, quod si sudor & urina copiosius manant, alvi secessus non adeo frequens esse soleat, nec tamen majori aquarum copia urgendus, quum per has vias sordes & aqua sufficienter proscribantur. Vicissim non mirum est, si in his, quibus alvus vel vicies solvitur, parcius sudor & urina prodeant. Quod si vero aqua ægrius per corpus transeant & non in debita quantitate iterum effluant, secessus, per usum salium, Ebshamensis maxime, Sedlicensis & Egrani, nec non illius, quod in Carolinis paratur, promovendus.

§. VII.

Non raro etiam contingit, ut ventriculo & tenuibus intestinis crasso & lento muco firmitus obductis, aqua subsistat & non ad interiora admittatur, sed moram necendo, eliquata spissa mucositate, nauseam & vomitum suscitet. Quod si evenerit, à potu non desistendum, sed stomacho subverso, illico iterum aliquot ollulæ ingerendæ, eoque facto, aqua retinebitur & potus feliciter cedit. Porro sub potu nonnunquam in hypochondriacis, flatus & dolores pungentes, tam in dextro quam sinistro hypochondriorum latere, infesti sunt, a crudis & viscidis succis, nec non facibus induratis, ab aquis in motum deductis & in flexuris coli obhærescentibus, oriundi, quibus submovendis, apprime conducunt clysteres emollientes & strictionem mulcentes.

§. VIII.

Alii torporem capitis persentiunt, inclinationem ad somnum, vertiginem, uvulæ lapsum, coryzam & hujus generis alia experiuntur, ob lentiores aquarum per capitis tubulos & glandulas colli commeatum. Quidam de dolore & ardore circa cordis scrobiculum ad dorsum tendente conqueruntur, forsitan ob bilis commotionem, vel nervorum ventriculi ab aquarum pondere tractu. Nonnulli, in quibus sanguinis massa multis acerbis sordibus referta, propulsis ad superficiem corporis ab aquis recrementitiis materiis, purpura, maculis, scabie & erysipellate infestantur. In habitioribus & pinguioribus, urinae fluxus sub initium tantisper nonnunquam sufflaminatur, quia liquati ab aqua crassi & viscidi succi, ad renum angustiores tubulos delati, ægrius pertranseunt, & urina postmodum stillans turbida mingitur. Sed omnia hæc symptomata, neque Medicum terrere, neque laborantes ab instituto abalienare debent, quia continuato aquarum potu, sponte exspirant & remittunt.

§. IX.

Non minus experientia compertum habeo, quod in iis, qui arthritidi, podagræ, chiragræ & doloribus ex calculo antea obnoxii fuerunt, sub initium curæ, horum morborum insultus leviores repetant, brevi iterum ultro discessuri. Idem usu venit in tumoribus, pedum maxime corporisque inferiorum, haud raro in spongiosa, laxa carne præditis, obviis, qui nisi extracto longius potu, sponte subsident, certissime tamen, aliquoties adhibito balneo, evanescent. Quod si vero mensium vel hæmorrhoidum fluxus inciderit in hanc

hanc temporis periodum, qua aquæ bibuntur, fatius est, potissimum foeminis, ad aliquot dies à potu desistere.

§. X.

Ut vero ad ea, quæ de modo bibendi monenda, redeam, optimum quidem, si peritus Medicus judicet, quamdiu potatio, pro morbi ægrique conditione, sit extrahenda; interim tamen communis est mos, ut septem dies primum potui, & duo vel tres balneo, impendantur, quibus exactis denuo potatio cum balnei usu instituitur, & his quoque absolutis, nonnunquam tertia vice eadem ratione aquæ usus iteratur. Verum, si dicere licet quod res est, longè consultius utique esse videtur, viis semel patulis redditis, eoque potui insistere, quousque morbus exposcit, quam balneo interpolare successum, meatus iterum adducere, & demum nova potatione easdem rursus referare. Quare, nostra quidem sententia, optimum foret, si potui tamdiu indulgeretur, ad decem circiter dies, donec corpus sufficienter expurgatum, & post duorum dierum intercapedinem, paucis adhuc diebus, altera modo cura susciperetur & absolveretur, nisi enatus tumor, ut balneum interponatur, jusserit.

§. XI.

Solenne etiam est in Carolinis, ut bibentes, ob inficetum tantisper aquæ saporem, ori indant & mandant cortices citri & aurantiorum conditos: sed quia iidem, ob adhærescentem interiorem album corticem, difficiles concoctu sunt, melius est saccharo instillare oleum de cedro, vel essentiam corticum aurantiorum, & epotis aliquot ollulis, tantillo hujus elæosacchari ingratum saporem emendare; quippe quod, nihil quod noxium relinquit, sed potius ventriculi robur solatur ipsumque sanguinem balsamica sua virtute egregie perfundit. Ii autem qui tabaci fumo assueverunt, sub potu thermalis aquæ eodem uti possunt, ne tamen quid nimis fiat.

C A P U T VIII.

De modo utendi balneo in Carolinis.

§. I.

Restat adhuc ut de externo Carolinarum usu differamus & quæ in hoc tenenda tradamus. Is plerumque ita adornatur, ut universum corpus balneo immittatur: nonnulli tamen embrocationem affectarum partium etiam suadent. In genere autem monendum: lavacrum in Carolinis nunquam prius esse admittendum, quam thermæ aquæ ad aliquot dies assumptæ. Non minus die ante balneum, per lenē laxans, cujus generis sunt pilulæ balsamicæ, aquæ, à potu in corpore restibiles sunt evocandæ; ita tamen, ut pilulæ mature deglutiantur, ne longius earum operatio duret, sed antequam tempus balnei appropinquet, finiatur, quandoquidem sanitati nihil magis dispendiosum excogitari potest, quam uno eodemque tempore, per laxantis usum apertionem, & balneum occlusionem moliri.

§. II.

Ubi ad balneum ventum, corpus aquæ non nimis calidæ est immittendum, sed tamdiu expectandum, donec tepore tantum perfusa sit: quod si enim nimis fervida est aqua, non solum vires dejicit, sed etiam sitim, quàm plane febrem accendit. Quare etiam moris est, ut fervidissima ex calidissimo fonte in caldariis per XXIV. horas detineatur, quo tepescat. Nihil minus tamen paullo ante quam è balneo egredien-

Frid. Hoffmanni Oper. Tom. V.

dum, calidâ affundenda & eidem corpus immergendum. Post balneum caute providendum ne frigidior aura corpori allabatur; sed in tepidario corpus calefactis linteis abstergendum & perfricandum. Eandem quoque in rem apprine utile est, si balneo egressi, stragulis, prius leniter calefactis, corpus immittunt & lenem inadorem expectant.

§. III.

Tempus quo lavacro utendum quilibet sibi maxime accommodum & opportunum eligere potest, cavendo tantum, ne mox post prandium vel coenam in balneum descendat: aptissimum tamen tempus est matutinum, inter sextam & septimam horam, & post meridiem, quinta hora, quibus concoctione peracta & chylo distributo, nihil noxæ timendum. Quamdiu vero balneo insidendum, pro circumstantiarum ratione præscribendum est. Plurimi horarium commodissime ferunt, quod satis longum est, quum quod primo lavacro non abigitur, repetito cedit, & periculosum est diuturniori infessu simul omnium discussionem urgere. Sunt etiam, qui suadent ut eadem ratione, quàm de potatione monuimus, primo brevius, & deinde longius, in balneo morentur ægri, ita quidem, ut primo per horam, deinceps per unam & dimidiam, tum per duas balnei usum extendant, & gradatim postea iterum desinant. Verum licet hic modus non penitus reprobandus esse videatur, neutiquam tamen indiscretim omnibus est imperandus, sed Medici curam dirigentis judicio relinquendus.

§. IV.

Supereest alia Carolinis exterius utendi ratio. Scilicet multi ad eas se conferunt, nulla alia plane labe affecti, quam quod resolutione femoris, aut alius cujusdam externæ partis vitio, detineantur. Hi ut plurimum nihil aliud agunt, quam ut affectum membrum tantum tepidæ immergant, aut saltem corpus ad umbilici regionem usque aquæ immittant, & egregium inde experiuntur levamen. Eundem in finem alii excogitarunt modum, quo aquam thermalem partibus laborantibus sensim instillant, quo in iidem exquisitus magis suscitetur sensus. Sed quum ita admissus usus nonnullis bene cesserit, aliis non item; magis est re est, si in consilium adhibetur usu pollens Medicus, qui pro judicio omnia dispenset. Saltem minus tutum est externe tantum uti, nisi prius usurpata sint laxantia.

§. V.

Absoluto autem penitus omni, tam interno quam externo Carolinarum usu, necessarium est, quo aquarum in corpore restagnantium colluvies per oblatum paullo efficacius purgans exturbetur. Sed multum certe interest, quo prudenter id perficiatur, ne ægrotantes corpus magis caussarium ex thermis reportent, quam eo adduxerunt. Sunt enim plurimi, qui hunc in finem mirifice commendant fortiora purgantia, quorum censum subeunt resina jalappæ, aurum fulminans, mercurius dulcis, trochisci alhandal, gummi guttæ, extractum esulæ, scammonium & hujus farinæ plura: sed quam præposere ipsa docet experientia. Quippe metallica, ut mercurius dulcis & aurum fulminans, licet aliis nupta, in quibusdam casibus utilitate non destituantur: minime tamen ex usu sunt, inprimis resinæ jalappæ juncta, post aquarum mineralium usum, eo quod ob gravitatem suam diutius incumbunt nervosis tunicis, easdemque ob accessum aquæ falsæ gravius rodunt. Resina jalappæ autem ab aquis non liquatur, sed firmiter adhærescendo intestinis, eo majora concitat tormina, quo exquisitiore sensu hæc pollent. Et omnia denique omnino purgantia tonum & motum peristalticum in intestinis pervertunt & plane destruunt, qui tamen ad vitam

& sanitatem summopere necessarius est. Quare, utut non penitus validiorum usus in robustioribus sit rejiciendus, absit tamen in omnibus tenerioribus & sensibilibioribus. Longe certe commodius, tuto non minus quam efficaciter, huic scopo inservit manna, paulo majori dosi cum sale digestivo, vel rhabarbaro exhibita, nec non pilulæ ex aloë rite præparatæ, extractisque amaris concinnatæ & extracto ellebori nigri aquoso, nec non extracto rhabarbari acuata, quippe quæ, necessitate exigente, iterato propinari possunt.

§. VI.

Ultimo loco quædam adhuc de victus & vitæ ratione, toto curationis tempore servanda, monenda supersunt. Primo omnium abstinendum est à nimia cibi & potus repletionem & ingestionem. Vitentur omnes cibi indurati, falsi, duri, concoctu difficiles, marini, acidi, fermentescibiles, lacticia & flatuum proventui faventes. Ex cerevisiis laudem merentur diu-

reticæ, uti sunt Iochimthalensis, Sneebergensis & Neukirchenensis. Vinum Hungaricum, Languedocense, & hujus census aliud, inter cibandum admitti potest. Post pastum, potum & balneum somnus est discutiendus & arcendus. Aer frigidus, pluviosus & crebrius immutatus sedulo evitandus, per totius curæ tempus. Motus corporisque exercitium, quo aquarum operatio egregie promovetur, subinde instituendum; omnes autem animi perturbationes, curæ & profundæ meditationes omni studio fugiendæ, & cuncta ita adornanda, quo is, qui propositus est finis, fortunante Deo impetretur. Et hæc de Carolinis physice & medicæ exposuisse sufficiant, qui plura, potissimum ad legitimum thermarum usum facientia, desiderat, adeat descriptionem Carolinarum Cl. SRAUSSII, SOMMERI, PAYERI & STROBELBERGERI, nec non libellum, quem vernacula, *de conservanda per convenientem mineralium aquarum usum valetudine*, ante aliquot annos evulgavi.



EXAMEN CHYMICO-MEDICUM

FONTIS SEDLICENSIS AMARI
IN BOHEMIA NOVITER DETECTI,

NEC NON SALIS EX EODEM PARATI.

P R O Æ M I U M.

Ingens divinæ misericordiæ donum aquas minerales medicatas esse, recte omnino dictum est ab ARNOBIO; eo magis & admirandum & venerandum, quo magis patet: eas non unius ejusdemque esse indolis, virtutis & usus, sed in tanta ægrotantium ipsorumque morborum diversitate, ita sapientissime dispensatas, ut non uni tantum aut alteri, sed quamplurimis saluberrimam præstare possint opem. Et enim licet in propatulo sit, eximiam inter fontes suo genio & indole salubres subesse harmoniam & convenientiam: nequiquam tamen negari potest, quod haud levis etiam inter eosdem vigeat differentia, ratione virium & elementorum, ut alii his, alii aliis morbis, magis dicati esse videantur, & nonnulli reliquis salubriores, præstabiliores magisque efficaces sint. Scilicet jam ex superioribus in aprico esse reor, multas salubrium aquarum, omnis terre, vel mineralis contagii expertes, potissimam facultatis suæ partem trahere, à singulari humoris puritate & levitate, & ob id mitissimæ, lenissimæ omniumque tutissimæ esse operationis. Alias terram calcariam, vel martialem ochram complexu suo suscepisse, eademque effectum exequi maxime roborantem & debilia fulcientem. Plerasque autem armatas esse salinis principiis, vigore & lenitate mixtissimis, ita quidem, ut vel alcalini salis genium referant, vel ad neutrius naturam accedant, vel etiam sal fixum alcalinum & medium, amico connubio junctum exhibeant, & his effectum vel diureticum, vel alvum ducentem, vel etiam utrumque simul, mox efficacius, mox remissius, prout parcius, vel uberius, salino elemento imbutæ, edant. Quemadmodum igitur tria hæc postrema fontium soteriorum genera, præ alijs medica virtute splendent, & tam in arcendis, quam debellandis, quamplurimis morbis, facultate pollent longe saluberrima: ita in horum numero haud ultimum certe merentur locum ii, qui sal neutrum in consortium admiserunt. Quum enim salium mediorum ea propria

fit laus & peculiaris indoles, ut non solum naturæ humanæ omnium maxime sint convenientia, & ne minimam quidem alterationem sanguinis & fluorum vitalium texturæ ac mixtionem inducant, sed etiam post egregias corpori præstas utilitates, expedite admodum, per ductuum excretoriorum ostia, alvi maxime secessum, exeant, sordesque simul everrant; facile constat: aquas iisdem instructas, venis totique corpori esse amicissimas non modo, tutas & ad usum internum egregie accommodas, verum etiam efficacissimas & longe utilissimas. Quo salubriores autem & præstantiores sunt fontes salis medii connubio nobilitati: eo magis certe mirandum, quod in Germania, nescio an ipsorum raritate, an inquirentium desidia & inscitia? nullus plane huc usque innotuerit, qui purum ejusmodi neutrius ingenii sal, sine omni alcalini vestigio, continuerit, præter hunc, qui paucis abhinc annis, meo potissimum studio meaque commendatione, ad publicam cognitionem pervenit & ad usum traductus est. Et licet hoc nomine dudum in Galliis Burbonenses & maxime in Angliâ Ebshamenses celebres fuerint: noster tamen fons, his ob uberiores salis cathartici copiam, longe præferendus est. Quare quum is, neque in Germania, neque in alijs regionibus æqualem & parem habeat, excepto illo, qui nuperrime demum in hujus confiniis salire deprehensus est, ac de eodem parum adhuc inter eruditos constet: non dubitavi, ejus natales & virtutes quas possidet longe nobilissimas, inque primis salis istius amaricantis, à quo præcipua ejus virtus pendet, naturam, indolem ac genesin paullo penitus exponere atque evolvere; ut Medici & aliorum locorum eruditi intelligant, quam salubres vires & dotes, immensa Dei benignitas, in Bohemia per novum hunc fontem, in salutem atque incolumitatem ægrotantium, clementissime obtulerit.

§. I.

Exposituro mihi eximias, quibus Sedlicensis fons splendet, dotes ac facultates, ordo rerum dicendarum exigere videtur, ut prius breviter strictimque ejus originem

ginem & incunabula lustrem, quam ad eruenda ejus elementa & dependentes inde virtutes progrediar. Est autem natale nostri fontis solum Bohemia, aquarum mineralium feracissima, iisque tota propemodum irrigua regio; & patria quidem obtigit Sedlicium, ignotus alias & ignobilis vicus, de quo non est ut quicquam commemoremus, præter id, quod ditioni ac potestati, religiosorum Canonorum Brixienfium, qui vocantur *die Creutz-Herren*, pareat, & uno Brixia, duobus vero Tœplicio, ob thermas celebratissima urbe, distet milliaribus. Ipsam scaturiginem tenuis rustici villa comprehendit; de qua illud inprimis memorabile est: quod tempestate brumali & cœlo pluvioso, longe abundantius salubrem laticem emittat, quam æstuoso annique gravissimo tempore; nihilo minus tamen eundem semper servet saporem, virtutem & eandem salis contenti quantitatem.

§. II.

Diu admodum in occulto jacuit & neglectui datus fuit nobilissimus hic medicatus fons, qui nec ad usum domesticum & culinarem, nec animantium potum ob inficetum saporem aptus, levi tantum audituuncula eo nomine inquilinis notus erat, quod ad mensuram dimidiam haustus, moveret alvum eamque obstructam referaret: tandem vero, in usum & in publicam notitiam ut proferretur hæc oblata fuit occasio. Labebatur jam annus MDCCXVII. quum adulto Maio iter ad Carolinas suscipiens, illud per Dresdam primum & deinde Tœplicium dirigerem, hanc maxime ob causam, ut celebratissimas Tœplicenses thermas inviserem easdemque curatius paullo ad ipsam scatibræ examini subjicerem. Tœplicium igitur delatus, visitatis & inspectis quæ notatu digna erant, explorationem thermalium aquarum adornavi, per varia tentamina, reagentium admixtionem ipsamque exhalationem in earum elementa inquirendo & cuncta studiose annotando. Intererat autem huic negotio præter Excell. Dn. D. ZITTMANNUM aliosque, illustrissimi Comitum de CLARY aulæ præfectus, jam vita functus, & impensius omnia oculis usurpans, tandem mentionem faciebat aquæ amarissimæ salsæ, purgantis, in pago Sedlitz scaturientis, adjiciens: se quidem vehementer optare, ut eandem pari ratione explorarem.

§. III.

His auditis, animum naturalium rerum curiosissimum, illico ingens incessit cupido, ignotæ hujus aquæ indolem penitus pernosceri, eaque motus, ab eodem, qui cupiditatem injecerat aulæ præfecto, petii, ut copiam ejusdem mihi faceret. Is illico petito annuens, postera die duas lagenas, aqua hac repletas, afferri curavit mihique transmisit. Accinxi igitur me ad examen, & his potissimum experimentis indagacionem institui. Infudi primum undam vitro puro & transparenti, in quo summam ostendit perspicuitatem & pelluciditatem: gustu autem explorata, saporem insigniter amarum & salsum exhibuit. Tum spiritus acidus validiores, vitrioli nempe & nitri, affudi, nullum tamen ebullitionis motum observavi, eoque compertum habui, non redundare alcalinum principium, id quod etiam adjectus syrupus violarum, qui viridem colorem, si quicquam alcalini salis accedit, induit, parum, vel nihil mutatus, confirmavit. Ad mixturam gallarum nullus purpureus color in conspectum venit, indicio, nihil martialis substantiæ hanc aquam continere. Instillato oleo tartari, quod Chymici dicunt per deliquium, perspicuitas quodammodo conturbata fuit, quod semper fere fieri solet, si quicquam calcaris terræ in aquæ sinu delitescit. Tandem ad evaporationem ventum, qua lenius administrata, ex libra medica drachmas duas & aliquot grana obtinui salis amari mediæ naturæ, quod Ebs-

hamensis Anglicani notatiorem similitudinem habebat.

§. IV.

Hinc perrexi ad Carolinas, inserviturus pro more consilio & studio ægrotantibus, frequentissime circa id tempus ibi confluentibus. Tum autem fors mihi obtigit, ut illustrissimus Bohemiæ Cancellarius, Comes de KYNISKI, tutelam sanitatis mihi committeret, cui data occasione fideliter acta retuli & vires præstantissimæ hujus scatibræ exposui. Is acceptum sibi hoc esse non solum gratiose testificatus est, sed etiam animos addidit & à me exegit, ut ulterius in hujus fontis salisque ex eo extracti indolem inquirerem, & ad Augustissimum Cæsarem illius notitiam perferrem. Domum vero redux ex thermis his factus, non destiti examen hujus fontis, noviter detecti, ejusque virtutes, à priori perspectas, in dissertatione *de acidularum & thermarum usu & abusu*, brevibus cum eruditis communicare.

§. V.

Quamvis vero discedens à Tœplicensibus, Medicis ibi medicinam facitantes, hujus aquæ usum, ad purgandam primam regionem, loco aliorum purgantium mirifice commendassem, simulque rogassem, ut efficaciam & virtutem ejus per experimenta practica magis adhuc explorarent: vix tamen quisquam fuit, qui hoc ipsum cum peculiari attentione & observatione perficeret; donec tandem peropportuna obtingeret occasio, qua saluberrima hujus fontis virtus penitus ex latebris & occulto quasi emergeret & illustrius exsplenderet. Accesserat nimirum ineunte vere anni MDCCXXI. ad Carolinas Augustissima Imperatrix, iisque utebatur sub præsentia & consilio *Perillustri Consilarii & Archiatri Cæsarei*, Dni. PII NICOLAI GARELLI, quocum à longo jam tempore & amicitia & litterarum commercium mihi intercesserat. Appuleram & ego in Carolinis, & hunc consummata eruditionis Medicum invisebam, qui inter alios, quos mecum ibidem miscebat sermones, Sedlicensis quoque fontis reminiscebatur, cujus notitia jam ex supra memorata dissertatione ad ipsum pervenerat, & ingenti hanc aquam videndi desiderio flagrans, ut asportaretur rogabat. Ablegato igitur Sedlicium tabellario & aqua per eundem advecta, non solum superius memorata experimenta iterata vice instituta sunt, sed periculum etiam fecimus, & eandem debito cum regimine quibusdam febre intermittente decumbentibus cum insigni levamine obtulimus. Validissime placuerunt omnia excellentissimo Archiatro, & finito Carolinarum usu, Pragam cum Augustissima Imperatrice concedens, mirificis laudibus hanc aquam Bohemiæ Proceribus commendavit, quo factum est, ut ingenti copia Pragam & Viennam adveheretur, ejusque virtus ad alvum solvendam & roborandum stomachum insigniter approbaretur. Subsequente vero autumno, illustrissimi Bohemiæ Comites ac reliqui Proceres, qui quotannis in thermis Tœplicensibus confluunt, exoptatissimo cum emolumento hac aqua una cum balneo usi sunt. Exsplenduit exinde magis magisque medicata hujus fontis virtus, & fama de eodem Dresdam etiam, Berolinum aliasque præcipuas urbes perlata fuit, ut ibidem tam familiaris jam sit Sedlicensium aquarum usus, quam Egranarum.

§. VI.

Quum vero in fale potissimum resideat laudatissima fontis virtus, neque semper opportuna occasio ad dissita loca aquam hanc asportandi detur, nec quilibet sumtus transportationi impendere valeat: auctor & suaser exstiti Pharmacopœo & Chymico Illustrissimi Comitum de CLARY, Tœplicensi, MULLERO,

ut debita enchirefi, leniori nempe coctione, evaporatione & purificatione, sal ex eadem pararet exterisque divenderet. Nec spem fefellit eventus. Is enim, pervulgata hujus salis nobilissima efficacia, jam tanta in copia ejus præparationem adornare solet, ut vix quinque centenarii sufficiant, qui quotannis consumuntur & per remotas regiones distribuuntur.

§. VII.

His ita peractis, quum fontis hujus laus & spectatissima virtus, fama longe lateque celebraretur: factum est, ut solertius excuteretur circumjectum solum & terra fonti propinqua, ex quo id fructus tulerunt rimantes, ut aliam adhuc falsam & amaram scatebram haud ita pridem detegerent. Salit hæc, vena admodum benigna, in patenti agro, ad pagum Seydschütz, & haud adeo magna intercapedine à Sedlicensi recedit, situm autem obtinet hac paullo altiore, & sapor intensius amaricans magisque falsus est: neque dubitandum videtur, quin hæc per mæandros declivi itinere Sedlicium etiam laticem dimittat, & fonti ibi scaturienti pabulum & materiam præbeat. Elementa quidem ipsiusque salis indoles in utroque fonte non discrepant, sed examine facto, eadem ambo exhibent phænomena: posterior tamen hic tantisper uberiores salis apparatus vehit, & libræ medicæ pondere, duas ejus drachmas cum decem granis, & terræ calcariæ tenerioris grana sex complectitur: hanc, uti reor, ob rationem, quod in loco elatiori constitutus, à torrentium incursum tutior sit, quam quidem Sedlicensis, cujus unda depressiora permeans, facile aliarum aquarum accessu diluitur.

§. VIII.

Admissi sumus ad fontis nostri incunabula, & vidimus, qua ratione innotuerit, & indies magis magisque inclaruerit, nec non quod salino potissimum, ad medii naturam accedente, elemento polleat: nunc, ut paullo penitius & exquisitius hujus salis indolem pernoscamus, instituti nostri ratio exposcere videtur. Quum vero hoc sal, & sapore & virtute proxime accedat ad illud, quod Ebshamensis nomine venit, non abs re fore puto, si prius hujus brevibus mentionem injiciam, & tum nonnulla experimenta & tentamina afferam, quæ cum utrisque institui, quo comparatione facta, uniuscujusque indoles & peculiaris virtus eo testatius elucescat. Vocari autem solet Anglicanum hoc sal Epsomense, five potius Ebshamense; quoniam celeberrimus Angliæ Medicus, D. GREW, primus ex fontibus Angliæ Ebshamensibus ejusmodi sal amarum purgans præparavit, ac de eodem elegantem libellum composuit. Quum autem harum Ebshamensium aquarum libra medica, non ultra drachmam dimidiam salis præbeat, certo utique certius est, Ebshamense ita dictum sal, quod in magnis vasibus, immo doliis, ex Anglia adportatur, & cujus libra vix octo grossis venit, ex hujus fontis aqua non præparari, sed arte factum esse. Et præparatur illud etiam non modo in Anglia à famigeratissimo Chymico HANCKWITZ, ex residuo à coctione salis communis lixivio, vulgo *Mutter-Soole*, sed & in Germania à celebri Lipsiensi Physico & Medico, LEHMANNO, in Thuringia Sulzæ, eximia in quantitate conficitur. Neque dubium est, quin aluminosum quoddam acidum, cum alcalina salis communis terra congregiens, in hoc lixivio contineatur. Notandum tamen, non ex omnibus salinis, neque nostris Halensibus, tale sal medium præparari posse, hanc forsan ob rationem, quod mineræ aluminis in tractibus subterraneis, quos falsugo perlabitur, deficient.

§. IX.

Experimenta autem, cum utrisque uno eodemque

tempore adornata, huc potissimum redeunt & hæc observavimus. I. Paratum è fonte Sedlicensi sal, coloris est opaci, nivei & quasi lactei; Ebshamense vero majori gaudet pelluciditate & aquositate, unde etiam gravitate specifica Sedlicense antecellit, & multo promptius humiditatem ex aëre imbibit. II. Sal Sedlicense, tam in aqua solutum, quam solida forma gustu exploratum, sapore insigniter amaro non solum Anglicanum superat, sed etiam simul saporem nauseosum exhibet. III. Crucibulo ignito injecta, ambo fluunt, & utrumque dimidiam sui partem in vaporis aquei forma amittit: fluor vero hic igneus, in Sedlicensi limpidissimus & aquæ similis, in Epsomensi autem magis tenax est atque lentescens. IV. Rectificatissimus vini spiritus utriusque ne granum quidem absorbet. V. Utrumque sal cum cineribus clavellatis & pulvere carbonum in crucibulo ignito debite tractatum, massam hepatis sulphuris æmulam largitur; magma vero ex sale Ebshamensi paratum, si aquæ injicitur, eandem longe intensiori viriditate inficit, quam cum Sedlicensi confectum: quemadmodum quoque illud, admixtis aliquot acidis guttulis, hoc multo uberiores lactis sulphuris quantitatem exhibet. VI. Utrumque sal cum vitriolo ad rubedinem calcinato mixtum, & crucibulo candefacto immisum, vaporem primo emittit qui spiritui salis haud absimilis est, hunc vero elapso exiguo temporis spatio, spiritus vitrioli volatilis excipit. VII. Adjecto violarum syrupo, Sedlicensi sali viridis, Epsomensi vero cæruleus color inducitur. VIII. Utriusque solutio cum oleo tartari per deliquium in adeo spissum coagulum abit, ut vitro inverso nil fere effluat; major tamen coagulationis gradus in Sedlicensi observatur. IX. Pari ratione per instillationem spiritus salis ammoniaci, utriusque solutio, ante limpidissima, turbulenta admodum evadit, multisque flocculis crassioribus conspicua redditur. X. Una aquæ communis uncia absorbet salis Sedlicensis unciam unam cum scrupulis duobus; Epsomense vero æquali tantum portione absumitur. XI. Saturatior ejusmodi salis Sedlicensis solutio citrinum exhibet colorem: Ebshamensis non item, sed remanet eadem aquæ, quæ antea perspicuitas. XII. Crystalli, quæ ex utriusque solutione post exhalationem concrevunt, haud multum differentiae alunt, nisi quod Epsomensis majores sint ac speciosiores, nitro quodammodo similes. XIII. Sal Epsomense, per aliquot dies in fornace calido detentum, omnem deponit pelluciditatem, atque exteriori quoque facie Sedlicensi simile evadit. Ex quibus clare patescit: Sedlicense & Ebshamense sal multum utique convenientiæ alere, tam quoad elementa & principia, quam indolem ipsamque virtutem.

§. X.

Eadem fere ratio est salis istius nativi cathartici, cujus proventum D. HERRMANN in Hungaria, primum Neosoliti in sodinis, & postea Chemnitii in sodinarum maxima, *auf der Wind-Schacht*, it. *Dreyfaltigkeit-Stellen*, deprehendit, & in dissertatione epistolica, ad Perillustrem GARELLI directâ, anno MDCCXXI. una cum ejus examine & virtute fusius exposuit. Etenim Hungaricum hoc sal, non solum ratione saporis & formæ exterioris, notatiorem similitudinem & Anglicani & Sedlicensis refert, sed etiam ratione ipsius operationis & facultatis cum iisdem admodum conspirat, & sufficienti in quantitate oblatum, alvum efficaciter solvit, eamque ob causam jam in Hungaria, Silesia aliisque conterminis locis usus est frequentissimus. In eo tamen dispar ejus à Sedlicensi est ratio, quod non per coctionem & coagulationem ex aqua eliciatur, sed jam tum siccum, filamentorum instar cuniculorum parietibus adhærescens, colligatur

gatur ac postmodum depuretur. Neque hanc ob causam dubium est, quin Hungaricum hoc sal quoad natales maximam affinitatem obtineat cum aphronitro illo, cujus circa Ienam in montibus, & maxime in notissima illa spelunca, quam vocant *die Teufels-Höhle*, uber efflorescit apparatus, & quod pari ratione abstergente virtute præditum, urinam movet, & liberalius datum, alvum quoque exercet. Quemadmodum enim hoc sic dictum aphronitrum, nonnisi sal amarum, acre & fixum est, concretum, ex terra gypsea spatiformi, in cujus poros acidum primigenium sulphureum ex aëre se insinuavit & cum ea societatem iniit: ita pari etiam ratione Hungaricum hoc sal, ex iisdem principiis in cuniculorum alveis conflatur & generatur: quandoquidem terra spatiformis ex solutione illius, adjecto alcali, ad fundum dejici, ob insitum acidum vero catholicum, admisto fale tartari & pulvere carbonum, verum sulphur minerale ex eodem præparari potest.

§. XI.

Quod si vero ullum sal arte paratum, & Chymicis non ignotum, ad naturam & virtutem falis Sedlicensis vere nativi & Epsomenfis artificialis accedere videtur; certe illud est, quod à celebri Germanorum Chymico, GLAUBERO, nomen mutuatur, & ex oleo vitrioli diluto & fale communi, abstracto prius leni calore per alembicum spiritu falis & elutriato capite mortuo, paratur. Est illud quidem, si quis punctum saturationis exacte tetigerit, mediæ naturæ, amari saporis, virtutis quoque absterfivæ & catharticæ: attamen re propius paullo inspecta, à Sedlicensi & Epsomenfi non parum differt. Etenim sapor ejusdem longe acerbius linguam ferit, ac Sedlicensis & Ebshamensis, licet multo majorem copiam aquositate in complexu suo foveat, ita, ut si fornaci calido imponatur ad uncias tres, id ipsum liquecat, & instar aquæ fluat, remanentibus vix duabus unciis. Præterea si in æquali portione aquæ solvitur & frigori committitur, in coagulum & solidam fere massam abit, ut effundi nequeat: contra vero, si solutioni instillatur oleum tartari per deliquium, eadem non coit, quemadmodum cum Sedlicensis & Ebshamensis falis solutione contingere supra meminimus. Hujus differentiae causam si quis investigare velit, veri valde est simile, terram falis communis culinæ esse quidem naturæ alcalinæ subtilioris, calci seu spatiformis: sed in muria, è qua paratur sal Epsomense, contineri paullo crassiores ac graviorem, quæ à solutione, lixivio admixta, fundum petit, quod non contingit in fale Glauberiano, ex puro fale communi & oleo vitrioli parato; neque etiam dubitandum est, quin acidum è vitriolo vehementia ignis prolectum, non parum etiam ratione subtilitatis differat à fale subtiliori acido, quale sub terra ex aluminis, sulphuris & vitrioli mineris accedit.

§. XII.

Porro non quidem negandum: esse adhuc alia plura falia mediæ, ad quarum concinnationem vitrioli acidum usurpatur, & quæ non solum saporem amaricantem obtinent, sed etiam liberalius data, alvum aliquoties sollicitant, cujus generis sunt arcanum duplicatum, vel tartarus vitriolatus. At vero in nativis istis fontium salibus, & amarities & vis cathartica longe major est, & exquisitior quoque partium subtilitas in iis observatur, quod vel ex eo clarius elucet, dum falia nativa amara expedite ab una parte aquæ communis solvuntur, ut una aquæ uncia falis quoque unciam recipiat, quum tartari vitriolati & arcani duplicati vix quarta pars, in eadem aquæ quantitate liquecant.

§. XIII.

His excussis quæstio incidit: unde sal hoc mediæ naturæ, quod non modo in aquis Sedlicensibus, sed etiam in omnibus fontibus, qui sedes fortiter movent, inprimis Egranis, continetur, saporem amaricantem nec non purgantem virtutem accipiat & mutuetur. Ut autem hac de re mentem nostram clarius exponamus, asserimus: peculiare has proprietates, quæ salibus istis nativis adhærent, amaritiem puto & purgantem facultatem, non tam ab acido illo sulphureo catholico, quod non modo in aëre, sed etiam in subterraneis locis abundantissime mineris adhæret & ex iis elicitur, tanquam à causa derivandas, sed potius à solidiori terreo-alcalinæ indolis elemento, quod ad lapidis calcarii, sive potius spati, naturam accedit, petendas esse. Lapide enim calcario & rudiori & subtiliore, qui vocatur *Spat*, item *Marmor*, *Alabaster*, subterranea loca referta esse, extra omne dubium est, quemadmodum etiam res pervulgatæ cognitionis est, omnes hujus lapidis species vehementissimo igne in calcem uri. Similiter calciformis ejusmodi materia quoque in marinis, maxime ostracodermatum & cochlearum generibus deprehenditur.

§. XIV.

Quod vero falia calcariam ejusmodi substantiam in societatem suam admittant, facile comprobari potest. Inprimis autem sal commune culinare uberius eandem alit: unde fit, quod in ejus coctione, præsertim nostri Halensis, cortinæ lateribus copiose & firmiter sese agglutinet lapidea materia, *der Schöp-oder Saltz-Stein*, ut etiam singulis hebdomadibus igne submisso, eam exurere & postea malleis excutere cogantur salinæ, quæ, elota prius quæ restat falis portione, fortiori unctione in calcem redigitur. Ejusdem quoque indolis est lapidosa illa alcalina & fere calcaria materia, quæ abundantissime in Carolinis conspicitur, & non solum in præcipuo earum fonte, vulgo *Prudel* dicto, nec non in canalibus, per quos decurrit aqua, ingenti in copia apponitur, sed etiam circa scaturiginis ostium, ubi aqua cum magno impetu ad circumposita ligna fertur, in lapides concrevit, qui politi & variegati, elegantissimum marmor vel jaspidem nitidissimam referunt. Neque ea propter dubitandum est, quin calcarea hæc terra, cum acido universali subterraneo commixta, præcipuum Carolinarum ingrediens efficiat, à quo cathartica earum virtus pendeat; præsertim quum circumjacens solum adeo lapide calcario, tenuissimo & crassiori, instar marmoris, scateat. Denique magma illud salino-terreum, quod ex ipsis Sedlicensibus aquis extrahitur, si denuo iterum aqua solvitur, relinquit etiam materiam pure lapidescentem.

§. XV.

Quod porro amarities & purgatrix falis fontium nativa vis, à subtilissima calcaria quadam, valde tamen alcalina materia, arcessenda sit, sequentia planum ac testatum faciunt experimenta: si solutioni falis Sedlicensis vel Ebshamensis oleum sic dictum tartari per deliquium instillatur, spissum admodum & album emergit coagulum, quod sufficienti aquæ communis quantitate dilutum, per chartam bibulam trajectum, relinquit terram albissimam in filtro, quæ magna effervescentia ab affuso spiritu vitrioli iterum solvitur, & rursus salem præbet amaricantem laxantem. Posterior vero hæc solutio, quæ fit ex solutione falis Sedlicensis, mixta cum oleo tartari per deliquium, identidem in sal tertium coagulatur, quod tamen non tanta amaritie ac vi laxante pollet, quam prius. Quo experimento evidenter confirmatur: terram hanc calcariam, acido non tam firmiter & intime adhærescere

cere, sicut terra procul dubio tenerrima, quæ in tartaro vitriolato & arcano duplicato reperitur: siquidem hæc ipsa minime, affuso solutioni oleo tartari per deliquium, mixtionem suam deferit, ut ab acido admixto separari possit. Porro videmus ex hisce: terram hanc esse valde alcalinæ naturæ, & plane integram ac illibatam manere, si ab acidi connubio liberetur.

§. XVI.

Clarius vero adhuc assertio nostra sequenti experimento stabilitur. Magnesium, quæ ex lixivio à coctione nitri relicto, vulgo *Mutterlauge*, per solam inspissationem & calcinationem paratur, alcalinæ & calcariæ esse naturæ nemo facile inficias ibit, maxime si consideraverit, calcariæ naturæ esse terram illam, quæ nitrum ex aëre suscipit, & ex qua nitrum coquitur, item terræ effoetæ nitrosæ, calcem vivam & sal commune admisceri, ut nitroso fale foecundior fiat. Deinceps non amplius in artis exercitio versantibus obscurum esse poterit: magnesiæ pulverem albißimum, & fere insipidum, ad drachmam unam oblatum, fortiter, licet non semper cum stimulo quodam, alvum movere, præsertim ubi acidum copiosum in primis viis offendit; tunc enim ambo degenerant in sal amaricans purgans. Quod si vero de veritate hujus rei quis uberius convinci cupiat, is spiritum vitrioli affundat magnesiæ, & tota solvetur in liquorem amarum & salsum, qui inspissatus, dabit sal amaricans purgans, quod si rursus liquefcit & solutioni oleum tartari per deliquium instillatur, albißimus pulvis fundum petit, non secus ac fieri solet cum solutione salis Sedlicensis & Epsomensis. His pulvis elotus, denuo promptissime solvitur cum spiritu vitrioli, & liquor rursus emergit amaricans, falsus, laxativæ virtutis.

§. XVII.

Et ex his luculenter admodum patere arbitramur, salia illa amaricantia, quæ fontibus catharticam vim conciliant, ex subtiliori calcaria terra & acido catholico, quale in sulphure, vitriolo & alumine deprehenditur, esse composita. Circa differentiam autem salium mediæ naturæ, quæ omnia ejusdem indolis ac virtutis acidum, ceu ingrediens admittunt, illud utique notatu dignum est: quod illa, quæ ex fale alcalino vegetabili, & quod facile in vitrum abit, sunt composita, præsertim si alcali quodammodo præ acido emineat, si mixta cum pulvere carbonum, debita quantitate fluant in igne, verum hepar sulphuris exhibeant, quod solutum, non solum, præcipitatione cum acido facta, sulphur largitur, sed etiam cum rectificatissimo vini spiritu solutum, veram sulphuris tinturam concedit. Neutiquam vero hoc ipsum contingit cum fale Sedlicensi, Epsomensi, Egrano, aphronitro & artificiali illo, quod cum spiritu vitrioli & magnesiæ paratur, eo quod sola calcaria & alcalina terra omni & fusioni, & vitrificationi, resistit. Si autem hæc salia cum fale tartari & cineribus clavellatis, præsertim diutius aëri libero expositis, miscentur, & tunc adjecto carbonum pulvere igni committuntur, tartari sal, aut cineres clavellati, ex fale amaricante recipiunt acidum & in fluorem abeunt, ut massa hepatis sulphuris æmula exinde emergat.

§. XVIII.

Tandem dispiciendum est: num amara hæc & cathartica salia, quæ exhalationis beneficio ex medicatis aquis eliciuntur, si iterum in aqua solvantur, eandem cum humore nativo salutari virtutem ac efficaciam obtineant? Nos certe negativam hic tueri malle, quam affirmativam, ob non exigui momenti rationes. Nimirum experientia, certissima rerum magistra testatur, maximam, ratione virtutis, esse differentiam inter foterios omnis generis fontes, sive

aquas sic dictas minerales, quæ ex scaturigine hauriuntur, & inter contenta eorum, quæ evaporatione & ignis ministerio educuntur, si in alia, purissima etiam aqua, iterum liquefcant. Nam præparatæ hoc modo per artem medicatæ aquæ, non tam expedite per corpus feruntur, neque tam prompte emunctoria subeunt atque rursus è corpore egrediuntur, neque tam efficaciter languidum appetitum excitant, aut vires dejectas erigunt, neque denique tam eximia laxante vi pollent, quam hæc, quas faultrix natura inexplicabili artificio producit ac sponte offert. Patet hoc luculenter admodum Sedlicensium exemplo, quæ ex scatebra potæ, sive aliorum in lagenis solite munitis transportatæ, non solum longe amaricantis saporis sunt, ac si eadem salis quantitas in eadem alius aquæ copia dissoluta fuerit, sed etiam ad easdem numero sedes movendas, vix salis drachmæ sex sufficiunt, quas una & dimidia medica aquæ libra, tres tantum salis drachmas comprehendens, efficaciter ciet. Quapropter nullum utique dubium est, quin medicinales aquæ, præter salinas istas fixiores particulas, quæ intime iis commixtæ sunt, subtili adhuc, licet insipido, spirituofo, aëreo-æthereo elemento foetæ sint, quod tenuitate sua per minima canalium ostia strenue eluctans, majorem aquæ conciliat penetrantiam, ut operatio ejus inde adjuvetur magisque augeatur: id quod in genere, non modo de Sedlicensibus, sed & de omnibus mineralibus aquis, notandum est ac tenendum. Etenim liber aëris accessus, calor & ignis tortura, mirifice unionem, crasin & mixtionem partium, quæ fontibus salutarem virtutem inspirant & à quibus specifica eorum efficacia pendet, immutant, corrumpunt ac destruunt.

§. XIX.

Enucleate sic exposita effectrice fontis nostri materia, salis scilicet amaricantis, genesi, natura ac indole: sequitur jam, ut eximias, tam hujus, quam ipsius aquæ vires, quas ad sanitatem tuendam & restituendam possident, explanate quoque tradam & uberius paullo recenseam. Et certe, si ex communi suffragio & populari approbatione, de ipsius rei dignitate & præstantia judicare licet: profecto medicinalem hunc nostrum fontem saluberrimum & longe præstantissimum esse constat. Etenim exiguum admodum & paucorum tantum annorum est spatium, ex quo foterii hujus laticis primum ad publicam notitiam ducti, vires, laudes ac fama adeo effloruerunt & longe lateque inclaruerunt, ut non solum ii, qui hospitibus calidis Tœplicesibus exterius utuntur, eundem, repudiatis Egranis, Selteranis aliisque mineralibus aquis, antea ibi communis interni usus, summo cum emolumento bibant, sed etiam alii, in exteris regionibus degentes, immensam propemodum ejus copiam peregre acciant & consumant: ne dicam de eximia salis quantitate, quæ quotannis ex eodem conficitur & quaquaversum dimittitur.

§. XX.

In genere autem, non solum à priori, ex scrutinio & examine indolis ac virium salis in hoc fonte contenti, sed etiam à posteriori ipsius experientiae calculo uberius constat: ad crudos, viscidos, acidos & biliosos corruptos, & in ventriculo ac intestinis obhærescentes succos, abstergendos & sine noxa per alvi secessum eliminandos, amara hæc & falsa aqua, nihil aptius esse, nihil efficacius; ita, ut eidem tam salubritate, quam expedita facultate, neque alii medicati fontes, neque solennia purgantia, æquiparari possint. Quod enim ad alias medicatas aquas attinet, harum ea est ratio, ut quædam illarum alvum quidem moveant, sed quia salina spicula parcius iisdem interfecta & in aquarum largiori vehiculo magis dispersa sunt, opera-

operatio illarum purgativa longe debilior ac remissior est, & duæ vel tres earum mensuræ sunt ingerendæ, antequam pervadant alvumque exerceant; quo tamen facile fastidium movent & solutiorem stomachum gravant. Contra ea, nostræ aquæ tam efficax & tam promptus est effectus, ut in exquisitis sentientibus ac tenerioribus, vel quinque aut sex patellæ, è quibus infusa calida forbillare moris est, sufficiant, firmioribus dimidia mensura satisfaciatur & robustissimis quoque vix ultra unam mensuram ascendere liceat. Deinceps nulla prorsus ex omnium mineralium aquarum censu est, quæ tam cito effectum suum exsequatur, & intestinorum volumen trajiciat fordesque educat, quam nostra, quæ elapso exiguo admodum temporis spatio, operationem edit efficacissimam. Accedit & illud, quod quum Sedlicensis aqua uberius salino elemento imbuta sit & præsentis adeo effectus, non necessarium sit, diuturnum tempus ejus usui impendere, sed paucorum tantum dierum intercapedo, octo ad summum vel decem dies, satis longa sit.

§. XXI.

Quemadmodum igitur Sedlicensis aqua, aliis medicatis ob expeditam & validiorem virtutem palmam præripit: ita non minus alvum vacuans qua pollet facultas, longe etiam præstantior ac salubrior est, quam omnium reliquorum usu receptorum purgantium medicamentorum. Id enim crebriori observatu constat: omnia illa pharmaca, quæ crebrius & fortius alvum sollicitant, vires dejicere, nauseam & molestum in præcordiis sensum suscitare, quin appetentiam ciborum prostrernere; quum contra amara hæc aqua, licet efficacissime alvum subducatur, neque languorem & debilitatem inducat, neque fastidium ciborum ingignat, neque siccitatem oris cum siti inferat, sed potius amaritiei sui stomachum soletur & appetitum augeat.

§. XXII.

Non minus experientia compertum est: purgantia & imprimis pilulas, quarum præcipuum ingrediens aloë est, sanguinem exagitare, & præter volatilem æstum sanguinisque exæstuationem, dolores dorsi concitare, sanguinem impetuosius, mox huc, mox illuc urgere, & sæpius, maxime succo & sanguine fartos, multis maculare incommodis. Quæ autem mitiora sunt & laxantium familiam ducunt, præsertim sennæ folia, agaricus, cassia & manna, in nonnullis flatuum proventui favent & tormina in abdomine gignunt. Sed hæc omnia, Sedlicensi aqua, vel ejus sale, usurpatis, neutiquam sunt metuenda, quippe quæ, effectum suum sine molestia & sine subsequente noxa edunt.

§. XXIII.

Si causam nobilissimæ hujus prærogativæ dispiciamus; ex facili suppeditari potest. Quum enim omnia illa purgantia, quæ ex vegetabilium censu depromuntur & è terra pullulant, facultatem & virtutem suam non tam ad salinum elementum, quam potius multas sulphureas, oleosas & pingues particulas subtiliore acredine remixtas, referant; facile patet, eadem sanguini infusa, non posse non ejus intestinam motionem augere & ebullitionem causari, solidis autem, nervosis, sensibilibus corporis partibus alius insinuatæ, acredine sua molestum inducere sensum, ut non solum ventriculus cum intestinis, sed etiam confines nervosæ partes, præter naturam stringantur & crispentur, sanguisque exæstuat inæquali motu circumagatur. Quin immo nonnulla è purgantium familia, quasi malignitate stipata, tam pernicialis sunt indolis, ut fluidis & maxime mobilibus corporis nostri partibus, spiritibus ita dictis animalibus, penitus adversa sint & inimica, & hanc ob causam vires mirifice pro-

sternant, motuum anomalias, spasmos & convulsivas strictiones efficiant: quo nomine potissimum notanda gummi guttæ, scammonium, elaterium, colocynthis, esula, helleborus albus, laureola, jalappa, semina cataputiae & hujus farinae alia. Contra vero salis in nostro fonte ea propria laus & peculiaris indoles est, ut pure sit salinum fixæque indolis, & sal quidem medium, naturæ, hoc est, structuræ ac dispositioni partium solidarum & fluidarum conveniens & amicum, quod neque volatilis & commoventis, neque sulphurei & exæstuantis quippiam, complectitur, & hanc ob causam omnis noxæ expers est.

§. XXIV.

Ut autem clarius paullo & explanate magis virtutem & operationem fontis nostri sistamus; prius monstrabimus: in quas potissimum corporis partes potestatem & vim exserat, & deinde quibus morbis, tam anteverendis, quam persanandis, ejus usus dicatur sit, docebimus. Jam vero omnium quidem medicamentorum ea est conditio, ut primum & potissimum effectum exsequantur in ventriculo & annexis intestinis; sed longe eminentius & efficacius id perficiunt ea, quæ minus volatilia, sed fixa sunt, & tamen insigni facultate pollent, immutationem motusque augmentum nervosis & exquisitis sentientibus partibus inferendi. Et ad horum classem merito referenda sunt varii generis salia, & maxime etiam id, quod fons noster in sinu alit, cujus indoles, virtus & operatio in eo versatur, ut non tam immediate lentorem crassorum & viscidorum succorum incidat & disraret, quam potius salinis aciebus nervosas fibrillas & sensibiles tunicas ventriculi & intestinorum aggrediatur, vellicet & ad contractionem vegetiorem sollicitet, quo intus contentas spissas & crassiores materias validius premant, citatius trudent & tandem penitus è corpore ejicient. Ex quo prona certe consequentia elicitur: in omnibus omnino affectibus & morbis, qui fixam sedem in ventriculo & intestinis, præsertim duodeno, obtinent, & à viscidorum, crassorum, bilioso-acidorum, corruptorumque ibique obhærescentium humorum sentina ortum trahunt, salia ejusmodi media, abstersiva & stimulantia, cujus generis est id, quod Sedlicensem aquam incolit, tam mature præscindendis, quam debellandis, facultate pollere longe spectatissima, quippe quæ, recrementitias has materias tempestive proscribendo efficiunt, quo minus morbis ansam præbere, vel, si jam adfuerint, eosdem fovere ac sustentare possint.

§. XXV.

Proinde, quum appetentia prostrata, ciborum fastidium, ructus, nausea, stomachi inflatio, pressiones & tensiones in præcordiis ad scapulas & dorsum excurrentes, sæpius à crudis & male coctis succis, nec non obhærescente in stomachi cavo lente muco, originem fortiantur: nullum utique ad horum malorum sublationem & persanationem, præsentius & efficacius excogitari potest remedium, quam Sedlicensis nostræ usus. Hæc enim sufficienti in copia & debito cum regimine pota, non solum collectas has fordes sensim educit, sed ipsum etiam ventriculum tam egregie fulcit, ut cibos avidius assumat, melius subigat, concoquat & digestos promptius in intestina trudent, sicque morbi præsentis abigantur, & incursum minantes arceantur.

§. XXVI.

Affectiones quæ hypochondriacos excruciare solent, uti sunt anxietates præcordiorum, spirandi angustia, nausea, lividus faciei color, languor totius corporis, somnus inquietus & terrificis somniis interturbatus, alvi obstipatio, animi angor, dolores dorsi &

capitis,

capitis, palpitationes cordis, vertigines, partium extremarum refrigeratio &c. plerumque incunabula trahunt, ex spasmodica constrictione vel inflatione ventriculi, nec non ex nimia distensione nervosarum & exquisito sensu dotatarum intestinalium tunicarum, præsertim coli, ab oclusis in ejus flexuris flatibus. Quia vero flatuum, molestarum inflationum & stricturarum ortus, tam crassis, acidis, biliosis & corruptis humoribus, quam potissimum imminuto & fracto ventriculi ac intestinorum robori & tono, sive motui peristaltico sordes expellenti perverso, debentur; in prono & facili est judicare: his in casibus & afflictionibus, præstantissima & saluberrima ea esse præsidia, quæ debitum robur & vegetum motum intestinis & stomacho reddunt, quo his fultis, superfluae & recrementitiæ materiæ, per contortum canalem protrudantur, expellantur, alvus officio fungatur & sic pabulum ac fomes his malis subtrahatur.

§. XXVII.

Quamvis autem peritis & in artis exercitio versatis Medicis haud obscurum esse possit: quod in spasticis his flatulentis & hypochondriacis affectionibus, non solum sordium per alvi secessum excretio, difficulter admodum & inordinate succedat & flatus ad superiora ipsumque stomachum magis vergant, sed etiam, quod summa cum cautione & prudentia alvus officii sit admonenda ejusque successus proritandus: profecto tamen vix dici potest, quam graves errores & inexcusabilia delicta, in hoc perficiendo admittantur. Etenim communis & pessimus plerumque Medicorum mos fert, ut hunc in finem offerant vel purgantia validiora, aut saltem aloeticas purgantes pilulas, vel etiam quotidie clysterum injectione anum fatigent: verum, quo successu, ægri damno suo experiuntur; quippe, quo crebrius & diutius his intempestive laborantes exercentur, eo magis augetur mali atrocitas, ita ut licet post exhibitum purgans alvus aliquoties referetur, operatione tamen peracta, pertinacior subsequatur obstipatio, ipsumque abdomen flatibus ad duritiem usque distendatur. Mitiora quæ sunt & magis blanda, inprimis cassia & manna, non omnes ob fastidium commode ferre possunt, sed sæpe contingit, ut iis assumtis, inprimis si à minus perito præscribuntur, flatus augeantur aliaque incommoda oriantur. Optima forent ex rhabarbaro confecta; ast nimis remissa earum est operatio, nec morbi pertinaciam expugnare valent. Et licet denique pilulæ balsamicæ polychrestæ, ad mentem Beccheri paratæ, omnium tutissima & accommodata esse videantur præsidia: ipsa tamen experientia teste constat, easdem nonnunquam plane nullum edere effectum, & non omnibus hypochondriacis earum usum esse suadendum: quandoquidem, si sanguis redundat & ad exæstuationem pronus est, ipse impetuosius plerumque ad ani venas fertur, ibique impactus hæmorrhoides cæcas cum diris doloribus protrudit. Ego vero confirmatius id asseverare possum: quod in solennibus hypochondriacorum afflictionibus, nullius medicamenti virtutem tam præstabilem & maxime egregiam multiplici usu deprehenderim, quam Sedlicensis aquæ, vel vere & autumnno adornatum, vel necessitate exigente crebriorem potum. Novi certe plures, qui à multis annis nunquam alvum, sine pilularum assumptione, vel clysterum injectione, depulerant, ex salutaris autem nostri humoris usu tam eximiam adepti sunt utilitatem, ut alvus sponte postea fluxerit & ordinatum secessum servavit.

§. XXVIII.

Porro ipsa eaque multiplex experientia comprobavit; multum valere fontis nostri usum in cachexia foeminarum, quas cohibitus mensstruus sanguinis per ute-

ri venas fluxus ad languorem dedit, respirationis difficultate, calore interno febrili, corporis contabescencia & appetitus prostratione afflixit, ita, ut pota per aliquot dies Sedlicensi aqua, vena in pede postmodum incisa & repetitum pilularum balsamicarum & elixirii alcalini usu, sanguinis stillicidium repeteret & ipsæ perfecte cum sanitate in gratiam redirent. Quamvis enim prima & palmaria hujus mali causa à subsistente mensium fluxu & sanguinis in visceribus stagnatione arcessenda sit: pressio tamen pede perversos hos motus excipit ilias malorum, ex prava digestionem & ventriculi languore oriunda. Scilicet succi illi salivales, quos tunica glandulosæ oesophagi, ventriculi, pancreas & duodeni glandulæ plorant, una cum bilioso humore, intimæ ciborum digestionem & resolutioni servientes, inde corrumpuntur & sordibus quibus sanguis scatet conspurcantur, ut laudabilis ac temperatus chylus non amplius elaboretur, sed ventriculus & intestina acidis & male coctis succis oppleantur, qui chylo insinuat & una cum hoc ad sanguinem advehi, eundem longe magis collutulando & penitus inficiendo, mali contumaciam augent & exacerbant. Quare qui huic morbo mederi nititur & felicem curationis successum exoptat: id potissimum agere debet, ut primam corporis regionem à sordium sentina liberet, digestionem revocet & laudabiles succos corpori inferat, & hoc facto, reliqua mensium fluxui proximius dicata remedia utiliter & felici cum eventu exhibentur.

§. XXIX.

Pari ratione egregie succurrit foeminis, quæ subsistente penitus post quinquagesimum annum menstrua sanguinis purgatione, ex contracta sanguinis redundantia, inordinatas varias commotiones, ebullitiones, æstus volatiles, cum flatibus, appetentiæ prostratione, doloribus dorsii, pedum tumoribus aliaque incommoda gravia perferunt: quandoquidem pota nostra aqua, vacillans ciborum appetitus erigitur, tumor disparet & vires corporis incrementum capiunt. Sunt etiam inter exempla viri, inter quadragesimum & quinquagesimum annum constituti, qui litterarum studiis impensius invigilantes, per vitam nimis sedentariam, profundas meditationes & concurrens animi affectus, intumescencia & œdematosos tumores, pravum corporis habitum, inflationes hypochondriorum & abdominis, ciborum fastidium & ructuum post pastum eruptionem, sibi arcessiverant, ex nostri fontis usu, fructum perferunt desideratissimum. Monendum tamen, quod ejusmodi in casu diutius & liberalius paullo aqua bibenda sit, eoque facto, alvo referata eructationes sistuntur, flatus ad ani ostium feruntur, alvus ad officium redit & ipse œdematosus tumor cum universi corporis intumescencia subsidet & disparet. Ut adeo pateat, fonti nostro hanc etiam laudatissimam inesse facultatem, ut subsistentes passim in partium poris humiditates in motum cieat, laxatum, tam in visceribus, quam remotis partibus, inprimis pedum musculis, tonum adducat, roboret & pristino vigori reddat.

§. XXX.

Præterea eximia etiam fontis nostri, & salis ejus in aqua soluti virtus est, ad massam sanguinis & lymphæ à scorbuticis impuritatibus & recrementitiis sordibus liberandam & repurgandam. Nimirum latius serpit & infesta semina nostra ætate spargit, chronica & scorbutica illa purpura, multisque quos corripit, incommodis divexat, ita, ut non solum ad aliquot menses lecto affligantur, sed etiam convalescentes, brevi iterum eidem implicentur. Ad superandam autem & subigendam rebellem hujus mali contumaciam, nihil

nihil certe accommodatius & præsentius deprehendi, quam si amara nostra ineunte vere, ad aliquot dies assumitur, & his exactis, fons Lauchstadiensis, vel Selterana aqua, debito ordine in usum vocatur & ad tres vel quatuor hebdomades continuatur: ita enim maximum semper ægri levamen perleserunt, quin penitus molestissimum morbum evaserunt. Et certe apprime hanc in rem commemorabile est, quod ipsa Lauchstadiensis martialis aqua, omnis purgativæ facultatis expers, ita, & ab his usurpata, tam efficaciter & crebro alvum subduxerit, ut ægri vix ano insidere potuerint: quum contra repetito sequenti anno post Sedlicensem hujus potu, parum vel nihil sollicitarit, eo quod acria illa morbofa salia, priori cura ad intestinorum volumen evocata, non amplius in sanguinis massa obhæserunt.

§. XXXI.

Accedunt gravia illa mala, quæ viris, qui ob nimiam sanguinis redundantiam ejusque interceptum per viscera abdominis progressum, dispositionem nacti sunt ad hæmorrhoides, his subsistentibus & retentis, imminet atque solennia sunt. Quod si enim repressus cruor ad intestina ipsumque ventriculum fertur, dira in abdominis regione tormina exoriantur, & in dorso dolor percipitur. Si præter stomachum ad pectus & caput urgetur, præcordia anxietate stringuntur, nausea infestat, difficulter trahitur spiritus, sicca tussis ingruit, caput torpore animusque angore detinentur, quibus plerumque accedit vel plenaria alvi obstipatio, vel inordinatus saltim minusque sufficiens excretionis alvinæ successus. His igitur ut succurrant Medici, pro recepto more prompte offerunt pilulas, sic dictas polychrestas, ex aloë potissimum & balsamicis gummatibus, ad mentem inventoris Beccheri confectas, iisdemque non solum alvum expedire, sed etiam sanguinis per ani venas stillicidium proritare nituntur. Verum, licet ejusmodi pilulæ in quibusdam, & maxime quidem segnioris naturæ ac phlegmatici temperamenti, nec non foeminis, eximio cum fructu in usum vocari possint: attamen, quia nostro ævo, earum usus nimis frequens est, & ab iis, qui plerorumque è morbis chronicis natales perperam à suppresso vel inordinato hæmorrhoidum fluxu ducere audent, sine rationali discrimine & subactò judicio, in omnibus ferme temperamentis, naturis, quin sexu & ætate administratur, non mirum est, si repetita & per aliquot dies, immo hebdomades, continuata earum oblatione, plus damni quam emolumenti procuretur. Quod si enim corporibus succo & sanguine fartis, & exquisitius sentientibus, nec non in quibus massa humorum sordibus recrementitiis multis infecta, crebrius inprimis, exhibentur, primum quidem alvum subducunt, extracto vero usu non amplius, sed potius sanguinem exæstuant, in acceleratum inordinatum motum & ebullitionem cient, eumque impetuosius ad inferiora dorsi & intestinorum agunt, ut pressio dolorifica dorsum & os sacrum attingat, ac in recti intestini extremis tumores cum sævo dolore protuberent, qui sæpius, accedente improvida curatione, in fistulas mali moris transeunt. Longe vero tutior & melior est institutus hunc in finem, post tempestivam sanguinis detractionem, aquæ nostræ potus, quo non solum symptomatum atrocitas componitur, sed admissio etiam leni emolliente fotu, sanguinis per ani venas secessus in dispositis summo cum levamine provocatur: inprimis si ægotantibus non tam sanguinem exagitantia, quam leniora antispasmodica simul propinentur.

§. XXXII.

Denique vermes communi afflictione infantes maxime excruciant, & nonnunquam in ventriculi cavo,

Frid. Hoffmanni Oper. Tom. V.

communissime autem in tenuium intestinorum plicis ac diverticulis hospitantur, ubi molesta & dolente rofione ac vellicatione nervosarum tunicarum, permulta inducunt mala, & gravia, quin nonnunquam funesta, suscitant symptomata. Quum vero omnia salia vermibus penitus ob acridinem sint adversa eodemque necent: nullum quoque est dubium, quin fontis nostri aqua, largius fale foeta, eundem exsequatur effectum, eo efficacior, quo penetrantior & activior nativi hujus salis est facultas. Accedit purgans aquæ virtus, qua peremptos illos una cum recrementitiis materiis eorum hospitio per anum exturbat, adeoque ejusmodi virtutem edit, quæ à nullo alio remedio solo, tam expedite speranda. Poterit igitur infantibus ad tollendam verminosam progeniem, pro ratione ætatis, hæc aqua ad duas, tres, vel plures uncias, tutissime propinari, non tamen sola, sed cum alio accommodo vehiculo diluta.

§. XXXIII.

Quemadmodum igitur spectata est fontis nostri virtus in propulsandis morbis: ita non minus eminens ejus est operatio in arcendis iisdem. Laudabilis certe plurimorum est mos, ut ineunte vere corpus à collectis sub hiemis intemperie sordibus repurgent morborumque futurorum semina præscindant, adhibito plerumque vino medicato laxante. Erit vero utile non minus quam accommodum, inprimis sanguinem copiosum in venis foventibus, ut loco hujus, post venæ sectionem, aquæ nostræ potum ad quinque vel septem dies instituant, & simul ad stomachum firmandum flatumque dissipandos, in prandio & quandoque coena, quadraginta, vel quinquaginta guttas essentiae corticum aurantium assumant & sic sese adversus morborum incursum muniant. Quin immo quotiescunque, siue adsit, siue præstoletur morbus, ventriculum & intestina à sordibus liberare expedit, longe salubrior & tutior est aquæ nostræ, ad unum vel alterum diem usus, quam ullius alius purgantis medicamenti.

§. XXXIV.

Maxime omnium autem summopere laudandus est, aquæ vel salis Sedlicensis usus, in susceptis ad sanitatis tutelam aquarum mineralium ope curis. Notum enim est, quod non solum tam ante acidularum, quam thermarum potum, corpus prius sit præparandum, quo salutaris humor sine obstaculo quaquaversum sese explicare possit, nec in effectu præstando à saburra in ventriculo & intestinis delitescere impediatur; sed etiam quod intermedio tempore & perducta ad finem potatione, purgatio instituenda sit, quo successus felix promoveatur & restibiles adhuc in intestinis & glandulosis partibus aquæ penitus proscribantur & effectus salubris stabiliatur. Satis autem pro re effari nequeo, quam gravia sint damna, quæ oblati hunc in finem validioribus purgantibus, à CAMPEGIO, HELMONTIO aliisque merito venenatis dictis, in ægotantes redundant. Quod si enim præmittuntur vel interponuntur potui, frangunt ac dejiciunt ventriculi & intestinorum tonum ac motum, qui tamen ad auspiciatum eventum summopere est necessarius, ita prorsus, ut usurpatis his, succedente adhuc pharmaci operatione, nauseam, cum languore & ciborum fastidio persentiscant ægri, ac subsequenter diebus aquæ potæ, neque per alvum, neque per urinam expedite transeant, sed subsistant & abdomen cum maxima molestia inflent. Si vero absoluta jam curatione propinantur, eo magis ventriculo & intestinis perniciofa sunt, spasmodicas stricturas, flatum, nauseabundas commotiones ingignunt & hypercatharces caussantur, ut aquarum salubrium usus sæpius cum maximo sanitatis flet dispendio.

R

§. XXXV.

§. XXXV.

Sed tuta, certa & innoxia fontis nostri ejusque salis est virtus eamque ob causam summopere proficuum, si salis Sedlicensis sufficiens quantitas, in dimidia mensura aquæ quam bibere animus est, dissolvitur, & antequam cura instituitur assumitur & sic corpus ad potum aptatur. Non minus medio curationis tempore & finita hac, apprime huic negotio inferviunt salina, vel alia benigna laxantia, eumque in finem jam à plurimis annis solenne mihi fuit in Carolinis mannæ liberaliorem dosin, nuptam cum fale, cujus generis est Sedlicense, adhibere; quo assumto, sexies vel decies alvus soluta, insignem aquarum & male coëtorum succorum copiam dimisit. Idem summo cum fructu perficitur, si externe tantum medicatæ aquæ usurpantur & alvi subductionem ante, sub & post balneum, moliri ex usu est.

§. XXXVI.

Sed sufficienter expositas esse reor spectatissimas fontis nostri dotes & in variis morbis utilitates: superest nunc, ut quoque doceam, qua ratione, qua portione sit exhibendus & quamdiu ejus usus extrahendus. Et de potu quidem monendum, adultis pro diversa corporis, ægrius, vel expeditius commovendi, habitudine, sufficere, si unam vel ad summum duas aquæ libras una vice hauriant, neque facile liberaliorem copiam assumere licet, quin immo, qui facilius & exquisitius sentiunt, quinque vel sex vasculis, è quibus infusa calida forbillare solent, sufficienter expurgantur. Et infantibus tres, quatuor vel plures uncias, prout ætate discrepant, concedi possunt, diluta prius accommodo liquore aqua. Salis vero semuncia aut drachmæ sex adultiores & firmiores ferre possunt, qui teneriores duas tantum aut tres drachmas desiderant. Liquatur hoc sal in pura fontana & calcariis materiis destituta, vel melius in aqua temperata minerali, cujus generis est Wildungensis, Spadana, Emsensis & aliæ, ita quidem, ut mensuræ dimidiæ, sive libræ, injiciatur salis semuncia. Tempus assumptioni aptissimum est matutinum, quo tam aqua, quam liquamen salis, non nimis perfrigerata successive potantur, & si ventriculus à frigida læditur & fors fert, elapsa hora aliquot patellæ infusi theiformis superbibuntur, quo factò post aliquot horarum intercapedinem alvus aliquoties solvitur.

§. XXXVII.

Quamdiu vero & quoties usui insistendum, superius jam sigillatim in morborum enarratione inculcatum, idque hanc ob causam hoc loco lubens prætermitto, traditurus adhuc nonnulla, quæ circa eundem observanda. Si longius extracto usu, vere vel autumnò, hanc aquam bibere animus est, octo vel decem dies potui impendendi, ita tamen, ut exactis quatuor vel quinque ad duos suspendatur, & tum reliquis quatuor aut quinque finis imponatur. Neque è re, vel necessarium est, ut alia medicamenta à bibentibus sub potatione in usum vocentur, sed satis est, si ad roborandum stomachum inter cibandum accommoda assumitur medicina. Et curiosius victus & vitæ ratio habenda. Vitandi cibi concoctu difficiles, flatibus ingignendis apti, fale & aciditate inimici, nec stomachus nimis opplendus. Potui convenientissima est cerevisia tenuis, defœcata & probe coëta, cum modico vini ventriculo firmando apti, Rhenani inprimis & Hungarici. Animus quantum quidem fieri potest tranquillus & pacatus servetur, neque ita & terrore exagitetur, neque mœrore & tristitia dejiciatur. Corpus denique subinde sub temperato cœlo exerceatur, hora ante prandium, & post meridiem, peracta ciborum digestionem & chyli per corpus distributionem.

§. XXXVIII.

Porro non prætermittendum est, quod aqua nostra, nec non sal ex ea elicatum, apposite satis & fructuose cum aliis laxantibus remisceantur & horum efficaciam mirifice connubio suo augeant atque intendant. Exemplo sit manna; hujus uncias unæ, in aqua quadam destillata dissolutæ, si adjiciuntur salis Sedlicensis drachmæ duæ, aut aquæ Sedlicensis uncias quatuor assunduntur, mixtura ita epota, longe efficacior em edet effectum, quam si vel tres mannæ solius uncias assumerentur. Similiter si drachmæ duæ rhabarbari infunduntur cum quatuor Sedlicensis aquæ unciis, & demum semuncia circiter syrupi de cichorio cum rhabarbaro admisceatur, plus præstabit mixta hæc, quam aquæ Sedlicensis libra. Porro laudabilis quidem omnino pilularum balsamicarum ex gummatibus, extractis amaris, aloë correctæ & extracto hellebori nigri concinnatarum virtus, sed nimis debilis, si major sordium colluvies exturbanda; at si deglutitis vespertino tempore quatuordecim harum pilularum, insequenti mane quatuor aquæ nostræ uncias bibuntur, vel drachmæ duæ salis nostri liquati assumuntur, efficax & exoptata succedet operatio. Et quum ex hoc, pro medentis intentione adornato connubio, nova semper exsurgat facultas: nullum utique est dubium, quin usus tam aquæ, quam salis Sedlicensis, pluribus adhuc, quam quidem diximus, morborum circumstantiis quam utilissime accommodari possit.

§. XXXIX.

Neque denique in levi habenda est efficacia, quam fons noster usu externo spondet. De hoc autem inprimis commemorabile est, quod aqua Sedlicensis, si alvus obstipata & intestinum colon stercoreibus vel flatibus fartum, commodissime clysteribus addi possit, ita quidem, ut vel sola, vel melius adhuc mannæ & oleis lenientibus, uti raparum, olivarum vel chamomillæ est, remixta, injiciatur, & hoc pacto in hypochondriacis & hysteriis ad evocandos flatus & derivandas ad inferiora sordes apprime conducit. Vel sal quoque Sedlicense hunc in finem semuncias, vel uncias pondere, loco salis communis clysteribus adjici potest & infundi. Præterea haud infructuosum fore reor usum hujus aquæ externe admissum, ad ulcera sordida & quæ in vetustatem inciderunt, eluendo repurganda. Quamvis enim ingenue fatear, me nondum periculum fecisse, & experientiam propriam afferre posse: non tamen sine ratione & incongrue hanc virtutem aquæ nostræ tribui patet, quum alii liquores salini & v. c. lapis medicamentosus Crollii, in aqua dissolutus, hunc in finem adhibeantur, & eloto cum iisdem ulcerum sinu, ad consolidationem viapandatur.

§. XL.

Quia vero omne omnino, licet saluberrimum sanitatis præsidium, temere, & inconsulto adhibitum, detrimentosum est & sanitati dispendiosum; necessarium non minus quam utile erit, ut ultimo loco cautiones quasdam adjiciam, quo rectius perspiciatur, quibus & qua ratione fons noster minus conveniat:

I. Scilicet superius jam indicatum est & fusius evolutum, aquam nostram à fale quod hospitio excipit, facultatem trahere, salis uberiores copiam in eo contineri & inde dependentem virtutem ventriculorum potissimum cum intestinis afficere, eademque à sordibus efficaciter repurgare. His autem pensatis, in prono & facili est judicare: non nimis liberalem hujus aquæ copiam, nec nimis longe extracto usu esse bibendam; eo quod salibus uberius corpori insinuat, periculum est, ne lapsu temporis villosam & nerveam ventriculi & intestinorum tunicam, nimis opere

arrodant

arrodant atque fatigent, quin plane sanguinis massam non sine detrimento subeant.

II. Si obefiores & habitiores ad usum aquæ nostræ descendunt: consultum est, ut non solum sufficienti copia, sed etiam satis diu eandem potent. Quod si enim potationem parciolem nimisque accisam, ad unum vel duos tantum dies adornant; sordes quidem in corpore in motum cientur, non vero exturbantur, sed commotæ, varia inducunt incommoda, flatu, anxietatem, ructus & id genus plura.

III. Multi morborum, qui lentis adolefcunt incrementis, originem trahunt ex minimorum tubulorum in hepate, liene & pulmonibus, nec non in glandulis obstructione & à crasso lento muco infarctu. His autem expediendis & abigendis apprime inservit aqua, quæ copiosius hausta & per corporis canales decurrens, obhærescentes in venarum angustis spissos succos, eliquat, diluit, protrudit & sic obstructa referat. Sed quia nostra aqua largius sale imbuta eamque ob causam non liberalius ingurgitanda; hæc quæ assumitur liquidi portio, desideratum effectum præstare nequit. Nihilominus tamen quum aquæ puræ ea sit indoles, ut partes quibus incumbit debilitet atque relaxet & ægrius per corpus feratur, necessarium utique est, quo sal naturæ amicum accedat, quod tanquam admissis calcaribus tubulos ad motum sollicitet & aquarum transitum promoveat. Quare quum aciduli sic dicti fontes alcalia & media blanda ejusmodi salia in connubio alant, copiosius tamen assumi possint; quin eorum usus his in morbis sit saluberrimus & nostræ præferendus, non est quod dubitemus. Interim tamen idem etiam ferme effectus fontis nostri potu obtineri potest, ita accommodando eum & temperando, ut uni ejus parti, duæ partes alius puræ, levis fontanæ aut pluvialis admisceantur; aut his deficientibus, aqua cum hordeo leniter decocta eadem mensura affundatur, & sic attemperata nostra cum debito in vita & victu moderamine, quotidie ad unam & dimidiam vel etiam duas mensuras bibatur.

IV. Similiter Sedlicensis aquæ potatio non satis tuta est iis, quibus exquisitius sentiens natura obigit, qui spasmodicis afflictionibus solenniter tentantur, & ex facili diarrhœa, torminibus, vel colica convulsiva infestantur. Quemadmodum enim his omnia salia, liberalius usurpata nocent, & consuetos hos affectus advocant: ita idem etiam à fontis nostri aqua, sale uberius onusta, timendum.

V. Porro minus recte commendatur iis, qui labe pulmonum laborant, vel in quibus nervorum systema sensibilius solennibus spasmis conturbatur; sed melius rebus suis consulunt, qui eandem uti tradidimus, temperatam, cum lacte caprillo miscent & sic in usum vocant, eodem modo ac cum Selterano moris est.

VI. Nunquam cum bonis ægrorum rebus in asthma convulsivo, & ubi nervosæ partes gravius afflictae, multo minus, si jam humor lymphaticus effluerit & thoracis cavum occuparit, propinantur salia & nostra etiam falsa aqua: eo quod his, partes exquisito sensu præditæ, magis vellicantur & ad crispaturam excitulantur, neque tamen ipsa mali causa, quæ plerumque polypus, vel hepatis infarctus est, remouetur atque discutitur.

VII. His, quæ partu functæ, ad evocandas sordes & elicienda lochia, apprime quidem ex usu sunt benigna laxantia; nostra autem aqua aliaque salina minus accommodata sunt, sed ut hoc negotium lenioribus pilulis balsamicis, cujus generis Beccherianæ sunt & ad imitationem earum paratæ, perficiatur, auctor sum.

VIII. Si corpus intumuit & abdominis regio aqua intercute & extra vasa constituto obsidetur; nihil valet nostræ usus, sed plus detrimenti, quam emolumenti procurat.

§. XLI.

Hæc itaque sunt, quæ de natalibus, elementis, viribus, & utilitate fontis Sedlicensis commentari è re visum fuit: nihil superest, quam ut ex animo voveam, quo ejus usus, quamplurimis porro in salutem cedat longe exoptatissimam.

D E

FONTIS MARTIATI LAUCHSTADIENSIS

VIRIBUS ET USU.

P R O Æ M I U M.

Inter admiranda illa phænomena, in penitiori fontium foteriorum scrutinio obvia, palmarium utique est inexplicabile illud naturæ artificium, quo aquæ, in tanta mineralium, metallorum, lapidum & falorum, succorum, quibus subterranei tractus reperiuntur, copia, perlabendo ea tantum delibant & in societatem suam admittunt, quæ corpori nostro non solum, accommodata, sed etiam saluberrima sunt. Ut enim mittamus salia illa utilissima alcalia & media, quæ easdem uberius incolunt, inprimis hanc in rem memorabilis est mirus ille delectus quem inter metalla servant. Scilicet quum in horum plurimis, tam firmam & compactam sit textura, tam stabilis nexus, ut aquis nupta & cum iisdem in corpus delata, succis solventibus temperatis nullo plane modo obediunt, sed potius pondere suo oneri sint; aut si etiam contingeret, ut ab acri quodam humore in terræ sinu liquata, in aquarum contubernium descenderent, certissimum tamen, ob corrodentem vim, corpori, injungerent detrimentum: providum omnino est, consilium, quod medicatæ aquæ illud tantum ex illorum censu hospitio suo excipiant, quod ad sa-

nitatem tuendam omnium est utilissimum aptissimumque, ferrum. Nam sicuti mars, si non tam pretium & caritatem, quam potius præstantiam & utilitatem spectes, in rebus mechanicis, æconomicis aliisque ad vivendi rationem pertinentibus, omnibus omnino metallis longe antefendus: ita pari ratione longe magis medico usu splendet, quam reliqua cuncta; utpote qui, non solum expedite à mensuris corporis insipidis solvi suamque virtutem iisdem insinuare potest, sed etiam tam præstabili pollet facultate, ut languentes fibras egregie fulciat & lassatis partibus efficaciter robur addat. Quamvis autem saluberrimum hoc metallum in mineralium aquarum plurimis deprehendatur, ita, ut vix ullam reperias, quæ non tenuia martialis terræ ramenta alat: saliant tamen nonnulli latices, qui uberiores ejus apparatus vehunt, & potissimam facultatis suæ partem ad hoc referentes, peculiaris plane indolis sunt & singulari præ aliis virtute instructi, ferrati, vel martiati audiunt. Horum mentionem jam injiciunt **PLINIUS** & **SENECA**, & nos superius etiam uberem eorum esse proventum in Italia memoravimus. Neque etiam nostræ regiones iisdem destituuntur, sed notæ sunt hoc nomine Freyenwaldenses in Marchia, Bebranæ

in Thuringia, Radebergenſes prope Drefdam & Weiſenburgenſes in Franconia. Hos tamen omnes martialis elementi ubertate & virtutis præſtantia, antecellere mihi videtur, fons ille, qui in vicino Lauchſtadii oppido ſalit, & ab aliquot annis ad inſignem utilitatis famam adſpirare cœpit. Quem quum ego primus detexerim, ejuſque elementis cum cura inſpectis, ad uſum traduxerim; id mihi in præſentiarum fuiſſi, ut principia, vires & uſum ejus plenius evolverem & uberius paullo exponerem.

§. I.

Dum itaque conſtitutum eſt, de fonte medicato martiato Lauchſtadienſi nonnulla commentari; placet primo loco ejus incunabula & ortum inſpicere. Is autem ſcaturit Lauchſtadii, quod oppidum mediocre eſt Miſniæ & Sereniſſimo Saxo-Martisburgenſi Ducis paret, ac uno Martisburgo, duobus Halæ & tribus Lipſia diſtat milliaribus. Et licet non ea loci amplitudo & pulchritudo ſit, ut cum ſpatioſiſſimis & florentiſſimis comparari poſſit; nihilo minus tamen ita ædificiis inſtructus eſt, ut concedentes eo fontinalia celebraturos ſatis commodis excipere poſſit hoſpitiis. Aer ibi quoque ſpirat ſaluberrimus, & circumjectum ſolum amœnitate ac fertilitate nulli cedit. Scatebra ipſa in horto arboribus frondibusque veſtito ſalutarem humorem fundit, ex pinguioris terræ ſinu, quæ paſſim colore ex flavo ruſſeſcente martialem indolem conſpectius prodiit.

§. II.

Occaſio autem qua noſter hic fons primum innotuit, hæc fuit. Viginti & quod excurrit elapſi ſunt anni, quum amicum quendam, à longo tempore mihi conjunctiſſimum, & tum quæſtoris munere Lauchſtadii fungentem, jam vero vita functum, inviſerem, & prandio finito, ambulationem cum eo in horto conſiciens, rivulum conſpicerem, ad alvei, per quem labebatur, latera ochram flaveſcentem egerentem. Videram hoc, & illico haud fallaci augurio conjiciebam, aquam hanc martialis quippiam in ſinu alere. Quod ut explorarem, vitro transparenti humorem excepi, qui turbulentam tantisper faciem exhibebat, & guſtu exploratus, ſaporem martialem & vitriolicum linguæ imprimebat, inſperſo autem gallarum pulvere, purpureo perfundebatur colore. Edixi igitur: mineralem & medicatam eſſe hanc aquam, eamque interne in morbis diuturnioribus, tumoribus, febribus, cachexia ſœminarum aliſque, externe vero in balneis, ad laſſa & debilia firmanda, non inutilem fore.

§. III.

Dicta memori mente repoſuerat integerrimus comes, & poſt meum diſceſſum nonnullis, quibus ex uſu fore audiverat hanc aquam, eandem ſuadebat. Qui, quum levamen & fructum inde perſentirent exoptatum, aliis ut idem facerent conſilium dabant, ita, ut ſuccedente ſub manu negotio, increbeſceret fontis fama, & non ſolum multi è vicinia allicerentur, ſed etiam ipſa aqua ſubinde aliorum adveheretur, mihi-que haud ita multo poſt Lauchſtadium venienti, plura memorabilia de ſalutari ejus virtute narrarentur exempla. Interea temporis à Potentiſſimo Boruſſiæ Rege auguſtæ memoriæ Berolinum evocabar, & aliquot ibi commorabar annos, quum interim aquæ noſtræ virtus & utilitas magis magiſque exſplendeſceret & frequentiores ibi confluerent, qui ſalutem ejus ope adipiſci ſperabant. Acceſſit liberalis Sereniſſimi Principis clementia, qua mandatum, ut ad commodiorem & meliorem uſum ſcaturigo domo inſtrueretur eidemque aquilex præſiceretur.

§. IV.

Quum vero Halam iterum repeterem, & omnia hæc reſcirem, digna omnino mihi viſa fuit res, quam curatius inveſtigarem, & animum induxi, exquisiti-
tius in hujus fontis elementa & vires inquirendi. Inſtitui igitur hunc in finem varia experimenta phyſico-chymica, quæ hoc loco memorare non alienum erit. Primum autem fuit, ut aquæ levitatem invento à me hydrometere indagarem, eoque humori immiſſo, animadverti, eundem, capto ad fontem tentamine, gravitatem quandam mentiri, & pondere plu-
vialem aquam ſuperare, domum autem delatum, hac levio-
rem eſſe & inſtrumentum altius mergi. Affudi deinde ſpiritum vitrioli & nitri, quorum utrumque aqua ſine pugna, ſine conflictu excepit, quod tamen ſolenne eſt, ſi alcalinum elementum eandem incolit. Porro mercurii ſublimate ſolutionem adjeci, ſed pariter, neque rubicundus, neque flaveſcens, neque lacteus color, qui alcalinum fixum, vel cum acido nuptum, vel etiam volatile elementum prodidiſſet, in conſpectum prodiit. Tum addidi ſolutionem vitrioli martis, itidem ſine ulla ſubſequenti mutatione, quæ ſi flocculos flavos protrudit, aut colorem nigreſcentem induit, terræ calcariæ & adſtringentis principii index eſt. Præterea oleum tartari per deliquium inſtillavi, quod quidem nullam edidit ebullitionem; nihilo minus tamen pellucidam faciem tantisper conturbavit, & leves albeſcentes floccos eructavit, ob tenue terreum in aqua contentum elementum. Denique gallarum ſolutionem infudi, quæ tincturam ſuſcepit ex atro-brunum, nihil tamen ad ima dejectum, luculento indicio, hoſpitari in aquæ ſinu principium martiale.

§. V.

Ex his igitur perſpiciebam, martiale potiſſimum principium in noſtro fonte redundare, quod ut magis adhuc eruerem & examini ſubjicerem operam dedi. Et hoc mihi diſpicienti, veſtigia ejus luculenta conſpicere viſus ſum, quod induſia balneantium flavo colore inficiantur, & ovum humori injectum, brevi tempore, quoad omnem putaminis ambitum, flavedinem induat. Inprimis autem terra illa rubra bolaris, quæ non ſolum canaliculorum, per quorum alveos aquæ decurrunt, parietes inveſtit, ſed etiam in conceptaculi lapidei, in quo aqua per hiemem aſſervatur, fundo copioſe ſubſidet & colligitur, martialem indolem teſtatur prodidit. Quæ, quod nihil aliud ſit, quam ſubtilis ſulphureo-martialis terra & verum martis crocum implicitum foveat, his compertum habui tentaminibus. Cepi hujus terræ uncias duas, eandemque aqua prius elotam & à craſſioribus ſabuloſis partibus liberatam, in crucibulo primum leni igne ſicca-
vi, quo elapſo horæ quadrante, colorem fulcum exhibuit & aucto poſtea caloris gradu, peruſta, intenſius rubere cœpit & in genuinum martis tranſiit crocum. Hunc poſt refrigerationem exemi, & addito dimidiæ ejus parti tantundem ſalis ammoniaci, iterum igne debito modo commiſi, ſublatis haud ita multo poſt in ſublime nitidiſſimis floribus, qui ad quatuor ſcrupulorum pondus accedebant. Tum his affudi ſpiritum vini rectiſſiſſimum, & præſtantiſſimam martialem tincturam extractam eſſe animadverti, quam, tam ſolam, quam melius adhuc, eſſentiæ amaræ nuptam, ſubinde ad ſtomachum roborandum, & ad februm intermittentium, nec non cachecticorum morborum contumaciam ſuperandam, ſummo adhibui cum fructu.

§. VI.

Præter martiale autem hoc elementum, aquam fontis noſtri etiam incolit, aliud quoddam, omnibus mineralibus medica virtute nobilitatis aquis, commune
princi-

principium, subtilissimus scilicet ille sulphureus & æthereus spiritus, cujus præsentiam plura phaenomena planam faciunt atque testatam. Scilicet superius jam memoravi, lancem hydrometricam, aquæ recenter haustæ injectam, sursum ferri, & gravitatem monstrare, quæ mota & aëris accessui patente eadem, disparet; quod quidem nullam plane aliam ob rationem contingere arbitror, quam quod tenuissimus ille humori interfluus elasticus spiritus, elateris sui annisu, ad superiora eluctetur, simulque instrumentum elevet atque protrudat, quod aufugiente eodem, illico altius demittitur. Porro hæc nostra aqua vitro infusa, & longe magis patinæ stanneæ immissa, carbonibusque imposita, innumeras bullulas emittit, in margine & fundo vasis collectius confidentes, quæ nihil aliud sunt, quam subtilissimæ aereo-æthereæ in aquæ sinu contentæ partes, quæ in motum actæ, aut aëris externi remissiori compressu non amplius cohibetæ, aquæ vinculis sese expediunt & exitum affectant. Præterea eidem subtilissimo huic elemento in acceptis referendus tenuis ille halitus & vapor, quem aquæ exspirant, quo fit, ut si copiosius ingurgitentur, caput quasi temulentia & somnolentia afficiatur. Ac denique eadem etiam causa subest, quod latex algidissima quoque hieme frigore non condensetur, & humori, si curiosius paullo aëris arceatur al-lapsus, diu sine corruptione sua constet integritas.

§. VII.

Quum itaque fons noster medicatus, non solum aquam puram & levem vehat, sed etiam spiritu æthereo & principio subtili martiali redundet; omnino non dubitandum videtur, quin in variis morborum generibus, tam interne, quam externe usurpatus, virtute polleat longe saluberrima. Quia enim exquisita ejus est puritas & à salinarum & calcariarum particularum contagio immunis; tenuissimam illam martialem scobem non solum uberius admittere & imbibere, sed etiam salutare facultatem longe expeditius corpori insinuare, crudos & male coctos succos melius diluere & contenta morbosa salia sorbere ac vehiculo suo educere potest. Accedit mira levitas, quæ tanta est, ut cœlestes etiam aquas superet. Quemadmodum enim leviores omnes aquæ sanitatis tutelæ egregie favent: ita pari ratione nostris, à singulari levitate haud tralatitia accedit commendatio & facultas, quippe quæ in causa est, ut non solum expedito itinere per universum corpus commeari & ad penitissimos viscerum recessus penetrare possint, sed etiam, ut succos vitales intime perluant, lentos humores eliquent & infarctos iisdem meatibus promte referent.

§. VIII.

Deinceps quam mirabilem virtutem subtilē illud spirituosum principium medicatis aquis inspiret, ut quasi earum anima sit, in prima disquisitione jam exposuimus. In nostra autem aqua id potissimum eidem tribuendum, quod gravia tantisper martis ramenta in aquæ contubernio detineat, quo fit, ut si aqua aliquandiu immota in libero aëre steterit, martialem scobem sub forma flocculorum dimittat & ad ima vasis tradat. Non minus ea hujus insiti spiritus est laus atque facultas, ut tenui elastica sua indole, intimius ad penetralia corporis nitatur, & strenue per ostia eluctans, aperientem & referantem ipsius aquæ facultatem mirifice intendat atque promoveat.

§. IX.

Palmarium autem & potissimum fontis nostri ingrediens est terra illa subtilis martialis, qua largius imbutus est, & cujus origo ac natales in solo fonti propinquo inquirendæ. Nimirum totus iste tractus in quo salit, admodum refertus est terra sulphurea martiali,

Frid. Hoffmanni Oper. Tom. V.

ita, ut passim in confiniis scatebræ à talpis egeratur & crebrius conspicua sit. Hanc dum perlabitur humor, non solum tenues partes elambit & secum auferit, sed etiam sursum rapti ex inferioribus sulphurei subtiles halitus, aquæ insinuantur, qui, si quando rudiores martiales particulas offendunt, iisdem sese agglutinant & sal fixum vitriolicum efficiunt, si vero ad subtiliores tantum pertingunt intercedente vehiculo aquarum, nexu minus arcto coherent, & volatilem magis servant indolem; quo fit, ut subdio, aut admoto calore, illico dissipentur, & aquæ recedentibus his, inspersis gallis, vel cum floribus balaustiorum decoctæ, non amplius nigrescentem tincturam recipiant.

§. X.

Non quidem negandum, fontem hunc momentum vitrioli martis complecti, quod rarius alias in mineralium aquarum consortium venit; sed quia tam parce eidem insitum est, ut XX. libræ vix dimidiam ejus drachmam alant, nullo modo insignis aliquis medicus effectus ex eo derivari potest, sed potissimam spectatæ facultatis & aperitivæ & roborantis partem martiali terræ tribuendam esse censeo. Quum enim ferrum ejus ingenii ac temperaturæ sit, ut sulphureas multas & terrestres particulas in complexu foveat, quarum ea vis atque facultas est, ut superfluum humidum imbibant & resiccent, ac fibras relaxatas leniter adducant & stringant: fit utique, ut propius ad se invicem coeuntibus fibrosis staminibus, pars ex iis coagmentata compactior & durior reddatur, majoremque vim nanciscatur sese contrahendi, & sub vegetiori motu humores quaquaversum trudendi & citatius circumagendi. Hinc est, quod potis modice nostris aquis, sanus, elapsis aliquot horis, appetentiam ciborum auctiorem, pulsusque validius micantem persentiscat, & ipsa facies colore vivido & rubicundo perfundatur. Et partibus ita sultis & ad motum animatis, is quoque subsequitur effectus, ut eadem subsistentes passim in canalium alveis crassos & impuros succos concutiant, premant, accedente copiosiori humido penitus eluant, abstergant & sic obstructionum repagula solvant, quo fit, ut pro varia dispositione corporum in quibusdam alvus secedat, in aliis urinosus latex copiosius stillet; & in quibusdam, inprimis si lenior motus & calor accesserit, ipse sudor eliciatur.

§. XI.

Neque tamen metuendum est, ne dependens à martiali terra roborans fontis nostri virtus, infestam partibus stricture inferendo, cum sanitatis stet dispendio. Quamvis enim non inficias ire velim, quod medicamenta è marte depromta, sæpius adstringentem pro corporis constitutione & partium solidarum dispositione edant effectum, & eodem non raro detrimentum ingungant; insignis tamen inter hæc, & fontis nostri aquam, intercedit differentia, quæ omnem noxam excludit. Videlicet in illis ferrum aut ignis tortura subtili insito sulphure orbatum, ejusque alcalina terra, destructa mixtura, penitus in callem usta, aut ipsum metallum ab acidis menstruis corrosus atque solutum, nocenti facultate imbutum est; in hac autem, marti nativa adhuc constat integritas, neque quippiam alieni sociatum, & hanc ob causam omni perniciali & detrimentoso effectui destitutus est. Ac licet in prima corporis regione ipsi occurrant acidi succi; ipsa tamen ingesta simul aquæ copia succurrit, & diluendo obvias aciditates, ipsasque fibras à constrictione inimica muniens, omne damnum arceat atque avertit.

§. XII.

Denique eidem martiali elemento merito etiam tri-

buenda spectatissima illa efficacia, qua fons noster externe usurpatus splendet. Hoc enim in balneo per cutis poros corpus subiens, fibris & nervosis partibus sese insinuat, eoque delatum, non solum obhærescentes ibi acres & corruptos humores resiccat & dissipat, sed fibris etiam motricibus robur addit, ut majorem & vegetiorem sese contrahendi potentiam adipiscantur & sanguis omnesque humores promptius circumagantur. Hinc est, quod balneo, licet tepide tantum admissio, venæ intumescant, pulsus validius manum vibret, & perspiratio, reposito in lectum corpore, copiosius eliciatur & nonnunquam plane liberalis sudor subsequatur.

§. XIII.

Excussis sic qua fieri potuit exploratione fontis nostri elementis, expositis quoque in genere inde dependentibus ejus virtutibus; jam specialius paullo dispiciendum: quibus potissimum morbis ejus usus dicatus sit. Ad usum igitur internum quod attinet, is quidem non adeo salubris est, quam acidularum, neque etiam externo æquiparandus: nihilo minus tamen sunt quidam morbi, qui eundem commode & utilissime ferunt, chronici scilicet & diuturni. Videlicet quum morbi, qui lentis adolescunt incrementis & diu extrahuntur, plerumque incunabula trahant, vel ex insigni solidarum corporis partium laxitate ac debilitate, vel ex infesta exquisito sensu dotatarum ipsiusque vitæ conservationi proximius ministrantium strictura & constrictione, vel ex infarctu & obstructione viscerum, indeque sufflaminata legitima sordium per excretoria eliminatione: in prono & facili est judicare; ad eorundem tam levamen, quam per sanationem, egregiam utique esse, roborantem & aperientem fontis nostri virtutem.

§. XIV.

Firmante igitur & debilia fulciente sua facultate, utilis admodum est in stomachi & intestinorum debilitate & motu destructo, omnibusque inde pullulantibus afflictionibus; cujus generis sunt appetentia prostrata, digestio vacillans, inflatio abdominis, & hinc pendens anxietas præcordiorum & spirandi difficultas, vomitus viscidus muci, lienteria varique alvi fluxus. Non minus succurrit reliquorum viscerum imbecillitati & inde oriundis malis, vitiis uteri medetur, nimium mensium fluxum cum fluore albo compescit, morbos quæ laxitati uteri ortum debent abigit & ortam inprimis hinc sterilitatem tollit, excedens quoque per ani venas stillicidium sanguinis, una cum mictu cruento sopit ac cohibet. Porro in morbis spasmodicis partibus nervosis & membranaceis incumbentibus conducit, inprimis in malo hypochondriaco, passione hysterica aliisque cum exquisitis doloribus stipatis afflictionibus, ex lentiori sanguinis cursu & intercepto humorum per viscera transitu, enatis.

§. XV.

Abstergens vero & roborans ejus virtus, haud proletariam opem spondet iis, qui visceribus oppilatis & obstructis, lienis & hepatis affectibus laborant, qui ictero impliciti, chlorosi affliguntur, cachexia detinentur & hinc ad hydropem tam pectoris quam thoracis tendunt. Laudem porro meretur in suppresso sanguinis, tam per ani, quam uteri venas fluxu, & quæ inde subnascuntur afflictionibus, nec non in morbis sic dictis tartareis, qui ex humorum impuritate originem fortiuntur, quorum familiam ducunt arthritidis, podagra, ischiadicum malum, calculus renum & vesicæ, quibus denique accedunt omnia illa pathemata, quæ à scorbutico cognomen habent.

§. XVI.

Maxime omnium vero præclara & innumeris ser-

me exemplis uberius confirmata est, fontis nostri exterius adhibiti virtus; ita, ut plane omisso etiam aquarum potu, exoptatissimo cum successu ad balnea usurpari possit. Scilicet egregie opitulatur iis, qui tam rigidis & contractis, quam aridis & languentibus membris, neque ambulare, neque pedibus insistere possunt, nec non exquisitis doloribus in pedibus, brachiis & scapulis torquentur. Deinceps multiplici experientia compertum habeo, balneum ex aqua Lauchstadiensi egregium solamen & robur attulisse his, qui perpeffa apoplexia, vel diutius podagra & arthritide detenti, elumbes facti, languidos & vacillantes circumtulere artus, ita, ut admissio illo, munia iterum obire & promte perficere potuerint. Porro eminens est balnei operatio, ad discutiendos, à lenti & defidis humoris decubitu, nec non fracto fibrarum robore, oriundos tumores, inprimis pedum. Non minus eximio præsidio est grandævis, qui ob ætatis rationem viribus deficientes, ad languorem & lassitudinem dantur, & doloribus acutis membrorum excruciantur. Quinimmo ubicunque fessa, fluida & languida sunt membra, laudatissimus & summopere commendandus est fontis nostri in balneo usus.

§. XVII.

Præterea sæpius contingit, ut in collo, sub axillis, in regione inguinali, inprimis si scorbutica impuritate succi infecti sunt, tumores pisorum instar protuberent, qui plerumque acerbis catharris, ulceribus ichorofam materiam fundentibus, lippitudine & humiditate oculorum nec non scabie serpiginosa stipantur. Hi autem, quum prohibita debita lymphæ in glandularum officinis à sordibus repurgatione, succorum in corpore impuritatem sustentent & augeant; mala inde pullulantia prius non sanescunt, quam tubercula ista, siue glandulæ tumidæ, disparuerint & subsederint, ac humorum depuratio his in organis iterum libere successerit. Et in his omnibusque à glandularum obstructione prognatis morbis egregium affert auxilium externus fontis nostri usus, inprimis si accomdis internis medicamentis secundetur ac promoveatur. Similiter crebriori observatu constat, multum prodesse balneum fontis nostri in ulceribus sordidis, & vetustis, scabie, impetigine, variis aliisque cutis defæcationibus, adhibitis simul interius laxantibus, diluentibus & sanguinem à sorditie liberantibus. Et quia luxato membro, confines quoque partes vitium pati solent & relaxantur, solenne admodum est, ut repositum ex facili iterum è sede dimoveatur ac dilabatur, aut saltem tumor juncturam occupet: præstabilis certe fuit multis balnei nostri usus, quo membra firmata & intumescencia discussa est.

§. XVIII.

Inprimis autem ingens præsidium affert balneum nostrum foeminis, quæ puerperio functæ, aut abortum passæ, plurimis attentantur malis, & fluore albo tabescunt, tributum lunare parce & male ad calculum solvunt, hysterice pathematibus torquentur, anxietate præcordiorum, stomachi & dorsi dolore, cephalalgia, animi angore, & lassitudine ac languore artuum, cum aestu volante, livido colore & alvi obstructione affliguntur; eo quod hæc fontis nostri peculiaris laus atque facultas, ut laxatum uteri robur adducat & fulciat, venas firmet, & ad revocandum legitimum menstrui fluxus successum multum conferat. Monendum tamen est, quod in ejusmodi morbis, præter balneum, interius quoque bibenda sit alia quædam mineralis aqua, Egrana inprimis vel Selterana, quo ejus potu, excretiones promoveantur, & sordibus è corpore proscriptis, ipsum balneum salutarem effectum eo promptius & efficacius exsequatur.

§. XIX.

§. XIX.

Supereſt ut ipſum exhibendi & utendi modum, tam internum, quam externum, tradam atque exponam. De hoc primo loco monendum: quod ejus uſus, uti omnium mineralium aquarum, commodiſſime inſtituatur tempore, quod nec frigore, nec calore modum excedit, vernali nempe & autumnali. Tempus vero diei, tam potationi, quam balneo, aptiſſimum eſt matutinum, quo ventriculo vacuo aquæ longe expeditius & ſine obſtaculo operationem edunt, niſi neceſſitas repetitum uſum ſuaſerit. Copiam aquæ pro doſi hauriendæ exactius definire non licet; eo quod ob diſſidentem corporum conſtitutionem & varium morborum genium cauſasque differentes, mox largiorem, mox liberaliorem potum ſuadere expedit. Interim tamen communis mos fert, ut dimidia vel una menſura, interpolatis hauſtibus bibatur. Neque etiam temporis uſui impendendum ſpatium penitus determinare integrum, quum quibuſdam octo aut decem dierum intercapedo ſatis longa ſit, nonnullis vero per duas vel tres hebdomades inſiſtendum. Prudentis itaque & periti Medici erit, omnia circumſpecte ita dirigere ac diſpenſare, prout ægri ipſiusque morbi conditio expoſcit & ad ſalutarem eventum obtinendum neceſſarium eſt. Eundem tamen in finem conſultum fore puto, ſi generales quaſdam præceptiones & cautiones ſubtexam, & uſuris ad curioſam obſervationem commendem.

§. XX.

Et de interno quidem uſu hæc monenda habeo:

I. Priuſquam potatio inſtituitur, alvus benigno cum laxante ſubducenda, ne obhæreſcens in prima corporis regione viſcidorum & male coctorum ſuccorum ſaburra, aquæ tranſitui remoram injiciat, operationem interturbet & varia inducantur incommoda, anxietates, compreſſus in ſtomacho, nauſea, vomitus & id genus alia. Neque plane diſſuaſerim, ſi pro circumſtantiarum ratione, leni vomitorio ſtomachus depleatur, & poſtea alvum ducens medicamentum propinetur.

II. In ſucco & ſanguine fartis neceſſarium eſt, ut vena pertundatur & ſuperfluum ſubtrahatur. Quum enim aquæ intimius ſuccos & ſanguinem perluere, in penitiores viſcerum reſſus provehi, & denique iterum per organa excretioni dicata evehi debeant; ſanguinis autem exundans copia liberum & promptum curſum mirifice impediat: hæc utique ſubmovenda eſt, & aquis liber commeatus parandus.

III. Juniores, firmiores ac robuſtiores, fibris durioribus & vaſis amplioribus dotati, nec non qui vini potui aſſueti, majorem aquæ copiam ferre poſſunt, quam qui exilitate canalium & fibrarum teneritudine exquisitiſſe ſentientem indolem produnt & ad ſpaſmos proni ſunt.

IV. Tutius eſt, parcius primum bibere & in copiam liberaliorem aſcendere, ac tandem in copiam magis acciſam definere. Quemadmodum enim omne inſuetum naturæ alterationem inducit: ita minus etiam conſultum eſt, copioſiorem aquæ quantitatem in principio ingurgitare, & verendum, ne ventriculum & inteſtina nimis diſtendendo, ægrius pervadat & in aliis corporis partibus moleſtiam importet.

V. Quando octo vel decem dies potationi indulſimus; è re eſt, ut alvus vacuetur & reſtibiles aquæ una cum viſcidis humoribus aliſque ſordibus evocentur; eoque facto, diſpiciendum: an morbi ægrique conditio expoſcat, ut potus diutius extrahatur, vel finiatur.

VI. Sub tota curatione non ſolum animus ab omnibus curis, ægritudine, affectibus & profundis meditationibus liber eſſe debet, ſed etiam exquisitum in vita & victu moderamen tenendum, ne operatio ſalutaris fon-

tis turbetur & ſpes decolletur. Corpus quoque ante prandium exercendum, ſomnus vero, præſertim pomeridianus, vitetur, quippe qui, experientia teſte, capiti nocet & ſæpius febres intermittentes, vertigines, laſſitudinem, deſtillationes cum torpore & capitis gravitate inducere obſervatus eſt.

VII. Stomachi porro ratio habenda ejuſque robori, baſamicis accommodis ſubſidiis ſuccurrendum, quem in finem apprime elixirium alcalinum & ſtomachicum utile eſt, quod tam ante prandium, quam peracta digeſſione, aſſumi poterit. Non minus etiam ſub ipſo aquarum potu alia adhuc medicamenta, morbo proximius dicata, ex uſu ſunt, pro prudenti medentis intentione offerenda.

VIII. Quia vero fontis noſtri virtus magis roborans eſt quam aperiens, & neceſſarium ſæpe, quo prima corporis regio à craſſis viſcidis impuritatibus repurgetur; apprime ex uſu eſt, ut alternis, vel ternis diebus, veſperi pulvis ſalinus aperitivus aſſumatur, quam in rem terram foliatam tartari, ſolutionem oculorum cancri, arcanum duplicatum, tartarum vitriolatum & in bilioſis ſubjectis nitrum commendo. His quoque, qui multos acidos ſuccos in primæ regionis diverticulis alunt, ex uſu eſt, ut ſalinos hos pulveres cum oculis cancrorum remiſceant. Quod ſi vero neceſſarium foret, ut evacuatione alvina liberalius ſuccederet, ternis vel quaternis diebus ſemuncia ſalis Anglicani, vel Sedlicenſis, in dimidia aquæ menſura liquati, exhiberi poteſt. Nonnullis etiam apprime conducet infuſum mannæ, inferius commendandum, inprimis ſi ſcorbuticæ acres ſordes ſenſibiles in thorace partes irritant & tuſſim cient.

IX. Non raro contingit, ut aqua noſtra primum, maxime ab inſuetis, pota, nauſeam, vomitum, inflationes, dolores circa præcordia, capitis gravitatem, ſomnolentiam nec non tumores pedum œdematoſos ſuſcitet; ſed hoc neque Medicum terrere, neque bibentes à potu abalienare debent, quum continuato uſu, & pervadente aqua, omnia ſponte evaneſcant. Si vero diutius infeſtarint, ut ſuſpectum reddant potum, ſatius eſt abſtinere, quam valetudinem in aleam dare & ægros periculo exponere.

X. Natu majoribus & infirmis, quibus ſolutior ſtomachus & ſpongioſus corporis habitus, nec non qui brevi à morbo convaluerunt & præterea ſpaſmis ſolennibus patent, inprimis ſcœminis; neutiquam expedit, ut frigidam bibant, ſed aqua in lagena ferventi aquæ immittenda, ut tepescat; tenendum tamen, quod hoc facto, tantum ad dimidias lagena ſit epotanda, & inferiora, quia ſpirituoso elemento orbata, ſeponenda.

XI. Similiter perfrigerata potatio nocet, ſi ſpaſmodici affectus præſto ſunt, & nervoſas partes attentant, ſi alvus copioſius fluit & ſanguis liberalius ex ſedalibus & uteri venis manat, vel etiam compreſſus eſt, ſi dolores adſunt, partes contractæ nimis & artus immobiles, nec non in omnibus morbis, qui à cohibita perſpiratione incidunt.

XII. Operatio fontis longe præſtabilior magisque præſens eſt, ſi pota ad quinque vel ſex dies aqua, balneum admittitur & potatio uſu ſalis Anglicani vel Sedlicenſis, aut mannati infuſi, denuo inchoatur. Quippe temperatus in balneo calor, & ſubeuntes, amiſſo eo, corporis intimiora ſubtiles partes, multum conferunt, quo affluxus impurorum ſuccorum ab exterioribus ad interiora & excretioni dicata organa convertatur.

XIII. Cholerici, graciles & ficcioris alvi, circumſpecte utantur potu, qui vero ſpiritum ægre trahunt, phthiſi, hæctica & febris lentis tabeſcunt, plane abſtineant. Neque etiam conſultum eſt, potationem inſtituere circa temporum articulos, quibus ſolennia ſanguinis profluvia repetere ſolent.

XIV. Si hepar aut reliqua abdominis viſcera,

indurata, scirrhusa vel plane labe affecta, aut saltem ita indurata sunt, inferiora corporis inde intumescant & superiora contabescant, neque spes affulget, fore, ut aquae pervadant & aditum sibi parent: nihil fontis nostri, ut omnium remediorum, valet usus.

XV. Ultimo loco monendum, quod quum fons noster peculiaris sit indolis, neque communis adeo interni usus esse possit: optime rebus suis consulant, qui antequam ad ejus usum descendunt, in consilium adhibent peritum ac prudentem Medicum, qui naturarum differentiam probe callet, morborum causas pernoscit & vires, remediis à DEO concessas, probe perspectas habet; quo is post exactam deliberationem omnium circumstantiarum, rationali modo dijudicet, an ægro conducat vel noceat.

§. XXI.

Ad usum externum quod attinet; ingenue fateor, longe plura de ejus salubritate ac præstantia huc usque innotuisse, quam de interno, quod quidem hanc ob causam factum esse arbitror, tum quod ille revera longe tutior hoc, tum quod frequentius etiam, & crebrius ad balneum usurpatus sit. Placuit igitur etiam de hoc utilissima quædam monita subnectere, ad quorum normam omnia solícite sunt adornanda.

I. Ante usum balnei corpus blando laxante à foribus repurgandum, eumque in finem egregiæ virtutis est hæc potio: *Recipe mannæ electæ uncias duas, cremoris tartari drachmam unam, aquæ florum acaciæ uncias quatuor; coque & solve leni calore, adde syrupi violarum unciam dimidiam, olei de cedro guttas tres: misce.* Assumenda autem est interpolatis vicibus, superbibendo aliquoties haustum decocti avenacei dilutioris.

II. Qui copiosum sanguinem in venis gestant, licet jam ætate grandiores sint, & pulsum validiorem, vasa tumida & colorem floridum faciei exhibent, cibos prompte appetunt & vitæ genus minus laboriosum colunt antequam balneum instituant, sanguinis copiam venæ sectione sufficiente minuunt. Hoc enim si neglectum fuerit, crebriori observatu compertum habeo, balneo præsertim calidius usurpato, maximum suscitatum fuisse damnum, ita, ut capitis & artuum dolores, lassitudines, calor internus, palpitationes cordis, post illud balneantes graviter affligerint: quum contra subtracto sanguine, illico hæc symptomatum atrocia conquieverint, & balneum postea exoptatissimo cum fructu usurpatum sit.

III. Eadem ratio est scarificationis, & auctor imprimis foeminis sum, ut si eidem assueverint, cucurbitulas prius sibi applicari curent antequam balnei usum moliantur.

IV. Matutinis balneandum est horis, antequam in solium descendat æger aliquot infusi Thee vel theiformis patellas bibat, & postea balneo per horam, aut diutius adhuc infideat.

V. Balnei calor exquisitè temperandus, ita, ut nec calidum nimis sit, nec frigidum sed tepidum, infundendo subinde sub infessu ferventem aquam, ne nimis perfrigeretur; ita tamen, ut exacto propemodum infessu, calidius paullo sit & corpus calore perfusum in lectum transferatur.

VI. Corpus è balneo surgens probe detergendum, indusio sicco, & infumato induendum, in lectum reclinandum & panno calefacto perfricandum, eoque facto, lenis sub stragulorum tegmine opperiendus & ad unam horam eliciendus est sudor. Eundem quoque in finem è re est, ut in lecto aliquot vascula infusi theiformis, aut jusculi, cum radicibus aperientibus decocti epotentur.

VII. Balnei usus pro ægri morbiq; conditione ad quatuor vel sex hebdomades prorogari, & demum jam laudata potione laxante mannata finire potest.

IIIX. Qui insigni membrorum languore & lassitudine detinentur, bis quotidie balneo uti possunt, & præter matutinum, post meridiem qui peracta digestionem hora circiter quinta.

IX. Post balneum summo studio aer frigidus vitandus, ne occlusis subito poris ipsa salutaris operatio turbetur & noxa subsequatur. Quare tam potantibus quam balneantibus maxima providendum est cura, ne vesperi diutius sub diu commorentur, sed hora nona quieti sese dent, & sexta matutina resurgant.

X. Alvus semper debet esse libera & fluida, eamque ob causam apprime utile est, vesperi subinde juscula ex prunis cum passulis confecta assumere, & singulis hebdomadibus semel potione laxante uti.

XI. Si balneum nimiam siccitatem inferre observatur: expedit, ut vesperi ante lecti introitum, vel post prandium etiam, pulvis præcipitans nitrosus sumatur, qui simul excretionis alvinæ successum faciliat.

XII. Quia non omnibus accommodum est, ut sub externo usu, interius simul aquam nostram bibant; Medici periti erit, ut dispiciat, an balneantibus conducibile sit, ut aliis adhuc accommodis medicamentis utantur, sive decocta ex lignis & radicibus, sanguinem diluentia & depurantia, sive alias minerales aquas potent, quo is, qui propositus est, finis, eo certius respondeat. Inprimis autem his, qui in pectore labem timent, aut arthriticis doloribus obnoxii sunt, egregio præsidio esse poterit, fons Selteranus, cum lacte, vel asinino vel Selterano remixtus.

XIII. Si balneum in affectibus capitis, ut vertigine, melancholia, hypochondriacis pathematibus in usum vocatur, tenendum, quod simul Egranarum vel Sedlicensis potus sit suadendus, & infessus in balneo diutius, ad duas minimum horas, extendendus.

XIV. Præter ea, quæ superius de moderamine in vita & victu monuimus, addendum, quod sub balnei usu ad potum ordinarium accommodatissimæ sint Selteranæ vel Antonianæ, cum vino Rhenano vel Burgundico modice mixtæ, parcus autem sit cerevisiæ usus.

XV. Foeminæ, exilibus vasis dotatae & vel nondum, vel parcius mensium fluxum expertæ, abstineant à balneo, ob constringentem & roborantem ejus virtutem: quæ vero laxiori corporis habitu & amplioribus vasis instructæ, & quibus jam sanguis ex utero stillabit, licet in præsentiarum minus ordinate succedat, utiliter & tutissime balnei usum ferunt.

XVI. Desistendum quoque est à balneo, si solennia & critica sanguinis, tam in foeminis per menses, quam in viris per hæmorrhoides profluvia ingruunt & succedunt, ob cohibentem aquæ virtutem, ne eadem retineantur & turbentur.

XVII. His qui colica convulsiva subinde affliguntur, quibus præcordia stringuntur, post præmaturre & intempestive suppressos febrium paroxysmos, quibus porro hæmorrhoides substituerunt & dolores ex calculo nec non spasmi ventriculi solemnes sunt, auctor sum, ut nostrum balneum fugiant, eo quod ejus facultas non tam emolliens & demulcens est, ac Tœplicesis, aut ex aqua pluviali confecta, quam potius firmans & fibras adducens, & eodem crispaturam augere minus salubre est.

XVIII. Mulieres, fluore albo molestissimo afflictæ, utilissime ad balnei usum descendunt; ita tamen, ut prius infuso laxante vel pilulis accommodis fordes uteri expurgent, & subinde fumum ex mastiche, succino, tacamahaca in sella ad inferiora admittant.

XIX. Qui post diuturnum morbum superatum, vel in malo contumaci & quod parti cuidam incubuit, balneum adhibere animum induit, post vernale tempus, autumnio iterum, vel subsequenti adhuc anno, ejus usum repetere debet. Quia enim partes

tes mali pertinacia admodum debilitantur & pravam dispositionem contrahunt, ut licet semel tantisper refocillatae sint, facile tamen pristina labe afficiantur & morbus recrudescat: necessarium est, ut per iteratum usum noxa praestolans arceatur & malum penitus eradiceatur.

XX. Exterius utendi modis accensenda adhuc sunt pediluvia, quae iis potissimum dicata sunt, qui capitis doloribus, vertigine, oculorum vitiis, pedum tumore ac debilitate affecti sunt. Adhibentur autem ea vespertinis horis, brevi antequam in lectum se conferat aeger, & ita instruenda sunt, ne calore nimio sudorem moveant sanguinemque exagitent.

XXI. Denique etiam nostra aqua exterius ita adhiberi potest, ut lippientes & lacrymantes oculi eadem subinde abluantur; non neglectis tamen pediluviis, quin balnei ipsius usu, & interius laxantibus, aliisque congruis auxiliis.

§. XXII.

Ad finem tandem perducto, tam interno, quam externo fontis nostri usu, insistendum est jugiter per aliquot hebdomadam decursum exquisito in vita ac victu temperamento. Sunt enim inter exempla, qui felici cum successu usurpata nostra aqua, antiquum obtinentes & parum curiosi legum diateticarum, sepositis quoque iis, quae effectum stabilire poterant, in pristinum non solum morbum relapsi, sed etiam gravioribus macerati sunt damnis. Quare solícite inculco, ut praeter ea, quae ad normam regularum à diæta cognominatarum servanda, infusum theiforme ex veronica, melissa, salvia & semine foeniculi subinde forbilletur, alvus quoque leniorum usu nonnunquam subducatur, stomachus per accommoda roborantia, crebrius usurpanda fulciatur & sic sanitatis tutelae quavis ratione curiose prospiciatur & consulatur.



D E

AQUA MEDICINA UNIVERSALI.

§. I.

Quam desiderata ubique & omni tempore efflagitata fuerit medicina, quae omnis generis morbos virtute sua vincat: nemini, qui paullo majori solertia in rebus medicis versatus, ignotum fore arbitramur. Hecatombe profecto redimendum esset, si quisquam Medicorum tam felici uteretur ingenio, ut tale remedii genus in aegrotantium salutem inveniret! At vero, cum ne ulla quidem adhuc nobis cognita explorataque sit medicina, quae vel unius morbi speciem certo semper eventu profliget; de tali profecto, quae omnibus morborum generibus depellendis sufficiat, eo magis videtur desperandum. Sane enim, si tam differentem subjectorum indolem & tam multiplices & saepe contrarias morborum causas, nec non remediorum vires, pro natura corporum subinde variantes, intuemur: circa medicinam universalem investigandam, non amplius frustranea opera & irritum ausu erimus occupati.

§. II.

Verum enim vero, quodsi medicamentum in universa rerum natura datur, quod universale appellari meretur; certe illud non aliud, nostro quidem iudicio, est quam aqua communis. Hujus tam communis tamque necessarius omnibus est usus, ut sine eo nec vivum, nec integrum corpus nostrum manere possit: quin & omnis generis morbos, arcet, corpus sanum tuetur, illudque ab omni corruptione, quae vitae inimicissima est, defendit. Praeterea usus aquae omnibus in curando indicationibus satisfacit, adeo, ut sine hac nulla passio, sive chronica, sive acuta, felici industria possit profligari. In hujus sententiae nostrae confirmationem nolumus jam hoc loco salutiferos, eosque tam calidos quam frigidos fontes, adducere, eorumque efficaciam in vincendis variis morbis vindicare: sed res nobis tantummodo erit cum aqua communi, pura tamen & optima, cujus universalem usum plurimum laudare ac commendare, hoc in schiasmate constituimus.

§. III.

Quum itaque de aqua, medicina in morbis praeservandis & sanandis universali, verba facere, & praestantissimis argumentis id ostendere propositum nobis sit; non alienum à scopo nostro fore judicamus, si

prius de necessitate naturali interitus corporis nostri quaedam praemoneamus, quo his cognitis, eo liquidius, quinam insanabiles sint, perspicere queat. Quod ad primum attinet, nempe naturalem moriendi necessitatem, quam notissimum est, corporis nostri durationem, & putredinis, ad quam per se valde pronum est, declinationem, unice à perenni ac non interrupto sanguinis & humorum circuitu dependere. Et enim quam diu is salvus ac integer est: tam diu corpus vivum appellatur, hoc vero paulatim deficiente, morte nihil est propius. Hic motus igitur est, qui unice corpus à corruptione vindicat, eo quod quietem, quae causa ac fundamentum omnis putredinis est, ab humido heterogeneo, cujus indolis in universum animantium partes sunt, solus avertit.

§. IV.

Duraret certe corpus nostrum in perpetuum, si sanguinis motum continuum ac perennem, possemus tueri. Id autem quum non ferat humana imbecillitas, miseraque mortalium conditio, in hujus defectus causas inquirere, operae videtur pretium. Sunt autem nostro iudicio haec: circuitus iste humorum vitalis organis & viis perficitur; organa, fibrae musculorum elasticae, quae successiva & reciproca dilatatione ac contractione gaudent, constituunt: haec sunt vasa majoris & minoris capacitatis. Si quando igitur fibrarum elater ac impulsus ita imminuitur, ut non amplius proportioni humorum ad movendum necessariae respondeat, neque hi per minimos tubulos expedite & prompte circulentur; fieri certe non potest, quin in capillaribus vasis humorum stagnationes, & inde tandem putredines, foecundae morborum & mortis genitrices nascantur.

§. V.

Sicuti autem in omnibus machinis, & elateres & vires motrices corporum, ob massae, ex qua coagmentatae sunt, mutationem, tandem fatiscunt & debilitantur: ita eodem modo sese res habet cum corpore nostro, cujus fibrae, quae motum unice perficiunt, procedentibus annis crassescunt, durioresque, solidiores ac aridiores fiunt. Quam ob rem non modo difficilius moventur, sed & pori ac meatus angustiores redditi, quo minus fluida per alveos libero ac aequali cursu possint trudi ac progredi, impediunt. Cujus rei luculenti testes sunt carnes annosorum animantium,

tium, quæ ob duritiem & soliditatem longe majori calore & longiori coctione, ut emolliantur, indigent, quam carnes juniores. Ex quo intelligitur, nullum esse dubium, quin si idem status eademque mobilitas fibrarum vasorumque, eadem denique pororum apertura perpetuo posset conservari, corporis vita hac ratione in perpetuum, nisi accefferit causa externa violenta, esset duratura. Hoc ipsum quidem vel medicina, vel victus delectu præstari posse, ii, qui rerum naturalium vires non perspectas habent, concipere nequeunt: illud tamen non vero simile, sed verissimum est, plurimos mortalium non illum vitæ terminum attingere, quem corporis constitutio ac temperies à natura ipsis tributa promittit, dum regulas, quibus ad naturalem terminum corpus posset pervenire, vel ignorant, vel despiciatui habent. Quare maxima hominum pars, cum affectuum & victus intemperantia, tum neglecto earum rerum, quæ salubres vel insalubres sunt, discrimine, vitam breviorē & afflictam valetudinem certo sibi accelerat.

§. VI.

Explicata jam interna & naturali interitus nostri causa, ac origine; rem non incommodam fore arbitrator paucis exponere, quare morbi dentur insanabiles, quique nullo auxilio, nullo remedio obsecundent. Etenim dari proportionem inter agens & patiens, & effectus adæquatam desiderare causam, cum sana ratio, tum ipsæ motuum leges satis explicant. Atqui si quando contumacissimæ vasorum contingunt obstructions, viscerumque indurationes, denique ingentes humorum in cavitates effusiones & inde ortæ putredines; quis poterit hisce malis expugnandis pares medicinæ vires invenire? Quis porro profundas & internas nobiliorum partium inflammationes & inde natas sphacelationes convenienti remedio sisteret? Postremo, quis vehementes & inveteratas generis nervosi commotiones reprimeret? Hoc certe si quis ullo remediorum genere præstiterit: hunc ego non Æsculapium, sed in humani generis felicitatem natum, dicam, certissime persuasus, neminem cui is adfuerit, morbis acutis esse perituum.

§. VII.

Cæterum dispiciendum quoque est: num detur in rerum natura tale remedium, quod certo morborum generi profligando idoneum sit. Noto notius est, specifica quædam ad certos morbos expugnandos adhuc mirifice commendari. Ita China Chinæ pro sacro antifebrili habetur. Argentum vivum adversus luem virulentam veneream mirificis laudibus extollitur. Opium omnium dolorum certissimum allevamentum dicitur. Mars hypochondriacorum audit solatium. Sulphur summum judicatur pectorale. Castoreum nervis amicitissimum. Amara cachecticorum & hydropicorum exoptatissima medicina prædicantur. Nitrum in febrili aestu extinguendo dicitur ferre opem desideratissimam. Verum enim vero, tametsi his eximiis remediis & sua laus & virtus constet, attamen qui artem aliquamdiu fecit, is ejusmodi auxiliorum genera his morbis debellandis minime sufficere facile judicabit. Quis enim ignorat, omnes fere morbos à causis diversis, imo sæpe contrariis, foveri? Quem latet, morbos sub diversis procedere symptomatibus, & hinc majoris vel minoris esse periculi; Cui non cognitum perspectumque est, diversas corporum dari indoles easque, in quas remedia agunt, multum inter se variare? Unde necesse est, ut ab uno eodemque adhibito remedio, pro diversa corporum natura, diversi, imo contrarii, subinde effectus consequantur. Etenim, quod probe observandum, remedia non agunt tantum secundum activitatem suam, sed & si ita loqui decet, secundum receptivitatem,

hoc est, remediorum vires, à mechanica corporum nostrorum medicamentorum mutua ac reciproca in se actione & reactione proficiscuntur. Ex quo intelligitur, quam nefario ausu ii curationes suas instituant, qui nulla habita subjectorum causarumque morbificarum aut aliarum circumstantiarum ratione, uno semper remedio una eademque methodo in eodem morbo utuntur, id quod omnes imperiti consilique inopes Medici magno vespillonum commodo facere solent. Nam qui horum omnium habuerit notitiam, is non facile unam medicinam in uno morbo omnibus accommodabit.

§. VIII.

Reliquum jam est, ut quo sensu ac mente aqua universalis medicina dicatur, exponamus. Affirmamus vero, aquam esse omnibus naturis & omni temporis convenientissimam; deinde non dari hac ipsa nobilioribus à morbis præservativum; præterea tam in acutis, quam chronicis passionibus, certissimam opem afferre, & tandem ejus usum omnibus indicationibus, tam præservatoriis, quam curatoriiis, satisfacere. At vero, cum magna aquarum in universo differentia sit, dispiciendum maxime omnium est, quænam aquæ, huic medico scopo sint accommodatæ. Neque enim negandum est, aquarum naturam ac vires, quam longissime inter se dissidere, id quod, aquæ potiores vel ipso gustu facile possunt dijudicare. Præterea aquarum differentiam non rectius addiscimus, quam variis chymicis examinibus eas subjiciendo, videlicet si ponderationes variasque mixtiones cum ipsis instituamus. Adeoque non existimandum est, aquam tam homogeneous, ut prima fronte apparet, esse liquorem; sed ex compluribus diversæ naturæ partibus eum mixtum esse, complura sunt, quæ id confirmant. Primo enim omnis aqua fluidum aëreo-æthereum in intimam sui societatem admittit, eo quod elastica aquarum vis, ab hoc unice repetenda videtur. Notum enim est, omnes aquas expandi & majus spatium occupare; easdem quoque contrahi inque arctius spatium cogi, pro majori aëris aut ætheris in aquas admittance, vel ex ipsius poris rursus facta expressione. Luculentum hujus rei exstat testimonium in thermometris, ubi liquidum inclusum, pro diversa caloris & frigoris admittance, jam spatium majus, jam minus occupat. Ea enim conditio est omnium liquidorum, ut calore accedente, fluidum æthereum uberius soleant admittere, quod etiam rursus frigoris interventu derelinquunt, sicuti aliquot ab hinc annis acerrima hieme fumus experti. Aeris vero & ætheris copia aquis inerrans, non melius quam antliæ pneumaticæ beneficio potest explorari, cum subtiliores aquæ numerosas bullulas in vacuo emittant, immo si paululum calefactæ fuerint, ytri, quo continentur, ora transcendunt: sicuti contra quo crassiores & graviores aquæ sunt, eo minor bullularum elevatio observatur.

§. IX.

Deinceps ipsæ aquæ ex subtilioribus nec non paulo gravioribus partibus constare videntur; illæ, ut mobiliiores, facilius ascendunt, inque altum caloris accessu sub destillatione & evaporatione elewantur: graviores vero & crassioris molis particulæ, majorem caloris gradum postulant. Quam ob rem animadvertimus in coctione avolare subtiliores & remanere crudiores minusque utiles: id quod curiosiores decocti ex fabis Turcicis, quod Coffee vocant, potiores probe experiuntur, qui, quoties lupinos contusos aquæ diutius coctæ immittunt, saporem exinde minus gratum percipiunt. Observatum quoque fuit, aquas in destillatione alias longe celerius, alias ægrius alembicum transcendere. Denique pon-

dere inter se multum aquæ differunt, dum aliæ graves, aliæ leves, instrumento statico notantur: utpote quæ, terreis varii generis, nec non salinis turgidæ sunt partibus, puras pondere multum exsuperant. Pluviales vero, ceu tenuiores & puriores, omnium sunt levissimæ. Non commodiore autem methodo puritas aquarum & heterogeneum illud, quod continent, quam destillatione potest cognosci: qua fit, ut non modo copia, sed & indoles contentorum, sensibus sese offerat. Mirabile certe visu est, quam insignis moles terreæ vel lapidosæ massæ destillatione nonnullarum aquarum relinquatur. Fecimus olim experimentum, & ex cucurbita vitrea aquam fontanam ad siccitatem destillavimus, sumendo duas mensuras, decemque vicibus in eodem vase id repetendo, eaque operatione ingentem, firmam ac duram crustam lapideam, crassitie cultri dorsum æquantem obtinuimus. Plurimæ vero aquæ calcariam terram: quædam lutosam & ferream massam flavesceniem: aliæ lapidescentem materiam complectuntur. Illæ, quæ martialis sunt indolis, sapore paululum adstringente & ochreo sedimento, quod mox circa scaturiginem deponunt, dignoscuntur. Multæ quoque, inter quas & Halenses nostræ referendæ, salis communis sunt participes, quod post coctionem in fundo, ex sapore judicatur. Rectius vero partium heterogenearum cum aquis permixtio, adeoque earum impuritas, chymicis quibusdam experimentis exploratur. Quo nomine duo nobis familiaria, quæ aquarum puritatem vel impuritatem egregie detegunt, plurimum commendamus; primum oleum tartari per deliquium, secundum argenti solutionem, cum aqua forti institutam. Si aquæ fuerint puræ, ut pluviales, vel destillatæ, aut nonnullæ fontanæ, ad horum mixturam ne minimum quidem mutantur: sin impuræ & graves, ab oleo tartari lactescunt, præsertim si calcaria terra fuerint imbutæ; à solutione vero argenti infusa, turbidæ redduntur & cinericio colore, propemodum rubescente, qui ferri delitescantis indicium est, imbuuntur.

§. X.

Postea indolem aquarum earumque subtilitatem ac gravitatem effectus, quos exhibent varii, clarissime demonstrant. Ita leviores & molliores durioribus carnibus & leguminibus coquendis, nec non duris ossibus & dentibus ac piscibus marinis emolliendis inferviunt. Qui linteamina lavare ac mundare, vel eadem applicatione candefacere solent, insignem mox aquarum differentiam deprehendunt, eo quod molliores citius sordes mucosæ & pingues detergant, quam graviore, quæ nullam spumam exhibent & cum sapone ægre subeunt connubium. Chymici quoque in laboribus suis non mediocre aquarum cognoscunt discrimen: nam fontanæ ac graves duræ, calcium ac magisteriorum v. g. calcis auri, auri fulminantis, magisterii lunæ, terræ vitrioli dulcis edulcorationi minus conveniunt, ideo quod tenerrimas à menstruo superstitas partes complures in poris relinquunt: eoque in negotio feliciore opera pluviales aliasque subtiles adhibent. Pistorum quoque experimento constat, subtiliores ac molliores aquas, farinam citius quam crassiores fermentare & attollere, cum hæ panes minus spongiosos ac leves producant. Neque ignotum est horti cultoribus, quod vegetabilia levi, subtili ac spirituosa aqua irrigata, multo lætius succrescant, quam si duriore ac fontana conspergantur.

§. XI.

Magna etiam aquarum in cerevisiarum coctione apparet diversitas, utpote duriores longe durabiliorem, molliores vero longe sapidiorem, sed facilius acescentem cerevisiam, producant. Cæmentarii & qui gypsum præparant, optime norunt, pluviales & subtiles aquas

huic negotio minus quadrare, cum nullam firmiorem consistentiam atque conglutinationem præstent: id quod longe felicius cum durioribus & fontanis procedit. Tandem indies experimento domestico doceamur, infusiones herbarum uti thee, veronicæ, salviæ, cum subtilioribus & fluvialibus aquis, longe fieri saturatiores, quam si fontanis misceantur.

§. XII.

Sunt autem omnium subtilissimæ pluviales, quippe naturæ beneficio revera destillatæ. Nam aquarum vapores solis calore è terra in altum elevati, motu & calore subtiliores redduntur, ideoque solutionibus, elutionibus, vegetabilium augmento, infusionibus, linteorum dealbationi, nec non interno medico usui sunt aptiores. At vero cum variæ indolis exhalationes, tam ex vegetabilium, quam animantium familia, corruptioni obnoxia se se immisceant, hinc fit ut liberioris aeris accessu, vel si diu in ligneis vasis steterint, putredinem facillime concipiant: quæ autem mense Martio decidere solent, durabiliores sunt, eo quod non tantam variorum effluviorum copiam receperunt. Ut itaque in usum medicum commode cedant, præstat eas terreis vasis probe clausis custodire, & ab aëre circumfuso defendere. Præterea non ex stillicidio effusas, sed extra urbem sub dio cadentes vasis excipere convenit, quo pacto plures annos durant.

§. XIII.

Succedunt fluvialibus fluviales, quarum nonnullæ puritate & bonitate illis vix sunt inferiores. Fluvii, quin ex pluviis crescant, & iis deficientibus etiam decrementum capiant, nullus est, qui dubitet. Quoniam vero fluviorum origine sunt fontes, in altioribus ac montosis locis scaturientes, & pluviae illis augmentum dant, deinde vero ipsi, longissimos terræ tractus transeuntes, varias ac dissimiles partes ex terra imbunt, fieri solet, ut fluvii inde tanto turbidiores & impuriore evadant, quanto longiores terræ tractus cursu suo absolverint. Ad hæc ex fundo etiam plures heterogeneous partes arripiunt, adeo, ut inter pluviales & fluviales non mediocris inde oriatur differentia. Accedit & hoc, quod fluvii aëri libero & solis actioni perpetuo expositi, subtiliores sui partes in auras dimittant, quæ nubibus ac pluviis subministrant materiam.

§. XIV.

Deinde & ipsi fluvii indole multum discrepare videntur, quandoquidem qui celerrime cursu vehuntur & ex altissimis montium jugis, ubi natales suas habent, in loca decliviora ruunt, longe differunt ab illis, quorum cursus lentus ac placidus est, utpote qui plerumque locis minus editis incunabula debent. Et enim qui celerrime feruntur, ut plurimum levem & subtilem aquam, minus corruptibilem, sed fecundandis & alendis piscibus minus idoneam, vehunt, propterea quod rapidus eorum motus impedit, quo minus piscium ovula ripis apponi, ibique solis calore possint excludi. Tametsi autem ejusmodi fluvii piscibus non admodum abundant, tamen ii, quos gignunt sapidissimi sunt & saluberrimi. Hinc Rhenus ac Rhodanus, qui in altissimis Rhætiarum jugis nascuntur, longe leviores aliis fluviiis deprehenduntur. Notabile est, naves secundo Mœno advectas, simul ac Rheno immittuntur, ob aquarum Rhenanarum levitatem, subsidere, multoque depressiores, quam antea procedere. Quare aquæ Rhenanæ & Rhodanæ, instrumento statico examinatæ, levitate aquæ pluviali proxime accedunt. Et cum hi fluvii magna celeritate volvantur, accidit, ut eorum aquæ satis diu à corruptione servantur immunes. Proinde omnibus fluviiis, Rheni & Rhodani aqua, in usu interno

terno medico palmam facile præripit, JACOBUS SPONIUS observationes suas circa aquam Rhodani prodidit; quæ in *Actis Erud.* anno 1683. p. 519. recensentur, ubi & hæc legas: aqua Rhodana in cellis vinariis intra maximas figulinas urnas recondita, ita, ut in iis subsidentiam omnem per aliquot septimanas aut menses, antequam potetur, deponat, pura & optima habetur, quæ non solum per plures menses, sed annos, imo per seculum integrum incorrupta conservatur.

§. XV.

Longe vero diversa est ratio fluviorum, quorum iter lento & paulo seigniori lapsu procedit; hi enim ingenti piscium multitudini generandæ atque nutriendæ sunt aptissimi, exemplo fluviorum Marchiæ, Spreæ, Havelæ, Viadri, maxime ubi hic in varia cornua ac divortia abit, ut & in Hungaria Teisæ. Hi tanto proventu & pisces varii generis & cancos proferunt, ut flumina magis pisciola vel in universa Europa vix inveniantur, rationem autem hanc suspicor: fluvii hi omnes non modo tardius incedunt, sed & per loca ac terras maxima ex parte pingues ac lutosas procedunt, unde affatim alimonia piscibus suppetit. Et hæc quoque est ratio, quare limpida illa ac crystallina pelluciditas, qua aliæ aquæ gaudent, ut Albis, Rhenus, his in fluviis non observetur. Quoniam autem sunt melioris naturæ, ad lintea emundanda, vel minima saponis parte adhibita, aptissimæ sunt. Ubi tamen notandum, quod hisce lota lintea non tam candida evadant, ac ea, quæ ex fluviis Albis, Salla & Mulda lavantur. Memorabile porro est, quod piscium, qui in Albi capiuntur caro, sit longe candidior, quam quos Sprea vel Havela fovet, quod hi non tam claram ac limpidam quam illi undam, trahunt. Ex his itaque quæ jam memoravimus facile colligitur: non omnes fluviatiles aquas inter se convenire, nec adeo omnes usui medico æque esse accommodatas. Probantur tamen eæ, quæ claræ sunt, quæ leves, quæ non facile putrescunt, nec ullam ab admixto oleo tartari per deliquium, vel solutione cujusdam metalli mutationem subeunt; ubi in universum scire convenit, semper fluviatiles aquas esse salubriores, quæ magno impetu ac cursu feruntur, quam quæ lente provehuntur.

§. XVI.

Accedimus jam ad examen fontium, quorum indoles ac virtus subinde diversa observatur. Et tamen si materiam suam ipsis aquis pluviis acceptam referant: nihilominus pro diversa soli natura, & pro diversa materiæ terrenæ, quam alunt ratione, variam indolem ac ingenium sortiuntur. Unde rarius fontes claros, puros ac leves licet deprehendere. Plerique magnam partem terrei concreti ab evaporatione vel destillatione relinquunt. Pauci sunt, qui non solutionibus metallorum vel à solutione salium alcalinorum turbentur. Quidam salis communis, ut nostri Halenses; quidam subtilioris vitrioli, ut nonnulli Servetani participes sunt: præsentiam salis communis liquor salis tartari, vitrioli vero infusio florum balaustrorum prodit. Nonnulli & martiales dantur, qui ex locis ubi ferrearum minerarum thesaurus reconditur, prorumpunt: quorum sapor subadstringens, & sedimentum ochreum est. Artis igitur ac industriæ est, ex tam numerosis, quos benigna natura passim aperit fontibus, salubres eligere, qui ex levitate, pelluciditate, puritate ac duratione debent judicari. Præterea etiam in fontibus ea notari meretur differentia, quod nonnulli foveant aquas molliores, alii duriores. Molliores plerumque sunt illæ aquæ, quarum scaturigo ad latera exillit, & quæ per arenam, vel super argillam vehuntur; duriores, quæ in locis declivioribus oriuntur, & rupes ac saxa lapidesque mar-

tialis indolis alunt, illæ minus solent durare, hæ vero sunt durabiliores, illæ facilius abeunt in glaciem, hæ congelationi valde resistunt: utraq; à salubritate sunt commendandæ, si prudens Medicus ad diversam morborum & subjectorum indolem noverit eas accommodare.

§. XVII.

Postquam itaque ex tanta aquarum copia salubres & quæ usui medico aptæ esse possunt, enumeravimus, & quomodo dignoscendæ & examinandæ sint, satis superque deduximus, nihil jam reliquum est, quam ut scopo nostro nos propius accingamus, & quam eximia immo universalis ipsis insit medendi virtus, demonstremus. Primum vero asserimus, omnium hominum naturis admodum diversis aquas puras ac leves esse convenientes. Etenim si fluidorum per omnis generis tubulos minimaque vascula circuitus, fundamentum est, cui conservatio humani corporis, corruptionisque prohibitio unice innititur, illud quod sanguinem fluidum conservat, vitæ erit quam maxime accommodatum. Corporis nostri fluores, qui & nutritioni & omnibus functionibus serviunt, & ex quibus solidæ quoque partes sunt compositæ, ex solidis & fluidis constant. Solidas inesse sanguini ejus exsiccatio demonstrat, easque diversas esse, nempe salinas, sulphureas, terreas, mucidas, sensu judice & inflammabilitate, neque minus destillatione aliisque experimentis chymicis addiscimus. Paucis: sunt partes heterogeneæ, sique calor, quies, humidum, ceu omnis corruptionis causæ accesserint, valde corruptibiles. Ne itaque in corruptionem abeant & sinceram quoque corporis partem trahant, necesse est, ut nunquam diu quiescant, vel invicem coeant, alias corruptio est paratissima. Opus igitur est, ut particulæ hæ solidæ subtiliores; sulphureæ terreæ, non modo in irrequieto intestino motu sint constitutæ, verum etiam, ut motu progressivo, per tot minimos tubulos & canales circulentur, eo quod hoc motu solidæ sanguinis partes in minimos globulos, mutuo attritu, ac conquassatione sanguinis partiumque fibrosarum inter se facta, dividantur. Quo magis necessaria est, ut fluidi aëreo-ætherei elastici & liquidi aquei copiosior admissio, unde fit, ut si in sanguine sani hominis è vena emissio fluidi ac solidi portionem examinemus: liquidum minimum duplo majorem sicco elemento copiam esse deprehendamus. Plerumque enim duodecim sanguinis uncias, octo liquidæ, quatuor solidæ materiæ complecti, crebrius à nobis fuit observatum. Præterea sanguinem largiori copia subtilioris aëris & ætheris imbutum esse ex eo manifestum est, quod in vacuo ita ebulliat, ut cylindros vitreos, quorum medium prius occupavit, transcendat. Nihil itaque salubrius, nihil vitæ accommodatius & ad hanc tuendam aqua magis est necessarium, quippe quæ, naturæ humanæ est convenientissima, sine qua nec corpus durare, nec vita diu satis persistere potest.

§. XVIII.

Deinceps nullum remedium ad conservandam sanitatem & morbos præcavendos, est aqua præsentius. Sanitatis naturam quicumque in legitimo omnium corporis functionum exercitio statuerit, ejus formalem rationem probe videtur considerasse. Quod si vero ejus causam scrutamur, non alia nobis succurrit, quam æquabilis ac libera sanguinis per omnes tubulos, etiam minimos qui in emunctoriis consistunt progressio: hac enim ratione fit, ut utile & quod nutritioni sit commodum, remaneat, inque poris secernatur, inutile vero tanquam corruptibile ac naturæ inconveniens, excernatur. Etenim quod maximam meretur attentionem, excretiones non tam directe, simpli-

citer & absolute ad vitam, quam indirecte ad sanitatem & functionum rite obeundarum exercitium esse necessarias judicamus, adeo, ut sanitas ino vita in periculo esse possit, nulla causa vel vitio in excretionibus existente. Quis enim nescit, ex gravissimo animi affectu, ex ingenti dolore, vel ventriculi erosione ac inflammatione, à veneno corporis functiones secundum naturam mirifice perturbari & periclitari? Neque in gravissimis chronicis passionibus, tam ad excretiones, quam ad glandularum obstructions, viscerum indurationes, corruptiones, sphacelationes, humorum extravasationes, quemadmodum in acutis ad stases sanguinis inflammatorias, respiciendum est. Liber itaque ac æquabilis sanguinis ac humorum motus est, qui sanitatem sustinet, qui inutilium excretionum promovet, qui commodum partibus solidis præbet alimentum, qui nervis sensoriis & fibris subtilissimum illud quo moventur & sentiunt, fluidum subministrat. Motu vero æquabili ac libero deficiente, quod fit, vel humorum abundantia, aut viscositate, aut impulsu & elatere, sive tono fibrarum morituum debilitato, mox via ad morbos, præsertim diuturniores, panditur expeditissima. Ex iisdem enim causis humorum in vasis majoribus stagnationes, in minoribus, stases, in emunctoriis obstructions, in glandulis indurationes sequuntur. Eas mox maximæ impuritates, dolorum & spasmodorum causæ, nec non putrefactiones sanitati & vitæ insensibilissimæ comitantur: hæc generatio est causarum, quæ morbos sustinent.

§. XIX.

Quis itaque tam emotæ est mentis, ut non intelligat, debitam sanguinis & humorum fluiditatem ad liberum & æquabilem motum sanguini conciliandum esse desideratissimam: ita enim vasa manent aperta, arcentur obstructions, vigent excretiones, stagnationes ac stases humorum eorumque impuritates, omnium morborum causæ, impediuntur. An vero ad fluiditatem sanguinis detur aptius ac nobilius ipsa pura aqua remedium, sapientissimus quisque Medicorum judicet. Aqua enim pura ac subtilis exquisite solidas ac viscidas humorum partes dividit, quo minus possint coire: aqua porro omne inutile ac viscidum dissolvit & varii generis terreas, salinas & sulphureas partes imbibit, easque per emunctoria convenientia evehit. Ex quo conficitur, à defectu humidi & motu omisso, plurimos nasci morbos.

§. XX.

Inde igitur patet ratio, quare potatores aquæ, modo fuerit pura & bonæ notæ, iis, qui vino & cerevisiis utuntur, & saniores & longæviores sint. Quin & edaciores ut plurimum & pinguiore reddunt, uti FONSECA de sanitate tuenda p. 51. notavit, siquidem aqua ad solutionem alimentorum, ad partium chylosarum extractionem, ad succum nutritium interioribus partium poris insinuandum, liquor est aptissimus. Denique aqua optime viscidum ac tenacem mucum, qui ventriculi & duodeni glandulosas tunicas obsidet, promte detergit, ut sic uberius menstruales latices appetitus & digestionis fontes cibi queant admisceri. Neque aqua, ut fert vulgi opinio, fermentescentibus fructibus horæis admixta nocet. Maxima enim pars Lusitanorum, Hispanorum & Gallorum aqua pro potu utitur, & tamen liberalius hisce fructibus per æstatem sine noxa vescitur. Porro aquæ potatores dentes longe habent firmiores & nitidius albicantes, quod putredo & dentium caries scorbuti soboles sit, cujus genesis aqua pura pota impedit, dum sanguinem purgat à sordibus, quæ per aperta emunctoria sua sponte feruntur. Tum aquæ potatores in omnibus, tam animi, quam corporis actionibus, iis qui cerevisias bibunt, longe sunt alacriores. Plurimæ enim

Frid. Hoffmanni Oper. Tom. V.

cerevisiæ viscidos & graves succos gignunt, quorum per minimos cerebri ac nervorum poros transitus est difficilis, unde languor existit corporis, nec membrorum ad sensum & motum tam vegeta dispositio. Quo magis itaque aquæ simplicis potus & sanitati ac vitæ est congruus, eo magis mirandum, nostrarum regionum incolas ab hoc salubri potu, quem aliæ nationes mirifice amant, mirum in modum abhorrere. Cerevisiæ sane, præsertim quæ nimis sunt crassæ & alimentosæ, multis gravissimis passionibus in plaga septentrionali, in primis si spiritus vini liberalior usus accedat, viam pandunt. Longe consultius esset assuescere bonis aquis, easque pro diversa temperatura, vel solas, vel cum vino temperatas, bibere.

§. XXI.

Postquam itaque aquam adversus omnes morbos imminentes efficacissimum præsidium esse ostendimus; sequitur jam, ut, quid in morborum curatione prosint, perspiciamus. Primum vero animadvertimus, omnes passiones à Medicis in acutas & chronicas dispesci. In acutis principatum obtinent febres, hæc nihil aliud sunt, quam motuum tam vehementia, quam celeritate, in partibus solidis, sive fibris, æque ac fluidis intensiones, quæ vel ad causam morificam vincendam, ubi sanitas, vel ad destruendam machinam, ubi tristis eventus, vel ad vitiandas machinæ partes, unde aliorum morborum fit dispositio, terminantur. Quapropter natura quæ sæpius morborum medicatrix est, quandoque etiam fit morborum & mortis productrix, omni consilio ac scientia agendi destituta. Minime enim natura, quæ est corporis sapientissimus mechanismus, secundum artificis summam rationem, ex potentiis sive viribus insitis mechanicis ac necessariis agens, cum anima ratione prædita est confundenda. Atque ita per tempora, quibus ordinariè ejusmodi motuum intensiones, quæ suos habent terminos, absolvuntur, neque arte sisti possunt, Medicus nihil aliud potest efficere, quam ut motui commodam præbeat materiam. Est enim ea motuum intensio cum magno ardore conjuncta, qui humidum, quod vitæ amicissimum est, vehementer dissipat: unde resarciendum. Neque enim motus ille in febribus auctus sine sufficienti liquido obstructions reserare, stases humorum inflammatorias discutere, aut quod noxium, potest expellere. Igitur nihil convenientius in id genus febribus est aquæ potu, eoque largiori, qui febricitantium unicum solatium optimaque medicina. Qua de causa HIPPOCRATES aliique ptisanam in curatione maximo opere laudant. Et hoc solo ac quiete, temperato calore, sine ulla alia medicina vel Medico sæpe febres gravissimæ sanantur. Parum tunc arte sua præstare potest Medicus, nisi quod statim inter initia morbi, vel sanguinis missione, ubi peccat in copia, vel emetico, si sedes morbi in prima regione, vel diaphoretico, ut celeriter subtile venenum propellat, præstare poterit: reliquo tempore nonnisi temperantia calorem, humectantia, diaphoretica propinanda sunt. Cautio vero adhibenda, ne potus nimis frigidus, præsertim circa crisin & ubi inflammationis primarum viarum metus est, neque in rigore, ubi externa constricta sunt, exhibeatur, sed tempus, ubi ad diaphoresin visitur dispositio, expectetur, ubi largiorem semper dare potum convenit.

§. XXII.

Quod attinet ad chronicas passiones, hæc plerumque à viscerum & glandularum obstructione, humorum abundantia & impuritate, eorumque in vasis majoribus stagnatione proficiuntur, quæ omnes ipsa

S

ratione

ratione, & experientia iudice sunt tollendæ. Nullum ad id perficiendum præclarius remedium ipsa aqua potest excogitari. Quam nobiles in hisce affectibus præstent effectus mineralium salutiferæ aquæ, tam calidæ quam frigidæ, res est clarissima & proxime demonstrata. Potissimum vero earum operationes ab aquarum copia & quam fœnerant humoribus fluiditate, sunt deducendæ. Frustra enim spiritus mineralis volatilis & sal, quo pollent alcalinum, in hisce morbis exhiberetur, nisi aquæ copia accesserit. Etenim fontes, modo fuerint puri & leves, utut aquarum mineralium ingredientibus careant, magna in depulsandis morbis longis præstare possunt, & prostant certe passim tales fontes, qui à salubritate sunt commendatissimi, cujus causa, si omnia bene perpenderit, solius aquæ benignitati est assignanda, id quod, cum quidam simplices Medici non intelligunt, nescio quæ ingredientia, ex terra vel cœlo petita, ejusmodi fontibus assignant. Hoc in numero merito haberi debent aquæ in principatu Hennebergensi, Schleusingenses, quæ nonnisi puræ & subtiles aquæ sunt, magna aëris & ætheris copia refertæ, hæc plerisque chronicis vitiis succurrunt, maxime omnium vero calculosis, arthriticis, rheumaticis, scorbuticis, membris languidis, opitulatur, & cum humores fluidos reddant, mensium & hæmorrhoidum defectibus subveniunt. In Marchia non ignobiles aquæ sunt Freyenwaldenses, quæ tamen acidularum nomen non merentur, utpote minerali spiritu parum imbutæ; sunt vero aquæ leves, martiales, paululum duræ & valde frigidæ, ex imo terræ scaturientes. Hæ percalidam humorum intemperiem eorumque fœsam acrem impuritatem feliciter emendant, unde identidem nephriticis, arthriticis, scabiosis, paralyti ac contractura scorbutica laborantibus, ferunt suppetias exoptatissimas. In confinio Thuringiæ usu ac virtute se ostendunt Bebranae, quæ nonnisi purissimæ aquæ sunt, insigni levitate, quæ proxime accedit ad aquas pluviales, conspicuæ & martialis principii participes, hæc non alvum sed urinam movent, & impuritates graves biliosas sulphureas è corpore educendo, internum partium æstum reprimunt, nec non cachexiæ, renum & vesicæ vitiis medentur. Pauci anni præterfluxerunt, ubi in sylva Hercynia prope Osterodam fons salubris surrexit, miro elogio ornatus: qui nostro examine, ne momentum mineralis ingredientis complectitur, sed aqua purissima & subtilissima, non adeo duræ indolis est; hæc in inveteratis capitis affectibus, languore membrorum, in scorbuto, malo hypochondriaco, in biliosis morbis, ad hepatis fervorem, ut cum Veteribus loquamur, attemperandum, summe proficua fuit observata. Quid dicamus de nostris Halensibus, quæ nonnisi puræ martiales aquæ sunt, argillacea rubicunda strata superfluentes, unde martialis quid hauriunt, nihilo minus prudenter adhibitæ in scorbuto calido sic dicto humorumque biliosa impuritate, nec non arthritide, scorbuto, corporis languore non mediocris sunt effectus. Distat duobus à nostra urbe miliaribus fons circa Lebeginum, qui ex rupibus profluit, & aquam habet valde subtilem fere incorruptibilem, ex hac coquunt Lebeginenses cerevisiam, quæ sponte fermentationem subit, & probe depurata, in cienda urina vix habet remedium simile, unde nephriticis & biliosis calidis naturis veram præbet medicinam.

§. XXIII.

Dantur quoque in nonnullis locis thermæ admodum salubres, omnis mineralis spiritus & ingredientis expertes, quæ nonnisi subtiles ac leves aquæ sunt; quo numero habentur Piperanæ in Rhæticiis montibus circa Curiam scaturientes, quarum effectus in morbis tartareis, scorbuticis, arthriticis, calculo, con-

tracturis vehementer & laudatur & probatur: fortiter movent urinam: solent aquarum omni mane mensuras tres bibere. A meridie hora quarta vel quinta balneum ingrediuntur, quod ordinarie pustulas expellit bono omine ac eventu. Hi fontes, quod notabile, mense Maio incipiunt fluere, mense Septembri desinunt, idque fit singulis annis: eorumque origo est ex nivibus, quæ altissimos Alpium montes occupant & solis calore solutæ, subterranea calida loca pervadunt, & ibi calefactæ in valle prodeunt, desinunt eo tempore, quo nix, remoto solis calore, non amplius liquantur. Nullum sal, nec sulphur, nec spiritum mineralem possident, nec martiale quid ostendunt, quod ex sedimento colligitur: neque ab acido, neque ab alcali, aut solutione lunæ turbantur, sed tantummodo subtiles, & instar aquæ pluvialis leves sunt aquæ. Notum quoque est in Hassia balneum, quod à serpentibus nominatur *das Schlangen-Bad*, hoc identidem nil nisi purissima aqua est, mollis tamen ac levis, cujus usus in membris languidis reficiendis, in contractis emolliendis, inque cutis vitiis emendandis est laudatissimus. In Italia existant plures salubres fontes, aquæ Pisanae, Tettucciana, Noceriana, quæ aquarum subtilitate omnia fere perficiunt, aliæque martiales, quarum mentio & usus in SYLVATICI consultationibus reperitur.

§. XXIV.

Quum itaque satis clare ostensum fuerit: multorum fontium salubritatem, unice à solius aquæ benignitate dependere; ex eo quam facile jam judicatur: alias aquas puras & simplices ubi haberi possunt, similes cum hisce effectus possidere, id quod etiam experientia respondet. Ita refert RIEDLINUS Anno 1697. mense Maio *Lin. med.* 27. Melancholico-maniacam per integrum biennium aqua pluviali usam esse. Et *lin.* 15. scribit: aqua pluvialis, instar acidularum primo paulatim ascendendo, hinc in summo gradu per aliquot dies pergendo, & tandem rursus descendendo, bibitur, cujus usu cachectici & tabe confecti, exemplo pastoris, convalescunt. RIVERIUS quoque in *operibus lib. IV. cap. 24.* refert: de mensibus vitiosis sive subsistentibus, solius aquæ repetito usu, pristinum fluxum restitutum fuisse, & hoc simplici remedio plus præstitum fuisse, quam aliis emmenagogis. Ex Veteribus CELSUS *lib. I. cap. 15.* usum aquæ frigidae vehementer commendat, dum inquit: *quos capitis imbecillitas torquet, iis usus aquæ frigidae prodest, sed iis etiam, quos assidue lippitudines, gravedines, destillationes, tonsillæque male habent.* Miror, inquit BELLONIUS *lib. I. epidem. pag. 106.* cur in herpetibus, inflammationibus, in quibus humectandi & refrigerandi consilium est, non potius ad aquam & succum plantaginis accedamus. In rubedine faciei, in gutta rosacea, in scabiæ, calidaque jecoris intemperie, plurimum ejus usum commendat SYLVATICUS *cap. 1. obs. 1.* Conferunt quoque tales aquæ arthriticis, quare scribit MARTIANUS in *Hippocratem*, solo aquæ frigidae potu Bernerius Cardinalis podagra perfecte sanatus est. Et RONDELETIUS in *Praxi pag. 611.* Ego multoties aquæ frigidae potu, podagricos sanavi, quod facilius succedit in biliosa. Cum vero nonnulla subjecta frigidioris naturæ, vel ob nervorum imbecillitatem & meatuum angustiam, non bene frigidum potum ferre possint, tunc præstat has calefacere, ea tamen circumspeditione, ut hoc fiat in aqua fervente, cui lagenæ, probe clausæ imponendæ, ne, quod subtile est, exhalet. Tales jejuno ventre potæ, notante AVICENNA *lib. 1. Sect. 2. cap. 16. pag. 102.* Stomachum abluunt, alvum subducunt, coli doloribus ac flatibus opitulatur; Conducunt etiam in morbo comitiali, dolore capitis, ophthalmia, destillationibus, & quibus in pectore soluta est continuitas, menses præterea promovent, urinam cient & dolores leniunt. Quam egregiam efficaciam, tam in morbo-

rum præfervatione, quam eorum mitigatione, vel etiam sanatione præstet aquæ calidæ potus, iis, qui expertas vires infusi herbæ thee habent, non amplius erit incognitum. Quicumque vero has vires ex hac herba exotica metiuntur, ii multum videntur hallucinari. Aquæ calidæ & puræ copia est, quæ utramque vere hac in re facit paginam, herba vero subabstringente sua virtute efficit, ut fibræ partium à tono dejectæ roborentur. Quoniam cum plurimis morbis fortior fibrarum constrictio conjuncta est, hinc tali in casu cautius etiam cum crebro usu herbæ thee mercandum esse, Practicorum solidiores probe cognoscunt. Atque ne veritatem dissimulemus, prostant certe in nostris regionibus tales herbæ, quæ viribus thee longe sunt superiores. Convenit quoque, eas pro diversa morborum indole & pro differentibus illorum causis, seligere & in usum medicum revocare. Ita in affectibus pectoris veronica, in nervorum vitiis betonica, in uteri morbis melissa & pulegium, in renibus exulceratis hederæ terrestris, in scorbutico trifolium fibrinum, cum aqua purissima infusa & calide pota, eximias & mirabiles virtutes exserunt. Porro in spasmodicis hypochondriacis nimisque hæmorrhagiis, millefolii summitates aquis calidis infundere, utile est. In colica chamomilla vulgaris, in scabie fumaria, in pelendo calculo petroselinum, in asthma humido ranunculus hortensis, loco herbæ thee infundi & cum fructu potest usurpari. In universum vero hoc loco tenere oportet: pro infusione herbarum adornanda aquas non esse diu coquendas, sed eo usque, ut saltim una vice fortiter ebulliant, quo minus subtiliores earum partes pereant.

§. XXV.

Reliquum præterea est, ut ostendam aquam universale esse remedium, quod non modo omnibus naturis, sed & omnibus morborum indicationibus conveniat. Primum enim in omni corporis temperatura utilis est aquæ potus, in sanguineis & habitu corporis laxiori ac minimorum vasorum copia præditis promptum ac facilem reddit sanguinis & humorum circuitum, qui alioquin perfacile tali in casu segnior ac impeditior factus, stagnationes circa viscera promovet. In choleris, ubi intensior viget humorum motio, nimium æstum temperat, quod transpiratione liberiori facta, partes sulphureas calidas per patentiores poros ac tubulos eliminat. Crassum vero sanguinem & humorum viscositatem diluendo, melancholicis & phlegmaticis opem fert saluberrimam. Omni quoque convenit ætati. Infantes ob lactis viscositatem & acrimoniam graves sæpe experiuntur morbos, ubi præter absorbentia, diluentia aquea, calide sumpta, ingens afferunt solatium. In puerili ætate, ob succi nutritii abundantiam humorumque spissitudinem, varii incidunt morbi, catarrhi videlicet, & cutis defœdationes, quibus omnibus vitiis diluens infusum egregie succurrit. Eadem est ratio morborum, qui in virili, imo senili ætate nascuntur, in quibus omnibus aquam bibere conducit. Namque virilis ætas valde opportuna inflammationibus & febribus: senilis vero

exposita iis vitiis, quæ ex infarctu & obstructione propullulant, ubi quid convenientius sit bonæ notæ aquis, vel calide vel frigide sumtis, equidem non video. Quam gravia mala foeminæ ex mensium vitio, viri ex hæmorrhoidum fluxu, non recte se habente, patiantur, praxis docet quotidiana. Has vero consuetas & salutare fluxiones diluentia in debito servare ordine, certum & exploratum habeo.

§. XXVI.

Plethoram foecundam esse morborum matrem in vulgus etiam notum est, ad hanc vero impediendam, aqua calida & infusis herbarum nihil est convenientius, utpote quæ, glutinosam humorum substantiam dissolvendo, impediunt, quo minus sanguis copiosius incrementum ac generari possit. Nec minus cacochymia humorum tollendæ liberalis aquarum potus satisfacit, quippe qui, impuras & falsas recrementitias partes per omnis generis convenientia emunctoria promptissime eluit & educit. Præterea aquæ potus omnia evacuatoria servat aperta & excretiones inutilium fordidum eximie promovet: alvum servat mollem ac liquidum, urinæ vias expedit, easque eluendo & abstergendo, calculi cohesionem impedit, transpirationem, omnium evacuationum saluberrimam, mirifice adjuvat, sique saburra vitiosorum humorum ventriculus repletus est, ingens tepidæ aquæ haustus eam sæpius evacuat promptissime. Est denique aqua optimum omnium medicamentorum vehiculum. Antiscorbutica & quæ sanguinis impuritatibus tollendis dicata sunt remedia, si ex vegetabilium genere fuerint, in humorum vitiis emendandis parum operæ collocabunt, nisi ministerio aquæ eorum virtus in decoctis vel infusis penetret in sanguinem & partium intimos meatus. In summa: ubicunque & quibuscunque in morbis, vel alterandum, vel evacuandum, vel aperiendum, vel resolvendum est, ibi aqua auxilium fert semper & omni tempore præstantissimum. Neque nutritio corporis sine aqua bene procedit, quippe quæ succi nutritii commodissimum est vehiculum, eumque ad minimos partium poros traducit.

§. XXVII.

Ultimo æquum est hic monere, quod quibus nulla est facultas puras ac benignas aquas obtinendi, ii, vel pluviales colligere, vel fluviatiles in usum trahere debeant. Sique hæc haberi nequeunt: impuriore sunt destillatione perficiendæ, vel coctione facta cum cornu cervi usto corrigendæ. Certe ingens benignæ naturæ parentis munus est in urbe quadam vel provincia, quando salubres fontes haberi possunt, qui pretiosissima quavis medicina sunt nobiliores. Et sapientis Medici est eorum locorum aquas, ubi medicinam facit, convenienti examine probe scrutari, quo postea cum fructu, tam præservandi quam sanandi gratia, iis uti possit, quibus etiam certe plus efficiet, quam tam magnificis & ad cælum elevatis chymicis aliisque arcanis.

D E

BALNEORUM EX AQUA DULCI

PRÆSTANTISSIMO

IN AFFECTIBUS INTERNIS USU.

PROOEMIUM.

§. II.

Innumerabilem quidem benigna rerum natura eorum, quæ in mortalium salutem inque auxilium morborum prompta sunt, nobis suggerit copiam, & immensus quoque medicamentorum, quæ arte parantur & componuntur, in officinis pharmaceuticis conspicitur apparatus, neque minor arcanorum chymicorum, quæ magnifice ad morbos debellandos extolluntur, est numerus; sed tamen qui in exercitio artis bene & paulo diutius versati sunt, ii longe felicius ac tutius, reliquis valere iussis, paucis tantum facillimis & simplicissimis in medendo opus esse remediis, quibus solidi quid præstari possit, re probe subacta optime perspiciunt. Neque enim satis in eo infinitam divini Numinis sapientiam ac benignitatem celebrare possumus, quod in rebus ubivis fere obviis, facile parabilibus & quæ sponte proveniunt, longe præstantiorem in salutem miserorum ægotantium vim ac virtutem reconditam, quam quidem in rebus rarioribus, magno ingenio, pretio & labore paratis, animadvertimus. Ex pluribus aliis, quæ in exemplum possemus producere, confirmare hoc nostrum assertum tantummodo sola aqua communi instituimus, quæ si ullum aliud remedium universalis titulum meretur, profecto hæc ipsa est. Quum vero præcedente schediasmate, aquæ communis usum in morbis internis præstantissimum & universalem quasi adstruxerim: jam de externo, per infusus & balnea, agere, & quemadmodum non tam in affectibus externis, sed potissimum internis partium vitiis, desideratissimam medentibus opem ferre possit, pervestigatius tradere constitutum est.

§. I.

Ex omnibus, quæ prostant, remediorum generibus nullum ferme est, quod ab antiquissimo ævo & apud omnes fere gentes tantopere celebratum & tam in familiari usu fuit, quam balneum. Magna omni tempore apud Ægyptios, Græcos, Romanos balneorum existimatio, laus & magnificentia fuit; & quum eorum plane eximium ad tuendam valetudinem viresque reparandas & ad morbos abigendos usum observarent, tantus demum, ut solet fieri, inde enatus est abusus, ut luxus & deliciarum causam & occasionem ingentem subministraverit. Siquidem & Græcorum & Romanorum luxus nullo in opere clarius quam in magnificis balneorum fabricis enituit: quemadmodum apud VITRUVIUM *de architectura*, SENECAM *in epistolis*, STATIUM *in sylvis*, MARTIALEM & PLINIUM *in Historia Naturali* legimus. Cæterum à Medicis, & antiquissimis & optimis, balnea semper magno in pretio, tam ad tuendam valetudinem, quam ad persanandos graviores etiam morbos, sive interno sive externo usu, alia remedia vix aut nunquam admittentibus, habita fuisse, ex HIPPOCRATIS, ARETÆI, TRALLIANI, GALENI, AETII posteritati relictis monumentis addiscimus.

Maxime omnium vero Methodici id remedii genus æstimabant, unde CELSUS *lib. II. cap. 17.* de eorum principe ASCLEPIADE refert, quod balneis paulo audacius usus fuerit; & CÆLIUS AURELIANUS, qui solus ex Methodicis superest, balneorum usum in multis & magnis morbis magnifice extollit. Sed dolendum est, quod nostra ætate laudatissimus balneorum usus fere exolescere & in medicina exspirare videatur, ita, ut rarius & nonnisi quibusdam in casibus, inque vitiis partium externarum, ea admitti deprehendamus; quod secundum nostram quidem sententiam, maxime fit eam ob causam, quia plurimi ex Medicis remedia externa & topica ad internarum partium vitia emendanda parum valere existimant. Alii, præsertim nostri ævi Medici, in explicandis morborum causis & symptomatibus, plus ad sanguinis & fluidorum depravatam indolem atque intemperiem & vitia, quam ad naturam solidorum, eorumque tonum robur & potentiam ad motum, respicere consuecunt, quum tamen ad solidorum, quæ fluidorum motum potissimum regunt, vitium, cui corrigendo balnea maxime idonea sunt, in affectuum morbosorum causis reddendis præcipue attendendum sit. Quamvis vero balneorum in morbis externis usum nemo facile negaverit; tamen nos præclarum balneorum usum magnamque in sanandis internis morbis efficaciam à neglectu vindicare, & solida experientia, auctoritate & ratione hoc loco adstruere & stabilire in animum induximus.

§. III.

Ante vero, quam ad præfixum scopum propius accedamus, consultum nobis videtur indicare: varia quidem esse balneorum genera, nos vero de humidis & quæ ex aqua dulci fiunt, esse acturos. Veteres enim non tantum humido, sed & sicco calore sudorem eliciebant. Siccus calor fuit, ut CELSUS *loc. cit.* optime notavit, arenæ calidæ & laconici, & clibanii, & quarundam naturalium sudationum, ubi à terra profusus calor ædificio includitur, quemadmodum in nostris salinis Halensibus videmus, ubi in officinis, in quibus sal coquitur, siccus & falsus vapor exsurgens, largissimum ex corporibus sudorem provocat. Species balnei sicci fuit quoque apud Veteres insolatio, dum aperto soli corpora, ut superfluum humorem ex intimis sedibus eliceret, paulo diutius exponebant. Apud nonnullas gentes hodiernum in usu est, corpora, in certis præsertim chronicis morbis, fimo equino penitus immittere, ad morbificum humorem digerendum & foras excludendum. Sed hæc omnia sudationum & balneorum siccorum genera jam mittimus, & de humidis tantum sermonem instituemus.

§. IV.

Balneum humidum rursus duplex est, vel calidum, vel frigidum, cujus etiam præsertim apud veteres Medicos in morbis sanandis maxima fuit æstimatio, quemadmodum STRABO *in Geographia lib. LXV.*

PLINIUS

PLINIUS in *Histor. Natur. Libr. XXIX. cap. 1.* HIPPOCRATES de *humidorum usu*, & ORIBASIIUS lib. VI. cap. 27. satis ample docuerunt; unde etiam natationes in mari, vel aqua frigida, Veteres in adversa valetudine maximopere commendabant. Neque sine iusta causa; siquidem frigidum, ubi colligendus intra corpus diffus calor, atque imbecilles & à tono dejectæ partes roborandæ sunt, plus valet, quam calidum & humidum. Sed hæc alias eximii usus tractatio, jam à nostro instituto & meditatione erit remota.

§. V.

Aquæ vero, quibus ad balnea uti possumus, rursus in puras & simplices, atque in eas, quæ heterogeneas varii generis partes admixtas habent, dispesci possunt. Nos de puris, levibus & simplicissimis, quomodo ad usum medicum præparari possint, agemus. Aquas enim, quæ ex terræ visceribus profiliunt, pro earum differentia diversæ indolis & virtutis esse notissimum est. Ita in variis etiam Germaniæ locis fontium, qui partes mineralium & metallorum secum vehunt & custodiunt, ingens est proventus: plurimi vero martialem & ochream terram in mixtionem suam admittunt, & virtutis manifesto adstrictivæ sunt; ut fontes Freyenwaldenses, Bebrani. Alii præter martiales & terrestres particulas, sal, licet parcius, vitriolicum habent, & à gallis injectis tinguntur, ut sunt Lauchstadienses. Aliæ, quas benigna natura largiter nobis concedit, minerales aquæ, præter spirituosum, sulphureum, expansivæ virtutis elementum, multas particulas salinas, ut acidulæ Egranæ, Schwalbacenses; aliæ alcalinæ naturæ salia, ut thermæ Carolinæ, fontes Selterani, thermæ Emsenses; aliæ sal commune, ut Wisbadenses, secum vehunt; quarum usus tam externus, quam internus, ad balnea & infusus, in varii generis morbis, jam satis notus & celebratus est.

§. VI.

Dantur vero adhuc aquæ, quæ non mineralium vel metallorum particulis, sed terreis, paulo rudioribus imprægnatæ sunt. Atque quum varia sint terrarum genera, tamen nulla facilius in intimos aquæ poros admittitur, quam calcaria, cujus indicia sunt, si aqua pondere gravis est, si affuso liquore salis tartari lactescit, crassiori alba materia in fundum demissa; sique ad lotionem & coctionem ciborum & ad vegetationem vegetabilium inepta est. Hac terra calcaria ita sæpius saturantur aquæ, ut non modo per coctionem vasorum parietes crusta tephacea obducant, sed & in subterraneis, ubi ex alto destillant, speluncis, varias lapidum figuras efforment. Quamvis vero balnea, quæ ex ejusmodi aquis, sive martialibus, mineralibus & calcariis asperioribus, quæ admodum manifesto videmus in Carolinis, quæ præter spirituosum elementum & sal alcalinum, calcaria & tephacea terra abundant, parantur, paulo subtiliori observatione adhibita, usu suo non destituantur, præsertim ubi corporis cortex nimis relaxatus constringendus & roborandus est: tamen horum tractationem jam plane prætermitemus; quoniam consilii & instituti nostri ratio fert, tantummodo de iis agere, quæ ex aqua pura simplici paucis vel plane nullis alienis partibus imprægnata, quæ à Medicis dulcis vocari solet, parantur, quorum præstantissimum in morbis, præsertim internis, usum & utilitatem hoc loco adstruere laborabimus.

§. VII.

Prius vero, quam incomparabilem balneorum ex aqua dulci in praxi medica utilitatem proponamus; operæ pretium nos facturos arbitramur, si, quid per aquas dulces; scopo nostro accommodatas, intellectum velimus, doceamus. Hæ itaque nobis dulces

vocantur, quæ omni sapore & odore carent, quæ etiam incoctæ nihil sapidi relinquunt, quæ porro valde leves sunt & ad naturam aquæ pluvialis vel destillatæ accedunt, quod pondere statim optime explorari potest, quæ ad nullius salini, metallici vel mineralis liquoris mixturam mutantur vel præcipitantur, quæ facile incallescunt, in quibus etiam legumina vel carnes annosiorum animantium haud difficulter coquuntur, quæ denique abstergendis maculis ex linteis præ aliis aptæ & idoneæ deprehenduntur. Ejusmodi vero ad balneum aquæ puræ, vel ex ipsis pluviis, si eæ, præsertim sub dio, ex aëre decidentes colliguntur, vel ex fluviis, maxime post largos delapsos imbres, petuntur. Dantur etiam aquæ, utut non adeo frequentes, fontanæ; subtilitate, puritate & levitate admodum commendabiles; & ad usum medicum, tam internum, quam externum, aptissimæ. Atque ejusmodi aquarum bonitas, præter jam adductas proprietates, faciliori extractione herbarum theæ aliarumque plantarum, quam maxime dijudicanda est.

§. VIII.

Sed quam raræ ejusmodi fontanæ simplices & leves aquæ sunt, tam magno in pretio habendæ, propter incomparabilem virtutem quam in tuenda valetudine possident; ita, ut ad eam amissam recuperandam non parum quoque faciant. Tales enim subtiliores aquæ promte & intime minima vasorum & pororum subeunt, & facile etiam per emunctoria transeunt, neque minus ad dissolvendas mucidas crassas partes, impuras salinas detergendas atque à corpore evehendas, valde idoneæ sunt. Præterea usu externo duras & constrictas partes emolliunt, relaxant, poros aperiunt & liberiores sanguinis & humorum affluxum ad partes invitant, eoque in medendo magnā præstare solent. Sique fateri licet, quod res est, plurimi fontes medicati naturales calidi, omnem suam vim & efficaciam, quam in morbis sanandis præstant, eximiam, præsertim in infestibus & balneis, ob subtilitatem & puritatem aquarum exserunt. Exemplo sunt thermæ Toeplicenses, quæ levitate pluviales aquas exæquant, & vix particulam elementi mineralis, metallici, vel salis cujusdam complectuntur, neque ad ullam mixtionem soluti metalli aut affusionem liquoris acidi vel alcalini turbantur, aut colorem suum ab adjecto gallarum pulvere, vel syrupo violarum, mutant. Eadem natura atque conditio est thermarum Piperharum, quæ fontes calidi celebres sunt Rhætiæ & nihil quoque, examine accuratiori instituto, de substantia salina aut metallica participant: nihilo minus effectus in magnis morbis, tam internis quam externis persanandis, exhibent præstantissimos. Idem judicium de thermis Hirschbergenfibus Silesiæ & fontibus sic dictis Schlangenhadenfibus ferendum esse puto. Thermæ Wisbadenses etiam levissimæ & nonnisi paucam salis communis & martialis elementi portionem continent. Ex quo clarissime intelligitur, horum fontium in medendo efficaciam vix ulli alii causæ, quam aquarum bonitati & tenuitati, esse adscribendam.

§. IX.

Constans itaque mea fert sententia: balneis ex aquis subtilioribus & dulcibus convenienti modo, ordine & tempore usurpatis; eosdem posse effectus obtineri, quam thermis naturalibus insipidis, & nullo principio evidenti salino-metallico armatis; quod etiam experientia solida & attenta confirmat. Quum vero non ubique molliores & tenuiores aquæ obviæ sint, neque fluviales ubivis locorum sese offerant; correctionem utique earum instituere oportet, ut asperitatem & duritiem suam exuant, & medico usui aptiores evadant. Præstari id opportunissime posse ar-

bitror per additionem salis alcalini, sive tartari, sive cinerum clavellatorum, item fursurum triticeorum, herbarum & florum chamomillæ vulgaris, feminis lini, straminis pisi, avenæ, quorum magna vis est aquarum duriem infringendi, ut molliores & tenuiores redditæ, altius sese poris solidarum corporis nostri partium insinuent.

§. X.

Ipsa vero instituti nostri ratio flagitare videtur, ut antequam de eximio & plane admirabili balneorum ex aqua dulci usu in debellandis internis gravioribus morbis dicamus, vires & modus operandi eorum in genere à nobis exponantur. Balneum igitur, quorum materia est aqua simplex, pura & levis, si demissum in illud fuerit corpus, hanc ipsi infert mutationem. Primum vi caloris expandit sanguinem atque omnis generis fluida; vasorumque efficit dilatationem. Est enim omnis caloris ea indoles, natura ac proprietas, ut materia tenuissima, quam spargit, ætherea, fluidis sese insinuans, intestinum eorum motum versus circumferentiam augendo, rarefactionem & expansionem ipsis inducat, ut clarissime apparet in thermometris. Ab hac dilatatione sanguinis crescit pulsus, sive diastole arteriarum, & hac ratione sanguinis intensior & fortior fit circuitus, partes superiores rubore tinguntur & sudore perfundi incipiunt.

§. XI.

Deinde alia corpori accedit mutatio ab aquæ gravitate; hanc enim aeris gravitatem occurrentis vicibus superare, ex geometricis & mechanicis notissimum est; quare non mirari oportet, quod corpus illi immissum valde alteretur. Nam ejus superficies magnum impetum & vim compressionis inde sustinet, unde sanguis à peripheria ad centrum, sive viscera magna, vi urgetur. Exterius autem, renitente vasorum compressione, & interne majori facta eorum dilatatione, velocior evadit intestinus partium sanguinem constituentium motus, quo major humorum viscidorum dissolutio perficitur, obstructions reserantur, aptique redduntur humores, ut per secretoria & excretoria eo melius trahantur. Quia vero ob gravitatem aquarum, à compressis partibus externis, sanguinis motus ad cor, pectus, cerebrum & vasa majora nimium urgetur; facile inde reddenda erit ratio, quare si æstus balnei major est, anxietas præcordiorum, palpitatio cordis & animi interdum defectio accidat, vel etiam in impuris repletis corporibus febris continua, vel si cruditatibus primæ viæ scatent, intermittens, diu sæpius affligens, induci possit; quod maxime fit ab iis thermis, quæ adstringentem virtutem habent, quales sunt thermæ Carolinæ, à quarum nimis calido usu, omnis generis febres, easque sæpe non sine periculo, concitari posse, res apertissima, omnibusque, qui has thermas frequentant, nota est.

§. XII.

Aliam præterea mutationem corpori infert balneorum humiditas. Nam utut, quam diu homo sedet in balneo, à pondere aquarum superficies corporis comprimatur, tamen ab earum humiditate & temperato calore ingens fibrarum ipsiusque cutis fit emollitio, ut deinde balneo relicto, habitus corporis valde inturgeat, relaxetur, & vasis dilatatis porisque apertis, uberius jam sanguinis & humorum ad superficiem corporis concitetur affluxus; quo efficitur, ut postea, si corpus in lecto tegatur, ob auctiorem factum arteriarum & universi sanguinis motum ac circulum, & relaxatum externum corporis ambitum, sudor copiosus fluere incipiat, qui velut effectus desideratissimus à balneo proficiscitur, magnæque ad sanandum virtutis

est. Quapropter aquæ quo tenuiores & leviores sunt, eo majorem virtutem, balnea ex iis parata, in relaxandis spasmo contractis partibus, habere per se liquet.

§. XIII.

Ab hac emollitione & relaxatione fibrarum primis tenfarum & rigidarum, dependet ille balnei ex aqua dulci in partium externarum contracturis, ariduris, tabe, membrorum frigiditate, paralyti ac summa debilitate & impotentia artuum, usus præstantissimus. Inde etiam fit, ut emollitis partibus inferioribus, partus faciliatur, alvus antea dura, tensa & contracta mobilis & lubrica evadat, mensium quoque, immo hæmorrhoidum fluxus, præsertim in consuetis, inhibitus, restituitur, & ex urinæ suppressione laborantes solamen inde accipiant.

§. XIV.

Utut vero hic emollitionis effectus in partibus externis per experientiam satis clarus & rationi manifestus pateat; tamen id maxime in considerationem venire video: num etiam balnea in læsionibus internis, quæ in partibus remotis, capite, pectore, & imo ventre fiunt, exoptatam ferant opem? Atque id maxime est, quod experientia & rationis præsidio suffulti hoc loco asserimus. Nam quemadmodum pediluviorum tanta vis atque utilitas est, ut in morbis internis & à partibus valde remotis, in cephalæa, clavo hysterico, vertigine, asthma convulsivo, tussi sicca, melancholia hypochondriaca, cordis palpitatione, ophthalmia, commodissimam collocent operam: ita certe non mirandum est, si profundius corpus demittatur in balneum aquæ dulcis, id cum successu fiat longe feliciori. Deprehendimus vero incomparabilem balnei utilitatem maxime in iis morbis, ubi à violentiori spasmo & strictione partium membranarum, congestiones sanguinis ad alias partes fiunt, & ubi à superficie corporis retrogrado & converso motu, ad interiora sanguis & humores feruntur; quod indicatur, si extremæ partes frigent, contractæ sunt, alvus adstricta liberaque per cutim exhalatio prohibita est. Tunc enim relaxato habitu corporis & meatibus tenuioribus rursus apertis, liber sanguinis ad ambitum corporis non solum redditur circuitus, sed & perspiratione restituta, ingens impurarum sordium per cutis cribrum fit exclusio, unde ad impuritatem & cacochymiam tollendam vix datur balneis, rite usurpatis, præsentius auxilium. Siquidem materia acris, quæ altius insidens nervosis & membranosis partibus, atroces dolores, spasmos, vel etiam exulcerationes concitat, exitum per vias apertas sic invenit.

§. XV.

Est vero eximius & plane admirabilis balneorum usus ad depurandam sanguinis massam ab impuris, quin immo virulentis, sordibus: siquidem non datur expeditior & commodior via, qua materia, ob subtilitatem & acrimoniam valde hostilis solidisque partibus insidens, & quæ gravissimorum symptomatum in nervorum systemate procreatrix est, expelli possit, quam per tubulosam cutim, quæ optimum & universale corporis emundatorium constituit. Quare morbus Gallicus raro sine balneis feliciter eradicatur. Notum enim est artis peritis, quam parum præstent & quantum damni inferant curationes luis venereæ per decocta & mercurialia, sive ad salivam, sive ad sudorem movendum usurpentur; nisi eo medentis consilium dirigatur, ut per cutim maxime totus malignus humor è corpore ejiciatur. Possimus plures recensere casus, ubi post salivationes, cum mercurio institutas, mercurios diaphoreticos, purgantia mercurialia & decocta sudorifera ad tempus quidem sympto-

matum atrociam mitigata fuit, sed aliquo elapso tempore, præter omnem opinionem recruduerunt symptomata, quia totum virus è corpore non fuit expulsum, sed ejus reliquæ intus retentæ, sensim paulatimque vires sumserunt. Postea vero per eadem fere remedia mercurialia & decocta lignorum & corticum sanguinem purificantia, interposito decenti balneorum aquæ dulcis usu, convenienti methodo & ordine usurpata, tota cura peracta fuit, ex intimis partium nervosarum sedibus virulento miasmate propulso.

§. XVI.

Est quoque egregius & plane excellens balneorum aquæ dulcis usus in gravissimo illo hydrophobiæ affectu, quod miserrimum morbi genus est, in quo æger simul siti & aquæ metu cruciatur, quo oppressis in angusto spes est. Sed unicum tamen remedium balneum est, quo Veteres usi fuerunt frigido vel etiam calido. Projiciebant enim hominem non opinantem in piscinam, ut CELSUS habet *lib. V. c. 27. Quidam vero*, scribit laudatus auctor, *post rabiosi canis morsum protinus ægrum in balneum mittunt, eumque patiuntur sudare, dum vires corporis sinunt, vulnere aperto, quo magis virus ex eo destillet. Deinde multo meracoque vino excipiunt, quod omnibus venenis contrarium est, idque cum ita per triduum factum est, tutus esse homo à periculo putatur.* In hujus remedii confirmationem ante aliquot annos à Medico Duderstadiensi communicatum casum referre placet, ubi à lupo rabioso, ex silva prodeunte, multi homines demorsi & necati fuerunt, donec tandem consilio plebei homines nonnulli hoc remedio ab omni periculo liberati fuerunt, dum jussit eos induci in balneum moderate calidum, sumta prius dosi theriacæ, cum fungo cynosbati, quod singulis diebus repetitum fuit. Juvant vero balnea eam ob rationem, quoniam ad corporis peripheriam subtile virus deducunt, ubi liberum invenit exitum. Video tamen magnam hic nasci posse dubitationem, dum à Veteribus balneum frigidum eum in finem usurpatum fuit; eo quod poros claudendo, virus retineat & ad interiora pellat; ne dum ad summam cutim alliciat. At vero nos frigidorum balneorum usum non quidem in totum damnamus; sed tamen valde infidum ipsum habemus ac judicamus. Nimirum si frigidum balnei usum sequitur intensus internorum æstus, cum pulsu celeri, eumque excipit sudor, quod sæpius evenit, tunc utique locum habere potest. Si vero illud non accidit, sed ob frigus nervos distensio vexat, non sine periculo est; unde ne in id incidat, ut bene monet CELSUS *loc. cit.* à piscina protinus in oleum calidum æger demittendus est.

§. XVII.

Tum in balneis, debita cautione & observatione adhibitis, magna sane & non satis laudanda ad impuritatem sanguinis & humorum scorbuticam, quæ in artubus graves concitare solet dolores, tollendam residet efficacia. Quid naturales fontes interno & externo usu hoc in casu valeant, iis, qui experientia horum virtutem exploratam habent, non obscurum est. In horum vero defectu utique decocta diluentia & blanda aperiente & diaphoretica virtute armata, interposito balneorum decenti usu, idem præstare possunt. Dici vix potest, quanta humorum saburra & colluvies ex cutis emunctorio mediante balneo in aquas sæpe transeat. Placet mihi hanc in rem historia in *Misc. Nat. Cur. Dec. II. ann. VI. obs. 239.* enarrata, cum foemina lumborum dolore crebro infestata, omnibus aliis frustra usurpatis, vix experta est ullum, quod strenuam æque tulisset opem, quam aquæ dulcis balneum, quo aliquoties usæ, melius habere coepit, & crassamentum pingue innatavit aquæ,

quod cochlearis beneficio separari potuit. Additur etiam alia historia, ubi vir hypochondriacus, cum deductus esset aliquoties in balneum aquæ dulcis, tandem aqua balnei foetere coepit, innatante ei saburra nigricante crassa, cum acredine quotidie crescente, ut quotidie novæ necessariae fuerint herbæ, propter insignem in aqua putredinem graveinque odorem acerbiteratemque, manus assistentis vellicantem, donec tandem æger feliciter restitutus fuit. Eadem ratione Cl. VOLCKAMERUS foeminam viduam, quæ quotidie foetentem talem colluviem, tres manus volas exsuperantem, ex corpore in aquam emisit, sanavit.

§. XVIII.

Maxime vero usus balneorum derivatorius in morbis, qui superioribus partibus corporis firmiter insident stabilemque habent sedem, expectatissimam opem suppeditat. Exemplo est infania, sive cum tristitia vel furore juncta, ad quam tollendam balnea quam maxime conferunt. Familiare id morbi genus esse hypochondriorum vitio laborantibus, ubi nervosæ imi ventris partes spasmo contractæ sunt, nec excrementa dimittunt, summaque etiam cutis, frigore tæste, spastica contractione affecta est, & sanguis crassus & impurus cum impetu ad caput urgetur, notissimum est. Nam sanguis, in vasis membranarum cerebri copiosius congestus, si difficulter progreditur, multas terroris & phantasmatum species excitat. Si vero in quibusdam corporibus febrem quasi particularem in meningibus cerebri accendit, & vehementius per vasa fertur, furor fit, ubi ægri violentius se gerentes, vinculis coercendi sunt, ne aliis noceant. Non alia sanè ratione balnea hic salutarem præstant efficaciam, nisi quod nervosas partes contractas emolliant & relaxent, cutinque strictam & frigidam calido tepore aperiant, atque adeo derivato sanguinis itinere ad habitum corporis, liberum ipsi circuitum per universum corpus concilient. Et profecto multiplici experientia hujus remedii præstantiam confirmatam assero. Plura enim & hic prostant exempla, ubi longa infania melancholica & furiosa laborantes, præmissis venæ sectionibus, ac medicamentis diluentibus & nitrosis, pristinae mentis integritati restituti sunt, quod medicationis genus etiam pluribus exteris Medicis à me commendatum fuit, qui illud admodum salutare ac proficuum deprehenderunt.

§. XIX.

Quamobrem sæpius mirari subit, quod hanc medendi rationem nostris temporibus in tollenda infania valde neglectam planeque insuper habitam videamus; quum tamen balneorum usus jam inde ab antiquissimo tempore ad evertendum hunc morbum fuerit celebratissimus, ita, ut veteres Medici ad hanc medendi methodum velut ad sacram anchoram confugerint. Quod ut aliis, harum rerum forsitan ignaris, facilius persuadeamus, placet hoc loco quædam Veterum testimonia in inedium adducere. ALEX. TRALLIANUS *Lib. I. p. 107.* balneorum usum in melancholia his verbis commendat: *dulcium balneorum usus, si quid aliud, melancholicis opitulatur: aliam namque partem cutis discutere, aliam humidorum qualitate contemperare; totum vero corpus aqua calida superfundere, caput tepida potius & luteis ovorum abstergere, & universum corpus kydrelæo, caput autem rosaceo ungere convenit. Ægri in balneo morentur diutius, ac in calidam descendere cogantur, omnino etiam, si æstas fuerit, in eo diutius desideant.* Pari modo ARÆTÆUS *Lib. VII. p. m. 134.* melancholicos in aquis sponte calidis sæpe commorari jubet; rare enim, inquit, & molles carnes ad ægritudinis remissionem maxime faciunt, verum sicca & tensa melancholia laborantibus carnes sunt. CÆLIUS etiam AURELIANUS *Lib. I.*

Morb. chron. p. 335. maniacis suadet usum *aquarum naturalium*, ut sunt nitrosæ, & magis, si odoris non fuerint tetri, quo capitis membranae quatiuntur. Ex Methodicis PROSPER ALPINUS melancholicos tepidis balneis, tum in universum corpus, tum præcipue supra capitis futuram coronalem stillantibus, perfecte sanatos esse commemorat: *vid. de Med. Egypt. p. 115.*

§. XX.

In aliis etiam capitis morbis sublevandis non mediocrem balnea dulcia ferunt opem, dum humorum impetum à capite ad alias & externas partes, humore tepido, quo eas relaxant, invitant. Ita in epilepsia, quæ in foeminis ex mensibus suppressis oritur, novimus balnea, aliis interpositis remediis, cum fructu usurpata. TRALLIANUS *p. 74.* valde suadet hoc in morbo balneum ex aqua dulci, non continuo, sed bis vel ter in septimana usurpandum, & potius ante, quam post cibum, cum situlis calidis stomacho & cruribus superfusis. Cavendum tamen est, ne imminente paroxysmo epileptico, balnei usum suadeamus; eo quod, ob compressionem partium inferiorum à pondere aquarum, humores nimium calore expansi, ad caput jam debile & iis recipiendis minus aptum ferantur, ut deinde paroxysmus non modo acceleretur, sed & gravior evadat. Quod non metuendum est, si tempore à paroxysmis vacuo id remedii genus in usum vocetur. In atroci & pertinaci hemicrania, in indomitis capitis doloribus, vertigine, mentisque brevi alienatione, si ex vitio hypochondriorum & spasimis imi ventris, quod plerumque fit, originem trahant, cum fructu etiam inter alia usurpata balnea fuisse reminiscimur; utpote quum non modo humorum motum versus inferiora retrahant, sed & ipsas spasticas partium stricturas, quæ hæc mala progenerant, demulceant atque componant. In epiphora, oculorum acribus defluxionibus, imo in eorum inflammatione sæpius redeunte, præter laxantia, diluentia & diaphoretica, etiam balneum aquæ dulcis magnæ efficaciae deprehenditur. Quo spectat HIPPOCRATIS *aphorismus 31. Sect. VI. oculorum dolores vinum & balneum solvit.*

§. XXI.

Nullus vero morbus est, qui plus auxilii & levaminis à balneorum usu percipiat, quam affectio sic dicta hypochondriaca, quod morbi genus & gravissimum & nostra ætate familiarissimum est, variis & gravissimis symptomatibus longo tempore & sine intervallo fere homines exercens, & Medicos mirum in modum fatigans; quoniam medicina nondum inventa est huic malo penitus tollendo accommodata. Sed tamen, si fateri licet quod res est, profecto ipsa suffragante experientia non præsentius, & melius auxilium ad hunc morbum, vel sublevandum, vel si principium ejus est, eradicandum, invenitur, quam in recto thermarum & acidularum usu, ubi tamen illud monendum duco, quod balnea horum fontium usum internum mirifice secudent, si horum materia est aqua pura, levis & subtilior. Nam minerales aquas, quæ apertissimæ quidem ad potum sunt, quum multum participant de graviore terreo salino, vel etiam adstringente elemento martiali, externe ad balneum non tam utiles deprehendi in hoc affectu, quam eas, quæ levioris & purioris naturæ sunt. Multiplici etiam experientia didici, thermas Carolinas ob id minus feliciter externe hypochondriacis adhiberi, quia graviores & constringentes aquæ sunt: sed loco earum sæpius suasi balneum ex aqua subtiliori, quæ vocatur *das Mühl-Wasser*.

§. XXII.

Utilissimum autem est hypochondriacis balneum Tœplicense sulphuratum, *das Schwefel-Bad*, non aliam

ob rationem, quam quod majori caloris temperie gaudet, quam illud, quod in urbe est, ita tamen, ut acidularum Egranarum usus internus interponatur, & sic miram certe ab hac cura observavi efficaciam. Si vero non copia est hujus balnei, quod à sulphure nomen habet, utendum est eo, quod intra urbem est, ut in labro ligneo ovali circulo fabricato, intra conclave balneo quis utatur; ita enim temperationi reddito calore, major utilitas in hoc affectu expectanda est. Hic vero notandum, quod, si thermæ naturales haberi nequeant, harum loco commodissime balneum ex subtili & levi aqua pluviali, præsertim post cadentes imbres excepta, substitui possit; quippe quæ, iisdem gaudet effectibus & cum maxima utilitate usurpari potest. Neque vero tantum hypochondriaci, sed & foeminæ, hysterice pathematibus obnoxie, à balneorum usu, non neglectis internis convenientibus remediis, desideratissimum solamen atque allevamentum accipiunt.

§. XXIII.

Rationem vero, quare tam nobili splendeant effectum balnea in hisce morbis, inquirentibus nobis, potissimum hæc esse videtur. Si sedem partemque affectam, immo naturam & genium mali hypochondriaci & quæ ab eo proficiuntur symptomatum, rationem & generationem probe intueamur; certe hic morbus unice in canali illo nervoso & membranaceo, in quo alimenta solvuntur, digeruntur & excernuntur, ventriculo nimirum & intestinis, residet, quorum motus sic dictus peristalticus, qui secundum naturam in reciproca dilatatione & constrictione consistit, plane turbatus, imo inversus est, idque maxime per spasticas stricturas & contractiones convulsivas, quibus si exercentur inferiores intestinorum, præsertim pleniorum, partes, non modo excrementa alvina intus detinentur, sed & flatulentia, exitu præcluso, versus superiora tendunt, & intestina tenuia & ventriculum cum vehementia distendunt, unde totum systema nervorum, sive omnes, quæ subtili sensu gaudent, membranosa partes, in similem motum spasmoticum, quem consensus nomine Veteres exprimunt, trahuntur, ex quo tanta symptomatum calamitas, omnes fere corporis partes excrucians, exoritur. Hoc malum si à causa transeunte, nec radices in ipsa substantia viscerum habente, proficiscitur; convenientibus adhibitis remediis facilius recipit sanationem. Si vero jam visceribus, præsertim pancreati, vel hepati, lieni aut mesenterio, male affectis, simul insideat, ibique foveatur, ipsaque substantia tunicarum intestinalium à causis variis gravioribus plane læsa & destructa fuerit: non tam facile hoc malum perfanatur, ut potius à Medicorum & medicamentorum copia & crebra mutatione, cui maxime favent hoc morbo detenti, mirifice exasperetur, immo plane ob hanc causam tandem insanabile reddatur. Quisque ex sanioribus Medicis jam facile perspiciet: ex omni remediorum genere, nullum tanta valere efficacia, tonum naturalem intestinalis canalisi restituendi, ipsasque spasticas stricturas harum partium mitigandi, & motum retrogradum, qui ad superiora tendit, reparandi & ad inferiora convertendi, quam calidum humidum, & interius, & exterius recte adhibitum. Id enim blando suo tepore fibras crispatas clementer emollit, relaxat & sanguinis ac humorum effluxum, antea exclusum, rursus invitat, & liberiores humorum circuitum per intestinorum vasa efficit. Neque hæc virtus calidæ aquæ ignorata fuit antiquissimo Medicorum HIPPOCRATI, cum *sect. V. aphor. 22.* prodidit: *calida aqua cutem molliat, attenuat, dolores eximit, rigores, convulsiones, distentiones mitigat, capitisque gravitatem solvit.*

§. XXIV.

§. XXIV.

Propter laudatissimum hunc effectum balnea in iis morbis, qui identidem à strictura & spasmo partium imi ventris proficiscuntur, præcipuum curationis punctum absolvent. Hujus generis sunt omnes intestinorum dolores, tormina, atrox colica convulsiva, dolores graves & spasmi ex renum calculo, cum urinæ suppressione, alvo adstricta; in quibus omnibus magna est balneorum efficacia. Id tamen circa convulsivam, quæ ex sanguinis stagnatione fit, colicam tenere oportet, ante missionem sanguinis, si plethora adest, balneorum præsertim calidorum usum penitus tutum non esse, in quo etiam consentientem habemus TRALLIANUM, qui in *Oper. p. 591.* hæc habet: *In doloribus colicis ex inflammatione intestinorum, balnea calida continuata, priusquam totum corpus recrementis vacuatum fuerit, adhibenda non sunt. Post sanguinis autem vacationem, etiamsi dolor urgeat, balneo uti absurdum non est.* In gravissimo vero dolore colico, ex fecibus induratis orto, balneum, ex emollientibus paratum, cum interno usu olei amygdalarum dulcium, vel lenioris decocti laxantis, ex manna, rhabarbaro, sale Epsomienfi, cremore tartari maximo erit usui; quod remedium etiam in passione iliaca, præsertim si portio ilei in scroto incarcerata ejus causa fuit, laudem & commendationem meretur. Si quid enim ad intestinum flatu & stercore repletum reponendum confert, certe præter dextrum balnei usum, vix præsentius invenimus auxilium.

§. XXV.

Peculiari etiam modo solatur eos, qui à renali calculo magnos sustinent cruciatus. Nam si paulo grandior angustis ureterum viis inhærescit calculus, spasmi non modo ductus urinarios, sed omnes quoque totius corporis partes nerveas penetrant. Nihil hic est consultius, quam corpus temperato balneo immittere, ut blando ejus tempore stricturæ & contractiones partium remittant: hinc non modo dolor mitigatur, sed & viis laxioribus redditus, facilior fit calculi transitus atque expulsio. Quod remedium in illo affectu non tantum nostræ ætati notum est, sed etiam jam ab antiquissimis Medicis magna laude celebratum. Quam in rem consuli potest ALEX. TRALLIANUS, *p. 543. 547. 551.* it. ARETÆUS, qui *p. 118.* in calculo renali infessus umbilico tenus commendat. Id vero maxime notatu dignum observavimus, quod quando calculus prægrandis in orificio urethræ subsistit, atrox dolor in pube oritur: quamdiu vero æger in balneo commoratur, nullus dolor præsto fit. Hanc tamen etiam adhibere cautelam oportet: ne balneum nimis calidum præscribamus calculosis, si plethora urget, si corpus juvenile & sanguine plenum est; facile enim sic febrem accendi posse, exploratæ experientiæ est.

§. XXVI.

Jam ad eam quæstionem solvendam nos accingimus: num scilicet in febribus, præsertim intermittentibus, balnea & infessus utilem operam commodent? Si Veteres & maxime ipsum HIPPOCRATEM, GALENUM, CELSUM, imprimis eos, qui methodicæ sectæ fuerunt addicti, consulimus; hos balneorum usum in tollendis febribus præcipue intermittentibus, maximi fecisse reperimus, imprimis tempore vacuo, & sub declinationem accessionis, vel etiam mox in principio febrium etiam ardentium. GALENUS *lib. 8. cap. 3. Method. Med.* scribit: *In prima febris accessione inclinante, ducendi in balneum omnes sunt: tum pinguiter simul & molliter fricandi.* Atque Ægyptii, teste ALPINO *de Med. Ægyptiorum* in febribus causa carentibus, statim in principio, homines in balnea tepida ducebant. Et ibidem scribit: *in putridis febribus apud Ægyptios usus*

balneorum est frequentissimus; eo enim in omnibus tum continuis, exceptis pestilentibus, tum intermittentibus, familiarissime utuntur, non tamen in principiis, sed quando declinare cœperint. Tertia laborantibus balneum ut maximum præsidium adhibendum suadet TRALLIANUS *Lib. 12. p. 735.* maxime, si quis calido & sicco temperamento præditus est, licet non prius cocta fuerit materia peccans. GALENUS *libro de Therap. lavacra calida in tertianis ex aqua potabili commendat, quia bilem educendo evacuant, neque nocent, si bis in die usurpentur, et si etiam coctionis signa non appareant.* Qua de re ut nostram hic interponamus sententiam, dicimus: balnea utique esse utilissima, primo vacuo à febre die, quod etiam CELSUS, *lib. II. cap. 17.* affirmat. Deinde, ubi prima regio à sordibus per salia aperitiva & laxantia probe prius expurgata est: siquidem corruptus humor, qui causa febris est, non tutius evocari potest, quam per relaxatam cutim; præsertim si ante ejus usum diaphoreticum propinetur. Imminente vero accessione, & si febris corpus tenet, recte secundum HIPPOCRATEM *de Morb. Mul. p. 151.* à balneis abstinere oportet. Commodissimus vero in intermittentium declinatione balneorum usus est, hinc CELSUS *pag. 105.* tradit: *balnei duplex usus est; nam modo discussis febribus, initium cibi plenioris viniq; firmioris valetudini facit, modo morbum tollit, & optimum balnei tempus est, vel ante horrorem, vel febre finita.* PLATERUS etiam in quartana die paroxysmum præcedente cum fructu usurpavit balneum aquæ dulcis. *vid. Lib. II. obs. p. 281.*

§. XXVII.

Denique & hoc addendum puto: quod operationem medicamentorum, quæ magna & heroica sunt; balnea tepida omnium optime secudent, ut longe nobiliorem effectum exferant. Nunquam facile secundum nostram sententiam atque experientiam mercurialia modo salivationis, modo evacuationis per sudorem fine, sive in lue venera, sive in aliis rebellibus morbis propinanda sunt, nisi balnei usus intercedat. Hoc enim dum relaxat summam cutim porosque aperit, id efficit, ut corruptus humor non tanto cum impetu ad fauces vel etiam alia loca urgeatur, sed magna ex parte per tubulosam cutis substantiam ex intimis sedibus evocetur; ut adeo tuto admodum curam cum mercurialibus institueri liceat. Veteres, chymicis & validioribus medicamentis destituti, in rebellibus morbis hellebori albi usu multum præstabant, sed nunquam eum facile adhibebant, nisi prius in balneum corpus demissum fuisset; quoniam id non modo fluidiores & mobiles reddit humores, sed etiam vias relaxat, ut eo melius peccans humor educatur. Neque etiam tunc facile periculosum symptoma à validioribus purgantibus, quæ spasmo operantur, metuendum fuit. Martialis porro virtus in chronicis morbis, atque etiam in malo hypochondriaco, non contemnenda est; sed ne adstrictione noceat, balneum opportunissime interponitur, quo humores ad motum & exclusionem eo facilius præparentur. Et nullum quoque dubium est, quin cortex chinæ aliaque adstringentia, quorum magna vis est in intermittentium paroxysmis cohibendis, longe tutius sub decenti balneorum usu usurpari possint.

§. XXIX.

Coronidis loco quædam utiles cautiones & observationes circa balneorum usum, ne noceant, adjiciendæ sunt. Primo balneum aquæ dulcis nunquam admittendum est nimis calidum, sed præstat semper temperato uti. Deinde in plethoricis & cacochymicis nonnisi soluta prius plethora & præmissis evacuantibus, balnea in usum trahere oportet. Tum commodissimum balnei tempus est matutinum, post somnum, concoctione peracta & vacuo ventriculo, præsertim si alvus ante ejus usum laxa fuerit. Præterea

Præterea non nimis diu insidendum est balneo, ne vires debilitentur, & post ejus usum corpus committendum est lecto, ut frigoris accessus omni modo prohibeatur, & sudor largius profluat, quem jusculum vel decoctum conveniens datum, egregie juvabit.

GALENUS in balneo tria observanda præcipit: primo, ne, qui balneantur, aliquo vasso horreant, secundo, ne ullum viscus imbecillum habeant, demumque ne multitudo crudorum humorum in primis viis adsit.



OBSERVATIONES

DE ACIDULIS, THERMIS
ET ALIIS FONTIBUS SALUBRIBUSAD IMITATIONEM NATURALIUM PER
ARTIFICIUM PARANDIS.

§. I.

IN superioribus dissertationibus credo satis manifestum à me ostensum esse, quod variæ fontium à benignissimo naturæ parente nobis concessorum salutiferorum saliant species, nec non quænam horum sint elementa atque principia; & quemadmodum salutares in corpore humano variis in afflictionibus exerant vires atque operationes: quo ipso simul monstravi & notavi decumanos tam Veterum, quam multorum nostri sæculi virorum lapsus atque errores, quos ignorantia genuini examinis physico-chymici harum aquarum adinserunt, dum plane aliena & principiis vitæ nostræ infesta, ex mineralium, & salium potissimum familia, tum acidulis, tum thermis, precario & frivole assignaverunt ingredientia, quæ, si aquis inessent, plus profecto damni & periculi earum usum injuncturum, quam utilitatis inducturum fore, quisque, nisi plane hospes & rudis in cognoscendis medicamentorum facultatibus & viribus sit, ultro perspiciet.

§. II.

Quin potius, posteaquam per DEI gratiam concessum mihi fuit, præcipuos Germaniæ quibus medicinalis vis inest foterios, tum frigidos, tum calidos fontes visendi, examinandi & quoad vires atque usum explorandi: offendi, clarissime demonstravi & in publicum conspectum produxi, nonnisi saluberrima, secunda, blanda & naturæ humanæ ac vitalibus motibus valde amica, efficacissimæ tamen virtutis ingredientia & contenta illos fovere, salina scilicet, si-ve neutra, si-ve alcalina, una cum terreo quodam alcalinæ indolis, partim calciformis, partim martialis profapiæ, elemento, & præterea nihil aliud esse nisi aquas plus vel minus leves, subtiles, tenuissimo elasticæ seu expansivæ virtutis elemento aëreo-athereo imbutas atque perfusas. Et hæc potissimum sunt fontium illorum ingredientia, à quibus omnis & præservatoria & curatoria in morbis virtus petenda venit, licet non negandum sit, quod pro diversa horum ingredientium præsentia, mixtione, proportionem, non parum etiam aquarum in emendandis corporum vitiis discrepent virtutes.

§. III.

Quum itaque tot saluberrimis ingredientibus & viribus præstantissimis minerales hi fontes instructi sint, ut in vincendis & avertendis difficillimis etiam morbis, in universa rerum natura & omnibus naturæ regnis non habeant paria præsidia; quemadmodum id ex abundanti notum est iis, qui eosdem frequenter visitant & eorum effecta coram inspiciunt; neque tamen omnibus tam felices esse liceat, ut facultates

& occasiones habeant, foterios latices frequentandi & iis utendi; utilissima pariter ac magni momenti quæstio incidit: annon perspectis & cognitis eorum ingredientibus, quasitis quibusdam artificiis ejusmodi salutares aquæ quoad ingredientia & virtutes præparari & confici possint? Plures fateor ex Chymiatorum numero superiori ævo hac versati sunt in sententia: maxime acidulas aquas, haud adeo difficulter & operose artis beneficio parari posse. Scilicet firma adhuc, & tam falsa, quam pervulgata opinione persuasum tenebant: acidulas potissimam facultatis suæ partem trahere à vitriolico-martiali principio; eamque ob causam autumabant, effectricem hanc materiam facili negotio aquis posse insinuari, si nempe liquorem vitriolicum, si-ve solutionem vitrioli martis, & maxime illius, quod ex minera martis Hassiaca, quæ inepte solaris dicitur, conficitur, aquæ puræ fontanæ instillarent, & sic vitriolico principio imbuerent.

§. IV.

Et eodem dudum exploso errore rotari adhuc nuperius admodum non sine admiratione vidi, Archiatrum & Professorem Saxonicum, qui in schediasmate, de fonte Radebergensi prope Dresdam, edito, confidenter admodum, ne dicam impudenter & frivole, asseruit: omnium omnino foteriorum tam frigidorum, quam calidorum fontium universale & essentialiale ingrediens esse vitriolum martis. Nam licet, ut ignaris speciosum fucum faceret, in confirmationem coacta alleget auctorum de centum & sexaginta fontibus scripta, quæ eandem cum ipso profiterentur sententiam, & inde, ut putat, firmissima argumentatione eliciat, Radebergensem quoque fontem, vitriolo martis imbutum, esse saluberrimum: attamen si libellum inspexeris & adducta rationum momenta ex æquo pensitaveris, verba tantum dari & assertum ficulneis, vel plane nullis argumentis stabiliri, ipsamque tractationem curtam admodum in rebus physico-chymicis peritiam, minorem adhuc candorem & minimam moderationem apertius prodere, deprehendes. Quod enim ad universalem illam propositionem de vitriolo martis communi omnium mineralium aquarum elemento attinet: profecto nemo, etsi omnes sibi admomorderit ungues, ex thermis & acidulis, ubicumque scaturiant, facto curatius examine, vitriolicum sal, sed potius huic è diametro oppositum alkali, educet. Neque etiam ullum ex productis in scenam totius mundi fontibus novi, qui genuinum & verum sal, vitrioli characterem habeat & exhiberet, ut scilicet infusum gallarum, vel florum balaustrorum atro colore inficeret, cum solutione salis alcalini in tertium, ut est tartarus vitriolatus, transfret, & qui post resiccationem relinqueret concretum

mentum salinum, quod cum nitro tritum aquæ fortis odorem diffaret. Deinceps auctoritates, quibus rebus suis parum fidens, fidem sibi præstruere laboravit, ita sunt comparatæ, ut, si ex meo allato testimonio ad aliorum inductio faciendâ, in alienum plane sensum detortæ sint, & potius hypothesin destruant; quandoquidem ego in omnibus quæ catalogo inseruit meis scriptis, id potissimum egi, ut falsam de vitriolico aquarum mineralium elemento opinionem everterem, tantum abest, ut confirmarem, nisi forsitan auctori arriserit, me ita per obliquum petere, meamque firmis rationibus subnixam sententiam tacite & sine argumentis refellere. Si momenta quibus commentum fulcire annisus est, expendimus, parum sibi constat auctor & mox universale illud elementum vitriolum sal neutrum, mox instar tartari tartarificati eminentius alcalificati esse perhibet, probationem non edisserit, & in continuatione speciminis plane retractat & restringit, quæ in priori confirmatius generatim asseruerat, quin quo magis experimentorum multitudine in exploratione elementorum fontis Radebergensis splendorem affectavit, eo minus vitriolicum ejus principium confirmavit, ut etiam neget, aquam hanc instillata gallarum solutione nigrescente tinctura imbui, quæ tamen certissimus & verus vitriolici contagii index ac proditor est. Et licet ad diluendam hanc magni momenti objectionem differentiam novam comminiscatur, inter martiale & venereum vitriolum, quod hoc atrum, illud vero tantum purpureum colorem excludat: experientia tamen & oculorum fides testantur, confecto ex vitrioli oleo diluto & purissima limatura martis liquamine, in quo acidum exquisitè marte saturum, (ne exsuperans tincturam impediatur) infuso gallarum saturato instillato atramentosum, & non tantum purpureum colorem inducere, quod tentamen quilibet imitari potest. Quamvis autem effugium quærat, & experimentorum, in contrarium à me allatorum, fidem sublestat reddere conetur hanc ob causam, quod aquas in vase stanneo exhalari jufferim, & stomachans existimet, acidum vitriolicum in aquarum sinu contentum, latera patinæ corosisse, & abraham calcem, residuum post exhalationem magna adulterasse, ut non integrum illud obtineri, neque de vera ejus indole judicium interponi potuisset: meminisse tamen utique oportebat magnum Physicum & Chymicum, salis tertii, alcalino, redundantius unito, nullo modo eam esse facultatem, ut metalla arrodat & stannum in calcem convertat, ne dicam, quod ipsa vitrioli martis solutio, in stannea patina ad ficitatem redacta, nunquam vasis parietes arrodat, & ne tenuissimam quidem metalli calcem efficiat.

§. V.

Sed hæc in transitu quasi monuisse sufficit, occasione methodi acidulas artificiales, per instillationem liquoris vitriolico-martialis, ex minera martis Hassiaca parati, conficiendi, quam idem auctor in allegato specimine historię naturalis communicavit. Lubentius equidem hæc etiam omissem, quum animus meus ab omnibus diludiis admodum abhorrens, ægrius semper induci se patiatur, ut in publicum literarum conflictum, imprimis cum rerum ignavis, descendat, si auctor nomini pepercisset & non indignis admodum, ea quæ in medicina consultatoria de fonte Radebergensi candide exposueram excepisset verbis & inepte admodum corrigere voluisset. Jam misso hoc minus genuino sed adulterino acidulas per artificium præparandi modo, progredior ad institutum, traditurus qua ratione artis ministerio, ipsius naturæ in salubribus, tam thermalibus quam acidulis aquis parandis artificium imitari & simplicem aquam iisdem

ferme elementis & viribus imbuerè possimus. Sunt vero aquæ calidæ & frigidæ medicatæ, quæ omnis salini vel mineralis elementi expertes, sola humoris exquisita subtilitate, levitate & puritate copiosius haustæ salutarem effectum edunt, eoque nomine insignem utilitatis famam habent Schleusingenses in comitatu Hennebergico, Schlangenbâdenses in Hassia, Tœplincenses in Bohemia, Piperanæ in Rhætia, in quorum locum, qua ratione fructuose substitui possit purissima aqua, præter ea quæ tam in schediasmate *de aqua medicina universali*, quam *de balnearum ex aqua dulci usu præstantissimo*, monuimus, nihil habemus quod addamus.

§. VI.

Deinceps salient nonnulli latices levissimam itidem & subtilissimam undam trahentes, omnique terreo-salino principio orbatæ & tenuissima tantum ochreo-martiali substantia imbuti, qui merito aquæ martiatæ, Germanis *Stahl-Wasser* dicuntur. Horum familiam ducunt Freyenwaldenses in Marchia, Bebrana in Thuringia, Lauchstadiensis in Miskia & præcui omni etiam dubio Radebergenses prope Dresdam fontes, quippe qui nec acidis nec alcalinis adjectis, mutationem experiuntur, sed mora vel calore accedente, martiale flavescens sedimentum dimittunt. Ferratas itaque ejusmodi aquas per artificium imitandi non adeo difficile erit, si copia est purissimarum & levissimarum aliarum simplicium aquarum, & hæc in vase clauso cum selectiori & subtiliori ochra venali decoquantur, eoque pacto paratæ, similem, tam externo, quam interno usu, exhibebunt utilitatem.

§. VII.

Porro scaturiunt fontes, qui pari ratione aquæ levitate & subtilitate nobiles sunt, ac præter momentum ochreæ martialis materiæ multum salis communis complexu suo susceperunt & ab hoc potissimam facultatis suæ partem trahunt. In horum numero antiquitate & præstantia celebres sunt Wisbadenses calidæ aquæ, dejectoria virtute pollentes & ad balneum utilissimæ, quæ pariter admixtis, tam alcalinis quam acidis liquoribus, nullam plane exhibent immutationem, neque etiam spiritu æthereo elastico afflatæ sunt. Has commodissime per artem imitandas esse arbitror, si aquis martiatis sal gemmæ vel commune adjiciatur, & quidem ad mensuram aquæ, salis drachma.

§. IIX.

Paulo difficilius negotium succedit cum acidularum imitatione, ut scilicet vere tales præparentur, & quæ non solum saporem eundem exhibeant, & cum acidis pugnent, sed etiam copioso spiritu æthereo elastico imbutæ sint, effusæ bullulas rejiciant & penetranti odore nares compungant: id quod obvium est in Selteranis, Buchensibus, Antonianis & Wildungensibus. Nihilo minus tamen artificiosam earundem elaborationem hunc in modum molitus sum. Infudi nemper aquæ simplicis & quæ obtineri potuit optimæ mensuram in figulinum vas, angustiori collo instructum, eidemque instillavi primum salis tartari probe calcinati iterumque soluti drachmam unam, vel etiam plus adhuc, deinde adjeci vitrioli spiritus, prout magis vel minus dilutus fuit quantitas, & quidem talem, ut facta ebullitione & mixtione alcalinum quodammodo emeretur, ac demum agitatione facta vas probe clausi. Prodiit hoc artificium sapor acidulis affinis cum bullulis sub effusione alte salientibus, respondit quoque virtus & effectus, ita, ut iisdem summo cum fructu in morbis, qui acidularum temperatarum potum postulabant, & harum

tamen copia deerat, usus sim. Eadem prorsus ratione Emsensium aquarum imitationem adornari posse reor; nisi quod aqua levior & purior sit adhibenda & major salis tartari portio adjicienda. Si vero Pyromontanis, quæ martialis ochreæ materiæ consortio imbutæ, similes conficere animus est, aquæ martialis vel naturales, vel artificiales adhibendæ & paulo major salis tartari & spiritus vitrioli copia admiscenda, ita tamen, ut pariter alcalinum elementum emineat.

§. IX.

Præterea sunt adhuc aliæ acidulæ, quæ alvum sollicitantem virtutem exserunt, ut Egranæ, ac licet cum acido effervescent, sal tamen tertium amaricans post exhalationem relinquunt. Hæ etiam non alia ratione quam dictæ acidulæ artis ope concinnantur, adjicienda tamen simul est salis Ebshamensis, Sedlicensis, Glauberiani, vel ejus, quod ex magnesia & spiritu vitrioli parare soleo, portio. Haud absimili ratione artificiose concinnari possunt aquæ, sale exquisite medio foetæ & efficaciter purgantis facultatis, quo nomine celebris est Sedlicensis & Seydschützenensis, scilicet quando aquæ simplici optimæ notæ sal Glauberianum injicitur, ut in ea liquecat, vel melius adhuc si per mixturam magnesiæ & olei vitrioli ex calcaria terra & acido vitriolico sal eodem modo, ut in nativis fit, paretur & aqua eodem imprægnetur, ita quidem, ut pondus salis inditi exæquet quantitatem illam, quæ per evaporationem ex aquis paratur, ac in libra medica ad duas minimum drachmas accedit. Ac denique si quis curiosius Carolinas aquas, valde alcalinas & laxante virtute imbutas, sibi artis ministerio comparare velit; is id potissimum agere debet, ut non levem & subtilem aquam, sed materia calcaria onustam eligat, eidemque pariter prius solutionem salis tartari & postea spiritus vitrioli, quo usque alcalina portio manifestius emicet, inspergat, quo terra calcaria cum spiritu vitrioli congregiatur & in sal neutrum transiens, purgantem effectum exsequatur.

§. X.

Et hi sunt modi ac hæ encheireses, quibus ex vero & fideliter mineralium aquarum pro interno usu imitationem artificiose institui posse tradidi; id certe quilibet, cui ita paratas in usum vocare arriserit, re ipsa deprehendet, iisdem non modo crassiores illas terreo-salinas substantias inesse, sed etiam in iisdem æmulum delibatissimum aëreo-æthereo-elasticum principium, ex actione & reactione acidi vitriolici & al-

calini salis sub effervescencia exsurgens, ac in nativis recondi, effectum quoque illarum esse saluberrimum & non sine summo fructu ad sanguinem depurandum, morbos arcendos variosque pro medentis intentione usus adhiberi posse, licet non pertinacius contendere velim, quod naturales virtute ac præstantia penitus exæquent.

§. XI.

Supereff, ut paucis adhuc doceamus, quo pacto simplices aquæ ad balneum per artificium aptari possint, ut mineralium vices suppleant. Nota sunt quæ jam superius exposuimus, qua ratione per additionem salis tartari, cinerum clavellatorum, salis, florum & herbarum, tam pediluvia, quam balnea sanitati apprime proficua, instrui atque parari possint. Ideoque hoc loco nonnulla tantum addemus de iis, quæ scoriarum metallicarum ope conficiuntur. Communissima horum & utilissima sunt, quæ ex scoriis martialibus, terreo salina & sulphurea martis substantia foetis concinnantur; quippe quæ ob roborantem & constringentem suam facultatem in membris lassis, debilibus & fessis fulcendis ac firmandis, & varii generis hæmorrhagiis tam compescendis quam provocandis, usus sunt tam egregii, ut commodissime in martiatarum locum surrogari possint.

§. XII.

Præter hæc in locis ubi metallifodinæ vigent & mineralium cuprearum, antimonialium & cobalti uber proventus, recepti usus sunt balnea, quæ ex harum scoriis præparantur, & pariter ob contentum vitriolicum sal, sulphur & terrestre elementum ad roborandum fibrarum tonum, & vicissim crispatas illas laxandas, nec non leniter septicam detergentem & mundificantem virtutem, prudenti medentis consilio, pro diversarum circumstantiarum ratione usus, accommodari insigni cum fructu & applicari possunt. Modus autem artificialia hæc balnea conficiendi is est, ut scoriam post fusionem metallorum vel mineralium adhuc candentes, aut ad minimum de novo concalescent, in aquam tepidam, in vase operculo probe munito, immergantur, ut aquæ medicinalem & salubrem virtutem insinuent; quæ postea sub balnei, infessius & foci forma ad corpus admittitur. Tandem etiam utilissima sunt balnea, quæ artis beneficio, ex alumine & calce viva parantur, ita quidem, ut his invicem decoctis, aqua levissima pluvialis imbuatur; quippe quæ, in membris paralyti tactis & à robore defectis, opem spondent longe saluberrimam.



DE EXIMIA VIRTUTE SALIS

CAROLINARUM.

§. I.

SI quid in universo rerum naturalium penu, ad varias, easque graves & pertinaces, ab humano corpore tam mature arcendas, quam commode debellandas afflictiones, certæ, securæ & comprobatae facultatis deprehenditur remedium; profecto hoc nomine jure suo superbire existimo medicamenta ex salium familia prognata, atque inter hæc maxime, quæ ob æquale acidi & alcalini principii connubium vulgari termino apud Medicos vocari solent falsa, enixa, media & neutra. Quorum agmen constituunt à longinquo tempore ab antiquissimis Medicorum celebrata: nitrum, tartarus vitriolatus, & tartarus, arcanum duplicatum, nitrum antimoniatum, terra fo-

liata tartari, sal à Glaubero dictum mirabile, digestivum Sylvii, sal polychrestum, quod ex nitro & sulphure paratur, ammoniacum, & pleraque ex optimarum herbarum ac plantarum succis inspissatis præparata salia sic dicta essentialia. Siquidem utilissima eorum virtus duplici potissimum se manifestat ratione: primo, quod in amplissima remediorum sylva, quæ tam ex vegetabilium, quam animalium & mineralium classe prodeunt, vix detur aliquod simplex machinæ nostræ solidis ac fluidis partibus tam amicum atque conveniens, ac ipsa hæc temperata salia: quippe quæ sanguini, lymphæ, omnisque generis animalium succis vario modo eorum naturali consistentiæ ac mixtioni inferant notabilem mutationem, sed & in ipso nostro corpore optima sanitate fruente copiosius perpe-

perpetuo generari, ac cum humoribus circumferri observantur: uti hoc ultimum ex urinæ, nec non sudoris falso sapore satis manifeste animadvertimus.

2. UTRUMQUE longe aliter se habet cum salibus acidis & alcalinis puris & extra connubium positis: quippe quæ plane nostri corporis humoribus adversa & contraria, iis secundum naturam constitutis, nec inesse certum est, nec salva eorum, quæ ad vitam apta est, mixtione, diu inhærere posse, satis clare per experimenta chirurgiæ, quæ olim magni habita fuit, infusoriæ demonstrari potest. Ex his enim constat, quod acidi magis vel minus saturati liquores, cujus generis sunt spiritus salis, nitri, vitrioli, solutio aluminis, per siphonem animalium viventium venis injecti, sanguini antea florido & celerrime per vasa currenti spissum illico nigri coloris inducendo coagulum, & latera vavorum membranoso-nervea constringendo & arrodendo præsentaneum vitæ exitum induxerint; alcalina vero fluida, præsertim saturatiora, ut oleum tartari per deliquium, vel spiritus salis ammoniaci copiosius eodem modo in sanguinem delata, animantibus ob expansam nimis & rarefactam humorum massam citam & violentam præcedentibus convulsionibus mortem intulerint. A qua nociva facultate remotissima esse ex utroque hoc sale composita, neutrius generis salia, vel solum illud in præcedente dissertatione jam allatum MALPIGHII experimentum demonstrat: qui ab infusa in canis robusti viventis venam jugularem nitri solutione nullam mutationem, præter urinæ copiosiorum proventum se observasse testatur *in libro de poly-po cordis*.

3. DEINDE & saluberrimam neutrius generis salium virtutem exinde luculenter apparere arbitror, quod in expediendis cujuscunque generis secretionibus & excretionibus, a quarum suppressione plurimi contumaces morbi tam gignuntur, quam foveantur & acerbiores redduntur, incidendo nimirum viscidas ac tenaces cruditates, quæ in ventriculo ex alimentis minus subactis natæ hospitantur, & magnorum fœcundæ fiunt malorum genitrices, ipso quoque sanguine spisso resolvendo, attenuando, per glandulas ac vasa in visceribus promte transprimendo, æque ac noxios humores per omnia excretoria, prævia leni eorum vellicatione, sine tamen sanguinis exæstuatione, sine torminibus & spasminis, uti aliis vehementioribus solenne est purgantibus, blande evacuando, vix in rerum natura sui habeant simile. Quemadmodum vero tam acida suo tempore ad appetentiam & dissolutionem ciborum promovendam & temperandas in primis viis hospitantes bilioso-sulphureas cruditates, quam alcalina ad absorbendam aciditatem, resolvendosque spissos humores moderate & debita cum circumspeditione usurpata, multos corpori humano præstant usus: ita præsertim salia alcalina mitiora salibus neutrius generis juncta, horum efficaciam mire exaltare observantur; eo quod acidus, qui aperitivam salium vim infringunt, succos imbibendo, salis medii genium acquirunt, & in solvenda ac educenda præsertim tartarea, quæ in renibus secernitur, mucositatem omnia alia diuretica & aperitiva quam longissime antecellunt.

4. QUAM præstans itaque & multiplex salium mediorum & ex parte etiam alcalinorum in corpore humano est utilitas; tam admiranda quoque divina pro hominum salute cura ac providentia: quod plures ejusmodi generis salibus fœtos saluberrimos tam calidos, quam frigidos fontes huc illuc è terræ latebris sponte premanare voluerit. Et eo magis etiam notandum puto Veterum errorem, qui cum Chymiciæ rationalis plane essent ignari, neglecto accuratiori horum fontium examine, eorum virtutes à variis metallicis, vitriolicis, bituminosis & alienis plane, nescio quibus, subterraneis materiis derivarunt. Enim vero, licet negari penitus non possit, inesse quam plurimis & thermis & acidu-

lis tenuissimum illudque summe volatile martiale vitriolicum principium; quod ex adjectione gallarum patescit, quæ recenter ex scaturigine haustam aquam atro purpureo colore imbuunt, diutius vero à fonte præsertim sine operculo servatam, immutatam linquunt: hoc tamen, quia facillime in auras avolat, & paucissimis ad aliena loca transvectis aquis inhæret, pro genuino & præcipuo operandi in fontibus fundamento haberi neutiquam potest, postquam peritissimorum in Chymia virorum opera nos docuit, plurimas, ubicunque etiam ortæ fuerint, acidulas & thermas in eo convenire, quod sale imbutæ sint medio & alcalino plus minus abundante. Atque ab hoc etiam, potissimas omnium fontium salubrium virtutes dependere, præ ceteris demonstrare operam dedi in variis scriptis, quæ *de aquarum mineralium elementis ac viribus tam in genere, quam speciatim de Carolinis, Sedlicensibus aliisque* cum publico communicavi.

5. Eidem etiam laudatissimæ naturæ scrutatorum operæ acceptum referre debet nostrum seculum, quod jam penitus naturam ac genium istorum, quibus salubres maxime in Germania pollent fontes, salium una cum suis differentiis ac viribus diversis cognoscamus. Scilicet, multis experimentis physico-chymicis jam quidem in vulgum notis demonstratum est: alios fontes tantum alcalino sale instructos esse, uti sunt Selteranus, Emsensis; alios minori salis alcalici cum terra martiali juncti portione præditos; ad quos pertinet Spadanus, Buchensis qui Carolinis adjacet, Pyrmontanus, Carbenensis in Wetteravia & Tœnsteinensis, aliis Antonianus dictus; alios vero sale magis falso amaricante, ut Egrani, Sedlicenses; alios porro terra alcalina subtiliori cum pauculo sale falso & alcalino, ut Wildungenses esse imbutos; quosdam verum sal commune admixtum possidere, uti constat de Wisbadensibus, Tœnsteinensibus & Egranis. Quos omnes mire antecellunt Carolinæ thermæ, quippe quas præter sal medium amarum & terram calcariam magnesiæ admodum similem, copiosum etiam alcalinæ & lixiviosæ indolis sal in se recondere, adeoque in gravioribus chronicis morbis, præsertim qui ab acidis & viscidis humoribus proveniunt, curandis, in aperiendis omnis generis excretoriis, maxime vero urina & alvo fortiter movendis, hæmorrhoidali quoque & mensium fluxu restituendo, omnes reliquas foterias aquas longissime antecellere pridem in peculiari dissertatione *de thermis Carolinis* docui, & plurimis experimentis atque observationibus confirmavi, quod post me etiam celeberrimus BERGERUS in diss. ejusdem inscriptionis præstitit.

6. At, cujuscunque demum generis sint ista, à quibus medicinalem suam vim salubres fontes mutuuntur, salia, eadem tamen omnibus arte factis tam mediis supra recensitis, quam alcalinis multis nominibus anteposenda esse, constans affirmare audeo. Quippe, subtiliori longe & naturæ magis amico tam acido, quam alcalino principio eo constare, vel exinde elucescit, quod salia ex fontibus prognata pleraque fere in æquali purissimæ pluvialis, præsertim calefactæ aquæ portione penitus solvantur, cum arte facta plurima vel triplo, imo quadruplo majorem mensuram requirant quantitatem, & longiori quoque ad sui intimam solutionem tempore opus habeant; nec non quod calori ignis exposita facillime fluant, quod secus contingit cum artificialibus. Unde nec dubium est, fore, ut corporis nostri succis facilius permisceantur, atque per vasa minima promptius transeant, quam illa, quæ ex graviore naturæ infuso acido & alcalino sale ab artificibus componuntur.

7. Quemadmodum vero non omnibus æqua facultas & occasio est, ipsos fontium medicamentorum natales visitandi, & in loco eos usurpandi, neque cuilibet sumtus ad transportationem aquarum necessarij suppetunt; ita Chymiatrum plurimorum ægrotantium inopiæ consulturi,

sulturi, diu de salibus per legitimam coctionem & evaporationem ex fontibus præparandis, quibus in sufficienti & adæquato menstruo solutis in sui corporis commodum uti quoque possent exteri, solliciti fuerunt. Primus inter hos fuit celeberrimus Angliæ Medicus D. GREW, qui ex patrio Ebshamenfi fonte ejusmodi amarum purgans sal præparare, & magno cum fructu peculiari tractatu de meliori commendare cœpit. Enim vero, cum admodum exigua sit salis, quod ex hoc fonte elici potest, portio, tantum omnino abest, ut ejusdem sub nomine quod hodie circumfertur, & viliori certe pretio venditur, Anglicanum dictum sal amarum, genuinum nativum ex fonte educitum sit, quale Doctoris GREW fuit, ut liquidissime potius inter omnes, qui accuratiori chymico examini illud subjecerunt, constet: id ex salis communis cum acido vitrioli, vel aluminis miscela, ad exemplar Glauberiani præparari, uti id probe annotavit LENTILIUS in M. N. C. Cent. III. IV. Obs. 173. & ego ipse ulterius demonstravi in *dissert. de salium mediorum eccellente virtute*.

8. Præter Ebshamenfem celebratissimum hætenus fuit sal fontium Sedlicensium sive Seidschutzensium, quorum usum per aliquot secula oblivione obrutum, una cum sale ex iis præparando medicinali, primus omnium detexi & in peculiari scripto commendavi. At vero, cum ipsi Sedlicenses fontes, sale hoc mediæ solum naturæ & ab omni alcalini prædominio libero imbuti, virtutibus longe inferiores sint Carolinis; quippe quæ ob notabile lixiviosi salis cum medio commercium in gravissimis chronicis afflictionibus debellandis omnibus aliis huc usque palmam præripuerunt; ideo diu de eodem sale ex fontibus Carolinis educendo sum meditatus, majora scilicet inde suspicatus commoda, quam ex ullo alio hætenus vel nativo vel artificiali fuerint præstita. Quare, cum sæpius ab illustribus personis in Carolinas vocatus crebriorem & elementa & præclaras hujus fontis virtutes examinandi habuerim occasionem, dudum quoque peritis in arte pharmaceutica ejus loci viris autor existi suaforque, ut naturale, quod reconduunt thermæ, sal ex iis juxta artis regulas elicere & publico usui offerre facerent periculum.

9. Factum hinc quidem est, ut per plures jam annos ruditer saltem coctum in minori copia ad privatos tam ægrotorum Carolinas usurpantium, quam Medicorum expetentium usum in pharmacopolio fuerit servatum; attamen, diligentiore & frequentiore ejusdem præparatione ut exteriorum etiam & à fonte remotiorum commodis consulere, eo usque ob peculiare forsitan privatam maxime incolarum utilitatem respicientes causas obtineri non potuit; donec abhinc lustro, cum ab Augustissima Romani Imperatoris Majestate ad deliberandum de ejusdem salute cum illustri Archiatro Dno PIO NICOLAO DE GARELLI in Carolinas vocarer, curiosus quidam pharmaceuticæ licet scientiæ ignarus, senatorii ordinis vir, Dn. GEORGIUS BERNHARDUS RICHTERUS, tinctoriæ arti deditus, elegans quoddam salis ex thermis Carolinensibus ducti, & ab omnibus terræ sordibus liberati specimen offerendo, à nobis examen & disquisitionem ejus peteret. Laudavimus ambo institutum, & compendiosam simul optimum ex fontibus sal eliciendi methodum suppeditavimus. Ex quo tempore etiam tanta virtutum præstantissimarum multitudine se commendavit istud sal, ut non modo à præsentibus sub ipso fontis usu, sed à remotioribus quoque optimo cum fructu usurpetur, ac copiose jam distrahatur. Sed, ut eximii hujus usus ratio eo clarius elucescat, operæ pretium duxi, peculiarem Carolinensium thermarum salis indolem, elementa ac virtutes, in specie vero præ Sedlicensi, quod hætenus palmam tenuit, prærogativam sequentibus demonstrare.

10. Primo quidem, ut, quæ de præparatione hujus salis scire convenit, paucis complectamur, monen-

dum est, materiam huic sali suppeditare fontem illud, qui furioso impetu fervidissimus ex terræ lateris profilit, & à vulgo in Carolinis dicitur *der Prudel*. Hujus videlicet ferventissimæ aquæ pro una vice circiter mille libræ vulgares ex scaturigine haustæ in catina ferrea super igne posita usque ad cuticulæ apparentiam inspissantur; & prævia per filtrum colatione, aëri frigidiori exponuntur, ut in crystallos abeat inspissamentum. Remanens autem à prima crystallisatione liquor de novo inspissatus ad crystallifandum reponitur. Atque hoc tamdiu reiteratur, quamdiu in fundo sal coire cernitur. Emergunt inde crystalli prioribus ex asse similes, nisi quod ultimæ à prioribus albedinis præstantia superentur. Massa producti hinc salis, æquat trium librarum medicarum pondus; unde calculi beneficio constat, quod ex una libra aquæ drachma circiter dimidia salis puri sit elicienda. Residuum, quod in fundo post absolutam crystallisationem conspicitur, est tinctura aurantii coloris, saturate lixiviosa, cum acido tamen minus effervescent, saponacea & oleosa, quæ spiritui vini rectificato permixta ex parte ab eo solvitur, & alcalino caustico sapore eum imbuat, ex parte vero in fundum instar magmatis spissi delabitur. Ad filtri vero parietes concrevit terra martialis adstringens lutea, & croco martis similis.

II. Expedita sic quam fieri potuit brevissime genuina, qua ex Carolinis fontibus sal elicitur, methodo, propius jam ad ipsius naturam penitus inquirendam, & differentiam à sale maxime Sedlicensi ostendendam accedimus: primo quidem experimenta cum utroque instituta exposituri, & ex his deinde præstantiam prioris præ ultimo demonstraturi: Phænomena autem circa utrumque observata huc redeunt;

I. Paratum è thermis Carolinis sal ex crystallis constat oblongis, nivei coloris, pellucidis, & interspersis hinc inde variis aquosis. Sedlicense minores exhibet, quæ itidem oblongæ quidem sunt, sed albedine, & aquosa pelluciditate prioribus cedunt.

II. Sal Carolinarum tam in aqua solutum, quam solida forma gustu exploratum, saporem præbet ex parte lixiviosum, ex parte amaricantem, mitiorem tamen quam Sedlicense, quod intense amarum est & valde nauseosum.

III. Aquæ purissimæ communis calefactæ uncia salis Carolinarum drachmas decem & scrupulos duos, Sedlicensis vero unciam unam recipit; frigidæ vero eadem portio à Carolinensi præter drachmas sex cum uno scrupulo, & à Sedlicensi præter drachmas quinque & duos scrupulos nihil solvit.

IV. Solutio salis Carolinarum ex adjecto violarum syrupo colorem adipiscitur viridem; à quo Sedlicense nullam patitur mutationem.

V. Aqua Carolinarum sale saturata ab oleo tartari per deliquium nullam sentit turbam; Sedlicensis vero solutio ab eodem in spissum lactei coloris convertitur coagulum.

VI. Productum ex Carolinis fontibus sal cum omnibus tam mitioribus, quam fortibus acidis vehementer effervescent, hinc ab affuso vitrioli spiritu vel alumine crudo, in aqua prius soluto, desinente effervescencia in sal tertium amarum transit: Quod minus contingit in Sedlicensi.

VII. Spiritus vini rectificatissimus saturatæ salis Carolinarum solutioni affusus, lacteum ei inducit colorem, & in fundum dejicit pulverem tenuissimum albicantem; qui ablato per accensionem vini spiritu in aqua facillime solvitur. Idem vero si Sedlicensi soluto misceatur, præcedente coloris turbidi in lacteum mutatione, spissum niveæ massæ præcipitatur coagulum, in aqua tamen post combustum vini spiritum promte solubile.

VIII. Cum sale ammoniaco per triturationem probe subactum sal Carolinense, sponte liquefit, & odor-

rem spargit volatilem penetrantissimum; quod frustra expectatur à Sedlicensis cum eodem miscela.

IX. Eductum è Carolinis thermis sal fornaci calidæ injectum cito fluit; frigidioris vero aëris accessui diutius expositum non liquefcit quidem, sed instar magnesiæ in tenuissimas moleculas dissolvitur. Sedlicense nec à calenti nec frigido aëre mutatur.

X. Etiam igne difficilius fluit ultimum quam prius.

XI. Una salis Carolinarum pars cum dupla antimonii crudi portione permixta, & in crucibulo candenti fusa præbuit regulum antimonii medicinalem, intense rubicundum & fragilem; qui ab eadem salis Sedlicensis & antimonii miscela sine fale tartari obtineri non potuit.

XII. Sal Carolinarum cum sexta pulveris carbonum parte mixtum, in crucibulo ignito facillime fluit, & massam hepatis sulphuris æmulam largitur, quod in aqua solutum atramenti instar est sympathetici, & literas ex solutione sacchari saturni vel aceto lithargyrii chartæ impictas, antea plane non cognoscendas, luteum iis inducendo colorem, manifestat. Sal Sedlicense idem nunquam præstat, sine additione salis tartari.

XIII. Eiusdem hepatis sulphuris in aqua facta solutio viridescit, sed aëri libero diutius exposita colorem adfciscit limpidum, delabente interea in vitri fundum terra viridi, à qua si purior aquæ portio separetur, & separata spiritus vitrioli affundatur, penetrans admodum foetidus emergit odor, & sulphur ex albo cinericeum præcipitatur; quod ipsum cum oleo terebinthinæ vel amygdalarum intime subactum balsamum sulphuris constituit: Sal Sedlicense eadem proportionem cum pulvere carbonum mixtum, & eodem modo in crucibulo candente tractatum, prævio magno ebullitionis motu sulphureum præbet odorem, neque fortissimo igne fluit, & calcinatum in fundo relinquit terram in aqua minus solubilem; quod si vero miscelæ huic sub initio sal tartari addatur, eadem contingunt phænomena, quæ à Carolinarum fale jam memorata.

XIV. Idem quoque singuli effectus observantur, si loco pulveris carbonum, nigricans illa, quæ à liquoris mei anodynii mineralis destillatione remanet, substituitur terra, ac cum eadem Carolinarum sali iusta proportionem nupta simili ratione adornentur experimenta; luculento testimonio, quod ista terra multum sulphuræ & inflammabilis materiæ in se complectatur. Nihil horum succedit cum Sedlicensi ejusdem destillationis capiti mortuo juncto; nisi conveniens salis tartari portio adjiciatur.

XV. Ultimo denique, per destillationem nostrum sal exploraturi, tres ejus uncias indidimus retortæ vitreæ, ex quibus fortissimi ignis beneficio præter omnem spem atque opinionem unam cum dimidia unciam & drachmas duas aquæ limpidæ dulcis & empyreumaticum odorem exhibentis, quæ nec cum acido nec alcali ebullit, obtinuimus. Residuum in retorta cinericea erat coloris, solvebatur in aqua, & ab affuso oleo tartari per deliquium penitus non mutabatur, cum acido vero mixtum effervescebat. Cum fale ammoniaco tritum volatilem penetrantissimum spargebat odorem, absque tamen colliquatione, quæ ab ipso Carolinarum fale ante destillationem observata fuit. Par salis Sedlicensis quantitas retortæ indita, aquæ insipidæ unciam unam & drachmas tres, phlegmatis aciduli autem drachmas duas dedit. Remansit hinc terra spongiosa calcaria nivei coloris, cum aqua frigida instar calcis vivæ fortiter ebulliens & eam calefaciens; quæ cum fale ammoniaco mixta omnis odoris expers manet, & in aqua soluta ab adjecto oleo tartari per deliquium in spissum vertitur coagulum.

12. Ex adductis his experimentis satis luculenter apparere arbitror, quæ utriusque salis sit indoles ac differentia. Quippe cum thermarum Carolinarum fale suscepta, ejus omnia sunt tenoris, ut pleraque à quo-

vis alcali, fale tartari & cineribus clavellatis, nonnulla vero etiam ab omnibus mediæ naturæ salibus, nitro, arcano duplicato, tartaro vitriolato, aliisque observentur. Quare nec dubitare quempiam spero, quod sal ex Carolinis fontibus eductum duplex diversi generis contineat principium, alterum alcalinum, alterum mediæ salinæ naturæ, cujus ultimi præsentia vel exinde satis manifeste cognosci potest, quod in crystallos abeat oblongas, ab aëre in liquamen fluidum non dissolvatur, & præter lixiviosum etiam amaricante sapore sit præditum. Quæ omnia contrario modo in salibus mere alcalinis contingere, nemo hodie non novit. Et licet negari non possit, salis alcalici portionem sal neutrum in Carolinensi superare, id tamen ex observatis vero admodum videtur simile, quod à dimidia parte salis medii quantitas parum recedat. Ad Sedlicense vero quod attinet sal, eo colludunt omnia cum eo facta tentamina, ut idem ad salia perfecte neutra referendum sit, quæ nec acido nec alcali eminenter abundant, sed ex æquali utriusque portione nupta sunt composita: quemadmodum omnes & iidem effectus observantur, quando per artem præparata salia neutrius generis, ut arcanum duplicatum, tartarus vitriolatus & tartarizatus aliaque ejusmodi chymico examini subjiciuntur. Deinde vero & illud ex adductis experimentis elucere arbitror, quod sal è Carolinis elicatum longe subtilioris sit indolis, quam Sedlicense; quod in aqua & difficilius solvitur, & majorem mensuræ copiam requirit. Curiosum denique & hoc observatu est, quod tanta in salibus delitescere possit aquæ portio; quam etiam fuisse causam existimo, quod Carolinum sal & ammoniacum sicca invicem mixta liquefacta sint: cum educto per destillationem humido, id non contigerit cum resitante fale.

13. Partium atque elementorum, quæ sal Carolinensium thermarum constituunt, hæcenus exposita natura, & proportio statim nos docere poterit, quidnam in corpore humano usus, & quæ vires in variis morborum generibus tam arcendis, quam tollendis ab eo sint expectandæ. Quas vero omnes partim ab alcalino, partim à medio, quod continet fale, partim ab utriusque conjunctione deducendas esse, neminem puto, quin perspiciat. Primo itaque ut ab alcalina ejus superabundante parte initium faciamus, præstans utique illius est virtus in absorbendis, quæ in primis viis, partim ab alimentis acidis, quibus pleraque hominum pars delectatur, partim ab imminuta ciborum digestionem, sæpe resitant, aciditatibus, quæ incrassando reliqua alimenta, præsertim ex lacteorum familia desumpta, item mucilaginosa & ex fructibus horæis parata, non modo insensissimarum cruditarum genitrices sunt, sed & vasa, quæ ventriculum percurrunt, sanguinea & nervea, à quorum legitimo elatere omnis fere concoctionis vigor pendet, constringendo fluidi & sanguinei & nervei ingressum arcet; adeoque ad spasmos intestinorum, colicam, cardialgiam, ructus, flatus, & anxietates præcordiorum, capitis dolores, appetitum incoercibilem, febres, aliosque graves morbos quam facillime disponunt. Quibus omnibus, si à contento in primis viis acido, originem eos trahere indicium sit, ipso hoc fale vix salubrior ac promptior opponi potest medicina. Unde nec mirum est, quod hypocondriacis & hysterico malo laborantibus personis, quæ ob debilitatam stomachi & intestinorum vim peristalticam, parum digerunt, & cruditatibus acidis tam fovendis quam generandis admodum aptæ sunt, præ omnibus aliis stomachicis ac roborantibus insignem præstet utilitatem.

14. Deinde, cum omnibus alcalinis & hæc sit propria facultas, ut si cum acidis congregiantur, eadem in sal convertant tertium amaricans, purgante præditum virtute; ideo & hoc nomine peculiariter commendari meretur sal alcalinum thermarum Carolinarum,

quod, nisi sufficienti & acido in primis viis hospitanti proportionata ingeratur quantitate, illud hostile cum omnibus cruditatibus per alvum evacuet, & adeo omnibus, qui ex obstructa alvo sentiunt incommoda, opem afferat longe saluberrimam. Quo ipso multum antecellit sal Sedlicense, quippe quod, nisi alcalino quodam pulvere, ut lapidibus cancrorum & conchis præparatis acuatur, in corporibus, ubi acidum primas vias occupat, plures sæpe molestias, quam levamina creare observatur.

15. Majora autem his sunt, quæ ab utriusque tam alcalini, quam medii salis combinatione in corpus nostrum derivantur commoda. Eminent hinc maxime nostri salis virtus in incidendis viscidis ac lentis humoribus, qui in ventriculo atque intestinis sæpius colliguntur, & tunicam nerveam inviscando æque ac menstrui ad digestionem necessarij effluxum intercipiendo, & sensum & motum stomachi imminuunt, hinc appetentiam prosterunt, nauseam & vomitus cient, & plurimarum cruditatum genesi velificantur. Unde non modo appetitui, sed & digestionem ab hac causa læsis egregie opitulari nostrum observatur sal. Porro, cum ista cruditatum in primis viis stabulantium sit indoles, ut, non modo ventriculum aggravando & distendendo, respirationem reddant difficilem, pectorisque anxietates inferant, sed & latera tam vasorum percurrentium, quam adjacentium viscerum, hepatis, lienis & renum comprimendo, & vasa lactea ac glandulas discernendis & attenuandis humoribus destinatas obstruendo, sanguinem efficiant spissum, salsum ac cacochymicum; hinc patet, quam ampla sit Carolinarum salis utilitas in omnibus iis avertendis & averruncandis afflictionibus, quæ ab humorum spissitudine, viscerum infarctu, & impedito secretionum successu oriuntur.

16. Neque vero solum inter alterantes, sed & præcipue inter evacuantes medicinas nostrum sal peculiari pollet prærogativa. Enim vero, commune hoc cum omnibus aliis tam alcalicis, quam mediis habet salibus, ut non modo humorum viscidorum cohesionem imminuere, sed & solidas molliores, præsertim vero nervoso-membranaceas partes stimulando, elaterem & vim contractibilem earum augere adeoque & resolutas cruditates evacuare valeat. Quare peracta humorum, qui in primis viis obvii fuerunt, acidorum correctione & viscidum glutinis à crusta villosa abstersione, incipit primo in fibras intestinales agere, & proritato per leniorem vasorum vellicationem majori liquidi nervosi affluxu vim peristalticam intendit, quæ adaucta, non modo vasa, quæ inter membranas intestinales currunt, serosa, sanguinea & lymphatica conquassando, majorem fluidi in cava intestinorum transillationem provocat, sed & attenuatis & dilutis hac ratione cruditatibus minus tunc resistentibus per alvum copiose eliminandis quam promptissime inservit.

17. Hac ipsa vero alvum aperiente facultate quantum omnia alia leniora & fortiora etiam purgantia, citâ, jucunda & tuta operatione nostrum sal antecellat, dici vix potest. Siquidem tenerioribus & exquisitiori fibrarum sensu præditis, sufficienti in copia, & sub convenienti menstruo oblatis vix horæ dimidium expectat effectus. Jucunditate vero & saporis & lenioris operationis mire se omnibus commendat, qui delicatioris gulæ & sensus pleraque ideo averfantur evacuantia, quod partim amaricante & tædiofo sale nerveas palati & oesophagi fibrillas irritent, hinc nauseam, sæpiusque vomitum producant, partim quod in ventriculum delata molestas intestinorum tensiones ac crispaturas inferant, nec sine acerba intestini recti rosione sæces subducant: quod plane alienum est à sale Carolinarum.

18. Sæcurius denique est omnibus aliis vehementius alvum moventibus medicinis: eo quod sine motuum exacerbatione, sine ventriculi, ejusque toni & appetitus dejectione, sine sanguinis exæstuatione, effi-

cacissime subduxit noxios humores, nec alvum relinquit obstructam; qui omnes pessimi effectus aloeticis, resinosis & acrioribus purgantibus solennes sunt. Qua propter omni ætati, sexui & temperamento, summo cum fructu exhiberi potest. Imo vero multiplici compertum est experientia, quod plurimi, quibus à multis annis nunquam sine pilularum assumptione, aut clysterum injectione alvus soluta fuit, ex continuato præsertim nostri salis usu tam eximiam persenserint virtutem, ut postea sine molestia & sine medicamentis alvum habuerint apertam, liberam & ordinariam. Neque vero hoc tanto sedum numero efficit, quam Sedlicense, cujus assumpta unica uncia vel robustissimos octies & decies desidere cogit, & in nonnullis etiam ob copiosum & frequentem acris feri secessum molestas intestini recti rosiones, imo sæpe per aliquot dies alvum obstipatam cum tenesmo relinquit. Non facile autem id observatum fuit à Carolinarum sale, quod mitissime potius sordes educit, & si robustis ac sanis corporibus ad sex vel octo drachmas porrigitur, vix ultra quatuor vel quinque sedes sine molestia ciet, & subsequenter diebus alvum fluxilem cum appetitus incremento conservat.

19. Cum itaque tam nobili & naturæ tam amico purgante effectû polleat sal Carolinarum; idcirco tam in antevertendis, quam abigendis, quæ ab alvo diutius obstructa originem trahunt, vel exacerbantur, afflictionibus conducit. Neque enim rara eorum sunt exempla, qui, cum solenni alvi obstipatione laborantes quotidianis fere cephalalgis, pectoris anxietatibus, respirationi difficili, phlogosi, hypochondriorum tensionibus, aliisque chronicis infimi ventris passionibus obnoxii fuerunt, à nostro sale, insigne omnium malorum experti sunt allevamentum. Præterea, plures prostant observationes, quod ab alvo diutius constricta, spasmodica intestinorum inferente, ac sanguinis per abdominis vasa circuitum impediende, impetuosæ sæpius humorum ad superiora & viscera contigua fiant regurgitationes. Quæ si in capite contingant, dolores acerbissimos, vertigines, apoplexiam, melancholiam, gravia insomnia, agrypniam cum terrore, sensuum stuporem, ophthalmiam, aurium tinnitum, æque ac auditus difficultatem causantur; in pectore vero anxietates, cordis palpitationes, hæmoptysin, peripneumoniam, inflammationes producunt; in hepate inflammationes, vesiculæ felleæ spasmos, hinc icterum; in liene, vasorum brevium rupturam ac vomitum cruentum efficiunt, in renibus & vesica ad initium cruentum & calculosas concreciones ansam suppeditant. Quæ omnia gravissima pathemata saluberrimi nostri salis tempestivo usu arceri posse, extra omnem dubitationis aleam est positum.

20. Proinde peculiaris quoque est illius virtus in promovendis sanguineis, quæ per uterum ac vasa hæmorrhoidalia solennes sunt, excretionibus: eo quod spissum, qui vasa comprimit, mucum incidendo & educendo, vasorum liberiores reddit & contractionem & dilatationem, atque hinc expeditiorem humorum transitum & exitum conciliat. Præsertim vero hoc præstat, si per aliquot dies cum pilulis balsamicis, ex depurata aloes parte, extractis amaris & gummatibus ad exemplar Becheri paratis, quæ sanguinem ad loca dicta promptius compellunt, exhibeantur, & infusorum ex herbis sic dictis uterinis, pulegio, melissa, millefolio, matricaria, mercuriali, floribus cheiri, chamomillæ, croci &c. paratorum potu secudentur. Qua ratione & irregularem aut suppressum mensium & hæmorrhoidum fluxum ad ordinem reductum, & varicofas venarum in utero ac ano distensiones ac tumores cum emolumento sæpius solutos fuisse, plurimis exemplis manifestum est. Neque vero in convulsivis spasmodicis hysteriarum passionibus hoc sal effectum carere ut ex compluribus aliorum observationibus, ita novissimo exemplo mihi constat, de virgine nobili singulis mensibus per integrum

integrum biennium epilepsia & suffocationibus hysteri-
cis afflicta, quæ ex sæpius repetito salis Carolinarum
cum pilulis balsamicis juncti usu optime convaluit, &
mensēs sine tentaminibus spasmodicis, habet liberos ac
sufficientes.

21. Simili quoque ratione nititur peculiaris nostri sa-
lis in aperiendis viis urinariis, & educenda, quæ in
renibus à sanguine segregatur, falso-sulphurea muco-
sitate efficacia: qua pariter laudatissima alias diuretica
mire antecellit. Hæc enim cum sulphureæ volatilis, &
causticæ ut plurimum sint indolis, non modo strictu-
ras vasculorum in renibus, ureteribus & vesica ex-
quisite sentientium adaugent, adeoque dolores vehe-
mentiores inferunt, sed & sanguinis vorticosum mo-
tum accelerando, sæpius vel omnem urinæ fluxum suf-
flaminant, vel subtiliori ejus parti transitum tantum
præbendo, pluribus gravioribus morbis januam ape-
riunt. Quorum nihil à nostro sale debet metui: quip-
pe quod incidente sua virtutē tartareas concretiones sol-
vit & tubulos renales, hisque connexas ureterum ac ve-
sicæ membranas leniter stimulando majorem urinæ se-
questrationem, & expeditiorem exitum procurat. Mi-
nor est hæc in Sedlicensi sale vis; quod copiosius per
alvum, quam per urinam serum educere observatur.

22. Hinc est, quod in obstructionibus renum, ve-
sicæ & ductuum urinariorum præcavendis, & si ad-
fuerint solvendis, nostrum sal, si mature & crebrius præ-
sertim cum aliquot nitri granis usurpetur, multis nomi-
nibus Sedlicense antecellat. Et cum ob absorbentem
suam facultatem, acidum, cujus cum terra connubium
gignit calculum, cicurare & in medium sal convertere
valeat; hinc tam ad avertendam tartarei coaguli gene-
sin, quam exturbandum initio rem calculum insignis est
efficaciæ. Quo nomine etiam iis commendari satis vix
potest, qui vel ob nativam vel ab alio qualicunque er-
rore diætetico contractam renum ac urinariæ vesicæ
imbecillitatem ejusmodi calculosis concretionibus &
generandis & fovendis sunt idonei. Quemadmodum
pariter singularem ejus experiuntur efficaciam, qui
vehementes à calculo in arctum & nervosum ureterum
cavum intruso dolores sentiunt; quibus præ omnibus
aliis medicinis lithontripticis, tam resolvendo, præser-
tim si recens fuerit, tartarei mucī concrementum, quam
exturbando illius copiam, egregie & cito opitulatur
sal Carolinarum. Quos saluberrimos effectus frustra à
Sale Sedlicensi expectaveris.

23. Superest alia non inferioris dignitatis in Caro-
linarum sale virtus diaphoretica, quam accedente præ-
sertim copioso calidi infusi potu iis maxime præstat,
qui vel ob sicciorem vel cachecticum corporis habitum,
aut impeditam à quacunque causa transpirationem mul-
tos viscidos in subcutaneis tubulis firmiter impactos suc-
cos continent. Quos & fluxiliores reddendo, & vaso-
rum excretoriorum contractionem à tergo promoven-
do, promte per corporis corticem expugnat. Et cum
omni calefaciente virtute careat, ideo quoque merito
cunctis volatilibus, oleosis, sulphureis ac resinosis præ-
fertur diaphoreticis; quippe quæ sanguinem quidem satis
commovent & exagitant, sed quia spissum, qui seri per
poros exitum præcludit, mucum non dissolvunt, sæ-
pius plus noxæ, quam emolumenti asserunt.

24. Triplici itaque hac aperitiva tam alvum laxante,
quam diuretica, & sudorem movente facultate omni-
bus iis sal nostrum se commendat morbis, quorum cura
ad singulas harum excretionum species simul respicere
medentes jubet. Eo autem felicius hæc singula exsequi-
tur, si cum aliis hisce indicationibus adæquatis conjun-
gatur medicamentis. Miram hinc in hydropse anasarca,
cum œdematoso pedum tumore, virium prostratione
& urinæ suppressione juncta, cum pilulis balsamicis
alternatim exhibiti virtutem esse, novissimo exemplo
comprobatum est. Siquidem copiosum per alvum
& urethram serum educendo & leniorem mane in

lecto diaphoresin movendo id effecit, ut detumescenti-
bus intra paucas hebdomades ventre & pedibus, ap-
petitus & pristina sanitas ægro redierint. Eadem ratione
egregiam in febribus intermittentibus, quartana, & ter-
tiana pertinacioribus sistendis exserit efficaciam, si vel
solum, vel cum æquali corticis chinæ aut chacarillæ
in pulverem redacti portione mixtum, diebus interca-
laribus bis vel ter, imo aliquot ante paroxysmum horis
ad drachmam unam assumatur. Quem in finem &
sub connubio lapidum cancerorum præparatorum, ni-
tri & cinnabaris, loco pulveris famigeratissimi antispas-
modici dicti, ad præparandos, ut eo commodius eva-
cuentur, noxios humores, & imminuendam spasmodorum
febrilium vehementiam, tam ante paroxysmum,
quam sub eodem ad æstum in sanguine præternatu-
ralem supprimendum, & capitis dolores ex stomachi
vitio ortos leniendos, summo cum fructu potest ex-
hiberi.

25. Porro, cum sæpius contingat, ut ex febribus ju-
sto citius suppressis, graviores viscerum labe, vaso-
rum sanguineorum, imprimis hepatis & lienis infarctus,
ac glandularum mesenterii & pancreatis obstructions
orianatur, hinc appetitus pereat, digestio vacillet, nau-
sea cum vomitibus familiaris fiat, corporis externus ha-
bitus fiat cachecticus, ictericus, cum virium languore,
& capitis debilitate; ibi ad hostilem materiam, quæ à
febre cohibita remansit, è corpore expedire proscri-
bendam, hoc sale cum amaricantibus & balsamicis
extractis mixto, non neglectis spissam lympham inci-
dentibus & diluentibus potibus mira effici pluribus ob-
servationibus nobis comprobatum est. Quo scopo: eli-
xirium ex extractis amaricantibus cardui, ne-
sinthii, centaurii minoris & sale Carolinarum, singulis
ad unam drachmam sumtis, in aquæ menthæ cum
vino paratæ uncis sex solutis, magnæ in ejusdem indolis
morbis efficaciam deprehendimus. Atque hac ratione in
cachexia, chlorosi, ictero, atrophia, expeditius sanan-
dis, observato simul convenienti vitæ & victus regimi-
ne, felicissimos nos fuisse, ingenue testamur.

26. Neque vero prætereundum hoc loco est, quod
vulgatis laxantibus additum nostrum sal, eorum vir-
tutem mire exaltare valeat. Ita, si mannæ uncia uni
in aqua veronicæ, aut menthæ dissolutæ, salis Caroli-
narum drachma una adjiciatur, mixtura hæc, interpo-
sito calidi infusi Thée usu, epota, plus præstabit, quam
si duæ vel solius mannæ uncia assumptæ fuerint. Dein-
de, quum pilulæ, quæ à variis hodie ad normam Beche-
rianarum paratæ nomine balsamicarum prostant, sæ-
pius ægrotantium, præsertim robustiorum, & in eden-
tium expectationem in laxanda alvo fallant; certe
vix melior iisdem addi potest stimulus, quam si assum-
to vesperi sufficienti earum numero, insequente mane
duæ vel tres Carolinarum salis drachmæ subjungantur.
Pari ratione cum anthelminticis maritatum, in subdu-
cenda verminosa colluvie, & sistendis, quæ ab infe-
stis hisce hospitibus humano corpori familiares sunt,
atrocibus pathematibus egregie conducit; uti id re-
centissimo infantis exemplo comprobatum habemus;
è quo beneficio supra descripti pulveris ex cortice cha-
carillæ & sale nostro concinnati, magnam ascaridum
farraginem evocatam vidimus.

27. At, quam præstans salis Carolinarum in variis
corporis afflictionibus virtus deprehenditur, tam impar-
est causis morborum & imminentium & præsentium
superandis, nisi convenienti & sufficienti fluido solu-
tum in corpus deferatur. Conveniens illud primo debet
esse, & sale recipiendo & cum humoribus nostris per-
miscendo; sufficiens autem, ut corporis vascula subti-
lissima transire & cum humoribus omnis generis vir-
tutem suam medicinalem communicare possit. At ve-
ro, cognoscimus natura ipsa duce, aquam communem
simplicem thermarum fluido similem, purissimam, à
calcariis sordibus liberam, ex fonte vel communi,

vel, si fieri potest foterio, recenter haustam ac spirituofo æthereo elemento copiosius imbutam omnibus aliis liquoribus jure meritoque anteferri. Hinc est, quod vel ipsas Carolinas vel Selteranas, Schwalbacentes, Egranas aliasque, quæ medicinali facultate se nobilitarunt, aquas, præsertim si in loco natali usurpari possint, pro vehiculo hujus salis præ omnibus aliis multiplici usu confirmati commendemus. Dicit enim vix potest, quantum ipsorum fontium adaugeatur virtus, si eorum potus crebriori nostri salis usu secundetur; quod præsertim ii cum fructu faciunt, quibus aquæ potatæ in primis viis resistentes viscerum imbecillitatem atque atoniam minitantur. Neque vero minoris efficaciam est nostrum sal, si aliis aquarum speciebus, præcipue cum salutaribus, sanguinem purificantibus herbis & radicibus, ut scorzonera, cichorei, veronica, decoctis, ipso etiam sero lactis solutum, vel calide vel frigide, prout optime fert ventriculus, sufficienti copia successive hauriatur.

28. De proportionem vero menstrui ad salis efficaciam, non tamen ingratum, usum accommodanda hoc tenendum est, quod, quo largiori sal excipitur fluido, eo & citius, in primis viis repurgandis, ac referendis viscerum obstructionibus, eoque potentius operetur. Optima, qua sensibiliorum etiam gustui consulitur, hæc erit methodus, ut decem vel duodecim fluidi partibus una saltem salis portio addatur. Quare qui robustiori fibrarum systemate instructi & agrius commovendi sunt, ex libra una medica aquæ, unam salis unciam haurire poterunt, sensibilioribus autem, ut foeminis & viris mitioribus fibris præditis semuncia vel drachmæ sex ex libra medica dimidia vel octo uncis fluidi assumptæ satisficient. Pueris etiam pro diverso virium ac corporis statu, unam vel duas drachmas ex quatuor liquidi uncis potandas commendamus. Hac successive epota portione commodum erit, plura infusi medicinalis theiformis ex herbis resolventibus & roborantibus parati vascula calida tandiu subjungere, dum aliquot sedes provocatæ fuerint. Quum vero ad eandem liberum ac promptum successum multum faciat, si ventriculus alimentis, quæ spicula salina involvendo eorum vim infringunt, non gravatus fuerit; hinc est, quod assumptionem nostri salis potius matutino, quam pomeridiano aut vespertino tempore suademus.

29. Varias hæcenus, quas interne sumtum Carolinarum sal exserit virtutes, commemoravimus. At monendum quoque est, illud & externe non omni fructu carere: Primo quidem clysterum ingrediens esse potest, eo potissimum tempore, ubi à flatibus aut stercoreibus induratis relaxatæ intestinorum crassorum fibræ toni augmento egent, ut in ejiciendis sordibus officio suo satisfaciant. Quo scopo vel solum sal Carolinarum, aqua calida solutum, & satis dilutum injici, vel aliis oleosis, mannatis & demulcentibus salis communis loco ad unciam unius vel dimidiæ pondus commodissime admisceri potest. Deinde, cum salium mediorum impurificandis & consolidandis externis foetidis ulceribus alias non infructuosa sit efficacia; ideo quin & hoc nomine ad externos usus sal nostrum commendari possit, nulli dubitamus.

30. Expositis itaque variis ac præstantissimis Caro-

linarum salis, in plurimis nostri corporis gravioribus ac pertinacibus afflictionibus tam avertendis, quam expugnandis, utilitatibus, superest, ut de cauto ac circumspecto illius, pro varia subjectorum æque ac morborum differentia, usu pauca adhuc subjiciamus. Quare notandum est:

I. Quod cautius hoc uti debeant omnes, qui teneiori fibrarum & membranarum compage, quæ facilius per salina spicula ad spasmos irritatur, instructi sunt: unde nec infantibus, nec adultis, qui à nativa generis nervosi debilitate ad varios spasmodicos affectus inclinant, nec foeminis sensibilibus largiorem & frequentiore ejus usum commodum judicamus.

II. Quantum cachecticis, obesibus & sero abundantibus personis confert sal Carolinarum, tantopere copiosior & crebrior illius assumptio iis dissuadenda est, qui vel à natura macilentioris sunt corporis, vel à morbo graviore languescunt, vel denique per ætatis rationem vasa exsucca & collapsa gerunt: eo quod humidum copiose educendo fibras ventriculi rigidiores & ad motum ineptas reddit, hinc digestionis & nutritionis negotiū labefactat.

III. Eadem est ratio, quare nec foeminis post partum ad educenda lochia, saltem non sine pilulis balsamicis uterum roborantibus atque expurgantibus, exhiberi debeat.

IV. Similiter iis non conducere videtur sal è thermis productum Carolinis, qui spasmodicis afflictionibus crebrius tentantur, & à leviori causa diarrhoea, torminibus ventris, cardialgia ac colica convulsiva infestantur; quapropter & abstinere ab eo penitus debent, qui ab acri in ventriculo & duodeno hospitante bile, vehementes ilei rosiones, vomitus, ructus & diarrhoeam patiuntur.

V. Homines, qui scorbuticis & falsis humoribus foeti, catarrhosis capitis ac pectoris defluxionibus, variis quoque in cute efflorescentiis, ut scabie, purpura, febre miliari sæpius infestantur, sal Carolinarum copiosius exhibitum, augendo humorum dyscrasiam & arrodendo vasa ventriculi magis lædit, quam juvat; Proinde nec in ulceribus internis, ad quæ vera phthisis etiam pertinet, nec fluore albo, nec lue venerea, gonorrhoea inveterata, bonis cum ægrorum rebus usurpatur.

31. Quamvis egregia sit nostri salis vis resolvens atque per varia emunctoria evacuans; ubi tamen inveterata præsto fuerit glandularum obstructio, aut viscerum pertinacior infarctus, incassum adhibebitur. Nihil itaque in scirrhusa glandularum mesenterii, omenti ac pancreatis induratione, à pulmonum tuberculis efficiet. Quemadmodum porro in omnibus tam internis, partium nobiliorum; ut ventriculi, diaphragmatis, pleura, quam externis inflammationibus consultius est diaphoreticis, ac demulcentibus insistere, quam fibras nerveas salinis multis irritare: In catarrho suffocativo vel apoplexia, sive serosa fuerit sive sanguinea, sal nostrum plane est inefficax.

32. Sed sufficiat hisce viam medentibus monstrasse, qua ratione ad varia afflictionum genera præstantissimi Carolinarum salis usum secure & cum emolumento adaptare debeant. Attentos plura forsitan docebit usus & meditatio. Nos si de singularibus quibusdam ejus virtutibus amplius instruxerit experientia, easdem data occasione cum publico fideliter communicare minus dubitabimus.

DE CONNUBIO AQUARUM MINERALIUM CUM LACTE LONGE SALUBERRIMO.

I. **I**nter omnia remediorum genera, quæ insigni efficacia & virium excellentia cum ad avertendas, tum expugnandas gravissimas ægrotudines præstant, & ob id maximopere iis, qui dextre medicinam facere volunt, commendari merentur, duo maxime eminent, eaque simplicia atque domestica: lac scilicet & fontes

aquarum salubrium, hoc est, talium, quæ à Benignissimo corporis humani Medico ingredientibus & facultatibus ad medendum nobilissimis instructæ sunt. Ambo hæc spectatissima valetudinis præsidia, quum principem merito atque primarium inter reliqua obtineant locum, ut non facile, propter eximium & præstantissimum

num, quo pollent usum, quispiam iis carere possit: mirandum utique ex eadem à plurimis recentiorum, qui tantum remediis chymica arte elaboratis, aut specificis medicamentis arcanis, ex auro, mercurio & antimonio paratis, morborum curationem tentant ac moliantur, adhuc magno cum detrimento ægrotantium ignorari, vel ex perverso, è doctrinis Præceptorum hausto præjudicio, negligi penitusque contemni. Permotus hinc ego sum, ut horum remediorum, simplicitate, facilitate & incomparabili virtute præstantissimorum, dignitatem & gloriam restituerem ac postliminio quasi revocarem, id quod multo labore compluribus scriptis perficere hætenus annis sum. Testantur inprimis de hoc studio plurimæ de soteriis fontibus seorsim editæ dissertationes, jam in *opuscul. physico-medico*. collectæ exhibitæ, nec non *de asinini lactis & feri lactis virtute longe saluberrima* huic præmissæ, in quibus, ut credo, sat dilucide ostendi, in maximo honore ac pretio HIPPOCRATI, DIOSCORIDI, CELSO & his, qui eorum vestigia legerunt, MESUE, AETIO, GALENO ac PLINIO lactis fuisse usum. Quum vero curatius animo perpenderem, quod lac propter caseosam substantiam non omnibus æque conveniat, & quod aquæ minerales, tam acidulæ, quam thermæ, sal alcali ceu prædominans elementum recipiant, & hujus ope præcipuas virtutes exserant, lactis cum medicatis aquis mixturam utilissimam fore, à priori perspexi, & ante viginti & quod excurrit annos, primum in Carolinis periculum faciens, succedente ex voto usu, postea pluribus & Medicis & ægrotantibus hoc remedii genus commendavi, eoque refractarios, quin desperatos morbos, adspirante DEO, felicissime profligavi. Utilissima itaque & maxime digna, hæc de saluberrima lactis cum mineralibus aquis connubio, nobis visa fuit tractatio, quam in præsentem institueremus, & ex experientia paulo fufius explicatiusque prosequeremur.

2. Quum de miscela lactis & fontium mineralium, præsertim acidularum, hoc loco agere consilium ceperimus; primo omnium ostendendum nobis est, quare talis mixtio, non modo utilis, sed & sæpe necessaria sit. Ut autem id eo luculentius demonstremus, necessarium omnino erit, ingredientia tam lactis, quam etiam acidularum, primo loco exponere, eo quod à natura & indole elementorum, omnes medicinales remediorum vires derivari debent atque deduci. Quod itaque ad lac attinet, notissimum est, illud ipsum ex butyrofa pingui materia, quæ paucissima, ex caseosa, terrestri solida, & denique aquea, tenui, subtili, quæ feri nomine venit & sale quodam dulci blando abstergente foeta est, constare. Ex quo quidem quisque, nisi admodum rudis in rebus medicis sit, facile perspiciet, illam lactis portionem, quæ feri nomen gerit, & aquosam ac salinam dulcem ejus substantiam complectitur, præcipuam medicamentosam virtutem præstare, eo quod plurimi certe morborum, præsertim qui longo tempore corpus affligunt, sanguinis & humorum spissitudine, viscositate, tenacitate & stagnatione in vasis, qua illa opplent, infarciunt, vel obstruunt, & denique ab excretionum, præsertim quæ fiunt per alvum & urinam, retentione & collecta inde ingenti impuritate humorum salino-acri sulphurea, quæ vulgo scorbutica & Græcis cacochymia vocatur, oriuntur.

3. Et hæc etiam causa subest, quod lac asininum, copiosum dulce serum vehens, & pauca caseosa, in coagulum vix abeunte materia refertum, nec non serum lactis, tam vaccini, quam caprilli, ex quo identidem dulce saccharum, licet non in tanta copia ut ex asinino lacte, parari potest, modo sit recenter secundum methodum nostram præparatum, usui lactis puri, longe multumque præferendum sit, propter incomparabilem quam obtinet virtutem abstergentem, diluentem, salium acrimoniam temperantem, obstructions aperientem & excretionum per alvum & urinam successum facili-

tantem ac promoventem; prout pluribus à nobis in *dissert. de saluberrima feri lactis virtute* expositum est. Quia autem lac asininum, quod revera divinam opem misere ægrotantibus promittit, ut loco arcani haberi debeat, difficilius obtineri potest, serum quoque ex lacte dulce, non acidum, operosam tantisper præparationem requirit; cogitandum omnino fuit, qua ratione lactis medicinalis, quæ maximam partem sero debetur, virtus, augeri possit, ut aquosa ejus pars præcaseosa prævaleret. Et hoc nos commodissime perfici posse putamus, per admixtionem aquarum salubrium, acidularum nempe sic dictarum, idque non tantum eam ob causam, ut aquosæ substantiæ in lacte augeatur quantitas, sed etiam, ut mediante mixtione acidularum, longe præstabiliior virtus & efficacia emergat, qua de re infra pluribus differemus.

4. Est vero hæc methodus, lac per aquæ admixtionem corrigendi, non nova, sed antiquissima, HIPPOCRATI jam usitata, quam postea alii Medicorum sequuti sunt, sicuti ex pluribus luculentis, quæ in ejus monumentis consignata sunt testimoniis, patet. Ita enim gravissimus hic auctor in enarratione historica *lib. VII. epid.* testatur: lac aquæ permixtum, Erotholai filio & Clonico Abderite felicissimo successu datum fuisse. Deinde, *lib. VII. Epid.* lac bubulum cum aquæ sexta parte permixtum se exhibuisse memorat. Et *Epid. lib. V. text. V.* recenset historiam Pythoclis, qui lac multa aqua permixtum ægrotantibus propinavit. Porro, TRALLIANUS *lib. VIII. cap. 7.* vult: ut quarta pars aquæ lacti admisceatur, postea ad dimidias coquatur. Sic enim minus in ventre, quod AETIUS monuerit, casei naturam accipere. ARETÆUS quoque in tabe dorsali lac commendat, cujus duæ partes, cum una parte aquæ remixtæ sunt. Et idem auctor *lib. II. cap. 13.* in elephantiasi lac largius, ad alvum molliendam, cum quinta aquæ parte mixtum, quo melius descendat, potui dare suadet. Præterea, HOLLERIUS *de phthisi & febre hectica* eandem in rem egregie scribit; *quod si ructus est nidorosus, aqua incoqui debet cum lacte, quod consilium, ait PRIMEROSIUS de vulg. error. lib. III. cap. 21: si plurimi sequerentur, majus ex lactis usu emolumentum persentirent, quam solent.*

5. Neque aquam tantum affuderunt, sed ipse HIPPOCRATES, ut lactis facultatem augeret vel corrigeret, & abstersivam intenderet, muriam addidisse legitur. GALENUS serum lactis cum sale ad alvum purgandam exhibere jubet, sal vero remove, ubi purgatio inceperit, sed per intervalla alternatim repetere, donec satis materiæ purgatum sit. *Copia*, præcipit, *pro virium ratione expendenda est, ac licet non multum peccaveris, si plus etiam exhibueris; certa tamen mensura ad hebras quinque accedat.* Et porro dicit: *Cares serum lactis cum aqua marina rursus decoquant & sic propinant, quod quidem sicuti efficacius, ita longe insuavius est.* Ne dicamus de aliis priscorum methodis, quibus lactis correctionem melle vel mulso tentarunt, ut ex PLINII & GALENI monumentis elucescit. Varia itaque Veteres ad augendam facultatem medicinalem lacti admiscuerunt, & quidem maxime aquam, ad diluendum viscidos, tenaces humores & ad caseosum coagulum arcendum, sal vero, seu muriam, ad excretionem, potissimum alvi promovendas, & mel denique, ad acidum, ventriculo inprimis inhærescens, ne lac densaret, obtundendum. Verum, licet hæc tentamina correctoria non improbemus, præsertim cum ipsa experientia eadem haud infructuosa esse docuerit; id tamen asserere non dubitamus, longe meliorem, tutiorem & salubriorem effectum in medendo expectari posse, si quando ipsum lac, vel asininum, vel caprillum, aut bubulum, prout conditio morbi, corporis ægrotantis & reliquarum circumstantiarum fert, cum mineralibus aquis tam calidis, quam frigidis, sive acidulis, remisceatur.

6. Quemadmodum autem ego ipse, quod sine ostentationis nota dicere licebit, primus Medicorum fui, qui asserui atque clarissime demonstravi: omnibus Germaniæ & aliarum quoque regionum acidulis, præter alia ingredientia salina terrea & martiale elementum, inesse potissimum sal fixum alcali eminens, adeoque minus recte acidulas, quum ne vestigium quidem acidi manifesti vel vitriolici salis contineant, vocari; ita etiam primus fui, qui ante viginti minimum annos edixi ac docui: minerales aquas optime & sine ulla noxa cum lacte in pectoris affectibus, & ubi lac solum exhibendi quædam contraindicatio & difficultas incidit, potui posse præberi. Primum hoc perficiendi consilium cepi & tentavi in Carolinis, ubi ante XXV. annos, viro honestissimo rei monetariæ in Hercyniæ fodinis profecto, qui ulcere pulmonum cum sputo copioso & purulento laborabat, thermalium aquarum cum lacte nuptarum potum exoptato cum eventu suasi, ut postea egregie levatus, licet non penitus ab insanabili morbo liber, vitam per quatuor adhuc lustra extraheret. Succedente sic ex voto negotio, cum Selteranis, quas omnium mitissimas & quam maxime alcalinas esse noveram, idem tentavi & Berolini olim degens, generosissimo viro-juveni, Serenissimi principis ephoro, hæmoptysi & dispositione phthifica affecto, Selteranas cum lacte bibendas commendavi, quarum ita institutum usum, hic pariter saluberrimum expertus pluribus ut probatissimum postea dilaudavi. Factum hinc est, ut aquæ Selteranæ, quas primus pariter, pro eo quo tumungebar munere, Potentissimo augustæ memoriæ Regi demississime suasi, & loco Carolinarum commendavi, ab aliis quoque Medicis tot exemplis nobilitatæ in usum vocentur. Haud parum itaque in me iniquus fuisse merito videtur auctor schediasmatis, aliquot annis abhinc Berolini editi, in quo præter alia minus curate scripta, contra omnem penitus veritatem alii Medico & Archiatro, quod Selteranarum cum lacte usum Berolini ad notitiam traduxerit, tribuitur. Neque etiam, quod falso iterum dicitur, Potentissimus Rex, augustæ memoriæ, unquam thermalibus Carolinarum aquis Berolinum advectis, sed, quotiescunque in regia sede minerales aquas potare placebat, Selteranis, ex meo potissimum consilio usus est. Serenissimo autem Principi Marchioni tertia duplici laboranti, D. G. ut Berolini Carolinas allatas potaret, auctor suatorque fui, neque hoc sine effectu. Interim capto etiam cum successu cum Selteranis tentamine, postea non modo has, sed etiam Pymontanas, Egranas, Schwalbacenses & Spadanæ, pluribus cum lacte bibendas, præsertim in pathematibus arthriticis, scorbuticis, hypochondriacis aliisque, opem à me efflagitantibus exhibui.

7. Merito quidem clarissimi nominis Medicus Londinensis & Regiæ Societatis membrum Dn. SLARE, in tractatu Anglico idiomate scripto & Germanice reddito *de aquis Pymontanis & martialibus pag. 67.* taxat errorem Germanorum, quod aquas minerales, quæ alcali eminens continent, dicant acidulas, & vel precario nomine inducti, sub earum potu lactis & ciborum cum hoc præparatorum usum, serio interdican. Et paucis interjectis *pag. 68.* ita pergit: *Quum plurimi etiam inter nos hoc detineamur præiudicio, non possum, quin confirmatius asseram, quod sæpius ob symptomata quædam accidentia, per totam martiatas aquis institutam curationem, vesperi exoptato cum effectu lac bibendum suaserim. Quin serius testor, plures martiatas aquas, non nisi admixta tertia lactis parte, ferre potuisse, cum lacte autem per plures hebdomades utilissime potasse. Solenne etiam est, ut sub usu Batheanarum, mane & vesperi asinum lac bibant, neque ego ea propter unquam lac bubulum potantibus prohibui, si modo alias illud concoquere potuerint.* Minus autem ex vero sunt, quæ addit, dum sibi inventionem hujus medica-

tionis tribuit, licet ad *Transact. Angl.* provocet, quibus jam *Anno 1713. vol. XXVIII.* hanc inferi curaverit. Notavit id jam in notis ad hunc libellum D. D. SEIPPIUS, Consiliarius & Medicus Pymontensis celeberrimus, qui cordate & aperte profitetur: me esse auctorem hujus inventi, & allegat dissertat. *de methodo examinandi aquas salubres* habitam Anno 1703. *de thermis Carolinis* editam 1705. nec non *de thermalium & acidularum ratione virtutum & ingredientium convenientia.* Anno 1712. publici juris factam, in quibus dilucide expositum & experimentis demonstratum sit: in thermis & acidulis eminere sal fixum alcalinum, cui præcipuus effectus & operatio in persanandis morbis, iisque chronicis, adscribenda sit. Et hanc sententiam, benevole scribit laudatus Dn. SEIPPIUS, postea clarissimi Germaniæ Medici, ceu veram & experientia convenientem, amplexi sunt. Neque ipse Cl. Dn. SLARE se has disputationes vidisse diffitetur, sed potius verba unius adducit, ac testatur, se auctoritatem & testimonium meum ceu Chymici & Medici peritissimi, absit ostentatio verbis, plurimum facere.

8. Inter alia plura vero experimenta, quæ alcalinam acidularum indolem luculenter evincunt, & ante triginta & quod excedit annos, cum pluribus Germaniæ acidulis, quas inter nominare possumus, Selteranas, Egranas, Pymontanas, Schwalbacenses, Antonianas, Schlangenbadenses, Buchenses & Wildungenenses, à nobis instituta sunt, inprimis hoc loco commemorabile est, quod cum omnibus acidis tam validioribus, ut spiritu vitrioli, nitri & salis, quam mitioribus, ut aceto, succo citri, vino Rhenano, soluto cremore tartari, confligant & effervescent, cum insigni bullularum prædeuntium copia. Quid? quod notatu dignum, acida illa fortissima & ipsa aqua fortis, his penitus obtunduntur & dulcescunt, sique liquores acidi insillati fuerint, pro horum differentia, post evaporationem varii generis magma seu massa remanet, ita, ut ex miscela spiritus vitrioli, tartarus vitriolatus, aquæ fortis, sive spiritus nitri, nitrum inflammabile; solutionis cremoris tartari, sal tartariforme solubile; concrecant. Ex quo proinde rectissime colligitur, aquas quascunque minerales, licet quædam nonnunquam falso pro acidulis venditentur, quæ non effervescent cum acidis & in sal neutrum migrant, acidularum nomen non mereri, eo quod alcali connubio non susceperunt, ut adeo acidulæ vulgo sic dictæ vocandæ essent alcalinæ, *alkalische spiritueuse Wasser.* Et utut non negandum sit, pluribus etiam sal neutrum inesse, tamen ne vestigium quidem acidi eminentis ullo modo in iis demonstrabile est, quo etiam fit, ut lacti affusæ, eidem neutiquam coagulum inducant, quod alias adjecto vel lenissimo acido, promptissime atque celeriter contingit.

9. Ex hisce jam dictis clarissime apparere arbitramur, ad corrigendas, immo intendendas lactis vires, non melius & convenientius ad curationem morborum, in quibus lactis usus indicatur & vulgo commendatur, dari medium, quam ejus mixtionem cum aquis medicatis, potissimum ita dictis acidulis, quas thermalibus, quæ pariter sale scatent alcalino, in hoc medicationis genere præferimus, quia majori copia elementi ætherii spirituosi, quod magnam efficaciam aquis insinuat, perfusæ sunt, & quod ab illis propter calorem facile aufugit. Etenim, sub hoc connubio, dum lac, liquor facile concrescens, cum subtili & elemento alcalino foeta lymphæ permiscetur, istud non tantum ab infesto in stomacho coagulo defenditur, verum etiam eximie diluitur, ut longe expeditius per exilissimos canalium alveos trajici, colatoria promte subire iterumque per excretoria, urinæ maxime & alvi secessum, exire possit. Deinceps, ipsa hac mixtura, lac ob salium, tam alcalium, quam nonnunquam mediorum accessum, præstabilem nanciscitur facultatem, resolventem, aperientem & abstergentem.

10. Porro, ubi lactis solius, ob metum coagulationis & obstructionis, ut in pulmonum infarctu & hypochondriacorum morbis, usus minus tutus est, nec non ubi ipsæ aquæ minerales, propter spirituosam, elasticam, & commoventem vim, item salinam acrimoniam, vel in nonnullis ob martiale constringens principium, uti in omnibus ex pulmonum vitio oriundis morbis, articularum & nervosarum partium doloribus, rosionibus, irritationibus & exulcerationibus, minus tuto propinquantur: ibi utique ambo amico connubio juncta in blandam, naturæ amicam, temperatissimam & securissimam medicinam coeunt. Denique etiam, in morbis omnibus, quibus lac asininum, vel serum lactis dulce accommodum est atque proficuum, hisce deficientibus, commodissime neque minus salubri effectu, substitui potest bubulum lac, si modo cum sufficienti foteriarum aquarum quantitate nuptum, usurpetur.

11. Sed, paulo specialius nunc expendendum, quibus maxime in morbis, quo tempore & quibus corporibus, aquarum mineralium cum lacte potus conveniat? & quinam etiam fontes, pro diversitate circumstantiarum, magis vel minus ad usum seligendi, sive commodiorem locum inveniant? Lustrabimus primum pectoris & maxime pulmonum morbos. In his præstantissimum esse lactis usum, experientiæ calculo & antiquissimorum medicinarum parentum auctoritate uberius constat, quorum testimonia in *dissert. de mirabili usu lactis asinini in medendo* adduxi ex HIPPOCRATE passim & maxime *lib. de intern. affect. cap. 4.* ex GALENO *de meth. medend. lib. V. cap. 12.* ARETÆO *de morb. chronic. lib. VII.* CELSO *lib. III. cap. 22.* TRALLIANO *lib. VII. p. m. 304. & 309.* PROSP. ALPINO *de medic. method. lib. IX. cap. 7.* De acidulis vero non eadem medentium est sententia, sed plurimorum potius opinio fert: easdem in pulmonum affectibus, præsertim phthisi & exulceratione, esse nocentissimas. Hinc etiam in commentariis medicis vix ac ne vix quidem relatum legimus, aquas minerales, ab ullo medentium in phthisi esse exhibitas. Unum è majoribus, quantum quidem novimus, excipimus Raymundum Jo. FORTIS, qui *Centur. II. cons. 20. 27. 28. 32.* & maxime 34. acidularum usum commendat, *adventante*, inquit, *tempore*, quo aquæ acidulæ in valle solis enascentes opportuna sunt, quæ pulmonum ulceribus saluberrimæ ac præstantissimæ à nobis quandoque fuerunt expertæ, ad easdem tanquam ad unicam sacram anchoram confugiendum consulimus; cui remedio si malum non cesserit, minus decoctis, lacti aliisque ejusdem facultatis cessurum fore arbitramur. Ex recentioribus MORTONUS medicatas aquas in pulmonum morbis salubres esse perhibet, *phthisiolog. p. m. 68.* si pulmones tumoribus steatomatosis, cum calore miti hæctico, obsessi, atque hoc pacto, scribit, plurimos phthisicos, multos annos harum aquarum usu, cum appetitus & virium restitutione, caloris hæctici & tussis minoratione, atque majori respirationis libertate, restitutos & sine ulla recidivatione sanos redditos, vidi.

12. Nos autem, licet in morbis, qui ex pulmonum vitio pendent, non facile minerales validioris indolis, stimulant, purgantes, terrestri ac martiali elemento eminenter imbutas, aut spirituosas nimis aquas, ut sunt Pyrmontanæ, Egranæ, Sedlicenses, & ex thermis Carolinæ, fervidissimi nempe communis fontis, suaserimus; frequenti tamen & multiplici experientia edocti, confirmatius testamur, eas, quæ mite obtinent ingenium ac temperatæ sunt, qua laude conspicuæ maxime Selteranæ, in tussi pectorali chronica, sicca & humida, hæmoptysi, dolore thoracis compressorio, tensivo, cum perpetuo ad tussim stimulo, spirandi angustia, calore lento, pulsu frequenti & languido corporisque contabescencia, quæ omnia phthiseos haud dubia sunt indicia, & insignem labem pulmonum, quod nempe vomitis, vel duris tuberculis, sæpe tandem in exulcerationem transeuntibus, obsessi, vel lento succo farti

sint, produnt, exoptatissimam & maxime præstabilem opem ferre, eoque præstabilior ac certior, si cum lacte caprillo, aut si hujus copia deest, vaccino, remisceantur. His enim ita amico consortio junctis, & prudenter ac sub debita vitæ victusque ratione usurpatis, ad expediendum in pulmonum tubulis infarctum, ad obstructiones referandas, tumores emolliendos, exulcerationes quoque abstergendas & consolidandas, & ad restituendum liberum sanguinis per pulmonum compagem com meatum, auxilium suppetit nullum præstantius, nullum præsentius. Multo magis vero lactis cum mineralibus aquis potus indicatur, quando hæc pulmonum vitia ab affectione hypochondriacæ, vel dyscrasia sanguinis scorbutica foveantur, eo quod in his hujus remedii tam excellens & omnibus indicationibus apprimè satisfaciens usus est, quam ullius mirifice dilaudati. Et certe in proclivi foret, plura de utroque in confirmationem luculenta adducere exempla, sed supervacuum & nimis longum fore putamus, his nobis fidem præstruere, & malumus, ut ipsi medentes saluberrimo magis effectu, quam nostra auctoritate convincantur, inprimis quum passim in scriptis meis ejusmodi casus exposuerim, è quibus hoc loco allegasse sufficiet descriptum in *medicina consultat.* de affectu spasmodico-hypochondriaco, hæmoptysi, doloribus vagis aliisque gravibus malis stipato.

13. Necessarium tamen est, ut sub hoc modo instituta curatione, pro differenti circumstantiarum ratione, alia accommoda medicamenta interponantur. Sic in hæmoptysi usurpandus pulvis temperans nitrosus, adhibenda pediluvia, & si corporis conditio fert, sanguinis missio instituenda. In tussi ex usu erit crocus, sperma ceti, oleum amygdalarum dulcium & syrupus violarum, atque ex his parati linctus. Ad consolidandos abscessus laudem meretur balsamum sulphuris temperatum, nec non balsamum pectorale Meibomianum. In vomitis & tuberculis egregium est decoctum ex scordio, symphyto majori, veronica, summitatibus millefolii, floribus hyperici, bellidis & fœniculo. Et quæ plura adhuc ipsum medentis subministrabit judicium. Porro, monendum est: nunquam nec lac, nec foterias aquas, utiles esse, ubi pulmonum jam evidens adest corruptio & ultimus febris hæcticæ gradus, vel ubi jam sudores colliquativi, diarrhœa vel tumores œdematosi funesti quid præsagiunt, sed tunc potius abstinendum est, ne præstantissimum hoc remedium perverso usu infametur. Præterea, phthisici & phthisico-hypochondriaci, non unum tantum mensem, sed aliquot potui insumere debent, sed eundem parcius & in minori quantitate repetere, recurrente præsertim tempore æstivo.

14. In tabescentia corporis viriumque languore cum lento & consumente calore, si non ex corruptione vel induratione visceris nobilioris originem traxerint, sed potius ex vitio primarum viarum & depravata digestionem, alvi nimia siccitate, ventriculo flatibus & spasmis referto, cura lactis, præsertim asinini, cum Selterano fonte permixti, præstantissimam fert opem. Confirmatum id habeo quam plurimis casibus, quorum unum recensui in *Medicina consultatoria* de Serenissima persona ab aliquot annis flatibus & alvi obstipatione, cum languore & debilitate universi corporis, nausea & anxietate præcordiorum, nec non calore volatico & corporis consumptione gravius affecta, quæ Selteranarum cum asinino lacte ad duos menses, interposito ad alvum subducendam Sedlicensis aquæ usu, extracto potu, ab omnibus, quibus affligebatur passionibus prorsus liberata est, ut universa natura inde penitus mutata videretur. Et nuperius admodum virgini generosæ quadragenaria jam majori, quæ aliquoties vehementi catarrhali febre, admissa incautius frigore, laborarat, nec amplius

plius cibum, nec potum propter ventriculi imbecillitatem ferre poterat, ac inter continuas fere anxietates lento contabescebat calore, lac asininum Selterano fontis nuptum, per duos menses usurpandum suasi, quo pristinum virium robur, appetentiam naturalem, faciliorem digestionem, somnum reficientem & sanum ac pleniorum corporis habitum recuperavit. Hæc enim nobilissima medicina non modo humorum biliosorum acrimoniam, nec non sulphurearum in sanguine partium, quæ motu intestino calido agitantur impetum contemperat atque refrænât, sed & partes solidas ipsasque tunicas intestinales, à spasmò nimis constrictas & rigidas, laxat, lubricat ac mulcet, æquabilem tonum iis reddit, ut tam alvus, quæ dura antea tensa & stricta erat, fluidior ac mobilior fiat, quam etiam ciborum appetentia eorumque digestio, melior reddatur.

15. Porro, in inveterata affectione spasmodica & hysterica, complicata cum lenta febre, virium prostratione, digestionem vitiata, saluberrimum quoque lactis mineralibus aquis sociati usum deprehendimus. Commemorari inprimis hoc loco meretur casus, quem elapso anno annotavimus in virgine Lipsiensi. Agebat hæc trigessimum circiter annum, & jam per duos annos immanibus spasmodis, doloribus abdominis, tractionibus artuum, præsertim circa tempus mensium, qui parci, cum maxima anxietate & inquietudine, bis vel ter quotidie divexabatur, cum alvi obstructione pertinacissima, adeo, ut non nisi intra quartum vel sextum diem, nec sine stimulo, secederet. Tentarat multa, sed frustra, ac tandem pathematibus diutius ferendis impar, ad placanda illa à Medico ordinario sumfit pulverem diaphoreticum absorbentem, cum duobus granis laudani hysterici remixtum, à quo conquieverunt quidem mox dolores, ut etiam somnum capere posset, repetebant tamen semper certis intervallis paroxysmi, ut aliquoties quotidie sopientem hunc pulverem, per totius anni & diutius spatium ingerere cogeretur, post momentaneum levamen, novum semper insultum pertimescens. Misera demum meum enixe efflagitavit auxilium, quare eidem, quum purgaretur ægrius, primum Sedlicensem aquam liberalius propinavi, à quo aliquoties deiecit, & postea Egranas cum lacte superioris anni autumnò per duos & quod excedit menses bibendas suasi, à quibus eximie levata & ab anxietate aliisque tormentis libera, ingruente vere ad Carolinas abiit, & usurpatis ibi thermalibus tam interius, quam exterius aquis, plenius cum sanitate in gratiam rediit. Eandem quoque in rem apprime notatu digna observatio inserta *medicinæ consultator.* de fœmina post febrim suppressam & puerperium dolore in dextro hypochondrio, flatibus, anxietatibus, mensium suppressione, ventriculi dolore, cum phlogosi & tabe detenta, quæ usurpatis cum lacte per aliquot septimanas Selteranis, adhibito simul exterius balneo, omnino convaleuit & vigori pristino est reddita.

16. Scilicet, lactis asinini vel alius cum medicatis amico sale imbutis aquis remixti, ea præcipua laus ac virtus est, ut blanda sua roscida ac emolliente humiditate efficacissime mulceat ac soletur strictas, duras & tensas fibras & tunicas, è quibus potissimum canales, qui fluida corporis nostri vehunt, coagmentati. His enim partibus præter naturam affectis, functiones universæ œconomiae animalis vitium capiunt, ut anxietates, inquietudines, dolores, virium jactura, excretionum naturalium suppressiones & calor præternaturalis, cum pulsu mutato, inæquali & celeriori corporisque tabescentia inde suam trahant originem. Quapropter, ad has passiones funditus abigendas, eo maxime Medici mentem & animum advertere in cura debent, ut in ejusmodi inveteratis atque in habitum quasi degenerantibus spasmodicis affectionibus, quæ vulgo hypochondriacæ, in fœminis hystericae audiunt, & quæ potissimum à vitio & præternaturali

statu nervosarum partium, quas inter maxime eminet ventriculus cum toto intestinorum volumine, originem fortiuntur, universum nervosum genus vigori suo, suæ temperiei & motui æquabili reddant, ac nimiam stricturam vel atoniam congruis remediis amoveant. Huic autem ex voto obtinendo, si quid aliud, certe lac aquatum cum debito regimine & exacta victus ratione diuturno satis tempore usurpatum, eximie inservit.

17. Accedunt mentis alienationes atque errores, cum depravata fortiori phantasia in melancholicis, & maniacis stipata. Hæ, quum proxime & principaliter membranarum cerebri, duræ præsertim matris, quæ ex fibris maxime, carneis & musculosis constructa, ac motu systaltico & diastaltico gaudet, quo circulum sanguinis per totum cerebrum, atque secretionem lymphæ spirituosæ ejusque influxum in nervos ac totum corpus moderatur, præternaturali affectione, præsertim tensione, rigiditate & aucta vi elastica, nitantur, ac contineantur, licet à vitio aliarum partium, præsertim affectione hypochondriaca, in abdomine sæpius foveantur; certe in horum morborum cura eo respiciendum maxime est, ut prava schesis & dispositio membranarum ad inordinatos & anomalos motus, convenientibus remediis tollatur, ipsæque ad statum naturalem reducantur, cui scopo exsequendo, non certius profecto suppetit auxilium, quam in lacte asinino, aut si hujus copia non est, bubulo aut caprillo, cum mineralibus aquis remixto.

18. Quum etiam sæpiissime hæc insaniam suscitentur à sale subtiliori caustico, nervosis partibus insidente, quod purpuræ materiam constituit & intra corpus remanens, convulsivas motiones atque mentis turbas inducit; ad acrimoniam sanguinis & humorum contemperandam ac diluendam, nil quoque convenientius est, hoc præsidio, quod utique, si à tali causa proficiuntur ejusmodi convulsivi motus cum insaniam juncti, omnibus aliis palmam præripit, prout infra pluribus patebit. Edocti porro experientia sumus, à cohibita iracundia mentem fuisse emotam nervosque præternaturaliter affectos, & propter excretionem per alvum & transpirationem suppressas, subtilem causticam acrimoniam, quæ nervosas sensibiles partes infestat, humoribus inductam, horum symptomatum causam exstuisse, quibus tollendis pariter nihil præstantius deprehendimus, lacte cum medicatis aquis aliquamdiu usurpato. Feliciter tamen etiam graves ejusmodi mentis morbos, si nec asininum lac, nec Selteranus fons haberi poterat, divina gratia solo lacte vaccino pingui ejusque cremore, decocto coffeæ vel infuso theiformi confuso, addito scrupulo nitri purificati, ad mensuram dimidiam quotidie, per duos menses & longius hausto, abegimus ac percuravimus.

19. Præterea, quia epilepsia & motus convulsivi artuum aspectu horribiles, fixam etiam suam sedem atque domicilium in membranis cerebri & spinalis medullæ, quæ nonnisi ex cerebro continuatæ, obtinent, & ab earum motu systaltico & diastaltico plane depravato & inæquabili reddito subnascuntur: in proclivi est judicare, quod diris hisce & gravissimis afflictionibus levandis & submovendis, non accommodatius nec efficacius inveniri possit præsidium, quam nostra hæc toties laudata medicina, infestam stricturam laxans, nervosas membranas mulcens ac firmans & noxium recurrentium insultum somitem sensim è corpore proscribens. Confirmatur hæc saluberrima virtus exemplo quam maxime memorabili, quod retuli in *med. consult.* pueri, qui affectu spasmodico-convulsivo, gravibus & diris symptomatibus stipato, aliquandiu gravissime afflictus, hoc demum remedio diutius adhibito, non neglectis aliis congruis præsidiis, penitus ab eodem liberatus est, & jam sanus ac incolumis degit.

20. In doloribus articulorum, siue sint in manibus, siue

sive pedibus, genuum ligamentis, dentibus, aut vertebrae dorsalibus, quando primæ viæ prius à colluvie vitioforum acido-bilioforum humorum purgatæ fuerunt, tam ipso usu, quam Veterum experientia summopere commendabile est lac asininum, vel serum lactis, de quo in superius allegatis dissertationibus testes produxi HIPPOCRATEM, CELSUM, PLINIUM, DIOSCORIDEM aliosque, & ex recentioribus *Sachsium* à LEWENHEIM in M.N.C. PECHLINUM, DOLÆUM & WALDSCHMIDIUM. Longe vero certius, tutius & præstantius hoc remedium evadit, quando lacti admiscetur mineralis aqua, pro diversa circumstantiarum morbi & individui ratione, vel mitior & lenior, ut Selterana, vel paulo validioris naturæ, ut Pyrmontensis, Egrana, Schwalbacensis, ita quidem, ut non tantum præservationis causa, verno vel æstivo tempore, ejusmodi cura, ad duos minimum menses continuari, sed etiam ipso in paroxysmo ad aliquot mensuras quotidie utilissime institui possit. Dici enim vix potest, quanta in paroxysmis podagricorum, quibus plerumque febris lenta, quæ speciem catarrhalis mentitur, jungitur, humorum sit acrimonia, intestina sanguinis & febrili humorum exæstuatione, ex destructa eorum debita crasi evoluta, quæ in sudoribus, sedibus, urina & foetidis sub perspiratione exhalantibus effluviis ipsisque doloribus ac spasmis, sese abunde manifestat. Ad hanc itaque eluendam opus est copioso diluente & temperante potu, neque huc usque hunc in finem immerito commendata fuerunt decocta ex lignis & radicibus temperatioribus, china, sarsaparilla, scorzonera, liquiritia, ligno sassafras præparata, & largius quotidie, adjecta sufficienti quantitate salis tartari aut nitri purificati, hausta; modo omitantur ex hoc decocto, quæ descriptio habet, hermodactyli & lignum guajacum. Commodissime autem, quin cum melioribus ægrorum rebus huic substitui potest lac asininum vel caprillum, eodem quo diximus modo aquatum & usurpatum, id quod multoties saluberrimo cum effectu præstiri. Inprimis nuperime nobili cuidam Varisco, doloribus podagricis & ischiadicis acrius afflicto, Egranum fontem cum lacte bubulo bibendum suasi, qui eodem per menses duos poto, ita se levatum sensit, ut novum alacris iniret conjugium. Et in Saxonia illustrissima fœmina Comes, diu excruciatâ fuerat doloribus artuum vagis, cum macie universi corporis, ex dyscrasia valde scorbutica, quam pariter lacte asinino Selteranis nupto, alvo prius laxante mannato subducta, interpositis simul balneis ex aqua dulci & lacte paratis, elapso vere ad sanitatem reduxi, ut vires cum appetentia augerentur, somnus redderetur placidior, internus calor extingueretur, ipsaque caro renasceretur & corpus fieret habitus.

21. Neque etiam hoc loco prætereundus est morbus ante quinquaginta annos fere incognitus, nostro vero hoc tempore admodum familiaris & fere pandemicus, qui purpuræ scorbuticæ nomine Medicis notus, varie homines miris symptomatibus excruciat, vires prosterndo, appetentiam & somnum auferendo, junctis interdum anxietatibus internis, cum extremorum frigore & insomniis terrificis. Difficillime hic affectus penitus extirpatur, sed facile recurrit, nisi seminum, seu fermentum, quod mire sese multiplicando, ipsum chylum inficit & universam humorum massam simili labe imbuit, exterminetur. Præstitimus id fortunate DEO huc usque sæpius feliciter, per lac, aut asininum, aut bubulum, cum Selterano, vel Egrano fonte permixtum, dextre & cum debito regimine ad duos vel tres menses usurpatum, quo infestum hoc miasma atque fermentum obtusum, elotum, eodemque per urinæ & sudoris colatoria maxime proscripto, corpus à perniciali hoste liberatum est. Obversatur adhuc animo notabile exemplum fœminæ nobilis, in vicina quadam celebri urbe degentis, quæ per triennium chronica hac purpura, cum colica convulsiva & alvi

obstructione conflictata fuerat, ex usu vero hujus nostri remedii, usurpato postea Lauchstadiensi balneo, interpositis simul pulvere bezoardico, præcipitante & liquore anodyno minerali, repetita insequentibus tribus annis hac cura, integram recuperavit valetudinem, & jam immunis à refractario morbo vivit.

22. Denique, de singulari & eximio usu hujus à nobis commendati remedii, in intestinorum affectibus, diarrhœa & dysenteria quædam dicenda restant. Quam graviter & moleste, nec sine periculo, præsertim si epidemica sint, hæc mala homines affligant, & vires innumeris sedibus exhauriant, pro dolor! præsens jam tempus, quo intestinalis hæc lues grassatur, testatum facit. Pauca vero profecto reperiuntur auxilia, quibus tuto certam laudabilis effectus spem tribuere possimus. Si tamen ex numerosis adversus hunc morbum quæ dilaudentur remediis, ullum spei respondet, certe est lactis vaccini cum Selteranis tepidus potus, nisi maligna & venenata morbi qualitas ipsaque febris interdicit. Dum enim in his cum acerbis dolorum tormentis stipatis alvi fluxibus, succi biliosi acerrimi intestina obsident, quin sub iisdem ex universo corpore quod falsum & acre ad hunc canalem confluit, & sensibiles membranas gravius afficiendo, alvum ad creberrimas dejectiones sollicitat; laudatissima certe tam lactis, quam aquarum mineralium est virtus, dum illud acrimoniam involvit ac contemperat, intestina, deliniendo latera, ab arrosione munit & stricuras dolorificas mulcet, hæc autem copia humoris sui acredinem intus contentam diluunt & dilutam sine noxa simul evehunt.

23. Notarunt id jam Veteres nostrique majores, ideoque lactis & medicatarum aquarum usus in eorundem scriptis ad dysenterias & diarrhœas passim celebratur. De lacte unus in confirmationem sufficere potest HIPPOCRATIS locus, quo *lib. VII. Epidem.* testatur: se lac caprillum cum quinta aquæ parte remixtum utiliter potui in dysenterico fluxu dedisse. Et VALESIIUS *comment. in lib. II. Epid. pag. 193. lactis*, inquit, *quatuor partes, cum aquæ duabus mixtæ, immixtis lapillis ignitis, aut ignito ferro, usque ad consumptionem tertiæ partis, sunt magni usus in dysenteria & omni fluxione, quam succorum mordacitas peperit.* Serum quoque lactis BAGLIVUS & SYDENHAM mirifice commendarunt, quod etiam hodiernum in Suevia communissimi & probatissimi ad dysenterias sanandas, tantum non inter omnes est usus. Non minus de mineralibus aquis luculenta prostant testimonia apud RIVERIUM *Cent. II. obs. 49.* testatur, in dejectione alvi dolorifica subrubra, colorem hepatis referente & interdum purulenta, usum aquarum thermalium ad triduum continuatum, fuisse saluberrimum. Et *obs. 64.* in diarrhœa inveterata thermas Balerucas utilissimas fuisse notabili docet exemplo. Idem de salutari thermalium aquarum in dysenteria potu adstruunt præter MEERMANNUM *consult. XXV. lib. III. M. N. C. Dec. II. A. X. obs. 29.* nec non FALLOPIUS *de therm. cap. XI.* Inprimis autem FABR. ab AQUAPENDENTE inter omnia medicamenta quæ ore assumuntur, aquas thermas frigidas, B. nempe Virginis Lucenses, Calderianas, præstantissimas esse perhibet, *medic. præct. lib. III. cap. 51.* ac fidem facit, se frequenter vidisse, multos juvenes, pueros ac senes dysentericos, qui alia remedia frustra usurparant, repropemodum conclamata, unico hoc auxilio, quod mirandum, fuisse sanatos. Hinc etiam ratio patet, quare SPONIUS *in aphorism. n. v. pag. 388.* confidenter admodum perhibeat: in dysenteria & diarrhœa aquam calcis vivæ, cum lacte aut sero lactis potam, mira præstare.

24. Nos itaque ex quo vergente hac æstate dysenterici, aliique alvi fluxus hic & in vicinis urbibus ac vicis populariter grassari coeperunt, summo, quotiescunque occasio tulit, cum fructu, ægris Selteranum fontem cum dimidia lactis parte remixtum calide liberalius bibendum

bibendum injunximus, eoque id effecimus, ut dolores cum tenesmo remitterent, tormina placarentur tandemque imminutis dejectionibus, alvus ad naturalem secessum rediret. Si vero copia mineralis hujus aquæ defuit, non minori cum utilitate infusum summitatum millefolii & florum chamomillæ cum semine carvi lacti admixtum, largius potui præbuimus; licet his non omnem penitus absolverimus curam, sed simul præter pulveres absorbentes ac temperantes, ea dederimus, quæ affecta acrius intestina solantur, dolores tantisper mitigant, acres subtiles sordes leniter ad corporis corticem amandant tandemque prostratum intestinorum robur fulciunt ac firmant, non omisis externis proficuis præsiidiis, clysteribus ac emollientibus maxime fotibus.

25. Brevibus sic expositis omnibus morbis, quibus lactis cum acidulis potus accommodus est atque proficuus; superest, ut modum dextre præstantissimo hoc valetudinis auxilio utendi tradamus, quem proinde monitis nonnullis complecti utile visum est.

I. Commodissime itaque potatio instituitur per totum veris & æstatis decursum, nec non primum autumnii mensem usque ad octobrem; si res tamen & necessitas urgeat, etiam brumali tempore, in moderatiori tamen dosi & cum majori cautione, in hypocausto calefacto bibere poterunt ægri.

II. Antequam vero inchoetur potus, si plethora urget, ut in omni medicatione facilitanda, sic & in hac, sanguis exundans, qui liberiori progressui & excretionum successui obsistit, tempestiva missione imminuendus est; quod etiam cum bonis ægrorum rebus fieri potest, si materia purpuræ intus delitescit, cujus expulsio ob nimiam sanguinis molem & turgescientiam ad corporis habitum impeditur. Quin immo, media quandoque in cura, summa cum euphoria venam incidi jussi.

III. Pariter expedit primas vias à cruditatibus & colluvie vitiosorum humorum deplere, quod tamen laxante clementi peragendum, quum experientia edocti simus, nihil magis felici successui curæ obesse, quam acriori purgante statim in principio tonum ventriculi & intestinorum dejicere. Apprime autem huic intentioni satisfaciet infusum mannatum, sumendo uncias duas vel tres mannæ & salis abstersivi drachmam unam; nec non passulæ minores, ad uncias quatuor cum rhabarbari drachma una & dimidia decoctæ, additis aliquot olei carminativi, vel de cedro, guttis, vel denique aqua Sedlicensis purgans, sufficienti dosi pota.

IV. Tempus potationi quam maxime quidem accommodum est matutinum, quo vacuo stomacho, sine offensa succedit operatio: interim tamen pro circumstantiarum ratione potest etiam vespertinis horis potus repeti, pariori tamen dosi, & digestionem peracta.

V. Ipsa potatio ita instituat, ut vel lac calidum acidulis confundatur, vel mixtis lacti acidulis, ambo vasi calida aqua repleto immittantur, quo tepescant, & sic successively, intra quartam aut dimidiam horæ partem, assumantur.

VI. Qua vero portione lac aquæ sit adjiciendum exacte definire non licet, sed medentis judicio merito relinquitur. Nonnunquam enim lacti tripla, nonnunquam dupla, nonnunquam etiam æqualis aquæ pars affundenda, prout nempe intentio vel diluens tantum & magis excretoria, vel nutriens simul & mulcens explenda.

VII. Dosis lactis ita aquati, una vice capienda, adultis sint tres vel quatuor libræ, ætate minoribus, minor: si autem & mane & vesperti bibendum, matutinus po-

tus libras duas aut tres, vespertinus unam, aut unam cum dimidia attingat.

VIII. Quamdiu porro curæ insistendum, ipse successus morbiq; decrementum monstrabit; in genere tamen tenendum: diutius paulo hujus remedii usum, & minimum ad duos menses, esse extrahendum, eo quod blande & leniter operationem exsequitur & longos morbos longo usu domat.

IX. Sub ipsa cura abstinendum ab omni cerevisia, quæ raro in morbis utilis deprehenditur, sed vel decoctum usurpandum, vel ptisana potui danda, cum pauxillo vini Burgundici, aut veteris Rhenani. Nos plerumque bibentibus suademus, ut Selteranas cum quarta parte vini Rhenani, vel Mosellani optimi, permixtas, ad potum usurpent.

X. Ad roborandum ventriculum & cruditates præscindendas, in prandio, vel post illud, elixir stomachicum, essentia corticum aurantium, aut elixir amarum balsamicum, cum lixivio paratum, ex vino & aqua convenienti in dosi exhiberi poterit.

XI. Si eminens adest succorum impuritas & acrimonia, ut in scorbuticis, purpuratis aliisque, ad hanc eo promptius subigendam & contemperandam, utile est, vesperti circa horam somni, pulverem præcipitantem nitrosum cum aqua analeptica offerre.

XII. Fugiendæ autem sub potu omnes animi perturbationes, vitandi difficilioris solutionis cibi, acidi quoque & qui ex vegetabilibus non coctis apparantur. Corpus horis pomeridianis equitatione, vectura, ambulatione, digestionem peracta, moderate exercendum, nunquam vero auræ vespertinæ & frigidiori exponendum.

XIII. Quando octo, decem, aut quatuordecim dies potationi indulsumus, alvus, imprimis si officii tantisper obliviscatur, per superius exposita laxantia subducenda: & perducta penitus ad finem curatione, itidem intestina à reliquiis sunt perpurganda, id quod commodissime pilulis polychrestis nostris balsamicis, vesperti & mane sumtis, perficitur.

XIV. Quod si autem ventriculus lactis usum plane ferre nequeat, & diu nimis potui vini vel cerevisiæ spirituosæ assuetus sit; præstat abstinere à lacte, & solam aquam minalem bibere: notandum tamen, quod ii, qui à lactis usu abhorrent, semper facilius concoscere possint asininum, quam aliud.

XV. Consultum quoque & utile deprehendimus in his, quorum ventriculus lactis potum ægre admittit, per unam vel alteram hebdomadam aquæ mineralis solius potum suadere, his vero exactis, demum lac admiscere, hanc potissimum ob causam, quo aquæ ministerio, acidi, qui lac facile cogunt, succi prima ex regione eluantur, & exilia lacteorum oscula lento mucos obfessa abstergantur & aperiantur, ut sic ad sanguinis massam promptius pertingere possit lac medicatum.

XVI. Tenerioribus denique & delicatioribus in lecto ut biberent injunximus; id quod etiam aliis utiliter poterit concedi; quandoquidem calefacto æqualiter toto corpore, ingessus humor facilius per primas vias, ventriculum & intestina transit, excretio quoque per cutis spiracula & urinam expeditius succedit.

26. Hæc itaque sunt, quæ de connubio aquarum mineralium cum lacte longe saluberrimo afferre animus fuit. Et quum de singulis ad specialem usum referendis præceptiones tradere plane non sit integrum, ipsum exquisitum medentis judicium accedat necesse est, quo peculiaribus circumstantiis dicta à nobis accommodentur. Deus autem inexhaustus salutis fons, ut commendatum hoc à nobis sanitatis præsidium quamplurimis in certam cedat salutem, largiatur quam clementissime.

DE FONTIS SPADANI ET SCHWALBACENSIS CONVENIENTIA.

Q. D. B. V.

§. I.

Acidularum, quæ passim in Germania nostra scaturiunt, non eadem est natura, neque eadem ad morbos, tam avertendos, quam abigendos, efficacia, sed magna diversitas, & ratione elementorum æque ac virium discrepantia. Ut igitur de omnibus eo melius constaret sigillatim, foret omnino operæ pretium, si qualibet ipsarum haberet, qui meritis laudibus in ægrotantium salutem præstantiam medentibus commendarent, & nativas dotes cum memoratu dignis observationibus prosequerentur, atque plenius exponerent.

§. II. Veteres quidem, & adhuc ante triginta annos Medicorum cæteroquin doctorum plurimi, foteriorum, & calidorum, & frigidorum fontium, sive thermarum & acidularum, vera & genuina principia ignorarunt. Plerique potius, qui de medicatis aquis in lucem scripta ediderunt, peregrina, aliena planè & naturæ humanæ prorsus infensa, non amica, ex metallis pariter & mineralibus, saliumque bituminumque familia effinxerunt agendi elementa numero plurima, è quibus vix unum reperire, vel demonstrare est integrum. Non tamen mirum, adeo hallucinatos esse priuscos, quia philosophiæ chymicæ & experimentalis cognitio ipsos præterit, cujus solius beneficio, ea quæ medico usui serviunt, explorari, ipsorumque contenta erui possunt.

§. III. Inprimis hoc ex fonte repetendum, quod olim crediderunt, & adhuc plurimi recentioris ævi credunt, minerales medicatas aquas, acidum quoddam elementum ac spiritum custodire, unde ipsis etiam acidularum nomen impositum. Sed primus utique inter omnes, jam ante aliquot lustra multis & claris argumentis demonstravi, ne minimum quidem acidi, sive spirituosi, sive fixioris, sed potius acido contrarium, alcalini nempe quippiam, in acidulis perperam sic dictis reperiri, eo quod alcalinorum est proprium, ut cum acido quovis affuso conflictum edant, ac lacti commixta illud non coagulent, id quod utrumque præstant acidulæ. Dein facta ulteriori indagine, aliquot postea dissertationibus, insignem illam, quæ inter acidulas & thermas intercedit convenientiam, publice docui, & asserui: thermas nihil aliud esse quam acidulas, intra terræ penetralia calefactas, eaque propter cum bonis ægrotantium rebus acidulas frigidas, moderato igne tepefactas, loco thermarum, tam interne, quam externe posse usurpari. Neque minus experimentis cum plurimis medicatis in Germania scaturientibus aquis institutis perspexi ac demonstravi, præter salinum ac terreum crassius elementum, inesse salubribus aquis spiritum quendam æthereum, volatilem, mineralem, ab eoque potissimam ipsarum virtutem esse arcessendam, adeo, ut hoc dissipato, vel in auras avolante, & sapor, & vis medicinalis præcipua mox exspiret.

§. IV. Quæ quamvis ita sint, neutiquam tamen negandum, conspicuam etiam esse inter minerales medicatas aquas differentiam, modo majorem, modo minorem. Aliæ quippe plus, aliæ minus spirituosæ purissimi & ætherei principii; aliæ vitriolici vo-

Frid. Hoffmanni Oper. Tom. V.

latis, martialis elementi aliquid, vel nihil recondunt; aliæ subtiliorem ac leviolem, aliæ rudiorem & graviorem, ob calcariam, vel ochream terram admixtam, vehunt aquam. Quæ ingredientium & mixturæ diversitas, diversas dein facit vires operationemque aliam atque aliam. Quare à circumspèctis & rebus suis satagentibus Medicis exacte merito pernoscenda hæc differentia, quo in tam discrepante corporum, naturarum & morborum quoque indole, cum certa ratione dare queant consilium, quanam ex foteriis aquis, magis, vel minus, singulis convenient.

§. V. Dedi quidem & inculcavi utilissima hanc in rem monita passim in scriptis nostris, quæ qui rite observat, ejus consilia certe non cadent in irritum. Ut tamen specialius paulo constaret, qua ratione comparatio instituenda & differentia æque, ac convenientia inter minerales aquas eruenda; placuit jam sistere celebratissimas binas acidulas, Spadanas scilicet & Schwalbacenses. Utriusque enim hujus foteriæ aquæ genuinæ ac optime conservatæ copiam fecit haud ita pridem Dn. HOCHHEIMER, mercator Lipsiensis integerrimus, & nos utramque examini curate subjecimus. In quo quid observavimus, quid de viribus & usu ceniendum, exponemus candide, quo medentes eo certiores reddantur, quibus ægris, quibus in morbis, & qua methodo usui sint acidulæ hæ nobilissimæ.

§. VI. Prius vero, quam nostra in examine Spadanarum & Schwalbacensium instituta experimenta promamus, haud abs re erit dispicere, quæ ipsis alii adscripserunt elementa. De Spadanis quidem edidit anno MDCCXIX. gallico idiomate tractatum NESSELIUS, Medicinæ Doctor & Senator Leodiensis, in quo & multa & varia ipsis inesse putat principia. Autumat enim easdem custodire quippiam martialis, eo quod canalium, per quos decurrunt, & vasorum in quibus aliquamdiu stant, fundo atque lateribus, flavum sedimentum, quod vulgo ochram vocant, apponant. Id vero non quidem negandum, sed commune est omnibus ferme thermis & acidulis, ut in locis, ubi scaturiunt, atque etiam in canalibus quos perlunt, terrestrem flavi coloris materiam deponant; ita tamen ut ab aliis id majori, ab aliis minori copia fiat.

§. VII. Idem porro auctor vult Spadanis inesse martiale vitriolum, ejusque in confirmationem provocat ad sorem. Verum, nos nunquam, neque ex acidulis, neque ex thermis, verum martis vitriolum educere, neque illud per evaporationem, neque per atramentosum adjectis gallis, colorem, deprehendere potuimus. Atque etiam in Spadanarum examine idem nobis accidit, quippe quæ insperso gallarum pulvere, non nigrum, sed tantum colorem ex bruno rufescentem exhibuerunt. Neque tamen color hic, ut in aliis quoque acidulis accidere solet, perpetuus est, sed si aqua in liberiore aëre steterit aliquamdiu, non amplius comparet. Quod haud fallaci est indicio, genuinum vitriolum, quale est nativum, vel artificiale, ex vitrioli spiritu ac limatura martis paratum, minime in hisce aquis recondi. Quod autem sapor acutus, vitriolici quippiam mentiatur, id dubio procul principii subtilioris terreo-martialis & spiritus mineralis ætherei connubio tribuendum.

§. VIII. Porro nitrum vehere Spadanas aquas

V

tradit

tradit NESSELIUS. At nitrum, cuius character inflammabilitas, ut ita loquamur, & fulminatio, nequam est nativum, neque in subterraneis locis, ut ab aquis forberi posset, reperitur, sed sal potius est aëreum, ex acido catholico, in aëre circumvecto, intine cum terra subtiliori alcalino-sulphureo maritato genitum, nec ullas unquam fontanas aquas, ut communis fert opinio, ingreditur. Ut mittamus ejusdem commatis asserta, quo aluminis, sulphuris & cerussæ contagio infectas esse nostras comminiscitur.

§. IX. Sic quidem satis multus est auctor hic in elementis Spadanarum nominandis, sed sterilis plane in iisdem per chymico-mechanica experimenta demonstrandis. Argumenta potius, quibus sententiam suam probare nititur, redeunt ad conjecturam, & ex operationibus ac diversis effectibus sunt desumpta, quibus etiam ante ipsum egregii alii viri, quos advocat testes, usi fuerunt. Scilicet observatum fuerat, acidulas nostras adstringentem & roborantem, nec non excretionem sistentem facultatem possidere. Hinc alumen ipsis inesse crediderunt, quod virtute pollet eadem. Observant, hanc aquam vim habere calefaciendi & cum fructu in morbis frigidis, & personis natura phlegmaticis usurpari, quare sulphur ipsi inesse conjecerunt. Noverant per experientiam, Spadanas in morbis à bile ortis nimium æstum restringere; eundem vero etiam effectum nitrum præstare: unde hoc illis inesse bona fide crediderunt. Vitriolum vero & ferrum omnibus fere foteriis fontibus inesse voluerunt Majores, inducti virtute eorundem roborante & aperiente, qua excretionem per alvum, urinam & sudorem promovendo & obstructa expediendo, in gravibus chronicis morbis opem ferunt incomparabilem.

§. X. Non melior fuit Schwalbacensium fors. Harum enim utilitas spectatissima jam pridem inclaruit, & longius quam ante centum annos in medicum tractæ sunt usum. Nec defuerunt, qui de iis scripto aliquid consignerunt, inter quos primas fert Jo. DANIEL HORSTIUS. Sed quicquid de salutari hoc latice differunt, eodem infirmo conjecturæ & ab effectu tantum desumpto fundamento nititur. Nimirum quia hæc aqua pro diversitate corporum ac morborum refrigerat, exsiccat, adstringit & calefacit, ferrum, vitriolum, ochram, sulphur, alumen, sal fossile, nitrum, in ipsius sinu hospitari, sine ullo experimento, & inde ducta demonstratione, perhibent ac salutaris effectus causam ab imaginariis hisce elementis repetunt.

§. XI. Nos igitur, relictis ducibus hisce, viam ingressi sumus aliam, & per instituta tentamina varia, chymica & mechanica, in genuina horum fontium agendi principia cum cura inquisivimus. Quo perspectum habuimus, ne ullum quidem ex allegatis ingredientibus, iisdem inesse revera, sed longe aliis præstabilem ipsarum virtutem in acceptis esse ferendam. Simul etiam innotuit, magnam Spadanis cum Schwalbacensibus esse convenientiam, qualem sovent aliæ nullæ, & ob id eo magis notandam.

§. XII. Primum, quod adornavimus tentamen, fuit ponderatio. Levitatem enim & subtilitatem aquæ nosse, est in examine palmarium, magnumque ad dignoscendam salubritatem fert momentum. Replevimus hunc in finem vitrum satis capax aqua pluviali, id lanci exquisitæ imposuimus, & vidimus, vitrum cum aqua gravitatem habere novem unciarum, drachmarum sex & granorum sedecim. Eidem dein vitro, ad eandem altitudinem, infudimus fontanam aquam, in area ædium nostrarum scaturientem, eadem lance libravimus & notavimus pondus novem unciarum, sex drachmarum & triginta sex granorum. Tam eodem modo expendimus in balance Schwalba-

centem mineralem aquam, ac observavimus, eandem idem pondus drachmarum & unciarum, sed granominus aquare, quam cœlestem. Et in Spadanæ demum ponderatione, eadem prorsus, quam quæ in Schwalbacensis, fuerunt notata. Ut adeo pateat, utramque aquam bonitatis indicem egregium ferre levitatem tantam, quæ uno grano superat ipsam pluvialem, fontanam communem vero viginti uno granis.

§. XIII. Aliud dein adhibuimus ad examen gravitatis instrumentum, à nobis inventum, ad explorandum salis, vel sacchari in aqua communi contenti pondus. Hoc ita fabrefactum, ut in aqua pluviali purissima penitus ferme submergatur, in aliis vero differentiam monstret insculptæ drachmæ ac lineæ. Nimirum, si aquæ puræ libræ inditur sacchari aut salis drachma, immissus in eam hydrometer eminet, ut conspectui offerat punctum drachmæ, si plus, ascendit altius, sin minus, mergitur. Hanc stateram etiam immisimus Schwalbacensi, ex lagena exacte obturata, nihilque vacui habente, desumptæ & in conspectum venerunt drachmæ duæ. Sumimus etiam ex lagena, quæ ante hebdomadem aperta sic non prorsus plena seposita fuerat, eandem hanc mineralem aquam, saporis non amplius adeo acuti, in qua staticum instrumentum ad drachmam unam & aliquot lineas submersum. In Spadana recenter ex plena lagena effusa, statera erecta est ad drachmam; in ea quæ aliquot dies steterat in aëre libero, tantum ad duas tertias drachmæ. Aqua vero fontana eodem instrumento explorata drachmæ unius gravitatem in libra exhibuit.

§. XIV. Hæc duplici modo instituta experimenta statica, sibi invicem videntur esse contraria. Priori enim ratione nostræ minerales aquæ leviores fuerunt fontana, posteriori graviores. Verum jam pridem id notavi, atque etiam hujus differentię subinde memini. Nec causa singularis hujus phænomeni adeo occulta. Videlicet subtile illud spirituosum elementum, quod minerales aquas incolit, elastica est & expansivæ indolis. Elater autem, seu elastica vis, uti quamplurimis physicis, pneumaticis & aërometricis experimentis constat, æqualis est motui gravitatis, seu ponderi. Atque adeo elastica & expansiva virtus ætherei in aqua principii, eodem modo hydrometricam lancem sursum urget, ac materia salina vel terrea gravitatem concilians, ejusdem descensum impedit. Unde quo magis minerales ejusmodi & spirituosæ aquæ stateram elevant, eo subtiliores sunt coque meliores, licet gravitatem mentiantur. Vicissim, quo minus spirituosum hoc elemento imbutæ descensum impediunt, eo rudiores minusque salubres censendæ, quamvis videantur esse leviores.

§. XV. Sed pergendum in examine. Si sapore explorantur, & Spadanæ, & Schwalbacenses exhibent acutum; sed illæ magis ad vitriolicam quandam constrictionem accedunt; hæ autem penetrantiores, quia plus spirituosi elementi custodiunt, quo etiam fit, ut non secus ac vinum odore nares ferire soleant, & ob id vernacula audiant *der Wein-Brumen*. Color utriusque aquæ pellucidus est atque perspicuus. Quam vero mutationem inspersis gallis subeat, dictum supra §. VII.

§. XVI. Per mixturam reagentium observavimus hæc. Neque salis tartari solutio, neque spiritus salis ammoniaci urinosus, Spadanis æque ac Schwalbacensibus instillata, ullam, tam in colore, quam consistentia, ipsis inducunt mutationem. Idem accidit commixta sublimati mercurii, lunæ & saturni sacchari solutione. Quod indicio est, nihil calcarii aut salis communis ipsis inesse; quandoquidem si quippiam inest, ad horum reagentium mixturam, aqua illico turbatur, lactescit & nonnihil sedimenti ad fundum dimittit.

dimittit, uti quidem factum cum aqua fontana communiantine, accidit. Quod si autem hæ aquæ aliquamdiu steterunt in aëre apertæ & spirituosum subtile elementum aufugit, confusum tartari per deliquium parato oleo, nec non lunæ liquamine, pellucidam faciem deponunt & lactescentem colorem exhibent.

§. XVII. Violarum syrupus, qui certissimus salis tam acidi, quam alcalini, in aquis proditor, si Schwalbacensi commiscetur, nitidam viridescentem exhibet tincturam, luculento testimonio, hospitari in ipsis alcali. Sed Spadanæ colorem syrupi non mutant. Neque etiam si Schwalbacensibus aëri expositis aliquamdiu & spiritu orbis immittitur, viridis amplius emergit color, sed natus violaceus manet. Ex quo merito concludendum, alcalinum principium una cum spirituofo in aëre destrui.

§. XVIII. Admixtis aquis hisce acidis liquoribus, oboritur pugna. Schwalbacenses quidem cum vini aceto forti valde effervescent & bullulas rejiciunt copiosissimas. Infuso Rhenano vino, nec non Mosellano, conflictus idem fere est, non ita à vitrioli spiritu. Spadanæ hisce commixtæ, etiam quidem effervescent, non tamen tam valide, neque tam copiose bullulas emittunt. Ubi vero dissipato minerali spiritu instituitur experimentum, vix ac ne vix quidem pugna observatur ac effervescencia.

§. XIX. Cum lacte promte ineunt connubium aquæ nostræ. Neque etiam lac hac mixtura densatur in coagulum, sed potius tenuius longe redditur ac fluidius. Quo aperissime erroris arguitur illorum opinio, qui acidum mineralibus hisce aquis inesse putant principium, ac ob id sub earum potu, ut lacticia in victu vitentur, serio præcipiunt.

§. XX. Atque sic se gesserunt foteriæ nostræ aquæ in examine per reagentia. Quo abioluto, perreximus ad eruenda ea, quæ ignis ministerio educuntur. Sumimus hunc in finem sedecim uncias, sive libram civilis ponderis aquæ Spadanæ, eandemque indidimus patinæ stannæ, subdidimus lenem carbonum ignem, & dissipato in auras humido, obtinuimus pulverem ficcum terreo-salinum, grana decem pondere æquantem. Idem dein experimentum eodem modo adornavimus cum Schwalbacensi, ac idem quoque materiæ resistentis pondus habuimus, ea tamen cum differentia, quod hoc residuum magis flavesceret, & martialis subtilis terræ indicium ferret, quam quod ex Spadanis manserat.

§. XXI. Resistentem hanc post exhalationem materiam fixiorem, terrestrem, salinæ indolis aqua irroravimus, spiritum vitrioli instillavimus & observavimus fermentativum quasi cum bullulis & conflictu motum. Quo composito, aliam portionem residui aqua diluimus & affudimus violarum syrupum, ac viridis in conspectum venit color. E quibus haud fallax capiendum indicium, inesse huic residuo quippiam terræ salinæ ad alcalinam indolem accedentis. Alii hujus cramatis portioni affudimus vitrioli oleum, ut videremus, an post ebullitionem vapor albus ascenderet, uti fieri solet, si communi sali adjicitur hoc oleum. Sed observavimus nihil, eoque compertum habuimus, ne quicquam salis communis in harum aquarum sinu delitescere, quod tamen alias satis accidit frequenter Selteranis, Antonianis, Egranis & Wisbadensibus aliisque foteriis undis.

§. XXII. Ex omnibus igitur hisce curate factis & notatis experimentis patescit abunde, nostras acidulas levitate, subtilitate ac puritate, plures, immo potissimas Germaniæ salubres aquas superare longissime. Neque enim multum terræ ochreæ, alcalinæ, neque multum salis fixi, aut calcarii amari, aut culinaris habere; quod tamen alias thermæ & frigidas minerales aquas redundantius incolit, Sedlicenses, Egra-

nas, Wisbadenses, Selteranas ac Pymontanas. Præcipuum potius quo operationem suam exsequuntur elementum, est delibatissimum, æthereæ, expansivæ & volatilis indolis spiritus, qui medicatarum aquarum quasi anima, à quo potissimam salutaris suæ facultatis partem trahunt. Hic pro diversitate materiæ, cui occurrit atque adhæret, varia exhibet phænomena variosque effectus. Scilicet quum sese unit cum tenuissimis martis moleculis, vitrioli indolem, saporem quoque ac virtutem refert; ubi cum terreis alcalinis concreditur, sal æmulatur alcalinum. Hæc tamen salia, tam vitriolicum, quam alcalicum, non fixam, sed volatilem ab hoc spiritu nanciscuntur naturam. Quo fit, ut calore cum spiritu promte abeant in auras, pereunte simul sapore, aperiente, roborante, acidum absorbente & corrigente virtute, ac remanente aqua effœta insalubri. Ex quibus porro in proclivi est judicare, mineralem hunc spiritum esse veram & efficientem causam virium, quibus minerales aquæ in morbis omnis generis persanandis æque ac arcendis, præstabilem suam facultatem debent. Atque, quum levis & subtilis aqua hujus nobilissimi spiritus sit quasi vehiculum, nullum utique est dubium, quin sic imbutus latex per omnes corporis tubulos ac mæandros expedite pervadere, impactos ibi humores expedire, tenaces dissolvere, falsos, acres acidosque contemperare, & per convenientia emunctoria eliminare possit. Ut adeo pateat, ejusmodi aquam esse vere medicinalem & longe tutius longeque efficacius potari, quam si in chronicis præsertim ac difficilibus morbis aquæ rudiores, graviores, heterogeneis, ochreis aut calcariis particulis foetæ aquæ in usum vocantur.

§. XXIII. Patet porro ex dictis, magnam utriusque nostri fontis mutuam esse convenientiam, tam quoad bonitatem aquæ, quam ingredientium proportionem & elementi spirituofo ubertatem. Ex quo perito artifice in promptu est judicare, exquisitam quoque utrisque intercedere virium & effectuum paritatem, in referendis viscerum & vasorum obstructionibus, fundendis ac diluendis tenacibus ac spissis succis, promovendis omnis generis excretionibus, per alvum, urinam & perspirationem, & quod maximum est, in roborando & confirmando nervosarum fibrosarumque partium tono labefactato. Qui sicuti plurimarum difficilium ac chronicarum passionum auctor est; ita ad emendandum illum & oriundos inde morbos præscindendos, nihil certe præstabilius nobilissimo elasticæ & expansivæ indolis spiritu, aquas nostras redundantius incolente. Hic enim dum remissam nimis cordis muscoli, arteriarum omniumque tubulorum qui fluida vehunt vim motricem firmat atque intendit, auget simul sanguinis omniumque in corpore humorum progressivum motum, & secundat pendentes ab hoc utilium secretiones ac inutilium egestionem, à quibus maxime sanitas & integritas corporis venit, & in quarum restitutione maximum sanandi momentum est repositum.

§. XXIV. Quæ quum ita sint, nemo, nisi qui ex ignorantia artis est osor, negabit, saluberrimam esse horum fontium in quamplurimis morbis facultatem. Sed nolumus longiores esse in recensendis quibus medentur malis, imprimis quum abunde id factum sit, ab iis qui ex instituto de ipsis egerunt, & de Spadanis quidem omnium optime *Henricus ab HEER*, ac de Schwalbacensibus supra laudatus *Jo. Daniel HORSTIUS*. Sufficiet nominasse ex his morbos, quibus profuisse exemplis & rationibus docent. Id autem asseverant de ventriculi morbis, anorexia, vomitu, inflatione, nausea, inappetentia, ructibus, diuturno ardore & dolore cardialgico; de morbis intestinorum, torminibus, colica flatulenta, spasmodica & scorbutica, cholera, diarrhœa, nec non lumbricis; de mor-

bis hepatis, ictero, cachexia, principio hydropis atque etiam scorbuto; de affectibus renum ac vesicæ, mictione dolorifica, ischuria, nephritide, vesicæ & renum calculo; de morbis nervorum, quorum referimus affectum spasmodico-flatulentum sic dictum hypochondriacum & hystericum, spasmos etiam artuum dolores creantes, rheumatismos appellatos; de morbis uteri, fluxu mensium suppresso, vel plane deficiente, aut vicissim nimium effuso, fluore albo atque sterilitate.

§. XXV. Quod autem mirum videtur, iis maxime, qui in eruendis morborum causis minus exercitati, est ille contrarius quasi quem in sanguinis profluvii præstant effectus. Scilicet quando in muliebri sexu salutaris illa sanguinis per uterina vasa excretio deficit, vel plane supprimitur, & ea propter mulierculas atrocia excruciant pathemata; soteriæ nostræ aquæ stillicidium, frustra adhibitis etiam fainigeratissimis pharmacis, revocant feliciter, & sic causam multorum malorum præscindendo, juvant egregie. Vicissim ubi sanguis effusius quam corporis constitutio fert effluit, idem hoc remedium opem fert eximiam & excessivum profluvium compescendo, imminentes inde graves morbos, cachexiam, phthisin & lentas febres arcet. Idem accidere in viris hæmorrhoidibus obnoxiiis multiplici compertum habemus experientia. Sive enim sanguis immodice per ani venas efferatur, sive suetus fluxus retineatur, utrique malo efficacissime opitulatur aquarum nostrarum potus. Utrumque vero præstat in utroque sexu, aperiendo vasa obstructa. Etenim obstructis arteriosis tubulis, nec menses, nec hæmorrhoides, debito modo succedunt, sed resistunt. Vicissim ubi hæmorrhoidalia, vel uterina vasa obstructa, sanguis aliorum ruit, ibidemque cum impetu prorumpit. Igitur quod obstructos tubulos expedit, id sanat malum utrumque. Quod præstare fontes nostros docet ratio, & exemplis confirmat NESSELIUS, tractatu supra allegato §. VII.

§. XXVI. Non minus oppositus sibi videtur duplex ille effectus, quem minerales spirituosæ aquæ præstant, in excretionibus per vomitum, alvum & sudoris spiracula sedandis, æque ac provocandis. Etenim in alvi profluviiis, dysentericis etiam, nec non cholericis, Antonianas non modo, sed & Selteranas acidulas, præsertim cum tertia lactis parte remixtas, eximie conduxisse, novimus ipsi. Et de Schwalbacensibus meminimus, WALDSCHMIDIUM commendasse in dysenteria tum epidemica ipsarum potum. Qui vero vomitu crebriori, ex imbecillitate, seu potius tono tunicarum ventriculi dejecto, & oriunda inde crudorum, viscidorum & acidorum humorum saburra laborarunt, his non præsentius & efficacius per ipsam experientiam novimus præsidium harum aquarum usu. Qui etiam largius cum lento & emaciante calore, nocturno præsertim tempore, ob cito nimis suppressas críticas evacuationes, vel febriles commotiones, diffuunt, his omnino præsidio est exoptatissimo aquarum nostrarum potus. Etenim, dum subtili & spirituosissimo suo elemento labefactatum excretoriorum tonum roborant, & humido suo puro atque tenui peccantem in corpore materiam, quæ acrimonia nervas fibrillas ad excretionem exstimulat, diluunt atque contemperant, sistunt motum impetuosum, eoque simul excretionem compescunt.

§. XXVII. Sunt etiam non tantum ex vulgi genere, verum etiam Medicis minus peritis, qui in cachecticis & sero turgidis corporibus, aquarum mineralium usum reformidant, quasi aqua tanta copia quotidie pota, malum augeret ac hydropem ingeneraret. Verum frustraneus est hic timor, qui ignorantium concutit animum. Nam medicatæ aquæ potius præscindunt hydropem, & cachexiam perfanant. Diluunt

quippe tenaces viscidos humores, eosdemque ad excretionem præparant, simul tonum & elasticam vim excretoriorum tubulorum firman, quo non modo inutilis ac superflui humores, per vomitum, alvum, urinam ac sudorem eliminantur, sed & corpus, omnesque in ipso partes ab exundante humiditate liberantur & exsiccantur quam optime.

§. XXVIII. In vincenda febrium intermittentium contumacia, an fontes medicati habeant usum? ambigunt multi. Etenim nullus fere eorum, qui de mineralibus aquis scripserunt ex instituto, mentionem injecit emolumenti, quod in febrilibus præstant insulibus. Neque etiam febres poscunt & admittunt talem potum ac usum, quem quidem servant, qui in aliis morbis tendunt ad scatebram, ibi certam quotidie bibunt mensuram & sic curam uti vocant faciunt. Sed ordinarii potus loco, tam intra, quam extra paroxysmum, potari possunt quam optime, atque etiam cum ipsis alia remedia antifebrilia, salina, detergentia, amara etiam & roborantia assumi possunt seu vehiculo commodissime. Novimus certe diuturnas quotidianas, autumnales tertianas, quartanas quoque, immo mesentericas & lentas, quæ ex nimis cito suppressis adstringentium ope, aut recidivantibus febribus accesserunt, hac ratione sanatas esse felicissime. Neque tamen mirandum, scriptores hunc effectum sicco præterisse pede. Neque enim ullus febre correptus peregre proficiscetur ad scatebras has; neque etiam qui accedit, facile ibi corripitur morbo febrili.

§. XXIX. An qui labe & vitio pulmonum affecti phthiseos metu tenentur, uti possint his aquis? haud levis momenti est quæstio. Plurimi id negant & pernegant. Verum respondendum cum distinctione. Si corrupta & exesa est pulmonum substantia & insignis humorum facta effusio; si tota pulmonum substantia scirrhis obseffa & vomica; si polyposæ, uti haud raro accidit, adsunt in pulmonum vasis concreciones: si etiam hydropis pectoris jam præsto est principium, potum aquarum suadere utique foret damnosum. Verum ubi phthiseos duntaxat est principium; sique ex hypochondriorum vitio nascitur, ac ob tonum pulmonum labefactatum, ingens seri ad pectus fit affluxus & cum tussi diuturna ac valida, quasi rheumatismus, neutiquam dissuadendus; sed potius præcipiendus est acidularum usus. Et quamvis levis præcesserit exulceratio, eandem tamen omnino egregie ad consolidationem aptam reddit mundificando hoc remedium, præsertim si ex catarrhali & scorbutica defluxione fuerit oborta. Tum potius medicatæ hæ aquæ cum lacte remixtæ & convenienti modo usurpatæ, levamen afferunt, suffragante quamplurimis exemplis experientia, incomparabile. Quod enim exulcerationibus, in interioribus corporibus non sint inimicæ, sed salutares, uberius confirmant effectus saluberrimi, quos in renibus, vesica & prostaticis glandulis ulcere obseffis, præstitisse, fidem faciunt testes oculati, exceptione majores, HEERIUS, HORSTIUS atque NESSELIUS, locis citatis.

§. XXX. An porro in morbis capitis & cerebri, soporosis affectibus, lethargo, comate, catalepsi, apoplexia, hemiplexia, paralyti vera, epilepsia, gutta serena, caduca vertigine, nec non furibundis & melancholicis deliriis, ex usu sint minerales aquæ? vexatum est dubium. Non enim leve dubitandi momentum suggerit, quod hi morbi potissimum à nimia membranarum cerebri remissione, vasorum distensione ac repletionem, immo humorum in cerebri tubulis stagnationem, vel plane effluxum, ortum ducunt. Quæ omnia, ne augeat atque exacerbet tam copiosus aquarum potus, metus esse videtur haud adeo injustus. Accedit, quod hæ aquæ spirituosissimo elastico, quo uberius persusæ sunt elemento, caput temulentia quadam afficiant, vasaque

vasaque nimium distendendo, eorundem tonum non-nihil debilitent. Verum & heic prudenti opus est limitatione. Quod si enim nominati supra morbi, sunt, ut scholæ efferunt, idiopathici, id est, sedem & causam suam principaliter ipso in cerebro ejusque membranceis & vasculosis partibus, multum læsa illarum substantia, habent, ac præterea propter diuturnitatem in habitum quasi sunt conversi; satius utique est, abstinere à potu. Sed ubi symptomatatici sunt hi morbi, ex hypochondriorum, vel primarum viarum vitio orti, neque in habitum jam conversi sunt, neque etiam cerebri substantia labe affecta, nullo modo reformidandæ, sed potius in usum vocandæ hæ aquæ.

§. XXXI. Quum porro insignis ratione ingredientium, saporis, subtilitatis & virium quoque inter medicinales aquas vigeat differentia, & ea propter aliæ præ aliis, aliis atque aliis individuis, nec non morbis, sint convenientiores; disquirendum merito: quando & quibus nostrarum potus sit magis ex usu. Jam diximus supra, easdem tenues esse atque subtiles, minerali spiritu copiose afflatas & quippiam volatilis vitriolici complecti. Unde peritus utique facile judicabit Medicus: peculiarem ipsis inesse roborantem, ac dejectam partium motricem vim ad propellenda fluida firmantem facultatem. Judicabit porro: ob puritatem ac tenuitatem humoris ad succos viscidos diluendos, glandularumque ac minimorum tubulorum obstructions referandas, easdem esse utilissimas. Ex quibus tandem recte concludet: in omnibus iis morbis, ubi toni adest remissio, præsertim in ventriculo & intestinorum canale, in sexu potissimum sequiore, temperamento phlegmatico aliisque imbecillioribus corporibus, nostras aquas in parva etiam quantitate potas esse saluberrimas. Scilicet in vomitu, diarrhœa, albo fluore, seminis stillicidio involuntario, rheumatismis, catarrhis, sudoribus nocturnis, nimio menses ob debilem uterum fluxu, nec non pendente ab eadem causa sterilitate, Spadanas cum Schwalbacensibus, plus præstare atque efficere, quam alii medicati Germaniæ fontes.

§. XXXII. Contra ea, ubi ex primis viis exturbanda per alvum humorum vitiosorum copia & colluvies, in cachecticis, phlegmaticis, vel etiam hypochondriacis; omnino Egranæ & Wisbadenses acidulæ cum Sedlicensibus præferendæ sunt nostris. Ubi dein acidi pontici humores, quorum uber esse solet proventus in hypochondriacis & hypochondriaco-melancholicis, nec non quartana diuturna cum nimia ciborum appetentia laborantibus, temperandi & per inferiora simul efficaciter eliminandi; Carolinæ thermæ in hoc perficiendo omnibus sunt superiores. In morbis pectoris, renum ac vesicæ vitiis, ubi diuresi opus est, aut etiam erosio & exulceratio has partes tenet, simulque nervosarum & membranacearum partium systema multis & validis spasticis obnoxium est stricturnis; Selteranæ, Antonianæ & Wildungenses acidulæ, nostris erunt antependendæ, eo quod parum virtutis adstrictivæ & vitriolicæ, sed multum salis alcalini cum aqua pura habent, neque tam ubertim spiritu minerali sunt foetæ.

§. XXXIII. Neque etiam negandum, quosdam ex mineralibus sic dictis fontibus, certis corporibus & temperamentis, victu etiam diverso utentibus magis congruos esse & aptos. Sic Pymontanæ acidulæ, rudiori aqua, sed copioso spiritu instructæ, optime quadrant Westphalis, qui victu fruuntur duriori & natura sunt robusti, non vero iis, qui sunt corporis tenerioris & tenui quoque diætæ affueti. Carolinæ thermæ aquæ sunt percommodæ Bohemis & viciniæ incolis, qui cibis ac cerevisiis nutrientibus multum fruuntur. Qui autem loca inhabitant calidiora, vini potum frequentiore habent quam cerevisiæ, qui etiam cholericæ & siccæ sunt constitutionis; his utique, si

valetudinem incurrunt adversam, saluberrimæ sunt Spadanæ nostræ & Schwalbacenses cum aliis mitioribus aquæ. Ut adeo divina merito veneranda sit & celebranda benignitas ac sapientia, quæ hominum salutem tam clementer prospexit, ut quælibet regio ejusdemque incolæ habeant auxilia ipsis maxime accommoda, quibus valetudinem levare possint, ac inter hæc maxime medicatos fontes, quorum alii alvum, alii urinam movent, alii acidum contemperant, alii acre obtundunt, alii viscidum resolvunt, alii roborant leniterque adstringunt, alii vicissim spasmos & rigidas fibras molliunt. Quam singularem omnium indolem, merito scrutari & perspectam habere debet peritus ac rebus suis satagens Medicus.

§. XXXIV. De ipso autem aquarum salubrium usu id monendum habemus in genere: erroneam esse illam pervulgatam, & Medicorum, & aliorum sententiam: thermas & acidulas certo tantum anni tempore, vere scilicet, vel exeunte æstate, esse per definitum temporis, mensis circiter, spatium, ad curam, uti vocant, potandas. Nam ratione & experientia convicti scribimus, omni tempore, ver sit, sive æstas, autumnus vel hiems, saluberrimum esse aquarum mineralium potum, non modo ad scatebram, sed & in remotis ab ea locis, modo in lagenis rite obturatis eo transportentur. Scilicet in variis tam longis, quam acutis morbis, & parcius, & copiosius, nec non vehiculi remediorum loco, solæ etiam mane, aut vesperi, vel vino remixtæ, inter cibos commodissime & cum insigni sanitatis emolumento, secundum periti artificis præscriptum, bibuntur foteriæ aquæ. Quare omnibus quibus salus sua cordi, quibusque comparandi facultas, serio suademus & candide, ut in promptu habeant, si conflictantur morbis, convenientem cuilibet salutarem laticem. Nam profecto, aquis summam & arcanam prorsus juvandi virtutem indidit universi opifex benignissimus, quam tamen norunt paucissimi.

§. XXXV. Ut tamen speratus salutaris effectus obtineatur eo certius, curandum, ut integris viribus bibantur in disitis maxime locis. Jam huc usque ex acidulis vix ullæ tam raro rite conservatæ ad nos pervenerunt, quam Spadanæ & Schwalbacenses, ita ut ex viginti lagenis, quandoque vix quinque usui fuerint aptæ, reliquis effoetis & corruptis. Ex quo autem mercator Lipsiensis famigeratissimus Dn. HOCHMEIER transferri curavit has aquas, ipsius solertia ac circumspeditione factum est, ut jam possint haberi incorruptæ & spiritu minerali penitus refertæ. Artificium conservandi abolvitur his. Lagenæ seligendæ sunt compactissimæ compagis & probe exustæ, ac vitrea quasi cœrulea crusta obductæ, ne per patentiores poros elabatur nobilis ille spiritus. Dein exacte sunt obturandæ eumque in finem orificia claudenda subere non carioso, sed integro, cera terebinthinacea, vulgo *Baumwachs*, fissuræ oblinendæ, ac corium extus illigatum pice inducendum ubique, ne aëri accessus & subtili elemento exitus pateat. Tum non sole ardentissimo, verè exeunte, vel ipsa æstate, transportandæ, semperque probe obtegendæ lagenæ, ne accessu solis calefiant, quo multum virium & spiritus dissipatur; frigidiori potius tempestate & noctu quoque transportatio instituenda, & sic certo servatur aquarum integritas.

§. XXXVI. Specialem demum usum quod attinet, has servandas præcipimus cautiones. Si solennis, uti vocant, cura, cum iis instituenda, sive domi, sive ad scatebram, videndum primo omnium, ut, si corpus plethoricum & sanguinis missionibus assuetum, duobus minimum ante potum diebus, vasorum persectam venam fiat depletio. Dein ante usum etiam prima corporis regio à sordium colluvie repurganda. Neque tamen id perficiendum acrioribus ca-

tharticis, quæ intestinorum tonum destruendo, felici aquarum operationi mirum obsunt, sed clementioribus congruis. Inter quæ pro naturæ & primarum viarum dispositione ex usu esse possunt, vel manna soluta ad uncias duas, cum drachma una cremoris tartari, vel passulæ rhabarbarinæ laxativæ, vel pilulæ balsamicæ ad Beccherianarum exemplar concinnatæ, vel etiam magnesia alba, cum, vel sine sale cathartico oblata.

§. XXXVII. Postea ipsa potatio sic instituenda, ut primo die, libra tantum dimidia, secundo integra, tertio duæ libræ, tres tum aut quatuor libræ, eo usque, donec per alvum, urinam & sudorem, aqua sufficienti æquali mensura iterum secesserit. Quod ubi factum, quantitate hac continuandum ad finem usque curæ, eademque absoluta, ad evehendas reliquias, superius commendata laxantia, sed majori paulo dosi, per biduum usurpanda. Quod si etiam sub ipso potu alvus obliviscatur officii, flatus in intestinis renitantur, vel etiam peristalticus motus inversus sit, clysteribus non adeo acribus, sed tantum stimulantibus, carminativis ac demulcentibus, ad inferiora vocanda est humoris evacuandi copia, vel pilulæ balsamicæ, ad aliquot tantum grana, circa somni tempus, deglutiendæ.

§. XXXVIII. Alia cæterum remedia sub potu commendare non solemus, quia ipsis aquis jam egregia inest medicamentosa virtus. Unum vero, tum ad secundandam auspiciatam operationem, tum avertenda quæ quandoque incidunt symptomata, habemus quod commendemus medicamentum, longo usu atque experientia comprobatum. Est illud elixirium nostrum balsamicum temperatum, ex benignis balsamicis speciebus cum menstruo lixivioso paratum. De quo in prandii ultimo haustu, vel etiam aliquot horis post digestionem peractam, octoginta, vel centum guttæ sumendæ cum quovis vehiculo. Id enim mirifice succurrit digestionem, acidum & viscidum corrigit, chylo blandam conciliat subtilitatem atque temperiem, simulque tonum intestinale servando integrum, excretionum successui velificatur egregie.

§. XXXIX. Ubi tamen vis morbi nervosis partibus insidet altius, uti fieri solet in diris passionibus spasmodicis, spastico-convulsivis, arthriticis, arthritico-rheumaticis, præter internum aquæ potum, utilissima sunt balnea. Possunt autem hæc concinnari ex aqua dulci, nullo minerali sale, aut martiali principio imbuta,

quam habent Piperanæ, Tœpliceses, nec non viperinæ, nostris *das Schlangenbad*. Quæ certe balnea, ad laxandas nervosarum partium tensiones & contractiones longe magis ex usu sunt, quam quæ multum croci, martis, vel terreo-ochrei, salini, aut calcarii principii vehunt.

§. XL. Si quis porro ob caput debilius has eminenter spirituosas aquas ferre nequeat, alia puræ fontanæ miscela easdem temperet. Si porro forsan adfrictio & spirituum ubertas nervis & pectori videatur inimica, asininum lac, vel lactis serum, ad emendandam hanc qualitatem admisceatur. Qualem præterea mixturam in podagra, arthritide, scorbutica lue, infando dolore artuum & membra divexante, in purpura quoque scorbutica, nec non foedis cutis exulcerationibus, summo cum ægotantium levamine, multoties commendavimus.

§. XLI. Maxime omnium vero sub harum aquarum usu exquisitum in vita victuque servandum regimen. Animi cura habeatur præcipua, ut sit tranquillus, ab omni affectuum impetu, meditationibus & fatigationibus liber. Nihil enim sub potu harum aquarum perniciosius, quam vehementiores animi per iram, aut terrorem commotiones, quippe quæ aquarum per vias ordinarias secessum legitimum intercipiendò, anxietates, flatulentias aliaque symptomata creant gravissima, ut satius sit, si inciderint, illico abstinere à potu. Dein sub usu nihil accommodatius quam ordinarii potus loco, bibere mineralem aquam, cum dimidia fontanæ, & tertia, vel quarta vini Rhenani parte remixtam. Qui etiam frigidioris naturæ sunt, vini plus potare possunt; quandoquidem sumtis tam copiose aquis, sitis non adeo esse solet intensa. Porro non omittenda corporis exercitatio, quæ mirifice favet effectui aquarum secundando. Instituitur hæc commodissime duabus horis ante, vel quinque aut sex horis post pastum, confecta jam digestionem. Cavendum vero summo opere, ne corpus frigidiori vespertino aëri, post solis occasum exponatur, sed ab eo quovis modo defendatur. Si secus fit, perspiratio intercipitur, somnus turbatur, multaque in valetudinem redundant cum successus impedimento, incommoda. Atque demum, ut breves finis, vitentur sub aquarum nostrarum usu omnia, quæ vitanda; & observentur omnia, quæ observanda, tam à nobis passim, quam ab aliis scriptoribus pluribus præscripta sunt & inculcata.

DE FONTIS SELTERANI VIRTUTE ET PRÆSTANTIA.

CAPUT I.

De aquis mineralibus in genere.

§. I.

INter innumera, quæ mirandam Summi Numinis providentiam comprobant documenta, hoc mihi non ultimum esse videtur, quod sub tanta morbosarum corporis humani afflictionum multitudine omnes prope, quas tria naturæ regna continent res creatæ virtutibus polleant medicinalibus, quibus peritus medicinae consultus pro naturarum, morborum aliarumque circumstantiarum ratione ad medendum uti potest commodissime. At vero ex singulis his medica facultate

instructis auxiliis vix ullum est, in quo tam salutare & efficaces reconditæ sunt virtutes, quam in mineralibus, ex imis terræ visceribus scaturientibus tam frigidis quam calidis aquis, quæ, si prudenter adhibentur, in pessimis temporisque diuturnitate confirmatis affectionibus incomparabilem ac omnibus tam laboriose paratis chymicis longe superiorem exserunt efficaciam, ut confiteri sagax quisque debeat, medicinam universalem, frustraneo huc usque studio undique conquistam in istis aquis vere esse reconditam. Etenim, omnis salutaris corporique humano proficiuus medicamentorum effectus eo maxime debet dirigi, ut vel corruptos & à naturali temperie sua deflectentes acidos, viscidos & biliosos succos corrigant, obstructos valorum tubulos referando, superfluos & vitiosos humores per alvum, urinam, cutim, aliaque mucæ excretioni dicata pulmonum & narium excernicula ejiciant, vel etiam debilitatum nervosarum partium tonum

tonum, corroborent variisque ex causis constrictas & rigidas fibras emolliendo, dolores consopiant, imo liberiorum sanguinis circuitum per universum restituant.

§. II.

Singulae autem hae facultates, quas in multis remediis seorsum distributas deprehendimus, in fontibus medicatis sunt unitae. Primo enim subtilem vehunt aquam, qua in convenienti dosi adsumta diluuntur, salini acres temperantur, fibrae nimis rigidae relaxantur, infarcti viscerum & emunctoriorum canaliculi aperiuntur, imo excretiones omnes promoventur utilissime. Alterum fontium salubrium ingrediens constituit sal quoddam alcalinae vel mediae indolis summe proficuum, quorum illud sordes acidas, quarum abundans in hypochondriacis proventus est, corrigit, spissos humores resolvit, sudorisque & lotii excretionem promovet; hoc vero insigni viscidos humores dissolvendi alvumque movendi pollet efficacia. Quodsi ulterius progrediendo in saluberrima aquarum mineralium principia inquirimus, quaedam earum in mixtionem suam recipiunt alcali fixum terreum, quod, absorpto primarum viarum acido, instar oculorum cancri vel magnesia albæ in sal neutrum transiens visciditates attenuat alvumque egregie subducit; aliæ contra secum vehentes tenuissimum martis crocum, in fibris vasorum & nervosarum partium nimis flaccidis roborandis, sanguinisque & humorum motu hinc inde retardato promovendo vim foenerant praestantissimam.

§. III.

Præter hæc vero ad unum fere omnes minerales fontes nobilitati sunt spiritu purissimo, valde penetrante aëreo-æthereo, quem præter odorem & saporem sat spirituosum, bullularum & vaporum ab affuso vino acido vel aquarum commotione emissio abunde satis confirmat. Atque hoc subtilissimum summæque energiae elementum aquis mineralibus, & præsertim acidulis omnibus animam quasi agendique potentiam elargitur & tantæ subtilitatis est, ut facile avolet, nec ulla imitari arte possit adeoque pro vera causa æstimandum sit, quod ipsarum elementa in minimos ac tenuissimos corporis meatulos penetrando, sanguinis & humorum in orbem motum & abhinc dependentes excretiones potenter promoveant, imo ventriculo & universo nervosarum partium systemati debilitato robur addant desideratissimum.

§. IV.

Quæ vero quum ita sint, ut tam excellens tamque præclara & à longo abhinc tempore ex mirabili morborum pertinacissimorum in tot hominum myriadibus curatione satis cognita juvandi facultas in medicatis fontibus sit reposita, mirari certe debemus, quod incomparabiles hujus remedii vires tam diu delituerint absconditæ & à Medicis, qui nonnisi panacæas & artificiose parata chymica excogitare student, derelictui fuerint habitæ. Multo vero adhuc magis dolendum est, etiamnum tales reperiri homines, qui vel ex ignorantia, vel perversis de aquarum mineralium ingredientibus sibi formatis conceptibus, vel ex stolidi quadam arrogantia, qua mirum inflati opiniones suas rejicere turpitudini ducunt, scaturigines medica facultate à Deo instructas plane negligunt, aut certe non eo, quo merentur, encomio commendant, sed ad easdem deturpandas varia eaque futilia proferunt argumenta, quæ tamen experientia, verissima rerum testis, optime labefactat.

§. V.

Verum enim vero licet aquis medicatis tam calidis, quam frigidis, ea præcipue, quæ præposui, ingredientia & facultates insint medicinales; nihilo tamen mi-

nus, accuratiori instituto examine, insignem inter ipsas, quoad agendi principia, deprehendimus differentiam, quibus plus minus instructæ majorem vel minorem in operando exserunt potentiam. Atque in eo quoque celebranda est summi Numinis misericordia, quod pro diversa hominum, respectu naturæ, temperamenti, climatis & victus conditione, (secundum quam modo acidi & viscosi, modo acres & biliosi peccant humores, ipsique exinde provenientes morbi vel cathartica, diuretica, vel sudorifera postulant virtutem;) differentis quoque indolis, & his illisve morbis abigendis magis aptas aquas concesserit, quas pro circumstantiarum ratione Medicus cum fructu possit præscribere. Nolo jam his seorsim explicandis diutius immorari, quum jam olim præcipuorum Germaniæ fontium elementa & vires in peculiari dissertatione pertractaverim, sed de fonte Selterano, omnium fere & utilitate & securitate præstantissimo, quem longinqua experientia satis exploratum primus ego commendavi, in præsentiarum dicturus demonstrabo, quibus ille principiis & medendi viribus sit instructus & qua methodo tam solus, quam cum lacte mixtus in varii generis morbis tuto & utiliter possit usurpari.

C A P U T II.

De elementis & viribus fontis Selterani.

§. I.

Fons Selteranus, cujus jam accuratorem suscipimus tractationem, nomen suum mutuatur à pago Trevirensi Nieder Selter dicto, qui tria milliaria à Longo-Schwalbaco, quinque ab urbe Gießa, totidemque passus à Francofurto ad Moenum distat. Hunc prope fons ille sub amœno cœli tractu trans piscinam truttis divitem jucundissimo scaturit murmure, aquas fundens limpidas, gratique saporis & eximiae salubritatis, quibus incolæ non solum potus loco, sed etiam medendi scopo cum fructu utuntur; unde etiam à longo abhinc tempore fontis medicinalis nomine inclaruit. Ita suo jam ævo TABERNÆMONTANUS in eleganti libro, quem inscribit *thesaurus aquarum*, & DANIEL HORSTIUS in suis de re medica monumentis ejusdem honorificam injiciunt mentionem. Maxime autem omnium JOHANNES DANIEL HORSTIUS, filius, & ante hunc JOH. WILH. MOGE, eximius civitatis imperialis Wormsensis physicus hunc fontem in peculiari de ejus principiis, virtute & usu conscripto tractatu commendavit.

§. II.

Prout vero prope omnes, quas pristina tulit ætas, medicinæ scriptores de aquarum mineralium usu & facultate medicamentosa varia in experientia fundata, de ipsarum vero elementis & agendi principiis nonnisi futilia & fabulosa prodiderunt figmenta; ita profecto non mirandum esse censeo, quod pari ratione res sese habeat cum fonte Selterano, cui citati auctores tam mirabilia affinxerunt principia, quæ nec ipsi unquam competunt, nec humana erui arte possunt. Exemplum dicti sit, quod præcipuum ejus ingrediens habuerint nitrum, cujus tamen vix ullum deprehenditur vestigium; siquidem sal inibi contentum nec instar nitri flammam concipit, nec ab affuso oleo vitrioli rubicundum & aquam stygiam odore æmulantem emittit fumum, qui tamen nitro nunquam non proprius est. Præter hæc valde erronea est opinio, qua nitrum terræ inexistere & à fontibus nonnullis in mixtionem recipi statuunt: quod vel exinde solum clare rejicitur, dum nitrum è terræ visceribus nullibi locorum effoditur, sed potius sub liberiori aëris accessione in terra pin-

guiori paulatim generatur; imo illæ ipsæ aquæ, quæ dicuntur nitrosæ, terram magis calcariam quam verum nitrum in sinu foveant. Neque aliter res comparata est cum sulphure, vitriolo, marte & aliis, quæ fonti nostro inesse somniarunt, ingredientibus, quorum nullum, vel accuratissimo instituto tentamine, potest explorari.

§. III.

Sed quo vera & genuina fontis Selterani elementa, quibus ab aliis distinguitur, paulo clarius innotescant, breviter jam strictimque suscepta cum ipso experimenta & quæ inde annotavi phænomena enarrabo. Scire itaque licet, aquam esse claram, liquidam, sapore magis lixivioso, quam acri vel acidiusculo præditam, nec ut in cæteris sic dictis acidulis compungentem & adeo penetrantem. Dein præ omnibus fere reliquis facillime vappescit & in putrilaginem abit, nisi lagenæ, quibus continetur, totæ repleantur, picentur curateque obturaculis muniantur. Unde si per nycthemeron in vase ampliori liberiori aëris accessui patet, nihil quidem ad fundum dimittit, sed amisso suavi sapore plane adversum & vere lixiviosum, perinde ac si oleum tartari per deliquium ipsi affusum fuisset, contrahit; quæ subitanea catastrophe meo quidem iudicio exinde derivanda est, quia elementum illud subtile spirituosum, à quo optima & præcipua ejus virtus dependet, facile hac ratione avolat & in auras dissipatur. Quæ vero cum ita sint, à veritate longe mihi discedere videtur auctor citati tractatus, qui hanc nostram aquam in libero aëre spirituosiores & effectu præstantiores fieri arbitratur, indeque suas sibi fictas rationes ducit, quia in dissitas etiam regiones commode possit transportari. Sed falso profecto ita concluditur: nam primo præter id, quod idem experimentum cum aliis etiam mineralibus aquis probe opertis possit institui, ego sæpe observavi, ipsam Selteranam tempore anni fervidissimo in lagenis non seorsum cistæ inclusis, sed solo stramine leviter obductis aliorum deveciam permultum penetrantis saporis & efficaciam ferme omnem amisisse.

§. IV.

Instituta cum reagentibus & contrariis principiis experimenta, quæ sequuntur sistunt phænomena. Et primo quidem Selteranæ cum quocunque acido, sive fortiori, sive leniori promptissimam subeunt effervescentiam, quæ inhospitantis alcalini principii indolem mentitur. Si cum æquali portione vini veteris generosi Rhenani miscentur, limpiditatem deponunt, colorem ex bruno rufescentem ostendentes, haud secus ac contingere solet, si oleum tartari per deliquium, vel spiritus salis ammoniaci rectificatus cum vino optimæ notæ confunditur. Adjecto contuso saccharo ingens cum strepitu & copiosissimarum bullularum adscensione conflictus observatur, ut tota inde mixtura non solum lactescat, verum etiam à bullulis emergentibus vaporem quasi emittere videatur. Syrupus violarum admixtus aquam viridiusculo tingit colore, eodem modo, ac cum alcali quocunque evenire deprehendimus; inspersus autem gallarum pulvis neque cœruleum, neque sanguineum, multo minus nigricantem inducit colorem, aperto indicio, nihil terræ martialis aut vitriolici elementi in hac aqua recondi, ideoque nec excrementa sub ipsa potatione egesta atrum referunt colorem. Ad mixturam olei tartari per deliquium nulla conspicitur ebullitio, sed turbidæ paulisper aquæ fiunt & lacteo quasi colore imbutæ, nullo tamen luctæ indicio succedente, nec maginate ad fundum dimisso; unde concludere licet, neque acidum neque calcariam terram in connubium has aquas recipere.

§. V.

Selteranarum libras duas medicas super leniori igne, quem carbonēs subministrarunt ardentes, evaporationi commisimus, & en! materiæ albæ, salinæ tenuissimæ drachmam unam cum duodecim granis obtinuimus, quæ oleo vitrioli imprægnata vaporem emisit albicantem, acidum, nares penetranti odore ferientem, haud aliter, ac cum sale communi & oleo vitrioli confusis solet contingere. Idem residuum in aqua liquatum & per chartam colatum bibulam præbuit lixivium, ex quo, lenioris exhalationis ope, alcalini salis scrupulos duos obtinuimus. Hac solutione infusum rhabarbari colorem induit exacte purpureum, & ubi dicto liquamini mercurius affunditur sublimatus in aqua solutus sensim paulatimque in fundo deponitur sedimentum, aurantii coloris, turpetho minerali quoad omnia simile. Eidem deinceps salina massa, evaporatione acquisita, si cum sale ammoniaco remiscetur, detentum adhuc vinctulis suis spiritum volatilem liberum reddunt; quod ex acriori, quo nares afficit, odore satis manifesto dijudicare licet. Tandem alcalina Selteranarum natura vel exinde satis apparet, quum, si ipsarum duæ libræ medicæ sufficienti spiritus vitrioli affusione saturatæ mitiori igni ad exhalandum committuntur, peracta evaporatione, salis medii, quod omnes tartari vitriolati characteres refert, drachma una cum dimidia nanciscatur.

§. VI.

Sicuti ergo singula hæc experimenta planum atque testatum faciunt, fontem Selteranum affluentem salis puri alcalini copiam in complexu suo alere; ita pariter ex variis à me observatis phænomenis evictum esse credo, eundem instar omnium aquarum salubrium, maximeque acidularum purissimo illo volatili & minerali spiritu esse imbutum, quem facile quisque deprehendet, qui Selteranas antliæ pneumaticæ beneficio aërea materia intus contenta privare contendit. Tum enim manifesto ebulliunt, marginem vitri transcendent, ideo quod elasticum illud elementum, subtracto aëris externi afflatu, nunc majorem semet expandendi nanciscitur potentiam, qua mediante protinus magnoque cum strepitu ex aqua emergit. Et inde simul ducenda mihi videtur ratio, quare sub sola Selteranarum concussione vel fortiori ex ampulla in vitrum effusione copiosissimæ ad superiora eluctentur bullulæ, quæ ad parietes vitri collectæ tandem disrumpunt & inter adspectum oculis aufugiunt; idque eo magis si dictæ aquæ igni carbonum impositæ paulatim incalescunt. Præter hæc vero certissimum elementi aëreo-ætherei & abhinc dependentis eximiæ harum aquarum utilitatis indicium præbet sapor ille prorsus singularis & suavi quadam acrimonia linguam compungens, quem in nulla, vel iisdem ingredientibus exacte imbuta aqua comperire licet, quemque à liberiori aëris accessu evanescere supra diximus. Et quamvis Selteranæ parciore spiritus mineralis copia præ reliquis, maximeque Pyramontanis acidulis, sunt nobilitatæ, sunt tamen eandem ob causam non adeo vehementis, sed mitissimæ indolis ac operationis, ut majori fiducia majorique utilitate in per pluribus morbis diversisque subjectis possint adhiberi.

§. VII.

Ex duobus itaque nostræ aquæ constant principiis, sale videlicet alcalino, & spirituofo aëreo-æthereo naturæ elemento, à quibus non minus quam ab aqua subtili, leviori ac pura spectatissima earum virtus est derivanda. Et primo quidem ad aquam quod attinet, jam supra satis ostensum fuisse reor, hanc ipsam ex natura sua insignibus splendere facultatibus & ad duras, tensas, strictasque partium solidarum fibras emolliendas, ad acres falsosque humores diluendos ac temperandos,

perandos; neque minus ad lentos humores incidendos obstruētosque vasorum porulos recludendos egregii esse usus, ita prorsus, ut hac via omnes ac singulæ corporis excretiones imminutæ pristinae restituantur integritati. Accedit adhuc, quod aqueum hoc elementum commodissimo inserviat vehiculo salibus Selteranis innatantibus, quæ quasi imbibit & secum vehendo per totum corpus in minutissimos viscerum recessus expeditius transfundit, ut dein eo melior sequatur operatio.

§. VIII.

At vero quum aqua sola, sibi relicta, perfacile vim vasorum, quæ perluit, systalticam imminuat & fibras jam antea debilitatas adhuc imbecilliores & ad motum magis reddat inertes, præcipuum profecto, quod connubio Selteranæ suscipiunt, constituens sal illud alcalinum habendum erit, quod stabulantem in ventriculo & intestinis acidorum succorum saburram absorbet & obtundit, visciditates resolvit, spissosque humores diluit & aptos ad evacuandum reddit. Neque dein alcalina hujus salis natura spernendam commodat operam in fibris vasorum & viscerum motricibus leniter irritandis & ad crebriorem fortiolemque contractionem stimulantibus; qua ratione non modo subsistentes hinc inde crudi humores in motum cientur, sed & oppilationibus vasorum reſeratis, liberior excretionum successus insigniter promovetur. Maxime autem omnium, experientia magistra, cognoscimus, renale illud cribrum, quod secernendis excernendisque fixioribus salino-tartareis scoriis speciatim dicatum est, ad majorem concitari ejectionem, ideoque parcius alvum, potentius vero urinam sub Selteranarum usu moveri.

§. IX.

His proxime accensenda est tenuissima spirituosæ elementi materia, qua Selteranæ animatæ subtilissimum illud, quod in cerebro secernitur omnibusque nervis impertitum sensibus & motibus præest, fluidum activius reddunt & fibrarum elateri novum quasi robur majoremque agendi potentiam addunt, ut hac ratione partium tam solidarum quam fluidarum saluberrimæ ad vitam ac sanitatem tuendam actiones in naturali conserventur vigore. Nec dubitare amplius licet, quin eidem spirituosæ minerali ingredienti salubris harum aquarum facultas quoad maximam partem tribuenda sit, ideo quod sua, qua pollet, subtilitate ubique penetrando, non modo infarctos vasculorum meatulos referat & ad sordes ipsis innidulantes eliminandos potenter stimulat, verum etiam elastica vi sua commodam aquæ viam pandit, ut eo facilius cum admixtis sibi fixioribus elementis per exilissimos canalium alveos possit trajici & vere medicinalis reddi.

§. X.

Jam, ubi singulorum nostri fontis ingredientium operationem curatius contemplamur, cuius, medicina vel leviter tincto perspectu erit facillimum, hunc ipsum prudenter adhibitum non corpori solum esse amicum & prorsus innoxium, sed multis etiam numeris aliis, quos medicatos dicimus, fontibus præferendum. Et enim locupletiori salis alcali fixi copia præ Pyrmontano, Schwalbacensi, Antoniano & Wildungenſi ipse foetus commodissimum cum lacte init connubium, eoque minus verendum est, ne hoc forte in nocivum condensetur coagulum: licet gravissime mihi omnes errare videntur, qui lactis cum aquis mineralibus mixturam ob coaguli metum prohibent, imo lacticia sub istarum potatione omnino interdicunt. Unde ego permotus jam ante viginti, & quod excurrit, annos sat ponderosis ostendi rationibus & experimentis, quod in acidulis minime acidum, qua tale & explicitum, sed potius alcalinum, ceu prædominans elementum reperitur, adeoque istæ majori jure dicendæ sint aquæ alcalinæ.

§. XI.

Eodem ego innixus fundamento primus omnium à priori perspexi & suscepto postea experimento optime cognovi, acidularum, maximeque Selteranarum cum lacte miscelam in multis morbis cum bonis agrorum rebus esse instituendam. Et profecto, si dicere mihi licet, quod res est, fateri debeo, Selteranam lactis & potissimum asinino nuptam in morbis, qui ex pulmonum substantia læsa, eaque vel duris tuberculis obfessa, vel lentis succis farta & à materia acri caustica exulcerata pendent, ut fere sunt phthisis, empyema, tussis pectoralis chronica, hæmoptysis cum spirandi difficultate calore lento corporisque contabescencia juncta, divinam polliceri & præstare opem. Enimvero licet de foliis lactis eximia in pectoris affectibus virtute abunde satis constet & asinum ob dulcem salinam & aquosam, qua turget, substantiam inter cæteras lactis species longe emineat adeoque ad medendum aptissimum sit, rarius tamen, quod dolendum est, ejus copia ægrotantibus potiri semper licet. Præterea non omnes pulmonum morbi soli acrimoniæ, nervosæ hujus visceris membranas arrodenti, sed potissimum ejus vesicularum vasorumque sanguiferorum obstructioni, liberiolem sanguinis per ipsa transitum remoranti suos debentur natales, cui removendæ lac solum non sufficit; quod è contrario commodissime perfici posse deprehendimus, si per convenientem spirituosæ alcalinæ aquæ affusionem aquosæ ipsius portionis quantitas augetur, quo facto longe præstabiliorem obtinet efficaciam.

§. XII.

Eadem lactis cum Selterana remixtio singularem spondet effectum in iis affectibus, qui à nimia sanguinis atque humorum acrimonia falsaque horum impuritate ortum trahunt, cujus generis sunt scorbutus indeque provenientes dolores, scabies, purpura scorbutica aliæque cutis exanthemata, nec non variæ dolorum quæ acridini debentur species, ut arthritidis vaga & podagra, ut & ipsa tabes hæctica. Hoc enim divino remedio, non modo succi corporis edulcorantur, falsi & acres temperantur, sed & cum urinoso latice è corpore paulatim eliminantur, ut quæ inde luunt nervosæ partes insigne percipiant levamen.

§. XIII.

Neque vero minus lactis cum fonte Selterano sociati usus eos egregie solatur, qui ex nimia nervorum membranarumque ariditate horrendis spasmodis & ad convulsivum usque gradum auctis membrorum agitationibus miseri torquentur, ubi exsiccatas partes humectando, densasque & strictas demulcendo, noxium spasmodorum recursum optime avertit. Et quia mentis abalienatio à membranarum cerebri strictura, quæ sero acri, falso debetur, sæpissime suam ducat originem, nullum sane ad istam funditus tollendam accommodatius vel efficacius excogitari potest præsidium, quam nostra hæc toties commendata medicina. Imò, quum in cardialgicis & colicis doloribus, in vomitu nimis alvi fluxibus tam serosis, quam sanguineis acris quædam biliosa rodens materia plerumque sit accusanda, quæ nervosæ ventriculi & intestinorum membranas, arrodendo, ad spasmos & irregulares motus, cum horrendis dolorum tormentis sæpe stipatos sollicitat, nihil profecto magis, quam dictum remedium ad spasmodorum dolorumque sævitiam complacandam est accommodatum.

§. XIV.

Præter amicum vero lactis cum fonte Selterano connubium præcipui quid in eo latitat, quod hic suam per urinam magis, quam per alvum exserat operationem; quare etiam in renum, vesicæ ac ureterum morbis,

qui

qui vel à tartareo muco & calculosa materia has vias obstruente, vel ab erosa & exulcerata ipsarum substantia proveniunt, admirabilem habet virtutem. Dum enim acrimoniam humorum temperat, mucum dissolvit ac eluit, renesque, vesicam & ureteres à materia ipsis inhaerente repurgat, non modo ad calculum præcavendum, aut jam præsentis incrementa impedienda præsentis est efficaciam, verum etiam in stranguria, difficilique ac dolorifica urinæ crassæ & turbidæ mictione exoptatissimas affert suppetias. Et quum in gonorrhœa tam maligna quam benigna non raro simul ipsi ureteres ab inquinamento venereo in consensum trahi graviterque exedi solent, ut urinæ inde difficilis oriatur emissio, ego pariter tali in casu sæpe laudatum nostrum remedium optimo cum successu præscripsi; quum è contrario reliquæ minerales aquæ omnes tam interne quam externe adhibitæ, maxime vero, quæ fortiter alvum movent & aquam graviolem vehunt, malum exacerbant.

§. XV.

Porro quoque Selteranæ nostræ in malo hypochondriaco & conjunctis cum ipso symptomatibus non satis laudandam præstant operam. Licet enim in diuturna hac passione ii omnes soterii fontes, qui cruditates viscido-acidas ex mala digestionem ortas & spasmodis ac flatibus materiem suppeditantes per alvum sufficienter educunt, ut fere sunt Egrani, Sedlicenses & thermæ Carolinæ, insigniter opiculantur; nihil tamen fecius fons Selteranus, ob vim suam acidum obtundentem partemque nerveas demulcentem in eodem casu eximiam meretur commendationem, idque eo magis, si corporis adest sensibilitas, emaciatio & ad spasmos concipiendos proclivitas, aut si cardialgici dolores cum præcordiorum anxietate, spirandi angustia & intercurrentibus calculi cruciatibus à multo sanguine in intestinorum volumine subsistente graviter urgent. Quod si vero primas expurgandi vias indicatio est, suavis sum, ut ad curationem rite instituendam ægrotantes primo fontem Egranum per octo dierum spatium in convenienti dosi bibant & huic dein Selteranum per tres circiter hebdomades substituunt, vel etiam dimidiam salis Sedlicensis unciam in mensura ejus solutam inter curæ initium & deinceps alternis vel tertio quovis die adsumant.

§. XVI.

Eandem fere efficaciam in malo sic dicto hysterico, quod cum hypochondriaco multum alit affinitatis, foeminino sexui Selterana commodare solet, maxime si illud à remanente aut inordinate succedente menstruorum fluxu suam mutuatur originem. Convenienti enim ordine, diætæ & vitæ genere ipsa epota & pro circumstantiarum ratione sale quodam leniter purgante remixta liberiolem sanguinis per imi ventris & uteri vasa circuitum restituit, inordinatos motus & spasmos confopit, vel certe fundamentum ponit, ad reliqua symptomata facilius abigenda & salutarem mensium fluxum aliorum hoc fine utilium remediorum ope revocandum.

§. XVII.

In morbis cum mentis abalienatione junctis, si præsertim à vehementioribus ac diuturnis animi affectibus nimisque mentis defatigationibus ortum traxerint, eadem Selterana, pariter ac Deinacensis, præstantissi-

mam fert opem. Mirum tamen salubris hujus aquæ usus adjuvatur, quando non modo sanguinis abundantia per venæ sectionem detracta & primæ viæ à colluvie vitiosorum humorum probe prius expurgatæ fuerint, sed ipsa quoque potatio cum quotidiano balneorum aquæ dulcis usu conjuncto ad commodum tempus protrahitur. Hac enim methodo certissime efficitur, ut, sedatis nervosarum partium spasmodis viscerumque imi ventris obstructionibus refferatis, circulatio sanguinis sicut per totum corpus, ita etiam per capitis & cerebri vascula pristino restituatur æquilibrium.

§. XVIII.

Denique præcipua fontis Selterani prærogativa hæc adhuc habenda est, quod ipse nec fixiori calcaria vel martiali terra, nec locupletiori spiritus mineralis copia imprægnatus mitissimam præstet operationem, ideoque imbecillioribus omnibus & minerales alioquin aquas ægre ferentibus optimo sit præsidio. Ita enim foeminis, utero gerentibus & ubera præbentibus admodum est proficua; nam pluribus edoctus exemplis confirmatius asserere possum, quod foeminæ in tertium quartumve mensem gravidæ non Selteranum solum, sed Carolinas quoque tam molares quam ferventes sine ul' subsecuta noxa utiliter potaverint. Enim vero licet ego gravidis Selteranas magna in copia adsumere vel curationes cum ipsis adornandas diu protrahere nunquam permittam; præmissa tamen venæ sectione, alvoque prius liquata tam inter cibos, quam extra hos mane & ante decubitum, ea, quam vitrum cerevisiarum capit, quantitate cum fructu commendare soleo. Nec reticere hoc loco licet, quod lactantibus foeminis, si forte lac generant impurum magnaue caseosæ substantiæ copia refertum, vel etiam si ipsæ scorbuto infectæ infirma premuntur valetudine, firmiori fiducia majorique jure possit præscribi. Et profecto, si dimidiam mensuræ partem quotidie hauriunt, lac inde, quod infanti sugenti præbent multo salubrius efficiunt & ne in coagulum coëns in ventriculo acefcat & fibras intestinorum nerveas irritando diarrhœas, ventris tormina, imo ipsam epilepsiam producat, commodissime avertunt.

§. XIX.

Imbecillioribus dein jure suo adnumerandi sunt senes, quibus Selterana non minorem pollicetur fructum. Etenim quum præcipuæ decrepitorum molestiæ, quales nominatim sunt scorbutus, scabies sicca, impetigo, renum & vesicæ calculi, stranguria, dolores dorfi & ischiadici, arthritidis & hujus census alia, fordes potissimum acidas salino-tartareas prima in regione stabulantes, æque ac insignem sanguinis ac humorum impuritatem pro vera causa agnoscant, in proclivi est judicare, fontem Selteranum, qui humorum acrimoniam temperare, succos edulcorare omnesque intus susceptas impuritates leniter expurgare solet, huic abigendæ esse convenientissimum. Optime itaque sibi consulunt, qui in senio constituti divinum hoc remedium, ad dictos affectus tam avertendos quam præsentis profligandos in usum trahunt & Selteranam vel lacti asinino nuptam per aliquot hebdomades, vel cum vini portione mixtam loco potus ordinarii per totam æstatem, vel etiam cum pane tosto, nuce moschata, cinnamomo & citri corticibus imbutam ad vim ventriculi concoctricem erigendam hauriunt.



FRIDERICI
HOFFMANNI
OPUSCULA DIÆTETICA.

DE MEDICO SUI IPSIUS.

PROOEMIUM.

Duplex
bonum
ducit mor-
tales ad
perfectio-
nem felici-
tatis.



DUPLEX datur bonum, quo humanum genus ad genuinæ felicitatis perfectionem ducitur: alterum spectat ad animam & magis spirituale est, & versatur in consortio & unione cum DEO, utpote

Quomodo
ad eam
possimus
pertingere.

per hanc unice beata, tranquilla & felix evadit anima, unde non immerito talis in DEO tranquillitas summum hominis bonum judicari debet: alterum pertinet ad corpus, & versatur in ejus statu sano, ordinato, ubi omnes actiones corporis recte secundum regulam, ordinem, sive naturam, sine molestia, sine dolore, sine morbo perficiuntur. Prudens igitur ille jure meritoque æstimandus est, qui ad duplicis hujus boni possessionem perveniendam omnibus viribus contendit, & inquirit debita media. Quenam vero hæc sint, & qua ratione ac via ad felicitatem hanc exoptatissimam pertingere quis possit, in quaestione non inepte venit. Brevibus ut rem & mentem nostram circa hoc negotium exprimamus, existimo, quemvis hominem debere esse sui ipsius Theologum & Medicum quoque. Miseri sunt isti Christiani, qui, quoad res credendas, imo agendas, tantummodo aliis credunt ac fidunt, nec ipsi ea, quæ ad salutem æternam animæ sunt pernecessaria præsidia inquirunt, scrutantur, cognoscunt, & indicia facta applicatione secundum hæc vitæ ac conscientie suæ curam ac rationem habent.

Oportet enim
numquam
que naturæ
scientiam
possidere,
& regulas
diætæ ser-
vare.

Eodem modo se res quoque habet cum salute corporis, ubi miseri sunt illi, qui ea, quæ corpori vel prosunt, vel nocent, ipsi non attendunt, vel cognoscunt, neque suæ naturæ scientiam possident, vel diætæ regulas servant, sed pro arbitrio suo vivunt, & persuasum habent, Medici duntaxat hoc esse officium, cui soli in negotio sanitatis sit fi-

dendum. Sed quam misere deludantur, & sanitatem optimum illum vitæ thesaurum postea deperdant, res per se clara est, nec ulla eget probatione. Non institui de præsentī quædam commemorare de rebus ad animæ felicitatem pertinentibus, sed hoc maxime scopo ac proposito nostro consentaneum erit, demonstrare, qua ratione quisque sui corporis debeat & possit esse Medicus, adeo ut Medico alio etiam possit ferme carere, & sine eo vitam sanam & longam servare atque tueri.

§. I.

ANtequam vero demonstrem modum, ac rationes indigitem, quas sequendo quivis sui corporis perfectus Medicus esse possit, opus est primum, ut afferamus momenta, quibus ostendamus, non modo id ipsum esse perutile, sed & summe necessarium. Prima ratio est medicinæ practicæ imperfectio. Quamvis ars nostra in se sit certissima & valde salutaris, nihilo minus non omnes in totum tollere potest morbos, neque in omnibus subiectis, neque omni tempore. Certis enim circumscripta ac limitata est terminis, utpote remedia, quibus ceu instrumentis utitur Medicus artifex, certæ suæ activitatis continentur sphaera, ultra quam minus agere possunt, unde plures à morbis victi plane non curantur. Sique rem velimus exemplis illustrare, ante oculos nobis morbi hæreditarii versantur, & ii, qui in habitum quasi degenerarunt affectus, ut sunt spasmodicæ & convulsivæ nervosarum partium passionibus, quæ abunde visuntur in podagricis, arthriticis, epilepticis, hypochondriacis, hysteri-

Medicina
practica est
imperfecta.

Morbi in-
curabiles.

tundit

Morbi
chronici.

tundit ac imminuit. Notum porro est, nonnullos ex chronicis ita esse comparatos, ut plane non auscultent ulli medicinæ, sed correptos ad lethum certissime ducant. Cujus generis sunt hydrops, phthisis, hæctica, febres lentæ, scorbutus consummatus, cachexia, morbi quidem familiarissimi, sed magna Medicorum opprobria, in quibus certe Medicus nihil solidi præstare potest. Quod vero attinet ad affectus, qui dicuntur acuti, ac in febribus & inflammationibus potissimum versantur, ibi & Medici plerumque frustrantur, sed natura hic optimus solet esse Medicus. Si hæc favet, si potens est, si viribus gaudet, tunc fere sola totum expedit curationis negotium; si vero virtus vitalis, quæ motrix est, si natura deficit, si viæ ac instrumenta ad motum destructa, si humores plane degeneres fuerint, omnis Medici labor inanis atque frustraneus est. Patet itaque luculenter ex hisce breviter adductis, quam debilis sit potentia artis nostræ, & quibus limitibus ac terminis adstricta, & quod Medicus non ea possit perficere, quæ ineptum vulgus ab ipso desiderat. Unde laborandum est, ne incidamus in tales affectus, qui Medicorum opem & remediorum facultates eludunt. Hoc perficitur, si conservamus corpus nostrum idque defendimus à gravibus morborum insultibus: longe enim facilius est sanitatem servare quam possidemus, quam reparare eam, quam amisimus. Cum autem scopum istum præservandi corpus à morborum injuriis, neutiquam quis valeat attingere, nisi ubi quis proprius suus Medicus sit, eaque calleat, quæ sibi prosint, vel noceant; facile apparet, quam necessarium sit, naturam suam cognoscere, & Medicum proprium agere.

Quomodo
sanitas con-
servetur.

Uniuscu-
jusque est
sui ipsius
esse Medi-
cum.

Pauci
dantur
Medici
periti.

Improbi-
tas quo-
rundam
Medico-
rum.

II. Secunda ratio, quæ urget quemvis, qui sanam & longam ducere vult vitam, ut sit sibi ipsi Medicus, sic se habet. Pauci Medicorum ex tanta turba inveniuntur periti & docti, fideles ac circumspecti, & verissimum deprehenditur ipsius HIPPOCRATIS edictum *libr. de arte. Fama & nomine dantur Medici plures, re vero & opere pauci.* Plures carent solida medica experientia, nec non accurata historiæ morborum notitia, quæ tamen fundamentum est totius artis, genuinas & veras remediorum facultates ignorant, sed cerebrum variis speculationibus, controversiis, inanibus & sterilibus theoriis repletum habent. Paucissimos reperies, qui sunt vere rationales, i. e. qui eorum, quæ fiunt, quæ sunt res facti & experientiæ, ex veris physicis & mechanicis principiis & imprimis ex motus regulis ac legibus, rationes & connectiones demonstrant. Physicam enim scientiam, nec non chymicam & anatomicam in academiis non addiscunt, vel ipsorum vel præceptorum culpa, cum tamen hæc scientiæ non egregie modo ornent, perficiant ac distinguant Medicum à Medico, sed & ipsum certum efficiant, & ad plura utilia in sanitatis negotio invenienda occasionem præbeant amplissimam. Plurimi penitus nobilissima medicinæ parte, à sapienti antiquitate semper maximi habita, scilicet *ὕλην*, quæ docet corpus conservare sanum & à morbis ipsum defendere, destituuntur: utpote nec aëris, nec climatis, nec locorum, nec alimentorum, aquarum, vinorum, consuetudinis notitiam vel rationem ullam habent, ex his tamen rebus vivimus, sani sumus & ægrotaamus, multo minus circa has res naturarum distinctionem atque diversitatem attendunt. Sed consuetudo pessima est, crudis studiis, experientia & scientia solida destitutis, prorumpere sic in forum medicum, & farragine remediorum pretiosis formulis, imo fraudibus & eloquentia maleferia-

ta, crumenas ægotantium emungere & plus revera nocere, quam juvare. Quam periculosum itaque sit, in re, ubi de vita & sanitate, pretioso illo thesauro, agitur, fidere cuivis Medico, facile poterit intelligi. Tutius itaque est, suæ naturæ & sui corporis proprium agere medicum.

III. Tertia ratio, quæ exigit, ut quivis calleat notitiam sui corporis, eaque cognoscat, quæ prosint vel noceant, est differentia subjectorum & naturarum maxima. Scitissime jam olim scripsit HIPPOCRATES *l. de flatibus. Differt natura à natura, corpus à corpore, nutrimentum à nutrimento, non enim omni animantium generi eadem aut conferunt aut commoda sunt, sed sunt alia aliis convenientia.* Posita est non minima artis nostræ difficultas in eo, nosse cujusvis individui ægotantis naturam, quas nempe habeat consuetudines in rebus non naturalibus, præsertim in excretionibus, quomodo sese habeat in hac vel illa dosi, quibus animi & corporis pathematibus sit obnoxium, quam sensibile sit corpus. Mirum enim est, quantum in eo differant temperamenta, sexus, familiæ, cælum, vitæ genus, consuetudo &c. imo ipsi morbi immutant corpora, & familiarissimum est, quod idem remedium, uno tempore prosit, altero noceat, & pro diversitate temporum diversas sæpe operationes exhibeat. Quam operosum vero & difficile sit, exacte hæc inquirere & memoria tenere in tot individuis, quæ Medicis offeruntur ad sanandum, facile apparet. Nullus autem melius suam naturam ejus vires & habitum ad hæc vel illa invenire, explorare & addiscere potest, quam quivis ipse: Medici vero sæpiissime in eo peccant, quod ea, quæ ipsis prosunt consueta, aliis quoque omnibus indistincte & promiscue laudent atque commendent, quæ tamen iis minus quadrant vel conveniunt.

IV. Ulterius rationem, cur Medico carere quis possit, ex HIPPOCRATIS *l. i. de dieta §. 14.* petere possumus, cum ait: *Medicina id, quod molestat, tollit, & id, quo homo ægotat, auferens, sanum facit. Natura eadem sua sponte novit, desidens, conatur resurgere, currens, conatur requiescere, & alia ejusmodi natura habet, quæ medicinæ sunt.* Quin imo, universalis sapientis antiquitatis in eo consensus est, naturam esse optimam morborum medicatricem, eamque sufficere sæpius in sanando. Quid autem per naturam intellectum voluerunt Veteres, non una eademque omnium est sententia. Nos, dum naturam nuncupamus, nihil aliud intelligimus, quam coordinationem & œconomiam omnium motuum in corpore, maxime omnium cordis & arteriarum, sanguinisque circulum, quem non à potentia quadam immateriali percipiente, per ideas agente, perque eas motus dirigente, videlicet anima derivamus, sed à principio pure physico, tenuissimo nempe fluido, vi motrice instructo adeoque mechanico. Utpote animæ est tantummodo, per ideas actiones corporum percipere & secundum easdem reagere; naturæ autem est, solo contactu corporeo suas operationes exsequi, i. e. solo motu causas nocentes corporis emendare atque expellere. Non inepte itaque hi agunt, qui non tam respiciendo ad causam, sed ad ipsum actum, sanguinis circulum habent pro natura. Potest hac de re fusius legi *Dissertat. nostra nat. morbor. medicatr. mechanica*, nec non *Clariss. BERGERUS in Dissert. de nat. morbor. medico*, ubi evidentissime demonstratur, corpus nostrum à sapientissimo Deo opifice tam affabre, tam artificiose, tantaque ratione esse constructum, ut non

Differen-
tia subje-
ctorum &
natura-
rum.

Remed-
ium
idem noce-
t & prodest,
pro diver-
sitate tem-
porum.

Natura
optima
morborum
medica-
trix.

Quid per
naturam
intelliga-
tur.

non modo se ipsum per motum à corruptione defendere, sed expellendo, nocentem materiam sanare possit.

Testimo-
nia vere-
rum, ut
unusquis-
que possit
esse sui ip-
sius Medi-
cus.

V. Contulimus hæcenus varia rationum momenta, cur quisque sui corporis proprius debeat esse Medicus, sequitur jam, ut hanc assertionem non novam esse, sed vetustissimam, præstantissimis quorundam Medicorum testimoniis corroboremus. Inter hæc vero eminet laudatissimi nostri HIPPOCRATIS edictum, qui in libr. de nat. statim in principio hæc prodidit: *Omnes homines artem medicam nosse oportet, est enim res honesta ac utilis ad vitam, & ex his maxime eos, qui eruditionis ac eloquentiæ cognitionem habent. Nam sapientiæ cognitionem, medicinæ sororem ac contubernalem esse puto. Sapientia enim animam ab affectibus liberat, augefcit autem intelligentia præsentē sanitatē. Ubi habitus corporis ægrotat, nec mens ipsa claritatem habet ad virtutis meditationem.* Hisce sapientissimus vir innuit, non modo omnem hominem, sed maxime sapientem & eruditum nosse debere medicinam, quoniam hæc animo simul & sapientiæ velificatur. Qua de causa pulchre scribit idem Author libr. 1. de diætâ §. 34. *si sanum fuerit corpus & non ab alio aliquo perturbetur, animi temperamentum sapiens existit.* Dehinc CICERO libr. 2. de officiis: *Valetudo conservatur notitia sui corporis & observatione earum rerum, quæ aut prodesse solent, aut obesse.* Huic quoque consentit Illustris VERULAMIUS, qui in sermone fidel. Tit. 34. hæc habet: *Observatio cujusque propria eorum, quæ nocent & eorum, quæ juvant, optima est medicina ad sanitatem tuendam.* Tiberium Cæsarem legimus apud SUETONIUM Cap. 68. & TACITUM Annal. VI. 46. *solum eludere Medicorum artes atque eos, qui post XXX. ætatis annum ad internoscenda corpori suo utilia vel noxia alieno consilio indigent.* Usus enim quid salutare, quid vitæ aptum, quid contra sit, docet. Cato ille magnus philosophus ipse erat suus & totius familiæ Medicus. Et Historici referunt de vita sua, quod illustris hic Romanus se suosque sanos servaverit per solius rationis & naturæ regulas. CELSUS autem elegantissimus ille Medicus, quod non adeo magnus medicinæ patronus fuerit, ex hisce clarum fit: Scribit enim statim in præfatione: *Multiplex ista medicina neque olim neque apud alias gentes necessaria, vix aliquot è nobis ad senectutis principia perducit.* Ipse HIPPOCRATES pulchre distinguit libr. de arte inter Medicos & medicinam, doctè judicans, plures evadere posse sanos, qui Medicis non utuntur, nihilo minus tamen medicina; valde enim necessarium est, ut ii, qui Medicis non sunt usi, si ægrotarunt, & convaluerunt, aliquid fecerint aut non fecerint, per quod sanati sunt, adeoque non minus ea, quæ opem tulerunt, quam ea, quæ damno fuerunt, testantur artis certitudinem.

uamodo
unusquis-
que se ip-
sum sanare
præser-
vare possit.

atus sa-
s.

VI. Offensum igitur est tum rationibus, tum autoritatibus, perutile esse, ut quilibet gnarus sit corporis sui, & quod sine Medici ope sanus esse, & permanere possit. Res ipsa jam ulterius postulat, ut doceamus, qua via & quo modo unusquisque ad cognitionem sui ipsius pertingere, seque ipsum & sanare & præservare possit. Primo omnium vero opus est, ut quisque sciat, an in statu sano vel ægroto sit, & quænam sint hujus status indicia ac notæ. Brevissimis: sanus homo is est, qui bene appetit, & bene secundum proportionem ingestorum egerit per omnis generis emunctoria. Sanus porro est, qui corpus possidet omnis doloris, gravitatis, lassitudinis ex-

pers, robustum, agile ad motum & laborem aptum, in quo somnus moderatus & reficiens, mens serena ac hilaris, ad studia apta, pulsus arteriarum moderatus cum calore corporis temperato, hisce signis præsentibus sanus homo dici poterit. Morbi autem tam præsentis quam futuri testimonium sunt appetitus prostratio, cum nausea, sitis magna, egestionum per alvum, per transpirationem, per urinam imminutio, & peculiaris in hisce mutatio, virium languor, corporis gravitas ac lassitudo spontanea, somni defectus, vel turbulentia, pulsus frequens solito major cum horrore & calore corporis, flatulentia & gravitas in hypochondriis, facies lurida & pallida, macilentia præternaturalis, magna proclivitas ad animi præcipientes motiones, dolor insolitus in capite vel circa lumborum vertebrae. Ex hisce colligere quivis potest, morbum gravem esse in propinquo. Unde celerius languenti naturæ est succurrendum. Qua ratione autem id perficiatur, inferiori loco docebimus.

Status
morbosus.

VII. Deinceps qui vult longam & à morbis immunem ducere vitam, is probe callere debet, quænam sit morborum origo ac fons. Ut autem hac in re breviter & perspicue exponamus nostram sententiam, ita dicimus: sicuti sanitas est motus liber, æquabilis & temperatus sanguinis, in debita quantitate & mixtione existentis, per omnis generis tubulos corporis nostri, quo omnes actiones secundum normam & regulam fiunt, ita morbus, à statu naturali recessio, fit à motu sanguinis & humorum impedito inæquabili intemperato, ob læsam non modo quantitatem & mixtionem humorum, sed & ob naturæ, motus & spirituum, qui motum celebrant, defectum. Perpetua enim hæc regula mechanica & physica Medicorum est, quod æquabilem proportionatum & temperatum motum, qualis vitam & sanitatem constituit, debeat esse proportio inter movens, five vires motrices, quæ sunt in nervis, & musculis, & inter mobile five sanguinem & humores, qui sunt in vasis. Ex hac proportionem læsa, quæ fit maxime ex defectu virium respectu sanguinis, resultat omnis morborum fons materialis nempe, utpote inter ipsum motum morbosum & causam morbi materialem distinctio quædam est.

Fons ac
origo mor-
borum.

VIII. Ut autem pressius hanc ipsam rem tractemus, placet ex ipsis scriptis HIPPOCRATIS quid ipse senserit de morborum ortu, hoc loco evolvere. Extat autem egregius locus libr. de natur. human. §. 18. *Morbi, (scribit) partim ex diætis, partim ex spiritu, quem attrahimus, fiunt.* Per spiritum intelligit aërem, quem libr. de flatib. nuncupat maximum in omnibus, quæ corpori accidunt, authorem & dominum vitæ, & morborum fabrum, idque judicat magnus ille vir optima ratione. Perquæ enim notum est, quanta sit aëris ad circulum sanguinis necessitas, quo vitæ & sanitatis ratio continetur. Nam is ipse est, qui pondere suo vesiculas pulmonum elevando transitum sanguini concedit ex uno ventriculo in alterum. Is pondere suo externe vasis corporis incumbens moderatur nimiam expansionem aëris interni, & transpirationis excessum. Aër porro elastica sua valida virtute subtilissimaque portione sanguini intime mixtus, totum negotium spiritualescentiæ & virium, quæ insunt musculis ac nervis, absolvit. Aër enim tanquam universalis spiritus, animantibus robur, motum, calorem, imo animam concedit. Et ut libere dicam, anima nihil aliud est, quàm aër variis potentiis inmaterialibus valde activis distinctæ operationis imbutus, unde non inepte HIPPOCRAT. l. de flatibus & de morbo sacro dicit: *aër sensu & motu præstat partibus.*

Aër pluri-
mi facit ad
vitam &
sanitatem.

Mutatio-
nes aëris
mutatio-
nem in
corpus fe-
runt &
animum.

Exinde
varii mor-
bi produ-
cuntur.

IX. Ex hisce facile intelligitur, si quando aër ab indole temperata desciscat, quantæ noxæ tunc immineant corpori. Experimento quotidiano discimus, ad aëris subitaneas mutationes, variumque tempestatum habitum, subito mutationem quandam in corpore & animo perferri. Atmosphæra enim nimis humida, cælum nimis nubilum & pluviosum, venti austrini & occidentales, corpus flaccidum languidum, mentemque tristiorrem reddunt. Motus enim sanguinis ob robur fibrarum delassatum, tardius procedens, excretiones omnes facit imbecilliores, unde omnes morbi humidi, putridi, maligni, & qui ex stagnatione feri, imbecillitate nervorum & motus defectu oriuntur, non modo tunc gignuntur, sed & præfentes incrementa capiunt. Atmosphæra nimis frigida, compressa asperis rigidis elasticis ventis, quales sunt septentrionales, animata, dolores & spasmos, ubicunque consistunt, acutiores reddit; tussis, rauces, coryzas, rheumatismos; catarrhales, inflammatorias febres progignere apta est, præsertim si ad hos affectus disposita fuerint corpora. Observavimus quoque febrium intermittentium recidivas & paroxysmos arthriticos à borealibus ventis facile suscitari. Quam infensus sit valde frigidus hyemalis aër nervosis partibus & quantum morbos ex debilitate nervorum eorumque obstructions augeat, inter practicos notissima res est. Neque dubitari poterit, ab austrina nimis fervida levi & valde rarefacta atmosphæra morbos præcalidos, choleras; ardentes, tertianas continuas & intermittentes febres, hecticas quoque, diarrhœas capere suum ortum, & nimium inde exacerbari. Neque ignorari oportet, omnes morbos epidemios, quorum magnus est numerus & ingens frequentia, ex aëre ceu communi causa plures simul lædente, prognasce. Clarissime jam dudum id professus est HIPPOCRATES l. de natur. human. §. 15. inquit: *Quando ab uno morbo multi homines corripuntur, eodem tempore causam ad id, quod communissimum est, & quo maxime omnium utimur, referre oportet, est autem hoc spiritus sive aër, quem inspirando trahimus.* Quales vero morbi sub peculiaribus tempestatibus surgant, de hisce ipse HIPPOCRATES aperte libr. de humorib. §. 7. pronunciat sequentia: *Qualia sunt tempora, tales etiam erunt morbi & constitutiones ex ipsis: si tempora tempestive & ordinate se habuerint, morbos judicatu faciles faciunt, & contra.*

Diæta prava morbum inducit.

Tria faciunt ad malam diætam.

X. Alteram causam, quæ morborum parens est, divinus noster Senex ducit ex diætâ pravâ. Est autem secundum gravissimum hunc Authorem l. de flatib. §. 9. *Mala diæta hæc, primum quidem, cum quis plures cibos liquidos aut siccos ingerit in corpus, quam ipsum corpus ferre queat, neque laborem aliquem ciborum saltem multitudini respondentem adjungit; Deinde cum varios & dissimiles inter se cibos assumit, seditionem enim movent, quæ sunt inæqualia, aliquaque citius, alia difficiliora concoquuntur.* Tria sunt, quæ ad malam diætam secundum HIPPOCRATEM concurrunt: primo ciborum multitudo, quam corpus ferre non potest, secundo, motus & laboris intermissio, & tertio ciborum varietas. Quandoquidem si sanum permanere debet corpus, generalis hæc observari debet regula, proportionem inter alimenta & vires, sive motum & naturam corporis esse debere. Sic robusta corpora, in quibus validus celebratur motus, ciborum copiam bene possunt ferre, i. e. digerere & superflua ejicere citra sanitatis dispendium. Imbecillia vero, quibus parum motus & vigoris inest, non sine damno utuntur alimentorum copia, ob defectum enim di-

gestionis & egestionis debitæ, copia feri vel sanguinis impuri in venis progignitur, quorum utrumque largus fons est ægritudinum cum chronicarum, tum acutarum. Veteres talis modi sanguinis abundantiam plethoram, feri vero excessum cacochymiam appellarunt, & pro fundamento morborum duplex hoc vitium unanimi consensu habuerunt. Solennes sunt ex nimia sanguinis abundantia, spasmi, inflammationes, febres & hæmorrhagiæ. Pulchre scribit HIPPOCRATES l. c. §. 9. *sanguine abundantes partes, propter sanguinis multitudinem, & tremunt & inflammationes suscitant, nequit enim fieri, ut sanguinis multitudo conquiescat.* Cacochymia autem sive feri impuri abundantia, cachexiam, scorbutum, varias exulcerationes, tumores, dolores, fluxiones serofas, variaque tartarea coagula, putredinem verminosam lentasque catarrhales, malignas febres exsuscitat, nec non scirrhusa viscera, gravissimosque chronicos morbos parit.

Plethora apud veteres quid.

Cacochymia varios morbos exsuscitat.

XI. Ad producendam autem tam plethoram quam cacochymiam non tantum multitudo ciborum major, quam natura ferre potest, sed & laborum intermissio confert. Dicit vix potest, quam salubris sit & sanitati amicus motus & labor membrorum. Externus enim motus exsuscitat internum motorem, spiritus auget, sanguinis & humorum excretiones adjuvat, ergo dilucide apparet, quam infensa sit quies & otium. Pulcherrima sunt, quæ hac de re nobis reliquit HIPPOCRATES lib. de diætâ §. 11. *Homo edens sanus esse non potest, nisi etiam laboret, contrarias enim inter se vires habent vices & labores, verum inter se mixti conferunt ad sanitatem. Labores enim ea, quæ insunt, consumere solent, cibi autem & potus ea, quæ evacuata sunt, explent. Oportet itaque habere mensuram, ac proportionem laborum ac multitudinem ciborum pernoscere. Si enim inventa fuerit ciborum mensura, & laborum ad unamquamque naturam numerus, ita, ut excessus neque supra neque infra modum fiat, inventa sane exacte hominibus sanitas.*

Motus & labor sunt sanitatis causa.

XII. Tertio refert HIPPOCRATES ad malam diætâ ciborum dissimilitudinem. Certe prisca, qui simplici victu utebantur, & saniores & longæviores erant nostrorum temporum hominibus. Et illi populi nec non plebeji, rustici, qui lacte, pane, caseo, butyro & aqua fruuntur, sanitate præstant omnibus iis, qui laute vivunt, & delicatis variis cibis sub otio vescuntur; & robustiora corpora habent & vivaciores infantes progignunt. Natura enim gaudet temperie & temperatis alimentis, quibus conservatur. Eam autem lædunt omnia intemperata, excessivis qualitatibus prædita, fortia & potentia. Meretur huc adduci elegans locus HIPPOCRATIS libr. de veteri medicina §. 32. *Verum robur & augmentum, ac alimentum præsertim per nihil aliud contingit, quam quod probe temperatum est & nihil habet intemperatum, neque forte, sed totum unum factum est, & simplex, & non forte.* Teneri hoc loco oportet, cibos optime dispesci posse in eos, qui sanguini materiam præbent, & qui serum generant, illudque peregrinis qualitatibus induunt. Ex illorum classe sunt carnes, præsertim gelatina abundantes, uti est suilla, vitulina, bovina junior, omnia farinacea, dulcia, ova, pingua, semina & fructus multum olei recondentes, dulcia vina, cerevisiæ alimentosa. Hæc copiam sanguinis proferunt maxime in corporibus, quæ natura multum generant sanguinis. Serum vero impurum & sanguinem intemperatum reddunt, lacticia, fructus horæ, omnia olera, vegetabilia, carnes indurata, salina acida, spirituosa, aromatica, acida, vina austera,

Dissimilitudo ciborum excitat malam diætâ.

Quales cibi sanguinem impurum reddant.

flera, marina, præsertim pisces. Hæc ipsa, ut non destituantur usu suo, præsertim in iis, qui multum generant sanguinis, nocent tamen serosis, & ubi viscerum obstructions adfunt, & ubi natura imbecillis est, maxime si peccetur in excessu; unde disponunt ad cacochymiam, omnesque eos morbos, qui ex hac resultant.

XIII. Restat adhuc alia causa, quæ efficacissima est ad gravissima pathemata celerime inferenda in corpus, eaque sit per animam nostram. Mirabile est, quod anima solo ideali & immateriali actu, & perversa ad certa objecta cogitatione & ratiocinatione, & inde nascente vario desiderio vel cupiditate, vehementer movere & conturbare possit non modo sanguinis circum, sed & excretiones pervertere, & spasmodicas contractiones in genere nervoso & membranoso hinc inde producere. Magna est vis & potentia animæ in corpus nostrum, & quasi rota suprema quæ alias rotas circumagit. Edocemur enim quotidiano exemplo, quod v. gr. à terrore gravissima mala inferantur, videlicet epilepsia, syncope in foeminis, abortus, mensium aut lochiorum suppressio aut nimius eorum fluxus, cordis palpitatio, apoplexia, paralyfis, nimia hæmorrhagia, hystericus adfectus. Ab iracundia non semel notata fuerunt erysipelas, inflammationes gravissimæ ventriculi, hæmorrhagiæ, febres biliosæ cholericæ, colicæ, arthritides, icterus, paralyfes, apoplexia, vomitus biliosi. Tristitia, mœror, nimia cura, animi anxietas ad morbos chronicos, febres lentas, hecticam, viscerum obstructions, affectum melancholicum, hypochondriacum, scorbutum præsentissime disponunt, imo vires destruendo malignitatem facillime morbis ingenerant. Neque tantum animi commotiones gignunt novos saltem morbos, sed & veteres exasperant, paroxysmos resuscitant, recidivas accersunt. Brevisissimis: animus hominis plus nocet corpori, quam omnes res corporeæ & non naturales, quibus homo utitur.

XIV. Expósito sic morborum, qui invadunt corpus humanum, ortu, eorumque causis perspectis, facillimum jam erit inquirere modum ac rationem, sese defendere ab ipsis, & in tempore prævenire horum ortui. Placet igitur per singulas classes ire & compendio subicere quasdam regulas, quarum observatio perquam utilis ad scopum nostrum obtinendum erit. Dictum fuit, ab aëris intemperie plures nasci communes morbos, hos ut evitemus, oportet sequentia tenere: 1) Vitandus est, quantum possibile, omnis aër humidus, & in humilibus locis, vaporibus & exhalationibus repletus, omnis quoque frigidus & excessive calidus: eligendus vero est serenus, ficcus, perflabilis & in altioribus locis existens. 2) Tempore vernali & autumnali, ubi aëris immutatio & alteratio varias mutationes & commotiones in corpore infert, vestibis probe est muniendum corpus, & victui tunc aliquid detrahendum, transpiratio quoque per infusa calida vegetabilium procuranda. 3) Si diu persistit austerina præhumida pluviosa cœli intemperies, ad serosos & putridos morbos valde disponens, medicamenta balsamica, salia volatilia oleosa, vinum generosum, usus pilularum *Ruffi* vel *Avicennæ*, in consuetis tabaci fumus, inveniunt egregium locum, non neglecta sobrietate, semper commendatissima. 4) Nunquam corpus liberius exponendum ventis borealibus, præsertim, si quis ad catarrhos & febres, & dolores arthriticos inclinet, vel etiam plethoricus sit, aut ex morbo convalescit, aut vino vel crapula onustus fuerit. 5) Quan-

do morbi grassantur epidemici ex pravo temperamento habitu, omnem nimiam repletionem in cibo & potu, affectuum intemperiem evitare oportet. Expediit tunc alvum habere apertam per pilulas balsamicas, ex quibus commendo sequentem formulam. *Recipe Aloës hepaticæ, extracti centaurei minoris, myrrhæ electæ ana scrupulum unum, croci, extracti rhabarbari, balsami peruv. ana scrupulum semis. M. F. l. a. Pilulæ, pro una dosi sufficient grana XV.*

XV. Proximum jam est, ut nos conferamus ad eos morbos, qui ex nimia repletionem & mala diætâ originem suam accersunt. Hos ut præcaveamus, sequentes inservire possunt regulæ: 1) Perpetuo studendum est temperantiæ & sobrietati, nec nimis saginandum est corpus. Elegantissima hanc in rem habet *CELSUS* in præfatione. *Verisimile est (inquit) inter non multa auxilia adversæ valetudinis, plerumque eam bonam contigisse ob bonos mœurs, quos neque desidria neque luxuria vitiarunt, siquidem hæc duo corpora prius in Græcia, deinde apud nos affligerunt.* Huic etiam assentitur *DEMOCRITUS* scribens: *homines à DEO sanitatem petunt, ignorant autem, quod ejus potestatem apud se habeant. Nam per intemperantiam facientes contraria ipsi proditores sanitatis suæ existunt. Et HIPPOCRATES libr. de morbis: si quis pauca edat, & pauca bibat, nullum inde morbum experietur. Et alibi: Nihil magis ad sanitatem facit, quam non satiari cibis, & impigrum esse ad labores, unde pulchrum adagium, modicus cibi, Medicus sibi.* 2) Quorum corpora copiam sanguinis facile progignunt, illi sibi temperent à nimio carniū elu, quem per totam vitam parciolem lubentissime vellemus. Certe fuerunt prisca sanissimi homines, qui fructibus, lacte, herbis contenti simplici victu & tenui diætâ consenescebant, uti *Plato, Zeno, Socrates.* *PORPHYRIUS libro 4. de abstinentia* testatur, quod carnibus abstinerent Philosophi, sponte nascentibus ex terra contenti. *PYTHAGORAS*, qui à sobrietate suam philosophandi rationem orsus est, certis de causis esum carniū prohibebat. Mirabile est, quod nos abstinerere soleamus ab omnibus eis animantibus, quæ carne vescuntur, nihilo minus ea mirifice delectemur. 3) Sanguinei parcius assumant dulcia, farinacea, leguminosa, pingua, vina generosa, hæc enim abundantem sanguinem corpori ingenerant. 4) Debiles, valetudinarii frigidæ & serosæ constitutionis homines, foeminæ præsertim, valde fugiant acidorum nimium usum. Dici enim vix potest, quantum hæc vitient corpora foeminarum, & irregularem mensium fluxum faciant nec non ad spasmodicas multasque chronicas passiones exemplo quotidiano eas deducant. 5) Cibi debite conditi sale, aromatibus, vino aceto melius concoquantur, & minus naturam gravant; quam qui talismodi condimentis carent, diutius enim morantur in sanguine quam decet. 6) Mensura ciborum tam ratione copiarum, quam ratione difficilioris concoctionis, æstimanda est, secundum proportionem laboris motuum, exercitationem corporis, secundum vires quoque. Nam robusti & qui laborant, duram & plenam diætâ ferre possunt, minus, infirmi abstinentes à laboribus. 7) Nunquam ingerenda sunt de novo alimenta, antequam priora fuerint concocta, judicamus concoctionem ex eo, dum agile & leve fit corpus, nullus torpor vel gravitas inest membris, ingenium alacre redditur, urina & alvus bene succedit, appetitus resurgit, nec flatulentia incommodant hypochondria. 8) Quod si gravitas percipitur in membris, lassitudo in corpore, alvus segnis est, ructus & inflationes primas vias occupant,

morbi epidemici sunt præcavendi,

Quomodo effugiendi sunt morbi ex repletionem & mala diætâ originem accersentes.

Quinam sibi temperare debeant à nimio carniū elu,

Diætâ sanguineis.

Quid oporteat debiles & foeminas.

Quales cibi eligendi.

Mensura ciborum.

Non de novo alimenta ingerenda ante concoctionem priorum. Quando lassitudo & alvus segnis sint, quid faciendum.

somnolentia & torpor caput petunt, detrahendum aliquid cibi est, vel à cœna plane abstinendum & humida tantum, facillimæ digestionis, assumenda, corpusque fortius movendum est; labores enim egregie evacuant & agile ac liberum corpus reddunt. Audiri meretur hac de re HIPPOCRATES qui in *lib. de veteri med. §. 19.* egregie describit incommoda, quæ à nimia ingluvie proficiscuntur, dum ait: *Si pransi fuerint, idque eis non conducatur, statim graves & corpore segnes fiunt, itemque mente pigri, flatuque ac oscitatione & dormitatione ac siti pleni; si vero insuper cœnaverint & flatu & tormina, & alvus infringitur; & multis magnis morbis principium hoc fuit, si eosdem cibos, quos semel assumere consueverunt, bis assumant & nihil amplius.*

Sanguinis exundantia convenit V. S.

XVI. Si vero nimia sanguinis exundantia morbum & periculum corpori minatur, solvenda hæc ipsa citius venit, idque optime per venæ sectionem. Indicant autem plethoram & hujus generosi auxilii necessitatem facies rubicunda, sanguine turgida, pulsus magnus, dolor gravativus in dorso, lumbis, in osse sacro, lassitudo & gravitas corporis præsertim à motu & adscensu acclivium, ardor ac pruritus cutis, venæ sectionis vel evacuationis sanguineæ naturalis consuetæ intermissio. Hisce signis præsentibus, tutissime veniendum est ad sanguinis artificialem evacuationem, commodissime autem ea ipsa fit ante & post æquinoctia hac cautela, ut sobrie vivamus post eam, cibusque facilis & boni succi corpus nutriamus.

Quando V. S. omit-tenda.

XVII. Si vero abundantia succorum impurorum ex intemperie alimentorum nata, subiecta imbecillia onerat, & morbos tales, quos cacochymia parat, minatur, consultius erit venæ sectionem omittere, & potius minuere & emendare peccantem materiam oportet per evacuantia balsamicæ naturæ, amara & majorem motum moventia. Talia sunt medicamenta sale volatili oleoso imbuta, vini optimi potus procurans liberiores ventilationem & excrementorum exculsionem, non omisis polychrestis pillulis, vegetabilium infusis cum aqua calida adornatis.

Quid circa potum tenendum.

XVIII. Circa potum tenenda hæc sunt, 1) ut temperatus citius hypochondria citra flatulentiam transiens præ omnibus aliis eligatur, sive sit vinum sive cerevisia. 2) sufficiens quantitas ejus sumenda est, ab hujus enim defectu pigra fit alvus, segnes evadunt evacuationes & corpora ad morbos chronicos disponuntur. Natura enim gaudet maxime fluido, sine quo sanguinis circulus & excretionum œconomia salva subsistere nequit.

Ebrietas nocet sanitati.

3) extra cibos, potus largior, præsertim inebrians, plane vitandus est: mirum enim nocet sanitati ebrietas, utpote intemperiem humoribus, nervis magnam infert debilitatem, ac digestionum robur destruit. 4) potus frigidus corpori calefacto magna quantitate ingestus verum æmulatur venenum. Nam uti venenum; ita talis potus celerrime totam œconomiam motuum vitalium & secretionum turbat & pervertit. Unde multiplici experimento compertum est, plures inde sibi contraxisse lethales morbos. Inciderunt nempe in ventriculi inflammationem, hæcticam, phthisin, hydropem, lentas febres, peripneumoniam, abscessus. Nocet autem maxime talis modi potus sanguineis, & qui vasa habent exilia, copiosa, & spongiosi sunt habitus corporis. 5) Si ex tali potu assumpto imminet noxa corpori, mox fortius illud movendum, vena mature secanda, & infusa calida, blanda diaphoretica sumenda.

Potus frigidus æmulatur venenum.

XIX. Quoniam in superioribus animi perturbatio relaxata fuit inter causas morborum præ-

sentissimas, hinc ne ab animo nobis contrahamus infirmum corpus, omni modo cavendum est. Palmaria autem & summa vere universalis medicina hic commendanda venit, quæ est animus tranquillus, & quietus & pacatus ejus habitus & status, qui omnibus vehementibus desideriis & cupiditatibus vacuus est. Maxime omnium autem cesset animi commotio circa tempus somni, cibi & motus: Audiendus hunc in finem est VERULMIUS in *serm. fidel. tit. de regim. valetud.* ita sentiens: *Vacuo animo esse & hilari, ad horas cibi somni & exercitationis, est ex optimis præceptis ad prolongandam vitam, quatenus ad animi passiones & studia. Devita invidiam, metus anxios: iram intus cohibe, subtiles & nodosas disquisitiones, gaudia, & exhilarationes immodicas, tristitiam alte pressam & non communicatam: amplectere spem, latitiam potius quam gaudium: delectationum varietatem magis quam satietatem, admirationem & propterea novitates; studia quæ animum replent splendidis & illustribus subjectis, veluti historias, fabulas, peragrationes naturæ. Ad tranquillitatem animo conciliandam subsidia hæc opportuna sunt, nempe sanioris philosophiæ saluberrima præcepta, quæ omnia mundana spernere docent. Itaque non sine ratione LUCIANUS, *Lib. Macrob. p. 827. longævis annumerat philosophos & omnes, qui ingenio & eruditione præstantes fuerunt. Ita etiam PLUTARCHUS narrat, plures corpore alioquin parum firmo philosophiæ præceptis vitam longam consecutos. Maxime autem omnium vitam longam vixerunt, qui delectabantur pulchris, & quos orationis capiebat ornatus, sic Gorgiam, Protagoram, Isocratem, & à latinis M. Senecam rhetorem, philosophi parentem longævus fuisse legimus. Laudandi eam ob rationem sunt Platonicæ veteres Medici, qui paucis remediis, plantarum nempe decoctis, contenti potius omnem animum atque operam eo convertabant, ut bonis moralibus præceptis imbuerent animos hominum, tam sanorum quam ægrotantium, probe gnari, quod ex animo magna medicina redundet in corpus. 2) Ad animi tranquillitatem conferunt pietas & frequens lectio verbi divini, cum animo serio id applicandi ad usum: pietas revera ad omnia utilis est, & hinc etiam ad vitam sanam ac longam. Nam qui per preces & fidem magno Spiritus Sancti dono beatur, ejus anima incredibili lætitia, pace, tranquillitate, amore fruitur, qui omnes affectus sanitati egregie favent. Denique ad tranquillum & pacatum animi flatum non parum confert studium rationis, ejus amor, & veritatis inquisitio, temperantia in vita & victu, conversatio cum honestis & piis hominibus, & fuga otii.**

Animus tranquillus summa medicina.

Quo pacto quis adipisci queat.

Læus Platoniorum veterum.

Lectio verbi divini confert ad tranquillitatem animi.

Ut & studium rationis.

Medicamentorum usus.

XX. Quandocunque vero commotio gravior animum corpusque percellit, utile est abstinere à cibo & potu, evacuationem moliri per alvum, & pacare spirituum discursivum motum per pulverem præcipitantem ex antimonio diaphoretico, lapidibus cancrorum, nitro purificato, & pauxillo anodynii confectum, qui in incandescencia valde proficius. In terrore subito, efficaces sunt spirituosæ aquæ cum antispasmodicis mixtæ, aqua florum tiliæ, liliorum convallium, spirituosæ, pulvis Marchionis, essentia castorei, sal volatile oleosum. In mœrore ac angore animi, usum vini optimi commendamus, item ambre vel moschi essentiam cum sale quodam volatili mixtam.

XXI. Præcepta hæc singula ad sanam & longam vitam ducentia generaliora sunt, nihilo minus in diligenti debent esse observatione; non alienum vero ab instituto nostro videbitur, quadam adhuc

Medicus
sui ipsius
debet possi-
dere ex-
quisitam
sua natura
& corporis
cognitio-
nem.

Vita unde.

Qualis ro-
busta na-
tura.

Que de-
bilis.

Robur na-
ture indi-
catur ex
habitu cor-
poris.

Consuetu-
do altera
natura.

Quomodo
attendenda.

Sensibilia
corpora.

Firmiora
corpora
sua.

Subiecta
idiosyncra-
m fo-
ventia.

adhuc specialiora afferre, ad cuiusvis individui usum spectantia. Nam qui sanum vult servare suum corpus, ille ante omnia exquisitam suae naturae & corporis debet possidere cognitionem. Aureum enim dictum est HIPPOCRATIS, *Differt corpus à corpore, natura à natura, temperamentum à temperamento*. Et quemadmodum juxta eundem nobilissimum autorem, principium ac fundamentum totius medicinae est scientia naturae humanae, ita etiam fundamentum, secundum quod leges & regulae, tam in diæta quam medicina invenire quisque debet, esse oportet cuiusvis propriae naturae in individuo scientia. Per naturam hic intellectam volumus maxime virium constantiam & totam oeconomiam motuum; vires judicantur ex sanguinis circulo & pulsu, ex labore & robore partium, ex vigore digestionis atque excretionum, ex potentia motus in musculis. Vita dicitur merito à viribus, & nil nisi motus est, & exierit se & perficitur motu, & unice dependet à viribus motricibus, quæ insunt partibus solidis & fluidis corporis nostri. In quocunque itaque subiecto copia virium manifestatur, illud bonam ac robustam natum est naturam, hoc non tam facile læditur à causis externis, multos ferre potest labores ac molestias, facilius convalescit & revertitur ex morbo. Contra ubi virium adest languor & defectus, debilis dicitur natura, quæ facillime læditur à quacunque causa heterogenea, nec sustinere multum potest, facilius ægrotat, & difficilius sanescit. Plurimi hic refert, ut robur & debilitatem naturae cognoscamus, inquirere in parentes, eorumque dispositionem ac morbos. Robusti enim ut plurimum robustos progignunt infantes, morbo si morbosos. Indicatur postea naturae robur ex habitu corporis, qui enim solida ossa, magnos nervos & tendines habent, vasaque majora, plures dentes, habitum corporis strictiorem, ii valentiori gaudent natura præ iis, quibus laxa & spongiosa est caro, facile sudant, venas habent & nervos exiles, ossa parva, paucos dentes.

XXII. Secundo loco quivis homo naturam suam, ratione consuetudinis, probe cognoscere debet: Scite enim dictum à Veteribus, *consuetudinem esse alteram naturam*. Consuetudo attendenda est maxime in usu rerum non naturalium, & nominatim circa quantitatem & qualitatem ciborum, circa tempus assumptionis, circa somnum & vigilias, corporis motum, aeris usuram. Extenditur quoque hæc ipsa ad excretionem per alvum, urinam, sudorem, sanguinis per nares, uterum, hæmorrhoides, imo ulterius ad sanguinis artificiales missiones, per venæ sectiones, cucurbitulas.

XXIII. Tertio versatur naturae propriae cognitio in eo, ut aliquis sciat, utrum corpus valde sensibile sit, nec ne: permagna enim in eo est differentia corporum, quædam naturae valde sensibiles sunt, activæ, & subito alterantur, vel ab ipso animi motu, vel ab alieno aëre, vento septentrionali, aut mutatione cibi aut potus. Sensibilia quoque ea corpora dicuntur, quæ mox sentiunt operationes cuiusdam purgantis, vomitorii, opii, in minima etiam dosi. Firmiora autem sunt, quæ non tam facile vitiantur aut afficiuntur, sive sit aer insuetus, cibus & potus, ventus, quæ majorem dosin vomitoriorum, purgantium, sudoriferorum ferre possunt.

XXIV. Quarto dantur plurima subiecta, quæ non modo differunt, ratione sensus exquisitoris vel minoris, sed peculiarem idiosyncrasiam vel sensum ad hæc vel illa fovant. Ita quidam plane nequeunt ferre tabaci fumum, cerevisiam, caseum, butyrum: quidam præsertim foeminae læduntur mi-

risce à suaveolentibus. Datur in nonnullis peculiaris averfatio, ab his vel illis medicamentis, camphora, aniso, absinthio: quidam plane certa remedia ferre nequeunt, uti sunt opiata, martialia, aloëtica. Novimus virum, qui, quoties assumpsit cremorem tartari, toties syncope correptus fuit. Tacemus, quod nonnullorum naturae ita sunt comparatae, ut mallent mortem admittere, quam sanguinem mittere vel clysteris admissionem pati. Denique observatur quoque peculiaris sensus in quorundam cute. Quotidiana hæc est observatio Chirurgorum, dum nonnulli in externis læsionibus plane nequeunt perferre emplastra, vel alii non spiritus, vel unguenta, nonnullis calida cataplasmata nocent, quidam vero ab hisce non afficiuntur. Ita etiam porro quorundam cutis facillime consolidatur, in aliis ægerrime vulnera coeunt.

XXV. Cum itaque hætenus deductum fuerit, multum longeque differre inter se naturas hominum quoad usum tam rerum non naturalium, quam medicamentorum; hinc utile erit, imo pernecessarium, quasdam regulas & observationes hac de re condere. Prima est: Qui robustam ac valentem natum sunt naturam, ii non debent tam accuratum servare diætæ regimen. Spectat illud CELSI: *Sanus homo & qui bene valet, & suae spondis est, nullis se obligare legibus debet; hunc oportet varium habere vitæ genus, modo ruri esse, modo in urbe sæpiusque in agro, navigare, venari, quiescere interdum, sed frequentius se exercere, nullum cibigenus fugere*. Et tali in casu valet illud: *Medice vivere i.e. rigore secundum regulas medicas vivere, est pessime vivere*. Secundo, qui naturam acceperunt debilem & imbecillem, valetudinarii sunt, & ad subeundos anomalos motus valde prompti, hi accuratius tenere debent diæteticas regulas. Certa enim cibi & potus mensura ipsis est præscribenda, temperatus aer, somnus quoque largior sit commendatissimus, quo enim quis debiliior est, eo diutius debet dormire & contra. Nocent quoque ejusmodi subiectis omnia intemperata, potentia, excessivis qualitatibus imbuta, & maxime omnium animi gravia pathemata. Tertio consuetudo longo tempore, non simul & semel sunt omittenda, quandoquidem consuetudo est altera natura, & sicuti difficile est naturam immutare, ita etiam consuetudinem non simul & semel tollere oportet: unde optimum HIPPOCRATIS effatum; *quarum rerum inveteravit consuetudo, quamvis deteriores sint, illa tamen minus consuetis male afficiunt*: Est ergo assuetorum usus suscipiendus, idem Author sect. 11. aph. 49. hæc habet: *Assueti, consuetos labores etiam si fuerint debiles aut senes, non assuetis quamvis fortibus aut juvenibus, facilius ferunt*. Paucis: omnis subita mutatio, in rebus diu consuetis periculi plena est, ita v. g. si quis consuevit somnum capere meridianum, vel diu dormire, aut lectum tardius petere, lucubrare, vel induratis infumatis cibis uti, vel tabaci fumo, sternutatoriis pulveribus semper delectatur, corpus in perpetuo labore servat, vel peregrinatur, is non facile ex istis rebus subitam mutationem capere debet. Meretur hanc in rem adduci insignis locus ex VERULAMII l. de sermon. fidel. *Cave à subita aliqua mutatione, in regiminis parte quapiam principali; quod si necessitas urgeat, cætera ad eam mutationem accommoda, secretum enim est & physicum & politicum: tutius est multa mutare, quam unum magnum, examini tamen subicias consuetudines tuas, diætæ, somni, exercitationis, vestium, mansionis & similibus, & si quæ nocumento esse judices, experire illud paulatim exuere, ita tamen, ut si ex muta-*

Exempla
quorundam.

Regula &
observa-
tiones re-
spectu
diætæ.
Diætæ sa-
norum.

Debilium
& imbe-
cillium.

Consuetu-
do quando
tollenda.

Subita
mutatio
periculi
plena.

tionem nocuementi aliquid perceperis, ad consueta redeas: Difficile enim, distinguere inter ea, quæ toto genere sunt salubria, & ea, quæ corporis tui unicæ constitutioni conveniunt. Quarto: ea, à quibus averfatur natura, & quod plane ferre non potest, tutius & consultius est omittere, quam contra naturam, five ea invita & repugnante aliquid moliri. Nam sicuti deteriora, quæ cum desiderio, appetitu & delectatione assumuntur, non facile lædunt: ita benigna & optima, quæ abhorrescente natura usurpantur, efficaciter nocent. Quinto: optima & universalis regula est: quæ corpori profunt, sunt facienda & continuanda, quæ vero nocent, sunt omittenda. Equidem circa hanc regulam hoc adhuc desideratur, quod mala sit conclusio: *hoc mihi non nocet, ergo est bonum.* Nam sæpius nocuementum non subito, sed successive fit: hinc legitimum requiritur tempus, quo explorare & attendere possimus, an hoc vel illud nocuerit nec ne.

XXVI. Ultimo loco perutile erit, subicere generale axioma, cujus observatio ad vitam sanam & longam ducendam commendari meretur, & hoc est: *Quodcumque conservat vires, hoc ipsum custodiendum, quodcumque vero eas destruit, hoc omittendum.* Destruunt vero vires crebræ venæ sectiones. Tametsi ea non simus in opinione, ac si velimus proscribere venæ sectionem ex foro medico, sed potius, quando plethora morbofa urget, generosum & magnæ virtutis præsidium hanc pronuntiamus, nihilo minus tutius est non adfuescere sanguinis missionibus, sed aliis modis, abstinencia, motu, evacuatione per sudorem & alvum demere humorum & sanguinis copiam. Secundo, infirmat naturam purgatio vehemens: Peritissime scribit HIPPOCRATES *sect. II. aph. 37. Qui secuta sanitate fruuntur, hos purgare grave est, utpote omnia validiora evacuantia agunt virulento quodam caustico, naturæ inimico elemento, quod subinde tonum ventriculi & intestinorum destruit, ad anomalos spasmodicos motus ea disponit, & valde copiosa educatione humorum debilitat. Robur autem naturæ conciliat, alvum semper habere liberam & apertam, eamque si pigra est, si victus lautus & plenus, crebrius blando monere & sollicitare stimulo, ubi egregium foenerant usum balsamica, amara, salia elixa &c. Tertio: rarius vel plane non utendum est medicamentis vomitoriis, sudoriferis nimis calidis, opiatibus, metallicis. Hæc enim ejus sunt indolis, ut valde afficiant, alterent & sanum corpus destruant. Accedit & illud, quod medicamenta assueta careant postmodum sua efficacia: Scite hac de re VERULAMIUS loco citato: si nimium assuescas medicationi, detrahet de viribus & efficacia ejus, quando morbus advenerit. Probo potius diætæ quasdam ad certa tempora, quam usum medicamentorum frequentem, nisi jam pridem transierit in consuetudinem. Quarto: destruant vires nimia ingluviæ, ebrietas & in seram noctem potatio & assidua Venus. Verissimum quod scribit HIPPOCRATES de diætâ; *Multi corrumpunt corpus suum, & quod Deus dedit aptum faciunt ineptum, idque labefaciunt, ocio, somnolentia, vino, vigiliis venereis, ac immodica libidine.* Et ipse laudatissimus autor *Epist. de sanit. tuenda, ad Demetrium Regem, hæc memoriæ prodidit: oportet apimum advertere & peculiariter vivere, ita ut neque rei venereæ, neque diversorum eduliorum incontinentia, neque somnis immodicis, aut inexercitato corpore utaris.* Quinto: infirmant anxia & morosa studia, cura & sollicitudines, animi labores, lucubrationes, quandoquidem hæc ut*

plurimum comites habent vigilias, & ipsa sua natura vires subducunt, & ita omnis virtus & vis, quæ requiruntur ad corporis functionum exercitium exspirant.

XXVII. Adduximus præcepta, quorum observatio ad sanā vitam tuendā monstrabit viam aperitissimam; sequitur jam, ut monita quædam etiam afferamus in medium, quibus uti quisque possit, si quando morbo jam detinetur. Quemadmodum autem dantur duplicis generis morbi, acuti videlicet & chronici, ita quivis seorsum peculiarem tractandi methodum & observationē exposculant. Acuti sunt, ubi motus in systemate tam vasorum, quā nervorum valde intensus & auctus est, & brevi terminantur vel ad vitam vel ad mortem. Oriuntur ut plurimū à subtili & exiguo virulentæ & activæ naturæ principio. Chronici sunt, qui per longum tempus vexant corpus, sustentantur potius à copia vitiosorum humorum, viscerum obstructionibus, & à motu sanguinis valde segni & impedito fiunt. In acutis motus ille vitiosus vehementer auctus, in quo consistit revera morbus, sæpissime bonum finem, licet per accidens obtinet, causam morificam emendando, atque propulsando. Natura enim, quæ nihil aliud est, quam motus & sanguinis circulus, morborum optimus medicus est. Omnis igitur opera, quam præstare Medicus & quisque debet, versatur in eo, ut vires naturæ five motuum quantitatem in hisce morbis probe observet, & cognoscat, an debilis an nimis vehemens vel languidus iste motus sit, hic promovendus, ille moderandus est. Secundo attendere debet, per quas vias & excretiones ordinario morbus terminari solet, ita inflammationes ordinario per diaphoresin, & hæmorrhagias, febres per diaphoresin & alvū, spasmodicæ affectiones per hæmorrhagias & sudorē terminantur. Hanc methodū & processū observari debet unusquisque, & probe caveat, ne alias excretiones suscitet, quas natura non intendit, sed cuivis morbo proprias & congruas faciat: Tertio: quo tempore debeant institui evacuationes, ex ipsa quoque natura addiscat, dies hi vocantur critici, & dies septimus, undecimus, & decimus quartus, quibus plerumque feliciter finiri solent morbi, hos dies probe attendat, & si tunc agit, sub favore naturæ agit. Quarto: grassantium morborum acutorum, ingenium, indolem ac mores probe ex experientia scrutetur. Non enim semper una morbi species diversis temporibus eandem desiderat methodum. Ita nonnunquam veræ sectio juvat, quandoque nocet, interdum volatilia ferre potest febris, quandoque plane non. Quinto: in quovis individuo consuetudines probe ac diligenter attendat, quibus nempe symptomatibus evacuationibus in statu ægroto ante usa fuerit natura, qui enim consuetudines novit & occasionem medendi, ille juxta HIPPOCRATEM invenit fundamentum veræ medicinæ. Sexto: generalis & perpetua hæc esse debet regula: In acutis morbis, blande, temperate successive agere debemus, nunquam violentia, & præstat tunc naturam ducere quam cogere. Aureum est dictum HIPPOCRATIS *I. de locis in homine §. 55. Medicamenta fortiora à natura in debilibus morbis dare non oportet, neque paucitate medicamenti debilitas ipsius facienda est: sed fortibus natura fortibus pharmacis utendum est: debilibus vero pharmacis non fortibus.* Septimo: diaphoresis in omnibus acutis per totum morbi cursum blande est movenda, quod fit per hypocausti & lecti calorem moderatum, per diaphoretica mediæ naturæ, per diluentia, temperata. Octavo: nocent in acutis omnia, quæ turbant & sistunt motus, præsertim diebus criticis, uti sunt

Morbi acuti & chronici.

Quinam acuti.

Chronici.

Quid in illis Medico incumbat.

Per quas vias morbus terminetur.

Quando evacuationes sint instituenda.

Quid observandum circa morbos grassantes.

Symptomata.

Quid agendum in morbis acutis.

Diaphoresis in morbis acutis movenda.

Frigus nocet.

frigus

Ea, à quibus averfatur natura, sunt omittenda.

Quæ corpori profunt sunt facienda.

Axioma ad vitam sanam & longam ducendam.

Abusus & usus V. S.

Purgatio vehemens infirmat naturam.

Medicamenta vomitoria rejicienda.

Ingluviæ, ebrietas, nox & Venus destruant vires.

Anxia cura sollicitudines infirmant.

frigus externum, anodyna, refrigerantia, acida, omniaque drastica nimiusque cibus. Nono: in dictis affectibus præstat semper alvum habere liberam quam clausam, hinc clysteribus & laxantibus congruis sui officii monenda est.

Alvus sit laxa.

Morbi chronici quomodo tractandi.

XXVIII. Quod attinet ad passiones chronicas, hæ non tam facile auscultant remediis. Equidem nonnulla peculiarem tractationem exigunt, uti lues venerea salivationem, scorbutus decocta lignorum balsamicorum, &c. nihilo minus placet regulas quasdam hic statuere, quæ diligenti observatione plus præstabunt opis ægrotantibus, quam pretiosissima quædam medicina. Primo: Ubi spasmodicæ contractiones nervosarum partium conspiciuntur, alvus semper debet esse libera, quod fit per clysteres, per laxantia, elixiria vel pillulas polychrestas martiales. Secundo: in subjectis plethoricis vena debito tempore est aperienda. Tertio: salium volatilium oleosorum frequentissimus debet esse usus, sed dosis non adeo magna. Quarto: pulveres præcipitantes, acrimoniam temperantes nunquam non egregium facient officium. Quinto: infusa herbæ veronicæ, betonicæ, fassafra, radicis chinæ, utilitatem afferent non minimam. Hæc remedia sufficient in affectibus ventriculi hysterici, hypochondriaci, nimis hæmorrhagiis, febribus lentis & omnibus affectibus chronicis, qui proveniunt ex vitio hypochondriorum. Saltem hæc cautela addi debet, ut diætæ regulas accurate servemus, nec multum mutemus remedia, sed eorum usum continuemus. Secundo in omni habituali morbo chronico, ubi obstructions adfunt viscerum & saburra vitiosorum humorum,

non præsentius datur auxilium, quam quod petitur ex legitimo acidularum vel thermarum usu, ubi notandum est, quod acidulæ magis plethoricis & calidis subjectis, frigidis autem, humidis, ubi nervi laborant, plus aquæ calidæ conferant. Deinde bibendæ etiam sunt in debita quantitate, copia enim debet juvare, & singulis fere annis, donec morbus ablatus fuerit, frequentandæ sunt. Hæ aquæ generosæ sunt operationis, innumeris exemplis testibus, tollunt vel ad minimum allevant calculum tam renum quam vesicæ, asthma, cachexiam, paralytes, podagram, rheumatismos, hystericas passiones, hypochondriacas, colicas & affectus ventriculi ac intestinorum spasmodicos.

XXIX. Tandem in omnis generis chronicis passionibus, stomachica remedia, quæ sale volatili oleoso temperato & balsamico pollent, crebrius & per longum tempus usurpata, omnibus aliis facile palmam præripiunt. Nam qui stomachi vitiis succurrit, digestionem semper adjuvat & blandam chyli ac sanguinis spirituscentiam promovet balsamicis & naturæ amicis remediis, is ferme omne punctum in medendo absolvit. Commendari meretur nostrum elixir balsamicum, stomachale *Michaelis*. Elixir proprietatis album cum sale volatili mixtum, Elixir amarum *Conerdingii*; quorum usu frequenti & continuo plus revera præstari potest, in minuendis affectuum chronicorum symptomatibus, imo in ipsis eradicandis, quam ulla alia medicina. Sed sufficiant hac vice dicta de nobili hac materia.

Stomachica remedia conducunt in morbis chronicis.

D E

METHODO ACQUIRENDI VITAM LONGAM.

P R O O E M I U M.

NULLO non tempore, summi Viri æque ac Philosophi extiterunt, qui non modo exoptarunt longam vitam, sed & summa adnixi sunt ope, ut viam invenirent, qua ad eam posset perveniri. Tam grata nempe, tam jucunda, tam exoptata res est mortalibus vita, ut nihil æque illos teneat, ac amor vitam, quæ brevis est, quam diutissime extendendi. Et fuit apud antiquissimos sapientium jam olim circa hanc rem meditatio, ut circumspicerent ejusmodi præsidia, quibus vitam sanam maximeque diuturnam adipiscerentur. Testantur antiqua eorum monumenta, qui alchymicæ studium professi sunt, ipsis non tam metallorum transmutationem cordi fuisse, quàm inventionem ejusmodi medicinæ, quæ corpora à morbis unice tueretur. Videbat enim venerabilis illorum solertia, qua ceteris mortalibus tum maxime anteibant, quam arctis angustisque terminis tot hominum vivacitas ac ætas circumscriberetur. Videbant etiam, quam multis iisque gravibus malis esset obnoxia vita, inde ejusmodi auxilia conquirebant, unde ex tot difficultatibus emergent. Licet vero illorum conatus sua laude minus defraudandi sint, eventus tamen, quod dolendum est, vota illorum ex parte destituit. Ex medicina enim ac remediorum adparatu vitam longam petere, difficile omnino est, & an hoc modo sit petenda, merito addubitamus. Longe alia sunt, quæ nobis dare possunt vitæ diuturnitatem. Quæ invenire, licet arduum inprimis ac difficultatis plenum sit, minus tamen abjicienda spes est

Summi viri & philosophi non solum optarunt vitam longam, ast etiam ad adipiscendum quam curaverunt.

d fru-

investigandi vitæ longioris auxilia. Etenim si certum est, & est omnino certum, & olim fuisse & nostro adhuc tempore longævus esse quam plurimos, imo certas gentes & certa corpora reliquis præstare vivacitate, necesse utique est, ut dentur quoque causæ longævitatis. Quas si invenire datur, speramus fore, ut pateat promptum expeditumque iter ad sanam atque diuturnam vitam adspirandi. In præsentī igitur remedia & causas longioris ævi exponendas putavimus, & quantum ingenio adsequi licet, presso faciliq; stylo exponemus. Ac primum quidem ostendemus, unde fluxerit quorundam hominum longævitæ & unde hodiernum ad longam vitam multi perveniant; & ex iis ipsis salubria præcepta atque modum trademus vitæ longæ acquirendæ. Neque tamen ita sentimus, sicuti quidam in suis de sanitate conservanda commentariis somniarunt, ut cuius homini longævitatē promittamus. Non minus enim impudens, quam ineptum foret, cuilibet non habita corporum ratione hanc polliceri. Multi enim tam infirmo debiliq; sunt corpore, multi ejusmodi temperamento, ut ne sexagesimum quidem annum impleant, licet summam circa victum curam adhibeant. Deus vero arbiter vitæ necisque hominum, cujus munere spiritum trahimus, clementer adsit labori nostro, ut exinde cum arti nostræ, tum vitæ hominum accedat incrementum.

Datur causa longævitatis.

Cur multi non diu vivant.

I. **J**AM primum omnium convenientissimum est, prius, quam descendamus ad expromendas longævitatis causas, ex physiologicis &

*Quid sit
vita corpo-
ris vete-
rum.*

quasi ab ovo repetere, quid vita sit corporis, & quonam formalis ejus ratio absolvatur. Minus vero congruum videtur, lectori fastidium movere in recensendis Veterum sententiis, qui clariore philosophia destituti rem physicam ac medicam inconcinnis abstrusisque terminis tradiderunt. In horum censum referendi calidi innati, humidi radicalis, quatuor temperierum, spiritus vitalis, flammulæ vitalis, archei conditores, quorum somnia ac nebulas nostri sæculi lux discussit atque dissipavit. In eo vero non inutilem nos operam posituros arbitramur, si paulo fufius dispiciamus, utrum vita res magis

*An vita
res magis
animæ, an
corporis sit
existiman-
da.*

animæ, an corporis sit existimanda. Deus nempe sapientissimus infinitæque virtutis sapientiam suam in operibus suis maxime demonstrare voluit, & demonstravit unice in ordine seu mechanismo, quo corpora organica inprimis hominum composuit. Hic ordo sive mechanismus, qui in situ, figura, dispositione materiæ ad motum apta consistit, causa fons & lex est omnium actionum, quæ ab ipsis corporibus perficiuntur, idque modo huic ordini conveniente, videlicet secundum proportionem, tempus, mensuram, gradum. Illud maxime notandum, quod omnia corpora vi activa motrice à Conditore summo sint donata, & omnes illorum actiones nil nisi motuum species sint, dum alterum in alterum agit, unumque alteri resistit. Si vero hæc ipsa, uti videmus in organicis, motus edunt proportionatos ad certum finem conspirantes, tunc utique ratio & ars, quam mechanis- mum vocamus, requiruntur. Quæ quidem in eo consistunt, ut corpora situ ac dispositione in certum finem componantur, quod *αὐτόματα* & horologia demonstrant. Sicuti vero ars & ratio divina infinitis modis superant naturam humanam, ita nullum dubium est, quin machinæ divinæ ratione compositionis ac ordinis humanas nimium quantum antecellant, uti id docent animantia & vegetabilia. Duplex vero in

*Duplex
principium
agendi exi-
stet in ho-
mine.*

homine præsertim, existit agendi principium, alterum corporeum, alterum incorporeum. Illud Veteribus naturæ nomine fuit insignitum, Recentioribus mechanismus vocatur, & causâ est proxima omnium, quæ corpus conservant, motionum. Hoc posterius dicitur anima, certis legibus & ordine agendi quoque donatum. Hujus vero actiones non proprie sunt edere motum, sed motus potius percipere, & ex his prognata adfectuum genera inclinationes averfationes producit. In homine vero hoc principium augustiore virtute est præditum, interna nempe notitia ratione liberaque voluntate. Utriusque, de quo loquimur, principii summum Numen esse voluit consensum eximium & ejusmodi conspirationem, ut ad certas fibrarum motiunculas varias perceptiones atque cogitationes anima concipiat, proportionem scilicet semper ad istam corpoream actionem. Et contra ad certas actiones animæ desideria in corpore certi motus excitantur, & quidem tales, qui ratione proportionis gradus in his vel illis partibus animæ actibus conveniunt, exemplo motuum voluntariorum, adfectuum animi, phantasiæ.

*Actiones à
mechanis-
mo depen-
dentes non
referendæ
ad ani-
mam.*

II. Jam vero in genere notandum, quod hæ actiones, quæ dependent à mechanismo & ex eo commode explicari possunt, non sint referendæ ad alterum incorporeum principium nempe animam. Tales vero sunt motus sic dicti naturales & vitales, fluidorum circuitus, digestiones, secretiones, excretiones, omnesque motus, qui in statu sano, morbosò, morborum-

que cura observantur. Non existimamus, animam hic proxime aliquid agere, vel, sive ordinati sive inordinati sint, efficere; sed omne, quodcunque hic sit, dependere ex divino & sapientissimo artificio, quo pollent corpora humana citra notitiam ac intellectum. Et tam stupendi ac sapientissimi ordinis causas in Deo primum, deinde proxime in virtute motrice partium corporis ceu secunda causa reponimus. Hic mechanismus debet esse fundamentum medicinæ rationalis, ex quo omnia, quæ profunt vel nocent, tam intra quam extra nos, in statu sano & ægroto explicari, connecti ac demonstrari debent. Alienum enim & absolum esse videtur, ubi phænomena & effectus in medicina explicari debent, confugere ad talem obscuram prudentiam, errorem animæ, cum quo nullam connexionem in rebus externis, quæ nocent vel profunt, mens humana adsequi & hinc ex tali principio nihil demonstrare potest. Igitur ad propositam quæstionem ut veniamus, utrum vita magis sit animæ, an corporis res, paucis dicimus; vitam, sanitatem, morbos & sanationem non proxime ab anima, sed à solo mechanismo i. e. fibrarum certo motu certaue ad motum dispositione, proportionem fluidorumque progressu ac temperie esse accersendam. Anima quidem lege commercii, quod ipsi cum corpore intercedit, turbare potest corporis motus, quod animæ adfectus testantur; nihilo secius hi motus non immediate ab anima, sed à virtute corporum insita, quæ mutationem suscipit, sunt derivandi. Et ut verum fateamur, quanta sit præstantia mechanisimi, vel ex eo clarissime evincitur, quod anima ejusque actiones plus à corpore adfician- tur, quam corpus ab anima. Quod apparet in temperamentis, ætatibus, climate, victu & hæreditaria dispositione, ubi observamus, pro diversitate harum rerum variare etiam ingenium, mores, virtutes animique adfectiones. Porro ipsa experientia teste, ab aëre, alimentis, medicamentis aliisque externis rebus corporis motus mirifice adficiuntur ac immutantur. Horum actiones in corpus cum claræ sint, & motu absolvantur, varietateque fibras corporis commoveant, non intelligo, cur nihil fere activitatis in negotio vitali, sed passiva tantum & instrumentalis facultas hisce rebus assignetur, origo vero omnium motuum ab anima petatur, quæ non adæquata causâ motuum est, sed tales operationes habet, quæ cum motu nullam habent connexionem, uti sunt perceptiones & desideria.

*Vita non
pendet ab
anima, sed
à mecha-
nismo.*

*Operatio-
nes anima.*

*Præstan-
tia mecha-
nismi.*

III. Cum itaque abunde pateat, vitam rem esse corporis, non animæ, opus est omnino, ut vitæ rationem & essentiam ex corporis natura & legibus mechanicis explicemus.

*Vita res est
corporis.*

IV. Per vitam vero corporis nostri non intelligimus ejus durationem in structura & mixtione, quæ etiam salva esse potest, vita cessante. Quod observamus in locis septentrionali polo vicinis, à gelu animantium corporum corruptionem impediende. Vita potius corporis nostri denotat actum quendam, qui cum in physicis non alius detur, quam motus, hinc & vita est motus, & quidem motus fluidorum progressivus per tubulosam animantium substantiam, dependens à fibrarum motricium pulsu, tono, impulsu ac robore. Nam quamdiu cor & arteriæ pulsant, & fibræ motu systoles & diastoles gaudent, & quamdiu etiam fluida per corpus bene feruntur, tamdiu adest vita. Ubi vero ille motus solidorum & fluidorum ita interit, ut non amplius possit revocari, tunc mors

*Quid per
vitam cor-
poris intel-
ligatur.*

corporis adesse dicitur, ut ut diu adhuc à corruptione saluum atque integrum illud consilire possit. Mors itaque est destructio circuitus sanguinis & omnia, quæ conferunt huic motui extinguendo, inter causas mortis præsentis sunt numeranda. In omnibus vero observamus propemodum, qui ex morbo obeunt, causam mortis fuisse sanguinis circuitum destructum ab extravasatione sèri vel sanguinis in cavitate quadam corporis, stasi sanguinis inflammatoria, fluidorum vel viscerum corruptione & vasorum occlusionem v. g. à polypo.

Mortis
causæ.

Præserva-
tio corporis
à putredine
est effectus
vitalis motus.

V. Exposita sic vitæ essentia & ratione formali, jam demonstrandum est, quinam effectus in corpus nostrum hunc vitalem motum sequantur. Primus & præcipuus est præservatio corporis alias ad corruptionem paratissimi à putredine, ejusque in structura & mixtione conservatio. Perficitur vero hæc ipsa sequenti ratione. Primo fluidum vel liquidum, quamdiu motu progressivo & celeriter movetur, putrescere vel ad putredinem disponi nequit. Est nempe hæc motus progressivi virtus & indoles, ut intestinum fluidorum motum naturalem conservet ac integrum tueatur. Hic causa est unica, quod corporis mixtura vigeat, simul ac vero accedit alius externus motus ab aëre vel æthere, qui naturalem destruit, partiumque ordinem ac situm interturbat, mixtio & crasis prior plane immutatur. Impedit vero & resistit externi aëris vi internus partium motus. Quod vero motus intestinalis fluidorum putredinem à corpore arceat, liquido videmus ex mustis in fermentatione existentibus, item in vinis generosioribus multo spiritu ac sulphure scatentibus. Hæc enim beneficio sulphuris tuta sunt à corruptione, nam propter internum particularum fortiolem motum minus patent circumfusi aëris injuriæ. Ubi vero despumaverint musta & vino decesserit robur, mox succedit ab aëre ambiente corruptio.

S. C. corpus
à putredine
defendit.

VI. Porro sanguinis circuitus corpus expositum corruptioni obviumque egregie defendit, dum partes alienas, quæ non misceri debent cum sanguine, quæque illis aliam crasin induunt, perpetuo secerant. Per tot enim genera emunctoriorum perenni & jugi motu ejiciuntur partes subtilissimæ salinosulphuræ mucosæ ferolæ, quæ ubi remanent, largam morbis præbent materiam. Vero simile tamen est, ad tuendam sanitatem non minus conferre circuitum sanguinis in se consideratum, quam harum fordium excretionem, quod nempe alienissimæ hæc sordes exemplo scorbuti, luis venereæ & cachexiæ diu in sanguine latere possunt, adeo ut connexæ cum illo videantur, salva interim vita. Præter hæc circuitus sanguinis hoc peculiare beneficium præstat corpori nostro, ut hujus munere velut arctissimo vinculo anima cum corpore uniatur. Ubi enim hic motus per cerebrum cerebrique vias labascit vel plane intercidit, actum est de animæ functionibus. Quod ut magis confirmetur, constat omnino, tales esse animæ actiones, quale sanguinis per cerebrum iter. Si celerior est is motus, vehemens quoque est animi impetus, si tardior est, eadem tarditas ac torpor animi, segnities par. Ultimo loco circuitus sanguinis ipsas partes corporis nutrit, fovet, auget & ipsis addit incrementum. Idem morbos sanat & causas morbificas corrigit atque expugnat. Et quoniam fluidorum motus tantam utilitatem corpori præstat, & ipsam vitam ac sanitatem constituit, hinc summa Dei providentia factum est, ut omnes corporis organici partes ratione actionis & officii eum in finem conspirent, ut sanguis rite moveatur, &

Animam
cum corpore
unit.

us effectus.

per hunc motum illibatum corpus maneat & anima operationes suas exerat. Enim vero objiciat hic quis forsitan, *circuitum sanguinis esse tantum instrumentum vitæ, causam vero, quæ circulum hunc regat, esse animam, quæ etiam omnis mechanismi prima causa formatrix & origo sit.* At licet generationis prima causa nobis plane sit incognita & quomodo operetur, certum tamen est, nos in procreatione animantium æque ac vegetabilium nullo modo concipere posse, quod hæc fiat ex ratione vel intellectu, ut ut non sine ratione ac intellectu summi Creatoris. Demus vero animam producere corpus organicum, sicut artifex machinam, machina tamen edit suas operationes ex actione insita materiæ, & proportionem ac situ partium, non vero ex concursu artificis, qui tunc est remotus. Eadem ratione corpora nostra, ut ut ab anima credamus producta, ex corporum motu ejusque legibus suas operationes exerunt, non vero proxime ex ipsius animæ actione. Unde vero anima nullum in demonstratione medicum fundamentum esse potest, nec ex anima vitæ vel brevitatis vel longævitas explicari potest. Ex mechanica potius ratione & structura fibrarum & temperie fluidorum longævitas est deducenda, & porro omnia ea, quæ circuli hujus diuturnitatem præstant, causæ illius possunt nuncupari. Hæc nostra & recentiorum nostri ævi Medicorum est sententia, qua nihil clarius apertiusque videtur, quam melioris doctrinæ gratia tyronum in commodum neque censendi libidine neque ex adfectu aliquo adjiciendam putavimus.

Responsio.

Vitæ bre-
vitas vel
longævi-
tas non
pendet
ab anima.

Unde S. C.
regularis
dependeat.

Quanam
fibræ sint
pluris cen-
senda.

Signa lon-
gævitatatis.

VII. Cum itaque nobis propositum sit, causas longioris vitæ in hominibus investigare ac expromere, hinc ut ex circuitu sanguinis diuturno & iis, quæ ad hunc contribuant tam intra quam extra corpus positis derivemus, ordo postulare videtur. Compertum ex physiologicis est, sanguinis circuitum regularem i. e. æquabilem, liberum ac moderatum dependere imprimis ex debito tono, robore & impulsu solidorum sive fibrarum justaque fluidorum copia temperieque. Hinc necesse est, ut, qualis structura habitusque fibrarum, qualis vasorum conditio, & fluidorum proportio ac temperies exigatur ad vitam longam, paucis videamus. Quoniam vero ad circuitum sanguinis conservandum solidorum actio principem locum obtinet, hinc maxime omnium, qualis fibrarum natura esse debeat, in præsentī intuebimur. Firmiores vero fibras, & quæ diuturniori motui apte sufficiunt, eas esse arbitramur, quæ sunt flexiles, compactæ, tensæ tamen & ex tenerioribus filamentis contextæ. Minus vero aptæ ad impulsum sunt densæ, tumidæ, nimis molles vel duriores. Ipsa senectus in fibrarum duritie, & minori ad impulsum promptitudine versatur. Ne longius repetamus exempla, experimento domestico constat, vetustiorum animantium carnes, ut percoquantur, fortiori igne tractandas, cum juniorum contra leni clementique flamma emolliantur. VERULMIUS in *historia vitæ & mortis* notat, illos longævos esse, qui cutim habent compactiorem, corpus nervosum, fibrosum, nates minus tumentes, eminentiores venas, dentes firmos, pectus latius, grandiores oculos manusque longas & palmas paucis lineis distinctas. Hæc omnia firmam fibrarumque structuram partiumque, quæ impulsui inserviunt, robur atque firmitatem significant. HIPPOCRATES eos longæ vitæ esse judicat 1. 2. *popul.* qui plures dentes habent, non alia de causa, quam quod dentium copia & firmitudo

do de partium solidarum vigore testantur. Ex decenti vero solidarum robore ac fortitudine pluris longa vita aestimari debet. Quibus ex causis animalia nervosa, fibrosa, macilenta vivacitatis exempla sunt, nempe corvi, cervi, aquilæ, psittaci, cameli, elephantes, cornices, quorum animantium nonnulla hominum ætatem exsuperant.

Vasa ampliora reddunt homines longævus.

VIII. Deinde observamus, vitæ longioris esse, quibus vasa ampliora indulgit natura, quippe per hæc facilius & promptius sanguis ire potest, quam per angusta ac exiliora. Memorabilis hac de re *aphor. 44. Sect. II. Qui natura sunt obesi, brevior vita sunt, quam graciles*, quippe obesi arteriis & vasis angustis & textura cutis ac fibrarum densiori fibrarumque imbecillitate laborant, unde difficilior sanguinis circulus est. In gracilibus contra vasa sunt majora, & nervi ac fibræ robustiores, unde secundum veteres calor natus & facultas major. Non temere vero Autor adposuit *κατὰ φύσιν* i. e. à natura, à prima conformatione. Nam ut ait GALENUS in comment. *si quispiam natura mediocris victu deinde plenior ac ignavia factus est crassior, is non citius moritur gracili, quod scilicet venas & arterias latas habet, atque adeo calorem nativum minime imbecillum & extinctioni obnoxium*. Elegantissima verba sunt, quibus in supra laudatum aphorismum commentatur HOLLERIUS Medicus ad Hippocratis genium doctus. *Qui parvo & crasso, (inquit,) capite præditi sunt, venis angustis, corpore denso & glabro, voce exili à prima conformatione, celerius moriuntur. Graciles è contra, qui magno capite sunt, & qui cum inclinantur, cervicem magnam ostendunt, gravem edunt vocem, amplas habent venas & arterias, longæviores sunt.*

Vita longa consistit in fibrarum motricium conformatione.

IX. Ex dictis intelligitur, maximum longioris vitæ momentum positum esse in fibrarum motricium conformatione, & si quis hac à natura destitutus est, licet omnes circa victum regulas sollicite observet, is longam vitam consequetur nunquam. Confirmatum est experientia crebra, longævos parentes progenerare etiam filios tales, & rarius accidere, ut, qui brevioris vitæ fuerunt parentes, diuturnioris vitæ filios suscipiant. Ratio nimirum hæc est, quod cum nihil per semen parentum in liberos transfundatur magis, quam solidarum constitutio, inde etiam longioris vel brevioris vitæ ratio ex hac hæreditaria dispositione proficiscatur. Multum vero refert, qualis sit structura fibrarum à nativitate, quæ multum differt pro vario gravidarum statu, earumque in rebus non naturalibus regimine. Nam gravidæ si fuerint plethoricæ, impuris succis turgentes, nutrimentum quoque embryonibus parum bonum præbent, à quo tamen solidarum ac fluidarum partium conditio dependet, unde infantes ab iisdem parentibus nati sæpius structura partiū magnopere differunt.

X. Cum vero ad tonum ac robur fibrarum musculosarum, nec non ad fluidum spirituosum, quo fluidis ac solidis vigor ac robur infunditur, multum faciat aëris usus, hinc videndum est, quid aër ad vitam longam contribuat. Est aër fluidum mobilissimum impetum faciens & partes commovens, sine quo nec vivere nec movere se potest animal ullum, unde respiratio & vita eodem pretio aestimanda. Inde HIPPOCRATES in lib. de flatibus non ineptè scribit, *quod aër sensum & motum præstet corpori nostro*. Fibræ enim corporis nostri, fluido tenuissimo æthereo elastico sulphureis sanguinis partibus confermentato repletæ demum adquirunt robur impulsivumque. Optimus vero aër ad fibras fibrarumque motum est se-

Aër magni facit ad vitam longam.

renus, ficcus, vaporibus minus repletus, compressiorque paulo ac frigidior. Hic enim calore accedente mirifice sese expandit, magnamque motus potentiam exerendo fibras comprimit, illas tono ac robore instruit, motumque intestinum spirituscentiæ fluidis scenerat. Quare non in obscuro est ratio, cur, qui frigidiores regiones incolunt, salubriore ac longævior vita fruuntur, quam qui sub calidioris cœlo agunt. Si oculos per omnes regiones circumferimus, quæ sub frigido cœlo sitæ sunt, hujus rei veritas de facili ostendi potest. Aëris in Islandia tanta est salubritas, ut paucis ibi morbis locus atque sedes sit, peste ac febribus velut exulare iustis. Videris ibi senes quam plurimos, quorum multi nonagesimum, imo centesimum, innumeri octogesimum annum egrediuntur. Videatur STRAUCH. in dissert. de Islandia.

Qualis eligendus.

Sub aëre frigido sunt homines longæviores.

XI. Qui novam Zemblam, Groenlandiam, Lapponiamque incolunt, eodem cœli beneficio prosperrima sunt valetudine, duro alioqui victui adsueta. Minora illis sunt corpora sed robusta ac compacta, iisdemque sera ac cruda senectus & senectuti nulla canities. Eadem aëris benignitas Sueciæ, Fioniaque incolas fovet, quorum corpora dura & robusta sunt. Fœminæ ibi fœcundissimæ, viri veneris potentes, sique temperantiæ student, vitam diutissime proferunt.

Ut patet ex Groenlandiam incolentibus.

XII. Angli & Scoti longæviores sunt Gallicis Italisque, quia septentrionali plagæ viciniore. VERULAMIUS in hist. vit. & mort. hæc scribit suo tempore: *Apud nos in Anglia non existere arbitror villulam paulo populosiorem, in qua non reperitur aliquis vir vel mulier ex octogenariis. Antè paucos etiam annos, pergit, in agro Herfordienfi inter ludos florales instituta erat chorea & saltatio ex viris octo, quorum ætas simul computata 800. annos implebat, cum quod aliis ex iis decederet annorum, alteri superesset*. Sed hoc illo forsant tempore, cum prisca adhuc frugalitas illi genti in honore esset, & nondum luxuria velut tabes in corpora invasisset. Eandem Angliam cum insulis Orcadibus & Hebridibus ad longam vitam maxime conducere, idem confirmat BACONIUS lib. cit. p. 518. Cui accedit nobilis Angliæ Medicus LISTER. qui in Commentario erudito ad Sancto-rium l. 3. aph. 34. disertè scribit, plurimos in remotis & montosis Angliæ locis magnæ ætatis reperiri, quia purior limpidiorque ibi aër. Non minor in Norwegia cœli aërisque est salubritas, eadem cum reliquis gentibus vivacitas. Corpora illis dura ac laboris frigorisque patientissima. Raro ibi morbi maligni occurrunt, & licet duro victu gaudeant, diutissime tamen vivunt.

Angli & Scoti sunt longæviores Gallis & Italis.

XIII. Quoniam frigidus concentratus ac purus aër tam egregie & solidis & fluidis partibus prodest, motum ac robur ipsis addendo, juvandoque transpirationem, hinc montosa & excelsa loca, quibus ejusmodi aër adfluit, longam vitam commode præstare possunt. Nobilis inde Bohemia, quæ salubritate sua ceteris Germaniæ locis longe præferenda. Est nempe regio altissima, testantibus id fluviis, qui ex Bohemiæ jugis oriuntur, & in declivia & planiora decurrunt. Omnes enim terræ, per quas feruntur fluvii, demissiores sunt illis, in quibus nascuntur. Ostendit Bohemia sanos longævos robustosque homines, optimi vultus, coloris albi. Slavatta Cancellarius Bohemiæ in regibus hujus regni observavit, omnes, qui ex regibus ægroti in Austriam vel Hungariam aliove se receperint, brevi obiisse. Eos contra, qui infirmi in Bohemia concesserint, pristinum vigorem atque sanitatem recepisse. Quod

Loca excelsa & montosa longævitate adferunt.

Bohemia reddit homines longævos.

Sigismundi, Maximiliani II. Matthiæ, Ferdinandi III. Annæ Imperatricis exempla abunde confirmant. vid. BALBINI *Chron. p. 9.* GASSENDUM in *vit. Tychon. Brab.* JESSEN. *de peste.*

XIV. Eandem ob causam Vogtlandia sanos longævofque incolas habet, quia regio hæc altior est, & ex altiore situ insignis ibi aëris clementia aquarumque præstantia sinceritasque. Hac prærogativa gaudent, qui in Silesia degunt, maxime giganteorum montium accolæ, nec cedit illis hac in laude Helvetia & Rhætia, quæ identidem & sana & longæva corpora producant. Cujus rei non alia dari potest ratio, quam aëris temperies & puritas & huic juncta temperantia, accedente etiam aquarum his in locis bonitate. Quoad Italiam in Apennini quibusdam locis homines viridis senectutis reperiuntur, & qui longissime mortalitatem extendunt. Quod idem de Tmolo famoso Poëtarum fabulis monte circumfertur, in cujus fastigio, quod *Tempstin* vocant, incolas 150. annorum reperiri, *Mutianus* gravis Autor apud *PLINIUM in histor. natural. l. VII. c. 48.* discrete contestatur. Athon etiam celeberrimum montem, qui Macedoniam & Thraciam distinguit, sua imprimis salubritas nobilitavit. Longam enim perpetuamque ibi ex aëris mollitie duci sanitatem, ex eo colligere est, quod, qui circa habitant, præstent ceteris mortalibus extento vitæ spatio ac valetudinis prosperitate. vid. *Erasmi. Francisci in Ausländischen Kunst-und Sitten-Spiegel lib. I. c. 28.* Montium salubritatem comprobatur *PLATO*, qui aperte scribit, in altissimis & temperatis regionibus senes & longævof ipsum maxime invenisse.

XV. In protensis montium jugis versus Æthiopiam & Abyssiniam, ubi propter arenarum moles nihil vel parum vaporis exsurgit, solito longior incolis ætas est ad annum sæpissime centesimum adscendens. Equidem has regiones fervidissimas adflat aër, & situs illarum planus ac depressus est, in montium vero jugis frigidius est coelum, & saluberrima inhabitatio. Spectat huc elegans locus apud *DIETERIC. in Jatric. p. 1412.* *urbes in montibus apertioribus, quos aër ferit vehementior, salubriores merito habentur, sed si montes montibus, colles collibus jungantur per flexuosa intervalla obscurarum vallium, sæpe mephitis exhalationum urbes incommodat, ut insalubriores sint civitates, quæ in declivibus vallibus in ipso luto jacent.*

XVI. Præter aërem frigidiorē & situm altiorē egregie etiam vitæ prorogandæ inservit aër temperatus æquabilis & constans. Laudat hoc nomine *Brasiliam V. Cl. PISO in hist. nat. p. 112.* in qua testatur, non paucos olim senes infirma tenuique valetudine ex Hispania aliisque locis has ingressos terras convaluisse, quos ex remotissimis locis exciverit cœli aquarumque salubritas, ceu egregia fulcra valetudinis vitæque conservandæ. Matura incolis ibi pubertas, tarda senectus & quod senectutis onus unice levat, vita senio molestiaque vacua, quippe sine calvitio canitieque. Quo minus mirari convenit, plurimos ex illis centum ultra annos vivere, idque non in America solum natos, sed qui ex aliis terris huc adpulerunt. Celebris etiam hæc est aëris constantia ac æqualitas in Hispania, & eandem ob causam Gallia Narbonensis sanos longævofque homines foecundo sinu profert. Constans ibi cœli facies, constans tempestas & per plures menses serenitas, plures etiam uno tenore tēpestates foedæ ac pluviosæ.

XVII. In nostris terris æstas non tam ferax est morborum, quam vernum atque autumnale tempus, quæ tempora multis funeribus foeda sunt. His-

ce enim temporibus atmosphaera nimium quantum immutatur, mox enim in barometro mercurius inferiorem, mox superiorem locum occupat, & ingentem in modum ejus situs variatur. Æstate vero minus observatur hæc varietas, quippe ultra tres gradus neque adscendit neque descendit mercurius.

XVIII. Cum igitur manifesto experientiae testimonio constet, animum vigore legis & commercii cum corpore magnæ efficaciae esse in motibus fibrarum adficiendis pulsu, tono, denique sanguinis circulo, hinc ab animi motu vitam quoque & longiorem & breviorē fluere videmus. Optime vero æquabilem motum solidorum fluidorumque sustinet mens tranquilla, hilaris, omni tristitia, curis, desideriisque vacua, moderato gaudio, spe, fiduciaque sese sustentans, quæ denique omnia adfectuum genera in potestate habet. Hæc enim si ita instructa fuerit, perpetua ipsi cum corpore est conspiratio, nec unquam corporis motus excretionumque opera interturbantur. Quamobrem in sacris etiam monumentis piis vitam pollicetur Deus, cujus promissi præter divinam benedictionem non alia causa est, quam animus in tranquillitate atque moderatione constitutus. Recte enim pietas & promissionem hujus & cœlestis vitæ habet. *LUCIANUS* longævis adnumerat philosophos inprimis, animique cultura conspicuos, qui aliqua corporis cura habita ad extremam senectutem perveniunt, eodemque loco magnum illorum numerum adnotat, vid. *dial. MACROB. p. 427.* In eodem negotio occupatus est *VERULAMIUS lib. de hist. vit. & mort. p. 510.* Veritatis enim investigatio mirifice recreat animum, illumque in statu hilari & pacato servat, unde studium investigandæ veritatis multum omnino facit ad vitam solito longius prorogandam. Quo nomine laudanda maxime amœnissima studia matheseos, philosophiæ naturalis experimentalis, chymiae, literarum denique humaniorum & sublimioris Theologiæ. Habent enim hæc studia præter delectationem, quam adferunt, hoc peculiare, ut non vera utilitate solum sese commendent, sed ut corpori etiam egregio sint fulcumento. Quod quidem non contingit iis, qui in ejusmodi studiis ætatem terunt, quæ in terminis, fictionibus, opinionibus & suppositis non intelligibilibus fundamentum suum habent. Hæc ut nullius plane sunt usus; ita nec animo nec corpori opem præstant ullam. Deinde studium philosophiæ moralis, quod non nuda contemplatione, sed praxi metiendum est, vitam etiam egregie sublevat. Illud vero intelligimus, quod in agnitione sui, quam urgebant perpetuo sapientes, maxime occupatur, quod imbecillitatem proprii ingenii detegit, quod denique salubrem præbet medicinam adfectuum vesaniam vecordiamque extinguendi. Non major enim pestis corpori nostro imminet, quam adfectuum impetus, quos qui prudenter compescere potest, næ is & animo & corpori eximium invenit levamentum. Id quum philosophiæ moralis studia inprimis nobis præstent, merito sunt magni æstimanda, & dolendum sane, pulcherrimum hoc studium negligi à literatis, qui nec fructum etiam illius, qui insignis est, exinde percipiunt. Hoc enim si didicissent, facile evaderent commune illud malum, quod velut pestilenti sydere, homines literatos adflavit, nempe indignissimam censendi aliorum mores libidinem, ne affectuum insaniam exagitati multa indigna sua committerent professione. Abesset certe jactantia, philautia, invidia, maledicendi petulantia, denique vesana illa in-

borum
quam ver-
num atque
autumnale
tempus.

Animi
passiones
multum
conducunt
ad longæ-
vitatem.

Ut & stu-
dia bona-
rum & li-
berarum
ariorum.

temperantia aliorum operam industriamque in-
fectandi. Ita cum dolore odia, jurgia, simulta-
tes plenis inveli velis videmus, quibus tamen
nihil indignius deformiusque est ordine erudito-
rum. Quæ cum & sanitati & vitæ sapientiæque
officiant, merito vitanda ac detestanda sunt.

*Ad longæ-
vitam
opus est de-
centi flui-
dorum mo-
tu.*

*Etiam
dieta mo-
derata.*

*Ut patet ex
exemplis
allatis.*

XIX. Persecuti igitur solidorum sive fibra-
rum naturam ac structuram, quatenus nempe ad
vitam longam concurrat, jam dicemus, quid
fluida ad hanc ipsam faciant. Sicut vero ad sa-
nitatem conservandam motu situ atque vasorum
iusta capacitate, fluidorumque debita quantitate
opus est, ita facile apparet, sanam & longam
vitam iisdem etiam præsiidiis adipiscendam, ma-
xime decenti fluidorum motu. Nam si sanguis
& humores modum excedunt, stagnationes hu-
morumque corruptiones nascuntur, quæ non mo-
do morbos morbososque motus excitant, sed fi-
brarum etiam robur labefaciunt & destruant, ut
diuturno circulo machina non amplius sufficiat.
Eam ob causam & Veteres & omnes, qui longæ-
vitatem exoptarunt, ad hanc consequendam stri-
ctam moderatamque dietam uno ore commen-
darunt. Optime SANCTORIUS *sect. V. aph. 34. si*
sciveris quotidie, quantum cibi tibi conveniat, scies
diutissime valetudinem & vitam conservare. Et
LISTER in *comment. ejusdem aph.* scribit: *ex mo-*
dico cibo vigor & longa vita. THONNERUS Cl.
Medicus, qui 80. annum attigit, suo exemplo
hæc comprobat, qui de se ipso hæc prodidit. Ego
longævitæ corporis à parentibus insitam accommo-
data dieta conservare studui, quæ optima est nu-
tricula senectutis. Lud. Cornarius, insigne medi-
cinæ decus, ab ineunte ætate cum iniqua vale-
tudine conflictatus, ejurata demum Medicorum
ope, ad dietam strictam velut extremum au-
xilium confugit. Nec fefellit ipsum, quippe præ-
ter omnium opinionem annos 95. consecutus est.

*plus quam
C.*

*Non con-
sentit Jo-
vius, qui
testatur
nullum ci-
borum ha-
buisse de-
lectum.
Moderatus
cibus præ-
bet ali-
mentum
corpori ne-
cessarium.*

Quanta vero tanti viri fuerit abstinentia, ex eo
patet, quod cum consuetam cibi potusque men-
suram ad uncias duas auxisset, in febrem in-
ciderit, sicut ipse de se scribit. Cibus ipsi erat
unc. 12. cibi, vini 14. uti ipse scribit de se in
lib. de vit. sobria. Idem fecit JCTUS Cl. Bartho-
lus de Saxoferrato, qui ad pondus victitasse di-
citur, ut sereno esset capite ad solvenda juris æ-
nigmata. Nec omittendus Cl. Medicus Italus
Nicol. Leonicens, qui *summa abstinentia* 90. an-
nos est consecutus. Et rogatus, quænam es-
sent remedia longæ vitæ, *Vividum*, inquit, *in-*
genium, perpetua vitæ innocentia, salubre vero
corpus hilari frugalitatis præsidio tuemur. vid. P.
JOVIUS in *elog.* Et vetus est proverbium *modicus*
cibus medicus sibi. Temperans enim & mode-
ratus cibus tantum corpori præbet alimenti,
quantum illi utile & necessarium est, lautior
vero & liberalior victus superflua & inutilia
producit, imo magis noxia; nam hæc cum
non sufficienter subigi regique possint, crudi-
tates & ex cruditatibus morbos produciunt. Ne-
mo vero secundum *Sanctorii aphor. 89. sect. III.*
incidet in morbum, si sedulo provideat, ne cru-
ditatibus laboret. Nam sobria vita perspirabi-
le corpus reddit, quo nihil aptius ad sanam &
longam vitam. Pulchre idem SANCTORIUS *sect.*
I. aph. 83. senectus revera est ægritudo, sed pro-
trahitur, si corpus est perspirabile. Ante omnia
vero in senectute, ubi vires deficiunt, libera per-
spiratio est commendanda.

*Ufus su-
persuus
carnium
impedi-*

XX. Ad copiosi sanguinis generationem car-
nes inprimis faciunt, inde, cui cordi est lon-
gævitas, à nimio illarum usu sibi temperet. QUER-

CETANUS in *diet. p. 323.* causam vitæ longævioris *mento est*
Veterum frugalitati illius ætatis & abstinentiæ *longævi-*
à carnibus adscribit. Illi enim simplici victu *tati.*
& agrestibus pomis, ac si sitis admoneret pro-
fluente aqua vitam tolerabant. Eadem est ra-
tio, cur in Ægypto longæviores sint homines,
quippe inveniuntur ibi, qui centesimum annum
egrediuntur. Causam hujus longævutatis ad so- *an hodie*
brietatem refert PR. ALPINUS de *med. Ægypt.* *an vero*
olim?
I. I. p. 23. & præcipue ad temperantiam à car-
nibus carniūque varietate, & optimum po-
tum aquæ ex Nilo, siquidem omnes Europæi,
scribit, qui crapulas & vina carniūque co-
piam amant, brevius vivunt. Germani ac Po-
loni multis carnibus vescuntur, vinoque largius
se ingurgitant, igitur morbis quam plurimis ad-
ficiuntur. Brachmanes Indiæ populos longissi-
mæ fuisse ætatis accepimus, quia nempe car-
nibus & vino abstinebant. Dicaarch. apud POR-
PHYRIUM I. IO. de abst. testatur, quod Saturni sæ-
culo longævi fuerint homines, quia carnes re-
spuerint, sponte ex terra nascentibus contenti.

XXI. Tandem & simplex victus facilis *Simplex*
que locum habet in longævitate acquirenda, *victus lo-*
quippe homini utilissimus, varioque cibo lon- *cum habet*
ge præferendus. Eleganter & graviter SENECA *in longævi-*
acerrimus luxuriæ Romanæ censor hac de re *tate acqui-*
scribit: *Multos, inquit, morbos multa fercula fe-*
cerunt, & simplex morbus ex simplici cibo. In-
numerabiles miraris morbos, numera coquos. Cui
igitur curæ est sanitatis ac vitæ diuturnitas, is
legem sibi indicat temperantiæ ac continentia,
ciboque semper in vitam non in voluptatem
utatur. MACROBIUS I. VII. saturnal. c. 8. ubi pro-
lixè de victus simplicis excellentia & usu differit,
saniora pecora hominibus ex ea ratione judicat,
quia simplici & uniformi victu delectantur, æ-
grefcere vero, quæ saginam composita varietate
patiuntur. Nam id genus alimonie non ma-
gis copia quam varietate crudescit. Eandem
etiam ob causam rustici agricolæque firma at-
que diuturna sunt valetudine, quia præter aë-
ris salubritatem victu simplici & aquæ potu
utuntur. Præterea dum sub dio & jove perpetuos
subeunt labores, corpus sibi indurant & abdi-
catis deliciis, quibus corpora sanissima effœmi-
nantur, in labore ipsis otium & valetudo. Ci-
bus, quem occupant, satiat, humus pro cu-
bili est, & paupertate magistra illorum disci-
plina sanitas longævitasque constat. Quæ cogi-
tans bona non injuste canit MARO:

*Ut patet ex
agricolis
& rusticis.*

O fortunatos nimium, bona si sua norint,
Agricolas.

XXII. Laudanda proinde aquarum etiam
bonitas ad longam vitam & infra eas & cere-
visia & vinum. Aqua enim potus est naturæ *Aqua ma-*
nostræ convenientissimus, celerrime viscera & *gis ad lon-*
venas transiens, & æthereum purum elemen- *gævutatem*
tum, quod pabulum est spirituum, fovens & *conducit,*
recreans. Prisca ætas, quo nulla gens bonis ex- *quom vi-*
emplis ditior fuit, sola aqua usa fuit & longis- *num & ce-*
sime vixit: TIBULLUS I. 2. eleg. 3. *revivis.*

Glans alat, & prisco more bibantur aquæ.
Claud. DEODATUS in *Panth. Hygiæ I. 2. c. 2.* potū
aquæ salubrem pronunciat, & ea Patriarchas us-
que ad Noæ tempora usos fuisse testatur. Et Æ-
gyptiorum longævutatem, de qua supra diximus,
non parum juvat aquæ Niloticæ præstantia, in
cujus laudibus recensendis multus est summus *Aqua Ni-*
Vir PR. ALPINUS I. c. p. 23. Creberrimo in usu *lotica laus.*
habent hanc aquam Ægyptii, in cujus bonitate
egre-

egregium adversus morbos ipsis est munimentum. Sunt enim hæ aquæ levissimæ, (levitas vero prima aquarum virtus est) sunt & dulcissimæ tenuissimæ ac splendidissimæ & celerrime corporis viscera perineant. In singulis etiam corporibus epotæ vel urinam vel sudorem, sæpe etiam alvum provocant, nulla in hypochondriis observata fluctuatione. Quod manifestum documentum est, ipsas valetudini imprimis convenire, dum, quod maximum ad firmum corpus momentum est, transpirationem & excretiones moliantur.

XXIII. Expositis sic causis longævæ vitæ, juvat jam inquirere, cur Veteres ante diluvium tam longam egerint vitam, & nostra tam brevis sit. Primum autem sedulam dabimus operam, ut quæ adversarii hic nobis objicere videntur, ante omnia diluamus atque refutemus. Inventi namque sunt homines, qui Patriarcharum longævitatē, qua nihil mirabilius, minus rem mirabilem existimarunt. Hi enim non dubitarunt adfirmare, illo pervetusto ævo annum nunquam à solis circuitu, quem ille per duodecim signa conficit, consuevisse numerari. Eo potius spatium annum complexos esse adserunt, quo lunare sidus orbem signiferum paulo minus 30. diebus emetitur. Quæ opinio si vera esset, & pro nostris annis anni Ægyptii menses nempe adfingerentur, oppido consequeretur, nostros homines perinde longævos esse, imo longæviores iis, qui rudi illo sæculo vixerunt. Nam non pauci dantur hodierno tempore, qui centesimum quandoque annum excedunt, jam si mensis computaretur pro anno, eorum ætas ad 1300. annos adscenderet, quos tamen nullus Veterum est adsecutus. Quippe infra millesimum omnes subsisterunt. Porro & hoc inde fluere, extitisse olim seculum, quo homines partim nono, partim sexto, ætatis anno sobolem procreaverint. Nam fide dignissimus scriptor MOSES scribit, filium Adami Sethum, cum 105. annorum esset, Henochum progenuisse. Jam si accurate hic ponamus calculum, fateamur necesse est, Sethum nono ætatis anno patrem esse factum. Quæ cum nugæ sint & fabulæ, merito hanc sententiam explodimus, & convertimus nos ad aliorum opinionem. Hi persuadere nobis conantur, Veterum annos minime duodecim, sed tres duntaxat menses implevisse. Qualis sententia fuit HELICONIENSIS & PLINII. At vero cum sine ratione hoc adstruatur, ita vicissim æquali destruitur facilitate.

XXIV. ROBERT. HOCHE in operibus posthumis & quidem in discursu de terr. mot. fol. 322. adfirmat, vitam patriarcharum ante diluvium non fuisse nostra longiorem, quia tunc fortasse anni fuerint breviores ob motum telluris diurnum adeoque & annum circa solem celerius absolutum. Celeriores autem tum fuisse rotationes telluris, inde suspicatur idem, quia probabile est, variare polum & axem rotationis telluris, cum non semper versus idem cœli punctum dirigi observentur. Etenim cœli punctum, quod nunc respicit polus telluris septentrionalis, exiguo intervallo distat ab ultima stella in cauda ursæ minoris, cum antea longe majori ab eodem removeretur. Provocat etiam ad puncta intersectionis eclipticæ & æquatoris variationem. Verum enim vero cum hoc suppositum dictum quidem sed non demonstratum sit, hinc nihil ipsi superstrui potest.

XXV. Substernemus igitur sententiæ nostræ aliud fundamentum ex sacro nempe fonte, unde compertum est, arcam Noæ confidentibus aquis ad VII. mensem in Armeniæ montibus confedis- se. Ex quo constat, non trimestrem, sed plurimum mensium fuisse annum. Neque hoc effu-

Frid. Hoffmanni Oper. Tom. V.

gium alicujus momenti est, menses tunc non dies novem & viginti complexos. Legimus vero in lib. Geneseos, quod dies decimus septimus mensis ibi commemoretur, quo primum conquevit arca Noæ, ut adeo & hæc sententia non recto stet- talo. Verissimum potius est, illos homines vere ad tantam ætatem pervenisse. Sapientissimus enim Deus ad gloriam suam & salutem nostram volebat tunc respublicas constitui, ecclesias colligi, familias extendi, ut incolas haberet spatiosum hoc mundi theatrum. Expirasset enim primo ferme sæculo universum genus humanum, si ætas hominum centum saltem annorum fuisset.

XXVI. Cum vero Deus in natura nihil sine causis agat, sed manifesta ratione, hinc quis dubitaret, quin & perspicuæ hujus longævitatē causæ existant. Neque illæ quidem ex animarum differentia petendæ sunt, sed potius ex rebus externis physicis & mechanicis. Extra dubium nempe est, ante eluvionem illam terræ longe aliam fuisse structuram globi terraquei, sicut & doctissimus BURNETUS jam dudum hoc elegantissime demonstravit. Alia itaque aëris & cœli tunc facies erat, æquabilis nempe puriorque, cum tota velut natura esset recens. Hinc inspiratus aër purissimus ac tenuissimus, qui sensum ac motum partibus præstat, non parum ad longam vitam contributebat. Deinceps haud exiguum fuit administriculum natale solum, quod habitavit Adamus cum posteris suis. Vero enim simile est, primos parentes ex paradiso ejectos domicilia ac sedes sibi non procul ab horto Eden, ubi insignem aëris benignitatem fuisse non temere conjicimus, collocasse, ubi ipsa vicinia multum de salutari aëris temperie retinuit. Et hodie etiam in Mesopotamia & Babylonia, ubi olim Paradisus fuit positus, habitatores esse vivacissimos, scriptores illarum regionum tradiderunt. Mite enim & temperatum ibi cœlum, æstus non solvit cutis poros, nec frigus torporem inducit. Ob singularem hanc aëris clementiam Dabroanam insulam incolentes, quæ, cum sub æquinoctiali ad ortum cœli sita sit, benigno aëre fruitur, vitam ad trigessimum supra centesimum annum perducunt, sine morborum insultu.

XXVII. Neque dubium est, aquas fuisse tunc subtiliores & salubriores terramque alimenta produxisse melioris mixtionis & temperaturæ. Post universalem vero totius mundi inundationem universale etiam vitium & terræ & aquis aërique incubuit. Nihil enim magis durationi conservationi & fecunditati adversum est, quam nimium humidum. Quod manifeste exinde patet, quod nullus annus insalubrior sit, & morborum magis ferax, ac quod annonam magis intendat, quam præhumidus. Humiditate enim nimia fibrarum robur laxatur, & fluida ad corruptionē præparantur. Itaque ante diluvium longe subtilior & siccior aër, subtiliores aquæ, subtiliora denique alimenta minusque putredini obnoxia firmum corpus suppeditabant. Is nempe saluberrimus annus est, qui siccitate moderataque temperie conspicuus est, quod confirmat illarum regionum salubritas, quæ ejusmodi aëre ac cœlo perfruuntur.

XXVIII. Illud vero priscorum hominum vivacitatem maxime juvasse constat, quod ad temperantiam victumque moderatum se imprimis composuerint. Verique simile est, inter nulla vel pauca plane auxilia adversæ valetudinis, plerumque tamen bonam contigisse ob bonos mores, quos neque desidia neque luxuria vitiaverat, CORNELIO CELSO teste in præfat. Abstinebant illi carnibus & delicatis cibis, vinique usus ipsis plane inco-

V

gnitus,

Causa longævitatē mortaliū, qui ante diluvium vixerunt.

Dabroa- nam insulam incolentes diu vivunt.

Causa vitii terræ, aquæ & aëris post diluvium.

Ante diluvium abstinebant carnibus & vinis,

gnitus, denique neque cibum neque potum ad voluptates, sed ad vitam referebant. In potum aqua, in cibum olera ac herbae sufficiebant, donec tempore Noachi quaesita & inventa sunt gulæ irritamenta, vini nempe carniūque usus. Deus autem fuit, qui iussit *herbam agri comedere*, & hic sane uniformis cibus ventriculo conveniens, quippe facile concoquitur, nec ex herbis tanta fordidum colluvies in corpora congeritur. Carnium vero usus à Deo non mandatus, sed permissus tantum est. Ipsi abstinemus carnivoris animalibus. Nec negari potest, augeri corpus carniū usu, dum multum sanguinem in corpore progenerant. Sed hoc ipso, quod plus sanguinis, quam quod propelli robore fibrarum possit, in corpore efficiant, nobis nocent, vitalem motum interturbando. Et hæc est ratio, cur vita nostra tantis intervallis cedat Veterum longævitati. Nam præter insignem intemperiem, quæ post diluvium in elementa introducta fuit, ingluvies & tot ciborum varietas, carniū & vini amor, libido denique corpora adflixerunt. Et quod corpori adversum maxime est, otio pigritiaque homines delectari coeperunt, cum labore potius industriaque sanitas sit conservanda. Non mirum inde, brevioris vitæ homines hodierno die esse, & generare etiam liberos infirmos & parum ad longævitatē idoneos. Cum semine enim quasi per successionem statim illis traditur solidarum partium infirmitas, eademque fluidarum intemperies.

XXIX. Propositis igitur longævitatē causis tam in vetustissimis illis mortalibus, quam nostri etiam temporis hominibus, nihil jam reliquum est, quam ut ea, quæ ex re nostra esse possunt, ex hisce causis excerpamus. Utile enim apprime futurum speramus, si quædam inde seligamus ac methodum ac regulas, quibus vita nostra salva ac integra permanere possit, ex iisdem causis tradamus. Diximus in superioribus, primum longævitatē momentum in partium solidarum seu fibrarum robore ac structura contineri. Hæc licet humana arte vix componi possit, sed ex hæreditaria potius profluat dispositione, nihilo tamen secius hæc nativa constitutio ut conservetur ac corroboretur, necessariis remediis prospiciendum est.

XXX. Initium vero faciemus in iis recensendis, quæ membrorum robur solvunt illorumque vim potentiamque labefactant. Inter quæ eminet & excellit immaturus foeminarum complexus. Incredibile, quantum hic damni sanitati adferat: subtrahito enim sero roscido spirituofo, quo semen constat, & quo adolescere roburque debitum acquirere fibræ debebant, necesse est, ut vires imminuantur & solido robore priventur membra. Laudanda hic veterum Germanorum continentia, apud quos, si TACITO credimus, parentum robora liberi referebant, quod nempe, eodem Tacito Autore, *tarda illis venus & pares validique miscebantur*. Qui mos, ut alia speciosa ac laudabilia, nostro seculo exolevit, quo luxuria peccandique licentia velut effractis claustris impune pervagantur. Ferme enim antequam pueri esse desinunt puerumque exuerunt, mariti sunt, & infirmis adhuc annis gerunt

Prælia conjugibus loquenda

uti Poëta canit. At hæc intemperantia non modo effectum infirmumque corpus senectuti tradit, sed ante tempus etiam vitalem corporis laticem absūmit, coctione eversa, fractoque partium robore ac enervato. Sapientiores olim erant Lacedæmonii Ægyptiique, quorum illi vigesimum quintum, hi trigesimum quintum ætatis annum ineundo matrimonio prudenter destinarunt, PLATONE

etiam egregium hunc morem collaudate. Idem tenendum servandumque est in foeminis, quæ, quantum immatura ac præcipiti venere patiantur, nihil attinet hoc loco longius explicare. Nam dum liberos pariunt, & quandoque singulis annis enuntur, succus nutritius, qui robori ac incremento solidorum debebatur, infantis intercipitur nutritione, relicto matri imbecillo infirmoque corpore.

XXXI. Fibrarum partiumque robur adfligit etiam non leviter nimia in vino intemperantia potandique cupiditas. Videmus raro illos ad senectutem pervenire, qui in juventute statim Baccho, Veneri & otio se dediderunt. Nam cum ad sustinenda corpora benigni ac temperati succi requirantur, intemperati & calidi succi ex potationibus proveniunt, firmandis nervis inidonei. Observamus contra, quod qui tardius & jam confirmata ætate ad veneris vinique usum accedunt, melius & sine damno has voluptates tolerant.

XXXII. Non minus corporis robur debilitat adfectuum incontinentia, & mens tristitia morore & angoribus inquietata. Cito enim moriuntur & morbofa redduntur corpora, quæ plus iusto adfectibus fræna relaxant. Animus enim quasi rota suprema est, inquit VERULAMIUS, quæ reliquas corporis rotas circumagit. Hæc immediato influxu in partes solidas agit, naturales turbando motus. Id quod si sæpius & per habitum quasi contingit, tunc necesse est, ut naturali ac genuino fibrarum motu inverso, nil nisi motus inordinati relinquatur.

XXXIII. Præter hæc corporis robori nocet humiditas, qua nihil nobis insensius, nihil quod motui fibrarumque tono magis aversetur. Inde non obscura est ratio, cur balneorum usus, aer turbidus ac pluviosus, tempestates annorum humidiores, loca denique humida & paludosa corpori sint extimescenda. Noxiosissimum vero est, circa ejusmodi loca habitare, vel sub tali aëre dormire, quippe natura adeo debilitatur, ut minus recte suo officio, cui destinata est, defungi possit. Imbecillitatem corpori adferre aëris humiditatem, ex eo constat, quod ubi coeperit humidus fieri aer, manifesta statim corporis lassitudo sentiatur, pulsusque insignis debilitas. Tantum nempe jus potentiamque in corpus aer sibi vendicat.

XXXIV. Corporis denique robur destrunt medicamenta in nimia copia adsumta, præcipue purgantia ac vomitoria, quæ ventriculi ac intestinorum robur male vitiant debilitantque. Jam olim hac de re nos monuerunt summi Viri HIPPOCRATES & PLATO, quorū hoc præceptū elegans celebratur, *ad bonam valetudinem consequendam omnia prius tentanda esse, quam corpus phar-* *macis operose commovendum*. Nec inelegans est C. CELSI illud: *Summa medicina est, non uti medicamentis*. Pertinet huc & aphoris. 36. sect. II. *Qui salubritate corporis sunt præditi, ii purgante hausto medicamento statim deficiunt, ut & qui pravo utuntur alimento*. Et æque gravis est sequens statim aphor. 37. *Qui integra sunt corporis valetudine, medicationes agre molesteque ferunt*.

XXXV. Ad ea jam progredimur, quæ positive robur fibræ addunt. Et cum à prima partium formatione multum dependeat, hinc providendum imprimis, ut semen, quo concipitur infans, tunc maturum coctumque sit. Quale enim semen, talis etiam est natura ac indoles infantis, & robustiores inde parentes firmiores etiam filios gignunt, quam quidem senes & in juvenili adhuc ætate constituti. Deinde semen illud bene coctum ac spirituosum sit, nec per ebrietatem nec nimiam

Causa brevioris vitæ hodiernæ.

Vitam longævam servare remediis opus est.

Immaturus foeminarum complexus nocet.

Eandem locū tenet in foeminis.

Nimius usus vini impedit longævitatē.

Animi adfectuum incontinentia debilitat corpus.

Humiditas nocet longævitati.

Abstinentia à Pharmacis.

Longævitas & robur ortum ducunt à semine.

& exercitatum antea venerem debilitatum. Confert etiam ad robur infantis tempus ipsum, illud nempe, quando natura est robustior, & tepore verno naturæ vigor velut renovatur. Commodissimum ergo est mense maio & autumnali tempore septembri mense, quod tunc ad venerem à natura animantia stimulentur.

XXXVI. Non minus facit ad decentem partium conformationem infantis in utero nutritio. Quare prospiciendum, ut matres gravidæ sanæ vegetæque sint, & si plethora ac cacochymia illas male habent, per V. Snem, per leniora laxantia & quæ juvant transpirationem, ipsis est succurrendum. Debet porro foetui in lucem edito debita suppeditari nutritio, quæ non pulpamentis variis & ovis, quibus vasa inviscantur, neque coagulato nutricula lacte, sed temperato ac tenui absolvitur. Aëris etiam maxime habenda ratio. Minus enim congruum est, aëri calido adsuefacere infantes, temperato frigidiori lucidoque potius adsuefaciendos. Laudem meretur hac in re veterum Germanorum consuetudo, qui infantes à matre fere adhuc rubentes in fluvio mergebant, & hoc modo tenerrima corpora ad patientiam laboris indurabant. Inde CLAUDIANUS canit:

Et quos nascentes explorat gurgite Rhenus.

Pessimus igitur mos est, infantes ab omni liberioris aëris usu excludere, illosque fomentum lectorumque onere tantum non opprimere ac sepelire. Abstineant etiam gravidæ infantesque à dulcibus acidis & spirituosis, quæ, dum sanguinem cacochymicum progenerant, facile foetus humores inficiunt.

XXXVII. Ad robur solidarum partium utilis etiam est motus, optima corporis medicina. Nam uti otio languescunt & emolliuntur corpora, relaxato fibrarum tono, ita motus est, qui fibras corroborat & vasa reddit ampliora. Placet elegantem adscribere locum ex Cl. PECHLINI observ. 34. *Nulla corpora morbis minus obnoxia intolerandisque injuriis magis idonea reperies, quàm illorum, qui à prima statim infantia motu palæstrico gladiatorio, & alia vehementia motum sibi contraxerunt viriumque robur, quod cum in senam ætatem extendant, usque eo etiam immunitatem à morbis incommodisque facile sibi procurant, quod infinitis exemplis obvium est.* Et celeberrimus Autor medic. mentis & corporis p. 6. scribit, *octoginta annorum senes se vidisse, qui cum assidue cursitando in perpetuo motu fuissent, pedibus plus valuerint, quam multi juvenes, qui & cibos appetenter & somnum quiete cæperint.*

XXXVIII. Dispiciendum jam etiam est, quænam in senibus inprimis fibrarum robur confervent ac tueantur. Ante vero, quam aliquid hac de re in medium adferamus, exponendum videtur, quænam fibrarum in ea ætate sit constitutio. Fibræ vero senum siccae duræ & aridæ sunt, quod testantur senectutis insignia rugæ nempe & partes ariditate nimia flaccescentes. Neque dubium, internas partes similiter esse constitutas. Et hinc omnia, quæ fibris vitalem rorem aufferunt, celeres rugas proferendo immaturam accelerant senectutem. Ob naturalem hanc fibrarum siccitatem, deficiente in illis vivida oscillatione & in fluidis elastico motu ac fermentatione, varii humores inter ipsorum spatia congeruntur. Qui stagnando ibidem nec manentes amplius sub potestate sanguinis in orbem commovendi, morbos excitant senectuti familiares. Et licet sæpe minus ex morbis periclitentur senes, virum tamen languore, qui à solidorum siccitate

Frid. Hoffmanni Oper. Tom. V.

fluidorumque intemperie provenit, difficulter liberantur. Deinde exsiccatis nimium fibris sensus impressiones objectorum vix percipiunt. Quæ de causa in senibus interni & externi sensus hebescent, ac ætate decursa memoria perit, ratioque imminuitur.

XXXIX. Ex his, inquit Cl. BAGLIVUS de fibra motrice p. 415. deduci jure poterit, remedia ad vitam longam & revera esse, & talia dici debere, quæ in humano corpore elaterem cum rotis, & rotas cum elatere, mollia, laxa & facile flexibilia conservare possunt. Cujus rei non ignari primi Medicinæ Parentes, nihil magis in morborum curatione præservationeque procurabant, quàm ut balneorum, fotuum, lotionum, unctionum, frictionum & omnis generis exercitationum usu, debitus in solidis servaretur tonus & mollities, ne impedimento essent circulantibus fluidis, & cõtra, ne fluida, nimio impetu, acrimonia, tenuitate, velocitateque præternaturali, morbosas ariditates, tenses, & crispaturas in solidis inducerent, mellis, lactis, olerum, fructuumque esu, & omnimoda vini, atque carnis abstinètia, in naturali quadam dulcedine ea perpetuo conservabant. Quo fiebat, ut non solum prospera semper uterentur valetudine, sed ad centum & plures annos dulcem vitam protraherent, ut olim Pythagorei, philosophorum omnium principes, hujusque diætæ primi autores, fecerunt. Quorum balneum ex ligno cedrio pro retardanda senectute, leniendisque artuum morbis adhibitum & odorosa cedria pice temperatum, incredibile quantum mihi arrideat: multa enim ad hoc in tota citro latent arcana & multa in herbis ad citri naturam accedentibus, ut melissa, thymis citratis, cedrelate, quæ cedrinam dat picem &c.

XL. Ad fluidorum vero temperiem conservandam & robur solidarum partium præter motum, abstinètia à carnibus dulcibus & viscosis, quæ sanguinem crassum & copiosum reddunt, merito est commendanda. Veteres hoc victus genus vocant diætam Pythagoricam, hinc miranda illa longævitas, hinc salubris & athleticus corporis habitus, & ignota tot morborum agmina. Causa enim, quare Pythagoreis animantium carnes interdictæ erant, non ea solum erat, ne talium animalium mores & ideas imbibere. Eo potius illorum prudentia sanitati prospiciebat, quod olera fructusque terræ talem in sanguine temperiem dulcedinem atque simplicitatem inducunt, quæ difficulter vel in morbos solvitur fermentatione, æstu & ebullitione, vel ansam præbet animi adfectibus iræ concupiscentiæ aliisque, uti loquitur jam laudatus BAGLIVUS l. c.

XLI. Ex cibis vero ad longam vitam probamus magis conducere eos, qui compactæ sunt substantiæ potius, quam fluxiles. Hippocrates eos adferit brevioris vitæ esse, qui cibis concoctu facilibus & ob id substantiam fluxilem facileque dissipabilem habentibus enutriuntur. Longioris contra vitæ eos adseverat esse, qui durioris victu utuntur, & ejusmodi cibis, quorum substantia pertinacius corpori inhæret. Unde Veteres ex usu grossioris panis carniūque induratarum plus sibi roboris acquirebant, quam ex delicatissimis cibis. Videmus inde, Westphalos, Suecos & septentrionis incolas corporis robore ac viribus polleere, quia duro ac indifferenti victu utuntur. Effeminatos contra & molles homines mollis cibus facit. Cæterum sanitati & vitæ nocent carnes nimis falsæ, vetustæ & rancidæ, item omnes ejusmodi generis cibi, qui ad putredinem sunt proclives dulces inprimis pingues marinæque copię.

Y 2

XLII.

Diætæ Pythagorica.

Quinam cibi eligendi ad longam vitam.

Quando Venus commodissima.

Quid requiratur in embryo-ne & foetu enixo.

Motus optima medicina corporis.

Observatio secundum fibras senum.

*Aër purus
& serenus
conservat
fluidorum
tempe-
riem.*

XLII. Ad fluidorum conservandam temperiem fibrarumque virtutem aër serenus purus compressiorque paulo commendari meretur. Omnis enim aër, qui humidior est, emollit & laxat corpus, frigidior vero robur ac motum solidis æque ac fluidis impertit. Sub hoc aëris statu alacriores semper sumus, torpemus vero sub humido & nebuloso.

*Præstantia
aqua.*

*Quanam
Vina op-
tima.*

XLIII. Ad sanum fluidorum statum custodiendum laudari etiam debet aquæ vinique salubris potus. Aquam omni potu salubriorem judicamus, modo sit aqua pura, levis tenuisque, quæ non facile gelu concrevit, & hypochondria bene transit, dentesque conservat. Talis si defuerit, confugiendum ad aquam cœlestem vel ejusmodi, quæ destillatione subtilior facta est. Vina ad vitam longam optima censem præsertim senibus, Hungarica genuina Toccaviensia, ex Gallicis Frontignac, ex Italicis Montefiascone, ex Helvetiis Veltlinum aromaticum. Viris & viridi ætati conveniunt temperatiora Mosellana, Rhena-na, Moenana. Neque nocet quandoque liberalior eorum usus, modo non ad ebrietatem perveniatur.

*An longæ-
vitam ab
medica-
mentis sibi
quis possit
polliceri.*

XLIV. Veniendum jam ad gravem quæstionem, an ab medicamentis sibi quis longævum possit polliceri? Nolumus hic commemorare fabulas de auro potabili & philosophorum lapide, quibus hanc virtutem vulgi adsignat credulitas. VERULAMIUS ambram & nitrum commendat, cujus excellentiam & ipse suo exemplo comprobavit, quotidiano illius usu, quod salu admiscuerat, egregiam adeptus senectutem. Veteres ex cervo, ex vipera, tanquam animantibus, quæ ob balsami abundantiam exuvias deponunt, vitæ longæ auxilia petiere. Alii in balsamicis, succino, balsamo Peruviano id quæsierunt. Verum ut medicamentorum laudibus hic nihil detrahamus, quippe quorum virtus in curationibus manifesta est, minus tamen suadendum videtur, ut illorum usui familiariter nos adsuëfaciamus. Natura enim facile iis adsuescit, ita, ut necessitatis tempore nihil opis adferant. Ubi vero vi-

res languescunt, ubi spiritus sanguini defecerit, nec sufficiunt victus auxilia, tunc utique ad balsamica, quoniam robur partium confirmant, est confugiendum. Ex horum numero laudamus falia volatilia oleosa bene præparata, essentiam ambræ, moschioleum cinnamomi, de cedro, rosarum genuinum, neroli, balsamum nostrum vitæ, essentiam succini, spiritum balsami Peruviani, massiches, elixiria balsamica, pilulas balsamicas, aquam aurantiorum, cerasorum nigrorum, rad. Ninsi aliaque hujus generis remedia. Hæc enim dum solidas partes mirifice corroborant, fluidas vero balsamico spiritu replent, merito iis commendanda sunt, qui corpore sunt imbecilliore.

*Pharmaca
corpus cor-
roboran-
tia.*

XLV. Non prætereunda est hic loci V. S. & num quid illa facere possit ad longævam vitam, breviter excutiendum est. Satis constat, sanguinis detractionem per se non inutilem ad vitæ diuturnitatem esse, sed illius usum quotidianis confirmari experimentis. Sciri tamen oportet, quod cum crebra V. S. vita debilitetur, hinc frequentiore illius usu corpora torpescant ac emolliantur. At in plethorico statu, ubi plus comedunt homines, quam consumere possunt, merito est amplectenda. Nisi enim solenni Veterum more ad abstinentioniam inediamque confugas, vix repereris ad conservandam sanitatem præstantius remedium. Tunc enim V. S. adeo non nocet, ut salubris potius sit medicina. Et ne longiores hic simus in commendando hoc eximio auxilio, ii certe illius præstantiam satis abundeque testantur, qui sola V. S. bonam valetudinem & diutissimam ætatem consequuntur. Testes Helvetii & Rhæti, quorum vivacitas exinde maxime profuit, quod bis de anno sanguinem sibi detrahant. RIOLANUS *Cl. Gallie Medicus* crebræ V. S. adscribit, quod ad longam ætatem pervenerit. Credibile tamen est, longæviores futuros, si abstinerent sanguinis missione & temperantiæ ac frugalitatis legibus se adstringerent. At hodierno sæculo, quo luxuria edendique libido nimis invaluerunt, tantum laudis hoc invenit remedium, quantum ipsi necessitas lenocinatur.

*V. S. ad
longavi-
tatem in-
stituenda.*



D E

A N I M O S A N I T A T I S E T M O R B O R U M F A B R O.

P R O O E M I U M.

*Homo con-
sistit ex du-
plici prin-
cipio.*

*Ejus defi-
nitio.*

HOMINEM creaturarum omnium esse miraculum, nemo facile in dubium vocabit, qui considerat, ipsum ex duplici principio, altero spirituali, animo, altero materiali, sive corpore organico esse compositum. Etenim optima ratione homo definiri potest, quod sit mens intrusa corpori organico, quæ in eo & per ipsum diversissimas res creatas percipiat easque invicem comparando ratiocinium producat. Mentis naturam quando penitus expendimus, est illa nihil aliud, quam vis quædam viva & substantialis, sui & rerum, quæ extra fiunt, conscia libertate agendi instructa. Hanc Deus Optimus Maximus in prima rerum creatione cum corpore organico univit, ut adjuvante substantia tenuissima aërea sanguinis varias operationes, quæ animales & rationales audiunt, exserat, variasque motiones per illam in corpore efficiat. Lubenter autem admittimus & confitemur, quod sicuti omnis immateria-

lis rei, ita & vis istius activæ, vivæ, cogitantis & intelligentis, quæ præcipua nostri pars est, essentia atque natura intima nobis abstrusa atque incognita sit, multoque magis nexus ille, quo inextensum cum extenso, spirituale cum corporeo arctissime jungitur, intellectus humani captus ac limites penitus transcendat. Sufficit tamen, perspexisse & cognovisse, corporis animique actiones amicissimo invicem contineri vinculo, mutuaque harmonia & singulari consensu gaudere, ut affecto animo corpus protinus afficiatur, inque consensu trahatur & versa vice. Quos itaque effectus animus in corpus habeat ad conservationem vitæ & sanitatem admodum conducibiles, & contra quas pravas & morbosas dispositiones corpori afferat, & quomodo ad vitæ destructionem concurrat, argumentum est medica inquisitione dignissimum. Et tametsi experientia satis corroboratū & apud omnes Medicos in confesso sit, quantum noceat animi pathemata corpori, allu- bescit tamen, de præsentī utilissimam hanc materiam, compluribus utut difficultatibus quoad cognitionis modum circumseptam, paulo accuratius tra-

*Quanam
humana
menti sint
incognita.*

*Animi pa-
themata
nocent cor-
pori.*

clare

Etare atque evolvere & speciatim ostendere, quo pacto animus noster corpori prodesse vel nocere possit.

Dicta Plutar-
chi &
Platonis.

I. Citissime PLUTARCHUS in *Sympos. Dec. v.* Probl. VII. πάσχεα ἡ ψυχὴ τὸ σῶμα διατίθῃσι.

Ac τὰ παθὲν τὰ δ' ψυχῆς ποιεῖ σφοδρότερας τὰς τοῦ σώματος δυνάμεις. Quin & PLATO, omnis augustinioris sapientiae Magister, in principio *Charmidis* gravissime scribit: Fieri non potest, ut animo male affecto non corpus etiam una laboret, & rursus animus bene affectus vi sua, quoad fieri potest, optimum reddat corpus. Ex quibus patet, quam necessarium sit & utile Medico scire animi vires & effectus in corpus, & qua ratione ipse autor fanitatis & morborum existere possit, & quomodo etiam animo curato corpus fanitati restituatur.

Necessarium est Medico & utile scire animi vires & effectus in corpus.

Quocirca HEURNIUS in *Institut. Med. p. 58.* affirmat, medicinam non in solius corporis, sed hominis etiam, qui ex animo & corpore constat, cognitione versari. Merito itaque in sanando corpore Medicus & animi rationem habeat necesse est.

Antiquiores sapientium philosophiam, quæ secundum TULLIUM vera animi cultura & medela est, non tantum ad vitia animi tollenda, sed & ceu medicinam ad corporis malè habentis affectus emendandos utroque pollice commendabant. Perpulchrè à TERTULLIANO *Philosophia* dicitur *medicinæ soror*. TYRIUS MAXIMUS, *Platonius* hunc Medicum magnopere commendabat, qui non tantum corporis mala herbulis quibusdam ratione observata tollere potest, verum etiam, qui per philosophiæ præcepta cupiditates animi, quas Stoici ejus *pathemata* dicunt, curare didicit. PINDARUS prodidit, eam in *Æsculapio* fuisse artis præstantiam, ut, quotquot ad ipsum venerint ægri, aut debiles, aut vulnerati, omnes malis ac laboribus levatos à se dimitteret, alios carminibus & dictis curans, alios potionibus, alios pharmacis & medicamentis foras admotis, alios adhibita sectione. Huc pertinet illud FLACCI:

Quenam fuerit præstantia artis in Æsculapio.

Sunt verba & voces, quibus hunc lenire dolorem

Possis, & magnam morbi deponere partem.

Quomodo Medicus philosophus ab Hippocrate appelletur.

Magnus noster HIPPOCRATES Medicum philosophum ἰσόθεον appellat, quo ipse non tantum philosophiam naturalem, sed potius moralem complectitur, cujus dignitas ususque in eo potissimum consistit, ut homines erudiat, quomodo possint animi perturbationes & adfectus, ne degenerent in vitia, ne graviter corpus ejusque actiones convellant, compescere & moderari.

Corpus non valet sine animo sano.

II. Cum itaque res sufficienter evidens & clara sit, & à multis retro seculis gravissimorum autorum sententia & experientia munita, corpus valere non posse, nisi animus sit sanus, placet itaque jam brevi labore & compendio investigare, qua ratione ex mentis fanitate corpori integra & firma valetudo accedat; & contra, quomodo ex animi turbatione & vitiis corpus morbosum, & languoribus fiat obnoxium gravissimis. Quomodo autem & quibus ex causis animus agat in corpus, sanguinisque & humorum motus vitales & secretorios variè demutet atque afficiat, theorema certè est non paucis iisque gravissimis difficultatibus involutum, cujus cognitionem ceu mentis humanæ captui minus obviam non promptum est attingere. Tametsi enim effrenes perturbationum animi tumultus atque impetus in nobismet ipsis frequenter nimis experiamur, velutique in intimo pectoris excitatos persentiamus, nihilo minus difficile est, eorundem causas proximas & primarias differentias enucleate explicare & claram ac perspicuam harum rerum ideam demonstrationis cer-

Animi actiones in corpore difficiles sunt intellectu.

Frid. Hoffmanni Oper. Tom. V.

titudine munitam suppeditare. Notum est, quam impervestigabilis sit animæ humanæ natura, quam impervestigabile arctissimum illud vinculum, quod animæ cum corpore intercedit, quam difficile etiam sit percipere, quomodo ab externis objectis imprimatur animæ certa agendi activitas. Deinceps notissimum quoque est, quam ingentes lites & controversiæ à longo tempore etiam nunc moveantur inter eruditos de sede animæ; ideo mirari nemo debet, si in iis, quæ jam dicturi sumus, quædam non excussa, vel quæ non plenius satisfaciant intellectui, qui circa omnia perspicua desiderat, invenerit. Admodum semper mihi placuit hac de re PLATONIS effatum, qui, cum de anima copiose disse-ruisset, in hunc tandem modum concludit in *Timæo*: Quidnam ergo mortale & quid divini habeat anima, & ubi & cum quibus & quorum gratia explicatum à nobis est, at quam verè id dictum sit, tunc demum, si id nobis oraculo Deus edixerit, asseremus.

Maximæ sunt lites de sede animæ.

Effatum Platonis de anima.

III. Primo omnium autem brevissimis de passionibus sic dictis animi, quid illæ sint, & quomodo fiant, mentem nostram exponere allaborabimus. Hæ animi affectiones vocari solent animi motus, impetus, actus potentiae appetitivæ, sensitivæ, ab aliis vero passiones, pathemata. Certissimum est, in tota rerum natura entium & creaturarum diversas dari actiones & passiones inter se invicem, & ex actionibus & passionibus produci quoque reactiones, quæ quasi sunt actiones per actionem alienam impetu quasi monitorio excitatæ. Actio autem dicitur, quando ex interna cujusdam objecti vi provenit motus, quando hæc actio recipitur in alia vi, fit passio, revera enim passio & actio sunt unum quid motu, terminis autem & mente distincta. Sicuti itaque in naturalibus movens in mobili producit novam semper actionem; ita etiam in moralibus actio alicujus agentis externi in nobis recepta producit reactionem sive vim, qua anima nostra agit, & in qua essentia ejus consistit, vividissime excitat & determinat ad agendum. Quoniam autem vis libera est, inde vel resistere vel obsequi potest motui recepto, id est vel impressum continuare vel minus. Talis passio in animo excitata supponit semper actionem externam quandam vivam intimè penetrantem, quæ in anima recipitur & deinde vi sua ipsam ad agendum stimulat. Ex quibus suppositis facile elicitur, tot dari passiones & diversas quoque reactiones in mente, quot nimirum dantur agentia intime animum afficientia.

Quid sint passiones animi.

Actio & Passio.

IV. Deinceps Deus sapientissimus naturæ microcosmicæ architectus talem legem ac proprietatem quasi essentialem & naturam menti nostræ concessit, ut nempe, quando ipsa deprehendit ideas, quæ nihil aliud sunt, quam actiones externæ in sensorio impressæ & illæ videntur bonæ, sive corpori utiles, excitetur motus attractorius, qui dicitur amor, quo ille, qui amat rem præsentem, quam amat, quasi ad se trahere & conservare conatur. Contra, quando ideæ sub specie mali & noxii offeruntur, ita, ut ad naturæ perniciem & animæ ac corporis vim imminuendam quasi tendant, motus sive reactio in contrarium producit nempe repulsoria, quæ dicitur odium, quo illam rem, quam anima odio habet, amovere quasi & destruere nititur. Hi itaque affectus duo universales & reliquorum fundamentales duos principales junctos habent effectus, nempe amor gaudium, odium tristitiam. Cognitionem enim amoreque boni & mali semper subsequitur vel lætitiæ vel tristitiæ affectus. Id autem bonum

Amor.

Odium.

Eorum effectus.

vocamus, quod nostram spectat conservationem & animi vel corporis potentiam auget aut juvat, id autem malum, quod pertinet ad nostram destructionem & animi vel corporis potentiam minuit & coercet. Unusquisque itaque ex legibus suæ naturæ necessario amat vel odit illud ipsum, quod bonum vel malum esse judicat. Quoniam autem animus, ceu principium immateriale intelligens, quod in nobis est, divina voluntate sic ordinante, nihil operari, id est nullam actionem vel motionem exferere, aut recipere potest, nisi mediante fluido purissimo summeque mobili in partibus solidis & fibris, cerebrique filamentis existente, quod animam sensitivam, naturam, spiritum animale alii vocitare assolent; hinc facile perspicitur, quando mens afficitur, sive ab objectis externis varie movetur, spiritus animales, qui indissolubili vinculo juncti sunt, simul affici, commoveri & in motus diversos abripi. Brevibus: sub omnibus animi sic dictis passionibus ab objectis externis factis commoventur varie spiritus animales.

Quo pacto spiritus animales moveantur.

In quibus versetur sanitas corporis.

In quibus consistat morbus.

Mens tranquilla servat corpus sanum.

Harmonia inter animam & corpus.

Mens tranquilla summum bonum.

V. Præmissis itaque illis, quæ in genere ad cognitionem affectuum animi pertinent, disciendum jam est, quomodo motiones mentis afficiant, demutent vel pervertant corpus & sanitatem vel morbos efficiant. Tenendum autem hoc loco est, sanitatem corporis nostri versari in æquabili, placida, libera & expedita spirituum, sanguinis & humorum per totius corporis tubulos motione, circulatione & excrementorum per debita evacuatoria secretionem. Ita enim corpus à putredine & corruptione non modo conservatur, verum etiam aptissimum animæ instrumentum, nempe spiritus animalis, producit. Contra vero omnis morbus & motus morbosus consistit immediate in motu partium fluidarum spirituum & sanguinis tardiori vel celeriori, circulatione inæquali & secretionem partium excrementitiarum plane depravata.

VI. His perspectis, considerandum jam est, quo pacto animus in sano statu corpora humana servare & morbos præcavere possit. Statuimus itaque, omnia illa, quæ placidum, tranquillum & moderatum in spiritibus animalibus excitant motum, ad vitam sanam & longam efficiendam esse aptissima, hoc autem præstat mens tranquilla sub moderato gaudio & amore temperato ac bene ordinato. Qualis enim est animus, talis spirituum motus, qualis spirituum motus, talis motus cordis & arteriarum, tonusque partium, & qualis partium tonus motusque cordis & arteriarum, talis circulatio, & qualis circulatio, talis sanitas. Est igitur mens tranquilla summum hominis in hac vita bonum, utpote in tali statu posita non tantum corpori, sed ratiocinationi quam utilissime inservit. Si enim placida & tranquilla est, circa motus quoque vitales & excretorios in corpore omnia sunt pacata & tranquilla. Porro si quieta est, si libera omnique inordinata commotione vacua, longe melius intelligentiam suam exferere potest. Id quod tacite subinnuisse videtur HIPPOCRATES libro de morbo sacro his verbis: *sola quies cerebri sapere facit, prudentiam subministrat & intelligentiam causatur*. Quamdiu enim mens nostra in se est quieta, nec affectuum cupiditatumque fluctibus jactatur, non tantum veritatem (quæ ipsi propria est, & ad quam quærendam non aliter mens nostra creata est, uti MARSILIUS FICINUS loquitur, quam oculus ad lumen solis perspicendum) clarius assequi, sed & secundum hanc mores & actiones suas instituere potest.

VII. Fateor quidem, rem esse difficillimam, comparare sibi quietem in animo, & omnes affectus velle tollere, quos, quamdiu in tabernaculo corporis hujus habitamus, & fragili carne circumdamur, amputare non possumus, nihilo minus illos moderari, regere ac temperare omnino homini rationali multo magis Christiano possibile est. Præclara res sunt affectus, si rationi obediant, in eo ipso enim virtus consistit, & virtutis hoc opus est, servare in affectibus symmetriam ac mediocritatem. Sunt enim affectus motus indifferentes, quibus proposita nobis objecta prosequimur aut fugimus, suntque hominibus inditi, ut essent virtutum stimuli & calcaria. Quod si itaque impressionibus externarum rerum mens per se libera resistit, & omnes res ex natura sua æstimare & bonum verum ab apparente distinguere scit, an ipsi noceat nec ne, tunc facile etiam fugere poterit motiones ac perturbationes animi ac spirituum. Spectant huc maxime sanioris philosophiæ saluberrima præcepta, quæ omnia mundana spernere jubent. Itaque non sine ratione LUCIANUS, lib. *Macrob.* p. 827. longævus annumerat philosophos & omnes, qui ingenio & eruditione præstantes fuerunt. Ita etiam PLUTARCHUS narrat, plures corpore alioquin parum firmo philosophiæ præceptis vitam longam consecutos. Maxime omnium autem vitam longam vixerunt, qui delectabantur pulchris studiis, & quos orationis capiebat ornatus. Sic Gorgiam, Protagoram, Isocratem & à Latinis M. Senecam Rhetorem Philosophi parentem longævus fuisse legimus. Cicero monebat per epistolam Pætum suum, quod pertinere ad bene vivendum arbitrabatur, ut cum viris bonis, jocosis, amantibus sui viveret, nihilque esse aptius vitæ nihil ad beatè vivendum accommodatius. Neque id ad voluptatem referebat, sed civitatem vitæ atque victus, remissionemque animorum, quæ maxime efficitur sermone familiari, qui est in conviviiis dulcissimus & mentis nubila fugat. Moderatæ autem lætitiæ genere capiuntur illi, qui contemplari solent naturæ miranda, modo non in causis eorum rimandis crucem sibi figant. Speculatio enim rei novæ & magnæ aut pulchræ suaviter spiritus oblectat. Unde inquit Vossius lib. de Idololatria Gentilium p. 910. Videmus Democritum, Parmenidem & alios naturæ admiratores ad longam pervenisse vitam. Philosophi enim vitam egerunt longissimam. A moderata & blandissima tali lætitia spiritus debite expanduntur, liberius in cor & musculos influunt, sicque circulatio ad sanitatem custodiendam aptissima redditur.

Difficile est ea acquirere.

Affectus quid.

Mundana spernere conducit ad longævitatē.

Lætitiā moderatā multum prodest.

Quomodo tranquillitas in animo acquiritur.

Theologia præstantia.

res morbosas sibi accersunt motiones, & vitæ spatium sibi met ipsi contrahunt. Contra, si experientiam consulimus, plurima possent allegari exempla, quod Theologi & pii viri sola, ut arbitror, mentis quiete ad extremam senectutem pervenerint. Ex quibus clarissimum esse arbitror, veram mentis tranquillitatem, sapientiam & inde etiam fanitatem non tantum ex philosophiæ præceptis, quæ mentem & rationem emendant, sed potius vera cultus divini praxi & exercitio spiritualium virtutum posse acquiri & comparari.

IX. Præterea tranquillus animus, siue mentis pacatus status non tantum sanum & integrum servat corpus, verum etiam disponit corpora, quo minus morbis epidemicis grassantibus corripiantur, imo sanationem illorum, si jam corripuerint, magna cum efficacia promovet. Testatur experientia, non salubrius esse consilium, quam morbis grassantibus, peste, febribus petechialibus, dysenteria, animo esse erecto, & in utramque fortunam parato. Et si unquam spes, fiducia & lenè gaudium commodum habet locum, certe est in ægrotantibus. BARDUS in medico politico p.310. scribit. *Cor letum benefacit medicinæ, tunc enim medicamentum proficit & juvat, dum alacri animo est, qui illud excipit.* Memoranda hic venit notabilis observatio, nempe sæpius nos vidisse graviter & periculose quosdam decumbentes sacra usurpata συνάξις melius inde se habuisse & ut sentire possis, vires recuperasse, quod procul dubio adscribi debet spiritualibus affectibus in amore, fiducia ac gaudio erga Deum positis. Hisce enim spiritus turbati & depressi vires acquirunt & eriguntur. Ex adverso dici vix potest, quantum noceat in morbis, & in quantum illorum sanationi resistat, esse abjecto & prostrato animo, in perpetuo terrore, formidine ac metu imminentis velut mortis versari. Et docet experientia, plerumque certum esse signum & prænuncium futuræ mortis desperationem de recuperanda valetudine. Certe enim periculosa ac sinistra ominis res est, grassantibus morbis male sibi metuere. Nam dum spiritus animales tristiori cogitatione se macerant & hac ratione consumuntur, non tantum corpora apta redduntur ad suscipiendum contagium, sed & tragoediam tunc ludunt magis funestam.

X. Ordo jam ac res postulat, ut etiam discipiamus, quomodo noceant corpori vehementes animi & spirituum animalium motiones. Graviorum esse ac perniciosiores animi quam corporis morbos, à plerisque non obscuræ famæ auctoribus est receptum. Et sicuti animus pretiosior est corpore, & bonum, quod ab animo provenit, majus, quam quod à corpore: ita etiam magis malum animi quam corporis est morbus, utpote turbato animo turbatur, pervertitur & noxam insignem etiam contrahit corpus. Pathematum autem omnium animi ad inferendum corpori damnum promptissima sunt gaudium repentinum atque effusum, vehemens terror, tristitia, ira. Nam cum hæ celerrimi animi sint motiones, necesse quoque est, ut celerrimæ ac concitatae præter naturæ ordinis motiones spirituum & sanguinis consequantur. Inde fit, ut partim dissolutis & consumptis viribus mors excipiat, partim etiam œconomia motus vitalis, & secretionis summe necessarium negotium evertatur, & via ad morbos struatur apertissima. Gaudium profusum ac insolens spiritus tam vehementer dissipat, ut sanguine hisce destituto syncope vel morte repentina homo corruat, quod nonnullis præsertim languidis, senibus & imbecillibus obtigisse memoriæ proditum est ab

observationum scriptoribus. Ex repentino gaudio exspirasse animam Polycratam nobilem foeminā à Naxo insula ARISTOTELES refert. Philippides quoque, comœdiarum poëta haud ignobilis, ætate jam provectiori, cum in certamine poëtarum præter spem vicisset & lætissime gauderet, inter istud gaudium repente mortuus est. Chilonem Lacedæmonium sapientiæ commendatione nobilitatū insignemque philosophum præ effuso repentinoque gaudio exspirasse, dum victorem in Olympia filium conspexit, PLINIUS scribit lib. VIII. c. 53. hist. natural. Plura exempla vide apud GELLIUM noct. att. I. III. c. 15. P. LOTICH. I. III. c. 4. Nec Veteres latuit tam subitæ mortis causa, unde HELIODORUS elegans scriptor l. 7. p. 321. obtingere ait ejusmodi mortem εν τῇ πνευματικῶν πόρῳ εἰς ὑπερβολῆς ἀνεθῶτων ἢ χαλασθέντων. Observatione etiam quotidiana constat, percepto improvise & magno gaudio appetitum mox deficere, vires infirmari & ad nimiam laxitatem ventrem disponi, placidumque somnum arceri ac pulsus fieri debilem & frequentem. Eleganter hinc carmine monet HORATIUS:

*Æquam memento rebus in arduis
Servare mentem: non secus in bonis
Ab insolenti temperatam
Læticia: moriture Deli.*

XI. Quemadmodum autem lenis & suavis lætitia spiritus recreat, excitat, & sanguinis circulum promptum expeditum ac liberum reddit, insolens autem & nimis effusa spiritus admodum dissolvit & consumit; ita tristitia & moestitia, quæ angor, cura & cruciatus animi est lætitiæ est contraria, & calorem, sanguinem, spiritum à circumferentia magis ad centrum intro cōpellit spasmodice constringendo habitum corporis, unde in moerentibus & tristibus facies apparet pallida, cutis constricta, transpiratio fit remissior, pulsus exilis ac lentus evadit, appetitus perit, somnus fit turbulentus & vires successive cōvelluntur. FERNELIUS scribit: *tristitia spiritus obtenebrat, ingenium hebetat, rationem impedit, judicium obscurat, spiritus ascensionem deprimit & melancholicas desperabundas cogitationes efficit, quibus ex causis corpus pallore defædatur, ignavia torpet, atrophiam liquefcit, & in marcorem aliosque frigidos morbos ruit.* Id quod SALOMO Proverb. XVII. palā testatur, ubi inquit: *Tristis animus exsiccat ossa. it. c. XV. sicut tineæ vestimento & vermis ligno, ita tristitia in viro nocet cordi.* Et revera tristitia ac moeror maximum tormentum animi & corporis est, ob id JAMBlichus de mysteriis, Dæmones, inquit, sua corpus præsentia gravant morbisque affligunt, qua scilicet moerorem ac tristitiam inducunt, inferni germina præcipua, desperationem, timorem, vitæ odium & mille terculamenta, quibus veluti aquila apud inferos Titii jecur arrodere non cessat præstigator ille. Cum Paulus Hymenæum & Alexandrum tradidit Satanæ castigandos cap. 1. ad Tim. I. non tam eos, quā moerori ac tristitiæ mancipavit. HIPPOCRATES lib. 2. de morb. *Cura in visceribus veluti spina videtur, atque illam pungit; & Idem alibi: Ubi hæc anxietas animum corripuit, lucem atque homines fugit, & tenebras amat, & timor invadit, aridus est & ad contactum dolet, & expavescit, & terculamenta & somnia horrenda videt.* In praxi observamus, tristitiam diuturnam ad febres malignas, putridas, melancholiam, maniam, malum hypochondriacum, calculum, phthisin, hæcticam, cachexiam frequentissimè disponere. Eosdem fere effectus cum tristitia habet invidia, quæ, ubi insita est, ita animū humanū consumit, velut rubigo ferrum, ut dicere solebat ANTISTHENES. Alexander M. apud QUINTUM CURTIUM, invidios homines nihil

Exempla
quorum-
dam.

Differentia
leneminter
& insolentem
lætiti-
am, ut &
tristitiam.

Tristitia
& moeror
maximum
tormen-
tum animi
& corporis.

Ut & in-
vidia.

aliud esse, dicit, quam ipsorum tormenta. Eleganter Poëta.

*Livor tabificum malis venenum,
Intactis vorat ossibus medullas,
Et totum bibit artubus cruorem.*

*Quod quisquis fuerit, invidetque sorti,
Ut debet, sibi pœna semper ipse est.*

Qualis af-
fectus sit
ira.

XII. Ira affectus quoque est nocentissimus vitæ ac sanitati hominis, & nascitur ex idea præsentis mali, quod animus odio habet, & omni vi ac motu amovere & amoliri nititur, unde commotio spirituum & sanguinis extrorsum à centro ad circumferentiam maximo tumultu perficitur. Eleganter loquitur hac de re PERGAMENUS lib. 2. de causis sympt. c. 5. Est quædam, inquit, ex primis & principalissimis motionibus ipsa naturalis coloris intro forasq; dilatio multas animi passiones sequens: simul autem & spiritus & sanguis modo intro & ad principia feruntur ac contrahuntur, modo foras distenduntur & funduntur. Et licet motus hos evidenter perspicere cum in aliis multis, tum in ipsis animi perturbationibus e.g. terrore & ira. Ille intro & ad principium spirituum & sanguinem una cum refrigeratione corporis superficialia subducit & contrahit, hæc vero foras agit fundit & calefacit. Cum itaque in iracundia sanguis vehementissime & maximo cum impetu ad externum habitum corporis moveatur, accidit, ut sub paroxysmo infletur facies, oculi fiant feroces & rubicundi, in partibus sentiantur tremor, & respiratio sit adaucta, pulsus existat vehementior & mens penitus extra flatum suum dejiciatur. Scitè hinc immoderatam iram dixit ENNIUS, insaniæ initium, quidam è sapientibus, brevè insaniam. Cato senior iratum ab insano non alia re distare aiebat, quam tempore. Color, vox, oculi, spiritus, impotentia dictorum atque factorum, quæ habent sanitatis partem? Ut scias, inquit SENECA, non esse sanos, quos ira possidet, ipsum intueri habitum. Flagrant emicantque oculi, multus ore in toto rubor est, labia quatuntur, dentes comprimuntur, surgunt capilli, stridet spiritus, gemitus mugitusque ut parum explanatis vocibus sermo præruptus & complosæ sæpius manus & pedibus pulsata humus foeda visu & horrenda facies depravantium se atque intumescantium.

XIII. Quoniam vero sanguis non semper eadem celeritate, præsertim, si viscosus & tenax sit, aut tubuli corporis angusti, quibus in arterias ad aëlium pergere & revehi potest per venas, hinc sæpius in tubulosa partium solidarum vel viscerum substantia subsistit, & inflammationes periculosissimas efficit. Et hæc est ratio, quare, qui ira corripiuntur vehementiore, experiantur non raro pleuritidem, peripneumoniam, inflammationem hepatis, item ventriculi & intestinorum, quod in herniosis maxime accidit. Erysipelas subsequi iram præcipue in cacochymicis & scorbuticis corporibus obesisque, res familiarissima est.

XIV. Quod sanguis vehementius in ira moveatur, patet ex obs. 18. cent. I. HILDANI ubi arteria vulnerata, postea probe sanata, rupta iterum fuit ab ira. Constat etiam experimento practico, iram maximam habere facultatem in consuetis & dispositis enormes sanguinis excretiones sive per nares, sive per venas ani, in foeminis per uterum excitandi. Et hæc quoque est ratio, quare in senibus & plethoricis vehemens ira apoplexiam non raro producat. Est enim apoplexia præsertim gravis brevi interficiens, ut plurimum sanguinea, quæ à ruptione arteriolarum in capite & inde consequente extravasatione sanguinis circulationem & influxum spirituum præpedientis proficiscitur. Ante omnia autem vulneratis, & quidem in capite læsis ira est

fugienda, utpote mox graves inflammationes partem affectam adoriuntur. Juvenis apud HILDANUM cent. I. obs. 17. cui caput vulneratum & cranium fractum erat, ex sola ira in febrem & phrenesin incidit & moritur. Cranio aperto, inventæ fuerunt cerebri membranæ inflammatae, venæque & arteriæ sanguine congrumato turgentes. Quod idem affectus ulcerum consolidationi multum noceat, vid. ejusd. autoris obs. 75. cent. V. Est peculiare iracundorum symptoma, quod in latere dextro sub scrobiculo cordis sentiant dolorem quandam constrictivum, in ore autem amaritiam. Initium suum hæc pathemata ducunt à motu bilis ejusque effusione in intestina impetuosiori, dum ductus biliarii nervosis ac musculosis tunicis constantes ab influxu spirituum animalium citiori nimium compressi ingentem quantitatem bilis exonerant & infundunt duodeno, unde etiam dependet inclinatio ad vomitum & diarrhœa, hinc HILDANUS cent. VII. obs. 18. annotavit, alvum subductam fuisse ab ira, ac si pharmacum assumptum fuerit.

Symptomata iracundorum.

XV. Notabile est, quod GALENUS lib. 2. de symp. scribit: Ira nunquam quandoque esse mortuum, gaudium autem non paucos. In gaudio enim intenso spiritus dissipantur & cor virtute motrice destitutum syncopen efficit. Id quod tamen non universaliter de omnibus individuis, sed de mobilioribus animis & corporibus saltem intelligendum esse, suadet ratio. In ira autem quoniam non dissolvitur spirituum robur, sed potius augetur, uti iratorum pulsus indicat, hinc nemo hac ratione derepente interit, sed potius testatur experientia & HIPPOCRATIS autoritas confirmat, pituitosis & paralyticis sæpius iram prodesse, quoniam inde eorum debilis calor augetur. CLAUDERUS observatione 196. decur. II. ann. V. scribit: Iram quod attinet, tum alios tum me ipsum praxis docuit, personis in senio constitutis hac mediante balsamum vitalem quodammodo reviviscere, & in actum deduci, cum ita mucosa phlegmatis visciditas illum quasi suffocans ventiletur & calor innatus senilis sit æquiparandus lapidi pyriti scintillas igneas non nisi ferro fortiter percussus spargenti & communicanti. Dicta autem incandescencia moderata, & lenior nec frequens esse debet, alias flammulam lucis innatæ semimortuam subito extingueret. Ad iram autem spectant etiam odium, inimicitia, contentio, certamen, utut non in simili gradu effectus producant.

Qua de causa ira nemo sit mortuus sed multi gaudio.

Quanam ad iram spectent.

XVI. Alia autem plane est ratio terroris, metus, formidinis, pavoris; nam hi affectus ex opinione mali præsentis oriuntur, unde, dum anima judicat, damnum ab externo objecto illatum iri corpori, spiritus & sanguis retrahitur & quasi occultatur, unde motum à circumferentia ad centrum sive ab externis partibus ad interiora suscitant prædicti affectus. Conspicitur hinc in terrore affectis in externo corporis habitu constrictio quædam spasmodica, ob quam rationem evenit, ut externæ corporis partes palleant, detumescant, venis plane nullis vel minimis apparentibus. Et cum sanguis sic cum impetu ruat ad cor & pulmones, excitat ibi mole sua premente anxietatem intensam, spirandi angustiam, pulsus debilitatem & frequentiam. Et quoniam ab onere hoc sese expedire vult natura, spiritus non raro maximo impetu in cordis musculos influunt & convulsivum motum cordis sive palpitationem, quæ fere individuum est signum terrore affectorum, producit. Terrorem cor virtute sua spoliare horroremque febri simile inducere, effatum est MOEBII in institut. lib. 7. Nam in febris principio pariratione partes extremæ constringuntur, ut sanguis non

Quid sint terrores, metus &c.

Vires terrores.

Quos morbos experiantur iracundi.

Facultates inc.

Vulneratis fugienda est ira.

non liberè possit in illas influere, sed potius retrogrado motu ad cor pellatur, ubi subsistens anxietates efficit intolerandas. Terror autem validus sæpius mortis subitanæ causa est, unde hac ratione plures interiisse dudum notavit GALENUS *lib. II. de causis sympt. cap. 5.* & PLINIUS *lib. VII. hist. nat. cap. 36.* BARTHOLINUS *hist. 76. cent. IV.* Plura exempla collegit etiam VALERIUS MAXIMUS. Ratio autem est facilis, quoniam sanguis sic circa cor & pulmones accumulatus, natura existente debili, coagulationem sanguinis ibi lethalem facile excitat.

Quæ mala à terrore & timore proficiuntur.

XVII. Considerabimus jam brevibus illa mala, quæ à terrore & timore proficiuntur. Primò autem experientia quotidiana clarum est, nihil magis provocare epilepsiam in dispositis, imò ejus primam causam esse, quam terrorem. Familiarissimum est, infantes lactantes adhuc, quando sugunt lac matris, terrore affectæ, incurrere in malum epilepticum. Quoniam enim in hoc affectu sanguinis liberior circulatio impeditur: hinc ab extremis partibus ad interiora cor & cerebrum propellitur, ubi deinde subsistens & acrimoniam concipiens totum genus nervosum convellere, & convulsivos universales motus excitare facillime potest. Porro nihil magis aptum est ad excitandum in gravidis abortum, quam inopinatus terror. Sanguis enim copiosius & fortiter expressus in gravidis, quæ sæpe sunt plethorico-cacochymicæ, à cortice corporis ad uterum efficit ibi vasorum distensionem, tandemque ruptionem & hæmorrhagiam intensissimam, cui tertio, ut plurimum, diè succedere solet abortus. Similiter observationis est frequentis, mammæ in puerperis & gravidis singulariter affici ab hoc affectu. In puerperis & lactantibus lactis coagulationem, quæ interdum in ulcera cacoëthica transit, non raro parit, item tumores mammarum muliebrium benigni à metu, tristitia in deterius mutari & in carcinoma verti, exemplis aliquot vidimus. Quod ex terrore paralyxis, apoplexia, hemiplexia, gravis obstructio mensium, hæmoptysis, vomitus cruentus producantur, in foro medico practico notissimum est, non aliam ob rationem, quam quod sanguine depulso ad interna, circulatio sanguinis & humorum fiat inæqualis, dum in una parte humorum impetus augetur & crescit, in altera autem decrescit & imminuitur.

Quid exinde gravidis contingat.

Gravissimi morbi ex terrore ori.

Symptomata terrores.

XVIII. Notabile hoc est, quod à terrore facile exulcerentur labia, manifesto indicio subsistentis in circulo suo sanguinis & stasi hac acrimoniam concipientis. Tales leves inflammationes visuntur etiam in gravidarum mammis ab ipso terrore dependentes. Præterea unicum adhuc referendum est, quod nempe post terrorem vel metum gravem flatus & borborygmi inquietare soleant homines, qui sæpius vel cum alvi fluxu, quod bonum est, vel cum ejus obstructione, abdominis distensione se exerunt, & inde accidit, ut terror hypochondriacis & hysteris familiaria symptomata mirifice adaugeat.

Terror quandoque mutat ingenium morbi.

XIX. Hoc autem quotidianæ est experientia, nihil magis morbis contagiosis viam pandere, & miasmati aditum præbere, quam gravem terrorem. Deinde etiam certissimum est, terrorem morbis acutis continuis præcedentem sævissimam inferre symptomata & sæpius mutare totam faciem & ingenium morbi, ut Medicus etiam peritissimus, nisi certus sit de causa hac præcedenti, in prognosi præsertim fallatur. Malignam enim morbo affricat naturam, dum anxietates præcordiorum maximas, extremorum refrigerationes, ani-

mi deliquia, pulsus debilitatem, convulsiones, dolores ventris, cardialgiam crudelem efficit. Deinceps etiam dici vix potest, quantum terror noceat in ipsis morbis acutis, præsertim si die critico accedat, ordinem enim naturæ morbi omniaque immutat & evacuationes criticas supprimendo, exanthemata retropellendo ægrum sæpius morti & internecioni dat. Similis quoque effectus est continuus metus & formido de morte apud ægrotos, revera enim sic remediorum efficacia eluditur & infringitur, ut exsuperare morbum nequeant. Unde semper, qui animo sunt constanti libero & affectibus vacuo, citius convalescunt, quam qui affectibus sunt detenti & occupati. Eisdem effectus in corpore nostro, quamvis gradu differentes, habent timor, metus, desperatio, exanimatio, pusillanimitas, tristitia, & notabile hoc est, quod terror gravis incussus reddat homines meticulosos, pusillanimes. Sicuti autem in terrore, cum maximo impetu revocatur sanguis introrsus, ita in dictis affectibus paulatim impetuque remissione id ipsum accidit.

Differentia inter hilares & pavidos.

XX. Restat jam, ut etiam aliquid dicamus de amore immoderato vel potius infano. Plurimi certe ab eo non tam animo quam corpore laborarunt, qua de re videri meretur D. GREGORIUS *lib. IV. moralium cap. 30.* & *lib. III. dialog. c. 24.* Indicat id Amnon, qui ex amore Thamar ægrotaffe traditur *libro III. Regū, 13.* Et Seleuci Filius, cujus erga novercam Stratonicen amore callide ex pulsu deprehendit Erasistratus ingeniosissimus seculi sui Medicus. vid. VALERIUM MAXIMUM & PLUTARCHUM. Effusus enim & immoderatus talis amor, si objectum amans præsens est, efficit gaudium impetuosum, unde spiritus & robur corporis dissolvuntur. Quando autem amans amabile objectum non obtinere potest, tristitia simul afficitur ac mœrore, qui non potest non ex antea dictis causis turbando sanguinis circulum & crasin morbos inducere præsentis. Et notum est experientia, ex amore tali perverso, nimio & immoderato corpori & animo non tantum mollietatem quandam conciliari, sed languores etiam, lipothymias, debilitates, cruditates, arthritides, vigilias perpetuas excitari, ut subtimidi, pallidi, lividi hujusmodi homines omni vegeto colore destituti conspiciantur. Tacemus, quod inordinato tali amore data occasione lues venerea tam famosa, qua partes corporis in putredinem foetidissimam solvuntur, exoritur. Hæc sunt ornamenta, illæ dotes, quibus satellites suos & milites voluptas exornat, quod tamen præ amoris insaniam parum reformidant aut nihil potius faciunt.

Quosnam effectus habeat immoderatus amor.

XXI. Postquam itaque passiones corpori nocentissimas brevi persecuti fuimus, operæ pretium esse duco, de imaginatione, quatenus nocet sanitati nostræ, pauca facere verba. Imaginatione est impressio firmissima in ipsum cerebrum idæa à certo quodam objecto vel ejus actione productæ. Quantam vim atque efficaciam talis impressio pro diversitate idearum & individuorum in corpus possideat, & quomodo actiones naturales, medicamentorum effectus moderetur, variet, augeat & minuat, experientia comprobatur quotidiana luculentissime. Equidem spiritus animales animæ imperio subjecti sunt in actionibus sic dictis voluntariis & animalibus, interim tamen conspiciuntur fit, ab imaginatione etiam varie determinari actiones naturales. Confirmant id infinitis exemplis nævi materni foetui impressi, quomodo nempe sola formidolosa apprehensio rei alicujus cupitæ & illius in instanti denegatæ sufficiens sit ad imprimendum id in corpore embryonis, quod mater

Imaginatio ejusque effectus.

mater appetiit & quidem eo in loco, ubi fortuito manum corpori suo tum mater apposuit. A sola impressione & imaginatione firma præsens mali contagiosi variolas, dysenteriam, imo ipsam pestem excitari posse observationes attentæ in praxi abundè comprobant. Unde HELMONTIUS p. 189. in *tumulo pestis* scribit: à solo terrore hominem sibi fabricare posse morbum & mortem. Sæpe enim fidem experientia fecit, quod quis terrore solo pestem absentem sibi atque suis paraverit. Unde communis paroemia, terrorem pejorem esse pestem. Ex sola enim imaginatione, terrore pestem ortam fuisse testatur DIEMERBROECK in *Tr. de peste* p. 859. De morbis, qui ex imaginatione nascuntur, legi meretur PECHLINUS lib. III. obs. 16. Quod solus aspectus variolarum provocare eundem morbum possit, quotidianæ est experientiæ, qua de re consuli potest PECHLINUS obs. 23. lib. III. ubi scribit: *Virginem novi pluribus animi dotibus nobilitatam, quæ cum nuncium de grassantibus in vicina domo variolis accepisset, velut fulmine icta in ipsum illum morbum idealiter sibi repræsentarum incidit, tributumque morti solvit.* Qua de re etiam legi meretur obs. 29. decur. II. anni 4. *Misc. Nat. Cur.* Nihil certe tam periculosum ac triste est, quam grassantibus morbis male sibi metuere, nam metu isto ac tristitia spiritus consumuntur, sanguinis crasis & motus invertitur, unde non tantum meticulosi facilius morbo corripiuntur, sed etiam, ubi correpti sunt, facile moriuntur.

Effectus
imaginationis
circa medica-
mina.

XXII. Præterea est magna etiam vis imaginationis, quam anima exserit, in moderandis, augendis & minuendis medicaminum effectibus. Elegans observatio PECHLINI est, lib. III. obs. 13. ubi inquit: *In purgantium effectibus id imprimis observavi, nisi conscia voluntate propinentur, vel nullo esse, aut eo converti, quo fixa cogitatio aut utentis præsumptio eos inclinaret, atque ea ratione in contrarium quoque medicamentorum actiones effectum ab imaginatione ad illum determinari, quem quisque sibi animo certo atque obstinato fingit.* Medicus etiam magni nominis mica panis in pilulas redacta in hominibus credulis, ducente huc phantasia, alvum provocavit. Quod purgatio statim sequatur viso purgante vel odore percepto, autor est BARTHOLINUS cent. 5. hist. 66. *Notabile est, inquit PECHLINUS loco cit. consuetudinem desidendi sive alvum excernendi ventrem disponere posse, ut certis de die horis semel vel bis respondeat, quatenus nempe spiritus sueti influere certa hora, nisi alia interveniant, eundem servant modum.* Plura qui desiderat legere de viribus imaginationis, evolvere potest FIENUM.

Quidnam
Amuleta
præsent
per imagi-
nationem.

XXIII. Ex effectibus imaginationis dependent etiam curæ sic dictæ sympatheticæ, item effectus amuletorum. Nota sunt nobis exempla, ubi ex firmiori phantasia & fiducia certa & efficacia amuleti curatæ fuerunt febres intermittentes, pathemata epileptica, dolores periodice recurrentes, cum tamen amuleta fuerint facta ex vulgaribus rebus, in quibus nec ulla efficacia deprehenditur, vel unquam talis observata fuit. Eveniunt autem hæc non in omnibus, sed præcipue in illis, qui texturæ sensibilioris & activioris, imaginationis vividissimæ & qui aliis animi passionibus facile obnoxii sunt.

Vis phan-
tasie &
contem-
plationis.

XXIV. Quid phantasia & contemplatio fixa rerum insuetarum efficiat, notum identidem est practicis. Referimus huc rationem, quare literati sæpiusculum alvum obstructam habeant, & ob excrementorum suppressionem facile incurrant in malum hypochondriacum. Quando enim spiritus abstrahuntur & impenduntur cogitationibus,

non possunt legitimè munere suo fungi in secretionibus & excretionibus. Videmus enim sæpe illos in eo cogitationum æstu, ut nec videant quicquam nec audiant nec tangant. Quando enim spiritus à sensoriis intro vocantur, nesciunt quid foras accadat, nihil sentiunt, imo dolorem non percipiunt. Curiosum est, sola impressione & insuetæ rei firmiori contemplatione singultum & vomitum in certis personis aliquoties sublatum fuisse. Ex quibus dictis patet, quam necessarium sit, ut in assumptione remediorum sive purgantium sive alterantium libero simus animo, neque vel profundis studiis vel tristibus cogitationibus indulgeamus, alias effectus plane nullus vel alii subsequenter.

XXV. Cum igitur hætenus breviter, sufficienter tamen, ut puto, discusserimus tantam pathematum animi in corpore evertendo potentiam, tantamque esse vim, ut mortem repentinam vel gravissimos morbos aut incommoda afferre queant, inde tanto minus à Medico negligi debent, sed potius in eo totus esse omnique studio in id incumbere debet, ut animum ægotantis ejusque consuetudinem, inclinationes & vires expiscetur, cum animus sanitatis corporis præcipua sit causa, & sanissimum etiam sanguinem invertere & deturbare possit. At vero non tantum noxas illatas remediis debitis auferat, verum etiam moralibus præceptis animum in ordinem redigat. Ita optimum est consilium, iracundiam lenitate, mansuetudine ac comitate demulcere, & docere, quomodo metus & formido animi firmitate & constantia abigenda, præsertim, quando ex philosophia & rationis lumine homines convincimus, quod omne illud, quo tristantur, quod timent, non sit revera malum, sed tantum sua persuasione. Quod si enim ritè distinguere ac discernere novimus bonum & malum à vero & apparente, possumus illorum affectus & perturbationes profligare.

Quæ in his
morbis ob-
servanda
sint à me-
dico.

XXVI. Postremo etiam de remediis ex medico fonte desumptis quædam adjicere necessarium erit, eum maxime in finem, ut symptomata & pathemata illa, quæ pressò pede subsequi solent inordinatos & nocentissimos dictos affectus, gravissima, &, nisi in tempore succurramus, sæpius mortifera, præcaveamus & avertamus. Consultum itaque est, post nimium & efferatum gaudium spiritus quodammodo colligere & concentrare. Cui fini inservire potest mixtura ex aqua liliorum convallium, melissa, florum tilia, papaveris rhæados, florum aurantium, additis guttulis aliquot essentia anodynæ & pro dosi pulveris cordialis Dorncrellii vel Marchionis epileptici, quæ mixtura syrupo acetositis citri vel berberum acidulari & aliquot vicibus, prout occasio fert, repeti potest. Sic etiam *Mixtura simplex, spiritus nitri dulcis, salis dulcis* usurpari hoc in affectu commode potest. Post *iram*, quæ sæpius graviter convellit affectus, & periculosa accersit symptomata, probatissimum pulverem commendo hunc: *Recip. Nitri purissimi, lapidum cancrorum, rhabarbari Alexandr. ana drach. j. M. F. P. Dividatur in 3. doses.* Hic pulvis temperat & detergit sordes biliosas, illasque blande ex primis viis educit. Notandum hic, omnia illa, quæ amurcam biliosam volatilem temperant & mitigant, uti *emulsiones ex seminibus frigidis, papaveris albi concinnatæ, nec non pulveres cordiales, decoctum cornu cervi, scorzonera, spiritus nitri dulcis* esse probatissima. Contra canem pejus & angue fugienda sunt omnia *spirituosa, sudorifera, salia volatilia oleosa* & quæcunque massam sanguinis in motum conjicere solent, quippe post horum usum arthritides,

Remedia
contra hæc
mala.

Quæ
Pharmaca
sint fru-
gienda.

convulsiones, cordis palpitaciones observatæ fuerunt. In plethoricis etiam *Venæ sectionem*, quæ autem minime larga sit, non parum etiam auxilii attulisse compertum est. Deinceps post terrorem magnum & subitaneum incussum valde necessarium est, manum auxiliatricem medicam porrigere. Utilissimum autem tunc temporis est, analeptica spirituosæ cum antiepilepticis & antispasmodicis miscere & propinare, unde mixtura sequens expertissimæ virtutis est. *Aquæ liliorum convallium spirituosæ, melissæ, florum tilie, cerasorum nigrorum ana unc.j. balsami vitæ drach.j. pul-*

Mixtura
expertissi-
mæ virtu-
tis.

veris Marchionis drach. sz. syrupi pæoniæ unc. sz. spiritus cornu cervi succin. guttas decem. Externe etiā spiritus salis armoniaci vinosus, balsamus vitæ apoplecticus & aquæ spirituosæ maximi sunt usus. In nimia tristitia & cura salia volatilia oleosa, ambrata, leniora laxantia, infusum veronica, & quæcūque humores crassos diluunt, blandæque sanguinis spiritualescentiæ inducunt, præsentissima sunt. In genere illud meretur notari, post gravē animi passionem abstinendum esse ad tempus ab omni cibo solido, potu, & alvum ac urinam quam celerissime reddendam & corpori quietem concedendam.



D E

MAGNO VENÆ SECTIONIS

AD VITAM SANAM ET LONGAM

R E M E D I O.

P R Æ F A M E N.

SI unquam breviter, solide tamen & accurate universæ medicæ artis natura tradita fuit, certe id ab antiquissimo & probatissimo Medico HIPPOCRATE præstitum fuisse arbitror, qui libro de flatibus docet: Medicinam nihil aliud esse quam additionem & subtractionem; & eorū quidem exsuperant quæ subtractionem, eorum vero, quæ deficiunt, additionem: Qui vero istud optime facit, is optimus Medicus existimandus est, quique plurimum abest ab eo præstando, is plurimum in arte medica deficere censetur. Profecto hac fere mechanica definitione gravissimus auctor universæ nostræ artis indolem ac solidum fundamentū complexus est. Ecquis enim est, qui liberum functionum corporis nostri exercitium, quo sanitatis natura continetur, in sola moderatione motuum, & humorum debita proportionem ac temperie versari ignoret? utpote nihil vitæ ac sanitatis negotio tam inimicum, & tam adversum est, quam eorum, quæ vitam dispensant, excessus aut defectus: qua de causa omnis generis morbificæ causæ humorum & motuum excessum aut defectum respiciunt. Et quicumque morbum vult tollere, is nihil aliud agere debet, quam ut motus & materias deficientes vel superabundantes in naturæ amicam temperiem ac moderationem reducat. Huc quoque omnis generis, quæ alma mater natura largiter nobis concessit, remedia spectant, quæ vel evacuan- dis vel restituendis humoribus aut nimis motibus compescendis vel tardis promovendis unice dicata esse animadvertimus. Ex quibus omnibus clarissime apparet, magnū nostrum HIPPOCRATEM universæ artis præsertim praxeos medicæ fundamenta nobis doctissime tradidisse, quæ si quis paulo diligentius & perquisitius attendat, is optimus certe effato HIPPOCRATIS Medicus censebitur: habet enim hic normam ac regulam, qua scit, quid agendum, quid omittendum sit. Quum vero excelsus & superfluous sanguis ex consensu etiam solertissimorum Medicorum, ipsaque teste experientia maxime omnium adstringat, & morbois passionibus producendis admodum idoneus sit, hinc facile apparet, principem merito locum inter ea, quæ exsuperans detrahunt, *Venæ sectionem* sibi vendicare: quia sanguis, quo natura, si moderatus fuerit, amicus est, eo, si superabundet, nocentior

Quid sit
Medicina
secundum
Hippocra-
tem.

Nihil vitæ
ac sanita-
tis negotio
tam inimi-
cum, quam
eorum, quæ
vitam dis-
pensant,
excessus
aut defe-
ctus.

Hippocra-
tes universæ
artis
præsertim
praxeos
medicæ
fundamen-
ta nobis
tradidit.

existit. Quapropter magna semper laus & gloria Magna
divino *Venæ sectionis remedio* constitit. Compe- semper laus
tit enim ratio & experientia confirmavit, omni- vena se-
bus aliis auxiliis tam operationis celeritate, & se- ctionis re-
curitate, quam tolerantia facilitate hanc esse supe- medio
riorem: hinc nullo ferme in morbo à Veteribus & constitit.
HIPPOCRATE est intermissa; ejus quoque utilita- Hinc nullo
tem præter Veterum testimonia longus & quo- ferme in
tidianus usus comprobatur, si modo is temeritate morbo à
Medicorum vel casu non pervertatur. Verum veteribus
enim vero nostri neutiquam instituti hoc loco est inter-
erit, V. S. nis incomparabilem in sanandis morbis missa.
vim & efficaciam uberius & per omnia capita ex-
ponere, sed in eo maxime nostra defixa erit me-
ditatio, ut princeps & præcipuum ad sanam & Princeps
longam vitam obtinendam efficacissimum esse re- ad sanam
medium non sine fructu demonstramus. Id vero & longam
laboris in nos suscepimus præcipue ob eam cau- vitam ob-
sam, quia cum dolore non semel, sed pluries ob- tinendam
servavimus, non modo Senes vegetos, sed & floren- est reme-
tes ætate ac viribus Juvenes & viros ex solo *Venæ* dium.
sectionis neglectu inexpectata morte celeriter fuisse Pluries ob-
extinctos. Summum vero Numen conatibus nostris servavi-
gratiam suam ex alto addat, quo tenebris peni- mus Senes
tus depulsis clarissimam veritatis lucem in praxi & Juvenes
medica, quod validissime optandum est, magis ex solo V.
magisque intueamur. Suis negle-
ctis fuisse
extinctos.

§. I.

Dicturi itaque de *Venæ sectione*, eamque ceu securum & summum ad prosperam ac longam vitam impetrandam auxilium adferturi, necessarium omnino arbitramur præmonere, neutiquam nobis in præsentem esse propositum ut solam sanguinis detractionem protrahendæ vitæ sufficientem asserere velimus, vel quod sine *Venæ sectione* nemo prospera ac secunda valetudine frui, aut ad vitam longam spem sibi possit facere. Neque enim ullum tam absolute efficaciam in universa rerum natura remedium, de quo quis certum sibi, nedum talem effectum possit polliceri: sed omnia, quæ in auxilium prompta sunt, remedia limitatis viribus determinantur, & natura corporis ægrotantis potissimum innituntur. Præterea novimus, qui sine *Venæ sectione* per longam ætatem firma gavisi sunt valetudine. Novimus quoque qui cum *Venæ sectione* præmaturo fato defuncti sunt. Qua propter hoc loco non est nostra in- tentio,

Nullum
tam abso-
luta effica-
cia in re-
rum natu-
ra datur
reme-
dium.

Non tam
omni-
bus pro-
miscue in-
dividuis
quadrat.

tentio, ut asseveremus sanguinis vacationem omnibus promiscue individuis quadrare, vel ad longam vitam necessario perducere; sed hic est noster scopus, hæc mens nostra, ut adfirmemus tantam hujus auxilii esse præstantiam, tantam virtutem, ut plures, quibus propter sanguinis redundantiam & gravis morbus, & subitæ mortis periculum immineat, quod non in crebro evenit ab impendentibus hisce malis tueri ac defendere possit.

Sunt tamē
et semper
fuerunt
qui hoc au-
xilium ex
toto dam-
nant vel
parcissime
utuntur.

Erasistrato,
Helm-
montio &
Thomsonio
hic error
de facili
videtur
condonan-
dus.

Ratio.

§. II. Prius vero quam in hujus rei explanationem paulo altius descendamus; non sine fructu fore arbitror, si eorum qui vel in totum vel ex parte hoc remedii genus contemnunt, rationes ac argumenta examini subjiciamus. Quamvis vero neque ullum unquam auxilium tanto Medicorum consensu ab incunabulis fere scientiæ medicæ per tot secula ubivis fere terrarum, & per tam constantem experientiam, approbatum fuerit, præterquam ipsa sanguinis per sectionem venæ emissio; nihilo minus esse & fuisse semper, quod satis demirari nequeo, qui fere divinum hoc auxilium ex toto damnare imo infamare, vel tamen parcissime eo utendum esse, contenderunt, vix ac ne vix comprehendendum est. Quod unicū certè documento esse potest luculento, quanta imperitia non dicam ignorantia inter gentem Medicorum adhuc versetur; quæ res quo certior, eo magis deploranda videtur. Atque non tanta nos tenere debet admiratio, quare olim ERASISTRATUS & ante seculum forsan HELMONTIUS, & qui ejus salivā lingebat THOMSONIUS, hoc remedium contemptui habuerunt, quandoquidem Erasistrati tempore spissis tenebris adhuc rerum physicarum & medicarum cognitio erat involuta, HELMONTIO vero viro alio nobili, & per ignem Philosopho, qui nunquam artem agitavit, hic error de facili videtur condonandus: Quod vero ex eo tempore quo magnum illud mundi inventum, sanguinis intelligo circuitum, orbi innotuit, & hinc corporis humani œconomia paulo subtiliori solertia excoli cœpit, ac universa medicina ex tenebris in ferentem lucem assecta fuit, adhuc ex Medicorum cohorte dentur, qui vel ex toto Venæ sectionem repudient, vel nimis timide ac trepide cum hoc agant, illud merito vituperandum videtur. Possemus certe hoc loco, si velimus ire in exempla & nisi veritas odium, molestiam ac periculum gigneret, multos casus recensere, ubi plures cæterum sani ac ætate florentes ex sola Venæ sectione tam curando quam præservando omiſsa in gravissimos & lethales morbos inciderunt, qui certissime potuissent maturæ Venæ sectionis auxilio servari; sed hæc lubenter jam prætermittimus: potius hoc loco non alienum esse existimamus, ut patrociniū venæ sectionis agam & argumenta in contrarium, qua fieri potest brevitate ac perspicuitate discutiam. Mittimus vero Erasistratos, quos olim jam suo tempore GALENUS libro de V.S. adversus Erasistratum non sine felicitate refutavit, sed rationum momenta, quibus nonnulli ex recentioribus uti solent intuebimur. Præcipuum vero quod proponunt, est: Sanguinem non modo vitæ esse thesaurum, sed & ipsius animæ vehiculum & instrumentum, & sanguine amisso non modo vires, sed & vitam amitti. Cum vero omnis thesaurus non sit minuendus, sed potius servandus & reparandus, hinc male cum ipsis agi

Rationes,
quibus re-
centiores
contra V.S.
uti solent
exami-
nantur.

asserunt, qui vitalem liquorem tam improvide profundunt. Insuper confugiunt ad experientiam, qua ostendunt plures à detractioe sanguinis ita fuisse debilitatos, ut ægerrime pristinam valetudinem fuerint assequuti: Porro ^{Nullam} quoque dicunt, complures firma & æquabili valetudine frui & longa vita gaudere, qui ^{plethoram} totam ætatem nullam sanguinis imminutionem ^{noxiam} passi sunt. Illud vero primum & præcipuum illorum videtur argumentum, quod nullam ^{esse con-} plethoram seu boni sanguinis redundantiam ^{tendunt.} noxiam esse contendunt, sique forsan superflua & pravus vasis inhæreat, felicius eum abstinentia, motu & tutioribus remediis absumi posse asseverent.

§. III. Operæ itaque pretium erit, ut hæc ^{Auctoris} dubia, quæ primo intuitu videntur speciosa, ^{pro V.S. ar-} paulo accuratius discutiamus. Primo vero non ^{gumenta.} ibimus inficias, sanguinem pretiosum & desideratissimum, quo vita & anima ad suas operationes utitur, esse liquorem, quo penitus amisso & vita exspiret, & anima corpus suum deserat, necesse est: quo nomine utique optimus vitæ est thesaurus. Concedimus quoque immoderatam ejus profusionem admodum debilitare, corporisque robur imminuere. At vero sanguis est thesaurus vitæ & animæ sustentaculum, dum nempe libero & æquabili flumine vitalem suum in orbem motum per corporis partes absolvit: Nunquam enim sanguis in se spectatus ratione mixtionis suæ præstat vitam vel animam cum corpore jungit, sed tum demum, quando in orbem agitur, & placido motu per corporis fertur tubulos, unde etiam talis motus recte dicitur vitalis, isque est, qui commercium corporis cum anima statuminat, simul ac vero optimus alias liquor in parte quadam subsistit, & progressivo motu exiit, protinus amplam non modo morbis & morborum causis, sed & morti occasionem subministrat. Quod vero nimium exsuperans sanguis vitalem circulum turbet, nostrum est inferius ostendere.

In quo casu
sanguis sit
thesaurus
vitæ &c.

§. IV. Remoto vero hoc dubio ad aliud ^{Natura nil} deproperamus: naturam nempe nihil facere ^{facere fru-} frustra declamant, utpote quæ tanta sapientia in- ^{stra, quo-} structa sit, ut non majori, quam par est, ^{modo in-} copia vitalem hunc liquorem progeneret. At ^{telligen-} huic assertioni optima veritatis parens experientia solenniter contradicit. Cui usui enim est ^{Quod ex-} ingens illa pinguedinis moles, qua subinde cor- ^{emplis il-} pus humanum obruitur, annon potius plus e- ^{lustratur.} xitiū quam salutis corpori adfert? Sique nihil noxii vel supervacanei aut deficiens quoddam natura proferat, unde sit, quod unum corpus præ altero debilius, & non modo ad morbos, sed & ad mortem promptius existat? Unde porro evenit, quod natura tam parata ac prompta sit in morborum variis causis fabricandis? Quo magis apparet, corpus nostrum ita esse dispositum, ut tam facile noxia quam utilia producat.

§. V. Accedimus jam eam rationem, quod ^{Auctor} videlicet experientia comprobet, amisso sangui- ^{partis con-} ne mire debilitari corporis robur: sed admo- ^{traria ar-} dum etiam lubrico & invalido fundamento hæc ^{gumenta} innititur. Quid enim notius, quam quod ex ^{ab experi-} corporibus pleni habitus per vulnera sæpe sæ- ^{entia refu-} pius incredibilis sanguinis copia sine noxa pro- ^{tar.} fundatur? In hujus rei illustrationem occurrit elegans apud JOH. HEURNIUM in Com. lib. 1. Aph. 3. dum scribit: Illustriss. Aurantia ^{Cl. Heur-} Princeps Wilhelmus Nassovius Antwerpiae à la- ^{nii de Prin-} rione

trone læsus sclopeto in collo, ita ut jugularis magna illa vena maximam sanguinis funderet copiam per plurimos dies, cum quotidie plures sanguinis libras emitteret, fluxione tandem colcothare cohibita salvis viribus evasit. Quid porro familiarius in praxi accidit? quam quod foeminae ex abortu ac in puerperio immensam subinde sanguinis quantitatem collectis mox viribus effundunt. Neque adeo crebrior per venam sectam sanguinis detractio viribus insensa est, ut fert vulgi opinio. Legimus apud SCULTETUM in observat. II. Virginem septingentes per vitam Venæ sectionem passam fuisse sine omni sanitatis periculo. Neque Gallorum hodie Medicorum morem ignotum esse existimaverim, qui acuta febre detentos decem sæpe repetitis venæ sectionibus citra detrimentum singulare exercent. Sanguis enim est, qui ex boni succi alimentis, salvo saltem ac integro manente appetitu, facilius reparatur, præsertim in iis, quibus laxæ fibræ sunt, & spongiosa carne gaudent; quandoquidem in his ob lentiores cursum temperatior fit calor, qui potius servat sanguinem, quam ut ipsum consumat. Deinceps non constantis est experientiae unicum virium fomentum esse sanguinem. Vidimus potius à Venæ sectione oppressas in plethoricis vires protinus erectas. Equidem negandum non est, quin sæpenumero Venæ sectio male à Medicis imperitis instituta corpora viribus exuat, ipsaque mirum debilitet, sed tamen remediorum abusus non tollere debet verum eorum usum, nec sinister quandoque superveniens eventus ejus legitimum usum excludit: nam vix prodest, quod non lædere possit idem.

§. VI. Urgent præterea ii, qui minus sanguinis vacationibus favent, quod plures sine Venæ sectionibus longam & sanam egerint vitam. At hi perpauci numero sunt, neque vero omnibus alma natura tam valens ac robustum à nativitate corpus concessit, cujus robur humorem alienum & excedentem facile vincere possit: pauci etiam sunt, qui motu, labore, commo- doque ac attemperato victu bonam, quam à parentibus nacti sunt naturam secundant. Hisce discussis deveniendum jam ad ultimum, quod tamen primo loco esset ponendum. Communis nempe est sententia, quæ etiam in Gallia teste JOUBERTO adhuc viget, primam Venæ sectionem à morte liberare posse, quare nonnulli hoc remedii genus ceu averruncum mortis differunt. Ad hæc vero dicimus, si sanguinis missio hominem ab impediēte morte vindicat, certe non aliter hoc præstat, quam sanguinem exsuperantem, à quo morbus subnatus fuit, & qui multum periculi minatur, subtrahendo: An non vero consultius est matura Venæ sectione morbum & illud, quod subest mali, depellere, quam periculo se manifesto exponere, quia hoc non raro labente bene agendi occasione & tempore hominem perimit.

§. VII. Dilutis itaque eis, quæ in contrarium possent moveri, dubiis, sequitur jam ut firmioribus ratiociniis Venæ sectionis tam necessitatem, quam utilitatem ad tutam & prosperam valetudinem diu servandam statueremus. Præcipuum vero ad firmandam nostram sententiam ex ipsa natura corporis nostri argumentum desumemus. Tam provide enim & tam sapienter à benigno conditore constructa machina nostra & tam insignibus viribus dotata est, ut non modo sponte ab eo quod vitæ est alienum se liberare & feliciter tueri possit: verum etiam,

Frid. Hoffmanni Oper. Tom. V,

ut sola sapius optima morborum sine Medici opera sit medicatrix. Jam vero cum nihil æque sit valetudini insensum, quam superabundans sanguis, eo quod vitalem in orbem motum sufflaminet, hinc nihil prius & antiquius prudens habet natura, quam ut sanguinem superfluum convenienti motu, debito quoque tempore ac loco felicissime eliminet: id vero non modo in sequiori sexu magno cum alleviamento singulis præstat mensibus, verum etiam in puerili ætate vel adolescentia exsuperantem sanguinem per nares, in adultioribus per sedis venas statim subinde periodis non sine singulari commodo, evacuat. Et quodcumque solennis & saluberrima hæc sanguinis excretio vel ob languorem ex ætate vel ex longo morbo provenientem, vel ob alias causas ex.gr. præposteram curationem supprimitur, vel penitus cessat, protinus ingens malorum agmen corpus adfligit. Fiunt enim ex consuetis narium hæmorrhagiis deficientibus graves cephalalgiae, ophthalmiae, vertigines, in adultioribus apoplexiæ, aut sensuum depravationes. Mensium vero inordinata vel deficiens fluxio quanta mala non concitat? sequuntur inde spasmodicæ internarum partium tractiones, cachexiæ, lentæ febres, miræ flatulentiae, ac digestionis vitia. Ex hæmorrhoidum vero impedita vel cessante vacuatione gravissima quoque mala, ut sunt hydrops, insaniæ, nephritides, spasmi primarum viarum, flatulentiae, asthma, cachexiæ, apoplexiæ subnascuntur. Monstrat certe Medico sapientissima natura, quid ipsi sit agendum: nam cum Medicus languidæ naturæ minister & adjutor, vel valentis spectator esse debeat, hinc naturæ methodum optimam addiscere, & cum attentione imitari debet. Videlicet ubi deficit, eam adjuvare, id est arte sanguinem exantlare superfluum, qui tantas molestias creat, enitatur; quo remedio tam ad depellendos quam etiam ad sanandos prædictos affectus nihil est efficacius.

§. VIII. Ex his itaque clarissime perspicimus, Venæ sectionem maximum fundamentum in ipsa natura habere, cujus ars tantummodo est imitatrix. Solvit autem Venæ sectio plethoram, quæ foecunda morborum est procreatrix: At cum ex Recentioribus nonnulli dentur, qui plethoram existere pernegent, hinc non alienum esse judico eorum etiam rationes paulo perquisitus intueri. Dicunt, sanguinem bonum minus abundare posse, talis vero ipsis est, qui gelatinosus, temperatus, & floridus apparet. Verum enim vero ipse sanguis duplici modo consideratus bonus dici potest, vel ratione mixtionis suæ, vel relatione facta ad motum, qualis demum recte hunc titulum meretur. Nam etsi optimus, & gelatinosus in vasis contineatur, minus autem recte & æqualiter per corporis partes circumferatur, tamen ad vitam & sanitatem tuendam is plane inidoneus est: quandoquidem si tardiori nimis motu provolvitur, facile in vasis præsertim minimis subsistit, & si viscidiores ejus partes secedentes coalescunt, atque emunctoriorum vias occludunt, hac ratione magna & noxia fit viscerum offensio. Cum vero optimus & temperatissimus, qui gelatinosa rubicunda substantia cognoscitur, maxime omnium facile redundet, patet, nullum æque hoc ipso ad morbos generandos esse aptiorem. Frequenti enim constat experimento, sanguinem ex plethoricorum vel etiam sanguineorum venis extractum, ut plurimum mixtione gelati-

Nihil æque valetudini est insensum, quam superabundans sanguis.

Hinc prudens natura in sequiori sexu singulis mensibus per uterum & in pueris vel adolescentibus per nares exsuperantem sanguinem evacuat.

Ex consuetis narium hæmorrhagiis deficientibus graves cephalalgiae, vertigines, &c.

Quanta mala non concitat mensium inordinata vel deficiens fluxio.

Idem fit in hæmorrhoidibus.

Solvit V.S. plethoram, quæ foecunda morborum est procreatrix.

Argumenta illorum qui Plethoram negant.

Argumentis contrariis ab Auriore re-fragantur.

nosum, temperatum, coccineo & eleganti colore tinctum esse. Ubi itaque talis sanguis animadvertitur, ex eo recte sagaciores Medicorum judicant, multum sanguinis in ejusmodi corporibus generari, missionemque ejus esse utilissimam: contingit id ipsum maxime in foeminis & qui spongioso habitu gaudent, laute vivunt, & mentis ac corporis motibus vacant; ibi enim temperatior calor mirifice sanguinis, ex gelatinosa substantia chyli, proventui velificatur. Etenim quo intensior corporis fervor ac æstus est, eo major liquoris hujus vitalis fit consumptio. Siquidem celerrima ætheris agitatione, qua caloris natura continetur, nexus ac unio partium sanguinis texturam constituentium facile dissolvitur, ut ex nobili & temperato alimento inutile excrementitium sulphureum liquamen emergat. Qua de causa vehementior corporis motus ac labor neque minus febrilis æstus pingue & sanguine superans corpus celeriter extenuat.

§. IX. Ex dictis itaque clarissime patet, non modo habitum corporis plenum ac coloratum, sed & sanguinem optimum periculi imminentis esse plenum, quia ubi bonus sanguis gignitur, ibi ejus quam facilis fit abundantia, quæ in pejus omnia successive præcipitat; qua de re perite non minus ac scite noster HIPPOCRATES lib. I. Aph. 3. prodidit: *Athletarum evexia, quæ ad summum distensionis evasit, periculosa, unde talem evexiam sine cunctatione solvere oportet*: hinc dicebat CELSUS. *Si plenior quis, speciosior & coloratior se ipso factus videatur, suspecta sua bona habere debet*, quia inquit HEURNIUS à nimia sanguinis ubertate calidum nativum extinguitur, & præcipiti lapsu homines rapiuntur, & interceptis carotidum viis, parva apoplexia fit. Quemadmodum vero redundans sanguis tam infensus naturæ ac inimicus sit, nostrum jam est exponere. Videlicet laudabilis ex bono chylo in vasis supra modum collectus sanguis vigori ac elateri, quo cordis musculi & arteriarum tunica instructæ sunt, nimium resistens, cursum ac circulum sanguinis reddit difficiliorem, unde sanguis ob debiliorem cursum spissescit, crassus evadit, ad obstructions & stagnationes gignendas paratissimus. Rationem vero hujus rei ex mechanicis eruere non magnæ erit difficultatis: nobilissima enim motus scientia est, quæ nos docet, ex proportionem & relationem virium moventis & resistentis motus effectum profluere, adeo, ut quo major potentia sit virium in impellente, & minor in resistente, eo celerior fiat motus; sicut contra quo major mobilis resistentia est, eo plus virium moventi detrahatur, & tardior fit impulsus. Itaque sicut major molis quantitas majorem gignit resistentiam, ita major quantitas sanguinis activitati & pulsui cordis atque arteriarum elateri plus quam minor resistit, consequenter sanguis copiosus minus expedito circulo per corporis partes circumfertur. Perquam curiosum illud anatomicum experimentum est, ubi ex flatu immisso in venam cavam vel ductum thoracicum canis viventis, cordis motus mox sistitur, subsequente inde morte. Cujus phaenomeni nulla alia subest ratio, quam quod dextra cordis auricula, cujus fibrarum structura valde tenera est, à flatu nimium distenta, non amplius contractioni sufficiat; unde cordis motus etiam conquiescat necesse est. Neque dubitamus, quin ex nimia sanguinis redundantia, si præsertim hic excedente calore aëris vel spirituoso li-

quore interius expandatur, cordis auriculæ eodem modo possint distendi, ut fibræ supra modum extensæ ad propulsandam sanguinis congesti molem & ad circulum continuandum fiant plane inidoneæ, unde lipothymia viriumque oppressiones plethoricis perquam sunt familiares.

§. X. Quis itaque Medicorum tam socordis ingenii & hebetis mentis est, qui non perspiciat, venæ sectionem in tam noxia sanguinis nimii congestione summum esse præsidium, eo quod superfluum sanguinem subtrahendo protinus convenientem proportionem inter cordis arteriarumque musculos & inter vim sanguinis resistentis restituat, circulum sanguinis rursus æqualem & liberum, à quo sanitatis & vitæ ratio pendet, reddendo. Quod etiam experientia confirmatum habemus, dum oppressæ nimio sanguine vires unica venæ sectione augentur, pulsu citatiori calore & perspiratione reddita intensiori.

§. XI. Quamvis vero hæc, quæ adduximus, ita sint comparata, ut quemvis etiam possent convincere, nihilo minus dantur, qui hæc subvertere enixe laborant, dicendo sanguinis excessum longe tutiori via, vid. abstinentia, inedia, victu tenui, motu corporis intensiori, infusis calidis, quam periculosa venæ sectione consumi ac castigari posse. Verum non timemus inficias, illud fieri posse, sed quis est nostris temporibus ita comparatus, ut à consueta sua indole, vel nimia edendi cupiditate facile deflectat & rigida hæc præcepta sequatur? Et utut hæc cuncta essent possibilia, tamen, ubi præsens impendet à sanguinis ubertate, præsertim in passionibus acutis, periculum, hæc commemorata remedia, quia tardissime agunt, plane non sufficiunt. Manet itaque & manebit perpetuo venæ sectioni sua laus & gloria.

§. XII. Confirmata sic firmioribus ratiociniis venæ sectionis necessitate, proximum jam est, ut paulo specialius, quibus in morbis avertendis, quo tempore & qua ratione sectio venarum sit instituenda, proponamus. Primo vero dicimus: omnibus, qui succi pleni sunt, vasa sanguine repleta habent, bene appetunt, laute vivunt & vita secunda ac otiosa fruuntur, neque sanguinis solennem & ordinariam quandam vacuationem habent, detractionem ejus ad depellendas, quæ pressio certe sequi debent, pede, ægrotudines longe esse utilissimam: Perraro enim accidit, ut homines ita comparati periculum evadant, quod feliciter venæ sectione bis vel ter anno instituta potest propulsari. Nunc vero devenimus ad eos morbos, quibus dimovendis venarum incisio idoneum est remedium. Videmus sæpenumero robustissimos, qui secunda videbantur frui valetudine præter omnium spem repente procidere omnique motu ac sensu privatos extinguere. Neque novum est, multos in lecto, quem sani firmique conscenderunt, emortuos reperiri. Novimus & ante oculos plura nobis versantur exempla, ubi tales funestos eventus prædiximus. Nuper admodum in hac urbe tres florida & sanæ visæ foemina subito fato ceciderunt. Quod si vero solertiori studio tam subitæ mortis causas explorare animus est, tunc demortuorum corpora aperiendo, plerumque has duplicis generis esse observamus. Vel enim ruptio vasorum intra cerebrum, aut in thoracis vel abdominis cavitate, quod tamen minus frequenter fit, visitur, vel polyposa in cordis thalamis concretio, magna

Quo in casu V. S. summum est præsidium.

Dantur tamen, qui hac subvertere enixe laborant.

Harum rationes.

Et etiam contraria partis.

Quibus potissimum conveniat V. S.

Morbi quibus dimovendis venarum incisio idoneum est remedium.

Repentina mortis exempla.

Causa.

Quinam maxime Apoplexiæ periculum incurrunt.

gna venarum occludens orificia causa deprehenditur. Incurrunt vero apoplexiæ periculum maxime ii, quibus copiosius intra venas sanguis fertur, maxime si senectuti fuerint propiores, facilius verum malum gignitur, si post largos imbres aquilonaris tempestas & sævientis boreæ flatus repente sequatur. Qui sanguinis missionem, quam alioqui salubriter adhibuerunt, temere negligunt, facile quoque eadem corripiuntur, id quod & iis evenit, quibus sanguinis per nares vel ani venas profluvium, vel sponte constitit vel suppressum est, hinc etiam mulieres lochiis non rite fluentibus, hoc acerbo malo adfectas vidimus. In præservatione hujus funesti & feralis mali, si quid aliud certe venæ sectio in pede plurimum sibi vendicat, quæ ubi circa æquinoctialia tempora instituitur, securam præstat valetudinem.

In suppressis mulierum fluxibus V.S. admodum convenit.

Qui sanguine abundavit polypo obnoxii.

Quæ ratio hoc fiat.

Ac ejus generis præcaveatur.

Quod ad polypi originem attinet, patent identidem huic quam maxime ii, qui sanguine abundant & habitu præditi sunt spongioso, insuper obesi, multum comedunt, sed parum bibunt, vitam agunt sedentariam, ac spiritum vini copiosius ingurgitant, fit exinde sanguis viscidus ac crassus, qui minus expetito itinere corpus percurrit, unde viscidiores & glutinosæ ejus partes columnis cordis facile adhærent in fibrillas paulatim coalescentes: Quo minus vero promptum est tale concretum veluti mortis fomentum ulla medicina dissolvere, eo facilius ac paratius est, hujus genesis præcavere, quo nomine præter abstinentiam & motum corporis validiorem nec non liberaliorem aquæ calidæ potum, venæ sectio omnibus præferenda videtur. Nacti enim liberiori spatio longe expeditius sanguis per cordis thalamos ac tubulos venosos movetur, unde concretio, quæ quietis & motus retardati soboles est, minus potest contingere.

acutis passionibus S. præcipuum fert punctum.

§. XIII. Deinceps heroicum nostrum remedium in gravibus acutis passionibus præsertim, ubi inflammationis metus subest, præcipuum fert punctum, idque non modo in curando, sed maxime omnium in præservando præstat. Est videlicet solertioribus Practicorum haud incognitum, quantum periculi in febribus sub initio & statu præsertim immoderata sanguinis profusio habeat, cui symptomati sanguinei sic dicti & plethorici in tales incidentes morbos plerumque obnoxii sunt: quantum itaque auxilii à venæ sectione tam ad præservationem, quam ad sanationem, si mature inter initia morbi adhibeatur, expectandum sit, quisque qui mediocri tantum judicio pollet facile judicabit. Pleuritides, peripneumonix, angina, nephritides & id genus aliæ inflammationes vel principaliter adfligunt vel secundo superveniunt aliis morbis ob sanguinem copiosorem spissioreque factum, qualis è vena missus plerumque apparet. Quid vero hisce gravibus vitiis plus præcavendis & propulsandis sanguinis decenti detractioe convenientius sit equidem non video?

Pleuritis, Angina, nephritis &c.

§. XIV. Abortus præsertim grandiore foetu grave malum est, ipsoque partu longe periculosius, eo quod secundina retenta vasorum orificia adaperta maneant & sic lethales ut plurimum fiant hæmorrhagiæ. Invadunt tales abortiones præcipue sanguine redundantes, si gravi terrore percelluntur. Præcavet vero dira hæc mala omnium optime phlebotomia in tempore instituta, quæ in quibusdam confiden-

tius repeti potest. Animadvertimus enim quibusdam scæminis abortum esse frequentissimum, adeo, ut repetitis vicibus recurat, à cujus mali amolitione aliis non neglectis nihil aptius est venæ sectione, quæ pro ratione circumstantiarum non semel vel bis, sed singulis mensibus, sicuti tales observationes nobis notæ sunt, debet continuari. Quoniam vero ordinario abortus circa tempus mensium consuetum solet invadere, opportunum utique tunc est, circa hoc, si res postulat, sanguinem demere. Cæterum plethoræ solutio gravidis administrata sanas reddit puerperas, vividos gignit infantes & multorum malorum materiam præscindit. Ordinario enim gravidæ sunt plethorica & inde fiunt cacochymica multis impuritatibus in vasis collectis, quæ matri & infanti malo sunt, siquidem in puerperio purpuræ tam rubræ, quam albæ, neque minus partium internarum inflammationi fomitem præbent. Solent quoque prægnantibus adhuc alia incommoda succrescere: scilicet pedum & abdominis tumores oedematosi, ferinæ tusses, vomitiones, dorsi dolores, odontalgia, languores, quæ cuncta sanguinis imminutio, non omisso clementium laxantium usu, egregie præoccupat. Dein ab impuro gravidarum sanguine infantes frequentem sibi contrahunt labem. Fiunt non modo inde infirmi, sed & si natura valet, variis exanthematibus, ut sunt tineæ capitis, aphthæ, erysipelata, variolæ, morbilli, crusta lactea, valde exercentur. Qui itaque ab omnibus hisce vitiis immunes eos reddere percipit, sanguinem ad justam mensuram reducat, necesse est. Quam gravia symptomata suppressa lochia causentur quotidianis exemplis edocemur, sequitur plerumque periculosa admodum inflammatoria febris complures perimens. Vidimus non semel cum fructu inter initia sectionem venæ in puerperio, ubi lochia cohibita fuerunt, adhibitam vitiis alias difficillimis mitioribus inde redditis vel iisdem plane averruncatis.

Ab impura gravidarum sanguine infantes frequentem sibi contrahunt labem.

Ut & in suppressis lochiis.

§. XV. Accedimus jam chronicas easque contumaces passiones, quibus amoliendis vix par habet sanguinis copiosioris diminutio. Non incognitum est iis, qui in artis operibus frequenter versantur, quod vere & autumno maxime circa æquinoctia graves morbi oboriantur & resuscitentur, in quo numero sunt hæmoptyses, arthritides, asthmaticæ pectoris oppressiones, insanix melancholicæ, hemicranix, febres & acutæ & intermittentes, colicæ convulsivæ, hæmiplexiæ, quæ sæpe anniversarias & statas temporum periodos observant, hisce generosa & alioqui probata præsidia frustra sæpe opponuntur: venæ sectione vero circa æquinoctia celebrata, non neglectis iis, quæ primam regionem ab impuris sordibus liberant, omne punctum sanationis conficitur.

In chroniciis vix par habet V.S.

Quinam morbi vere & autumno circa æquinoctia maxime oboriantur. V. S. ne tum omne sanationis punctum conficitur.

§. XVI. Arthritis malum est, quod omnis ætatis & sexus homines vario tempore & diversis in artubus exercet. Et quamvis eos, qui vel natura languidiores fuerint vel præpostero vivendi genere debilitatem membris contraxerint, potissimum invadat, attamen à sanguine plurimo, qualis fit ob evacuationes solennes cohibitas, maxima parte fovetur: Sanguinei enim & spongioso habitu præditi plerumque fiunt arthritici, quibus si per hæmorrhoides aut alia loca superfluous sanguis fertur, ab hoc malo evadunt ferme immunes. Quicumque itaque à sævis hisce doloribus suum corpus tueri percipit, is nihil

Abortum omnium optime præcaveo Phlebotomia.

Circa tempus mensium consuetum solet invadere, oportunitatem utique tunc est, circa hoc, si res postulat, sanguinem demere.

Gravidæ ordinario sunt plethorica.

Quæ incommoda prægnantibus adhuc succrescere soleant.

Ab impura gravidarum sanguine infantes frequentem sibi contrahunt labem.

Ut & in suppressis lochiis.

In chroniciis vix par habet V.S.

Quinam morbi vere & autumno circa æquinoctia maxime oboriantur. V. S. ne tum omne sanationis punctum conficitur.

Arthritis ob evacuationes solennes cohibitas, maxima parte fovetur.

Sanguinei plerumque fiunt arthritici.

*Temperata
dieta &
V. S. cura-
tur.*

prius habere debet, quam ut temperata diæta nimium sanguinis proventum impediat: deinde omni studio ea removeat, quæ viribus ullo modo convellendis idonea sunt. At solenni & spontanea sanguinis cessante yacuatione vel intermissa in iis, quibus humorum aderat plenitudo, venæ sectione, si magnum malum incidit, tunc plus matura sanguinis detractio quam ulla alia medicina efficitur.

*Nec non
suppressum
mensium
proflu-
vium.*

§. XVII. Mensium profluvium, à quacunque etiam causa suppressum fuerit præsertim ob imbecilem & languentem naturam, quæ circa 50. annum plerumque accidit, innumerabilibus fœminarum corpora malis objicit, hæc solers Medicus nunquam non matura venæ sectione præcavere potest; hac enim graves diaphragmatis spasmi, cardialgiæ syncopticæ, cordis palpitationes mox conquiescunt, neque tutius præsidium est, multa mala ab illis, quibus propter alias causas & malam diætam deficiunt, avertendi ipso nobilissimo nostro sanguinis mittendi remedio.

*Ad etiam
dolor cal-
culi.*

§. XVIII. Dolor calculi est unus ex atrocissimis, sed si originem ejus spectemus vix alia est, quam quod lente nimis procedens plus justo abundans & spissus sanguis in renalibus vasculis stagnet eorumque elaterem ac tonum imminuat, unde urinæ difficilis fit secretio, hinc tartarus secedens paulatim concrefcit & inimicum hunc hospitem ingenerat. Videmus itaque plethoricos, vitæque sedentariæ addictos, & quibus hæmorrhoides vel menses non amplius feruntur, potissimum diro hoc malo exerceri. Atque hæc est ratio, quare fluentes hæmorrhoides magno sint nephriticis remedio: ubi vero illas non provocare licet, vicariam operam ipsa venæ sectio in pede præstat. Et notavimus plures à calculo, quem dolor circa lumbos prænunciabat, hoc modo immunes redditos.

*Fluentes
hæmor-
rhoides
magno
sunt ne-
phriticis
remedio.*

*Potiora ca-
chexie,
scorbuti &
hydropis
remedia:
V. S. mo-
tus, ac a-
quarum
minera-
lium usus.*

§. XIX. Cachexia & qui hanc insequitur scorbutus atque hydrops ex sanguinis & feri redundantia, factaque viscerum inde obstructione citra omnem contradictionem suam originem nanciscitur. His difficilioribus vitiis maxime ii patent, qui fibras natura laxas exiliaque vasa habent, atque ex victu crasso, duro, item intemperantia, nimio otio vasa humoribus aggravarunt. Arduum vero ac difficile est, has graves adfectiones visceribus non amplius integris eradicare; neque tamen, si recens malum fuerit, omnis sanationis spes est amittenda, quam in sanguinis matura detractio, motu ac labore usque aquarum mineralium præcipue ponendam esse arbitramur.

*A phthi-
s corpora V.
S. defendi
possunt.*

§. XX. Ex longis & periculi plenis vitiis non ultimum est phthisis, quæ multos in juventute perimit opprimitque. At vero ab hac venæ sectione corpora defendi posse, paradoxon multis videbitur, sed tamen experientiæ id esse consentaneum, pluribus exemplis confirmatum habemus, ubi nempe juvenes sanguine pleni ex variis causis macilenti facti, spiritus angustia, tussi sicca, dolore circa pectus gravativo, calore intensiore diu correpti in extremo phthiſeos periculo versantes, admissa phlebotomia & usurpatis aquis mineralibus cum lacte caprino mixtis, nec non pediluviiis & nitroso-absorbentibus rursus obesi, & robusti præter omnium expectationem facti fuerunt, pristinis incommodis penitus sublatis. Neque porro incognitum est, eos, qui hæmoptysi patent, quam facile fieri phthiſicos, sanguine ex aliis parti-

*Quod ex-
emplis pro-
batur.*

*Hæmop-
toici facile
fiunt
phthiſici.*

bus ob spasmodicas interiorum stricturas ad pulmones cum magno impetu congesto, qui postea vasorum orificia disrumpens floridus tussi ejicitur. Jam vero nil familiarius est, quam quod hæmoptysin male tractatam pulmonum exulceratio subsequatur. Quum vero proinde instituta venæ sectio aliaque sanguinis à pulmone motum divertentia commodissime hæmoptysin præcaveant, hinc quoque phthiſeos periculum depelli hac ratione posse certum est.

*Roma-
dium V. S.*

§. XXI. Ultimum est, ut venæ sectionem in senibus longam vitam producendi esse præsentissimum artis subsidium confirmemus. Communis & pessima opinio increbuit quæ non modo vulgum, sed Medicos etiam occupavit, senectuti sanguinis detractioem esse inimicam, eo quod senibus, qui ordinario invalidi ac infirmi sunt, non conveniat illud, quod virium pabulum ac alimentum est, subfurari. Quoniam vero supra jam hanc rationem destruximus, hinc supervacaneum ducimus hæc ipsa fastidiosè repetere; quin potius experientia solidoque ratiocinio nixi adfirmamus, venæ sectionem senibus quibus appetitus adhuc integer ac salvus est, & quorum vasa turgent, ad longam vitam & ad seniles ægitudines amoliendas esse convenientissimam. Error enim est, sanguinis missionem senectuti vires subtrahere; possem hoc loco complura exempla proponere, ubi septuagenarii imo octogenarii per aliquot annos singulis fere mensibus venam aperiri passi sunt sine ulla virium diminutione. Certoque scimus plures eam ætatem ad quam pervenerunt, non attigisse; nisi ex consilio Medici singulis annis minimum bis venæ sectionem admisissent. Deinde nulla regio est ubi tam liberaliter hoc auxilii genus admittitur præterquam in ipsa Helvetia. Nemo fere est, qui non bis minimum singulis annis venæ sectionem ibi sibi curat administrari, vixque in ulla regione, quam in hac tam longævi homines reperiuntur. In universum plurimi senum sunt plethorici, inque primis ii, qui robustiori natura & vegeto adhuc appetitu gaudent, quibus sanguinis copia præsertim ex boni succi alimentis adsumtis intermissioque exercitio in vasis colligitur plus quam expedit; accumulatus itaque nimium in visceribus subsistit, illaque infarcit, obstruit, unde ad cachexiam & marasimum via paratur paratissima. Ob lentiores quoque humorum cursum & perspiratum segniorem perfaciles feri contingunt secessiones, unde catarrhi, tusses, raucedines, paralyses, pruritus, stranguriæ, dysuriæ senibus perquam familiares propullulant. Si quando vero gravi animi motu vel acri frigore accedente redundans sanguis ex partibus inferioribus ad caput & pulmones nimium urgeatur, apoplexiæ & subitanæ mortes, catarrhi suffocativi celerrimi suboriuntur. His itaque de causis senibus sanguine plenis nunquam V. S. nem inutilem judicamus, adeo ut potius eam ad longam vitam impetrandam expeditissimam esse asseveremus, modo simul ea, quæ vires frangunt & huic ætati sunt aliena removeantur.

*V. S. Seni-
bus conve-
nientissi-
ma.
Quod ra-
tione & ex-
perientia
probatum.*

*Bis mini-
mum sin-
gulis annis
unusquis-
que in
Helvetia
sibi venam
pertundere
curat, &
longævi
homines
ibi reperi-
untur.*

*Qua ratio-
ne apople-
xia &
mortes su-
bitanæ in
senibus su-
boriuntur.*

§. XXII. Ex hisce jam quæ proposuimus clarissime intelligi posse existimaverim, quam generosum & magnæ utilitatis venæ sectio sit remedium & adversus gravissimos morbos præservatorium, item quanta ignorantia ac imperitia illi Medicorum laborent, qui hoc in conservationem generis humani à Deo concessum auxilium

*V. S. in
comia.*

*Et contra-
dicentium
contemp-
tus.*

Nulla corpora à copiosa V. S. ne tam celerem animi patiuntur defectionem quam præpinguia.

Juvat his scarificatione & laxante succos minuere.

Macilentiores obefioribus plus sanguinis & majora vasa habent.

Sicuti in inflammationibus nimia sanguinis quantitas detracta nocet, ita quoque nimis exigua ejus portio is est adversa.

Celsi de hisce monita.

V. S. quando vitanda.

lium despiciatui habent & tam improvide pluribus in casibus omittunt & negligunt. Equidem lubentissime largimur, quæ omnium remediorum etiam optimorum est natura, dari ejus abusum, si nempe sine judicio, sine providentia admittitur. Ea propter placet hoc loco breviter tamen strictimque, ubi minus ea locum inveniat vel parca manu concedenda sit nostram sententiam exponere. Dantur corpora valde pingua repleta, venis exiguis, laxisque fibris prædita, ubi humorum utique tardior cursus eorum suadet detractionem: at vero paulo hic opus esse circumspeditione, non sine ratione monemus. Nulla enim corpora à copiosa sanguinis missione tam celerem animi patiuntur defectionem, quam præpinguia, quare oportet potius alia via in his exsuperantes succos remove. Juvat in hunc finem scarificatione & clementi laxante succos minuere. Fallimur sæpenumero in eo, quod magnam sanguinis redundantiam in iis, qui pingues & robusti sunt & coloratiorem faciem habent, parvam vero adesse portionem in macilentioribus judicemus: cum tamen potius hi longe turgentiora habeant vasa, ampliores canales, magnum cor, (quod ex Observationibus nostris vasorum amplitudini correspondere solet) obtineant præ pinguibus, quorum cor ordinario est exiguum vasaque admodum exilia. Quare confidentius macilentioribus sanguinis major copia, quam pinguibus extrahenda est. Secundo loco, circa sanguinis emittendi quantitatem monendum ducimus; quod nimia sanguinis copia si fuerit detracta non sufficiens satis ad partes inflammatione adfectas perveniat, quo fit ut humor eccentricus de sede sua non dimoveatur, sed corruptionem & sphacelum parti adfectæ minuetur. Nam sicuti inflammationibus sanandis nimia sanguinis quantitas nocet, ita etiam exigua ejus portio est iis adversa. Ex quo patet, quanta prudentia & judicio opus sit, ut Medicus hæc diligentius discernat. Rectissime monet Celsus Lib. II. Cap. 10. in sanguine mittendo vim corporis melius ex venis, quam ex ipsa specie aestimari; & porro ibidem ait: si materia vel deest vel integra est, istud alienum est. At si vel copia sui male habet, vel corrupta est, nullo modo melius succurritur. Et vehemens febris, ubi rubet corpus, plenæque venæ tument, sanguinis detractioem requirit: item viscerum morbi, nervorumque resolutio & rigor & distentio quicquid denique fauces difficultate spiritus strangulat, quicquid intolerabilis dolor est & quacunque de causa ruptum aliquid intus atque collicum est: item malus corporis habitus, omnesque acuti morbi, qui modo non infirmitate, sed onere nocent.

§. XXIII. Neque facile suadenda est V. S. ubi ex longo morbo, ex inedia, ex diuturno animi mœrore macerata ac infirma facta fuerint corpora, vel ubi appetitus plane extinctus est aut digestio ciborum male se habet, primæque viæ vitiosorum humorum colluvie scatent. Nam tali casu sanguinis multum emittere, est plurimum virium subtrahere, siquidem iis, qui cibis

diu abstinerunt & animus laborat, sanguis sponte imminuitur, neque opus tunc est ulterius eum subfurari. Præterea quoque illud animadvertere oportet, quod per largiorem venæ sectionem ventriculus ut plurimum debilitetur. Nam quemadmodum partes sanguine repletæ, ut viscera, longe facilius sanguinis detractio nem ferunt: ita membranaceæ, quas Veteres frigidas dixerunt, minus commode eam tolerant. Ea propter non sine ratione omnibus, qui sanguinis imminutionem passi sunt, suadendum est, ut ad tempus cibos tales removeant, qui implent, inflant & cruditates parant atque difficilioris sunt concoctionis. Deinceps, quia sanguinis largior detractio perspirationem quodammodo remoratur subsidentibus paulisper subcutaneis canaliculis, optimum tum est consilium omni studio curaque ea, quæ liberum transpiratum impediunt, fugere, ut est frigidi æris & ventorum borealium admissio, nec non acidorum & refrigerantium usus, item intemperantia in victu & potu. Etenim compertum habemus multiplici experientia, complures statim post venæ sectionem frigidum humidoque ære expositos in catarrhos & febres sic dictas catarrhales tussesque chronicas incidisse. Neque etiam post adstringentium acidorum aut opiatorum usum vena facile debet secari, quia illa sanguinis motum & exitum retardant, quæ de re elegans extat observatio in *Dissertatione WEDELII de venæ sectione ritè administranda: Observavimus*, inquit, *in hæmoptico, cui, cum per aliquot dies sumisset opiata & adstringentia, sanguis aperta licet vena, fluere penitus renuit.*

§. XXIV. Ultimo loco circa venæ sectionis proficuum usum & illud adjiendum videtur, quod hæc ipsa nec unquam facile locum inveniat alvo obstructa. Juvat potius eam prius clementi laxativo, ut est decoctum mannæ adjecta salis Anglicani portione, solvere & postea sereno die ad sanguinis extractionem se accingere. Cavendum vero nunquam non est à validioribus cathartics, ceu universam humorum massam exagitantibus, ne in corporibus plethoræ obnoxiiis ante venæ sectionem exhibeantur, exinde enim facile præter inæqualem sanguinis ad cerebrum propulsionem paralyses & apoplexiæ vel periculosa inflammationes suscitantur, commodius vero est, si malum purgantia desiderat, hæc venæ sectioni subordinare. Deterior vero res est, eodem die & venæ sectionem & vomitoria & purgantia in usum accumulare, quod non potest non cum notabili virium decremento contingere. Coronidis loco addimus, quod utique ad sanam & longam vitam tuendam & à corpore varii generis vitia abigenda omnino non satis sit sanguinem semel vel bis de anno emittere, sed aliis adhuc utique opus esse auxiliis tam ex elementorum & alimentorum, quam medicamentorum classe petendis, quæ cum venæ sectionis usum secudent, tum vires ac robur corporis, quo vita & sanitas potissimum sustentatur, firment atque conservent.

Per largiorem V. S. nem ventriculus ut plurimum debilitatur.

Quales cibi conveniant in sanguinis imminutionem passis.

Ær frigidus ventique boreales tum sustinendi.

Nec post adstringentium, &c. usum facile vena secari debet.

Neque obstructa alvo.

Cavendum à validioribus cathartics.

Si malum purgantia desiderat, hæc V. S. subordinanda.

Eodem die & V. S. & vomitoria & purgantia non in usum sunt accumulanda.

DIÆTETICA SACRÆ SCRIPTURÆ MEDICINÆ.

PROOEMIUM.

Nihil præstabilius in universo terrarum orbe esse, quam sanitate integra vitaque longæva frui, extra omnem dubitationis aleam est positum. Excedit enim vita & sanitas omnium rerum terrenarum pretium, & maxima pars felicitatis humanæ in ejus integritate sita est, quippe corpore male constituto etiam animi vigor imminuitur, & homo ad actiones mentis obeundas ineptior redditur. Quanti sanitatis commodum sit æstimandum, perpulchre prodidit dexterrimus morum magister SIRACIDES *cap. XXX. v. 15. Sanitas, inquit, & bona constitutio quolibet auro melior est & corpus validum immensis opibus. Potior est mors, quam vita acerba aut invaletudo permanens.* Quapropter omnes homines egregiam hanc sanitatis tuendæ scientiam sibi habere debent commendatissimam. Licet autem hæc scientia longe sit nobilissima & utilissima, temporum tamen fato accidit, ut perpauci reperiantur, qui corpus suum recte curare, omnique modo illud integrum conservare allaborant; quin potius pleraque hominum pars, pro vario connatæ pravitatis impulsu, eas consecratur res, quæ ad diminutionem sanitatis & ad morborum productionem, imo ad mortis accelerationem causam fatalem præbent. Proh dolor! nostra ætate in plerisque Medicorum scholis eo fere deventum est, ut vel parum, vel nihil cogitent de corpore humano in suo vigore per salutaria diætæ præcepta conservando & à morbis præservando, cum tamen maxima pars potestatis medicæ in hoc unico præservationis negotio versetur. Notum enim est, potestatem Medici in depellendis à corpore morbis & morte averruncanda admodum esse circumcisam & restrictam, quippe in morbis præsertim acutis spectatoris tantum & ministri munere Medicus fungitur, cujus adjumento quidem natura sibi adhuc constans parumper sublevatur, quod tamen minime sit ipsa jam succumbente. O tempora! o mores, quibus sanitas vili adeo pretio penditur! Reperias logiatros, etiam fama celebres, qui tanquam fungi subito creverunt, & speciem quandam magnæ eruditionis præ se ferentes subito in altum, quanquam in casum generis humani, evecti sunt, qui ex vana persuasione diætam ferre insuper habent, omnem fiduciam collocantes in suis pharmacis vel medicamentosis spiritibus, sale acri vel sulphure quodam metallico aut terra prorsus fatua imprægnatis. Hæc ipsorum sunt arma, quibus corpus diu sanum, imo longævum, reidderere satis jactabunde gloriantur. Pulchrum certe hoc est institutum! quæstuosa sane Medicorum auro inhiantium molimina, quibus homines potius præparant ad morbos, ut ipsis postea non desint ægroti, quorum mortibus lucrum facere possint. Ea est jam temporum indoles, ut derisui omnes ii exponantur, qui tum ad præservandum, tum ad liberandum à morbis corpus maximam artem in diæteticis & naturæ convenientibus remediis collocant. Perspecto igitur insigni hoc circa sanitatis curam errore non potuimus, quin meliora edocti ex divinif-

simo illo mysteriorum sacrorum codice, junctis simul salutaribus medicinæ sobriæ rationibus, diæteticam scientiam de meliori nota commendaremus. Prudentior ille jure meritoque censendus est, qui ad hujus boni, sanitatis nimirum, possessionem acquirendam omnes animi vires intendit, & media ad hunc finem collimantia & necessario adhibenda eligit. Ut autem hæc nostra præcepta diætetica majorem obligationis vim in animis hominum habeant, non abs re fore visum fuit, illam ex sacro revelationis fonte depromere. Est enim Scriptura sacra hac in parte summa philosophia, in qua plurima, quæ circa rerum non naturalium usum & abusum observanda sunt, præclare annotata reperiuntur. Hæc enim fons ille est misericordiæ divinæ, ex quo tanquam ex rivo viventium aquarum omnes istæ divitiæ promanant, quarum usus homines omni ex parte beatos reddit. In hac delitescit arcana conservandæ sanitatis methodus, quam qui adsequitur, secretum omnium maximum acquirit, hacque ratione vitam quam diutissime sanam & ab omnibus fere morbis immunem protrahere poterit; in hac sanctissima præcepta continentur, quorum recto ac pio usu terrenæ non solum, sed & cœlestis illius tantopere à mortalibus expetitæ felicitatis fructum consequi datur.

§. I.

ANte vero, quam ad ipsam diæteticæ sacra tractationem progrediamur, non alienum à scopo nostro erit, fundamentum vitæ ac sanitatis, nec non mortis præmittere & explicare; quippe hoc intellecto minori cum difficultate diæteticorum præceptorum, quæ huic superstruuntur, rationem veram perspectam habebimus. Quodsi Veterum monumenta evolvinus, & ex iis rei hujus dissolutionem expectamus, præter vocabula sesquipedalia & grande quid sonantia, quæ nec concipi nec explicari commode possunt, nihil quicquam inveniemus. Alius calidum quoddam innatum & humidum radicale, alius archeum, rursus alius naturam vel similem vocolam causam vitæ ac sanitatis constituit, & hoc pacto unusquisque suam hac in re ignorantiam involucro quodam literalis abscondidit. Verum excusandi sunt Veterum hac in re errores, quippe accuratiori anatomes studio destituti, circulum sanguinis & humorum progressivum nesciebant. Nostro autem tempore, ubi ille ipse per solertissimum HARVÆUM detectus est, ubi deinceps multa, antiquiorum seculorum Medicis prorsus incognita, in structura corporis nostri frequentiori ac diligentiori cadaverum humanorum ope cultri anatomici perscrutatione patefacta & in lucem prodita sunt, ubi insimul matheos studium ad altius fastigium evectum est: multo aliter jam philosophandum. Missa igitur faciamus Veterum ratiocinia, & verum fundamentum ex ipsa machinæ nostræ natura depromptum inquiramus. Exacta inter Philosophos rationales res est, omnes actiones corporum in universa rerum natura ex motu profluere, & nullum corpus sine motu ipsi naturaliter insito concipi posse, unde effectuum vel phænomenorum

menorum naturalium rationes deducendæ, vel corporum qualitates explicandæ. Quod si igitur jam principium adæquatum & certam vitæ & sanitatis machinæ nostræ corporeæ rationem reddere velimus, omnino ista ex motus natura deducenda est. Quapropter non inconcinne hoc modo definiri potest vita; quod nimirum sit motus sanguinis systolicus & diastolicus, per cor & universam tum arteriarum, tum venarum per corpus disperfarum compagem, cui simul arctissime connexus est inde dependens solidarum partium tonus. Hæc sanguinis in circulum per corpus abiens progressio machinam nostram ex rebus corruptioni valde obnoxiiis conflata & mixta ab actu putredinis egregie defendit. Quamdiu itaque hic motus fluidorum aliquo modo viget, tamdiu vita præsens est: simul ac vero hic motus ac tonus partium plenarie cessat, ut non amplius possit revocari, mors adest & cadaver homo nuncupatur; mortis enim ratio formalis in motuum machinæ nostræ omnimoda abolitione consistit.

§. II.

Deducta sic, quam compendiosissime fieri potuit, vitæ ac mortis causa, jam facillimum erit sanitatis definitionem exinde formare. Quando hic motus sanguinis systolicus ac diastolicus partiumque tonus vitalis, liber, æquabilis & moderatus est, quod cognosci potest ex pulsu, habitu corporis externo, actionibus corporis nostri præsertim naturalibus, quæ in secretionem rerum similium & excretionem dissimilium versantur, recte & secundum regulam ac ordinem naturæ se habentibus, homo optimo jure sanus est dicendus. Sanitas itaque dependet à circulo sanguinis & humorum libero, æquali & moderato per omnes corporis partes. Quoniam vero hic circulus sanguinis nonnisi ex effectibus in corpore humano se exerentibus, nempe secretionis potissimum & excretionis negotio cognosci & dijudicari potest, hinc optima ratione sanitatis definitio ab his effectibus circuli sanguinis & toni partium petitur. Dicimus idcirco, sanitatem esse convenientem omnium actionum tam corporis, quam animi exercitium à vegeto, moderato & æquabili sanguinis circulo, indeque dependentibus secretionibus & excretionibus debitis proficiscens.

§. III.

Hiscæ suppositis quæritur, quænam sint illæ res, quæ corpus nostrum & conservandi in debito sanitatis vigore, & variis morbis vel morti quoque illud exponendi facultate polleant, pro diverso eorum vel legitimo vel illegitimo usu? Si Veterum hic responsionem nostram facimus, dicendum, eas comprehendere sub nomine sex rerum non naturalium, quibus homo, quamvis ejus essentiam non constituent, continuo opus habet ad conservandam vitam ac sanitatem, si ve, ut medice loquimur, ad liberum ac æquabilem humorum circuitum. Sunt vero hæ ipsæ maxime omnium animi conditio & universalis ille æris & ætheris fons, qui omnium animantium necessarius potus est: sunt alimenta solida æque ac fluida: sunt denique actiones ipsius hominis nunquam non necessariae, quæ ad motum, quietem, somnum, vigilias, consuetudinem vitæque genus pertinent. Quicunque itaque harum rerum usum ita moderatur, ut circulus sanguinis liber & æquabilis maneat: is veram sanitatis tuendæ, ac vitæ longæ methodum, & sa-

luberrimas diæteticas regulas obtinet, quæ unice circulo sanguinis proportionato innituntur. Quemadmodum enim affabre constructi automatis motus ab elasticitatis vi vel pondere alterius corporis dependet: ita etiam sapientissime fabricatæ machinæ nostræ à corruptione conservatio, atque regularis & ordinatus motionum successus à rebus memoratis externis earumque sub prudenti regimine usu unice profuit atque perficitur. Hæc ipsa enim sunt, quæ corpori nostro mobilitatis seu motus materiam sufficientem ac bona temperie gaudentem largiuntur. Hæc ipsa sunt, quæ vigorem, motum, actionem partibus solidis æque ac fluidis contribuunt. Quare sole meridiano clarius hinc elucescit, utique in harum rerum justo usu, primum vitæ ac sanitatis nostræ momentum esse constitutum. Hanc ob causam unica nostra cura eo tendat, ut leges sanitatis, quæ nobis convenientem earum rerum usum præscribunt, diligentissime observemus.

§. IV.

Cum igitur sacra scriptura nos optime hac de re instruat, & viam simul monstrat tutissimam, qua incedentes & sanitatis exoptatum commodum, & vitæ terminum à Deo machinæ nostræ naturaliter concessum, ex voto adsequi optime possumus: hinc jam toti in id erimus defixi, ut methodum hanc sacrae diæteticæ medicinæ, qua licebit perspicuitate, evolvamus & publico usui sistamus. Primum vero occupati erimus circa affectus animi eorumque regimen, quibus deinceps ordine subjungemus, quæ circa aërem, alimenta & potulenta, somnum & vigiliam, nec non motus exercitium in sacris literis præcepta diætetica occurrunt.

§. V.

Primum jam nostræ tractationis caput ab affectibus animi exordimur. Quæritur hic antequam omnia: an anima potestatem quandam exercere possit in corpus humanum? Si accuratiori scrutinio hanc rem examinamus, ingenue fateamur necesse est, vitam & sanitatem nostram in rerum natura vix infensorem habere hostem, qui tam potenter, tamque celeriter, œconomia nostræ vitalis motus turbare, imo penitus subvertere possit, præterquam animam nostram. Etsi enim nullam potentiam absolutam in actiones sic dictas vitales, eas pro lubitu moderandi & dirigendi habeat, attamen has ipsas variis modis perturbare potest, ob arctissimam connexionem, quæ ipsi cum corpore intercedit. Testatur experientia, quantos motus irregulares varii affectus animi, desideria anxiosa firmiores impressiones producant, sique verum fateri debemus, plurima pars hominum ægrotat & perit magis animi, quam corporis morbis. Id quod ii maxime experiuntur, qui lecto ægrotantium adstant, ubi convenienti facto examine circa morborum originem, animi gravem affectionem morbo ansam præbuisse subinde observant. Satis pro compendio dictum putamus; Nolumus enim hac vice in hujus quæstionis deductione, cum rem complectatur per se manifestam, esse prolixiores, sed potius nos accingimus ad ipsam exponendam diætam, quæ circa hos affectus homini sanitatis amanti attendenda est.

§. VI.

Videamus igitur, quid commodi ex affectuum animi contemperatione in corpus humanum redundet. Quod si sacram scripturam hac de re

consulamur, ea ad sanitatem & vitam longam egregie commendat hilaritatem atque tranquillitatem mentis. Sapientissimus Regum SALOMO *Proverb. cap. XV. v. 13. animus lætus, inquit, bene afficit vultum: Idem v. 15. ita pergit: læti animo sunt convivium iuge: quasi diceret: qui lætus est animo & sua sorte contentus, melius habet, quam si semper lautissimis epulis frueretur. Ulterius Prov. cap. XVII. v. 22. ita fatur: animus lætus bene medicinam facit. i. e. optimæ medicinæ loco est, qua corpus à morbis & morte præmatura conservatur. Quid quod, multis in locis hilarem animum vitam quotidianam jucundam appellat. His adstipulantur verba Ecclesiastici cap. XXX. v. 21. lætitia cordis est vita ipsa hominis & exultatio producit dies vitæ. Ex hisce omnibus sequentem regulam diæteticam elicere possumus: Quicumque sanitatis suæ curam habere cupit, is hilari atque tranquillo animo sit necesse est. Ejusmodi enim mentis compositio placidum & pacatum in spiritibus animalibus excitat motum; qualis autem spirituum motus, talis motus cordis, & arteriarum, tonusque partium; & qualis partium tonus motusque cordis & arteriarum, talis sanguinis circulatio, & qualis hujus circulatio, talis sanitas. Quapropter mens tranquilla summum hominis in hac vita bonum judicari debet; utpote mens in tali statu posita non tantum corpori, sed ratiocinationi quoque quam optime inservit & ingenii vim acuit. Experientiæ fide certissima constat, animo placido & affectibus vacuo præditos omnium fere morborum & ipsorum quoque epidemico-
rum contagio inficientium tela plerumque effugere, ac, si forte ab iis petantur, non modo non succumbere, sed cæteris omnibus etiam felicius evadere. Neque minus in morbis, periculo non plane expertibus, maximam reconvalescentiæ spem ex animi tranquilla habitudine concipi posse, praxi clinica quotidie edocemur.*

§. VII.

Hoc tamen loco maxime notari velim, nos sub lætitiæ vel tranquillitatis animi conceptu, non comprehendere gaudium repentinum atque effusum: nam cum hoc celerrima animi sit motio, eam quoque irregulares spirituum & sanguinis motiones excipiant necesse est, unde occasionem magnarum turbarum morbosarum, imo mortis repentinæ præbere possunt; qualia exempla hinc inde apud auctores Medicos consignata exstant.

§. VIII.

Sicuti autem sacer codex animi constitutionem hilarem atque tranquillam ad incorruptam sanitatem ac vitam longam suadet atque commendat: ita è contrario tristitiam, quæ lætitiæ adversatur, & animi angor, cura ac cruciatus est, omnibus & singulis dissuadet. Pertinent huc, quæ à SALOMONE sapienter dicta sunt *Proverb. cap. XVII. v. 22. Spiritus fractus exsiccat ossa. item Cap. XV. v. 13. dolore animi spiritus frangitur. item Cap. XV. sicuti tineæ vestimento & vermibus ligno: ita tristitia in viro nocet cordi. Sagacissimus morum præceptor SIRACIDES Cap. XXX. v. 21. unumquemque hominem à tristitia his verbis avocare studet, ne tradas tristitiæ animum tuum, neque angas te ipsum consilio. Dilige animum tuum, & consolare cor tuum, tristitiamque procul à te pelle. Rationem, cur fugienda sit tristitia v. 26. subjungit, sollicitudo, inquit, ante tempus senectutem adducit. Quicumque igitur sanitatis curam habet, is mœrorem ac tristitiam*

quovis modo fugiat. Quemadmodum enim lætitia blanda, ac moderata spiritus recreat, excitat, & sanguinis circulum promptum ac liberum reddit: ita mœstitia spiritus obtundit, deprimit, & sanguinis circuitum impeditiorem facit, sanguinemque à naturali sua temperie, ad spissitudinem lentam redigit. Et sicuti in lætitia sanguis undiquaque æqualiter circumfertur, & ipsa adeo cutis vascula capillaria minima pervadit, unde rubore amœno facies coloratur: sic contrario modo in tristitia, sanguinis calor & spiritus à circumferentia ad centrum magis intro compelluntur, & habitus corporis spasmodice constringitur, unde in tristibus pallor faciei, cutis constrictio, transpiratio remissior, pulsus exilis ac lentus, appetitus imminutus, somnus terroris plenus & virium languor subinde observantur. Probe hæc cognovit FERNELIUS, qui ita hanc in rem differt: *tristitia spiritus obtenebrat, ingenium hebetat, rationem impedit, judicium obscurat, spiritus ascensionem deprimit & melancholicas desperandas cogitationes efficit, quibus ex causis corpus pallore defædatur, ignavia torpet, atrophiam liquescit & in marcorem aliosque frigidos morbos ruit.* In praxi attentiori observare licet, mœrorem profundum ac pertinacem, ad febres mali moris, melancholiam, insaniam, malum hypochondriacum, calculum tam renum, quam vesicæ, phthisin, hæticam, cachexiam, aliosque morbos frequentissime disponere. Nam ab ejusmodi continuo mœrore, sanguini fluiditas demitur, unde spissescit, stagnationes subit & hinc inde obstructions parit, à quo dictorum malorum origo fere unice dependet. De mœrore profundiore pulchra quoque extant apud HIPPOCRATEM *Lib. II. de morbis. Cura in visceribus veluti spina videtur atque illa pungit.* Et alibi: *ubi hæc, inquit, anxietas animum corripuit, lucem atque homines fugit, & tenebras amat, & timor invadit, aridus est & ad contactum dolet, & expavescit & terculamenta, & somnia horrenda videt.* Hæc sunt præcipua symptomata, quibus mœrore sepulti contorquentur, & continuo discruciantur, ut quandoque etiam eo insaniam procedant, ut prævitæ tædio sibi ipsis vim faciant, & in laqueo solamen suæ miseriæ quærant. Patet exinde evidentissime, tristitiam & mœrorem, maximum corporis & animi esse tormentum, unde sapientissime is rerum suarum & sanitatis satagit, qui omnem mœrorem procul ablegat.

§. IX.

Eisdem fere effectus, cum tristitia, habet invidia, quæ ubi altius animo insidet, humanum consumit corpus, ut rubigo ferrum. Placet hanc in rem allegare *Ecclesiast. Cap. XXX. v. 25. ubi de invidia dicitur, quod minuat dies. Pari passu cum tristitia & invidia, ambulat anxia in divitiis corradendis cura; unde idem Ecclesiast. Cap. XXXI. v. 1. ejus noxam, quam corpori humano infert graphice depingit, vigilia, inquit, divitiarum causa tabefaciunt carnes, & cura earum amovet somnum.* Huc pertinet quoque amor insanus, cujus vehementia fere contabuit Ammon. II. Samuel. Cap. XIII. Unusquisque ergo, qui sanitati studet, ex præscripto sacrae scripturae, omni studio ab his vulgaribus & maxime turpibus affectibus, quales sunt invidia & avaritia, sibi temperet, necesse est.

§. X.

Restat adhuc alius affectus corpori nocentissimus, qui iræ nomine venire solet. De hac *Ecclesiast.*

Isaï. c. 30. v. 25. claris verbis pronuntiat, quod dies vitæ minuat. Idcirco sanitatis cultori incumbit, ut iram, ceu pestem corporis, omni arte fugiat. In omni enim iracundia commotio fit spirituum & sanguinis extrorsum à centro ad circumferentiam. Cum itaque in iracundia sanguis maximo cum impetu ad externum corporis habitum pellatur, hinc evenit, ut sub iræ æstu infletur facies, oculi appareant feroces, in partibus sentiatur tremor & respiratio cum pulsu adauctior fiat, ipsaque mens à statu suo deiciatur. Et ab hac vehementiori sanguinis in ira commotione, plurima mala corpori humano accidunt. Præclara est observatio HILDANI *obs. 18. cent. I.* ubi arteria vulnerata, postea probe sanata, iterum rupta fuit ab ira, quæ disruptio à nulla alia causa facta fuit, quam à sanguinis impulsu majori, & tunicarum arteriæ expansione fortiori. In praxi attentiori observamus, iram maxima pollere vi, in consuetis & dispositis enormes sanguinis excretiones siue per nares, siue per venas ani, siue per uterum in foeminis proritandi. In senibus & sanguine abundantibus, vehemens ira apoplexiam non raro producit; si quando enim sanguis cum impetu ruit ad caput, vasa à nimia congestione ejus distenduntur ac perumpuntur, unde sanguinis fit extravasatio lethalis. In plurimis post paroxysmum iracundiæ in latere dextro sub scrobiculo, cordis mox sentitur dolor quidam constriktivus cum oris amaritie, quod symptoma ortum habet à motu bilis impetuosiore, ejusque in intestina effusione, hinc etiam dependet inclinatio ad vomitum & diarrhoea, unde HILDANUS *Cent. VII. obs. 18.* annotavit: alvum subductam fuisse ab ira, ac si pharmacum adsumtum fuisset. Morbi inflammatorii, ut sunt pleuritides, peripneumoniæ, inflammatio hepatis, ventriculi & intestinorum, item erysipelas subinde ab ira ortum traxisse observantur. Hi morbi potissimum eveniunt in iis, quorum sanguis impurus ac spissus est, & tubuli corporis angusti, quapropter in arterias ab iræ affectu adactus sanguis, si viscosus & tenax sit, non eadem celeritate per venas reverti potest, unde sæpius in tubulosa partium solidarum, vel viscerum substantia subsistit, & inflammatorias ejusmodi passiones efficit. Quicumque igitur ex præscripto sacra Scripturæ iram coercet, is sanitati suæ optime consulit & corpus ab his morbis immune servat.

§. XI.

Ordine jam progredimur ad aëris diætam. Nihil sane ad sanitatem ac vitam tuendam plus confert, quam elementum illud commune aëris & ætheris fluidum, quo omnia animantia continuo opus habent, cujus secundum HIPPOCRATEM *Lib. de flatibus §. 6. tanta est necessitas, ut si omnibus aliis abstineat homo, neque cibum sumat, neque potum, possit dies tres vel plures vivere: si vero spiritus viæ in corpus intercipientur, brevi tempore illi esse pereundum.* Hoc certissimum est, aërem esse primum, corporis nostri quoad solidas & fluidas partes, motus, materiam ac instrumentum. Quo igitur purior est ac temperatior, eo magis ad vitam & sanitatem integre conservandam confert; è contrario vero, quo impurior & intemperatior, eo magis vitæ ac sanitati inimicus est. Sicut enim aer purior circulum sanguinis promovet, robur & tonum partium auget, transpirationi velificatur, atque ingenio vim addit: ita impurior particulis heterogeneis, narcoticis & putredinis maxime inquinatus, circulum sanguinis turbat, robur partium infringit, perspirationem remoratur, ingenique vim obtundit. Unde talismodi intemperatus aer ad morbos, ex humorum stagnatione indeque contracta impuritate oriundos, item ad putridas febres, imo ipsam pestem disponit. Et hanc ob causam, ut quidem nostra est sententia, elementissimus rerum conservator Deus, pro singulâ sua in homines providentia permotus fuit, ut populo suo cautio-

nem, à rebus aërem inquinantibus serio injungeret. Quare *Levit. XI. v. 35.* omnia ea, quæ labe quadam forte aërem inficere possunt, ceu impura & inquinata proscripsit, eorumque usum plane interdixit. Cumprimis etiam huc pertinere videntur, quæ de inspectione sacerdotali leproforum *Levit. Cap. XIII. v. 8.* proponuntur. Lepra enim erat morbus, summa ex corruptione humorum ortus, qui suam foeditatem vicinis corporibus, infirmioribus præsertim, communione aëris facillime adfricare potuit, unde tam sedula leproforum inspectio & custodia separata à cœtu hominum fuit injuncta. *Levit. XIII. v. 46.* Quicumque igitur aëris noxas evitare, & sanitatem hoc modo integram conservare nititur, is omni arte & studio loca suspecta, ex præscripto sacra scripturæ, fugiat & commercium hominum infectorum diligenter evitet. Optimum enim præservativum, à morbis ex aëre impuro oriundis, imo ipsa peste in fuga & curatori contagii evitacione consistit, ut gravissimorum Medicorum est sententia.

§. XII.

Ad alterum jam membrum nostri propositi pergitur, quod de cibo ac potu institutionem diæteticam subministrabit. Alimentorum & potulentorum maxima habenda est ratio, cum proxime ad vitæ ac sanitatis conservationem concurrant. Nullus enim homo sine cibo & potu vitam diu conservare, vel sano ac integro corpore esse potest; siquidem ob continuas egestionis partium, motu sanguinis intestino resolutarum, quotidiana etiam ingestione opus habemus, ut partes illæ motu sanguinis effictæ reddantur, ad consueta emuntoria delatæ & foras protrusæ, nova utilium succorum accessione reparentur, & sic corpus sub continuis egestionibus & ingestionibus in vigore actionum suarum, adeoque in sanitate conservetur. Quum autem esculenta & potulenta tum ratione indolis & temperaturæ, tum etiam ratione facultatum & virtutis mirum inter se dissideant, & cum etiam magnus subinde error circa adsumptionis quantitatem committatur: hinc omnino Medicum & naturæ consultum oportet scire, quænam ex hisce tam ratione temperaturæ, quam ratione quantitatis corpori nostro congrua vel incongrua sint, ut hoc pacto noxam à corpore avertere possit. Multa præclara huic fini accommodata hinc inde ex sacra scriptura depromi possunt, unde illa jam ordine percurrere & explicare animus est.

§. XIII.

Quod attinet ad ciborum quantitatem, omnis repletio ex iis ceu naturæ corporis nostri inimica & morbis proferendis apta, ex præscripto sacra scripturæ prorsus vitanda est. Notatu digna sunt, quæ hanc in rem adfert *Ecclesiasticus Cap. XXXVII. v. 32. seqq. Ne esto insaturabilis omnibus deliciis, neque projectus esto ad escas. Nam multis cibis adhæret morbus & insatiabilis voracitas maxime accedit ad choleram. Voracitate insaturabili multi sunt mortui.* Idem *Cap. XXXI. v. 22.* ita fatur: *laboriosa vigilia & cholera torminaque adsunt viro insaturabili.* Recte à SIRACIDE ciborum nimia adsumptio & voracitas plurimorum morborum, speciatim vero cholera, laboriosarum vigiliarum, torminum, imo ipsius adeo mortis causa statuitur. Nam quancumque cibis variæ præsertim indolis majori in copia, quam par est, ventriculus oneratur, non modo ejus tonus & robur inde imminuitur, & chylus ob lymphæ gastricæ insufficientiam crudus, intemperatus ac intimiorem cum sanguine mixtionem renuens separatur, sed etiam ingens colluvies acidorum, biliosorum, pituitosorum ac putrescentium humorum in primis viis à reliquiis ciborum ibi diutius commorantibus colligitur, quæ omnia morborum causis jam dictis originem atque materiam præbent fertilissimam. Non inconcinne

FERNELIUS in *Patholog. lib. I. Cap. XV. pag. 210.* perniciosam admodum sentinam abdomen insaturabile appellat, quia omnium tum corporis, tum animi vitiorum fons & origo est, ut adeo verissimae sint facietiae illorum, qui intemperantiam Medicorum nutricem adpel-
 — larunt. HIPPOCRATES *Secl. II. aph. 17.* ita de ciborum intemperantia loquitur: *ubi cibus præter naturam copiosior ingestus fuerit, morbum facit.* Cuicumque ergo sanitas curæ est, is à nimia ciborum ingestione & voracitate turpi absteineat necesse est. Observent vero hanc diæteticam regulam cumprimis imbecilliores, quorum in numero habendi ii, qui modo à morbo aliquo convaluerunt, qui enormes cum virium jactura passi sunt hæmorrhagias, & qui fame, vigiliis immo-
 — dicis ac labore emaciati sunt, vel alia ratione vires amiserunt. Horum enim hac in parte excessus tanto sape nocumento est, quantum vix expectari poterat. Profecto innumera sunt comoda, quæ ex accurata & moderata ciborum mensura in corpus nostrum redundant. Probe hoc vidit SIRACIDES, unde *Cap. XXXI. v. 22.* ita exclamat: *Quam sufficit homini erudito res modica! nam in cubili suo non anhelat, somnus sanus est, cum intestino mediocri surgit mane compos animæ suæ.*

§. XIV.

Uterius diætam circa alimenta persecuturis non incongrue quæritur: quinam cibi & quales in usum trahendi? Quando sacram Scripturam hac de re consulimus, commendatos hinc inde atque in usum vocatos fuisse temperatissimos & optimi succi cibos reperiemus. Ex carnibus enim quadrupedum à Deo ipso conceduntur bovinæ, vitulinæ, agninæ, hoedinæ, arietinæ. *Levit. Cap. XI. v. 3.* *quicquid habet ungulam scissam & bifidatum est fissura ungularum, revocans ruminis cibum, ex quavis bestia, illud comedetis.* Carnes harum bestiarum cumprimis juniorum, omnium Medicorum consensu, ejus sunt indolis, ut & facilius à menstruo ventriculi solvantur & bonum sanguinem ingenerent. Habent enim cum sanguine nostro exactam convenientiam, & temperatam gelatinam in se recondunt, quam coctione omnes dimittunt. Quid vero aliud est sanguis optime temperatus, quam gelatinosus succus, à continua in circulum translatione rubicundus redditus? Hac de causa verissimum manet hoc assertum, quod dictorum animantium puriorum, præcipue carnes, succique inde excocti & juscula, quia gelatinam copiosam & temperatam præbent, ad corporis nutritionem & sanguinis restaurationem præ aliorum animantium carnibus optime inserviant.

§. XV.

Ex volatilibus humano usui concessit summus rerum œconomus carnes columbarum, alaudarum, gallinarum, perdicum, anserum, anatum & aliarum avium, quarum *Levit. Cap. XI.* non fit inhibitio. Hæ omnes & adhuc aliæ volatilium species, eandem ob causam, quia succum temperatissimum & cum sanguine nostro convenientissimum foveant, in optimum nutrimentum corporis nostri cedunt.

§. XVI.

Ad aliud genus ciborum nempe pisces nos convertimus. Horum usus *Levit. Cap. XI. v. 9.* commendatur his verbis: *hos comedatis ex omnibus quæ sunt in aquis, omne quod habet pinnas & squamas in aquis, tum per maria, tum in fluminibus, illa comedatis. conf. Deut. XII. v. 9.* Equidem non sine ratione esus piscium commendatur, nam propter faciliorem solutionem & copiam partium humidarum, quibus abundant, uti ex destillatione eorum videre est, minime nocent, & quoniam non tam facile putrescunt, quam quadrupedum vel avicularum carnes, hinc etiam absque nocumento

in febribus, in morbis malignis ipsaque in peste agrotis possunt concedi, ubi alias ab esu carnum maxime est abstinendum. Siquidem putredo, in qua malignitatis natura continetur, non parum harum usu promovetur, & humores jam tum corrupti, ad majorem putredinem disponuntur; unde etiam evenit, ut natura ipsa in ejusmodi morbis sponte ab esu carnum abhorreat. Datur autem magna piscium differentia respectu aquarum, in quibus degunt, ex quibus illi sapidissimi sunt & saluberrimi, qui in fluviis, ubi aqua levis & subtilis est, ac rapidissimo cursu fertur, progignuntur: è contrario ii minus saponi sunt minusque salubres, qui in aquis paludosis & stagnantibus capiuntur. Deinde etiam datur differentia inter ipsas piscium species, quidam enim durioris & compactioris, quidam mollioris & candidioris respectu carnis sunt indolis. Unde, si optio nobis detur, pisces omnium sapidissimi ac optimi pro usu seligendi sunt.

§. XVII.

Alimentorum ex regno vegetabili usus est vetustissimus itemque innocentissimus, quippe herbæ, semina & fructus arborum, paradisiacus ille cibus erant à Creatore sapientissimo Adamo in statu integritatis concessus, uti clarissimis verbis *Genes. cap. I. v. 29.* legitur, ubi scriptum extat: *præterea dixit Deus: ecce dedi vobis omnes herbas sementantes semen, quæ sunt in superficie totius terræ, omnesque arbores sementantes semen vestræ ad comedendum erunt.* item *cap. II. v. 16.* *de fructu quidem omnis arboris libere comedes.* Herbæ & arborum fructus nutrimentum quidem adeo copiosum, ut carnes animantium, non suppeditant, interim tamen hoc verissimum est, illa succum præbere levio-
 — rem, facile transeuntem, & necessarium, eumque optime temperatum sanguinem gignere, ideoque ad vitam sanam atque longævam maximæ utilitatis esse, eam maxime ob causam, quia plethoram avertunt, quæ à cibis plenioris nutrimenti corpori ingenerata, plurimorum morborum & ipsius etiam mortis maturioris causa esse potest. Majus vero nutrimentum præbent varii generis semina præsertim tritici, siliginis, hordei & ex iis præparata. Est enim ea omnium seminum indoles, ut temperie optima gaudeant, dum ex partibus terreis subtilioribus, mucidis & oleoso-sulphureis probe mixta sunt, unde cum aqueo liquore cocta vel trita, eundem lacteo colore bene saturato imbuunt. Ex his colligi facile potest, quare panis ex frumentorum generibus præparatus in optimorum nutrimentorum numero habeatur. Ex sola aqua & pane homo vivere potest, testante id *Ecclesiastico Cap. XXIX. v. 25.* *præcipua vitæ humanæ sunt aqua & panis.* Hinc etiam regius Psalmista panis virtutem confortantem & cordialem tribuit. *Psal. 104. v. 15.* Huc pertinent quoque legumina, quorum genus quoddam Propheta Daniel cum sociis suis præ cibo regio expetiit, uti ipse testatur in prophetia sua *Cap. I. v. 12.* quo in loco nempe *v. 15.* simul indigitavit, quam bene usu hujus cibi eorum corpora nutrita fuerint, facies enim illorum inde apparuit elegans ut pinguium carne. Ex hisce jam omnibus, quæ de ciborum conditione ex sacris fontibus protulimus, hæc regula diætetica consequitur: eligenda sunt alimenta corpori nostro congrua, temperata, quæ facilius solvantur & corpus transeunt.

§. XVIII.

Antequam pedem ulterius proferamus hoc loco non incongrue quæritur: an rationes medicæ firmiores dari possint, quod esus adipis *Levit. VII. v. 13.* item carnis suillæ *Levit. Cap. XI. v. 7.* ut & sanguinis animalium *Levit. Cap. XVII. v. 10.* *Act. Apost. Cap. XV. v. 29.* nec non suffocati *Lev. XVII. v. 17.* *Act. Cap. XV. v. 29.* interdictus, sit insalubris ac noxius? Adipem quod attinet, ejusdem indoles noxia cognoscitur ex eo, quod

quod vix in ventriculo dissolvatur & in alimentum cedat, sed ab acido in coagulum concreseat, plicis ventriculi & intestinorum cellulis adhærescit, ubi ex diuturna mora corrumpitur & ructuum, sodæ, pathematum spasmodicorum ac dolorum occasionem præbet amplissimam. Notandum insimul hoc loco est, quod quo viscosiores & magis rancidæ ac vetustiores sint pinguedines, eo etiam peioris sint indolis. Hanc ob rationem præsertim ii, quorum primæ viæ acido copioso scatent, optime sibi consulunt, quando ab esu omnis generis pinguedinum copiosiori penitus abstinent. Quare vero caro suilla sit noxia, majoris paulo difficultatis quæstio est, cum maximam habeat convenientiam cum sanguine humano & præterea gelatinam præbeat multo copiosiore ipsa carne bovina, vel ovina, aut alia. Respondemus autem hic cum distinctione aliqua & dicimus: carnem suillam minus nocere illis, qui ea parciore in quantitate utuntur & insuper corpus motu ac labore exercent, sed infirmioribus, iisque, qui corpus parum movent, non potest non magno esse nocumento propter glutinosum, quo abundat, succum, hinc promte illius frequentiori usu emunctoriorum tubuli obstruuntur, quibus obstructis plurimæ impuritates in corpore accumulatur, quæ deinde variis cutis vitiis & scorbuticis morbis occasionem subministrant. Optime igitur faciunt ii, qui cachecticæ sunt constitutionis & vitam degunt otiosam, si talismodi carnis usum plane abdicant. Nunc videbimus etiam, quænam ratio medica dari possit de noxa esus sanguinis interdicti. Quicumque sanguinis examen instituit, haud difficili negotio comperiet, eum ex particulis maxime putrescibilibus constare. Elucescit id inter alia ex eo, quod sanguis è vena emissus statim coaguletur & rancorem contrahat. Quod si igitur ejusmodi sanguis in cibum sumitur, facile in ventriculo corrumpitur & chylum minus aptum suppeditat. Eadem est ratio suffocati. Nam quandocunque animal suffocatione perit, sanguis in vasis partium coagulatur & putredinis celerioris causam præbet.

§. XIX.

Hicce discussis pergimus ad potulenta. Diversa dantur potulentorum genera, hoc autem loco solummodo ea recensere lubet, quæ naturæ nostræ maxime congrua sunt & quorum in ipsa sacra scriptura fit mentio. Primum igitur de aqua ejusque usu agemus, quem ex ipsa sacra scriptura probaturus provoco ad Num. Cap. XX. ubi Israelitæ aquam postularunt à Deo per Moysen, quam etiam impetrarunt, cum Moyses petram virga sua percuteret. Huc spectat locus 1. Reg. XVII. ubi potus Eliæ fuit aqua è torrente. it. Ecclesiast. Cap. XXIX. v. 25. ubi legitur: *præcipua vitæ humanae sunt aqua & panis*. Primævos homines & Patriarchas usque ad Noachi tempora aquæ potu usos fuisse, non obscure judicatur: nullibi enim ante tempora Noachi vini fit mentio, multoties vero aquæ. Ex hisce adductis satis manifestum videtur, quod jam inde ab antiquissimis temporibus usus aquæ fuerit cognitus & maximi æstimatus. Est itaque aqua potus omnium animalium communissimus & ad vitam ac sanitatem tuendam accommodatissimus. Hoc enim aqueum elementum maxime omnium ad constituendam sanguinis ac humorum vitalium texturam necessarium est. Aqua ad digestionem & extractionem succorum ex alimentis aptissima, hæc minimos corporis meatus quam expeditissime subit, unde ad interiores partium poros nutritum succum advehit, hæc quoque evehendis è corpore salino-sulphureis excrementitiis partibus quam maxime idonea est, unde optimo jure medicina universalis præservativa nuncupari posset: non enim facile datur hac ipsa nobilior à morbis præservativum. Qui solo aquæ potu utuntur, ii multo robustiores & vivaciores sunt, quam qui aliis liquoribus aut cerevisiis delectantur. Aquæ potus dentes firmiores & can-

didiores & gingivas sanas conservat. Pulchra est observatio, quam *Miscell. Natur. Curiosor. Dec. II. A. III. obs. 15.* exhibent de sene centum & viginti annorum, cui adhuc integra dentitio in senectute obtigit, quique nullam aliam longævitatatis causam proferre potuit, quam quod per omne vitæ tempus aquæ potum in deliciis habuerit. De *Andrea Tiraquello*, Juris Consulto, auctores referunt, quod solo aquæ potu contentus senex obierit. Inter causas longævitatatis Ægyptiorum aquæ Niloticæ usus non infima fuit. Diversa vero aquarum ratione bonitatis est indoles, optimæ sunt pellucidæ, leves, particulis heterogeneis calcariis non refertæ, quæ epotæ in hypochondriis fluctuationem non concitant, bene per urinam & transpirationem secedunt, & sic excretoria aperta conservant.

§. XX.

Post aquam merito quoque vini mentio est injicienda, cujus inventor & primus cultor Noachus celebratur ex *Genes. Cap. IX. v. 20.* unde patet, ejus usum itidem esse antiquissimum. SIRACIDES ejus usum moderatum egregie commendat *Cap. XXX. v. 30. tanquam vitæ est vinum hominibus, si moderate illud biberis*. Lætificans cor hominis virtus ipsi tribuitur *Psal. 104. v. 15.* Denique in omni mœrore extollit ejus usum *Ecclesiastic. Cap. XXXI. v. 32. exultationem cordis lætitiæque animi efficit vinum potum tempestive, quod satis est, & ibidem v. 33. acerbam animam facit vinum multum potum irritatione & adversa causa*. Et *Cap. XI. v. 20. vinum & musica lætitiæ adferunt cordi*. conf. *Proverb. Salom. Cap. XXX. v. 6. 7. date potum inebriantem perituro, & vinum amaris animo. Bibat, ut obliviscatur paupertatis suæ, & molestiæ suæ non sit memor amplius*. Sane vinum temperatum non nimis acidum, nec vaporosum inter remedia nobiliora totam naturam corroborantia facile principem obtinet locum, siquidem eximie circulum sanguinis promovet, ventriculo tonum ac robur largitur, corpus perspirabile reddit, & vires collapsas mirum in modum erigit. Hanc ob causam PAULUS Timotheo suo infirmitate ventriculi laboranti vini usum præscribit in *Epist. I. ad Timoth. Cap. V. v. 23.* Et postea subjungit: *aquas ne bibas, sed vini modicum bibe propter stomachum tuum & propter morbos tuos assiduos*. Quantas enim vires vinum generosum in anorexia seu appetitus prostratione & digestionis vitiis corrigendis possideat, vix satis deprædicari potest, quotidiana id testante experientia. Potissimum autem vinum iis conducit, qui temperaturæ corporis sunt frigidioris ac humidioris, qui vitæ sedentariæ addicti sunt, & corpus parum movent; calorem enim ipsis addit & spiritaliscentiam auget, unde etiam vinum bonæ notæ optimum affectus hypochondriaci, & aliorum frigidorum morborum præservativum judicatur.

§. XXI.

Quemadmodum vero sacra Scriptura moderationem vini usum concedit & commendat: ita vicissim ejus abusum & immoderatam in corpus ingurgitationem summopere reprehendit: hinc ebrietas multis in locis N. T. ceu vitiorum genitrix & seductrix à via salutis, ab Apostolis severe inhibetur. Sapientissimus SALOMO in *Proverb. c. XXIII. v. 29. & seqq.* genium vinosorum & ebrietatis studiosorum cum incommodis tam corporis, quam animi, quæ ex vini nimia ingurgitatione proveniunt, graphice depingit, dum ait: *cui vix? cui eheu? cui contentiones? cui loquacitas? cui vulnera impune? cui rubor oculorum est? immorantibus apud vinum, euntibus ad investigandum vinum mistum. Ne respicito vinum, quum rubescit: quum exhibet in poculo colorem suum, indefinenter movetur rectissime: tandem velut serpens mordebit & velut hæmorrhoids punget. Oculi tui respicient alienas & animus tuus eloquetur perveritates*.

Et eris, ut qui jacet in medio mari, & ut qui jacet in corona carcheshi. *Ecclesiastic. Cap. XIX. v. 1.* de vino proferit: quod intelligentes seducat. item *Ecclesiastic. Cap. XXXI. Ps. XXVIII. in vino, ne agas virum: nam vinum multos perdidit: in eodem Cap. V. v. 34. auget animum ebrietas imprudentis ad offensionem: minuit robur & acquirit vulnera.* Quantas noxas vina praesertim intemperata, vel nimis dulcia, vel acida, vel spirituosa, vel sulphur vaporosum olentia, si immodice ingurgitentur, corpori humano inferant, etiam vulgus non ignorat. Dulcia enim vina plethoram augent & morbis ab ea pendentibus ansam praebent. Quae vero acidum foveant, passionibus ex acido & viscido nutrimentum praebent & speciatim calculorum, hysterici ac hypochondriaci mali, podagrae generationem in dispositis corporibus promovent. Deinceps spirituosiora vina, dum mirifice sanguinem & humores excitant, in juvenibus inprimis & cholericae temperaturae hominibus calorem adaugent & bilem acrem ingenerant, unde ad haemorrhagias, febres ardentes, biliosas, spasmos, dolores maxime arthriticos, quandoque etiam convulsiones inducendas sunt aptissima. Ea denique vina, quae sulphure vaporoso scatent, nervis infesta sunt & capiti nocent, unde morbis capitis, quales sunt torpor, somnolentia, cephalalgia, paralyxis & epilepsia, viam sternunt. Huc satis apposite transferri possunt, quae de vino differit VALLERIO Lib. II. *Enarrationum Medicinalium Enarrat. IV. vinum varia in corpus incommoda pro sui natura, aetate, potentia, adsumptionis modo infert. Nam vinosa immodice sumpta caput tentant, nervos implent, fluxiones excitant, mentem labefaciunt, vires corporis universas dissolvunt; aquosa minus alunt, dulcia obstruunt; crassa nigraque difficile permeant, diuque in ventre morantur: vetera vehementer calefaciunt: nova turbant & fluctuationem miram concitant; acida ledunt ventrem, nervisque sunt inimica.* Quicumque igitur sanitatis suae curam habet, is immoderatum vini usum ceu corruptelam animi & corporis abhorreat, eoque modico, nec excessiva qualitate donato utatur.

§. XXII.

A potulentis ad motus diætam transibimus & considerabimus, quid commodi ex illius convenienti administratione in vitam & sanitatem humanam redundet. Sacra Scriptura motus exercitium, quod fit per laborem, ceu summum à morbis praeservativum agnoscit, uti videre est ex *Ecclesiastic. Cap. XXXI. v. 25.* verba textus ita se habent: *In omnibus operibus tuis esto promptus & ulla infirmitas non obveniet tibi.* Hinc etiam PAULUS II. *Thessal. Cap. III. v. 10.* his, qui nolunt operari, ciborum adsumptionem dissuadet his verbis: *quod si quis non velit operari, neque comedito.* Magnificae etiam praestantissimorum Medicorum hinc inde prostant commendationes motus corporis, qui fit per labores & variis aliis modis. Ex hisce placet allegare HIPPOCRATEM Lib. de *Dieta* §. 1. ubi inquit: *homo edens sanus esse non potest, nisi etiam laboret. Contrarias enim inter se vires habent cibi & labores: verum inter se mixti conferunt ad sanitatem.* SANCTORIUS in *medicina statica* ait: *si homines tempore debito exercitio ac labore uterentur, carere possent multis Medicis ac medicamentis.* Nihil tam idoneum est ad circulum sanguinis promovendum & humores à particulis impuris liberandos, quam motus externus musculorum; siquidem quodcumque muscoli, qui genuina sunt motus instrumenta, pro animae imperio, ope subtilis elastici sanguinis & nervei fluidi vivida ac mobilissima expansione contrahuntur, accidit, ut strictura quadam agilissima, non modo vasa praesertim venosa, ad constrictionem, sicque ad fluidi sanguinis progressum motum expeditiorem amentur, sed & ipso hoc motu attritivo particulae crassiores attenuentur & dividantur. Hoc vero modo intestina motio valde increfcit, flui-

ditas, spiritualescentia, calor augetur, ut adeo transpiratio & superflui humidi evaporatio magno cum corporis levamine perficiatur. Hanc ob causam homines laboribus dediti non modo robustioris & sanioris sunt corporis, sed & vitam longævam ut plurimum degunt. Nemo facile ex iis, qui diligenter laboribus incumbunt, calculi, podagrae, arthritidis, affectionis hypochondriacae, cachexiae, scorbuti, hydropis malum incurret: contra vero, qui desidiae se manciant, vel vitae sedentariae corpus addicunt, frequentissime his morbis patent ac exponuntur, praesertim si genio indulgent & laute vivunt. Hoc enim vivendi more sanguis in vasis accumulatur & ob segniorem perspirationem impuritatem contrahit, spissitudinem lentam acquirit, in visceribus stagnationem subit, eorumque vasa minima opplet & obstruit, sicque dictorum malorum causam praebet foecundissimam. Optime itaque sibi consulunt, qui secundum praceptum Dei *Genes. III. v. 9.* in sudore vultus cibis suis vescuntur.

§. XXIII.

Quemadmodum vero moderatio in cunctis rebus naturae corporis nostri est amicissima: ita motus exercitium, praesertim id, quod per labores fit, non excessivum ac immoderatum, neque continuum, sed moderatum cum alterna quiete interposita sit, necesse est. Utrumque enim horum & motus parcitas, & ejusdem frequentia male afficit corpus, illudque mirum quantum debilitat, dum priori modo excretiones retardantur, posteriori vero plus justo adaugentur. Quare semper, ubi sanitatis scopus nobis propositus est, quies ac motus alternari & se invicem excipere debent. Et haec inter eas rationes, quae Deum permoverant, ut sex in hebdomade dies operibus faciendis destinaret, septimo vero à laboribus omnimodam quietem praeciperet, non infima forte fuerit.

§. XXIV.

Ad somnum & vigiliam quod attinet, non minus his, quam aliis in rebus ad vitam & sanitatem corporis necessariis prudentissimum regimen requiritur. Sacra Scriptura usum somni labore defatigatis vires addere confirmat *Ecclesiastic. cap. V. v. 12.* ubi verba textus ita se habent: *dulcis est somnus illius, qui servit.* Hisce verbis peritissimus morum magister SIRACIDES somnum iis cumprimis, quorum vires per diem laboribus plurimis magna ex parte exhaustae sunt, esse dulcem, id est, vires corporis reficientem adserit. Equidem somnus ad vitae & sanitatis conservationem cuivis homini summe necessarius est: nullus enim homo absque ejus usu diu salvus ac incolumis esse potest. Hic corpori delassato vires collapsas restituit illudque ad consuetos labores subeundos aptius reddit, imo etiam, quod majorem adhuc admirationem meretur, ipsum animum vegetat, eumque ad functiones suas perficiendas alacriorem ac promptiorem efficit.

§. XXV.

Sicuti autem somnus moderatus magnopere conducit corpori nostro & vires refarcit: ita immoderatus damno eidem est, & vires potius imminuit, quippe non modo capitis gravitatem & torporem infert, sed & omnibus partibus corporis languorem inducit, sicque agilitatem menti & corpori subtrahit, quia influxum fluidi subtilissimi & mobilissimi in nervos & solidas partes, quae motum efficiunt, nimium impedit, unde spiritualescentia & fluiditas sanguinis perit, humores spissescunt, incrassantur, & ad chronicos morbos fit dispositio. Hinc ob tantam noxam, quam immoderatus somni usus corpori humano adfert, divinus SALOMO in *Proverb. Cap. VI. v. 4.* nimium somnum dissuadet his verbis: *ne concedito somnum oculis tuis, aut dormitationem palpebris tuis: quod dictum de somno*

somno intemperato omnino intelligendum, cum moderatus nihil vitii habeat, & homini ad vitam & sanitatem sit necessarius.

§. XXVI.

Quod si igitur somnus moderatus ad vitam & sanitatem est accommodatissimus, facile inde consequitur, vigilias, quarum paucis adhuc attingenda consideratio est, immodicas & longius protractas ingentem noxam corpori nostro adferre. Ex nimis enim vigiliis coctio perturbatur, facies pallorem induit, corpus macie conficitur, oculi fiunt concavi cum austero & tristi vultu. Pulcherrimus huc quadrans locus deprehenditur *Ecclesiast. Cap. XXXI. v. 1. vigilie divitiarum causa tabefaciunt carnes*. Ex hisce jam omnibus, quæ de somno ac vigilia paucis commentati sumus, sequens elicitur regula diætetica: nempe sanitati suæ illum optime consulere, qui omnem excessum ac defectum circa somnum evitat, eoque ipso, quantum ad vires refarciendas sufficit, moderate utitur.

§. XXVII.

Hisce ad finem perductis paucula de diæteta circa veneris usum annectere visum fuit. Uti vero venus legitima & moderata nulli culpæ est obnoxia, cum ipsius Dei providentissimum sit institutum, eum in finem, ut genus humanum nova subinde generatione conservaretur & hominum numerus multiplicaretur: ita eadem præposere & immoderate exercita, plurimorum malorum, imo mortis maturioris causa esse potest, quod ex sacra scriptura luculenter satis demonstrabimus. Cum SALOMO in suis *Proverb. Cap. VII. veris coloribus ingenium meretricis impudentissimæ depinxisset*, sapientiæ cultori commercium cum ejusmodi obscœna adultera *v. 25. severe interdicit eam ob causam, quia nempe, ut v. 27. verba se habent, viæ ad sepulchrum sunt viæ ad domum ejus descendentes ad penetralia mortis*. Præterquam enim, quod talis modi facinus sit abominabile coram Deo & poenam mortis æternæ mereatur, nihil etiam magis sanitati corporis infensum est; vires enim destruit & sanguinem spiritualescencia orbat veneris usus immodicus, & substracto sic sero roscido spirituofo, quo semen constat, quod ad robur partium accedere debebat, necesse est, ut vires labefactentur & suo robore priventur membra. Majora vero adhuc mala sunt, quæ ex impuro concubitu corpori accidunt, quod *Ecclesiastic. Cap. XIX. v. 2. satis evidenter docetur, ubi hæc verba leguntur: qui agglutinator scortis, est audax, tinea & vermes hereditario jure possidebunt illum, & arefiet traductus in exemplum infamiæ maximæ*. Hoc loco luis venereæ natura ac indoles non obscure exprimitur; hæc enim in summa humorum, præsertim lymphæ putredine & corporis defœdatione ac contabescencia consistit. conf. *Eccles. Cap. XXXII. v. 21. 22. Nolumus hac in re esse prolixiores. Qui sanitatis curam habet, is monito SYRACIDIS florem ætatis suæ conservabit sanum, nec robur suum meretricibus dabit*.

§. XXVIII.

Restat adhuc magni momenti diætetica regula exponenda, quam *Ecclesiastic. Cap. XXXVII. nobis tradit, ubi vers. 30. & 31. ita dicit: fili, dum vivis, periculum fac animi tui, ac vide quid sit malum, ac ne des illi. Non enim omnia omnibus conferunt*. His verbis divinus SYRACIDES vult, Frid. Hoffmanni Oper. Tom. V.

ut probe nostrum corpus exploremus, quid ipsi in individuo damno vel nocumento sit, à quibus rebus male vel bene se habeat, multum enim differre corpora à corporibus, & his sæpe nocere, quæ aliis prosint ac vicissim. Equidem auctore CELSO & ipsa experientia teste, sanis omnia sunt sana; sed cum naturarum maxima sit diversitas, & unum corpus præ altero robore excellat, hinc alimentorum salubritas atque insalubritas non in genere, more vulgi, sed secundum vires & naturam corporum in specie æstimanda est. Quicumque sanissimum corpus habent, illi non facile ab ulla re offenduntur & cibum copiosorem eumque etiam intemperatiorem ferre possunt; eorum enim ventriculus, sufficienti robore ad illum subigendum instructus est, & sanguinis motu vivido omnia supervacanea debite excernuntur. Ast qui imbecillius habent corpus, à copiosioribus æque ac intemperatioribus alimentis lædantur necesse est, quoniam eorum ventriculus ad digestionem & intimam adsumptorum resolutionem est impar, nec sanguinis motus adeo vividus existit, ut superfluitates debito modo expellere possit. Hoc itaque verissimum est assertum, neque alimenta, neque medicamenta salubria, aut noxia vocari posse per se, & absolute, neque secundum suam insitam virtutem certum effectum semper exferere, sed prout corpus ratione roboris solidorum & viarum ac humorum conditione dispositum inveniunt, tum demum proficuum aut perniciosum effectum edere. Hoc cum ita se habeat, optime sibi consulit isle, cui vita & sanitas curæ cordique est, si corporis sui naturam & peculiarem dispositionem accuratissime inquirat & insuper solerter observet, quænam naturæ suæ amica, quænam inimica sint. Hoc enim pacto, si seligit ad usum, quæ prodesse sapius observavit, & rejicit, quæ nocere & vim naturæ suæ inferre animadvertit, optima & constanti sanitate perfrui poterit. Profecto, si cauta victus ratione uterentur homines, & usu probe explorarent, à quo potu vel cibo se juvari lædive sentirent, in paucissimis, vel planè non Medicorum opera egerent, quoad sani forent.

§. XXIX.

Coronidis loco non possumus non omnibus & singulis, quibus sanitas vitæque longævitas curæ cordique est, sinceram pietatem ceu irrefragabile Diæteticæ hujus nostræ fulcrum etiam atque etiam commendare. Profecto Theologia, quatenus in praxi consistit, nec in nudis tantum speculationibus acquiescit, optimo jure corporis medicina nuncupari potest: adeoque non sine causa etiam naturali in sacro codice probis ac in timore Dei ambulantis vitæ longævitas est promissa, improbis autem & in voluptatum cœno se volutantibus vitæ brevis in poenæ locum indicta. Sic divinus SALOMO de præceptis sapientiæ dicit: *Proverb. Cap. III. v. 2. longitudinem dierum annosamque vitam cum pace adjicient tibi*. Idem *Cap. IX. v. 27. ita fatur: reverentia Jehovæ adjicit dies, anni vero improborum decurtantur*. Conf. *Proverb. Cap. III. v. 16. item Cap. IV. v. 22. Cap. IX. v. 10. 11. Pariter Ecclesiasticus Cap. I. v. 11. hæc verba habet: reverentia Domini deletura est cor & inditura lætitiæ, gaudiumque, & longævitatem*. Divus PAULUS in Epistola priori ad Timotheum: *pietas, inquit, ad omnia utilis est, ut quæ promissionem habeat vitæ præsentis ac futuræ*. Nam quodcumque homo terminum voluptatis suæ Deum constituit, omnes actiones suas ita moderatur, ut mentem sanam conservet

in corpore sano, & hac ratione particeps red-
datur perfectionum hujus & futuræ vitæ. Qui
veræ pietati pectus suum consecravit, ac per pre-
ces ac fidem magnum illud Spiritus Sancti do-
num acquisivit, animo est tranquillo, & omnium
commotionum ab objectis externis vacuo, lætatur
in Domino omni tempore, nec ulla re acerba con-
tristatur, omnis generis maledicta, contumelias
& injurias patienter tolerat, laboribus suis soler-
ter incumbit: cibo, potu, somno aliisque rebus
ad vitam necessariis utitur in conservationem cor-
poris, nec curam habet carnis suæ ad concupis-
centiam. Et hac methodo ingenuus pietatis cul-
tor fructum vitæ longæ ac incolumis optime con-
sequitur. Si experientiam consulimus, plurima
possunt allegari exempla, quod Theologi & pii
viri, ad senectutem grandævam pervenerint vel
sola mentis tranquilla constitutione. Quicun-
que autem à recto pietatis tramite discedunt &
sanctissima vitæ præcepta negligunt, impetu pra-

varum cupiditatum abrepti, nulla in re facile
moderationem admittunt, variis affectuum flu-
ctibus agitantur, & rebus sic dictis non naturali-
bus, quarum rectus usus vitæ ac sanitati amicis-
simus est, nefarie & contra sanam rationem ab-
utuntur: quippe pax & tranquillitas mentis non
est apud improbos; ingluviei dediti sunt, pota-
tiones sæpius in seram usque noctem protrahunt,
somnia indulgent & Baccho ac Veneri tan-
tum non assiduo litant. Et isthoc vivendi more
insanum hocce hominum genus complures mor-
bosas sibi accersit motiones & vitæ filum, quod
naturæ ordine ac cursu longius potuisset produ-
cere, temerè ac in optimo sæpe ætatis flore ab-
rumpit. Quicunque igitur sanam ac longam
vitam magni æstimat, is totis animi viribus eo
annitatur oportet, ut in possessionem divinæ gra-
tiæ perveniat, qua duce & cooperatrice à viis
salutis æque terrenæ ac cœlestis nunquam aber-
rabimus.



D E

PROLONGANDA LITTERATORUM VITA PER REGULAS DIÆTETICAS.

I. N. I.

CAPUT PRIMUM.

QUICUNQUE viam asperam arduamque & longam ingreditur, quæ ad
excelsum sapientiæ, (A) & musarum templum assiduo labore (B) per-
ducit: inter alios hujus viæ ac itineris duces fidosque comites, aliaque ne-
cessaria adminicula (C) etiam Medico peritissimo (D) indigere videtur. Mi-
sertus sæpius sum sortem laboriosissimam illorum, qui sacris Minervæ ope-
rantur & difficili assiduoque labore, magnaue intemperie studia tractant,
salutaribus autem Medici præceptis destituti, gravissimam labem corpori in-
genioque afferunt, ac irreparabile damnum viribus suis inducunt. Peccari
hic solet ferme toto die, dum litterati diætæ sive prudentis vivendi rationis
ignari

Quid vera
sapientia?

(A) Sapientia est divinarum humanarumque
rerum scientia. Divinam definit S. Scriptura,
quod sit vapor potentiæ divinæ, emanatio sin-
cera omnipotentis gloriæ & splendor sempiterni
luminis. Hæc unica veritas est & vera sapien-
tia, quæ non solet fallere. ORIGENES *contra Cel-
sum* p. 154. Humana comprehenditur Philoso-
phia morali, disciplinis mathematicis, & exqui-
sita rerum naturalium scientia.

(B) *δύσκολα τὰ καλὰ*, ardua quæ pulchra. Ar-
boris scientiæ radix amara, fructus vero dulcis-
simi. Philosophus.

Quinam
præceptor
optimus?

(C) Videlicet optimam indolem, locum ad stu-
dia aptum, institutionem fidelem, præceptorem
probatissimum. PLUTARCHO in libro de liberis
educandis hic probatissimus est, qui simul & dice-
re & facere solet. Hinc Divus GREGORIUS: aut
non doce, aut vita ac re ipsa doce, ne una qui-
dem trahas, altera vero manu retrahas. QUINTI-
LIANUS istum probatissimum arbitratur, qui suo-
rum discipulorum proventum proprium æstimat,
quem laboris studium non fatigat, qui interro-
ganti discipulo non tædiose respondet, bonos lau-

dare non cessat, medios leviter increpat, & du-
ros à studendi proposito non deterret.

(D) Hunc peritissimum dicimus, qui acce-
dente fortuna, nihil sine ratione, nihil sine con-
silio circa suos ægros agit. HOMERUS talem cæ-
teris antefendum arbitratur *lib. Iliados*; item
CELSUS, qui vitam, non cædem, molitur. TYRIUS
autem Platonicus hunc commendat, qui & per
philosophiæ præcepta animi pathemata feliciter
sanat, & corporis male habentis affectus herbu-
lis quibusdam ratione observata tollit. PINDARUS
cum exposuisset, *Æsculapium Chironi* in disci-
plinam esse traditum, ut ab eo medendi scien-
tiam disceret atque ad *Æsculapium* postea con-
venire & concurrere solitos, qui aut morbis affe-
cti, aut ulcerosi aut faucii essent, subjungit ad
extremum, eam fuisse in *Æsculapio* artis præ-
stantiam, ut quotquot ad se venirent ægri aut
debiles aut vulnerati, omnes malis ac laboribus
levatos abs se dimitteret, alios carminibus cu-
rans, alios potionibus, alios pharmacis & me-
dicamentis forinsecus admotis, alios adhibita se-
ctione.

Medicus
non solum
per medi-
camenta
sed & phi-
losophiam
sanare de-
bet.

(E) Fami-

ignari & incuriosi maximo fervore museis ac libris affixi studia urgent, debitumque robur corpori ingenioque, consumtis spiritibus, suffurando, in sævissimos & satis diuturnos morbos (E) incidunt, vel præmatura morte fatalem diem sibi accersunt. Felicius ille procedit, qui rationem sanitatis & animi habendo (F) in studiis vires conservat, vires quæ non paucæ requiruntur ad animæ functiones, & hoc modo vitam longam & sanam, quæ ad mentis sanitatem, (qua sola sapientia comprehenditur) (G) necessaria est, consequitur. Quapropter, ut eruditus & litterarum amore flagrans non modo salvis studiis sanum corpus, in eoque sanam conservet mentem; (H) verum etiam majores in studiis sentiat profectus, non inutile vel vanum erit, brevi labore compendioque præcepta litteratis potissimum commendare, quibus sanitatem ac vitam tueri, atque corporis animique vigori prospicere queant. Agite itaque, florentissimi juvenes, & omnes quos ardentius Minervæ studium nimium enervat, legite hæc solertius, atque curate valetudinem diligentissime. Sublata enim sanitate, sublimes Musarum fores, nisi DEUS omnipotens mira quadam virtute patefaciat, aut non tanguntur à nobis unquam, aut certe frustra pulsantur. Amicabilis autem sanitatis cum eruditione mixtura atque conjunctio est. Diligenti experimento atque observatione constat, Medicorum cura non solum eruditos natura validos, sed etiam valetudinarios vitam longam aliquando consecutos. *Herodicum* quendam litterarum studiosum omnium sui temporis infirmissimum Medici providentia annum centesimum implevisse PLATO & ARISTOTELES prodiderunt. PLUTARCHUS narrat, multos corpore alioquin parum firmo vitam sola diligentia longam consecutos. Mitto in præsentia multa, quæ nobis nota sunt exempla. Instituta vero hæc ad vitam longam ducentia, non inertibus ignavisque proponimus: Cur enim cupiamus istos diu vivere? Nec hominibus, perdita voluptatum libidine dissolutis, qui brevem quotidie voluptatem longæ stulti præponunt, nec improbis iniquisque patefacimus, quorum vita mors est bonorum; sed duntaxat tradimus hæc prudentibus, atque temperatis solertis ingenii hominibus, humano generi vel privatim vel publice profuturis.

C A P U T II.

Quemadmodum cursores crurum, athletæ brachiorum, musici vocis exquisitam curam gerere atque habere solent: pari ratione, qui ad sapientiam & doctrinam adspirat, cerebri (A) quod principale animæ habitaculum & sapientiæ sedes est, rationem habere debet exactissime. * Solers quilibet artifex instrumenta sua perquam diligenter curat; peniculus pictor, malleos incudesque faber, miles equos & arma, venator canes, & sua quisque similiter. Soli vero Musarum sacerdotes, soli summi boni veritatisque indagatores tam negligenter prohi dolor! instrumentum illud quo mundum & universas scientias quodammodo metiri & capere possunt, colunt atque percurant. Instrumentum illud tenuissimum, machinæ fluidum cerebrique ac nervorum

Litterati animæ instrumentum cerebri bene curent.

(E) Familiarissimus eruditus affectus est ex vita sedentaria & nimia mentis agitatione hypochondriacus, quem vere omnium malorum compendium dixeris.

(F) *Thales* ut refert LAERTIUS cum interrogaretur, quis esset felix dicendus? respondit: Qui corpore sanus est, animo autem eruditus.

(G) Ad artem scientiamque perfectam non tam vel docilitas ingenii, vel memoriæ firmitas quam prudentis judicii alacritas nos perducit. Judicium vero propter ambiguitatem ex conjecturarum diversitate conceptum adeo difficile est, ut experimento sit necessario confirmandum. Experimentum quoque fallax, tum propter judicii ipsius difficultatem, tum ob fugacem opportuni in experimento captando temporis breviteratem. Quibus sane de causis artem esse longam, una cum HIP-

POCRATE recte concludimus: nec posse nos eam nisi vitæ longitudine consequi. Vitam vero longam præter fata medica etiam diligentia præstat. vid. MARS. FICINUS, Lib. II. de vit. long. cap. I.

(H) HORATIUS: Optandum, ut sit mens sana in corpore sano. SENECA *Ep.* 10. Roga bonam mentem, bonam valetudinem animi, deinde corporis.

A) Cerebri, quod motum & sensum homini conciliat, præstantiam tantam Platonici crediderunt, ut veriti non sint, cerebrum nostræ animæ habitaculum principale nominare, & propter memoriam sapientiæ sedem. Ex quo tandem colligitur de *Pallade* sapientiæ & armorum Dea, summa ratione Veteres dixisse, eam ex Jovis cerebro enatam esse.

Cerebrum animæ sedes est.

* Vid. *Marsilius Ficinus de valetud. Studios.*

Qualis
spiritus a-
nimalis in
cerebro,
talis &
ratio.

vorum incolens est, quod animalis spiritus nomine à Medicis donatur, vapor sanguinis subtilis, purissimus, quo anima tanquam instrumento idoneo ad suas functiones, motus & sensationes in corpore exercendas jugiter utitur; adeoque qualis hic spiritus, tales & sensus ingeniique vires, talis & ratio esse solet. (B) Miranda enim ex animæ corporisque unione commercii oritur affinitas, & utriusque vitia invicem facile communicantur, & transeunt. Seneſcit protinus animæ virtus, ubi corpus vacillat & succumbit; & corpus quoque detrimentum accipit, quando animus in præceps rapitur ab affectibus. Adeo mutua necessitudo animæ ac corporis ex æquo dispensat commoda & incommoda sua. Quo circa qui nobile, & ad sublimitates rerum capiendas aptum sibi conciliare instituit ingenium, imprimis curet, ut spiritum ingeneret sanguini ac corpori benignum, purum atque temperatum, diligentissime observet ea, quæ natura sua talem procreare apta sunt. Ex hisce principatum obtinet purus, liquidus, & imperturbatus aër; hic enim præcipuum & superius, spiritus, qui præest corpori nostro, elementum ac pabulum est, ut qualis aër, talis quoque spiritus esse soleat. (C) Græci aërem appellarunt spiritum vitalem (D) per cuncta rerum meabilem totoque confertum. Quam ob causam loca quæ inhabitamus, (E) quo puriore, serenior (F) ac temperatior aëre gaudent foventurque, & à gravi nubiloque cœlo magis remota sunt, hoc salubriora judicantur. Aër ingenii favet (G) maxime temperatus, & hic quoque studiis apprimè utilis. Nimis calidus spiritus dissolvit, densus, (H) & caliginosus, itemque gelidus corpus premit, & humores coarctat, ac spiritus minus serenos ingignit. Quo circa improbamus pro studioſis musea nimis calefacta, vel etiam nimis frigida, nec non quæ denso & humido aëre ac peregrino vapore (I) stipata sunt. Ante omnia hieme cavendum est, ne infernum frigus in cerebrum (K) ac nervos penetret, quod ingenio mirum nocet. Actio & operatio iudicii ingeniique optimo gaudet successu, quando suscipitur sub cœli aërisque temperie. Temperatus calor temperaturam addit sanguini & humoribus, spiritus animales in æquilibrio motus servat, & singularem inducit partibus alacritatem; & ob id, si verum fateri volu-

Aër tem-
peratus in-
geniis
commen-
datur.

Actiones
animæ ac
corporis
magnum
inter se ha-
bent com-
mercium.

(B) Mirabile est commercium animæ atque corporis, adeo ut etiam unius in alterum vis ac impetus mutuaque communicatio perspectissima sit. Quo purior sanguinis vitalis tinctura est, quo mixtura elementorum ejus magis congrua, eò major ingenii promptitudo enitet, & vice versa, quo lentior ad motum sanguis est, & fixiores spiritus, eò tardius ingenium apparet. Pituitosos ignavum ac iners possidere notissimum; Ebriorum inordinatas actiones, calido in venas abeunti vino deberi, indubium; Et quantum detrimenti corpus capiat, si à sævis affectibus animus in præceps rapitur, haud ignotum esse existimo.

Aër spiri-
tus anima-
lis proxi-
ma mate-
ria.

(C) HIPPOCRATES lib. de morbo sacro inquit, cap. 8. tit. 12. ὁ ἡγρὴ τὴν φρόνησιν καὶ τὴν κίνησιν τοῖσι μέλεσι παρέχει. Aër sensum & motum exhibet membris. Per aërem intelligit spiritum animale, quia naturæ subtilis & aër est, facta in cerebro majori alkoholisatione.

Quanam
sit optima
habitatio.

(D) HIPPOCRATES passim v. 9. lib. de morbo sacro t. 24. c. 6. πνεῦμα vocat spiritum animale, quo nomine etiam aërem donat, quod PROSPER MARTIANUS comment. in hunc librum latius confirmat.

(E) Ubi ædes hominum aëri sereno, claro, puro & malignis omnibus exhalationibus caventi expositæ fuerunt: ibi vita hominum diu conservatur. vid. QUERCETAN. diætet. p. 145. CELSUS. Habitare in ædificio lucido perflatum æstivum, hybernium solem habente; cavere solem meridiano, matutinum & vespertinum frigus: auræ stagnorum ac fluminum, minimeque nubilo se committere cœlo, & dormire in loco non humido, sed temperato & perflabili, optimum est.

(F) Solebant Veteres, maxime senes, in sole etiam nudi ambulare, ex quo spirituale nutrimentum sibi attraherent. vid. PLATO in Phædone. Hinc PLINIUS Lib. III. ep. 10. de avunculo: post cibum æstate si quid otii jacebat in sole. Gravioris ætatis hæc recreatio erat nativo calore jam sensim decrescente. Hinc HORATIUS senile corpus, aut senili simile solibus aptum dixit. Ep. 20. v. 24.

Veteres se-
nes ambu-
lant in
sole.

(G) Aër subtilis procreat spiritus corporis subtiles & temperatos ad mentis regimen accommodatissimos. Tenue Athenis cœlum acutiores Atticos effecisse, crassum autem Thebis pingues Thebanos & valentes memoriæ prodidit. CIC. lib. de fato.

Qualis
aër, tale
hominum
ingenium.

(H) Thraces ob crassum regionis quam incolunt aërem crassum itidem habent cerebrum. Obliviosi enim plane sunt desides & torpescerent. Guido Bituric. ex Herodot. Bœoti ob aëris impuritatem crassis ingeniis præditi fuerunt: unde HORATIUS: Bœotum crasso juraris in aëre natum.

(I) Cavendum maxime tempore hyemali, ne aër in hypocausto fumis candelarum nimium inquinatus intro subeat pulmones, & spiritus atque humores inficiat. Peropportune tali in casu præstat tubo è laminis ferreis confecto per fenestram noxium vaporem educere.

Aër vapo-
ribus stipa-
tus nocet.

(K) Imago Hippocratis pileata ab antiquis celebratur, ut inde admonerentur homines, eam partem maxime custodiendam esse, in qua tanquam in domicilio princeps animus resideret, totaque intelligendi vis collocata esset. Caput, stomachus, ac pedes ante omnia defendendi à frigore sunt.

Cur caput
à frigore
defenden-
dum?

L) Orien-

volumus, vernale tempus literatis ac studiis accommodatissimum, quoniam temperatum. Quando arbores foliis se induunt, brachiaque floribus ornant fragrantibus, ingenia etiam vires ac robur acquirunt, & fructus proferunt exoptatissimos; & sicuti tunc temporis omnia vigent ac florent: ita quoque ingenii vigor summus. Præterea, cum maxima pars eruditionis consistat in meditatione, inque hanc non pauci impendantur spiritus: ideo vernum tempus ceu optimum subtiliori speculationi, & altioribus ingenii actionibus commodissimum censemus. Æstivum ad experimenta facienda, & ad illa, quæ didicimus applicanda; hyemale autem ad ratiocinia in ordinem redigenda haud inconsulto commendamus. Quantum incommodi aër intemperatus, vel peregrino vapore refertus, ingenio afferat, dici vix potest. Multiplici compertum est experientia, certo anni vel etiam diei tempore mentis actiones longe alacriores esse, speculationes longe floridiores concinnari quam alio, cujus causam haud injuriâ rejicimus præcipue, nisi alia notior subsit, in aëris dispositionem. Quando sol non amplius illustrat horizontem, nec amplius radiis suis implet illum, & aër crassus, densus, gravis & frigidus est, pigrum corpus, & animus ad speculandum inidoneus redditur. Proinde nihil magis ingenii nocet, quam tempore nocturno studiis invigilare, & contemplationes longas & difficiles adornare, utpote spiritus in corpore tunc pauci retrahuntur etiam ad caput, ut sic distracti, neque stomacho satis, neque capiti faciant. Merito ergo, qui nocte contra naturam pro die, atque contra die rursus pro nocte utuntur, vel inviti noctuas imitantur, ut quemadmodum sub solis lumine caligant oculi: ita & in illis mentis acies sub veritatis splendore caliget. Accedit, quod fatigatione diuturna spiritus iique subtilissimi resolvantur, nocte autem pauci crassique supersint, cogitationibus ac rerum ideis disponendis ineptissimi. Qua de causa matutinum tempus (L) quando aër calore temperatus est, nec tam fortiter movetur vel agitur, studiis gratissimum pronunciamus; aurora quippe Musis amica. (M) Etenim aër subtilis extenuatus ad similem naturam sanguinem & spiritus compellit. Adde, quod sol radiis suis hemisphærium nostrum incedens meatus corporis aperiat, atque à centro ad circumferentiam humores spiritusque moveat, quod ad vigiliam actionesque multum excitat & conducit. Præterea matutino tempore post somnum spiritibus recreatis, membrisque corroboratis multi tennesque spiritus adsunt, qui cerebro serviant, atque expeditius obsequi possint, in membris fovendis regendisque parum admodum occupati. Quamobrem scite ARISTOTELES in œconomicis monet: ante lucem surgendum, (N) asseritque id corporis sanitatem & ad philosophiæ studia, addimus & preces fundendas (O) prodesse quam plurimum. Hinc ruricolæ præ aliis sanitate firmiore gaudent, quippe qui in aurora surgentes claram & fragrantem auroram hauriunt. Consentit & ipse rerum ordo, dies enim vigiliæ, nox somno tributa est. (P)

Vernum tempus studiis accommodatissimum.

Quare non est animus ad speculandum est inidoneus?

Quare tempus matutinum studiis gratum sit?

Quare ruricola firmitiore gaudent sanitate?

C A P U T III.

Præterea quicumque spiritum animale purum subtilem, ingenii functionibus aptum, ingenerare corpori cupit, ante omnia & benignum, laudabilem, & temperatum sanguinem sibi comparet, necesse est. Ad hujus autem

L) Oriente sole movetur aër, tenuaturque & claret; occidente vero contra. Sanguis autem & spiritus motum qualitatemque aëris circumfusi naturaque similis sequi necessario debet.

M) In aurora movetur sanguis motuque tenuatur maxime post mediam noctem hora secunda & tertia; (quare Veteres tunc temporis studebant & studiis invigilabant) spiritus vero sanguinem sequi imitarique solet. Verum accedente nocte, melancholia crassior & frigidior atque pituita dominatur, quæ spiritus ad speculandum ineptissimos reddit. Vid. MARSIL. FICIN. de stud. valed. c. 7. ERASMUS musis auro-

Frid. Hoffmanni Oper. Tom. V.

ram sacram dixit.

N) Sed hoc ita accipiendum est, ut cita & modica coena matutinam cruditatem diligentissime devitemus.

O) Sacer ille vates David nunquam dixit vespere, sed mane semper atque diluculo in DEUM suum canendum, se cithara psalmisque, surgere. Quidem mentē ea hora omnino debemus, mox etiam corpore, si modo commode id fieri possit.

P) Et ita sentit HIPPOCRATES 2. Prognost. c. 11. quando inquit: somnus naturalis non effugiat noctem, & non impedit diem.

Sanguinis
tempera-
tura ad
pruden-
tiam mul-
tum con-
fert.
Per diæ-
tam & me-
dicinam
homo po-
test reddi
sapientior.

Eruditi-
bis tene-
rioribus
opus ha-
bent.

Quinam
cibi profint
mentis ac-
tionibus?

Pro diver-
sitate ali-
mentorum
differunt
ingenia.

Cur victus
crassus im-
becillibus
& quietis
noceat?

autem generationem maximum momentum affert diæta, & usus re-
rum, quæ à Medicis appellantur non naturales, quæ sanguinem va-
rio modo afficiunt & alterant, qui quo purior & temperatior, eo sub-
tilior spiritus, ingenii sublimis fœtura exsurgit. Sapientissime hanc in rem
scribit HIPPOCRATES *lib. de Flatibus*, ex iis quæ corpori insunt, nihil
magis ad prudentiam confert, quam sanguis. Hic ergo cum consistenti ha-
bitu persistit, prudentia etiam constat; sanguine vero permutato, concidit
simul prudentia. Nemo itaque ibit inficias, in temperamentum redacta ex-
cessiva sanguinis qualitate, sive per medicinam, sive diætam (A) menti sic
sapientiam reddi. Pulchra sunt, quæ hanc in rem scribit CARTESIUS *diss. d.*
methodo S. 6. §. 2. dum inquit: Animus adeo à temperamento & organo-
rum corporis dispositione pendet, ut si ratio aliqua possit inveniri, quæ
homines sapientiores & ingeniosiores reddat, quam hætenus fuerunt, credo
in medicina illam quæri debere. Ut autem ad rem propius accedamus: in
medium conferre ea volumus, quæ natura sua apta sunt procreare laudabi-
lem sanguinem. Primum eruditi, quoniam spirituum copia & subtilitate egent
ad legitime exercendas functiones mentis, cibis paulo tenerioribus (B) po-
tuque meliori opus habent, quam plebei, qui minus cerebro laborant; quan-
doquidem labores animi ac meditationes spiritus exhauriunt, & ideo illi non
contenti esse possunt victu atque potu plebeiorum, qui labore ac motu talem
corrigunt: litterati autem propter sedentariam vitam (C) cui plurimum in-
dulgent, non satis subigere & digerere talia possunt. Quapropter doctis &
tranquillitatem sectantibus non facile durata, salita atque viscosa concedenda
sunt, ut quibus excoquendis tenerum molliculumque fermentum sufficere
non possit, nisi ubi consuetudo (D) aliud imperet. Namque & in hisce
reperies, qui generosum ventriculi menstruum nacti duriora etiam & dyspepta
admittant. Ex cibis autem, qui caliginem menti obfundunt, studiisque no-
cent, crassum proferendo sanguinem & spiritus, (E) atro carbone notandi
sunt crassæ, compactæque substantiæ, pisces complures, omnia leguminosa,
uti pisa, fabæ, (F) milium, similiter olera, carnes vetustiores non probe co-
ctæ.

A) Rectissime *lib. de diæta sect. 32*. HIPPOCRATES concludit: Et sane hoc faciens, i. e. tali diæta & medicamentis utens sanior & sapientior anima fuit; & *ibid. sect. 33. §. 33*. Potest ex diæta & melior & deterior anima fieri.

B) Pro diversitate alimentorum diversus generatur sanguis. Crassus provenit ex cibis viscosis tenacibus sale fixo scatentibus. Subtilior, mobilior ex cibis tenerioribus, subtilioribus. Belgæ cum utantur cibis sale conditis, aut fumo induratis, piscibus salitis, leguminibus, lacticiiniis, caseo, crassum fovant sanguinem, à cujus crassitie tardior motus, & illorum morbi chronici proveniunt. Ex adverso Galli vescuntur cibis tenuioribus, pullis, caponibus, avibus, columbis, jusculis delicatis, carnibus vervecinis, quæ in Languedocia & Delphinatu optimi sunt saporis, quoniam oves dictis in regionibus herbis aromaticis, lavendula, rosinarino, thymo, majorana iponte provenientibus vescuntur. Quapropter sanguinem mobiliorem habent, & morbos patiuntur ex ejus resolutione, tenuitate, concitatio-
reque motu potissimum nascentes. Quin imo Galli corporis & membrorum agilitate mentisque calliditate frigidiorum regionum incolæ magnis parasangis exsuperant. Pulchre docet *Philosophus lib. 1. polit. 3*. Victus alimentique diversitatem diversas ac dispares hominum vitas efficere. Curiosum est lectu in historiis, sarcophagos longe magis delectari carne Gallorum, Italicorum, quam Danorum, Belgarum, ceu crassiore & crudiore.

C) Motus calorem partibus intimis quasi sopitum & torpescientem excitat, diffundit foras, in ventriculum evocat, unde concoctionem, alimenti distributionem, excrementorum omnium su-

pervacaneorum expulsionem juvat. Victus crassus tutus est illis personis, quæ imbecilles sunt, quiete ac otio nec laboribus assuetæ. Sapienter HIPPOCRATES in *lib. de Med. prisc. sect. 1. p. 3*. scribit: valentiora alimenta hoc habent, quod à natura superentur, nutrant egregie, si non dolores & morbos frigidos producant. Et CELSUS dicit *pag. 106*. valentiora minus facile concoqui, sed si concocta sint, plus alere. Labore itaque & motu hic opus est.

D) Semper aliquid concedendum consuetudini in sanitatis conservatione, ut monet HIPPOCRATES *sect. I. aphor. 17. Sect. II. aph. 50*. consuetudo multo tempore, nisi deteriora fuerint, incon-
suetis minus molestare solent.

E) Crassos spiritus & humores similisque naturæ excrementa proferunt cibi atque potus crassæ compactæque substantiæ, ut panis azy-
mus, bubula caro, majorumque animantium & piscium esus, vinum crassum ac rubrum; tenues vero gignunt alimenta & medicamenta extenuantia, potusque tenuis & liberalior. FERNEL. *lib. 1. c. 20*.

F) Pythagoræi à fabis abstinebant. Testatur hoc TULLIUS *lib. 11. de divinatione* hunc in modum scribens: Jubet igitur PLATO sic ad somnum proficisci corporibus affectis, ut nihil sit, quod errorem animis perturbationemque afferat. Ex quo etiam Pythagoræis interdictum putatur, ne faba vescerentur, quæ res habet inflationem magnam, tranquillitati mentis quærentis vera contrariam. Idem testatur PLUTARCHUS in *Problematis*, causamque addit: quod omnia legumina ventum & humorem impurum afferant corporibus, atque hanc ob causam ad venerem incitent.

Quare Pythagoræi abstinebant à fabis?

etæ. Perutile quoque est glutinosa, pultes ex farina tritici confectos (G) dulcia (H) & quæ facile putrescere solent, item nimium usum casei, acidorum, allii, ceparum devitare. Laudamus magis victum tenuem, vel medium, cibos simplices (I) facilisque digestionis (K) boni succi & conditos cinnamomo, nuce moschata, (L) cardamomo, croco, majorana, item juscula ex bonis carnibus parata; tempore æstivo lac, ova, illorum vitellos, cremorem lactis, modicam carnem animalium juniorum, & quæ sunt ejusdem generis alia. Ex potulentis nocent cerevisiæ crassæ, nimium lupulatae, quæ ingeniis nocent, dum vaporibus replent caput. Magis probantur pro studiosorum sanitate tuenda temperatae bene coctæ, ex levi & subtiliori aqua (M) confectæ, & quæ tam palato, quam ventriculo gratæ acceptæque sunt, & urinam promovendi virtute pollent eximia.

Laudatur
victus te-
nuis &
facilis di-
gestionis.

Quoniam
cerevisia
optimæ

C A P U T IV.

Non inutilis quæstio oritur, an potus aquæ apprime litteratis conveniens sit? Cui respondemus, proflare exempla, ubi viri eruditi ab ordinario aquæ potu nullum sanitatis aut ingenii damnum deportarunt, quin imo ad longissimam vitam (A) pervenerunt. Nihilo secius non promiscue omnibus individuis quadrat, maxime in regionibus nostris, quæ propter frigiditatem aquas bonas ac tenues non admittunt: quarum signum est, si cito descendunt ex hypochondriis, pinguedinem in animalibus albam, hepata rubra efficiunt, & renes absque lapillis præservant. Cholerici qui ingenio ac spiritibus exsuperant, & humores acres ac biliosos in venis alunt, aquam bene ferre possunt. Læduntur autem ab ipsa pituitosi, & qui viscosum habent minus perspirabilem tardiorisque motus sanguinem. Cæterum potus aquæ calidus, qui etiam Priscis in deliciis fuit (B) à multis gravissimis morbis præ-

An potio
aquæ uti-
lis, &
quibus?

G) GALENUS lib. de Alimentorum facultat. historiam notabilem refert de noxa pultis ex farina tritici, ubi semper gravitatem & dolorem ventris induxit.

H) Saccharata & dulcia uti omnibus nocentissima sunt, sic & litteratis sanguinem reddunt viscosum & crassum, & acidum primarum viarum magis exacuunt, & tonum ventriculi & intestinorum destruunt, ad flatulentias, præsertim hypochondriacas disponunt. Adde quod intemperies sanguinis à dulcibus introducta, difficulter à remediis corrigatur.

Dulcia se in bilem vertent, stomachoque tumulum

Lenta feret pituita----

HORATIUS Satyr. 2. l. 2.

I) Cibus simplex homini est utilissimus. SENECA l. I. ep. 90. multos morbos multa fercula fecerunt, & simplex ex simplici causa valetudo. Innumerabiles esse morbos miraris? coquos numerosa inquit idem l. 7. ARISTOTELES probl. cibus varius morbosus, turbulentus enim est, neque etiam omnibus una concoctio. Et confer. HORATII Satyr. 2. l. 2.

K) PLINIUS de avunculo suo scribit, ipsum sumfisse cibum interdum levem & facilem more Veterum. Coena ante omnia parca sit. Platonica coena laudatur, quia non solum in præsentis, sed & postero diè jucunda fuit. TULL. Tuscul. V. it. ATHEN. l. X.

L) Hæc blando subtili oleo pollent, spiritibus valde amico. Commode quoque eruditi ad actiones mentis facilitandas, digestionem juvandam, & ad spiritus recreandos inter cibos uti possunt sale volatili oleoso cinnamomifato, vel cum oleo cardamomi essentificato & maritato cum essentia ambrae: hoc balsamica vi à pluri-

mis morbis præservat.

M) Aquæ bonæ characteres sunt, si omni sapore ac odore caret, pellucida, levis est, post evaporationem parum crassamenti relinquit, sitim sedat, promte incalescit, hyeme calida est, æstate gelida, & qua legumina facile & cito percoquantur. Corrigitur aqua, si bis vel sex per arenam coletur aut coquatur, vel pauca guttulæ spiritus aromatici instillantur, aut vino misceatur.

A) Primævi homines ante diluvium præter aquam nihil aliud biberunt, & ad extremam senectutem sani robustique degerunt. Petebant illam ex fluviiis & eo nomine fontes quarere solebant, uti constat ex Gen. c. 26. Priscis aquæ potum, ac primævis usitatum indicat TIBULLUS l. 2. eleg. 3. ita canens: glans alat & prisco more bibantur aquæ.

Præstantis
aquæ cha-
racteres,
& quomo-
do pravæ
corrigen-
dæ?

Potus
aquæ pri-
scis fami-
liaris, nec
ingeniis
nocet, sed
longævus
efficit ho-
mines.

CLAUDIUS DEODATUS in Panth. Hygiastic. l. 2. c. 12. potum aquæ salubrem pronunciat, eaque Patriarchas usque ad Noæ tempora post diluvium usos fuisse ostendit. Brachmanni longævi erant, quia abstinebant ab esu carniū & vino, dum nullum ferme animal, quod carne vescitur, longævum est, sed ipsi utebantur cibo simplici, vegetabili & aqua. Nec nocet aquæ potio ingeniis. DEMOSTHENEM abstemium fuisse prodiderunt. Cujus exemplo & argumento eos acrioribus ingeniis homines pronunciant, qui aqua, vino autem non utuntur. vid. CÆLIUS RHODIGI-
NUS l. 28. c. 36.

B) Et Græci & Romani usi fuerunt potu calido. vid. ATHENÆUS Deipnosoph. l. 3. c. 34. Innuere hoc quoque videtur HORATIUS lib. 3. od. 19. quarens:

---- quis aquam temperet ignibus.

Et cum ipso JUVENALIS: Quando vocatus ad-
est calidæ gelidæque minister?

284 Cap. IV. De prolonganda litteratorum vita &c.

Calidus
aqua potus
cur tanti
effectus sit
in praefer-
vandis
morbis?

Prodest se-
nibus &
imbecillis.

Non deter-
rior inge-
niorum pe-
stis est ipsa
ebrietas.

Nimius
nicotiana
usus etiam
nocet litte-
ratis.

Sufficien-
ter tamen
biben-
dum.

Quare in-
fusa indi-
genarum
herbarum
praestent
spiritibus?

Veteres
calidam a-
quam mis-
cebant
cum vino.

Aqua po-
tio in po-
dagra
laudatur.

Vinum in-
geniosos
reddit.

præservat, maxime si correctus fuit virtute herbarum balsamica, (C) vel etiam vini mixtura, (D) convenientissimus est uti omnibus individuis, sic quoque eruditis, dum sanitatem conservat. (E) Quandoquidem ipse tenuitatem sanguini & humoribus foenerat, illorumque perspirationem, circulationem, nec non depurationem egregie promovet, ut sic spiritus & subtiliores & copiosiores procreentur, ad vigilias & mentis functiones conducentes, quo nomine inter eruditos celebratissimus est potus theæ. Quod vini usum attinet, circumcidendus ille est, maxime juvenibus: equidem paulo largiori copia mentem & vitam vegetiorem & alacriorem, (F) sed tamen hanc brevior efficit. Concedendum id ipsum, si bonæ notæ sit, provectioris ætatis hominibus, & qui laborant ventriculo debili; (G) qui flatus, ructus, dolores ventris tensivos, & somnum inquietum accersit. Vinum autem stomachum languentem confortat, vitia ejus corrigit, placidum conciliat somnum, & spiritus progenerat ad actiones subeundas satis utiles. Ubi tamen generatim tenendum est, non deteriore ingeniorum esse pestem (H) ipsa ebrietate sive ex vino sive ex cerevisia. Potus omnes inebriantes, intemperantius, maxime circa tempus nocturnum (I) hausti, vaporibus pessimis implent cerebrum, & suscitato calore sanguinis texturam laxant, arteriolarum poros aperiunt, ut impuræ & crassiores sanguinis partes promptius cerebri subeant tubulos angustissimos, unde gravitas & dolor capitis, torpor, lassitudo corporis oboritur, ingenii vigor minuitur, catarrhis via panditur, & filum vitæ præscinditur, quod tristissimo spectaculo (K) experiuntur præcipue juvenes, qui antequam corpus satis firmum ac stabile nacti sint, mero se obruunt. Spectat huc quoque abusus nicotianæ, cujus fumum interponunt compotationibus sæpius per noctem, quod pessimum; utpote narcotica sua vi spiritus figit, concoctionem turbat & mentis actionem pervertit; cum alias usus moderatus & circumspectus puitosis, & in aëre crasso degentibus bonum medicamentum sit. At vero, nec hic dissimulare possumus, rursus peccari frequentius à litteratis, in defectu potus (L) dum non sufficiens assumunt liquidum. Eget enim copioso humido sanguis, quo fluidus conservatur, circulatur, & ad sequestrationem heterogenearum, simul homogenearum partium unionem aptus redditur; dum ex adverso defectus humidi excretiones sordium retardet, alvum exsiccat, serum sanguinis red-
dat

C) OLAUS BORRICHIVS *de usu plantar. indigenar.* harum infusa calide bibita mirifice laudat, ut spiritibus earundem longe præferat, dum hi vim faciunt corpori nostro, illa autem moderate agunt.

D) Veteres Romani & Græci calidam aquam cum vino miscebant, quorum exempla imitati fuerunt Anton. Persius & Galli, quorum meminit BRUYERINUS. l. c.

E) Dum humores pravos, falsos diluit, & è corporis sphaera per sudoris & urinæ vias educit, graves & difficiles morbos continuato & frequenti usu persanat. In podagra usum aquæ simplicis loco vini magnificum ac pene divinum præsidium vocat BRUYERINUS *de re cibaria* l. 16. c. 13. Confirmat hoc l. 12. c. 2. Medici Veneti exemplo, qui ad senium usque correptus podagra vinum dum biberat, liber dein & dolorum expers ad ultimum senium fuit, aquam cum biberet. Confer exempla eorum, qui ad extremam pauperiem redacti & in carceres coniecti, aqua pro vino bibere cogebantur apud SCHENCK. lib. 1. obs. Præsertim contra catarrhos præsidium est utilissimum. vid. BARTHOL. PASQUET. lib. 2. destill. cap. 4.

F) Vinum optimum medicamentum mentis dixit ORIBASIVS, & PLATO in Phædone: Vinum animum cum corpore calefacit. Hanc ob causam ingeniosi & Poëtæ omni tempore vini usum maximi fecere, unde etiam caballus Poëtarum appellatur. Qua de re eleganter TAUBMANNUS in chelodæsia. Hujus sententiæ favorem addit HORA-

TIUS Ep.

*Nulla placere diu nec vivere carmina possunt
Quæ scribuntur aquæ potioribus.*

Ingeniosiores populi sunt, qui vino utuntur præ illis, qui cerevisiam bibunt.

G) Etiam ipso PAULO teste vinum stomachum languentem confortat.

H) Habet vinum æquale cum igne robur, ubi hominem subierit, conturbat eum ceu Lybicum mare aquilo vel auster; unde quoque prodit ea, quæ latent in recessu mentis, & virorum animum in universum concutit. vid. STRABO lib. 13. HORATIUS *Sermon. lib. 2. Satyr. 2.*

Corpus onustum hesternis vitiis animum quoque prægravat una. Atque affigit humo divinæ particulam auræ.

Pocula vel mentē rapiunt prudentibus omnem.

I) OVIDIVS in metamorph. lib. 15.

Nocte nocent potus, sine noxa luce bibuntur.

K) Apparent rari nantes in gurgite vasto. TULLIVS in Catone: Libidinosa intemperansque adolescentia effœtum corpus tradit senectuti.

L) Quantitas potus sufficiens concedenda est necessario omnibus, alioquin cibus copiosus, præprimis in coena, destitutus sufficienti potu, pertinacem causatur obstructionem, hypochondria infarcit, falsos procreat humores, unde scabies, stranguria, qui affectus opificibus & juvenibus vitæ sedentariæ valde sunt familiares. GALENUS ad 4. aphor. 83. Potus multus dandus est his, qui habent alvum siccam, contra qui humidam.

Pocula
nocturna
mirum
nocent.

Quantum
noxa pro-
veniant ex
humidi
defectu?

(M) De

dat falsius, spissiusque; unde hypochondriorum & alvi obstructiones, morbi salini, scabies, scorbutus, calculus propullulant. Quivis itaque & hinc explorare debet ingenium corporis sui & humorum, ut justam mensuram potus (M) invenire atque observare possit. Non facile enim pro quovis individuo certa mensura liquidi exacte determinari potest.

C A P U T V.

Alterum quod stomacho, sanguini, spiritibus & ex consequenti ingenio mirum nocet, est nimia voracitas (A) vel ciborum satietas, præsertim in cœna. (B) Quandoquidem cibus nimius spiritus, & omnem quasi naturæ vim è mentis & animæ functionibus revocat, occupatque in concoctione; quo fit, ut capiti simul speculationique intendere nequeant. Deinde cibus exsuperans gravis ventriculo est, vires premit, in rudem facessit chylum, crudum & crassum sanguinem procreat; hinc intemperies, hinc obstructio, hinc plethora, quæ vitia gravissimorum morborum causæ antecedentes continentisque fiunt: & quamvis etiam satis cibus coquatur, aciem tamen mentis obtundit, & ut GALENUS ait: animus sanguine & adipe suffocatus cœleste aliquid (C) pervidere non potest. Unde etiam pessimum est, proximis horis post cibum meditationi difficiliori sedulo indulgere. Meliores progressus in studiis experiuntur, qui temperanter & sobrie vivunt, (D) modice pasti sunt, & quando satis temporis à pastu effluxit, demum in studia incumbunt. Postea non possumus non & hic quoque improbare illorum modum, qui longius jejunando abstinent, vel ab omni cœna, vel etiam cibus vix satiati corpus defraudant viribus. Ut ut itaque temperantia ad vitam sanam & longam conferat, & ad profectus in studiis apprime utilis sit; non temere tamen cibo & potui aliquid demendum est, sed ipso satiandum corpus, quamvis non onerandum (E) ut spiritus ad studia necessarii reficiantur, & apte illud refarciatur ac restauretur, quod tum caloris vi, tum aëris circumfusi necessitate dissipatum è corpore fuit. Quod attinet somnum & vigilias litteratorum, moderatior maxime commendandus est. Immoderatior (F) calorem obtundit, pituitam & omnis generis supervacanea adauget, spiritus obfundit & obscurat, omnesque sensuum & mentis vires torpore & ignavia quadam debilitat. Somnus ille semper optimus est, qui durat ad concoctionem absolutam. (G) Imbecillitate corporis & ventriculi laborantes longior

Voracitas
nimia inge-
niis
summe
perniciosa.

Cibus sa-
tiandum
corpus est,
non onerandum.

Immoderatus som-
nus spiri-
tus obscu-
rat.

Somnus
quidem
optimus est

rem

M) De Bartholo Jctorum principe dicitur, quod ad mensuram certam & pondus biberit, ut ingenium omni tempore æqualiter dispositum, nec unquam alteratum haberet, quod mirifice commendatum sibi habeant juvenes litterati. Quamvis & in hoc medice vivere, non raro pessime sit.

A) HIPPOCRATES: Ubi cibus præter naturam copiosus ingestus est, hic morbum facit, proinde uti à multo oleo lucernæ flamma, sic à cibo copioso suffocatur calor natus. Non minus acute quam facete quidam intemperantiam Medicorum nutricem appellant. Perniciosa sentina est abdomen insaturabile, omnium tum corporis, tum animi vitiorum fons atque origo.

B) Nam, Ex magna cœna stomacho fit maxima pœna,

Ut sis nocte levis, sit tibi cœna brevis.

SCHOLA SALERNITANA. In cœna liquidiora & facile resolubilia commodius assumuntur, quoniam nutritio noctu melior, resolutio autem ciborum difficilior est.

C) HIERONYMUS: Plenus venter non gignit spiritum tenuem. Quid quod nec mente quidem recte uti possumus multo cibo & potione repleti. TULLIUS Tusc. l. V. Eodem pertinet, quod scripsit THEOPHRASTUS lib. V. Phil.

Multum edere, & carnibus vesci, rationis & consilii usum adimit, animosque efficit tardiores, & eos immani quadam dementia ac stultitia complet.

D) Una temperantia totius est jucundæ salubrisque vitæ moderatrix. Et nulla calamitate vel ærumna premetur, qui vitæ fundamentum jecerit temperantiam. Tempore isto, cum temperata omnia erant, Macrobios i. e. longævus ætas tulit. PLINIUS: quando voluptas vivere cœpit, vita ipsa desit. Gigantes & pugiles fortissimi viri sobrii erant. vid. OLAUS MAGNUS in Tr. de gentibus septentrional. lib. V. c. 3.

E) Quantum decedit cibo & potui, tantum decedit spiritibus & viribus; quantum spiritibus, tantum studiis. vid. WEDELIUS de diætâ litterat. Tantum cibi & potionis adhibendum, ut reficiantur vires, non opprimantur: CATO MAJOR de senectute.

F) PLATO dicebat somnum immodicum & corpori & animo obesse. lib. 30. cap. 9. ipse prima nocte surgebat, & non plus dormire solebat, quam quod satis esset ad vitandam ex nimia vigilia malam habitudinem. HOMER. Iliad. 20. Turpe duci totam somno consumere noctem.

G) CELSUS lib. 1. cap. 2. Qui bene concoxit, mane tuto surget: qui parum quiescere debet, &

Tempe-
rantia ad
longævita-
tem com-
mendatur.

Improbatur nimia
abstinen-
tia.

Quantum
somni ca-
piendum est.

Copiosus
cibus parit
morbos.

In cœna
liquidiora
commodius
assumuntur.

Sufficienter dormiendum est litterariis.

Vigilia nimia debilitant.

Sessio corpori nocet, ingenii functionibus favet.

Statio sessione pejor & quare?

Commodissima est ambulatio pro litterariis.

Ambulationis modus commodus.

rem desiderant. Quo major enim quantitas alimenti, & quo major cruditas; hoc longior debet esse somnus. At vero multum & hic solent litterati peccare, qui vigilatas noctes ex ordine ducunt, & necessariam ad vires reparandas sibi demunt quietem. Somnus est requies animi (H) & pars humanæ melior vitæ, & quantum demitur somno, tantum viribus & spiritibus, & istæ non paucae requiruntur ad studia, secus ac vulgus putat: sufficienter itaque dormire debet, qui feliciter in studiis vult progredi, ut concoctio absolvatur, & spiritus de die dissipati, ad meditando autem necessarii, restituantur. Nimia autem vigiliæ (I) spiritus exhauriunt, corpus debilitant, & cruditates ingenerant maximas. Denique dispiciendum est, quænam positura corporis in studendo litteratis maxime conveniat, & quæ circa motum & quietem notanda veniant. Nonnulli mirum amant sessionem. Fatemur illam non plane rejiciendam esse, sed magis ipsa offendi illos, qui minus huic assueti sunt, & quibus vita otiosa & sedentaria est. Alias quando quis sedendo solus & sibi relictus à motu immunitatem nactus est, uberius & excitatior animi vis exsurgit. Quippe spiritus, qui alias ad musculos convertuntur, sic retracti in animæ ministerium se impendunt, & egregiarum rerum ideis in cerebro disponendis unice serviunt. Alii mala illa, quæ ex sessione (K) fluunt, corrigere omni modo contendunt statione, quam corpori non ita nocere existimant. Verum enim vero admodum falluntur. Statio enim non modo ipsa sessione pejor, sed & perniciosior corpori esse solet; utpote in ejus figura perpendiculari sanguinis & humorum descensus promovetur quidem, ascensus autem retardatur, nisi membrorum actione & ambulatione sanguini in pedibus lentius progredienti succurratur. Porro, statio musculorum æquilibrium tensio est, cui tota corporis moles ad perpendicularum incumbit, quantum autem hoc lassat, dici vix potest. Postremo, Spiritus etiam impenduntur, sic dupliciter & menti vacant, & musculis in tono servandis. Prudentius itaque in totum est, aliquantum se movere, ambulare (L) quando indulgemus meditationibus, quo in musculorum actione fervetur æquilibrium. Deinde quoque ex motu plurima bona in corpus profluunt. Musculi enim, dum sic æqualiter moventur, fluidi circuitus ex æquo respondet, à quo cum viscera & corporis membra firmitatem, robur, atque calorem accipiant, utique etiam partium actiones, in illa sanguinis per motum divisione mirifice confirmari, credibile est. Præterea motus digestionem & concoctionem egregie procurat, & si quid à coctione superest lenti humoris commode & feliciter dissipat.

& si mane surgendi necessitas fuerit, redormire: Qui non concoxit, ex tuto quiescere, ac neque labori se, neque exercitationi, neque negotio credere. Qui vires imbecilles habent, nihil somno detrahere debent.

H) Somnus ab antiquis Poëtis appellatur pax & tranquillitas omnium rerum, nec non quies spirituum;

Sic canit OVIDIUS:

*Somne quies rerum placidissime somne Deorum.
Pax animi quem cura fugit & pectora duris
Fessa ministeriis mulces reparasque labori.*

Et SENECA in Tragædia.

Tuque ô domitor somne malorum

Requies animi pars humanæ melior vite.

Effecta vigiliarum nimiarum.

I) Immoderatæ si fuerint, temperamentum hominis mutatur: facies pallescere incipit, corpus macie contabescit, oculi in capite concavi cum austero & tristi vultu fiunt, concoctio vitatur, vires depauperantur, sanguis siccatur, exardescit. Optimum remedium ad vigilias diuturnas est balneum ex herbis paregoricis paratum tempore vespertino.

Motus intermissio segniores facit mentis actiones.

K) Quies diuturnior & exercitationis intermissio; qualem habet desidiosa vita, inertem calorem, spiritus ignavos ad omnes sensus & mentis naturæque functiones segniores facit. vid. FERNEL lib. 1. de morborum causis cap. 16. PLATO

in Theæteto. Corporum habitus otio & torpore corrumpitur, exercitiis autem & motu plurimum conservatur. Sessio nimia disponit maxime ad affectum hypochondriacum. Optimum remedium est ambulatio, unde illud apud PLAUTUM: Ambula, hoc lienosis prodest.

L) Mirum est, inquit PLINIUS lib. I. ep. 7. quod animus agitatione motuque corporis excitetur. Idem PLINIUS non minus animum quam corpus exercebat; animum eruditione, corpus venatione, mille passus mane ambulabat, movebatur quoque pila vehementer, nam hoc exercitationis genere pugnabat cum senectute, unde illi post septimum & septuagesimum annum aurium oculorumque vigor integer, inde agile & vividum corpus. vid. PLIN. lib. 3. epist. 1. SENECA lib. 1. epist. 90. p. 786. corpora opere ac vero labore durabant; SOCRATES sanitatis causa artem saltatoriam magnificiebat, & ipsam quoque addidit. vid. ATHENÆUS lib. 1. cap. 16. unde exercitia moderatiora, saltatio, equitatio maxime ante cibum juvenibus concedenda sunt. SOCRATES dum solebat quotidie fere usque ad vespertinam contentius ambulare, à quodam interrogatus, cur hoc faceret, respondit: quo melius cœnem. Quibus verbis ostendit vir sapientissimus, ambulationis usum, tum ad ciborum appetitum, tum ad cruditates absumendas non parum conferre. vid. CICERO lib. IV. Tusc. quest. Notum est illud HIPPOCRATIS:

Veterum eruditorum genera exercitationum & motuum.

diffipat atque attenuat. Motus enim ad vitam & sanitatem maxime utilis est. Quo plus alimenti, & hoc crassius assumitur : eo validior & diuturnior debet esse motus (M) & vice versa.

C A P U T VI.

Ultimo loco litterarum studio flagranti primum omnium commendanda est ^{Animi tranquillitas commendanda est studiosis} vera animi tranquillitas, quæ genuinum animi pabulum est, quo nutritur & sustentatur. Hoc si animus perfusus est, non tantum corporis functiones, sed & ingenii vires vegetiores exsurgunt. Fieri non potest, inquit PLATO, ut animus bene affectus non corpus quoque vi sua optimum reddat. Et deinde : quamdiu mens nostra in se quieta est, nec affectuum cupiditatumque fluctibus jactatur, non tantum veritatem (quæ ipsi propria est, & ad quam quærendam non aliter creata mens est, quam oculus ad lumen solis perspiciendum) clarius assequi, & secundum divinam animæ partem mores & actiones suas instituere poterit, vel etiam corpori & vitæ, sanitatique melius præesse. Consistit enim tam animæ quam corporis sanitas in placido, æquabili & temperato spirituum animalium & sanguinis motu. Nihil autem magis illud æquilibrium tollere solet, & spiritus in motu suo turbare, quam animi pathema : unde etiam ejus perturbatio vocatur. Omnis itaque, qui vitam sanam & longam exoptat, qui in studiis multum proficere vult : ille sanam, tranquillam, & ab omnibus affectibus liberam ac vacuum mentem habere, necesse est. Maximum autem ad animi tranquillitatem & vitam longam momentum ponit sanior philosophia (A) & praxis Christianismi. (B) Hisce enim cupiditates animi, ingenio, vitæ ac sanitati nocentissimas, feliciter reprimere possumus. Neque profecto præter tristitiam, animi moerorem, curam quæ spiritus turbant & consumunt, Venus ullo modo salubris est, ut pote quæ ingenii memoriæque pestis (C) existit, maxime si excesserit, & ipsam corporis languor vel dolor subsequatur. Subito namque exhaurit subtiliores spiritus, caput debilitat, mentem ac sensus infirmat atque convellit, (D) & stomachum labefactat atque enervat. Tandem unicum remanet litterarum

Tranquilla mens facit ad vitam longam.

Ad tranquillitatem acquirendam commendatur Philosophia Christianismus.

Venus nimia cerebri functiones imminuit.

cratis : ὁ πόνος αὐτῆς ἐπὶ τοῦ βίου. Labor cibum antecedit. Et CYRUS apud XENOPHONTEM l. 2. curam adhibebat, ne unquam sui ad prandium aut coenam ἀνδραγαθίας sine sudore accederent. Mollibus autem viris, & qui contemplationi se dederunt consulo, ut repentinam exercitationem, & quæ laboriosa est ac fatigat, omittant : comoda deambulatio in aëre sereno maxime ante cibum & tempore matutino amicissima studiosis est.

M) Gigantes & fortissimi viri, athletæ fumido ac rancido usi cibo fuerunt, ne virtutis nervos externarum deliciarum contagione remitterent. Unde fortium crudus cibis est virorum. vid. OLAUS MAGNUS *hist. septentrional. gentium lib. V. c. 3.* Victus crassus & multum nutriendus minus tutus est illis personis, quæ imbecilles sunt, quiete ac otio fruuntur nec laboribus adfuetæ; Motus enim est, qui intimiore attritione & vi sua elastica crassas alimenti particulas resolvit, subigit, digerit & in substantiam corporis nostri convertit. Quies autem nutritionem sufflammat, obstructions morborum generatrices, atque ingenium tardum & fluxile parit. Olim athletæ, qui robustissima membra & nimio sanguine atque adipibus quasi luto involutas animas habebant, panem grossiorem, quem dicebant coliphium ἀπὸ τοῦ κολῆς membrum & ἰσχυρὸν robur, quasi robur membrorum, duntaxat edebant in prandio, in coena vero carnem suillam non elixam sed igne paululum assatam, & aquam calidam bibebant, ut alimentorum duritie ac crassitie non modo uberius nutrentur, sed etiam diu-

tius saturi permanerent. vid. PETR. FABER *Agonistices lib. 3. cap. 3. p. 231.*

A) LUCIANUS lib. Macrobi. p. m. 827. longævis annumerat Philosophos, & omnes qui ingenio & eruditione præstantes fuerunt, aliqua sui cura habita, ad extremam senectutem pervenerunt; & eodem loco recitat multa exempla Philosophorum longævorum. Speculatio novæ rei & magnæ aut pulchræ suaviter spiritus oblectat : Unde videmus, *Democritum, Parmenidem* & alios naturæ admiratores ad longam pervenisse vitam, inquit VOSSIUS in *lib. de idololatria Gentilium p. 910.*

B) Quicumque per veras spirituales virtutes ac preces Spiritum S. jungit animæ suæ, incredibile gaudium, tranquillitatem, pacem, amorem possidet; qui affectus sunt ad vitam sanam ac longam multum facientes, ut sic revera Christianismus ad vitam sanam & longam cæteris paribus potissimum contribuat.

C) Musas atque Minervas virgines esse voluerunt Veteres. Huc *Platonicum* illud spectat : Cum Venus Musis minitaretur, nisi sacra venerea colerent, se contra illas suum filium armaturum : Responderunt Musæ : Marti ô Venus talia minitare : Tuus enim inter nos Cupido non volat. TACITUS de morib. Germ. Rara juvenum venus, eoque inexhausta pubertas.

D) HIPPOCRATES coitum comitiali morbo similem judicavit, quia mentem quæ sacra est, percellit.

E) Anxia

Continua
meditatio
corpori no-
cet, & stu-
dia magis
postponit.

rarum studiosis tenendum, ut in labore & studiis commendatam sibi habeant moderationem ac temperiem. Peccari contra hoc solet in dies, dum litterati per dies ac noctes libris ac museis affixi studia vehementissime urgent, quasi vi possit nasci eruditus, cum tamen revera postponant magis profectus. Continua enim & non-interrupta meditatio (E) necessarias corpori subfura-
tur vires, motumque, spiritus consumit, & evocato è ventriculo ad laboran-
tis cerebri subsidium igne cruditates accumulat, quæ obstructions in hypo-
chondriis, quæ omnium malorum fons sunt, producit. Sic revera corpus
torpidum redditur, ingenium hebetatur. Quò magis enim illa vi urgentur:
eo minores subsequuntur profectus. Tempore namque egent litteræ, quo
fructus desideratos ferant. Successiva temporis mora, & moderato humido
& calido, non vi provocantur flores, cæteroquin nullos ferent fructus. Ea-
dem res est studiorum, quorum intempestiva tractatio non promovet profe-
ctus, sed postponit potius. Sapientius illi faciunt, qui moderate in studia
incumbunt, & secundum virium proportionem dirigunt meditationes, ac
honesto otio animique remissione quandoque fruuntur. Moderata enim du-
rant, & agri quiete egent, quo meliores fructus ferant. Qui medio gradu
sic incedunt, longe subtiliores (F) postmodum conficiunt speculationes, &
sublimiora ingenii opera concinnant, & talia invenire solent (G) otiosi, quæ
illis, qui continuo studio se macerant, nunquam in mentem inciderunt. Ul-
timo loco, quoniam litterarum cupidis atque eruditus non nunquam accidit,
ut pituita copiosior ex nimis meditationibus, vita sedentaria, prava ciborum
digestione non tantum corpus, sed & caput occupet & gravet, atque hebe-
tes & obliviosos efficiat, unde sæpius sine remediis exonerari non potest:
(H) commendamus itaque tali in casu inediam; ex remediis sunt pilulæ
cephalicæ, salia volatilia oleosa, ambrata, succinata & ejusdem generis,
quæ cerebro mirum conferunt, item medicamenta, quæ blande & citra tu-
multum humores crassos & viscidos per alvum evacuant, & simul facultate
nervos ac caput roborante, pollent. Extrinsecus vaporosa suaveolentia præ-
fertim in tenerioribus in copia maxime evitanda sunt, dum facile dolorem in
capite causantur, & vertiginem producant. Tandem memento, optimam
semper esse temperiem aëris, alimentorum, motus, somni, vigiliarum, stu-
diorum ac laborum, animique: & omnia temperata custodienda esse, quæ
ferme omne punctum ad vitam longam & sanam obtinendam absolvunt. (I)

E) Anxia & morosa studia obsunt valetudi-
ni, quia spiritus consumunt. vid. VOSSIUS *de Idolatria Gentilium* p. 910. vide elegantem tracta-
tionem de studiorum intemperie WEDELII.

Animi re-
missio pro-
moveret stu-
dia.

F) Vegeta & strenua ingenia quo plus reces-
sus sumunt, hoc meliores impetus edunt. VALE-
RIUS MAXIMUS *lib. III. c. 6.* Danda est remissio
animis: meliores acrioresque requieti surgent. Ut
fertilis agris non est imperanda, cito enim ex-
hauriet illos nunquam intermissa fecunditas; ita
animorum impetus assiduus labor frangit. SENE-
CA *de Tranquillit. animi.* Indulgendum est ani-
mo, dandumque subinde otium, quod alimen-
ti ac virium loco sit: & in ambulationibus aper-
tis vagandum, ut cælo libero & multo spiri-
tu augeat attollatque se animus; Aliquando vec-
tatio, iterque & mutata regio vigorem dabunt,
convictusque & liberalior potio. Adde & illud
XENOPHONTIS: fortium virorum voces & gestus
etiam in vino & lusu dignum studio & memora-

tu quiddam proferre. Corpori vaco, cujus fulcris
animus sustinetur, inquit PLINIUS *I. I. ep. 9.*

G) Ipsum illud silentium quod venationi da-
tur, magna cogitationis incitamenta sunt. Ex-
perieris non Dianam magis montibus, quam
Minervam inerrare. vid. PLINIUM *I. I. ep. 6.* Inge-
nium secessus maxime appetit, ubi magna reclu-
duntur. Idem *I. 6. ep. 31.* Frequenter comædiis
cœna distinguitur, ut voluptates quoque studiis
condiantur, PLINIUS *lib. 3. ep. 1.*

H) Exercitatio cum inedia à multis præservat
morbis, dum crassum sanguinem movet, & atte-
nuat, atque ejus copiam imminuit. HIPPOCRA-
TES: non repleti cibis, & impigrum esse ad la-
borem, sanum efficit corpus.

I) Parvitate victus, somno sufficiente, exer-
citatione modica, animique lætitia tota vita hu-
mana ac sanitas constat. Cætera sunt quædam ad-
ditamenta, & parum efficiunt. vid. CARDANUS
de sanit. tuend. p. 349.

Quibus
conserva-
tur vita &
sanitas?

Q. D. B. V.

DE VALETUDINE SENUM TUENDA.

P R O Æ M I U M.

FInem velle, nolle tamen media, perversa plurimorum & tantum non omnium fert affluetudo, nullibi frequentior, quam ubi de præcipua felicitatis humanæ parte, sanitate scilicet, consequenda agitur. Etenim nemo certe non, diu sospes & incolumis vitam transigere ardentem percipit: sed vix ullus admittit subsidia, hoc est, præceptis obtemperat, quæ ad obtinenda hæc bona deducunt, ut nempe ex præscripto saluberrimarum sic dictarum diæteticarum regularum, omnem plane suam vivendi rationem institueret, servando exactum moderamen & æquale temperamentum, tam quoad tempus, quam ipsum adhibendi modum & usum, in iis, quorum ope vita sustentatur, & ad quæ præter aërem, cibum & potum, corporis alimoniam potissimum dicata, referenda sunt ea, quæ ad placidum & moderatum somnum inducendum, corporis motum & exercitationem, nec non ad legitimum excretionum vitæ ministrantium successum pertinent, non neglectis iis, quæ ad mentem compositam, sedatam & ab impetuosius affectuum exagitationibus immunem servandam, apta sunt atque idonea. Hæc autem curiosa salutarium ejusmodi legum observatio, omnibus quidem, qui vitam longam & morbosarum afflictionum expertem vivere gestiunt, cujuscunque ætatis, temperamenti corporisque constitutionis sint, & sub quocunque cœlo degant, summo opere est inculcanda & excolenda: attamen infirmi potissimum sunt, debiles ac præsertim senes, imbecillimis merito accensendi, qui earundem omnium exquisitissimam habere debent rationem; eo quod facillime ab incongruis læduntur & leve tantum contra normam admisum delictum gravissime luunt, quod robustioribus & ætate vigentibus nihil plane noxæ infert. Quia vero ætate provectiores, quo magis viribus & corpore labentibus annis deficiunt, eo magis per longiorem experientiam rerum gerendarum peritia atque prudentia augentur aliosque ipso usu longe antecedunt: nihil utique æque necessarium ac salutis publicæ utilius excogitari & suscipi potest, quam ex artis, quæ sanitati præest, penu, salutaria monita & consilia hunc in finem depromere, quo veneranda ejusmodi, habilia & exercitata capita, diutissime animo æque ac corpore valentia supersint, reique publicæ consiliis suis profint. Quod quidem negotium, licet jam dudum nonnulli tractare exorsi sint, ipsa tamen argumenti dignitas & utilitas nos allexit, ut nostras etiam de eodem meditationes in publicum conferremus, & inaugurali hoc specimine salutaria præsidia ipsamque rationem valetudinis senum conservandæ, uberius paullo ac pervestigatius exponeremus. Cui labori ut summum Numen gratiam & auxilium addere velit, devotissime precamur!

§. I.

DE senum itaque sanitate & integritate, per diætam salubrem & convenientem victus rationem, conservanda, dum curatius acturi sumus: primum opus est, ut eam ætatis humanæ periodum, quæ senectutis nomine effertur, exactius determinemus, & ab aliis annorum terminis rite distinguamus. Dividitur

Frid. Hoffmanni Oper. Tom. V.

autem senectus, secundum receptum in scholis ordinem, plerumque in tres periodos, quarum prima à quinquagesimo sexto ad sexagesimum tertium usque ætatis annum porrigitur, & viridis communiter, sive vegeta, vocari solet; eo quod hac decurrente, vires plerumque satis constant parumque imminutæ observantur. Secundam sexagesimi tertii & septuagesimi anni termino includunt, qua actionum & functionum vigor notabile patitur decrementum. Et tertia denique, quæ decrepita audit, à septuagesimo ad octogesimum annum & ultra prorogatur & cum ipsa vita terminatur, ita, ut eadem robur sensim mirifice atteratur, vires consumantur, corpus animusque vacillent, donec mors omnia extinguat.

§. II.

Constitutis his ipsius senii diversis terminis, jam facile patet: per senectutem, quæ ab HIPPOCRATE ipse morbus nuncupatur, & pro ultima vitæ periodo & pro na ad interitum via judicatur, nullam aliam esse intelligendam, quam consummatam illam & decrepitam. Sunt enim & novimus plures senes sexagenarios & septuagenarios, integris sensibus, tam externis, quam internis pollentes, vegetos, cibos probe adhuc appetentes, concoquentes, somnumque longum adhuc & quietum capientes, neque tam facile ab externarum rerum, aëris, cibi & potus usu, nisi quoad genus, modum & tempus excessus accesserit, detrimentum patientes. Sed hi omnino sunt, qui à parentibus ipsaque nativitate, stabilem, firmam & ad diutius suslinendum ac protrahendum sanguinis cursum, solidorum nacti sunt structuram: neque elapsa ætate, per intemperantiam vitæ & affectuum, luxuriam aliaque voluptatum lenocinia, languidum, imbecille & effœtum corpus reddiderunt, & jam attritum senectuti tradiderunt.

§. III.

Hinc etiam est, quod sapientissimus noster Senex *Secl. II. aphor. 39.* disertis verbis edicat: *senes minus, quam juvenes agrotare*, eos nempe, qui bonam corporis obtinuerunt naturam, temperanter vixerunt & in viridi, vel media etiam, senii periodo versantur: quum contra idem gravissimus auctor, *lib. I. de diæta*, morbosissimos dicat eos, qui maxime senes sunt, hoc est, qui decrepiti & à Græcis *πρεσβύται ἢ δὴ γέροντες* nuncupantur, sive, qui senium & insignem virium imbecillitatem, non tam ob ætatem ingravescentem adepti sunt, quam ob intemperantiam suam & admissa in rerum sic dictarum non naturalium usu, delicta, sibi contraxerunt. Etenim quo magis juvenes ac viri incontinentiæ indulgent nihilque moderati habent, eo magis & citius vires corporis profundunt, illud caussarium reddunt, & sic ante tempus senes fiunt, miseram, infirmam multisque morbis obnoxiam vitam ad extremum usque halitum trahentes. Ex quo quum pateat: senes non tam annis, quam virium constitutione æstimandos esse; utique nos etiam, de valetudine senum tutanda differentes, per senes non solum eos, qui ob grandiore ætatem, sed etiam qui propria culpa ac vitio, anticipato termino, senium sive præcipitatum vigoris decrementum, incurrerunt, volumus intellectos.

§. IV.

Ut autem certa ac rationali methodo incedamus in enumerandis iis, quæ ad conservandam senum valetudinem

Bb

nem

nem faciunt : necessarium est , ut prius dilucide exponamus : quænam illa sint mala , quæ in senio constitutos potissimum attentant ipsisque quasi propria sunt , nec non a quibus causis hæc ipsa dependeant ? In genere igitur tenendum est : ingentem in senectute virium defectum & roboris imminutionem ingruere , quæ tamen ad vitam sustentandam sanitatemque servandam summo opere necessariae sunt. Quod si enim functiones , quæ recepta in scholis voce animales dicuntur , pensitamus , ingravescente ætate , memoria & acumen quoque ingenii debilitantur & languescunt , oculi caligant , somnus est brevis , non placidus , interruptus , viresque minus reficit. Quoad actiones , κατ' ἐξοχὴν sic dictas vitales , & quæ à viribus denominationem fortiuntur , lassæ sunt & languida senilia corpora & ad laborem & exercitationem minus prompta , perquam facile ad languorem dantur , pedes nutare incipiunt , pulsus tardius , utut durius , micat & omnes partes , inque primis pedes , à frigore facile afficiuntur & inhorrescunt. Et tandem ad actiones sic dictas naturales quod attinet , universus corporis habitus contabescit , facies rugas contrahit & livido colore perfunditur , tempora collabuntur , oculi fiunt concavi , cutis exsucca & arida , dentes vacillant & decidunt , ciborum appetentia prosternitur & digestio minuitur.

§. V.

Jam si specialius paulo morborum , quibus senilis ætas solenniter affligitur , considerationem & censum iniimus , lustrando omnes corporis à capite usque ad calcem partes , in illo frequentissime sedem figunt capitales affectus senum , apoplexia , lethargus , paralytis & vertigo , una cum tinnitu aurium , incipiente surditate visusque hebetudine. In narium & faucium confiniis corizæ , acres in laryngem destillationes , tussis , pituitæ viscidæ secretus , quin ipse catarrhus suffocativus , sæpe scenam ludunt. Cor una cum arteriis , lenta febre , quæ marasmus dicitur , infestante , crebrius pulsantur , & succi laudabiles cum ipsis viribus paulatim absumuntur & dissipantur. Digestionis officina , ventriculus scilicet & duodenum , nec non organa alimentorum solutioni , chyli elaborationi servientia , & ductus recrementitiorum eliminationi dicati , alvi maxime secessus & urinariæ viæ , tantopere à pristina indole defecisse observantur , ut cibi ingessi facile acescant , in ructus & flatus explicentur , stomachum & intestina inflent , caput torpore gravent , dolores ac tormina pariant , alvus plerumque solutior sit & crebrior ad desidendum stimulus , vel plane lienteria & coeliaca passio infestet , urina ut plurimum cum difficultate , ardore , vel dolore reddatur , & saturate tincta , nonnunquam etiam sanguinolenta , prodeat. In corporis cortice universo , & maxime ano , molestissimus percipitur pruritus. Denique pedes levi de causa occupant inflammationes erysipelaceæ , ulcera mali moris , quandoque etiam iisdem exquisitus dolor insidet , cum tophis & subsequente ambulandi impotentia. Quin omnes morbi interni & externi , omnia ulcera , vulnera ossiumque fracturæ , in senili corpore difficillime sanationem admittunt , & vix ac ne vix quidem coeunt ac consolidantur.

§. VI.

Et hos modo enumeratos morbos , non solum in nostris oris nostroque tempore senibus familiares esse , ipsa experientia luculenter confirmat : sed idem etiam in quibusvis plagis contingere & prisco etiam ævo obtinuisset , antiquissimorum auctorum fide uberius constat. Ipse enim gravissimus medicinae parens HIPPOCRATES , plurimas in senili ætate solennes ægitudines integro aphorismo 31. Sect. III. fuscè commemorat , quem clarus olim in Academia Jenensi Medicinæ Professor , Andreas ELLINGERUS , in paraphr. aphorism. poet. ita numeris latinis reddidit :

*Dyspnœa , tussis , cum catarrho , urinaque
Seu difficulter , sive guttatim exiens ,*

*Renumque acutus , insuavis & dolor
Nexus revinctorum ossium quo vapulant ,
Vertigo , apoplexia , habitusque corporum
Mali , vigiliæ , alvus soluta , & humida
Nares oculique , totiusque corporis
Pruritus , acies luminum retusior
Glaucedinesque , auditus & gravis , senum ,
Τὰν πρεσβυτέρων , sunt morbi & arrostemata.*

HIPPOCRATI accedit CELSUS , qui lib. II. cap. 1. p. m. 46. senectutem longis magis morbis , adolescentiam acutis patere asserit , & lib. V. cap. 28. ulcera , & præcipue cancrum , in senibus maxime fieri perhibet. Ut prætereamus alios , qui idem conceptis verbis testantur.

§. VII.

Verum enim vero non satis est Medico , qui ratione & demonstratione certa cuncta assequi & metiri nititur , ut tantum sciat , quæ fiunt ; sed necesse etiam est , ut causas , quare sic & non aliter quid contingat , & sigillatim ut quam ob causam senectus hisce potissimum morbis pateat eruere & clarius sistere possit. Primo itaque loco altius paullo rimandæ & exponendæ erunt genuinæ ac veræ rationes , quibustribuendum , quod in ætate provectis tanta virium jactura & imminutio fiat , & sensim paulatimque sic successive increseat , ut tandem ex plenaria earum defectione ad mortem fiat aditus. Veterum quidem placita si arcessere hanc in rem velimus , ad unum fere omnes edixerunt : senectutem esse inevitabilem quandam caloris nativi humidique radicalis diminutionem & absumptionem , & inde quoque causas languoris & functionum læsarum in hac ætate derivarunt. GALENUS autem ejusque dogmatum sequaces ac æmuli , nimiam abundantiam humidi excrementitii in senibus , & partium solidarum nimiam frigiditatem , siccitatem & ariditatem accusarunt. Recentiores in spirituum , tam vitalium quam animalium , qui vires inspirarent defectum , causam rejecerunt. Ac recentissimi quidam inevitabilem hanc senii ipsiusque mortis necessitatem , ita ex facili explicari posse crediderunt , si supponerent principium vitale movens , quod à summo rerum conditore certis quibusdam limitibus ac terminis circumscriptum , quos si attingeret , deficeret & ab opere suo in regenda ac sustentanda machina desisteret , & sublata ejus in corpus actione , sic omnes in eodem functiones collaberentur.

§. VIII.

Ast qui notiones claras , distinctas & adæquatas , à confusis quæque minus concipi possunt & intelligi , reales conceptus , à speciosis verbis , & remotas quoque nimis quandoque causas à proximis & veris discernere novit : is certe omnibus his verba tantum dari , non rationes , perspiciet ; quum ex iisdem neque morborum senilium explicatio deduci ac perspicue explanari , neque congrua ad arcendos eos præsidia depromi & ad usum impendi possint. Quin potius , quum quilibet homo , temperatissime etiam & ex præscripto exquisitissimarum regularum diæteticarum vitæ rationem adorans , ingravescente ætate , insignem in omnium functionum exercitio persentiat debilitatem & notabilem virium lapsum , quem tandem mors excipit ; in proclivi est judicare : veram hujus defectus & languoris causam , in ipsius corporis compage ejusque partibus inquirendam esse , ita quidem , ut primo & principaliter non tam in natura ac temperie fluidarum consistat ibique quærenda sit , quam potius in solidarum , quæ juxta ætates valde differunt , mutata structura & textura , fundamentum & originem obtineat. Nam si solidarum corporis partium , ossium nempe , nervorum , tendinum , musculorum , membranarum & tunicarum in annosioribus , & animalibus & hominibus , intuemur constitutionem & habitudinem : certe hæc omnes longe densiores , duriores , aridiores ,

res, rigidiore & compactiores esse, quam in tenerioris & juvenilis ætatis, animadvertimus.

§. IX.

Jam vero omnium omnino animantium nec non hominum corporum fabrica ita concinnata est, ut mere sint hydraulica, quoad vasa ipsaque viscera, ex tubis majoribus, minoribus & minutissimis capillaribus, conflata, per quos varii generis fluida jugiter ire, redire, fluere, secerni iterumque excerni debent, si rite & ex æquo functionum in corpore successus sperandus. Increfcente igitur fibrarum & tunicarum, à quibus vasa exilia æque ac ampla coagmentantur, duritie & crassitie, necessarium utique est, ut ipsi canales angustentur, quin minima illorum plane concidant & collabantur, ut transitus humorum ipsiusque sanguinis, per eorum alveos vel tardius succedat & sufflaminetur, aut plane præcludatur & de negetur. Eo facilius autem eoque majori cum detrimento in arctius adducuntur & oppilantur vasorum cava, in organis, quæ ex congerie minutissimorum tubulorum conflata, & potissimum fluidissimis succis spirituosiss, & secundum HIPPOCRATEM impetum facientibus, partibus separandis dicata sunt, cujus generis sunt cerebrum, nervi & tubulosa testium substantia, in intestinis crusta villosa cum vasis lacteis, nec non canaliculi, qui succum roscidum nutritium in musculis secernunt. Quod si enim exiles meatuum in his partibus cavitates procedente tempore & ob ipsam ætatis rationem in angustum magis coeunt & sicciore fiunt, nec subtilior sanguis & lympa, nec succi, qui potentia & viribus movendi instructi sunt, ab alimentis, & sanguine nec separari, nec in organa, sensibus & motibus ministrantia, influere possunt, non possunt utique non vires ac vigor, tam in sensuum quam motuum exercitio, mire labefactari ac dejici; quandoquidem omnis tonus, robur, vigor & motus reciproci systoles & diastoles, nec non peristaltici, qui in canalibus maxime secretoriis & excretoriis viget, potentia & administratio, à tunicis musculosis & nerveis, nec non subtiliori sanguine arterioso & fluido nerveo, penitus duci debent ac derivari.

§. X.

Si porro, specialiori disquisitione morborum quibus infestatur senectus, natales rimari velimus: certe præcipui eorundem, à copia & impuritate sanguinis & lymphæ viscida falso-tartarea, & à naturali blanda ac dulci sua schesi deflectente humorum natura petendi sunt. Inde enim tussis, coryzæ, atrophie, defluxiones acres, urinæ difficultates & stillicidia, cutis pruritus, originem fortuntur; inde exulcerationes & difficiles in partibus læsis consolidationes, cum cachexia, sive malo habitu, senibus familiarissimo, incunabula trahunt; inde calculosæ in renibus, vesica urinaria & fellea concretiones, nec non tophaceæ, in artuum juncturis excluduntur, inde quoque vigiliæ, gingivarum putredines, dentium vacillationes ortum nanciscuntur. Quin eadem quoque causa subest, quare nulla ætas tam facile pateat sphacelationibus & cancriosis exulcerationibus, præsertim in corporis exterioribus, quam senilis. Summa enim eaque foeda & corruptiva humorum impuritas, cum vitium defectu, sive cacoehymia, quæ communis & fere perpetua est senibus & quam ipsa hæc ætas progignit, corruptionis hujus, quæ in partibus extremis prodit, vera causa, origo & fons est.

§. XI.

Unde vero tanta humorum sordities in extremam ætatem incidat, ipsique quasi propria, vel familiaris admodum sit, ut etiam nonnulli senectutis vitium cum malo scorbutico comparare permoti fuerint: jam erit evolvendum. Nos, uti omnis impuritatis in humoribus causam, in organorum, quæ excretionibus vacant & feculentas ac alienas materias à succorum vitalium confor-

Frid. Hoffmanni Oper. Tom. V.

tio segregant, vitium rejicimus: ita idem etiam in senili cacoehymia gignenda animadvertere licet. Etenim libera & sufficiens per cutis meatus perspiratio, omnium, quæ corpus à putredine & interitu vindicant excretionum saluberrima est atque præcipua; ita, ut hac imminuta, plurimæ recrementitiæ sordes multaque inquinamenta in corpore remaneant & vitæ servientes humores conspurcent. In decrepitis autem & senio confectis, hæc per corporis corticem succedens evacuatio, propter aridam & siccam cutim, porosque ac tubulos subcutaneos coarctatos & contractos, valde minuitur ac supprimitur; quo fit, ut dulcis alias & saporis expers nutritius succus, peregrinæ & falsæ indolis humore inficiatur, urina multo acrior & salibus onustior cum dolore reddatur, corpus minus recte alatur, ulcera difficilius coeant, fracturæ ægre consolidentur, & quæ hujus generis plura sunt. Et quia biliosi pariter & lymphatici humores, à suppressa & cohibita sordium per cutis perspiracula eliminatione, acrimoniam & alienam indolem contrahunt: neutiquam certe mirum videri debet, si ob eandem lenterie, cœliacæ passionis & alvi crebriores dejectiones senes quam maxime impetant ac detineant.

§. XII.

Ad mictum denique cruentum quod attinet: cur is tam crebro in decrepita ætate conspiciatur, & quare vesicæ morbi senilia potissimum affligant corpora; ex facili reddi posse rationem existimamus. Id enim crebriori observatu compertum habemus; eos, quibus antea per ani venas sanguis secessit, postea vero substitit, vel non sufficienti in copia stillavit, sanguinolenta mictione tandem infestari & vesicæ vitiis quam maxime laborare, dum cruor, prohibito per hæmorrhoidales venas exitu, restagnans, ad ramos earum vesicam versus excurrentes defertur, ibique perrumpens, in ejus cavum effunditur & cum urina emittitur. Quando tamen facile contingit, ut perforata sic interiori vesicæ tunica, factum vulnusculum ob perpetuum urinæ acrioris appulsus iterum non consolidetur, sed in ulcus transeat, aut ipse sanguis altius & firmiter tenerrimis furculis impactus, eosdem nimium distendat, inflammationem pariat, corumpatur & sic ulcus suscitetur, non solum ex secedentibus apospasmatibus ulcerosis, ex urina præcipitatis & concrecentibus calculus generatur, sed ipsa etiam urina turbida, pultacea & cum magna difficultate ac ardore stillat, donec tandem læso sphinctere, ejus oriatur incontinentia.

§. XIII.

Allatis sic atque perspectis causis morborum, qui senilem ætatem frequentissime adoriuntur summamque ingenerant infirmitatem: paratiori nunc via accedimus ad præsidia quæ vires senum, pari cum vita passu ambulantes fulciunt, & difficiles istas morbosas afflictiones arcent. Quum vero prima in medendo sapientiæ pars sit, ea nosse, quæ nocent, utile non minus quam necessarium visum fuit ea præmittere, quæ ætate provectis adversa sunt & inimica, quæ naturale virium robur frangunt ac dejiciunt, & alendis, quin augendis, morborum causis favent: quo majori postea cura & sollicitudine, qui in senio processerunt, sibi ab iis cavere possint. Ordiamur proinde ab iis, quæ subito & potentissime vires convellunt & singularum fere partium robur prosternunt, quo nomine potissimum notanda sunt ea, quæ animum percellunt, impensius affligunt & sollicitant, quibus merito diuturnum mororem & gravem angorem annumeramus quo plures senes subito è medio sublato esse novimus. Et sane pro re satis effari nequeo, quam gravi & perniciali noxa longius protracta tristitia animique sollicitudo, tam firmos & valentes, quam multo magis senio fessos, infirmos ac imbecilles macet. Inde enim ciborum appetentia perit, somnus fugatur, languor & imbecillitas totum corpus occupat, vigor ingenii & corporis atteritur,

extrema frigescent, alvus fit solutior, sudor ex pedibus ob inductam debilitatem, noctu copiosius manat. Quapropter in declivi hac ætate omni certe studio & cura evitandæ sunt quævis occasiones, quæ ægritudines anxias & acerbis importare, aut mœrorem & terrorem incutere possunt. Nam sicuti ad difficiles & chronicas passiones excludendas ipsamque scorbuticam sanguinis impuritatem ingenerandam, auctore EUGALENO, nihil magis quam tristitia animique mœror confert: ita omnino alendis & augendis senum afflictionibus, quæ natales ex crudis potissimum & impuris humoribus trahunt, exitialis hic affectus quam maxime servit & velificatur.

§. XIV.

Porro omnes, qui ætate graves, solerter animum continere debent, ab immoderatiore ira. Hæc enim si incidit in corpora impuro sanguine oppleta, aut si inferiores partes spasmodicis ac doloribus torquentur, perquam facile apoplecticum aut hemiplecticum insultum, vel inflammationem erysipelaceam, aut ventriculi, inducit. Non minus senibus infirmioribus exitiosa adeoque fugienda est Venus. Nam licet, forsan ob lymphæ seminalis majorem falsedinem, stimulos ad eandem persentiant: attamen, si vim naturæ inferentes, hos promovent & ad ipsum exercitium descendunt, certissima virium subsequitur jactura, quæ nonnisi ad difficiles morbos, quin ipsum interitum, aditum pandit. Maxime omnium vero ii, qui eam ætatis periodum attigerunt, ut præstolante ex prisco foedere morte, mox transactæ vitæ ratio ipsis reddenda sit, id potissimum per Dei gratiam agere debent, ne peccatis sese polluant, quæ conscientia suffragio ipsos injecto metu redarguant, animumque lacerent, & ipsi sic grassante in vires angore, easdem disperdant corpusque morbis obnoxium reddant.

§. XV.

Post animi turbas, in eorum, quæ senibus evitanda sunt, censu, secundum utique locum ex rerum non naturalium classe meretur, frigus. Nam si quid aliud, certe hoc, naturæ corporis senilis insensum est atque adversum; quia, dudum notante HIPPOCRATE, *Secl. II. aph. 20.* cutim obdurat eamque rigidam & pallidam reddit, quæ jam tum in annosioribus dura, arida & contracta, sordium ex subcutaneis tubulis exhalationem prohibet & ad plurimas ægritudines viam sternit. Hinc est quod admissio ad partes inferiores vel etiam ipsum corporis habitum paullo intempestivius frigore, non modo cutis inhorrescat & subito humorum ad interiora conversio oriatur, gravedines, tussis, desillationes, & raucedines, cum languore, inappetentia & inquietudine suscitentur, sed etiam apoplexiæ metus ingruat. Et hæc etiam ratio subest, quare senes ætate optime valeant & hieme pessime habeant, adeo, ut auctore eodem HIPPOCRATE, senes hieme bis senes sint. Eo igitur studiose allaborandum est senioribus, ut corpus, maxime pedes, exquisitè vestibus adversus auræ perfrigeratæ allapsus muniant, neque eidem, post somnum maxime & sub linteorum mutatione, accessum præbeant, ac præterea nunquam non ejusmodi regimini studeant, ne corpus ventis borealibus, aut pluviosæ ac procellosæ tempestati exponant, neque hiemali potissimum tempore ex calidiori hypocaufto, mox in frigidum locum, vel ex hoc, confestim in valde calefactum conclave concedant. Similiter quum in locis depressioribus, humilioribus aut subcavis, in terram altius demissis conclavibus, quæ liberiore aëris transitui minus patent & vappidis tetræ exhalationibus referta sunt, ob inspirationem aëris minus puri ipsamque perspirationem sufflaminatam, degere vel dormire insalubre admodum sit & sanitati dispendiosum: utique eadem curiose vitare, & saluberrima semper senes seligere debent domicilia.

§. XVI.

Accedimus nunc ad ea, quæ in victus ratione ætate gravioribus fugienda sunt. Hæc inter inprimis connumeranda nimia & avidior ciborum ingestio. Quod si enim simul & semel largiori alimentorum copia infarcitur ventriculus, is jam tum ob ætatis rationem solutior, ingestorum molem non debite subigere, comminueret & in laudabilem succum convertere potest, neque chylus, ex indigesta massa extractus, à sanguine intimius absorberetur, & hinc perspirationi parum idoneus est. Quin potius, dum cibi diutius in stomacho moram necunt, cruditates, inflationes ac tensiones ventriculi, flatus, nec non somni perturbationes, excludunt, aliaque incommoda inducunt. Unde scite non minus, quam ex vero CELSUS *lib. I. cap. 2.* fatur: *ubi ad cibum ventum est, nunquam tuta est satietas.* Cujus in sententiam conspirat HIPPOCRATES *lib. de diet. acut. prava*, inquit, *est hæc diæta, cum quis plures cibos corpori præbet.*

§. XVII.

Quoad ciborum vero genera, senio plane inimici sunt, qui glutinosi, compactiores & plurimum alimenti crassi, rudioris custodiunt, à CELSO valentioris materiæ dicti, nec non qui, ob tardiores minusque expeditam concoctionem, ægrius intestinorum volumen trajiciunt & flatulentis ingignendis favent. Horum familiam ducunt ova ad duritiem cocta, carnes & pisces nimis saliti vetustiores & duriores, marini, vel indurati, fabæ, milium, lentes, pisa omnesque placentarum, quæ ex lacte, ovis, butyro & fari tritici pinfuntur, species, nec non ipsa pingua, ægrius semper solubilia. Eundem quoque in censum referenda omnia cruda, dura, & quæ ob fibrosiorem texturam, difficile in digestionis officina discerpuntur, sed ob viscosam tenacitatem facile in flatus resolvuntur, ex vegetabilium classe deprompta, cujus generis potissimum sunt, napi, rapæ, bulbi, brassicæ species, dauci, allium, cepæ, raphani, acetaria, ex lactuca variisque herbis parata.

§. XVIII.

Sed nihil certe magis senibus damni importat iisque adversum est, quam acida, ipsius vitæ principiis inimica. Hæc enim dum solidas partes p. n. afficiunt, confringunt, irritant, densant, meatus coarctant, minima vasa obstruant & vinculum seri ac sanguinis destruunt, fluida incrassant, & excretiones, præsertim quæ per alvum succedunt, impeditiores reddunt: utique non possunt non senilibus corporibus, in quibus solidorum constitutio jam vitata ipsaque fluida ipissitudinem contraxerunt & lentius circumaguntur, maximum injungere detrimentum. Deinceps quum ea ventriculi in annosis sit habitudo, ut ob imminutum robur & motum peristalticum, viscidas quoque & crudiores sanguinis particulas, per progressivum & intestinum motum tardiores minus evolutas, subtilisatas & ad sulphureo-alkalinam naturam deductas, ingestæ facile in ejus cavo aciscant, & sic saponariam illam alcalinam bilis indolem infringendo, ad strictiorem alvum, tenesimum, feces albas aliaque mala ansam præbeant; iterum dilucide patescit: non solum quæ acidam & noxiam indolem apertius produnt, sed etiam in stomachum delata, acetosam & perniciosam naturam induunt, in grandiori ætate, tam ex ciborum, quam eorum, quæ potui inferviunt censu, summo esse vitanda studio.

§. XIX.

Potissimum huc trahenda ex iis, quæ conspectius, ipso sapore teste, aciditatem monstrant, sunt omnes horæi fructus acidi & immaturi, acetaria, vina acida, potissimum Rhenana, nec non cerevisiæ vetustiores. Ex his vero, quæ in ventriculi cavo demum acetosam indolem suscipiunt valetudini noxia sunt, nominandæ inprimis omnis lactis,

lactis, excepto solo asinino, cum regimine dato, species, omniaque ex ipso parata, maxime caseus. Dum enim lactis materia cum acido, in ventriculo senum ubertim delitescit, congregitur, in coagulum abit & in firmam tractam difficulter solubilem densatum, parietibus adhærescit, & cum succo corrosivo, acido & bilioso mixtum partem cui incumbit rodit, molestum in præcordiis senum, cum inflatione stomachi excitat, variaque alia damna, in capite potissimum, ex consensu oriunda importat. Idem tenendum de dulcibus & conditis, & variis bellariorum generibus, quippe quæ, si non solutiorem alvum reddunt, damnum gignunt, & testimonio CELSI imbecillo stomacho aliena sunt in eoque coacescunt. Eo major autem noxa ab iis metuenda, si cum acidis, ut vino Rhénano, fumantur, eo quod aciditatem quidem promte imbibunt, sed firmiter retinent, donec tandem calore accedente, fermentatione acerrimam & corrosivam indolem induant, qua ventriculum & intestina mordente, anxia & nauseabunda circa præcordia molestia percipitur, & alvi tormina, irritus ad desidendum stimulus cum albis stercorebus excluditur.

§. XX.

De potus delectu jam quidem ex præcedente §. constat, damnosum esse omnem illum, qui acidum in recessu alit, addendum vero etiam & senibus perniciosum esse reor hunc, qui caput petit, gravat & facile inebriat, sive vinum sit, sive cerevisia. Quia enim in senibus caput maxime, cum universo nervoso genere, insigni infirmitate laborat: profecto omnia spirituosæ & ebrietatem inducentia, cerebro & nervosarum partium naturæ valde inimica, ipsumque sanguinem nimis rarefacientia, in iis non possunt non cum eximio damno naturale robur & motum magis pervertere, & distentis nimium à sanguine expanso tenuissimis cerebri vasculis, gravissimis capitis morbis occasionem præbere. Et quum legitimus alvinæ excretionis successus senum valetudinem quam maxime tueatur: utique, tam in cibo quam potu, solliciti sibi temperare debent ab omnibus, quæ eundem turbare aut cohibere possunt, è quorum numero, præter acida, notanda potissimum cydonia & ex ipsis conflata, vina austera rubicunda, Gallica maxime quæ vocant Pontac & Claret, nec non cerevisiæ vetustiores, præsertim è tritico coctæ, utpote quæ, longiori mora non solum magis spirituosæ redduntur, sed etiam acorem contrahunt. Denique ætate grandes desidiam quoque nimiamque quietem fugere debent; quandoquidem si his indulgent, humores lentius per corporis vasa volvuntur, spissescunt, & excretionibus suppressis, facilis ad obstructions aliaque mala est aditus.

§. XXI.

Remotis igitur & interdicitis, quæ senum valetudinem labefactant ac destruunt: progrediendum est ad ea, quæ eidem servandæ profunt. Est vero imprimis mens hilaris, æqua, composita & ab affectuum impetu immunis, quæ non solum motibus machinæ vitali conservationi dicatis imperturbatum semper concedit successum, sed etiam vigorem corporis fulcit ac tuetur. Et optime certe à Sapiente dictum est: *animus gaudens ætatem floridam facit, spiritus tristis exsiccat ossa*. Quare nihil magis è re sua esse putent ii, qui obrepente senectute valetudini consulere nituntur, quam ut pacato, cello ac excitato fruantur animo, illum subinde oblectando & innocenti voluptate & lætitia perfundendo, cujus uberimam materiam penitior rerum, tam divinarum in sacro codice comprehensarum, quam naturalium in amplissimo naturæ libro obviarum, contemplatio suppeditat.

§. XXII.

Deinceps aëris quoque magna vis est, ad inducendam tam secundam quam adversam valetudinem, corporibus

Frid. Hoffmanni Oper. Tom. V.

præsertim imbecillis senilibus, quæ mutato illo, illico etiam mutationem experiuntur. Ne igitur ex insalubri aura detrimentum accidat senio fessis, eligendus erit aër temperatus, purus, tetrus halitibus non inquinatus, sed liber, isque ruralis: quippe qui verum sanitatis pabulum, quod vires inspirat, appetitum excitat, concoctionem juvat ipsique libero excretionum successui servit. Imprimis è re illorum est, ut incolant conclavia ampla & spatiosa, ad quæ aër libere pertingere eademque perflare potest, orienti quoque & hiberno potissimum soli patentia.

§. XXIII.

Apprime enim senibus conducit solaris calor hie me præsertim & autumno usura; quandoquidem sicuti floribus, herbis aliisque vegetabilibus, brumali tempore propagandis, ad incrementum & durationem solis accessus summopere confert: ita pari etiam ratione, marcidæ senum corpora hiemis ipsiusque senectutis molestias longe tolerabilius perferunt, si solari naturali calore, & non tantum adscititio per ignem suscitato, perfruantur. Veteres hunc in finem in superiori ædium parte construebant solaria, quæ solem undique exciperent apricaque essent, & recepti inter eos ad valetudinem tuendam moris erat, ut crebrius nudi in sole jacerent, sederent vel ambularent, quod sole uti, & insolationem dicebant, cujus commoda MERCURIALIS lib. VI. cap. I. fusius exponit.

§. XXIV.

Prodest etiam nonnunquam, præsertim Maio & Septembri mense, qui saluberrimi censentur, senibus, ut peregrino aëre se confirment, quod præsidium prisci identidem ad conservandam & fulciendam corporis integritatem mirifice commendarunt; ita, ut PLINIUS lib. III. ep. I. de Vespricio quodam fidem faciat, quod constanter hanc regulam servans, post septuagesimum & septimum annum, aurium oculorumque vigorem integrum, agile & vividum corpus servavit. Idem clarissimo argumento docent diuturni & quam maxime rebelles morbi, quos, quum non tempus, non remedia vicerunt, mutatum coelum subinde sustulit.

§. XXV.

Porro motus corporisque exercitatio viribus fulciendis & sanitati servandæ longe utilissima est. Dumdum id professus est CELSUS, perhibens: *ignavia corpus hebescere, labore firmari, illa maturam senectam, hoc longam adolescentiam fieri*. Quemadmodum enim ipsa vita, omniumque tam animi, quam corporis functionum integritas, consistit in motu solidarum æque ac fluidarum partium æquali ac imperturbato: ita certe, quin motitatio corporisque exercitium, hunc adjuvando, non solum vitæ & virium conservationi eximie patrocinetur, sed etiam in ætate declivi vigorem ingenii ac corporis sustentet & augeat ipsique sanitatis constantiam spondeat, non est quod dubitemus. Et licet plura ex remediorum classe sint, quæ corpus calefaciunt & motum sanguinis intendunt: motus tamen corporis his omnibus longe præferendus, quippe qui, naturalis magis & de proprio principio calorem & progressus augmentum inducit, ille vero adscititius, externus & aliunde accensus, naturæ non adeo amicus.

§. XXVI.

Sunt vero ejusmodi exercitationum modi eligendi, qui corpus non nimis languori dant, sed ætatis provectionis viribus respondent. Saluberrima ambulatio, vel vectura, præsertim litteratis, quo sedentaria vita, quam poscunt Musæ, per intervallum temperetur corpusque refocilletur. Hæc quo moderatior est, sub temperate calido coelo, eo plus emolumenti præstat, præsertim si tribus, vel etiam quatuor, ante, nec non post cibum sum-

tum, horis, instituat; quandoquidem hoc pacto, concoctionem non turbat, sed eandem adjuvat & appetitum excitat.

§. XXVII.

Aptissimum quoque imbecillis & senescentibus, nec non qui Musis in quiete & secessu litant, motus genus est clara lectio, cujus usum Veteres eximie collaudarunt. Dum enim elata voce diutius emissa, respiratio intenditur, non solum pulmones crebrius attolluntur, latius panduntur, incalescunt & cum aëre sordes eliduntur, sed universus etiam sanguinis circulus, cum calore, spiritu & perspiratione augetur, quo fit, ut partibus robur infundatur omnesque in corpore functiones expeditius & melius succedant. Quin auctore CELSO, figurata voce instituta lectio robur ventriculo maxime ingenerat & ciborum concoctioni egregie servit; siquidem motis sub sermone thoracis septique transversis musculis, vicinus conquassatur ventriculus & comprimitur, ut non solum sanguinis arteriosi & fluidi nervei in ejus tunicas augeatur impulsus, sed etiam major salivialis & fermentalis mensui fiat affluxus. Ut adeo pateat, egregio beneficio publice docentes in eo frui, quod ipsa muneris ratio ipsis injungat, ut ademptis maxima ex parte aliis motus speciebus, voce corpus exercent.

§. XXVIII.

Lenissima & imbecillimis quam maxime conducibilis corpus agitandi ratio est gestatio in lectica: quippe quæ, ad discutiendum id, quod coit in habitu corporis & liberum perspiratum retardat, sine ulla vehementia plurimum confert. Iisdem quoque senio & debilitate affectis, CELSUS lib. IV. cap. 5. suadet, ut ejusmodi exercitationis genus adornent, qua superior corporis regio magis dimovetur & percietur, illudque in omnibus stomachi vitiis accommodum & ex usu esse confirmat: id quod commodissime perficitur manuum motitatione & brachiorum agitatione, per pulsationem musicorum instrumentorum, lusum varia genera & qui plures alii sunt modi.

§. XXIX.

Motus vices in iis, quibus exercendi corpus occasio & locus deest, supplet frictio, quæ utilissime non modo in capite & dorso, sed etiam pedibus & toto corpore instituitur; eo quod inde calor insitus excitatur, motus sanguinis per minima urgetur, cutis rarefit, & si quæ subtus hac latent superflua transpirant. Multum certe huic detulerunt Veteres, & CELSUS imprimis in corporibus imbecillis & levata adversa valetudine, ejus administrationem præcepit, neque dubium est, quin eadem debilibus etiam senum corporibus apprime proficua sit. Tutissimum vero & opportunum est, corpus quotidie, perfectâ concoctione alvoque prius excreta, mane in lecto, vel vesperi ante lecti introitum, maximeque partes extremas, pedes potissimum, panno asperiori ad cutis ruborem usque perfricare, & ita quidem, ut fricatus deorsum ducatur; siquidem lentior semper est sanguinis ex inferioribus partibus ad fontem recursus, qui hoc auxilii genere adjuvandus est, imprimis quum pedes senum & imbecilliorum ex facili & plerumque frigescent.

§. XXX.

Non minus Priscis in quotidiana corporis cura olim frequentissimus fuit balneorum & unctionum usus, & pugnare hæc præsidia contra frigiditatem & ariditatem partium, senibus exitiosissimam, affirmarunt. Verum nostris in regionibus, quæ coelum longe frigidius & rigidius obtinent, auramque inclementiorem foveant, quam Græcia aliaque calidiora loca, minus tutus est senibus balneorum infusus, imprimis autumnis & hieme,

eo quod aër perfrigeratus corpus ambiens, tonum cutis magis destruit & ad destillationes ac gravedines disponit. Interim tamen iis qui senio non adeo exhausti sunt, æstivo tempore, fatigatis per motum & iter membris, non adeo dissuademus, ut partes, tam inferiores, quam superiores, accommodo balneo, in conclavi maxime spatiofo, amplo, alto & lucido, foveant. Uctiones autem magis, inter nostrates etiam, usui esse possunt, ita easdem adornando, ut partes inferiores, & maxime etiam spina, ad solem, vel fornacem calidam, calide cum oleo v. c. amygdalarum dulcium, vel pinguedine caponum & gallinarum, additis aliquot olei lavendulæ guttis, inungantur & leniter perfricentur.

§. XXXI.

Præterea somni ad vitam & sanitatem fervendam tam præstans est usus; ut sine eo durare nequeant, & ad vires reparandas tam incomparabilis facultas, ut omnem, cujuscunque etiam analeptici, dilaudatam virtutem longissime exsuperet. Is enim non solum spirituosas & fluidissimas sanguinis & lymphæ partes fovet & tuetur, sed etiam nutritium & alibilem succum retinet, quo solidæ partes egregie humectantur & dulci rore perfunduntur; ut adeo ad exsuccas & aridas corporis marcescentis partes, eodem nihil sit utilius & aptius, & ex vero à GALENO monitum: *omnibus ex siccitate laborantibus, somnus opportunissima est medicina.* Quo magis itaque senibus siccitas est infensa, & genuina, tam imbecillitatis eorum & extincti caloris, quam ipsius mortis causa; eo magis ipsis somnus amicus & in pretio esse debet, & is quidem non interruptus, non fatigans, inquietus nimisque accisus, sed placidus, plenus & reficiens, qualis esse suevit post cœnam facilem & frugalem, animoque hilari & tranquillo quieti sese dantibus. Incubandum vero etiam stratis mollioribus, non solum ut ipse somnus eo quietior sit, sed etiam quo mollescente inde & relaxato corporis habitu, sanguinis liberior in hunc fiat appulsus, & sordes per aperta cutis spiracula eo promptius diffentur.

§. XXXII.

Succedunt ingesta, cibus scilicet & potus, in quorum delectu maximopere respiciendum ad senilium corporum, tam quoad annos, quam vires, diversam habitudinem. Etenim quibus firmior adhuc ventriculus minusque annorum, non facile discedant ab assueta victus ratione, licet tantisper durior sit & ex viliorum more; qui vero solutioris sunt stomachi, uti decrepita ætate confecti, selectum instituant & accommodis cibis utantur, iis nempe, qui probatissimi succi, temperati, faciles concoctu, nec diu in ventriculo moram necentes eumque gravantes & moleste afficientes. Commendamus hunc in finem imprimis juscula ex caponibus, gallinis aliisque alibilium carnum generibus, nec non liquamen ex confusis cancris fluviatilibus, sine aqueo vehiculo, affuso vini modico adjectisque aliquot citri taleolis & macis frustulis, in vase clauso, imposito aquæ bullienti, per decoctionem paratum. Eandem quoque in rem laudem merentur brodia, quæ ex pane grossiori suffuraceo, cum aqua & vino, addito cinnanomo & saccharo, conficiuntur, nec non, succus ille gelatinosus, qui ex assatis carnibus stillat, quippe qui, tanquam electissima & ad chyli naturam quam maxime accedens pars, nativi caloris in senibus substantiam egregie inflaurat, affuso solidis temperato, & spirituosus delibatissimo, nutrimento. Neque etiam penitus abstinendum à cibis lævioribus, qui alvum lubricam servant & acidis in prima regione succos contemperant, cujus generis sunt pira & poma dulcia, pruna Hispanica, fructus cynosbati, cum passulis aqua & vino decocta. Parcior vero semper sit cœna senibus, præsertim si caput infirmitate detinetur, vel tussis humida urget, ipsiusque ventriculi robur remissum. Nam licet somnus cœnam excipiens ingestorum digestionem

ffionem secundet; ipse tamen, superfluum per alvum, urinam, perspirationem & pituitæ scretum eliminatio- nem impedit, eaque suspensa, cruditatū sit proven- tus, quas ventriculi inflatio, ructus, capitis oppletio, pondus, sensuum torpor, nocturna tussis corporisque sub somno jactatio arguunt.

§. XXXIII.

Non minor cautio circa potum adhibenda. Et ut prius de cerevisiis mentem promamus; rarissima certe sunt exempla senum, qui eandem ferre possunt. Nam si juniores, flatuum generationi velificantur, sin vetu- stiores, acorem contraxerunt & caput petunt, uti so- lenne inprimis est ex tritico coctis, si vero lupulo ama- ricanes & validioris materiæ, humoribus lentorem & capiti segnitiam insinuant. Quare si quis cerevisiis as- fuetus, nec aquarum potum admittere potest, tenuissi- mæ, vulgo *Halb-Bier*, crassioribus præferendæ, & spi- rituosæ gratiores, quo nomine notæ sunt Goslarieus, Brunsvicensis & Mecklenburgensis, saltem instar medi- cinæ stomachicæ, modice, & quidem in cœna, bibendæ. Qui vero aquis affuefacti, his levissimas & purissimas, leniter tantum cum ligno lentisci, vel corticibus citri, decoctas, potui dare expedit, eo salubriores, si cum vino apto remisceantur.

§. XXXIV.

De vino ejusque usu, communis quidem Veterum sententia fert: pueris dilutum, meracum & potens se- nibus conducere; norma tamen est neutiquam perpe- tua, sed potius cum judicio & discrimine applicanda. Omnino enim natu grandioribus saluti est, ut vinum mi- nus potens bibant, vel forte, quale vetus Rhenanum & in- ter Gallica optimum Burgundicum est, aqua temperent: ita tamen, ut si aquæ potus ordinarius, illius tertia vel quar- ta pars confundatur. De generosioribus autem monen- dum: quod potentia eorum simulque dulcia, quorum cen- sum subeunt, quæ superior Hungaria profert, inprimis Tockavienſe, porro è Gallicis Languedocense, Vin de St. Laurent, Lusitanum quod ex Portu Cale advehitur, Florentinum, & inter Franconica *der Stein-Wein*, senili ætati admodum salubria sint, modice tamen & crebrius inter cibandum sorbillata, quo pacto juvant concoctio- nem, calidum nativum, ex prisco loquendi more, in- staurant, neque minus universo corpori calorem infun- dunt, & serosas fordes, tam per urinarios meatus, quam subcutaneos tubulos, ejiciunt.

§. XXXV.

Sunt vero etiam præter frigidos potus, recepti no- stra ætate usus calidiorum potulentorum genera, Théé scilicet Cofſée & Succolada, quæ, an grandævis etiam profint, dispiciendum. Hæc utique senibus eorumque valetudini tuendæ aptissima sunt, etiam paullo libera- lius propinata; eo quod humectant, crassos & falsos hu- mores diluunt, meatus patulos servant, & calore sangui- nis progressum sordiumque cum perspiratione diffatio- nem promovent; modo ventriculus liberaliorem ferre possit copiam. Interim tamen, quia vis herbæ Théé adstrictiva senili corpori non adeo favet, rebus suis me- lius consulunt, qui tutioris virtutis herbas cum calida infundunt, eoque nomine inprimis herba veronicæ, beto- nicæ, melissæ, præsertim Turcicæ, cum corticibus citri & aurantiorum, commendationem merentur. Decoctum quoque Succoladæ, si cum aqua paratur, adjecto uno vel altero ovi vitello, senum constitutioni & nutritioni qui- dem maxime accommodum est: sed moderamen te- nendum, nec nimis crebro eo utendum. Neque etiam potus Cofſée plane rejiciendus, quod si enim alvum solvit & nervoso generi non obest, acidum, quo senio- rum ventriculus plerumque obsidetur, infringendo & contemperando, egregie inservit. Sorbillantur autem ejusmodi calidæ potiones, nostra quidem sententia,

commodissime & optime mane in lecto, quo iisdem lenis & placidus mador eliciatur.

§. XXXVI.

Sed hæc de vitæ regimine & victus ratione in tu- tanda senum valetudine servandis; jam nonnulla adjici- enda sunt, de aliis præfidiis, medicamentosis magis & non ita quotidianis, integritati tamen ætate provectio- rum egregie patrocinantibus. Et primo quidem loco excutiendum: num thermarum vel acidularum potus senibus utilis sit & accommodus? In hac autem consi- deratione potissimum ratio habenda non solum virium, quæ usuris consent, & ipsius periodi senectutis, quæ non adeo sit declivis, sed etiam facultatis mineralium aquarum, quæ minus vehemens esse debet. Proinde in decrepitis & à vigore defectis, quales communiter sunt qui septuagesimum annum compleverunt, caute mer- candum est in medicatarum aquarum commendatione, ac potissimum improbandæ sunt validiori agendi vi instru- ctæ, quarum classem ducunt Pyrmontanæ & Egranæ, ex thermis Carolinæ, ex falsis Sedlicensis, cum fonte qui ad pagum Seydschütz salit. Temperatarum vero & mitius operantium usum admitti posse censemus, & ex his quæ saluberrimæ est, Selteranæ, inprimis si tempore æstivo loco ordinarii potus, cum tertia vini Rhenani optimæ notæ parte nupta, exhibeatur; ita enim acidum vini, cum alcalino aquæ elemento in tertium quoddam sal absterfivum degenerat, cujus ad excretionum successum secundandum eximia est virtus. Addi etiam potest huic mixturæ elæosacchari citri sufficiens quantitas, tum ut saporis gratiam captemus, tum etiam ut viribus tantisper prospiciamus.

§. XXXVII.

An venæ sectio senibus proficua sit? vexatum in fo- ro medico est dubium, facile diluendum & solvendum, si subactum Medici judicium accesserit. Quod enim in senili corpore, si firmior adhuc ventriculus & appeten- tia vegeta, sanguinis abundantia adsit, nullum est du- bium, eo major & certior, quo minus sub otioso minusque laborioso, senibus familiari vivendi genere, is per mo- tum consumitur. Quin potius in plerisque non solum humorum redundantia, sed etiam ex hac oriunda im- puritas peccat, ut plurima ipsis solennia mala, ac inpri- mis infestissimus provectiori ætati marasmus, à crasso & copioso sanguine, quo viscera turgent & infarcta sunt, originem trahant. His igitur sanguinem mittere, est vitam prorogare & sanitatem servare, præsertim si jam antea venæ sectioni assueverint, diæta lauta ac vinosa fruuntur, sanguinisque per anni venas secessus subsisterit. Novimus certe plures, qui subtracto quotannis aliquoties è vena sanguine, ætatem, quæ robustissimis etiam satis longa est, impleverunt, & annum octogesimum quartum & sextum exceſſerunt. Contra vero, si cor- pus impenſus enervatum, vires confectæ, appetitus du- dum prostratus, sanguinem educere, piaculum foret & senectutem extinguere. Sed quum nobile hoc non minus quam utile argumentum, D.D. PRÆSES, jam olim peculiari *dissert. de venæ sectione magno ad vitam longam præsidio*, fusius pertractaverit, supervacaneum duco, plura de eodem, ibi dicta, huc transcribere.

§. XXXVIII.

Præterea quum alvina excretio, sive excedat, sive deficiat, senum saluti periculum minetur, legitimi ejus- dem successus quoque ratio habenda erit. Quod si au- tem alvus compressa fuerit, ejus solutio, neutiquam va- lidioribus, & virulenta indole gravius in vires grassanti- bus, molienda; sed confectæ huic ætati, præter laxantes, ex falsis, dulcibus & pinguibus, cibos, apprime dicata & accommoda est manna, ad unam vel alteram unciam, cum lacte asinino, vel sero caprillo, oblata; quippe quæ, pe- ctori amica, tussi medetur & ponticos auſteros in primæ

regionis diverticulis obhærescentes succos egregie cicurat, eosdemque sine virium damno, promte per ani secessum exturbat. Sæpius quoque observavimus, exhibitio saltem pulvere absorbente, vel bezoardico fixiori, alvum in senibus fuisse motam, hanc forsan ob causam, quod alcali terreum pulveris ingrediens, cum acido primarum viarum in sal tertium coaluit, & tunicis intestinalibus stimulum insinuavit. Sennata autem nec non aloetica exulent. In segnioribus tamen & phlegmaticis, si res postulaverit, pilulæ temperatæ balsamicæ ex usu esse possunt, cujus generis sunt Becherianæ & ad imitationem harum partæ & correctæ. Et si forsan acciderit, ut ob fecum ficitatem & copiam alvus obstipetur, injiciendi sunt clysteres emollientes oleosi & his stercorea evocanda. Sin vero nimis crebra alvi dejectio senes exerceat, ut metus lienteriae sit, nocentissima sunt adstringentia. Tutius est, diæta quodammodo ficcante uti, abstinendo ab omnibus acidis, falsis & acribus, stimulum inferentibus. Et ad reparandum intestinorum laxatum tonum, ex cinnamomo paratis nihil est præstantius. Utilissimum quoque est balsamum nostrum spirituosum sic dictum vitæ, cujus guttæ decem vel plures, cum duabus olei cinnamomi guttis, interius assumendæ, eodemque exterius ventriculi regio inungenda.

§. XXXIX.

Supereft tandem, ut de iis, quæ ex medicamentorum classe ad refocillandas in grandævis vires faciunt, nonnulla addamus. Quamvis autem plurimi ad hoc perficiendum spirituosus & aquis sic dictis stomachicis, primas deferant; cautissimus tamen eorum sit usus auctor sum, ne liberali manu & crebrius propinata, sangui-

nem, præsertim si redundet, exagitent & caput imbecillius reddant; quin, in senectute viridi & vino fruentibus, plane ab iisdem abstinendum esse censeo. Interim si vires vacillantes remediis suscitare ex usu sit, tria, quæ principem inter analeptica locum tenent, ambram scilicet, cinnamomum & succinum, & ex his lege artis parata, plenissime commendamus. E liquorum autem analepticorum compositionibus, hanc maxime utilem & accommodam fore reor formulam: *Recipe myrrhæ electæ uncias duas, croci unciam dimidiam, corticum citri & aurantium ana uncias duas, cinnamomi acuti unciam cum dimidia; affunde spiritus liliorum convallium libram dimidiam: postea adde vini Hungarici mensuras tres, destilletur lege artis per alembicum, prodians liquor suavissimi odoris & saporis, julepo rosarum grata dulcedine imbuatur & affusa drachma una essentiae ambrae, usui servetur.* Est certe hoc remedium tam accommodum senum fessæ naturæ, & tam præstans ad imbecillitatem sublevandam, quam vix ullum aliud, firmat quippe ventriculum debilem, caput roborat & blandum quoque somnum inducit. Poterit autem de eodem nonnunquam cochlear unum vel alterum, vel solo, vel intincto pane mellito Norimbergensi exhiberi. Non minus etiam viribus & stomachi infirmitati egregie succurrit elixir nostrum balsamicum stomachicum, inprimis autem balsamum nostrum sic dictum vitæ, quod interius, confecto ex eodem elæosaccharo, assumtum, vel etiam infuso thee instillatum, & exterius, attracto per nares odore, verticis, nuchæ & necessitate exigente aliarum à robore defectarum partium inunctione, in capitis dolore, vertigine aliisque senum afflictionibus, opem præstat longe saluberrimam.

Q. B. F. Q. V.

D I S S E R T A T I O M E D I C A

D E

M I L I T U M V A L E T U D I N E T U E N D A
I N C A S T R I S.

§. I.

DE militum valetudine in castris tuenda nunc acturis, verborum definitione parum opus videtur, quum omnibus notum sit, quid sit miles, quid castra denotent, quid rectam valetudinem dicamus. Enimvero juvabit rem non tam definire, quam secundum attributa & circumstantias, ad præsens negotium præcipue pertinentes, describere, ut lectori in memoriam revocemus, quid in recto judicio ferendo maxime attendi debeat. Est autem miles persona honesta, quæ sacramento, quod Principi suo dixit, obstricta est belli laboribus & ærumnis, quoties id jubetur, etiam cum vitæ manifestissimo periculo, fortiter subeundis: tantum abest, ut suæ spontis sit, atque vel commode vivere, vel se subtrahere possit tempestatum variis injuriis, aliisque causis, quibus valetudini labes affricari, aut corporis integritas detrimentum capere possit. Non habet plerumque cibi & potus delectum, sed obviis, & pro temporis ac loci circumstantiis paralibus, victitare debet: aliquando affluit & abundat victus optimus, est vero sæpius, quando parce vivere, aut famem sitimque sustinere cogitur. Tempora cibi certa, eduliorum adfuetus ordo, lautitiarum creber usus, adeo non conveniunt cum vita militari,

ut omnium primo his desuescere debeat, qui vel tirocinium artis hujus ponere aggreditur. Jam somno meridiano statuta hora indulgere, aut certa noctis hora lectum bene stratum & mollem intrare, beneque clauso & munito conclavi requiescere & vires reficere, donec statuta hora evigilare & labores repetere jubeat, adeo non est militare, ut nihil minus possit. Vigilandum est, dum alii dormiunt, & dormiendum quando licet & vacat. Laborum & quietis nulla certa designataque habent tempora. Non licet, quod suæ spontis homines magni faciunt, statis excretionibus sudoris, ut matutinis à somno, vacare, non ejus causa sanguinem infusis calidis excitare, certisque horis illud, quo se carere non posse aliqui existimant, evacuationis genus adstringere. Nec tempora sanguini mittendo certis lunæ phasibus adstringere valent. Animi affectuum noxas, præsertim ab ira excandescere, omnium minime licet evitare: præsertim illis, quibus gregarii militis dirigendi & in ordine continendi munus incumbit: quin ipsis illis, qui ordinem præcipuum obtinent, ceterisque præsunt, multa quotidie occurrunt, quæ animum commoveant indignatione: ne dicam de irrequieta cura & cogitatione, qua hostium consilia rimari, ab insidiis ipsorum sibi cavere, totiusque belli successum è longinquo prospicere debent.

§. II.

Castra non intelligimus illo sensu, quo sæpe arces & habitationes nobilium eodem nomine afficiuntur: sed stativa militum à ducibus & imperatoribus assignanda, quibus vel integer exercitus subsistit, & commodissimum aliquid agendi tempus expectat, aut hostium conatibus sese opponit: vel certæ cohortes ex mandato imperatoris consistunt, ut transitum hosti prohibeant, aut in propinquo sint, si hoc vel illo loco in subsidium vocari debeant. Sub dio aut tentoriis ibi degitur, male à frigore aut intenso calore munitis. Et quamquam libero perflatu ventorum satis, & aliquando plus satis, frui licet: fieri tamen nequit, quin in tanta hominum & animalium multitudine aer effluviis variis impleatur: fordesque accumulentur: præsertim ubi venti silent, & siccus calor diu continuat, ipseque positus locorum ventos aerem purgatuos excludit & prohibet, aut à paludosis humidis locis ad castra compellitur noxiarum exhalationum copia. Sunt quidem aliqui etiam præsidio urbium & castellorum impositi, qui videntur his in apriçi gramine campi recumbentibus feliciores: sed quum obsidione cinguntur, sat multum sustinent incommodorum: ne dicam ipsa istiusmodi castella propugnacula raro optimis & saluberrimis locis esse structa, sed plerumque in eo spectari solere reliquas rationes, ad securitatem potius & expugnandi difficultatem, quam ad salubritatem, adeo accurate exactas.

§. III.

Valetudo est vocabulum ancipitis significationis, nos autem rectam intelligere, quæ tuenda sit, facile intelligitur. Sed labascentem fulcire, lapsam erigere, depravatam corrigere, vitioque depulso integram restituere, officio Medici castrensis non minus contineri, & ut, quantum in ipso est, hic sedulo invigilet, omnemque operam & studium ad hoc præstandum conferat, obligatum eum esse agnosco & profiteor. Atque utinam liceat priori, quod ob dignitatem titulo inscripsimus, obtento, supersedere ceteris officii partibus. Quum vero fieri vix possit, ut in exercitu, aliquot hominum millia includente, tam recte ad votum omnia comparata sint, ut non pluribus morborum causæ inhærescant, & valetudinem labefactent: dispiciendum utique erit de causis istis, unde morbi primam originem frequenter habere soleant, ut his cognitis & averfis, aut si averti omnino non possint, mature recteque correctis, exorientes morbi in herba, quod aiunt, supprimantur, & fugiens sanitas revocetur.

§. IV.

Eundem itaque nobis erit per sex illas rerum in schola medica non naturalium nomine appellatarum classes, ut videamus, quantum, & quale à singulis immineat rectæ valetudini periculum: hocque cognito statim jungamus, quid facere, ad illud avertendum, recta cum ratione oporteat. Aëris, quem non eligere militi licet, sed quemcunque circum se hærentem perferre oportet, qualitates excessivæ corpori nocent, ut si excessive sit frigidus, calidus, humidus aut siccus. Frigus excessivum, fortiori fibrarum & vasorum stritura & compressione, humorum motum ab ambitu corporis magis ad interiora urget & convertit, & æqualem atque per vasa minima exteriora liberum sanguinis & humorum circuitum impediendo, graves & periculosos, in partibus, præsertim debilioribus, infarctus, vasorum repletiones, & morbiferas semper stases ac stagnationes efficit. Quod si nimis diu perferendum sit rigidissimum gelu, humores omnino congelantur, parsque sit tanquam emortua, quæ nisi recte studiosissimeque tractetur, sæpe omnino emoritur & à parte sana abscedit. Potentissime corpora ferit vehemens frigus, matutinis horis iter versus solem orientem hyeme facien-

tes, quia tunc fere ventus ab ea plaga conjungitur vehementissime perfrigerans: sic ut tota die his maxime horis cavendum sit. Eundem effectum facit boreas, adversus instans, & per noctem aut noctis partem tolerandus. Noxarum militibus illatarum à frigore gravissimarum exempla dant XENOPHON *de exped. Cyrt. libr. IV.* & HENR. MUNDIUS *oper. med. physicor. p. 23.* qui ultimus commemorat in Scotia factum fuisse, expeditione quadam hyeme instituta, ut plerisque militum pedes & manus adeo gelu contraherentur, ut multi ægre incedere valerent, quidam non omnino, nec arma tractare.

§. V.

Præter manus ac pedes, pinnae narium & auriculæ maxime expositæ sunt injuriis, ab intenso frigore suscipiendis: de quibus præter alios videndus est AMBR. PARAEUS *libr. XI. Cap. 2.* qui sphaceli, à congelatione tam in his quam aliis partibus orti, pessimam indolem exemplis ostendit. Et sane plurimum nocet illis, qui humorum copia repleti sunt, eorumque impuritate cachectica, vel cacochymica laborant, aut spasmodicis morbis obnoxii sunt, vel nuper à gravi morbo convalescerunt: concitat autem cephalalgias, vertigines, affectus soporosos, apoplexiam, paralyin, auditus vitia, oculorum obfuscationes, lippitudinem, tussis, pleuritides, asthma humidum & longe plura mala.

§. VI.

Adversus tam graves noxas munitum militem reddunt vestes: multum tamen ipsum etiam juvat, si corpus moveat cursu, aut cita deambulatione, manuumque concussione. SCHNEEBERGERUS *de sanit. milit. conservand. p. 6.* de Walachis scribit, quod cum in regione frigidissima habitent, & propemodum nudi, levissimis vestibus induti incedant, motum sive cursum, & manuum concussione, vice tecti, vestium, lectique sibi esse didicerint. Juvat interdum manus rigere incipientes nive defricare, deinde crebrius movere. Si ad ædes perveniant, caveant probe calefactum locum illico intrare, aut ad fornacem vel focum properare. Rigentem partem nive aut aqua frigida foveant: deambulent potius, quam quiescant, & ante quam ad interna compulsi detentique humores ad externas partes remeaverint, spiritum vini aut alium valde spirituosum potum assumere caveant: quoniam facile coagulantur intus coacervati humores. Tutius bibitur cerevisia, postque hanc haustam, si iter continuandum sit, spirituosus potus, moderate tamen & ipse sumendus. Etiam illud admonendum esse puto, ne miles, si forte ad frigidum locum pervenerit, ubi pernoctandum sit, in conclavi, quod nec fornacem nec caminum habet, carbonem ligneos, quolibet fabri utuntur, succendat. Quo gravius frigus, eo certior noxa, majusque vitæ periculum imminet, quod suo exemplo omnem posteritatem docet Romanorum imperator Jovianus, qui vitæ exitum hoc modo invenit in pacata regione, quum ab hoste victorias retulisset. Vide EUTROPIUM *lib. X. conf. nostr. Medic. System. tom. II.*

§. VII.

Atque hæc de frigore sicco dicta sufficiant. Frigus humidum non minus, immo magis etiam, corpori nocet, humores quidem æque inspissans, tonum autem fibrarum insuper relaxando, universum humorum cursum retardat, transpirationem imminuit, sicque copiam impuritatum succis adjicit. Tanto autem pejor est humiditas, si à locis paludosis adspirans flatus nebulas ac nimbos afferat: unde vernali atque autumnali tempore plurimi populariter grassantes morbi exoriantur. Oportet itaque illo tempore, quo talis est aëris constitutio, potissimum id agere, ut transpiratio conservetur, atque hoc fine adhibere vinum, spiritum vini juniperatum

niperatum, medicamenta spirituoſa, allium, baccas juniperi, &, quod fere parabiliſſimum eſt, ſulphur ejuſque flores, quibus diapnoen conſervari & promoveri experientia docuit. Si rob juniperi vel ſambuci ad manus ſit, nec ipſa ſine fructu adſumentur.

§. VIII.

Omne frigus vehementius nocet homini jejuno, quam qui cibo potuque reſectus eſt. Vehementer igitur optandum eſſet, ut tali tempeſtate miles non prodire deberet, niſi juſculo vel infuſo aliquo calido aſſumto. Votum noſtrum id eſt & conſilium *in diſſ. de morbis præcævend.* §. 31. ubi ſuadeo, ſi nihil aliud ad manus ſit, libræ aquæ ferventis uni addere baccarum juniperi leviter toſtarum xx. aut xxx. & fruſtulum toſti panis, & poſt unam vel alteram ebullitionem calidiſſime hoc ſorbillare, ut alia infuſa ſolemus. Hoc præmiſſo nec facile nocebit hauſtus aliquis ſpirituoſus: ſicque bene fluxiles humores cutis conſtrictos poros aperient, & tam per hos, quam per alia emunctoria, diſſipabitur, quicquid impuratum in corpore alias erat remanſurum.

§. IX.

Sed non minus, quam à frigore, lædi calore nos poſſe, certum eſt: certe moleſtiarum inde militibus in caſtris degentibus plurimum enaſci ſolet. Aer nimio calore fervens, *vid. med. System. tom. 1.* humores corporis immodice attenuat, ac raros facit, dumque pororum hiatus latiores reddit, inconſpicuas diſſationes nimis auget. Sic vero ſanguinis particulæ ſubtiliores, quæ optimæ ſunt, plus juſto eliminantur, gelatinoſæ vero reſolvuntur & diſſipantur, unde corpus debilitari neceſſe eſt. Quamquam, ſi recte rem ponderamus, pleræque noxæ, quæ ſub æſtuate tempeſtate oriri ſolent, non tam directe & primario calori tribui debere videntur, quam vel frigidiori & humidiori aëri, qui nocturnis & matutinis horis regnat, indeque ortis crebris viciffitudinibus, vel maleſuadæ ſiti, cujus levandæ gratia milites potum aut intemperanter, aut qualitate noxium infundunt: vel ejuſdem ſitis explendæ cauſa fructus horæos, ſæpe non ſatis maturos, ſæpius rore noxio conſperſos, ingurgitant.

§. X.

Oportet itaque, quantum fieri quidem poteſt, providere, ut, dum maximi calores fervent, miles ſub tentorio requieſcat: itinera autem noctu ſuſpicere, atque matutinis horis eadem proſequi. Illo potiſſimum tempore vino & ſpirituoſis potibus atque aromatibus, utpote humores magis expandentibus, abſtinendum eſt. Utendum autem nitro, acidis, ut acetofa, acetofella, ſucco citri, ipſoque aceto, quod, teſte SCHNEEBERGERO *p. 66.* Romanis militibus in uſu fuit, quemadmodum de *Marco Catone* relatum legitur, ipſum in militia ſemper aquam biſſe, niſi quando ardentè ſitiret, tunc enim acetum potaſſe. Sed de hoc ſuo loco inferius ſeorſim diſpiciemus, ubi de potu agendum erit.

§. XI.

Calor humidus corpora vehementer reſolvit, languoremque inducit, quia fibras motrices nimium laxas & flaccidas reddit, & cutaneam excretionem valde & ad exceſſum uſque intendit. Tanto autem nocentior eſt, quum humiditas, quam aër ſecum fert, impura eſt, atque exhalationibus ſulphureo-ſalinis referta: unde morborum celeri impetu in plures tranſeuntium, magnasque ſtrages edentium, quos epidemios ſeu populares vocare ſolemus, origo pendet. Ipſa vero effluvia hujus generis frequentiffime debentur in vicino putreſcentibus aquis, paludibus, ſtagnis: ſed & tot hominum & animalium, in magnis caſtris diu degentium, exhalationes, & excrementa cetera, non poſſunt non aërem circumfuſum implere & inquinare. Si vero his accedant ho-

minum & animalium in pugnis cæſorum aut morbo deſunctorum, non ſatis profunde humatorum, aut prorſus ſepultura carentium, putridæ & foetidæ colliquationes & tabeſcentiæ; utique gravius malum reddi neceſſe eſt: graviſſimum vero fit, quando ex his jam plura corpora infecta in febres, dyſenteriaſque malignas incidunt, atque in horum corporibus ſpecificatum & exaltatum venenum in plures, qui verſari cum illis & inter illos debent, tranſit, ſimilemque corruptionem malignam putredinoſam in illis excitat: quæ vix coercibili impetu tunc potiſſimum progreditur, quando ad aëris infecti malignitatem, varia in victu reliquo vitia accedunt: de quibus ſuo loco inentio facienda erit.

§. XII.

Vix certius tanto malo remedium datur mutatione loci, caſtrorumque ad ſalubriorem regionem tranſlatione: ſed hoc non pendet ex Medici voto: quem, dum illud liceat, alia artis ſuæ præſidia & auxilia afferre oportet, aut ſuadere ſaltem & proponere. Juvabit igitur ad aërem corrigendum magnos & luculentos ignes in caſtris ſæpe accendere, quibus aër ſtagnans & vappidus commovetur, ipſuſque corruptionis magna pars conſumitur. Tentoria ſuccenſi ſulphuris fumo ſæpe purganda ſunt, & aceto conſpergenda. Si juniperi copia ſit, illius virides ramos cum baccis utiliter incendimus, atque hoc fumo impuras aëris partes vel diſpellimus vel corrigimus. Militi tunc temporis utiliter datur, quicquid tranſpirationis ſucceſſum conſervat, ut infuſum quale §. 8. commendatum eſt, pulvis ex vegetabilibus quibuſdam alexipharmacis, ut pimpinella alba, helenio, angelica, galanga, gentiana, carduo benediſto, cum nitri aliqua portione: aut, ſi nihil horum ad manus ſit, ſubinde ſulphuris flores, quantum cultri cuſpis capit, præbeantur cum aliquo terreo abſorbente, ut teſtis ovorum, conchis præparatis, chelis & lapidibus cancrorum. Utiliſſime verſus noctem capietur talis medicina, quo tempore frigus, calorem diurnum excipiens, ſolet ingruere, & corporis ſuperficiem conſtringere.

§. XIII.

Dum calido aëre ambiuntur corpora, & ſub eo moventur, neceſſarium eſt ſæpe illa multumque ſudare, & illuvie multiſque ſordibus obſideri. Hæ dum cutim undiquaque tegunt, non ſolum cum tempore poris claudendis valent, verum etiam idoneum hominem reddunt, cui exterius per aërem ſparſa halituoſa miaſmata facilius inhæreſcant, ſicque toti corpori inſinuantur. Duo præſidia adverſus hanc noxam nobis data ſunt, alterum, ut induſia, quæ ſudorem multum exceperunt, crebro mutantur: alterum vero, ut ubi locus & tempus permittunt, corpus crebro lavemus. Dici vix poteſt, quantum Veteres huic rei tribuerint. Afferam in hanc rem notabilem SCHNEEBERGERI locum: Cum vero, inquit, qui in ſole fervente itinere peracto non laverit, *GALENO meth. med. lib. X. cap. 10.* auctore, aut in febrem incidat, aut capite gravato longo laboris tædio afficiatur: illico ſe in aquam frigidam milites, utpote valentes viribus conjiciant & juvabuntur. Nam ex itinere accedimus balneum frigidæ, ne loqui quidem præ linguæ & faucium ariditate valentes, totumque corpus ſqualidum ac exſiccatum habentes. At egreſſi e frigida, conſeſtim omnia pro naturæ habitu recipimus, nec febrili calore vexati, nec ſiccitate afflicti, promteque loquentes, ac magna ſitis parte levati. Sed & ruſtici in ſtagna vel flumina ſeipſos conjiciunt, nullo Medici conſilio, ſed ipſa gubernante corpus natura ad id, quod utile eſt, compulſi: quæ eadem etiam animantia ratione carentia inſtinctu concitat ad eorum, quæ offendunt, contraria: ſiquidem & hæc, ubi æſtu vexantur, frigida ſe lavant. Haſtenus SCHNEEBERGERUS.

§. XIV.

Enimvero huic conſilio obſequuturi caveant, ne maxime

maxime æstuant, & vere adhuc sudantes, frigido lavacro se permittant. *Alexander Magnus*, quum se incautius in hoc gereret, inquit Cydno, Ciliciæ rapidissimo & hinc frigidissimo fluvio, lavaret, in magnum vitæ periculum adducebatur. Deinde etiam providendum est, ne quis febre actu laborans lavacro se tradat: tandem ne natandi imperitus, in fluvii ignoti gurgitem illabendo, vitæ periculum subeat. Si in vicino sunt thermæ, ut in Hungariæ multis sit locis, etiam ad Rhenum illarum lavacro utilius etiam se permetterent. Sed quum hæc res multas cautiones habeat, quas hic locus non capit, sine Medici consilio hoc promiscue fieri non suaferim.

§. XV.

Progredior ad exponendum de cibo & potu militum, unde non parvæ nec paucæ morborum causæ & occasiones solent nasci, si magni errores in quantitate, qualitate & assumendi modo aut tempore committantur: quos tanto studiosius cavere militem oportet, quo certius est morbos facillime exoriri, si cum crebro intercepta & prohibita transpiratione concurrat ventriculi imbecillitas, aut ille cruditatibus oppletus sit. Quantum enim diapnoë liberior, auctiori sanguinis circulo impetranda, concoctionem juvat: tantum male succedens hæc illi vicissim detrahit: *vid. medic. system. tom. II.* Oportet autem assumptorum quantitatem æqualiter respondere illi copię humorum, quæ per labores, & inde factas excretiones, consumpta & dissipata fuit. Hoc nisi fiat, languebit miles, & minus bene transpirans omnibus morbis fiet idoneus. Docet hoc sæpius visâ calamitas, ubi se fami prægressæ nimis cito pestilentes gravissimi morbi adjunxerunt, in quibus à Medicorum ope minus auxilium accessisse debuit, quo magis hi morbi, deficientibus initio probis succis, deinde pravis miasmatis subingressis, & in corpore multiplicatis, originem debuerunt.

§. XVI.

De ciborum delectu multa præcipere militi supervacuum existimo: quum raro copia diversi alimenti suppetat, & ut necessarij ad vitam cibi potusque boni & laudabiles adsint, per homines huic procurationi idoneos efficiatur. Incidit autem subinde, ut vel comæatu excludatur exercitus, vel intercipiatur, vel ob longiora itinera aliasque causas inedia longior necessaria & inevitabilis fiat. Ubi id factum fuerit, vel maxime cavendum est, ne subita & nimia repletionem, damnum irreparabile militis inferatur valetudini. Optimum tunc est refectionem à jusculis incipere, & ubi ab his humores novum supplementum acceperunt, jamque ventriculo affertur, quo opus est ad cibos concoquendos, generosus latex gastricus, ad solidiorem cibum licet progredi, ea quantitate, quæ infra satietatem subsistat potius, quam illam æquet aut prorsus excedat. Si jusculo parando necessaria desint, vini, sed diluti, aut cerevisiæ calidæ scypho misceatur vitellus ovi, aut si & hic desit, manipulus farinæ, aut panis frustulum, quod bene emollitum, sensim cum potu deglutiat.

§. XVII.

Pertinet huc CORNELII CELSI aureum monitum, quo milites sæpe indigebunt: *Si quando insuetus quis laboravit, aut multo plus quam solet, etiam is, qui adsuevit, huic jejuno dormiendum est. Illud quoque nosse oportet, quod ex labore sudanti frigida potio perniciosissima est: atque etiam, quum sudor se remisit, itinere fatigatis inutilis.* Et potusquidē frigidus hac ratione improvide sumtus, hominem in ventriculi & intestinorum gravem periculique plenissimam inflammationem conjicit, stasi inducta humoribus per tenuissima vasa circulantibus, & actuali frigido coagularis. Si cum enarratis omnino conjuncta fuerit aliqua causa, quæ magnam ab iracundia excande-

scientiam attulit, tanto magis augetur periculum, sed ad extremum discrimen res adducitur, si quis accedat inconsultus Medicus, & tunc emicantibus vomendi conatibus, sub vana præfiguratione ac spe ductum naturæ sequendi eamque adjuvandi, præbeat vomitoriam medicinam, sicque oleum camino addat. Venenum non majori periculo præberi potest, quam talis medicina datur his circumstantiis: utique si subiectum sit plethoricum, & temperamenti sanguinei ad cholericum vel melancholicum declinantis, de quo *vid. med. Syst. tom. II.*

§. XVIII.

Non possum, quin hic apponam MINDERERI, multum in castris versati Medici, doctrinam ex *medic. milit. pag. 69. seqq.* *Si valde æstuas & sitim perferre amplius nequis, tantam tibi indulge moram, ut prius lotium emittas, os frigida probe colluas, atque micantibus temporum & carporum arteriis eandem admoveas. Si vero præcipitanter potum infudisti, noveris te in magno periculo versari, quod multis vivendi finem intra XXIV. horas attulit, alios in cachexiam, asthmata & hæcticam consumptionem adduxit: quosdam pleuriticos & empyos fecit, aut viscera naturalia labe insuperabili vitavit. In tanto itaque periculo constitutum docebo te auxilium, quod Deus militum & laboriosorum hominum usibus, per omnia præta & loca graminosa, per totum annum præstolari nos jussit. Est hæc plantula vulgaris, quam bellidem minorem vocant. Hujus tu folia humum tegentia collige, munda, & cum aceto, oleo & pauxillo sale tibi acetarium para, quod celeriter, post acceptam noxam assume. Certam fere opem & conspicuam, venerorque immortalis Dei beneficium, qui mihi concessit bene multorum salutem tam vili medicina sartam tectam conservare, & in periculum adductam recuperare. Viginti & pluribus annis medicinam tractanti nondum occurrit certius & jucundius auxilium & experimentum hoc ipso, quod laudavi, modo celeriter fuerit allatum. Floribus non opus est, sed folia opem ferunt. Meretur hoc experimentum humani generis bono omnibus revelari, utque innotescat cunctis, urbium portis & templorum foribus inscribi & affigi.*

§. XIX.

Sæpe accidit militi in castris & itineribus, ut aquæ non optimæ, necessitate cogente, bibi debeant. Cautio hic sit, ne manifeste turbidam ingerentes animalcula aut ovula insectorum simul deglutiant, quod aliquibus magno valetudinis suæ damno accidisse, nimis quam certum est. Huic periculo obviam ibitur percolatione per linteum. Si tempus permittet, melior correctio est per decoctionem, quæ concitato intestino motu expellet sulphureo-salinas volatiliores partes, in fermentescente putredinoso motu constitutas, aut ab ipso ortas & productas. Si minus moræ conceditur, juvabit tali suspectæ aquæ instillasse unam vel alteram guttam olei vitrioli, quod remedium tam SCHNEEBERGERUS *pag. 58. b. & 69.* albo calculo notat, quam MINDERERUS *pag. 67.* valde commendat. Et sane à recta ratione haud abludit hoc correctionis genus: quippe tam concentrati acidi exigua quantitas, magno vasi, fermentante aut putrescente materia repleto, infusa intestinam illam expansionem manifeste compescit. Ne dicam quod intensissimo æstui, indeque ortæ siti compescendæ, valde simul proficuum sit idem remedium, quod in tantilla quantitate secure adhibetur ita dilutum, quum alias, & extra hæc conditiones, nocere possit.

§. XX.

Et quoniam ad hunc locum deducti sumus, ut de sitis, militibus sæpe molestissimæ remediis dicendum sit, quæritur quid de adipficis seu antidipficis veterum, quibus nos à siti, vel magna ejus molestia, liberare possimus, sperandum sit. Equidem existimo naturale desiderium alimenti humidi, quod suppleat sanguinem per sudorem certasque excretiones imminutum, nulla re

alia vere fisti & auferri posse, nisi ea, quæ defectum humorum expleat. Dari tamen, quæ sitim morbosam, ab acrimonia humorum salina, fauces & palatum quasi exurente, corrigere possint, persuasum habeo: deinde quæ nimium humorum motum compescendo & calorem imminuendo efficiunt, ut dissipatio fluidi tenuissimi minor fiat, crassique humorum melior firmiorque subsistat. Prioris generis sunt pulvères temperantes ex absorbentibus, salibus mediis & nitro: posterioris ipsum quidem etiam nitrum, deinde vero acidula vegetabilis regni, & quod antea laudabamus, acidum vitriolicum, moderate adhibitum. Qui sumtus impendere possunt, curent sibi conficiendas tabellas ex cremore tartari, succo citri, berberum, cum sacchari sufficiente quantitate conficiendas. Tandem sunt etiam, quæ auxilium palliativum præbent, salivæ affluxum excitando, sicque oris siccitatem corrigendo, ut si quis crustam panis ore mastiget, aut glycyrrhizam mandat, aut globulum plumbeum in ore agitet.

§. XXI.

Atque hæc satis secura sunt sitis remedia. Paulo majorem cautionem requirunt fructus horæi, ex quibus aliqua, quæ æstate ineunte ad maturitatem perveniunt, ut fraga, myrtilli, cerasa, sic satis secura sunt, præsertim quod tunc temporis raro noxii rores per noctem decidunt. Sed vergente jam ad auctumnus æstate, dum hujus generis aspergines deferuntur, longe major est adhibenda in hujusmodi indulgendis cautio. Et prunorum præcocium aliqua genera inprimis vitanda videntur, quoniam in ipsis est succus alvum exstimulans, qui facile diarrhœas concitat, quæ deinceps, accedentibus pluribus causis, quarum castra feracia esse diximus, in dysenterias malignas degenerant, magnasque strages subinde edunt. Eadem causa parum esse usum jubet malorum Armeniacorum & Persicorum, quibus tutius abstinetur, ubi jam diarrhœæ se ostendunt: ut melonum ac cucumerum usus in castris plus timoris quam fiduciæ ostendit, præsertim in gregariis, qui raro sibi temperant, & destituuntur illis præfidiis, quibus ordinum præcipui ductores facile vincunt aut avertunt inde metuendas noxas.

§. XXII.

Quod ad potum in universum pertinet, de eo dicenda aliqua videntur, in quibus sanitas militum valde versatur. Sunt in magno exercitu diversissimi homines, qui stipendia merentur. Aliqui à juventute non adfueverunt nisi cerevisiario potui, alii vinis innutriti sunt. His in regione vinis abundante secure vinum conceditur: illis non nisi cum conditione magnæ moderationis, donec ejus usum perferre addiscant. Juva-bit eos aquam interponere & admiscuisse. Fuere quidem inter Veteres, qui vini usum omnino interdixerunt militibus: sed hi de vinis generosissimis, qualia apud Græcos, Italos & Hungaros proveniunt, cogitasse videntur, quæ utique majorem cautionem requirunt, quam Germaniæ pleraque vina. Sed & inter illos veteres non defuerunt, qui graves morbos in exercitu ortos annotarunt, ex quo vino coeperunt destitui: de quo videntus est APPIANUS *de bell. Parth. pag. 165.* qui illud *p. 168.* seorsim testatur Antonii milites, post longam omnium rerum, & præcipue vini inopiam, quum ad feliciores agros pervenirent, seseque affatim implerent, hydropicis coeliacisque morbis laborare coepisse: quod simul comprobatur, ab adfuetis non posse subito ad insueta tuto transiri: & periculi plenam esse repentina repletionem post diuturnam inopiam.

§. XXIII.

Inter potus genera à milite potissimum expetitur vinum adustum, seu spiritus sic dictus vini, qui vel ex fœcibus vini destillando paratur, vel ex frumenti diver-

sis generibus, præcipue autem ex tritico & hordeo. Copiose hic haustus non solum inebriat, & militem vigiliis obeundis, cæterisque officii partibus, ineptum reddit, verum etiam valetudini ingens periculum afferre valet. Nam non solum sanguinem & lympham coagulando periculosas stases, hincque ortos inflammatorios acutos morbos, inducit: verum etiam cachexiæ, phthisi, hydropi obnoxium illum reddit, talemque efficit, qui nunquam ad integram valetudinem possit revocari. Merito igitur abusus prohibetur, & innoxius ac salutaris usus ostenditur.

§. XXIV.

Cum periculo & damno adhibetur, quoties magna copia bibitur, & quidem minimo phlegmate præditus, quem rectificatissimum, aut alcoholisatum dicimus. Talis enim coagulat lympham & sanguinem, corporisque tenuissimas & subtilissimas partes exsiccando & constringendo valde nocet. Qui vero minus est accurate à phlegmate liberatus, minus corpori nocet, & majori fructu & utilitate accipi potest, modo & hic in quantitate non excedatur. Est autem usus securior, post aliquem cibum vel potum, quam si solus, præcipueque post incalescentiam aut defatigationem, corpori infundatur. Idemque minori damno bibitur auctumno & hyemis initio vel fine, quando aër frigidus & humidus regnat, quam vel æstate, qua humores jam satis expansos & fervidos magis æfluare facit, vel sævissima hyeme, qua humores ab externo habitu ad interiora compulso, promte coagulat, & polyposas in vasis majoribus concretiones, multorum morborum chronicorum matres, producit: præsertim si bibatur ab illis, qui sub tali statu quiescunt, nulloque corporis motu humores suos commovent. Si quis vero motum sævissima hyeme subiturus moderate biberit, & aliquid cibi, potumque minus spirituosum, ut cerevisiam, prius adsumsit, non facile hinc lædetur. Emendatior erit hic potus, si super juniperi baccas, aut anisi semen, abstractus fuerit. Sed & hic idem tenendum fuerit, quod de vino, respectu consuetudinis & insuetudinis, antea monuimus: & in genere dicendo, semper vinum minus, quam spiritus vini, nocere deprehendetur.

§. XXV.

Ordine sermonis ad exponendum de fluidis sponte sumus deducti, ante quam de cibus dicenda omnia absolvere licuit. Militibus quidem non præcipiendum scimus de gulæ deliciis & irritamentis, quippe paucis eorum licet talibus abuti. Sunt tamen hæc inter aliqua, quæ accuratam curam postulant: sæpe autem militibus, rei hujus non omnino gnaris, periculum grave inferre possunt, si se promte sponteque offerunt. Talia sunt fungorum varia genera, quos inter omnino sunt aliqui edules: sed quod similitudo facile fallit, ipsaque tempestatum diversitas modo satis innoxios reddit, aliquando conspicue nocentes facit: equidem militi suaferim omnino ab illis abstinere. Certum est quod parum nutrant, & si quid conferunt corpori, illud à jure & pinguibus additis veniat. Quare suadeo militi, in hoc sequatur sapiens monitum SCHERBII, qui fungos sumtuosissime apparatus fineto deberi, ad posteritatem transmisit. Si magni imperatores non satis cavere damnum ab illis metuendum potuerunt, quid non metuendum erit militi, cujus culina non ferre potest illum apparatus, qui lautitiis his apparandis impendi debet. Si quis tamen incautus fuerit ab illis læsus, & strangulari se sentit, illico ad acetum confugiat, quæratque hoc præsumto theriacam: aut potius ante antidotum evomere tentet, multa tepida cum oleo aliisque pinguibus & lubricantibus in ventriculum infusis, deinde digito faucibus intruso.

§. XXVI.

§. XXVI.

Ex avibus etiam non sine metu comeduntur omnes palustres, seu quæ alimentum ex paludosis locis quærunt, quas inter est ciconia. Relatum accepi à viro fide digno, qui nobilem quendam & minime gregarium militem novit, cui placuit ciconiæ apparatus carnes comedere, atque ab eo tempore in tertium annum nidoros ventriculi male appetentis ructus, atque diarrhœam valde debilitantem toleravit, quum antea sanissimus fuisset, nihilque à se admissum invenire cogitando posset, quod causam languori suo præbere potuisset. Ejusdem generis sunt ardeæ, quamvis forte salubriores, quia piscibus plerumque pascuntur, quum ciconiæ omne insectorum genus devorent. Ex cæteris avibus coturnices non carent metu. noxæ inferendæ. Plures in historiis medicis occurrunt, qui earum esu in vitæ præsens periculum fuere præcipitati. Malignitatem illam tunc extimescere in primis decet, quando continuæ pluviae messis tempus antecesserunt, aut comitatae sunt, magnumque proventum lolii temulenti attulerunt, quod in tractibus Franconiæ, Sueviæ ac Rhenano frequentius inter segetes, quam alibi, sub tali tempestate, succrescit, & coturnicibus jucundum pastum præbet. Caveat etiam miles delibare illam jucunditatem, quam aliqui percipiunt turdorum ventriculis exsugendis: nam ut innoxium hoc sit in illis, qui juniperi baccis sese impleverunt: non tamen carebit periculo in passis solani furiosi baccis, quibus, in quibusdam montanis tractibus utique abundantissimis, jucundissime pascuntur.

§. XXVII.

Quando miles, annonæ difficultate, forte in pratensi aut palustri solo fossis agendis occupatus, & siti ac fame pressus, conspicit radices molles, succosas & carnosas, degustanti non ingratas, caveat sibi ab ipsarum usu: potest enim incidisse in radices cicutæ aquaticæ, quibus nihil humano generi nocentius excogitari potest: sic ut omnes Medicorum libri pleni sint describendis earum noxis, quas post WEPFERUM, præstantissimum Medicum Scaphusinum, qui integrum tractatum de hoc argumento reliquit, aliqui præstantes viri porro annotarunt, quibus adducendis supersedemus, quia recentis lectoris Medici memoriæ facile occurrent.

§. XXVIII.

Longum foret, si de omnibus à cibo & potu metuendis noxis monere hic & erudire militem cuperem: quare id unicum addo, temperantiam in hisce optimam esse morborum multorum castrensium averruncam: cui tanto magis studendum est, quando morbi ingruere jam incipiunt. Si quis à cibo vel potu noxio & insalubri se læsum sentit, optime facit, si mature evomat; cui scopo serviet aqua tepida copiosa hausta, & digitus ad summas fauces intrusus. Etiam hoc subjungo, quo magis aër intemperatus est, aut impurus, & morborum castrensium initia se exserunt, cavendum esse, ne jejunos miles prodeat, aut infectos accedat. Dysenterii sese ostendentibus victus ab oleribus & fructibus ad oryzam, fagopyrum, farinacea, hordeum mundatum & ex-corticatum, debet transferri, adjectis, si haberi possunt, aromatibus temperatioribus & croci pauxillo. Tunc quoque vinum moderate sumtum egregie juvat: tantum abest, ut sit militibus subtrahendum. Loquor autem non de musteis, sed de probis & justam ætatem consequutis. Hic vero iterum sit cautio, ne à nefariis hominibus mangonio corrupta, aut lithargyrio injecto edulcorata vina bibantur: quæ adeo non juvant, ut potius in extremum valetudinis periculum, lentasque noxas hominem præcipitent. Cognoscuntur autem & deteguntur illa liquore præcipitante ex auripigmento cum lixivio calcis vivæ decoctione parato, quem Exc. D. D. ZELLERUS singulari dissertatione de *docimasia* Frid. Hoffmanni Oper. Tom. V.

vinorum lithargyrio mangonifatorum & celeberr. D. D. ROSINUS LENTILIUS in *Jatromnematibus* conficere docent. Ipsos etiam cibos qualitate innoxios & laudabiles esse debere, jam supra §. 16. innuimus: facile enim intelligitur panes mucidos & corruptos, carnes semiputridas, lardum rancidum, olera infectis permixta, farinam situ corruptam & lolio permixtam, & quæ alia sunt hujus generis, non solum parum, verum etiam pessime nutrire, integrisque exercitiis morbos ingenerare posse. Sed hæc potius annonæ procuratoribus & magistris, quam Medico, respicienda existimo. Pro conclusione tandem totius hujus argumenti, quod insalubritatem ex cibis & potibus ostendit, plura cupientem remittimus ad nostr. *medic. System. tom. I.* ubi incipit tractatio de *salubritate & insalubritate esculentorum*: & ubi de *morborum origine ex copia & vitio ingestorum, & de alimentis intemperatis* ex instituto agitur. Uti etiam multa in scriptis nostris in vernaculum sermonem translatis, quæ huc faciunt invenire licet.

§. XXIX.

Atque hæc nunc de noxis à cibis atque potibus in militem redundaturis dicta sufficiant. Progredimur ad tertiam rerum non naturalium classem, quæ motum & quietem complectitur. Motum quoque exercitationum nomine complectimur, quæ adeo debent militi esse consueta, ut hinc exercitus nomen accepisse videatur, quod exercitando fiat melior, ut Cicero ex M. VARRONE adducit. Atque his tirones militiae à primis annis instruantur & adsuescunt: ipsique veterani, ne torpeant aut habitum amittant, crebro ad easdem revocantur: quo nihil potest utilius esse, quum & peritiam belli laborum augeat hic labor, & valetudinem juvet, durataque corpora efficiat, quæ, ubi necessitas & usus requirit, longe plurima facile perferunt aliis gravia & intolerabilia futura. Sed in his respici tamen debet, ut laboribus tam ingesta, quam interquiescendi justa spatia, bene respondeant: & in fatigatis à magno labore probe caveantur illi errores circa potum assumendum, quos supra notavimus. Etiam hoc salutariter commendatur, ut à maximo labore, sub quo corpus valde incaluit, ad quietem per placidiorem demum motum transeamus: omnis enim subitus ab extremo uno ad alterum transitus periculum afferre solet.

§. XXX.

Quumque magnus labor sudorem, aut saltem copiosiore transpirationem, moveat; nihil autem perniciosius esse possit, quam subita illius suppressio: illam avertet miles, si corpori valde æstuant vestes non detrahat, neque se quieti in loco frigido & humido statim permittat. Id si in stativis ex pleno voto caveri non possit, ad ignem succensum se foveat, tunc indusio humido à sudore facto aliud siccum substituat, ciboque ac potu recreatus quiescat. Si cui altero die à magna defatigatione artuum gravitas superest, frictio valde conducet, & ab ea lenior corporis motus. Aliquibus febres à vehementi commotione accenduntur, quæ, si cætera sanus homo sit, non diu durant, & à brevitate diariarum nomen acceperunt: sed omnino contemni tunc non debent, quando populariter grassantur malignæ & petechiales: quippe hoc initio prætervifo facile confirmantur & tanto citius jugulant.

§. XXXI.

Quies nimis diuturna & quasi perpetua homini laboribus adueto noxia est: præsertim si cum securitate & omnium rerum abundantia conjuncta sit. Enervatur enim miles otio ac voluptatibus, quod Hannibal maxime sensit, cum ipsi ad Capuam confidenti Romanorum dux confligendi nullam copiam faceret, miles autem in illo totius Italiae fertilissimo ac jucundissimo agro adeo degeneraret, ut nihil deinceps ageret pristini

na fortitudine dignum. Causa, cur valetudini rectæ officiat desidia & motus defectus, non è longinquo petenda est. Nam quum labor corpus firmet, excretionisque, quæ pro sanitate sunt, excitet & augeat: ignavia idem hebetat, sordesque omnis generis in ipso colligi & acervari permittit: unde morbi promte exoriuntur. Quanta providentia id omni tempore avertere duces conati sint, nolo ex historiis hic adducere: præsertim quum hæc cura non tam Medicum tangat, quam ipsis imperantibus incumbat.

§. XXXII.

De somno & vigiliis, quod in militum gratiam hic addam, parum invenio. Etiam illis, ut cuivis homini, opus est somno reparare & instaurare vires. Sed ita in hoc debent versari ut vigiliis, quoties id res & imperantium requirit edictum, possint vacare, easque cum recto studio obire. Obest autem illis magna repletio à cibis & potibus, hisque maxime spirituosus. Oportet itaque ab his sibi temperare illos, quos vigiliarum ordo tangit, cæteros autem nunquam ita indulgere, ut bonam mentem amittant, soporeque graventur. Exemplum nimis multa prostant exercituum hac calliditate victorum, quod fugam simulantes hostes, castra vinis abundantia reliquerunt, reversi deinde vino sepultos aggressi trucidaverunt. Cumque potus medicaminibus soporiferis aliisque noxiis infici possint, semper donum ab hoste suspectum esse militi debet, ne cum honoris & vitæ jactura redimendum sit.

§. XXXIII.

In recta valetudine tuenda non infimum sibi locum exposcit excretionum omnium naturalium legitimus successus, & artificialium aduetarum tempestitiva observatio. Has inter regnat illa per universam corporis superficiem fieri solita transpiratio insensibilis, qua non solum impuritates & superflua multa expelluntur, verum etiam omni corporis puncto nutriendo idoneæ materiæ iter apertum conservari unice debet ac potest. Sed hujus rationem jam habuimus supra, quum de aëris, ad impediendam vel nimis intendendam illam idonei, cavendis noxis ageremus. Non esse supprimendam eam, præsertim fortius commotam, dicebamus, quum de motu loqueremur. Nihil itaque hic superest, quod de illa addamus.

§. XXXIV.

Si, valde multum transpiramus sub aëre calido & humido, adjuvante insuper motu diuturniore & graviore, alvus facile siccitatem contrahit, qua neglecta in morbos varios incidimus. Solent enim non longe abesse congestiones ad caput, unde dolores vehementes enascuntur, aut decubitus humorum ad alias partes, antea forte debilitatas & morbo idoneas factas, unde, concurrentibus aliis causis, variæ ægitudines nascuntur. Succurrendum igitur erit mature alvo obstructæ, non per drastica remedia, quibus motus intestinorum peristalticus vehementer excitatur & pervertitur, sed potius per blanda: quæ inter regnant salina cum copioso vehiculo aqueo assumenda, ut sal Anglicanum, mirabile Glauberi, sal fontium & thermarum, aut salia media, ut tartarus vitriolatus, arcanum duplicatum. Quin ipse tartarus crudus pertinacem alvi duritiem corrigere valet. Si jam tormina & cephalalgia superveniunt, nihil certius succurret, nihilque jucundius, infuso calido foliorum fennæ, cui & ipsi tartarum ac saccharum licebit jungere. Si id parare locus prohibet, succurret scrupulus unus pulveris radices jalappæ, cremore tartari, aut crudo pulverisato, pari pondere addito. Sed optimum erit in hoc nihil sine consilio Medici moliri, quia subesse possunt gravium morborum initia, quibus singulari consilio prospiciendum sit.

§. XXXV.

De re venerea exercenda aliqua hic sunt adducenda, quia raro exercitus tam bene legibus coerceri potest, ut non aliqui hic peccent & libidinibus se permittant. Curet miles, ut se suamque valetudinem conservet, cavendo impuram venerem: idque, si non conscientiae dictamine impetrari ab ipso potest, discat exemplo commilitonum, qui gravissimos simulque lœdissimos morbos reportaverunt à scortorum consortio, quibus deinde omnino terribiles opponi curationes debent, quarum tamen ope vix unquam integra valetudo recuperari solet. Si cui tamen acciderit hic vel sua culpa lædi, vel contagio à commilitone infici, caveat sibi à curationibus proprio consilio suscipiendis, vel iisdem ab hominibus imperitis, sibi expetendis aut admovendis: quum inter tot homines male mulctatos revera pauci sint, qui non potuissent facile liberari, aut minori labore & impensa restitui, nisi suam salutem imperitissimis, & thrasonice tamen multa pollicitis, permisissent. Non optime hic curat, qui citissime juvare videtur, & gonorrhœa cito suppressa longi languoris, & magnæ morborum catervæ, causa infinitis exstuit.

§. XXXVI.

Qui sanguinem certis anni temporibus vel per venam incisam emiserunt, vel per cucurbitulas subtrahendum sibi curaverunt, non temere desinant his uti præfidiis; tantoque minus recedant, quanto longiori jam adfueverunt tempore. Hæmorrhoidum evacuationem sponte advenientem nunquam supprimat miles, suppressamque non negligat: neque tamen quæcunque abdominis tensiva & flatulenta pathemata hæmorrhoidale molimen existimet, magnamque spem collocet in illa excretionem promovenda. Non deerunt facile nostro hoc sæculo, qui magnifica polliceantur, & nescio quæ certa medicamenta jactent, arcana, si diis placet, & infallibilia. Cogitet autem miles nulli vitæ generi, quam militari, minus commodam existere hanc excretionem posse: omniaque potius esse tentanda, ut militem superfedere hac molestia faciamus, quam ut è longinquo quasi instruere hanc scenam, & invitare fluxum hunc oporteat, etiam si verissimum esset, quod minime concedimus, tam certas & específicas esse illas medicinas, quarum fiducia sese tantopere aliqui jactitant.

§. XXXVII.

Cæcarum hæmorrhoidum furore exagitatus miles, si sanguine multo abundet, detrahendum illum sibi curet: utatur deinde sanguinem contemperantibus & inflammationem prohibentibus. Initio primo satisfaciet suffitus ex ungulæ equinæ præseginibus, aut scobe à quovis cornu vel ungula. Interponatur unguentum de linaria. Alvus clystere infuso emollienda est, ut blande secedat, alias enim dolores immanem in modum augentur, ipsaque congestio & flasis à nisu excretorio intenduntur.

§. XXXVIII.

Tandem etiam bonæ militum valetudini à perturbationibus animi varia imminent pericula. Fortes quidem viros nullum periculum terrere, nec strenuo pectori metum incutere quicquam adeo debet, ut non spes victoriæ, aut honesti ex hac vita exitus, illum sustentet & erectum mentis statum conservet. Sed quoniam in tanta multitudine non potest fieri, ut omnes æquè sint adversus perturbationes munito & preparato animo præditi: præsertim post magnas calamitates jam acceptas, quando se novæ & majores offerunt: efficiendum quidem erit, ut animi quoviscunque modo ad spem, fiduciam & hilaritatem excitentur: quod quidem præclari duces atque imperatores omni arte consequi semper studuerunt. Medici partes hic forte sunt minimæ, & tantum

tum in illis, qui morbo correpti majora metuunt, quam ex ratione debent; quos probabili sermone erigere debet, datisque medicinis, quæ vires prostratas excitent, humoresque ad interiora compulso ibique detentos per omnem superficiem æqualiter distribuunt, ad alacritatem revocare. Juvat autem in omni tali statu adhibere vinum & blande spirituosum: illis autem, qui diutius passiva talia fuerunt, resolventia, ut lapides cancerorum succo citri saturatos, aut tantum cum aceto exhibendos; à quibus etiam juvantur, qui ab iracundiæ excandescencia graviore læsos sese sentiant. Iisdem casibus convenit mixtura simplex ad guttas XXX. cum aqua vel vino exhibita.

§. XXXIX.

Inter causas, quibus militum valetudo læditur & pessundatur, haud postrema est, quod se homines imperitissimi, lucri spe ducti, curationibus ingerunt, quamque nunquam didicerunt artem, in perniciem humani generis impune exercendam arrogant. Quantam hi cladem inferant castris, TOBIAS COBERUS, in ipso *observationum* suarum *castrensi* initio, ostendit & exemplo comprobat. *Sancta fide*, inquit, *confirmare ausim plures hoc decennio per ejusmodi Harpyias, quam ab ipsis hostibus, trucidatos fuisse.* Offerunt se scilicet & Medicos profitentur omnis generis & conditionis homines, agyrtæ, Judæi, Anabaptistæ, Chirurghi imperiti, chymistæ desperati, tonsores, & tandem, ne quid desit, ipsi subinde milites, ii præsertim qui lue venerea sæpius correpti, peritiam aliquam inungendi mercuriales litus acceperunt, propria in suis corporibus experientia. Nec desunt qui cistulas medicamentorum, hic illic acceptas, secum ferunt, quæ forte non mala sunt, sed peritum &

tempestivum usum postulant: quem quum non noverint, sibi ipsis & aliis sæpe insignem noxam illis inferunt. Si non alio nocent nomine, illud certe magnum jam est & notabile damnum, quod hujusmodi tentaminibus favorabile tempus sæpe elabatur & morbus confirmatur.

§. XL.

Neque parum peccari passim observatur, quod in militibus citas curationes præstare & peragere studentes aliqui, quam tutæ illæ sint parum cogitant. Hinc fit, ut boni milites sæpe vexentur periculosis remediis, quæ præsentem morbum magis supprimunt, quam tollunt, unde in chronica mala & vix unquam superabilia conjiciuntur. Hujus generis sunt remedia saturnina ad gonorrhoeam cito curandam, Chirurgis quibusdam castrensis familiaria, & arsenicum, vario modo tectum & incrustatum, pro febrium intermittentium celeri, ut putant, auxilio: remedia etiam alia omnis generis drastica, purgantia, vomitoria, adstringentia, opiata, sudorifera, quæ in manu imperitorum idem faciunt, quod gladius strictus in furiosi manum datus. Non satisfacit officio, qui celeriter curat, nisi & secure curet: & præstat morbum simplicem per aliquot dies tolerasse, ut fida curatione penitus tollatur, quam eum suppressere, & hominem in cachexiam, hydropem, phthisin, lue veneream, asthmata, aliaque hujus generis incurabilia fere mala conjicere. Sed quantum in hoc sit periculi, vid. *medic. systemat. tom. II.* & sequentibus, ubi medicamenta veneni vim habentia dilucida oratione exposita, idemque, quantum imprudenti medicatione noceatur, & quot inde morbi pululent, singulari scripto ostensum.



D E

PRÆMATURA MORTE
ET MORBIS PRÆCAVENDIS.

§. I.

Perversa opinio multorum animis est infixa quod Medici officium unice sit sanare. Hinc mos invaluit non à Medico consilium prius expeti, nisi ubi magnus morbus corpora humana occupaverit.

Perversa opinio à longo jam tempore multorum animis firmiter infixa est, quod Medici officium unice sit sanare, adeo ut etiam solennis usque adhuc invaleat mos, non à Medico consilium vel auxilium prius expeti, nisi ubi magnus morbus corpora humana occupaverit. Ignorant autem plurimi, quam parum solidi Medicus arte & scientia sua in difficilibus, sique per longas moras radices egerint, affectibus præstare valeat. Equidem adversus omnis generis morbos passim remedia à Medicis numerosa celebrantur & magnificis laudibus extolluntur: Si vero rem sine affectu consideremus, pauca sunt quæ laudes suas sustinent, sed pleraque ita sunt comparata, ut famam suam profituant, & spem medentium penitus eludant. Ut enim quis ex acutis & periculo plenis morbis convalescat, id certe naturæ potius quam artis beneficio debetur. Chronicarum vero complures passionibus minus esse sanabiles usu & experimento pro dolor! quotidiano habemus exploratum. Quæ autem potestas sit Medici & quid præstare debeat & possit, paucissimi intelligunt, ipsique Medici non recte attendunt.

Frid. Hoffmanni Oper. Tom. V.

Atque adeo quæ beneficia à Medicis vel medicina in publicam mortalium rem possint redundare, quam plurimis est obscurum atque incognitum. Permagna certe atque eximia res est, vitam hominum tueri, nec non omni modo cavere, ne illa abbrevietur, & ut sine singulari & corporis, & animi, ægritudine illa diu servetur, efficere. Quod si vero candide fateri liceat, quod res est, vix ex centum hominibus unus ad eam pervenit ætatem, quam naturæ ordine ac cursu posset attingere, si ipsam methodum recte vivendi perspectam haberet, neque ex supina ignorantia sibi ipsi filum vitæ præscinderet. Turpe dictum est, & pudet proponere, Medicos maxima ex parte hujus miseriæ causam & culpam esse, quod scientiam suam hoc in argumento non satis excolant, neque talia addiscant, vel doceant, quæ præmaturam mortem arcere & infelicitissimos morbos avertere possint. Videmus potius plures hisce in rebus parum doctos in forum medicum protrudi, qui omnes morbos sanare volunt, sed paucos possunt; consilium vero, quomodo ipsi præcaveri possint, in promptu ac paratu non habent. Hujus profundæ miseriæ causa nostris peccatis ac ingenti mentis corruptioni merito debet adscribi, ut-

plures minus sunt sanabiles. Quæ potestas sit Medici, paucissimi intelligunt. Vix ex centum hominibus unus ad eam pervenit ætatem, quam naturæ ordine posset attingere. Medici maxima ex parte hujus miseriæ sunt causa.

Plures parum docti in forum medicum protruduntur.

Quamplures autem me servari possent, modo vellent & doctos medicos tempestive consulere. Dolendum quod pessimus mos jam invalescat, ut nonnulli præsidia ad hunc scopum obtinendum spectant, negligant.

Longe tutius est corpora humana à morbis præservare, quam illis oppressa restituere.

Ni sana & longa vita est præstantius, sed pauci sunt qui cogitant de hoc beneficio adipiscendo. Equis est qui corporis sui notitiam & quæ sanitati & vitæ profunt vel obsunt, curæ cordique habeat. Hippocratis de hisce effatum.

Unum corpus altero aptius est ad sanitatem vitæque diuturnitatem. Quidam à parentibus

pote benignissimus Deus obedientibus & piis tantum vitam longam promittit, inobedientibus vero loco poenæ præmatura mors & magnâ afflictio corporis est destinata. Quam plures ex proceribus, & principibus, ex sapientibus, eruditis, quique Rem Publicam re & operè juvant servari diutissime possent, modo vellent & doctos Medicos tempestive consulere. In optatis vero est, ut ipsi Medici id negotii magis curent eorumque meditatio ad vitam sanam & longam tuendam fiat attentior. Dolendum vero est, quod pessimus & detestandus mos jam invalescat, ut nonnulli ea præsidia quæ ad hunc scopum obtinendum spectant, cujus generis sunt exquisita corporis nostri omniumque rerum physicarum notitia, negligant & tanquam arti inutilia contemnunt, cum tamen artis & scientiæ medicæ incrementum non aliter nisi Anatomiae, Physices & Historiæ morborum pleniori notitia, potissimum vero Rationis cultura quæ experientiæ in se cœcæ unica est directrix, possit & debeat promoveri. Quod morborum causæ physicæ sint, & quod præservatio à morbis, item ægri restitutio ab iisdem causis pendeat, res est certissima, & si quis de eo dubitaverit, præsens tractatio id clarissime edocebit. Quisque vero sanioris mentis intelliget, quod longe tutius & facilius sit, corpora humana à morbis præservare, quam illis oppressa restituere. Deus vero qui omnis veritatis & perspicuitatis fons est, ex alto vires nobis elargiatur, quo errorum fontes qui ex abusu rationis & inanibus figmentis unice proficiscuntur, nunc & omni tempore evidentissime detegantur.

§. II. Sana & longa vita nihil esse præstantius, nihil optabilius, uno ore omnes affirmant, pauci vero sunt, qui cogitant de hoc beneficio adipiscendo: paucissimi qui constans ac firmum habent propositum ea addiscendi & observandi, quæ huic scopo accommodata injunguntur. Ecquis enim est, qui corporis sui notitiam & eorum cognitionem, quæ sanitati & vitæ profunt vel obsunt, curæ cordique habeat? cum tamen si quis stabilem & firmam valetudinem tueri velit, Medicus sui ipsius esse debeat, quod plane est necessarium. Pulchre in epistola ad Damagetum HIPPOCRATES inquit: si quis juxta propriam facultatem omnia facere cogitaret, stabilem sane custodiret vitam se ipsum cognoscens. Quoniam vero hoc nobile argumentum fusius in pluribus Dissertationibus persequuti sumus; hinc nolumus longius hisce immorari, sed potius, ut instituti nostri fert ratio, convertimus nos ad ea, quæ & præmaturam mortem & morbos corpus destruentes avertant ac præcaveant. Quemadmodum vero in genere nunquam Medicus seipsum sanare vel præservare aliquem potest à morbo, (nam medica scientia relationi individuorum tantummodo innititur:) ita etiam hoc considerare oportet in negotio præservationis & vitæ longæ acquirendæ, quod natura à natura, corpus à corpore multum differat; unde videamus unum corpus altero esse aptius ad sanitatem vitamque diutius tuendam. Perimagni momenti ad hanc rem debet esse naturæ cujusque corporis structuræ consideratio. Quidam à parentibus robustum, validum atque durable corpus adepti sunt, quidam imbecillum, languidum, sensibile, & quod variis & multis morbis patet, nacti sunt. Multum certe interest, à quibus parentibus quis fuerit prognatus, & qualis fuerit ejus conceptus, an semen maturum fuerit, qualis matris vel nutricis constitutio.

Nam si quis fuerit ex parentibus longævis, validis, sanis, & virilis ætatis, si conceptus fuerit tempore verno, salubri, à parentibus rara sed fervida venere utentibus circa tempus matutinum, peracta coctione: porro si mater infantem gestans fuerit bene sana, tranquillæ animi, ab omni impetu affectus vacua, & bono ac salubri lacte nutritus, is corpus etiam obtinebit validum, injuriis morborum minus patens, & longæ vitæ protrahendæ idoneum. Inter bonæ naturæ autem & robusti corporis indicia sunt: oculus vivax, dentium multitudo & robur, manuum ac pedum nec non aurium, narium, labiorumque magnitudo & apta formatio, femora & crura firma, carnosæ, pilis obsita, magnum & capax cranium, vasorum amplitudo, adeps parcior. Talis enim habitus corporis de solidorum robore, quæ fluidorum iter dirigunt ac motum dispensant, abunde testatur. Etenim quo facilior & promptior fluidorum per solida motus est, eo vegetiores omnes persunt corporis functiones, eoque minus morborum causæ generari vel radices agere possunt. Alia vero corporis consideratio est imbecilli, languidi, ad morbos proclivis, quod acquiratur, si quis natus fuerit à parentibus morbosus, sensibilioris corporis & animi; sique conceptus fuerit in parentum senectute, vel etiam in ætate prima, & adhuc infirma; vel à crapula & intemperantia præcedente semen factum fuerit effœtum, aquolum, immaturum; sique gestatus fuerit à matre spasimis & animæ gravibus motibus affueta & lacte fuerit nutritus impuro, intemperato, & nutrix animi affectibus agitur. Dicit vix potest, quantum intersit ad robur corporis, ut à nativitate fundamenta ac primordia solidorum, à quorum robore, vigore & vi motrice fluidorum natura & motus pendet, probe fuerint disposita, ordinata ac constructa; unde etiam rectissime natura dicitur à nascendo. Insalubris vero & minus benignæ naturæ indicia sunt: depressus thorax, cranium parvum, nimia sensibilitas corporis, animique, laborum intolerantia, exiguitas vasorum atque angustia, cutis rara, caro spongiosa, flaccida & mollis, & extremarum partium parvitas: tales longe facilius incurrunt in morbos, eaque propter salubria vivendi præcepta majori attentione tenentur observare.

§. III. Quisque ex jam dictis clarissime intelliget, vario opus esse regimine, multumque differre diætæ vivendique regulas, prout videlicet corpora majus vel minus fuerint robusta. Evenit enim sæpissime & usus docet, quod ea, quæ robusta corpora ferre possunt, non quadrent debilibus ut potius hæc lædant. Quare sicuti victus sanorum à victu ægrotantium: ita victus robustiorum à victu debiliorum corporum multum inter se distat. Sanus homo, recte notante CELSO lib. I. cap. 1. p. 21. & 22. qui bene valet, & suæ spontis est, nullis se obligare debet legibus, neque Medico eget: hunc oportet varium habere vitæ genus, modo ruri esse, modo in urbe, sæpius in agro; navigare, venari, quiescere, frequenter se exercere. Paucis: sanus homo omnibus rebus debet assuescere, variis cibis, potionibus, aëri, modo non nimium excedat, sed modum teneat in omnibus. Debiliores vero & morbosæ naturæ homines non tantum modice, sed & medice vivere & ea accurate tenere debent, quæ corporibus nocitura vel profutura sint. Sæpe tales lædit minimum, quod robustiora plane non offendit;

robustum adepti sunt corpus. Quidam imbecillum & languidum nacti sunt. Horum omnium rationes.

Quæ bonæ naturæ & robusti corporis sunt indicia.

Alia huic contraria corporis consideratio.

Insalubris naturæ indicia enumerantur.

Ex dictis facile quisque intelliget vario opus esse regimine. Nam quæ robusta corpora ferre possunt non quadrent debilibus.

Celsi de his oraculum.

Horum omnium ratio.

fendit; fani itaque & robusti paucis egent regulis, quarum hæ præcipuæ sunt, ut fugiant ignaviam & nimiam quietem, corpus vero moveant, neque nimium se satient & mensuram motus atque alimentorum probe observent: hanc in rem mirifice mihi placet, quæ HIPPOCRATES libro de *Dieta* philosophatur, qui ita pronunciat: *Si inventa fuerit ciborum mensura & laborum ad unamquamque naturam numerus, ita ut excessus neque supra, neque infra modum fiat, inventa sane exacte est hominibus sanitas. Nam contrarias inter se vires habent cibi & labores, verum inter se mixti conferunt ad sanitatem. Labores enim ea, quæ insunt, consumere solent; cibi autem & potus, ea quæ evacuata sunt explent.* Ut rem in pauca contrahamus.

Vita hominis ut duret, & conservetur sanitas, homo continuo opus habet ingerendis & egerendis. Aërem, qui vehiculum mobilioris & tenuioris adhuc substantiæ est, in singula momenta debemus inspirare. Hic secundum HIPPOCRATEM libro de *flatibus* motum & sensum præstat partibus. Alimenta solida æque ac fluida in in signi quantitate singulis diebus ingerenda sunt; horum vero paucissima pars in vasis, quæ in robusto homine vix quindecim libras fluidi capiunt, remanet, sed quicquid ex aëre & alimentis corpus subiit, continuo rursus debet excerni. Sub perpetuis & reciprocis itaque ingestionibus & excretionibus vita corporis durat atque fovetur, neutiquam vero solis excretionibus continetur. Quamdiu itaque debito numero, mensura, proportionem hæc invicem fiunt, sibi que respondent, bene valet corpus ejusque actiones secundum naturam sive sapientissimum ordinem fiunt. Quicumque itaque multum ingerit, multum debet emittere, & iterum, qui multum excernit, multum debet assumere: quoniam vero motus, labor atque exercitatio corporis ad motum solidorum & fluidorum, & consequenter ad quantitatem excernendam multum confert; hinc sequitur, ut, qui multum laborat, multum quoque debeat alimenti capere.

Quare, ut recte monet HIPPOCRATES libro de *dieta*: oportet disponere mensuram ac proportionem laborum ad multitudinem ciborum & hominis naturam, & corporum staturas ac ætates, & ad anni tempora, & ad mutationes ventorum, & ad regionum, in quibus degunt, situm, anni que constitutiones ac status. Quisque ita mortaliū si diu vitam ac sanitatem tueri desiderat, sedulo debet observare, an excretiones cum ingestis habeant proportionem: quæ si læditur, via paratissima est ad multorum morborum genesis. Inde enim humorum præternaturalium abundantia & pravitas, à quibus humorum stases ac stagnationes viscerumque obstructions & corruptiones pendent, propullulant. Tutissima itaque præservatrix morborum & custodia sanitatis est abstinentia & temperantia in victu, laborque impiger.

§. IV. Denique si diu sanus homo velit permanere, utile æque ac necessarium est, ut fluida in perpetuo ac libero progressu per minima vascula, ex quibus omnia viscera, & universi corporis compages constructa est, conserventur; utpote formalis vitæ ratio circuitus fluidorum est, qui quamdiu viget, homo dicitur vivere; si plane aboletur, mors præsto est. Deinceps fluidorum progressio illud est medium, quo corporis ejusque partium mixtura ad corruptionem paratissima, salva & illibata permanet, sanitas servatur, morbi arcentur, eorum-

Frid. Hoffmanni Oper. Tom. V.

que sanatio perficitur. Nam quicquid Veteres de natura pronunciarunt, quod sit actionum corporis præses, vitæ conservatrix, morborumque medicatrix, hoc optima ratione per fluidorum non interruptum circulum beneficio reciproce systoles ac diastoles, tonique ac elateris fibrarum & solidorum explicandum est. Excretionum enim ratio, sine quibus vita non statim cessat, sed sanitas periclitatur, à circuli sanguinis moderatione maximam partem dependet. Quoniam vero autopsia & analysi teste, humidum sanguinis & feri plus quatuor vicibus siccum & solidum exsuperat, ideo facile est judicandum, hominem majori humidi & potus, quam solidi & ciborum quantitate egere. Videmus hinc calida infusa herbarum cum aqua dulci parata, potum convenientem largiorem, nec non thermarum atque acidularum usum, naturæ non modo, sed & sanitatis tutelæ, admodum esse accommodatam. Deinceps perquam notabile est, sanguinem atque humores intemperie etiam laborantes, quæ ex diversorum alimentorum assumptione judicatur, non adeo nocere, si interrupto motu circumvolvuntur, simul ac vero subsistunt & stagnant, mox morborum segetem præsto esse.

§. V. Prima itaque & præcipua, & Medici & cujusque, qui vitam sanam & longam amat, cura atque intentio esse debet, ut liberum & illibatum sanguinis conservet circulum, neque illum admodum turbet atque pervertat; quem in finem quisque nocentissimos animi affectus, omniaque temperie excedentia; ut nimium frigus, diuturnam humiditatem, omneque nimium quod naturæ secundum Hippocratem admodum est inimicum, studiose ac sedulo evitare debet. Tandem quisque sibi caveat à subitis mutationibus, quæ ex nimii caloris transitu in excessivum frigus & contra fiunt: Nimia repletio post famem, vel ubi corpus à morbo fuerit debilitatum, subita quoque mutatio eorum quæ diu consuevimus, ingens solent afferre corporibus damnum. Hæ sunt generales regulæ, quales omnes sive robustioris sive imbecillioris naturæ fuerint, debent observare.

§. VI. Non vero est nostri instituti de victus ac diætæ præceptis primario hoc loco agere, sed morborum primos fontes atque origines aperiendo perspicue volumus ostendere, quamnam facienda vel omittenda sint, ut quispiam à morborum injuriis immunis, diu salvus & incolomis maneat. Hoc vero quod fieri possit, tam à priori, rationis lumine, quam à posteriori sensu, experientia ipsoque affectu clarissime potest demonstrari. Morbos esse turbationes motuum, variasque esse causas, quæ motus naturales mutant, nemo facile in dubium revocabit. Si quis itaque morborum causas singulas habeat perspectas ac cognitatas easque sedulo corpore arcere sciat, tunc certe præservationis via erit inventa; hoc autem jam fusius deducere & exemplis rem confirmare, scopi nostri ratio erit.

§. VII. Initium vero deductionis nostræ faciemus à febribus, quæ morbi sunt humano generi valde insens; inter hos vero periculo ac vehementia omnes superat pestis & ipsi affines malignæ exanthematicæ febres. Causam agnoscunt duplicem, altera extra corpus; altera intra corpus quæri debet: priorem constituit tenuissima à corpore infecto proveniens exhalatio, quæ miasmatis & contagii nomine venit; hæc beneficio aëris intra corpus subiens pau-

Excretionum ratio à circulo sanguinis moderatione maximam partem dependet.

Præcepta Medici & cujusque, qui vitam sanam & longam amat, cura esse debet, ut illibatum sanguinis conservet circulum.

Quisque sibi caveat à subitis mutationibus.

Etiā eorum quibus diu consuevimus.

Quamnam facienda vel omittenda sunt, ut quispiam à morborum injuriis immunis & incolomis maneat.

Febres sunt morbi humano generi valde insens.

Duplicem causam agnoscunt.

co tempore solidorum ac fluidorum vim indolemque subtilissima corruptiva fermentatione turbat ac destruit; altera causa consistit in corpore, quando hoc succis impuris & qui facile miasmatis virtuti obsecundant repletum est. Vis quoque motrix solidorum quando simul labefactata & corpus debilitatum est, natura oppressa ægre putredinem arcere & corpus defendere potest. Ut evitemus itaque hujus luis truculentiam, nihil præstantius est, quam omni modo fugere suspecta & infecta loca, omniaque quæ recipiendo & retinendo contagio sunt idonea evitare. (II) quando in infectis locis versamur, ne miasmata in aëre undulantia nobis noceant, consultum est, fauces & os cum aceto bezoardico mixto cum aqua vel vino probe eluere, idque in nares attrahere; interne vero frequentius succo citri, quod Turcis familiare est remedium, aut vino Rhenano uti, utpote acida tenuissimum talem putridum vaporem egregie figunt ac corrigunt. (III) Grassantibus ejusmodi malignis contagiosis morbis, nihil tutius est, quam corporis sui ejusque virium probe habere rationem, eumque in finem cavenda intemperantia, quæ crudiatum genitrix: omnis impetuosis animi affectus, animi terror, quæcunque corpus debilitant, ut sunt nimii labores, fames, excessivæ evacuationes tam sanguinis quam aliorum humorum, vigiliæ, excedens venus, crapula. Si vero corpus cacochymia infectum fuerit, præter hæc jam dicta convenit balsamicis impuritatem humorum corrigere, superfluum cum moderamine foras proscribendo. Cui intentioni cum effectu satisfaciunt quæ ex Myrrha, Aloe, Succino, Croco, Extractis amarioris, Mastiche, Opobalsamo, resina Ligni Aloes constant sive in solidam, sive in liquidi formam fuerint redacta, modo crebrius & pariori dosi in usum vocentur. In summa: omnia temperata balsamica cum vel sine acidorum accessu acuata in arcendis contagiosis morbis magnum punctum absolvunt.

§. VIII. Quod jam dictum est de Peste & malignis febribus, id quoque valet de aliis, qui contagio serpunt atque infecti sunt, quibus Variolas, Morbillos merito debemus annuere, quorum miasma contagiosum, si corpora cacochymica offenderit, diram & lethalem ludere solet catastrophem. Grassantur potissimum autumno & vere ubi subitæ tempestatum mutationes humores ad stagnationem & putridas corruptiones disponere solent; eumque in finem acida temperatiora ut Phlegma Vitrioli, Spiritus Vitrioli phlegmaticus, Tinctura Rosarum, Violarum, contagii tempore usurpata non fructu carent, & parciorem quoque variolarum copiam efficiunt. Deinceps optime nondum hoc morbo correpti sibi prospiciunt, si fugiant infecta loca, & firment & robovent vitales humores, ne vehementia contagii facile succumbant. Convenit itaque omnia excessiva fugere, & maxime à subitis aëris mutationibus se cavere. Sique nimium tempestas pluviosa & humida regnat, parum oportet comedere, omneque crudum, crassum, impurum & quod difficillime solvitur, evitare. Maxime omnium vero abstinendum est à dulcibus, fermentescibilibus, farinaceis, omnibusque, quæ corpora debilitant ut sunt purgantia, crapula, venus, eo quod vappescentem lentorem succis afferant. Cum vero hi morbi infantilem ætatem ordinario adgrediantur, videndum num verminosa putredo in canali intestinorum subsistat, quæ

vim morbi ac symptomatum vehementer adauget. Utile est, ab hac corpus Mercurialibus cum Balsamicis amaris purgantibus remixtis liberare. Præstat quoque grassantibus variolis infantibus absorbentes Pulveres ex lapidibus cancrorum, matre perlarum admixto pauxillo cinnabaris & nitri crebrioribus vicibus, nec non Infusa ex semine fœniculi, radice scorzonæræ, liquiritiæ, herbæ veronicæ offerre. Sique purgare expedit primas vias, pulvere rhabarbari & mercurio dulci id perficere debemus. Hac ratione si procedimus, id nobis polliceri possumus, ut mitius hic morbus sua tempora abique metu graviorum symptomatum vel confluentium, faciem mire defœdantium, & graviorum inflammationum, percurrat. Ne vero benignæ variolæ in malignas convertantur, quod ab imperitis Medicis frequentius fit, cavendum ante omnia est ab omnibus expellentibus calidioribus & regimine calido præsertim primis diebus, nam si ullo in morbo, certe in hoc natura vult duci non vero pelli. Frustraneum est expulsionem moliri ubi materia nondum cocta à sanguine separata & ad exitum fuerit disposita.

§. IX. Quoniam vero impuri gravidarum & nutricum succi, in liberos transfusi, materiam exanthematicam luis, tam variolarum quam morbillorum causam constituunt: hinc prudentis Medici est, quovis modo humorum pravitatem & corruptelam in gravidis æque ac nutricibus præcavere. Et quia humorum ac sanguinis depurationi promptior hujus circulatio æque ac excretionum naturalium vigor mirifice favet: hinc convenienti tempore administratæ sanguinis missiones, nec non leniores alvi evacuationes, infusaque herbarum calida eo splendent effectu, ut infantes raro vel mitissime procedente variolarum & morbillorum affectu affligantur. Notavimus crebra vice gravidas, quæ, natura sic moderante, mensium fluxum aliquoties expertæ sunt, liberos, qui per omnem ætatem à variolis immunes permanserunt, progenerasse.

§. X. Succedit jam febris purpurata nostro climati ac sexui sequiori familiarissima, ipsique puerperis maxime infensa: in nonnullis subjectis quandoque variolis, morbillis aliisque continuis, vel etiam malignis febribus in fine non sine metu periculi sese associat. Soboles est impuræ vappescentis & corruptæ lymphæ, quæ dum ob obstructas glandulas stagnat & motu caret, hoc vitium contrahit & sæpe chronicam purpuram inducit. Meo quidem judicio nostris regionibus gravidis perquam familiaris est, ob paulo liberaliorem usum placentarum ex triticea farina, butyro & ovis paratarum, nec non ob abusum dulcium, quæ fermentatione primarum viarum facile acescunt & insignem lentorem humoribus ingenerant. Si vita sedentaria, neglectus venæ sectionis & evacuationis alvinæ in gravidis accedit, atque diuturnæ humidæ tempestates regnant, in puerperis hic morbus sæpissime visitur. Non semel notavimus à suppresso fluore albo periodico & critico, loco hujus purpuram successisse, quæ reslituto fluxu corpus deseruit. Quod vero aliis malignis & continuis febribus in fine quandoque supervenire soleat, Medici ut plurimum in culpa sunt, qui collectas alvi plus justo diuturna retentione impuras sordes, per calidum regimen & sudorifera, in lympham transferunt. Quapropter præservationis sine gravidis, ne puerperæ

Pestem ut evitemus nihil est præstantius quam fugere loca infecta.

Quid porro faciendum.

Corporis sui probe habere rationem.

Intemperantia cavenda.

Omnis impetuosis animi affectus &c. præscribendi. Myrrha, Aloë, Succinum, &c. in usum vocentur.

Quod de peste est dictum, id quoque valet de aliis, qui contagio serpunt.

Acida temperatiora usurpata non fructu carent. Nondum hoc morbo correpti fugiant infecta loca.

Quid tum ulterius agendum.

In infantibus.

In gravidis & nutricibus.

Febris purpurata sequiori familiarissima.

Hujus causa.

Qua ratione medici hic ut plurimum in culpa sunt.

peræ factæ in molestias hujus morbi incidant, suademus parciorem dulcium & farinaceorum usum, & ut motu, venæ sectione debito tempore admittā, usuque infusorum calidorum & polychrestī evacuantis humores ab omni impuritate præservent ipsis injungimus. Convenit quoque in ipso puerperio lochiorum fluxum in ordine servare, primamque regionem, quæ ut plurimum colluvie sordium scatet, in puerperis mature expurgare, minime vero, quando hoc nondum factum fuit, in sudore perpetuo eas servare vel sudoriferis uti. Ne vero aliis acutis morbis demum superveniat, cautio adhibenda est, ne nimis diu alvus maneat adstricta, sed potius ea mature, aut emolliente clystere, aut suppositorio, aut polychresto evacuantem vel salino nitroso remedio, pro circumstantiarum ratione, est aperienda.

Quid in
Febris
agendum.

Febris Ca-
tarrhales
vere & au-
tumno sunt
epidemi-
ca.

Quo de-
scribuntur.

Quomodo
corpus tum-
escit mode-
randum.

Catarrha-
les affi-
nes sunt
tunc cum
virescent
doloribus in-
vadunt.

Quando
occurrit.
Quid mul-
tum ad po-
dagra ge-
neratio-
nem faciat.

Quid con-
trat.

Quid no-
m infi-

§. XI. Sequuntur jam Catarrhales febres, quæ ob aëris inæqualitatem subitamque ejus mutationem vere & autumno epidemicae sunt, & variis larvis incedunt, corporaque, maxime frigida & humida temperaturæ, corripunt. Interdum ferina tussis, pectoris oppressio, coryza, quandoque faucium squalor & inflammatio jungitur, etiam dolor gravis artus occupans five rheumatismus circa noctem exasperatur. Quapropter tempore, quo solent grassari, mirifice prodest parum cibi assumere, inque perpetuo, sed moderato transpiratu cutis emunctorium conservare, quod fit vitando aërem frigidiorum & valde humidum. Maxime omnium vero cautio eo est dirigenda, ne imminente veris serenitate subito mutemus vestimenta, leviora induendo, quod plures suo damno experiuntur: deinde coelo diu existente frigido & humido, nullo modo vires corporis subtrahere vel transpirationis negotium intercipere licet, quem in finem oportet evitare sanguinis missiones, nimias purgationes, intempestivam venerem & victum durum, salum, crassum. Crebrius à nobis observatum plures à venæ sectione liberalius instituta corpora frigido & humido aëri objecisse, & inde catarrhales febres reportasse.

§. XII. Catarrhalibus affines & congeneres sunt eæ, quæ cum artuum doloribus corpora invadunt, & quamvis hi ipsi morbi suam sedem altius in visceribus habeant, illorum tamen impetus certo tempore solet ingravescere, & eo maxime, ubi inæquales & subitas aëris permutationes argenti vivi in barometro motus varians indicat. Quod fit præcipue vere & autumno & circa æquinoctia. Multum vero ad arthritidis fixæ, præsertim podagræ, generationem facit nativa debilitas ligamentorum nerveo-tendinosorum glandulis interspersis gaudentium. Si itaque hæreditaria quædam adfuerit dispositio, ad mitigationem mali hæc sunt tenenda; Omnia videlicet, quæ pedum vigorem & totam naturam debilitant, & transpirationem, optimam sanguinis depuratricem, lædunt, cane pejus & angue fugere oportet; contra vero quæ roborant vires, quæ necessarias & naturæ convenientes excretiones adjuvant, utilitatem adferunt maximam. Rejicimus itaque merito largiorem vinorum, cujuscunque fere generis sint, ingurgitationem, venerem vagam & fervidam, & vehementiorem animi impetum, nec non in victu intemperantiam: Laudamus vero ac vehementer commendamus provocationem fluxus hæmorrhoidalis, si natura huic consueverit, vel loco hujus venæ sectionem aut scarificationem in partibus affectis, corporis motum, ac ca-

primum lac cum fontibus mineralibus sale alcalico turgidis potum: insignem quoque usum præstat alvum in officio suo continere, quem in finem pillulis Cratonis, Becherianis genuinis vel correctis singulis septimanis utendum est.

Valde vero proficuum observamus balsami nostri liquidi externum usum, cujus inunctione extra paroxysmum præservationis gratia singulare articulis accedit robur. Deinceps pedes pellibus animantium probe muniantur, neque refrigerentur, nec humectentur, aut valde sudent, sed sicci servantur. Si vero ob debilitatem stomachi vinum potui est dandum, omnium nobilissimum Hungaricum offerendum est. Memini aliquoties maximum allevamentum paroxysmo podagrico accedere, si ante accessiorem pulveres præcipitantes cinnabarini propinentur iisque mox subjungantur doses aliquot evacuantis lenioris. Dicit enim vix potest, quam utile sit mature, non modo in aliis morbis, sed & in arthriticis, primam regionem expurgare & ex flexura duodeni, quæ faber morbosarum minerarum plerumque est, morbi ac paroxysmi materiam eliminare: hac enim ratione symptomatum vehementia non solum minuitur, & citius morbus exstinguitur. Neque sine ratione, saniores Veterum in prima podagræ accessione emetica vehementer laudant. Ita MARTIANUS in Commentario ad Hippocratem p. 382. scribit: *Ego observavi quam plurimos podagricos ab hoc affectu liberatos aut mitigatos fuisse, ubi acetosa evomuerint.* Et ALPINUS de medicina Ægyptiorum pag. 110. refert: *multos novi à podagra renumque calculo vexatos vomituum crebro usu magnopere adjutos.* Et HILDANUS centuria 6. observ. 83. mirifice in podagræ accessu deprædicat vomitorium, quoniam post ejus usum nullus fere sequitur dolor, & scribit id cum magno successu expertum esse in nonnullis ægrotis. Quæque jam dicta sunt de podagra, hæc omnia circa alias arthritidis & rheumatismi species sunt observanda. Inter has ichiatis solet esse molestissima, cui, ut præveniamus, opportuno præsidio esse solent venæ sectio in talo, equi vectio, mutatio aëris, thermarum vel acidularum potus, purgatio singulis mensibus bis facta, aëris mutatio, quæ in universum ad præservationem omnium arthriticorum affectuum THEODORUS PRISCIANUS p. 308. etiam atque etiam commendat.

§. XIII. Descendimus jam ad inquirendam methodum ab hæcticis & lentis febribus corpus nostrum defendendi. Putridæ excrementitiæ sortides, vitalibus succis intime mixtæ, harum febrium sunt genitrices, hæ vero producuntur, quando critica evacuationes per sudorem, per alvum vel alia emunctoria aut fonticulos & ulcera antiqua supprimuntur. Hoc etiam evenit, si consuetæ sanguinis excretiones, sive per hæmorrhoides, sive per uterum cohibentur, vel quando febriles intermittentium motus, qui sæpe magno præsidio sunt visceribus obstructis aut relaxatis, nimis celeriter opiatorum, adstringentium, quorsum etiam referri debet China Chinæ abusu sistuntur. Oritur quoque lenta febris, quando corpori à morbo vel nimia evacuatione, debilitato alimenta plus jussu ingeruntur, quo fit ut promptissime pessimæ cruditates in corpore & primis viis colligantur. Si viscerum adfuerit corruptela insanabilis fit febris, quæ hæctica appellatur. Quemadmodum autem variæ esse solent harum febrium causæ: ita præservandi modus diversus est. Si cor-

Autoris
Remedia
acceden-
di Metho-
dus in po-
dagra.

Veteres in
prima po-
dagra ac-
cessione E-
metica
valde lau-
dant.

Uti Mar-
tianus, Al-
pinus &
Hildanus.

Qua via
corpus no-
strum à fe-
bribus hæ-
cticis queat
defendi.

Intermittentium impetus haud nimis cito est cohibendus.

pus valde fuerit enervatum, ventriculi primo omnium ratio est habenda, præsertim ne nimio alimento eum oneremus, sed parum semel at crebrioribus vicibus, est assumendum, moderatus quoque sit corporis & tranquillus animæ motus necesse est. Cautio quoque adhibenda, ne nimis cito intermittentium impetum cohibeamus, præsertim si humorum copiam atque stagnationem, nec non viscerum obstructionem pro radice habeant. In consuetis sanguinis evacuationibus suppressis, iusto tempore venæ aperiantur. Quoniam vero prima, quæ in ventriculo & duodeno est, regio, colluvie sordium repleta, mater est harum febrium: hinc mature leni emetico vel sale aperitivo aut evacuante polychresto ea deplenda est: id enim si non accidit, calor nimius & vires & solidarum partium succos laudabiles depascitur.

Febres quarum paroxysmus certo temporum intervallo intermittit.

§. XIV. Sequitur jam ut à febribus illis quarum paroxysmus certo temporum intervallo intermittit, corporis præservandi modum meditemur. Hæ, cujuscunque generis fuerint, singulis anni temporibus, sola hyeme excepta, grassari solent, certis vero etiam locis sunt endemiæ. Vero simillimum est aërem subtilioris causlicæ febrilis materiæ, ex confermentatione variarum particularum productæ, vehiculum esse; hæc condensata, præsertim occiduo sole, intus subit vitalia, & ad ventriculum & duodenum descendens, cum stagnante ibi bile & pituita, mineram febris fabricat. Ita epidemice grassantes generantur. Alioquin à transpiratione prohibita & cruditatibus ventriculi, alienam indolem mora nanciscentibus, solennis fit febrium genesis. Quod si vero intermittens offendit labem in visceribus, diuturnior ac contumacior fit. Intensior vero earum fit æstus in choleris, diætæ vinosæ adluetis & iis qui ad iram proclives sunt. Qua propter ad febres dispositi, quo grassantur tempore, hæc debent servare (I) aëri vespertino vel nocturno, neque cælo nubilo ac pluvioso, corpus diu obijciendum. (II) quisque tunc sese abstineat à crudis & duris cibis, cujus generis sunt omnia marina, carnes infumatae & induratae, lacticinia parcius sumantur, ante omnia vero id omne evitandum est, quod cum nausea assumitur, utpote in ventriculi sinu moratur & facile corrumpitur. Quodocunque vero vitiosa cruditas, solennis febrium procreatrix, cum febrium prodromis præsens est, nil securius abstinentia & bono emetico, quod vel solitarium vel cum infuso mannæ sociatum, primas vias ab omni putridarum sordium colluvie liberat, una sæpius vice febrem præscindens.

Febres continuæ raro fiunt sine inflammatione interiori.

Causa.

§. XV. Febribus admodum affines sunt inflammationes. Nam continuæ raro sine inflammatione interiori fiunt, neque inflammatio sine febre facile existit. Omnium vero intensissima est, quæ consistit in ventriculi membranæ, & perfrequenter fit, neque sine periculo. Quum enim sensibilissimæ parti accidat, spasmos & convulsiones in universo nervorum ac membranarum systemate celeriter suscitatur. Exemplo sunt venena caustica, quæ inflammando ventriculum & intestina subito interficiunt. Plura vero sunt, quæ id malum inferunt, inter quæ eminent frigidus corpori extreme calefacto potus copiose superingestus, id quod persæpe funesto eventu accidit. Vehementior quoque ira, drasticum purgans vel emeticum, præsertim si quis frigidum superbibat potum, grave hoc vitium ingenerat. Vidi plures necatos fuisse,

quando à gravi ira forte emeticum sumserunt; cujus effectus fuit inflammatio ventriculi & mors. In peste ejus inflammatio frequentissime fit, qua imminente vel præsentem mortem inferunt emetica, quorum tamen usus maturus & cautus non potest contemni. Incurrunt plurimi hoc malum si exanthemata in febribus, variolis, morbillis, purpura, petechiis, peste retrocedunt, vel criticæ evacuationes, in his dictis affectibus supprimuntur. Idem evenit in podagra, arthritide vaga, erysipelate, si ab emeticis, venæ sectione, frigore, terrore & inflammationi inimicissimis opiat, materia retro cedit. Probe itaque hæc omnia observare debet Medicus, ne ex imperitia tantum malum accersat. Neque periculo carent intestinorum inflammationes, in dysenteria, colica convulsiva spasmodica aut herniarum comite iliaca passione. Pessima sunt hoc passu in alvi fluxionibus opiata vel adstringentia: in colica convulsiva purgantia acriora, eaque aliquoties repetita, in herniosis intensum frigus aut iracundia. Quare hæc omnia sedula cura sunt evitanda.

Quas probe observare debet medicus.

Quando pessima sunt in alvi fluxionibus opiata, &c.

§. XVI. Succedit jam Peripneumonia, quæ profundior pulmonum inflammatio est, cum levior sit pleuritis. Fit quando sanguis glutinosus & crassus, qualem semper fere peripneumoniaci è vena emittunt, motu corporis vehementiori, aut balneis, sudorifero calido, iracundia, in angustissima vasa impulsus ibique subito refrigeratus, incarcerationatur. Hujus mali generationi sæpe polyposam in pulmonum vasis concretionem velificari sectiones docent. Convenit itaque ut plethorici vel crasso sanguine abundantes, fugiant, quicquid corpus & nimium calidum & nimium frigidum reddit, maximeque eorum subitam invicem permutationem: servant vero sanguinem fluxilem calido potu quem juvat nitroso vel lixivioso sale acuire. Hæc etiam impediunt quo minus polypus in vasorum anfractibus succrescat.

Peripneumonia est profundior pulmonum inflammatio.

Quomodo fiat.

Quid conveniat.

§. XVII. Graviter sæpenumero inflammari uterum, funesti puerperarum symptomata docent: huic malo lochiorum suppressio, per refrigerationem, animi affectus aut diætæ vitia facta, causam subministrat. Si impura fuerint corpora, si spasmodicis abdominis cruciatibus pateant, malum hoc frequentia non minus quam periculo terribile est. Igitur ad præservationem nihil est convenientius, quam hæc omnia averfari, idque curare ut spasmi abdominis mature sistantur, ne ab iis lochiorum fluxio cohibeatur; quibus indicationibus Oleum Amygdalarum dulcium, Sperma Ceti, Antimonium Diaphoreticum, Lapides Cancrorum, Nitrum, Crocus, nec non Flores Chamomillæ vulgaris & Romanæ, summitates Millefolii cum cerevisia cocti & interius dati egregie serviunt, quia stagnantem ibi sanguinem dissolvunt eumque ad exclusionem præparant. Neque intutum tali in casu venæ sectionis præsidium est, utpote quo ad omnem inflammationem avertendam nihil est præsentius.

Uteri inflammatio.

Ejus causa.

Ad præservationem quid conveniat.

Et ad Curationem.

§. XVIII. Periculo vero omnes antecedit phrenitis, quæ acutis passionibus in fine sæpenumero jungitur. Causam dare solet partim retrocessio omnis generis exanthematum, partim fortior translatio sive metastasis sanguinis facta ad caput, quam faciei ac oculorum rubor, tumor, fortis arteriarum capitis pulsatio, diuturna vigilia, stillicidium sanguinis ex naribus, alvus adstricta, extremorum frigus comitantur:

Periculo omnes antecedit phrenitis.

Remedia in phrenitide.

quo

quo casu venæ sub lingua opportune secantur vel Ægyptiorum more nares scarificantur. Neque minus utile est blanda & continua diaphoresi sanguinis circulum æquabilem servare, per mixturas temperatas, acidulas, alexipharmacas, & alvum clystere aperire: hoc modo fit, ut infensæ sanguinis & humorum metastases æque ac retrocelliones sordium excernendarum impediantur.

Magnis hæmorrhagiis corpora valde debilitantur.
Ilias inde malorum oritur.
Quæ enumerantur.
 §. XIX. Ab inflammationibus deveniendum jam erit ad enormes sanguinis varia per loca excretiones, quibus non modo corpora valde debilitantur, sed & alii graviores morbi inde capiunt initium. Accedit, quod si natura ipsis consueverit & sanguis ad partes congestus exitum non invenerit, ilias malorum inde oritur. Hac enim ratione in capite cephalalgia, hemicrania, ophthalmia, vertigo, auditus difficilis, aurium tinnitus, imo paralyfis, apoplexia suboriuntur: in pulmonibus inflammatio, obstructio, corruptio, asthma, tussis chronica, phthises hæcticae fiunt: si per vasa hæmorrhoidalia non rite fertur sanguis, non modo in intestinorum canale, sed & visceribus abdominis stagnationes facit, & ita vomitus cruentus, morbus niger Hippocratis, cachexia, hydrops, colicæ convulsivæ, hæmorrhoides cœcæ, ani inflammatio, nec non fistulæ, ulcera in hoc loco, tubercula, mictus cruentus, nephritis, inde subnascuntur. Prudentis itaque Medici est, omnem curam adhibere, omnemque operam dare, ne natura affuescat sanguinis excretionibus, solo mensium fluxu excepto, quod vero præstare res utique ardua & difficilis est, neque vero minus omnis spes abjicienda venit. Cum vero ii, qui habitu corporis laxo, spongioso & vasculoso præditi sunt, ad copiosi sanguinis generationem, æque ac ad spasmos, qui omne ferunt in pressura sanguinis ad talia loca punctum, valde proclives sint: propterea ne nimium sanguis in eorum corporibus succrescat, & ut spastica quoque stricturæ partium impediantur, omni modo enitendum est. Huic scopo admodum conducit abstinentia & temperantia ab iis, quæ copiam sanguinis ingenerant: ut sunt carnes juniorum animantium, lacticia, dulcia, ova, gelatinosa, farinacea, vina dulcia, cerevisiæ dulces ac spirituosæ, otium, somnus largior: præstat potius victus tenuis, ex vegetabilibus, herbis, fructibus, desumptus, potuique dare convenit cerevisias tenues, vel loco harum vinum tenue cum aqua bona dilutum. Convenit quoque motu & exercitatione, usuque insulorum calidorum sanguinis circulum & proficuum transpirationem promoveri. Deinceps venæ sectio tali in casu præsidium est omni laude majus. Hæc eo maxime tempore, quo sanguis quasi ebullire & exitum affectare solet, ut fit vere & autumnio, circa æquinoctiorum tempora, administranda est, inque nonnullis subjectis, quæ ingentem sanguinis copiam proferunt, bis imo quatuor vicibus debet repeti. Neque prætereundum est, omnes intempestivos animi motus, ubi metus est hæmorrhagiarum, magna cura opereque esse fugiendos, utpote qui ejus sunt naturæ, ut solidorum tonum ac robur, quæ motum fluidorum dirigunt, aut nimia relaxatione aut vehementiori constrictione pervertant: quare videmus in praxi quotidie, iram & terrorem gravissimarum hæmorrhagiarum esse auctores. Cum vero bilis acris in duodeno subsistens spasmos abdominis concitet, & hæmorrhagarum

translationum causa existat: ideo mature hæc ut temperetur & expurgetur, nec non ut alvus quotidie respondeat, operam dare oportet; quem in finem rhabarbarina cum nitrosis & absorbentibus mixta etiam atque etiam commendamus. Hæc, quæ jam monuimus, servanda quoque sunt foeminis, quod nimias uteri hæmorrhagias, quæ in gravidis pariunt abortus, corpore arcent, avertuntque.

Dolores corpus & animum hominis mire exercent.
Ex hisce eminet dolor ventriculi & intestino-
rum.
Hujus causa.
 §. XX. Sequuntur jam dolores, quorum acerbitas sæpe tanta est, ut corpus & animum hominis mire exercent. Eminent vero ex hisce ventriculi & intestinorum dolor acerbis, quorum prior cardialgicus, insequens colicus appellatur, ut ut tenuia exquisitæ sensibilitatis plus quam crassa intestina occupet, transit sæpentero in pæresin, quandoque etiam in icterum, tympanitidem. Si quando autem is continuo spasmis & flatulentis exercet hominem, affectus dicitur hypochondriacus in viris, in foeminis passio hysterica. Communis est sententia hepar & lienem in culpa esse. Alii accusant progressum sanguinis difficiliorem per venam portæ & consequenter per hepar. Alii hunc morbum esse inane ac iners naturæ molimen, sanguinem per venas sedis evacuare volentis contendunt. Pace vero horum omnium regeo, quod Cachectici, Scorbutici, Hydropici, IctERICI, Quartanarii, Lienosi, qui viscera abdominis, hepar & lienem, pancreas infarcta, obstructa, indurata sovent, & ubi sanguinis per venæ portæ innumeras ramificationes motus valde segnis & difficilis est, hypochondriacorum pathematibus ordinario non affligantur. Multo minus vero fluxus hæmorrhoidalis parum feliciter succedens hujus passionis causa esse potest, quoniam juvenilis ætas huic malo plus est obnoxia quam senilis, quæ tamen ordinarie hunc fluxum solet experiri: minus vero familiaris est juvenibus. Neque fluxio sanguinis restituta hoc malum tollit, quamvis interdum levationem adferat. Sed potius statuemus nobis videtur, fluxum hæmorrhoidalem & viscerum obstructions magis hypochondriacorum symptoma atque effectum hujus morbi, quam causam esse. Videmus sæpissime homines hilaris & alacris ingenii perfecte sanos malo regimine affectuum, vel diætâ perversa, vel à male tractatis morbis, aut evacuationibus criticis cohibitis, subito factos hypochondriacos, melancholicos & per plures annos variis phantasmatibus miserrime pressos. Causam vero atque occasionem huic malo, omnia ea, quæ universum genus nervosum debilitant, quæ totum sive motum peristalticum ventriculi & intestinorum lædunt atque pervertunt, subministrant: ut sunt purgantia aciora valida frequentius usurpata, præsertim cum malo regimine, desuper corpus refrigerando, aut potum frigide assumendo, vel animæ passionibus indulgendo. Omnia enim frigida, tam interne quam externe admissa, omnes animi immoderati impetus, omnia fermentescentia, omniaque acida in excessiva quantitate sumpta, opiata, item adstringentia, vitæque sedentaria, mire tonum intestinorum destruunt, eoque magis lædunt & affectum diuturnum reddunt, quo plus in corpora, sive à morbo præsertim intestinorum, sive ab evacuatione nimia aut perverso affectuum & diætæ usu debilitata incidunt. Tenendum hoc loco est, quod si malum inveteraverit, fieri habituale, adeo ut levi occasione data gravia pathemata excitentur.

Quum

310 De Præmatura morte & morbis præcavendis.

Quum vero dolor ille intestinorum, five transiens, five permanens, cum flatulentis, tum spasmis ac tractionibus nervorum absolvetur: hinc etiam complicata symptomata ex hisce ceu fontibus quasi possunt duci ac derivari. Si quis itaque ab hoc molestissimo affectu se præservare velit; vitet omnem usum purgantium acriorum ac drasticorum: caveat sibi ab omni animi gravi affectu, præsertim tristitia; caveat à remediis quæ celeriter & febres & evacuationes sanguinis supprimunt; ut sunt adstringentia, opiata; caveat ab intemperantia edendi & crapula, vitæque sedentaria, quæ pessimæ crudæ sunt genitrices; sique sanguis abundet, sectione venarum superfluis evacuandus est; si alvus adstrictior sit, pilulis polychrestis sollicitanda est; si ventriculus acido nimio infestatur, illud destruentia profunt; sique torpida natura & obstructionis viscerum metus fuerit, thermis, acidulis, balneis, motu & medicamentis balsamicis atque stomachicis, tonus intestinorum roborandus est. Maxime omnium vero abdomen & pedes probe à frigore defendendi sunt. In paroxysmo ad dolores & flatulentias tollendas nihil præsentius est clysteribus emollientibus ac carminativis. Et quoniam alvus adstricta prodromus esse solet toni intestinorum læsi: hinc laborandum est, ut ipsa suum semper faciat officium, nec nimis stricta, nec nimis etiam laxa sit; utpote alvus naturaliter recte respondens, signum toni salvi ac illibati intestinorum est.

Vitet omnem usum purgantium acriorum qui ab hoc affectu molestissimo se præservare velit.

Caveat quoque ab adstringentibus, Opiatis, à crapula, vitæque sedentaria &c.

In Paroxysmo ad tollendos dolores, &c. nil præsentius est clysteribus.

Quid faciendum in cruentis alvi excretionibus.

§. XXI. Intestinorum tormentis sæpenu-mero sese affociant nimia & quandoque cruentæ alvi excretiones. Ne quis itaque in has incidat, ea servet necesse est, quæ superiori paragrapho monuimus. Quum vero epidemici affectus, ex certa & præternaturali anni & temporum constitutione emergant, præsertim quando pruina autumnales corrosivo sale fructus inficiunt: ideo hoc tempore convenit abstinere à fructuum horarum & in fermentationem proniorum abusu. Neque unquam illi nisi prius bene loti & cum calidis cibis debent assumi. Nocet quoque quicquid ventriculum & intestina lædit, præsertim aer humido-frigidus, borealis, iracundia, mœstitia, purgans. Convenit interius tonum fibrarum roborare, quod commode fit balsamicis elixiriis & stomachicis, quorum guttulæ aliquot singulis diebus semel vel bis cum calido vehiculo sunt assumendæ, & spiritu Menthæ frequentius totum abdomen inungendum est. Neque ea quæ humorum acrimoniam in primis viis temperant, qualia sunt Cornu Cervi ustum, aut philosophice præparatum, lapides Cancrorum, Antimonium diaphoreticum, Nitrum, hoc tempore debent negligi. Quoniam vero colluvies biliosa prima in regione collecta, dysenterico miasmati plerumque fomitem præbet; tunc tali in casu suademus, ut radicis Ipecacuanhæ, quæ inter emetica omnium tutissima est, dosi mature hæc ipsa expurgetur.

Radix Ipecacuanhæ inter emetica omnium tutissima.

Dolorum gravissimus est à calculis tam renalibus quam vesicalibus. Imo & in cystide fellea con-cretis. Quæ in calculo vi-landa.

§. XXII. Est quoque dolorum facile gravissimus, qui à grandiori & asperiori calculo vias urinarias permeante nascitur, universum sæpe nervorum genus in anomalas spasticas tractiones rapiens. Neque minoris momenti est ille, qui in vesica stabulatur & continuas molestias & dolores creat. Non rarum quoque est, in cystide fellea variæ figuræ magnitudinis & coloris concrevere calculos, qui, quod sæpius vidi-mus, per ductum choledochum viam affectantes, immanes & fixos cruciatus in dextro la-

tere cum magno periculo inserunt. Ut itaque à tam dira dolorum acerbitate homo maneat immunis, opera danda est. Quum vero calculorum generatio stagnationem humoris glutinosi tartarei supponat: ideo omnia quæ lentos & glutinosos reddunt humores, quæ acidum quod concretionis est principium, vel sal tartareum gignunt, & renum aliarumque partium tonum destruant, vitanda sunt. Ex quo censu inter alimenta, caseosa, lacticia, leguminosa, farinacea, præsertim cum acidis, cum vino, spiritu vini, aut diureticis calidioribus, juniperinis, succinatis, terebinthinatis in usum vocata, primas tenent partes. Denique quoniam Plethorici communiter calculosi sunt, quod nimia sanguinis & humorum exundantia renum tonum non solum dissolvat, sed & coagulo humorum ansam præbeat; hinc ea, quæ abundantem sanguinem gignunt, fugere oportet. Porro vita sedentaria, diuturna tristitia, experientia teste, calculorum productioni multum favet, quare motus, exercitatio & tranquillitas animus præsidio sunt. Ubicunque vero dispositio quædam ad hæc mala animadvertitur, omnia quæ fluidos servant humores, quæ transpirationem aliasque excretiones promovent, nec non quæ tonum ac robur ventriculi & renum conservant, in frequentem usum admittantur. Quod nomine laudamus infusa calida ex Urtica mortua, Veronica, Hedera terrestri, Equifeto, radice Eringii, Althææ confecta, cum quibus singulis diebus portio quædam mellis Prussici potest assumi. Laudamus quoque diuretica blandiora, quæ non coagulant humores, sed acidum simul absorbent, ac simul fluiditatem glutinosæ materiæ præstant, talia sunt Nitrum, Arcanum duplicatum, Tinctura Tartari, Antimonii acris, Conchæ usta, lapides Cancrorum, Magnesia, Arcanum Tartari. Laudamus quoque præservationis causa venæ sectionem circa æquinoctia administrandam, nec non Acidularum & Thermarum usum. Quæ sicuti in omnibus affectibus chronicis: ita etiam ad impediendam calculorum generationem universalis & magnæ energię sunt præservantia.

Plethorici communiter sunt calculosi.

Motus & tranquillitas animus præsidio sunt.

Laudantur herbarum &c. infusa & diuretica blandiora.

Nec non Phlebotomia circa æquinoctia.

§. XXIII. De doloribus articulorum supra facta est mentio, reliquum jam est, ut etiam quædam addamus de cephalalgis vehementer affligentibus.

De Cephalalgis vehementer affligentibus.

Sæpe sunt Symptomata aliorum morborum, quandoque morbus principalis. Has qui evitare vult, rationem habeat ventriculi & assumptorum, utpote omnia, quæ cruditates & flatulentias efficiunt, & quæ caput petunt ac feriunt, ut sunt sulphurata fumosa, crapula, vitare oportet. Enitendum ante omnia est, ut alvus bene respondeat & transpiratio sit laudabilis, nec non pedes à frigore defendantur. Si plethora in causa, venæ sectio est utilis. Si capitis venæ sanguine sunt infarctæ, pediluvia profunt & venæ sectio in pede instituenda; exterius vero loco epithematis acetum Rosaceum cum Oleo Ligni Rhodii, Nitro & Camphora applicatum solamen adfert præsentissimum. Cæterum in serosioribus mirifice roborat caput & à doloribus præservat moderatus Balsami liquidi nostri usus, si vertici, temporibus, naribusque admoveatur. Quod si membranas, quæ dentes obvolvunt, gravis occupaverit dolor, & ab eo nos præservare velimus, plethoræ ac cacoehymię habenda est ratio. Cariosus si fuerit dens, tutissimum remedium exustio est. Atque ut universa capitis

Alvus tunc bene respondeat & transpiratio sit laudabilis. Si Plethora in causa V. Sectio est utilis. Alia Remedia.

Etiā in dentium dolore.

tis regio à defluxionibus acerbis molestis maneat immunis, roborandi fine non possumus satis laudare Balsami liquidi nostri externum usum, sive naribus, sive vertici, sive temporibus applicemus, sive miscendo illud cum aqua vel vino os, faucibusque eluamus, ac totam faciem nuchamque lavemus.

Morbi convulsivi & soporosi sunt in senibus.
Epilepsia puerorum.
Ex qua causa.
Quid faciendum ad præservationem.
Ad Epilepsiam d. spum. fiant vinum, liquores inebriantes, &c.
Abstineant à fructibus horæis, saccharatis, lacticiis, flatulentis, acidis, acidularum & theriacarum potu, nec non ab ipsis balneis; caput vero nunquam humectent vel inungant. Præservant vero optime à gravioribus capitis passionibus fonticuli, setacea nuchæ applicata, cœli mutatio, alvique apertio. Si sordes verminosæ in primis viis causam hujus mali constituunt, has ipsas pilulis ex mercurio dulci, myrrha, aloe, asafœtida & camphora confectis oportet expurgare. Nihil vero familiarius est, quam quod retropulsis eis, quæ excerni debebant e. g. variolis, morbillis, scabie, crusta lactea, tinea capitis, purpura, malum epilepticum, maxime in infantili ætate, superveniat, quare tali casu omnis navanda est opera, ut naturam prudenter in excernendo adjuvemus, neque eam turbemus.

Alpitatio cordis est species convulsivæ.
S. hic agno. esse fonticuli.
d. affe. us Spasmodicos.
sthma quoque est frenum.
ausa.
diuturnum, polyplemque in ipa esse.
bito gigitur à re-pulsa b. e. &c.
 §. XXV. Convulsivæ quoque species est cordis palpitatio, quæ si pertinax & chronica fuerit, plerumque à cordis & pulmonalium vaporum polypo fovetur, simulque ab animi affectu, præsertim terrore gravi subito producit: neque minus spasmodicis abdominis pathematibus in hypochondriacis & hysteris plerumque complicatur: Venæ sectio hic magno solet esse solatio: Atque omnia quæ alvum aperiant, & quæ flatum discutiant in usu sint frequentiori. Præterea ad affectus spasmodicos convulsivos referendum quoque est asthma, quod à spasmis nervorum pneumonicorum & à stricture fortiori vesicularum pulmonalium provenit; Oritur non infrequenter in hypochondriacis & hysteris, vel qui intenso frigore, iracundia, crapula nervos thoracis læserunt: Si diuturnum est, polypus plerumque in culpa esse solet, & tunc facile definit periculose in hydropem thoracis ipsamque mortem. Subito vero gignitur à retropulsa scabie, arthritide, podagra, erysipellate vel alia excretionem subcutanea & critica, quod identidem accidit, ulceribus antiquis incau-

te consolidatis. Qui fumos saturninos hauriunt metallicolæ, spasmodicum asthma sæpissime percipiunt: pro varietate vero causarum variat quoque præservandi methodus. In metallis qui operantur, ne eorum fumi noceant, frequens sit butyri & oleorum usus. In retrocedentibus vero iis, quæ foras debebant proscribi, vesicatoria & fonticuli applicentur. Et ne polypus concreseat, venæ sectio, motus fortior, nitrosa salia lixiviosa, infusa calida, thermæque profunt. Harum vero & acidularum usus in hoc affectu, præsertim ubi polypi est indicium, debet esse cautissimus, utpote plus vice simplici lethalem inde eventum observavimus; quare legi potest *Dissertatio de asthmate convulsivo*. In genere ab hoc gravi & periculoso affectu præservat defensio pectoris ab omni frigore, abstinentia à crapula, & continens animus in sævis passionibus, siquidem tria hæc, crapula, ira, frigus, si sæpius concurrunt, non modo hoc grave malum, sed & alias spasticas & inflammatorias passiones excitant.

§. XXVI. Ordo jam ad soporosos morbos nos deducit, inter hos periculo omnes exsuperat apoplexia, quæ senili ætati est insensibilissima. Pro causa plerumque agnoscit plethoram, capitis debilitatem & spasticas constrictiones si ve externarum si ve internarum partium: sæpe frigore, ira, terrore, cum impetu sanguis congestus in caput ibi stagnat, vasa distendit eaque rumpit, sicque lethalis hæmorrhagia cerebri, quæ proxima causa apoplexiæ est, inducitur. Ea propter senes & quicumque ad hoc malum prædispositi sunt, plethoræ gignendæ resistant. Quare ante æquinoctia, in quibus solennes solent esse sanguinis congestiones & apoplecticorum insultus, venam secare utique necessarium est. Deinceps omnibus iis abstinendum est, quæ nervorum & cerebri tonum destruunt, quorum jam mentionem fecimus; nam quæ in ætate infantili epilepsiam producant, ea in senili disponunt facile ad apoplexiam, neque minus ad affectus soporosos, paralyses, hemiplegias, coma, lethargum, carum, vertiginem, sensuum abolitiones, guttam serenam, surditatem, viam sternunt paratissimam. Tuta præservatio in eo consistit, ut probe corpus, caput & pectus muniat à frigore, quod senibus & nervoso generi admodum inimicum est, deinde alvus & transpiratio liberior conservetur. Tum temperatis, balsamicis, succinatis, ambratis & balsami vitæ tam interno quam externo moderato usu cerebri & nervorum tonus corroboretur.

§. XXVII. Considerandi jam veniunt illi morbi, qui chronici dicuntur & vehementia non minus quam contumacia terrent. Hi ut plerumque in visceribus sedem fixam habent, si ipsa obstructa, infarcta, contracta, indurata, exulcerata, vel alio modo corrupta fuerint. Pro differentia vero viscerum differentes etiam nascuntur morbi. Itaque, si vitium in pulmonibus latet, fit phthisis vel orthopnoea, item hæctica; si in hepate, cachexia, scorbutus, icterus, hydrops; si in liene, cachexia & atrophia; si in pancreate, contumax intestinorum dolor atque inflatio; si glandulæ hinc inde obstructæ fuerint, scabies, lepra propullulant. Quemadmodum vero omnia, quæ lentorem fluidis ingenerant, eorumque segniorem progressum faciunt, nec non minimos canaliculos partium occludunt, horum morborum genesi multum velificantur: ita quæ fluiditatem humoribus foenerantur, quæ obstructa referant & sanguinem depurant, præ-

Ex fumis Saturninis metallicis la spasmodicum Asthma percipiunt.

Horum Antidotum.

Contra Polypum Remedia.

Apoplexia senili ætate est insensibilissima.

Ejus causa.

Ante æquinoctia venam secare necessarium est.

Corpus, caput & pectus à frigore muniantur. Alvus & transpiratio liberior conservetur.

Morbi chronici sunt, qui vehementia non minus quam contumacia terrent.

Pro viscerum differentia, differentes etiam nascuntur morbi.

Horum omnium ratio.

servan-

fervandis his morbis commodissime inferviunt. Id genus vero sunt labor, motus, exercitatio corporis, serenus & siccus aër, abſtinentia à dulcibus, acidis, ſaliſis, duris, potu ſpirituoso & à nimia mœſtitia, Thermae quoque, acidulae & aquae dulces & minerales, nec non infuſa calida præſertim ex herbis, Trifolio fibrino, floribus Naſturtii Indici, Baccis Juniperi toſtis compoſita uſus ſunt præſentiſſimi: ſi plethora urget, ſanguis mittendus eſt: ſi ordinariae & criticae evacuationes menſium vel hæmorrhoidum fuerint ſuppreſſæ, cito has reſtituere neceſſarium eſt. Cavendum quoque eſt, ne refrigerantibus, adſtringentibus & opiatibus intempeſtive immodicas omnis generis evacuationes, præſertim ſanguinis, febres quoque intermittentes cohibeamus; ſed potius in moderatum uſum baſamica, amara, & per epicriſin evacuantia nec non ſalia volatilia oleoſa admittenda ſunt.

Remedia
his caſibus
conve-
nientia.

Ex corrup-
to pulmone
oritur
phthiſis.

Malum in-
diciuſ eſt
depreſſior
thorax.

V.S. matura
admini-
ſtrata mul-
tos à peri-
culo phthi-
ſeos libe-
ravit.

Auctor
quoque
laudat Sel-
teranum
fontem.

Si Hæmop-
tyſis Phthiſi
jungatur
nitruſ &
laxantia
opem pro-
mittunt.

Adſtrin-
gentia in
Cachexia
fugienda.

Ex diutur-
no aſth-
mate fit
Hydrops.

§. XXVIII. In ſpecie vero ex corrupto pulmone oritur phthiſis cum febre & colliquativis excretionibus: inſenſa eſt maxime juvenili ætati & ſoventur ut plurimum ab hæreditaria pulmonum debilitate: unde malum indicium eſt depreſſior vel anguſtior thorax, ſcapularum eminentia, pulſus ordinario citatior. Fit plerumque in hoc adſectu decubitus p. n. in pulmone ſanguinis & ſeri, quare tuſſis, reſpiratio difficilis, hæmoptiſis malum futurum ſignificant. Ad impediendum itaque ſtagnatorium in pulmone decubitus, opus eſt venæ ſectione, qua mature adminiſtrata, multos novimus à periculo phthiſeos liberatos & macilentos, pingues redditos. Juvat quoque ordinarias ſanguinis evacuationes & conſuetas in ordinem redigere & cauſiſſime adſtringentia, acida, ſpirituosa, opiatia, copioſa dulcia & expectorantia uſurpare; utpote quæ bronchia ſtimulando humores ad pulmones debiles & laxos nimium alliciunt, eoſque ad ſtaſin valde diſponunt. Robur vero pulmonum ſervant illibatum & heterogeneum ibi ſubſiſtens egregie diſcutiunt ſulphur purum & myrrha electa, quibus interne, externe etiam in forma emplaſtri, utendum eſt. Laudamus quoque Selteranum fontem mitiſſimum: qui præter ſal alcalinum fixum ſulphur quoque tenet. Hic cum Lacte Caprino mixtus & convenienti regimine ad menſem ſumptus, inſignem utilitatem ad labem pulmonum tollendam affert. Si hæmoptiſis phthiſi jungitur, Nitruſ cum abſorbentibus & leniora laxantia deſideratam opem promittunt. Quod ſi vero ab immaturo infarctu pulmonum aſthma chronicum & humidum generetur, quod à ſicco multum diſtat, tunc acidularum & thermarum potum aliaque reſolventia, Baſamica, Gummata, Gummi Ammoniacum, Myrrham electam, Benzoe, pulverem Millepedum, Mercurium dulcem, Nitruſ in forma pilularum invicem mixta, valde proficua ſemper deprehendimus.

§. XXIX. In Cachexia, ne in Hydropem degeneret, fugienda ſunt adſtringentia, quamobrem cautus eſſe debet uſus Martialium. Neque quartana in hunc affectum abeat, quod non raro fieri ſolet, China Chinæ, cortex Fraxini, Viſcus quercinus, quibus impetum febris coercemus, magna cum circumſpectione debent adhiberi. Ex diuturno quoque aſthmate ſæpius fit Hydrops, ubi dulcia, incrassantia & pectoralia, propter infarctum, quem augent, ſuſpecta ſunt.

§. XXX. De ſcœminarum morbis quædam etiam dicenda reſtant. Conſtat, harum ſanitatatem multum pendere ab ordinata menſium fluxione; jam igitur, ut hic fluxus juſto tempore, modo & menſura procedat, ſcœminæ conveniens vitæ regimen obſervare tenetur. Maxime omnium vero ad hanc ſolennem evacuationem ſanguinis conſervandam omnia exceſſiva in victu, diætâ & animo & aëre aſpernentur. Etenim nimium comeſta acida, dulcia, ſarinacea, lacticia, indurata, falſa, ingens frigus, diuturnum otium & omnes vehementes animi paſſiones protinus ordinem hujus fluxus perturbant. Potius hæc omnia fugere, & iis uti oportet, quæ humores ſervant fluxiles, partiumque tonum roborant: cujus generis ſunt infuſa calida ex herba Meliſſæ, Pulegii, floribus Chamomillæ, Millefolii, Anthos cum aqua concinnata, quæ in omnibus ſcœminarum morbis præcavendis, imprimis vero circa evacuationis menſtruæ tempora opem ferunt præſtantiſſimam. Cæterum cum morbi, quibus ſcœminæ adſiguntur, maxima ex parte à colluvie impurorum ſuccorum, partim in ſanguine, partim in primâ regione collecta, ob alvum ſegniorem, diætæ errata & vitam ſedentariam naſcantur: ideo ut cauſas morbiſeras præſcindamus, ſuademus majorem corporis exercitacionem, laborem, motum, ſuademus quoque ut præter jam dicta infuſa calida, per ſingulas ſeptimanas Baſamicis pilulis ſordes primarum viarum evacuent, quæ ſecundum exemplar Becheri, ex herbarum extractis, gummatibus reſinoſis & reſracta Aloes lotæ doſi poſſunt concinnari; utpote tale remedium non tantum plethoræ & cacoſymia gignendæ reſiſtit, ſed & tonum partium roborando, excretiones neceſſarias promovet, & nervorum ac fibrarum ſyſtema à ſpaſmodicis conſtrictionibus defendit. Neque inutile eſt interdum uti in laudatis infuſis ſale volatili oleoſo vel Baſamo noſtro liquido. Hæc omnia jam monita majori cura debent obſervare gravidæ, quæ, quo magis ſibi in diætâ & regimine affectuum temperant, eo ſaniores liberos generant, & minus periculi in puerperio ſuſtinent. Nihil vero ipsis eſt inſenſius quam omnis vehemens animi affectus, præſertim terror, qui in diſpoſitis ſubito abortum excitat. Quoniam vero plethora & hanc preſſo pede inſequens cacoſymia gravidis & foetus corpori maxime eſt inimica: hinc ut juſta venæ ſectionis adminiſtratione & ſecura evacuatione mature auxilium feramus, ſumme neceſſarium eſt. Accidit vero ſæpiſſime, ut puerperæ in graves incidant morbos, ſi corpora nempe fuerint impura, ſi lochia non rite ſuccedant, ſi prima regio ſordibus ſcatens non expurgetur. Nihil itaque in hoc caſu ipſarum ſanitati eſt convenientius, quam exacte diæteticas ſervare leges, corpus & animum in quiete tenere, ac diaphoreſin lenioribus promovere, neque minus alvinam regionem ſecuro & baſamico evacuante & roborante decenter à ſordibus expurgare; ita non poſſunt non omnia feliciter, benedicente DEO, ſuccedere. Ad febres & inflammationes præcavendas, nil ſecurius eſt pulvere Diaphoretico & Nitroſo: ad ſpaſmodicas vero & dolorificas inteſtinorum & uteri criſpaturas avertendas, nil tutius ipſo oleo Amygdalarum dulci, Spermate Ceti, Eſſentia ſaturata Millefolii, Chamomillæ vulgaris, corticum Aurantiorum, Croci, Caſtorei deprehendimus. Evenit ſæpenumero, ut, quæ ſemel abortum

ſcœminarum morbi
multum
pendent ab
ordinata
menſium
fluxione.

Quæ ordi-
nem hujus
fluxus per-
turbant.

Morbi mul-
ierum à
colluvie
impuro-
rum ſucco-
rum, diætæ
erratis,
& vita ſe-
dentaria
maxima
ex parte
naſcuntur.

Pro illa-
rum mor-
bis Rem-
edia.

Gravidis
nil eſt in-
ſenſius,
quam om-
nis veh-
emens ani-
mi affe-
ctus.

Exacte
diæteticas
ſervare le-
ges debent.

Ad febres,
&c. nil eſt
ſecurius
pulvere di-
aphoretico
nitroſo.

Semel ab-
ortum paſ-
ſæ, fre-

ortum

quentius
hunc expe-
riantur.

Ejus causa.

Infantum
morbi de-
scribuntur.

Quid eo-
rum sani-
tatem de-
truit.

ortum passæ sunt, frequentius hunc experian-
tur; cuius rei causam esse suspicor, quod sub-
stantia uteri, tam quoad tonum ejus, quam quo-
ad vasa, violenta vasorum apertione & foetus
expulsione, læsa fuerit: hanc læsionem itaque
restituere & sanare, balneis, infusis herbarum vul-
nerariis & balsamicis temperatis statim oportet,
quod si negligitur, spes perfectæ sobolis fere
expirat.

§. XXXI. Ultimo de infantum morbis quæ-
dam etiam merentur adduci. Et sicuti prove-
ctiores ætate victus & diætæ vitio, ac malo af-
fectuum regimine multa mala patiuntur: ita et-
iam recens nati ex iisdem causis agrotant. Si
enim plus lactis quam ferre potest tener ventri-
culus assumserit; sique hoc crassum, impurum
& ad coagulationem promptum fuerit, neque
per alvum rite secesserit: statim acefcit, cor-
rumpitur & bile admixta corrosivum evadit; un-
de torminum, spasmodorum, convulsionum asth-
matis, dolorum & febris fit origo. Nihil ve-
ro citius eorum sanitatem destruit, quam si nu-
trices animi affectibus indulgent vel gravi terro-
re corripiantur, deinde si tenerrima hæc cor-
pora frequenter acerbis resinosis evacuantibus
exerceantur, præsertim quæ firmitus intestino-
rum tunicis ob gravitatem vel difficiliorem so-
lutionem impinguntur: hac enim ratione fit, ut

tonus & motus peristalticus ventriculi & inte-
stinorum lædatur: quo deperdito nunquam re-
cte procedit alvina sordium excretio, quæ ta-
men sanitatis infantum certissimus index & pa-
rens esse solet. Hujusmodi purgantia ad dolo-
res, tormina, spasmos, convulsiones, asthma-
ta, nec non Oesophagi & Diaphragmatis stric-
turas singultuosas corpora præparant, quare ta-
lia cane pejus & angue evitentur, prudentia, ratio,
& conscientia suadet, dicat, injungit. Pejoris
adhuc indolis sunt, quæ ex metallorum regno
petuntur remedia infantibus tenellis plane non
convenientia, ut Aurum fulminans, Mercurius
dulcis, utpote quæ, præsertim pulvere assump-
ta, ab humorum in prima regione collectorum
commixtione suam plerumque accipiunt opera-
tionem, quatenus nempe plus vel minus solvun-
tur; hinc tali passu infida & infecura merito ha-
bentur. Præstat potius acrimoniam & viscidita-
tem humorum absorbentibus, nitratis & cinna-
barinis tollere, & mitiore laxante rhabarbarino
aut mannato aut clystere emolliente morbosas la-
ctis corrupti sordes expellere. In genere vero hæc
regula tenenda est: parcissime infantibus tenellis
offerenda sunt remedia, sed consultius semper est
nutricibus ea, quæ necessaria sunt ad lactis vitia
corrigena, exhibere. Verum pagellarum angustia
nostri argumenti disquisitionem fusioem excludit.

Ex Metal-
lorum re-
gno reme-
dia infan-
tibus haud
conve-
nient.

Tenellis
parissime
offerenda
sunt Re-
media.



D I S S E R T A T I O

S E P T E M L E G E S S A N I T A T I S

E X H I B E N S.

P R O O E M I U M.

Nihil est ad ineffabilem Dei gloriam in toto hoc
universo illustrius, quam quod omnia & sin-
gula mirabili proportionem, sapientissimo ordine &
convenienti tempore perficiantur. Neque ullus in
natura notabilis effectus, nisi sub certo causarum
ordine, atque concursu animadvertitur. Corpora
organica suas actiones, motusque secundum cer-
tam normam certasque leges constanter absolunt.
Sidera cælestia ad constantes regulas, cursum,
iter, ac motum suum in vastissimo cæli spatio con-
ficiunt, quas leges magnus KEPLERUS accurate
notavit. Neque descensus corporum gravium sine
legibus fit, quarum observationem Mathematicis,
præsertim GALILÆO A GALILÆIS, debemus. Ne-
que percussiones atque impulsus, legibus, quarum
inventionem præcipue Clarissimi Viri HUGENIUS,
BORELLUS & LEIBNITIUS sibi vendicant, desti-
tuuntur. Id vero in solertiorum adhuc desideriis
est, ut leges, quibus fluida & elastica obsecundant,
satis superque perspectæ atque detectæ essent. Cum
itaque in tota rerum natura, nihil sine ordine, ni-
hil sine regula ac lege fiat, nullum est dubium,
quin etiam vita atque integritas humani corporis
certo ordine ac lege naturali quam maxime dis-
pensetur atque administretur. Has itaque leges mi-
crocosmicas, hunc, quo natura gaudet ordinem re-
cte explorare atque intelligere utique boni Medici
esse videtur. Hisce enim inventis, postea quam
facillimum erit salutaria vitæ & sanitatis tuendæ
causa, præcepta superstruere, quorum observan-
tia inconcussam sanitatem promittat, contemptus
vitam miseram, atque breviorē post se trahat.

Frid. Hoffmanni Oper. Tom. V.

Quemadmodum enim, qui legum civilium sunt ob-
servantes in Republica, salutem sibi atque tran-
quillitatem parant: ita etiam quibus legum Me-
dicarum observantia non despicatur sed curæ cor-
dique est, ii prosperam aquabilem atque perpe-
tuam valetudinem, qua nihil potest esse in vita ca-
rius, sibi conciliare poterunt. Duodecim olim ta-
bulis omnium legum jurisque scientiam prisca &
sapiens vetustas complexa est, nos jam sacro sep-
tenario vitæ ac sanitatis regulas atque leges inclu-
dere allaborabimus, adeo ut in compendio, qua-
si omne illud alias valde diffusum, quod circa sa-
nitatem tuendam observandum est, hic reperia-
tur. Quem laborem neque injucundum, neque in-
utilem ad Bonum publicum cum judicaverimus,
placuit illum loco speciminis cujusdam inaugura-
lis curiosorum oculis atque animis subicere. Cui ut
immensus veritatis fons benedictionem, gratiam
atque prosperum successum elargiatur, non sine
devoto animi cultu precamur.

Sicut le-
gum civi-
lium ob-
servantes
in Repu-
blica salu-
tem pa-
rant, ita
legum me-
dicarum
observan-
tia perpe-
tuam va-
letudinem
sibi conci-
liare pote-
runt.

§. I.

Septem itaque leges, quibus sanitas incorrup-
ta diu servari possit, proposituris, primo om-
nium nobis incumbit, ut fundamentalem mi-
crocosmicam legem, secundum quam ceu ad nor-
mam omnes actiones corporis nostri neque non
vita atque sanitas administrantur, & cui nostræ
etiam diæteticæ leges insistant, in medium pro-
feramus. Est vero ea lex, liber, æquabilis ac mo-
deratus fluidorum in circulum abiens motus, per
moderatum constantem & æquabilem solidorum
pulsus ac tonum; Hoc princeps est conservatio-
nis corporis nostri in se corruptibilis fundamen-
tum. Hæc lex omnium actionum, quæ in cor-

Septem le-
ges, quibus
sanitas in-
corrupta
diu serva-
ri potest.

Primo, li-
ber, aqua-
bilis &c.
fluidorum
in circulo
motus.
Hujus le-
gis elogia.

D d

pore

pore contingunt, tam naturalium quam animalium norma & regula est. Hic omnis theoriæ sive scientiæ & prudentiæ sive praxeos medicæ unicus & perpetuus est scopus. Hæc exquisiti vitæ regiminis & salubrium diætæ præceptorum præcipua directrix. Hac facta, tecta ac salva, in vigore ac sanitate persistit corpus, hac destructa multum in hisce periclitatur. Nullus enim morbus, nulla œconomiae motuum vitalium perturbatio animadvertitur, ubi violatio hujus legis fundamentalis microcosmicæ evitatur.

Quænam illa sunt, quæ legem vitæ & sanitatis constituent.

§. II. Hisce jam perspectis ingeniosa & eximia utilitatis emergit quæstio, quænam illa sint, quæ legem hanc ceu fundamentum vitæ & sanitatis constituent, firment, atque corroborent? nec non quænam hanc naturæ normam violare atque destruere idonea sint? Sicuti enim ab illis longam vitam illibatamque sanitatem, qua nihil potest esse dulcius: ita ab his ejus abbreviationem & incommodam valetudinem expectari oportet. Facta autem accuratiore pensatione, machinam nostram & materiam qua constat, & motum, qui actuat materiam, à rebus mere externis accipere, annotamus. Hisce enim per singula momenta eget & conservatur: iisque deficientibus destruitur. A Veteribus hæ res non naturales appellantur, quoniam extra corporis nostri essentiam constitutæ sint. Sunt vero hæ ipsa maxime omnium animi conditio, & præterea universalis ille aëris & ætheris fons, è quo omnia viventium genera bibere debent. Sunt alimenta, solida æque ac fluida. Sunt denique actiones ipsius hominis nunquam non necessariae, quæ ad motum, quietem, somnum, vigiliam, consuetudinem, vitæque genus pertinent. Et quemadmodum ingeniose constructi automatis motus à vi motrice elastica vel pondere alterius corporis dependet, conservatur atque dirigitur: Ita etiam artificiosissimæ atque infabibili sapientia constructæ machinæ nostræ à corruptione conservatio, atque regularis & ordinatus motionum successus à rebus memoratis externis unice pendet, per easque durat atque persistit. Hæc ipsa enim sunt, quæ vigorem, motum, actionem partibus solidis æque ac fluidis tribuunt. Ex quo clarissime intelligitur, utique in harum rerum prudenti ac decenti usu præcipuum vitæ & sanitatis nostræ momentum versari, eaque propter hanc curam animo nostro perpetuo esse debere infixam, ut leges, quæ præscribunt nobis convenientem earum rerum usum diligentissime observemus. Hæc vero ipsas sequenti jam ordine promulgabimus.

Hæc sunt, quæ nostram machinam mobilem subministrant.

§. III. Prima itaque lex esto:

Omne nimium, quia naturæ est inimicum, effuge.

Est regula hæc venerandi & primi artis nostræ parentis HIPPOCRATIS, quam *Sectione II. Aphorismo 51.* proposuit, eaque valde est universalis, & hinc amplissimæ utilitatis. Per id omne intelligit, quodcumque corpus nostrum ullo modo mutare, afficere, vel alterare potest, sive ex elementorum, alimentorum, medicamentorum classe, sive ad animæ vel ipsius hominis actiones referendum fuerit. Per naturæ vero vocabulum, quod ingenti propter varias in disciplinis significationes obscuritate laborat, quid magnus noster Auctor intellectum velit, explicatione paulo planiore opus est. Loca vero in quibus non modo HIPPOCRATES, sed & alii Veterum sapientiores, naturæ mentionem faciunt, facta prudenti inspectione declarabant, per hanc

Omne nimium effugiendum.

Per Naturæ vocabulum quod Hippocra-

ipsam nihil aliud intelligi, quam existentes in corpore nostro motus, qui physica quadam necessitate ex structura videlicet, dispositione, atque coordinatione mutua partium fluidarum, humidarum, & solidarum (quæ nunquam vi motrice destituuntur) perficiuntur. Placuit mihi semper hac in re C. AURELIANI, qui exstat *lib. I. acutorum morborum pag. 39. locus. Omnia, inquit, fiunt necessitate, & nihil sine causa; neque natura nihil aliud est quam corpus & ejus motus.* Igitur hoc sensu accipi etiam debet vocabulum in nostro Aphorismo, cujus explicationem hanc esse oportet: Omne excessivum & immoderatum sive qualitate sive quantitate peccet, corpus nostrum, inque eo vigentes motus, quorum princeps est sanguinis humorumque progressio, lædit, quæ postea, cum omnis secretionis, excretionis, conservationis, nutritionis, atque operationum animæ fons atque fundamentum sit, vehementer functiones corporis alterat atque affligit. Quare vero omne intemperatum & excessivum motibus œconomiae nostræ vitalis inimicum sit, ratio hæc est, quod temperatus ac placidus fluidorum progressus norma ac regula vitæ & sanitatis sit, ut supra docuimus, igitur omnis copia peccans materia libero fluidorum progressui resistit. Nimius quoque solidorum impulsus potius ad destructionem quam conservationem corporis nostri tendit. Porro ex altera parte, si humorum nimius esset defectus, si eorum motus plane deficerent atque elanguescerent, infensæ stagnationes, obstructions, nec non corruptiones perquam funestæ inde emergerent. Quemadmodum enim omne excessivum corpori nostro est infensum: ita moderatum ac temperatum, quod quasi inter extrema medium est, ipsi est amicissimum.

Aureliani de voce Natura sententia.

Omne excessivum corpus nostrum lædit.

Quare.

§. IV. Sicuti autem à priori, ut Philosophi loqui amant, hujus regulæ veritatem demonstravimus: ita multo magis ab effectu, sive à posteriori per experientiam res evadet clarior. Observatione enim indubitata comperimus, excessivum in rebus non naturalibus vehementer nos lædere. Ita nimia à quocumque cibo facta repletio, & contra fames sive alimonie bonæ defectus magnorum morborum genitrices sunt. Omnis cibus, excessivis qualitatibus notatus, qualis est admodum salsus, acidus, durus, glutinosus, vel nimis calidus, dulcis, acris, fermentescibilis in copia ingestus, incommodum creat. *Omnia enim, ut noster HIPPOCRATES lib. de vet. med. §. 25. inquit, quæ edit, aut bibit homo, minime intemperato & dissidente ac excedente succo participare debent, velut sunt panis & maza & his similia, quibus assuetus est homo pluribus & semper uti. Nam robur & augmentum & alimentum per nihil aliud contingit, quam quod probe temperatum est, & nihil habet intemperatum.* Potus sive sit nimium potens, sive acidus, aut valde dulcis minus congruit succis corporis nostri, neque in æquilibrio vitales motus conservat, unde minus salubris habendus. Vehemens frigus, intensus calor, diuturna humiditas summopere humorum temperiem & motus corporis lædunt. Et quemadmodum vehemens exercitatio, indefessus labor, assidua vigilia vires frangit, easque dissipat: ita diuturna quies, vita sedentaria, diuturnum otium & animum & corpus iners, torpidum, segneque reddunt. Nimia venus præsertim una nocte sæpius repetita mire debilitat corpus, ut si quis acuto morbo correptus sit ex eo vix eluctari

Per experientiam res evadit clarior.

Quod demonstratur.

Etiam Hippocratis oracula.

Et per ea quæ quoti die fiunt.

eluctari possit. Contra vero nimis parvus venieris usus, torpidos, & timidos reddit homines, ac capiti, membrisque gravitatem affert. Quam perniciosus naturæ nostræ sit ipse vehemens animæ affectus neque minus ipsa valentior medicina, sive purgans, sive adstringens aut motus cohibens, dici vix potest. Et sicuti excretiones, quando in excessu aut defectu delinquant, morbum futurum nunciant, ita æquabiles, constantes, moderatæ, prosperum valetudinis statum promittunt. Auream quippe regulam in diætetis perpetuo observandam censemus. Moderata durant, atque vitam & sanitatem durabilem præstant.

Moderata durant.

Secunda lex.

§. V. Secunda perquam salutaris lex esto:

Ne subito muta assueta, quia consuetudo est altera natura.

Consuetudo altera natura.

Inque naturam commutatur.

Hippocrate quoque teste.

Consuetudini litandum: hujus enim vis in vita instituta maxime elucet.

Quod exemplis illustratur.

Trita & pervulgata est hæc regula à Physicis æque ac moralium Professoribus approbata. Utpote experientia teste consuetudo non minus in naturalibus & medicis quam quoad mores, vitia & virtutes in moralibus multum valet, inque habitum quasi & sic in naturam commutatur. Quapropter malam etiam consuetudinem non esse abjiciendam, omnes saniores asseverarunt. Nam HIPPOCRATE auctore lib. I. I. Aph. 50. ex multo tempore consueta inconsumetis minus molestare solent. Idem Aph. 49. prodidit: assueti, inquit, debiles ferre possunt ea, quæ inassuetis robustioribus molestiam creant. Per consuetudinem vero intelligimus hoc loco longiorem & repetitum rerum quæ corpus nostrum afficiunt, atque mutant usum. De hoc utut paulo deteriori dicitur, quod continuato usu altera fiat natura, id est, quod demum conformis & amicus evadat corpori nostro, neque amplius noceat, vel turbet ejus motus, ut potius cum natura ejusque motibus in consymbiosis atque affinitatem abeat. Hujus regulæ veritatem non tam ratio, quam certa & indubitata experientia comprobatur atque illustratur. Utpote hac magistra discimus, quod etiam immoderata neque adeo amica longioris temporis usu, innocua tandem fiant. Ita exempli causa videmus, durum, quo Westphali gaudent, victum ex pane grossiori fursuraceo, & induratis ac infumatis suillis carnibus constantem ipsorum membris vim ac robur addere; tenues vero, temperatos & facili solutionis cibos, hos populos offendere. Notum est, quam maxime immoderatus usus aromatum piperis præsertim, item spiritus vini, aquarum vitæ in Polonia & Moscovia vigeat, neque facile assuetos ibi lædat, cum tamen, si nostri idem vellent imitari, in magnum periculum incurrerent. Inclementius atque impurum crassum & nebulis ac vaporibus oblitum cœlum, non tam facile iis corporibus, quæ diu eo usa fuerunt, nocet, ac si sana corpora quæ puro antea fruebantur aëre in talem locum fuerint delata, nam hæc protinus ab insalubri aëre admodum offenduntur. Valet id maxime de tenerioribus & sensibilibus subjectis, utpote quæ ex peregrinationibus, mutatione aëris vel victus plane contrarii facta facile læduntur atque ægrotant. Si quis diu assueverit urbano, minisque libero aëri, is à puro, salubri, aperto, qualis ruralis saluberrimus est, facile perturbabitur, adeo, ut lassitudinem & gravitatem quandam in capite experiat. Qui assueti sunt continuis laboribus & motionibus, si has intermittunt, facile ægrotare

Frid. Hoffmanni Oper. Tom. V.

incipiunt. Cerevisias qui diu potarunt amaras & lupulatas, dulces postea æque bene ferre nequeunt. Valet quoque hæc consuetudo, quoad animi pathemata. Dantur qui ita adsuaverunt commotioni animi per iracundiam, ut in nutrimentum sanitatis ira cedere videatur, cum contra inadsueti per gravem iram in præproperam mortem incidere possint. Qui longiori somno diutius usi sunt, si parum dormire coguntur, multum debilitantur. Ita etiam meridians somnus in adsuets citra noxam & cum commodo melioris chylicationis peragitur, qui minus adsuets noxius est. Porro si quis corporis motionem inusitatam paulo fortiolem susceperit, non modo multum de lassabitur, sed etiam plures molestias altera die in membris persentiet. Spectat huc Aphor. 49. Sect. II. Hipp. assueti consuetos labores ferre, etiam si fuerint debiles aut senes, non assuetis fortibus ac juvenibus facilius ferunt. Pertinet huc quoque nimis frequens & immoderata medicamentorum assumptio; quæ multis hypochondriacis perquam familiaris est, nam hoc morbo correpti frequentius pharmacomania laborant, dum medicamenta quotidie ingerunt, eorumque copiam ac varietatem appetunt, quibus tamen ita natura assuescit, ut tandem ferre omni effectu destituantur. Porro in vulgus nota sunt exempla, quod ea, quæ veneni naturam habent, diuturno usu non amplius noceant, sicuti familiarissimum exemplum habemus in Tabaci fumum potantibus, qui sulphure narcotico naturæ inimico valde caput lædit, & acerbæ symptomata inducit, successivo autem & longiori usu non modo omnem nocendi facultatem amittit, sed naturæ etiam tandem blandus atque amicus redditur. Simili etiam ratione Opio assuescere possumus; Quam in rem observationem meretur FALLOPIUS. Persiani, inquit, comedunt opium à pueritia incipientes in minore quantitate, & sensim ac sensim quantitatem augentes, donec assueverint magnæ opii quantitati, idque faciunt, ut fiant ad coitum promptiores. Puellam napello nutritam legimus, quæ cum modice atque sensim venenum id devorasset, eo in posterum absque ulla noxa usa est. Valet hæc regula in omnibus simpliciter consuetis, videlicet alimentis, refrigeratione, calefactione, balneis, tegumentis, motionibus, animi affectibus, venere, somno, imo venenis, ut consueta inconsumetis minus sint noxia. Quoniam ut videtur, ex crebra applicatione ad corporis nostri fibras, fluidasque partes ad similes motus, atque materiæ habitum dispositionem quandam promptam atque facilem tandem adipiscuntur. Maximi itaque momenti est consuetudo, neque minus periculi est à consuetis desciscere, eaque in contrarium mutare, præsertim si repente id fiat. Unde est illud CELSI lib. I. cap. 3. Periclitatur, & qui semel & qui bis die cibum contra consuetudinem assumit. Item neque è subito labore subitum otium, neque ex nimio otio subitus labor sine gravi noxa est. Ergo si quis mutare aliquid volet, paulatim debet assuescere. Nam omnis subita mutatio est periculosa. Quod vero paulatim ac successively fit, id tutum est. Notari autem hoc loco velim, inconsumeta æque ac consueta nimio excessu sicuti in lege prima deduximus, delinquere & vehementer lædere corporis nostri actiones posse.

§. VI. Accedimus ad legem tertiam, quæ sic se habet:

ruralis analogis.

Spectat huc Hippocrate, effectum.

Medicamenta usu quotidiano tandem ferre omni effectu destituantur.

Tabacus longiori usu non lædit, sed natura tandem amicus redditur. Pari ratione quidam opio assuescunt.

Puellam napello nutritam legimus.

Siquis mutare aliquid volet, paulatim debet assuescere.

Animo hilari ac tranquillo esto.

Quia hoc optimum longæ vitæ & sanitatis præsidium.

Nihil potentius & celerius œconomiae nostræ vitales motus turbare, atque pervertere, & funestos effectus producere potest, quam illud ipsum, quod in nobis perceptionum, impressionum, desideriorum causa ac fons est, cuiuscunque etiam nominis fuerit. Animadvertimus videlicet accuratiori facta meditatione omnium universi corporis partium mutuam & mirificam inter se esse connexionem atque harmoniam, ut sicuti in machinis fit, una parte læsa vel mutata, aliæ mox in societatem trahantur. Operationes sic dictæ immateriales, ut sunt impressiones, inclinationes, cupiditates, desideria, cum sanguinis & humorum circulo, & solidorum impulsu ac tono mirabile habent commercium, mutuamque harmoniam. Quid enim illustrius, quam pro varia dispositione motus sanguinis varie quoque disponi immateriales sic dictas animales actiones, unde temperamentum sequuntur & mores, & inclinationes atque affectus animi. Quid luculentius est, quam quod ad varia desideria & firmiores impressiones adeo corporis motus turbentur, ut mors vel etiam funestus morbus à sola perversa & minus rationali impressione ortum suum subinde traxerit? Sique libere fatendum, quod res est, plures hominum ægrotant & pereunt magis animi quam corporis morbis. Id quod solertiores practicum convenienti facto examine circa originem morborum indies experiuntur, ubi quam maxime, animi gravem morbum gravissimorum & longorum pathematum occasionem fuisse observatur. Inter morbos animi referimus terrorem, metum, diuturnum mœorem, animi angorem, odium, invidiam, iram, profundam & inquietam meditationem, ingens & flagrans circa aliquam rem desiderium, firmiorem de malo impressionem, excessivum gaudium, hisce si animus laborat, corpus sanum esse nequit, unde jam recte intelligitur scitum

JUVENALIS dictum:

Optandum ut sit mens sano in corpore sano.

Mirabile certe est, quomodo ad solam firmiorem animi in ira commotionem protinus pulsus fiat citatior, respiratio auctior & sanguis cum magno impetu per caput & reliqua viscera feratur, ut graves exinde morbi, Inflammationes, Sanguinis nimia profluvia, Apoplexiæ, Epilepsiæ, Febres quoque acutæ inde propullulent. Mirabile quoque est à gravi & subito terrore protinus à corporis ambitu ad interiora recurrere sanguinem, ubi in pectore non raro syncopen, anxietatem, cordis palpitationem, & spiritus angustiam: in cerebro vero epilepsiam & convulsiones excitat. Sæpius vidimus à terrore simul & semel mensui fluxum substituisse. Corpora à diuturna tristitia mirum debilitari & vires ventriculi & intestinorum tonicas inde labefactari, ut appetitus & digestio omnis concidat, & alvi liberalior fluxus fiat, neque minus ad veteres & longos morbos viscera inde disponi, quotidiana pro dolor! loquitur experientia.

§. VII. Quum vero oppositorum opposita sit ratio, itaque nil dubii est, quin sicuti immoderatus animi motus regulares in corpore motiones turbat: ita pacata, tranquilla, hilari & ab omnibus vehementibus desideriis vacua mens statum corporis reddat pacatum atque

tranquillum. Mentis enim sanitas corporis parit sanitatem. Illam vero acquirere, ardui omnino laboris est. Complures frustra remedia, quæ mentis morbis medentur, quæsi verunt. Verumtamen hæc ipsa, quæ menti tranquillitatem restituant, partim ex illis, quæ corpus nostrum, partim quæ animum proxime afficiunt, petenda esse arbitror. Illius generis sunt, suavior conversatio cum hominibus jocosis, lusus, vinum, musica, equitatio, venatio, usus aëris rustici, peregrinatio. Præter hæc etiam sanitatem menti reddunt verum rerum, quæ sunt & eveniunt, secundum rectæ rationis trutinam examen, item saluberrima Christi, & Apostolorum nec non saniorum philosophorum præcepta moralia, studium veritatis ac virtutum, & jucundarum ac salutarium rerum inventio, denique familiaritas cum prudentibus, & maxime omnium seria auxilii divini efflagitatio. Hac enim methodo & via, sapientia, humilitas, patientia, *ἀντάρετα*, quæ magna morborum animi præsidia sunt, comparantur. Nullum itaque dubium est, quin veritatis atque virtutis studium ad longævitatē perducatur, quare non sine ratione liber Macrobius pag. 857. *longævis annumerat philosophos, & omnes, qui eruditione & ingenio præstantes fuerunt. Ita etiam PLUTARCHUS narrat, plures corpore alioquin parum firmo philosophiæ præceptis vitam longam assecutos.* Neque dubium, quin vera pietas atque obedientia faciat id confirmante codice longævitatē promittat, eo quod & sævis in undis tranquillam mentem præstat. Regum sapientissimus Prov. c. XIV. v. 15. item c. XVII. v. 26. *hilarem animum vitam quotidianam jucundam appellat.* Notabile est, quod SANCTORIUS Medicus staticus incomparabilis, semper post hilaritatem majorem perspirationem & decrementum corporis ratione ponderis observaverit. Idem præstantissimus Auctor Sect. 11. Aph. 49. scribit, nihil magis reddit liberam perspirationem, quam animi consolatio. Ante omnia vero mens hilari utilis est, si quis cubitum eat, sique cibum sumat, ubi perpetuo perturbatus à sævis affectibus animus corpori est nocentissimus.

§. VIII. Legem jam quartam statuere placeat. Quæ est: *Aërem purum & temperatissimum vehementer ama, quia ad corporis & animi vigorem multum confert.* Nihil profecto, si ab animi motu discesserimus, ad sanitatem & vitam ac valetudinem præ speram tuendam plus confert, quam superius illud pabulum ac elementum commune, quo omnia animantia continuo opus habent. Quo ipso intelligo aëris & ætheris catholicum illud fluidum, quod Veteres spiritum appellaverunt, cujus secundum HIPPOCRATEM lib. de flat. §. 6. *Tanta est necessitas, ut si omnibus aliis abstineat homo, neque cibum sumat, neque potum, possit tamen dies tres vel plures vivere: si vero spiritus viæ in corpus intercipientur, brevi tempore illi esse pereundum.* Hic certe aër, eodem auctore HIPPOCRATE lib. cit. motum & sensum corpori administrat, & mortalibus vitæ & ægrotis morborum solus est auctor. Nolumus jam prolixiores esse, in usu, atque virtute aëris ad vitæ & sanitatis tutelam enucleando, certum tamen illud est, aërem esse præcipuum & princeps corporis nostri, quoad solidas & fluidas partes, movens, quod partim vivo suo elatere, partim etiam gravitate ac penetrantia, machinularum motricium elaterem & tonum, neque minus fluidorum intestinam agitationem conservet, systolenque ac diastolen vasorum

Mentis sanitas corporis parit sanitatem. Ex quibus petenda remedia, quæ mentis morbis medentur. Remedia numerantur.

Tam religiosa quam civilia.

Macrobius ac Plutarchi de longævitate assecutis.

Salomon hilarem animum vitam quotidianam appellat.

Sanctorii de hisce terminis.

Lex quarta de Aëre.

Quanta sit necessitas Aëris & Aetheris secundum Hippocratem.

Mortalibus vitæ & ægrotis morborum solus est auctor.

Pro varia dispositione motus sanguinis varie quoque disponuntur immateriales sic dictæ animales actiones.

Plures hominum ægrotant & pereunt magis animi quam corporis morbis.

Inter animi morbos referuntur terror, mœor, &c.

Scitum Juvenalis dictum.

Scitum Juvenalis dictum.

rum reciprocam, qua vitales potissimum motus sustinentur, in convenienti servat æquilibrium. Hoc nomine vero aer temperatus & purus commendandus est; per temperatum vero intelligimus eum, qui nec excessive frigidus, nec iusto calidior aut humidior est, qui non nimis rarefactus aut levis, neque nimis compressus vel gravis est, qui non vehementer commovetur, sicut fit in ventis; neque nimis quiescit aut immobilis est, ut fit in conclusis & demissioribus locis. Purus porro aer est, qui serenus, expansus, è quo vapores copiosi humidi, vel etiam falsæ, acres, sulphureæque partes præcipitatæ fuerunt. Talis certe genuinum spirituum corporis nostri, sive potius virium motricium pabulum ac fomentum est. Selige igitur ad salubritatem optatissimum aërem ruralem, liberum, in editioribus locis, quæ orientalis saluberrimus ventus perflare possit; Selige aërem post pluvias & post solis ortum, qui purus & defœcatissimus est: frui aëre potissimum verno, majali: Et cum autumno mensis September, æstate Augustus, hyeme Februarius, vere Majus reliquos facile salubritate superent, hinc præstat maxime iis mensibus peregrinationes instituere vel in libero aëre versari. Maxime omnium vero purum & serenum aërem commendamus in iis locis, ubi somnum capimus. Nihil enim insalubrius est, quam cubiculum expositum esse aëri vappido, effœto, humido, gravi, immobiliori, qualis est in locis humilioribus, subterraneis & terræ vicinis, circa aquarum stagna & paludes; Talis modi quippe aer vim, robur, tonum, & elaterem corporis nostri valde minuit, ad catarrhales defluxiones, corruptum habitum corporis, languorem, febres catarrhales, putridos morbos, ad hydropem quoque & scorbutum viam sternit paratissimam. Devita quoque, qua potest fieri solertia, immodicum calorem, qualis est circa solstitium æstivum, sub climate calidiori, & sole meridiano, vento flante ab austro, hic enim non modo vires solidis, sed & sanguini blandum ac tenuem humorem, quo gaudet, maxime corpus, sufflatur. Fuge quoque aërem perfrigidum, qualis regnat hyeme sub flatibus borealibus, & qualis ordinario est noctis tempore, utpote, qui liberam perspirationem inutilium impedit, humores tenues incrassat, & angustas vias confringit. Defendendi à frigore præcipue sunt pedes & ventriculi regio. Fuge quoque præhumidum aërem, qualis est tempore Autumnali, nubilo & pluvioso coelo, vento regnante zephyro & australi. Hic valde fibrarum tonum relaxat; perspirationem retardat, & hinc ad ægritudines, quæ ex impuritatibus & humorum stagnatione nascuntur, admodum disponit. Quam maxime vero evitabis subitas aëris mutationes, quæ fiunt, quando concedimus è loco nimis calido in locum valde frigidum, & contra, vel ubi corpora exponimus mutationibus tempestatum subitis, quæ à contrariis se insequentibus ventis plerumque proveniunt; Tam subita enim aëris mutatio hujus est indolis, ut mire fibrarum elaterem destruat, unde inæquabilis sanguinis & humorum progressio minusque expedita eorum quæ excerni debent ejectio subsequitur. Hyeme nos Germani summopere peccamus, dum vel in æstuariis nostris corpora valde torrentur, vel sub dio aëre frigido & gelu torquentur; cum tamen ab utroque enixe cavendum sit. Certe.

Frid. Hoffmanni Oper. Tom. V.

tissime sanitas ad extremam senectutem inconcussa duraret, si cæteris paribus aëre per quatuor anni tempora, puro, moderato & temperato semper frui liceret.

§. IX. Progressum jam facimus ad Legem quintam, quæ ita se habet: *Quam maxime selige alimenta corpori nostro congrua, & quæ facilius solvuntur & corpus transeunt.* Vita nostra sive integritas machinæ nostræ corruptibilis continuis ingestionibus & egestionibus reciprocis maxime omnium continetur & conservatur. Opus enim homo habet quo vivat & sanus sit, ut multa quotidie in corpus ingerat, multa quoque egerat. Parum enim est, quod intra canales corporis nostri remanet, præsertim in corporibus jam factis adultioribus, id quod exacta ponderatione cognoscitur. Ex quo facile apparet, cum ingesta foras excerni rursus debeant, ea alimenta saluberrima esse, quæ partium sunt tenuiorum, adeoque & facilius solvuntur, & emunctoria corporis celeriter transeunt. Ex ficioribus itaque alimentis sunt maxime huic scopo idonea carnes leviores juniorum animalium, spongiosæ, ut bovina Friscæ & Anglicæ, quæ Polonicas & Russicas levitate & tenuitate longe superant. Omne ferum quoque animal levius est domestico, levior piscis qui inter saxa & arenam, quam qui in limo & in stagnis vel lacubus degit. Frumentum, quod crescit in collibus, salubrius est, quam campestre. Volucres, qui in aëre vivunt salubriores sunt palustribus, ut sunt anseres, anates: panis bene fermentatus levior & mitior est pane crasso, denso, non fermentato & ponderoso, qui diu morari solet in ventriculo. Optimæ sunt carnes hœdinæ castratæ, vitulorum lactantium, pullorum, perdicum, phasianorum, avicularum parvarum montanarum. Optima sunt juscula carniū, quæ valde temperata & gelatinosa, & olera bene cocta, utpote quæ succum fovēt leviolem & facile transeuntem, qui minus oneri est naturæ. Quam maxime vero effuge carnes duras compactas, annosiores, induratas, infumatas; pisces marinos, asellos & qui sunt durioris carnis, conchas, cochleas, caseum, lacticia, ova dura, leguminosa, nimis pingua, pastilia, & quæ in sartagine fringuntur. Abstine quoque à placentis, quæ ex farina, butyro, ovis, saccharo non satis subactis fiunt: cavendum quoque à nimis dulcibus, fabis, lentibus, milio, & quæcunque crassos & difficilis solutionis succos vel compactam texturam obtinent, difficilior quoque per corporis minimos tubulos feruntur, adeoque excretionibus resistunt. In genere vero notandum, panem fœcalinum similagineo longe esse præferendum, siquidem ille fovet partes magis naturæ & præsertim ventriculo amicas, sulphureas, acidulas: similagineus vero propter lentorem magis obstruit, & ob id ad chronicas passiones viam aperit. Placet hic inferere pulchrum locum, qui extat apud SIMON. PAULI in *Quadrip. Botanico* pag. 283. In quotidiana victus ratione, qui similagineo pane vescuntur, nec corpus laboribus validoquo opere aliquo exercent, parum sibi consulunt. Nam cum palato morem gerunt, in varios morbos incurrunt. Confestim enim illis jecur & lien obstruitur, nephriticis, arthriticisque doloribus corripuntur, atque hæc est ratio, cur magnates & ditiores calculi & podagræ doloribus assidue vivant obnoxii. Nocet vero admodum panis qui à fornace adhuc calet, qua de re elegantem quoque habet observationem item laudatus

Lex quinta. Seligenda alimenta corpori nostro congrua, & quæ facilius solvuntur & corpus transeunt. Vita nostra sive integritas machinæ nostræ corruptibilis continuis ingestionibus & egestionibus reciprocis maxime omnium continetur & conservatur. Opus enim homo habet quo vivat & sanus sit, ut multa quotidie in corpus ingerat, multa quoque egerat. Parum enim est, quod intra canales corporis nostri remanet, præsertim in corporibus jam factis adultioribus, id quod exacta ponderatione cognoscitur. Ex quo facile apparet, cum ingesta foras excerni rursus debeant, ea alimenta saluberrima esse, quæ partium sunt tenuiorum, adeoque & facilius solvuntur, & emunctoria corporis celeriter transeunt. Ex ficioribus itaque alimentis sunt maxime huic scopo idonea carnes leviores juniorum animalium, spongiosæ, ut bovina Friscæ & Anglicæ, quæ Polonicas & Russicas levitate & tenuitate longe superant. Omne ferum quoque animal levius est domestico, levior piscis qui inter saxa & arenam, quam qui in limo & in stagnis vel lacubus degit. Frumentum, quod crescit in collibus, salubrius est, quam campestre. Volucres, qui in aëre vivunt salubriores sunt palustribus, ut sunt anseres, anates: panis bene fermentatus levior & mitior est pane crasso, denso, non fermentato & ponderoso, qui diu morari solet in ventriculo. Optimæ sunt carnes hœdinæ castratæ, vitulorum lactantium, pullorum, perdicum, phasianorum, avicularum parvarum montanarum. Optima sunt juscula carniū, quæ valde temperata & gelatinosa, & olera bene cocta, utpote quæ succum fovēt leviolem & facile transeuntem, qui minus oneri est naturæ. Quam maxime vero effuge carnes duras compactas, annosiores, induratas, infumatas; pisces marinos, asellos & qui sunt durioris carnis, conchas, cochleas, caseum, lacticia, ova dura, leguminosa, nimis pingua, pastilia, & quæ in sartagine fringuntur. Abstine quoque à placentis, quæ ex farina, butyro, ovis, saccharo non satis subactis fiunt: cavendum quoque à nimis dulcibus, fabis, lentibus, milio, & quæcunque crassos & difficilis solutionis succos vel compactam texturam obtinent, difficilior quoque per corporis minimos tubulos feruntur, adeoque excretionibus resistunt. In genere vero notandum, panem fœcalinum similagineo longe esse præferendum, siquidem ille fovet partes magis naturæ & præsertim ventriculo amicas, sulphureas, acidulas: similagineus vero propter lentorem magis obstruit, & ob id ad chronicas passiones viam aperit. Placet hic inferere pulchrum locum, qui extat apud SIMON. PAULI in *Quadrip. Botanico* pag. 283. In quotidiana victus ratione, qui similagineo pane vescuntur, nec corpus laboribus validoquo opere aliquo exercent, parum sibi consulunt. Nam cum palato morem gerunt, in varios morbos incurrunt. Confestim enim illis jecur & lien obstruitur, nephriticis, arthriticisque doloribus corripuntur, atque hæc est ratio, cur magnates & ditiores calculi & podagræ doloribus assidue vivant obnoxii. Nocet vero admodum panis qui à fornace adhuc calet, qua de re elegantem quoque habet observationem item laudatus

adhuc ca-
lens.
Exem-
plum.

Auctor. *Fœmina, inquit, imminentibus mensibus devoravit unum vel alterum similagineum panem calidum, ex furno extractum: vix horæ spatio intermisso lipothymia corripiebatur, post dyspnœa & tandem intra octiduum orthopnœa ipsam jugulavit.* Caro suilla saluberrima est iis, qui valde laborant & exercent corpus, infirmioribus vero & minus exercitatis nocet, propter glutinosum, quo abundat, succum, qui facile apponitur, & in forte nutrimentum cedit, hinc nihil omnino emunctoriorum tubulos tam promte obstruit, ac frequens carnis suillæ usus. His vero obstructis magnæ impuritates lymphæ & defœdationes atque exulcerationes cutis succedunt. Ab esu hujus carnis semper transpirationem seigniorum & gravitatem corporis SANCTORIUS l.c. perquam curiose observavit. Summopere vero alimenta valde acida lædunt, eo quod coagulum fluidis facile inferant, & ob id difficulter per corporis officinas ejusque colatoria transeant. Idem tenendum est de nimis dulcibus, saccharatis, mellitis, nimia copia ingestis, quæ ob insignem quo constant lentorem obstructionibus viscerum gignendis aptissima sunt.

Quibus ca-
ro suilla est
saluberrima;
& quibus
nocet.

Sanctorii
de his ob-
servatio.

Potulentorum
quoque ratio
habenda.

Laudem
merentur
vina temperata.

Mosellana,
Rhenana.

Hungarica.

Qualis sit
character
vini boni.

Quæ cerevisia
est
probatissima.

Quæ cerevisia
Saxon.
inter maxime
celebres probantur.
Procul absint
vina crassa &c.

Hæc etiam
circa cerevisias
sunt tenenda.
Potus omnium
saluberrimus
est aqua dulcis.

§. X. Proximum jam est, ut potulentorum etiam habeamus rationem, & quænam salubriora præ cæteris sint, perspiciamus. Valet quoque hic regula, quam supra tradidimus; videlicet ea, quæ facilius digestionum officinas, corporis meatus & emunctoria transeunt, pro saluberrimis æstimanda esse. Eo nomine hinc laudem merentur vina temperata, subtilia, tartareo vel nitroso sale fœta, ut sunt Mosellana, quæ citius per alvum feruntur, & ad vesicam descendunt. Laudem quoque merentur Rhenana melioris notæ, & annosiora, quæ præter virtutem eximiam roborantem & transpirationem & urinam movent. Multum quoque elogii promerentur nobiliora Hungarica, quæ acidi parum habent, & spiritum cerebro & nervis amicum in sinu foveant, atque per transpirationem egregie promovent; unde hæc vina maxime sunt diaphoretica. Character enim vini boni est, si neque ventriculum, neque caput neque pedes offendit, sed facilius transit per emunctoria. Ex cerevisiarum genere probatissima sunt, quæ cito etiam per urinarias vias feruntur, neque gravant caput, neque languorem relinquunt in membris, neque flatulentias in hypochondriis pariunt; Tales sunt præsertim tenaces, subtili acore notatæ, minus lupulo conditæ, & quæ ex subtili & pura aqua decoquuntur. Nobis inter maxime celebres probantur cerevisiæ Hammenfis, Mindensis, Falkenhagensis, Moscoviensis, Lusatia, & quæ instar omnium est, nostra Lœbeginensis, inter diureticas facile princeps. Procul absint omnia vina crassa recentia, non satis digesta, acida, sulphure vaporoso & fuliginoso plena, potentia, vel fortiter adstringentia, quorum certe parcius, nisi sanitatis periculum subire velimus, debet esse usus: Quæ singula etiam circa cerevisias nimis crassas viscidas, sulphuris vaporosi feraces tenenda sunt. Omnium vero saluberrimus potus merito aqua dulcis æstimari debet, modo bona, subtilis, levis & pura fuerit. Hæc ad digestionem & alimentorum solutionem aptissima, hæc minimos corporis meatus quam expeditissime subit, unde ad interiores partium poros nutritium succum advehit: hæc quoque evehendis è corpore excrementitiis partibus quam maxime idonea est. Observatione con-

stat accuratiori; aquæ potum omnes sensus acutiores reddere, unde gustus & odoratus, in iis, qui aquam ordinarie bibunt, excellens est. Deinde aquæ potus dentes firmiores & candidiores, sanasque gingivas conservat. Tum qui aquam bibunt eximio etiam gaudent appetitu & membrorum vigore; pinguioribus etiam sunt, & diutius secundum FALLOPIUM lib. de sanitate tuenda vivunt. Notavimus in praxi, commutato cerevisiæ cum aqua potu insigne robur ventriculo redditum fuisse, & consuetas catarrhales defluxiones, lippitudines & arthriticas passiones cessasse. Satis recte sentit de hac re CELSUS, quem ego vehementer auctorem probo lib. I. cap. 5. pag. 38. *Neque his solis, quos capitis imbecillitas torquet, usus aquæ frigida prodest, sed iis etiam, quos assidue lippitudines, gravedines, destillationes, tonsillæque male habent.* Quorum vero ventriculus aquam crudam minus ferre potest, illis cum pane tosto decoquenda, aut destillanda est, vel portio vini admiscenda. Nocet vero maxime omnium frequens aquarum vitæ vel vini adusti usus, quod partes solidas inflammando, obstruendo, fluidas vero coagulando ad chronicas & acutas passiones viam sternit paratissimam. Sunt spiritus vini potiores plerumque vitæ brevioris, & inflammationibus vel etiam hectico & hydropico morbo facile pereunt. Perquam curiosa est in œconomiis observatio, quod ex porcorum intestinis, qui reliquiis ex fermentatione vini adusti saginantur, propter teneram & facile dilacerabilem texturam non possint sarcimina confici. Ultimo loco tenendum est, quod, quæ exposuimus, alimenta salubriora languidis, infirmis, ægotantibus maxime commendanda sint, cum alias non negandum sit, robustiora & exercitata corpora etiam duriora insalubritatis titulo notata, sæpe sine læsione ferre posse.

Potus aqua
omnes sensus
acutiores reddit.

Aqua potior
res diutius
vivunt.

Quibus
præsertim
conducit.

Nocet frequens
vini adusti
usus.

Spiritus
vini potiores
sunt plerumque
brevioris
vitæ.

§. XI. Sequitur jam ordine lex sexta, *Mensuram semper querere inter alimenta & inter motum ac robur corporis.* Vivimus tamdiu, quamdiu sanguis & fluida per canales corporis feruntur, valemus quando motus ille liber atque æquabilis secundum ordinem & regulas actiones animæ & corporis dispensat. Eget vero vitalis hic motus perpetuo nutrimento, quod tam ab alimentis solidis & fluidis, quam ab ipso aëre subministratur, desiderat vero, ut ea quæ immixta fuerunt, maxima ex parte rursus ejiciantur. Unde fluit perpetuam debere esse & observari, si sanum debeat persistere corpus, inter ingesta & egesta, proportionem; qua læsa, si nempe plus ingeritur, quam ejicitur, præsto materia ad morbos est, utpote ex excretionibus, earumque conditione modo ac quantitate recta sanitatis nota ac ratio ducitur. Si enim multum remaneat excrementitii humoris, languor & gravitas occupat membra, elanguescit vis vitalis, appetitus & ventriculi robur emoritur, somnus fit gravis & paratur sic via ad morbos. Jam vero quæstio emergit, quænam præcipue ad necessarias illas egestionem proficiant, easque adjuvent; Non vero excellentius ex naturalibus rebus datur auxilium ipso motu, labore, & exercitatione corporis; utpote motus ejus est naturæ, ut stringendo solidorum fibras promptissimum fluidorum cursum per omnis generis tubulos efficiat, quo fit, ut motus intestinalis calidus humorum crescat, viscidum dissolvatur, humidum diffletur, & perspiratio, quæ omnes succos corporis purgat & depurat, liberior fiat. Animadvertimus hinc,

Lex Sexta.
Mensura
inter alimenta
& inter motum
corporis querenda.

Quod caret
alternis
motu durabile
non est.
Et vice versa.

Quod caret
alternis re-
quie durabile
non est.
Natura
motus.

hinc, vehementiori motu corporis sanguinem abundantem non secus ac pinguedinem consumi. Pinguefacta animantia & volucres motu & cursu macrescunt: Alaudæ, quod mirabile est, nocturnæ pinguiore semper sunt ipsis diurnis, propter quietem & aëris frigiditatem. Quibus perspectis sequitur, ut, qui multum alimentorum ingerit, ille multum etiam debeat exercere corpus, & qui parum se movet, otioque deditus est, is parum quoque debeat comedere. Sanitatis itaque præcipua pars est, proportionem inter alimenta & inter motum ac laborem corporis invenire. Sapienter itaque HIPPOCRATES cujus auctoritas semper nobis maxima est lib. I. de dieta scribit: Si inventa fuerit ciborum mensura & laborum ad unamquamque naturam, ita ut excessus neque supra neque infra modum fiat, inventa erit exacta hominibus sanitas. Nam (addit §. I.) Homo edens sanus esse non potest, nisi etiam laboret. Contrarias enim inter se vires habent cibi & labores, verum inter se mixti conferunt ad sanitatem. Labores enim ea, quæ insunt, consumere solent; Cibus autem & potus, ea quæ evacuata sunt, explere solent. Oportet autem mensuram ac proportionem cognoscere laborum ad multitudinem ciborum, & hominis naturam, & corporum staturas, ac ætates, & ad tempora anni, & ad mutationes ventorum &c. Cum vero ordinario ingestioni copiosiori non respondeant corporis labores & exercitationes, hinc fit, ut multæ cruditates in ventriculo & intestinis generentur, sanguis in venis nimium increseat, & halituosum ac subtile cutis excrementum remaneat. Inde foecundo proventu morborum semina prodeunt. Quo casu nihil consultius est, quam ut motum augeamus & subtrahamus quodammodo alimenta, sive per diem abstinendo, sive parum in coena assumendo. Recte enim HIPPOCRATES: Non repleti cibis & impigrum esse ad laborem, sanum efficit corpus. Comparata vero sunt ad motum, ambulatio, vectio, gestatio, equitatio, navigatio, ludus, corporisque labor. Instituitur autem motus in puro, temperato, libero, & rurali aëre, in aurora, post solis ortum, ante cibum, nunquam statim post eum. Talis certe motio cum universo corpori, tum animo quoque dabit vigorem. In quiescentibus vice motus fungatur clara lectio, seu vociferatio, quam CELSUS & Veterum sapientiores mirifice ad sanitatem commendant, utpote qua sanguinis cursus & transpiratio cum totius corporis incalescentia egregie promovetur. De huius utilitate legi meretur AETIUS libro III. pag. 95. Vicem quoque motus obeant frictiones in Veterum monumentis commendatissimæ. Instituantur vero in dorso, pedibus, hypochondriis, & fiant in lecto, calido mollique linteo, mane post somnum, hæ enim egregie humidum iners discutiunt, poros aperiunt, transpirationem juvant, bonumque succum, quod in equis videmus, ad carnes nutriendas adducunt. Ulterius circa motum tenendum est, ut ille fiat successive, neque in minus adsuæ statim fortiter. Infirmitates quoque & modicas exercitationes subeant, & ab immodicis sibi caveant. Prodest motus maxime iis corporibus, quæ spongiosi habitus sunt, exilioraque vasa habent, inque iis multum sanguinis collecti sovent. Post nimium vero exercitium, nunquam statim cibum sumere oportet, sed post semihoram sedata prius corporisurbatione edere præstat. Ex quibus omnibus apparet, quam præstans & simplex

medicina corporis sit ipse motus veluti saluber-
 rimum magnorum morborum præsidium, unde scite scribit SANCTORIUS l. c. Si homines tem-
 pore debito exercitio ac labore uterentur, care-
 re possent multis medicis & medicamentis. Et GA-
 LENUS Comment. 40. §. III. Exercitatio supplet
 vicem purgationis humorum, qui sunt in profun-
 do corporis. Et §. III. Comment. 50. Exercitia
 collecta singulis diebus superfluitates expurgant.
 Unde exercitio corpora leviora sunt, ut habet monia.
 SANCTORIUS in Medicina Statica.
 §. XII. Ultima jam lex esto. Fuge Medicos &
 medicamenta, si vis esse salvus. Olim MONTANUS,
 nobilissimus Italarum Medicus, cum inveterato
 morbo affectis, tum infirmis æque ac valenti-
 bus hanc regulam in consultationibus suis miri-
 fice commendabat. Ad huius imitationem soler-
 tissimi Helvetorum practici WEPFERUS & BRUN-
 NERUS consiliis suis perpetuo fere istud adjiciunt:
 Fuge Medicos & medicinam. Valet hoc dictum
 maxime de Medicis imperitioribus, temerariis,
 qui non victu curare volunt, sed valentioribus
 adversus morbos omnis generis pugnant, eosque
 multis remediis præcavere tentant. Neque vero
 Medici docti, periti & prudentes hunc censum
 subeunt, quorum conversatio & familiaritas nun-
 quam non omnibus utilis & fructuosa est. Si-
 mili modo per medicinam intelligi debent me-
 dicamenta sive pharmaca, quæ secundum HIP-
 POCRATEM lib. de locis in homine c. 55. præsentem
 statum corporis transmovent, vel naturæ motus
 & succos valde alterant: Huius generis maxime
 sunt validiora evacuantia, aliaque commoven-
 tia. Quorum usus rarus & cautissimus esse de-
 bet: secus ac plures, qui perversa persuasione
 laborant, medicamentorum usum morbos &
 mortem unice præcavere, ideoque ea frequen-
 tius esse usurpanda existimant. Res vero longe
 aliter sese habet. Admoneo enim, obtestor, &
 repeto, corporis naturam integram valentem &
 robustam rectius victu & exquisito vitæ regi-
 mine, quam medicamentis servari & à mor-
 bis defendi. Unde etiam sapientissimi Veterum
 præservationis causa rarius utebantur pharma-
 cis, præsertim validioribus, sed victum conve-
 nientem potius commendabant. ASCLEPIADES te-
 ste CELSO in præfatione Lib. V. pag. 241. usum
 medicamentorum ex magna parte sustulit, quia
 omnia fere stomachum ledunt & mali succi sunt:
 Potius vero ad victus rationem omnem curam tran-
 sulit. Cui consentit CELSUS qui scribit optima me-
 dicina est non uti medicina: seu uti WEPFERUS di-
 cere solitus est, nullum medicamentum optimum.
 Et HIPPOCRATES Sect. II. aph. 37. qui secunda fru-
 untur sanitate, hos purgare grave est. Item S. II.
 Aph. 37. Qui sunt sano corpore, dum Pharmacia
 purgantur, celeriter exsolvantur. Et optime GA-
 LENUS in Comment. §. 15. lib. III. frequenter me-
 dicamentis uti non convenit, tum quia corpus
 in pravam consuetudinem adducitur, tum quia
 nocet plurimum. Si victus rationem mutaveris, plu-
 rimum proderit illi, qui tam sæpe evacuare velit, &
 evacuatio eorum, quæ quotidie generantur, mi-
 nor est, quam ut requiratur medicamentum pur-
 gans. Abstinentium itaque est, à crebro purgan-
 tium præsertim validiorum usu, quæ nulli sub-
 jecto, nulli morbo, nullique ætati congrua
 sunt, infirmum corpus magis infirmant, sa-
 num vero & robustum labefaciunt, inque pri-
 mis ventriculi & intestinorum tonum ac robur
 exsolvant. Huic sententiæ omnes circumspectiores
 Medici suffragium adjicere debent. Placet in-
 ter plurimos citare PLEMPPIUM, lib. de valetudi-
 ne

Magnorum morborum est præsidium.

Sanctorii Galenique de his testi-

Lex ultima,

Fuge medicos & medicamenta.

Secundum Montanum Wepferi & Brunneri consilia.

De quibus medicis hoc dictum valet. Et de quibus medicamentis.

De validioribus nimirum evacuantibus.

Corporis natura integra rectius ex-quisito vitæ regimine quam medicamentis servatur. Asclepiades des medicamentorum usum ex magna parte sustulit &c. Cui consentiunt Celsus, Wepferus, Hippocrates.

A crebro Catharticorum usu abstinentium.

Quod suffragatur à Plempio,

ne tuenda, pag. 325. qui ita scribit, vomitum & alvi subductiones, quæ pharmacis fiunt, ut mala solatia repletionis, nisi gravis exigat necessitas, non oportet experiri, quod tamen vulgus hominum facit, qui ipsum corpus explet, ut possit evacuare, & rursus evacuat, ut possit explere. Optime JOHAN. CRATO in Consilio 25. Qui rectam victus rationem tenere nequeunt, is optimam medicinam præscribere supervacaneum est, nam omnia prius ad valetudinem rectam consequendam tentanda sunt, quam corpus medicamenti laboriose commovendum. Equidem Veteres ad sanitatem integram servandam & morbos à corpore arcendos vernaes & autumnales curas, quæ in venæ sectione, & evacuationibus per tempus continuatis consistebant, plurimum laudare solent. Neque talismodi curæ de nihilo sunt, attamen & illis penitus superfedere possemus, modo abstinencia, corporisque motu ac labore uti vellemus, quæ superfluos corporis succos longe tutius consumunt, atque in vigore sanitatem conservant, quam prædictæ sanguinis & humorum evacuationes. Nostra sententia circa hanc rem hæc est, plures hominum ob cruditates neque minus superfluos in venis succos, (quæ vitia ex intermissione motus & ciborum intemperantia quam maxime homines sibi contrahunt,) multa in mala incidere, secundamque valetudinem amittere: quorum præsidium optimum esset abstinencia & motus. Quod si vero saluberrimis diæticis præceptis sese submittere nolunt, tunc denique, ubi definit victus, ibi incipit medicina, & tunc venæ sectiones, & lenes per epicrisin factæ

Et à Joh.
Cratone.

Evacu-
ationibus
penitus su-
perfedere
possumus.

Optimum
in morbis
præsidium
est absti-
nencia.

evacuaciones, valde proficient. Neque ad harum usum fiderum aspectus consulere, aut certos dies eligere oportet, sed quando necessitas urget, & æquabilis aeris & cœli status apparet, opportunissimæ sunt. Neque adeo omnia medicamenta præservationis causa adhibita rejicere animus est, sed repudiamus saltim validiora, nimiumque motus alterantia, laudamus vero maximopere ea, quæ naturæ sunt amica, quæ corporis vires roborant, & liberam transpirationem, utilissimasque evacuationes adjuvant, quo nomine salis volatilis oleosi, vel Balsami nostri vitæ, aut essentia stomachicæ, in ditioribus ambratæ usum, suademus. Item laudamus frequentem infusorum Mellissæ, Veronicæ, corticis Sassafras aut aliorum simplicium ex aqua pura & simplici usum. Hæc enim remedia ejus sunt naturæ & indolis, ut neglectam corporis motum compensent. Usui quoque esse possunt cancerorum lapides, si intemperantia acidorum succorum intra primas vias observetur. Usui quoque possunt esse pilulæ balsamicæ ex extractis amaricantibus & balsamicis temperatis gummatibus paratæ, has valde refracta dosis Aloë ingrediatur, laudatissimæ, quæ præeunte BECHERO, HERMANNO ac Cl. STAHLIO, præparantur, & passim cum fructu usurpantur, quibus, præsentem in primis viis cruditate, vel coacervata ibi viscidorum humorum saburra, cum fructu vel singulis mensibus, vel si necessitas urget, crebrius utendum est. Pauca certe sunt, eaque selecta & tuta, ex remediorum generibus, quibus ad tutelam vitæ & sanitatis uti necessarium est.

VSnes &
lenes eva-
cuaciones
proficiunt
quando ne-
cessitas ur-
get.

Præserva-
tionis cau-
sa Salis Vo-
latilis oleo-
si &c. usum
suademus.

Ut & in-
fusa. Me-
liss. Vero-
nic. cort.
Sassafras
ex aqua
simplici.

Usui quo-
que esse pos-
sunt oculi
canceri, pil.
Balsamica
&c.

PEREGRINATIONIBUS INSTITUENDIS SANITATIS CAUSA.

PROOEMIUM.

Sanitas
multum
dependet à
causis ex-
ternis.

PRÆSTANTISSIMUM illum mortalium thesaurum, puta sanitatem, à causis externis, quæ non semper sunt in potestate nostra, maximam partem pendere, innumeraque esse, quæ ipsam vitare ac labefactare possunt, nemo, nisi qui plane ignarus est rerum physicarum, in dubium vocabit. Ipse animus hominis, tametsi omnis materiæ expers sit, attamen tanta vi pollet, ut celerrime æconomiam corporis pervertat & sanguinis circum, à quo vita ducitur, male conturbet, sicuti id ipsum luculenter testantur graviora animi pathemata. Non sufficit autem, in homine intus malorum & ægritudinum ipsius fontem quærere, sed extra ipsum ex rerum corporearum ordine tam numerosa reperiuntur, quæ periculum vitæ intendunt, ut cognoscere & rite ac sufficienter ea ipsa discernere, certe perdifficile artis ac scientiæ opus sit. Ex omnibus tamen nihil præsentius vitam ac valetudinem tuetur, & hanc quoque vitare ac destruere idoneum est, quam catholicum illud æthereo-æreum fluidum, sine cujus usura nullum ex animantibus vita perfrui potest, aer nempe. Nemo autem rectius hac intelligit, quam qui physica nobilissimum studium cum medicina conjunxit. Hic indies animadvertit, ad repentinas aeris pro diversa ventorum ac tempestatum natura mutationes, corpora præsentissime affici, illorumque nec non animi functiones immutari, adeo, ut sevisimi &

Æthereo-
æreum
fluidum
maxime
prodest ac
nocet.

Morbi epi-
demici ob
insueto &
vitato æ-

epidemici morbi ab insueto & vitato aere originem suam certissime petant. Sicuti id laudatissimo labore in nuperrime editis observationibus meteorologicis deducere annisum sum. At vero non morborum tantum aer existit causa, si à naturali & sibi debita temperatūra defleat: sed medicinam & remedium etiam præbet adversus graves morbos & ad tuendam valetudinem efficacissimum est, si purus, temperatus ac benignus fuerit. Et hæc jam fuit causa, cur Veterum sapientissimi Medici tantopere in gravissimis affectibus, ubi vix locum invenit alia medicina, & ad valetudinis integritatem conservandam, mutationem aeris & peregrinationes ex una terra in aliam commendaverint. Dolendum certe hodierno tempore est, quod fere plane in desuetudinem ille laudabilis sanitatem servandi ac recuperandi abierit mos, cum ex pharmacopoliis tantum remedia adversus morbos frustaneo certe sapissime successu petere solenne sit. Cum autem hanc rem paulo acrius & penitus sub rationis examen vocaverim, rem certe fore utilissimam judicavi, aeris mutationem & peregrinationem ceu magnum remedium non modo commendare, sed & clarissima Veterum auctoritate, experientia & rationum solidarum pondere illud firmare atque corroborare. Utpote sic futurum arbitror, ut longe commodius quis ex magno morbo convalescere possit, ac si pretiosa variorum remediorum genera summo sepius cum fastidio atque molestia in usum adhibeat.

re prov-
nunt.

Cur vete-
res agris
commen-
darent mu-
tationem
aeris & pe-
regrinatio-
nem.

C A P. I.

De Peregrinationibus Veterum sanitatis causa susceptis.

Migratio
in alia loca
morbos
auertit &
sanitatem
firmat.

exempla
e veterum
morum
monum
lata. Ci-
ronis.

I. **A**NTIQUISSIMUM consilium est, ad sanitatem firmandam & morbos auertendos, ipsa aëris mutatio inque alia loca migratio. Ita magnus noster HIPPOCRATES lib. IV. epidem. sect. 5. t. 19. in morbis longis solum mutare suadet. Quem locum intendit EROTIANUS, dum ait: *ἡν μεταταμείβειν ἢ ἡν πορεύεσθαι, ἀμείβειν γὰρ τὸ ἀλᾶσθαι ἢ μεταπορεύεσθαι.* Migratio interdum medicina & in morbis mutatio loci saepe salutifera. Ita etiam GALENUS libro de uteri cura, corpore languentibus peregrinationem & equitationem commendat. Et AVICENNA libr. I. tit. 4. p. 72. Ex generibus medicationum esse, scribit, mutationem de terra ad terram & de aëre ad aërem. SENECA de tranquill. animi c. 15. p. 541. prodidit: *Aliquando uelatio, iterque & mutata regio vigorem dant.* Eleganter STRABO lib. V. p. 238. scribit: *Quos senectus affligit, vel aduersa valetudo, Roma Neapolim secessum faciunt.* At vero, ut magis nostram firmemus sententiam, è re nostra fore ducimus, ut specialiora quædam exempla ex Veterum clarissimis monumentis adferamus, quibus liquido intelligi possit, ad corporis robur, & valetudinem aduersam abigendam, multum valere peregrinationes aërisque commutationes. Primum autem in medium proferam CICERONIS exemplum, qui libr. de claris orat. c. 16. de se ipso ita scribit: *Erat eo tempore in nobis summa gracilitas & infirmitas corporis, procerum & tenue collum; qui habitus & quæ figura non procul abesse putatur à vitæ periculo, si accedit labor, & laterum magna contentio. Eoque magis hoc eos, quibus eram charus, commovebat, quod omnia sine remissione, sine varietate, vi summa vocis & totius corporis contentione dicebam. Itaque cum me & amici & Medici hortarentur, ut causas agere desisterem, quodvis potius periculum mihi adendum, quam à sperata dicendi gloria discedendum putavi. Sed quum censerem remissione & moderatione vocis & commutato genere dicendi me & periculum vitare posse, & temperatius dicere, ut consuetudinem dicendi mutarem, ea causa in Asiam mihi proficiscendum fuit. Paucis interjectis dicit, se venisse Athenas, & per sex menses ibi mansisse; postmodum totam Asiam peragrasse, denique Rhodum venisse &c. Quod verò hac ipsâ migratione sanitati pristinae fuerit restitutus, innuit his verbis: *Ita recepi me biennio post non modo exercitior, sed prope mutatus. Nam & contentio nimia vocis reciderat, & quasi reserverat oratio, lateribusque vires & corporis mediocris habitus accesserat.* Idem ad Gallum lib. VII. epist. 26. scribit: *Cum decimum jam diem graviter ex intestinis laborarem, fugi in Tusculanum; sed visa est mihi vel loci mutatio, vel animi etiam relaxatio, vel ipsa fortasse jam senescentis morbi remissio profuisse.**

II. Ad hæmoptysin, & quæ ex ipsa nascitur, phthisin sanandam Veteres navigationem Roma in Ægyptum maiorem in modum commendabant. Spectat huc egregius PLINII locus I. V. epist. 19. qui de Zosimo liberto suo ad Paulinum ita scribit: *Ante aliquot annos, dum intente instanterque pronunciat, sanguinem reiecit, atque ob hoc in Ægyptum missus à me post longam peregrinationem confirmatus rediit nuper: deinde dum per continuos dies nimis imperat voci, veteris infirmitatis tussi-*

cula admonitus rursus sanguinem reddidit, qua ex causa destinavi eum mittere in prædia tua, quæ Foro Iulii possides. *Audiui enim te saepe referentem, esse ibi & aërem salubrem & lac huiusmodi curationibus accommodatissimum.* Qua de re plura elegantia congeffit Clarissimus CELLARIUS in antiquit. med. pag. 38. Neque omittendus est pulcher hanc in rem locus, qui exstat apud Hieron. MAGIUM miscell. 18. 38. & RHODIGINUM I. 18. c. 38. ex GALENI Therapeutices quarto adversus Thessalum & affectatores: *Si, inquit, medicamentum series numerosa cum diæta ratione nil prorsum ægritudinem allevavit, ἀποπέμψουσιν ἐς Λιβύην τὸν ἀνθρώπον.* i. e. in Lybiam hominem remittent. Ex classicis enim authoribus exploratius est, homines in Africa salubri esse corpore ac plerosque dissolvi magis senectute, quam morbo superari.

Ue & Hieronymi
Megii &
Rhodigini

III. De cætero non modo ad ægritudines propugnandas, sed & ad valetudinem confirmandam & præsertionem à multis incommodis mutationem cœli laudabant Veteres. Sic Treunerus ad Cluverum p. 172. meminit, Reges Persarum pro quatuor anni partibus sedes imperiales mutasse, idque ulterius demonstrat NEANDER in præf. ad Erotem. græc. lingu. p. 44. quando scribit: *Susa est civitas, ubi Reges Persarum hyeme ob mitiorem cœli plagam debebant, quod is regionum tractus tum salubris & temperatus, tum etiam inter paucos amœnissimus esset. In æstatis autem caloribus maximis Ecbatana petebant montosis sita locis ac algidis ac flatibus exposita frigidis. Autumnum vero omnem Persæ poli transmittabant; reliquum anni spatium Babylone morabantur.* Idem testatur ATHENÆUS I. XII. 2. additque: *Parthorum Reges ver traduxisse Rhagis, hyemem Babylone; in Hecatompylo quod ex anno superest, transgessisse.* De Parthis CURTIUS dicit I. V. c. 8. §. I. quod Ecbatana æstiva agentibus sedes sit, & FREINSHEMIUS in notis addit rationem: *quia Ecbatana aquiloni obversa per æstatem friget, cum in Asia vapor solis passim omnia accendat.*

Reges Persarum mutabant sedes imperiales sanitatis causa.

C A P. II.

Causas peregrinationis exponit.

I. **A**NTEQUAM in ulteriorem elegantissimæ huius materiæ tractationem descendamus, & loca salubria ab insalubribus probe distinguamus, & quibus ægritudinibus itinera conveniant, exponamus, operæ erit pretium, ut causas peregrinationis, & quare ipsæ valde proficiuæ sint afferamus. Conducunt autem peregrinationes maxime, quoniam animum diuturnis curis ac negotiis fessum ingenti voluptate demulcent, adeo, ut pacatus & tranquillus ipsi status reddatur. Quam autem potentiam animus habeat in corpus, & quantum faciat ad conservationem vitæ & sanitatis, autoritate & experientia Medicorum clarissima abunde exploratum est. Pulchre PLATO, optimus sapientiæ magister, in principio Charmidis gravissime scribit: *Fieri non potest, ut animo male affecto, non corpus etiam una laboret, & rursus animus bene affectus vi sua, quoad fieri potest, optimum reddat corpus.* Nam qualis animus est, talis spirituum motus, qualis spirituum motus, talis motus cordis & articularum, tonusque partium, & qualis partium tonus motusque cordis & articularum, talis circulatio, & qualis circulatio, talis est sanitas. At vero tranquillitas animus non modo sanum servat corpus, verum & sanationem morborum efficaciter promovet. Pulchre scribit

Quam ob causam peregrinationes sint instituentæ.

Convenientia animi cum corpore.

BARDUS

BARDUS in medico polit. p. 310. Cor latum benefacit medicinæ; tunc enim medicamentum proficit & juvat, dum alacri animo est, qui illud accipit. Item KUHNIIUS ad LAERTIUM p. 517. Cor sanans est cor latum & hilare.

Quo pacto
animo
tranquilli-
tas in iti-
neribus
compara-
tur.

II. Comparatur autem tranquillitas animi in itineribus, dum animus planè ab ordinariis occupationibus & objectis, quæ curas, quæ sollicitudines injungunt, avertitur & versatur & delectatur novis rebus, quas in itinere cum cupiditate perspicit. Cupidissimi enim omnes sumus novarum rerum, quas in peregrinis locis deprehendere licet. Huc accedit, quod conversatio cum hominibus doctis & peregrinis non parum momenti ad animi relaxationem afferat, quorsum etiam referri potest visitatio amicorum in conviviis. Menedemus philosophus apud LAERTIUM lib. II. segm. 133. dicitur φιλοπόδοχος ex eo, quod ad loci insalubritatem vel evitandam vel minuendam frequentius inter amicos hospitesque in conviviis exhilaraverit animum, cujus futura corpus quoque sustinetur. Ex hoc factum est, ut veteres Romani, item Byzantini inter summa deliciarum genera peregrinationes retulerint. Quid enim suavius atque jucundius vitæ mortalium contingere potest, quam si animus colloquiis, conversatione & convictu amicorum jucundissimo indies pascitur, & sensus suavissimis multis novisque rebus occupati sunt. Hoc pacto enim animus roboratur, erigitur, excitatur & hinc sanguinem & humores temperate movendo & spiritus exsuscitando nec morbi injurias admittit, vel si admiserit, citius ac celerius dispellit.

Veteres aë-
rem occul-
tum vitæ
pabulum
dixerunt.

III. Secunda causa, cur peregrinationes à Medicis etiam atque etiam suadendæ ac commendandæ sint, salubrior aëris est constitutio. Optima ratione Veteres aërem occultum vitæ pabulum dixerunt. Et VARRO animam definivit per aërem ore conceptum, tepefactum in pulmone, fervefactum in corde, diffusum in corpus, utpote revera aër anima animantium est, maximè, quoad principium materiale. Hinc etiam HIPPOCRATES de morbo sacro scribit: Aër sensum & motum membris præstat. Etenim spiritus sanguinis & tenuissimum illud nervorum fluidum, quod motum membris præstat & fluores vitales in nativa sua mixtura, fluiditate, spiritusascentia servat & incongruum ab ipsis secernit, maximam partem dependet ab aëre, qui subiens vasorum pneumonicorum poros, elasticis æthereis partibus suis in sanguinem admissis, rarefactivam spiritusascentiam, vitalem organum ac spirituum materiam ingenerat. Inde perspicua est ratio, cur ad aërem minus serenum, impurum, turbidum, corporis & animi vires mox concidant & non parvæ molestiæ in languidis membris exoriantur; cum ex adverso aëre liquido, sereno, sincero ac puro existente, corpus mox inde percipiat non leve robur & malorum allevamentum. Ab aëre ventorum flatu varie modificato morborum epidemicorum originem duci ac derivari debere, id fusius nuper deduxi in observationibus barometricis. Respexerunt huc omnes veteres & prudentiores Medicorum, qui consilium loca mutandi dederunt, ut ex aëre minùs salubri concederent ægri in salubriorem, ad spirituum refectionem, quibus resectis & amissa sanitas facilius redit & morborum promptior fit sanatio. Quocirca magna certe in morbis omnibus vis est loci, & quo circumfundimur, aëris. Quemadmodum enim ex transmigratione unius regionis in aliam propter insolentiam cœli morbi perfacile suscitantur, maxime si ab aëre impuriore in uliginosum fiat tran-

situs: ita etiam ex adverso sanitas redit, si ex insalubri regione transeamus in salubriorem.

IV. Suadenda quoque itinera sunt ob aquarum puriorum & salubriorum usum. Aqua enim catholicus quidam, summe necessarius ad nutritionem & animantium vitam ac sanitatem conservandam liquor est, quo intime invicem ununtur ac miscentur diversa sanguinem & nutritionem constituentia corpuscula, ita ut mediante simplicissimo hoc humido, omnis nutritionis, augmentationis omnisque excretionis pernecessarium negotium, imo ipse humorum vitalis motus perficiatur. Quapropter multum interest, cujus naturæ ac indolis sit ipsa, qua indies fruimur aqua, cum experientia addoceat, maximam esse aquarum diversitatem, præsertim ratione ingredientium ac elementorum, quæ ex terra ejusque contentis hauriunt. Nonnullæ salis muriatici, aluminosi vel vitriolici quantitatem recondunt, si in clauso vase per alembicum fiat evaporatio. Aliæ multum terræ custodiunt, unde sæpius vidimus ex aquis frequentissima cohobatione destillatis remansisse instar lapidis duram & solidam substantiam. Quædam calcario lapide refertæ sunt, cujus indicium apparet, quando oleum tartari per deliquium infunditur, tunc in momento albescent, decidentibus ex poris aquæ lapidis calcarii particulis, cujus generis etiam observatæ fuerunt nuperrime exortæ aquæ istæ salubres prope Stafffurtum, quæ simul salis communis insignem alunt quantitatem, unde & alvum & urinam satis valide sollicitant, neque illis, qui salia copiosa, morbosa in succis sovent, proficuæ observantur. Nonnulla loca valde dulces, ubi pinguis argillacea terra fundum, ex quo oriuntur, occupat, aquas sovent, quæ utilitate ac usu egregio se commendant. In universum autem hic tenendum, aquas illas ad sanandum esse optimæ indolis, quæ levitate atque subtilitate præ aliis eminent, inodoræ, omnisque saporis expertes, & quæ ad nullius salini liquoris affusionem turbantur, vel pellucidum suum colorem amittunt; quo spectant etiam quæ extremo frigore circa scaturiginem non congelantur. Tales certe sunt valetudini tuendæ, imo morbis sanandis accommodatissimæ, si ad sitim sedandam non modo usurpentur, sed & paulo largiori copia, præsertim æstatis tempore, potentur. Valet illud maxime, ubi salia excrementitia lympham & sanguinem deformant & dolores, exulcerationes fluxionesque varii generis excitant; utpote non datur certior medicina morborum salinorum, quam aquæ puræ sufficiens potus.

Aqua ad
nutri-
tionem & vi-
tam sum-
me necessa-
rius liquor.

Ejus mag-
na diffe-
rentia.

Quanam
aquæ ad
sanandum
optima in-
dolis sint.

V. Ex omnibus autem, quæ fama & viribus celebres sunt, maxime eminent Nilotica, quoniam longissimus calidarum, quas percurrit Nilus, terrarum tractus est. Nilus quippe ortus ultra æquatorem non procul à tropico capricorni, zonam torridam præterfluens per utramque Æthiopiam ac utrumque Ægyptum citra tropicum cancri mare mediterraneum subit. Igitur in tam longo & præcipiti cursu aqua Nili multipliciter frangitur ac comminuitur, eaque catadupis devoluta variis per plana fluit, nullis nubibus obducta, adeo ut à solis calore continuo percoquatur, quæ præcipua ejus bonitatis causa arbitratur. Auget Niloticæ aquæ excellentiam ros è cœlo defluens, quotiescunque Nilus exundat, qui cum purificet aërem, ita ut universales morbi desinant, aquam etiam præstantiorem reddit, unde ejus dulcedo, salubritas, fecunditasque. Nam quod mulieres & cætera animalia in Ægypto plures uno nisu foetus pariant, in Niloticam aquam refunditur. Nec alius antiquis regibus potus. Quin-

Ex omni-
bus Niloti-
ca eminent
conquam
celeberrima.

imo Philadelphus, cum Berenicen filiam Antiocho Syriæ Regi θεός dicto uxorem dedisset, identidem Nili aquam ad eam iussit deferri, ne aliam biberet. Fusius hac de re agitur in *Misc. N. C. D. 2. A. 6. App. p. 84. seqq.*

VI. Deinceps laudem & commendationem etiam merentur migrationes propter corporis exercitationem ac motum, qui per se ad valetudinem tuendam remedium est efficacissimum, sicuti nuper in dissertatione quadam luculenter id ipsum à me fuit demonstratum. Et quoniam intermissio motuum ac exercitationum causa adversæ valetudinis ut plurimum est; ita illam remove nihil magis aptum, quam æquabilis corporis motus, qualis est vectio in curru, in navi & equo. Dum enim totum corpus æquabiliter sic concutitur, ipsaque viscera simul tremulo motu agitantur, accidit, ut sanguis & humores hac ratione ad promptiorem motum & circulum excitentur. Inde sanguis non solum subtilior fluidiorque redditur, sed & visceri ac crassi humores ex glandulosis partium tubulis excutuntur, & in cavitates excrementis colligendis dicatas deponuntur. Meretur maxime legi SYDENHAMII de *podagra*, qui mirificè p. 35. magnificat illud incredibile emolumentum, quod illi, qui morbis chronicis plerisque, præcipuè verò phthisi laborant, ab equitatione percipiunt, quod genus exercitii digestionem singulas excitat firmatque, dum à continua corporis succussione calor naturalis accenditur & organa secretioni destinata in munere depurandi sanguinis ritè fungendo promoventur: unde necesse est, ut sequatur digestionum deperditarum quasi renovatio quædam. Huc etiam referendum, quod ORIBASII ex *Antyllo lib. VI. coll. med. cap. 24.* notavit: Equitatio (nempe vehemens) magis, quam omnes aliæ exercitationes, corpus & præsertim stomachum firmat, & jensuum instrumenta purgat, eaque reddit acutiora, sed thoraci exercitatio hæc est insensibilissima.

C A P. III.

De Locorum in quæ peregrinationes suscipiendæ salubritate.

I. EXPOSITIS jam abundè causis, quæ Medicos movere debent, ut peregrinationes in alia loca suadeant ægrotantibus, res jam & ordo poscere videntur, ut commemoremus & recenseamus ea loca, quæ & Veteribus & nostri temporis Medicis ob salubritatem placuerunt, ut eo mitterent homines. Antiqui *insulas Canarienses fortunatas* vocarunt ob aëris miram temperiem coelique clementiam. vid. COLUMBUM in *Navig. Roterodam. Anno 1616. p. 2.* Præterea Hispania ob salubritatem mirum in modum celebratur. Sic NONIUS de *Hispania p. 16.* ita scribit: *An cæli temperiem quæris? tota ea vitalis ac perennis salubritatis est, adeò ut beatorum hic felices sedes & campos Elysios Homerus statuerit, teste Strabone, quippe nec violento æstu excoquitur, aut nimio frigore tellus aduritur, non ventorum procellis aut gravi paludum nebula obnoxia, sed aura est suda serenaque.* In specie vero p. 83. de Granata Hispaniæ urbe hæc scribit: *Urbs Granata Hispaniæ gaudet aëris temperie saluberrima, nec nimis austrinis obnoxia æstibus, aut arctois frigoribus objecta, sed media axis utriusque vernanteque gaudet temperie.* Madritum omnium Hispanorum consensione saluberrimo aëre atque excellentissimis aquis perfruitur, ut propterea Hispaniarum Reges, posthabita Toleti ur-

be, quæ veterum Regum antiquissima sedes fuit, situque gaudet omni ex parte peropportuno, ibi sedem sibi collocarent. Olim etiam Athenarum salubritas maximi æstimata fuit, sic JOH. MEURSIUS de *Fortuna Athen. cap. 3. p. 22.* inquit. *Supra urbem aër purus tenuisque & salubris, unde ingenia ibi etiam acutiora existimata.* Plura circa hanc rem videre licet apud CICERONEM *lib. de fato.* Salubritas aëris Bohemici maxime commendatur à BOHUSLAO BALBINO, in *dec. 1. cap. 5. misc. hist. R. B.* egregia observatione, ubi commemorat, Reges Bohemos quotiescunque ægroti vel in Austriam vel in Hungariam aliove se deportari curaverint, brevi obiisse; contra, qui infirmâ valetudine in Bohemiam advenerint, plerosque sanitatem recuperasse, idque constare exemplis Sigismundi, Maximiliani II. Matthiæ & Ferdinandi III. Cæsarum, ac Annæ conjugis Matthiæ. HAM-DOLLAHI CASVINENSIS in *histor. natur.* quam Persica dialecto concinnavit, maxime salubrem prædicat terram Ispahanæ, quando juxta interpretationem VELSCHII de *vena medinensi p. 204.* dicit: *Si uno in loco jungerentur terra Ispahanæ & borealis ventus Heratæ & aquæ Chovarezma, non contingeret homines unquam mori.* De salubritate Brasiliæ vid. GUILIELM. PISO *histor. natur. & med. Brasilia. annexa CASP. BARLÆI rebus gestis p. 603.* Perquam maturè, scribit, pubescunt incolæ, senescunt tardè, idque sine omni canitie, aut calvitie, quo fit, ut longe ultra centesimum ætatis annum viridi senectâ non Americani tantum, sed & ipsi Europæi fruantur, totumque adeò territorium Macrobium dici mereatur, non aliter, ac si fervor juvenilis frigore senectutis repressus temperatiorem illam in calidis hisce plagis efficeret. Neque enim solis calore torretur hæc terra, neque squalore vel aquarum penuria resiccatur, neque frigore extinguitur, sed rore perpetuo imbribusque multis ac fontibus irrigatur. Abundat balsamis nativis, oleis, mellibus non unius generis, herbarumque ac radicum medicarum & ad tuendum valetudinem potentium ferax est.

II. Italia quoque regio maximam partem est salubris. Ita Croton fuit civitas saluberrima Italiæ, inde ortum adagium: *Crotonæ salubrius*, quoniam nunquam ibi pestis fuit orta. vid. HOFFMANNI *Lex. p. 503.* Infra Neapolim & juxta Vesuvium montem sitæ sunt Tabiæ. Illas salubres comprobant Authorum testimonia ob situm loci optimum, qui ut STRABO testis est inter occidentem æstivum & meridiem suavissimam siccamque africæ auram excipit. Cui ARISTOTELIS ratio adspulatur in *primo problem.* Nam mare ob placidas adspirationes salubritatem facit insignem, unde navigantes semper coloratiores existunt, quam in palustribus degentes. Siccitatis verò nomine magnam Tabiis ipsis laudem attribuit GALENUS ad phthisin ac hæmopticos sanandos *lib. meth. med. V.* hunc in modum: *Est, inquit, locus nempe Tabiæ, satis editus ac sicci aëris, nam in imo sinu, qui est inter Neapolim ac Surrentum, à Surrenti maxime latere porrigitur collis ad Tyrrhenum mare, qui leviter deflexus ad occasum, nec in meridiem totum percurrrens sinum ipsum à ventis iis, qui ab ortu efflant, euro, subsolano atque borea tutum reddunt. Conjungitur autem illi in imo sinu alter Vesuvii collis non parvus, qui propter ignem, qui in eo subjacet, non parum mihi ad ambientis ejus aëris siccitatem conducere videtur, alioqui præter ipsum ignem, nec stagnum propinquum, nec palus, nec fluvius alicujus momenti usquam in sinu habetur. Omnibus vero ventis, qui ab arcto ad æstivum occasum perflant, Vesuvius ipse objicitur, multus-*

que

324 Cap.III. De Locorum in quæ peregrinationes &c.

que cinis ab eo ad mare usque pervenit, reliquæ videlicet materiæ, tum quæ in combusto est, tum qui nunc etiam exurit. Omnia hæc aërem efficiunt siccum: ac omnes id genus herbas alit sicca ac adstringentis qualitatibus, quæ & pascua pecoribus efficiunt salubria, lacque eis inter cætera generant, sicca item ac salubris qualitatibus ad ea, quæ diximus. vid. GALENUM l.c. & ex eo BACCIIUM de thermis. Neque hic locus erit reticendus, quem suppeditat GRILLUS in orat. de stud. med. p. 5. Jucundum mihi fuit Puteolis locum Tabiarum contemplari, ad quem GALENUS solebat mittere eos, qui Romæ vitio pulmonis contabescant.

Neapolis.

III. Neapolitani aëris salubritatem præclare prædicat BARTHOLINUS de peregr. med. p. 28. quando dicit: Neapoli aër est saluberrimus, ventilatur mari vicino, & ab oriente quoque mons Apenninus pervius patet, solum quoque calidissimum & sulphureum, quod aërem mundat, corrigitque. De æstate dicunt: quanto pio caldo, tanto piu sano: quia semper aura ventilatur gratissima; & si cum Romano aëre Neapolitanus commutetur, exitium inferri putatur ob vapores ibi elevatos, nisi boreas spiret, vel pluvia largior superveniat. Experientiæ consentit QUERCETANUS in diætico: quia aër Neapoli subtilis, Romæ crassior & mutatio periculosa ad contrarium, Romæ quippe aër per apertos ante poros penetrat. Alexandria quoque à Veteribus semper salubris æstimata fuit, hinc teste CELSO Phthifici in Ægyptum & speciatim in Alexandriam mittebantur. CURTIUS refert: Nullo fere die Alexandria solem serenum non videri propter aërem perpetuo ibi tranquillum.

Alexandria.

Cujus temperamenti illa loca saluberrima debeant esse.

IV. Maxime omnium autem ubique terrarum loca illa sanitati & vitæ prolongandæ conducunt omnium confessione, quæ sunt editiora, montosa & aëre puro, sereno atque sicco fruuntur; item illa quæ venti boreales & occidentales purgare & vi sua expansiva effluviorum noxiorum copiam disjungere & dissipare apti sunt. Deinde ratio ipsa & Medicorum ac Physicorum consensus docet: quæcunque loca tenui puroque aëre gaudent, siccoque potius quam humido, quæ neque nimio æstu torrentur, nec nimio frigore congelantur, quæque patulo liberoque cœlo fruuntur & cum solis radiis, tum mediocribus ventis exposita sunt: salubria vitæque hominum idonea esse. Contra morbosam atque insalubriam, quæ pigro crassoque ac supra modum humenti aëre gravantur; item valde æstiosa aut perfrigida; tum humilia aut concava, quo nec solis radii, nec ventorum agitatio facile pervenit; vel quæ nimium violentis flatibus infestantur, aut denique contrariis qualitatibus non paulatim sed subito afficiuntur. Præcipue verò morbosæ censentur nebulosa, uliginosa, palustria, falsuginosa, ac ventis simul humentibus ac fervidis obnoxia, quæque aura qualibet foetida, cœnosa, sulphurea, bituminosa afflantur, ac demum halitu quovis insueto ac gravi. Confer DONIUM de rest. salubr. agri Rom. p. 78. seq.

Quænam sint loca morbosæ.

Regiones montosæ omnium sunt saluberrimæ.

V. Tandem montosæ regiones omnium sunt saluberrimæ, nisi nimium fuerint gelidæ aliisque de causis, ut aquarum vitio aut ventorum nimia vehementiâ, noxiæ. Quapropter in Apennini quibusdam locis longissimæ ac præviridis senectutis homines reperiuntur, quemadmodum in Tmoli, qui mons Lydiæ est, cacumine, quod Tempsin vocant, centum quinquaginta annos incolæ vivere, Mucianus gravis apud Plinium Author differtè testatur. vid. PLINIUM lib. VII. c. 48. Sic quoque Athos montium celeberrimus intra Macedoniam atque Thraciam incolis suis ad longævita-

tem acquirendam maxime accommodatus est, teste ERASMO FRANCISCI in ausländischen Kunst-und Sitten-Spiegel l. I. c. 28. PLATO dicit se in altissimis & temperatis regionibus invenisse valde longævus. vid. BACQUERE Sen. med. p. 22. Exstat etiam hanc in rem perelegans locus apud JOH. BAPT. DONIUM in libro de rest. salubr. agri Rom. dum ait: Illud perquam dignum notatu est, ea maxime loca temperatissimo aëre frui ac longævus homines progignere, quæ elata quidem ac sublimia, sed non præaltis ac perfrigidis montibus edita, verum quæ longiori terrarum fastigio latenter assurgunt, ut in multarum regionum mediis & à mari procul recedentibus spatiis, quorum altitudinem, flumina illinc in diversum dilabentia ostendunt, ut in Umbria tractu circa Spoletum, ubi Apennini juga modicè attolluntur. Ibi enim si uspiam in Italia, vivacissimi homines reperiuntur. Spectat huc elegans locus apud DIETERICUM in Jatreo p. 1412. Urbes in montibus apertioribus, quas aër ferit vehementior, salubriores merito habentur, sed si montes montibus, collesque collibus jungantur per flexuosa intervalla obscurarum vallium, sæpe mephitis exhalationum urbes incommodat, ut insalubriores sint civitatibus, quæ in declivibus vallibus ipso in luto jacent. Appositè hoc contentione urbium Hassiacarum Marpurgensis & Giessensis ex D. Dan. Horstii manu ductione potest monstrari, testisque esse possunt ipse ego utrarumque urbium incolæ, pluries infestam fuisse montanam Marpurgum morbis pestilentibus quam depressam situ Giessam. Sæpius febricitat septicollis Roma quam igein Heidelbergæ.

Exempla in hunc finem allata.

VI. De cætero aër ruralis & loca rusticana semper præferenda esse oppidanis, non immerito creduntur. Quapropter veteres Romanorum ob urbem minus salubrem semper habitam, agrorum secessus ac ruris otium maximopere expectabant ab æstivo solstitio ad æquinoctium usque Septembris & nonnunquam longius. Hinc exstruebant amoenissimas ac saluberrimas villas, quales fuerunt Albanæ, Tusculanæ Ciceronis, Nomentanæ Senecæ, in quibus non modo pernoctabant, sed & vitam sine sanitatis dispendio agebant. Circa Tibur magnates Romani salubritatis causa prædia habebant, quo æstate secedebant, hinc FARNABIUS in not. ad Martialem Ep. 60. scribit. Ditiore prædia & villas circa Tibur aut in ipsa urbe ædes habebant, quo æstate secedebant. Prædia illa Tiburtina appellabant, quemadmodum Tusculana, quæ prope Tusculum, unde Tusculanum villa Ciceronis. MARTIALIS prædia illa gelidas Tiburis arces nominat, quia cœlum æstate non adeo æstu torridum ibi refrigeria dabat principibus Romanorum, qui æstate summâ Tibur commeabant; se quoque Tiburtinum habuisse l. 4. ep. 8. sive joco sive serio ait. Villam ipsam vel diversorium æstu vitando Tibur appellari docet nos PAPIUS lib. I. Sylv. it. BARTHIUS Adversar. lib. 24. cap. 12. Magnus Lucullus, cujus meminit Plutarchus, dicere solitus est, se duas colere consuevisse villas, alteram Tusculanam æstate, alteram hyeme in Bajanis, (nam Bajæ semper æstiosæ ad montis Campaniæ radicem sitæ sunt. vid. FARNABIUM in notis ad Martialem lib. 4. ep. 47.) Hinc HORATIUS:

Loca rustica præferenda sunt oppidanis.

Quod testantur veteres Romanorum.

Nullus in orbe locus Bajis præluet amœnis.

Imò summus est apud omnes scriptores de Barbarum celebritate consensus, qui eas modo felices, modo beatas, modo principes aut alio ejusmodi præclaro epitheto nominant, ut luculenter inter alios peculiari Epigrammate modulatus est MARTIALIS:

Littus

*Littus beata Veneris aureum Bajas,
Bajas superbæ blanda dona naturæ,
Ut mille laudem Flacce, versibus Bajas,
Laudabo digne non satis tamen Bajas.*

CAPUT IV.

De morbis in quibus peregrinationes conducunt.

§. I.

Cum abunde partim rationum ponderibus, partim Veterum testimonio à nobis probatum fuerit, secessus in peregrina loca inque alium aërem ac solum servandæ valetudini multum conferre posse; operæ jam erit pretium, ut sollicita & acri cura scrutemur, annon etiam ad ægri-
*tu-
dines
corporis,
mutando
loca, possint
propulsari.*
tudin-
es corporis propulsandas vitiaque viscerum emendanda conferat, mutare loca. Ut autem hæc nostra assertio liquidissime pateat, ex Veterum probatissimis non modo authoribus testimonia hanc ad rem pertinentia adducemus, verum etiam præclaris rationibus atque experientia id confirmare laborabimus. Primum autem in corporis languore, viriumque defectu peregrinationes multum facere dilucide testantur Veteres. Ita GALENUS *libr. de uteri cura* corpore languentibus peregrinationem commendabat. Et SENECA *libr. III. cap. 3. Quæst. Nat.* scribit: *Multum virium sibi accessisse postquam vineas attigerit.* Idem gravis author *epist. 85.* ita dicit: *itineræ ista, quæ segnitiam mihi excutunt & valetudini prodesse judico & studiis, quare valetudinem adjuvent vides, cum pigrum me & negligentem corporis literarum amor faciat, alienâ operâ exerceor.* JUSTUS LIPSIUS *Epist. prætermissa Offenbaci cum notis in Sueton. ep. 12. p. 40.* Magnum solet ad confirmationem valetudinis momentum afferre peregrinatio cælique & loci mutatio.

II. Deinceps quantum faciat benignior aër ad pulmonum morbos & vitia dici vix potest. Phthi-
*thifici
Hæ-
moptici in
Egyptum
ad sa-
luti-
tem
operan-
m.*
ficos & Hæmopticos Medici olim in Ægyptum & Alexandriam mittebant, uti jam primo hujus dissertationis capite memoratum legimus. Idem testatur CELSUS *libr. III. cap. 22. p. 158.* Si malus est & vera phthisis est, inter initia protinus occurrere necessarium est, neque enim facilius morbus, cum inveteraverit, evincitur. Opus est si vires patiuntur navigatione, cæli mutatione, sic, ut densius quam id est, ex quo discesserit ager, petatur. Ideoque aptissime Alexandriam ex Italia itur. Si id imbecillitas non sinit, nave tamen non longe gestari commodissimum est. Si navigationem aliquæ res prohibet, lectica, vel alio modo corpus dimovendum est. Medici Neapolitani pro ultimo refugio, phthi-
*dic-
apolita-
nis mor-
labo-
tes ad
bias
tebant.*
ficos & qui sanguinem exspuunt, vel ejusmodi thoracis ulcera ac alia vitia patiuntur, ad Tabias mittunt, nam aërem ipsum ut etiam lactis potum inveniunt adeo salubrem, ut sint, qui totam in eis degant vitam. Ex recentioribus clarissimus Anglus MORTON in *tr. de phthisi* & maxime illâ, quæ ex sanguinis benigni & spirituum defectu oritur, commendat migrationes in aërem apicum & salubrem, quem plusquam medicamenta cætera nervorum & spirituum confortatione, appetitus & hilaris animi recuperatione & consequenter tabis ingruentis præcautione experientiâ multâ edoctus ut plurimum conducere observavit. *vid. cap. 3. lib. I.* Et certe nulli parti corporis nostri magis favet loci aërisque mutatio, quam pulmonibus, quoniam immediate ad hos
Frid. Hoffmanni Oper. Tom. V.

pertingit. Hinc videmus, quod etiam in tussi
*Mutatio
aëris favet
pulmoni-
bus.*
egregium afferat solamen, testante CELSO
lib. IV. cap. 4. pag. 189. Utilis omni tussi est
peregrinatio, navigatio longa, loca maritima,
natales.

III. Mirabile illud est, quod aëris conditio ac
*Indolis aë-
ris, varios
edit effec-
tus ad ul-
cera & fis-
tulas sa-
nandas.*
indoles ad ulcera & fistulas sanandas tam varios edat effectus pro indole locorum, adeo ut in certo aëre curam recipiant, in alio recrudescant. Non inelegans hanc in rem est observatio RIED-
*Quod ap-
probat de
Mayerne
in observa-
tione nobi-
lis cujus-
dam.*
LINI, quando scribit: *Juvenis quidam à pueritia ulceribus manus dextræ spinaque ventosa laborans, omnibus Chirurgorum remediis in casum adhibitis, denique mutavit locum atque aërem, & vix per semestre Viennæ degenti ulcera fuerunt persanata.* *vid. ejusd. Lin. med. Ann. 95. p. 256.* In fistulis sanandis peregrinationis vim egregia observatione testatur TURQUETUS DE
*Ut & Bor-
richius.*
MAYERNE *consil. de phthisi*, dum ait: *Vidi nobilem, qui accepto profundo in thorace vulnere, bis sanatus est fistulâ succedente apertioni in opposita parte factæ. In Hispaniam is migravit, ubi post quinque annorum moram occlusa fuit fistula, patriæ redditus climati frigido & humido hæc sponte reclusa est, sanationemque iterum recepit in Hispania per totidem annorum spatium.* Memorabilis quoque hanc in rem est historia notata à BOR-
Richius.
RICHIO in *Actis Hafn.* quando ita scribit: *Vir generosus ante hos viginti septem annos infelici lapsu crus perfregit; Chirurgi advocati, licet diutricantes, nequiere ita solidare vulnus, ut non perpetuo stillicidio ichor inde emanaret, desinente in fistulam plagâ. Post annos aliquot Madritum legatur, neglectâ propterea propter longi subsellii negotia curâ illâ intentiori corporis, advertit tamen elapsis aliquot mensibus sponte stare serum invisum nec amplius profluere quicquam triennio integro & quod excurrit. Ut rediit Hafniam, paulatim aperitur fistula, & more veteri sero quotidie madet ad annos aliquot. Iterum in Hispaniam negotiorum causa mittitur, iterum coit vulnus, nec toto sexennio, quamdiu Madriti substitit, scaturit quicquam. Tandem redditus patriæ in paucis mensibus apertum rursus foramen videt, quod hodieque nondum coit, aëre arcto humidior referante, quod Hispanus siccior occluserat.* *vid. Act. Hafn. vol. III. obs. 43. p. 76.* Quod de
*Observa-
tiones cir-
ca vulne-
ra.*
ulceribus ac fistulis jam diximus, idem quoque valet de vulneribus. Ita PARÆUS *lib. X. cap. 8.* notavit: *Vulnera capitis difficilius curari Lutetiae quam Avenionis, additque rationem, quia Lutetiae aër frigidior & siccior vulneritus capitis infensus est, aër vero Avenionis calidus humorum fluiditatis & subtilitatis causa, quare humores facilius ad pedes devolvuntur, ubi vulnere sanationem difficiliorem reddunt.* *vid. plura l. c.* Ita alii scribunt, Florentiæ etiam vulnera capitis periculosa & curatu difficilia esse.

IV. In capitis & nervorum morbis mutatio lo-
*Capitis &
nervorum
morbos
curant
mutatio-
nes loci &
aëris.*
ci & aëris haud minimum ad sanitatem fert punctum. Et hoc jam dudum dilucide testatur HIPPOCRATES *lib. II. aph. 47.* Finem epilepsiæ juvenibus afferunt ætatis, loci & victus mutatio. Nam cum epilepsia malum sit habituale, & secundum nostram sententiam spasmus meningum cerebri, qui à stagnatione humorum circa has membranas magis vel minus acrium provenit, hinc cum aër peregrinus sanguinis diathesin ac crasin mutet & spiritibus cum in illorum pabulum maxime cedat, novam quoque indolem ac motum procuret, hinc iis firmatis obstructions iis in locis facilius cedunt & à motu talis modi inordinato, spasmodico deflectunt aliumque sibi formant, unde hor-
*E e
rendi*

Ut & vertigines, Melancholiam & maniam.

rendi talismodi paroxyfmi cessant. Neque dubium est, in vertigine, melancholia, mania omnibusque morbis habitualibus & qui à spirituum perverfo motu fiunt, eosdem effectus habere com meatum in alienum aërem. *In insania regiones mutare debere agros, & si mens redit annua peregrinatione esse jactandos*, dudum prodidit CELSUS l. III. c. 18. Dolorem capitis singulis pleniluniis repullulantem mutatione loci tandem curatum fuisse testatur LOSSIUS lib. I. obs. 13.

In morbis chronicis levamen adferunt peregrinationes.

V. In affectibus quoque chronicis egregium allevamentum adferunt peregrinationes. Ordinem inter hos ducit malum hypochondriacum, cujus pathemata mirum in modum mitigari solent ab alieno puriori aëre & per motum, quo peregrinantes fruuntur. Illud mirandum est, quod etiam hydrops, qui ex contumacissimis hepaticarum glandularum obstructionibus nasci solet, solatium & decrementum ab aëre mutato experiatur. Memorabilia sunt, quæ scribit EPIPHANIUS FERDINANDUS in suis consult. p. 33. *Neapoli hydropicos ad agrum Puteolanum, tabidos ad Tabias relegant, & ego Messapiae nonnullos agros sive tabidos, sive hydropicos, maxime, quando divites sunt, ad aërem S. Angeli vulgo Tostini dimitto, & non sine maxima egrotantium utilitate, & memini, inter alios me misisse annis elapsis quendam meum vicinum empyematicum, phthisicum atque consumptum ab hectica febre per sex menses cui sola cutis & ossa apparebant &c.* In febribus intermittentibus nonnunquam

Quomodo Seneca febre sanatus fuerit.

opem laudatissimam fert aëris mutatio. SENECA, febre laborans, recepit se in Nomentanum, & ibi fuit sanatus, quam in rem consentit BONGARSIIUS epist. 7. ad Joh. Camerar. *Ego febricula tentatus & vexatus tussi gravissima liberavi me provectione marchica.* Ita etiam Casp. Peucerus ad depellendam febrem mutabat aërem, ut scribit ejus socer PHILIP. MELANCHTHON in epist. p. 110. Idem clarissimus MELANCHTHON l. V. epist. p. 668. ad Meienburgium scribit: *Comperi in febribus initio mutationem aëris utilem esse, vidique multos hoc consilio curari.*

Magna præstantia ac vires aëris.

VI. In universum illud servandum est, peregrinationes & aëris mutationes in morbis, qui à spirituum defectu & sanguinis ac humorum dyscrasia originem suam ducunt, ubi sanguinis spiritaliscentia blande promovenda, transpiratio juvanda & vires reficiendæ sunt, adjumentum præstare maximum. Etenim aër purior & defecatus non modo spiritus immediate reficit & solatur, ipsisque aptissimam materiam præbet, sicque vires, quæ ex spirituum copia nascuntur, efficaciter erigit; verum etiam aër hanc possidet naturam, ut ipsam sanguinis mixturam ejusque intestinum motum varie alteret ac demutet. Quantam potentiam aër habeat in fermentescibilibus, pervulgata res est, ita cerevisiarum sapor peculiaris certis locis non tam ab ingredientibus & tractationis modo, quam ab aëre singulis locis proprio dependet, qui cum varius sit, variam quoque texturæ ac craseos mutationem, à qua odor, sapor, virtus maximam partem pendent, inducit sub ipso fermentationis actû. Curiosum est, quod aër effluviis sulphureis refertus, quod accidit in tonitru & fulmine, cerevisiam in fermentatione existentem mox corrumpat & acrescentem efficiat. Ex quibus vel inde elicere licet, quanta vi polleat aër in crasi ac textura sanguinis humani mutanda, ut adeo non possint non consequi effectus mirabiles in morbis depullandis, quales similes ab alia medicina vix quidem possunt expectari.

VII. Nos igitur in genere iis in morbis, qui sunt diuturni, qui habituales, qui medicamento rum vires eludunt, ubi tamen viscera penitus non

sunt corrupta, sed virium adhuc quoddam robur percipitur, maximopere suademus & commendamus medicinam ex aëre propter dictas in superiori capite causas; utpote experientia certa didicimus, quos medicamina morbos non curant, aërem sæpius sanare. Ex nostra autem sententia cœli locique mutatio convenientissima erit hypochondriaca & scorbutica affectione laborantibus. Etenim si quid hypochondriacis confert, certe est motus, qui sanguinis motum in hoc morbo impeditum suscitatur, excretiones & transpirationem adjuvat, & crudum viscidumque humorem in membris hinc inde residentem discutit. Si quid porro hypochondriacis prodest, certe est aër purus, benignus, serenus, qui spiritaliscentiam sanguinis blande promovet, & spiritibus materiam præbet laudatissimam. Omittimus liberiores ac tranquillum animi statum, qui in hypochondriacis ad anxias & tristes curas animique angores perpetuo fere dispositis valde desideratur & per itinera in loca amœna, jucunda, novarum rerum plena acquiritur. De cætero commendamus febre lenta & hectico morbo viriumque languore affectis non sine ratione locorum mutationes. Laudandus hoc in genere nobis merito est peritissimus SYDENHAMIIUS, qui experientia laudatissima & certissima in scriptis affirmat, non dari expeditiorem languidorum hecticorum medicinam, quam si æquabilis exercitationis motu corpus agitent. Et cum à depressa laudabili sanguinis & humorum spiritaliscentia, nec non accumulatione multarum sordium viscidarum in sanguine & primis viis, & emunctoriorum opere neglecto lentus talis modi morbus suscitetur, liquido apparet aërem temperate benignum particulis elasticis expansivis instructum & sulphure balsamico præditum spiritus recreando, sanguinis motum & transpirationem sordium exhalandarum procurando non posse non egregium solamen atque levamentum asserre.

VIII. Denique in quacunque cutis impuritate ulcerosa & pustulosa, scabie cujuscunque generis, lepra, defluxionibus falsis cutim defœdantibus, si aliis ordinariis remediis cedere nolint, utilissimam fore judicamus locorum aërisque mutationem. Utpote quis est, qui non perspiciat molesta hæc & foeda cutis incommoda à peregrinis salibus in lymphâ accumulatis, nec per poros & glandulas subcutaneas debite secretis originem suam petere? si autem quis degit in aëre pigro, præhumido, vappido, suffuginoso, non potest, quin causam præbeat hisce malis apertissimam. Quapropter opus certe est tali in casu, ut quis aërem mutet & cedat in meliorem, qui salibus non imprægnatus, qui transpirationem & sordium salinarum secretionem per cutis spiracula promovet. Hoc pacto effici potest, ut salubrioris aëris usu mox recipiat perfectam valetudinem. Præterea in spirituum & nervorum morbis, præsertim truculentissimis spasmodicis, qui ex atonia partium spirituumque anomalo & per habitum acquisito irregulari motu proficiuntur, nullo in sanguine & visceribus manifesto apparente vitio, si quid juvat vel malum levat, certe aëris est commutatio. Cum enim aër, ut dictum est, spiritus quoad materiam maxime constituat, accidit, ut novo & insueto aëre accedente, ad cerebrum & nervosum systema, mutatio magna in crasi, motuque contingat, ut hac ratione tales effectus in medendo subsequantur, quales à nulla alia medicina cæteroquin celebratissima expectari possunt. Apparet jam liquido ratio, quare in epilepsia habituali & idiopathica laudaverit magnus noster HIPPOCRATES victus locique mutationem.

Morbos per medicamina incurabiles, sæpe aër curat.

Aër purus prodest maxime hypochondriacis.

Quibus particulis aër bonus instructus esse debeat.

Quo pacto impuritates ulcerosæ & lepræ sanentur.

Sententia Hippocratis.

CAPUT V.

De cautelis in itineribus observandis.

§. I.

Quemadmodum ex aëre multi ac gravissimi oriuntur morbi, ita ut non tantum epidemii, sed etiam chronici inde & certis locis endemii originem nanciscantur, sic etiam in aëre incomparabilis medicina est quærenda. Etenim temperies sicuti semper ad vitam est pernecessaria, ita maximè illud valet circa aërem. Locorum enim mutationes mutant corpora modo in meliorem modo in statum pejorem. Si remotas terras perëgrinatione adimus, tunc demum experimur, quid possit alius sol, aliud clima, quid possit aëris & victus mutatio. Cum autem rarissime perfecte temperatus aër reperiatur, sed excessivis qualitatibus secundum loci situm, secundum anni tempora, secundum tempestates potissimum præditus sit; inde si quis recte aëre velit uti pro medicina, necesse est, ut aërem cujuscunque loci cognitum habeat, ad quos morbos disponat, qua intemperie gaudeat, ut postea Medicus prudens consilium dare queat, qualis aër & locus sit eligendus. Siquidem non promiscue omnis aëris & loci mutatio juvat, sed tantum talis, qui contrarius est aëri isti, qui morbum peperit. Nam non omne corpus ferre potest omnia, hinc utique peregrinationes, nisi prudenter instituantur, periculosæ sunt, quod confirmari posset multis exemplis. Pulchrè scribit CELSUS lib. I. cap. I. *Pessimum cælum est, quod agrum fecit, adeo ut in id quoque genus quod natura pejus est, in hoc statu salubris mutatio sit.* Exemplo sit aër serenus, purus, ficcus, qui alias saluberrimus, & tamen phthifici tali aëre non commode perfruuntur. *Conf. obs. barometr. meæ:* sed magis gaudent aëre temperate humido; hinc etiam patet ratio, cur tantopere fuerit commendata Veteribus navigatio in Ægyptum.

II. Secundo quicunque perfruuntur aëre gravi, humido, turbido, quali gaudent, qui in insulis, quæ hac de causa in universum sunt insalubriores, vivunt, cedendum est in puriorem, unde recte faciunt Angli, ubi rara est serenitas, & semper fere similis autumnio tempestas cum aëre gravi, cœlo denso, nubibus obsito, quando in Galliam, ubi aër purior, serenior, tenuior, migrant. Curiosum est, quod scribit CLARAMONTIUS hac de re de aëre, aquis & locis terræ Angl. p. *De aëris Anglicani temperie melius judicare meaque quidem sententia nemo potest, quam qui illuc ex Hispania, aut Italia, aut editissimis Gallie partibus commigrant.* Experiuntur enim in se ipsis aliquam intra paucos annos commutationem. Præsertim vero quibus splendida & sicca bilis est. Nam illi omnium optime in hac Insula degunt. Secundum eos valde sanguinei, deinde melancholici. Pituitosi & catarrhis obnoxii deterime. Contra qui ex Anglia phthisi & scorbuto laborantes in Galliam proficiscuntur, ii ferme hausto illinc aëre puriore convalescunt. Porro in Anglia lues Gallica difficillime sanabilis est, cum hic morbus à lymphæ contumaci coagulo & stagnatione oriatur & spirituosum ac mobilem requirat sanguinem, qualis sub tali aëre non generatur; hinc optimo successu lue venerea laborantes in Galliam trajicere solent.

Frid. Hoffmanni Oper. Tom. V.

III. Tertio in salubritate nonnunquam primas tenet aër nativus. Quodam enim quasi foederis jure inito, agris symbola sua erogat viresque salutariter prodit, ut extra patriam, profecti reduces larium tutela à morbis sæpius gravibus vindicentur. vid. MURALTUM in *Ephem. N. C. Dec. II. A. 4. p. 246.* Ita compertum est experientia, nonnullos extra patriam longe distitam agentes in nostris terris non bene sese habere, sed perpetuo esse valetudinarios neque perfectam consequi sanitatem, nisi rursus in patriam suam proficiscantur. Ita Sueci, Norwegi, qui aëri rigidiori ac frigidiori assueti sunt, raro perfecte sani sunt in nostris terris. Deinceps, qui marino aëre subinde fruuntur, non leviter alterantur, si terrarum incolæ fiunt, sicuti id compertum ac pervulgatum est in Batavis.

IV. Quarto loco ratione habitus corporis & temperamentorum variare quoque debet ipsa cœli mutatio. Quapropter qui graciles sunt & nimia corporis laborant ficcitate, ad phthisin inclinant, nec non calore præternaturali capitisque dolore frequentius corripuntur, omnibus modis abstineant ab aëre nimis sicco, fervido, sed potius in loca temperata ipsis migrandum erit. Quicunque autem sunt obesi, sanguine pleni, ætate senes & nervos imbecilles habent, item qui ad paralytin, rheumatismos, apoplexiam, spasmodica pathemata dispositi sunt, omni studio evitent loca valde frigida, montana, septentrioni obversa, quod etiam valet de iis, qui in pectore quandam sentiunt asperitatem, vel tussi vexantur, aut quorum pulmo & pectus debile est. Tales enim ipso etiam RHASE teste lib. V. cap. 4. *si aërem attraxerint frigidum, ad tussim vel ad sanguinem spuendum velociter pervenient.* Tandem opus est, ut caveant ii, qui teneræ sunt constitutionis, tenui & spongioso corporis habitu præditi sunt, victuque usi sunt tenui & delicato, ne commigrent in eas terras, ubi aër densior, gravis & impurus est & victus durior crassior. Experientia enim didicimus tales rediisse ut plurimum valetudinarios, qui postea phthisi, hectica demortui fuerunt; vel lentos hypochondriacos sibi contraxisse affectus, utpote à tali aëre & victu in tenerioribus corporibus perfacile contumaces & scirrhoræ indurationes viscerum & obstructions glandulorum emunctoriorum gravissimorum morborum genitrices progigni possunt. Sanguinei & cholericici calidam incolentes regionem, ne proficiscantur in loca calidiora & ficciora & ubi vina generosiora sunt in deliciis & usu, operam dare debent eximiam. Ita Gallis Italia, præsertim Sicilia solet esse funesta.

V. Quinto quod attinet ad ipsum iter faciendum & hoc quoque ad hominum habitudinem attemperandum esse, differit HIPPOCRATES de *salut. vict.* dum inquit. *Corpulentos celerius, graciles vero lenius iter facere convenit.* Et GALENUS in comment. addit rationem: *Nam celer motus augendo calorem corpus colliquat, in motibus vero remissioribus calor mediocris sanguificationi & nutritioni prodest.*

VI. Sexto in itinere ipso faciundo quædam sunt notandæ cautelæ, videlicet plethoricus si iter, præsertim longum vult peragere, priusquam illud ingrediatur, sanguinem emittat & alvum solvat necessum est, maxime si longum fuerit tempus, ex quo neutrum fecerit. Si quis enim secedit in alienum aërem sanguine venis repletis & habitu corporis humoribus stipato, vix febres evadere poterit, sique eas aliquando evaserit & cutis rara est, neutiquam tamen evadet catarrhos, scabiem, pustulas. Cum autem homini non sem-

Quidam non possunt vivere sine aëre nativo.

Qualis cœli mutatio quibusdam corporibus sit eligenda.

seren-
aëris
Anglicani
Gallici.

Dicta Hippocratis & Galeni de itinere faciundo.

Cautelæ in itinere faciundo notandæ.

per liceat longius peregrinari, nihilo minus cuivis, qui integram valetudinem & à morbis immunitatem vult tueri, suadenda interdum est aëris & loci mutatio, nimirum ex aëre urbano secedat in ruralem magis purum, magisque liberum & certe mox sentiet quandam alterationem circa sensuum exercitium, appetitus & digestionis negotium, somnum & vigilias. Qui enim diu assuetus est domi sedere & aëre domestico tectis concluso, urbano perpetuo frui, si in liberum rusticorum aërem secedit, accidit quandoque, ut gravitatem quandam in capite, in membris persentiat ab aëre eo, qui spirituum & sanguinis crasin quodammodo immutat. Maxime omnium autem literatis & qui profundis speculationibus animi & corporis vires frangunt, secessus in prædia, in villas, quo aëre puriori & liberiori utantur, & rursus spiritus reficiant & animum à labore fessum relaxent. Merito enim in eo imitari literati nostri temporis antiquos philosophos & eruditos debent, qui in prædiis suis amoenissime exstructis frequentius ad sanitatem firmandam

animumque roborandum vitam debebant.

VII. Ultimo loco, ne quis in ipso itinere noxam patiat, opus est, ut si quis velit peregrinari longius, id minime faciat in nimio frigore, neque in nimio calore, neque si fieri potest nocte, sed omnes excessivas qualitates injuriasque aëris evitare debet. Deinde patiat corpus interdum quiescere & tunc paulo largius quam in itinere cibum & somnum capere potest. Præstat enim in itinere à ventre pleno & largiori cœna abstinere, maxime si per noctem incedendum est. Ne autem lædatur à varii generis potu & victu, quem effugere non potest ipso in itinere, opus est, ut omni cura ac diligentia ventriculi ac digestionis opus conservet, idque opportune fieri potest medicamentis stomachicis ventriculi tonum & calorem respicientibus, nec minus amicam quandam tenuitatem foenerantibus. Ex horum genere laudem merentur salia volatilia oleosa temperata, elixiria balsamica, essentia amaræ aromaticæ, aquæ vitæ stomachales temperatæ & quæ sunt hujus generis alia.

Nimium
frigus ni-
minus calor
& nox
sunt su-
gienda.

Quid lite-
ratis sit fa-
ciendum.



D E

INEDIA MAGNORUM MORBORUM REMEDIUM.

P R O O E M I U M.

Morbi ex
triplici
causa ori-
ginem du-
cunt.

Prima est
animi per-
versus mo-
tus.

Secunda
est aëris
vitium.

Tertia est
victus pra-
vi ac ple-
nioris in-
gestio.

Sympto-
mata ex
immodico
cibo pro-
venientia.

Morborum, quibus infestari genus solet humanum, originem paulo accuratius quando expendimus, triplex potissimum ipsa sese ostendit. Vel enim ab animi perverso motu, vel ab aëris vitio, vel denique à copioso ac pravo victu tota morborum dependet classis. Quantam perturbationem atque anomalam in succis vitalibus fluidoque nerveo, cujus ministerio anima utitur, excitet præposterus affectuum usus, res inter Medicos compertissima est. Aëris mutationibus præcipuos in hominibus morbos deberi, jamdudum HIPPOCRATES, Vir in ejusmodi rebus diligentissimus, olim notavit. Etenim aër magnum jus habet in spiritus, qui regunt & movent corpus nostrum. Contagiosi & qui latius grassari solent morbi, certis tempestatibus, aërisque vitiis, maxima ex parte suos debent natales. Præterea diuturniores, & quæ lento gradu procedere solent, ægrotudines, intemperantiæ victusque pravi ac plenioris potissimum soboles existunt. Verissime scripsit HIPPOCRATES lib. de natura hominis: morbi oriuntur tum à victus ratione, tum à spiritu, cujus inspiratione vivimus. Pessimus autem omnium victus est, qui contumacissimos fovet morbos, immoderatus nempe, immodicaque ciborum ingestio. Perniciosa admodum sentina est abdomen insaturabile, omnium tum corporis tum animi vitiis fons atque origo. Non minus acute, quam facete Veteres intemperantiam Medicorum nutricem appellarunt. Bene dicit HIPPOCRATES, ubi cibus præter naturam copiosior ingestus est, hic morbum facit, utpote non tantum vasa implet, vires premit, sed & nativum calorem ac motum extinguit, omnisque generis cruditates congerit. Hinc intemperies, hinc obstructions, hinc inordinati humorum motus, quæ vitia gravissimorum morborum causæ antecedentes continenturque sunt. Quo circa veteres Medicorum prudentissimi, inter quos emi-

nent methodici, in plurimis morbis abstinencia, inedia, & convenienti diætâ plus præstiterunt, quam alii generosissimis pharmacis. Solennis hæc methodus fuit antiquis & sapientissimis sanandi morbos, maxime eos, qui ex repletione oriebantur. Hodier- no tempore ferme hic mos, ut alia laudabilia ac speciosa exolevit, sed Medici ægrotantium luxui adulescentes, sprete fere omni diætâ, speciosis medicinis ac pharmacis malunt curationem expedire, hisce insigne lucrum ac famam aucupantes. Cum autem mihi valde arrideat ratiocinio atque experientia firmata Veterum consuetudo, dum sola quandoque inedia rebelles expugnabant morbos, apud animum constitui, accuratius paulo hoc utilissimum thema evolvere, menteque mea pro viribus paulo altius agitare, simulque ostendere luculentissime, quibus in morbis abstinentiæ possit esse locus, & qua ratione prudenter inedia, tanquam remedio, uti debeamus.

Vitium
hodierno-
rum me-
dicorum.

§. I.

Antiquissimus & sapientissimus medicinae parens, HIPPOCRATES lib. de affectibus docet, cibos ad sanitatem optimos, qui parva quantitate ingesti, fatis esse, ut fami & siti in edam afferant. Idem lib. de morb. talia effatur: Si quis pauca edat & pauca bibat, nullum inde morbum experietur, & alibi: Nihil magis ad sanitatem facit, quam non satiari cibus, & impigrum esse ad laborem. Natum hinc elegans adagium medicum: Modicus cibi, medicus sibi. Fuerunt sane patres nostri, priscique seculi homines temperatissimi, ut qui plane lacte, melle, fructibus, herbis contenti, luxum & delicias hodiernas respuebant, hinc salubrius vixerunt & diutius. Eremitæ, item Philosophi, ut Plato, Zeno, Socrates simplici victu tenuique diætâ consenescebant; PORPHYRIUS lib. 4. de abstinencia testatur, quod carnibus abstinerint, sponte ex terra nascentibus contenti, atque ita summa

Parva
quantitas
cibi sani-
tatem ser-
vat.

Exempla
veterum
id compro-
bant.

summa illorum vita fuerit, cum otio, sanitate, pace, amicitia & necessariorum in futuros usus negligentia. De Essenis scribit JOSEPHUS *libr. 2. de bello judaic. cap. 7.* eos ob simplicem victus rationem, vitamque bene ordinatam longissimam vixisse vitam. Recte APULEJUS sobrietatem dicit esse sapientiae omnis primum fundamentum, quod in se virtutum omnium semina continet. Nam sobrietas, temperantiae species, prudentiae comes est in perspicientia veri falsique, in delectu habendo rerum bonarum ac malarum. Ea fortis est, quippe quae voluptatum illecebris non capitur, & justitiam colit, quam in se primum servat, aliis etiam tribuit. A sobrietate itaque suam philosophandi rationem orsus est PYTHAGORAS, qui etiam certis de causis esum carniū prohibebat. PLATO in *Charmide* temperantiam vitae custodem appellat: In *Gorgia* praecipit, ut qui sanus ac beatus esse velit, hanc virtutem exerceat. Itaque quotquot sapientes olim habiti sunt, temperantissimi praedicantur, ut adeo ex hisce adductis pateat, sobrietatem vitae ac temperantiam & corporis & mentis functiones egregie promovere ac sustentare.

II. Ut ad nostra devolvamur tempora, multa prostant & ibi salubris & longae vitae exempla, quae temperantiae, seu fundamento, debentur. Sic THONNERUS Medicus Ulmensis *lib. VI. epist. 4.* rationes reddit, quare per octuaginta duos annos salvus atque incolumis, absque morborum molestia, & ullo catarrho, perseveravit. Nimirum, quoniam à pueritia cibi & potus appetitus moderatus ipsi fuerit, & accommodata diæta, quae optima senectutis est nutricula. Hac enim sanitatem sartam tectam conservari scribit, nec ipse in opiparis conviviis obrui se passus est ferculorum copia, sique pro votiva aliorum salute pocula irent in orbem, pessifero Germanorum more, pitissabat ea, transfusis alio vase reliquiis, sicque intercapedine octuaginta duorum annorum nullum sensit sanitatis dispendium. LEONHARDUS LESSIUS mentionem facit Ludovici Cornarii, Patricii Veneti, qui à juventute ad virilem usque aetatem erat valetudinarius, ita ut complurium Medicorum consiliis & medicamentis in cassum adhibitis, exigua ipsi spes diuturnioris vitae residua esset. Tandem re desperata, omissis omnibus pharmacis, observare coepit strictam diætā, neque copia nec quantitate nocentem, cujus etiam munere praeter omnem Medicorum opinionem, vitam ad annum nonagesimum quintum protraxit. Ratio in procinctu est, & solidam affert FERNELIUS *lib. I. de morb. causis p. 139.* hisce verbis: omnis cibus potusque moderatus & ad naturam accommodatus, spiritus nativum calorem corporisque substantiam tuetur & rescit, facultates omnes earumque functiones corroborat, concoctionem alimenti, distributionem humorum, aequabilitatem & excrementorum propulsionem, motus denique, sensus, mentisque vires integras incolumesque conservat.

III. Deploranda autem ferina & nocentissima illa ingluvies est, quae hodiernum invaluit, & tam altas inter mortales egit radices, ut foecundissima mater morborum vitaeque brevioris existat. Familiarissimae sunt & jam virtuti habentur, quae olim vitio, prodigiola ac vastae commensationes, non probro tot luxuriae instrumenta; tot in conviviis apparent fercula, quot ferme nocentis appetitus stimuli. Cibus per artem voluptatemque corrumpitur, inventae sunt mille conditurae, quibus aviditas excitatur, tanta ciborum ac potus ingurgitatio, ut barathrum,

sentinam atque cloacam faciant ex stomacho, qui debebat esse culina, unde etiam tanta morborum innumerabilium propullulat turba. Optime SENECA *lib. I. ep. 95.* de seculi sui luxuria non dissimili illi, quae hoc tempore veluti tabes in corpora invasit, *Vis numerare morbos, coquos numerare, & paucis interjectis, quae desiderantibus alimenta erant, onera sunt plenis, inde pallor & nervorum vino madentium tremor, & miserabilior ex crudelitibus quam ex fame macies. Inde incerti labantium pedes, & semper, qualis in ipsa ebrietate titubatio, inde in totam cutem humor admissus, distentusque venter, dum male adsuescit plus capere, quam poterat; inde suffusio lurida bilis, & decolor vultus, tabesque in se putrescentium, & retorti digiti articulis obrigescentibus, nervorum sine sensu jacentium torpor ac palpitatio sine intermissione vibrantium. Quid capitis vertigines dicam? quid oculorum auriumque tormenta? innumerabilia febrium genera? &c.* Immunes, pergit, erant ab istis malis, qui nondum se deliciis solverant, qui sibi imperabant. Corpora opere ac vero labore durabant, aut cursu defatigati, aut venatu aut tellure versata: excipiebat illos cibus, qui nisi esurientibus placere non poterat. Optandum, ut tanta luxuria saltim inter priscos Romanos regnasset, verum & ad nostra tempora manavit. Germanis, Anglis & Belgis voracitas quasi connascitur, eam implantant nutrices infantibus, infarciunt enim eos lacte ab incunabulis ad vomitum usque, laxa & lata hinc ventriculi latera nolunt esse vacua. Quam pessimus nutricum mos sit, nimio replere lacte debiles parvulorum ventriculos, ut flatibus ob id, verminibus, febribus, obnoxii evadant, jamdudum notatum à sacratissimis Medicis. Ipse HIPPOCRATES in ore habuit: *dum lactant, maectant.* In pueris & adolescentibus enormis ille ciborum appetitus putridas febres, & mali moris variolas, morbillos, ulcera, cutis foedas exulcerationes, narium haemorrhagias producit frequentissime. Juvenibus ob immoderatam victus rationem inflammatoria febres & tertianae, haemoptyses, abscessus, scabies, catarrhi, tussis, hypochondriorum vitia, solent esse familiaria. In vergenti aetate qui constituti sunt, propter idem vitium patiuntur saepius obstructions, cachexiam, pravam ventriculi digestionem, hydropem, haemorrhoidum fluxum & spasmodicas passiones in partibus abdominis, item febrem quartanam, icterum, calculum, podagram, similiaque, ut hinc verissimum sit illud sapientis, *plures occidi gula, quam gladiis, & SYRACIDIS illud locum habeat, capite 38. v. 33. Viel fressen machet krank, und ein unersätlicher Frass krieget viel Grimmen. Viele haben sich zu tode gefressen, wer aber mässig ist, lebet desto länger.* Quamvis autem haec omnia negari nequeant, utpote in ratione & experientia firmissime fundata, dolendum tamen est, & turpe dictu, saluberrimas modice vivendi regulas hodierno tempore ita Medicis ferme expultas atque explosas esse. Plurimi practicum gulae mancipia sunt, aegrorum luxui adulantur, ipsique aegrotantibus persuadent, ipsos neglecta diæta sanitatem recuperare posse solis pharmacis, atque medicinis, quas speciosis titulis ornare, & ad caelum usque ipsarum virtutes laudibus extollere solent. Qua indulgentia & fraude, non tantum benevolentiae atque favoris auram ab ipsis aegrotantibus captant, verum etiam morbo sic prolongato, crumenas suas implere student. At vero nec nostra hic mens est, ut tam rigidi & morosi esse velimus in concedendo quodam cibo; qui etsi paulo videatur deterior,

Unde multis producantur morbi.

Quod optime notavit Seneca.

Causa morborum infantum.

Puerorum.

Juvenum.

In vergenti aetate.

Prava methodus quorundam practicum neotericorum.

fame tamen & consuetudine eum imperante, & pauca quantitate admissus nocere nequit, sed culpamus maxime illud, quod non respiciant vulgariter quantitatem ciborum, & nullam attendant differentiam pro diversitate morborum, & individuorum aliarumque circumstantiarum inter victum plenum, tenuem mediumque. Prudentiores olim erant Veteres, qui in sanandis morbis, convenientis diætæ regimine plus certe efficiebant, quam ex fonte pharmaceutico delumtis remediis. Morbi enim originem atque indolem exacte perscrutabantur, & accurate respiciebant in morbo, an ex repletione, vel inanitione ortum suum nancisceretur. Ad illam expugnandam venæ sectionibus, motu, purgantibus, fritionibus, balneis non tantum pugnabant strenue, verum ante omnia inedia, abstinentia, motuque imperato cruditates copiosas, ceu morbi fontem extinguebant felicissime, ita, ut non raro sola abstinentia atque inedia gravissimos persanarent morbos.

Methodus
veterum.

Quomodo
methodica
secta ad-
di de me-
deretur
morbus.

Exem-
plum in
eum finem
à Celso
allatum.

Duo gene-
ra absti-
nentia.

Inedia
convenit
plethori-
cis.

Contentio
de pletho-
ria.

IV. Ex omnibus autem, qui hanc medendi viam amplexi sunt, maxime eminuerunt, hac curandi arte clari ipsi methodicæ sectæ addicti, qui laxum & strictum, sive repletionem & inanitionem vel abundantiam & defectum in morbis attendebant. Primus methodicorum ASCLEPIADES, qui 120. annos ante Christum vixit, ejusque discipulus THEMISON LAODICEUS, frequentissime morbos ab abundantia sola curabant abstinentia. Hujus curæ C. CELSUS meminit in operibus suis Lib. III. cap. 4. *Asclepiades, ubi agrum triduo per omnia defatigaverat, quartum diem cibo destinabat. At Themison nuper, non, quando cœpisset febris, sed quando desisset aut certe levata esset, cibum dabat; Thessalus eadem arte utebatur ianandi, ut etiam male audiret, quod tridua inedia ægros maceraverit omnes. Plerique ex antiquis inquit CELSUS tarde dabant cibum, sæpe quinto die, sæpe sexto, & id fortasse vel in Asia vel in Ægypto cæli ratio patitur. Et alibi idem: Optimum autem medicamentum est opportune datus cibus. Laudatus SENECA l. i. ep. 95. Antiqui Medici nesciebant cibum dare sæpius, & vino fulcire venas cadentes, & paucis interjectis: itaque nihil erat opus tam magna Medicorum supellectile, nec tot ferramentis atque pyxidibus. Ipse HIPPOCRATES in libr. de vet. med. agebat: fames plurimum potest in hominum natura ad sanitatem, & hic ipse erat accuratissimus in imperanda suis ægris diætâ. Abstinentiæ autem duo ipsis erant genera, alterum ubi nihil plane assumebat æger, alterum ubi non nisi quod oportebat. vid. C. CELSUS l. 2. c. 16. Placet autem nunc in sequentibus fusius recensere atque definire non tantum quibus in morbis Veteres usi fuerunt abstinentia atque inedia, verum etiam quo pacto & qua ex ratione ad sanandos quosdam morbos sit certissima & saluberrima medicina prudenter imperata abstinentia.*

V. Primum itaque inedia, aut tenuior parciorque victus indicatissimus est plethoricis robustis, ad præservationem multorum morborum. Ingens fuit huc usque contentio inter Medicos, an detur plethora, sive an sanguis bonus sive succus nutritius quantitate exsuperante gravis naturæ insensusque esse queat? In animo jam non est exquisitius hanc sententiam vel refellere vel affirmare, utrum sanguis ille, qui cum magna naturæ euphoria in foeminis singulis mensibus, vel in aliis excretionibus criticis excernitur, sit perfecte bonus, nulloque vitio nec crassitie quidem laboret? sufficit, quod adstruere & defendere velimus, quod sanguis & serum possit esse su-

perfluum, id est, majori quantitate peccare, quam receptacula & venæ capere, subigere, digerere & superfluum secernere queunt. Quod evenit in illis, qui copiam alimentorum succo bono turgentium subinde ingerunt, otio indulgent, nec motu ac transpiratione superfluum dissipant. Talis modi subjecta, quæ ob vasa, quibus præditi sunt, sanguine turgentia dicuntur plethorica, facillime incurrunt in morbos, dum facile à causa quadam externa, vel ab affectu animi, vel à præpostero usu medicamenti, aut vitio aëris in impetuofum motum sanguis exsuperans citatur, unde vasorum disrptiones, humorum stagnationes, inflammationes, multaque alia vitia gravissima oriuntur. Doctissime scribit FERNELIUS l. i. d. morb. causis pag. 139. *Quin etiam ea cibi exsuperantia, quæ vasa implet, nondum tamen vires premit, licet tota in optimum succum & in sanguinem faceffat, tuta tamen non est, sed maxime lubrica & periculosa.* Notabile est, quod scribit illustris Dominus de TSCHIRNHAUSEN in medicina corporis, dum inquit: *Observavi eos, quorum facies indies solito magis erubuit, continuante coloris hujus augmentatione, ex improvviso omnium cum admiratione (quia florida ejusmodi facies vulgo signum perfectæ valetudinis judicatur) in febrem illos, ubi postea multis, in quibus tale quid adverti ad malum, ni à consueta victus ratione abstinerent, certo ipsis eventurum auguratus sum; qui experientia postmodum ejus, quod antea credere noluerant, convictu obstupuerunt, quod nullo modo comprehenderent, unde ejusmodi de ipsis, satis & athletice valentibus, præfagire potuerim.* Et bene monet C. CELSUS l. i. c. 2. *quod si plenior aliquis, si coloratior, si speciosior factus est, suspecta habere bona sua debeat.* Facilis enim & expeditus ex plethora, sive superfluo sanguine, transitus fit ad gravissimos morbos. Multitudine enim sanguinis vasa si premuntur, insignis flatuum atque cruditatum fit proventus, obstructions accersuntur, viæ contrahuntur, sicque infarctum ac turgidum corpus minimeque pervium est, nec perflari nec ventilari potest. Hinc perinde, atque à multo oleo lucernæ flamma, natus calor opprimitur, & quasi strangulatur morbi- que frigidi, uti cachexia, macies, paralyfis, hydrops succrescunt, & quo diutius insedit abundantia, eo majorem corruptelam atque laborem contrahit, & ubi in summum excrevit, vasorum disrptiones, tam sanguineorum, quam lymphaticorum, fieri possunt, cum repentina ac inopinata morte. Quapropter rectissime HIPPOCRATES talem habitum periculosum & sine mora solvendum pronunciat. Plura autem sunt, quæ superfluum sanguinem congestosque superfluos humores demunt atque imminuunt, & hujus census sunt sanguinis missiones, evacuationes per alvum, & transpiratio liberior reddita sive per motum, sive per diaphoretica, frictiones, aut balnea. Quamvis autem hæc ipsa singularem præstare opem, in minuenda sanguinis quantitate, non eamus inficias, præstat tamen, ipsum respicere fontem, unde hæc noxia redundantia ortum suum habeat, & cum deprehendimus ex immoderato appetitu, ciboque copiosius, quam par est, ingestio, causam petendam esse, melius & longotutius præ omnibus aliis remediis, nisi periculum in mora sit, & in instanti aliquid efficiendum, commendamus abstinentiam, & parcum ac tenuem victum. Hic enim corpus pervium patensque reddit, obstructions expedit, secretiones excrementorum promovet, cruditates discutit, concoquit atque emendat, crassosque humores

Datur sanguinis & feri superfluum.

Quod observationibus probatur.

Incommenda ex superfluo sanguine provenientia.

Quanam superfluum sanguinem demant.

Causa plethoræ.

Effectus abstinentiæ.

res subtiliores reddit. Subtractione enim alimenti motus sanguinis atque spirituum in corpore plethorico vegetior & alacrior fit, quo deinde ulterius crudi & rudes humores attenuantur, expelluntur, & foras eliminantur. Motus enim est, qui emendat, corrigit, expellit, atque curat tam superfluos, quam qualitate nocentes morbosos humores. Scite itaque Veteres inediam dixerunt universalem evacuationem per accidens. FERNELIUS l.c. parsimoniam ac moderationem cibi ac potus mirifice commendat hisce verbis: *Longior inedia aut tenuior parciorque victus, non id apte refarcit & instaurat, quod tum nativi caloris, tum circumfusi aeris vi necessario dissipatur è corpore: proinde ex accidenti siccatur, quod in pabuli penuria nativus calor propriam corporis substantiam exsorbeat; at profecto corpus pervium patensque reddit, obstructions expedit, flatus, alvi feces, urinae, cerebri, omniumque partium excrementa movet & excludit. Atque si impurum corpus vitioso humore perfunditur, cruditates concoquit & emendat, tenues humores & inutiles exhaurit, aut halitu dissipat, crassos vero cuique parti tenacius inherentes proritat atque movet. Paucisque lineis interjectis hæc legimus verba: Hujus ope aliquando morbi periculosi & ancipites felicem eumque admirabilem exitum invenerunt, ad quem ars nulla dirigebat: idque multo mitius ac levius, quam dum corpus medicamentorum aliena qualitate laceffitur.* Ejusmodi itaque robustis & plethoricis personis peropportune injungere possumus, ut vel per unum totum diem, vel etiam duos per septimanam abstineant ab omni victu cibumque crassum evitent, vel semel tantum de die sumant cibum. HIPPOCRATES de dieta libr. 2. *Semel in die sumtus cibis extenuat & siccatur, alvumque sistit, quoniam animi calore (id est spiritus calore & agitatione à cibi abstinentia procurata) ventris & carnis humidum absumitur; quin imo optime tales plethorici possunt abstinentiam & subtractionem ejusmodi sustinere.*

VI. Præterea in vitiis stomachi, anorexia, quando ventriculus mole & colluvie serosorum humorum repletus est, deficiente calore ac tono, cibis opportune sublatus optima est medicina, utpote ventriculus humoribus pravis obsessus quodlibet ingestum in morbificæ causæ fomentum solet corrumpere. CELSUS in stomachi omnibus morbis interponendam abstinentiam esse pronunciat, vide l. IV. c. 5. SENNERTUS libr. III. pr. sect. 1. c. 5. docet, in quacunque ventriculi intemperie cibi & potus nimiam copiam vitandam esse, quæ ventrem gravat. Abstinentium etiam esse ab iis, quæ ingrata sunt, & adversa, item quæ tonum ventriculi laxant, quandoquidem onere atque saburra liberato ventriculo medicamentorum stomachalium atque balsamicorum vires in spirituscentia chyli promovenda & tono roborando mirifice adjuvantur. In cachexia seu malo corporis habitu, qui facile fit, quando longo morbo vitiata corpora inutiles ac copiosos cibos assumunt, *abstinere æger ad minimum debet uno die; deinde ab exiguo cibo incipere, quotidie adjicere, donec ad justum modum perveniat. Præter hæc convenit ambulare locis quam maxime frigidis, sole vitato: per m. nus quoque exerceri. Si infirmior est, gestari, ungi, perfricari, si potest, maxime per se ipsum, sæpius eodem die, & ante cibum, & post eum, sic, ut interdum oleo adjiciantur quædam calefacientia, donec insudet.* Videatur CELSUS l. 3. c. 22. Quod hydropem autinet, eleganter CELSUS cap. 21. scribit: *facilius in servis, quam in liberis tollitur; quia, cum desideret famem,*

stim, & mille alia tædia, longamque patientiam, promptius iis succurritur, qui facile coguntur, quam quibus inutilis libertas est. Sed ne hi quidem, qui sub alio sunt, si ex toto sibi temperare non possunt, ad salutem perducuntur. Ideoque non ignobilis Medicus, Chrysippi discipulus, apud Antigonum regem, amicum quendam ejus, notæ intemperantiæ, mediocriter eo morbo implicitum negavit posse sanari. Optima methodus est sanandi cachecticos & hydropicos, si spirituscentia humorum ac sanguinis promovetur, & crudi superflui humores digeruntur atque evacuantur. Quo nomine commendatissima est fames atque abstinentia à cibis, item assumptio remediorum martialium, amarorum, aperientium & spirituosorum, quæ juncta cum inedia efficacissimam vim possident. Veteres Medici docebant, pituitam caloris opera in venis perfici, per moram concoqui & in laudatum sanguinem transire. Est enim phlegma sanguis deminute coctus ut loquuntur, qui post accuratam elaborationem partibus nutriendis inservit. Sinendum itaque, ut calor in tam laudato opere se exerceat, id quod cibus continuo ingestus interturbat, ad quod maxime conferunt inediæ iis valde salutare, qui dulcis vel acois humoris pituitosi copiam habent in toto corpore collectam. Ob id recte HIPPOCRATES famem præcipit carnes humidas habentibus, quoniam humoribus etiam crudis jucundius, fruitur calor, quam recenter ingestio cibo. Icterus, qui commode ad cachexiam referri potest, & ex crassitie sanguinis, atque glandularum hepaticarum & vasculorum biliariorum obstructione nascitur, peropportune sanatur quoque abstinentia, quoniam dum alimenta ad tempus subtrahuntur, sanguis majorem gradum subtilitatis ac motus acquirit, viscidæque cruditates collectæ attenuantur ac solvuntur, præprimis si medicamentis aperientibus amaris, sale volatili oleoso turgidis spirituscentia humorum procuratur. CELSUS in cachexia ictericia primo die abstinentiam ægro commendat, secundo alvi ductionem. *Quidam medici, inquit, purgationibus omissis, per eos cibos, qui extenuant, hoc etiam consequi dicunt.*

VII. Ad viscerum obstructions scirrhusque, gravissimorum morborum causas, modicus cibus, isque facilis, una cum aperientibus temperate spirituosus medicamentis accommodatissimus est. MERCURIALIS libr. 3. c. 24. de scirrhus lienis scribit: *de cibis in universum dicendum, quod commendatum invenitur ab Avicenna, optimum esse perferre jejuniū; & THEOD. PRISCIANUS l. I. c. 15. inchoandam hujus mali curam à jejuniō & patientia esse asserit.* In colica contumaci & crebrius redeunte, maxime, si à pituita secundum Veteres vitrea & infarctu viscosorum humorum est, parcus cibus, cum clysteribus deterfivis, intermixtis carminativis, sale volatili oleoso & sulphure anodyno plenis, omne sanationis punctum ferme absolvit. In passione iliaca tam à stagnatione excrementorum, quam ab ilei inflammatione nata quietem cum inedia commendatam sibi habeant ægri; quies enim spiritus alias dicto in morbo pervagantes ac spasmodicas contractiones excitantes in pacato servat motu. Inedia majorem alvi fecum viam non liberam invenientium quantitatem præcavet. COELIUS AURELIANUS continendum esse jubet ægrum in loco modice calido & lucido in quiete ac inedia; *cujus consilium inquit MERCURIALIS l. III. c. 27. de ileo. & ego maxime amplector, præsertim ut æger abstineat à cibo & potu, nam quia tum non licet emittere excrementa, id saltem curandum est, ut non fiant, vel*

Optima
methodus
sanandi
cachecticos
& hydro-
picos.

Icterus
curandi
methodus.

Viscerum
obstructiones
& scirrhus
quo pacto
curen-
tur.

In quibus
consistat
curatio
ventriculi
vulnerati.

paucissima fiant. Porro in læsionibus & vulneribus ventriculi autores passim parcum præscribunt victum. Hinc SENNERTUS *Pr. l. III. p. 1. f. 1. c. 16.* victus sit tenuis, & parcissime æger edat, ne ventriculus cibi copia distendatur, sed corrugatus maneat & sic facilius conglutinetur; cibi vero ipsi in parva quantitate magnam alendi vim habeant, sint boni succi & coctu faciles.

Quomodo
morbi ab
impedita
corporis
perspira-
tione sa-
nemur.

VIII. Præterea si unquam, iis sane in morbis locum habet inedia, qui proveniunt à perspiratione corporis impedita. Eorum autem plures, iique magni sunt, siquidem ad vitam tuendam & ad æqualem humorum circulum temperiemque servandam, tenuissimorum vaporum exhalatio summe necessaria est, qua penitus cessante turbatur imo sufflaminatur respiratio, motioque sanguinis intestina ac circularis. Quanta autem commoda ex æquabili & proportionata ad habitum corporis, & alimentorum assumptionem evacuatione vaporum per poros corporis succrescant, quantave incommoda ex ea sublata oriantur, optime deduxit SANCTORIUS in *medic. stat.* Sapienter HIPPOCRATES *de morb.* inquit, quibus corpus probe transpirat, ii imbecilliores sed salubriores existunt, prompteque ad sanitatem restituntur; quibus corpus male transpirat, ii prius quam agrotant robustiores, cum vero in morbos inciderint, difficilius restituntur. Notandum enim, maximam morborum classem originem sumere ab impedita transpiratione, & per eandem quoque terminari. Impeditur autem à variis causis externis atque internis: externe aër frigidus densus & compressus, (qualis tempore pluvioso est & ubi luna plena fuerit) ventilationem humorum prohibet, partim constringendo cutis poros, partim evaporationi resistendo. Ad internas causas præter sanguinis crassitiem, ob quam ad glandulas cutis non pertingit ideoque à sero falso liberari nequit, pertinet quoque ejus quantitas, unde plethorici ut plurimum egent transpiratione liberiori, nec non hypochondriaci ac melancholici. Cæterum acrimonia feri stimulus delata ad cutis sensibiles fibras spasmodica harum constrictione exhalationem impedit, hinc quo sensibilia sunt corpora ac delicatiora, eo facilius horrore, rigore & transpiratione impedita, motioneque febrili corripuntur. Hinc nascitur vulgarissimus ille ac universalis morbus febris scilicet, cujus causam omnes fere Veterum perspirationem corporis impeditam dixerunt. vid. MERCURIALIS in *comment. ad libr. Hippoc. de arte p. 17.* Ipse HIPPOCRATES *libr. I. sect. 4. de locis in homine pag. 88.* eleganter id exprimit, dum scribit: *At vero febris hanc ob causam oriuntur, cum corpore tumidiore reddito, carnes intumuerint, pituita bilisque conclusa conquieverint, nihilque refrigeretur, neque exeat, neque moveatur, neque aliud quid subeat.* Meatum obstructiones febrium causas passim pronunciat GALENUS *libr. IX. de meth. med.* quare & omnia frigida, quia crassos faciunt humores, in cura damnat, laudat vero illa, quæ meatus obstructos referant, absque multo tamen calore. Etenim ex præpedita per corporis poros secessione feri falsi, hujus sordes variæ, maxime in externis partibus & inde concitant spasmos, unde familiaria febrium symptomata omnia dependent. Igitur omnia, quæ vitiosorum & stagnantium humorum quantitatem, ceu potissimam febrium causam demere, humores subtiliores reddere possunt, restitunt transpirationem suppressam, sanantque febrem. E contra quæ augment humorum quantitatem, graviolem febrem efficiunt. Patet jam ratio, cur Veteres Medicorum tam se-

vere ante paroxysmum febrium, vel etiam intermissionis tempore interdicanct victum copiosum. vid. HIPPOCRATES *aphor. 2. libr. I.* quoniam tunc semper exacerbatur febris, prolongatur, & symptomata ingravescent. Patet quoque causa, cur passim inediam tanquam expertum febris remedium commendent; quia breviores & faciliores reddit paroxysmos demendo quantitatem vitiosam, qua opprimi solet sanguis. Verissime CELSUS: *Initia febrium famem sitimque desiderant.* Idem alibi: *Nihil aliud fieri potest in febribus intermittentibus, quam ut primis diebus bene abstineat æger, dein sub decessum febris ejus, quæ gravissima est, cibos sumat.* Si quotidiana est, in versa pergit pagina, *triduo primo magnopere abstinere oportet, tum cibis altero quoque die uti.* Qua ratione febris quartana, quæ contumacissima est, & sæpius in ludibrium medentium transire solet, abstinentia sanari debeat, & quo modo illa ordinanda sit, fusius tradit laudatus jam CELSUS *l. III. c. 15.* Illud experientia constat, quod quo major appetitus in febribus intermittentibus est, & quo plus justo ipsi indulgemus, eo diuturniores, magisque rebelles fieri febres. Quo minor autem appetitus, parcioreque alimentorum assumptio, citius eæ terminantur. Et D. TSCHIRNHAUSEN *l. c.* febres, multosque morbos à transpiratione impedita factos sola inedia felicissime sanari posse perhibet, omnesque ferme autores practici victum tenuem & carniū expertem sive ut Græci dicunt, *ἀναμύσασθον* mirifice passim commendant. WILLISIUS in *tract. de febr. cap. 4.* scribit, se febres tertianas saltim purgatione ex infuso sennæ, & rhabarbari, victu tenui & topico febrifugo pectori aut carpi appposito sine pharmaci cujusvis alterius delictarii usu, brevi tempore sapissime curatas nosse, quin imo, inquit, gravidas, senes, item valde imbecilles, quorum vires purgationi non sufficiebant, solum tenuis diata cum periaptis tempestive adhibitis perquam feliciter sanavi. In febribus malignis & acutis tenuissimus victus locum habet, unde D. DONCKERS in *tr. de morb. punct. membr. 4. c. 12.* iuscula confortantia, nutrientia, ægris ab adstantibus ministrari solita, rejicit, cum observatum sit, ea in necem vel summum vitæ periculum ægros coniecisse. Inprimis autem crisis impeditur cibi accessione, quod bene notavit HIPPOCRATES *l. I. aph. 19. natura*, inquit, *cibis oppressa morbo succumbit, nec potest evacuationem criticam instituere.* Idem *libr. I. aph. 8.* Cum efflorescit morbi status, cumque ille viget maxime, tum pertenuissima diata uti perutilissimum est.

Methodus
Celsi me-
dendi fe-
brem.

Inedia op-
time sanat
febres.

Febrister-
tiana quo-
modo à
Willisio
sanetur.

IX. Scabies, elephantiasis & ulcera ut plurimum oriuntur à transpiratione impedita feri excrementitii, accumulati plerumque à voracitate maxime salforum viscosorumque & à ventilatione sanguinis ob defectum motus atque exercitii deficiente, unde inprimis vitam sedentariam otiosam insequuntur. Tali in casu, quando à cruditatibus oriuntur, abstinentia convenientissima est, adhibenda autem ex consilio CELSI *l. III. c. 25.* per triduum vel quanta sustineri potest inedia, paululum dein vires rescindendæ, & ducenda alvus, utendumque exercitatione, cursu, frictione; cibis autem sit sine pinguibus, sine glutinosis, sine inslantibus. Et bene monet HIPPOCRATES: *Paucus cibus & aquæ potus omnibus ulceribus maxime confert, magis tamen recentibus quam vetustis, nec non ubi inflammatio adest, aut impendet.* Quo magis enim vasa distenta sunt humore, eo copiosior sit suppuratio, quæ tamen ulceris curationi quasi ex diametro opposita esse videtur. Eadem ratione in catarrhalibus defluxionibus, coryza, tussi humida,

Scabies,
elephan-
tiasis &
ulcera un-
de orian-
tur.

Catarrha-
les fluxio-
nes unde
prove-
niunt.

Febris à
perspira-
tione im-
pedita ut
plurimum
ortum du-
cit.

Sympto-
mata exin-
de prove-
nientia.

Catarrha-
les fluxio-
nes unde
prove-
niant.

da, quæ ut plurimum ex suppressa ab aëris frigore vel inæqualitate transpiratione originem trahunt, abstinencia ab omni vel copioso victu utilissima est, quæ dictos morbos cum blanda diaphoresi, & potu parco, additis edulcorantibus ac lenientibus sanat. Mirandum enim, rheumaticos & arthriticos insultus ut plurimum præcedere appetitum nimium.

Curatio af-
fectuum
cerebri.

X. In affectibus cerebri, ab humorum copia vel crassitie oriundis, uti paralyti, affectibus soporosis, cephalalgia, melancholia, incubo, epilepsia CELSUS jubet vehementer exerceri, neque pingues carnes, neque vinum assumere, sed cibis uti post purgationem ex media materia quam lenissimis. In comitiali morbo, qui ex humiditate & nimia laxitate tubulorum cerebri provenit, jubet idem CELSUS *Lib. III. cap. 23. cibum post diem tertium, simul ac transit hora, qua concidit, dare. Neque sorbitiones his aut alioqui molles, & faciles cibi; neque caro, minimeque suilla convenit; sed mediæ materiæ; nam & viribus opus est, & cruditates cavendæ sunt &c. & ubi tertio die cibus datus est, intermittere quartum, & invicem alterum quemque; eadem hora cibi servata, donec quatuordecim dies transeant.*

Tempe-
rantia ar-
thriticis
convenit.

XI. Contra podagram, arthritidem & quoscunque affectus spasmodicos externarum partium periodicos, qui ut plurimum ex copia vitiosa humorum vel consueta sanguinis evacuatione suppressa oriuntur, multum valere temperantiam, docet experientia. SYDENHAM in *oper. p. 479.* item TAKIUS *pag. 97.* podagricis prandium saltem concedunt, & à coena abstinere suadent. VALESCUS de TARANTA refert in *Obs. med.* quendam, quotiescunque imminere paroxysmum sentiret, ab omni cibo & potu abstinuisse morbumque ita præcavisse. SCHENCK apud CASP. REJES. *camp. clyf. de opulento quodam Germano scribit, quod cum otio deliciis luxuque circumflueret familiarem huic viæ podagram arthritidemque adeo miserabilem contraxerit, ut non nisi duobus suffultus adjutusque famulis promoveri loco posset; verum lapsis sensim rebus ad paupertatem redactus est tantam, ut & opibus destitueretur & famulis, nec nisi frugalis mensa ad vitam superesset. Hac fretus & paulatim ipse solus incedebat, & à podagra prorsus deserebatur.*

Moderata
victus
rationibus
ingenii
entis in-
ruit.

XII. Tandem moderatus victus ingenii mentisque actionibus egregie inservit, dependent enim ex spirituum motu, hic autem à sanguine, qui quo copiosior crassiorque, eo crassiores suppeditat spiritus. Verum illud GALENI est, *animum sanguine & adipe suffocatum cæleste aliquid pervidere non posse*, & HIERONYMUS inquit: *Plenus venter non gignit sensum tenuem.* Eodem pertinet, quod scripsit THEOPHRASTUS *L. V. Philos. multum edere & carnibus vesci rationis & consilii usum adimit, animosque efficit tardiores, & eos immani quadam demencia ac stultitia complet.* Eleganter SANCTIUS: *Sobrius esto & memineris non temere credere, hæc sunt membra mentis.* A sobrietate Veteres sapientes, Pythagoras imprimis, philosophiam orsi sunt esumque carniū prohibuerunt, quod adeo multis probatum fuit, ut plerique inde facti cultiores melius sapientiæ latices imbiberint. Quapropter literarum studiosis maximeque temperamentis pituitosis commendandus modicus cibus est, vel ceteris paribus omnis cœnæ intermissio suadenda. Novi, plures stupidos præ nimia cerebri humiditate, sobrietati ac temperantiæ deditos factos sagaciores, ingenii vi mirifice adaucta. Postremo omnibus in morbis, & maxime, ubi ipse ventriculus quasi consulto à cibis abhorret, abstinendum

est ab alimentis. Debilis enim & ex morbo iners ventriculus conficiendo cibo ineptus est, ubi peccant adstantes, qui ex metu, ne fame pereat æger, hunc ad alimenta sumenda persuadent coguntque, in id solum intenti nec imbecillitatem ejus, nec morbi vehementiam curantes, unde major virium jactura quam ex morbo. Nunquam igitur invito ventriculo danda sunt alimenta, nec inclinato morbo, redeunte licet appetitu, copiosi vel crassi coctuque difficiles cibi ingerantur. Fiunt hac ratione maxime in febribus facile recidivæ, vel debilis ex diuturno morbo ventriculus novam inde morbi causam concipit, & ingesta in morbificæ causæ fomentum corrumpit. In debilitatis atque exhaustis à parco victu ad largiorem procedendum, & ubique ad virium robur in constituenda diæta respiciendum.

Invito
ventriculo
nunquam
danda
sunt ali-
menta.

XIII. Hisce jam deductis circa curationem vel præservationem morborum per inediam tenendæ sunt sequentes regulæ & cautelæ. (1) Non convenit juxta inediam protinus ad satietatem esse. Plurimum enim & repente replere ex sententia HIPPOCRATIS periculosum est. Prudenter monet CELSUS *Lib. II. cap. 16. Si sanis corporibus ipsa (satietas) est inutilis, ubi aliqua necessitas famem fecit, quanto inutilior est infirmo, nedum ægro.*

Regula
observan-
da.
Prima.

(2) In morbis considerandum, utrum superans an deficiens materia læserit; corruptum corpus sit an integrum? si copia male habet, vel corrupta est materia, tunc nullo modo melius succurritur, sin à defectu sanguinis, succi nutritii, spirituum morbus provenit, & acria alia peccant, inedia & potus denegatus pessimus, ubi magis locum habet ceteris paribus & appetitu urgente restaurantia alimenta & juscula, quare si imbecillitas est ab humorum copia juvat inedia, si à defectu, nocet. (3) Præstat sæpius modice, quam semel de die nimium assumere, quod valet maxime in exhaustis. (4) Vires subjectorum semper sunt respiciendæ. Senes inediæ patientissimi sunt, mox homines consistentis ætatis, nequaquam adolescentes, minimeque omnium pueri, atque omnino qui in ea ætate fuerint alacriores, teste HIPPOCRATE *libr. I. aph. 13.* nam puerilis ætas ad incrementum, & quia tenellum facile exhauritur, multo eget alimento. (5) Non inedia tractandi sunt, qui purgantibus, V. Sne, sudoriferis utuntur vel usi sunt, qui laborant, & corpus exercent, ubi multum humidi dissipatur, unde HIPPOCRATES *L. I. aph. 18. æstate inediam ægerrime ferunt, (ubi plus transpirant) hyeme facillime, mox vere, ut adeo ad victus τέμναρτον constituendam multum valeat temporum distinctio.* (6) Otiosi, qui minus perspirant, facilius ferunt abstinenciam, quam qui laborant, hinc foeminae magis quam viri. (7) In cibis eligendis vel instituenda diæta magna distinctione opus est, aliis semel de die præstat edere; aliis bis & parum; aliis, maxime togatis & animo excolendo in quiete deditis, sufficit abstinencia à crassis cibis & flatulentis, à carne porcina, anserina, caseo, lacte, leguminibus; aliis ad diem per septimanam, ad biduum vel triduum conducit abstinere, ad præservationem, liquidis tenuibus saltem concessis. Verbo: prudentia & judicio Medici ad rectum nostri remedii usum opus est ubique respiciendo ad individua, cujus ætatis, sexus, vitæ, generis, consuetudinis, quarumque sint virium, item morbum attendendo ejusque causam, naturam & conditionem, alias hisce neglectis plus detrimenti, quam emolumenti dabit inedia.

Secunda.

Tertia.

Quarta.

Quinta.

Sexta.

Septima.

MEDICINA SIMPLICISSIMA

ET OPTIMA,

MOTU, INEDIA, AQUÆ POTU.

§. I.

Quemadmodum natura, sapientissimum Altissimi DEI opificium, in admirandis suis quas præstat operationibus, non varia, non diffusa, sed simplex est, sive facili, simplici & compendiosa via, ratione ac methodo, in universo systemate, effectus & phænomena sæpius stupenda producit; ita, artificiosissimam corporis humani mechanicam, saluberrimum illud vitæ, sanitatis, atque depellendi morbos negotium, eadem facili & simplici methodo administrare, quibus interiora naturæ & artis medicæ, paulo accuratius, inspicere & perspicere integrum est, Philosophi unanimiter utique confiteri tenentur omnes. Hanc demum corporis nostri machinam, ex elateribus & tubulis varii generis, summa & divina arte sapientissime exstructam, ratione mixtionis vero ad extremam corruptionem pronam, solo & unico motu sanguinis progressivo, debitis rerum heterogenearum, per emunctoria convenientia, excretionibus, ab omni corruptione vindicari, quid, quæso, potest esse simplicius, quid unquam compendiosius? Denique illum ipsum progressivum in orbem abeuntem fluidorum motum, solo & simplicissimo systoles & diastoles solidorum elastico motu sustineri, id etiam est, quod omnes solertiores naturæ indagatores in admirationem abripit profundissimam.

2. Sicuti autem non tam multiplices multumque inter se dissidentes, sed perpauca afflictionum morbificarum esse causas, quæ non semper tam natura differunt, quam pro locorum quibus insident diversitate, corporis sani & integri functiones varie lædunt & labefactant, saniori pathologiæ qui addiscendæ operam dederunt, non ignorant; ita ad morbos depulsandos, non tam ingenti medicamentorum copia, sed paucioribus saltim ac simplicioribus opus esse remediis in propatulo est: cujus rei veritatem, pauperes & plebei, non pretiosis, sed solis domesticis à morbo convalescentes, luculenter dant evictam. Quinimo antiquissimis temporibus medicinam tantum paucarum herbarum fuisse, CELSI testimonio, in principio statim operis sui, proditum ac confirmatum habemus. Mirum igitur, nec profecto sapientior quisque admirari satis, quin credere vix poterit, quo fato & infausto fidere factum sit, ut ars hæc salutaris & simplicissima, nostris temporibus, tam immensa medicamentorum compositorum, ex variis, etiam dissitis regnis advectorum, pretiosissimorum, omnique arte vel paratorum aut excogitatorum mole ac farragine laboret, ut fere omnem exsuperet numerum; quorum, tot libri practici, pharmaceutici, botanici, omniumque fere regionum, urbium quoque præcipuarum dispensatoria, testes præbent locupletissimos.

3. Sed audiamus hac de re magni nominis ingeniique virorum judicia. Inter quæ digna sane sunt, ut animadvertantur, quæ in *limine præfationis* laudatus jam CELSUS proposuit, hisce ver-

bis: *Multiplex medicina, neque olim, neque apud alias gentes necessaria, vix aliquot ex nobis ad senectutis principia perducit. Et ipse HIPPOCRATES lib. de victu acutor. mox sub initio, valde laudat eos, qui paucis numero, bonis, & quæ morbo conveniunt, usi sunt medicamentis. Neque ad hujus veritatis dilucidationem, egregium illum ex PLINIO locum, quem adducit probatissimus ille scriptor JOH. LANGIUS in epist. præmittendum, quin potius in medium proferendum existimavi, lib. XXIV. cap. I. his extantem: Ex terræ nascentibus nata medicina. Hæc sola naturæ placuerat esse remedia, paratu vulgo, inventu facilia, ac sine impendio ex quibus vivimus. Postea fraudes hominum & ingeniorum captura officinas invenere istas, in quibus sua cuique vernalis promittitur vita. Statim compositiones & mixturæ inexplicabiles decantantur, Arabia atque India in medio æstimantur, ulcerique parvo, medicina à rubro mari importatur; cum remedia vera pauperrimus quisque cœnet. Quadrat huc itidem egregie DAMASCENI quod prodidit prudens consilium, aph. 34. Pharmaca pauca tibi tenenda sunt, quorum operationes & potestates jam multoties expertus es. Totius enim multitudinis notitia incomprehensibilis est, ac cum per singulas volueris inquirendo discurrere, multiplici diversitate distentus, nescies, cui debeas fidem adhibere.*

4. Equidem, si quid ego judicem, ex animo dicere debeo, artem nostram, cui utique divinæ laudes habendæ, si ad ulteriorem perfectionis gradum perducendam velimus, inter maxima obstacula, hoc palmarium removendum esse duco, ut tam innumerabilium compositionum, maxima ex parte ineptissimarum & natura pugnantibus ex ingredientibus concinnatarum, tam Galenicarum quam chymicarum penitus in exilium exacta mole; tutis, naturæ amicis, paucis & selectis, efficacibus tamen, plus simplicibus quam compositis, in medicina, cum ad corpora à morbis vindicanda, tum ad sanitatem amissam restituendam morbosque vincendos demum uti incipiamus remediis: quippe perpauca & selectis horum generibus, convenienti methodo usurpatis, & olim & nunc, præstantissimos Medicorum, famam ac summam medendo celebritatem nactos, fuisse usos, vitas & facta eorum inspiciendo cognoscimus. Quod pernobile utilissimumque argumentum quum nec dici, nec scribi satis hodie possit, pertractandum in præsentiarum summus: rebus nimirum simplicissimis citra magnam artem & laborem conquisitis, quotidianis, diæteticiis & quibus semper natura ad conservandum opus habet, tantam cum in morbis arcendis, tum sanandis, à sapientissimo Numine, inditam esse virtutem, ut sæpius his solis tutissime fidere, & sine alio magno medicamentorum apparatu, Medici officium explere possimus exactissime.

5. HIPPOCRATES, antiquissimus ille & re vera optimus disciplinæ medicæ Præceptor ac Pater, uti omnia fere, quæ in monumentis immortalis memoria dignis prodidit, summam in arte peritiam atque in observando solertiam spi-

rant,

rant ac declarant; ita observatu dignissimus est locus, qui primo statim libro, de arte §. V. in conspectum venit, ita habens: *Multi agri etiam citra Medicorum opem sanantur & sunt sanati, videtur autem, ut & qui Medicis non usi sunt in medicinam inciderint, per quam servati sunt; aut enim, pergit §. VI. inedia, aut copioso cibo, aut uberiori potu, aut siti, aut balneis, aut laboribus, aut quiete, aut somno, & vigilia convaluerunt.* Quo prælusi loco, venerabilis Senex, complures agrotantium, citra opem Medicorum, citra peculiarem medicamentorum apparatus, remediis familiaribus convalescere posse luculenter testatur. Hæc vero, non alia sunt, quam quæ classis rerum à GALENO sic dictarum non naturalium, quibus homo ad sustentandam vitam & valetudinem carere nequit, completitur, ut sunt: inedia, sive abstinentia à cibis, victus largior, uberior potus, sitis, balnea, labor sive corporis motus & exercitatio, quies denique & somnus. Quibus gravissimus auctor, magnam tam ad morbos præservandos, quam sanandos, vim atque potestatem, si quis recte iis utatur, attribuit. Nam, uti §. VII. subjicit, *quæ ex hisce rebus profuerunt, ob rectum usum profuerunt, quæ vero nocuerunt, ob id, quod non recte usurpata sunt, nocuerunt.* Sane, sapientissimum hoc & magni in praxi medica momenti assertum, paulo accuratiorem, quam quisque putaverit attentionem & diffusio-rem illustrationem meretur. Atque in hoc etiam nostra jam erit meditatio intenta, noster labor defixus, ut, quæ & quanta inhæreat rebus hisce, quæ in vita habentur familiares ac domesticæ, & juvandi & medendi virtus, omnibus subinde aliis medicamentis superior, appareat quam clarissime.

6. Ex dictis igitur diæteticiis nunc modo recensitis remediis, labor sive motus & exercitatio corporis, merito nobis primum differendi locum, quantum scilicet inde utilitatis, cum ad sanitatem conservandam, tum ad morbosas afflictiones avertendas propulset, suppeditare videtur. In limine vero hujus disquisitionis statim monendum esse duximus: inter omnis generis remedia sive diætetica, sive pharmaceutica quibus in medendo utimur, nullum dari, cui, vel sanitatem conservandi, vel amissam restituendi vim ab eorum natura absolute dependentem assignemus, sed tantum, relatione facta ad corporis humani naturam, eorum virtutes æstimandas venire; quare non sine ratione cum ipso HIPPOCRATE statuimus: *naturam optimam morborum esse medicatricem*, insuper addimus, vitæ & sanitatis conservatricem, à morbis præservatricem & præcipuam remediorum operatricem. Per naturam vero corporis humani, quæ fundamentum ac principium, juxta laudatum Senem, omnis sermonis sive demonstrationis medicæ est, nihil aliud, quam œconomiam motuum vitalium, progressivi videlicet, combinatorii, secretorii & excretorii, in machina mere hydraulica, sive ex tubulis diversissimi generis, vi elastica contractili & distractili donatis composita, intellectum volumus; qui solidorum & fluidorum motus, si recte, & secundum leges æqualitatis, sive temperamenti se habent, omnes functiones quas partes corporis nostri exercent, secundum regulam fiunt, & non modo vita, sed & integritas corporis & animi conservatur. Hos motus attente observare, siquæ à proportionem & symmetria abeunt, & nimii evadunt, vel etiam vacillant variis ex causis & deficient, idoneis remediis in ordinem & moderationem reducere, unicum & vere præcipuum Medici esse officium recte judicatur. Quam mirabilem vero hoc nomine & genere, res supra ab HIPPOCRATE recensitæ, motus machinæ nostræ ab ordine & regula deflectentes, in ipsam moderationem & æquabilitatem redigendi, potentiam habeant, quantumque inter eas maxime motus valeat, id nunc paulo pressius declarabimus.

7. Complures ex desidi, otiosa & laboris experte vita, præsertim si paulo pleniori victu utantur, inque primis sub cœlo inclementiori, inordinata animi perturbatione & ex neglecta venæ sectione, in difficiles diuturnas & obfirmatas ægritudines incidere; cujus generis quam maxime sunt pathemata spasmodico-flatulenta, hypochondriaca, colica, hysterica, item scorbutum, cachexia, nimix hæmorrhagiæ, lentæ febres & cutis descædationes, immanes etiam dolores qui sæpenumero quoque ex calculo proveniunt, experientia quotidiana obvium est & compertissimum. Quos omnes dictos affectus, à nimis tardo, lento & difficili sanguinis & humorum circulo ac progressu, & exinde impeditiori facta fluidorum utilium sequestratione, humorumque vitalium, per excretionem inutilium depuratione, causam & ortum repetere, identidem, qui puriori pathologiæ præceptis instructi sunt medicis, non potest non esse notissimum. Solus vero conveniens corporis ejusque partium motus & exercitatio, eo præ aliis gaudet beneficii genere, ut æquabili & plane naturali, sive naturæ amico modo labascentem & deficientem solidorum & fluidorum motum excitet & hac ratione saluberrimas & valetudini conservandæ necessarias secretiones & excretiones, eamque præsertim, quæ fit per illud fere catholicum cutis emunctorium promoveat, atque adeo dictas chronicas passiones, quæ omnes à stasibus, stagnationibus, infarctibus viscerum & nimis ad certa loca sanguinis congestionibus pronascuntur, non modo feliciter avertat, sed & præsentis efficacissime vincat atque expugnet.

8. Sunt quidem nobis, ex remediorum maxime diaphoreticorum, sudoriferorum, confortantium ac spirituorum classe, multa in promptu, quæ etiam cordis & arteriarum motum augendo, circularem sanguinis & humorum progressivum motum, neque minus ab eo dependentes secretiones & excretiones adjuvant; sed non æque tam secunda, tam facili, tam æquabili & naturæ amica ratione, ac ipse motus & corporis exercitatio, id præstant. Nam hic sine violentia, sine addita interne humoribus quadam materia præcalida æstuante, salino-sulphureo-volatili, orgastica, qua polent sudorifera, operationem suam, citra virium jacturam exerit placidissime. Deinceps id peculiare & eximium habet motus remedium, præ diaphoreticis & sudoriferis, quod in arbitrio nostro positum sit, virtutem ejusdem, pro rei natura & circumstantiarum ratione minuere, temperare atque intendere, quod à medicamentis intus sumtis, quorum operatio non est in nostra potestate, expectari nequit. Præterea etiam ob id, motus corporis, cum aliis de prærogativa contendere potest, quod præter evacuationes, vires & robur corpori non secus ac animo addat, appetitum emortuum resuscitet, languentem erigat & digestionem vacillantem confirmet, blande videlicet spirituscentiam sanguinis & humorum promovendo; id quod à plurimis aliis medicamentis, usu familiaribus, sperare nemo unquam poterit.

9. Habemus hac in re, quam maxime, experientiam & auctoritatem veterum Medicorum suffragantem, qui quidem tanta medicamentorum compositorum & igne chymico excoctorum copia, quæ nostra ætate in pharmacopoliis conspicitur, carebant; sed, re vera, ejusmodi diæteticiis, inter quæ primas corporis motus & exercitatio tenet, plus certe, si ingenue veritatem fateri licet, in medicina præstabant, quam nostri temporis Medici, innumeris suis pharmacis. Quot autem modos & species motuum, ad tuendam & reparandam, pro cujusvis corporis natura & statu, valetudinem excogitaverint, id quam optime, ex eleganti illo libro, quem doctissimus Medicorum MERCURIALIS, ex Veterum consignavit monumentis, & artis gymnastica nomine insignivit, conspicitur. Nos jam potiora, inter

inter innumera ex veterum probatissimorum Medicorum scriptis adducere volumus loca, ut hinc incomparabilis hujus remedii efficacia, ejusque laus & encomium abunde eluceat. HIPPOCRATES enim *lib. I. de diata* aperte scribit: *Homo edens sanus esse non potest, nisi etiam laboret*; & in eodem libro, ceu regulam sanitatis universalem inculcat: *mensuram motuum pro mensura ciborum semper esse estimandam*. Neque hujus asserti ratio intellectu difficilis est; quodcunque enim corpori ingeritur, eadem fere mensura, si istud non amplius augeatur, per evacuationes debet egeri, quas vero motus corporis convenienter institutus, præ aliis omnibus, egregie promovet ac moderatur. Spectant huc verba GALENI, quæ *commentario, in hunc aphorismum*, habet: *Exercitatio omnium vitiosorum, qui in corporis profundo sunt, humorum purgationem supplet*. Cui sententiæ calculum addit AVICENNA *lib. I. Fen. c. I.* his verbis: *Possent homines, si debito tempore, exercitio ac labore uterentur, omnibus Medicis ac medicamentis carere*. Intellige venæ sectione, purgantibus, sudoriferis, diaphoreticis, aperientibus, incidentibus, attenuantibus; quippe horum virtus omnis motui inest.

10. Consideratione porro dignissimum est, quod præter evacuantem, laudatum nostrum remedium, roborantem quoque virtutem possideat. Partibus enim imbecillibus, ipso HIPPOCRATE teste, tam internis quam externis robur adjicit. Hinc *Sectione IV. aph. 71.* laborem articulis & carnibus cibum esse prodidit: & *lib. de diata §. 38.* perhibet: *laborem siccare & corpus robustum facere*. Nec non *lib. I. de diata §. 40.* deambulationem & alvum, & corpus, & ventrem siccare ac firmare, affirmat; *lib. II. de diat.* autem in nimis alvi fluxibus, eam commendat. Cui gravissimo Auctori nostro adspicatur PLUTARCHUS *Oper. Tom. II. p. 130.* ita eloquens: *usus sermonis quotidianus, mirum dictu, quam utile sit genus exercitationis, non ad sanitatem duntaxat, sed etiam ad vires reparandas*: & CELSUS *lib. I. cap. 8.* & passim in suis operibus, claram vocem in stomachi vitiis, qui videlicet in ejus resolutione consistunt, magnopere commendat. Et profecto laudem suam, eximium hoc motus remedium, quo probatissimi viri & Medici illud affecerunt, suo jure meretur, ut etiam quasi medicinam universalem, & præservatoriam & curatoriam ipsi inesse recte putaverint. Hinc gravissimus ille Auctor & Philosophus, VERULAMIUS *lib. IV. de augm. scient. c. I.* ita differit: *vix aliquam in morbum inclinationem inveniri, quæ non exercitatione quadam propria corrigi possit*. Et PECHLINUS, *lib. II. obs. 34.* hæc habet: *Nulla corpora morbis minus obnoxia reperies, quam eorum, quæ à prima statim infantia, motu gladiatorio, palæstrico, firmitatem sibi contraxerunt, viriūque robur, quod quum in seram ætatem extendant, immunitatem sibi à morbis procurant; quod infinitis obvium est exemplis*.

11. Inter omnes vero motus species equitationi primum concedendum esse locum, & sana Medico ratio dicitur, & ipsa experientia confirmat. Siquidem, totius corporis tam internas quam externas partes, æquali succussione afficit, & motum ac circulum sanguinis, in primis per mesenterium & viscera abdominis, qui ordinario fere difficilis est, procurando, mesenterii glandulas referando, tonumque viscerum & stomachi roborando, in malo sic dicto hypochondriaco, hysterico, cachexia, hydrope, ac febribus lentis mirabilem sane præstat opem. Primus fere omnium, ORIBASIUS, magnas sanandi partes equitationi tribuit, quod vel sequentia loca indicant: *lib. IV. enim c. 24.* hæc perhibet: *Equitatio magis, quam omnes reliquæ exercitationes corpus præservat, stomachum & sensuum organa confirmat, eaque reddit acutiora*. Et, in capite de equitatione, ita scribit: *Si vehementer impellatur equus,*

quamvis totum corpus laboriose concutiat, tamen aliquid utilitatis affert; siquidem magis, quam omnes aliæ exercitationes, corpus & præsertim stomachum firmat. Ex recentioribus vero nemo rectius de equitatione, ejusque in medendo viribus, ipso SYDENHAMIO differuit: hinc in *Oper.* in malo hypochondriaco, & passione hysterica, non satis laudare ejus usum potest. Meminit enim sacerdotis malo hypochondriaco vehementer correpti, qui sine alio pharmaco, sola equitatione pristinum acquisivit vigorem, & *ibid.* hæc refert: *multi mihi sanguine juncti, tabidi & phthisici, multum terrarum, equo vectore, peragrantes, ex meo consilio, sanitati sunt restituti, medicamentis aliis frustra adhibitis*.

12. Verum enim vero, cum nullum, etiam efficacissimum & tutissimum, si quis eo recte utatur, remedium sit, quod non præpostero ejus usu, plus noxæ quam levaminis afferre possit: ita etiam id ipsum, de exercitio corporis, si imprudenter suscipiatur, tenendum esse animadvertimus. Nam plura nobis, intra aliquot annos, innotuerunt exempla, ubi valde imbecillis hominibus, hæctica & phthisi laborantibus, vel quorum, à morbo præcedente, vires & humores vitales penitus exhausti & consumti fuerunt, fortior motus, lignorum videlicet cum ferra scissio, ac sectio, improvide fuit commendatus, quos dein in animi deliquium, quod brevi excepit mors, collapsos fuisse perspeximus: motus enim paulo fortior, licet vires restauret, eas tamen adhuc sufficientes, licet quodammodo suppressas requirit. Quin, varia dantur motuum genera, quorum quædam sunt fortiora, ut cursus, venatio, pilæ lusus, armorum & palæstrica exercitia; quædam mediæ naturæ, ut ascensus scalarum, vectura in curru, equitatio paulo validior; quædam sunt leviora, ut equitatio lenta, lectica, deambulatio, frictio, vox clara. Quas diversas motuum species, pro virium mensura, proportionem, & corporum robore, vel debilitate, circumspectum oportet Medicum ordinare & præscribere. Quod discrimen & observationem, ipsos Veteres, inque primis HIPPOCRATEM animadvertisse, video: nam, *lib. de intern. affect. Sect. 33.* splenetico ægro, si validus fuerit, per tres dies, ut ad ligna secanda cogatur, consulit. Et *libro cit. §. 28.* Si potens est cachecticus, inquit, *luctetur summis humeris & laboret per circuitus multos in die*. Et CORNEL. CELSUS *lib. I. cap. 2.* dum ad valetudinem integram servandam, varia motus genera commendat, inter hæc ascensus quoque & descensus mentionem injicit; nimirum qui quadam varietate, ut inquit, *corpus movet*; addit: *nisi corpus perquam imbecillum est*.

13. Præterea & certum tempus, si quis exercitatione, præsertim paulo fortiori, pro remedio uti velit, observare convenit. Nam, nec mox ante cibum, nec mox post eum sumtum utilis est, quia concoctionis opus inde perturbatur; sed commodissime absoluta concoctione, matutino tempore, hora quarta vel quinta à cibo, instituitur. Juxta HIPPOCRATIS enim effatum: *Deambulationes matutine extenuant, & quæ circa caput sunt, levia, agilia & prompta efficiunt, alvumque solvunt*. vid. *lib. Epidem. VI. Sect. 4.* Siquidem peracta concoctione ciborum in primis viis, & succi chylosi distributione per totius corporis venas facta, perspiratio sive excretio inutilis, qui per cutem fit, humoris, longe liberior atque expeditior reddi, & motu quam facile augeri potest. Demum, si quis exercitationis remedio recte uti velit, & hoc servandum esse monitum arbitror, ut, pro cujusvis laborantis corporis & morbi natura, determinatus & proportionatus modus & mensura, in eo præscribatur. Si virium satis est, in obfirmata chronica passione, diutius corporis labori & exercitationi est insistendum. Novimus melancholia hypochondriaca ad furorem usque affectos,

affectos, peregrinatione facta, per pedes, viginti imo triginta miliarium fuisse sanitati mentis & corporis redditos. Novimus etiam lenta equitatione, ter vel quater de die per dimidium horæ facta, duorum mensium spatio, atrophica & lenta febre extenuata corpora integre restituta.

14. Præter motum & corporis exercitationem HIPPOCRATES, superius citato loco, ad valetudinem conservandam & amissam, sine Medicorum vel potius medicamentorum usu, restituendam, plurimum inedia tribuit. Neque id assertum, clarissimis rationibus & indubia experientia desinitur: nimia enim edendi intemperantia sive ciborum ingluvie, complures & valde difficiles ac diuturnas passiones, inter quas hysterica & hypochondriaca primas merito tenet, cum suis quæ ipsam comitantur & excipiunt pathematibus; item, quæ ex nimia sanguinis vel succorum pravorum abundantia nascuntur morbi, progigni comperitissimum est. Recidivæ quæ post febres intermittentes sanatas frequentissime fiunt, vix aliis causis, ac vegetiori appetitui largiorique cibo sumto, præsertim si accedat ex frigido & ex septentrione spirante aëre, prohibita transpiratio, debentur. Cachexiam, hydropem, scorbutum & morbos capitis, affectus soporosos, ac paralyses, à sanguinis & succorum, ob nimiam voracitatem in vasis congestorum copia, ceu genuina & proxima causa proficisci, rationali pathologiæ & therapiæ dediti quam optime noverunt.

15. Profecto nullum corpus, plus morbis obnoxium, difficiliorisque sanationis est, quam copiosis & impuris succis repletum; adeoque peritissime CELSUS lib. I. c. I. scribit: *corpora, quæ more athletarum repleta sunt, celerrime & senescunt & ægrotant.* Neque deficit ratio: nam, quando supra modum, ac ventriculi & intestinorum vis motrix & peristaltica concoctionem maxime adjuvans, ferre & subigere potest, cibus ingeritur, multæ emergunt cruditates, atque magna humorum vitiosorum colluvies, quæ primis viis inhærens, ructus, flatus, borborygmos, inflationes, hypochondriorum tensiones, alvi constipationes & interdum nimias fluxiones suscitatur, ingignitur. Quanta autem mala & damna, ex vitiis primæ digestionis, in viscera reliqua corporis redundant, & quam graviter inde omnium partium functiones lædantur, nemo rectius, quam Medicus sanioribus philosophiæ rationalis dogmatibus instructus, pernoſcit.

16. Quamvis vero major cibi copia probe concocta fuerit, in corpore scilicet firmitate & robusto, nihilo tamen secius nimia succi chylosi, & quæ ex eo producit sanguinis exuperantia, sive plethora, ad multas & graves affectiones sternit viam amplissimam, in quo etiam Veterum constans & unanimis semper fletit sententia. Ratio quoque est in procinctu: nam nimia humorum copia resistendo, vim cordis, arteriarum, aliorumque tubulorum motricem, lyftalticam, elasticam, quæ regit in tota machina vitales motus, progressivum & circularem, quo utilia retinentur, inutilia excernuntur, minuit ac labefaciat, quo inde in laxioribus & imbecillioribus, inferioribus præsertim, & multum remotis à corde partibus, inque vasis maxime venosis, stagnationes, humorum decubitus, infarctus, obstructions, corruptiones, & impetuosæ etiam interdum ad removendas eas, à provida natura, cum fortiori strictione & spasmus institutæ motiones proveniunt; quæ omnia, totam œconomiam animalem perturbant.

17. Quum vero hæc innumera fere mala, primam suam à nimia ciborum appetentia, victu pleno & largo, ducant & trahant originem; quantum utilitatis & salubritatis ad ea avertenda & sananda, in parco & tenui victu, abstinentia per aliquot dies à cibo, sive inedia repositum sit, quisque clara & sana ratione instructus, quam facile poterit intelligere. Quapropter, non

Frid. Hoffmanni Oper. Tom. V.

sine, sed certe cum magna & fundata ratione, Medicorum antiquissimi & optimi scriptores ad custodiendam vitam & sanitatem, morbosque avertendos id remedium non satis laudare & commendare possunt.

18. In confirmationem hujus, placet saltem pauca adferre testimonia. Ita HIPPOCRATES, lib. de morb. it. VI. Epidem. aperte scribit: *sanitatis studium, non satiari cibis.* Et alibi: *nihil magis ad sanitatem facit, quam non satiari cibis & impigrum esse ad labores.* Item: *si quis pauca edat nullum morbum experietur.* Et libr. de prisca medic. ita fatur: *fames plurimum potest in hominum natura, ad sanitatem.* Eadem pariter est CELSI sententia lib. II. cap. 16. hæc tradentis: *non ulla res magis adjuvat laborantem, quam tempestiva abstinentia:* addit, *intemperantes homines apud nos, sibi cibi tempora, modum curantibus dant.* Sic PLINIUS lib. XVIII. cap. 5. longe utilissimam esse ad sanitatis conservationem, in cibis temperantiam affirmat. *Ut enim, inquit, tempestiva abstinentia, summas in secunda valetudine partes sibi vindicat: ita quoque in adversa plurimum momenti obtinet; sanat enim plenitudinem, nimirum obesos, pituitosos, vitiaque ex pituita nata, apoplexiam, epilepsiam, comata, vertigines & id genus alia.* Et SENECA, lib. I. epist. 95. hæc habet notatu digna: *Antiqui Medici nesciebant cibum dare sæpius, & vino fulcire venas cadentes: itaque nihil erat opus, tam magna Medicorum suppellectile, nec tot ferramentis & pyxidibus.* Philosophi Plato, Zeno, Socrates simplici victu, tenuique diætâ consensebant. De quibus PORPHYRIUS lib. IV. de abstinentia, testatur: *quod carnibus abstinerint, sponte ex terra crescentibus contenti; atque ita summa illorum vita fuerit cum sanitate.* Et PLATO in Charmide, *temperantiam vitæ custodem* appellat.

19. Neque nobis desunt literarum monumentis inscripta exempla virorum, qui à prima ætate valetudinarii fuerunt, & sine ulla medicamentorum ope, pariori victu, moderata diætâ, & abstinentia ab omni repletionem potus & cibi, egregie valuerunt, & ad octuagesimum, imo nonagesimum & ultra annum, sub vigore mentis & corporis vitam produxerunt. Nam uti doctissime scribit FERNELIUS lib. I. de morb. caus. pag. 210. *Inedia ac parior & tenuior victus, corpus pervivum patensque reddit, obstructions expedit, flatus, alvi faeces, urinas, cerebri, omniumque partium excrementa movet & excludit; atque, si impurum corpus vitioso humore perfunditur, cruditates concoquit & emendat, tenues & inutiles humores exhaurit aut halitu dissipat, crassos vero & cuique parti tenacius inhærentes proritat atque movet.* Ita abstinentiæ & inediæ tanta inest vis medicinalis, ut non modo in vitiis stomachi omnibus fere, in quibus eam CELSUS lib. IV. cap. 5. commendat, colluviem crudorum humorum absorbendo calorem & tonum deficientem restituat, sed & copiam seri impuri in reliquis corporis partibus evacuando solidorumque tonum ac elaterem restituendo, iis affectibus, qui ex nimia seri proveniunt abundantia, medeatur atque occurrat insignissime. Quadrat hinc pulcherrime aph. 59. Sect. VII. HIPPOCRATIS, ita habens: *corporibus præhumida carne præditis fames commendanda est, quæ exsiccat corpora.* HEURNIUS in hunc locum addit: *quia sensim & æqualiter totum corpus exsiccat.*

20. Ex hisce igitur dictis & adductis facile jam intelligi posse arbitror, quare in morbis capitis gravioribus, ut sunt: paralyſis, affectus soporosi, melancholia, incubus, epilepsia, Veteres inque primis CELSUS imo HIPPOCRATES lib. popul. VII. p. 858. *exercitium corporis & abstinentiam à carnibus, præsertim pinguibus, à vino etiam, maximopere commendarint.* Qui iidem auctores in morbo cachectico, icterico inque omnis generis cutis vitiis, ulceribus, scabie, elephantiasi, cibum paucum sine pinguibus, sine glutinosis, sine

infantibus, item aliquot dierum inedia ac sudorem per laborem corporis, præ omnibus aliis remediorum generibus mirifice extollunt. Vide sis CELSUM *lib. III. cap. 25.* Et THEOPHRASTUS *lib. V. philos. auctor est: abstinentiam rationis usum reddere, quia multum edere & carnibus vesci cum adimit, animosque efficit tardiores, & eos immani quadam dementia complet.* Minime vero opus esse autumo, in hujus rei illustrationem latius divagari, quum mihi liceat provocare ad meam ipsius experientiam. Nam ad obfirmatam luem scorbuticam, nec non eam, quæ ex impura venere nascitur, radicitus tollendam, imò ad ulcera cachecticorum cum summa corporis lassitudine juncta sananda, non tutius, non certius & quod majorem ægrotantibus opem tulerit remedium me unquam fuisse expertum plena fide testor, præter curam emaciantem, per mensem vel duos institutam, nimirum quæ in tenuiori victu & abstinentia à carnibus, præcipue pinguibus, motu corporis convenienti & loco potus decoctorum usu, ex lignis & radicibus temperatioribus cum aqua paratorum, interpositis idoneis laxantibus consistit.

21. Et certe, ut non dissimulemus veritatem, sed eam aperte & ingenue profiteamur, posset quidem quisque hominum bene & per totam vitam valere ac penitus omni sanguinis missione carere, si temperanter & moderate viveret, & pro ciborum mensura, convenienti corpus motu exerceret. Quum autem luxuriam & perditam ciborum ingluviem cum otio & desidio declinare homines nolint, ut potius saluberrima hæc remedia plures & fere omnes abhorreant; utique venæ sectione opus est, qua ad nimiam vasorum plenitudinem, quæ subinde præsens & subitum periculum minatur tollendam, ut sunt: apoplexia, hæmoptysis, phrenitis, peripneumonia, angina, febris synocha, inflammatio & spasmodicus intestinorum dolor, non dari potest facilius, præsentius & efficacius remedium; neque minus hac multæ diuturnæ & dolorificæ passiones, ut rheumatismi, arthritides, phthisis, pathemata hypochondriaco-spasmodica, calculus, ischiaticum malum, si in corporibus copiam sanguinis alentibus ac viribus satis constantibus convenienti tempore & modo administraretur, averti possunt quam felicissime.

22. Videmus etiam frequentissime, à nimia sanguinis copia, quæ minuendo solidorum elaterem, promptiorem alias ac liberiores sanguinis & humorum circulum reddit tardiores, salutare valde excretionem per transpirationem, per alvum, per urinam, item solennes & criticas sanguinis profusiones per uteri ac per ani venas fuisse suppressas. Neque tamen hoc loco, & hac occasione præterire & reticere possumus, quod nonnulli, nostris præsertim temporibus, efficacissimo hoc remedio cum damno ægrotantium sæpius abutantur, non considerantes, insignem esse differentiam inter plethoram ad vasa, quæ nimium distenta remorantur circulum sanguinis ut vires inde premantur; & inter eam, quæ à Veteribus dicitur plethora ad vires, in qua sanguis ebulliens vasa nimium distendit & liberum circuitum impedit: revera autem inopia boni & sinceri sanguinis adest. Quo posteriori casu, nimie & repetitæ sanguinis detractioes plus utique vires exhauriunt, stomachum infirmant, excretionem retardant & morbos sæpe insanabiles reddunt; igitur hac ratione, optimo & maxime innocuo huic remedio temerarie pessima fama infertur.

23. Missa perquam utili hac materia, ad aliud genus remedii simplicissimi, quod vulgo vilis habetur pretii, cui tamen maximam & prorsus mirabilem ad conservandam vitam & medendum, inexhausta DEI bonitas indidit efficaciam, nos convertimus. Et hoc est ipsa aqua communis, quæ uti omnium animantium corporum præcipuum est elementum constitutum, ita etiam summum medicamentum; cujus

uberiori potu, juxta locum HIPPOCRATIS citatum ægrotantium plures, sine Medicorum ope convalescunt. Saluberrimum hujus autem in medicina usum, antequam paulo pressius prosequamur, principia & ingredientia illa, à quibus proxime ejus in corpus humanum pendet efficacia, paulo accuratius examinabimus.

24. Primum autem monendum esse ducimus, nos non omnem promiscue aquam, quia magna inter eam differentia occurrit, ad salutarem usum commendare, sed eam potissimum, quæ limpida, levis, pura est, non heterogeneis multis sive alienæ naturæ partibus e. g. terreis, salinis imprægnata, sive ex fontibus sive fluviis vel ex pluviis desumpta. In hac ipsa tria potissimum medicam considerationem promerentur. Primo, humidum quod præcipuum formale & essentiale est hujus elementum. Dein, tenue illud spirituosum sive potius æthereum, quod intime partibus ejus immixtum hæret. Et denique, ipsum frigidum principium. Ab hisce utique singulis, magna & salutifera in animale corpus virtus redundat.

25. Sine sufficienti enim aquei elementi copia, nec vitam nec sanitatem consistere, nec ullum morbum sanari posse, iis plane qui interiora artis nostræ haud leviter attigerunt perspicuum est. Nam natura Veterum, illa vitæ conservatrix & morborum optima sanatrix, nihil aliud est quam sanguinis & humorum perennis progressivus & circularis motus, cujus beneficio, œconomiae vitali amica retinentur, quæ vero aliena expelluntur; ut hac ratione, ab interitu corruptibile corpus vindicetur. Quum autem hic ipse in orbem abiens motus per tenuissimum vasculosum animale contextum corpus, sine sufficienti liquido consistere nequeat, quam necessaria & vitæ utilis sit liquidi copia, jam constat planissime. Atque id etiam clarissime evincit experimentum, quo constat, in lacte humano quod non nisi chylus est, vel in sanguine arterioso septem partes aquei, & in sani hominis venoso, tres partes ejus ad unam partem solidæ & siccæ substantiæ contineri, quod si lento calore humidi facta fuerit evaporatio.

26. Unde manifestum evadit, liquidum, si quis sanus persistere velit, longissime superare debere solidum quod in cibus est, ne humores convenienti carentes fluxilitate inspissescant, in minimis vasculis secretoriis & excretoriis hæreant atque subsistant; & hinc inde salutaribus evacuationibus suppressis, copia sanguinis & seri impuri increfcens & liberam humorum circulationem impediens, diuturnas & periculi haud expertes concitet passiones, cujus generis sunt: morbus cachecticus, malum scorbuticum, arthriticum, nephriticum, neque minus hypochondriaca & hysterica pathemata, quibus quam maxime obnoxii sunt ii homines & præsertim mulieres, quæ pariori utuntur potu & desidi atque sedentariæ addictæ sunt vitæ: cum è contrario, eos qui copiosum tenue & humidum victum, juscula videlicet, cereviasias valde tenues, imò ipsam aquam puram & frigidam in usu habent, ac frequentius infusis herbarum temperatarum ex aqua calida utuntur, motuque ac clamore simul corpus exercent, ab omnibus fere morborum insultibus, tutos ac immunes permanere, experientia plane indubia edoceamur.

27. Equidem nos si quid judicare possumus, nulum, sive acutus sive chronicus sit, morbum sine sufficienti & tenui aqueo potu sanari posse, adeo ut huic præcipua & medicinalis virtus adscribi debeat, ingenue asserimus ac profiteamur. Nunquam cura febris, sive sit chronica intermittens, sive continua & acuta, sine largo satis aquæ, sive calidæ sive frigidæ, vel cerevisiarum tenuium aut pilanæ potu feliciter absolvitur; modo debito tempore, ordine & mensura subministratur. Nam sine humidi copia, vehemens ille,

ille, qui carnem & vires consumit mixturamque sanguinis temperatam destruit æstus, vix ac ne vix quidem sedari potest. Neque deficiente hoc, stagnationes & obstructions, quæ maxime febrium causam constituunt, solvi, neque excretiones & quidem cuticularem illam, qua potissimum id quod febrem fovet & concitavit expellitur, recte succedere posse, res est in aprico posita. Quippe medicamenta fere omnia, febribus compescendis motibus à Medicis dicata, ut diaphoretica, diuretica, incidentia, laxantia & roborantia, nullius fere effectus sunt, nisi ab humido copioso secundentur & promoveantur.

28. Equis est, qui sine salutiferorum fontium sive aquarum mineralium frigidarum & thermalium usu, tutius, melius & certius tollere, vel minimum minuere ac levare chronicas & difficiles passiones, quibus genus humanum subinde afficitur & cruciatur, majora denique mala avertere, vel quod præcipuum est ab ejusmodi morbis, corpora ad eos disposita, vindicare suis pharmacis specificis & arcanis audeat sibi que persuasum habeat? Harum nimirum & summa virtus aliis remediis in affectibus debellandis longe superior, sanæ rationi, ductui & ordini naturæ non modo convenientissima est, sed & per tot secula firma est stabilita experientia, ut profecto derisui se dent, qui vel ex ignorantia, vel ex affectu, hanc à sapientissimo Numine, generi humano providentissime gratis concessam medicinam flocci faciunt vel plane contentui habent.

29. Peropportunam nobis interea, hæc nostra, de aqua meditatio largitur occasionem, curiosam pariter ac utilem movendi quæstionem; utrum incomparabilis harum aquarum efficacia, eis quæ in visceribus terræ primario admiscuntur varii generis salibus & mineralibus, an aqueo potius elemento accepta referenda sit? Nos certe tuemur posteriorem sententiam, ita tamen, ut statuamus, ipsam aquam ab admixtis hisce rebus, quæ utique activæ indolis sunt, majorem vim poros intimius penetrandi, & obstructions referandi & excretiones promovendi acquirere, quia sine sufficienti vehiculo aqueo, parum admodum in dictis hæc præstare possunt morbis.

30. Alterum aquarum salutiferum ingrediens est ipsum elementum aëreo-æthereo-subtilissimum, quod intine ejus poris innatat, & immersum est, quo aqua nulla, præsertim quæ recens ex fontibus depromitur, antequam calore ejus maxima pars effugiat, caret, ita tamen, ut major vel minor ipsis insit quantitas. Ab hoc elemento dependet aquarum levitas, subtilitas & medicinalis poros penetrans ac roborans virtus. Quod ipsum etiam subtile ac spirituosum principium, quo acidulæ tam calidæ quam frigidæ copioso instructæ sunt, multum harum aquarum medicam virtutem adjuvat. Et quo magis aqua foeta hoc est elemento, quod maxime ex levitate & prompta evaporatione, nec non ex ingenti bullularum copia in vacuo prosilientium cognoscitur, eo salubrior est æstimanda, eoque aptior usibus œconomicis, in coquendis cibis, in extrahendis vegetabilium, radicum, herbarum per infusionem viribus evadit. Ad quod hoc notatum volumus: aquam, quo diutius coquatur, eo minus aptam esse ad extrahendam gratam & sapidam ex herba Thee, vel fabis Coffee substantiam; & hinc statim post primam ebullitionem, optime in hunc finem adhiberi.

31. Afferuimus, in ipso frigore aquæ limpidæ & puræ insignem ad medicum usum residere virtutem. Veteres Medicorum HIPPOCRATES, CELSUS, GALENUS, RHASES, potionem aquæ frigidæ plurimis & gravibus in morbis, ut sunt ardentes & cholericæ febres, magnæ infirmitates ventriculi & intestinorum, dolorificæ, flatulentæ, item quæ ex partium nervosarum resolutione & infirmitate oriuntur passiones, ut paralyses, ca-

tarrhi, rheumatismi, frequentissimo in usu habuerunt & laudabilem ejus in hisce morbis effectum prædixerunt, id quod ex eorum quæ posteritati reliquerunt monumentis abunde licet animadvertere.

32. Inter plurima vero quæ extant loca, perpauca saltem huc adducere placet. CELSUS *lib. I. cap. 8. iis, qui tarde concoquunt, & quorum ideo præcordia inflantur ac qui propter ardorem aliquem, noctu suire consueverunt, antequam quiescant, duos vel tres cyathos frigidæ per tenuem fistulam bibendo*, suadet. Et si meam ipsius experientiam interponere integrum est, ex imbecillitate ventriculi & intestinorum laborantibus, qui præcordiorum anxietates cum phlogosi & lassitudine, sanguinisque ebullitiones cum pulsu celeri & difficili respiratione fuerint passi, ante lecti introitum, solam aquam frigidam optimæ notæ paulatim assumendam sæpius optimo cum successu suasi. CELSUS *in præfat.* meminit Medici cujusdam CASSII, qui febricitanti cuidam & magna siti affecto aquam frigidam porrexit, qua protinus eam sedavit ac somno & sudore discussit. Et HIPPOCRATES *lib. Epid. VI. Sect. 4. adrefrigerandam calidam naturam, conferre dicit aquæ potum & quietem.* Neque minus laudatus jam CELSUS, *lib. I. c. 2. iis qui ex prava concoctione crudum sine præcordiorum dolore ructant, ex intervallo aquam frigidam bibere & se continere* commendat. GALENUS ad ardorem in febribus temperandam præbuit aquam frigidissimam ad satietatem; qui idem in colica quoque biliosa ejus usum non satis dilaudare potest.

33. Ceterum, illud certissimum est, quod hydroptæ longe melius valeant & maxime ab articularibus doloribus immunes degant, quam qui cerevisiis, vino & potibus inebriantibus utuntur. Namque meo ipsius testimonio, si quis dubitaret, confirmare possum, me ex aquæ puræ ac frigidæ usu & potu, valde tamen cauto & circumspecto, per aliquot annorum spatium, in levandis & sanandis obstinatis affectionibus, quæ vix ullo remedio cedebant, longe præstantiorem vidisse effectum, quam ex aqua calida sive simplici, sive in infuso usurpata; quemadmodum id superioribus annis habita dissertatione, *de potus frigidi salubritate*, fusius ostendi ac demonstravi, varia quoque perutilia quæ hic merito conferri merentur monita adjiciens.

34. Quemadmodum vero experientia, quæ optima veritatis medicæ est parens, habemus confirmatum, eos, qui supra modum & quotidie fere potibus spirituosius indulgent, capitis & artuum doloribus, rheumatismis, calculo, catarrho suffocativo & maxime effrenibus hæmorrhagiis esse obnoxios: ita, qui ab iis potibus abstinentes tenues potiones ipsamque frigidam aquam, vel vinum cum multa aqua dilutum in quotidiano usu habent, à vehementibus hisce malis immunes persistere, identidem observatione constat certissima. Possem omnino hujus asserti veritatem pluribus exemplis ac testimoniis confirmare, si instituti & brevitatis ratio id permetteret; ast, cum plane constet, me superioribus annis, ob ingentem & multiplicem in præservando & morbis oppugnandis utilitatem, aquam tanquam universalem medicinam, in peculiari dissertatione, non ita pridem Parisiis Gallico sermone redita, quæ ab iis qui medicam praxin intendunt atque intelligunt legi potest, plurimum commendasse, huic labori merito supersedeo.

35. Equidem omne frigidum naturæ humanæ, quæ temperato semper gaudet calido, ac humores valde fluxiles & tenues, motibus vitalibus aptos desiderat, nervosisque pariter ac membranosis partibus solidis, testimonio ipsius HIPPOCRATIS, valde alienum & inimicum habetur; neque ullum fugit, quam subita & gravia imo funesta à largiori potus frigidi haustu subinde fuerint damna oborta: hæc tamen omnia, de imprudenti & inconsulto frigidorum usu intelligenda

sunt; nullum enim, ut inter omnes constat, heroicum, nullum forte & magnæ in medendo efficaciæ remedium est, quo non possimus in perniciem corporis humani abuti. Calidum ipso teste HIPPOCRATE *Sect. V. aph. 16.* naturæ humanæ alias admodum amicum, carniuin laxationem, nervorum infirmitatem, mentis stuporem, hæmorrhagias, lipothymias quæ ejus sunt naturæ, ut mortis consecutionem afferant, iis qui eo diu multumque utuntur, inducit. Nam & calido & frigido sua juvandi & nocendi virtus constat, calidum videlicet tenues & fluxiles servat humores, partes duras & tensas emollit & laxat atque salubres movet excretiones; sed ubi jam æstus nimius adest in corpore & omnia in motu sunt ac fluxilitate, vires solvit & dissipat, vimque solidorum elasticam & systalticam vitalem subtrahendo valde nocet.

36. E contrario, frigus solidis partibus, ubi ab excessivo æstu & humido earum vis elastica systaltica, quæ regit maxime fluida & eorum motibus salutariibus præest, nimium relaxata & soluta est, elaterem, tonum ac robur restituit, intestinumque præcalidum sanguinis motum & orgasmum temperat, circumspecto nimium, tempestivo & moderato ipsius usu; qui ubi negligitur, & vel solidis nervosisque partibus rigore & spasmo affectis, vel subito & in nimis larga quantitate corpori æstuanti ac sudore diffluente ingeritur, incrassando humores, eosque circulationi per minima vasorum ineptos reddendo, frigidum utique perniciosissimum est.

37. Denique, iis rebus, quæ non procul quærendæ & quasi nobis domesticæ magna tamen virtute medicinali instructæ sunt, balnea quoque ipse HIPPOCRATES accenset; quorum virtus identidem ab elemento aquæ, coque vel frigido vel calido unice venit derivanda. Afficiunt hæc vero quam maxime integumenta corporis, cutim, & qui ei substernuntur musculos, tendines, vasa ac nervos; si in iusta temperie non sunt constituta, sed præter naturam nimis relaxata vel constricta: utroque enim vitio si laborant, mox totum corpus propter motuum nexum & conspirationem partium inde male afficitur, etenim internis partibus præter naturam se habentibus, ut videre licet in febribus, convulsionibus, affectibus spasmodicis, etiam externas partes & ipsam cutem ceu valde nervosam & sensilem in consensum rapi conspiciamus; unde non modo laborantibus externis, sed etiam internis partibus succurri posse balneis, ratio ac naturæ ductus suadet & experientia confirmat.

38. Miræ & fere ineffabiles sunt utilitates, quas balnea, quibus vel inferiorum partium, ut pediluvia temperata, vel superiorum, nimirum capitiluvia, ex aqua tantum dulci parata, accensemus, in doloribus, spasmis, contracturis, omnibusve partibus frigore & rigiditate affectis recte usurpata præstant. Adeoque quam insignes & eximias vires in morbis internis gravioribus & diuturnitate molestissimis, ut sunt affectio hypochondriaca, hysterica, colica, calculosa, in deliriis quoque, mania & melancholia mitigandis ac curandis, balnea temperate calida exerant, iis, qui praxin exercent & intelligunt optime cognitum & perspectum est. Quam materiam,

cum fufius olim persecutus fuerim in dissertatione: *de usu balneorum ex aqua dulci*, lectorem eo remitto.

39. Præter balnea calida vero etiam frigida peculiarem plane in medendo promittunt efficaciam. Romanam pariter ac alias gentes balneis olim frigidis, non tam delectationis & munditiæ, quam sanitatis causa usas fuisse constat: quod remedium in Anglia retentum fuisse, Buxtoniensia, quæ maximæ in sanandis morbis efficaciam perhibentur, inprimis testantur, quæ de re certe doctissimi Angli FLOYERI *tractatus de usu balneorum* evolvi meretur. Profunt autem quam maxime in affectibus paralyticis, inque malo hypochondriaco, hysterico, ubi ventriculi & intestinorum tonus solutus est, in malo ischiatico, rheumatismis, artuum & capitis doloribus, hujusque generis similibus. Neque exempla desunt melancholicorum pariter ac maniacorum balneo frigido curatorum, quale de mania curata *Clar. MICHELOTTUS in M. N. C. vol. I. obs. 102. pag. 191.* refert.

40. Suffragatur nostræ quoque sententiæ hoc in genere antiquitas. Nam *lib. I. cap. 5.* CELSUS inquit: *Neque his solis, quos capitis imbecillitas torquet, usus aquæ frigide prodest; sed iis etiam, quos assidue lippiudines, gravedines, destillationes, tonsillæque male habent; his autem non caput tantum quotidie perfundendum, sed os quoque multa frigida aqua fovendum est: præcipueque omnibus, quibus hoc utile auxilium est, eo utendum est ubi gravius cælum Austri reddiderunt.* Neque prætermittendus ex eodem Auctore alius de hac materia illustris locus, qui extans *lib. IV. cap. 5.* hic est: *vulgatissimum, pessimumque stomachi vitium est resolutio, id est, cum cibi non tenax est, soletque desinere ali corpus ac sic tabe consumi.* Huic generi inutilissimum balneum est. *Lectiones, exercitationesque superioris partis necessariae; item unctiones, fricationesque; hinc perfundi frigida, atque in eadem natæ, canalibus ejusdem subicere etiam stomachum ipsum, & magis etiam à scapulis, id quod contra stomachum est: consistere in frigidis medicatisque fontibus, quales Cutiliarum, Sumbruinarumque sunt, salutare est.* Quo loco aperte CELSUS profitetur, balneum calidum minime prodesse, ubi stomachi vis concoctrix fracta ac debilitata est, quam potius frigidum egregie excitat atque erigit.

41. Paucis ut dicam meam sententiam: exerit frigidum balneum quam maxime virtutem suam, tonicam & elasticam vim motricem partium solidarum, præsertim externarum, etiam ipsius stomachi atque intestinorum penitus solutam vel relaxatam restituendo, ut majori vi ac robore fluida regi & propelli per canales possint, inprimis ubi eorum infirmitas ex nimia humiditate vel excessivo calore, qui solvit tonum, oborta fuerit.

Certe notatu digna sunt quæ hanc in rem scribit HIPPOCRATES *de humid. usu §. 6.* item *lib. II. de dieta §. 35.* calido balneo corpus magis perfrigeratur, post frigidum potius concalescit. Sed hæc satis de hac materia. Possemus adhuc plura, ex ipsius HIPPOCRATIS supra citato loco, de jusculorum quoque medicamentorum mira in medendo efficacia adducere, si uberiores harum rerum evolutionem & disquisitionem, temporis pariter ac brevitatis studium permetteret.

VINI RHENANI PRÆSTANTIA.

PROOEMIUM.

*ernicialis
vinio tam
ulgi,
iam me-
corum,
queren-
copiam
med.o-
mdiver-
morum.*

Communis sed pernicialis est opinio non tam vulgi, quam ipsorum quoque Medicorum, ad sanitatis tutelam ac restitutionem copia diversissimorum remediorum opus esse. Quamobrem nullus finis est subinde nova & sexcenta inveniendi & componendi pharmaca, quæ revera plus in confusionem medentium, inque damnum ægrotantium potius quam in eorum salutem conquiruntur. Etenim si quis curatius paulo, unde pendeat vitæ, sanitatis & morborum ratio, scrutetur, certe perpauca esse, à quibus sanitas pendet, & quæ eam labefactatam restituunt, clarissime perspiciet. Nosse autem hæc ipsa, & exquisita prudentia iisdem uti, præcipua, quæ Medicum ornat ac constituit, sapientiæ pars est. Ego vero, postquam in ima medicinæ penetralia admissus sum, constanter hac fui in sententia, ad sanitatem custodiendam & morbos avertendos non opus esse pretiosis & magno labore & subtili ratione excogitatis remediis, multo minus eorum copia; sed sufficere huic scopo ea, quæ omnibus nota vulgaris & ad cuiusvis manus & potestatem sunt, per quæ ego speciatim intelligo v.g. aërem, aquam, motum, somnum, cibum, animique regimen. Horum tanta vis & potentia est, ut servare corpus, idque destruere & graves quoque morbos tollere recto ac debito usu possint. Optandum igitur vehementer esset, ut quisque medentium ad res sic appellatas à Medicis non naturales majori studio ac industria animum ac cogitationes componeret eorumque vires in sanandi negotio penetrando ostenderet, plus hisce ipsis sæpe profici, quam si ex remotissimis locis & materia humana nature plus inimica quam amica petantur ac desumantur tot remediorum classes. De præsentis id laboris suscepimus, ut præstantissimum vini & maxime Rhenani usum in medicina solida experientia non minus quam exacto ratiocinio suffulti demonstramus; nec non qua ratione omnibus celebratissimis, quæcunque natura vel ars largitur, medicamentorum speciebus vinum longe superius sit, & quemadmodum universalis medicinæ imprimis præservatoriae titulum optimo jure mereatur.

CAPUT I.

De præstantibus Europæ vinis eorumque natura ac facultatibus.

§. I.

*a deli-
tima
s offert*

Quidem animus est, Germaniæ nostræ vina & inter ea princeps Rhenanum ejusque indolem ac vires scrutinio medico hoc loco evolendi, atque usum in medendo ostendendi, nihilo minus neque alienum ab instituto neque injucundum fore judicamus, præcipua, quæ ex Europæ locis ad nostras terras exportantur vina recensere, & perpauca de eorum virtutibus quædam edisserere.

II. Ex omnibus autem regionibus delicatissima & valde generosa nobis offert Italia, ex quibus ma-

xime eminet illud vinum, quod ad Vesuvii radices nascitur, & Lachryma Christi nuncupatur. Alii quoque Virgineum illud idem denominant. Ratio denominationis desumpta est ex eo, quod ex selectis uvis & antequam calcantur more lachrymarum emanet; est valde potens, rubro colore splendens, odore suave, sapore subdulce & salubre, urinæ etiam vias mox invenit propter suam, qua imbutum est, tenuitatem.

*Vinum
virgi-
neum.*

III. In pretio quoque habetur Albanum ad Albam civitatem crescens, quod ægrotis non minus quam sanis commodum ac salutare est, transpirationem & urinam movens, prostatque album & rubrum.

Albanum.

IV. Inter primæ notæ vina etiam numeratur Muscatellinum Falsicorum, Vin di monte Fiascone, & notum est de hoc vino epitaphium cuiusdam bibuli positum à famulo suo: propter est est dominus meus mortuus est: gustu est gratissimū.

*Vin di
monte
Fiascone.*

V. Merentur etiam hic recenseri Vinum del Monte Bolzano rubrum, & muscatellinum Perusinum, quæ ambo non sunt incelebrata, & è civitatibus ejusdem nominis quotannis in magna copia Romam transportantur.

*Del monte
Bolzano &
Perusi-
num.*

VI. Ordo jam tangit Pucinum, antiquitati etiam notissimum. Largitur illud saxeus collis nomine Prosec in sinu Adriatici maris hodie Capo d'Istria situs, dicitur etiam Prosecker Reinfall; dulce est, caput non ferit nec mentem percellit, odore suave, fulvo nitens colore. Huic PLINIUS adscribit, quod Livia Augusta 82. annum attigerit, cum alio vino non fuerit usa.

Pucinum.

VII. Excellens quoque vinum est, quod non adeo procul à Vicentia progignitur, & Marcinum dicitur, podagricis præ cæteris innoxium esse perhibetur.

*Marcini-
num.*

VIII. In districtu Aquilejensi à Rosacio civitate Fori Julii nomen accepit Rosaceum Rosazer, nobile & præstans vinum.

Rosaceum.

IX. Nec silentio prætereundum est Vernacium, vinum generosum, quod nomen obtinuit à monte rubro Vulnetia in Liguria nunc Vernacia dicto, non modo in Italia, sed apud Gallos & Britannos notum.

Vernacium.

X. Spectant hic similiter Rhætica vina Germanice Veltliner, quia in Valle Tellina crescunt Ober und unter Veltliner Vin aromatique. His Augustum delectatum fuisse referunt: est vinum instar sanguinis rubrum, dulce, & subausterum in lingua relinquens saporem.

*Rhætica
vina.*

XI. Notatu huc venit dignum, plurima Italiæ vina & generositate & dulcedine superare alia: dependet autem dulcedinis nec non virium causa potissimum ex eo, quod in more habeant, vel ex uvis maturis selectis in aëre parumper exsiccatis ea præparare, vel ipsa recentia musta igne leni aquositate in auras emissa inspirare, & tunc fermentationi exponere. Hoc artificio vina majorem acquirunt dulcedinem, quandoquidem mustum, quo dulcius & spissius est, eo minus vehementem subit ebullitionem, quæ alias plerumque aciditatis nimiae genitrix est.

*Quare vi-
na Italica
sunt dul-
ciora aliis.*

XII. Causa porro tantæ in vino nobilitatis est ipse situs Italiæ, folique sulphurei natura, fervens enim solis ardor, & insitus terræ calor non potest non ad perfectam maturitatem & dulcedinem

Vina
Aſciuti.

uvæ perducere. Verum enim vero dantur in Italia etiam auſteriuſcula vina, dicta *Aſciuti*, quæ ex crudo parantur muſto, & proferuntur iis in locis, quæ ſeptentrionem ſpectant. Utuntur his magno cum fructu æſtate ferventiſſima, in morbis quoque præcalidis ad immodicum ardorem reſtinguendum.

Vinum
Creticum.

XIII. Ex Græcia Vina Cretica de Cyp̄o magnificæ famæ ubivis ſunt. Olim dicta Punica.

Le Vin de
Champagne.

XIV. Accedimus jam ad Galliæ vina, quorum præſtantia & nobilitas nemini noſtris temporibus obſcura eſſe poteſt. Omnium autem nobiliſſimum habetur *le Vin de Champagne*, quod etiam in pretio magno habent Magnates, ipſeque Rex eo utitur. Laudem meretur, quod gratum ſit ſtomacho, capiti & nervis non inimicum, citoque per urinam tranſeat, colore rubicundum eſt, delicati ſaporis propter acidi ſubtilis & ſpirituofi temperatam mixturam. (Optima ſunt Aix, Seteri, Roan.)

Burgundia.

XV. Huic ſecunda ſunt Burgundiaca, ex quibus optimum *Beaunſe* generoſum colore oculum perdicis æmulante *du Couleur de Perdrix* ſaporis grati, minus vaporoſum & melius tolerat aquam *le Vin de Champagne*.

Le Vin de
Paris.

XVI. Non etiam incelebre eſt *le Vin de Paris* præſertim ex maturis uvis confectum, tenue eſt ſed guſtui acceptum, aquæ mixturam non bene ſubit.

Vin de
Grave.

XVII. Ex Burdigalleniſt districtu optimum habetur Gravianum *Vin de Grave*, *Claretwein*. Dicitur *Vin de Grave*, quia ſolum eſt valde arenoſum. *Grave* enim Gaſconibus eſt arena; ſaporis eſt auſteriuſculi, caput & mentem minus percellit, nec non ſtomachi & inteſtinorum tonum egregie roborat. Præſantiſſimum *Vin de Pontac* quo Angli multum delectantur.

Aurelianenſia.

XVIII. Œſtimantur ſimiliter in Gallia Aurelianenſia, quorum alba dantur & rubra; ſunt vina generoſa, ventriculo proficua, ſed caput ferire ſolent.

Pictavenſia.

XIX. Notiſſima quoque ſunt Pictavenſia alba, quæ multum conveniunt cum Germanicis noſtris Rhenanis, tantum in eo inferiora hiſce, quod ſint crudiora.

Frontinianum &
Muſcat de
Lion.

XX. Denique etiam excellentiſſima inter Gallica ſunt Frontinianum St. Laurentii & vinum *Muſcat de Lion*. Illud dicitur ab oppido Frontiniano tribus milliariis Monſpelio diſtante, in Provincia Languedoceniſi, delicatiſſimum eſt, moſchi ſaporem & odorem referens. Hoc ita appellatur, quia Lugdunum deſertur, eſt rubrum, generoſiſſimum, ſaporis auſteriuſculi ſuavis moſchatellini, aquæ mixtura indiget ob nimiam generoſitatem.

Vin de
l'Hermitage.

XXI. Tandem ex Gallicis quoque vinum ſaluberrimum cenſetur vinum Eremiticum, *Vin de l'Hermitage*, creſcit inter Valence & S. Vallier, eſt rubellum ſubaſterum, & baccarum myrtilli ſaporem referens.

XXII. Hiſpania nobiles quoque alit vites, quæ ob maturitatem uvarum vina largiuntur pretioſiſſima.

Canarienſe.

XXIII. Canarienſe, quod hodie ex inſulis Canariæ, maxime Canaria magna apportatur; circa Palma generoſiſſimum creſcit.

Malvaſium.

XXIV. ſpectat huc quoque Malvaſium, quod ex grandibus rotundis uvis magnæ præſtantia exprimitur. Vinum hoc diutius durat, & ubivis gentium per mare devehi poteſt, quod non omnia vina perferunt.

Malacenſe.

XXV. Vinum Malacenſe, ſive vinum Secco Germanice *Seſt*, forte quod in ſaccis vel utribus

in Hiſpania circumferatur, vino Canarienſi eſt pinguius.

XXVI. *Petriſimonis* illud, quod dicitur, præcipue ad urbem Gualdalcazar naſcitur, ex palmiſibus Germanicis per Petrum Simonis ante 200. annos in Hiſpanicum ſolum deductis, ibique tranſplantatis. Memorabile enim eſt, vites uniſ regionis in alias, ob diverſi ſoli naturam & æeris, ſoliſque ſtatum fructus diverſæ naturæ producere. Ita vites Germanicæ in Hiſpania uvæ producunt longè dulciores, fracta nempe & emollita ibi eorum aſperitate. Ita etiam vites Malvaticæ ad nos delatæ multo delicatiora vina exhibent, quam in Italia.

XXVII. Ager Andaluſiæ prope Xeres admodum vini ferax eſt; ſed hæc vina Xerena ſunt auſteriuſcula, minus dulcia & citius etiam aceſcunt in calidis locis, hujus generis ſunt etiam, quæ circa Madrid proveniunt.

XXVIII. Alonenſe ſive *Alicante*, in regno Valentia rubrum eſt ſed craſſum, palato quidem acceptum at ſtomacho minus utile. Huic non diſſimile eſt genus illud, quod noſtratibus dicitur *Vin de tinto*.

C A P U T II.

Hiſtoriam Vinorum Germaniæ maxime Rhenani nec non Hungariæ ſiſtit.

§. I.

Curioſum & perquam dignum obſervatione eſt, dimidiam Germaniæ partem boni vini eſſe genitricem, eam videlicet, quæ plagæ auſtrali propinqua eſt. Quæ vero ad ſeptentrionem ſpectat, vel plane vinorum experts eſt, vel ea valde acida & tenuia profert. Sique conſulimus Geographicas tabulas, ſpeculari ibi jucundum eſt, eas omnes ferme regiones ad alendas vites & bonum vinum producendum inidoneas eſſe, quæ ultra 51. gradum elevationis poli ſitæ ſunt; ita nempe, ut quo remotiores ſint à polo ſeptentrionali, & meridionali viciniore, generoſius & fortius vinum producant, imbecillius autem acidoque magis prægnans, quo plus à meridie ſunt averſæ. Ratio obſervationis hujus merito debet ab eo deſumi, quod loca ſeptentrioni vicina non tantum à ſole æſtum experiantur, neque ær tam tenuis & ſubtilis, terraque minus ſpongioſa tenera ſulphureque vegetabili turgida ſit (quæ omnia ad ſœcunditatem vegetabilium in genere, & maxime uvarum maturitatem requiruntur) quam in meridionalibus calidioribus regionibus. In hiſ enim non modo plantæ, ſed & ipſa animantia tam domeſtica quam ſylveſtria ob auctiorem nutritionem majori incremento majorique perfectione ſapore quoque gratiori eminent, omnibus iis, quæ tellus ſeptentrioni ſubjecta profert. Quemadmodum autem Hungaria præ ſœcundiſſimis Germaniæ regionibus primas tenet & tam vegetabilium quam animantium fertilitate atque nitore celebratiſſima eſt, ita etiam vites fructum ferunt, qui nobilem & generoſum largitur potum vinis Italicis & Hiſpanicis non poſtponendum. Germaniæ autem vinis merito præferendum eſt, ejuſdem mentionem perpaucis facere inſtituimus, enumerando ea, quæ celebritate undiquaque feruntur. Eſt autem primi ordinis Toccavienſe, quod in cacumine alti montis, qui in ſinu auri mine-

Petriſimonis.

Animadverſio in vites.

Vina Xerena.

Alonenſe.

Vin de tinto.

Dimidium Germaniæ profert vinum, altera pars vini experts eſt.

Ratio alla-

Hungariæ fertilitas.

Vinum Toccaviense.

mineras fovet, non adeo insigni copia provenit, sed delicatissimum, & hinc tantum ad aulam Augustissimi Imperatoris deferitur. Spectat huc quoque Toccaviensi Secundarium, quod crescit in districtu Toccaviensi. Notabile vero hoc tempore multa adulterata & ex passulis ac saccharo parata vina vendi pro Toccaviensibus. Secundum locum obtinent Tarnaviensia, & circa *Gross Waradein* provenientia.

II. Huic non secundum est, quod in oppido Sancti Georgii singulari artificio paratur, & vocatur *Sanct Georger ausbruch*: maturiores ibi & semi-passos à minus maturis separant ex uvis acinos, ex quibus (non secus ac Italia cum Lachryma Christi) exprimunt non magno pondere succum, qui promanans & asservatus gustum summa suavitate afficit, & propter gratam nervis & spiritibus generositatem, totius œconomiae animalis vires & functiones egregie recreat ac sustinet.

III. Vilioris autem sunt conditionis imbecilliora nempe & saporis paululum acidiusculi, nec non adeo caro pretio venduntur, quæ ex reliquiis uvarum in dicto Sancti Georgii oppido conficiuntur.

IV. Deinceps laudem etiam merentur Oedenburgensia & Presburgensia vina, quorum præcipua sunt circa Rustum & Neosidlentem lacum: *Klein und Gross Gubelein*, *Staner Goldbenger*, hæc in arenosis locis proveniunt. Notandum vero, quod hæc vina magis dici mereantur Austriaca.

V. Præterea magna adhuc copia vinorum in Hungaria existit, diversisque in locis vitis colitur, neque incelebre est vinum illud Hungaricum rubrum, quod circa urbem Budam *Ofen* terra largitur.

VI. Quod attinet naturam & virtutem Hungaricorum vinorum, certe ea pereximia est: nam generositate & salubritate non cedunt Italicis vel Hispanicis, atque paucam acidi tartarei salis quantitatem obtinent, præsertim ea, quæ superius laudavimus, spiritu autem sulphureo grato eoque aromatico abundant.

VII. Equidem non eam, quam merentur, famam hætenus obtinuerunt. Fallax enim non modo vulgi, sed & Medicorum fuit persuasio, vinum Hungaricum insalubre morbum Hungaricum progignere, cum tamen potius dira hæc lues pauperes, imo peregrinos, exerceat, & ab aquarum impuritate, aëris inæqualitate & intemperantia longe rectius ejus origo derivetur. Nos potius vinum hoc saluberrimum judicamus ipsa teste experientia: neque enim gravat dolore caput etiam liberalius haustum, modo non fuerit adulteratum, neque nervos afficit, ut potius affectibus spasmodicis, podagræ, scorbuto, hypochondriaco malo præ Rhenano aliisque, quæ admittunt multum acidi in mixtura, longe sit accommodatius.

VIII. Tandem (atque boni vini character est) agilitatem vigorem & levitatem largius potum in toto corpore relinquit, manifesto documento, ex ejus usu spiritus nec non vitalem circulum excitari, & insensibili modo hoc, quod gravat, quod molestum est sanguini, evacuari.

IX. Quoniam vinum Hungaricum præ aliis quam plures peculiare proprietates gerit, de iis etiam paucis mentionem injicere hoc loco allubescit. Singulare vero illud est, quod non bene aëris accessum ferre queat: mox enim si aut vitra aut dolia ad aliquod spatium fuerint vacua, colorem & cum eo saporem mutat atque amittit. Protinus nimirum ejus color albus ipsi quasi

proprius, transit in flavum seu fuscum, & clarum, quod erat vinum, turbidum evadit, idque sæpe paucis diebus. Experiantur talem inversionem maxime vina ignobiliora, acidum admixtum soventia, & quæ recentia sunt: immunia autem ab hac labe persistunt generosiora Toccaviensia, Sancti Georgii *Ausbruch*, Item Rustianum, præsertim si soboles fuerint boni autumnii. Hæc non diminuto sapore, colore & virtute longos annos perdurant, tantum quod dulcedinem, quæ recentibus est propria, cum senio quodammodo deponant. Quare non opus est hæc vina sulphuris fumo imprægnare, vel dolia repleta servare. Memorabile autem est, quod ab admixtione vini Rhenani aut alterius acidi, omne Hungaricum illico non tantum alteretur, sed & ab indole sua plane deflectat & corrumpatur. Quin imo observavimus, vinum ipsum Hungaricum vetus paululum acidum non esse novo addendum. Unde cum tanta difficultas sit pro implendis doliis vina exacte similia in promptu semper habendi, nisi periculum præsertim in ignobilioribus Hungariæ vinis subire velimus, elegans stratagemata inventum fuit, ut silicibus nempe mundis repleantur dolia loco vini, quod exhauritur, ita qualibet Hungarici vini species salva & incorrupta usque ad ultimam guttam diutissime permanere solet. Ratio autem quare hæc vina præsertim acidum in mixtura soventia, ignobiliora puto, ad aëris accessum tam subito mutantur, neque acidi vini vel alterius heterogenei mixturam tolerare queant, nulla alia est, quam quod acidum in sulphureum vini principium agere soleat, adeoque hoc pacto crasin, texturam (ex qua proxime resultat sapor, color & virtus) penitus invertat ac destruat: actio autem & reactio acidi sulphure per liberioris aëris aditum, qui intimius admissus activa sua expansiva virtute diversas partes, quibus fluida constituuntur, varie invicem agitat, multum promovetur. Quamobrem etiam spiritus tartari, mellis, mannæ, qui acido & oleoso principio constant; item liquor ex spiritu vitrioli, nitri dulci & spiritu cornu cervi compositus, si per tempus libero aëri exponantur, induunt protinus colorem ex flavo rubicundum. Denique vina Hungarica hoc habent peculiare, quod melius conserventur & successive generosiora evadant, si tantum à primis facibus crassioribus liberentur, postea vero illis non amplius spoliuntur, in fundum sedentibus particulis tartareis, *sie sollen über der Mutter liegen bleiben*.

X. Progressum jam etiam facimus ad nobiliora Germaniæ vina, inter quæ principem locum tenent ea, quæ ad fluvium Rhenum, Moenum, Mosellam & Nicrum proveniunt in locis præsertim montosis, soli meridiano oppositis. Hæc enim longe salubriora iis sunt, quæ in planitie & à fluminibus disitis terris proferuntur. Unde celebria sunt vina Rhenana, Moenana, Neccarina, Mosellana. Quemadmodum autem vina inter se etiam unius ejusdemque districtus differunt (nam quævis terra distinctas suas mineras, cerevias, ingenia hominum varia, nec non vina cuivis loco propria progignit) ita Rhenanum per longam & constantem annorum experientiam & consensum tam Physicorum quam Medicorum & gratia & salubritate reliqua omnia exsuperat. Unde Germanicorum vinorum princeps non immerito debet censeri. Intelligimus autem per Rhenanum illud, quod ad Rhenum nascitur.

XI. Ex hisce palmam refert Hocheimense, quod à Principibus & magnatibus maximi

Methodus servandi vinum Hungaricum.

Quare Hungarica acidum non admittant.

Hungarica à primis facibus liberanda.

Loca montosa præferunt salubriora vina, quam quæ in planitie crescunt.

Rhenanum exsuperat omnia.

Hocheimense.

æstimatur, nomen suum adeptum est à pago Hocheim, cujus soli partus existit, qui pagus è regione urbis Moguntiae non ultra dimidium miliare ex altera Rheni parte situs est. Et notabile est, quod vina, quæ non procul ab hac urbe cis Rhenū reperiuntur, reliquis Rhenanis sint meliora.

Cochei-
menſe.

XII. Secundum locum obtinet Cocheimense à pago Cocheim ita appellatum, bonitate non multum inferius Hocheimense.

Rhinga-
viensia.

XIII. Cæterum Rhingavia nobilis & delicati vini abundat copia, non tamen ejusdem in quolibet loco virtutis: præstantissimum habetur Rudesheimense à pago Rudesheim, prope Bingam nomen adeptum, quod spirituositate, & ob acidi defectum gratia reliquis Rhingaviæ vinis præcellit: exprimitur enim ex uvis peculiaris speciei dictis *Orleans*, *Draminer*, quæ tantum in hujus pagi certo monte & in nullo alio Rhingaviæ loco perfectam maturitatem & dulcedinem acquirunt; hæ uvæ Ruslingensibus sunt majores & dulciores.

Johannes-
bergenſe.

XIV. Laude quoque eximia extollitur Johannesbergenſe, & id quod vineæ Erbacum inter & Hattenheim prope fontem dictum *Marckbrunn* elargiuntur.

Ravenha-
lenſe &
Neuen-
dorffenſe.

XV. Subsequitur postea Raventhalenſe & Neuendorffenſe, hæc magis quam recensita sua aciditate palatum excitant, & jure meritoque inter meliora numerantur.

Mogun-
tiaca &
Rhinga-
viensia
aciditatem
præ se fe-
runt.

XVI. Reliqua vina, quæ Geiſſenheim, Winkel, Oeftrig, Elfeld, Ober & Unter-Wallef &c. proferunt, etiam encomio digna sunt, prædictis tamen aliis Rhingaviensibus prærogativam cedunt. Pleraque titulo Moguntiacorum insignita vina, & Rhingaviensia aciditatem præ se ferunt; & memorabile est, quod maxime pars ex vite acinos proferente exiguæ dimensionis Germanice *Rusling* dictam originem suam trahant. Hæc intensiori solis egent fervore, ut uvæ perfectæ donentur maturitate, & vinum palato gratum ac spirituosum porrigant: secus enim ob non depressam sufficienter aciditatem usui & sanitati minus conveniunt. Illud autem commodi habent hæ uvæ, quod vina dent valde durabilia, quæ sub annis semper meliora & generosiora evadunt, & grata aciditate gustum adficiunt; id quod huic effectui assueti magni æstiment. Dicta hæc loca quotannis, mille quingenta plus minus dolia vulgo *Stuckfaß*, quorum quodvis capit 16. amphoras (*Eymer*) elargiuntur: nihilo minus bonum Rhenanum caro emittitur pretio, neque vix in his terris, præsertim Misnia, Thuringia, Saxonia, Marchia, Silesia venale proſtat. Vetus enim Franconicum pro veteri Rhenano venditur, maxima vero pars vini proprie sic dicti Rhenani jam descripti, Coloniam, in Belgium, Angliam, Hamburgum, Lubecam navibus excepta Rheno & mari transfertur. Causa etiam cur tam rara avis in his terris sit verum Rhenanum, hæc videtur, quod hujus districtus homines blando & dulci sapore plus quam grato acido delectentur. Hinc etiam œnopolæ egregie fallunt, dum sub nomine Rhenanorum Franconica, quæ gratiora existimantur, non sine culpando lucro imperitis divendunt.

Copia iflorum
quotannis pro-
lata.

Cur ve-
rum Rhe-
nanum ra-
tum sit.

Bacchara-
censia vina
viliora
sunt Rhin-
gaviensibus.

XVII. Post Rhingaviensia descendimus ad Baccharacensia, hæc illis sunt imbecilliora, nec tam diu durant, nihilo secius gratia & salubritate sese commendant. Procreſcunt ex solo valde nigro, scissili lapide, qui egregie radios solis concentrat, repleto. Invaluit mos hic locorum gratiam quandam hisce conciliare vinis, dum nempe vastis doliis musto repletis subdunt car-

bones vivos, quorum calor dolium (cujus partes mirum in modum exterius ob siccitatem dehiscunt,) penetrat, nulla tamen in terram prolabente guttula ob humiditatem, à qua superficies interna concava dolii protegitur, ne asserculi doliarii aridi se deserant. Hoc labore efficitur, ut mustum non tanto impetu effervescat, quo pacto aciditas avertitur, & gratus sapor resultat: Germanice vocant *geſeuerte Wein*. Salubritati tamen vinorum ita minus consulitur, & ea, quæ liberæ fermentationi fuerunt commissa, sanitati magis amica censentur.

Quo pacto
corrigan-
tur.

XVIII. Notari meretur, quod vina Rhenana hæc omnium excellentissima in terris ditioni subiectis Serenissimi & virtute incomparabilis Electoris Moguntini, ex Illustrissima Familia Lib. Baronum de Schönborn, Domini nostri clementissimi, benigna natura ex amplissimo penu suo dispenset.

XIX. Cæterum circa Rhenum & non procul ab eo terra etiam perbelle vineis luxuriat, ex quibus non ignobilis notæ vinis cellæ ditantur: ut sunt Hembachica, Pfeddershemica, Riderbergica, Affenſteinensia, Oppenheimensia.

XX. Dicendum etiam aliquid est de Palatinis, crescunt magis in terris planis ex uvis variarum specierum sapidis succulentis: ætate fiunt multum spirituosæ, sed sulphure vaporoso caput gravant. Hujus generis sunt Wormacensia, & præcipue *die Liebenfrauen Milch*, Forſtiana, Edinghofensia, Ambacensia, Roteriana.

Vina Pa-
latina.

XXI. Neque silentio transmittenda sunt, quæ in amoenissimo districtu inter montes & hortos vulgo *Bergstraßen* succrescunt. Hæc prædictis sunt tenuiora, oligophora, ob acoris & spirituositatis mixturam non ingrata, propter celeritatem etiam per renes & alia emunctoria transitum, caput & nervos minus afficiunt, & salubritate præstantissimi usus sunt, minus tamen ferunt ætatem. Nam post sextum annum ad summum spirituaſcentiæ gradum deveniunt. Optima ex istis sunt Averbacensia, Bensheimensia.

Vina ex
Bergstra-
ßen prove-
nientia.

XXII. Mosellana sunt quoque magna laude digna. Eminent Dufemundensia, Zeltingensia & quod Wela profert. Ex Neccarinis eminent Heilbronnensia & Eſlingensia.

Mosellana
& Necca-
rina.

XXIII. De Mosellanis & Neccarinis illud notari velim, quod ob temperaturam acidi & spirituoſi principii, copiamque aquæ, pura sint, suavia tenuia tamen, & quæ celeriter petant vesicam, hinc calculosis & podagricis valde appropriata existunt, dum horum effectuum elementum nempe tartarum egregie ex sanguine eliminant. Facile tamen vappescunt, situm contrahunt, præsertim Neccarina, ætate viribus spoliuntur: unde ad loca diſſita non multum transportantur. Pessimus mos quibusdam est, illa sulphuris fumo imbuiere vel spiritum vini illis affundere, quo sæpe contingit, ut à Neccarinis & capitis dolores & ventriculi tormina suscitentur.

Vires Mo-
sellanorum
& Necca-
rinorum.

XXIV. Franconia insignem alit vinorum abundantiam, hæc autem Rhenanis quoad salubritatem multo sunt inferiora, hinc quoque viliora. Sulphure gaudent spiritibus corporis nostri minus amico, ut largius pota capitis gravitatem relinquere, & torporem membris imprimere soleant. Nihilo minus quædam generosa sunt & magna vi activa prædita. Ex spirituosissimis autem eminet illud, quod crescit in monte dicto *der Stein* prope Herbipolim, qui aspectum cum vicinis sibi continuis obtinet tam pulchrum, ut dubitare fas sit, an ullibi in Germania sit reperire similem montium tractum, qui in una recta linea, superficie nullibi

Multa vi-
na ex Fran-
conia ve-
niunt.

Vinum
Steinenſe.

nullibi magis depressa aut elevata exhibeat vinearum seriem adeo amoenam, longam & altam, & quæ ita oculis simul sese ostendat, virescens eos alliciat, detineat ac recreet. Vinum quod exhibet *Stein-Wein* appellatur; hoc potest esse viliorum acidorum correctivum, & medicina: unde illi, qui calleant artem miscendi vina, pauca quantitate genuini Steinenfis, ignobiliora Rhenana vel Palatina egregie non sine magno foenore corroborant, & palato delicatiorum sapida reddunt.

Vinum
Leisenfe.

XXV. Ex monte, cujus cacumini arx Herbipolensis superstructa est, qua ille meridiei obvertitur, & vulgo *die Leiste* nominatur, colligitur vinum, quod bonitate Steinenfe adhuc vincit: sed in sola cella hujus arcis vinis optimis refertissima gustandi illud occasio querenda.

XXVI. Magnæ etiam æstimationis sunt Sommerhaufana, Randesakeriana, Frikenhaufana & plura alia in hoc districtu, quem Moenus alluit.

XXVII. Vini Iphoffienfis & Redelseenfis magna etiam copia in Bohemiam Saxoniamque transfertur.

Vina Mœ-
nana.

XXVIII. Præterea juxta Moenum fluvium & suavitate & salubritate sese commendant Wertheimense, & Klingenbergense. Hoc ad saporem Mosellani multum accedit, capitique minus est offensum. Pertinent etiam huc magnam affinitatem cum Klingenbergensi alentia, quæ habentur ex vineis non procul ab Hanovia cultissimis. Sunt hæc Michelbacense, Hirschsteimenfe, Nierensteimenfe, Hochstattenfe, quæ vina sunt usu quotidiano inter cibos sanissima propter tenuitatem & faciliorem per sanguinem transitum & gratum acorem: tertio demum vel quarto anno evadunt optima, ætate autem illorum spirituositas magis decrefcit quam increfcit.

inum
ud Sach-
mhaufen
escens.

XXIX. Aliam vero obtinet naturam illud vini genus quod prope Francofurtum vulgo Sachsenhausen habetur, constat hoc sulphure quodammodo vaporoso, caput afficiente. Terra enim Francofurtensis admodum sulphurea est & scaturiunt ibi fontes, qui purum sulphur olent.

autem unum altero tenerius, subtilius, alterum contra crassius, viscosius, terrestrius. Alterum effluvia odore gratissima emittit, alterum gravi & ingrato vapore caput replet. Alterum per fermentationem magis attenuatum clarumque & subtile redditum flavo & aureo colore mixturam tingit, aliud densius est minus fermentativo motu evolutum; unde & consistentiam crassiorum, colorem nigrum, pondus quoque gravius vinis largitur.

II. Differunt quoque quæ vinum ingrediuntur salia, & quemadmodum omnium vegetabilium, ita & uvarum sal tartareæ profapiæ est. Tartarus constat ex terra, oleo & acido; hæc enim juncta tartariforme sal producant. Inesse autem vinis talis generis sal, vel ex eo clarum fit, quod omnia vina, si pura sint neque adulterata & fermentationem sustinuerint, si destillentur, in vase relinquunt magis quoddam acidi tartarei saporis. Demonstrat hoc quoque aceti generis: nullum enim datur vinum etiam generosissimum, quod non longiori & moderata digestionem transeat in acetum. Conspicitur autem ipse tartarus ad oculum in lateribus dolii, quem non modo recentia sed & vetera successive dimittunt: ipse autem sapor acutus & austerus, qui ferme cuius non adulterato puro, minusque arte præparato proprius, luculentus testis est. Evidem dantur pure dulcia vina, quæ etiam post destillationem non nisi dulcissimum magma dimittunt, uti Hispanicum, quod hic locorum divenditur, sed artificialia hæc esse vina ex melle, rob passularum & Spiritu Vini parata, plura sunt, quæ nos ad credendum inducunt, vel si genuina fuerint vina, non sufficienter passa sunt fermentationem, quæ dum mustum nimis arte concentratur, impeditur, & ita tartarus facile, qui pro matre dulcedinem habet, & formam ex fermentatione nanciscitur, parcius generatur.

Salia vi-
num ingre-
dientia
differunt.

Vinum
transire po-
test in ace-
tum.

Tartarus
ineff vinos.

III. Sicuti autem tartarus non unius ejusdemque indolis est, dum vel acidum exsuperat, idque vel magis fixum vel volatile, vel etiam terra in eo abundat, quæ pariter vel ad lapidis, luti, aut calcis naturam accedit; ita etiam in nonnullis vinis tartarus est valde subtilis volatilis, in aliis crassius, fixus, terreus, calcarius, in quibusdam tartarus copiosus, in nonnullis rarus & parvus.

Differen-
tia tartari.

IV. Restat adhuc tertium principium spirituosum seu mercuriale. Per hoc non aliud intellectum volumus, quam aëreo-æthereum: subtile enim illud aëreo-æthereum principium, sicuti omnia corpora pertransit, eorumque poros & interstitia occupat, ita & illud idem apparet in vinis, in quibusdam in majori in aliis in minori copia. Patet illud ad oculum, quando vinum ex uno vase in alterum transfundimus: globulos enim aëreos copiosos ex fundo in forma bullularum in altum ascendentes ipsumque aërem petentes non sine injucunditate & oculis & naribus senties, Germani vocant *lufftige Weine*. Gaudent hoc elemento tenui & rêvera salubri vina, quæ liberam fermentationem subierunt: tunc enim rarioris fiunt texture, & copia aëris & ætheris intermixti ipsa levia subtilia & rara redduntur; unde salubritate antecellunt ea, quorum fermentatio fuit de industria cohibita. Quod fit, si dolia fere plena firmissime obturantur, ubi fortiora quidem hoc pacto evadunt vina, sed ob defectum subtilitatis & spiritus aërei minus sana. Efficat etiam hic internus vini motus, ut vinum celerius venas corporis nostri & emunctoria pertranseat; unde recentia vina, utut majorem præ veteribus copiam terræ & sulphur

Quid per
mercu-
rium vini
intelliga-
tur.

Quenam
vina hoc
elemento
gaudent.

C A P U T III.

De natura atque elementis vini & maxime Rhenani aliorumque Germaniæ.

§. I.

ANtequam de salubritate & virtute medica hætenus recensitorum Germaniæ vinorum & præcipue Rhenani verba faciamus, ratio ipsius ordinis postulat, ut prætermittamus ea, quæ ad cognitionem exquisitiorem virtutum scitu prius necessaria sunt. Inde prius elementa sive principia & ingredientia vini, ex quibus naturam ac indolem ejus pernoscemus, paulo accuratius exponere allubescit. Quod si vero ullo in mixto famosa illa quinque Chymicorum principia offenduntur, certe ea clarissime conspicua sunt ipso in vino: inest enim ipsi sulphur, sal, & volatile, quod spiritus vel mercurii nomine insigniunt. Prostat quoque in ipso aqua & terra, & ab horum principiorum indole proportionem & mixtionem tanta vinorum diversitas ratione consistentiæ, ponderis, saporis, odoris, coloris & virtutis dependet. Per sulphur intelligimus illud, quod concipit flammam, & cum fluoribus corporis nostri nuptum calorem excitat: est

inque
mico-
n pr-
a con-
uafunt
vino.

id per
hur in-
igatur.

346 Cap. III. De natura atque elementis vini &c.

minus subtile contineant, nihilo minus ob copiam incolentis ætheris salubritate antiquis sæpenumero sunt præferenda.

V. De principio aqueo ut longius edifferamus, non res erit magnæ operæ. Est enim illud necessarium cujusvis vini ingrediens & vehiculum substantiæ activæ in vino, quam pro diversa portione quantitatis in activitate & vehementia sua vel mitigat vel auget. Vina enim quo tenuiora sunt, id est, quo majorem aquæ copiam admittunt, imbecilliora & minus calida existunt, quo autem minor humiditatis ingreditur quantitas, eo fortiora sunt, unde etiam magis inebriant: consistentia enim imo pondus vini debetur unice aqueo elemento & terreo.

VI. Terræ elementum num ad vini constitutionem etiam concurrat, merito quæritur. Equidem non facilis erit laboris res, chymica aut quacunque alia analysi ex ipso vino sistere solidum terreum principium: nihilo secius quodocunque lentorem & viscositatem, quam vina præsertim recentia sæpenumero induunt, nec non illum mucum tenacem, qui circa orificia vasorum ex vino ministerio aëris generatur, consideramus, fateamur necesse est, hæc ipsa effecta non nisi solido terreo principio, quod fluiditati contrarium est, deberi. Deinceps nulla aqua est, quæ non sit particeps terræ: unde omnis aqua etiam fluidissima sub quavis destillatione repetita in fundo relinquit terræ portionem; neque ullum in rerum natura datur oleum, vel sulphur, vel sal, quod non in mixtionem suam recipiat terram: sicuti encheirisi chymica ex oleo etiam calidissimo caryophyllorum insignis copia fixæ terræ educitur, quod fit, si cum spiritu flammifico nostro ad solam mixtionem accenditur. Ut itaque unum sal tartareum vel oleum & sulphur præ altero magis vel minus terrestre est, ita etiam non tantum aquæ, sed & sal tartareo & sulphuri vinorum terreum quoddam adjunctum esse principium, nemo penitus revocabit in dubium.

VII. Hisce suppositis, facillimum erit concludere, unde pendeat tanta differentia & varietas vinorum, non tantum ratione saporis, odoris, coloris, consistentiæ, sed maxime etiam ratione virtutis. Nolumus hic in diversas vinorum species inquirere, & horum elementorum naturam vel proportionem scrutari. Quod nimis longum sit pertractare: nobis saltem hoc loco suffecerit meminisse, Rhenana & de quibus nobis sermocinatio salubria temperataque Germaniæ vina quævis in sinu suo fovere non multum crassi terrestris minus resoluti vel intestina agitatione subacti sulphuris; sed potius ipsis inesse sulphur valde subtile, gratum, delicatum, fermentationis actu solutum & attenuatum, unde colore & odore suave se sistit; valet hoc maxime de vinis veteribus. Notabile est, recentia colore esse ut plurimum diluto, minus flavo, consistentiæ turbidioris, quæ tamen temporis & annorum successu claritate, suavitate & saporis gratia, nec non colore aurum æmulante cujusvis palato se commendant. Præterea Rhenana vina magnam copiam acidi non tamen fixi terrestris, sed teneri & subtilis admittunt. Patet hoc clarissime, quando hoc vinum destillationi committitur, tunc acidi penetrantissimi insignem quantitatem in vase relinquit. Principium spirituosum æthereum ingreditur quoque nostra vina magna in copia, visitur hoc maxime in vinis recentibus ex numerosis bullulis, ex vino in altum sese elevantibus post factam agitationem, vel ex uno vase in alterum transfusionem. Præsens quoque est

aqua ceu vehiculum substantiæ activæ in vinis Rhenanis satis copiosa, quæ partim per destillationem factam oculis sistitur, partim etiam ex tenuitate vini colligitur. Paucis: elementa, quæ fluida & quæ subtilia levis tenuis & raræ sunt substantiæ, constituunt nostra vina, illud autem quod grave, densum, terrestre & viscosum tenax est, ab eorum mixtura est remotum.

VIII. Cum autem & Germaniæ salubria vina ipsaque Rhenana non quoad omnia unius ejusdemque indolis vel virtutis sint, sed quævis ferme loca, imo in certo loco certus quidam districtus vina peculiaria inter se differentia producat, merito hujus causa venit inquirenda. Dicimus autem, specialem cujusvis vini naturam, facultatem & vim unice dependere à sole, ceu patre, & solo, ceu matre, nec non specie vitis diversa. Sol, sicuti in universo caloris spirituscentiæ & sulphurei volatilis elementi in mixtis causa & author est: ita etiam activi calidi spirituosi sulphuris in vinis genitor & parens existit.

IX. Patet hinc vera ratio, quare eæ regiones, quæ magnum & diuturnum solis æstus experiuntur, vina valde generosa exhibeant, nec non ea loca, quæ à vento septentrionali & maxime aquilonari ceu frigidissimo defensa sunt, solique meridiano liberius patent, uti sunt montes; qui spectant austrum, grata & fortia vina largiantur, opposita autem cæteris plagis loca vinum longe ignobilius progignant. Dilucescit & porro ratio, quare æstas & subsequens autumnus serenus & fervidus dulces uvas & generosa vina, nebulosus vero nimbosus & frigidus è contra immaturas uvas, cruda vero & acida vina profert.

X. Verum enim vero ad differentiam vinorum non sufficit sol, habemus enim compertum per experientiam, in locis eodem sole respectu situs gaudentibus, diversæ tamen indolis ratione spirituscentiæ imo salubritatis vina provenire. Exemplo nobis sit tractus cis Rhenum Moguntinæ urbi obversus, ubi pagus Hochheim, Cochem & Cassel situs similitudine & propinquitate gaudent, nihilo minus Hochheimense multis parasangis vincit Cochemense & hoc Cassellanum, quod vilioris conditionis est. Causa itaque hujus differentiæ merito transfundi debet in ipsum solum. Observavit jam suo tempore id antiquissimus naturæ scrutator HIPPOCRATES qui lib. 4. de morb. p. 58. ait: Considerandum, quantum locus loco etiam valde vicino ad vini suavitatem præstet, quamvis sol aequaliter sufficiat, cum in hoc terræ humor sit, qui vinum suave exhibeat, in illo vero minime. Sunt quoque non agrestia pauca in loco nascentia, quæ ad ulnæ spatium translata non amplius produci comperias. Neque enim terra ejusmodi humorum translato accommodatum habet, qualem illa agrestibus plantis suppeditabat. In his enim sunt quedam magis virulenta, quedam magis humida, quedam dulciora, sicciora quedam, asperiora etiam quedam aliæque sexcenta aliter se habent. Hæc summa ratione producta sunt à divino Sene. Terra enim mater istius humoris est, qui ad nutritionem vegetabilium pertinet, & quamvis omnes plantæ aqua fluviali, ceu universali & accommodatissimo nutritio succo alantur, nihilo minus diversæ naturæ terra, per quam transit ad radices, naturam & genium singularem cum ipsa communicat. Neque dubium est, ipsa effluvia earum rerum, quæ sub certa terra latent, eam mirifice disponere & alterare, & hac ratione etiam vegetabilia ipsumque vinum certa qualitate imbuere. Curiosum inde est, Hochheimenses

Etiam aqua.

Qua de causa vina diverse indolis & virtutis sint.

Quod exemplis evincitur.

Sol ad differentiam vinorum non sufficit.

Sed solum plerumque.

Quod testatur Hippocrates.

Terra est mater humoris nutritionem præbens.

Quid sit principium aqueum vini.

An terra elementum ad vini constitutionem concurrat.

Omnis aqua particeps est terræ.

Quod probatur.

Vinis Rhenanis inesse sulphur valde subtile.

Admittunt Rhenana copiam acidi.

Spirituosum æthereum ingreditur vina Rhenana.

vineas maxima ex parte intus alere fossiles carbones, qui aliquid contribuere possunt, quod vinum succino fere similem odorem & saporem præ se ferat.

XI. Tandem distincta natura vinorum ex differenti specie vitis non sine ratione ducitur ac derivatur: multum enim differunt inter se vites & uvæ. Ita quædam vites uvas copiosas, quædam paucas, quædam succulentas majores, aliæ parvas suggerunt. Nonnullæ uvæ citius ad dulcedinem & maturitatem, aliæ tardius ad eandem perducuntur. Ex parvarum uvarum numero, quæ exilia grana sovent, sed tardius perveniunt ad dulcedinem, sunt illæ, quæ dicuntur *Russling*. Uberiores & succi plenæ sunt *die Hei-nisch*, quæ copiosum mustum, sed minus forte vinum efficiunt. Illæ autem species, quæ vocantur *Gut-edel*, *Elbing*, facilius perveniunt ad maturitatem, dulcedine quoque se commendant &c. Notatu quoque hic dignum venit, quamvis speciem vitis suam peculiarem culturam nec non refectionem convenientem requirere. Hæc qui non probe callet & intelligit, fecunditate privare vitem facillime potest.

CAPUT IV.

De modo conservandi vinum Rhenanum
aliaque Germaniæ.

§. I.

Quemadmodum vini omnis qualitas, videlicet sapor, odor, color, virtus & consistentia, unice à crasi mixtione, & proportionem elementorum certum vini genus componentium dependet: ita etiam ejus conservatio, quæ non nisi duratio quoad easdem facultates & qualitates est, ex conservatione ejusdem craseos ac mixtionis proficiscitur. Salva enim mixtione & unionem elementorum certum corpus constituentium, mixtum conservatur in sua natura: illa destructa perit & destruitur color, saporque non minus quam virtus. Exploratum autem per attentam observationem est, nihil magis fluidorum texturam ac crasin custodire, eamque fartam, tectam immunemque ab omni corruptione & immutatione servare, quam spiritus, qui nil aliud sunt, quam sulphur mixti intestino motu resolutum & subtile redditum. Sulphur enim per unanimum Philosophorum sententiam balsamum est corporum, ea defendens ab omni corruptione: sulphur custos & conservator est propriæ cuius corpori craseos, neque in regno animantium datur aliud in sanguine, quod eum, totumque corpus præservat à putredine, quam spiritus, qui est sulphuris in sanguine motu intestino resoluti soboles, qui, quamdiu præsens est, vitæ particeps corpus efficit. Ex eo jam clarum fit, quod omnia spirituosæ & generosæ vina, nec non antiqua haud facile suscipiant mucositatem, situm, vel colorem aut saporem mutant; ex adverso cuncta recentia, tenuiora, imbecilliora multum aquæ & acidi tartarei, sed parum sulphuris complectentia, uti Neccarina, Mosellana, facillime alterentur & in vappam *Kaan* abeant.

II. Ex jam dicto fundamento intelligi quoque ratio poterit, cur sulphuris vulgaris fumus vel solus, vel cum aromatibus mixtus Germanice *der Einschlag*, à multis seculis per constantissimam experientiam tanquam præsentissimum remedium ad conservanda vina adhibeatur. Qua-

re hodiernum in usu habent, dolia, antequam ipsis immittant vinum, sulphuris vapore imbuere. Quin imo ipse fumus adhibitus vacuis doliis, ex quibus vinum emissum fuit ne vappescerentiam vel situm noxium contrahant, ea per longum tempus præservat. Quoniam vero promptissime vinum vappam induit, quando ad aliquod spatium evacuatum fuerit, quod nempe liber patet aëri ingressus, hinc, ut hanc impediant, sulphuris fumo vacuum spatium implent. Præterea sulphur & hanc virtutem medicam custodit, ut vina turbida clara reddat, heterogenea dejiciens in fundum, nec non acidum saporem temperet; hinc evenit experimento quotidiano, ut vina, quo crebrius illorum receptacula mutantur, quo crebriore sulphuris fumo adstantur, eo evadant mitiora. Ex quo intelligitur, sulphur esse veram vini animam ejusque vitam, non aliam ob rationem, quam quod spiritu suo penetrantissimo minima interstitia fluidi vinosi occupante, intestinum partium fluidarum motum, qui genuinæ & nativæ craseos conservator est, tueatur. Verum enim vero vehementer dolendum est, non adeo istum sulphuris vaporem, amicum nervis & capiti deprehendi, unde plures capite imbecilles, à vinis sulphuratis pessime sese habent. Quam ob rem nonnulli vel plane ab omni sulphuris fumo abstinent, & loco hujus accenso thure vel succino, aut spiritu vini aromatibus imbuto accensoque dolia implent; quæ res non est de nihilo sed maximopere commendanda. Nihilo minus monendum est, si vina fuerint vetusta & generosa, illud procedere, non autem, quando imbecilliora & recentia fuerint. In his enim sulphuris fumus, qui tamen aromaticis effluviis condiri potest, longe multumque aliis præferendus. Ulterius commendamus hanc encheiresin, ut vas imprægnetur vel accenso floris macis, aut frustuli nucistæ in spiritum vini aromatizatum intincti fumo, quando ipsum vinum depromere solemus, *wan es zum Zapfen gehet*, hoc enim modo vappescencia avertitur, & salvus ac integer manet sapor. Porro quoniam spirituositas vini est præservatrix corruptionis, nonnulli spiritu vini ex ipso vino parato, sufficienti quantitate in vasa infuso ipsa eluunt, & postea vino replent, neque felicius, si in superficie proclive vinum est ad vappam ipsa tollitur, ac si aliquot cochlearia spiritus vini vinosi infunduntur.

III. Posteaquam consideravimus causam, quæ vinis integritatem & durabilitatem præstat, perutile quoque fore arbitramur, si inquiramus ortum & causam corruptionis. Sicuti autem illud, quod conservat motum intestinum partium certum mixtum constituentium, spirituosæ naturæ est: ita vicissim & illud principium, quod motum mixturæ huic contrarium internum introducit, sive labis & immutationis causa est, agilissimæ & tenuissimæ mobilissimæ indolis est; estque illud, ut pressius mentem nostram exprimamus, aëris nostri atmospherici fluidum. Dicit vix potest, quanta potentia aër alterare, ac mixtorum crases destruere soleat. Quantum noceat vulneribus & ulceribus, item abscessibus admissus aër, notissima res inter Chirurgos est. Ipsæ acidulæ & salubres omnis generis aquæ, quæ nostra sententia ex principio spirituosæ minerali operantur, protinus amittunt cum sapore omnem virtutem, si liber aëri accessus concedatur. Olea & spiritus chymici, ad aëris communicationem successive in colore & consistentia mutationem subeunt. Pluribus hoc ipsum experimentis, quæ etiam in promptu essent, corroborare possemus, si instituti posceret

Redditur turbida etiam vina clara.

Sulphur est vera vini anima & vita.

Sed non convenit nervis & capiti.

Optima methodus conservandi vina.

Causa & ortus corruptionis vini.

Aër nocet vino.

Ut & vulneribus.

Aquis.

Differentia vinorum ducitur etiam ex differenti specie vitis.

Unde sapor, odor, color, virtus & consistentia vini dependeant.

Quid sit spiritus.

Quid sulphur.

Quemadmodum vina non facile alterentur.

Quæ facile.

Fumus sulphuris vulgaris conservat vina.

posceret ratio. Illud autem dicimus, nil sere esse tam inimicum & contrarium vinis ipso aëre, unde omni studio omnique modo defendere id debemus à liberiori ejus aditu. Qua causa intellecta, non difficilis est ratio, cur repleta semper debeant esse dolia, quod solent communiter efficere affusione ejusdem generis vini. At vero cum sæpius detrimentum capiat & non levem immutationem, si vinum non sit ejusdem ætatis vel loci, quod frequenter obtineri nequit, excogitarunt curiosiores alium modum: nempe silicibus mundis implent dolia, eosque loco vini absumti sive per aërem, sive emissionem, substituunt, quod non tantum ad Hungarica, sed commode etiam ad omnis generis vina non sine magno commodo & lucro potest applicari. Alii, ne aër operetur in vinum, doliis quantitatem olei olivarum infundunt, ut superficiem ejus obtegat, id quod revera non vilipendendum. Apprime enim vaporem impedit, quæ mox ad aëris liberi sufficientem attactum, ingrato odore non modo vasa, sed & contentum replet. Et quoniam aër tam insensibilis mixturæ vini est, hinc spiritum vini vel sulphura viva in doliis vacuis accendunt, & hoc pacto (quæ secunda sulphuris virtus est) per flammam expellunt omnem ex vase aërem. Curiosum autem est, quando aër vappidus vel mucidus, qualis sit à vino vappido, stagnat in vase, nec sulphur nec spiritum vini in dolio flammam concipere, sed statim extingui. Cujus rei ratio est aëris crassi resistentia, opus tunc est, ut orificiis apertis, beneficio solium aërem cum impetu impellamus, impurum ejiciamus, vel apertum salsa calida item frigida aqua eluamus & purificemus vini receptaculum.

IV. At vero non omnis aër æquali virtute & potentia corruptionem in vino suscitatur, sed, sicuti calidus & humidus ad efficiendam putredinem in animantibus efficacissimus est: ita & hic ipse maxime est infestus vini texturæ. Testatur id experientia: non enim lubentius ad noxam patent vina, quam tempore autumnali vel etiam æstivo, si tempestas diu fuerit pluvialis. Contra frigidus, siccus & serenus aër, non ita noxius vinis deprehenditur, quapropter in cellis, quæ non satis profundæ sunt, humiditate scatent, & diurni caloris participes fiunt, vina non diu subsistunt integra, præsertim recentia, & quæ supra faeces Mutter jacent. Optima autem ea sunt loca subterranea ad conservationem vini, quæ septentrionem spectant, profunda, sicca sunt, æstate frigida, hyeme autem temperata. Quapropter ob cellarum bonarum defectum, non omnes urbes sunt aptæ bona possidendi vina: deinde experientia à longo tempore confirmavit, ad ventorum flatum & tempestatum flatum, varie sese habere vina. Ex omnibus autem venti calidi & humidi, & tempestas quoque humida & calida vinis minus favet, uti auster & africanus, quia atmosphæram copiosis similibus corpusculis implent: septentrionalis vero & orientalis ipsis magis est amicus. Notavit austri noxam suo jam tempore magnus medicinae parens HIPPOCRATES, qui lib. de morbo sacro p. 91. scribit: *cuncta corpora ventum austrum sentiunt, & ex splendidis tenebrosa fiunt, & ex frigidis calida, & ex siccis humida, & quæcunque in domibus vasa sunt juxta terram cum vino ac alia copia liquorum, ea omnia austrum sentiunt & formam in aliam speciem transmutant.* Optimum itaque consilium est, cellas ab æstivo calore, à flatu austrino præservare, firmiter obturatis cellarum spiraculis. Ne autem aër ibi stagnans putrescat, circa tempus

nocturnum vel matutinum die existente sereno, vento flante vel orientali vel aquilonari eadem aperire convenit, ut pertranseundo ventilent & purificent inclusum aërem.

V. Silentio hoc loco non est transeunda observatio trita & vulgata, de mutatione vini in vasis circa tempus, quando vitis floret. Annotarunt nempe curiosiores, tunc temporis recentia & dulcia quoque vina experiri quandam fermentationem, transmutationem quoque, imo eadem ex doliis effluere, vel si eorum orificia nimis arcte clausa sint, ipsa vasa magno cum damno disrumpere. Hujus effectus ratio certe non rejicienda est in florem, sed potius in talem aëris flatum, qui tunc temporis (nempe circa solstitium) quando vitis floret, penetrantissimo & mobilissimo calore agitur, unde non mirum, subsequi tales effectus. Et certissimum est, quod tunc probe debeant custodiri vasa, & eorum circuli, ne disrumpantur. Si enim à subtili aëris calidi rarefactione (uti videmus in thermometris vel aliis vasis spirituosus liquore repletis) aliquid rarefit, & majus affectat spatium ipsique hoc non conceditur, non potest non vim suam exercere in ipsa receptacula.

VI. Experimur clarissime talem disruptionem in lagenis vitreis densissimis, si enim illæ spiritu vini aut vino generoso Italico vel Gallico fuerint totæ repletæ, & obturaculo firmatæ, tempore æstivo vel sub calore externo facillime disiliunt, unde necessaria cautela hæc est, ne unquam spirituosus liquoribus in totum vasa repleamus.

VII. Videtur, si rem paulo exquisitius trutinemus, ipsum aëris fluidum, sicuti cum totius universi fluoribus & animantium sanguine, ita & cum vino quandam communicationem habere; quod vel exinde evincimus, quoniam ad impetuosos ventos, ad aquilonares etiam flatus, præsertim si luna simul existit plena, ex orificiis ipsa vina exsurgunt & effunduntur: unde tunc temporis semper madida eo in loco advertuntur. Humidus quoque & calidus aër, utut non immediate attingit vina, efficit tamen in ipsis quandam alterationem, turbulenta enim ipsa facit & gravia, pendula. Quamvis enim aër externus non immediate vinis permisceatur, nihilo minus æthereum illud principium, quod ab ipsis excludi nequit, intrinsecam alterationem sentit; non secus ac id contingit in homine, cujus spiritus in sanguine & nervis secundum aëris externi conditionem, varie sese habent. Perquam dignum autem observatione est, ab aëre vino introduci crasin ac texturam ab intestino vini motu alienam, ac situm, dispositionem partium vinum constituentium plane transmutari. Videmus id ex vappa, ex muco, qui glutinis sæpe naturam acquirit, quique apparet in embolis, si per ea vinum transudat, nec non ex viscositate pendula idem conspicitur. Aër enim suo motu è se de sua disjicit ætherem vini, qui in fluiditate & tenuitate illum conservat, & gravitate sua particulas inter se compingit, conjungit: quapropter pendulum vinum mox fluiditatem iterum recipit vehementi facta agitatione & conquassatione cum ferulis.

VIII. Tandem non solus aër, sed imbutus certi generis corpusculis activis naturæ penetrantis inducere noxiam vinis mutationem idoneus est, quare à fulgure & tonitru insignem experiantur ea, præsertim recentia, non secus ac cerevisiæ noxam. Facile enim degenerant in acorem. Postea aër flaccidus, vappidus vel morbosus effluviis

Dolia semper debent esse repleta.

Quidam implent dolia silicibus.

Alii infundunt oleum.

Alia methodus.

Quo tempore vina magis ad noxam patent.

Quanam loca optima sunt ad conservationem vini.

Quales venti optimi.

Quomodo cellæ sint præservandæ.

Vina exparantur transmutationem circa tempus vitis florentis.

Lagenæ sæpius effrumpuntur.

Aëris fluidum cum vino communicationem habet.

Ejus operationes.

Aër disjicit ætherem vini.

Vinum corrumpitur à fulgure & tonitru.

effluviis contaminatus, ea flatu, crasi & sapore exuit. Ideo non sine ratione solent sceminae, quibus menstrua feruntur à tractandis vinis arceri eademque de causa nulli odores fortes ex allio, cepis, cadaveribus admitti. Praestat quoque eum in finem singulis septimanis probe ab omni situ dolia, embola, & orificia purgare & polire, cavere insuper, ne morbosus vel foetidus halitus per siphonem cum vino communicetur.

IX. De Rhenano vino illud adhuc monendum esse duximus, hoc omnium optime conservari, nec facile desciscere à statu suo. Durare enim non tantum ad 100. annos potest, sed & non facile ab admixtione alterius generis vini, modo non sit dulce & ad fermentationem proclive, alteratur: cum e contra vina Italica, Gallica pleaque, Hungarica, Neccarina, Mosellana, facile de crasi ac indole sua abscedant, nec omnem vinorum admixtionem ferant: dulcia enim ad acidi mixturam mox acescunt.

X. Postremo gelu penetrantissimum brumali tempore, non minus crasin quam mixtionem vinorum lædit, praesertim si ea fuerint recentia, imbecillia, tenuia, minusque generosa. Tota enim massa tunc congelascit, quo fit, ut sapor & penetrantia multum minuatur. Gelu enim unionem partium mixtum constituentium plane disturbat ac destruit: semel autem immutato situ partium, pristina mixtura ægerrime restituitur. Videmus id manifesto, quando vinum leni tantum calore destillatur in spiritum, qui iterum affusus substantiæ illi, quæ remanet in destillatorio vase, nunquam producet ejusdem saporis & qualitatis vinum. Minus autem nocet frigus generosis spirituosus & inveteratis, quia potius hæc ipsa reddit fortiora, quandoquidem phlegma tantum vertitur in glaciem, quo remoto activum & spirituosum concentratur. Et habemus à fide dignissimis ceu rem exploratam & certissimam in multis locis Galliæ, etiam prope Genevam, vina dicta *Franginer*, saluberrimæ indolis per totum annum hyememque aperto aëri in vasis exponi, dum existimant, frigoris vehementia asperitatem attenuari, & spirituositatem vinis conciliari.

tur, & meridiani solis actionem libere & diu experiuntur. Talis modi vina in genere sunt saniora iis, quæ in planis locis & à fluminibus diffitis subnascuntur. Ratio horum consistit in eo, quod solum, si firmum porosumque est, solis radios diutius detineat, cujus vivifico calore succus vitis mirifice attenuatur. Deinde per solum arenosum pluvialis nutritia aqua egregie quasi percolatur ipsaque percolatione subtilior & purior redditur. Montosa loca autem præ humilioribus aptiora sunt bono vino generando, quoniam à tergo avertunt frigidos & septentrionales ventos, qui incrementum uvarum & vegetabilium multum morantur. Insuper purior ibi & magis elasticus aër est, & sol quoque liberius terram radiis suis fovet. Accedit & hoc, quod superflua pluvialis aqua, cum non omnis impenditur nutritioni, gravitate sua iterum dilabatur, nec circa radices vitium stagnet, quod fit in humilibus profundis locis, non sine magno detrimento.

III. Exoptatissimus quoque vinearum situs est circa aquas fluentes, propter atmosphæram prope illas tenuibus effluviis aqueis refertam, unde circa fluvios agri etiam solent esse fecundiores, quia humidiores nempe. Ros enim desideratissimus ex vaporibus collectus, de nocte dilabens, subtili suo succo, laudatissimum vegetabilibus præbet nutrimentum.

IV. Secundo loco salubritatem vini accersimus ex temperatura eorum, adeo, ut temperata vina omnium sint optima. Ipsa sanitas nil nisi harmonia & temperies diversæ naturæ partium, nec non sanguinis temperatus, & æqualis humorum motus est. Tuentur itaque maxime sanitatem tam ex alimentorum quam medicamentorum classe, quæ temperie gaudent, quæ omnis excessivæ qualitatis expertia sunt. Temperata autem ea dicimus vina, in quibus conveniens proportio elementorum, nempe sulphuris, spiritus, tartari, terræ nec non phlegmatis cernitur, five ut rem clarius exprimamus, quæ non nimis sunt spiritiosa, neque nimis crassa, nec porro nimis cruda, tartarea, acidi saporis, non nimis saturati, nec nimis diluti coloris, sed mediæ naturæ. Ex temperata autem elementorum commixtione & legitima proportionem nascitur etiam temperatus & naturæ amicus in corpore nostro effectus. Si vero ullum vinum commendandum est propter temperaturam, & ex ea proficiscentes salubres qualitates, certe vinum Rhenanum hac gaudet prærogativa. Primo enim est illud spirituosum, nam sub destillatione, una mensura spiritus inflammabilis dephlegmati saltem uncias duas largitur. Testatur id quoque inebrians & analeptica virtus, nec non productio aceti fortissimi ex ipso hoc vino. Nam loco regulæ hoc tenendum: quo generosius vinum, eo fortius acetum, e contra penetrantia aceti testatur de spirituositate vini. Nam tenuia, & quæ carent spiritu debito, uti sunt verb. grat. hic locorum crescentia, in debilia mutantur aceta: neque enim putandum est, acetum esse tantum acidam vini portionem destitutam spiritu, cum potius hic ipse involutus tantum & depressus ab acido eminentiori & extricatori reddito mixturam ejus adhuc incolat; quod vel spiritus aceti destillatio ex saccharo saturni, & ex crySTALLIS viridis æris abunde testantur. Tacemus, quandoque saccharum saturni sub destillatione nimis calide tractatum, aëre accedente in flammam verti. Jam vero celebratissimum est, quod Francofurti parant ex vinis Rhenanis acetum, propter suum acorem fortem & penetrantem, nobile inprimis,

Vinea circa aquas fluentes sunt saluberrima.

Temperata vina omnium sunt optima.

Signa vini temperati.

Vinum Rhenanum optimo gaudeat temperamento.

Ex generoso vino fit fortius acetum.

Francofurti paratur fortissimum acetum.

CAPUT V.

De salubritate vini rhenani.

§. I.

Medicus, qui imperator vitæ & sanitatis est, & curam corporis humani gerit, eo maxime respiciat, ut vinum seligat & commendet tam sanis, quam ægrotis, quod sit præstantissimæ & saluberrimæ virtutis. Quodnam autem hunc mereatur laudis titulum, perspicendum est. Salubre dicimus illud vinum, quod non lædit, sed potius juvat sanitatem, quod non crasin & circulum sanguinis vitalem violat vel labefactat, nec viscerum & membrorum munus ac officium invertit, sed potius confirmat ac roborat, adeoque digestionem juvat, vires reparat, capiti neque nervis nocet, artubusque, praesertim pedibus, nullum torporem vel lassitudinem inducit.

II. Ex horum censu sunt, (I) ratione natalis soli, ea, quæ in locis præaltis & sublimibus, montosis nempe, in solo sabuloso, omnis sulphurei & salis contagii experti, probe tamen culto & fecundato, circa fluvios currentes nascun-

Frid. Hoffmanni Oper. Tom. V.

G g

cum

cum una uncia plus præstet virium tam in medicina, quam in oeconomia, quam uncia quatuor hujus loci.

Vino Rhenano inest sulphur probe excoctum.

V. Præterea inest Rhenanis vinis sulphur probe excoctum, non crassum, crudum, rude, sed subtile, præsertim in antiquis. Crassa & cruda sulphura ingrati sunt odoris, vaporosa sunt, gravant caput, minime autem id dicendum est de Rhenano. Hoc gratissimi & penetrantissimi est odoris, unde exterius adnotum saltem naribus, si ullum, certè hoc analepticum est, jucundissime spiritus immediate afficiens, quod morbo languidi, & convalescentes summo cum fructu experiuntur. Tenerum etiam hoc sulphur est, quoniam à nimia etiam hujus vini ingurgitatione, non facile vino assuetis dolet, vel male sese habet caput, seu gravitas vel lassitudo quædam in membris relinquitur, ut potius agilitas & alacritas tam animo, quam toti corpori cum transpirationis laudabili promotione concilietur; id quod maxime præstant generosa & spirituosissima, non nimis recentia.

Acidum tartareum subtile constituit Rhenanum.

Perversas metus exinde medicorum.

Qui refutatur.

VI. Tertio acidum tartareum subtile vinum Rhenanum constituit, quod ex sapore non minus, quam ex eo, quod à destillatione remanet, cognoscitur. Verum enim vero ob acidi valde copiosi ingressum Medici non minus quam imperiti vina hæc improbare & rejicere communiter solent, dum existimant, acidum non modo sanguini ob metum coagulationis, sed & ipsis nervis esse hostile. Quod verum est de acido sibi relicto, præsertim crasso, fixo; at longe alia virtus & efficacia resultat ex mixtura hujus acidi cum sulphure spirituoso delicatissimo. Nihil enim est, quod tam egregie contemperet ac demulceat acidi stimulantis & vellicantis naturam & quod tam gratum saporem & odorem ipsi foeneret, quam spiritus. Habemus clarissima hujus rei testimonia in destillatione spiritus nitri, salis, vel etiam vitrioli dulcis. Quanta corrosivitas, quam foedus & ingratus odor reperitur in aqua forti? si vero una ejus pars cum partibus tribus spiritus vini rectificatissimi miscetur, & per destillationem vel calorem ambo intime junguntur, perit sapor iste corrosivus, perit odor teter, & inde suavissimi saporis & odoris resurgit spiritus, in medicina ob egregias vires non satis prædicandus. Dicimus potius, Rhenana eam ob rationem esse sana, quoniam subtile acidum hæc ipsa ingreditur, nam hac ratione sulphur eorum, quod valde calidum & igneum existit, egregie temperatur, ut minus ferire caput vel præternaturali æstu sanguinem afficere possit, quale quid expectandum à vinis fortibus, quæ acidi parum in mixtione agnoscunt.

Quare Rhenana sint sana.

Incommoda crassi & dulcis vini.

Qua de causa Hippocrates dulcia damnet.

VII. Temperies & inde salubritas vini nostri, in eo quoque versatur, quod non multum crassæ terræ vel viscositatis, sed copiam tenuis aquosæ substantiæ possideat. Crassa vina, item dulcia, hoc habent incommodi, quod liberalius & frequentius hausta, crassum & copiosum sanguinem corpori ingenerent, uno verbo, plethoram accersant. Nam illud, quod crassioris molis est, non pertransit emunctoriorum tubulos, sed in vasis remanet, ibique humores auget; quot autem malorum genitrix sit plethora, peritiores medentium optime callent. Damnat dulcia vina HIPPOCRATES de ratione vict. in morb. acut. p. 62. eam ob rationem, quod tumores hepatis & lienis augeant, quod fit, dum sanguine crasso & copioso has partes infarciunt. Porro crassa, dulcia & pingua vina insignem copiam biliosi in san-

guine & humoribus producant principii, unde etiam ad acutas & biliosas, nec non lentas hecticas febres immoderato usu disponunt. Ea autem vina, quæ tenuia sunt, per angustissimos emunctoriorum canaliculos sine ullo impedimento feruntur, hinc rursus è corpore eliminantur, nihilque heterogenei, quod vel copia vel perversa qualitate nocet, in sanguine relinquunt, ut & ob hanc rationem Rhenana aliis salubriora esse, facile judicandum sit.

Virtutes nui vini.

VIII. Ut autem eo melius, quænam ex Rhenanis, & aliis quoque corpori humano proficua & salutaria sint, quisque cognoscere possit, certas quasdam notas & characteres boni vini ut constituamus, res erit magnæ utilitatis. Primo itaque salubre vinum est, quod grato & reficiente odore præditum. (2.) quod receptum & detentum in ore relinquit in lingua blandam adstrictionem & ob penetrantiam nares & caput pervadit. (3.) Si pellucidum & clarum est, & aureo præditum colore. (4.) quod citius pertransit renes, & altero die madorem vel sudorem quandam in corpore excitat, vel alvum quoque lubricam reddit. (5.) quando nullum dolorem vel lassitudinem in capite, vel membro quodam relinquit. (6.) quod appetitum excitat, & concoctionem adjuvat. (7.) liberalius & frequentius haustum, non ad calculum vel podagram disponit. Secundum hos characteres, ceu ad lydium lapidem si vina examinemus, deprehendimus ex Rhenanis saluberrima esse vinum Hocheimense, Cocheimense, Rudesheimense, Joannesbergense, Rauenthalense, Neuendorffense, & Rhingavica pleraque, dummodo non sint nimis recentia, sed ad minimum octo vel decem annorum, quæ etiam ad victus sanorum & ægrotantium accommodatissima laudat DIOSCORIDES L.V. c. 5. Baccharacense ætatem mediam dum attingit, convenientissimum est.

Characteres qui dam boni vini.

Quænam ex Rhenanis saluberrima.

IX. Inter vina Moenana corpori apprime conveniunt Klingenbergense, Hirsteinense, Michelbacense, Nierensteinense, quod maxime ii, qui illis vinis persæpe utuntur, testari possunt, siquidem ea sanitati utilissima deprehendunt. Nec Mosellana virtute medica & salubri destituuntur.

Quænam ex Moenanis.

X. Cætera, quæ hic non recensemus, ne utique corpori inimica proclamamus, abstrahimus potius ab iis, & ea, quæ nobis nota sunt, ac salubritatis fama eminent, ob egregium commodum, quod corpori conferunt, commemorare hic volumus: sicuti neque exotica vina contemnimus, quæ non unius cum laudatis indolis sunt, potius asserimus, ex Italicis, Gallicis &c. vina deprehendi, quæ præstantissima & salutari etiam excellant virtute. Intendimus solum Rhenanis attribuere prærogativam, præ aliis, quod horum usus sit universalior, & ob egregium elementorum æquilibrium omnibus ætatibus, temperamentis, morbis etiam cujuscunque generis rectius hæc respondeant, cum aliorum vinorum usus sit limitatior, eaque non promiscue, & sine cautione adhiberi possint.

Ex omnibus vinis Rhenano attribuitur prærogativa.

XI. Ex vinis Franconiæ vero illa ad usum quotidianum judicamus convenientiora, quæ nimiam ætatem nondum redolent, cum qua depouunt tartarum, secus quam Rhenana, quæ eundem conservant, & propterea (quod contra vulgarem opinionem statuimus) corpori nostro etiam plus solatii asserunt. Tartarus quippe blando suo stimulo omnia emunctoria animat, & sui admonet officii, alvum puta, ac partes urinæ secretioni destinatas &c. cum alias reliqua

Quando vina Franconiæ ad usum sint convenientiora.

Egregie virtutes tartari.

vini

vini substantia destituta hoc stimulo diutius in sanguine subsistat, hic etiam blandam, subadstringentem virtutem vinis scenerat, quæ tonum non modo ventriculi, sed aliorum pariter viscerum valde roborat; quo rite se habente, circulus humorum & totum excretionis negotium felicius & promptius peragitur.

arceri à corpore, & sanum ac robustum illud in multos annos conservari posset: sed an melius & accommodatius quoddam ipso vino excogitari possit, equidem non video; constat & aliis remediis sua laus & gloria, cum vino tamen nunquam sunt comparanda; quando quidem vinum non tantum in corpus agit, sed & in ipsam animam, quam reficit, sanat, ejusque functiones mirifice promovet.

Nullum accommodatius remedium vino.

III. Antequam autem ulterius progrediamur, breviter saltem strictimque, quomodo vinum in animum exserat operationem, explicabimus. Nullum dubium est, homines ingeniosos, imo sapientes & acutos, evadere à vini potu. Ita Italos, Gallos, Germanos, & ubi bona vina crescunt, cæteris septentrionalibus maxime populis vino destitutis & cerevisiam bibentibus longe esse ingeniosiores, ipsa veritatis magistra experientia patefacit. GRYLLUS de sap. dulc. lib. I. existimat, Græcos ob præstantiam vini olim fuisse sapientiæ parentes, qui nunc cum vitibus à Turcis exstirpatis ingenii & doctrinæ gloriam simul amiserunt. Gentiles Palladem & Bacchum in uno simul templo collocarunt, in non obscurum signum, vino prudentiam augeri. Fictum à priscis est, Deos sapientiores esse hominibus, quia fruuntur & ambrosia & nectare. Ingenium, quod excitet vinum, ex eo clarissime intelligitur, quod ad poësin, quæ res ingenii est, mirifice disponat. Perpetuo ab antiquitate creditum fuit, & ipsa res ita docet vini calore poëtarum furorem & impetum excitari, & Bacchi & Apollinis furorem unum esse eundemque. Quamobrem OVIDIUS, vino carens in exilio, de se conqueritur:

A vino homines ingeniosi & sapientes evadunt.

Ad poësin mirifice disponit.

Quod probatur exemplo Ovidii.

*Impetus ille sacer, qui vaturn pectora nutrit,
Qui prius in nobis esse solebat, abest.*

Et ut NICARATUS scribit, vinum magnus est poëtarum equus, aqua namque haud bonum facere versum perhibetur, nec durabilia illa dicunt esse carmina, quæ ab aquæ potatoribus conduntur. HOMERUS, ENNIUS, HORATIUS præstantissimi poëtæ, vinosi celebrantur.

IV. Deinceps vinum hanc mirabilem possidet virtutem, quod omnem metum & tristitiam ex animo expellat, hominesque animosos, cordatos, audaces, alacres hilaresque reddat. Antiqui Bacchum cordis præsidem eam ob rem pronuntiarunt. Horum effectuum testimonium perhibet non modo ipsa experientia, sed & plurima in sacro textu satis nota loca id testantur, & ex eo saltem colligi potest, dum SYRACIDES scribit: *was ist des Menschen leben. ohne Wein.* Univer-
sale autem esse vinum præservativum à morbis ferme cujuscunque generis, non sine ratione affirmare sustinemus: quandocunque enim morborum, qui humano corpori infesti sunt, speculamur originem, eam ex imbecilliori sanguinis circulo petendam esse, nullus rerum medicarum peritus in dubium vertere poterit. Quemadmodum enim æquabilis liber & expeditus sanguinis per sua vasa progressivus motus unice conservat & tuetur corpus ab omni labe, corruptione & morbo, & vitæ non modo, sed & sanitatis faber & auctor est: ita ex imminuta, inæquali tarda sanguinis progressionem ad morbos fieri dispositionem, ex facili judicandum. Sanguis sufficienter motu circulatorio per omnis generis tubulos corporis circumpulsus, fluidus fit, subtilisatur, & à sordibus diversæ naturæ & indolis per congrua sua emunctoria dejecturatur, & ita aptus ad functiones omnes redditur. Ex motione vero segnior & debiliori, densus, crassus, immobilis fit, &

Expellit omnem metum ex animo.

Vinum est universale præservativum à morbis.

Differentia motus sanguinis in statu sano & morbo.

XII. Ultimo non possumus non elegantissimi loci HIPPOCRATIS, in quo boni vini notas & differentias exprimit, mentionem facere, qui extat lib. 2. de ratione vict. morb. acut. pag. 62. Vinum dulce vinoso minus caput gravat, & minus caput ferit, magisque sane, quam alterum, intestinorum dejectiones movet, viscerum tamen tumores, hepatis nempe & lienis auget. Neque igitur his, qui amaram colligunt bilem, convenit, nempe quod hic sitim facit. Quin etiam in superiore intestino flatum excitat, neque tamen inferiori intestino pro flatus ratione est adversum, & si non valde penetrat à dulci vino flatus circa præcordia immoratur. Et certe hoc minus urinas prorsus movet quam vinosum album, sputum tamen potentius educit alterum, quod dulce est. Vinum autem vinosum album ad vesicam altero magis penetrat & cum urinam provocet, & semper perumpat, multum in his morbis contulerit. Quamvis enim ad alia altero sit minus idoneum, quæ tamen ab ipso fit per vesicam purgatio, liberat, si uti debet impellatur; bonæ hæc sunt notæ de vini utilitate & noxa, quæ sanioribus incognitæ fuerunt. Fulvo vino vero & nigro austero in his morbis ad hæc uti possis, ubique capitis gravitas non insit, neque mentis percussio, neque sputum sursum ferri prohibeatur, neque etiam urina inhibeatur, sed alvi egestionem humentiores & ramentosiores fuerint. In his sane vel maxime ex albo mutationem facere convenit, & quacunque iis similia existunt. Istud autem insuper nosse oportet, si dilutius fuerit vinum, superiores omnes partes & quæ circa vesicam sunt, minus ledere: meracius vero iis, quæ circa intestina, magis prodesse.

CAPUT VI.

De virtute vini medicinali præservatoria maxime, & curativa.

§. I.

PULCHRE CARDANUS de rerum varietate lib. 8. cap. 23. ait: in uno hoc liquore tot salutaria recondita remedia sunt, ut quicquid saluberrimarum virium natura cæteris plantis indidit, illud omne facillima participatione vino & in vino homini ad diversissima valetudinum genera communicaverit. Et Veteres haud injuria propter summan & incomparabilem, qua imbutum est vinum, virtutem, nomen vini derivarunt exinde quasi dicatur divinum. Alii ex vi originem ejus duxerunt, quoniam vim seu virtutem animo & corpori inducere aptum est. Et revera si rem ex æquo perpendimus, non in tota rerum natura, tam ad tuendam sanitatem, quam ad valetudinem infirmam domandam, datur & invenitur præstantior & accommodatior medicina, quæ tot & tantis fulgeat virtutibus, quàm quæ residet in vino, quo olim Veteres pro summo medicamento usi fuerunt.

II. Mortales à multo tempore anxie laborarunt & quæsiverunt securum remedium ad longam & sanam vitam, quo omnis generis afflictiones

Frid. Hoffmanni Oper. Tom. V.

G g 2 ea,

Boni vini notæ & differentie ab Hippocrate prolata.

Proverbium Cardani de vino.

Vinum unde derivatur.

Vinum optima medicina.

Causa sanguinis circuli imminuentes.

ea, quæ debebant excerni, remanent, unde non modo copia sed & qualitate peregrina imbutus, plethoræ, impuritatis, obstructionum, stagnationis, infarctus viscerum & exinde productorum spasmodorum fecunda fit mater. Jam autem si consideremus eas causas, quæ imminuunt ipsum sanguinis circulum, sunt eæ potissimum quærendæ in ipso principio motus, quod subtiles mobilissimæ sive spirituosæ, impetum facientes corporis partes constituunt. Hæ si deficient, vires ad motum debitum non adsunt sufficientes, vel tardioris circuli culpa est ipsa sanguinis & humorum moles, ex intemperantia vel aliis causis nimis adaucta, & respectu virium motricium corporis nostri sive spirituum improporcionada reddita.

Quod sanguinis circulum promouet, illud morbos avertit.

V. Ex jam dictis liquido constabit, illud, quod ad morbos tam brevioris, quam longioris naturæ variique generis avertendos, & corpus ab iis defendendum adhibetur, sanguinis circulum excitare, intendere & promovere idoneum esse debere, quo fit, ut sanguis ab omni crassitie, impuritate, stagnatione, infarctu liberetur. Qualis enim sanguinis est circulus, talis ejus est fluiditas, talis excretio impurarum & superfluarum fordium, ex quarum retentione prima morborum ponuntur fundamenta. Jam vero cogitet quisque prudens & cordatus, num in tota rerum natura detur convenientius remedium, ad excitandum, augendum & promovendum circulum sanguinis ipso vino, præsertim tali, quale nos laudavimus nempe temperato. Hoc amico suo naturæ gratissimo spirituosum sulphure efficacissime vires motrices videlicet, in corpore nostro resuscitat, & impetum facientes partes adauget, omniaque membra ad vigorem & motum disponit. Postea illud tenue acidum tartareum, spiritu vinoso dulcificatum elementum, summa aperiendi nec non roborandi, incidendi, stimulandi & obstructiones referandi facultate præditum est, ut hac ratione longe felicius motus progressivus procedere possit. Accedit & illa tenuis aquea vini pars, quæ diluendo, attenuando humorum crassitiem, non levem ad promptiorem motum operam confert. Id omne ostendit ipse affectus, à vino enim bonæ notæ epoto mox intenditur calor, pulsus citatior & validior fit, sanguis à centro ad circumferentiam movetur, facies fit rubicunda, vasa turgida, augetur transpiratio, urina pellitur, & totum corpus cum ipso animo reficitur & excitatur.

Effectus vini bonæ notæ epoti.

VI. Quis itaque non perspicit, non dari aptius præsidium ad vitam longam & sanam tuendam ipso vino nobili albo?

Ebrietas in quem finem à veteribus commendata.

VII. Veteres igitur cum intelligerent, à vini potu tanta commoda redundare in corpus, commendarunt eum in finem ebrietatem, non quidem frequentem & intensam, sed levem & rarā. Arabes Medici, & inter hos AVICENNA in magn. sui op. lib. sect. 3. cap. 8. quovis mense semel aut bis ebrietatem mirifice laudat, ad proliciendū sudorē, ad resolvenda ea, quæ superflua sunt. Ipse DIOSCORIDES ait: *Vinolentia non omnis noxia; sed sæpe necessaria est ad sanitatē conservandā.* SENECA stoico supercilio gravis vir inquit: *Convictus & liberalior potio vigorem dabit, & nonnunquam usque ad ebrietatem veniendum, non, ut mergat nos, sed ut deprimat curas. Ejicit enim tædia, & ab imo animo curas, atque ut morbis quibusdam, ita & tristitiæ medetur.* HOMERUS author est, Nestorem, qui tamdiu vixit, magnas pateras vini exsiccatse. At vero hæc omnia intelligenda sunt cum grano salis, minime enim nostra

mens est, ut ebrietatem, quæ potius imminuit vitam, nec non ingenii & corporis destruit vires, collaudare velimus: sed e contrario eam valde dissuademus. Hoc tamen non negandum, nonnunquam liberaliorem potum vini, & ordinario majorem concedendum esse, non vero talem, ut inde male, sed potius bene sese habeat corpus. Dicimus, vinum esse præstantissimum medicamentum, & omnibus, ob mirificum, quem cum corpore habet concentum atque convenientiam & cum corporis nostri spiritibus affinitatem antefendum: sed uti generosa & optima remedia abusu, & non debita dosi ac tempore abhibita nocentissima sunt: ita etiam vinum summam perniciem corpori inducere aptum est, ideoque non secus quam aliud medicamen cautione & Medici consilio eget.

Usus & abusus vini.

VIII. Ut autem mentem nostram clarius quodammodo aperiamus, certo convicti & persuasum, vinum ex Medici consilio usurpatum, plus præservare à morbis posse, quam faciunt omnis generis acidulæ, thermæ, aliæque salubres aquæ. Non inficiandum est thermas & acidulas à morbis præsertim chronicis egregie corpus custodire, verum non alio agunt modo, quam circulum sanguinis & humorum augendo, nec non pondere atque elemento spirituosum minerali evacuationes per alvum, per urinam, quandoque etiam per vomitum excitando, & obstructiones ubicunque consistunt, aperiendo. At vero cum principium agendi habeant minerale, quod non adeo homogeneous naturæ nostræ est, neque reparare vires, neque spiritus ingenerare aptum existit. Deinde cum magis quantitate & copia aquæ operentur, non quivis autem ventriculus, seu viscerum ac intestinorum tonus tantam quantitatem ferre queat, & frigidus acidularum potus, serosis, phlegmaticis, & qui imbecillos & ad spasmos proclives nervos alunt, utilis esse nequeat, ideo nos sumus in hac sententia, vini salubris potum, debito regimine à Medico præscriptum ad certa tempora, plus efficaciam & virium ad præservandum ac medendum custodire, quam expectari possit à dictis illis aquis.

Vinum à morbis plus præservat, quam acidula, thermæ & alia aqua.

Vinum enim, uti antea diximus, est universale evacuans, nam per alvum, urinam & sudorem pellit; vinum est analepticum, nil enim vino citius vires reparat; est etiam optimum stomachicum. Sacra etiam scriptura teste, ad calorem & toni ventriculi concurrat: PAULUS enim Apostolus Timotheum suum, qui ex infirmitate ventriculi languebat, diserte monet, ut ad propulsandum hoc malum vini mediocrem usum sibi haberet commendatum. Est vinum optimum aperitivum sanguinem depurans, quoniam per intensiorem sanguinis motum, emunctoria recludendo, separat scorias cujusunque naturæ & generis excrementitias: unde nullum dubium, quin in malo hypochondriaco, in debilitate ventriculi, cachexia, hæmorrhoidum suppressione, tumore & obstructione hepatis & lienis, in calculo renum & vesicæ, in arthritide frigida, catharrois variisque defluxionibus, rheumatismo, lassitudine & gravitate corporis egregia sit efficacia. Idem in perduto ingenio & memoria debilitata, auditus gravitate, visus hebetudine, sensus ac motus ex defectu spirituum & nervorum imbecillitate, in venere virorum depresso ac sterilitate sceminarum, & quacunque frigida morbosa corporis intemperie, senes, pituitosos, & serosos exercente, si circumspectus ejus fuerit usus omnibus thermis, acidulis, aliisque remediis & curis, longe multumque est præferendus.

Vinum est universale evacuans.

Est optimum aperitivum.

Omnes ferme morbos sanat.

rendus. Certe si mortales scirent, quantæ virtutes salubres à benedicto naturæ parente inditæ essent huic liquori, non inciderent ita in morbos, neque tanta pharmacorum ingratorum vel etiam medicorum copia egerent.

Sententia Whitakeri. IX. Memorabilia sunt, quæ scribit WHITAKERUS insignis Medicus tract. de sanguine uvæ pag. 33. Vinum medicamentum est, ac si mea experientia esset tanti, varias & mirandas operationes usu hujus medicamenti in me ipsum, & in alios complurimos, silentio non possum præterire (scilicet) corpora extenuata ad sarcositatem reducta, & exsiccata ad humiditatem oleaginosam, quando cerevisiæ deabilis, vel aquarum potiores complexionibus simiarum potius quam hominum obtinerent.

X. Possemus & ipsi allegare exempla, ubi post bonum Rhenani usum, per aliquot septimanas, abstinendo ab omni alio potu, plures mutato quasi toto temperamento, insigne robur & virium augmentum quoad omnes actiones experti fuerunt.

Regula quædam observanda. XI. Ut autem nonnulla perquam utilia monita circa talem vini curam adjiciamus, dicimus. Primo, præparata prius corpora esse debere. Nempe si plethora adest, ea, venæ sectione tollenda est, si alvus est obstipata, & multæ viscosæ cruditates ac sordes primam regionem occupant, eæ per salina abstersiva, & laxantia debita sunt auferendæ. Secundo vina optima, temperata tamen Rhenana, & ex Moenani imbecilliora, oligophora, Klingenbergen, Michelbacense, Hirssteinense in usum hunc trahenda sunt.

Secunda. Tertio: Abstinendum est ab omni alio potu cerevisiæ, spiritu vini, cibi autem liquidi & boni succi, non crudi, non falsi, nec acidi, non calidi aromatici tunc temporis usurpandi, sed juscula ex vegetabilibus alimentosis parata optime tunc conveniunt, & augebunt vini energiam. Quarto: Potio hoc modo instituenda: si ferre possunt ægri matutino tempore vinum cum aqua Schwalbacensi aut Dinsleinensi, vel Wildungeni ad dimidium mixtum ad mensuram bibant, in prandio autem & cœna purum vinum pro siti non modo extinguenda, sed & paulo ultra, nunquam tamen cum nausea & fastidio, & ad minimum in principio de die duæ mensuræ vel tres sunt impendendæ, ita tamen, ut ab initio dosis minor postea successive augeatur.

Tertia. Quinto: Si corpus à vino nimium calefit, vel somnus impeditur, acidulæ dictæ vino miscendæ, in cœna & prandio. Sexto: Alvus si exsiccetur, prunorum, pomorum borsdorffianorum, passularum, ficuum decocto, adjecta portione salis nitrati, vel arcani duplicati est solvenda. Septimo: Tempore vernali, seu autumnali cura hæc debet institui, & per sex septimanas continuari. Octavo: Caveant autem ab ea omnes, qui copiosas & impuras, falsas, sulphureas scorias in sanguine habent, nempe scorbutici calidi biliosi, arthritide vaga laborantes, ad phthisin, hæcticam, hæmoptysin, soporosos affectus & epilepsiam dispositi.

Quarta. XII. Postquam hætenus præservatorium vini præstantissimum effectum perlustravimus, sequitur jam, ut disquiramus, in quibusnam morbis eorumque paroxysmis proficuum illud sit. Fatendum est, in præservando ejus vires esse universaliore, in medendo econtra magis limitatas & circumscriptas, certissimum tamen est, etiam in ipsis morbis sanandis, divinam Medico porrigere manum.

Quinta. XIII. Et quidem in febribus malignis vino nil *Erid. Hoffmanni Oper. Tom. V.*

datur excellentius; malignitas dignoscitur ex motuum & virium defectu, nec non valde depressa sanguinis spirituscentia, ex tardo circulo ejusdem, quæ cuncta dispositionem quandam cruoris ad putredinem designant. Igitur in iis morbis restaurare vires, spiritus erigere, circulum sanguinis liberum reddere, transpirationem movere expedit, & in eo versatur omnis alexipharmacorum virtus, quod autem vinum hæc omnia præstet, nolumus pluribus autoritatibus, quibus practicum libri pleni sunt, confirmare, sed confugimus ad solam experientiam, qua nobis constat, plures ex malignis evasisse solius vini moderato usu.

XIV. Præterea in illis morbis, ubi ad peripheriam corporis virulentum quid expellendum est, videlicet in petechialibus, variolis, morbillis, si nempe natura est imbecillis, motus cordis ad expellendum insufficiens, vel etiam retrocessio exanthematum ob debilitatem virium contigerit, vinum convenit, cæteroquin si magnus æstus & humorum ebullitio, pulsus citatior hosce morbos comitantur, abstinemus merito.

XV. Febribus continuis laborantibus non modo ipse HIPPOCRATES lib. II. de morb. acut. §. 61. vinosum vinum album & aquatum commendat, sed & innumeri practici inter quos FORESTUS lib. observat. I. obs. I. Rhenanum aquosum album subtile laudat. HELMONTIUS de feb. c. 12. pag. 772. scribit; quotquot modice vino in febribus utuntur, facilius convalescunt, vires conservant & in pristinum ocyus restituntur.

XVI. Multo magis autem hoc ipsum procedit in febribus intermittentibus, quæ ex cruditatibus, & evacuationibus impeditis, præsertim transpiratione suppressa, maxima ex parte oriuntur. Ea tamen cautione opus est, ut die intermissionis liberalius, parcius autem vel plane non in paroxysmo porrigatur nisi in declinatione, & corpore ad sudorem disposito.

XVII. Ratio vero, quare in omnibus ferme febribus non sit prohibendum, hæc datur, febris intensior sanguinis commotio est, eum in finem excitata, ut motu hoc fortiori removeat & expellat illud, quod corpori minatur interitum. Facile jam patet, quod, ubi motus ille valde est intensus, & nimis auctus, vinum parcius admittendum sit. Quod si autem debilis & languidus existit, natura deficere vel succumbere videtur, excitari debet, & promptissime vinum album & oligophorum, ut sunt à nobis commendata, offerenda, ut imbecillior facta natura restauretur.

XVIII. In syncope viriumque prostratione nil vino præstantius est. GALENUS lib. III. de medic. facult. omnibus syncope afflictis vinum suadet, substantia tenue, colore fulvum ac vetus potius, quam novellum vel mediæ ætatis, quod vires recreet, quia spiritus mire refocillat, cum exterius odoretenus exhibitum vel cordi, pulsibusque applicatum, omnibus aliis confortantibus & analepticis longe superius sit.

XIX. Dum exercet ventriculum nausea, imbecillitas, & digestionis adest defectus, inflatio, vino nil utilius reperitur: Hinc D. PAULUS Timotheo dyspepsia laboranti vinum suavitatis I. Timotheo cap. 5. vers. 23. GALENUS lib. IV. de sanit. tuenda c. 6. perhibet colore fulva aut alba, odora, substantia autem tenuia, nobilissima esse stomachica, præsertim si leniter subadstringant, & talia sunt Rhenana, quæ in appetitu excitando, in roborando stomacho, & resolutione ciborum promovenda, ob subtile acidum spirituosum adstringens eximia.

nil excellentius est vino.

Quo pacto in morbillis, variolis & petechialibus sit usurpandum.

Vinum convenit febribus continuis laborantibus.

Ut & intermittentibus.

Quamobrem in omnibus ferme febribus non sit prohibendum.

Nil vino præstantius in syncope.

Vinum convenit vitio stomacho.

Quodnam
vinum u-
surpandum
in fame ca-
nina.

XX. In fame canina HIPPOCRATES *sect. VI. aphor. 21.* vini potum commendat, neque res destituitur suo fundamento. Intelligendus autem hic aphorismus non est de quovis vino, sed generoso mero antiquo, causa enim hujus effectus acidus corrosivus humor est, in ventriculi sinu hærens, qui ab hujuscemodi vino egregie temperatur, non aliter ac spiritus nitri vel vitrioli corrosivitas ab admixto spiritu vini, vel tartari aciditas, quamdiu cum vino juncta est, ita contemperatur, ut palato jucundum exhibeat saporem.

Vinum
aqua dilu-
tum sedat
sitim.

XXI. Ad sitim sedandum, vino aqua diluto nil est præstantius, hoc pacto enim longe promptius sitim extinguit, quam si sola aqua fuerit exhibita, quando quidem sitis ex obstructis & constrictis glandulis, quæ salivalem laticem fundunt in faucibus easque ac oesophagum humectant, exoritur, has autem vinum dilutum melius referat quam aqua pura, ea propter ipse HIPPOCRATES non veretur in febribus quoque acutis talem vini & aquæ mixturam præscribere.

XXII. In vomitu idiopathico vel quando febribus jungitur, præstat vino tenui uti, quam alio humido.

Vino Rhe-
nano uten-
dum est in
colico affe-
ctu.

XXIII. In colico affectu, præsertim si ex cruditatibus viscidis, vel flatibus proficiscitur, veteri Rhenano nil est utilius. Ipse HIPPOCRATES *lib. II. epidem. 6.* vinum meracum commendat, quia cruda reddit apta ad concoctionem, attenuat crassa, flatibus discutit. Laudat quoque dicto in affectu Rhenana CRATO *conf. 169.* dissuadet Moravica & Austriaca, improbat malvatica dulcia, crassa, turbida.

Uti & in
diarrhoea
& dysente-
ria.

XXIV. In diarrhoea & dysenteria, quæ acutis etiam morbis jungitur, vinum Rhenanum tenue vel cum ptisana mixtum aut solum præstantissimum est, virtute enim pollet subadstringente, qua tonum intestinorum & laxatam glandulosam intestinorum tunicam roborat. Et cum hisce in morbis sanguinem à centro ad peripheriam movere, transpirationem augere & urinam ciere utilissima res sit, ea propter vinum, quia tales præstat effectus, optatissimum. Laudant vulgariter melioris adstrictionis causa vina rubella, quæ, si bonæ notæ sint, utique possunt admitti.

Rhenana
& Mosel-
lana opti-
mos effe-
ctus exhi-
bent in ob-
structione
hepatis &
lienis.

XXV. In obstructione hepatis, & lienis, in ictero quoque, in cachexia vinum optimos exhibet effectus. SOLENANDER celebris practicus *sect. I. conf. 12.* vinum album, maturum, purum, non potens aut vehemens, pellucidum aqua martiali dilutum, ut sunt Rhenana & Mosellana ceu admodum grata hepatis & quæ sua adstrictione viscera roborant, magnam attribuit laudem, dulcia autem, quia sanguinis copiam adaugent, non modo HIPPOCRATES *l. 2. de morbis*, sed & GUARINONIUS *conf. 117.* maximopere dissuadet.

Quodnam
vinum
convenit
hydropicis.

XXVI. In Hydrope HIPPOCRATES *de internis affect. Lind. edit. p. 230.* vinum austriacum magnificat. Item aquosum *lib. V. epidem. §. 37.* Notavit EPIPH. FERDINANDUS *hist. med. 38.* asciticos solo malvatici vini usu curatos.

Rhenanum
est adver-
sum hypo-
chondriacis.

XXVII. Affectus hypochondriacus an vinum admittat, in controversiam merito vocatur. Observavimus non unica vice in praxi, ab acidis maxime Rhenanis vinis symptomata exasperata fuisse: ratio, quod minus ferre possint vina ad aciditatem inclinantia, hæc mihi videtur & attendenda venit.

Quod cla-
rius dilu-
idatur.

XXVIII. Ob segniores peristalticum motum, qui in hypochondriacorum intestinis contingit, contenta non promoventur (familiaris enim ipsis est alvi adstrictio) sed stagnant, ipsa mora acorem contrahunt, unde vinum in talis mo-

di subjectis ipsa stagnatione in acetum forte, nervosas partes ad consuetos spasmos fuscitans convertitur. At vero cum hypochondriaci egeant viribus, ventriculus quoque robur & calorem exposcat, vinum non penitus ipsis est prohibendum. Quapropter vetus Rhenanum vel bonum Hungaricum inter ipsos cibos modice assumtum, reliquis omnibus præfert in dictis affectibus BRUNNERUS *conf. 9.* Abstineant autem à rubris, austerris, dulcibus, & ab omni usu immodico.

XXIX. In scorbutico salium tartareorum fixorum ferace Rhenanum egregium est, quia valde diureticum, unde scribit SACHSIUS *de vite vinifera p. 314.* vina Rhenana in scorbutico utilissima sunt ob vim diureticam, quia tartaream expurgant saburram, quod ex Hollandia Rheni ripam legens & Francofurtum tendens observavit, in talibus scorbuticis vini Rhenani usu crassissimas urinas tartaro copiosissimo scatentes cum fructu redditas fuisse. REUSNERUS *lib. de scorbut. p. 533.* vinum potens generosum idque meracum scorbuticis commendat, sed paucum, quod si calor intendatur, aqua passulis mixta diluendum esse.

Rhenanum
egregium
est in scor-
butico.

XXX. In calculo renali vina dulcia & generosa oleosa CRATO *in conf. 53.* recte improbat, genesis enim calculi plerumque fit ex copia sanguinis viscera abdominis ipsosque renes infarciendo, primo inflammationem, postea læsionem substantiæ renalis calculumque producente; plethoram autem à vino dulci augeri superius dictum est. Ingenerant porro renibus calculum turbida, austera, & quæ facile fiunt pendula, uti sunt hujus terræ Numburgensia. Laude autem digna sunt Rhenana, quia valde diuretica. Neccarina laudat SCHOLZIUS *consil. III.* & oligophora evacuato prius corpore moderate bibita UNZERUS *de nephrit. cap. 23.* MONTANUS *conf. 229.* vinum oligophoron purissimum maturum, colore album dicto in affectu magni æstimat. Urinæ stillicidium Authore HIPPOCRATE *sect. VII. aphorism. 28.* vini potus solvit. Intelligi debet hic aphorismus maxime de vino generoso, utpote stranguria ex prohibita transpiratione plerumque nascitur, hanc autem restituit ejuscemodi vini potus.

Quomodo
generentur
calculi re-
num.

XXXI. In affectu arthritico & podagrigo num vinum sit concedendum quæstio majoris momenti existit? Communis est persuasio, hos affectus Bacchi esse sobolem, & solo aquæ potu & abstinentia à vino curari. Equidem indubitæ veritatis est, hos affectus pro causa tartarum subtilem membranas lancinantem agnosce-re, unde vina, quæ copiam hujus principii obtinent, valde nocere videntur. Verum enim vero tartarei hi morbi ex obstructione emunctoriorum progignuntur, & viscositatem ac densitatem humorum pro fundamento agnoscunt, vinum autem per renes, qui congruum tartari evacuatorium constituunt, morbificam materiam egregie educit: hinc non apparet ratio, quare eorum usus non debeat admitti, præsertim cum plerumque etiam à ventriculi debilitate, spirituscentiæ sanguinis defectu, circulo segniori, natales suos arthritis agnoscat. Quapropter vinum cum debito regimine & ex Medici consilio præservare potest à truculentis hisce malis, si nempe extra paroxysmum usurpetur. At vero cum magna sit inter vina nec non inter naturas differentia, hinc prudens Medicus hæc probe inter se distinguere debet, nonnullis individuis magis quadrant acido destituta vina, & generosa, nempe Hungarica. CRATO *in consilio 253.* podagricis parum vini Hungarici vel Malvatici inter cibos com-

Quæ vina
huic malo
accommodatissima.

An in affe-
ctu arthri-
tico vina
sint conce-
denda.

Locus So-
lenandri
eum in fi-
nem addu-
ctus.

commendat. Et SOLENANDER in consiliis ob imbecillitatem ventriculi parcum vini usum collaudat. Egregius locus apud SOLENANDRUM *sect. IV. consil. 24.* meretur huc adduci. Videndum, inquit, quid ferre ventriculi dispositio, quid reliqui corporis possit, non cuilibet temperamento, constitutioni, etati, consuetudini omnimoda abstinentia injungenda est, magna corporum varietas: si modice vino utamur, mediocri potissimum leviter adstringente suoque id tempore debito, non obfuturus sed profuturus ejus usus: & videmus, pergit ille, ab exiguo sumto vino declinante jam paroxysmo podagricorum dolores, discusso ab excitato calore & spiritibus qualicunque humore leniores fieri, modo ut ante dictum in principio abstinenceatur.

Methodus
Hippocra-
tis curandi
malum is-
chiaticum
& arthri-
ticum fi-
xum &
vagum.

XXXII. Cæterum mentio facienda hic loci est singularis methodi, qua HIPPOCRATES in ischiatico malo & arthritico fixo & vago curando & in principio penitus profligando utitur, & memorabilia sunt, quæ scribit de intern. affect. *sect. V. pag. 120.* Ex renum morbo invadit magnus venarum cavarum morbus, venæ autem cum sanguine refertæ sunt, si quid alieni ad eas pervenerit, male afficiuntur. Sic igitur afficitur, si dextra parte morbus est, per exordia ad coxendicis acetabulum dolorem exhibere incipit. Quo autem longius tempus processerit, & productum fuerit, eo gravior dolor ad inferiora descendit, cumque ad malleolum pedis externum, & pollicis intermedium pervenerit rursus ad caput fertur ubique in eo ulcus constiterit vehementer urget, sibi que caput disrumpi videtur, oculi pituita totumque corpus implentur. Et paulo post: Si morbi initio accesseris vinum Mendæum album dilutius quam plurimum per diem potui exhibere oportet. Et inebrietur quoad sanguis è naribus plurimus erumpat: cum autem fluere cæperit, minimum tredecim diebus fluit: ubi vero hi præterierunt; non amplius inebrietur, neque ubi semel fluere cæperit. In cibo tamen paulo plus vini bibat, ut sanguis fluat. Deducit gravissimus author hos affectus ex plethora & optime, cum experientiæ consentaneum sit, hanc nititur tollere narium hæmorrhagia, quam vini largo potu provocat. At vero an non consultius sit, vel venam, vel hæmorrhoides aperire, & superfluo sanguini exitum dare, peritorum judicio relinquo.

XXXIII. Explorato sic ad sanandos internos

morbos vini usu, pauca quædam jam ut annectamus circa ejus noxam, quam ejus abusus in quibusdam ostendit, res postulat. Experientia autem & ratio docet, quod in omnibus affectibus, ubi sanguis magna copia congestus hæret, sicuti in inflammationibus, & in plerisque morbis capitis nominatim in ejus dolore à causa sic dicta calida orto, phrenitide, insania, vertigine, epilepsia, lethargo, & cunctis soporosis affectibus, vinum quodvis valde noceat. Cum enim dictis in morbis sanguis cum copia & impetu vasis partis affectæ infusus ibique congestus impeditus circuletur, non potest non à vino, quod spiritu suo petit superiora nempe caput, & sanguinem expansiva virtute ulterius rarefacit, nec non majori cum vehementia illum in partem obstructam largius è corde eo pellit, dictorum morborum exasperatio subsequi. Habemus in eo consentientem maximum nostrum HIPPOCRATEM qui *lib. II. de morbis* in cerebri repletione dolorifica, vini abstinentiam commendat, & ibidem ait: sideratus à vino penitus abstinenceat, & *lib. IV. de morb.* in cerebri sphacelismo penitus à vino est abstinendum, item in lethargo à vino abstinendum: phreneticum calefacere oportet calefactoriis humidis & potionibus excepto vino. Et *lib. de insomniis*, qui insania laborant, vinum non bibant.

Quibus in
morbis vi-
num valde
noceat.

Symptoma-
ta exinde.

XXXIV. Deinceps vinum nocet in tussi, in phthisi: aspera enim arteria minus ferre potest acres stimulos, nihilo minus vinum dulce cum ad expectorationem juvet, modice haustum non est nocivum, neque vetus Rhenanum, si tussis ad declinationem vergat prohibendum, sed potius commendandum est.

Vinum no-
cet in tussi
& phthisi.

XXXV. Tandem coronidis loco sint illa, quæ habet TIRELLUS in *historia vini pag. 60.* Vina sustentant firmos, erigunt lapsos, cohibent cadentes, vina edunt miracula, non extracta; non lapides, non quintæ essentiæ nomina fabulosa, non boli, non pilulæ argenteæ, aureæ, aut geminæ plebis deceptiones, incantamenta marsupii, vituperia sapientiæ, medicinæ opprobria. Vina autem calidi innati vera pabula sunt, certissimaque alimenta, hæc ideo celebranda elogiis vestris, encomiastico cantu, hæc severiori disciplina in usum vitæ percolenda, in ægrotantium commodum danda.

Vini lau-
des.

DISSERTATIO INAUGURALIS

MEDICO-PHYSICA,

DE VINI HUNGARICI EXCELLENTE

NATURA, VIRTUTE ET USU.

§. I.

Quum excellentem Hungarici inque primis Tockaviensis vini naturam, virtutem & usum exponere constituerim, plures fore arbitror, qui rem ab officio Medici plane alienam me suscepisse existiment. Nam perversa illa opinio plurimorum mentibus inhæret & præfertim vulgi animum irrepfit, à Medico non nisi medicamenta, eorumque formulas & varias compositiones pharmaceuticas expectandas esse; vina

vero & id genus alia inter alimenta magis esse referenda, quorum usus ad Medicum non adeo singulariter pertineat. Verum enim vero quum Medicus, qui valetudini & tuendæ & instaurandæ præesse vult, omnia ea ex rerum natura, quæ ullo modo prodesse vel etiam nocere possint, scopo suo accommodare debeat; ex re omnino esse videtur, ut non tantum ex pharmacia, sed etiam ex alimentorum genere & diætetico fonte ea meditationi & perquisitioni paulo subtiliori subiciat, quæ magnam vim & efficaciam tam in avertendis, quam sanandis morbis atque

in integritate corporis conservanda possident, in quibus vinorum genera propter egregiam, quæ iis inest, virtutem & mirabilem operationem primum omnino ac principem locum obtinere, non est, quod amplius dubitemus. Atque ego quidem in hac sum sententia, Medicum, qui aliquid solidi & laude digni in medendo præstare velit, longe tutius & consultius agere, si laborantibus auxilium ferat alimentis & præsidiiis diætetis, quam si ea ipsa ex medicamentis validioribus, magis activis & naturæ corporis humani non adeo amicis adhibeat. Nam si antiquissimorum & qui methodicæ inprimis sectæ addicti fuerunt, Medicorum monumenta consulimus, hos ipsos suas curationes ex diæta petitis remediis maximam partem instruxisse deprehendimus. Inedia enim, abstinentia, motu & exercitatione corporis, quiete, frictionibus, balneis, mutatione cœli & aëris, convenienti victu, aquarum & vini potu contra graves etiam & chronicas passionem non sine insigni successu pugnabant, rariusque medicamentis & rarissime validioribus utebantur. Qua in re optimos hos artis magistros ac professores nos hodieque sequi & imitari debere persuasissimus sum. Qua de causa, nobilem hanc materiam de vini Hungarici natura, virtute & usu evolvere & explanare constitui, ea inprimis ductus ratione, quum ejus usum jam ubique invalescere maximique æstimari videamus.

§. II.

Prius vero, quam excellentes vini Hungarici in corpore sano conservando & minus firmo restituendo virtutes ante oculos ponam, historiam physicam de hujus vini solo natali, cultu & præparatione hoc loco prætexere commodum mihi visum fuit. Amplissimam Hungariæ regionem in inferiorem & superiorem discesci, cuius vel leviter rerum geographicarum gnaro non poterit esse ignotum. Utraque vinorum nobilium, imo optimorum feracissima est, quæ tamen, quum inter se non parum ratione indolis ac virtutis differant, singula breviter strictimque considerare oportet. Quod attinet itaque ad Hungariæ inferioris districtus, ubi vites coluntur & vina proveniunt, maxime Soproniensis recensendus venit, qui vinorum est feracissimus, inter quæ tamen palma maxime tribuenda est iis, quæ in lacu *Neosidlensi* progignuntur, omnium sane delicatissima. Nam soli hujus ingenium producendo optimæ notæ vino quam maxime accommodatum est. Siquidem hic locus multis montibus stipatur saxosis, arenosis, copiosa sulphurea terra imprægnatis, è quorum etiam radicibus minerales aquæ subinde scaturiunt. Crescit ibi generosissimum vinum *Goldbergense*. Minori in pretio habentur vina eorum montium, qui solem occidentem respiciunt atque arborum multitudine vestiuntur. Et tales quidem sunt, qui in terris pago *Wohndorff* vicinis extant, quorum vina *Goldbergenfibus* multum sunt inferiora, quoniam hæc terra non tam fecunda est, limoque inertis scatet. Neque pagus circa *Gros- & Klein-Hoflingen* prætermittendus est. Atque hinc est, quod incolæ iis loco ordinarii potus utantur. Nam in genere hoc loco sciendum est, plerosque Hungariæ incolas minus frequenter vina generosa & optima ad quotidianum usum transferre, quum perpauci calidissima æstate & qui corpus multo labore exercent, sine sanitatis offensione ea ferre possint, præsertim tanta in copia, quanta ad sitim levandam requiritur. Si vero utuntur generosis,

admiscendo aquam iis tale inducunt temperamentum, quod suæ quisque valetudini proficuum arbitrat. Quem morem etiam colli videmus à reliquis gentibus, quas natura faulrix vinis valde generosis instruxit. Nam & Hispani, Itali & Galli rarius illud merum hauriunt, sed pro potu ordinario aqua admixta diluunt atque attemperant.

§. III.

Ex inferioris Hungariæ vinis commemoratio- ne digna sunt ea, quæ trans Danubium in tractu *Posoniensi* progignuntur, quorum nobilissimum habetur illud, quod in vicinia *St. Georgii* civitatis ex terra ibi valde lapidosa editur, & duplex est; alterum ex uvis selectioribus & maturioribus expressum, saporis delicatissimi, vocatur *Ausbruch*, & caro admodum venditur pretio; quum illud, quod ex uvis non selectis vulgari modo præparatur, vilius veneat. Postea vina, quæ natales suos ad terram *Rustensem* & vicos *Besingen*, *Modern*, *Razenberga* referunt, optimæ notæ sunt, & ob salubrem usum & præstantem vim ab incolis pariter ac exteris magni æstimantur. Vina *Posoniensia*, & maxime id, quod vocatur *Roster*, peculiarem in eo habent proprietatem, quod minus commode aëris liberiores ac diuturniores accessum ferre possint. Mox enim inde colorem, qui ex aureo in brunum transit, nec non saporem suum mutant.

§. IV.

Accedimus jam ad generosissima illa superioris Hungariæ vina, quæ crescunt in iis locis, quæ appellantur civitates submontanæ, in comitatu *Zempleniensi* sitæ, quarum nomina sunt *Mad*, *Tolexua*, *Benye*, *Talia*, *Schadan*, *Kerestur*, *Tarzal*, *Serensch*, & *Tokay*. Vina omnia, quæ ibi crescunt, submontana *κατ' ἑξῆς Tockaviensia* appellantur, quoniam in eo præjudicio mercatores versantur, ut à popularibus fide dignissimis accepi, vinum, quod circa *Tockay* provenit, reliquis submontanis esse præferendum, quum tamen omnia fere sint æqualia, utut non negandum sit, quod spectans ad meridiem certa pars hujus promontorii, ex 600. passibus constans, excellentissimi vini genitrix sit. Deinde celebris est ille districtus vinearum in territorio civitatis submontanæ *Tarzal*, qui se extendit in latitudine ad 3000. passus, in longitudinem vero circiter 9000. passus patet. Hæc duo loca sibi vicina vocantur *der Zuckerberg*, & quamvis hæc vina, in *Zuckerberg Tarzaliensi* & *Tockaviensi* nata, habeantur præstantissima, non tamen hujus vini adeo parva quantitas est, ut secundum vulgarem & usu receptam opinionem Augustissimi Imperatoris mentis tantum inserviat, quum Rex præter unam vineam non possideat, quam ante aliquot annos Princeps *Ragotzky* in potestate habuit. Cæterum autem vinearum partem Comites, nobiles, harum civitatum incolæ, imo rustici in possessione habent. Præter hæc loca sunt multæ aliæ civitates hisce vicinæ, in quibus vinum etiam valde potens ac generosum, optimi saporis & egregiæ salubritatis crescit, utut *Tockaviensi* & *submontano* paulo inferius, cujus naturæ est, quod in vinetis *Zackmariensibus* producit. Nec inglorium est *Mischkotien*se, cujus præstantia in famam dedit mediocre oppidum, *Mischkotz* dictum. *Tockaviensium* præstantiam æmulari etiam videntur *Tarnaviensia*, & quæ circa *Groswarden* satis benigno solo educantur.

§. V.

§. V.

Propositis sic vinorum inferioris & superioris Hungariæ optimorum natalibus, sequitur jam, ut de uvis earumque indole, quæ suavissimum hoc nectar proferunt, quædam inferamus. Has fere omnes satis commode duas in classes dispesci posse existimo, quæ quidem differentia maxime in *Soproniensibus* & *Posoniensibus* animadvertitur, quarum una uvas valde nobiles comprehendit. Inter illas eminent, quarum succus saporis dulcedine delicatiori palato miſſice blanditur, & quas incolæ vocare solent *Augſter-Muſcateller-Meyer-und Geysdutzen-Trauben*. Ad ignobiliores referendæ sunt uvæ albæ & cæruleæ, quarum succus non tanta dulcedine gaudet, sed sub æſtate non adeo fervida auſteri quippiam in lingua relinquit. Præſtantiffimæ sunt illæ uvarum ſpecies, quæ *Augſter* vocantur, & mutantur nomen ſuum partim ab inſigni magnitudine baccarum, quæ ſæpius pollicem adæquat, partim etiam à tempore maturationis, quod plerumque in principium menſis Auguſti incidit. Nulla enim regio inferioris Hungariæ uvas tam cito & expedite maturat, quam terra Sopronienſis, maxime ea, quæ lacum Neofidlenſem ambit. Hinc etiam Senatus Sopronienſis harum uvarum primitias quotannis primo die Auguſti Romano Imperatori offerre ſolet. Incolæ has uvas ſemipaffas dicunt *Manckele*, iſque utuntur loco paſſularum majorum, quarum ſaporem mira ſimilitudine exprimunt. Cæterum de hiſce uvis illud notari meretur, quod quædam ex illis baccas obtineant paulo minores, & quæ vix ſeminis cannabini magnitudinem ſuperant. Sed tamen earum parvitas generoſitati nihil detrahit, nam ſi ad maturitatem perveniunt, ſaporis ſuavitate non cedunt majoribus. Ad nobiles uvas, præſtantioris vini genitrices, pertinent etiam Moſchatellinæ, quæ nomen ſuum debent ſucco, quem alunt, delicatiſſimo, qui & ſapore & odore nucem moſchata æmulatur. Magnitudinem præ ſe ferunt cocculorum orientalium & colore leviter ruſcente tinctæ ſunt. Quod ex iis paratur vinum, Germanice *Muſcateller-Wein* vocari ſolet. Ad has proxime accedunt eæ, quas dicunt *Meyer-vel Meyran-Weintrauben*, quoniam ſucci, quem intus ſovent, ſapor & odor herbæ majoranæ valde ſimilis videtur. Velantur baccæ tenui, tenaci tamen tunica, cui puncta nigricantis coloris interſperſa ſunt. Vinum præbent ſpiritu & oleo plenum palatoque gratiſſimum. Sequuntur tandem uvæ, quas vocant *Geysdutzen-Trauben*, quarum baccæ craſſa & virideſcente teguntur membrana, & formam habent papillis caprinis ſimilem. Succo abundant copioſo, qui maxime dulciariorum uſui inſervit.

§. VI.

Quod vero attinet uvas vilioris notæ, harum in numero ſunt albæ & pallidæ, quibus à tunica, qua veſtiuntur, pellucida & alba nomen obſtigit. Succum ſovent copioſum; ſubdulcem, virtute tamen debiliorem. Huic generi viliori etiam adſcribendæ ſunt rubræ ſeu cæruleæ, quarum proventus maxime in terra Sopronienſi & Budenſi exuberat. Nomen gerunt ab exteriori rubra ſeu cærulea pellicula, unde vocantur *die blauen oder rothen Wein-Trauben*. Succus earum paulo adſtringens eſt & aciduſculus.

§. VII.

Recenſitis jam variis uvarum, quas Hungaria ſuperior & inferior alit, ſpeciebus, proximum eſt, ut quomodo variæ ex iis præparentur vini & muſti ſpecies, paulo clariſus exponamus, præſertim, quum per paucis hic conſciendi modus notus ſit, quem à fide digniſſimis popularibus accepimus. Primum & delicatiſſimum præparant ex uvis, quas vocant *Augſter-*

Trauben, quod ab incolis vocatur *Effentz*. Colligunt ſigillatim uvas, ultra conſuetum maturationis gradum excoctas & ſemipaffas, quas etiam interdum, ſi ſolis calore non ſatis ſiccatae fuerint, miſiſſimo furni calore committunt, ut magis flacceſcant, eaſque a racemis revuſſas torculari ſubjiciunt, cujus forti preſſione ſuccus elicitur, nectaris ſuaviſſimi æmulus, qui exacto deſpumationis tempore vinum præbet generoſiſſimum, oleoſum, quod diu dulce manet, & ſpatio unius anni demum deſecatur, caroque venditur pretio, & magnatum menſæ inſervit, quod mercatores pro aliis vinis perficiendis emunt. Secundum genus dicitur *Ausbruch*, quod paratur ex uvis nobilioribus invicem collectis, ex quibus, ſeparatis racemis, torculari identidem exprimitur ſuccus dulciſſimus, cui poſt aliquot dies ſervefacto adjiciunt uvas ſemipaffas, ita ſervente muſto dulcedo uvarum paſſarum extrahitur; vinum fit dulciſſimum, oleoſum, ſaporis gratiſſimi, cujus dulcedo valde diu immutata durat. Tertium genus eſt, quod conficitur ex puro muſto nobilium uvarum, quod fermentatum dat vinum valde ſpirituolum, minus dulce, limpidum. Sequitur poſtea quartum genus, quod ex diverſis uvarum ſpeciebus, nobilibus & ignobilibus, parant, & ſic muſtum copioſum acquirunt, quod peracta fermentatione vinum præbet mediocre, quod nec nimis aquoſum, neque etiam nimis generoſum aut dulce eſt, præſtantia tamen vino Rhenano palmam dubiam reddit. Ex vilioribus pallidis parant muſtum, quod fermentatum cedit in vinum cibarium, quo maxime incolæ utuntur, quoniam liberalius hauſtum non adeo facile ebrietatem inducit. Ex rubris ſeorſim etiam parant vinum, dum ſuccus ex contuſis uvis exprimitur, qui rubris pelliculis per aliquot dies ſtat ſuperfuſus. Ex muſto fit vinum rubrum, ſaporis quodammodo adſtringentis. Hæc omnia vina quod diutius ſervantur, eo præſtantiora ſunt & fortiora, & odore quodam naturali & proprio prædita ſunt.

§. VIII.

Vera ſic & ſpeciali vini Hungarici hiſtoria deſcripta, liceat nobis jam in peculiare vires, proprietates ac virtutes eorum inquirere, quibus ab aliis vinorum generibus diſtinguuntur, eorumque, quæ in ſupra memorata hiſtoria continentur notabilia, genuinas rationes invenire ac reddere. Primo vero omnium eſſentiales huius vini characteres & notæ enumerari merentur, quæ ſunt primo, quod hæc vina præ omnibus aliis valde ſint ſpirituola; ſecundo, quod quædam, præſertim generoſiora, ut fere ſunt *die Effentz und der Ausbruch*, diutius ſervent ſuam dulcedinem, alia vero non ita: tertio, quod peculiari aromatico odore & ſapore prædita ſint: quarto, quod vim habeant diaphoreticam, roborantem, & liberalius etiam hauſta nullum dolorem in capite vel languorem in artubus relinquant, ſed potius totam corporis naturam robovent: quinto, quod generoſiora non vappam contrahant, atque in vitris clauſis optime per multos annos conſerventur.

§. IX.

Primum itaque diſpiciendum venit, unde tanta vini Hungarici, præſertim quod in ſuperiori tractu creſcit, excellentia dependeat, ut plurimorum, Italici etiam, Hiſpanici & Gallici vincat præſtantiam: quod vero in inferiori Hungaria provenit, Germanicis omnibus palmam reddat dubiam. Cujus rei cauſam altius inveſtigare, non adeo difficile vel operoſum erit, ſi conſiderate ac diligenter nobiſcum reputemus, Hungariam regionem eſſe ita à natura comparatam, ut omnibus iis præſidiis inſtructa ſit, quæ ad generoſi ac potentis vini eſſentiam unice requiruntur. Sita eſt fertiliffima hæc regio in illo orbis terrarum ſpatio, quod gradu elevationis poli quadrageſimo & quinquageſimo deſcribitur, imo poſita eſt in ejus medio, quod tabulas

geographicas vel leviter inspicienti in oculos incurrit. Jam vero perpetuæ observationis res est, certoque experientia suffragio compertum habemus, has regiones, quæ intra quadragesimum & quinquagesimum gradum elevationem poli habent, vinis nobilissimis progignendis maxime esse idoneas. Nam si universam Europam per omnem ambitum usque ad ejus fines perlustramus, oculorum sane judicio constat, hanc lætissimam cœli regionem sibi subjectam habere Portugalliam, Hispaniam, Galliam, Italiam, magnamque partem Germaniæ, Austriam, Styriam, Carinthiam & fere totum tractum Rhenanum, Hungariam, Transylvaniam & eximiam partem Græciæ, quas terras, continuo & cohærente tractu exporrectas, vina omnium præstantissima proferre animadvertimus. Cujus rei ratio non abstrusa videtur; nam sub hac poli elevatione sitæ terræ fecunditate fere omnes superant, propter maximam temperiem, qua gaudent, quæ omni propagationi, fecunditati & augmento eorum, quæ è terra nascuntur, est accommodatissima. Hæc vero consistit in abundantia subtilioris humiditatis & efficacia caloris solaris: illa ad nutritionem & augmentum, hæc vero ad crescentium rerum perfectionem, coctionem & maturitatem confert. Est enim hisce in regionibus efficacior solis operatio, quam in reliquis, quarum situs in septentrionem declinat, quæ parcissimo solis calore foventur.

§. X.

Ea nimirum in varianda vinorum indole solis vis est & efficacia, ut in reliquis causis, quæ ad nobilitandam & exaltandam eorum virtutem conspirant, primum ac principem locum tueatur. Quemadmodum enim ejus calor universale quasi naturæ instrumentum est, quo in augmentandis & perficiendis vegetabilibus utitur, quo fecunda reddit animantia, eorumque vitam custodit: ita maxime ejus calor paulo penetrantior in excoquendo & dulcificando uvarum acido succo fere omne fert punctum. Sol enim paulo altior & perpendiculariter positus aeris & ætheris fluidum in vorticosum & celerrimum motum abripit, & nobilissimum nutritium succum ita attenuat atque expandit, ut tenuissima radicum ora subire possit. Deinde eundem, ostiis radicum susceptum, per angustias filamentorum & tubulorum, quibus vitium compages contexta est, vi propellit mirifica, ejusque progressum ad diffusas racemorum propagines insigniter adjuvat. Denique etiam succum intra uvarum folliculos collectum amplius resolvit, torquet, attenuat, pleniusque elaborat ac perficit, ut tandem sublata cruditate plane dulcescat. Quo fortior itaque solis est in succum vitium nutritioni destinatum operatio, eo perfectionem eum fieri nullum est dubium. Patet ex hisce facile ratio, quare in regionibus, septentrioni valde vicinis, uvæ non facile dulces fiant & maturecant, nec vinum generosum ibi possit produci, & cur sub æstate frigidiuscula vina debilia, acida & languida, sub æstate autem calidiori generosa & spirituosissima evadant.

§. XI.

Neque vero solus calor solis, licet sit ferventissimus, progignendis optimis vinis aptus est. Adspiciamus jam tantummodo eas regiones, quæ intra trigésimum quintum & decimum quintum elevationis poli gradum sitæ sunt, in quibus Barbariam, Lybiam Indiamque hoc loco nominasse juvat, quibus intensior solis æstus graviter incumbit. Nihilominus ibi admodum rarus vini est proventus, aut si quæ proveniunt, non tanta excellenti virtute, quantam ea obtinent, quæ sub temperatiori cœli ingenio nascuntur, cui Hungariam aliasque regiones subjectas esse commemoravimus. Neque deficit ratio; nam calidissimis hisce in regionibus rarius

cadunt pluviae, & si cadunt, per multos menses continuant, gravesque fiunt inundationes, quibus irrigata terræ quandam fecunditatem concipiunt. Jam vero inter omnes constat, potissimum esse pluviales aquas, quæ vegetantibus, maxime etiam vitibus, genuinum pabulum & nutrimentum præbeant. Si itaque eæ deficiunt & vites convenienti nutrimento defraudantur, hæc solis vehementiori calore quasi torrefiunt: si vero pluviae adsunt continuæ, deficit æstuans solis calor, neque etiam nimia humiditas fecundationi & perfectioni vegetabilium idonea est, sed potius humiditatis & caloris temperamentum ad eam requiritur. Quapropter in locis temperatæ zonæ subjectis, ubi temperies caloris & humiditatis non deficit, omnes plantæ, vegetabilia & vites optimos ferunt fructus. Quare etiam non mirum est, Hungariam fere omnes regiones fecunditate superare & optimæ notæ proferre vinum. Regio quidem hæc torquetur sæpius certis temporibus, imprimis interdiu, incredibili calore, qui incolis multam creat molestiam. At diem calidissimum nox sequitur paulo frigidior, qua sub forma roris aqua in forma vaporum in atmosphæra contenta & solari calore valde attenuata descendit, qui totam terram mira fecunditate imbuat, atque in vitium sanguinem & succum convertitur.

§. XII.

Neque vero solus est cœli calidioris favor solisque benignitas, cui adscribi debeat vini Hungarici excellentia, sed etiam in ejus societatem venit ipsius soli natalis indoles & conditio. Nimirum ad generosioris vini efformationem non sufficit blandum cœli ingenium, nisi conspiret conveniens terræ temperamentum, à quo ingens vinorum differentia proficiscitur. Quemadmodum enim frumentorum semina, licet etiam vegetissimum solis calorem experiantur, lætam in messem ægre efflorescunt, nisi opportuno solo excipiantur: ita etiam ad efficiendam vini præstantiam ac nobilitatem parum valet convenientissima cœli inclinatio, nisi à favorabili terræ genio secundetur. Quando autem vividior solis operatio solique opportunitas conveniunt, admirabilem sane in amplificandis vini dotibus exerunt efficaciam. Ante omnia igitur illud animadversione dignum est, quod nobilissima Hungariæ vina, quæ maxima in celebritate sunt, & reliquarum virtutem longissime exuperant, nascantur in summis montium jugis, solem orientem vel meridianum respicientibus, inque fluviorum confinio positis, quorum etiam terra admodum arenosa & copioso sulphure imprægnata est. Hæc autem locorum positura, hæc soli indoles ita omnino comparata est, ut generosissimo vino perficiendo quam maxime inserviat. Primo enim scire oportet, montes altissimos, quorum facies in orientalem vel meridionalem plagam directa est, vini feraciores esse aliis locis humilioribus vel etiam montosis, quorum situs ad solem occidentem propius accedit. In illis aer spirat purissimus, nullisque peregrinis effluviis contaminatus, illi ab omni ventorum septentrionalium injuria immunes sunt, dumque præruptis jugis vividiores solis radios excipiunt & versus se invicem reflectunt, calorem augent, conceptumque diutius retinent. Aer autem purus, vegetus & solis calore extenuatus succo nutritio uvarum se intime miscet atque insinuat, ipsique subtilitatem & quandam spiritualcentiam conciliat, vinaque maxime salubria reddit, ut promptius minimos etiam corporis humani tubulos tam secretorios, quam excretorios transeant. Subtile & æthereum hoc principium vinis admixtum efficit in partibus nostri corporis solidis quoddam robur ac vigorem, ut sanguinis & humorum circuitus facilitetur. Nam tenuissimum & æthereum hoc elementum quo majori in copia liquidis & potulentis inest, eo majori salubritate ea aliis præstant, quod ipsis etiam in aquis animadvertimus fontanis, maxime

maxime vero mineralibus, acidulis, thermis, quæ efficaciam suam in medendo, & a salibus & maximam partem à principio aëreo æthereo, quod accedente vel levi calore vel motu bullarum, copiosissimarum auctor est, quæ vitri parietibus adherent & foras erumpunt. Quo spirituofo principio si privatae fuerint, longe inertiores evadunt, & saluberrima earum virtus multum elanguescit. Præterea & aer purus ac defœcatus & solis æstus efficacior in causa est, quare omnia ea, quæ in editoribus & montosis locis succrescunt ac germinant, & teneriori habitu & nobiliori virtute splendeant, quam quibus solum natale humiliter valdeque depressum & planum obtigit. Plantas in montibus & altioribus locis crescere saluberrimas, roborante & aperiente virtute præditas, artis medicæ periti optime norunt. Frumenta, quæ ibi nascuntur, tenuiori cortice esse donata, ac meliorem & copiosiore farinam dare, fœnum quoque & gramina ad nutrienda jumenta, & nobilior lac præbendum esse aptissima, in re œconomica versatis perquam notum est.

§. XIII.

Ego vero hoc loco & occasione hoc egregium argumentum, quod videlicet ad præstantiora vina generanda loca montosa & declivia, & ubi in eorum radicibus flumina feruntur, sint aptissima, paulo explanatius evolvendum esse arbitror. Nam si loca natalia eorum vinorum, quibus naturæ benignitas Germaniam nostram fortunavit, consideramus, observare licet, nobilissima vina in tractibus montanis, maxime soli orienti vel meridiano oppositis, circa flumina, quæ infra transeunt, prægnatæ, & aliis etiam propter nobilissimam virtutem vulgo præferri. Ecquis enim nescit, in Franconia Würzburgense, Wertheimense, Klingenbergen, quæ omnia in montibus Mœno vicinis proveniunt, ceteris esse superiora? Quorsum etiam spectant vinum Nierensteinense, Hochheimense, Muchelbachense, Cocheimense, quæ non procul à Mœni fluvio producuntur. In montibus circa fluvium Rheni positæ prodeunt Bacharacense, Rudelsheimense, Laubenheimense, Johannesbergen & hujus generis plura. Circa fluvium Mosæ quæ crescunt, ex his celebrantur Dufemundense, Selleri; circa fluvium Kocher proveniunt etiam nobilissima Neccarina; in montibus, quos transfluit fluvius Albis, optima vina, quæ suppeditat Bohemia & Misnia, proferuntur. Eodem modo res habet cum vinis Austriæ, quorum præstantiora in locis montanis circa Danubium extant. Pater hinc etiam ratio, quare vinorum circa lacum Neosidensem optimorum sit proventus, & loca illa superioris Hungariæ submontana, ubi generosissimum & Tokavien, vinum abundat, superius enumerata, in confinio fluviorum præsertim Teyssæ posita sint.

§. XIV.

Sequitur jam, ut hujus salubritatis & excellentiæ vinorum, quæ in montibus fluvii vicinis producuntur, causas, & quare in locis planis & humilioribus non tanta bonitate gaudeant, inquiramus. Nos in ea sumus sententia, præstantiam & salubritatem vinorum præter solis efficaciam etiam deberi nutrimento vitium teneriori & subtiliori. Quum vero omne plantarum alimentum ex aqueis & tenuioribus sulphureis pinguius partibus sit compositum, facile inde judicare licet, quæ ad subtilem reddendum nutritium succum & præbendas particulas aqueas sulphureas pingues, tenuiores, levioresque conferunt, ea etiam ad nobilitatem & salubritatem vinorum præstandam esse aptissima. Jam vero quum montes expositi sunt nocturnis roribus, qui circa confinia fluviorum sunt abundantissimi, & subtilissimam & æthereo principio intermixtam aquam foveant, non mirum est, rorem optimum esse nobilissimarum vitium nutrimentum. Patendum quidem est,

rorem nocturnum per se ad nutriendas vites non sufficere, sed pluviae ut accedant necesse est, quæ plenius nutrimentum toti vitium compagi afferant. In eo tamen posita est differentia, quod copiosæ pluviae, in locis planioribus collectæ & diu stagnantes, situm & putredinem contrahant, valdeque crassum & impurum nutrimentum reddant. Ubi vero post humectationem terræ, quæ vites alit, citius delabuntur, nulla harum stagnatio, nulla corruptio locum invenire potest.

§. XV.

Diximus etiam supra, ipsius soli naturam atque indolem diversam multum facere ad differentis vini, nobilioris vel ignobilioris, proventus, quod jam plenius & accuratius evolvendum erit. Constat nempe ipsius experientiæ & oculorum testimonio, nobilissima vina, ubicunque terrarum crescant, natale solum habere terram non valde pinguem, crassam, lutosam, nigram & viscidam, sed potius saxeam, arenosam, calcaream, vel scissilem lapidem. Videtur quidem primo intuitu ejusmodi terra valde infœcunda & sterilis, & prægignendis ac fœcundandis plantis & fruticibus minus idonea; sed tamen res aliter habet cum vitibus, quæ si nobilissimum succum ferre debent, utique talis terræ indoles huic rei aptissima est, & quidem eas ob causas, quia arenosæ, calcareæ & saxosæ ejusmodi terræ diutissime retinent solares radios, qui hic concentrati radices blando suo calore fovendo efficiunt, ut nutrimentum per omnes ejus poros facilius transeat. Deinde dum per hujus generis terras quasi per filtrum humiditates & pluviales aquæ transmittuntur, has ipsas non modo attenuant, inque minimas partes dissolvunt, sed & crassiores & rudiores partes separant ac detinent, ut longe subtilior succus nutritius evadat. Ubi tamen notandum venit, quod ejusmodi terræ vinearum & montium fimo & stercorea materia singulis fere tribus vel quatuor annis probe imbui debeant. Nam hæc ipsa utique pingue & sulphureum principium, sine quo nulla sit fœcundatio, suppeditant. Sed tamen ad purificationem & subtilitatem etiam hujus sulphureæ & oleosæ materiæ solum arenaceum & calcareum multum confert. Ubi vero terræ sunt valde pingues, lutosæ & viscidæ, ibi nec depurantur satis aquæ pluviales, nec sulphur soli satis subtile redditur, sed integrum & minus defecatum canales & poros plantarum ac vitium subit. In diversissima igitur soli natura, & quidem non sine ratione, diversi saporis, quo vina prædita sunt, eorumque salubritatis & insalubritatis causas positas esse existimamus. Neque enim ignotum est, mirifice inter se ratione saporis & odoris differre vina Rhenana, Franconica, Hungarica, Mosellana & alia etiam aliis esse salubriora; quam differentiam solo natali si quis adscribere velit, is utique non multum errabit. Dici enim vix potest, quam diffidens planeque diversa sit natura atque indoles soli & terræ, quod vel ex colore, odore, textura, consistentia, porositate, crassitie, imo ex destillatione aliisque laboribus mechanicis & chymicis satis superque cognoscimus. Mirum itaque est, quod vineæ, quæ habent eundem solis aspectum, quæ etiam in ejusdem altitudinis montibus positæ sunt, & ejusdem generis vites alunt, vina tamen ratione præstantiæ, salubritatis, saporis ac penetrantiæ admodum diversa proferant. In cujus rei illustrationem ut saltem unicum adducamus exemplum, notum est, vina, quæ circa pagos Hochheim, Kochheim & Cassel, è regione urbis Moguntiae producuntur, nasci ex unius generis vitibus, quæ etiam eodem modo tractantur, eodemque prorsus sole foveantur; nihilo minus præstantia mire inter se differunt, ut longe etiam cariori pretio Hochheimense præ Kochheimensi & hoc præ Cassellano ematur. Quum vero nihil fiat sine ratione, valde credibile est, hujus differentiae causam referendam esse ad soli diversitatem,

tem, quæ non adeo aperte in sensus incurrit. Et quum etiam vinum Hungaricum ratione saporis & odoris aliquid habeat præ aliis vinis peculiare sibi quæ proprium, & spiritus etiam ex iis destillatus saporem & odorem exhibeat singularem, nullum sane dubium est, quin hoc soli natalis peculiari naturæ sit adscribendum.

§. XVI.

Accedimus jam ad virtutem vini Hungarici, præsertim Tockaviensis, explicandam, quæ etiam quodammodo peculiaris est. Nam plura vinorum genera dantur, ut Rhenana & Mosellana, quæ virtute diuretica & alvum solvente eminent. Hungarica vero diaphoretica, imo sudorifera virtute præ omnibus aliis excellent, quod quisque sanus homo experiri poterit. Nam si quis illud paulo liberalius atque etiam ad ebrietatem usque hauserit, mane totum corpus sudore diffluere observabit, si modo vinum bonæ notæ & purum fuerit. Quemadmodum vero liberior transpiratio & sordium in corpore superfluum excretio, quæ per corporis corticem, nempe cutim fit, omnium excretionum est præstantissima, quoniam totum corpus & universam sanguinis & humorum massam à sordibus depurat; ita vina diaphoretica saluberrima esse, quilibet facile judicabit. Liberior enim & vel ad sudoris eruptionem aucta transpiratio intensiorem & expeditiorem sanguinis motum sequitur, cordisque & partium solidarum, sanguinem impellentium, robur ac vigorem indicat, quod utique ad tuendam valetudinem, eamque à morborum causis atque insultibus præservandam plurimum valet. Præterea vinorum Hungaricorum salubritas eo manifestatur, quod nullum fere acidum in se custodiant, neque illud in primis viis relinquant, quemadmodum omnia fere Germaniæ vina id faciunt, adeo ut ab iis omnes, qui imbecillum habent ventriculum, qui affectu hypochondriaco laborant, & ubi alvi seguities est, plane abstinere debeant. Quam nocivum vero sit acidum, ex alimentis in corpore relictum atque ad massam sanguinis tractum, res jam satis clara & inter Medicos decisa est. Quis enim nescit, eam esse acidorum indolem, ut tunicas nerveas ventriculi & intestinorum arrodant, extractum ex alimentis succum præcipitent, alvum constriquant, sanguinemque & reliquos humores ad crassitiem, spissitudinem & coagulum disponant, & arthritidis, rheumatismi, calculorum frequentissimam causam constituent, in foeminis vero, dum saluberrimum mensium fluxum retardant, innumeris malis, quibus affligi solent, occasionem præbeant, quæ omnia à vinis Hungaricis non expectanda sunt incommoda. Alia vina, si destillantur, præsertim quæ in Germania proveniunt, tertiam circiter partem spiritus inflammabilis præbent, tres vero sui partes in cucurbita relinquunt, saporis valde acidi & austeri. Hungarica vero vina, quæ fermentationem subierunt, generosiora fere dimidiam partem spiritus vini grati odoris exhibent, dimidia parte relictæ subacidi dulcis saporis. Vina autem generosiora, oleosa & dulcia superioris Hungariæ, item *der Ausbruch*, non quidem tantam copiam inflammabilis spiritus suppeditant, sed præter phlegmata insignem copiam magmatis viscidæ dulcis præbent, quod siccatum & igni injectum flammam concipit.

§. XVII.

Ex his elementis & ingredientibus vini Hungarici jam expositis quisque peritus Medicus facile judicare poterit, quas alat in medendo virtutes, quibus corporibus, ætatibus & temperamentis conveniat, & quibus in morbis usurpari possit. Qua de re etiam, ut scopo nostro medico satisfaciamus, paulo fusius & distinctius agendum erit. Diximus in superioribus, ipsa vina Hungarica diversis modis præparari, & inter se quoque ratione nobilitatis differre, hinc etiam virtutes singulorum

non esse easdem, sed differentes facile apparet. Nonnulla enim valde generosa & dulcia sunt, suamque dulcedinem diutius servant. Alia sunt tenuiora & spirituosiora, minoris dulcedinis. Dulcia maxime sunt recentia, & quæ in Hungaria superiori ex nobilissimis uvis proveniunt. Sed placet hoc loco, priusquam ulterius progrediamur, ante omnia inquirere, quare vina Græca, Hispanica, Italica, aliaque in regionibus calidioribus, etiam ex uvis optimis parata, dulcia non diu retineant suam dulcedinem, sed eam mox deponant, ita ut vel in fortia aceta degenerent, vel in valde spirituosiora vina convertantur; vina vero Hungarica, præsertim, quæ ex urbibus submontanis superioris Hungariæ ad nos veniunt, & quæ vulgo dicuntur *Ausbruch*, eam diutius servant. Etenim omnia musta, sive succi ex uvis recenter expressi singulari dulcedine linguam afficiunt, quæ tamen mox post fermentationem perit. Deinde omnia musta destillata parum vel nihil dant spiritus inflammabilis, post fermentationem vero, quum jam omnis fuerit finita, multum spiritus phlogistici exhibent, acido & tartareo phlegmate remanente. Quare vero vina Hungarica non ita deponant suam dulcedinem, sed eam servant, & cum vetustate generosa evadant, res scrutinio non erit indigna.

§. XVIII.

Supra jam memoravimus, diversis modis tractari & præparari vina Hungarica; ex qua peculiari tractatione erit etiam petenda ratio durantis illius dulcedinis. Nam ubi succus ex uvis nobilioribus & maturis semi passis & exsiccatis elicitor, qui essentia dicitur, diutissime manet dulcis. Deinde quando musto subdito calore ferventi immittuntur uvæ passæ vel aliæ adhuc recentes, dulcia identidem vina emergunt, quorum dulcedo diutissime durat. Quæ vero non ex siccatis uvis vel ex musto fervefacto proveniunt vina, ea utique, non secus ac alia vinorum genera effervescentia, gratum ac dulcem suum saporem amittunt; idque etiam fit in nostris regionibus. Nam si quis musta recentia calori vel igni admoveat, ut ex parte ebulliant, quemadmodum additis herbis, vina v. g. cochleariæ, enulæ, absinthii, melissæ parantur, non amplius ita effervescent, sed dulcedine diutius linguam afficiunt. Eadem encheiresi in insulis Canariensibus vina, quæ dicuntur *Sect*, item Hispanica, vina de Tint, de Alicante incolæ parare solent. Causa igitur durabilis illius dulcedinis non est à natura, sed dependet ab artificio, ab igne nempe & calore, qui hunc peculiarem effectum producit, eo quod fermentationis actum præpediat, qua unio dulcium dissolvitur ac destruitur, ingensque mutatio ipsi musto ratione qualitatis inducitur. Fermentatio vero est nihil aliud, quam motus intestinalis aëris & ætheris partiumque aquearum in musto contentarum, qui partes, quæ mixturam dulcium corporum constituunt, dissolvit, particulasque acidas & sulphureas terreasque, quæ inter se commixtæ dulcedinem formant, à se invicem separat, adeo, ut acidum incipiat in sulphureum ac terreum principium agere, unde fit ebullitio, spumescencia & evaporatio partium sulphurearum, nec non dejectio partium crassiorum terrearum in fundum; qui motus ebullitionis dum diu durat, acidum cum subtiliori sulphure & phlegmate sese intimius conjungit rursus, & vinum inde surgit, sive liquor acido-spirituosus. Quod si vero per calorem mustum fervefit, & ex parte ebullit, particulae aëreo æthereæ & subtiliores aqueæ, quæ prima ac præcipua motionis illius intestinalis fermentativæ causa efficiens sunt, ex intimis musti poris exturbantur atque aufugiant, unde necessario sequitur, ut partium liquoris dulcis salva & integra maneat textura ac dispositio, & inimica earum separatio impediatur. Quum vero non omne principium aëreo-æthereum & subtile humidum per fervefactionem evaporet, sed quædam

quædam pars ejus remaneat, impeditur quidem vehemens fermentationis actus, sed tamen remissior & lenior species fermentationis adhuc manet, à qua etiam defœcatio successiva & spirituscentia blandior horum vinorum dulcium producitur.

§. XIX.

Explicata sic dulcedinis, quæ vinis Hungaricis inest, ratione, jam longe felicius & clarius vires & virtutes horum vinorum peculiare deducere ac determinare licet. Vina itaque dulcia generosa quum nihil fere in se habeant acidi, nec valde spirituoſa, sed temperata sint, corporis humani naturæ admodum amica & blanda observantur; eo quod omne dulce & temperatum nutritioni & succorum deperditorum restaurationi valde aptum sit. Quare etiam lac, quod sensu medico dulce est, multum nutrit. Hinc hæc vina ad succum nutritium chylosum temperatum blandeque spirituosum reddendum multum valent, unde si moderatori dosi usurpentur, nullum dubium est, quin succos nutritioni aptos reddant, & corpora exsucca & arida, imbecillia etiam, alant ac nutrant, viresque simul restaurent. Rectissime igitur ejusmodi vina à Medicis & sapientissima antiquitate lac senum vocantur, qui virium restauratione valde indigent. Deinde etiam eorum usus admodum salubris & utilis est iis corporibus, quæ vel ex nimia sanguinis profusione aut diuturno morbo, præsertim acuto, aut fatigatione corporis & animi succos & vires amiserunt, viriumque amissarum & nutritionis reparationem expetunt, si nempe inter cibum pariori manu, sed crebrius sumantur. Porro ubi digestionis vis est diminuta, ubi acidorum humorum est colluvies, alvique stipata & adstricta, suppetias hæc vina ferunt desideratissimas. Nam subtili suo spiritu adaugent calorem, viscidaque dulcedine acidum contemperant & lubricas intestinorum tunicas reddunt, ut excrementorum progressus ac transitus fiat facilior. Quapropter summo cum fructu hypochondriacis, arthriticis, podagricis, quibus omnibus acida vina valde infensa sunt, illa exhibentur; quippe qui inde magnum levamen, quotidiana id testante experientia, persentiunt; siquidem hos morbos valde pertinaces ex tartareis salibus invicem concretis prognasci extra dubium est. Quum igitur acidum prima in regione collectum attemperent, atque impediunt, quo minus cum particulis terreis & sulphureis sanguinis coire & congregari possit; utique tartari generationem ejusque causas prævertunt & remonent. Accedit etiam, quod intestinorum & ventriculi tunicis valde nerveis & exquisitori sensu armatis multum faveant, dum blanda sua visciditate eas oblinunt, ut à succis acidis corrosivis ibi stagnantibus non offendantur, vel earum læsio ab hisce jam inducta emendetur, partesque corrosæ demulceantur ac deliniantur. Denique etiam paulo liberalius sumta, modo non crebrius, non facile nocent, nec corpora, ut alia vina, ad morbos disponunt, sed eos potius, præsertim chronicos, præcavent. Nam quum circulum sanguinis strenue promoveant, atque insuper perspirationem reddant auctiorem, corpus a multis foribus excrementitiis liberando id agilius & alacrius reddunt.

§. XX.

Quemadmodum vero nihil eminente quadam virtute agendi præditum in tota rerum natura
Frid. Hoffmanni Oper. Tom. V.

existit, quod incongrue atque immoderate usurpatum non noceat, licet sit sua in natura optimum: ita etiam cum optimæ notæ vinis, Hungaricis quoque, comparatum est. Nam parcius uti eo debent, qui nimium abundant succo & sanguine, & ubi vasorum angustia ingens est, eaque succis referta, quoniam non modo eorum augent copiam, sed & dum in motum intestinum calidum eos conjiciunt, ex ingente sanguinis turgescencia calores, anxietates, sanguinis congestiones, imo ad inflammationes viscerum internas dispositiones, febresque synochæ & sanguinis profusiones fieri possunt, præsertim si quis ea crebrius & immoderatus in usum velit recipere. Infensa etiam sunt iis, qui ex motu & calore æstuant, vel ad choleram & vehementem iram proclives sunt. Vidimus ab ejusmodi vinis dulcibus & spirituosiss, in actu iracundiæ fortius haustis, inflammationem ventriculi subortam, quæ, emetico, imprudenter à Medico exhibito, adaugeta intra paucas horas mortem induxit.

§. XXI.

Accedimus jam ad vina Hungarica spirituosiora, quæ motum fermentationis sustinuerunt; ea prioribus calidiora esse, nemo facile in dubium vocabit. Hæc utique corporibus humidioribus, & ubi multum crassi phlegmatis in partium tubulis subsistit, sub moderatori tamen semper usu, valde conveniunt. Hæc etiam digestionem primarum viarum labascenti calore & spirituscentia sua valde succurrunt, inque morbis chronicis, qui ex atonia & nimia laxitate fibrarum proveniunt, in alvi fluxibus, flatulentis in dispositione cachectica, affectibus paralyticis, colicis, opem ferunt exoptatissimam; sed ut moderatior eorum sit usus, providendum est. Et quemadmodum omnia calidiora sanguinem in vehementem motum conjiciunt, eumque valde exagitant: ita sanguinei & cholericis, plethorici atque ad vehementiores animi affectus proniores, iis ut parcissime utantur, necesse est, si ardentes febres, sanguinis profluvia, congestiones & inflammationes itemque nimios conatus & motus ad hæmorrhoidales venas evitare velint. Novimus, quosdam plethoricos & vitæ sedentariæ addictos, qui iis frequentius usi fuerunt, in dorſi graves dolores incidisse, quos passionis calculosæ & ischiadicæ sequutæ sunt, quibus deinde sanguinis missiones in pede, neque minus diluentia ac nitrosa profuerunt. Habent vero vina Hungarica generosiora id commodi secum, ut correctionem acidis & ponticis humoribus, si prima in regione stabulentur, dulcificantem medicinam præbeant. Nam corrosivos etiam mineralium spiritus spiritus vini rectificati additione sufficienti temperari inque blandam & dulcem naturam converti, spiritus vitrioli, nitri & salis dulcis præparatio chymica luculenter demonstrat. Et quum sæpius ex cruditatibus acidis in senibus vel imbecillibus capitis dolores, ophthalmiæ, dysuriæ, hemicraniæ, stranguriæ, eructationes & vomitiones acidæ eveniant, certe hi convenientissimum præsidium in vinis Hungaricis, tam dulcibus, quam spirituosiss invenire possunt: hæc enim inter vina stomachum confortantia principem sibi locum vindicant.

§. XXII.

Cætera Hungariæ vina, quæ non tam spirituosiora, sed temperatiora sunt, quod attinet, præstat iis uti loco vini Rhenani vel Franconici, si quis cum molestissimo illo hypochondriorum
H h malo

malo aut podagrico affectu conflictetur, quin non tam subtile acidum ac tartareum principium, nerveis partibus valde inimicum, quod iis se alius insinuat, secum ferunt, & transpirationem etiam melius adjuvant, quæ his in morbis excretio est desideratissima.

§. XXIII.

Convenienti sic usu & viribus vini nostri traditis, exposita etiam eo male utendi ratione, jam breviter strictimque proponere placet, quam opportunum in nonnullorum medicamentorum præparatione illud locum habeat. Igitur primo optime inservit destillationi aquarum spirituosarum ex speciebus aromaticis vel sale volatili oleoso pollentibus. Serenissimus Rex Prussiæ, Fridericus, augustissimæ memoriæ, frequenti in usu ad flatulentias deprimendas habebat aquam carminativam, quæ ex corticibus aurantiorum recentium, pomorum Chinenfium & citri cum vino Tockaviensi per destillationem præparabatur, cui ad dulcificationem pauxillum julapii rosarum additum fuit, quæ odoris fragrantia, saporis suavitate, & eccellente virtute utique se commendabat. Ex vino Hungarico destillatus spiritus aliis ex vino vel fecibus vini paratis spiritibus longissime præferendus est; non modo enim sapore & odore aromatico, sed & viribus differt. Præter virtutem enim confortantem & calefacientem blandum somnum placidamque quietem, si circa lecti ingressum sumatur, inducit, ob sulphureum, quo gaudet, principium, quodammodo vaporosum, sed blandum, & nervorum texturæ eorumque fluido amicum. Præterea Hungaricum generosum, præsertim Tockaviense, optimi menstrui vicem gerit, quo in elixirio stomachico & antihypochondriaco præparando felicissime utimur, cujus præparatio hæc est: *sumo corticum aurantiorum recentium unam unciam, qui in mortario contunduntur in massam, cui extracti cardui benedicti, centaurii minoris, salis tartari æquali portione drachmas duas admisceo, postea olei macis, olei de cedro guttas viginti adjicio; affunditur vini Tockaviensis libra una medica, extractio fit in Mariæ balneo: post subsidentiam clarus liquor decantetur, qui ad cochleare dimidium cum convenienti vehiculo datus in morbis, qui ex prava digestionem nascuntur, & prima in regione sedem habent, & maxime in molestissimo illo hypochondriorum malo, si quod aliud remedium, præsentissimi usus. Eodem modo elixir proprietatis præparationem institui posse, ut loco spiritus vini sumatur vinum Hungaricum, & loco spiritus vitrioli sal tartari, in feliciorem usum nemo facile inficias ibit. Postea etiam hoc vinum optimum præbet vehiculum ad assumenda medicamenta, quæ saporis paululum nauseosi sunt; ita enim gratia iis conciliatur. Species aromaticæ & nervinæ si cum eo infundantur & cum hoc infuso partes externæ, si qua latio aut contusio, tumor, aut impotentia motus*

cas obsideat, calide foveantur, nihil poterit esse præstantius. Corticis chinæ uncia una, & florum chamomillæ vulgaris uncia semis, addita salis tartari drachma una, si decoquantur cum libra una vini Hungarici, medicina fit antifebrilis, quæ si ventriculus nimia imbecillitate laborat, in febre intermittente & chronica, præsertim ubi vires morbo vel ætate fractæ sunt, virtutem habet excellentissimam.

§. XXIV.

Ultimo loco de adulteratione horum vinorum quædam adjicienda sunt, quæ nestra tempestate est usitatissima; maxime eam ob causam, quia hæc dulcia vina ob eximiam virtutem magno in pretio habentur. Solent eam tentare, dum musto recenti dulci cuicunque vel etiam calefacto adjiciunt uvas passas Hispanicas vel saccharum etiam, & parum ex fecibus cerevisiæ albæ addunt, ita in loco temperato fit ebullitio, & liquor gratus, suavi dulcedine præditus emergit, quem incautis parumque vinorum naturam intelligentibus pro Hungarico vendunt, & ut naturalem saporem hoc vinum æmuletur, portionem vini Hungarici inferioris admiscunt. Sed sapor & odor, maximeque virtus ab iis distinguitur, qui frequentius genuinis vinis usi fuerunt. Certissimum tamen vini Hungarici genuini indicium illud est, si liberalius haustum nullam capitis gravitatem inducit, sed potius corpori alacritatem affert. Nam licet artificialia dulcedine placeant, valde tamen insalubria sunt, caput enim statim occupant, & immodice hausta mirum languorem ac gravitatem toti corpori inducunt. Spirituosum enim & subtile illud elementum, quod salubritatem vinis ingenerat, & ex vitium, solis, soli & nutrimenti natura peculiari affertur, in ejusmodi arte factis plane deficit.

§. XXV.

Coronidis loco id prætermittere intactum non possumus, quod salubris & præstantissima vini Hungarici præsertim superioris indoles communiter, imo ab ipsis incolis etiam solo, ubi vires crescunt, aurifero adscribi solet, eo quod terra Tockaviensis roborans in se auri sulphur copiosum contineat. Quin imo variæ circumferuntur historiæ & literis etiam mandatæ sunt, de quibus legi possunt JACOBI TOLLII *Epistolæ itinerar.* in ipsis botris & acinis compactas sapius auri atomos mire splendentes fuisse repertas, ita ut etiam membranulæ exteriores auro quasi obductæ fuerint. Et ajunt, in Tockaviensi tractu, ubi generosissima nascuntur vina, videri non raro aurum instar funiculi rotundi simul è terra enasci; quas tamen historiolas in medio relinquimus, utut non de earum fide dubitandi prægnantes habeamus causas. Id saltem dicimus, nec aurum, nec alia metalla ad foecunditatem terræ, multo minus ad succos vegetabilium nobilitandos: & salubres reddendos quicquam conferre posse.

PRÆSTANTIA REMEDIORUM DOMESTICORUM.

§. I.

U Tcunque id temporis ars, quæ ægris sanitate & sanis vitam longam promittit, longe subtilius quam superioribus temporibus exulta sit, cum ex nobilissimis pariter & utilissimis anatomicis, physicis, mechanicis & chymicis inventis magna ceperit incrementa, nihilo fecius, quo minus hujus artis opera & exercitia feliciter & ex voto adhuc succedant, complures remora atque difficultates observantur, ex quibus immensa illa medicamentorum farrago ac silva, quibus Medicorum libri & pharmacopolia repleta sunt, præcipuum locum sibi vindicat. Antiquissimi Medicorum perquam paucis utebantur remediis, sed victu potius curabant & cuivis morbo & corpori accommodatam vivendi rationem præscribebant, atque de origine ac causis morborum avertendis plus erant solliciti, quam de iis curandis. Et quia animadvertēbant præposteros animi motus perniciales maxime affectiones suscitare, salutaribus potius morum præceptis animum magnis desideriis intentum componere & sanare omni studio laborabant, paucis herbarum infusis vel decoctis contenti. At vero postquam GALENUS & ejus sectæ addicti, atque Arabes doctrinam hanc salutarem majori labore excutere & agitare cœperunt, tanta compositionum, medicamentorum & materiæ medicæ copia ac cumulus ortus est, ut si medicinæ initiandus libros, qui hisce repleti sunt, introspectiat, ingens artis addiscendæ fastidium eum teneat necesse sit. Et postquam superiori seculo Chymici caput in medicina attollere cœperunt, rursus magna & pene mirabilis ab eorum manibus atque experimentis per ignem factis remediorum maxima ex parte vehementium copia in praxin medicam redundavit. Quapropter nostro tempore omnes fere sic dicti practicum libri arcanis chymicis & immensis compositionibus fere luxuriant, quibus incomparabiles & pene divinas in morbis, cujuscunque etiam generis fuerint, sanandis laudes adscribere non erubescunt. Si quis vero sine ullo præjudicio adeoque libero animo solidaque attentione earum vires ac virtutes in tot differentibus morborum & corporum aliarumque circumstantiarum statibus pensiculatus explorare studeat, ea omnino spem suam penitus fallere, neque expectationi ullo modo respondere eorumque vires maxima ex parte non modo inertes ac steriles, sed etiam naturæ morborum infestas esse certissimeprehendet. Quare, ut libere sententiam nostram profiteamur, tanta medicamentorum farrago meræ ignorantie filia est. Qui enim vitæ ac sanitatis rationem & genuinas morborum origines & causas & principia, quibus agunt omnia remediorum genera, cognita perspectaque habet, is facile dijudicabit, tanto remediorum apparatu in præservando & sanando non opus esse, sed pauca selecta, usu frequenti

probata & simplicia magis, quam composita sufficere. Plures certe compositiones ineptissime ex variis ingredientibus, sæpe sibi invicem contrariis, confarcinatæ sunt, ut ex centum vix una laudem & usum in praxi mereatur. Eodem modo comparata sunt chymica, quibus identidem optime, paucis tantum exceptis salibus, oleis destillatis & ex metallicis dextre præparatis quibusdam, carere possumus. Nam remedia hæc longe activiora naturæ animantium, quæ temperata maxime desiderat, minus sunt amica, & vel vehementes motus tantum suscitando vel eos validissime deprimendo agunt, aut infesta corrosivitate vel adstrictione solidorum texturam lædunt. Deinceps ignis, cujus beneficio chymica eliciuntur, destruendis potius simplicium texturis, à quibus eorum facultates & virtutes unice dependent, idoneus est, quam ut earum virtutem acuat, vel meliores infitis vires inducat. Denique tantæ compositionum veterum & arcanorum chymicorum multitudinis è medicina removendæ causa potissimum hæc est, quod veteres & veras morborum causas & remediorum genuina principia, quæ causis profligandis opponi debebant, plane ignorabant, quare vix quicquam solidi aut boni de eorum compositionibus sperandum esse, quisque medentum prudentior perquam facile dijudicabit. Atque etiam experientia per plures annos certa & attenta suffulti confidenter adfirmamus, vernacula, parabilia & domestica omnibus nota, viribus, usu atque utilitate, varia composita pretiosa & magno labore conquisita arcana chymica longissime antecellere inque sanando longe certiorum & tutiorem efficaciam illis promittere. Qua re permoti præsentis hoc specimine domesticorum & parabiliorum remediorum præ illis præstantiam bono cum Deo adstruere annitemur. Adsit vero summum Numen hisce laboribus, ut publico humani generis bono, quo unice collineant, inservire possint.

§. II. Ante vero, quam ad specialem hujus thematis tractationem & ad explicationem eorum, quæ in auxilium morborum prompta ac parata sunt, descendamus, non incommodum fore judico, si præmittamus, quanam eorum nomine intelligamus. Jam vero mihi facile persuadeo, unumquemque levi labore adsecuturum, ea me vocare remedia domestica, quæ & plebi nota & in quavis re familiari facile profant, in culinis ad manus sunt, quæ in hortis, sylvis, pratis crescunt, aut quæ natura omnibus non denegavit. Nolumus itaque peregrina accersere, sed ea, saltem quæ nostra patria profert, quæ omnibus & singulis usui esse possunt, enarrare nobis constitutum est. Supersedebimus autem tædiosas & difficiles ex iis præparationes indicare, omnesque vires & facultates simplicium & domesticorum à Medicis annotatas late ac diffuse commemorare, quia harum paginarum angustia tantum laborem capere non possunt, sed suffecerit ex domesticis selectiora & quæ nobis

Ela, usu frequentiori probata, & simplicia magis quam composita.

Horum rationes.

Tam immensa furaginis veterum medicamentorum causa est potissimum, quod veteres veras morborum causas plane ignorabant. Vernacula, parabilia & domestica omnibus nota pretiosis antecellunt, inque sanando certiorum efficaciam promittunt.

Quanam autem per remedia domestica subintelligat.

364 De præstantia remediorum domesticorum.

usu spectata, viribusque in morbis cognita atque probata sunt, delibasse, iisque in medium prolatis nostram subjecisse sententiam.

§. III. Prius vero, quam hæc enarremus, quædam argumenta pro evincenda simplicium & domesticorum præstantia in medium adducere nobis consultum videtur. Et ut ab auctoritate rem ordiamur, summus & antiquissimus medicinae auctor HIPPOCRATES vulgaria & plebeia remedia non spernebat, sed potius maximo habebat in pretio, quare *Lib. de præceptionib.* scribit: *ne pigeat ex plebeiis sciscitari, si quid ad curationem utile sit.* Et apud eundem multa recensentur remedia vulgaria per experientiam nota, quæ procul dubio à mulierculis partu defunctis aut hysteriis affectibus detentis didicerat & annotaverat, *mulieribus enim*, inquit *Lib. de Septimestri partu, fides habenda est, uti de iis, quæ circa partum accidunt loquuntur.* Ejusdem quoque sententiæ fuisse GALENUM ex *libro de simplicium facultatibus* patet. Nam ipse plebeios & imperitos piscatores aliosque infimæ sortis homines consulere non erubuit. Hic gravissimus post HIPPOCRATEM auctor cum Alexandria in patriam rediret, in illo itinere incidit in quendam villicum, gravi tonsillarum, uvulæ & colli dolore ac inflammatione laborantem, qui suffocationis metum incutiebat. Is destitutus aliorum remediorum apparatu viridia juglandium teginina circumspiciebat, adeoque jubet ex illis succum exprimere & cum melle miscere, eoque percolato ægrum fauces crebro perluere, quod remedium cum animadverteret celerrimæ operationis fuisse, sæpius illud in tali malo adhibuit.

§. IV. Neque dubium est, quin medicina augmentum suum maxima ex parte debeat experimentis à plebe sæpius factis: nam rustici & plebei homines opibus destituti sine medicamentis singulari artificio paratis & etiam sine Medicis diutius vivunt & felicius ex gravibus morbis evadunt, quam divites, nec vero aliis, quam simplicibus, parabilioribus, domi natis utuntur, & Deo, naturæ ac tempori reliqua committunt. Et quemadmodum illi sine ejusmodi arcanis & magno labore conquisitis in morbis convalescunt & antiquissimi quoque hominum hisce inventionibus & artificio destituti è morbis, qui nunquam non genus humanum affligerunt, eluctati sunt, ita & sine iis nostris temporibus cur non sanitatem integram conservare & reparare possimus, equidem non video. Sicuti enim divina sapientia omnia in tota rerum natura & quæ maximæ admirationis sunt, facillima & simplicissima via peragit & paucissimis alimentis animantia conservantur, causæque morborum sua natura paucæ & simplices sunt; ita recte concluditur, pauca facilia & simplicia quoque remedia ad causas morborum removendas sufficere. HELMONTIUS, gravis alias Galenicorum censor, in *Dispensatorio moderno* ingeniose prodidit: Deum jam perfecte & sufficienter ex simplicibus remedia composuisse, ut in iis perfecta cura & sanatio omnium morborum sit, atque existimat, Deum ex sapientia & providentia sua æterna simplicibus vires ad destinatos usus sufficientes jam indidisse, & per consequens scribit eos, qui dispensatoria volunt componere &nectere plurima, ocula quasi blasphemiam insufficientiam divinæ sapientiæ accusare & supplere velle. Neque hæc solida ratione est destituta sententia: Nam Deus sapientissimum chymicum suum & compositionis artificium non potuit perfectius exprimere,

quam per tot infinitas texturas ac crases triplicis regni corporum, quorum quævis peculiaribus proprietatibus, dotibus ac viribus donata sunt. Ulterius maximum divinæ sapientiæ argumentum inde elucet, & quod nos satis ad æstimationem vulgarium remediorum perducere debeat, quod iis plantis, quæ ubique & in seminis ac campis crescunt, majorem juvandi efficaciam indiderit, quam rarioribus, pretiosis & quæ magno labore ac studio ex regno minerali vel marino comparantur, in quibus sæpius exigua vel plane nulla medendi virtus animadvertitur. Quo magis eorum stultitia manifestatur, qui magnæ virtutis auxilia in pretiosis illis, auro, argento, perlis, gemmis, coralliis & exoticis rarioribus quærunt, quasi Deus, qui summa est erga genus humanum misericordia, pro divitibus & magnatibus hujus mundi tantum præstantissima remedia in ejusmodi rebus constituerit. Ego sancte adfirmare possum, me superioribus temporibus mirifice inhiasse & delectatum fuisse chymicis & activioribus ex mineralium regno petitis remediis, & ubivis fere arcana conquisivisse. Postea vero longe aliud ipsa in veritate & per attentam experientiam expertus sum, pauciora, nempe selectiora & viliora longe promptiora in auxilium esse & majorem in medendo efficaciam custodire ipsis jam dictis magno pretio & labore præparatis chymicis arcanis.

§. V. Jam vero, ut ad ipsam rem progrediamur, singulatim quædam ex ferme vulgaribus & quæ ad usum medicum valde apta sunt, excutiemus, initium facturi ab aqua, vino & pane. Hæc tria sola sicuti hominis vitæ ac sanitati diu conservandæ idonea sunt, siquidem panis solidam sanguinis substantiam, aqua liquidam, & vinum illam fluidissimam, quæ corpori vires & robur addit, materiam ministrat: ita certe non sine magna ratione factum est, quare sapientissimum Numen hæc tria ceu elementa sacramentorum etiam ad vitam spiritualem conservandam & corroborandam accommodaverit. Neque etiam mediocria sunt commoda, quæ ab iis ad præservationem & medelam multorum affectuum suggeruntur. Simplex aquæ puræ potus cum debito regimine tantæ est in tollendis & præservandis morbis efficaciam, ut certa medicamenta multum superet. Quia vero de hac nobili materia, videlicet aquæ medicina universali jam peculiarem tractationem adornavimus, nolumus esse prolixiores in iis repetendis, quæ ibi satis enucleate & copiose proposita fuerunt. Vinum generosum & optimæ notæ principem locum inter omnia confortantia ventriculi & omnium corporis partium obtinere, etiam in peculiari Dissertatione adstruximus, quo lectorem brevitatis studio remittimus. De pane itaque quotidiano secalino, qui omnibus in promptu est, restat ut agamus. Illud quidem in antecessum hic in genere monendum duximus, quod in hac tractatione non omnia, quæ usui inservire possunt ex domesticis & simplicioribus, sed pauca saltem & quæ multoties experta sunt & aliorum Medicorum fide corroborata, depromere nostri instituti sit.

§. VI. Itaque tractationis initium à pane secalino faciemus. Ab hoc jam HIPPOCRATES *Lib. de Salubr. diæta* §. XI. medicinam desumpsit suasitque hominibus laborioso vitæ genere utentibus, si alvi profluvio corripiantur, ac recrementa cruda ciborum speciem referentia secedant, ut loco securioris medelæ assatum panem vino intrin-

Deus iis plantis quæ ubique crescunt majorem juvandi efficaciam indidit, quam rarioribus & pretiosis.

Licet Clar. Auctor olim mirifice Chymicis activioribus inhiasse & arcana conquisivisse.

Aqua, vinum & panis hominis vitæ ac sanitati diu conservandæ idonea sunt.

Neque mediocria sunt commoda quæ ab iis ad præservationem & medelam morborum suggeruntur.

Aqua potus tantæ est efficaciam, ut cætera medicamenta multum superet.

Neque minus vinum generosum.

Panis præsertim secalini, ælogia atque virtutes. In alvi profluvio. Ad rejiciendum vires.

Hippocrates vulgaria & plebeia remedia non spernebat, sed potius maximo habebat in pretio.

Qui à mulierculis quoque quædam didicit.

Neque Galenus infimæ sortis homines consulere erubuit.

Quod villici exemplo in suffocationis periculo versantis probatur.

Medicina augmentum suum maxima ex parte debet experimentis à plebe sæpius factis.

Pauca facilia & simplicia quoque remedia ad causas morborum removendas sufficientia sunt. Helmontii de hisce sententia.

tum adsumerent. Neque ignotum est, quantum tum ad vires reficiendas præsidii insit pani similagineo tosto & vino generoso imbuto, cui quidpiam cinnamomi vel sacchari additum fuerit. Hoc sane analeptico præstantissimo illi uti maximo cum fructu possunt, qui ab ingenti defatigatione aut sanguinis enormi à vulnere profusione celeri virium refectione opus habent. Quare huic simplicissimo refectorio Propheta regius vim cordialem divino plane encomio tribuit, quippe *Pf. 104. vers. 5.* scribit, quod *vinum latificet cor hominis & panis illud fulciat.* Utroque horum analepticorum HENR. AB HEER, uti in *Obs. Med.* 18. prodidit, maritum, à veneris immodico usu pene exanimem, viribus & vitæ reddidit, quem alius Medicus, qui venæ sectionem suaserat, procul dubio morti dedidisset. Clarissimus Medicorum Batavorum, BOERHAAVE in *Materia Medica*, non ita pridem edita, decoctum panis præstantissimi analeptici usus in febribus & aliis affectibus commendat, quod hunc in modum paratur: *recipe panis tritici cum furfuribus fermentati biscocti uncias octo, aquæ putealis purissimæ libras tres, coque in vase figulino recenti clauso, per spatium unius horæ, addendo semper, quantum coctione exhalat, aquæ, deinde cola per setaccum; sume decocti præscripti libram, succi citri semiunciam, aquæ stillatitiæ cinnamomi drachmas duas, vini Rhenani uncias quatuor, sacchari q. s. ad gratum saporem conciliandum.* Memorabilis est *Observat. 10.* REUSNERI 109. ubi meminit foeminæ aliquoties abortu periclitatæ, quæ sub medium gestationis tempus coepit quotidie panis frustulum vino malvatico imbutum jejuno ventriculo adsumere sicque malum casum feliciter evitavit. Huic auctori accedit etiam VELSCHIUS, qui septimum in una foemina abortum, reliquis Medicis frustra laborantibus, hoc potissimum euporisto avertit. Panis butyro illitus mane jejuno ventriculo sumtus excessivum in prima regione stabulans acidum contemperando præcordiorum anxietatem, vertiginem, capitis dolorem & virium exsolutionem feliciter sustulisse, non semel à nobis observatus fuit. Idem jentaculum in constitutione epidemica morbofa, ubi aer effluviis & vaporibus naturæ infestis refertus est, non sine ratione & experientia commendari meretur.

§. VII. Quemadmodum vero panis interne sumtus insigni gaudet virtute analeptica & confortante: ita eandem etiam externe mirifico plane modo exerit. Probe hoc cognovit summus ille Philosophus, *Democritus*, Hippocrati æqualis, qui referente DIOGENE LAERTIO in *Libr. de vit. Philosoph.* IX. instantem extremo senio vitæ finem sentiens, in gratiam sororis suæ odore panis recenter cocti ad triduum mortem remoratus est, quod etiam LAUR. JOUBERTUS experientia confirmat, qui panem naribus admotum à lipothymia liberare auctor est. Neque omittendum est, quod panis cum carvi semine coctus & ex furno recenter extractus atque dissectus & auri calide fomenti loco applicatus maximum etiam nostro experimento sit remedium euporiston adversus surditatem, quod etiam RIVERRIUS in *Praxi Med. Lib. III. Cap. II.* insigniter commendat. Similiter id suo calculo confirmavit HIERON. REUSNERUS *Obs. Med.* 55. qui Henricum Comitem à Stolberg, cui ex fragore & sonitu tormentorum bellicorum surditas obtigit, pane recenti cum baccis juniperi cocto & auri mane adplicato magno cum emolumento se levasse

Frid. Hoffmanni Oper. Tom. V.

scribit. Superior panis domestici crusta in orbem discissa & mediocriter excavata & aceto probò vini tepidiusculè calente conspersa, additis aromatibus caryophyllis, nucista, ventri adplicata in torminoso ejus profluvio vel etiam vomitu præsentissimum fructum adfert. Pane quoque tosto & vino bonæ notæ imbuto additis aromaticis, si umbilico imponatur, ad abortum præcavendum non facile felicius datur remedium.

§. VIII. Dimisso pane farina nobis cum furfuribus consideranda est, fecalina nempe; hæc probe exsiccata & cum sale communi remixta erysipelati calide imposita cum floribus sambuci insignem discutientem efficaciam exerit, si vero eadem farina cum melle misceatur, maturandis apostematibus multum conducit, nec absque singulari fructu quotidie adhibetur. De furfuribus id maxime laudandum est, quod absterfiva vi polleant & removendis sordibus capitis egregie prosint. Balneum vero ex furfuribus & aqua dulci paratum ex quacunque causa debilitatos corporis artus egregie reficit, sique flores chamomillæ addantur, ceu euporiston, ubi balneis opus est, adhiberi potest. Vidimus, quibus frictio capitis cum furfuribus triticeis calefactis gravitatem capitis tensivam & aurium tinnitum abstulerit. Hordeum quoque familiarissime in usum cedit medicum, dum cum aqua ad crepaturam usque decoquitur, quod decoctum additis radicibus scorzonæræ & pulpa citri ad æstum refrænandum & sitim levandam in febribus præsertim biliosis longe expertissimum est: quin imo in omni fere morbo acuto juvat, & in pectoris affectibus, ubi humorum acrimonia peccat & expectoratione opus est, ejusmodi hordei decoctum, si caricæ addantur, singularis est efficaciam. Præterea ex hoc hordei decocto cum amygdalis nonnulli egregiam faciunt emulsionem, quæ in variolarum etiam confluentium genere magno solamini est & proxime ad hydrogallam accedit, cujus largiorem potum SYDENHAMIIUS in *opusculis pag. 257.* in confluentibus variolis, ubi salivæ largior fluxus ab initio jungitur, optimum deprehendit. Longe vero efficacius evadit decoctum hordei in variolis aliisque acutis, si cornu cervi ustum & syrupus de succe aurantium adjiciantur. Quanti olim ptisana ab HIPPOCRATE in acutis sanandis æstimata fuerit, ex ejus monumentis & quidem ex *Lib. de victu acutorum* satis abundeque patescit, ubi hunc in modum scribit: *ptisana recte omnibus frumentaceis eduliis prælata esse videtur in morbis acutis, & laudo sane eos, qui ipsam prætulerunt. Nam viscositas ipsius levis est & continua & jucunda & lubrica & moderate humida & sitim eximit & facile eluitur, si forte & hoc opus sit & neque adstrictionem habet neque malam turbationem, neque in ventre intumescit.* Apparet hinc satis, quantum à ptisana fructum Veteres in morbis acutis sibi promiserint. Adhibebant autem illam non uno modo, ne eadem ratione præparatam: interdum enim hordeum decorticatum sufficienti tempore decoctum exhibebant, quod totam ptisanam vocabant; alio tempore colaturam, sive, ut CELSUS loquitur, cremorem ptisanæ forbebant, imo etiam album infuso hoc cremore ducebant. In præparatione ejus ita se, auctore GALENO, gerebant, ut decem aquæ portiones ad unam ptisanæ partem adsumerent, peractaque coctione aceti momentum oleique exiguum admiscerent cum pauxille salis. Verumtamen hic Veterum ptisana utendi modus fere inter res omissas & oblivioni traditas

Hh 3 referendus

David in Psalmis panis vim cordialem tribuit. Analepticam Henr. ab Heer.

Panis etiam encomiastes Herm. Boerhaave.

Ejus decoctum panis.

Reusneri observatio de pane & vino.

Nec non Velschii.

Atque Auctoris nostri de pane butyro illito.

Non modo interne sed & externe virtute analeptica pollet. Democritus odore panis ad triduum mortem remoratus est. Quod & Joubertus experientia confirmat.

Panis remedium est euporiston adversus surditatem. Testibus Riverio & Reusnero.

Farina erysipelati medetur.

Furfures vi absterfiva polleant.

Debilitatos artus in balneo reficiunt.

Capitis gravitatem & aurium tinnitum tollunt.

Aqua Decoctionis hordei in febribus est expertissima.

Et in pectoris affectibus.

Emulsionibus in variolis est convenientissima.

Quarum largiorem potum optimum deprehendit Sydenham.

Quanti olim Hippocrates ptisanam fecerit ex ejus scriptis patet.

*Pisana a-
pud veteres
preparatio.*

*Avena de-
coctum vi-
ribus suis
magna fa-
ma reme-
d a longis-
sime exu-
perat.*

*Tam in de-
coctis
quam in
Clysteribus*

*Brodium
pisorum al-
vo rese-
rande in-
servit.*

*Nephriti-
cis prodest.*

*Cutis vitia
abstergit.
Lentis de-
coctum va-
riolarum
eruptioni
opiulatur.*

*Ab Avi-
cenna hu-
jus decocti
usus pri-
mum fuit
receptus.
Valet Cice-
rum deco-
ctum in
calculo
comminu-
endo. Testi-
bus Horat.
Augenio &
Laurem-
bergio.*

*Raparum
decocto ni-
hil est lau-
dabilius in
pectoris af-
fectibus.
Raparum
exsicca-
tum bro-
dium sem-
ine fen-
iculi ab ex-
creto ha-
buit Crato.
Atque in
frequens-*

referendus est, vid. LANGIUS in *Epist. Med. Lib. I. Epist. 57.* Quod attinet ad avenam, ejus decoctum cum aqua, adjectis radicibus cichorii cum nitro & floribus papaveris, itemque melle tantæ est efficacæ pro potu in omnibus acutis, in doloribus præcipue podagricis, atque ad sanguinem purificandum in scorbuto, ut viribus suis magnæ famæ remedia longissime exuperet. Extat de hoc Disputatio sub præsidio nostro habita, ad quam lectorem remittimus. De cetero decoctum ex avena excorticata paratum, vulgo *Habergrütze*, si ullum, certe hoc præstans est inter domestica remedia in multis morbis usurpandum præsidium, siquidem in omnibus iis morbis, ubi humorum in primis viis vel etiam in sanguine peccat acrimonia, ut in tussi, catarrho, coryza, febre purpuracea, variolis, morbillis, febribus biliosis cholericis, in alvi quoque à bilis acris redundantia dejectionibus inque intestinorum erosione commodissimum pro potu locum invenit. Nos sæpius huic decocto innoximus aliquot pugillos florum chamomillæ vulgaris, adjectis saccharo & oleo amygdalarum dulcium, & cum summo fructu in prædictis morbis usi fuimus, quod etiam decoctum in iisdem morbis ano injiciendum non sine summo emolumento suavisimus, optime enim sua viscositate acrimoniam humorum obtundit.

§. IX. A frumentaceis transitum ad legumina facimus. Inter legumina illa, quorum apud nos frequentior in re familiari esse solet usus, maxime pisa & lentes eminent. Brodium pisorum non solum alvo referandæ egregie inservit, sed etiam, ut lochia liberius in foeminis profluant, efficit. Idem decoctum nephriticis prodesse adversus eos, qui negare ausi sunt, defendit Medicorum nobilissimus, SIMON PAULI in *Quadripartito Botanico*. Nonnulli etiam pisorum decocto ad abstergenda cutis vitia & eminentias persanandas cum fructu utuntur. Lentium vero decoctum cum caricis & semine fœniculi plebei utuntur maximo cum fructu in variolis, morbillis ad exanthematum eruptionem; materiæ enim morbidæ acrimoniam mitigando spasmos & dolores sistit & hac ratione eruptionem promovet. A Medicorum Arabum principe, AVICENNA in praxi medica hujus decocti usus primum fuit receptus. Cicerum decocto plures novimus in calculo comminuendo non sine fructu usos fuisset, & est sane una cum millepedibus præparatum inter medicamina calculum depellentia præcipuum, cujus diutino & patienti usu HORATIUS AUGENIUS vesicæ calculos comminuit, & GUIL. LAUREMBERGIUS jam ultra sexaginta tres annos natus in se ipso impetravit, ut dirum vesicæ malum per frustula sensim discederet, ut ipse de se peculiari dissertatione epistolari commemorat.

§. X. A leguminibus ulterius progredimur ad alia, quibus res familiaris instrui solet. Hic maxime locum inveniunt rapæ præsertim exsiccatæ Germ. *vvelcke Rüben*, quæ utilitate plane singulari se commendant, quippe quarum decocto nihil est laudabilius in pectoris affectibus ac tussi pertinacissima, si præsertim illud ad magni CRATONIS consilium 81. adornetur. De eodem Cratone auctor nobis est CASP. HOFFMANNUS in *Inst. Med. Lib. V. Cap. 11.* eundem in curatione quartanæ contumacioris, nec non aliorum affectuum, ubi multa & longa humectatione opus est, tantum non pro secreto habuisse raparum exsiccatum brodium semine fœniculi alteratum. Et de *Scherbio* idem nobis auctor est, quod præcepto-

rum *Cratonis & Erasii* exemplo rapas exsiccatas in usu frequentissimo habuerit puerorumque tabem, quam *die Miteffer* vocant, sæpe cum multo successu hac medicina fustulerit. Idem quoque raparum decoctum in teneismo, in diarrhœa infantum contumaciori, quæ plerumque ab acri humore intestinis crassis inhaerente fovetur; remixtum cum butiro insulso, vel oleo amygdalarum dulcium clystere per diem aliquoties injectum præsentissimam opem attulisse non semel vidimus. Neque externo usu rapas defuit ad sanandas partes frigore tactas, in vulgus fere cognitum experimentum est.

§. XI. Inter radices edules utilitate quoque commendanda sunt pastinaca sativa, radix asparagi, petroselini, graminis, fœniculi, cichorii. Quod si illæ probe decoquantur in brodio caponis vel gallinæ veteris, & hoc decoctum singulis diebus mane bibatur, hypochondriaci & qui scorbuto, phthisi, tabe, hepatis ac lienis vitio laborant, insigne solamen inde sentiunt, quemadmodum etiam infantibus tabe confectis ejusmodi decoctum frequentius usurpatum summo prodest: alvum enim moderate fundit, urinam potenter educit. Optime in infuso loco thée folia ejus recentia, mane sumuntur, quod & sapore, colore, odore ac virtute se commendat, siquidem in iis affectibus, ubi feri abundantia est, in cachexia, inque mensibus etiam suppressis, & ubi metus calculi vesicæ in renibus vel vesica est, non sine insigni fructu usurpatur. Atque etiam notabile est experimentum RIVERII, quod ipsi communicavit quidam chirurgus veteranus, ubi foemina quædam, nescio cujus vetulæ suasu, ad propellendum hydropem quotidie petroselini foliorum quantum manu capere poterat, linteo madido involutorum sub cineribus calidis affabat expressumque succum vino albo exceptum bibebat simulque ossium quorumlibet ad liberum aërem ficcatorum & comminutorum drachmam in eodem adsumebat vehiculo, quo per integrum mensem facto feliciter sane convaluit. Herba petroselini cum lupulo ex cerevisia cocta & exterius regioni pubis calide admota, in urinæ suppressione præclarum exerit effectum. Raphanorum magna apud Veteres existimatio fuit, quibus succo radicis sumto vomere quotidianum erat: etiam nostrates vidi raphanis in taleolos dissectis saccharum adspergentes & hoc liquamen pueris præbentes, ubi vomitu opus erat. Ad calculosam concretionem in vesica prohibendam raphanum in taleolos discissum & cum sale conditum novimus non sine fructu adhibitum fuisse. In febris maligna putrida CRATO adplicationem raphani in pedibus mirum quantum æstimat & ita inquit: *misso sanguine pedibus adplicetur raphanus comminutus & sæpe is muretur.* Plurimum ex adplicatione raphani adjuvanti esse in pluribus adverti, ubi materia omnibus modis à corpore ad superficiem est trahenda.

§. XII. Accedimus jam ad allii & ceparum genera, visuri, quænam parabiliora & in auxilium prompta possint inde depromi remedia. Rusticorum theriacam allium vocat GALENUS, cujus usus inter multas nationes adeo invaluit, ut nobiles pariter ac plebei, nihil morati ejus graveolentiam, eo delectentur, rati vires illo excitari. Infantibus verminosa colluvie infestatis nihil æque prodest ac allium, quod vermium mors est lacti incoctum & adsumtum, hoc enim modo infesta illa progenies ex ventre feliciter projicitur.

Observavi-

*fimo usu
habuit
Scherbio.*

*Raparum
decoctum
in teneismo
& in Diar-
rhœa opem
attulit.*

*Rapæ ex-
terne sa-
nant par-
tes frigore
tactas.*

*Rad. passi-
nac. aspa-
rag. petros-
elini. deco-
cta, hepatis
ac lienis vi-
tios laboribus
conveniunt.*

*Petroselinæ
folia opti-
me in infu-
so loco thée
mane su-
muntur.*

*Petroselini
succus auc-
toris Rive-
rio, hydro-
picam re-
juvuit.*

*Herba pe-
troselini
exterius
regioni
pubis cali-
de admota
in Ischuria
præclarum
exerit effe-
ctum.
Olim ra-
phanorum
succo sum-
to vomere
quotidia-
num erat.
Ad calculo-
sam con-
cretionem
raphanus
haud ineffe-
cax est re-
medium.*

*Raphani in
pedibus ap-
plicationem
in febre
maligna mire
laudat Cra-
to.
Allium ru-
sticorum
theriacam
vocat Ga-
lenus.*

*Verminosa
colluvie
infestatis
nihil æque
prodest.*

Observavimus etiam solo fœtu lactis cum allio cocti ad anum admissi vermes ad exitum prolectos fuisse. PARACELsus in morfu canis rabidi & contra omne venenum tam interne, quam externe, contra pestem, bubones, carbunculos alium cum stercore humano mixtum egregie commendat. Bulbuli allii tres aut quatuor feliciter ab iis, qui calculo laborant cum haustu spiritus vini sumuntur semel singulis septimanis eodie, qui proxime quadras lunæ præcedit. Novimus hoc remedii genus à multis in usum vocatum felicissime. Ad febres intermittentes contumaciores, imo ad ipsam quartanam feliciter profligandam, omnibus aliis irritis, allium contusum & ad carpum manus vel etiam ad articulos digiti adplicatum cum dolore magnam facit vesicam, qua aperta serosa materia effluit: liberantur quidem hac ratione à febris, sed quia graviter allium inflammat has partes, prudenti cautela graviora symptomata præcavenda sunt. conf. *Misc. Nat. curios. Dec. II. Ann. IX. obs. 127.* quo loco etiam in scholiis mentio fit à Medico viduæ, quæ dolores dentium alligato allio ad cubitum & inde excitata vesica sopiebat. In doloribus pedum scorbuticis frictio cum raphano rusticano vel etiam allio inciso & aceto immerso eorum remissionem, in cassum aliis adhibitis, procuravit. Meminit etiam PLATERUS in dolore dentium allii contusi carpo dextro, si dolor in dextro latere, vel sinistro, si dolor in sinistro latere urget, adponendi. *vid. ejusd. Libr. II. obs. pag. 371. & 375.* Cepis singularem quoque medendi efficaciam inesse, multiplici experimento didicimus, præsertim quoad externum usum: cepis enim assis ad tumores duos emolliendos & bubones venereos maturandos, præsertim si cum ficibus adplicentur, nihil est efficacius: eadem assatæ pubi, adplicatæ in infantibus, si nihil quicquam urinæ emittunt, præsentem opem ferunt. Inest etiam omni alliorum & ceparum genere sal quoddam causticum tenue, vesicatoriæ indolis penetrantissimæ, quod nervosis partibus immediate adplicatum graves dolores, imo inflammationem parit. Ceparum succus monente CASP. HOFFMANNO *Institut. Med. Lib. V. pag. 677.* si in vulnera influat, illa consolidari non permittit ipsosque cultros & ferramenta tanquam leni veneno inficit, quod notari meretur, ut caveamus: at vero intra corpus sine noxa quotidie adsumuntur.

§. XIII. Hisce discussis descendimus ad gratissima nemini non nota semina, qualia sunt semina fœniculi, anisi, cymini, anethi, quibus identidem magnas vires inesse ad concinnanda hinc remedia parabilia domestica, plurimis experimentis habemus compertum. Nolumus de singulis peculiarem sermonem instituere, sed in genere notare, quod ea quinque semina, sive in formam pulveris redacta, seu cum cerevisia decocta, aut cum aqua calida infusa, ob sulphur & oleum blandum naturæ amicum ac vaporosum insignem qualitatem possideant humorum acrimoniam & viscositatem temperandi & resolvendi partesque universi corporis quocunque modo laceffitas & commotas placandi & sedandi, unde egregie omnibus affectibus spasmodicis & convulsivis succurrunt. Spasmos enim optime sedant, flatus discutiunt & simul edulcorationi humorum patrocinantur. Commendamus igitur hæc remedia in colica, in tussi, in diarrhoeis & torminosis intestinorum cruciatibus, quibus infantes præsertim lactantes

Frid. Hoffmanni Oper. Tom. V.

sunt obnoxii ob acrimoniam causticam lactis quam excrementa viridia alvo emissâ produnt. HIPPOCRATI semen anisi fuit usus non infrequentis, & profecto ob amicas ventriculo & intestinis dotes insignem meretur commendationem, unde non inconcinne illud HELMONTIUS intestinorum solamen adpellavit. Decoctum horum quinque seminum cum floribus chamomillæ & oleo amygdalarum dulcium & pauxillo saponis Venetiani infantium in eorum atrocissimis affectibus infusum, & flatuum torminibus eisdem egregie liberat. Hæc quoque quinque semina seu in forma sicca seu humida sumta menses cient, sudorem movent, singultui medentur, abortum præcavent, in vomitu & singultu ventriculorum roborant, flatus discutiunt, urinam & calculum pellunt fauciumque raucedini succurrunt, neque minus partum faciunt, præsertim, si vapor eorum admittatur ad uterum; specificè vero vapor decoctionis fœniculi mire oculos mundificat & visum confortat; in surditate quoque confert, de quo inter alios testatur GABELCHOVERUS *Centur. I. Curat. 60. in annotatis.* Decoctum item fœniculi mirifice lactis defectui conducit, de quo *Centur. VI. Curat. 86.* potissimum AMATUS LUSITANUS videndus est. Cumino nihil præstantius dici potest ad tonum intestinorum nimis relaxatum restituendum flatusque discutiendos. *Est etiam mirabile, inquit REINERUS SOLENANDER Consil. lib. 35. pag. 329. ex Serapione, in confortando matricem & auferendo ejus ventositatem ac constringendo menstrua alba & rubra.*

§. XIV. Ipsa brassica rusticorum rubra, vulgo *Braunkohl*, tota medicamentosa est, & succo scætet nitroso; dulci, emolliente, laxante ac insimul blanda vi aperitiva, fundente ac stimulante instructa excretiones saluberrimas adjuvat, & hac ratione non modo à morbis præsertim chronicis egregie præservat, sed etiam eorum sanationi multum patrocinator. Eximie sunt laudes, quas recenset de hac BARTHOLINUS in *Libr. de medicina Danorum domest. Dissert. I. pag. 24.* ipsa brassica rusticorum ceteris oleribus antistat, tam cruda, quam cocta omnibus pharmacopoliis palmam dubiam reddit, ut non sine causa, illa in hortis omnium rusticorum visa, sterilem sibi messem in Dania prælagiverit olim Medicus peregrinus: facit alvum bonam ac obsequentem, quam si deicere voles, superioris cymæ decoctæ succus tantum bilis pituitæque ejiciet, ut miraturus sis, nullam rem tam bene purgare, neque helleborum neque scammonium & sine periculo & cito salubrem esse corpori. Est enim in brassicæ rubræ nostratis caulibus, si autumnopæ præsertim adultiori eos secundum longitudinem feces, succus quidam instar mellis vel mannæ, qui exsudat, si aliquandiu in loco non calido relinquantur, cui experientia suffulti vim illam alvum laxandi confidenter adscribimus. Nostris in regionibus male sibi & suis matres familias consulunt, quando cum aqua prius hocce saluberrimum olus decoquunt, deinde exprimunt brodiumque effundunt & postea nova aquæ simplicis adfusione iterum incoquunt & ad cibum præparant. Hæc enim methodo succus ille medicamentosus nobilis maxima ex parte perditur. Laudandus hanc ob causam jure meritoque est mos eorum, qui in Westphalia & Ducatu Brunsvicensi degunt: hi enim brassicæ brodium extracto nobilioris virtutis probe imbutum non auferunt, sed addito sale & pinguedine, ita præparant, ut non modo gustui fiat acceptior esca, sed etiam in alimentum corpori nostro longe

H h 4

saluber-

Hippocrati semen anisi fuit usus non infrequentis. Intestinorum solamen illud adpellavit Helmontius.

Menses cient, sudorem movent, &c. hæc V. semina.

Fœniculi decoctionis vapor mire oculos confortat.

Idem decoctum lactis defectui conducit.

Tonium intestinorum nimis relaxatum restituit cum minum.

Tota est medicamentosa brassicarum rubra.

A morbis præservat, eorum sanationi multum patrocinator.

Eximias brassicæ laudes recenset Bartholinus, neque mirum, quippe quæ, referente Cæsonio per 600. annos Romanis instar panaceæ fuit. Autor illi vim alvum laxandi adscribit.

Male sibi consulunt illæ matres familias, quæ hujus saluberrimi oleris brodium effundunt.

Laudandus magis est mos eorum qui hoc brodium non auferunt, sed addito sale præparant.

Paracelsus in morfu canis rabidi & contra omne venenum alium cum stercore humano mixtum commendat. Laudatur etiam in calculo.

Allium contusum externe applicatum à febris intermittibus liberat.

Medicus allio ad cubitum alligato odontalgiam sopivit.

Idem remissionem in pedum doloribus per frictionem cum allio inciso procuravit.

In dentium dolore allium contusum carpo apponendum, urget Platerus.

Cepis assis ad tumores duos emolliendos nihil est efficacius.

Ceparum succus, si in vulnera influat, illa consolidari non permittit.

Quinque semina calida majora haud immerito miris semperentis celebravit universus asclepiadeorum cyclus.

Ex comis
brassica ru-
bra para-
turibus in
phthisi at-
que scorbu-
to omnibus
aliis medi-
camentis
preferen-
tius.
Beta rubra
recens suc-
cus naribus
ulcere ob-
sessis con-
ferit.
Radices
aride pul-
vis naribus
attractus
cephalal-
giam tollit.

Ruta olim
magna fuit
existimatio
Antidoti
Mithrida-
tis præci-
pua est ba-
sis.

Ad aver-
tenda a cor-
pore infen-
sa tempore
pestis mias-
mata exi-
mie con-
ferit.

Carpi arte-
riis imposi-
ta febrilem
impetum
sufflami-
nat.

Acetum
rutæ nari-
bus orique
adnotum
Cl. Autor
longe effi-
caci-
us in
contagiosis
grassanti-
bus morbis
et ad lipo-
thymiam
omnibus
pretiosis
balsamis
apoplecti-
cis depre-
hendit.

Salvia sal-
vatrix na-
tura con-
ciliatrix,
cujus exsic-
cata folia,
orientales
populi plus
æstimant
quam her-
bam Thé.
Præpollet
in affecti-
bus spas-
modicis at-
que in epi-
lepsia chro-
nica.

Ad quos-
cunque oris
affectus
collutione
mitigandos
magno ha-
betur in
pretio.

Menthæ ac
Melissæ
species quo-
que lau-

saluberrimum cedat. Ex comis brassicæ rubræ , quando nasturtium aquaticum, hederæ terref-
tris, spinachia, asparagus, radix cichorii, urti-
ca mortua adjiciuntur & in brodio carnis bubu-
læ vel caponis excoquantur, cibus paratur in dis-
positione phthysica atque scorbutica omnibus aliis
medicaminibus vel pretiosissimis multum sane
præferendus. Betæ rubræ radices quod atti-
net; earum recentium succus rubicundus subtili
quoque, nitroso & colliquativo sale imbutus
est, qui naribus ulcere vel lenta materia obses-
sis egregie confert tam humectando, quam ape-
riendo. Hujus radices siccæ pulvis naribus attrac-
tus pituitam è sinibus capitis evocando cephalal-
giam, quæ ab impacta ibi vitrea materia ori-
tur, tollit.

§. XV. Deveniendum est jam ad herbas in
re familiari satis cognitæ, quarum insignis ad
medicinam parabiliorem poterit esse usus. Pri-
mas vero teneat ruta, cujus magna olim fuit
existimatio; exemplo esse potest rex *Mithrida-
tes*, cujus antidoti præcipua basis est. Scatet hæc
herba oleo admodum acri & penetrante, quo
fibras à motu dejectas stimulat & novo vigo-
re acuit. Ejus folia cum recenti butyro mixta
& cum pane fecalino mane sumta iis, qui pi-
tuita abundant & aëri vappido ac humido cor-
pus objicere necesse habent, neque minus ad
avertenda à corpore infensa in grassantibus mor-
bis miasmata, eximie conferunt. Ejus folia
cum pipere, sale communi, & aceto penetran-
tiori contusa atque carpi arteriis imposita ad
febrilem impetum, si modo materiæ morbidæ
aliis prius prospectum fuerit, egregie sufflami-
nant, & plus sæpius minorique periculo, quam
interna constringentia & famigeratissimus chi-
næ cortex in contumaciori etiam quartana si-
stenda præstat. Nos præterea acetum vini for-
te rutæ succo bene imprægnatum non mo-
do in contagio infestis grassantibus morbis, si
nari adplicetur & ori admoveatur, valde ad-
probamus, sed & ad lipothymias avertendas ejus
odorem longe efficacior omnibus spiritibus
cephalicis & pretiosis balsamis apoplecticis de-
prehendimus.

§. XVI. Ex herbis polychrestis & cephalicis
nunc prodeat salvia, quæ in omnibus fere hortis
prostat, & ab orientalibus populis nunquam non
maximi æstimata fuit, cujus exsiccata folia et-
iamnum plus æstimant, quam herbam thé. Pro-
pter oleum subtile, & vaporosum & sedativum
ejus decoctum vel potius infusum in affectibus
spasmodicis, in contracturis, in epilepsia etiam
chronica loco herbæ thé non mediocrem effica-
ciam exerit, quæ, si usus ejus externus per bal-
nea accedat, additis aliis nervinis, ut fideritide,
origano, serpillio in membris paralyticis vel to-
no uteri restituendo, ad feliciorum conceptum,
valde augeri potest. Chirurghi ejus decoctum cum
passulis & nitro ad faucium inflammationem
deliniendam, ad dentium quoque & alios oris
affectus facta collutione mitigandos magno ha-
bent in pretio. Ex herbis porro cephalicis & eu-
poristis mentha tam crispa, quam saracenica,
melissa quoque tam nostras, quam Turci-
ca egregiam laudem & commendationem me-
rentur. Mentha subtili, confortante & nervis
amico ac sedativo oleo abundat, quo tamen non
solo, sed subadstringente terreo principio vires
suas in confirmando tono ventriculi præsertim
& intestinorum exerit, quare hæc herba in sub-
stantia aut infusa cum aqua, aut vino vel spiritu

vini in compescendo, singultu, vomitu nimio-
que alvi fluxu aut colicis tormentis sedandis
vix par sibi habet remedium usuque tam inter-
no, quam externo sese mirifice commendat. A-
quam ejus sive cum vino aut aqua simplici para-
tam ad usum domesticum omnibus singulisque
commendatam habere volumus. Vidimus sola
aqua menthæ spirituosæ, decenti usu & purgan-
tibus præmissis, inveteratas gonorrhœas fluo-
remque album feliciter sublata. Eandem fere cum
mentha virtutem suavissima illa herba, quæ me-
lissæ nomine venit, custodit. Oleum gratissi-
mum naturæ valde amicum continet, cujus
aqua cum vino, additis corticibus citri, destil-
lata & edulcorata facile omnes aquas vitæ, bal-
sama embryonum, aquas apoplecticas, analep-
ticas & odore & viribus exsuperat. Melissæ flo-
ribus Turcicis in conservam cum saccharo redac-
tis si spiritus ejusdem herbæ adfunditur, essentia
prodit, quæ & odore, sapore ac virtute ma-
gnatibus ac divitibus ad ventriculum maxime
& genus nervosum roborandum commendatissi-
ma esse debet. PARACELsus arcanum ad vitam
longum in hac herba reconditum esse adferebat.
*Multa adhuc, scribit BAGLIVUS Libr. de fibra mo-
trice pag. 214. latent in herbis ad citri naturam
accedentibus, ut melissa, sed sapienti sat.* Hujus
herbæ infusum cum aqua egregie iis uteri vitiis
succurrit, quæ ex ejus tono ac robore dejecto
proveniunt, ut sunt difficilis retentio foetus &
facilior ad abortum dispositio, perpetuum feri pu-
tridi sine sanguine vel etiam cum ipso mixti ex
utero stillicidium & inde profecta sterilitas. Idem
decoctum eo tempore, quo menses fluunt, usur-
patum, feliciorum horum fluxum promovet.
Melissæ in substantia pulverem ad drachm. 1.
singulis diebus per mensem usurpatum in me-
lancholia hypochondriaca ad maniacum fe-
re affectum inclinante valde proficuum anno-
tavi.

§. XVII. In herbis cephalicis & quæ in hor-
tis coluntur atque omnibus fere obviæ ac notæ
sunt, non infimum sibi locum spica vindicat,
quæ, si ulla, certe hæc oleo scatet subtili, bal-
samico & aromatico, quod in majori copia, si
destilletur, quam vix alia herba, præbet. Ab
ejus floribus, si spiritus saltim frumenti aliquo-
ties abstrahatur, spiritus cephalicus, aquam re-
ginæ Hungariæ si non superans, tamen ipsi æqua-
lis producit, qui in affectibus capitis à causa
sic dicta frigida, & à nervorum debilitate sub-
natis, in apoplexia, paralyfi, auditus gravitate,
cephalalgia, vertigine, usu interno & externo
spiritibus & balsamis apoplecticis jure meritoque
anteferri debet. Exterius in doloribus, rheu-
matismis ad eorum discussionem, ad roborandos
quoque artus, podagra vel chiragra declinante
egregium adfert solamen. Præterea omnibus ulce-
ribus, præsertim antiquis fistulosis & quæ par-
tes tendinosas tangunt, læsionibus ejusmodi spi-
ritus balsamicos decenter adplicatus ad eorum
consolidationem, mundificationem plus certe opis
præstat, quam ingens emplastrorum & unguen-
torum sarrago. Rosmarinus, quia valde ratio-
ne virium spicæ & lavendulæ affinis est, & oleo
quoque penetranti balsamico abundat, in iis-
dem capitis affectibus ejus spiritus non secus ac
spiritus lavendulæ cum fructu adhibetur. Ejus
infusum cum aqua vel etiam cum vino in fluxu
mulierum albo & exinde proficiscente sterilita-
te, in molesta raucedine, asthmate, oris foeto-
re egregie se gerit. Cancros, gangrænas & fi-
stulas,

dem &
commen-
dationem
merentur.
Mentha
oleo nervis
amico
abundat.
In morbis
ventriculi
& intesti-
norum vix
par sibi ha-
bet.
Eandem
cum Men-
tha virtu-
tem Melissa
custodit.
Ejus oleum
& aqua
destillata
facile om-
nes aquas
vitæ odore
& viribus
exsuperat.
Paracelsus
arcanum
ad longa-
vitatem in
hac herba
reconditum
esse censet.
His accedit
magnifi-
cum Bagli-
vi de her-
bis ad citri
naturam
accedenti-
bus præco-
nium.
Melissa
uteri vitiis
succurrit.
Mensum
fluxum
promovet.
Ejus pul-
vis in sub-
stantia
usurpatus
in melan-
cholia hy-
pochon-
driaca val-
de profi-
cium an-
notavit Cl.
Autor. Spi-
ca oleo sca-
tet subtili &
balsamico.
Spicæ flo-
rum spiri-
tus median-
te spiritu
frumenti
destillatus
aquam Re-
ginæ aut su-
perat aut
saltem ipsi
æqualis
censetur.
In podagra
& in anti-
quis ulceri-
bus plus
opis præstat
quam in-
gens un-
guentorum.
& emplastrorum
sarrago.
Rosmarini
spiritus in
iisdem ca-
pitis affecti-
bus cum
fructu ad-
hibetur.
Ejus infu-
sum cum
aqua con-
venit in
fluxu albo.
In gangre-
na & can-
cro.

flulas, ex spiritu vini infusiones rorismarini sæpius collatas fuisse exsiccatas, & quæ alias omne medicamentorum subsidium eluserint, ad perfectam sanitatem pervenisse, se plus semel vidisse ac expertum perhibet ARNOLDUS DE VILLANOVA. Vinum rorismarini membra corporis principaliora roborat & ab omni putredine præservat, ita, ut nullum venenum ipsis nocere possit. *Est vicarium theriacæ*, inquit ARNOLDUS DE VILLANOVA. Quibus vero pauperioribus non plantæ hæ hortenses ad manus sunt, hi ex serpillio, origano ubivis obviis, eadem remedia petere & concinnare possunt. Balnea quoque ex his præparata in omni externarum partium debilitate atque languore subigendo, præsertim si quis ex diuturniori morbo, vel foemina ex puerperio convalesceret præsentissimum solamen adferunt.

§. XVIII. Devenimus jam ad herbarum virtutem pene singularem commendandam, quæ ubique haberi possunt & quarum largissimum proventum benigna natura non sine singulari ratione ac consilio nobis concessit. Primum itaque in considerationem nostram veniat millefolium; quo omnia prout, omnes ferme vici luxuriant, cujus flores destillati oleum saphirini coloris, insigni sedativa, blanda & antispasmodica virtute donatum, largiuntur. Horum florum cum aqua infusio in omnibus doloribus & affectibus spasmodicis egregiam exerit efficaciam, siquidem non sine magno fructu atque utilitate in hæmorrhoidum cæcarum dolore, in colica, doloribus post partum à lochiis suppressis, & quæ ex hæmorrhoidum suppressione nascuntur, acerbioribus tormentis, in cardialgicis quoque anxietatibus, affectu spastico ventriculi & diaphragmatis aqua cum millefolio destillata vel ejus infusio cum aqua, aut essentia cum spiritu vini saltem vulgari facta usurpantur. Quum vero enermiores sanguinis sive per uterum sive per sedis venas aut fistulam bronchiale profusiones acerbioribus spasticis viscerum vel aliarum partium contractionibus suam originem suæque incunabula debeant: euporista illa ex millefolio parata in iis compescendis vix ulli alii remedio efficacia cedunt. Et quia flores chamomillæ vulgaris etiam propter oleum, quod per destillationem identidem saphirinum, temperatum & sedativum prodit, millefolio penitus ferme similes & ipsi affines vires alunt, eorum quoque virtus non dispar, sed una eademque in commemoratis jam affectibus observatur. Qua de causa opportune admodum in horum morborum curatione hi duo flores conjungi & in unum medicamentum, ut in infusum, vel decoctum aut in clysterem vel cataplasma recipi possunt: siquidem hic flos in omnis generis doloribus, spasmis quoque & hæmorrhagiis sistendis fere incomparabilis est. Id vero habent maxime peculiare præ millefolio, quod flores illi, qui flavi sunt, ad drachmam unam aliquoties die vacuo sumti pertinaces febris intermittens insultus ac impetus potenter sistant atque compescant longe tutius, quam ipsa tantopere commendata china, quæ ex remoto Peruviano regno ab aliquot inde jam annis tanto pretio redempta fuit. Nullum vero simplex in rerum natura reperitur, quod tam amicum sit intestinis, quam flos chamomillæ. Qua de causa etiam non sine consilio & singulari fructu huc usque solos flores chamomillæ ad clysteres, in omnibus fere affectibus loco aliorum ingredientium recipiendos, curavimus & suavimus, addito, si opus fuit, oleo amygdalarum

dulcium & in pauperibus oleo lini vel raparum, vel ad feces dejectivas sufficienti salis communis copia, quod in stimulando meliorem usum habet, quam varia extracta vel electuaria lenitiva aut purgantia, quibus omnibus inter clysteres carere possumus. Inter externa, quæ discutunt, emolliunt vel maturant abscessus, cataplasinata primas etiam hi flores tenent, & vel soli vel cum floribus sambuci, malvæ, millefolii, croci mixti & cum lacte decocti inque vesicam inditi & partibus affectis adpositi in sedandis doloribus atque emolliendis tumoribus omne punctum ferunt. Spiritum vini abstractum à summitatibus millefolii, floribus chamomillæ, femine anisi, cymino æthiopico, vulgo *Kram - Kummel*, in discutientibus flatibus plus certe valere, quam alia tantopere laudata carminativa & antispasmodica longiori usu atque experientia didicimus.

§. XIX. In absinthio, quod omnis facile terra gignit, eximia efficacia atque virtus recondita est, ut vix medicina domestica eo carere possit. Certe multarum chronicarum passionum præservatrix non modo, sed & curatrix est: at quia est vulgaris, non magni aestimatur, ut verum sit PLINII edictum: *nos plerasque herbas pedibus conculcare, quarum si nobis virtus spectata esset, eas in cælum laudibus efferremus*. Gaudet absinthium principio amaricante balsamico & oleo vaporoso, sedativo ac fixiori sulphureo sale alcalino. Ob oleum vaporosum ac sedativum dolores & spasmos compescit, ob amaricans vero principium & sal alcalino-sulphureum bilis naturam æmulatur & id fere omne præstat ac supplet, quod alias bilis balsamo in corpore humano efficere competit. Quamobrem etiam in omnibus morbis frigidis, quæ ex defectu bilis, ex nimio acido & viscido, obstructione & infarctu viscerum fiunt, vel ex putredine nascuntur, tam curative, quam præservative opem fert acceptissimam. Propter amaritiam alvum quoque stimulat, febres intermittentes aufert, vermes enecat, atque in cachexia, tumore oedematoso, obstructione viscerum convenit, neque minus juvat concoctionem & in obstructione hepatis, inque ictero cum fructu sumitur. Optime decoquitur cum aqua & redigitur in extractum, quod solutum in spiritu vini ad drachmam unam vel ultra propinari potest: istiusmodi enim decoctione absinthium privatur oleo suo vaporoso, capiti & nervis non semper amico. Experimento vulgari tota herba plantis pedum imponitur ad tumorem ibi decumbentem dispellendum. Fumaria uti notissima est herba, ita eadem saluberrima jure optimo celebratur, scatet enim succo non tantum amaricante, sed etiam sale copioso, tartareo, nitroso. Si in decocto cum cerevisia vel etiam sero lactis bibatur, aut si in forma pilulari adsumatur, omnibus morbis chronicis, præsertim iis, qui ex lymphæ & sero corrupto oriuntur, quales sunt cutis variæ defædationes, lepra, scabies, scorbutus, lues venerea & plurimi alii, egregie subvenit & circulum sanguinis promovendo infarctum viscerum amovet, obstructions referat, excretionem salutaris æque per alvum, ac urinam & transpirationem secundat, atque lympham cum sanguine hoc modo optime depurat. Et sane vix præstantior datur herba ad sanguinis & humorum massam depurandam viscerumque tonum roborandum, ut quidem nostra fert sententia, quam jam laudata hæc divinæ virtutis fumaria. Eisdem

Ad cataplasinata primas etiam hi flores tenent:

In absinthio eximia virtus recondita est.

Dolores & spasmos compescit.

Alvum stimulat &c.

In tumore oedematoso convenit.

Plantis pedum imponitur ad tumorem dispellendum. Fumaria scatet succo amaricante & sale tartareo nitroso.

Subvenit iis morbis, qui ex sero corrupto oriuntur.

Vix præstantior datur herba ad sanguinem depurandum.

Balnea ex Roremarino morbo languentibus solamen adferunt.

Flores Millefolii destillationis ope oleum antispasmodicum largiuntur. Ad spasmos multosque spasmodicis aut analo-gis affectibus conferunt eorum cum aqua infusio, aut essentia cum Spiritu vini.

Nec minus valent in omnibus sanguinis profusionibus.

Millefolio penitus ferme similes flores Chamomillæ.

Id vero maxime habent peculiare, quod febris intermittens insultus potenter sistant. Et quidem longe tutius quam China Peruviana. Præ ceteris omnibus flores chamomillæ ad clysteres commendat Cl. Autor.

Eosdem effectus ex-
erit nastur-
rium aqua-
ticum.

Quod spe-
cificum
maxime
audit in
scorbuto.

In sangui-
ne resol-
vendo &
in asthma-
te egregie
conferat
Chærefo-
lium.

Veronica
optimo ju-
re dici po-
test de dui-
ze Thé.

Equisetum
Hedera
terrestres
&c. cum
aqua cali-
da infusa
loco Théæ
calculosis
opem attu-
lerunt.

Rosarum
aqua in
morbis ca-
lidis tam
interne
quam
externe
longe uti-
lissima est.
Conserva
rosarum
phthysicis
& hæcticis
dicata est.
Acetum
rosarum
virtutis est
incompara-
bilis in ce-
phalalgia,
deliriis, na-
riumque
hæmorrhagi-
is.

Florum
acaciæ in-
fusi leniter
alvum sub-
ducit.
Flores Chæ-
ri menses,
fœtum
mortuum
aut secun-
dinas pro-
pulsant.

Flores Hy-
perici in
Phthysi,
vermibus,
affectibus
spasmodi-
cis, &c.

effectus cum fumaria in circulo sanguinis promo-
vendo, in obstructionibus & infarctibus viscerum
auferendis atque excretionibus adjuvandis exerit
nasturtium aquaticum, quod omni tempore viret
& juxta rivulos & in locis paludosis natale so-
lum habet. Specificum maxime audit hæc her-
bula in scorbuto; præterea etiam ventriculum,
omniaque viscera & totam naturam corrobo-
rans virtus ipsi encomio non falso adscribitur.
Hæc planta adhuc recens sumi potest cum bu-
tyro vel etiam cum aceto & oleo olivarum lo-
co acetarii, aut cum brodio caponis coqui aut
vino vel spiritui vini infundi, & ita frequentius
in usum vocari potest.

§. XX. De chærefolio illud tenendum est,
quod ad sanguinem coagulatum resolvendum,
& in asthma ad expectorationem in jussulis
egregie conferat. Gaudet quoque hæc herba vir-
tute traumatica, resolvente, diuretica & emme-
nagoga. Sequitur jam veronica herba valde tem-
perata aperiente & roborante virtute instructa,
cujus infusum cum aqua illud, quod ex herba
thée paratur, longis intervallis post se relinquit,
unde optimo jure dici potest *der teutsche Thé*; si-
quidem non tam præservando in omni generis
morbis, qui ab impuritate humorum ac visce-
rum infarctu oriuntur, sed & in iis sanandis, in
phthysica maxime & nephritica affectione vires
exerit longe æstumatissimas. Conf. hac de re no-
stra *Dissertatio de infuso Veronicæ præferendo
herbæ thé*. Quoniam mentio facta est calculi,
in memoriam nobis incidunt aliarum herbarum
etiam notissimarum virtutes, quæ cum aqua ca-
lida infusæ loco herbæ théæ calculosis exoptatissi-
mam opem attulerunt. Sunt vero hæc herba equi-
feti, hederæ terrestres, baccæ alkekengi, junipe-
ri tostæ, semen dauci. Novi plures, qui multis
abhinc annis misere ex calculo laborantes non
præsentius solamen, quam in horum decoctis,
quotidie ea bibendo, invenerunt.

§. XXI. Ex floribus in usum quoque dome-
sticum quosdam decerpere liceat. Atque in his pri-
mum locum inveniunt rosæ, quarum aqua prop-
ter oleum fragrantissimum, naturæ amicum & do-
tes plane singulares in erigendis viribus, in dolori-
bus & inflammationibus levandis inque omnibus
sic dictis calidis morbis tam externo, quam inter-
no usu longe utilissima est. Rosarum conserva ob
vinum confortantem & leniter confringentem pe-
culiariter phthysicis & hæcticis dicata est. Acetum
rosaceum cum spiritu & aqua rosarum commix-
tum, adjecto nitro & pauxillo camphoræ epi-
thema constituit, quod capiti admotum in sisten-
dis doloribus, avertendis deliriis & compescen-
dis immodicis narium hæmorrhagiis multiplici
nostro experimento virtutis est incomparabilis.
Florum acaciæ plenior & saturata infusio cum
fero lactis vel etiam cum vino diluto, verno tem-
pore leniter alvum subducit & in scabie aliisque
ex impuritate humorum proficiscentibus morbis,
in subjectis maxime tenerioribus, magnæ virtutis
laude insignis est. Floribus cheiri eorumque ex-
presso succo nihil ad menses pellendos vel fœtum
mortuum aut secundinas propulsandas, item ad
obstructiones hepatis in inveterato etiam ictero
recludendas, vix quicquam dari potest præstan-
tius, si cum cerevisia calida bis de die medicamen-
tum porrigatur. Hyperici flores, nusquam non
satis obvii, etiam peculiare ad domesticum usum
commendandas custodiunt vires, in dispositione
videlicet phthysica, in enecandis vermibus, in-
que affectibus spasmodicis, & melancholia hy-

pochondriaca allevandis. Usus poterit institui
in infuso cum aqua, vel cum aqua leniori infu-
satione in extractum redigi possunt, quod cum
aliis pilulis sumi potest. Neque vero viola-
rum flores prætermittendi sunt, quorum infu-
sio ex aqua, addita sufficiente sacchari quantita-
te, lenissima coctione in syrupum transit gratissi-
mi cœrulei coloris, quo ad expectorationem in
omnibus morbis pectoris, & ad expurgandas in
infantibus sordes alvinas, sive ore adsumatur sive
ano infundatur, vix ullum datur excellentius ex
domesticis remedium. Flores bellidis silvestris,
vulgo *Kâse-Blümlein*, quorum passim magnus
in pratis & pascuis proventus est, mirabilem vul-
nerariam & specificum, quæ cruorem resolvit
& per insensibilem transpirationem evocat, vir-
tutem exerit, unde omnibus læsionibus, quæ ab
externa causa fiunt, horum decoctum in aqua
vel melius cerevisia quam maxime accommo-
datum est. MINDERUS ejus efficaciam in hydropē
& aliis morbis, qui ex potu frigido corpori ca-
lescenti immisso suam originem trahunt, non satis
prædicare potest. Cyani florum decocto in uri-
næ suppressione, ad ejus fluxum promovendum,
nihil datur potentius, præsertim si semen urticæ
commixtum fuerit.

§. XXII. Ordo nos jam ad arbores deducit,
quarum copia nullibi non suppetit omnibus, &
ex his quoque parabilia auxiliiorum in mor-
borum curatione genera petere volumus. Prodeat
vero primum omnibus fere notissima abies sive
Tanne, quæ ob balsamicum resinofum suum suc-
cum perpetuo viret & singulares in omnibus ex-
cretionibus promovendis sanguineque depurando
possidet facultates. Hujus summitatum vel turio-
num sumantur manipuli tres & aquæ fontanæ ac
vini ana mensuram unam, coque in diplomate
per horæ quadrantem, postea exprime; hujus
dosis sunt uncia duæ vel tres, quod certe omni-
bus decoctis ex lignis exoticis paratis ratione
virtutis præferendum est. Siquidem in scorbuto,
hujusque contractura, vaga quoque arthritide
efficacissime sese exerit, si ejus usus ad mensis spa-
tium protrahatur. Balneum vel infusum ex fructi-
bus abietis ad paralyfin & contracturam scorbu-
ticam à pluribus peritissimis Medicorum cum
fructu usurpatum novimus.

§. XXIII. Arbor juniperi tota medicamento-
sa est, quia tota balsamica. Lignum ejus effi-
cacia non cedit lignis exoticis guajaci, vel fassa-
fras, ut commodissime eorum in locum substitui
possit, imo iis præferendum existimamus in omni-
bus morbis ex impuritate humorum ortis. Baccæ
propter oleum, quo scatent, copiosum, balsami-
cum, sive in substantia sumantur, sive in rob re-
ductæ, vel si tostæ cum aqua loco caffè infun-
dantur, medentur omnibus iis morbis, qui ex
obstructione viscerum, & à sanguine lento &
crasso proveniunt. Quare in asthma, in ca-
chexia, ictero, mensium suppressione, colica, cal-
culo vesicæ & renum, in ventriculi quoque cru-
ditatibus magno sunt præsidio. Lixivio ex cineri-
bus hujus arboris cum vino sumto multos hydro-
picos sanatos esse, non infimæ conditionis Me-
dici memoriæ prodiderunt. Junipero non inferior
est sambucus, in qua, judice BARTHOLINO *de me-
dic. Dan. Dissert. I.* plus medicinae latet & tutior
omni tempore salubritas, quam in pomposis an-
tidotis, quæ patrem theriacam & matrem mi-
thridatum habent. Flores & rob sunt vulgatissima
illa euporista, quibus non facile plebeius vel rusti-
cus caret. Ipsi flores externe in omni tumore ery-
sipelaceo,

sunt con-
mendatissi-
mi.

In morbis
pectoris
&c. vix
datur sy-
rupus viola-
rum excel-
lentius re-
medium.

Flores Bel-
lidis sunt
specificæ
vulnerarii.

Valent et-
iam in hy-
dropē.

In urinæ
suppressio-
ne nihil
datur po-
tentius
decocto
flor. Cyani.

Abies in
excretioni-
bus promo-
vendis
&c. singu-
lares possi-
det facul-
tates.

In scorbuto
vaga quo-
que arthri-
tide effica-
cissime sese
exerit.

Juniperus
tota est
medica-
mentosa &
balsamica.
Lignum,
Baccæ,
Oleum,
Rob, me-
dentur om-
nibus mor-
bis qui ex
obstructioni-
bus pro-
veniunt.

In Sambu-
co latet in-
tegrum
Antidota-
rium.

lipelaceo, odontalgia, podagra impositi, ad emolliendos quoque abscessus & duros à lacte coagulato tumores cum fructu adhibentur. Eorum aqua ob vim anodynam fere polychresta est, inque omnibus morbis, siue acuti siue chronici sint, non sine fructu usurpatur. Convenit maxime in iis morbis, ubi expulsiōne opus est, ubi dolores urgent, ubi inflammatio internarum partium adest. Rob ex baccis paratum rusticorum panacea & theriaca est, quod vel in cerevisia calida, vel aqua florum sambuci datum universale fere præservatorium & tutum remedium in omnibus ingruentibus morbis constituit; siquidem excretiones per alvum & per cutim promovet & anodyna simul virtute fulget. Quidam ad diaphoresin movendam addunt cornu cerviustum ad drachmam unam. Cum sacchari candi anatica portione rob si misceatur & superfundatur spiritus vini isque accendatur, facta probe agitatione, in diuturna tussi & ante paroxysmum intermittentium ad cochleare unum datum insigniter prodest. Rob frequentiori usu impetum harum febrium egregie mitigare, imo sistere solet, modo cruditatibus primarum viarum laxantibus & corrigentibus probe antea prospectum fuerit. Medius fruticis cortex, si coquatur in cerevisia vel aqua aut vino, & urinam & sudorem, menses quoque fortissime pellit, unde cachecticorum optima est medicina. Externe si tumoribus œdematosis, item erysipelaceis imponatur, & dolorem & tumorem abigit.

§. XXIV. Acacia quoque nobis suggerit probata remedia, florum jam supra facta fuit mentio. Aqua ex iis destillata fere polychresta est & omnibus commendanda, suavissimi est saporis, roborat & vim quoque anodynam habet. De cortice radice illud tenendum est, quod is infusus cum simplici vini spiritu mirabilem virtutem foveat & calculosis, qui hoc malo inveterato procul dubio ex substantia renum prorsus læsa laborant, opituletur, si bis de die pro una dosi cochleare unum exhibeatur.

§. XXV. Ex arbore tiliæ nonnulla etiam in nostrum usum vocanda sunt, & quidem flores, quorum infuso in aqua theiformi novi olim chronicam epilepsiam diuturniori usu persanata. Aqua florum in omnibus affectibus, ubi spasmi vel dolores regnant, specifica est, hinc ceu polychrestum remedium utique commendari meretur. Medius hujus arboris cortex cum aqua in mucilaginem redactus incomparabili virtute gaudet dolorem, inflammationem & ardorem mitigandi, unde cum præsentissimo fructu in ambustionibus, in podagricis, arthriticis doloribus adhibetur.

§. XXVI. Neque aromatum usus prætermitti debet ad elicienda in scopum nostrum quædam parabilia. Piper non facile carere possumus in re domestica. Hoc sale scatet alcalino fixo, valde acri, siquidem, quod notabile est, piper in pulverem redactum cum acido affuso effervesceat. Ratione hujus salis fixi alcalini aperit, incidit, viscidos humores resolvit, cruditates ventriculi corrigit, & ad concoctionem promovendam nihil datur facile efficacius, cum primis si ventriculus ob cruditates collectas nihil appetit & gravativum dolorem circa præcordia causatur. Optime sumitur in granis integris ad decem vel duodecim, præsertim si ante cibum vel etiam circa tempus somni deglutiantur. Extra paroxysmum in quartana piperis integra grana plures per dies deglutita cubantes hac febre liberasse, plerique autores affirmant. Eiusdem

cum pipere virtutis est zingiber, quippe & hoc non volatili per destillationem eliciendo oleo, sed tantum sale acerrimo fixo imbutum est, ratione cujus pulvis ejus ad drachmam unam sumtus digestionem ventriculi ex cruditate viscidorum humorum depravatam penitus restituit, sique cum melle misceatur ac in electuarium redigatur, in asthma, tussi, in calculo quoque, item ad excitandam venerem, menses movendos & visum abolitum restituendum utilissime singulis diebus adsumitur, cui specificum infusum superbibere potest. NATHANAEL HODGES in *Loimologia Sect. VII.* commendat eximie zingiberis pulverem in morbis putridis & ipsa peste, quam diaphoresi sua, qua operationem perficit, & præservat & optime quoque sanat. De nuce moschata, etiam medico domestico usui apta in medium proferenda sunt. Propter oleum, quo gaudet aromaticum & simul anodynum in spasmodicis & doloribus, vomitu, colica, diarrhoea, dysenteria, ejus pulvis ad drachmam semis sumtus non sua caret laude; maxime omnium vero hoc remedium gravidis earumque affectibus quadrare multiplici experimento cognovimus. Eas subinde primis mensibus pertinaci nausea, vomitione, quin etiam tussi corripere constat, quibus incommodis sublevandis nuce moschata cum saccharo mixta in pulvere non certius auxilium invenimus. In alvi nimio fluxu compescendo, in soda siue ardore ventriculi leniendo, una pars nucis moschatæ cum tribus partibus lapidum cancrorum non sine fructu exhibetur. Eadem nux æquali portione cum alumine crudo remixta febrium intermittentium paroxysmos potenter sistit, hac tamen cautione adhibita, ut non nisi prius præmissis evacuantibus & cum regimine diaphoretico, cum infuso nempe calido vel sub motu corporis laborioso propinetur.

§. XXVII. Neque vero crocus in præteritis relinquendus est, qui propter insignes in medendo vires nonnullis Philosophorum aroma, aliis rex vegetabilium, quibusdam etiam anima pulmonum appellatur; siquidem ob sulphur blandum anodynum ac vaporosum, doloribus & spasmodicis mitigandis, propter sal acre autem & volatile incidendis humoribus & obstructionibus referendis egregie inservit. In contumaciori tussi & in respirationis difficultate infusum croci in aqua veronicæ, adjecta sufficienti sacchari candi quantitate insignis efficaciam deprehenditur. Eodem infuso cum aqua cinnamomi parato ad menses promovendos, laboriosum partum facilitandum, ad secundinas expellendas, ad lochia movenda nihil est præstantius, præsertim quando olei amygdalarum dulcium usus interpoletur. Exterius crocus cum floribus sambuci, chamomillæ, lacte & mica panis similaginei coctus & instar cataplasmatum partibus arthriticis impositus mirifice dolores lenit. Idem remedium etiam cum effectu novimus adhibitum in dolore hæmorrhoidum cœcarum. Crocus cum aqua rosarum addito pauxillo camphoræ oculorum inflammationi in morbillis & variolis medetur. Cubebæ ore masticatæ peculiariter caput confortant & mirum in modum vertiginem avertunt, teste CRATONE in *Cons. Med. p. 182.*

§. XXVIII. Spectant huc quoque mala citria, quorum usus in re domestica & in medica quoque satis notus est. Horum acetositas cum saccharo in syrupum redacta & ptisanis addita sitim & æstum immodicum egregie sedat. Cortices cum saccharo contusi & spiritui vini infusi liquorem & stomachicum

à quartana liberasse auctores affirmant. Zingiber sale acerrimo fixo imbutum est. In ventriculi cruditate, in asthma, tussi, calculo, &c. magnas fere suppetics.

Commendatur & in ipsa peste.

In multis affectionibus morborum siue haud sua caret laude nux myristica.

Crocus etiam à quibusdam aurum vegetabile appellatur.

Plurimi est usus in morbis pectoris & uteri.

Exterius impositus partibus arthriticis; mirifice dolores lenit.

Cum aqua Rosarum oculorum inflammationi medetur. Cubebæ masticatæ vertiginem avertunt.

Syrupus acetositis Citri sitim æstum sedat.

Est tanquam Panpharmacum multis morbis accommodatum.

Ac suavis bita laude haud fraudandum.

Aqua Acacia fere est polychresta.

Florum Tiliæ infusio in aqua epilepsiam persanavit.

Piper scatet sale alcalino acri.

Ventriculi concoctionem promovet.

Si ejus grana aliquot ante cibum deglutiantur; hac ratione quosdam etiam

chicum & qui flatus egregie discutit, præbent, quod etiam de corticibus aurantiorum tenendum. Taleoli mali citrii pulsibus manuum vel plantis pedum adplicati in omni febre ad æstum depri-
 mendum non inutiliter adhibentur.

Oleum amygdalarum à veneni noxa ventriculū oblinendo prohibet.

§. XXIX. Antequam à vegetabilibus discedamus, paucis verbis dicendum est de amygdalarum dulcium oleo, remedio certe ad plurima utilissimo. Non enim tantum clysteribus ad alvum ducendam sive solum, quod SIMON PAULI in *Quadripartito Botanico* suadet, sive decoctis emollientibus mixtum convenit: sed etiam interno usu varias præstat easque insignes utilitates. Nam venenum, si quis incautus adsumserit, à noxa inferenda lubricitate sua, qua ventriculū oblinet prohibet. Egregium insuper est antispasmodicum atque sedativum, si iis, qui torminosis alvi fluxibus vexantur, propinatur. In faucium raucedine, in tussi, asthma & pectoris quibuscumque affectibus, in phthisi etiam admodum prodest, præsertim si cum spermate ceti, & saccharo cando misceatur. In colica spasmodica, in dolore ex renum calculo subinde atrocissimo, atque in torminibus, quæ lochiorum fluxum, præsertim suppressum, comitantur, magno & præsentissimo auxilio hoc oleum est, si ad aliquot cochlearia cum brodio carnis sumatur. At vero in universum hoc tenendum est, quod recens & ex recentibus amygdalis, non rancidis expressum, & quod clarum ac pellucidum, non turbidum est, hac virtute gaudeat.

Sit autem recens & ex recentibus amygdalis, non rancidis expressum.

In delirio confert cancerorum succus.

Etiam in phthisi.

Lapides cancerorum pulverisati in omnibus fere morbis cum fructu adhibentur.

§. XXX. Devolvimur denique ad regnum animale, ex amplissimo ejus sinu quædam in usum nostrum delibaturi. Et hic primum se nobis offerunt cancri, quorum succus cum succo sempervivi mixtus & capiti adplicatus in gravioribus doloribus capitis, qui delirium minantur, mitigandis aptus. Eorum quoque succus jusculis restaurantibus & nutritivis in tabe, in phthisi utilissime adjungitur. Majori vero utilitate ac laude splendent horum lapides, quorum pulvis solus vel cum testis ovorum aut conchis præparatis mixtus & quarta parte nitri adjecta tantarum est virium, ut in omnibus fere morbis chronicis & acutis, præsertim, quibus immodicus calor junctus est, ad drachmam unam cum maximo fructu adhibeatur, & est fere pulvis amplissimi usus, qui ad acidum primarum viarum absorbendum, in hypochondriacis & scorbuticis, in æstu contempe-

rando in omnis generis febribus, item ubi diaphoresi opus est, egregium facit officium. Iidem lapides, si cum aceto destillato offerantur, longe magis eximia virtute pollent, dum potenter coagulatos humores resolvunt, urinam & diaphoresin movent, inque omnibus febribus, etiam ipsa in peste & malignis aliis morbis, in pleuritide, peripneumonia, in omnibus inflammationibus insigni cum fructu usurpantur. Lumbrici terrestres exsiccati & in pulverem redacti, convenienti dosi aliquoties repetita exhibiti, in epilepsia chronica & omni dolore arthritico laudatissimæ sunt virtutis, item lumbrici vivi partibus stoleribus adplicati egregio solamini sunt. Cochleæ dant pulverem, quo ad præservationem calculi renalis, si aliquoties in septimana adhibeatur, nihil secundum nostram observationem deprehendimus efficacius.

Lumbrici terrestres siccati in epilepsia & arthritide haud contemnendum suppeditant remedium. Cochleæ dant pulverem in calculo renali.

§. XXXI. Plura dicenda etiam essent de lætis usu, quod omnibus fere remediorum generibus in medendo palmam dubiam reddit. Optimum judicamus asininum, postea caprinum, cum quibus cura si instituatur per mensem & ultra, abstinendo ab omni ciborum & potus genere, arthritis, podagra, phthisis sub debitis cautionibus & convenienti regimine felicissime sanari possunt. Illud præterea etiam tenendum est, quod contra venena adsumpta validissima corrosiva, ut sunt mercurius sublimatus, cobaltum, arsenicum, antimonialia, emetica fortiora, quo etiam spectant acriora & drastrica purgantia, non detur præsentius auxilium mortem & funesta symptomata avertendi ipso lacte copiosius hausto.

Lac omnibus fere remediorum generibus palmam dubiam reddit. Primas tenet asininum, postea caprinum. In medicatione arthritidis, phthiseos, &c.

§. XXXII. De nitro, quod vili constat pretio & ubique haberi potest, illud ultimo loco inferendum arbitror, quod id ipsum depuratum vel cum absorbentibus exhibitum sit fere universale remedium, quia omnibus morbis, quibus interna vehementior commotio vel æstus junctus est, quadrat, eamque ob causam in omni febrili, inflammationum, dolorum, hæmorrhagarum genere interne utilissime adhibetur, alvum quoque laxat, urinam ad diaphoresin movet, sitim sedat, dolores lenit, cujus incomparabilem & divinam virtutem si plebei nescerent, multis sumptibus atque expensis, quas pharmacopoliis insumere debent, parcere possent.

Nitrum est fere universale remedium. Omnibus morbis quadrat.

Quod si plebei nescerent multis sumptibus parcere possent.

D E

PANE GROSSIORI WESTPHALORUM,

Vulgo

B O N P O U R N I C K E L.

A Nimantium corpora, jugi motu calidi & fluidi interni varie exagitata, partes aliquas sui continuo amittere, & hinc congrua quadam reparatione egere, res est certissima. Illud ipsum jam commode perficitur alimentis, quæ in humorum absumentorum substantiam fatiscere atque converti, & corpus nostrum tam alere, quam augere debent. Ex horum genere primas

obtinet panis, ISTODORO à πᾶσι dictus, quod omne quasi alimentum absolvat. Basis quasi ciborum hic est, & alimentum universale, naturæ admodum consentaneum, ventriculo acceptum, citra ullum fastidium, omnibus ferme genibus ac priscis familiare, totque seculorum ac nationum longo usu comprobatum, hinc alimentorum facile princeps. Etenim frumentum omne, &

& ex eo confectus panis, elementa complectitur valde affinia succis nostris vitalibus, negata ceteris rebus alibilibus. Constat nimirum, fluida nostræ machinæ ex diversissimis, ratione figuræ & molis corpusculis, esse composita, variaque elementa ibi contineri, chymico igne eruenta, nimirum, sulphur, oleum & sal volatile, mucilaginem, terram, aquam, & quæ sunt id generis alia. Similia quoque reconduntur in pane. Nam destillatus fundit spiritum acidulum, oleosum, qui præter alia & coralliorum substantiam promte solvit, & rubineam tincturam, digestionem prævia, constituit, medicamentum non contemnendæ virtutis. Deinde magnam olei inflammabilis largitur copiam, nec non terram fixam nigram à destillatione restilem præbet; & denique mucilaginosa ejus & lenta substantia ad ipsum sensum patet. Spirituosas subtiles particulas ipsi & vim confortantem inesse, præter testimonium sacra scripturæ & odor panis resollatorius, & aqua ex pane, præcipue grossiori, parata, virtutis analepticæ, à Medicis mirum laudatæ, nec non quotidianus ejus usus, vires firmas suppeditans, comprobatur. Præterea ventriculus hoc alimenti genere apprime gaudet, propter acidum subtile & blandum, quo gastrici menstrui vis & activitas dissolvens egregie adjuvatur & exaltatur. Plura in hanc rem de panis natura, viribus, variisque generibus, Veteribus jam cognitis, commentari possemus, si instituti nostri permetteret ratio: Possunt autem evolvi HIPPOCRATES, *Lib. II. de vict. rat. sect. 4. pag. 22. 23.* It. ATHENÆUS *Lib. III. cap. 17.* & 18. POLLUX *Lib. VII. cap. 11.* & PLINIUS *Lib. XVIII. cap. 7.* Placet tantum in præsentiarum panem illum grossiorem, quo Westphali pro victu quotidiano utuntur, à Gallo, ut ferunt, peregrinante denominatum Bonpournickel, paulo penitus examinare ejusque naturam ac vires breviter strictimque evolvere, atque usum ejus à multorum contemptu vindicare.

Priscis jam tum gentibus panis hic cognitus fuit, dictus furfuraceus, quoniam à furfuribus non repurgatus, teste GELLIO *Lib. II. cap. 9. it. impurus*, vid. HIPPOCRATES *l. 9.* ATHENÆUS *lib. III. p. 125.* syncommistum vocat, ex farina incerniculo non excussa subactum. It. Coliphium *ὀλίζοτροφώτερον*, membrum, & ἰσὶς robur, quasi robur membrorum, appellatur. vid. PETR. FABER *Agonistices Lib. III. c. 3.* CÆLIO RHODIGINO *Lib. IX. c. 16.* dicitur cibarius & gregarius, TERENTIO ater. Hoc panis genus magno semper in pretio habitum fuit, ad alendum & firmum ac robustum corpus reddendum: hinc furfuracei panes *πολυτροφώτεροι*, h. e. multum nutrimenti habentes, & qui ex polline, seu farina purissima confecti sunt, *ὀλιγοτροφώτεροι*, seu minus alimentum dantes, dicti sunt, teste ATHENÆO *l. c.* Hanc ob rationem olim athletæ, qui robustissima membra & nimio sanguine atque adipibus quasi luto involutas animas habebant, coliphium illud duntaxat edebant in prandio; in cœna vero carnem suillam non elixam, sed igne paululum affatam, & aquam calidam bibebant, ut alimentorum duritie ac crassitie non modo uberius nutrentur, sed etiam diutius saturi permanerent. vid. PETRUS FABER *l. c. p. 231.* GALENUS *de Alimentis & ARRIANUS Lib. III.* VERRIUS apud PLINIUM auctor est, populum Romanum, pane fursuribus adhuc remixto, trecentis annis usum fuisse. Vid. FULVII URSINI *Append. p. 316.* Durus quippe & firmus hic victus minus corruptibiles

generat succos, duplo plus nutrit, fami magis resistit, & generat corpora firma, perferendis laboribus injuriisque tolerandis idonea, & à morbis, maxime qui à dissolutione massæ sanguineæ calida proveniunt, immunia; cuius asserti veritatem sufficienter corroborat tota Westphalica gens, robusta, firma gravissimisque laboribus & injuriis perferendis apta. Notabile est, populum illum raro infestari febribus acutis, & morbis ab humorum ebullitione & sanguinis elementorumque dissolutione quadam maligna ortis, sed magis hic morbos frigidos & chronicos grassari, quod utique crasso victui & duræ diætæ adscribendum est. Cum enim alimentorum pauciorum corruptibilium sit assumptio, tardam, nec tam acrem subeunt humores fermentationem, unde & calor nimius viscosarum partium impedimentis obtunditur, nec humores texturæ firmioris tam facile divelli & destrui à fermento morbofo possunt. Præterea ingeniorum & morum constantia, & solidum in rebus gerendis iudicium, quo Westphali præ aliis nationibus polent, & ob id ad Ecclesiæ & Rerumpublicarum gubernationem, etiam in peregrinis locis, præ indigenis adhibentur, meo iudicio, partim educationi, partim victus rationi, adscribenda esse existimo. Ad laborem adsueta sunt: ut autem homines nihil agendo male agere discunt; ita rursus honestis laboribus multæ pravæ cupiditates & vitia reprimuntur. Victus autem hic magnum contribuit symbolum. Pulchre docet PHILOSOPHUS *Lib. I. Pol. 3. victus alimentique diversitatem diversas ac dispares hominum vitas efficere*; nec sine ratione: perpetuum enim corporis & animi commercium ac vinculum est. Qualis constitutio ac motus spirituum, sic dictorum animalium, tales quoque inclinationes, cogitationes animæque actiones moresque exsurgunt, id quod firmissimis rationibus adeo est manifestum, ut frustra operam ponere vellemus, si Medicorum trivium nota hic congereremus: nec obstat, hic crassum victum crassos procreare humores; utpote labore ac motu viscidæ particulæ satis dividuntur, præparantur, subtilifantur, ut non tantum intimiori allusione ad tubulos corpori in augmentum solidi cedant, verum etiam succos vitales progenerent satis firmos & sufficientes, quamvis non fluxiles & inconstantes: Et utut sanguine præditi sint frigidiori, sufficiente tamen gaudent partium subtilissimarum activitate. Notissima sunt observationes, quod quæ spiritu gaudent intestino & pariter per liquidi poros diviso, pressione rigidorum crassiorum, in medium se recipere & ad diffationem minus apta esse, ut sic in centrum coactæ & unione fortiores particulæ spirituosæ, magnam habeant vim & potentiam. Non tamen negandum est, victum hunc crassiorum & minus tutum esse illis personis, quæ imbecilles sunt, quiete ac otio fruuntur, nec laboribus assuetæ. Hinc sapienter scribit HIPPOCRATES *de Medic. prisc. Sect. 1. p. 14. Valentiora alimenta hoc habent, quod à natura si superentur, nutrant egregie, si non, dolores & morbos frigidos producant.* Et CELSUS dicit *p. 106. Valentiora minus facile concoqui, sed si concocta sint, plus alere. Labore, itaque & motu opus hic est.* Corpora athletica nutritionem recipiunt solidiorem, quam tranquilla & otiosa, ubi suspecta magis omnis nutritio & pinguedo est. Motus enim est & sanguinis circuitus, qui intimiore attritione & vi sua elastica, crassas alimenti particulas resolvit, subigit, digerit & in substantiam corporis

corporis nostri convertit : quies autem omnem nutritionem sufflammat, obstructions morborum genitricis atque ingenium tardum ac fluxile parit.

Ex hisce jam liquido constare existimo, plurimam alibilem qualitatem in pane Westphalorum contineri, & quidem tantam, ut securius & meliori fato laboribus affueti, firmissimo hoc nutriendi genere utantur, & corpora illorum ac ingenia inflaurentur, quam nos, delicatiori ac tenuiori victui & otio adfueti. Sique porro rem paulo accuratius ad rationis momenta exigere velimus, hic offerunt se plurima clarissime. Multum enim distat natura & indoles panis grossioris fursuracei ab illo, qui ex farina purissima præparatus est. Westphalicus si destilletur, copiosissimum empyreumaticum & inflammabile præbet oleum : mediocrem quantitatem panis medius ; minimam, seu potius nullam, panis ex tritici farina purissima factus, seu simila. Immo destillati fursures copiosum semper fundunt oleum, cuius proventus, mea sententia, cortici externo duriori, qui ab æris calore jugiter atteritur, debetur. Notum autem jam est, quam activum principium, naturæ nostræ & mixturæ sanguineæ consentaneum, & humorum balsamum, ac temperiei nativæ custos sit, oleum destillatum : Ipse sanguis abit in oleum, & inflammabilis est, & quo magis de hoc principio participat, hoc firmiores suppeditat vires, sanitatis & vitæ nostræ conservatrices. Oleum destillatum mineram ac matricem esse salis volatilis, quo mire gaudet regnum animale, compertum est rerum chymicarum gnaris.

Ex hisce jam apparere existimo, quantam prærogativam hic panis habeat, præ aliis sui generis. Alimentum vere dici potest medicamento, quoniam præter qualitatem corpori nostro similem, habet & aliam, qua insigniter afficit, intemperiem humidam emendat, exsiccat, à putredine defendit & vires reficit ; quare loco medicamenti tali in casu ubi vires jacturam passæ sunt, ubi sanguinis pulsus deficit & dissipatio subtilissimi fluidi metuenda adhiberi potest, sive in jusculis, quæ cum vino, saccharo & cinnamomo parata, sunt optima confortantia, vel in aqua ejus destillata, saporis suavissimi, in phthisi, hæctica & virium defectu egregia. Taceo ejus usum externum in capitis dolore, & ubi discuf-

sione humorum stagnantium opus est, eximium. Tandem panis hic crassior singularem fovet virtutem, aliis panibus non concessam, quod licet sit crassioris texturæ, alvum tamen subducatur. Notata hæc virtus jam olim fuit ab HIPPOCRATE, dum scribit *Libr. II. sect. 4. pag. 23. Panem ex farina integra non excussa, alvum subducere, purum, vero minus, sed magis illam constipare.* Hanc virtutem maxime derivandam esse existimo ex fursuribus rigidioris texturæ ac figuræ, quæ tenuissimas intestinales fibras ad motum excretorium promptiores sollicitare & irritare continuo possunt ; *fursures* enim teste GALENO *virtutem habent deterforiam.* Hinc in praxi observatur & talia juscula ad alvum laxam servandam esse accommodatissima.

Quod concernit medicamenta ex pane hoc Westphalico concinnanda, ex illis laudem eximiam meretur, ad vires restaurandas & humidum homogeneous corporis refarciendum, in fervore sanguinis hæctico, aqua, quæ paratur sequenti modo. *Sumatur panis contusi libra una, succi cancerorum fluviatilium libra dimidia, aquæ roris maialis mensuræ duæ, aquæ rosarum uncia quatuor, nucistæ uncia dimidia, croci drachma una: destillantur hæc invicem in balneo M. moderato calore, sic prodit aqua egregie confortans, suavissimi odoris, stomacho grata & ad restinguendum æstum hæcticum eximia, si quotidie ad mensuram dimidiam sumatur, vel sola, vel cum pulvere cornu cervi philosophice preparato.* Porro, si spirituosam stomachalem expetis, destillandus panis hic est cum vino Rhenano, adjecta nucistæ & cinnamomo sufficiente quantitate, sit exinde aqua stomachum corroborans, in nimia ejus laxitate, vomitu, appetitu dejecto, summe proficua. Præterea spiritus panis, ex pane sicco, in retorta destillatus, & probe ab oleo suo foetido rectificatus & purgatus, medicamentum sudoriferum est, naturæ non adversum, quod tenuitatem sanguini conciliat ; hinc ad scorbutum & sanguinis impuritatem tollendam, summe proficuum. Si radiis solis per aliquod tempus exponitur, tincturam induit rubineam. Fusius hujus spiritus laudes recenset JOH. TACKIUS in *Chrysogonia animali* pag. 76.

1911

FRIDERICI
HOFFMANNI

CONSILIARII REGIS BORUSSIÆ INTIMI,
ET ARCHIATRI,
PROFESSORIS MEDICINÆ PRIMARI IN ACADEMIA HALENSI,

OPERA OMNIA
PHYSICO-MEDICA

Denuò revisa, correcta & aucta,

IN SEX TOMOS DISTRIBUTA;

QUIBUS CONTINENTUR

DOCTRINÆ SOLIDIS PRINCIPIIS PHYSICO-MECHANICIS,
& anatomicis, atque etiam observationibus clinico-practicis superstructæ;

*METHODO FACILI AC DEMONSTRATIVA DEDUCTÆ,
& per experientiam LVII. annorum stabilitæ.*

CUM VITA AUCTORIS,

Et ejus PRÆFATIONE de differente medicinæ & medicorum statu atque conditione,
& criteriis boni ac periti medici.

TOMUS SEXTUS.



GENEVÆ,

Apud FRATRES DE TOURNES.

M. DCCXLVIII.

1812

THE AMERICAN

AND THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN

OF THE AMERICAN



CONSPECTUS

TOMI SEXTI.

Opuscula medica de Remediorum efficacia, facultatibus & viribus.

| | | |
|-------|---|--------|
| I. | <i>De mirabili lactis asinini in medendo usu.</i> | Pag. 1 |
| II. | <i>De saluberrima feri lactis virtute.</i> | 9 |
| III. | <i>De salium mediorum eccellente in medendo virtute.</i> | 16 |
| IV. | <i>De manna, ejusque præstantissimo in Medicina usu.</i> | 24 |
| V. | <i>De recto corticis Chinæ usu in febris intercurrentibus.</i> | 32 |
| VI. | <i>De medicamentis selectioribus.</i> | 41 |
| VII. | <i>De medicamentis balsamicis.</i> | 47 |
| VIII. | <i>De præstantissima nitri virtute medica.</i> | 55 |
| IX. | <i>De Camphoræ usu interno securissimo & præstantissimo.</i> | 60 |
| X. | <i>De vesicantium & fonticulorum circumspæcto in medicina usu.</i> | 66 |
| XI. | <i>De Opiatorum nova eaque mechanica operandi ratione.</i> | 78 |
| XII. | <i>De vera medicamentorum in morbis virtute & efficacia ritè dignoscenda.</i> | 85 |
| XIII. | <i>De cognoscenda corporis humani natura ex effectu remediorum.</i> | 95 |

Opuscula pathologico-practica, varii argumenti.

| | | |
|--------|---|----------|
| I. | <i>De ætatis mutatione, morborum causa & remedio.</i> | Pag. 104 |
| II. | <i>De salium morbosorum generatione in corpore humano.</i> | 111 |
| III. | <i>De putredinis doctrina, ejusque amplissimo in medicina usu.</i> | 118 |
| IV. | <i>De usu anatomes in praxi medica.</i> | 124 |
| V. | <i>De morbis fœtuum in utero materno.</i> | 134 |
| VI. | <i>De dentibus, eorum morbis & cura.</i> | 141 |
| VII. | <i>De bile medicina & veneno corporis.</i> | 151 |
| VIII. | <i>De salubritate febrium.</i> | 160 |
| IX. | <i>De situ erecto in morbis periculosis valde noxio.</i> | 169 |
| X. | <i>De Crisium natura ejusque explicatione rationali.</i> | 173 |
| XI. | <i>De certo & rationali mortis in morbis præfagio.</i> | 181 |
| XII. | <i>De duodeno multorum malorum causa.</i> | 188 |
| XIII. | <i>De ignorata uteri structura, multorum in medicina errorum fonte.</i> | 195 |
| XIV. | <i>De morbis certis regionibus & populis propriis.</i> | 202 |
| XV. | <i>De læsionibus externis, abortivis, venenis ac philtris.</i> | 209 |
| XVI. | <i>De metallurgia morbifera.</i> | 216 |
| XVII. | <i>De inflammatione ventriculi frequentissima.</i> | 223 |
| XVIII. | <i>De morbis hepatis ex anatomia deducendis.</i> | 232 |
| XIX. | <i>De pulsuum natura, genuina differentia & usu in praxi.</i> | 237 |
| XX. | <i>De generatione mortis in morbis.</i> | 244 |

CONSPPECTUS TOMI SEXTI.

Opuscula medico - practica , quæ curam morborum & medendi methodum , nec non circumspectum remediorum usum spectant.

| | | |
|-------|--|----------|
| | <i>Præfatio.</i> | Pag. 251 |
| I. | <i>De naturæ & artis efficacia in medendo.</i> | 254 |
| II. | <i>De recta & simplicissima naturæ medendi methodo.</i> | 264 |
| III. | <i>De medicamentorum prudenti applicatione in tempore.</i> | 272 |
| IV. | <i>De prudenti medicamentorum continuatione.</i> | 278 |
| V. | <i>De purgantibus fortioribus ex praxi medica merito ejiciendis.</i> | 284 |
| VI. | <i>De medicina emetica & purgante , post iram veneno.</i> | 291 |
| VII. | <i>De imprudenti medicatione , multorum morborum & mortis causa.</i> | 296 |
| VIII. | <i>De medicamentis infecuris & infidis.</i> | 308 |
| IX. | <i>De erroribus vulgaribus circa usum topicorum in praxi.</i> | 322 |
| X. | <i>De remediorum benignorum abusu & noxa.</i> | 331 |
| XI. | <i>De venæ sectionis abusu.</i> | 339 |





F R I D E R I C I
H O F F M A N N I
O P U S C U L A M E D I C A
D E R E M E D I O R U M E F F I C A C I A ,
F A C U L T A T I B U S E T V I R I B U S .

D E M I R A B I L I L A C T I S A S I N I N I
in medendo usu.

§. I.



Remedia simpliciora, parabiliora & velut domestica, cum in persanandis, tum tempestive præscindendis, variis morborum generibus, omnia sic dicta composita, artificiose concinnata & concentrata pharmaca, non modo securitate, sed & virtute ac efficacia, longe multumque antecellere: nemo facile rectius intelligit, quam qui in

artis salutaris exercitio diu cum cura versatus est. Sane, si præclara antiquissimorum medicorum monumenta evolvimus & curatius excutimus, eosdem medicaminibus simplicissimis & paratu facillimis, naturæ amicis & ita dictis diæticis, magis alimenti, quam medicamenti vires obtinentibus, plus detulisse & re ipsa præstitisse, omnino deprehendimus, quam recentioris ævi chymiatři, chymico igne excoctis, activioribus pharmacis & pretiosis arcanis proficiunt. Hæc enim, nisi summa adhibita cautione & prudentia administrantur, magis ad nocendum, quam ad juvandum, parata sunt atque disposita: eamque ob causam merito valde infœcunda censenda, & domesticis minus ancipitibus longe sunt postponenda.

2. Constat quidem subtiliori chymix laus sua & haud translatitia commendatio, ad perscrutandas maxime rerum naturalium mixtiones ac vires; laudanda quoque in eo est quorundam chymiatrorum contentio, quod paucis guttulis & exigua mole ægrotantium fa-

stidia levare annisi sunt: sed profecto, quum penitus ferme rejectis diffusioribus & sic dictis Galenicis medicamentorum formulis, ipsisque diæticis, à veteribus tantopere laudatis præidiis, neglectui datis, medicamenta ex chymia petita, in avertendis & debellandis morbis, nimium in usum vocarunt; factum utique est, ut praxis medica nostra ætate, longe periculiosior sit veteri, funestisque plurimis exemplis subinde infametur. Ego vero hanc semper animo imbibi sententiam: ad felicem & auspiciatum in arte salutari finem obtinendum, necessarium esse, ut theoria cum praxi, veteres cum recentioribus, remedia Galenica & domestica cum chymicis, perpetuo conjungantur. Quippe, longa demum & multiplici experientia reperi & annotavi, remedia, quæ & alimenti, & medicamenti vi instructa sunt, tanquam affinia & blanda corpori nostro, in morbis curandis & præcavendis, non modo securissima esse, sed etiam efficacissima. Et horum usum ac genuinum adhibendi modum, ex veterum monumentis, longe melius, quam ex recentiorum libris hauriri posse & addisci, identidem iis, quibus antiqua non sordent, apprime cognitum est.

3. Præclaro inprimis & luculento hujus rei exemplo est lac asininum, quod, licet à priscis medicorum mirifice laudatum, & in expugnanda gravissimorum morborum contumacia utilissimum deprehensum fuerit; plurimis tamen ex recentioribus, etiam magni nominis medicis, præstantissimæ hæc dotes latent, eamque ob causam, exoptatum hoc sanitatis præsidium, vel parcius in usum medicum traxerunt, vel

eodem uti plane non ausi sunt. Nos itaque & solida ratione ducti & multiplici experientia edocti, præfenti specimine nobilissimum lactis asinini usum ejusque virtutes plane mirandas, velut ex ignorantiae tenebris iterum in lucem proferre & ad pristinum splendorem postliminio quasi revocare, apud animum constituimus.

4. Prius vero, quam ad institutum nostrum exsequendum paulo propius accedamus; e re visum fuit, ostendere in genere: quod omne lac alimentum sit maxime medicamentosum, sive, quod eidem, præter eximiam nutrientem facultatem, singularis & admiranda plane virtus insit medicinalis; ob quam merito, nec sine gravi ratione, ad medicos usus commendari queat. Et nutritivam quidem lactis efficaciam, eo minus ulli dubiam fore credo, quo magis inter omnes, vel proprio cujusvis exemplo, constat, lac corporis nostri alimoniam, si quid aliud, convenientissimum esse & quam maxime accommodatum. Etenim foetus, uteri ergastulo adhuc inclusus, lacte, in secundinarum compage elaborato, nutritur & augefcit. In lucem deinde editus, lactis beneficio firmitatem nanciscitur, ad perfectionem sensim deducitur, omnesque ejus internæ partes tantum roboris inde sortiuntur, ut alimenta assumpta subigere, digerere & in lacteum succum, chylum scilicet, convertere possint. Ac denique quilibet homo, quousque vita fruitur, chylo, ex alimentis digestis & solutis extracto, qui non nisi lac est, nutrimentum accipit & vigescit. Quin imo lac est, quod non modo sanguinis, sed & omnium quæ vitam foveant ac sustentant liquidorum, pabulum & materiam suggerit.

5. Quemadmodum igitur lac in alimentorum classe principem obtinere locum, certum ac manifestum est: ita non minus primas in remediorum censu meretur. Quod, licet non adeo omnibus cognitum sit atque perspectum: facili tamen negotio probari potest ac demonstrari. Ut enim ab experientia, optima rerum magistra, omnibusque subtilissimis ratiocinationum speculationibus superiori, ordiamur: nemini certe, vel levi brachio in artis medicæ cultura versato, obscurum esse poterit: lac, omnium propemodum animantium, excellentem & prodigiosam fere, adversus potentissima, corrosiva maxime & funestis exemplis penitus infamata, tam ex mineralium, quam animalium & vegetabilium sic dicto regno, petita venena contemperanda, cicuranda & infringenda, vim possidere: quæ tanta est, ut quilibet toxico infectus, lactis tempestive, convenienti tempore, modo & quantitate hausti usu, præsentaneum interitum effugere & omni periculo eripi possit; eamque ob causam merito dubitandum sit, an, præter lacteum humorem, tam promptum tamque excellens antidotum, in universa rerum natura deprehendatur & æquali facultate splendescat. Et hanc certissimam lactis adversus venenorum noxam virtutem, dudum jam veteres & primi medicinæ & materiæ medicæ auctores perspexerunt & prodiderunt. Inprimis DIOSCORIDES, antiquissimus medicinalis materiæ scriptor, GALENO teste, nulli secundus, *lib. II. de mat. med. cap. 77.* ita differit: *Lac autem, recens etiam, efficax est contra rosiones & inflammationes, à medicamentis exitialibus factas, uti à cantharide, pityocampa, salamandra aut bupreste, auripigmento, dorycnio, aconito aut ephemero.* Id quod etiam PLINIUS *hist. natur. lib. XXVIII. sect. 21. & 33.* totidem fere verbis testatur.

6. Si morbos ipsos dispicimus, amplissimus pariter lactis in iis est usus & incomparabilis utilitas, quam unanimi suffragio, testimoniis & exemplis luculenter adstruunt, cum priscis medicorum HIPPOCRATE, GALENO, CELSO & ARABIBUS, neotericorum quidam. Patebit hoc uberius in sequentibus nobilissimo

lactis asinini exemplo; in præsentiarum autem suffecerit allegasse MARTIANUM, *Comment. in Hippocr. lib. I. de morb. mul. p. m. 205.* perhibentem: antiquitus lac fuisse veluti sacram anchoram & omnium remedium caput; ita ut vix ullus morbus esset, in quo lac non administraretur. Eandem quoque in rem pulchre non minus quam ex vero Jo. JAC. WEPFERUS, probatissimus auctor & gloriam Helvetiorum medicorum quam maxime exornans, *in epistola ad Verzascham* scribit: *certe, divini aliquid in lacte latet. Antehac nunquam credidissem, nisi id sensibus comperissem. Vidi his meis oculis, quasi novos homines inde factos fuisse. Nam legitimo ejus usu, habitum firmiorem, colorem nitidiorem & vires robustiores plurimi acquisiverunt.*

7. Utut autem in genere lacti animantium, quæ in usum maxime œconomicum cedunt, ut bubulo, ovillo & caprillo eximia medicamentosa facultas insit: attamen asininum lac, PLINIO *l. c. sect. 33.* teste, omnium est efficacissimum, & virtute reliquas lactis species in medendo longe exsuperat, ita prorsus, ut neque tam securum, neque præstantia & efficacia tam excellens remedium, ullibi sit reperiendum. Hoc enim opportuno tempore, debita quantitate & convenienti cum regimine exhibitum, phthificis, hecticis, marasmo & febribus lentis tabescentibus, tussi chronica & atrophia scorbutica laborantibus, hypochondriaco & hysterico malo afflictis, spasticis pathematibus detentis, viscerum exulcerationi & morbis ab erosione salino-acri proficiscentibus implicitis, summo auxilio est atque præsidio. Quare dignum omnino mihi visum fuit hoc potissimum lactis genus, quod præ ceteris eligerem, meditationi subjicerem, cujus vires eruerem, utilitatem demonstrarem ac testimoniis & exemplis confirmarem.

8. Cur vero asininum lac, aliorum animantium lacti in medendo sit præferendum, primo omnium ratio erit reddenda. Quo ut eo facilius & felicius defungar, supponenda prius & statuminanda erunt nonnulla, de lactis mixtione ejusque ingredientibus, tanquam operationum fontibus. Videlicet, res vulgo notissima est: omne lac ex diversa eaque triplici substantia, quarum quælibet discrepantem facultatem & proprias vires obtinet, conflatum esse. Prima est fluida portio, quæ feri nomine effertur. Altera est oleosa, pinguis, quæ in supernatante cremore sese conspiciendam præbet, & ex qua butyrum elaboratur. Tertia est crassior, terreæ & mucilaginosæ texturæ, ex qua caseus coagulatur & conficitur. Serum, sive aquea portio, reliquas omnes quantitate superat, ita, ut pro differentia lactis, nonnunquam octo vel decem fluidi partes, & una tantum solidi, in eo contineantur. Butyrofa, oleosa, pinguis materia, levissima est & parcissima, naturæ inflammabilis. Et caseosa denique indolis est fixioris & gravioris, quæ ab acido facile densatur, in casei speciem coit fundumque petit.

9. A triplici hac & differenti lac constituentium ingredientium natura ac indole, omnis omnino lactis, in quibusvis morbis, tam arcendis, quam debellandis, virtus repetenda est ac derivanda. Etenim quodcunque lac tenue est ac liquidum multumque feri alit, illud & humectandi, & diluendi, & abstergendi, & laxandi facultate præ reliquis commendabile est. Vicissim, quod gravius est, multumque caseosæ, crassioris materiæ fovet, increassandi, constipandi, adeoque rupta vasa consolidandi efficacia maxime splendet. Id autem, quod multum cremoris butyrosi, nec non largum caseosæ substantiæ apparatus complectitur, emolliendi, demulcendi, inviscandi & nutriendi facultate conspicuum est. Jam si diversas & quæ communioris ac recepti usus sunt lactis species lustramus: humanum omnium dulcissimum, tenerioris caseos

substantiæque præpinguis est, quare eximie nutrit ac naturæ humanæ maxime est accommodatum. Bubulum pinguius est, multumque etiam terrei & minus feri habet, ideoque minor in eo vis abstergendi est, tanto autem major leniendi, temperandi & nutriendi. Ovillum omnium crassissimum & caseosa terrestri mucilaginosa materia foetum est: unde, teste HIPPOCRATE, minus detergit, conglutinandi autem vasa læsa & ab humorum acrimonia erosa, sive sanguinea, sive lymphatica, utilitate excellit. Caprillum parcius sero imbutum & crassioris tantisper consistentiæ & adstringentis naturæ est, minus butyri largitur, meliorem tamen adhuc bubulo, absterforiam facultatem obtinet.

10. Hæc autem diversa in lacte ingredientium portio, & inde dependens quoad operationem & usum differentia, non tam pabulo, quo vescuntur animantia, de quo inferius latius agemus, quam potius diversæ corporum, quæ lac præbent, texturæ & conformationi tribuenda est. Etenim licet singula animalia lactaria eodem tempore, eodem modo eodemque alimento nutrantur; non tamen unius ejusdemque indolis lac fundunt, sed quodlibet proprium & peculiare concedit. Id quod luculento utique est documento, pabuli materiam & naturam ad lac conficiendum non solam sufficere, sed diversam animantium naturam, quæ non nisi à disidente fluidorum, sanguinis nempe & reliquorum humorum varia crasi, mixtione & textura, nec non solidorum, maxime glandularum mammariarum, quæ à minimis vasculis conflatae sunt, fabrica, structura & constitutione petenda est, concurrere maximumque conferre momentum.

11. Jam si medicamentosam asinini lactis facultatem ejusque indolem figillatim perquirimus, istud multis peculiaribus splendere dotibus deprehendimus, quæ id singulari quadam & eminente salubritatis nota insigniunt. Nimirum ea asinini lactis propria laus est, quod præ reliquis tenue, aquosum sit & seroso humore abundet: id quod dudum jam cum ARISTOTELE lib. III. hist. anim. cap. 20. animadvertit GALENUS, qui lib. X. de simpl. facult. nec non lib. VI. de sanit. lac asininum vocat λεπτομερές, tenuissimarum partium. Quare, quum in confesso sit, plerisque morborum origines ducere ex humorum tenacitate & spissitudine, qui, dum ægrius per minima vasculorum, è quibus præcipua emunctoria & colatoria glandularum organa coagmentata sunt, transeunt, his in angustiis subsistunt easdemque infarciunt, & sic obstructions gignunt: in proclivi est judicare, lactis asinini, serosa & fluida materia largiter scatentis, ad referenda obstructorum repagula, spissiores & viscidos in corpore succos attenuandos, fluxiles reddendos & in motum redigendos, usum esse saluberrimum. Similiter, quum in propatulo sit: permultas ægitudinum acri, falsæ & vellicanti humorum constitutioni ortum debere; non minus luculenter patet, lac asininum, multo sero & humido dilutum, huic diluendæ, temperandæ ac obtundendæ apprime ex usu esse: licet non negandum sit, quod in exsequenda saluberrima hac efficacia, oleosum ac dulce simul succurrat elementum, quod interfertas salinas acies involvit & cicurat, quo sic attemperati crudi & male cocti succi, accedente liberalioris feri vehiculo, promte per vasorum excernentium emissaria eliminantur.

12. Altera, qua lac asininum dotatum est, prærogativa, in eo constituenda & quærenda est, quod parum caseosæ & crassioris substantiæ alat. Etenim octo primum lactis asinini uncias carbonibus vivis in patina ampliori imposuimus, & post omnimodam feri exhalationem, vix sex drachmas materiæ albescentis dulcis collegimus. Cepimus deinde ejusdem lactis libram medicam, quæ duodecim uncias æquat, & in

vase clauso, ad dimidias repleto, ut coagularetur seposuimus. Elapso triduo, ad fundum secessit candidissimum ac tenue coagulum, quod colatu per chartam bibulam à sero liberatum & penitus postea exsiccatum, pondere vix ad drachmas duas accessit, reliqua substantiæ solidioris parte, partim una cum sero per cribrum transeunte, partim filtri vasorumque parietibus firmitus agglutinata ipsaque sub operatione dispareunte. Contra vero idem vaccini lactis pondus, eodem modo tractatum, in longe crassius & ponderosius coagulum densabatur, quod transmissio per filtrum liquido, insolatum & ad lancem expensum, decem drachmarum gravitatem exhibuit. Quod manifestatur, per exiguum, comparatione cum aliis lactis generibus facta, esse caseosæ crassioris substantiæ in lacte asinino apparatus, eoque ipsi peculiarem commendationem accedere. Quippe facilius ad extremas venarum angustias pertingit, succos vitales intimius perluit, lentos humores citius eliquat, inertes & impactos attenuat, solutosque promptius evertit.

13. Accedit tertio, & eminentius salubrem lactis asinini facultatem conspectius arguit: quod ipsa caseosa, quam complectitur substantia, longe tenerrima sit, neque in crassum ac firmum coagulum abeat. Calefecimus hunc in finem asininum lac, & asperso acido, ut spissitudinem contraheret expectavimus; sed præter flocculos paucos, tenues & sparsim sero innatantes, nihil in conspectum venit: quum contra bubulum lac, admixto acido, illico in offas densetur, quæ firmitus concrecentes ob pondus fundo adhærescunt. Jam vero in cura, quæ lactis ope adornatur, nihil æque noxium ac perniciosum est, quam si hoc in ventriculo coagulum contrahit, eamque ob causam, ut hoc avertatur, primaria medentis est intentio. Gravissima enim, quæ factam lactis in ventriculo coagulationem subsequuntur, sunt damna, & à probatissimis auctoribus passim observata & annotata. Quare liquido patescit, longe salubrius & medico usui multo magis accommodatum esse illud lac, quod difficulter coit, vel tenerum tantum & exiguum spissamentum dimittit, cujus genii potissimum est, de quo jam agimus, asininum.

14. Quam modo in asinino lacte laudavimus ténitudinem & serosi humoris copiam; huic dos quarta eaque electissima proxime adjungenda est, quam exquisita dulcedo ipsi conciliat, & quæ tanta est, ut omnes lactis species, solo humano excepto, superet, eamque ob causam delicatissimum saccharum, seu potius manniforme magma, artificiose longe melius & copiosius ex eo elici possit. Suscepimus experimentum, & duodecim lactis asinini, Junio mense emulcti, uncias, leni igne incoximus, ac primum unciam concreti crassamenti, admodum dulcis, obtinuimus. Huic affudimus rursus in vitro conservali aquæ pluvialis libram medicam, qua crebriori agitatione dissolutum propemodum est concrementum totum, relicto tantum parco in fundo sedimento. Supernatans liquamen per chartam emporeticam trajecimus & exhalationi commisimus, eaque spissamenti melliformis, saporis mirum dulcis & coloris albi, unciam dimidiam impetravimus. Quum igitur asininum lac liberalius sal dulce intus reconditum habeat: omnino non dubitandum videtur, quin ab eo eximiam quandam medendi facultatem accipiat, quæ non expectari potest ab aliis lactis speciebus. Melleum enim hoc sal, acrimoniæ humorum, tam acidorum, quam biliosorum, contemperandæ, obtundendæ & cicurandæ egregie intervit, simulque fibras intestinales blande irritando, alvum officii admonet eamque subducit. Unde recte HIPPOCRATES lib. II. de diæt. auctor est: quod lac asininum magis per alvum secedat, quam ullum aliud. Et idem gravissimus auctor, lib. de nat. mulier. in

perfanando uterino fluxu albo, primum per inferiora lactis asinini potu purgationem absolvit, & post hanc lactis bubuli usum suadet.

15. Ex his igitur, quæ hæcenus fufius de nobiliffimis lactis asinini dotibus & prærogativis differuimus, intelligentium iudicio luculenter patebit: incomparabilem prorsus ipsi inesse facultatem, ad perfanandos quamplurimos morbos, quos ut ordine jam enumeremus, ipsumque usum quoad specialiora exponamus, instituti ratio postulat. Quod si vero morborum censum, quibus asinum lac dicatum & accommodum est, inimus, inter præcipuas præstantissimi hujus remedii laudes, primo merito connumerandum est loco: quod phthificis & tabe consumtis, hoc, certius ac utilius, neque excogitari, neque suaderi possit, remedium. Antiquissimus certe his in morbis lactis est usus, quem præcæ medicorum scholæ, Cnidia æque ac Coa, propugnarunt, donec ex hac prodiret HIPPOCRATES & illustrius hunc assereret ac stabiliret, cujus auctoritatem ii, quos postera ætas tulit, unanimi suffragio sequuti sunt. Inprimis GALENUS multus est in commendando lactis ad phthisin usu, & *lib. V. meth. med. cap. 12.* mentionem injicit loci, quem vocat Stabias, æris bonitate, pecudum pabulo & lactis ibi emulsi salubritate celeberrimi, in quem frequentissime confluxerit, ad sanitatem recuperandam elumbis phthificorum cohors. Quinimo ARETÆUS tantum lacti in gravissimo hoc morbo tribuit, ut *lib. VII. de morb. chron.* non dubitaverit asserere: phthificos, si multum lactis potent, nullo alio egere auxilio.

16. Quamvis vero omne lac phthificis & tabidis saluberrima eaque optima sit medicina: asinum tamen reliquis omnibus palmam præripit, dum ejus usus cunctis indicationibus, quæ ad phthisin curandam requiruntur, plenissime satisfacit. Quod si enim causam & originem phthisis pulmonalis paulo curatius scrutamur; utique ab infarctu & obstructione vasculorum, ex quibus pulmonum compages maxime contexta est, eadem arcessenda erit. Unde apposite non minus, quam mechanice, HIPPOCRATES *lib. de internis affectionibus cap. IV.* phthifici mali generationem hisce delineat verbis: *Quum pulmo sanguinem in se ipsum traxerit, aut pituitam salsam, & non rursus dimiserit, sed in ipso coacta & compacta fuerint, ab his tubercula fiunt in pulmone & suppurantur, ab initio & per totum morbum tussis acuta sicca obtinet, & rigor, & febris, & dolor in pectore & in dorso incumbit, aliquando etiam in latere & erecta cervice spiratio vehemens incidit, deinde corrumpit pus & multum exspuit.* Solemne quidem fuit veteribus, lactis curam in phthisi ita adornare ac præscribere: ut asinino nonnunquam præmitterent, nonnunquam subjungerent, pro varia cujusvis intentione, aliud lactis genus. Sic HIPPOCRATES primo suadet purgationem cum lacte asinino cocto, vel etiam equinum lac excolatum, quod valde persimile est asinino, quotidie mane ad tres heminas hauriendum: postea vero, lac vaccinum, aut caprillum, usurpandum commendat. Et PROSPER ALPINUS, *de medic. meth. lib. VIII. cap. 7.* in exulceratione pulmonum & inde facta tabe, primo lactis muliebris, deinde asinini, & tandem caprilli usum, plurimum laudat. Nos autem, solum lac asinum ad truculentum hunc morbum abigendum sufficere, & ratione, & experientia confirmati, asserimus. Quippe hoc, ad amurcam mucidam in tubulis pulmonum obhærescentem abstergendam, dissolvendam, propter sal dulce deterfivum quo pollet, nihil est aptius nihilque magis accommodatum. Vires præterea dejectas egregie instaurat, calorem intestinum temperat, vacuata membra replet omniaque excretoria aperta servat. Neque tamen penitus inficias imus, obstructionibus vasorum pulmonalium sublatis, ad cavitatem, quæ ab erosione

& ulcere fit, replendam & consolidandam, lac vaccinum, vel caprillum, ob copiam mucidæ terrea, qua refertum est substantiæ, optimo cum fructu addi posse atque substitui.

17. Si nostram licet interponere experientiam, in proclivi foret, plurima recensere exempla, phthificorum, qui contumaci tussi, febre, puris & materiæ viscidæ copiosa ex pectore rejectione & incredibili corporis contabescencia afflicti, omnibus aliis fere frustra datis, tandem ex consilio meo, solo lactis asinini, vel etiam vaccini, cum, vel etiam sine infuso theiformi, exhibiti, longius extracto usu, perfecte sanitati redditi fuerunt. Sed missis aliis, recentissimum tantum & quod animo nostro adhuc obversatur interferemus. Vir quidam, triginta circiter annorum, prava victus ratione, inprimis spirituosorum ingurgitatione, nec non affectuum intemperantia, primum in hæmoptysin incidit, qua curata, quum antiquum obtineret, febrem nactus est prima facie catarrhalem, sed progressu vires fumentem & ægrum diu noctuque affligentem. Accessit continuus & copiosus purulentæ & viscidæ materiæ scretus, cum extremo virium lapsu & summa corporis contabescencia, ut ossa circumferre non posset & morti ab omnibus destinaretur. Nihilo minus, quum per trium ferme mensium decursum gravissime decubisset, ineunte vere, præter omnem, nostram etiam opinionem, lacte caprillo, mane calide sumto, postquam pulveribus leniter aperientibus salino-abstersivis & nitrosis, infarctui & calori hæctico occurrissemus, adspirante Deo convaleuit.

18. Monendum tamen est, quod, licet lac præstantissimum inter omnia in phthisi curanda remedia sit, & justo tempore ac convenienter datum, non facile usu suo destituatur; non tamen omnis omnino phthisis eodem perfanari possit, sed principiis maxime obstandum, & tum hoc subsidium in usum esse trahendum, quando ulcera non adeo callosa sunt, si cavitas & erosio non profundior & amplior, neque febris continua, sine ulla intermissione vel remissione, urget. Recte enim CELSUS *lib. III. cap. 22.* tradit: *Si vera phthisis est, inter initia protinus occurrere necessarium est: neque enim facile hic morbus, quum inveteraverit, evincitur.* Inter initia vero, subjicit, sicut in omnibus longis difficilibusque febriculis, lac recte dari potest. Et ALPINUS l. c. considerate monet: lactis potionem continuatam sanare posse phthificos in principio, antequam ulcera augeantur & callosa evadant.

19. Porro, quum hæmoptysis, difficilis spiratio, tabes & febricula, ab eadem causa, nempe obstructione vasorum pulmonalium & inde obortis tuberculis, quæ malo consummato in scirrhus & exulcerationes cancrosas abeunt, & individui plerumque phthiseos pulmonalis comites sunt, originem ducant: his etiam malis nullum aliud & præstantius, quam usus lactis asinini, opponi potest præsidium, quod etiam ab antiquis & peritissimis medicis magnopere semper fuit laudatum & commendatum. Meretur huc adduci insignis ex TRALLIANO locus, *lib. VII. p. 309.* dum ait: *quod si corpus totum alimentum non sentiens contabescere manifesto inceperit, neque thorax multum puris contineat, etiam solum lac ipsis dari debet, & asinum omnia alia antecellit, quod probe purgat.* Idem auctor lac asinum in difficili spiratione commendat l. c. scribens: *agre spirantes asinino lacte adjutos subinde conspexi, quum opportune esset datum, omnia enim, quæ pulmonum cavernis infixæ sunt, rejectione reddit morigera.* Et de hæmoptysi l. c. p. 304. ita habet: *omnes hæmoptyci lacte utantur. Neque enim medicamentum, aut cibus, aut aliud quippiam, adeo accommodum ipsis aut utile, quam lac: & qui per initia solo ipso constanter, longiori tempore usi sunt, omnes in*
totum

De mirabili lactis asinini in medendo usu.

5

totum consanuerunt. Porro addit: novi quendam, qui cum toto anno lac bibisset & comedisset, & à vino abstinisset, ab hæmoptysi & puris sputo liberatus fuit, ut nec postea in phthisin inciderit.

20. Tabes cum calore febrili lento plerumque originem ducit ex infarctis, vel obstructis vasculorum angustis, & inde exorta humorum stagnatione, sive eadem in pulmonibus, sive visceribus abdominis & partibus glandulosis, contigerit. Lactis autem asinini ea propria laus atque facultas est, ut egregie humectet, obstructa expediat, & teste *Prosp. ALPINO l. c. cap. 8.* plus refrigeret, ac refrigerando prohibeat caloris effluuium, humiditateque caloris ignei efficaciam hebetet. Unde luculenter patet: ejus convenienter institutum usum, non solum desideratissimam in omni febre lenta spondere opem, sed reliquis etiam omnibus remediis merito esse præferendum. Quadrant huc quæ *HIPPOCRATES Sect. V. aphor. 64.* perite suadet: *tabescentibus, inquit, cum febricula, lac sumere convenit.* Idem testatur *RIVERIUS*, idque notatu digna observatione *Cent. II. obs. 78.* confirmat, memorans: quod virgo Montpelienfis, XXV. annorum, quæ tussi molesta, dies noctesque urgente, perpetuis vigiliis, dolore pectoris, febre lenta, alvi constrictione & macie totius corporis afflicta diu lecto affixa fuerat, præmissa ptisana laxante, postea solo lacte asinino, per mensem usurpato, plenarie convaluerit.

21. Præter hæc memorabilis maxime est casus, qui mihi ante aliquot annos contigit: Generosa quædam foemina variis à multis annis detenta fuerat morborum afflictionibus, à dimidio vero anni, nata erat febrem lentam, cum ciborum fastidio, artuum languore, tussi sicca, insomnia, dolore circa os sacrum, urinæ ardore, copiosis nocturnis sudoribus, summa corporis macie viriumque lapsu stipatam, ita ut pedem è lecto proferre non posset. Incassum adhibita fuerant decocta visceralia, pulveres antihectici, stomachica, antihysterica, resolventia & sexcenta alia: omnia videbantur conclamata, nihilque præter duram moriendi necessitatem superesse. Tandem vero, ex consilio meo, adulto vere lac asininum, interpositis subinde, laxante mannato, pulveribus temperantibus nitrosis & assumtis jusculis nutrientibus, cum radicibus aperientibus paratis, in usum vocatum fuit, tam felici cum successu, ut exactis vix tribus diebus, in melius verterentur omnia, protractaque ad aliquot hebdomades adhuc cura, ægra sanitati & vigori penitus redderetur, eademque per *DEI* gratiam adhuc læta fruatur. Ipsum casum & curationis successum pluribus commemoratum vide in mea *medicina consult. part. IV. Dec. II. cas. 7.*

22. In empyemate quoque, quod non raro à pleuritide vera, eaque perperam tractata, præsertim in corporibus spongiosi habitus gignitur & ingenti quotidie puris copiarum per os ejectione manifestatur; mirabilem lactis asinini efficaciam deprehendimus. Quod ut eo testatius elucescat, in confirmationem adducere placet illustre exemplum à *FRANCISCO VALLERIO lib. V. obs. 5.* proditum, utpote narrat: mulierem quandam post pleuritidem ingentem sputi purulenti copiam per os rejecisse, & inde totam consumptam, attenuatam, exsanguem planeque tabidam fuisse factam. Ipsum quidem deterforiis potionibus, linctibus, & jusculis, & aliis omnibus auxiliis, illam juvare & à pectore contentam saniem evellere tentasse, sed parum profecisse; tandem vero, quia febris non fuerit gravis, nec in hypochondriis & visceribus obstructio ulla apparuerit, lac asinæ recens mulctum, adjecto pauxillo saccharo, fuisse, eoque per sesquimensum assumpto, in integram sanitatem bonumque corporis habitum deductam esse ægram, ac demum post duodecim annos in puerperio obiisse. Memini etiam viri cujusdam nobilis, triginta

Erid. Hoffmanni Oper. Tom. VI,

annorum, temperamenti sanguinei, succi pleni, qui ante plures annos, quum Mindæ medicinam factitarem, à pleuritide male curata inciderat in ingentem, tam purulentam, quam chylosam materiam per os ejectionem, per mensem & ultra durantem, ita, ut primis hebdomadibus, libram minimum unam quotidie expueret, & mirum inde viribus deficeret macieque consumeretur. Huic quum suavissem lac asininum, & is hoc ad duos fere menses, adhibitis simul pulveribus ex lapidibus cancrorum & bolo Armeniæ, nec non balsamo sulphuris amygdalino, cum spermate ceti & sanguine draconis remixto, quotidie potasset, eundem, fortunate divina gratia, feliciter cum omnium admiratione ad sanitatem reduxi.

23. Verum enim vero usus lactis asinini non tantum in morbis, qui pulmones aliaque viscera cum gravi tussi, febre, labe ac tabe attentant, eximiam & plane divinam exserit utilitatem, sed admiranda etiam & exoptatissima virtute in leniendis, demulcendis ac sopiendis atrocioribus partium maxime nervosarum doloribus, è quibus qui articulis incumbunt præcipui sunt, splendet. Oriuntur articulares hi morbi, inprimis chiragra, podagra & ischiadica affectio, à sero tenui acriori, ligamenti articulo-nerveo-tendinosi, ex glandulis à *Clopton HAVERO* inventis, imo tunicis glandulosis, transsudantibus illapso, quod arrodendo incredibiles dolores & spasticas contractiones suscitatur, quæ postea per consensum totum systema nervosarum partium afficiendo, febrem, vigiliam, anxietatem, virium languorem, inappetentiam, inquietudinem, si paroxysmus gravior est, inducunt. In ejusmodi rheumaticis & arthriticis passionibus, universa fere humorum massa, impuris, falsis, tartareis, acerbis particulis est referta, quæ, licet sæpe antecedentem causam sive plethoram, sive sanguinis excretionem quandam criticam suppressam, affectuum intemperantiam & diætam inordinatam habeant: perperam tamen novaturientes quidam remotas has causas, cum proxima, salina humorum impuritate, confundunt, & sic, quod neque genium hujus morbi, neque remediorum agendi modum intelligant, produnt. Quippe experientia calculo constat: omnia ea remedia, quæ succos edulcant, salinos acres contemperant, ipsa salium spicula involvunt & omnis generis excretiones in corpore blande promovent, mitigandæ paroxysmorum atrocitatis, ipsis doloribus leniendis ac sopiendis, imo malo, si non plane inveteraverit, vel hereditarium fuerit, penitus submovendo, egregie prodesse & tantum non sufficere.

24. Inter hæc autem, præter diluentia & decocta, ex temperatis radicibus concinnata, maxime eminet, omnibusque superius est lac, præsertim asininum, cujus usum non heri aut nudiù tertius neoterici quidam excogitarunt, sed primi medicinæ auctores, omnesque qui eorum vestigia legerunt, magnopere commendarunt & gravissimis rationibus adstruxerunt. Ipse *HIPPOCRATES, lib. de intern. affect.* auctor est: ut in ischiadide primo exhibeatur purgans, & postea lac asininum bibatur. Et in eodem libro prodidit: *arthritidi confert, alvum clystere, aut suppositorio solvere & purgans exhibere, tandemque serum coctum & lac asininum propinare.* *PLINIUS l. c. sect. 9.* plurimos lactis usu ab articulari morbo liberatos perhibet. Cui assurgit *CELSUS lib. IV. cap. 24.* scribens: *quidam etiam, cum asinino lacte poto, ex toto sese eluissent, in perpetuum hoc malum evaserunt.* Ex recentioribus *GABRIEL FONSECA, HOLLERIUS, BALLONIUS, BAGLIVUS, SYDENHAM, SACHS A LEWENHEIM, GREISELIUS, PECHLINUS, DOELÆUS, WALDSCHMIDT* alique plures, lac, & maxime asininum, arthriticorum & podagricorum solatium & sacram anchoram, compluribus exemplis & accuratis observationibus esse affirmant.

25. Nos etiam plena fide testari possumus, quod præmissis lenioribus laxantibus, ex manna, syrupo rosarum solutivo, adjectis absorbentibus, lactis caprilli, si non haberi potuit asininum, potum, remotis omnibus aliis cibis & potulentorum generibus, per aliquot dies continuatum, utilissimum deprehenderimus, ita, ut dolores inde & mitiores & breviores redditi fuerint, & alia consueta symptomata plane cessarint. Plures certe novimus podagricos senes, qui asinino lacte, primis tribus diebus cum manna sumto, & postea illo solo per binas septimanas continuato, mitissimos dolores inde experti sunt; quum intermisso hujus præsidii usu, tormenta essent acerbissima & contumacissima, ut per aliquot menses ægros lecto affigerent. Id vero non prætereundum: quod in omnibus hisce afflictionibus, longe facilius ac certius salutaris effectus lactis usum subsequatur, si ætas adhuc sit juvenilis, malum non adeo inveteratum, podagra non fixa ac tophosa, neque per hereditatem propagata.

26. Quemadmodum igitur asininum lac præstantissimum inter omnia ad abigendos exteriores corporis partes occupantes dolores remedium est: ita non minus in iis, qui internas nerveas partes, ut ventriculum & intestina, prout in colica convulsiva contingit, infestant, usui est longe exoptatissimo. Ratio saluberrimæ hujus facultatis in eo potissimum constituta: quod asininum lac, diluendo, acrimoniam humorum biliosorum infringat ac enervet, parte serosa ac pingui constrictas fibras emolliat & laxet, & dulcioribus sui partibus alvum fluxilem reddat; quo caustica illa, dolorum scenam adornante materia, promte per ani secessum exturbata, iidem conquiescant. Quoad experientiam autem, inprimis memoratu digna sunt, quæ de utilissimo lactis usu in colicis doloribus prodidit. BALLONIUS *Comment. in lib. epid. p. 98. in doloribus*, inquit, *colicis, iisque biliosis, lactis usum valde contulisse vidi. Et tamen si HIPPOCRATES lactis usum interdicit, dum sunt dejectiones biliosæ; tamen nisi insignis aliqua sit febris, quæ corrumpit lac, ab eo abstinendum non videtur. Si enim in ventrem clysmate injicitur, & nulla inde sequitur noxa, cur non in ventriculum injici poterit?*

27. Et quum spasticæ nervosarum partium constrictiones, fere omnia illa, quæ hypochondriacis & hysteriis solennia sunt symptomata, concitent; lac utique, præsertim asininum, eandem ob causam utilissimum à nobis observatum est, modo non adsit viscerum infarctus & obstructio, nec primæ viæ pituita acida & viscida sint obfusa. Hinc est, quod SYDENHAM *in opp. p. m. 425. in colica sic dicta hysterica lactis usum mirifice commendat. Mulieres*, ait, *aliquot, cum affectibus hystericis diu conflictatæ, maximeque ea specie, quam ego colicam hystericam appello, tandem solo lacte aliquandiu videntes convalescere.* In ipsa autem affectione hypochondriaca lactis asinini, saccharo conditi & modico sennæ pulverisatæ subinde dejectorii redditi, potum, ad quadraginta & plures dies extrahendum, BENED. SYLVATICUS *Cent. I. obs. 65.* miris dilaudat encomiis. Et quamvis HIPPOCRATES *aph. 64. sect. 5.* lac dare prohibeat, ubi hypochondria tensa sunt, hoc est, si flatibus ventriculus distensus & expansus est, vel abdominis viscera sanguinis infarcti turgent: attamen non semper his hypochondria detineri, sed ventriculum & ei annexa intestina sapissime ob acrimoniam humorum, & sanguinem in eorum vasis immobiliter hærentem, spasticis stricturis torqueri, & his salutariter lacte succurri, indubia experientia edocemur.

28. Eadem etiam ratio subest, quare in mania ac melancholia hypochondriaca; quæ identidem ex spasmis, qui sanguinem nimium ad caput urgent, ut

æqualiter & libere per vasa meningum volvi nequeat, originem trahunt, idem præstantissimus Auctor *cent. I. obs. 54. item 57. 58.* lactis asinini usum summopere collaudat & commendat. Siquidem si hoc ipsum per mensis, & longius adhuc spatium, quotidie matutino tempore ad uncias quatuor vel quinque assumitur, humores acres temperat, spasticis fibrarum stricturis leniendis inservit, alvum subducit & sic atrocis & contumacis morbi causam sensim submovendo, eundem expugnat & abigit. Quod ut eo certius eveniat, expedit dejectoriam & purgantem hujus lactis facultatem, manna adjecta, augere et intendere: id quod multoties felici cum successu à nobis factum esse testamur.

29. Quum igitur asininum lac nervis tam amicum sit, & mulcente ac lubricante sua virtute ipsorum affectionibus jam enumeratis eximie opituletur; neutiquam dubitandum est, quin in aliis etiam passionibus, ubi nervosæ partes pariter afflictæ sunt & violento motu exagitantur, ut in epilepsia & convulsivis motibus, non sine fructu ejus usus administrari possit. Testatur id disertis verbis laudatissimus auctor SYLVATICUS *l. c.* & nosmet ipsi idem confirmatius asserimus. Plurimis enim confirmatam habemus exemplis, saluberrimam hanc facultatem, è quorum numero notabilis inprimis est casus, quem ante aliquot annos in nobili quodam puero, quatuordecim annorum & vegeti admodum ingenii, vidimus. Is improvisò quodam terrore perculsus, subito convulsivis artuum, pedum nempe & manuum, tractionibus comprehendebatur, & cum præcedente anxietate præcordiorum animique deliquio, gravius torquebatur, ita, ut paroxysmus interdum alternis, interdum etiam singulis diebus, vespertino maxime tempore, vel etiam nocte, appeteret & per duos menses ægrum affligendo eundem viribus exueret. In consilium vocati plurimi medici, adhibita plurima medicamenta, malum vero omnia eluserat, donec tandem, sumto quotidie matutino tempore ad uncias tres asinino lacte, nonnunquam manna sociato, & balneo aquæ dulcis alternis diebus tepido usurpato, interposito simul usu pulveris antepileptici, intra mensem atrox morbus superaretur, & æger pristinae sanitati & corporis firmitudini, Deo favente, redderetur.

30. Accedunt gravissima illa pathemata, quæ scorbutico malo complicantur, uti sunt atrophia, lancinantes & spastici dolores artuum, nec non erosiones & exulcerationes partium externarum. Quæ omnia sicuti non nisi humorum summæ dyscrasiæ, & ob sufflaminatum ac imminutum saluberrimum illud excretionum naturalium, quæ fiunt per sudorem & alvum, negotium, ac ipsius biliosi humoris in hepate secretionis defectum, obortæ falso-sulphureæ impuritatis, nec non nimiae eorundem spissitudini, legitimum progressum retardanti & vasorum minima obstruenti, originem debent: ita certe, ad meatus oclusos referandos, obstructions expediendas, acrimoniam humorum temperandam, eorumque tenacitatem emendandam & dissolvendam, nihil aptius est diluentibus, humectantibus, refrigerantibus, sero videlicet lactis caprilli, vel, quod huic etiam palmam præripit, lacte asinino.

31. Luculentum hujus saluberrimæ in lacte reconditæ virtutis testem citamus optimum qui de scorbutico scripsit auctorem, EUGALENUM, qui p. 62. hunc in sensum differit: *vidi frequenter cum latiore colore à morbo surrexisse, qui lacte & lacticiis in scorbutico usi fuerunt, quam qui ex medicorum præscriptis vixerunt; & quosdam recenset, qui lactis usu in scorbuticis febribus, in quibus tamen ex præscripto HIPPOCRATIS in aphorismis interdictum est, convalescerunt.* Et ego pariter ex multiplici experientia, quam plurima allegare possem exem-

exempla arthritide vaga scorbutica, endemio Westphalorum morbo, laborantium, quos ipse, quum olim Mindæ medicinam facerem, lactis, vel asinini, vel alius usu, ab eadem penitus liberavi: nisi in re tam clara exemplorum farragine fidem præstruere supervacaneum foret.

32. Et quum scorbutici ac senes, quorum ætas ad dyscrasiam humorum falsam & impuram admodum proclivis est, nec non ii, qui venereo inquinamento infecti sunt, sæpius ulceribus mali moris & ad canceri naturam accedentibus infestentur; profecto in hisce gravibus vitiis, non certius & præsentius, quam in lacte asinino ejusque fero auxilium est. Quod, quemadmodum ob rationes superius allatas fieri certum est: ita de præstantissima hac lactis asinini facultate uberima exstant auctorum, veterum æque ac recentiorum, testimonia. Ipse DIOSCORIDES, *lib. II. cap. 75.* in universum in omnibus exulcerationibus, tam internis, quam externis, in summo cutis pruritu, papularum eruptione & vitiatis corporis succis, lac, addito melle crudo vel sale, miris encomiis ornat. GALENUS quoque *lib. X. de simpl. medicam. facult. cap. de lacte*, asininum lac commendat ad ulcera uteri, renum, vesicæ & pudendorum. Quibus accedit SYLVATICUS *cent. IV. conf. 66.* fidem faciens: quod non solum lacte asinino, trigesies vel quadragesies poto, cancrosum cervicis uteri tumorem feliciter subegerit, sed etiam quod idem lac, in ulcere Gallico, cum tabe & febre lenta conjuncto, exoptato cum successu usurpaverit. Quinimmo idem gravissimus auctor, *cent. IV. conf. 100.* ad elephantiasin, Herculeum illum morbum, persanandum, hoc præsidium magnopere laudat: *in elephantiasi*, inquit, *accommodatissimum remedium est lac asininum ejusque potus, quotidie mane ad libras duas, cum saccharo & cremore tartari, quo defætorium fiat.* PARÆUS quoque in *Chirurgia lib. VI. cap. 28.* saluberrimam & utilissimam efficaciam lacti asinino, experientia edoctus, tribuit, in iis, qui cancrofa ulcera gestant, ad acrimoniam humorum corrigendam, tam interne ad potum, quam externe, ad fomenta, usurpato.

33. Denique, in enarratione nobilissimarum virtutum, quibus lac asininum splendet, ceu præcipua non prætermittenda videtur illa, qua senibus non solum tanquam utilissima medicina auxilio est, sed etiam ut accommodatissimum ad vires reficiendas alimentum inservit. Quod si enim medicamentosam ejus ad senium sublevandum facultatem dispicimus; jam alibi latius deduximus, profecta ætate, ob excretoriorum vasorumque factam angustiam, sanguinem omnesque humores eminentem dyscrasiam & impuritatem contrahere, & ex hac demum varios propullulare morbos, quos inter maxime atrophia, languor virium, marasmus, seu lenta febris, nec non pruritus eminent. Hisce vero omnibus egregie lac, opportune datum, opitulatur: eoque nomine etiam nunquam non, à veteribus æque ac recentioribus, magni habitum fuit: quippe quod, humores spissescentes fluxiles reddit, salios & acres diluit, strictas & rigidas fibras laxat, & excretionum turbatarum successum revocando, succos à forditie non solum repurgat, sed etiam bonos ac laudabiles ingenerat. Suffecerit in præsentiarum in confirmationem citasse TRALLIANUM, qui *lib. XI. p. 729.* senibus marasmo laborantibus asinini lactis usum insigniter commendat, & quidem hanc ob rationem, quia vires habent imbecilles, nec alimentum possunt attrahere, neque in corpus distribuere, quare lac muliebre primum, secundum vero locum asininum obtineret.

34. Si nutritivam & analepticam lactis asinini vim, qua tam senio, quam morborum atrociam à viribus defectis, præsidio est, pensamus; eo minus hanc ulli

dubiam fore putamus, quo magis patet, huic præstantia nullum aliud lactis genus esse æquiparandum, & quo major est numerus eorum, qui illud hoc nomine unanimi suffragio concelebrant. Erit vero utile non minus quam gratum, gravissimorum auctorum hac de re percipere testimonia. Primum sit HELMONTII elogium, qui, licet alias injuriosum admodum sit in lactis usum; asinino tamen *lib. de digest. alim. p. 179.* virtutem, peculiariter reficientem & recreantem, nec non nutrientem, adscribit, existimans asinam, quatenus longæva, lac ceteris animantibus præstantius præbere, dum archeum, longæva vita donatum habeat. Euryphon, referente HERODOTO, ad reficiendam senum & extenuatorum corpora tantummodo in lacte asinino fiduciam habebat. Novi etiam quendam militiæ præfectum, venerea lue & diris dolorum tormentis per plures annos mirifice excruciatum & penitus ferme emaciaturum, ex lactis asinini usu, exoptatissimum solatium & allevamentum percepisse. Quin immo HEURNIUS, *in aphor. 64. sect. 5.* lac hoc senium & rugas tollere meminit. Qua, formæ lenociniis studentibus accepta lactis asinini efficacia, inducta procul dubio fuit Poppæa, digna Nerone uxor, ut centum semper asinas aleret & in comitatu duci imperaret, quo harum lacti quotidie in balneo immersa, cutis candorem, molliem, lævitatem ac nitorem servaret.

35. Expodata sic nobilissima asinini lactis facultate & præstantissima variis in morbis utilitate: superest adhuc, ut ipsum exhibendi modum attingam, & postea ea, quæ ad dextrum curationis successum necessaria sunt, præcipiam. Antequam vero quæ de usu tenenda tradamus, hæc de animali, è quo lac petitur, monenda habemus. Eligenda est lactaria asina sanissima, non nimis annosa, sed mediæ ætatis, nec nimis pinguis, nec nimis macra, & quæ mense Majo peperit. Hæc non domi nutrienda est, sed ruri, in viretis herbis medicatis obstitis. Potus sit aqua fluvialis, quæ subtilior ac levior est, emunctoria quoque expeditius transit & humores intime perluendo eos puriores reddit, quam quidem fontana. Elegans quoque HELMONTII *l. c.* hanc in rem est monitum, præcipientis: ut asina instar equorum quotidie pectinetur, quum ex lacte statim dignosci possit, an asina isto mane pexa fuerit nec ne? hanc procul dubio ob rationem, quod, si strigili ducantur animalia, transpiratio auctior reddatur, & pluribus excrementitiis falsis partibus sic exhalantibus, humores puriores fiant.

36. Porro, ipsius etiam pabuli, quo asina nutritur, ratio habenda: eo quod à diversa alimentis, quo animalia vescuntur indole, lac quod præbent, dissidentem quoque naturam & facultates sortitur, ut salubrius vel insalubrius, imo certis morbis magis accommodatum sit. Etenim, quemadmodum pervulgato & domestico exemplo constat, quod medicamenti, tam purgantis, quam alterantis, nutriti oblatis, virtus lacti insinuetur, & una cum hoc in infantem transfundatur: ita, quin idem in animalibus, quorum lacte fruitur homo, succedat, non est quod dubitemus. Probat hoc maxime GALENUS *lib. III. de aliment. facult. cap. 15.* exemplo caprarum scammonio aut tithymalo pastarum, quarum lac est catharticum. Idem sentiunt DIOSCORIDES *lib. II. cap. 62.* & HIPPOCRATES *lib. VI. epid. & Aphor. 64. sect. 5.* Et *Acta Hassniensia Vol. II.* fidem faciunt, quod absinthio copiosius sumto, lac redditum fuerit amarum. Hinc est, quod CæL. AURELIANUS *lib. IV. cap. 3.* in passione coeliaca commendat lac, ubi capræ lentisco, vitis foliis, vel quercus aut salicis, polygoni, plantaginis, aut horum similium fuerint nutritæ, rationem addens: *quia constrictiva harum herbarum qualitas, in qualitatem lactis influit.* Inprimis autem notabilis intercedit differentia inter lac, quod verno tempore, è

viridi pascuo, & inter illud, quod hieme, è sicco pabulo elaboratur. Testis est peritissimus rei rusticæ VARRO, *lib. II. cap. 2.* conceptis verbis scribens: *lac, quod ab hordeo fit, & stipula & omnino arido & firmo cibo pecude pasto, id alibile est, ad perpurgandum vero id, quod à viridi pascuo.* Et DIOSCORIDES *l. c. cap. 75.* verum lac dilutius æstivo judicat, & quod è viridi pascuo est, alvum magis emolliat.

37. Ex quo dilucide patescit, lactis in genere, & maxime asinini curam, non solum tempore vernali commodissime institui, sed etiam ipsius lactis salutritatem adversus certos morbos, per pabulum posse admodum intendi & singulis specialius accommodari. Quare etiam auctor sum, ut asinæ, cujus lac ad curam adhibetur, pro nutrimento objiciantur ejusmodi herbæ, quæ ad morbum, quem curandum suscepimus, virtute apprime specifica gaudent. Sic in phthisi, pulmonum & pectoris affectibus veronica, hedera terrestris, urtica mortua, tussilago, scabiosa, & si consolidatio molienda, fanicula, anserina, nummularia, consolida major, flores hyperici, alchimilla, polygonum & similia inter pabula offerri possunt, vel animal eo agi, ubi sponte pullulant. In doloribus & spasmodicis, tam internas, quam externas partes excruciantibus expedit, pascui loco nonnunquam objicere millefolium, flores chamomillæ, acaciæ, ulmariae, tiliæ, meliloti, horminum, malvam, altheam, & alia hujus census. In lentis & hæcticis febribus, præter ea, quæ in pectoribus affectibus ex usu esse diximus, plantago, prunella, & scabiosa cum scordio addi poterunt. Si hypochondria obstructa & inde exorta humorum impuritas scorbutica, ex aperientium classe seligendæ species, cujus generis sunt: fumaria, centaurium minus, absinthium, scabiosa, trifolium fibrinum, beccabunga, nasturtium, sedum minus, cum aliis. Et hoc modo etiam in aliis morbis, pro medentis intentione & judicio, congruis, tam herbis quam floribus, ipsum lac medicamentosum magis reddi, ejusque usus ad speciales effectus dirigi poterit.

38. Ipsam autem utendi rationem ac methodum quod attinet; his eandem comprehendere regulis è revisum fuit. I. Omni quidem tempore, necessitate urgente, lac asininum propinari potest, commodissime tamen & efficacissime, vernali & æstivo, quo omnis generis herbæ succo turgent, & ab asinis devorata, lacti nobiliorem facultatem inferunt. II. Lac ubere exprimendum in mulctrale aquæ ferventi impositum, illico lagenæ angustioris orificiū indendum, obturaculo muniendum & tepidum sic successive bibendum. Quemadmodum enim omnibus liquoribus subtile ætherium, roborantis & analepticæ virtutis elementum innatat: ita ejusmodi etiam lacti inesse, extra dubitationis aleam positum est, quod, ne cum calore sese subducatur, hoc pacto providendum. Unde procul dubio GALENUS *lib. V. meth. med. cap. 12.* inculcat: ut lac recentissime mulctum, animali adhuc ægro lectore ejus adstante, bibatur: quippe cujus natura tam facile ab aëre alterabilis sit, quam seminis. III. Tempus diei potationi maxime opportunum est matutinum, quo, vacuo ventriculo, celerius & efficacius operationem exsequitur, neque hanc ob causam, nisi elapsis quatuor vel quinque horis cibus in prandio assumendus. Sunt tamen horæ etiam pomeridianæ, si circumstantiæ repetitum usum suaferint, non alienæ potui: ita tamen, ut digestionem peracta, horis circiter quatuor, post prandium, dimidia tantum ejus, quæ mane pota fuit, mensuræ portio, bibatur. IV. Lactis hauriendi copiam generatim exacte definire in difficili est, ob diversam ætatis rationem, multiplicem corporum habitudinem & discrepantem morborum genium. Non facile tamen ultra tres libras medicas, quæ mensuram ci-

vilem circiter æquant, ascendendum. V. Temporis spatium usui impendendum, morbi indoli ejusque contumaciæ accommodandum, quæ si major est & obstinatio, ad duos aut tres menses, vel diutius adhuc, cura extrahenda erit: inprimis si spes optati successus affulserit, & vehementia symptomatum seorsim remittere inceperit.

39. Interim tamen prudentis, & solidiori, tam doctrina, quam experientia, instructi medici erit, lactis hujus usum ita disponere, dirigere ac restringere, quo feliciter cedat, neque spes concepta fallatur, & incommoda oboriantur. Erit itaque perutile quasdam eum in finem curiose tenendas ac observandas cautiones subjungere. I. Antequam lactis potatio instituat, ventriculi ratio habenda & studiose dispiciendum: utrum is lac ferat, ac ejusmodi robore polleat, ut illud concoquere, digerere iterumque expellere possit. Quod si enim atonia laborat, flatibus & pituita viscida turgēt, vel acidorum humorum sentina scatet, nunquam lac propinandum, eo quod, his prius non emendatis aut sublatis, illud stagnando acorem suscipit, corrumpitur & flatuum cum anxietate incremento favet. Quare expedit ante lactis curam, ventriculum & primam regionem, vel inferne blando laxante mannato, vel, si conditio ferat, superius, adjecto tartari emetici uno vel altero grano, à collecta intus saburra deplere ac repurgare. II. Curiose providendum est, ne lac in coagulum abeat; eaque propter ubi alimenta, sicuti in senibus & plurimis hypochondriacis solemne est, in ventriculo facile coacescunt, tam ante, quam inter ejus usum absorbentia, terrea, alcalina, cum ipso lacte, subjuncta essentia stomachica carminativa, vel sale volatili oleoso, exhibere consultum est. III. Quando per sex vel octo dies æger potationi indulget, remedium quod alvum ducat mannatum interponendum, quo collectæ interea in ventriculo & intestinis fordes, è corpore proscribantur, ne ulteriori lactis usui obsint. IV. Præstat lac sub initio parcius, ad tres vel quatuor uncias, haurire, ac in copiam magis liberalem ascendere, ne ventriculus nimium simul ac semel obruatur, neque nauseam contrahat & labefactetur. V. Conveniens victus ratio habenda est sub lactis potu, & tenui potissimum diætæ studendum, vitando non solum cibos concoctu difficiles, sed etiam nimis nutrientes carnes, cavendo ab obsoniis flatulentis, horæis fructibus omnibusque acidis, abstinendo ab omni cerevisiarum potu, nec non vino, excepto modico tantum Hungarici aut Hispanici usu: neque etiam conducibile est, pane farreo confermentato vesci, sed similagineus potius eligendus.

40. Ultimo loco, placet nonnulla subicere, quo perspiciatur, quibus lactis usus minus conveniat. Si dolor capitis ex ventriculi cruditatibus affligit, si febris valde acuta est, viscera abdominis sanguine crasso turgent; lac utique juxta priscum HIPPOCRATIS monitum propinare periculosum est. Neque enim lactis potatio nimis frigidum & acido obsessum admittit ventriculum, neque nimis æstuantem, qualis est in febre, & ubi biliosus nimis redundat humor: inde enim facile in nidorofam putredinem fatiscit & corrumpitur. Nunquam etiam cum bonis agri rebus lac exhibetur iis, qui ex intermissa venæ sectione, vel suppresso aut plane desinente hæmorrhoidum vel menstruo fluxu, nimia & præternaturali sanguinis abundantia, & inde oborta humorum sorditie laborant; & apprime huc quadrat illud divi Cui: *corpora impura quo magis nutriveris, eo magis læseris.* Nisi enim conveniente sanguinis missione superfluum subtrahatur, & universam humorum massam repurgantibus medicamentis caco-chymia tollatur, ab omnibus lacticiiniis est abstinendum.

41. Tantum est, quod in presenti, de mirabili lactis asinini in medendo usu, commentari placuit, & pro instituti ratione licuit. Id certe ex omnibus his intelligentium judicio luculenter patere arbitramur :

amplissimam esse domestici hujus remedii utilitatem, summam virtutem & tam præstabilem facultatem, ut ejus usum omnes medentes merito sibi habeant commendatissimum.

D E

SALUBERRIMA SERI LACTIS VIRTUTE.

§. I.

Tanta est divinæ benignitatis & clementiæ in mortalium genus ubertas, ut in morborum tam ingenti multitudine ac mira varietate, non modo ex regno vegetantium, animalium & mineralium, innumera, varia & efficacissima ad morbosas afflictiones tum avertendas, tum perfanandas, remediorum genera, largissime concesserit, sed etiam ipsa quotidiani usus alimenta saluberrimis ad præscindenda & expugnanda gravia mala instruxerit virtutibus. Præclaro inprimis hujus rei exemplo est lac, quod sicuti omni ætati, omni corporis naturæ & temperamento, ad nutriendum & sustentandum corpus convenientissimum: ita certe inter magna quoque sanitatis præsidia principem jure meritoque sibi vindicat locum, adeo, ut non facile par subsidium, tam quoad virium præstantiam, quam securitatem, in universa rerum natura sit reperiendum. Ast vero, quemadmodum porro nullum magnum & præstantissimæ virtutis remedium, minus recte præparatum, vel non rite & prudenter usurpatum, noxa caret; ita idem etiam in omnis generis lacte ejusque usu, certissime obtinet: eo quod omnium, & alimentorum & medicamentorum natura & conditio, ita plerumque comparata est, ut præter salutare quod alunt principium, aliud etiam minus salubre & noxium commixtum habeant ingrediens, eodemque, nisi administrantis prudentia quod damnum minatur præscindatur, detrimentum injungant. Quare periti utique medici est, sapienti consilio, ea quæ noxia sunt à salutaribus discernere, dispendiosa arcere, fructuosa admittere & rejectis alienis, ea in usum vocare, quæ sanitatis tutelæ favent; cui scopo obtinendo, paulo exquisitior rerum naturalium, & potissimum chymicæ notitia, plurimum certe velificatur.

2. Et utilis hæc non minus quam curiosa contemplatio, nos etiam permovet, ut, quum omnia in medicina ad veram mortalium utilitatem referenda velimus, lac potissimum meditationi subjiceremus & medicinalem ejus virtutem asserturi, clarissime demonstraremus: fluidiorem in lacte substantiam, quæ feri nomine effertur, præsentissimum & fere sine pari remedium præbere; crassiorem vero & graviorem terrestrem ejus partem, præsertim à feri connubio penitus sejunctam, nunquam non, tam nutriendi, quam medendi sine esse perniciosissimam.

3. Quamvis lacte ad alenda animantium ipsorumque hominum corpora nihil detur accommodatius, nihil salubrius, ut recte princeps alimentorum dici mereatur; nihilo minus tamen, vix ullum ex alimentorum omnium numero deprehenditur, quod tam infecurum, tam exitiosum tantisque gravibus malis ansam præbeat, quam ipsum lac. Quum enim omne omnino lactis genus, ex duplici potissimum substantia, fluida una, altera solida, compositum sit, & nennisi his uni-

tis & intimius junctis, salutarem exsequatur effectum & corpori blandum concedat nutrimentum: ita certe densata in coagulum caseosa substantia, alienam plane indolem & integritati corporis inimicam, induit. Nihilo tamen secius, vix reperies ullum alimenti genus, quod tam facile mixti dissolutionem admittat, & in quo tam cito partes mixtum constituentes à se invicem discedant & separentur, quam lac animantium; ita prorsus, ut non solum affusis quibusdam liquoribus, ejus crasis facile destruat, sed ipsum etiam sponte fatiscat & cogatur.

4. Scilicet, domesticis admodum experimentis factis notum est, omne lac quieti expositum, æstivo tempore, & hieme in conclavi calefacto, longe fere magis, si tonitru, si fulgur cælum percusserit, quam promte & facile ultro coire; serosa butyracea & caseosa substantia discedente & seorsim in vasa obhærescente. Compertum porro est, ab omni liquore acido, vel qui acidum in recessu habet, asperso e. g. ab aceto, succo citri, vino Rhenano, cerevisia, lac coagulari, quod longe promptius incidit, si hoc prius tepesactum fuerit. Id tamen mirabile videtur, quod forte & valde concentratum acidum, cujus generis est oleum vitrioli, minime lac denset, ut potius fluidius id reddat, hanc forsan ob rationem, quod ætheria illa, oleo vitrioli immixta substantia, nisu suo, partes ad coagulum suscipiendum aptas, ita disraret ac circumagat, quo minus coire ac concrecere possint. De vini autem spiritu hoc commemorabile: quod dilutior is lacti affusus, vix ullam alterationem eidem inducat, rectificatissimus vero, præsertim liberalius aspersus, mox ut in crassam offam transeat, efficiat; quod quidem hanc ob causam fieri arbitror, quod purissimus hic vini spiritus humidum ex lacte sorbens, secessionem crassioris substantiæ ex poris liquidi causetur, non secus ac is ipse saturatum salis ammoniaci spiritum in coagulum vertit.

5. Hæc extra corpus humanum lactis coagulationem promovent: nunc dispiciendum est, quam in corpore nostro, ad vinculum feri & casei in lacte destruendum, plurimum faciant. Rarius quidem sine acido est ventriculus, quia plurima ex ingestis, tam solidis, quam fluidis, aciditatem recondunt, quæ maxime peracta ciborum solutione remanet, sui juris fit, & firmius ventriculi tunicis inhærescit: attamen, ut natura & viribus hoc acidum differt: ita etiam coagulum, quod lacti inducitur, discrepat; aliud nimirum est, lactis mixturam tantum turbare, partes crassiores tantisper coire & adhuc in fluidi sinu natantes hære; aliud est, illas ipsas in durum, firmum & grave, quod fundum petit coagulum transire, quod tenacius ventriculi & intestinorum tunicis agglutinatum, ægre dissolvitur; sed postea peioris indolis excrementitiis fœdibus sociatum, pessimam morborum graviorum mineram constituit. Id vero non facile contingit, licet acidum ventriculi paulo fortius sit, nisi ipse etiam flo-

ma-

machus sit infirmus & imbecillis, ut ingesta diutius in ejus cavo moram nectant, & nisi quoque calore præternaturali, qui multum lactis mixtioni adversatur, sit affectus.

6. Ex hisce jam definitis & expensis, quibus corporibus, & in quibus morbis lac, ob coagulum quod in ventriculo subit, noxium ac perniciosum sit, clarissime intelligi potest. Primo enim observamus, lactentium infantum pessimas affectiones potissimum à lacte coagulato subnasci, si videlicet copia crassioris lactis, præbendo assiduo mammas, infirmus infantis stomachus plus justo infarcitur, ut contentam molem non debite subigere possit, sed illud in coagulum fatiscat, mora valde acidum & corrosivum reddatur, & accedente in duodeno bilioso succo, confermentatum viridescat, & acrimonia acuta, tenerrimas & exquisitè sentientes intestinorum nerveas tunicas arrodendo, sæva cum inquietudine & anxietate tormina, quæ subinde epilepticæ convulsiones lethales subsequuntur, excitet.

7. Porro, senibus lac, præsertim id, quod multum caseosæ substantiæ alit, adversissimum est, partim quod omnia ingesta facile in senum ventriculo coalescant, partim etiam, quod ob solutiorem nimisque remissum motum peristalticum, tam lac ipsum, quam etiam factum coagulum, in stomacho diutius hæreant, ut inde anxii in præcordiis dolores, tormina cum tenesmo, ventris inflatio, suscitentur, fæces cum dolore & alvi arrosione & pruritu secedant, corpus lassetur, ipsaque ciborum appetentia concidat. Vix vero ullus alius affectus est, in quo tam detrimentosus sit lactis usus, quam is, qui vulgo vocari solet hypochondriacus, & in quo, ob plane turbatum concoctionis & excretionis alvinæ à spasmodicis & copioso flatuum proventu negotium, plures cruditates acidæ ventriculo ingenerantur, quæ quum lac eo delatum promte coagulent atque præcipitent, molestissima afferunt symptomata. Neque etiam ullo modo expedit, lac ad alendum corpus, dare iis, qui à gravi morbo convaluerunt, quia ut plurimum adhuc imbecillis ventriculus non subigere hoc validioris materiæ nutrimentum potest, sed diutius retinet, ut stagnatione pessimam induat naturam, variisque malis inducendis fa-veat.

8. Quibus in morbis sapientissimus noster senex lacticiniorum usum prohibeat, *aphorismus* 64. *Sect. V.* disertis verbis docet, ita habens: *lac dare caput dolentibus malum, malum etiam febricitantibus & quibus præcordia elevata permurmurant; ex siti-culosis malum, quibus biliosa alvi egestionis in febribus acutis sunt, & quibus sanguinis multa egestio facta est.* Quod caput dolentibus noceat, hæc soleo suppeditare rationem. Ingens est ventriculi & capitis ob membranas nerveas consensio, adeo, ut si capiti exquisitus dolor insideat, ventriculus etiam simul afficiatur, & non debite concoctioni, solutioni & ingestorum expulsionem vacet: quin sæpissime etiam capitis dolor ex stomachi vitio ortum trahit, si hic scilicet concoctionis officio minus recte fungitur, & cruditatibus acido-viscidis obsessus est. In utroque casu lactis potus perniciem intentat, ob diuturniorem in ventriculo moram & nocentissimum inductum inde coagulum.

9. Præterea, idem gravissimus noster Auctor valde febricitantibus lactis usum interdicit: neque etiam hujus rei rationem promere erit difficile. Primo enim, intensus æstus mixturæ lactis homogeneæ valde est adversus, & quotidiano admodum experimento constat, ab externo calore lac prompte in casei speciem densari. Deinde, alvus in omni febre adstrictior est, vel plane compressa, unde crassior illa, recrementitia & humorum vitalium connubio minus apta lactis ma-

teria remanet, ac febrili causæ accedens eandem auget, ut spasticæ stricturæ quoque incrementum. Ulterius, lac malum esse judicat noster auctor iis, qui alvi dejectione biliosa, sive cholera, torquentur; siquidem hujus mali causa subinde in succo valde acido corrosivo, cum sulphureis bilis partibus remixto & lactis texturæ dissolvendæ accommodo, posita est. Improbatur quoque lac dare iis, qui nimias sanguinis egestionis experti sunt, per quas utique, subtracto nimium calore & spiritu, robur & tonus ventriculi ac intestinorum, cujus beneficio ciborum solutio, chyli elaboratio & fæcum expulsio administratur, frangitur ac labefactatur, ut hinc lac ingestum mora acefcat, crassescat & hostiles fiant prima in regione recrementorum stagnationes.

10. Quod si vero præter rationes allatas, in confirmationem accersimus probatissimorum medicorum auctoritates & testimonia; multi certe sunt veteres æque ac recentiores, in exponenda gravi noxa è lactis in ventriculo coagulo oriunda. Audiamus quosdam tantum. AVICENNA *L. IV. Fen. VI. Tr. III. §. 96.* de lacte differens, si, ait, *lac acidum fit in ventriculo, ab eo vertigo, syncope & punctura in ore stomachi oritur, & quandoque accidit inde cholericæ passio mortifera.* Et DIOSCORIDES *lib. II. cap. 64.* biliosis & hepaticis lac omne ob coagulum respuendum esse, perite monet, cujus causam MATTHIOLUS, *comment. in h. l.* hanc adjicit: *lac quod coagulo concrevit angustiam parit, ventriculum opprimit, caput vaporibus replet & ægre concoquitur.* Porro BALLONIUS in *L. II. Epidem. p. 211.* hæc prodidit: *Quidam laborabat fluore dysenterico, post multa remedia, consilio medicorum ad usum lactis bubuli recens multum adactus est; hoc in ventriculo coagulatum, incredibile, quanta inde symptomata, quantæ defectiones animi & similia.* Refert quoque HENR. ab HEER *Observ. 15.* quendam à lacte coagulato sudore frigido perfusum, ægre respirasse, ut suffocationem timeret, nausea pressum esse & quaquaversum in lecto sese volutasse, recurrentibus crebro lipothymiis. Alium quendam inde in choleram morbum incidisse, idem auctor testatur. Accedit AMATUS LUSITANUS *Cent. VI. curat. 56.* memorans: *lac coagulatum pondus grave cum dolore circa præcordia effecisse, & ægrum, cum vomere volebat, mox strangulasse.* Idem etiam auctoritate AETII in dysenterico pessima symptomata à dato lacte, orta fuisse confirmat. Plura autem eandem in rem exempla annotata sunt in DODONÆI *annot. c. 17.* & apud FORESTUM *lib. XVIII. obs. 13.* quæ tamen prætermittimus, contenti, quod sciamus, optimos quosque medicorum, pessimis à coagulato lacte suscitatis symptomatibus, inductos, lactis coagulum veneni naturam obtinere asseruisse.

11. Quum igitur tam gravia pericula à lacte in ventriculi cavo densato immineant; quid, si coiverit, è re sit, ad arcenda quæ inde pullulant mala, paucis tradendum. SENNERTUS *lib. VI. Prax. Part. VIII. Cap. 34. & in Paralip. p. 17.* emetica huic scopo apta judicat: & DIOSCORIDES *l. c.* lixivium commendat. Nos autem hanc interponimus sententiam, asserentes: alcalia, sive lixiviosa, sive terrea sint, ante lactis usum data, ejus coagulum, acidum hostile absorbendo, quam optime impedire, & hoc cicurato, solita symptomata, à coagulatione oriunda, opportune præscindere. Si vero densatum jam & coactum sit lac, & quis jam exinde pejus habeat, aquea diluentia paulo largius sumta, ut infusum theæ, veronicæ, ad coagulatum diluendum, viscidum lentorem dissolvendum & eluendum, usus sunt quam maxime egregii. Si etiam nausea urget & ad vomitum dispositio adest, hic utilissime promovetur per sufficientem aquæ tepidæ potum, præsertim si adjecto uno vel altero grano tartari emetici soluti, stimulo imbuatur & is facilitetur.

Expe-

Expedit quoque, si vires ferunt, & superne & inferne, evacuationem moliri; cui scopo obtinendo manna ad uncias duas vel tres, in aqueo vehiculo, una cum duobus tartari emetici granis exhibita, plenissime satisfacit. Et hæc tam in adultis, quam infantibus ex usu esse poterunt, modo medens eadem pro diversa ætatis viriumque ratione prudenter dispensare & accommodare noverit.

12. Verum enim vero, non solum à solidato lacte intra ventriculi pomœria tantum periculum metuendum, sed etiam ipse frequentior lactis, quod parum feri & multum caseosæ in coagulum pronæ substantiæ alit, quale est lac caprillum, vaccinum & ovillum, potus, non omnibus æque convenit, sed multis exitio est. Etenim, minus tuto tum ad alendum, tum ad curandum, lac datur, si corpora spongiosi & porosi habitus sunt, exilioribus & copiosioribus vasis prædita, neque minus ubi copia humorum spissescantium, ex meris sanguinis tubulis conflata viscera, ut hepar, lien, renes, pulmones, detinet, & infarctui & stagnatione sanguinis canales repleti sunt; quia periculum est, ne à crassioribus lactis partibus, quæ facile feri vinculum deserunt, iidem magis infarciantur & oppilentur.

13. Meretur in hujus confirmationem egregius adduci locus ex GALENO, quem etiam MARSILIUS FICINUS de salubri victus ratione p. 125. allegat, ita habens: *frequens lactis usus cui modicum serosæ humiditatis, casei vero plurimum inest, non omnibus tutus est, præsertim renibus ad calculum generandum paratis; affert quoque obstructions hepatis illis, quos aptos invenit, tales sunt, qui vasorum hepaticorum fines angustos habent.* Et hæc etiam causa subest, quare AETIUS sollicitè inculcat, quod, qui lacte uti velit, meatus viscerum apertos & venas latas habere debeat. Præterea, noxium in hepate affecto lactis usum HIPPOCRATES speciali historia, quæ Lib. III. Epidem. consignata est, confirmat: *Appollonius, inquit, erat magnis visceribus & circa hepar dolor continuus, & tunc icteritius fiebat, flatuosus, colore subalbido; invaluit primum modicum, decubuit; lacticinii vero usus coctis & crudis multis, caprillis & ovillis, & victu pravo, omnium læsiones maximæ erant. Febre exacerbata, alvus nihil reddidit, urina tenuis & pauca.* HIPPOCRATI suffragatur DIOSCORIDES, qui l. c. lienosis & hepaticis, comitialibus, vertiginosis & nervorum vitio laborantibus, & capite dolentibus lac omne respuendum esse pronunciat.

14. Neque in difficili est, hujus rei rationem eruerè ac sistere. Quum enim graves & longæ, quæ in capite vel abdomine nidulantur afflictiones, plerumque incunabula trahant ex libero sanguinis & humorum per has partes sufflaminato & intercepto progressu, quem postea stagnationes, obstructions, infarctus, pressio sequuntur pede, & ex his demum in imo ventre cachexia, icterus flavus & niger, hydrops, renum calculus, in capite insania melancholica & furiosa, epilepsia, gravativus dolor, in pulmonibus, polyposæ concretiones, difficilis respiratio, hæmoptysis, phthisis, liberaliter pullulant; in proclivi omnino est judicare: lactis usum, multo magis longius extractum, ob crassiorem & coagulum promte suscipientem substantiam, obstructionis minimorum canalium augmento potius favere & insensissimum esse, inprimis in habitioribus, & qui ex nimia quiete & otio vel unctius vivendi genere, valetudinarium sibi corpus contraxerunt.

15. Verum, quo magis noxia & plurimis ingenerandis malis aptissima spissescens & ad coagulum pronæ lactis materia est; eo magis vicissim naturæ humanæ, sive solidorum & fluidorum temperiei & motibus vitalibus amica, salutaris atque ad morbos tam

præscindendos, quam superandos idonea est, humida illa lactis portio, quæ feri nomine venit. Hujus saluberrimam virtutem in medendo dudum jam vetustissimi iique peritissimi medici perspexerunt & posteris mirifice commendarunt. DIOSCORIDES, antiquissimus ille & optimus materiæ medicinalis scriptor lib. II. cap. 64. hunc in sensum de præstabili feri facultate differit: *Serum, ubi discessit à lacte, multo potentius ad purgationes redditur; datur, quibus sine acrimonia volumus dejectiones moliri, ut melancholicis, lepris, elephantiacis, & erumpentibus toto corpore papulis.* Huic accedit GALENUS, ex antiquioribus post HIPPOCRATEM facile princeps, ita perhibens: *lactis serum, ob suas abstergendi vires, ad alvi dejectiones, tum potum, tum per clysterem injectum, assumitur; absque erosione enim abluit & abstergit ab intestinis acrimoniam.* Et alio loco egregias feri virtutes graphice satis, hisce delineat verbis: *serum, inquit, simplicissimum, mollioribus corporibus præcipue convenit, quorum ventres tantum & intestina abluere purgareque cogitamus; item his, quorum intestinum à quacunque medicina facillime ulceratur, & quorum ventres biliosa intemperies vexat, & quos arguunt inania egerendi desideria, quæ tenesmi vocantur, & quorum renes, vesica & uterus ulceris periculum subeunt, & gracilibus, qui non aluntur, purgatione vero nihilo minus indigent, his omnibus serum exhibendum, nec sale, nec quove medicamento adjecto.* Pueris, mulieribus, senibus, tutissime hæc medicina datur, vel sub ipso febris fervore, quo præcipue tempore reliqua omnia medicamenta suspecta sunt. Efficaciori sero utetur aliquis, ad corpora & morbos, qui validioribus præsidii indigent, præsertim ad diuturna exanthemata, liventesque varos & ad omnes humorum depravationes, ad cutim tendentes, ut lepram & consimilia; ad antiqua & ferina ulcera, ad capitis achores & hujusmodi, item ad oculos assiduo fluentes, ad palpebrarum scabiem, ad faciei maculas, imo & ad diuturnas febrium periodos, & ad hos, qui ab adversa valetudine in hydropem pergunt.

16. Easdem porro feri lactis eximias dotes, passim in monumentis suis annotarunt & deprædicarunt alii. Et CELSUS lib. I. cap. 12. sero & lacti asinino dejectoriam facultatem adscribit: *Dejectionem, ait, antiqui variis medicamentis moliebantur, in omnibus vero morbis dabant lac, vel asininum, aut caprinum, eique salis paululum adjiciebant, idque decoquebant, sublatis his, quæ coiverant, quod quasi feri supererat bibere cogeant.* Inprimis autem dignum est luculentum MESUES testimonium, quod totum transcribatur: *Aqua lactis caprini per se innocuum medicamentum; præfertur quæ fit ex lacte nigrarum caprarum, in laudatis pascuis victitantium recenterque fætarum; attenuat, abluit, abstergit, & nitrosa, qua referta est facultate, alvum absque aliqua mordacitate leniter subducit; bilem tum atram ab exustis humoribus genitam deijcit, quo fit, ut mirifice conferat maniacis & melancholicis. Idem præstat ad viscerum infarctus, & morbis inde provenientibus opitulatur, nimirum aqua intercute laborantibus, felle suffusis & lienosis; datur utiliter febrientibus ex bile, viscerum ac vasorum obstructione; convenit etiamnum vitiis in cute, à bile & perustis humoribus emergentibus, quare lichenibus, vitiliginibus, alphis, psoris leprisque admodum convenit.* Neque prætereunda AETII, de feri utilitate sententia, quam ita declaravit: *Ad pulmonis, intestinorum, renum, vesicæ uterique ulcera & exanthemata cæterasque cutis asperitates, & cantharides, epotum lactis serum mirifice proficuum est.*

17. Missis autem aliis idem conceptis verbis confirmantibus; jam ex allegatis luculenter admodum constare arbitror: summo in pretio priscis medicorum fuisse lactis serum & frequentissimum plurimis

mis in morbis usum. Nimirum, ut compendio exhibeamus, ad unum fere omnes sero lactis, virtutem alvum dejicientem, præsertim ubi humores falsi, acres, biliosi, blande & sine acrimonia expurgandi sunt, assignarunt. Dein, ejus usum in morbis, qui ab acrimonia succorum, cutis teneras tunicas & fibras nerveas & subcutaneas glandulas erodente oriuntur, cujus generis sunt interne ulcera pulmonum, vesicæ, renum, externe vero lichenæ, impetigines, lepra, elephantiasis & variæ cutis defœdationes & exulcerationes, quam maxime collaudarunt; non aliam ob rationem, quam quod virtute polleat eximia subtilissimam illam acrimoniam feri, nec non eam, quæ in venenosis cantharidibus delitescit, tam diluendo, quam acies involvendo ac obtundendo, contemperandi, demulcendi & invertendi. Denique etiam, saluberrimam sero veteres tribuunt facultatem ad referandos & aperiendos obstructos viscerum & reliquarum partium meatus, à quibus graves morbi, prout superius dictum, tam in capite, quam in abdominis regione, originem fortiuntur.

18. Et hæc fuit veterum de sero lactis ejusque utilitate sententia; quæ, an veritati & experientiæ respondeat, jam dispiciendum. Quod ut recte & rationali modo exsequamur, imprimis necessarium est, genuina feri cujusvis elementa ac principia, à quibus, ceu à fonte, virtus manat, eruere atque exponere. Quum vero ex lactis mixto secedat & obtineatur serum, utile erit, prius perspicere, qua proportionem fluidior & serosa hæc pars, crassiori & minus solubili, in variis usu receptis lactis speciebus, nupta sit & sociata. Experimenta hunc in finem à nobis instituta, huc potissimum redeunt. Sumimus primo libram medici ponderis lactis vaccini, illudque in vase stanneo subjectis carbonibus vivis, evaporationi commisimus, eademque ad ficitatem usque continuata, obtinuimus pulverem flavescentem, grumofum, qui ad lancem exactus, unciae unius & quinque drachmarum pondus exhibuit. Simili modo, lac caprillum recenter mulctum igne siccavimus, & idem ferme pondus materiæ pulverulentæ, deficiente tantum drachma dimidia, remansisse deprehendimus. Lac autem asininum & muliebre insigne prodidit discrimen, & longe minorem solidæ substantiæ apparatus: quippe ex asinini libra una medica, post omnimodam humidi exhalationem, collegimus vix unciam pulveris albi subdulcis; & ex eadem muliebris quantitate, unciam unam materiæ siccae albescentis.

19. Siccum hunc ex quovis lacte pulverem ulteriori deinde subjecimus examini, & resiliibili post exhalationem à bubulo lacte pulveri, qui ad unciae & quinque drachmarum pondus accedebat, aquæ pluvialis duodecim uncias affudimus, carbonibus, ut bulliret & solidum illud magma iterum dissolveretur, imposuimus, hoc facto, liquamen colatu per linteum trajecimus, relictum in colatorio spissamentum rursus exsiccavimus, & adhuc ad unciae unius, trium & dimidiæ drachmarum pondus accedere animadvertimus, luculento indicio, unam tantum & dimidiam drachmam subtilioris materiæ in aquæ contubernium & cum hac per linteum transiisse. Tum percolatam sic aquam, quæ saporis pinguis & subdulcis erat, & colorem ex flavo albescentem referebat, iterum ad ficitatem l. a. reduximus, & jugi facta ejus agitatione, ne empyreuma contraheret, drachmam magmatis ex albo flavescentis terreo-dulcis impetravimus. Eadem experimenta cum lacte caprino adornavimus & nullam fere differentiam, tam ratione ponderis, quam ratione saporis & coloris, in residua materia notavimus, saltim quod in sero lactis caprini sapor paulo dulcior emicaret, & plus pinguedinis instar guttularum supernataret, ac si pauxillum butyri admistum

fuiſſet. Sed longe major differentia apparuit in pulvere ab evaporatione lactis asinini relicto, quippe qui, unciam unam pondere æquans, libræ medicæ aquæ puræ pariter inspersus & ad ebullitionem & solutionem igne leniori deductus, totus ferme liquatus fuit, ita, ut in colatorio tantum una & dimidia drachma remaneret & septem circiter ab aqua absumerentur linteumque permearent. Liquamen autem quod dulce admodum erat, post omnimodam humidi exhalationem, pulveris siccissimi & albiſſimi instar sacchari plus quam sex drachmas reliquit. Denique, lac humanum & elicitus per evaporationem ex eodem pulveris, unciae unius & drachmæ unius gravitatem exhibens, eodem modo dissolutus & percolatus, reliquit tres drachmas crassamenti spissi in colatorio, liquor autem transiens, iterum reficcatus, pulverem dulcem, coloris ferme subfusci, drachmarum sex circiter pondere concessit.

20. Jam, si specialius paulo ipsius feri indolem perſequamur, delibatiſſimam hoc esse lactis à rudiori, crassa & caseosa substantia liberatam partem, constat, in qua copiosi aquei humoris hospitio, sal tenerrimum dulce, cum substantia mucilaginosâ pingui subtiliori excipitur. Et à tribus his longe saluberrimis elementis omnis quoque omnino feri medicinalis præstantissima virtus repetenda est. Scilicet, palmarium & quantitate reliqua superans feri elementum est, fluida illa & humida portio. Hac igitur viscidos & spissos succos eliquat & diluit, infarctos à lento humore canales eluit & obstructionum in visceribus repagula solvit ac referat. Alterum ejus ingrediens est salinum dulce tenerrimum, quod velut essentialiale sal, ex herbis, quibus vescuntur animantia, extractum & à naturali quasi chymia per varias mixtiones elaboratum, singularem plane excretoria stimulandi & maxime alvum subducendi & urinam movendi, facultatem habet, simulque acrimoniam humorum biliosam causticam obtundit ac contemperat. Hinc est, quod, quo majori dulcis hujus materiæ copia lac turget, eo efficacius sit ad perpurgandum corpus: id quod manifestum patet in asinino, quandoquidem ad dimidias incoctum, dissecto nimio humido & coeuntibus dulcibus particulis, longe validius & promptius purgantem effectum exsequitur; quod HIPPOCRATI in crebriori usu fuisse legimus. Accedit tertium feri ingrediens, mucilaginosâ scilicet & subtilior pinguis pars. Hujus ea præcipua laus ac virtus est, ut fibras aridas & crispas humectet, molliat & relaxet, & falsam acredinem humorum succosque mordaces involvat, deliniat eorundemque noxam arceat.

21. Hæc sunt feri elementa & hæ inde dependentes virtutes, quas si quis curatius perpendit, ultro à priori statim certa & rationali inductione perspiciet: easdem in plurimis morbis spondere & commodare utilitatem longe saluberrimam. Prius vero quam specialiori meditatione hæc ad varia morborum genera applicemus, præmittimus nonnulla scitu necessaria, de feri lactis præparatione, medico usui quam maxime accommodata, nec non de modo illud exhibendi. Nimirum, communissima serum à caseosa, crassiori substantia separandi ratio est, ut accedens calor sub quiete vinculum solvat & secessionem faciat, vel ut eadem aspersis acidis, prout superius jam meminimus, acceleretur & producat. At vero, quum, si mora aceſcat lac, vel etiam adjecto acido feri secessus provocetur, hoc non parum vitietur, & naturæ gratissimam atque in medendo desideratiſſimam dulcedinem exuat, ac potius acetosam indolem, quæ nunquam corporis integritati blanda & amica est, induat, cogitandum fuit de accommoda quadam & salubriori præparandi ratione, qua ex recenti adhuc lacte, integra manente ejus dulcedine & salva teneriori, pingui &

& mucida substantia, serofus humor eliceretur & extraheretur.

22. Quod ut perficerem, aptissimus mihi visus fuit modus, si, uti jam narravi, lac recenter mulctum exhalationis ope penitus reficcaretur, & postea residuo flavescenti grumoso pulveri, tantum aquæ purissimæ, levis & salubris, quantum in forma vaporis in auras disiectum, affunderetur, hæc invicem tantisper bullirent, ut dulcissima, salina & pinguis mucida tenerior portio ab aqua forberetur, & liquamen denique collatu à crassiori, terrestri substantia liberatum usui servaretur. Et certe parata sic per decoctionem lactis aqua, sive serum artificiosum, multis præ vulgari splendet dotibus & coloris ex flavo albescentis gratissimique dulcis est saporis ac simul pingui & oleosa substantia liquata perfusum; quod sine omni nausea & calide & frigide assumitur, & diutius quoque, salva textura & sapore, durat.

23. Ad exhibendi modum porro quod attinet; videbimus primum, qui solennis fuerit tam ratione mensuræ, quam temporis, veteribus, optimis hac in re magistris. Horum monumenta si curatius lustramus; luculenter patet: eosdem non in exigua, sed satis sæpe magna quantitate, & per tempus etiam satis longum feri lactei usum suavisse; hac tamen cum cautione & distinctione, ut, si primam regionem tantummodo à sordibus purgare niterentur, minori copia & ad paucos duntaxat dies, id præscriberent, si vero in longis morbis, & qui altius viscerum male affectorum penetralibus infidebant, ad ejus usum descenderent, diutius & majori quoque mensura hoc ipsum adhiberent. GALENUS *l. c.* de sero lactis utendi ratione hæc præcepit: *copia feri pro virium ratione expendenda est: ac licet non multum peccaveris, si plus etiam exhibueris; certa tamen mensura ad heminas quinque accedat.* Hemina vero apud priscos duodecim uncias æquasse, pariter ab antiquioribus medicis memoriæ proditum est.

24. HIPPOCRATIS sententia ex *libri VII. sect. I. epidem.* patescit, ubi prodidit: quod in fluxu hepatico, ubi similes loturæ carnis ejectiones copiosæ, à bilis vitio factæ, lac asininum, à quo multo magis argumentari licet ad serum lactis, ad quantitatem novem cotylarum Atticarum dederit, non quidem unica vice totum, sed pluribus, ita, ut spatio duorum dierum, tota quantitas absumeretur. Quin imo, ubi purgandi fine eo usus est, semper, prout MARTIANUS in *comm. in aphor. 64. Sect. V.* probe notat, largius id exhibuit, & quandoque ad congii mensuram accessit. Et VALESIIUS *Comment. in Epid. L. VII.* scribit: *erat veteribus familiaris lactis asinini usus ad purgandam bilem, ut constat ex Lib. II. de natura victus in acutis; quem usum ego non sine magna utilitate sum imitatus, cogens ægrotos accipere hujus feri, aut hujus lactis, quod etiam est valde serosum, plus quam duos sextarios.*

25. Quamdiu vero potatio extrahenda, iisdem priscis auctoribus ducibus constat. Et quidem, si diuturnior & contumacior affectus, HIPPOCRATES lac asininum, vel serum lactis, maxime caprinum, per plures dies potari iussit; quemadmodum ex *libro Epidem. VII.* patet. Serum lactis per mensem & ultra assumi posse, testes gravissimi sunt RIVERIUS & SYLVATICUS, qui, lacte asinino, & sero lactis, summo cum emolumento, in gravissimis affectibus ad XII. XX. vel XL. etiam dies usi, multi sunt in commendando ejus potu. Porro relatum legimus apud HIPPOCRATEM *Lib. de Internis affectionibus §. XI.* illum in tabe dorsali lac per XLV. dies, tertia aquæ nullæ parte admixta, propinasse. Neque enim in difficilibus & longis morbis, ubi viscera male affecta & obstructa sunt, laudabilem præstare poterit effectum, nisi, ut

Frid. Hoffmanni Oper. Tom. VI.

cum aquis mineralibus fieri solet, liberaliori dosi & per plures dies usurpetur.

26. Nos igitur hunc semper servavimus morem, ut quantitatem pro dosi capiendi feri ægri rationibus accommodaremus, & iis, qui facile nausea tentantur ac teneriores sunt, libram medicam, qui vero firmioris minusque acuti sensus, libras duas propinaremus, & nonnunquam mane tantum, quandoque etiam pomeridianis horis, sed pariori quam matutinis quantitate, potum præciperemus. Tempus vero usui impendendum, pariter ex morbi majori vel minore contumacia mensi sumus, & quosdam duobus hebdomadibus elapsis, quosdam vero vix quatuor aut sex decurrentibus, abactos fuisse novimus. Denique etiam cum MARTIANO *Comm. in Hippocr. Aphor. pag. 163.* laudamus modum exhibendi lac asininum, vel serum lactis, per vices, non simul & semel; tum quia, si æger debilis & stomachus solutior est, tantam molem simul ferre nequit, tum quia ipsum serum, interpolatis vicibus assumtum, longe felicius & expeditius alvum subducit.

27. His expensis, dispiciendum: quibus potissimum usibus & morbis dicatum sit lactis serum. Hos inter primo merito connumerandum est loco: quod ipse HIPPOCRATES solenne habuerit, ut sero lactis & lacte asinino, post exhibita fortiora purgantia, ut helleborum, elaterium &c. ad arcendam noxam & infringendam eorum deleteriam vim, uteretur. Is enim *lib. de internis affectionibus §. 44.* post veratrum sumtum, serum caprillum coctum, duorum congiorum mensura bibendum se dedisse testatur; & *l. c. §. 46.* post nigrum veratrum ventrem superne purgantem, & inferne per scammonii succum, serum & lac bubulum, item asininum coctum, pro tempore præbendum esse auctor est. Porro *lib. II. de morbis mulierum §. XII.* ita sapienter differit: *Post veratrum datum, serum coctum, per plurimos dies, cum modico sale bibendum; & addit: si non adjuerit serum, lac asininum coquito & exhibito per quatuor dies.* Ratio, quare potus feri lactis caprini, vel lactis asinini, post fortiorem ab aciori cathartico purgationem, maxime salutaris sit, hanc esse reor. Validiora purgantia, caustico & fere virulento sale, tenerrimas intestinorum tunicas arrodente, suam exserunt operationem, & copiosas cum torminibus movent dejectiones, quas ob subtractam nimis intestinis humiditatem & tunicas eorum valde contractas & constrictas, sequentibus diebus, alvus dura, tensa & constricta, non sine molestia sequitur. Serum autem vel lac dilutum, assumtis iis ingestum, succum & humidum intestinis reddit, fibras tensas & crispas emollit & laxat, spiculorum acris purgantis tunicis exquisito sensu dotatis adhuc infixorum inhaerentium acies obtundit, & leniori ac blando stimulo alvum constipatam expedit ac solvit.

28. Nos ipsi quoque confirmatius testamur: quod in hypercatharsi tam metuenda avertenda, quam præsentis compescenda, sive fuerit per catharticum, sive emeticum excitata, certius & præsentius remedium non deprehenderimus ipso lacte bubulo, quod etiam expertissimum ad infringendam arsenici infamem virulentiam est præsidium. Non minus plurimis exemplis confirmatum habemus, eadem plane ratione à fortiori emetico, mercurio vitæ, aut pulvere Monckii, inconsulto & perperam liberalius oblato, enormes vomitiones obortas, solo lacte, vel ejus sero, calide sumto cohibitas fuisse atque sopitas. Ut adeo non sine gravi ratione existimem: convenientius vehiculum, si emeticum, vel purgans dandum, non facile reperiundum fore, quam lactis serum rite preparatum, quippe quod, præter utilissimam humores lentos mobiles & evacuationi aptos reddentem facultatem, egregie simul virulentiam ejusmodi pharmacis propriam contemperat atque emendat.

29. Deinceps, superius diximus, serum lactis, ob insitum sal dulce, excretioni dicata organa stimulare eademque proritare, id quod potissimum de ea, quæ per alvi secessum succedit, intelligendum. Mitior autem & remissior est operatio hæc, eamque ob causam commodissima & utilissima, ubi validioribus alvum exercere virium aliarumque circumstantiarum ratio interdicit, inprimis in morbis, ubi purgatio periculosa est, nec non in febribus & omni fere æstu præternaturali. Veteres quidem lac asininum his in casibus potissimum exhibere sueverunt, & HIPPOCRATES in febre quotidiana ex bile, & in febre interficiente appellata *lib. II. de morbis* illud commendat, nec non in febre ardente *lib. IV. Acutorum v. 10.* & in erysipelate *lib. II. de morbis* lacte corpus purgandum esse præcipit. Sed, ubi lactis asinini copia deest, serum lactis caprini, adjecta mannæ portione quadam, quæ cum sale essentiali dulci lactis magnam alit convenientiam, in iisdem morbis & casibus surrogari, ac præsertim in calore hæctico, magno cum commodo exhiberi posse, multiplici nobis compertum est experientia.

30. Quamvis vero serum lactis, præsertim asinini, liberalius haustum, egregium admodum sit laxans; expedit tamen sæpius, ubi ventriculus largiorem copiam ferre nequit, pariori dosi illud exhibere, & ejus dejectoriam vim, addito alio laxante clemente, acuere atque intendere. Commodissima autem hunc in finem sunt manna, syrupus rosarum solutivus, syrupus de cichorio cum rhabarbaro, cremor tartari, vel ejus terra foliata; utilissime quoque cum tamarindis & radice polypodii decoquitur, & postea sal polychrestum, sive arcanum duplicatum, manna vel etiam roob sambuci, quod majori in quantitate etiam alvum subducit, adjicitur. Et hoc modo parato sero laxante summo cum fructu eoque non satis prædicando frequentius sum usus, inprimis ubi natura imbecillis, ut in senibus & infantibus, vel ex morbo debilitatis, aut non ita pridem convalescentibus, vel etiam ubi in febribus etiam exanthematicis, variolis, morbillis &c. alvus diutius suppressa detrimentum minatur. Porro, quando in pectoris affectibus, tussi ferina & sicca, vel etiam nimis humida atque catarrhali, aut lenta febre, alvum ducere ex usu est, commodissime id perficitur, si uncia duæ vel tres mannæ, in libra una feri lactis solvuntur, cremoris tartari vel terræ foliatæ tartari drachma adjicitur, ad palati gratiam duæ vel tres olei de cedro guttæ instillantur, & ita confecta potio tribus vicibus successive assumitur. Flores quoque acaciæ & persicorum, cum sero lactis caprini calido infusi, laxatoriam ejus vim augent, præsertim adjecto sale digestivo, vel manna.

31. Quod si igitur expedit, ut vere vel æstate, prima corporis regio à sordibus depleatur, vel ad cacochymiam tollendam laxans propinetur medicina: certe ejusmodi serum lactis laxantibus ita acutum, singulis diebus ad dimidiam mensuram per aliquot septimanas utiliter sumi potest. Et instituta sic cura ita dicta vernalis gracilibus, attenuatis & sensibilibus corporibus, juvenibus maxime, longe tutior, longèque salubrior est, omnibus aliis vulgaris usus nodulis, sive infusis & vinis medicatis purgantibus & sanguinem purificantibus. Non minus, in principio dysenteriae apprime conducibile est, ut mordaces caustici succi nervosam intestinorum tunicam gravius infestantes, arrodentes & inflammationem suscitantes, clementer evocentur; quod quidem aptissime lacte asinino perficitur. Ubi vero hoc non suppetit, serum lactis caprilli, adjectis aliquot extracti rhabarbari granis, cum una, vel una & dimidia mannæ uncia eundem exoptatum effectum præstabit. Et sane antiquissimus feri lactis in dysenteria est usus. Ipse HIPPOCRATES,

lib. epid. VI. quum dolor circa totum ventrem, & labores, surrectio multa & subcruenta fere, jam per viginti dies esset, Adriano & puero Cenæi, caprillum serum & lac asininum coctum propinavit. Recte enim hunc morbum judicat VALESIUS fuisse dysentericum, & *comment. in h. l.* in dysenteria autumnali lactis serum filice candefactum laudat, & scribit: *egestiones biliosas subcruentas cum vehementi ventris dolore, ubi serum & lac bibisset æger, longe moderatiores fuisse factas.*

32. Si quando etiam validioribus ad educendas copiosas in leucophlegmatia, sive anasarca, opus est remediis, uti sunt extractum esulæ, hellebori nigri, hæc ipsa non modo securissime, sed & optime & accommodissime cum lacte asinino, vel sero miscentur & propinantur; sumendo drachmam dimidiam purgantibus ejusmodi pharmaci ad libram unam feri, & per vires mixturam ebibendo. Similiter, quum maxime salutare sit, ut ante usum aquarum mineralium, vel etiam finita cura, primæ viæ à sordibus collectis, vel aquis retentis, liberentur ac depleantur: nihil, nostra quidem experientia, tutius & præstantius ipso sero lactis, in quo minimum uncia tres mannæ, cum una & dimidia drachma cremoris tartari solutæ fuerunt, reperire licuit; inde enim sex vel octo secessus sine omni molestia motos & miram quantitatem aquarum exturbatam fuisse, non semel, sed sæpius, observavimus. Quin immo, ubicunque ob fœcum copiam & nimiam siccitatem, alvum mollire & evacuare necessarium est: nil quoque præstantius & efficacius est, quam serum lactis cum manna, addita sufficiente quantitate olei amygdalarum dulcium, assumere & quoque per clysterem, ad lubricanda intestina & stercora emollienda, ano infundere.

33. At vero, præter has egregias utilitates, quas serum lactis in primis viis ad alvi solutionem præstat, aliis adhuc laudatissimis facultatibus splendet, quas ultra primam corporis regionem explicat, & in iis morbis exhibet, qui lentis adolescunt incrementis & ex visceribus male affectis incunabula trahunt longiusque extrahuntur, quorum in numero haud infimum locum obtinet scorbutus, sive cachexia scorbutica, tot malorum & atrocium symptomatum fons. Sane, si curatius paullo præstantissima peritissimorum medicorum, qui de scorbutico ex instituto egerunt scripta, ut EUGALENI, *Balthas.* BRUNNERI, *Henr.* BRUCÆI, RONSÆI, WIERI, *Salom.* ALBERTI, *Matth.* MARTINI, DRABIZII evolvimus ac lusiramus, ad unum omnes ferme candide fatentur: sola diæta lactea, vel sero lactis, cum antiscorbuticis herbis decocto & diutius usurpato, in pessimis, quæ scorbutus importat symptomatibus, ut doloribus acutis, ventris torminibus, vomitibus, atrophia, febribus lentis, se plus præstitisse, quam ullis aliis auxiliorum generibus, & molestissimo malo tabescentes plus etiam virium hinc hausisse, quam ex optimis roborantibus & artificiosis analepticis. Mos scilicet fuit usu exercitatissimis his medicis, ut herbas antiscorbuticas, ut cochleariam, beccabungam, nasturtium aquaticum, comas abiyntii, acetosam, fumariam, scolopendrium, epithymum, betonicam, carduum benedictum, centaurium minus, trifolium fibrinum cum lacte decoquerent, & quotidie matutinis horis mensuram dimidiam, vel etiam plus adhuc, scorbutico detentis calide propinarent, & simplici hoc remedio rebellem morbi contumaciam superarent, diraque omnia symptomata abigerent.

34. Audiamus tantisper, quam magnifice de feri lactis in scorbutica labe percuranda incomparabili utilitate sentierint probatissimi hi auctores. Primus sit Jo. WIERUS, qui in *tract. de scorbutico* p. m. 334. solidum hoc interpoluit judicium: *quod, ait, in lacte plantas antiscorbuticas coquant, expressumque liquorem felici.*

felici successu hauriant agroti, id feri magis, quam lactis ratione, evenire sentiendum; in cribro butyri & casei coagulum remanet, serum autem quod transfluit & tenuium partium est, abstergit, aperit, urinas movet atque ad scorbuticæ luis profligationem cumprimis utile, ex priscorum etiam AETII, GALENI, testimoniis est. Porro, Matth. MARTINI Lib. de Scorbuto p. 679. de lactis in scorbutica lue usu hæc habet: *Rationibus agrotantium mirifice conducit lac caprinum, totius morbi decursu exhibitum, quod non alvum modo moderate subducit, sed & concoctu facile & adstrictoria sua facultate viscerum atoniam emendat, & ad reparandas vires accommodatissimum est; ne tamen hypochondria insilet, & in ventriculo debili coaguletur, aquæ nonnihil, vel salis, aut sacchari momentum, adjiciendum est.* At vero, hic metus fere omnis supervacaneus est, si loco lactis caprini, ejus serum, vel lac asininum, in usum trahatur; inprimis quum, herbas antiscorbuticas supra memoratas non in lacte, sed sero coquendas esse, Bald. RONSÆUS Tr. de scorbuto admoneat. Denique etiam, de sero lactis caprini ejusque præstabili in scorbuto facultate, egregium testimonium perhibet MOLLENBROCCIIUS in Lib. de arthritide vaga & scorbutica p. 193. *Serum lactis, inquit, inprimis caprini, multum prodest in scorbuto; & scribunt Salernitani:*

Inciditque, lavat, penetrat, mundat quoque serum. Serum enim, ratione aquosæ suæ humiditatis, ea quæ salsa sunt, solvit, ratione vero nitri abstergit parietibus venarum adhaerentia, ac alvum, absque aliqua mordacitate, leniter subducit; & ratione occulti alcali volatilis refrigerat. Unde agrestes Frisii ac Batavi quotidiano feri usu à scorbuto patrio sese muniunt ac liberant. Magis autem accommodatum redditur, si cum herbis antiscorbuticis ebulliat, aut infundatur.

35. Et, si verum fateri licet: certe in sævissimo illo affectuum chronicorum, scorbuto, non facile certius & præstantius datur auxilii genus ipso lactis sero, dulci nempe, ex lacte asinino, vel caprino nostro modo & methodo paratum. Quum enim origo hujus pertinacis luis nonnisi summa humorum vitalium impuritas sit, orta à salino-sulphureis excrementitiis sordibus, ob deficientem excretionum successum in corpore retentis, & motu intestino calido, variaque partium inter se combinatione, magis corruptis, quæ partes solidas interiores & exteriores, acutioris sensus, lancinando & arrodendo, dolores non modo atroces, sed & varii generis maculas & exulcerationes in summa cute pariunt: ad amolienda dira hæc mala, certe non aliud scopo medico accommodum & salubre est præsidium, quam quod falso-acres humores diluit, contemperat, minima emunctoriorum vascula obstructa recludit, humores viscidos incidendo, viscera à stagnatione feri & sanguinis liberat, alvinam excretionem, urinæ fluxum, nec non perspirationem, sine ulla noxa & exagitatione, clementissime adjuvat & promovet, ac nervosis præterea partibus blandum atque amicum est.

36. Sed, omnes has nobilissimas facultates in sero lactis rite præparato reconditas, & certo ab eodem expectandas esse, jam ex superioribus abunde constare arbitror. Quare etiam non sine ratione à medicorum antiquissimis HIPPOCRATE, GALENO, DIOSCORIDE, PLINIO, AETIO, MESUE, in morbis, qui ab humorum impuritate incunabula trahunt, tantopere feri lactis usus laudatus & commendatus fuit. Tenendum tamen est, quod in ejusmodi longis & refractariis vitiis, feri potus, non secus ac cum soteriis aquis solenne est, per mensem & ultra convenienti data mensura extendendus sit & continuandus. Quinimo, licet in biliosis & calidis naturis solum lactis serum sufficiens sit: attamen, si humores sunt crassiores, corpora segniora, frigida & humida, præstat uti-

que herbas amaras, & sic dictas antiscorbuticas, quæ præter oleum volatile, amaritiam maxime in hisce morbis salutarem custodiunt, moderata dosi incoquere, idque sic exhibere.

37. Non minus, eximia & longe præstantissima feri lactis utilitas est in iis morbis, qui motibus spasmodicis & nervosarum partium constrictionibus suam ludunt tragœdiam, & totam œconomiam vitalium motuum, tum secretoriorum, tum excretoriorum, pervertunt, quos inter præcipuum in nostro climate locum sibi vendicat affectus sic dictus hypochondriacus, qui in foeminis hystericus audit, & nostro tempore non solum frequentissimus, sed etiam, ob perverfam vulgarem curandi rationem, contumacissimus est. Hic sedem suam obtinet & tyrannidem potissimum exercet in ventriculi & intestinorum canali nerveo-membranoso, per spasmos continuos & flatus, quibus totum nervosarum partium genus in consensum rapitur, ut iisdem motibus agitur, unde inæqualis sanguinis & humorum fit cursus, quippe qui à partibus exterioribus ad interiores, præsertim ad caput & pectus ruit, & pessima ibi suscitatur symptomata. Præcipua vero truculenti hujus mali causa in summa imbecillitate generis nervosi, ex parte, nativa, ex parte etiam per noxam earum rerum, quæ vires frangunt, texturæque & motui nervosarum partium adversantur, inducta, quærenda est: cui, si postea accedit ob intermissum corporis motum & exercitationem, nec non pravam victus rationem, sanguinis ipsius copia, is in contorto intestinorum volumine ob impeditum per hepar liberum transitum stagnans, flatulentias & spasmos longe magis adauget & exacerbatur. Et quod magis adhuc est, quia affectus hic, visceribus in hypochondriorum regione sitis firmitus innidulatur & universum nervosarum partium systema afficit, latius quoque noxam spargit & reliquas corporis partes gravi damno maculat, ut inprimis caput exinde graviter luat & vertigines, epilepsia, paralyfes, melancholia, mania exoriantur, à spasmis autem, corporis interiora detinentibus, naturalium excretionum saluberrimum negotium mirifice turbetur ac pervertatur, quo tam sanguinis per ani & uteri venas, quam sordium per alvum, urinam, sudorem eliminatio, vel plane cohibeatur, vel inordinate succedat, aut nonnunquam etiam excessu delinquat.

38. Ad hæc igitur capitalia sævissima mala efficaciter debellanda & subigenda, non utilius, non tutius & certius sero lactis, vel lacte asinino, aut lacte caprillo, cum fontibus mineralibus mixto, meo quidem judicio & invento, reperitur remedium; si nempe debito tempore, mensura ac regimine, non secus ac cum aquis mineralibus fieri suevit, cum eodem cura instituitur. Et certe ego firmis & momentosis rationibus inductus, asserere non dubito: plus præstari in sævis hisce affectibus hoc modo adornata cura posse, quam cum solis aquis mineralibus. Desiderat enim ejusmodi morbus spasmodicus, remedium quod temperatum & naturæ amicum est, quod humores tenaces viscidos fluidos reddit, obstructa minima vascula aperit, falsos acres humores contemperat, & clementi stimulo omnis generis excretionem promovet, quæ omnia in sero lactis dulci comprehenduntur, utpote quod virtute omnia reliqua in hoc casu antecellit, modo recte administratur, neque, si non statim notabilem in melius mutationem inferat, ab ejus usu ægri desistant, sed congrua etiam alia præsidia pro diversitate corporum & symptomatum, admisceantur vel interponantur.

39. Et egregias has laudatissimasque sero insitas doses, omnium optime perspectas habuit, celebris olim Italorum Medicus *Benedictus SYLVATICUS*, quippe qui, in consiliis suis passim in gravissimis & maxime rebellibus morborum generibus sero lactis & asinino

lacte usum se esse conceptis verbis testatur. Neque alienum erit, brevibus hoc loco memorare, quibus in affectibus & qua ratione id usurparit. Is igitur *Consil. 58. Cent. I.* in pathematibus melancholicis & maniacis serum lactis caprini cum syrupo de polypodio & feminibus malorum in emulsionem redactorum, suadet; *Consil. 6.* in affectu melancholico-hypochondriaco idem serum per quindecim dies ad libras quatuor quotidie potum mirifice dilaudat. Porro, *Consil. 65.* serum hoc caprinum, optime depuratum, cum coma absynthii infusum per aliquot dies præscribendum esse præcipit, ac *Consil. 73.* in melancholia hypochondriaca eidem instillare jubet chalybem potabilem cum oleo citri, & sic propinare. Præterea, in semiparalyti serum lactis caprini cum cremore tartari & rhabarbaro magis dejectorium, & postea cum ceterach. capill. veneris, radic. feeniculi, petroselinii, adjectis aliquot guttis spiritus vitrioli, magis diureticum factum, utile esse perhibet. Syncopen quoque epilepticam cum sero caprino persanavit, ita quidem, ut sumeret serum optime depuratum cum succo limonium, idque primum exhiberet, quarta vero die dejectorium redderet, infundendo quatuor ejus uncias, cum drachma una rhabarbari & foliis fennæ, superbibendo tres feri libras & intermediis tribus diebus libram unam feri, maceratis prius in eo floribus pœoniæ, rutæ caprinæ, melissæ & corticibus citri propinaret. Non minus in passione hysterica feri lactis usum *Cent. II. Consil. 68.* mirifice dilaudat, nec non in morbo nigro sic dicto Hippocratis *Consil. 77.* in sanguinis vomitu *Consil. 82.* & in sputo cruento, *Consil. 34. & 35.* Idem laudatissimus auctor diarrhœam & tenesimum syrupo rosarum solutivo, julepo tamarindorum, ingerendo postea serum lactis caprilli destillatum, se abegisse prodidit. Similiter tumoris cancri in mamilla incipientis minas, *Cent. II. Consil. 32.* solutis in sero caprillo tribus mannæ uncias & oblati repressit ac jugulavit. Et tandem in inquinamento gallico, tabe, febre lenta *Cent. IV. Consil. 92.* idem remedium præstabilem tulisse opem confirmat.

40. Nos quoque confirmatius asserimus: quod incomparabilem feri lactis utilitatem in quamplurimis morbis deprehenderimus. Et ut hoc eo testatius elucescat: placet ultimo loco quasdam subnectere observationes & notabiles casus, quos intra mensis spatium annotavimus. Acceperat vir quidam triginta annorum, non adeo robustus, à studioso medicinæ pilulas, nescio quas, purgantes, quæ tam fortiter & valide operationem suam exsequutæ sunt, ut, licet dimidiam earum partem ipsa sub assumptione vomitu rejiceret, per plures tamen postea dies alvus jugiter

fluere & vel centies deponeretur, quo factum est, ut vires penitus collabascerent, appetentia ciborum intercideret somnusque inquietus, accisus & fere nullus esset. Accessit febris erratica intermittens, tandem in lentam, vires & corpus penitus consumentem, degenerans. Conclamatis sic propemodum rebus, ardentissimis precibus à me auxilium flagitavit, tum ego ad lectum ægroti accedens, eundem jam per aliquot hebdomades decubuisse & sudoribus nocturnis colliquativis, nec non febre lenta tabescere, cujus index erat pulsus jugiter celer & debilis, percepi. Suasi igitur, ut sepositis omnibus medicamentis serum lactis caprilli, cujus præparationem tradebam, quotidie per vices ad mensuram hauriret, simulque guttas XII. liquoris anodynii assumeret, & crebrius decoctum dilutius avenaceum forbillaret, quibus per quatuordecim dies continuatis, somnus rediit, appetentia resuscitata, vires refocillatæ & æger ita cum sanitate in gratiam rediit, ut munia sua iterum obire posset.

41. Succurrunt adhuc alii casus memoratu digni. Generosus juris Studiosus, iracundia commotus & mœrore affectus, nausea & vomendi conatu infestabatur, quem ut sublevaret, per amicum à pharimacopœo petit emeticum; sed eodem assumpto, non solum crebrius vomuit, sed etiam in summam virium prostrationem delapsus est, cum incendio stomachi, assidua vigilia, siti, & ciborum fastidio. Ego accitus ventriculi inflammationem metuens, nihil aliud, quam serum lactis, ex nostra sententia paratum, cum emulsione ex quatuor feminibus frigidis, ad aliquot uncias, tam interdium quam noctu, interpolatis vicibus bibendum præcepi, quo ardor cum æstu extinctus pulsus & somnus ad quietem & ordinem traducti summaque sanitatis spes affulsit.

42. Similiter, nobilis puella, trium circiter annorum, tenerioris constitutionis, ut sese adversus variolarum, populares tum circuitus habentium, incursum muniret, ex consilio medici purgans ex radice jalappæ & mercurio dulci deglutit, à quo bis quidem vel tertantum dejecit, sed appetitus penitus prosternebatur & ipsa corpus jactitando insomnes transigebat noctes ac siti mirifice excruciabatur, cum æstu corporis intenso & pulsu celeri. Accessi & commendavi lactis serum, secundum nostram methodum parandum, cujus usu, symptomatibus successive penitus expirantibus, sanitati reddita fuit ægra. Ex quibus quum patefcat: incomparabilem in variis morbis esse feri utilitatem, nihil jam superest, quam ut nobilissimi hujus remedii usum aliis, qui artis exercitium agitant, de meliori quoque commendemus, & ut quamplurimis in salutem cedat, voveamus.



D E

SALIUM MEDIORUM EXCELLENTE IN MEDENDO VIRTUTE.

§. I.

IN sole & sale omne illud, quod sapientes quærunt, reperiri, ab omni jam inde antiquitate inter philosophos celebrata parœmia est, ita prorsus, ut qui alchymisticæ arti apprime favent, hoc dictum sibi quam maxime applicent, atque ad suum sibi præfixum scopum transferant. Nos, relictis hisce inanibus & supra captum nostrum positis opinionibus, potius hoc vetustissimum sapientum edictum, simplicissime

tantummodo intellectum, ad usum physico-medici perquam commode traduci posse existimamus. Ecquis enim salis, qui jure meritoque rerum conditarum princeps ac rex, atque universi systematici mundi primum mobile appellari potest, immensam ac pene divinam in immutandis, generandis ac perficiendis rebus corporeis virtutem digne satis æstimare ac prædicare poterit? Hujus calor genuinum chymie naturalis instrumentum est, cujus beneficio res germinant & fœcundantur, cujus ope quasi ex nihilo produ-

producantur, & sapida insipida, fixa volatilia, inodora odora redduntur, atque etiam ex succis aqueis bituminosa & inflammabilia generantur. Præterea, illud immensæ magnitudinis ac pene stupendæ & miraculosæ virtutis corpus solare præcipua causa atque origo est tantarum mutationum, quæ hoc in universo subinde contingunt. Prout enim calorem, lucem, motum & vigorem non modo elementis & alimentis, sed etiam vegetantium & animantium corporibus foenerat: ita etiam foecunda & salubria, vel etiam insalubria tempora inde proveniunt. Nam, quod certis locis & climatibus propriæ sint ægritudines, quod singula anni tempora diversæque tempestatum constitutiones suos peculiare alant morbos, qui populariter grassentur, id maxima ex parte solis operationi acceptum referendum est. Is enim est summus tempestatum, caloris, frigoris, pluviarum ac nebularum moderator, hic intestino suo motu variaque mixtione diversas & subinde alienæ indolis salinas sulphureas pro-gignit particulas, magnorum & undiquaque sævientium morborum frequentissimas procreatrices.

2. Enimvero, præter mirabiles solis in sublunaria effectus & operationes in universa rerum natura, quod tam penetrante agilitate, tamque insigni corpora immutandi varietate miscendi potentia instructum sit, præter salinum principium fere nihil invenies. Neque enim vel in natura vel in arte ulla occurrit operatio, quæ absque salium concursu perficiatur. Præcipuum illud, quo unum corpus in alterum agit, salini generis principium est, neque animantium vita, functionumque in iis integritas, & corporis humani conservatio sine salibus persistere aut præstari possunt. Deinde, quemadmodum salia diversi generis præcipuum sunt generationis morborum fundamentum: ita etiam, quæ à remediis expectanda venit salus, potissimum salibus debetur. Atque, ut mentem nostram paulo pressius & liquidius explicemus, profecto ex omnibus medicamentorum generibus, varia etiam arte conquistis, nulla dantur usui medico, in morbis tam avertendis, quam tollendis, singulariter accommodata, quæ cum salibus comparari possint. Tametsi vero plura eaque diversissima salium, quæ vel natura sponte profert, vel quæ arte eliciuntur, sint genera, quæ usui medico apta atque idonea deprehendimus, cum non modo fixa & volatilia, acida & alcalina, vel ex hisce media, sed & acria corrosiva, oleosa, amara, dulcia & austera dentur, quæ omnia & singula aliis atque aliis modis saluti ægrotantium inservire possunt: attamen ex hisce omnibus nulla esse putamus, à quibus major virtus, salus & tutior medendi ratio, quam ab iis, quæ mediæ indolis sunt & neutra vocantur, peti & expectari possint, adeo, ut omnis fere, quæ à medicamentis desideratur, virtus, etiam cathartica, in iis resideat. Atque id maxime est, quod in præsentis tractatione, paulo altius perquirendum demonstrandumque suscepimus.

3. Quum nobis propositum sit, ingentem illam salium mediorum in tota remedium silva præ aliis prærogativam atque eximiam in medendo efficaciam paulo penitus & accuratius demonstrare, visum nobis est, primo omnium, quid per salia media intellectum velimus, paulo clarius explanare. Salia igitur media, sive neutra, nobis vocantur ea, quæ ex sale alcali aut terra alcalina & acido sunt composita, ita ut nullum ex hisce habeat prædominium. Quid per acidum & alcali intelligatur, res jam valde obvia & tritissima est, & quemadmodum hæc ipsa admodum excessivo sapore & virtute sunt prædita, adeo, ut utrumque ad corrodentem naturam sæpe accedat: ita proportionem convenienti invicem mixta per mutuam allisionem & conflictum ita attemperantur, ut tum ratione saporis, tum aliarum facultatum & virium medium,

innocuum & naturæ amicum sal inde emergat. Deinde, salia perfecte media dicuntur ea, quæ nec ad acidi, nec alcalini liquoris cujuscunque miscelam amplius effervescent, sed quæ perfecte saturata sunt. Quo nomine & virtute maxime eminent inter salia nativa sal commune & nitrum, item aphronitrum, & quæ ex quibusdam aquis medicatis & acidulis coctione eliciuntur; ex arte paratis, arcanum duplicatum, nitrum antimoniatum, sal Glauberianum, tartarus vitriolatus: quæ singula nec à quovis affuso acido, nec alcalino liquore ebulliunt, nisi acidum valde forte & penetrans fuerit, quemadmodum oleum vitrioli, quod sali communi vel etiam nitro adjectum non modo ingentem ebullitionem, sed & copiosum ac subtilissimum ex sale communi album, ex nitro rubicundum vaporem suscitatur; quale tamen à leviori acido, ut est spiritus salis, vitrioli, acetum, succus citri, vix unquam facile evenit.

4. Hisce jam suppositis, nec ex vegetabilium regno tartarum, neque ex mineralium profapia alumen vel vitriolum, commodum inter media salia tueri posse locum, quisque facile intelliget; quandoquidem unum eorum quovis affuso alcalino liquore, sive mitioris, sive valentioris generis sit, protinus vehementer commovetur, inque bullulas attollitur, non levi indicio, acidum salinem in iis prædominari, neque hoc ipsum intime cum alcali metallico vel terreo esse unitum. Nam ea indoles ac proprietas salium mediorum esse debet, ut arctissime unita neque ab acido, neque alcali affuso facile præcipitentur, quare nec sal lunæ, nec saturni dulce in numerum stricte & proprie sic dictorum salium mediorum jure referre licet. Ubi tamen non possumus non monere, quandam etiam differentiam inter ipsa salia media non inconvenienter ponendam esse, quum alia arctiorem & alcalini & acidi principii, alii paulo laxiorem horum nexum & unionem habeant.

5. Inter ea, quæ arctiorem copulam ineunt, sunt imprimis, quæ valde difficili negotio destrui possunt, ut sunt omnia salia, quæ cum alcalino principio & acido vitrioli parata sunt, ut sunt salia fontium mineralium media, arcanum duplicatum, tartarus vitriolatus, & sal ex calce viva & acido vitrioli vel salis paratum, & ipsum quoque sal commune & nitrum. Ad ea vero, quæ sunt laxioris & minus coheræntis contextus, salia ex acido leniori & terra alcalina composita pertinent, quo in numero sunt sal coralliorum, lapidum cancerorum, tartarus tartarifatus, terra foliata tartari, ex quibus per fortius acidum quam facile corpus solutum rursus deijci potest.

6. Quum vero nostri consilii ratio eo maxime tendat, ut, quod salia, quæ sunt temperatæ & mediæ naturæ, sint omnium saluberrima, & tum ad medendum, tum ad præservandum tutissima & valde efficacia remedia, paulo clarius demonstrare velimus, opus est, ut argumentis, quæ id evidentissime evincant, sententiam nostram corroboremus. Primum vero est, quod in omnium animantium succis secundum naturam, sive quum in statu integro constituta sunt, nec acidum, nec alcali purum, sive fixum, sive volatile, sed tantum mediæ naturæ salia reperiuntur. Ita neque in sanguine nec lymphâ unquam offendere licet acidum, quæ tale, quod tamen paradoxon superiori tempore à nonnullis parum chymicæ artis gnaris fuit assertum. Neque etiam in statu morbo suo seu præternaturali acidum purum deprehendere licet, nullo artificio eruendum; ut adeo pateat, quam sterilis non modo, sed & in praxi noxia fuerit hypothesis eorum, qui acidum omnium fere morborum causam valde audacter statuebant, & ob id omnia acida è foro medico releganda, omnesque remedium vires eo referendas esse, ut vel acidum vel viscidum destruant, acriter

18 De salium mediorum eccellente in medendo virtute.

ante aliquot lustra contendebant, quibus etiam jam Dissertationem *de acidi & visceri insufficientia* mascule opposui, atque tunc sectam, per universam fere Bataviam regnantem, solide prostravi.

7. Equidem, non negare fas est, partim ex alimentis & assumtis, præsertim si diutius in primis viis morerentur, acidus sæpe & crudos succos ibi nidulari, qui naturæ alieni variis de causis magnas molestias procreant, & symptomatum etiam causam atque incrementum non raro suppeditant; ideoque ea remedia, quæ acidum infringunt ac temperant, præsentissimam opem ferre. Minime tamen inde sequitur, acidus hos succos integros, immutatos & salva sua textura in sanguine vel aliis humoribus, qui per vasa in orbem feruntur, contineri, vel mixtionem ingredi animale; sed potius peregrina & morbosa prima in regione habenda sunt, præsertim si ibi per digestionem & mixtionem aliorum liquorum non temperata fuerint. Nam, licet acidum temperatius bene ferre possit ventriculus, dum blando stimulo & appetentiam excitat, & dissolutionem quoque alimentorum promovet; præter ventriculum tamen purum acidum corpori animantium valde est hostile, partibusque ejus fluidis & solidis quam maxime adversatur. Illis enim vitæ & motui progressivo penitus inimicam spissitudinem infestumque coagulum inducit, partes autem solidas, præsertim fibrosas & nerveas, stimulo, arrodendo vel etiam confringendo mirifice lædit.

8. Quamobrem à benignissima natura bene provisum est, ut illis in ventriculo solutis atque ex eo expulsis protinus succus affundatur, qui blanda sulphurea & ad alcalinam indolem accedente natura peregrinum acidum in eis contentum attemperet, & venis totique naturæ amicum reddat. Cui etiam scopo lymphatici ex pancreate & aliis glandulis affluentes succi multum velificantur. Neque sal alcali purum, sive fixum sive volatile, in animantium succis, præsertim in statu naturali, occurrit. Bilis utilissimus humor, quem naturalem seu à natura constitutam omnium animantium medicinam præstantissimam æstimamus, ad indolem quidem alcalinam tam prope accedit, ut effectum acidum infringendi habeat communem; sed tamen purum alcali haberi non poterit, quod nullo cum acido effervescat, nisi intensissimum sit, ubi etiam ista ebullitio non principio alcalino, sed potius sulphureo oleoso adscribi debet, quoniam olea tam expressa, quam destillata, cum spiritu fortiori, ut oleum vitrioli vel spiritus noster fumans est, intensam eamque calidam effervescentiam concitare observamus.

9. Neque alcali fixum vel volatile sine ignis & combustionis adminiculo ullo modo in sanguine, lacte, chylo, lymphæ, imo nec in excrementis, sudore, urina, secundum statum naturalem comparatis, ostendere licet. At vero, si ex succis alcali volatile exspirat, vel in excrementis etiam, sive in bile sive in urina, manifestior alcalina qualitas observatur, tunc certe id indicium corruptionis est, vel putredinis præsentiam manifestat. Sed potius in statu sano salia excrementitia mediæ esse naturæ, ex acido nempe & alcali fixo vel volatili composita, ex sapore falso urinæ animadvertimus. Sal vero illud medium maxime inclinatum ad naturam ammoniacalem propter compositionem salis volatilis alcalini urinosi cum acido. Nam si urinæ inspissatæ calx viva vel sal quoddam alcali immisceatur, mox prodit odor salis volatilis. Atque etiam, quod in urina continetur sal, tartareæ esse naturæ, ex acido & terrestri oleoso principio compositum, quod apparet partim ex inspissatione, partim etiam ex tartaro illo, qui in hypochondriacis & scorbuticis parietibus vasis urinarii adhærescit, vel ad fundum fertur.

10. Salubrem vero & naturæ humanæ convenientem salium mediorum indolem ac virtutem vel inde maxime apparere arbitror, quod hæc ipsa ne ullam quidem animantium succis, cujuscunque etiam generis sint, mutationem vel turbationem inferant, quemadmodum id promte fieri conspiciamus ab aliis salibus acidis vel alcalinis, sive fixa sive volatilia fuerint. Sanguini enim è vena emissio si quando acidus liquor, ut spiritus salis vel vitrioli, aut solutio salis, quod excessive acidum, ut aluminis vel vitrioli infunditur, mox color & consistentia perit, dum color purpureus in lividum & luridum protinus permutatur, & sanguis fluidus tenuis coagulatur, quod etiam fieri consuevit, si hæc ipsa cum lymphæ, sero, chylo, lacte, vel ovorum albumine confunduntur. Neque ignota sunt illa experimenta, quæ olim, ad demonstrandam sanguinis transfusionem, varia liquida in venas animantium siphone injiciendo, adornata fuerunt, ubi à liquoribus acidis injectis non ita multo post mortem sequutam esse observatum fuit, sanguine in vasis majoribus coagulato reperto. Quando vero sanguini recenter è venis educto alcalinus liquor, v. g. oleum tartari per deliquium, vel spiritus salis ammoniaci bene saturatus admiscetur, non minorem etiam mutationem animadvertimus, dum color purpureus inde intenditur, & valde coccineus fit, ac major fluiditas sanguini conciliatur.

11. Simili modo, hæc ipsa alcalina addita lacti, sero, albumini ovi, ea reddunt fluidiora. Quamvis vero coloris intensio & tenuitas, quam alcalini liquores sanguini conciliant, vitali ejus progressivo inque circulo per tot vasculorum myriades abeunti motui non adeo adversa videatur; tamen purum alcali paulo largiori dosi vitalem sanguinis & humorum crasin atque temperiem mixtionemque invertere, vel ex eo liquido constat, quod ab injectione alcalini liquoris in venas animantium lethales convulsiones fuerint sequutæ, quod minime evenit à salibus, quæ mediæ sunt naturæ. Horum enim indoles ita est comparata, ut ne minimam quidem alterationem in sanguinis & fluorum vitalium texturam & mixtionem inferant. Nam sive solutio salis communis & salis ammoniaci, sive arcani duplicati, terræ foliatæ tartari, aut nitri antimoniatæ, fluido sanguini vel lacti admixta fuerit, ne ullam quidem mutationem inde in hisce sequi deprehendimus. Nitrum, quod etiam sal mediæ naturæ est, mixturæ sanguinis ejusque motibus vitalibus plane non esse adversum, testatur inter alia experimentum MALPIGHII *libr. de Polypo cordis*, dum ab infuso cani robusto per venam jugularem nitro ad drachmas sex nulla observata fuit mutatio, præter urinæ copiam majorem inde proveniente.

12. Ex omnibus vero mediis salibus vix ullum revera est, quod natura corporis humani melius & sine ulla offensa ferre possit, & quod majorem præstet utilitatem, quam sal sic dictum commune, sive ex mari, sive ex fontibus, sive è terra fuerit eductum. Hoc certe nec homo, nec pleraque animantia inter alimenta carere possunt, eo quod non modo ad saporem ciborum faciat, sed & quod ad meliorem alimentorum digestionem sive intimam resolutionem plurimum conferat. Nec vero sal commune in mixtionem humorum vitalium admittitur, sed omne rursus foras per emunctoria propelli debet, quum in corpore relictum subtilium fibrarum texturæ valde adversum sit, & vellicatione & arrosione earum multas procreet molestias. Nihilominus inter alimenta in corpus admissum maximas, præter jam dictas, præstat utilitates. Fibras enim motrices & canales excretorios, ex iis compositos, blande stimulo efficit, ut non modo sanguinis & humorum celerior fiat progressio, cujus beneficio optime partes crassiores atteruntur,

trituran-

trituantur & cum fluidis melius permiscantur, sed & ut saluberrimæ secretiones & vitæ perquam necessaria rerum alienarum excretiones, quarum ope ipsum simul è corpore expellitur, felicius succedant.

13. Salibus mediis iisque valde salubribus & naturæ humanæ amicis jure etiam annumerari posse saccharum censemur, quod convenienter usurpatum non ita sanitatem offendit, ut vulgo accusatur, licet non in omnibus morbis vel omni tempore singulis hominibus conveniat. Id ipsum tamen in paulo excessiva quantitate à quibusdam quotidie sumtum eos plane non offendere, ut potius salvi & incolumes degant, multiplici experientia edocti sumus. Siquidem saccharum æque est sal dulce & blandum, mixturæ humorum plane non adversum, & quod acidos biliosos humores temperat, & lubricando primas vias blandeque fibras intestinales stimulo alvum liquidiorum & mobiliorem reddit. Præterea, aliud adhuc beneficium à saccharo cum cibis sumto peti potest. Nimirum, omne oleum & pingue corpus unionem & copulam cum aqua prorsus respuere perquam notum est. Hæc autem adjecto saccharo optime perficitur, sequente id luculenter docente experimento: oleum cinnamomi plane non miscetur cum aqua, sed fundum petit; si vero aliquot ejus guttulæ prius misceantur cum saccharo, idque postea aquæ immittatur, statim, facta prius agitatione, intimam olei cum aqua conjunctionem percipimus, ita ut hac ratione extemporanea cinnamomi aqua præparari possit. Quum itaque homo multa sæpe pinguedine vescatur, quæ ægerimæ dissolutionis & mixtionis cum aqua in lacteum succum difficulter transit, quin beneficio sacchari & dulcium id fieri possit, nihil dubii superest, quum videamus, & anseres & capones saccharo, eorum eduliis admixto, pinguefaciendi modum dari non meliorem. Huc etiam illud experimentum pertinere existimo, ubi addito cremori lactis saccharo impeditur, quo minus butyracea pars ab eo faciat secessionem.

14. Quemadmodum vero inter alimenta ad integram servandam valetudinem salia mediæ naturæ principem locum tenent: ita profecto in medicamentorum classe virtute sua incomparabili in curandis morbis omnia reliqua remediorum genera longissime exsuperant. Et cum instituti nostri ratio hæc sit præcipua, ut hoc assertum paulo clarius & explicatius demonstramus, placet primo omnium salia, quæ mediam præ se ferunt naturam, paulo exquisitius inter se distinguere, in duplicem classem ea dispefcendo, quoniam alia naturæ, alia artis producta esse comperimus. Inter ea igitur, quæ natura sponte profert, præter sal commune, referimus maxime salia sic dicta essentialia, quæ ex plantarum plurimarum succis debita encheiresi eliciuntur, quorum præcipua ad tartariformem, quæ ex acido & alcalina terra, intermixtis partibus sulphureis, composita est, naturam & mixtionem accedunt. Ab hoc naturali plantarum blando & medio sale qui earum eximias illas dotes & virtutes, quas in medendo possident, derivat, is certe à vero mihi non declinare videtur. Ea enim vegetabilia, quæ convenienti præparatione copiosum ejusmodi sal elargiuntur, aliis virtute præcellere experientia docemur.

15. Horum vero classem ducunt eæ herbarum species, quæ vulneribus sanandis & sanguini depurando dicatæ sunt, in quarum numero eminent veronica, scordium, carduus benedictus, urtica mortua, millefolium, tussilago, plantago, hederæ terrestris, borago, buglossa, centaurium minus, fumaria, pyrola, bellis, flores chamomillæ, absinthium, anagallis, brancæ ursina, nasturtium aquaticum, chainædrys, alchimilla, consolida media, scolopendrium, flores chamomillæ vulgaris, scabiosa, quarum succi, decocta,

infusa in gravissimis morbis chronicis, qui ex obstructione & infarctu viscerum aut eorum corruptione atque emunctoriorum & tubulorum excretoriorum opilatione pronascuntur, eximiam certe & pene mirabilem virtutem exerunt, quæ vero unice sali illi essentiali, partim tartariformi, partim nitroso, accepta ferenda est. Hinc fit, ut ob copiam hujus salis eorum extracta non facile sicca sine deliquio asservari in aëre possint, quemadmodum id quoque in sale essentiali, siue terra foliata tartari, item in eo, quod ex vini Rhenani acido & oleo tartari mixtis post debitam inspissationem fit, animadvertimus. Atque etiam ob copiosum sal, quo foetæ sunt dictæ plantæ, tartariforme per combustionem insignem salis alcalini fixi quantitatem elargiuntur. Nam sicut tartarus vini vel etiam nitrum combustionem in sal alcali fixum demigrat; ita salis alcalini ortum, quod comburendo ex plantis elicimus, à sale hoc medio tartareo ducendum esse judicamus.

16. Inter salia neutra eaque saluberrima, quæ sine commixtione acidi & alcali sponte in ipsa natura proveniunt, jure etiam referri nitrum debet, quod terræ sulphureæ, pingues, alcalinæ, animantium stercorea & excrementa, item vegetabilia & animalia in putrefactione posita, neque minus cineres, calx viva, & terræ putridæ, soli & pluviis diu expositæ, ex acido universali aëris, quasi imbibendo & attrahendo, progignunt, cujus virtute in medendo pene divina non facile peritus medicus carere poterit. Est enim hoc sal naturæ animantium ita amicum, ut nullas, nisi nimium usurpetur, non modo creet molestias, sed & ad graves avertendas ægrotudines, quæ ab exsuperante bile sanguinisque & humorum vehementiori ebullitione eorumque nimio æstu proveniunt, nihil datur præsentius; ita ut VERULAMIUS in *Historia vitæ & mortis* huic sali virtutem vitam prorogandi, si sapius ad scrupulum pro dosi detur, non dubitaverit assignare: sique ullum remedium medicinæ universalis titulum meretur, & aquæ communi & nitro eum tribui posse non sine ratione judico. Nam si alvus solvenda, si urina movenda, si transpiratio in nimio æstu, dolore & spasmo liberior efficienda est, certe id optime per nitrum fieri posse experientia confirmat. Porro, si causticam & virulentam humorum biliosorum acrimoniam, quæ cholerae, diarrhoeæ, dysenteriae, immodicæ vomitionis & nausæ, ac febrium biliosarum, ardentium etiam, & gravissimæ ventriculi & intestinorum inflammationis procreatrix est, temperare ac demulcere velimus, nihil certe in tota rerum natura nitro præsentius & efficacius deprehendimus. Si inflammatio partes internas infestat, adeo, ut incendio quasi eæ torreantur, eoque substantificum humidum cum viribus absumatur, atque inexhausta sitis fiat assidueque vigilia, nitrum inter medicinas admissum præcipuum certe curationis punctum fert. Nam inter vera & tuto refrigerantia, febrili & inflammatorio æstui dicata, in natura nitro haud simile reperimus. Si humorum crassities, quæ obstructionibus vasorum & concretionibus polyposis mire velificatur, dissolvenda est, in nitro certe ejusmodi vis residet exoptatissima. Nequaquam enim nitro vis coagulandi humores inest, quod nonnulli aliquin etiam periti contra manifestam oculorum fidem contendunt; quum ad oculum pateat, solutionem nitri depurati cum aqua factam, sanguini coagulato & obscure nigricanti immixtam, eum & liquidiorum & coloratiorum reddere, dum obscuro-nigrum in pulchre miniatum & coccineum colorem convertit. Et quia serum & lympham liquandi virtute gaudet peculiari, exsiccatas partes humectat, duras & confictas emollit, ac tenaces humores fundendo obstructa referat.

17. Præterea, ea quoque est nitri efficacia, ut con-

cretiones salinas tartareas in renibus, vefica, & aliis locis impediatur. Et quamvis ipsius experientiae suffragium hanc veritatem satis luculenter confirmet; placet nobis tamen, ut res fiat apertior, quasdam auctoritates in medium hoc loco adducere. Ita *PENOTUS de Medicamentis chymicis, pag. 57.* calculosis & qui dysuriam passi sunt, siue sint adulti, siue infantes, siue robustiores, siue languidiores, mirifice ejus utilitatem commendat, adeo, ut singulis quatuordecim diebus si fumatur, nunquam arenam in renibus nasci posse polliceatur. *TIMÆUS in consil. consult. 3.* audivit Batavii à Prævotio nephriticum quendam diuturno nitri præparati usu à calculo perfecte fuisse curatum. Et *GRÜLINGIUS in observat. de Calculo p. 120.* scribit: *satis notum est omnibus, sal prunellæ egregium esse auxilium pro præservatione & curatione nephritidis.*

18. Quam gravia eaque spasmodica & flatulenta sanguinis in valis ventriculi & intestinorum stagnatio concitet pathemata, quæ miras in universo corpore creant molestias, id illi potissimum, qui sic dicto malo hypochondriorum vel hysterico laborant, satis luculenter planum ac testatum faciunt. Ego vero ingenue fateor, in tanta remedium silva nullum nitro par reperi, quod tam potenter spasmos solvat, flatus discutiat, dolorumque sævitiam mitiget. Hinc ejus usus in colica spasmodica seu convulsiva non satis digne prædicari potest. Si ab atroci dolore & spasmo transpiratio, vel sudor, vel urinæ fluxus præcluditur, si alvus dura & stricta manet, sanguinisque salutes illæ & consuetæ per hæmorrhoides, per uterum, etiam in puerperis, excretiones deficiunt, nitrum decenter exhibitum spasmos & dolores sedat, & hac ratione, liberiori facto per tubulos itinere, saluberrimos hos fluxus restituit. Quum vero ex iisdem vasorum & viscerum spasticis stricturis validioribus, liberiori sanguinis cursu impedito, tanto major humorum motus & imperus ad alias easque remotas partes subinde contingat, hinc vasa à nimia congestione distenta referantur, & immodicæ sanguinis fiunt profusiones, unde hæmoptysis, nimius narium, mensium vel hæmorrhoidum fluxus, aut mictio cruenta, suam ducunt originem.

19. Si tale quid incidit, summum æque in nitro-sis medicamentis est auxilium, quæ spasmos removendo, non adstringendo, dum liberiores cursum sanguini restitunt, profluvia illa immoderata & enormia sistunt. Ego certe ex omnibus superioris seculi medicis non invenio ullum, qui frequentiori in usu nitrum habuerit ipso *RIVERO*, qui illud cum singulari fructu ad compescendas hæmorrhagias adhibuit, quemadmodum ejus monumenta practica cum observationibus testantur. Ita in lochiis immodice fluentibus, *centur. 1. obs. 96.* item in exsuperante mensium fluxu, *cent. 1. obs. 94.* in hæmoptysi, *cent. 1. obs. 83.* in hæmorrhagiis cum febre maligna, *cent. 2. obs. 18.* nitri usum mirifice extollit. Post *RIVERIUM*, *MYNSICHTUS* nitri usum medicum maximi semper fecit, testantibus id in ejus Armamentario chymico variis & eximiis compositionibus, in quibus nitrum basin constituit.

20. Dicendum etiam aliquid est de aphronitro, quod veteribus & maxime *PLINIO* non fuit incognitum. Hoc in speluncis saxeis ex alto destillat, con-crescit, & partus identidem est salis universalis, quod aër secum vehit, acidi & gypseo-calcareæ terræ. Sal est paululum acris & amaricantis saporis, sed fixum, ac vim ignis sustinet, utpote quum nec fluat in eo, nec flammam concipiat, nec avolet. Hujus salis largiorem copiam non modo spelunca, quæ à diabolo nomen habet, circa Jenæ oppidum, suppeditat, sed in locis etiam subterraneis, cuniculis præsertim è saxo confectis, in magna sæpe abundantia colligitur. Hoc sal

incidentem, diureticam & majori dosi cathartica virtutem possidere, sal Epsomenfi similem, experientis practicis compertum habemus.

21. Sequitur jam ex nativis sal commune, cujus usus sicut inter alimenta saluberrimus, ita etiam ex medicamentorum classe non penitus rejiciendus est. Quanta sit ejus virtus in tardiori movenda alvo & fecibus exonerandis, si clysteribus adjiciatur, ubi ejus una drachma plus valet, quam uncia alicujus laxantis, res vulgo etiam nota est. Interne quoque paulo liberalius assumptum inter cibos alvum expedit; quo nomine maxime haleces comesti laudem merentur. Verum hoc ipsum sal commune quorundam fontium mineralium medicamentorum, cathartica virtute celeberrimum, non raro præcipuum ingrediens esse, nos satis cognitum atque exploratum habemus. Ante quadraginta & aliquot annos Hornhusæ in Principatu Halberstadiensis fontes soterii è terræ sinu prodibant, ad quos incredibilis ægrotantium erat confluxus. Hi fontes, quibus ego tanquam physicus ordinarius præeram, examine instituto, nihil aliud continebant, quam sal commune & aliud falsum instar arcani duplicati, quorum illud in crystallisatione figuram cubicam, hoc sexangularem retinebat: salis vero communis pondus longe alterum superabat. Hi fontes ad tres vel quatuor libras epoti clementer alvum solvendo multas efficiebant sedes; insuper prostratam excitabant appetentiam, & crassos viscidosque humores incidendo ventriculi digestionem egregie inferviebant, corpus alacre & agile reddendo. Habebant præterea peculiarem virtutem anthelminthicam, dum omnis generis lumbricos, inque primis ascarides, magna in copia cum fecibus ejiciebant. Externe discutiebant tumores & scabiem & antiqua ulcera sanabant. Atque etiam ante triginta & aliquot annos in pago Resburg, non procul à civitate Stasfurth, fontes oriebantur, qui potè fortiter sedes movebant, & eandem fere virtutem cum Hornhusanis possidebant. Facto examine, nihil aliud arte potui elicere, quam purum sal commune, qualis Stasfurthi ingens copia excoquitur. Nam ex veteribus monumentis constabat, ante aliquot secula ibi salinas & salis cocturam floruisse.

22. Sed missis hisce fontibus, qui non adeo diu durarunt, ad eos, qui per multa secula ob saluberrimum usum celebres fuerunt, & à sale potissimum communi suam efficaciam mutuuntur, nos convertimus. Hujus generis sunt antiquissimi illi fontes, quorum jamdum *Tacitus* mentionem fecit, Wisbadenses, quorum usus antea omni tempore externus jam ab aliquot annis fieri cœpit internus, quem non satis laudare possunt ii, qui viscerum infarctu, depravata digestionem, & malo flatulento alvoque tardiori laborant; ad uteri quoque vitia, quæ subinde abortum & puerperium excipere solent, corrigenda non sine eximio fructu usurpantur. Cum cura eorum chymicum institui examen, nihilque aliud reperire potui, quam præter aquas pondere valde leves ac subtiles verum sal commune, cum quodam sale alcalino mixtum, quod non modo sapore & crystallis cubicis se manifestabat, sed & ab oleo vitrioli acido admixto copiosissimum fumum valde penetrantis odoris, qualis è sale ammoniaco ordinario exire solet, emittebat.

23. Ad salia medii generis nativa eaque saluberrima pertinent etiam ea, quæ ordinario in omnibus thermis & acidulis Germaniæ continentur, & à quibus etiam celebratissimi hi fontes virtutem potissimam nanciscuntur. Hoc loco communem veterum errorem præterire non possumus, qui de medicatis fontibus quædam prodiderunt. Hi plane aliena & nunquam ibi obvia ex variis terris mineralibus & metallis ingredientia, à quibus eorum virtus deducenda sit, propo-

proponunt, ne ulla quidem eorum, quæ re vera secum habent, elementorum facta mentione. Verumtamen, illud adhuc magis mirum est, quod communis nostro, etiamnum tempore medicorum sententia fuerit, imo adhuc apud plurimos, vigeat, acidulas vitriolico sale esse turgidas, atque eminens acidum custodire, quum tamen plane ipsis contrarium sal insit, nempe alcali, quod vel ex eo patet, dum cum omni acido effervescunt, & medium sal suppeditant; imo plures post evaporationem sal purissimum relinquunt, & quod maximum est, lac affusum fluidius reddunt, tantum abest, ut ullum coagulum ipsi inferant. Et utut plerique fontes minerales inter thermas & acidulas saporis quodammodo vitriolici sint, minime tamen eorum virtus & in medendo efficacia à vitriolico sale dependet; nam paulisper saltem calefacti protinus amittunt hunc sorem & virtutem tingendi cum gallic colore obscure purpureo, manifesto indicio, & pauxillum & volatile illud esse martiale, vel vitriolicum, quod in se habent reconditum.

24. Multo magis argumentari licet, præcipua, quibus & thermæ & acidulæ præstantissimos in medendo edunt effectus, elementa & ingredientia præter spirituosum illud aëreo-aethereum penetrans subtile principium, quod bullulatum salientium causa est, salia esse, five alcalina fixa five media, ad naturam Salis Glauberiani vel tartari vitriolati proxime accedentia, quibus eximia horum vis, qua humores crassos incidunt, resolvunt, obstructions referant, acidum primarum viarum invertunt, & omnis generis excretiones, maxime per alvum & urinam promovent, tribuenda est, quemadmodum id in *Dissert. de Thermis Carolinis, de Acidularum & thermarum ratione ingredientium convenientia, de thermarum & acidularum usu & abusu*, copiose luculentissimeque & medicæ artis peritis & aliis sagacioribus naturæ scrutatoribus ante oculos posui. Ecquis igitur non clare intelligit, quam tuta & plane innoxia atque ab omni vehemente & drastringa vi aliena medicatis his fontibus insint ingredientia, à quibus revera nihil prorsus periculi vel damni unquam metuendum est, ut adeo pateat, harum rerum ignaros medicos valde decipi aliosque decipere, qui ob vanum noxæ metum & vehementem operandi modum ægrotantibus, qui forte adhuc fervari possent, harum saluberrimarum aquarum usum speciosis rationibus dissuadent. Videmus potius ex hisce, quanta vis & energia in persanandis chronicis non raro valde contumacibus affectibus insit salibus, tam mediis, quam alcalinis, si sufficienti aqua diluta & soluta convenienti regimine & tempore assumantur.

25. Illud vero circa salia aquarum mineralium nativa quam maxime dignum observatione videtur, quod, qui præter salem alcalinum salia mediæ naturæ eaque paulo in majori quantitate continent fontes, præ aliis, qui his destituuntur, & copioso tantum sale alcalino foeti sunt, longe majorem cathartica virtutem exerant. Et hæc est causa, quare ex thermis totius fere Europæ nullæ inveniantur, quæ magis alvum sollicitent, ac ipsæ Carolinæ, quum Emsenses, quæ purum sal alcali habent, id parum efficiant. Nam præter alcalinum & salinum terreum principium etiam sal neutrum habent, ex sale alcalino & acido sulphuris compositum. Siquidem ex sale illo thermarum Carolinarum, quod post evaporationem relinquitur, adjecto pulvere carbonum, per fusionem in igne sulphuris hepar, ex quo tinctura sulphuris cum spiritu vini extrahi, & ex cujus decocto cum aqua lac sulphuris præcipitari potest, obinetur; quæ sulphuris vulgaris regeneratio ex sale hoc thermalis præsentiam salis mediæ, & quidem ex acido vitrioli vel sulphuris oriundi, liquido demonstrat; utpote quum sine eo sulphur vulgare & inflammabile de novo com-

poni & regenerari prorsus non possit. Accedit, quod etiam hoc sal, quod ex Carolinis coquitur, utut eminentioris sit saporis alcalini, in aëre, more salium alcalinorum, plane non deliquecat, quod ab acido minerali juncto fiat necesse est.

26. Ex acidulis universæ Germaniæ vix ullæ copiosiores dejectiones ipsis Egranis efficiunt; siquidem ad libras quinque vel sex potæ sex vel octo interdum sedes sine ulla molestia movent; quum Pyrmontanæ tantum ter vel quater ventrem solvant. Selteranæ vero, Antonianæ, *Dünsteiner-Brunnen*, Wildungenses, & in Vogtlandia Elsterianæ, *Elstersäuerling*, in Bohemia Buchenses, *Buchsäuerling*, in alvo movenda admodum segnes sunt, urinæ fluxum magis promoventes. Cujus diversi effectus ratio unice à præsentia salium neutrius generis in hisce fontibus petenda est. Nam ex Egranis debita coctione & inspissatione copia salis mediæ elicitur, quod ad unciam semis cum sufficienti aqueo vehiculo exhibitum alvinas dejectiones satis valide ciet, atque Egræ non adeo caro pretio in ingenti copia venditur. Fontes Schwalbacenses, præter subtiliorem aquam, principium, quo nobilitati sunt, aëreum subtile & sal alcalinum, nec non sal mediæ generis alunt, hinc dejectiendi etiam gaudent facultate salis opportuna, qua aquæ Antonianæ, Selteranæ & reliquæ destitutæ sunt, quia coctione & inspissatione instituta non nisi purum sal alcali obtineri potest. Ego jam olim utilissime patefeci modum, quo ex tempore hi fontes alcalini minus purgantes virtute cathartica satis eximia imbui possunt, ut Egranis & ratione saporis & ratione virium respondeant, quum tantummodo spiritus vitrioli in debita dosi ipsis adjiciatur, qui congregiendi cum eorum sale alcali salem medium, tartaro vitriolato similem, efformat.

27. Nec vero tantum in Germania, sed aliis etiam Europæ regionibus, in Gallia, Angliæ, fontes medicati frigidi, cathartica virtute conspicui, ex quibus etiam coctione sal elicitur ejusdem facultatis, reperiuntur. Inter quos in Angliæ eminent & celebres sunt Ebshamenses, qui ob sal falsum amaricans, quod foveat in sinu suo, alvinas sordes egregie expurgant. Permotus hinc est celeberrimi nominis Anglus, *Nehemias GREW*, ut arte & igne per coctionem salem inde neutrum saporis amaricantis purgantem eliceret, qui etiam peculiarem de hujus salis natura & viribus libellum conscripsit. Hoc ipsum verum & non adulteratum, quod ubivis jam ferme vili pretio venditur, non ita pridem ex Angliæ obtinui, ac relatum fuit, libram medicam aquæ unam vix drachmam ejus dimidiam suppeditare; feci propterea cum eo experimentum, miscendo & fundendo cum pulvere carbonum, & massam inde sulphuream nactus sum purpuream, hepatis sulphuris exquisitè similem.

28. De hoc genuino sale, quas virtutes clarissimus Grew prædicet, commodum nobis videtur, hic breviter enarrare. De eo enim hunc in modum scribit: hoc sal nunquam sua virtute cathartica destituitur; in morbis permultis gravioribus efficacissimum remedium præbere dicitur, nec unquam aliquid mali, si apposite præscribatur, procreat. Purgantium fere omnium lenissimum existit, humores non exagitat, & nunquam ægrotudines, deliquia & tormina excitat. Laudatur hujus salis usus in morbis ventriculi, cardialgia, immodicis vomitionibus, & calida affectione hypochondriaca. Commendatur etiam in intestinorum & uni ventris morbis, in colico & nephritico dolore, vernibus, urinæ ardore & suppressione, ictero, in passione hysterica. Præterea, capitis affectibus egregie opitulatur, atque in cephalalgis, vertigine, deliriis, oculorum inflammationibus cum summo fructu porrigitur. Propinatur in aqua fontana stillatitia, aliave purissima, decocto hordei, avenæ aut lactis sero: aqua etiam parum coqui & mace condiri potest, cujus libræ duæ vel tres salis cathartici semiunciam vel integram unciam pro dosi recipiunt,

29. Verum enim vero, detexi ante aliquot annos quum in Tœplicensibus thermis eas investigandi causa versarer, ex fonte quodam Zetlicensi, qui duobus miliaribus Toeplizio distat, facto accuratiori examine, sal amaricantis saporis & catharticae virtutis, per omnia Epsomenfi simile, ea tantum intercedente differentia, quod libra una medica beneficio evaporationis drachmam unam & dimidiam hujus salis dederit. Aqua, ex qua educitur, est summe amaricantis saporis, ut cum vix lingua tolerare possit, & longe amaricantior ipso sale. Hoc ad drachmas sex sumtum liberalissime purgat, & aqua ad quatuor libras medicas sumta identidem alvum large subducit. Et quum nuper ex Carolinis, procurante illustri sacrae Caesareae Majestatis Archiatro, medico consummatissimo, Domino GARELLI, satis insignem hujus salis quantitatem huc asportaverim, feci etiam cum eo experimentum, eumque cum dimidia parte carbonum pulveris mixtum in ignito crucibulo fundi curavi; ita pariter hepar sulphuris obtinui, tetri sulphurei odoris, coloris purpurei, ex quo rectificatissimo vini spiritu vera tinctura sulphuris aurei coloris extracta fuit.

30. Neque ita pridem prodiit de nativo sale cathartico, in fodinis Hungariae recens invento, dissertatio epistolica, Illustri Archiatro Garelli, qui eam benigne mecum communicavit inscripta, auctore D. Hermannō Neosolensi, qui in cuniculis Neosoli subterraneis album & amaricans sal tenerimum, saxorum lateribus innexum, deprehendit, Epsomenfi cathartico forma & sapor per omnia simile, quum etiam majori dosi sumtum alvum frequentius exercuerit. Ejusdem naturae & virtutis sal postea etiam Chemnitii in fodinarum maxima, *auf der Wind-Schacht*, it. *Dreyfaltigkeit-Stollen*, parietibus cuniculi adhærescens, & nivis instar candidum, saporis itidem amaricantis invenit. Et quoniam cum eodem sale beneficio salis tartari & carbonum verum sulphur minerale produxit, nihil dubii est, quin ejusdem cum sale Epsomenfi & Zetlicensi sit naturae. Hujus salis cathartici mineralis genesis, quod partim humidum in fontibus, partim etiam siccum saxi adhærens habetur, multum mihi convenire videtur cum aphronitro, quod ex acido primogenio aeris sulphureo in faxea, calcarea, gypsea, *Spath* dicta, terra, tanquam matrice sua, coit & coagulatur, & abundantius in montibus excavatis circa Jenam haberi potest, ac ratione formae, saporis, virtutis in igne & corpore humano à sale Epsomenfi, Zetlicensi & Hungarico non differt, sed tantummodo in eo, quod nativum & fossile ex acido sulphureo subterraneo, & alcalinis terris adhærescente progignatur, quod abundantissime ibi reperitur; idque maxime exinde patet, quia ex sale Epsomenfi, Zetlicensi & Hungarico terra quaedam lapidosa, *Spath*, ex parte cum alcali præcipitur, partim etiam facta denuo solutione & depuratione hujus salis cum aqua impetrari possit.

31. Ex hisce omnibus, quæ jam dicta sunt, probe pensitatis liquidissime apparet, quam eximiam & fere incomparabilem virtutem salia mediae naturae nativa, quæ partim in sicca, partim in humida forma prostant, in medendo habeant, & quod majori dosi exhibita, præter alias egregias virtutes, vim cathartica exerant, potenterque, tuto tamen & clementer, alvinas sordes exturbent. Sed à nativis salibus jam ad ea, quæ arte conficiuntur & componuntur, salia neutra, in officinis etiam pharmaceuticis & chymicis non ignota, progredimur, nûm ejusmodi doctes & vires medicinales interque eas catharticae in iis offendantur, maxime inquisituri. Primum vero nobis occurrit illud sal, quod chymica arte ex acido sulphuris mineralis, mixto cum alcalino sale, conficitur. Nam hoc ipsum ad nativi illius medii, quod fontes

minerales medicati complectuntur, naturam quam proxime accedere videtur, unde etiam non dissimiles virtutes ab eo licet expectare. Quum vero specificum illud acidum, quod præcipuum sulphuris mineralis ingrediens est, etiam in aliis salibus mineralibus, ut in vitriolo & alumine, contineatur, varius & multiplex id sal parandi modus existit, utut ejusdem virtutis & efficaciae. Aliud enim ex nitro & vitriolo, adeoque ex aquæ fortis residuo per debitam calcinationem conficitur, & nitri vitriolati nomine venit, quod *Mynsichtus* arcanum duplicatum, quia ex binis istis salibus producit, vocavit, & pro arcano olim habitum fuit in aula Gottorpiensi, dum conficiendi modum Fredericus, Princeps Holsatiae, sat magno pretio, 500. nimirum imperialibus, redemit. Hoc ipsum longe compendiosius parari potest, si nitro in alcali redacto sive fixo vitrioli spiritus guttatim ad saturationis, ut vocant, punctum instilletur. Et certe hic modus longitior est priori, quia vitriolum, quod aquæ stygiae ingrediens est, saepe de venere participat, quæ nisi probe per reiteratam calcinationem separetur, arcanum illud Gottorpiense, si liberalius & ultra scrupulum propinetur, vomitum ciet.

32. At vero, quia sal tartari fixum & probe calcinatum quam parum à nitri fixi indole ac virtute distat, nonnulli idem remedium ex sale tartari & spiritu vitrioli, *Tackenius* ex vitriolo & sale alcali, conficiendum esse existimant, quod alias in officinis tartari vitriolati nomine venit. Et quum spiritus, ex minerali sulphure elicitus, à spiritu vitrioli plane non differat, atque in antimonio purum sulphur minerale sat insigni copia insit, idem sic dictum arcanum duplicatum ex nitro & sulphure, item ex nitro & antimonio, chymici præparare sciunt: illud sal polychrestum appellant, idque ex æquali portione nitri & sulphuris prævia combustionem & calcinationem in crucibulo conficiunt: hoc vero ex antimonii diaphoretici cum tribus partibus nitri & una parte antimonii præparatione, una cum nitro crystallifato obtinent, inque pharmacopœis nitrum antimoniatum salutare solet. Nam si comburitur nitrum cum sulphure, acidum ex nitro valde volatile exhalat, & sulphuris acidum fixius sese uniendo cum alcalino nitri sale sal neutrum constituit, paululum amaricantis saporis, deterfivæ & laxantis virtutis. Ulterius, quia acidum aluminis ab acido vitrioli & sulphuris plane non dissidet, sed similis indolis atque ingenii est, hic idem medicamentum commodè etiam elaborari potest ex alumine cum sale fixo alcalino, sali tartari vel cineribus clavellatis probe mixto & unito.

33. Ex his recte colligere licet, arcanum duplicatum, quod ex residuo aquæ stygiae paratur, & nitrum vitriolatum, quod ex nitro fixo & spiritu vitrioli fit, nec minus tartarum vitriolatum, item nitrum antimoniatum & sal polychrestum, nec non sal purgans aluminis, cujus inventor fuit Keilingius, medicus Islebientis, quod B. HOFFMANNUS in *clave Schræderiana* describit, quia ratione ingredientium plane non differunt, unius ejusdemque indolis, neque minus virium & virtutum medicarum esse, & unum alteri facile in medendo substitui posse; utpote hæc omnia in minori dosi convenienti vehiculo propinata humores viscidos incidunt, dissolvunt, & tubulos excretorios stimulando & alvum servant apertam & urinæ fluxum promovent. Ubi vero in majori dosi ad unciam dimidiam vel ultra cum sufficienti aqueo vehiculo propinantur, non secus ac acidulae operationem suam quinque vel sex sedes movendo exerunt; adeoque ubi purgatione opus est, quæ sine sanguinis ebullitione, sine spasmodica fibrarum intestinalium contractione, sine motuum exacerbatione & virulentia quadam fieri debet, opportunissime hæc salia ad majorem dosin

dofin utique sunt offerenda. In dofi vero pariori & refracta fi unum ex illis cum nitro, fale tartari, cancrorum lapidibus mifceatur, fane habemus fal aperitivum & deterfivum incomparabilis in medendo ufus, quod in omnibus intermittentibus febribus, malo hypochondriaco, calculo, afthmate, colica flatulenta, alvi adftrictione, ictero, cachexia, fummo cum fructu ufurpari poteft.

34. Progreffum jam facimus ad fal illud, mirabile à Glaubero dictum, & mirifice ab eo, tum ad labores chymicos, tum ad medendum commendatum. Id ipfum etiam eft mediæ naturæ, & ex acido vitrioli fortiori & fale communi feu gemmæ componitur, dum nempe acidum vitrioli penetrantius alcalinum & terreum illud fal & principium, quo fal commune conftat, aggreditur, feque cum illo uniendo fal neutrum cum acido falis fpiritu per copiofum fumum in auras avolante conftituit. Hoc eminentis eft faporis amaricantis, atque egregia aperiens & ftomachica medicina, quæ liberaliori dofi largas movet per alvum dejectiones. Mirabile hoc dictum eft à Glaubero, quia fi ejus æqualis portio cum limatura metalli & dimidia cum pulvere carbonum mifceantur, igneque fuforio invicem tractentur, fulphur ex quovis metallo hac ratione extrahi poffe judicavit, dum fpiritus vini dephlegmatus fuperfufus tincturam fulphuream elicit. Verum enim vero in eo Glauberum erraffe, vel exinde fatis apparet, quia, fine metallo addito ex folo hoc fale & pulvere carbonum, fi modo tantillum falis alcalini adjiciatur, fulphuream maffam infar hepatis parari, ex quo verum fulphur minerale educi poffit, variis exemplis Exc. STAHLIUS docuit. Nam hac ratione tantum fulphuris vivi regeneratio fit, quod ex acido peculiari in fulphure contento & phlogifto combuftibili principio de novo componitur, quemadmodum ex oleo vitrioli & terebinthinæ Boyle, atque ex opio & oleo vitrioli ego ipfe perfectum fulphur vulgare deffillatione facta eduxi, & id jam ante XXX. annos in demonftrationibus phyficis propofui.

35. Quum vero hoc fal dictum Glauberianum eadem cum fupra expofitis falibus mediis, arcano duplicato & ceteris ingredientia habeat, nempe acidum fulphuris & vitrioli ac fal alcali fixum, quale etiam in fale communi refidet, teftante id experimento, quo ex fpiritu falis & fale tartari perfectum fal commune fit, recte & non fine ratione inde concludere licet, ex omnibus his dictis falibus cum fale tartari & pulvere carbonum, fufionis caufa addito, tractatis fulphur artificiale produci poffe. Et quoniam, ut fupra docuimus, cum fale Epfomenfi, fale Egrano genuino, fale Zetlicenfi, nativo Hungariæ, thermalis Carolino, idein fieri confpicimus, quifque inde recte conjicere poterit, hæc omnia falia & nativa & artificialia, quum unius naturæ, eorundemque ingredientium & effectus fint; ratione virium in medendo plurimum inter fe convenire & confpirare.

36. Devolvimur jam noftra meditatione ad fal illud purgans mediæ etiam naturæ, quod vili admodum pretio pro fale Epfomenfi jam venditur, & ad plures centenarios ex Anglia ad nos advehitur. Id certe non genuinum effe, ex aquis Epfomenfibus extractum, facile ex exigua quantitate falis in his aquis contenta & vili pretio, quo vulgare conftat, conjici poteft. Nihilo minus tamen ejus virtutes & aperitivas & purgantes non rejicere, fed potius plurimum commendare & extollere debemus, multiplici experientia edocti. Eft vero hoc fal artis productum & fali Glauberiano admodum fimile, quum etiam illud ipfum pro fale Epfomenfi venditur; fed quia hujus pretium valde carum eft, præ noftro, dubitandum utique minime eft, quin ad exemplar falis Glauberiani hoc ip-

fum ex vilioribus & facilioribus ingredientibus præparetur. Quod etiam revera fic fe habet, liquidem ex capite mortuo vitrioli, five vitriolo bene calcinato & lixivio, in falis coctura refiduo, quod vocatur *Salz-Mutter-Lauge*, & præter fal commune fal alcali terreum fecum habet, non nulli ex chymicæ artis peritis in Anglia parare iftud folent; quemadmodum etiam Cl. LENTILIUS in *Mifcell. Nat. Cur. Cent. 3. & 4. obf. 173.* id probe & recte notavit. Fecimus cum hoc ipfo experimentum, tractando id per ignem calcinatorium, admixto pulvere carbonario, fed renuit fufionem; igne vero aciori adminiftrato, totum fere avolavit, cum ingenti tetro vapore & foetore fulphuris vulgaris, quo totum conclave repletum fuit. Adjecto vero fale tartari, hepar fulphuris impetravimus. Quo utique certo convincimur, ex fulphuris acido, quod vitriolo ineft, cum terra falis marini vel alcalini nupto, ortum & natales hujus falis effe deducendos.

37. Miffis itaque his falibus, quorum ortus ex acido fulphuris & fale alcalino eft, ad alia, quæ ufum in praxi habent, remedia eorumque naturam confiderandam nos convertimus. Sunt vero hæc primo fal ammoniacum, cujus genesis ex fale volatili urinæ vel fuliginis & fale marino eft, quod ab addito urinofo volatili principio longe majorem & acrimoniam & penetrantiam acquirit, & ob id etiam attenuandis & difolvendis cruditatibus primæ regionis vifcidis, tenacibus medicina eft aptiffima. Et hoc folo fale Cl. MUYS, Medicus Batavus, in peculiari Tractatu omnium febrium intermittentium certam ac plenariam promittit fanationem, fi appofite, decenti dofi & tempore ufurpetur. Sed ego crediderim, hoc remedii genus magis robustioris naturæ hominibus & Bataviæ incolis, quam tenerioribus & delicatioribus proficere.

38. Ejuſdem commatis ac virtutis eft fal fic dictum Sylvii digeftivum, quo frequenter hic medicus ad confumendas cruditates vifcidas, ad appetitum & digeftionem proſtrataſt reſtaurandam, atque ad abigendas intermittentes ufus eft, idque ex fpiritus falis ammoniaci cum fale tartari parati refiduo per elixivationem cum aqua conficitur. De hiſce falibus id certum eft, quod majori doſi etiam alvum vehementer ſolvendi facultate polleant. Autor tamen ſuaſorque ſum, ut à liberiori ſalium horum doſi in curandis morbis abſtineamus, quandoquidem, niſi ejus acria ſpicula vifcoſis & tenacibus particulis in corpore quadatenus involvantur, & niſi humido ſufficienti diluta fuerint, facile contextum inteſtinorum villoſum & glanduloſum deſtruiere poſſunt. Proſtant porro in uſu ex tartaro, item ex aceto & falibus vel alcalinis corporibus ſalia mediæ naturæ, ut ſunt tartarus tartariſatus, fal eſſentiale, five terra foliata tartari, ſolutio oculorum cancri, fal coralliorum, matris perlarum, quæ eximie virtutis ſalia olim magno in pretio habita fuerunt, præſertim à Tackenio, qui terram foliatam tartari cum ſolutione oculorum cancri mixtam pro fale viperarum fixo venditavit, ingentem pecuniæ ſummam inde lucratus. Habent hæc ſalia id potiffimum peculiare, ut ad ſanguinis maffam propter ſubtilitatem ſalinarum partium magis penetrent, quam alia ſalia, item quod per urinarias vias noxios humores eximie è corpore exturbent.

39. Hactenus fuſius deduximus, ſalia media ſere pleraque, præſertim quæ amaricantis ſaporis ſunt, valde eximiam validamque alvum movendi obtinere facultatem, idque ſtimulo ſuo, quo tunicas inteſtinales nerveo-muſculoſas laceſcendo motum periftalticum auctiorem reddunt, perficere affirmamus. Huic aſſerto poſſet quiſpiam opponere, quod etiam medicamenta, omnis ſaporis ſalini, ejusque amaricantis expertia, penitus inſipida, non ſecus ac ſalia illa, vehem.

vehementer subinde intestinalem proritare soleant purgationem, quemadmodum id in magnesia, pulvere levissimo, insipido, candidi coloris, omnis stimuli experte conspiciamus. Verum enim vero, exponendum hoc loco utique est, quomodo magnesia vim suam exerat purgantem. Certe id non ob terreum suum alcalinæ indolis, quo constat, principium efficit, sed quoniam hoc medicamentum cum quovis acido vehementer effervescent, eoque solvitur, atque in solutione saporem valde salum, amaricantem acquirit, qualis non ab ullo alio alcali terreo, sive lapidibus cancrorum, sive conchis, vel ovorum testis exsurgit; certe hinc concludere licet, magnesiā tunc demum purgare, quando ab acido in ventriculo stabulante dissoluta in sal tertium amaricans convertitur, quod etiam experientia confirmat, qua constat, hypochondriacos optime hoc remedio purgari, minime vero eos, quorum ventriculus crassa & viscida pituita repletus est.

40. His igitur deductis jam liquidissime demonstratum esse arbitror, id quod instituti nostri fuit, salia mediæ naturæ eccellente in medendo gaudere virtute aperitiva, detergente, omnis generis excretoria stimulante, & sub majori dosi etiam cathartica, satisque in aprico est, hujus naturæ salia omnium esse saluberrima, & naturæ amicissima, quibus nec medicus carere, nec facile damnum inferre possit. Veruntamen plura hic in contrarium moveri posse video, quoniam & frequens usus & attenta observatio docet, etiam medicamenta, acido excessivo prædita, imo volatilia urinosa, & alcalina fixa inter optima & classica remedia sibi adhuc locum tueri ac vindicare, tantum abest, ut naturæ corporis humani inimica, vel insalubria dici mereantur. Quibus omnibus id reponendum esse existimo, neque acida, neque alcalina, sive fixa sive volatilia, unquam proficere, aut salutarem effectum in medendo præbere, nisi ea cautione à medico perito administrantur, ut à dispositione humorum interna & præcipue eorum, qui primis in viis consistunt, in sal medium tertiæ naturæ mutantur, atque hac ratione naturæ corporis, id est fluidis & solidis partibus, blanda & amica reddantur.

41. Propterea, quando copia bilis, præsertim alcalinæ oleosæ, in flexura duodeni collecta & stagnans fortiter genus nervosum afficit, & hac ratione sæpe vomitus biliosi, nausæ, appetitus prostrati, calor lentus, cephalalgia, febris etiam ardentis, aut inexhaustæ sitis causa est, tunc certe acidula, ut sunt julapia,

refrigerantia vel alii spiritus minerales acidi dulcificati egregiam præstabunt opem. Ubi porro intensus febrilis æstus, à fortiori motu intestino partium sanguinis sulphurearum ortus, ipsam sanguinis temperati texturam nimium destruendo corpus & ipsas vires penitus exhaurit, ibi acida plus proficient, quam salia media, alcalina, vel alia remedia, quia particulas sulphureas, à quarum motu fit calor, figendi & enervandi facultate gaudent. In morbis malignis, qui ex interna humorum putredine nascuntur, ab acidis revera plus auxilii, quam ab ullo alio remedio expectare possumus, & quidem ob hanc causam, quia per putredinem gignitur alcali, & à copioso etiam alcali provenit, quod quum protinus ab acido cicuretur, putredo sistitur. In scorbutico & arthritico inveterato malo copiose salia in massa sanguinis generantur, quæ certe magis ad alcalinam lixiviosam, quam mediam naturam pertinent. Hinc etiam eorum sanguis è vena ductus tenuis & floridus subinde apparet, & urina plerumque valde rubicunda & falso-lixiviosa emingitur. Plus sæpe tunc præstare acida temperata, quam alcalina urinosa & volatilia aut calida spirituosæ, minus peritos experientia certissime docebit.

42. Quod attinet ad medicamenta, quæ sale alcalino fixo sive volatili foeta sunt, iis certe non indistincte & promiscue uti oportet, utut prudenter usurpata egregiam utilitatem afferant. Nam quandocunque nimia acidorum succorum copia primam regionem infestat, & gravia symptomata, ut videmus in hypochondriacis, hysteriis, melancholicis, concitant, ut sunt ventriculi & intestinorum rosiones, anxietates, ventriculi inflationes, cardialgiae, tussis stomachales, cephalalgia, nimia alvi adstrictio vel dejectio cum tenesmo, ventriculi ardor; tunc certe alcalina terrea, præsertim cancrorum lapides, conchæ præparatae, vel solum oleum tartari per deliquium, plus præstabunt, quam ulla alia, quia acidum absorbendo in sal neutrum convertunt, quod deinde facile & sine offensa per tubulos excretorios transit atque educitur. Si vero acidi potius defectus, quam exuperantia in primis viis est, eæque copiosa tenacium viscidorum humorum colluvie refertæ sunt, profecto copiosius ingesta alcalina terrea multum afferunt detrimento. Nam quia non solvuntur, sed potius cum particulis terreis limosis se jungendo pituitam augent, hinc appetitum proflernunt, ventriculum gravant, orificia vasorum lacteorum obstruunt, neque minus alvum segniorem reddunt.

D E

MANNA EJUSQUE PRÆSTANTISSIMO
IN MEDICINA USU.

§. I.

Vitam cum sanitate non tantum ingestionibus, sed maxime etiam excretionibus sustentari atque absolvi, indubia plane in re medica est veritas. Tametsi vero tam multa, tamque diversa hunc in finem in machina corporis nostri sapientissime constructa sint organa, per quorum ostia jugiter superflua, inutilia & noxia foras dimittuntur: vix tamen ulla excretionum est, quæ, si à perspiratione longe saluberrima discedimus, tam insigniter vitæ ac sanitati patrocinetur, quam illa, quæ per alvum succedit. Hujus enim beneficio, non solum crassioris naturæ & ab extractis alimentis residuæ effoetæ sæculentiæ, nec non plures

alieni, falso-sulphurei, biliosi, mucidi & lymphatici in glandulosis intestinorum tunicis separati humores in maximam sanitatis tutelam excluduntur; sed ipsi etiam morbi mirifice debito ejusdem successu levantur; ita prorsus, ut hac deficiente, neque acutarum, neque chronicarum passionum, tuta ac felix succedat sanatio, & providissima natura, sæpe has sibi eligat vias, quibus id, quod in vitio est, exturbet & ægritudines expugnet.

2. Quare is qui salutis & integritati corporis invigilat, utique exactam quidem saluberrimæ hujus excretionis habere debet rationem summaque cura providere, ne unquam alvus officii sui obliviscatur; sed multum etiam interest, ut congrua seligat remedia, qui-

quibuscum tuto & sine subsequente noxa eandem expedit. Etenim amplissimus quidem pharmacorum est apparatus, quæ in purgantium classe ad alvum solvendam commendantur; at hæc ita sunt comparata, ut iisdem uti anceps admodum sit, quin plane damnosum. Nimirum, inest validioribus purgantibus acre & virulentum salino-sulphureum elementum, quo non modo nerveas ventriculi & intestinorum tunicas agrediuntur & fortiori spasmo exagitant, sed etiam vehementi crispatura biliosum & lymphaticum humorem copiosius exprimunt, & delassatis nimium & resolutis motricibus fibris, magna peristaltici motus excipiat imbecillitas, & deficiente bilis stimulo, nec non lymphæ intestinalis lubricatione, alvus post eorum usum magis constipetur & occludatur. Accedit, quod drastica hæc remedia tam pernicialis indolis sint, ut teneras & valde sensibiles intestinorum tunicas nonnunquam graviter lædant & plane arrodant, aut spasmus longius in reliquis nervoso-musculosas corporis partes explicando, dira tormenta & gravissima progignant mala.

3. Repudiatis itaque merito omnibus his quæ violenter & virulentia quadam naturam laceffunt, ejusmodi potius instrumenta & remedia in usum vocanda sunt, quæ temperatius stimulant, naturæ amica sunt, & nullam noxam iis, in quibus operantur partibus, affricant: quo nomine virtutis longe præstantissimæ sunt laxantia & lenientia, à veteribus ob id *benedicta* nuncupata. Sicut vero lenientium & laxantium affluens pariter est copia: ita facile patet, non unam eandemque omnium esse utilitatem atque præstantiam, sed alia aliis esse præstabiliora, tutiora magisque proficua. Sunt enim nonnulla ex horum familia, quæ licet mitioris & temperatæ sint indolis: nihilo minus tamen sanguinem nimis commovendo, aut flatu gignendo, nonnunquam detrimentum inferunt.

4. Sed omnis ejusmodi infestæ qualitatis expertus, & præterea spectatissimæ virtutis est *manna*, vel ipsa denominatione ipsoque sapore, gratissimum suavissimumque medicamentum: ut certe mirandum sit, quod nobilissimi hujus laxantis eximia virtus inter medicos pæne evilerit, & vix quispiam sit, qui eandem curatius perspexerit & ad usum traduxerit, multo minus pro dignitate exposuerit. Quare non incongruum aut infructuosum fore duxi, si præstantissimi hujus medicamenti pertractationem uberius paulo & perveſtigatius susciperem: & maxime quidem præclaras & multiplices experientias confirmatas, quas in mendo possidet, vires enucleate traderem.

5. Dum itaque constitutum est, de manna ejusque insignissima in arte medica utilitate differere: rerum dicendarum ordo exigere videtur, ut prius de iis, quæ ad plenioris hujus medicaminis cognitionem faciunt, sermonem instituamus, & tum eximium illius in variis morborum generibus usum, explanate tradamus. Quum vero mannæ vox latius tantisper pateat, & plura sint, quæ hac denominatione insigniantur: haud supervacaneum fore putavimus, si paucis præmoneremus, quo sensu nobis veniat. Est nimirum hæc vox originis Hebraico-Syriacæ, & proprie denotat donum gratiosè immissum, sine vinculo obligationis, quo teneatur is, qui illud elargitur. A propria hac significatione translatus fuit verbum *man*, primum in sacris litteris, ad illud cibi genus, quo populus Israeliticus, ex singulari Dei clementia, in deserto per quadraginta annos vitam sustentavit. Et quum hoc alimentum antelucano tempore roris instar in terram descenderet, & præterea saporem referret subdulcem, ulterius translatio facta, ut Græcis & Latinis manna postmodum idem esset, ac ros melleus matutinus, prout notat CÆLIUS *lib. XIII. c. 46*. Tandem vero sensu strictiori mannæ denominatio imposita est

Frid. Hoffmanni Oper. Tom. VI.

à veteribus medicamento cuidam, quod roris progeniem esse opinabantur, ut adeo medicis manna audiat, substantia illa grumosa, ex albo flavescens, saporis dulcis, subacris & pinguis, virtute laxante instructa, de qua nobis in præsentiarum sermo erit. Præter hanc, datur adhuc alia manna, quæ vocatur thuris, & nihil aliud est, quam micæ thuris, concussu, dum convehitur, elisæ, teste PLINIO & GALENO *de compos. medicam. lib. IV.* ob figuram forsitan & colorem mannæ nomine insignitæ. Denique mannæ etiam nomen gerit semen graminis dactyloidis esculenti, semini milii solis non absimile, quod in *Silesia & Polonia* confiniis pullulat, ita vocatum, quod ex vulgi opinione ex aëre decidat.

6. Hisce præmissis, primum jam meditationis nostræ argumentum erit, ut mannæ hujus medicæ natales ac genesin perveſtigatius paulo rimemur. Quod si vero eorum, qui hoc de argumento nonnulla prodiderunt, monumenta evolvimus & curatius perlustramus, in tres potissimum partes medicorum de mannæ generatione abire sententias, deprehendimus. Nimirum, CHRISTOPH. à VEGA singularem plane confinxit mannæ ortum, autumans: eandem adhuc liquidam, guttatim ex cicadis & apibus parvis defluere, foliis imponi & solis calore indurari. Sed quemadmodum hæc opinio omnium maxime à veritate recedit; ita merito à B. parente meo in *clav. Schroeder. p. 637.* tanquam imaginaria & falsissima explosa est.

7. Alia magis trita & à veteribus tantum non omnibus exposita sententia est, quæ mannæ natales ex aëre arceſſerunt & exhalationibus suavis sulphureis, à terra & aquis solis calore prius in die calida & sicca elevatis, & frigore sequentis noctis condensatis, ac demum sublucanis horis in arbores & terram roris instar delapsis tribuerunt. Nam PLINIUS *H.N. lib. XI. c. 12.* auctor est, quod veniat ex aëre & maxime siderum exortu sublucanis temporibus, & sive sit coeli sudor, sive quædam siderum saliva, sive purgantis se aëris succus. Et GALENUS *de aliment. facult. lib. III. cap. 3.* mannâ vocat mel aëriam, & memorat, quod peritis naturæ interpretibus halitus è terris & aquis prodeuntes, solis calore exacte attenuati & cocti, à frigore secutæ noctis in unum coacti & condensati esse videatur. His accedunt ZACUTUS LUSITANUS *Med. Princ. hist. pag. 949.* nec non in *Pharmac. pag. 88.* FUCHSIUS *de comp. med. lib. I. cap. 76. Opp. pag. 111.* SCHROEDERUS *Pharmacop. medico-chym. pag. 256.* nec non alii, mannâ itidem pro rore melleo, ex aëre descendente, venditantes. Inprimis MATTHIOLUS *comment. in lib. I. Dioscorid. p. 95.* acriter in contrarium sentientes invehens, contendit, quod manna sit quidam ros, sive liquor suavis, qui ex aëre veniens sublucanis temporibus, brevi temporis curriculo coalescens, grumulosus, gummi in morem efficiatur.

8. At vero, præter ea quæ itineribus in loco mannæ feraci de ejus genesi comperta sunt, plures & momentosæ sunt rationes, quæ luculenter demonstrant, eam neque rorem, neque roris esse progeniem: ut etiam FALLOPIUS *Opp. Tom. I. pag. 114.* de hujus sententiæ veritate dubitare inceperit, & alii clarissimi viri eandem gravissimis argumentis oppugnarint & confutarint. Quod si enim manna ros esset aut roris foetus, procul dubio ad caloris occursum colliquesceret & absumeretur, aut omnes herbas, arbores, rupes, totumque ejus tractus solum irroraret; sed notum est, quod à solis æstu condensetur potius, & nonnisi in certis quibusdam arboribus, deprehendatur, ac in his quidem modo parcius, modo copiosius, prout nempe magis vel minus succo turgent.

9. Succedit tertia, eaque ad veritatem maxime accommodata de mannæ origine sententia, qua asseritur: eandem esse succum nutritium ex arboribus, fraxino maxime & orno stillantem, aut prolectum.

C

Nam

Nam sicuti in genere notandum, quod rores sic dicti mellei, è coelo in arbores & maxime frumentorum species defluentes, nostra quidem sententia, inter non entia sunt referendi; eo quod, non tam in superiore, quam averfa & supina foliorum parte concreti inveniuntur, & præterea certis tantum vegetabilium speciebus, nec omnibus eidem plagæ ac regioni expositis arboribus, fruticibus & plantis insident: ita profecto ad veritatem quam maxime accedit, substantiam illam roscidam, subdulcem, pinguiusculam, quæ circa solstitium, æstivum maxime, tempestate præcedente fervidissima, in frumentis, præsertim tritico & secale, post pluviam tenuiorem delapsam, deprehenditur, non nisi succum esse nutritium, qui in tubulis plantarum concretus subsistit & stagnat, ac solis calore dulcescit & quasi maturefcit; accedente vero postea pluvia, in canaliculorum alveis dissolutus, ad extremitates culmorum propellitur ibique erumpit. Accedit, quod melleus hic succus, ex secale potissimum exsudans, insignem alvum movendi virtutem possideat, si culmi eodem obfiti decerpantur; eodem plane modo, ac notum est, quod succus ex tenuioribus adhuc framenti foliis, vulgo *der Saat*, expressus, aut infusione cum aqua calida extractus, egregie alvum subducit. Inprimis autem efficacissime hanc nostram sententiam adstruit succus ille nutritius subdulcis, qui primo vere, ex vulnerato betulæ cortice prolicitur & colligitur; quandoquidem, si evaporationis moderatæ beneficio condensatur, instar mellis concrefcit & itidem facultate laxante instructus est.

10. Quare nullum utique dubium est, quin mannæ natales eidem origini, succo nempe arborum nutritio debeantur: ita ut fraxini potissimum & omni succus, in Calabria, Apulia & Sicilia, calidissimis locis, acuto solis æstu ad maturitatem subdulcem perductus, rore nocturno in æstuosis ejusmodi plagis frequentissimo, & interiora arborum facile pertranseunte, eliquetur, in foliorum flamina protrusus erumpat, aut facta incisione ex trunco effluat, solisque igne tandem spissescat & coalescat. Confirmatur id maxime testimonio & propria observatione JO. RAII, quam *Sam. DALE in pharmacop. p. II. pag. 449.* nec non CHARRAS *in pharmacop. Reg. pag. 300. seqq.* allegant. Is enim quum in Italia peregrinationis causa commoraretur, curiosius in mannæ genesin inquisivit, & comperit habuit, quod eadem in arboribus fraxini de industria tectis, ut rori omnis aditus intercluderetur, reperta fuerit. Et idem auctor aliorum fide confirmat, quosdam ramos arborum linteo involvisse, aut plane præcisos in cellis per noctem recondidisse, & nihilo minus mannâ in iisdem concretam collegisse.

11. Est itaque manna succus nutritius, qui ex arborum foliis, vel cortice, aut sponte exstillat, aut prolicitur. Contingit autem hoc in plurimis regionibus, unde varia etiam mannæ prostant genera. Scilicet, datur manna liquida, HIPPOCRATI ex quorundam sententia mel cedrinum vocata, cujus uber admodum proventus est circa montem *Sinai*, teste LINSCHOTO. Aliud mannæ genus largitur *Persia*, ex spinoso frutice, quem Arabes *Algul* & *Alhagi* vocant, semen coriandri figura & magnitudine granorum referens, auctore RAUWOLFFIO *in itinerario*. Nota porro est mannæ species, quæ ex *Syria* adfertur, veteribus maxime cognita, & ab ipsis in mastichinam, optimam, & bombycinam, ignobiliorem, distincta, de qua MATTHIOLUS *Comment. in Lib. I. Dioscorid. pag. 94.* pluribus agit. Denique etiam ex *Armenia* adportatur manna, quæ id peculiare obtinet, quod frustis majoribus pugni magnitudine constet fuscique coloris sit. Omnium vero copiosissime manna in *Sicilia*, *Apulia* & *Calabria* stillat, unde etiam ad nostras oras defertur, & à patria dicitur *Calabrina*. Quare quum *Calabrina*

hæc manna recepti tantum in nostris officinis pharmaceuticis sit usus, missis reliquis speciebus, huic potissimum exponendæ immorabimur.

12. Ut autem hoc nostrum propositum eo felicius exsequamur, ipsum mannâ Calabrinam eliciendi & colligendi modum tradere juvabit. Quem quum omnium optime ex JO. RAIIO, aliorumque testimonio confirmatum consignarit CHARRAS *in pharmac. reg. pag. 300. seqq.* licebit ex hoc auctore depromere, quæ scopo nostro maxime erunt accommoda. Is autem perhibet: quod manna sit succus, manans quum sol cancri signum ingreditur è fraxino vulgari, aut ex sylvestri, quem ornum vocant. Hunc succum singulis annis colligi tempestate calida, non imbrifera, circa vel paulo ante caniculares dies & sextiles pluvias, eo quod simul ac pluuere incipiat, stillare cesset. Triplex vero esse hujus mannæ Calabrinæ genus, unum, quod Italis *manna di corpo* audit, esse elegantissimum & aut sponte defluere ex trunco & ramis arboris crassioribus, liquoris crystallini instar, & in grana candida vel majora vel minora concrefcere, quæ postridie, postquam ex arbore exsudarunt, summa cura colligantur, ne à pluviis aut nebulis iterum collescant. Aut corticem arboris exorto sole cultellis tenuioribus dividi, & liquorem exeuntem illico colligi in vasa, & chartæ inditum soli ad resiccationem exponi. Secundam speciem vernacula dici *Forcata*, h.e. coactam, & ex iisdem arboribus, quum prior sponte stillare desit, mense Augusto elici, incisione facta per corticem ad lignum usque, ex hac à meridie ad decimam usque noctis mannâ per rivulos quasi copiose manare, & postridie foli obversam exsiccari; hanc tamen minus probari, ob flavedinem & quod turbida admodum sit: Tertiam speciem vocari, *manna di fronda*, & sponte prodire sudoris instar ex foliis arborum, quibus insidentes erumpentes guttæ indurentur. Sed postremam hanc non tanta cura colligi, eo quod agerrime divellatur à foliis.

13. Est autem manna antiquissimum medicamentum, quod priscis medicorum aliisque rerum naturalium ex veteribus peritis jamjam innotuit, utut HIPPOCRATI non adeo cognitum fuisse videatur. Nam superius jam meminimus, quod PLINIUS & GALENUS de ejus origine quædam prodiderint: MATTHIOLUS autem *l. c. p. 9.* memorat, quod dudum ante horum tempora ejus mentionem fecerit THEOPHRASTUS, Hesiodi auctoritate *Lib. III. cap. 9. de plantarum historia*. Sed quia nullus horum de mannæ usu & purgante facultate mentionem injicit, eandem ipsis incognitam & ab Arabibus demum perspectam fuisse verisimillimum est. Arabes enim medici ut AVICENNA, MESUES, SERAPION, AVERROES, quum affluens apud illos esset mannæ proventus, non solum passim ejus sub nomine *Tereniabin siracost* & *mellis de Cusuram* mentionem injiciunt, sed simul etiam varios illius usus & miras virtutes primi exposuerunt, asserentes, eandem temperamento symmetram & in activis primo ordine calidam, in passivis temperatam esse.

14. Horum vestigiis postmodum institerunt ii, qui in Italia artem exercuerunt, inprimis BRASSAVOLUS, RVELLIUS, FERNANDUS alique, & frequentissime manna maximo cum emolumento usi sunt in gente, quæ ob exquisitam generis nervosi ténitudinem & sensibilitatem, acriora & validiora pharmaca ferre non poterat. Serius autem in Germania eique conterminis temperatis regionibus præstantissimi hujus remedii usus exsplenduit, quandoquidem medici robustis, firmis & minus mobilibus Germanorum corporibus, lenè ejusmodi medicamentum minus accommodum & sine effectu fore opinabantur. Sed hunc errorem fa tanque persuasionem ipsa postmodum experientia irretragabili testimonio confutavit.

15. Expofitis fic quæ de mannæ origine & geneſi, nec non antiquiſſimo ejusdem uſu præmonenda erant: progredimur nunc ad exactiorem ejus contemplationem, examinaturi, quibus elementis agat & quem potiſſimum edat effectum. Quod ſi igitur principia, quibus manna componitur, curioſius rimamur, animadvertimus, quod in eadem ſubtilis quædam & volatilis acrimonia deliteſcat, quæ promte diffilatur atque exhalat, quo fit, ut non ſolum vetuſtate inertiam contrahat, & diuturna, aut vehementiori coctione, plurimum efficaciz ſuæ perdat, ſed etiam ut nauſeoſus ſubacris ſapor guſtu ſeſe in ſenſus ingerat. Quapropter, quemadmodum in genere pro comperto eſt, crebriores alvi dejectiones fieri à motu perſtaltico inteſtinorum auctiori & celeriori, hunc vero ſulcitari maxime ab iis, quæ ſubtiliſſima quædam & penetranti acrimonia, tenuiſſimas tunicarum inteſtinalium fibrillas nerveas, quibus ſeſe intime inſinuant, attentant & ſtimulando ac vellicando, eas ad contractiones ſyſtalticas celeriores & magis repetitas animant; ita facile patet, idem acre ſubtile, volatile ſalino-ſulphureum in manna contentum elementum, eandem parî virtute inſtruere, alvum nempe ſtimulante ac movente.

16. Quia vero hæc, qua purgantia operantur acrimonia, varii generis eſt, non modo ratione ipſius ſuæ magis cauſticæ, fixæ, vel volatilis indolis, ſed etiam, prout magis vel minus cum particulis ſulphureis, vel etiam mucilaginofis, terreis aut amaris unita eſt atque permixta: diverſi etiam eorum tam in evacuando, quam alterando contingunt effectus, ita ut unum præ alio tutioris ac præſtantioris ſit efficaciz. Jam ſi conſideremus ſubſtantiam illam mucilaginofam, temperatam, dulcem, terro-oleoſam, cujus commodiſſimo hoſpitio acre illud & ſtimulans in manna elementum excipitur: in proclivi eſt judicare, eandem potiſſimam, blandam nempe & clementem, nobiliſſimæ ſuæ facultatis partem ab illa trahere. Nam in propatulo eſt, omnia mucilaginofa & terrea egregie humectare, emollire, partes duras delinire, ſalinas, acidas, bilioſas, nec non alias acres volatiles particulas contextu ſuo & involucro mucilaginofa temperare & obducere, & ſic ſubmovendo quæ excretionem retardare poſſent, eandem facilitare ac ſecundare: ut adeo nullum plane dubium ſit, quin dulcis hæc & mucilaginofa mannæ ſubſtantia, cicurando acrem noxiarum humorum indolem, ipſiſque viam ad commodum exitum pandendo, egregie ipſi evacuatorio effectui velificetur.

17. Quod autem ſucci mucilaginofi & ſubdulces vegetabilium inſigni facultate temperante, emolliente & laxante polleant, non ſolum ex iis pateſcit, quæ ſuperius de ſucco tenuiorum & recentium pullulantis frumenti foliolorum expreſſo, nec non ex betula ſtilillante memoravimus, ſed etiam aliorum ſuccorum, maxime cum ſaccharo ſubactorum exemplo, luculenter adſtruitur & confirmatur. Præclaro hujus rei argumento ſunt ſuccus piſorum, cicerum rubrorum, pomorum dulcium, recentium & putridorum, ſyrupus de pomis putridis, ſuccus prunorum, malorum Armeniacorum, florum perſicorum, acaciæ, roſarum, & ex iis parati ſyrupi, rob paſſularum majorum & minorum, ſambuci, ſuccus liquiritiæ, polypodii, de ſpina infectoria, nec non ipſum mel, pulpa caſſiæ, myrobolani, pruna Damalcena aliaque ex vegetabilium familia deprompta, & ſucco dulci turgentia.

18. Quum itaque mannæ ea ſit indoles & tam præſtans facultas, ut non ſolum alvum officii ſui admo-
neat, ſed etiam corrigente & temperante facultate polleat: recte utique hæc ipſa tanquam clementiſſimum purgans, tutiſſimum & naturæ amicum, ſummo in pretio habenda eſt. Nam licet, aucta inprimis doſi, primas vias ab omnibus fordibus efficaciffime repurget, & ad tres vel plures uncias aſſumta, in quibusdam

vel viginti ſedes non obeat: nihilo minus tamen tam mira tanque ſalubris ejus eſt virtus, ut ſine dolorum tormentis, virium proſtratione, ſanguinis ebullitione, fitis & pulſus augmento, aut præternaturali calore, effectum ſuum promte exſequatur. Quare in genere de nobiliſſimi hujus medicamenti uſu id pro certo affirmari poteſt, quod latiſſime pateat, & longe præſtantier, multoque pluribus accommodatus ſit, quam ullius alius lenientis vel purgantis medicaminis: ita, ut peculiaribus quibusdam virtutibus ſplendeat, quarum alia alvum vacuantia medicamenta plane ſunt expertia.

19. Ea vero hujus remedii eſt facultas; ut omnis generis humores, tam ſeroſos quam bilioſos & acidos, promtiſſime è corpore educat: quandoquidem bilioſorum acredinem ſimul contemperat & involvit, acidorum vero occuſu, prout reliquis purgantibus ſolemne eſt, neque ligatur, neque infringitur, ſed ipſos potius cicurando, ut per ani ſeceſſum exturbentur, efficit. Porro, ejus uſus maxime accommodus eſt omnibus iis, qui ob virium debilitatem & exquisitam generis nervoſi ſenſibilitatem, aciora ferre non poſſunt, & tamen à ſaburra prima in regione contenta liberandi ſunt: cujuſcunque ætatis, ſexus, temperamenti & nationis ſint. Quare ſcite non minus quam ex vero præſtantiffimas mannæ virtutes compendio complexus eſt ZACUTUS LUSITANUS *Medic. princ. hiſt. Lib. VI. hiſt. 8. pag. 951.* dum inquit: *Manna in omni temperamento exhiberi poteſt; corpus enim impurum ab excrementis purificat univerſum, præcipue à bile, detergit peſtus, lenit, & viſcidos ex thorace humores, unaque tenues, citra capitis aut ſpiritualium partium noxam, expellit, viſcera firmat, roborat ventriculum, ſanguinem puriorem reddit, exhilarat cor, auget ſpiritus, ſitim ſedat, appetitum excitat; demum nulla eſt corporis pars, quæ ex ejus uſu mirabile levamen utilitatemque maximam non ſuſcipiat.*

20. Inprimis autem per experientiam compertum eſt, quod manna admodum proficua ſit infantibus. Sæpiſſime enim contingit, ut lac in ventriculo ſtagnans coaguletur, & conſermentatione cum bile facta, enormem acredinem, quin plane corroſivitatem inducat, & ad ſenſibiles inteſtinorum nerveas tunicas delatum, ſæva ventris tormina, cum inquietudine, convulſionibus & lethalibus ſæpe epilepſiis concitet. Hinc ut exſuperans & rodens acrimonia contemperetur, & corruptus humor educatur, primaria utique medentis erit intentio. Hanc autem ut ex voto impetret, neutiquam aciora purgantia & evacuantia accommodata ſunt præſidia; quippe quæ, efficaciter quidem purgant, ſed ob ſummam nervearum ventriculi & inteſtinorum teneritudinem, univerſum genus nervoſum graviſſime lædunt & majora longe mala inducunt, tantum abeſt ut proſint. Quin potius palmam ejusmodi in caſu omnibus præripit manna, quæ ob clementem indolem nulla plane violentia infeſta eſt, ſed inertii reddita acrium humorum ſaburra, eandem ſummo cum emolumento promte ejicit. Et hoc nomine inprimis ſyrupus de manna, uſus eſt longe præſtantiffimi, quem proinde vel ſolum, vel cum rhabarbaro nuptum, vel etiam ſub forma mixturarum & potionum propinare expedit, quæ pro diverſorum aliorum additione, varie etiam concinnari poſſunt. Inprimis autem crebriori experientia edocti ſequentem commendamus egregiæ utilitatis mixturam: Recipe aquæ florum acaciæ, ceraſorum nigrorum, florum tiliæ, ſingulorum unciam unam, lapidum cancrorum drachmam unam, extracti rhabarbari grana XII. ſyrupi de manna unciam dimidiam, ſpiritus ſalis ammoniaci anis. guttas X. M. D. S. Mixtur zu 1. bis 2. Löſſel.

21. Eadem prorsus ratio ſubeſt, quare uſus mannæ ſenibus quam maxime eſt proficiuus. Quum enim in ſenili ætate ipſius CELSI effato omnia aſſumta aceſcant,

& ingens humorum impuritas ob secretionum defectum contrahatur, maxime quidem ex usu est, primam regionem subinde à sordibus deplere. Sed si quis validioribus & vehementioribus earum per alvum expulsiōnem moliretur, gravissimo certe damno & irreparabili noxa afficeret eos: quandoquidem purgantium ea propria & pernicialis est facultas, ut vires mirum dejiciant, ut adeo hæc iis, qui senio fracti, genus nervosum debile obtinent, propinare piaculum certe foret. Contra vero blanda est mannæ indoles & ad acidam sentinam educendam quam maxime apta; eamque ob causam, ad alvum in senibus laxandam; eadem nihil aptius est, nihil præstantius.

22. Præterea iis, qui lenissimis tantum evacuantibus tractandi, annumerandæ etiam sunt gravida. Nam prægnantibus quam maxime familiare est, ut ex plethora incidant in cacochymiam: ideoque omnis certe cura adhibenda est, quo hæc succorum impuritas decenti auxilio à corpore arceatur; quod educatione impurorum è primis viis humorum potissimum perficitur. Ast huic scopo obtinendo neutiquam conveniunt fortia purgantia; quæ validiori spasmō intestinorum membranas & nervosas corporis partes contorquendo, uterum ad elidendum foetum sollicitant, vel etiam tonum ventriculi destruant: sed potius ea, quæ clementer evacuant, inter quæ præter pilulas balsamicas, rhabarbarina & passivata, inprimis etiam connumeranda est manna, præterim si addantur ea, quæ ventriculum & universum genus nervosum roborandi facultate pollent. Id quod luculenter etiam testatur ZACUTUS LUSITANUS *histor. medic. princip. lib. II. pag. 951. Manna, inquit, tuto exhiberi potest faminis uterum gestantibus, quum & commoditas vocat & necessitas urget.*

23. Ulterius, si specialius paulo dispiciamus, quibus potissimum morbis mannæ usus dicatus sit: ex facili est judicare, eandem utilissimam locare operam, tam in morbis, qui acidorum & biliosorum succorum colluvie & magna humorum acredine foventur & stipantur, quam etiam ubi partes nervosæ spasmō stringuntur & inordinatis comotionibus exagitantur. Quare quum in tussi, coryza, affectibus rheumaticis, podagricis, arthriticis, scorbuticis insignis humorum subit acrimonia & impuritas, præstabile utique manna in iis est remedium, eo quod illius usu humores prima in regione obharecentes acres attemperantur & una cum feri copia educuntur, ne novam dolorum & passionum scenam instruere possint. Inprimis vero spectatissima mannæ virtus est in tussi ferina diuturna stomachali: ita ut vix, ac ne vix quidem, sine hujus medicaminis usu, sopiri & abigi possit; unde etiam ALPINUS *de medic. method. lib. IX. cap. 12. p. 344.* auctor est, ut alvus in tussi laxetur per mannā. Hæc enim non solum mucilaginosa sua insita dulcedine id, quod acre est ac intus stimulat involvit & infringit, sed partes etiam tussi attritas, hispidas & aridas factas, delinit ac mulcet, & præterea viscidam illam & acrem saburram per alvum, aut quandoque etiam per vomitum, utiliter exturbat.

24. Præterea, ad arcendos, mitigandos, vel præscindendos catarrhales & tussiculosos affectus, nec non dolores artuum, nihil æque conducit, ac si inter initia insultus horum morborum, manna cum lacte, jusculo avenaceo, vel infuso Thée assumatur, & postea lac aut asininum, aut caprillum, cum, vel etiam sine aqua Selterana, matutinis horis per aliquot dies bibatur: quo omnis intus delitescens acrimonia subigatur & sensim evertatur.

25. Porro etiam manna exoptatissimam spondet medelam in omnis generis febribus. Nimirum quum somes & minera intermittentium plerumque in prima regione & præsertim duodeno latitet, collecta ibi a-

cidorum, biliosorum & male concoctorum humorum saburra, nihil certe magis ex usu est, quam ut hæc ipsa promptissime excutiat & corpus ab eadem liberetur: id quod commode & efficaciter mannæ ope perfici potest. Ut vero eo certior & morbo exquiritur respondens succedat operatio, eadem sapienti consilio, cum amaris, decocto absynthii, centaurii minoris, nec non salibus deterfis, aut si necessitatis est, stimulo emetico armatur & die intercalari propinatur, quo sic omne id, quod febrilibus motibus concitandis favet, submoveatur. Pariter, si in febribus causis, biliosis, tertiana biliosa & duplici, repurgandæ sunt primæ viæ: aptissimum & medentis scopo apprime inserviens laxans subministrat manna; quandoquidem etiam in his bilis delinquit indoles & nonnunquam sponte eximia cum utilitate alvi suboritur fluxus morbumque solvit. Commodissima autem mannā in ejusmodi biliosis febribus exhibendi ratio est, ut mannæ tamarindi jungantur & ex his julepus laxans concinnetur.

26. Maxime omnium vero præstantissima mannæ facultas elucet in affectibus spasticis hypochondriacis & melancholicis: in quibus alvus non tantum ex defectu humidi & copia acidorum succorum prima in regione occluditur, verum etiam ob spasticas tunicarum intestinalium strictiones obferatur, ut obstructio ad aliquot dies etiam duret. Jam vero certa & constanti experientia edocemur, pessimum in hisce affectibus contumacis morbi signum præbere, si alvus continuo clausa est, & nisi clystere aut laxante admonita, ad officium redit. Accedit, quod si per spasmus his morbis solennes, tantopere læsus est peristalticus intestinorum motus, nec chylosa ingestorum massa tenuia intestina permeare; neque faeces per crassum cavum transire, neque flatus perrumpere possint, sed sordes subsistant, mora deteriores fiant & aciores, flatus maxime ad superiora reprimantur & ventriculum inflent, ut per consensum, ob male affectum nimia hac distensione octavum nervorum par, nervosæ universi corporis partes, maxime capitis & pectoris, simul gravius affligantur omniaque indereius rulant.

27. Quæ cum ita sint, primarium utique & præcipuum curationis momentum in eo versatur, ut motus in intestinorum volumine vicens peristalticus corruptus in integrum restituatur & alvus iterum expediatur, quo sordibus & flatibus liber pateat exitus. Sed hoc maxime artis & prudentiæ est, & dici vix potest, quam graves errores in eo à vulgo medicorum committantur. Purgantia enim & acrius stimulantia strictionem adaugent, motum intestinorum magis pervertunt viresque debilitant, eamque ob causam nociva potius summopere sunt quam proficua. Aloetica temperationis quidem sunt indolis, sed sanguinem exagitando conatus ad hæmorrhoides gignunt, & denegato cruori exitu, doloribus suscitandis & symptomatum augmento favent. Senna & ex ea deprompta medicamina, licet neque acriora sint, neque sanguinis ebullitionem inducant, nihilo minus tamen flatus ingenerant, ideoque si unquam, certe in flatulento hoc malo obsunt. Quum vero manna clementissimum & securissimum sit laxans, merito hæc laus ei tribuenda, quod in passione hypochondriaca aptissimum ad alvum movendam sit præsidium. Hæc enim rigido spasmō confictas intestinorum fibrillas mulcet, lenit & laxat, humorum acrem indolem, ne nova vellicatione strictiones inferant, corrigit, & tandem sine roboris intestinorum diminutione purgamenta educit. Tenendum tamen est, quod amicum admodum & fructuosum ejus in ejusmodi affectibus sit cum salibus mediis nec non rhabarbaro connubium, quippe horum accessu, non solum efficacia mirifice intenditur, sed flatuum etiam preventus impeditur.

28. Quem-

28. Quemadmodum itaque summa mannae in malo spastico flatulento sic dicto hypochondriaco est utilitas : ita non minori præstantia splendet in aliis morbis, qui spasmi in abdominis cavitate contentas partes exercent. Nobili inprimis hujus rei exemplo est, colica sic dicta spasmodica, quæ sævis dolorum tormentis ægros excruciat & plerumque pertinaci alvi adstrictione stipatur. Nam licet solenne sit ad mitigandam dolorum acrimoniam clysteres infundere alvumque fatigare : sapissime tamen tanta est morbi vehementia, ut applicatis iisdem, nihil plane levaminis accedat. Quare ipsius rationis dictamine & experientiae calculo constat : optimum præsidium collocari in iis, quæ universum intestinorum volumen intus obliniunt, quo crispatura remittat, simulque acrium humorum illuviem, novam semper dolorum scenam adornantem, ad inferiora ducunt atque exturbant. Proinde quum manna, ob insitam præstabilem suam facultatem, utrique indicationi opportune satisfaciat, luculenter admodum patet, illius usum in colicis doloribus summopere esse proficuum, inprimis si ex consilio & observatione *Laz. RIVERII prax. Tom. I. lib. V. cap. I.* cum oleo amygdalarum dulcium & jusculo gallinae pinguis exhibeatur.

29. Succedunt vitia, quæ renes, vesicam & vias urinarias affligunt, & sævis dolorum facibus infesta sunt, quarum in numerum referenda potissimum cum calculo ischuria & urinæ ardor. De his pervulgata est practico- rum sententia, quod medicaminum, quæ per inferiora evacuant, usum exposcant, quo per alvum, quæ solemniter constipata est, recrementitiæ morbum foventes & exacerbantes sordes removeantur. Bene autem monet *FUCHSIUS de medend. morb. lib. I. cap. 38.* quod à validiorum usu meatus urinarius angantur & comprimantur : ideoque iis maxime erit utendum, quæ blande id, quod in vitio est, evocant, & sine nervosarum partium jamjam afflictarum exagitatione, operationem suam exsequuntur. Quare quum ex hæcenus dictis clarissime constet, mannam lenissimum & rutissimum esse laxans, prona admodum consequentia elicitur, eandem in hisce etiam affectibus egregie opitulari & alvo aperiendæ velificari.

30. Neque tamen evacuandi tantum fine manna in vesicæ & viarum urinaryarum morbis commendabilis est, sed succedit alia eaque longe præstantissima ejus efficacia, qua dolorificam partium harum exquisite sentientium contorsionem & stricturam sopit & componit, id quod inprimis ex voto succedit, si cum oleo amygdalarum dulcium remisceatur & sic ad usum transferatur. Nam licet hoc remedium non immediate affectas partes attingat, sed proxime intestinorum cavo virtutem suam impertiat : nihilo minus tamen, ob miram partium abdominis & maxime quidem crassiorum intestinorum cum viis urinaryis consensionem & vicinitatem, medicamentosa facultas ex una in aliam transit. Hinc si fibræ intestinorum mirifice contortæ atque crispatæ, assumpto mannato hoc remedio leniuntur & laxantur, in ureteres quoque, vesicam & urethram saluberrimus hic effectus propagatur, & spasmò delinito & conquiescente, dolor exspirat & nonnunquam calculus sævissimus hostis, referatis viarum repagulis, eliditur. Commemorabile inprimis hanc in rem est *SYDENHAMI* exemplum, cujus ipse mentionem facit *Opusc. p. m. 702.* memorans, quod mannae cum sero lactis usu aliquandiu continuato, non solum ab atroci circa renes dolore, sed etiam mictu sanguineo liberatus sit : ita ut post singulas catharseos vices melius habuerit. Haud vero inconsultum erit, si hic loci ipsius præscribendi methodi mentionem injicimus, ordientes à potione in nephritide & calculo Celeberrimo huic medico usitatissima : Rec. Mann. el. uncias duas, Cremor. tartari drachmam dimidiam, decoct. nephrit. Foresti unc. IV. Hanc excipit altera potio

Frid. Hoffmanni Oper. Tom. VI.

in mictu cruento eidem commendatissima, quæ constat ex Mann. uncias duabus & dimidia in feri lactis libris duabus solutis, addita portione succi limonum vel citri.

31. Denique non prætereundum est, quod manna virtutem quodammodo obtineat diureticam, quam in dysuria & urinæ suppressione conspectius exserit. Ut enim complura alia quæ crebrius observavimus mittamus, non possumus, quin luculentum hoc interseramus exemplum. Laborabat nimirum ante aliquot annos septuagenarius quidam per septem dies urinæ suppressione, post mictionem cruentam infestante, cum exquisitissimo circa regionem pubis dolore & plenaria alvi constipatione. Placebat catheteris immisione fluxum proritare, sed frustra, quum ne gutta quidem prodiret. Exhibebatur tandem decoctum nostræ ordinationis mannatum, cujus usum tam auspiciatus subsequerebatur effectus, ut non tantum alvus aliquoties summa cum euphoria solveretur, sed urina etiam ad aliquot mensuras efflueret.

32. Quapropter, sicuti hujus suppressionis causam in grumos sanguinis, in ureterum obliquo ductu circa insertionem obhærescentes rejicimus : ita nullum etiam est dubium, quin, si renibus à flatibus compressis, aut ductibus urinosis tartareo mucilaginoso sabulo oppletis, urinæ exitus intercludatur, præstantissimum manna pariter spondeat præsidium, promovendo una cum alvinis dejectionibus feri urinosis effluxum. Nam verisimillimum est, quod subtile illud acido-sulphureum volatile mannae elementum, intestinorum nerveas tunicas exstimulans, pari ratione urinosis renum tubulos stimulo quodam exagitet & ad urinosis laticis secretionem ac expulsionem sollicitet : adeoque simili fere efficacia pollere videatur, ac inspissatus betulæ succus, qui ad drachmas aliquot assumtus, liberaliter urinam provocat.

33. Plures quidem adhuc supereffent morbi enumerandi, ad quorum persanationem manna eximiam confert opem : sed suffecerit in præsentiarum eos adduxisse, in quibus conspectius sese exserit nobilissimi hujus medicaminis virtus. Ex his enim facili negotio de utilitate mannae in aliis morbis, præsertim qui à spasticis internarum partium stricturis, ut fere omnes deliriorum, dolorum & convulsionum species, proficiuntur, judicium poterit desumi : siquidem jam ex supra dictis constat, amplissimum ejus esse usum & nunquam intermittendum, si corpus à sordibus quibusvis repurgandum, nec tamen validioribus attentandum.

34. Proinde missis his, paucis addemus, quæ de eximio & singulari plane usu mannae, in cura, quæ medicatarum aquarum beneficio in sanitatis tutelam adornari solet, silentio non sunt prætermittenda. Perquam nimirum notum est ac cognitum, quod ante usum mineralium, tam frigidarum acidularum, quam thermalium aquarum, corpus per blandum evacuans præparandum sit, quo expurgata sordium sentina, hæc soteriæ aquæ inoffenso cursu primam regionem perluere & transire possint. Sed cavendum maximopere est, ne pharmaca, quæ acre quoddam purgans recipiunt, hunc in finem adhibeantur, eo quod motum peristalticum lædendo & tonum intestinorum dejiciendo, officiant potius transmittendis libere per tubulosam & villosam intestinorum substantiam aquis, tantum abest ut profint. Pariter deducta ad finem cura, opus est, ut reliquæ aquarum à visceribus evacuatione paulo validiore exturbentur, eamque ob causam ubivis fere medici, qui regimini agrotantium ibi locorum præsunt, fortiora purgantia, nunquam non venenosa & viribus inimica, ex scammonio, gummi guttæ, extracto colocynthidis, refina gialappæ, &c. pilularum maxime forma præscribere solent. Ast, quam gravia inde agrotantes patiantur damna, dici vix potest. Nonnulli enim, qui tenerioris sunt naturæ &

ventriculum cum genere nervoso ad spasticas contractiones pronum obtinent, in anxietates cardialgicas, virium defectionem & sæva incidunt ventris tormina. Alii vehementissime ad animi usque deliquium dejiciunt, viribus ex toto prostratis, ut nonnunquam corpus multo magis causarium à foteriis fontibus referant, quam illuc attulerunt.

35. Indolens sane ego, ex quo vigesies ferme Carolinas frequentavi, crebrius observavi, à præpostero hoc purgantium usu, penitus eversum fuisse salubrem aquarum mineralium effectum, & sanitatem insigniter labefactatam: ideoque ratione exacte putata primus consilium inire coepi, ut pharmacis naturæ magis amicis & blandis eundem obtinerem effectum, & restitutum in visceribus aquarum colluviem, sine detrimento eliminarem. Et quum mannam inprimis appositam huic scopo fore judicarem, eandem ad uncias tres vel quatuor, in appropriata aqua solutam, addendo nonnunquam cremoris tartari drachmas duas, propinavi, exoptato respondente successu; quippe sequutis sæpe decem vel ultra sedibus, ingentem aquarum copiam eductam esse summa cum euphoria, deprehendi. Quare non dubitavi eadem methodo tam ante, quam post salubrium aquarum usum, uti, & rejectis penitus, inprimis à sedecim annis, omnibus valentioribus drasticis, sanitati eorum, qui curæ meæ sese commiserunt consulere: ita, ut uno vere vel viginti mannæ libras consumserim. Neque defuerunt, qui ex sagacioribus medicorum eandem medendi formam summo cum fructu postmodum inirent. Sed hæc de mannæ præstantissima facultate & in diversis casibus utilitate.

36. Devolvimur jam ad ea, quæ de ipsa oblatione & mannâ exhibendi ratione dicenda restant: ad quam primo omnium requiritur, ut justam ejus dosin determinemus. Sunt enim quidam, qui nobilissimum hoc laxans flatulentiae accusant & hanc ob causam ejus usum rejicere conantur. At vero, re penitus inspecta, ipsorum potius naturæ, omnia dulcia plane averfanti, vel minus congruæ præscriptioni, quam medicaminis facultati hæc culpa tribuenda videatur. Nam solemne ipsis est mannâ tantum ad unciam dimidiam vel unam exhibere: ideoque non mirum est, si mota quidem, sed non emota materia, viscidæ sordes in flatibus explicentur, præsertim in ejusmodi corporibus, quæ jam flatuum proventu torquentur, cujus generis potissimum sunt, quæ malo hypochondriaco & hysterico detinentur. Ut itaque noxa hæc prævertatur, tenendum est, quod manna infantibus à drachmis duabus ad unciam dimidiam, & in adultis à duabus ad tres usque & quatuor uncias, pro majori corporis firmitate offerenda sit. Et hoc pondere propinata, non facile flatibus vel torminibus infesta erit, sed purgantem virtutem efficaciter edet, quin imo quandoque obruto saburra ventriculo, lenissimum eliciet vomitum.

37. Ipsum exhibendi modum quod attinet: is non minus ita erit instituendus & imperandus, prout is, quem artifex concepit effectus desiderat. Nimirum, quemadmodum in genere in propatulo est, quod omnia evacuantia longe citius, expeditius & feliciter operationem suam exsequantur, si prius soluta assumantur: ita idem etiam de manna ejusque usu tenendum, quod nimirum utilissime dissoluta exhibeatur. Sunt autem varii liquores qui mannæ solutioni inserviunt. Ægyptiis, teste ALPINO *lib. III. de med. method. cap. 9.* familiare erat eandem in aqua Nili clarescens, aut ex jure pulli propinare: ideoque simplici admodum ratione manna nostris etiam temporibus in lacte, sero lactis, aut juscule avenaceo poterit dissolvi, vel etiam decocto coffeæ & succolade, nec non infusis theiformibus sacchari loco injici & sic deglutiri. Si vero pharmacum ex eadem artificiose conficiendum, plerumque quidem adhibentur aquæ ex floribus & herbis destillatæ, e. g. fl. acac. sambuc. ulmar. ceras. nigr. vero-

nic. sed quia non omnes æque suaveolentes ejusmodi aquas ferre possunt, commodissimum vehiculum præbent aqua pura fontana, & pluvialis destillata, nec non acidularum temperatarum, ut Spadanarum, Wildungensium, Antonianarum portio, aut si placuerit, ipse ros majalis. Inprimis solenne est nobis, potiones laxantes ex manna præscribere & ejusmodi præparationem imperare, ut eadem leni coctione in aqua appropriata dissolvatur, recipiendo ad mannæ unciam aquæ unciam & dimidiam. Monendum tamen est, quod coctio ad liquandam mannâ lenissime instituenda sit, ne videlicet vehementiori aut diuturniori coctura subtile & volatile illius stimulanse elementum in auras dejiciatur.

38. Ut vero paratum ejusmodi mannatum decoctum eo magis voto respondeat, ipsique palato acceptum reddatur: apprime ex usu est, quædam addere, quæ huic scopo velificentur. Inprimis utilissimum est, salia adjicere, inter quæ nominasse sufficiet cremorem tartari, arcanum duplicat. terr. fol. tart. sal Ebsham. Sedlicense, quippe quæ, dum viscidas potissimum sordes incidunt, resolvunt & abstergunt, ac præterea stimulo quoque imbuta sunt, ipsam purgantem mannæ efficaciam mirifice secundant & intendunt. Poterit autem ejusmodi potioni drachma una vel altera salis commisceri, & si hoc paullo difficilioris solutionis sit, antequam mannæ coctio instituat, seorsim liquari. Deinceps, ut palati gratiam captemus, simulque roborationi tantisper prospiciamus, coctione peracta, colaturæ instillare expedit guttas XX. essent. cortic. aurant. aut guttas duas vel tres olei fragrantis, vel aromatici destillati, cujus generis est oleum de cedro. Et hoc modo parata potio medicata, ita postmodum erit assumenda, ut non simul & semel ingeratur, sed partitis vicibus bibatur, superbibendo sub ipsa assumptione aliquot decocti avenacei haustus.

39. Porro etiam mannæ pro varia medentis intentione, morbi & ægrotantis conditione, plura adhuc alia admisceri, & ex ipsa alia remediorum genera concinnari possunt. Nam præter ea, quæ in antecedentibus passim in enumeratione morborum, qui mannæ usum utiliter admittunt, inseruimus, non omittendum esse putamus, quod manna in febribus ardentibus nec non biliosis, cum syrupo acetositis citri vel rob tamarindorum & decocto hordei, ptisana aut sero lactis caprilli commode offeratur. Deinde, ad enecandam & exturbandam verminosam progeniem, fructuosum mannæ connubium cum mercurio dulci & extracto rhabarbari instituitur. Porro in asthma suffocativo, tussi ferina & convulsiva infantum, commode cum spermate ceti, oleo amygdal. dulc. & pauxillo croci in juscule avenaceo propinatur. Denique, si indicatio urget, ut sordes acres, biliosæ viscidæ tam per inferiora, quam superiora evocentur, decocto ex duabus mannæ unciis adjicienda sunt aliquot tartari emetici prius soluti grana, & pharmacum interpolatis vicibus assumendum, ita ut aliquoties sub assumptione liberalis decocti avenacei dilutioris haustus potetur. Hac enim ratione primo vomitus exoritur, & paullo post dejectiones numerosæ subsequuntur. Est vero hæc medendi forma potissimum commendabilis in principio febrium, tam intermittentium, quam acutarum, quando haud fallax saburra copiosæ prima in regione latitantis suspicio adest. Novimus etiam, ejusmodi emetico-laxans medicamentum singulari & præstantissimo cum fructu in febribus exanthematicis petechialibus, purpura, variolis, morbillis, castrensis præcipue, & morbo Hungarico statim inter initia fuisse oblatum.

40. Dum inter alia hæcenus recensita morborum genera, in quibus mannata profuisse diximus, in variolarum quoque initiis & eruptione excellentem eorum usum deprædicavimus, expedit omnino inquirere, num sub ipsarum etiam maturatione illis uti æque

æque conducatur. Quis non novit, quanta in variolis, præsertim confluentibus reformidanda sint medenti pericula, quantaque ad ea avertenda opus sit prudentia & circumspeditione. Sicut enim ut plurimum in variolis, ita maxime in confluentibus fieri solet, ut circa nonum potissimum diem ob novum quasi febris insultum auctioremque inflammationem & doloris vehementiam omnia intenduntur symptomata & in pectus plane ruat misera afflictorum conditio. Oriuntur tum summa circa præcordia anxietates, moventur anhelitus, augetur corporis inquietudo, pertinaciori subsistente alvi obstipatione. Quæ vero singula, quemadmodum aliunde non proveniunt, nisi à materia vellicante, acri, caustica in sanguine aut retenta, aut eo, quo prodierat, redeunte, ubi exitu per cutem præclusa denuo exagitur tantisque in universo corpore creat molestias: ita judicatu erit facillimum, in debita & convenienti ejusdem excretionem omnem ægrotantis contineri spem atque salutem.

44. Conveniret tum quidem omnino naturæ ductum sequi materiamque ad peripheriam corporis propellere, utpote quæ methodus & tutissima & sola tantummodo sufficiens habita ab omnibus fere huc usque fuit. At vero, sat graves quoque sunt rationes, quæ ejus applicationem interdum prohibent. Quum enim sæpe sæpius eveniat, ut materia variolarum nocentissima ad interiora & præsertim ad nervosam intestinorum compagem delata ab alvi obstructione mirum sustentetur, sustentata majoris sæpè numero inflammationis causa existat; facile perspicitur, omnia bezoardica, alexipharmaca aliaque expulsionem ad cutis corticem promoventia remedia tunc temporis minus præstare, ut potius majorem noxam inferant. Et temerarii sane ausus existimandum puto, materiam in intestinis altius radicatam ad cutem revocare velle. Longe tutior commodiorque via est, constipationem solvere additoque ventri leniori stimulo per anum feces putridas & impuras fordes educere.

29. Cui scopo, nisi sufficiant ex appropriatis confecta speciebus enemata, quum nihil sit ipsa manna accommodatius, nihil ob benignam operationem præstantius, non possum non eandem præ cæteris hoc loco commendare quam maxime. Id quod non mea ipsius solum experientia edoctus scribo, sed testes etiam hac in re habeo locupletissimos, quos inter nominare præ cæteris lubet experientissimos Angliæ Medicos, SYDENHAMIIUM & FREINDIUM, qui ambo lenientia cathartica tali in casu eximie collaudant & mannata tantum non omnibus hoc fine longe præferunt. Inprimis autem *Cel. FREINDIUS* in libro quem inscripsit: *Commentarii novem de febribus*, usum purgantium & præcipue mannæ in febre putrida variolis confluentibus superveniente admodum extollit variisque tum suis tum aliorum observationibus & morborum historiis de felici mannæ effectu testantibus lucutenter confirmat.

43. Sed ut redeamus, quo digressi sumus, subjungimus nonnulla ex manna conficienda eaque saluberrima remedium genera. Primum esto potio, qua Sacratissimus Romanorum Imperator sub potu thermarum Carolinarum utebatur: *Rec. Cremor. tartari drachmas duas, solve & coque in libra una aquæ fontanæ usque ad medietatem: adjice mannæ el. uncias tres, clarificetur albumine ovi, addito succo integri pomi citri succulenti: denuo fiat parva ebullitio. Coletur denique frigide per linteum album, cui flavi cortices citri inditi fuerunt, aliquoties, donec fiat potio clarissima, quæ insigni virtute gratissimoque sapore egregie sese commendavit. Neque minus porro laudabilis quorundam mos est, ut ineunte vere corpus à sordibus sub hiemis intemperie collectis repurgent, eumque in finem varia concinnari & præscribi solent præsidia. Nos certe ad instituendam vernalem ejusmodi, uti vocant, curam, summopere commendamus hoc infusum, de quo alternis diebus uncia*

sex ad octo hauriendæ: *Recipe mannæ el. uncias quatuor, passul. min. uncias duas, rhabarb. elect. tartari crudi aa. unciam unam, summit. centaur. min. pugil. IV. cinnamomi acuti, cardamom. ana drachmam: infundantur cum vini Rhenani mensura una & dimidia: calori per XXIV. horas exponantur.*

44. Præterea, varia in officinis pharmaceuticis præparata præstant medicamenta, quarum vel basis vel ingrediens est manna. Ex horum numero potissimum sunt electuarium diacassia cum manna, electuarium lenitivum de manna, nec non syrupus de manna, cujus vicem commodissime & utilius sustinere potest ita parandus: *Recipe mannæ el. libram, solve & coq. len. cal. in aquæ fl. acac. libra una & dimidia, infunde calide fl. persicor. acac. viol. singulorum manipulum, colat. leni igne inspissa, eadem refrigerante, adde olei de cedro guttas XX. Ad præparata pharmaceutica referenda porro manna liquida, cujus confectionem SCHROEDERUS in *pharmac. chym. p. 267.* tradidit & B. Pater meus in *clave pag. 637.* emendavit, nec non manna sic dicta julepata à Parente meo, *l.c.* exposita, una cum manna tartarificata: quæ etiam si sua non defraudanda sit laude, nihilo minus tamen facillime contingit, ut spei non respondeant, eo quod sub incautiori earum in officinis pharmaceuticis confectione, manna subinde à vehementiori igne & coctura virtute sua privatur.*

45. Ultimo loco quædam de iis, quæ ignis tortura è manna eliciuntur, dicenda restant. De his autem in genere verissimum est HELMONTII *de potest. medicam. p. m. 383.* judicium, quod chymico ministerio parentur ea, quæ antea non erant: mannæque inprimis per ignem acrimoniam assumere. Adornavimus tamen nosmet ipsi mannæ destillationem in arena, & inditis retortæ circiter IV. ejus unciis, prius cum arena subactæ, subdito paulo fortiore igne, liquorem acidum & post hunc ex bruno-rubrum crassorem empyreumaticum obtinuimus, ita quidem, ut prior ad unciam, posterior autem ad unius & dimidiæ drachmæ pondus accederet. De acido hoc ex manna prolecto liquore, quem spiritum dicunt, omnium suffragio confirmata sententia fert, quod sudorem moveat, cujus effectus causa procul dubio permixtis empyreumaticis partibus tribuenda videtur. Suggestit vero etiam hic liquor menstruum ad dissolutionem quorundam corporum. Cepimus experimentum eidemque tam corallia, quam martem injecimus, & liquatione facta, & coralliorum, & martis producit tinctura, iisdem viribus armata, ac illæ, quæ communi more acidiusculis menstruis parari solent. Contra vero non successit sulphuris cum illo exacte tentata solutio, cujus SCHROEDERUS *l. c. p. 258.* & ex hoc forsitan CHARAS in *pharmac. reg.* mentionem injiciunt. Crassius autem ille rubicundus oleoso-gummosus liquor, empyreuma gravius redolebat, haud secus ac saccharum carbonibus injectum, & neque aquæ, neque spiritus vini renuebat consortium, sed in utroque promte dissolvebatur: neque dubium est, quin ad guttas decem assumptus, sudorem liberalius eliciendi facultate gaudeat.

46. Atque hæc fere sunt, quæ de manna in præsentiarum differere placuit & pro instituti ratione licuit. Confidimus certe, nos ita defunctos esse hoc labore, ut unicuique exinde innotescat, injulissime huc usque mannæ à medicis neglectam ferre esse, & dignam, quæ postliminio quasi à practicis ad usum revocetur. Serium enim meum est monitum, quod in gratiam eorum, qui exercitium artis suscipiunt, huic tractationi addo, ut nimirum ab omnibus vehementioribus & drasticis purgantibus abstineant: siquidem vix dici potest, quam ingens damnum inferre soleant, & quod nonnunquam tantum est, quantum vix à gravissimo morbo metuendum foret; ut adeo hanc ob causam

32 De recto corticis Chinæ usu in febribus intermittentibus.

justissime à CAMPEGIO *de cribr. medicam.* venenosa & maledicta appellantur. Rejectis potius colocynthide, scammonio, helleboro albo, turbith, elaterio, esula & quod sequioribus seculis innotuit, gummi gutta in usum vocent & substituant tuta & securissima reme-

dia, cujus generis sunt salia mediæ naturæ, manna, rhabarbarum, tamarindi, cassia & aloë recte correctæ & præparata, imprimis quum hiæ laxantibus & lenioribus idem effectus, si majori paulo dosi exhibeantur, obtineri possit, quam acrioribus & nocivis.



D E

RECTO CORTICIS CHINÆ USU IN FEBRIBUS INTERMITTENTIBUS.

§. I.

EA quidem innata quasi & per manus tradita tantum non omnium animis hæret opinio: dari certas medicinas, ad hunc vel illum morbum sanandum aptas semperque salutes; nec quisquam ferre ex doctis, æque ac indoctis est, qui non Empiricum agat, & viso quodam ægrotante, salubre remedium in promptu habeat idque ultro commendet. At vero, erronea utique atque perversa hæc est sententia, contra quam, ceu genuinum temerariæ Empiriæ fundamentum, merito omni pugnandum studio. Uti enim in universa rerum natura corporum vires & effectus non dantur absolute tales: ita etiam nec alimentorum, nec pharmacorum facultates sunt absolutæ, sed omnes relativæ, conditionatæ & limitatæ, respectu scilicet corporis humani vivi, in quod agunt, & cum quo operationem suam exsequuntur. Hinc quippe est, quod, experientia teste, medicamenta eodem modo, tam ad juvandum, quam ad nocendum, sint apta, & quod omnia, quibus medicus utitur præsidia, ita sint comparata, ut nonnullis profint, nonnullis vicissim, in eodem etiam morbo, obsint.

2. Professus id jam pridem est antiquissimus artis nostræ parens HIPPOCRATES, *lib. de art. §. 6.* ita differens: *non quivis cognoscere potest ea, quæ commodo & detrimento sunt. Et sunt nihilo minus ea, quæ damno fuerunt, quam ea, quæ opem tulerunt, in testimonium arti, quod ars ipsa sit. Quæ enim profuerunt, ob rectum usum profuerunt; quæ vero nocuerunt, ob id, quod non recte usurpata sunt; nocuerunt.* Neutiquam scilicet gravis hic Auctor omnis generis medicamentis absolute certam adscripsit salutis afferendæ virtutem, sed certo tantum respectu, nec ob id, quod in certo morbo exhibita, sed quod recte, hoc est, cum iudicio, explorata prius corporis ægrotantis natura morbiq; causâ & indole; itemque convenienti tempore, ordine, dosi ac proportionem, usurpata sunt, profuisse; neglectis vero hiis cautionibus, nocuisse edixit. Quumque adeo sint medicamenta, quæ & damnum, & auxilium afferre queant, dari artem, recte omnino colligit, atque ex eo peritum atque præstantem iudicat medicum, qui diversos remediorum effectus variasque operationes probe discernere novit.

3. Propterea vehementer optandum, ut quisque medentum verissimum hoc HIPPOCRATIS effatum curate pensaret ac ad usum transferret. Sic sane exspiraturæ demum forent opprobriosæ illæ in hunc usque diem inter medicos de remediorum virtutibus vigentes discordiæ atque dissensiones. Nam turpe quidem dictu, ast verissimum, plebejos non tantum & rudes, verum eruditos etiam magnique nominis medicos, raro admodum in determinandis viribus, effectum & usu medicaminis cujusdam, in hoc vel illo morbo convenire, sed alios miris illud dilaudare encomiis, alios contra idem, in eodem morbo, damnare prorsus atque rejicere. Nemo non novit, quam diversis, immo perversis iudiciis, potissimum exposita sint ipsa valida & heroica sic dicta remedia, uti quidem

maxime sunt ex mercurio parata, emetica antimonialia, martialia, opiata, drastica purgantia, narcotica, ex chirurgicis, vesicatoria, fonticuli, setacea & venæ sectiones, quin quod magis mirandum, ex simplicissimis & diæteticiis, fontes medicati calidi & frigidi, balnea, lactis cura & cura per inedia.

4. Idem hoc fatum expertus est allatus ex America in Europam ante LXX. circiter annos cortex, chinæ dictus. Mirum erat, quanto applausu hic primum excipiebatur, quantisque encomiis, ceu certum & incomparabile ad vincendam intermittentium contumaciam præsidium, ornabatur, nec desunt, qui hodiernum magno illum habent in pretio atque honore. Sed non minori agmine surrexerunt, qui eundem impugnarunt & ceu infecurum, quin plane noxium, venditarunt & adhuc infamare non erubescunt. Plura quidem in utramque partem prodierunt scripta, experientiam ipsam in partes passim vocantia; nos tamen ita potius censendum esse arbitramur: bonum, efficax & tutum esse hoc remedium, si quis, secundum allegatum HIPPOCRATIS edictum, eodem recte uti sciat; valde vero noxium & infecurum, quando empirice, hoc est, imprudenter, imperite, nulla corporis ægrotantis, causæ febrilis, temporis & aliarum circumstantiarum ratione habita, usurpetur. Quod ut eo testatius pateat, elegimus hoc argumentum in dissertatione præsentī, propositio Numine divino, penitus paulo evolvendum, ita quidem, ut adducamus primum testimonia eorum, qui magnifice de hoc cortice sentiunt, his deinde adjungamus observationes & rationes eorum, qui illum noxium, infidum & infecurum esse asseverant, postea ex rationali febrium doctrina causarumque, quæ has movent explanatione, nec non principiis & modo agendi nostri corticis, & nocivam, & salutarem, ipsius facultatem, evictam demus, simulque ad dissentientium objectiones solide atque modeste respondeamus.

5. Sunt vero oppido multi, qui in laudes hujus Peruviani corticis eunt. Ut primum enim in Europam delatus, Romæ innotuit & à Patribus societatis Jesu, ut præsentissimum febrifugum, caro admodum pretio divenditus fuit, in schedula, modum usurpandi habente, de eodem jactarunt: quod omnes fere intermittentes, etiam quartana, laborantes, purgato prius, si opus fuerit, corpore, sine ulla alia adhibita medicina, liberaverit. BARTHOLINUS *Cent. V. hist. 50.* Cardinalem de Lugo, plus mille testimonia, hoc cortice anno MDCLIII. quo quartanæ duplices & simplices grassatæ, curatorum habuisse, memorat; de FONSECA vero, celeberrimo sui ævi medico, ibidem refert, quod exploraverit nostrum corticem eundemque non innoxium tantum, verum etiam saluberrimum deprehenderit. Fr. REDI *de experim. nat. a. 143.* miraculosum hujus corticis effectum vocat, & TOZZI *comment. in aph. XXV. sect. II.* perhibet: febres quartanas, quas antea medici longissimas & fere immedicabiles habuerunt, hac nostra ætate, unius corticis Peruviani ope, cito tutoque fugari.

6. Ex Italia in Galliam pervenit postea hujus febrifugi notitia ibidemque varia pariter sustinuit experi-

men-

menta, tam felici tamen successu, ut ipsi Regi ac Regio Principi, febre laborantibus, non semel, sed aliquoties, insigni cum fructu, potissimum à TAGOULTIO, sit oblatum. Eodem quoque tempore in Anglia ipsius fama percrebuit, applaudentibus tantum non omnibus. WILLISIUS quippe *de febr. cap. VI.* disertis scribit verbis, ex centum hoc remedio usis, vix unum non convaluisse. Cui accedit illustre illud Angliæ decus ROBERTUS BOYLE, in *tr. de philos. experim.* fidem faciens: se una vel altera dosi corticis febrifugi, ad drachmam unam propinati, sapius quartanas, quæ per annum durarant, abegisse. Quin DYGBÆUS *tr. de medic. secret.* sancte affirmat: ex triginta quartana detentis, quos hoc remedio liberarit, ne vel duos in eandem relapsos, & addit: culpandum potius esse medicum, quam nobile medicamentum, si post ejus exhibitionem unquam revertatur febris. Ipse felix ille & circumspectus medicus SYDENHAMUS, in *tr. de febrib.* mirifice, ceu optimum remedium, hunc corticem extollit & methodum eadem recte utendi sive tradit. Magno etiam adhuc apud Anglos est in pretio, ut patet ex FREINDH, LISTERI, nec non MORTONIS scriptis, qui in *tr. de febribus* ita differit: *cortex Peruvianus, consensu medicorum hoc licet omnium, est catholicum febrifugum, quod omnes febres intermittentes, in quavis anni tempestate, in omni ætate & temperamento, penitus, cito, tuto & feliciter sanat, neque opus est, ut medici ingenia sua amplius torqueant in febrifugis explorandis.*

7. Quin in omnibus fere Europæ regionibus corticis hujus virtus spectata enituit. Inter Helveticos quidem medicos multum ipsi detulit MURALTUS & M. N. C. *Dec. II. An. IIX. obs. 2.* aliquot inseruit historias, quod eodem, tam in senibus, quam in pueris, tertianas & quartanas curarit, tandemque enarrationi finem his memoratu dignis verbis imposuit: *in immensum volumen excreveret, si, quæ curæ nostra ex hoc pulvere experientia alienaque facta, describere satageremus.* In Belgio celebres & peritissimi medici plurimi hoc nostrum antifebrile fecerunt & adhuc faciunt, cujus testes citamus BOERHAAVI & DECKERI scripta. Potissimum in nostra etiam Germania corticis chinæ ad debellandas intermittentes usus, ut laudatissimus fuit celebratus, ejusdemque efficaciam salutarem tam BOHNIIUS in *diff. de minus suspecta febrium fuga*, quam BERGERUS *diff. de cortice chinæ ab iniquis judiciis vindicatio*, pluribus & solidis argumentis asseruerunt. Fuit præterea frequenti in usu WALDSCHMIDIO atque DOLAEIO, nec non celebri quondam Ducis Cizensis Archiatro, ZAPPIO, qui electuario antifebrili, cujus basis chinæ cortex, & famam & opes acquisivit, eodemque adhuc ipsius gener, Dn. STREIDEL, clarus atque peritus in arte nostra vir, non minori crebrius utitur successu.

8. Contra ea, sunt pariter & fuerunt permulti periti, docti & clari medici, qui minus favent huic cortici, illumque infidum, insecurem, quin plane noxium vocare medicamentum, haud erubescunt. Videas complures, qui experientia & observationibus fidem sibi præstare contententes asserunt: usum Peruviani corticis non modo recidivas longe graviores, sed & novos prorsus & insanabiles morbos insequi, cachexiam scilicet, tumores pedum œdematosos, hydropem, pertinacem alvi obstructionem, præcordiorum angustiam, pathemata hypochondriaca & hysterica, febres lentas & hecticas, cum virium prostratione, appetitu dejecto & tabe, in pueris nonnunquam convulsivos & epilepticos motus. Inprimis acriter in febrifugum nostrum invehit BAGLIVUS *opp. lib. II.* perhibens: febrem tertianam nonnisi elapso decimo quarto die, quo quidem sponte finiatur, febrifuga pati, & irritò prorsus conatu ante illud tempus remedia quævis, vel sine fructu, aut certe non sine ingenti damno adhiberi. Medicos intempestive febrifugis febrem veluti in ovo jugulare conari, quum paucis interjectis diebus, vel ipsa redeat velocius, vel ejus

loco quamplures gravissimi morbi, asthmata, hydropes, febres lentæ, phthises aliaque gravissima mala emergant.

9. Idem fere ex nostratibus censet ETTMULLERUS, qui *opp. tomo II. pag. 277.* chinam non solum infidum vocat remedium, sed etiam *pag. 598.* asserit: ordinarie fere alvi præclusionem, tumorem abdominis ejusque duritiem atque dolores tensivos consequi solere, iisdemque vel successive remittentibus, vel per purgantia, aut spiritum salis ammoniaci irritatis, eandem febrem similem, interdum intensiore frigore, recurrere. PALLIUS quoque in epistola ad BAGLIVUM scribit; Gallos quidem feliciter china chinæ in febribus uti, sed minime id suadendum in agro Romano, quin ridet hujus corticis usum, nisi in fine ad roborandum stomachum adhibeatur. Plura præterea de noxa hujus antifebrilis remedii memoria consignata exempla evolvi possunt in BLEGNY *Zodiac. Gall. med. phys. An. IV. mens. August. Anno V. mens. Januar.* nec non in M. N. C. *Dec. III. Ann. IX. obs. 109.* item *Cent. III. p. 52.* Et nostro deum hoc ævo, cl. STAHLIUS tam in *theoria med. quam opusc. physico-med. p. 432.* neque minus ex STAHLIO, JUNCKERUS in *conspect. medic. theoret. pract. pag. 261. seqq.* & passim chinæ in febribus usum & impugnarunt & rejecerunt. Quin nosmetipsi testamur, corticem hunc, promiscue atque empirice usurpatum, multum detrimenti intulisse, & vel recidivas agre expugnabiles, vel alios sæviores morbos, potissimum post quartanam hydropem, post tertianam pathemata hypochondriaca, accensisse.

10. Interim tamen neutiquam cum iis facere possumus, qui hunc corticem absolute & fere semper noxium in febribus esse censent ejusque usum rationibus quibusdam infestum plane reddere conantur, quasi febrium indoli, salutari successui ipsiusque naturæ intentioni contrarius esset atque inimicus. Putant scilicet, febrem nihil aliud esse, quam exacte methodicam naturæ medicationem, qua auctiori solidorum & fluidorum motu, causas, quæ febrem movent, per congrua secretoria & excretoria è corpore proscribere nititur. Ad hoc ex voto perficiendum opus esse humoribus fluxilibus viisque apertis; adstringentia autem, quibus cortex Peruvianus accensendus sit, succos fluidos incrassare, excretoriorumque tenues canaliculos angustare, quin occludere, ideoque retineri, iis usurpatis, morbificam in corpore materiam, ac recidivas, vel graviores alios morbos, produci.

11. Autumant porro, præcipuam providæ naturæ in intermittentibus esse intentionem, ut redundantem sanguinis vitali conservationi semper infestam copiam auctiori intestino calido, ex progressivi acceleratione resultante motu, dissolutoria quadam in serum excrementitium resolutione, imminuat simulque fortiori impulsu, viscera ab inhaerentibus vitiis atque obstructionibus liberet. Atque adeo motus hosce febriles esse præsidio ac medio, quo morbi curantur, graves arcentur & ea quæ vitæ insidias struunt eliminantur, nec ea propter, nisi cum ingenti damno, sisti ac cohiberi. Adhæc anceps admodum esse molimen, susceptum sapienter naturæ, in expellendis per secretoria & excretoria, noxiis, opus turbare, impedire, planeque contrarium adstringentibus inducere effectum, quem non possint non, præter pessimas recidivas, acerbiora longe pathemata, hypochondriaca scilicet, hysterica, lentæ febres, obstructions viscerum, icterus, cachexia, hydrops, melancholiæ quoque & pertinaces alvi obstructions, presso pede inlequi.

12. Et quod maximum esse volunt, tertianæ mineam primæ in regione, seu ventriculo, tenuibus, præsertim primis intestinis, nec non adjacentibus organis, mesaraicis nempe vasis & glandulis, consistere perhibent. Hæc autem quum ut plurimum viscidus & tenax humor sit, provido certe consilio stringi in principio porosas & externas partes, sanguinem ad interiora agi ibidemque ali-

aliquamdiu detineri, quod sufficiens humoris serosolymphatici quantitas per tunicas & glandulas viscerum in ipsorum cavitates transfudet ac postea partim liquandæ & emolliendæ febrili materia, partim ipsi eo commodius egerendæ serviat. Hinc colligunt, perniciose esse omnia ea, quæ motus hos tam apprime morbi causæ oppositos sistunt, febrilem illum lentum primis in viis humorem spissorem reddunt & excretoria constringendo utilissimas secretiones atque excretiones tam per alvum, quam urinam & cutis spiracula, sufflaminant & cohibent. Id vero præstare chinæ manifesto constringentis naturæ corticem, hinc rejiciendum & usurpanda potius esse ea, quæ naturæ opus juvent, febrilem materiam solvant, & redundantem sanguinem dissolvendo omnisque generis excretiones promovendo, à materia, quæ in vitio est, corpus liberent, non vero eandem, febrilibus tantum motibus suppressis, cum periculo reprimant.

13. Sic quidem ratiocinantur corticis nostri adversarii, & fatemur sane, primo intuitu, hæc non nullius videri momenti; an vero sint tanti, ut medentes penitus ab ejusdem usu detertere possint, paullisper jam perquirere juvabit. Nititur autem omnis propemodum argumentatio supposito principio, quasi corpori inesset agens quoddam, quod prævia intima cognitione, rationali postea intentione, ad certum finem, motus vitales, è quorum familia etiam febriles, nec non remediorum effectus, efficiat ac dirigat. Sed tantum certe abest, ut ejusmodi principium in rationali medica theoria æque ac praxi ullo modo locum habere, aut quicquam utilitatis præstare possit, ut potius in explicandis intelligenter & demonstrandis medicis rebus, nec non inveniendis & applicandis remediis, ignorantiam stabiliat vel confusiones & errores inducat.

14. Hoc qui tenet, facile conijcere poterit, quid de concitatis ab hoc principio febrilibus motibus sit sentiendum. Dicunt quidem, hos in se & sua natura esse salutare; sed ita potius sunt comparati, ut perniciem intentent & sapientem naturam imprudentiæ, quin plane dementiæ, aperte arguant. Ecquis enim in arte exercitatus est, qui ignoret, illum in febribus omnibus obvium à circumferentia ad centrum motum, cum vehementi partium externarum ac nervosarum spasmo & convulsiva quadam agitatione, pertracto simul in consensum universo nervorum systemate, fieri, & cum tam gravi omnium functionum læsione, quin ipsius mortis periculo, accidere, ut, qui intermittentibus decedunt, sub hoc ipso pereant. Sane, si pro arbitrio motus vitales dirigere posset agens hoc, tutius longe & facilius foret, sine tam pernicioso spasmico universali habitusque corporis constrictione, copiosorem sanguinis & humorum motum ad morbi sedem sensim, amica magis ratione, amandare atque dirigere. Et quamvis tan isper largiamur, febres, præsertim quæ intermissionem habent, corporibus crassius, copiosis & impuris succis fæctis, quandoque præstare medicinam & imminentes ex viscerum opplezione longas & graves affectiones, motu humorum progressivo extra ordinem cum intensiori calore aucto, ceteris paribus arcere: neutiquam tamen omnes intermittentes sanguinis & succorum abundantiam, impuritatem, nimiam spissitudinem, aut viscerum infarctum juncta habent, multo minus hæc veram & adæquatam febrium causam & materiale fomitem constituunt, ut nec ea propter opus sit, tam impetuoso solidorum & fluidorum motu, atque humorum vitalium dissolutione.

15. Quod porro ad illud assertum attinet: naturam maxime in febribus occupatam esse, quo sanguinem redundantem, dissolutoria quadam per motum intestinum resolutione, in corporis salutem imminuat; prorsus & quidem recte negamus, sanguinis & humorum abundantiam febris causam esse. Hoc enim si esset; plethorici frequentius sane febricitarent, & om-

nis generis febres tempestiva venæ sectione certo ac cito arceri possent atque præscindi. Eveniens autem sub febre sanguinis consumptio & in partes excrementitias dissolutio, est potius effectus & necessarium consequens febrilis caloris, naturæ per se plus inimica, quam amica, quia simul vires, à quibus motuum vitalium vigor pendet, dissipat ac destruit.

16. Ejusdem commatis est illud, quod humores crudi, viscosi, tenaces ex depravata maxime digestionem oriundi & in primis viis hisque conterminis organis hærentes, fomitem præbeant intermittentium. Rarissime enim evenit, ut ob vitium in diætâ commissum, vel pravam digestionem intermittentes gignantur. Longe magis vero copiosi acres, biliosi prima in regione succi, tertiana laborantibus molestias creant, in primis quum observemus, & juvenes, & cholericæ constitutionis homines, nec non iracundos, sub æstate ferventissima tertianis corripi, & his vomitus biliosos, dejectiones biliosas, solennes admodum esse urinasque flammei coloris, ob admixtas copiosas sulphureas & biliosas particulas, secedere. Ac licet demum nosmet ipsi vehementer improbemus adstringentium in cujuscunque etiam generis febribus usum, minime tamen concedimus, chinæ corticem, cum judicio, habita naturarum & circumstantiarum ratione, debito ordine ac tempore oblatum, talem præstare effectum, ut potius, uti fusius infra docebimus, ad promovendas excretiones ipsamque perspirationem liberiores reddendam, eundem aptissimum esse remedium, asserere non dubitemus.

17. Jam non incongruum, aut infructuosum erit, ut nostram de intermittentibus earumque generatione promamus theoriam, quo postea eo melius de methodo iis medendi accommoda & de remediis adversus ipsas idoneis judicare queamus. Id vero primo omnium tenendum, quod experientia constat, rarissime scilicet intermittentes unum vel alterum individuum ex vitio diætæ, vel digestionis invadere, sed plerumque grassari epidemice & ex præcedente insolita diuturna calida & sicca aëris intemperie oriri, tum quidem, quando corpus incautius vel borealibus ventis, vel auræ frigidiori & humidiori, sole maxime occiduo, exponitur, ut inde frigus notabilemque persentiat horrorem. Pari ratione, plura novimus loca, humiliora nempe, paludosa, compluviis, stagnis atque piscinis cincta, crebro febrium proventu adeo infesta, ut indigenæ & advenæ perpetuo fere omnique anni tempore iisdem exerceantur & tardius ac difficulter senescant, nullam certe aliam ob causam, quam quod ob aërem ejusmodi in locis densum, frigidum ac humidum insectorumque copia refertum, perspiratio languescat & sufflaminetur. Nulla enim unquam febris, præsertim intermittens, vel etiam catarrhalis, arthritica, rheumatica, nisi post imminutam & cohibitam excretionem cuticularem, accedit; nulla facile recidiva, quam hoc facto, repetit, neque minus etiam febrilis morbus eo gravior & diuturnior esse solet, quo magis hic saluberrimæ evacuationis successus interceptus atque cohibitus.

18. Igitur, quando ingens recrementorum per poros cutis eliminandorum copia, sive ex aëris intemperie & præternaturali constitutione, sive ex malo in animi affectibus & victus ratione regimine fuerit contracta, perspiratio autem, quæ pro tanta sordium activæ, halituosæ & salino-sulphureæ indolis, multitudine necessario sufficiens, quin auctior esse debuerat, constrictis nervosis & excretoriis cutis tubulis, valide potius impeditur; fit utique, ut motus feri excrementitii aliorum & ad interiora vertatur. Quod quidem, sicuti in febribus catarrhalibus, ad glandulosam narium, faucium & bronchiorum loca, in rheumaticis & arthriticis ad membranas musculorum & nervosoglandulosam artuum ligamenta, in diarrhœis ad in-

restinorum tunicas evenit : ita intermittentibus in febribus idem ad abdominis secretoria & depuratoria viscera, hepar nempe, pancreas, ventriculi & intestinorum glandulas & glandulosas tunicas contingit. Heic vero confluens malignus humor, fermentales, lymphaticos, salivales & biliosos, digestionis & chyli elaborationi servientes succos, inquinat, corrumpit ac intemperatos reddit, qui congesti, in duodeni maxime cavo, mutuo confermentantes & cum cruditatibus vitiosæ digestionis permixti, mora pejorem nervosisque partibus valde inimicam indolem contrahunt. Sic depravati & tam per poros, quam tubulos, successive ad sanguinem delati succi, quando ad nervosas, quæ cerebrum & spinalem medullam cingunt membranas pertingunt, infesta sua indole, universalem demum in vasorum & nervosarum partium systemate spasium concitant, qui febris essentiam constituit.

19. Febris quippe nihil aliud est, quam affectus & effectus systematis nervosi præter naturam affecti. Etenim, omnia illa, quæ sub accessione febris affligunt symptomata, dolor scilicet capitis, dorsi, maxime circa primam lumborum vertebra, dolor contusivus omnium artuum, ingens lassitudo & languor, frigus, rigor, horror, totum quandoque corpus concutiens, summa præcordiorum anxietas, spirandi angustia, cum inquietudine, pulsus arteriarum contractus, celer, parvus, inæqualis, vomitus, vel conatus ad vomendum, sitis sæpe sub ipso frigore, alvi fortior strictura, vel etiam fluxus, in nonnullis stimulus ad mingendum, mentis quoque ac sensuum, quam sæpe observavi in senibus, præsertim quartana laborantibus, obnubilatio, satis superque testatum faciunt, graviter læsum & affectum esse nervorum systema. Dum autem sub hisce symptomatibus ab exteriorum strictura, sanguis ad interiora & vasa majora, pulmones, caput & cor urgetur, ipsa sua copia cordis muscolum ad vehementiorem pulsum celerioreque systolen excitulat, quo fit, ut sanguis celerius & valide per vasa trajiciatur, arteriarum motus vehementior & citatior micet, æstuque sic majori facto, spasmi nervosarum partium iterum laxentur, materia quæ hos excitarat excutiat, sanguis ad ambium corporis appellatur, & adaperitis, remittente strictura, cutis spiraculis, sudor erumpat.

20. Hac ratione febris primum generatur atque succedit, quod vero interposito aliquo tempore novus impetatur paroxysmus, ita concipiendum esse arbitramur. Conflata illa, ex corruptis biliosis & lymphaticis salivalibus, cum indigesta alimentorum massa, succis, febrilis in duodeno potissimum hærens materia, non omnis simul & semel, sed successive, ad sanguinem & nervorum systema transit. Deinde id, quod ab hoc, ut ita loqui liceat, fermento restitat, ab affluentibus ex hepate, pancreate & glandulis duodeni impuris succis, novum subinde accipit pabulum ac nutrimentum. Tum intestino illo mirum adaucto in paroxysmo motu, ipse sanguis & serum in mucidas falso-sulphureas sordes fatiscit, quæ quum non omnes die vacuo diffentur, intus manent & succos lymphaticos salivales ipsamque bilem inquinant magis atque corrumpunt. Accedit, licet à nemine, quod scimus, annotatum sit, quod intercalari die pulsus admodum languidus & debilis, partes quoque externæ ipsaque cutis magis frigida, quam calida sint, & perspirationem remissam minusque sufficientem, intuitu sordium excernendarum, esse, luculenter arguant. Demum etiam verisimillimum est, universale illud nerveo-fibrosus & tubulosus corporis emunctorium, cutem, tot impetuosus & plane contrariis spasticis, constrictoriis, subsequente nimia remissione, motibus, nec non vehementi æstu, quoad tonum, robur & functionem suam admodum labefactari & vitari, ut saluberrimum illud excretionis periphericæ negotium,

sub toto febris decursu minus recte succedat ipsaque adeo sanguinis & humorum depuratio multum elanguescat. Quibus omnibus junctim expensis, in promptu est judicare, novum sic succrescentem sensum somitem, & certo interposito temporis spatio sufficienti quantitate collectum, novum iterum proritare febrilis paroxysmi insultum.

21. Quod autem rediens ejusmodi paroxysmus, non in omnibus intermittentibus idem recurrit tempus fervet; sed vel singulis, vel ternis, vel quaternis diebus repetat, quandoque typum suum & accessionis periodum mutet, interdum etiam duplicet; id omnino ob impuratum, ratione copiae, & indolis plus minus activæ & mobilis differentiam, largioremque vel parciorem earundem ad primas vias affluxum, nec non ob diversam viscerum, præsertim hepatis, lienis & pancreatis, conditionem & statum, fieri, censendum est. Luculenter certe id constat elapso anno, quo, propter insolitam diuturnam calidam & siccam aestatis & autumnii constitutionem, per universam fere Germaniam febres grassatæ, quotidiana, tertiana & quartana, simplices & duplices, nimirum anomalæ, nullam omnino aliam ob causam, quam diversam humorum indolem viscerumque constitutionem, pro varia temperamenti victusque eorum, quos invaluerunt, ratione.

22. Post intermittentium genesin & naturam, spectanda nunc adversus eas præsidia, quæ inter principem merito locum obtinet chinæ cortex, cujus ideo principia & quos in corpore vel cum emolumento, vel damno, præstat effectus, penitus paullo examini subjiciemus. Est vero inter hujus corticis elementa primo loco connumerandum adstrictivum. Patefecit hoc ex sapore linguam constringente, quem tam pulvis ipsius, quam infusum cum aqua fervente factum, nec non liquor, affuso ipsi spiritu vini purissimo, confectus, exhibet. Idem quoque confirmatur chymico experimento, dum solutio hujus corticis, adjecto vitriolo, more omnium adstringentium, nigrescit & atramenti colorem induit. Aterum, quod in complexu fovet elementum, est amarum, naturæ plane aperientis, quod unanimi medicorum consensu febribus perdomandis aptissimum, quandoquidem omnia fere amara, uti herba absynthii, cardui benedicti, fumarie, centaurei minoris, radix gentianæ rubræ, lignum colubrinum, antifebrilia suppeditant præsentissima.

23. Accedit tertium chinchinæ ingrediens, naturæ admodum gratum, balsamicum scilicet, quod sapore & odore, non tam pulveris, quam potius ex prolecta destillationis ope aqua, nec non vini spiritu, manifestatur. Quartum demum elementum est terrestre fixum, peracta solutione, & extractione conspicuum, quod quidem huc usque penitus ferme neglectum fuit, egregiæ tamen virtutis, ad corrigendam, obtundendam & involvendam materiæ febrilis, præsertim biliosæ, acrimoniam, eodem modo ac notum est, sola terrea, ut conchas, matrem perlarum, terram sigillatam & corallia, in sistendis febribus efficacia polere haud spernenda. Agit igitur hoc simplex tota ut GALENI loquendi formula est, substantia, & plura continet principia ad febres sanandas proficua, quæ rarius, vel plane nunquam, in ullo alio medicamento reperiuntur, eaque propter vehementer errant & falluntur ii, qui à sola facultate adstringente, febrifugum corticis Peruviani effectum derivare satagunt.

24. Hæc autem hætenus allata tam febrium theoria & pathologia, quam vera febrifugi nostri principia, expeditam monstrant viam, ad rectam intermittentibus medendi methodum, & quo pacto chinæ cortex cum bonis ægrorum rebus propinandus. Diximus scilicet superius, mineram, sive causam intermitten-

36 De recto corticis Chinæ usu in febribus intermittentibus.

tium materialem, ex affluxu copiosioris corruptæ bilis & salivalis laticis maleque digestis alimentis conflata primis viis, & quam maxime flexuoso intestino duodeno, firmiter impactam hære, ac inde successive certa quantitate ad interiora & nervosarum partium systema translata, motus istos spasmodicos febriles concitare. Hinc utique in perlanatione rationalis medici intentio eo dirigenda, ut peccans hæc materia attemperetur, obtundatur, eliminetur ipsiusque ulterior & largior affluxus ex glandulis ductibusque biliariis cohibeatur. Et his certe indicationibus peritum corticis Peruviani usum, si non ex toto, tamen maxima ex parte, satisfacere posse, existimamus.

25. Largimur quidem, minus proficuum esse hoc antifebrile, quando prima corporis regio, redundante vitiosorum, præsertim viscidorum, acidorum, & tenacium succorum saburra oblecta, ut hos potius inviscando, magisque immobiles reddendo, & simul adstrictiva sua vi alvinam evacuationem supprimendo, multum noceat, ut tum quidem non modo materia febrilis retineatur, sed & dolores tensivi & anxietates circa præcordia augeantur, quemadmodum in his, qui diuturna laborarunt quartana, senibus inprimis & pueris, nec non oggesto crebrius & liberalius cortice multoties vidimus. Quare tutius tum omnino & consultius est, hoc medicamentum vel plane omittere, vel non prius admittere, quam præmissis, quæ crassos, viscidos & tenaces humores attenuandi, incidendi & per alvi secessum evacuandi facultate pollent. Merentur hoc nomine laudem ex salium familia deprompta, sal scilicet ammoniacum depuratum, sal digestivum Sylvii, tartarus vitriolatus, arcanum duplicatum, sal Glauberianum, Ebshamense. Potissimum tamen in vincendis chronicis febribus spectatæ virtutis salia ex aquis medicatis prolecta, ut Sedlicense, & Egranum, quippe quæ paulo majori dosi, ad unciam scilicet dimidiam, vel unam, in sufficiente quantitate aquæ soluta, & aliquoties pro circumstantiarum ratione oblata, à colluvie viscidarum sordium intestinorum canalem egregie expurgant. Magna quoque amarorum ad mucidos, tenaces, & acidos succos incidendos, detergendos, ac evacuandos facultas, quorum in numero celebria sunt extractum centaurii minoris, gentianæ rubræ, cardui benedicti, absinthium, rhabbarum, aloes rite prius correctæ & cicurata, quæ in lixivioso aqueo menstruo soluta & die vacuo, vel cum vino, vel cum spiritu vini oblata, egregie profunt. His autem præmissis, cum ad interceptum nimium humorum vitiosorum ad primam regionem confluxum, tum ad facilitandum perspirationis successum, cortex noster cum aliis, quæ operationem ipsius secundant, utiliter propinari potest.

26. Pari ratione, ubi cruditates ex male digestis & corruptis cibis cum bile succoque salivali vitiatas, fomitem febris subministrant, & ratio dictitat, & experientia confirmat, liberandas, ante specificorum antifebrilium & roborantium usum, esse ab illuvie tam acidorum, quam biliosorum & corruptorum humorum, primas vias. Quod ut obtineatur; convenientissima sunt blanda emetica, vel *αῖμα* simul & *κάρω* evacuantia, rejectis omnibus acrioribus drasticis purgantibus, & validis emeticis, quippe quæ ventriculo & nervosis partibus admodum infesta, vires deijciunt, & motus efferos potius intendunt, quam minuunt. Nos, quam hunc in finem commendemus, habemus mannam, cujus uncia una, vel duæ, cum uno, vel duobus tartari emetici granis sufficienti aquæ fontanæ quantitate solutæ clementissime, satis efficaciter tamen, sursum ac deorsum evacuant, ac, ut multiplici compertum habemus experientia, egregie intentioni satisfaciunt. Et hoc facto, majori cum fructu & feliciore cum successu, antifebrile nostrum usurpare licet.

27. Contra ea plurimæ dantur febrium species, ut biliosæ, quartanæ & tertianæ æstivæ, duplices, continuæ, gravibus & acerbis symptomatibus stipatæ, quæ plerumque post diurnam præcalidam & siccam tempestatis constitutionem, à bile nimis intemperata, acrida, calida & volatili incunabula trahunt. Ad hanc earundem materiam figendam, cicurandam, obtundendam ejusque copiosorem ad intestina affluxum impediendum, cortex chinæ, præsertim in pulvere oblatus, absorbentibusque ac nitrosis remixtus, egregie ex usu est, eaque propter paucos post paroxysmos propinandus. Sic multoties, largas biliosas dejectiones, præsertim in corporibus biliosæ naturæ & cholericæ constitutionis, felici admodum successu erupisse novimus, discedente paullo post penitus febre.

28. Quod quidem, sicuti experientia edocti scribimus; ita non minus eodem fundamento nitentes, de hoc cortice asserimus, quod perspirationem fulciat ac promoveat, in quo, si non præcipuum, certe non minimum, intermittentes curandi, repositum est momentum. Hæc enim, ut supra diximus, saluberrima evacuatio, quando supprimitur & sordes per eam evhendæ ad interiora recedunt, primordiale suppeditat intermittentium causam, eo magis, quo major resistentium recrementorum biliosorum in sanguine & humoribus est proventus. Deinceps eadem hæc sordes, ob succedentem parcius & languidius die post paroxysmum vacuo hanc excretionem, copiosius denuo collectæ, palmariam repetentis paroxysmi causam præbent. Ipsæ recidivæ non aliam accedunt ob rationem, quam quod materia febrem movens exitu præclusa, uti potissimum fit, quando superata vix febre corpus paulo liberius frigido & humido aëri, circa stagna aquarum, in humilioribus locis, & templorum concamerationibus, vel etiam borealibus ventis exponitur. Liberiori quoque æstatis tempore cuticularis excretionis successui tribuendum, quod æstivæ tertianæ, & quartanæ, faciliore sint sanationis, quam autumnales, quin, diurnæ & contumacissimæ, etiam quartanæ, per autumnum, hiemem & ver affligentes, accedente solstitio æstivo, sponte, sine medicina, conquiescant. Hinc demum petenda ratio, quare, ut observationes fide dignorum auctorum confirmant, sæpe sola fortiori corporis, cursu, saltu, equitatione, ad sudorem utque exercitatione, nec non prolecto in balneo sudore, aut largiori vini potu, intermittentes admodum rebelles expugnentur & abigantur.

29. Tanta utilitas, tantaque necessitas hujus evacuationis in febrium est curatione, eaque propter, quod etiam hoc nomine cortex noster laudem mereatur, penitus paullo evolvendum. Videtur quidem huic facultati obistere, virtus ipsius adstrictiva, qua cutis poros stringi potius, & perspirationem sufflaminari vulgo creditur. At vero, non pure & positive adstrictivam, sed potius ob admixtum amaricans & balsamicum ingrediens, roborantem virtutem nostro cortici adscribimus. Nam, utut eminenti facultate adstringente dotata, cujus generis sunt aluminosa, vitriolica, & ex vegetabilibus radix tormentillæ, bistortæ, si convenienti tempore & regimine in intermittentibus usurpantur, non penitus spernendam habeant efficaciam, præsertim quando post eorum usum decoctum vel infusum calidum superbibatur & fortiter corpus motu exerceatur; sed tamen longe alia est ratio, natura & virtus roborantium, quæ non tam terrea, constringente, quam potius simul balsamico, araro elemento, in solidas corporis nostræ à tono dejectas partes agunt, iis robur, tonum atque vigorem & potentiam motricem conciliando, ut motus fluidorum catholicorum vitalium, qui potissimum à solidorum motu pendet, per compagem corporis inere vasculosam, promptior, citatior, & expeditior fiat; quem nunquam non major & auctior, per intensilem transpi-

rationem, impuritatum excretio, summo cum fructu sequitur, ut longe tutiora sint puris adstringentibus. Et profecto, quæ ex remediorum genere roborante & subadstringente, paulisper balsamica virtute splendent simplicia, in morbis longis & difficilibus perfanandis, magna præstare solent, & aliis longe superiora sunt. Hinc enim est, quod decocta herbarum, quæ vulnerariæ dicuntur, ut sunt nominatim: fragaria, fanicula, mellissa, agrimonia, veronica, scabiosa, marrubium, pulmonaria, hepatica, scolopendrium, nummularia, plantago, millesfolium, consolida Saracenica, flores bellidis, hyperici, muscus pulmonarius, polychrestam & mirabilem certe, non tantum in vulneribus consolidandis, verum etiam longis, insanabilibus fere morbis, cachexia, phthisi, scorbuto, ictero, hæmoptysi, atque identidem febre quartana, sanguinem depurando, viscera obstruata referando, nec non excretionem languidas promovendo, exserunt effectum, quæ tamen non proxime in fluidas partes, earum vitia corrigendo, sed potius in solidas, tonum & robur restituendo, agunt, atque sic operationem suam exserunt. Neque nostro tempore, singularis corticis chaccarillæ virtus, qui paullo calidioris & plus, nostro cortice, balsamicæ naturæ est, in sistendis nimis alvi fluxionibus, etiam dysentericis, ignota est, qui cortex etiam decenter usurpatus in febribus intermittentibus, item lentis, quæ ex stomachi & digestionis vitio proveniunt, curandis, non spernendam opem confert.

30. Est itaque tam salubris & spectata corticis chinæ virtus, ut roborando solidorum tonum, circulum sanguinis, excretionem, maximeque insensilem, per cutis spiracula, egregie promoveat, eaque propter per ipsam experientiam confirmatum habemus, ab ejus usu, mox virium accedere augmentum, vigorem corporis & animi restitui, appetitum antea emortuum resuscitari, cum omnimoda paroxysmorum febrilium cessatione. Observarunt etiam hos insignes & eximios effectus alii præclari medici, cujus rei testes citamus LISTERUM, BOHNIUM, SYDENHAMIIUM, DECKERUM, BERGERUM, JONES, MORTONEM, D'AQUIN, qui unanimi suffragio testantur, quod cortex egregie ventriculum roborat, appetentiam acuat, ac deficientem corporis calorem excitet, vires reficiat, nec solum perspirationem promoveat, sed etiam urinam, subindeque alvum, præsertim si recens sit, moveat. Et perite demum adjiciunt: omnes, qui cortice in febribus hoc effectu usi, à febre liberos mansisse, nec ullo inde oriente symptomate atque incommodo fuisse afflictos. Monendum tamen, has tam egregias operationes, non à sola excretionem cuticulari aucta, derivandas esse. Nam, non modo pluries à nobis observatum est, sub largo etiam & continuo diebus vacuis sudore, paroxysmos nihilo secius repetiisse, nec vires, nec appetitum, inde accepisse incrementum, sed & ipsa experientia comperitum est, ea, quæ sudorem movent efficaciter, ad sistendos febriles paroxysmos, non adeo esse apta atque conducibilia. Ingens quippe est differentia, inter sudorem, qui sæpius à virium prostratione & dejecto cutis tono provenit, & inter perspirationem auctiorem, quæ ex vegetiori ac celeriori sanguinis per universum corpus circuitu, expulsum vigore & æqualitate dignoscendo, resultat. Et hæc non tam positive sudoriferis, motum intestinum calidum in sanguine cientibus, procuratur, quam potius iis, quæ tonum solidorum, cordis, vasorumque dejectum fulciunt &

adducunt, quorum in numerum noster quam maxime referendus est cortex.

31. Neque etiam nostra fert sententia, semper, & omni tempore unicum hoc nostrum præsidium, roborando, & circulum sanguinis, & perspirationem augere, in iis, qui febre laborant, sed utique opus est, ut corpus sit dispositum, viæ & excretoriorum tubuli paruli, nec ipsasmo contracti, humores tenues & fluxiles, non crassi, viscosi & immobiles, ipsius quoque remedii virtus integra, nec à vitiosis primarum viarum succis obtusa, aut enervata. Eadem enim corticis nostri est ratio, ac martialium bene preparatorum, quæ itidem adducendo solidorum tonum, sicque universum sanguinis & humorum progressum promovendo, egregios quidem in longis ac rebellibus morbis expugnandis præstant effectus, non tamen semper & absolute tales, sed tunc demum, quando & solidorum, & fluidorum, apta & conveniens est ad aperiendum & excretionum successum dispositio. Atque adeo, quum roborando perspirationem moveant ex marte confecta, in proclivi est ratio, quare flores salis ammoniaci martiales, nec non cum hæmatite parati modestissime usurpati, in pulvere, vel cum spiritu vini in essentiam redacti, crocus martis tenuissimus, limatura martis in rubiginem versa & in subtilissimum pollinem comminuta, ad compescendos, immo tollendos febriles motus, cum prudentia usurpata, idem fere ac chinæ cortex, præstare soleant, contra vero, quando empirice, nulla corporum, naturarum, circumstantiarum & temporis ratione habita, ingeruntur, noxam inferant non levem.

32. Quæ quum ita sint, speciosum omnino videtur dubium, vel monitum: tutius forsitan esse famæque & conscientiæ medici magis conducibile, tam in quorumvis morborum, quam speciatim intermittantium medicatione, penitus ab ejusmodi remediis, quæ tam exactam in applicatione, ne noxam inferant, exigunt circumspeditionem, abstinere, & potius præcipuum sanationis negotium naturæ committere, adhibitis duntaxat iis, quæ humorum intemperiem corrigunt eisdemque mobiles ac fluxiles reddunt. Sed tenendum utique, non semper tuto & cum bonis ægrorum rebus hoc fieri posse. Docet enim experientia, adeo rebelles & insensas nonnunquam esse intermittentes, ut observato quantumvis exquisito regimine, adhibitis quoque tutis & selectis remediis temperantibus, diluentibus, blande evacuantibus & diaphoresin, finito paroxysmo, elicientibus, nihilo tamen secius per complures menses, quandoque integrum annum & longius perdurent, corpus emacient viresque penitus deiciant. Quin, licet his febris vehementia tantisper fracta fuerit, ob magnam tamen diuturnitatem inductam imbecillitatem, quæ CELSI effato omnibus morbis patet, accedente levi in vitæ victusque ratione errore, ex facili vel febriles motus, leviores quidem, recrudescunt, vel alii morbi, præsertim si copiosior cibus ingestus, cachexia febrisque lenta pullulant, ut etiam, qui minus favent huic nostro febrifugo, ipseque BAGLIVUS l. c. fateri cogantur, in fine, quando febris vires per longum tempus contriverit, ad ventriculum totumque corpus roborandum, nostrum usurpari posse corticem. Et certe multi & magni morbi, præsertim qui ex abundantia & impuritate succorum succrescunt, sine medicina, sola abstinencia & inedia, feliciter arceri possent atque sanari, sed quia plures has molestias subire recusant, venæ sectio in auxilium vocanda, abstinencia longe

38 De recto corticis chinæ usu in febribus intermittentib.

intutior. Providendum igitur, ut modo sine noxa fiant omnia.

33. Aliud, quo multi, etiam periti medici, corticem nostrum suspectum reddere nituntur, argumentum est, quod ejusmodi constringentia & roborantia motus & paroxysmos febriles suspendant quidem, causam vero & materiam febris non tollant, quæ postea vel recidivas, vel novos peiores morbos inducat. Verum superius jam evicimus, ita comparatum esse chinæ corticem, ut, si recte, debito ordine aliisque accommodis remediis nuptus, usurpetur, febris etiam causam tollat, promovendo nempe perspirationem destructumque tonum restituendo. Ad hæc incidunt sæpe casus, ubi motus morbosos, etiam febriles, relicta tantisper causa, compescere & ad tempus tollere expedit. Tam atrociter enim quandoque sæviunt paroxysmi in tertiana, v. gr. continua & duplici, ut consumtis ob vigiliam & jugem æstum nimium viribus, corpus morbo diutius sustinendo vix amplius par sit. Hic omnino utile, immo necessarium est, infestos hos motus ad tempus suspendere, quo majori cum fructu ad tollendam febris causam applicari possint remedia, tam corrigentia, quam evacuantia, quæ sub tanta insultus febrilis vehementia, & turbata plane tamdiu motuum & functionum naturalium œconomia, vel nihil proficiunt, vel contrarium prorsus interdum exserunt effectum.

34. Majoris momenti ad evertendum chinæ usum excogitatum quorundam argumentum esse videtur, quod, teste experientia plures febricitantes ab eodem exhibito in graves, eosque immedicabiles morbos, quales sunt lentæ ac hecticæ febres, cachexia, hydrops ascites & tympanitis, contractura, pathemata, in viris hypochondriaca, in foeminis hysterica, nec non motus in pueris convulsivi & epileptici, præcipitati fuerint. Verum enim vero, quamvis non negandum sit, periculosas ejusmodi afflictiones intermittentes sæpenumero sublequi, unde tamen id ipsum eveniat, non tam clare semper & plenarie liquet, sed pervestigatius paulo hujus rei ratio inquirenda venit. Propterea sciendum omnino est, ante febrem plerumque humores & viscera ad dictos morbos per se apta esse & disposita; dein accedit etiam perversa regiminis, diætæ & vitæ ratio, concurrunt graves animi perturbationes, & forsan quoque intempestivus plane & imprudens, ratione molis sive doseos & temporis, chinam exhibendi modus suum confert momentum. Quis itaque subtili rerum statu & conditione circumspectum pariter hujus corticis usum pro sola iniqui effectus causa agnoscere, vel eundem in genere suspectum, infidum & noxium reddere velit.

35. Præterea, satis omnino constat, summæ efficaciam præsidia, venæ sectionem, emetica, purgantia, opiata, mercurialia & martialia, item ex auro & antimonio parata, nec non salia volatilia animalium, balnea Laconica & medicamenta spirituosæ, si empirice & non cum judicio atque discrimine in usum trahuntur, æque perniciem noxasque inferre posse plane lethales. Nemo autem facile hanc inde formabit conclusionem: ergo hæc omnia medico usu carent & prorsus sunt rejicienda, sed ita potius arguendum: quia tam prompta ad juvandum, quam nocendum hæc generosa sunt remedia, ergo recte iisdem utendum. Longe majori vero jure eadem argumentatio valet in usu nostri corticis, qui ne quidem his magnæ activitatis remediis accensendus. Illa quippe in complexu suo quid-

piam foveat, quod exili mole subito ingentes in corpore suscitatur mutationes, hic autem non ita; sed si effectum exserere debet, majorem molem, ad uncias aliquot, successive sumendam, exigit. Neque etiam adversum naturæ humanæ remedium esse corticem chinæ, ex eo recte colligitur, quod in morbis, ubi vires imbecilles nervorumque systema affectum, eximio cum fructu exhibeatur, ac ob id non modo in febribus, sed &, experientia teste, in alvi fluxu, vomitu, dysenteria, malo hypochondriaco, hysterico & podagricis doloribus, ad firmandum ventriculi intestinorum & nervosarum partium tonum, apprime ex usu sit.

36. Demum, id quidem omnes fere concedunt, superata propemodum, naturæ auxilio, febre, ad compescendos, qui in habitum & consuetudinem abierunt febriles motus, febrifugum nostrum cum fructu usurpari posse; quod vero statim in principio, post unum vel alterum paroxysmum tuto in usum vocari possit, pernegant maxime isti, qui naturam febre tanquam remedio sapienti consilio uti censent, ad amoliendas causas, quæ vitæ periculum fruunt, persuasi, optimam & salutarem naturæ intentionem hac ratione turbare. Sed supervacaneum plane esse hunc metum, experientia, optima medicarum etiam veritatum magistra omnibusque ratiociniis superior, luculenter admodum docet. Nobis certe innumera fere nota sunt exempla eorum, qui tertiana epidemica gravibusque symptomatibus invadente correpti, hac methodo feliciter sanati sunt, ut expurgata, post tertium vel quartum paroxysmum, per superiora & inferiora, efficaci medicina, corporis regione, altero post die antifebrile ex cortice chinæ electuarium, congrua dosi, ordine ac tempore, sumserint; & hoc facto, post secundam vel tertiam statim accessionem, nullum amplius experti sunt insultum, sed perfecte cum sanitate in gratiam redierunt, præsertim, quando post hujus medicaminis usum, corporis exercitatione perspirationem auctiorem proritarunt & medicamenta roborantia stomachica simul usurparunt. Atque etiam id ingenue affirmare possumus, nos frequentiori observatione didicisse, & longe difficiliori negotio, & longe majori cautione, corticem nostrum febri opponi, ubi hæc aliquandiu per aliquot hebdomades, vel menses, corpori inhæsit, quam ubi haud ita pridem illud invasit; eo quod, quo diuturnior febris est, eo major recrementorum ex dissolutione sanguinis, per motum calidum intestinum, nascitur copia, quæ postea ægrius & corrigitur, & educitur.

37. Idem nobiscum censent præstantissimi in arte viri, inter quos nominasse sufficiet BOHNIUM, qui peculiari *dissertatione de fuga febrium minus suspecta*, id pluribus adstruxit, nec non BERGERUM, qui in citata superius docta *dissertatione de chinchina ab iniquis judiciis vindicata*, ita apprime ad veritatem §. 9. scribit: *non possum probare vulgari medicorum cantilena seductam SYDENHAMI cautionem, ut ne præmature nimis antequam febris ipsa suo se Marte aliquantisper protriverit, in usum hic cortex ducatur, ne agrotantis vita periclitetur, si sanguini omni fermentationis nisu se despumanti, derepente remoram injiciamus.* Rectius PADUS, DONZELIUS, LISTERUS, MORTONUS, JONES & maxime BOHNIIUS, docent, præmissis quidem, si opus fuerit, evacuantibus, ac præsertim emeticis, mox ineunte morbo & antequam febris radices egerit & succos visceraque ac vires corporis labefecerit, usu corticis vires illius

illius feliciter frangi & atteri. Hic nec recidivarum, nec illorum metus est malorum, quæ BAGLIVUS usui corticis adscribit, quum potius febris perversæ curationi & corporis impuritati debuisse causam dare, quia recto corticis usu egregie adjuvantis, causam illorum malorum una cum febre tolli, & ratio suffragatur, & experientia monstrat, ita, ut laudatus BOHNIUS testetur, innumerabiles fere, quibus, ab initio morbi, corticem præbuerit eoque febrem sanaverit, nihil damni percepisse.

38. Ad rectum igitur, securum & efficacem hujus medicamenti in febribus debellandis usum stabiliendum & confirmandum, annectemus ultimo loco salutare quædam cautiones & præceptiones, quibus rite observatis, non facile quispiam cortice nostro nocebit.

I. Corticem chinæ non exhibere oportet, nisi primis viis, à multa vitiosorum humorum saburra, qua scatent, probe prius liberatis; id quod optime fit per salia deterfiva, vel sola, in debita quantitate sumta, vel cum accommodato laxante aut emetico nupta. Neque ad ejus usum, præsertim in majori copia instituendum, facile descendendum est, si abdominis viscera obstructa, vel sanguine & humoribus infarcta existunt, sed prius potius obstructions referentur, infarctusque expellantur, necesse est, quod per potum aquarum mineralium, per salia neutra & amara thermarum & acidularum, per rhabarbarina cum sale tartari vel terra foliata tartari permixta, per juscula cum radicibus & herbis aperientibus decocta, per sufficientem motum corporisque exercitationem efficitur quamoptime.

II. Nec facile cura intermittentis cum cortice chinæ suscipienda est in corpore aperte plethorico, cacoehymico, cachectico & hypochondriaco, aut criticis sanguinis evacuationibus suppressis; sed præstat omnino per sanguinis decentes missiones, per elixiria temperata balsamica, pilulas balsmicas polychrestas, interponendo salia neutrius generis amaricantia, impedimenta remove motusque istos febriles medicamenti instar ad hæc vitia submovenda aptos impendere nec repente unquam suppressere.

III. Majori cautione opus est, si corpora, quibus exhibendum est nostrum febrifugum, viribus sanguineque exhausta, si animi affectibus obnoxia, si senilia sunt; nec non si ipsæ febres in hecticam continuam & lentam inclinant, si alvi obstructions, urinæ sine sedimento tenues incidunt, si hypochondria tument & febris autumnalis vel hyberna per longum jam tempus inhæsit: quod si accidit, expedit potius febriles, si præsto sunt, motus lenioribus evacuantibus & roborantibus blande moderari, donec tandem, quod sæpius fit, vel loci mutatione, vel exquisitiori observato vitæ victusque regimine, vel aëre salubri, levi, sereno & calido accedente paroxysmi sponte conquiescant.

39. Quum ad rectum & salutarem nostri medicamenti usum multum omnino conferat, qua forma, dosi, tempore & sub quo regimine exhibeatur, tenendum est:

I. Quod ad formam attinet, ante omnia corticem purum, solidum, bene sapidum nulloque fracido vel vappido odore imbutum eligendum esse. Hic ipse in minutissimum pulverem comminutus simplex in substantia, sine ullo alius additamento in quovis vehiculo commodissime datur. Si quis autem hunc pulverem reformidet, sum sola aqua & saccharo in electuario red-

Frid. Hoffmanni Oper. Tom. VI.

ctus degluti potest. Testari ego sane certa explorataque fide possum, me efficacior semper præstantiorque animadvertisse hunc corticem simplici hac methodo exhibitum, quam multis aliis ingredientibus permixtum varieque hinc inde mutatum. Ubi manifesta ventriculi adest imbecillitas cum fastidio pulverem assumendi, in infuso cum aqua vel vino & ad gratum saporem cum pauxillo cinnamomi parato in forma potus Théé, facta pro lubitu edulcoratione, calide vel etiam frigide ad decentem quantitatem sumatur. Dein, si febris biliosa magno cum æstu juncta urget, ejus pulverem cum quarta nitri purificati parte remixtum exhibere præstat. Ubi vero ob obstructionis & viscerum à viscidis & crudis humoribus infarctus suspicionem major ab eodem adstrictio metuenda est, in forma vel solida vel liquida salia addenda sunt lixiviosa, & inprimis alcalina, quæ adstringentem corticis nostri virtutem egregie corrigunt & cicurant. Potest hac ratione extemporalis liquor parari roborans & antifebrilis securissimus, quando uncia una corticis chinæ & salis tartari drachmæ duæ in aquæ cum vino dilutæ libra una coquuntur. Denique ego quoque in arte exercenda ad domandos febrium insultus optimo cum successu usus sum sequenti electuario: Rec. Roob Sambuci unciam unam, cortic. chin. drachmas VI. extracti fl. chamomill. vulg. nitri depurati, antimon. diaphor. singulorum drachmam unam & semis, julepi rosarum q. s.

II. Quoad dosin hujus specifici hæc monenda duxi: quod excessiva valde quantitate ad drachmam unam vel ultra pro una vice nunquam sit exhibendum; sed longe erit consultius, diversis vicibus unum alterumve tantummodo scrupulum die intercalari, finito paroxysmo, intra trium horarum spatium, sufficientem superbibendo vel aquæ, decocti, brodii, vel cerevisiæ quantitatem, inter cibum quoque porrigere. Mirifice autem operationem hujus medicamenti adjuvat motus & exercitatio corporis, qua saluberrima ad febrem fugandam perspiratio insigniter promovetur & omnis suspecta adstrictio aut humorum coagulatio prohibetur.

III. Tempori prospicitur, si curæ ad minimum per unam hebdomadem, dicta ratione insistimus. Tum sublata febre & appetitu redeunte semel quotidie, ac demum alternis diebus dosi nostri corticis capienda erit.

40. Sequuntur adhuc aliæ in cura febris per hunc corticem necessario tenendæ cautiones:

I. Durante usu, quando alvus adstricta, ea primum non nisi clystere emolliente & leniter stimulante officii admonenda; haud vero tentanda per purgantia, ne recidivæ accedant, eo quod horum usu perspiratio retrahitur & humorum excrementitiorum affluxus ad intestina revocatur. Postea vero manna cum cremore tartari locum habere potest, nec non pilulæ balsmicæ Becherianæ, Stahlianæ, vel nostræ, cum sale quodam aperitivo, intermedio tempore & sub finem propinata, ita tamen, ut post alvi subductionem, semper iterum exhibeatur dosi electuarii.

II. Discedente demum penitus febre, corpus aliquandiu in libera perspiratione adhuc servandum, aër gelidus, venti boreales & septentrionales, nec non omne externum frigus, loca humida, vappida vitanda, & usurpanda elixiria amara, stomachica, roborantia, uti est elixirium nostrum, quæ mane, vel in prandio sumta, non modo ventriculum roborando, sed excretionem per cutis poros fulciendo, egregie prosunt.

40 De recto corticis chinæ usu in febribus intermittentib.

41. Ultimo loco non possum, quin peculiare, quod dissertatio hæc experta est, fatum commemorem. Prodiit videlicet Francofurti ad Viadrum dissertatio, de cortice chinæ noxio licet recto usu in febribus, directe nostræ opposita, in qua auctor intempestivo contradicendi studio jam tum satis clarus chinæ corticem, licet summa cautione usurpetur, infidum, suspectum & in se noxium esse medicamentum multis, sed plane frivolis & inanibus rationibus affirmare omni conatu contendit. Contra hæc quædam ex professo quicquam movere vix operæ pretium duxi, quoniam in arte periti & recte judicandi facultate præditi viri sterile & inane contradictionis argumentum cum præjudiciis pariter ac affectibus junctum sponte deprehendere poterunt. Nihilominus in gratiam juniorum medicorum, qui facile diversis opinionibus confunduntur, perpauca hoc loco monere & attingere placuit.

42. Omne earum, quæ in memorata dissertatione in contrarium adducuntur, rationum momentum unice hypothesei notissima Stahlia ininititur, animam rationalem motus febriles salutarem in finem, ad causam febris e corpore eliminandam instituere, qui nullo modo, præsertim adstringentibus, inter quæ præcipue cortex chinæ referendus est, sint cohibendi. Quum vero in ipsa hac nostra dissertatione jam satisfactum fuerit huic opinioni; eo magis sane miror, auctorem veritatem facti, sive experientiam innumeris casibus & exemplis à medicis non modo Germaniæ, sed aliarum quoque nationum peritissimis fideque dignis, per longum annorum spatium diversis temporibus adstructam & comprobata, corticem videlicet Peruvianum in chronicis febribus, quæ nulla alia arte expugnari poterant, felicissime & ulla noxa fuisse adhibitum, sola hypothesei minus adhuc probabili in totum negare penitusque rejicere conari. Est enim à vera philosophandi methodo prorsus alienum, solis sibi mente fictis hypotheseibus vel rationum momentis experientiam æstimare, aut medicaminis salutarem usum metiri velle, cum potius, si ordine procedere velimus, veritas facti prius consulenda sit, & tum demum rationes inquirendæ hypotheseisque applicandæ veniant. Quapropter, Dnus Auctor dissertat. quod ipsi incumbit, demonstrat, corticem nostrum, etiam caute & circumspecte adhibitum in febribus indistincte omnique tempore damnum attulisse. Quod meam attinet experientiam, ego quidem, ultra quinquaginta & quinque annos, in diversis locis idque primum in Westphalia, ubi corpora crassis succis sunt repleta, morborum curationibus vacavi, certa fide affirmare possum, à cortice chinæ prudenter, & non adeo magna dosi dato me nec immedicabiles morbos, nec facile recidivas, si exacta accesserit vitæ ratio, observasse, ut potius conspicuum inde & securum effectum animadverterim. Id quod in meo ipsius corpore expertus scribo, quippeter per ætatem meam febre intermittente pertinacissima detentus, omnibus aliis incassum adhibitis remediis, solo corticis nostri recto usu integræ restitutus sanitati fui. Econtrario vero susceptæ ab aliis medicis sine cortice chinæ aut cascarillæ febrium intermitten-

tium curationes satis superque me docuerunt, quod non ægri solum sat diu macerati, verum etiam sæpenumero in graves passiones chronicas præcipitati fuerint; imo, quod mirandum, ipsos ejusmodi contemtores ad nostrum remedium, quasi ad ultimum refugium, sæpe coactos vidi.

43. Sed ut ex ratione quoque pateat, an ita sit, ut falso dicitur, corticem chinæ etiam recte usurpatum febriles quidem motus propter vim suam adstrictivam deprimere, neutiquam vero causam febris tollere, necessarium erit, ut ipsum operandi modum hujus corticis penitus paulo inquireamus. Gaudet vero hic cortex particulis fixioribus, terreis, gaudet adstringentibus & amaricantibus suis, quibus virtutem suam febrifugam exercere debet. Quis autem saniorum est, qui non perspiciat, in his ipsis chinæ principiis aptum natum, si decenter usurpetur, contineri remedium, ad subtilem bilis acrimoniam causticam, à qua maxime epidemice grassantes tertianæ oriuntur, in primis viis antea prorsus infringendam, quam ad sanguinis massam aut ex hac ad genus nervosum delata universum nervorum systema ad truculentas tractiones spasticas irritet. Deinde, quum roborans chinæ principium, quæ partes relaxatas intendere, & à toto dejectas firmare valet, inter omnes plane constet, quid mirum est, quod auctiori reddito, præsertim die intercalari perspirationis negotio, novo paroxysmo materiam præbentes reliquæ e corpore eliminantur & hac ratione totius febris impetus optime evertatur.

44. Nunc quidem ultro largimur, medicamentum hoc perverso plane modo exhibitum, nullo ad plenariam morbi historiam, ad individui naturam, constitutionem internarum partium, ad causam febris aliasque morbosas dispositiones & res circumstantes, ad tempus, ordinem & dosin, habito respectu, insignem corpori noxam, imo majora, quam antea fuerunt, mala affricare possit. Sed nihilo minus, quum ita, ut supra docuimus, argumentari haud liceat, sponte exinde sequitur, corticem nostrum recto usu prodesse, in quo nocere. Cujus ratio in eo consistit: si quando in majori & sæpius continuata dosi data china obstructions minimorum vasorum in visceribus & copiam viscidorum humorum in corpore obfibrarum motricium crassitiem & inertiam male disposito offenderit, hoc casu omnino propter vim adstrictivam & simul increassantem malum augere & graves chronicas excitare passiones valet.

45. Atque hæc sunt, quæ in præsentiarum exponere placuit, eum maxime in finem, quo omnibus constaret, chinæ corticem, non tam suspectum & pertimescendum in febribus aliisque morbis esse remedium, ut perperam à quibusdam creditur, sed tutum, efficax & innocens, modo accedat medens, qui cum judicio & ratione sua perficiat, nec ea propter noxam subinde emergendum medicamento, sed vel perverso usui, vel erroribus ægrotantis, vel etiam neglectæ reliquiarum remotioni, merito essetribuendam. His autem, qui præcepta rationalis medicinae non ad amissum callent, auctor suusque sum, ut ab omnibus heroicis pharmacis, & hoc etiam cortice, penitus abstineant, ne plus noceant quam prosint.

D E

MEDICAMENTIS SELECTIONIORIBUS.

§. I.

Ingeniose acutissimus sui temporis Philosophus *Helmontius* scribit: *Pauca sunt, quæ medicum nobilitant.* Quemadmodum enim natura ad corporis conservationem tuendam, perpaucis utitur artificiis, neque alimentorum copiam desiderat: ita etiam ad propulsandos morbos certe non multis & multiplicibus, sed admodum paucis selectis tamen opus habet remediis. De hujus alicuius veritate, nemo facile dubitabit, qui accurata facta pensatione consideraverit, non admodum multos esse causarum morborum proximarum fontes, ex quibus symptomatum omnium ratio debeat derivari. Quum vero sublata causa proxime sanatio morbi consequatur, inde facile quisque perspiciet, non operose conquisitis variis copiosisque ad curandum opus esse auxiliis, quod certe solers & peritus Practicus optime intelligit. Mirandum hinc merito est, unde tantus remediorum numerus qualis visitur in libris chymicis, pharmaceuticis, practicis, in medicinam irreperit, quum tamen ex tam innumerabilibus, quorum virtutes saepe ad coelum usque sublatas vides, perpaucis sint, quæ & medentium & ægrotantium spem ac expectationem sustineant atque tueantur. Profluxit procul dubio hæc quasi rabies pharmacorum ex sola theoriæ medicæ solidioris ac veræ ignorantia. Nam quum exquisita corporis nostri, & eorum, quæ illud mutant atque afficiunt, scientia, veteres, ceteroquin non sua laude defraudandi, plane carerent: hinc neque veras morborum causas, neque genuinas remediorum facultates perspectas cognitasque habebant. Postea vero quam nostris temporibus per divina anatomiam, chymiam, neque minus philosophiæ experimentalis & mechanicæ studia, magnam lucem medica scientia, quæ olim figmentis & inanibus terminis penitus erat involuta, accepit, factum est, ut etiam therapia ad majorem perfectionem fuerit deducta. Jam enim facile quisque solidior medicorum non modo plurimas ineptas compositiones cum nausea intuetur, sed & maximam partem superflua & inutilia medicamenta cognoscit, quibus commodissime vera medendi scientia carere posset. Ex quo satis apparet, praxin medicam nostris temporibus perquam facilem esse, quæ olim magno labore, sumptu, apparatuque medicamentorum suscipiebatur. Quod beneficium, at certe maximum, unice nos debere meliori theoriæ medicæ, cujus incunabula ab anatomia & naturali philosophia ducenda sunt, nemo sapiens negabit. Quam vero ante nos multi præclari viri in eo operam suam collocaverint, ut ex immensa medicamentorum sylvæ selectum quendam indicarent: non tamen sine fructu fore arbitror, si in universa fere materia medica examinanda nos quoque rem compendii faciamus, & perpaucis, selectissimis tamen, & quæ omne in medendo punctum ferre possint, præsidia indigitemus. Quod in præsentis quum persequi nobis constitutum sit, ut benignissimum ex alto numen huic nostro labori benedicat, demissè precamur.

§. II. Quum itaque selectissima tantum remedia

Frid. Hoffmanni Oper. Tom. VI.

dia compendio quasi includere animus sit, illum sequemur ordinem, quo omnia remedia in certa quædam genera dispescuntur. Veteres ad evacuantia & alterantia maximam remediorum partem referebant, hisce vero recentiores plurima specifica, quæ peculiariter certam partem roborant, vel etiam morbum expugnent, adjecerunt, unde in medicina tituli cephalicorum, stomachicorum, hepaticorum, splenicorum, cordialium, pectoralium recepti sunt, & medicamenta ob virtutem, qua morbos sanare perhibentur, antifebrilia, antiepileptica, antinephritica, antihypochondriaca, & id genus alia, mirifice laudata fuere. Hæc vero omnia & singula, & quæ amplius possunt excogitari, in quatuor fere classes & genera commode ex nostra sententia dispescuntur, quæ sunt evacuantia, alterantia, roborantia & sedativa. Quemadmodum enim omnes, quæ morbos continent, causæ, vel quantitate vel qualitate sive temperie aut motu peccant: ita etiam omnia remedia vel quantitatem vel qualitatem, vel motum respiciant, necesse est. Quæ morbis peccantibus quantitate opponuntur remedia, evacuantia, quæ in temperie delinquentibus, alterantia vocantur. Quoniam vero porro omnis, qui morbum sustinet, motus vel vehementior vel languidior est, hinc illum sistunt sedativa, languidiorem vero resuscitant roborantia. Neque tamen negandum est, inter hæc quatuor genera dari quædam remedia, quæ certæ parti magis antica, certoque morbo sanando magis sint idonea, & ob id specialem observationem mereantur. Testes rei hujus sunt cantharides, quæ sale subtili caustico efficacissime vias urinarias, vesicam vasque annexa afficiunt: parum vero in reliquis membranaceis partibus præstant. Mercurialia remotis partibus admota, protinus fauces & ipsis annexarum partium glandulosum contextum afficiunt, quorsum ingentem humorum copiam mox congerunt. Ex acidis spiritus salis pulmonum bronchiis maxime infestus est, mentha in vomitu sistendo, castoreum in compescendis ex uteri vitio spasmodis, crocus in pulmonibus affectis, peculiare quid præstant, nitro in refrenando sanguinis fervore nihil datur excellentius. China Chinæ omnium antifebrilium facile princeps est. Camphoræ simile quid natura vix arcendis inflammationibus possidet. Vino, ambræ & cinnamomo ad roborandum nullum aliud comparari potest præstantius. Atque adeo appropriatæ quorundam remediorum vires longo usu exploratæ minime negligendæ sunt.

§. III. His perspectis secundum methodum illorum, qui in therapeuticis quædam memoriarum prodiderunt, exordium faciemus ab ipsis evacuantibus, & quidem illis, quæ per partes superiores celeriter vitiosorum humorum laburam fores projiciunt, & emetica appellantur. Ex his vero maxime ea proponemus, quæ non modo securitate, sed & prompto effectu sese commendant. Notum enim est, quæ vomitum ciere solent, esse inter valentissima, adeo ut penetranti caustico & ob id virulento elemento plerumque agant: quod in spasmos & convulsionem ventriculum eique proxime annexum intestinum conjicit. Prædens igitur medicus,

Veteres ad evacuantia & alterantia maximam remediorum partem referebant.

Hisce recentiores plurima specifica adjecerunt. Antifebrilia, antiepileptica, &c.

Hæc omnia & singula in quatuor classes commode dispescuntur.

Quæ morbis quantitate peccantibus opponuntur Evacuuantia. Quæ in temperie delinquentibus alterantia vocantur.

Quoniam omnis, qui morbum sustinet, motus, vel vehementior vel languidior est, hinc illum sistunt Sedativa, languidiorem resuscitant Roborantia. Dantur & remedia certa parti magis antica.

Qualia describuntur. Appropria igitur quorundam remediorum vires minime negligendæ.

Ex evacuantibus ea proponemus quæ non modo securitate, sed & prompto effectu sese commendant.

Veteres orientales lenissimis ad vomitum utebantur. Stibiana & metallica nesciebant, aqua tepida cum pauco sale, &c. contenti. Noster ventriculus valentiora desiderat. Hinc prioribus seculis ex stibio emetica arceffebant. Ex omnibus vero tartarus emeticus maximum applausum habuit. Antidota emetica minus imo expeditius suum faciunt officium, si non sicca sed soluta exhibentur. Ratio. Hinc vinum emeticum Rulandi aqua benedicta olim vocatum. Nos semper tartarum emeticum in aq. menth. vel Cinnamomi usurpavimus. Emetica ex vino data longe expeditius operantur. Si ventriculus tam per superiores quam per inferiores partes deplere utile sit manna liberalis dosis cum granis aliquot tart. emetici convenit. Longe adhuc tutius emeticum est Rad. Ipecacuanæ. Quæ expeditius vomitum, intermedium una sedes movet, & celerius ipso tartaro emetico ad operationem pervenit. Ab ejus usu vires non ita elanguescunt.

maxime circumspiciat necesse est, ut quo minori periculo, vel sine ventriculi læsione hæc operatio celebrari possit, eo solentiori cum cura id negotii conficiat. Veteres orientales & calidiorum climatum medici, lenissimis ad vomitum provocandum utebantur, forsitan quod horum populorum ventriculus longe sensibilior ac mobilior fuerit, quam in nostris regionibus. Stibiana & metallica nesciebant, sed aqua tepida liberalius hausta, in quam modicum salis conciciebant, vel ubi fortiore opus erat, oxymelle squillitico contenti erant. Noster vero ventriculus ceu robustior, valentiora desiderat, quia septentrionales populi luxuriæ & intemperantiæ magis dediti sunt. Hinc prioribus seculis, ubi chymia majori studio excoli coepit, ex stibio, cuius regulina pars impurioris mercurialis sive arsenicalis substantiæ est, emetica arceffebant: quare sulphura, vitra, crocos variis modis ex antimonio parabant, atque ex illis diversa concinnabant vomitoria. Ex omnibus vero maximum applausum emeticus tartarus habuit, partim quod levissima dosi gratus & acceptus fuerit; partim etiam quod tutior sit vitro & crocis stibiatis in substantia datis, quæ prout magis vel minus in ventriculi sinu dissolvuntur, ita differentem operationem nanciscuntur.

§. IV. Veruntamen attentiori experientia didicimus, antimoniatum emetica longe tutius imo expeditius suum facere officium, si non sicca sed soluta, & ut vocant, in forma liquida exhibeantur. Perpetuo enim præstat, metallica vel etiam, quæ virulento agunt principio, nunquam concentrata vel in pulvere, qui difficiliter in ventriculo solvitur, sed diffusa & diluta propinare, ne firmiter insidendo nerveis ventriculi membranis eas majori stimulo & rosione ad spasmos & convulsiones universum nervosum genus sollicitent. Et hinc, certe non sine ratione, vinum emeticum Rulandi aqua benedicta olim vocatum fuit. Nos tutissime semper tartarum emeticum solutum in aqua stomachica, ex gr. menthæ, cinnamomi, quandoque pro morbi ratione purganti, sudorifero vel antispasmodico junctum in praxi magna cum felicitate usurpavimus, imperando ut desuper hauriatur calida butyracea cerevisia vel avenaceum decoctum. Observamus quoque ex vino & aliis vehiculis roborantibus emetica, immo purgantia, data longe expeditius, quam alias fieri solet, operari. At si prima regio ingenti vitiosorum humorum saburra sordescit, uti in intemperantibus fieri solet, tunc utique tam per superiores quam per inferiores partes eam deplere utile est, cui scopo maxime convenit mannæ liberalis dosis, decocta cum aqua, adjectis aliquot granis tartari emetici, ita enim & plures sedes & vomitus moventur, quod ad præsciendendas intermittentium vires quam opportunum vidimus remedium. Quod si vero longe adhuc tutius expetas emeticum, minime ventriculo infestum, sed quod potius eum roboraret, ecce America hujus beneficii nos reddit participes, cum laudatissimam radicem Ipecacuanæ protulit, cujus pulvis ad scrupulum unum, vel in robustioribus ad drachmam semis cum pauxillo nitri in jusculo calido datus, expeditie vomitum, quandoque etiam una sedes movet: & quod mirum videtur, celerius ipso tartaro emetico ad operationem pervenit. Ab ejus usu vires non ita elanguescunt.

Est enim suavi aromatico principio hæc radix instructa, unde etiam in diarrhœis, inque dysenterici principio, ubi cetera emetica multum habent periculi, non sine ratione, ob fructum & utilitatem quam prodit, magni æstimatur. Quare ut in frequentiore usum in posterum remedium hoc tutissimum vocetur, auctor suasorque sum.

§. V. Magni quoque in praxi medica interest, ut selectiora, quæ alvinas fordes moveant, remedia possideamus. Neque enim iis carere possumus, quæ primas fordes, magnorum morborum fomites, mature & quantum satis est, excludunt. Veteres qui leniora, ut rhabarbarum, folia sennæ, mannam & tamarindos, ignorabant, valentioribus utebantur; sed quantum periculi imo exitii hæc ipsa, præsertim imprudenter oblata, sensibilioribus subjectis procreaverint, dici vix potest. Vehementer enim ventriculi & intestinorum tonum debilitant, & labefactant. Etenim omnia quæ interne sumuntur primo ad ventriculum, deinde ad intestina descendunt, hinc utique in has partes præcipuum effectum & quidem integra & nondum immutata sua textura exerceant necesse est. Itaque ante omnia harum partium textura & sensibilitas diligentissime spectanda est, utpote, quæ ratione ætatis, sexus, temperamenti, dispositionis hæreditariæ & regionum multum variat. Negari enim nequit, in uno subjecto longe teneriorem & sensibiliorem esse ventriculum, quam in altero. Ita scemini, quæ in universum partes corporis teneriores & delicatiores habent, longe tenerioris texturæ ventriculus est, quam ipsis viris, quo fit, ut etiam graviora pathemata spasmodica, quam illi sustineant, quare etiam minus vehementiora ferre possunt. Infantes tenerrimum habent ventriculum & subtilioris texturæ intestina; hinc à solo lacte per moram corrupto non modo atrociora tormina, sed convulsiva symptomata facile experiuntur: quod in adultis vero rarissime visitur. Sciendum tamen est, quod interdum lætis viscositas vehementiorem etiam acrimoniam pharmacorum obtundere soleat, pro dispositione enim humorum in primis viis infantes à purgantibus varie moventur. Hypochondriaci sensibilibissimas ut plurimum habent primas vias, unde anxietatum, flatuum, & spasmodorum ingens penes ipsos est copia. Huc accedit, quod sæpiusculi acidi corrosivi humores, quibus abundant, primam villosam, quæ nerveam munit, tunicam eroderint. In tanta igitur primarum viarum varietate, quam periti difficulter agnoscunt, temerarii vero plane non intelligunt & negligunt, utique & famæ & conscientiæ consultum est, tutissima via perpetuo incedere, & non tam facile ad vehementia & infecura prolabi. Nos omnia in totum fere purgantia acriora ab usu removenda esse judicamus, sola forsitan radice jalappæ vel mechoacannæ, quæ mitior est, si necessitas urget, excepta. Hæc in electuarii formam, cum mercurio dulci, vel alio, si opus est, redacta, efficax ad detergendos & expellendos viscidos humores fit medicina. Nihilominus in exhibendo & prudentiam & moderationem medici desiderat. Sique pillulis polychrestis laxantibus majorem adjicere velimus stimulum, extractum panchymagogum Crollii, quod instar omnium esse potest, vel jalappæ resina cum amygdalis contusa, vel in ovi vitello soluta, sive sola sive cum mercurio dulci mista omne adimplebit punctum. Inter ea ve-

Suavi aromatico principio est instructa hæc radix.

Cujus usus ab auctore commendatur.

Magni quoque interest ut selectiora purgantia possideamus.

Veteres valentioribus utebantur. Sed vehementer ventriculi, &c. tonum debilitant.

In uno subjecto longe tenerior & sensibilior est ventriculus, quam in altero.

Fœminis longe tenerior ventriculi textura quam viris.

Infantes tenerrimum habent ventriculum.

Hypochondriaci sensibilibissimas habent primas vias.

Omnia in totum fere purgantia acriora proferimus, sola jalappæ vel mechoacannæ exceptis.

Extractum Panchymagogum Crollii instar omnium esse potest. Vel Resina Jalappæ cum amygdalis contusa vel in ovi vitello soluta omne adimplebit punctum.

Cassia, Tamarindi, Manna, Rhabarb. Aloe sine magna turba alvum movent. Rhabarb. ro sunt præterea roborandi virtutes. Eius usus est commendatissimus.

ro, quæ leniter sine magna turba ac læsione alvum movent, & hinc veteribus benedicta vocantur, sunt cassia, tamarindi, manna, rhabarbarum, aloe, quorum quatuor priora veteribus fuere incognita, sed post sæculum decimum tertium demum ex Arabia ad nos adducta. Rhabarbarum vero, præter virtutem leniter alvum ducentem, simul relaxatos intestinorum villos roborat, unde non modo in immodicis alvi fluxionibus, sed & in tono intestinorum penes hypochondriacos læso, inque lienis & hepatis infarctu proficit. Gravidis quoque & puerperis, & ubi ingens ex iracundia in primis viis colluvies biliosa est, ejus usus est commendatissimus: præsertim si in electuarium cum rosaceo saccharo vel syrupo, quod commodum est redigatur.

Manna & Cassia admodum proficua sunt.

Opportune hisce salina adjiciuntur.

Tamarindi non modo alvum subducunt, sed & bilis fervorem infringunt.

Senna quoque inter leniora laxantia merito recenseri, sed quæ meliora habemus ab ejus usu abstinendum. Virtute aliis palam præripit aloe succorina. Hæc Galeno fuisse cognita.

Aloes encomia.

In minori & refracta aloe plus commodi quam in magna efficitur.

Manna & cassia, ubi acrimonia primas vias vel pectus obsidet, paulo majori dosi in decocto oblata, admodum proficua sunt, quare in tussi, in catarrhalibus, rheumaticis, nec non arthriticis passionibus, item in melancholicis & hypochondriacis affectibus, si modo dulcia ferre possint, cum fructu adhibetur tale decoctum, quod recipit uncias tres vel quatuor mannæ & dimidiam portionem cassiæ: non simul & semel, sed successive est exhibendum, interpotando decoctum hordei, vel cornu cervi. Ita enim acrimoniæ humorum prospicimus, & sine incommodo multas sedes movemus. Opportune hisce salina, ut nitrum & tartarus solubilis, vel carminativa, ut aqua corticum citri, vel eorum essentia adjiciuntur. Tamarindi propter suavem, quo pollent acorem, non modo alvum aptissime subducunt, sed & immodicum bilis fervorem infringunt, sitimque sedant, unde ubi febris vel præcalidus alius ex bilis copia aut fervore morbus alvi apertionem urget, hi merentur commendari. Commodissime vero dantur cum decocto cornu cervi, manna & syrupo acetositis citri: ita enim gratissima redditur potio. Senna quoque inter leniora laxantia utique meretur recenseri, sed cum paulo fastidiosioris sit saporis, & facile decocta tormina excitet, consulo, ut, cum jucundiora & meliora habeamus, ab ejus usu abstineamus.

§. VI. Virtute vero facile omnibus aliis palam præripit aloe purissima, ut est succotrina, quam veteres lotionem, nos coctionem probe corrigimus, & à sulphure naturæ alieno liberamus. Hæc neque veteribus, præsertim Galeno, fuit incognita, qui lib. viii. de compos. Medicam. cap. 2. illam recte appellat medicamentum, quod vim balsamicam corroborantem & laxationem obtinet, & quod motus convulsivos à ventriculo ortos tollat, de quo legi potest Lib. de locis affectis cap. v. Maxime omnium vero morbis, qui consistunt in primis viis, opitulatur, utpote balsamica roborante & laxante sua virtute viscidos humores abstergit, educit, acidos & vappescentes, putridos emendat, intestinorum & ventriculi tonum nimis relaxatum confirmat, & sic primarum viarum spasmi & flatulentis quæ duo in hypochondriacis & hysteris miras solent facere tragœdias, cum effectu medetur. Illud vero circa aloes usum notari velim, quod etiam selectiores practitorum observarunt, eam in minori & refracta dosi plus commodi quam in magna efficere, unde peccarunt veteres quod in abundantiori dosi ad scrup. unum & amplius una vice eam exhibuerint. Ita enim non potest fieri quin periculose ad nimias effusiones sanguinis, ad

hæmorrhoides, hæmorrhagias, hæmoptisin, inque gravidis ad abortum disponat. Profecto si unquam ullum remedium à veteribus magni æstimatum fuit, quod fere omnes eorum compositiones laxantes, pillulasque maximi usus ingrediatur, certe est aloe. Galenus hieram picram, cujus usus olim fuerit commendatissimus, ex ea composuit; plerumque eam cum extractis herbarum v. gr. fumariæ, absinthii, cichorei, rosarum, vel etiam cum resinosis temperatioribus, mastiche, myrrha, succino, gummi ammoniac, vel aromaticis, ut cum spica celtica, xylobalsamo, croco, cinnamomo maritarunt. Quo nomine commendari merentur pilulæ Avicennæ, Ruffi, Aloephanginæ, Angelicæ, Marocosinæ Mindereri, Tartaræ Schroederi, Cratonis, pilulæ pestilenciales Plateri. At vero id vitii saltem in hisce compositionibus animadvertitur, quod nimia in quantitate recipiant aloem, quæ ut plurimum duplum ponderis reliquorum adæquat, cum potius æquali tantum portione cum aliis ingredientibus esset miscenda. Hac ratione enim fit, ut aloe refracta dosi cum extractis præsertim amariorum & temperatis balsamicis mixta in roborando intestinorum tono, & alvo sine molestia ducenda felicissima fiat operationis. Commodissime vero tales pillulas ingrediuntur ex extractis cardui benedicti, fumariæ, absinthii, cent. min. cochleariæ, millefolii, agrimonii, ex gummatis resinosis mastiche, olibanum, benzoe, myrrha, succinum, sandaracha, ex purgantibus aloe rosata: extractum rhabarbari: ex roborantibus extractum Zedoariæ, cortex Chacarillæ. Hæc quisque sagacior facile invicem pro morbi ratione miscere & formulam mutare poterit. Fiant hoc modo pilulæ tam evacuandi quam roborandi fine in multis morbis longe præstantissimi usus.

§. VII. Perspectis iis quæ crassiores morbi materiam per superiores & inferiores partes evacuant, veniendum jam est ad ea, quæ subtiliorem & agiliorem, noxiam è corporis sphaera partem ejiciunt, cujus generis sunt, quæ sudorem vel perspirationem paulo liberius movent, nam quo peioris indolis est retardatum cutis excrementum, eo majori solertia convenit medico incumbere, ut longe utilissimam in morborum curatione transpirationem promoveat: quæ tutissima omni tempore in morbi nondum cognita indole via medendi est. Ex immensa vero sudoriferorum farragine tantummodo, more nostro, ea propinamus, quæ & virtute & usu sese præ reliquis commendant. Unicum vero sal volatile cornu cervi rectificatum, vel admixtione salis succini neutrum factum, instar omnium laude dignissimum est, quod vel solida vel liquida forma, inquam facile spiritu vini redigi potest, exhibitum potenter sudorem, si expedit, movet, præsertim quando cum vehiculo calido debitoque regimine propinetur. Singulari quoque inter sudorifera virtute fulgent spiritus Buili, spiritus de tribus, spiritus cornu cervi balsamicus, qui præparatur ex succini pulverisati uncis quatuor, balsami peruviani uncia una, cinerum clavellatorum uncis tribus, sale volatili cornu cervi uncia una, salis ammoniaci uncis duabus, quibus mensura una spiritus vini rectificati affundatur, fiat extractio & destillatio. Præter hæc mixtura simplex Paracelsi, mixtura bezoardica Michaelis plus vel minus acidulata, præcipuam utique

Commendatissimus olim hiera picra usus.

Infinite præparantur ac proficua sunt ex aloe remedia.

Quorum pars ab alore dicitur meretur.

De sudoriferis vel diaphoreticis.

Unicum sal volatile C. cervi rectificat. vel admixtione salis succini neutrum factum, instar omnium laude dignissimum est. Porro inter sudorifera fulgent, Spir. Buili, de tribus, C. cervi balsamicus, &c. Nec non mixtura simplex Paracelsi, Bezoardica Michaelis.

Accitiam
nostra Ef-
sentia ale-
xipharma-
ca.

laudem merentur. Neque alienum hoc loco esse existimaverim, nostram, qua hactenus cum fructu usi sumus, essentiam alexipharmacam, eo quo convenit candore communicare. Habet vero hæc radices angelicæ, vincetoxici, pimpinellæ, enulæ, contrajervæ, carlinæ æqua portione sumptarum unciam unam, herbæ scordii, cardui benedicti, ana manipulos duos, corticis chacarillæ, croci ana unciam semis, spiritus florum sambuci, corticum citri ana libram unam: adjiciantur spiritus tartari rectificati uncia tres, spiritus vitrioli uncia una, & liquoris nostri mineralis anodynii uncia quatuor; Hæc mixtura debita dosi oblata, in varii generis morbis, tam acutis quam chronicis passionibus, præsertim febribus mali & benigni moris, usus & virtutis est desideratissimæ.

Quæ nescit
viri-
tutis
est dese-
ratissima.

Quæ placi-
dus agunt
& diapho-
reticorum
nomine ve-
niunt sunt
Cervi ust.
vel philos.
prepara-
tum can-
corum la-
pides, &c.

§. VIII. Inter ea vero, quæ placidius agunt, & roborando fibras cursum sanguinis per corporis ambitum efficiunt liberiores, & diaphoreticorum nomine veniunt, cornu cervi usum vel philosophice præparatum, cancerum lapides, mater perlarum, antimonium diaphoreticum, bezoardicum minerale, terra sigillata, cinnabaris cujusunque generis fuerit, præcipua sunt, quibus, pro circumstantiarum ratione, ad fervorem immodicum moderandum, nitrum: ad spasmos & dolores sedandos, pauxillum theriacæ coelestis adjici potest. Ex hujus modi pulvere perfacile præparabis misturam, si aquæ bezoardicæ acutum destillatum & syrupus acetositis citri admisceantur. Neque hoc loco ad mitigandam inflammationis vehementiam pulverem expertissimæ virtutis oportet præterire. Componitur hic ex bezoardico minerali, nitro & camphora, ita nempe, ut ad bezoardici mineralis & nitri præparati scrupulum semis dimidium granum camphoræ adjiciatur. Hæc perpauca & selectissima remedia, ad diaphoreticum usum sola sufficere possunt, adeo ut non opus habeamus innumeris speciebus, pulveribus cordialibus, spiritibus, essentiis & tincturis bezoardicis & alexipharmacis, quorum farrago cum fastidio in tot voluminibus pharmacopœorum & medicorum conspicitur.

Pulvis ex-
pertissimus
ex bezoard.
minerali,
nitro &
camphora.

Hæc per-
pauca &
selectissima
remedia ad
diaphoreti-
cum usum
sola suffice-
re possunt.
Selectiora
in diureti-
corum clas-
se.
Tales sunt
sal tartari,
tinctura
tartari, &c.

§. IX. Perlustratis iis, quæ sudorem & perspirationem movent, remediis, ordo jam exigit, ut, quæ selectiora sunt in diureticorum classe, recensamus: Primum genus est eorum, quæ salino quodam stimulo renale glandulosum cribrum afficiunt, viasque urinarias aperiendo expediunt. Sunt vero ex hisce præcipua, quæ ex tartaro arcessuntur, qualia sunt sal tartari, ejus terra foliata, tinctura tartari, tartarus solubilis, tartarus vitriolatus, liquor ex tartari sale & nitro crudo paratus, hæc omnia non modo mucum renalem abstergunt, sed & stimulo majorem feri tartarei falsi transcolationem concitant. Solet vero potentioris virtutis esse tinctura antimonii sic dicta acris ex ejus regulo per calcinationem cum nitro parata: cujus color perperam antimoniali sulphuri adscribitur, cum potius ardens & caustica ejus vis extreme alcalisato nitro debeatur. Hæc tinctura paulo liberaliori dosi data cum convenienti vehiculo, egregie cachecticorum superfluas ferositates educit.

Potentioris
virtutis est
tinctura
antimonii.

Quæ egre-
gie cache-
cticorum
ferositates
educit.

Alterum
genus diu-
reticorum.

§. X. Alterum genus diureticorum ex subtili acri balsamica resina suam operationem nanciscitur. Utpote tenuiora balsamica peculiari virtute, non modo renes, sed & vesicam reliquasque

urinarias vias afficiunt, quemadmodum luculenter ea, quæ ex junipero, succino & terebinthina parantur, id comprobant, & quod notabile, urinæ plerumque hæc ipsa violaceum quendam odorem conciliant. Nos vero pro delicatioribus spiritum balsamicum maximopere commendamus, cujus præparatio hæc est. Recipe succini, mastiches selectæ ana uncias quatuor, balsami Peruviani, balsami de Copaiva ana unciam unam, salis tartari uncias sex, quæ pulverisata exactissime misceantur, postea libræ tres spiritus vini tartarisati affundantur, & prævia digestione fit destillatio, ita prodit spiritus balsamicus nervinæ, roborantis & simul diureticæ virtutis, facto præsertim ejus connubio cum spiritu nitri vel salis dulci. Ex vegetabilibus radix altheæ, eringii, petroselini, selleri, laudem eximiam merentur. Tandem inter diuretica locum quoque inveniunt refrigerantia, quæ secessionem & quasi præcipitationem quandam feri à sanguine efficiunt. Hoc modo nitrosa, ut nitrum purificatum vel artificiale, quod ex spiritu nitri & spirit. salis ammoniaci præparatur, item nitrum antimoniatum operatur, spectat huc quoque spiritus salis probe rectificatus, & ex hoc præparata tinctura Mœbii aperitiva. Inde etiam fit, ut serum lactis & omnia emulsiva, præsertim quæ ex seminibus quatuor frigidis conficiuntur, urinam provocare soleant. Quod etiam valet de fructibus refrigerantibus, ut sunt fraga, mala persica, quorum succus acido-nitrosus valide refrigerans potenter urinam movet. Tandem ex animantium genere pulvis millepedum itemque tinctura cantharidum rite parata, sale penetranti caustico, renales tubulos stimulo, urinæ fluxum faciunt liberaliorem.

Succino-
ra balsa-
mica, quæ
ex junipe-
ro, succino
& terebin-
thina
parantur.
Auctor ma-
ximopere
spiritum
balsami-
cum com-
mendat.

Ex vegeta-
bilibus
Rad. Al-
theæ, E-
ringii, &c.
laudem
merentur.
Nitrosa in-
ter diureti-
ca quoque
locum in-
veniunt.
Nec non
serum lac-
tis & e-
mulsiones.

Fraga &
mala per-
sica poten-
ter urinam
moverent.

Ex anima-
libus mil-
lepedes &
Canthari-
de. urine
fluxum fa-
ciunt libe-
raliorem.

§. XI. Sunt adhuc alia evacuantium remedium genera, quæ videlicet salivalem laticem valide commovent, ac per salivales glandulas & ductus largius exonerant, quorum usus in lymphæ & glandularum vitio, non potest non esse laudatissimus. Nihil vero hoc in negotio, nisi cum mercurialibus rite paratis, potest effici, utpote quæ singulare quid in eo possident, quod mirifice lymphæ massam ad salivæ fontes, commoveant. Prompte id præstat mercurius dulcis probe præparatus, mitius id efficit æthiops mineralis, mitissime vero cinnabarina agunt, quæ paulo largiori dosi usu repetito oblata, si viscidum serum stagnans resolvendum est, in morbis gravioribus capitis non spernendum edunt effectum. Qua de re pulchram observationem attulimus in notis ad Poterium. Caterum non sicco pede præterire licet mercurium præcipitatum album, qui fit, quando spiritu nitri rectificato depuratissimus mercurius solvitur, postea cum spiritu salis ammoniaci præcipitatur in magisterium, quod facta sufficiente cum aqua dulci elotione, edulcorandum, ipsique æqua portione auri subtilissimus crocus admiscendus est, qui pulvis cum saccharo rosaceo datus non modo in venerea lue, sed & in aliis rebellibus lymphæ & glandularum morbis, magna præstare solet officia. Si enim decenti methodo procedamus, sine ullo salivæ fluxu tantum facta auctiore transpiratione, persanantur.

Remedia
quæ sali-
valem lati-
cem valde
commo-
vent.

Quod
prompte
præstat
mercurius
dulcis, mi-
tius id effi-
cit æthiops
mineralis.

Pulvis sin-
gularis qui
magna in
lue vene-
rea, &c.
solet præ-
stare offi-
cia.

§. XII. Ex iis, quæ narium tunicam afficiunt, vel etiam sternutamentum movent, quædam itidem seligenda sunt: ex validioribus solus helleborus albus sufficere potest. Quæ vero mi-

Ex validio-
ribus sternu-
tamentum
helleborus
albus suffi-
cere potest.

*Mitius a-
gun. Her-
ba B. fili-
con, Majo-
ran, &c.*

mitiori gradu narium mucum colliquant, sunt herba basilici, betonicae, majoranae, marum verum, flores liliorum convallium, flores benzoës, extractum ligni guajaci cum aqua paratum: ex hisce pulveres errhini præstantissimæ virtutis, si caput à sordibus mucidis purgandum est, confici possunt. Solenne jam est sal volatile ammoniaci siccum cum oleo majoranae vel florum aurantium aut cedro probe imbuere & naribus crebrius offerre, quod mire mucositatem colliquat, & vigorem sensibus affert.

*Sequuntur
Alterantia.
Optandum
foret ut in-
gens eorum
copia pro-
staret.*

§. XIII. Evacuantia, quæ jam exposuimus, ordine sequuntur alterantia, quæ insensæ & noxiæ humoris peccantis qualitati emendandæ magis dicata & destinata sunt. Optandum vero vehementer foret, ut ingens eorum copia prostaret, quæ materiam morbi sæpe tenuissimæ & agilissimæ indolis proxime sive mediate invertere ac immutare possent: utpote perniciosissimæ & periculo & vehementia notatæ passiones, non tam copiae humorum peccantium, quam sæpenumero tenuissimo vaporis incunabula sua atque originem debent, cujus maligni elementi indoles, celerem potius immutationem, quam operosam è corpore evacuationem exigeret. At quum de hujus generis efficacibus remediis potius sit desperandum: hinc saltim ea, quæ obvio & manifesto quodam agunt principio breviter strictimque perlustrabimus. Quoniam vero id, quod tenax, spissum, viscidum & immobile in sanguine & humoribus est, maxime liberæ ejus progressionis per minimos corporis tubulos, visceraque & glandulas resistit, & ad diuturnas & perniciosas obstructions viam sternit, hinc ea remedia, quæ humores crassos attenuant & dissolvunt, obstructos, tubulos referant, ante omnia sunt attendenda. Eximie vero id præstant

*Asi de hisce
potius est
desperandum.*

*Sed ea quæ
manifesto
agunt prin-
cipio perlu-
strantur.*

salia, præsertim neutra & alcalisata, quia stimulo, quo pollent, non modo fibras motrices ad majorem impulsu concitant, quo omnium optime crassum dividitur, & immobile ad motum incitatur, sed & immediato suo contractu viscosas & crassioris molis partes discerpunt. Ex horum vero censu sunt salia vegetabilium fixa, arcanum duplicatum, tartarus vitriolatus, solutio lapidum cancri, terra foliata tartari, nitrum fixum, sal ammoniacum depuratum, quæ & aperiendo & resolvendo in diversis morbis se commendant, maxime omnium vero laudatissimum nitrum dictis his neutris salibus associatum, incidendi & resolvendi virtute pollet. Perquam enim curiosa est observatio, nitrum solum coagulato & nigricanti sanguini affusum illum ex tempore reddere fluidum & floridum. Et quoniam peculiari ratione siccitas & constrictas partes emollit & humectat, hinc obstructionibus removendis remedium est accommodatissimum. In genere vero notandum hoc loco est, nihil potentius viscidos humores incidere & obstructions referare, quam copiam fluidi, quod præsertim elemento activo armatum ad durum & compactum emolliendum & diluendum, omnium aptissimum est. Et hæc est ratio, cur aquarum salubrium mineralium tam frigidarum quam calidarum, nec non puræ simplicis aquæ, sive frigidae sive calida infusæ cum herba appropriata, in chronicis morbis persanandis tanta sit vis atque efficacia.

*Salium
præsertim
neutrorum
ac alcali-
norum vi-
res & vir-
tutes.*

*Inter quæ
nitrum fi-
xum emi-
net.*

*Quod ob-
servatio
confirma-
tur.*

*Præterea
obstructioni-
bus re-
movendis
est accom-
modatissi-
mum.*

*Aquarum
magna vis
in chroni-
cis morbis
persanandis.*

*Ad Alter-
rantia spe-
ctant omnia
terrea
alcalina.*

§. XIV. Denique ad alterantia merito spectant omnia terrea alcalina, quæ, si quid aliud, prompte & expedite acidosis, ponticos, corrosivos, primis in viis plerumque oberrantes hu-

mores, immutant atque invertunt, & vocari solent absorbentia, quorum usus in pluribus morbis longe est eximius. Quamvis vero complura, quæ acidum absorbeant, in rerum natura profuerint remedia, nihilo minus unum præ altero corpori nostro magis est amicum & consymbolicum, & sine noxa relicta operatur, quem in finem cancrorum lapides, ovorum testas & ossa sepia, ceu innocentia absorbentia, maximopere commendamus. Ex salinis vero alcalinis oleum tartari per deliquium vel liquor fuliginis cum sale tartari paratus & absorbendi & aperiendi fine, debita dosi datus, reliquis omnibus facile est anteposendus.

*O uli can-
cri, ovi-
rum testæ
& ossa se-
pia sunt in-
nocentissi-
ma absor-
bentia.
Ex alcali-
nis liquor
tartari vel
fuliginis in-
absorbendo
reliquis fa-
cile est an-
teponendus.
Materia te-
nuior &
maligna in
morbis e-
mollienti-
bus, &c.
demulcentia
est.*

§. XV. Delinquit in morbis sæpiissime materia quædam tenuior, mobilior, acris & causticæ indolis, summæ activitatis & veneni naturam imitans, quam utique corrigere, demulcere ac temperare oportet, quod omnium optime præstant sic dicta emollientia & inviscantia, quæ viscido quodam involucre tenuissimas acies involvunt, obtundunt, & hinc etiam contra validiora venena antidotum præbent. Præstant vero hæc ex regno vegetabilium & animantium desumpta; speciatim vero pertinent huc omnes axungia, butyrum & lac animantium, gelatina ossium; ex vegetabilibus flores sambuci, malvæ, meliloti, verbasci, chamomillæ vulgaris, millefolii, papaveris, semen lini, fœnigræci, cydoniorum, radix althææ, liliorum alborum, crocus, ficus, passulæ, amygdalæ dulces earumque oleum; semina quatuor frigida majora, decoctum hordei, ad salios & erodentes acres humores temperandos ac mitigandos, tam interno quam externo usu virtutis sunt præstantissimæ.

*Qualia ad
hoc præ-
stant.*

§. XVI. Reliquum jam est, ut etiam consideremus, quanam maxime humoribus biliosis, sulphureis, & præcalidis temperandis conveniant: qua in re ipso nihil est præclarius, utpote quod intestinam calidam humorum ebullitionem protinus sistit ac deprimit, & præsentissimum refrigerium corpori adfert. Secundum locum obtinent acidula, quæ bilis nimium fervorem ac volatilitatem simili modo figunt atque enervant, ut sunt ex selectioribus citri poma & ex ipsis paratus syrupus, item berberum, cerasorum, rubi Idæi, fragorum, cydoniorum, granatorum succi & syrupi, aqua acetosæ, acetosellæ, spiritus salis, vitrioli vel nitri dulcificatus, tincturæ quatuor florum cordialium, ex quibus varia julapia & potiones refrigerantes possunt concinnari, in nimio fervore & æstu sanguinis atque humorum sua laude non defraudandi.

*Humoribus
biliosis,
&c. tempe-
randis, ni-
tro nihil est
præclarius.*

*Secundum
lo um obti-
nent aci-
dula.*

§. XVII. Defuncti tractatione eorum, quæ præcipue fluidis partibus dicatæ sunt, remediorum, jam nos accingimus ad ea, quæ solidas earumque tonum motum ac robur peculiari ratione afficiunt, & sunt vel roborantia vel sedativa. Illa fibrarum dejectum robur restituunt: hæc vero nimias & effrenas eorum motiones atque contractiones sedant atque componunt, doloremque levant, & solent anodyna appellari. Ex roborantibus, quæ in universo corpore ejusque solidis fibrosis partibus motum augment, eumque citiorem reddunt, sunt maxime ea, quæ materiam sic dictis spiritibus seu fluidissimis & impetum facientibus partibus scenerant, & subtili, suavi, naturæ amico, balsamico oleo & spiritu imbuta sunt, & vocari solent confortantia.

*Ex robo-
rantibus
quæ in cor-
pore mo-
tum au-
gent, sunt
confortan-
tia.*

Talia

Talia sunt
præcipue
ex aroma-
ticis.
Ex ani-
monibus
& plantis.

Talia sunt ex aromatibus præcipue cinnamomum, caryophylli, cardamomum, cubebæ, flores macis, nux moschata, cortices citri, aurantium, pomorum chinensium: ex balsamicis, benzoe, storax, myrrha, mastiche, opobalsamum, resina ligni aloes, balsamus peruvianus, folia lauri, myrti: ex marinis succinum & ambra; ex animantium genere moschus, quæ analeptica & cordialia dici solent. In confortantibus vero principem locum tenet vinum subtile, potens & spirituosum, quale est Rhenanum ejusque spiritus: ex plantis, majorana, rosmarinus, serpillum, lavendula, spica nostra, Indica & Celtica, flores chamomillæ vulgaris, melissa, mentha, quorum pleraque suave & subtile oleum præbent, quo spiritus & vires corporis nostri mire reficiuntur.

Ex hisce se-
lectioribus
simplicibus
varia ana-
leptica,
&c. con-
cinnari
queunt.
Præter hæc
spiritus o-
leosus vola-
tilis, uri-
nosus, &c.
Ut spiritus
oleosus Syl-
vii, &c.

Ex hisce selectioribus simplicibus, varia possunt analeptica & confortantia, aquæ stomachicæ, carminativæ, confortantes, balsama apoplectica, aquæ apoplecticæ, balsamum vitæ, & embryonum, concinnari.

§. XVIII. Præter hæc spiritus oleosi volatiles, urinosi ut & spiritus salis ammoniaci cum aliis aromaticis blandioribus probe essentificatus, ut est celebratissimus ille spiritus oleosus Sylvii, & secundum ejus exemplar, salia volatilia oleosa præparata, singulari roborante & tonica virtute gaudent, & in tono ventriculi dejecto, neque minus in cerebri & nervorum debilitate removenda, magno utique præsidio sunt. Inter salia vero volatilia oleosa, quæ naturæ thesaurus suggerit, camphora merito principem sibi locum vindicat, quia subtilissimæ indolis est, & celerime per universi corporis poros penetrat, usque tam interno quam externo in discutiendis flagrantibus humoribus, & abigendo inflammationum periculo, præsertim si amicum cum nitro conjugium ineat, nobilissimarum virium est medicina.

Quæ nobi-
lissima est
medicina.

Martialis
ex roboran-
tibus, quæ
immediate
agunt, pal-
mam cete-
ris dubiam
reddunt.

§. XIX. Ex roborantibus vero quæ immediate agunt in corporis nostri fibras, eas levi constrictione roborando, palmam ceteris dubiam reddunt martialia, legitimo modo præparata atque administrata. Quemadmodum vero omnium naturæ est inimicum: ita etiam paulo fortiora ex martialibus præparata adstringentia & vitriolacea plus damni quam emolumenti solent afferre. Sunt vero desideratissimæ virtutis & operationis, quæ ex subtiliori sulphuris & terræ martialis elemento componuntur; quo nomine tincturam florum salis ammoniaci martialium, cum hæmatite præparatorum, item tincturam martis Zwölfferi, Ludovici, & quæ cum succo Cydoniorum paratur, commendamus. Ex simplicioribus sola limatura ferri, in subtilissimum pollinem redacta, omnibus martialibus crocis, jure meritoque est anteferenda, quia terreo-alcalina & sulphurea ferri crasis adhuc salva integra ac intacta in hac ipsa est. Ex compositis solus pulvis cachecticus *Quercetani* arridet. Sufficere hæc possunt ex martialibus, quibus si prudenter in chronicis passionibus debellandis & tono viscerum roborando uti velimus, cetera omnia martialis & vitriolacæ indolis commode possunt postponi.

Inter hæc
præstant
tinct. flor.
sal. ammo-
niaci mar-
tialium,
item mar-
tis Zwöl-
fferi, &c.
Ex simplicioribus
limatu-
ra ferri in
pollinem
redacta
omnibus
crocis est
anteferen-
da.

Ex compo-
sit. pulv.
cachect.

Quercet.
arridet.
China cor-
tex in fe-
bris impetu
coercendo
vix parem
habet me-
dicinam.

§. XX. Dantur adhuc alia specificè roborandis partibus dicata simplicia, quæ pari ratione in certis morbis profligandis magnam exserunt efficaciam. Exemplo sit famigeratissimus chinæ cortex, qui in febris impetu coercendo, vix parem & similem habet medicinam. Nullum vero dubium est, quin omnia, quæ hoc in ne-

gotio præstat, adstrictoria & roborante sua facultate efficiat. Exemplo quoque potest esse, non satis laudatus chacarillæ cortex, qui aromatico balsamico & terrestri instructus est elemento, inque roborando ventriculi & intestinorum tono & pectoris ex pulmonum nimia laxitate natis vitiis, medicamentum, si ullum, est certe maximopere commendandum. Habemus præterea specifica, si ita loqui fas est, certas partes roborantia. Ita betonica & melissa peculiari modo dicatæ sunt capiti, sulphur, myrrha & crocus pectori, mentha ventriculo, plantæ amaræ hepatis, lieni scolopendrium, renibus rebinthinacea, glandulis omnis generis ligna & omnia resinosa balsamica, oculis fœniculum, utero artemisia, melissa & pulegium. Sunt velut adhuc plura alia non contemnendæ utilitatis specifica, quorum tamen catalogum hic recensere nimis supervacuum esset labor, sed suffecerit pauca quædam in medio proferre. Ex compositis vero quæ roborandi viscera partesque solidas corporis interiores facultate gaudent, elixir stomachale *Michælis*, essentia ablynthii composita *Connerdingii*, essentia carminativa *Weddelii*, elixir balsamicum nostrum, balsamum Anglicanum, balsamum vitæ nostrum, essentia chacarillæ, spiritus balsami peruviani, aqua mastichina, essentia ambra, cinnamomi, aqua Anhaltina, aqua carminativa *Schrœderi*, aqua vitæ *Matthioli*, aqua apoplectica *Sennerti*, aqua *Chemnicensis*, aqua vitæ mulierum singularem laudem & commendationem merentur.

§. XXI. Reliquum jam est, ut etiam ea remedia quæ effrenes & nimios motus sistendi & sedandi virtute instructa sunt & in atrocioribus doloribus, inque gravioribus spasmodicis & fibrarum constrictionibus, nimia quoque sanguinis & humorum effusione, locum inveniunt commodissimum. Recte vero hæc ipsa distinguere licet in universalia, quæ in universo corpore, ubicunque consistant dolores, spasmos & vehementiores motus sistunt, & in particularia, quæ magis specificè certis partibus & morbis succurrunt. Ex illorum numero sunt opiata, quæ principem facile inter dolorum sedativa, locum inveniunt. Quum vero horum innumerabiles fere in pharmacopœis prostant compositiones, hinc selectissimas tantum recensebimus, quales sunt theriaca cœlestis in notis ad *Poterium* descripta, Pilulæ *Wildegansii*, massa pilularum *Starckii*, diascordium *Fracaflorii*, Laudanum per fermentationem cum succo cydoniorum paratum *Helmontii*, pilulæ è styrace, è cynoglossa, syrupus papaveris rhœados, papaveris albi, theriaca vulgaris, essentia theriacalis, quorum omnium usus prudens & cautus in mitiganda symptomatum ferocia multa & magna præstare solet. Neque mineralia sulphurea anodyna & sedativa penitus sunt destituta, sed abundans id ipsum in marte & vitriolo conspicitur, ex quo paramus singulari encheiresi, spiritum aromatici saporis & fragrantissimi odoris, cuius usus opiatum longe tutior & præstantior est. Sunt præterea inter sedativa & antispasmodica præcipua quadam laude conspicua, quæ nobis præ cæteris suggerit regnum animale. Utpote omnes fere animantium partes exsiccata, sulphureo quodam vaporoso & volatili principio pollent, quo impetum motuum & spasmodicorum refrenant. Ita ad capitis vitia rasura cranii humani, ungulae alci, pulvis lumbricorum terrestrium, moschus:

Chacarillæ
cortex ma-
ximopere
est com-
mendandus.

Specificæ
certas par-
tes robo-
rantia sunt.
Betonica &
melissa ca-
piti: sul-
phur, myr-
rrha, crocus
pectori:
mentha
ventriculo:
plantæ a-
maræ he-
patis: sco-
lopendrium
lieni.

Theribin-
tinata reni-
bus: glandu-
lis ligna,
&c. oculis
fœniculum:
utero ar-
temisia,
&c. dicata.

Dantur &
multa ro-
borantia
composita.

Remedia
quæ effren-
es motus
sistendi vir-
tute instru-
ta sunt.
Quæ in u-
niversalia
& in parti-
cularia
distingui-
untur.

Ex quorum
numero
sunt opia-
ta.

Horum se-
lectissima
dinume-
rantur.

Neque mi-
neralia
sulphurea
anodyna &
sedativa
penitus
sunt desti-
tuta.

Præ cæteris
regnum
animale
est ef-
ficacissimum
&
antispas-
modicum
suggerit.

in

in pectoris affectibus vulpis pulmo, & spermaceti, item mandibulae lucii piscis, in immodicis sanguinis profluviiis, dens hippopotami: in uteri affectibus castoreum & pulvis secundinae humanae: in renum & articularum gravi dolore lapis manati, in parturientium spasmodicis angustis: in gravioribus ventris torminibus, rasura priapi cervi, nec non cor & hepar viperae: in partium externarum contracturis, animalium axungiae omnem laudem superant. Denique plura quoque occurrunt in vegetabilium regno, quae sedativa vi specialiter partibus succurrunt. Ita in capitis & cerebri affectibus paeoniae planta, betonica, basilicum, salviae quoque flores, in pectoris morbis crocus, in graviore renum dolore & spasmo fructus alkekengi, semen lycopodii, in spasmodicis viscerum abdominis pulvis millefolii: in ventris torminibus pulvis chamomillae vulgaris, & flavedo corticum aurantium: In stomacho male affecto, mentha & nucifera, in uteri spasmodicis crocus &

galbanum laudem eximiam promerentur. In nervorum vitiis aquae florum suaveolentium, ut sunt primulae veris, liliorum alborum, convallium, rosarum, tiliarum, paeoniae, chamomillae, acaciae, ulmariae, sambuci, hormini, salviae, florum aurantium praeter ceteris omni laude & commendatione dignae sunt. Ex compositis vero sedativis non citra rationem extollimus pulverem epilepticum Marchionis, specificum cephalicum Michaelis, pulverem-antiepilepticum D. Aquin, qui describitur in pharmacopoea de Chartras pag. 527. item pulverem contra rabiem ibidem descriptum, trochiscos alkekengi, elixir uterinum Zwölfferi, quibus omnibus & singulis sciens & prudens Medicus, pro morbi, ejusque causarum subjectorum ratione cum fructu uti poterit. Haec itaque sunt selectiora à nobis proposita remedia, quae certe sufficere possunt omnibus morborum generibus felicissime abigendis.

Sedativa composita quae ab alicuiore extolluntur.



D E

MEDICAMENTIS BALSAMICIS.

P R A E F A T I O.

DUlcissimum nomen balsami est, quo non facile ullum in universa re medica gratius & acceptius reperitur. Siquidem tale medicamenti genus, quod suavissima fragrantia sese commendabat, & quod foedae putredinis atque corruptionis vim, usu tam externo quam interno à corporibus humanis arcebat, veteres medici balsami nomine insigniverunt. Antiquissimus primum mos erat balsamis eorum, quibus vivis amore & obsequio devincti erant, condire cadavera, quo à corruptione vindicata ingens annorum spatium perdurarent. Et quum tanta ad putredinem, quae mortis quasi filia est, avertendam in balsamis efficacia animadverteretur, hinc sapientiores judicare ceperunt eadem balsama, optima vitae humanae esse fomenta, quibus diu salva ac integra conservaretur. Unde ad vitam longius prorogandam vim ipsis inesse praesentissimam credebant, existimantes à balsamicis rebus Spiritum seu calidum innatum in sanguine fluctuans, quod Naturae ac vitae balsamum sit, mirifice corroborari. Quicquid autem veri subsit tam specioso asserto, hoc tamen certissimum est in immenso illo, quem providentissimus naturae parens in omnibus regnis nobis subministrat, remediorum apparatu, nulla praestantiora, inque majorem usum nata auxilia reperiri, atque ea, quae balsami & balsamicorum nomen promerentur. Haec enim, cum viribus corporis quasi consymbolismum facientia, illas mirifice foveant, erigunt, recreant, robur partibus adferunt & vitales fluidorum motus egregie tuentur. Prospexit certe divina, eaque sapientissima benignitas humani generis saluti ac incolumitati praestantissimorum remediorum infinita copia, prorsus ut nullum detur ex animalibus, plantis aut mineralibus, nullum etiam eorum, quae in mari vitam degunt, quod non salutare & eximias ad morbos depellendos, vitaeque integritatem sustentandam, offerat vires.

Neque venenum, alioquin humanae naturae infensissimum, juvandi viribus est plane destitutum, si artifex eo prudenter uti sciat. Attamen non iisdem singula pollent viribus, sed aliud utique alio est praestantius, naturaeque nostrae magis amicum & adcommodatum. Artis itaque & prudentiae est, ex tanta simplicium neque minus compositorum remediorum multitudine, optima & convenientissima seligere, iisque feliciter in vita tuenda, morbisque depulsandis uti. Neque enim benignissimi conditoris intentio haec fuit, ut omnibus & singulis, quae in auxilium prompta sunt ac disposita, uteremur: sed juvat pauca & selectissima ex tanto penu depromere, quibus, ceu instrumentis, medicus artifex scopum suum in praeservando & sanando obtineat. Quum vero ex tanta opem sanitatemque promittentium copia & numero balsamum & balsamica, ceu naturae amica, principatum meritissimo jure obtineant, commodum atque jucundum visum fuit inaugurali specimine optima balsamica, & quibus principiis agant, & quas eximias virtutes possideant, recensere, inque salutem humani generis eorum usum dirigere. Quod dum conamur, DEUS, fons omnis boni perennis & inexhaustus ita faveat meditationibus nostris, ut non nisi illud, quod verum bonum ac salutare sit, indagando consequamur.

Neque venenum juvando viribus est plane destitutum, si artifex eo prudenter uti sciat.

Pauca & selectissima ex natura depromenda.

Balsamica naturae amica.

§. I.

DICTURI itaque de praestantissimis balsamis, seu balsamicis simplicibus quae in humanum cedere possunt usum: ut intelligatur quid sit de quo sermonem instituemus nostrum, non inutile arbitrati sumus primo de nominis origine, quae nobis cognita sunt, exponere: deinde quid per balsamum proprie intelligamus, subjungere. Quum vero balsami usum primi, quantum scimus, habuerint homines Palaestinae & Phoenices oras incolentes, forte etiam his vicini Arabes & Aegyptii, ratio ipsa nos eo deducit

Nominis origo ex qua ducitur.

cit ut nominis originem ex indole linguarum, quibus oriens utitur, exquiramus. Sive igitur vocabulum sit simplex, quod vero simillimum, & indoli Orientis convenientissimum est; ab **בוסם** Bossem erit deducendum, Ebraeis ad denotandum fragrantissimum & delicatissimum quodvis peculiariter inserviente voce, cui aliæ gentes, quod in pluribus fecerunt, unicum elementum inferuerunt; sive compositam vocem cum aliis esse statuamus, ex **בשל שמן** Baal schemen, quod dominum vel principem oleorum aromatumque denotat: Res tamen eodem redit, ut ipsa vis atque origo nominis documento sit aromata, olea & resinas omnium præstantissimas, quæ & virtute & odoris ac saporis suavitate conspicua præ aliis sint, balsami nomen tantummodo tueri. Neque etiam nobis alia Balsami ac balsamicorum notio erit, quam ut per id vocabulum indigitemus tale remedium, quod sulphureo resinoso ac oleoso, suavissimo tamen, naturæque amicissimo gaudeat, quo agat, elemento. Duo itaque balsami requisita ac characteres esse debere judicamus. Primus est, quod corpus debeat esse maxima ex parte inflammabile, hoc est oleosum vel resinosum. Secundo suavissimi odoris & penetrantis saporis sit, necesse est, quibus de partium tenuitate ac virtute testimonium sensibus præbeatur. Quibus suppositis sulphura & resinosa, nec non oleosa corpora inflammabilia, balsami quoque consistentiam præ se ferentia, suavi vero odore ac sapore destituta, ex vere balsamicorum numero excludenda esse clarissime apparet, adeoque naphtha, petroleum, asphaltum, terebinthina, pix, resina pini, oleaque terebinthinæ ac abietum, sub censum nostrum nequaquam venire debent, quæ, tametsi inflammabilia penetrantia corpora sint, inque balsamandis corporibus vires egregias habeant: neque minus tam externo quam interno usu salutarem in medendo efficaciam polliceantur: nihilo secius, quoniam ex sulphure nimis forte, acri, penetranti, minus blando & naturæ amico conflata sunt: hinc viribus quoque corporis nostri fractis erigendis ac fovendis, pari ratione minime sunt idonea. Deinceps neque proprie sola suaveolentia, ut Zibethum, Moschus, flores fragrantissimi, Jasmini, Aurantiorum, hyacinthi, tuberosi, &c. balsami vel balsamicorum nomen suslinent, eo, quod non sola ad balsamum constituendum suaveolentia sufficit, quæ vaporoso tenui sulphuri debetur; sed ut in oleo subtili, acri, inflammabili resina isthæc suavis fragrantia reposita sit, necessarium est.

§. II. Num itaque in regno animantium verum balsamum detur, merito dubitandum est. Abundat vero hisce & ditissimum est vegetabile regnum. Est autem antiquissimum & cui primum Balsami nomen impositum est, ipsum sic dictum Opobalsamum Arabicum & Ægyptiacum. Hoc ex arbore humili in Judæa, Ægypto & Arabia nascente, collectum fuit. Tota arbor erat fragrantissimi odoris, & fauciata in cortice, succum resinosum suavissimi odoris ac magnarum virium, quem opobalsamum dicebant, supeditabat. Hujus arboris lignum Xylobalsamum, fructum vero Carpobalsamum veteres nominabant, succo autem seu lacrimis exstillantibus opobalsami proprie conveniebat nomen. De hac arbore veteris Geographiæ princeps *lib. XVI. p. m. 525. ed. Genev.* ita scribit: „Hiericus est campus, ubi balsami viridarium, arbor est odorata, seu aromatica & fruticosa, cytiso & terebintho

persimilis. Ejus corticem scindentes aut vulnerantes, succum inde percipiunt tenaci lacti persimilem. Susceptus autem in conchis coagulatur; is capitis dolores & suffusiones oculorum incipientes, & hebetudines mirifice sanatur, & pretiosus liquor est, eo quod hic loci solum nascitur. Concordat cum hac balsami descriptione *Prosper Alpinus*, plantarum Ægyptiarum optimus delineator, qui ita scribit in *tract. de plant. Ægypt.* Balsamum arbuscula est quæ crescit ad altitudinem cytisi, folia pauca gerens rutæ similia, perpetuo virentia, vel etiam lentisci foliorum æmula sunt. Ramuli quoque sunt odorati, gummosi digitisque contrectati, iis tenaciter adherent, flores fert parvos, albos, acaciæ proximis summe odoratos, à quibus semina promanant flava, folliculis nigris subrufescentibus contenta, valde odorata, intusque humorum flavum melli persimilem habentia. Sapore suo amaro parumque acri linguam ferientia, opobalsamumque redolentia. Fructus vero terebinthi figuram ac magnitudinem æmulantur. Notabile vero est, quod plures auctorum asseverent, arborem hanc Judææ non indigenam sed inquilinam factam, quum olim multæ plantæ à Mecchâ, Arabiæ felicitis oppido, in Palæstinam, & hinc, Cleopatrarum & Antonii temporibus, in Ægyptum translatae sint. Plures sunt hujus opinionis non amplius verum opobalsamum dari, nec usquam gentium hoc, quod in Ægypto nasci solebat, inveniri. Nam qui venditur pro opobalsamo in capsulis, quæ cortices nucum sunt, ex Balsamo Peruviano, Benzoe & Storace confectus illis videtur: quemadmodum *Pomet in histoire des drogues p. 275.* indicat. At vero adhuc verum dari opobalsamum valde est credibile. Nam qui ex Mecchâ adducitur & balsamum de Mecchâ dicitur, in omnibus fere ab auctoribus descriptum opobalsamum adæquat. Est liquor oleosus, instar terebinthinæ spissus, saporis & odoris penetrantis & gratissimi. Venditur quoque caro pretio, utpote unciae unius dimidium duobus constat imperialibus. Eiusdem quoque nobiscum est sententiæ *Clusius in exoticis*, qui *Lib. X. §. 9. de balsamis p. 304.* ita scribit: Arabia felix, quæ sola balsami plantas sponte nascentes ab omni ævo protulit, ac etiamnum profert, legitimum balsamum præbet.

§. III. Maximi vero semper habitum fuit hoc balsamum à veteribus, propter incomparabiles, quas fovet, virtutes, unde in nobilissima antidota receperunt, quæ tam pretiosa olim & rara fuerunt, ut pondus duplo argento, *Theophrasto, Plinio & Dioscoride* testibus, pendebatur. Neque hujus rei ratio difficilis est. Etenim arbor balsami parva est, unde non potuit uberem, sed exiguam balsami quantitatem proferre, cujus virtus, quum mirifice æstimata fuerit, pretium, ut creverit, necesse fuit. Et hæc quoque causa fuit, quare opobalsamum veterum vitiatum sapissime fuisse Cyprio terebintho, vel oleo lentiscino expresso, à *Lobelio in animadversionibus pag. 521.* commemoretur. Quum itaque Balsamum de Mecchâ longe delicatissimum, sine ulla dubitatione verum sit opobalsamum Ægyptiorum, & illud exquisitè secundum omnes notas referat: hinc ejus usus in medicina utique vehementer commendandus est, utpote ex hoc, menstruo spirituosissimo, singulari encheiresi præparato, quo ambram etiam intine resolvimus, dissoluto, elegantissima pro usu interno medicamenta possunt concinnari.

Quid per balsami vocabulum est intelligendum.

Balsami requisita & characteres.

Fœtida ex vere balsamicorum numero excluduntur.

Quoniam refocillantibus viribus minime sunt idonea.

Balsamis abundat regnum vegetabile.

Opobalsamum.

Xylobalsamum.

Carpobalsamum.

Balsami descriptio.

Arbor balsamica Judææ non indigena sed inquilina facta est.

Adhuc verum dari opobalsamum valde est credibile.

Clusius ejusdem quoque est sententiæ.

Maximi semper à veteribus habitum fuit hoc balsamum & quia rarum etiam carum.

Balsamum de Mecchâ sine dubio verum sit opobalsamum.

*Balsamum
de Tolu ex
America
adfertur.*

§. IV. Opobalsamum ordine & merito jure balsamum de Tolu excipit, quod nostro etiam tempore multi opobalsamo substituunt. Hoc ipsum ex provincia novae Hispaniae inter Carthaginem & Nombre de Dio sita, & quidem ex urbe Hiobi sive Tolu adfertur, & ex arbore pino simili, testante *Raio in hist. plant. pag. 1759.* profluit. Colorem prae se fert aureum, odorem vero spirat Limoniis similem, frictione, praesertim in vola manus instituta. Siccum vero & solidum est, pellucidum, & in Anglia, unde ad nos ejus cognitio emanavit; admodum caro constat pretio. Hoc balsamum in Spiritu Vini tartarifato rectificatissimo solutum, gratissimam non minus quam efficacissimam, ad plures internos & externos usus, essentiam suppeditat.

*Balsamum
Peruvia-
num.*

*Album &
nigrum.*

*Genuinum
coloris est
fusci.*

*Pessime a-
duccera-
tur.*

*Prepara-
tiones mul-
tiplicae ex
Balsamo
Peruvia-
no.*

§. V. Sequitur jam ordine balsamum, quod ex America novaque Hispania seu Mexico adducitur, ac Peruviani Indicique nomine venit, cujus diversas species ac differentiam idem laudatus *Pomet. l. c.* recenset. Statuitur vero illud communiter duplex, album nempe & nigrum. Illud optimum & primum judicatur, balsamumque incisionis dicitur, quia sponte ex Hoiziloxi & Hernandez dicta, vastae magnitudinis arbore, leni incisione vulnerata, exstillat, teste *Monardo.* Limpidum est, & terebinthinae habet consistentiam, odoris fragrantissimi, estque rarius & carius nigro, sed cavendum ne terebinthina laricea adulteratum pro vero obtrudatur. Nigrum vero, cujus ingens quantitas ad nos adfertur, decoctis ex ramis, corticibus, foliis arboris, *Clusio teste, comment. in Monardum pag. 302.* paratur atque extrahitur. Genuinum coloris est fusci, saporis & odoris penetrantis atque fragrantis, fluidum quoque prompteque totum Spiritu vini rectificatissimo dissolvitur. Dolendum vero est & hoc ipsum balsamum nostris temporibus, admixta styrace ut videtur, liquida, aut forsan foecibus, quae a preparatione & coctione balsami Peruviani remanent, admixtis, pessime adulterari adeo, ut genuinum vix amplius in officinis reperiatur. Falsum autem ab vero dignoscere haud est difficile, siquidem illud crassum & coagulatum est, ac penetranti odore & sapore caret, & ægerrime transit in vini spiritum, sed instar crassi oleosi magnatis remanet. Ex vero autem elegantissima medicamenta prodeunt. Primo enim solutum in spiritu rosarum rectificatissimo nobilissimarum virium essentiam constituit. Secundo, quando una pars hujus balsami cum æquali pondere salis tartari exquisite in mortario miscetur atque teritur & spiritus rosarum rectificatissimus adfunditur, facta in arena per alembicum destillatione tam fragrans & delicatus prodit spiritus, quo non facile medicina vidit præstantiorem, praesertim si ad solutionem ambræ vel moschi adhibeatur. Is interno usu mire fovet ac recreat fractas vires, & generi nervoso amicissimus, ad morbos, qui ab ejus imbecillitate nascuntur, felicissime expugnandos facit. Potest cum eo ex tempore Syrupus balsamicus magni & multi usus parari, si modo uncia illius uni libræ julepi rosarum admisceatur. Commode hic syrupus cum aquis vitæ stomachicis & cephalicis miscetur, neque minus portionibus & mixturis singularem gratiam conciliat. Cum aqua si destillatur balsamum Peruvianum ex vesica, eam non modo imbuat odore gratissimo, balsamum redolente, sed & virtute nervina, diuretica quoque instruit, cujus aquæ usus paullo liberaliori in quantitate institutus, in affectibus chronicis, ex scorbuto & nervorum im-

Frid. Hoffmanni Oper. Tom. VI.

becillitate ortis, effectum laudatissimum promittit. Curiosum est, quod oleum aquæ supernatet, æthereum, longe suavissimum, quod promte in se vini rectificatissimus spiritus recipit.

§. VI. Ordo jam nos deducit ad famigeratissimi balsami de Copaiba perlustrationem. Hoc in Brasilia nascitur, & ex Rio de Janeiro, Fernambouc & St. Vincent. in nostras terras per Portugalliam in lagenis terreis advehitur. Hujus color ex albedine in flavum abit, consistentia fluida, resinosa, balsamica, uti terebinthina laricea est, sapore acri & amaricante, ex arboris mediocris cortice læso profluit. *Rajus* appellat hanc arbo- rem balsamiferam Brasiliensem fructu monospermo. Duplex autem nobis apportatur balsamum, quale unum est liquor limpidus, stillans ex arboribus Americanæ provinciæ, Copaiba dicta; ad medullam usque perforatis, odoris fragrantis & gratissimi; saporis acriusculi. Alterum vero crassioris, instar terebinthinae est consistentiæ. Discrimen hoc autem dependet ex diverso colligendi tempore. Illud enim quod statim post arboris incisionem primo effluit, est admodum clarum, album, odoris resinosi. Hoc autem quod sequitur, magis aurei coloris & consistentiæ densioris est, quæ consistentia ipsi balsami nomen conciliavit. Et ultimum hoc est, quod nobis adportari magna copia in lagenis ex Portugallia diximus: alterum autem tenuius, magis rarum est. Hoc balsamum identidem cum tinctura tartari vel tinctura antimonii acri in essentiam redigitur, quæ in nervorum affectibus sic dictis frigidis, & qui ex glandularum vitio atque nimia laxitate nascuntur, adeoque in fluore albo, gonorrhoea, praesertim si cum vino Hispanico sumatur, præstantissimæ est efficaciae.

§. VII. Simplicibus, quæ nobis balsamica remedia subministrant, merito quoque liquidambra debet annumerari. Stillat ex arboris Mexicanæ, styraferæ dictæ, cortice fauciato. Est liquor oleosus, resinosus, pinguis, consistentiæ ejus, qua est terebinthina Veneta, coloris ex flavo rufescentis, saporis acris, aromatici, oleosi, odoris fragrantis, ad styracem calamitam accedentis, cujus essentia cum tinctura tartari vel spiritu vini tartarifato extracta, caput & universum genus nervosum roborat. Destillatur quoque mediante aqua ex ipsa per vesicam oleum tenuissimum & fragrantissimum, quod usu tam interno quam externo validissime se commendat.

§. VIII. Perspectis jam balsamis, quæ benigna natura nobis elargitur, liquidis: ordine jam ad balsama solidiora & sicciora, cujus generis sunt resinosa gummata, fragrantia, & suavissimo oleo prædita, provolvimur. Ex horum vero numero quam maxime Benzoe, Styrax pura calamita, Ladanum, Myrrha, Mastiche eminent. Proveniunt quoque hæc ipsa ex arboribus, quæ balsamiferæ sunt & perpetuo virentes, fervidissimo tempore fauciato cortice. Stillat exinde humor tenax, qui humidioribus particulis solari æstu sublatis, paulatim solidescit: quare non immerito hæc resinosa Gummata balsama sicca sunt appellanda, quia in omnibus cum balsamis conveniunt, tota nempe inflammantur, suavem expirant odorem, penetrantis sunt saporis, solvuntur, quamvis non ex toto, spiritu vini rectificatissimo, & oleum quoque per destillationem præbent.

§. IX. Et primo, quod attinet ad Benzoe, hæc arboris Sumatrensis benzoiferæ dictæ foetus est. Purissima est & alba & solvitur spiritu vini

*Bals. de
Copaiba
nascitur in
Brasilia
Rio de Ber-
nice, &c.*

*Apporta-
tur duplex
liquorem
& cras-
sius
Utriusque
descriptio*

*Liquidam-
bra stillat
ex arboris
Mexicanæ
cortice fau-
ciato.*

*Balsama
solidiora
sunt Benz-
oe, Sty-
rax, Lada-
num, Myr-
rrha, Mas-
tiche.*

*Benzoe ar-
boris Su-
matrensis
est foetus,*

E recti-

rectificatissimo in essentiam, quæ aquæ rosarum instillata, lac cosmeticum elegantissimum constituit. Gummi hoc per sublimationem levi encheiresi in olla in flores adigitur. Si coquitur in aqua & decoctum inspissatur, flores splendentes fundum petunt elegantissimi, qui non modo interne ad juvandam expectorationem in asthma & pulmonum infarctu ob subtilem acredinem egregie valent, sed & nares vellicando sternutamentum movent. Ceterum Benzoe est præcipuum suffumigiorum præstantium ingrediens; & cum extracto Benzoes debite commixtum, adjectis quibusdam oleis odoriferis, & momento Zibethi, massam illam pro fumo delicatissimam Hispanicam constituit.

Prepara-
tiones ex
Benzoe.

Styrax Ca-
lamita.

§. X. Similis naturæ est Styrax, Latine frequentius Storax dictus, qui ex arbore, in India, nec non jam in quibusdam tractibus (teste Lobelio pag. 429.) Gallicæ provinciæ succrescente, & quæ folia habet mali Cydonii, truncum vero similem ligno betulæ, stiriatim exstillat, unde stirax dictus esse Lobelio, quanquam non satis magno jure, videtur, purissima resina lacryma stiracis dicitur, perquam odora, inque grana & glebas coacta. Hanc quoque solent dicere Calamitam, cujus nominis rationem dat Strabo lib. XII. quod videlicet ex arbore in modum arundinis cavata & exesa proflueret. Conf. quoque Salmasius ad Solinum pag. 383. Impurior vero magma rubrum est, cui sæpe paleæ, folia, &c. intermixta sunt. Videtur hoc ipsum ex arboris partibus, ramis, cortice, radicibus, per coctionem extractum. Solemus ex hoc Storace elicere resinam duplici modo, vel per expressionem, quando prius cum vini pauxillo maceratur ad humectationem, vel mediante spiritu vini rectificatissimo.

Ejus Re-
sina.

Mastiche.

Ejus in-
gens in In-
sula Chio
est proven-
tus.

Spiritus
Mastichis.

§. XI. Mastiche resina est pallide flavescens, pellucida, saporis resinosi, aromatici, odoris fragrantissimi, stillans ex cortice fauciato arboris lentisci bacciferæ, cujus ingens in insula Chio proventus est. Chienensis autem hæc est optima, nam quæ in Gallia succrescit, magis est rudis & impura. Nos solemus ex Mastiche magnæ virtutis spiritum parare, quando videlicet ejus partes duæ cum parte una salis tartari exquisite miscentur, & affuso spiritu vini rectificato destillatio instituitur. Ita fragrantissimus spiritus elicitur, qui in roborando stomacho & nervoso genere, in provocanda quoque urina usum habet præeximium. Etenim sal tartari optimam & convenientissimam corporum resinorum clavem constituit, cujus beneficio subtile volatile oleum à crassioribus & viscosis terrestribus particulis extricatum, separatum, suique juris redditur.

Ladanum
ex foliis
Cisti in
Hispania
& Creta
colligitur.

§. XII. Est quoque balsamicum resinofum concretum ipsum Ladanum, in spiras contortum, saporis amaricantis, odoris grati & fragrantis, præsertim si accenditur. Colligunt incolæ hoc gummi ex foliis Cisti ladaniferi in Hispania & Creta. Multæ sunt admixtæ arenulæ, eo quod arbores in arenosis locis crescant. Extrahitur cum spiritu vini resina purissima, quæ vel liquida, vel in solidam formam redacta, roborante nervino effectum splendet, cujus usum in gravibus & contumacibus cephalalgis non sine efficacia aliquoties experti sumus.

Gummi
Elemi
exstillat
ex cortice
arboris
Myroba-
laniferæ in
insula Cei-
lon.

§. XIII. Succedit hisce Gummi Elemi, quod est resinofum, lucidum, ex flavo albicans, instar ceræ ductile, saporis aromatici, fragrantissimi odoris, exstillans ex cortice arboris myrobalaniferæ, quæ crescit in insula Ceylon. Incolæ accendunt in lampadibus, & est ipsis instar lucernæ. Destillant quoque ex hoc Gummi cum

aqua per vesicam oleum penetrantissimum, quod in Gonorrhœa, vulneribus atque ulceribus interne & externe valde est proficuum.

§. XIV. Spectat ad Balsamica sicca quoque Myrrha, præsertim purior, quæ maculas pallidas intermixtas habet, saporis acris & aromatici, odoris fragrantis. Stillat ex arbore baccifera Pola, dicta, quæ crescit in deserto Arabico; videatur Lobelius pag. 429. Exhibetur hæc optima in substantia, cum saccharo canto mixta, ad omnem putredinem, præsertim pulmonum, arcedendam. Ingreditur quoque composita præstantissima Elixir Proprietatis, pillulas Ruffi, Avicennæ & magnifica veterum antidota, omnisque generis fere pillulas. Præstat hanc ipsam in substantia quam in essentiis interne usurpare, quoniam hæc paullo calidioris sunt naturæ, & paullo fortiter sanguinem exagitare solent. Temperantior vero est in substantia propter mucidas quasdam gummeas partes admixtas. Ejus essentia in putridis ulceribus externo usu non contemnendam se gerit.

Myrrha
stillat ex
arbore Po-
la dicta in
deserto A-
rabico.

Ex Myr-
rha multa
præstantis-
sima pa-
ramur re-
media.

§. XV. Consideratis gummatibus & resinis balsamicis, nostra jam meditatio ad illa ligna, quæ balsamicum recondunt principium, descendit. Inter hæc vero primas omnium consensu tenet lignum Aloes, quod Xylaloen alias vocant, totum resinofum, saporis aromatici & amari, odoris fragrantis ac grati, præsertim si in pulverem redigitur. Est arboris Indicæ, Calambach dictæ interior substantia. Ejus resina spir. vini rectificatissimo extrahitur, in pillulas vel pulveres cephalicos adaptanda. Essentia vero resinosa ejusdem efficacitæ cum tinctura martis permixta, tincturam martis balsamicam constituit, cujus virtus ad debilitatem viscerum corrigendam, in hypochondriaco affectu magno pretio habetur. Præterea paravimus olim ex rasura ligni aloes per destillationem ex vesica aquam, cui supernatabat oleum odoratissimum, quod instar camphoræ in album coagulum frigore convertebatur. Hoc in spir. vini rectificatissimo dissolutum, essentiam magnarum virium in roborando cerebro, nervorumque debilitate reparanda præbebat. Possunt hac de re legi ea, quæ in Poterium p. 437. commentati sumus.

Ligna que
balsami-
cum recondunt prin-
cipium.

Inter hæc
primas te-
net lignum
aloes.

Prepara-
ta ex ligno
aloes.

§. XVI. Sequitur jam lignum Rhodium, cujus radix resinosa aromatici saporis odorisque rosei fragrantissimi est. Crescit in insulis Canariensibus, & oleum per destillationem præbet longe suavissimum; cujus usus inter balsama suaveolentia celebratissimus. Neque tamen negandum est essent. rad. ligni Rhodii, neque minus ejus decoctum cum aqua, propter balsamicam, qua gaudet resinam, in lymphæ vitiis indeque exortis morbis, inque ipsa lue venerea atque intima humorum corruptione, eximium præstare effectum.

Lignum
Rhodium
crescit in
insulis Canariensibus.

Ejus usus.

§. XVII. Lignum Rhodium ordine excipit santalum citrinum, quod resina scatet fragrantis; cujus luculentus testis est Spir. vini ab hoc ligno abstractus, qui fere ambram redolet. Sique rectificato spiritu extractio fiat, atque essentia leni calore abstrahatur, remanet liquor oleosus fragrantissimus, qui Peruviani balsami consistentiam habet. Ea propter hanc resinam penetrantem, hujus ligni decoctum maximi æstinandum est.

Santalum
citrinum.

Ejus vir-
tutes.

§. XVIII. Ex corticibus balsamicis eminet maxime cortex ligni Sassafras, Peruvianus, Winteranus, Chacarillæ, Costus verus, Chinæ Chinæ. Principio quoque resinoso balsamico & subadstringente præditi sunt, quod non modo ex sapore & odore penetranti, sed etiam essentia, atque

Cortex li-
gni Sassa-
fras,
Peruvia-
nus, Win-
teranus,
Costus ve-
rus, resino-
so quoque

51

Olea subtiliora, ætherea nil aliud sunt quam resina liquida.

Hinc omnia illa aromata
qua per distillatio-
nem oleum fragran-
tiss. exhibent.
Inter species balsa-
micas jure
varioque
vincunt em-
porium ob-
tinent.
Ol. Caryo-
phyllorum
à Vaterio
Cordo opo-
balsamo
substitu-
itur.

Olea hac
aromatica
sunt balsa-
ma spiri.
mosa, &c.

Olea destil-
ata ex her-
barum aroma-
tis no-
stratibus.

icuti
ni, Ma-
rana Me-
ff. Ros-
harin.
lavend.
Basilicum,
nes
Mentha
pecies,
dc.

§. XXI. At vero in nostris terris dantur quoque spirituosa ejus generis balsama, quæ virtute non minus quam fragrantia orientalibus balsamis & oleis aromaticis palmam dubiam reddunt. Et hæc sunt olea illa destillata, quæ ex herbis aromaticis fragranti odore & penetranti sapore imbutis, destillantur. Et tales sunt nominatim Rosmarinus, Lavendula, Spica, Majorana, Melissa vulgaris & Turcica, Basilicum, Serpillum, Chamomilla Romana & omnes Menthæ species, aquatica, quam Balsamitam vocant, Calamintha montana, campestris, Mentha crispa, Mentha farracenica, German. *unsrer Frauen-Müntze* (vulgus etiam corrupte pronunciat *Morgen-Müntze*, pro *Marien-Müntze*) Origanum,

§. XXII. Ex his dictis itaque adductis clarissime apparere arbitror, nobilissima & selectissima vegetabilium regnum nobis elargiri balsama, quorum prudens in medicina usus, mirabiles effectus in persanandis morbis ac sanitate vitæ custodienda exserit. Hoc vero ultimo loco non prætereundum est, plantas & arbores balsamicas, in solatium ac salutem generis humani maxime ab benignissimo conditore productas, externo quasi charactere ac sigillo notari, quod intus latitans corruptioni resistens adeoque vere balsamica virtus optime dignoscatur. Et id est quod perennent & perpetuo vireant fere hæc omnes. Verum enim vero circumspiciendum quoque hic loci est, annon sub terra, vel etiam sub mari, balsama pro conservanda humana natura, divina sapientia reposuerit. Igitur si paulo diligentius ibi constituta corpora investigemus, deprehendimus utique duo sicca balsama sub terra condita, inque maria effusa, quæ cum reliquis omnibus, ex vegetabilium regno depromptis, certare videntur. Sunt vero hæc in orientalibus locis delicatissima & maximo semper pretio habita Ambra; in borealibus autem terris ipsum Succinum: utraque nobis balsamica remedia præsentissimi effectus concedunt. Et ambra quidem grysea est corpus resinofum fragrantissimum, quod totum à nobis peculiari menstruo solvitur, inque essentiam redigitur commendatissimam, quæ ab omni præcipitatione sive coagulo ambrae aliena est, vires prostratas potenter erigit, recreat, & blanda sua ἀναδυμνίασες dolores demulcet, placidumque somnum conciliat, aquis etiam spirituosis & saccharatis, vel saccharo conditis admixta, mirabilem affert gratiam. Succinum vero, quod subtili fragranti oleo, partibus tamen terrestribus & viscidioribus intime immerso, constat, ægerrime per destillationem in aqua dimittit suum oleum, sed ignem desiderat fortius & immediatum, cui tandem obsecundat, & copiam olei, sed empyreumatici, fundit, quod nihilo minus bene depuratum ac rectificatum non sine fructu in medendo adhibetur. Est vero nobis modus cognitus, quo succini oleum fragrans, salva sua textura elicitur, idque fit quando cum sale tartari probe calcinato teritur, & affuso Spir. vini Rssimo destillatur, ita Spiritus fragrantia valde commendabilis obtinetur, in nervorum debilitatibus magnificandus. Iunc spiritum si denuo succino puro, prius commixto cum sale tartari adfundamus, essentia inde longe suavior & penetrantior vulgari exsurgit.

Qua del
re destina-
ta, olea
dant sua-
vissima.

Sed varissima
me in offi-
cinis pura
prostant ;
nam adje-
cta in de-
stillatione
therubin-
thina ad-
ulterantur.

Reducun-
tur in es-
sentialias gra-
tissimas.
Sp. vini re-
ctificatissi-
mo.

*Dua sicca
balsama ;
sub terra
condita.*

in orientali-
bus locis
Ambra.
in boreali-
bus Succu-
rum.

Ambr
risc
ates.

uccini A.
atome.

spiritus
mucini
um alko-
ol vini
repara-
um.

Hæc natura balsama magna certe vitæ ac sanitatis sunt præsidia.

Omnia fere Theriacam Andromachi itemque Mithridatium ingrediuntur.

Balsamica hæc species non sine insigni fructu ab antiquis medicamentis purgantibus adiciebantur.

Ratio.

Et certe hæc composita veterum ratione virium nostris longe sunt superiora.

Species balsamica egregia quoque sunt stupefacientium & sedativorum correctoria. Exempla.

§. XXIII. Hæc itaque sunt nobis cognita atque perspecta naturæ balsama, magna certe vitæ ac sanitatis præsidia, ex quibus medicus, artificio solidaque ratione præparare & componere alia admiscendo, poterit optima remediorum genera. Quapropter etiam oleum à veteribus Græcis & Arabibus medicis, præstantissimis suis antidotis admixta animadvertimus, sicuti videre est in *Valerii Cordi dispensatorio, Pharmacopœa Augustana, Schræderi Pharmacopœa*, idque genus pluribus pharmaceuticis libris. Solemniter vero species balsamicæ fere omnes recensitæ Theriacam Andromachi itemque Mithridatium ingrediuntur. Habet vero maxime olim in usu tales species, Mesue & Nicolaus, Medicorum Arabicæ sectæ præstantiores, præsertim pro scopo confortandi, sicuti adparet ex descriptione aromatici caryophyllati Mesues, vide *Val. Cordi dispens. pag. 71*. Speciebus Diambrae *l. c. p. 21*. Cinnamomi Mesues *p. 27*. Spec. Diaxyloaloes *p. 57*. Aurea Alexandrina Nicolai *p. 84*. Sp. Diacastorei Nicolai *p. 92*.

§. XXIV. Præterea balsamicæ hæc species non sine insigni fructu medicamentis laxativis & purgantibus ab antiquis adiciebantur, utpote credebant purgantium vehementem vim naturæ esse inimicam, hincque corrigendam & naturam simul roborandam. Quapropter Electuarium Mesue, vide *Cord. l. c. p. 199*. diasenna Nicolai *pag. 207*. hiera picra Nicolai *p. 216*. hiera simplex Galeni *p. 237*. Pill. de hiera composita Nicolai *p. 237*. Pill. hieræ picræ Rhasis *p. 231*. Pillulæ aloephanginæ Cordi *p. 251*. lucis majores *p. 214*. species aromaticas balsamicas insigni quantitate habent atque recipiunt. Et certe, nisi dissimulare velimus, hæc composita veterum laxantia & purgantia, modo minorem quantitatem (quod in genere monere velim) haberent purgantium, præsertim aloes, ratione virium nostris longe sunt superiora. Ex recentioribus pillulæ æstimatissimæ de succino Cratonis, catholicæ Poterii, & Becherianæ, ubivis jam famigeratissimæ, variis modis correctæ, non tanta pollerent efficacia, neque in tanta celebritate atque existimatione essent, nisi parciore dosis purgantium, præsertim aloes balsamicis gummatibus & vegetabilium extractis associata fuissent.

§. XXV. Stupefacientium & sedativorum egregia quoque balsamicæ species sunt correctoria. Hinc passim videbis opiatas has fuisse à veteribus admixtas, eo, quod crederent frigidissimam opii & narcoticorum vim iis cicurari, & spiritus ab hisce sopitos resuscitari. Et certe pillulæ de cynogl. non tam securi essent usus nisi radix cynogl. sem. hyoscyami albi & extr. opii, myrrham, olibanum, resinam storacis secum haberent. Neque pillulæ de styrace ad acres humores demulciendos in tussi & catarrhis tam nobili usu se commendarent, nisi simul olibanum, resinam storacis, myrrham, ambram caperent. Pillulæ Wildegansii ob admixtum oleum caryophyllorum, myrrham & aloem longe tutiores aliis, ex opio confectis remediis, habentur. Laudanum opiatum Sydenhamii, cujus non modo in Anglia, sed & aliis Europæ regionibus, familiarissimus est usus, non parum adjectis aromatibus cinnamomo, nucista, caryophyllis ac vino Hispanico corrigitur. Elixir proprietatis ab Paracelso inventum, & ex ejus speciebus paratæ pillulæ Ruffi & Avicennæ per longa tempora famam suam sustinuerunt, quia adjectione balsamicæ myrrhæ & croci catarthica illa vis aloës valde corrigitur & cicuratur. Optandum mo-

do vehementer foret, ut omnia illa composita veterum, quæ aloë ingreditur, minorem ejus dosin susciperent, quandoquidem hæc propter sulphuream ac volatilem acridinem, qua pollet, valde sanguinis & humorum massam exagitant, & in calidioribus subjectis, in majori dosi sæpe plus nocumenti quam levamenti offerunt. Præterea aquæ & elixiria, sic dicta, vitæ mulierum, balsama embryonum, aquæ apoplecticæ spirituosæ, spiritus & balsama apoplectica, aquæ cephalicæ calidæ, quæ nobilissima ex balsamicis & aromatibus ac cephalicis herbis, subtili balsamico oleo gaudentibus, ingredientia habent, virtutem in excitandis viribus, in tono viscerum & ventriculi corroborando inde potissimum mutantur.

§. XXVI. Quum vero veterum medicamentorum compositiones, ob ignorantiam veræ theoriæ medicæ ut plurimum sint inidoneæ atque ineptæ; quoniam notitia verarum morbi causarum neque minus modi agendi medicamentorum destituebantur: hinc nullum dubium est, quin in fereniore jam luce, rebus medicis nostro hoc tempore fulgente, meliores etiam & selectiores formulæ medicamentorum possint concinnari. Et quum medicamenta balsamica quasi universalis sint naturam roborantia, atqui in omni morbo confortantibus opus sit, hinc non inutile sed jucundum visum est, aliquot exempla balsamicorum heic loci recensere. Primum vero omnium optime balsamica evacuantibus admiscuntur, ut drastica eorum vis quodammodo corrigatur, addo etiam, ut naturæ in excernendo vis quodammodo adjuvetur, ac vires, quas ordinario evacuantia convellunt, conserventur. Igitur optima ratione miscentur cum emeticis. Ita aquam vitæ balsamicam emeticam in usu habet Autor, quam non modo ægri cum summa voluptate accipiunt: sed & operationem inde desideratissimam experiuntur: siquidem & celeriter & cum magna virium tolerantia, & sine appetitus vel ventriculi destructione, operatur. Potest vero sequens huic substitui, quæ constat aquæ menthæ spirituosæ, & aquæ cinnamomi, etiam cum vino destillatæ, singularum uncia unius dimidio, quibus tartari emetici duo grana, syrupi autem balsamici una drachma immiscetur. Fit potio inde gratissima, pro una dosi assumenda. Si quis vero in usum trahere velit pillulas evacuantes, quæ roborante balsamica virtute nobilitatæ sint, harum sequens erit exemplum. Accipiantur extractorum aloes rosatæ, cardui benedicti & absynthii, singulorum una drachma, extractorum rhabarbari, ladani, ligni aloes, itemque pulveris gummi benzoës, myrrhæ electæ, corticis chacarillæ; & denique balsami Peruviani atque nitri, singulorum drachma dimidia. Hæc inter se commixta fiant pillulæ, quarum unus scrupulus pro dosi sufficiet. Si aciores in usum vocandæ fuerint, addantur vel extr. panchym. Crollii, vel resina jalappæ cum mercurio dulci probe permixta. Ubi vero morbi ratio infusum purgans balsamicis junctum efflagitat, sequens formula satisfaciet, quæ recipit fibrarum hellebori nigri, rhabarb. opt. rad. zedoariæ, de singulis semiunciam, agarici trochiscati, cinnamomi, caryophyllorum, corticum ligni sassafras, chacarillæ, citri, aurantiorum, duarum drachmarum æqua pondera. Addantur pasularum minorum uncia duæ, tartari crudi & salis tartari, singulorum tres drachmæ. Omnia debito modo mixta & comminuta, spiritus salis ammoniaci una drachma irrorentur, tandem-

Quid foret optandum.

Aquæ apoplecticæ, elixiria, & suas vires & virtutes potissimum à balsamicis mutantur.

Qua de causa veterum medicamentorum compositiones ut plurimum sint ineptæ.

Hinc in fereniore jam luce selectiores formulæ medicamentorum possint concinnari.

Omnium optime balsamica evacuantibus admiscuntur.

Optima ratione miscentur cum emeticis.

Aquæ vitæ balsamica emetica.

Pillulæ evacuantibus balsamica.

Infusio purgans balsamica.

demque vini tribus libris perfundantur. Posset tali formulæ non sine fructu adjici martis limatura, quando ægro exhibenda est ex hypochondriorum malo laboranti. Neque incongrue balsamica sudoriferis associantur, adeoque eximiam laudem in movenda perspiratione, atque sudore eliciendo meretur sal volatile cornu cervi bene depuratum, si cum essentia succini, qualem superius descripsimus, destilletur. Inde spiritus provenit penetrantissimus, quem spiritus balsami Peruviani nobiliorem reddit. Tanta est ejus præstantia atque commendatio, ut non facile in sudoriferis alius ipsi par ponendus sit. Datur ad guttas 50. licet vero etiam ulterius progredi, si id quidem postulare videantur circumstantiæ. Si quis vero balsamica resinosa ligna decoquere, inque formam liquidam redigere velit: procedat in huncce modum. Sumantur rasuræ lignorum fantali, rhodii, juniperi, sassafras, guaiaci, & radicis sarsaparillæ ad æquale unius unciae pondus, rad. pimpinellæ & angelicæ, itemque cinnamomi, caryophyllorum & rasuræ ligni aloes, singulorum drachmæ duæ: Inter se probe commixta vase clauso, cum sola aqua vel vino adjecto decoquantur. Complures chronici morbi largiorem urinæ effusionem postulant: tum, si ullum aliud, certe hoc erit summe proficuum. Misceantur invicem spiritus mastichinus, sp. balsami Peruviani, tinctura antimonii acris & spiritus nitri dulcis æquis portionibus. Ita medicamentum præparaveris, quod ad drachmæ unius dimidium cum singulari fructu offeres. Convenientissimum est in capitis nervorumque vitiis nares quandoque irritando mucum extrahere, vel sternutamentum movere, quod obtinemus sequenti remedio: sume pulveris herbæ majoranæ & basilici, singulorum drachmam unam, mari veri & rasuræ ligni aloes ana drachmam semis, fl. benzoës grana XII. essent. ambræ guttas x. olei caryophyllorum guttas iv. M. Sæpissime evenit ut in morborum curatione sit virium habenda ratio, quæ omni modo fulciendæ ac erigendæ sunt, quia nihil periculosius & commodæ valetudinis restitutionem plus impediens dari potest, quam si virium robur penitus evanescat. Eo itaque fine convenit uti sic dictis analeptics, ex quorum numero potissimum habemus, si essentias ambræ & moschi, cum spiritu rosarum fortissimo paratas, cum spiritu balsami Peruviani æquali pondere misceas, additis moderata proportionem oleis cinnamomi, de cedro, bergamotti, melissæ turcicæ, & id genus aliis. Magna est salium volatiliū oleosorum fama, & si recte utaris, efficacia. Ea si desideras balsamica virtute imbueri, facile id efficies. Misce tincturæ tartari & spiritus salis ammoniaci vinosi ana unciam unam, his autem affunde olei de cedro, menthæ, macis & caryophyllorum, singulorum guttas x. Hoc medicamentum ad ventriculum roborandum & tonum intestinis restituendum insignes omnino vires possidet. Ipsum elixir stomachale, quod experientissimus practicus Lipsiensis *Michaelis* in frequenti usu habebat, ex meris balsamicis compositum est. Vide descriptionem in *B. Hoffmanni thesauro pharmaceutico*, quem *clavi Schræderianæ* adnexuit. Eodem quoque consilio adornavimus nostrum elixir balsamicum, cujus descriptionem in annotationibus ad *Poterium* pag. 186. & 382. communem fecimus, ex quo tempore in varias etiam Germaniæ officinas pharmaceuticas receptum est.

§. XXVII. Ceterum illud notissimum est, *Frid. Hoffmanni Oper. Tom. VI.*

quam egregie balsamica remedia se gerant in persanandis glandularum vitiis, iisque morbis expurgandis, qui ab earum nimia laxitate, humorum decubitu, vel immoderato secessu proveniunt. Unde in gonorrhœa & fluore albo summe sunt proficua, quæ in sequentem modum præparantur. Æquo pondere invicem commisce tincturam antimonii acrem, essentias balsami de Meccha, de Copaiba, Peruviani, lignorum, singularum semi unciam. Adde camphoræ drachmam. Monendum tamen hoc loco existimo, neque hoc elixir, neque alia hujus generis in usum prius vocanda esse, quam corpus necessariis evacuationibus sufficienter præparatum fuerit. Si cui medicamentum, solida pilularum forma dandum commodius visum fuerit, ex his adornet, nempe recipiat balsami de Copaiba, de Tolu, succini, mastiches, olibani, terra catechu, sigillatæ, antimonii diaphoretici, coralliorum ana unam drachmam, olei ligni sassafras decem guttas. Mixta hæc inter se cum syrupo balsamico in pilulas redigantur, quæ ad fluxum seminis cohibendum oppido sunt efficaces.

§. XXVIII. Pectori quoque summe amica sunt balsamica, quoniam infarctum pulmonum expediunt, expectorationem juvant, & debile vesicularum pulmonalium viscus mirifice confirmant. Præscribi in hunc finem posset formula, quæ recipit essent. benzoës, myrrhæ, balsami Peruviani, croci, nucistæ, tincturæ tartari, gummi ammoniaci, singularum drachmas duas, olei anisi, macis, foeniculi ana guttas x. addi etiam pro lubitu posset spiritus salis ammoniaci. Nec inconueniens fuerit pilulari formæ balsamica cum aliis ad eundem morbum facientibus includere, & asthmate laborantibus porrigere. In exemplum sit sequens formula: Recipe gummi ammoniaci, myrrhæ electæ, benzoës, croci, balsami Peruviani, extracti enulæ, singulorum semidrachmam, addantur pulveris millepedum & nitri depurati scrupulus unicus. Si quis renum & vesicæ, calculo laborantium, vitiis succurrere velit, non frustra sane opem insignem à balsamicis expectaverit, possetque sequentem pulverem drachmæ unius pondere sumendum, cum lacte amygdalorum vel brodio carnis exhibere. Formula hæc sit: sumantur seminum lycopodii & milii solis, nucleorum Persicorum, pulveris glycyrrhizæ, lapidum cancrorum, succini, mastiches, singulorum drachma unica, adspargantur aliquot guttis oleorum ligni sassafras, macis & juniperi.

§. XXIX. Quando mulierum menstruæ evacuationes minus recte & ordine procedunt, sive deficient, sive modum excedant: aut quando frequens abortio vel sterilitas spem lætæ prolis affligunt: tunc roborare utique remissum uteri tonum oportet, ut superandis & eliminandis vitiis natura sufficiat, foetuique fovendo & perficiendo idoneus sit locus. Illud, nostro quidem judicio recte obtinebit, si quisumat herbas melissæ, menthæ sarracenicæ, veronicæ, pulegii, millesolii, flores rorismarini, lavendulæ & salviæ, cujusvis illorum quantum manu complectitur, & adjiciat æquis portionibus corticum citri & aurantium, nec non myrrhæ electæ & baccharum juniperi duas drachmas, hæcque omnia aquæ convenienti, quantitate, vel, quod præstabilius videtur, vino perfusa maceret. Judicabit prudens medicus si forte ægrotantium conditio efflagitet adjectionem laxativi, ex quorum genere rhabarbarum aut sennæ folia commendationem præcipuam merentur.

E 3

§. XXX.

Balsamica in gonorrhœa & fluore albo summe sunt proficua.

Pilule ad fluxum seminis cohibendum.

Pectori quoque summe amica sunt balsamica.

Quæ in forma liquida, & pilulari ab auctore præscribuntur.

Renum & vesicæ calculo laborantibus succurrunt balsamica. Medicamenti formula.

In minus recte & ordine procedentibus mulierum menstruis evacuationibus, valent melissæ, mentha, Pulegium, &c.

Nec incongrue balsamica sudoriferis associantur. Salvolatile C. cervi cum essentia succini destillatum.

Decoctum ex balsamicis resinosis lignis.

Mixtura adurest dicta.

Pulvis sternutatorius.

Essentia Analeptica.

Quomodo salia volatilia oleosa virtute balsamica imbuantur.

Elixir stomachale M. Hoelii ex meris balsamicis compositum est.

*Balsama
vulnera-
ria.*

*Balsamum
Anglico
locatelli
longe præ-
ferendum.*

*Essentie
vulnera-
ria descrip-
tio.*

§. XXX. Restat jam de balsamis vulnerariis vel verbulo dicamus. Horum enim in viscerum varia læsione, vel partibus externis corruptis & destructis latissime patet incomparabilis utilitas. Communicabimus autem cum lectore nostro unicum ad externos & internos usus excellentissimum, quodque omnibus aliis, & ipsi famigeratissimo illi Anglico Locatelli dicto, longe præferimus. Sumimus autem essentiarum myrrhæ, succini, gummi elemi, fantali rubri, balsami Peruviani & Tolutani singulorum unciam unam, oleorum hyperico, summitatibus millefolii & momordicæ infusorum, æquali singulorum pondere duas uncias. Ab his inter se mixtis lenissimo calore spiritum avocamus, eo autem, quod remanet, ante jam dicto fine & modo utimur. Paramus quoque essentiam vulnerariam, qua in ulceribus mundificandis & carne nova inducendis exterius utimur, ex millefolii, hyperici, myrrhæ, succini, mastiches, gummi elemi, balsami Peruviani & florum rosarum essentiis pari pondere conjunctis. Aliquando mel etiam non sine fructu adjicimus.

§. XXXI. Ceterum quanti pretii olim habita fuerint balsama arte composita, cum pro usu interno, tum ad usum extra corpus: satis superque apparet ex *Euonymi* i. e. *Conradi Gesneri Thesauro de remediis secretis apud Andream Gesnerum 1552. Tiguri edito*, qui multo plures & excellentes quoque balsamorum compositiones ex aromatibus, resinis & gummatibus fragrantis odoribus paratas, & ab veteribus maximi habitas, proponit, ex quo libro clarissime intelligitur eo tempore, quo chymia incepit florere & paullo diligentius excoli, balsama maxime omnium in usu tunc fuisse, quæ per destillationem ex nobilissimis ingredientibus, quibus sp. vini rectificatum & terebinthinam miscebant, conficiebantur. Ex his unicum tantummodo exemplum, cujus Lullius auctor est, & quæ terebinthina carent, de reliquo autem ingredientia longe præstantissima complectitur, edere ac recensere volumus, quod ita se habet; nempe recipere jubet caryophyllorum, nucis moschata, zingiberis, zedoariæ, galangæ, piperis, granorum juniperi, corticum citri, salviæ, basilici, rosinarini, majoranæ, menthæ rotundæ, baccarum lauri, pullegii, gentianæ, calaminthæ, fl. sambuci, rosarum, ammios, spicanardi, ligni aloes, cubebarum, cardamomi, cinnamomi, calami aromatici, stœchados, chamædryos, melissæ, mastiches, aloes epaticæ, seminis & fl. aneithi: seminis artemisæ, singulorum unicam unciam. Hæc omnia jubet immittere in aquam vitæ quinquies vel sexies destillatam, quæ pondere triplici species omnes superet. Destillantur lento igne, sic prodit aqua clarissima & pretiosissima, de qua hi laudatissimi effectus recensentur. Si fundatur in vulnus recens, non opus est alio remedio, sed intra diem naturalem cum dimidio ad summum sanabitur, modo non sit mortale: omne ulcus malignum, vetustum, putridum, cancrum, si ista aqua lavetur, intra paucos dies sanabitur. Si oculus labore lippitudine vel ungula, intra paucos dies instillatum persanabit. Si dolores sint ex percussione vel casu sine ulcere, foveatur locus exigua ejus portione, intra tres horas dolor recedet. Internus ejus usus tantum fuit æstimatus, ut hæc scripta de eo legantur. Senibus juventutem recuperat, hominem moribundum, desperatumque à medicis restituit, & quod si quis per annum quotidie paucas guttas biberit cum aqua fl. borraginis, anno

*Balsama
quondam
maxime
omnium in
usu fue-
runt.*

*Balsamum
Lullii.*

*De quo mi-
rabilia
narrantur.*

exacto carnibus, sanguine & toto corpore renovatus videbitur. Plura in hoc libro, optimæ certe compositionis balsama recensentur, in quibus tamen id considerandum est, quod omnia fere terebinthinam habeant, quæ tamen propter nimium, quo sanguinem exagitat, calorem, oleum naturæ minus gratum suppeditat, unde ex omnibus veterum balsamis & aquis spirituosis terebinthinam illam expungendam existimaverim.

§. XXXII. Mentio hoc loco quoque, breviter tamen strictimque injicienda est balsami liquidi spirituosi, quod vitæ appellant, ab Dn. Autore inventi, cujus usus multis in locis propter nobiles, quibus præstat virtutes, celebratissimus est. Ubi totius compositionis ratio in solutione oleorum purissimorum, & balsamorum non adulteratorum, atque ingredientium debita proportionem consistit. Et hæc puritas ingredientium causa quoque est, quare tantis viribus splendeat, quantæ in aliis compositis, quæ similia habent, non facile reperiuntur. Sed quoniam de ejus usu interno & externo peculiaris descriptio extat, nolumus in his recensendis esse longiores.

§. XXXIII. Postremo res & ordo quoque postulat ut de virtute atque efficacia, quam balsamica, quæ audiunt, remedia foveant, nostram sententiam pluribus verbis exponamus. Dicimus autem hæc esse vere universalialia seu polychrestia medicamenta, quorum tanta vis est, quanta in ullo alio auxiliorum genere animadvertitur, quoniam omnibus fere naturis quadrant, omnibusque remediis facile associantur, neque minus vincendis morbis fere omnibus, aptissima sunt præsidia. Etenim id habent præ aliis medicamentis balsamica proprium atque peculiare, ut naturæ humanæ admodum sint amica, cum ea quasi conspirent, atque affinitatem habeant. Quod vel ex eo intelligitur, quando tam celeriter vires diuturno morbo, senectute aut alio accidente fractas atque oppressas à balsamicorum tempestivo usu reparari atque restitui animadvertimus. Unde ad animi defectionem, quacunque etiam ex causa fiat, superandam, nec ullum sibi simile in tanta remediorum farragine inveniunt. Paucis dicemus, hoc quod in nobis vitam præstat, quod cordi arteriis & nervis, robur, pulsum ac tonum affert, principium sive spiritum sive animam aut naturam aut aliud quid appellare velimus, mirifice erigunt, excitant, conservant, constituunt. Videntur enim in naturam ac indolem substantiæ illius mobilissimæ, quæ regendis nostris membris præest, transire, quia vel odore admissa, tam subito cordis motum in syncope oppressum restituant, ut satis admirari nequeamus. Est enim hæc indoles omnium earum rerum, quæ fragranti ac penetranti oleo constant, ut tam externo quam interno usu vires corporis nostri foveant, tueantur, & singulari corroborandi facultate instructa sint: sicut contra nil magis inimicum aque alienum est viribus atque vitalibus motibus, quos subito opprimit & extinguit, quam quod putridum & foetidum est, & à suaveolentis maxime sejunctum. Siquidem omnis putredo vitæ est inimicissima, & ubi hæc in corpore humano exoritur vel incrementum sumit, mox vires omnes fatiscunt, ac collabuntur, quem admodum in peste, malignis febribus, ac sphacelo internarum partium clarissime deprehenditur. Atque adeo non sine ratione ex balsamicis concinnata remedia, balsama, aquas, spiritus vitæ adpellantur, quod cum vita utique proximum habent commercium.

§. XXXIV. Quum itaque motum robur ac

*Balsamum
vitæ auto-
ris celebra-
tissimum.*

*Ejus enco-
mia.*

*Balsamica
sunt vere
universalia
medicamen-
ta.*

*Natura
humana
admodum
sunt amica.*

*Et nos mi-
rifice eri-
gunt, con-
servant,
& consti-
tuunt.*

*Hæc omni-
um fra-
grantium
ac pene-
tranti oleo
constan-
tium indo-
les.*

*Nil contra
nobis ma-
gis inimi-
cum quam
quod pu-
tridum &
foetidum
est.*

Quibus in morbi maxime valent balsamica.

tonum præstent universi corporis partibus, jam facile intelligitur, quod in iis morbis atque affectibus ubi vires & vitales motus deficiunt, aut viscera ac partes ex nimia atonia & laxitate laborant, hæc remedia opem ferant præstantissimam. Quapropter in cerebri ac nervorum imbecillitate, sensuum ac memoriæ debilitate, membrorum paralyfi, aphonia, hemiplexia, denique in anorexia, cibi fastidio, vomitu, alvi fluxu, ventris torminibus, & quando flatus molestiam creant, in languore universi corporis, animique defectiōne, inque omnibus morbis sic dictis frigidis, catarrhalibus, defluxionibus, tussi nimis humida, coryza, fluore albo, gonorrhœa, asthma humido, & in universum ubi robur addendum est partibus, nunquam spem & fiduciam prudenter exhibentis medici frustrabuntur. Deinceps, quia nobilissima balsamica solidis nostri corporis partibus, præsertim cordi & fibris musculosis, quæ fluidas movent atque impellunt, robur atque virtutem foenerantur: hinc certissima sunt adversus omnia morborum genera præsidia atque præservatoria, id quod sequentem in modum dabimus demonstratum. Quamdiu videlicet sanguis atque humores, per universi corporis tubulos ac vasa, prompto ac perenni motu feruntur, ac superflua cum alienis per commoda colatoria & emunctoria sejunguntur: tamdiu universum corpus & omnes ejus partes sanitate gaudent, & officio suo rite defunguntur. Quamprimum autem iste motus, vel in toto corpore, vel in certa ejus parte turbatus aut impeditus fuerit, necessariis secretionibus deficientibus protinus materia ac via ad morbos panditur amplissima. Non aliud vero majorem facile præstat usum ad humorum vitalem circulum tuendum, & perspirationis quam utilissimæ negotium conservandum, quam quod balsamica vi, principem illam cordis partem firmat atque corroborat. Maxime omnium vero nobilissima nostra balsamica à morbis putridis & qui contagio & malignitate sunt infames, corpora vindicant. Unde grassantibus epidemicis malis, cum prorsus singulari fructu præservandi causa adhibentur. Neque minus cum alexipharmacis juncta, dictis in morbis egregie succurrunt, quod putredini resistunt, vires erigunt, & circuitum humorum promovent. Et quia putredinem vitæ inimicissimam potenter corpore nostro arcent, hinc in morbo illo vere putrido, qui ab impuriori venere nascitur, & scorbutico malo, quod ex aëris & alimenterum impuritate progignitur, non sine certo fructu atque utilitate usurpantur. Lignorum enim illa decocta, elixiria atque essentia, à balsamica ingredientium virtute, suam efficaciam

Sunt certissima adversus omnia morborum genera præsidia.

Quod demonstratur.

Maxime omnium à morbis contagiosis corpora vindicant.

Præsertim alexipharmacis juncta.

In lue venerea & scorbutico cum utilitate usurpantur.

mutuantur. Præterea & hoc illustre habent balsamica, præsertim suaveolentia, quod pacatos motus reddant, & exorbitantes componant, atque dolores sedent. Unde in gravi capitis vel etiam dentium atque articulorum doloribus, solo tantum externo usu ingens saepe solamen afferunt. Neque prætereundum est, quod laudatissima hæc medicamenta omnium fere vehementiorum, præsertim evacuantium, & sopientium sint correctoria, eorumque virtutem eximie roborante sua facultate moderentur. Unde, ut supra innuimus, felicissimum hæc balsamica cum omnibus fere evacuantibus & sedativis ineunt connubium. Ex quibus omnibus adparet, quanta laus ac virtus consitet balsamicis, & quam eximio usu ad sanandos morbos idonea sint.

§. XXXV. Verum enim vero, sicut nihil ex omni parte perfectum atque beatum, neque ulla medicina vel præstantissima, datur, quæ non possit, imprudenter administrata, nocere: Ita etiam nihil dubii est, quin sine ratione ac prudentia hæc remediorum genera data nocumtoto esse possint. Namque ubi in corpore ingens est sanguinis præcalidi copia ac fervor, ubi motus sunt aucti, pulsus celerior ac vehementior: ibi quum magis opus sit fræno quam stimulo, motus efficere vel promovere non licet. Præterea & hoc habent incommodi suaveolentia, quod, ubi cerebrum ex quadam debilitate ægrius dimittit sanguinem, sed vasa potius capitis humoribus turgent: tunc quoniam majorem decubitus efficiunt, minus congrua sint, adeo ut dolores, torpores, vertigines, sensuumque oppressiones quandoque incrementa capiant. Ultimo loco hæc addere nobis commodum visum est, quod virtus balsamicorum adhuc in re medica, ab iis, qui in artis operibus versantur, non sufficienter fuerit perspecta atque explorata, quum certe plus efficaciam in illis situm sit, quam vulgo creditur. Deinde balsama illa spirituosas, quæ olea æthereas, aromaticas & cephalicas constituunt, ac vulgo præstant & venduntur, maxima ex parte falsata & adulterio corrupta esse, unde mirum esse medico non debet, si id, quod debebant, præstare nequeunt. Tandem & illud monendum est, multum peccare in eo medicos, quod balsamica spirituosos liquoribus quasi obruant, dum fere semper ea cum spiritu vini miscent, aut per destillationes ei copulant, quo ipso illud fere tantum obtinent, ut nativa eorum vis maxime infringatur, & ejus loco virtutem vehementer calefacientem induant. Quo magis itaque sibi relicta sunt, eo majorem utique præstare usum jure meritoque censendum est. Et tantum de balsamicis nunc dixisse sufficiat.

Suaveolentia pacatos motus reddunt, &c.

Sæpe solo tantum usu externo.

Cum omnibus evacuantibus & sedativis felicissimum ineunt connubium.

Asi sine ratione ac prudentia data non minus esse possunt.

Quando minus congrua sunt.

Eorum virtus nondum sufficienter ab omnibus medicis explorata est.

Quæ vulgo præstant & venduntur maxima ex parte sunt adulterata.

In quibus medici circa balsamica peccant.

D E

P R Æ S T A N T I S S I M A N I T R I
V I R T U T E M E D I C A .

§. I.

QUando benignissimum numen in rerum productione immensæ sapientiæ suæ gloriam generi humano voluit declarare; non modo innumerabiles & indole, specieque plane differentes res condidit; sed cuivis, nec venenis excep-

tis, proprias ac peculiare vires infudit, quibus in mortalium salutem, qui rerum naturalium cognitionem sibi vindicarunt, medici cum fructu uti possint. Meditatione vero paulo diligentius circumducta deprehendimus, nonnulla dari corpora, quæ præ aliis singulari virium prærogativa atque eminentia sunt instructa, quæ-

que in salutarem mortalibus usum variis modis ac rationibus cedere possint præsentissimum. Quod si locus esset exemplis, possemus ex lapidum familia allegare ipsum magnetem, cuius in attractione ferri; in conversione ac inclinatione ad polos; nec non in acus mirabili hoc lapide tactæ pro diversitate regionum à polis declinatione mirabilis efficacia omnem humanum captum ac rationem longissime exsuperat. Ex metallis caput extollere videtur mercurius, qui simile quid in tota rerum natura non habet: est liquor siccus, gravissimus; saporis & odoris expers, nihilo minus penetrantissimæ in omnis generis corpora etiam solidissima metallorum virtutis, cuius destructionem frustra huc usque chymix filii moliuntur.

Enim vero ex salium tantum ordine placet jam producere Nitrum, cuius eximiam indolem ac proprietatem, nec non saluberrimum magnis in morbis usum præsentis specimine paulo attentius evolvere allaborabimus.

§. II.

Equidem jam olim superioribus annis quædam de hac nobili materia commentati sumus, nihilo secius laboris pretium ac fructum doctrinæ non poenitendum futurum existimamus, si peculiæres quasdam observationes circa hujus salis naturam, usum & modum operandi ingeniosioribus insinuemus. Primum vero considerare oportet, nitrum esse summe volatilis & simul fixissimæ indolis. Volatilitatem arguit ejus genesis, quæ ex aëre elementorum subtilissimo, nec non ex materia prosapiæ animalis longe teneriori perficitur. Nitrum terræ foetum esse, ex qua demum prodeat in aquas & fontes, frustra adhuc creditum & inter physicos male fundata opinio fuit. Etenim illud, cuius veteres multo sæpius mentionem injecerunt, plane à nostro inflammabili differentis est ingenii, siquidem ex hoc ne tantillum ignei volatilis spiritus elici posse, sed extrema ignis tortura, ceu fixum sal alcalinum remanere, chymix peritioribus non amplius est obscurum: neque ulla observatione solida confirmatum habemus, verum nitrum inflammabile ex terra erutum, vel ex aqua fuisse productum. Qui thermarum & acidularum elementa scrutantur, sine ulla solida ratione inter hæc nitrum collocant nostrum, quo, si intellectum voluerint salem alcalicum, qui ab evaporatione aquarum salubrium multarum relinquitur, veterum potius nitrum quam nostrum inflammabile esset dicendum. Inflammabile, quo nos hodierno tempore utimur, aërem serenum purum, cuius usura omne animantium genus fruitur, natalem agnoscit, adeo ut quo aër sicciior, quo compressior ac serenior sit, eo proventum nitri majorem, quo vero humidior, magisque rarefactus, eo minorem ejus copiam subministret. Et hæc est causa, cur frigidiora Muscoviæ loca & orientales ac boreales æstivo tempore nostram atmosphæram occupantes venti copiosum & purissimum nitrum animantium excrementitiæ & putrefactæ aut alcalinæ terræ ingenerent. Meretur etiam attentionem, terram, ex qua nitrum fuerit extractum, in loco umbroso cumulatum septem semper annorum spatio de novo ab imprægnatione aëris nitrum copiosum præbere, utpote aëris fluidum tenerrimis sulphuræ simplicis indolis moleculis imbutum esse, tot revivificationes salium vitrioli, aluminis, salis cujus-

dam medii instar arcani duplicati, nec non generatio sulphuris ex aëre plenissime evincunt.

Terra, quæ minera nitri est, tenerioris & sulphuræ indolis esse debet, arripit ex hoc ipso catholico fluido tenerrimum sulphur & subtile æthereum acidum, quod demum collectum & unitum nitrum nostrum, quod salium recte princeps dicendum, constituit. Et hinc jam amplius nullus dubitandi locus est, cur igni immixtum totum volatile fiat, & deflagret, quemadmodum ejus spiritus five beneficio olei vitrioli, nitri texturam intime referantis, five cum simplici bolo destillatus & concentratior redditus totus in fumum incoercibilem, vel leviter aëre ac calore admixto resolvitur. Hujus spiritus penetrantia longe apparet illustrior, quando cum oleis destillatis paulo gravioribus, ut sunt oleum cinnamomi, caryophyll. lign. sassafr. mixtus in apertissimam flammam resolvitur, exiguo si experimentum rite successerit, tam spiritus quam olei vestigio relicto. Quamvis vero hoc modo ex mobilissimis aëreo-æthereo igneis partibus nitrum sit compositum, nihilo minus, quod mirum videtur, fixissimæ est indolis; stat in igne fustum per aliquot horas sine aliqua molis & ponderis diminutione, neque ipsa flamma potest ejus texturam resolvere, quod tamen prompte fit, si vel paucillum terræ ignitæ sulphuræ fixæ massæ adjiciatur.

§. III.

Deinde & hoc est in compositione hujus salis mirabile, quod ex penetrantissimo volatili corrosivo acido nec non fixissimo igneo caustico alcali sit conflatum. De ejus spiritus acidi volatilitate & penetranti corrosione, jam mentio facta est. Quomodo vero nitrum ferme totum levi encheirisi portione, videlicet æquali reguli antimonii adjecta per vehementiorem calcinationem in fixum causticum alcali mutetur chymicis est notissimum. Præparari hac ratione solet Tinct. sic dicta Antimon. acris, quæ inter diuretica haud difficulter omnibus palam dubiam reddit; hæc pure est alcalina (quod patet evaporatione spiritus vini) tanti vero ardoris ac acrimonix, ut guttula etiam linguæ admota vesicam excitare idonea sit.

§. IV.

Tertio loco singulare in nitro & hoc ipsum videtur, quod uti jam dictum, parari ex eo possit spiritus acidus summe corrosivus volatilis, & identidem sal alcali fixum maxime causticum; nihilo minus virtute gaudeat eximia, septicam, adeoque virulentam corrosivam indolem omnium fere corporum tollendi, eamque in propitiam temperatam & salutarem reducendi. Regulinæ antimonii substantiæ, & quod cum hac participat sulphuris antimonii vis vehemens atque emetica, iis qui leviter saltim chymiam salutarunt, non est incognita, & quam facile hæc sola adjectione nitri in debita dosi per ignem in mite & temperatum remedium, blande sudorem movens, transmutari possit perspectissimum. Mercurii, arsenici, cobalti, vismuti, virulentiam chymix peritiores nitro cicurare consueverunt. Cupri saporem amarum metallicum stiptico-corrosivum una cum virtute drastica nitrum cum vitriolo veneris convenienti quantitate mixtum & fustum immutat. Ex animalium regno infecta pleraque sale acerrimo vesicas excitan-

citante constant, hujus vim perdomare nihil magis aptum est, quam mirabile nostrum sal, in forma sicca, si intime cum ipso misceatur. Tuto sic utiliterque cantharides, aliaque similis notæ corpora sine ullo damno offeruntur etiam sensibilibus ad urinæ difficultatem expediendam, modo cum prudentia, causis mali perspectis, adhibeantur, nihil vero periculi habent, si tantillum camphoræ, quæ inflammationis eximia victrix est, adjiciatur. Prostant inter purgantium genera valde drastica, quæ imprudenter sumpta mire genus nervorum exagitant & sæpiusculæ in ventriculi tunicis inflammationem movent: ex quorum censu sunt gummi guttæ, scamnoneum, resina Jalapp. colocynth. & quæ ejusdem sunt naturæ e.g. elaterium, esula, quæ etiam extrinsecus apposita, vesicas excitant. Perit horum caustica vis vel certe mitigatur, quodcumque cum nitroso sale ineunt conubium. Et revera si ullum genuinum corrigens purgantium datur, quod æstum, spasmodum, inflammationem à delicatis & sensibilibus membranis averruncat, certe nitrum est: aloe laxantis ac balsamicæ alioquin virtutis, per sal acre subtile, quo pollet, non semel vasorum anastomoses suscitavit, hæc vero benignior & propitia magis redditur nitri mixtura. Bilis omnibus animantibus ob vim suam deterforiam amarā, balsamicā naturalem medicinam præbet, sine qua nullum ex animantibus diu salvum ac incolume persistere potest; hæc, si vitiatur congestione acrimie fordium in succis retentorum, veneni partes implet, molesta generis nervosi insultatione, plurimis, ardoris nempe, anxietatis, inquietudinis, enormis evacuationis, atrocis doloris indiciis manifestanda; ad hanc malitiam corrigendam, an ipso nitro modesta dosi sumpto detur præstantius remedium, merito dubitamus.

§. V.

Uterius attentione perquam dignum est, nitrum esse sal inflammabile, sed tamen nihil hoc ipso universum corpus nostrum refrigerare potentius. Hujus frigoris sensus, simul ac linguæ admoventur, cognoscitur; multo magis autem in vehementissima corporis incalescentia ejus effectus, interius si sumatur percipitur, quapropter nitro nullum datur excellentius antifebrile, nullum, quod tam cito, tam tuto æstum febrilem temperet & omnes ex eo pendentes effectus simul extinguat. Meretur hanc in rem adduci egregius locus ex Angel. Sala Myrotech. Sect. V. p. 778. Nitro in febribus quotidianis & chronicis tertianis item hemitriteo putrido maximo cum successu utimur. Ægrotis enim convenienter ante purgatis, si bis aut ter duabus vel tribus ante paroxysmum horis nitrum, servatis iisdem in loco moderate calido offeratur, morbi ideam ita immutat, ut brevi sequatur sanitas. Uti vero omnia alia refrigerantia, ex quibus acida eminent, sanguinem & succos corporis nostri inspissant & coagulant, ita contra nitrum potius totam humorum massam fluidiorem reddit. Pulchrum est experimentum, quando sanguini è vena emisso coagulato & nigricanti solutio nitri infunditur; protinus enim hæc ipsa instar liquoris alcalini sanguinem reddit fluidiorem, nec non minio quovis elegantiorē colorem ipsi conciliat. Ex quo intelligitur, quam præstans sit ejus usus ad deprimentum corporis æstum, quamque longe magis exoptandus præ omnibus aliis refrigerantibus acidisque, quæ coagulationem humorum vitæ & sanitati infensam inducere solent. Eam quoque ob causam nullum sal videtur naturæ animantium magis congruum, quam laudatissimum nostrum nitrum. Nota sunt experimenta, quæ circa sanguinis transfusionem curiosiores olim instituerunt, varii generis liquores in animalium venas infundendo, ubi compertum fuit, ab acidis non minus quam alcalinis infusionibus animalia fuisse extincta, diverso qui-

dem effectū, siquidem acida nimiam coagulationem, alcalia vero nimiam fluiditatem in sanguine relinquerunt. Nitrum vero sine ullo damno legimus injectum à *Malpighio in Tract. de Polypo cordis Tom. II. pag. 380.* qui fatetur, se nitri soluti 6. uncias cani robusto in venas jugulares infudisse, nulla admodum insigni mutatione secuta, præterquam quod urinæ copia ex eo major provenerit. Adeoque mixturæ sanguinæ nitrum valde conveniens est. Quare *Verulamius in Histor. vitæ & mortis* non dubitavit nitro assignare virtutem vitam prolongandi, si multo sapius ad 1. scrup. pro dosi exhibeatur. Quin videtur quoque hoc ipsum humano sanguini formaliter inexistere, quod vel ex eo cognoscitur, quod sanguis exsiccat & pulverisatus carbonibus injectus, instar nitri injecti igneam quandam ebullitionem efficit.

§. VI.

Præterea adest ipsi nitro peculiaris vis ac proprietas putredinem à corruptibilibus arcendi. Cognitæ sunt eximie in hac re vires salis communis: dubius verosum, an non nitro prærogativa præ sale communi in præservatione corporum sit concedenda? Bene memini ego, me ante plures annos sanguinem è vena extractum cum liquore nitri mixtum per longum tempus fluidum sine ulla putredine eleganti spectaculo in thermometro multorum oculis exposuisse. Neque prætermittendum est, carnes animalium nitro solo vel cum sale communi mixto conditas diu elegantissimum colorem eumque rubicundum etiam post coctionem retinuisse; cujus phænomeni hæc videtur ratio, quod sal istud sanguinis in minimis vasculis adhuc contenti colorem rubicundum magis exaltet. Ex hisce clarum fit, nitrum putredini, quæ sæpe primis in viis consistit, & in totius corporis sphaeram vires suas spargit, adversum esse, & ea propter in putridis febribus, & in vermibus infantum cum fructu posse exhiberi.

§. VII.

Circa usum medicum hoc maxime scire convenit, quod nostrum sal interne sumptum omnis generis excretiones videlicet per alvum, per urinam, per sudorem egregie promoveat. Unica nitri depurati uncia, soluta in aqua, alvum lubricat & nonnullis aliquot sedes movet, quod majori effectū facit, quando infusis vel decoctis laxantibus ex tamarindis & fol. Senn. manna, debita quantitate admiscetur. Quod si liquor inferioribus partibus est infundendus, præsertim in febribus, nitri accessionem plurimum commendamus. Inter urinam moventia nullum medicamentum cognitum est, quod urinarias vias tam prompte expediat, & per has urinæ iter liberum reddat, nec non calculosas æque dissolvat concretiones, quam laudatissimum nostrum simplex. *Penotus de Medicam. Chym. pag. 57.* calculosis, & qui dysuriam passi sunt, sive sint adulti, sive infantes, sive robustiores, sive languidiores mirifice ejus utilitatem commendat, adeo ut singulis 14. diebus si sumatur, nunquam arenam in renibus nasci posse polliceatur: *Timeus in Consil. Consult. 3.* audivit Batavii à *Prævotio* nephriticum quendam diuturno nitri præparati usu à calculo perfecte fuisse curatum, & *Grulingius in observ. de Calculo pag. 120.* scribit: satis notum est omnibus, sal prunellæ egregium esse auxilium pro præservatione & curatione nephritidis. Confirmo id quoque, me ad doloris ex calculo ferociam domandam emulsionem ex variis seminibus cum nitro acuatam magno cum emolumento aliquoties adhibuisse. Transpirationem quoque liberiorē & auctiorem in nonnullis subjectis efficit; ubi videlicet vigilia, sitis & immodicus æstus urget, cutis cortice firmiter constricto eapropter, quia temperat sanguinis æstum, sive intestinam percalidam partem

tium sanguinis agitationem: tali ratione omnia fiunt in toto corpore quietiora; partes nimie contractæ relaxantur, & ita liber sanguinis ad emunctorium cutis transitus restituitur. Videmus indies in praxi medica pulveres præcipitantes nitrosos in omni inflammatione & calore præternaturali sudorem eximie movere, id quod secus fit in subjectis segnioribus, frigidioribus cachecticis, quorum vis activa motrix in musculis valde languida est, quam proinde calidioribus & activioribus magis excitare convenit.

§. VIII.

Est insuper nitrum, egregium & quo non opportunius inveneris, carminativum. Quantum molestiarum ac damni stagnantes & incarcerati interdum in spasmo contractis intestinis flatus procreant, obscurum practicum esse nequit, ut tot malorum auctores prompte dissolvere & foras proscribere artis sæpius sit. Ego, quod majori successus felicitate se commendat auxilium quam nitrum, vel solum vel carminativis mixtum, non inveni; aperiuntur mox ab ejus usu portæ inferiores & fluctuatione ac murmure flatus se ostendunt, & felici exitu ac strepitu se produnt; quod maxime fit, ut arbitror, fibrarum intestinalium contractionum solutione & relaxatione; quapropter merito ejus usus in colica spasmodica, præsertim biliosa & veteribus sic dicta calida commendatur. Maxime omnium vero hoc remedium hypochondriacis & hysteriis foeminis magnum præbet allevamentum; spasmi enim & flatus in hisce tantum tragœdiam ludunt & malorum ac symptomatum causa ac fons sunt, quibus cunctis abigendis nitrum nostrum admodum est idoneum.

§. IX.

Inter præclaras quoque laudes nitri non postrema, sed merito primo loco ponenda est virtus inflammationibus resistens. Nullum vitium œconomiae vitali magis insidiatur, quam inflammatio, quæ in morbis peracutis ut plurimum perimit, quando occupat stomachum, anxietas & inquietudo, ubi meninges dolor capitis, phrenitis aut convulsio, ubi pulmonum membranas, periculum suffocationis oritur; si quando in aliis interioribus partibus consistit, internorum ardor cum extremorum perfrigeratione nascitur. In visceribus sanguineis inflammatio facile abit in abscessus vel in gangrænam. Ad curandam itaque inflamatam partem, nitrum vel solum vel cum pauxillo camphoræ & aliis bezoardicis mixtum omne infert curationis punctum; ut quod hæc medicina non præstat, nulla præstare posse videatur. In praxi olim similem pulverem habui familiarissimum, qua de re legi possunt *animadversiones meæ in Poterium*. Vidimus sæpenumero in pleuritide, phrenitide, peripneumonia, angina, inflammatione œsophagi, ventriculi, erysipelate, à tali pulvere aliquoties assumpto ardorem, dolorem, sitim, vigiliam, delirium maxima ex parte simul & semel quievisse, blando madore per universum corpus, quod ante erat aridissimum, subsecuto. Extrinsecus quoque cum aliis mixtum inflammationis succurrit partibus. Ita spiritus vini camphorat. rite paratus, cujus nota est, quando aqua affusa non præcipitatur, solutioni nitri mixtus, addito aceto destillato, erysipelas discutit, immanesque dolores capitis abigit.

§. X.

Est insuper nitrum inter ea, quæ spasmodis medentur, præcipuum. Quantas tragœdias spasmodicæ nervosarum partium contractiones in humanis corporibus excitent, ii, qui morborum illorumque causarum exquisitiorem sibi vindicarunt cognitionem, norunt. Certe

hoc haud adeo difficile possunt demonstrare enormes illæ sanguinis profusiones, non aliam sere causam agnoscentes, quam inæqualitatem circuli sanguinis, dum spasmo contractis vasis in parte quadam minoribus impetus ad alia vicina, eorumque ramos ruit, quos nimium distendendo, & eorum oscula aperiendo, larga sæpius in copia sanguinem propellit: hac ratione hæmoptysis, narium hæmorrhagia, nimius hæmorrhoidum fluxus, sanguinis mictus & immodica ejus profusio per uterum generatur. Hisce vitiis si quis recte mederi vult, non alia curandi via debet procedere, quam ut contractas spasmo partes solvat, relaxet & liberum demum per has sanguinis meatum ac transitum restituat. Huic intentioni, suffragante multiplici experientia, egregie satisfacit nitrum, cujus usum jam tum saniores practicum in scriptis suis adversus hos morbos plurimum laudarunt: ita *Riverius Cent. 1. obs. 94.* in lochiis immodice fluentibus, *Cent. 1. obs. 96.* idem auctor in exsuperante mensium fluxu, *Cent. 1. observ. 94.* in hæmoptysi, *Cent. 1. observ. 83.* in hæmorrhagiis cum febre maligna, *Cent. 2. observ. 18.* nitri usum mirifice extollunt. Et quoniam spasmus frequens subinde causa est suppressæ sanguinis ordinariæ excretionis, quæ fit, v. g. per uterum in foeminis, dum hujus partes contractæ resistunt sanguinis ad uterina vasa majori impulsui; hinc facile patet nitrum & tali in casu suppetias ferre posse desideratissimas, quare idem *Riverius* insignis hujus remedii patronus in lochiis suppressis *Cent. 1. obs. 80.* *Grulingius* in diminutione mensium *obs. 50.* hoc ipsum magni faciunt. Dolores sæpissime spasmodorum sunt soboles & horribiles illi, qui calculi excretionem solent comitari, vel qui in intestinis consistunt & pro coli afflictione habentur aut pericranium occupant, nitri usu felicissime vincuntur. *Welschius Cent. 2.* curatione ultima refert solo nitro innumeros milites epidemica & castrensi cephalalgia laborantes quondam in Hungaria fuisse liberatos.

§. XI.

Hæc omnia tametsi in praxi quotidiana obvia sint, & veræ experientiæ respondeant, nihilo minus non minus utile quam jucundum erit cognoscere rationem & modum, quo laudabiles hoc remedium effectus in corpore humano præstet ac feliciter perficiat.

Fateor, rem valde arduam esse, medicamentorum vires exquisita ratione cognoscere & demonstrare, neutiquam tamen circa cognitionem rerum desperandum, sed ulterius semper progrediendum esse existimo. Experientia enim innixa rationibus & judicium in medicamento applicatione duo sunt, quæ medicinæ veritatem & certitudinem in medendo adstruunt atque confirmant. Faciemus hinc & in præsentī materia periculum, & videbimus, num supra memorati nitri effectus ex uno principio sive agendi fonte possint derivari. Ex omnibus præcipua nitri virtus est calorem extinguendi sive refrigerandi sanguinem, quod quomodo fiat ostendendum est. Calorem omnem in corpore fieri ex sanguinis particularum præsertim sulphurearum intestino agitissimo, mathematicis, motu vertiginis & circa axin dicto, inter physicos & medicos hætenus convenit ita, ut quo celerior & major hic motus sit, à majori attritu ac pressione sanguinis, beneficio cordis & arteriarum, & fibrosarum partium corporis, pendens, eo major enascatur calor. Quicumque itaque motum hunc intestinum sistere, is calorem quoque præternaturalem tollere novit; sistitur hic motus, vel labefactatur, quando alia partium sanguinis circa axin se moventium motus fit directo, eaque contraria, quæ est secundum lineas rectas, qui motus secundum modernorum physicorum & mathematicorum sententiam frigoris causa est. Ostendit id inter alia ludicrum illud experimentum, dum quan-

quando ore halitum foramine angusto facto celerius emittimus, frigus producit, quando lenius hoc fit calor oritur, quin imo non tam materiali principio, quam solius motus directioni, acceptum ferendum esse frigus artificialis eaque curiosa glaciei ipsa in æstate ex aqua productio mediantibus salibus nitro, sale communi, sale ammoniaco demonstrat.

Inesse autem nitro talem motum, siue particulas ejus calore solutas motu ferri rectilineo, ex pluribus rationibus colligere est. Nitrum elasticæ & expansivæ esse virtutis efficacia pyrii pulveris demonstrat, unice ex eo principio derivanda. Ea enim est elateris expansiva natura, ut propellat à se versus circumferentiam vi quadam motrice corpora, porro talem vim inesse nitro confirmat ejus mixtio cum sanguine coagulato, qui mox exinde resolvitur, fluidus evadit, subsequente colore coccineo & florido. Huic expansioni nitri elasticæ tribuendum quoque est, quod nitrum cum aqua fontana mixtum ejus frigus sensibilibiter adaugeat; ex quo colligitur conveniens esse conceptui & rationi, nitrum in corpus sumptum intra fluores expansionem efficiendo, minuere intestinam sanguinis partium percalidam agitationem, & hoc efficit non modo mox prima in regione calidam & intestinam acris bilis cum aliis succis effervescentiam & agitationem infringendo, sed & in corde & pulmonibus partium sanguinis sulphurearum majorem ibi æstum proveniente temperando. Sedato sic intestino calidissimo motu sanguinis, relaxantur fibræ à nimio calore contractæ, oscula ac pori cutis clausi aperiuntur, & sic transpiratio redditur liberior, ut in corpore retentæ agilissimæ sulphureæ partes exhalent, hac ratione calor & fitis sedantur, spasmus tollitur, dolor levatur, & liber excrementorum nec non flatuum ex intestinis exitus præbetur. Accedit & hoc, quod mitigato calore corporis humidum consumente hoc ipsum postea conservetur, quod demum contractas antea partes emollit & ulterius relaxat; ut adeo nitrum non modo refrigeret, sed & humectet. Dictum quoque supra fuit, nitrum præservare corpora à putredine, ipsique esse contrarium, cujus effectus debetur identidem expansivæ nitri virtuti, quæ motum intestinum, unionem partium mixti dissolventem, in quo vis ac causa putredinis radicatur, extinguit, ut adeo similem effectum cum frigore in conservanda corporum textura præstet. Meliorem ac magis distinctam explanationem harum rerum, si quis proferre poterit, facile cedere volumus.

§. XII.

Inquirendum ulterius est, unde peculiaris illa nitri proprietas, causticam & vehementem nonnullorum mixtorum indolem perdomandi, eamque mansuefaciendi, proficiscatur, quemadmodum supra mentio facta est, de purgantibus vehementioribus, de insectis acerrimo sale imbutis, de mineralibus, veneni naturam præ se ferentibus, quorum omnium vim vehementem ita temperat ac corrigit, ut terrere medicum propter periculum inde expectandum amplius nequeant. Ratio hujus effectus in eo videtur esse collocanda, quod omnia ea, quæ dicuntur agere virulentia, me-

tu valde penetranti agitissimo, partium acutarum & tenuissimarum, in nerveas tensas sensibiliores fibrillas, eas nimium irritando, lancinando, rodendo, id perficiant; quo plus itaque hujus generis particulae sunt unitæ, & invicem sibi arctius junctæ, eo plus virium, plus potentiae exerunt; & contra, quo magis divisæ, à se disjunctæ, eo plus virium deperdunt. Multiplici experimento confirmatam habemus hanc sententiam, quod non solum omnis generis caustica, siue acida, siue alcalia sint, sed & ipsum sublimatum, quo non datur fortius venenum, sola sufficienti quantitate aquæ communis injecta, diluta, pernitiæ vim exuunt: simili ratione nitrum cum regulo antimonii calcinatum, dum expansiva & resolvente sua vi, in igne à se invicem disgregat antimoniales particulas, illarumque arctiorem compagem dissolvit, easque comminuendo subtilizat, innocentem, benignam & diaphoreticam virtutem ipsis conciliat. Oportet autem, ut hæc divisio & disjunctio partium sufficiens sit, & ideo duæ vel tres partes nitri ad unam partem reguli requiruntur; minori dosi si adjicitur, calx antimonii nauseam vel vomitum excitantis virtutis non plane expers redditur; diaphoretica hæc calx bene præparata, modo cum anatica portione nitri & pulveris carbonum fundatur, reassumit mox vehementiam rursus antea divisas partibus arctius unitis atque collectis. Neque videtur à ratione alienum eodem modo, nitrum cum purgantibus drasticis & vesicantibus, probe mixtum, simili modo agere, videlicet earum partes à se invicem disjungendo, ac discontinuando.

§. XIII.

Ex his dictis & adductis jam apparet, quam nobile nitrum omnium drasticorum corrigens sit, adeoque in praxi medica maxime utilitatis futurum; ita commodissime emeticis, purgantibus, diureticis, sudoriferis fortioribus, admiscetur, quare tutissimum fit emeticum, quando tartari emetici grana duo miscentur cum lapidum cancrorum granis duodecim & granis tribus nitri: nec non purgantes pilulæ, quæ vario usu se commendant energiae emergunt, quando massæ pilularum Avicennæ, & Extracti Panchymagog. Crollii granis decem adduntur nitri grana sex; si præstans expetis diureticum, accipe millepedes & lapidum cancrorum grana duodecim & nitri purificati grana sex. Si bezoardici mineralis grana duodecim miscentur cum grano uno camphoræ & salis volatilis cornu cervi, nec non nitri granis quatuor, tutissimum habes sudoriferum. Mercuriale si tutum desideras, quod coagulum lymphæ & glandularum infarctum expediat, cinnabarim præparatam quamcunque, siue antimonii, siue nativæ sit, misce cum nitro & aliis præcipitantibus, en! habebis medicinam in morbis chronicis desideratissimam. Solemus quoque non sine magno fructu sedativis, quorum opium ceu præcipuum ingrediens est, ut theriacæ coelesti, Laudano opiato, massæ pilularum de Cynoglossa identidem nitrum & cinnabarim admiscere; utpote hac ratione, soporosa eorum vis plurimum corrigitur ac temperatur.

CAMPHORÆ USU INTERNO
SECURISSIMO ET PRÆSTANTISSIMO.

§. I.

Medicamenta sua etiam fata experiri, nemo facile, nisi rudis sit historiæ medicæ, in dubium vocabit. Quid enim frequentius occurrit, quam quod non tantum diversæ circa remediorum efficaciam apud medicos vigeant opiniones, sed & quædam interdum ob mirabilem maxime, qua celebrantur, virium potentiam ad cælum usque tollantur, quæ intervallo temporis ob noxam, quam forte crearunt, iterum culpantur & ad ima usque relegantur. Neque tantum ab antiquis præstantissimis medicis maximopere commendata inque pharmacopœis recensita medicamenta composita præsertim hoc fatum sustinent, sed maxime nostris temporibus, quibus medicina magis exulta & clariori luce est magnificæ famæ, quæ extiterunt remedia, paucis abhinc annis laudem atque existimationem suam penitus ferme amiserunt. Quanta enim famæ celebritatis fuit paucis abhinc annis laudano opiato *Helmontii*, elixirio proprietatis *Paracelsi*, antihectico *Poterii*, aquæ benedictæ *Rulandi*, specifico cephalico *Michaelis*, tincturæ ejus bezoardicæ, pulveri bezoardico *Sennerti*, spiritui oleoso volatili *Sylvii*, tincturæ aperitivæ *Mæbii*, tincturis ferme omnibus martis, bezoardico sic dicto solari, *Joviali*, Cerussæ antimonii, bezoard. minerali, panaceæ *Glauberianæ*, theriacæ coelesti *Quercetani*, salis viperarum *Tachenii* fixato, salis volatili cornu cervi, chinæ chinæ, illis, qui in artis operibus indefesso studio versantur, notissimum est. Utpote hæc ipsa velut polychresta & arcana ob mirabilem & pene divinam virtutem ipsis concessam recondebantur, quorum tamen fama atque existimatio nostris ferme temporibus periit atque exspiravit, eo quod conceptam medentum spem maxima ex parte eluserint. En miseram artis nostræ faciem, quæ nunquam fere sibi constat, sed semper innovatur, reformatur & immutatur! Nolo tamen hoc loco ipsa culpæ vel accusare remedia, quibus eximias vires agendi in submovendis morbificis causis utique Numen benignissime indidit, sed medicorum coarguo ignorantiam, inconstantiam, inque judicando & applicando præcipitantiam: quorum alii, cum parum docti & solidi sint & recte ratiocinandi usu ac arte destituti, hinc in sentiendo sunt inconstantes, huc vel illuc agitantur, inque diversas partes facile distrahuntur: maxime omnium vero eorum opinionibus, quos fama vulgi, casus, aut cæca fortuna forsitan extulit, & qui in adplausu & existimatione vivunt, inhærent. Alii in præceptoris & magistri sui, quem sapius etiam forte nanciscuntur, unice verba jurant, ejusque dicta quasi Apollinis Delphici oracula æstimant. Alii, dum à certi remedii usu sinistrum vel dextrum effectum observant, protinus hunc soli remedio, nulla aliarum causarum concurrentium habita ratione, quæ multum remedii virtutem modificant, ascribunt, & hinc noxium aut proficuum in his vel illis evincendis morbis illud existimant, sique tantopere decantatum remedium votis & expectationibus non recte respondet, tunc mox ad alia ab aliis magnifice laudata, vel etiam ad exotica transcurrunt, quo efficitur, ut nunquam recte notitiam remediorum facultatis atque potentiae, quæ tamen ferè præcipuam the-

rapiae medicæ partem sustinet, acquirant. Maxima itaque scientiæ & prudentiæ medicæ pars est, nosse medicamenta, nosse eorum facultates ac vires, neque minus eorum usum ab abusu recte distinguere, ita enim fiet, ut neque ipsis nimium laudis vel virtutis tribuamus, neque nimium detrahamus. Præfari hæc volumus, cum nostri instituti sit de interno præstantissimo camphoræ usu nostras observationes atque rationes exponere.

§. II.

Prius verò, quam de interno camphoræ usu & ejus admiranda in compluribus morbis depellendis efficacia differamus, quædam de illius origine, solo natali atque natura peculiari præmittenda esse censemus. Quod itaque ad ejus originem ac generationem attinet, est ipsa foetus arboris glandiferæ in India Orientali, cujus folia & radices tenerrima tali resina sunt imprægnata, unde etiam arbor camphorifera adpellatur. Fusiolem vero hujus arboris descriptionem exhibuerunt *Breynius in exoticis Plantis Cent. 2.* & *Kleyerus in Annotat.* Crescit hæc arbor in Japoniæ sylvis absque cultura insigni in abundantia, radicem habet crassam, densam, subrusam & ligneam, quæ admodum olet camphoram, cortex est inæqualis ac grysei coloris, lignum vero solidum, ponderosum, subfuscum, oleoso humore turgidum, & identidem camphoræ odorem de se spargit, rami oblongi, late expansi atque divisi foliis alternatim positis gaudent palmam longis & duos transversos digitos latis, referunt Cassiæ ligni folia & contritu fragrantissima camphoræ effluvia emittunt. Hæc arbor ad quercus altitudinem in India quandoque adfurgere dicitur. Perpetua fronde viret & sub nostro quoque climate culturam fert, modo ab acri gelu & ventis borealibus solite defendatur. Eam non modo in horto medico Leidensi, sed etiam in famigeratissimo illo Schwebbelensi, quem ingenti sumtu adornavit generosus Dominus de Münchhausen, vidimus. Neque vero tantum in uno eodemque Indiæ loco progignitur, sed alibi quoque ejus proventus visitur, utpote in Sumatra & in Insula Borneo sponte & copiose in sylvis crescit, nec multum à Japonica distat. Quando inciditur hæc arbor, profluit oleosus succus, qui particulas camphoreas non paucas continet.

§. III.

Hæc itaque arbor camphoram nobis largitur, quæ non uno modo ex ipsa elicitur. Distinguitur autem camphora in nativam & factitiam, illa granulata est, & ex arborum trunco solis æstu sponte transsudat, vel ex fisso aut inciso ligno prolicitur, & ea rarissima est: factitia vero, quæ ad nos in glebas & panes compacta transportatur ex radicibus, ligno, ramis ac foliis dissectis ignis officio coctione extrahitur atque sublimatur. Nativa maxime ex Sumatrana & Borniensi arbore depromitur. Japonenses vero per destillationem longe majorem ejus quantitatem obtinent, segmentis enim adfundunt aquam simplicem sufficienti quantitate, & postea in vesica, quæ collo longo ac angusto & capitello lato est instructa, destillationem adornant, in capitello vero ipsa camphora colligitur ac condensatur, & si opus esse censetur, denovo sublimatur, quo præstantior

stantior puriorque evadat. Genere jam perspecto, ac origine camphoræ, res poscere videtur, ut in ejus quoque naturam ac indolem paulo penitius inquiramus. Persecuturis vero excellentissimi hujus simplicis naturam & proprietates paulo adcuratori indagine ac meditatione, in universa rerum natura vix simile sibi aut par haberi jure pronuntiandum est. Quare etiam ob peculiare sibi proprias vires ac qualitates, ad quod genus vel speciem referenda sit, nondum inter Medicos & Physicos est consensus. Veteres camphoram pro resina habuerunt, eo quod ex arbore incisa succus elicuitur instar resinæ inflammabilis concreascit: at vero, cum ad resinas camphora sit referenda, merito dubitamus. Nulla enim ex omni resinarum genere, seu natura talis seu arte præparata reperitur, quæ accensa nullo cinere relicto tota in auras avolat: quid quod haud ulla datur resina, quæ vase clauso per ignem tota in altum elevatur. Ea enim est natura atque indoles resinarum, ut vehementiori igne tractatæ, phlegma, spiritum & oleum fundant. Accedit, quod nulla ex resinis nobis cognita sit, quæ tam promte insignem quantitatem spiritus vini rectificatissimi recipiat atque absorbeat, quam camphora, cujus pars una exacte à spiritus vini rectificatissimi partibus duabus dissolvitur.

§. IV.

Cum itaque camphora inter resinas vix commodum inveniat locum, hinc recentiorum nonnulli in eam invenerunt opinionem, ut camphoram salis volatilis oleosi possidere naturam adseruerint, impulsu maxime ad hanc sententiam ex eo, quod instar salis volatilis oleosi accedente calidiore igne non modo tota in auras avolet, sed & in clauso vase, ne minima quantitate relicta, in sublime feratur. Verum enim vero etiam hi ipsi mihi à veritatis tramite valde aberrare videntur, utpote nullum datur sal oleo etiam intime imbutum, quod in flammam abripiatur, vel quod cum rectificatissimo spiritu vini aut oleo quodam arctissimam subeat unionem. Et qui camphora salis titulum jure mereatur, cum solutionem in aqueis mensuris penitus aversetur? Neque isti rem accurata acu tangere mihi videntur, qui inter gummata illam collocant, quia & solutione & volatilitate plane cum ipsis nullam alit adfinitatem. Nostra vero hæc est sententia: camphoram nihil nisi oleum volatile tenuissimum esse, aut coagulatum, non liquidum, id quod multis iisdemque firmissimis rationibus corroborabimus. Primo enim multæ dantur species fragrantis odoris & saporis penetrantis, quæ subtile oleum, quod etiam promptissime sub destillatione in vesica cum aqua fundunt, in se custodiunt. Hac ratione non modo ex omnibus fere aromatibus, sed etiam ex plantis oleo volatili turgidis, ut sunt lavendula, majorana, mentha, rosmarinus, ruta, oleum destillatur, unde profecto non mirum est, camphoriferæ arboris partes tale oleum fundere. Secundo sicuti omne oleum destillatum flammæ admotum, mox accenditur atque totum avolat, & aterrimam fuliginem emittit: ita etiam idem fit cum camphora, quæ mox flammam concipit, tota avolat nigerrimo fumo exhalante. Dein, quemadmodum omne oleum destillatum in spiritu vini rectificatissimo præsertim tartarifato solvitur, adeo ut partes duæ spiritus unam partem olei v. g. lavendulæ, in se recipiant intimeque invicem uniantur: ita etiam idem experimentum cum camphora feliciter succedit, dum nempe uncia una spiritus vini rectificatissimi promptissime dimidiam camphoræ unciam dissolvit. Et quemadmodum solutioni oleorum cum spiritu vini peractæ adfusa aqua oleosas particulas præcipites dejicit: simili ratione soluta in spiritu vini camphora, menstruo aqueo accedente, rursus fundum petit & præcipitatur, mixtura inde turbida albescente

Frid. Hoffmanni Oper. Tom. VI.

reddita. Denique sicuti olea destillata, quibusdam saltem gravioribus aromatibus exceptis, propter levitatem aquæ supernatant: ita etiam camphora in omnibus aqueis liquoribus in superficie hæret. Postremo camphoram cum oleis destillatis similis ejusdemque esse indolis, vel ex eo colligitur, quod illa in spiritu vini rectificato soluta & per alembicum destillata non simul tota evehatur, sed in fundo cucurbitæ, nisi ulteriori destillatione in alembicum urgeatur, pars illius relinquatur, perinde ac fieri solet cum solutis oleis æthereis in spiritu vini rectificato, quæ destillationi submissa, spiritum oleosa substantia subtiliori quodammodo imbutum, fundunt, potiori tamen olei parte in fundo cucurbitæ relicta, quæ ulteriori commissa igni separatim in forma olei prodit. Hæc exactissima experimenta satis abundanter comprobant, maximam inter camphoram & olea destillata intercedere conformitatem. Quapropter non satis mirandum est, quam inani & frustraneo conatu magni etiam Chymiatrum oleum ex camphora destillatum eliciendum quæsierint. Quo fine obtinendo & sua ingenia & nobilissimum hoc simplex dire torserunt atque adfluxerunt: ignorabant enim hi lepidi camphoræ carnifices, ipsam jamdum oleum volatile & destillatum esse. Sicuti vero ridiculum est ex oleis destillatis oleum elicere velle, cum jam tale quid sint: ita etiam si quis ex camphora oleum vult perficere, res merito paradoxa dici debet. Decepti vero omnes sunt in eo, quod camphoram resinam esse credebant, quæ sicuti facile per destillationem oleum largitur: ita etiam hoc ipsum ex camphora eliciendum omni studio curarunt.

§. V.

Verum enim vero non eadem, sed diversa camphoræ natura ab oleis destillatis videtur, cum hæc solida & sicca, illa vero pinguis, fluida quoque & manus madefacientia sint. Deinceps & in eo discrimen notabile observatur, quod oleum volatile denuo ex retorta vitrea per arenam destillatum subtilissimum quidem largiatur oleum, sed crassum magma relinquatur: camphora vero tota in forma sicca, nec ulla materia relicta, in auras abit. Quibus dubiis, ut satisfaciamus monendum est, dari quædam simplicia in vegetabilium regno, quæ volatilem illam sulphuream & inflammabilem partem, quam in mixtione custodiunt, non in forma pinguis olei, sed in sicca forma, non secus ac camphora elargiantur. Ita si florum rosarum cum sale bene contritorum ac maceratorum magna quantitas cupræ vesicæ immittitur & cum aqua destillatur, præter aquam fragrantissimam etiam oleum, quod ipsi supernatat album, coagulatum instar sevi, elargiuntur odoratissimum, quod non secus ac aliud oleum in spiritu vini rectificatissimo dissolvitur. Hujus olei delicatissimi hac ratione parati portionem possideo; simili modo adhuc ante aliquot annos ex ligno aloës tale oleum destillatum instar camphoræ proliciui, ingentem nempe raspaturæ ligni aloës odoratissimi ad libras decem accedentis sumsi quantitatem, ad fundi curavi aquam fluviatilem, qua per aliquot dies in temperato loco macerata fuit, postea adornata destillatione prodiit aqua, cui oleum siccum, album, odoratissimum miræ suaveolentiæ & penetrantis saporis supernatabat, & ad drachmas sex minimum collectum fuit. Hoc resolutum in spiritu vini rectificatissimo elegantissimum liquorem cephalicum præstantissimi odoris & virtutis subministrabat. Ex radice recentis camphoræ simile oleum, quod camphoram & ipso odore & virtute æmulatur, destillari ex vesica posse mediante aqua *Hermannus in Collegio manuscripto in materiam medicam* notavit. Ita porro ex cortice radicis Cassiæ cinnamomeæ camphoram parari posse *Grimmius* docet in *Laboratorio Zeulónico*. Ex cortice vero radicis

F

arboris

arboris cinnamomiferæ oleum paratur liquidum, quod camphoræ & cinnamomi fragrantem odorem refert, & ex India ad nos transportatur, nullumque dubium est, quin ex aliis fragrantissimis corticibus, radicibus & gummatibus simile oleum siccum per destillationem haberi possit.

§. VI.

Quamvis vero camphora ad oleorum æthereorum classem perquam commode possit referri, quod ex antea adductis experimentis & rationibus satis superque adparet: nihilo minus talismodi sicca olea, ut camphora, præ pinguibus illis liquidis quasdam peculiare & sibi proprias facultates in sinu suo recondunt. Multum enim inter se ratione volatilitatis seu tenuitatis partium differunt, nam camphora non modo igne submisso, sed & sub moderate calido aëre tota in auras & quidem celeriter avolat & evaporat nullo vestigio remanente: contra vero destillata olea tardissime avolant, emittunt saltim tenuissimas sulphureas partes crassioribus & viscidioribus relictis, unde olea destillata vetusta crassescunt, adeo, ut terebinthinæ consistentiam accedant. Quapropter etiam camphora, ne avolet, longe exactiori custodia & conservationis cura in vasis muniri debet, quam ipsa olea destillata, quorum evaporation non tam prompta & expedita est, sicuti camphoræ. Hanc ob causam Pharmacopœi perperam suis rebus consulunt, quod camphoram citra exquisitam clausuram libero sic aëri committant, falsa traditione & opinione occæcati, quod adpersio seminis lini ejus evaporationem impediat, cum tamen parum vel prorsus nihil huic scopo inserviat.

§. VII.

Ex hoc igitur adparet, longe majori partium sulphurearum inflammabiliumque tenuitate & exiguitate camphoram præ aliis oleis destillatis pollere, utpote quæ viscido quasi quodam & ramoso involucro excipiuntur & custodiuntur, quo camphora summe volatilis ac tenera caret. Hæc summa partium sulphurearum tenuitas à viscido pingui involucro liberata efficit quoque, ut camphoræ virtus ab olei cujusdam destillati viribus longe multumque distet ac differat; nam utut camphora tota inflammabilis sit, nihilo minus tamen in corpore nostro calorem haudquaquam efficit, adeo, ut potius intensiorem corporis fervorem sistat, quo circa etiam à veteribus non calida, sed frigida habita fuit. Etenim viscidiores & secundum *Cartesii* doctrinam ramosæ olei destillati partes sulphur tenuissimum & inflammabile in carcere quasi irretitum & conclusum habent, ut minus promte per poros corporis evolare possit, sed diutius in corpore maneat, unde etiam intensiorem intestinum sanguinis partium motum melius sustinet atque tuetur. Quæ de causa omnia olea destillata, gummata quoque, quæ insignem olei quantitatem custodiunt, ut sunt gummi ammoniacum, myrrha, balsamum Peruvianum, sagapenum, galbanum, quæ sanguinis & humorum massam atque universum corpus mire exagitant, magnumque æstum atque fervorem accendunt, siquidem particulae sulphureæ, æthereæ, quæ omnis intestinæ calidæ agitationis causa sunt, anfractuoso, viscido & gummoso contextu involutæ per majus temporis intervallum remanent, neque tam facile ab involucro hoc se possunt emancipare, quare effectus diutius persistit ac durat: aut secus sit in camphora, cujus partes per poros citissime avolant, hinc etiam una guttula olei cinnamomi plus calefacit, quam decem grana camphoræ. Quod vero viscosa, pinguis & ramosa olei substantia volatilitatem impediat vel ex eo liquidissime patet, quod camphora in oleo amygdalarum dulcium expresso vel in oleo de cedro aut lavendulæ soluta, sub liberiori quoque

aëris accessu non facile in auras abeat, sed sub tegmine hoc oleoso diutius ejus substantia contineatur. Et hæc forte fuit ratio, quare veteres semen lini cum valde oleosum camphoræ adjici curarunt, quo minus ejus volatiles partes in aërem secedant, quanquam hic effectus longe felicius obtineri possit, si modo camphoræ superficies oleo amygdalarum dulcium inungatur, quod ad tutelam partium subtilissimarum plus, quam talismodi semen adjectum efficere poterit.

§. VIII.

Quod vero camphora volatilis, tenuissimi & inflammabilis sulphuris copia imbuta sit, vel unice ex sequenti, eoque perpulchro experimento clarissime evincitur. Nostri enim temporibus ex urina fermentata debita encheiresi in Anglia præsertim paratus phosphorus est celebratissimus, qui levi attritu lucidissimum sine flamma ignem spargit, cujus causa ab acutioribus physicis in partium sulphurearum motu intestino, celerrimo, verticillari non incongrue constituta videtur. Hic lucidissimus ignis non melius, quam beneficio camphoræ multiplicatur ac propagatur. Sumitur nimirum granum unum phosphori & grana decem camphoræ adduntur: hæc invicem in mortario probe prius contusa miscentur, quo facto tota camphora fit lucidissima, quæ, si solvitur in oleo caryophyllorum, liquidus fit phosphorus, quo sine noxa & metu inflammationis, caro, cutis, crines, & vestes inungi possunt, quod elegantissimum de nocte præbet spectaculum. Hujus vero lucis phosphori per camphoram propagationis nulla alia subest ratio, quam quod camphora propter summam partium sulphurearum tenuitatem ad intestinum lucidum motum producendum sit aptissima. Id autem minus experiri licet in aliis oleis destillatis, si cum solo phosphoro misceantur. Atque adeo ex hoc etiam experimento peculiaris & extrema camphoræ proprietas ab aliis oleis destillatis distincta elucescit.

§. IX.

Hæc igitur partium sulphurearum tam incomparabilis tenuitas in camphora efficit, ut ejus quoque usus sit singularissimus, neque aliis oleis destillatis proprius. Ita camphora in universa rerum natura nullum datur excellentius & magis discutiens remedium. Omnes enim humores in tubulis & poris stagnantes promptissime dissolvit, partim poros obstructos aperiendo, partim etiam fibras relaxatas animando, ut vel exhalent particulae subsistentes, vel in motum ac circulum redigantur. Quæ de causa in omni dolore, si ve iste in pericranio, si ve perioestio persistat; spiritu vini camphorato nihil excellentius est. In omni præterea tumore abigendo, à quacunque etiam causa subortus fuerit, idem spiritus mirabiles fovet vires, namque tonum fibrarum roborando humorum cursum atque iter promovet. Denique in omni inflammationum genere, imo in ipsa gangræna convenientissimum est remedium, non modo enim præservat ab his sævissimis malis, sed etiam, si eorum cohibitioni locus superest, nihil hisce casibus ipsa camphora exterius applicata est præsentius, sicuti id solertiores Medici & Chirurghi longo usu atque experientia compertum exploratumque habent. Ejusmodi vero efficacia roborans & discutiens in dolorum & inflammationum atrociam à nullo destillato oleo vel alia inflammabili substantia in rerum natura expectari vel obtineri poterit. Tametsi vero magna quoque oleis quibusdam destillatis æthereis, si debite fuerint soluta, & roborandi partium tonum & fibrillarum exorbitantes motus sedandi virtus insit, ut non sine fructu adhiberi possint: nihilo minus in inflammationum vi compescenda inque partis inflammatae ardore extinguendo

camphoratus spiritus ceteris multis parasangis præcedit.

§. X.

Utut vero à nullo facile medicorum ejus summa & mirabilis virtus ab usu externo negari possit : nihilo minus plures medicorum extiterunt, & adhuc sunt, qui ejus internum usum admodum reformidant, & damno atque exitio facile esse posse sibi persuasum habent, hinc veteres ea rarissime & parca admodum dosi in medicamentis & formulis suis uti consueverunt, nullam aliam forsan ob rationem, quam quod eam credebant calidissimam, quæ intensam sanguinis ebullitionem efficiendo æstum atque delirium accendat. Alii contra eam valde frigidam rati venerem ipsam extinguere credebant, cum tamen effectus ille, qui frigiditati adscribitur, cum intenso calore, qui ab aliis camphoræ adsignatur, minime conveniat. Quidam nimis vaporosam & caput & cerebrum exhalationibus opplent eam habuerunt, unde affectibus, qui à cerebri nervorumque vitio originem ducunt, eam minus conducibilem medicinam judicarunt. Sed quod omnis hic metus inanis atque frustraneus sit, quo boni illi de cetero ac eximii viri laborarunt, & quod camphora non infœcra, sed optima medicina sit, tum ratione & experientia, cum etiam auctoritate, quæ fulcimenta nostræ artis sunt, solide demonstrabimus.

§. XI.

Quum vero securum camphoræ usum internum dicamus, primo omniam hoc vocabulum, ne offensio- nis lapis fiat, dilucida expositione enucleandum est. Sensu itaque medico securum illud audit, quod naturæ humanæ conveniens est, neque in copiosiori dosi datum, facile motus aut turbas in corpore excitat & periculum gignit. Infecurum autem adpellatur, quod valenti agendi principio instructum in minori & proportionata dosi efficaciam exerit, in majori vero commotiones vehementes & excretiones enormes suscitatur. Ex his dictis tamen minime sequitur: (quod etiam tyrocinia medicinæ edoctus capere potest) secura non posse nocere, quod per abusum illorum utique solet contingere, quemadmodum etiam de infecurorum utilitate non penitus desperandum, siquidem quando recte, prudenter & tempestive adhibeantur, magna eorum vis & efficacia in persanandis morbis proditur. Juvat tamen hanc distinctionem medicamentorum in praxi tueri eam ob rationem, ut quivis prudentior medicus intelligat, abusum medicamentorum infecuriorum & fortiorum plus periculi gignere, quam si quis benignis securisque abutatur; majori itaque cautione ac circumspeditione esse hæc adhibenda, facile nullus ibit inficias. Jam vero camphoram majori in dosi exhibitam plures æstimant infecuriorem, adeoque periculi minus expertem. Crato minus æquus camphoræ censor est, & fere ablegat eam in morbis ob dolores capitis, quos concitare putat, hinc robore maxime valentibus subjectis vix tria grana præscribere ausus fuit. Sed præcipuus auctor hujus præjudicii mihi videtur Medicus alias & Chymicus magni nominis *Daniel Ludovici in Pharmacia*, quem postea multi Professores, Doctores & horum discipuli non pauci usque huc pressopede sunt secuti. Hic in *Pharmacia hodierno seculo adplicanda Dissertat. I. de Diaphoreticis vegetabilibus* camphoram calidissimam resinam dicit, eamque volatilioribus, calidioribus ac vaporosis medicamentis accenset. Dicit porro de ejus operandi ratione, quod producat angustias, solutiones virium funestas, frustraneas ebullitiones, intensioris æstus & insurgentis naturæ confusiones & id genus alia. In eruditissimis, qui debiliore capitis sunt, itemque in delicatioribus foeminis cephalalgias incompossibiles atque deli-

ria sæpe lethalia in febribus continuis, præsertim in earum statu, secundum ipsius sententiam excitat. Cum igitur tali modo inter calidiora remedia camphoram reponat citra manifestam sufficientemque rationem, hinc multis eam exilioris virtutis medicamentis postponit. At vero (pace hujus viri dixerim) camphora minime est medicamentum calidissimum & noxium, quin potius prudenter, debito tempore & conveniente dosi exhibitum recensita symptomata febrium feliciter tollit & protinus aufert; siquidem camphora ad scrupulum unum vel etiam ad drachmam dimidiam in spiritu vini dissoluta & sano homini exhibita cum sufficienti vehiculo, quemadmodum experimentum multoties fecimus, corpori neque intentiorem æstum aut calorem infert, neque pulsus adaugere, sed potius manifestum refrigerium præsertim circa præcordia præstat. Multo minus vero appetitum extinguit, sitim movet, aut urinam coloratiorem reddit, quod tamen omnibus nimis calidis proprium est, hinc ad unciam spiritus vini ingestus vel unicus haustus vini generosi plus caloris corpori, quam duæ drachmæ camphoræ inferunt. Quod si ergo ejusmodi symptomata à camphoratis remediis forsan concitata fuerint, tunc sane illum effectum magis calidioribus essentiis atque elixiriis, quibus camphora adjecta fuit, quam ipsi camphoræ adscribendum jure censendum est. Camphora certe propter partium tenuitatem, qua pollet, cito è corpore avolat & intime poros subiens eosque obsidens animando fibras inertes & relaxatas, non modo expeditiorem sanguinis & humorum cursum facit, sed & transpirationem valide adjuvat, tubulos obstructos aperit & peregrinas atque naturæ inimicas partes expellit. Quod autem usum internum camphoræ nonnulli reformident, eo quod venerem sopiat atque extinguat, id minime experientia est consentaneum. Novimus potius camphoram naturam roborando cupiditatem coeundi concitasse. Et notatu digna sunt, quæ clarissimus *Pauli in Obs. 235. M. N. C. Dec. I. A. VI. & VII. est*, inquit, *in vicinia juvenis vegetus & sanus, cui meo jussu in omni fere cibo ac potu camphora per aliquot septimanas à matre data fuit, ipse tamen minime recessit ab indole sua puel- larum amantissima.*

§. XII.

Nos sumus ea in sententia, quod in universa rerum natura ad submovendam de corpore malignitatem, cujus naturam in penetranti putredine tam solidarum, quam liquidarum partium reponimus, vix ullum simplex camphora detur præsentius atque potentius: hinc & jure suo alexipharmacorum princeps dici meretur. Deinceps ad contagii sive maligni miasmatis morbifici vim infringendam, idemque mox ab initio de corpore propulsandum summum camphora est remedium. Morbi enim, qui contagio natales suos debent, ex putrido quodam vapore seu halitu in interiora corporis suscepto fiunt, qui cum salivali latice in ore mixtus ad ventriculi & intestinorum sinum descendens humores ibi stagnantes, ut sunt biliosi & salivales ad fermentationem subeundam faciles, penitus corrumpit, ipsisque putredinem inducit, quæ postea fluidum corporis nostri tenuissimum, quod maxime in membranis, nervis & fibris habitat, contaminat, unde solidorum vis motrix, tonus & robur perit, quod summa virium convulsio denotat, atque sic humores & sanguis tardius non modo circulantur, sed & ad sphacelofam corruptionem inclinant.

§. XIII.

Quicumque itaque malignos contagiosos corpore ar- cere vult morbos, is vel ipsum putridum miasma, vel quod ab ipso corruptum fuit, ex corporis nostri

sphæra propellere omni studio atque opera nitatur. Nihil vero ad hoc præstandum aptius est camphora, utpote quæ oleo penetrantissimo omnes corporis poros pervadit ipsasque fibras motrices, è quibus solida componuntur, citra augmentum caloris armat, quo fit, ut fluida corporis nostri promptiori cursu per omnes tubulos corporis ferantur, inde stases corruptivæ non modo impediuntur, sed & illud tenuè putridum sanguini admixtum per glandulas & poros subcutaneos velut congruum omnis excrementi spirituosum tenuis emunctorium expellitur. Unde etiam veteres ejus virtutem in peste & malignis mirabilem agnoverunt. Quam ob causam non modo *electuarius antipestilentiale Kogleri*, sed & *pulverem Pannonicum rubrum*, cujus virtus, quæ ab admixta camphora maxime dependet, in malignis expellendis febribus semper plurimi habita est, ingreditur. Habet quoque camphoram *mixtura simplex Paracelsi* & *famigeratissima Michaelis bezoardica tinctura*, de qua tamen illud monendum ducimus, quod, si commotio sanguinis ab ejus usu paulo concitator fiat, is effectus non tam camphoræ, quam potius aliis admixtis radicibus calidioribus & ingredientibus debeat adscribi. Quam potens camphora sit in sphacelo partium externarum quem profunda inflammatio minatur, avertendo remedium, vel medicæ artis & chirurgicæ elementa edoctis haud ignotum est. Quod si igitur tanta ejus laus est in sphacelo partium externarum avertendo, quidni etiam ejus usus internus ad interiorum sphacelationem viscerum præcavendam eadem ratione proficius sit? Quum vero ratio & ipsa experientia optima veritatum medicarum magistra aditipuletur, merito concludimus camphoram in omnibus malignis putridis morbis, inque ipsa etiam peste omnibus alexipharmacis esse præferendam.

§. XIV.

Huic nostræ sententiæ primo adstipulatur *Mindererus in Lib. de Peste Cap. XV.* dum, inquit, nostris laudibus insigniter deprædicanda venit camphora: non mirabile modo, verum etiam forte & efficax alexiterium est. Modum operandi ita explicat: *interno nostro calore mox ignita & in corporis quasi meditullio flagrans inquinatos spiritus, eosque tetros ac fædo miasmate pollutos aut inspiratos veneni tabe aliqua contaminatos halitus jam cordi vicinos ac circa præcordia hærentes, exurit, & sicco plane ac igneo calore pervadens partem expellit, partem combustionem absument, partem corrigit atque emendat, partem per sudorem pellit.* Neque *Johannes Crato in Epistolis medicinalibus à Schulzio editis pag. 103.* diversæ est sententiæ, sed potius hanc confirmat ita differens: *adversus pestem multa, quæ pro certissimis habentur, fallacia sunt, camphoram omnia remedia excellere re comperi.* Et idem Auctor loc. cit. sequentibus utitur in febribus malignis nempe; *pulvere ex bolo armenie drachma una, camphoræ scrupulo uno, ambre gryseæ granis tribus.* Subscribit huic etiam *Fernelius Lib. V. Methodi medendi Cap. 21.* ubi camphoram malignos calidos vapores extinguere statuit. *Zwingerus in Epistola ad Monavianum inter Schulzianas num. 246.* camphoram cum spiritu vini solutam in peste & malignis mirifice commendat. *Hartmannus vero in Pract. Chymiatr. pag. 364.* aqua antipestilentiali in peste 1629. grassante magno cum fructu usus est & edidit hac de re germanicum scriptum. *Descriptio vero hæc est: Rec. Spiritus vini optimi libram unam, camphoræ unciam unam, croci orientalis scrupulum unum, solvantur & spiritus vini fit aurei coloris, qui ad cochlearia aliquot dandus est.* Hujus spiritus largiorem dosin suadet *Screta in Tract. de febr. pestilent. pag. 296.*

cumprimis instante crisi in malignis & quod miraculum præstiterit adfirmat. Vidimus quoque ex *manuscriptis Beati Wepferi*, illum in malignis ad drachmam semis pro dosi dedisse summo cum fructu. Nullus vero facile fuit, qui majori dosi feliciter illa in malignis & petechialibus febribus usus fuerit ipso *Riverio.*

§. XV.

Neque alienum erit hoc loco notabilia circa ejus usum ex *Observat. & Histor. Riverii* recensere. *Cent. I. Obs. 24.* hunc casum insinuat: *juvenis sedecim annorum, febre maligna laborans, maculis violaceis conspersus cum delirio & alvi fluxu, sumpsit camphoræ grana duodecim cum pulveris sudoriferi scrupulis duobus; copiose sudavit, delirium cessavit, alvi fluxus imminutus est, & optime se habuit.* Et porro *Cent. I. Obs. 29.* hunc casum adfert: *Juvenis febre maligna cum exanthematibus laborans die nona moribundus viscebatur. Dedit pulveris diaphoretici scrupulos duos, camphoræ grana duodecim cum aqua cardui benedicti, & lectus in lecto mansit per duas horas, non sudavit, vesperi eadem portio fuit iterata & copiose sudavit, multo melius habuit & convaleuit.* Denique *Cent. II. Obs. 18.* hic casus proponitur: *Vir quadraginta annorum febre maligna cum maculis lividis, hæmorrhagia, pulsu parvo & frequenti laboravit, præscriptus fuit hic pulvis. Rec. Salis prunellæ unciam semis, camphoræ semi drachmam, misce, divide in quatuor doses, quarum unam accepit singulis tribus horis, mane multo melius habuit, jussit iterari pulverem & eodem die à præsentaneo vitæ periculo liberatus est, ac paucis postea diebus convaleuit.* Et *Obs. 62. Cent. II.* hic casus legitur: *Juvenis viginti quatuor annorum febre maligna laboravit cum delirio, & circa undecimum diem motus tremuli & convulsivi nervorum visi sunt, administrata fuit venæ sectio in fronte & dati fuerunt pulveres ex bezoardico minerali ad scrupulos duos, camphoræ granis duodecim cum aqua cardui benedicti ad uncias duas & evasit.* Et *Cent. II. Obs. 64.* hunc nobiscum communicat casum: *Mulier quinquaginta annorum febre maligna cum maculis latis violaceis laborans octavo die potionem diaphoreticam supra laudatam sumpsit & addita est ventri & pectori cum spongiis, pulsus inde factus est validior ac magis ordinatus & die undecimo parotis apparuit, quæ in suppurationem transit & convaleuit.* Et *Cent. II. Obs. 73.* idem sequenti confirmat observatione: *filia viginti annorum febre laborans maligna, accessit circa undecimum diem delirium cum contractione nervorum in carpis manuum & lipothymia, ordinatum fuit julapium ex aqua cardui benedicti uncias tribus, aquæ theriacalis drachmis tribus, bezoardic. mineralis scrupulis duobus, camphoræ granis sex, qui julepi per biduum usurpati fuerunt, mane & sero, hoc remedio intra paucos dies convaleuit.*

§. XVI.

Ex his adductis jam liquidissimum est, camphoram in malignis præsertim eo tempore, ubi corpus critico motu in eo, quod ipsi inimicum ac perniciosum est, expellendo occupatur, salutarem opem adferre, nullumque dubium est, quin laudatissima nostra camphora adversus pestem tantopere commendatis omnibus remediis, modo debito tempore, quod caput praxeos medicæ est, exhibeatur, sit superior. Quam eximia laus oleo sic dicto pestilentiali *Heinssii*, cujus balis camphora est, constiterit, obscurum esse nequit. Huic viro statuam Romæ ob praxin feliciter in peste gestam erectam fuisse communis est Doctorum traditio. Atque secundum nostram sententiam, si ulla

medicina præsertim camphora multum in peste præstare potest, modo non præposere, sed recte & ordine habita circumstantiarum & temporis ratione ipsa utamur. Neque enim incognitum est, præsentissimam adversus quendam morbum medicinam minus recte & inconvenienti tempore datam maximum nocumentum adferre, sicuti id clarissime in exhibitione chinæ chinæ ad curandas intermittentes animadvertimus. Inter fortissima alexiteria à viris doctis atque eximiis medicis camphora numeratur, quia putredini mirifice resistit, sed quod non semper expectationi & spei conceptæ effectus respondeat, hoc non remedio tanquam clavæ Herculis, sed medico, qui Herculis clavam tractare ignorat, adscribendum esse jure meritoque censemus. Nos hujus sumus sententiæ, delinqui maxime in eo, quod camphoram in peste in exili admodum dosi præscribant & majorem reformident. Deinde, quod calidioribus elixiriis & essentiis oleosis ipsam admisceant. Tum quod non convenienti tempore eam exhibeant. Nos sub invasione vel prima accessione mali neque minus circa criticum tempus ejus usum convenientissimum judicamus, præsertim si cum acidis ceu vehiculis administretur. Hunc in finem in pestilentialibus febribus sequentem mixturam etiam atque etiam commendamus: sumatur nempe aquæ acetosæ & cardui benedicti ana uncia una, bezoardici mineralis drachma semis, camphoræ grana sex, syrupi acetositatis citri uncia semis, detur pro una dosi.

§. XVI.

Præterea visitur adhuc in camphora alia nobilis virtus putredinem & malignitatem lentam quidem, sed admodum perniciosam ex corporis nostri sphaera propulsandi: talis est, quæ ab impuro coitu lymphæ succis vitalibus, & postea solidis partibus ossibus quoque affricatur. Exiguum quidem, sed potentissimum omnium venenorum more est illud elementum, quod & virulentam gonorrhœam & luem sic dictam veneream ejusque atrocissima symptomata suscitât, intima corruptione & putrefactione succos præsertim lymphaticos contaminando. Præcipuum igitur curationis momentum etiam in eo consistit, ut putridum exterius susceptum miasma prima quasi in herba suffocemus, illudque citius è corpore expellamus, neque minus id, quod putridum & corruptum fuit, à vitalibus succis separemus. Huic vero scopo obtinendo diu jam dudum ex omnibus naturæ regnis remedia quæsitâ & excogitata fuerunt, num vero camphora præsentius & excellentius adhuc fuerit repertum, ipse usus atque experientia addocet.

§. XVII.

Profecto summa in camphora ad gonorrhœam etiam veterem, item luem veneream extirpandam medicina recondita est, qua omnes mercuriales salivationes liquorumque decocta balneaque laconica omniaque alia sunt inferiora. Neque ita pridem à medico, cui fides indubia habenda est, nobis relatum est, quod præmissio conveniente alvum ductorio remedio sola camphora soluta in axungia viperarum ad diram hanc luem persanandam suffecerit, id quod plurimis experimentis & exemplis edoctus assevero. Crediderim tamen mercurio fixato nostræ præparationis, qui sola diaphoresi agit, camphoram decenti dosi adsociatam in tollenda luis hujus atrociam majores adhuc præstare effectus. Hoc certa experientiæ fide possumus asseverare, quod in gonorrhœa curanda inque luis venereæ principio nihil præsentius camphora deprehenderimus, quare etiam non sine ratione essentiis & elixiriis contra gonorrhœam balsamicis, quæ ex opobalsamo, balsamo de Capaiba, balsamo de Peru, balsamo de Mecha, resina ligni aloës, gummi Guajaco cum spiritu vini tartarificato præparan-

Frid. Hoffmanni Oper. Tom. VI.

tur, camphora adjicitur, utpote quæ mirifice horum virtutem acuit atque incendit, inque roborando glandularum tono & stasibus corruptivis abigendis mirabilem efficaciam exserit.

§. XVIII.

Deinde camphora non datur excellentius remedium contra internas inflammationes, quæ sphacelum & interitum, si graviores sunt, inque membranosis partibus maxime consistunt, minantur & maximum alunt periculum. Felicissimo vero connubio tunc conjungitur cum nitro, nam solam camphoram in inflammationibus, quibus maximus æstus junctus est, non facile suaderem. Etenim, ubi magnus fervor urget, spasmus plerumque constrictæ sunt fibrillæ, & pori cutis clausi ac coarctati: his apertis & spasmus sedato mox sudor apparuit. Quum vero id felicissime exsequatur ipsum nitrum, quod quoque mirum refrigerat & hoc modo efficit, ut camphora felicius & obstructionsolvere & materiam vitiosam in partibus inflammatis stagnantem discutere possit, metus enim est, ne poris arcte clausis & cute aridissima existente camphora interne quidem multum commoveat, sed parum vel nihil prorsus promoveat. Quare in febribus continuis, quæ fere omnes aliquid inflammatorii habent, itemque etiam in inflammationum generibus ceteris, in pleuritide, phrenitide, angina, inflammatione uteri magno cum fructu semper in praxi usus sum camphora cum nitro mixta, adjecto pulvere bezoardico, ubi mox ab eorum assumptione ratione æstus, delirii, sitis, & vigiliæ ingens allevamentum secutum est. Tales quoque nitrosos & camphoratos pulveres acutus pariter ac prudens *Belgii Medicus Cran* in frequentissimo habuit usu, ut ex ejus *Praxi Medicinæ reformata* adparet. Ita in phrenitide & mania hunc pulverem laudat: Rec. lapidis prunellæ grana quindecim, camphoræ grana quatuor vel quinque, laudani opiatum semi granum, misceatur & fiat pulvis. *Ab hoc pulvere*, scribit pag. 132. loc. cit. *miras aliquando vidi operationes in phrenitide & mania ita, ut ægri ipsi mutationem admirarentur.* In pleuritide & peripneumonia camphoram cum spiritu nitri vel etiam ipso nitro & aqua papaveris rheados mire quoque commendat. *conf. pag. 197.* & in renum inflammatione lapidem prunellæ ad grana duodecim cum camphoræ granis quatuor miscet & præscribit. *conf. pag. 207.* & in febre continua pro siti sedanda grana tria camphoræ pulveribus addenda esse suadet, & talem pulverem in febre pestilentiali cum bezoardico minerali quoque commendat.

§. XIX.

Denique camphora in hæmorrhagiis valde periculosis & enormibus, præsertim, quando febribus malignis junguntur, miras præstat vires. Hac de re elegantem locum habet *Raygerus in Observationibus medicinalibus obs. 20.* ubi ita scribit: *Nihil frequentius apud nos est in variolis, morbillis, & febribus petechialibus, quin & ipsa præterita anno 1679. peste, quam hæmorrhagia narium quandoque ab initio, quandoque in statu morbi superveniens & quoniam rarius critica, semper, imo sæpius symptomatice morbum non solvit, sed potius exanthematum eruptionem impedit, spiritusque dissipat, agrumque debilitat, hinc omnibus modis sistenda, vix autem melius & magis adpropriatum inveniri potest, quam sperniola Crollii, cujus miram efficaciam semper tuto & optime sum expertus.* Et confirmat hanc adsertionem observationibus anni 1685. *In hyeme puella duodecim annorum petechiis laborans corripitur hæmorrhagia narium, quam cum domesticis remediis reprimere non potuissent, & tota nocte sensim ita stilasset sanguis, mane vocatus ego, obstupui conspecta quantitate sanguinis,*

nunc cum gossypio pulverem ex colcothare vitrioli, sanguine Draconis & terra sigillata consperso obturavi nares, & exhibui sperniolam ad scrupulum unum & post tres horas rursus, & tertia vice reiteravi, sic sanguis non modo subleuit, verum & petechiæ jam disparentes erupere sensimque puella convaleuit & adhuc vivit. Et porro anno præcedenti vocatus sum ad scæminam, in quartum diem febre acuta maligna detentam, mane insuper abortum passam, huic circa vesperam hæmorrhagia enormis supervenit, ut usque ad nonam noctis plus quam duæ libræ sanguinis effluerint, cum valde debilis esset, exhibui statim sperniolæ scrupulum unum cum aliquot granis coralliorum præparatorum, at nares obturavi gossypio atramento scriptorio imbuto, ita effecit, ut intra breve tempus sisteretur. Jussi, ut singulis tribus horis pulvis reiteretur, sic hæmorrhagia totaliter emansa & illa convenienter tractata convaleuit.

§. XX.

Nec in hæmorrhagia narium solum, verum & in hæmoptysi optimum ejus successum idem Auctor expertus est. Componitur vero hoc medicamentum ex myrrha electa, thure, sumendo uniuscujusque unciam unam, croci grana quindecim, camphoræ drachmam unam & dimidiam, qui pulvis aqua spermatis ranarum vigesies vel trigesies irroretur: ita tamen, ut semper prius sponte exsiccet. Confectio de hyacintho ejusque species laudantur etiam in nimis hæmorrhagiis, in malignis morbis & aliis, utut compositio ex pretiosis adeo lapidibus conflata curiosa videatur, quicquid tamen præstat potissimum camphoræ intermixtioni adscribendum. *Heurnius* ad omnem sanguinis fluxum maximo cum successu semper propinavit sequentem pulverem in notis ad aphorism. *Hippocr.* Rec. seminis papaveris albi, hyoscyami albi cujusque drachmam, hæmat. corallia rubra cujusque semidrachmam, camphoræ scrupulum semis: sumat mane & vesperi semidrachmam. *Craen in Praxi reformata* in narium hæmorrhagia sequentem pulverem maxime commendat. Rec. lapidis prunellæ scrupulum unum, camphoræ grana tria usque ad quinque, laudani opiatum granum unum. item Rec. boli Armeniæ, terræ sigillatæ, cujusque grana quindecim, camphoræ grana quatuor. Camphora vero cum nitro in omnibus hæmorrhagiis magnæ est efficaciam, eam maxime ob rationem, quod graves hæmorrhagias, si à causis internis proficiantur nempe à viscerum & mesenterii spasmodis & constrictionibus, tanquam egregium antispasmodicum cohibeat.

§. XXI.

Præterea camphora in discutiendis flatibus, qui hypochondriaca, hysterica & colica passione correptos sævissimis sæpe symptomatibus torquent, mirabilem præstat opem. Dicitur vix potest, & quotidiana id docet observatio, quantam truculentiam in ventriculo & intestinis detenti atque incarcerati exercent; nimia enim tunicarum sensibilibus expansione & distractione maximas angustias, anxietates, spasticas nervosarum partium constrictiones, quas excretiones suppressæ, & extremorum frigora insequuntur, non sine ingentis periculi & mortis metu concitant. Nihil hic opportunius est, quam ut penetranti medicina tonum ventriculi atque intestinorum dejectum, qui plerumque flatuum causa est, restauremus, quo vividiori reddito, non modo flatuum, sed & humorum aliorum excrementorum ibi hærentium copia feliciter foras eliminatur. An vero quid præstantius ad hunc scopum obtinendum ipsa camphora cum nitro mixta inveniri possit, est quod merito addubitemus; sicuti enim nitrum cum camphora in pluribus casibus felicissimum init conjugium: ita maxime id fit, ubi carminativam vim exercere debet,

quia solum nitrum relaxando spasmos & biliosam acrimoniam partiumque calidam intemperiem temperando in vehementibus colicorum tormentis miracula præstat, multo magis vero, si felici copula jungatur camphora. Meretur vero hoc medicamentum longe majorem laudem atque palmam, quam aliud ullum ex calidioribus præsertim concinnatum carminativum, eam ob causam, quod citra interni fervoris augmentum operetur, quæ virtus aliis calidioribus in flatibus discutiendis negata est. Varia vero forma ac modo in talismodi casibus camphora poterit exhiberi, vel enim in liquidam aut solidam formam redigi poterit, si illam desideras, sequens formula selectissima laudem mereatur: Rec. tincturæ tartari, essentia corticum aurantium recentium, spiritus nitri dulcis cujusque drachmas duas, camphoræ grana decem, misceantur, dosis sunt guttæ quinquaginta vel sexaginta, singulis duabus horis. Si vero spasmi truculentiores urgeant, tunc castorina possunt admisceri nempe essentia vel extractum ejus. Pulverem si expetas, ille sequenti modo concinnari potest: Rec. lapidum cancrorum, antimonii diaphoretici, nitri purificati cujusque drachmam unam, camphoræ grana decem, olei chamomillæ vulgaris non adulterati vel olei millefolii guttas sex, misceantur, fiat pulvis, dosis est drachma semis. Hæc duo magnarum virium sunt remedia, quæ in hysteriis compescendis pathematibus omnes fere numeros absolvunt. Etenim hæc ipsa præter virtutem roborantem & flatus discutiendam simul sedativam & anodynam habent, quæ in ejusmodi casibus desideratissima est.

§. XXII.

Est præterea camphoræ alia adhuc laudatissima virtus atque efficacia infusa, sanguinis nimirum excretiones consuetas & naturæ solennes promovendi. Haud ignotum in foro medico est, quam gravia symptomata suppressas vel deficientes ordinarias sanguinis periodicas in plethoricis præsertim scæminis evacuationes sequantur, cum nihil certius, præsentius & celerius flatum sanum in deterius commutare his ipsis possit. Neque vero tam facilis res est medico, opportuna medicina in ordinem talismodi salubres excretiones restituendi. Fateor vero ex omnibus tantopere ad id perficiendum laudatis remediis, nihil camphora esse excellentius, præsertim, si cum balsamicis & antispasmodicis specificis, quorum virtutem non parum accendit & augget, misceatur. Nostri moris est, hac uti mixtura: Rec. essentia myrrhæ electæ, succini cujusque drachmam semis. Essentia croci, castorei cujusque drachmas duas, camphoræ drachmam semis, quæ mixtura præmissa venæ sectione atque alvi ductione circa instans mensium tempus frequentius usurpata eximio usui erit. Observavimus scilicet à frequenti & continuato camphoræ usu sanguinem antea crassum longe tenuiorem & fluidiorem redditum fuisse. Observavimus quoque homines obesos & sero turgidos quodammodo macilentiores factos fuisse evidenti argumento: hanc medicinam egregie humores crassos & stagnantes attenuandi & dissolvendi virtute gaudere.

§. XXIII.


Est denique usus camphoræ singularis atque eximius in morbis, qui vesicam infestant, quales sunt dysuria, stranguria, qui ut plurimum vel à vesicæ calculo vel à viscida tartarea in ejus cavitate stagnante saburra, vel à seminali lymphâ corrupta & acri facta nunquam non proveniunt. Etenim à læsione substantiæ vesicæ putridus quidam corruptus fit humor, qui urinam præcipitat, ipsamque putridam efficit, quæ postea eximio sensu præditam urethram membranofam lacinat atque dolore adfligit. Ad putridam igitur in vesica & urethra stagnantem materiam submovendam fortiori quodam

quodam roborante & stimulante opus est. *Johann. Græneveld* Anglus Medicus *tractatum* edidit Londini anno 1703. *de tuto cantharidum in medicina usu interno*, qui in vesicæ vitiis, in ejus calculo, in gonorrhœa quoque virulenta cantharidum pulverem cum aliquot granis camphoræ mixtum præscribit, ejusque insignem utilitatem non satis dilaudare potest. Cantharides solæ & sibi relictæ ob sal, quo pollent, tenuæ, penetrans causticum validissime vesicæ partes nervo-membranosas stimulant, & impactum viscidum, acrem humorem excutiant, quia vero metus est, ne inflammationem vel vasorum apertionem efficiat, camphora adjicitur, quæ causticæ vehementiæ non modo optima correctrix est, sed & stases inflammatorias impediendo facit, quominus periculosa inflammatio subsequatur. Etenim camphora non tantum vehementiorum diureticorum, quæ erodente sale prædita sunt, vehementiam mitigat atque cassigat, sed & valetioribus acribus, purgantibus, quæ simili caustico acri sale agunt ceu summum correctorium quam opportune admiscetur, utpote omnia cathartica, si pauxillum camphoræ ipsis adjicitur, longe mitiorem naturam ac facultatem induunt.

§. XXIV.

Hiscæ jam diductis ac demonstratis, quod camphora sit securissima medicina, reliquum jam est, ut de ejus utendi ratione monita breviter adjiciamus. Quemadmodum vero nullum optimum etiam medicamentum semper juvat, quin potius improvide & intempestive datum nocet, ita etiam nulla hac in re camphora gaudet prærogativa. Nam & ratio dicitur & experientia confirmat, quandoque oriri ab ejus im-

provido usu anxietates circa præcordia, cephalalgias augeri, appetitum destrui. Fit hoc maxime in iis, qui infirmioris sunt naturæ & facile à levi mutatione læduntur. Accidit quoque in iis, qui capitis & cerebri vasa sanguine & humoribus repleta habent seu ubi inæqualis humorum circuitus est, & cum impetu sanguis forsan propter membranarum & vasorum atoniam ad caput ruit, quod ex facie tumida & rubicunda, dolore capitis gravativo, vertigine, torpore, somnolentia adparet. Quo casu utique omnia volatilia & vaporosa spirituosa præsertim in majori dosi exhibita nocent. Quare etiam paralyticis, epilepticis & convulsionibus diris afflictis cum cautione & parca manu sunt concedenda. Neque minus congrua præsertim in excessiva dosi sunt plethoricis & repletis corporibus, utpote motum intestinum, in humoribus, quorum liberior cursus ac iter impeditur, efficiunt & ut dici solet, movent, sed non promovent, hinc anxietates & inquietudines vel producant vel augent. Neque in alvi adstrictione utilia sunt, quia fibras intestinales siccando nimium efficiunt, quo alvus tardior descendat. Denique in omnibus acutis, ubi omnia interius fervent & ardent, humidumque deficit, cutis sicca & torrida est & omnia constricta sunt, ea remedia, quæ motum intestinum augent interius, nequaquam locum inveniunt. Præstat etiam tali in casu lenissime agere & naturæ potius frenum, quam stimulum injicere: nam in acutis nihil præcipitandum est, sed omnia moderate ac tempestive sunt agenda. Quapropter in horum morborum augmento vel statu cautissime procedendum est. Tutius in principio vel instante crisi, si natura eget stimulo, vel sub declinatione, locum habent.



D E

VESICANTIUM ET FONTICULORUM CIRCUMSPECTO IN MEDICINA USU.

§. I.

1. **D**Uplex est, quod explicandum in præsentis suscipimus, dissertationis argumentum; unum quod vesicantium, alterum quod fonticulorum usum medicum monstrat. Ideo maxime ambo hæc remedia conjungenda existimamus, quia conveniunt in eo, quod externam requirant adplicationem. De utroque tamen seorsim agemus, incipientes à vesicatoriis.

2. Totum hominem morbum esse, vetus quidem & vera est parœmia, nec ulla in corpore humano pars, quæ non multifariis vitiis ac morbis pateat: sed tam immensa quoque summi Numinis benignitas, ut tota natura sit medica, nec quicquam fere in tota rerum universitate, ipso veneno, aut vilissima fere quacunque re non excepta, quod medicinali non gaudeat virtute. Testes jam producimus cantharides, abjectum insecti genus & muscas vere venenatas, singularis tamen & mirabilis plane in gravissimis etiam morbis, vesicatorio scopo perite usurpatas, utilitatis. De harum usu acris inter celeberrimi nominis medicos viguit contentio, aliis ipsas ob virulentam nervosas partes in vehementes præter naturam motus abripiemtem indolem, penitus è foro medico proscribentibus; aliis contra ipsarum usum in multis & valentibus morbis, reliquis omnibus incassum adhibitis, spectatissi-

mum & in magno pretio ceu secretum habendum, contententibus. Neminem certe in medica historia vel leviter versatum latet, quam acriter de hoc argumento elapso sæculo in Italia HERCULES SAXONIA & ALEXANDER MASSARIAS, illo utilitatem, hoc noxam defendente, publicis scriptis decertarint. Et qui practica Medicorum scripta lustrat, perspicit ultro, ex recentioribus BAGLIVUM minus favere vesicantibus, quæ à SEVERINO, SEPTALIO, HOLLE- RIO, mirifice commendantur. Longe magis adhuc in determinando specialiori cantharidum usu in diversum abeunt medentes, & quæ à quibusdam in continuis, malignis & exanthematicis febribus, ad materiæ virulentæ profectionem ad corporis corticem, quam maxime laudantur vesicatoria carpis manuum apposita, ab aliis penitus rejiciuntur & pro gravissimorum symptomatum, immo ipsius mortis causa, venditantur. Ne dicam, recentiores multos, post inventum sanguinis circulum, vesicatoriorum æque ac fonticulorum usum sterilem plane censere atque inutilem. Quod vero maxime mirandum, neminem ex omnibus his invenies, qui non rationes in demonstrationem afferat & ipsam experientiam demum confidenter in partes vocet, ut certe in difficili sit judicare, cui tandem assensus præbendus. Ut igitur veritas eruatur & quid cantharidibus tribuendum patefcat, exuto omni auctoritatis aut alio quocunque præ-

judicio, methodo rationali utendum, & ex plurimis observationibus ac morborum historiis in vesicantium effectus, vires & facultates inquirendum, ac postea indagando principia & modum, quibus ejusmodi remedia agunt in corpus, certis atque indubitatis rationibus, eorum usus salubris, vel insalubris evolvendus & adstruendus.

3. Agemus igitur de vesicatoriis, quorum virtutis quidem plura innotuerunt præsidia, ut euphorbium, flammula Jovis, ranunculus, succus esulæ variique generis insecta, potissimum tamen cantharides, Germanis *die Spanischen Fliegen*, sunt solenne illud instrumentum, quocum vesicatorius perficitur effectus. Quare missis aliis, has in præsentiarum maxime disquisitioni subiciemus, inquirendo primum in earundem indolem, modum & principium agendi. Jam autem de cantharidibus asserere non dubitamus, eam illarum esse indolem, ut inter formalia referri mereantur venena. Venenum enim illud merito nobis audit, quod exili mole corpus subiens, nervosas maxime partes subito & vehementer, tam interne, quam externe adurit, ac tenui penetranti suo principio, brevi tempore magnas mutationes easdemque perniciosas inducit.

4. Talem vero cantharidibus inesse venenatam facultatem, plura sunt quæ confirmant. Nimirum, is quem in corpore præstant effectus, testatum primo facit, ipsas virulentum quoddam causticæ indolis recondere elementum. Etenim DIOSCORIDES jam notavit, easdem interius sumtas renes & vesicam exulcerare, mictionem cruentam, pruritus in pudendis venerisque ciere stimulum. GALENUS *lib. IV. de med. simpl. facult. cap. 18.* monet: ne quis easdem degustare audeat, propter erosionem interimentem. AVICENNA *lib. II. tr. II. de virt. medic. singul. cap. 205.* ipsis acrem, acutam, putrefactivam & adurentem facultatem conceptis tribuit verbis. Quibus addenda merito singularis BARTHOLINI *Cent. III. hist. anat. 16.* observatio, de devorato ex errore vesicatorio, quo fauces corrosæ & cruciatus circa vesicam exquisiti fuerunt inducti. Inprimis BAGLIVUS *opp. pag. 647. seqq.* virulentam cantharidum naturam pluribus luculenter adstruxit experimentis, memorans: binos canes, injectis in apertam venam jugularem per syringam duabus tincturæ cantharidum cum aqua cardui benedicti factæ uncis, primum aquea & viscosa vomuisse, postea humi cecidisse, vehementissime sitiisse, alimenta respuisse ac demum convulsos periisse. Hinc etiam est, quod deleterius ipsarum effectus, nonnisi iisdem fortissimorum venenorum antidotis, lacte nempe & pinguibus, obtundi possit atque præscindi, ut quidem ex præcis jam PLINIUS, DIOSCORIDES ipseque CELSUS testantur.

5. Adhæc tenue admodum, subtile & maxime penetrantis indolis est id quod in cantharidibus delitescit elementum, ut vel extimæ corporis parti admotæ, prompte intima penetralia subeant ibidemque gravia multa inducant pathemata. Uberius hoc & quasi totidem argumentis omnia ab auctoribus de vesicantium noxa passim annotata exempla evincunt. Inde enim mictum cruentum cum vesicæ exulceratione productum TIMÆUS *lib. VII. cap. 20.* ZACUTUS LUSITANUS, *Medic. princip. hist. lib. II. hist. 117.* PASCHALIUS *meth. cur. morb. cap. 44.* BRASSAVOLA *comment. ad aph. 17. lib. I. perhibent.* Deinceps HILDANUS *cent. VI. Obs. 98. 99.* vesicatorium ex cantharidibus febres, dolores & urinæ ardores concitasse testatur. THONNERUS *lib. I. Obs. 20.* convulsiones epilepticas in febribus inde derivat. BAGLIVUS *cap. II. de incommodis ab usu vesicantium*, in iis qui graviter capite vulnerati, inde vomitum cum abolitione sensuum & vehementissimis convulsionibus, alios lethalius frigidis sudoribus perfusos, sequenti nocte con-

vulsione mortuos, annotavit. Idem etiam *l. c.* meminit, quendam torminibus spasmodicis cum febre moleste laborantem, post appositum vesicatorium multum sanguinis rubicundi per secessum excrevisse & paulo post periisse. Neque minus RIVERIUS *Cent. VIII. obs. 88.* cantharides externe applicatas gangrænam induxisse auctor est, quod etiam ROLFINKIO in extrema senectute obtigisse ipsumque è medio sustulisse constat.

6. Quod autem subtili hac & caustica cantharidum acrimonia exquisitæ sensationis partes nervoso-membraceæ afficiantur & ex parte corrodantur, vel in vehementes spasmodicos motus abripiantur, præter jam enumerata symptomata, ut ingentem ad urinam stimulum, vesicæ excoriationem, mictum cruentum, vomitum, intensam sitim, pulsum celeritatem; is de quo jam agimus vesicatorius ipsarum effectus, quem in pulvere, cum saliva aut fermento panis in pastam redactæ & applicatæ cum dolore exsequuntur, testatur. Subjectum enim hujus operationis non est extimum illud, tenue, sensus expers & ex multis squamulis emergentibus inter interstitia porulis conflatum corporis integumentum, sed substrata huic proxime suprema & corticalis quasi cutis, ex tenuissimis papillulis nerveis & fibris tendinosis, nec non innumeris vasculis, quæ fines sunt arteriolarum, & partim humorem nutritium, partim salinum excrementitium, qui vel sub vaporis forma in perspiratione insensibili modo exhalat, vel sudoris forma conspectius stillat, vehunt, conflata substantia. Ad hanc dum tenuissimæ salino-acres causticæ cantharidum moleculæ penetrant, obvias nerveas fibrillas vellicant, tubulos humore plenos stringunt partim, ut advectum liquorem largius effundant, partim tenuissima eorundem oscula corrodunt & exulcerant, ut non secus ac post ambustionem divulsis ac dissolutis iisdem, humor copiose exstillet. Qui quum ob copiam & crassitiem exiles cuticulæ porulos permeare nequeat, abscedente hac, subtus colligitur & collectus eandem in vesicam elevat.

7. Proprius quippe est hic agendi modus omnibus venenis, quæ penetrantissimæ indolis & tenuissimis particulis effectum exsequuntur, ut nervosas, in quibus adhuc sensus & motus viget, partes aggrediantur & per spasticas stricturas humorum congestiones, inflammationes, ac demum plane sphacelationes efficiant. Et hinc utique ratio petenda, quod vesicatoria ex cantharidibus nec tam crasso modo, ut actuale vel potentiale cauterium destruant & exedant cutaneam cum musculari substantiam, nec in cadavere, nec membris sensu destitutis, vesicantem exserant effectum, haud secus ac de arsenico albo, vitro antimoni & croco metallorum constat, quod vulnere, vel ulcere vivi corporis inspersa, insitam septicam vim efficaciter edant, in mortuo secus. Quare etiam attentiores practici non modo minus fausti eventus, sed & plane certum mortis signum esse perhibent, quando vesicatoria apposita, in morbis præsertim acutis, vesicas non excitant, sed effectum prorsus destituuntur, uti quidem inter alios auctor est FREIND *comment. de feb. pag. 142.*

8. Quum itaque cantharides in nervosas corporis partes agant, & salubris ipsarum effectus non tam ab illa lymphæ, quam eliciunt per vesicas copia, quam potius à stimulo, quem nerveis fibrillis ad motum auctiorem & excutiendam incumbentem, quæ in vitio est, materiam inferunt, dependeat; in proclivi est judicare, easdem in illis affectibus, qui ex languore & imbecillitate motus proficiuntur, ubi stimulo & incitamento opus est, in corporibus temperamenti & naturæ segnioris, phlegmaticæ & melancholicæ constitutionis, habitus spongiosi & obesi, nec non sequiori

lexu,

sexu, item in regionibus septentrioni vicinis, frigidis & humidis, eximii & saluberrimi esse usus. Quum porro nervosae omnes corporis partes conspectius conspirent & mutuo annuant, ita ut ex una in alteram oblato medicamento effectus promte propagetur; idem idem laculenter patet, vesicantium ex cantharidibus virtutem, ex nervea quam proxime afficiunt cute latius diffundi & amplissimum illorum in variis remotarum partium vitiis esse usum. Egregie hanc in rem scribit & vesicatoriorum virtutes in compendio exhibet FREIND *l. c. pag. 143. Verisimile est*, inquit, *cantharides etiam cum cuti admotae sunt, altius pervadere. Aliiter enim quomodo contingeret, ut in pleuritide, in peripneumonia, in destillatione, in gravedine nervorumque distensionibus, egregie valeant cantharides cuti appositae? ut dolores coxarum praecipue, per vetustos tollant obstructionesque liberent? ut iis demum apposis, humores sese ad perspirandum magis accommodent, ut sudores facilius fluant, ut pustularum omne genus à cute promptius foras emicet?*

9. Sed, quo spectatissima vesicantium ex cantharidibus in variis morbis virtus testatius paulo pateat, è re omnino erit, ut, quid per experientiam de ea constet & in observatis medicorum passim annotatum, edisseramus. Nimirum, ut à capite ordiamur, inter eos qui magnifice admodum de cantharidibus sentiunt, praeter SEPTALIUM, HERCULEM SAXONIA & FREINDIUM est maxime SEVERINUS, qui in *pyrotechn. chirurg. lib. II. cap. 8.* vesicatoriorum usum ad plurimos affectus conducibilem tradit, eo quod revellant, divergant, attrahant & evacuent simul, non solum ex propinquioribus, sed & remotioribus locis. Potissimum tamen in dolore capitis essentiali & contumacissima cephalalgia frequentissime applicanda suadet, ita quidem, ut capillitio derafo, vel parti solum dolenti, vel toti capiti, in forma cucuphae imponantur. Idem censet HOLLERIUS, qui inter Gallos maxime & primus fere vesicatoriis usus est, in *institut. chirurg. lib. III. cap. 5.* ubi de pyroticis agit, asserens: quod ope vesicarum, quas cantharides excitant, coxarum, podagrici, hemicranici, cephalalgici saepenumero releventur, viscera repurgentur atque corpus à fordibus & excrementis liberetur & sexcenta vitia vetusta contumaciaque percurentur. Neque minus incomparabilem opem vesicantia in contumacissimo capitis dolore praestitisse uberius confirmat SEPTALIUS in *animadv. & caution. lib. VI. caut. 18. & 55.* nec non RIVERIUS *Cent. I. obs. 37.* TULPIUS cephalalgiam periodicam per vesicatoria occipiti admota se curasse *lib. I. obs. 37.* testatur. Et MUYS in *prax. chirurg. rational. Dec. II. obs. 2.* dolorem capitis, appposito parti affectae cantharidum pulvere cum saliva in pastam redacto, sequenti die evanuisse memorat. Quin ipse HIPPOCRATES vesicantium ad capitis cruciatum usum innuisse videtur, dum *lib. I. coac. sect. I. p. 23.* eruptionem capitis dolorem solvere prodidit.

10. Pariter in aliis capitis affectibus vesicatoriorum usus ut laudatissimus à quamplurimis celebratur. In mania quidem ROLFINKIUS in *ord. & meth. cogn. cap. aff. diff. V. pag. 23.* eadem summe proficua esse asserit, si scapulis, si brachiis admoveantur. In epilepsia idiopathica, derafis capillis, per universum caput vesicantia applicare jussit SEPTALIUS *lib. VI. cap. 29.* RIVERIUS *Prax. lib. I. cap. 8.* PISO de *morb. ex colluv. serof. cap. XIX.* hac cum praecptione, ut vesicae diu servantur apertae, quo continuo per eandem fluat humor. Sympathicam epilepsiam TRALLIANUS herba lepidii vesicante, loco illi à quo aura frigida ascendebat, apposita, abegit. Et quae plura de vesicatoriorum in epilepsia salubri virtute consignarunt PLATERUS *prax. lib. I. cap. 2.* HENR. ab HEER *obs. 20.* WEDELIUS *amoenit. mat. med. lib. I. sect. II. cap. 6.*

In epilepticis infantum convulsionibus Tb. WALLISIUS de *morb. convuls. cap. 4.* in nucha & pone stramque aurem vesicatoria apponere suavit, quo per eadem, cum reliquo latice seroso plures heterogeneae & morbigae particulae simul effluant. In cujus confirmationem idem auctor *l. c. cap. 3.* exemplum affert puellae, quae, quum epileptico insultu correpta in candentes carbones cecidisset, facies quidem & sinciput tam misere concremata sunt, ut cranio cute & carne nudatis eschara lata & profunda inusta sit, sed aegrotam interim quamdiu ulcera inusta manarunt, paroxysmis caruit, simul ac autem sanata sunt, caducus rediit. Quo etiam referenda HIPPOCRATIS observatio, qui *lib. de morb. sacr.* perhibet, ulcera capitis manantia si fiant pueris, eos à comitiali morbo liberare.

11. Accedunt soporosi affectus, ipsaque apoplexia, ad quos dispellendos quam maxime proficua celebrantur vesicatoria, sed augenda dosis. Commendantur autem in soporosis passionibus à RIVERIO *lib. I. cap. 4.* SEPTALIO *lib. VI. caut. 35.* vertici & sincipiti apposita. Et licet PISO de *morb. rect. cogn. & curand. lib. I. cap. 2.* eadem in lethargo, cui febris complicata, damnet: SEPTALIUS tamen *lib. V. caut. 44.* in lethargo etiam symptomatico, in febre, pestilentiali quoque, nullum praestantius iisdem se invenisse praesidium testatur; SYLVATICUS vero tutiora ex ranunculo, quam cantharidibus parata judicat, propter urinae suppressionem.

12. Ad oculorum porro vitia & mitiganda & abigenda spectata quoque vesicantium virtus. Ipsam coecitatem TULPIUS *lib. I. cap. 10.* vesicatoriis amplius femoribus apposis se perlanasse fidem facit; & in lippitudine mirifice eadem profuisse testis est FORESTUS *lib. I. obs. 11.* In ophthalmia quoque egregii sunt usus, sed observavi, quod in nucha non adeo conducant, sed potius dolor inde augeatur, quum contra pedibus admota, saepe simul ac humor stillare incipit, dolorem levant. Neque minus in gutta serena, suffusione & cataracta, vel incipiente, vel acu jam deposita, vesicas diu apertas gestare suadet RIVERIUS in *prax. lib. II. cap. 10.* Atrocem illum dentium dolorem vesicatoriorum usu promte comoni memorant *Misc. nat. curios. Dec. II. An. V. pag. 313.* PARÆUS *lib. VI. cap. 25.* SCHOLZIUS in *consil. med. 72. §. 195.* In tinnitu aurium & surditate recenti ad derivationem vesicam in primis colli vertebrae palmae amplitudine excitare jubet RHODIUS *lib. I. cap. 32.* Ad abolendas foedas, rubras & ardentes faciei pustulas PARÆUS *opp. chirurg. lib. XX. cap. 28.* vesicantia laudat, & ad ulcerosas resiccandas, idem remedium apprime conducibile judicat PLATERUS *Prax. lib. III. pag. 619.*

13. Praeter capitis morbos in aliarum quoque partium vitiis eximie opitulantur vesicatoria. Nimirum, ex pectoris affectibus truculentum illud asthma spasmodico-convulsivum, praesertim si ex retrocedente, vel remanente podagra prognatum, egregie levare vesicis in furis excitatis, multiplici compertum habeo experientia, & idem confirmant *Misc. nat. curios. Cent. I. & II. obs. 164.* Vix vero ulla passio est, in qua tam conspicuam opem praestent vesicantia, quam dolores rheumatici & arthritici, potissimumque contumax ille & chronicus ischiadicus dolor; nullam praeriter aliam ob causam, quam quod serum acre nervosis & tendinosi partibus firmitus impactum in motum cieant & ad evacuationem sollicitent, uti maxime auctor est LAURENTIUS in *annotat. ad Guidon. de morb. artic.* LENTILIUS certe in *Misc. med. pract. I. 285.* conceptis scribit verbis: *in ischiatide; reliquis non juvantibus; vesicatorium applico, sed magnum, vesicam apertam teneo per integros octo vel decem dies.* RIVERIUS autem roborans & vesicans emplastrum miscet

prax. med. lib. XVI. cap. 2. & fortioribus utendum esse præcipit PARÆUS *lib. XVII. cap. 23.* id quod etiam inculcant M. N. C. *Dec. I. An. IX. & X. pag. 95.* Huc quoque referenda, quæ SCHEFFERUS in *descript. Lapon. cap. 27. pag. 351.* prodidit, memorans: Laponiæ incolæ, quando dolorem articularum persistentiunt, fungum betulæ inslar placentulæ inhærescentem, ignitum loco affecto imponere, quo ulcus pravos succos attrahat & dolores componat. Et licet ad podagram abigendam passim decantatissimum præsidium sit mœxa Indorum, BORRICHIVS tamen *Vol. V. Act. Hafn. pag. 183.* eandem vix plus præstare asserit, quam usu recepta vesicatoria.

14. Neque minus ea vesicantium præstantissima est facultas, ut humorem acrem malignum intus retentum, vel repulsum, ad extimum corporis corticem alliciant & damna inde oriunda arceant. Certe quam gravia pathemata ab internis partibus incumbente arthritica materia immineant, notissimum est; ad quæ omnia præscindenda magnum utique vesicatoria sunt præsidium, eamque ob causam magnopere dilaudentur à PISONE *observat. sect. V. RIVERO Prax. lib. II. & in M.N.C. Dec. I. An. II. obs. 214. An. VIII. obs. 34.* Idem salubris effectus expectandus, quando materia acris caustica in variolis & morbillis, febre quoque petechiali, purpurata, quin ipsa etiam pestilentiali, vel ob languorem retenta, vel ob spasum retroacta, nobilibus incumbit visceribus & atrocia ciet symptomata. Potissimum, multiplici edoctus sum experientia, infantibus succulentis, variolis aut morbillis, mox prodeuntibus, mox relabentibus, exoptatas tulisse suppetias vesicatoria, brachiis vel manibus admota, ipsa vesica, imposita emplastro diapalmæ, per aliquot dies aperta servata. Laudantur hinc merito in variolis à SYDENHAMO *opp. p. m. 274.* nec non MORTONO, si non prodeunt, vel mox recedunt. BARTHOLINUS quoque *Act. Hafn. Vol. III. obs. 36.* percussis variolis, quatuor brachiis & femoribus applicuit vesicatoria, eoque facto, ipsæ redierunt, suppurarunt & sanitas sequuta.

15. In febre petechiali hoc præsidium egregiæ pariter virtutis, ut eadem Jo. DAN. HORSTIVS *epist. medicinal. 10.* vel juramento confirmet. Ex usu quoque est in febre castrensi, nec non pestilentiali, præsertim si quicquam comatosi complicatur. Ipsam pestem vesicatoriis & arceri & sanari auctor est LOTTICHIVS *obs. lib. I. cap. 7.* cui assurgit HEURNIVS *de febr. pestil. cap. 19.* cum WILLISIO *de febr. cap. 13.* nec non SEPTALIUS *l. c. caut. 42.* qui eadem extremis partibus, suris, femoribus & coxis applicare iussit, ut virulentum humorem ad inferiores partes traherent. MERCURIALIS *de pest. cap. 26.* in peste, quæ anno MDLXXVI. & sequenti Venetiis sæviit, inter præstantissima remedia fuisse vesicantia testatur. In primis eorum appositio ad excretionem cutaneam & eliciendos bubones & carbunculos, quibus prodeuntibus symptomatum sævitia conquiescere solet, commendatissima, cujus rei testes producimus RIVERIUM *Prax. lib. XVII. sect. III. cap. 1.* SYDENHAMUM *p. m. 281.* HODGES *de pest. Londinens.* & DIEMERBROCCIVM *de peste.* Pariter in bubone pestilentiali eadem proficua judicat HEURNIVS *de pest. cap. 9.* nec non ab AQUAPENDENTE.

16. Atque hi sunt præcipui illi morbi, in quibus, ratione suffragante, experientia teste & peritissimorum quoque medicorum consensu præstabilis vesicatoriorum ad juvandum facultas. Interim, quum hæc remedia ob summam agilitatem & promptam in partes, exquisito sensu præditas nervosas actionem, tam proclivia sint ad nocendum, quam juvandum: è re utique erit, ut quasdam ad fructuosam illorum in variis casibus applicationem necessarias cautelas annec-

tamus. Nimirum, ante usum curata omnium circumstantiarum habenda est ratio, ac non modo in morbi genium, ejusdemque causas, sed & ipsius corporis ægrotantis naturam & constitutionem sollicite inquirendum, morbi quoque tempus considerandum & locus accommodus eligendus. Quod si enim corpus acutioris est sensus, æger à levissima causa animo movetur, magnasque ex facili in corpore experitur mutationes, si porro ætas juvenilis, regio præcalida, tempestas fervida, habitus corporis strictior & macilentus, corpus succis & sanguine fartum, morbus etiam in paroxysmo & impetu constitutus, vel locus cui apponitur admodum nervosus, longe major motuum exacerbatio cum præsentaneo damno inde expectanda, & ob id abstinere à vesicantibus tum consultius. Hinc apprime utique ad veritatem scribit AETIVS; *in segnioribus, ubi carnea moles, utile remedium vesicantia, in calidis autem & siccis corporibus & affectionibus, his ego non utor.*

17. Deinceps, ubicunque totum genus nervosum vehementibus jam agitur spasmis, ut fit in febribus, acutis præsertim & inflammatoriis, & causa exorbitantium horum motuum non tam crassa & materialis, quam potius tenuis atque subtilis, ubi vigilæ assiduæ & deliria adsunt, vel imminet, summa inquietudo, corporis jactatio & præcordiorum anxietates urgent, multo magis, si accedunt tendinum subsultus & convulsiones, vesicantia penitus absint. Nam nihil certius, quam, ut admotis his, quæ nervosas partes ad spasticas stricturas magis exstimulant, nec tamen causam tollunt, motuum impetus & anomalia cum irreparabili damno longe magis increseat & plane lethales consequantur convulsiones. Gravis hanc in rem testis est BAGLIVUS *Prax. pag. 102.* perhibens: *delirantibus cum febre acuta, lingua arida & indicibus magnæ viscerum inflammationis, si applicentur vesicantia, omnia in pejus ruunt & magna ex parte moriuntur convulsi.* Idem perite monet ALPINUS *de medic. method. lib. V. pag. 173.* nunquam, inquiens, probare potui, in acutis febribus vesicantium usum, quod calorem febrilem augeant, vigilias doloremque concitent & deliria inducant, coctionem impediant, non minus & motui humorum critico obsint, quum incertus sit locus ad quem, vel per quem crisis est futura.

18. An in febribus malignis vesicatoria conducant? vexatum inter medicos est dubium. Et nonnulli quidem maximeque RAMMAZZINI in constitutione epidemica anni MDCXCII. XCIII. & XCIV. eadem minus proficua annotarunt, alii contra ipsa plurimum opis tulisse confirmant. Sed lis facile dirimenda. Nimirum, quando pulsus exiles & debiles micant, vires languent, ad soporem inclinatio, & corpora segnioris naturæ, ex usu sunt, ubi alia omnia, secus. Quare recte utique de vesicatoriorum his in febribus utilitate Acta Vratislav. *An. MDCC. pag. 64.* sentiunt, si, verba habent, *corpora succi plena & plethorica, nihil fere effecerunt vesicatoria, sed febres exacerbatae, deliria & inflammationes auctæ, majorque orgasmus sanguini inductus; ubi vero humores crassi, visceri & ad soporem inclinatio, eximiam attulerunt utilitatem, sed opus est, ut in principio statim applicentur.* RIVERIUS *prax. med. lib. XVII. cap. 1.* hanc adjicit cautionem: ut, si malignitas totum jam corpus occupavit, variis in locis simulque admoveantur, eandemque GALENI *lib. V. meth. med. cap. 12.* auctoritate confirmat.

19. Licet porro in varii generis doloribus, ut odontalgicis, arthriticis, eximie profint vesicantia: nihilo minus tamen, quando corpus plethoricum & febris acuta conjuncta, ab iis abstinendum. Idem tenendum de capitis doloribus, si cœu symptoma febrilibus commotionibus superveniunt; quando vero ab humore

humore viscido acri pericranio & membranis cerebri inhaerescere oboriuntur, cum fructu, eoque magis in phlegmaticis corporibus, applicantur. Si contumax capitis dolor, aut alius affectus, amplum apponendum toti calvariae rasae vesicatorium, quod quidem vesicam non excitat, copiosum tamen viscidum serosum humorem ex poris cum levamine prolicit, uti quidem disertis verbis auctor est WEPFERUS in *epist. ad LENTILIUM*, inserta *Miscell. medico-pract.* In ischiadico quoque dolore, ut latum applicetur & vesica per aliquot dies aperta servetur, ex usu est, quo tam diuturniori stimulo, quam liberaliori affluentis humoris subtractione, ipsum demum malum abigatur.

20. In apoplexia sanguinea, quae spasmis infimi ventris, pulsu intenso & respiratione auctiori stipatur, vesicantia exulcent: in lenta autem & serosa, senibus potissimum ab externo frigore familiari; egregiam spondent operationem. Pari ratione cum distinctione de vesicatoriorum usu in hydropse ferendum est iudicium. SEPTALIUS quidem eadem in hydropicorum curibus applicari posse penitus negat, & in *animadv. med. lib. VII. caut. 56.* fidem facit, se quadraginta annorum spatio, quo medicinam fecerit, nullos unquam, quibus a medicis vesicantia admota, curatos vidisse, sed semper fere gangraenas subsequitas curatu fere impossibiles. Verum in anasarca, hydropse subito, ut ex mensium vel haemorrhoidum suppressione, prognato, si viscera adhuc sunt salva, vires non adeo prostratae, urina non parca & tenuis & febris quoque deest, locum habere possunt; quandoquidem ipsa natura sponte saepe vesicas excitat & per easdem a copia feri cum euphoria sese liberat, tenendum tantum, quod vesicae diutius per plantaginis vel brassicae folia aut alia, non cantharides, aperta sint servandae & humor copiosior eliciendus.

21. Multum etiam refert, ut congruo loco applicentur vesicantia. Quando enim stimulo intensiori & auctiori motu opus est, locis, qui exquisitioris sensus & eminentius nervosi sunt, apponantur, nuchae nempe, collo; pone aures, carpis manuum & genibus: contra ea si febris adest, pulsus valide & celeriter vibrant, morbi impetus est, vel etiam per periodos paroxysmi spasmodici, convulsivi, epileptici accedunt, in inferioribus minusque acuti sensus musculosis partibus, suris, coxis & femoribus, eadem admove magis expedit. Nunquam etiam imponenda parti, cui dolor, inflammatio & spasmus insidet, vel partibus exulceratis, quia stimulo suo dolores & pathemata exasperant, tantum abest ut levant, & semper consultius, ut non loco affecto & proximo, sed remotiori ad derivationem adhibeantur.

22. Praesentissima quidem & maxima cantharidum ex vesicantibus facultas; sed tota quoque sua substantia, ut symptomata inde oriunda evincunt, fluidis & solidis corporis nostri partibus sunt adversae. Hinc utique quaestio non infructuosa: annon prostant ejusmodi remedia, quibuscum deleteria ipsarum indoles possit corrigi, cicurari & perniciosus effectus praescindi? Jam quidem tria sunt potissimum, quae per experientiam hunc in finem proficua innotuerunt. Primum est lac, cujus egregia cantharidum virulentiam coercens virtus priscis jam innotuit. Testem citamus ARETAEUM, qui primus quasi cantharidibus externe usus est, quum HIPPOCRATES interni tantum usus mentionem faciat. Is enim in *curat. diut. morb. I. 14.* perite monet, ut triduo ante usum lacti advescat aeger, ne vesicam laedant cantharides. Alterum ex iis quae cantharides castigant, camphora; quae si ipsis in pulverem tritis admiscetur, medicina emergit, quae interne innoxie non modo, sed & magno cum fructu dari potest in lue venerea, gonorrhoea inveterata, calculo & bubonibus; uti pluribus adstruit GROENEVELT

in *tr. de cantharidum usu interno.* Et tertium denique cantharidum correctorium acetum, quod acrimoniam illam volatilem salinam in ipsis ligat quasi & contemperat, quo minus adeo diffundi & nervosas partes exagitare queat.

23. Verum, quia haec antidota ita sunt comparata, ut ipsam cantharidum vim plus minus infringant & obtundant, cum distinctione utique usurpanda; ne speratus deficiat effectus, & non addenda, ubi fortiori stimulo opus est. De acidis quidem MUYS in *prax. rational. chirurg. Dec. II. obs. 2.* observavit, quod cum cantharidibus scopo vesicante admota; adeo hebetent earum virtutem, ut longe debiliorem edant operationem, quam si cum saliva in pastam rediguntur. Hinc quando fibrae mitius exstimulandae tantum, & a validiori vellicatione periculum metuendum; utiliter cantharides cum fermento panis & aceto destillato subiguntur; id quod maxime ex usu est in affectibus periodicis spasmodicis & convulsivis, item in febribus intermittentibus, quas identidem egregie sufflaminare solent vesicantia, quo etiam nomine ut potens antifebrile allium commendatur in *Misc. Nat. Curios. Dec. II. An. IX. obs. 125.* Camphora vero cantharidibus commodissime sociatur in febribus malignis; petechialibus ipsaque peste, ac tum quoque acetum & theriaca addi possunt, quorum virtus in his febribus ad corpus ab interitu vindicandum insignis. Et lac exhibere tum maxime ex usu est, quando periculosa symptomata, ut mictus cruentus, vomitus, convulsiones, a cantharidum usu suscitata; quippe quod non modo causticam ipsarum acrimoniam hebetat atque obtundit, sed & ipsas fibras mulcet atque laxat, quo minus insensibilis spasticis stricturis afficiantur. Hinc PLINIUS jam *Hist. Nat. lib. XXXII. cap. 9. & 10.* lac adversus cantharides commendat, & CELSUS *lib. V. cap. 27.* eandem in rem scribit: *si cantharides aliquis ebibit, panaces cum lacte confusa, vel galbanum vino adjecto dari, vel lac per se debet.*

24. Postremo monendum etiam est, quod non semper opus sit iis, quae vesicas eliciunt; sed quod saepius sufficiant topica ex paulo acrioribus parata & lenius stimulantia, inprimis si locis, in quibus acutior sensus, ut nuchae, carpis manuum & plantis pedum applicentur. Celebrantur haec passim phanigmorum; rubefacientium, sinapismorum, epispasticorum & atrahentium nomine, & a vesicantibus gradu tantum differunt, haud secus ac laxantia a purgantibus; diaphoretica a sudoriferis; errhina a sternutatoriis; longe tamen securiorem his praestant effectum. Quare si vitium levius & desiderata operatio initioribus his impetrari potest; haec adhibere utique magis e re est. Optima autem ex iis, quae hunc in finem commendantur; sunt semen sinapi, piper album, allium, sal volatile cornu cervi, sal ammoniacum, caryophylli; terebinthina & fuligo, item theriaca, quae in epithematis vel emplastri formam redacta, in contumaci quartana, carpis manuum, in podagra & arthritide; ipsis locis affectis, in febribus malignis, plantis pedum, in motibus convulsivis & epilepticis, itidem plantis pedum, vel etiam nuchae, summo cum fructu ad moveri possunt.

25. Alius adhuc exquisitae sensationis locus, cui cum omnibus nervosis partibus consensus intercedit; est sub axillis, ob grandiores ibi discurrentes nervorum ramos, glandulas nerveas & cutem superinductam admodum tenuem. Huic minus commode & non sine periculo gravioris noxae imponi possunt vesicantia, quam optime vero stimulantia, inter quae ceu tutissimum merito connumerandum semen sinapi, quod linteo tenui inclusum, balsamo vitae irroratum & sub axillis gestatum, ex frequenti observatione mea in affectibus capitis, qui ex atonia membrarum & vasorum

humorumque stagnatione proficiuntur, uti quidem sunt affectus epileptici, paralytici, cephalalgiae serosae, tinnitus aurium, auditus difficilis, oculorum vitia & defluxiones, insultus vertiginosi & apoplectici, praestabilem confert opem. Ita enim & rubefacientia operationem suam exsequuntur, ut oscillatorium nervosarum fibrillarum motum stimulo suo intendendo, impellendis & dimovendis stagnantibus non modo ferviant humoribus, sed & motus vitiosos loco cui-dam incumbentes derivent & aliorum divertant. Hinc etiam, ubi nervis robur addendum & ipsarum motus resuscitandus, commode nervinis & balsamicis sociantur, iisdemque sic locis nervosis, plantis pedum, carpis manuum & sub axillis apposis, efficacior & magis penetrans emergit operatio. De qua tamen non est ut in hac vesicantium consideratione pluribus differamus. Transimus potius ad alterum dissertationis nostrae argumentum explicandum, quod agit de fonticulis.

26. Ita quidem artificiosissima machinae microscopicae comparata est fabrica, ut in ipsa innumera diversissimaeque figurae & structurae fabrefacta sint organa, quae ad tuendam cum sanitate vitam, arcendos etiam & percurandos graves morbos, utilium succorum secretioni & praeparationi, inutilium vero, superfluum & recementitiosum excretioni, egregie serviunt. Nihilo tamen secius saepissime contingit, ut natura novos alios moliatur ductus novaque efformet emissaria, per quae depravati, insolentis & plane peregrinae indolis succi, maxime ipsis in morbis, praesertim chronicis, denuo prognati, summa cum utilitate e corpore proscribuntur. Abunde hoc testatum faciunt obviae subinde in externis corporis partibus ulcerationes & facti per eas impuri & morbifici humoris fluxus, quibus succedentibus corpus sanum est & integrum, resiccatis autem & cohibitis, illico graves & ancipites patitur morbosas passiones.

27. Scilicet, quem latet, quam egregie in puerorum infantumque salutem illa materiae serosae & purulentae per sic dictam tineam, achores & favos evacuationo cedat, ita prorsus, ut ad arcendos aequae ac persanandos atroces affectus, cephalalgiam, epilepsiam, lippitudinem, ophthalmiam, catarrhum suffocativum & asthma maximo sit praesidio, imprudenter autem suppressa, omnia haec invehat iterumque reducat. Per plicam, quam vocant Polonicam, qua, per cutis & radicum capillorum nimis laxatos meatus, copiosi visceri & impuri succi eliminantur, intolerabilem cephalalgiam, maniam, melancholiam, epilepsiam aliosque truculentos capitis affectus abactos, & vicissim abscissa illa, iterum suscitatos esse, innumeris certum & confirmatum est exemplis. Nobis quoque plures cogniti sunt casus, quod ulcera pedum, praesertim in scorbuticis & senilibus corporibus, aliquandiu manantia, asthma spasmodicum, motus convulsivos, dolores ischiadicis, arthriticos diu infestantes, feliciter discusserint, & quod eadem mala, consolidatis exulcerationibus, longe graviore quam antea insultu repetierint. Nuperius admodum notatu hanc in rem digna fuit observatio in sene fere octogenario, qui quum diu jam graviter dolente laborasset dysuria, erysipelate affectus esset in pede, quod reliquit ulcus quotidie insignem feri ichorosi copiam fundens, tam salubri successu, ut ex eo nunquam molestum amplius persenserit mihi.

28. Ut mittam id, quod omnibus, qui in artis exercitio versantur, notissimum, apprime scilicet pro sanitate esse, quando ex succorum vitalium connubio ab internis nobilioribus partibus ad externum corporis corticem, materia corrupta, acris, deleteria amandatur, & scabies, purpura, gutta rosacea, phlyctenes, tubercula purulenta, quae vocant *Schwären*, aliaque

exanthemata sponte efflorescunt, adeo, ut hoc pacto rebelles chronicae passiones, febres intermittentes, praesertim quartanae, affectus arthritici, epileptici & convulsivi, maximeque capitis & nervorum morbi ancipites, eximie & mitigentur, & penitus sanentur. Hanc itaque insignem extraordinariam ejusmodi evacuationum salubritatem quum perspicerent medicorum sagaciores, laudabili utique consilio, providum hoc naturae institutum & sequi & imitari animum induxerunt, ac per artificium in congruis locis excitarunt ulcera, quo per eorundem emissaria intus delitescens & ad excretionem per consueta emunctoria minus accommodum humorem sic longe feliciore & faciliore successu foras evocarent. Hinc merito repetenda fonticulorum origo, quorum quidem saluberimus effectus & praestans in medicina usus ex allatis jam abunde patet: ut vero eo luculentius innotescat, quibus maxime in morbis, quibusque cum cautionibus, hoc sanitatis utendum sit praesidio, plenius paulo atque curatius de fonticulorum usu medico demonstratum dabimus.

29. Fonticuli nomine quid in medicorum scholis insigniatur, omnibus notum: ulcus nimirum cuti variis modis artificiose inductum, quo per istud diutius apertum noxius in sanitatis tutelam effluat humor. Haec quidem fonticuli vox nullibi, quantum quidem novimus, in HIPPOCRATIS, CELSI, GALENI aliorumque ex veteribus monumentis reperiunda, modus tamen varii generis morbos per ulcera artificialia & arcendi, & curandi, à primis inde medicinae incunabulis cognitus fuit. Perfecerunt id maxime prisca cauterio actuali, ignito nempe ferro, quo modo levius, modo gravius adusserunt cutem & ulcus sic concitando humorem elicuerunt. Ipse jam antiquissimus artis nostrae parens HIPPOCRATES *lib. de intern. affect. §. 19.* si dolor ex coxae acetabulo corripit & infra descendit indeque rursus ad caput fertur, id fortiter premit, ut aeger caput sibi diffringi putet & oculi puita repleantur, itemque totum corpus, adhibita incassum purgatione & lactis cura, suadet, ut in acetabulum coxae crustae urantur tres, sub nates duae, supra genua una, & supra malleolum una, quippe quae nec morbum sursum, nec deorsum procedere permittant. CELSUS quoque *lib. VII. cap. 7. §. de puita oculor.* in diuturnioribus oculorum vitiis cutis in capite incisiones, nec non venarum adustiones commendat, cum cautela, ut antiqui cutis fines inter se committi impediuntur. Quam frequenti porro in usu ejusmodi cauteria fuerint Methodicorum antiquissimis THEMISONI, ARCHIGENI aliisque, passim confirmat COELIUS AURELIANUS, id quod etiam de Arabibus dicendum, uti potissimum ex RHASIS *lib. de affect. junct. tit. 16.* patet. Et hinc omnino factum est, ut plurimis ex veteribus fonticuli audiant cauteria, quemadmodum constat ex SOLENANDRO *sect. II. conf. 13.* item Jo. de VIGO *lib. VIII. cap. 15.* alii vero, ut AETIUS, RHASES, AVICENNA eisdem communi ulcerum nomine insigniant.

30. Probe itaque veteres utilitatem hujus per ulcera artificialia medendi rationis perspexerunt, & post ipsos creber usus & multiplex idem uberius confirmavit experientia. Fuerunt tamen, ex HELMONTII maxime & CARTESII schola prodeuntes, qui invento sanguinis circulo, particularium ejusmodi per setacea & fonticulos evacuationum nullum amplius usum esse, asserere haud erubuerunt. At vero, una, quod dicitur experientia, plus profecto valet, quam centum acutissimae rationes, ideoque id primo omnium agemus, ut ex probatissimis prisca, aequae ac recentioribus auctoribus observationes & exempla de praestabili fonticulorum virtute colligamus & quasi totidem argumenta in medium adducamus. Et in genere quidem

quidem quam spectata fonticulorum ad arcendos varii generis morbos sit facultas, testatur Siculorum inprimis mos, qui teste *AQUAPENDENTE oper. chirurg. Part. I. cap. 95.* etiam si sani sint, sibi tamen fieri fonticulum volunt, ut sani conserventur. Quin barbari Lybiae populi, memorante *HERODOTO lib. IV.* pusillis suis quarto ætatis anno venas cervicis, ad avertendos morborum ipsis solennium insultus offerunt; quippe addimerentur ea, quæ *Casp. BARTHOLINUS, exercit. III. ad h. l.* differit. Idem quoque moris fuit apud Italos, qui teste *RODERICO à CASTRO de morb. mulier. lib. II. cap. 2.* frequentius quam ulla alia gens fonticulis utuntur, ita, ut *SCIPIO MERCURIALIS in Heb-Ammen-Buch, cap. 26.* fidem faciat, eosdem statim post baptismum infantum cervices ferro candente adurere, felici cum successu, & *AQUAPENDENS chirurg. op. cap. VI. pag. 44.* perhibeat, Florentiæ potissimum vel plane nullos, vel paucos tantum pusillos, hanc capitis exustionem evadere.

31. Quod vero ad ipsam morborum curationem attingit, multiplex & varius in hac fonticulorum est usus, & veritate utique nituntur in genere, quæ quidem *AQUAPENDENS operat. chirurg. P. I. cap. 1. pag. 12.* figillatim de fontanellis in capite prodidit: eosdem nempe inprimis conferre ad capitis morbos frigidos & humidos, ut puta, scotomiam, vertiginem, capitis dolores ac defluxum ad oculos, nares, aures, columellam, fauces, dolorem dentium, gingivarum, gutturis & ad defluxum ad stomachum, nec non ad eos revellendos conferre, qui ad thoracem descendunt & membra spiritualia offendunt, phthisin, asthma, empyema & omnem spirandi difficultatem, denique etiam artuum potissimum dolores juvare. Jam si specialius paulo morborum censum inimus, eminent hos inter maxime, qui caput obsident, in quibus fonticulos maximum & mirandum præstare auxilium *SCULTETUS armament. chirurg. tab. 43.* affirmare non dubitat. Et de doloribus quidem, qui caput sæpe graviter infestant, luculenta passim prostant testimonia, quod fonticulis & setaceis ad eosdem levandos nihil sit præstantius. Sic *GRAMMIUS in M. N. C. Dec. I. A. III. obs. 81.* meminit: fonticulum, in capite profundius inustum, virginem, quæ per multos annos cum atrocissimis doloribus capitis, noctu maxime, misere conflictata, ab iisdem penitus liberasse. *SOLINGEN operat. chirurg. P. I. cap. 1. pag. 3.* in cephalalgia inveterata mirifice commendat fonticulum in capite excitandum. Neque minus *WEPFERUS obs. 41.* suadet, ut ad cephalalgiam fonticulus in brachio conficiatur; quia sensim à loco affecto derivet, simul evacuet & ab apoplexia præservet. Et idem auxilium ad hemicraniam *obs. 51. & 60.* tollendam utile judicat. De setaceorum autem saluberrimo effectu multa potissimum prodidit *HILDANUS*, qui *Cent. IV. obs. 6.* exemplum habet de adeo rebeli cephalalgia, ut nec internis, nec externis, nec ipsis narcoticis potuerit mitigari, setaceo autem facto sensim conquievit. Et *obs. 7.* casum exponit diuturni doloris, qui setaceo statim levatus, & mutato setaceo in fonticulum, penitus abactus. Quibus accedit memorabilis *RUYSCHII* observatio *XL.* de cephalæa rebeli, quæ setaceo admoto cessavit, hoc consolidato, recrudit, denuo excitato, rursus evanuit, iterum coeunte, tertia adhuc vice repetiit.

32. In oculorum quoque affectibus spectatam esse fonticulorum & setaceorum virtutem, plurimis exemplis medicorum observata confirmant. De fonticulis fidem faciunt *Acta Hafn. Vol. III. obs. XII. pag. 23. seqq.* quod puer omnimoda oculorum imbecillitate laborans, ut lucem agre ferre posset, uno in brachio, altero in pede excitato, convaluerit. Alium, cui muscæ & culices ante oculos versari visæ, fontanella

Erid. Hoffmanni Oper. Tom. VI.

in brachio visus claritatem, evanescentibus muscis, recuperasse. Et *Chiliarcham* visus imbecillitate & acri defluxione oculorum cum rubedine afflictum, usurpatis frustra omnibus ophthalmicis, à fontanella tam singularem percepisse fructum, ut ea, quæ antea vix perspicillorum ope viderat, postea acute sine his cernere potuerit. Neque minus *WEPFERUS obs. 180.* se guttam serenam subito invadentem, vesicatoriis, setaceo, hisque demum coeuntibus fonticulo in brachio sinistro percurasse, tradit. Inprimis tamen præsentanea in visus vitiis pollent facultate setacea. *WEPFERUS* hinc non solum in imminente gutta serena *obs. 60. 80. 182.* setaceum commendat, sed etiam testatur, se quater eundem morbum hoc auxilio sanatum vidisse. Pariter *HILDANUS Cent. I. obs. 41.* duplex consignavit exemplum ophthalmiæ post variolas setaceo discussæ; ubi simul notabilem offert observationem de puella, quæ præ defluxione & inflammatione oculorum visum plane amiserat, setacei autem beneficio, videndi facultatem in eo oculo, ubi tunicæ nondum exesæ & corruptæ erant, recepit. Idem remedium *epist. 67.* in suffusione incipiente suadet, & *epist. 59.* perhibet: se cuidam, qui visum pæne perdidit, eadem ratione, ita opem tulisse, ut elapsis jam decem annis, sexagenario major, optime sine perspicillis videat. Quin ipsam fistulam lacrimalem trajecto in cervice setone, bis se consolidasse idem gravis auctor *Cent. IV. obs. 19.* memorat. Ut mittamus quæ *SYLVATICUS* in consiliis de amplissimo hujus remedii in affectibus oculorum usu passim annotavit.

33. Atrox ille epilepticus morbus, qui pariter in cerebri membranis sedem obtinet & exinde universum corpus gravissime quatit & concutit, hac noxiæ materiæ per ulcera artificialia subtractione, tam egregie, quam vix ullo alio auxilio & mitigatur & expugnatur. Jam dudum enim *HIPPOCRATES lib. de morbo sacro*, ulcera capitis pueros à morbo caduco præservare prodidit, & *TULPIUS* veritatem hujus effati in binis comperit pusillis, *lib. I. obs. 8.* narrans: ulcera in capite ab epilepsia eosdem liberasse, illisque occlusis, repetiisse iterum priorem morbum, ut necessum fuerit hiatus referare. *ARETÆUS quoque lib. II. de diut. cur. cap. 4.* hunc in finem commendat ustionem, cui assurgit *RONDELETIUS meth. curand. morb. cap. 36.* ubi cauterium actuale in parte posteriori capitis suadet, & addit, est præstantissimum remedium. *MON-TANUS conf. 50.* refert: senem *LII.* annorum solis cauteriis in brachio ab epilepsia esse liberatum. Et *CRATO epist. 118. ap. Scholz.* cauteria optima adversus epilepsiam esse prophylactica, conceptis scribit verbis. Idem vero præstans effectus à fonticulis & setaceis expectandus, digna memoratu hanc in rem est observatio, quam consignavit *MECKREN* de juvene, qui horrendis convulsionibus epilepticis misere affectus, frustra sumpsit omnia antepileptica, ac demum inuito cum cauterio actuali futuræ coronali fonticulo, ab insultu tam trucis mali immunis factus. Epilepsiam quotidie accedentem per setaceum abactam vidit *HILDANUS Cent. I. obs. 41.* Hinc magnifica passim in medicorum commentariis de hoc præsidio encomia, è quibus nominasse sufficit *FONTANONUM lib. I. de morb. intern. curat. c. 15.* *MARCELLUM DONATUM hist. mirab. lib. II. cap. 4.* *SEVERINUM pyrot. chirurg. lib. II. P. I. cap. 6.* *RIVERIUM Cent. II. obs. 93.* *SYLVATICUM Cent. I. conf. 42. 43. 45. 48.* *WEPFERUM obs. 108. 117. 131. 125. 135.*

34. Accedunt aliæ quæ caput infestant morbosæ passiones, quibus idem hoc præsidium egregie accommodum per experientiam compertum. Nimirum, fonticulos in melancholia, mania, catarrhis, paralyti, cephalalgia aliisque prodesse fidem faciunt *RONDELETIUS meth. curand. morb. HORSTIUS lib. II. obs. 9.*

G

GROS-

GROSSIUS *de morb. cap. VIGO lib. VIII. c. 15.* MERCURIALIS *lib. I. cap. 27.* CRATO *conf. 80.* CORLIUS AURELIANUS *lib. III. c. 1.* Potissimum in apoplexia utiles deprædicat NYMANN *de apopl. cap. 46.* nec non FAVENTINUS *in med. empir.* De catarrhis capitis hoc pacto resiccandis luculenta sunt SOLENANDRI verba *conf. XI. sect. I. vix credi potest*, inquentis, *quam eximium in destillationibus sit remedium fonticulus, ratio hoc ipsum docet, & frequens experientia facile comprobatur.* Multus quoque est in commendando hoc auxilio WEPFERUS, quippe qui istud *in observat.* suadet in obtusione capitis, hemiplegia, vertigine, aurium tinnitu, auditus difficultate, narium foetore, memoriæ abolitione ejusque defectu, ozæna, genæ ulcere. Idem passim facit SYLVATICUS, ut *conf. 38. Cent. I.* in vertigine, 29. in gravitate capitis, *conf. 46. & 74.* in melancholia, *conf. 100.* in catarrhis, *Cent. IV. conf. 23.* in herpete menti, *conf. 33.* in aurium tinnitu; in locutione læsa *conf. 28.* vitiis gingivarum *conf. 27.* tuberculo in naso *conf. 26.* ulcere cancroso narium *conf. 25.* narium angustia *conf. 24.* sibilo & gravi auditu *conf. 21.* gravi auditu *conf. 17.* Quo etiam referenda observatio de salubri effectu fonticuli in polypo narium, inserta M. N. C. *Dec. I. An. IX. & X. pag. 28.*

35. A capite descendimus ad pectus, inquisituri, quid de hujus chirurgicæ medendi rationis usu in ipsius affectibus, per experientiam confiet. De hoc luculenta sunt SCULTETI *tab. 43. armam. chirurg.* verba: fonticulos in thoracis, cordis & pulmonum affectibus magnum & mirandum præstare auxilium. WILLISIUS allegatus in *Praxi Barbetti. pag. m. 121. ad pectoris*, inquit, *morbos fontanella inter homoplatas, item in brachio, aut crure, ad humores versus pulmonem affluentes, evacuandos, aut anticipandos, etiam propter eosdem illuc depositos avocandos, conducunt.* Inprimis ad phthisin laudantur fonticuli à Christ. BENED. *theatr. tabid. pag. 29.* Et HILDANUS *ep. 49. fonticulorum*, ait, *beneficio, phthisicos & semiphthisicos, qui sanguinem simul & pus expuebant, sanatos fuisse, his meis oculis vidi.* Idem de setaceis affirmat *Cent. I. obs. 41.* Quin *Cent. III. obs. 28.* exemplum affert matronæ, quæ non solum materiam purulentam, sed etiam sanguinem exspuit & in hecticam cum totius corporis extenuatione & virium prostratione incidit, setaceo tamen cum omnium admiratione sanitati perfecte reddita; nec non *epist. 66.* antifistulam à catarrhis pulmonum tabem inducentibus setaceo liberatum esse, prodidit. AQUAPENDENS etiam *l. c. p. 15.* graphice scribit: *ego libere & ex animo testor, me in praxi vidisse empyematium, quotidie pituita catinum extussentem, per fonticulum sanitati fuisse redditum.* De difficultate autem spirandi CAPIVACCIUS *conf. 97. ap. Scholz.* tradit: quotidiana exploratum esse experientia, anhelitus difficultate vexatos, fonticulo in brachio incredibilem percipere utilitatem. Hinc sæpe admodum in consiliis suis adversus pectoris morbos hoc remedium eximie suadet SYLVATICUS, ut *conf. 56.* adversus palpitationem cordis & spirandi difficultatem, *conf. 51.* tussim & asthma, *conf. 46.* ad tussim, raucedinem & difficultatem spirandi, *conf. 39. 40. 42. 43.* ad phthisin, nec non *conf. 36.* contra tussim & sputum cruentum cum febre.

36. Ad morbos, qui in abdomine sedem obtinent plurimos, fonticulos utiles esse perhibet SYLVATICUS, & eisdem *Cent. II. conf. 74. & 75.* commendat ad dolores ventris, *conf. 92.* in diarrhœa & dysenteria, *Cent. III. conf. 3. 4. 8.* in dolore colico, *conf. 26.* in cachexia, *conf. 65. 67. 68. 69.* in dolore renum, vitiis vesicæ & mictus, *conf. 92. 96.* in nephritide & colica, *cent. IV. conf. 1. 2.* in pollutione nocturna, *conf. 7. 9. 14.* in affectibus hystericis, *conf. 19. 20. 28. 29.* in fluore albo *conf. 40.* in sterilitate. Maxime om-

nium vero dignum est quod totum transcribatur SCULTETI *l. c. tab. 43.* testimonium de egregia fonticulorum in affectibus uteri utilitate, ita habens: *fonticulus in femore in hystericis affectionibus efficacissimus, revelando & derivando, curavi eo mulieres, quæ ob suppressionem mensium uteri furores aliaque symptomata sunt passæ; cui addenda merito observatio in M. N. C. Dec. I. An. IX. & X. pag. 46.* de eximio ad fluxum menstruum ex fonticulis præsidio. Neque minus egregie de fonticulorum in morbis infimi ventris usu scribit WILLISIUS *l. c. fontanella*, inquit, *in dorso, ad nephritim & colicam omnem morbi fomitem anticipanda eamque, dum ad nidos suos tendit, intercipiendo, egregia conferunt.*

37. Superfunt vitia, quæ artus externumque corporis ambitum obsident. Ex his primum commemorandi varii generis dolores. In coxendicis quidem afflictione dolenti pridem unctiones commendavit HIPPOCRATES *sect. VI. aph. 60.* & vix in ulla passione tam magnifice de fonticulorum & setaceorum usu, quam in hac, sentiunt scriptores medici. In hac ipsa enim magnopere prodesse fonticulos testatur SCHULZIUS *M. N. C. Dec. I. Ann. III. obs. 156.* MERCATUS *lib. I. de rect. præf. art. med. 115. cap. 16.* FORESTUS *lib. XXIX. obs. 22.* Instar omnium vero esse poterit SCULTETI *l. c.* testimonium, asserentis: se ipsum sibi contra hoc doloris genus summo & felicissimo cum successu fonticulum parasse inter principia musculi gastrocnemii. *Quare, pergit, si in futurum in tali cruciatus ischiadis diuturno, tam interna, quam externa remedia sine successu usurpata fuerint, meo consilio & bona spe salutis, ad hanc Chirurgiam tanquam sacram anchoram confugiant.* Idem sentit WILLISIUS *l. c.* scribens: *per fontanellam in inguine lumbaginem immanem, quibusvis aliis remediis obstinatam, inque alio affectionem ischiadicam inveteratam, feliciter olim sanavi.* Neque minus HILDANUS *Cent. IV. obs. 75.* dolorem ischiadicum, cum pruritu totius corporis, fonticulorum solummodo usu discussum esse, auctor est. Et idem remediæ genus in eodem morbo dilaudat SYLVATICUS *Conf. 88. & 90.* Setaceo quoque per furas trajecto ischiadicam passionem discessisse RIVERIUS *Cent. II. obs. 100.* pluribus fidem facit.

38. Podagræ apprime conducere fonticulos SCHOLZIUS *epist. X. SCHORERUS tr. german. von Fontanellen*, nec non CAPIVACCIUS *sect. 1. lib. V.* pluribus confirmant: & adversus dolores artuum & arthritidē eisdem ex usu esse non sine ratione SYLVATICUS *Cent. III. 99. 100. & 83.* censet. Quin in *M. N. C. Dec. II. An. VII. obs. 189.* narratur exemplum rustici, qui diu arthritide afflictus, ulcere, quod vocant *einen Schvvarz*, in tibia demum affectus est, quod ad consolidationem perducere noluit, sed fonticulum ex eo paravit, tam salubri effectu, ut ab omni dolorum recursum immunis posthac manserit. Pruritus manuum fonticulo in brachio sustulit GLANDORPIUS, & pruritus scroti fonticulo in femore WEDELIUS, allegante FASCHIO in *dissert. de fonticulis.* Denique etiam ad ulcerum antiquorum & mali moris consolidationem magnum quoque in fonticulis repositum præsidium, ut etiam SCULTETUS *l. c.* plures, qui ulcera in tibiis habuerunt dysepulotica, iisdem se curasse tradat; & AQUAPENDENS *l. c. p. 382.* senem, tibiam mirum tumidam cum ulcere gestantem, fonticulo supra genu in coxa sanatum esse, perhibeat. Quibus omnino penitus respondent, quæ SYLVATICUS de fonticulis in ulcere ani, tumore scroti, doloribus & ulceribus ex inquinamento venereo, inurendis, idemtidem in consiliis suis præcipit, & quæ in *M. N. C. Dec. I. Ann. III. pag. 396.* relata leguntur.

39. Tam spectata igitur in variis chronicis passionibus fonticulorum & setaceorum est, ipsa experientia

tia teste, virtus. Ex acutis autem potissimum in peste eorundem usus in commentariis medicis ut salubris de-
prædicatur. Testatur id proprio exemplo SCIPIO MER-
CURIALIS, nec non HILDANUS *Cent. VI. obs. 92.* memorans: se peste Bernensi cum uxore quidem peste correptum, sed non adeo periculose laborasse, & cau-
sam rejicit in fonticulos, quos in cruribus gestavit,
eo quod fonticuli & setacea sint præstantissimum præ-
servativum tempore pestis, ut in bina peste observa-
rit, ita ut ex viginti sex, vix tres obierint, licet per-
petuo circa agrotantes versati sint. CLAUDINUS quo-
que *emp. f. 197.* neminem Venetiis peste correptum
fuisse refert, qui fonticulum in pede gestavit. Hinc
WILLISIUS *de febr. cap. 13. fonticulos*, ait, à caute-
riis excitatos, adeo omnium pæne suffragiis præservatio-
nis gratia contra pestem usurpantur, ut eorum usus vul-
go frequentissimus existat. Eadem est sententia FINCKE-
NAU in *diff. de fonticulorum usu tempore pestis*, qui eos-
dem præservatorie & curatorie commendat. Præserva-
torie maxime, quod semper aliquid de materia corru-
pta evehatur & sic, quo minus omnimode à peste cor-
ripiatur corpus, præcaveatur, idque se crebrius obser-
vasse scribit in iis, qui infecti tumores nacti, fonticu-
lo excitato evaserunt. Curatorie autem adhibendos esse
tum, quando à contagio pestifero aliquid ad glandulas
delatum, & periculum, ne relabatur ad interiora, id-
eoque ipsi tumori inurere suadet fonticulum. Et quæ
plura eandem in rem memoriæ prodita sunt à KIR-
CHERO *de peste*, FONSECA *conf. 49.* DIEMERBROECK
de pest. lib. IV. hist. 110. FORESTO *lib. VI. obs. 15.*
QUERCETANO *lib. II. cap. 2.* nec non DOLÉO *ency-
clôped. pag. 326.*

40. Adduximus hætenus ex probatissimis tam prif-
ci, quam recentioris ævi auctoribus luculentas observa-
tiones, quæ insignem usum & setaceorum & fonticu-
lorum in multis & valentibus morbis, iisque maxime
chronicis, mitigandis, æque ac sanandis, abunde con-
firmant. Jam sequitur, ut hanc experientiam, ne fallax,
sed fida & certa sit, solidis & firmis rationibus sufful-
ciamus, & modum, quo salubris hic succedit effectus,
dilucide monstremus, addendo demum utiles cautio-
nes in applicatione studiosè tenendas. Et primo quod
attinet ad operandi rationem, hæc quidem multis ob-
scura adeo visa fuit & imperceptibilis, ut ipsum re-
medium omni propterea usu carere putarint. Autu-
marunt quippe, quum sanguis & fluida perenni mo-
tu per vasculosam corporis compagem circumagantur;
omnem illum qui ex faucibus, sive per vulnera, sive
per ulcera, vasculis effluit humorem, à sanguine, me-
diante cordis & arteriarum impulsu, ad partes adve-
cto, materiam & ortum nancisci, ita, ut qualis san-
guinis & feri sit conditio ac status, etiam sit illius suc-
ci, qui ex ruptis & discissis fibris & canaliculis effluit.
Jam autem supposito, quod corrupta & impura ma-
teria insit sanguini & corporis succis, quæ morbi ma-
teriam præbeat, adeo tamen exiguum dicunt esse id,
quod quotidie exstillat, & præterea adhuc noxium cum
utili & nutritio inime sic esse mixtum, ut parum uti-
litas ab hac excretionem sperari possit. Et quod maxi-
mum, longe commodius & efficacius serum morbi-
cum, vel quantitate, vel intemperie perversa peccans,
per alia loca & emunctoria, uti per cutis cribrum, per
renum tubulos, vel etiam per alvum, intestinales glandu-
las & excretorios hepatis poros, quin ipsas etiam sa-
linales glandulas posse secerni & excerni, quam per
ejusmodi præter naturam plane novas & largiori eva-
cuationi minus aptas vias.

41. Alii Philosophiæ Cartesianæ & corpuscularis
præceptis imbuti, uti Muys in *prax. ration.* modum,
quo fonticuli & setacea effectus suos edant, mecha-
nica prorsus ratione ita concipiendum esse conten-
dunt, quod serum in omnibus omnino ulceribus, ad-
Frid. Hoffmanni Oper. Tom. VI.

eoque etiam fonticulis, stagnans foetidum primum
fiat & corrumpatur, corruptum postea efformet po-
ros & canaliculos in carnosâ & vasculosa substantia
sibi similes, id est, qui figura sua respondeant figu-
ræ particularum impuri & corrupti in sanguine hu-
moris, ut adeo in tale ulcus nihil aliud emittatur &
admittatur ab humoribus eo circulationis lege allatis,
quam quod corruptum & à porulis suscipi potest.
Afferunt etiam in confirmationem experimentum, de
filtro ex charta emporetica confecto, quod intinctum
prius in aquam, & infusa postea mixta oleo aqua,
tantum aquam, oleo autem immersum, indito eo-
dem mixto liquore, nonnisi oleum transmittat. At
vero, quam infirmis in genere argumentis nitatur, &
quam longe à veritate discedat, illa à pororum figu-
ra desumpta secretionum ratio, nemo non novit; de
experimenti autem allati veritate merito dubitandum,
quum non modo alii istud contrario plane successu,
teste CL. WEDELIO, ceperint, sed & nosmetipsi oleum
& aquam simul per chartam emporeticam transudasse
viderimus, licet prius vel oleo, vel aqua, eandem im-
buerimus.

42. Quamvis vero non negandum, sufficere in sta-
tu naturali & ad tuendam valetudinem fabrefacta in
corpore humano emunctoria impuris & superfluis hu-
moribus educendis, atque etiam excretionibus per al-
vum, per cribrum cutis, renes, glandulosas intestino-
rum & narium tunicas, ipsasque salivales glandulas
ad curandos morbos multum facere & sanguinem
egregie depurare; nihilo tamen secius extraordinariæ
per ulcera partibus inductæ evacuationis egregii sunt
usus, effectum nempe non tantum evacuatorio univer-
sali, verum etiam particulari derivatorio. Etenim,
quamvis exiguum sit humoris serosi, quod effluit; ta-
men quia fluxus & continuus & quotidianus, potest
utique quippiam conferre ad imminuendam copiam
feri præternaturalem. Derivatorius autem & particu-
laris effectus longe eminentior est. Scilicet, causæ ma-
teriales, quæ motus præternaturales & turbulentos mor-
bosos in corpore creant, sunt potissimum stases & sta-
gnationes sanguinis, feri, vel etiam alius humoris in
nervosis & exquisitè sentientibus locis, quæ vel acri-
monia hostili rodente vellicant, vel copia sua premunt
& comprimunt, & sic dolores, spasmos, inflamma-
tiones, tumores & alia gravia symptomata cient. Et
strictius quidem loquendo, consistunt hæ stases & sta-
gnationes, præsertim feri, in vasculis minutissimis ca-
pillaribus, quæ ex finibus arteriolarum ad latera emer-
gunt, & succum vel nutritium, vel excrementitium
vehunt, in quæ si delabatur, vel etiam impetuose ur-
getur humor intemperatus nimis & præter naturam
crassior, obharefcit ibi, nonnunquam perrumpit &
partem cui infidet, moleste afficit, ut variæ consequan-
tur morbosæ passionibus, pro diversitate loci qui patitur
discrepantes.

43. Hinc si contigerit, ut pericranium totum à sub-
sistente humore patiatur, atrox oritur capitis dolor, si
dimidia tantum hujus pars, hemicrania, si circum-
scripta regio, clavus. Ubi stagnans acris liquor in
membranis, quæ investiant cerebrum, sedem figit,
epileptici, ubi in membranæ spinalis medullæ, con-
vulsivi præsto sunt artuum motus. Quum principiis
nervorum opticonum tenax incumbit, gutta fit serena,
spinalis autem medullæ, paralyfis & hemiplexia.
Quando humor sanguineus in tunica quæ oculi bul-
bum cingunt incarceratur, ophthalmiæ, & quando
serosius acris ibidem copiosius colligitur, vasa distendit
tandemque exstillat, lippitudines, feri falsi, acris sa-
pius corrosivi, cum dolore & ardore defluxiones ac
visu imminuto emergunt. Humores serosi, vel lym-
phatici, membranæ musculorum nerveis firmiter inhæ-
rentes, dolores pressorios spasticos molestissimos,

præsertim nocturno tempore, cum notabili frigoris sensu junctos excludunt, qui rheumatismi nomine veniunt, & plurima loca, solenniter vero homoplasas & humeros, infestant; & in affectis sic partibus à lymphâ acriter tanta est constrictio, ut ex iisdem ne gutta sudoris profluat, licet totum reliquum corpus sudore diffuset, si vero scarificantur, plus feri, quam sanguinis extrahitur. Idem vitiosum & acre viscidum serum intra membranas & ligamenta nervea & glandulosa articularum subsistens, pro locorum diversitate eorumque diversa denominatione, modo ischiadicis, modo podagricis, modo gonagricis, nec non arthriticis parit dolores; in cutis autem tubulis & glandulis firmiter detentum, impetigines, herpes, lichenes, pustulas ulcerosas, in facie guttam rosaceam & varos gignit.

44. Hisce omnibus morbis, quia partim à firmiter inhaerente, partim & extravasato humore fiunt, ulcera arte facta, quæ fonticuli audiunt, omnino succurrere possunt, eo quod, facto ejusmodi in parte vicina emissario, corrupto & incarcerato quasi humori, exitus paratur & facile præbetur. Nam in genere in excretionis, quæ per vesicatoria & fonticulos fit negotio, id merito tenendum esse arbitramur: non omnem secretionem & humoris excretionem intra vasa & tubulos fieri mediante motu progressivo circulatorio, sed per porosam etiam partium solidarum substantiam, dum vasorum alveis elapsus humor, calore & motu tonico extraordinario fibrarum ab una parte ad alteram dimovetur tandemque emovetur. Testatum hoc faciunt varia, quæ subinde obveniunt phaenomena. Quando pedibus hydropicorum oedematis levis plaga infertur, brevi tempore magna quantitas feri extravasati, hac data porta exsillat, quod nequitiam per arteriolarum pulsus ejicitur, sed ipsa sua gravitate & motu fibrarum interno adjutum, elabatur atque prodit. Materia purulenta in abscessibus & ulceribus partium externarum collecta, solo terrore aut refrigeratione intensiori, vel medicamento dolorem excitante reprimitur & transfertur sæpe ad loca vicina & interna, non sine periculo. Novimus glandularum colli & parotidum insignes in infantibus & adolescentibus tumores medicamentis reprimentibus abactos, ubi humor deleterius è sede pulsus ac in pectus delapsus asthma convulsivum, immo ipsam phthisin & ulcus pulmonum insanabile fere excitavit. Et nihil quoque familiarius, quam quod materia ulcerosa in scabie humida, per porosam fibrarum & vasorum texturam repellatur cum præsentaneo subsequente damno. Quidni etiam humor interius obhærescens eodem modo per poros ad loca externa meare, foras propelli & excludi poterit? Certe copia feri, quæ in hydropicis per sorte drastringum alvo excluditur, non adducitur, mediante pulsu, per arterias ad tunicas intestinorum glandulosas, sed veri est simillimum, quod per poros vasorum foras intro spectantes & per porosam partium fibrosarum substantiam ad intestina transeat. Atque adeo clarissime patet: fonticulos non modo evacuationem humoris præbere universalem, id est, quæ ex tota sanguinis & humorum massa procedit, sed præcipue localem, sive partialem & derivatoriam, dum ex imis ad extimas ad se quasi alliciunt, trahunt vel etiam revellunt.

45. Nunc facilius explicanda venit causa, cur consolidatio fonticulorum magno sæpe conjuncta sit cum periculo, ut non modo morbi priores sublatis repetant & recrudescant, sed non raro etiam graviores, immo funesti affectus, in aliis & remotis locis suboriantur. Ueberius hanc noxam testatam faciunt peritiores medentum ex antiquis & recentioribus. CRATO longævus ille, felix & prudens medicus, in consiliis & epistolis, quas collegit SCHOLZIUS *epist.* 174. item *conf.* 221. scribit: *multis exemplis erudimur, quam gra-*

ves subito affectus, immo mors ipsa, fonticulos, præsertim in pede clausos, consequantur. Ex Arabibus RHASES *lib. de aff. junct. tit. XVI.* gravissima sæpe vidit symptomata fonticulo coeunte. LAELIUS à FONTE *consil. pag. 56.* asthma, MERCURIALIS *tom. IV. pag. 175.* podagram, HORSTIUS *lib. IV. Part. II. obs.* 15. spirandi difficultatem cum anasarca, coalescente fonticulo, annotarunt. Quumque ab antiquis pedum ulceribus ad consolidationem perductis pulmones labe & ulcere affecti, multoties à Practicis observati sint; nullum utique dubium, à fonticulis diu cum fructu gestatis & intempestive clausis, præsertim in impuris corporibus, quin idem possit contingere. Causa hujus effectus non alia videtur subesse, quam quod ab ulceribus, sive arte, sive sponte factis, ob effluxum qui simul contingit humidi nutritii, debilis & imbecillis omnino pars cui insident reddatur, ideoque, deficiente debito ad propulsionem toni robore, major fiat ibi affluxus & stagnatio humoris, qui tam copia, quam qualitate delinquens, si exitum fortitur, pro sanitate est, ubi vero ipsius excretio, viis & orificiis ductuum clausis & constrictis, impeditur, remanet ob partium vicinarum infirmitatem, copiosior humoris serosi affluxus & stagnatio, majorque ex longiori quiete accedit corruptio, unde non mirum est, in laborante parte, aut pristinum vitium resurgere, aut, si humor inquinatus & malitiosus, vel vitalibus succis immixtus manens, vel receptus iterum per poros in vasa, mediante sanguinis circulo ad alia loca desertur, pessimas passim propullulare ægrotudines. Nos certe sæpius observavimus, post morbillos vel variolas in pueris oculorum acres defluxiones, quæ non nisi appposito in nucha setaceo cessarunt, sublato autem postea setaceo, protinus de novo oculos infestarunt.

46. Jam etiam facile ratio patefcit, quare à tinea capitis, vel scabie humida in pueris perperam curata, insultus epileptici, vel asthma convulsiva subnascantur, quæ postea appositis vel vesicatoriis, vel fonticulis in brachiis, aut pedibus, conquiescunt. Novimus exempla, ubi à materia arthritica & podagrica ad internas partes relapsa, vel etiam non sufficienti vigore expulsa, spasmodicæ constrictiones diaphragmatis, ventriculi & intestinorum non levem formidinem inducentes, omnibus aliis frustra datis internis, apposis in brachio vel pedibus fonticulis, sublatis fuerunt. Neque certe experientia suffragio destituitur, phthisin posse eodem pacto præcaveri, si nempe ortum trahit ex acri & impuro humore à partibus superioribus capitis, faucibus, vel tumoribus glandularum internis & externis descendente ad pectus, & huic ulcere in costis, vel in scapulis excavato, via ad exitum paratur. Atque adeo luculenter utique innotescit: magni in arte medendi momenti esse medicationem, quæ ad feri impuri, non tantum evacuationem, verum etiam derivationem, immo revulsionem directa, uti quidem jam in sanguinis missione aliisque excretionibus pridem est nobilitata.

47. Altioris indaginis quæstio: qua ratione cauteria, fonticuli & setacea, partibus capitis externis applicata, apoplexiam serosam, hemiplexiam, paralylin, guttam serenam, cephalalgiam inveteratam, vertiginem aliosque graves admodum cerebri morbos, qui ab humore seroso firmiter insidente imis cerebri partibus, originem trahunt, abigere & partes internas liberare queant? Jam vero experientia uberius confirmat, quod in his morbis setacea nuchæ injecta, vel cauteria applicata loco ubi futura coronalis & sagittalis concursus est, egregiam tulerint opem, potissimumque majores nostri mirifice hunc in finem commendarunt fonticulum capiti, ubi futura committuntur, inductum, uti quidem patet ex AQUAPEND. *pag. 12. 13.* SOLINGEN *oper. Chirurg. P. I. c. 1.*

I. c. I. FIENO *de cauteriis cap. 22.* SEVERINO *lib.*

II. *pyrot. chirurg. p. 2.* Sunt quidem nonnulli ex recentioribus, qui periculosum modum applicandi cauteria tam actualia, quam potentialia, in hoc tam sensili & nervoso loco, ubi in commissura futuræ coronalis & sagittalis duræ matris & pericranii est connexio, censent, eo quod ob dolorem ibi quam facile possit inflammatio suscitari. Verum frustraneus est metus, propter multiplicem jam ab omni ævo innoxium & felicem usum, & potius admodum credibile, quod dolor major, quem producit chirurgica hæc operatio, multum ad feliciorum operationem conferat, eo quod recensiti capitis morbi à lymphâ glutinosa, intra anfractus & membranas cerebri detenta & à torpore spirituum & motuum maxima ex parte oriuntur. Profunt itaque hoc in loco apppositi, non tam ad evacuandum humorem noxium intus latentem, quam potius ad tonum excitandum & motum aliter determinandum, ut quod subsistit è loco suo dimoveatur, non secus ac ipsa vesicatoria, præsertim ea quæ cantharides habent, non tantum excernendo, verum etiam systema nervorum afficiendo motusque excitando, conducunt.

48. Singularis adhuc fonticulorum in arte medica usus est, quod conditionem atque temperiem & fluidarum & ex parte etiam solidarum partium extraordinariam prodant ac detegant. Nimirum, firma & quotidiana constat experientia, quod, qui fonticulos gerunt à paulo diuturniori usu insalubrium & valde intemperatorum alimentorum, v. g. acidorum, salis, acrim, calidiorum, ut piperis, allii, molestas quasdam affectiones, punctiones, dolores, rubores, tumores & alia insolita accidentia ibi percipiant. Crebrius quoque observatur, quod à graviore animi affectu, præsertim ira, tristitia ac terrore, item ab insigni & præternaturali temporum & tempestatum constitutione, extraordinaria quædam sensatio in locis, ubi fonticuli apppositi, ipsiusque fonticuli insolitus aspectus, adfit. Præterea, quando in morbis intensior spastica contractio, vel stomachum & intestina, vel diaphragma petit, ut in hysteriis & hypochondriacis, item in colica convulsiva, asthma convulsivo, tunc statim etiam compatiuntur fonticuli, ut vel exsiccentur & claudantur, vel dolorifice cum rubore afficiantur. Quinimmo præternaturalis siccitas, livor & palor fonticulorum arguere aliquid damni in œconomia animali solet, & nihil familiarius est, quam quod ante mortem fluxus humoris per hæc ulcera plane cesset. Ex quibus quidem omnibus merito eliciendum est, tum ingentem partium fluidarum & solidarum in corpore humano dari conspirationem & una parte affecta alteram statim etiam pati, tum quod non secus, ac ex naturalium excretionum, quæ per vesicam, alvum & cutem fiunt, constitutione, ita etiam ex ulcerum & excerniculorum horum insueta & extraordinaria conditione, sanitatis & morborum indicia, fluidarum & solidarum partium natura, indoles atque constitutio à prudenti medico perspicui possit.

49. Neque etiam omittendus aut floccipendendus ille fonticulorum secundarius quasi usus, quem in corpore, cui jam inducti, in sanitatis tutelam præstant, dum præbent emunctorium, in quod velut incile confluit & rejicitur, si forsân corpus noxia & morbum minitans subiit materia. Et certe plura sunt quæ hoc confirmant obvia subinde phænomena. Crebrioris quippe observationis est, loca illa, ubi fonticuli existunt, præsertim in

Frid. Hoffmanni Oper. Tom. VI.

pedibus, ex facili tentari erysipellate, sive animi affectus, sive alii errores commissi causam præbuerunt. Attentior quoque docet experientia suscepto intus morborum epidemicorum contagioforum ipsiusque pestilentiae miasmate, proinus fonticuli excerniculum inde mutationem experiri & frequentissime inflammatorii quippiam cum dolore & rubore in ipsius confiniis comparere. Luculento utique indicio, autocratiae naturæ tribuendum esse, ut ad partem hanc debilem & languidam humor, qui in vitio est & morbum minatur, ad promptam secretionem & felicem excretionem transmittatur.

50. Restat demum, ut exposita fonticulorum operandi ratione, de recto eisdem usurpandi & perite tractandi modo utiles pariter ac necessarias practicas regulas subnectamus.

I. Quando morbi capitis à congestione & impetu sanguinis & humorum ad superiora oboriuntur, frustraneus, vel plane noxius est fonticulorum usus, sed præstat tunc potius sanguinis, quam feri excrementitii, evacuationi invigilare.

II. Ubi dolores capitis acuti, item motus convulsivi & epileptici, tenera & sensibilia corpora diu detinent, minus tuto in locis sensibilibus & nervosis, ut in nucha, vel pone aures, vel in futuris admoventur cauteria & fonticuli, sed si forsân indicatio est, melius brachiis vel pedibus imponuntur.

III. Non tam facile nec statim, ad ejusmodi molesta & diu vexantia remedium genera descendendum est, si res commodiori ratione expediri & causa morbi per præparantia, corrigentia & per naturales excretionem tolli potest, sed tunc demum, quando hæc frustra adhibita, & morbus diutius partem afficit ac detinet, verbo: si læsio magis particularis, quam universalis est.

IV. Neque etiam in morbis externis his solum fidendum, sed præmittenda, imo adjungenda, interna & alia externa, quæ morbo expugnando serviunt præsidia, quibus etiam adhuc paulo longius insistendum, inprimis quando spes sanitatis per eadem recuperandæ affulget.

V. In senibus, qui solenniter dyscrasia falsa scorbutica laborant; item in ipsis scorbuticis, ad præcavenda, vel minuenda symptomata, non inutiliter parantur ejusmodi per artem ulcera, tutius tamen id fit in brachiis, quia facilius ibi inflammationes & ulcera tolli possunt; sed si semel inducta, sedulo providendum, ne forsân coeant aut consolidentur, eo quod, quo magis corpus est impuris succis refertum, eo majus periculum imminet, quando exitu præcluduntur & emissarium aboletur.

VI. Magnam cautionem consolidatio & exsiccatio horum ulcerum desiderat, ne inde gravius damnum emergat. Proinde non facile admittenda in senibus & adultis, sed potius in adolescentia, juvenili ætate, & corporibus quæ adhuc crescunt, sique prius probe consisterit, omne vitium & omnem intemperiem massæ sanguinis esse sublatam. Hinc, antequam id fiat & postquam factum, temperantibus & evacuantibus commodis utendum, & pars ubi constitit fonticulus subinde spiritu vini camphorato inungendus, vel vino calido diligenter fovendus.

VII. In cachecticis & hydropicis corporibus non sine periculo fonticulus excitatur, quia facilis est in sphacelum transitus. Perite enim monet AQUAPENDENS *operat. chirurg. P. I. pag. 222. Maximum*, inquiens, *imminet periculum dum fiunt, ne sphacelus partem calore depauperatam apprehendat & occupet, qui brevi hominem intermat.*

78 De opiatorum nova eaque mechanica operandi &c.

VIII. Quando exulceratio, ut interdum fit in senibus & scorbuticis, circa partem, in qua gestatur, nascitur, vel etiam dolor & tumor urget, tunc epithema, quod aquam calcis vivæ, aquam floram sambuci, l'eau d'arquebuse, saccharum saturni & camphoram habet, cum fructu applicandum, quo in ejusmodi casibus nihil præstantius, nihil utilius.

IX. Incidit interdum, fonticulus nihil amplius humoris fundere, sed siccescere & consolidationem subire, tum utile globulum ex cera viridi indere, vel si hoc fluxus non repetit, pauxillum emplastri vesicatorii admiscere.

X. Quando caro spongiosa in cavo fonticuli succrescit, pulvis ex alumine usto & mercurio præcipitato rubro compositus & inspersus instar omnium est.

XI. Locus cui tutissime & quam optime inducuntur fonticuli, est inter spatium duorum musculorum, vitando eorum tendines & nervos, ubi nostro tempore incisione lancetæ, rejectis omnibus cauteriis, tam actualibus, quam potentialibus, commode & cum minori dolore excitari solent.

§ 1. Hæc itaque sunt, quæ de præstantissimo fonticulorum usu medico edifferere placuit, ex

quibus luculenter satis apparere arbitramur, quosdam inter celeberrimi nominis viros, ut HELMONTIUM, CRAANIUM, BONTEKOE, GEHEMAM, DÆLMANNUM, ALBINUM, LIMMERUM, multum errasse, qui vesicatoria & fontanellas è foro medico rejicere & pro remediis mortiferis venditare haud veriti sunt. Neque minus ex hac nostra rationali disquisitione modi, quo operantur ulcera hæc arte facta, irracionales illi mechanismi medici, quo optime nostro tempore res medicæ ad rationes revocantur, ofores intelligent, sterile & ignorantiam prodens molimen esse, in explicando salutari fluentium, & detrimentoso coeuntium fonticulorum effectu, ad internum rationalem & moralem corporis nostri œconomum confugere & loco causarum obscura verba dare, uti quidem nuperius larvatus ille *Ursinus Wahrmond*, præjudiciis occæcatus contra præjudicia in therapia medica infeliciter pugnans fecit, quasi possessor œconomiae vitalis per fonticulos omnibus sese exoneret purgamentis, quando autem contra vitalem consuetudinem, invito vitali principio iidem coalescant, expectandum sit, quid vitaliter eventurum.



D E

OPIATORUM NOVA EAQUE MECHANICA OPERANDI RATIONE.

PRÆFATIO.

NUllum in tota vegetabilium familia reperies medicamentum, quod tam varia fata atque judicia medicorum subierit, & quasi lapis offensionis fuerit, quam opium. Utpote nonnulli tam ex veteribus quam recentioribus illud pro puro veneno habentes ab usu medico plane ejiciendum esse existimant, experientia inducti, inde sæpenumero accidisse soporem, torporem, stuporem, imo ipsam mortem utentibus, vel ad minimum morbos in pejus ex illius usu abiisse. Ex adverso dantur, & maxime ex recentioribus, qui non verentur illud ceu divinum remedium ac præsidium prædicare, quo non detur præstantius ac salubrius ad componendos dolores, somnum inducendum, & vires conservandas, adeo ut quidam non erubuerint dicere, quod de Platero & Sylvio ajunt, qui ex altis quasi tenebris hoc remedium genus protraxerunt, se nolle esse medicos, si opium non amplius proslet. Et Sydenhamius in Ep. 1. pag. 339. item de dysenteria pag. 209. laudat Deum omnipotentem, quod hoc remedium in miseriarum solamen humano generi concesserit, quo non detur salubrius, quod vel pluribus malis emendandis prosit, vel eadem efficacius extirpet. Quin imo non desuerunt, qui pulchro atque eximio labore totos libros de opio in publicum emisserunt, quibus maxime omnium ab insectationibus aliorum id vindicare, & ceu tutissimum ac quasi universale morborum remedium commendare, si prudenter adhibeatur, allaborarunt. Tametsi autem hoc loco animus non sit opiatorum laudes,

virtutes ac damna recensendi, non possumus tamen, quin brevibus affirmemus, opii in medendo usum esse maximum, & ejus quoque abusum, quod omnibus validioribus peculiare est, nocentissimum, ita ut per accidens venenum evadere possit. Imo non veremur experientia atque exemplis variis persuasi adfirmare, abusum hujus remedii prævalere ferme vero hodierno tempore usui, sive plus damni ac detrimenti ab ejus improvido & præposterò usu experiri morbo afflictos, quam utilitatis atque emolumenti. Quod tamen neutiquam imputandum nobilissimæ medicinæ, sed potius medicorum imprudentiæ ac ignorantie, qua sæpius efficitur, ut nobilissima remedia incurrant vituperationem. Quemadmodum autem in foro medico varia prostant autorum circa opiatorum efficaciam opiniones atque dissensiones; ita circa illorum modum agendi tanta deprehenditur sententiarum diversitas, ut certe quis nesciat, cuius partes sequi debeat. Quandocunque autem illas accuratius perspicimus atque examinamus, certe parum sufficientes omnes, si verum fateri licet, nobis videntur hætenus receptæ de opiatorum & narcoticorum modo agendi hypotheses. At vero, sicuti omnem operam atque meditationem hætenus eo impendimus ac direximus, ut simplicissimo mechanico motus principio difficillimas causas morborum, & perplexos remediorum effectus summa perspicuitate evolveremus atque explicaremus: ita etiam Numine adspirante in præsentia ausi sumus, difficile hoc negotium suscipere, circumspecturi inprimis, annon ex sanguinis motu anodynorum atque narcoticorum vis atque effectus in corpore humano paulo luculentius simpliciusque demonstrari possit.

Ejus usus in medendo maximus.

De ejus agendi modo multo hallucinati sum.

§. I.

Quemadmodum autem illa hypothesis, semper censetur melior aliisque præferenda, quæ pro fundamento habet principium intellectui facilius, perspicuum, & simplex, cujus beneficio omnia phænomena, omnes effectus cuiusdam rei, cui applicari debet, apte & cum connexionione deduci, explicari, confirmari ac perspicua reddi possunt, nulla ingenti difficultate, vel dubitatione remanente: ita primum omnium incumbit necessitas illis, qui aptam hypothesin, sive congruum explicandi principium invenire volunt, ut omnes effectus, cunctaque phænomena accurate & attente notata, non omitta cuiusdam momenti circumstantia, in medium afferant, quo postea debita facta hujus principii applicatione, ac collatione, ejus cum effectibus, quivis aptitudinem applicationis, & rei verisimilitudinem dilucide cernere atque perspicere possit. Quocirca etiam è re nostra imo perutile arbitror esse, prius exponere notabiliores ab experientia depromptos effectus, quos opiata variis in corporibus, pro diversa applicandi ratione, quoad dosin & tempus produxerint.

§. II. Primum itaque constat de experientia, omnia ex vegetabilium familia, quæcunque acriorem & diuturniorem spargunt odorem, corpori humano interne vel etiam tantum forinsecus adhibita movere somnum, ac somnolentiam & sensuum stuporem inducere. Sique in majori eadem copia & per longius tempus adhibeantur, soporem, capitis gravitatem, stuporem excitando, narcoticum effectum producere. Deinde notatu dignum est, omnia suaveolentia, & vaporosa ad blandum somnum corpus provocare, quod valet maxime de floribus, v. g. rosarum, croci, lil. convall. primulæ veris, sambuci, tilia, acaciæ, aurantiorum, jasinini, lil. alborum, quorum aquæ ritè destillatæ, præsertim cum rore majali, eximiam in epilepsia & affectibus spasmodicis præstant virtutem impotentem effrenatumque spirituum tumultum sedandi. Ad eandem classem ex animalibus referimus moschum, zibethum, ex marinis, ambiram, quæ cerè anodynum effectum debita dosi oblata, etiam in epilepticis insultibus gravissimis non vice simplici præstiterunt exoptatissimum. Ex adverso notamus constanti experientia, quæ gravem, virosum, fixum, & diutius remanentem exhalant vaporem, magis esse stupefactiva quo vires, sensus, atque mentis actiones insigni modo debilitantur, infringuntur imo auferuntur, ex quorum censu sunt papaveris, hyoscyami, solani, mandragoræ species. Ex animalibus autem quæ graveolentia sunt, uti castoreum, rasura unguarum, cornuum, animalia & insecta quædam exsiccata, nunquam narcoticum facile corpori effectum, sed tantummodo spirituum effrenem motum ligando, uti vulgaris fert sententia, dolorificis spasmodicis egregie opitulatur.

§. III. Tertio observamus, nullas res anodyno vel narcotico effectui præditas esse, nisi principio consent vaporabili, quod prout fixioris vel volatilioris indolis est, quo citius vel tardius vapor dissipatur, diversas etiam operationes producit. Unde nitro vel vitriolo, vis narcotica vel anodyna falso adscribitur, quamvis non negamus, hæc ritè parata & applicata in dolorum ferocia demulcenda præstantissimæ efficaciam esse, dum biliosam in prima regione acrimoniam fi-

gunt atque enervant. Ex præmissis porro perspicua esse potest ratio, quare opium non coctum — longe promptius somnum moveat & dolores mitiget, quam si diuturna decoctione vaporabili suo principio orbatum fuerit: item cur semina hyosc. papaveris, quoad oleosam suam pinguem partem minus narcotica sint, quam illorum planta, folia, flores, radices, quæ principio vaporoso, resinoso, utut difficilius exhalante, constant. Et certum porro est, vapores, qui ex fixiori substantia evaporabili tamen, emergunt, gravius affligere cerebrum & vehementius motum spirituum ac sanguinis sistere, & exercitium actionum animalium suspendere, quam si materia ista evaporabilis sit tenuissimæ naturæ, hinc aqua, spiritus opii, aqua florum pap. rhœad. nymphææ, longè mitiores sunt, quam illorum extracta magis fixa & resinosa.

§. IV. Quarto experientia in praxi docuit quotidiana, opiata circumspicte sollerterque præparata & cum prudentia adhibita debita dosi ac tempore, præsertim in personis minus plethoricis & cacochymicis, ætate juvenibus & viris, temperamento sanguineis & cholericis, ubi vires adhuc constant, & pulsus robur atque vim naturæ indicat, securissima & exoptatissima esse remedia in gravissimis doloribus, motibus convulsivis, spasmodicis, nimis sanguinis vel feri profusionibus, vigilisque assiduus. Et contrario comprobavit frequentissima, pro dolor, experientia, & eventus feralis, opiata imprudenter nacta medicum multos homines interficere, vel in peiores afflictiones illos conjicere, imprimis, si non correctæ inque nimia dosi offerantur corporibus debilioribus, imbecillioribus, vel morbo maligno laborantibus, qui pulsum debilem & exilem habent, phlegmaticis, obesis, plethoricis, & alvo adstricta laborantibus.

§. V. Maxime omnium autem notabile est, quod opiata, omniaque narcotica, intempestive adhibita circa caput ac cerebrum & functiones animales potissimum effectum exserere soleant noxium & præternaturalem. Quid enim frequentius est, quam quod horum usum superveniat capitis dolor gravativus, somnus gravis terribilamentorum ac phantasmatum plenus, vertigo ut caput in sublimi servari nequeat, sensuum torpor, rubor & tumor faciei, inflatio venarum capitis languor virium & impotentia motus? Quin imo adnotata etiam sunt à peritissimis Viris adhuc graviora cerebri symptomata incautum opii usum secuta, cujus generis sunt, sopor profundus, stupor, memoriæ extrema amissio. Merentur in confirmationem hujus rei quædam fide dignissimæ adduci autoritates, ex quibus palmam jure præfert Willisus, qui in *Pharmac. ration. part. 1. pag. 292.* notavit, à laudani pillula devorata illico quosdam tam alto sopore obdormivisse, ita, ut nunquam expergeri potuerint. Vixerunt quidem per tres aut quatuor dies, quoad pulsum, respirationem & calorem satis rectè habentes, nullis interim remediis nec vi externa ad sensum & vigiliam revocari potuerunt. Et porro scribit *eodem loco*: Observavi alios ab opio assumpto mediocriter tantum imo interdum parum aut vix omnino dormivisse, quoad pulsum vero & respirationem & calorem mox deterius habuisse. Illi nimirum statim ab hoc pharmaco assumpto languescere, deinde anhelosi magis atque magis deficere solebant, nec cardiacis ullis illorum vigor instaurari potuit, quia sensim fatiscientes vitam exhalaverunt. Idem optimus Autor

Opium enim cum prius somnum inducit, quædam coctum.

Ratio.

Opiata in debita dosi sunt securissima remedia.

Imprudenter nacta medicum multos interficere.

Ab intempestivo adhibito opio, quædam exortantur mala.

Willisus de hisce testimoniis.

80 De opiatorum nova eaque mechanica operandi &c.

lib. de anima brutorum, hanc recenset historiam: vir robustus colica acerrime vexatus, sedandi doloris causa multum opii incaute assumfit; mox autem conquestus est, onus ingens ventriculum aggravare, & durissime opprimere. Amici aquas cardiacas, vinum, & spiritus ardentis exhibent, sed sine levamine. Oppressio latius serpens circa præcordia languores & deliquia excitabat, usque tamen vigil ille & mente constans, tandem spiritus magis ac magis fatiscere inclamans, expiravit post tres horas animam.

§. VI. Præterea quod cerebri, sensuum, nec non ingenii actiones opiatorum improvidus usus lædat, ex singulari obl. quæ recensetur in *Misc. N.C. Dec. I. A. 5. pag. 767.* animadvertere est.

Quidam enim opium in magna quantitate ex errore cum sumpisset, primo insomnia gravia oboriebantur, cum linguæ usu impedito. Post horam superveniebat vertigo, & circumgyratio, coepitque caput turbare. Retulit etiam postea, se cum lecto in aëre suspensum fuisse visum & quasi volitare. Attonitus animus & sui fere nescius perstitit; acetum acerrimum initio propinatum nihil

acredinis habere dicebat, nec spiritum salis ammoniaci odorem habere percipiebat: pulsus erat suppressus: cum clauderet oculos, prorsus extra se positus videbatur, & propinabatur aqua apoplectica spirituosa, qua hausta, illico spiritus recreabantur, sentiebatque se egregie refici. Postea sensit pruritus in toto corpore.

Stalpartius vander wiele obs. XLII. pag. 181. pulchre scribit: caveant atque observent sedulo, quotquot curæ suæ traditos infantes custodiunt, mulieres nutricesque, ne illis, quamprimum molestia doloreve quodam afficiuntur, continuo somnifera propinent. Contingit enim sæpenumero, ut hæc,

quamvis non occidant, infantum cerebrum nervosque tamen crebro usu debilitent, artuum tremorem, paralyfimque, uti ipsa docet experientia, nec non stuporem iis excitent. Scio quosdam, inquit *Willisus Pharm. ration. P. 1. pag. 191.* ab hoc pharmaco ingenii tarditatem & stupiditatem, alios etiam amentiam, contraxisse. Et idem eodem loco pag. 206. scribit: Novi quendam à laudani dosi majori, cum febricitaret, assumpta,

memoriam penitus amississe. *Tilingius de laudano opiato pag. 103.* mentionem historię sequentis injicit: nempe famula loco theriacæ sumfit laudanum opiatum, unde illico sensuum stupor & somnolentia per totam vitam illi adhæsit, memoria amissa, nec unquam priore valetudine recuperata. Et *Schneiderus de catarrho lib. IV. c. 8.* Me non fugit, cujusdam Regis Indiæ filium usu opii mentem memoriamque amississe.

§. VII. Ex hisce dictis clarissime intelligi potest, quare experientia consentiente & testante, opiata tam infesta & noxia sint capiti, quod experimur frequentissime in capitis gravioribus affectibus, nempe apoplexia, epilepsia, lethargo, paralyfi, memoria imminuta, vertigine, qui post opiatorum assumptionem ferme semper ingravescent, & ad majus periculum accedunt. Ita refert *Bartholinus in Act. Hafniens. ægram dolore capitis à narcoticis sedato, ab eo tempore correptam fuisse vertigine, stupore & imbecillitate capitis. In visus imminutione, auditus difficultate plane etiam horum usus exulet. Ita memorabile est, quod scribit *Waldschmidtus in Diss. de opiatorum noxa*: Novi, ait, mulierem, cui hæ-*

morrhagia uteri extremum minabatur periculum, opiatorum usu in cœcitatem incidisse, nullis cedentem remediis.

§. VIII. Opiata porro atque narcotica usum sensuum rationisque disturbant, & amentiam atque delirium sæpe concitant, quod etiam valet de fixioribus istis stupefactivis, solano somnifero sive baccis Belladonnæ, radice & semine hyoscyami, mandragora, lolio, quæ devorata, testantibus observationibus, alienant mentem & in furorem agunt homines, adeo ut dæmoniacci facti videantur. In nonnullis mirabiles convulsiones & membrorum agitationes cum furore efficiunt, qua de re evolvi possunt *Matthias de Lobel in novis stirpium adversariis*: it. *Matthiolum in Dioscoridem pag. 756.* *Wierus de præst. dæm. lib. 7. c. 30.* *Olearius in Itin. Persico. Timæus cas. p. 310.* In mania furorem plerumque augent: quare rectè *Helmontius de Lithiasi* erroris coarguit eos qui maniam opiatum compescere satagunt, cum omne opiatum sit in se amens, quia amentia nihil aliud præter somnium vigilans. Et lib. Retenta, pag. 82. id confirmat hisce: narcotica vix somnum conciliant amentibus quadrupla dosi, sed amentiam insuper augent. *Freitagius lib. de opio cap. 3.* notat ex *Prosp. Alpino & ex Bellonio, Ægyptios & Turcas vesci opio,* ad comparandam alacritatem, audaciam, ven-

erisque appetitum; addunt tamen bene opii hos devoratores, etsi ejus usu rectè valere, & minime lædi videantur, tamen frigidiores reddi, eorum functiones esse deteriores; ebrios & torpidos ferè perpetuo apparere; fieri comatosos, stupidos, inconstantes; modo affirmare, modo negare; adeo, ut caveant tractare & conversari; ut etiam in dicterium, convitio non absimile, quod sibi mutuo objiciunt, abierit; tu edisti opium; non aliter, quam cum nostrates alicui temulentiam exprobent.

§. IX. Præterea opiata motus vitales, nempe cordis & arteriarum valde sistunt, & circulationem sanguinis debiliorem ac languidiorem reddunt: Unde fere ordinario opium pulsus efficit imbecillum, respirationem difficilem, anxietatem circa præcordia, præsertim in iis corporibus, quæ sanguine copioso eoque crasso abundant. Inde jam perspicua reddi potest ratio, quare imbecilliora corpora, in quibus vires languent, & qui malignis morbis detinentur, ex facili ab opiatum assumptis trucidentur, dum ultima virium dejectio, syncope, & postea ipsa mors succedit, unde lethales opii eventus passim animadvertere licet in observationibus. Ita febre ardente, referente *B. Frid. Hoffmanno in M. M. pag. 370.* laborans *Physicus Hallensis* ad vigilias continuas sistendas laudani grana aliquot sumebat, & sic æternam sibi accelerabat quietem. Sic *Sanctorius Methodo vitandi errores lib. 8. c. XII.* scribit, se vidisse in finitimæ Hungariæ locis militem, qui cum sump-

isset septem opii pillulas confestim cum impetu spiritum traxisse, ut paulo post deficeret, & è vivis discederet. Commemorat quoque *Forestus l. 9. obs. 14.* de caco-chymico, cui cum imperitus medicus in dolore calculi stupefaciens exhibuisset opium, eo accepto non amplius vigilasse ægrum, atque ita, quem dormire voluit, excitare postea non potuit. Conferantur hanc in rem exempla, quæ extant apud *Willisium cit. loco pag. 392.* *Sennertum prax. l. 6. p. 7. c. 1.* Illud tandem mirabile est, quod opium ano immisum per suppositoria vel clysteres multis mortem conciliaverit. vid. plura exempla collecta in *Tilingio de opio p. 46. it. in Sennerto lib. 6. prax. parte 7. c. 1. Nec non Marcello Donato de historiis medicis mirabilibus lib. 4. c. 18.* quod mea sententia ex eo

accidit.

accidit.

accidit.

accidit.

accidit.

accidit.

accidit.

accidit.

accidit.

accidit.

accidit.

accidit.

accidit.

Historia
cujusdam
qui nimium
opii devoraverat.

Stalpartius
de Opiatis
Observatio.

Tilingius de
laudano
opiato.

De Narcoticis
Observatio
Bartholini.

Waldschmidtus.

Narcotica
homines in
furorem
agunt.

Opio vescitur
Turca ad comparandam
alacritatem.

Pessima
tamen inde
oriuntur
Symptomata.

Quo pacto.

Hujus rei
Exempla
ab Hoffmanno,
Sanctorio,
Forestio,
Willisio
& aliis
producta.

De opiatorum nova eaque mechanica operandi &c. 81

accidit quod sphacelum, sistendo & cohibendo sanguinis motum, istis partibus inducit.

§. X. Ultimo loco non possumus, quin mentionem faciamus, opium in venerem armare, ac alacritatem crudelitatemque conciliare. Celebris ideo ejus usus apud Turcas & Indos, qui ex purissima opii lacryma per fermentationem suam maslach faciunt, potum valde inebriantem & dementantem, quo utuntur praelium & foeminas inituri ad utraque praelia excitandi. Confirmat id ipsum relatio *Job. Jac. Suar. Itiner. Ind. Orient. p. 11.* qui expressis verbis scribit, parare Indos in Bandam electuarium ex opio, quod Affion vocant, coloris cineritii, saporis dulco-amari, cujus usu feroces fiant; Chineses vero in Batavia eo uni ad ciendam venerem, cujus usu adeo veneris aestro incitantur, ut per totam noctem veneri li- tent, saepe aufugientibus, nec ulteriorem vim sus- tinentibus scortis. Vid. de hoc latius *B.D.D. Sachs, Tom. II. Ephem. Germ. obs. 69. p. 126.* ubi & alii citantur. Et *Cl. Wedelius de Opio pag. 129.* scri- bit, experientia saepius deprehendimus, ab assum- to opio in calidioribus, praecipue vero dispositis, ortas fuisse pollutiones nocturnas cum tentigine, cujus rei plura exempla possemus in medium af- ferre, nisi nomina aegrorum propalare, religioni nobis duceremus. Hinc si cum ambra misceatur, sive in substantia, sive in essentia, aphrodisiacum confurgit non contemnendum.

§. XI. Tandem etiam de modo corrigendi opii aliquid dicendum est. Nam certe sicuti opio cru- do raro fidendum, ita si recte praeparatum & cor- rectum fuerit, remedium praebet magnae effica- ciae. Egregia sunt verba Galeni, qui admodum cautus ac timidus in adhibendo opio fuit, quae ex- tant *lib. de theriaca ad Pisonem c. 13.* Quod opium per se potum exitiale sit, neminem latere existi- mo; si autem cum aliis nonnullis sit praeparatum, aegrotis ita subinde juvat, ut maxime salutiferum ipsis medicamentum esse videatur. Quae cum ita sint, ea demum ex nostra sententia opium emen- dant, quae virulentam ejus vim imminuunt, quae eandem temperant lenemque ac salubrem corpori efficiunt, quae denique, quod primum praecipu- umque puto, motum fibrarum languescentem ex opii usu excitant. Nam cum opium, uti ex effe- ctibus videmus, omnes motus spirituum & san- guinis sistere soleat, salutare utique est, talia opio admiscere, quae motus cient ac promovent. Hinc ex duobus hisce contrariis & repugnantibus invi- cem mixtis, neutrum quiddam & tertium singu- lare exsurgit, quod aperitiva & simul etiam se- dativa virtute pollet. Cumque illa, quae motum vehementiorem inducunt corpori nostro, omnium consensione sint maxime sudorifera, purgantia, spirituosa aromatica, nec non salino-diuretica, hinc etiam commodissime cum ipsis misceatur, qua mixtione medicamenta stupendae & mirabilis vir- tutis & velut polychresta & universalia existunt. Et talis virtutis est theriaca Andromachi, a mul- tis jam inde saeculis probatissima: it. diascordium Frac. theriaca coel. requies Nicolai, theriaca de citro, quae tutissima & summae efficaciae in multis morbis, doloribus, fluxionibus, spalinis praesidia sunt. Deinceps cum purgantibus & quidem vel cum extracto aloes, uti fit in pill. *Wildegansii*, ve- lut & extr. hellebori & pulvere hellebori albi mix- tum sicuti in decantatissima pillularum *Starckii* vel *Matthiae* massa contingit, magnae famae remedi- um concinnatur, quod, uti saepius animadvertimus, alvum solutam praestat sudorem efficaciter movet, & nunquam facile torporem, insomnia turbulen-

ta, vertiginem, capitis torporem gravativum, si- cuti sibi relicta opiata efficiunt, post se relinquit. Denique cum tinctura antimonii tartarizata vel acri ex regulo parata, valde diuretica opium per- commode ac artificiose miscetur, sicque securissi- ma exinde provenit medicina. Tandem etiam spi- rituosa, caryophylli, cinnamomum, ejusque olea, it. vinum Malvaticum & Hispanicum egregie opiatorum noxam debellant, illudque convertunt in opatissimum auxilium. Qua de causa merito collaudari debet *Sydenhamii* laudanum liquidum, quod experientia certissima docente, tutissime in morbis, ubi sedatione opus est, offertur. Dn. Prae- ses maximopere etiam commendat sequentem spiritum per destillationem ex opio paratum.

R. Vini Hisp. mens. unam.

Opii optimi unciam semis.

Flor. papav. rhœad.

lambuci ana pug. iii.

croci drachmam unam.

nucistae

caryoph.

cinnam.

cardamom. ana drachmas duas.

Commixta & ex arte destillata spiritum praebent gratissimum sapore & odore & virtute certe commendatissimum, qui summum nervinum an- tispasmodicum & sedativum est remedium. Do- sis est cochleare unum.

§. XII. Perlustratis itaque praecipuis opiatorum in corpore humano effectibus, venio jam ad inda- gandam rationem ac modum agendi narcotico- rum & in specie opii. Placet autem antea allegare ac recensere praecipuas & a praestantissimis medi- cis adhuc receptas hac de re sententias. Quantum attinet veteres, hi ipsi ex occulta quadam vene- nata qualitate frigefaciente, & calidum innatum extinguente operari unanimiter statuerunt. Ex re- centioribus *Willisus P. 2. pathol. c. 3.* asserit, phar- maca haec quoddam veneni genus esse, spiritus animales afflatu suo pessundans & quasi extinguen- sis, sanguine interim & partibus solidis plane il- laesis. Et *pharm. rat. sect. 7. c. 1.* scribit, ab opiatis spiritus affici & venenari, ut a medicamento velut afflatu, tanquam vinculis constricti illico succidant & pensa sua dimittant. Doctissimus *Ettmullerus* in *disp. de Virtute Opii diaph. c. 501.* opiata ligare spiritus affirmat, & illis in casibus, ubi spiritus ani- males, tanquam equi furiosi decurrunt, aut extra orbitam coguntur, ab opiatis coerceri & reduci. *Celeberr. Wedelius in tract. de opio*, condensatione spirituum & pororum cerebri occlusionem eorum agendi operationem explicat, dum ait: modus agendi opii consistit in *avastupendo* ejusmodi, quae porulos cerebri a vigiliis nimis apertos & dilata- tos obstruit, ac spirituum animalium effrenem in- fluxum impedit, eosdem quasi coagulat & con- densat, adeoque suavissimam corpori conciliat quietem. Neque negamus, inquit, *l. c. pag. 40.* nervos stomachicos statim in se recipere vapo- rum illud, praesertim cum opium sulphur habeat maxime resolubile in aceto, aqua & spirituosus. *Cl. Gladbachius Prax. Med. idea nova* dicit, opium praestare suam efficaciam sale suo volatili, oleoque crasso, quod resolutum in ventriculo & sanguine expansum ramulis suis spiritus a fermentatione re- solutos involvit, quo minus sanguis in se invicem insurgere & effervesce possit. Hinc spiritus in sanguine exultantes supprimuntur crassiores, & pauciores in cerebrum deponuntur, qui nervos obstruendo impediunt, quo minus veloci cursu in corpus ruere possint. Hoc dum fit, segnius e corde

Spirituosa
que que
Opium noxam
debellant.

Auctor
commendat
spiritum
per destil-
lationem
ex opio pa-
ratum.

Narcotico-
rum agendi
modus in-
dagatur.

Veterum
de iis sen-
tentia

Uti &
Willisii.

Ettmulleri.

Wedelii.

Gladbachii.

Mixtione
tamen cum
aliis medi-
camentis
virtutis su-
pendae inde
resultant.

82 De opiatorum nova eaque mechanica operandi &c.

Cartesiano
rum.

propellitur sanguis, pulsus tardior evadit, & circ-
culatio impeditur. Ex Cartesiana schola prode-
untes hanc de obscuro hoc negotio foveant sen-
tentiam, dicentes, quod valde peregrino suo;
quem in sanguinem & humores introducunt,
æthere eosdem quodammodo coagulare & in
motu suo sistere valeant, non obstante ipsorum
sale volatili & subtili oleo, quæ alias motum in
sanguine majorem efficere potius videntur; hinc
cum non tam vehemens amplius sanguinis in
partes obstructas fiat motus, quantus antea, ideo
dolor nonnihil mitigari debet: & probabile est,
scribunt, quod sal volatile ipsorum valde subtile
sed tamen satis acre, fibrillas aliquas partium ab
invicem nonnihil resolvere valeat, ita ut flaccidio-
res reddantur, quæ proinde motum non tam ve-
getum ad sensorium transferre possunt commune
quam ante. Hinc sententiæ assensum quoque præ-
bet Cl. Cranius, qui in tract. de homine pag. 440.
tradit, spirituosas & volatiles opii partes, non
secus ac spiritum urinæ spiritum vini rectificatum
sanguinem coagulare, unde postea sopor oriatur,
dolorem autem sistere ob id, quoniam sale vo-
latili suo acri fibrillæ nervorum solvuntur, quæ
tensionem amittentes, actionem objectorum non
possint deferre ad sensorium. Postremo dantur
nonnulli, qui opii sulphur acidum variis experi-
mentis adstruunt, & maxime ex eo, quoniam
opium crudum affuso oleo tartari per deliquium
ebullitionem excitat. Hinc acido isto sanguinem
coagulari & figi spiritus existimant.

Cranius.

Non probe
i. me quæ-
drant effe-
ctibus me-
mo aris
solvendis.

§. XIV. Quandoquocunque autem præmissæ om-
nes circa opiatorum rationem agendi opiniones
paulo considerentur exquisitius, nemo non facili
negotio perspiciet, illas non probe quadrare &
respondere effectibus antea memoratis solvendis
atque explicandis. Et primum quantum spectat
ad veteres illosque, qui opium pro veneno ha-
bent, quod nativum calorem seu sulphur & spi-
ritum sanguinis conclamato frigore suo uti lo-
quuntur extinguat, paucis dicimus, opium etiam
ipso Hippocrate latente & liquor esse, & sulphure
calido inflammabili constare, imo & extrinsecus
admotum tumores emollire atque resolvere, quod
calidis proprium est. Multo minus autem auto-
res hujus sententiæ aptam rationem afferre pote-
runt, in quonam consistat venenata illa qualitas,
spiritus vitales extinguens. Et nescio quomodo
se expedituri sint, si quis ipsis proposuerit, the-
riacam *Andromachi*, coelestem, mithridatium,
diascordium Fracastorii, quorum basis opium est,
à multis seculis habita fuisse pro alexipharmacis
præsentissimis, & magnæ famæ remediis. Quin
imò splendidissima & decantatissima in foro me-
dico remedia, quæ panacearum nomine insigni-
ta fuerunt, & adhuc laudem & famam suam in
medendo sustinent, maxima ex parte in composi-
tione sua recipiunt opium; sicuti id videre licet
in pillulis *Widegansianis*, quæ panacæ solaris
nomine venduntur, & Anglicis, Starckianis
aliisque. Accedit & illud, quod opium sit aphro-
disiacum præsentissimum, & feminis turgescen-
tiam & membri inflationem efficiat, imò orien-
talibus populis alacritatem & audaciam in præliis
adjiciat, quod prius etiam in aliis personis, si mo-
destè adhibeatur, notavimus. Tali in casu autem
spirituum majori excitatione, tantum abest, ex-
tinctione opus est. Et quamvis observationes va-
riæ doceant, ab opio sumto quosdam esse mor-
tuos, vel in gravissima pathemata incidisse; ex-
inde tamen nihil aliud elucescit, quam quod
opium sit corpus summe activum, & magna agen-

Qua de
causa.

di potentia instructum. Et sicuti omnia validio-
ra remedia, quemadmodum id certum est de
oleis athereis, sudoriferis, emeticis, purgantibus,
mercurialibus, immodice adhibita, noxam imò
mortem inducere possunt; ideo venena tamen
neutiquam dicenda sunt: ita etiam hoc ipsum
valet circa opium.

§. XV. Jam qui existimant, opium spiritus &
sanguinem coagulandi & figendi efficacia gaude-
re, potissimum propter sulphur, quod in ipso est, in-
dolis acidæ, mea quidem sententia falluntur. Et
quamvis lubenter admittamus, opium crudum ad
mixturam alcalinorum congregi, & mutationem
in odore ac textura contrahere, propter acidum
resinosum gummeis vegetabilium ferme omnibus
extractis familiare, attamen neutiquam exinde
colligere possumus, acidum hoc spiritus & multo
minus sanguinem figere & coagulare posse. Ut-
pote compertum chymia est, omnes resinas, gum-
mata resinosa & ligna acidum saporem saltem cu-
stodire, qui tamen minime vim reddit narcoti-
cam. Sique ab acido opiatorum effectus proficif-
catur, certe oleum vitrioli acidissimum, spiritus
aceti concentratus, nitri, similesque, inque ma-
jori gradu deberent exserere effectus, quod tamen
minus accidit. Deinceps, quis in aqua papaveris
rheados, opii, croco, semine papaveris, hyoscy-
ami, acidi vestigium reperire vel ostendere cona-
bitur? Addimus & hoc, quod opium tinctura
tartari resolutum, in liquorem, acido sic demto,
nihilò secius vim suam soporiferam retineat. Et
posito, acidum opii sulphur esse peculiaris naturæ
figentis, quæ aliis acidis sit negata: neutiquam
tamen concipere quis potest, quomodo totam san-
guinis massam vel spiritus ceu fluidum mobilis-
simum, in motu suo sistere vel coagulare queat.
Neque plane huc quadrat experimentum, quo
miscetur spiritus urinæ rectificatus cum spiritu vi-
ni rectificatissimo, utpote hæc ipsa non tam coa-
gulatio, quam potius præcipitatio est salis volati-
lis in poris phlegmatis contenti à spiritu vini recti-
ficatissimo phlegma imbibente. Porro & intelli-
gere nemo potest, quod opiata dolorem sopiant,
quoniam acredine summa, salina volatili, fibra
nervorum solvuntur, ut tensionem debitumque
sensum amittant. Tanti enim non sunt illa spicu-
la, si quæ dantur in opio, ut dissolvere texturam
nervorum vel membranarum debeant, ita dolo-
res magis augerent, & salia volatilia, omniaque
acria, uti sunt piperata, cantharides ex eodem fun-
damento dolorum faces accenderent, quod tamen
minime accidit. Tandem quicquid de æthere pe-
regrino assertur, illud, quoniam non definiri po-
test, & sensibus & rationi quoque peregrinum est.
Qui opii virtutem diaphoreticam & dolorem si-
stentem ex sale volatili oleoso, quatenus acidum,
tanquam principium dolorum materiale absorbe-
ant, derivant, sicuti Bontekoe in suis scriptis tra-
dit, solido quoque destituuntur fundamento. Pau-
xillum enim est salis volatilis oleosi, quod in opio,
mandragora, solano, papavere continetur & arte
elicitur; deinceps quæstio merito moveri potest,
cur salia volatilia oleosa majori dosi data non eun-
dem effectum præstent? Hac autem de re fusius
egimus in disert. de acido & viscido pag. 52.

§. XVI. Qui sibi rem melius tetigisse videntur,
eorum sententia est, quod opium vapore suo te-
nuissimo sulphureo ramosa naturæ inmediate
agat in spiritus, & poros cerebri ac nervorum, il-
los obscurando & obnubilando, hos autem ob-
struendo & occludendo. Unde factio in præditi
spirituum in partes musculosas & ipsum cor influ-

Opium
spiritus &
sanguinem
coagulari
propter sul-
phur quod
in ipso est.

Ipsius ac-
cidum inno-
cuum est.

Nemo in-
telligere po-
test quod
opiata dolo-
rem sopi-
ant, summa
eorum a-
credine
consideran-
da.

Æther pe-
regrinus est
chymia.

Qui ex sale
volatili o-
leoso opii
vires deri-
vant solido
quoque de-
stituuntur
fundamen-
to.

Aliorum
negis vo-
luntatis
sententia

84 De opiatorum nova eaque mechanica operandi &c.

profusiones solet, dum spirituum influxum retardat & imminuit, quoniam sanguinis debitus affluxus & refluxus in capite intercipitur. Et ex hoc fundamento liquet ratio, quare pulsus post opiatorum usum fiat inbecillior debiliior & tardior, cum omnium Anatomicorum consensu cordis motus à spirituum animalium influxu sustentetur. Tandem ex eo intelligitur etiam, quare in defectu virium in motu humorum imminuto, febribus malignis, it. in omnibus capitis affectibus, apoplexia, vertigine, paralyfi, sensuum debilitate, deliriis, memoriae amissione, qui omnes ab impedito circulo sanguinis per caput proficiunt, praesentissimum damnum ac noxam inferant, & dictos morbos periculosiores reddant, quod valet etiam de omnibus debilitatis personis, obes, phlegmaticis, & ubicunque vires ac spiritus deficiunt, ubi unica improvida opiatorum dosis mortem arcescere potest. Affectus aphrodisiacus, quem opium in nonnullis excipere solet, ex eadem hypothese prompte explicari potest, quippe sanguis in toto corpore rarefactus, & impeditus circumvolutus expandit musculos penis, unde membrum erigitur, cum non tantum à spirituum influxu, sed sanguinis majori appulsu & quadam remora membri erectio fiat.

Acidorum. usus inducit ab opiatorum symptomata auferi.

Historia curiosam magis explanans.

§. XIX. Tandem nihil efficacius ab opiatibus inducta symptomata aufert, & illorum noxam allatam corrigit, quam acidorum usus, etiam jam notante hæc Plinio, & Matthiolo, quoniam nempe acida praesertim volatilia acutis suis spiculis motum fibrarum inferunt, partim etiam nimiam rarefactionem sanguinis sistunt, & vaporum sulphureorum evolutionem impediunt. Purgantia quoque omniaque quæ in corporibus motum efficiunt opiatorum noxam debellant & morantur, quoniam his ipsis fibrarum ad motum incitatis sanguinis stagnatio in capite minor fieri solet, unde etiam symptomata illa pessima nequaquam expectanda sunt. Postremo ad hujus sententiae confirmationem multum contribuit historia curiosa, quæ extat in Lentilii Misc. Med. pract. p. 223. ubi refertur, usum feminis cannabini subsecutam fuisse dimidia hora tantam cranii expansionem, ut chirurgus extravasatum sanguinem in vulnere per fissuras cranii eximere potuerit, quod prius non fuit factum. Quod autem semen cannabidis habeat virtutem narcoticam, vid. Sim. Pauli in Q. B. p. 232. Imo datura à multis rerum indicarum scriptoribus pro specie cannabidis habetur, vid. Itiner. Olearii Orientale l. 1. c. 10. Unde eleganter concludit Lentilius à fumis opii cerebri substantiam turgescere, & majorem molem ac spatium in dimensionibus acquirere, vid. Lentil. l. c. Præterea evidentissime actionem narcoticorum versari in sanguinis motu per cerebri vasa impedita ostendit dissectio cadaverum à talismodi remedio demortuorum. Ita Joach. Curæus lib. 2. de sensu c. 17. p. 229. Nec non Lev. Lemnius de Occ. Nat. Mir. l. 2. c. 52. referunt in cerebri ventriculis sanguinem instar glaciei coactum & congelatum fuisse inventum.

A Sanguinis & humorum rarefactione anodynorum effectus exponi potest.

§. XX. Postremo ex sanguinis & humorum rarefactione atque expansione anodynorum effectus commode exponi posse, vel ex eo comprobatur, quod ea ipsa, quæ in sanguine & humoribus expansivum & rarefactivum motum efficiunt, somnum inducendi potentia eximia quoque polleant. Ita à spiritu vini immoderate assumpto, non somnus solum profundissimus, sed & stupor maximus sequitur. Et multoties observavit Platerus lib. 1. obs. p. 27. hos, qui spiritum vini, seu aquam vitæ communiter dictam, immoderate sumserant,

primum summopere accendi, postea attonitos stupere ac si opium bibissent, & stertere ad mortem usque. Ambram, moschum, crocum, camphoram, nucistam sanguinem rarefacere, expandere, attenuare, & simul tamen effectus anodynos præstare, res in propatulo est. Capitulivia, pediluvia, balnea ad somnum blandum disponere, in foro medico notissimum, quod tamen non alia ratione fit, quam quod expansionem ipsis humoribus inducant, unde etiam habitum corporis turgidulum atque inflatum reddunt, sicque lentius succedit sanguinis motus per caput, & placidus subsequitur somnus. Vaporosa & odorifera, quæ ex floribus exhalant, somnum quoque movendi facultate pollent & inde carum ab odoriferis nimis productum Strabo Geogr. l. 65. p. 535. testatur. Quâdoquidē vapores sulphurei, insigni elasticitate gaudentes per poros suscepti in sanguinē, ipsum dilatant, expandunt, & dictos effectus produciunt. Experientia etiam ostendit, ab exhalatione ardentium prunarum propter illud sulphur sylvestre expansum multos fuisse stupore & morte correptos eandem ob rationem. De his exempla passim occurrunt apud Autores. Quod autem in somno humores expandantur & simul totius corporis habitus, manifestissime apparet in dormientibus, ubi inflatio totius corporis & capitis perspicitur, & advertimus in illis qui somno detinentur, tibialia, calcamenta, vestes fieri arctiores. Inde sequitur etiam ratio, quare tempestate austriana, æstiva, calida & humida existente, it. in hypocaustis calidis, quæ cuncta manifesto sanguini rarefactionem inferunt, somnus plus obrepat, quam si tempestas fuerit borealis, frigida, serena, sicca, quoniam sub hac ipsa fibrarum corporis sunt strictiores, humores condensati, & sanguinis promptior circulatio. Denique ex præmissis hæc ratio perspicua est, quare somno profundo oppressi excitari possint quam optime aqua frigida, vel melius aceto applicato regioni hepatis, genitalibus, dorso, it. cur acida, succus citri, acetum externe vel interne adhibita, commode somnum & ebrietatem arceant. Tandem illud monere necessarium ducimus, expansionem istam sanguinis & humorum, quæ ad somnum inducendum & indolentiam inferendam requiritur, multum variare, & non unius ejusdemque indolis esse, prout nempe causæ illam excitantes differunt, ita profecto multum interest, à quibus remediis virtus anodyna & soporifera inducatur, ita si à suaveolentibus & talis modi corporibus, quæ sulphur alunt naturæ blandum, spiritibus amicis proficiunt, non tam periculosa metuenda symptomata ac damna sunt. Quod si autem à vapore sulphureo, foetido, peregrino, naturæ & spiritibus infenso suscitatur, tunc certo majora nocumenta subsequuntur: Nam certum illud est, spiritus qui rectores & moderatores corporis nostri sunt, qui rationi & mentis functionibus serviunt, à subtilissimo sanguinis vapore & tenuissima aëris elastica portione ortum suum tradere; hinc ex facili intelligitur, spiritus nostros varie ab anodynis & narcoticis affici, immutari, adeo ut etiam opiata & narcotica non tantum in sanguinem, verum etiam in spiritus immediate operationes suas exerant.

Ejus exempla.

Ab exhalatione prunarum ardentium multi morte correpti sunt.

Somno profundo oppressi excitari possunt aqua frigida vel aceto applicato.

Cautissime offerenda sunt Opiata.

Ex quibus jam allatis liquido constare arbitror, cautissime offerenda esse opiata in illis affectibus, ubi manifesta spirituum debilitas, virium defectus & motus sanguinis, praesertim in capite, imminutus est, unde in capitis morbis deliriis, in omni generis febribus, praecipue inflammatoriis, plane hic dicta remedia exsulent vel cum cautione & prudentia administranda sunt.

V E R A M E D I C A M E N T O R U M I N M O R B I S V I R T U T E E T E F F I C A C I A R I T E D I G N O S C E N D A .

§. I.

Humanæ sapientiæ centrum in late patente utilifimarum scientiarum circulo constituendum in eo maxime terminari & figi constans philosophorum estatum existit, ut quis rerum omnium causas cognitas habeat atque perspectas. Quare nec minus indubium est, optimum illum audire philosophum medicum, qui rerum naturalium & quorumvis effectuum in naturæ gremio & corporis humani meditullio observandorum genuinas & authenticas excutere norit rationes. Ardua, fateor, & stupenda res est, phænomenorum physicorum assequi ductum huncque nosse delineare; quandoquidem scientia nostra, si rem solerter perpendimus, in exquirendis primitivis & originalibus causis, quæ principia tenent effectuum, nimis quantum insufficiens, manca ac sterilis est, cum tam angustis intellectus humanus contineatur terminis, ut à rerum principiis seu causis primis cognoscendis prorsus excludatur. Vanus itaque & supervacaneus omnino conatus, vana æque gloriatio eorum, qui rerum primordia primasque causas in physicis & medicis mente sua attingere gestiunt. Ut enim, quod res est, dicamus, quanta quanta nostra est scientia, tam *φύσις* in genere, quam mechanisimi humani in specie, considerationem concernens, seu quos unum in alterum inducit effectus, jam attente explorabimus, hosque non ex primis, seu remotis, sed ex proximioribus, ut sensu obviis, principiis deducemus, demonstrabimus.

2. Quapropter ille demum medicus recte suam locat operam, qui relictis metaphysicis causarum primarum speculationibus, eorum, quæ vitam & sanitatem obfirmant, nonnisi nota & in sensus incurrentia rimatur, quibus veritates incognitas elicere & pandere valeat, & sic quidem rationalis medici & practici tuebitur nomen. Quo absunt, qui missa omni ratiocinatione, quæ tamen ut in aliis disciplinis, ita maxime in medicina, omnis acquirendæ notitiæ clavis ac anima est, nudæ tantum experientiæ mancipiorum instar inhærent, quo fit, ut in facienda medicina inque assignandis remediorum effectibus mirum & miserum in modum implicentur aliosque implicent perplexi. Ut enim ratio ad evidentiam & veritatem rei nos unice deducit, ita sola experientia, hoc fulcro destituta, credulitatis & falsæ opinionis est feracissima, ipsosque medentes reddit incertos ac fallaces. Quod non clarius in ulla medicinæ parte, ac in summe utili, remedia ad sanitatis negotium subministrante therapeutica elucet, ubi ad indagandos effectus horumque perspicendas rationes animi solertia undiquaque præsens requiritur. In hac insigniter errant, in hac fallaciam causæ ut causæ haud infrequenter committunt, alienam nimirum, quid quod contrariam & erroneam, remediis vindicando virtutem.

3. Ingentem, turpe dictu! negligentiam vel potius ignorantiam circa hoc argumenti genus existisse, ingenue largimur. Quot, quæso, hæcenus non tribuimus vires ad superlativum gradum & divinas usque certis remediis, & simplicibus & compositis, tam chymicis quam Galenicis, ad certos domandos morbos constanter deprædicatis? Quantisne virtutibus splen-

dent plantæ earumque radices, folia, flores? Quantis encomiis splendent ex mineralium regno petita medicamina! Evolve scripta chymica, botanica, pharmaceutica, ne practicis exemptis, & ubivis pollicitis speque ditissima, sed quæ praxin dein suscepturos præter omnem expectationem frustrantur, invenies & re accuratius trutinata solidoque ratiocinio & circumspicua observatione ad decantatos effectus inquirendos. Adhibita, energia egentissima non sine tædio conquires remedia. Nihil sane majoribus premitur difficultatibus, at nihil quoque majori gaudet usu, quam scrutinium remediorum, quibus emineant virtutibus, verisne an falsis, quas providens rite distinxerit artis peritus. Cujus rei neglectus sola ac unica causa & occasio fuit tantæ, proh dolor! empiricæ luis & miseriæ, crassæque in medendo ignorantia, nullo fere consilio, si non auxilio, corrigendæ. Quivis enim se fingit medicum, vel medicamentum probatum adversus certum morbum jactitat, modo semel vel bis ab eo propinato conspiciat agrum convalescentem, cum tamen ad ipsam sanationem re ipsa nihil contribuerit. Hinc quoque ista calamitas, cur tantam farraginem & numerosissimam remediorum sylvam in libris inque officinis possideamus, & tamen præ nimia copia, ut *Tantalus* in aqua, selectorum penuria laboremus.

4. Quod vitium cum jam panicum sit, non potest non in sanitatis & salutis humanæ cedere detrimentum. Hoc vero cum merito cordi habeamus, dictis rationibus jam permoti, non inutilem laborem judicavimus, si veram methodum ac viam monstrarem, qua genuinæ suæque vires & vera efficacia in medendi methodo consent medicamentis, unaque fallaciæ, quæ in allegandis effectibus fieri solent, detegantur, virtutesque remediorum ab operatione naturæ, quæ plerumque sola optima morborum existit medicatrix, distinguantur, & hac ratione evitetur, ne vehementiam ac vim morbi habeamus pro effectum remediorum. Ita certissimam concepimus ipem, fore, ut omnis empiriæ fons dispatescat & verum fundamentum therapeutices, in quo consistat, substituatur atque corroboretur.

5. Ut autem paulo pressius & apertius instituti nostri mentem declarem, sententia nostra hæc est, perpaucas adhuc cognititas esse vires remediorum, quibus firmiter inniti & fidere possit praxin exercens, sed plerasque esse fictas, falsas, imo adhuc dum in *Democriti* latitare puteo. Quod quidem assertum primo intuitu paradoxon & à ratione alienum haberi posset, cum tanta copia numerusque vix determinandus suppetat remediorum. Hoc tamen majorem mirationem injicit, quod pauca eaque vera adversus morbum cognoscamus præsidia horumque vires teneamus, alias certe nullam videmus necessitatem, tantum numerum tantamque syllogem struendi remediorum. Verissima enim hæc & unica causa est tam amplissimæ farraginis formularum & medicamentorum, quæ passim describuntur, citantur & miris laudibus extolluntur, quod nemo recte attenderit vel intellexerit remediorum efficaciam, in quo proprie sit constituta, & quod reapse paucorum veras virtutes habeamus perspectas. Unde cum his vel illis magnæ famæ remediis adver-

fus morbos utebantur practici, nec is, quem anxie expectabant, effectus statim sequebatur, mox ad alia delapsi, nova condere vel ab aliis condita & commendata in usum vocare sunt annisi. Quæ cum & ipsa ipsorum votis non responderent, sed inopiam ubique & defectum proderent, ad alia rursus animus conversus est, etiam ad ipsa exotica, quorum modo fama perveniebat ad aures, qua ratione fons perversæ istius mendendi methodi scaturiebat. Et sane nihil ad distindam ægrotantium incolumitatem excogitari pestilentius, nihilque ad praxis rationalis incrementa promovenda inveniri poterit perniciosius, quam tanta varietas, tanta copia & numerus, quæ artem exercentem non possunt non remediorum reddere incertum, hæsitantem, dubium. Ut itaque jam ex isto errorum labyrintho emergamus, & fundamentum hoc omnis empiricæ, irrationalis praxeos destruamus, opus maxime omnium est, ut clarissime demonstremus, nullum effectum formalem aut virtutem quandam inhærere remediis, sed omnem, quam in corpore humano exerunt, demum ab ipso obtineri. Hoc si argumentis comprobaverimus, tam splendida laus remediorum in certis morbis ad certos fines commendatorum unico quasi ictu cadit ac diruitur omnis.

6. Nulla unquam sententia in propaganda re physica & medica majorem sterilitatem & noxam, quam hæc ipsa, attulit, quod veteres existimarent, vires, qualitates & effectus rebus inesse corporeis, dum non modo certis mixtis assignabant calidum quoddam, frigidum, humidum vel siccum temperamentum, sed & ulterius progressi, virtutem aperitivam, incisivam, venenatam, alexipharmacam, huic vel illi parti amicam, stomachicam, pectoralem, hepaticam &c. ipsis tribuebant, perinde quasi rebus talis indita esset virtus & qualitas. Ex quo falso fundamento innumeri isti errores in praxin irreperunt, quos dextre & solide primus omnium perspexit & detexit CARTESIUS, demonstrans, has qualitates & facultates omnes non esse quidditativas, absolutas rerum entitates, sed relativas & sub relatione ad alia. Unde non sine ratione hæc sensu minus philosophico sumi ipsi videbantur, quod e. g. saccharum sit dulce, arsenicum venenum, camphora quod sit calida.

7. Non equidem negari potest, hos effectus rerum, qui sunt naturales, suis testari de causis, interim tamen illi non confundendi sunt cum ipsis causis, neque putandum, corpus quoddam per se aptum esse ad ullum formalem effectum producendum. In physicis enim res ita comparata est, ut actiones & effectus corporis omnes, quicunque fuerint, in alio producantur, respectu cuius sequuntur effectus. Ita v. g. nullus motus potest confici ab uno corpore in se considerato, sed necesse est, ut, si motus fieri debeat, semper præsto sint duo, unum agens, alterum patiens, & dum unum in alterum agit, & hoc illius actionem recipit, tum demum resultat inde motus, qui effectus est duorum corporum, unius agentis, alterius actionem recipientis vicem sustinentis. Quapropter sapienter dictum fuit à veteribus: nullum corpus per se moveri, sed omnem motum proficisci ab alio. Paucis ut conficiamus, ad motum requiritur movens & mobile. Male itaque dicitur: motum inhærere uni corpori, qui potius effectus est duorum.

8. Quum autem omnes effectus, virtutes ac vires, quæ in tota rerum natura visuntur, & speciatim in corpore vivo, animato producuntur, non nisi motus sint species, nec sine motu unquam concipi queant aut percipi, facile jam apparet, istos effectus, qui remediis vendicantur & in certa motionis specie consistunt, non posse uni adscribi corpori, sed duo minimum exposci. Ita v. g. calor, qui sensationis species est & in corpore animato efficitur, formaliter non potest

tribui ipsi igni, bene autem hoc dici potest, quod celerime moventis naturam habeat. Idem hoc applicari potest ad ipsa remedia vel etiam venena. Illud enim audit remedium, quod certum effectum exserit in corpore humano, sive purgantem, sive anodynum, sive vires restaurantem. Venenum quoque dicitur id, quod subito destruit & subvertit motus vitales. Jam facile concipi potest, quod isti effectus cum in alio corpore debeant fieri, non ipsi inhæreant remedio vel veneno, utpote quæ agentis tantum munus obeunt. Sed tum demum eos subsequi, quando hoc agens alio corpori rite involvitur.

9. Veteres philosophi rem accurate definiverunt hoc axioma: corpora non agere secundum sphaeram activitatis, sed receptivitatis, & ad edendum effectum non sufficere tantum causam, sed etiam ipsius subjecti dispositionem legitimam requiri. Hæc si nobiscum considerato animo pervolvamus, ultro sequitur, nos in falsa esse opinione, qua singularem virtutem sine debita consideratione subjecti, adversus hunc vel illum morbum edomandum ipsis assignamus remediis.

10. Duo sunt probe advertenda, ut salutaris vel noxius ex remediis sic dictis in corpus invehatur effectus, ipsum nempe corpus, quod pharmaci loco propinatur, & ipsum quoque corpus humanum. Hæc ergo invicem erunt conferenda, hic proportio quærenda & indaganda, ut certus, quem medicus intendit, sequatur effectus. Nihil adeo certi quoad virtutes & effectus decernere vel definire possum, nisi semper facta relatione ad corpus humanum, quod cum varium sit, varia pariter ab uno remedio visitur efficacia & operatio. Ita vomitorium ex regulo antimonii eductum, quale MUNKII est, diversis admodum operationibus conspicuum est, dum nonnunquam iners plane atque inefficax deprehenditur, ne ad nauseam quidem ventriculum disponens, in aliis autem, utut eadem fuerit dosios mensura, enormissimas ab ejus usu vomitiones ad lipothymiam usque excitatas vidimus. Hydrofici rarius moventur à vomitoriis, quod ipsis cum quartanariis commune est. Aestate insuper expeditior per superiora fit egressio, quæ hyeme coactor.

11. Non minus quoque sudorifera præsertim fortiora & calidiora non unam ratione subjecti in operando ineunt viam, sed plane quandoque aliam, imo alienam. Cujus rei sufficiens dabunt argumentum plethorici & cacoehymici, quos à spiritu cornu cervi & tinctura bezoardica volatili affectus soporosos, guttam serenam, imo paralyses incurrisse tristis loquitur experientia. Ejusdem census fortiora diaphoretica sub initium variolarum & morbillorum usurpata febris calcar addunt, delirium & epilepticos motus suscitant, & non raro ægrotos mortali vinculo exsolvunt. Idem fere efficiunt salia volatilia, præsertim oleosa, quæ in febrium intermittentium curatione sinistre adhibita has ipsas tertianas, vel si tertianæ fuerint simplices, duplices vel continuas reddunt, quod etiam valet de sudoriferis, acribus, calidis: in plethoricis quoque largius sumpta capitis dolores ut & hæmorrhagias post se trahunt; vidimus tamen ipsa hæc salia aromatica inter cibos pauca dosi exhibita hæmoptysi, imo hæmorrhoidali fluxu nimium exhaustis egregium attulisse solatium.

12. Quod si pedem promoveamus & ad purgantia accedamus, eadem horum circa effectus suos erit conditio. Ita v. g. notum est, purgans gialapium diversissimos edere effectus, prout inter se differunt subjecta, adeo ut unus certus, necessarius & perpetuus ipsi nunquam queat adjudicari. Quod si enim illius optimi & resinosi tantillum sumamus, hoc juveni seroso datum eum fortiter purgabit, quod tantum abest, ut in affectu hypochondriaco & in febre quartana præstet,

ut potius non modo destituatur successu, sed & tormina excitare aptum sit. Eadem porro dosis in bilioso subiecto & tempore autumnali metu praesentis hypercatharleos non vacabit, quæ in plethorico & obeso præter tormina & paralysem ipsam accersere valebit, imo infanti data si non necem ipsam conciliabit, plane tamen stomachi tonum dejiciet viresque prosterneat, prout alias in his, qui debilioris sunt stomachi, emetica insignitur virtute, quid quod sæpius advertere licet, unum idemque purgans in uno subiecto, diversis temporibus oblatum, differentes à se invicem sistere effectus. Ita in genere notamus, catharticum tempore æstivo vel verno exhibitum majori eminere virtute, quam hyemali, minori adhuc, quando die prægresso acidi cibi fuerint assumpti, quæ contra intenditur falsis, acribus eduliis prius ingestis.

13. Ad hæc diversa regionum indoles, ut varie homines temperat, ita varie sigillabit virtutem medicamentosam, dum, ut purgantium exemplis id explanare pergamus, hoc quod in certa dosi sumtum Westphalum rusticum nonnisi debite ad purgationem invitabit, natione Gallum vel Aulicum delicatioris vitæ, tenerioris pariter constitutionis, ut Misnicum, prope modum dabit eadem dosi internecioni. Denique in affectibus, ubi horrendis spasminis & anxiiis contractionibus intestinorum membranæ exagitantur & convelluntur contumaxque alvi præsto est adstrictio, ibi sane nunquam expedient alvum, sed adaucta symptomatum sævitia magis constipabunt, quali in casu clyster oleosus vel jusculum oleosum cum manna conditum optatissimum producet effectum. Illud autem maxime tenendum est circa aloëticorum usum, quæ largiori dosi concessa in ficcis alvum procurabunt occlusam, minore autem & refracta lubricam & emollitam. Quis ergo non perspicit, ab uno simplici diversissimos induci effectus; quis autem sibi poterit imaginari, omnes hos effectus formaliter jam dum latitare in purgante, quod potius ad diverse agendum eadem sese semper habet ratione, adeoque diversitas causæ non in hoc, sed in subiecto individuali, quod actionem recipit & reciproca agendi facultate instructum est, plenarie quærenda erit ac determinanda. Quæ subiecti ratio cum diversimode se habeat, in aprico est, diversam, imo sæpe contrariam unius purgantis evenire operationem.

14. Tanti profecto refert pharmacum cum prudentia ex justis rationibus illius usum colligente adhibuisse, quod & de simplici illo nitro, omnino erit tenendum. Insignis equidem ejus efficacia est in cholericis, & ubi humorum maximus est orgasmus, dum calorem febrilem & præternaturalem egregie deprimat, sudorem promovet; at vero in febribus malignis, ubi pulsus fatiscit viresque deficiunt, eadem mole porrectum, excretionem ad peripheriam corporis & exanthematum eruptionem magno cum periculo retardat. Est quoque porro notatu digna observatio illa practica, nitrum in nonnullis subiectis laxare alvum, in aliis autem, ubi nimia bilis acredo & ardens in intestinis inflammatio abscondita est, idem remedium magno poliere usu & fluxum talem nimium cum successu cohibere. Opiata, ut ulterius progrediamur, nimias sanguinis excretiones compescere, sat abunde constat; sunt tamen quam plurima exempla, ubi hæc in usum vocata non modo sanguinis per uterum effusiones, sed & per venas hæmorrhoidales effecerunt atrociores. Præterea opium omniaque anodyna in quibusdam placidum procurant somnum & inordinatum spirituum motum deliriumque sedant & componunt; in aliis autem plane contrarios producunt effectus, ut vigilias perpetuas & delirium, si non adsit, introducant, vel si jam præsens, gravius redant. Eadem opiata conveniente dosi subministrata

Frid. Hoffmanni Oper. Tom. VI.

largum sudoris profluvium certis in subiectis certis, quæ in morbis efficere res nota ac vulgata in foro medico est, quæ tamen ipsa in cachecticis & frigidis morbis non modo sudorem, sed & transpirationem si dictam insensibilem penitus sistunt, ut inde in hæticorum colliquativis sudoribus magno cum fructu adhibeantur.

15. Videamus jam & consulamus experientiam ratione suffultam, num alia medicamenta unum operandi modum unumque sic effectum inferant. Inter hæc non infimum locum obtinent martialia & vitriolacea, quæ vi sua adstrictiva agere videntur ideoque alvum in quibusdam plane constringunt; hæc ipsa tamen sæpiissime alvum laxam reddunt & instar purgantis irritant. Ita porro in nonnullis appetitum erigunt, quem in aliis destruant, item spasmodica parthematata in quibusdam subtrahere solent, quæ in aliis ab iisdem sunt diriora. Quid notius est, quam quod amara & balsamica hypochondriacos egregie solentur: interim sæpe accidit, ea ipsa ardores internos, phlogoses & anxietates in iisdem augere. Salia media, duplicata, ut sunt nitrum vitriolaceum, sal digestivum Sylvii &c. hypochondriacis & quorum prima regio scatet magna humorum colluvie, apprime utilia sæpius deprehenduntur, nihilo minus nec defunt exempla, ubi dicta salia intensissimas cardialgias excitarunt. Acida volatilia & fixiora etiam in ardentibus, biliosis febribus, in malignis quoque sævientibus usum habent re vera non contemnendum; melancholicis autem & hypochondriacis ferme omnibus mirum quantum nocent.

16. Ea, quæ subtili & balsamico eminent oleo, ut sunt terebinthinacea, juniperina, urinæ fluxum movent & calculo resistunt; haud defunt tamen exempla, ubi memorata dispositionem calculosam, in quibus antea non fuerat, unice introduxerunt. Quam diversus remediorum mercurialium soleat esse effectus, attentis practicis non potest esse ignotum; quædam enim subiecta ea optime ferunt, alia alvi irritationem persentiscunt, alia glandularum salivalium stimulationem, alia gingivarum putredinem inde concipiunt. Huc quoque referri possunt ex mineralibus sulphura varii generis, solutiones metallorum mitigatæ, solutio auri, veneris &c. quæ pro diversitate subiectorum, vel vomitus, vel alvum, vel sudorem movent, quinimo in aliis plane nihil operantur, ubi contra in aliis effectus sequebatur exoptatus. Plura, si non innumera, possemus recensere & in medium proferre exempla & observationes, quibus fusius dispalesceret, quam diversum, imo alienissimum & contrarium unum remedium sæpius in eodem subiecto, diverso tempore vel alia dosi exhibitum, tanto magis autem in illis individuis, quoad sexum, ætatem, temperamentum, clima admodum distinctis, eodem licet morbo decumbentibus, excitet effectum. Sed nobis prolixiores esse haud æque licuerit, cum ex iis, quæ huc usque ex attenta praxi deduximus & tetigimus, sufficienter elucescat, efficaciam illam, quam remedia producere dicuntur, minime ipsis inharere medicamentis, sed eam demum resultare ex actione remedii & reactione, quæ in varia temperie, mixtione varioque partium fluidarum in corpore motu consistit, in corpore nostro exantlata.

17. Ex allatis itaque conficitur, stolidam & perversissimam esse viam ac methodum, qua nonnulli medicorum incedentes remedio huic vel illi certam & infallibilem contra hunc vel illum morbum decernunt efficaciam, illudque jam plenis buccis commendant, eblaterant, & ad coelum usque extollunt, nullo habito respectu individuorum, nulla habita ratione circumstantiarum, & ut canis è Nilo, generalè medicinæ superficiem generalibus theorematibus limita-

tam lambentes, omnem medicinæ practicæ molem exhaustisse, sibi imaginantur. Certe, si rem, uti est, detegere velimus, nihil nisi ignorantiam suam aperte profitentur, vel contra conscientiam agentes homines decipiunt & pecuniam fraudulenter emungunt. Minime nobis animus est, damnare in totum omnem usum omnesque vires remediorum, neque etiam censemus, non dari talia remedia, quæ in pluribus affectibus magnum & copiosum habeant usum ac fructum, sed hoc saltem improbamus & monemus, quod in genere non possint certæ vires remediis adscribi, sed semper proportio ineunda sit cum individuis, hæcque una consideranda & referenda veniant; unde omnes sic generaliter assignatas panegyres floccipendimus, detestamur & ex medicina rationali exesse desideramus.

18. In eo profecto cardo totius empiriæ vertitur, ut commendare & venditare velimus certa adversus morbum in quovis subjecto remedia, & nisi hac in parte hos errores eorumque latifundium inquirendo evertamus & pessimæ huic consuetudini audacter obviam eamus, non aliam quoque praxin, quam mere empiricam exercemus ac profitemur. Sed pro dolor! quanta empiria, quam perversa medendi ratio abunde & undiquaque conspicitur in tot libris & scriptis eorum, qui docti & rationales nominari gestiunt, quanta formularum, quasi vero normularum, copia, quanta jactantia virium spargitur & disseminatur, quibus sane omnibus veræ & solidæ medicinæ majus decrementum, quam ullum incrementum portendere & spondere possumus. Haud quaquam enim generosa remedia deficiunt, neque unquam arcana amplius tam anxie quærenda vel indaganda sunt, unicui saltem arcanum est, & quod re vera arcanum est, empiricis summe necessarium, prudens applicandi ratio, qua suus quibusque remediis constat & in ægrotis succedit optatus & desideratus effectus. Qui enim illam novit, is determinare norit vires, qui contra ea non instructus est, in vanum jactat remedium & potius obest eodem, quam prodest.

19. Ad prudentem autem applicationem non sufficit superficialiter & ex cortice quasi nosse medicinam, sed ex physicis, anatomicis, mechanicis & chymicis principiis elementa agendique modum ducere ac derivare debet medicus, nec non ipsius subjecti naturam, corporis specialissimum mechanisimum, motuum morbosorum morem ac conditionem & causarum quæ eos excludunt, indolem nosse ac demonstrare, nam ut GALENI verbis utar l. 3. meth. c. 7. in initio reperiundis: *remediorum inveniendorum initium ex morbi natura desumendum est, cum absurdum sit, aliud esse quod curatur, & aliud quod curationem præscribit*, & sic demum recte judicari poterit, quo remedio, quo tempore & qua dosi utendum & quamdiu cum eo sit continuandum. Hic est finis & verus terminus, quo genuinus medicus disjungitur ab empirico vulgari.

20. Jam vero satis superque apparet, medicum, si naturæ ductum in medendo probe assequi & scire velit, quænam remedia in hoc vel illo casu utilia vel noxia sint futura, non acquiescere debere in generali illa & trita virium in remediis reperiundarum assignatione, cum illa ipsa, ut evictum dedimus, quam multis involutâ sit fallaciis; sed ad alia longe graviora ipsi descendendum esse, quæ eum in assignandis remediorum virtutibus circumspicte adhibendorum reddant confirmatum, quod hujus nostræ dissertationis erit argumentum. Antequam autem ad hoc negotium pertractandum nos specialius accingamus, è re fore judicavimus percurrere quædam polychrestâ, generosa, authentica & hisce temporibus valde celebrata remedia, ad ostendendum, quam infirmo subinde stent talo, quamque fallaces & ancipites sint eæ vires ipsis vulgo adjudicatæ.

21. Decantata itaque exposituri, haud ignoramus, quanti ab omnibus ferme æstimetur & unanimi consensu afferatur & transcribatur, cinnabarinam nativam vel antimonii esse verum antidotum & specificum contra epilepsiam, hac inductis opinione, quod ob sulphur antimonii virtus ipsi indita sit anodyna spiritusque coercens. Verum enim vero, si experimenta solerter & attente instituiamus, hæc nos docebunt, quod sola cinnabaris nil prope effatu dignum exhibeat in epilepsia infantibus solemni, æque parum in ea, quæ variolis & dentium dolore inducta fuit, uti nec in idiopathica confirmata, quibus in affectibus quantumvis maxima dosi concessa nunquam probavit quendam effectum, sed potius gravando ventriculum, anxietatibus causam præbet. Neque specificum sic dictum *Michaelis* cephalicum ob cinnabarim suam possidet virtutem, sed potius ex aliis ingredientibus, anodynis, antispasmodicis & acidum infringentibus illa deducenda venit; quod pariter sentimus de Panacæa Anghaldina, quæ in affectibus spasmodicis, epilepticis non rejicienda est, interim tamen illius vires non à cinnabari, sed à radice pœoniæ proveniunt. Deinde vero cinnabaris minime agit ob sulphur, sed hoc arctis tenetur compedibus, ut ægerissime, etiam fortissimis lixiviiis, ab ejus vinculis possit separari. Quod vel ipse arguit odor, quo nulla de se cinnabaris effluvia spargit, cum tamen anodyna virtus ex volatilitate & *anadymis* sulphuris debeat accersi. Est nihilo minus utique cinnabari suus usus atque effectus, quæ epilepsiæ convenit, at non omni, tantummodo illi, quæ v. g. à contusione externa capitis vel à fuscitata stasi feri, vel coagulatione sanguinis in vasis proficiscitur. Cinnabarina enim non minima, sed plena dosi exhibita eaque iterata salivationes exprimunt, sanguinis ac lymphæ motum per vasa accelerando, citra tamen exquisitum calorem aut tumultum, unde demum evenit, coagulum feri dissolvi & sic desideratum effectum subsequi, quod tamen in epilepsia ab alia causa suborta non valet. Plura, quibus de hoc cinnabaris in affectibus spasmodicis effectum hic referendis supersedemus, videantur in meis *Animadversion. ad Poterium*.

22. Inter ea, quæ alexipharmacorum titulo designantur, à longo jam tempore pro penetranti alexipharmaco habiti sunt spiritus & sal volatile cornu cervi, eboris & spiritus cornu cervi succinatus, quorum virtus in peste, febribus petechialibus & malignis à practicis magni censetur. Sed rem accuratius trutinantes solidamque experientiam consulentes deprehendimus, assertum illud multis laborare præjudiciis & exiguum, vel plane nullum, dictis in affectibus habere usum, quod in nupera, ante aliquot annos grassante peste satis edocti sumus, siquidem omnia illa, quæ sanguinem nimis impellunt ac commovent medicamenta in hujus generis morbis, funesto dramate haud vacant, ideoque cum illis caute est mercandum, & illo tantum in casu sunt admittenda, ubi natura oneri impar partes sui mixtum destruentes ad corporis habitum amandare & exanthemata seu maculas formare non valet, vel quando talia recrementa priora vestigia relegunt: ibi sane observatum fuit, quod naturam nimis languidam ad excernendum heterogeneous partes quodammodo stimulent & animent; in reliquis vero vel plane nullum, vel non nisi debita circumspeditione, locum inveniunt.

23. Secus vero res se habet cum illis præservandi gratia ab instante quodam miasmate contagioso, in malignis & putridis morbis usurpatis, quo tempore eorum quendam usum esse non ibimus inficias, cum omnia ea, quæ circulum sanguinis illibatam servant & transpirationem debito modo adjuvant, humores vitales à multis peregrinis impuritatibus & excrementis activis liberent; quæ si retinentur, circulo humorum existente

existente languidiore, tum ad malignitatem & corruptionem subeundam proxima est via. Quandocunque autem hæc corruptio profundius insinuata & immersa fuit succis corporis humani, tum cavendum potius ab iis est, quoniam motu suo intestino, intestinum putredinosum motum adaugent virisque propagant, ubi contra acida, terrea, quæ his contrariam exierunt operationem, curandis dictis morbis egregie subveniunt.

24. Universale magis alexipharmacum venenorumque antidotum creditur Theriaca tam vulgaris quam cœlestis, quæ non nisi ad certam eorum speciem restringitur & reducitur. Quod autem ad omnium venenorum classem utriusque virtus extendenda non sit, obstat, quod in iis, quæ humorum & spirituum motum sufflamant & narcosi agunt, ut & in fermentativo & putredinoso motu à venenis sanguini illatis, qualis in morbis malignis, peste, ictibus animalium visitur, enervandis locum suum haud tueantur, sed saltem, ubi acrimonia volatilis, penetrans, caustica irritando & vellicando fibras nerveas exercet & spasmos gignit, sicuti accidit in mineralibus arthenicalibus & huius census aliis, quamvis tamen & ibi non omne punctum absolvant, sed oleosa & pingua theriacalibus longe sint præferenda.

25. Ut omnibus morbis propria medici quæsiiverunt præsidia, ita & febribus propellendis sic dicta febrifuga à recentioribus maxime destinantur, quorum primicerias quasi ducit China chinæ ceu probatissimum & infallibile adversus omnis generis febres remedium specificum, quod dum firmiter sibi persuaserunt, sit ut plures, si quem febris decumbere audiunt, mox illotis, quod ajunt, manibus, omni insuper habito respectu causarum & circumstantiarum, ad ipsam ceu iacram anchoram confugiant & sola hac febres ad Indos usque agere moliantur, sed magno sapius cum ægrotantium vitæ discrimine. Largimur utique, cortici huic egregiam inesse vim motus febriles inhibendi & salubilis acria figendi, præsertim in tertianis & biliosis febribus, at nisi prudenter & cum ratione, sed promiscuè ipsum offerimus, certe majus damnum quam commodum juste exspectandum habemus, quod recidivæ peiores, febres lentæ, viscerum contumaces oppilationes & tumores ceu seriales nuncii abunde testantur. Est ipsi suus usus, quando non alia ratione quam vi sua adstrictiva tonum excretorium vasculorum & fibrarum musculosarum dejectum excitat & restaurat, unde, cum humores expeditiorem circuitum recuperant, & per evacuatoria inutiles ac superflui humores educuntur, felicissime sic & perfecte curatur febris.

26. At vero, cum notum sit, adstringentia non semper effectum aperitivum post se relinquere, h. e. circulum sanguinis & humorum adaugere & excretionis negotium factum tectumque servare, sed persæpe motus retardare & refrænare, tantoque magis, si humores tenaces, viscosi & ad motum inepti sunt, si præterea spasmodica quædam fibrarum contractio adest & medicamentum magna mole exhibere necessarium videtur, cuivis in promptu erit colligere, quod tum graviores metuendi veniant morbi, & id plerumque accidit in febribus quartanis auctumnalibus & aliis intermittentibus refractariis, personis melancholicæ temperiei maxime mollesis, imprimis autem sub febrium initia, ubi motu suppresso humores incrassantur & obstructions obfirmantur. Non contemnendum autem spondent effectum in tertianis continuis exquisitis intermittentibus in personis sensibilibioris texturæ & bile affluentibus æstatis tempore subortis, si jam per aliquod tempus æstus febris deferbuerit, sic enim excretionem hinc inde egregie sollicitant & solidam curationem reddunt, quale quid etiam in minori dosi & longe tutius præstant tincturæ martiales,

Frid. Hoffmanni Oper. Tom. VI.

uti est illa *Zwölfferi*, & essentia amara cum liquore martiali maritata, quibus sæpenumero olim tutissime intermittentium pertinaciam subegi, qua de re conferri possunt meæ *Animadversiones in Poter*.

27. Præter superius memorata antepileptica non minus deprædicant ex animali regno desumpta, & ex his præcipue pulverem lumbricorum terrestrium & fere omnes animalium partes exsiccatas, ignis violentiam non expertas, quorum etiam spectant ungulæ, dentes & cornua animalium, quæ singula in sistendis insultibus epilepticis peculiarem & mirabilem vim possidere dicuntur; sed minime hæc est universalis & à vero longe absunt, qui in epilepsia à quacunque causa orta eundem sibi effectum promittunt. Nunquam enim tali in casu, ubi causa materialis præsens est, v. g. si sanguis extra vasa in cerebro obhæreat, si primæ viæ saburra acidorum corrodentium humorum infarctæ sint, si virulenta, acris quædam materia nervos in morbis pungat ac vellicet, operæ pretium faciunt, sed potius tum, quando ex causa quadam immateriali, animi affectu, terrore &c. ortum fuerit malum inque simplici proclivitate ad talem motum ratio epilepsiæ consistit omnisque materialis causa morbum fovens sublata fuit, revera tum prudenter data faciunt quandoque, ut malum illud, quod per plures annos tragædiam hanc luserat, nunquam recrudescat.

28. Antidysentericum præsentissimum hodiernis temporibus creditur esse *Hippecacuanhæ*, Peruviae nativæ plantæ radix, pluribus id ex Gallia attestantibus, qui magnum ex ejus usu lucrum captarunt. Notum est, hanc radicem etiam in aliis corporibus, si largiori dosi offertur, nauseam & vomitionem creare sale aculeato tenui, quo pollet. Ita *HERMANNUS* in febrium intermittentium curatione ipsam præscripsit in infuso cum vino. Ea propter non omni tempore, non in omnibus subjectis, non sub quavis causa quadrat in dysenteria, sed potius noxam perperam adhibita radix infert. Nos censemus, dysenteriae causam esse bilem, viscidiorum quidem & tenacius adhærentem, at salibus & spiculis acerrimis & causticis refertam, quæ insensibilissima irritatione mucum intestinorum omnem abradit, inflammationem & spasmos suscitatur. Hanc igitur si statim in principio ex superioribus eliminamus, uti vomitum in diarrhœis & dysenteriis conducere ex *aphor. 15. Sect. 6. Hippocr.* patet, in quo non tantum vomitum sponte supervenientem, sed & arte suscitatum comprehendit *GUIL. PISO* non sine causa statuit, omnino sit, ut prima quasi in herba jugulemus hunc affectum vel minorem reddamus. Quod si vero jam adsint inflammationes periculosæ, intestinorum exulcerationes, quis sibi persuadere poterit, tunc temporis hanc radicem collaturam esse tam insigne emolumentum, ac sub initia morbi, utut præcesserint jam dum sanguinolentæ excretionem. Qua tamen ipsa carere possumus, ubi alia suppetunt, quæ idem & majori quidem cum securitate exequuntur, antimonialia volo fixiora rite parata, emetica virtute dotata, quibus solis quondam per Dei gratiam medelam attuli non minus præsentaneam quam securam.

29. Radix Nisi, quæ carissimo emitur pretio & ex remotissimis oris ad nos affertur, habere putatur præsentissimam virtutem non modo analepticam, sed & alexipharmacam, qua non detur in rerum natura excellentius simplex; sed vana res est omnis. Longe præferimus aromatum, cinnamomi, caryophyllorum & cardamomi virtutes, & in alexipharmaco scopo ipsam etiam radicibus vincetoxici, angelicæ, imperatoriae &c. postponimus. Gaudet equidem sale quodam tenui sulphureo acri, quo spiritus excuscat, motus languidos erigit; sed quod singulare quippiam præ aliis possideat, id quemvis attenta praxis docebit, qua expertus sum, quod radicis illius infusio cum

aqua calida facta, quam loco Théë assumendam suasi, in defectu virium non magnum dederit solamen.

30. Castoreum ceu specificum antihystericum à multis retro seculis constantissime habitum fuit, quasi in momento motus uterinos componat. At vero, si tanta vis huic remedio insita esset, cur quæso tam pertinax & chronicus hic est affectus, graviter per plures annos ægras femellas torquens. Non dubitandum est, ipsum vaporositatem & delinitionem suam sulphurea spasmos sopire & dolores sic subtrahere, quod tamen ad breve temporis spatium perdurat: nequaquam enim causam, quæ nervis altius impacta est, maxime omnium autem in hypochondriis radicatam sustollit, ut longe alia hinc opus sit procedendi via, si omnem huic rebeli malo subnascendo præscindere velimus occasionem.

31. Fabam S. Ignatii hoc etiam tempore à plurimis medicorum ceu antepilepticum & antifebrile celebrari quis ignorat. At vero, ex relatione peritorum virorum, qui hac ipsa adversus memoratos morbos usi fuerunt, scribimus, non leves ex ejus usu anxietates præcordiorum & angustias ventrisque tormina fuisse subsecuta, & licet quandoque his superatis febrilis insultus, imo epilepticus, fuerit remotus, quod tamen non semper contingit, insignem tamen remansisse virium imbecillitatem. Quare in ea sumus opinione, hanc fabam naturæ nostræ maxime esse inimicam & lenem recondere virulentiam. Cujus rei simile argumentum præbent venena mitiora vel in minori dosi oblata, qualia sunt mercurialia & arsenicalia, magnes quoque arthenicalis, quæ febriles, imo convulsivas commotiones quandoque compescunt, non alia de causa, quam quod truculentos spasmos & irritationes aliis in regionibus corporis nostri efficiant, unde accidit, naturam quasi ibi occupatam pristinos motus non amplius instituere in solitis partibus, sed derivari spiritus & motus morbosos ad partes à veneno tactas, & hac ratione quandoque habitu suo excidere, ut in integrum deleatur paroxysmus, quod ipsum tamen rarioribus dubiisque eventus ac periculo plenis, phænomenis accensendum est, nec nisi in solo p. n. inordinato motu immaterialis & formalis rationem habente succedit, quod si fecus, & materialis perniciofa causa anomalos motus inferens præsto fuerit, ut iusta indicatione, ita rationali destituitur expectatione.

32. Inter specifica remedia hætenus deprædicata haud exigua certis in locis fama claruit liquor quidam acidus, ut variolarum antidotum certissimum, adeo ut eo devenerint, non posse variolosum amplius mori. Cui magno thesauro, uti vulgo fit, inhiantes veram ejus editionem captabant omnes; in quo cum sæpius frustrarentur, habuit & hoc medicamenti genus suum fatum, ut ejus præparationes valde differant, multique in Hassia cum pharmacopæi tum medici habeant compositionem eamque pro genuina commendent. Ut ut se habeat, omnes, quot hætenus videre contigit, in eo conveniunt, quod ex acido minerali sint conflata. Huic autem remedio omnem gloriam adimere nolumus, sed potius suum ipsi usum vendicamus, in eo tamen discrepantes, quod pro infallibili medicamento venditari nequeat, quasi nullus ex variolis, hoc adhibito, mortem obeat, cum in epidemicis variolis ante aliquot annos hic locorum grassantibus multa in contrarium exempla viderimus.

33. In confesso est apud omnes peritos, in variolis peccare sal quoddam tenue volatile causticum vesicatorium, quod in cantharidibus, purgantibus & emeticis cuivis innotescit; porro juvenes maxime & sanguineos, si variolis corripiantur, intensissimas incurere sanguinis & spirituum commotiones, has vero ab acidis cohiberi certissima quoque res est. Nullum hinc est dubium, si in principio adhibeantur, magnam hæc

præstare efficaciam, at vero quando malignitas fuerit complicata, i. e. sanguis & humores ad putredinem vergunt, vires labascunt, motus humorum imminuitur, imo tota M.S. peregrinis causticis salibus stipata est, ut vel in nimia copia erumpant, vel salia ista succo nutritio, qui deficit, obvolvi & emolliri nequeant, quod in cachecticis & melancholicis accidit, certe ipsum hoc remedium tunc non sufficiet salibus istis morbos in humoribus jam dum oberrantibus invertendis.

34. Ut panacearum seriem ulterioribus explicemus, nostra disquisitione haud indignæ sunt famigeratissimæ illæ pilulæ Wildegansii, quæ sub titulo panaceæ solaris circumferuntur, cujuscunque generis morbis tam chronicis quam acutis expugnandis habitæ pares. Concinnantur hæc ex opio cum aloe auroque fulminante aliisque ingredientibus mixto, quibus narcotica opii virtus corrigatur & cicuretur, ut in securum transeant opiatum, quod motum ita temperat, ne omnes excretiones penitus intercipientur, sed primæ viæ aperta & transpiratio libera servetur, quæ vera earum operandi est ratio. At vero, quam plures dantur morbi, in quibus quantitas humorum excedit, circulus immixtus est, stasis primas tenet, vasa turgida & inflata sunt, viscerum obstructions adsunt, ubi nec hæc, nec alia sedativa locum habere possunt. Eadem nostra est sententia de pilulis Starckii sive Matthiæ Anglicis.

35. Sulphura mineralium, præsertim antimonii, metallicis subtilioribus particulis nobilitata & omni venenoso, stimulante principio orbata, magnum in mendo spondent usum; pauca enim dosi excretiones ad peripheriam corporis promovent, & in dispositis alvum quoque expediunt, unde non inutiliter tam in acutis quam chronicis morbis adhibentur, & inter tanta diaphoretica reponuntur. At nec hæc omne punctum absolvunt, utpote plurimi morbi à plethora oriuntur, qui remedia diluentia, humectantia, viscidos humores incidentia requirunt, ubi motum exacerbare non modo supervacaneum, sed & absolum esset, unde prudentiam in applicando merito consulimus, cum aliam considerationem & tractationem humores fluxiles & mobiles, aliam vero crassi & immobiles involvant.

36. Accessum jam facimus ad fallaces liquores solares, aura potabilia varii generis, auro si non abundantia, aureum tamen effectum foenerantia, quæ ex auri calce salibus oleosis resoluta & postea in spiritu vini extracta conficiuntur, & paucos, modo dextre illa præparare quis noverit, sumtus requirunt, dum pauca magnis ampullis horum liquorum erogandis grana auri sufficiunt. Dicitur enim vix potest, quam aurum prævie solutum per liquorem se diffundat. Prostant inde variæ tincturæ, selectis nominibus ornatae cum in Anglia, tum etiam Germania percelebres. Ne vero empiricorum more res agere & tractare videamur, lubenter concedimus, præconia illa ex auro paratis vendicata quodammodo relinquenda, nec veterum chymicorum & medicorum his de rebus sensum plane reprobandum esse. Cum enim aurum inter metalla nobilius, mercurio fixiori, valde tamen activo gaudeat, & more aliorum metallorum, salia maxime temperata continentium, in pauca dosi virtutes suas exhibeat, quis ipsi soluto & debite dein edulcorato energiam suam denegare posset?

37. Consistit autem auri efficacia maxime in eo, quod metallico suo, simplicissimo, activo mercuriali principio, spiculis salinis armato cum chylo sanguini insinuato, non modo in primis viis, sed etiam per totum corpus vasa excretoria nerveasque membranas animet & irriter, ut sic totus circulus sanguinis ac humorum promptior & excretiones liberiores fiant idque sine tumultu, sine calore p. n. peragatur; & cum sanguinis circuitus promotus multis iisque gravissimis mor-

morbis medeatur, satis perspicitur, & hanc medicinam recte adhibitam plurimum posse. At vero, ut omnia reliqua, ita & hæc recto usu sunt determinanda, nec promiscue in omnibus morbis & subjectis convenire arroganter dicenda; alias mehercle imprudenter & inconsiderate sic adhibita hæc medicamenta potius diffamantur, quam effectu, qui de ipsis jactabatur, ea frustrari homines videant.

38. Nostira itaque est sententia, illa nil efficere posse, ubi motus ille est improporcionatus v. g. ad saburram movendam, ad excludendos viscidos humores per alvum, ad sanguinis quantitatem imminuendam, neque ubi jam contractio quædam adest spasmodica, ipso nempe in paroxysmo; quæ extra paroxysmum optime conveniunt, quatenus causam, excrementitia nimirum salia eliminando, transpirationem liberam reddendo, hæmorrhagias sistendo & convulsiones avertendo, præscindunt. Nil itaque solidi præstabunt in affectu hydropico, cachectico, scorbutico, podagra inveterata, asthma convulsivo, calculo, malo hypochondriaco & hysterico, contracturis, & ubi anxietates, diarrhææ, vomitus ventrisque tormina infestant, nisi alia accedant debitaque dosi, & reiterata quidem, debitoque tempore propinentur, & revera tunc temporis, quando humores redduntur fluxiles, in personis cholericis, tenerioribus, tempore remissionis vel intermissionis, præmissis prætermittendis præparantibus &c. tuto nec sine effectu possunt exhiberi.

39. Veneris tincturæ, quæ sub specioso titulo & hodie pro tincturis martialibus venduntur, quantumvis ex marte præparentur, à venere tamen, cujus contagio & enti primo omne debent, omnis dependet effectus, variis id testantibus experimentis. In refracta enim dosi propinata eodem modo, quamquam non eadem securitate, ut alia medicamenta ex auro parata, agunt, dum irritando in toto corpore motus augment humoresque fortius impellunt, & hac ratione excretiones adjuvant, unde in variis morbis chronicis, epilepsia, vermibus, sanguinis impuritatibus, febrilibus insultibus non de nihilo sunt. Quorsum etiam spectant crystalli cœruleo elegantissimo colore splendentes, efficaciarum in epilepsia ex lacte corrupto generata haud spernendæ.

40. Nunc demum de mercurialibus quoque, quibus à magnis Chymiatriis divina vis tribui solet, aliqua adhuc erunt subjicienda. Indubium est, mercurium inter omnia mineralia & metalla quoad agilitatem & efficaciam maxime esse penetrantissimum, qui in exili mole validissimos motus magnosque effectus in corpore humano edere solet, id quod mercurii crudi vel externus, vel internus usus in lue venerea curanda assatim testatur. Id tantum incommodi hoc generosum remedium habet, quod facile veneni induat naturam, præsertim si salia acria, quæ ejus amplexus mire appetunt, in corpore nostro accedant, quod præcaveri potest, si cum auro, quod mercurius fixissimus est, vel cum sulphureo quodam corpore, v. g. jove, sulphure antimonii combinetur, & debito calore digestivo temperetur ac subigatur, qua ratione in summe efficax transit medicamentum, quo adhuc eximiori dotabitur virtute, si prius probe depuretur, qualem purificandi modum tradit *Philaletha in Introitu aperto ad occlusum regis palatium*.

41. Hoc certe medicamentum, si ullum, potentia valet in corpore motus, non tamen destructorios, excitandi, dum immediate agit in nervos & spiritus, minime autem proxime in sanguinem & humores, uti alia calida & sudorifera, vim suam exerit. Cum itaque omnium humorum & sanguinis motum in toto corpore reddat auctiorem, illeque circulus intensus incongrua expellendo, obstructions recludendo uni-

ce corpus fanet; facile liquet, rebellium morborum sanationi hoc prudenter adhibitum satisfacere posse; operatur autem potissimum per transpirationem, quam promovendo vires suscitatur, caloremque, eum tamen non excessivum, per totum corpus efficit, adeo ut ejus operatio fiat quasi in instanti, mox enim ægotantes ab exhibitione talis remedii, ut & auri rite soluti, virium quoddam incitamentum majusque robur persentiunt. Hinc si ullum medicamentum reperitur, quo mirabiles effectus in morbis possunt produci, maxime hoc ipsum est; tantum quod ejus decens præparatio longum temporis spatium & indefessum exigat laborem. Verum enim vero, nec ejus usus ubique quadrat, quem respuunt & admodum abhorrent magna virium debilitas, tenera subjecti constitutio, sanguis calore hæctico vel febrili resolutus, inflammationes, exulcerationes & corruptelæ viscerum, alvi fluxus, vomitus; quibus in casibus si mercurialibus rem nostram agere susciperemus, magis tum noceremus, quam prodessemus.

42. Postquam hæcenus celebratissimorum remediorum, quibus Herculeas operas communi empiria præstare volunt vulgares medici, universalibus remediis, panaceis, specificis, essentiis divinis &c. mire delectantes, mentionem & verum usum injecimus, jam tempus foret, ut produceremus exotica illa proximo abhinc tempore summis encomiis ad nos delata: ita v. g. herba ackmellæ ceu certum specificum contra calculum, Pietra del Porco ceu tutissimum alexipharmacum, & mures marini tanquam solamen præsentissimum affectuum hæmorrhoidalium commendantur; sed cum de eorum usu partim ex experientia, partim ex relatione aliorum, quod pollicitationibus effecta respondeant, & quod in aliis quoque reperiatur idem effectus, nihil certi determinare valeamus, sicco quod ajunt pede illa lubenter transibimus.

43. Unum adhuc superest, ut brevibus tangamus, quod quondam magnam sui fecit exultationem, curam nimirum per sympathiam, quæ ceu certum & infallibile medium multis affectibus medendi tam in aulis principum, quam à magnis viris prædicabatur. At vero, hæc ipsa certe in se nihil valet, nisi quod fortior imaginatio quosdam effectus, maxime autem sudorem, in iis, qui sensibilibus sunt naturæ & ab animi motionibus facile occupantur, producat. In cujus rei certitudinem inquisiturus ego ipsemet experimenta institui, excrementa, nimirum urinam, cum pulvere isto famigeratissimo, qui ex vitriolo, sale communi & terris compositus erat, coquendo. Secutus equidem est effectus sudorificus, at quod notatu dignum erat, etiam in aliis personis tum ægotantibus, quorum cum urina coctionem talem non celebraveram; in ea autem versabantur ægroti opinione, ac si experimentum hoc cum ipsorum urina fuisset factum. Plane itaque infidum est & per accidens tantum quandoque aliquos post se relinquit effectus.

44. Ex merito sic, ut opinamur, empiria notata, superest, ut vexatissimam hanc in foro medico questionem agitemus ac solvamus: num detur medicina universalis? Ad quam prævie reponimus; cuivis ex superius adductis satis constare, talem neutiquam dari posse, utpote tale remedium, quod quovis fanet morbos, inveniri stolidum esset assertio. Intelligenda itaque res ita est: an tale detur remedium, quod tuto in omnibus morbis possit præscribi, & quo solo etiam morbus alias sanationem non admittens ad eam possit deduci? quod neque posteriori hoc sensu locum habet. Nam quamvis non negemus, dari remedia multi & magni usus, fieri tamen non potest, ut ad unam classem referri valeant, quoniam in affectibus & paroxysmis sæpius occurrunt motus sanguinis & spirituum exorbitantes & effrænes, qui sunt sistendi, cohibendi, demul-

cendi. Deinde, dantur etiam ex adverso morbi, ubi motus sunt languidi, debiles, imminuti, qui sunt excitandi, promovendi.

45. Præterea, medendi ars generalibus indicationibus multis de causis, & impedimentis variis obstantibus nec comprehendere, nec iis acquiescere potest. Primum enim nisi in corpore adsint spiritus, qui motus efficiant, nil juvabunt ea, quæ excitabunt, illi siquidem proxime & immediate constituunt impulsus in machina nostra; ubi ergo nullus motus per artem introduci potest, nullus stimulus proficit, sed tum ea necessaria sunt, quæ materiam & pabulum spirituum largiuntur, neque etiam sufficiunt spiritus & ea quæ spiritus ad motum instigant, sed materia debet adesse mobilis, in certa quantitate eaque non nimia, alias motus est improporcionatus, neque in minima, alias deficit & languet. Deinde vero, humores quoque debent esse constituti debita in qualitate & temperie, qui si nimis fuerint densi, inspissati, crassi, fixi, nullus subsequitur motus, utut stimulus & causa motus sufficiens adsit. Ad hæc viæ quoque debent esse aperta, libera; unde licet motus adsit, viæ vero compressæ & constrictæ aut obstituta fuerint, tum motus magis incongruus erit, & sæpius magis nocebit quam proderit. Revera enim, quod quantitatem auget humorum, non potest eam adimere, & quodcumque humores consistentes reddit, illos non potest subtile, tenues, sulphureos & fluidos efficere.

46. Ex quibus omnibus iuste concluditur, non unum ad amissum sufficere remedium, sed plura diversi generis diversæque naturæ & indolis concurrere debere ad obtinendam sanationem, quæ quum teste experientia non conspirent in unum effectum, certe unum remedium haud quaquam par erit. Tandem vero, qua ratione unum remedium temperiem sanguinis conservare possit, non videmus, cum spiritus vitæ, ut ROLFINKIUS loqui amat in *Chym. in artis formam reducta*, à variis causis lædatur, ideoque nec una sufficiat medicina, sed plures, ut removeantur plura hæc impedimenta. Quemadmodum enim non unum alimentum sufficit, quod corpus conservet, sed præter fluidum aëreum temperatum alimenta ac potus varii generis vigorem ac sanitatem conservant: ita etiam diversæ naturæ esse debent, quæ resituant, quod desideratur, & detrahant, quod abundat & luxuriat, quo debita harmonia, temperies & proportio non modo in mixtione humorum, verum etiam in eorum motu producat, quæ uti fundamentum est vitæ ac sanitatis; ita etiam fundamentum ac scopus debet esse omnis Therapiæ & curationis.

47. Ex eo jam perspicitur, quantam ignorantiam profiteantur, & quanti deceptores sint ii, qui hominibus persuadent, dari certa adversus morbos particularia & universalia remedia: quod si ita esset, carere possemus studio medico & physico, & facillimus labor esset curandi. At profecto res non adeo levis est, nec cadit vera medicina in idiotas, nisi per accidens, cum sola natura, vel medicamenta ex mero accidenti cæco impetu adhibita operantur. Stat ergo sententia CICERON. l. 2. de legib. quod, uti juris disciplina non haurienda est ex edictis iudicum, tabulis XII. sed ex intima philosophia; ita quoque medicina non ex formulis medicorum, ex solo usu, sed ex rerum naturalium studio ducenda sit, qua duce vix medicus errare potest.

48. Ex proluxa hac medicamentorum serie, quam brevi, quantum fieri potuit, orationis filo prosecuti sumus, clarissime apparere arbitramur, talia remedia nunquam inveniri posse, quibus in singulis morborum curationibus certo confidere audeamus, ita ut omni tempore & in quibuscunque individuis optatum præstent effectum. Generosa, imo polychresta dari & haberi, secunda pariter, quæ certis in morbis, quid quod in pluri-

bus desideratissimam opem conferant, remedia, id omni modo largimur, agnoscimus & experimur. At, omnia illa non nisi relativa sunt, relatione nempe nitentia ad causas morbificas ut & individua, unde est, quod prudentiam medendi & applicandi exposcant. Medicorum enim est, omnes tam prævias, quam concomitantes circumstantias probe inquirere, ponderare, naturam medicamenti cum genio morbi, & quidem in tali individuo comparare; quod si neglexerint, quid aliud quam mera & temeraria Empiria exsurgit? Interdum quidem accidit, si aut fortuna adjuverit temeritatem & ab ejus farinæ medicis in mortem vel sanitatem propinatum remedium, aut si forte concedente morbo illud profuerit, ut inde magna, imo divinæ propemodum scientiæ fama in vulgus dimanet; sed, quamvis hic bonus & faustus eventus ex temere adhibitis medicamentis per accidens succedat, eo tamen, si non alio nomine tota res culpanda erit, quod noxa, quæ debita prudentia adhibita evitari poterat, ægrotorum afferat salutem.

49. Quod si igitur lapsam & quasi in ruinam omniumque contemptum conjectam medicinam velimus erigere & pristino suo nitori restituere, veramque rationalem praxin & certam demonstrativam medendi rationem firmare ac statuminare, ante omnia opus est, ut affectuum conditiones & remediorum operationes in variis individuis, variisque morbificis causis & casibus probe attendamus. Profecto in eo differt vera praxis à vagabunda empiria, & verus medicus ab indocto & circumforaneo, quod ille certo scit, tam à priori quam à posteriori, quæ damna & incommoda & quæ utilitas ac fructus salutaris in subiecto ægrotante sperari possit à medicamento. Hic autem vagabundus & confusus semper fluctuat, nil certi determinare potest.

50. Si quid itaque commendandum est, quod solidam praxin efficit quodque medicinam evehit, nil certe est excellentius, quam attente & solerter cum suis circumstantiis observare & annotare diversissimos effectus remediorum in his vel illis individuis, locis diversis, certis anni temporibus, certis in morbis & eorum progressu. Sic enim periti viri deprehenderunt, bonos in praxi eos fecisse progressus, qui morbos primis annis obvenientes cum omnibus circumstantiis memoriæ & litteris probe mandarunt, consignato semper successu ac eventu remediorum. Optandum esset, ut omnes, qui medicinam faciunt, id monitum curæ cordique haberent, in quo sane omnis praxeos felicitas & auspiciatus successus agendi consistit. At vero, res non tam facilis & superficialis est remediorum vires ac facultates recte explorandi, plura & majora sunt, quæ scrutinium hoc utilissimum morantur: non minima enim prudentia est, distinguere effectus remediorum ab effectibus solius naturæ, quandoquidem in morbo non tantum medicamenta agunt, sed & natura ipsa agit ac ipsius quoque morbi vis non parum addit.

51. Quum itaque hinc facile confusio, errorum mater, gliscat, quatenus nempe fallacia causæ ut causæ admittitur, quodque naturæ & morbotribuendum, ipsi medico falso adscribitur, quod & PECHLINUS in suis observationibus memorat, dum, *Frequens*, inquit, *est in medicorum scholis fallacia causarum & adeo quidem propria, ut neminem adhuc unum cognoverim eorum, qui ad praxin se adjecerunt, qui cum vitio hoc non usque sit colluctatus*; omni modo è re fore iudicamus, regulas & monelas quasdam hic annexere, quæ tractationi huic lucem affundere queant. Primum ergo paucis edisserimus, quod naturæ effectus sæpius ab ignavis medicis habeantur pro operationibus medicamentorum & pro actionibus suis venditentur, id optime notante GALENO l. 2. de medicament. Facult. p. 21. quo loco ait: *Sæpe propriam cujusque medica-*

menti vim obscurari necesse est, ubi fallentem aliunde qualitatem acceperit. Ita v. g. accidit, in variolarum principio vehementissima esse symptomata, & delirium ipsasque convulsiones accedere; si quis ipsa hæc symptomata, quæ vigore & natura morbi ita fiunt, asserat medico, vel medicamento purganti, quorum utrum hæc subsequuntur, is magnam ipsi inferet injuriam, & contra, quum circa diem quartum omnia sunt pacata & tranquilla, ferocia symptomatum reinit, si tum alius medicus gloriari velit, suis datis remediis hæc se fuisse, is certe inanem gloriam aucupatur, quæ potius victrici naturæ in acceptis ferenda est.

52. Ex febribus intermittentibus eæ, quæ autumnæ & hyeme invadunt, sua natura ac indole curationis negotium difficilius reddunt. Si quis autem hanc curandi difficultatem in medicum rejicere velit, etiam si optima illuc facientia porrexerit remedia, is certe rei ignarus maxime errabit, & vice versa, quandoque quispiam circa tempus vernum & autumnale, febris vehementia defervescente, omnem curandi gloriam certis tum temporis adhibitis remediis velit arrogare, is falsam ipsis tribuet virtutem: tali enim tempore vigorem nata natura ipsamet par est proferenda minera febris per transpirationem aliaque excretoria, tanto magis, si idoneum ipsi suppetias ferat medicamentum. Frequenter quoque in febribus malignis continuisque evenit, symptomata adesse gravissima, præsertim in statu, quæ sua sponte sæpius cessant, vel etiam circa dies sic dictos criticos, septimum, nonum vel undecimum pejora fiunt: quando itaque melior vel pejor exurgit status, quis adscribet hos medico vel medicamento effectus? Ad hæc, de febribus inflammatoriis, & præsertim peripneumoniciis constat, has primis temporibus graviter affligere decumbentes, sed die quarto solvi sputo cruento & die septimo plerumque sudore terminari, ipsius naturæ robore. Perperam jam faciet is, qui remissionem morbi sua prudentia & medicatione vel remediis tum temporis datis procuratam esse gloriatur.

53. Quandoque contingit, febres continuas, variolæ etiam & morbillis solemnes, certis temporibus non adeo mali esse moris, quo casu vel sola natura omnem medicinæ paginam absolvit, vel tantillo adjuta, quod sagacissimus motuum naturæ observator SYDENHAMUS non otiose perspexit. Si jam medicus offert remedia, quorum nulla adeo erat necessitas, ipse interim morbus placide decurrit, & tum exinde velit concludere, se datis medicamentis illud præstitisse, certe decipietur. Sic dantur quandoque quartanæ æstivæ, quæ sanguineos & juvenesprehendunt, ex fervidissimo aëre subnatæ, in quibus china chinæ, salia absterfiva & regulus antimonii medicinalis egregiam ferunt opem, quam si quis credat universalem, & dicta remedia ceu specifica & quæ infallibiliter sanent in omni febre commendat, is tempora & temperamenta distinguere haud novit; cum enim illic natura morbi benignior & mitior sit, facilius quoque obsecundat remediorum energiam. Sic v. g. videmus juvenes paralyticos facilius, senes ægrius sanitati reddi, quod certe non solis remediis, quæ contra affectum illum diriguntur, debetur, sed potius in ipso naturæ vigore causa est quaerenda.

54. Idem quoque obtinet in Chirurgicis ratione vulnerum, quæ in sanguineis & benignum seu dulcem sanguinem foventibus levi data opera ad consolidationem perducuntur, contra quam in melancholicis, cachecticis, scorbuticis fit, quos ob sanguinis dyscrasiam graviora symptomata manent, ut adeo effectuum diversitas ex unguentis & emplastris impositis non unice sit derivanda. Ita porro phthisis vera in ætate juvenili orta, v. g. ex hæmoptysi & pleuritide ma-

le curata, salva reliquorum viscerum eorumque, medellam admittit, quæ in iis, quorum viscera scirrhusa & obstructa sunt hincque naturæ vires vacillant variis spasmodis attritæ, haud æque speranda est, nec facile eadem remedia opposita quid proficient, quod iterum argumentum præbet dextri vel sinistri eventus ex ipsa natura decidendi.

55. Demum vero quid frequentius, quam febribus ardentibus complicari diarrhoeam, ægrorum salutem in ancipiti versante, quam in medicamenta mox propinata & medicum rejecturus utrisque faceret injuriam. Taceo, quod sæpius morbi chronici sub uno climate obstinati curam eludant, mutato cœlo, sub alio, accedente alia insuper diata, stationem suam derelinquant. Maximopere itaque errant, exsolutionem morborum à natura perpetratam suis, quæ præscripserunt, remediis pompose adjudicantes, cujus opinionis falsitatem per sexcenta alia, si per specialem morborum classem sigillatim percurrere animus esset, facili negotio evincere possemus.

56. Quis quæso ex dictis jam non colligere poterit, effectus naturæ & medicamentorum probe ab invicem esse distinguendos, & non raro naturam, nullis adjutam remediis, aut levi saltem medicatione morbum profligare, & hoc jam est illud fulcrum, ille clypeus, illa anchora, sub cujus favore latitare, personas suas agere & famam venari possunt summe ignorantes, ita ut per naturam sint medici, minime vero per artem suam ac rationem, naturæ opera pro suis audacter venditantes, quo stratagemate & sagaces quandoque medici naturam & tramitem morbi, quem curant, probe intelligentes, hæc ipsa, quæ à natura efficiuntur, ad captandam famam & gloriam, in sua, ut facile est morborum ignavis imponere, transferunt remedia suæque vendicant prudentiæ. Deceptiones itaque in nulla re frequentius & facilius contingunt ac in medicina, ubi alias etiam prudentissimi falluntur, quum, optime notante PECHLINO in suis *Observ. aliquando in medicina eveniant, quæ evenire nec posse nec debere juratus crederes, adeo aliena illa sunt tum à scopo medici, tum medicaminis effectui; nunc etiam quæ speras & fingis animo futura, non eveniunt, aliter quam oportet*. Conf. BAGLIV. *Prax. med. l. 1. cap. 2. §. 4.* Sed candoris & veritatis amans hæc omnia non curat, sed tanto ardentius inquit & separat, quid solius naturæ opus sit, & quid per naturam medicamenta operentur, quod alias sibi relicta haud daret effectum. Nam natura semper etiam per medicamenta operatur, sed hoc maxime loco in quæstione est, quid natura sola possit efficere, & quid non, nisi per adjuncta medicamenta, & tum certi sumus de probata remediorum virtute.

57. Quo pacto vero ad illam cognoscendam pervenire possimus, monita quædam ceu regulas ad medicamentorum agendi modum investigandum & determinandum coronidis loco adjicere necessarium duximus, ut quæ hæcenus dictorum erunt consuetudines. Primum igitur ægre facienda sunt experimenta circa remediorum efficaciam in morbis acutis & continuis, ubi maximus jam dum naturæ est fervor, vel in bonum vel in malum cessurus eventus. Dicimus, obscuram hic fieri genuinam remediorum virtutem, quod hæc naturæ, tum in fastigio positæ, viribus implicentur & involvantur. Aliter se res habet cum morbis chronicis, obfirmatis & contumacibus v. g. epilepsia inveterata, quæ à sola natura haud excutitur; hinc si medicamento dispellatur, nullis metuendis reduviis, tum certe magna vis adscribi potest illi pharmaco contra eam in hoc vel illo subjecto directo. Pari modo febres intermittentes rarius à sola natura sanantur, quæ si identidem remediis tollantur, tum sane his causæ curationis est adscribenda.

58. Porro

58. Porro mania soli naturæ nimis gravis est, ut ab ea superari valeat, quam si medicamenta sustulerint, ea utique haud exiguum reportabunt considerationem. Spasmodicæ partium contractiones, cardialgiæ, singultus, vomitiones, palpitationes, & quæ innumera alia symptomata hypochondriacos & hystericas diu graviterque exercentia, si certis remediis cessent, his sua efficacia est relinquenda. Malum scorbuticum inveteratum & lues venerea sunt affectus gravissimi, quos sola natura non vincit; quod si autem certa medela ipsis paretur, quis non in medico vel remedio hoc positum esse dixerit. Hæmoptysis, nimius mensium fluxus, fluor albus, mictus cruentus solius naturæ auxilio non facile cedunt, quos qui solide curaverit, maxime sua laude dignus erit. Hydrops vel ascites vel anasarca non sanescit solius naturæ ope, cujus curationis fructus in medicinam omni modo redundat. Molestissimus ille podagricus affectus, bis per annum ad minimum ægros divexans, si à ferocia sua desistat, nec amplius revertatur, tum curatio non est de nihilo, nec tam naturæ quam medico tribuenda. Oculorum vitia, pannum v. g. exulcerationes partium, capitis tineam, scabiem siccam vel humidam, & omnes alios in exteriori corporis ambitu conspicuos morbos, sola natura rarius excutit, quorum perfecta sanatione si ægri valeant, quis remediis hoc acceptum ferre nollet?

59. Quisquis ergo gloriari cupit de certa remedii efficacia, de medicamento magnæ efficaciam noviter invento, huic, nisi in memoratis morbis eodem se quid præstitisse demonstraverit, non facile fides est habenda; scimus enim, quanti referat medicamentum in paroxysmo exhibuisse, quod extra ejus momentum nihil forte effatu dignum sisteret, in quo à PECHLINO non dissentimus, quando in suis *Observ. p. 17.* scribit: *Non in alio magis medici boni prudentiam consistere, quam in temporis, aut momenti illius aestimatione, quo natura jam ipsa solvere se gestit, siquidem illa obluente natura πάντα;* hoc ipsum tamen remediorum explorationem relinquere incertam agnoscimus, cum in febribus continuis & morbis acutis, nec non in paroxysmis chronicorum motus maxime sint vegeti & intensi, qui sæpius bonum in finem cedunt, & dolores, spasmos, febriles commotiones ac symptomata his annexa averruncant. Omnis itaque eorum operatio, quæ in ejusmodi casibus divulgatur, valde dubia est, si non infida, cum medicus suis remediis motus exsuscitare hisque corpus humanum refarcire debeat, non natura sola, alias immergitur errorum labyrintho.

60. Deinde quoque, ut certior evadat de remediorum virtute peculiari ac specifica, non sufficit, ut semel vel bis talis sequatur effectus, sed sæpius iterata confirmandus observatione. Multi siquidem, quos merito sagaciores esse admonet BAGLIVIVS lib. 1. *Præxos medicæ c. 5. §. 1. & 8.* quodque in initio hujus differt. notavimus, ob faustos eventus semel aut bis observatos ex aliquo remedio, vel potius ob innatam quandam proclivitatem tum laudandi, tum fingendi ad libitum medicamentorum vires, ita erga remedium aliquod afficiuntur, ut putent, illud unum ad curandos quosque morbos summam vim ac veluti imperium obtinere, sed progressu temporis re melius perspecta illud particulare & instabile, non vero commune ac perpetuum fuisse animadverterunt. Non equidem statim desistendum aut desperandum est de remedio, quando non in eodem morbo eadem operatio sequitur, nam causa morbi & subjectum variat, sed necesse est, ut medicus, si accuratam medicamentorum notitiam habere cupiat, totius morbi historiam cum adjectis circumstantiis & remediis usurpatis graphice concinnet, qua ratione minime est dubitandum, si similis quoad omnia oc-

currat, eandem expectandam esse virtutem & se speciales vires in hoc vel illo morbo experturum. Utinam hac methodo instructam generosorum remediorum haberemus cognitionem, ad quam quis sine improbo observandi studio non pervenerit, nisi medicamentum agere sui que officii negligentiam præ se ferre videri velit.

61. Porro medicamentum exploraturus, hoc solum adhibeat, non cum aliis mixtum, ubi ab ingredientibus ad composita argumentari haud licet. *Dolosum enim est, juxta WALÆUM p. 49. uti composito, ubi simplicia sufficiunt. Composita enim ideo inducta videntur, ut medicamentum præcipuum aliorum additione abscondamus.* Impossibile quidem est, ut unum remedium omnibus satisfaciat, interim tum, cum exhibet ut agat, non adjiciat alia, quæ vel infringere vel augere vim possunt, unde dubitatio postmodum injicitur de virtute ejus genuina. Quod si vero medicamentum compositum sit, cui tanta vis tribuitur, hoc non cum aliis jungatur, vel si certa methodus curandi venditur, ea etiam bene erit attendenda, nec pro lubitu varianda, alias nihil certi inde elicere possumus. Optandum foret, ut gloriari possemus in praxi medica, plures nobis notos esse specialissimos effectus in variis individuis remediorum heroicorum, ita majori felicitate, certitudine & fama salutem promoveremus ægrotorum. Sed prohi dolor! pauca nobis nota sunt remedia, idque culpa perversæ methodi: nam cum variis compositis pro varietate individuorum pugnamus, quum ipsi medici sibi contrariantur, hicque hanc, ille aliam eligat methodum, quales autem observationes & quales effectus certi sint, experientur medici.

62. Ad hæc requiritur ad instituendum medicaminis examen, ut debita dosi certoque tempore detur & convenienter continuetur: sunt equidem qui sciunt certum adversus morbos remedium, sed quoniam debitum tempus non attendunt, desideratus effectus haud respondet. Quo faciunt ea, quæ leguntur in *Dissertatione superiori de prudenti medicamentorum continuatione.* Nunquam enim vires innotescunt remedii, quod non pro ratione individui vel morbi sub debita dosi & ad certum tempus usui destinatur: crebra enim mutatio remediorum medicinæ pestis est, quæ certitudini in arte medica comparandæ admodum officit. Ad quam vitandam medicus non statim à medicamento desistat, memor moniti HIPPOCR. *Sect. II. aphor. 52.* dati: *omnia secundum rationem facienti, si non succedant secundum rationem, non est transeundum ad aliud, si manet, quod ab initio visum est;* si gravia superveniant symptomata, ipsi prudenter dijudicandum erit, an à vehementia morbi vel medicamenti illa sint arcessenda, quod ipsi constabit, si pluribus experimentis id scit effectum. Nec facile à cognitis usitatisque remediis ut securioribus ad incognita & vulgo dictas panaceas abripi se patiat, ubi *nil temere experiri* medicum admonet HIPPOCR. *l. 6. Epid. Sect. 2. text. 29.* sed bene fundata ratiocinatione, summa id exigente necessitate, ad alia demum accedat, quod & antiquiores medicos à se non alienum duxisse CELSUS auctor est, qui non quodlibet ægris inculcaverunt, sed cogitarunt, quid maxime conveniret, & id usu explorarunt, ad quod conjectura adducti sunt.

63. Si quod autem præter expectationem impedimentum cum ratione medicamenta præscribenti & de reliquo agenti interveniat, aut longe aliud occurrat phenomenon, subinde quidem cogitet, memor illius ex CELSO, *mon borum in iisdem hominibus alias atque alias esse proprietates, & qui secundis aliquando frustra curatus est, contrariis restitui.* At sic diversum suo quem intendat scopo advertens effectum simul sollicite inquirat, num relationi ægrotantium tuto fidere possit, ut qui non raro ipso incio alterius cujusdam acciti medicamen-

camentis usi priorem anxium reddunt; de reliquo etiam animæ & imaginationis maxime subinde variantis vires in figillandis remediorum effectibus non insuper habeat, qua de re miras eleganter annotavit historias PECHLINUS in suis observ. lib. III.

64. Demum certa ille in experiendis medicamentis incedet via, qui elementa eorum activa, quibus agunt vel agere possunt, à priori cognoscere annititur. Cui tentamini non modo manus porrigit ipse, sapor & odor, qui de elementis activis, sale & sulphure testantur, sed potissimum subvenit analysis chymica, variis per ignem adornatis destillationibus, solutionibus per artem, aut mixtionibus, reductionibus cum variis liquoribus celebratis, quibus omnibus naturam, indolem ac principia medicamenti detegere non minus curiosum quam fructuosum existit. Et si quis à priori cognoscit remedium v. g. mediante sapore, illico eo solo noscere poterit quasdam illius vires.

65. Propterea, si ex metallis & quidem mercurialibus desumptum est medicamentum, operabitur minima in mole; si est ex marte, virtute adstrictiva & roborante; si ex venere, irritativa; si ex saturno, constringente pollet; si sulphureum est minerale, præter virtutem anodynam sanguinem promotum à centro ad circumferentiam pellet; si ex regulo antimonii vel arsenico fuerit paratum, gravissimas & vehementes excitabit commotiones. Vegetabilia omnia agunt sale acri caustico vesicatorio, vel resina balsamica temperata, vel sale volatili oleoso, vel principio anodyno, vel oleo æthereo, calido, vel sale nitroso absterlivo, vel terreis, fixis particulis, aut acidis, vel principio constringente. Animalia autem virtutem suam exerunt vel sale suo volatili, vel terra alkalina, vel principio vaporoso oleoso, narcotico. Longè vero excellentius & specialius sensibus nostris sistentur per varia experimenta chymica.

66. Quæ agendi principia si quis solerter rimetur & accurate calleat, & præterea ex physiologicis & pathologicis morbi characterem designet, symptomatum rationem & subjecti ægrotantis idiosyncrasiam & specialissimos motus attente evolvat, is mehercle ex analogismo juste colligere & determinare poterit, quæ vires, an salubres, an noxiæ, ex remediorum usu sint expectandæ, quæ nec suo destituentur eventu & usu magis magisque confirmabuntur solerti, & tum longe certius & securius procedet, ac ille, qui solam consulit experientiam & citra rationem via incedit producta & obliqua: *discit enim hic, ut PLINIUS inquit, quodque HIPPOCRATES in lege sua maxime conqueritur: periculis nostris, & per experimenta impune mortes agit.*

67. Denique verò & ultimo, cum ad morborum indolem, tum ad medicamentorum efficaciam indagandam, intersviet exactior quædam ipsius subjecti ægrotantis ratione suæ constitutionis cognitio; non enim omnia omnibus utut eodem morbo detentis conveniunt, quod humorum temperies valde discrepet & hinc variam medicamenta nanciscantur operationem. Habent quæque temperamenta imo individuata suos mores, morbos & peculiarem ad hunc vel illum motum suscipiendum proclivitatem, ut hinc non sine ratione jam ab antiquis *ιδιοσυγκρασίας* studium injunctum fuerit. Quam clariorem insuper dabit sexus consideratio, ut qui diversam sæpius tractandi methodum exposcit, quando spasticarum commotionum & phantasiæ imperium in fœmininum præ virili cadit. Nec quidem negligenda sunt ætatis, vitæ generis, anni temporum, tempestatum, morborum prægressorum, regionum, aliorumque ad consuetudinem specialem pertinentium momenta, quæ singula ut in concinnanda observatione desiderantur, & verum observationum usum constituunt; ita suis quæque exemplis comprobentur.

68. Quodsi sic memoratas circa subjectum circumstantias, & circa medicamentum tempus exhibitionis, dosin, applicandi modum ratione vehiculi medicus probe annotaverit, tum demum indicati & exhibitæ sic medicamenti observet effectum, qualis mutatio contingat, an illa visatur in evacuationibus, quas promoveat vel etiam sistat, an vero in incremento virium vel robore functionum animalium, diversâ pulsus vel urinæ conditione, aut appetitus vel somni restitutione consistat. Hac methodo genuinas medicamentorum explorabit virtutes, & scientificæ Praxeos non imaginariam, sed experientiæ omnino superstructam & firmam sibi comparabit ideam; & inde est, quod medicum sic comparatum *fortuna minime egere, illam respicere aut expectare, sed & citra fortunam & cum fortuna recte facere* egregie asserat de arte medica HIPPOCRATES noster de locis in homine text. 58. imo *illum fortunæ in facienda arte penitus imperare velle, qui medicamentorum certas ac in morborum curationibus non fallentes cognovit facultates*; tum pergit: *deinde vero quid opus est medicinæ fortuna, si enim morborum medicamenta clara sunt & manifesta, velut equidem arbitror, non expectat sane fortunam ad sanandos morbos, siquidem sunt medicamenta.* Quibus omnibus ut medicamentorum virtus ad ipsam morbi naturam refertur & ex mutuo inter se habitu solide determinatur; ita accuratæ theoriæ cum praxi rationali connubium indissolubile merito infertur & statuminatur.

D E

COGNOSCENDA CORPORIS HUMANI NATURA EX EFFECTU REMEDIORUM.

§. I.

DEjecit quidem jam dudum indefessus solertiorum medicorum labor commune illud omnis Empiriæ fulcrum, fallacissimum commentum: existere in rerum natura talia corpora, quæ ex insita quadam virtute specifica, certum morbi genus, quodcunque illud etiam corripuerit subjectum, & à quacunque causa ortum traxerit, tollere possint atque profligare. Verum enim vero licet detrimenta compendiosæ

hujus praxeos jam fatis superque sint detecta; nihilo minus magna adhuc mortalium pars, brevitate hujus ad sanitatem reducentis viæ magnopere delectatur: hincque multi, cum viderunt, hoc vel illud remedii genus in morbo quodam commodam aliquando præstitisse operam, prompti inveniuntur, ad fingendam sibi compendiarum huncce morbum abigendi methodum. Quam primum enim morbus, respectu symptomatum, ex parte tantummodo similis ingruit, statim ad idem tanquam ad sacram anchoram refugiunt auxilium, & facta falsissima à particulari ad universale conclusionem,

96 De cognoscenda corporis humani natura ex effectu &c.

sione, illud, quod uni vel alteri profuit, omnibus conducibile, non sine præsentaneo ægotantium credunt detrimento.

2. Tantum vero abest, ut sinister, qui medicamenta empirice ita applicata ut plurimum sequitur eventus, tales medicos erroris sui arguere valeat; ut potius plurimi tam ex nobilium quam plebejorum numero & illis rebus, quæ medicamentorum titulo ornantur, perverse sentiant, quod ex se & sua natura sint salubres, nequaquam vero ad damnum perniciemque corpori inferendam aptæ atque proclives. Quanta autem ex putrida hac empiricæ ignorantie scaturigine indies propullulent mala, copiosissima eaque tristissima testantur exempla. Id quod optime norunt illi, qui ex indefessa attentione practica didicerunt, medicamenta non absolutas, sed certa ad ægotantis corpus facta relatione limitatas possidere vires; quique porro prudenti medicamentorum analysi physico-chymica cognoverunt, plurima illorum, si quædam forsitan ex iis, quæ universalium & auro productorum nomine circumferuntur, excluseris, talia continere principia, quæ in corpore nostro non otiose jacent, sed varias in solidis fluidisque illius partibus eorundemque motu producendo mutationes, activam suam vim, & tam ad juvandum quam nocendum promptitudinem satis superque produnt.

3. Quum itaque empirica talis, & sine omni habito ad subjectorum causarumque differentiam respectu instituta praxis, sanitatem ipsamque vitam hominum tantis exponat periculis: certe illi mihi singulari ac immortalis laude digni videntur, qui securiorem pandunt viam, sedulo inculcando necessitatem, suppeditando simul media differentiam individualemente cognoscendi, indolem genuinam, causasque morborum veras judiciose eruendi, & sic tandem prudenter inveniendi, quid cuique noxium quidque salutare. Quantum ego quidem hæcenus potui docentis munere functus nunquam non ad id curam intendi, ut demonstrata morborum origine ac genio selectissima ipsique causis morborum removendis apta remedia suppeditem, ex horum vero operatione ac effectu maxime omnium eruam, qua ratione ipsius morbi indoles ægotantisque natura rite inde cognosci possit ac debeat. Quod scrutinium pragmaticum quum magni in re medica sit momenti eximieque utilitatis, dignum æstimavi, quod paulo fusius in præsentis specimine pertractetur.

4. Paradoxum forte meum videbitur institutum, quod ex effectu remediorum, cognitionem corporis humani indolisque morborum desumendam suadeam; cum tamen ipse paulo ante fassus fuerim, omnem remediorum applicationem, nisi prius hæc omnia probe explorata fuerint, temerariam esse, empiricam atque periculi plenam. Quo itaque objectionem hanc in ipso statim limine removeam, clarius mentem meam hac de re explicare atque declarare placet. Utique ego cum omnibus medicinae rationalis amatoribus firmiter statuo, quod certa atque sufficiens corporis morbi que cognitio, omnem medicamentorum, inprimis vero validiorum exhibitionem semper præcedere, hæcque in illa fundata esse debeat. Id quod suo jam tempore optime cognoverat ARISTOTELES: ille enim medico, quem, ut sibi in morbo quodam auxiliatrices porrigeret manus, vocari jusserat, dum hic statim, nulla antea adducta causa & ratione, pharmacum vellet propinare, his verbis negligentiam exprobrasse dicitur: *Numquid bubulo mederi putas? rationem edissere, cur mihi necesse sit pharmacum bibere, si me facilem vis & obsequentem tibi habere.*

5. Longissime itaque à mente mea aberrarent illi, qui ex dissertationis hujus titulo falsissimam, & à me, & à veritate alienissimam extorquere contenderent o-

pinionem, quasi liceret medico ad ægotum vocato, naturam illius statim medicamentorum ope explorare, aliis & tutioribus idem illud cognoscendi posthabitis atque neglectis signis. Certe si ullum aliud experimentum medicum; hoc quam maxime, secundum magni HIPPOCRATIS effatum, *Aphor. I. Sect. I.* esset periculosum. Et dolenda sane miserorum illorum conditio, qui, dum ægotant, in hujus farinae medicos incidunt: iustissimam enim obtinent causam priscas illas sapientis repetere querelas: *Discunt periculis nostris, experimenta per mortes agunt, medicoque tantum hominem occidisse summa impunitas est.* Minime itaque illuc præsens mea tendit pertractatio, ut tali modo effrenatæ empiricorum audaciæ frena ulterius laxet, sed potius ut injiciat. Mecum enim fusius ostendere constitui, quomodo medicus solida scientia limatiorique judicio instructus, si ad mutationes illas, quas medicamenta in corpore ægotantis producant sollicite attenderit, pulcherrimam sæpe obtineat occasionem, intimius adhuc abditos & reconditos naturæ cognoscendi recessus. Cum enim ad feliciorum curationem summe necessaria sit accuratior ægotantis ejusdemque constitutionis notitia; certe omnia quæ nos ad eandem ullo modo perducere possunt, sedulo quoque erunt attendenda.

6. Minime igitur credat medicus, se officio suo jam satisfecisse penitus, omniaque jam satis explorasse, si ad ægotum accedens illius tetigerit carpum, & ex HIPPOCRATIS præscripto ex eo sciscitatus fuerit, *quæ patiatur; & ex qua causa; & quot jam diebus: an venter secedat, & quo victu utatur?* adjiciendæ enim multæ adhuc aliæ quæstiones, ex quibus nec illa omitteunda, num patiens jam quibusdam usus fuerit remediis, quænam illa fuerint, & quem habuerint effectum? Et hæc quæstio rarius quidem attenditur, utilissime tamen & peropportune nostris præsertim temporibus instituitur, quippe hodie medicus non facile ad infirmum, præsertim ex plebe curandum vocatur, qui non jam variis, amicorum & aliorum suavis, usus fuerit medicamentis. Inprimis vero, si miseræ conditioni illorum succurrendum, qui morbis chronicis, complicatis, varioque medentium & medicamentorum incongruorum usu corruptis, vexantur, nunquam præsidium aliquod vel solamen ex artis suæ penu depromere illisque porrigere poterit medicus, nisi ad ea, quæ sub priori perversa medicatione fuerunt adhibita, omni cura respiciat, & illorum quoque remediorum, quæ ipse indicationibus quantum potest accommodatè præscribit, operationem atque effectum sollicite observet, & quid ulterius suscipiendum exinde judicet atque concludat.

7. Ut vero ordine procedam, aliqualem tituli explicationem præmittere placet, ut eo clarius constet, quo sensu illa sint accipienda, de quibus in præsentis acturus sum. Facile quidem huic labori supersedere possem, cum quilibet ex allatis jam facile perspicere queat, quid per naturæ vocabulum intellectum velim. Quo vero omnem verborum ambiguum sensum removeam, mentem meam clarius detegam. Paucis itaque moneo, me sub naturæ nomine hoc loco nihil aliud intelligere, nisi quod communi & in vulgus noto sensu denotare solet, constitutionem nempe corporum internam, sive dispositionem individualemente; quo sensu multi dicere assolent, se robustiorem, alii se debiliorem possidere naturam, medicosque ordinarios aliis idcirco præferunt, quod experientia edocti naturam suam melius jam cognoverint. Est itaque natura ex remediorum effectu cognoscenda mihi nihil aliud, quam peculiaris & specialis quædam, quam quilibet homo figillatim possidet, partium solidarum & fluidarum inter se invicem mutua proportio, & exinde resultans ad motus

& fun-

& functiones tam naturales quam præternaturales dispositio.

8. Quod quilibet homo peculiari proportionem solidorum & fluidorum inter se invicem gaudeat, prolixiori non indiget probatione; cum quisque qui corpus suum in relatione ad aliorum corpora paulo accuratius considerat, se ipsum facile de veritate hac convincere queat.

9. Neque illud, quod ex hac peculiari proportionem in quovis individuo specialis quædam ad motus dispositio resultet, adeo absconditum, abstrusum atque ignotum est, ut longa & operosa demonstrationum serie & argumentorum concatenatione opus habeat. Dum enim experientia quotidiana docet, illos homines, qui tendines crassiores, vasa capaciora, musculosque compactiores, solidiores & ex durioribus fibris sibi invicem arctius junctis compositos, laudabiliumque humorum temperato influxu irrigatos obtinent, majorem semper ad motus quoscunque & vehementiores quoque labores subeundos diutiusque continuandos possidere dispositionem & promptitudinem; quam quidem illi, in quorum corporibus ante dicta contrarium modo sese habent, qui nempe teneriores nervos, tendines graciliores, minora & angustiora vasa, carnemque molliorem, flaccidiorem & laxioris compagis nati fuerunt: cuilibet facile constabit, diversam hanc corporum ad naturales motus dispositionem non aliunde elici, quam ex diversa solidorum & fluidorum constitutione & proportionem, hanc nimirum inferre corporibus debilitatem, quæ nihil aliud est, quam motuum languor, defectus atque inertia, illam vero ipsis largiri robur atque vires, sive quod idem, vigorem motuum atque energiam.

10. Facilis pariter erit negotii, si modo ad ea, quæ experientia rursus suppeditat adminicula rite attendimus, illius quoque assertionis agnoscere veritatem, quod scilicet peculiaris quoque ad præternaturales motus dispositio pariter ex singulari solidorum & fluidorum proportionem proveniat. Videmus enim indies, multos sub ingenti illo morborum rerumque nocentium numero, nihilominus plena & perfecta frui per plures annos sanitate, nullamque prorsus motuum suorum naturalium ab injuriis externis reportare perturbationem morbosam: multos vero miseram continuo vivere vitam, quotidie fere variis malis, doloribus, tumoribus, inflammationibus, spasmodicis, fluxionibus vexari atque exagitari. Observamus porro certis in subjectis peculiarem & propriam quasi ad hunc vel illum morbum propensionem. Sic foemina nonnullæ, ex percepto suaveolentium, ut moschi, zibethi vel jasmini odore, in vehementissimos spasmodicos imo convulsivos motus abripiuntur; pluribus aliis summo cum delectamento & virium refectione crebrius iis utentibus. Illi ex esu quorundam ciborum, quos hi sine ullo incommodo concoquunt, insignem statim ventriculi reportant gravitatem, præcordiorum angustia, torminibus, flatibus & alvi obstructione adficiuntur.

11. Porro, nocentissimæ, insensibilissimæ & summe activæ illæ res, quæ causam morborum epidemicorum & contagiosorum constituunt, non omnes, qui eundem aërem particulis hisce noxiis refertum & inquinatum hauriunt, indiscriminatim hisce morbis subji-ciunt. Notatu hac de re dignum mihi videtur cl. RAMAZZINI in *Dissert. de Peste Viennensi* pag. m. 707. prolatum judicium. Quum plura prius tam ex sua ipsius quam aliorum experientia, & inter illa ex CARDANO de *Peste Basiliensi* adduxisset, quod, pestis sævissima, dum urbem hanc civibus suis pene depopulata esset, Italos, Hispanos aliasque nationes exteras, quæ tunc in urbe aderant, vix attigerit; in hæc tandem erumpit verba: *Hanc nimirum habent epidemici morbi naturam,*

ut eos, quibus eadem humorum prava diathesis, quæcunque sit causa, sive ab aëre, sive ab aquis, aut alimentis ortum habuerint, facili negotio corripiant. In primis vero epidemici & ex communi quadam causa producti morbi, diverso suo, quem in diversis subjectis fortiuntur, decursu atque exitu, nos clarissime docent, magnam quidem interdum morborum causis inesse, motus naturales invertendi vim atque potentiam; hanc tamen nunquam esse absolutam, sed varie semper, peculiari & specifica partium solidarum structura, fluidarum crassi, proportionem & dispositionem, modificari, limitari, atque determinari.

12. Videmus illud in primis, quando variolosa febris certis in locis infantilem ætatem hostiliter aggreditur: in nonnullis enim, qui iusta solidorum & fluidorum gaudent proportionem, consueto tempore, certoque ordine, placide satis atque tranquille eruptio, suppuratio & exsiccatio succedunt, & ægrotantes brevi tempore integram & plenam recuperant sanitatem; in aliis vero, quorum corpora impuris repleta sunt succis, & vel hæreditaria vel acquisita imbecillitate laborant, gravissima & eruptionem & suppurationem concomitantur symptomata, sub quibus plures vel misere pereunt, vel, si forsitan aut ipsius naturæ, aut remediorum auxilio ex mortis faucibus eripiuntur, ad alia gravissima disponuntur mala, ut multis quoque jam exinde præterlapsis annis cum atrocissimis affectibus, veluti internis apostematibus atque abscessibus, externis foedis cancris & exedentibus ulceribus, tanquam tristissimis variolosi morbi reliquiis ipsis sit conflictandum. Et sic quoque omnes alii morbi multo mitius decurrunt, si in corpore benignos, dulces atque temperatos humores, viresque & robur offendunt; gravius vero affligunt, si horum loco multæ sordes, inquinamenta varia, viriumque penuria præsto sunt.

13. Uti vero illæ res, quæ causas morborum constituunt, non absoluta gaudent nocendi potentia; sic quoque illæ, quæ in numerum remediorum receptæ, limitata & relativa tantum juvandi virtute instructæ deprehenduntur. In omni enim remediorum effectu, sive proficius sive noxius ille fuerit, plures concurrunt causæ, quarum nexus sollicite semper considerandus. Cum enim omnium medicamentorum efficacia non nisi motu absolvetur; motus vero unius corporis productum esse nequeat, sed deum ex actione & reactione diversorum resultet; quilibet facile perspicit, quod omnis remediorum effectus non unice dependeat ab activa illorum vi, sed quod ad eundem, & structura corporis & ipsa materialis morbi causa multum conferre debeant.

14. Clarissime hujus argumenti veritas elucescit ex effectu, quo magnesiæ nitri, tutissimum illud ad acidas primis in viis stabulantes impuritates educendas præsidium, hypochondriaco malo laborantes solatur. Est enim illa nihil aliud, quam subtilissimus calcis vivæ flos, qui per se omni laxante virtute destituitur, si vero præsentem in primis viis copioso acido affluitur, promte cum eodem congregitur, quo facto ex hisce duobus, tertium quoddam exsurgit corpus, quod salibus illis neutris, quæ vel arte parantur, vel in fontium nonnullorum aquis reperiuntur effectu est simillimum: tunc enim particulis suis salino-amaricantibus & acris tunicas intestinorum irritat & stimulat, quam irritationem postmodum excipit frequentior promptiorque fibrarum tam longitudinalium quam orbicularium reciproca contractio & dilatatio, sive, quod idem, auctior peristalticus motus, à quo deinde vegetior sordium alvinarum oritur exclusio. Ex quibus liquido, ut ego arbitror, constat, effectum hujus medicamenti laxantem à trium causarum dependere nexu. Magnesiæ enim hoc tantum præstat, ut acidum imbibat, acidum vero terram hanc calcaream insipidat.

dam spiculis armat acribus, quorum stimulo postmodum fibræ intestinorum officii sui, quod quidem jam antea sed segnius præstiterant, admonentur, ut nunc illud promptius, vegetius & efficacius absolvant.

15. His itaque præmissis ad specialiore[m] Themat[is] pertractationem descend[er]e. Quod si enim illud prius evictum, quod cujuscumque hominis individualis constitutio, morborumque specifica indoles, multum conferant, ut certus quidam medicamenta exhibita excipiat effectus, quodque omnis effectuum horum discrepantia atque diversitas, non ex essentia remedii, sed ex natura ægrotantis morbi que qualitate, tanquam à causa efficiente proveniat; quisque facili negotio perspicit, optime à diversimode ita alteratis remediorum effectibus ad dispositionem individua[m], tanquam ab effectu ad ejus causam, & à diversitate effectus ad diversitatem causæ posse concludi. Cum vero omnes veritates practicæ in arte medica multo majus pondus roburque ab experientiæ suffragio observationumque fide, quam ex nudis talique fulcro destitutis speculationibus accipiant, nolo & ego in præsent[is] tempus iisdem consumere, sed percurr[en]do diversa remediorum genera, nonnulla ex illis accuratiori & specialiori considerationi subjiciam, ita quidem, ut, recensitis prius, quos experientia teste, ediderunt, diversis effectibus, ostendam, quantum ex hac effectuum differentia, de solidorum & fluidorum constitutione & proportionem, dispositioneque ad motus, tam naturales quam præternaturales, sagaci scrutinio indagari queat.

16. Produco hunc in finem primo in conspectum evacuantia, & ex illorum numero imprimis ea, quæ sordes in ventriculo & duodeno potissimum contentas motu horum inverso superius per os ejiciunt, & emetica medicis audiunt. Si itaque horum effectus, quos in diversis subjectis edunt, paulo curatius consideramus, tantam in illis observamus differentiam, quæ nos manu quasi ducere poterit ad cognoscendam specialem corporum constitutionem, tanquam differentia hujus genuinam causam. Sic enim, si emetica subjectis ætate diversis adhibentur, diversissimus quoque observatur effectus; idem enim emeticum, quod sufficit ventriculum infantis vel pueri ad subversionem & vomitum concitare, id ætate provectioribus sub eadem dosi exhibitum vel insufficientem, vel plane nullum edit effectum; illud vero, quod huic ætati vomitum sine noxa movet, in senio constitutis non absque periculo exhibetur, imo nonnunquam veneni loco esse poterit. Quo ipso egregie confirmatur veritas illa, ex aliis quoque indiciis nota, quod nempe corpora nostra, pro differentia ætatis & annorum, ratione virium & roboris quoque differant. Dum enim emetica nonnisi spasmum agunt, quem spiculis suis acerrimis tunicis ventriculi, fibras illarum nerveas irritando & lancinando, inducunt; necessario in illis fortiorem validioremque edere debent effectum, quorum fibræ uti in toto corpore, sic etiam in ventriculo sunt teneriores, sensibiliores, minus robustæ, & idcirco ad resistendum non ita idoneæ, quam quidem in illis, qui solida possident robustiora, per temperatum sanguinis & lymphæ subtilioris influxum justo tono & viribus tum ad motus naturales absolvendos, tum ad inordinatos ab externis objectis imminentes superandos, instructa.

17. Nec vero illam tantum differentiam, quæ ratione ætatis humana intercedit corpora, emeticorum effectus indicat, sed eam quoque prodit, quam unius ejusdemque ætatis homines ex aliis causis obtinent. Sic enim unum idemque emeticum hominibus in eadem ætate constitutis æquali dosi eodemque tempore exhibitum, effectus edit longe quoque discrepantes. Liceat mihi exempli loco emeticum quoddam,

ut ita dicam diætetikum proferre, cum vomitoria pharmaceutica non facile uno tempore eademque dosi plures ejusdem ætatis & cæteroquin sani homines assumere soleant. Consistit illud in poculis compotantium vino vel cerevisia repletis, quæ licet omni sibi careant, optimo tamen jure emetica dicenda, dum repetitis vicibus pleno haustu à strenuis Bacchi cultoribus, in perniciem potius, quam, ut propinando dicunt, in salutem ventriculo reluctanti ingeruntur. Alius enim à longe minori potus ingesta mole ventriculum suum ita distendi percipit, ut vi illius expultrici non amplius resistere valeat; alius, qui multo majorem ingurgitavit copiam, ne nausea quidem, multo minus vomitu afficitur; alius nauseam sentit molestissimam, vomitum vero anxie etiam desideratum, stimulo quamvis adhibito, excitare nequit. Alius, qui ex illorum forsitan numero, qui quotidie ejiciendo non vorandi, ut CÆLSUS *libr. 1. cap. 3.* dicit, sed bibendi facultatem moliuntur, peracto jam vomitu plura adhuc exhaurit pocula, nihilque se exinde debilitari ostendit; cum alii ita enerventur, ut somno deperditas recuperare vires necesse habeant, imo insequente die magnam appetitus viriumque persentiant prostrationem.

18. Ex his itaque diversissimis affectibus, qui nimiam per copiosorem potum ventriculi distensionem excipiunt, multa commode desumi poterunt, constitutionis individualis indicia. Sic enim illum, qui minori ventriculi distensione ad nauseam vomitumque commovetur, non tantum ventriculum sensibiliorem, sed totum nervosum genus debile & levi accedente stimulo in anomalos motus proclive possidere, non sine ratione concluditur, id quod de illis quoque valet, qui ingentem virium & appetitus imminutionem post vomitum experiuntur. Robustioribus vero annumerandi erunt illi, qui majorem sine nausea & vomitu perferre possunt ventriculi distensionem, & qui peracto vomitu, nec appetitus, nec virium singulare quoddam sentiunt detrimentum. Monendum tamen, quod, antequam ex dictis effectibus de individuali constitutione formetur judicium, aliæ quoque res concurrentes prius probe sint attendendæ, & imprimis sollicitè illuc respiciendum, num subjectum longa consuetudine ad hunc vel illum effectum fuerit dispositum, quæ omnia, si non tantum præsent[is] in casu, sed etiam circa aliorum remediorum operationem rite semper observarentur, multum omnino lucis afferre possent, ad detegendam peculiarem illam vim motuum solidorum & fluidorum, & quo usque actio illorum atque reactio à justa temperie, proportionem & æquilibrio recedat.

19. Emetica melancholia hypochondriaca laborantibus exhibita interdum nullum plane edunt effectum; sin vero præmittantur illorum usui absorbentia & alcalina, vel si una cum infuso ex manna propinantur, facilius feliciusque operationem suam absolvent. Clarissime hoc ipso discimus, melancholiam sic dictam hypochondriacam multum foveri ab acidis cruditatibus, quæ ob destructum ventriculi & intestinorum tonum in illorum cavitate copiose generantur. Quod enim hæ ipsæ impediunt emetica, quo minus suam perficere possint operationem, primo exinde patet, quod acida extra corpus nostrum quoque maximam vim possideant, principium summe activum & subtilissimum emeticorum figendi & destruendi; secundo, quod adhibitis prius antacidis, ut absorbentibus alcalinis, vel etiam manna, quæ pariter dulcedine sua acidum eximie corrigere atque invertere potest, vomitoria vegete satis atque efficaciter officio suo satisfaciant, & ingentem sæpe corruptorum humorum colluviem per os ejiciant.

20. In ictero emetica nonnunquam ægrotantes in præsentaneum vitæ discrimen perducunt, imo interdum hunc

hunc ipsum morbum ante nondum præsentem, in corpore disposito excitant: nonnunquam vero optime conducunt, imo unicum ad hostem hunc è corpore ejiciendum evadunt præsidium. Diversissimum iterum hoc loco emetica sortiuntur successum, perniciosum scilicet & summe quoque salutarem atque proficuum; quo ipso aperte satis produnt, non unius ejusdemque, sed discrepantis plane indolis hujus effectus esse causam. Quod si enim noxius illorum oblationem sequitur effectus, indicium ille præbet non contemnendum, ictericum malum à spasmodica ventriculi & annexi duodeni, in quod cholodochus ductus bilem exonerat, constrictione, & præcluso hoc modo bilis in intestinorum canalem influxu, ortum suum habuisse. Si ergo partibus hisce spasmo jam adfectis major adhuc emeticorum stimulo inducitur crispatura & contractio, causa icterum producens non tollitur, sed potius confirmatur atque augetur. Imo, si validius fuerit vomitorium, in tantam interdum ventriculus abripitur spasmodicam constrictionem, ut sanguis intra illius tunicas exinde incarceretur & periculi plena oriatur inflammatio.

21. Si vero bono cum eventu adhibentur in ictero emetica, aliam plane indicant huncce morbum excitate causam, imo illa ipsa, quæ tali in casu horum remedium ope ex corpore cum euphoria eliminatur copia viscidioris & crassioris biliolæ saburræ, bilis in intestina influxum, non spasmo tunicarum duodeni fuisse interceptum, sed illam propria sua visciditate, qua ductus suos atonia laborantes obstruxerat, exitum sibi præclusisse testatur. Dum itaque emeticorum ope, quæ utique virtutem suam ad bilarios usque ductus extendunt, nervosi hi canales, ad majorem oscillationis & contractionis gradum animantur, illud quoque, quod in illorum cavo hæret, promptius eliminant, sicque emetica dum causam tollunt, ipsum morbum ex voto pellunt. Sed sufficiant hæc, quæ de emeticis huc usque disserui, quamvis enim plura adhuc supersint, ad ulteriorem argumenti hujus illustrationem ex eorum effectu desumenda, nolo tamen longius illis insistere, sed me potius converto ad ea, quæ contentas in intestinorum cavo recrementitias fordes inferius per alvum eliminant, & quæ si vehementius & impetuosius illud efficiunt purgantium, si vero mitius id præstant, laxantium & lenientium nomine insigniri solent.

22. Quod purgantia illa drastica attinet, quæ principium tenuissimum causticum & virulentæ indolis possident, rarius quidem illa nostris temporibus à judicioso & conscientioso medico vocantur in usum: Interdum tamen ea est morborum contumacia, ut, dum mitiora omnia eludunt, ad potentiora & sic dicta heroica medicamenta, magna vero cum circumspeditione sit descendendum. Hinc ex horum quoque effectu corporum naturam indagandi mihi relinquitur occasio. Sic enim experientiæ testimonio constat, purgantia validiora ad aquas hydropicorum evacuandas vulgo adhiberi, docet vero illa quoque, nonnunquam bono, nonnunquam vero malo illud ipsum fieri cum successu, clarissimo iterum documento, non unam eandemque hydropicorum ipsiusque morbi esse naturam. Dum enim exhibitio acriorum purgantium stimulo, & illius ope ad majorem motum contractionemque concitatis nervosis & membranosis partibus salubris aquæ impetratur evacuatio, nulla subsequente virium prostratione & nova humoris inundatione, levior tantum subsuiffe causam, lentior nempe per abdominis summe debilitata viscera, sanguinis atque lymphæ progressum, atque ex horum stagnatione exortam feri per vasorum poros in abdominis cavum musculorumque interstitia secessionem, indicio est. Si vero & hoc in casu plus valet arte malum,

& drasticis his adhibitis in pejus ruit misera hydropicorum afflictio, à graviore illam sustentari causa, aquarumque copiam ex ruptis, ob viscerum & glandularum obstructionem plenariam, vasis lymphaticis, tanquam ex fonte nulla arte exantlando, profluere, non obscure concludere licet.

23. Quo rarius vero purgantia locum inveniunt, eo crebrius contra laxantia & lenientia ob moderatiora & temperatiora quibus agunt principia, vocantur in usum, ita quidem, ut præservationis quoque gratia à multis certis anni temporibus usurpari soleant; quo ipso vero medicus, qui curiosiori animo præditus, pulcherrimam ad cognoscendam & perscrutandam diversam hominum naturam, obtinet occasionem. Adhibui hac quoque in parte, sicuti in aliis omnem, quam potui solertiam: dum enim olim Regio jussu pueris quibusdam ejusdem fere ætatis, eodemque & vitæ & victus genere educatis, tempore vernali infusum quoddam laxans præscripsissem, & postmodum ex singulis operationis quærerem successum, diversissimos infusum præscriptum deprehendi edidisse effectus, quos non solum ipse totidem diversæ naturæ subjectorum indicia consideravi, sed & aliis exempli & incitamenti loco in scriptis meis proposui, ut simili quoque diligentia ad illa respiciant, quæ ad cognoscendam corporis nostri naturam aliquid conferre possunt.

24. Recordor hac occasione, dum quondam aliqua aquæ cujusdam fontis & ex ea excocti salis ad me transmittèretur portio, ut meam de illa, facto examine chymico, declararem mentem, me nonnullis auditorum meorum hujus salis amaricantis & nitrosi saporis præbuisse dosin, ut suo ipsi corpore virtutem illius laxantem explorarent, ubi pariter sub relatione effectuum magna occurrebat differentia, aliis enim bis, aliis crebrius aperuerat alvum, & quidem vel cum vel sine torminibus; nonnulli post assumptionem hujus salis nitrosi magnam, alii vero exiguam, vel plane nullam senserant refrigerationem. Sic quoque memoriam subit, præcticum quendam foeminæ, corporis laxi & spongiosi, pilulas præscripsisse laxantes balsamicas, quæ ipsi alias familiari in usu, & quas sapius jam, subsequente lenissima alvi apertione, assumerat, inexpectato nunc cum successu; creberrimæ enim hac vice illarum usum excipiebant dejectiones, ingenti anxietate, torminum atrociam, & virium prostratione stipatæ.

25. Causa hujus nimii effectus minime in essentia & compositione remedii erit quærenda; quod enim si esset, alio quoque tempore pari cum vehementia operationem suam debuisset absolvere; sed potius ad præsentem hujus foeminæ variis ex causis alteratum & immutatum internum statum erit respiciendum. Notum vero est, lenissima quoque laxantia drasticorum purgantium acquirere vehementiam, si corpori exhibeantur, cujus in abdomine contenta viscera spasmis obfessa, & quod impuris & acrimonia infectis succis valde repletum est. Tunc enim laxantium stimulo multo vehementius crispantur nimium jam ob spasmum oscillantes intestinorum fibræ, & provocatus hoc ipso acrium & impurorum humorum ad intestina irritata affluxus, non tantum vim remedii laxantem valde intendit atque auget, sed dum diutius quoque continuat, cessante etiamnum medicamenti stimulo, illius effectum sustentat atque producit. Et talem quoque eo tempore hujus foeminæ fuisse constitutionem, ex exacerbato & nimium aucto exhibitilaxantis effectu conjicere licet; imo clarissime patet, si insuper consideremus, quod circa instans menstrui fluxus tempus fuerit exhibitum, cum hac sanguinis excretio nunquam sine spasmodica inferiorum partium affectione contingere soleat, & quod adhibitis postmodum

congruis remediis, excrementitia & acrimoniæ non expers purpurata materia per cutis emunctorium fuerit expulsa.

26. Progredior nunc ad illud remediorum genus, quod serosum & salino-tartareis particulis referunt, in renali vero cribro à massa sanguinis separatum humorem, per urinarias vias è corpore eliminat. Horum vero censum multa sunt, quæ subeunt, neque unius ejusdemque, sed diversæ plane indolis res. Aliæ enim relaxando, crispando relaxatas fibras, aliæ diluendo & demulcendo, aliæ incidendo & dissolvendo viscidiores & crassiores humores, urinæ excretionem faciunt liberiusque promovent, clarissimo iterum documento: diversissimam corporum esse naturam morborumque indolem, quibus per tam discrepantis virtutis remedia provocatus urinæ fluxus convenit atque conducit.

27. Sic in illis, quibus anodyna, antispasmodica & relaxantia diuresin movent, urinæ excretionem à spasmodica viarum urinalium constrictione impeditam sufflammatamque fuisse certissimum est; si vero roborantia & stimulantia hunc præstant effectum, à relaxatis nimium & à tono motuque, qui in sano & naturali statu hisce in partibus viget, dejectis urinali se- & excretioni dicatis organis, urinæ exitum interceptum fuisse, non est dubitandum. Diluentia vero & quæ incidente & resolvente virtute instructa, quando diureticum præstant effectum, aperte produnt, morbi causam in defectu sufficientis fluxilitatis humorum secernendorum esse quærendam: materia enim secernenda, si justo crassior viscidiorque existit, ad vasa capillaria, ex quibus potissimum excretoria constant, pertingere non potest, vel si vi quadam atque impetu ad ea propellitur ipsisque intruditur, in angustissimis hisce canaliculis subsistit, lentore visciditateque sua obstruit patentia alias illorum orificia, sicque consuetas, & sanitati admodum proficuas se- & excretionem impedit atque sistit.

28. Diureticis his subjungam ea, quæ subtiliores serosas salino-sulphureas excrementitias sordes sub sudoris nomine per cutis amplissimum excretorium evacuant.

29. Quod validiora attinet sudorifera, vehementer illa humorum circulum intendunt, sanguinemque in ingentem commotionem & orgasticam expansionem abripiunt: ex quo facile arguere licet, quod ex illorum quoque effectum multa atque præclara de sanguinis humorumque constitutione & motu desumi possint indicia. Suffragio quoque suo illud indies confirmat experientia. Sic enim multi ex vulgi & indoctorum numero, assumpta semel tantum validioris sudoriferi dosi, didicerunt, se calidioris esse naturæ, sanguinemque possidere in orgasticas ebullitiones aliis multo procliviores. Quanto magis itaque solidiori scientia instructus medicus ad cognoscendam corporis naturam ex illorum effectum perducere poterit.

30. Notum est inter alia, quod magna sæpe sanguinis abundantia in corporibus spongiosioris habitus, quæ copiosis prædita vasis, per longum tempus, sine ullo exinde percipiendi incommodo, latere possit, id quod veteres plethoram ad vasa nominarunt: assumpto vero calidiori quodam pharmaco, statim apertius occultus hic insidiasque struens hostis suam prodit infestam præsentiam: aucto enim cordis & arteriarum motu & per medicamenti sulphureo-oleosas particulas in orgasticam & intestinam commotionem abrepto sanguine, tota illius moles mirum expanditur; hinc dum majus affectat spatium, vasorum in quibus decurrit latera ultra eorum resistantiam distendit, ex hoc ipso contractioni illorum nimium resistens, omnia illa periculi plena producit symptomata, quæ à majori sanguinis abundantia, plethora nempe ad

vires dicta alias provenire solent.

31. Neque minus circumspecta illa methodus, quæ rite observata, Alexipharmaca sic dicta remedia summum grassantibus morbis contagiosis & pestilentialibus sunt præsidium, & qua neglecta, maximum quoque afferunt damnum, causam nobis præbet contagii indolem corporumque ad illud suscipiendum dispositionem inquirere. Communi scriptorum de peste testimonio constat, illa, grassantibus morbis contagio & malignitate infestis, prophylacticum habere effectum, qui quidem non aliunde dependet, quam quod cordis & arteriarum motum ob aëris valde vappidi minusque elastici usum mœroremque & mortis metum languidiorem valide augent, atque intendunt, massamque humorum ab impuris serosis & in corruptionem pronis inquinamentis ope sudoris, quem fortiter movent, promte liberant; luculento testimonio, maximam contagiosos morbos subeundi dispositionem, consistere in partium solidarum, nervosarum inprimis & vasculosarum imbecillitate, fluidarumque impuritate. Optimo quoque cum successu in principio morborum contagiosorum, præmissa quadam medicina emetica, exhibentur; maximo vero cum damno, si jam per tempus aliquod susceptum contagium corporis penetralibus altius sese insinuaverit. Ex quibus patet, miasma tale per os susceptum & cum salivali latice in ventriculum delatum, promte quidem ad sanguinis humorumque massam transire, in principio tamen illius adhuc esse indolis, ut per cutis poros ope largioris sudoris evacuare queat, brevi vero temporis spacio ab ipsis corporis nostri impuris succis illam induere naturam, ut per cutis emunctorium sub sudore excerni renuat, sed plane peculiare excretorium desideret, glandulosas nempe vel musculosas corporis partes, in quas nempe ipsius naturæ salutari motu bubonum vel carbunculorum forma deponitur & evacuat.

32. Infelix porro, quem medicamentâ sudorifera, vel regimen calidius in variolosa febre producant effectus nos satis docet, fermentum quoque variolosum non ita esse comparatum, ut per sudorem evacuare possit, nec velocissimum maximeque intensum sanguinis circulum illius se- & excretionem ullo modo promoveri, sed plures potius evolvere & generare sordes, illas partibus exquisitoris sensus altius infingere, massamque sanguineam, non secus ac fluvium quamdiu magna cum celeritate undas suas rapidissime volvit, nihil admixtarum sibi sordium deponere: tunc vero optime depurari potest, quando paulo lentius procedere tardiusque moveri incipit. Multa quoque ex spirituosorum & salium volatiliū frequentiori & nimio usu, sub præcedentis seculi fine resultantia damna affatim docuerunt, causam illam morborum universalem ex acido & viscido desumtam maxime esse insufficientem.

33. Longe excellentiori virtute, ampliori quoque & universali fere usu se commendant diaphoretica; quippe quæ multo moderatius placidiusque genitas in corpore subtiliores serosas sordes per cutem insensibiliter educunt. Paucissimi certe occurrunt morbi, in quibus corpus nostrum à placida hac & tutissima diaphoreticorum virtute producta excretionem non insigni levamen summumque sentiat auxilium. Ut vero & hoc remediorum genus ad præsentem applicemus scopum, pauca ex illis perlustrationi nostræ subjicere volumus; & primo quidem tutissimum illud ad diaphoresin movendam præsidium, corporis nempe sub libero & temperato cœlo moderatam exercitationem. Consideramus itaque plures, qui & sanitatis & recreationis causa sub aëre temperato amœna perambulant loca; licet enim omnes pari passu incedant, citius tamen alii, alii tardius incalescunt, & ad sudorem

rem commoventur, nonnulli sudore madidi atque persusi redeunt, cum tamen plures sicco corpore revertantur: certo iterum documento, ad hanc quoque excretionem diversimode dispositam esse corporis nostri naturam; quæ quidem dispositio à variis oritur causis, ut plurimum tamen ea corpora, quæ tam prompte sudore diffluunt, spongiosioris sunt habitus, cutem possident teneram atque laxiorem, sanguinemque in venis alunt copioso sero refertum: illa vero quæ intus genitas subtiliores sordes insensibili magis transpiratione quam aperto sudore excernunt, cutem carnemque plerumque obtinent densiorem sanguinemque recondunt nec nimis copiosum nec nimis serosum, sed aliquo modo crassiores, firmiori nexu, meliorique particularum mixtione gaudentem.

34. Notabile porro est; quod venæ sectionem nonnunquam excipiat liberior transpirationis successus, nonnunquam vero post emissum è vena sanguinem protinus cesset vel segnius minimum procedat cuticularis hæc excretio. Inquirenti in diversissimorum horum effectuum causam, pulcherrima iterum sese objicit corporum differentem naturam cognoscendi occasio. Si enim ventilatione sanguinis facta promoveatur diaphoretica vel quævis alia cutanea excretio, certissimum præbet prægressæ nimis sanguinis abundantiae indicium, & natura hoc ipso, instituto medici qui venam secare jusserat tacite quasi applaudit, quod educto superabundante sanguine, solida & fluida ad temperiem atque æquilibrium conservationi sanitatis summe necessarium iterum reduxerit; hinc novis insurgit viribus, & cum cor & artèriarum canalis antea non suffecerit ad tantam molem rite regendam, nunc demto superfluo pondere, illud, quod reliquum est, eo vegetius circumagit, sordesque sub lentiori circulo sensim conceptas, transpirationis ope per cutis emunctorium eliminat. Quod si vero per sanguinis evacuationem impeditur saluberrima hæc peripherica excretio, inopiam potius quam copiam fluidi hujus purpurei præsentem fuisse indicat. Hinc si magis adhuc per imprudenter institutam venæ sectionem corpus sanguine & viribus spoliatur, non potest non cordis & artèriarum motus valde languescere: latera enim vasorum non sufficienter expanduntur atque dilatantur; quare debiliorem illorum diastolen languidior quoque excipit systole, & deficiente hoc modo vegeto humorum ad corporis peripheriam cutisque emunctorium appulsu, transpiratio eximie læditur, & in salubri suo decursu impeditur. Similem fere virtutem diaphoreticam nonnunquam exferit magnæ virtutis & ex aëre progenitum sal inflammabile nitrum, item aquæ frigidæ potus, dum nempe infringendo & imminuendo nimium, qui corpus adurit, febrilem æstum, impedit, ne nimium exsicceetur sanguinis massa, neque orgasmica sua expansione ulterius elateri vasorum resistat, systalticamque illorum vim imminuat.

35. Antequam evacuantium classẽ penitus deferam, brevissimæ adhuc disquisitioni subijciam illa medicamenta, quæ lymphaticos corporis nostri succos vehementer commovent, & salivam per ductus glandularum faucium & oris copiose fundunt. Propria est & unice atque specificè quasi competit hæc virtus mercurio variis modis præparato & corpori applicato. Hujus enim subtilissimi summæque mobilitatis globuli spiculis salinis armati, glandulosa & vasculosa lymphæ receptacula intime penetrant, solidorumque fibras nerveas fortiter stimulando & crispando, contentam in illis lympham in vehementissimum abripiunt motum, magnamque salivalis humoris copiam, per patentia in ore & faucibus ductuum salivalem ostia, sub continuo ptyalismo è corpore ejiciunt. Quo majorem vero circumsp̃ctionem mercurialia requirunt, eo crebrius tamen generoso hocce remedio incititia illius-

que comes audacia abutitur, tristissimisque confirmat exemplis, illud in imperiti manu idem esse, quod gladius in manu furiosi. Non solum enim ad curandam veneream luem sæpius indiscriminatim, neglectisque summe necessariis cautelis adhibetur; sed haud raro eo usque progreditur empirica temeritas, ut in aliis quoque affectibus difficilioribus & contumacioribus, quorum causam plane non attingunt, ægros sialagogis fatiget, hostemque incognitum sub excitato profuso salivæ fluxu exspuere cogat, inani & fallaci ipsis insinuata spe, malum hac methodo radicitus & ut dicere affolent ex fundamento posse extirpari. At vero infelix qui brevi sequitur effectus, incios istos & rem malitiose gerentes homines gravissimi sui, sed sero arguit erroris.

36. Econtrario prudentiori ac circumsp̃ctioni medico inde suppeditatur occasio ex damnis ab aliis inductis securiorem ineundi viam, suamque medendæ methodum morbo atque subjecto omni ex parte reddendi accommodatam. Dum enim inter alia vidit, mercurium vivum nullam fere in corpus nostrum agendæ habere potentiam, nisi salibus prius fuerit solutus, illorumque spiculis armatus, itemque tutiora mercurialia, ut mercurium dulcem, sola admixtione & trituratione cum sale quodam alcalino vel neutro, tantas acquirere vires, ut interdum veneni ad instar totam œconomiam motuum pervertere valeat: non solum ipse penitus à mercurialium usu abstinet, si corpus, quod curandum suscepit, multas salinas biliosas & acres sordes vel primis in viis, vel in ipsa humorum massa recondit; sed & exinde prudenter concludit, quod plurima damna, quæ mitioribus & rite præparatis mercurialibus, minus convenienter applicatis, inferuntur, ex neglecta hac summe necessaria circumsp̃ctione profluxerint, quodque corporis humani natura sub illis mobis, in quibus mitiora mercurialia corrosivam & deleteriam induunt indolem, salium fertilissima sit productrix: cumque illud maxime in scorbuto, arthritide, scabie & podagra eveniat; hoc quoque mercurialium effectum evincitur, non omnem Pathologiam falsam esse rejiciendam, multosque affectus, quos alii ex sola sanguinis abundantia proficisci autumant, potius ab humorum impuritate, acrimonia & salina intemperie & generari & sustentari.

37. Missis evacuantibus ad illud remedium genus me converto, quod sub ampliori roborantium titulo multas includit singularis energię species, ex quibus primum produco ea, quæ analeptica & confortantia in scholis medicorum audiunt. Duplici vero modo hæc ipsa depresso & imminutas corporis nostri vires erigunt atque augent: nonnulla enim ex illis subtilissimo suo atque fragrante, blando tamen naturæque amico sulphure, tenuissimum illud in cerebro à sanguine separatum & in nervis undulans liquidum ad promptiorem motum inque singulas partes vegetiorem influxum disponunt atque concitant; nonnulla vero substantia sua alimentosa, gelatinosa dulci & moderate spirituosa defectum illorum succorum refarciunt, ex quibus mobilissimum nervorum fluidum erat conficiendum atque elaborandum. Quod priora concernit, agunt illa principio tenuissimo, calore prompte in exhalationes & effluvia resolubili, quæ naribus suscepta suavissimum odoris sensum nervis, tunicam internam pituitariam copiose & satis aperte percurrentibus, imprimunt; hinc exterius tantum naribus adnotata suaveolentia, confortantem exferunt virtutem, imo ipsius cordis motum sub syncope ad tempus cessantem egregie resuscitant.

38. Nonnunquam vero eadem medicamenta in sequioris sexus personis ex longinquo etiam talem producant effectum, qui satis superque prodit, illas misero hysterica afflictione laborantium numero

pariter esse adscribendas. Sævissima enim interdum moschi, zibethi, jasmīni, rosarum, & ambrae fragrans odor in foeminis nonnullis excitat symptomata: dum præter dolorem capitis anxiamque præcordiorum constrictionem, potens est syncopen, imo convulsivas & spasticas tractiones in locis quoque diffitis producere. Quæ omnia non obscure innuunt, talia corpora debiliore esse naturæ, nervosumque illorum systema ad subeundos anomalos & spasticos motus maxime dispositum. Prudenter itaque & circumspicte agit medicus, qui, dum cernit, lenioribus hisce tantas in ejusmodi corporibus excitari posse turbas, à validioribus medicamentis & inprimis ab illis, quæ ad spasmos producendos apta nata sunt, omni cura in sanandis hysteriarum afflictionibus abstinet, & diæteticis potius temperatisque roborantibus dejectum partium, inprimis ventriculi & intestinorum tonum erigere & resuscitare fludet, liberumque sanguinis circuitum per abdominis viscera & præcipue uterina vasa restituere contendit.

39. Non minoris momenti indicia de corporum constitutione desumi quoque possunt ex illorum effectu, quæ alimentosa sua & nutritiva facultate virium largiuntur augmentum. Cum enim omnes corporis nostri solidiores partes à fluidis incrementum suum accipiant: fluida vero, quorum magna indies portio consumitur, per alimenta ingesta conserventur atque restituantur, necesse est, ut fluida æque ac solida aliquam cum alimentis tam quoad quantitatem, quam qualitatem retineant conformitatem. Quod quantitatem humorum & inprimis sanguinis concernit, non melior certe ad eandem perscrutandam, datur via, ac si sollicitè ad alimentorum, quo quilibet vescitur, indolem & quantitatem, conjunctumque vitæ genus, num otiosum vel laboriosum, respicimus.

40. Fluit sane ingens illa, quæ integras nationes intercedit corporum differentia, si cœli aërisque excipias flatum, quoad maximam partem ex fonte commemorato, victus nempe vivendique consueto genere. Sic Galli qui cibis mollioribus, carnibus valde gelatinosis & vario artificio, quo palato arrideant, præparatis, jusculis maxime nutrientibus, vinoque dulci frequentius utuntur, ad concipiendam sanguinis humorumque abundantiam sunt promptissimi, eamque ob causam ad subeundos inflammatorios aliosque ex nimia sanguinis copia vasorumque repletionem oriundos affectus quam maxime proclives. Hinc quoque hujus gentis medici & frequentiores & largiores sanguinis missiones instituunt, imo in febribus aliquoties hoc auxilii genus cum bonis ægrotantium rebus repetere non dubitant.

41. Porro præsidia modo dicta alimentosa & nutritiva quam optime nos perducunt ad cognoscendum ingentem illum virium lapsum roborisque imminutionem, quam morborum plurimi, vel præsentis corpori nostro & inprimis ventriculo inducunt, vel jam abacti congruisque præsidiis eliminati post se relinquunt. Sic enim frequentissime videmus, si parentes vel amici ægrotantibus illis, quos singulari amore prosequuntur, in ipso acutarum vigore, ad resuscitandas, ut autumant, summe depressas dejectasque vires, nutrientia valde & alimentosa virtute instructa jacula renuentibus quoque obtrudunt; vel si, quum à morbo quodam graviore convaluerunt, illorumque appetitus, ut plerumque fit, fortior majorque esse assolet, perverso huic, minimeque à rationali quodam principio in corporis commodum excitato ciborum desiderio indulgentes liberaliori manu varia alimenta copiose porrigunt, quod nihil aliud hoc ipso efficiant, quam quod viribus suis spoliatum ventriculum cruditatibus obruant, præsentemque morbum hoc ipso graviorem reddant atque periculosiorem, vel delas-

fatum corpus denuo in eundem affectum, quem modo superaverat, imo in deteriorem adhuc conjiciant. Neque minus insigne nutrientia hæc præsidia de corporum impuritate præbent documentum. Multi enim licet optimo utantur cibo atque potu, nihilo minus elanguido atque emaciato incedunt corpore, tristisque exemplo comprobant HIPPOCRATIS *Secl. 2. Aphor. 10.* contentum effatum: *Corpora impura, quo plus nutritur, eo magis læseris.*

42. Roborantium ex numero disquisitioni nostræ adhuc subjicienda illa, quæ adstringentis sunt naturæ, fibrasque languidas nimium atque flaccidas arctius adducendo atque stringendo, partibus corporis nostri deperditum restitunt tonum. Multa sane tria illa sic dicta medicorum regna nobis suppeditant, quæ vel majori vel minori gradu pro principiorum suorum differentia talem edunt effectum. Quo vero brevitate fludeam, unicum tantum ex vegetabilium regno desumptum præsentī applicabo scopo. Est illud famosissimum, ex Peruviana regione ad nos delatus Chinæ cortex. Quantum enim febrifugi hujus singularis plane effectus ad detegendam febrium intermittentium genuinam indolem, corporumque iidem vexatorum differentiam, conferat, præstantissimorum medicorum loquuntur scripta. Placet hanc in rem illa adducere verba, quibus Celeberrimus RAMAZZINI *Orat. VIII. p. m. 107.* usus est: *Non absimili ratione, inquit ibi, Peruvianus cortex, celebre illud febrifugum, cujus nostra hac ætate tam frequens, nisi forsā nimius & imprudens est usus, nondum meditullius febris naturam nos attigisse palam fecit, cum sat virium habuerit, ut omnium antiquorum de natura febris systemata è suo gradu dejiceret, & recentiorum quoque ideas omnes, quæ de hoc affectu hætenus prodire, non parum dubias reddiderit.*

43. Verum enim vero, non ad refutanda tantum, quæ minus recte de febrium indole concepta fuerunt commenta, febrifuga hujus corticis virtute usus est, sed ulterius quoque ex remedii hujus differenti effectu febricitantium naturam internarumque partium constitutionem explorare studuit. Eximium nobis hac de re reliquit documentum in *Descriptione Constitutionis Epidemic. anni 1690. p. m. 149.* Ibi enim inter alia quæ noxia vel proficua in affectibus tunc temporis grassantibus deprehenderat, corticis Peruviani quoque mentionem injicit, & non solum candidè fateatur, non admodum salubrem ejus in constitutione hæc fuisse usum; sed semet ipsum quoque infausito cum successu nobili cuidam virgini, quæ per 40. dies cum tertiana duplici conflictata fuerat Chin. Chinam præscripsisse. Illam enim, postquam ex vino infusam respuisset, ad tres dies stupidam & comatosam evasisse, cum pulsu adeo exili, ut vix percipi potuisset; donec tandem soliti paroxysmi redeuntes stuporem discusserint. Ubi in mox adjecta epicrisi ex insalubri hujus remedii usu concludit, massam sanguineam hujus virginis multis cruditatibus fuisse refertam, crassioresque habuisse consistentiam, ideoque ad promptum motum circuitumque minus fuisse aptam; sublato itaque fortiori, quem à febre acceperat, impulsu, quandam veluti in vasis stagnationem functionumque torporem inde fuisse obortum, quæ vero restituto iterum sanguini velociori motu, redeunte febrili æstu omnia feliciter disparuerint.

44. In genere vero illud probe observandum, non omnibus indicationibus nominatum corticem satisfacere, hinc aliis præsidiis ante ejus usum omnia sunt removenda obstacula, liberandæ prius primæ viæ ab inhaerentibus viscidis, acidis biliosisque cruditatibus, massa quoque humorum à fordibus vindicanda, sanguinique liberior per viscera, inprimis in abdomine contenta, restituendus circulus, spasmodorum quæ juncta est

vehemen-

vehementia compescenda atque mitiganda; & tunc demum, si febriles motus ex assuetudine relictaque debilitate adhuc infestant, febrifugo modo laudato & debita dosi congruoque tempore exhibito sistendæ atque profligandæ. Certissimum itaque ex felici hujus remedii effectu, dum nempe febris post ejus moderatum usum plenarie silet, nullæque recidivæ, nec alia subsequuntur mala, desumi poterit indicium, corpus nunc à colluvie sordium sufficienter esse depuratum, viscera abdominis ab obstructione liberata, glandulas referatas & liberum sanguini per omnes partes restitutum progressum. Si vero, assumpta jam aliqua hujus corticis portione, nihilominus insistit febrilis spasmus, vel alia sequuntur incommoda, nequaquam ulterius hujus remedii usus est continuandus; sed potius exinde prudenter colligendum, materiali febrium causæ nondum ex asse fuisse prospectum, viscera nondum plenarie referata, sanguinisque & humorum motum nondum in justum ordinem & ad sufficientem libertatem esse productum. Confirmant hæc quæ modo attuli in *Medic. Systemat. Tom. IV. Sect. I. cap. 2. de Febr. Quartan.* consignata verba: *Si his (congruis nempe paulo ante descriptis præsiidiis) febris non discessit, indicium fuit, infarctus viscerum, aut obstructionis glandularum in abdomine.*

45. Subiungam hisce defectum virium refarciendis, motusque excitantibus medicamentis, aliud, & diversæ quidem plane indolis remediorum genus, illa nempe pharmaca, quæ fluidorum solidorumque motum illiusque ferociam componunt atque sistunt, dolores & spasmos sopiunt, & vigiliis morborumque atrociam fatigatis & delassatis corporibus placidum conciliant somnum. Præstat hæc omnia quam maxime opium, vario modo præparatum, correctum, variisque compositionibus immixtum, cujus virtus ab antiquissimis jam temporibus nota fuit atque explorata. Rarior quidem nostro ævo, quo multo securiora & tutiora innotuerunt anodyna, usus opiatorum esse solet; ast, sicuti nunquam desunt, qui in clarissima & serena luce cœcutire non erubescunt, sic quoque imprudentum audacia nondum desinit, valentioribus pharmacis ægrotantes vita & sanitate spoliare, quæ mitioribus atque lenioribus perfacile potuissent conservari. Plures certe infausti opiatorum effectus in recentiorum quoque scriptis reperiuntur, quos & ipse in artis exercitio sæpius animadverti; ex quorum numero præsentis scopo illum tantum breviter accommodare lubet, quem aliquoties me observasse in *Med. System. Cap. VII. pag. 227. in Scholio §. 12.* his verbis testatus sum: *Non semel sed aliquoties, quod sancta fide testari possum, ab immoderato adstringentium & opiatorum usu in diarrhœæ vel dysenteriae fluxu coercendo, vel cohibendo intermittentium impetu, molestissimum hypochondriacum, quod in fœminis hystericum dicitur malum, & quod per omnem fere reliquam ætatem homines misere exercuit, enatum animadverti.*

46. Certe, nisi me omnia fallunt, sinister hicce opiatorum effectus, qui tamen subito hypochondriacum hystericumque malum, in corporibus, quæ antea ab utroque plane immunia vixerant, producere potest, de genuina hujus mali indole, veraque illius sede optime instruere convincereque poterit. Si enim, in quo omnes unanimiter consentiunt, opiatorum nociva & deleteria vis exinde potissimum dependet, quod principio suo halituoso vaporoso-sulphureo tonum partium nervosarum & exquisitoris sensationis destruant, robor atque vires motrices labefactent atque imminuant: certe nec aliunde infausta hæc hypochondriaci mali ab improvido opiatorum usu facta exclusio deducenda

erit, quam quod ventriculi & intestinorum tunicas, quibus maxime opiata & sedativa vim inferunt, à robore suo atque tono, per spasmos præcedentes jam satis imminuto atque destructo, penitus tandem dejece- rint. Ex quibus luculenter elucescit, primariam hujus molestissimi mali causam veramque illius sedem non alibi esse quærendam, quam in ingenti intestinorum & ventriculi atonia, ex qua postmodum tanquam ex genuino suo fonte reliqua omnia, quibus hypochondriaci vexantur, propullulant symptomata.

47. Ultimo tandem & colophonis loco unicum ad hæc ex anodynorum & sedantium effectu, de singulari ischuriæ specie desumptum adjiciam judicium. Obtulit se mihi quondam inter alias difficiliores pariter ac rariores consilii dandi causa ad me missas morborum relationes singularis quidam affectus, dignus omnino, quem paulo accuratiori scrutinio subjiciamus. Quum vero ejusdem completam historiam in *Medic. Consult. Part. VIII. Dec. V. Cas. III. pag. 334.* in publicum usum omnium jam exposuerim perlustrationi, integram denuo repetere minus necessarium æstimans ea tantum huc transferam, quæ proprie ad institutum pertinent: Fœmina nempe calculosa, variisque spasmodicis insultibus ob nervosarum partium insignem debilitatem diu lacerata, inopinato dolore dextri lateris corripitur, cumque à calculo illum provenire crederet, medicamentum anodyno-antispasmodicum assum- sit; quo quidem dolor discussus, sed in ejus locum successit ischuria, seu plenaria urinæ suppressio; quæ quidem hac vice post tincturæ tartari & pilularum laxantium usum internum cessavit; ast præterlapso sub variis spasmodicis afflictionibus aliquot septimanarum spatio, rediit dolor iste gravativus lateris, illumque denuo sequuta multo pertinacior ischuria. Frustra ad ea, quæ sub priori insultu profecerant, recurrebat ægra, præsidia: & licet multa postmodum applicarentur antispasmodica & anodyna, ut clysteres emollientes antispasmodici, balnea, pulveres & potiones antispasmodicæ & anodynæ, minime tamen his ipsis per novem jam dies occlusæ urinales viæ potuerunt aperiri atque referari, unicum solamen percipiente ægra ex clysterum & pilularum laxantium usu, quarum quippe ope ingens semper serosi humoris quantitas per alvum, & aliquot urinæ guttæ per ordinariam viam fuerunt eductæ. Ex tam frustraneo itaque tot remediorum anodynorum & antispasmodicorum usu genuinam veramque hujus affectus causam felici cum eventu erui, atque in suppeditato consilio rescripsi: ischuriam hanc non à spasmodica viarum urinalium constrictione, sed à contrariæ plane indolis provenire causa, nimia nempe tubulorum renalium & ureterum flacciditate & atonia, motusque, qui alias in his quoque partibus viget & contenta in ipsis liquida strenue propellit, inertia atque defectu. Suasor itaque fui, ut ab ulteriori anodynorum, antispasmodicorum & emollientium usu penitus abstineant, & ea potius adhibeant, quæ confortante & roborante virtute debilitatis hisce partibus deperditum restituant tonum, imo, quæ leviori stimulo elanguidum resuscitent amissumque revocent motum. Fecit hæc omnia ex præscripto patiens, & haud ita multo post de felici exoptatoque successu me reddidit certior.

48. Habemus certe in enarrata morbi historia insigni saluberrimi ex remediorum effectu desumpti consilii exemplum, quod ego eo lubentius colophonis loco dissertationi huic adjicere volui, cum clarissimum exhibeat documentum, non otiosa fructusque expertia me in illa pertractasse, sed talia potius, quæ rite observata in praxi medica usus esse possunt amplissimi.



FRIDERICI
HOFFMANNI
OPUSCULA PATHOLOGICO-
PRACTICA, VARII ARGUMENTA.

DISSERTATIO MEDICA
DE ÆTATIS MUTATIONE MORBORUM
causa & remedio.

§. I.



INGENS quidem morborum, quibus mortalium genus subinde affligitur, est numerus; sed immensa quoque Numinis misericordia factum, ut innumera passim in universa rerum natura ad eosdem tam arcendos, quam sanandos, proflent auxilia. Etenim non modo illa

tria sic dicta naturæ regna amplum suggerunt apparatus rerum, quæ salutaris & medicinali pollent virtute, sed & ipsa elementa, quæ omnium naturalium, & maxime vivorum corporum, constituunt naturam, ejus indolis ac virtutis sunt, ut accommodatam adversus multos & difficiles morbos præbeant medicinam, testantibus id clare satis puris aquarum fontibus, maximeque iis, qui acidularum & thermarum nomine insigniuntur. Catholicum illud, aëreo-æthereum, quod vitam fovet ac sustinet, fluidum, tam salubrem in sinu fovet facultatem, ut multæ longæ ac rebelles sint passiones, quæ non nisi aëris mutatione sanescunt. In ipsis alimentis, quibus omnes ad vitam & sanitatem servandam perpetuo indigemus, vis recondita est medicinalis, & jam pridem vel experientiæ suffragio in comperto habemus, deprompta ex diætetico fonte remedia in vincenda morborum difficilium pertinacia, iis quæ à pharmacis petuntur, Galenicis æque ac chymicis, longe esse anteferenda, uti quidem vinum, lac, serum lactis, jura & gelatinæ carniū, decocta avenacea, hordei, axungia animantium, olea expressa, planum faciunt testatumque.

2. Neque vero tantum in iis, quæ extra corpus posita sunt, salubris & medicamentosa latet virtus, verum, ita etiam à summo opifice sapientissima illa corporis humani structura est fabricata, ut ad morbos expugnandos non mediocri symbolum conferat, eaque propter ipsi quandoque morbi medicina sint & adversus morbos præsidium. Luculento exemplo sint febres, in quibus motuum intensiorum beneficio sæpenumero non modo causæ, quæ febrem excitando, perniciem intendant, amoveantur, sed & multæ graves & chronicæ passiones, uti epilepticæ, convulsivæ & spasmodicæ, abiguntur & corpus firmiorem sanitatem, majus robur majoresque vires acquirit. Quod quidem sicuti in febribus, nec non sanguinis excretionibus, à varia conditione varioque motu fluidorum evenit; ita non minus in structura, conformatione atque textura solidorum singulare latitat artificium, quod in medicatione morborum præcipuum sæpe curationis punctum absolvit. Emicat id, ut mittamus alia, sub mutatione ætatum, cujus magna vis est tam ad inducendam morborum dispositionem, quam eorundem sanationem; utrumque non aliam ob causam, quam ob mutatam sub ætatis periodorum temporis decursu solidorum fabricam atque texturam. Quod penitus nosse, quum in arte nostra magni sit momenti, dignum curatori indagine mihi visum fuit hocce argumentum fusius evolvendum.

3. In perquirenda igitur salutaris mutatae ætatis adversus morbos efficacia, haud abs re erit præmittere nonnulla, de proxima hujus effectus causa, solidis nempe corporis nostri partibus earumque natura, actione atque ad vitam & sanitatem tuendam, ad morbos ingignendos eosdemque rursus abigendos potentia.

Veteres,

Veteres, ac inter hos maxime GALENUS, cum iis, qui ex posteris pressius ipsius vestigiis institerunt, neglectis plane solidorum vitiis, à fluidorum tantum labe, intemperie, vel corrupta ac depravata indole, omnium fere morborum ortum ac causas derivarunt. Hinc si monumenta eorum, qui post GALENUM per multa sæcula medicinam opere & sermone agitarunt, evolvimus, vix quicquam aliud in explicanda morborum generatione invenimus, quam sanguinis abundantiam & inopiam, bilem flavam, vel atram, aut pituitam eminentem, vel horum quatuor humorum intemperaturam, vel eorum putredinem, vapores insensos & præternaturales humorum in partes fluxiones, quibus postea medendi methodum accommodarunt, unice in corrigendis, vel evacuandis, intemperie, aut vitio laborantibus humoribus, occupatam. Reliquæ, quas in dogmatica morborum disquisitione tradunt causæ, mera grande sonantia sunt nomina, humidum radicale, calidum innatum, potentiæ attractrices, expultrices, retentrices, antipraxiæ viscerum, idiosyncrasia, sympathia, venenata qualitas, & id genus plura, quæ tamen ad intelligenter explicandam morborum genesin & inveniendam congrua adversus hos præsidia, nullius plane usus sunt atque momenti.

4. Jam quidem priscis medicorum facile condonandum, quod in vitæ, sanitatis & morborum causis eruendis cæcutierint, & alienas prorsus foverint opiniones, quum ipsos non modo exquisitior corporis humani structuræ notitia & genuina partium functio, sed & vitalis ille humorum in circulum abiens motus, omnium in corpore actionum fundamentum, latuerit. Nostri vero temporibus, post divinum illud circuli sanguinis multaque alia præstantissima inventa, in luce palpare non amplius licet, sed ægre merito ferendum, quod pathologica doctrina à plurimis recentiorum, superiori etiam adhuc sæculo, non melius fuerit exculta, quæ tamen unica & vera rationalis & tutæ therapiæ basis est. Fuerunt enim, qui licet non ex quatuor morbofis Galenicorum humorum, ex aliis tamen non minus gratis suppositis fluidorum vitiis, morborum duxerunt incunabula, acido scilicet & viscido, pituita, bile & acido, acrimonia varia, falsedine, dyscrasia salino-sulphurea, scorbutica impuritate, morbificis fermentis, succorum crassitie, plenitudine, venenata qualitate, spirituum obfuscatione, fixitate, male posthabito perverso habitu & vitio solidorum.

5. Neque etiam nostro hoc ævo ferendum esse existimamus, quod docti quidam & celebres medici in explicandis medicis rebus, & maxime quidem morborum ætiologia, nova quædam principia, seu magis nomina, quæ plus essentia substantiarum spiritualium & intelligentiû, quam rerum corporearum quadrant, obtrudere & infelici fidere introducere contendant, dum vitæ & mortis, sanitatis & morborum causam, quin hos curandi facultatem, in spirituali quodam, interno vitali sensu, cognitione & intentione prædito ac motus ad certum finem, certo gradu dirigente principio constituunt, & inter materiales morborum causas, exclusa fere omni falsa pathologia, præter humorum abundantiam, admittunt fere nihil. Ens enim ejusmodi metaphysicum & deprompta inde abstrusa principia, ex sententia nostra nullius sunt usus, eo quod minus sufficiunt claris & distinctis in pathologicis eliciendis conceptibus, qui tamen ad omnem veritatem & demonstrativam cognitionem requiruntur, neque etiam formandis accommodis curandi indicationibus serviunt. Hinc rectius utique ejusmodi amplectenda esse principia censemus, quorum ductu ex causis proximis, sensui & rationi obviis, in pathologicis ratiocinatio & in therapeuticis medicatio adornatur, quæ potissimum suppetit, solidorum & fluidorum, è quibus corpus coagmentatum, natura, vis atque operatio mutua intimius cognita, quam recentio-

res mechanismi nomine efferunt.

6. Et profecto iusta nobis suppetit causa reprehendendi eos, qui ad occulta ejusmodi principia & sterilia nomina confugiunt, quum ex perquisitiore solidorum cognitione, plurima in medica doctrina perquam facile ac commode enodari & ad rationes revocari queant. Adducemus in exemplum inevitabilem moriendi necessitatem. Hæc quidem inventu non adeo difficilis est iis, qui rerum corporearum naturam callent; illis vero, qui hac destituuntur, abstrusa mirum videtur, ut etiam ad speculationes à corporis natura plane alienas delabantur, quasi tum energia principii vitalis vacillet, deficiat istudque à motu in corpore suscitando desistat. In corpore potius, non spirituali ente, causa interitus quærenda, mutata scilicet structura solidorum, quæ regunt, movent & impellunt fluida, quæ saluberrimas secretiones atque excretiones sustentando, mortem morbosque avertunt. Jam ipsis sensibus manifestum est, carnes, tendines, ligamenta, ossa, vasa, longe flexiliora, porosiora esse & molliora in junioribus, in annosioribus vero & decrepitis duriora, compactiora & solidiora, ductibus & poris coarctatis, reddi; unde vel domestico experimento constat, longe intensiori coctione annosiorum animantium carnes indigere, quam juniorum, ut mollescant. Quum igitur ingravescente ætate fibræ non modo rigidiores & duriores evadant, sed & pori, ductus & canaliculi angustentur & coalescant, ex necessitate utique mechanica fit, ut utilissimæ nutritioni, viribus ac robori servientes in corpore functiones, secretio scilicet roscidi nutritii succi, fluidi spirituosus in cerebro & spinali medulla, liquoris chylosi in villosa intestinorum & seminalis in testium canaliculosa substantia, minuantur ac sufflaminentur. Dein, quum pariter minima illa vascula, quæ impurarum & superfluarum partium emissioni maximeque cuticulari excretioni servant, lapsu temporis collabantur minusque patula sint, remanent recrementa ac vitales succi inquinantur. Utrisque vero junctim pensitatis, non mirandum est, morbos ipsamque mortem sensim necessario gigni atque demum induci, quemadmodum id latius, primus quod sciam deduxi in *med. rat. system. tom. I. Sect. I. cap. I.* nec non *dissert. de fato physico & medico.*

7. Cognita hac necessaria mortis, in mutata solidorum textura constituta causa, in proclivi est rationem reddere, quare ante diluvium adeo longævi fuerint homines, ob subtiliora scilicet, tenuiora & temperata à crassioribus & feculentis partibus immunia, quibus usi sunt, elementa, quæ post universalem inundationem inter se commixta, impuriora facta atque corruptioni magis obnoxia. Facile exinde quoque causa elucescit, quare incolæ regionum montanarum, qui subtiliori ac puriori aëre, aquis & alimentis purioribus fruuntur, uti in Helvetia, Bohemia, & in Italia Alpibus vicino tractu, graviores ætate fiant iis, qui in depressis locis aërem & alimenta infecta atque inquinata hauriunt. Neque minus id ad usum hinc decerpere licet, quod ad vitam sanam & longam conciliandam nihil aptius sit aëris puri & temperati, potus limpidi ac tenuis & ciborum mollium ac facilis solutionis usu, lenibus frictionibus & inunctionibus poros simul apertos servando & perspirationem eliciendo.

8. Quam singularis porro utilitatis exquisitior solidorum partium & aptitudinis earundem ad motum tam recipiendum, quam propagandum sit cognitio, ad plurima in pathologicis clare & distincte explananda, luculenter confirmant morbi sic dicti hæreditarii. In vulgus quippe notum est, parentes phthysicos, hypochondriacos, calculosos, podagricos, epilepticos, melancholicos, quin haud raro hydropicos & cachecticos, gignere infantes ad eosdem morbos proclives & iisdem plerumque obnoxios. Hujus causam si quis idea-

rum seminalium, spirituum, vel principii vitalis peculiarem labem, vel dispositionem suggerere velit, is certe verba dabit sterilia, quæ ad intelligenter explicandum & invenienda remedia usus sunt plane nullius. Fundamentum potius nativorum ejusmodi morborum in vitiata flaminum, fibrarum & vasorum, è quibus corpus coagmentatum est conformatione, illarum nimia sive laxitate, sive strictura & tensione, ac horum nimia vel amplitudine, vel angustia, ab ipsis parentibus connata, reperiundum. Hæc vero qui novit atque perpendit, facile judicabit, morbos per nativitatem in liberos translatos, difficulter sanationem recipere, eo quod omnium sit difficillimum, solidæ cujusdam partis conformationem aliam facere & immutare. Habebit quoque perspectum, à parentibus morboſis prognatis, exquisitam vitæ victusque servandam esse rationem, ne delitescens solidæ partis labes ex fluidorum vitio invaleſcat & in morbum erumpat apertum.

9. Eadem hæc alia atque alia solidorum quoad habitudinem fibrarum, vasorum, pororum, nervorum ac minimorum ductuum, in unione & cohæſione, textura atque structura, verà præterea causa est, quod unus altero robustior, facilius ægrotet, facilius quoque vel difficiliter sanescat, nec non ratione animi mobilior sit, vel torpidior & ad hos vel illos animi affectus magis, vel minus proclivis. Verbo: hæc solidorum structuræ diversitas, est causa diversitatis operationum in functionibus animalibus, vitalibus & naturalibus. Vulgo quidem, secundum GALENUM ipsiusque sectatores, hæc temperamentis, sive sanguinis & humorum temperiei & intemperiei adscribuntur, sed absonam & à veritate alienam hanc esse opinionem, vel ex eo clare patet, quod actiones illæ, quæ temperamentis, sanguineo, cholerico, melancholico & phlegmatico, vulgo tribuuntur, mutare & corrigere arduum & vix sit integrum, quod tamen, si natura & temperies fluidorum earundem causa esset, facillime, mutato aëre, victu & vivendi genere, fieri posset. Contra ea ipsa experientia uberius confirmat, nihil magis tam ad mutationem ipsius sic dicti temperamentis & actionum corporis secundum ipsam naturam, quam etiam ad morbos ipsorumque productionem conferre, quam ætatem ejusdemque vicissitudines. Ratio pariter in procinctu est, quia videlicet labentibus annis, interea temporis solida, per quæ fibrosa flamina, membranas, vasa, nervos, ligamenta, tendines & ossa intelligimus, immutantur, eaque propter in motu, tam progressivo, quam secretorio & excretorio, ipsa quoque temperie fluidorum, ingens contingit mutatio.

10. Antiquissima hinc jam priscorum Philosophorum fuit sententia, certis annis & quæ ex his conficiuntur ætatibus, occultam & plane peculiarem inesse virtutem immutandi hominis valetudinem & corpus ad varios morbos ipsamque mortem disponendi. Scitum potissimum hanc in rem est VERULAMII effatum: *hæc intestina illa calamitas, quam nulla ars, nulla humana industria effugere, sed ne reprimere quidem potest. Etenim si cui ab ortu temperato vel ÆSCULAPIUS præsit, qui illum ab iis, quæ foris sunt, aut quæ intro sumuntur causis, salvum & incolumem sic tueatur, ut nullum inde corpus detrimentum capiat; is tamen à semetipso suaque sponte magis magisque conficitur consumeturque, donec extremum vitæ spiritum edat. Illuc dum contendit, plurimas hoc interim spatio mutationes necessario sustinet. Has qui annorum spatiis & intervallis dimensi primum discreverunt, simul ætates appellarunt, ut sit ætas id vitæ curriculum, quo luculenter corporis constitutio per se suoque nutu mutatur.*

11. Maxime omnium vero septenario multum detulerunt numero, & annos numerantes septimum

quemvis vocarunt climactericum, quasi singulorum lapsu homo tanquam per gradus & scalas ad perfectionem viriumque robur, & retrogrado postea cursu ad decrementum rursus vitæque interitum vergeret; Nec sine ratione. Potiores enim in corpore humano mutationes exserunt se ad ductum numeri septenarii. Scilicet ter septima hebdomade embryo in utero primum motum edit & sex septima ad partum est paratus. Infante in lucem edito, septimo mense dentes exitum moliuntur, atque erumpunt; bis septimo mense stomachi ea firmitas facta, ut cibum capere & digerere possit; ter septimo mense pedes in incessu, & lingua in loquela officio fungi incipiunt; septimo anno primi decidunt dentes, mentisque & sensuum internorum operationes cum ingenii viribus sese primum exserunt; bis septimo anno pili in pube crescunt, in foeminis menses exsolvuntur, in testibus quoque adolescentum spermatici liquoris secretio inchoat, & utrisque potentia generandi accedit. Inde ad ter septimum usque annum corpus in longitudinem & caput in magnitudinem excrescit debitam, barba in mento comparet, & animæ facultates sese magis produnt. A vigesimo quinto ad trigessimum quintum annum, corpus in amplitudinem extenditur, ossa magis solidescunt, membra nanciscuntur firmitatem ac robur, & corpori maxima est agilitas animoque & ingenio vigor. Tum perstat idem corporis robur ad quadragessimum usque nonum annum, quo sensim diminuitur, in foeminis mensium fluxus subsistit, in viris potentia generandi deficit, & ingravescente magis ætate, sub senectute successive vires decrescunt animi, ingenii & corporis, actiones vitales, naturales & animales labascunt, donec demum penitus concidant.

12. Propius vero nostrum institutum & scopum maxime medico-practicum tangit, quod ab hac solidarum corporis nostri partium, quoad texturam, structuram & conformationem, in figura & magnitudine per ætates, sive certas annorum periodos, facta immutatione, peculiaris in certis partibus cuivis ætati propria ad producendos morbos emergat dispositio. In quo quidem illud inprimis observatione dignum videtur, quod hinc oriundi ætatum morbi à capite & superioribus incipiant, & postea per gradus quasi ad inferiora descendant, & collum, fauces, pectus, præcordia, hypochondria, imum ventrem, pelvim & partes extremas occupent. Ratio hujus observati in proclivi & hæc esse videtur. Scilicet, quemadmodum sapiens natura, in-efformando embryonis utero inclusi corpuseulo sic versatur, ut primum caput cum cerebro ipsaque spinali medulla, postea thoracem, abdomen & partes externas ad perfectionem suam perducatur, ita etiam eadem hæc extra uterum occupata primo omnium est, ut caput ad justam suam magnitudinem & perfectionem provehat, postea pectoris elaborationem intendat & œconomiam motuum vitalium recte instruat, ac demum ad reliquas inferiores partes rite perficiendas & ad justam magnitudinem ac proportionem traducendas omnem laborem atque operam conferat. Hæc autem quum nonnisi expandendo & dilatando debito modo canales & eorum diametros, tonum & robur fibris motricibus conciliando & majori sanguinis ac humorum copia affluente perfici queat; neutiquam mirandum est, si hæc omnia non secundum regulam, ordinem & proportionem rite fiant, sed humores plus justo ad partes ampliandas & nutriendas adducuntur, iique minus temperati & mobiles sunt, vel forsan à debitis suis viis deflectunt & alias sedes aliaque loca occupant, varias ex humorum stagnationibus, stasibus, morboſas affectiones in partibus pullulare ac infestare.

13. Is autem est naturæ processus & hic morborum ætatum proventus. In infantibus caput quam

maximè

maxime tam quoad externas, quam internas partes patitur. Tunc enim variæ in facie exulcerationes, achoræ, favi, in ore aphthæ, in oculis & auribus humiditates, in narium cavo coryzæ observantur, nullaque ætas tam facilis & prompta est ad concipiendam levi ex causa, uti ex solo lactentis matris terrore, epilepsiam, quam hæc ipsa infantilis. Circa mensem septimum, quum ordinario naturæ cursu dentes prorumpere incipiant, à dolore & vellicatione nervosarum in gingivis fibrarum, totum systema nervorum per consensum irritatur & valide afficitur, unde in difficulter dentientibus pavores, vigiliæ, febres, convulsiones epilepticæ, oppRESSIONES pectoris, ventris tormina, cum nimio alvi profluvio, vel interdum ejus constrictione, observantur. Qualia generis nervosi præternaturalia pathemata, ob summam in infantili corpore imbecillitatem, à lacte copioso, stagnante, corrupto, corrosivo reddito, quam facile proveniunt & plures etiam infantes interficiunt. In pueris dein usque ad decimum quartum annum, tinea in capite, tumores glandularum in collo, in nucha parotides tumefactæ, acres oculorum defluxiones, aurium & narium fluxus interdum purulenti, tussis ferinæ, convulsivæ, inflammationes anginosæ, in quibusdam scrophulæ observantur. Ob ligamenta quoque adhuc valde laxa & flexilia luxationes, in humeris præsertim & vertebriis dorso, & gibbositates facile, accedente causa quadam externa violenta, proveniunt. Et quum in hac ætate valde dulces & temperati sint humores, quibus lumbrici in intestinorum tenuium anfractibus promte nutriuntur & succrescunt, ab horum morfu importuno sæpe epilepticæ & convulsivæ artuum agitationes infestare solent.

14. Circa decimum quartum postea annum, sanguis paullo tenuior, calidior & copiosior redditus, efficit, ut pili prorumpant in pube, ut testium quoque fabrica elaboretur inque eorum minutissimis canalibus succus lymphaticus spirituosus seminalis secernatur, in foeminis vero uteri vasculosa compages ampliatur, canales tortuosi explicentur, sanguinem superabundantem recipiant eundemque nimis accumulatum demum eructent. Circa hanc ætatem, quæ pubertatis nomine venit, major vigor majusque robur accedit partibus solidis, vox etiam sonora redditur, sique sanguis non liberum per uteri oscula invenit exitum, sed refluit & regurgitat ad ventriculi & intestinorum tunicas nerveas, nec non vasculosa abdominis viscera, gravia & varia sæpe femellas premunt incommoda, ut sunt vagi æstus, inappetentia, virium dejectio, corporis lassitudo, tabescentia & id genus plura. A decimo quarto ætatis anno usque ad vigesimum primum, quæ adolescentiæ periodus, in subjectis habitu corporis spongiosiori, pluribusque & exilibus vasis præditis, eaque propter ad plenitudinem succorum ipsa natura proclivibus, sanguis paullo majori impetu fertur ad caput, unde in adolescentibus dolores & exæstuationes capitis, aurium tinnitus, narium siccitates & hæmorrhagiæ, dolores quoque oculorum, immo interdum phrenitides, præsertim ab incitatori ad studia impetu, vel gravi animi affectu, suboriri & hanc ætatem graviter infestare solent.

15. In juventute, quæ à vigesimo quinto usque ad trigessimum quintum annum porrigitur, in thoracis cavitate plures sedem obtinent passionēs. Tum quippe præter tussis siccæ & defluxiones acres salsas ad epiglottidem & arteriam asperam, hæmoptyses, pleuritides veræ & spurias, vomicæ, tubercula pulmonum, abscessus, phthises, hæcticæ, tabes, asthmata convulsiva, cordis vehementes & crebræ palpitationes sese produnt. In juventute enim cordis atque arteriarum major potentia motrix elastica systaltica succrescit, pulsus fit validior, ipseque sanguis magis attenuatur

& intestino valde fervet motu, inde uberior sanguinis calidi portio, quam promte & facile in arterias laterales, quæ ordinario lympham vehunt, urgetur, & vel statim ibi concipiendo firmam, vel nimium distendendo & aperiendo vascula, jam nominatos morbos excludit. Observatum quoque per frequentem dissectionem corporum morbis defunctorum est, in juvenili ætate concreciones polyposas inembranaceas in vasorum cordi vicinorum cavitate, frequentissime generari & ad pectoris morbos, præsertim funestos & incurabiles, multum conferre, atque cordis contumaci palpitatione, pulsu intermittente, inæquali, ingenti spirandi angustia, anxio & pressorio in præcordiis dolore, ceu certis indiciis, sese prodere. Quod autem in juvenili & virili ætate familiares fiant polypi, quam in aliis, hæc videtur ratio, quod tum validiori cordis & arteriarum impulsu, crassiores & graviores sanguinis & succorum partes, longe facilius & arctius compingantur, coeant & concrecant.

16. Post annos juveniles sequuntur viriles, quos nonnulli à trigesimo quinto ad quinquagesimum usque nonum annum computant. Hac in ætatis periodo, summus vigor & valor partium solidarum, promptior quoque succorum progressivus motus & calor intensior est, unde fit, ut accedentibus aliis causis externis sanguinem nimium commoventibus, vel etiam subito in motu sistentibus, febres inflammatoriæ, acutæ, ardentes, phreneticæ, erysipelaceæ, arthriticæ, nephriticæ oboriantur. Hoc quoque temporis spatio, ob incrementum perfecto jam corporis incremento, succorum copiam, in dispositis sanguis per hæmorrhoidalia vasa effertur, minusque rite exsolutus, varia inducit incommoda, moliminum hæmorrhoidalium nomine passim nota. Postea notabiliter, in sexu præsertim sequiori, decrescit ac minuitur vis systaltica vasorum infimi ventris, neque amplius prodit mensium fluxus, cessatque vis generandi, tum pariter in viris, ab anno scilicet quinquagesimo sexto, ad sexagesimum tertium, lentior fit sanguinis circuitus per hepar & sanguinea corporis viscera, ac non modo in foeminis, sed & viris, exsurgunt illi morbi, qui à motu lentiori & segniori progressui sanguinis per viscera eorumque ab humoribus stagnantibus infarctu proficiuntur. In viris maxime, qui antea hæmorrhoidali fluxui affueti, eundem non amplius experiuntur, pullulat nephritis, calculus renum, icterus, colica convulsiva, cachexia, hydrops, quartana, morbus niger, hæmorrhoides cœcæ, vel etiam nimium fluentes, mictiones cruentæ, nec non apoplexia.

17. Post annum sexagesimum tertium, ad septuagesimum septimum & qui sequuntur annos, tonus solidorum longe magis frangitur, partes incipiunt siccescere, rigescere tubulique angustari. Hinc vero perspiratio minuitur, remanent impuri succi, quibus sanguis & succus nutritivus inquinatur & ingens fit acrimoniæ salinæ proventus, qua serum imbuitur, ut morbi seniles & decrepitæ ætati familiares inde pullulent, quales sunt marcor cum rugis, scabies sicca, pruritus circa anum, virium languor, dysuria, stranguria, tenesmus, vesicæ calculus, impotentia virilis, podagra nodosa. Quin succrescit sensim dyscrasia scorbutica adeo corruptiva, ut partes extremæ in senibus etiam leviter læsæ, facile tangantur sphacelo, vel hic etiam sponte oriatur.

18. Per omnem igitur ætatis flexum peculiare quidam morbi, ob ipsam corporis, maximeque solidarum ipsius partium, mutatam habitudinem, infestant, quos inter nostris quidem in oris frequentissimi sunt, quos hæcenus enumeravimus. Nec tamen dubitamus, quin in aliis locis & regionibus, longius à nobis remotis aliaque temperie gaudentibus, alia adhuc ætatum passionēs, & hæc quoad symptomata à no-

stris diversæ, sint solennes. Patet hoc ipsum jam ex HIPPOCRATIS monumentis, qui quidem *Seçt. III. aph. 24. ad 31.* morbos cuiusvis ætati proprios atque consuetos longa enumeravit serie, & primus hanc veritatem ipsa experientia habuit perspectam; sed non omnes, quorum mentionem injicit, in iis, qui zonam temperatorem incolunt, observantur, nec iisdem, quibus in calidiori tractu, incedunt pathematibus. Neque etiam censendum est, in omnibus ætatibus, omnibusque individuis, semper ita exacte præsto esse hos morbos, ac diximus, sed experientia utique testatur, pro temperamentorum, solidarum partium & habitus corporis varietate, majori, vel minori fibrarum sensibilitate, diversa etiam vitæ victusque ratione, vel anticipare, vel postponere, majori aut minori vehementia invadere, nec non has, vel illas partes magis occupare ac detinere.

19. Quemadmodum vero quævis ætas ad ingignendos certos in his vel illis partibus morbos conspicuam vim habet atque potentiam; ita vicissim notatu dignum est, quod hæc, vell illa vitæ periodus, à pathematibus quibusdam, reliquis solennibus, secundum suum naturæ ordinem, immunis sit. Sic experientiæ calculo constat, infantes & pueros capitis quidem morbis & epilepticis maxime convulsionibus frequentissime affligi; ab insultibus tamen paralyticis, apoplecticis, nec non ab affectibus soporosis, hemiplexia, vertigine, melancholia & insania, liberos esse. Ratio hæc subesse videtur. Postremi hi capitis affectus à nimia sanguinis & humorum congestione, à spasticis partium imi ventris, vel etiam externarum constrictionibus producta, ortum trahunt, eo quod inde vasorum cerebri nimia fit distensio, sanguinis in iisdem stagnatio, infarctus, eorundemque demum ruptura cum subsequente humoris effluxu. In infantibus vero & pueris humores magis serosi, quam ipse sanguis redundat, partesque solidæ flaccidiores atque remissiores sunt, ut sanguis non tanto impetu ad caput possit urgeri. Pari ratione in puerili & infantili ætate constituti, à pleuritide, tam vera, quam spuria, hæmoptysi, phthisi, hæctica, pulmonum abscessibus, vomitis & inde resultante tabe ac tussi purulenta, minus infestantur; eo quod omnes hæc passiones, & abundantior, & tenuior sanguinem, cum intensiori in vasa thoracis impulsu requirunt, quæ in teneris ejusmodi non præsto sunt corporibus. Neque etiam infantia & pueritia spasmis præcordiorum & hypochondriacis, hæmorrhoidibus & inde oriundis incommodis, nephritidi, calculo renum, arthritidi, chiragræ, podagræ, ictero & scorbuto patet. Tum enim corpus magis perspirabile est, quam in virili & senili ætate, humores quoque tenuiores expeditius feruntur per viscera abdominis, quam si spissiores facti sunt sub senio.

20. Contra ea adultior ætas hoc habet singulare, ut non facile corripiatur morbis infantum, tinea scilicet, achoribus, favis, tumoribus colli & parotidum, aurium fluxu, item epilepsia & motibus artuum convulsivis. Senum etiam grandævorum pathematibus minus patent, qui ætate consistunt & vegeti sunt. Potissimum periculum sphaceli ex causa interna ipsis non imminet, eo quod in ipsis succi magis defecati promte circumaguntur & ipsarum quoque fibrarum tonus vegetior est. Nec ulcera scorbutica cacoëthea hos tam frequenter detinent, quam senes, in quibus ob excretiones minus rite succedentes cutisque spiracula minus pervia, humores impuri & sulphurea falsa diathesi imbuti, facile ulcera sordida inducunt. Qui vero ætate magis sunt provecti, nec hæmoptysi, nec phthisi, nec febribus ardentibus, nec synochis, nec malignis, facile implicantur. Neque etiam hos torquent familiares illæ juvenibus ac viris, in nostris

maxime septentrionalibus oris, strictione ac spasmu diaphragmatis & ventriculi cum pathematibus ex vitio hypochondriorum, vel systemate nervorum præter naturam affecto. In juvenibus quippe major adest toni intensio, fibræ magis tensæ & ad dolorificas spasticas crispaturas magis proclives; in senibus vero ob rigiditatem fibrarum & fluidi nervei, quod sensum & motum dispensat, inopiam, non tantæ, nec tam promptæ corrugationes & strictione in nervorum & fibrarum systemate oboriri queunt. A vermibus quoque senes non experiuntur incommoda, ob succos valde acres, salios & impuros, qui verminosæ progeniei minus favent, sed potius adversantur. Non minus grandævi à peste aliisque contagiosis morbis raro tentantur, quia eminens apud ipsos prima in regione acor, & in venis acrimonia salsa, subtilitati & tenuitati, qua contagium motu intestino sese propagare solet, multum resistit ejusque deleteriam vim reprimit atque infringit. Tenendum tamen in genere: hæc omnia ita quidem communi maximeque solenni more accidere, extra ordinem vero, licet rarissime, fieri omnino posse, ut regula patiatur exceptionem, ac senes puerorum, vel juvenum & virorum, hi vicissim senum morbis obnoxii sint, tum maxime, quando eminens error in diætâ & vitæ ratione admissus fuerit, vel hæreditaria dispositio, aut alia quædam externa valida causa accesserit.

21. Sicut autem porro ætatis mutatio magna pollet potentia ad inducendam corpori morbosam dispositionem; ita eundem annorum vitæ decursum hanc iterum tollere, per ipsam constat experientiam, adeo, ut id, quod pueris, adolescentibus & juvenibus molestum fuit, ingruente senio, cesset atque expiret. Testatur id luculentis verbis HIPPOCRATES *Seçt. II. aph. 20.* quibus, inquit, *quum juvenes sunt, ventres humidi, his senescentibus siccantur, quibus vero juvenibus siccis sunt, his senescentibus humectantur.* Rationem hujus observati veteres & inter hos, optimus ille HIPPOCRATIS interpres, MERCURIALIS, hanc afferunt: in juventute intemperies calida acerrimæ bilis procreatrix est, à quo læviora fiunt intestina & alvus fluxa, in frigida vero senectute, pituita eminet, cessat alvi laxitas & durities succedit. Contra ea ubi in juvenili ætate, ob perspirationem auctiorem & firmiorem ventriculi atque intestinorum tonum, alvus sicca est, accedente senectute humectatur, ob lentiorum tum factam & impeditiorem perspirationem. Angustatis enim & siccatis in senili corpore vasorum & cutis spiraculorum osculis, succi non rite eadem subeunt, foribusque perspirandis præcluditur exitus, quo fit, ut humida hæc recrementa ad alia corporis excernicula refluant, ibidemque collecta molliant, humectent & exeant, ex quo utique causa petenda, quod senes multum tussiant, spuunt, mingant, per alvum dejiciant, crebriusque catarrhis & coryzis exerceantur.

22. Adversus ipsos etiam morbos mutata ætas præsidio est, eisdemque felicius, quam ulla medicina abigit. Illustre hanc in rem HIPPOCRATIS est testimonium *Seçt. III. aph. 28.* ita habens: *plurimæ affectiones pueris judicantur partim in quadraginta diebus, partim in septem mensibus, partim in septem annis, partim ad pubertatem accedentibus. Quicumque vero pueriles morbi perdurant, nec desinunt, quum ex ephebis egressi sunt, aut scemina, quum menstruales esse inceperunt, consensescere consueverunt.* Potissimum de epilepticis motibus idem gravis auctor hoc passim asserit, quod per ætatem sanentur, ab hac vero non abacti, ægrius vel plane non tollantur. Sic enim *Seçt. II. aph. 45.* disertis perhibet verbis: *juvenibus comitialium liberationem faciunt mutationes, maxime ætatis, & aëris, & regionum viciumque.* *Seçt. VI. aph. 7.* ita prodidit: quibus

quibus epilepsia ante pubertatem contingunt, mutationem accipiunt, quibus vero accidunt viginti quinque annos natis, iis plerumque commoriuntur. Et lib. prædict. art. XVI. hæc habet: *difficillime à morbo sacro liberantur, in quibus à puero contigit morbus, & simul ad virilem ætatem pervenit.* Eadem pariter CELSI sententia est, qui lib. II. cap. II. hunc in modum fatur: *si quæ genera morborum in infantem inciderunt, ac neque pubertate, neque primis coitibus, neque in fœmina primis menstruis finita sunt, fere longa sunt.* Hinc etiam de CALIGULA Imperatore narrat SÆTONIUS, eundem ætatis beneficio, ab epilepsia fuisse liberatum.

23. Si causam rimamur hujus effectus, hæc utique videtur veri simillima: desiderari scilicet ad gignendum epilepticum morbum, non tantum certam in fluidis intemperiem, sed & peculiarem pravam in solidis, præsertim cerebro ejusque vasis, membranæ & nervis dispositionem, ut non modo humor morbo excludendo aptus, ibi subsistere sedemque figere possit, sed & systema membranarum & nervosarum partium ad concipiendos spasmos & contractorios convulsivos motus habile sit atque dispositum. Jam vero humidiora cerebri & nervorum flamina ante pubertatem facile admittunt humorum stagnationem, atque etiam ob teneritudinem ad convulsivas motiones mobilia sunt magisque proclivia, eaque propter, ante septimum præsertim annum, uti recte notavit DURETUS, & epilepsia & horrendæ interdum artuum convulsivæ tractiones, agitationes & disensiones invadunt, quæ tanto gravius tantoque diutius infestant, quanto magis à causis externis, inordinato & incongruo victu, animi motibus, aut mentis fatigationibus foveantur. Superatis autem pubertatis annis, quando ab admixto sanguini & lymphaticis succis generaturæ virilis, ut ita loqui liceat, spiritu, ceu fermento, omnes solidæ corporis partes, ipsaque cerebri flamina, tonum intensiorem majusque robur adipiscuntur, excretiones quoque, harumque potissima perspiratio, liberius succedunt, evenit, ut vel naturæ beneficio sua sponte, vel adhibita quadam leni medicina, truculentæ illæ passiones desinant atque expirent. Recte enim HIPPOCRATES lib. de morb. sacr. art. 13. hanc rationem reddit: *postquam, inquit, viginti anni præteriere, venæ plenæ sunt & cerebrum magis compactum est atque adstrictum, quare non defluit in venas humor; si vero defluerit, sanguinem non superat, multum ac calidum existentem.* Quod si vero facta hac per ætatem partium solidarum & fluidorum progressus mutatione, epilepsia post vigesimum quintum, & qui sequuntur, annos, persistit, vel etiam tum demum oboritur, vix perfecta speranda est medela, ipso jam fidem faciente CELSO lib. II. cap. VIII. sic differente: *morbis comitialibus post annum vigesimum quintum ortus ægre curatur, multoque ægrius is, qui post quadragesimum annum cæpit, adeo ut in ea ætate aliquid in natura spei, vix quicquam in medicina sit.*

24. Neque vero tantum in epileptico malo, verum etiam in aliis gravibus & difficilibus capitis morbis, illa quæ annorum lapsu in corporis partibus contingit mutatio, auxilio est, in phrenitide scilicet, melancholia, paralyfi, insaniam, memoriæque debilitate, nec non convulsivis artuum motibus. Ea enim, probe monente MERCURIALI in prælect. Patav. perpetua quasi HIPPOCRATIS fuit consuetudo, ut quando uno exemplo plura similia docere vult, illud semper seligat, quod frequentius, difficilius & notius est. Unde quum in allegatis locis exponere sibi sumsit, quantum in morborum curatione valeat ætatis mutatio, epilepsiam in exemplum produxit, neutiquam exclusis aliis morborum convulsivorum speciebus, nervorumque & capitis affectibus, in quibus functiones animales &

sensitivæ turbantur. Sic igitur concludendum: si in epilepsia, ubi omnes functiones sensuum internorum penitus perduntur, ut superato insultu nec præteritorum memoria supersit, ætatis mutatio medelam præstat, multo magis convulsiones & convulsivi motus aliique capitis, qui sensus internos non adeo lædunt, morbi eadem cedent.

25. Nobis certe plurima nota sunt exempla puerorum, qui à vermibus, adolescentulorum, qui ab immatura venere, iracundiæ affectu & studiorum intemperantia, in convulsivos artuum motus, phrenitides & insanias inciderunt, & adhibitis quantumvis spectatæ virtutis remediis, acidulis, antepilepticis, cauteriis & balneis, graviter iisdem detenti fuerunt, post annum vero decimum, nonnulli etiam post vigesimum primum, sponte, sine medicina, accedente præsertim aëris mutatione, prorsus convaluerunt. Novius quoque, impuberibus quibusdam tantam fuisse memoriæ membrorumque imbecillitatem, ut nec distincte loqui, nec firmum tenere gradum, nec memoria quicquam comprehendere potuerint, superatis tamen pubertatis & maxime vigesimo primo annis, membris externis vigorem ac firmitudinem, intellectui quoque ac memoriæ aciem accessisse, pristinaque penitus evanuisse vitia. Similiter multi animo observantur casus de tinea capitis, falsis ad oculos defluxionibus, glandularum colli tumoribus, aurium fluxibus, pertinacibus coryzis & acribus ad epiglottidem destillationibus, quæ omnem medicorum eluserunt operam, post pubertatis autem periodum, præsertim juncta loci victusque mutatione, vel sponte cessarunt. De quibus tamen omnibus historias, quarum nobis suppetit numerus, hic inferere, brevitati studentes, superfedemus.

26. Quam variis, difficilibus & contumacibus passionibus femellæ pubescentes, antequam mensium experiuntur profluvium, attententur, res tam clara est, quam quæ clarissima, omnes tamen hæ affectiones, simul ac tributum lunare decimo quarto anno persolvunt, expirant penitusque disparent. Paucos ante dies veritatem hujus observati nobis confirmavit generosa puella. Fuerat hæc prima ætate floridi semper aspectus & vegeta, accedente vero decimo tertio anno, tussim continuam, vomitionem, lassitudinem totius corporis, inappetentiam, lentum calorem ac gliscentem febrem, incurrebat, quæ secta in pede vena magis incredebant, donec ipsa natura, medicamentis temperate balsamicis, laxantibus & stomachicis adjuncta, menstruum sanguinis stillicidium inducens, exoptatam afferret medelam, prioribus penitus evanescentibus pathematibus. Adolescentes crebrioribus nocturnis pollutionibus diu afflictos mirumque debilitatos novimus, qui nihil levaminis à probatæ alias virtutis præfidiis experti, sed vigesimum primum annum ingressi, lenissimis remediis, maxima ex parte sponte, ab hoc liberati sunt incommodo. Pari ratione sunt nobis inter exempla juvenes noviter matrimonium ineuntes, qui semen non continere potuerunt, sed ad contactum fœminæ illico dimiserunt, elapsis vero aliquot annis, molestum hoc & in conjugio infestum pathema discessit prorsus atque evanuit.

27. Neque etiam hoc loco prætereundum est id, quod ad illustrationem & confirmationem hujus nostri argumenti apprime facit, observatum. Multis scilicet exemplis confirmatum habemus: virgines nobiles sævis & rebellibus sic dictis hysteris, spasmodico-flatulentis ac convulsivis pathematibus fuisse exagitatas, nec prius ad sanitatem potuisse perducì, quam quum viro collocatæ eundem expertæ sunt. Primis enim coitibus, quibus etiam CELSUS lib. II. cap. 2. magnam solvendi morbos tribuit virtutem,

plane peculiaris in solidis & fluidis partibus inducitur mutatio. Spiritus quippe, ut ita loquamur, genituræ virilis, elastica & expansiva facultate pollens, in interiora uteri admissus, occlusa valorum oscula aperit atque expandit, ut liberior sanguinis per uterinam compagem fiat circuitus, ac in ipsis fibris motricibus novi oscillatorii & systaltici motus ac impetus oboriantur, quorum ministerio subacti & emendati morbidi succi deferunt latibula, eliminantur, & restituto simul debito sanguinis progressu, sanitas reddit.

28. Hæc autem omnia, quæ hætenus pluribus exposuimus, apertius confirmant, vix ullam inter medicas doctrinam, tantum lucis in causarum, quæ morbos gignunt, investigatione & hos arcendi ac curandi ratione, afferre, quam hanc, quæ de morbis ætatum horumque vera origine, tractat. Hæc enim luculenter docet, præcipuas & proximas morborum causas non tantum à fluidorum vitiis & perversis motibus, verum etiam, & quidem potissimum, à solidorum labe eorumque prava dispositione, textura & conformatione dependere. Hæc idemtidem tradit, in sanandis etiam morbis, præsertim longioribus & difficilioribus, medicationem non tam ad humorum correctionem & emendationem, quam potius ad solidorum vitia corrigenda & submovenda, ab artifice perito per congrua & efficacia auxilia esse dirigendam. Nam profecto, vix dici potest, quantum ad morbos tam arcendos, quam curandos valeat, illa, quæ in solidis corporis partibus contingit mutatio. Hac quippe non modo fibræ & membranæ nervosæ & musculosæ aliam texturam, structuram & conformationem adipiscuntur, ac vel subtiliores & teneriores, vel crassiores ac densiores, vel etiam magis tensæ, aut remissæ redduntur, ut alios motus oscillatorios & systalticos, eosque vel majores, vel minores, edant, sed & ipsa vasa & canales fluida vehentia, tum contrahuntur, angustantur & clauduntur, tum elongantur, ampliantur & aperiuntur, ut novam plane figuram atque flexuram nanciscantur, & fluidorum motum aliter etiam dispensent ac dirigant.

29. Et certe, quod tamen obiter tantum hoc loco tangimus, medicamenta, & ipsa quoque venena, testatum faciunt, adeo immutari posse ab ipsis solidorum naturalem conditionem, ut universi corporis integritas inde graviter luat. Novimus exempla, quod à rebus, quæ venenatæ sunt naturæ, ut emeticis, mercurialibus, arsenicalibus, narcoticis, opiatibus, validius quoque adstringentibus, debitus solidorum, maxime ventriculi, intestinorum & nervosarum partium tonus, penitus fuerit labefactatus atque destructus, ut corpus postea nunquam sanitatem perfectam recipere potuerit, sed semper infirmum, causarium ac debile maneret. Hinc vicissim illum medentium præstantissimum & peritissimum merito censemus, qui per remedia, quæ immediate & proxime in solida agunt, eorundem vitiis auspiciato succurrere morbosque depellere novit. Absolvitur hoc tam salubri effectu tantopere celebratorum specificorum, si quæ dantur, adversus certos morbos virtute & efficacia: referenda huc quoque illa magnarum virium pharmaca, emetica, antimonialia, sudorifera, mercurialia, anodyna, vesicantia, balnea, quæ imprudenter usurpata, maximam solidis affricare possunt labem, vitæ sanitatisque periculo stipatam, provide contra atque perite adhibita, præsentanea & efficacissima pollent salubri facultate.

30. Inter ea vero, quæ ex hac rationali morborum ætatum disquisitione in usum medico-practicum

elicienda, hæc adhuc merito referri debent. Scilicet tum felici & fructuoso labore curationem rebellium morborum, capitis præsertim & nervorum, medentem aggredi, quando instante hoc termino accedit, quo solidorum in melius fit ob ætatis rationem mutatio, ipsaque natura molimen secundat, uti maxime est, anno septimo, decimo quarto & vigesimo primo. Quando vero superatis his annis, infantiles, pueriles, vel juveniles morbi nihilo minus eadem persistunt atrocitas, nec solvuntur, certo est indicio: eisdem fore maxime diuturnos ac contumaces, quin plane insanabiles. Recte enim MERCURIALIS prælect. Patav. pag. 271. scribit: *illis temporibus natura in motu est, & sua sponte materiam morbi expellit, cui si medicus auxilietur remediis, quibus ars utitur adversus hos morbos, & illi non superantur, tunc non amplius, natura veluti quiescente, curantur, sed in longum protrahuntur.* Dein artis operibus manum admoturus discat hinc: epilepsiæ aliorumque gravium morborum curationem in ætate infantili & puerili, non tam in eo positam esse, ut per pharmaca fluidorum vitia, pravam scilicet qualitatem ac intemperiem, vel eorundem nimiam molem corrigat & mutet, quam potius, ut solidis partibus aliam schesin & texturam, per congrua medicamenta & specifica sic dicta antepileptica inducat, quæ tum certe non prorsus laude sua defraudanda, eo quod infantili ætate nondum adeo firmatus solidorum tonus emendationem facilius, quam in senescentibus admittit.

31. Demum, quum hi ætatum morbi tam rebelles sint tamque multi; quisque vel ultro perspicit, plus utique studii atque operæ impendendum esse iisdem præscindendis ac avertendis, quam quidem huc usque à medentibus factum; id quod etiam detectis & cognitis veris eorum causis perficere non adeo est arduum. Scilicet pueriles morbi & infantiles à nimia fibrarum laxitate & succorum nutrientium abundantia proveniunt; ideoque recte concluditur: ad arcendos ipsos temperata nervina, roborantia & blanda laxantia atque diuretica optima esse præsidia. Affectiones, quæ adolescentes, juvenes, nec non viros detinent, sanguinis calidioris copię, intensiori solidorum motui nimięque humorum ad certas partes congestioni, ortum debent. Hinc ad declinandum earum insultum apprime conferunt, tam diætetica, quam pharmaceutica, quæ nimium æstum & ebullitionem sanguinis contemperant, ut sunt aquea diluentia, nitrosa, nec non tempestivæ sanguinis missiones, rejectis omnibus calidioribus, sudoriferis, exagitantibus, validioribus purgantibus, vehementioribus quoque animi corporisque exagitationibus. In senio qui infestant morbi, à nimia fibrarum siccitate & rigiditate, tubulorum angustia, & secretionum atque excretionum impeditiori successu pendent. Omnia igitur intemperata, tam in victus, quam pharmacorum administratione evitanda, nimis videlicet calida, frigida, acida, falsa, tanto magis exsiccantia, adstringentia & tonum fibrarum minuentia; contra ea salubritatis laudem ferunt merito omnia temperata, ex medicamentis diaphoretica, laxantia, nutrientia, stomachica, roborantia, ex alimentis, quæ facile digeruntur, vimque emolliendi, humectandi & temperandi habent. Quod si vero jam impetunt ac præsto sunt hi morbi, non penitus omittenda sunt remedia, nec concedendum, ut morbus libere sæviat, sed occurrendum potius iis, quæ causam leniendo ejusque vim sensim infringendo, naturam adjuvant, semperque, quo ipsa vergit, ducunt.

SALIUM MORBOSORUM GENERATIONE IN CORPORE HUMANO.

§. I.

TOtam rerum naturam salibus diversissimi generis esse refertissimam, & non tantum in macrocosmo, sed & in microcosmo ex diversis mixtionibus, combinationibus, nec non efficacissimo motus instrumento nova quotidie prognerari & produci, eaque invicem converti ac immutari, & ubivis ferme salia in producendis effectibus atque phaenomenis praecipuam causam existere, nemo, nisi qui hospes in physicis, chymicis atque medicis est, in dubium vocabit. Natura enim nunquam quiescit, sed perpetuo vicissitudines & alterationes parit. Motus enim, qui per vocabulum naturae hic exprimitur, semper statum rerum mutat, mixtiones, conjunctiones ac separationes efficit, & diversissimas ex uno subiecto formas producit, adeoque verus ille salium genitor est dicendus. Hic enim ex insipidis & salium expertibus solo actu immateriali producit sapida & magnae efficaciae corpora. Ita ex insipida aqua pluviali & tenera terra vegetabilia suum augmentum sumunt, & sulphure ac salibus diversi saporis ac virtutis imbuuntur, quae non nisi terrei & aquei principii variae à motu alterationi, divisioni, attritioni, & translocationi debentur. Animantia nullo alio succo quam insipido, sensu medico, dulci ac gelatinoso roscido nutriuntur, nihilo minus, analysi chymica teste, salium volatilium ac sulphuris maximam quantitatem largiuntur. In artificialibus, chymicis ac physicis mediante fermentativo putredinoso motu nec non ignis & caloris efficacia, aërisque libero accessu, ex corporibus mixtis, diversi generis salia volatilia, fixa, acida, spiritus sulphura non modo de novo produci, sed & invicem transmutari possunt, quod innumeris experimentis, si temporis & instituti ratio posceret, comprobare possemus.

2. Primogenium autem & simplicissimum sal quod natura primum producit, & quod fons est reliquorum omnium nostra sententia est tale sal, quod ad acidi naturam accedit, hoc varia mixtione cum corpusculis terreis & aqueis, & pro varietate intestinae aetheris agitationis in varia salia convertitur, sicuti id olim deduxi & demonstravi. In aëre videtur tale sal acidæ indolis manifestissime, dum in terris pinguibus calcareis concentratum & mixtione denuo cum subtilissimis hujus terrae partibus intime sociatum abit in sal sulphureum, elasticum, inflammabile, quod vocatur nitrum. Aluminosas terras jam sale privatas coctione, per annum libero aëri commissas, denuo magnam quantitatem aluminiis præbere, res est certissima. Neque ignotum est, mineras sulphureas, quæ in Anglia & Hassia reperiuntur, in aëre diu retentas in elegans vitriolum concrefcere. Præterea quoque manifestum in aëre acidum ostendit experimentum, quandocunque sal alkali vel cineres clavellati sicco & sereno aëri per longum tempus obiciuntur; tum enim sal mediæ naturæ, amaricantis saporis instar tartari vitriolati in satis ingenti quantitate generatur, quod debita encheiresi commode potest separari. Hoc sale universali imbuti maxime sunt venti orientales & septentrionales, serenitatem atmosphaeræ nostræ inferentes, quare hisce flantibus, præsertim tempore æstivo, longe uberior dictorum salium est proventus;

Frid. Hoffmanni Oper. Tom. VI.

ac si austrini vel occidentales dominantur. Et hinc etiam probabile est, incommoda & morbosas dispositiones, quæ corpora humana accipiunt à diu regnantibus hisce ventis, non modo ab eorum rigiditate, siccitate, sed & à materiali simul influxu dependere.

3. Tandem etiam acidi salis copiam in atmosphaera nostra ostendit aliud singulare phaenomenon nempe fulguris & fulminum productio: hanc sobolem esse sulphuris, quoad naturam atque effectus vulgari ac minerali ex omni parte similis nullum subest dubium. Odor etiam sulphureus penetrantissimus, inflammabilitas, sulphur in aëre præfens esse minerali analogon abunde demonstrat. Unde autem id habeat suam originem jure meritoque venit in quaestionem. Vulgaris sententia est, hoc ipsum ex subterraneis cavernis & speluncis evaporare, & in atmosphaeram mediante calore elevari. At vero non sine ratione dubitandum est, solarem calorem tantæ esse efficaciae, ut ex intimis terræ meatibus sulphureas partes à mineris separare possit, quæ non nisi ingenti ignis, uti notum est, tortura sequestrantur ac sublimantur; sed potius statuo sulphur hoc, quod fulguris materiam constituit, esse valde affine minerali, & ex mixtione de novo in aëre produci ac generari. Certum enim est, quod ex resinosis corporibus cum oleo vitrioli mixtis, debita encheiresi sulphur perfectum inflammabile possit obtineri, & tale quoque eduxi & sublimavi, quod in omnibus tam colore quam consistentia inflammabilitate, odore, simile est vulgari minerali, ex opio & oleo vitrioli per destillationem in retorta. Quum itaque in aëre acidum illud universale ad naturam acidi sulphurei & vitriolici multum accedat, inque maxima quantitate ibi generetur, nec non exhalationes resinosæ, ex arboribus resiniferis nunquam deficiant, præsertim fervente tempore æstivo, hinc veritati consentaneum est, ex harum cum acido intima mixtione concretum propullulare sulphureum. Ex quo consequitur, non inodo salia, sed & ipsa sulphura in macrocosmo posse progigni.

4. Quemadmodum autem in toto macrocosmo, inque animantium ac vegetabilium regno, magna copia salium productorum conspicitur: ita etiam naturam microcosmicam ad generationem salium & sulphurum valde idoneam deprehendimus atque dispositam. Notatu autem perquam dignum est, quod utut homo vescatur multis rebus acido imprægnatis, utut etiam aërem continuo hauriat, qui salis hujus universalis non expers est, nihilo minus acidi salis vestigia extra ventriculi regionem in corpore sano non reperiantur, quandoquidem omnes hominis partes tam fluidæ quam solidæ exsiccatae & igne tractatae, copiam salis volatilis & olei, non autem alterius generis salis momentum suppeditant. Quod autem animale regnum salium volatilium copiam minifret abundantissimam, non aliæ causæ adscribendum est, quam motui intestino aëreo-aethereo, qui in animantium succis actuosissimus & vividissimus est, & acida spicula cum oleosis mixta, quæ in alimentis sufficientissime deprehenduntur perpetuo attritu, divisione, subtilifat, & ex fixis partibus summe volatiles, ex acidis vero alkalinas reddit. Quod autem ex acido & oleo item ex rebus sale volatili expertibus, rapidissimus motus ignei & aërei fluidi, sal volatile quoddam progignere queat, clarissime

112 De salium morbosorum generatione in corpore &c.

docet fuligo, utpote ligna in vase clauso cremata nil nisi acidum, stigma & oleum fundunt; quod si autem in aëre aperto accendantur & vapores concentrentur in fuliginem, & si hæc denuo in retorta destilletur, sal volatile vere urinosum in ingenti copia inde prolicitur.

5. Tametsi autem in iis partibus, quæ proprie ad humani vivi & sani corporis constitutionem spectant, nulla alia salia quam volatilia oleosa arte produci possint, nihilo minus quæ secernuntur & ex homine excernuntur, salibus præsertim mediis tartareis, ammoniacalibus, sulphureis foeta & imprægnata sunt. Nullus enim ferme humor est excepto muco, qui secretioni & excretioni ad extra destinatus est, qui non participet de manifesta falsedine plus minus cum sulphure mixta. In sudore, bile & urina, nemo negabit falsedinem: salivam etiam recondere tenue quoddam salinum elementum, variis evinci potest experimentis. Ex dictis igitur patet, salia ut extricata & in se considerata libera, non esse principia constitutiva corporis nostri vera, neque ad nutritionem vel ad spiritalitatem proxime idonea existere.

6. Verum enim vero, concludere quis ex dictis poterit, si salia non constituunt & ingrediuntur corporis nostri humores, alimenta & medicamenta, quæ salinæ profapiæ ac virtutis sunt, esse noxiosissima & potius ex corpore excludenda, quam in illud recipienda. Neutiquam tamen hæc succedit argumentatio, sed potius statuimus, sine salibus nec vitam nec sanitatem fartam tectamque servari posse, unde non modo in alimentis, sed & medicamentis præcipuum ea ipsa inveniunt locum. Monstrat experientia, quod ii homines, qui à pane, quod subtile continet acidum, qui à sale communi inter cibos, qui ab acidis, acribus condimentis, vino etiam abstinent, & nil nisi insipida nutritiva ingerunt, ægrotudinibus atque variis incommodis perpetuo sint obnoxii, adeo scorbutico sic dicto morbo, alvi quoque obstructionibus, catarrhis, rheumatismis & multis chronicis morbis, viscerumque obstructionibus plus pateant, quam illi ipsi, qui excessum in dictis hisce rebus committunt. Certe sal commune balsamum corporis nostri est, & non tam saporis causa adjicitur, quam ut defendat sanguinem & humores à putredine. Neque minus acidum blandum in pane, item condimenta aromatica sanitatem egregie conservant ac tuentur. Ex medicamentis salia tam media quam alkalia fixa & volatilia ad sanitatem recuperandam principem locum obtinere, uno ore peritiores medentur affirmabunt.

7. Etenim, utut non ea præsertim, quæ acidæ & falsæ indolis sunt, ingrediantur fluidas vel solidas corporis nostri partes, nihilo minus quoniam irritando ac stimulando fibras motum accelerant sanguinis & humorum, excretiones quoque per debita emunctoria promovent, viasque apertas servant, visciditates solvunt, neque minus humores ad fluxilitates disponunt, atque etiam ciborum dissolutionem adjuvant, omnino egregie sanitati ac vitæ velificantur. Et hæc est ratio cur ipsa natura quosdam humores à sanguine secretos uti v. g. salivam, lympham intestinalem & gastricam nec non bilem principio salino refertos, antequam excernantur, usui impendat, & cum alimentis denuo misceat non modo ut debite dissolvantur, verum etiam ut chylus extractus & sic conditus eo melius per vasa & emunctoria corporis postea propellatur. Salia itaque ad sanitatem custodiendam egregie conferre extra dubium est.

8. E re itaque erit jam demonstrare, qua ratione ipsa salia morborum causas constituere possint. Meretur autem hunc in finem perpendi insignis & celebris

locus scite ab HIPPOCRATE in tr. de prisca medicina notatus. *Est, inquit, in corpore humano & amarum & salum & dulce & acerbum aliaque sexcenta, quæ pro copia & viribus habent facultates. Et hæc quidem mixtione & mutua inter se contemperatione neque cernuntur, neque quenquam molestia afficiunt. At ubi horum quicquam secretum fuerit & per se exstiterit, tunc & conspicuum fit, & hominem molestia afficit.* Hæc & alia si præpotentia fuerint & supra naturam humanam, adeo ut ab ea superari non possint, id lædere censuerunt & tollere conati sunt prisca medici. Quo textu prudentissimus senex salia, quæ ordinario sive materiali proxima aptitudine, sive formali actu insunt humoribus, quamdiu probe inter se temperata & mixta sunt, non judicat perniciofa, sed tantum si excessu peccant, si extricata, intemperata & præpotentia sint, ut naturæ humanæ non correspondeant, adeoque nec bene vinci & evacuari possint, tunc hominem lædere & morbos parere edixit. Operæ itaque pretium esse arbitramur, paulo curatius inquirere, qua ratione salia tam copia quam qualitate ac virtute corpori nostro insensa adeoque morbosa generentur atque producantur. Jam autem si omnia externa, quæ materialiter in corpus nostrum influunt, & ad ejus constitutionem faciunt, examinemus, liquidissime deprehendimus, primo aërem salium esse minus expertem, ut in superioribus deduximus, deinde in plurimis etiam esculentis & potulentis non tam materiali dispositione, sed potius ipso actu formali salia & sulphura sapore & virtute satis conspicua insigni in copia adesse. Namque nulum ferme cibum assumimus, qui non salino vel aromatico sapore sit imprægnatus: in cerevisiis & vinis manifestum inesse acidum neminem latet. Quod si itaque intempestive inque nimia & excessiva quantitate salia diversi generis, fixa & volatilia vel acria sulphurea ingerantur, quis dubitabit, sanguinem & humores non inde salina potentia imbui atque imprægnari.

9. Verum restat adhuc alius modus, quo salia in corpore nostro possunt accumulari, nempe per motum intestinum, quo agitatissimo sanguinis & humorum partes inter se cientur ac volvuntur. Nam natura microscopica ex insipidis & omnis salis expertibus salia per dictum modum, fabricat ita, ut quo major ille, vehementior atque intentior sit, eo major salium progenies cernatur. Animantia omnia utut ferme insipidis vescantur, nihilo minus eorum excrementa salibus abundare notissimum est. Tempore æstivo cum omnia calent, in febrili quoque intensa sanguinis commotione universa, quæ secedunt excrementa per alvum, urinam sulphure & sale extraordinarie abundant, adeo, ut in hectico morbo tota ferme sanguinis & humorum massa in excrementa viscosa salinæ ac sulphureæ indolis resolvatur. Ex hisce dictis itaque patet, salia quoad quantitatem non tantum per externam immisionem, sed & per specialem in sanguine ex insipida materia mediante motu generationem in corpore posse augeri.

10. Jam autem, quum salia, uti supra dictum est, non directe corporis nostri materiam & succos bonos ingrediantur, utut officium quoddam, si in moderatione sint, adhuc præstare possint; quare provida natura certa construxit colatoria ac quasi cribra ex diversissimis canaliculis ratione diametri & structuræ composita, per quæ illa salinæ indolis excrementa ratione consistentiæ crassioris vel tenuioris diversa ordinario secernuntur. Inter hæc autem emunctoria principem obtinet locum cutis, quæ ratione fibrosæ arctiorisque structuræ tantum halituosum idque tenuissimum serum salio-sulphureum transmittit. Renes canaliculis paulo amplioribus aqua, muco

ac oleosa pinguedine salia terrestria tartarea evehunt. Secretoria adhuc majoris diametri hepatis vasa secedente prius fluxili per vasa lymphatica lymphæ, crassum salino-sulphureum biliosum humorem ex sanguine per venas viscerum abdominis reliquorum redeunte sequestrant. Hæc sunt solennia illa ac præcipua salium sulphureorum emunctoria, quæ si non rite suo funguntur officio, id est secernenda non secernunt & excernunt, vel quod sanguis non debito motu ad ea appellat, vel quod ipsa obturata, infarcta obstructa sint, fieri aliter nequit, quin remanente illa excrementorum salino charactere imbutorum colluvie vitales illi fluores, qui dulces, temperie benigni esse debebant, falsi acres & intemperati evadant, & sic fecundam matrem ac materiam morborum constituent. Talis sanguinis status dicitur cacochymia, vel impura falsa sulphurea dyscrasia. Et quoniam ipsa salia ratione indolis assumptorum ipsiusque aeris multum inter se variant, atque pro mutua inter se facta mixtione & motu intestino differente, proque diverso vitio emunctorii plane dissidentem atque alienam indolem & facultatem nanciscuntur; hinc non adeo mirandum est, si acria caustica salia ex aliis benignis producantur.

11. Quod quidem adfertur, ut eo clarius pateat, consultum fore arbitror, id ipsum notabilioribus quibusdam confirmare observationibus, quas inter maxime omnium memorabilis est CVII. quæ exstat in Dec. II. A. II. M. N. C. ubi ex vena in brachio secta sanguis exiliit, cujus unica guttula ad denudatum brachium cecidit, cum maximo doloris & ardoris sensu, ut vulneratus ad ejulandum fuerit coactus. Exussulat enim non tantum cuticulam excitata in ea vesicula, sed etiam subjectam cutim cum eschara, phlebotomum autem in cuspide livido tinctum colore tam friabilem reddidit, ut levi attritu in particulas abierit, unde juvenis per alvum, urinam, vomitum, tussim, non tantum sanguinem, sed etiam carunculas membranulis & venulis conspicuas egressit. SENNERTUS *Tr. de Consensu & dissensu Chymicorum Lib. I. C. XVI. p. 16.* Urinam scorbuticorum lintea corrodentem vidit, item DORING *Tr. de scorbuto p. 109.* Sanguinis admodum caustici etiam mentio fit in BONETTI *Medicina septentrionali part. II. L. II. Sect. 22. obs. 2.* Porro urinam acerrimam induratum bidui spatio erodentem annotat *Salmuth. Cent. 2. obs. IV.* Neque minus memorabilia sunt, quæ scribit *D. Wolfius* de lacte ex mamma puerperæ profluente, cujus acrimonia mammarum propinqua loca erodit & ulcera ipsis induxit, ut fuerit opus vasculis admotis excipere illud, & subinde ex illis effundere. Vid. *obs. LXXII. Dec. II. anno VIII. M. N. C.* Plura exempla excrementorum & humorum sale refertorum infra recensēbimus.

12. Placet jam brevius determinare quænam copiosæ salium generationi in corpore nostro maxime velificentur; inter hæc autem principem locum obtinet plenitudo sive nimia humorum copia, quæ semper ratione virium motricium sive roboris musculorum in quovis individuo debet mensurari. Quod si enim proportio illa inter movens & mobile læditur, adeo ut copia sanguinis & humorum resistat potentiae ac virtuti loco motrici, musculorum, ita ut non satis valide & velociter pro debita conservanda crassi circulentur humores, fit ut ob tardiores motum à fluiditate & tenuitate sibi debita deflectant, & crassi, rudes & viscosi evadant. Lenti autem & crassi humores obstructionum postea promptissimi fiunt fabri, dum in minutissimis capillaribus tubulis hærent, illos obstipant, infarciunt, unde emunctoria & colatoria publica excrementitios humores non rite separando inutiles falsas scorias, impuritatem & cacochymiam efficiunt. Et hinc fluit ratio, quare morbis ex intem-

perie & dyscrasia falsa ortis ii, qui sedentariæ vitæ dediti sunt, & qui sunt mollis spongiosi habitus corporis & delicatulis cibis sese saginant, catarrhis, defluxionibus, rheumatismis valde sunt obnoxii. E contra agricolas, bajulos, nautas laboribus deditos, rarius cacochymia & ex hac obortis morbis videmus vexari, utpote abstinentia, exercitatio & motus corporis plethoram absument, humores attenuat, fluxilesque reddit, sicque ab intemperie falsa præservat. Spectat huc aphorismus HIPPOCR. XI. Lib. II. veritate ac utilitate commendatissimus. *Corpora impura quo magis nutriveris, eo magis læseris.* Per impuritatem hic intelligitur intemperies viscido-falsa, quæ ex emunctoriorum obstructione & officio neglecto, ordinario solet oriri. In tali itaque corpore, ubi magna alimentorum & succorum copia oneratur, augentur cruditates, obstructiones, & inde crescit intemperies & cacochymia.

13. Deinceps verissime monet HIPPOCRATES *de prisca med.* non modo ex plenitudine, sed etiam ex inanitione gravia oriri mala, estque ex iis præcipuum magna succorum impuritas. Quod si enim ex sanguinis defectu, qui ob varias causas & maxime ob enormes effusiones fieri potest, pauci spiritus generantur, & ubi pauci spiritus, languidus ac imbecillis motus est, necessario hinc consequitur, circulum sanguinis, & debitam quoque secretionem inutilium falsarum partium fieri languidiorem; præterea sub defectu sanguinis ipse non ad vasa capillaria in extremo habitu corporis & in emunctoriis potissimum sita non potest contingere: unde cum ea non sufficienter expanduntur, & aperta servantur, sed cum tempore subsident & contrahuntur, fit ut scirrhescentiæ & callositates atque obstructiones viscerum inde oriantur, quæ immedicabiles magnæ impuritatis & scorbuticæ quoque genitricæ certissimæ fiunt. Præterea dantur adhuc aliæ causæ, quæ proventum salium morboforum secundant. Et hæc sunt certi morbi & inter eos præsertim febres, quæ cum magno motu ac calore sunt stipatæ. Mediante enim febrili percalida commotione & succi corporis alias benigni ac lenti copiosa, manifesta & excrementitio-sulphurea imbuuntur falsedine. In tertianis quidem continuis id manifesto conspici licet, in quibus mirabile omnino est, quanta biliosi humoris copia per alvum, imo per vomitum, & urinam, quæ à bilis miscela saturatissime tincta est, indies egeratur, qui de novo semper ex motu intestino adaucto generatur; quod vel ex eo clarissime efficitur, si chinæ chinæ debita dosi atque administratione vel alio quodam remedio sistente ac roborante febriles paroxysmi per aliquot dies compescuntur: tum enim mox copiosæ istæ per alvum & urinam ejectiones cessant. In hæctica pinguis illa saturata rubicunda urina, sputum perpetuo falsum, fæces acres & foetidæ nullum alium quoque agnoscunt ortum, quam quod intestina illa vehementi calida particularum sanguinis commotione, terreum illud ac mucidum sanguinis insipidum sulphuris, ac salis schema induat. Nil frequentius in praxi est, quam quod mox post febres perpeffas, graves colici dolores, rheumatismi, tussis catarrhales, defluxiones falsæ asperam arteriam & oculos infestent, scabies itidem & ulcera oriantur, quæ nullam aliam causam agnoscere videntur, quam quod sub paroxysmis morbofis & vehementibus humorum commotionibus falsedo insignis biliosa in sanguine fuerit producta, quæ nisi debite temperetur, & per congrua evacuatoria eliminetur, multas passiones excitare potens est.

14. Tandem etiam medicamenta multum conferunt ad salium in corpore augmentationem. Quod si enim alimenta falsis rigidis partibus plena, nec non calidis sulphureis particulis stipata corporis partibus &

maxime solidis infesta sunt, ut catarrhi falsi, rauces, oculorum defluxiones, odontalgia inde oriantur, arthritici paroxyfmi incrementum accipiant, & scorbutica ulcera omnia inde exacerbentur; quidni etiam medicamenta, quæ adhuc activioris indolis sunt, falsa & acria augebunt intemperiem sanguinis falsam? Toties observavimus in scabie præsertim sicca, in scorbuticis & arthriticis doloribus, in odontalgicis etiam affectibus omnia remedia, quæ notabili falsedine, calore, acredine notata fuerunt, aucta semper pathemata fuisse & dolores, rosiones, exulcerationes atrociore exinde factas. Etenim non solum salia manifesta, sed & spirituosæ ad salium morbificorum genesin symbolum suum addunt. Si enim motus intestinus concitator salia producit, facile exinde fluit, omnia calida & spirituosæ, quoniam motum hunc sanguinis calidum mirifice augent, salibus quoque producendis ac generandis apta & idonea esse.

15. Cum autem salia in microcosmo, uti notum est, non unius ejusdemque sint indolis, & viribus quoque & effectibus mirum quantum dissideant, neque in statu sano & morbo inter se convenient; hinc perutile fore judicamus, accuratius paulo determinare, cujusnam naturæ salia in corpore humano præter naturam abundare ipsique infensa esse possint, quæ certos morbos foveant atque progignant, quænam porro certis individuis ratione ætatis, temperamentorum, habitus corporis, vitæque generis valde distinctis, magis vel minus sint familiaria, & quibus partibus hæc vel illa salia, plus vel minus noceant. His enim perspectis eo melius ac felicius in enodandis & explicandis morborum & symptomatum causis ipsaque medicina cum ratione applicanda progredi poterimus. Ante omnia vero circumspiciendum est, quænam speciatim salia in corpore humano, sive in statu secundum sive præter naturam versetur, repariantur. Primo autem asserimus, sal acidum purum, liberum & extricatum sapore & virtute tale in corporis nostri succis, qui motu circulari circumvolvuntur, non inveniri. Ea enim acidi conditio est, atque indoles, ut propter spicula sua, quibus constat, acuta, facillime cohæreat, & sese intime fixis terrestribus immobilioribus, & pinguibus particulis, quibus solet irretiri, & quas in motu suo intestino sistere solet, associet: unde dependet ratio, quare acida concentratiora cum terreis oleosis pinguibus mixta coagulentur, & in massam sive salinam sive in resiniformem vel aliud crassum magma coagmententur, unde etiam sal acidum in copia ingestum, quando cum sanguine nostro miscetur, naturam suam non retinet, sed pro varia partium inter se facta miscela, vel in sal neutrum salum ammoniacali simile, vel in tartareum vel in acre transmutatur. Quapropter nullus facile artifex ex sanguine vel partibus solidis animantium producere poterit acidum formale. Equidem mentionem facit *Cl. Viussens* in peculiari epistola ad Lipsienses acidi, mediante argilla ex sanguine humano exsiccatum ignis calore propulsi. At vero probe monitum est à *Cl. Pittcarne* in Dissertationibus ex argilla, quæ per se propter sulphur, quod alit minerale, acidum flagra fundit, hujus spiritus acidi ortum esse derivandum. Non negamus acida sanguinis & humorum crasin invertendi nec non partibus solidis & nerveis nocendi efficacia pollere, nihilo minus formale acidum tale morborum causam proximam & immediatam, uti communis est opinio, constituere, & ad hoc absumendum ferme totam medendi methodum debere esse directam negamus, quod olim jam deduximus.

16. Deinceps neque in corpore humano purum datur alkali, sive fixum sive volatile. Acida salia magis sunt universalia & pura existant in mineralibus ac

vegetabilibus, alkalia autem præsertim fixa magis artis sunt effectus, & purum sal volatile urinosum sine prævia putredine & sine combustione nunquam offenditur, multo minus sal alkali fixum, quod tantum per combustionem ex vegetabilibus neque ex omnibus, sed ex iis tantum, quæ sal acidum, particulas terreas & sulphureas in debita mixtione custodiunt, in abundantia paratur. Hinc alkalia sive fixa sive vegetabilia sint, mixturæ sanguinis sunt plane contraria, sicuti patet clarissimo exemplo ex chirurgia infusoria desumpto; ubi liquore alkalino sive urinoso sive fixo in venam animalis vivi injecto, non secus ac ab acido liquore infuso, mox animal interficitur, ea tantum differentia, quod sanguis fluidus & floridissimus ab injectione salis volatilis urinosi, fixus autem coagulatus & crassus nigricans ab infuso acido fuerit repertus.

17. Præcipua autem salia, quæ tam in sano corpore, quam in eo, quod indolis morbosæ est, occurrunt, potissimum sunt media neutra, & quidem vel tartarea vel acria falsa, quæ tam copia quam volatilitate & tenuitate, differentes morbosos, exhibent effectus. Quemadmodum autem in superioribus & alibi etiam latius deduximus, acidum quasi primam reliquorum salium in macrocosmo esse matrem & originem: ita etiam statuimus, acidum salium plurimorum, quæ in corpore humano tam in statu naturali, quam præternaturali reperiuntur, præcipuam esse causam. Tametsi enim illud purum in sanguine & vitalibus succis non reperiatur, nihilo minus in primis viis & maxime ventriculi & intestinorum canale in statu secundum & præter naturam illud purum deprehendere licet. Nam acidum naturale temperatum ac modicum ventriculo & primis viis non est hostile, sed potius appetitum, digestionem & alimentorum resolutionem egregie adjuvat; unde etiam acida remedia, qualia sunt vinum, succi acidi & panis, qui subtile acidum recondit, ventriculi actionem egregie juvare & promovere solet. Quod si autem acidum illud propter nimis acida ingesta nimium & excessivum sit, vel si humores in ventriculo diu morantes & peregrinum acorem induant præternaturale illud fit & morborum causas ministrat.

18. Ad generationem autem hujus salis acidi excessivi dispositi sunt maxime infantes lactantes & pueri. Lac enim, uti notum est, facillime mora acorem concipit, quod etiam accidit in ventriculo infantum, si nimium lacte nutriuntur, illudque per alvum non bene excernitur & hoc præcipua morborum, quibus infantes subjecti sunt, causa est. Tormina & erosiones in intestinis, maximeque in colo efficit, unde alvi adstrictiones spasmodicæ, epilepticæ & convulsivæ agitationes corporis dependent. Quod autem acidum in iis delinquat, ex eo apparet, quod plerumque fæces viridissimo colore, qui ex bilis & acidi mixtura nascitur, tinctæ sint. Nam acidum corrosivum v. g. spiritus vitrioli cum bile mixtus viridem colorem inducit. Quapropter infantilibus in morbis egregiam efficaciam præstant omnia alkalina, terrea, absorbentia, oleum tartari per deliquium, tincturæ tartari & clysteres oleosi demulcentes. Porro in ætate puerili, sexu foemino & tempore autumnali, maxime ob esum fructuum horarum ingens aciescentia in primis viis præsto est. Unde deducimus, quod ad crustam lacteam, achores capitis, ad fluxiones in auribus & oculis infantilis ætas valde sit proclivis. Acidum enim in sanguinem delatum lympham coagulat, falsam reddit, glandulas obstitat, transpirationem impedit & prædicta mala certo certius infert. Qua de causa etiam omnia, quæ acidum in primis viis absorbent, quæ humores temperant, fluxiles reddunt, humorumque excretionem promovent, dictis in affectibus emolumentum præstant egregium. Verminola dispositio, quæ

quæ ætati puerili infantili & adolescentibus per quam familiaris est, idemdem lentori, aciecentiæ atque corruptioni humorum debetur. Utitur enim acida penetrantia vermibus noceant, leniâ tamen bene ferre possunt: ubi autem acidum in primis viis hospitatur, ibi bilis, quæ antidotus vermium est, deficit, ibi calor est temperatus, ibi alvi contenta ex intestinis non sufficienter propelluntur, nausea oritur, saliva in os fluit, phlogosès laborantes patiuntur, & quandoque forti appetitu gaudent. Quoniam itaque acidum ad vermium generationem confert, hinc hypochondriacorum intestina, præsertim in sexu sequiori ascaridum copia sæpius scatere deprehendimus.

19. Acidum porro exsuperans inque primis viis congestum ex acidorum nimio usu maxime in phlegmaticis, phlegmatico-melancholicis, vitæ sedentariæ & lucubrationibus addictis, ac imbecilibus subjectis pathematum hypochondriacorum causa remota præcipua existit. Notum namque est, quod alvi adstrictio & obstructio plerumque præcedat vel etiam comitetur malum hypochondriacum, quæ tamen à nulla re magis, quam ab acidis assumentis fovetur. Acida porro in sanguinem delata impediunt transpirationem, serum reddunt viscidum & ad motum ineptum; unde circulatio per viscera præsertim abdominis fit tardior, & sic obstructions hepatis, lienis, indeque dyscrasiæ falsæ, acres, corrosivæ, spasmodum autores, promptissime generantur. In hypochondriacis autem acidum corrosivum prima in regione plerumque oberrare, non modo ructus, sed & vomitus acidi virides patefaciunt, idque vera causa est, quod purgantia etiam fortiora emetica effectu suo sæpius frustrentur, & martialia sicca assumpta mox nigerrimas fæces efficiant. Et hinc quoque deducenda est pulverum martialium energia, utpote qui præcipitando & absorbendo primarum viarum acidum, atrocium pathematum levamentum afferunt egregium.

20. Illud autem observatione dignum est, quod, utut frequentius tales agroti absorbentia assumant, adeo ut omne acidum absumtum videatur, nihilo minus acor in os mox regurgitet, & priora pathemata repetat. Hoc vero mea sententia exinde deduci debet, quod, tametsi acidum in intestinis sit saturatum, illud tamen, nisi excernatur per alvum propter affluentem ex glandulis intestinalibus novam lympham, mora acidam factam, quæ coagulatum jam in partibus terreis acidum resuscitat, mox resuscitatur; non secus ac videmus, oleum vitrioli sali communi affusum, vel spiritum vitrioli saccharo saturni admixtum ex ipsis leni ignis calore acidum rursus expellere. Unde optimo consilio post absorbentia & martialia assumpta subungi debent evacuantia, ut simul illud acidum evacuetur. Rarum est quod refert *Ill. Boyle in Chymista sceptico* p. 68. de milite hypochondriaco lapides & frustula devorante & ita consumente, ut alvi excrementa arenosa secuta fuerint lapidibus ab acido stomacho in arenulas resolutis.

21. Quod autem de hypochondriacis dictum est, illud etiam de hysteriis valet. Acidum enim plerumque est hujus morbi causa remota, & postea etiam malo jam suscitato humores serosi ad aciecentiam valde inclinant, qui rodendo, vellicando, digestionem turbando, flatulentias, cardialgias multaque alia incommoda pariunt. Febrem lentam post intermittentes curatas sæpius observavimus, adeo ut metus fuerit hæcticæ, nisi præsentissimum levamen à lenioribus emeticis ægotantes fuissent experti. Ita pariter aliquot exempla in praxi notavi, ubi colluvie humorum viscidorum viridum evacuata, calor febrilis innox fuit mitigatus & dolores pedum ostlocopi remiserunt; quod medicamentum aliquoties repetitum, laburram removendo, febrem felicissime curavit.

22. Deinceps acidum in prima regione coacervatum in phlegmaticis, phlegmatico-melancholicis, maxime in sexu foeminino, & sub vita sedentaria disponit ad mensium suppressionem, quæ mille malorum origo est. Quotidianæ enim est experientiæ, ad ordinarium sanguinis fluxum inhibendum, chlorosin & cachexiam inducendam & innumera mala proferenda; foeminis præter acidorum & aceti &c. usum nihil esse nocentius. Hæc enim in sanguine delata, ejus sulphur, quod matrix vitalis caloris ac spiritaliscentiæ est, figunt, deprimunt, enervant, lentiores humorum cursum efficiunt, & sic cacochymiam viscido falsam impuritatemque magnam, pathematum variorum productricem ingenerant: quam ob causam & illi, qui ordinario patiuntur fluxum hæmorrhoidalem, omni studio sibi cavere debent ab intempestivo acidorum usu præsertim tunc temporis, quando fluxus instat. Ex iis jam patet, utut non semper causa materialis morborum proxima sit acidum, ex remo is tamen principem locum obtinere.

23. Denique acidum in massam sanguinis & humorum delatum, & cum partibus sulphureis terreis nuptum, degenerat in sal falsum, quod si non rite per universale illud sanguinis evacuatorium cutim nec non per renes secernitur & è corpore exterminatur, ulteriore commotione intestina acre simul factum & ad glandulas subcutaneas delatum, facit ibi rosiones, pruritus tenuissimarum fibrillarum, dilacerationem variasque exulcerationes, scabiem, phymata, & cutis defecationes. Et scabies ista humida in adolescentibus vitæ sedentariæ deditis, præsertim si fructibus horæis ventriculum onerant, nullam aliam habet causam, quam acrium salium erodentium in sero viscido abundantium quantitatem. Longe autem molestior scabies sicca est, & in melancholicis, ac senibus, quibus serum rosicidum deficit, insigni ut plurimum pruritu stipata. Quapropter in utroque casu omnia, quæ salia diluunt, eorum acrimoniam temperant, emunctoria, præsertim cutim aperiunt, indicatissima & certissima sunt præsidia. In humida autem scabie valde proficui deprehenduntur pulveres absorbentes circa tempus noctis adhibiti. Externe saturnina, terrea & quæ leniter exsiccant egregiam scenerant utilitatem, ut perspicuum exinde fiat, quare in dictis affectibus cuncta, quæ salibus motum & acridinem conciliant, ut sunt spirituosâ, calidiora, falsa, &c. majores & acerbiores inducant erosiones.

24. Cumque acidum secundum nostram sententiam sit fundamentum reliquorum salium morbosorum, hic pro differentia sanguinis & succorum in varias non modo species transmutatur, sed & pro diversitate partium, quas affligit, peculiare producit morbosas adfectiones. In ætate juvenili & virili, præsertim in sanguineis & sanguineo-cholericis excretiones per transpirationem impeditæ, & alimentorum acido exsuperantium crebra assumptio, inque edendo intemperantia, morbos à sale acri proferunt; ex quorum censu sunt arthritis vaga, rheumatismi, odontalgia, catarrhi, tussis, diarrhœæ. Hæc ægritudines plerumque esse epidemias, & sub certis anni temporibus & tempestatibus dominari, constans est experientia. Præcipue autem generantur post coeli flatum austrinum & humidum, quem si boreales venti vel frigora excipiunt, protinus una nocte dispositos dictæ passionis invadunt, vix aliam ob rationem, quam quod sub coeli statu humido spirituum, qui ex aëre sumunt pabulum vigor pereat, partesque fibrosæ & musculosæ flaccescant, sicque ob lentiores sanguinis circulum copiosa impuritatum excrementiarum fiat collectio, quas majori motu & impetu facto venti boreales, qui rigiditatem partibus solidis, elasticitatem fluidis conciliant, sive in emunctoria sive in

partes membranaceas hinc inde pellunt; unde postea, quum proportio ratione quantitatis vel qualitatis cum eorum poris non respondeat, fiunt stimuli, rosiones, quas sequuntur, stases, congestiones, dolores, febres aliaque symptomata. In coryza sal tenue acre per sternutationem ipsumque gustum sese exferit efficacissime. In odontalgicis defluxionibus, quæ sæpius dimidiam partem capitis occupant, non raro tam falsa acris lymphæ per nares & fauces defluit, ut valde acris percipiatur. Haud aliter comparatum est cum iis fluxionibus, quæ oculos cum rubore & tumore infestant, ubi sæpius tanta acrodo sese offert, quæ non tantum gustu percipi potest, sed ipsam quoque cutem faciei erodit. In arthriticis & rheumaticis doloribus sal tenue biliosum corrosivum plerumque peccat, & insensibilissimis partibus cruciatus maximos suscitatur. Salinum autem in his affectibus esse principium ex eo argumentari licet, quod à transpiratione prohibita, vinorum potu & acidorum assumptione nec non magna ciborum intemperie, in subiectis debilioribus, veneri deditis & otio assuetis per familiares sint isti morbi, qui per leniora diaphoretica, transpirationem liberiores promoventia, per temperantia, demulcentia, lac & serum lactis curantur; quum contra omnia falsa, acria, calida, tam ex alimentorum quam medicamentorum classe summe deprehenduntur hostilia.

25. In diarrhœis, quæ plerumque sunt epidemice & ab intercepta transpiratione in intemperantiæ deditis corporibus suscitantur, sal biliosum falsum ex habitu corporis ad intestina præcipitatum, rosiones, irritationes nimiasque excretiones producit. Quis autem hic vellet dubitare salinum acre stimulant, sulphureum principium esse accusandum? quoniam omnia purgantia, quæ diarrhœam artificialem efficiunt, ob principium tale salinum sulphureum acre operantur. Monstrat id quoque ipsa cura, dum omnia demulcentia, acrimoniam temperantia, incrassantia & quæcunque transpirationem in cute liberiores & expeditiores reddunt, opem ferunt præcipuam: quod etiam valet de dysenteria, ubi tanta corrosivorum humorum sæpenumero indoles est, ut ipsæ membranulæ intestinales plane erodantur.

26. Ulterius acidum in senili ætate & in sanguine terrestri crasso, sub diætâ viscida & dura exsuperans degenerare solet in sal tartareum, quale ex terra fixa, oleo & acido conflatur. Hoc si non debite per congrua evacuatoria ejicitur, varias tartareas calculosas, præsertim in renibus & vesica, tam urinaria quam biliaria producit concretiones. Præterea stranguriam efficit, quæ ideo senibus & calculosis valde est familiaris. Quod si autem tale sal tartareum resolutum ad glandulas & membranas articulorum pedum præcipitetur ibique hæreat, dolores lancinatorios & podagricos causatur. Podagra enim, præsertim fixa, nodosa, tophacea, omnium consensu, à sale tartareo fixo terreo oritur; unde ratio dependet, quare hypochondriaci & calculosi podagra facile afficiantur: quin imo juncturarum ligamenta à sabulo tartareo ibi subsistente erosa in sectionibus cadaverum sæpius fuerunt reperta, imò ex ipsis tophis quandoque tartarea terrea materia exempta. Neque rei medicæ peritos fugit, in articulis podagricorum sæpe colligi & quandoque vesicatoriorum usu effundi summe corrosivæ indolis liquorem; & quod acidorum & viscidorum abusus, calculosam & podagricam dispositionem corporibus ingeneret; unde omnia antacida terrea & quæ salina tartarea excrementa ex corpore educunt, nimiam calculosam vel etiam podagricam materiam genesis impediunt.

27. Nullus autem morbus majori ferocium salium copia stipatus est, quam ipse scorbutus. Unde hic

morbus oriatur, non nemini in medicis paullulum versato notum est, quod nempe ex defectu spirituscentiæ sanguinis, ejusque tardiori circuitu, viscerum obstructione & hinc vacillante excretionum negotio pronascatur: quare fecundissima scoriarum salino-sulphurearum progenies fit, quæ dolorum, ulcerum malignorum, spasmodicarum contractionum, nimiarum defluxionum & excretionum, præcipuam causam materialem fovet. Et sicut ex alimentis, sale copioso præditis hic adfectus potissimum nascitur: ita quoque per ea ipsa exacerbat. Plura autem sunt, quæ clarissime docent, in scorbutico mirabilem salium peccare copiam. Argumento potest esse sola urina, quæ saturato rubicundo colore tincta mingitur; & quoniam salium copia scatet, ponderosior est sani hominis lotio, & non modo evaporatione facta, sed & per præcipitationem cum oleo tartari per deliquium, magnam copiam mucidæ substantiæ exhibet. Urinam in salem lixiviosum coagulata vide in *Act. N. C. Dec. I. A. II. p. 162. 141.* crySTALLISATAM describunt identidem *Miscellanea Dec. I. A. VI. & VII. p. 93.* arenosam *Dec. I. A. II. p. 35.* sabulosam perhibent *Dec. II. A. X. p. 44.* & urinæ corrodentis exemplum *Dec. II. A. VIII. p. 157.* Urinæ viridis RHODIUS meminit *Cent. III. observat. 21.* Et quoniam falsugine succi corporis nostri referti sunt, hinc omnia ea, quæ diluunt & temperant, plus efficacitæ in medendo spondent, quam omnia volatilia, acria & spirituosâ, quæ dum, experientia teste, salia acuunt, iisque penetrantiam addunt, & exacerbationem symptomatum efficiunt. Eam ob causam cavendum quoque est, ne scorbutici tractentur mercurialibus. Notum enim est, hæc ipsa salibus corporis associata insignem acquirere corrosivitatem & causticitatem, unde sævissima non secus ac à formali veneno nasci solent symptomata. Luem quoque veneream & virulentam gonorrhœam à principio caustico oriri nemo facile negabit, ubi tamen notandum, quod in hoc morbo non modo salia simpliciter vi rodente caustica agant, sed simul intestina putredinosa motione in partes solidas & corporis nostri succos grassentur, adeo ut abominandæ istæ, quæ his affectibus familiares sunt, partium & ossium erosiones non tantum à sale erodente, sed & à motu putrefactorio destructivo sine deducendæ.

28. Probe autem hoc loco tenendum est, quod salia, quæ in scorbuticorum sanguine ac succis regnant, non sint domestica neque unius ejusdemque generis, sed statuimus potius, salia illa impura in corpore retenta, toties facta, repetita & aucta intestina motione, fermentatione & variarum partium inter se mixtione prorsus in alterius schematis salia mutari, quæ lixivii acris calcinati salis & similibus qualitates & vires exferunt.

29. Tandem etiam in variis morbis sal tenue, causticæ & acris indolis accusandum venit, quod ob penetrantiam & subtilitatem, stimulo hinc inde fibras nerveas & per corpus vagando, maxime noxium & perniciosum est. Talis modi generis sal extra corpus deprehendimus in validioribus purgantibus, emeticis, in venenis quamplurimis, in cicuta, cantharidibus, araneis, bufonibus, arsenico, mercurialibus &c. Et quemadmodum secundum nostram sententiam acidum primum salium constituit fundamentum, ita quoque asserere non dubitamus, tale causticum volatile primum suum ortum ab acido habere, quod vel ex eo apparet, dum salia alcalia omnium purgantium & causticorum vim, debita commixtione facta, egregie infringunt atque enervant. Tale sal quoque generatur in corpore nostro & in variolis, morbillis, purpura manifesto conspicitur, licet gradu virulentæ & acrocinis valde differat.

Cog-

Cognoscitur ejus effectus ex cutis erosione pustulosa, pruritu maximo, ex vomitu, diarrhoea, cardialgia, urina cruenta, stranguria, sternutatione, tussi & salivatione, quæ sæpiusculæ eruptionem in cute antecedere solent & comitari. Porro etiam nos certiores reddit de hoc sale ipsa cura, quæ maxime in dilutione & spiculorum acrium contemperatione versatur; contra omnia, quæ humidum absorbunt, salia commovent, exagitant, perniciosissima sunt, & præsens damnum inferunt. Inter morbos quoque, qui ex principio summe subtili caustico oriuntur, merito referenda quoque venit pestis, quæ halitu summe tenui solet propagari. Et quoniam mox vertiginem, syncopen, anxietates, nauseam, cardialgias, imo in ipso ventriculo, uti nota sunt exempla, escharas producere solet, de causticitate non dubitandum est. Venena enim, quæ simili principio operantur ex vegetabilibus & mineralibus, iisdem symptomatibus infesta sunt, tantum quod hoc venenum, quoniam ex regno animali desumptum est, facilius intestina motione propagetur, quod circa alia venena non accidit. Neque mihi pestis & febrium petechialium miasma agere videtur, corruptionem putredinosam sanguini introducendo, utpote in sanis corporibus, quæ etiam pestis invadit, succi, qui in circulatione perenni existunt, non tam in instanti in putredinem rapi possunt. Nullum enim fluidum, quod fortiter movetur, ad putredinem concipiendam aptum est, neque etiam tam subito ea in corpus potest introduci, ut prædicta symptomata statim ab ea producantur. Præterea carbunculi & bubonis pestilentialis exortus id ipsum clarius videtur demonstrare: hæret enim ibi principium summe activum lancinans, summosque dolores procreans, quod spasmodica contractione sanguinis stagnationem efficit putredinemque sphacelofam inducit. Morbi autem maligni, qui à causa interna fiunt, plerumque ex dispositione sanguinis putredinosa originem suam agnoscunt. Tandem etiam tale virulentum sal penetrans & causticæ indolis generatur in corpore nostro ex sordibus recrementitiis retro pulsus, sive id fiat per externa refrigerantia, repellentia, sive per anodyna aliaque perperam administrata remedia, & locum maxime habet in scabie, in achoribus capitis, variolis, morbillis, purpura, arthriticis, podagricis doloribus, erysipelate &c. quod in dissertatione de generatione veneni in corpore humano fufius deduxi.

30. Ex hætenus dictis & adductis clarissime apparere arbitror, plures ac graves morbos foveri ac sustentari à salibus, & ex illis non solum oriri, verum etiam per remedia falsa exasperari. Neque tamen in ea sumus sententia, ac si tantum salia materiam morborum interiorum præbeant, sive eorum omnium causam constituent. Multæ enim & gravissimæ ægri tudines excitantur, ubi principium salinum nullum invenit locum, quandoquidem ex stasi, extravasatione & motu humorum impedito, inflammationes, spasmi, dolores, convulsiones, febres, sensuum motuumque abolitiones fiunt frequentissime, ipsa quoque putredo ac corruptio, quando partes corporis visceraque infestat, pathemata summe periculosa excitat, adeo, ut in morbificis causis non modo ad qualitatem salino-sulphuream, sed & ad quantitatem peccantem & motum præsertim impeditum, & putredinosum sit respiciendum. Interea tamen negari non debet, nec commode potest, salia ex morbificis causis esse excludenda. Equidem varia prostant dubia, quibus hæc doctrina possit labefactari, quæ brevibus adhuc perpendere lubet. Palmarium est, quod dicant: si salia morbosa præsentia sunt in certi individui sanguine, cur non omnes tales morbos, qui fiunt à salibus, v. g. podagram, scorbutum, calculum, scabiem, diarrhoeam producunt,

cum tamen calculus, arthritis, podagra sint morbi certarum tantum ætatum. Verum enim vero non omnia promiscue salia quoslibet morbos progignunt: alii enim foveantur ab acido, alii à falso sale, alii à tartareo fixo, alii à caustico. Neque deinceps omnis ætas, vel omne temperamentum & quodcunque vitæ genus ad talia salia, quæ ad certum morbum gignendum requiruntur, sunt disposita, nec omnes partes corporis æqualiter sunt constitutæ, ut æque facilius adficiantur à causa morbifica salina; sed cum partes differunt structura, accidit etiam, ut principium quoddam noxium huic parti non noceat, alteri grave damnum inferat. Quemadmodum itaque morbus quidam salinus, non à quocunque, sed certo tantum & determinato sale proficiscitur, & quævis ætas, temperamentum, vitæ genus certa etiam salia proferunt: ita etiam non cuius ætati, temperamento, vel vitæ generi omnis morbus salinus quadrat. Nam ad morbi cujusdam genesis non una causa remota ex naturalibus & non naturalibus sufficit, sed plures in unum principium materiale morbosum debent conspire. Postremo etiam hoc solet urgeri: si salia morborum sint fabri, eaque morbosa in corpore semper sint præsentia, cur non semper etiam affectus morbosos prodant, cum tamen experientia doceat, plurimos morbos periodicè recurrere & plane quandoque intermittere & remittere. At vero non semper sequitur: posita causa poni & sequi etiam effectum. Habemus præsentissimum exemplum in purgantibus, quæ caustico quidem sale intestinorum fibrillas irritant, nihilo minus tamen in corpus ingesta, excretionem per alvum & tormina non continuo, sed temporis certo intervallo efficiunt, adeo ut intermedio tempore nihil incommodi & molestiæ ab iis mentiat, salis hujus purgantis licet non desit in irritando efficacia. Quis autem est, qui exinde velit argumentari, si talem irritationem non perpetuo sequitur effectus excretionis; ergo sal in purgante non perpetuo in intestina agit. Patet itaque, salia in corpore peregrina posse consistere, ut ut non semper ex ipsis fluat operatio: nam ad certum effectum seu motum & excretionem præstandam, semper inter movens & inter mobile requiritur proportio, quæ si deest nullus sequitur motus. Deinde opus est dispositione ad receptivitatem causæ agentis, imo non modo receptivitas, sed & dispositio ad reagendum debet considerari. Hinc, ponamus exemplum, quandocunque causa acris stimulans in eadem activitate præsens, nec dolorem nec spasmus, nec excretionem efficiat, tunc culpa non in ipsam causam materiale est rejicienda eaque neganda, sed in id quod motum recipere & reddere debet, nimirum fibras spiritu animali turgidas. Minime itaque video, si fibræ membranaceæ & musculosæ post diuturnos spasmos ad tempus in robore ac tono suo debilitentur, &, quum spiritus non amplius æquali nisu in eas influant, relaxentur, cur motus non possit feriari, præsertim cum aperte perspiciamus, in fibris nimium relaxatis & non sufficienti copia spirituum turgidis nullum motum reddi nihilque sentiri: contrario autem, si rursus successive spiritus influunt & ad partem debilitatam tendunt, utique hos vim motus sui rursus imprimere. Hæc mechanica si probe attendantur, non amplius difficile erit judicatu, cur præsentibus licet causis morbificis motus morborum non semper præsentis sint, sed certis temporibus quidam ex iis revertantur. Quod autem nonnullis individuis spirituosæ, etiam in excessiva quantitate assumptæ, item acria volatilia non manifestum damnum vel morbos salinos dictos inferant, nulla alia ratio est, quam quod in sanis corporibus, ubi humores sunt fluxiles inque perpetuo motu & evacuatoria aperta constituta, superflua hæc salia partim per alvum,

partim per sudorem & urinam rursus ejiciuntur. Deinceps sæpius accidit, quod error in rebus non naturalibus commissus uni individuo non noceat; imo & hoc accedit, quod ætas, temperamentum, anni tempus, cælum aliaque externa symbolo quasi quodam in eundem lædentis causæ effectum conspirent, atque tunc promptissime effectus morbosus sequatur, quod tamen minime contingit, si ita sint comparata, ut effectui ac operationi morbosæ peccantis materiæ sint contraria.

31. Paucissimis adhuc attingere juvabit, quæ ad præservationem & curam morborum à sale oriundorum aliquo modo spectant. Primo itaque monendum arbitror, cum acidum & viscidum sanguinis motui progressivo valde resistunt, & sic plurimum excrementorum salino-sulphureorum in sanguine accumulationi

occasionem & simul materiam eorum præbent, hæc esse fugienda; & quoniam ex nimia succorum abundantia nascitur cacochymia, hinc abstinentiam & motum convenientem, item, si opus est, venæ sectiones & purgationes debito tempore institutas mirifice ab istis morbis præservare judicamus. Porro quoque omnia ea, quæ sanguinem fluidum & tenuem reddunt, quæ circulum debite promovent, transpirationemque liberam servant, ea & curant & ab iisdem præservant. Nec denique negligenda sunt medicamenta, quæ obstructions glandularum & viscerum veteres potenter referant, ex quibus eminent martialia, antimonialia, sulphurea, thermæ acidulæ, utpote quæ ad eradicandos diuturnos istos morbos effectum spondent præsentissimum. Sed hæc circa hanc materiam, dixisse sufficiant.

D E

PUTREDINIS DOCTRINA, EJUSQUE AMPLISSIMO IN MEDICINA USU.

§. I.

SI quis demonstrationes conficere & veras ac solidas phænomenorum & effectuum, qui in medicina obveniunt, rationes apposite & intelligenter reddere velit, is plures ex physicis veritates antea cognititas perspectasque habere debet. Veritatem enim adhuc incognitam detegere, vel doctrinam quandam clarius explicare nemo facile poterit, nisi illud, quod quærit vel explanare instituit, ex veritatibus jam notis cognitisque scienter eruere didicerit; quandoquidem veritatis ea est indoles isque character, ut non modo mentem ad assensum cogat, sed & frugifera sit, seque multiplici usu propaget, & uberrima aliarum veritatum sit genitrix. Uti vero quævis disciplina ulterius excolenda suas ipsi congruas & respondentes supponit veritates atque principia domestica: ita doctrina medica, si in formam scientiæ redigi debet, non nisi veritatibus & fundamentis physicis jam jam detectis & publicam assensionem habentibus, ad ulteriorem perfectionis gradum evehitur. Dicit enim vix potest, quam eximio usu atque utilitate studium anatomes paulo diligentius excultum, quod mechanicam corporis humani structuram ejusque partium contextum monstrat, neque minus paulo subtilior rerum physicarum & chymicarum per experimenta instituta contemplatio atque motuum ex mechanicis scientia incrementis artis medicæ provehendis inserviant. Nisi enim quis hisce disciplinis earumque principiis atque præceptis probe imbutus sit, is certe nunquam solidas, quæ intelligi & demonstrari possunt, causas in medicina afferre, vel solidi quid in explicandis rebus præstare poterit. Nam qui his destituti sunt scientiis, illi loco demonstrationum & veritatum nomina tantum rerum, obscuros & confusos terminos, qui intelligi nequeunt, in medium proferunt, atque adeo sermonem in medicina, non vero medicinam tradidisse videntur. Qui vero speculationum suarum fundamenta ex hypothesibus depromunt, ii quidem melius agunt, & veritates quasdam in aprico ponunt, quæ tamen tantum sunt probabiles, & omnibus phænomenis explicandis minus sunt idoneæ. Optima itaque ea est in medicina philosophandi ratio, ubi quis ex simpli-

cibus, claris atque jam probatis rerum principiis physicis, chymicis, mechanicis, vitæ, mortis, morborum & sanitatis restituendæ causas dare atque investigare conatur, & partim analytica, partim synthetica methodo incedit, dum motuum in genere causas, leges, materiæ indolem ac vires ex selectis quibusdam phænomenis atque experimentis in physicis deducit, & ex his deinde per synthesein motuum microcosmicorum causas, leges, sanguinis & humorum indolem, constitutiones & vires tradit & derivat. Quam vero insignem usum atque eximiam utilitatem veritates in physicis ac chymicis jam cognitæ in rebus medicis explicandis præstent, exemplo putredinis fusiùs ostendere atque demonstrare allaborabimus.

2. Cum itaque nobis constitutum sit, quam eximium doctrina de putredine in medicina habeat usum, & quam scitu hæc ipsa necessaria sit omnibus, qui hac in arte proficere volunt, pluribus argumentis paulo plenius atque uberius tradere. Primo omnium consultum nobis visum fuit, putredinis indolem, causas & effectus ex ipsis physicis & chymicis fontibus paulo altius accersere, ut postea hujus doctrinæ utilitas in applicatione rerum, quæ ad medicum spectant usum, eo clarius innotescat. Ordinem vero ab ejus non tam nominali, quam reali definitione, eo quod omnes rerum definitiones ejus indolis atque usus sint, ut ceu principia demonstrationum considerari debeant. Corporis igitur putredo nihil aliud est, quam intima partium, ex quibus mixtum corpus constat, ex unionem & nexu suo dissolutio cum foetido & volatili halitu juncta, totam mixti crasin, proprietates & vires immutans.

3. Corporum dissolutio rectissime in superficiale & intimam sive radicalem distinguitur: in illa tantum corpus in tenuissimas partes, ex quibus aggregatum est, dividitur atque discerpitur, quarum singulæ adhuc suam indolem atque virtutem, nec non proprias & específicas qualitates ac vires retinent. Exemplo poterit esse solutio auri cum aqua regis adornata, in qua etiamsi aurum in stupendæ exiguitatis particulas seu atomos fuerit resolutum, quod exinde patet, dum ejus aliquot guttæ integram libram spiritus vini aliis sapore inbuere possunt, tamen ex præcipitatione, quæ

quæ fit cum sale quodam sive lixivioso, sive volatili, corpuscula hæc auri naturam perfecte in se retinuisse apparet. Intima vero & radicalis solutio ea habetur, qua partes corporis è nexu, & situ suo dimoventur, atque arctissima mixtione, à qua essentia & specifica corporum differentia dependet, penitus exsolvuntur, ut in aliam prorsus texturam & habitum transformatae, novas plane qualitates atque vires induant. Atque ejusmodi intimæ solutionis exemplum solutio ciborum in ventriculo & intestinorum canale exhibet, in quo à subtilissimo illo menstruo universalis microcosmico salivali, & caloris animalis influxu intima alimentorum mixtio & textura ita dissolvitur atque destruitur, ut sapore, odore, colore, consistentia & cæteris omnibus qualitatibus ablatis novus chylus & fœculentiæ alvo eliminandæ exsurgant. Pariter intimæ solutionis exemplum conspiciamus in fermentatione vegetabilium, dum dulces uvarum & fructuum horæorum succi beneficio fermentationis dulcem & temperatam suam naturam plane depouunt, & in liquorem acido-spirituosum sive vinosum inebriantem immutantur. Ad hanc itaque solutionis intimæ classem referri etiam debet putredo, cujus natura & effectus in eo consistit, ut corporis mixtionem & ab hac dependentem formam, qualitates atque vires plane extinguat.

4. Causa hujus dissolutionis intimæ tam fermentativæ, quam putridæ, est motus intestinus partium humidarum & copiosus materiæ agitativæ calidæ influxus. Nam sicuti nulla unquam potest fieri sine humido corporis solidi solutio, ita etiam sine aqua, quæ primum humidum est, nec fermentatio, nec putredo perficitur. Est enim aqua universale menstruum, quod non modo poris corporum sese altius insinuat, sed etiam, quia ejus partes in continuo intestino motu constitutæ sunt, eorum partes, quæ variis modis mixtæ & unitæ sunt, disjungere, & de loco ac situ suo deturbare potest. Multo vero feliciter id præstat, ubi à calore adjuvatur, qui non nisi rapidior materiæ æthereæ coelestis motus est, magna expansiva, à centro ad circumferentiam propellente, potentia instructus. Humidum itaque in materiam fermentescibilem & putrescibilem dum agit, partes tam salinas, quam sulphureas & terreas resolvit, in se recipit, easque in similem fluiditatis motum abripit.

5. Utut vero fermentatio & putrefactio in eo conveniant, quod utraque à motu intestino humidi & calidi elementi fiat, tamen differens valde est earum effectus. Nam fermentatione spiritus sulphureus inflammabilis, putrefactione vero spiritus urinosus volatilis producit, & inde fit, ut putredo semper fœtorem comitem habeat. Deinde notandum est, animalium succos nullam admittere fermentationem, neque ex iis spiritum inflammabilem vinosum præparari posse, cum vegetabilia hac sola gaudeant prærogativa, quæ tamen non secus ac animantia putredinem concipiunt. Ratio vero, cur animantia eorumque partes tantummodo putrescant, nunquam vero ex iis per fermentationem elici inflammabilis spiritus possit, unice in vegetabilium differente ab animantibus mixtione quærenda est: quandoquidem hæc in suam mixtionem præter oleum etiam acidum admittunt, quod etiam ex iis destillatione elicitur, cum in animantibus tale non reperire liceat, utpote quæ magis oleo & terra subtiliori volatili, quæ igne falsedinem induit, fœtæ sunt. In fermentatione itaque vegetabilium à motu intestino calido primo solvitur acidum tartareum, quo, dum deinde in partes sulphureas & oleosas incipit agere, non modo mutua hac actione & reactione effervescencia concitatur, sed & copiosus penetrans vapor exsurgit atque in auras fertur, & denique mutua combinatione partium acida-

rum & oleosarum acido-spirituosus sive vinosus liquor emergit. In putrefactione vero, ubi acidum deficit, principium oleosum & sulphureum una cum salino volatili statim abripitur, neque ab acido figitur aut corrigitur, sed libere cum tetro fœtore avolat inque auras diffatur; utpote experimentis chymicis certo constat, fœtorem ab oleoso sulphureo principio & sale volatili proficisci. Clarissimum exemplum habemus in sulphure minerali, quod inodorum est, si vero igne cum sale lixivioso funditur, ingratum accipit odorem. Eodem modo si sulphur minerale cum calce viva & sale ammoniaco destillatur, spiritus perpetuo fumans elicitur. Quod si itaque sal volatile oleosum fœtidum ex animantibus elicere velimus, opus est, ut ea vel putrefactioni subjiciamus, vel igne fortiori, ut comburantur, tractemus, ita & oleosæ & volatiles partes à contextu aliarum partium, in quibus irritatæ hærebant, liberantur.

6. Diximus in superioribus, humidum & calidum esse præcipua motus dissolutorii in putrefactione & fermentatione instrumenta, adeo, ut absque illis neutra harum perfici queat. Ex hisce jam sequitur, corpus in putredinem alias valde proclive, non meliori ratione ab ea defendi salvumque & integrum servari posse, ac si humiditatem & calorem removeamus. Qua de causa etiam fit, ut corpora probe exsiccata nunquam putredini & corruptioni subjecta conspiciere liceat. Carnes suillæ & bovinae, per fumum halitus & aëris flatum exsiccatæ, non facile putrescunt: quod si vero maceratione in aqua humiditatem recipiunt, sub calido mox aëre facile ruunt in putredinem. Frigoris quoque ea est peculiaris indoles, ut corpora à putrefactione tueatur, idque non alia ratione quam quod motu quodam rectilineo partes premat & arctissime inter se jungat, ut è situ suo non facile possint dimoveri, cum potius calor id habeat, ut motu vorticoso & circa axem poros ampliet, expandat, & partes à centro ad circumferentiam propellat.

7. Cum vero humiditatis absumptio varia ratione possit perfici; varii etiam modi dantur conservacionis corporum à putredine. Ita constat experientia, rectificatissimum vini spiritum conservandis corporibus maxime esse idoneum, si in eo detinentur, & quidem ob hanc rationem, quia videlicet humiditatem, quæ vegetabilibus & animantibus inest, ex interioribus eorum poris & partibus promte imbibit & absorbet, hinc etiam corpora antea mollia indurescunt; feliciter vero res succedit, si aliquot vicibus novus spiritus dephlegmatus affunditur. Et utut per olea destillata & per balsama liquida corporum balsamatio, sive à putredine conservatio, adornari queat, tamen iis omnibus rectificatissimus spiritus longe multumque antefereendus est, eo quod penetrantioris est naturæ, atque in intima corporum facilius, quam corpus resinosum balsamicum, sese insinuat.

8. Præterea alius adhuc datur modus, corpus à corruptione præservandi, nimirum per salia, inter quæ maxime eminent sal commune & alumen, quæ egregie etiam humidum recipiunt, quo absumto fibræ carneæ duriores redduntur. Hæc salia quo magis sunt pura & exsiccata, eo feliciter hunc præstant effectum. Et quoniam alumen propter copiosas particulas terrestres simul constringentem facultatem obtinet, qua partes inter se invicem firmiter uniuntur & connectuntur; hinc beneficio lixivii, ex alumine & sale communi præparati, omnia humani corporis viscera per plures annos integra conservari possunt.

9. Notandum est, humida corruptibilia, si continuo agitantur motu, non facile in putredinem abire, stagnantia vero & putrescentia, uti videmus in aquis paludosis,

paludosis, facillime corruptionem admittere. Etenim calor & humiditas dum continuo in particulas quiescentes agunt easque afficiunt, facilius earum mixtionem dissolvunt ac destruunt, ac si locum & situm suum perpetuo mutant, ubi actio & mutatio caloris magis est transitoria, quæ contra in quiescentibus magis constans & permanens est. Videmus etiam, vegetabilia humiditate imbuta atque in ingentem molem ac acervum congesta, longe facilius incallescere inque putredinem arbire, quam si sparsa jacent, ubi à putredine immunia manent. Cujus rei hanc subesse rationem putamus: si in acervum collecta fuerunt, effluvia à motu humidi & intestini calidi excitata in liberum aërem evehi & exspirare nequeunt, sed coercita, conclusa & in se quasi redeuntia, motum intestinum putredinosum accelerant, tantum abest, ut eum imminuant. Nihil vero magis corruptionem à rebus corruptibilibus arcet & incipientem aufert ac dissipat, quam liberioris aëris, præsertim sicci & frigidi, afflatus ac transitus. Denique & illud observatione perquam dignum est, quod putredo incipiens se valde multiplicet ac subito se diffundat; agit enim instar seminii seu fermenti, quod in similem putredinosum motum congeneres & vicinas maxime partes cito abripit: quemadmodum id clare videmus in rebus fermentescibilibus, ubi parum fermenti massæ farinaceæ vel vegetabilium succis additum, eos mox in similem fermentationis motum conjicit.

10. Evoluta sic paulo ex fontibus physico-medici putredinis natura, genesi atque effectui, longe facilius jam erit hæc, quæ jam diximus, in corpore nostro ad usum medicum applicare, in quo illud singulare & plane mirabile occurrit explicandum, quare animantium corpora, inque iis contenti succi, in se & sua natura putredini concipiendæ admodum apti, humido & calore adhuc præsentē, & quamdiu viva animantia existunt, eam non subeant, sed integra, salva & à corruptione immunia persistant, cum tamen statim post mortem celeriter in putredinem ruant. Atque in eo conservationis vitalis ratio maxime posita est, cujus causam utique paulo exquisitius investigare diligentis ac sciscitabundi medici est. Falluntur ii quam maxime, qui in spiritu aut balsamo quodam vitali & calido innato hujus admirandæ conservationis causam quærunt. Quandoquidem pro veris causis hic tantummodo allegantur termini, qui rem nullam significant, & hinc quoque nihil explicant. Falluntur etiam, qui sale & sulphure, quod vitalibus inest succis, id conservationis negotium confici autumant. Indubia namque & plane infallibili constat experientia, neque salina, neque spirituosā, neque medicamenta balsamica, copiosius etiam in corpus humanum assumpta, tantum valere, ut avertere putredinem possint, ut potius ad hanc promovendam non parum conferant. Videmus enim corpora scorbuticorum, quorum succi salinis & sulphureis partibus abundant, facillime in corruptionem sphacelosam incidere; quapropter utique hujus durationis vitalis aliæ afferendæ & investigandæ sunt causæ. Jam vero observamus, sanguinis & humorum valde corruptibilium massam, quamdiu perenni ac jugi progressivo motu ac circuitu per compagem corporis mere vasculosam circumvolvitur, à corruptione esse immunem; quamprimum autem hi ipsi humores, extra motum & circuitum positi, in partibus solidis quiescunt aut subsistunt, paratam ipsis esse putredinem, quæ mox sese diffundit, atque ad vicinas partes adhuc sinceræ serpens, iisdem mortem & sphacelum inducit. Et quâncumque etiam ipse sanguinis circuitus penitus sufflaminatur ac tollitur, quod fit in morte, è vitio sequitur putredo, ceu mortis indivulsa comes

ac pedissequa, nisi à frigore vel causa alia externa violenter arceatur.

11. Ex hisce apparet, solum sanguinis itum ac reditum esse præstantissimum illud balsamum, quod corpora animantium à corruptione defendit atque tueatur, quo motu salvo atque integro corpus omnes putredinis injurias eludit. Id vero maxime omnium inquirendum venit, utrum hic sanguinis fluxus ac refluxus solo progressivo motu id perficiat, an potius aliæ causæ cum hoc motu in circuitum eunte ad hunc effectum præstandum conspirent, quod vero maxime videtur consentaneum. Nam per continuum & perennem illum sanguinis circuitum & progressum motus partium, sanguinis mixtionem constituentium, intestinus calidus, qui dissolutoriæ est naturæ, valde increfcit, & sanguinem ac succos temperatos non modo consumit, sed & sensim paulatimque in falsos sulphureos & excrementitios convertit. Ex quo patet, illud ipsum progressivum motum ad destructionem potius, quam conservationem sanguineæ mixturæ, tendere, id quod clarissime intensior in febribus æstus testatur, ubi ob velociorem sanguinis motum major fit intestina partium agitatio & major accenditur calor, qui & corpus & ejus succos atque vires non modo consumit & destruit, sed & eos in copiosas excrementitias partes, quæ partim per cutim, partim per urinam & alvum foras debent proscribi, resolvit. Accedit & illud, quod cum aëre, esculentis & potulentis plures à mixtura sanguinis alienæ & in corruptionem pronæ partes in succos vitales subinde irrepan, quæ si intus retineantur, non possunt non ex sua natura mixtionem sanguinis nativam & benignam turbare atque destruere. Insuper sub ipso etiam vitali actu & motu perpetuo corruptibiles aptasque ad putredinem inducendam materias in sanguine generari animadvertimus. Quare ipsa ratio dictitat, quod hæ partes vitæ insensæ, ne damnum mixturæ sanguineæ inferant, continuo separari, secerni & è corporis sphaera eliminari debeant.

12. Et inde quoque est, quod naturæ benignitas in artificiosissima animantium structura tot innumera efformavit secretoria & excretoria organa, quorum ope non modo fixioris, sed & mobilioris & agilioris naturæ, & falsæ sulphureæ, aqueæ & aëreæ indolis excrementa continuo & non interrupto actu à sanguine & humoribus vitalibus sequestrantur. Quem in finem conditum est à natura vasum illud viscus, hepatis, quod in secernendis scoriis sulphureis adustis salinis & serosis partibus nunquam non occupatum est. Tum innumerabiles hinc inde in corpore glandulæ extant, conglomeratæ, quæ ex infinite parvis tubulis coagmentatæ laticem subtiliorem valde fermentescibilem, salivalis naturæ, continuo secernunt, qui officio suo defunctus è corpore eliminatur. Cutis tota tubulosa & porosa universale & publicum quasi est emunctorium, quo serosæ & sulphureo-falsæ sub humoris specie excrementitiæ partes foras proscribuntur. Renes feri falsi sulphurei crassioris colatoria sunt, ac per intestina crassa fœculentæ sordes & alvi purgamenta evacuantur.

13. Verum enim vero, ad mixtionem humorum vitalium conservandam, non sola sufficit perpetua partium inutilium separatio, sed opus est alio adhuc ad vitam & sanitatem tuendam præsidio, de quo altum apud auctores nostri ævi est silentium, idque in nova succorum blandorum & temperie gaudantium accessione positum est, qui in locum eorum, qui corrupti secesserunt è corpore, surrogari & substitui debent. Ex quo apertissime videmus causam, quare homines & animantia, ne putredinem intus concipiant, atque ut vitam tueantur, alimenta semper assumere debeant, ex quibus rursus boni nutriendisque viribus apti,

apti, temperati, dulces succi, quales sunt chylosi lactei, generentur: nam sine eorum accessione & novo affluxu vita & vires diu durare nequeunt. Igitur vita conservatur, & mortifera putredo à corporibus animantium per assumpta & excreta, per ingesta & egesta optime avertitur. Ubi in genere notari velim, in adultis, & quæ non amplius indigent auctione, corporibus excretiones æquales esse debere ingestis, si prospera & æquabili valetudine gaudere velint.

14. Firmum itaque & inconcussum sanitatis fundamentum, in eo consistens, ut omnis materia corruptioni proxima & quæ corpori interitum & destructionem minatur, continuo removeatur, plura eaque utilissima corollaria & theoremata in medicum & practicum usum nobis suppeditat. Primo ex hisce jam allatis veritatibus mortis, & quæ eam sequitur, putredinis, vitæ insensibilissimæ rationem formalem & proximam causam elicere possumus, quæ est destructus sanguinis motus & progressus, indeque enata putredo & corruptio, quæ vice versa plerumque est causa totius circuli destructi atque ipsius mortis: quandoquidem frequenti & paulo attentiori corporum, morbis sive acutis, sive chronicis defunctorum, dissectione constat, manifestam semper & conspicuam mortis causam reperiri, dum vel viscus aut pars nobilis interna, vel etiam plures partes, per vim morbi ab extravasato vel stagnante humore corruptæ & putredine vel sphacelo tactæ adparent. Frequentissime vero accidit, ut in iis, qui subita morte extincti sunt, vel morbis gravibus chronicis, difficilioris paulo cognitionis, perierunt, ex variis fibris & membranis concreta corpora, quæ medici polypos nominant, intra majora vasa & potissimum cordis ventriculos, vel etiam duræ matris sinus reperiantur, quæ liberum sanguinis iter impediendo turbandoque vitam tollunt.

15. Quum itaque præcipuum medici officium in eo versetur, ut vitam longam præstet, corporis integritatem servet, ac denique mortem præmaturam & morbos ad eam ducentes avertere quærat, non aliter certe id fieri potest, quam ut putredinem & corruptionem à partibus internis & externis arceat. Hoc vero non meliori modo ipse perficere potest, ac si omne consilium & operam eo dirigat, ut sanguinis circulum liberum per universi corporis tubulosam structuram conservet, omniaque impedimenta huic motui contraria removeat.

16. Plura vero sunt, quæ liberum hunc sanguinis progressum pervertendi atque impediendi potentia valent: quorum in numero præcipuum locum tenet nimia sanguinis & humorum abundantia, quæ vi multum resistente nimiaque expansione elaterem fibrarum cordis ejusque auricularum infringit atque minuit, ut valde tarda & segnis fiat progressio, ex qua tandem, nisi cito succurramus, humorum stagnationes, viscerum infarctus, obstructions, indurationes, humorum extravasationes, & partium corruptelæ putredinosæ vel apostematicæ prodeunt. Hac tarda sanguinis & humorum progressionem excretiones imminuuntur, præsertim ea, quæ fit perspiratione, & maxime humorum biliosorum, qui magna in quantitate quotidie in hepatis tubulis, secernuntur; unde ingens cacochymia, sive varii generis impuritatum in sanguine fit proventus.

17. Quam infesta vero est conservationi nostræ vitali plethora, tam frequens quoque & familiare iis est vitium, qui spongioso habitu præditi laute vivunt & dulci otio & quiete fruuntur; maxime vero omnium foeminæ præ viris plus sanguinis quam ad nutritionem & vitam est necessarius, colligunt. Ne igitur exuberans illa sanguinis & humorum copia

Frid. Hoffmanni Oper. Tom. VI.

sanitatem lædat, vel vitæ periculum minetur, sapientissimo structuræ machinæ nostræ artificio factum est, ut à stagnatione & copia humorum talis præter naturam & ordinem motuum fiat in vasis & partibus nervosis dispositio, cujus beneficio natura ab insensa sanguinis redundantia se liberat, in tenera ætate ordinario per nares, in foeminis per uterum, in viris per ani venas certis & statis periodis superfluum, qui in vitio est, sanguinem evacuando. Quandounque itaque solennes & salutare ejusmodi minuendæ sanguinis plenitudini dicatæ excretiones variis de causis deficiunt, minuuntur, vel cum violentia quadam cohibentur, ilias malorum exoritur, ita ut nisi cito succurras, corpus omnis generis morbis tam acutis quam chronicis pateat, quod in *Tom. II. Medicinæ ration.* fusius exposui. Vidimus non semel foeminas sanguine abundantes, ex cohibito per terrorem mensium fluxu, accedente refrigeratione, vel validiori purgante admissio, brevi tempore ex sphacelosa partium corruptione extinctas, ubi statim post mortem totum corpus intumuit, foedissima putredine cum magnis vesicis hinc inde emergentibus correptum.

18. Ecquis itaque ex his, quæ jam à nobis dicta sunt, non intelligit, à sola sanguinis benigni abundantia putredinem & mortem generari posse; ad quam avertendam non convenientius est auxilium, quam sanguinis missio, vel excretionum consuetarum sanguinearum restitutio. Quod si quis autem venæ sectionibus non sit adsuetus, vel ab iis natura abhorreat, & talem agat vitam, talique victu fruatur, qui nimiae copiae sanguinis ingenerandæ convenit, natura vero in excretionibus otiosa vel iners sit, vel plane deficiat, hunc oportet alio modo tractare ipsique prospicere, ne in gravem vel etiam lethalem à putredine oriundum morbum incidat. Ea enim, quæ nimiam sanguinis & humorum copiam detrahunt, pro ratione circumstantiarum, adhibenda sunt, cujus generis sunt labor & exercitatio corporis, abstinentia, cibus & potus tenuis, balneum, laxantia, infusa theiformia, & decens aquarum mineralium, ut thermarum & acidularum, usus.

19. Quæstio jam incidit, num etiam ex inopia & defectu sanguinis putredo lethifera in corpore humano ejusque partibus subnasci possit? Equidem diversi generis causas diversos & dissimiles effectus producere debere, judicandum videtur; attamen in negotio vitali causas morbi contrarias in eundem effectum & generationem unius morbi conspirare posse, variis exemplis confirmare possemus; sed satis jam nobis erit hoc loco demonstrare, quomodo nimia sanguinis abundantia & nimia ejus inopia corruptionem lethiferam humoribus partibusque solidis inferre possit. Diximus supra, sanguinem luxuriantem facillime in vasis stagnare & facile quoque impurum reddi, ob imminutas ab eadem plethora secretiones & excretiones, quæ sanguinem à sordibus impuris & inquinamentis, in corruptionem pronis liberant & tumentur. Idem pariter fit à sanguinis boni defectu; nam quemadmodum ab ejus naturali & convenienti quantitate omnis generis tubuli aperti servantur: ita ab ejus inopia concidunt, coeunt, angustantur, vel tandem penitus occluduntur, unde nec benigni alibiles succi ad solidas partes accedere, neque sufficiens fluidi mobilissimi in cerebro generari potest copia, unde vires ingens capiunt decrementum. Accedit & illud, quod impulsus sanguinis à corde & arteriis earumque debita diastole, qualis observatur in pulsu, à sufficienti quantitate sanguinis proficiscatur, sub cujus defectu non potest aliter fieri, quam ut pulsus valde fiat debilis & languidus, ipseque sanguis per vasa minima capillaria viscerum non

L

debi-

debite propellatur, sed hinc inde in visceribus, ut sunt pulmones, lien, hepar, subsistat, & corruptiones, cachexiæ, febres lentæ & hæcticæ sequantur.

20. Non vero expeditior ad putredinem & ex ea oriundos morbos via est, ac si viribus per immodicas sanguinis profusiones, per gravem antecedentem morbum, aut diuturnos animi affectus, tristitiam, vel etiam famem, consumtis, homines nimia voracitate & avidissime ciborum copiam ingerunt, qui cum nec possint à natura corporis valde languida satis recte digeri & utile ab inutili secerni, ingens non solum fit vitiosorum humorum in prima regione colluvies, sed & valde impuris & corruptibilibus succis vasa ob impeditas excretiones replentur, atque ad febres malignas putridas, vel etiam hæcticas lentas, magna fit dispositio. Observatione quoque certa & indubia constat, morbos perniciosos illos castrenses, febres nempe malignas petechiales, morbum Hungaricum, diarrhoeam atque dysenteriam mali moris autumnali maxime tempore, & quando castra relinquere cœperunt, gravissime militiæ deditos affligere, & longe lateque infesto contagio serpere. Cujus rei non alia subest causa, quam quod æstate sub diurno calore, nocturno frigore & continuis fatigationibus, vigiliis, fame, vel etiam corruptis esculentis ac potulentis & vires & bonum sanguinem amiserint, & hujus loco venas & primas vias multis corruptis succis confertas habeant, qui ad putredinem subeundam admodum sunt faciles, atque in febribus acutis lethalem ut plurimum sphacelum partibus internis inprimunt.

21. Expedita sic horum, qui malignitate infesti sunt, morborum causa, quæ est succorum & sanguinis benigni defectus, & ex eo contractus perquam facilis ad putredinem transitus, exercitior quisque & intelligens medicus clare & evidenter jam perspicit, nihil periculosius esse, quam ex morbis vel aliis de causis imbecillia corpora, quæ juxta *Celsi* effatum morbis putridis patent, nimia ciborum, præsertim qui mali succi sunt, copia replere; sed præstat tali in casu sensim paulatimque absumtum sanguinem reparare, & cruditates inde evenientes vel per regionem alvinam, vel per cutim clementer evacuantibus educere, & insuper digestionis negotium ac stomachi vim concoctricem temperatis roborantibus & stomachicis acuire & corroborare, qua methodo longe optime graves ex putredine & corruptione humorum metuendæ ægritudines possunt præcaveri.

22. Datur adhuc alius modus celerrime in sanis etiam, integris florentisque ætatis corporibus mortiferam putredinem inferendi, idque fit per subministrata venena, præsertim ea, quæ sunt causticæ indolis, quorum in numero sunt arsenici factitii tres species, vel etiam purgantia acriora, aut emetica ex antimONIO validiora. Hæc nimia dosi data, nisi cito convenientibus auxiliis violentissima eorum operatio impediatur, brevi tempore per truculentissimos partium nervosarum spasmos & per illatam partibus nobilioribus putredinem enecant. Cadaveribus dissectis statim sphacelosæ maculæ in ventriculo & intestinis cum teterissimo foetore oculis sese offerunt; utpote hujus generis venena vehementissime partes nerveas & vasa ventriculi constringendo, inflammationes in sphacelum abeuntes producant, qui eo infestior vitæ est, quo plus nerveo-membranosas partes obsidet, ut sunt ventriculus & intestina, quæ cum systemate earum partium, quæ exquisitissima sensatione & vivido motu instructæ sunt, amicabilem habent consensum, similesque in motus inordinatos eas rapiunt. Id vero maxime mirandum est, quod valde frigida potio in corpus, calore & sudore diffluens, ingesta perniciosissima sit & venenum æmuletur, non raro sphacelum & mortem, cum celeritate quadam inferendo: & quamvis non semper tam funestus sequatur

eventus, habemus tamen aliquot exempla in promptu, solum frigidum potum, corpori calefacto immisum, mortem intulisse, ubi dissectio corporis viscera sphacelosa ostendit. Ita ante aliquot annos Serenissimus Princeps quidam, in florentissima ætate constitutus, à vehementi corporis exercitatione totus sudore perfusus, duas mensuras frigida cerevisiæ simul & semel hausit, inde summo languore, nec non anxietate præcordiorum conatuque vomendi & frequenti animi deliquio correptus, quarto die convulsionibus obiit, ubi post sectionem non modo pars ventriculi sphacelo correpta, sed & lien & sinister pulmo in foetidissimam & instar atramenti nigerrimam, putrilaginem resoluta fuerunt reperta. Cum enim viscera ex vasorum minutissimorum congerie fere tota sint conflata, quam facile locum & occasionem dant stagnationibus & infarctibus sanguinis patent; copioso itaque accedente ad sanguinem, ob calorem & motum valde tenuem & fluxilem, actu frigido liquore, non mirum est, si sanguis statim in coagulum densetur, inque vasis firmiter inclusus putrescat. Non datur hoc in casu præsentius auxilium, quam si mature & tempestive post ejusmodi grave diæticum erratum motu, sive equitatione, sive vactione, corpus exerceatur, assumpta prius ingenti quantitate potus calidi sive theiformis ex floribus bellidis, chamomillæ vulgaris, cardui benedicti, veronicæ, scordii &c. quo infensum illud vitæ coagulum impediatur, sanguinisque liber circuitus per vasa promoveatur. Unde videmus, quam simplicia, efficacissima tamen sint ad mortem tristissimam avertendam præsidia.

23. Inter affectus, ex putredine funestos, morbus ab Hippocrate niger dictus jure meritoque debet recenseri, quo incidente non modo per superiora humores atro colore tincti, sed & foetidissima purgamenta per alvum secedunt atque feruntur. Notandum hic est, vomitum cruentum & nigrum rarius esse lethalem, si vero sanguis copiosior ex venis intestini ilei ruptis ad stercora intestini coli delabatur, ibique non statim ejectus, sed subsistens, in motum putredinosum cum ipsis alvi excrementis abripitur, intolerabilis foetor fit, qui brevi hominem exanimat. Nam, nostro judicio, qui ex hoc morbo extinguuntur, non ex profusione sanguinis, quæ non tanta est ut valde debilitare, vel ipsam mortem inferre possit, sed ex sola putredine, quam sanguis cum excrementis mixtus constituit, vita privantur. Siquidem foetidissimus ille vapor naturæ humanæ inimicissimus est, utpote qui ob subtilitatem suam intime ad fluidum, quod membranosas ac nervosas partes animat, motusque & sensationes gubernat, inficit, contaminat, ac penitus destruit, unde est, quod vires, quarum origo non alia nisi subtilissima & purissima humorum constitutio est, mox vacillare & tandem penitus deficere incipiant, quemadmodum id in sphacelo & cancro exulcerato externarum partium videmus, ubi non nisi putredo, ad intima penetrans, spirituum animalium agilitatem tollendo, homines jugulat.

24. Inter morbos, qui putredinem, vitæ hostilem, fovent & maligni vocantur, sunt maxime pestis & febres petechiales, quæ interdum vehementia pestem superant, licet contagio pesti sint inferiores; siquidem hi ipsi miasmata, quod non nisi putredinosum fermentum est, propagantur & cum corpore communicantur. Nam quemadmodum exigua moles massæ, jam jam putredine correptæ, rebus corruptibilis indolis admixta, protinus eas putredine inficit & sese mirifice propagat: ita etiam tenuissimus ex peste vel ex febre petechiali infectis emissus & ab aliis corporibus aëris vehiculo susceptus vapor, partim immediate per patulos oris & nasi tubulos ac poros ad ipsam sanguinis massam, partim etiam cum saliva deglutita & alimen-

tis ad ipsas primas vias transit, celerrime se multiplicat, & totam humorum massam tandem coinquinat, pessima symptomata producendo. Quod vero dictorum horum morborum essentia & natura in putrefactione consistat, id summa virium omnium prostratio, pulsus valde debilis & inæqualis, carbunculorum & bubonum abscessus, exulcerationes foetidissimæ, excrementa alvina foetentia, & maculae per totum corpus dispersæ nigrae & lividae, quæ non nisi sphacelationis species sunt, & corporis post mortem intumescencia satis abundeque indicant. Et utut hæc miasmata etiam sanos & qui temperatum sanguinem in venis alunt, homines infestent, id tamen ordinario observare licet, quod in corporibus cacochymicis, quorum prima regio pravis humoribus obsessa est, majorem vim atque perniciem exercent, eo quod humores offendant jam ad putredinem & corruptionem pronos, cuius naturæ maxime sunt salivales, qui facile in motum fermentativum conjiciuntur. Atque ex hisce jam facile patebit ratio, cur pestis maxime in pauperes grassetur, & quare illi, qui fame premuntur & inordinato victus generi adfueti sunt, hisce putridis morbis quam maxime sint obnoxii. Dysenteria, variolæ, morbilli, purpura si malignitatis speciem referunt & plures necant, non aliunde malam indolem suam, quam à pravis humoribus & succis ad putredinem inclinantibus & corruptis atque à pravo corporum habitu, accipiunt.

25. Evoluta sic pestis & malignorum morborum ac febrium natura, quæ vel in ipsa putredine, aut facili in ipsam transitu consistit, facillimum jam erit prudenti medico, apta remedia & commodam iis utendi viam ac methodum tam ad præservationem, quam ad curationem invenire. Nullum enim ad præservandum tutius ac convenientius est auxilium, quam bona diæta & prudens vitæ regimen, ne nimia alimenterum, præsertim corruptibilium, copia ventriculus oneretur. Deinde circumspiciendum est, ut salutare, quibus sanguis optime depuratur, excretiones expedite fiant & rite sese habeant. Ita enim miasma, sibi simile non inveniens, vel plane nihil operatur, vel feliciorum progressum & exitum morbi efficit. In ipsa curatione cane pejus & angue vitanda sunt illa, quæ motum intestinum sanguinis & humorum augment, uti sunt omnia sic dicta alexipharmaca & calida bezoardica ac spirituosa, quæ ad putredinem diffundendam & accelerandam plus juvant, tantum abest, ut eam impediunt. Exulent quoque omnia alcalina, volatilia, foetida, oleosa, quippe quæ nonnisi putredinis producta sunt; contra vero acida, quæ figendo partes oleosas & volatiles, putredini mirifice resistunt, longe optima in peste sunt medicamenta. Quo spectant etiam terrea bezoardica, & quæ blande corpus in diaphoresi conservant, utpote cum non præsentior via sit ad putredinem, quæ jam incepit, removendam & partes subtilioris & fermentescibilis naturæ evacuandas, quam cutis emunctorium, inter quæ primas tenent analeptica, quæ vires restaurant & circuitum sanguinis promovent. Terrea vero & bezoardica id habent peculiare, ut sanguinis mixtionem quodammodo conservent, & quo minus tam cito dissolvatur impediunt.

26. Spectant etiam ad morbos malignos febres hecticæ, quæ ex putredine non tam activa, sed lentius procedente & quasi domestica & vires depascente nascuntur: has ipsas ex abscessibus corruptis & in sphacelum abeuntibus visceribus, hepate, pulmonibus, ortum traxisse, anatome corporum his morbis defunctorum testatur. Et hæc partium internarum corruptela causa quoque est, quare difficilem vel plane nullam hæc febres sanationem admittant.

27. Denique nec illud prætereundum est, quod ple-

raque ex acutis febres non alia ratione, quam putredine, mortem inferant: testantur id sectiones statim post mortem institutæ, ubi intolerabilis foetor, qui non nisi ex putrefactione oritur, deprehenditur, & plerumque etiam ventriculus & intestina vel alia viscera nobiliora sphacelo correpta inveniuntur. Cum vero ingenerandæ putredini & sphacelationi internarum partium nihil magis resistat, quam stasis sanguinis impedire & illius æquabilem circulum conservare: quare omnis medentis intentio eo dirigi debet, ut ea medicamentorum genera præscribantur, quæ sanguinis progressum conservant, vires restaurant, & transpirationem promovent, qualia maxime sunt temperatæ mixturæ bezoardicæ, quæ e. g. aquas florum acaciæ, ceraforum nigrorum, cardui benedicti, rosarum, cinnamomi sive vino, acetum destillatum, syrupum acetositis citri, mixturam simplicem, cancrorum lapides, antimonium diaphoreticum, cornu cervi philosophice præparatum, cinnabarin nativam vel vulgarem complectuntur, quarum usus diutius insistendum, neque concedendum est, ut alvus diu clausa maneat, quia putridæ fordes, ex universo corpore ad intestinorum canalem translatae, ibi per con fermentationem pejores factæ, fomitem putredinis præbent. Hoc vero artis & consilii est, ita prospicere primarum viarum evacuationi, ne plus detrimenti inferamus. Nunquam tamen huic scopo fortiora stimulantia inserviunt, sed non nisi blande & leniter laxantia & intestina eluentes clysteres adhiberi debent, idque non omni, sed remittentis morbi tempore.

28. Jam oritur quæstio pragmatica, an camphora, quæ putredini tam vehementer resistit, ut etiam ad sphacelum & gangrænam externam nihil ipsa præstantius inveniatur, & hanc ob causam alexipharmacorum princeps vocetur, ad cohibendam putredinem tuto usurpari possit? Nos hac de re ita sentimus: camphora oleum quidem est subtilissimum, sed coagulatum, admodum evaporabile, in eo tamen ab aliis oleis destillatis differt, quod hæc longe majorem æstum sanguini conciliant, quam camphora, quæ mox transpirat, cum illa ob viscidam naturam & tenaciorem contextum diutius poris & partibus immorentur, quod experimento confirmari potest: nam à drachma dimidia camphoræ, in drachma una spiritus vini soluta, & interne à sano homine sumpta, refrigerium potius in internis partibus, quam æstus percipitur, nec pulsus intenditur vel urina rubicunda fit; si vero viginti guttæ olei cinnamomi vel caryophyllorum, in spiritu vini prius solutæ, assumuntur, notabile caloris & pulsus augmentum observatur. Plurimum itaque, imo summopere in malignis commendamus interne camphorata tam ad inflammationes, quam malignas febres sanandas, idque non ex theoria vel vana speculatione, sed ex solida ratione & experientia suademus, quæ observatio in usu omnium remediorum, quæ virtute excellunt, & efficacia insigni pollent, merito adhibenda est. Nimirum sub vigore & exacerbatione morbi, si cutis vel omnia excretoria spasmo contracta sunt, & interiora valido æstu uruntur, præsertim si corpus simul juvenile est & spirituosius assuetum, ab iis abstinere præstat. Commodissime initio usurpantur, si opus est, per vomitum prima regione purgata, cum pulvere bezoardico cinnabario & ad aliquot grana admixto nitro purificato cum regimine sudorifero. Novi plurima exempla, ubi quidam maligna contagiosa febre certis indiciis videbantur correpti, qui hoc remedio mature semel vel bis adhibito, subsecuto sudore, ex toto à malo hoc liberati sunt. Tempore remissionis sub cute madida, pulsu debili, viribus prostratis camphora additis bezoardicis acidulis magno erit adversus malignitatem

præsidio; urgente delirio nihil præstantius est nitro, si modico camphoræ armatum fuerit. Viribus insuper à vehementia morbi exhaustis, ut pene vacillare, nec sanguini movendo sufficere videantur, aliquot grana camphoræ, in oleo amygdalarum dulcium solutæ, egregie iis restaurandis conveniunt. Deinde in febribus, ab inflammationibus partium internarum subortis, camphora refracta dosi ad granum dimidium vel unum pro dosi cum nitro miscenda & repetitis vicibus usurpanda est, qualem pulverem in gravi peripneumonia summo cum fructu sæpius usurpavi.

29. Sequitur nunc, ut paulo diligentiori prosequamur indagine, quare scorbutici vel etiam senio confecti tam facile ex levi causa externa, vel etiam sine hac, ex interno sanguinis vitio in sphacelum fere semper funestum prolabantur. Dicimus id fieri ob sanguinem valde in putredinosam corruptionem pronum atque proclivem, siquidem scorbutus est summa sanguinis impuritas, sive cacochoymia, à copia partium salino-sulphurearum, quæ ob imminutas excretiones remanent, humores benignos & temperie gaudentes inquinant, eorumque mixtionem destruant, suborta. Sanguis itaque ejusmodi impuritatibus repletus, quam facile labitur in putredinem, quare etiam fit, ut in scorbuticis sæpius oris, faucium vel etiam aliarum partium pravæ cum ichore foetido exulcerationes incidant, gingivarum caro tumida fiat & putrescat cum summo oris foetore & lividis ac in cœruleum colorem vergentibus maculis, inferiores corporis partes corripientibus, quæ non nisi levioris sphacelationis indicia sunt. Non itaque mirum videri poterit, quare ex levissima causa sanguis in partibus subsistens in putredinem sphacelosam mortiferam abeat, & cur à causa, ut loquuntur, interna oriens sphacelus nullam admittat sanationem. Etenim sanguis in corruptionem proclivis à putredine, partem quandam jam obsidente, protinus totus inficitur, ut medicamenta etiam efficacissima periculum avertere nequeant. Senibus etiam & internarum & externarum partium sphacelatio valde est familiaris, idque ob hanc rationem, quoniam ii cum scorbuticis multum habent commune, siquidem ob densitatem & rigiditatem fibrarum, quas per ætatem contrahunt, omnis generis secretorii & excretorii tubuli angustantur, & minorem accipiunt dia-

metrum, unde secretiones laudabilium humorum, succi nutritii in poris partium appositio & succi fluidissimi in nervosas partes influxus labascunt, totiusque corporis robur & partium vigor minuitur, corpus ficcum atque aridum fit lentoque marcore contabescit. Cum vero etiam in hac ætate declinante ob contractata emunctoria & excretiones imminutas falsæ & acidæ in primis viis accumulatur sordes, hinc sanguis senum salibus scorbuticis repletur, indeque est, quod pruritus, scabies sicca, urina rubra, calculosæ concrectiones in renibus & vesica, tophaceæ in podagra, catarrhi, tussis, rheumatismi, stranguriæ, partium exulcerationes huic ætati solennes & familiarissimæ sint. Jam apparet ratio, quare etiam cum scorbuticis illud commune habeant, ut eorum partes tam internæ, quam externæ sphacelationi sint obnoxie. Vidimus à levissima externarum partium læsione, v. g. à vespæ punctura, à leviori contusione, à discissione clavi pedis sphacelum in senibus obortum: vidimus etiam decrepitæ ætatis viros, ex dolore cardiacico, colico, à levi errato in diætâ concitato, brevi mortuos, dubio procul ob nullam aliam rationem, quam quod in iis partibus, quas dolor occupavit, stasis sphacelosa suborta fuerit.

30. Quamobrem, quoniam humorum cacochoymia & scorbutus, item ætas senilis tam gravibus iisque putridis & periculosis morbis patent, si quis se immunem ab hisce malis servare velit, is ab omnibus, quæ impuritatem sanguini inferunt, sibi cavere debet; maxime omnium vero ipsi senes, qui jam semiscorbutici sunt, ab omnibus iis, quæ scorbutico ingenerando apta sunt, abstinere debent, cujus generis sunt cibi ex mari, qui non adeo congruos corpori nostro succos præbent, carnes & cibi fumo indurati, falsi, & omnia ex alimentis rancida, corrupta & semiputrida, alimenta valentioris succi, ut sunt legumina, vitæ sedentaria & omnis laboris experts, aer nebulosus, frigidus-humidus, gravis, aquæ graves, asperæ vel semiputridæ, habitatio & dormitio in locis humidis, diuturna cura & tristitia, excretionum consuetarum neglectus, nimius usus acidorum & spirituosorum, quæ omnia uti nunquam utilia & imbecillioribus maxime nociva sunt, ita quam maxime, ut senes ea evitent, necesse est.



D E

USU ANATOMES IN PRAXI MEDICA.

§. I.

Qui ad civilem prudentiam animum adplicuerunt, hisce in eo maxime elaborandum est, ut præcipuam illius partem, geographiam recte adsequantur, eo quod hujus studio illa doctrina mirifice augetur atque illustratur. Parem in medicina utilitatem præstat anatomia seu corporis humani notitia, qua ornatus si quis artis nostræ sacra accedit, non potest non feliciter iisdem operari. Non sufficit vero in geographiæ studio, locorum situs & positus eorumque fluvios & montes nosse, nisi & cetera, quæ hanc doctrinam imprimis commendant, ingenio comprehendantur. Scire enim oportet, quale sit incolarum ingenium, quales mores & instituta, quibus artibus, quibus commerciis iidem delectentur. Scire porro oportet, quibus copiis regio adfluat, quinam plantarum atque animantium sit proventus, quænam aëris aquarumque conditio, quales denique lapides & mineralia intra abstrusa terræ viscera ibi recondantur. Hæc ubi quis in geographiæ studio observaverit,

ubi in hisce posuerit operam, is certe singularem sibi inde fructum in addiscenda politica pollicebitur. Simile quid in anatomia adnotandum est, cujus exquisitior ac elegantior cognitio non nudum unius alteriusve visceris situm, non magnitudinem, non colorem, non figuram ordinemque intestinorum complectitur, sed latissime fines suos extendit. Necessarium enim est, peculiarem summoque artificio compositam cujusvis partis structuram, curatius nosse, quemque illa usum, quod officium corpori præstet, quæ illi connexio cum aliis membris sit, qualemque vim ac virtutem mirabili plane ratione ceteris iisque remotis partibus infundat, probe tenere.

2. Atque talis anatomie scientia, firmissimum utique fundamentum est, quo medicina tuto inniti potest universa, & quo revulso, rationalis medicarum rerum explicatio vacillat, praxis periclitatur, imo tota denique medicina corruit. Equidem anatomie in chirurgia usus adeo exploratus est, quem nemo temere, nisi in arte medica parum versatus, negabit; hæc enim medicinæ pars, si recte feliciterque debet exerceri,

ceri, exquisitam externarum partium postulat cognitionem, adeoque anatomiae beneficio plurimum praestatur & ad summum evehi potest fastigium. De eo tamen à medicis, qui exercendae magis arti, quam eadem cognoscendae vacant, posset dubitari, num anatomia in praxi usum aliquem polliceatur? Nos, absit invidia verbis, ita omnino censemus, medicum solidum peritumque anatomia maxime fieri, adeoque illa carere minime posse. Quod ut uberius, praesertim nostro saeculo, quo post spissas superiorum temporum tenebras clarior scientiis lux adfulsit, confirmetur, usum anatomes in praxi hac dissertatione adferemus, dignitatem hujus argumenti paulo fusiore filo persecuturi.

3. Rem ipsam itaque adgredimur, eorum primum argumenta consideraturi, qui de anatomiae excellentia secus judicant, parum illi in praxi medica utilitatis tribuentes. Hi quidem ut suam confirmant sententiam, in corpore nostro naturam, per quam animam intelligunt, constituunt. Ex hac omnes motus, ceu primo fonte profluere, penes hanc omnium effectuum, qui in corpore accidunt, arbitrium esse existimant, cum ipsum corpus mere passivum sit organon, & ad recipiendos illos motus tantum dispositum. Illam esse dicunt, quae corpus saluum ac integrum praestet, quae à morbis tueatur, quae si tentaverint morbi, eosdem depellat. Quippe hanc, quum exquisita corporis notitia praedita sit, certo ordine, mensura, tempore, gradu ac loco certumque in finem agere, ut non modo servando corpori, sed & morbis, si qui infestent, propulsandis sufficiat: siquidem plebeji & imperitissimae etiam gentes, quae nec herbas, nec alia in auxilium morborum nossent, solius naturae beneficio convalescerent. Ex quo concludunt, in eo maxime medico esse adlaborandum, ut solius naturae virtutem, vias ac intentionem, neglecta corporis, quod mere passivum se haberet cura, cognoscat. In cuius quidem rei confirmationem illud adjiciunt, & fuisse olim & floruisse medicinam, cum anatomia & physica parum exultae fuerint: imo medendi scientiam in nonnullis superasse nostri temporis solertiam, licet illius aetatis medici, simplicibus contenti, metalla & mineralia ceterosque remediorum adparatus ignorassent. Et de anatomia quidem, ut ejusdem laudes imminuant, addunt, summum etiam omnibusque numeris absolutum anatomicum, licet omnes musculos eorumque texturam promptissime intelligat, in eorum tamen curatione, si quid vitii in illos incidat, aequè minus proficere, quam illum, qui nec primoribus labris hanc medicinae partem degustaverit. Animam enim esse, quae partes corporis componat, quae mirabilem illam texturam moliat, quae, si quid fractum, si labefactatum sit, restituat & medeatur, frustra medico succurrente. Quum itaque in animae potestate haec omnia sint reposita, nihil ex anatomia commodi in praxin medicam redundaret.

4. Enarratis igitur his argumentis, quae contra anatomiam adferunt, propositi nostri ratio exigit, ut discussis illis, anatomiae dignitatem atque amplitudinem ab illorum objectionibus vindicemus. Ac primum quidem paucis dicendum videtur, quid per naturam veterum intelligi debeat. Majores utique nostri, alioquin sapientissimi, licet & ingenio & longo rerum usu plurimum valerent, rationali tamen medicina & naturali scientia, ne dicam, inferiores nostro saeculo erant, sed illa plane destituti salutarem artem solis effectibus & experimentis metiebantur. Inde est, quod illis temporibus medicina rudis tradetur, quia nobilissima doctrina de corporum natura & motu sepulta quasi jacebat, chymia vero plane ignorabatur, ut ideo quoque venia tribuenda sit illius saeculi simplicitati, quae tot somnia & inaudita no-

mina nobis reliquit. Varia enim jaecitabant entia activa, materiam passivam inertem statuebant, & corpus nostrum ceu merum instrumentum intuebantur. Animam porro vel naturam ens incorporeum & sapiens, ratione instructum, omniumque, quibus corpus valet, motuum rectorem ac principem credebant. Quod fundamentum cum adfererent, necessarium omnino erat, ut, cum principium incognitum obscurumque esset, omnis etiam scientia ac demonstratio collaberetur. Ex qua autem re quantum detrimenti ars medica ceperit & quantum è contrario praxeos incrementum inde impeditum fuerit, cum praesentis saeculi luce non obscurum esse potest, tum à nobis infra explicabitur. Etenim quum ex principio incognito nec virtutes nec effectus rerum corporearum, quae mirabili tamen modo in nos agunt, explicari atque demonstrari potuerint, facile adparet, quantae illis temporibus incubuerint tenebrae, quoniam in medicis rebus exponendis maximam partem ad ignotam naturam, ceu asylum unicum confugiebant. Majori ergo jure nostro saeculo gratulandum puto, quo saniori philosophia edocti sumus, omne corpus, qualecunque etiam sit, in actione esse, & per motum nihil aliud, quam *exsuperantiam* actionis virtutisque in duobus corporibus significari. Duo enim corpora dum activa illa vi, quae ab initio à summo conditore ipsis indita & impressa est, sibi invicem resistunt, alterumque alteri cedit, motus existit, & ubi aequalis harum actionum vis contigerit, quies oritur; imo ipsi motus, qui singulari ordine, mensura, proportionem atque tempore fiunt, non aliunde quam ex sola corporum inter se agentium resistentiumque combinatione & situ eveniunt. Mirabile enim est, quam eximii effectus vel ex solo corporum situ producantur. Cujus quidem rei simplex exemplum esse potest vectis, nam ad ordinatos corporum motus non opus est incorporeo externo principio, multo minus prudentia quadam naturae, quae movendi instructa sit facultate; sed ipsis etiam corporibus potentia data est motrix, quae pro illorum dispositione & augeri & imminui potest.

5. Quum proinde in rebus arte factis tam mirabiles tamque accurati effectus ex sola corporum actione profluant, multo magis id accidat necesse est in illis machinis, inque absolutissimo illo opere, quod summus ille artifex Deus composuit. Hominis enim corpus, quod divina effinxit manus, tanto nobilius tantoque excellentius est certis machinis, quae humana solertia molitur, quanto excelsior augustiorque homine Deus, benignissimus ejus conditor celebratur. Hoc itaque corpus, quum compendium quasi sit omnis artificii, pulcherrima ratione constructum, omnibus fere legibus mechanicis, staticis, hydraulicis, opticis respondet, adeoque omnes motuum species cum admiratione sui repraesentat. Eo magis hinc adnendum est medico, ut ejusdem machinae texturam diligentissime scrutetur & exploratam habeat rationem motuum, qui in corpore excitantur, & quos aër, cibi & medicamenta corpori conciliant. Quae ubi recte quis comprehenderit, naturae indoles latere minus poterit, atque ex attentiore corporis contemplatione facile adparebit, illam vitae ac fanitatis esse autorem eandemque medicamentorum operationes ceterosque motus moderari. Atque si hoc modo natura, uti etiam debet, intelligitur, firmissimum habemus munimentum, cui tota medicina recte insistit, aliorum somniis erroribusque non commovenda. Neque hac ratione ignorare potest medicus, quid benignior, quid pejor sit natura, quid vita, quid sanitas & morbus, quid ipsa denique mors denotet, neque fallere illum potest curationis & virtutis in medicamentis ratio.

6. Quodsi igitur natura, uti veteribus dicere placuit, morborum *medicatrix* adpellatur, nihil aliud intelligitur, quam ipsum corpus, singulari artificio ad certos motus edendos constructum. Quippe hoc solidarum fluidarumque partium, ex quibus constat, beneficio nec non virtute elementorum ciborumque motus promptos ac ordinatos edit, qui non vitam solam tuentur, sed & ad tollendas morborum causas plurimum conferunt. Quare ut hæc pulcherrima corporis fabrica recte cognoscatur, ut abditæ etiam partes oculis pateant, anatomix diligentissime opera danda est, eo quod hæc unice adcuratam corporis nostri tradit cognitionem. Deinceps corporis machina nec subsistere nec vitam tueri morbosque elidere potest, nisi externis præsiidiis, aëre, victu remediisque sustineatur; unde facile quisque videre potest, medicinæ necessitatem exinde comprobari. Hæc enim succurrit naturæ, hæc motus, quos molitur, considerat & moderatur, hæc quid secundam, quid adversam valetudinem præstet, perspicit, eademque providet, ut quæ inimica corpori sunt, evitentur. Et licet multi dentur, qui prosperam ac diuturnam vitam etiam sine medicis consecuti sunt, minime tamen sine medicina i. e. sine remediis, sine victu commodo ad eandem pervenerunt. Quo minus quis eo insolentix processerit, ut temere affirmare audeat, solam naturam sufficere morborum curæ, cum illa sola in pluribus acutis & chronicis morbis curandis parum vel nihil valeat, nisi medici manu adjuvetur. Minime itaque sufficit, hunc longo rerum usu variisque experimentis eruditum esse, vel ea, quæ profint vel noceant, quibus signis morbus infestet vel desinat scire, sed oportet eum quoque rationes expendere, & his innixum morbos judicare, eorum eventus prædicere, & curationem prudenter instituere. Quam quidem viam si quis ingreditur, hanc curationis methodum si servat, in arduo sanitatis negotio adeo non erraverit, ut salutarem ægrotis opem non sit præstiturus. Satis enim constat, experientiam nudam & medico & ægrotanti sæpius imponere, ideoque sub tanto causarum concursu rationem adhibere præstat, ut vera causa inveniatur. Inde medicina emergit rationalis, quæ philosophiæ præceptis rite instructa longe anteponenda est ei, quæ angustis experientix terminis circumscribitur. Rectæ vero rationi superstructa medicina non ea solum, quæ in re medica occurrunt phænomena, ex certis principiis deducit approbatque, sed ipsam etiam praxin adjuvat, saluberrima ministrans præcepta, tutam ac facilem medendi viam inveniendi. Equidem non negandum, medicinam experientix suos debere natales, solidæ tamen rationi acceptum ferendum est, quod eadem liberalius jam floreat, & ad hoc, in quo jam constituta est, fastigium emerferit. Ad hanc autem medicinam rationalem ut perveniamus, anatomia summe est necessaria, sine cuius præsidio frustra illam nobis pollicemur.

7. Equidem anatomia directe & immediate ægrotos non curat, plurimum tamen confert, ut curatio tutius jucundiusque perficiatur. Quam in rem eleganter scribit CORNEL. CELSUS in præfatione p. 13. *Quam, inquit, multa sint, ad ipsas artes proprie non pertinentia, tamen eas adjuvant, excitando ingenium artificis.* Itaque ista quoque rerum naturæ contemplatio, quamvis non faciat medicum, aptiorem tamen medicinæ reddit. Pari ratione nec anatomia medicum constituit, eundem tamen ornat & adjuvat, & salubribus præceptis, quibus in praxi egregie proficere potest, instruit. Nam ad errores in praxi detegendos, ad adplicanda remedia, & ad prudentiorem prognosin nihil utilius commodiusque est ipsa anatomia. Quæ omnia in nostra dissertatione uberius exsequemur.

8. Placet vero initium capere à divino illo cete-

risque omnibus longe præstantiori invento, sanguinis circulo. Ex quo divino munere detecto quanta medicinæ lux adfulserit, & quam atroces inde tenebræ ab hac arte depulsæ fuerint, non difficile est judicare. Nam cum ex adcuratiori corporis inspectione pateat, sanguinem ceterosque humores partium solidarum muscutorumque pulsu ac tono continuoque per innumeros tubulos motu circumvolvi, manifesto inde, quid vita sit, edocemur. Ex quo simul intelligi poterit anatomix præstantia, si perpendere velimus, quantum veteres, qui utilissimæ hujus artis culturam neglexerunt, in definienda vita adeo hallucinati fuerint, ita prorsus, ut mera sibi somnia & nugæ de re tam necessaria imaginati fuerint; unde est, quod causam vitæ, animæ vel naturæ actionem in corpus, spiritum vitalem, cordis flammulam, calidum innatum, quatuor humorum temperiem, spiritumque insitum & influum esse statuerint. Quæ figmenta cum nullius sint usus, uno quasi ictu conciderunt, sanguinis circulo in lucem prolato, qui quamdiu corpus perenni flumine perluit, ipso sensu teste, vita adesse dicitur. Hujus quippe salutaris motus officium est, ut corpus corruptioni alioquin valde opportunum, salvum & ab omni labe integrum præstet. Neque enim ignorare oportet, vitam corporis nostri proprie ac formaliter non esse durationem seu conservationem mixti, quoniam, si hac ratione vita sustineretur, lapidi vel pani etiam, quamdiu huic mixtio sui constaret, vita tribui posset; sed vita rectius est perennis actio & motus, cujus præcipuus effectus est, ut à tetra corruptione corpus præservetur. Scilicet, uti putredo nihil aliud est, quam motus intestinus ab externo principio excitatus mixturamque partium destruens, ita etiam nulla re perinde inhibetur, quam motu intrinseco, qui à progressivo promovetur. Isque motus circumfuso aëri, externæque ejus in intimam sanguinis mixtionem ac crasin actioni mirifice resistit, siquidem corpus statim ejus injuriis patet, simulac fluidæ partes illius conquiescunt. Incredibile vero est, quantum utilitatis egregium hoc inventum, ut rei medicæ universæ, ita maxime pathologiæ & therapix attulerit. Quippe ex hoc discimus, nihil vitæ esse infestius, nihilque valetudinem magis adfligere, quam ea, quæ hunc salutarem sanguinis motum impedire, vel turbare ullo modo valent. Unde haud sollicitè circumspicienda causa est, cur frigus vehementius corpori adeo sit inimicum, cur frigidus potus corpori æstu soluto ingestus spiritum sæpius elidat, hominemque exanimet. Patet etiam exinde, cur concreciones polyposæ intra oscula vasorum cordis pulmonumque hærentes, sanguinis iter intercludendo, repentina inopinataque morte suffocent. Ex eodem sanguinis motu ratio nobis constat, cur venena corpori tam sint infesta, quod nostro quidem judicio vix alia ratione accidit, quam quod spasmodorum atrocitate vasa constricta perennem sanguinis circulum intercipient. Cognoscimus porro inde, omnia acida, viscida & alimentorum copiam vitæ corporique esse infensam, quod vitalem corporis succum crassum vel copiosum reddendo, liberum ejus motum cum præsentī valetudinis damno remorantur. Quæ cum ita sint, facile nobis inde optima valetudinis vitæque prorogandæ præcepta elicere possumus; quippe is, qui vitam diuturnam prosperamque adpetit, hujus inventi beneficio facile videt, in eo sibi elaborandum maxime esse, ut perennis ille sanguinis motus salvus incolumisque conservetur. Unde vitanda sunt, quæ sanguinem coagulant, aut quæ eundem, ut propter abundantiam minus recte vasa transire possit, nimium augent. Sicut contra illa unice commendari debent, quæ vitalem hunc laticem fluidum reddunt, uti sunt salia volatilia, a-

romatica, infusa herbarum balsamicarum calida, quæ motum debitum corporis optime tuentur. Imo exinde iudicatu facillimum est, sanguinem, si nimium adfluat, esse imminuendum, adeoque sanguinis missionem ceu summum præsidium, merito hoc fine adhiberi.

9. Deinceps quoque ex anatomia, ceu fonte uberissimo, facile causam haurimus, cur omnibus mors certa atque necessaria, nec ullis evitanda remediis impendeat. Vita nempe, quæ perpetuus fluidorum motus est, non temperie tantum fluidorum absolvi- tur, sed solidarum maxime motu velut fultura quadam sustinetur. Jam ubi adpropinquat senectus, fibræ motrices sensim indurescunt, crassæque & immobiles fiunt, pori occluduntur, & vasa opplentur; unde fibræ, tenuissimo nervorum fluido parum recte animantur, rigida minusque flexibiles & sanguini per corpus propellendo fiunt ineptæ. Accedit, quod spiraculis in cute obstructis, excretiones retardentur, sordibusque intra corpus accumulatæ cacochymia primum, mox ipsa mors inevitabili sorte consequatur. Quod dum adcuratius consideramus, facile nobis vitam diuturnam consequendi suppetit ratio, optimeque perspicitur, eo præcipue adnitendum esse, ut succi corporis subtiles tenuesque semper maneant, ne fibræ inde crassitudinem & rigiditatem induant, porique obdurentur. Cui fini mirifice inservit motus & exercitatio corporis, qua fluida corporis nostri egregie conservantur. Referri huc porro debet aer subtilis & temperatus, aqua levis & tenuis, item vinum tenuissimum ac temperatum, victus, qui non multum terrestris compactæque substantiæ habet, levis & facilis animique tranquillitas. Hæc ubi diligenter custodiuntur, ubi ad has leges valetudo componitur, non potest non illa protrahi diutissime. Neque eodem fine omittenda est crebrior venarum sectio, quæ quantum ad vitam producendam valeat, ex hoc invento identidem comprobatur. Satis enim constat, hoc remedio sanguini, qui copia sua redundat, rectum per corpus cursum restitui, cum alioquin propter abundantiam crassior factus, suum per corpus iter tardius explicet. Neque verendum est, ut hoc remedio vitalis ille fons exhauriatur, siquidem compertum est, veteres non ad uncias, ut hodie fieri solet, sed ad integras libras sanguinem sine ulla singulari noxa detraxisse, Galeno id bene adnotante.

10. Anatomia porro beneficio exploratissima nobis est formalis mortis causa, quæ, utcumque etiam è vita tollat hominem, intra quatuor omnino classes concluditur. Adest enim vel inflammatio partium nobiliorum, uti meningum, pulmonum, ventriculi, ac intestinorum; vel sanguis aut serum extra vasa secessit, uti in cerebro, thorace, & abdomine fieri solet. Vel etiam viscus porro aliquod corruptum est, vel polypus intra cordis pulmonumque vasa hærens, liberiori sanguinis cursui obicem ponendo, hominem strangulavit. Hisce quatuor causis omnes omnis temporis homines extincti sunt, & quotquot eorum incideris, unam ex his semper reperies. Et inflammatio quidem in acutis, corruptio viscerum & feri sanguinisve extra vasa secessio in chronicis morbis mortem adfert, polypus vero repentina mortis causa plerumque observatur. Quæ quidem causæ & illud demonstrant, mortem nihil aliud, quam sanguinis circuli esse eversionem. Et ex eadem contemplatione sequitur, illum, qui mortem præcavere tentat, eo respicere oportere, ne partes corporis internæ inflamentur, ne labem & obstructionem viscera contrahant & sanguis vel serum extra vasa sua delabatur.

11. Idem fundamentum, quo nihil in re medica præstantius utiliusque est, clarissime causas sanitatis explicat & abunde satis comprobatur, illam haud aliunde, quam ex libero & moderato sanguinis humorum-

que circuitu & iusta excretionum progressionem derivandam esse. Ubi enim sanguis tranquillo placidoque & disposito cursu per corpus fertur, tunc non modo diversa illa elementa invicem recte miscentur, sed inutilia etiam, & quæ tam copia quam qualitate nocent, extra corpus ejiciuntur. Ita omnes actiones secundum naturæ ordinem & regulam procedunt, ita sanitas & ejus vigor conservatur. Errant proinde, qui vitam in excretionibus versari adserunt, quod vita, nulla excretionum habita ratione potest definire, imo experimentis constat, plurimos mortalium sub ipsis excretionibus interire. Quapropter rectius adfirmamus, sanitatem à sanguinis circulo dependere, qui ubi valet, & ordinate corpus transit, excretionibus etiam illibatas præstat, quæ contra, languescente illo, vel per morbum imminuto intercipiuntur. Neque enim quisquam morbus est, ubi excretionibus non adfligantur; imo sæpe ægros non tam his impeditis quam nimium procedentibus decedere videmus, uti quidem in acutis passionibus, in hæctica, dysenteria similisque generis morbis observare licet. Atque ideo is medicus officio suo convenientem se gerit, qui in curatione morbi non sanguinis tantum circulum, sed excretionibus etiam, præsertim transpirationem intuetur.

12. Quum vero fluida corporis nostri sæpius de die corpus transeant, & natura ubique congrua excernendis sordibus emunctoria constituerit, ut eadem aperta semper ferventur, providere oportet. Ita enim sanguis subtilis, purus ac temperatus redditur, & quæ fomitem morborum præbere poterant, ex corpore eliminantur. Inter hæc autem emunctoria, quorum plura in corpore sunt obvia, primas tenet cutis, & quæ hujus ope per invisibilia foramina, ut Celsus inquit, perficitur transpiratio. Hæc quid corpori præstet, quantumque conservandæ valetudini inserviat, vel exinde conjicere licet, quod per hanc plures cum mole tum virulenta qualitate noxiæ sordes exeant, quam per reliquas excretiones omnes. Ex quo manifestum est, nihil æque morbis occasionem præbere, quam si excretionibus supprimuntur, maximeque sordium exspiratio inhibetur. Unde recte curat, qui, cum origo causæ ipsum non fallat, excretionibus restituit, & obstructa emunctoria, malignis sordibus promptum facilemque exitum moliendo, recludit. Longe vero optimum est, motu auctiore id perficere, qui cum in acutis passionibus, præsertim febribus præsens sit, facile ratio patet, cur, qui ejusmodi malis detinentur, solius naturæ beneficio, medico parum admodum juvante, plerumque sanescant. Intensior enim ille motus causam morbi expellit, emunctoria referat, humoresque resolvit, & intra breve spatium valetudinem reddit. Quod aliter evenit in longis morbis, in quibus dum tarde cunctanterque motus fiant, arte excitandi augendique sunt, ut naturæ imbecillitati hoc modo succurratur. Ideoque in ejusmodi malis juvant sudorifera, martialia, amara, salina, purgantia, item thermæ & acidulæ; quorum remediorum virtus unice exinde deducenda est, quod fortiori motu obstructions solvant, & excretionibus restitutis fluida in ordinem ac numeros redigant. Par ratio est, cur motus, cur aquarum salubrium thermarumque potus, item aeris cælique clementia egregie diuturnos morbos allevant, plurimumque in iis evellendis valeant.

13. At cum nobilissimum hoc inventum veteres ignoraverint, minus mirari debemus, varios eos in praxi errores commisisse. Ut alia omittamus, notum omnino est, quam solliciti, imo religiosi fuerint in venis incidendis, falso persuasi, hanc vel illam venam proprie capiti, cordi, hepatis vel certæ parti esse consecratam, eamque in hujus partis morbo pertun-

di oportere. Quæ somnia, procedente tempore, quo anatomia subtilius cœpit excoli, plane exspirarunt; siquidem edocti sumus, duplicem tantum V. S. nis usum, evacuatorium atque derivatorium celebrari; quorum ille in adfluentia sanguinis adhiberi debet, parumque refert, quam venam aperias: in hoc vero, seu derivatorio sufficit, in superiore vel inferiore corporis parte, prout morbi ratio exigit, sanguinem educere.

14. Ex anatomia quoque constat, quatuor illos humores eorumque intemperies ceu morborum causas falso à veteribus fuisse propositas. Illi enim humores nusquam in corpore adparent, adeoque ruat necesse est illorum medicina, quam in tam lubrico fundamento constituerunt. Inde enim est, quod illorum medicamenta maxima ex parte purgantibus validis absolventur, dum purgantia, uti vocabant *electiva* sibi fingeant, ex quibus aliud bilem, aliud melancholiam vel pituitam educere arbitrabantur. Ac licet facile concedamus, ex his etiam remediis, uti in ceteris alterum alteri præstare, & in certis morbis certisque subjectis elidendæ morbi causæ magis convenire, sicut hac de re latius olim egi in *dissertatione de medicamentis specificis*, minus tamen probanda est illorum sententia, quod hæc sanguinis circulo, ex quo unice vitæ morborumque ratio fluit, manifesto adversatur. Nam quod validius fortiusque purgat, illud omnes humores, quicunque corpori insident, seu visceri seu biliosi sint, ejicit, unde & in eo peccabant, quod tam frequens ipsis fuerit valentissimorum purgantium usus. Galeni enim, maximeque Hippocratis ætate non locus erat clementioribus laxantibus, sed helleboro, colocynthide, scammonio & elaterio similisque commatis purgantibus ægri torquebantur. Quæ tamen medicamenta, experientia teste, corpori nostro sunt perniciosissima, tantum abest, ut singularem opem adferant. Hæc enim intestinorum tonum ac robur, quod ad tuendam vitam summe necessarium est, solvunt; spasmodicis membranarum constrictionibus vires infringunt, bilis balsamum evacuant, & humorem, qui per cutim secedere debebat, ab ambitu corporis ad centrum provocando, salutare excretionum opus interturbant. Neque alia hujus erroris causa fuit, quam anatomix ignoratio & contemptus, quæ postquam suas eluctata est tenebras, & hos errores denudat, & ut ab iis caveamus, saluberrime nos instruit.

15. Dein, quid ingens illa medicamentorum copia, quæ in immensam prope sylvam excrevit, aliud demonstrat, quam intempestivum in praxi studium & vanam industriam? Quid enim volunt tot cordialia, hepatica, splenetica, uterina, antepileptica, anthelmintica singulisque corporis partibus dicata remedia, nisi ut aperte contestentur, medicum, cum in tanta remediorum adfluentia versetur, ne paucorum quidem vires satis intellexisse. Paucis enim selectisque auxiliis curantur morbi, quæ dum ignorarunt veteres, necessario tantam remediorum molem, tamque ineptas, inutiles & contrarias confarcinarunt species. Accedebat, quod eorum ævo generosa remedia nondum innotuerint, ut sunt salia volatilia, salia neutra, rectus anodynorum usus, item quæ ex marte, antimonio & mercurio adparantur medicamenta, unde & chronicis malis expugnandis parum apti erant, aut quid in ejusmodi morbis auxilii adferebant, id victu, abstinentia, sanguinis missione, frictionibus, balneis, exercitationibus, aëris mutatione, ferro denique & igne præstabant. Neque mediocriter curam juvabat ipsa cœli ratio, sub quo degebant prisca medici; quippe in locis illis calidis, ut in Græcia & Italia non tam altis radicibus defixi morbi inhærebant, adeoque vel mediocri accedente cura evincebantur. In acutis vero

passionibus ut ubique plus natura, quam ars sibi vindicat, ita nec dubium est, quin apud veteres ejusdem beneficio cœlique & aëris clementia celeres isti morbi fuerint curati. Quod itaque non simili remediorum segete nos indigeamus, quodque facilis, tuta paucisque auxiliis curandi ratio nobis contigerit, anatomix in acceptis ferendum esse judicamus. Nam cum in omni valetudinis genere id maxime medicus debeat curare, ut proportio ad vasa & vires, temperiesque & mixtio humorum conservetur, & ut iidem in suo circulo retineantur, excretionibus rite procedentibus; facile conjicere licet, quam pauca ad hoc ipsum perficiendum requirantur remedia.

16. Proposita igitur jam sanguinis circuli in praxi utilitate, pergimus ad ceterarum partium considerationem, quam illæ in praxi usum promittant, explicaturi. Sistemus vero primum velamentum corporis nostri cutem, cujus texturam si ex anatomia penitus inspicimus, vulgi circa eandem errores facile evitare & egregie inde in curatione adjuvari possumus. Desinunt in cutem varia vasa, tendines & nervi, quibus intertextæ sunt minimæ glandulæ seu villosa corpuscula, eo fine, ut serum crassum, falsum agilissimumque aëreum principium inde separetur. Quam structuram si practicus recte intelligit, ex facili videre potest, per cutim, quæ tenuissimis partibus excernendis constituta est, colluviem viscidam & biliosam, in primis viis residentem inique prorsus expurgari. Ubique igitur ejusmodi humoribus ventriculus & intestina turgent, uti quidem in febribus intermittentibus, in quartana, in hysterico & hypochondriaco morbo accidere solet, sedulo fugere oportet medicum calidiora, & quæ sudorem fortius provocant medicamenta. Hæc enim alvum, quæ tamen maxime moveri debebat, omnino non movent, ut eandem potius adstringant, sordium colluviem à centro ad totum ambitum corporis pellendo eademque cum sanguine commiscendo. Idem pariter summa cum cura vitandum est, si bilis ex subita iracundia suos egressa alveos ventriculum vel intestina inundavit, quippe si calidioribus commota ad sanguinem transit, veneni naturam atque noxas æmulatur, cum præsentis ægrotantis discrimine. In tali itaque casu recte suo defungitur officio medicus, qui molem istam humorum ventriculo & intestinis insidentem per congrua loca lenibusque laxantibus evacuare satagit.

17. Minus contra hanc evacuandi rationem congruere, cum salinæ, causticæ & subtiles sordes sanguini & lymphæ sunt admixtæ, eadem anatomica observatione erudimur. Hisce enim per cutim parari debet exitus, ideoque curandum, ut pori conveniente calore & remediis aperiantur. Idque in omnibus morbis, ubi ejusmodi sordes peccant, animadvertere oportet, quales sunt erysipelas, scabies, purpura, petechiæ, variolæ, morbilli, arthritis, podagra &c. præsertim si exanthemata retro in corpus abierunt. Quæ omnia confirmant, medico, qui minister naturæ esse debet, in hoc addiscendo nihil melius quam anatomiam opitulari. Quoniam autem cutis propter nervos ac tendines, qui in illam terminantur, mollissimi exquisitissimique est sensus adeoque facillime constringitur, practico exinde illud succurret, vitanda esse diligentissime, quæ poros stringunt & salutarem corporis transpirationem impediunt. Idque inprimis observare oportet, ubi impuris salsisque sordibus sanguis abundat, sollicitèque providendum est, ne acris & noxia materia, quæ per cutem exspirare debebat, imprudenter intra corpus & ad sanguinem retro pellatur. Quo fine abstinendum est à frigidis, ab unguentis, emplastris, humidis, ceterisque quæ cutem contrahunt omnibus: quod observare maxime convenit in exanthematicis malis, in scabie, arthritide, tinea

tinea capitis, lepra, erysipelate, item in sudoribus criticis, quia metus est, ne incauto talium rerum usu in perniciem aegrotum precipitemus.

18. Proxima cuti pinguedo est, à cujus contemplatione non sine fructu artem exercens dimittetur. Nam hæc cum alias partes liberalius, alias parcius investiat, exquisitam tradit rationem, qua externa remedia seu topica, ut vocant, recte adplicari debeant. Ita v. g. parum is adlevabit ischiadicos dolores, qui natibus vel femori auxilia externa admovet, quoniam ob abundantiam adipis muscutorumque crassitudinem medicamenti vis adfectam partem minus penetrare valet. Neque melius fecerit, qui stomachi morbos repressurus emplastra stomachica abdomini vel sterno imponit, quod hæc remedia ob pinguedinem, qua abdomen turget, parum ibi operantur. Illud proinde ex anatomicis præceptis tenere oportet, adplicandis topicis eas convenire corporis partes, quæ minus robustioribus musculis & nimia pinguedine conteguntur. Quare optima sunt nervea & tendinosa loca, uti plantæ pedum, volæ carpique manuum, tempora, nucha, commodumque etiam est, sub axillis, sub genibus ejusmodi remedia imponere, unde mirificam illorum vim per totum corpus experimur. Ubi itaque in æstu ac fervore nimio refrigerandum corpus est, præstat his partibus, quas recensuimus, acidula clementerque reprimentia admovere, quorum usu corpus egregie refocillatur. Idem fieri oportet in compescendis febrium spasmodis, quo in casu roborantia & subadstringentia emplastra nuchæ temporibusque & manuum carpi non sine fructu adplicantur. At ubi confirmandum est nervosum genus, juvat idemtidem nucham, suturas capitis & tempora blandis balsamicis & corroborantibus fovere. Ubi vero torpens nervorum vis excitanda, vel viscosus humor intra partem aliquam defixus avertendus est, vesicatoriis nuchæ adplicatis optime id perficitur. In lue porro venerea & scabie, quæ mala opportuna sæpe salivatione tolluntur, optime tutissimeque movetur saliva, si sub axillis ejusmodi remedia imponuntur.

19. Pari felicitate ac prudentia in adhibendis topicis uti poterit medicus, si accuratiorem umbilici notitiam sibi adquisiverit. Notum quippe est, circum umbilicum, qui per se sensibilissimus est, lineam albam poni, in qua concurrunt tendines eximii, ut clare inde eluceat, hanc partem corporis subtilissimo omnino sensu præditam esse, ideoque cum toto corpore conspirare. Memorabile enim est, omnes partes corporis nervosas, si validius irritantur, vel alio modo adficiuntur, totum simul corpus, ob nervos mutuo perpetuoque nexu per universum corpus dispersos, commovere. Quare non mirandum est, remedia umbilico admota, virtutem suam non intra spatium illud continere, sed eandem in remotissimas etiam partes diffundere, eximiis per umbilicum nervis discurrentibus. Ita vel domestico experimento constat, butyrum insulsum avellanæ magnitudine umbilico inditum infantibus alvum movere. Imo quoque si vermes intestina vexant, inunctus felle taurino inspissato cum unguento de arthanita & oleo colocynthidis mixto umbilicus intestina ad vermes ejiciendos stimulat. In colica convulsiva, gravissimo alioquin malo, mirifice sedantur atrocissimi dolores, si aliquot zibethi granis umbilicus illinitur. Neque minus levamenti expectandum est in urinæ suppressione, si umbilicus oleo terebinthinæ diligenter foveatur, quippe urina inde mirifice cietur, cum arteriæ umbilici vesicæ lateribus jungantur.

20. Facilius autem partium interiorum morbi ac curationes in notitiam venient, si quis earum sedes atque situs recte consideraverit. Scimus igitur, ventriculum maxima ex parte ad sinistrum latus inclinare, &

rificiumque illius superius spinæ dorsi adnecti, cum inferius contra cordis scrobiculo contegatur. Ex quo manifesto adferitur, acutissimum illum dolorem, qui perperam à corde adpellationem traxit, ex ventriculo omnino provenire, & cardialgiæ sedem non in sinistra ventriculi parte, quæ male illi dolori adsignatur, sed in dextra potius residere. Præter ipsum enim situm doloris, qui sub scrobiculo cordis urit, vel exinde etiam id adparet, quod bilis, quæ frequenter hunc adfectum excitat, huic quam sinistro orificio vicinior sit, unde etiam ii, qui hepatis obstructione laborant, frequentissime hoc malo detorquentur. Jam cum ipse dolor ad dorsum usque pervagetur, necesse est, ut sinistrum etiam osculum simul patiatur. Ostendit igitur anatomia, emplastra, externa spiritiosa, balsamica & quæ ventriculo corroborando sedandisque doloribus inserviunt, scrobiculo cordis & sinistro lateri sub costis spuriiis esse adplicanda. Perspicimus etiam inde, optime hunc adfectum levari posse ab iis remediis, quæ humorum acredinem temperant, & flatus bene discutunt. Quoniam porro ventriculus, uti ex anatomia constat, sub diaphragmate situs est, sæpius accidit, ut à sola ejus inflatione summa excitetur anxietas spirandique difficultas; quo in casu ignarus anatomie medicus vehementer erraverit, si pectoralia dulcia & emollientia adhibet, in pulmonibus causam mali positurus, sed removenda potius est causa, quæ est crassa pituita & inflatio, spasmique ventriculi sunt tollendi, quod leni sæpe emetico laxantibusque optime peragitur.

21. Coli situs & sinuosa ejus textura, quam ex anatomie contemptu ignorabant veteres, & ipsos & plurimos ex recentioribus ita fefellit, ut tumores maxime sinistri lateris, qui ex flatibus & scybalis intra flexuras coli detentis in malo hypochondriaco nascuntur, ex lienis vitio arcefferent. Hi si didicerint, sub diaphragmate jacere lienem, eundemque propiorem esse spinæ, facile tam gravem errorem evitassent. Notum enim est, hypochondriorum dolores, ardores, tumoresque sub costis spuriiis, maxime in sinistro latere adparere. Accedit, quod lien minore sensu polleat, & propter magnitudinem, qua molestus plerumque est, gravativo fixoque magis dolore vexet, cum in hypochondriaco malo acutior quidem dolor, sed qui citius transit, omnino observetur. Quæ cum ita sint, clare patet, in curatione illius mali clysteres carminativos, & qui acrimoniam humorum diluunt, nerveasque coli membranas deliniunt, ceteris omnibus remediis merito anteferri. Quo loco nec prætereunda sunt emplastra carminativa, quæ sinistro lateri imposita, tonum coli roborando, eximium in hoc malo præstant adlevamentum.

22. Ingenium medicorum, qui paulo rudiores in anatomia sunt, aliud interdum malum torquet, quod ex colo idemtidem proficiscitur. Quandoque enim accidit, ut in dextro latere circa ilii costam subitus & atrox dolor cum contumaci alvi adstrictione invadat. Cujus mali causa inde petenda est, quod coli ibi principium situm sit, idque eodem loco ex satis robustis membranarum atque ligamentis constet, ut eo promptius stercorea sursum protrudere possit. Ubi vero imbecillioribus personis ex morbo graviore tonus ac robur hujus intestini imminutum fuerit, flatus & excrementa ibi retenta illud distendunt, tumorem mentiuntur, summisque cruciatibus aegrotum conficiunt. Causa igitur mali demonstrat, unice hic auxilio esse cataplasmata carminativa ex feminibus & herbis carminativis parata & aptissimum quoque esse, clysteribus oleosis intestina eluere, quod hi, dum coli principium subeunt, sordes egregie emolliunt & foras ejiciunt.

23. Gravissimi sæpe dolores circa umbilicum insistant, qui in illo existentes perversè pro colicis à quibus-

dam medicis, qui expertes anatomiae sunt, habentur. Frequens certe hoc malum est, frequentius tamen Hippocratis saeculo, qui saepe hujus, colici autem doloris nunquam meminit. Idque inde accidere videtur; quod coeli beneficio in Graecia haec passio, uti & hypochondriacum malum facile evitari potuit. Proinde in cura valde expedit, hunc intestinorum situm recte perspexisse, quia verendum alioquin est, ne frustra huic morbo medicinam moliamur. Nam cum in colico dolore clysteres omnino convenient, minus tamen in ilii dolore eosdem juvare tanto minus dubitaveris, quanto clarius est, clysteres ultra coli valvulam nunquam pervenire. Quare in hoc adfectu frustra ad clysteres pervenitur, sed conducit potius, externe emplastra & unguenta, interne oleum amygdalarum dulcium cum oleo anisi mixtum adhibere. Recte etiam dantur theriacalia & quae ex castoreo parantur, medicamenta, quoniam hisce spasmodorum ferocitas egregie sedatur.

24. Qui intestini recti situm, & hujus arctissimam cum vesica connexionem tenet, eum non fugere poterit ratio, cur in urinae difficultate, praesertim si a laesione vel calculo accadat, perpetuus tenesmus adsit, & in eodem malo alvus saepe superne delabatur. Reddet idem & facile rationem, cur versa vice in tenesmo vesica ad reddendam continuam urinam stimuletur. Tali itaque in casu probe examinandum est, an vesica, an intestinum rectum laboret, ne, fallente causa, secus cedat curatio. Male enim vesicae admoveantur remedia, si recto intestino malum inhæreretur.

25. Aequè necessarium est vesicae situm perpendere. Posita haec est in ipso sinu sive pelvis superiori parte, jungiturque ossi, quod pubi subest. Haec speciosas copiosasque & carneas fibras ostendit, quarum contractione urina redditur, quae contra, ubi ex nimia humoris copia vesica distenditur, fibrarumque elater relaxatur, ibi supprimitur. Unde in adlevando hoc malo discimus, pubis regioni admovenda esse remedia, quae fibras ad contractionem sollicitant, ut hoc modo urinae fluxus restituatur. Proinde non contemnendae virtutis in hoc malo sunt olea, uti scorponum, juniperi, item allium, cepa tosta ceteraque remedia, quae collapsum vesicae tonum excitant & corroborant.

26. Ad vesicam ureteres feruntur, qui obliquo itinere supra musculos psoas posteriori vesicae parti inferuntur. Hi cum ex fibris musculosis & tendinosi contexti sint, à calculo intra illos desidente acriter irritantur. Quo igitur ab hac etiam anatomica contemplatione doctior recedat medicus, scire omnino licet, vitandum hic esse oleum juniperi, terebinthinæ, balsamum sulphuris & illius generis auxilia, quae pellendo juvant, quoniam in hoc malo relaxare oportet partes spasmò contractas, quo majori commodo ad olea expressa, ut oleum amygdalarum dulcium, nucis moschatae, oleum liliorum albor. scorponum, feminis papav. carvi & cetera transire convenit, quippe haec lumbis & ureterum regioni illinita mirifice dolores confopiant.

27. Ejusdem momenti utilitas exinde ad curandos morbos fluit, quando egregios illos nervorum plexus, varias arterias, venas & tendines consideramus, qui circa dorsalem ultimam & primam lumborum vertebrae mesenterio implicantur. Inde enim facile auguramur, acutum illum dolorem, qui in principio febrium intermittentium in variolis, morbillis, item in passione hysterica ceterisque acutis passionibus adoritur, non à renum calculo derivandum esse, uti plerumque solet, sed à plexibus potius nervosis mesenterii merito deduci. Quippe si hi distenti & vellicati fuerint à flatibus intra intestina haerentibus, vel à sanguine ibi stagnante, dolor in spina dorsali, ger-

manice in *Kreutz* oritur. Periculosissimum olim practicum in extinguendo hoc malo frequenti in usu emplastrum spermatis ranarum cum oleo hyoscyami & camphora habuisse novi. Contra narcoticis adstringentibus remediis, item saturninis emplastris pro auxilio perniciēs aegrotis potest accelerari. Et ejusmodi quoque remedia ad sedandum menstruorum fluxum adhibita eundem non tam cohibuisse, quam cum summa perniciē plane intercepisse, sanguine ad alias partes vi medicaminis inclinata, saepius mihi observare licuit.

28. Descendimus jam ad intimam viscerum fabricam, ut exinde doceamus, quantum lumen facemque praxi anatomia praestet. Ut à pulmonibus igitur initium faciamus, satis liquet, hoc viscus, cum ex meris vasis constructum sit, sanguine mirifice abundare, quippe per hoc innumerabiles vasorum propagines flexu multiplici & tortuoso serpunt, continuo itinere branchia amplectentes. Ipsa quoque arteria pulmonalis, qua ex dextro cordis ventriculo in pulmones sanguis effunditur, majorem amplitudinem refert ipsa aorta. Praeterea pulmonalis vena tot mirabiles ramos per hoc viscus dispergit, ut, si injiciatur liquida cera, insignis vasorum numerus insipientium oculis se offerat. Quod argumento esse potest, eos morbos, qui pulmones male habent, maxime ex sanguinis stagnatione ejusque per hoc viscus motu impedito provenire. Loquuntur id haemoptysis, peripneumonia, pleuritis, phthisis ceterique fere morbi omnes, qui in hoc viscus incidunt. Quibus recte perpendis, evidens est, in pulmonum malis venae sectionem non succurrere solum, sed necessariam omnino esse, & cum ad ipsam curam tum ad praeservationem singularem praestare opem. Atque hinc satis commode cernimus, omnia remedia, quae sanguinem, qui intra hoc viscus colit, solvunt fluidumque reddunt, in pulmonum malis merito praedicari. Inter quae remedia excellunt infusa calida, quae ex herbis balsamicis, & subtile sal nitrosum continentibus, parantur. Perspicuum etiam inde est, in ejusmodi malis nihil infestius nihilque perniciosius esse, quam acida adstringentia, styptica, viscida, & quae sanguinem in cursu suo impediunt, adhibere. Et quoniam pulmonem aspera arteria intrat, eaque interius membrana nervosa circumdatur, hinc necesse est, ut omnia acida & acris in pectoris adfectibus, quippe noxiosissima, sollicite fugiantur. Haec enim non tantum majorem sanguinis copiam alliciunt, quae tamen jam praesto est, sed quod pessimum est, sanguinis etiam motum sistunt.

29. Sequitur, ut hepatis structuram oculis subjiciamus, quod viscus, si ullum aliud, sanguine turgēt, & varia vasa, quorum numerum inire difficile est, ostendit. Imo ipsae glandulae, quae hepar subeunt, nihil aliud sunt, quam innumerae vasorum propagines, quae à vena portae & cava ortae membranaceas cellulas ovalis figurae convolutae efformant, uti probe adnotat vir omni laudis genere abundans *Vieußens in novo vasorum systemate p. 119*. Glandulae enim hepaticae, muscum quasi exprimunt, qui ex variis vasculis varie intertextis & cohaerentibus invicem coagmentatur. Quodsi itaque perpendimus, in hepar maximam sanguinis partem ex liene, omento, ventriculo ceterisque intestinis per venam portae exonerari, hanc vero debito carere pulsu, facile intellectu erit, hoc viscus maxime stagnationibus sanguinis & iis malis, quae inde sequuntur, obnoxium esse. Fatiscentem enim sanguinis motum per hoc viscus excipiunt obstructiones vasorum, infarctus atque indurationes, & plurimi ex chronicis malis inde oriuntur. Nam si per venam portae pariter ac per cavam clausum est sanguini iter, repetit viscera, unde exierat, & ad lienem, pancreas, mesenterium ceterasque partes derivatur. Quo fit,

fit, ut, dum ibi residet, vasa distendat, membranasque nerveas irritans varia spasmodica mala & obstructions excitet. Inde lymphæ extra vasa elabitur, inde tumores, hæmorrhoidum fluxus, vomitus cruentus, morbus niger & alia tot malorum agmina adoriuntur. Ut ejusmodi igitur mala à corpore arceantur, ex anatomia prudens medicus sine ullo negotio intelliget, caput curationis hoc esse, ut sanguinis motus per hoc viscus liberior reddatur. Unde auxilio sunt acidulæ, thermæ, aquæ salubres liberalius epotæ, item omnia amara, salina, salia fixa neutra, & ut breviter dicam, omnia, quæ fluidum sanguinem præstant, quæ robur solidis addunt, sanguinisque circulum pristinae integritati restituunt. Cumque sanguis uberiori copia accumulatus, uti sæpe fieri solet, vehementer noceat, non arduum est judicare, sanguinis detractionem malis hujusmodi egregie auxiliari, eo quod hæc sanguinis abundantiam, quæ extendendo vasa infestat & obstructions parit, salutari eventu imminuit.

30. Porro in anatomia hepar diaphragmati adnecti deprehendimus, quod singulari providentia ab autore naturæ eo fine factum est, ut diaphragmatis motu, quod respiratione crebriore fit, hepar simul concussum sanguinis motum imbecilliorum alioquin adaugeat. Quod indicio esse potest, salubrem medicinam in ejusmodi morbis motum esse, & merito exinde gestationem, vectionem, equitationem ceterasque motus species ægrotis imperari. Si quis ulterius etiam perpendit, vasa hæmorrhoidalia, quæ secundum coli longitudinem & rectum intestinum exporriguntur, à trunco venæ portæ quam remotissima esse, omnem vero adscensum ad perpendiculum, uti dicunt, difficulter peragi, non potest non inde intelligi, quod, cum sanguis difficiliter per venam portæ abdominisque viscera transeat, facile stagnet, & ruptione vasorum facta, præsertim si spasmus insuper corripiant, sanguis per venarum ora profundatur. Utile inde est, in ejusmodi adfectu solidas partes roborare, sanguinisque motum per diluentia restituere, omnibus interdictis purgantibus acerbis, aloeticis, & adstringentibus, quippe quæ intestinum rectum irritando, in pejus salutarem alioquin hunc fluxum conjiciunt.

31. Satis jam dictum de hepate, ideoque ad ipsum uterum digredimur, cujus penitior consideratio non parum momenti adfert ad curandas muliebris sexus passiones. Est uterus, anatomia teste, viscus idemdem sanguineum, quod præter musculosam fibrosamque substantiam insigni vasorum multitudine abundat, quæ ex hypogastricis spermaticisque vasis flexuoso itinere in eum deferuntur. Et cum vasa hæc variis nexibus invicem sibi alligentur, atque implicentur, fieri omnino oportet, ut sanguis propter anfractuosos istos canales, præsertim ubi mole nimis turgat, minus expedito circuitu per hanc partem volvatur. Ex his facile adsequi possumus, quod, si sanguis ibi stagnet, minusque recte per tortuosos venarum anfractus revertatur, gravissima omnino mala impendeant. Quippe effusiones inde sanguinis, concretiones sanguineæ viscidæ, quæ polyporum nomine veniunt, & innumera denique mala, velut ex fœcundo matris sinu enascuntur. Inde quoque frequentissimi abortus, hydropes, tumores, cachexiæ, obstructions, & quicquid denique malorum sequiorem sexum affligit, oriuntur.

32. Quæ cum ita sint, liquido affirmant, summo studio ea omnia vitanda esse, quæ sanguinis motum retardant, uti acida, styptica, adstringentia, quia his omnibus hæc mala exasperantur. Usui contra sunt, quæ sanguinem subtilem, floridum tenuemque efficiunt, partesque solidas firmant, ut vitalis humor eo promptius salutari flumine corpus irriget. In quem

censum referenda sunt balnea, salia volatilia oleosa, amara balsamica, quæ medicamenta tempestive prudenterque adhibita, in dictis adfectibus opem certe non contemnendam pollicentur. Neque aliter sentiendum velim de venæ sectione, quæ ab abortu ceterisque malis egregie tuetur.

33. Lienem jam accedimus, ex illius textura, quid anatomie praxin juvet, perlustraturi. Adnotavit jam olim D. SPIGELIUS, variisque experimentis hodieum adseruit anatomicorum, quos nostra ætas tulit, facile princeps RUYSCHIUS, lienem ex copiosissimis vasis arteriis & venis componi. Quod nonnullos ex recentioribus eo adduxit, ut viscus hoc pene vasculosum & quasi sanguineam glandulam existimarent. Nos certe inde facile videmus, lienem aptum esse natum sanguini, qui crassior ad illum accedit, attenuando, ut subtilior longe floridiorque ad hepar deferatur. Quibus cognitis manifestum omnino est, quanta noxa valetudini immineat, si lien obstruitur, si intumescit, & sanguine infarcitur, quia inde sanguis crassus & viscosus ad ceteras partes transit, & dum per angustias vasorum non bene progreditur, ibidem desidet variaque mala machinatur. Ex quo in praxi illud annotari potest, contra ejusmodi mala nihil æque valere, nihil paratius eadem tollere, quam ea remedia, quæ sanguinem fluidum reddunt, vasa recludunt, obstructions referant, tonumque solidorum corroborant. Hisce enim efficitur, ut languens sanguinis motus excitetur, & expeditius iter suum absolvat, & illibato cursu in orbem feratur. Ad discutendum ergo viscosum sanguinem prodest potus salubris aquæ liberalior, & in promptu est ratio, cur thermæ & acidulæ in ejusmodi morbis juvent, omnibusque auxiliis longe sint superiores. Jam cum etiam solidarum partium tono circulatio sanguinis adjuvetur, hic vero tonus distentione vasorum languescat, facile adparet, leniter adstringentia, uti sunt martialia & sic dicta splenetica, in hujusmodi adfectibus non esse negligenda.

34. Inter sanguinea viscera merito & renes numeramus, quorum cognitio in praxi utilissima minus à nobis debet præteriri. In his enim secretio feri falsi à liberiore sanguinis circulatione per hoc viscus unice dependet, quem sanguinis motum per renes celerimum esse duobus maxime compertum est argumentis: Primum enim arteriæ emulgentes non multum distant à corde, in quo systole arteriarum vehementissima est, deinde liquida, quæ intra corpus adsumuntur, brevi spatio per vesicam descendunt. Idque in calido inprimis potu accidit, uti infuso Thee, veronicæ, item cerevisia tenui, ex quorum potu copiosa mox urina effunditur. Quæcunque igitur mala renes vexant, uti sunt exulceratio, inflammatio, calculi dolor, urinæ suppressio vel profluvium, ex sanguinis stagnatione proficiscuntur. Discere inde potest practicus, sanguinis abundantiam, seu plethoram horum malorum causam esse, adeoque iisdem optime sanguinis detractione subveniri. Discimus etiam inde, thermas, acidulas, item infusa calida ex herbis veronicæ, hederæ terrestres, & alia quæ coagulatum sanguinem dissipant, in renum malis convenire.

35. Peculiarem etiam animadversionem desiderant membranaceæ corporis partes, quia multum interest harum structuram, quippe quæ subtilissimo sensu instructæ sunt, à medico intelligi. Sunt vero hæc viscera, quæ ex membranis maxime constant, ventriculus, oesophagus, intestina & vesica. Nempe ex anatomia colligitur, eas partes, quæ ex membranis constructæ sunt, parum sanguinis vehere, easdem vero multis nervorum ramis fibrisque carneis eo fine instructas esse, ut & contrahere & relaxare se possint. Quibus de causis ad spasmos promptæ paratæque sunt, unde san-

guis per pressas ac impeditas venas segnius progrediens facillime flagnat, & pestifera inde mala producit. Videmus enim inflammationes exinde ortas periculofissimas, quoniam partes nerveæ totum genus nervosum propter incredibile illud nervorum commercium simul irritant & adficiunt, ita, ut gravissima symptomata plerumque conjungantur; quippe huic malo adsunt febres acutæ, vigiliæ, cibi fastidium, internarum partium ardor, externarum frigus, inquietudo, convulsiones, animique alienatio. Emergit etiam inde hoc, quod quo nobilius præstantiusque sit membrum, eo gravior ac periculosior existimari debeat inflammatio, tantoque magis adniti, ut mature imbecillitati jacentis succurratur. Cujus doctrinæ ratio demonstrat, ad defendendum ab hoc malo corpus ea expedire remedia, quæ tonum atque vires harum partium tuentur, & nec adstringunt, nec nimis relaxant. Inter quæ laudare juvat nervina, temperata balsamica, item infusa herbarum calida, salia volatilia oleosa, essentias alexipharmacas &c. Opus etiam est, ut sanguis, si abundat, detrahatur, & contra omnia purgantia, vomitoria, styptica, opiata, ex victu acida, viscosa & quæ frigore corpus vexant, removeantur, eo quod ejusmodi res, fibras ad spasmos sollicitando, facile hoc malum provocant.

36. Ut speciatim vero strictimque aliquid de ventriculo dicamus, dignitas & amplitudo hujus visceris exigit. In quo cum cetera tum hoc inprimis memorabile est, quod in superiore cavitate sinistræ partis vasa sanguinea breviter tenuissima membrana muniantur, carnea & villosa exinde tenuissima ibidem existente. Ex quo dilucide liquet, cur in malo hypochondriaco & obstructione lienis hæc vasa copia sanguinis distenta facile rumpantur, & per os copiosum sanguinem effundant. Qui cruentus vomitus familiaris etiam foeminis esse solet, non alia de causa, quam quod sanguis, qui per menstrua exire debebat, retentus & ad ventriculum delatus vasa hæc primum distendat, deinde plane dirumpat. Porro fundus ventriculi & inferius ejus osculum, item duodenum crassa admodum & villosa tunica teguntur, qua nervea, eaque sensibilis tunica investitur, ut ideo minus mirari debeamus, cur hæc intestinorum partes reliquis sensu omnino cedant, cum anatomica demonstratio illas tunica hac destitutas doceat. Quod prudenti quidem naturæ instituto factum esse constat, ne bile vel alimentis, quæ in his partibus maxime morantur, irritata hæc tunica sanitati sit molesta. Unde & in praxi illud intelligi potest, salina purgantia & quæ clementer alvum provocant, nihil in ejusmodi morbis proficere, ubi moles acidæ vel biliosæ materiæ ventriculi fundo, duodeno, jejuni que principio insidet; quippe hæc partes, sensu hebetiore præditæ stimulos ejusmodi remedium non sentiunt. Nihil vero educendis his fordibus, quæ altius inhærent aptius est, quam lenia emetica; etenim hæc sulphure & sale subtili caustico, quo constant, villosam tunicam penetrant, & nerveam irritando, facile spasmodicam in his partibus contractionem efficiunt, unde fordes, quæ intra eas desident, vi remedii eliciuntur.

37. Dum de duodeno loquimur, non inutile fuerit, texturam ejus accuratorem, paucis adhuc satis exploratam, breviter explicare. Imitatur duodenum sacculum & parvum quasi ventriculum refert, ea naturæ providentia, ut bilis ex ductibus suis in hoc intestinum effusa longius ibi morari possit; quo eo melius cum cibis, quod ad sanitatem apprimè necessarium est, commisceatur. Quæ cum ita sint, nihil est dubii, quin ex hoc sacculo magnus morborum fiat proventus, si bilis copiosior ibi hæret, & si præsertim motus languet mora longiore corrupta virulentam naturam induit. Certum omnino est, & urgeo unice, quod

scio, hujus rei animadversionem, in hoc sacculo gravissimorum malorum causas contineri. Quo præcipue intermittentes tertianas ardentesque & biliosas febres, item dysenteriam, diarrhoeam & cardialgiam referre licet. Delitescit etiam ibi materia maligna, quæ in sanguinem postea translata variolas, purpuram, variique generis dolores suscitatur. Ex quo haud temere colligitur, non exoptatius præstantiusque in ejusmodi malis, vel ubi ab iisdem metus est dari præsidium, quam ut leni emetico ille morborum fomes exauriatur, ne evacuatis diligenter fordibus, sanguis iisdem commaculetur. Pertinent huc etiam nitrosa absorbentia abstersiva, quæ proxime in materiam morbi agunt, ejusdemque aculeos infringunt.

38. Nefas foret necessarium corporis nostri humorem, bilem hoc loco præterire, cujus copia in corpore merito miranda est, cum in amplissimo hoc viscere generata per duo itinera intestinis infundatur. Cujus quidem rei non alia causa est, quam quod hic humor summe necessarius sit corpori, dum duodenum & prima intestina subeundo, cum chylo miscetur, contentaque ad exitum proritat. Unde & commode addiscimus, bilem plurimum sanitati conferre, eandemque si corrupta est, aut deficit, varia mala excitare. Quod argumentum cum proluxa dissertatione persecutus sim, supervacuum esse existimo, huic diutius immorari. Illud tamen exinde commode in praxin fluit, omnia, quæ bilis defectum, ejusdemque temperiem & balsamicam amaritudinem restitunt, optima valetudinis tuendæ esse præsidia. Quapropter digna laude sunt amara extracta absynthii, centaury minoris, cardui bened. extracti aloes & hujus censis alia. Sicut enim bilis secundum naturam constituta, intestinorum motum roborat, & excretionem alvi debito motu adjuvat, acidumque & viscidum incidit, & sic à frigidis maxime morbis corpus tuetur; ita nec dubium est, quin amara, adjectis balsamicis, in ejusmodi malis insignem præstent usum. Jam nec ratio deest, cur hæc remedia cachexiæ, hydropi, malo hysterico & hypochondriaco egregie opulentur.

39. Non alienum jam erit, de lymphæ circulo, & quid idem in praxi præstet, paucis disserere. Et primo quidem scire oportet, lympham seu tenuissimam lectissimamque feri partem, ab arteriis separari, per vasa vero lymphatica ad ductum thoracicum & ad cor revehi, ea intentione, ut sufficiente humore sanguis irrigetur. Ex quo illud attendimus, debito fluido corpus inprimis nostrum sustineri. Chymicis enim staticisque constat experimentis, vitalem nostrum fontem unam tantum partem solidi, undecim vero humidi continere. Proinde fluidum omnino præcipuum elementum est sanguinis, quo hic conservatur, quo ita diluitur, ut per angustos vasorum tubulos commode pervolvatur. Neque ignotum inde esse potest, quid fluidum, etiam copiosissime adsumtum ad bonam valetudinem faciat, quod quo levius, quo subtilius & tenuius sanguinisque mixtioni non alienum est, eo præstantius jure habebitur. Quem in finem sagacius examinare aquas debet medicus, ut sciat, quæ in potum maxime dandæ ægris sint, & quæ valetudini conducant. Neque minus inde perspiciet, ad sanguinem crassum resolvendum nihil æque valere, quam humidi abundantiam & hinc in pertinacissimis etiam malis, uti sunt, quæ ex obstructionibus viscerum & sanguinis viscositate nascuntur, acidulas & thermas optimam ferre opem, sed ut majori in copia hauriantur, necesse est.

40. Anatomica lymphæ contemplatio illud etiam docet, lymphæ cursum, quem retro instituit, esse difficillimum. Cui negotio ut solertia naturæ succurreret, vasa lymphatica multis diverticulis instruxit, dum

dum glandulas conglobatas, per quas transeunt vasa lymphatica, fibris nerveis corroboravit, ut earum robore & impulsu tanto promptius lymphæ cursus ad cor peragatur. Inde enim est, quod sollertissimus vasorum lymphaticorum scrutator NUCKIUS recte eas cum siphonibus conferat. Quod si itaque hic motus languescit, si lymphæ viscida sit, vel vires deficient, ipsa lymphæ circa glandulas subsistit, easque obstruit. Ipsa vero lymphæ dum conveniens ipsi motus deest, corrumpitur, vappescit & multis iisque gravibus malis occasionem subministrat, qualia sunt, quæ ex impuritate lymphæ fiunt & deformando atque erodendo cutem se produnt. Inter quæ lepra, herpes, pustulæ, scabies, scorbutus, lues venerea &c. numerantur. Considerata igitur ejusmodi morborum causa, quam sine anatomia nunquam adsequimur, commode medicus admonetur, in iis curandis lymphæ imprimis circuitum esse restituendum, i. e. glandulas obstructas esse aperiendas, ut lymphæ motus augeatur. Ideoque in ejusmodi casu non venæ sectiones, non purgantia, non absorbentia vel salia juvant, sed validiora oportet adhibere, quæ penetrant, quorum textura salva & incolumis manet, & quæ stimulando fibras, vasa & glandulas recludunt. Hæc autem regnum minerale suppeditat, uti sunt sulphura metallorum, antimonialia, mercurialia, quorum mirabilis in glandulas & lymphæ motum vis non satis potest deprædicari.

41. Lymphæ circulus si impeditur, præsertim ab hepate obstructo, vasa lymphatica intumescunt primum, deinde etiam rumpuntur, unde serum extra vasa in copia delatum varias hydropis species producit, quæ pro diversitate partis diversis nominibus insigniuntur. Ex quo manifesto demonstratur, ægre hos morbos curationem admittere: quam difficile enim sit, indurata viscera emollire & disrupta consolidare vasa, non multa indiget probatione.

42. Accedimus jam ad cerebrum nervorumque systema, ut & ex horum consideratione anatomie in praxi usum confirmemus. Et veteres quidem has partes frigidas appellarunt, non quod ipsis non calor suus conflet, sed quia cum aliis membris collatæ pauciore sanguine perluuntur. Sensu porro in se & sua substantia caret cerebrum, unde & facile elucet, minus conferre his partibus sanguinis in corpore paucitatem, sicuti videmus, sub sanguinis missione, sub largiore ejus fluxu animum deficere, manifesto documento, his partibus inde suum quasi pabulum subtrahi. Discimus exinde, calidiora cerebro imprimis esse amica, quia hæc, membranarum robur addendo, circulum sanguinis celeriore promptioreque per cerebrum efficiunt. Quare non laude carent sic dicta cephalica, uti sunt olea destillata ex herbis aromaticis parata, item balsama apoplectica & salia volatilia oleosa. Nam si membranarum cerebri minus roboris inest, facile in iis sanguis detinetur, unde gravissimi adfectus proveniunt. Hujusmodi sunt apoplexia, aphonia, melancholia, visus auditusque difficultas, gutta serena, incubus, insomnia terroris plena, affectus soporosi, sensuumque & motuum imminutio. Quam egregie autem morbos roborantia depellunt, tam infestæ contra cerebrum sunt ejusmodi res, quæ nimiam laxitatem frigus torporemque ipsi inducunt: Quo ex numero sunt vaporosa, aer humidior, copiosior somnus, animi adfectus & imprimis mœstitia, & quæcunque sulphure vaporoso caput feriunt, ut fere opiata, narcotica, nec non acida, refrigerantia fructusque autumnales. Pro sunt contra salia volatilia oleosa balsamica, ex quibus eminet balsamum nostrum liquidum, quod cum ex optimis & genuinis oleis, quæ difficulter alibi reperias, compositum sit, in cerebri nervorumque adfectibus cum mirifico levamine in subsidium vocatur. Pa-

ri ratione inde admonemur, in malis, quæ ex capite nervorumque obstructione proveniunt, uti paralytis est, externa remedia balsamica non tam debilitato membro, quam principio nervorum & nuchæ recte superimponi.

43. Superesset jam ut in amplissimam de nervis doctrinam excurreremus, sed sufficiet, paucis hanc doctrinæ partem attigisse. Certe si quid ex anatomia medicum scire expedit, nervorum mirabilem structuram & consensum accurate teneat necesse est. Nisi enim hac ornatus est notitia, non discernere potest, unde originem habeant symptomata, & quæ mala per consensum tantum adficiant. Unde quos errores in praxi admittere possint medici, non difficile est intellectu. In genere enim monendum est, causam morbi curandam esse, & sinistre facere cum medicum, qui ignarus anatomie, neglecta causa ad symptomata oculos deflectit. Symptomatum vero non alia ratio est, quam quod partes nerveæ intime inter se conspirant, unde mirificus iste consensus excitatur: nam mirabile certe est, quod una parte nervea commota, totum simul corpus concutitur. Ita à graviore remotæ etiam partis dolore, à nervo vel tendine læso, à dolore calculi, à dolore colico, ilii &c. febres, deliria, convulsiones & alia atrocissima proficiuntur mala.

44. Intercoastalis ramus & par octavum omnes fere corporis partes pervagantur, ex quo plerumque accidit, ut capitis adfectus, epilepsiam, apoplexiam, item contusionem capitis, vomitus, diarrhœa, asthma, alvi contractio, urinæ suppressio & præcordiorum spiritusque gravitas excipiant. Idem in passione hypochondriaca vel hysterica evenit, in hac quippe si à flatibus, vel ab acri materia plexus nervosi mesenterii, ventriculi & pulmonum nervi trahuntur, strangulatio faucium, cordis palpitatio, vertigo, capitis dolor, animi defectio, cervicis dolor, asthma, catalepsis & convulsiones imminet. Nihil ageret hic medicus, qui symptomatum habita ratione contra hæc remedia pararet, cum tamen, si causam satis perfectam haberet, tanta malorum moles unico sæpe carminativo clystere, vel antispasmodico medicamento possit removeri. Dolori ex calculo sæpius vomitus, colicus dolor, stupor femoris, testis retractio, quandoque etiam, quod magis terrere potest, epilepsia, & summa præcordiorum anxietas jungitur, quo casu non alia causa subest, quam quod intercoastales & paris octavi nervi, vesicam atque renes ingrediuntur. Neglectis itaque symptomatibus, ad calculi dolorem cura hic convertenda est medico, quo levato & cetera mala exspirabunt. Ad quem scopum impetrandum balnea, unguenta oleosa & blanda anodyna commendamus, ut relaxatis viis dolor sopiatur.

45. Æque necessaria observatio est circa vermes, qui si intestinum ileon occupant, membranarum ejus nerveam arrodendo, sævos in pueris spasmos & convulsiones excitant. Quæ tamen symptomata facile cessabunt, si medicus, cognita malorum causa, remedia recte suppeditat, & lumbricos per anthelmintica enecare satagit. Erosionem vesicæ à calculo infesti sæpe dolores, tenesmus, cibi fastidium, vigiliæ, sudoresque frigidi consequuntur. Si ad causam mali, anatomie beneficio, animum advertimus, facile adparebit, ad propellenda tot mala curam in submovendo calculo defigi oportere; quod optime impetramus oleosis & balneis, vel si nimium urget malum, de calculo perita manu extrahendo est cogitandum.

46. Longum foret, & reliquarum partium meminisse, quæ ex mirabili illo nervorum vinculo, quo invicem arctissime connectuntur, gravissimis tormentis cruciantur. Ex re tamen nostra erit, pauca de hoc argumento adduxisse. Ita dentium dolorem, dentitionem difficilem in pueris, atrocissima mala, ut

M

diar-

diarrhoea, tussis, febres, alvus adstricta, praecordiorum gravitas, convulsiones & alia comitantur: quae symptomata cum tantum non opprimant aegrotum, statim remittunt, sedato dolore, vel evulso etiam dente, qui negotium facebat. Mirum vero est, quam atroces cruciatus inflammatum ventriculum comitentur, quia haec corporis pars eximiis instructa nervis totum simul corpus adficit. Inde ab adsumto veneno, ab acri materia intra ventriculum latente cardialgiae intolerabiles, deliria, anxietates funesto saepe eventu excitantur. Internae porro partes, maximeque pectoris regio, exaestuant & velut flamma extorrentur, externae contra frigent, pulsus denique venarum inaequaliter moventur: quae symptomata cum gravia & truculenta sint, medicum quidem terrere quam maxime possunt, omnia tamen decedunt, si ventriculo consulitur, ejecto per olea vel per lac veneno, sive materia acri convenientibus auxiliis attemperata. Neque minus in vulneribus tendinum id evenit, quippe nonnunquam ex laeso manus vel pedis digito, ex clavo imprudenter exciso, ingens malorum agmen concitatur. Tum enim spasmi cynici, convulsiones, dolores & alia symptomata exercent, quae summum saepe periculum aegroto minantur. Remittit tamen hic symptomatum furor, si tempestivo remedio nervorum dolor mitigatur.

47. In hysterica passione, solemni foeminis malo, aegrae velut apoplexia vel fulmine tactae prosteruntur, dum ob nervos paris octavi & vagi, qui uterum subeunt, membranae cerebri simul adfectae spasmio corripuntur. Ut taceamus reliqua mala, quae, quum infesto agmine in hoc adfectu aegrotas adpetant, non aliunde proveniunt, quam quod nervi continua serie per totum corpus ejusque partes extenduntur.

48. Ex hoc mirifico nervorum consensu accersenda

saepe ratio est adfectuum, in quibus bilis non immerito arguitur. Nam cum plexus hepaticus nervorum & qui ad vesicam felleam fertur, pylorum, pancreas & duodenum simul percurrat, ratio in promptu est, cur irritato ventriculo bilis cum ex ductibus tum ex cystide prorumpat, & quare icterus ipsum ventriculum simul adficiat, ad nauseam ac vomitum eundem stimulando.

49. Ureterum quoque & vesicae magna est consensio, quod iidem nervi per has partes indissolubili vinculo pervagantur. Unde si ureterum principium ex calculo vel spasmio dolet, non raro, urinae suppressio, stranguria & frustranea mingendi cupiditas adsociatur.

50. Sed satis jam huic argumento de nervorum consensu immorati sumus, quod tamen, si omnia persequenda essent, diutius nos moraretur. Interim & ex hoc habebit medicus, quod discat, & in quo proficere possit, ut causam morbi a symptomatibus recte discernat. Ceterum qui plura de hoc legere cupit, adeat diligentissimum hujus rei scriptorem *CL. Vieussens*, qui effusiore stilo hanc de nervis doctrinam pertractavit. Licet vero omnia, quae adduximus, satis superque anatomiae in praxi usum comprobent, chirurgia tamen, si in hujus contemplationem descendere placeret, magis eundem comprobatura esset. Hujus enim effectus inter omnes medicinae partes evidentissimus est, cum contra in internorum morborum curatione dubitari saepe possit, medicinae an naturae beneficio secunda valetudo contigerit. At in ea artis parte, quae manu curat, oculis statim deprehenditur, medici imprimis manu aegrum adjuvari. Unde facile adparet, quantum ex chirurgia laudem ferre possit medicus, qui anatomica corporis scientia imbutus hanc ad usum rite transferre novit. Plura de anatomiae in chirurgia usu non addo, quum haec materia tantae sit dignitatis, ut peculiarem postulet tractationem.



D E

MORBIS FOETUUM IN UTERO M A T E R N O.

§. I.

TAm misera ac ærumnosa generis humani conditio est, ut non modo innumeris malis per vitam homines crucientur, verum etiam, ut intra carceres uterinos adhuc conclusi foetus, antequam vitali hac aura fruantur, & lucem aspiciant, à malis atque aegritudinibus non immunes sint. Ita nihil familiarius est, quam ut foetus in utero, ex gravi praeferrim matris affectu, convulsionibus & inordinatis membrorum agitationibus, matre id abunde perferente, distorqueantur. Insuper ipsa experientia addocet quotidiana, peculiaribus morbis eos in utero affligi, & afflictos in lucem prodire. Tanta vero matrum cum foetibus, quos utero gerunt, est consensio, ut hi illis intime compatiuntur, adeo, ut non modo, ad omnem gravem animi affectum matris, tristitiam & iram, tenerae foetuum fibrillae, in malos motus concitentur, sed quod magis est, à forti imaginatione eorum, quae in sensus inciderunt, formatio partium plane impediatur, turbetur, ac vitiatur, similesque characteres ac imagines, quas ma-

ter in cerebrum recepit, tenello infanti certis in partibus affricentur. Ex quibus abunde dilucescit, magnam esse sympathiam ac affinitatem matris cum foetu quoad partes spirituosas impetum facientes, sive ipsam animam, ut loquuntur, sensitivam. Similis quoque consensus manifesto deprehenditur, inter fluidas, humidas, ac solidas matris partes: unde si ipsae conceperunt vitium & dyscrasiam, ipsi infantes mox in utero labem inde luunt, similibusque morbis afficiuntur, vel extra uterum degentes eosdem affectus, qui successu temporis sese exserunt, dispositi sunt. Haec omnia cum profundius paulo mecum meditatus fuero, placuit affectus hos morbosos, qui infantibus in utero familiares esse solent, recensere atque evolvere; praesertim cum hanc materiam speciali labore tractatam nondum mihi videre contigerit. Spe nitor firmissima, fore, ut opus hoc, & labor, non sine utilitate, atque emolumento proximi esse possit.

2. Princeps autem nostra erit intentio, ex fide dignis auctoribus & observationibus historias atque exempla asserre variorum morborum, quibus foetus in ipsius uteri ergastulo laborarunt, & afflictii fuerunt,

runt, quorum postea ortum ac causas specialius, quantum fieri potest, inquirere, & qua ratione in posterum averti possint, exactius paulo perscrutari lubet. Primum autem morbum variolarum, quo gravida corripitur, saepe in ipsum foetum transire deprehendimus. Ita *Hildan. Cent. IV. Obs. 56.* duo insinuat exempla foetus nempe masculini, itemque foemini variolosorum, qui à matre tali morbo laborante, prodierunt: similem casum refert *Thom. Bartholin. Cent. IV. histor. 50. ubi anno 1656.* in Dania illud accidisse tradidit. *Forestus* quoque auctor fide dignus observavit *libro 5. Obs. 44. p. 196.* foetum à variolis non fuisse immunem. Ita etiam *Mællenbroccius in Miscell. Natur. Curios. Dec. I. p. I. p. 131.* hanc dedit observationem; generosi cujusdam viri uxor, cum ante variolis laborasset, filiam peperit vestigiis variolarum conspicuam. Unde liquet ipsam adhuc in utero materno, simul cum matre, variolis fuisse affectam. *Miscell. Nat. Curios. Dec. 11. An. VI. Obs. 61.* hanc recensent historiam: juvencula quaedam gravida, dum detenta esset variolis, enixa est foetum, in toto corpusculo variolis plenum. Plura evolvi possunt exempla in *Dec. I. AN. I. Obs. 53. it. Rhodii Cent. III. Obs. 83. in Bartholini Cent. III. epistola 85.* At vero illud non perpetuo contingere, ut mater variolosa infantem in utero talem quoque reddat, præclare ostendit *Borrichius in Act. Med. Hafniensibus vol. V. Obs. 75.* adducens exemplum infantis, qui sine variolis à matre, quæ gravissime istis laboravit, exclusus fuerit. Prout etiam foetum in claustro materno harentem variolis corripere matre ab iisdem immuni, *Job. Fernelii* testimonio inprimis constat, qui *libro II. de abditis rerum causis Cap. 12.* Sæpe, inquit, deprehensum, prægnantes maturos foetus edidisse hac lue perfosos, quarum aliae nihil omnino foris, aliae non nisi multis post diebus, incommoda senserunt, idque proprio suo exemplo *Francisc. Mauriceau lib. I. de morbis gravidarum cap. 2.* comprobat. Morbillorum morbo infantes quoque in utero materno affligi identidem experientia comprobat. Ita *Baronissa de K.* ultimo in prægnationis mense corripiebatur morbillis periculossissime, restituebatur quidem feliciter per convenientia auxilia, attamen foetus, qui statim prodibat, maculas rubras ostendebat, *vid. Dec. II. An. III. Obs. 97.*

3. Majus adhuc & atrocius malum est, lues venerea, quam ex corporibus gravidarum transfusam in foetus legimus, qua de re consuli possunt *Dec. II. An. VI. Obs. 61. & Mons. Gervais Ucay, vid. Probleme Curieux XII. dans le nouveau traité de la maladie vénérienne.*

4. Perquam familiaris quoque & communis morbus est ipsis foetibus cum matre icterus, quem puerum in utero matris contraxisse *Panorolus Pentecost. IV. Obs. 44. p. 137.* recenset. Curiosa est observatio, *57. Kerkringii*, quam narrat hoc modo: mater ictero laborans, octavo gravitationis mense peperit mortuum puerum, sed ita flavum, ut de cera factus, non partus humanus videretur, sic, inquit, eum potestatis meae factum seco, pro sanguine humorem fellis instar flavum reperio, eumque diligenter, lagena exceptum servo: ad ossa ut perventum, ea sic erant, eodem humore, eodemque colore flavo imbuta, ut si non ipse secuissem corpusculum, illud mihi, atque arte tinctum fuisse putarim. Est penes me etiamnum plena isto sanguine lagena, est skeleton ipsius pueri, non minus rara sui compositione, quam colore isto visendum. Vix credes fucum abesse, nisi sinceritatem meam ex aliis, quæ hic narro, & in museo servata ostendo, comprobaveris. *vid. Obs. 57.*

5. Quod attinet ad febres intermittentes, eae ipsae quoque, si matres gravidæ illis laborant, in prolem transire solent. In hujus rei confirmationem meretur *Frid. Hoffmanni Oper. Tom. VI.*

adduci egregius locus ex *Fernelio*, qui exstat *Path. lib. I. cap. XI.* si gravida medio gestationis tempore quartana febris afficitur, partum edi, qui diu postea quartana febris conflictabitur, atque si nono ea mense phrenitide prematur, prolem gigni in pleuritidem proclivem, quemadmodum & ejus, cui abscessus ex octavo mense præruperat, filium in omnem vitam habuisse purulentas aures, unde intelligi potest, non modo prima conformatione ex semine, verum etiam toto gestationis tempore, tum ex materno sanguine, tum ex aliis humoribus, atque alimentis morborum proclivitates in foetum contrahi. Similem observationem conspicias in *Dec. II. An. 5. Obs. 44.* foeminam nempe cujusdam militis invaserat pertinax quartana altero statim mense, ultimis mensibus ante & post paroxysmum embryonem maxime inquietum, tremulum, & ab uno in aliud latus sese volutantem manifeste sensit, ut tristem sibi ipse prædiceret eventum, tandem superato eodem terribili paroxysmo circa decimam vespertinam peperit filiolum, quæ una eademque hora, una cum matre febre ista misere affligebatur, & tenerrimo corpusculo, septimam usque in septimanam, gravissimos hos sustinuit insultus. Hujusmodi exempli ipsemet quoque memini quod ante 10. annos in consulis primarii Ascaniensis uxore gravida quartana laborante notavi, cui remediis opem tuli; quæ filium enixa est, per longum tempus eadem febre correptum. Illud autem observatione erat dignum, quod brevi post partum matrem deseruerit, *Dan. Puerarius* medicus testatur, *Genevæ*, recensente *Barthol. Cent. IV. Ep. 86. p. 488.* observatos à se infantes, qui in utero materno febricitarunt, certissimis cum indiciis, & quorum demortuorum totius corporis habitus maculis quibusdam rubris & lividis distincti fuerint. Meretur quoque adduci hic historia, quam recenset *Gockelius Dec. II. An. VI. Obs. 131.* Foemina quaedam binos ante puerperium menses, tertiana exquisite laborans, curata vero, justo tempore puellam peperit cum cuticula pustulosa, quam paulo post plenaria velut excoriatio exceperit, haud secus, ac si fervida aqua macerata esset cutis, cuticula vero regenerata fuit medicamentis oleosis, in specie oleo lini tepesfacto.

6. Hydropicum quoque tumorem in foetum ex vitio matris derivari posse, experientia testatum facit. Ita uxor gravida ex ingenti terrore propter incendium fitti molestissima urgetur, quam cerevisiæ secundariæ largiori potu abigere tentavit, decimo autem post die enixa est filiolum hydropicam, quæ, medicamentis nihil quicquam conferentibus, paucis post diebus hydrope periit. Hydrocephalus, uti est affectus familiaris & quasi proprius infantibus, ita prostant exempla, eum in utero jam radices suas sumisse. Sic *Blancardus in Collect. Phys. Med. Cent. I. Obs. 73. fol. 65.* se in septem mensium abortu inter duram ac piam matrem magnam aquæ sanguineæ latentem quantitatem animadvertisse memorat. *Balduin. Ruscus de extractione foetus Cap. 23.* se puerum quendam vidisse hydrocephalo laborantem scribit, cui mortuo in lucem prodenti caput toto corpore fuit gravius. *Job. LEDELIUS Miscell. Curios. Dec. II. A. II. Obs. 178.* exemplum habet pueri masculi, cui recens nato caput hydrocephalo obsidebatur, cujusque non multo post mortui cerebrum non excedebat calami scriptorii crassitiem, quo separato, loco ventriculorum ostendisse se, ait, amplam quasi vesicam limpidissima & insipida aqua repletam, quantitate uncias L. excedente. Simile exemplum exhibet *Frid. RUYSCHIIUS in thesi anatomic. adjuncta icone elegantissima.*

7. Recensendum quoque est egregium exemplum de vesicæ calculo; qui in ipso infante intra uterum concretus fuit; ante viginti nempe & quod excurrit

annos, Serenissimi Ducis Zeizensis Mauritii uxor ex renali calculo magnos subinde dolores perpeffa, peperit filiam principem, quæ mox à partu atrociam tormina experta fuit, præsertim in mictione, tertia septimana moriebatur, aperto corpore in vesica inventus fuit calculus instar nuclei mali perfici majoris. Nullum hic dubium est, jam in utero, lapidem accepisse sua rudimenta ac principia: extra uterum enim, tam brevi temporis spatio tantæ magnitudinis lapis gigni vix poterat.

8. Nullus autem affectus familiarior solet esse proli in utero, quam epilepsia, utpote subinde experiuntur gravidæ, à vehementi animi motu seu terrore seu ira ingentes jactationes ac volutationes foetus in utero, ut sæpius ipsæ exinde deficere videantur. Multo magis autem illud ipsum apparet, si mater, quæ utero gerit, sævissimo hoc morbo corripitur. Memorabilis hinc est casus, quem insinuant *Miscell. Nat. Cur. Dec. I. A. III. Obs. 106.* foemina ultra quartum mensem gravida epilepsia corripiebatur crebra, effluebat ei postea è pudendis albicans humor tetterimi odoris cum ipsorum tumore anxietate ingenti, inguinum doloribus, & summa virium prostratione; existimarunt foetum esse mortuum, mox autem motum foetus percepit ægra vehementissimum & simul ac fuerunt propinata epileptica, convulsivum motum foetus sensit, tandem convulsa bis graviter in paroxysmo peperit filium, & ab eo tempore, nec mater, nec filius sensit insultus. Majorem adhuc considerationem meretur observatio, quam allegatam habemus *Dec. II. A. IV. Obs. 15. Misc. N. Cur.* Foemina ultimis gestationis mensibus, de molesto admodum & sæpius recipiente foetus motu conquerebatur, præsertim cum inde ita defatigaretur, ut non raro animi deliquis proxima, hic motus subsultorius suos quasi rythmos observans, quoties percipiebatur, toties matris abdomen percutiebat, singulis diebus ter ad minimum hunc paroxysmum illa sustinebat. Effectum tandem est medicamentis acedinem obtundentibus, ut cessante motu hoc convulsivo, foetus absque violentia naturaliter sese moveret, sanusque aliquot post septimanas in lucem mitteretur.

9. Ultimo loco memorandum etiam aliquid est de malo, quod non adeo raro contingit: quando nempe infantes in lucem eduntur intestinis, vel etiam visceribus extra naturalem abdominis cavitatem propendentibus, in abdomine circa umbilicum facta ruptura, tale quid ante XII. annos observavi Halberstadtii in infante, qui nascebatur sine apertura ani, & sine distinctione sexus, magna autem moles intestinorum, flavo obscuro colore tinctorum, propendebat extra corpus, quæ erat intestini coli portio, cum dimidia parte ilei, mirifice erant expansa, & succo foetido, obscure nigricantis coloris referta, tertio die moriebatur infans, baptismo prius accepto. Similis casus ante aliquot annos Querfurti à Dn. SCHAUMBURGO Practico & Physico ibi egregio animadversus est. *Blancardus lib. de morbis puerorum Obs. XI. lib. I. fol. 299.* meminit infantis, qui intestinis extra abdomen propendentibus natus erat. Et *Elzbolzius de conceptione tubaria* ita scribit: foemina primipara vivum enixa est puerum prope umbilicum in sinistro latere rotundo tumore, & caput infantile magnitudine multum superante, deformatum. Ut vero appareret, quid intus aleret tumor ille, apertio fuit concessa, ubi portionem magnam intestinorum inclusam deprehendimus, copiosa flavescens aqua abdominis viscera, cæterum naturaliter se habentia nec ulla labe deturpata, circumfluente. Innotuitque una cum peritoneo tendinosam illam musculorum abdominis partem, quæ lineam albam constituit, fuisse

se disruptam, sicque per datam portam erumpentibus intestinis extensioni aptam cutis substantiam cefisse. Dantur etiam exempla, ubi à causa externa & violenta foetibus in utero læsio quædam ac vitium accedere potest, maxime in conformatione partium solidarum. Ita historias legere licet, ubi infantes pronati fuere cum umbilicali hernia, five potius ejus prominentia, quæ nihil aliud solet esse, quam umbilicalis funiculi maxima dilatatio, nam aperto hoc, illico in conspectum venit peritoneum. Vitium tale evenire potest, si gestationis tempore lapsa fuerit mater, vel ventrem duro corpori admoverit: quæ de re legi meretur *Stalpart van der Wiel Cent. II. Obs. 23.*

10. Restat jam, ut etiam hoc loco quædam recensamus exempla, quibus corroborari ac demonstrari possit, perversum ac concitatum spirituum animalium motum per graves animi affectus insigne damnum & atrociam symptomata inferre posse foetibus. Sicuti autem nullus perniciosior generi humano affectus, & præsertim gravidis est, quam terror: ita etiam ultra modum infestus solet esse tenerrimis in utero foetibus. Ita in *Miscell. Curios. Dec. II. A. X. Obs. 18.* *Sommerus* recenset historiam, ubi mater sexto mense prægnans, gravissimo terrore perculsa, omnibus viribus destituebatur, & omnis foetus motus per viginti quatuor dies disparebat, ut inter propriarum virium extremam jacturam de vita foetus actum esse mater indubie crederet. Interim continua analepticorum interna & externa applicatione, post tres septimanas foetus tremore quodam intercalari animulam superesse adhuc docebat, & semper cum matris anxio dolore, post hæc successive veri foetus motus redibant. Memoratu quoque digna est *Obs. 83. Dec. I. A. II. Miscell.* gravida nempe circa initium noni mensis inopinato metu percellitur propter incendium in urbe, dum illa ab eo temporis momento male se habere cœpit, motumque infantis per triduum nullum sensit, sequentibus vero diebus admodum debilem, variis usurpatis roborantibus octavo die peperit filium bihorium tantum viventem, cujus totum sinistrum latus à capite usque ad calcem colore flammeo conspiciendum erat. Recensenda hoc loco etiam est *Obs. 61. Dec. I. A. II.* dum nempe gravida partu jam instante & valde consternata, ut in lipothymiam incideret, paucis diebus elapsis filium curvis manibus ac pedibus enixa est.

11. Tandem etiam animam, specificè per varias ideas objectorum externorum & fortem impressionem matris characterisatam, similes effectus & stupenda phænomena in infantibus producere, res est in foro medico notissima, & nolumus in hujusmodi exemplis numerosissimis recensendis prolixiores esse, sed potius candidum lectorem remittimus ad *Marci à Kronland lib. I. idearum operatricium Cap. IV. Saxii Gamma-logiam Curiosam lib. II. Cap. IV. p. 596. ad Thom. Fienum de viribus imaginationis. Schrad. Disp. de viribus imaginationis maternæ in foetum, it. Harderi A-piarium p. 340. ad A. I. Dec. III. Miscell. Obs. 117. it. Stalpart van der Wiel Cent. II. Obs. 36. de navis maternis.*

12. Variæ superius adductæ ægritudines & affectiones, quibus conflictantur foetus in utero materno, ita sunt comparatæ, ut exactissimam consensionem atque harmoniam & communicationem matris cum foetu addoceant. Utpote tota formatio, nutritio, vita, ac sanitas infantis in utero dependet à vita & sanitate matris; sine matris enim arctissima unione progigni ac produci nunquam foetus poterit. Tanta autem est communio, ut anima matris cum anima foetus conspiret, & nullum dubium est, quod sensationes, perceptiones, ac passionem in matris ani-

anima excitata transeant quoque in ipsum infantem, sicuti id perversae phantasiae effectus luculenter loquuntur. Consentit quoque motus spirituum seu fluidi tenuissimi nervei in matre cum motu spirituum in infante, seu similis spirituum motus matris efficitur in infantibus, quod liquidissime conspicitur in motibus convulsivis irregularibus spirituum agitationibus ministerio affectuum animi, qui in omnibus similes sunt in ipsis infantibus. Quocirca eo minus dubium erit, quod motus & circulatio sanguinis, ejusque temperies ac crasis in matre, exacte quoque correspondeat cum sanguinis motu ac temperie in infantibus, adeo ut si hic temperatus placide & æquabiliter moveatur, talis circulatio & motio quoque in ipsis foetibus deprehendatur, & vice versa, si intemperies subest, si motu agitur sanguis irregulari morbofo, eundem quoque teneri in utero infantes experiantur.

13. Quivis tamen hic facile perspiciet, quicquid vitii in motu ac crasi contraxerint spiritus ac humores in matre, id gravius sentirent infantes, adeo ut quod illis præsentaneam noxam non insert, hisce maximum damnum, ac læsionem affricet. Quod etiam manifestissimum apparet in vehementi ac firma impressione ac phantasia matris, quæ tenellis fibrillis ac staminibus suam determinatam motus efficaciam imprimit, minime autem partibus matris robustioribus ac validioribus. Unde etiam familiare est, à terrore incommodum mox accedere infanti, quale quid matres in tanto gradu non percipiunt. Sed propositi nostri ratio postulabit paulo accuratius consensionem illam matris cum foetu, inquirere ac indagare.

14. Primum autem pro certo ac comperto habendum est, sicuti omne animal, ita etiam præstantissimum omnium hominem progigni ex solido principio, nempe vesicula membranacea, cui tenuissimus lymphaticus, spirituosus liquor inclusus est, & vocatur ovulum foemininum, in quo omnia lineamenta ac rudimenta animalis compendio præexistunt, quæ tandem expansivo similis materiae genitalis motu intestino foecundata, succi nutritii debito accessu evolvuntur ac visibilia redduntur. Equidem diversissimæ inter eruditos de abstruso & à sensu remotissimo formationis negotio præstant sententiæ. Quæ quoniam tantum probabilitate nituntur, inter se, ut cum iis rebus accidit, non exacte conveniunt, minime autem has omnes adducere & examinare nostrum propositum est: perpauca tamen non possumus non commemorare, eorum sententiam nobis minime arridere, qui existimant, in ovario Evæ totum genus humanum delituisse: neque nobis concipiendam esse recentiorum quorundam opinionem, quasi Deus corpuscula innumera organica, quæ servire possint propagationi vegetabilium & animalium, in prima creatione produxisset stupenda exiguitate donata, eaque hinc inde in fluidis natæ sicque in corpora recipi. Non enim perspicere possum, quomodo conciliari cum hisce hypothesebus possit, quod infantes non tantum lineamentis & partium conformatione valde similes parentibus generentur, sed & dispositionem ad similes morbos, inclinationes, vitia, & virtutes acquirant, & postea, quod maximum est, quod sola phantasia matris evertere, immutare, & deturbare possit totum formationis negotium, etiam in foetu jam aliquot menses adulto & vitali. Multo minus autem nobis persuadere possumus, quod productio prima organicorum horum corporum ex principio fluat interno, notitia, intellectu, intentione prædito, quod secundum has spirituales affectiones dirigat ac moveat materiam; quoniam secundum nostra principia hæ affectiones sunt tantum propriae substantiis immaterialibus

& libere agentibus, non autem corporeis & ex necessitate quadam suas operationes edentibus. Tacemus, quod ratio, intellectus, ac voluntas per se nullum jus quoddam habeant seu directionis, seu immediatæ motionis in corpora, sed saltem quod ea potentia seu potius imperium limitatum ex singulari beneplacito ad certos actus tantum homini à Deo sit concessum. Statuimus ego animam, quæ format corpus, quæ illud conservat, quæ varias ac específicas motiones in ipso efficit, esse fluidum tenuissimum in actuoso motu existens, quod veteribus ætheris ac ignis nomine venit. Hoc enim, non ut in crassiori mechanismo, simplices tantum ab agentibus externis recipit motuum impressiones, & ex his facit reactiones, sed ut tenuissimum, innumerabiles específicas secundum numerum & ordinem impressiones ab organicis creaturis à Deo in creatione prima constructis recipit, retinet, & secundum hos motus organicos & regulares commoveret & disponit aptam præsentem materiam. Hæ sunt nostræ rationales cogitationes, & si quis meliores afferre poterit, nobis nemo, nisi iniquus cenfor, vitio vertet, si illas deferimus, & alias amplectamur, quod omnes ingenui viri semper in physicis & probabilibus fecerunt. Ex hoc principio facillime deducemus, quæ ratione non modo morbosæ partium dispositiones, fluidorum temperiei vitia, inclinationes transfundantur in liberos, verum etiam, quo pacto motus in anima adfuefacti vel firmissime ab objectis externis in sensoriiis impressi potentiam agendi certas in materiae partes, retineant. Hæc omnia autem fieri mechanice, id est, physice, naturaliter, & ex quadam necessitatis lege in corporeis substantiis, libere & aperte dicimus ac profiteamur.

15. In ovulo autem foecundato, corpus organicum infantis, utut exilissima mole latet, ulterius nempe extendendum, evolvendum, atque visibile reddendum est. Nam exiguitas corporis ordini atque organicæ partium conformationi nihil derogat. Videmus id manifesto in minimis insectis, v. g. acaro, qui non nisi oculo armato exacte conspici potest: in quo tamen & musculos & canales, cavitates, humores, ac spiritus, summo artificio ac ordine compositos esse nemo physicorum facile in dubium vocabit. Quin imo in primorum mensium abortibus observare sæpenumero licuit embryones instar formicæ natantes in crystallina lympa, vesicula conclusa, qualem observationem perelegantem notavit *Cl. Bergerus in Lib. de Natura humana. p. 468.* Ante omnia itaque opus est, ut augeatur hoc organum extensione, & continua succi nutritii, blandi, gelatinosi, lymphatici accessione. Hujus autem copia à matre subministratur, adeo, ut non secus, ac aliæ matris partes, totum infantile corpus succo alibili, & quidem delibatissimo, nutriatur. Ingens quidem adhuc viget inter physiologos controversia, qua ratione & quibus viis humor ille alibilis matris communicetur cum ipso foetu, ubi alii, & quidem veteres mediantibus vasis umbilicalibus ex placenta transferri istum succum ad corpus foetus asseverarunt. Deinceps surrexerunt alii, qui non tantum per umbilicum, sed per os nutrirî infantem humore intra amnium collecto, profitebantur. Recentiores autem, ex quibus primum nominandus *Stalpart. van der Wiel*, repudiata veterum de nutritione foetus per umbilicum sententia, unice contendit, foetum nutrirî & crescere succo tantummodo per os sumto. Temporis autem ac instituti ratio hic non permittit, exactam trutinam præsentis argumenti instituire: nihilo minus non possumus non fateri, admodum dubiam nobis apparere nutritionem solummodo per os, quoniam in ipsa membrana chorii ac amnii accuratissime inspecta nulla vascula arteriosa vel venosa, aut alia conspiciuntur, hinc qua ratione succus possit

hic advehi, penetrare non possumus. Accedit maxime illud, quod provida natura, in elaborando secundinarum corpore primo tempore sit admodum occupata, ut non incrementum singulare foetus animadvertatur, antequam placenta uteri insignis molis fuerit utero annexa.

16. Statuendum itaque potius esse existimamus, placentam eum in finem maxime esse formatam, ut recipiat ex osculis arteriarum & glandulosa uteri substantia lymphaticum probe digestum alibilem succum, eumque, si non detur alia via, per poros venularum ab extra intro spectantes cum sanguine foetus intime misceat ac uniat. Præter hunc usum alium adhuc placentæ uterinæ assignamus, qui in eo consistit, ut vicem gerat pulmonum, non ut sanguis refrigeretur & ventiletur, sed ut transeundo per capillaria innumera vasa, attritione intima facta exacte, quoad sua principia misceatur sicque tenuis, fluidus, spirituosus ac calidus evadat, utpote pulmonum usum non refrigerare sanguinem, uti veteres statuerunt, sed spiritualescentiam ipsi conferre à præstantissimis viris, SVLVIO, MAUROCORDATO, CHARLETON, BORELLO, SWAMMERDAMIO, BOHNIO probe notatum est. Nam si accurate perspicimus placentæ substantiam & structuram, ex meris membranaceis cellulis & innumeris vasorum ramificationibus affabre conflata est, & quoniam paucus vel plane nullus sanguis pulmonum vasa intrat, necesse fuit, ut in illud viscus, illorum vices gerens, derivaretur sanguis; ubi tamen non negandum, quod simul ibi roscidi & lymphatici succi accessione, per glandulas ac poros communicati, ad vitam & nutritionem sustentandam imbutus redeat ad tenellum infantem. Merito autem talem usum placentæ negamus, qualem nonnulli affingunt, existimantes, aëreas partes, per eam sanguini inspirari, quibus certe non opus fuit, cum humores, subtili aëris elastici portione jam subactos & retentos à matre recipiat infans. Cæterum tamen non inficiabimur, non impossibile esse, ultimis inprimis mensibus, succum quendam, qui continetur intra cavum amnii & variam habens originem; qua de re consuli potest Bohnius in Circulo anatomico, in patentiore oris, œsophagi & ventriculi cavitatem impelli & per totum corpus sic distribui. Nam per os aliquid humoris ab extra in intestina ingeri copia succorum, quæ observata fuit in superius memorato infante, qui clausa alvo & urethra intestinisque extra abdomen propendentibus natus fuit, perspicere licet, utut non ad nutriendum corpus specificè ut opinamur destinatus sit.

17. Ex dictis illis facile colligitur, magnam intercedere consensionem matri cum foetu, ratione hujus nutritionis, cujus materiam infans recipit à matre. Quamvis enim non immediate sanguis maternus per arteriosos vel venosos canales ex matre derivetur ad corpus foetus, neque spiritus animales seu fluidum nerveum immediate & directe feratur ex matre ad infantem, nihilo minus cum succus ille, quo alitur, & extenditur & vitalis fit infans, delibatissima & delectatissima sanguinis materni sit portio ac quasi quinta essentia, spirituum animalium copia sufficienter persusa, (nam non crudum, non indigestum, non actuositatis expers esse debet, illud quod nutrit, sed optimum, subtile, depuratum spirituosum ac temperatum;) ratione hujus succi maxima illa consensio matris cum foetu, non tantum in rebus corporeis, sed in immaterialibus ac specificis motionibus fiat necesse est. Nisi enim in succo illo alibili, qui per placentam foetui committitur, insit fluidum elasticum animale, quod in cerebro ac nervis maxime subsistit, non possemus causas atque ortus ducere ac derivare passionum atque pathematum, quæ fiunt ex

terrore, vel ira matris in ipsis foetibus, neque phantasiæ matris effectus in infantibus utero conclusis rite explicare. Equidem non diffitemur, harum rerum explicationem, quoad τὸ πᾶσι admodum esse difficilem, quoniam hæc res à sensibus alienissimæ, & subtilissimi mechanismi sunt, hinc temerarium hic esset pro simplici & nuda veritate, meditationes hac de re venditare, & usque ad extremum vitæ halitum defendere, sed sufficiat si modo non tale aliquid statuamus, quod sano conceptui refragetur, quod non misceat principia inter se, & tollat spiritus stricte sic dicti, & corporis summe necessarias differentias.

18. Statuimus itaque animam, quæ format, movet & conservat corpus in animantibus tenuissimam esse fluidam substantiam motus agitatissimi. Omnes autem vires cujusvis substantiæ creatæ immateriales sunt, id est, ipsi effectus, qui fluunt ex creaturis in alias creaturas non sunt materiales, non extensi, satis tamen activi, adeo, ut non nisi immateriali ratione concipi queant: & sicuti crassum corpus vim alterius immaterialem in motu recipit, & secundum hanc reagit, id est, novum motum inchoat: ita quo tenuiora & fluidiora sunt corpora, eo magis sunt apta, ab aliis corporibus innumeras impressiones in se recipere, & propagare, uti id manifesto videmus in vorticibus luminosis, sonoris, qui ex instanti per aërem & ætherem ferri solent; quid ni etiam exinde colligendum erit talem mobilissimam substantiam, veteribus igneam dictam, in fibrillis cerebri ac nervorum existentem, innumerabiles impressiones motuum ab objectis externis in variis sensoriis recipere, & secundum has, positis omnibus requisitis, ordinatos & determinatos motus efficere. Et quemadmodum in fluidissimis corporibus excitati motus luminosi, perniciosissime transfunduntur ac propagantur per magnum spatium, ita etiam motus in anima, seu fluido mobilissimo suscitati per totum corpus penetrant, imaginem & impressionem specificam efficiunt, quale quid percipimus in animi affectibus totum corpus alterantibus, ut ideo nullum dubium sit, speciales, & quasi sigillatas in certa figura ac magnitudine vires has motrices immateriales per totum abripi corpus, non sine operatione & activitate, nisi valde sit resistens mobilis materia. Et hac ratione explicari debet radiatio illa spirituum, qua CARTESIUS exponere solet phantasiæ effectus: hinc perspicuum erit, ad effectus istos stupendos, qui per phantasiam accidunt infantibus, deducendos, non opus esse ut advocemus in subsidium proprietates ac potentias spiritibus stricte sic dictis competentes, nempe intellectum, intentionem, directionem ac notitiam.

19. Morbi autem, qui ex humoribus seu materno sanguine & sero oriuntur, non aliam agnoscunt originem, quam succum nutritium matris, quo foetus nutritur, à temperie ac indole sua blanda debitaque mixture deflectentem: quod si enim vitales matris fluores impuri sunt, variis excrementitiis salinis & sulphureis sordibus viscidis deturpati, quod fit ex vitio diætæ, circulatione debiliore, & excrementorum secretionem in matre impedita, non potest aliter fieri, quin succus nutritius infantis similis naturæ ac indolis fiat, eosdemque imo graviore effectus morbosos in infante, quam in matre producat.

20. Sed ut paulo specialius progrediamur in explicandis ac enodandis affectuum infantum in utero causis operæ pretium esse existimamus. Primum quod attinet ad morbum variolarum, hic infantes in utero facile corripere potest, si mater eodem laborat: etenim à sale tenui, sulphureo, caustico à massa humorum & sanguinis, quin imo à partium solidarum, quibus implicitum diu latuit, nexu ac involucris liberato, originem suam ducit; quod vehiculo lym-

lymphæ per totum corpus distribuitur, & spasmodicas contractiones, anxietates, irregulares sanguinis & spirituum motiones efficit, donec relaxata cute vigore motus musculorum, præsertim cordis, ad habitum corporis propellatur. Idem causticum principium, mediante lymphæ communicatur quoque ex facili ipsi foetui inque eo similes commotiones morbosas excitare aptum est, donec etiam vigore cordis intrinseco relegatur ad relaxatam infantis cutem. Eodem modo morbillorum morbus, qui ex simili mioris tamen acrimoniæ elemento constat, pronascitur, & vitium præcipue in sero ac lymphæ complectitur. Multo magis autem putredinosa ingens destructio lymphæ ac sanguinis in lue venerea & accumulatio multarum salino-acrium causticarum partium infesta ac exitialis erit tenellis infantibus.

21. Quartanam ex matre transire in foetum curiose superioribus observationibus notatum fuit. Nam febrem, maxime intermittentem, esse irregularem spirituum commotionem, & fibrillarum musculorum spasmodicam, præsertim in principio, externi habitus corporis constrictionem, quam postea citatus ac vehemens motus cordis & articularum, & consequenter progressivus motus sanguinis velocior, plane tamen inæqualis, sub vigore morbi & æstu subsequitur, ut symptomata ac phænomena satis testantur, notissimum est. Revertitur autem hic motus per periodos, & quidem quarto die, quoniam materiæ febrilis, procul dubio causticæ, acris, salino-sulphureæ indolis ad spasmos spiritus stimulantis activitas, quæ in certa quantitate ac qualitate, antequam motum inordinatum in spiritus inchoare queat, consistere debet, ad vigorem & statum illum requisitum, propter sanguinem valde viscidum, qualis solet esse in quartanis, non prius pervenire & efficaciam nocentem exserere potest, quam die quarto. Ex quibus jure meritoque concludimus, cum similis sanguinis & succorum viscida intemperies quartanæ nutrix & sustentatrix in infantibus deprehendatur non secus ac in matre, nec non principium illud materiale sulphureæ acris indolis, quod ex transpirationis impeditæ, vel excretionum prohibito officio generatur, tali ratione communicari etiam cum ipso infante. Unde ratio in promptu erit, quare infans in lucem editus diu adhuc febri hac corripitur possit.

22. Qua ratione autem icterus matris in infantem derivetur, res adhuc facilius conceptu est. Tinctura enim bilis flava, sulphurea non in sanguine, sed in lymphæ ac sero conspicitur. Jam si firmiter supponamus, non sanguinæ, sed succo lymphatico, nutriri foetum in utero, necesse est, ut flava hæc tinctura à lymphæ non tam facile rursus separanda, amandetur etiam ad ipsum infantem, ejusque corpus simili colore afficiat. *Amatus Lusitanus curationum medicarum Cent. V. fol. 71.* refert; mulierem quandam ab epoto medicamento, cui admixtus crocus erat, duas puellas coloris lutei peperisse. Experimentum etiam fecit *Cl. Hertod*, cani gestanti in utero alimenta croco copiose condita offerens, catelli erant de nigro ad albedinem variegati coloris, excepta abdominis regione, hinc inde sese volutantes, in quibus albidiores cutis particulæ, plenarie croceo colore tinctæ fuerant.

23. Cachecticas & hydropicas gravidas foetus in lucem edere œdematoso tumore turgidos, observationes supra adductæ loquuntur. Ratio etiam hujus rei facilis videtur: etenim hydrops ex spiritualescentiæ defectu, circulatione sanguinis & consequenter transpiratione impedita, & glandulosorum viscerum infarctu à feri copia, nascitur. Qualis autem sanguis & lymphæ matris, & qualis spirituum constitutio, quale robur partium, talis etiam spirituum, humorum, ac

solidarum partium dispositio ac status erit in ipso infante, & consequenter similis ad morbos proclivitas. Ex hisce quoque non difficilis explicatio est, quare calculosæ concreciones in vesica, quibus affligitur mater, in infantibus etiam recens natis deprehendantur, utpote ex sero, tartareis, terreis salibus ad coagulationem aptissimis, imprægnato, in substantia renali, vel vesica læsa promptissime calculi generantur, tale serum tartareum ad infantem transire & similes effectus edere posse, res omnis dubitationis expers est.

24. Epileptici insultus & omnes spirituum inordinatæ commotiones, spasmos & convulsiones hinc inde in partibus dispositis efficientes, lubentissime ex matre proficiuntur in infantem, motus enim facilius penetrat, quam qualitas vitiosæ materiæ; unde quotidiana docet experientia, ad omnes animi commotiones, & nervosi generis pathemata vehementia, debilitari & affici ultra modum infantes; & quamvis nervi non pertingant ad ipsum infantem, fluidum tamen illud elasticum actuosissimum, quod in nervis existit, transit in succum alibilem & sic cum infante communicatur. Si enim lac & salivam ingreditur illud fluidum, quidni etiam in succum corporis nostri puriorem, subtiliorem transibit. Jam autem morsus animalium rabidorum, ira percitorum, luculenter comprobatur, spiritus communicationem habere cum saliva, & terror quoque nutritis, qui sæpe numero fugientibus infantibus lethalis est, clarissime demonstrat, à commercio spirituum ipsum lac non esse immune.

25. Dari etiam casus experientia abunde docet, ubi gravidæ laborant ex vehementi morbo foetusque edunt vitales & primo intuitu sanos, qui tamen brevi post graviter ægrotant & moriuntur. Ita proxime talem nobis historiam communicavit *Excellent. Dn. Lichtenhantius, Archiater Saxonicus*, referens, illustrem matronam partui jam proximam correptam fuisse variolis, tunc temporis epidemice grassantibus, quæ die ab invasione tertia præsentem enormissimam hæmorrhagiam enixa est foetum vivum quidem, & nullis maculis conspurcatum, qui tamen sexta post natiuitatem die, convulsionibus moriebatur, sphacelo in visceribus hinc inde apparente. Non potest enim aliter fieri, quin matris succi vitales conspurcati similem characterem sanguini foetus imprimant: qui autem non illico, successive tamen, virulentiam suam prodit.

26. Ultimo loco subjungenda quædam sunt circa signa, ex quibus iudicium formare licet, foetum in utero esse imbecillum seu morbosum: & audiendus hac in re primo omnium est *Hippocrates*, qui *Secl. V. Aphor. 52.* scribit. *Mulier utero gerenti, si lac fluat à mammis copiose, foetum imbecillum significat. Si vero firmæ solidæque marmæ fuerint, valentiores conceptionem indicant.* Hic canon non destruitur suo ratiocinio, & experientia quoque corroboratur. Quod si enim gravidæ ultimis mensibus præter morem solitum magnum affluxum lactis sentiant ad mammæ, indicium est, non tanta in abundantia amplius sanguinem cum succo fluere in uterum, sed ex quadam causa præternaturali vasa uterina compressa, & conferta esse, ut hac ratione intercipiatur illius affluxus. Hinc necesse est, ut impetus copiosi sanguinis ad mammæ, seu corpora flaccida distensibilia, derive-tur; unde, materia spirituum & alimenti infantibus subtracta, necessario hi debent fieri imbecilliores. Ex adverso etiam si marmæ in gravidis nimis fuerint extenuatæ, pariter indicium est foetus imbecillioris & intermorituri, sicuti id in subsequenti *aphorismo* magnus noster *Hippocr.* præclare confitetur: nam si marmæ, quæ alioquin à motu foetus ad extremum us-

que gestationis tempus, à lactis copia, solidæ esse debent, non sensim & pedetentim, sed subito extenuentur, indicium maximum est, oportere subesse causam & vehementem mutationem in sanguinis & spirituum motu præcessisse, dum vel ipse in aliis partibus stagnat, inflammationem parit, vel ob defectum spirituum & virium, chylus non generatur, vel ad mammas vehitur; uno verbo, omnes extenuationes gravidarum subitæ periculi non sunt expertes. Quod etiam innuit laudatissimus *Hippocr. aph. 55. ejusd. Sect.* dum inquit, quæ gestantes uterum febribus corripuntur aut vehementer sine evidente causa extenuantur, eæ difficulter cum periculo pariunt, aut abortientes periclitantur. Nam extenuatio illa non leve vitium in sanguine, & robur destructum indicat. Ubi enim cacochymia est, ibi non potest consistere virium robur: quodcumque autem corpus matris vitiosis humoribus abundat, vel intestinus calidus depascens humidum motus in sanguine custoditur, fieri non poterit, quin mater & foetus sit imbecillior. Quandoque autem accidit, ut mulieres gravidæ extenuentur, quia foetus nimium consumit alimoniam matris; unde etiam non sine ratione scribit *Hippocr.* quod tales foeminae cum periculo pariant, quia causæ necessariae ad partum facile tolluntur, ut sunt robur matris, viæ apertæ, molles, ac lubricæ.

27. Præterea vel excessivus vel deficiens motus infantis in utero, signum est certissimum vel morbofi vel imbecillis foetus. Motus enim plane languidus vel nullus si percipitur, extremam debilitatem significat, qui ex imminuto affluxu boni succi ex matre, & defectu spirituscentiæ in sanguine, nascitur; si autem nimia & vehementes observantur commotiones & jactationes membrorum infantis in utero, infallibile indicium est, convulsionibus agitari tenera membra.

28. Postremo ea consideranda quoque veniunt, quæ magna facultate pollent foetum morbosum in utero efficiendi. Ex omnibus autem hic obtinet principatum aer, & quidem tempestas aeris, præsertim in hyeme, nimis humida, austrina, succedente vere sicco & aquilonio. Magnæ considerationis hac de re est *Aph. XII. Sect. II. Hippocr.* Si hyems, inquit, austrina & admodum pluviosa fuerit, ver autem siccum & aquilonium, mulieres, quibus vere imminet partus, ex quacunque causa abortiunt, aut si pariunt, imbecilles aut morbosos partus edunt: ita ut vel ipsi statim intereant, vel tenues, vel valetudinarii vivant. Ratio hæc esse videtur quando hyems flatibus meridianis, austro nimirum, Africo, euronoto, & libonoto confiat, & cælum justo magis pluviosum, transpiratio & circulatio sanguinis in gravidis, quæ ordinario plethoricæ sunt, languidior & depressior est, tali vero ratione, copiosi, pituitosi, crudi in corpore generantur humores, qui, accedente aëre frigidiori, vento aspero boreali, ex ambitu & cortice corporis ad interiora ipsumque uterum magis truduntur, & urgentur. Unde dum nimiam relaxationem uteri, infarctum & sanguinis impeditum motum efficiunt, non modo causam præbent abortus, sed & infirmum & morbosum reddunt infantem. Aeris itaque tempestates in culpa sunt, ut foetus reddantur morbofi, & ut certum anni tempus noxium ac funestum quibusdam prægnantibus sit. Egregie hoc insinuat *Thom. Barthol. Hist. Anatom. Cent. III. Hist. 59.* Primis anni 1654. inquit, mensibus satis calidis, post æstatem æstuantem Hassniæ plerisque prægnantibus male cessit graviditas, calidioris cœli vitio. Petechiis enim plurimæ occubuerunt, & gravidarum periculum secuturam pestilentiam præsignabat. Infectus cer-

te & intemperie quacunque vitiatus aer à matre attractus facillime tenellum foetum vel in utero enecat, suffocat, vel si robustior est, ut inquinatum sibi que noxium aerem fugiat, ante statum tempus expellit. Hinc aliæ prægnantes eadem hyeme primis mensibus abortierunt, aliquæ postremis, magno propriæ vitæ discrimine, aliæ petechiis infectæ, una cum foetu expirarunt, aliæ epilepsia convulsæ, quæ sine intermissione miseras comprehendens paucarum horarum spatio è medio sustulit.

29. Secundo loco & ciborum assumptio, excessus vel defectus, siue nimia satietas & abstinentia, matrem & foetum ad morbos disponere solet. Nimia enim alimentorum copia, gravidis semper est insalubris, quæ sua natura ad statum plethoricum & cacochymicum inclinant. Succorum enim copia non rite subigi, circulari, & à superfluis evacuari potest. Unde impurus alibilis succus nascitur, qui totum nutritionis negotium in foetu pervertit. Nimia autem abstinentia, vel inedia, subtrahendo spiritibus & corpori necessarium pabulum, non potest non esse foetibus summe exitialis. Meretur hic adduci, quod *JOHANN. MEURSIUS Vir Clariss. lib. 1. de urbe Leidensi Cap. XII. p. 58.* habet, dum ingentem famem, qua istius urbis incolæ tempore obsidionis Hispanicæ afflictæ fuerunt, latius describit, & inter alia hæc refert: ægrotantibus & puerperis, quæ lactarunt, in dies singulos buccellatum ad quadrantem libræ adpensum, nonnullis in ipso utero foetus inedia exstinctus & abortum multæ fecerunt. Ante omnia acidorum usum esse noxium annotarunt medici, vid. *GARMANN. A. II. Dec. I. Obs. 149.* fructus horaei & crudi penitus ab usu excludantur. Infantes enim nasci exinde solent laborantes defluxionibus catarrhalibus, narium obstructione, anxia respiratione, ut de vita periclitentur, qua de re vide *Miscell. Cur. Dec. II. A. X. Observ. 83.*


30. Affectus animi immoderatos & intempestivos, quod concernit, quantum ii noceant corporibus humanis, & imprimis tenellis matrum foetibus, dijudicari facillime poterit. In instanti enim hi ipsi labem inferunt foetibus, & nulla causa solennior est, & celerius abortum procurare solet, quam vehemens terror, & diuturnus moeror, angor, & tristitia.

31. Hisce jam discussis, è re fore judico, quædam addere ex therapeutico fonte, quibus tam matri, quam foetui infirmo succurrere possimus. Non autem nostri propositi est, curam specialem cujusvis affectus, quo gravida laborat, texere vel commendare, sed saltem eo nostra tendit intentio, qua ratione foetus imbecillitas averti, & si ea præsens sit, emendari possit. Primo omnium itaque moderationem & mediocritatem in sex rerum non naturalium usu commendatissimam sibi habeat gravida, & occasiones affectuum & phantasmatum omni modo ac studio evitet, sique sanguine abundans est, necesse est, ut plethora & cacochymia avertatur circa medium gestationis tempus per debitam venæ sectionem, quæ solet intempestivam foetus expulsionem præcavere. Alvus quoque quotidie respondeat, eaque ad suum officium revocanda ope clysteris emollientis, siue leniori rhabbarino passulato assumpto pharmaco.

32. Denique studeat maxime omnium virium conservationi, cui fini ex fonte pharmaceutico serviunt analeptica, mitiora aromatica, carminativa, balsamica, essent. ambrae, si ferri potest, cum balsamo vitæ nostro & spiritu nitri mixta; item pulveres ex C. C. præparati: coralliis, unicornu animali, ebore; externe aquæ vitæ, hungaricæ, balsam. & spiritus apoplect. regioni abdominis sunt applicandi. Si vero convulsionibus videtur infans in utero agitari,

ri, aquæ antispasmod. ex floribus, pulvis marchion. specificum cephalicum Michael. mixtura simplex, propinanda erunt. In universum autem tenendum, ab omnibus fortioribus purgantibus, sudoriferis, medicamentis calidioribus, opiatibus, penitus abstinendum est.

se, quocunque etiam affectu laboret gravida; sed potius blande ac temperate semper agendum erit, ne damnum ac noxam inde infans in utero contrahat.



D E

DENTIBUS EORUM MORBIS
ET CURA.

§. I.

Quemadmodum nulla ad constitutionem machinæ nostræ artificiosissimæ faciens pars est, quæ non luculentissime ineffabilem magni opificis sapientiam atque benignitatem demonstret: ita etiam dentes, illorumque ordo & structura opus identidem Dei miraculosum ostendunt. Primum circa illorum naturam illud maxime occurrit notabile, quod cunctas animantis partes duritie & durabilitate vincant longissime. Unde etiam, TERTULLIANO teste *lib. de resurrectione*, antiqua pietas dentes ob perennationem post multos centum & mille annos sub terra voluit recondere, pro integrando corporis in resurrectione seminario. Qua de re latius videri potest GALENUS *de ossibus* p. 480. Deinde, quando admirandum illum ordinem & perpulchram seriem, quæ in utriusque maxillæ extremitatibus lyræ ad instar positi sunt, contemplamur, non possumus, quin & in hoc providentissimæ naturæ solertiam admiremur. Ita enim ipsos locatos conspiciamus, ut superiores cum inferioribus committi queant, non tamen omnes simul & semel, ut variari actus possint incisionis & contusionis ciborum: commissis enim molaribus, anteriores superiores transgressi, inferiores tegunt, coeuntibus anterioribus, hiant molares, quiete & actione utrinque mutua intercedente. Mirabile hoc artificium, sufficiens jamdudum visum fuit GALENO *loc. cit.* naturæ calumniatores, qui artificiosa ejus opera fortuito atomorum concursui adscribebant, exinde refutare. Concinnum & longe utilissimum hoc organon sive molam microcosmicam, sine qua masticatio alimentorum, quæ tamen ad vitam longam, bene momente HELMONTIO *in tractatu de victus ratione*, multum facit, legitima fieri nequit, in præsentem, paulo penitus perscrutari, illorum naturam, structuram, connexionem & usum, nec non qua ratione lædi, & quibus remediis restitui queant, expendendo, apud animum constituimus.

2. Omisso autem omni curioso & prolixo, minusque utili nominis scrutinio, saltim, quod dentes quasi edentes olim nominati fuerint, sub principio statim dentium descriptionem quandam exhibebimus. Sunt itaque dentes partes corporis osseæ, ex substantia duplici, una durissima & quasi lapidea, altera molliori, ossea tamen constantes, intus cavitate quadam instructæ, maxillarum alveolis per gomphosin inarticulatæ in usum masticationis, melioris loquelæ & ornatus. Primum itaque notandum: dentes gaudere diversa substantia, exteriori, quæ est durissima, instar lapidis, utut de natura lapidis non participet. Experimento enim clarissime ostendere id possumus, dum integer dens humanus, immissus sufficienti aquæ fortis quantitati per aliquot horarum spatium

promptissime dissolvitur, remanente paucissima, glutinosa, quæ sulphurea & pinguiuscula dentis portio videtur, substantia. Solutioni quando ad saturationem debitam affunditur oleum tartari per deliquium, candidissimum exsurgit magisterium in usibus medicis cum illo, quod ex dente apri, aut ungula alcis fit, conveniens. Hanc chymicam mechanicam non instituere & perficere licebit cum filicibus & lapidibus genuinis. Est autem tam dura & solida exterior dentium substantia, ut sub vehementiori attritu & concussione cum ferro scintillas copiosissimas edat, quod tamen tantum valet de dentibus molaribus grandiorum animalium, qui propter magnitudinem magis resistunt. Lapidea hæc dura pars observatur tantum in illa portione dentium, quæ extra gingivas prominet, & instar corticis & involucri investit osseam dentis partem: radices quippe dentium, quæ in alveolis & sub gingivis latitant, osseæ tantum naturæ, & hinc non tam candidi, splendidique coloris sunt, quam externa pars, prominens libera à tegmine. Durissima autem est externa, ut non tantum ab omnibus injuria & læsione immunis sit, verum etiam, ut incisioni & confractioni durorum alimentorum eo melius inservire queat. Materia interior ossea facilius propter poros laxiores dissolvi & consumi potest, unde etiam externo cortice duriore tegitur, ne forsan particulæ acres corrosivæ ciborum illam ipsam lædant ac destruant. Hæc itaque est, quæ in carie maxime læditur & afficitur: cortex enim raro ab acri corrosivo succo consumtus visitur totus, sed saltem quoad partem. Deinde differt etiam filicea dentium pars corticalis exterior ab interiori, ipsa structura: in illa enim obliquo situ in circellos terminantur striæ; altera autem interior, mollior, & præcipua, qua dentes constant, pars ex multis fibrarum planis secundum longitudinem sibi firmiter superinductis constructa est. Patent singula plana resolutione facta per longam ossium macerationem; integræ namque osseæ reticulares bracteæ evelluntur, qua de re legi meretur MALPIGHIIUS in *anatomie plant.* p. 19.

3. Diximus in definitione, cavitationem quandam reperiri ipsis in dentibus, quæ etiam luculentissime se ostendit, quando secundum longitudinem per medium dentem diffecamus, ubi observamus, singulas dentis radices cavitate esse donatas, quæ autem satis insignis est in ipsa basi, seu ea, quæ ex gingivis eminet, parte. In cavitate enim dentis, ex quocunque animante ipse sit, semper & perpetuo reperitur substantia quædam mucosa, membranacea, seu funiculus quidam mucosus, forma vesicæ oblongæ ex tenuissimis vasis sanguifluis, membranis nerveis, & glutinosa quadam substantia compositus, qui etiam usque ad extremitatem dentis pertingit, ibi membranulis quasi magis constrictis quodammodo durior & rubicundior apparet. In foetibus & pueris ipsa hæc cavitas satis ampla

ac magna est, tenui squama, notante EUSTACHIO *tr. de dentibus* ad septimum annum instar favorum apum circumsepta, quæ tamen in adultis magis imminuta est. In pueris hoc cavum refertum est mucosa materia, circumsepta membrana, quæ quoad exteriorem superficiem rubicunda, interius magis alba apparet, & hic ipse mucus tandem convertitur in ipsam dentium substantiam, & genuinum illorum nutrimentum existit. Videmus enim, quo magis dentium substantia solidescit, ac firmior evadit, uti in adultis, eo paucior deprehendi hunc mucum, & vice versa in infantibus, quorum dentes ex tenuibus lamellis constant, copiosum reperiri. In vitulinis dentibus, & maxime in illo, qui vulgo *der Milch-Zahn* dicitur, hanc materiam commodissime oculis lustrare licet, in superficie ejus vestigia sanguinis sub rubedine aliquali subinde se repræsentant, quam etiam compressa materia mucosa manifesto evomit.

4. Hisce decursis, placet jam formationem & generationem dentium paulo penitius inspicere. Hic autem primo annotandum venit, dentes omnes, non secus ac reliquas partes, statim in utero accepisse rudimentum, ibique jam dum esse efformatos. *Αὐτοψία* enim anatomica hic omnem exsuperat rationem. Pulcherrime scribit EUSTACHIUS *de dent. c. 15.* se plures maxillas foetuum, tam abortivorum, quam maturorum aperuisse, ibidemque dentes incisores, caninos, & tres molares adhuc molles, tenuissimo interstitio osseo disjunctos observasse, quibus singulis folliculus mucosus & tenax, extrema parte perforatus, unde mucro dentis pullulantis procedit, fuisset appensus. Imo his artificiose separatis, novus iste, licet exiguus, adhuc ordo absconditus latuit, qui quasi germen est pro renovatione ordinis prioris, uti latius id dicto loco describit; imo posteriores & extraordinarios dentes, quos sapientiæ communiter vocant, in calvariis demortuorum adhuc latuisse, testis est ANDREAS VESALIUS *de corp. hum. l. 1. cap. 11.* Eadem ratione COLUMBUS *l. 1. c. 10.* in abortibus septem & octo mensium, item in recens natis demortuis exiguos dentes in suis alveolis invenit, & ex ipsis eruit. Ex hisce dictis facile intelligitur, nullos de novo dentes creari, quando priores decidunt, sed dejectis prioribus, latentes saltim succedere; unde fabula est, in senio de novo creari quosdam dentes, quando nimirum decrepitæ ætatis homines, vel cum summo vel sine dolore pariunt dentes. Historias vide in M. N. C. *Dec. II. anno IV. p. 73.* SCHENCKIO *observ. med. p. 215.* LAURENTIO *in anat. p. 728.* SEBIZIO *disp. de dent. EUSTACHIO loc. cit. BARTHOLINO in anat. p. 728.* HELMONTIO *arcan. Paracels. p. 740.* Ceterum illud notabile est, incisores præ ceteris in foetibus laminam seu squamam candidam solidiusculam, caninos vero minorem, nec ita solidam possidere; molares autem tenuissimam, & fere chartaceam: quare non mirandum est, si quidam citius, quidam tardius, suum adipiscantur complementum, & eodem ordine, quo in utero quoad rudimenta sunt, distincti egrediantur. Vid. EYSSONIUS *de ossibus infant. cap. 3. p. 51.* Apparent autem ordinario in homine primum incisores, mense septimo, vel serius, decimo, item post anni cursum: canini nono aut decimo mense, maxillares vero ante secundum annum, & secundo anno producuntur, nonnullis citius superiores, nonnullis inferiores. Decem autem in utraque maxilla rursus excidere solent, quatuor nempe incisorii, duo canini, & quatuor maxillares, & excidunt quarto, quinto & sexto anno. Novi vero seu succedentes, vel circa septimum, vel circa decimum quartum annum erumpere solent. Conferatur huc BARTHOLINUS *in anat. p. 728.* VERHEYEN *anat. p. 224. 225.* & FORESTUS *lib. 14. observ. 3. in scholiis.*

5. Dictum antea fuit de materia dentium alimentari, quod sit mucosa. Deprehendimus id ipsum non tantum in puerorum dentibus, sed magis adhuc in foetibus & abortibus, ubi tres sese partes exhibent, folliculus membranofus, aut potius mucosus, totum dentem includens, facile ab eo secedens, à basi æque ac radice perforandus: radix mucosa, pellucida, vasis scatens, compressa sanguinem sudans, cavitate notabili prædita, successu ætatis à circumferentia ad centrum magis magisque offescens, ita tamen, ut levis cavitas semper remaneat; & basis ipsa candidæ squamæ tenuis & excavatæ similis. Vid. BLASIUS *in anat. contract. pag. 100.* Mucosa & glutinosa hæc materia verum pabulum ac alimentum dentium est, quo crescunt, extenduntur, & soliditatem acquirunt. Solida produci ex fluidis experientia multiplici comprobatum constat. Testantur id ossa corporis solidissima, quæ nonnisi ex succo terebri, fluido tamen, sanguinis ortum suum habent; lapides crescere ex aquis stillaticiis in subterraneis fornicibus, notissima apud curiosos res est. Aquam communem liquore certo petrifico affuso, successu temporis, quoad partem indurescere ac in lapidem converti posse, nostrum est experimentum. Eadem ratione nullum dubium est, mucosam illam materiam in dentibus contentam cedere in substantiam ipsorum osseam. Comprobat inter alia hoc ipsum analysis chymica, dum mediante machina, quæ ab inventore dicitur Papiniana, nostra autem industria longe majori perfectione & effectu splendet, non tantum omnia ossa, sed & ipsi dentes brevi spatio emolliri, inque succum gelatinosum resolvi possunt, remanente terrestri quadam mucosa substantia, ut adeo hac ratione elementa ossium clarissime demonstrari queant. Certissimum enim est, non secus ac alias corporis solidas partes ipsa componi ex succo gelatinoso; terrestriori tamen & crassiori, cum minus solidæ ac molliores partes, v. gr. fibrosæ ex fluido gelatinoso succo, in quem etiam omnis caro machina Papiniana resolvitur, consent. Originem mucosa dentium alimentaris materia habet ex ipso sanguine, & advehitur mediantibus ramulis arteriolarum minutissimis, ex carotide externa oriundis, per ipsius dentis poros. Antea jam dictum fuit, materiam hanc mucosam in dentibus repertam membrana contineri satis valida, quæ copiosissimas vasorum sanguiferorum & advehentium, & revehentium ramificationes repræsentat. Intensa autem hujus membranæ rubedo præcipue apparet in infima parte, cavitatis dentis brutorum. Ratio hinc facile deducenda est, quare è dente carioso serum sæpius sanguineum exstillet, sive suctione evocari queat, manifesto indicio: sanguifera vasa in ipsam dentium cavitatem penetrare. Mea itaque sententia ex poris arteriolarum cribratur & transsudat succus lymphaticus pellucidus, qui in membranæ cavitatem effusus, illic subsistit, & successive concrescit, quoniam vasa dubio procul lymphatica, quæ juxta SCHENCKIUM *anat. part. hum. corp. p. 2. c. 6.* cavitatem dentis intrant, tenuiorem & liquidior partem absorbent & revehunt, remanente crassiore, & ad concrescendum aptiore, quæ primo in superficie & circumferentia longo transpiratu solidescit, cujus postea interstitiis, novus succus affusus, tandem successu temporis majorem soliditatem conciliat. Revera enim osseæ dentis partes nutriuntur succo, qui per poros advehitur. Videmus nutriri ossa, quoniam tendines & cartilagine tempore diuturnitate osseæ redduntur, & ossa mollissima in infantibus durissima tandem evadunt. Osseus denique succus, qui ex ipsis ossibus fractis transsudat, facillime concrescit, & ad callosum generationem, quibus mediantibus ossa glutinantur, facit. Statuendum itaque esse existimamus, ossa non

non tantum ad justam mensuram augeri, sed ad finem utique nutriti, dum nova semper materia alimentaris per vasa sanguinea accedit. Et hæc est ratio, cur accessu novæ materiæ in infantibus aucti & extensi dentes, tandem protrudantur ac ex gingivis appareant. Dentes autem continuo crescunt, alioquin ex continua attritione & manducatione cito forent contriti, sicut gutta cavat lapidem: quantum ergo atteruntur, tantum rursus augeantur. Quando autem dentes vel deficiunt, vel excidunt, succus ille pro dente augendo in alveolum vacuum delatus, ipsum ossea substantia replet, gingivali carne, etiam duriore reddita, ut dentium vices aliqua ex parte supplere possint.

6. Perspecta hæcenus dentium generatione ac nutritione; restat jam, ut explicemus, unde dentes seu ossa sentiendi vim obtineant. Sentiunt autem dentes non eatenus, quatenus ossæ sunt: absurdum enim esset, ossibus sensum adscribere velle, qui adeo duri sunt, ut vix igne ac ferro sint domabiles, sed quatenus singulis dentium radicibus per porulos minimos in hominis adulti præsertim incisoriis & caninis vix conspicuos, in majoribus autem brutis satis observabiles, tennes nervorum furculi, qui ex quinta secundum enumerationem recentiorum prodeunt, implantantur. Nervuli hi cum vasis sanguineis ope membranæ velut in funiculum constricti sub dentibus decurrunt, & dentium cavitatem ingrediuntur. Horum nervosorum furculorum, utut minimorum, sensibilissimorum tamen gratia dentes duntaxat, evidenti inter ossa sentiendi facultate donatos credimus. Noverat namque rerum opifex, cum dentes nudi crebro variis alterationibus, rosionibus, fractionibus exponantur, illos plus cæteris ossibus enutrirî, & incrementum longiore vitæ tempore accipere debere, unde ipsis nervos dedit, ut influxu spirituum pro majore accretione juvanda & nutritione gauderent. Nervi autem, qui per maxillam tam superiorem, quam inferiorem transeunt, ac ipsis dentibus implantantur, ab ipso quinto pari originem suam habent. Distribuitur nimirum hic nervus in varios ramos, quorum primarii hi sunt, unus ophthalmicus, qui oculi orbitam ingressus adnatae oculi tunicae, glandulae lacrymali, palpebris, musculis nasum sursum moventibus, item frontis musculis suas fibrillas impertitur. Crassior ac interior propago hujus ramus ophthalmici per foramen peculiare in orbita, calvariam juxta cristam galli ingrediendo, crassam meningem penetrat, ac subinde è cranio exeundo per foramen ossis cribriformis nasum ingreditur, & per membranam ejus distribuitur. Alter ramus quinti paris maxillaris è cranio per tertium foramen emergit ramulis variis conspicuus, quorum primus postquam furculos musculo masseteri, gingivarum carni & radicibus dentium maxillæ superioris per foraminula conspicua eis in postica impertit maxillæ parte, sinum peculiarem ossis infimam orbitæ partem constituentis subit, & ubi primum ex ipso per foramen, peculiare ipsimet orbitæ subditum egressus est, modo in tres, modo in quatuor dirimitur propagines, quæ utrinque faciei tegumentis, labro superiori, musculo infimam nasi partem ad latera ducenti, nec non interno ipsius nasi musculo, fibrillas plures largitur. Alter ramus deorsum recta fere tendens circa posticam ductuum seu canalium ad fauces tendentium regionem in duas propagines dividitur, quorum superior ad membranam pituitariam, quæ sinuum sphenoidæ, ethmoidæ, frontalium sinuum & maxillarium interiora obducit: inferior vero per foramen peculiare parti ossium palati incisum transit per carnem peculiarem & spongiosam palati ossibus substratam, ubi minimi ramuli dentes anteriores superio-

ris maxillæ, mea sententia, etiam ingrediuntur. Ramus tertius maxillaris inferior seu gustatorius dictus per quintum utriusque lateris foramen emergit, in tres insignes propagines finditur, quarum prima ac interior, utrinque linguæ lateri, paulo supra radicem illius subjicitur, & per mediam linguæ regionem & glandulas maxillares trajicitur. Secunda propago sinum infra os mandibulæ inferioris excavatum ingreditur, ubi plures exferit fibrillas, quo dentium radices penetrant, & cum nervus hic ad radicem quinti dentis molaris pertingat, per foramen in antica parte maxillæ exit, & antè ad labium ejusque musculos excurrit. Tertia propago rami ejusdem majoris glandularum parotidem subit, & in ipsa terminatur. Cognita sic ramificatione paris quinti, in promptu erit deducere inferius, quomodo dentes per consensum etiam alias partes afficiant, & quare medicamenta naribus, temporibus, item posticæ parti maxillæ inferioris applicata in sistenda odontalgia insignem habeant efficaciam.

7. Quod numerum dentium, illorum magnitudinem, figuram & officium attinet, dentes ut plurimum triginta duo numerantur, una serie in utraque maxilla sedecim instar justissimæ choreæ siti, in foeminis vero sæpius quatuordecim. Natura communiter homini concedit dentium pluralitatem, ita dispositam, ut in qualibet mandibula detur unus dentium ordo, quo nimirum eo melius alimenta comminuantur & ad chylicationem præparentur. Quæstio hic moveri posset, an ex frequentia dentium vitæ longitudo brevitæque dijudicanda sit? Notatum enim jamdudum est ab Hippocr. lib. VI. epidem. sect. 6. t. 2. *Qui longæ vitæ sunt, plures dentes habent.* BARTHOLINUS in instit. anat. p. 730. *Paucitas, inquit, dentium & signum est materiæ inopiæ, & debilis vis formatricis, aut causa est, quare cibi non bene præparari queant, unde concoctio prima & secunda quoque vitatur.* Plura vide in M. N. C. Dec. I. an. VI. & VII. obs. 138. & SCALIGER de subtil. ad Cardanum. Plures adsunt dentes, & quidem divisi, quo statuto tempore non uno impetu omnes, quod valde dolorificum esset propter dolorum augmentum, sed divisim è torulis suis egredi possint, deinde dum unus ab officio suo desciscit, nec huic variis de causis amplius præesse potest, facile seu rebellis sine alterius adhuc sani læsione ejici queat, quæ omnia minus feliciter contingerent, si omnes dentes unum os continuum facerent, læsa enim illius tunc aliqua parte totum corpus facilius afficeretur necesse esset. Magnitudine dentes in homine sunt mediocres. Ratione figuræ & officii varia aderti sunt nomina, quorum quatuor medii priores incisarii vocantur, sunt enim lati & acuti, quo oblatum ipsis cibum mordendo cultri modo promte abscindant dividantque, vocantur etiam risarii, quod inter ridendum primo denudentur, item lactei, *die Milch-Zähne*, quoniam primi prodire solent: dein sequuntur canini, qui incisariis proximi sunt, suntque utriusque maxillæ duo, basin habent amplam, & radicem longam, in fine autem à gingivis remoto, acuti sunt, ut si quid propter duritiem, ab incisariis non præscinderetur, hoc illi confringerent: ipsis hoc nomen inditum est, quod exferis canum, qui hos multos habent, dentibus correspondent, vulgo etiam dicuntur oculares, quod evulsi oculis molestiam creant, de cuius rei causâ vulgo disceptatur. Alii arbitrantur, quod ad orbitam oculorum radice sua maxima pertingant, cum tamen vix infimam alarum nasi partem tangent. Alii dicunt, nervum ex orbita oculi inferiore, qui per foramen maxillæ egreditur, ad dictos dentes portione quadam propagari, quæ sententia videtur probabilior, sed quoniam dentes canini maxilla inferioris portionem istius nervi non admittunt, ideo nec dici pos-

possunt oculares. Post hos maxillares seu molares quinque ab utroque latere habentur ampliores, asperiores & lata, ac inæquali basi conspectiores, ut eo melius omnia asperitate sua conterere queant in lævorem exactum, quæ ab incisoriis incisa, & à caninis diffracta fuerant. Interdum in utroque latere quinque molares occurrunt, interdum quatuor: nonnunquam quatuor à sinistris, quinque vero à dextris: vel contra in sinistris quinque, ex dextris quatuor: vel infra quatuor, supra autem quinque, quam differentiam potissimum pariunt postremi dentes, quos plerique genuinos vocant, etiam si Cicero ita molares vocaverit. Sunt autem illi, qui primum post pubertatem, venerisque usum, hominibus cum maximis subinde cruciatibus prodeunt: id quod medici parum observantes, aut alios dentes evellunt, aut humorum vitio eos infestari sibi persuadentes, ægros captatorii, atque id genus aliis pharmacis obruunt; cum dolore affectis nullum, levi gingivarum ad postremum dentem scarificatione, ac interdum ossis pertusione, præsentius remedium adferri possit, id quod ipse etiam expertus sum, cui trigessimus secundus dens ætatis meæ vigesimo sexto anno succrevit. Hactenus verba VESALII, de corp. hum. fabrica l. 1. p. 34. Quoad colorem dentium, is quo candidior eo melior est, & sanitatis dentium certius indicium; impediunt vero candorem illum negligentia, senectus & morbus, vid. BARTHOLINUS anat. p. 729. cui adscribitur VERHEYEN in anat. p. 6. & 225. inquit: *colorem flavum & nigrum*, non, nisi præter naturam, & ordinarie per corruptionem accedere. In juventute vero usque ad annum circiter trigessimum dentes albissimi sunt, & deinde tendere solent nonnihil ad flavedinem, quæ cum majore ætate intenditur, redditurque color albus obscurior, eo tamen nunquam, nisi præternaturaliter spoliantur & ætates dentium secundum colores HELMONTIUS distinguere docet. Variat tamen hic color etiam ratione climatum, hinc australes, dentes nitidiores habent borealibus, Æthiopum & Ægyptiorum candor & ob aëris benignitatem, & Nili sanitatem, cæteris palmam præripit, quod idem HELMONTIUS animadvertit, nec non PETRUS JOHANNES FABER, ac PROSPER ALPINUS de medicina Ægyptiorum ita scribens: *Ægyptiorum dentes juventutem suam servant & vigorem, nec cariem sentiunt, nec dolorem.*

8. Dentes ad unum omnes maxillarum finibus, quos alveolos, fossulas & præsepiola vocant, cuneorum seu clavorum in modum, beneficio articulationis, *γυμνασμός* dictæ firmissime infiguntur, ut nequaquam in duriorum ciborum comminutione vacillent aut commoveantur. Cæterum dentes omnes non paribus collocantur in maxillarum alveolis radicibus, incisarii singulis immittuntur, canini quoque habent singulas, quæ incisiorum radicibus multo altius inseruntur: tantoque majores sunt, quantum caninorum robur excedit, unde & inter incisorios, duo medii altioribus hærent radicibus, quoniam latiores grandioresque sunt, quam duo laterales caninis proximi. Molares radicibus inter se variant, superiores, maxime posteriores duo ternis subinde infiguntur, inferiores autem duabus præditi sunt, partim quoniam substantia maxillæ superioris mollior & rarior est, quam inferioris, unde duabus radicibus tam firmiter inhærere non possunt, partim quod inferiores gravitate sua incumbant in radices, contra ac superiores, qui penduli sunt, adeoque pluribus indigent vinculis. Reliqui molares superiores canino denti succedentes duas radices, inferiores autem unam saltem habent. Cæterum non prætereundum est, puerorum dentes imperfectis & mollibus, & quasi medullosis constare radicibus, unde vacillantes, & præcipue incisarii unguibus, aut filo denti circunda-

to eximi possunt. Illud autem adhuc porro observationem meretur, radices dentium ligamentis membranaceis, nerveis interius omnes cinctas esse, quibus dentes oculis suis firmiter affiguntur, externe autem firmiter ambit ac unit dentes gingivalis substantia, quæ caro est dura, ex fibrosis lamellis juxta se positis, conflata, infinitis vasculis sanguineis intertexta, unde etiam rubedine intensa fulget. Præterea copiosis membranulis, glandulis atque nervorum ramis scatet, unde sensibilis est, & subinde humiditate irrigata observatur, hæc caro instar valli dentes cingit, & instar muscutorum ipsos roborat, unde gingivali carne vel exesa, vel nimis relaxata aut flaccida redita, dentes facillime excidunt & vacillant. Membrana autem illa, quæ radices dentium & illorum partem, quæ obvelata est, investit, bene monente CLOPTON HAVERS in osteolog. non est continuatio perioestii maxillaris, sed potius ea propagatur, quæ gingivas contingit, ac universo ori communis est, & revera glandulosa, quæque non cum gingivis terminatur, sed quam primum ad extremas earum oras pervenit, intorquetur, & intra alterum gingivæ & dentis latus reflectitur, ossea vero in alveolum descendit, & immediate illis dentium partibus adhæret, quæ in alveolis situantur. Nonnullorum dentium radicibus in specie in maxilla superiore, una cum hac membrana aliquid duræ & carneæ gingivarum substantiæ communicatur, per quam dentes eo firmitus in loculamentis suis affixi & annexi sunt. Et quamvis dentes ipsi de communi perioestio haud participant, alveoli tamen eo gaudent, & cum ipsa membrana, quæ dentes tegit, coalescit, ut unam quasi constituere videatur.

9. Postremo de usu dentium pauca adhuc monenda esse arbitror. Diximus in definitione, non tantum ad masticationem ciborum, sed etiam ad vocis expressionem ipsos conducere. Primarius autem usus est masticatio, ceu ciborum solidiorum incisio, fractio & comminutio, ad quam omnes dentes requiruntur, quapropter omni tempore dentium magna fuit æstimatio. Egregie MOEBIUS in fundament. med. cap. 9. ostendit, quod non solum Deus in lege Mosaiica servum, cui dominus dentes effregisset, manu mittendum mandaverit, sed & veteres plumbeum odontagagon in Apollinis templo suspenderint, ne eos evellerent posteri, nisi cariosos & summe mobiles, plumbeoque instrumento cessuros. Turcæ itidem, MENAVIO scriptore ITALO lib. 3. cap. 22. referente, non, nisi impetrata regis licentia, dentes extrahere ausi fuerunt. Secundarius usus est vocis articulatio, dum valli instar linguæ ærique refluenti obijciuntur, hinc infantes, dum dentes non habent, vagitum edunt, qui duos aut tres, mullitant, qui plures, distinctius loquuntur, imo, qui aliquot amiserunt, vocis læsionem incurrunt. vid. LINDANUS in physiol. Præter duplicem hunc usum etiam ad ornatum faciunt, nam ingrata est facies, cui gelatinus abest, quare & incolæ occidentalis Indiæ stulte agunt, qui ornatus gratia anteriores dentes sibi evelli curant. Videatur ea de re HIERONYMUS BENZO de rebus Indicis. Deformes etiam habentur, qui nigricantes & cariosos habent.

10. Postquam hactenus, ut arbitror, satis copiose & enucleate dentium statum secundum naturam consideravimus, quali gaudeant substantia, qua ratione generentur, quomodo & quibus viis nutriantur, unde suum habeant sensum, quomodo alveolis suis firmissime inclusi ac connexi sint, promptum ac facile jam erit, illarum læsiones morbosas, statumque præternaturalem perspicere, & illius varias causas tam mediatas, quam immediatas eruere.

11. Quoniam autem dentium pathologiam specialius perlustrare animus est, consultum fore arbitror, omnes dentium affectus dispescere in eos, quibus dolor jungitur, qui dolore vacui sunt, nec non in illos, qui ex vitiata nutritione, vel ex nervorum aut ligamentorum, & gingivæ, quæ juxta dentes est, debilitate aut vitio oriuntur. Primum autem occurrit communissimum illud dentium vitium, ratione ipsorum substantiæ, nempe caries aut exesio, quam non tantum sæpius gravis dolor, mutilatio, sed & foetor putredinosus, verminosa progenies, & fistularum generatio subsequitur. Originem suam habet caries à causa potissimum interna, dum mucus iste gelatinosus, qui dentium cavitatem replet, ob lympham impuram scorbuticam, acredine & salugine quadam erodente imbuitur, unde non secus ac caro ex lymphâ falsa impura nutriente destruitur, corroditur, in ulcuscula abit, dens quoque ob vitiosum nutrimentum emollitur, corroditur ac successive destruitur. Quod autem non singuli dentes à lymphâ tota corrupta illud vitium patiantur, ratio hæc esse videtur, quod singularis debilitas vasorum, quibus dens constat, aut dispositio ab externa causa accedat necesse est. Inchoat enim plerumque caries dentis ab extra per parvum quoddam nigricans punctulum seu foraminulum, præsertim in maxillaribus, qui latiores sunt, & in medio successu temporis substantia corticali absumpta cavitates quasdam acquirunt, quibus adherentes ciborum reliquiæ mora acriores redditæ, motu putredinoso intestino facillime osseam dentium substantiam excavare atque dissolvere aptæ sunt: simul ac autem in parte quasi vacuum quoddam spatium factum est, protinus ad illud invitatur major humidus influxus atque accessus, & ita successive totus ferme dens consumitur, ut frustulatim excidat, id quod mutilatio dicitur; accidit autem hæc anterioribus dentibus absque prævia excavatione, sed cuniculi carioli exitum non invenientes liberum, latera eorum statim diffindunt.

12. Quando sanies carioli dentis per angustum foraminulum libere satis effluere nequit, & versus radices inferius agit ipsosque alveolos & maxillam aggredditur, oritur fistula, quamvis etiam ipsa non semper ex dente cariolo originem ducat, sed sæpius etiam in maxilla incipiat, in ipsoque dente terminetur, & illum demum reddat cariolum. Historiam talem fistulæ ZWINGERUS in *M. N. C. Dec. II. an. VII. obs. 233.* refert, ubi ex dente cariolo fistula, & ex fistula iterum plures dentes carioli facti sunt; potest etiam hanc in rem legi *disputatio Argentoratensis de genæ fistula, in dentem cariolum terminata.* Excavatis dentibus foetor supervenit teterrimus, isque ex sanie dentis carioli cadaverosa, quæ ex ciborum reliquiis in cavitare putredinem suscipientibus oritur: sanies enim dentis salino-sulphurea motu intestino vehementi instructa agit in ipsos ciborum reliquias intimam unionem partium dissolvendo, ex quibus constant, unde putredo, quæ nihil aliud est, quam dissolutio elementorum corpus constituentium, mediante motu intestino vehementiori, exsurgit, cujus perpetuus ac individuus comes est ipse foetor, qui ex secessione & evaporatione particularum tenuissimarum salino-sulphurearum producitur. Sub putredine tali foetida dentis conspicitur sæpius verminosa progenies: nihil enim magis facit ad generationem vermium, quam motus intestinalis putredinosus, utpote qui semina verminosa actuat, vivificat atque expansiva virtute sua brevi tempore ipsa insecta excludit, multumque illa nutrit. Nolumus jam hanc litem decernere, an insecta talismodi verminosa semper supponant seminum quoddam, an vero juxta veterum æquivocam generationem ex disposita quadam materia mediante

motu intestino putredinoso saltem produci queant; placet tamen in illustrationem hujus rei memorabiles duas adjicere observationes. Retulit nempe nobis ante aliquot annos *Professor Lipsiensium*, reparatum quondam fuisse in collegio principum inajori hypocauftum quoddam & vermem, insignis longitudinis & crassitie in trabe tegumentum hypocaufti sustinente cariosa facta repertum, qui figuræ monstruosissimæ, dimidiam trabis longitudinem fere adæquavit. Altera ibidem annotata fuit. Ovum quoddam rubia tinctorum infectum integrum, nec ullam fissuram ostendens, per totam æstatem linteis involutum & superstratum in scatula asservatum est. Accidit autem, ut linteis opus habens scatulam aperiret, quo facto, magna formicarum ad instar, alatorum vermiculorum quantitas evolabat, acidissimo interim odore omnibus linteis imprægnans, tandem ovo conspecto, in basi aperturam offendit, ex qua animalcula dicta egrediebantur; diffracto demum ovo, vermiculos caseosis illis non dissimiles, alatis nigris succedentes, ac in albumine nidulantes, (de vitello autem nihil amplius apparebat,) in conspectum veniebant. Quemadmodum autem nulla pars humani corporis est, in qua non vermes generari possint, uti observationes in *FORESTO lib. XIV. p. 330.* aliisque testantur, ita non video, cur in dubium vocandum sit, in dentibus illos non progigni, cum quotidie cibis vescamur, qui verminoso inquinati sunt seminio: confirmat id quoque ipsa experientia, cum ex ipsis dentibus evulsis cariiosis diffractis, vermiculi extracti fuerunt, quam in rem evolvi possunt SCHULZIUS & PECHLINUS, *M.N.C. Dec. I. an. IX. X. p. 433.* HOLLERIUS, in *perioche ad lib. V. Galenus de compos. med.*, JOANNES AGRICOLA in *not. ad Job. Popp. de tartaro*, SALMUTHIUS *obs. med.* Confer præterea *FORESTUM pag. 399.* SCHENCKIUM & ETTMULLERUM in *praxi p. 66. a & b. it. p. 822.*

13. Ex vitioso nutrimento, quod non tam dentium, quam gingivarum est; perficitur quoque generatio lithodonti seu lapidis dentalis, tartari dentium vulgo dicti. HELMONTIUS gingivas, ipsis dentibus nutrimentum suppeditare putat, quod si in excrementum vertitur, & ex læsis gingivis emittitur, circa dentes ipsum indurescere, cum jam tum aliqualem suscepit determinationem sive potentiam dentalis duritie. Nostra sententia hæc est, tartarum dentibus adhaerentem, productum esse partim saliva terrestribus, tartareis & viscosis partibus stipata, partim etiam lymphâ gingivalis impura tartarea, quæ subinde dentes humectando, successive ipsis viscosas tartareas partes apponit: hic tartarus propter acredinem suam paulatim ipsam dentium substantiam consumit, & nigredinem, quæ propter poros copiosiores inductos lucem suffocantes oritur, ipsam cariem inducit. Cæterum hic dentalis lapis, spiritus salis affricu in momento resolvitur ac abstergitur, indicio, terra alcalina ipsum constare. Solet hic affectus familiarissimus esse infantibus, qui lacticiis viscosis & saccharatis vescuntur; item scorbuticis, arthriticis, nephriticis, hypochondriacis, non aliam ob rationem, quam quod illorum serum scateat impuris terrestribus tartareis copiosis partibus, quo circa ex hisce concludendum esse existimo, inspectionem gingivarum merito commendandam esse medicis, quoniam harum status feri ac lymphæ statum nobis indicat luculentissime.

14. Accedimus jam ad illos dentium affectus, qui ex vitio ac imbecillitate nervorum nascuntur, & primum occurrit dolor, qui interdum crudelissimus percipitur in tota dentis substantia, imo in gingivis & vicinis partibus, tota sæpius maxilla. Membranam enim licet tenuem, exquisitissimi tamen sensus per cavitatem dentium dispersam esse, nec non nerveam tunnicam, ipsas gingivas, alveolos & radices imme-

N

diate

diatē cingere, ex physiologicis sufficienter notum est; quando itaque ipsa sanies cariosi dentis, fibrillas membranaceas in medulla dentis contentas aggreditur, dolor excitatur truculentus. Unde experientia quotidiana deprehendimus, raro excitari odontalgiam, nisi dentes existant cariosi. Defluxio enim quæ è capitis vertice per tempora in maxillas ruit, dentem, qui exesus est, in eum maxime infilit. Interdum etiam dentibus salvis ac integris dolor se manifestat una cum rubore, tumore, pulsatione arteriolarum, facie rubicunda, perpetuo salivæ stillicidio, calore præternaturali & febriculosa quadam sanguinis commotione, assiduæque vigilia, quæ cuncta symptomata arthritidem quasi dentium & partium vicinarum inflammationem patefaciunt. Invadit sæpius hic affectus plethoricos, scorbuticos, & quibus solennis evacuatio sanguinea, in foeminis per menses, in viris per hæmorrhoides aut per omissionem venæ sectionis cohibita & suppressa fuerit, hinc gravidæ ob statum plethoricum, cui cacochymia sæpius se associat, valde obnoxia sunt huic affectui. Fit nimirum à decubitu feri acris circa radices, gingivas ac membranas dentium stagnantis, quandoque cum affectu erysipelaceo, qui cutem externam faciei & substratos mufculos, & glandulas parotides infestat, jungitur odontalgia, & spasmodica partium constrictione ipsos dentium nervos in consensum trahit. Cæterum notissima veterum distinctio est odontalgia à causa calida vel frigida, quæ etiam sano sensu potest admitti: calida dicitur, quæ cum fervore ac aestu in sanguineis, plethoricis, cholericis, ætate existente juvenili vel virili, cum symptomatum ac febris vehementia invadit, facie rubicunda, & vasorum intumescencia. Ex causa dicitur frigida, si corpora cachectica, subiecta serosa, senes, foeminas adoritur & cum facie pallida, pulsus debilitate, tumore oedematoso jungitur: & notandum in genere est, quando odontalgia proficiscitur ex causa calida, acerbiores, breviores tamen existere dolores, quando ex humore frigido, remissiores, aut diuturniores fieri. Secundo loco attentione dignum est, odontalgiam, quæ cariem dentis pro causa agnoscit, magis esse continuam, ita tamen, ut occasione multiplici externa & interna excitetur & exacerbetur, quæ autem est inflammatoria, & à decubitu feri viscidis acris suboritur ac arthriticis, rheumaticis, hypochondriacis, plethoricis, & qui consuetas narium hæmorrhagias non patiuntur, familiaris est, cum febriculoso horrore, capitis gravitate, corporis lassitudine, faciei distensione per periodos invadere solet, & certo quoque tempore finitur. Simile quid hic affectus, ratione invasionis, ratione causarum, symptomatum, & curationis habet cum erysipelate, arthritide, podagra, rheumatismo; adest nimirum in hisce omnibus inflammatoria feri vel sanguinis congestio cum spasmodico dolore, tumore, rubore, ardore, pulsatione conjuncta, quæ debitam dissipationem & resolutionem requirit.

15. Neque hoc loco silentio prætereundus est ille dolor, qui è prorupione dentium suscitatur in infantibus ac pueris, præsertim quando canini, qui præ reliquis satis duri ac acuti sunt, unde germanicis *die Spitz-Zähne* dicuntur, gingivalem carnem pervadere nituntur. Profecto enim longe majori cruciatu atque molestia hi prodeunt, quoniam acutius gingivas afficiunt, quam molares majores & obstrusiores. Unica doloris causa est perruptio, lacinatio & irritatio gingivalis carnis, quæ ex variis fibris, nervis ac membranis contexta est, unde ex hac irritatione exsuscitatur dolor, ex dolore dein, qui semper cum spasmo & impetuoso spirituum animalium per systema nervosum commotione junctus est, proficiscuntur atrocita dentientibus supervenire solita symptoma-

ta, quæ recenset divinus *Senex Sect. 3. Aphor. 25.* inquiens: *cum dentire cœperint, gingivarum molesti pruritus, febres, convulsiones, diarrhœæ oriuntur, maximeque cum edunt caninos dentes, & qui inter pueros crassissimi sunt, alvoque adstricta.* Quibus tanquam frequentioribus junguntur etiam vigiliæ, vomitiones, salivatio crebra, asthma, tussis. Et ordinario adest major horum symptomatum imò convulsionum truculentia, quo major ad eas diathesis ex utero materno, nutrice morbosa aut prægnante, lacte in ventriculo coagulato, aut in putrilaginem acidam aut amurcam degenerante, pultibus ferventibus, aëris frigidi admissione, capitis aliarumque partium ulceribus aut exanthematibus subito evanescentibus, lumbricorum in intestinis præsentia, accedit. Plura hac de re legi possunt in *WILLISIO lib. de morbis convulsionis pag. 54. & 58.*

16. Transiitum jam facimus ad illos affectus, qui ex vitio nervorum, illorum nempe resolutione ac ligamentorum laxitate dependent, & primus dicitur vacillatio: vacillant autem dentes ob duplicem rationem, vel vitio dentis proprio, vel ratione gingivarum; ratione prioris causa vacillationis proxima est vinculorum seu ligamentorum laxitas, flacciditas, corrosio & ruptio. Ratione posterioris vero sunt vel gingivæ in tono resolutæ, vel in unitate solutæ, idque vel in simplici cruentatione, in *den Zahn-Bluten*, vel in putrida simul, epulice *oder die Mund-Feile* dicta.

17. Ligamenta laxantur & flaccescunt narcoticorum & opiatorum ope, unguento hyoscyami aliisque, quale exemplum *M. N. C. Dec. II. an. 2. pag. 273.* suppeditant. 2. à violentia externa, casu, ictu, rerum durarum obviatione, alaparum inflictione &c. idque periculosius in anterioribus, quippe qui ob radicem simplicem facile vacillant incisores imprimis parum profunde inhaerent, vid. *anatomici & FORESTUS lib. XIV. obs. 12.* ad quam violentiam externam & rerum durarum mordicatio pertinet, imprimis si nucleos ceraforum, prunorum dentibus diffringere quis studeat. 3. à convulsionibus laxatur e. g. in stridore & collisionibus dentium, quod infantibus familiare, de quo *FORESTUS p. 405.* in collisione imprimis, *wenn sie mit den Zähnen knirschen.* 4. Ob defectum nutrimenti in convalescentibus, interdum & in senibus, confer etiam *FORESTUM p. 413.* Ligamenta seu fibrosi illi hamuli porro corroduntur & mortificantur ab acri corrosivo quocunque, five sit tartarus & caries, five scorbutica affectio, five mercurii reliquia. Sic *EUSTACHIUS de dentibus* non semel ex defluxionibus, quibus dentes obnoxii, in præsepiolis tantam materiæ gypseæ, quam *ETTMULLERUS in praxi p. 68.* pro topi dentalis uberiori incremento habet, copiam coacervatam invenit, quæ vincula laxarit, ac tandem ipsos dentes extruserit, quem in *SCHENKII observationibus* allegatum vide. In scorbutico vero acre peregrinum, ex gingivis corrosis ad dentis radices & ligamenta elabens, eandem corrosionem inducit. Mercurius firmitati dentium insensibilissimus est, ubicunque enim poros invenit, (invenit autem ob tenuitatem etiam in subtilissimis) ibi se insinuat, & corrodere incipit, nervis imprimis ac ligamentis infestus: huc facit *BOYLEI observatio, tract. de poris cap. VII.* qui mercurii guttulam in dentis alveolo invenit ab inunctione mercuriali reliquam, quæ & dentis elapsi causa fuit; eundem effectum aquæ cosmeticæ mercurio imprægnatæ sæpissime produciunt, de quo *FORESTUS & ETTMULLERUS* plura habent. Tandem violentia externa ligamenta etiam rumpuntur, si non omnia, saltem plurima, ut leviter saltem adhuc alveolis dens adhæreat, idque vel per dentiducis extractionem, vel per ictum, vel per excussionem, aut per

per casum. Gingivas quod attinet, illæ in tono suo plerumque resolvuntur vel odontalgias cessantibus; propterea, quod inflammata antea intumuerant; nam omnis caro inflammata postmodum flaccescit, vel à salivatione cessante, gingivis antea non ruptis, sed rarefcentibus saltem. Unitas earum soluta in simplici saltem cruentatione fit, si saliva acri caractere infecta, sive simplici sive scorbutico, gingivarum carnem in spongiositatem ac tumorem attollit, unde modo leviter tactæ rumpuntur & sanguinem fundunt. Jam longe facilius erit de dentium casu & defectu differere: dicitur autem casus quando vel vacillatione, vel vi externa excidit dens. Defectus est, quando propter ætatem prioribus novi non succrescunt.

18. Devolvimur jam ad stuporem dentium, qui peculiare quasi quoddam doloris genus est, quando nimirum membrana dentes investiens sensu quodammodo privatur. Causa petenda est maxime ab acido austero assumto, vel etiam per vomitum rejecto, unde hypochondriacis ex acido & austero laborantibus hic affectus valde familiaris est, vid. *M. N. C. Dec. II. an. VII. pag. 142.* Quo de morbo etiam legi meretur *FORESTUS lib. XIV. obs. IX. pag. 406.* Superest stridor dentium seu eorundem crebrior collisio: est peculiare convulsioneis genus à spasmo reciproco musculorum in genis abductioni & adductioni mutua opera inservientium, qui aliquali convulsivo motu affecti, stridorem talem inferunt. Causæ sunt, quæcunque ad convulsiones aliquid conferre possunt e. g. frigus intensissimus, dolores ex vermibus, ex dentitione difficili, suppressio catameniorum, circa quam consuli possunt *ETTMULLERUS in Praxi pag. 70.* & *FORESTUS obs. IX. pag. 460.* Hæc circa dentium pathologiam hoc loco sufficiant.

19. Postquam diversos in superioribus consideravimus dentium affectus, illorumque causas exposuimus, restat jam, ut singulis seorsim convenienti medendi via & remediis ad causas tollendas potentibus apertissimisque occurramus. Primum autem in considerationem merito venit ipsa dentis caries, sive ejus destructio ac corruptio faniosa, ubi illud notandum, cariem seu corruptionem & mortificationem dentis nec ulla arte vel remedio reparari posse. Quod enim corruptum & mortuum est, uti videmus in sphacelo, illud ad integritatem & vitam minime potest revocari; nam quod sphacelosa putredo & corruptela est in carne, illud caries est in ossibus. Interim tamen eo allaborandum est, ne illud malum quod in principio sæpenumero leve & exiguum est, ulterius serpat & vires acquirendo, totum dentem destructione afficiat. Si enim semel inceperit caries in dente, propter putredinem, quæ subinde sese multiplicat, & continuo partem rapidissimo suo motu inficit, maxime si aëris ceu fluidi gravis penetrantissimi, vehementissimi, vehementi in motu intestino existentis, liber fuerit accessus, non desistit, donec totum os consumferit; quinimo observamus, quod caries, dente uno consumto, etiam alterum vicinum adoriatur & simili labe afficiat, huic itaque corruptioni ponenda sunt obstacula. Ea autem omnia, quæ alias cariei ossium magno cum effectu opponi solent, qualia sunt euphorbium, camphora, oleum cochleariæ, caryophyllorum hoc loco insufficientia deprehendo; hanc potissimum ob rationem, quoniam partim commode non applicantur, partim etiam accessione ciborum & continuæ salivæ virtute sua imminuuntur. Illud unicuique expertissimum pro conservatione dentis, qui jam excavatus & carie tactus fuit, deprehendi remedium, nimirum curavi parari ex plumbo massulas & molleculas, quæ exactissime cavitati dentis respondebant, illasque decenti applicatione intrusi: ita ad mul-

tos annos dens servatus fuit integer, quod felicissimi effectus esse sum expertus; impeditur nimirum hac ratione, ne reliquæ ciborum intrantes dentis cavitatem in putrilaginem abeant foetidissimam, quæ non tantum ulterius depascit osseam dentis substantiam, verum etiam male olente odore totum palatum imbuat. Addimus etiam, quod plumbum saniem istam cadaverosam acidam acrem substantia sua alcalina temperet, corrigat, immutet, uno verbo: fermentum sic dictum ulcerosum penitus destruat, nec non ulterius aëris liberum aditum præpediat.

20. Notissimum in foro medico est, nullos gravioribus conflictari doloribus dentium, quam qui dentes exesos & excavatos alunt, in illos enim, cum via jam pateat, fluxio feri acris magis insilit & irritando membranam nerveam, quæ cavitatem dentis interiorem investit, crudeles dolores efficit. Ut itaque talis modi dens cariosus nunquam amplius dolore afficiatur, optimum arcanum hoc est, applicetur nempe cauterium actuale, & hujus beneficio comburatur membrana interior nervea, per quam sentit dens. Accidit hæc operatio sine ullo dolore & citra ullum periculum: quod non tantum in me ipso, sed & in compluribus individuis illud tentasse testor, instrumento singulari hunc in finem elaborato, auspiciatissimo semper cum effectu, cavitati postmodum dentis intrudenda est massa, ut antea dictum fuit, plumbea. *FORESTUS lib. XIV. p. 410.* actuale cauterium applicat per cannulam, & dentes vicinos cera vel re simili munit. Instrumentum huic fini aptum communicat *SCULTETUS in arment. chirurg. appendice p. 5.* In genere hic tenendum, actuale cauterium potentialibus, cujusmodi sunt oleum vitrioli, aqua fortis, caput mortuum vitrioli, longe præferendum esse, hæc enim simul destruant dentium texturam & fauces lædunt, illud autem humiditatem dentis nimiam exsiccando, & simul fermentum, ut vocant extinguendo, juvat, adeoque ex duplici effectu merito laudatissimum est.

21. Accedimus jam dentis extractionem, circa quam etiam nonnulla merentur animadverti: asserimus autem dentium extractionem aliquando non juvare vel necessariam non esse, quandoque periculosam esse, interdum autem summe necessariam. Non juvat, quando inflammatio & exulceratio, non tantum dentem & gingivam, sed & totam viciniam, ob congestionem impurorum ex corpore humorum ibi factam, occupat: quando enim nullum in dente vitium est manifestum, tunc dolor minime tollitur dentis extractione. Non necessaria etiam est in odontalgia ex dente carioso, quoniam, uti supra innuimus, dens servari & caries ulterior nec non dolor dentis ex carie generatus, præcaveri potest, debita cauterii actualis applicatione. Periculosa est in extractione dentium caninorum, qui satis longam ac latam radicem habent, cui implantatur portio nervi, qui ex foramine orbitæ prodit, unde facile dolor acutus vel inflammatorius oculorum, & cephalalgia excitari potest. Confirmat id quoque observatio notabilis *HIGHMORI in disquisit. anat. c. 2. p. 1.* Larga quoque hæmorrhagia ab extractione dentium, qui altius insident alveolis, præcipue in plethoricis, mensibus infantibus, scorbuticis, febre ardente laborantibus obvenire potest, quæ etiam mortem post se trahit. Exempla videri possunt apud *HIGHMORUM, HOLLERIUM, comment. in sect. 2. lib. 2. aph. 18.* *PLATERUM & ROUSSETUM lib. de hom. primordiis, & hystericis affectibus.* Cavendum quoque est, ne dens eo tempore evellatur, quo caput dolet & congestio nimia sanguinis est ad caput, aut crudelis dolor urget: quia tunc cum omnia irritata sunt, atrociora symptomata creantur. Plures cautelas circa evulsionem observandas tradit *RIVERIUS prax. med. L. VI. c. 1.* Si hæmorrhagia

rhagia enormis fit à dente evulso, caput mortuum vitrioli admoveere oportet. Periculosa identidem est extractio, præcipue dentium molarium, præsertim in maxilla superiori existentium duorum, nempe penultimi & succedentis tertii, non tantum quod ternis subinde infigantur radicibus, adeoque major læsio carnis gingivalis metuenda sit, sed maxime, quod maxillæ os simul facillime dilacerari possit. In hujus rei illustrationem sequens historia plurimum faciet. Accessit ad me ante aliquod tempus generosissima fœmina, quæ conquerebatur de fistula existente in maxilla superiori, in illa parte, ubi penultimus dens, qui extractus erat ante annum ob doloris atrocitatem, positus erat, ab hoc tempore statim, dicebat ægra, non consolidatam se observasse cavitatem, & ex hac perpetuum materiæ serosæ effluxum in os habuisse. Admittebat hæc cavitas stylum tres transversos pollices longum & quando applicandum fuit huic cavitati pro fine consolidandi balsamum Peruvianum, vel aliud remedium penetrantis odoris, sensit illud ipsum ægra in naribus efficacissime, quasi illud ab extra naribus fuerit immissum: observavit porro, quando nares non bene fluebant, accumulari & incrementum sumere effusionem materiæ serosæ per illam ipsam notatam cavitatem, & vice versa, quando dicto in loco non bene profluebat mucosa materia, in naribus excretio fuit adaucta. In consilium vocavit celebres & peritissimos multorum locorum medicos & professores, nec non chirurgos expertissimos, qui unanimi ferme ore dixerunt esse fistulam, in cuius sanationem ordinarunt usum thermarum, decoctorum exsiccantium ex lignis & radicibus confectorum, nec non purgantia. Uti quoque fuerunt externis balsamicis, traumaticis, constringentibus, sed sine omni effectu. Chirurgi incisione curandam esse putarunt, sed quomodo hanc celebrare potuissent, lubentissime voluissent edoceri. Hæc omnia cum mihi narraret, & à me peteret auxilium, statim edixi non esse fistulam, sed per violentam extractionem læsam fuisse maxillam superiorem & insignem illum sinum seu cavernam aut antrum accurate à Cl. HIGHMORO l. c. descriptum, (quod pituitaria satis valida tunica pro mucæ secretionē instructum est, & in ipsas nares exitum suum habet,) apertum fuisse. Et hoc ipsa generosa fœmina confirmat cum ediceret, radici dentis extracti adhæsisse materiam solidam, satis copiosam & pumicosam, statim in capite sceleti ipsi ægrotanti monstravi, quam tenuis sit, circa illum sinum in fine, ubi radix inseritur, substantia alvearis penultimi dentis, & qua ratione hac læsa stylus possit admitti usque ad orbitam oculi, item, quomodo in nares terminetur. Itaque impossibilem esse sanationem plenariam judicavi præcipue in fœmina ad senectutem inclinante, nec ullam chirurgicam operationem, aut ullam medicinam internam, locum habere posse, sed jussi tantum, ut cavitās illa plumbo occludatur, ne aër libere accedens ad sinum illum, majorem putredinem ac corruptionem efficeret. Ceterum usum balsami vitæ, ut ipsum attrahat naribus commendavi, quibus remediis etiam optime se habet.

22. Necessaria autem extractio dentis est in fistulis, siue illæ ex tumore inflammatorio gingivarum & maxillæ rupto dentem cariosum efficiente, siue ex dente carioso & putrido, non mature exento ortum suum habeant, eum in finem, ut saniosæ materiæ præbeatur exitus. Legi meretur hac de re FORESTUS *lib. XIV. p. 394*. Etenim necesse est, ut materia hac ratione exitum inveniat, quæ alias à stasi majorem acrimoniam & erodendi vim concipit. Accidit sæpius, ut cum dente simul evellatur callus, & sanguinis profluxus ex fistula subsequatur, unde felix subsequitur curatio, qua de cura videri potest SENNERTUS, *lib. 2. prax.*

part. 1. c. X. MARC. AUREL. SEVERINUS *chirurg. efficaci part. 2. c. I.* 20. GUIDON. de CAULICO, *it.* FORESTUS, qui aliquot historias curatarum fistularum una cum cautelis præstantissimis consignavit, duas nimirum describit gingivarum fistulas ex dente carioso *Lib. 14. obs. 17.* unam ex gingivarum inflammatione dentes cariosos reddente, libro eodem, *obs. 15.* unam quoque partis externæ, ita ut in barbam virus manaret, *obs. 7.*

23. Quando dentes cariosi ac putridi vermibus præbent hospitium, dolor subinde pruriginosus, ardens, cum nulla aut pauca salivatione observatur, notante id doctissimo FORESTO *in observationibus lib. XIV. p. 339*. Odontalgia ex vermibus orta difficulter sanescit, & ægre domari potest; spernere enim solet omnia specifica alioquin odontalgica, accersenda itaque talia sunt, quæ singulariter verminosæ progeniei adversantur, quem in finem laudatus FORESTUS *l. c.* decoctum colocynthidis, pilulas ex aloë & myrrha, item pulverem contra vermes commendat. Quidam fumum hyoscyami ad eliciendos vermes laudant, sed noxas hujus suffitus deducit egregie HAGENDORNIUS, *in hist. med. p. 395*. tutior est fumus sabinae. CLAUDE-RUS *in M. N. C. Dec. II. an. 5. p. 304*. evulsionem dentis suadet, at vero nunquam ad extremum hoc præsidium est refugiendum, nisi durissima adsit necessitas. Ceterum tartarea & tophacea materia, quæ scorbuti, & lymphæ impuræ soboles est, & subinde dentibus firmissime cohæret, non melius tolli & amoveri potest, quam operatione chirurgica, per certa instrumenta ex chalybe, hunc in finem affabre confecta. Etenim abstergendus & abradendus tartarus ille est, ne cariem, insignem foetorem, abominabilem nigredinem & vermes producat; si levius saltem adhæret, pulvis ex osse sepia, cornu cervi usso, testis ovorum calcinatis, tartaro vitriolato, iride florent. & moscho paratus, ad dentium dealbationem, & à tartaro corrosivo purgationem commendari meretur. Ita etiam spiritus vitrioli, cum syrupo cochleariæ & violarum subactus medicina non spernenda est, ad tartarum mucosum à dentibus auferendum; prudenter tamen adhibeatur, ne ipsa ossea dentis substantia simul in corruptionem abeat.

24. Accedimus jam ad dolorem inflammatorium, quo maxilla cum dentibus à decubitu sanguinis vel potius feri acrioris affici & sæpe graviter solet corripitur. Commendamus hoc loco omnia illa, quæ alias inflammationibus solent opponi, nimirum ante omnia materia ibi hærens per blandam diaphoresin est discutienda, & enormes dolores, qui quandoque febrem, vigilias assiduas, insignes cephalalgias, imo convulsiones producant, blandis anodynis & nervinis componendi sunt. Quando corpus est plethoricum, vel solennis & consueta evacuatio sanguinis suppressa est, sanguinem educere convenit, siue ex brachio, siue ex lingua, incisus venis raninis. Ita fœminam plethoricam largissima venæ sectione in pede à sæva odontalgia statim liberabat THONERUS *cap. XI. obs.* Postea diaphoretica cum anodynis mixta in usum vocentur, qualia sunt diascordium Fracastorii, roob sambuci, camphora, nitrum, theriaca coelestis, essentia scordii, aqua Fl. sambuci, tinctura bezoard. mixtura simplex, ess. castorei, anodyna, cinnabaris, quæ sub varia forma adhibenda & subinde continuanda sunt, expectando semper lenem ac moderatam diaphoresin ac discussionem, hæc enim ingravescenti feбри simul obviam eunt. Abstinentium autem merito est à regimine impetuose sudorifero, utpote quod sanguinem vehementer commovendo ardorem, dolorem & symptomata magis adaugere, & vires ipsas præmature destruit. Externe ad dissipationem doloris & tumoris convenientissimi sunt sacculi ex speciebus discutientibus & sale volatili oleoso & sulphure evaporabili

porabili demulcente constantibus, parati, calideque applicati, sunt autem ejusdem generis flores chamomillæ simpl. & roman. sambuci, meliloti, papaveris rhœados, herba card. bened. chærefolii, hyssopi, hormini, semen anisi, carvi, anethi, baccæ junip. camphora, crocus, succinum, farina fabarum, sal commune, nitrum, quæ omnia potentissima sunt resolventia & discutientia; præterea ab omnibus frigidis tam siccis quam humidis est abstinendum. Dein interne, si dolor atrocissimus est, pilulæ WILDEGANSIÆ & MATTHIÆ, quæ ex opio, ceu basi, & purgantibus ac diaphoreticis constant, & opium præstantissime correctum exhibent, circa tempus præsertim nocturnum in usum vocari possunt. Ipso in paroxysmo, quando dolorum ferocia urget, spiritum vini camphoratum, vel balsamum vitæ ad guttas aliquot in nares attractum ex tempore & instar incantamenti inducias doloribus facere sæpius observavi, quamvis non continuas; cujus ratio hæc esse videtur, quoniam ramus nervi ad narium membranas pertingens, ex eodem provenit trunco: nimirum ex quinta conjugatione nervus ad dentes fertur. Thus quoque in balsamo nostro vitæ solutum & cum gossypio denti dolenti admotum, item cum aqua Caroli cephalica gingivarum frictio opem adfert præsentissimam. Ad mitigandum vero dolorem clystere nil est præsentius. In statu cacochymico, purgantia, specifica etiam ex gummatibus, mercurio dulci, sale succini, resina ligni guajaci, extracto aloes, parata, & per epicrasin purgando forma pilularum exhibita, summe erunt proficua.

25. De cætero in deliberationem hoc loco venit, an cauteria vel vesicatoria in odontalgia alicujus sint usus & fructus. Præctici non satis deprædicare possunt singularem eorum usum in gravissima odontalgia. Notum est anthelici auri aut musculus temporum affecti lateris applicari hunc in finem cauteria, vid. ZWINGERUS in *ephemerid. l. c. obs. 233*. Alii moxam circa tempora apponunt, cujus loco clarissimus FRANKIUS fune inflammabili carpto, *geschabten Lunden*, consilio B. Scretæ, præstantissimi medici utitur, vid. *M. N. C. Dec. 2. ann. 1. obs. 27*. In odontalgia periodica non minus feliciter SPIGELIUS usus est cauterio actuali, quo eam anthelici partem, quæ superiorem tragi immediate contingit, incidere, vulnusque debite consolidare solitus est. Loco cauteriorum potentialium specificè inservire queunt ranunculus nemorosus, raphanus rusticanus & alia. Alii contusi ad cubitum applicatione vesicas excitatas, eisque odontalgiam sedatam *M. N. C. Dec. 2. ann. 9. pag. 221*. narrant. Ita etiam ranunculi nemorosi JACOBUS WOLFFIUS *M. N. C. Dec. 2. ann. 7. pag. 351*. meminit, qui cum spiritu vini contusus, brachio lateris affecti, grossi magnitudine in parte carnosâ applicatus, vesica relicta, dolores sedat: plumbaginis seu dentariæ radix contusa & carpo manus imposita per noctem relicta, mane maculam plumbeam relinquit & dentium dolorem dissipat, quod ETTMULLERUS in *praxi pag. 824*. ceu verum experimentum allegat. Idem ex BARTHOLINO de raphano cubito applicando, aliisque sale volatili acri gaudentibus *M. N. C. Dec. 2. anat. 4. pag. 181. 182*. tradunt. Linimentum quoque ex octo cantharidibus, tribus allii radicibus & theriaca cum linteolo flexuræ cubiti admovendum enarrant *M. N. C. Dec. 2. anat. 5. pag. 335*. Alios allii ad hunc finem applicandi modos ex PLATERI observationibus *lib. 2. pag. 371. & 375*. & *Paræi Chirurgia, lib. 16. cap. 25*. eadem ephemerides communicant. Quantum vero vesicatoria in dolore dentium conferant, testantur observationes in dictis miscellaneis passim occurrentes. Nostri sententia est, non inutiliter nec sine fructu in graviore odontalgia, præsertim si ex sero acri corrosivo, nervum obsidente, Frid. Hoffmanni Oper. Tom. VI.

oriuntur, dicta remedia applicari posse, partim ut ipsam peccantem materiam foras ejiciant, partim etiam, ut morum enormem impetuosum spirituum ex dentium membranis in alium locum derivent. Vesicatoria dicta, nec non nervina antispasmodica & anodyna optimo cum successu pone vel sub aures applicantur, ob hanc rationem, quoniam arteria una cum nervo & vena sub aurem maxillam inferiorem ingreditur, & secundum ejus longitudinem in omnium dentium inferiorum radices disseminatur. Commodissime itaque hoc loco serum acre influens avocatur & divertitur, vel etiam impetuosus spirituum per nervum motus compescitur. Ob eandem rationem firmior compressio pone maxillam inferiorem digitis facta, ipso in doloris dentium paroxysmo dolorum ferociam ex tempore sistere solet. Præterea observamus in praxi, temporibus, item infra orbitam applicata emplastra ex nervinis & antispasmodicis facta, nominatim mastiche, balsamo de Peru, extracto castorei, camphora, oleo nucistæ, croco, & in graviore casu, oleo hyoscyami expresso, addito simul opio, promtissime & repente auxilium ferre, quoniam ramus nervi ad musculos temporales transiens ejusdem originis est cum nervis, qui ad dentium cavitatem feruntur, & nervus sub orbita statim egreditur in maxillâ superiori dentes anteriores.

26. In dentitione seu prurptione dentium difficili, quæ convulsiones, febriculas & diarrhœas in pusillis infantibus sæpenumero post se trahit, præter interna antepileptica, antispasmodica, præcipitantia & maximi hoc in casu æstimatum usum gelatinæ cornu cervi in potu dissolutæ una cum essentia papaveris rhœados, liquor noster anodynus mineralis ad aliquot guttas frequentius datus omnibus palmam præripit. *Paræus l. 23. chirurg. c. 67*. scalpello gingivas aperire jussit antequam lethalia signa superveniant: quod remedium exoptato cum successu aliquot suis liberis, præsentibus *Feureo, Altino, Curtino*, Medicis regiis & Guillelmo chirurgo applicavit. Incisio potest fieri scalpello *mit einem Federmesser*, non phlebotomo. Externe prodest, ipsa illa in parte, ubi dens prorumpere conatur & tumorem, dolorem ac ardorem gignit, ficum per medium dissectam applicare, vel etiam mucilaginem cydoniorum cum vitelli ovorum momento, aqua rosacea & syrupo violarum dissolutam, vel adhuc melius cerebrum leporinum, quod specificè à peritissimis hunc in finem commendatur, adhibere.

27. Quando dentes vacillant ex gingivarum consumptione, corruptione, vel exulceratione scorbutica putrida, nec non nervorum imbecillitate, non neglectis internis antiscorbuticis, sanguinem & lympham depurantibus lignosis, radicem mali auferentibus, externe quoque, quæ gingivas mundant & firmant, in usum trahenda sunt. Laudo autem instar omnium in gravi gingivarum erosione, foetore & exinde emergente dentium debilitate, liquorem præstantissimum sequentem: recipe mastiches, myrrhæ, gummi elemi ana drachmas duas, herbæ scordii, hormini, salviæ, fol. myrthi ana pugillos duos, florum rosarum rubrarum pugillos tres, aluminis drachmam unam & dimidiam caryophyllorum drachmam, vini rubri gallici uncias octo, spiritus vini camphorati unciam unam: debito calore fiat extractio; filtratis potest addi præter nata spiritus cochleariæ. Hic liquor sæpius teneatur in ore & gingivis immediate applicetur, ac dici vix potest, quam valide ab ulteriori putredine gingivas defendat, dentes firmet, & carnem consumptam de novo generet. Poterit tamen eodem fine eodem fructu etiam adhiberi essentia balsami Peruviani cum liquore nostro balsamico & mellis rosati

rosati portione remixta, quæ insignem mundificantem & roborantem obtinet virtutem. Quandoque rebellis gingivarum adest ulceratio, & expertissimis remediis cedere renuit, sed remanent semper ulcera gingivarum stillantia & aperta, ubi bene investigandum est, an non subsit dentis caries, in quam ulcus definit, quo in casu caries radicitus tollenda, vel ipse dens cariosus extrahendus est. Ceterum ad dentium ab omni nigredine, carie, & tartaro præservationem, nec non ad gingivarum firmitatem utilissimum erit, interdum mane, jejune os colluere & dentes fricare vino, cui infusum fuit salvia, quod etiam senibus, quibus dentes ex imbecillitate nervorum vacillant, nec non illis, qui foetidum anhelitum habent, etiam atque etiam commendandum est. Quando deficient dentes, & in alveolis nulli amplius supersunt, medicus regenerationem nullam novit, sed curam palliativam instituit, ac per artem chirurgicam naturæ defectum nonnihil supplet, dentes ex ebore aut dente hippopotami, comedendi tempore exemptiles, substituendo, quo tamen artificio non masticatio, sed loquela saltem adjuvatur, & ornatui consulitur. Alligant vero & devinciunt tum inter se, tum ad proximos fauces & integros, præcipue quidem aureo aut argenteo filo, sin minus, etiam lineo, ut ex *Hippocrate Paræus l. 2. c. 3.* adducit. Alii pectine eburneo alligant, & exemplum de *Merulo Alexandrino A. Benedictus, l. 3. cap. 22.* qui sibi dentes, cum excidissent, aureo filo ad pronuntiandum alligavit, enarrat. Historias vero de excussis dentibus subito repositis & iterum innatis, item illius foeminae nobilis, quæ pedisequæ suæ sanum dentem illi avulsam sibi deficientis loco restitui curavit, idque cum felici novæ radicationis successu, tum ipse *Paræus* priorem casum enarrans, *l. 16. c. 26.* tum *ETTMULLERUS in Pr. p. 65.* quoque in dubium vocant. Conferatur præterea *RIVIERUS in obs. comm. p. 357. vel 685.* & *BORELLUS l. obs. 10. p. 18.*

28. Quando fluxus sanguinis ex gingivis exulceratis vel scorbutis affectis vehemens & nimius est, quem aliquoties annotarunt Practici, ita ut etiam periculum post se trahat, præter interna diaphoretica, acrimoniam temperantia, sanguinis ebullitionem sistentia, externa malactica & fortiter glutinantia suadenda sunt. Expertum ac fidum deprehendimus spiritum vini rectificatissimum, essentiam succini bene saturatam, vel etiam liquorem, ex decocto corticum granatorum, flor. balaustrorum & syrupo granatorum acidorum paratum: his enim egregie sanguinis profusio sistitur. Si enormis est hæmorrhagia, ut coerceri non commode possit, rectissime deveniendum est, annotante *Tulpio in observationibus*, ad applicationem fungi dicti *Bovist.*

29. Ex illis, quæ dentium substantiæ nocentissima sunt, merito primam in considerationem venit frigidum, hoc enim, juxta *aphorismum 28. lib. 5.* *HIPPOCRATIS: bellum indicit dentibus, nervis, cerebro, dorsali medullæ.* Quandoquidem frigus partes exsanguies vel etiam sensu eximio præditas valde lædit, dum strictura pororum & vehementi ad lineam rectam ætheris motu (in quo essentia frigoris versatur) resistit libero spirituum transfluxui, proinde in omni dentium graviore dolore & quacunque illorum morbosa dispositione, ut vehemens evitetur frigus, autor tuus forque sum; unde facies semper, præsertim in paroxysmo potius caleat, nec externum frigus genas libere tangat. Exinde proficiscitur ratio, quare dolor ex dente excavato notabiliter remittat, si cavitas illa globulis plumbeis vel frustulis nucis moschatae repleatur. *FORESTUS lib. 14. obs. 11.* ob metum ingredientis aeris ex dentibus laboranti consulit, ne ore aperto dormiat, nec multum loquatur, qua ratione etiam


collutiones oris cum aqua frigida nunquam, semper cum calida instituantur. Altera parte nimium calidum minus quoque feliciter confert dentibus, ex sententia ipsius *HIPPOCRATIS lib. 5. aph. 16. Excessivum calidum carniū laxationem & nervorum infirmitatem affert, spiritus enim nimio calore dissipantur, unde fibræ laxantur*, quia nervorum robur, quod maxime consistit in mediocritate siccitatis, perit. Quapropter scorbutici & qui largas dentium hæmorrhagias patiuntur & ipsorum vacillationem habent, excessiva calida & simul humida omni studio ac modo evitent. Scite inquit *schola salernitana: pulles ferventes faciunt corrumpere dentes.*

30. Secundo loco dentium texturæ inimicissima sunt omnia acida, præsertim corrosiva, hisce enim non tantum ipsis stupor conciliatur, verum etiam tota illorum substantia successive dissolvitur atque destruitur, quo nomine spiritus nitri omnium nocentissimus, utpote qui brevi tempore solidissimum dentem in liquorem convertere judicatur. Perperam itaque medici consulunt illis, qui candidos dentes desiderant, ut utantur hisce spiritibus, etenim non potest non exinde dentium friabilitas & destructio subsequi. vid. *TIMÆUS à GULDENKLEE casu medicinal. lib. 40. cap. 1.* unde non audiendus hic *MONTANUS*, qui in *consultatione medica III.* illa in dentium dealbatione ad coelum extollit. Interne etiam acida in copia assumpta, uti vina & cerevisiæ acedentes, dum acedinem scorbuticam sanguini & lymphæ ingenerant, ad corruptionem ac cariem dentium & gingivarum erosionem magnum contribuunt solum. Præterea omnia viscosa, lacticia, caseosa, dulcia, saccharina, dentibus minus amica sunt, partim quod elementa sanguinis scorbutici suppeditent, partim etiam, quod crassitie particularum gingivarum substantiæ adhæreant & foedo lentore illam obducant, liberamque præpediant transpirationem. Nulla enim existit pars, quæ non propter nutritionem necessaria egeat transpiratione, unde cernimus ab hisce dictis, tephaceam materiam, corruptionem & nigredinem dentibus accedere. Deinde nimis acrida, salita, aromatica, alliacæ, spirituosæ nocent dentibus, breviter: omnia quæ lympham nimia falsedine atque acrimonia inquinant, seu ad scorbuti genesin faciunt, nutrimentum quoque dentium & gingivarum depravant.

31. Cæterum dentium substantiæ insensibilissima sunt ipsa mercurialia, tam intus, quam extus adhibita, quandoquidem videmus ab illitu mercurii ad concitandam salivationem in morbis chronicis rebellibus, insignem vacillationem ac nigredinem dentibus, gingivarum carni autem foetidissimam corruptionem & laxationem accedere, partim propter mercurii corrodentem vim causticam, accessu salium factam, partim etiam, quod copiosis humiditatibus glandulosas & nerveas partes, relaxando ipsorum fibras, repleat. Denique nec illud silentio premendum est, opiata certam dentium existere ruinam, qua de re consuli possunt *M. N. C. Dec. 2. ann. 2. obs. 163.* spirituum enim influxum sistendo, ad vacillationem & lapsum dentes disponunt. In insigni inflammatione facile gangrænam & sphacelum ac mortem ipsam inducere potest opium, quale exemplum in *FORESTO lib. 14. obs. 6. in scholiis* legitur. Nocent primario senibus, pituitosis, quia stupiditatem, vertiginem & gravedinem inducunt, testante id observatione *SALMUTHI Cent. 3. obs. 32.* Dicunt etiam, dentifragibulos semine hyocyani ac opio extractionem facilitare posse, quo circa ad ipsa deveniendum non est, nisi gravissimo existente dolore: & semper consultius est, ipsa præscribere cum purgantibus, diaphoreticis vel alexipharmacis mixta, quam sibi relicta. Fumus tabaci in asfuctis propter vim anodynâ simulque dissipantem

gravi in odontalgia non dissuadendus est, correspondente hic undiquaque experientia. At vero immoderatum ejus abusum vacillationem & præmaturam dentium jacturam inferre posse ob narcosin, non ibo inficias. Postremo, circa pulveres dentifricos illud meretur notari, quod male illi faciant, qui pulveribus asperis, v. g. paratis ex silicibus calcinatis, pumice, coralliis &c. ad dentium dealbationem subinde utantur, siquidem his ipsa substantia dentium consumitur & tandem atteritur. Præstat itaque ab illis abstinere, & saltim uti subtilissime pulverisatis lap. cancr. conchis præparatis, ossæ sepiæ, quibus admisceri pos-

sunt pulvis nucistæ, iridos, mastiches, alumen & parum inoschi. Hic egregie dentem purificat, firmat, detergit & gratum simul facit anhelitum. Tali pulvere, si fieri potest, post quemlibet pastum fricandi dentes sunt, non tamen duriter, sed sumendæ radices malvæ majusculæ, seu althææ eæque bene mundatæ aceto rosaceo immergantur, hinc iisdem in extremitate confusis in fibras & pulvere dentifricio conspersis dentes à sordibus blanda attritione liberandi sunt. Sed hæc de dentium morbosorum therapia in præsentī sufficiant.



D E

BILE MEDICINA ET VENENO CORPORIS.

§. I.

Sapientissimum dictum est HIPPOCRATIS: per quæ vivimus & sani sumus, per ea etiam agrotamus. Luculentum hujus adfert res sic dictæ non naturales præbent documentum; sicuti enim aëre, cibo & potu, motu, somno ac quiete homo necessario utitur; ita, si vitium iis rebus inest, graves inde ac morbosas afflictiones corpori ingenerari, est certissimum. Verum enim vero non solum hoc ipsum de iis rebus, quæ corpori nostro externæ sunt, valere arbitror, sed de iis quoque, quæ intrinsecus proxime ad vitam tuendam & sustentandam conferunt, ut sunt sanguis, lymphæ & spiritus animales. Uti enim ex horum debita indole, temperie, mixtione, motuque vitalium functionum pendet integritas; sic etiam eorum à naturali statu deflexio & morbosâ proxima via ex horum labe ac vitio peti ac derivari debet. Plura quoque in corpore deprehenduntur, quæ quanquam non proxime, necessario tamen ad sanum corporis statum magnum addunt momentum; ex quo facile intelligi potest, ex ipsorum vitio ac labe sanitatem vehementer perverti, & occasiones ac causas morbis succrescere. Exempli loco instar omnium nobis sit bilis, quæ quam perutilis imo necessarius ad vitam & sanitatem custodiendam sit liquor, nemini solidioris medicinæ perito incognitum esse potest, quod & ejus in quovis animante, etiam minutissimo declarat præsentia, siquidem nec ullum bilioso humore destitutum animal invenies. Et profecto, si rem recte exprimere velimus, bilis in corpore animantium genuinum corporum est medicamentum à natura prudentissime elaboratum, ut per hoc omnes morbosæ afflictiones avertantur, earum causæ præscindantur, & vitia, si quæ adsint, corrigantur; sicque corpus per liquoris hujus virtutem ac plane incomparabilem energiam vivum ac sanum conservetur, id quod infra uberius demonstrabimus. Cum itaque tantus usus tantaque in corpore sano servando sit præstantia, dum ipsius quasi universalis ac naturalis est medicina; quidni, si ipsa vel deficit vel depravata est & à debita sua temperie ac crassi deflectit, ingens ad morbos producendos nascatur occasio. Et quanquam à sapiente antiquitate magno præsertim medicinæ parente bilis inter morborum causas fuerit relata; nihilo tamen minus nostris temporibus fateri cogimur, quibus omnia vel ex acido, viscido, acri, vel ex archæi aut erroneæ animæ aut prudenti motu deducunt, vix amplius in censum morbificarum causarum bilem venire; cum tamen plurimæ eæque gravissimæ adfectiones ex bilis vitio suas trahunt natales,

in quibus maxima medicamentorum virtus ac energia in bilis emendatione, generatione vel evacuatione consistere debet. Quemadmodum enim bilis si sufficit pro vera ac genuina corporis medicina est habenda; ita & ea medicamina, quæ ad bilem temperatam & naturalem reddendam accommodata sunt, omnium esse præcipua, in iisque inveniendis & rite applicandis palmarium medici munus versari, quisque facile ad sensu suo comprobabit. In præsentī itaque nobis constitutum est, bilem tam secundum naturam ceu universalem corporis medicinam, quam præter, naturam, ceu plurimorum morborum causam atque originem considerare.

2. Præcipuum & vere unicum hepatis esse officium, ex sanguine per venæ portæ truncum & arteriam hepaticam ac glandulosos ejus acinos mechanica quadam ratione activum illum salino-sulphureum humorem, qui bilis nomine venit, filtrare & transcolare, res inter anatomicos & medicos est certissima. Equidem propter innumera, quæ ibi conspiciuntur, vasa lymphatica lymphæ secretioni ac dispensationi hepar præesse non inepte quidam judicant; sed secundarium hoc esse officium, quisque qui res ac circumstantias rite considerat, facile perspiciet. Aliter enim minus fieri potest, cum crassiusculus liquor ex sanguinis massa debet separari, quin per tubulos & poros amplioris orificii, quam fluida tenuioris consistentiæ exigunt, ea contingat secretio. Jam vero ipse sensus & ratio suadet mechanica, per quos liquor crassiusculus transire potest, per eosdem quoque facilius tenuiorem una pervadere posse liquorem. Non itaque existimandum, bilem tali forma & consistentia ab hepatis glandulis & sanguine separari, qualis dein ex hepatis viscere per ductus biliarios effluere conspicitur; sed potius valde fluida & diluta cum lymphâ influit, & à glandulis recipitur; ubi postea nova quasi evenit separatio; siquidem per vasa illa lymphatica, quæ glandulis adsunt, tenuis & aquosa pars fluit, remanente spissiori crassiuscula bilis substantia, quæ ob orificiorum angustiam excluditur. Recipitur vero ab amplioris diametri tubulis hepaticis, qui per totam hepatis substantiam, injectione cum cera teste, dispersi sunt, biliosus, & partim immediate ad duodenum, partim ad capsulam fertur biliariam.

3. In eo quidem inter se anatomici dissentiant, unde biliaria vesica hepati subnexa accipiat bilem. Alii enim tunicam glandulosam ex sanguine, per cysticas arterias advecto, eam separari existimant; alii minimos tubulos bilem advehentes fundo vesicæ implantatos esse statuunt; & denique alii certos ductus cysti hepaticos, per quos immediate bilis ad hoc receptacu-

lum ducatur, affirmare sustinent. Verum enim vero quid de hisce opinionibus sentiendum sit, sequens à Cl. BOHNIO aliisque institutum experimentum declarabit: in aperto scilicet cane omnis è vesica bilis expressa ductusque cysticus ligatus est, & nihilo minus in subiecto aliquamdiu superstita aliquid bilis in vesica expectarunt non obstante hoc vinculo, negatoque folliculi fellis cum poro hepatico commercio: at nihil fellis, sed loco hujus tantillum sanguinis congrumati deprehenderunt. Hinc recte potius accuratiores statuunt, bilem, quam custodit cystis hepatica, natales suos petere ab ipso solenni ductu hepatico. Horum enim ductuum commercium apertissimum est, flatu enim per cholodochum immisso, & cystis & ductus hepaticus inflatur: rursus tubulo immisso in hepaticum biliarem canalem & hepaticus & cystis & cholodochus eodem distenditur flatu. In homine etiam aliisque animantibus ductus hepaticus cysticusque in unum abeunt canalem. Jam vero si consideramus vesiculæ felleæ situm; fundus ejus in decliviori loco, cervix vero & collum ac biliosi ductus in sublimi posita sunt, & hinc est probabile, quando bilis per porum cholodochum propter ejus obliquam insertionem inter tunicas duodeni, præsertim si hoc ipsum vacuum fuerit, à massa chyli tardius descendit, relabi hanc ipsam in substratam vesiculam, præsertim si ea minus referta est, donec hæc compressione intestinorum vel propria contractione rursus exprimatur. In bove id videtur manifestissime, ubi ductus hepaticus ita in vesicæ collum hiat, quod valde tendineum ac nervosum est, ut eadem facilitate bilis ad vesicam descendere quam per ductum communem ad duodenum amandari possit. In eodem subiecto, quod visu mirabile est, papillula quædam in interiore membrana cystidis fere in medio conspicua est, & protuberat, simili fere modo, uti ductus in intestino apparet duodeno. Papillula hæc orificium esse videtur ductus, qui inter vesicæ membranas fertur, & protuberantia hæc valvulæ munere fungitur, ne semel eructata bilis eandem repetat viam, per quam erat egressa.

4. Verum enim vero, non parum differt bilis vesicæ & hepatica, nam illa longe est crassior, acrior, amaricantior, & colore saturatior; hæc vero magis est fluida, diluta atque minoris amaritiei. Unde & quem in usum talem bilis in vesica subeat mutationem, negotii excellentia paullo accuratiorem disquisitionem postulare videtur. Ut vero id ex voto cedat, ante de vesicæ felleæ structura quædam dicenda veniunt. Observamus vero, ex variis membranis cystidem esse conflata, quarum interior in omnibus fere similis est tunica villosa duodeni; observantur porro ibi varii sulci, lacunæ & valvulæ conniventes, glandulas vero notare non licuit. Dein membrana, quæ sequitur, valde est spongiosa & quasi vesicularis ex variis pliculis, quibus aëreæ bullulæ inhærent composita. Nul- lum dubium est, quod hæc originem subministret copiosis vasis lymphaticis, utut etiam plurima horum in cystide ex hepate immediate prodeant. Tertia tunica est musculosa sive fibrosa, nerveam vero & tendinosam in vesicæ fundo ejusque cavitate haud conspiciere licet: ejus collum vero & ductus tam hepaticus quam cysticus tunica firmiori tendinoso nervea sunt conflati. Extima tunica est à peritonæo, inter quam & musculosam arteriosi & venosi ductus sparsi videntur. Cervix vesicæ valde est angusta, qualis angustia in vesica fellis bovina aperte visitur, minime autem ibi valvula notari potest. Talem semilunarem & cochleæ in modum extensa, multis rugis asperam in subjectis humanis annotarunt BAUHINUS & SPIGELIUS. Ego fateor ejusmodi valvulam in humanis cadaveribus me non deprehendere potuisse; probe autem notabilem angustiam non rectilineam, sed obliquam & curvam filo

etiam propter obliquitatem resistentem. Et hæc angustia nullum alium usum habere videtur, ac ne bilis semel egressa crassior in cystidem regurgitet, per quam tamen bilis hepatica tenuior commodè transit.

5. Interior tunica vesicæ villosa non secus ac ea, quæ in duodeno est, quasi colatorii seu filtri vicem gerit, & tenue illud aquosum bilis fluidum secernit vasisque lymphaticis infundit. Non enim negandum est, hæc ipsa, quæ in vesica & circa hanc perreptant, saporis amaricantis lympham custodire; quin imo in statu præternaturali multæ testantur observationes, ex poris tunicarum vesicæ insignem bilis tenuis copiam transfudasse. Quoniam vero hæc tunica tenuiorem bilis partem separat, relicta crassiorem consistentiam & amarorem acquirit. Præterea propter tunicam carneam & nervos quoque eximios & sensu gaudet vesica & motu, maxime vero omnium ductus ejus biliarii, quæ tunica valde robusta & nervea sunt instructi; hinc quoque graves dolores & spasmi in iis oriuntur. Bene igitur notante VIEUSSENS in *neurographia* p. 376. ex nervi intercostalis dextri plexu hepatico semilunari sex emergunt fibræ, quarum tres inferiores ac minores vesiculæ felleæ vasis cholodochis, pyloro, duodeno & pancreati impenduntur, ut ibi debitum tonum & constrictionem præstent, unde etiam harum partium magna consensio derivatur, nullumque dubium, quod non tantum pondere bilis descendat ad intestina, sed proprio ductuum motu adjuvetur. Sedulam ceterum ductus cholodochi insertio meretur attentionem; qui inter tunicam exteriorem & interiorem unciali fere longitudine prorepat, & tandem meatu rotundo in ejus cavitatem se aperit.

6. Prius vero quam insignem bilis in corpore usum ac necessitatem, ejusque vitia ac noxas exponamus, necessarium esse duco, quædam de ejus natura ac indole institutis cum ipsa experimentis præmittere, ut dein eo melius de variis phænomenis ac vitiis judicare valeamus. Primo omnium vero ipsos sensus in testimonium citare placet, cum ex sapore & odore simplicis cujusdam, principiorum, ex quibus mixtum aut compositum, naturam dijudicare possimus. Universale id est, quod cujusvis animantis bilis sapore intenso amaro prædita sit, adeo ut unica guttula bilis in dimidiam aquæ unciam immissa suam dispergat amaritiam. Jam vero apud omnes artis chymicæ peritos in confesso est, ex intima sulphuris mixtione quodammodo terrestris cum sale amarum nasci saporem. Cujus vero naturæ hoc sal sit dispiciendum nunc est: quantum cernere animo & per experimenta licet, acidum cum terrestri alcalina sulphurea materia intime junctum constituit mixturam amaram; ita spiritus vitrioli sulphureus acidus cum sale tartari vel nitro fixo coagulatus exhibet sal neutrum, saporis amaricantis, uti in tartaro vitriolato & arcano duplicato, licet acetum vini valde sulphureum coralliis & cancrorum lapidibus affusum sal elargitur medium, quod saporis est amariusculi. Constat porro ex chymicis, amarissima v. g. aloen, colocynthidem, absinthium, penetrantiam saporis mixtura alcalinorum salium multum deponere; id quod etiam de bile animantium valet, non obscuro documento, acidum ad amaricantis saporis constitutionem non parum conferre, quo enervato omnis simul sapor perit. Dein & hoc experientiæ est, amara vegetabilia præ reliquis copiosum sal per incinerationem exhibere. Certum vero illud, quod genesis salis alcalini fixi ex intima combinatione acidi sulphuris & terra fiat, sicuti id olim susius in *dissert. de generatione salium* demonstravimus.

7. Præterea sapor bilis in lingua constantissimus & penetrantissimus eximiam ejus activitatem satis superque prodit; omne enim quod penetrat & latius se diffundit subtilis est naturæ. Inter alia vis ejus valde penetrans

netrans ex eo conspicitur: quando enim aliquot guttulæ tunicæ ventriculi aut intestini instillantur, flavissimus mox inducitur color, nec ulla arte extergendus. Nec minorem ejus penetrantiam pileopæi animadvertunt, dum ad nigredinem pilis inducendam bilem bovinam cum iis rebus miscent, quæ atramentosum exhibent colorem. Croceus quoque color valde explicabilis admodum subtilis & activi sulphuris esse potest, si illud adhuc axioma chymicum valet: colorem realem esse flavum vel rubicundum ex sulphure. Quam maxime vero bilis elementa destillationes ejus & mixtiones patefaciunt. Ita uncia duodecim bilis bovinæ uncias undecim dant phlegmatis, nullius plane saporis; ex residui uncia una prolicitus postea spiritus odoris ingrati ac empyreumatici, qui cum spiritu nitri expedite effervescebat & syrupum violarum viridem in signum naturæ alcalinæ efficiebat, fundebat simul olei quicquam similis cum spiritu indolis & efficaciz. Caput mortuum terreum, quod in retorta resistabat, drachmas duas cum dimidia pendens per incinerationem fixi salis manifesto alcalini drachmam dedit unam. Ex quo allato experimento patet, quam magna copia aquæ ingrediatur bilem; quod ex eo elucescit, dum bilis in extractum redigi potest: uncia enim duæ bilis bovinæ, si leni calore inspissantur, non ultra drachmam unam extracti spissi concedunt. Quin imo si bilis instrumenti statici beneficio ponderetur, uncia quatuor bilis respectu aquæ pure destillatæ vix ipsi drachmis duabus præponderant. Quod si vero extractum bilis bovinæ cum sale tartari anatica portione miscetur, & dein invicem in retorta vitrea ex arena destillantur, tunc spiritus urinosus manifesto alcalinus prodit, qui vehementem ebullitionem cum quovis acido suscitatur; sublimati solutionem lacteam, syrupi vero tunicæ viridem efficiens, id quod salibus volatilibus urinosus est solemne. Ratio vero cur sal tartari additum spiritum magis alcalinum volatilem & urinosum producat, hæc esse videtur; salia calcinata alcalina intimius oleosorum contextum aggrediuntur, acidumque destruendo sulphur magis volatilifant & alcalifant. Simile quid in destillatione fuliginis, succini & tartari videre licet, quæ si solitaria destillantur, spiritum oleosum acidum obtinemus, si vero prius cum sale fixo miscentur, spiritus prodit valde urinosus ac oleosus.

8. Accedimus jam ad mixtiones, quarum usus in corporum elementis ac virtutibus explorandis maximus est. Observatione itaque constat, bilem cum nullo acido effervesce, excepto spiritu nostro fumante flammifico. Contrariatur hoc vulgari experientiz, cum bilis statuitur alcalina. Neque bilis bovina cum oleo vitrioli concentratissimo efficit ebullitionem, nec viridem mox colorem acquirit, quod etiam multorum opinioni refragatur, sed potius sequitur turbatio, coagulatio & præcipitatio. Spiritus vero salis, quod notabile est, bilem reddit spissiore quam spiritus nitri & vitrioli, & minime à spiritu nitri coagulatur. Quando spiritus salis ammoniaci concentratus cum calce viva factus bili admiscetur, exaltatur ejus color, fit saturatior & mixtura manet diaphana. Equidem phænomena conspiciuntur, si experimentum cum oleo tartari per deliquium instituitur. Scire autem hoc loco oportet, miscelam alcalium saporem ejus amarum valde imminuere. Quando cum syrupo florum tunicæ aut violarum bilis permiscetur, non emergit mixtura viridis, sed talis color, qui ex flavo & rubicundo elici solet, nascitur. Spiritus quoque vini rectificatissimus bilem quodammodo turbidam reddit, diaphaneitate amissa; exiguum autem inde præcipitatur, & spiritus valde amaricans evadit. Forte è contrario & crassum saccharum saturni causatur coagulum, bili exigua etiam quantitate adpersum. Bilis vero inspissata affuso oleo vitrioli non effe-

vescebat, sed amittebat nigricantem colorem & luridus inde factus; mixtura olebat pessime. Noster spiritus fumans flammificus movebat cum extracto bilis effervescentiam valde calidam cum ingente spuma fumoque rubro; extractum autem solvebatur in mucum, quod ab oleo vitrioli piceum magis coagulum induebat; totum fere extractum cum spiritu vini item aqua solvebatur. Ulterius bilis extractum ficcatum flammæ commissum fluebat, nec statim ignem concipiebat, sed humiditate avolante ardebat, odoremque salis foetidi volatilis in auras spargebat, cinere relicto, multo sale alcalino, sapore teste, imbuto.

9. Hisce experimentis & hæc adjicienda esse puto. Bilis scilicet bubula ex folliculo recenter desumta diaphana est & valde fluida; quodcumque vero per aliquot horas libero exponitur aëri, ejus diaphaneitas turbatur, crassior evadit, odorem mutat, & successu temporis acquirit foetorem. Dici enim vix potest, quam facile brevi temporis spatio ipso sanguinis citius bilis abominabilem foetorem concipiat: id quod argumento esse potest, uti omne animantium fluidum, ita & hoc ex partibus constare, quarum unionem ac mixtionem inter se solus aëris calor sejungit. Deinceps & illud notandum, serum sanguinis vel lympham cochleari inditam sub leni calore in offam abire gelatinosam; quod frustra cum bile tentatur, quæ minus calore coagulatur, eam ob causam, quod lymphæ nutritia eam non ingrediatur. Quod usum tandem bilis mechanicum attinet, is omnino in fordibus pinguibus vestium extergendis & picturis purificandis est egregius: nec minus pictores ad colorem exaltandum eam adhibere solent. Cæterum interne quoque fel bubulum clysteribus inditum egregie alvum stimulat; & à nonnullis aliorum quoque animantium bilis in epilepsia, quartana, partu difficili & spasmodicis cum fructu adhiberi solet.

10. Et hæc sunt experimenta, quæ cum bile bubula tantum instituiimus; non tamen diffitemur, aliorum animantium bilem quodammodo differre, nec semper ejusdem animantis bilem omni tempore ejusdem naturæ esse ac indolis. Humanæ bilis copiam, quoniam in manu nostra non fuit, destillationi subijcere non licuit; differentiam tamen, respectu bilis bovinæ, in eo positam esse arbitramur, quod nonnihil spissior ac crassior sit; quo fit, ut ab aqua forti affusa, itemque à spiritu vitrioli fortiori calore admoto effervescat, viridisque mixtura fiat; promptius quoque à spiritu vini rectificato coaguletur. Nullum hinc dubium est, quin bilis humana principio salino-sulphureo longe saturatior aliorumque animantium bile sit activior. In universum hoc notari vellem: quo calidiora sunt animalia, eo activiorem possident bilem.

11. Præfata hæc experimenta satis superque docent, bilem non puræ esse naturæ alcalinæ; unde non cum quovis acido, nisi fortiori effervesce, utpote omne alcali sive terreum sit, sive salinum cum quovis acido etiam lenissimo ebullit paratissime. Dehinc discimus, bilem esse oleosæ naturæ sulphuræ, ideo etiam ardet; pure tamen sulphurea non est, alias cum spiritu nitri vel nostro fumante æstuosa excitaretur effervescencia. Ea enim est oleorum subtilium natura, ut, si cum hisce confundantur, ebulliant; quare bilis potius liquor valde temperatus est, qui ex particulis oleosis, terreis, aqueis, salinis, volatilibus constat. Et ut paucis nos expediamus, amarus ille biliosus succus, quoad mixtionem ac crasam suam in omnibus fere similis est succis herbarum amarificantium, maxime omnium vero centaurei minoris, nec ejus extractum multum ab inspissata bile differt, ut omnes hæc plantæ ex sulphure, sale alcali terreo sunt compositæ. De his etiam illud considerari meretur, quod succi hi depurati & simili modo tractati ac destillati, cum mensuris acidis alcalinis

linis spirituosus mixti, similia fere phænomena in omnibus exhibeant, ut certo certius credendum sit, intimas horum simplicium partes quoad mixtionem, crassum ac virtutem esse easdem. Et hinc patet ratio, cur amarificantium plantarum extracta & essentia in bilis defectione, & qualitate deperdita corrigenda ac restauranda tam ad morbos præcavendos, quam eosdem curandos divinum quasi præbeant auxilium.

12. Perlustrata sic bilis natura ac indole, proximum nunc est, ut ad elaborationem & generationem ejus in corpore cognoscendam nos convertamus. Primo omnium igitur hoc dicendum est, bilem non sub tali forma ac schemate, qualis in receptaculis, ejus poro nimirum hepatico & cystide fellea apparet, sanguini inexistere; nam nec sanguis nec serum amaricat, nec in statu sano flavum est, quod vero contingit, quando bilis cum sero miscetur. Qua de causa nullum est dubium, ejus materiam duntaxat in sanguine contineri; quod etiam non incredibile est: sulphur enim, terra, sal, phlegma, & mucus, ex quibus bilis mixta est, in sanguine reperiuntur copiosissime. Notum vero ex chymico-mechanicis est, corporum qualitates, virtutes, odorem & saporem unice dependere à variarum partium mixtione, unione, positione sive, ut loquuntur, crassi ac textura, cujus mutationem & destructionem saporis, odoris, consistentia & virtutis sequitur mutatio. Quapropter peculiaris mixtio partium sanguinis pinguium, salinarum terrearum & aquearum intestini motus beneficio, à consortio sanguinis & feri prius avulsarum, dein invicem junctarum, bilem constituit. Minus vero nobis probabile videtur, bilem immediate ex chylosis partibus, sive iis, quæ superficialiter tantum inhaerent sanguini coagmentari; sed ea est nostra sententia ex intimiori sanguinis nexu omnes has partes diversas mediante intestino motu discerpi atque resolvi, quæ unione postea facta bilem constituunt. Unde clarissime videmus, copiosæ bilis generationem in iis subjectis fieri, ubi motu intestino calido sanguis vehementius exæstuat; hinc cholericis, juvenes, qui corpus exercent, victuque calido utuntur, magnam bilis possident copiam; senes contra, infantes, phlegmatici, otiosi & torpidi, bilem aquosam, dilutam & inertem fovant. In confirmationem hujus sententiæ luculentum nobis præbent testimonium febres ardentes, continuæ, tertianæ, in quibus magna bilis exundantia, ob motum intestinum vehementem, sanguinisque nexum dissolventem, producit. Mirum enim est, quanta quotidie dictis in febribus bilis abundantia in urina, alvi fecibus & egestis per vomitum conspiciatur, quæ quoque ratio est: quare veteres bilem hanc, quæ excernitur, causam febris habuerint, quæ tamen potius ejus est productum. Observamus e. g. in tertiana, quod, quo vehementior sit & diutius duret, eo biliosiora sint excrementa. Nec natura bilis copiam gignere desinit, quandiu febris præfens est. Tollitur vero vel tantummodo sistitur ac ad tempus famigeratissimo chinæ chinæ cortice supprimitur, fit enim, ut, paucis tempore elapso, urinæ flammeus color pereat, diluta & aquosa fiat, alvi que scybala ad naturalem redeant colorem; simul ac vero febris revertitur, mox ea omnia rursus conspiciuntur. Ex quibus recensitis satis superque elucet, motu intestino calido ipsum sanguinem in hunc aliosque liquores excrementitios resolvi. Id quod etiam hecticæ & latentes febres testantur, ubi ipse sanguis continua & præcalida exæstuatione tandem consumitur ac in bilem & excrementa convertitur. Inter alios, quamvis paucos, qui hoc animadverterunt, adduci meretur HILDANUS, qui in *select. medic. pag. 71.* hæc habet: *mirabile est, quod copiosissima bilis nonnunquam evacuetur, nec tamen post obitum vesica vacua*

inveniat. Nullum est dubium, inquit, sanguinem ab æstu inflammatorio exuri in bilem. Ulterius observamus quod quo magis abstinemus ab alimentis, & corpus motu agitamur, eo majorem bilis proventum fieri: & contra sub otio ac copioso victu ejus generatio valde impeditur atque retunditur.

13. Perspecta hætenus ac demonstrata bilis origine ejusque genitrice causa; sequitur nunc, ut dispiciamus, quomodo particulae per motum intestinum à sanguine avulsæ in liquorem coeant biliosum, quod à sanguinis tardiori per hepar progressu derivamus. Ad meliorem vero hujus rei declarationem ea, quæ sequuntur, mechanica axiomata supponimus. Primo miscibilia, quo magis agitantur celerrimeque moventur, eo magis eorum particulae dividuntur. Secundo, in quo minores mediante motu divisæ sunt partes, eo majori stringuntur nexu, & difficilius à reliquis separantur, quia major est in parvis, quam in magnis corporibus superficies, & ob molis parvitatem decrevit illa vis, qua unum fluidum ab altero seungi nititur. Ex quo illud consequitur, particulae inter se coeunt, colliguntur & facilius à mixtione heterogenearum partium recedunt, uti id clarissime videmus in sanguine extravasato, ubi mox, deficiente motu, serum à sanguine separatur. Cum itaque notum sit ex anatomicis, tardissimum in hepate esse sanguinis circuitum, quoniam vena portæ, quæ pulsu est destituta, vehitur & minimis ramificationibus per hepatis parenchyma dispersis adducitur, in quo quidem arteriarum imitatur indolem, sed cum desit motus impetus, sanguis in hoc viscere tardius movetur, & per consequentiam in omnibus visceribus, quæ vasa habent ex vena portæ, lentior ac tardior debet esse progressio. Liquet hinc ratio, quare hepar, lien, pancreas, mesenterium & intestina plerumque sedes sint gravissimorum chronicorum morborum; dum in his partibus facile obstructions, indurationes, stases sanguinis, inflammationes & corruptiones fieri possunt. Quapropter cum in hac vena sanguis particulis dulcibus chylosis sit orbatus, crassiores, sulphureæ, salinæ quasi calore adustæ cum mucilaginosi & lymphaticis sub tardiori motu in unum coeunt, colliguntur ac secernuntur, per quam novam unionem ac mixtionem, novus schematismus, nova crasis novusque sapor & color emergit. Non dubitari tamen potest bilem novam ex sanguine ad eam, quæ est in cystide vel in poris successive magis specificari, ut quasi fermenti loco sit. Uti enim sanguis intestino suo motu chyli novi transmutationem in sanguine adjuvat, & uti acetum, vinum affusum in acetum convertit; ita bilis accedente simili succo ex sanguine formam similem ac texturam inducit facillime.

14. Postquam itaque naturam & indolem bilis ejusque generationem investigavimus, oportet jam ad rem ipsam & institutum nostrum propius accedere & demonstrare, bilem esse pernobilem omnis generis animantium medicinam. Id quod hisce comprobabimus argumentis. Primo enim nullum animal in rerum natura datur, quod hoc liquore sit destitutum; non reperitur tantum in quadrupedibus, volatilibus, sed etiam in minimis insectis. Et quamquam vesicula fellis quibusdam desit; minime tamen carent hepate & ex hoc ductibus bilem vel ad intestina vel ventriculum vehentibus. Secundo bilis necessitas in animantibus exinde videtur maxima, quod tam magnæ molis viscus, quod tam eximium in abdomine obtinet spatium, à provida natura eum tantum in finem elaboratum sit, ut bilem secernat atque dispenset; hoc autem viscere nullum animal carere certum est. Tertio ex anatomicis animadversione dignum est, in plerisque & nobilioribus animantibus bilem ad duodenum duplici via ac ductu ex hepate deferri; nam præter hepaticum

hepaticum, qui bilem proxime ex hepate fert, cyllicus etiam ductus, & hi plerumque junguntur & in unum communem coalescunt, qui cholodochus dicitur. Ex hoc profecto non satis miranda Numinis elucet providentia; nam cum ille humor sit præstantissimus, quo nec ullum animal carere potest; factum est, ut si quando unus ductus fuerit obstructus, per alterum tamen saluum & apertum balsamicus hicce liquor adfluere possit: vel etiam si certo tempore in nimia quantitate elaboretur, ipsa ne deperdatur, ut in diverticulum abeat, ibique pro futuro usu tamquam promptuario conservetur. Quarto, quod bilis non inutilis corporis nostri sit liquor, ex eo manifesto elucet, dum in omnibus animantibus mox à ventriculo primum intestinum ingreditur, ibique ciborum massæ affunditur. Si igitur excrementum & naturæ humanæ esset heterogeneousum, sapientissimum Numen proxime potius in intestinum colon vel rectum detrussisset, ne chylum, ceu spiritum, sanguinis & totius corporis pabulum, peregrinis suis sordibus atque quicquiliis inquinaret. Ultimo loco ejus insignis quantitas, quæ secundum nonnullorum sententiam BORELLI præsertim singulis diebus ad libram unam sese extendit, præcipue in majoribus animantibus plane peculiarem usum atque necessitatem demonstrat.

15. Et quamquam hæc, quæ prolatae sunt, rationes probabilitate potissimum nituntur; nihilo tamen minus ad bilis utilitatem adferendam sufficiunt. Ut igitur rem aliquanto clarius explicemus, primo ceu indubium supponi oportet, quod vita nostra multo magis sanitas in jugi ac perenni, temperato ac æquali sanguinis & humorum per corpus motu consistat. Hic motus jure suo ac merito vitalis appellatur, corpus enim à putredine defendit, ipsique integritatem & durationem præstat, nutrit & id ipsum quod inter animam & corpus est, commercium tanquam hujus instrumentum ac vinculum restaurat; quam diu itaque hicce humorum cursus saluus ac liber est, tam diu vita ac sanitas adeste dicitur; simul ac vero hic motus cessare incipit, variæ mox ægrotudines, actionum corporis depravationes, dolores, putredo & ipse tandem interitus subsequuntur. Is vero ut illibatus fervetur, opus omnino est, ut sanguis sit fluidus, quo angustias minimorum tubulorum transire queat. Dein ut particulæ sanguinem constituentes heterogeneæ in intima mixtione & unione sint positæ, in hoc enim genuina sanguinis crasis ac textura consistit. Est autem experientiæ, nihil magis huic texturæ adversum esse, quam quod, tenax, viscidum, acidum est; hæc enim fluiditati officiunt, nec facile in motum intestinum cientur, nec intimam cum aliis subeunt miscelam. Quem vero fugit, nos varii generis edulii ac alimentis vesci, quæ multum acida viscidi, ac tenacis principii in suam recipiunt mixturam, ex quibus non alius nisi crassus, viscosus, male miscibilis, minusque fluidus chylus & sanguis postea emergere potest. Præterea ad vitam non tantum sanguis ad circulationem dispositus sufficit, sed motu etiam seu motore opus est; motus enim maxime de essentia vitæ ac sanitatis est. Constat porro, fibras corporis nostri, quæ motrices sunt seu ad motum & constrictionem idoneæ stimulante quodam promptius meliusve suo officio fungi, i. e. si corpus extraneum in motu existens activitate & penetrantia in eas ipsas agat. Videmus enim odorem saltem penetrantem, quem vinum, spirituosæ & salia volatilia de se spargunt, mox totius corporis motus labascentes erigere. Tali itaque motore naturali naturæ quoque opus est, qui perpetuo solidas corporis partes ad debitum motum ac impulsu incitet, sine quo nec circulatio fieri, nec vita & sanitas subsistere potest.

16. Hisce consideratis, videmus nunc quo pacto

bilis corporis nostri sit naturalis ac polychresta medicina, & qui fiat, ut hæc omnia ad fluiditatem & motum sanguinis necessaria præbeat subsidia, quibus morbi ac ipsa mors avertatur. Supra autem ostendimus, bilem esse valde activæ & penetrantis indolis humorem; dum ex partibus sulphureis oleosis cum sale volatili & fixo mixtis sit compositus; temperatæ tamen simul naturæ propter partium aquosarum & terrestrium admixtionem. Hic liquor partim penetrantia, partim textura sua omne id, quod ex ventriculi sinu & viscidum, crassum ac acidum elabatur, incidit, temperat ac corrigit, & quod maximum est, ad subtilisationem, & blandam chyli & dein sanguinis spirituscentiam permultum contribuit. At vero nullum est dubium, non modo in ventriculo, sed & in tenuibus intestinis ipsa alimenta intimam subire solutionem ac fermentationem, qua eorum nexus, unio ac mixtio quoad intima dissolvitur & destruitur, sapore satis, odore mutato, ac consistencia testante. Jam vero notum est, quando rebus in fermentatione existentibus spirituosæ & activæ indolis admiscuntur, liquores motu intestino eos intime solvi, egregiamque spirituscentiam fermentescibilibus addere. Idem contingit, quando bilis in fermentatione alimentis existentibus affunditur, utpote non modo acidi & viscidi sit correctio & subactio, sed & simul ipsi massæ chylosæ blanda conciliatur spirituositas, ut hac ratione chylus subtilis, spirituosus, temperatus ac sapore dulcis evadat. Quod vero bilis fermentationis actum in intestinis subeat, ex eo colligi potest, quod suam penitus deponat amaritiam: fermentativus enim intestinus motus partium unionem crasin ac texturam, à qua sapor & qualitas pendet, intime dissolvit ac plane invertit. Bilis itaque in primis viis chylum præparat, ut aptus & dispositus fiat ad circulum vitalem obeundum & ad nutrimentum toti corpori præstandum, quo sine humore chylus crassus, crudus male subactus & ad motum progressivum ineptus evadit, qui ad massam sanguineam delatus, non levem ad morbos dispositionem ingenerat.

17. Chylus balsamo spirituosus sic conditus, & ad sanguinem accedens intimius immiscetur; fluida enim quo sunt subtiliora, magisque divisa, eo facilius in intimam mixtionem admittuntur; & contra, quo crassiora sunt fluida, eo facilius à heterogeneorum copia discedunt. Chylus quoque stimulo quodam & sale armatus, fibrarum in toto corpore motricium tonum & impulsu egregie adjuvat & excitat, ut hinc circulatio fiat promptior & expeditior, quæ sub fibrarum debito vigore maxime salva persistit. Quapropter non sine ratione à veteribus uti & recentioribus bilis corporis balsamum audit, non quod immediate balsamica sua vi dispositionem ac putredinem avertat, sed quod ad liberum & expeditum sanguinis circuitum multum conferat. Hic enim circulus optimum est corporis balsamum, quo vigente corruptio in corpore aliena est; siquidem motus progressivus perpetuusque motus fluiditatis & spirituscentiæ putredinoso motui resistit. Præterea sub motu isto circulari multæ superflue excrementitiæ partes, quæ ad corruptionem inducendam pronæ sunt, per debita & congrua evacuatoria eliminantur.

18. Restat adhuc alius bilis in primis viis usus magni etiam æstimandus; nempe hæc ipsa moderatum ipsis intestinis præbet stimulum, quo ad debitum motum peristalticum, qui summe necessarius est, & ad chyli in vasa lymphatica expressionem & remanentium facum propulsionem continuandam, excitantur. Certum est, quod tonus debitus intestinalis, qui in æquali systole & diastole consistit, ad discernendum id, quod inutile est, multum contribuat; excrementa enim si minus debite ejiciuntur, magna certe sanguini & lym-

lymphæ non modo accedit impuritas, sed & ad spasmodica pathemata dispositio fit præsentissima. Bilis igitur in statu ordinato & naturali massæ chylosæ affusa excrementorum promovet ejectionem, idque partim acrimonia irritante, partim elastica spirituascentia quam chylo foenerat, præstat, nec non chyli & acidi absorptione.

19. Quod bilis corpori nostro medicinæ instar sit excellentissimæ, quæ à morbis præservet, & omnem ad eos dispositionem arceat atque exstinguat, sufficienter à nobis stabilitum esse credimus. Nihilo minus egregiam nostræ adsertioni confirmationem addit magna salubritas eximiaque virtus in præservandis & tollendis multis incommodis amarorum medicamentorum. Expositum est supra quanta ratione mixtionis, craseos inter bilem & extracta ac succos herbarum amaricantium præsertim centaurei minoris intercedat harmonia ac adfinitas. Jam vero indubitata praxis quotidie docet, non dari ipsis remediis amaris præstantiora, tutiora, & naturæ magis conformia magisque experta tam ad morbos præservandos quam curandos. Elixir proprietatis ipsaque aloë cum extractis amaricantibus additis gummatibus balsamicis in formam redacta, item essentia & extracta absynthii, centaurei minoris, fumarie, gentianæ polychresta & tuta sunt, ut fere omnium chronicarum passionum præsidia non solum ad præservationem, sed & morborum curationem sint exoptatissima, quibus medicina carere nequit. Medicina enim multis carere potest remediis, neutiquam autem amaris. Et revera iis plus quam salibus volatilibus, spirituosus & oleosis & fixis terreis præstamus; nam naturæ magis sunt conformia, magis temperata & blande ac successive correctionem & emendationem instituunt; si modo, quod probe notandum, eorum usus ad tempus continetur. Et ut paucis dicamus: amara sunt optima remedia, quia idem, quod bilis, præstant; ea enim, si bilis deficit, regenerant & restituunt, inertemque & pravam corrigunt. Nec in eo fallimur, dum naturam imitamur providentissimam, hæc quoniam amarum elaborat, quæ medicina corporis est præservatrix; hinc & nos errare non possumus, si etiam amaris utamur.

20. Tandem & hæc resolvenda venit quæstio, num detur bilis circulatio? Primus qui hanc sententiam in medium produxit, est BORELLUS, lib. de motu animalium, qui cum judicaret, bilem corporis nostri utilissimum humorem maxima quantitate quotidie ex ductibus in intestina prolabi, adeo, ut intra horæ spatium aliquot uncia defluant; talis vero copia ex sanguine generari non possit; hinc maximam ejus partem sanguini rursus per venas mesaraicas adfundi, quæ ad instar hirudinum biliosum humorem exsugendo, ipsum per venam portæ rursus in hepar advehant. Præterea plures bilis particulas activas chylo immisceri, quæ dein ad sanguinem accedentes novam materiam ac bilis pabulum præbeant. Eadem sententia ante aliquod tempus Lugduni Batavorum in peculiari dissertatione de *motu bilis circulari* est proposita. Hic ipse auctor in ea est sententia, quod ad minimum viginti quatuor horarum spatii uncia sex bilis in intestinum duodenum infundantur, id quod experimento in cane instituto comprobatur; & hanc bilis quantitatem in hepate posse generari minime existimat, nisi ipsius statuatur circulatio; in homine vero singulis diebus libram integram secerni. Dein argumentum ab amplitudine venarum mesaraicarum desumit, quæ tanta est, ut non solum sanguini vehendo, sed & alii humori etiam sit destinata. Postea id quoque embryonis meconio comprobatur, quod bilem in intestinis stagnantem esse judicat: sed quoniam hoc illi quantitati bilis, quæ quotidie ad

intestinum fluit, non respondet, eam igitur ipsam poros rursus venarum mesaraicarum ingredi judicat. Has putat ad hoc negotium esse aptissimas; quoniam ope tubuli flatus in venam mesaraicam immixtus in intestina ingrediatur; imo in animalibus pennatis, quæ vasis lacteis carent, chylus per venas mesenterii deferatur.

21. Verum enim vero plura sunt, quæ ad credendum minus nos adducunt. Primo enim quod tanta bilis copia in homine separaretur, nondum firmo comprobatum est argumento. Ponamus autem hanc quantitatem esse certam, hujus tamen generationi & feri copiam sufficere posse arbitramur, quæ subinde à tanta alimentorum gignitur. In hæc vero cum perpetuus motus calidus agat, necesse est, ut rursus in varii generis falsas & excrementitias partes resolvantur. Nam utut omnia alimenta insipida ac sale destituta assumantur; nihilo minus quotidie magnus salium sulphureorum in urina & bile conspicuorum fit proventus, quorum copia intestinæ tantum sanguinis commotioni debetur. Cum itaque urina tantam salis, sulphuris, pinguedinis & mucis contineat copiam, quam quotidie excerni videmus, & ex sanguine, non autem immediate ex alimentis proveniat; quidni materiam ex sanguine sufficientem bilis accipiat non video, adeo, ut circulari quodam motu non opus sit. Nec in embryonibus bilis in tanta generatur quantitate, ob motum intestinum valde temperatum & à sordibus biliosis in visceribus matris jam depuratum: neque pondus huic sententiæ addit venarum mesaraicarum amplitudo; venæ enim in toto corpore semper sunt majores arteriis, & quando sanguis per hepatis ramos non tam expedite per ramos venæ portæ transit, quam ut adferatur per arterias, hinc accumulatus ibi nimium vasa distendit. Insuper nec ullo experimento comprobatum est, in venas mesaraicas aliquid humidi in homine ex intestinis recipi, & cur eadem bilis non æque poros vasorum lacteorum, utpote patentiores, subeat, perspicere non possumus. Multo minus autem concipiendum est, bilem succo chyloso immixtam specificè deinde à venis mesaraicis sine chyli admixtione rursus separari. Porro ipsa bilis intestinis mixta fermentationis & intimæ solutionis actu in tenuibus planè immutatur, ejus crasis dissolvitur, amaritiam deponit & formalis bilis esse definit. Nihilo secius non negandum est, sulphureas & spirituosas bilis partes fermentatione resolutas rursus transire in sanguinem, sed non sub forma bilis: neque diffiteri possumus, si bilis nimium in duodenum, vacuo existente ventriculo & intestinis, effunditur, uti quandoque accidit in statu præternaturali, ejus portionem in substantia in venas lacteas recipi posse. Nam si medicamentis amaris in copia adsumtis id conceditur, cur non etiam id de bile superabundante valeat minus perspicio.

22. Cum in superioribus demonstratum fuerit, bilis necessitatem & utilitatem in corpore nostro esse maximam; imo genuinam ejus medicinam naturalem & universalem existere; facile apparet, quando ea vitio laborat sive id in quantitate, sive qualitate perversa vel motu consistat, maxima incommoda & dispositiones ad morbos, imo ipsas ægritudines ex eo in corpus nostrum redundare debere. Primum itaque in considerationem venit, num bilis abundans recte quoad qualitatem & temperiem se habens damnum corpori adferre possit? Ad hæc respondemus, non facile abundare bilem bonam & laudabilem nostris in regionibus, ubi aer crassior, cerevisiam incolæ bibunt, & aquæ non subtiles ac tenues sunt. Nihilo minus non negamus, in juvenili ætate, æstate fervente, ex vini, aromatum & dulcium abusu nimiam bilem descendentem ad intestina & cum sanguine rursus mixtam, præsertim sub pariori alimentorum solidorum usu nocere posse. Notum quippe est, optima medicamenta activa,

activa, si nimia in quantitate fumantur, quod etiam valet de amaris, noxam adferre posse: & ita quoque bilis exsuperans præcalidam intemperiem sanguini inducit, & ad hæmorrhagias, animi adfectus, inflammationes, vomitiones, diarrhoeas & tabem disponit. Delinquit autem magis defectu, ad quem ætas senilis, infantilis temperamentum serosum & pituitosum, nimius refrigerantium & opiatorum usus, crebra venæ sectio, vita sedentaria, dispositio ad cachexiam, sæpius iterata purgatio, & virium ex longo morbo defectio contriunt. Hic bilis defectus, probe notante HELMONTIO, ad cachexiam, hydropem, hypochondriacum malum & graves chronicos morbos disponit. Perite hanc in rem scribit FERNELIUS in *pathol. non pauci*, inquit, *è vivis erepti sunt, in quibus non alia interitus causa apparuit, quam quod folliculus bile omnino esset exhaustus.* Et MOEBIUS in *fundamentis physiolog.* de tribus infantibus tabe mortuis refert, quod in horum cadaveribus ne vestigium quidem bilis inventum fuerit, & à nimio purgantium usu id factum esse iudicat. M. N. C. Dec. II. obs. 224. mori illum necessario debuisse confirmant, qui per crebras vomitiones bilem è corpore ejecit.

23. Deficit vero quam maxime bilis in intestinis, quando orificium ductus cholodochi calculo vel spasmo constrictum fuit, quam adfectionem gravia & plura pathemata insequi solent. Ordinario fit icterus; nam, cum exitus ad intestina non detur, in hepate vero ejus generatio non cesset, aliter fieri non potest, quin non modo ad vesiculam felleam, quam mirifice distendit, sed & ad ductus biliosos & glandulas hepatis ruat, ubi ob nimium factam distensionem & pororum apertionem per vasa lymphatica transit in sanguinem, totamque feri massam flavo illo foedo colore, in toto corpore apparente imbuunt. Ingentem autem esse quantitatem, quæ ex hepate in sanguinem transfuit, exinde iudicare possumus, quoniam urina crassa, bilis colorem æmulans & linteamina etiam croceo colore tingens mingitur. Jungitur insimul ictero alvus adstricta, fæces fiunt albæ cum torminibus & flatulentis, dolor adest in dextro hypochondrio gravativus, vel etiam valde acutus & ardens, vomitus, nausea, appetitus prostratio & cardialgia præsertim si calculus in ductibus hæreat, vel bilis extravasetur. In superioribus enim traditum fuit, quod ductus biliaris valde sint sensiles & nervosi; si itaque hi ductus vel à calculo, vel à bile stagnante nimium distenduntur vel vellicantur; ventriculus simul, œsophagus & intestinum duodenum in consensum trahuntur. Plura sunt quæ id confirmant, quod ductus biliaris ejusque orificium in duodeno constringatur, & ob id icterus, qui tamen facilius evanescit, generetur. Sæpiissime in hypochondriacis, in hysteris, colica atroci laborantibus, item ab iracundia graviori flavum colorem per totum corpus dispergi deprehendimus, cum dolore in scrobiculo cordis pressorio, versus hypochondrium dextrum, ubi duodenum, pylorus, & hi ductus sunt, utpote, orificio vel à flatibus clauso vel à spasmo constricto, bilis ad sanguinem regurgitat. Optime huic malo antispasmodica, carminativa & humorum acrimoniam demulcentia medentur; unde etiam SYLVII experimento erocus, opiata, lac, emulsio cannabina in tali casu juvant egregie; minus vero calida sudorifera, stimulantia & aperientia conveniunt. Jungitur quoque sæpiissime febris ardenti biliosæ & causæ, tertianæ quoque, sive sit continua sive intermittens aut duplicata, icterica passio, quæ non aliam quoque habet originem, quam quod viæ ad duodenum vergentes biliaris constrictæ vel obstructæ sint. Sæpius in febre ardente seu causæ inflammatio est duodeni ejusque partis pancreatis, quæ ipsi adhæret, nec non pylori, præ-

sertim quando ex gravi suppressa iracundia, superingesto potu frigido, fuerit orta. Hinc nullum est dubium, quin ob inflammata hancce partem & tumore ac dolore & spasmo obsessam ductus compressi bilis adfluxum ad duodenum præpediant. Porro ex praxi notum est, venena adsumta, viperarum & canis rabidi morsum sæpe icterum subsequi; cujus rei non alia videtur causa, quam inflammatio & spasmus in ventriculo & intestinis tenuibus fortior, qui simul bilis ad intestina vias occludit.

24. Quandocunque pertinacior est ductuum biliosorum obstructio; tunc vesica biliaria à bilis largiori influxu mirum in modum distenditur. Dein ob stagnationem & quietem crassiores & mucidæ particulae separantur, colliguntur & concretioni biliosæ præbent occasionem. Bilis porro pars tenuior & acrior per poros vesicæ felleæ nimis ampliatos transsudat, & tormina, cardialgia, vomitus gravissimasque ventriculi & intestinorum constrictiones, ut & convulsiones excitat; cujus rei exempla in *Stalpart van der Wiel* Cent. I. obs. XLVII. legi possunt. Quod enim bilis ex cystide sua transsudare possit, confirmat inter alia TULPIUS obs. lit. cap. 27. ubi historiam adfert prægnantis, in cujus cadavere aperto præter abscessum mesenterii à partu disruptum, colon tam libere flavæ bili innatare repertum fuit, ut cochleari eam inde eximere licuisset. Simile quid D. MELCH. FRIBE *Ephem. Nat. Curios. German. Dec. an. 3. obs. 100.* de auriga febre continua ardente defuncto refert, in ejus cadavere exenterato inter cætera se observasse, è cystide fellea adhuc integrâ & illæsâ, ovo columbino majore, tenuiorem bilis portiunculam duorum vel trium transversorum digitorum spatium circum circa superas, inferas & adjacentes partes undiquaque croceo colore tingentem, irrigantem ac ita corrodentem exsudasse, ut partes ea illinitas & tinctas putredinem non solum acquisivisse manifesto constiterit, sed & præter hepatis substantiam magnam hypochondrii partem inficiendo rodendoque putridam, illæsâ planè biliaria vesicula, reddiderit.

25. Bilis porro in motu suo, repleta cystide mucosâ vel calculo, vel etiam in collo vesicæ hærente, quam maxime turbatur; tunc enim bilem hepaticam non recipit, sed hæc ipsa majori quantitate, quam opus est, influit in duodenum; quæ non necessaria est; si ventriculus ab alimentis vacuus est: quod si vero ille iis repletus est, tunc hæc bilis minime sufficit, sed propulsione liberaliori spissioris magisque saturatæ ex cystide bilis opus est, ut eo felicius chylicationis & spiritus ascensionis absolvi possit negotium. Et talis tempore passus bilis defectus multas cruditates acidoviscidas, quæ ad tormina, alvi adstrictionem, cachexiam & hydropem disponunt, progenerat. Jenæ olim ensifabrium sectum fuisse memini, qui dum viveret per integrum vicennium gravissimis torminibus sensu ardoris circa scrobiculum cordis & cardialgia fuit vexatus. Vesicula biliaria miram habebat structuram; cujus amplitudo & longitudo erat maxima, & 3646. grana bilis coagulata partim pisi, partim globuli forma ibi reperiabantur. Frequentes etiam ejusmodi in statu sunt dolores & dextri hypochondrii, vomitus, icterus, & passiones colico-hysterico-spasmodicæ, de qua re videatur *Cl. Dn. STEINII lithographia p. 45.* Et quod hydrops sæpè numero talem à calculo vesicæ repletionem consequatur CNOEFELIUS M. N. C. *Dec. I. an. 3. obs. 260.* confirmat. It. D. GEORGIUS FRANCUS *Dec. II. an. 6. obs. 194.* ex alterius medici observatione casum militis cujusdam, pectoris hydrope demortui, comprobat, in cujus post mortem dissecti cystide fellea calculus, unciam dimidiam & drachmam semis pendens fuerit repertus. Aeger hic durante morbo de dolore gravissimo in hepatis regione

O

valde

valde fuerat conquestus, ut neque erectus stare, nec ambulare, sed usque ad vitæ terminum curvus in lecto federe fuerit coactus.

26. Accidit vero bilem ingenti in quantitate & extra ordinem ex ductibus hepatis in intestinum præternaturaliter ejici, ubi, si præsertim qualitate simul peccet, multa incommoda creat, variaque symptomata producit. Evenit id potissimum à gravi iræ exandescencia, tunc magno impetu, convulsis fibris musculosis tam vesicæ quam ductuum, non modo oris amaritiem, nauseam, appetitum prostratum, cardialgiam, sed etiam vomitum parit, vel ventris tormina & biliosam diarrhœam excitat; ubi notandum, quod si mox excernatur, periculi res expers est, si vero magis iracundia fuerit suppressa vel cohibita, accidit sæpe, ut commota bilis in cavitate intestinorum hærens non excernatur, sed ad sanguinem perveniat, & febres, acerrimas convulsiones, spasmos, & dolores procreare soleat. Maxime omnium vero corpori inducitur noxa, quandocunque sudorifera calida, vel spirituosa volatilia superingeruntur; quo fit ut bilis impura copiose ad massam sanguinis delata, inque partes nerveas & membranas propulsa incommoda periculosa creet. Qua de re elegantissimum in HIPPOCRATE in lib. de veteri medicina §. 34. locum habemus: *Ubi, inquit, cum amaritudo quædam diffusa fuerit, quam bilem flavam appellare solemus, quales statim anxietates & æstus & impotentia occupant: verum ubi liberati fuerimus ab illa & purgati aut sponte, aut per medicamentum, si modo tempestive quid ipsorum fiat, manifesto & à doloribus & à calore liberamur. Quando autem tempore fuerit elevata & cruda, meraca ac intemperata nulla arte neque dolores neque febres sedare possis. Et quos quidem acuta, acrisque ac æruginosa bilis adfligit, quales mox rabies & morsus viscerum ac pectoris & desperatio.* Bene hic monet Hippocrates, quod bilis intemperata hæc faciat: nam si plus justo temperata ira in intestinum immittitur, hæc non adeo nocet, sed potius remedio est frigidis; passim id Hippocrate in scriptis notante.

27. Considerabimus jam porro, quinam morbi ex bile perversa & ad sanguinem traducta fiant. Inter hos autem præcipue febres, & quidem sic dictæ biliosæ, tertianæ duplices continentes recenserent merentur. Et quamvis ipsæ febres bilem generent; nullum tamen est dubium, quin etiam à bile vitiosa oriantur. Consentientem hac in re habemus HIPPOCRATEM, qui lib. de natura humana §. 27. scribit: febres plurimæ à bile fiunt, præsertim continens quotidiana, tertiana & quartana. Primo enim non dubitari potest, & assensum quoque apud antiquitatem invenimus, febrium plurimarum, præsertim intermittentium, ardentium & sic dictarum cholericarum propriam sedem & originem in prima corporis regione, circa præcordia, intestina tenuia, jecoris cava, lienem, pancreas, omentum, utpote in hisce locis ordinario sanguinis tardior est circulus, generatio fit impuritatibus, & corrupti acres humores ex pancreate in intestina influunt, & non modo pathemata ordinario in hypochondriacis spasmodico-febrilia, sed & supra dictas febres excitant. Siquidem symptomata, quæ has febres comitari solent, plerumque dicta in regione incipiunt, quod maxime ventriculi & abdominis inflatio, dolor dorfi, anxietas, nausea, vomitio, & alvi adstrictio testantur; & quoniam sensibili quadam parte in corpore spasmò adfecta, omnes reliquæ in universo corpore facile in consensum trahuntur; hinc horror, rigor in corporis superficie, frigus, dolor externarum partium convulsivus & pandiculatio ex primarum viarum irritatione originem suam agnoscunt. Quin imo ipsæ diarrhœæ, dejectiones per vomitum biliosæ, urina flammea, sitis in-

extinguibilis, ardor intensissimus, tussis ferina stomachalis, faucium erosio, nec non levamen ex refrigerantibus, præcipitantibus bilis acrimoniam demulcentibus nitratis, lenioribus evacuantibus; & è contrario noxa, quam volatilia, calida, oleosa, acria inserunt, præsentiam vitiosæ bilis in primis viis & massa sanguinea adfertum nostrum sufficienter declarant & confirmant. Insuper & illud observamus, quod corpora biliosa juniora & ad iram proclivia ex facili in febres exardescant; aliquoties quoque annotavimus, illos qui antea biliosis adfuetis diarrhœis criticis fuerunt obnoxii, si sequenti anno non eveniunt, harum loco febribus tertianis, cum morfu, dolore & ventriculi rosione corripitur, quæ vomitu atque alvi dejectione materiæ biliosæ flavescens & copiosæ subortis cessare solent.

28. Præter alia elegantissimus locus sententiam nostram confirmans existat in HIPPOCRATE, qui lib. de adfectionibus §. 11. scribit: *ubi febris adest, sitis fortis, lingua aspera & nigra, color biliosus est, & sputa biliosa, & æger extrinsecus frigidus fit, intrinsecus valde calidus, ibi conducunt frigescentia & morbus fit à bile, cum mota intra corpus firmata fuerit.* Plerumque tales febres septimo die cessant. Nec minus harum febrium solutiones sententiam nostram confirmant; plerumque enim per criticum icterum, quo corripuntur, maxime septimo die tertiana continua laborantes, sine ullo gravitatis tensionis aut doloris in hypochondrio dextro censu, cessare solent. Perite HIPPOCRATES ait lib. de morbis §. 6. *febrienti ac bilioso in tempore foras dispersa bilis bonum.*

29. Veteres & maxime HIPPOCRATES, item FERNELIUS pro auctarum febrium causa bilis putredinem accusant, quare hic in Patholog. de febribus p. 6. sic scribit: *bilis putrescens in febre acrem malignamque qualitatem adipiscitur; eaque accessionis initio quasi turgens impetu fertur, affatimque in præcordiorum membranas irruit, iis sane argumentis, quæ de tussis sicca, de oscitatione, de suffocatione, de anxietate, de præcordiorum distensione, de dolore, de nausea, de vomitu & de albis tenuibusque urinis protuli.* Et certe bilis est humor, qui dum stagnat & subsistit, facile putrescit. Jam vero nihil magis ipsi naturæ nostræ microcosmicæ adversum est, nihilque magis ejus vigorem imminuit, ejusque motus turbat ac pervertit, quam quod corruptum & putridum est: unde malignarum febrium originem in cachecticis, phlegmaticis, à bile copiosa, in primis viis corrupta, non sine ratione deducimus. Quin imo si putredo à bile in primis viis consistit, hæc miasma pestis, febrium malignarum, petechialium, variolarum, morbillorum, dysenteriarum aliorumque contagiosorum morborum facile recipit, multiplicat & activum hoc reddit. Unde ea, quæ vomitu, purgatione colluviem ex primis viis evacuant, uti sunt acidula, linum, nitrum, spiritus vitrioli & nitri dulcis, elixir proprietatis cum acido egregie contagio morbisque malignis resistunt. Ulterius paroxysmorum in febribus intermittentibus novam originem bilis impura, de novo generata, facile suppeditat; hæc, si in sufficiente quantitate adest novum procreat paroxysmum: unde patet ratio, quare in intermittentibus data evacuantia, præsertim quæ sine spasmis agunt, & tonum intestinorum non lædunt, uti sunt pilulæ amaræ, salia neutra in copia data, mercurius dulcis: item quæ bilem minus acrem corrigunt, ut nitrosa & corruptionem ejus arcent, uti amara terrea, china chinæ & tonum partium nervosarum, ne nimium ad spasmodicas contractiones pronæ fiant, roborant, optime harum febrium causam ac radicem præscindant.

30. Tandem & hoc singularis considerationis phænomenon ponderandum venit; facile nimirum concipi potest,

potest, sub omni febrili æstu non modo bilem copiosam generari, sed maxime vitiosam ob humorum dyscrasiam sanguinisque circulum non recte sese habentem. Hæc bilis necessario in intestina fluit, & si non evacuatur, ibi subsistit & in venas lacteas ipsumque sanguinem transit; necessario ad majora incommoda occasionem præbet. Qua de causa in omnibus febribus alvus aperta admodum est salutaris, siue arte fiat siue natura: unde si alvi jungitur hisce febribus adstrictio, videmus inde nasci purpuram, aphthas, inflammationes oris & faucium, varii generis exanthemata, quorum nulla alia est causa, quam quod humores, præsertim biliosi corrupti, sub præternaturali & febrili sanguinis commotione nati, in sanguinem accedentes foras in partium extrema conjiciantur. Notandum hoc loco est, quod purpura, quæ morbus maxime æstatis est, & corpora impura, qualia ut plurimum gravidarum sunt, & scorbutica infestat; & sæpe die septimo nono succedere solet, multis in acutis febribus ex humoribus biliosis primis in viis oberrantibus potissimum nascatur. Unde omnia quæ acrimoniam temperant & leviter evacuant, à purpura præservant, & eam quoque tollunt, præsertim si diaphoretica leniora cum acidis nonnunquam debito modo ac methodo interponantur. Nam in puerperis ut plurimum ex neglecta lochiorum & primæ regionis evacuatione oritur purpura, quæ, si non rite tractatur, necat.

31. Ad alios etiam morbos devenimus, quorum origo commode à bilis vitio deducitur, & ex his est erysipelas, præsertim si alvus cohibita & transpiratio fuerit impedita. Nihil enim magis bilem vitiat, eamque impuram & salibus causticis refertam reddit, quam solennis per superficiem corporis prohibita evacuatio. Quodcumque igitur talis bilis caustica in primis viis existit, horrorem, anxietates & vomitus parit; postea in sanguinem recepta motu febrili, ut plurimum die tertio, foras ejicitur. Eodem modo dolores arthritici, podagrici, qui secundum veteres ex causa calida oriuntur, sustentantur potissimum primarum viarum vitio, ex bile vitiosa effluente, quæ ad sanguinem delata dolorum illorum omnium causa est; dum sal illud causticum ad articulorum membranas præcipitatur. Et hæc est ratio, quare podagricorum insultus doloribus ventriculi, anxietatibus, nausea, appetitu prostrato ut plurimum oriuntur, unde tunc temporis, qui sine tumultu primas vias evacuare scit, simulque acrimoniam humorum temperare, is certe egregie vias hisce doloribus præscindit, eosque mitigat.

32. Illud quam maxime etiam attentione dignum est, hæmorrhagias, quæ siue consueto vel statuto tempore contingant, siue criticæ & symptomaticæ in morbis fiant, suum potissimum in primis viis habere principium. Ibi enim flatulentia percipiuntur, angustia, constrictiones, dolor gravativus pressorius in hypochondriis, in dorso, alvus est adstricta, partes extremæ frigent, & postea sanguinis impetus ad partem quandam siue ad caput, siue ad pulmones, siue anum siue uterum fertur. Optima autem præsidia, quæ nimium fluxum sedant & præservant, ea sunt, quæ alvum blande aperiunt, simul tonum intestinorum respiciunt, & bilem temperatam balsamicam reddunt, uti sunt rhabarbarina, pilulæ Becherianæ, Marcostinæ, elixir nostrum amarum balsamicum correctum, salia volatilia oleosa repetita sed parciore dosi data. Ad acridinem vero & volatilitatem bilis causticæ temperandam nitrosa & pulveres præcipitantes omne ferunt punctum.

33. Jam quaestio exsurgit, an non ex hisce circumstantiis commode quis argumentari possit? bilem vitiosam in primis viis accumulata, in dispositis

corporibus occasionem & stimulum, illis spasms primarum viarum præcedentibus, præbere hæmorrhagias. Et hoc loco illud notandum est, quod statæ ac consuetæ sanguinis excretiones, sicut & arthritici morbi, catarrhales oriantur autumnali maxime tempore vel etiam vernali mense Martio, Octobri, cujus rei non alia causa inveniri potest, quam quod fibrarum tonus æquabilis ab aëris inæqualitate tunc pereat, & sic æquilibrium fluidorum & solidorum, in quo sanitas versatur, pereat: item quod à transpiratione prohibita salia illa excrementitia activa, quæ per poros ejiciuntur, maxime ad bilem transeant, ubi unita vi ad intestina descendunt, multaque pariunt incommoda.

34. Ante omnia vero ex bilis vitio, acridine ac corrosivitate, ob admixtas plures stimulantes heterogeneas & corrosivas partes, in ipsis intestinis graves defluxiones suscitantur. Nam diarrhœæ, cholera, vomitiones enormes, ventris tormina & dysenteria inde nascuntur. Accusant hic veteres ut & recentiores bilem æruginosam porraceam prassini coloris, qui bilis color præternaturalis apertè monstrat crasin ac mixtionem bilis, ab acido corrosivo ipsi admixto, esse destructam: bilem enim ab acido viridem acquirere colorem certum est, & fæces virides in infantibus, quæ ubi adsunt acidi ex lacte corrupti sufficientiam testantur; nam ab acido color perit & morbus inducitur. HIPPOCRATES lib. de natura hominis p. 282. jam dudum bilem viridem atro notavit calculo ita scribens: *viridis bilis juxta hepar manens ubi super ebullit, humani corporis corruptio est & novus ac inutilis ejus inquilinus*. Testantur quoque observationes præctico anatomica viridem bilem memoratorum morborum causam esse; ita DIEMERBROCCIIUS in anat. p. 44. testatur: se in forti diarrhœa biliosa viridi mortuo folliculum fellis viridissima bile repletum, ad ovi gallinacei magnitudinem intumuisse, deprehendisse. Idem Auctor p. 115. scribit: in sectionibus cadaverum in nosocomio nostro mortuorum sæpe bilem viridissimam æruginosam & subnigricantem in ipso fellis folliculo demonstravimus: imo in filiola Dn. Ulych alvi fluxu æruginoso mortua, & post mortem coram plurimis medicis à me aperta folliculum felleum ad ovi gallinacei turgidum & æruginosa bile infarctum invenimus: quod ipsum etiam in aliis quibusdam infantibus simili diarrhœa extinctis observavimus, uti & in aliquibus, quibus cholera morbus vitæ finem imposuerat: à PECHLINO *exercitatione de purgantibus* p. 494. bilis hepatica sæpe viridis nigra & plumbea reperta est. Testamur quoque in nobili studio melancholico variolis mortuo, bilem in folliculo fellis spissam & nigram instar picis observasse, id quod etiam olim in maniaco dissecto vidi. Apud BONATIUM de medicina Indorum pag. 194. legitur, quod in puero asmatico dysenteria mortuo vesicula fellis, humore atro infecta, fuerit inventa; quæ nigredo non aliam agnoscit causam, quam copiosum acidum admixtum, quod mora ex stagnatione bilem reddit nigram. Patet jam ratio, quare dictis in morbis, inque eorum principio leniora emetica rhabarbarina, item pulveres præcipitantes nitrosi, lac, serum lactis, oleum amygdalarum dulcium, clysteres anodynus & emollientes ut & cremor hordei omnem impleant paginam: nam bilis acerrima & caustica reddita, instar veneni symptomata movet. Notabilis est *observatio* 36. quam insinuat BORRICHIIUS in Act. Med. Hassn. Tom. III. ubi juvenis symptomatibus vexatus fuit quasi à veneno adsumto; ventriculi nempe erosio ac acerrima bilis sequuta est. Idem Auctor scribit: ipsa bilis, uti & alii humores; ita non raro corpus adficiunt, ventriculumque infestant, ut crederes venenum esse adsum-

tum, certe malignam qualitatem acquisiverunt, qua cruciatus incredibiles membranarum cæterisque partibus sensibilius imprimunt, & eas erodunt, miserumque in modum vellicant. Quod bilis tam corrosiva evadat, ut instar aquæ fortis ejecta in terram ebulliat, vid. BORELI *Observatio I. Cent. II.*

35. Ex hisce dictis & adductis clarissime apparere arbitror, bilem nostri corporis utilissimum esse humorem, & venenum quoque, si vitio laborat; adeo per bilem sanos esse homines & ægrotare: hinc in pathologia nec non in medendi methodo & indicationibus ante omnia ad hunc humorem ejusque statum respiciendum esse, utrum nimirum vel quantitate vel qualitate vel motu delinquat. Nam certe plurima reme-

dia, quod præstant in morbis sanandis, id exferunt ut bilem vel deficientem augeant, vel superfluum educant, vel vitiosam emendent & corrigant, motumque ejus ad intestina in statu legitimo conservent. Et enim pauca remedia agunt in sanguinem & humores, pleraque vim suam exferunt in primas vias, ibique vitiosos humores, inter quos principatum tenet bilis, quique mineram & causam occasionalem & materialem motuum morbosorum constituunt, proxima via emendant, quemadmodum id potissimum valet de emeticis, de laxantibus, absorbentibus, acidis, nitrosis, temperantibus, emollientibus, amaris, salibus fixis, martialibus roborantibus & id genus aliis.



D E

SALUBRITATE FEBRIUM.

§. I.

Permolestos & sæpe exitiales diversi generis morbos, quibus subinde affligi solent corpora, in pœnam generis humani à justissimo Deo esse datos, nemo facile inficiabitur; nihilo minus infinitus Dei amor, sicuti nihil per se mali efficit vel tribuit mortalibus, sed semper sub specie acerbi & mali præsidium bonum ac remedium recondit, quod luculentissime apparet in afflictionibus spiritualibus, quæ christianis ut plurimum medicinæ & salutis sunt; ita etiam mirabilem suam benignitatem in eo ostendit, quod morbosas corporis afflictiones, quibus nunquam non homines in hac vita impetuntur, sapientissime sæpenu-mero dirigat & convertat, in corporis sanitatem & vindicationem ejus ab interitu. Tam mirabilis enim benigna & divini conditoris in rebus corporeis administrandis est œconomia, ut sub eo, quod nobis sensu & primo intuitu videtur noxium & pernitiabile, nostra salus lateat, adeo, ut causam habeamus, propitium Numen non modo in prosperis, sed & in iis, quæ adversa statuit mens humana, celebrandi ac collaudandi. Illustri exemplorum numero ex arte medica depromptorum assertum hoc stabilire & confirmare possemus, si scopus institutæ scriptionis id permitteret; hoc saltem dicimus, quod febriles sanguinis commotiones, quæ plurimis & chronicis & acutis, affectibus associantur, ejus sint naturæ ac indolis, ut profligandis & extinguendis morbificis causis inserviant, adeoque plus utiles & salutares, quam detrimento corpori sint humano. Et hoc est quod de præsentis sub divina gratia & assistentia instituimus pertractare.

2. Ante quam ulterius in confirmationem hujus nostræ assertionis descendamus, è re fore judico, ut ostendamus, autoritatibus perantiquis sententiam nostram non destitui. Ipse *Hippocrates*, gravissimus & sapientissimus scriptor toties in scriptis suis inculcat, febrem certis morbis, de quibus inferius fuse agemus, supervenientem eos sanare. Ipse etiam *Celsus* disertis verbis *Lib. II. C. VIII.* scribit: *ipsa febris, quod maxime mirum videri potest, sæpe præsidio est.* Nam & præcordiorum dolores, si sunt sine inflammatione, sistit, in dolore succurrit, & distentionem nervorum rigoremque si post ea coepit ex toto tollit, & ex difficultate urinæ morbum tenuioris intestini ortum, si

urinam per calorem movet, levat. Deinceps febris à cordata antiquitate non inepte lucta motus & certamen naturæ adversus causam morbificam & vim morbi dicta fuit, quo indicare volebant, esse rem non noxiam, sed potius salutarem; nam illud quod pugnat adversus hostem vitæ, qui causa morbifica est, non potest in se & sua natura esse perniciosum. Quibus ex rationibus permotus ipse *Cl. Lindenius in selectis Medicis p. 148.* non satis potest mirari, cum tot exempla hujus apud *Hippocratem* existant, esse etiam hodie, qui *Campanella* id commentum autumant, & novitatis nomine damnant, ceu profectum ab homine non medico. Ipse enim *l. VII. de sensu rerum c. II.* nullum febrem esse morbum, sed remedium erga morbos contendit. Ejus sententiam quoque secutus est & brevibus composuit *Joh. de Mey* in commentario *Philos. Cap. V. loco V.* Ex recentioribus autem *Cl. Angelus Sydenhamius* id agit potissimum in suis scriptis, ut febrem pro naturæ conamine & instrumento habeat, quo partes puræ ab impuris secernuntur, quo causa morbifica exterminatur & expellitur. *Vid. Præfationem & Sectionem I. Cap. IV.*

3. Ex quo intelligitur, optima ratione jam olim *M. Hippocratem Lib. II. Epid.* scripsisse, prudentis medici esse aliquando febres accendere. Denique quid magis confirmat nostram sententiam, quam firma illa & constans veterum in eo consensus, naturam esse optimum medicum, optime sanare & solvere morbos, eamque, ut *Galenus* exprimit, adversus morbificam causam impetu valido insurgere, & decretoria excretionisque vehementer moliri, & concoctione, tandemque vacuatione à lethalibus morbis ægrum liberare. Ille enim impetus, ille motus, illa lucta, qua ceu instrumento natura morborum causis medetur, quid aliud est quam febris? unde recte concluditur, hanc ipsam esse instrumentum, cujus beneficio natura corpus ab interitu, quem causa morbi molitur, vindicat, eamque expellendo & subigendo corpus sanitati restituit.

4. Equidem febris ab omnibus medicis tam priscis quam recentioribus semper habita fuit pro morbo, & ipse *Hippocr. l. de flatibus Sect. III. p. 80.* febrem communem morbum, qui aliorum morborum & præcipue inflammationis comes sit, appellat; neque dissentit ratio: Febris enim est motus sanguinis & humorum præter naturæ ordinem institutus, qui actiones corporis & mentis lædit & labefactat, imo qui mor-

tem affert & exitio est. Nam pauci moriuntur nisi cum febre, attamen non impedit, quo minus idem diverso respectu possit esse morbus & simul etiam remedium tam suæ ipsius causæ quam aliorum morborum. Et hoc est, in quo admirari & celebrare debemus, ut in præfatione diximus, divini Numinis providentiam & benignitatem, qui machinam nostram tam affabre & tam concinno ordine construxit, ut viribus ac mediis suis se ipsam defendere non modo queat contra injurias ipsi interitum minitantes, sed & ut ipsi motus, ceu effectus causæ morbificæ, ejus naturæ & genii sint, ut ipsi causæ tollendæ, cæteris paribus, sufficiant & adversus eum directi sint, adeoque effectus ut ipsius causam destruere possint & jugulare. Quo autem hæc saluberrima in arte medica materia recte intelligatur & in usum ægrotantium ex merito tractetur, opus est, ut paulo penitus breviter tamen strictimque naturam & essentiam febris, qua ratione à natura producat, investigemus, & deinde definiamus, quænam febres & in quibus morbis ac quo tempore & sub quibus circumstantiis salutarem & utilem effectum in medendo præstare queant.

5. Quam vulgaris morbus est febris, & qui ferme omnibus sese associat corporis humani affectibus, tantis difficultatibus & obscuritatibus involutam ejus cognitionem hæcenus fuisse, nemo qui rerum medicarum gnarus & peritus est, poterit inficiari. Quot enim celebres scriptores existunt, tot ferme prostant de febre opiniones atque hypotheses. Nolumus longiores esse hisce in rebus recensendis, cum in plurimis tum in præcipuis opinionibus tradendis, operam locaverim in *annotationibus Poterii, de febribus*. Hoc saltem loco illud attingemus, ex motu spirituum sanguinisque circulo, sicuti vitæ & sanitatis ratio pendet, ita omnium affectuum interiorum, imprimis febrium ortum ac causas ex eodem fonte recte peti & explicari debere, unde dicimus febrem esse motum musculorum præcipue autem cordis concitatio-rem cum inæquali sanguinis circulo, caloris & pulsus naturalis, nec non excretionum immutatione junctum, certis temporibus remittentem vel intermittentem.

6. Est nempe nobis febris motus auctior & validior in systemate musculofo. Motus consensione medicorum perspicacissimorum in corpore nostro fit substantia tenuissima, fluidissima, quam alii spirituum nomine indigitare solent, alii principium vitale appellant, & originaliter existit in semine, reconditur in sanguine & ab externo fluido ambiente & spirituosis alimentis postea sustentatur. A veteribus natura dicitur, item anima purpurea, calidum innatum, omnisque motus tam intestini, quam circularis causa est, omniaque membra movet, & genuinum existit animæ in sentiendo & ratiocinando instrumentum. Hoc vehementius, hoc celerius in nervis & fibris musculosis, quæ palæstræ motuum sunt, movetur, sicuti liquidiissime id fieri videmus sub spasmodicis cutis, aliarumque partium internarum, sub pulsu cordis aucto frequentiori majorique calore. Rectissime enim cum *Hellmontio* statuimus in *libro de febribus Cap. I.* quod calor ille febrilis non sit materiæ peccanti proprius sive ejus effectus, sed sit effectus spiritus seu principii impetum facientis in nobis, qui uti omnis caloris naturalis in statu sano, ita & febrilis immediata & primaria causa efficiens est; ubi tamen probe notandum, in eo nos ab ipso dissentire, quod causam febris materialem tantum dicat occasionalem, materialis physici influxus & concursus ad febrem expertem, sed tantum occasionem præbere archeo intelligentia prædito, qui non aliter ac objecto iracundiæ extrinsecus suggesto, propria vi & thymosi sese accendat, & peregrinum ho-

Frid. Hoffmanni Oper. Tom. VI.

stem adoriatur atque expellere nitatur, sed potius non denegamus vim & potentiam agendi & movendi causæ morbificæ, quæ in principium vitale seu spiritus inordinarie agendo, ex mechanica quadam necessitate suscitatur illum impetuosum, qui in corde, arteriis & musculis visitur, motum. Est enim motus ille morbosus effectus ex utriusque principii agentis & reagentis, tam principii morborum activi, quam naturæ, seu principii moventis vitalis in corpore nostro. Quo sensu utique admitti potest, fabrum & auctorem febrium esse ipsam naturam, seu archeum.

7. Ratio autem nostri instituti postulat, paulo penitus determinare, quo pacto materia febrilis in spiritus nervorum & membranarum agat, & qualis effectus sive reactio hanc operationem insequatur, ipsaque symptomata & pathemata febribus communia progignantur. Afferimus autem, omnem motum in corpore nostro, qui fit in fibris musculosis activum esse systolicum seu contractorium, unde præternaturalis, vel in hujus motus relaxatione vel intensione consistere debet; intensio solenni nomine spasmi venire solet, qui solito validior & diuturnior fibrarum musculosarum contractio est. Ejusmodi spasmus omnium fere affectionum præternaturalium & morbosarum commotionum prima & fundamentalis causa est, quæ plurimos & diversos post se trahit effectus, utpote vix morbus conspicitur, ubi non spasmi subsint & suam ludant tragœdiam. Eminentius id quoque contingit in febribus & caloris excessivi generatione, ubi spasmi circuli sanguinis inæqualis, inordinati & aucti pulsus aliorumque accidentium causa sunt. Quemadmodum enim, si tonus musculorum & pulsus cordis moderatus est, inque debita proportione & temperamento consistit, tranquille & placide humores vitales circumvolvuntur, secernenda & superflua ejiciuntur & quæ servari debent, in vitæ ac sanitatis commodum retinentur: ita mox ad vitiatum tonum musculorum seu spasmus motumque cordis inordinatum totus complexus & ordo motuum vitalium totaque œconomia secretionum & excretionum turbatur atque pervertitur.

8. Evidentia autem signa & effectus spasmodicæ fibrarum musculosarum & membranarum contractionis, quæ in intermittentiis initio aperte, languidius & remissius in continuarum remissione visuntur, varia sunt, tam pro diversitate individuorum, quam ipsarum febrium. Potiorem tamen catalogum percensere, è re fore ducimus. Visitur quam maxime inter initia paroxysmi cutis, quæ exquisito sensu pollet & omnium consensione tactus organon est, summe constricta ubi pori laxiores contrahuntur, inque tubercula cutis, ut anserina solet, attollitur, vasa, quæ valde tumida & repleta sanguine erant, disparant, detumescunt, rubedo in livorem convertitur & turgescencia totius habitus corporis subsidet ac deprimitur, horripilatio, rigor, refrigeratio, præsertim in partibus extremis moleste afficiunt. Præterea cutis, quæ antea erat madida, evadit sicca & arida; sudor, qui ante aderat, mox supprimitur. Verum enim vero non subsistit hæc fibrarum & vasorum compressio & constrictio tantum in ambitu & cortice corporis, sed in interiora quoque porrigitur, quæ de re testari potest copiosa sub hoc tempore, præsertim in lentis & continuis, urinæ limpidæ aquosæ emissio, alvi contumax adstrictio, flatuum retentio, nulla clysterum admissio, præcordiorum anxietas, nausea, dispositio ad vomitum, dolor ingens in medulla spinali & lumborum regione: quæ cuncta abunde designant, ventriculum & intestina, nec non ipsos renes & vasa hepatica, spasmus & constrictionem præternaturalem pati. Neque substantiam cordis, arteriarum & musculorum à tali spasmo, qui in spi-

ritibus radicans totum corpus consensione afficit, immunem esse docet pulsus iste parvus, frequens, durus, debilis, qui ab insufficiente & minus libero spirituum influxu oritur. Differunt hæc omnia, uti diximus gradu, differunt etiam tempore accessionis, in intermittebantibus in principio visuntur hæc symptomata, in continuis in statu & etiam reliquo tempore sæpius intercurrent, nec tempus nec tenorem neque proportionem servant. Et certe nulla erit febris, ubi non talia pathemata attentus, diligens & peritus medicus intermixta esse annotabit. Perquam diligens autem harum rerum scrutator & observator fuit *Helmontius*, qui in *Lib. de febr. Cap. IX.* memoratu digna prodiit sequentia. In quo sane pars, cui infidet materia febrilis primum se contrahit in rugas, quod sentitur facile in præcordiis. Parti vero obsessæ totum genus venosum collaborat, strictim se arctat, contractis fibræ obliquis. Inde namque rarus durus atque minutus pulsus, frigoris index atque opifex. Hanc enim corrugantem stricturam venarum quisque febriens si in se animadvertat, facile dignoscet & penitus naturalem etiam bene valenti. Nam etsi scrotum laxum propendeat, statim tamen atque scoria humana ad sphincterem delabitur corrugatur scrotum sua sponte. Naturale est itaque venis & partibus primario affectis se in rugas contraxisse. Cum igitur venis passim associantur plerumque arteriæ, necesse est pariter has obliqua cum venis convulsione contrahi.

9. Sunt autem spasmi præcipua tam rigoris quam caloris febrilis causa. Hisce enim sanguinis & humorum circulus inæqualiter per corporis partes movetur & dispensatur, adeo, ut quædam partes sanguine turgant, quædam exsanguis sint, per quasdam celerius, per alias impeditius moveatur, unde quædam horrore & frigore tentantur, quædam fervent & incallescunt. Et hic sanguinis motus inæqualis à spasmo essentiam februm quam maxime absolvit. Nullus autem tam ex veteribus quam recentioribus rectius & tersius rem tetigit, quam ipse noster *Hippocrates* in *Libro de flatibus*. Locus autem, quo hæc tractantur, notabilis hic est: obstructo, inquit, in inferiori ventre in universum flatus percurrunt (per flatus hic spirituum irregulares motus, qui spasmos efficiunt, intelligit, ut ex antecedentibus patet) & ad sanguine refertas corporis partes elapsi eas refrigerant, videlicet constrictione impediendo sanguinis affluxum. At refrigeratis his locis, in quibus fontes & radices sanguinis radicanter, uti sunt cor & hepar, per universum corpus horror penetrat. Universo autem sanguine perfrigerato, totum quoque corpus horror occupat. Hanc igitur ob causam primum horrores ante febrem oriuntur, & quo majori copia flatus irruperint, talis quoque rigor consequitur. A pluribus quidem & frigidioribus vehementior, à paucioribus vero minusque frigidis, minus quoque vehemens. Cum horribus autem corporis quoque tremores ad hunc modum contingunt. Sanguis enim præsentem horrorem metuens per totum corpus perreptat, & ad maxime calidas partes concurrat. Atque hi sunt ejus saltus. Desiliente autem ab extremis corporis partibus sanguine, & viscera & carnes contremiscunt. Aliæ enim corporis partes copioso sanguine refertæ, aliæ exsanguis sunt. Atque exsanguis quidem ob frigus minime conquiescunt, sed concutiuntur, quod eas calor destituerit. Quæ vero sanguine replentur, ob sanguinis copiam contremiscunt & inflammationes excitant. Neque enim fieri potest, ut sanguinis copia conquiescat. Confirmat hanc sententiam *Libro 2. de morbis Sect. V. p. 15.* Sanguine in se coeunte & condensato dum venæ contrahuntur, corpus contrahunt & tremorem excitant, quod si modo minus in se coeat sanguis, hoc modo rigor appellatur, horror autem dicitur

quod est debilissimum. At vero quod post rigorem necessario major aut minor febris prehendat, sic res habet. Cum sanguis per quandam vim (id est per motum cordis & arteriarum auctiorem) incaluerit, rursusque in suam naturam abierit; nempe ex statu frigoris in calorem, quod pituitæ & bilis sanguini permixtum est, (motu vehementiori) simul incallescit, sanguisque se ipso multo calidior evadit. His igitur percalefactis post rigorem ad sanguinis caliditatem febrem supervenire necesse est. Hoc loco gravissimus auctor totum processum febris ejusque generationem ex principiis mechanicis & motuum legibus accurate describit, an vero à recentioribus melior harum rerum explicatio proficisci queat, merito dubitamus.

10. Neque *Erasistrati*, vetustissimi medici opinio de februm generatione parum ab *Hippocratis* jam memorata sententia abludit. Ipse enim, notante *Celfo* pag. 5. hanc fovet sententiam: videlicet si sanguis in eas venas, quæ spiritui accommodatæ sunt (id est arterias) transfunditur & inflammationem, quam græci φλεγμονήν nominant, excitat, eaque inflammatio talem motum efficit, qualis in febre est. Et pag. 17. mentio fit rursus *Erasistrati*, qui transfuso in arterias sanguine febrem fieri dixit, idque nimis repleto corpore. Quibus diserte inæqualitas sanguineæ circulationis in omni febrili commotione indicatur. Nam rigor, qui ordinario fervorem febrilem antecedit, spasmi species est, quo venarum tubuli capillares contracti liberum sanguinis ex arteriis transitum & regressum ad cor, ceu fontem quadantenus impediunt, unde regurgitante eo ipso ad arterias & cordis sinistram sinum, ubi copia sua premens liberiores spirituum influxum invitat, pulsationes crescunt: quare eleganter noster *Hippocrates* hæc exprimit, dum *libro de flatibus l. c.* scribit: sanguis vi pulsus dum calidus exiit, per angustam viam (nempe arterias) transire celeriter nequit, quod multa remorentur, quæ impediunt & obstruunt, eamque ob causam pulsationes contingunt, & ad hunc modum febres fiunt ac dolores.

11. Ex quibus adductis luculenter apparere arbitror, frigus quod in febribus, præsertim in partibus extremis percipitur, à deficiente sanguinis sufficientis influxu & ejus motu intestino languidiori dependere, corporis autem quæ sequitur incalescientiam auctiorem habere intestinum motum.

12. Cum autem febris essentia maxime radicetur in inæquali sanguinis motu & ex eo dependente frigore, horrore, calore, aliisque symptomatibus, operæ erit pretium, ut tradita jam refrigerationis genesi, caloris ortum ac causas scrutemur. Nolumus autem jam hic esse longiores in recensendis & refellendis aliorum circa hanc rem sententiis, sed placidum lectorum unice ad *dissertationem de caloris naturalis & præternaturalis causis* duobus abhinc annis habitam remittimus. Hoc loco saltem sententiam nostram, quam hactenus sustinuimus & defendere semper parati sumus, ne alios ulterius offendat, explicationem reddere in animum induximus.

13. Est nempe solennis & non indigna accuratio-ri scrutinio medico quæstio, an à circulo sanguinis aucto ista vehementia caloris oriatur. Primus mihi hanc sententiam sustinuisse visus est *BORELLUS* in *Tract. de motu animal.* pag. 337. Scite inquit: propriissima affectio & character febris est pulsus & ad commotionem vehementem cordis & arteriarum consequitur incallescencia. Et hoc verum esse constat ex universali fere omnium consensu, atque evidenti ratione & experientia fundatur, quia videmus, quod posita vehementi cordis concussione & motione, paulo post subsequitur in toto corpore animali nova quædam caliditas, quæ

quæ prius non aderat, ut patet in ira & vehementi commotione corporis, similiter ablata tali motione cordis, scilicet diminuta, contracta & tardius facta, subsequitur tepor, rigor & frigiditas, quæ prius non existebat per corpus animalis, ut contingit in frigore & in rigoribus quartanæ. Postea addit *eod. loco p. 339.* hæc verba: quod ex pulsatione vehementi & concitata muscoli cordis, sanguis, qui continetur in qualibet pausa & quiete ejus repletur, effusus à vena cava impelli intra arterias usque ad extremas ejus capillares extremitates debeat eodem concitato motu, quo cor contrahitur, ut patet ex legibus circulationis sanguinis. Similiter evidentia sensus constat à vehementi & concitata circulatione sanguinis per totum corpus animalis excitati fervorem, caliditatemque de novo, quæ prius non existeret, cujus originem haudquaquam ex motu, ut motus est, nempe progressivus, peti debere censeo, sed potius ex ipsa sanguinis natura; continet enim sanguis spiritum seu oleum, seu potius igneas particulas sopitas, quæ si dissolvuntur à vinculis, quibus neciebantur, ut indolem sui motus exercere valeant, tunc caliditatem sensui ostendent.

14. Proxime itaque præfatus Autor calorem sanguinis nostri deducit à motu intestino partium tenuissimarum sulphurearum sanguinis adaucto. Nam consensu omnium philosophorum recentiorum calor nil nisi rapidissimus partium sulphurearum motus est: neque etiam dubitandum, intestinam hanc per calidam sanguinis partium commotionem augeri à circulari motu celeriori facto, quem non modo vehementia, sed & frequentia & plenitudo pulsus demonstrat. Pulsu enim frequenti, vehementi ac pleno præfente, non potest non sanguis velociori motu per tubulos corporis cieri, sicque calor, sensu & experientia teste, augeri. Neque etiam dubium, quod non modo in statu sano, aucta vehementia & magnitudine pulsus ob corporis fortiorem motum animique commotionem, sanguinis circulus & cum eo calor increseat, sed & in statu læso imò ipsis in febribus, præsertim tertiana intermittente & continua, nec non ardente & synocha, maxime in statu eadem species pulsus circulationem celeriolem, nec non sanguinis exinde ortam incalescentiam majorem demonstrat. Non tamen id universale est, neque ubicunque calor præternaturalis in sanguine, ibi etiam circulus sanguinis citatiorem esse mea assertio fuit, aut adhuc est. Profecto enim non solus auctior circulus seu motus progressivus sanguinis motus intestini calidi unica causa est, sed plures adesse posse, quæ sanguinis minimas partes in vehementem concitant motum verticosum, utut impeditior sit circulus, non levia momenta suadent. Notum enim est, non modo in malignis, sed & in compluribus febribus adesse calorem consueto intensiorem seu præternaturalem, ubi pulsus non vehemens sive fortiter manum tangentis percutit, neque magnus, sed tantum celer seu frequens, parvus, imò debilis, qualis pulsus minime arguit sanguinis per cordis musculos transitum celeriolem. Deinceps ipsæ stases sanguinis inflammatoriæ in pulmonibus aliisque visceribus, quæ nunquam concomitatae sunt interno anxio ardore, siti & calore, extremis partium refrigeratis, luculentissime testantur, non omnem calorem excessivum à motu progressivo auctiori sanguinis ortum suum habere. Et certe nihil magis in praxi notandum occurrit, quam quod intolerabilis & mire anxius ardor intra corpus conclusus maxime tunc temporis molestet, quando corporis extrema obstipata, contracta, arida & exsucca sunt: & ex adverso minus molestum esse illum ardorem, qui habitum corporis occupat, sive qui ad extrema vergit, vulgo dicunt, *die Hitze schläget aus*, utpote hic ipse liberiolem sanguinis cir-

culum per habitum corporis, ille autem impeditiorem ejus motum per partes internas designat, ubi perpetuo ea notabilis differentia servanda est, quod sub interno calore semper majus adfit periculum, sub externo autem major sanationis spes adfulgeat.

15. Deinceps per ipsam quoque constat experientiam, ea omnia, quæ sanguinem fluxilem reddunt ejusque motum ac circulum ad partes extremas invitant, ut blandus subsequatur ardor, quod fit sub pulsu pleno ac celeri, aucti circuli sanguinis teste, præsentissime depromere & exstinguere permolestum corporis ardorem, adeo ut felix ille medicus sit, qui aliquot horas ante paroxysmum, conveniente adhibito medicamento corpus ad sudorem disponit, ita enim semper mitior paroxysmus succedere solet. Arbitramur ideo, vero esse consentaneum, sub calore intestino partium fluidarum corporis multa fuscitari effluvia igneæ naturæ, hoc est in agitatissimo motu constituta, quæ, si libere avolare per corporis spiracula possunt, calori magnum pabulum subtrahunt. Hæc autem si remanent, quod fit circulo diminuto & transpiratione impedita, necesse est, ut in sanguinem redeundo, motum calidum intestinum reduplicent & mirifice augeant. Deprehendimus enim calorem, qui extra corpus humanum excitatur, plus ex motu reflexo intestino partium agilium in se redeunte, quam ex motu progressivo proficisci. Manet itaque illud firmum & inconcussum, caloris essentiam conquiescere in motu partium sulphurearum concitatissimo, eum autem sub omni progressivo motu auctiorem per impulsu & attrituram ad poros fibrasque partium solidarum vehementem fieri, minime tamen sequitur, ubi calor intenditur, ut semper id eveniat aucta progressionem, sed à retentione exhalationum calidarum & nova percussione in idem subjectum ille sæpenumero provenit, uti in gravioribus inflammationibus & hectico calore apertissime patet.

16. Verum enim vero, qui ex circulo sanguinis intensiori caloris febrilis genesin derivant, eo nituntur fundamento, quod pulsus celer, qui febrium pathognomonicum signum & indivulsus comes esse solet, testimonium certissimum afferat motus progressivi sanguinis auctioris, magnaque sit differentia inter celerem & frequentem pulsus, à practicis minime confundenda, quorum hic magis in statu secundum naturam, nec non ætate juvenili, motu corporis vel animi aucto, à vino assumpto, ut & in cordis palpitatione & asthma locum inveniat, adeoque non genuinum febris signum sit, licet pulsus celer nunquam à febre absit.

17. Promeruit hæc non noviter inventa assertio quodammodo accuratiorem considerationem atque investigationem, idque non tam ideo ut de caloris febrilis genesi certiores evadamus, sed & ut pulsuum naturam exactius cognita, determinare possimus, quid de controversia diu inter eximios medicos agitata, an pulsus frequens magis quam celer, sit nota essentialis commotionis febrilis, judicandum sit. Suscepi id laboris libero animo, sine ullo respectu quendam refutandi vel aliis molestiam creandi, & observata omni modestiæ, quam nunquam non profiteor in scriptis meis, lege. At vero præter omnem spem nostram, quod dolemus, olim longe alia intentione, quæ à nobis procul abfuit, excepta controversia fuit, uti rerum inter se collatio docebit.

18. Quapropter uti firmus mihi animus perpetuo fuit & est, cum nullo ob rerum investigationem congre- di in disputationem maxime contentiosam, sed tantum ipsas res sine ullo respectu, à quibus proficiscantur, libere ac placide tractare: ita etiam nemo mihi vitio vertet, si in materia controversa non ex merito responsum dederim, probe reputans, litibus

ac jurgiis animos magis exulcerari, veritatem autem magis supprimi quam investigari; nihilo minus in gratiam veritatis, ne mihi fiat injuria, brevibus, data hac occasione mentem clarius explicare constitui, ut quivis planius intelligere possit, num consentanea veritati fuerit & sit mea sententia, nec ne?

19. Quæstio autem prima ventilata hæc est, an magna inter pulsum celerem & frequentem sit differentia, & an certo respectu unus idemque dici possit? Postremum jam olim asserui & clare deduxi in *dissertatione de pulsibus*, neque dissimulare possum, hunc laborem magis ex professo & clarioribus conceptibus tractatum fuisse in *dissertatione de pulsibus*, quam factum fuit in ea *de causis caloris*, ubi levissime saltem tetigi hoc argumentum. Attamen nemini hæc licentia, cum iniqua sit, tribuenda erit & concedenda, si quis posteriores labores, qui limatiores & accuratiores semper esse solent prioribus, cum iis, quæ ante non ex instituto dicta sunt, conferendo, extrahat, & inde misceat quædam pro lubitu in refutationem alterius.

20. Sed ut ad rem deveniamus, ante quam solvamus quæstionem, supponenda quædam esse existimo. (1) Convenit inter mechanicos, frequentiam non motum in se & sua natura ingredi, cum motus possit fieri & absolvi, qui non sit frequens, id est qui non repetitur, sed potius omnis motus in se est vel celer vel tardus, id est qui breve vel longum tempus requirit, vel magnus vel parvus est, respectu molis, quæ movetur, vel vehemens vel debilis respectu virium motricium. (2) Supponendum est, pulsum cordis & arteriarum esse motum continuum, videlicet sine ulla sensibili quiete vel mora diastolen arteriarum, quæ tangentis manu percipitur, systolen sequi, & systolen rursus diastolen: talis modi species motus est quoque pendulorum vibratio, cujus reciproca ab uno latere ad alterum motio continua est, & fit non interrupto certo quietis spatio. (3) Motuum singulorum celeritas, præsertim impulsus, ægrius nisi ex spatii æstimatione, quod mobile percurrit, inter se comparari & distinguere potest. Ceterum hoc verum est, quod motus celerissimus cum motu valde tardo comparatus, in ipsam perceptionem etiam cadat, quod nunquam negavimus, sed hic difficultas hæret, quomodo celeritatem motuum vel pulsum, inter se gradu non nimis remoto differentium velimus dijudicare, an id ex singulis ictibus, an potius ex numero repetito illud ipsum sit colligendum? Manifestissimum exemplum habemus in pendulo, in quo ratione gradus celeritatis differentes vibrationes, pro diversa fili, ex quo suspenditur, summatione ægerrime à se invicem distinguere licet, nisi quis ex frequentia, id est ex numero vibrationum, per certam temporis mensuram, majori vel minori illud ipsum conjiciat.

21. Ex hisce præmissis liquide fluit, unum quidem pulsum posse esse celerem, qui tamen non sit frequens, adeoque celeritatem & frequentiam esse res distinctissimas, quarum hæc numerum plurium motuum, illa autem unius motus intensiorem certo tempore indicat. Potest itaque celeritas esse sine frequentia, sed frequentia motuum ac pulsum, qui sine ulla interjecta mora diversis rationibus fiunt, non potest esse sine celeritate singulorum pulsum. Nam cum motus ille sit continuus, impossibile est, ut ille numerus possit crescere, sive paucio tempore multi motus fieri, nisi quivis motus sigillatim breviori temporis spatio absolvatur, id est celerior sit. Ex eo sequitur, nullum dari frequentem pulsum, qui non sit celer, & frequentiam testari de celeritate & raritatem de tarditate singulorum pulsum, imo esse celeritatis affectionem, frequentiam. Nunc quæstio oritur, si certent medici, quale quid maxime factum à *Sylvio*, *Deussingio*, aliisque,

num pulsus celer, an potius frequens sit essentialis febribus, sive, quod idem est, si quis dicat non confundi debere à practicis pulsum celerem & frequentem, eamque distinctionem in praxi habere insignem usum, quid sentiendum? Considerato nec præcipitanter reposuimus, quæstionem esse de nihilo, nec habere usum distinctionem hanc in praxi, modo non confundatur vehementia pulsus cum celeritate, sed frequentem pulsum esse celerem, sive unum eundemque esse pulsum. Lapis autem offensionis hic existit, unum eundemque esse pulsum celerem & frequentem; sed quis ex lectione *dissertationis de pulsibus* non clarissime videt, illud ipsum prædicatum non esse intelligendum hac ratione, ac si celeritas non distincta sit à frequentia, ipsa natura rei, ipso conceptu, sed tantum ratione effectus, ratione judicii medici, ratione cognitionis morborum, unum esse idemque, si quis dicat, pulsum in ægrotante celerem esse, ac si dicat pulsum frequentem esse. Hanc fuisse nostram sententiam & verba plene detorta esse in alienam prorsus significationem, quisquis, qui attente & sine præjudicio perleget dissertationem de pulsibus, statim judicare poterit. Neque sine ratione lectionem hujus dissertationis, quæ argumentum in praxi egregium & nunquam, ut arbitror, antea satis excussum tractat, rerum medicarum peritis commendare erubesco.

22. Sed ut propinquius ad rem ipsam accedamus, hoc inprimis restat discutiendum, an pulsus celer, qui ex frequentia recte judicatur, indicet semper circulum sanguinis auctum? Res esset salva & omnis dubitationis expers, si ostendi posset, celeritatem pulsus involvere simul magnam copiam virium motricium, sive supponere magnam vim, sive fieri ex magna virtute systoles cordis. Secundo si semper celeritas includeret magnam molem mobilis sanguinis, sponte utique tunc sequeretur, si motus esset satis validus isque sæpius repetatur paucio tempore, & simul promoveat ac impellat magnam quantitatem sanguinis, quod tunc longe velocior etiam fluxus & refluxus sanguinis procederet, quam qui esset sub pulsu tardiori debili & parvo. Verum enim vero, cum persæpe illud, quod movet celeriter, exiguae molis sive debilis efficaciam ad movendum sit, nec cum omni celeri pulsu arteriarum juncta semper sit plenitudo, magnitudo sive repletio arteriarum, sed sæpissime paucus sanguis impellatur in vasa, neque semper vehementia, quæ ex virium motricium quantitate nascitur, celeritati, quæ tamen opus est, si sanguis debeat celerrime suum per vasa circulum absolvere, societur, ideo, ut opinor, recte concluditur, quod ubicunque & in quibuscunque subjectis, ac febribus & quocunque tempore pulsus celeritas cum magnitudine & vehementia juncta est, ibi intensior & auctior sit sanguinis circulus & major quoque calor, minime autem sequitur, ut in iis febribus & morbis, ubi celeritas cum parvitate & debilitate sociatur, sicuti fit plerumque in malignis, in principio intermittentium & potissimum tunc temporis, quando natura in maximo discrimine versatur, ut, inquam, adsit ibi auctus sanguinis circulus: quare nec calor internus anxius, sitis cupiditas, ab eo est deducenda.

23. Ex hisce jam dictis probeque consideratis & intellectis quivis non potest non percipere, me celeritatem pulsum in febribus nunquam negasse, multo minus cum statuerim, celerem & frequentem certo respectu pro uno haberi posse, animum habuisse refutandi alterius hypothesin, cum meæ sententiæ è directo non sit contraria, sed in eo tantum versetur differentia, an ubicunque pulsus celer observatur, etiam velocior sanguinis circulus sit, omnisque corporis calor tantum ex progressivo motu derivari debeat. Et hoc est, quod adhuc ob argumenta non levis momenti

negavi, donec hoc negotium clarius fuerit ab altera parte deductum.

24. Tractavimus hactenus causas horroris, rigoris ac frigoris, quæ nunquam non in febribus observantur & præcedere solent: explicata etiam est caloris indoles ac genesis & demonstrata duplicis generis motuum in febre reciprocatio, quorum unus ex partibus externis vergit introrsum ad centrum, alter ex partibus internis ad circumferentiam corporis extrorsum; superest jam, ut paucis determinemus, an à causis mere physicis, an vero simul moralibus dependeant, & quem in finem vergant & destinati sint hi motus. Ut itaque primæ quæstioni satisfaciat, statim monendum ducimus, animam in cogitando & ratiocinando plane incorpoream maximam potentiam habere in principium vitale corporis nostri, sive spirituum motum, quem vel augment, vel imminuunt varieque determinant; quod nunquam sapiens, qui pathematum animi & imaginationum vires cognitæ habet, & quæ ratione motum & crasin partium fluidarum, nec non solidarum configurationem mutant, probe tenet, negavit, adeo ut etiam nullum dubium sit, ex causis mere intentionalibus moralibus febrilem quandam commotionem posse in corpore suscitari, sed hoc est maxime determinandum, an non ex mere physicis causis sine moralitate agentibus, sine spontanea directione motus talis modi aucti febrilis ex causis mere physicis sæpiissime contingat febris. Primus qui causarum moralium intentionalium, quæ certum in finem tendunt, & tantum ex occasione certi objecti suscipiuntur, ab agente interno sive archeo in scenam produxit, *Helmontius* fuit, adeo ut causas physicas morborum in classem moralium reducere nimium intempestive intenderit; videatur ejus *Liber de morborum ortu & de febribus*. Nos semper fuimus ea in sententia, ubi causæ notæ & explicationes per res sensibus obvias & physicas reperiuntur vel reperiri possunt, & ex corporum affectionibus phænomena accersi, in iis ad incognita & incorporea non est deveniendum vel properandum. Etenim probe hic servandum est, antiquiores sollicitè naturæ effectus ab animi operationibus distinxisse: nunquam enim legitur, animam esse morborum medicatricem, quod tamen dicitur de natura.

25. Natura antiquis ipsis motuum causa & principium est, cognitionis & perceptionis autem fons & principium anima ipsis dicitur, cum natura ab *Hippocrate* plane indocta & intelligentia expers pronuncietur. Elegans locus hac de re exstat in *Cælio Aureliano l. 1. de passionibus acutis, pag. 39.* dum meminit Asclepiadis, qui animam cœtum sensuum salutavit, prætereaque dixit, omnia in corpore nostro fieri necessitate & nihil sine causa, & naturam nihil aliud esse, quam corpus vel ejus motum, & non solum prodesse naturam, sed etiam nocere. Enim vero anima sive sit sensitiva sive simul rationalis, (quæ in hominibus principium directionum & motuum voluntariorum in animantibus est,) nihil tamen percipere potest sine ideis, id est sine motibus ab objectis externis impressis, hi autem tantum variis sensoriis eum in finem constructis recipiuntur. Ubi itaque deficiunt sensoria varia, ibi quoque perceptio & directio motuum deficit, (nam tactus ad causarum materialium morbificarum indolem, figuram, motum, noxam & vires pernoscendas plane insufficiens est,) hinc facile etiam intelligitur, directionem in morbis specialem motuum indoli morbificæ causæ correspondentium ab anima suscipi nequitiam posse.

26. Verissimum quidem, naturam numeri, ordinis, temporis & locorum esse observantissimam, sicuti id in formatione, nutritione corporis, conformatione, sanatione morborum & excretionibus conspicitur: at-

vero id non ex peculiari rerum, quibus cum agit, intelligentia & arbitrio pro lubitu motus hos vel illos instituendi eosque in hunc vel illum finem, cujus plane ignara est, dirigendi profluit, sed potius ordinatissimi hi certum in finem effectus unice ab artificio mechanico, & coordinatione corporum in se agentium & reagentium, sub certa mensura, gradu, proportionem, derivandi sunt, quod vel ex eo satis perspicue intelligi potest, cum hos ordinatos motus per meras actiones corporeas pro lubitu suspendere, augere ac immutare possumus. Præterea apertissimum exemplum habemus structuræ organicæ & ordinatissimæ in vegetabilibus, quorum magnum ordinem ac artificium præ se ferens fabrica non ab intelligente quadam facultate, sed à mere necessaria, non tamen ordinis experte motus efficacia dependet. Sed hæc uberius deducere, non pertinet ad præsentem institutionem. Hoc autem, quod dissimulare non possum, pro te maximi momenti, & quasi fundamenti loco in medicina recte tractanda habendum est, videlicet ne confundamus effectus morbosos, qui ex meris causis necessariis fluunt, cum iis, qui liberum & immateriale quoddam agendi principium junctum habent, sicuti id patet in animi affectibus, ubi inter hunc & morbum ingens intercedit differentia, dum morbus is proprie dicitur, ubi causæ agentes mere sunt corporeæ, affectus autem animi nuncupatur, ubi vitio laborat animus, utut effectum sæpe in corpore morbosum producat.

27. Ex hisce dictis concludimus, febrem non esse salutarem eam ob causam dicendam, quasi natura materiam interius intelligat noxiam, eamque pro diversa qualitate noxæ certa proportionem ac gradu motus per certa loca ac certo tempore ex corporis sphaera amoliri nitatur. Concedi hoc potest de anima, certo objecto, quod extrinsecus obvenit, irascente, nequitiam autem commode hoc applicari potest ad motus pure mechanicos: nam quemadmodum animi affectus & morbus; ita etiam ira & febris differunt, non autem omnis febris immaterialem & idealem animæ actum vel perceptionem supponit. Non potest itaque commode dici febris res salutaris & utilis, bonum in finem excitata, cum natura, imo anima nostra sensitiva plane ignoret conditionem causarum morbificarum, viarum, locorum, & fines quoque rerum, quæ internæ existunt, nesciat. Est itaque nostra opinio febris, non motus in se salutaris dicendus, neque respectu principii sive causæ efficientis, neque respectu finis, sive effectus, quia sæpenumero naturæ humanæ hostilis, imo funestus esse solet, sed tantum quoniam effectum quandoque præstat mere ex accidenti salutarem. Meretur hoc ipsum illustrari exemplo, nempe constrictio firmior spasmodica tunicarum ventriculi & intestinorum ab emetico vel purgante producta non in se res bona & salutaris est, cum plane sit præternaturalis adeoque morbosa & gravissimorum sæpe symptomatum auctor, nihilo minus dum colluviem impuram, viscidam, corruptam ex iis locis exsultat, est & fit ratione hujus effectus res salutaris. Ita etiam porro spasmus partium internarum, qui hæmorrhagias spontaneas progignere solet, in se non res proficua est, quoniam sæpe lethales causatur effusiones sanguinis, effectum autem hunc & quidem per accidens salutarem efficit, quando sanguis adest in copia, nec nimium evacuat. Sic etiam res comparata est cum febre, quæ in se considerata non utilis vel salutaris dici meretur, utpote vel dimidiam mortalium partem jugulat atque interficit, nihilo minus effectum salubri persæpe gaudet, dum perfectæ integritati ac sanitati corpus impurum morbosum restituit.

28. Operæ pretium autem est, ut paulo specialius

lius determinemus, in quibus subjectis & quo modo ac ratione febris salutarem præbeat corpori medicinam. Primum autem omnium sciendum est, causam, quæ suscitatur febrilem in musculofo systemate commotionem, esse sæpissime non modo nimiam sanguinis & humorum abundantiam, sed & impurarum & excrementitiarum partium viscidarum tam in primis viis quam in vasis collectionem, quæ duplex causa, cum à circulo sanguinis impedito tum à colatoriorum & emunctoriorum infarctu atque obstructione proficisci solet, quemadmodum evenit id plerumque in omnibus ardentibus, synocha biliosa, tertiana continua, catarrhali & hujus generis aliis. Ad expellendam itaque talis modi corpori insidias fruuentem causam armat se ipsa natura non ex libero quodam arbitrio, sed ex necessitate quadam physica, per actionem hostilis & peccantis materiæ stimolata, tam motu spasmodico partium extremarum & membranacearum, quam motu musculorum & præcipue cordis per majorem spirituum influxum aucto. Motu enim opus erat tam intestino calido, quam progressivo seu circulari intensiori ac fortiori, ut sub languidiori hoc duplici motu progenerati & copia & qualitate infesti humores è corpore ejiciantur, obstructionibus prius solutis, præparatisque & dispositis ad id humoribus. Scite enim & non sine magna ratione veteres morbi sanationem per naturam fieri scripserunt primo *πρωασμῶ* id est maturatione & coctione, dein *ἀραιώσε* hoc est discussione & rarefactione, & tertio *λύσε* hoc est solutione & excretionem, vid. HOLLERIUS in scholiis ad Aphor. 39. Hippocr. p. 181.

29. Per coctionem autem & maturationem intellexerunt pathologicam, quæ est adaptatio materiæ excrementitiæ ad excernendum, sicuti coctio physiologica est adaptatio materiæ ad nutriendum. Cum enim crudi, rudes & partim immobiles & secretoriorum poris minus correspondentes humores morbofi sint, præparandi hi prius sunt ad exitum, nempe materia viscida incidenda, abstergenda, crassa fluxilis reddenda, intemperati & acres humores temperandi & corrigendi sunt, quod maturationis & coctionis vocabulo designavit sapiens antiquitas, quæ non cruda, sed cocta tam natura quam arte è corpore expellenda esse ingeniose suadebat.

30. Quoniam autem excretio peccantis materiæ minus commode fieri potest, nisi viæ prius sint liberæ & emunctoria aperta, hinc obstructiones dissolvendæ ac stagnantes & hærentes in vasculis capillaribus & excretoriis fixi humores resolvendi sunt ac colliquandi. Quibus effectis commode postea succedit quantitate peccantis materiæ excretio.

31. Hi sunt præcipui modi ac rationes, hic est processus solennis, hic ordo, quo utitur natura in sanando morbo, seu auferenda morbifica causa è corpore. Id autem omne exsequitur unico instrumento, motu.

32. Motus autem sanguinis duplex est, alter intestinus partium sulphurearum calidus, alter progressivus seu circularis. Utroque opus est, ut illud, quod noxium & pernitiæ in corpore est, præparetur ad exitum & postea ejiciatur. Certe non solus sufficit motus sanguinis circularis, utut intensior & auctior sit, nisi simul comitem habeat intestinum auctum, sive incrementum caloris. Et tamen non negari possit, quod calor nimis excessivus in febribus damnum afferat corpori, nihilo minus, uti motu progressivo aucto, sic etiam auctiori intestino calido eget natura ad expugnandam causam febrilem. Quid enim felicius humorum glutinositatem & viscositatem dissolvit quam calor? quid ad obstructiones à crassa amurca indutas referandas, ad emunctoria obstructa expedienda, opem spondet promptiorem, quam calidus & fluidus

sanguis? quid exsuperantem sanguinis & humorum copiam citius imminuit, immobile & crassum fluidum reddit, quam calor? unde non sine magna ratione veteres calorem febrilem utilem judicabant ad concoquendam, id est incidendam, attenuandam & excretionem paratam reddendam materiam peccantem. Et quod calor moderatus, in se consideratus res sit corpori maxime proficua & salutaris, vel ex eo satis superque apparet, quod calidioris temperiei homines, juvenes etiam, & qui motu corpus exercent & calidis potibus utuntur, rarius passionibus chronicis & viscerum obstructionibus obnoxii sunt. Et hæc quoque est ratio, cur omnes intermittentes febres etiam ipsæ quartanæ, teste Hippocrate, si æstate invadunt, longe breviores sint, facilioremque sanationem admittant, quam si autumnii vel hiemis soboles sint: illæ enim sponte sæpe mense Junio, quando aer est fervidissimus, cessare solent, quin imo, quo major in paroxysmis febrilibus percipitur calor, eo citius febris solvitur, & contra languidus & lentus fixam morbi sedem ac radicem arguit. Equidem ad infringendam hanc sententiam reponi potest, quod tales effectus non tam calori, quam circulo sanguinis aucto, cujus individuus comes sit calor, adscribenda veniant. Verum enim vero, utut circulatio sanguinis intensior non fiat sine incremento caloris, nihilo minus tamen, uti superius dictum, non omnis calor causam in corpore agnoscit circulum auctum; siquidem sæpissime sub pulsu languido & frequenti extrema frigent, interiora ardent, cum linguæ siccitate, nigredine & inexplibili siti. Deinceps motus intestinalis uti natura plane diversus est à progressivo: ita etiam diverso gaudet ad vitam effectum, neque, si sola circulatio & excretio inutilium partium absolveret vitale negotium in animantibus, opus esset certa temperie, mixtione ac moderatione elementorum sanguinis & maxime sulphuris (quod intestinali motus fundamentum est) ad conservandam vitam & sanitatem, quod tamen statuere absonum est.

33. Quapropter non inepte dictum fuit ab antiquitate, vitam consistere in calore, item calore naturam pugnare adversus causam morbificam, & nullum reperiri animal, ubi non calidum quoddam substantiale in sanguine & ejus succis lateat; utpote sine motu intestino calido nulla generatio, nulla vita, nullus motus vitalis perfici potest. Neque hoc loco sequitur, nullum esse calorem, qui non ad sensum tactus sit perceptibilis. Nam hominis sensus non solus est iudex & norma caloris. Motus, qui est intestinalis calidus, dici potest partim respectu frigoris, partim ratione effectus, præsertim rarefactorii, ut adeo ad infringendam hanc sententiam frivola sit ista oppositio, quod pisces sine calore vivere possint. Calore autem opus est in animantibus, ut spiritusascentia humorum hoc ipso promoveatur, humores fluxiles servantur, & omnes pori patuli & aperti maneant, tam nutritionis quam necessariorum excretionum ergo. Qua de causa GALENUS de usu part. lib. XIV. cap. VI. calorem non inconcinne appellat naturæ primum instrumentum. Eadem ratione natura in expugnandis morbis optimum in finem utitur calore fortiori, sicuti id patet in febribus. Hoc ipso enim non modo subigitur & attenuatur vitiosa materia, sed & ad excernendum idonea redditur. Enim vero non negari hoc loco potest, magnum intensum fervorem multum præpedire evacuationes & maxime per sudorem, adeoque hoc respectu plus nocere quam prodesse; nihilo minus si rem diligentius examinamus, natura non sola evacuatione sanat morbos, sed potius sola sæpius dissolutione & rarefactione humorum sine ulla excretionem materiæ morbum tollit, imo prius materiam, si excernenda est, ad excretionem disponit, coquit, vias aperit,

aperit, quod commode præstatur calore, utpote non tam in evacuatione quam in correctione causæ morbificæ noxiæ consistit cura. Unde nostra opinione ii admodum falluntur, qui sibi persuadent, illud ipsum, quod statu morbi peracto circa declinationem diebus criticis excernitur, & per emunctoria corporis excluditur, pro causa morbifica habendum esse: de hoc quidem non dubitandum, quod evacuationes, legitimo tempore & debita quantitate in febribus succedentes testentur de convalescentiæ statu & optimum signum victricis naturæ præbeant, quoniam omnia jam esse pacata & tranquilla in corpore, circulum sanguinis jam rursus liberum & æquabilem seu secundum naturam esse restitutum, spasmodicas partium contractiones cessare designant, unde liberiores fiunt evacuationes, & quidem materiæ non modo morbificæ ad exitum dispositæ, sed & aliorum excrementorum humorum, qui sub irregulari ista febrili commotione humorum in corpore generati fuerunt, quo circa utique proficuæ sunt & ideo non sistendæ vel cohibendæ tunc dictæ criticæ evacuationes. Probe enim tenendum est, causas morbificas agere potissimum spasmis, sub spasmis autem turbari circulum sanguinis, æque ac debitum excretionis negotium. Quapropter si evacuationes rite procedunt, bonum hoc præbet medico indicium, causam morbificam esse expugnatam, motus morbosos jam esse sedatos & ad naturalem statum jam rursus universa tendere. Nam simul ac incipiunt evacuationes debitæ sub restituto sanguinis circulo, quales sunt criticæ non autem symptomatice, protinus etiam morbi vis remissa conspicitur. Ex quibus allatis liquido patebit mens nostra circa ea, quæ olim diximus in *dissertationis de causis caloris præfatione*, & omnis bonus & æquus lector ac censor judicabit utrum mea asserta adhuc inconcussa permanerint ac firmo stent talo, vel an in contrarium allatis argumentis confutata fuerint?

34. Dicimus itaque, febrem esse salutarem corporis nostri medicinam, quod in hac ipsa motu calido intestino nec non impulsu sanguinis aucto & celeriori ac vehementiori per omnis generis tubulos facto, cruditates viscidæ attenuentur, dissolvantur, obstructions glandularum referentur, stagnantes humores in ordinem redigantur, corrupti & quantitate peccantes evacuentur, nimiumque excessivum humidum discutatur, adeo ut febris sæpius egregia medicina corporis sit depuratoria & evacuatoria. Meretur autem perutile hoc argumentum, ut non modo firmis autoritatibus, sed & experientiæ irrefragabili fide corroboretur. Unde primo omnium magni nostri HIPPOCRATIS placita atque dicta circa hanc materiam evolvere & circumspicere animus est. Ipse vero *l. V. aph. 70.* scribit: Qui quartana corripuntur, non admodum convulsionibus tentantur, si vero tentantur, superveniente quartana liberantur. Ex nullis siquidem febribus nulla magis salutis hominibus est, quam tertiana & quartana, quod etiam vulgo notum est: hæc si recte percurrunt tempora, neque nimis diu perseverant, nec in ætate plane decrepita & viribus consumptis fiunt, sanguinem egregie depurant & obstructions circa mesenterii venas potenter tollunt nec non humores concretos, congelatos, crassos & viscidos, qui variorum spasmodorum causæ sunt, resolvendo, auferunt, & nervos præhumidos exsiccant, nimis resolutos ac laxos firmant & roborant, unde vulgi persuasio, quod quartanæ magnum robur ingenerent corpori, ita ut is, qui tertiana vel quartana fuerit correptus, intra aliquot annos degat liber & immunis ab omnibus morbis. Spectat huc etiam *aphorismus 26. sect. II.* qui hic est: *febrem convulsioni accedere satius est, quam convulsionem febrili.* Probe hic attendendum, quod convulsio à repletionem, id

est copia humorum, non à qualitate materiæ acris & causticæ orta esse debeat, quoniam motus tam intestinus quam progressivus densam illam, viscidam & compactam materiam, quæ nervis & cerebro infidet & in primis viis continetur, attenuat & discutit. Pulchre autem hic notat HOLLERIUS in *scholiis in aphorism. eundem*, quod non quævis febris convulsionem solvat, sed moderata nec nimis debilis, nec nimis vehemens maligna, quæ vires exsolvit. Mirabile antea est, quod gravissimus noster Autor *l. VI. in Epid. Tom. VII.* scribit: quartanam à melancholia, epilepsia, lepra, liberare & scabiem etiam abigere. Alunt nempe hi sævissimi morbi ferme eandem causam cum quartana, & oriuntur ex sanguinis viscidis & impuri stasi circa abdominis viscera, nec non lienis, hepatis & pancreatis infarctu ac induratione, cum vero motus febrilis in quartana probe administratus, obstructions pertinaces & veteres motu dissolvat, fit, ut radicibus evulsis isti gravissimi morbi ceu effectus tollantur. Memorabile hoc loco est, quod circa sanationem scabiei & circa quartanam refert LANGIUS *epist. 16. l. I. p. 20.* dum inquit: Vidi plus centies, scabiem & per aliarum febrium & præcipue quartanæ crisin exortam sponte exolescere, citra omne medicamentorum subsidium. Quod autem ad epilepsiam attinet, magnus HIPPOCRATES alio loco, nempe *l. V. Epid. part. VI.* scribit: à quartana correpti magno morbo, id est comitiali non rapiuntur, quod si vero ante capiuntur, quartana succedente liberantur. Hoc assertum diserte confirmatur *aphor. XX. Sect. V.* qui hic est: Qui febris quartanæ dominatu tenentur, haud facile convulsione infestantur; quod si ante laboraverint, superveniente quartana morbo illo defunguntur.

35. Neque adeo difficile est, rationem hujus experientiæ invenire. Minime enim obscurum est, sed unanimis fere practicum sententia, chronicam epilepsiam in obstructionibus & inde resultantibus impuritatibus partim viscidis radicari, quas natura per spasmus universalem, qui principaliter in meningibus cerebri oriundus per totius corporis musculos penetrat, & epilepsia dicitur, excutere nititur. Tales autem obstructions, nec non humores viscidos, qui liberum sanguinis circulum per vascula capitis impediunt, resolvit, discutit & foras ejicit calor ac horror quartanæ. Certe enim valido talis modi fibrarum motu, impetuque sanguinis majore, qualis sub febrilibus paroxysmis conspicitur, plus efficitur in removendis obstructionibus & excutiendis humoribus stagnantibus, quam alia medicina præstantissima, sive sit sudorifera, sive aperiendi & evacuandi facultate celebris. Quod autem ii, qui quartana prius detenti fuerunt, non facile incidant in epilepsiam, ex eodem fonte fluit, quoniam quartana, legitime administrata liberat corpus, solvendo obstructions, ab iis causis, quæ epilepticum morbum inducere potentes sunt.

36. Præterea etiam leviolem apoplexiam febris discutit, quorsum spectat *aphor. V. l. V. Hippocr.* qui est: si quis ebrius repente obmutescat, convulsus moritur, nisi febris incidens eum corripiat. In ebrietate à copia vini præsertim generosi assumpta corpore minus perspirabili contingere potest, ut plus justo caput repleatur sanguine copioso, qui arterias & venas plexus choroidei nimium distendendo, spirituum meatus intercipit. Accedens autem motus sanguinis in febre celerior obstructa in cerebro vasa aperit, nec non materiam stagnantem in ejus poris, sive aquosa sive viscida sit potenter discutit.

37. Tandem etiam magnus noster Hippocrates febrem ceu peculiare remedium ad hypochondriorum vitium tollendum æstimat, dum *l. VI. aph. 40.* scribit. Quibus ad hypochondria dolor est sine inflammatione, sed

sed vel ab obstructione, vel à spiritu flatulento, vel ab intemperie inæquali frigida, iis febris superveniens dolorem solvit. Perpetuum hoc est apud *Hippocratem*, quod quicumque morbi ab obstructionibus & viscida amurca, nec non viscerum infarctu proveniunt, commode solvantur febre, quoniam motus in febre tam intestinus quam progressivus major attenuat, incidit & resolvit materiam immobilem eamque fixam & stagnantem ad evacuationem disponit ac præparat. Vidi sæpius in praxi, quod pathemata hysterica & spasmi in foeminis etiam vetulis post emanationem menses abdominis climata pervagantes suscitati ab ipsa natura febre efficaci calore & horrore stipata, fuerint sublatis. Et si rem paulo accuratius pensitamus, isti insultus spasmodici & febriles, qui hypochondriacis perquam familiares sunt, præsertim autumnali & hyemali tempore, egregie inserviunt, sordibus excrementitiis in massa sanguinis & humorum coacervatis per emunctoria à corporis sphaera eliminandis.

38. Quod autem febris salutare sit naturæ, quo se liberat & vindicat à præsentis periculo, commodum instrumentum, vel ex eo clarissime evincitur, quod magna colluvies in corporibus collecta feri puri, sive salibus excrementitiis biliosis acribus tincti, quæ non potest non esse magno oneri naturæ, commode motu naturæ valido febrili, in musculofo genere concitato, per convenientia & peculiaria emunctoria proscribi soleat, sicuti id manifesto videmus in febribus catarrhalibus, rheumaticis, arthriticis, nec non erysipellate, variolis, morbillis & purpura, ubi nunquam non febrilis quædam commotio & hanc subsequens critica & salutaris evacuatio subsequitur. Denique nihil magis contingit, quam quod sanguinis stagnationem vel extravasationem subsequatur febris, quæ dici solet inflammatoria, quam secundum nostram sententiam, non præmeditata & destinate ex quodam arbitrio libero anima suscitatur, ad humorem ibi stagnantem & corruptioni proximum submovendum, sed mechanicum potius & necessarium hunc esse effectum asserimus, dum ipsa materia peccans & quantitate & qualitate hostili irritante & premente, ad motionem exorbitantem principium illud, quod in membranis & musculis est, movens stimulat, qui motus postea auctus utitur præternaturalis egregie, modo recte à medico attemperetur, inservit discussioni & resolutioni sanguinis eccentrici. Posset hoc prænotabile argumentum, quod in totam praxin sese diffundit, fusiùs tractari, si permetteret id instituti ac temporis ratio. Hoc tamen ex dictis sufficienter perspicuum esse arbitror, recte dictum esse à nostro *Hippocrate* aliisque sapientissimis veteribus, naturam esse optimam morborum medicatricem, nempe per motum intensum & auctiorem, qui est febrilis. Patet quoque, quam verissime scripserit *Asclepiades*, notante *Celfo* in *C. IV. l. III. de diversis curationum generibus*, se ipsa febre præcipue uti in morbis ad remedium. Et idem hoc repetit *Sydenhamius*, dum in operibus suis febrim naturæ instrumentum, quod partes impuras à puris sæcernit, appellat.

39. Ex dicta hac doctrina sequentia perutilia profluunt in praxin medicam. (1) Cum febris tam utilem præstet corpori effectum, probe animadvertant medici, ne statim ipso in limine suppressere ac cohibere quærant insultus febriles, quod in continuis & acutis febribus, nempe variolis, morbillis, erysipellate, podagra, præsentissimum periculum, imo ipsam mortem inducere solet, in intermittentibus vero tales citius suppressæ febres, ipsa attestante experientia, in gravissimas viscerum obstructions, & inde resultantes lentas febres, hecticam, hydropem, nec non convulsivas spasmodicas affectiones cum maximo agrotantium damno desinunt. Tota nempe me-

dentis prudentia in eo mihi versari videtur, ut probe discat discernere motus naturæ febriles, qui bonum effectum præstare possint, & salutares ac critici habendi sunt ab iis, qui perniciales, symptomatice ac noxii sunt. Illos utique non immediate sistere, sed potius, si languent, promovere, si nimii sunt moderari debet. Nunquam autem plenarie sistere vel nimium etiam intendere eos debet, sed illa intentio ejus principalis & optima sit, ut, si potest, causam morbificam, quæ suscitatur hos calidos motus, aggrediatur eamque remove ac imminuere quærat. Imprudenter itaque illi faciunt, qui china chinæ, quæ divinum, si recte usurpetur, remedium est, item opiatis, neque minus vi styptica præditi abutuntur in intermittentium curatione. Peccant utique in eo medici, qui rem plane perniciosam febrem judicantes, cum tamen sit effectus bonæ causæ, eam mox suppressere laborant, nec melius agunt, quam illi qui evacuationem sanguinis per uterum vel hæmorrhoides mox adstringentibus cohibent, unde non nisi pessima sequi solent symptomata. Nunquam itaque medicus suppressere intendat febrim, sed tantum animum advertere debet ad causam profligandam, & quando hanc non potest commode tollere, moderanda est febris, quæ præparationi & expulsionem causæ morbificæ etiam dicata est.

40. Secundo: ex præfata doctrina sequitur, omnia remedia & alimenta, quæ nimium refrigerant, humores coagulant, viscositate, aciditate, nec non anodynâ virtute sanguinis motum retardant, non modo inutilia, sed potius noxia esse ad febres tollendas; potius eo respicere debet medicus in cura, ut humores fluxiles reddat, & circulum sanguinis per omnia evacuatoria promoveat: unde recte *HELMONTIUS l. de febribus c. IX.* diaphoretica sola esse febrium appropriata atque specifica remedia pronunciat. Neque alium in finem, vel venæ sectiones vel evacuationes aut alterationes varii generis in febrium curationibus conducunt, quam quod tantum liberam circulationem & transpirationem adjuvent. Quod si enim hoc verum est, quod plerumque febres ex transpiratione impedita & circulo sanguinis imminuto oriantur, necesse est, ut non nisi circulo & transpiratione adaucta restitui debeant. Patet quoque porro ex prædicta doctrina, quod medicamenta tunc temporis commodissime propinentur, quando natura ipsa est in motu. Ita enim facilius natura, arte adjuncta exoptatos præstat effectus. Insignis hanc in rem locus memorandus est ipsius *HELMONTII*, qui *l. de febr. c. IX.* sequentia habet: si ipso die accessus & hora opportuna propinantur remedia, sæpe unica vice multas febres tollunt. Est ista nempe opportunitas in spatio horulæ ante paroxysmum, quantum scilicet exigit actio medicaminis & stomacho vacuo. Nam si detur diebus quietis intermittentiū, vel dudum ab incepto paroxysmo, dum medicamen non præsentit naturam sibi auxiliantem, tam ad actuandum sive animandum, quam ad expellendam materiam occasionalem febris incassum propinatur. Imo tunc angit medicamen magis, quam juvat, quatenus naturam, dum quiescere mallet, ad proscriptionem stimulat.


41. Deinceps addiscimus ex deducta doctrina, malum esse signum, si gravis causa vel obstructio præsens est, lenta tamen seu levior febris adsit, sive si febrilis motus non respondeat causæ; unde recte dictum ab *HIPPOCR. Aph. IV. l. 40.* Nunquam bonum est, si modo caleseat modo frigescat corpus, hoc enim diurnitatem morbi indicat. Patet quoque ratio, quare in debilitatis corporibus & ubi motus ad extra non satis sunt liberi, nullæ genuinæ evacuationes, sed metastases & apostases difficilis laboris succedant. Obser-

Observamus & illud in praxi, quod istae febres longe peioris & malignioris naturae sint, quae non calore, pulsa, & siti se exerunt, quam si haec excessivo utur in gradu adsint; nec semel in praxi annotavimus, si lento gradu incedentibus febribus superveniat calida febris eum horrore, optimum esse recuperandae sanitatis signum.

42. Ex hisce jam allatis tandem concludimus cum ipso HIPPOCR. I. II. *Epidem. Prudentis medici esse, aliquando febres accendere.* Nam uti inquit I. XVII. *Epid.* Quicquid natura facit sponte, id medicus facit arte, suadet autem talis febris excitationem manifestum aphor. XXI. I. V. dum dicit: *in tetano ulceris experte, juvene bene habito, etate media, frigida quam copiosa profusio calorem nativum revocat, huiusmodi autem haec nempe tetanum calor solvit.* Confirmat hoc curationis genus I. III. *de morbis* his verbis: *Aquam frigidam plurimam superfundito, & post ea vestimenta tenuia, pura & calida super integito, ignem autem tunc non adhibeto, hoc auxilium & ad τήνην & ad ἐπιστόμην adhibeto.* Nempe aqua frigida quando superfunditur corpori juvenili in media aestate, poris & fibris constrictis rigor ac horror fit, & repellitur sanguis ad interiora sicque sollicitans cordis musculos excitat motus vehementiores, qui valde proficui sunt ad tollendas chronicorum morborum causas. Semper enim & necessario, uti loquitur HIPPOCRATES I. II. *de morbis Sect. V. p. 15.* post rigorem major vel minor febris supervenit. Notum ejusmodi curationis genus copiosius reprehendere. Illud saltem dicimus, quod longe tutius sit, medicamentis validioribus, quae motum injungunt sanguini & humoribus, causas morborum chronicorum removere. Et hinc luculentissime patet ratio, quare decens usus, decoctorum lignorum, thermarum acicularum, salivantium, sudoriferorum, diaphoreticorum, in chronicis & radicatis passionibus expurgan-

dis, tanta vi tantaque efficacia polleat.

43. Ceterum clarissimum est per experientiam, nec non plures hinc inde consignatae observationes practicae testantur, vehementi irae affectu, quandoque gravissimas & chronicas passiones fuisse sublatas; cujus rei ratio non aliunde accersenda est, quam quod in ira non secus ac in febre sanguis & humores cum quodam impetu moveantur, luculenter id ostendente pulsu vehementer celeri corporis incallescencia & respiratione citatiori. Meretur in hujus rei confirmationem adduci egregius locus ex VALERIOLA ex *obs. med. IV. lib. II.* qui ita scribit: memini, inquit, & fide sancta asserere possum, quartana affectum Jacobum Batum, virum probitate insignem, in vehementem iram meo consilio à suis accensum, curatum extemplo fuisse, cum nullis antea medicamentis cessisset morbus: & porro scribit: ego mirum quid vidi in consobрино meo Joh. Sobiratio & testari plena fide possum, hic cum Avenione convulsus plures annos constitisset, ita, ut contractis poplitibus ingredi non valeret, repentina ira eaque vehementi percitus, in famulum quem plagis cedere nitebatur, irruendo ita corpus exagitavit, ut confectum, dissentis cingulum nervis ac poplitibus emollitis, sine ullo doloris sensu, incedere & rectus stare posset, quum incurvo corpore annos plus minus sex constitisset: dein per omnem vitam sanus evasit, ut quem non operosa medentium manus, non accurata medicorum diligentia, non ulla medicamentorum genera curare potuerant, sola ira, naturam exagitans, perianavit, ut in hoc nostro cive Arelatensi, evenisse scimus, qui à resolutione alterius partis immedicabili, terroris ac irae potentia, animam vehementer moventibus, curatus miraculo fuit. Praeterea plenariam paralytici restitutionem ex sola incundia, PAULINI in *fascic. observ. ad Acad. Nat. Curios. Dec. II. A. VI. annexo.*



D E

SITU ERECTO IN MORBIS PERICULOSIS
VALDE NOXIO.

§. I.

Cum de testimoniis & observationibus medicorum hac de re colligendis sollicitus essem, vix unum deprehendere mihi licuit, qui paucissimis verbis annotaverit situs erecti in morbis periculosis noxiam. Videtur tamen eam jam attendisse Divus Senex Hippocrates, qui, sicut in colligendis & consignandis aliis ad veritates medico-practicas spectantibus circumstantiis diligentissimus fuit & accuratissimus, maximamque reliquit copiam rerum fusius indagandarum, ab ipso aphoristice tantum propositarum: ita etiam hac de materia egregium & notatu dignum, brevem licet, reliquit locum in *praenotionibus*: *Ceterum, inquit, erectum sedere velle malum est in acutis, pessimum autem in peripneumoniacis pulmone inflammato.* Quem locum ab auctoribus quibusdam, cum de signis morborum acutorum prognosticis funestis atque lethalibus agunt, allegatum quidem, nequaquam autem vel propriis observationibus confirmatum, vel solidis illustratum rationibus reperio. Ita videlicet SENNERTUS *Institut. Lib. III. Part. III. C. V. Frid. Hoffmanni Oper. Tom. VI.*

inter signa prognostica ab actionibus laesis desumenda recenset quoque signa à decubitu aegrorum, magis vel minus naturali ac consueto, depromi solita, eaque auctoritate Hippocratis prognostica confirmat, & cum illis citatum quoque locum allegat, sed citra ullam illius explicationem.

2. Ita etiam CELSUS *Lib. II. de medicina Cap. IV.* ubi de malis aegrotantium signis agit: *Gravis, inquit, morbi periculum est, ubi supinus aeger jacet porrectis manibus & cruribus: ubi residere vult in ipso acuti morbi impetu, praecipueque pulmonibus laborantibus.* Ex hisce vero locis id tantummodo patet, citatos quidem auctores Hippocratis auctoritatem, ex parte etiam propria forsan experientia edoctos, situm aegrotantium erectum in morbis acutis tanquam malum atque funestae prognoseos signum agnovisse, & quod pessimi eventus praesagium secum ferat; sed minus manifestum est, num situm erectum mali ejusmodi eventus pessimorumque symptomatum causam agnovissent. Id quod etiam suspicari licet de perspicacissimo ceteroquin BAGLIVO, qui ea, quae à modo citatis auctoribus generatim ad morbos acutos applicata fuerant, ad pleuritidem solam restringit, *Cap. de pleuritide*

dicens : *Si cum mala respiratione aeger erectus sedere velit in lecto, nec in lecto decumbere potest, quia sibi suffocari videtur : lethale id esse vidi in pluribus. Erectum igitur sedere velle in morbis acutis pulmonum, perniciosum ac ferme lethale.*

3. Cum igitur adducta loca medicorum ad prognosin formandam præcipue respiciant, neque sufficiant ad veritatem historicam asserti hujus stabiliendam, dum situm erectum in morbis periculosis, eorumque statu ac vigore valde perniciosum, pessimorumque symptomatum causam esse affirmo, atque hujus rei rationem investigare annitor; necessarium erit, ut ipsas observationes easque selectiores inferam, & fundamenti loco præmittam, ut postmodum rationes & causas repentinae catastrophes, sæpenumero occurrentis, rite possim enodare. Prima autem observatio virum sistit L., & quod excurrit annorum, superiore anno, quo febres petechiales multos in urbe infestabant, correptum eadem febre ex ipso contagio oborta. Placide & moderate succedebant omnia usque ad diem septimum; vires non adeo erant prostratae, mens semper constabat, neque deficiebat penitus somnus, neque urina erat sine sedimento, pulsuum vero aderat debilitas, cum celeritate quadam juncta. Circa septimum diem ipsæ maculae in corpore conspiciebantur, alvus per totum morbi decursum bis, vel semel minimum, singulis diebus aperiebatur: ad hanc itaque deponendam aeger surrexit è lecto, & paulo diutius versatus est in sella perforata, bene tamen munitus tegumentis. Conquestus hinc fuit de animi defectione atque debilitate virium; hinc depositus fuit in lectum; extrema, manus nempe & pedes, refrigerabant, & inhorrescebat quoque cutis. Ab hoc tempore pessime se habuit: maculae enim vix conspiciebantur, & erant lividiores. Secuta est prostratio virium, de spirandi angustia conquerebatur & de pressione circa pectus; vix capiebat somnum, & deliria ac male cohaerentia interdum sermoni intermiscebat; pulsus etiam valde parvus & contractus deprehendebatur, & omnia erant mutata in pejus, nonoque die è vita decessit.

4. Altera historia idem confirmans juvenem sistit viginti & aliquot annorum, constitutionis obesioris & spongiosioris corporis, variolarum morbo laborantem, qui morbus cum gravi dolore dorsi & capitis, ac quodam delirio, secundo statim die superveniente invadebat. Circa diem quartum, cessantibus omnibus his symptomatibus, variolae prodibant copiosissimae, quae nullo periculoso symptomate stipatae erant usque ad nonum diem, nisi quod de summo incendio & dolore manuum fuerit conquestus, ubi ingens conspiciebatur pustularum suppuratio. Ob dolorem itaque, ardorem atque anxietatem petiit ab adstantibus, ut vellent ipsum dimittere è lecto, ac prope lectum ad dimidium horae sedebat in sella probe tectus, ut ne minimum aëris frigidi accessum percipere potuerit. Postea vero simul & semel ob debilitatem & virium defectionem petiit, ut in lectum rursus descenderet, à quo tempore facies, quae antea erat valde turgida & rubicunda, coepit detumescere, salivæ fluxus etiam, qui antea copiosus erat, imminui. Nox subsequens plane erat insomnis, respirationis erat magna angustia atque difficultas, pulsus plane erat mutatus, debilis & inæqualis: sæpe stimulabatur ad urinam edendam, sed parum secedebat; loquebatur male cohaerentia, & ex improvviso correptus convulsionibus moriebatur.

5. Tertius casus fere idem nos docebit occasione studiosi è generosa familia nati, annorum vix viginti. Hic absque gravioribus symptomatibus variolas experiebatur; siquidem statim tempore circa quartum diem erumpebant pustulae, quae ad suppurationem placi-

de quoque perveniebant. Noctes non erant plane insomnes; erat vero tenerioris constitutionis, & de debilitate & lassitudine conquerebatur per totum morbi decursum. Pulsus erat languidus cum aliquali frequentia junctus, alvus paulo magis adstricta: die octavo inflammationem quandam, sed leviolem in faucibus passus est. Medicus ad aperiendam alvum, quae jam per sex dies clausa erat, praescripsit clysterem emollientem, salino stimulo, non adeo tamen forti, armatum, à quo infuso dejectiones habuit; sed cum tertia vice paulo diutius extra lectum versaretur in alvo dejienda occupatus, tota ejus facies erat livida, & conquerebatur de animi & virium collapsu subito, & vomendi quasi conatu mox deducebatur in lectum, & pedes, qui paululum erant refrigerati, calidis integumentis operiti fuerunt; non ita multo post praeter omnium opinionem graves accedebant convulsionem, quibus intra decem horas, postquam surrexit è lecto, periit.

6. Neque minus mihi adhuc alii, quos & ipse expertus sum & plures practici mecum communicarunt, noti sunt casus, quibus situm erectum in aëgris, purpura rubra laborantibus, non minus funestum deprehendi. Inter quos quam maxime notabilis est ille, quem novi de puerpera de cetero robusta & optimae constitutionis, annorum XXX. cui primiparae lochia placide & sufficienter quidem fluebant, sed febris superveniebat continua, exacerbationes tempore vespertino & per noctem servans, cum anxietate praecordiorum, sudore satis copioso, atque urinae pariori excretionem. Succedebat post aliquot dies purpura rubra, quae, exhibitis licet diaphoreticis privativis ac lenioribus, sed adhibito ab adstantibus praepostero regimine nimis calido ac positive diaphoretico, copiosissime efflorescebat, ita ut totum corpus instar crustae obsideret, omnesque extremitates occuparet. Aëgra de cetero notabilem virium defectum non patiebatur, nec delira erat, quamvis à somno expergiscens aliquando non adeo prompte sui conscia esset. Medicus die à puerperio undecimo mane illam visitans, reperiebat erecte sedentem in lecto, & quidem dorso justo minus lectulis oblecto, nec tamen plane illis destituto. Sermonem faciebat aëgra cum medico, & distincte praegressae noctis symptomata referebat, ac insuper maritum praemore aëgotantem ipsius curae commendabat. Purpura ubique locorum non modo erat conspicua, sed etiam in pectore ruberrima, ut nihil circa ejus efflorescentiam desiderari posset; pulsus erat frequens, plenus & satis aequalis; urina sedimentum monstrabat pallide roseum, nec adeo paucum. Cum autem per dimidiam circiter horam in hoc situ permanisset, praeter omnium adstantium opinionem in momento delirare incipiebat, & mox lipothymica evadebat; quapropter medicum, qui vix ad aedes suas reversus erat, revocarunt; hic rediens mox adspiciebat purpuram, eamque per universum corpus rubram, nec ullo modo recedentem animadvertibat, excepta regione praecordiali, in qua ad volae manus majoris magnitudinem omnem ruborem amiserat & alba apparuerat, oculi caligine erant obducti, & intra horae quadrantem aëgra exspiravit. Id quod repetitis vicibus observare licuit in aëgris purpura correptis, & quidem semper cum notabili illo phaenomeno, ut, purpura in toto corpore manente rubra, portio ejus in scrobiculo cordis & regione praecordiali albesceret, mortemque subitanam comitem haberet.

7. Primus vero omnium hanc maximi momenti in praxi medica observationem annotavi, ejusque mentionem feci in *dissertatione* Anno 1699. habita, quae *historiam febris malignae epidemicae petechialis Hale grassantis* sistit, §. XI. hisce verbis: *Observatum*
sæpius

sapius à nobis fuit, non modo in hac grassante febre, sed etiam in aliis malignis, quod, si ægrotantes diutius in erecto corpus teneant situ, sive surgendo sive in lecto sedendo, morbi vehementia mirifice mox adaugeatur & increseat, ut etiam mors interdum brevi fuerit subsequuta. Sentiunt ægrotantes à tali situ ingentem mox debilitatem, animi deliquium, extremorum frigus, anxietates circa præcordia; quin imo maculæ in cute, quæ erant conspicuæ, mox sese abscondunt, cum maximo, quod sequitur periculo. Verum enim vero non tantum in morbis acutis & periculi plenis, sed & in chronicis quibusdam exitium minantibus valde perniciosus observatur situs corporis erectus, atque capitis maxime diuturnior in linea recta elevatio. Plura observavi hydrope consummato vel phthisi cum febre hæctica ægrotantium & valde debilitatorum exempla, qui, cum paulo diutius extra lectum in sella capite erecto se detinuissent, non modo summam & extremam mox experti sunt debilitatem, animique defectionem, sed & interdum non ita multo post placide exspirarunt. Sed hæc sufficiant pro veritate hujus rei historica declaranda, cum ex adductis casibus & observationibus satis clare appareat, quam noxium & infestum sit in morbis acutis, æque ac in longioribus ac diuturnis passionibus; præsertim ægrotantibus vi morbi valde debilitatis, in situ erecto corpus diutius tenere, adeo, ut, quod valde mirandum, ipsa mors sæpius subsequatur. Ordo jam postulat, ut pro confirmanda phænomeni hujus veritate etiam veras, genuinas atque solidas rationes & causas adducamus, ex quibus clare & evidenter appareat, erectum corporis situm tantam posse habere vim atque potentiam, ut tam funestos dictis in morbis, & sub commemoratis circumstantiis, corpori effectus possit inferre.

8. Cum vero omnes veritates in rebus medicis theoreticæ è sanguinis circulo, qui universæ medicinæ rationalis principium est ac fundamentum, deduci atque derivari debeant; videbimus, num etiam inde hujus peculiaris & plane mirabilis phænomeni causas veras & adæquatas deducere possimus. Primo itaque morborum acutorum natura explicanda erit, ut qualem mutationem in vigore suo sanguini, qui vitæ ac virium vera & materialis causa est, inferant, appareat; deinde quoque adjiciendum erit, qua ratione corporis & capitis situs erectus viribus debilitandis, imo circulo sanguinis libero & æquabili turbando & destruendo, atque funestis symptomatibus arcessendis, quadret atque accommodatus sit.

9. Per morbos acutos; in quibus minus convenit diutius erecte sedere vel è lecto surgere; intelligimus eos, quorum natura & essentia in motibus tam solidarum quam fluidarum partium inordinatis & valde auctis continetur; quorum in numero maximè sunt febres, & quidem eæ, quæ omni intermissione vacant; ubi continua; per totum tempus morbi, adest motuum acceleratio & vehementia tam eorum, qui in corde & arteriis, quam qui in ipso sanguine & humoribus fortiter motu progressivo & intestino agitantur, conspiciuntur. Quam infesta vero vitæ sit hæc motuum inordinatio & quantam vim habeat, omnes functiones, quæ secundum naturam fiunt, invertendi & destruendi, id non modo experientia fere quotidiana, sed & ratio satis evidenter declarat. Quid enim solennius est, & frequentius in praxi observatur, quam quod, qui febribus acutis, sive maligni sive benigni moris sint, paulo diutius detinentur, præsertim si illæ ad *animum* vel vigorem devenerint, in summam prolabantur virium debilitatem, ut omnes corporis functiones valde labefactatæ appareant: tum neque sensibus internis neque externis mens recte fruitur, quod male cohærentes sermones ex phantasia corrupta indicant. Adhuc præterea continuæ vigiliæ, cum cor-

poris inquietudine summaque anxietate junctæ, appetitus constans est prostratio, corpus valde circiatum & consumtum videtur, omnis generis excretiones non recte se habent, urina mutata est, os plane aridum & exsiccum siti continua premitur, alvus constipata, vires penitus vacillant, pulsus arteriarum sunt minores, debiles, inæquales & accelerati.

10. Horum graviorum symptomatum in hisce febribus non alia reddi potest ratio, quam motuum, qui in partibus solidis ac fluidis celebrantur, nimis adaugeta vehementia, qua humores, qui vitam & vires tuentur, & functionibus secundum naturam præstant, plane in crasi, mixtione & textura sua immutantur, corrumpuntur & destruuntur. Quandoquidem hæc sufficienter in physiologicis adstructa & demonstrata veritas hic quoque adduci & applicari meretur, quod nempe, si massa sanguinis & humorum debita ratione quantitatis & temperaturæ, proportionem gaudeat; & æquabili, libero ac moderato partium solidarum, præsertim cordis & arteriarum pulsu, atque impulsu, per compagem corporis partium mere tubulosam & vasculosam circumferatur, tunc non modo vita & vires sibi constant; sed & omnes functiones rite sese habeant. Nam vires, vitæ & sanitatis natura motuum atque sanguinis & humorum temperie unice continentur & conservantur: siquidem, quæ temperata sunt, omnia vitam & vires tueri, certa & constanti observatione comperimus. Catholicum aeris mobilissimum fluidum, sine quo nullum subsistere potest animal, nec nimis frigidum; nec nimis calidum aut humidum, sed purum & temperatum, vitæ ac viribus maxime favet & patrocinator. Omnia, ex solidis & liquidis quæ assumuntur, quo magis ad blandam & amicam accedunt temperaturam, eo aptiora sunt magisque convenientia ad corporis nutritionem, ad sustentandas vires, omnesque animi & corporis functiones perficiendas; cum è contrario omnia, quæ intemperata sunt, ut nimis spiritiosa, calida, acida, pingua; acrida, falsa, viscida & tenacia, sanitatem & vires admodum lædant & ad morbos disponant. Insuper; quam benigna & amica naturæ corporis animantium sit iusta & laudabilis sanguinis & humorum temperies, vel ex eo clare apparere arbitror, quod benignissima parens natura, ineffabili illa & sapientissima machinæ animantium structura tot organa secretoria & emunctoria, & inter ea plurima & amplissimi usus viscera constituerit; quorum officii ratio vix ulla alia est, quam ut primo intimæ variarum tam solidarum, quam fluidarum, quæ sanguinem constituunt, partium mixtioni & fluiditati inserviant; deinde ut partes intemperatas ac superfluas nominatim salvas, acres, sulphureas, viscidas, aqueas, separent ac secernant, easque tanquam plane inutiles & noxias è corpore ejiciant atque proscribant, ut intemerata sanguinis & humorum massa permaneat.

11. Jam vero explicanda erit ratio, cur sanguinis iusta temperies & quantitas ad sustinendam vitam corporisque integritatem tantam energiam obtineat. Notum alias est, vitæ & sanitatis naturam libero & æquabili sanguinis & humorum processu, & per vasorum systema circulatione contineri, eo quod hoc præfente omnes & singulæ in corpore nostro, quæ fiunt, functiones recte & secundum ordinem sese habeant. At verò solidorum motus, qui fluida regunt & moderantur, non aliam originem atque causam agnoscunt, quam ipsa fluida, sanguinem nempe atque in eo contentam subtilissimam & nobilissimam; aereo-ætheream substantiam. Equidem illi, qui nec corporum nec motuum naturam ac vires intelligunt; aut spirituum à corpore discernere norunt, neque, quales potentie motrices & mechanicæ insit diversæ corporum structuræ, experimentis satis edocti sunt, nihil

corporeum in movendis solidis animantium partibus admittere volunt, sed potius ad plane ignota, & quæ nec definiri nec explicari possunt nomina, quæ pro veris motuum causis venditant, confugiunt, uti sunt innatum calidum, archeus, natura, sensus naturæ, vel natura sensu & ratione prædita, quæ percipiens eorum, quæ amica vel hostilia corpori sunt, pro horum æstimatione varie in conservationem corporis motus dirigat. Verum enim vero non negamus rem clarissimam, ad certas nempe perceptiones & cogitationes certos & determinatos quoque in quibusdam partibus nasci motus. Ecquis vero facultatis ratiocinandi gnarus inde concludere audebit, ergo perceptiones sunt causa efficiens horum motuum; ergo omnes motus, qui etiam præter voluntatem fiunt, à perceptionibus istis & operationibus animæ dependent: & porro, ergo omnes isti motus à nulla alia causa, quam ab hac dicta proficiuntur. Cui enim nisi hosti in physicis & medicis ignotum erit, operationes, quæ animæ tribuuntur, nempe perceptiones, inclinationes varias, ingenii quoque vigorem & vires, & sic dictos animi affectus, à sanguinis & humorum temperie, à circulo & motu libero maxima ex parte dependere. Deinde quotidiana constat experientia, ad aëris, ad alimentorum mutationem, & pro diversis rebus noxiis & alienis, imo venenatis, vel etiam salutariis, motus tam solidorum quam fluidorum pro lubitu accelerari, retardari, immutari, & actiones partium corporis labefactari posse. Itaque non opus est, ut causas manifestas sensui & rationi obvias relinquendo ad entia plane ignota, & quorum natura & actio in corpus nostrum ne ullo quidem solido argumento demonstrari potest, in allegandis motuum vitalium causis confugiamus. Nostra sententia hæc est: cor partium moventium in corpore animantium princeps, tubuli arteriosi, & omnes canales, qui fluida vehunt, structura mechanico-geometrica gaudent, quæ in motum constrictionis & dilatationis, sive systoles & diastoles ab ipso sanguine in vasis contento, & à fluido ejus tenuissimo, quod in cerebro secretum per nervos & nervosas membranas vehitur, animatur, & vigorem recipit. Etenim fluidorum ea est natura, ut eorum partes intestino semper gaudeant motu, adeo, ut quo tenuiora sint, eo majori virtute & potentia movendi, resistendi & expandendi instructa sint, ut videmus in aëre, æthere & igne. Fluida itaque corporis nostri agunt in solidas partes, easque peculiari modo ad motum constructas movent, & solida motu agitata agunt rursus in fluida, eaque impellunt & propellunt, & hac actione mutua solidorum in fluida, & fluidorum in solida, circulus sanguinis & humorum vitalis absolvitur. Causa enim motuum, qui celebrantur in corpore humano, vitalium, ipse sanguis est, mobilissima & subtilissima aëreo-æthereo elastica substantia refertus, quæ una cum subtilissima & purissima lymphæ, in cerebri vasculoso cortice secreta, per tubulos medullares, & nervorum meatus ac poros, in membranas non modo nerveas, sed & musculosas influit, inque iis sensationis ac motus systaltici omnisque toni ac roboris, quo partes instructæ sunt, causa & auctor existit. Neque enim ulla pars corporis nostri est, si sensu gaudet, si motu ac robore pollet, quæ non influxu sanguinis arteriosi & fluidi nervei opus habeat, atque adeo vasis sanguineis & nerveis membranis instructa sit; quorum tam necessarius est usus, ut ligato nervo vel arteria partes cujusdam, protinus ejus sensus, motus quoque & nutritio, auferatur. Motus cordis, qui præcipua & princeps circulationis sanguinis ipsiusque vitæ causa est, identidem non modo ab affluxu sanguinis copiosi, sed ab influxu fluidi, quod nervi vehunt, dependet. Quare si vel fluidum subtilissimum in cerebro

deficit; vel per animi affectus ejus motus turbatur & invertitur, aut nervi ad cor tendentes in animantibus præscinduntur; statim machina illa cordis impulsoria quiescit, omnique motu destituitur, & corpus vita privatur.

12. Ad motum itaque cordis, arteriarum, omniumque partium activum & systalticum, quo sanguinis & humorum progressio & circuitus perficitur, necessario liquidi cujusdam, ex cerebri & nervis provenientis, purissimi & mobilissimi sufficientem influxum desiderari, rem extra omnem dubitationem positam esse existimo: unde si vel liquidum hoc inquinatum, vel impurum est, vel insufficiens, aut plane deficit, non mirum est & cordis motum cessare, & ab eo dependentem vitam quoque tolli. Hisce suppositis, ad clariorem observationum, quas supra adduximus, explicationem jam paulo facilius & felicius pervenire licet. Propositum nempe est in ipsis observationibus practicis, in morbis periculosis & maxime acutis, uti sunt febres continuæ, præsertim exanthematicæ, inque earum statu, situm corporis erectum periculi plenissimum esse, adeo, ut etiam inopinatam mortem accersere possit. Si itaque rationem hujus peculiaris eventus inquirere paulo accuratius velimus, primo omnium necesse est, ut quid febrium acutarum natura & quid erectus situs in earum vigore ad tantum vitæ periculum conferre possit investigemus.

13. Jam vero perquam notum esse omnibus, qui febrilis caloris indolem atque effectum penitus perspectum habent, arbitror: nihil magis benignam & blandam sanguinis humorumque vitalium temperiem ac mixtionem destruere; invertere, & dulces ac insipidos fluores in salios, sulphureos, nimis calidos, excrementitios humores convertere posse, ut plane inepti fiant ad omnes motus & functiones in corpore præstandas, quam nimium & præcalidum in febre particularum sanguinis motum intestinum. Accedit, quod sub nimio & præcalido æstu ciborum appetentia penitus prostrata sit, & nulli boni & laudabiles, nutritioni & vitalibus motibus præstandis idonei, succi in eorum locum, qui sub febrili ardore deperditi fuerunt, substitui possint. Denique neque illud prætermittendum est, acutas illas, easque exanthematicas atque malignas febres à materia sæpius valde virulenta, & quæ putridæ, fermentescibilis indolis est, excitari, à qua longe facilius succorum vitalium naturalis & naturæ amica *σφοδρὴ* atque crasis destruitur. Jam vero inversa & destructa sanguinis boni, qui utique & motuum vitalium thesaurus & fundamentum est, in morbis acutis textura, non mirum est, vires motrices vacillare ac deficere, cordis & arteriarum motum languidiorem fieri, circulumque sanguinis sequirem, & robur cordis omniumque partium deficere, quod maxime in statu & vigore harum febrium conspicitur, sub quo etiam ob virium motricium defectum, & propter stasim & stagnationem sanguinis in partibus principalioribus, cerebro, pulmonibus, ventriculo, & subsequenter inflammationem sphacelofam ordinariæ ægrotantes moriuntur: utpote in principio febris, ubi non tam diu æstus massam sanguinis deturbavit, non tanta virium defectio, quam in statu, in quo jam per septem dies & ultra vehementia febris continuavit, observatur. Videmus itaque in vigore febrium massam sanguinis, ex qua fluidum nerveum, & omne illud, quod partes musculosas in motum excitat & animat, materiam & ortum suum trahit, plane corruptam, & depravatam esse, ut non mirum sit, vires, motus, & omnes actiones, quæ vitam sustinent, multum periclitari, motumque etiam cordis, à quo sanguis pellitur ad caput, valde imbecillum fieri.

14. Ex hisce itaque, quæ à nobis jam dicta & adducta sunt, facile liquet, perpendicularem corporis situm in eo statu, ubi cordis motus valde exiguus & contractus est, admodum perniciosum & periculi plenum esse, eo quod semper & perpetuo sub tali corporis positura ascensus corporis gravis ad perpendiculum difficilis sit, multo vero magis, ubi vis impellens & movens cordis impar est sanguini ad caput & cerebrum protrudendo. Igitur exinde jam liquido constat, si cerebrum sanguine destituitur, ex quo prodit fluidum illud, viribus motricibus ad solidas corporis humani partes regendas & movendas instructum; si porro etiam ipse sanguis in acutis iisque malignis febribus plane corruptus & depravatus est, cessare penitus fluidi nervei, quod quasi, secundum Verulamium, rota suprema est, quæ omnes corporis nostri partes circumagit, secretionem, & inde animi defectionem atque syncopen fieri, vel minimum circulationem sanguinis longe debiliorem reddi; transpirationem quoque & excretionem inde imminui. Quam exitiosa vero in acutis febribus sit inertia motuum vitalium, & debiliior sanguinis circuitus, vel plane ejus interceptio, exinde judicare licet, quia motus sanguinis ad cutem, quæ præcipuum corporis emundatorium est, & quo sordes in febribus excrementitiæ ejici & morbus solvi solet, inde turbatur, & valde imminuitur; unde videmus post situm corporis erectum paulo longiorem in febribus externum habitum corporis pallefcere, constringi, collabi, refrigerare quoque, cutisque poros ac meatus occludi, quod cum ita contingat, non modo excretio noxiæ materiæ, quæ per cutis peripheriam fieri adhuc debebat, impeditur, & materia è corpore eliminanda intra illud detinetur, sed & quæ jam factæ erant, invertuntur. Hinc enim fit, ut petechiales maculæ vel plane dispareant ac retrocedant, vel livescant & colorem coeruleum contrahant. In purpura, quæ rubra erat, totus ille ambitus rubicundus simul & semel pallefcit, purpura ipsa albescit, aut sub constrictione cutis paulo fortiore repente evanescit; morbilli cito disparent cum totius ambitus externi corporis pallore ac refrigeratione, variolis idem evenit, dum pustularum ambitus, alias rubicundus & floridus, pallefcit, aut livescit, pustularum incrementum suffaminatur, earumque suppuratio impeditur, aut materia suppurata retropellitur, ut pustularum superficies vel concidat foveasque formet vel indurescat, corneamque duritiem repræsentet.

15. Sordes itaque excrementitiæ è corpore ejicientæ, sed hoc modo retropullæ, humoribus iterum permiscetur, atque non modo motum intestinum corruptorium ac dissolutorium illis inducendo mixtionis dissolutionem funestam minantur, sed etiam cum humoribus ad partes interiores nobilissimas, præcipue nervosas, delata, hic loci motus spasmodicos producit, qui promptissime in spasmos universales ac convulsionem degenerant, sub quibus ejusmodi ægrotantes ordinarie & ut plurimum moriuntur. Hæc itaque cum ita se habeant, luculenter satis inde patere arbitror, quare tam noxius deprehendatur situs corporis erectus, in morbis periculi plenis, & præcipue in febribus exanthematicis; & quam necessarium consequenter sit medico practico, ut hanc quoque notatu dignissimam observationem in praxi probe attendat, damnaque, quæ ex hacce corporis positura in ejusmodi ægrotantes redundare possunt, tempestivo consilio avertere studeat. Dissuadendus igitur omnino est situs corporis erectus, atque sedulo monendi ægrotantes, qui vel ejusmodi morbo acuto, prout sunt febres continuæ, præsertim exanthematicæ, laborant, vel etiam quorum vires ex diuturniori quodam & chronico affectu, uti sunt phthisis & hæctica, valde jam debilitatæ & prostratæ apparent, ne in horum affectuum statu & vigore lectum atque decubitus in eo deserant, ac vel in lecto vel in sella quadam erecti per aliquod tempus sedere, inque hoc situ diutius commorari cupiant: caveat sibi quoque medicus, ne hoc tempore clysteribus, præsertim stimulo salino fortiori munitis, multo minus aliis purgantibus fortioribus, alvum nimis sollicitet, atque hinc crebrioribus dejectionibus ægro occasionem præbeat, è lecto surgendi, ac in erecto situ diutius permanendi, multo potius, si alvus jam per se, absque ulla stimulatione, fluida existat, eam sub decubitu deponendam suadeat. Denique si forte aliquando ex improvviso in ejusmodi morborum statu ægrotum in situ erecto deprehendat, consultum erit, analeptis aut confortantibus eidem succurrere, viribusque valde labefactatis ac debilitatis aliquatenus reficiendis ac restaurandis operam dare, ut adeo ex omni parte dicta funesta symptomata, quæ diuturniorem in situ erecto commorationem consequi solent, quantum fieri potest, præcaveantur & avertantur, ægrorumque saluti & sanitati restituendæ omni modo prospiciatur.



D E

CRISIUM NATURA EJUSQUE EXPLICATIONE

R A T I O N A L I.

§. I.

Primus, & qui omnium optimè, scitu non minus utilia quam necessaria de crifibus & diebus criticis eorumque effectu in febribus prodidit, ipse est *Hippocrates*, quem plures postea & inter hos *Galenus* ejusque affectu secuti quidem sunt, tantum autem abest, ut hanc doctrinam longe utilissimam experimentis ac observationibus auxerint, ut potius in nonnullis eam pervertendo deturpaverint. Placet itaque ipsum fontem, à quo utilia hæc in artem medicam promanarunt, *Hippocratem* nimirum adire, & scientiam de crifibus inde haurire, eamque & experientia & ratiociniis stabilire, ut dein facillimum sit, superflua nec non defectus ac erroneos conceptus, circa hanc materiam occurrentes,

Frid. Hoffmanni Oper. Tom. VI.

clarius intueri. Primum vero perquam dignum est observatione, vocabulum crileos *Πρόσημον* esse & varie tam à veteribus quam recentioribus accipi. Alii enim sapissime pro ipsa noxiarum in corpore excretionem ut *Hippocrates* sumunt, qui *lib. de arte* corrupti ossis excretionem crisin appellat. Alii ut *GALENUS Comment. in aph. 13. sect. XI.* crisin pro secretionem humorum noxiarum facta in febre accipiunt; *Hesychio* enim & *Suida* notante auctore *LANGIO lib. 1. epist. 37.* το κρίνειν sequestrare & veluti per cribrum aliquid excernere denotat. Alii denique non raro pro ipso motu critico & maxima actionum in corpore perturbatione, sive, ut loqui amant, certamine naturæ cum morbo sumunt, ubi terminus à quo status morbi, terminus ad quem salus & mors est,

GALENUS *feñt. 2. aph. 13.* crifin vocat , fubitam ac repentinam in febre mutationem ad falutem vel mortem , five in melius vel deterius. Vulgus vero medicorum fæpè numero crifin cum die vel tempore critico confundit.

2. Quoniam vero HIPPOCRATES primus eft , qui de diebus criticis & crifibus facit mentionem , non inconſultum erit , hic allegare , quo fenſu ipſe hoc vocabulo fuerit uſus. Teſtantur autem ejus præclara monumenta , crifeos vocabulum ab hoc communiter fuiſſe acceptum , de judicio nimirum , quod format & formare debet ex morbi circumſtantiis & ſubjecti natura , de morbi eventu five fauſto five infauſto , unde crifis bona vel mala , fida vel infida exſurgit. Et *lib. de adfection. §. 8.* ita ſcribit : *judicare in morbis eſt , cum morbi augeſcunt aut minuuntur , aut in alium morbum tranſeunt aut deſinunt.* Dehinc familiariffime hac voce denotat morbi ſolutionem , hinc clare de *præcept. ſect. 12. tom. III.* ait : *κρίσις ἐστὶν ἀπόλυσις νόσου* , crifis eſt morbi exſolutio. Paſſim quoque in ſcriptis *Hippocraticis* hæ formulæ lectori occurrunt ; hic morbus vel hic æger die ſeptimo vel decimo quarto perfecte judicatus eſt , i. e. morbus ſolutus & æger convaluit.

3. Ut autem verum & evidentem de crifi morborum acutorum conceptum nobis formare queamus ; res ipſa poſcere videtur , ut omnia crifeos requiſita recenſeamus. Primo itaque tantum locum habet , & dicitur de morbis acutis & ſpeciatim febribus continuis : *λύσις* enim chronicis magis adfectionibus competit. Dein crifis certis tantum morbi diebus inſtituenda eſt , inter quos ſolennes ſunt à morbi initio ſeptimi , & ſemi-ſeptimi , reliqui dies parum vel nihil ad crifin faciunt. Denique hiſce diebus de tranſitu morbi ad ſalutem mortem vel alium morbum medicus judicat. Tandem crifin decretoriis diebus ex certis ſignis medicus inſtituit , inter quæ non modo urina & excretiones , ſed & ipſe pulſus & vires ægri attendi debent. Et hæc ſunt , quæ , mea ſententia , legitimum de crifi medica in morbis acutis abſolvunt conceptum ; quidve prudens antiquitas per eam intellectam velit , designant. Quanta itaque hæc elegantiffima doctrina in praxi ſe commendat , facile colligere licet : quid enim præſtantius ? quam quod , natura providentiſſima ſic dirigente , ſtati ac certi dies à medico obſervandi ſint , in quibus præcipue ad id , quod præſens , præteritum , quodve futurum eſt , reſpiciendum , & ex hiſ de morbo judicium eſt inſtituendum.

4. Primum vero ex HIPPOCRATIS , quæ nobis reliquit , ſcriptis perſpicua loca adducemus , quæ clare demonſtrabunt , quibus diebus crifeſ fiant in febribus. Primus eſto , qui exſtat *de diebus judicatoriis §. 9.* *judicantur* , inquit , *febres quarto die , ſeptimo , undecimo , decimo quarto , decimo ſeptimo & vigefimo primo ; ex hiſ autem acutis quædam etiam trigeſima , deinde quadrageſima , poſtea ſexageſima.* In *lib. aphoriſm. ſect. II. aph. 23. & 24.* hæc habet : *acuti morbi in quatuordecim diebus judicantur , ſeptimæ quarta judex eſt , alterius hebdomadæ octava principium eſt ; conſideranda vero undecima eſt ; hæc enim quarta eſt ſecundæ hebdomadæ.* Conſideranda rurfus decima ſeptima ; ipſa enim eſt quarta quidem à decima quarta , ſeptima vero ab undecima. Idem auctor *lib. de prænot. §. 20.* hæc notabilia proferit : *placidiffimæ febres & ſignis ſecuriſſimis nitentes , quarto die deſinunt aut prius. Maligniſſimæ vero & ſignis horrendiſſimis oborientes , quarto die aut prius recidunt.* Primus igitur ipſarum inſultus ſic deſinit ; ſecundus autem ad ſeptimum producit , ſextus ad vigefimum. In *lib. III. de præſag. 7. & 8.* morbos advertere à prima die oportet , atque ſingulos dierum quaterniones obſervare ; ſic enim haud obſcure ſcies , quo ſe converſurus ſit morbus. Febres ar-

dentis epidemicæ judicabantur bono ordine in ſeptem ac decem diebus ; it. *lib. de ſepteſtmi partu §. 6.* hæc proferit : *dies maxime inſignes in pluribus ſunt primi & ſeptimi multum potentes in morbis , & multum in fætibus ; nam plurimi abortus in hiſ diebus ſunt ; & §. 8.* hæc habet : *medicum , qui ægrotorum ſalutem recte conjectare velit , animadvertere quidem oportet & contemplari omnes dies ; ex paribus vero decimum quartum , vigefimum octavum & quadrageſimum ſecundum , hic enim terminus ponitur. Contemplari autem oportet per ternarios ac quaternarios.*

5. HIPPOCRATIS igitur ſententia eſt , ut ex ſuperioribus adductis clarum ſit , acutas & continuas febres ſolvi & terminari debere ſeptenis diebus , ſi horum morborum ſalutaris ſit ſolutio. Ea vero ſolutio per evacuationes aut per ſudorem , aut per urinam , alvum , ſanguinem , ſputum ſit , ſufficientes , & quidem criticis dictis diebus , hinc etiam critica vocari ſolent ; excretiones hæ , ſi aliis diebus contingunt , minus ſalutares habentur , ſed ſymptomaticæ eſſe ſolent. Egregia ſunt , quæ circa hanc rem in medium adfert HIPPOCRATES *§. 37. ſect. IV.* *ſudores febricitanti ſi inceperint boni ſunt tertia die & quinta & ſeptima & nona & undecima & decima quarta & decima ſeptima & vigefima prima , & vigefima ſeptima & trigeſima prima & trigeſima quarta ; hi enim ſudores morbos judicant : qui vero non ſic ſunt , dolorem ſignificant longitudinem morbi & recidivas.* Conſentientem hac in re habet GALENUM , qui *de diebus judicat. qui ſudores manant diebus indicantibus non criticis , laborem ſignificant & diuturnitatem morbi , nam judicatoria non judicantia aut ſunt funeſta aut certe ſiniſtri judicii.* Idem in eodem libro ſcribit : *in duodecimo & decimo ſexto die nullum judicatum vidit , in ſexto judicantur ægri cum difficilibus ſymptomatibus & periculo non mediocri imperſecte & obſcure i. e. excretiones tum temporis ſunt periculofæ.* Illum vero HIPPOCRATES ſudorem maxime judicat ſalutarem , qui febrem in diebus judicatoriis ſolvit , uti ſcribit *lib. de Coac. §. 4.* & eum malum , qui cum febre in acuto morbo conſiſtit. Quo cum etiam conſentit *aphoriſm. 65. ſect. VI.* *febricitanti ſudor oboriens febre non remittente malum ; moram enim trahit morbus , & multam humiditatem ſignificat.*

6. Salutarem vero futuram crifin & morbi ſolutionem critico die ſecundum HIPPOCRATEM designant , urinæ probe coctæ i. e. quæ tenues nec albæ nec copioſæ fluunt , ſed ſaturatæ ſunt , conſiſtentiam habent & ſedimentum deponunt. Notabilis hac de re locus in HIPPOC. *lib. I. epid. ſect. II. §. 56.* exſtat : *cruda & incocta* , inquit , *& in malos abſceſſus converſa in febribus aut judicationis ſublationem , aut dolores , aut diuturnitatem , aut mortem , aut eorundem recidivas ſignificant.* It. *ſect. IV. aph. 71.* quibus ſeptima die morbi judicantur , hiſ nebulam habet urina , quarta die rubram & alia ſecundum rationem : it. *aphor. 72.* quibus urinæ pellucidæ , albæ , malæ , maxime autem in phreniticis apparent. De ſignis bonæ crifeos ex urina memorabilia enim notavit in *Coac. §. 5.* in principio urina in febre albam habens & levem ſubſidentiam , firmatam celerem diſmiſſionem ſignificat ; ſubruba & ſubrubicula ſubſidentiam & levem habens , ſi ante ſeptimum diem prodeat , ſeptimo die liberat : poſt ſeptimum vero tardius aut omnino poſt tempus aliquod diuturnius. Et quæ in quarto die nebulam ſubrubiculam habet , ſeptimo liberat , ſi reliqua juxta rationem habeant. Ceterum tenuis & bilioſa & vix tenuem & exiguam ſubſidentiam habens , & quæ ad melius ac deterius mutatur , diuturna eſt. Hæc autem diutius conſequens aut temporis diuturnitate circa judicationem trahente , periculo non vacat , aquoſa vero & alba perpetuo in diuturnis morbis difficulter judicat & ſecura non eſt. *Lib. III. epidem. ſect. II.* æger quartus ſecundo die ſurdus cum urinis albis tenuibus & pellucidis , quin-

quinto die mortuus eſt; & ſect.III. æger quartus, ſcribit, cum urinis tenuibus & albis, quarto die moritur phreneticus.

7. Fit etiam ſolutio febrium quandoque per ſanguinis eruptiones vel etiam per alvinam excretionem die critico; qua de re apud HIPPOCRATEM eximius locus eſt lib. I. epidem. §. 115. in febribus ardentibus populariter graſſantibus, quibus bene ac large ſanguis per nares erupit, per hoc maxime ſervabantur, & nullum novi, qui in hac conſtitutione mortuus eſſet, ſi recte ſanguis profluxiſſet: in Philifco enim & Epaminone ac Sileno quarta ac quinta die parum de naribus ſtillavit & moriebatur. Sanguis autem plurimis erupit maxime adoleſcentibus & in vigore conſtitutis, & talium plerique perierunt, quibus ſanguis non erupit: ſenioribus vero ad morbum regium res devenit, aut alvi ipsis turbata ſunt, aut dyſenterici facti.

8. Acuti pectoris adfectus, uti eſt peripneumonia cum febre per ſudorem æque ac ſputum vires ſuas demittunt. Graviffimus auctor noſter lib. de diebus judicat. de febre pleuritica hæc habet: judicatur morbus ſeptima die, longiffimus decima quarta. De peripneumonia ibidem ſcribit: ſymptomata patitur æger minimum diebus quatuordecim ad ſummam viginti uno, & tuſſit hoc tempore vehementer, & una cum tuſſi purgatur, primum quidem ſaliva multa ac ſpumofa, ſeptima vero & oſtava die, ubi febris in vigore fuerit & humida fit peripneumonia, craſſior minus, non. Nona vero & decima cum virore pallida ac ſubcruenta; duodecima autem uſque ad decimam quartam multa & purulenta. Atque hoc in his contingit, quorum naturæ & corporis adfectiones humide ſunt & morbus fortis eſt. Quorum vero & natura & morbi conſtitutio ſicca eſt, in his minus.

9. Conſiderata hætenus febrium ſolutione, quæ diebus criticis variarum excretionum beneficio fieri ſolet, jam res & ordo quoque poſtulat, ut de imperfectis criſibus & ſolutionibus, quæ fiunt per abſceſſiones, ſive, ut Hippocratico vocabulo utamur, apoſtaſes & decubitus in aliis præſertim extremis partibus quædam dicamus. Hos inter abſceſſus merito numeranda ſunt eryſipelata, bubones, dolores arthritici, & tumores, maculæ, puſtulæ boni & mali moris, purpura, variolæ, & hujus generis plura exanthemata; hæc ipſa ſecernit etiam natura ſtatis diebus, & ſæpe magno cum emolumento, nempe cum febris & ſymptomatum mitigatione, utut non ſufficiente & plenaria. Quod ad eryſipelas attinet, notum eſt, quod hoc ipſum vehemente febre invadat, quæ tumore apparente in cute poſtea ſolvitur; & quod HIPPOCRATES ipſum eryſipelas inter abſceſſus judicatorios referat ex lib. II. epiſt. ſect.III. §. 59. luculenter apparet, dum ait: quæcunque ſine ſigno judicationis judicatori diſparent, male judicata ſunt, velut eryſipelas ancilla Polymarchæ. Deinceps criticis febrium ſolutionibus etiam artuum, genuum ac coxendicum dolores ac tumores ſubjungit de judicationibus & Coac.I. Ita lib.III. epid. ſect. I. ægrotus tertius die vigefimo coxæ dextræ dolore non quidem perfecte judicabatur. Denique inter abſceſſus, ſive quæ ſub cute abſcedunt, recenset tubercula & putreſcentia, & quæ ſuppurantur, puſtulas quoque, uti videre eſt ex loco, qui exſtat I. II. epid. §. 45. nullum dubium, quod hic etiam morbilli & variolæ ſubintelligantur. Inter abſceſſus merito quoque tubercula ſive tumores circa aures refero, in quos tandem febres reſolvuntur, id quod ab auctore noſtro, qui ſect.I. lib.I. epid. §. 10. tubercula, inquit, circa aurem alteram multis erant, plurimis ex utriſque citra febre recte obambulantibus, quibuſdam vero etiam parum incaleſcebant. Fiebant autem hæc adoleſcentibus, juvenibus in vigore conſtitutis & ex his plurimis, qui circa paleſtram exercebantur. Notabiliffimus

vero locus eſt de iis, in quæ febris abſcedit, in lib. de victu acut. §. 35. dum loquitur de febris ardentis certo genere & addit: ſi non ſanguis ex naribus fluxerit, aut abſceſſus circa collum fiat aut crurum dolor & ſputa craſſa ſpuerit, aut coxæ dolor aut pudendi livor, non judicatur, & teſtis intenus judicatorium ſignum eſt. Nec minus carbunculus peſtilentialis inter abſceſſus recenſeri meretur, qua de re lib.VIII. epid. §.55. legi poteſt.

10. Deſumſimus hætenus doctrinam & hiftoriam de criſibus & diebus criticis ex ipſo Hippocrate, qui primus eam nobis detexit ac revelavit; hunc preſſo pede infeſcutus eſt Galenus fideliffimus Hippocratis imitator, qui in omnibus fere hanc doctrinam confirmat, & dierum criticorum præſertim ſeptimi naturam ac potentiam ſalutarem mirifice extollit, ſextum vero infidum & ſuſpectum pronunciat, & hunc tyranno, illum regi aſſimilat, quoniam ille levat, hic ſemper diſcrimen aſſert & cum difficillimis ſymptomatibus & imperfecte & ſiniſtre judicat, de qua re legatur lib.I. de diebus decretoriis. Illud vero ſingulare habet Galenus, quod nonum diem etiam inter criticos ſalutares referat, unde loc. cit. proponit, ſe conſpexiſſe per experientiam æſtate quadam plus quam trecentos homines acute ægrotantes univerſos vel ſeptimo vel nono die criſin habuiſſe. Porro notabile eſt, cum ſcribit, ſe neminem perire vidiſſe, qui præcedentibus coctionibus criſin habuerit. vid. lib. III. de criſibus cap. 3. & quod nunquam criſis fit, niſi magna perturbatio præcedat & ſubito ac vehementiſſime natura à morbo irritetur; unde ſemper in ſtatu eam fieri pronunciat, ſemperque præcedentem diem & noctem gravioſem eſſe dicit, nec ullum à morbo liberari, niſi ubi aliqua evacuatio effatu digna aut abſceſſus aliquis contigerit: hinc criſin nominavit, quando morbus per excretionem vel abſceſſum finitur. Caterum ipſe GALLENUS lib. de diebus decretoriis, principes criticos vocat ſeptimum, decimum quartum, vigefimum, in quibus plures ſanari, quam mori declarat. Secundum dierum criticorum ordinem vocat contemplabiles indices internuncios, quod in hiſce criſeos futuræ in ſeptimo die ſigna eluceant, ſi nempe excrementa fuerint cocta, & hi dies ſunt ſemi ſeptimi, i. e. dies inter ſeptimum & tertium, reliquos dies inter indices & vere criticos dixit intercalares vel etiam provocatorios, quod naturam ad excernendum proritent, & ejuſmodi ſunt in prima ſeptimana tertius & quintus, reliqui dicuntur vacui, quia nec decernunt, nec indicant, nec provocant. Medicinales vero, quia illis diebus ægris mederi, iſque cathartica citra periculum exhibere poteſt medicus; & hoc apertis verbis divinus ſenex lib. IV. de morbis expreſſit: quicumque, inquit, febre continua correpti cathartico diebus paribus uſi ſunt, hi nimium purgati ſunt nunquam: at qui diebus imparibus cathartico ſunt uſi, nimium ſunt purgati & multi perierunt. Dies hos quidam criticos artificiales vocant, quod arte medica judicent, i. e. ſolvant. vid. Laurent. p. 110. de criſibus.

11. Poſtquam itaque tam ex Hippocratis quam Galeni præclaris monumentis ea, quæ de morborum acutorum criſibus & diebus criticis utilia & neceſſaria tradiderunt, delibavimus; antequam de iis noſtrum judicium interponamus & eorum, quæ veritati & experientiæ conveniunt, rationes aptas reddamus, utile erit, ut eos auctores & illorum argumenta, qui hanc doctrinam in dubium vocarunt, producamus atque conſideremus. Primus ex veteribus fuit Aſclepiades, hic teſte CÆLIO AURELIANO lib.I. cap. 14. ſtatuit: non eſſe in paſſionibus ſtatos dies, quos criſmos appellant, etenim non certo aut legitimo tempore ægritudines ſolvi. Huic vetuſtiſſimo auctori aſ-

ſentitur quoque CELSUS, qui *lib. III. c. IV.* diſerte ſcribit: eſt de diebus dubitatio, quoniam antiqui potiſſimum impares ſequebantur, eosque tanquam dum de ægris judicaretur *ἡμέρας* nominabant. Id Aſclepiades ut vanum repudiavit, neque in ullo die, quia par imparve eſſet, his vel majus vel minus periculum eſſe dixit; interdum enim pejores dies pares ſunt. Non nunquam etiam in ipſo morbo dierum ratio mutatur ſuntque gravioreſ, qui remiſſioreſ eſſe conſueverunt; verum in his quidem antiquos tunc celebres admodum Pythagorici numeri ſeſſellerunt; dum hic quicunque medicus non numerare dies debeat, ſed ipſas acceſſiones intueri. Inter recentioreſ HELMONTIUS qui *lib. de tempore §. 53.* crifeſ in praxi ſedulo perſtringens: notavi, inquit, quod nuſquam ſit criſis, ubi medicus artis ſuæ gnarus morbum ante criſis exſpectationem ſuſtulit. Etenim ut natura ordinariis gaudet motibus, iſſque adſueta eſt, & unitate virtutis motricis gubernatur lubens: ita quando totum morbi negotium ſuis tantum incumbit humeris, ſtatim ipſa ciet crifeſ, quas alioqui medelæ anticipat bonitas pravitaſque retardat vel perdit. Sic nempe dies criſeos decimus quartus in quadrageſimum prolatus eſt. Boni ergo & fidelis medici eſt crifeſ negligere, præſtaretque ægros medente caruiſſe, quotquot per criſin evadunt, multo magis, quarum criſis tardior eſt. Idem de febr. *cap. 2. §. 8.* verus ergo medicus ante criſin morbum ſuperare debet, ſin ſecus egerit, medicæ artis auxilio nihil penitus adſcribi poterit. Si enim criſis, inſert CL. LANGIUS *Miſcell. quæſt. 4.* in morborum curationibus exſpectanda medicina proſecto ſupervacaneum ſeu inutile magiſterium erit; quia totum medendi negotium naturæ quaſi unice non vero arti, nec ejus proſecto hac ratione committitur. Ejusdem ſententiæ eſt Faber, qui *panchymag. tom. III.* medico incumbere docet, ut morbo ante criſin & ſine criſi medeatur. Accedit huic Comes de Flisco qui in *lib. de fato* aperte profitetur, in praxi numerum hunc dierum non ſemper obſervari, & ſæpius aliis etiam diebus crifeſ fieri.

12. Sunt præterea alii, qui quidem exiſtentiam ac uſum dierum criticorum in dubium vocant, obſervationem tamen hanc in Græcia ſaltem, non vero in noſtris regionibus locum invenire exiſtimant. Ita CL. WALDSCHMID. in *fundament. med. de criſi* dicit: notandum venit nos non admodum curioſos eſſe debere in rimandis cauſſis criticarum mutationum, cum in noſtris regionibus & hoc noſtro tempore tales crifeſ non amplius ſiant; hinc etiam prædictiones noſtræ in morbis acutis non adeo certæ ſunt nec indubitata fidei, prout apud Hippocratem inveniuntur; ubi alia phænomena nobis raro vel nunquam conſpicienda apparuere. Et Eichſtad. *pæd. astron. ſect. III. p. 372.* in noſtræ Germaniæ regionibus & præſertim ſub noſtro polo & in ſolo noſtro rarius crifeſ perfecte ad ſalutem eveniunt. It. HOLLERIUS in *aphor. Hippocr. in frigidis & borealibus regionibus rarius exſpectantur critica exactæ evacuationes.* Cauſam quod ſpectat, cur in noſtro climate tam raro obſerventur exquisitæ crifeſ, diebus criticis evenientes, non nulli in ipſam regionum temperiem rejiciunt. vid. WEDEL in *diſſert. de diebus criticis.* Neque ab hac ſententia diſſentire videtur BAGLIVUS *p. 140.* in *prax. medica*, qui ſatetur in Græcia perfecte ſuccedere crifeſ in acutis morbis, non vero ita in noſtris ſeptentrionalibus regionibus. Id quod adſcribendum putat æris puritati & tenuitati illius regionis, ut & adjacentis orientis valde elatiſci; cum noſter ær aqueis & craſſis impuritatibus fœdatus, humores quoque corporis magis impuros nunquam non faciat, ut ad debitum criſeos ſive deſpumationis officium nunquam poſſint pervenire.

13. Reſtat jam, ut cauſas effectuum mirabilium dierum criticorum in acutis ſecundum veterum maxime ſententiam & mentem adducamus. Plurimi vero in eo

conveniunt; motuum criticorum cauſam efficientem non aliam eſſe, quam naturam corporis, animam ſive principium motuum in corpore noſtro, quod regit & totam machinam gubernat, quod tollit morbos, quod ut *lib. VI. epid. ſect. V.* exiſtat, à nemine informatum eſt, nec quicquam didicit, ea tamen, qua decet, quæ fieri & ubi fieri debent, efficit, quod cum morbo committitur, nec extremum certamen detrectat, magno impetu inſurgens, noxium à bonis ſecernit, per debitas vias debito & convenienti tempore bonum & neceſſarium in finem, & tales efficit commotiones & tali proportionem ac gradu, qui præſenti materiæ morbificæ quadrat, idque ex ſe, & ſua natura libere, non coacte ex cauſis externis neceſſariis ceu res incorporea, quæ à rebus corporeis nec affici nec alterari poteſt. Nonnulli ceu cauſam remotiorem naturam adjuvantem aſtralem influxum præcipue lunæ adjiciunt, prout nimirum hæc planetas ſalutares vel infauſtas adſpiciens ſigna zodiaci ingreditur.

14. Poſtquam igitur ex veterum ſcriptis criticorum dierum & crifium hiftoriam variaſque de eorum effectibus deduximus ſententias, proximum nunc eſt, ut & noſtram ſententiam, quidve veri falſique huic doctrinæ inſit, exponamus, & an dies critici, & quare tam eximium uſum, ut veteres voluerunt, in praxi medica habeant, doceamus. Quoniam vero ad veritatem in rebus phyſicis & medicis indagandam ſemper eminet experientia, quæ omnis veritatis, quæ in factis conſiſtit, & ratiocinationis medicæ primum fulcrum ac fundamentum eſt, quare etiam in hac materia ea primum nobis conſulenda eſt. Qua de cauſa, quæ nos, omni auctoriſtatis præjudicio exuto, circa ſolutionem februm, præſertim certis ac ſtatis diebus attente obſervavimus, candide proponenda ſtatuiſmus. Primo experientia indubitata certum eſt, ephemeræ febres viginti quatuor horis, ſynocham quarto vel ſeptimo die cedere plerumque per ſudorem vel hæmorrhagiam. Pleuritis ſeu peripneumonia levior & mitior ſit circa diem quartum, per tuſſim ejeſta materia cruenta, circa ſeptimum plerumque ſolvitur ſudore & liberiori expeſtoratione; gravior vero extenditur ad decimum interdum quartum diem, & ſi ulterius procedit, in empyema mutatur. Ventriculi eryſipelas, quod febre indicatur leipyria, per ſuperiora vel inferiora evacuatione, ſudore quoque vel quarto vel ſeptimo die dimittit. Febris inflammatoria hepatis ſeptimo undecimo vel decimo quarto die partim ſudore partim etiam alvi profluviis exſolvitur, ſi pars nempe concava hepatis fuerit inflammata. Coniunguntur inflammationibus internis viſcerum narium ſtillicidia, quandoque ſalubria, ſed rarius vel plane non perfecte morbum ſolventia. Tertianæ ſimplices ſeptenis circuitibus ſponte ſua ſæpiſſime recedunt. vid. *lib. de judic. §. 4.* Ardentes febres bilioſæ ſeptimo plerumque aut die decimo quarto ſudore & alvi liberiori ſolvuntur. vid. HIPPOCRAT. *l. c. de judic. §. 4.* Petechiales ſeptimo, undecimo, decimo quarto, nonnunquam etiam, licet rarius vigefimo primo demum virulentiam ſuam exuunt. Peſtis quarto, ſeptimo vel undecimo die, ſi ſervatur æger, truculentiam relinquit: & uno verbo pleræque febres continuæ ſeptimo, undecimo, decimo quarto die ordinarie finiunt. Et febres malignæ & peſtilentiales plus alvina excretionem, quam ſudore finiuntur, uti ego ſæpe & GALENUS *lib. de atra bile cap. IV.* it. GERHARDUS Columba in *lib. de febr. peſtilent.* mirifice excretionis alvinæ effectus in harum februm ſolutione commendat, ubi ſcribit *pag. 231.* quod in illa conſtitutione peſtilenti fere omnes, quibus alvus copioſe ejecit, licet cum ſignis cruditatis fuerit, tandem liberatos fuiſſe. Procedente enim, pergit, alvi fluore indies coſtione ſigna ſuperveniebant, morbus evadebat clementior, & tandem alvi fluore perſeſerante, fideliter & integri ægri judicabantur.

15. Quod attinet ad febres earumque commotiones, quæ quidem non penitus folvuntur, fed mitiores tamen fiunt, apoftafi feu decubitu noxiæ materiæ in partibus corporis facta, hæ temporis ratione fic fe habent. Eryfipelas cum febre vehementiffima invadit, fed die femifextimo i. e. inter tertium & quartum diem propulfa materia ad ambitum corporis plane quiefcit. Variolæ, morbilli adoriuntur corpora cum vehementibus fymptomatibus intenfaque febre; hæc vero die femifextimo, propulfata cauftica acri materia ad corporis corticem, mitior non modo fit, fed fimul acerbiffima fymptomata conquiefcere folent. Febres purpuratæ, acri perniciofo humore ad corporis ambitum relegatæ, circa quartum diem omnem acerbicatem fymptomatum deponunt. Petechiæ quarto vel feptimo die cum levamine quodam femper prodeunt. Febres arthriticæ, fi vehementes funt, mox mitefcunt, ad artus acri cauftico humore delato. Febres biliofæ die feptimo vel nono vel undecimo vel decimo quarto, ictero fuperveniente, ad apyrexiam perveniunt; hinc recte HIPPOCR. *de judic.* §. 10. *definente febre ardente, fi accedat morbus regius, non folet amplius exfudare, neque ufquam alibi abfcelfum facere, fed fanus fit.* Bona etiam & falutaris apoftafis eft tumor in meatu auditorio, & ex eo proveniens furditas, quæ in Hungarica febre, & acutis cum cephalgia & delirio junctis, fi die critico fupervenit & confians eft, plerumque fauftiffimum convalefcenciæ fignum præbet; id quod jam olim fuo tempore etiam notavit HIPPOCRATES *feft. II. aph.* 60. Ratio hujus peculiaris obfervationis in promptu eft; naturæ enim robuftæ indicium eft, quando ad partes extremas ignobiliores & emunctoria, quale hic funt glandulæ meatus auditorii, humorem fine dubio vilcidum fulphureum propellit: unde clare poterit intelligi propositio HIPPOCRATIS *lib. de judic.* §. 11. *quibus in febribus alires obfurduerunt, his non foluta febre infanire neceffe eft. Solvit autem fanguis è naribus erumpens aut alvus biliofa egerens, aut dyfenteria arrodens aut coxarum aut genuum dolor.*

16. Tandem nec hoc præterire poffumus, quod in noftris regionibus valde familiares in febribus acutis funt metaftafes; ubi natura imbecillior facta non fanguinem vel humorem peccantem è corpore foras expellit, fed ad partes internas fub temporibus criticis & extra ea amandat. Sunt vero hæ metaftafes omnes fere exitiofæ; nam ex ftagnatione, quæ exitioforum fymptomatum, & præcipue lethalitatis fons ac caufa exiftit; nafcuntur, fiuntque fic phrenitides, convulfiones; tendinum fubfultationes, fopores & fiderationes, quæ à fanguine copiofo in vafis cerebri ftagnante, originem fuam petunt. In pectore etiam inflammationes & fuffocationes à congesto ibi fanguine finem vitæ faciunt: fimiles modo in faucibus, œfophago ejusque orificio à ftafi fanguinis ortæ inflammationes anginoſæ, aphthæ cum oris ardore & fiti inexplebili, deglutiendi difficultas plerumque lethum prænunciant. HIPPOCRATES *feft. IV. aph.* 50. in febre continua difficultatem fpirandi cum delirio lethale fignum æftimat. It. *aph.* 52. involuntariam lachrymarum emiffionem, difficile quoque deglutionem dictis in febribus lethalem febris notam perhibet. Ea enim jam ftagnantem & extra circulum confitutum in dictis fanguinem indicant.

17. Denique circa folutionem febrium, ipfa vera & firma affentiente experientia, falutarem fequentia merentur obfervationem. I. In cujufvis febris falutari dimiffione & folutione circa diem criticum vel in ipfo vacuatio notabilis five per fudorem five per alvum femper fere contingit, eaque fatis liberalis, ut quandoque per aliquot dies duret, & præfente hac imo fub hac & poft illam pulfus fieri folet fedatior, vires cre-

fcunt, animus vigorem acquirit, erectior fit; fomnus evadit quietus, & calor membra definit. II. Quandoque largæ evacuationes vel extra dies criticos vel in illis contingunt; vehementia vero morbi & fymptomatum non decrefcit, fed potius in eodem ftatu permanet vel increfcit, tunc peffimum indicium eft. III. Obfervatio confians & frequens eft, ficuti faufta folutio morbi & fymptomatum hæc eft, quæ fit diebus criticis cum levatione & evacuatione: ita omnes evacuationes, quæ hisce temporibus non inftituuntur, utut primum corpus levare videantur, non funt, utæ fed fufpectæ; unde HIPPOCRATES *feft. V. lib. II. epidem.* perpetuo ea damnat, quæ levant diebus non criticis. IV. Obfervatur, fi variolæ, morbilli, petechiæ, purpuræ maculæ mox primo vel fecundo die infultus prorumpunt, eas effe notæ peffimæ. V. Urinæ copioſæ tennes nullo febris continuæ tempore falutares obfervantur. VI. Ante exanthematum propulfionem, & fic dictas abfciffiones à partibus interioribus ad exteriora; fere femper major vehementia & fymptomatum exacerbatio motuumque turbatio contingere folet; unde canon HIPPOCRATIS *aph.* 13. *feft. II.* veriffimus eft; quod *ante crifin nox præcedens gravior, poft eam vero quietior fit.* Hoc ipfum vero non perpetuo verum eft de perfectæ & plenaria febris folutione: hinc morbi folutionem non poffe fieri fine præcedente exacerbatione morbi & fymptomatum, & naturæ perturbatione majori, non confians regula eft. VI. Quamquam in febre continua acuta nunquam plenaria fymptomatum fit intermiffio: locum tamen quædam habet remiffio, quam nova poftea fymptomatum exacerbatio & incrementum fequitur, & hanc sæpe horripilatio cum rigore quodam præcedere folet; fub qua tam apoftafes quam metaftafes funt metuendæ. VII. In genere illud tenendum eft, quod principium numerationis in criticorum dierum computatione, non à laffitudine, decubitu, vel mala ægri difpofitione fit faciendum, fed à motu febrili; qui ex horrore, pulfus mutatione, dum nempe frequentior fieri incipit, cognofcitur, qui celeritatem fingulorum pulsum, quæ febrium fignum conftituit pathognomicum, manifeftat; uti hoc ipfum fufius & accuratius in *difertatione de pulsum theoria & praxi; ita de falubritate febrium* oftendi. VIII. Quamvis quaternarius & feptenarius dierum femper majoris confiderationis funt quam reliqui: nihilo tamen minus non femper in hisce locis Hippocratis & Galeni refpondet obfervatio, e. g. quod quartus indicet feptimum, undecimus decimum quartum, fed quandoque figna coctionis in urina non femper in hisce, fed in aliis demum fiunt atque vifuntur; oportet potius in omnibus diebus ægri ftatum, vires atque excretiones contemplari. IX. Febres ardentes biliofæ, it. inflammatoriæ cum vehementia fymptomatum ftipatæ, in fubjectis præfertim fenfibilioribus, crifes jufto tempore femper habent perfectiores, quam malignæ putridæ in fubjectis impuris cacochymicis debilibus ortæ; quarum intra quatuordecim dies terminus quidem eft: fed non tam accurata tempora & dies fervant criticos.

18. Verum enim vero non tantum diebus criticis folvuntur morbi, fed in hisce etiam fæpius exacerbantur & agrotantes non raro pereunt; unde eft obfervatio & feptimo, undecimo & decimo quarto die inflammatoriis, variolis, petechiis aliisque epidemicis acutis febribus multos inieriffe: nihilo fecius tamen plures nono, quam feptimo die moriuntur, plures imparibus diebus quam paribus. Copioſæ evacuationes per fudorem, urinæ tennes & copioſæ; cum pullis parvo debili, frequenti & deliriis mortem prænunciant. Notavimus, fubjecta quo calidiora & fenfibiliora funt, quo calidius clima & quo morbi vis vehementior,

eo citius morbum vel in melius vel in pejus folvi; tardius vero procedere crifes in fubjectis languidioribus, phlegmaticis, in frigidis & paludofis regionibus; fub minori morbi vehementia, victu pleno, craffo & carneo; in tali ftatu recidivæ etiam familiariores & in alios morbos facilior eft tranfitus.

19. Porro & illud notabile, quod, uti bene monet *Hippocrates* lib. 11. epid. §. 20. in quietis & conftantibus temporibus & annis tempeftiva præbentibus, boni ftatus & judicatu facillimos fieri morbos; in inconstantibus vero inconstantes & qui difficulter judicantur. Hæc ita intelligenda funt, quando anni naturalem fuam conftitutionem ac temperiem bene fervant, & tempeftates non extraordinariæ & præternaturales contingunt; tunc & vegetabilia & animantium corpora bene funt difpofita; fiquæ morbi in ejufmodi temporibus contingunt, ordinariam fuam indolem, morem ac genium fervant, unde etiam confuetis fymptomatibus ftipantur & legitime fua tempora percurrunt, folennibus quoque criticis diebus folvuntur: fi vero anni tempora à naturali fua indole defleunt & plane contrariam ac alienam adfumunt, unumque in aliud tranfmutatur, æftas autumnò fimilis, hiems tepida, vel æftatis naturam referens, cælumque diu nebulofum ac humidum, ventis deftitutum permanet; tunc & irregularem & plane ordinariam crasin ac temperiem fluores animantium accipiunt; inde peiores, infuetis fymptomatibus ftipati, nafcuntur morbi, qui difficillime judicantur, quoniam fecundum ordinariam naturæ legem & curfum non procedunt. Et hujus ratio in promptu eft: aër enim, ipfius *Hippocratis* effato, eft dominus & auctor maximus eorum, quæ in corpore noftro fiunt, is elaficitate fua robur & tonum non modo folidis, fed & fpirituafcentiam & expanfivam vim fluidis partibus elargitur, unde fanguinis & humorum circulum & ab eo neceffarias & integritatem corporis confervantes excretiones difpenfat atque moderatur. Neque dubitari poteft in regionibus calidioribus, inque aëre tenuiori & humores effe fluxiliores & mobiliore, & corpora ad tranfpirationem magis apta; hinc crifes & criticas acutorum folutiones plus in iis obfervari, quam in regionibus humidioribus, & ubi aër elatere deftitutus non limpidus, fed peregrinæ indolis effluviis eft imbutus. Hac enim ratione non modo crifis retardatur nec ita fenfibiliter fit, fed & ordinarii naturæ motus certis temporibus adftricti multum turbantur; unde non fine ratione nonnulli magni viri vel de crifibus in noftis regionibus dubitare, vel eas non tam accuratas effe, quam in Græcia pronunciare aufi fuerunt, inter quos nominandus eft *Cafparus Hoffmannus*, qui in *Inftitut. med.* p. 620. crifes apud nos effe rariffimas exiftimat. Neque *Baglivus* in *prax. med.* diffitetur, in Græcia, ubi aër purior, regulares ejufmodi criticos motus plus habere locum, quam in Italia. Verum enim fedula & affidua obfervatio docet, utique etiam in noftis regionibus eas dari, fed profecto inter anni tempora, regiones, victum, ægrotantium naturas & inter ægrorum tractationem à medico differentiam attendi debere; fiquidem hæc omnia mirum quantum limitant, & ordinarios naturæ in morbis motus modificant. Quare & *Galenus* optime monet in *lib. de dieb. decret.* quod diem crifeos cognituro agnofcenda fit ætas, natura, anni tempus, locus & pulfum cognitio.

20. Conftitunt in eo omnes fere medici faniore, quod præpoftera medendi methodo vel errore in diætâ commiffo crifes vel anticipari vel poftponi vel imminui queant: ita præclare differit *SENNERTUS* de *diebus criticis in inftitut. lib. III. part. III. cap. 2.* Si æger aliquem notatu dignum errorem commiferit, non levis eft fufpicio, eam crifin, quæ bono critico die, e. g.

feptimo futura eft, vel anticipato tempore citius, vel motu retardato tardius ut fexto vel oclavo die eventuram. Clarius vero id exprimit *Proſper MARTIANUS* comment. in lib. de morbis fecl. II. p. 174. continuo, inquit, medicamentorum refrigerantium uſu (propter febrim) incrassatis humoribus corporibusque densatis spontaneæ evacuationes sæpe prohibentur, ut hæc non levis fit. cauffa, cur noſtris temporibus tam raro fiant crifes, quæ antiquis erant frequentiffimæ. Præclara quoque funt, quæ hac de re *Cl. BAGLIVUS* in *praxi med.* p. 254. ſcribit: mirari definant præctici, ſi hodie nec frequentes nec perfectæ ſuccedant crifes, uti olim in Græcia; ſiquidem illi Græcarum legum ignari vel obtrectatores à principio morbi ad declinationem uſque purgantibus, diaphoreticis, phlebotomiis, ſpirituofis aliisque imprudenter & intempeſtive exhibitis medicamentis ægrotantem fere conficiunt; ideo impoſſibile eſt, ut humores per tam diverſas medicamentorum ſeditiones diſtracti, ad criticæ deſpumationis negotium ſtato tempore diſponantur, ſed affiduis confuſionibus agitati, loco crifeos perfectæ in meſtaſes præternaturales definant, atque hæc de cauſſa nec crifeos, nec dierum criticorum, nec aliorum demum naturæ motuum regulas ab antiquis traditas in febribus obſervabimus. Quapropter idem auctor non fine experientia refert: in ruſſicis, & qui medicorum opera non utuntur, manifeſto documento huiusmodi crifes ſive deſpumationes peccantis materiæ, per ſudorem, alvi fluxus, urinam, aliasque naturæ vias perfici, & motu prorsus ordinato fieri.

21. Cum itaque ſatis abundeque non modo auctoritate probatiſſimorum in arte noſtra virorum & recentiorum, ſed & experientia indubitata veritatis magiſtra, doctrina de crifibus & diebus criticis ſtabilita ac fundata ſit, uti ſuprà deduximus, reſtat adhuc, ut in horum natura mirabilium effectuum cauſſas perſcrutemur. Recte quidem *Galenus* in *lib. de dieb. decret.* fatetur, deſumptam hanc doctrinam tantum effe ex experientia non vero ex ratione, & captum inſpectio accurata cauſſarum hujus mirandæ in natura operationis ſuperare videtur; nihilo tamen minus, aliorum repudiatis opinionibus, eo annitamur, ut, quæ vero proxima videntur, aptis ratiociniis explicemus atque proponamus. Exordiamur à veteribus, unanimi fere conſenſu cauſſam crifium & dierum criticorum efficientem naturam effe exiſtimabant, quam omnium actionum in corpore principium credebant, quæ ſingulari agendi ſcientia prædita, certo tempore, ordine, gradu, proportionem mediis que utatur pro cauſſæ morbificæ diverſitate motuſque convenientes cauſſæ & objecto ad certum finem inſtituat, nempe conſervationem corporis certo tempore, & certis mediis ſive organis eos dirigat. Quapropter agens illud, quod tanta prudentia movet ac regit omneſque motus tam in ſtatu ſano, quam morboſo juſtis ac convenientibus mediis perficit, ens effe reale, liberum, incorporeum ſcientia agendi præditum exiſtimant; maxime vero ex ejus effectum nempe motu eſſentiam ejus incorpoream judicant. Nam motum putant in ſe & citra actum in corpore, vel dum in corpore fit, aut in corpus agit, non poſſe dici aut intelligi aliquid corporei, ſed ab eſſentia corporis fit ſeparatum, & nunquam cum corpore exiſtat neceſſario, corpusque ſine illo poſſit ſubſiſtere, adeoque ad corporeitatis formam, ſicuti quantitas, magnitudo, figura non faciat. Hinc ſpirituale quid hujus motus cauſſam effe, præfertim ordinati & regularis in corpore, colligunt; maxime quod nec alterationes humorum materiales, nec aëris varius ſtatus vel diætâ vel medicamenta motus naturæ ordinatos minimum alterare aut invertere poſſit: ex eo vero ſpiritualem ejus inprimis vim æſtimant, quod ſolis phantaſmatibus & fictionibus, mentis, perverſio ordinis ac directionis horum motuum poſſit per-

perfici. Hanc itaque naturam temporis etiam effe obfervantiffimam credunt i. e. certo ac determinato tempore actiones fuas inftituere, in formando, perficiendo, fanando, homine confervando, cauffis morborum corrigendis, expellendis, jufto cum tempore per congrua emundatoria præfenti materiæ quadrantia e. g. humores vifcidos & biliofos per alvum, tenues acres per corporis habitum, fallos & ferum fuperfluum per renes, exundantem fanguinem per vaforum ofcula, bilem volatilem acrem per vomitum expurgat. Dehinc naturam hanc liberrime in perficiendis notabilioribus & folemnioribus effectibus femper feptenarium numerum dierum, menfium & annorum feligere adfirmant. Et hæc veterum fuit fententia communiffima, quæ revera nihil aliud infert, quam quod mirabiles illi & ordinati effectus cauffam habeant, fimilem à qua illi proficifcantur, quænam autem illa fit? cujus naturæ fit? an fcientia & rerum notitia fit inftituta? an vero citra notitiam & cognitionem hi effectus ab ordine five artificio & neceffario ac phyfico cauffarum agentium hæc profluant? de hoc merito eft quæftio.

22. Nullum dubium eft ordinem, in quibufcunque rebus obfervatum, femper cauffam ipfo ordine priorem fupponere, hujus nempe ordinis auctorem, uti v. g. horologii cauffa artifex eft; illud vero urgendum eft, num effectus ordinati proxime ab ipfo ordine five mechanifmo in natura pofito, five an à cauffa prima five ordinis auctore, fcientia & notitia imbuto, proxime fint derivandi? exemplo manifefto eft horologium, ubi quod index accurate monftret horas, non proxime ab artifice, fed ab ordine & artificio deduci debet, quod cauffa proxima & immediata hujus effectus eft; ita etiam illud ad corpus noftrum applicare licet, in quo ordinatiffimos effectus in nutritione, augmento, perfectione corporis, in excretionibus, motu fanguinis, & morborum curatione videmus. Merito hinc quæftio eft, an hi à Deo ordinis primo & perfectiffimo auctore, five à cauffa fubalterna anima, an vero potius ex ordine, ftructura, & mechanifmo corporis proxime fint deducendi? Nos in ea fumus fententia, fi in rebus & medicis effectus proxime ex cauffis corporeis mechanicis, in fenfus incurrentibus poffunt demonftrari, non opus effe, ad cauffas primo obfcuras & plane incognitas, fpiritum, animam vel ad eorum fymphathiam, antipathiam, terrorem, furorem, errores five ad morales intentiones ac directiones refugere. Deinde fentimus, quamvis omnes effectus, qui fiunt in natura, à priori & ad fenfum & captum hominum clariffime oftendi nequeant, quomodo nempe fiant mechanice ob humani intellectus circumfcriptos limites: ex eo tamen minime fequitur, non fieri eos à mechanica, fed à cauffa fpirituale. Urgemus hoc maxime & instantiffime, ut medicus & phyficus cauffas femper proximas & phyficas scrutetur; hæ enim fcientiam pariunt & demonftrationem; non vero ad fpirituales, metaphyficas incognitas ac plane inutiles eft confugiendum.

23. Nemo quidem fanæ mentis negare poterit, in corpore noftro artificiofiffime conftituito, principium etiam inhabitare, cujus natura & operatio à motu & corpore plane eft feparata; uti eft perceptio, cogitatio, directio motuum, voluntas, quæ fine corpore fubfiftere poffunt, & cum ejus motu non habent convenientiam. Conftanter vero negamus & pernegamus, motum five potius principium, à quo motus five localis, five inteftinus in corporibus fit & dependet, non ad effentiam corporis fpectare; fiquidem non poteft corpus fine operatione & operationis principio concipi; creatura enim mere paffiva, quæ non principio agendi inftituta eft, non ens reale phyficum fed rationalis eft. Nunquam itaque corpus fubfiftit & exiftit, nec

concipi poteft fine principio interno motus innato, quod cauffa eft virium & potentiarum motricium, quas in alia corpora exercet. Ubicunque igitur corpus eft, feu fubftantia extenfa, ibi præfens eft motus, nifus, preffio, actio unius corporis in alterum: & ubi machina five corpus organicum, ibi motus ad certum fcopum ordinatus eft. Noftro corpus machina eft artificiofiffima, quæ ex decenti & concinna partium impetum facientium, fluidarum & folidarum difpofitione actiones edit, id quod in confervatione corporis per digestionem, mixtiones fe- & excretionem, motus progreffivos inteftinos nutritionemque fatis confpicitur. Hos vero motus non immediate anima in fibris motricibus perficit; fed hæc tantummodo certas motuum fpecies in organis percipit, intelligit, diftinguit, comparat, inque voluntati fubjectis partibus, motibus imperat. Maxime omnium vero illud magnum commercium notari meretur, quod Deus in homine inter animam & motus corporis conftituit; utpote illa non quidem motus præftat immediate in corpore; modificare tamen eos & turbare exiftit idonea. Luculentum exemplum præbent animi adfectus & gravidarum phantafmata, quæ quantam potentiam in fanguinis & humorum motum habeant, notiffimum eft. Contra etiam motus fluidorum operationes animæ, mores videlicet, paffiones, mirifice difponunt, ficuti id ex diverfa temperamentorum, ætatum, populorum, victus natura clariffime poteft demonftrari. Quapropter nec dubitari debet, motus in corpore longe diftinctos effe ab actionibus animæ, & fanguinem & fluida non fe paffive habere, ita, ut ab anima regantur, fed potius hæc fluida actionem fuam exerunt in animam. Et ut paucis me expediam, quid clarius & manifeflius? quam quod ab aëre, potu, victu morbi fiant, vita confervetur, deftruatur, fanatæque refituitur. Quid certius? quam quod ftructura partium folidarum in ætatibus, temperamentis, difpofitione hæreditaria differens ad hos vel illos morbos difponat; cum tamen hæc omnia nullum plane refpectum vel communionem cum anima habeant; ut hæc igitur paffive fe habeant eft neceffe.

24. Cæterum quod in quibufdam actibus, & quidem præcipuis folemnioribusque juftum tempus obfervetur, hoc inprimis mechanifmi præfentiam & neceffitatem arguit; ordo enim exquisitus & accuratus in actionibus vifitur, ubi mechanifmus fundamentum eft. In macrofmo id videmus, ubi notabiles funt reciprocationes maris, flatu venti & pluvie quibufdam in locis, temporum & tempeftatum revolutiones, plantarum progerminatio, fœcundatio, fructificatio, quæ fingula certo tempore fiunt, certumque tempus requirunt. Elegit vero hujus univerfi fapientiffimus conditor liberrime præfertim in microfmo numerum feptenarium, in quo multi folennes & mirandi fane effectus producuntur, qua de re in *difertatione de annis climactericis* fufius egimus.

25. Appellavit veneranda antiquitas hunc numerum perfectum, plenum, facrum, mafculum, ob magnos, qui in illo fiunt, effectus, id quod fatis infinitam artificis fapientiam, in natura noftra microfmica pofitam, prædicat. Non vero exiftimandum eft, in ipfo hoc numero hanc hæere potentiam, quod nonnullis veterum placuit; fed ita res eft concipienda: ad certos in rebus corporeis effectus producidos certa & fpecifica proportio cauffæ agentis five actionum requiritur; jam vero omnes actiones phyficæ nil nifi motus funt, ideoque certa proportio, certus numerus motuum ad certum effectum eft neceffarius: menfura enim & numerus motuum conftituit tempus, & tempus nil eft, nifi certus motuum numerus; hinc certæ actiones certum requirunt tempus. Et ut hoc ad noftrum inftitutum accommodemus v. g.

ut in inflammationibus certa proportio flagnantis sanguinis in vafis diffolvatur, eluatur; certa potentia & numerus motuum eft neceffarius, quibus fanguis ex corde & arteriis ad partem adfectam impulfus, eam ab obftructione liberat: fic autem Deus noſtram effinxit machinam, ut ad hoc negotium perficiendum feptem dies, & in his, qui fiunt, fanguinis circuitus impendantur, hinc feptimo die acutæ & inflammatoriæ febres ordinario ſolvuntur. Variolarum, morbillorum, petechiarum, purpuræ materiam eſſe acrem cauſicam, tot moleſtæ irritationes, in genere nervoſo & membranolo factæ, ſatis ſuperque teſtantur: hæc vero ut contemperetur mixtione aliarum partium ex ſanguine, & ſic ad ſecretionem ad habitum corporis idonea reddatur, certum tempus requiritur, quod trium & quatuor dierum ſpatio abſolvitur; quo elapſo mox peccans materia interna deſerit & ad exteriora progreditur. Miasma in peſte & contagioſis febribus ſummæ & penetrantiſſimæ putredinis materia eſt, quæ ſanguini commixta vel ſimilem in totum introducit motum putredinoſum, & ſic lethaliter corpoream deſtruit mixtionem, vel ipſa correctæ e corpore eliminanda eſt, quod quidem ut fiat, juſtum requiritur tempus, ſive ſufficiens motus ad corrigendam & nocentiſſimam materiam evacuandam. Eodem modo, quando ex flagnantis humoris putredine in viſcere febris oritur ſimiliter certus appuſſi ſanguinis putredinem eluens & abſtergens motus eſt neceſſarius, qui certis numero pulſationibus cordis & arteriarum, quales nempe & quot fiunt ſeptimo vel undecimo die, perfici debet. Plures ardentes ex bile acri cauſica oriuntur, ad quam temperandam, corrigendam, & ut veteres loquebantur, ad ejus coctionem & maturacionem idem tempus requiritur. Hanc Deus, ut *Plinius* ait in *Hiſtor. natural.* morbis poſuit legem, ut quaternario & ſeptenario numero finiantur.

26. Quod verò hoc definito tempore facta morbi ſolutio, non ab anima ſeu natura tanquam principio incorporeo intelligente, ſed à mechanismo proveniat, vel exinde colligere eſt, quod crifes tales vel anticipent vel poſtponant, irregulares fiant, ſi victu æger peccet, ſi perverſa medicina morbus tractetur, & ſi cauſa morbi ſit inſueta ac inſolentior: quapropter etiam pro annorum diverſitate, tempeſtatum, regionum, ac ſubjectorum variant. *Riverius in inſtitut.* ſcribit: motum & diſpoſitionem in cauſa eſſe, ut crifis nunc citius nunc tardius, nunc diebus intercalaribus accidat, prout humorum benignorum vel malignorum celerior eſt coctio. Quapropter ſi cauſa morbi non adeo maligna eſt, ſeu motus ordinarii non turbantur, aut perverſa diæta vel medicina ſiniſtra pervertuntur, ſi corpora bene perſpirabilia, nec adeo impura ſunt, ſi aer purus, ſerenus, elaficus eſt, tunc crifes juſto tempore & ordine procedunt.

27. Quæſtio jam non ſine ratione naſcitur, cur crifes plenæ & perfectæ diebus maxime criticis fiant, & quod crifes bonæ ſint, quæ cum remiſſione ſymptomatum & evacuationibus fiunt: nam, ut *Galenus* habet: nulla crifis bona fit, niſi effatu digna præceſſerit evacuatio. Explicatur nempe id hoc modo; naturam ſeptenarii numeri obſervantiſſimam ex tempore omnibus viribus contra morbi cauſam inſurgere, quam emollire & foras pellere ſtudet; quoniam corporis noſtri conſervatio & duratio per excretorios actus maxime ſuſtinetur, & ſic à putredine ſeu morte defenditur. Ad quæ reſpondemus, animam quidem cognitione eſſe præditam, ſed non naturam, quæ medetur morbis, & nullius rei conſcia, ex neceſſitate tantum agenda agit; hinc etiam ea nec cauſam morbi intelligit, nec ob id certamen, luſtam aut febrem inſtituit, ſed hæc omnia ex pura mechanica ratione pendere arbitror, dum ſolæ cauſæ externæ e. g. balnea

poros claudencia, liquores heterogenei inſuſi in venas, diſtentione & punſtione membranarum, febriles ſpaſmos excitare poſſunt. Dein non negandum eſt, quando vita pro integritate ſtructuræ aut mixtionis ſumitur, excretionem hanc conſervari; quoniam vero vita magis actum ſignificat i. e. ſanguinis & fluidorum circularem motum, qui etiam proximum corporis cum anima vinculum eſt, non vero integritas mixtionis; nec non omnium actionum in corporibus animantium ipſarum etiam excretionum fons eſt, quæ mixtionem integram & ſtructuram ſervant; facile patet, non excretionem tantum vitæ ſuſtinendæ cauſas eſſe attendendas, neque ex ſuppreſſis excretionibus morbos tantum naſci, nec iis reſtitutis eos ſanari. Ectid enim maniſteſtius eſt, quam ſanguinis effuſione nec non per polypos, ligaturas, coagulationes, ſanguinis circuli interceptione, vel motuum per venena turbatione, ſalva manente textura ac mixtione partium, vitam auſſerri? Quapropter non omnes, quæ morbum pariunt, cauſæ ita comparatæ ſunt, ut putredinem tantum indicent, & excerni debeant vel poſſint; ſed ſæpiſſime qualitas exiguæ materiæ nocentiſſima, quæ correctionem & præparationem ad excretionem indicat, vitæ maximas ſruit inſidias, ſæpe etiam non tam expellenda, quam materia peccans eſt reſolvenda.

28. Et ſane magni erroris imprudentiæ coargui poſſit natura, quod in febribus tam vehementes motus, reſolutionis & excretionis ergo, faciat; cum notum ſit excretionem nec non ſecretionem non melius atque feliciter ſuccedere, quam ſi non nimii & effraenes, ſed moderatiores paullo ſint fluidorum motus. Sententia itaque noſtra eſt; excretionem, quæ fiunt, diebus criticis ſolvuntur, non cauſam eſſe ſoluti, quam potius victi jam morbi ſignum; dum nempe natura quieta reddita, & deſinentibus in fibris irregularibus & ſpaſticis motibus, jam liberalior ad emunctoria corporis ſanguinis & humorum etiam impuritate, quæ in morbo gignitur, non carentium appuſſus & ſecretio ſit expeditior. Nam ſi copioſiſſimæ etiam excretionem extra criticos dies & in ipſis, ſine dolorum levamine & virium augmento, fiunt, nullius tamen ſunt efficaciam, adeo, ut etiam cum largis excretionibus mors interdum eveniat, maniſteſto documento, non excretionem eſſe, quæ morbum levat. Qua de re omnes evacuationes, quæ non in & cum morbi decremento fiunt, ſymptomaticæ vocantur: criticæ vero; quæ ex virium augmento & naturæ robore & vigore oriuntur.

29. Excretionem per urinam copioſam, nec non urinæ tenues aquoſæ, ſudores quoque largi ſine alleviatione ſymptomatum nunquam tutæ ſunt, veterum ac recentiorum auctoritate & experientia id ſatis monſtrante; teſtantur enim morbi materiam nondum eſſe ſubactam, alias ſymptomata quieſcerent, ſed mixturam ſanguinis ejufque vinculum cum ſero deſtrui, fluidas & aquoſas partes à craſſioribus ſeparari; unde etiam copioſæ tenues urinæ, probe id olim annotante *Hippocrate*, delirium præſagiunt; ſanguis enim craſſior factus, ſubtracto ſero & præteritum ſub impuſſu arteriarum languidiori, facile in meningum vaſculis ſtagnat, & phrenitidem ingenerat. Quandocumque vero abſceſſiones v. g. variolæ, morbilli, petechiæ, citius, quam ordinatum tempus poſtulat, mox primis diebus erumpunt, infauſtum omen eſt, ſiquidem materiam copioſam & non bene coctam & temperatam denotat.

30. Docent jam adducta hætenus, excretionem in diebus criticis non eſſe cauſas ſolutionis morbi, ſed potius effectus ſuperatæ jam cauſæ morbiſicæ. Maniſteſtum habemus exemplum in paroxyſmis intermittentiis, ubi ſudores, qui in paroxyſmis fiunt,

fiunt, nihil juvant; quando vero cunque in declinatione contingunt, utilitatem præstant, non quod materiam formalem febris ejiciant, sed quod testentur de moribus irregularibus & ipsalimis febrilibus jam cessantibus. Nihilominus & multas excrementitias fordes, quæ in ipso morbo prognatæ sunt, secum evehunt. Quin imo observamus in omni graviore dolore, non prælici sudorem, simul ac vero ille libere fluit, indicium sublatis doloris est, toni fibrarum relaxati & circuli sanguinis liberioris redditus.

31. Ex jam dictis & expositis clare apparet utique observationem crileos, criticorum dierum fundamentum in natura habere & usum in praxi medica; sicut enim nihil fit & producit sine tempore, sed omnis effectus certo tempore eget: ita, ut causa morbifica corrigatur & ad evacuationem præparetur, certum requiratur tempus. Nam sicut ad generationem causæ morbificæ definitum tempus est necessarium: sic & ejus correctio & propulsio e corpore simili modo certo temporis spatio conficitur. Contingunt vero hæc alternationes, correctiones, & materiæ morbificæ immutationes septimo, semi-septimo, undecimo, decimo quarto die secundum naturæ cursum ordinarium. Quicunque itaque medicus contra hunc ordinem agit; i. e. qui ante tempus, quod natura requirit ad morbi materiam subigendam, cum impetu & vi agit, & morbum expugnare studet, is & præposere & temere agit, & errat. 2) Quando materia coquenda & temperanda est, & expulsionem moliuntur, eumque in finem volatilibus, sudoriferis, venæ sectione medici utuntur; hi contra naturæ legem peccant, & non leve

damnum inferunt: naturæ enim lex medico quoque lex est. 3) In diebus criticis & circa hoc præstat à fortiter evacuantibus abstinere, ne forsan in alia inconvenientia loca à congruis emunctoriis excernendi humores deriventur. 4) Si natura in expulsionem imbecillis est prudenter juvanda; evacuationes enim, si fiunt à naturæ robore & victo jam morbo, utiles sunt; dum corpus à multis excretionibus noxiis, quæ ipso tempore febrili tam in vasis, quam intestinorum tubulis generatæ fuerunt, liberant, alioquin non bene succedentes evacuationes recidivas facile inducunt. 5) Evacuante & moventia juxta HIPPOCRATIS canonem *sect. II. aph. 25.* mox in principio febris obtinent locum, si materia turgeat, i. e. si sanguis copiosus & vasa, primæque viæ impuris sordibus scatent; quales depletiones naturæ mirifice succurrunt, & impedimenta curæ malique fomenta tollunt. 6) Quando vero prudens medicus ob materiæ malignitatem, motus naturæ irregulares periculosas metastases observat: tunc nullo temporis respectu habito sanguinem resolvere, ad alia loca derivare, & ejus stagnationem per providam laxationem, venæ sectionem, diaphoresin, externam discutientiam, quandoque per sectionem sub lingua vel narium scarificationem impedire debet. Hic enim crisin expectare, cum mortem signa certissima significant, esset vesaniæ; unde sæpius vidimus, alvum stimulantia innoxia, ut & salina nitrosa cum auro fulminante mixta, cum circumspectione data inexpectatos tali in casu faustissimos successus edere. Sed hæc de crifibus adduxisse sufficiant.

DISSERTATIO MEDICA

DE

CERTO ET RATIONALI MORTIS IN MORBIS PRÆSAGIO.

§. I.

TRia potissimum sunt, quæ medicum, si officio suo recte defungi velit, commendant, eumque perfectum & omnibus fere numeris absolutum reddunt. Primum, ut ex accurate notatis observationibus veras morborum, quibus humanum genus affligitur, origines & causas evolvat atque indaget, ut morborum primordiis mature opportunis auxiliis, ne in actum erumpant, occurrere possit, vel etiam, ut hisce cognitis salubria dare possit præcepta, ne homines in morbos tam facile incidant. Alterum est, ut morbos ratione genii sui, & pro differenti corporum ægrotantium natura, probe cognoscat, & ad eos tollendos apta auxilia & remediorum genera inveniat. Tertium est, ut prudens de morbi eventu, vel etiam de medicamentorum operatione atque effectu judicium proferre sciat. Quamvis autem hoc postremum non directe ad finem artis obtinendum pertineat: non tamen est dubium, quin non parum ad artis certitudinem & existimationem medici conferat. Quamobrem præclare statim in principio *Prænotionum* HIPPOCRATES, artis prognosticæ facile princeps, hunc in modum differit: *Medicum prænotionem adhibere optimum esse mihi videtur, prænotans enim & prædicans apud ægrotos & præsentia & præterita & futura & quæ ipsi ægroti delinquant, exponens fidem utique fecerit, quod*

Frid. Hoffmanni Oper. Tom. VI.

ægrotorum res magis cognoscat. Quare audebunt homines se ipsos medico committere. Hisce addenda etiam sunt, quæ *Libr. II. prædictor. Sect. III.* prodidit, dum ait: *in prædictionibus medici illius probe memores esse debent, quod si cui successerit prædictio, is apud ægrotum intelligentia præditum in admiratione fuerit. Si vero quis aberrarit, supra hoc, quod odio habetur, fortasse etiam insanire videbitur.* At vero, quam excellens & divina fere hæc præfagiendi in morbis scientia est, tam difficilis, tam infida, incerta & dubia ea deprehenditur, adeo, ut non immerito judicium de morborum eventu formandum in difficillimis sit, id quod inter alia optima rerum magistra docet experientia, dum medicorum etiam peritissimi sæpius in prædicendo morbi eventu mirum falluntur, adeo, ut subinde ægrum, de cujus salute securi fuerunt, interire videamus. Neque hoc diffitetur ipse *Hippocrates*, dum omnes prædictiones in morbis acutis ratione salutis & mortis incertas pronuntiat. Atque etiam, ob difficultatem hujus scientiæ, inter conjecturales artem medicam viri sapientissimi, & inter eos maxime medici, reponere non dubitarunt, & vulgus incertitudine harum prædictionum non modo artem nostram incertam judicat, sed & medicos inde contemnit.

2. Fatendum quidem est, vix ullam medicinæ partem tam incertam & dubiam esse, vel tantis laborare difficultatibus, quam judicatoriam, quæ à Græcis

απορροσιν vocatur; ego tamen non plane despero, fore, ut in scientiæ formam etiā hæc ipsa redigi & certis regulis universalibus sive axiomatibus, imo definitionibus firmari possit, si modo, quæ necessaria sunt ad hanc obtinendam, recta præsidia & media adhibeamus. Ante vero, quam hæc ipsa indigitemus & nobilissimam hanc materiam paulo penitus excutiamus, non alienum erit, exponere primum causas, quæ impediverunt, quo minus ad scientiam hæc ars pervenire potuerit. Inter has itaque primo loco observationum defectum ponere licet; nam sicut accurate conscriptæ & completæ observationes & morborum historiæ primum & verum artis nostræ constituunt fundamentum, ex quibus discere & depromere licet, quid in rerum natura fiat, quinam effectus in hoc vel illo morbo producantur, & quæ mutationes in corporibus ab his vel illis rebus humanis contingant: ita etiam perfectæ & plenæ observationes nobis circumstantias, materiam atque occasionem recte judicandi subministrant. Ex his igitur omnibus probe collatis medicus, judicandi non modo facultate, sed & principiis artis veris mechanico-physicis & anatomicis instructus, non modo præteritorum & præsentium, sed & futurorum causas adæquatas & veras inquirat & inveniat, ex quibus postea ingens periculum morbi, vel mortem ipsam, aut etiam salutem & convalescentiam optime prædicere poterit. Cum vero veteres non ex integris morborum historiis & observationibus, sed ex paucis tantum circumstantiis suas regulas prognosticas, quarum maxime copia in *Hippocratis* & aliorum, qui ejus vestigia sequuntur, monumentis reperitur, deduxerint, non mirum est, eas rarius respondere, sed sæpius potius fallere. Deinceps, quia veteres vera medicina rationali carebant, cum neque vitæ, neque morborum aut mortis, in quo posita sit, naturam atque causam intelligerent, & structuræ corporis humani atque ex ea pendentium motuum ignarissimi essent, non poterant etiam ex observationibus, licet plenissimis, veras causas ac notas & signa futuri eventus, ratione salutis & mortis, multo minus operationis diversæ remediorum exinde convenienti modo ac ratione elicere. Ex quo utique sequitur, veteres, uti ceteras, ita etiam hanc medicinæ partem mere empirice tractasse; quod ita explicandum mihi videtur: si quis e. g. febre acuta laboravit & sub his vel illis symptomatibus mortuus est, idque aliquot vicibus observavit, statim inde formarunt regulam, hæc symptomata esse mortis indicia. Quoniam autem hæc ipsa pro diversitate subjectorum, morborum, regionum, temporum etiam morbi mirifice variant, hinc innumerabilia fere, apud veteres præsertim, consignata sunt præcepta, quæ tamen rarius respondent, adeo, ut etiam princeps hujus artis magister, qui fuit HIPPOCRATES, ob incertitudinem ejus, tandem exclamare non veritus fuerit: *prædictiones in acutis ratione salutis & mortis admodum sunt incertæ.*

3. Ut igitur nobilissima hæc de morbis divinandi scientia majorem lucem & incrementum accipiat, & cum tempore inter scientias locum inveniat: in morbi processu vel historia omnes fere ponderandæ sunt circumstantiæ. Neque enim sufficit morbum vel etiam ejus causas nosse, sed maxime omnium notitia corporis ægrotantis accurata scitu est necessaria. Multum enim refert scire ad recte judicandum, quæ ætas ægrotantis, quæ vires, quis viscerum status, qualis sanguinis & humorum sit constitutio, quis corporis habitus, quæ vitæ ratio præcesserit, quod anni tempus, firmum an imbecille sit corpus, genus nervosum an ad motum anomalias & ad spasmos proclive sit; nec ne. Deinde etiam oportet scire, quænam morbi sint tempora, in quibus hæc vel illa pathemata aut affectiones incidunt. Præterea inquirendum est, qua

methodo quis curatus fuerit, an error ab ægrotante vel medico commissus. Ex hisce probe cognitis demum judicium formandum est, quænam signa vel symptomata sub his vel illis circumstantiis, in hoc vel illo subjecto salutarem vel funestum habeant eventum. Accidit enim sæpiissime, ut certum symptoma ejusdem morbi in hoc corpore lethale, in altero minime lethale sit. Ita sæpius videmus, infirmos, in quorum numero sunt senes, & qui morbo præcedente, vel etiam inedia aut animi diuturno affectu fracti sunt, si dolore ex calculo vel etiam colico corripuntur, sub levissimis sæpe symptomatibus, quæ nihil periculi habere videntur, & quæ impune robusti ferunt, fatis cedere. Idem quoque observare licet in acutis passionibus, ubi sæpe, qui graciliores sunt corpore, & partes exquisitius sentientes habent, in acuta febre gravissimis anxietatibus, doloribus, vigiliis cum delirio etiam junctis & vehementi siti torquentur, & tamen evadunt; quum ex adverso, qui spongiosioris sunt habitus corporis, qui viribus fracti sunt, ex eadem febre decumbentes, non adeo de incommodis quibusdam, neque de ullo dolore, aut siti, aut vehementi aestu conquesti, levi accedente externa corporis refrigeratione & delirio, in statu morbi moriantur. Deinceps quod attinet ad morborum tempora, utique horum consideratio multum confert magnamque vim habet ad phænomena in morbis dijudicanda. Ita notum est, epilepsiam sæpiissime, præsertim in ætate infantili, variolarum initiis sine ullo periculo & noxa accedere: cum tamen hic affectus in vigore morbi funestum certissime declaret eventum. In eodem variolarum morbo inter initia phrenitis sæpius in juvenili corpore observatur omni vacans periculo. Quod si vero circa nonum vel undecimum diem infestat, in propinquo mortem esse significat. Atque ideo probe omnia sunt in prognosi discernenda, distinguenda, ponderanda. Quare sapientissimum est monitum illud HIPPOCRATIS, quod extat *Libr. Prædictor. II. §. 3. consulo, ut medici quam prudentissime agant, tum in reliqua arte, tum in hujusmodi prædictionibus.* Nam certe medicus nulla re turpius, quam ejusmodi vanis & temerariis vaticiniis, vocularum hominum incurrit, vel apud vulgus in contemtionem adducitur, præsertim, si quis ceu moribundus deferitur à medicis & postea convalescit, vel si spes frustratur & moritur quidam, de quo medicus plane fuit antea securus. Novi medicos, qui juramento confirmant ægros non morituros, qui tamen elapsis aliquot horis extincti fuerunt.

4. Igitur ego sum hac in sententia, utut prognosticandi ars valde difficilis sit: maxime omnium tamen esse laborandum medico, ut certa aliqua signa & notas futuræ mortis cognoscat, id quod etiam obtineri posse non despero. Nam illud negari nullo modo potest, omnes eventus, sive ad salutem seu mortem spectent, à certis & adæquatis & proportionatis causis proficisci, neque sine iis fieri posse. Quod si itaque causas, cur homo per morbum mori necessario debeat, probe noscat, earumque causarum indicia, quibus se manifestare debent, in ægrotante probe observet; nullum est dubium, quin ex eorum præsentia futurum eventum prævidere possit. Simili ratione si quis probe sciat medicus, quo modo, quo tempore, quibus viis aut excretionibus morbus solvatur & homo ad sanitatem perveniat, utique ex iis præsentibus confidenter, nec sine certa ratione, salutem futuram conjicere poterit. Hisce positis jam statim præeximium illud monitum adjungere licet, quam perverſe ii agant medici, qui antequam satis certas futuræ salutis vel mortis habeant vel habere possint notas, nimis temere & inconsiderate statim inter initia vel progressum morbi judicium de ejus eventu interponunt.

Nam,

Nam, si ullum quid, certe hoc fallit, à morbi nempe principio ad ejus finem non esse firmum judicium ferendum. Sæpe enim lenissime morbus incipit & mitissime videtur procedere, sed si ad statum pervenit, brevi omnia in pejus ruunt.

5. Illud vero, antequam ulterius progrediamur, sciendum est, minime hanc mentem esse nostram, ac si medicus, ineunte vel progrediente morbo, ejus eventum ratione salutis & mortis prænoscere possit, quod vulgus putat, & subinde judicium à medico hac de re postulat; sed hoc urgemus & intellectum volumus, dari certas notas atque indicia, quibus tum in acutis, tum in chronicis passionibus funestum eventum prævidere & declarare possimus, ut vero hoc præstemus, expectanda esse illa tempora, quibus hæc indicia se prodant. Deinde quoque aliud est morbum, num multum habeat periculi, declarare, aliud est, mortem sequenturam prædicere. Illud quidem ex ægrotantis natura & viribus morbiq; genio vel in principio statim conijcere licet; hoc vero non certo prænuntiare possumus, nisi vera mortis indicia præsto sint. Quanam vero sint illa, de quibus certi & securi esse possumus, futuræ mortis in quovis magno & dubiæ spei morbo indicia, illud nobis jam excutiendum est. Priusquam vero illud adgrediamur, non alienum, sed maxime è re erit, mortis theoriæ ejusque veras causas paulo accuratius evolvere, quo postea eo melius ratio eorum, quæ dicturi sumus, appareat.

6. Veteres uti solidis ratiociniis in re medica prorsus destituti erant, ita certe inanis esset labor, si quis ex eorum monumentis discere vellet, in quonam mortis natura atque essentia posita sit. Nam illi nihil aliud adferunt, quam quod vita in calidi innati & humidi radicalis temperamento, mors vero in extinctione horum consistat. Verum cum hæc nihil nisi obscurum conceptum in mente humana relinquant, certe nihil circa præsens negotium solidi exinde vel demonstrari vel inveniri potest. Postquam vero nostris temporibus per rerum naturæ studium ac contemplationem, neque minus per solertissimam corporis humani, beneficio anatomes, structuræ indagationem, disciplinæ medicæ maxima lux accessit, & nobilissimum, imo divinum illud circulationis sanguinis inventum manifestatum fuit, vitæ & mortis rationem non amplius in obscuro esse positam clarissime intelligitur. Nam quemadmodum perenni & libero sanguinis & humorum circuitu corpus, putredini alias in se & sua natura valde obnoxium, ab omni corruptione vindicatur & integrum durat, omnesque actiones tam naturales, quam animales salvæ permanent, robur quoque tam animo, quam corpori præsto est: ita circulo illo penitus destructo, non modo omnes & animi & corporis vires perire, eorumque functiones omnes cessare & corpus protinus in putredinem ruere animadvertimus. Ex quo intelligitur, mortem tunc adesse, & recte pronuntiar de corpore, si fluidorum progressus ille & in circulum abiens motus ita extinctus est, ut nulla arte vel ratione amplius revocari possit. Sicuti vero ille fluidorum circuitus à cordis, articularum & omnium canalium, qui fibris nerveis motricibus instructi sunt, motu, impulsu & tono dependet; ita etiam mortis causa non aliunde, quam à cordis & articularum pulsu, neque minus à thoracis motu sive respiratione penitus destructa derivanda est. Quomodo vero ille motus in morbis ex toto intercipiatur, illud jam venit explicandum.

7. Quemadmodum itaque morborum propria sedes, ita etiam mortis causa non rectius, quam ab arte anatomica, sive accurata inspectione corporum morte extinctorum, petenda est. Jam vero, si corpora, morbo quocunque etiam extincta, anatomico cultro subjiciamus, statim evidentes mortis causæ sensibus & in-

tellektui sese manifestant. Nam sive quis ex morbo acuto sive ex chronico factus mortuus, semper partis cujusdam corruptio quædam putredinosa, cum ingenti foetore juncta, in conspectum venit. Vel enim semper & ubique in nobiliori quadam parte interna, sive in ventriculo & intestinis, sive intra cerebrum ejusque membranas, sive in hepate; utero, renibus; liene aut pulmonibus, corruptio quædam putrida & sphacelosa offenditur, quæ naribus vix tolerabilis est, & hæc ipsa vel ex sanguinis stasi sive inflammatione, quæ mortem in acutis ingenerat, vel ex stagnatione aut extravasatione sanguinis & humorum in præcipuis cavitatibus, capite videlicet, thorace aut abdomine, enata deprehenditur; quod ultimum maxime fit in morbis chronicis, ubi viscera, præsertim in thorace, abdomine, aut pure aut sero extravasato corrupta conspiciuntur. Nunquam enim dissectio corporum fit ex gravi quodam capitis morbo, v. g. apoplexia, epilepsia, lethargo defunctorum, ubi non vel stasi sanguinis inflammatoriam & sphacelosam in meningibus videre licet. Idem animadvertimus, si quis ex gravissimo pectoris morbo diem suum obiit. Nam in pleuritide profunda & peripneumonia tota pulmonum vasculosa compages sanguine corrupto infarcta & obstructa est. Si quis ex phthisi perit, pulmo ex purulentis tuberculis obsessus, vel ejus major pars pure corrupta & exesa deprehenditur. In convulsivo asthma ordinario ingens collectio aquarum in thorace finem vitæ facit, inque catarrho, qui subito jugulat, suffocativo in pulmonum bronchiis vel feri vel sanguinis collectio, aëris liberum egressum & ingressum impediens, reperitur. Si quis vero mortis causas in morbis chronicis, qui sedem & domicilium in abdomine suum fixum habent, perscrutari velit, is semper in cachexia & hydropo induratum vel corruptum hepar & omentum cum magna extravasatione feri inveniet. In morbo sic dicto nigro Hippocratis valde funesto lien ut plurimum magnus, infarctus & corruptus, neque minus extravasatio sanguinis in ventriculi atque intestini ilei cavitate conspicitur. In passione iliaca pæne mortifera, in atrocissima colica, cholera, dysenteria, cardialgia lethali inflammata, sphacelosa & erosa cum summo foetore ventriculi ac intestinorum partes invenire licet. Quem atrocem ex calculo, in urethere firmiter hærente, dolor interficit, is inflammatum maxime ventriculum habet, viis quoque & ductibus urinalibus ipsisque renibus male affectis & corruptis. In morbis uteri, qui foeminas necant, ipse vel inflammatus vel exulceratus aut sphacelatus, vel extravasato sero corruptus sese conspectui offert.

8. Quod attinet ad passiones acutas, inter quas principem locum habent febres, quæ plures mortalium in flore ætatis è medio tollunt, & vitæ humanæ inimicissimæ sunt: ex profecto nulla alia ratione homines perimunt; quam partium internarum, præsertim ventriculi, inprimis intestinorum, meningum, inflammatione in sphacelum desinente, hæc enim nusquam non in febre enectis reperitur. Neque alia ratione venena, cujusunque etiam generis sint, quam sphacelosa inflammatione, quæ primas maxime vias infestat, interficiunt, quæ etiam mox dissectione facta sensus incurrit, adeo, ut hæc veneni adsumti certissimum inter alia præbeat indicium. Ubi vermes vitam tollunt, intestina identidem erosa & inflammata oculis sese offerunt. Ex quibus satis clare apparere arbitror, nunquam mortem facile contingere, nisi hæc ipsa à putredine & corruptione partis cujusdam internæ proficiscatur, ita prorsus, ut putredo vitæ inimicissima & mortifera recte dici possit. Nam sicut vitales sanguinis motus penitus exunctos totius corporis putredo certissime sequitur: ita illa

ipsa etiam est plerumque adæquata, vera, ac fere perpetua mortis causa, quæ vel externas partes, quod rarius, adgreditur, vel internas, quod frequentissime fit, partes obsidet: atque adeo vere adfirmare possumus, vix unum ex mille hominibus sine sphacelo mori. Jure autem hic excipimus eos, qui violenta morte pereunt, vel qui ex polypo, orificia vasorum claudente, subito extinguuntur. In ceteris vero omnibus, si post mortem aperiuntur, corporibus foetida putredo, nares molestissime feriens, percipitur.

9. Verum enim vero quamvis mortis causas evidentiores semperprehendere liceat in defunctis & dissectis corporibus: sapienter tamen hoc loco monendum esse ducimus, ne ipsas mortis causas cum morborum causis confundamus, quod sapissime contingere animadvertimus. Nam pluribus medicis id in more positum esse video, ut, si quis ex periculoso decedat morbo, corpus aperiendum esse suadeant, & quando postea internæ partes sphacelatae & corruptæ sese sistunt, hæc omnia adstantibus monstrant, & proponunt, non potuisse ob tantam læsionis vehementiam ægrum ullo modo servari, cum tamen manifesto causas mortis cum causis morbi hac ratione confundant: siquidem illud maxime in quæstionem venire debet, annon illæ, quæ mortem produxerunt, causæ convenientibus atque in tempore adhibitis auxiliis potuissent averti; qua ratione errores suos, si quos forsitan commiserunt, satis callide & astute apud ignaros tegere & occultare sciunt. Quum itaque mortis ratio sive natura in præsentanea & putrida corruptione sita sit, sapienter hic inferre licet, si quis servare velit ægrum, omni modo & cura laborandum esse medico, ut opportunis auxiliis & remediis corruptionem sphacelofam, quæ nunquam non à stasi & stagnatione humorum proficiscitur, præcaveat atque avertat, omniaque ea evitet, quæ ullo modo ad putredinem promovendam aliquid conferre possint.

10. Sed ut propius scopum nostrum attingamus, qui in eo vertitur, ut ex indiciis & signis quibusdam futuram hanc corruptionem advertamus & prænuntiemus, evolvendæ utique sunt causæ, per quas corruptio hæc mortifera intus gignatur. Uti enim in rerum natura nullus effectus fit sine suis certis & proportionatis causis; ita etiam pro certo adfirmare licet, certas dari hujus corruptionis in morbis causas, ex quibus præsentibus ratio prognoseos rectæ demum deducenda est. Prius vero, quam meditatio nostra ad explicationem harum causarum descendat, paucis saltem placet exponere, cur putredo vitæ humanæ tam inimica sit, ut etiam levior & non adeo magna sphacelatio, in parte ventriculi vel intestinis existens, subita morte hominem perimat. Id itaque hac ratione fieri nobis videtur: vitalis ille motus & circuitus sanguinis, à quo omnium functionum corporis integritas pendet, solidorum impulsu, robore & potentia motrice eorumque viribus sustentatur; hic autem non, ut quidam sentiunt, ab ente quodam materiæ experte, sed potius à subtilissimo, quod in sanguine & nervis est, fluido, ejusque influxu in has partes dependet, quod vel hoc unicum experimentum satis luculenter confirmat, dum nervo vel arteria, quæ ad partem abit, ligata vel præcisa, omnis motus, sensus & nutritio ejus perit. Deinde quod robur & vires partium à materiali quodam principio proveniant, vel illud documento sufficienti esse potest, quod inedia non modo vires pereant, sed & quod, congruis datis alimentis, vires consumptæ mox recuperentur. Jam vero in tota rerum natura nihil tam perniciosius reperitur, quod tam cito vires & robur adimat corpori, quam putredo, uti videmus in sphacelo, in cancro exulcerato, qui brevi tempore & vires & vitam adimunt. Ecquis itaque negare ausit, intus conceptam putredinem, præsertim

si sese diffundat & incrementum sumat, intine tetrum suum vaporem in partes maxime nervosas & motrices fibras dispergere, qui, cum tota sua natura fluido illi, quod motus regit solidorum, adversus sit, illudque corrumpat & quasi extinguat motus systoles & diastoles, tonumque & motum fibrarum penitus auferat.

11. Duplex igitur datur in morbis iter ad mortem: alterum est nimis subitum & præceps, idque fit per vehementes partium nervosarum constrictiones, quæ vel ex inflammationibus oriuntur, vel inflammatorias stases subinde novas in morbi vigore ingenerant, ad sphacelum & mortem tendentes, quod maxime contingit in febribus & passionibus acutis; alterum est paulo lentius & successive fit ex viscerum corruptione, humorum stagnatione & extravasatione, idque præcipue in morbis sic dictis chronicis obtinet. Quod attinet ad generationem mortis in morbis acutis sive febribus, illa plerumque evenit per spasmos vehementes, qui inflammationem ventriculi vel intestinorum, aut membranarum cerebri & mortiferam corruptionem post se trahunt. Est enim spasmus naturæ humanæ & vitæ semper & ubique insensibilissimus, eo quod humorum & sanguinis motum à circumferentia & ambitu corporis ad interiora convertit & dirigit, & saluberrimas excretiones, quæ vitæ & sanitati patrocinantur, impedit & cohibet. Præterea spasmodorum ea est potentia, ut liberum & æqualem sanguinis circuitum, in quo sanitatis ratio posita est, impedian, eumque inæqualem reddendo nimias congestiones sanguinis in nobilioribus partibus, præsertim in capite, corde, ventriculo & intestinis efficiant, quæ si non superantur à natura per commodam discussionem & resolutionem, corruptio & mors certissime sequuntur. Nam in omni motu sic dicto naturæ, sive febre, duplicis generis motus junctus occurrit, & probe attendi & à se invicem secerni debet: alter est valde perniciosus qui fit à circumferentia ad centrum, & hic est spasticus, semper morbosus, qui ad destructionem naturæ & motuum vitalium tendit, & frigore, rigore, horrore & pulsu parvo, debili atque anxietate sese manifestat; alter est valde salutaris, qui spasmus subsequitur & huic contrarius est, atque à centro ad circumferentiam dirigitur, sive ab interioribus ad exteriora vergit, & calore ac pulsu celeriori & validiori sese manifestat, & hic quasi interna naturæ medicina est, corpus ab omni destructione vindicans, cujus beneficio exitiales illæ spasticæ partium strictiones resolvuntur, laxantur atque inflammatoriæ stases discutiuntur, tubulique excretorii antea clausi & contracti felicissime aperiuntur. Hic est ille motus, quo veteres naturam medicatricem indigitarunt, cujus ministerio morbi vincuntur, homo convalescit & mortis periculo eripitur: hic etiam est, sub quo nemo moritur, quod potius fit sub spasmō, qui ipsi est contrarius. Quicumque itaque ex medicis horum motuum sibi oppositorum, unius quidem salutaris, alterius vero perniciosi, genium, potentiam, effectus & mutuas eorum actiones & relationes probe novit atque cognoscit, is magna cum ratione & prudentia in morbis agere, sapienter pericula prædicere & faustos eventus prænuntiare optime valet; is quoque veterum phraseologias medicas v. g. febrem esse naturæ pugnam cum morbo, & convalescentiam fieri si morbus naturam superet, perquam facile intelliget. Nam si spasmi, inflammationes, congestiones ac stases sanguinis, in se mortales, à motu calido, resolutorio, febrili, certo interposito tempore, non digeruntur ac discutiuntur, sed illæ superiores sunt, tunc utique succumbit natura, & ægrum mori oportet. Cum vero dentur certa indicia, quibus & victoria naturæ super morbum & morbi super naturam

naturam prævideri & dijudicari possit; liquido apparet, artem illam præfagiendi, quæ *πορρωσικη* à græcis dicitur, certis utique niti fundamentis.

12. Visum itaque nobis est, effectus & indicia illa spasmodorum lethiferorum non facile fallacia in acutis hoc loco breviter strictimque exponere, quæ si circa dies sic dictos criticos, corpore à morbo debili reddito, apparent, nec evanescent, aut incrementa sumunt, certus de sinistro morbi eventu poterit esse medicus. Neque vero exitiales hi spasmi tantum in una parte, sed in pluribus sese manifestant. Igitur si rigor cum frigore circa morbi vigorem observatur, vel sæpius recurrit, si corpus non æqualiter molle, sed durum, calidum & asperum est, & exanthemata à spasmo cutis retrocedunt vel minuuntur, si exteriora horrent & frigent, si fonticuli vel ulcera præsentia nihil amplius humoris emittunt, indicia certe hæc sunt, quæ nihil boni portendunt, sed potius summum mortis periculum minantur: quia propter cutis spasmos sanguinis & humorum motus versus interiora pessimas inflammatorias congestiones facile suscitatur, & impedit, quo minus morbida materia perspiratione à corpore possit expelli. Pergunt plerumque spasmi in acutis morbis etiam ad alia excretoria, vias nempe urinarias, alvinas, quarum constrictione efficiunt, ut urina tenuis & aquosa reddatur, & alvus plane dura, tensa & occlusa sit. In quibusdam ob urgentem spasmus frequens mejendi & desidendi est desiderium.

13. At vero gravius imminet periculum, & spastica illæ contractiones interiores & nobiliores, quæ motibus vitalibus vacant, partes infestant. Nam pulsus parvus, contractus, celer & durus, item inæqualis & intermittens, non aliunde, quam à spastica & convulsiva strictura nervorum, qui in cordis fibras & tunicas arteriarum desinunt, proficiscitur, & semper in statu morbi plurimum periculi ostendit. Ejusdem pessimæ notæ respiratio crebra, anxiosa & difficilis est, si in critica tempora incidit; nam sicut, sapientissimo Hippocratis effato in *Prognosticis*, facile spirare magni momenti est ad salutem in omnibus morbis, ita spiratio crebra & ægra in acutis nihil boni unquam ostendit. Si nervos præcordiales feralis exercet spasmus, summæ anxietates, inquietudo & jactatio corporis, crebraque lecti & situs mutatio contingunt. Si idem spasmus œsophagi & ventriculi membranas nerveo-musculares occupat, ad vomendum conatus, regurgitatio potionis, item seri limpidi ex faucibus non infrequens extrusio, difficultas in deglutiendo atque inexhausta sitis cum oris & linguæ ariditate se produnt, sique in consensum duodenum rapitur, flavo colore corpus maximeque facies tingitur. Ubi vero profundior spasmus totum genus nervosum graviter concutit atque convellit, ad ultima jam ventum esse, indicio sunt nares acutæ, collapsa tempora, frigida languidaque aures, oculi concavi, cutis circa frontem dura & intenta, color niger aut perpallidus, quibus facies Hippocratica, certa mortis index, describitur. Deinde nervorum distentionis, quæ semper in acutis terribilis, juxta *aph. VI. sect. IV.* indicia sunt, ubi æger supinus cubat, eique genua contracta sunt, ubi deorsum ad pedes subinde delabitur, ubi brachia & pedes nudat & inæqualiter dispergit, ungues digitique pallidi sunt, sique manibus floccos legit, fimbriasque diducit, vel in adjuncto pariete, si qua minuta eminent, carpit. His quoque adjungi debent subsultus tendinum, quæ omnia si apparent, in propinquo mortem esse denunciant.

14. Quamvis vero plurimæ ex acutis internam quandam partis inflammationem pro causa, agnoscant, atque ob id periculo non careant: sæpissime tamen in ipso vigore & vehementia morbi inflamma-

tiones novæ & quidem in ventriculo, vel in membranis cerebri supervenire consueverunt, quæ nunquam non valde terribiles sunt & mortis prænunciæ. Atque hæc inflammationes, vel separatæ, vel simul junctæ, non modo in malignis, petechialibus, contagio infectis ac castrensibus febribus, sed & in aliis acutis, synochis, ardentibus, purpuraceis, variolis, morbillis circa septimum, nonum vel undecimum diem supervenientes, certissime hominem perimunt. Cognoscitur vero inflammatio ventriculi ex eo, si magnus æstus, & quasi incendii sensus, cum acuto dolore circa præcordia est, & locus circumscriptus tactu durus, extrema inalgescunt, summaque anxietas & inquietudo jungitur, sique omne, quicquid vel medicamenti vel potionis assumitur, vel protinus vomitu ejicitur, vel retentum summam creat molestiam augetque anxietatem. Quandoque tanta est inflammatio, ut per œsophagum ad ipsas fauces transeat, quæ ardentibus dolorificis pustulis obsidentur, & viscido putrido muco continuo obducuntur, quæ omnia futuræ mortis præfagia sunt. Altera inflammatio, quæ sæpissime huic jam dictæ jungitur, & brevi ante mortem accedit, adhuc periculosior, membranarum cerebri est, quam Græci phrenitin vocant, quæ plerumque assiduam & pertinacem vigiliam, capitique vehementem dolorem sequitur. Eam prænunciare solent præcedens rigor, urinæ copiosæ & tenues, aurium tinnitus, fortis pulsatio in capite, paucæ sanguinis ex naribus stillæ. Ejus vero præsentia his signis innotescit: rubicundi, flammei & truces sunt oculi, alienatio est mentis, verba sine sensu & ordine proferuntur, interrogati omnia aliena respondent, lacrymæ sæpe effunduntur involuntariæ, dentibus strident & nulla amplius humidi est appetentia. Convulsio, si phrenitidem sequitur, haud dubia significatio mortis est. Hæc sunt principales afflictiones, quæ homines in acutis jugulant. Hoc mortis genus per vehementes inflammationes & spasmos maxime subeunt temperamenti sic dicti sanguinei, cholericæ, vel sanguineo-cholericæ, ætate juvenes & viri, teneriori sensu præditi, ad iram proclives, habitu corporis macilenti & contracti, & qui victui valde spirituosissimo indulserunt.

15. Aliud genus mortis obeunt etiam in acutis & continuis febribus, qui repleti & spongiosi sunt habitus corporis, phlegmatici, & qui vel per morbos, inedia aut diuturnam tristitiam, vel sanguinis profusiones vires exhausserunt. Nam hi non tam per vehementes spasmos & gravia ac dolorifica pathemata à medio tolluntur, quam potius ex motuum imbecillitate atque defectu partiumque atonia, roboreque & viribus dejectis vitam finiunt. Atque in ejusmodi casibus stagnationes ac stases humorum ac sanguinis in putridam corruptionem statim in principio inclinant. Et hi morbi, quia lenibus incedunt symptomatibus, sæpissime fallunt medicorum spem, eorumque præfagia eludunt; unde etiam ob non tam evidentem, sed magis occultam perniciem difficilis sunt judicii, & malignis annumerari solent. Cognoscuntur vero his indiciis: cum levi frigore & horrore oriuntur, sed summa statim inter initia virium est prostratio, pulsus languidus & frequens simulque contractus, in situ erecto facilis est animi defectio, urina tenuis & sine sedimento, nullus somnus, ad eum tamen perpetua inclinatio, quem etiam major virium prostratio & mentis alienatio sequitur, de nullo dolore, siti vel magna molestia conqueruntur, nihilominus valde inquieti sunt, jactantur, sique extrema algescunt & pulsus incipit deficere, neque in carpo manuum amplius percipitur, mortis in vicinia ægros esse positos rectissime colligitur. Quamvis vero & hi homines non sine inflammatione ventriculi & membranarum cerebri moriantur; ea tamen non

tam gravibus spasminis & symptomatibus juncta est, sed facilis ad corruptionem est transitus.

16. Cum vero omnes inflammationes demum in necrosin sive sphacelosam corruptionem terminari soleant, non alienum videtur & hic subjungere quasdam notas, quibus transitus inflammationis in sphacelum significetur. Sunt vero hæc sequentes: internus quidam frigoris sensus percipitur, & dolor ante acutus & acerbus circa caput vel inferiores partes subito definit, & mens antea delira ad se quodammodo redit, virium vero defectus major fit; pulsusque ex toto deficit, vel valde inæqualis, angustus & intermittens est, & alvus antea fortiter clausa se aperit vel præter voluntatem fluit, vultus foedus ac pallens apparet, tempora, cervices & pectus gelido sudore madent, extremæ corporis partes refrigescunt, pulsus plane deficere coepit, borborygmi ac sonitus in ventre oriuntur, & liquida immixta quando descendunt, sonum emittunt, tamquam cavo & profundiori vasi immitterentur. Hæc omnia mortem præ foribus esse manifesto demonstrant, quia ob sphacelum, vires fumentem, summa partium atonia & extremus virium lapsus adest. Si quando sanguine nimium redundantes subito ex sphacelo interno vita decedunt, aliquot post mortem elapsis horis horrendum in modum venter intumescit, & magnæ vesicæ oriuntur, & facies plumbea ac viridis fit, intolerabilis foetor adest, atque ex ore sæpius & naribus male olens cruor stillat.

17. Est adhuc aliud mortis genus, quod, qui ex gravibus pectoris vitiis ægrotant, subire debent, idque est suffocatio, qua pereunt & anginosi & peripneumoniaci, catarrho suffocativo laborantes, & quos asthma convulsivum & thoracis hydrops jugulat. Hi morbi non modo omnis aëris ingressum & egressum in pulmones liberum intercipiunt, sed & sanguinis per pulmonum vasa circuitum ex uno ventriculo ad alterum tollunt. Nam angina, quæ musculos laryngis internos occupat, & Græcis cynanche dicitur, ubi neque in cervice, neque in faucibus quicquam vel tumoris vel ruboris conspicitur, simul tamen summi doloris tormentum & vehemens febris est, citissime per suffocationem necat, tum profecto, ut verbis utar LOMMII *Lib. II. Medic. Observ.* oculi vertuntur & rubent & veluti iis, qui strangulantur, prominent, vox impedita nihil significat & qualis catulorum est, tenuis editur, os apertum hiat frigidi aëris cupidum, ex eoque spumans saliva movetur, lingua exeritur; potui datus liquor per nares remeat, ipse æger totus inquietus est, crebro & cubili exilit, tandem vero strangulatu atque syncope oppressus perit. Ita etiam præfocatione occidit peripneumonia, nam si nihil plane expuitur, sed magna adest & anxiosa spirandi difficultas atque angustia, inquietudo, sputum intus in pectore strepit, pulsus inæqualis & intermittens fit, & alvus infirmis jam viribus funditur, & quod tussi rejicitur, spumofum modo cruentum, modo flavum est, & simul continua vigilia urget & phrenitis sequitur, frigidique aëris hauriendi cupiditas maxima est, æger lubenter supinus & erectus cubat, nam in nares reclinatus enecare præfocatione videtur, quinto vel etiam septimo die ad summum certa mors sequitur.

18. Qui asthmate sic dicto convulsivo moriuntur, hos identidem suffocatio perimit, quod vitium nascitur plerumque ab hydropneumonia thoracis, subito per ruptas hydatides orto, quando nimirum ingentes inundationes aquarum pondere suo diaphragmatis motum & liberam pulmonum expansionem impediunt, ut nec aër ingredi, nec sanguis opportune eos transire possit. Oritur etiam hoc malum, quando tunica bronchiorum glandulosa interior, multis & magnis glandulis obsita, ita angustatur, ut nec spiritum in pul-

monibus contentum elidi, vel novum recipi patiatur. Sæpe etiam spasmus convulsivus tam fortiter bronchia convellit & coarctat, ut strangulatione ægri misere intereant. In omnibus hisce vitiis summa anxietas atque inquietudo, tremulaque adest spiratio, pulsus inordinatus & inæqualis, & sibilus ac strepitus in pectore percipitur, nec uno in loco conquirere possunt, & nil, nisi spumofum quidpiam aut cruentum è pectore extunditur; extremis tandem corporis partibus inalgescuntibus syncope & suffocatione pereunt. Idem fit in catarrho sic dicto suffocativo, qui maxime senes, imbecillos atque infantes perimit, & plerumque à paralyfi nervorum pneumoniacorum nascitur. In hoc vitio identidem spiritus cum summa difficultate, angustia & anxietate trahitur, & bronchia humore à sanguine secedente replentur, & quia nihil sputi excernitur, aër admissus magnum strepitum ac sonum edit, donec tandem ex aëris defectu æger suffocetur. Præter hæc jam dicta certa adhuc mortis indicia sunt, pulsus intermittens, parvus & ex toto desinens, quod sæpe aliquot horas ante mortem fit. Sæpiissime etiam turbatio supervenit cum extremorum frigore. In phthisicis, ubi magna in pulmone cavitas exesa ingentem purulenti humoris copiam recipit, si ob imbecillitatem virium non ejicitur, sed expectoratio cessat, mors brevi sequitur.

19. Expositis iis morbis eorumque lethalibus signis, qui suffocatione necant, proximum erit, ut quosdam adhuc acutos, qui & inflammatione & vehementioribus spasminis hominem è medio tollunt, persequamur, & quibus signis futura mors prævideri & prædicti possit, exponamus. Febris cum purpura alba, quæ lymphæ valde vappescentis & corruptæ soboles est, si in fine adsociatur aliis acutis febribus, item variolis, morbillis, vel etiam in puerperio post lochia suppressa accedit, nunquam expers est periculi, necat autem ut plurimum per inflammationem interiorum partium, præsertim ventriculi & intestinorum. Funestum indicium est, si æstum præcordiorum summamque anxietatem internus frigoris sensus cum pulsu parvo, debili, inæquali excipiat, purpura dispareat, animi defectio, mens turbata & spiratio difficilis fit. Variolæ si statim primis diebus cum gravi dolore lumborum & delirio invadunt, & mox secundo die exanthemata in cute apparent aspera instar purpuræ cum maculis, & die quinto & sexto post plenam eruptionem pulsus non sedatior fit, sed in eadem celeritate permanet, & totum corpus pustulis obsitum est; raro in juvenili ætate evasisse quenquam scio. Ardentissimus vero circa nonum diem ex exulceratione manuum dolor omnia statim, quæ spem salutis facere videntur, sæpe immutat: nam vehementissimus ille & æstuosus dolor, universum genus nervosum spasmis afficiens, summas parit anxietates, jactationes corporis, pustularum subsidentiam: postea respiratio difficilis, mentis turbatio, convulsio & pulsus parvus languidus supervenientes brevi interficiunt.

20. Quicumque à veneno validissimo emetico aut purgante sumto moriuntur, hos identidem inflammatio sphacelosa è medio tollit: dissectorum anatome id testante. Mortis vero futuræ præfagia sunt, si ardores internos & summas anxietates pulsus valde parvus & inæqualis vel plane deficiens sequitur, cum sudore frigido, delirio & convulsione, quam à medicamento purgante concitatam ipse HIPPOCRATES *sect. VII. aphor. 25.* & multis aliis in locis, mortiferam pronuntiat. Qui ex dolore à calculo vita decedunt, in iis plerumque inflammatio lethalis ventriculi & meningum supervenit. Nam si vomitum & acutissimum dolorem febris sequitur cum magna anxietate & siti vehementi, & postea singultus & delirium cum extremorum frigore accedit; non diu superstes æger

æger erit; in cholera, si acuti dolores & torsiones incidunt, & supra infraque magno impetu humores præfertim virides prorumpunt, & ingens afficit bibendi cupiditas, & facies flavescit, pallida fit, pulsusque parvus atque concisus est, non sine periculo morbus est. Si vero pulsus quoque totus concidit, & crura contrahuntur, frigidæque sudationes fiunt, animaque deficit, inflammationem in sphacelum transiisse non leve indicium est. Dysenteria si post alium morbum homine jam infirmo oritur, raro æger servatur: facilis enim est tunc transitus inflammationis in sphacelum. Pessimum adeoque sphaceli indicium est, si tormina acuta subito cessant, & æger refrigeratur summaque adest virium prostratio. Singultus, cardialgia, præcordiorum æstus atque anxietates summa ut plurimum præcedunt, & perniciosam ventriculi inflammationem indicant. In passione iliaca, ubi acutissimi sunt dolores cum contumaci alvi constrictione & vomitu assiduo, etiam male olente, si singultus, delirium, gelidus sudor, extremorum frigus, nervorum distentio accedit, ea omnia certissimæ mortis nuncia sunt, id quod jam dudum observavit HIPPOCRATES *sect. VII. aphor. 10.* dum ait: *ab ileo vomitus, singultus, convulsio aut delirium malum.* Eodem modo etiam atrocissima & convulsiva colica necat. Tam acerbus sæpenumero dolor in intestino recto à stagnante sanguine hæmorrhoidali urget atque affligit, ut non modo inflammatio, sed & lethalis sphacelatio hoc intestinum occupet, sub qua excrementa propter intestini putredinem foetidissima prodeunt; pulsus frequens & debilis cum summa sequitur virium prostratione; & ipse sphacelus sæpius ad partes externas atque scrotum serpit, animi defectio tandem & brevi post mors ipsa succedunt.

21. Plures in partu, vel post eum, itemque in puerperio mori foeminas notissimum est: quare etiam de funestis mortis indiciis ac præfagiis quædam dicenda sunt. Si mulier vel propter pravum situm infantis, præsertim grandioris, continuis spasmodicis, doloribus ac laboribus per aliquot dies assiduus atque ardoribus simul junctis internis vehementibus, quos pulsuum celeritas ostendit, valde defatigata est; accidit sæpius, ut in partu, vel etiam post eum, repente dejectis viribus, in animi forte deliquium vel affectum apoplexiæ similem, propter pulsus præsentiam, incidunt, & nulla arte vel ope vires & vitam recipere possint. Mortis indicium est, si affectus ad aliquot horas perdurat, neque penetrantissima medicina, qualis est spiritus salis ammoniaci cum calce viva paratus & oleo rutæ essentificatus, in nares intrusa, excitari possunt. Si facies ipso in paroxysmo colorata manet, indicium est, sanguinem, ex vehementioribus spasmodicis nimio impetu ad cerebrum delatum, hoc malum apoplectico per omnia simile produxisse, & plerumque post obitum ex ore & naribus serum sanguineum foetidum effluit. Si parturientes, foetu adhuc in utero mortuo, exspirant, sæpius ille post mortem ob jam nimis relaxatas vias & interiorum fermentativum motum foras ex utero propellitur. Quæ in puerperio è vita discedunt foeminae, ac ut plurimum, retento impuro sanguine, qui post partum ex utero salutariter per aliquot dies prodire solet, graves dolores antea patiuntur, quos si non excipit effusio lochialis sanguinis, sed fluxus magis stipatur, uteri plerumque inflammatio & febris sequitur valde exitiosa. Illam incendium ab inferioribus locis usque ad cordis regionem vergens manifestat: sique magna anxietas, virium prostratio, inquietudo & omnis appetitus defectio jungitur, postea sensus internus frigoris cum horrore accedit, ac pulsus frequens, parvus ac debilis jungitur, & visus incipit obfuscari; in propinquo mortem ex sphacelo esse hæc significant. Plurimæ ex puerperis integra mente mori solent, nam hæc antea tur-

bata paucis sæpe ante mortem horis ad se revertitur, ut imperitiores rem penitus in vado esse sibi persuadeant: sed ex pulsu moribundo prudentiores proximi exitii indicium desumunt. Si quando, ob nimiam sanguinis post partum & in puerperio profusionem lentus cum pulsu frequenti & debili calor assidue urget, neque etiam post somnum mane sedatur, & juncta est plenaria inappetentia viriumque dejectio, circa exitum puerperii, i. e. sexta septimana, syncoptica mors plerumque succedit.

22. Cancro exulcerato nemo facile servatur propter summam corruptionem, quam sanies nigra, tenuis, odore abominabilis testatur; lenta est febris & vires indies decrescunt, somnus anxius, laboriosus vel nullus, donec tandem animi defectio & mors sequatur. Accidit interdum, ut inflammationes in exterioribus partibus consistentes, cujus generis sunt erysipelata, podagra, chiragra, retrocedant, atque ad interiora pellantur, ac cito hominem rapiant. Neque vero id aliter fit, quam inflammatione & sphacelatione ventriculi aut intestinorum. Major perniciēs est, si in peste carbunculi vel bubones retrocedunt vel non satis prodeunt: nam tunc in certo vitæ periculo homo versatur: horrore enim homo concutitur, summe anxius & inquietus fit, æstus cum exterioribus algescentibus regionem ventriculi occupat, ad vomendum est cupiditas, vel etiam singultus accidit, postea sub mentis turbatione & syncope homo exspirat. Si quis ex nimia sanguinis profusione, quale quid contingere potest felici abortu, in hæmoptysi, in cruento vomitu, vel morbo nigro *Hippocratis*, aut gravi hæmorrhagia in febribus moritur, is quidem ex animi defectione ipsaque syncope vitam amittit; sed tamen notabile est, quod plerumque vehemens sitis, inclinatio ad vomitum & pulsus cum debilitate, frequentia & artuum distentione præcedat, indicio, sanguinem in partibus interioribus, ventriculo, capite subsistentem movere adhuc quosdam spasmodicos; nam sitis ex spastica strictura tunicae glandulosæ œsophagi ut plurimum oritur. Morbi, quibus infantes pereunt, sunt ut plurimum spasmodici & convulsivi, inflammationem & sphacelum præsertim ventriculi, intestinorum aut capitis, post se trahentes; nam ex acutis doloribus facile in epilepsiam & convulsiones, febres atque asthmata incidunt. Si epilepticus paroxysmus unus alterum consequitur, & alvus antea fortiter clausa sponte jam dimittit excrementa valde foetida & nigra, vox clangosa & singultuosa fit, totumque corpus ardet, in propinquo exitum esse judicare licet.

23. Restat jam, ut mortis præfagia in quibusdam etiam morbis chronicis exponamus. Hos inter vero eminent maxime hydrops, cachexia, scorbutus, marasmus, hæctica, phthisis ac tabes. Qui hisce decumbunt, lente transeunt ad mortem, propter lentius procedentem viscerum ex humorum stagnatione aut extravasatione corruptionem, quæ, quoniam nulla arte averti potest, certe mortem ingenerat. Indicia vero viscerum corruptorum in inferiori ventre, adeoque mortis secutura, sunt appetitus in totum prostratus cum eorum etiam aversione, quibus sani valde delectati fuerunt. Deinde lenta febris si incrementa sumit & celerior pulsus evadit: qui nunquam non corruptionem internam indicat. Denique summa virium cum respiratione difficili prostratio, somnus valde laboriosus & plus debilitans, quam reficiens. Hæc si diutius adfligunt & nullis remediis mitescunt, certo mortem præfagiunt, maxime si corpora sunt senilia, vel ex morbo præcedente in ejusmodi chronicam passionem delapsa. Hæc sunt quædam communes & exitiales chronicorum notæ: non alienum vero erit, quasdam in certis morbis specialiores adjicere. Itaque quod attinet ad phthisin, pessima & mortem indicantia signa sunt, si totum corpus tabe

consumtum est, si assidua atque hæctica febris urget, facie rubicunda, si profluit alvus, sudor colliquativus est sique pedes intumescunt, si sputum supprimitur, pallidi ungues, oculi concavi & nares acutæ fiunt. Si ex asthma diuturno cordisque palpitatione, vel ex induratione hepatis post quartanam hydrops sequitur, non facile servari posse hominem certo pronunciari potest, sique urina pauca, turbida, rubra redditur, omen est valde perniciosum, sique superiora gracilescent, & facies insimul flavescent, præfagire mortem aliquot menses antequam accedat, haud dubiose licet, quæ etiam certissime sequitur, febre aucta & respiratione difficili reddita. Quicumque sæpius, & maxime ex motu corporis & animi vehementiori, fortem & contumacem palpitationem cordis sentiunt, & postea asthma convulsivum vel hæmoptysin aut hydropem incurrunt, iis diu ante mortale periculum præfagiri potest, multoque magis, si quandoque animo delinquant. Nam horum omnium causa polyposa in cordis vasis concretio est, quæ nulla medicina tolli potest, & tandem hos morbos, concursantibus aliis causis, funestos ingenerat, sique subito & sine causa manifesta & frequenter incidit animi deliquium, identidem causa ejusmodi polypus est, & mortem, si frequenter incidit, repentinam inferre solet. Quisquis enim sæpe multumque sine evidenti occasione animo deficit, hunc recte *Hippocrates* innuit subito mori consuevisse.

25. Si hepar corruptio sphacelosa & mortalis occupat, tum fastidium adest cibi, maximeque carnis, frequens & multa est sitis, febris, virium dejectio, singultus, & vomitu subinde extunditur serum vel flava bilis & corpus sensim contabescit: quibus in casibus post mortem jecur plane sphacelatum, nigrum observavi. Ventriculi exulceratio longum etiam & lethalem morbum producit, & cognoscitur, si summa anxietas & vomitus cibum adsumtum excipit, quæ vitia, dato medicamento quodam acri salino aut spirituoso, augescunt, corpus contabescit, pulsus semper celer est, extrema partium rigent & quandoque horrent, fonticuli clauduntur, & somnus parvus & laboriosus fit. Hi tertio vel quarto mense demum moriuntur, & diu ante mortem prædicere possumus. In cachexia si totum corpus fit tumidum, inflatum, pallidum, si ciborum adest fastidium & crebrior male olens vomitus urget, & pauca per alvum feruntur, urina cruda & pauca, respiratio difficilis & totum corpus male olet; postea si frequens pulsus accedit & respiratio difficilis, mortem aliquot mensibus prænuntiare licebit, quæ eo certius sequitur, quo ægrotus majora errata in diætâ, in nimio potu commisit, vel mœstitia animi diuturna fuit fatigatus.

26. His jam expositis è re esse duco, quædam adhuc eximia ac salutaria præcepta & monita ad prognosin instituendam subjungere, quæ inter maxime eminet illud, quod probe morbi spasmodici chronici à passionibus acutis distingui debeant. Nam sæpissime in hypo-

chondriacis & hysteris ejusmodi pathemata occurrunt, quæ in acutis passionibus lethalem effectum denunciant, in illis vero minus periculi alunt. Quid enim frequentius est, quam quod sub paroxysmis maximas anxietates spirandique angustias cum extremorum frigore, urina aquosa, patiantur, pulsu existente parvo, debili, sæpiusque animi vehemens deliquium accedat, quæ tamen omnia brevi expirant, & sine periculo transeunt. Deinde probe morborum tempora sunt discernenda; nam ex iis omnibus signis, quæ modo attulimus, funestis, si quædam vel etiam plura sub initio & primis morbi diebus apparent, inconsiderate certe agerent, qui statim mortem præ foribus esse exinde judicare vellent. Aliud vero est, si viribus à nimio calore, vigilia assidua, inappetentia, anxietate dolore per plures dies fractis & exhaustis funesti ejusmodi spasmi, & ab iis oriunda symptomata, prodeant, maximeque iis temporibus, ubi morbus alias salutariter solvi solet, quod ordinario fit circa dies impares, septimum, nonum & undecimum. Postea magna semper est habenda ratio corporum, quæ ægrotant, & maxime æstimandum, utrum ex imbecillibus, an robustis sint; nam illa semper magis periclitantur, quam quæ constitutionis robustioris & validioris sunt. Imbecillibus vero ratione ætatis senes & infantes, ratione corporis structuræ, qui spongiosi, repleti, multisque & exilibus vasis instructi sunt, annumeramus, neque minus, qui à parentibus debilibus ac morbofis procreati sunt, it. qui præcedente morbo diuturno, vel immodicis sanguinis profusionibus ac diuturna inedia, vel animi affectu, mœstitia & cura, inquieta meditatione vires amiserunt. Referimus huc etiam puerperas, & qui ex vitiosa diætâ vitæque regimine & excretionibus suppressis ingentem impurorum humorum copiam intra vasa sibi contraxerunt. Nam in iis omnibus invalidis corporibus facile dolorum vel inflammationum ad mortiferum sphacelum transitus est. Postremo etiam illud adjiciendum puto, ut probe semper attendamus, num à causis quibusdam nocentibus, externis, per iram, terrorem, corporis refrigerationem, aut cibum perniciosum, vel per medicamentum vehemens & virulentæ indolis ea, quæ apparent symptomata, suscitata fuerint. Quæ omnia ita etiam sunt comparata, ut in morbis in se periculosis & corporibus invalidis in mortalem perniciem ægros conjicere mortemque accelerare possint. Si tamen in morbo minus periculoso, & corpore robusto, perniciosa ejusmodi adsunt symptomata, non statim penitus sunt extimescenda. Postremo plurimum etiam refert ad prognosin feliciter instituendam, principia morbi invadentis probe expendere. Nam omnis morbus, qui statim in principio vires tollit, pulsu valde frequenti existente, nihil boni portendit; eo quod & infirmiores vires, & succorum impuritatem & pravam dyscrasiam sanguinis, clarius manifestet. Sed hæc de nobilissima hac materia dixisse sufficiant.



D E

DUODENO MULTORUM MALORUM
CAUSAS.

§. I.

Dicturi de duodeno, idque mille malorum sedem adserturi, necessarium omnino arbitramur, ut, priusquam altius in ejus explicationem descendamus, paucis præmoneamus, in præsentī dissertatione mi-

nime id nobis esse propositum, ut hujus sententiæ auctores nos profiteamur, quippe falso nobis hanc gloriam vindicaturi. Debetur hæc potius immortalis memoriæ medico Sylvio, qui ante aliquot lustra totam medendi scientiam truncam ac debilem adhuc principio quippe firmo stabilique destitutam, in ampliorem decorem reposuit, & omnem fere curandi rationem

rationem hoc fundamento confirmavit. Is itaque fuit, qui primus omnium hanc viam vidit, visamque longius omnino persecutus est, & triumviratu humorum, bile, pituita, succoque pancreatico corpus regi professus, ac ex eorum temperie mixtioneque & clementi effervescencia non digestionis modo, sed ipsam quoque vitæ atque sanitatis rationem deduxit. Sicut è contrario ex horum etiam intemperie, & nimia eorundem abundantia vel defectu omnes omnium morborum causas inno sanandi rationem nasci contendebat. Quæ cum ipsè, latius uberiusque in sua praxi persecutus sit, & speciatim *lib. praxeos p. 174.* persequatur, supervacuum nobis videtur, prolixius eadem enumerare.

2. Fuit itaque hæc *Sylvii* sententia, quæ, ut lucem adspexit, ingenti excepta est adplausu, primum quod nihil obscurum, imaginarium, & nihil de veterum somniis retinebat, deinde quod ex ipsa rerum natura, velut ex fonte deducta, claro exploratoque insistebat fundamento. Eadem tamen, posteaquam altius examinari cœpit, quam prius consecuta erat laudem, magna ex parte destituit, illius nævos, anatomia & physica denudantibus. Nempe enim minus latere poterat iis, qui hisce in studiis versati erant, impetu magis, quam diligenti ratione eo, adactum fuisse *Sylvium*, ut *effervescencia succorum*, uti loquitur, in duodeno adfirmaret. Quam opinionem ut argumentis tueretur, bilem pure alcalinam omnino adferebat, quod quam falsum sit, vel ex eo liquet, quod adfuso etiam validissimo acido, quale est spiritus vitrioli, illa non effervescat, in flavam potius ac mucilaginosam offam coalescens. Quod idem ex eo colligere licet, quod, ubi spiritum nitri, qui æque vehemens acidum est, adjeceris, identidem coaguletur, & viridi adsumto colore, quam lenissime commoveatur. Neque minus errasse videtur, quod succum pancreaticum, ceu acidum adseveraverit, cum anatomicis constet experimentis, hunc, quodcunque etiam alcali adfundas, nullo modo cum eo effervesce, nedum cum bile conflictari. Imo exciso pancreate vitam spiritumque incolumem manere animantibus, *CL. BRUNNERUS* in *libello erudito de pancreate* demonstravit, quo unico experimento non mediocriter hæc *SYLVII* opinio adfligitur.

3. In eo vero magnum errorem admisit, quod ex hoc triumviratu vitæ sanitatisque rationem explicaverit, & ex eodem universam medicinam tam theoriam quam praxin quasi à capite arcessiverit. Neque enim potentem satis esse hanc sententiam, plura testantur, quæ cum ad explicationem rerum naturæ & ad ipsum remediorum usum pertineant, minus tamen ex hoc principio derivari possunt. Ut enim taceam, de iis morbis, qui in certas ætates temperamenta familias & tempestates incidunt, satis superque constat, ex rabidi canis morfu, ex putrido miasmate pestis, dysenteriae, luis venereæ, imo ex sola animi perturbatione gravia oriri mala, quæ sine prævia humorum corruptione ægrotantem conficiunt. Porro experientia confirmatum est, ex sanguinis abundantia, ejusque extra vasa secessione, item ex viscerum vitio & ægrota-
re plures & iisdem intercipi, cum manifesto argumento, graviter eum erraturum, qui in his morbis triumviratum culpæ accusaret. Quæ quidem omnia eo fine à nobis dicta sunt, ut adpareat, hanc *SYLVII* sententiam utilem alioquin, explicandæ toti medicinæ nunquam sufficere. Quanquam autem neque universalis sit, neque explicata satis: non contemnenda tamen observatio est, sed suam etiam utilitatem eamque amplam pollicetur, modo curam adhibeas, ne *Sylvium* secutus, nimium ejus fines extendas. In quo uti ille Vir erravit, ita tamen illius sententia probatur, & ita nos identidem probamus, quod plurimi ex chronicis malis in duodeno exi-

stant, ibidemque generentur. Et hoc quidem est, quod in præsentī dissertatione meditamur, hanc *Sylvii* sententiam, quæ sere exolevit, revocaturi & saniores eam sensu explicaturi. Natura nempe mortalium hoc quoque nomine prava & sinistra est, ut novas dictorum sententias, quæ aliquid utilitatis habent, minus recte intueantur, quippe primo cum impetu ad eas ruentes, mox, ubi effectus non responderit, easdem destituentes: adeo, uti in ceteris rebus mortalium, ita hic est arduum omnino, modum tenere. Quod idem fatum *Sylvii* sententia sustinuit, quæ ubi primum in lucem prodiit, avidissime excepta fuit, mox ubi non in omnibus respondit, (neque enim respondere poterat) eodem consensu destituta ac repudiata fuit; cum tamen revera, multum veritatis suo loco & pretio æstimandæ in medendi methodo hac in hypothesi occultetur. Nos itaque jam in eo occupati erimus, ut hypothesin à *Sylvio* primo propositam nostro vero tempore partim neglectam, partim suppressam vindicemus, & quasi ex tenebris in lucem revocemus.

4. Est vero hæc nostra sententia firma ac stabilis primum tenuium intestinorum, quod duodeni nomine venit, ab usu & officio reliquorum intestinorum plane esse remotum atque distinctum, adeoque singularem considerationem mereri. Provida namque natura non contenta ventriculū superiorem & majorem condidisse, sed ipsi quoque adjecit ventriculū minorem, & quemadmodum in primo & majori ingestorum magis rudis & simplex sit solutio: ita in secundo & minori sit magis intimior & chymus plus elaboratur, miscetur & attenuatur. Sicuti vero hujus intestini usus maximi est æstimandus, ita ex adverso, si vitio laborat, si muneris sui obliviscitur, sedes ac diversorium & fomes fit multorum magnorumque morborum. Ut vero hujus adfirmationis veritas magis constet clariorque ea fiat, placet jam ex ipsis anatomicis paulo subtilius & diligentius duodeni structuram ac fabricam, & ex hac ipsum usum ejus æstimare.

5. Nobis nempe, uti antea dictum, duodenum videtur parvus ac succenturiatus ventriculus, & magna digestionis alimentorum officina. Primum vero ventriculi requisitum est, ut gaudeat flexura sive curvatura & habeat fundum, in quo paulo diutius ingesta hæreant ac commorentur. In eo vero anatomici ferme omnes consentiunt, quod duodenum ab orificio ventriculi dextro incipiens insignem versus spinam repræsentet flexuram. *RIOLANUS* in *Enchirid. anatomic. Patholog.* duodenum ad spinam complicari dicit. Idem sentit *BLANCKARD* in *Anatom. p. 410.* *duodenum*, inquit, à pyloro versus spinam sub ventriculo excurrit, fere circa mesenterii centrum, deinde lumborum vertebri per ligamenta membranosa jungitur, atque sic ulterius ob brevitatē, nulla circumgyratione facta, circa renem sinistram, ubi jejuni anfractus inchoantur, terminum consequitur. Eodem modo *HORNIUS* in *Microcosf. duodenum*, inquit, à ventriculo incipit & facto deorsum parvo flexu recta fertur spinam versus, cujus vertebri lumbaribus transversim incumbit fere circa mesenterii centrum. Et *MUNYKS* *Lib. de re anatomic. p. 36.* hæc habet: tenuium intestinorum primum à duodecim digitorum mensura duodenum veteribus transversim incumbit: ductum admittit biliarium, atque pancreaticum, habetque sibi annexam latiore pancreatis extremitatem. Ubi circumvolvitur, intestinum jejuni appellatur. *VESALIUS* in *Anatom. p. 379.* de duodeno hæc proposuit: ex humiliori orificio ventriculi, quod è sua elatiori & dextro ipsius lateri proxima consistit sede, principium intestinorum exoritur, illive orificio, ubi id crassiori sua substantia introrsum protuberat, continuatur, ut simul atque è ventriculo prodiit in posteriora retortum sub sede ventriculi posteriore secundum dorsi dextrum latus recta deorsum profisciscatur, in
nullo

nullos omnino anfractus revolutum. Errant itaque plures ex anatomicis, qui duodeni terminum ibi constituunt, ubi ductus biliaris, vel pancreatici in homine orificium in duodeno prostat. Rectius vero ibi finis est ponendus, ubi flexura duodeni desinit & in anfractus incipit convolvi. Unde rectissime VERHEYEN in *Anatom. p. 41.* scribit: *duodenum, ab orificio ventriculi dextro initium habens, versus spinam reflectitur, atque in latere sinistro, ubi anfractus incipiunt, terminatur.* Et optime quoque HORNIUS in *Opuscul. Anatomicis: duodeni finis ubi sit non satis est determinatum apud Autores. Nam qui 12. digitorum longitudinem, à qua nomen habet, in eo reperiri volunt, non ad insertionem poris biliaris, respicere debent, sed potius terminum ejus in sinistris querere, ubi jam in gyros volvi incipit intestinum.* Et HIGMORUS in *Anatom. p. 27.* finem quoque duodeni statuit, ubi hoc in gyros incipit convolvi.

6. Alterum requisitum ventriculi est, ut ejus cavitas sit ampla & capax, jam vero utut capacitas duodeni longe minor sit ea, quæ in ventriculo deprehenditur; nihilo minus multum reliqua intestina amplitudine superat. Unde VESALIUS in *Anatom. p. 379.* verissime scribit: *Duodeni pars sub ventriculi fundo, ad dorsum proxime adligata, inter diffecandum capacior, ampliorque reliqui intestini ductu occurrit.* VESLINGIUS quoque laxitate & amplitudine insigni præditum asserit. Quod etiam DIEMERBROEK adfirmat *p. 153.* dum ait: *quotidiana anatomica observatio ostendit, hoc intestinum non nunquam laxitate & amplitudine insigni præditum reperiri.* Vehementer itaque errant illi Anatomici, ex quorum censu est Bartholinus, Bauhinus & Blanckardus, qui existimant, duodenum reliquis tenuibus crassius quidem esse, sed angustius. Deinceps quod duodenum gaudeat munere ventriculi vel ex eo innotescit, quod ejus textura, præsertim interna eadem sit cum ventriculo. Habet hic tunicam glandulosam ac villosam, ex qua continuo sudat atque distillat succus solvens fermentescibilis: eadem tunica visitur vel potius continuatur in duodeno. Hæc non separat liquidum ex intestinis, nam nullæ sunt viæ vel ductus patentes, sed potius secernit succum à sanguine similis indolis cum menstruo sic dicto ventriculi. Illud vero maxime memorabile, quod duodenum, præter tunicam glandulosam crustaceam, innumeris parvis glandulis instructum sit, quæ, separata tunica villosa, in nervea positæ sunt, & visui occurrunt. De hisce WEPFERUS in *Histor. cic. aquatic. p. 190.* ita scribit: *in duodeno plurimas insignes glandulas ultra palmi latitudinem à pyloro divisim sparsas inveni, quæ detracta tunica fibrosa quasi conglomeratæ apparent, dimidiati seminis cannabini magnitudine, quæ aqua maceratæ mucum stillabant copiose etiam octavo adhuc post mortem die.* Harum glandularum inventor celebratur Clarissimus BRUNNERUS vid. *Misc. Natur. Curios. Dec. II. ann. 5. p. 464.* Glandularum harum officium sine dubio non aliud est, quam ut lympham menstrualementem secernant atque in cavum duodeni infundant. Ulterius ventriculi requisitum præcipuum ac palmarium est, intimam dissolutionem ingestis præstare, eorumque nexum ac mixtionem solvere, & hæc solutio maxime viget in hujus fundo, ubi diutius hæreere solent contenta. Gaudet eo quoque privilegio & prærogativa imo majori nostro ventriculus præ superiori: hic enim accipit tantum fermentalem succum ex tunica glandulosa ac villosa, ille vero præter hanc tunicam & glandulas speciales, obtinuit peculiare quosdam insignes ductus, qui largo flumine fluida solventia magnæ activitatis infundunt. Influit nempe succus biliosus parciore quidem quantitate ex cyllide, majori vero ex hepate & ejus ductibus biliaris, manifesto indicio, quod

tanti succi copia & usum præstet egregium. Simili ratione ex magnitudinis eximia pancreatica glandula emergens ductus lymphæ solventis fermentescibilis ingentem quantitatem advehit: quod etiam de magno & singulari ejus usu testimonium esse potest. Perquam vero dignum notatu est, quod hi duo ductus in homine ambo concurrant & horum orificia in papillam definant, quæ directo fundo flexuræ duodeni superposita, quod sæpius in anatomia annotare mihi licuit, ut ex superiori loco sic guttatum in substratam chyli massam descendentes, mirabilis virtutis menstruum illud microcosmicum universale, vere balsamicum constituent, quod ex bile, quæ fluidum alcalino-sulphureum est, ac succo pancreatico tenuissimæ ac spirituosæ indolis compositum est.

7. In ventriculo tantum fieri solet ingestorum dissolutio, nulla vero separatio vel secessio fluidi ad sanguinem, unde omnium consensu ventriculus lacteis vasis est destitutus. Simili modo in duodeno nullæ viæ vel venæ lacteæ observantur, nihil itaque separatur, quod sit in aliis intestinis, præsertim in jejuno, & eum quoque in finem mesenterium non pertingit ad duodenum, cui alias cetera tenuia adhærent, & quod fulcrum non modo solet esse vasorum lacteorum, sed & liberio rem transitum ipsis præbet, potius duodeni interstitium occupat inferior & eminentior pars pancreatis cum mesenterii centro, quod vertebriis firmiter alligatum. Centrum vero mesenterii dicitur, ubi ex aortæ trunco arteria in mesenterium fertur, ubi etiam plexus insignis nervosus ex spinali medulla ad mesenterium ac intestina prolabitur, nec non ex trunco venæ portæ ramus dexter ad mesenterium abscedit.

8. Hæc omnia adducta clarissime evincunt, jure meritoque duodenum quod dicitur, in classem magis eorum, quæ ventriculi nomine gaudent referendum esse, quam in numerum intestinorum, quæ magis vacant secretioni quam digestioni. Et certe non leve occurrit dubium, an non in duodeno ceu ventriculo succenturiato plus vigeat digestionis negotium, quam in ipso primario, ubi cruda modo & rudis saltem solutio videtur peragi: in nostro vero fit magis intimior, ciborum massa hic magis elaboratur, rectificatur; major partium attenuatio, & major spiritusascensio locum invenit. In ventriculo succus tantum lymphaticus cum reliquiis ciborum acidulis præsens est; in nostro vero præter hunc succum affluit adhuc alius penetrantis & activæ naturæ, qui longe excellentius, tenax viscidum pingue, quod est in ciborum massa, diducit, dissolvit, & se intime cum ingestis miscet, quod vel ex solo flavo excrementorum colore abunde apparet. Hoc vero consideratione maxime dignum est, nullum dari ex animantibus, quod destitutum sit hac intestini flexura, sive quod non gaudeat parvo illo & succenturiato ventriculo. Nullum quoque datur animal, ubi non succus biliosus in vasto hepatis viscere genitus, in magna copia affundatur duodeno, perspicuo argumento, naturam prudentissimam maxime omnium occupatam esse, ut hanc essentiali corporis partem, & ad vitam ac sanitatem tuendam summe necessariam recte construeret ac efformaret. Unde facillimum est judicatu, quantus usus sit hujus prænobilis partis, quantumque eadem ad universam corporis œconomiam tuendam conferat. Et quemadmodum usus amplissimus & longe maximus est illius; ita etiam si vitium vel defectus in illud incidit, si intemperie menstruales succi laborant, si debitus tonus hujus eximia partis læsus vel destructus fuerit: magna inde turbatio in universa corporis œconomia & ingens malorum proventus exsurgit. Præsentis igitur instituti maxime omnium erit, inquirere, quomodo in hoc intestino ceu parvo ventriculo plurimæ causæ

causæ morbiificæ, si præter naturam est adfectum, elaborantur & progredientur. Et in eo laudandi quoque mihi *Helmontius* & *Sylvius* videntur, qui urgent maxime in scriptis suis, scaturiginem plurimorum morborum ibi ponendam ac quærendam esse.

9. Diximus in superioribus, omne principium morborum materiale, quod causæ morbiificæ nomine venit, non in humoribus, qui jugi intra vasa feruntur circulo, locandum esse, utpote humores nunquam nocent debito motu provoluti: nam hac ratione, non modo à corruptione alieni manent, sed & nullam partem laceßere vel lædere sufficienter possunt. Quapropter ut humor à naturali sua indole deficiat, ut alienus fiat & corrumpatur, ut denique corporis partem lædat atque offēdat, opus est quiete, opus est stasi ac stagnatione. Jam vero nulla pars in universo corpore nobis videtur aptior ad stagnationem, ad corruptionem fovendam, atque consequenter ad generationem causarum morbiificarum, quam ea pars, quæ flexuram habet, quæ ventris nomine venit, in qua propter flexuram diu hære ac subsistere possunt humores, in quam classem jam præter ventriculum etiam referendum est duodenum. Solent enim humores maxime corrumpi & à natura blanda ac amica in inimicam nocentemque primo sola stagnatione, deinde aliarum heterogenearum rerum mixtione degenerare.

10. Alienam plane indolem & virulentam naturam mora induunt humores, ita etiam bilis, si quies ipsi concessa est, maxime effertur. Inde jam olim atrò carbone notata fuit ab *HIPPOCRAT.* de natur. human. p. 282. qui ita sentit: *viridis bilis juxta hepar manens ubi superebullit, humani corporis corruptio est ac noxius atque inutilis corporis humani inquilinus.* Non aliud hoc loco intelligitur, quam quod bilis, ex stagnatione in duodeno ductibus biliariis corrupta, corpori nostro sit nocentissima. Similis locus hac de re extat *Lib. de Medic. veter.* p. 34. qui hic est: *cum amaritudo quadam diffusa fuerit, quam bilem flavam appellare solemus, quales statim anxietates & æstus & impotentia occupant; verum ubi liberati fuerimus ab illa & repurgati, aut sponte, aut per medicamentum, si modo tempestive quid ipsorum fiat, manifesto & à doloribus, & à calore liberamur. Quando autem tempore eodem elevata fuerit, & cruda est meraca ac intemperata, nulla arte neque dolores neque febres sedaveris. Et quos quidem acuta acrisque ac æruginosa bilis affligit, eos mox rabies & morsus viscerum ac pectoris corripit desperatio? Non sedantur autem hæc, priusquam eadem expurgetur & prosternatur, & aliis permisceatur.* Qui elegantissimus locus abunde declarat, quam graves affectus corruptam bilem soleant consequi.

11. Primum vero sermonem facere placet de bilis præternaturali stagnatione, ad quam non modo bilis legnities, & defectus partium salino-sulphurearum in illa, sed & tonus & motus peristalticus hujus intestini labefactatus plurimum contribuit. Deficiente enim hoc motu peristaltico bilis, quæ continuo effluit, ingenti in copia accumulatæ & congesta in hac parte, mirifice intestinum distendit, qua de re notari meretur locus ex *DIEMERBROECK* p. 53. in *Anatom.*: *quotidianæ, inquit, anatomicae sectiones docent, hoc intestinum non nunquam amplitudine insigni præditum reperiri, atque tunc majori à succis fermentaceis acrioribus vitiosis in illum delabentibus, hincque validis indutis fermentaceis effervescentiis, à quibus non solum ipsum valde distenditur; verum etiam molesti rugitus, magni dolores, lancinationes, summæque anxietates in viventibus oriuntur.* Ita *Miscell. Natur. Curios. Dec. II. ann. 2. pag. 186.* observant, in cachectico vesicam biliariam hepatis annexam, bile plane vacuum; intestinum vero duodenum, humore bilioso repletum adeoque

dilatatum fuisse, ut quasi bursam referret, qua humoris libra ad minimum contineri potuisset, cum enim sectione præpropera aperiretur, plus quam dimidium humoris crassioris è flavo nigricantis effusum, & nihilo minus in ipso superfuisse 12. amplius cochlearia. Sæpiissime accidit, bilem in duodeno plus justo accumulari & ipsa stagnatione & distensione multa pathemata excitare, videlicet dum intestinum vehementer distenditur, non modo tunicæ, quæ exquisito sensu pollent, affliguntur, sed & rami plexus mesenterici tenduntur, nec non, vasis sanguineis compressis, congestio sanguinis fit circa truncum venæ portæ & initium arteriæ meseraicæ: sequitur hinc fixus in lumborum prima vertebra dolor, præcordiorum anxietas, appetitus dejectio, somni & virium defectus, alvi que adstrictio. Observavimus sæpius, ejusmodi pathemata in corporibus imbecillioribus, in fœminis, quibus menses defecerant, hypochondriacis, in intermittentibus præpostere suppressis, in diætæ aberratione, præsertim post iracundiam. Et tali in casu parum efficiunt stomachica carminativa, absorbentia, laxantia, multo minus anodyna, quæ potius noxiosissima observantur: sed optimo consilio, emetico cum cautelis administrato, oportet primam regionem à succis biliosis stagnantibus deplere. Dum hæc scribimus, occurrit nobis casus viri in hac civitate honestissimi, qui paulo imbecillioris naturæ, per vitam sedentariam & continuos labores, quos ratione officii laudatissime administrat, ingentem humorum impurorum copiam circa primas vias colligere solet. Is si ventriculus plus justo alimentis difficilioris solutionis aggravatur, premitur anxietatibus, circa præcordia angustis, phlogosi, dolore circa scrobiculum cordis & circa latus dextrum; cibos porro respuit, corpus lassatur, somnus parvus, & flavo fœdoque colore tingitur cutis, & hæc symptomata sæpius recurrunt. Rhabarbarina cum abstersivis salibus & aperientibus mixta, non inutilem locarunt operam, sed paulo tardius curam confecerunt, quæ plerumque ad tres septimanas extendebatur. Hæc ante paucos dies à nobilissimo ægroto mihi exposita, me fallere non poterant, quin re probe pensitata atque examinata judicarem, stagnationem biliosorum humorum in duodeno, maxime in causa ac culpa esse. Unde lenissimum emeticum ad saburram horum humorum expediendam porrigebam. Æger, qui præcedente nocte integræ vehementissimis cruciabatur symptomatibus sine omni somno, altero mane sumit emeticum ex gr. j. tartari emetici soluti in aqua menthæ: mox quatuor vomitibus mensura imo ultra bilis crassæ, obscuro flavæ viscidæ in vas stanneum rejicitur; quos vomitus subsequuntur quatuor alvi dejectiones. Hac peracta operatione simul & semel cessant symptomata, appetitus cum somno redit, anxietates omnes remittunt, & cum morbo redit in gratiam. Quæ unica morbi historia nos edocet, quam insigni efficacia sit emeticum, si mali causa delitescit in primis viis.

12. Deinceps bilis in duodeno stagnatio alvi excitat tarditatem; meretur enim notari, quod, si motus peristaltici defectio sit in primo intestino, reliqua etiam una patiantur, ut tardior fiat contentorum progressio. Accedit quod bilis ceu stimulus intestinorum retenta, difficiliorem contentorum progressum per intestinorum anfractus efficiat. Confirmat hoc ipsum inter alia observatio, quæ extat in *Miscell. N. Cur. loco citato.* Præterea in duodeno subsistens cum liquore pancreatico atque ingestorum mucosus flatus excitat, qui lumborum dolores atque anxietates movet, & nephriticam colicam imitantur. Elegans hanc in rem est *Observatio 57.* *PECHLINI*, qui inquit: *obliquus assurgens tenuium illa pars lienem versus acutiusque inde reflexa vel situs ingenio efficit, ut diutius ibi hæreat, quicquid justo viscosus allabatur, sive pitui-*

ta sit, seu *lympa pancreatica sive bilis seu denique flatus*. Periclitatur autem quatinus maxime hic locus in foeminis, ut quæ aſotica horæorumque fructuum ingluvie cruditatibus fermentationibusque flatulentis copioſam miniſtrant materiam, in illa inprimis corporum per balenatios; imo & ferreos thoraces ſtrictura. Equidem cum ſucci importunius efferveſcentes ſpatium requirant ſolito majus, in quo libere ſe expandere poſſunt, accidit, ut compreſſo illo hypochondriorum angulo, quem dilatari oportebat, & ſucci & flatus ibi hæreant & fixa ſede novis corruptelis & fermentationibus viam aperiant. Eodem modo diſtenſio duodeni à flatibus producere ſolet fixum dolorem chronicum in lumbis, id quod ſuo tempore jam notavit Sylvius; qui dolorem, lumbos quaſi perterebrantem, in eo loco fieri exiſtimat, ubi confluxus bilis & ſucci pancreatici exiſtit. Notum eſt febriliū inſultuum initia plerumque fieri cum dolore fixo lumborum, eo in loco, ubi centrum meſenterii vertebris alligatum eſt, cui validis & firmis membranarum coheret quoque duodenum, unde non mirum, violenta expansione harum membranarum, exquisitiſſimi ſenſus expansione facta, vicinos nervorum plexus ad ſpaſmos ſollicitari. Porro ſtagnant tam ſolida quam liquida in ventriculo & duodeno, ſi ſpaſmodice hoc inteſtinum conſtringitur, quo fit, ut omnis tranſitus ad reliqua inteſtina præcludatur. Experientia quotidiana conſtat, alimenta tam ſolida quam liquida ante triduum aſſumpta magna in quantitate ejici, imo ebrios ſæpius poſt duodecim horas miram liquidi aſſumpti quantitatem reddere: qua de re eximium locum habet HELMONTIUS *Lib. de febr. cap. X. Si pylorus*, inquit, *nimia errat ſtrictura, potus ibidem nonnunquam toto triduo perſeverat, atque tandem plus unico vomitu rejicitur, quam per biduum ſit aſſumptum*. Hæ ſpaſmodicæ conſtrictiones efficiunt, ut non modo humores corrupti, ſed & flatus ſubſiſtant in hypochondriacis & hyſtericis, unde in febrilibus inſultibus anxietates, inquietudines, oppreſſiones ſpiritus, dolores circa ſcrobiculum cordis, circa lumbos, nauſea vomitusque exoriantur. Et hæc ſtrictura duodeni icterum ſæpiſſime efficit, dum nempe criſpatura & fortiori contractione tunicarum duodeni ductus cholodochus, qui itinere obliquo ferme digiti minoris longitudine tranſit, coarctatur vel comprimitur, ut ſic minus descendere bilis ad duodenum poſſit, unde reſtagnans bilis tam in ductibus biliariis, quam in cyiſtide, non modo dolores & ſpaſmos efficit, ſed & per vaſa lymphatica in ſanguinem rediens ſœdum illum flavumque colorem externo corporis cortici adſpergat.

13. Sunt plures alii effectus, qui ex intemperie & corruptela bilis & ſuccorum confluentium in duodeno præparantur; uti ſunt febres præſertim intermittentes omnes, inprimis tertianæ continuæ, lentæ, ardentes, cholicæ, variolæ, morbilli, diarrhœæ, dyſenteriae, cardialgiæ, tuſſes graviores chronicæ; arthritides, dolores vagi & hujus generis plura. Corrumpuntur vero humores in hoc loco non tantum ſtagnatione, ſed & commixtione cum aliis ſuccis excrementitiis impuris, qui ad bilem redundant & ſuccos ibi hærentes vel ex ventriculo vel ex maſſa ſint ſanguinea. Ex ventriculo ſæpe acidi, pontici, corroſivi ex alimentis ejus naturæ vel ex diuturna mora ibi geniti humores ad duodenum tranſeunt, cum bile miſcentur & ibi moram trahentes bilioſum balſamicum humorem mirum in modum dejiciunt atque deturpant. Bilis vero admixtione ejuſmodi acidi non tantum coagulatur, & corroſiva evadit, ſed colore etiam ſuo mutato, æruſinoſum ac viridem habitum induit. Talis in duodeno exiſtens, roſione & vellicatione in vicinis partibus tam ventriculo, quam inteſtinis ſenſibilioribus graves dolores, tormina, ſpaſ-

modicas criſpaturas, in infantibus facillime convuſiones & epilepſiam ſuſcitatur. Malum itaque ſignum eſt, ſi in hiſce excrementa descendunt viridi colore tinctæ, quæ ſæpius tam corroſiva ſunt, ut lintamina inde exefa atterantur. Ab eadem bile æruſinoſa ſtagnante tuſſes ſtomachales chronicæ & ferinæ, non modo in infantibus, ſed etiam adultioribus oriuntur. Eademque ſæpe intermittentibus & hypochondriacæ affectioni ſe aſſociant, quò in caſu omnia dulcia, peſtoralia plus damni quam emolumenti aſſerunt; & talis tuſſis, tam de die quam de nocte ſubinde recurrens, certas periodos ſervare ſolet. Infringitur enim quodammodo acidum corroſivum, alimentorum ſucco adfluente, quo minus graviter ſubjectas partes velli-care poſſit. At ubi hic ſuccus recedit, in reliqua membra diductus, relinquitur corroſivum, quod, priore impetu reſumpto, tenerrimas membranas duodeni flatibus diſtensas, corripit, quæ dein in conſenſum trahunt diaphragma plexus meſentericos ſtomachales, pneumonicos, & ſic violenta fit tuſſis, quandoque cum vomitu & ſuffocationis metu, propter ſequeſtrationem & affluxum ſeri viſcidi in bronchia pulmonum. Tales ferinas tuſſes brevi tempore feliciffime ſolo pulvere ex lap. cancror. compoſito curavi, adjecto oleo aniſi, pro doſi drachmam unam binis de die vicibus offerendo. Infantibus hoc adſclicis malo leniora emetica it. infuſa rhabarbarina cum manna colluviem iſtam viſcido-bilioſam detrahendo inſignes ferunt ſuppetias.

14. Talis cauſtica bilis in flatus reſoluta ſæpe in remotis partibus atrociffima producit ſymptomata. Notabilis eſt *Obſervatio River. Cent. 2. obſ. 8.* Dolor acerbis ſingulis noctibus affligebat poſt primum ſomnum, incipiebat in latere ſiniſtro, & ad anteriorem partem thoracis & poſteriorem ad latus ſiniſtrum & ſcapulas extendebatur, tanta vehementia, ut ſubito excitatus in nulla decubitus forma conſiſtere poſſet. Perſeverabant iſti dolores uſque ad matutinum tempus & tunc temporis quieſcebant, tota die non amplius apparentes. Optime judicat Riverius, cauſam eſſe flatus, qui ex illuvie pravorum crudorumque humorum in primis viis, ob pravam victus rationem congeſtorum, à calore intenſiori facto in ſomno oriuntur. Sæpius notavimus in plethoricis, & qui avidius comedunt, quod certis horis in ſomno poſt factam digeſtionem expergilcantur, magna cum anxietate, anguſtia circa præcordia & quaſi metu ſuffocationis, quibus venæ ſectio, emetica & abſtinentia à cœna præſentiſſimam opem attulerunt. Quandoque etiam effectus pravorum iſtorum ſuccorum in duodeno primisque inteſtinis ſtagnantium uſque ad caput ſe exerunt, & cephalalgias, vertiginem, torporem omnium ſenſuum, imo apoplecticos inſultus ibi machinantur. Vomitus bilis, quæ inſtar aquæ fortis ebulliebat, fuiſſe cauſam hemicranie *Borell. Cent. 2. obſ. 1.* teſtatur. *Laborabat quidam tertiana & gravi capitis dolore pun-gente ac lancinante, dimidiam capitis partem occupante, vomitorio ſumpto ejecit libram unam bilis porraceæ & ruruſus pari quantitate, ſequenti acceſſione reddita omni capitis dolore liberatus fuit. Vid. River. Cent. 1. obſ. 27.* Nuper generoſus Vir hic locorum poſt ſanguinis detractiōnem liberalius per aliquot dies vino ſemet invitare cœpit, adſumptis etiam ſubinde oſtreis aliisque, quæ difficiliter concoquantur. Inde languere primum cœpit, mox paulatim ſenefcente adpetitu, ipſe ſuper menſam, cui conviva adhibitus fuerat, ſubito ſummo præcordiorum æſtu corripitur. Sequitur vehemens frigus torporque & animi defectio, omnibus inſuper ſenſibus velut extinctis. Injecto clyſtere alvus ſexies dejicitur, & inde parum allevatus, poſt paucos dies lectum reliquit, mox eodem adſectu, quamvis mitiore, in convivio oppreſſus, & ciborum ſaſtidio & virium languore eidem adhuc adhærentibus.

rentibus. Tandem deprehensa mali causa, lene ob-
tuli emeticum; quod ubi adsumsit, ingentem visci-
dæ materiæ viridisque bilis per superiora & inferiora
rejecit, exhausto inde mali fonte præsentis periculo
exemtus cum gaudio in hæc verba erumpebat: *Es
ist als wenn ich neu geboren wäre*. Neque dubium
est, quin omnia hæc symptomata à bile porracea,
ventriculi orificia irritante, orta fuerint.

15. Vertigo quoque, æque molesta passio in hoc
duodeno domicilium sedemque sibi constituit. Et in-
de est, quod jejuno ventriculo cum nausea orisque
amaritie hic adfectus corripiat, sicuti idem contra,
adsumtis cibis, mitigatur. Ex vitio etiam stomachi
epilepsiam adnotavit Galenus, non sine conjectura,
bilis in duodeno nostro velut in cubili delitescens.
Memorabilis quoque morbus est, quem ex eadem
caussa profectum ante aliquot annos habui, qui sic est.
Comes quidam ex Saxonia, turbato statu perterritus,
huc concesserat. Is in consilium me vocans conqueri
cœpit de adfectu gravissimo, quo per annum fere
laboraverat. Ipse alioquin plethorico - cacochymicus
erat, quem habitum ex diuturno mœrore, victus vi-
tio vitæque sedentaria sibi contraxerat. Itaque hic sin-
gulis fere noctibus circa horam tertiam & quartam
acerbissimis doloribus excruciabatur, qui circa umbi-
licum primum emicabant, mox hanc regionem emensi
ad dorsum, novissime ad ipsa præcordia inclinaban-
tur, ita constricto ægro, ut jam jam strangulandus
extrema meditaretur. Accedebat summa anxietas, sen-
suum torpor, sæpe etiam epilepticæ contractiones,
& hæc symptomata, ubi alvus adstrictior erat, omnia
intendebantur. Clysteribus carminativis & clementer
laxantibus imo emetico subventum ægro fuit, quæ re-
media mirifice levarunt illum, quamvis ipsum malum,
quod nimis altis radicibus infederat, non expugnare
potuerint.

16. Apoplexiam porro sæpe in ventriculo & duo-
deno generari, præter frequentes observationes Hel-
montius testatur, solerter hanc illius mali latebram sub-
odoratus. Aperte enim scribit in libro, in quo mor-
borum sedem in anima sensitiva ponit, recentem apo-
plexiam sæpius vomitu rebusque aromaticis se curasse.
Quod identidem confirmat *Cl. Wedelius in patholo-
gia dogmatica*, p. 135. clarissime testatus, tegularium
Jenensem, qui in apoplexiam inciderat, adhibito reme-
dio plenissime fuisse restitutum. Nempe crebra expe-
rientia loquitur, quod, qui sanguinis alioquin abun-
dantia laborant, circa æquinoctia tempore plenilunii
& hiemali, ex iracundia vel intemperantia, apople-
ctico insultu opprimantur, adfectum sæpe præcurren-
te vomitu, sæpe eundem concomitante, qui tamen
tetro atroque colore tinctus adparet.

17. Ex hac colluvie humorum, qui in ventriculo
ac duodeno accumulatæ sedent, alia quoque ac gra-
viora mala descendunt. Inter quæ primo loco poni-
mus lentas febres, quæ ex intermittentibus, sæpe
etiam ex acutis generantur. Nempe ubi illæ, nimis
festinanter, nec expurgatis ante primis viis, adstrin-
gentibus, ex quorum censu china chinæ est, sistun-
tur, tunc colluvies sordida, intra ventriculum deten-
ta, facile gravioribus malis præbet occasionem. Quod
identidem accidere potest, si post acutum atque diu-
turnum morbum avidius cibi adsumuntur, quibus di-
gerendis, cum ventriculus morbi vehementia debili-
tatus minus sufficiat, non potest aliter fieri, quam ut
materia novo morbo præparetur. Ex horum nume-
ro, uti diximus, sunt febres lentæ, quæ hisce signis
adpropinquant: vexat corpus calor lentus cum pulsu
celeri & frequenti, adest lassitudo languorque virium,
sudor nocturnus, & corporis macies. Ubi igitur ori-
ginem hujus mali recte cognovimus, facile videmus,
minus convenire in hoc adfectu refrigerantia, quæ

Frid. Hoffmanni Oper. Tom. VI,

adeo non juvant, ut potius perniciem ægrotis ad-
ferant. Tentanda potius cura est salibus absterfivis
& lenioribus emeticis, laxantibus & amaris medica-
mentis, quæ in hoc malo unicum præsidium ægrotis
pollicentur.

18. Hactenus quidem dictum à nobis, quomodo
bilis per stagnationem admixtoque eidem acido vi-
tiata graves multosque morbos excitare possit, jam
instituti ratione adacti de eo solliciti erimus, ut quæ-
ramus, quomodo naturalis ejus constitutio ac crasis
ab aliis admixtis partibus retexi ac corrupti possit.
Itaque omnino recte statuimus, maxime id fieri à
suppressione aliarum excretionum & præsertim tran-
spirationis. Jam primum satis constat, quam saluta-
ris, quam necessaria vitæ sanitæque sit hæc per cu-
tem evacuatio, quippe quæ universi corporis ac san-
guinis emunctorium recte appellatur. Per hujus nem-
pe poros omnia expirant, atque exhalant, quæ su-
perflua & inimica naturæ à vitali sanguinis circulo
velut purgamenta rejiciuntur. In hoc censu est prin-
cipium salino-sulphureum, subtile aereo-aqueum, quod
ubi intra corpus retinetur, fontem nostræ vitæ sangui-
nem nempe facile inficit, atque corrumpit. Inde est,
quod hac expiratione interclusa, plures gravissimique
morbi prodeant, maxime omnium febres cujuscun-
que generis, & quæ cum exanthematibus criticis con-
junctæ sunt.

19. Rationem vero hujus rei ut reddamus in ge-
nere adnotandum est, ab inhibitis excretionibus hu-
mores corporis nostri maxime lædi, idque inprimis
accidere ab intercepta transpiratione. Ubi enim acer-
rimæ sordes exitum non inveniunt, occlusis poris, in
corpus inclinatæ ad lympham atque bilem redeunt,
quæ inde alienam plane naturam fortitur. Atque
hæc corrupta hoc modo, ubi in intestina delabitur,
ibique non mature eliminatur, sed subsistit & stag-
nat, ipsa mora deterior adhuc reddita, immutata ma-
gis schesi illius, seminarium existit morborum præ-
sertim febrium. Unde non sine ratione judicamus,
in duodeno periodicorum morborum maxime febrium
semina delitescere, hac in re merito *Clarissimo Medi-
corum pari Sylvio Helmontioque* accedentes. Quorum
ille passim in scriptis suis hoc argumentum tractat,
duodenum ceu sedem multis morbis assignans, hic au-
tem *l. de febb. cap. 17.* diserte hæc ipso veritatis sty-
lo consignavit. *febris, inquit, habet virus, quod circa
pylorum & paulo infra hunc hospitatur. Et cap. X.
n. 3. hæc scribit: nidus febrium est in primis officinis,
extenditur scilicet à pyloro ad duodenum.* Consentit
huic sententiæ magnus Galliæ medicus FERNELIUS,
qui *lib. 6. c. 7.* nidum intermittentium circa stoma-
chum, duodenum & pancreas adserit. Harum igi-
tur febrium sedes recte in duodeno constituitur, si-
quidem ex corrupta lymphæ & bile velut in offici-
na hic adornantur. Præcedit plerumque transpiratio
suppressa, plethora, robur ventriculi ac intestinorum
ex intemperantia debilitatum, quibus rebus corruptio
hæc maxime adjuvatur. Si enim transpiratio non re-
spondet, bilis sordibus commixta vitium capit, ea-
demque si tonus ventriculi segnescit, intra intestina
detinetur, deficiente natura ad eam excernendam. At
ubi subsistit & corrumpitur, non in hac solum regio-
ne tyrannidem exercet, sed ad sanguinem delata no-
vam malorum scenam pandit, membranaceas ner-
veasque corporis partes variis spasmodicis doloribusque ad-
fligendo.

20. Diximus supra, intermittentium præsertim ter-
tianæ sedem in ventriculo & duodeno esse, id quod
& ipsa symptomata confirmant, quæ hos adfectus
eosque incipientes comitantur. Principio enim ha-
rum passionum flatus duritiesque abdominis, do-
lor dorsii fixus, nausea, præcordiorum anxietas &

R

inque-

inquietudo exercent. Mox remittente frigore, accedit vomitus, color faciei flavescit, corpus calore exaestuatur, siti nullo liquore restinguenda ora exuruntur, urina fertur flammea, & quod à purgantibus per alvum dejicitur, flavissimum colorem repræsentat. Junguntur sæpius biliosi vomitus, interdum etiam viscosi & ab adsumpta china chinæ, præsertim in iis corporibus, in quibus duodenum bilis abundantia turget alvus sæpiissime biliosa descendit. Cujus rei hæc omnino ratio est, quod hoc remedio tonus intestinorum languescens alioquin restitutus motum identidem peristalticum augeat, fordes, quò pollet, robore expellentem. Nonnunquam icterus se adsociat, bile ad sanguinem, à quò salutari modo antea rejecta fuit, redeunte. Magna hæc omnino symptomata intermittentibus, majora utique tamen eadem sunt in tertianis continuis, & gravius utroque malo in ardentibus, quas causonas Græci vocant, intenduntur. In causa enim bilis acerrimæ copia infesto stimulo membra exagitans, & inde est, quod omnia, quæ bilis acrimoniam eluunt, quæ ejus stimulos obtundunt, quæ primarum viarum fordes abstergunt, hisce morbis unico adjumento sint. Ejusmodi sunt leniora emetica, nitrosa salina & absorbentia, quæ in ejusmodi morborum cura merito suo celebrantur.

21. Et hæc quidem remedia in omni ejusmodi passione avide amplectenda sunt, minus tamen sufficiunt, si pertinacius intermittentes insistant exemplo quartanæ. Hic enim pertinacia mali remediis non cedens altius radices jam egisse, & in ipsis visceribus residisse adfectum indicat: siquidem manifestum inde est, hepar, pancreas & lienem obstructione laborantes, succum tam biliosum quam pancreaticum continuo rivulo intestina subeuntem, corrumpere, fomitem mali inde subministrantem. Itaque ubi ejusmodi casus incidit, non satis est, dictis remediis ægotantem tractare, sed validiora adhibere oportet, quem in censum referenda aperiencia fortiora, salia, & quæ ex rhabarbaro, ex marte mercurioque dulci constant medicamenta. Neque tamen removenda interim sunt emetica, quæ sæpius etiam in ipsa viscera, fordes in iisdem detentas expellendo penetrant. Laudem proinde invenit pulvis Riverii felicissimi practici, qui, cum & per alvum & vomitum vim suam exerat, hisce morbis egregie opitulatur, quippe hoc vel centies quartanam sustulisse passim in observationibus suis, quas ideo legendas commendamus, attestatur. Eandem curam desiderant febres intermittentes, quæ circa tertium subinde diem exasperantur, quippe & hæc idem ex bile acri corruptaque nascuntur. THONNERO *lib. 1. obs. 1. p. 10.* id ipsum comprobante.

22. Contemplati igitur febrium naturam ac ingenium, ad eos morbos accedimus, qui per exanthemata sese manifestant. Placet vero primam nominare purpuram, morbi genus, quod aliis regionibus parum notum, longe lateque in hisce terris dominatur. Idque aliis maxime morbis, iisque jam fere inclinatissimis jungitur, non aliam ob causam, quam quod exsiccatis per febrilem fervorem intestinis, alvo idem eadem exarescente, materia corrupta biliosa in primis viis minus corrigatur, quæ tandem magis corrupta nec per medicamenta rejecta cum sanguine miscetur, & hocce malum molitur. Eam, quam proposuimus, causam vel illud etiam confirmat, quod purpura sæpe accidere soleat, si diutius alvus adstricta fuerit, neque clysteribus neque mollioribus laxantibus exsoluta: eadem quoque infantes sæpe invadit cum vomitu, diarrhœa, febris, tussi & dentitione difficili. Adest præter hæc mala inmodica sitis, præcordiorumque anxietas & vigiliæ. Nascitur etiam hoc malum ubi venæ sectio, cui alioquin adsuevit aliquis, per tempus fuit intermissa, & finitur maxime purgatione, ideo-

que sedulo in hoc adfectu providendum, ut alvus semper respondeat. Sunt, qui hoc malo correpti largum de nocte sudorem fundunt, sunt, qui matutino tempore id patiuntur, dantur etiam, qui singulis annis chronica purpura laborant, cum non obscuro indicio vitii in hepate & bile desidentis. Juvat itaque in ejusmodi casu, per vomitoria & laxantia clementiora inire curationem, quippe quæ medicamenta optimam locant operam, siquidem & hoc malum à bile acri stagnante sæpe proficiscitur. Simili modo perpetuos sudores cum pruritu curatos fuisse, solertissimus vir P. BORELLUS *cent. 2. obs. 36.* adnotat, adhibito nempe vomitorio & abstinentia à vino.

23. Ipsa porro arthritis & podagra in hoc chronicorum morborum stabulo desidere videntur. Adoritur nempe hic adfectus hypochondriacos & debilioris naturæ homines, qui velut hæreditate quadam laxam mollemque membranarum texturam acceperunt. Hi itaque maxime proclives ad hoc malum sunt, præsertim verno & autumnali tempore, quia hisce tempestatibus, propter aeris inæqualitatem varietatemque transpiratio maxime læditur, salibus inde tartareis, quibus ejusmodi corpora scatent, segnius per urinam procedentibus. Unde hæc, exitu ipsis intercluso, ad humorem biliosum & salivalem pancreaticum confluent, primam regionem variis malis divexando. Talia sunt flatus, præcordiorum dolor, alvi segnities, dolor circa lumbos oberrans, febrili motu simul comitante. Quod vero in primis viis causa mali lateat, vel exinde adparet, quod leniore sæpe emetico sub adventum mali dato, adfectus si non supprimatur certe mirifice adlevetur. Eleganter hanc in rem diligentissimus Hippocratis Commentator MARTIANUS: *in arthriticis*, inquit, *doloribus, ob acorem in ventriculo peccantem, à doloribus correptos memini, qui ab iisdem liberati vel levati fuerunt, ubi acida evomuisse.* Quod idem eodem comprobatur Sylvius, aperte scribens, hanc curam per vomitionem utilissimam arthritidi, multisque eandem à se confirmatam experimentis. Imo eadem ratione non paroxysmum tantum imminuentem sublaturum, sed & novi impetus semina extincta fuisse, idem eodem loco scriptum reliquit. *vid. p. 786.* Adsentitur huic HILDANUS *centur. 6. obs. 84.* Vomitorium principio podagræ datum omnem dolorem absolvere legimus. Ipse quoque in notis ad Poterium observavi, in principio exhibitum vomitorium impetum arthritidis retudisse, idemque altero die repetitum similem effectum præstitisse. ALPINUS *in Medicina Ægyptiorum p. 110.* observat, multos se vidisse, qui cum à podagra calculique doloribus excruciatii fuissent, crebro usu vomitorii egregie adjuti fuerint.

24. Solent etiam ab iracundia multa atque graviora mala oriri, non alia de causa, quam quod bilis copiose in duodenum ex ductibus biliariis effusa, genus nervosum membranasque graviter adficiat, multa inde mala excitando. Si enim nimium redundat bilis, neque per alvum, neque per vomitum rejecta, multas anxietates, oris amaritiem, nauseam vomendique conatum & alia mala creat. Profunt igitur in hoc adfectu absorbentia, rhabarbarina, leniora laxantia & emetica, spirituosus salibus volatilibus infusisque calidis diligenter evitatis.

25. Erysipelas, variolæ, hæmorrhagiæ, aphtæ, diarrhœæ, adfectus hypochondriaci & hysterici, febres malignæ petechiales eandem sedem agnoscunt, duodenum nempe, siquidem in hoc ex bile lymphæque putridæ stagnatione oriuntur. Unde & illud fluit in praxin, primæ regionis rationem maxime esse habendam. Quod argumentum cum latius uberiusque sim complexus *in dissertatione de bile medicina & veneno corporis*, nos brevitati consulturi, ampliori explica-

explicationi superfedemus, ad illam dissertationem lectorem remittentes.

26. Quod praxin & viam medendi attinet morborum, qui in duodeno & prima regione sedem fixerunt, facile ex dictis apparet, emetica diligenter præparata & prudenter exhibita hisce morbis unice auxiliari. Emetica sunt generosa & valida remedia, quorum virtus fere omnibus reliquis medicamentis præferenda. Et si medicus solidi quid præstare potest, certe emeticis id efficere valet. Sæpe enim unico remedio magnus tollitur in principio morbus, & qui emeticis non utitur, nec iis recte uti novit, ille nostra quidem sententia veræ praxeos ignarus est. Opus est vero emeticis, si ventriculus & duodenum impuris humoribus scatent, ut statim in limine materia peccans ejiciatur. Perniciosum enim est, per tam longum intestinorum canalem & per inferiora evehere, cum ad sanguinis massam facilius pertransire possit. Et quod maximum est, purgantia pleraque materiam, in ventriculo & duodeno stagnantem non aggrediuntur, nec commovent, nec promovent; sed in hisce partibus parum operationis exercent magis intestina tenuia excitando. Ratio ex ipsis anatomicis potest peti: gaudet, uti notum est, ventriculus & duodenum crassa glandulosa, sub qua nervea jacet, per quam minus penetrare purgantium spicula possunt & nerveam pungere, utpote quæ fixioris & minus vehementis sunt indolis: melius autem ipsarum emetica stimulant, quæ sunt penetrantioris & agilioris ingenii. Præferimus tamen semper liquida solidis, utpote quæ non in una parte ventriculi hærent, sed ubique æqualiter sese diffundunt, & propter virtutem suam facilius & majori cum euphoria operantur. Secundo commendamus in morbis, qui duodeno & intestinis insident ea omnia, quæ tonum roborant, motum peristalticum conservant, tonum labefactatum adaugent, & sic alvum solutiorem præstant. Hujus generis sunt salia deterfiva v. g. arcanum duplicatum, terra foliata tartari, it. medicamenta amara cum temperatis gummatibus & resinis mixta, rhabarbarina, succinata, myrrhata, aloetica. Qui enim curare morbos chronicos, & eos, qui in

primis viis fiunt, avertere tentat, hic ante omnia motum peristalticum respicere debet, quo salvo, quod patet ex alvi debito officio, cetera facilius subiguntur. Deinceps ad morbos in duodeno subortos, eliminandos maximi facinus absorbentia & præcipitantia, quæ acorem atque acrimoniam infringunt: horum usus certe maximus in medicina. Si fuerit bilis nimis calida, acris, volatilis; nitrosa acidula præsentissima sunt remedia, quæ eam corrigunt atque emendant. Eadem si iners, si nimis viscida est, elixiriis amaris balsamicis restitui debet.

27. Ultimo sciendum est, iis in morbis, quorum causa delitescit in prima regione, quæ impuris multis humoribus repleta, minus quadrare sudorifera, calidiora, & salia volatilia, utpote hæc ipsa non tantum materiam peccantem magis attenuant, sed & in massam sanguinis & humorum nocentissime inferunt; cum tamen potius per superiora & inferiora eliminanda sit. Placet mihi locus SYLVII *prax. med. p. 445. quandocunque prima regio scatet impuris humoribus, sudorifera non sunt adhibenda, quia sudor non excitatur nisi sanguine commoto universo, qui tunc quoque solito fit fluidior, unde cum ipso, quaqua versum facilius & citius & abundantius feruntur, quæ vis sanguini admixta.* Peccatur hac in re toto die, dum ante evacuationem primarum viarum calida propinquantur, præsertim sudorifera cum regimine. Denique improbamus & illud, quod prima regione impuris humoribus repleta, multi anodyna adhibeant, cum tamen in tali casu illa perniciosissima. Nam materiam nocentem in centro tenent, quæ tamen erat evacuada; tertio illud maxime tenendum, quod, si materia peccans in primis viis latens, jam ad massam sanguineam atque ad ipsum habitum corporis transit, sicuti in erysipelate, variolis, arthritide accidit; tunc caute adhibenda emetica, quæ materiam à peripheria ad centrum trahendo graves affectus, convulsiones & gravia symptomata excitare possunt. Ideo hisce tunc abstinendum est, & absterfivis lenioribus vel etiam clysteribus utendum, illis potius in initio morbi & extra paroxysmum locum habentibus.



D E

IGNORATA UTERI STRUCTURA MULTORUM IN MEDICINA ERRORUM FONTE.

§. I.

IN perquisitiore structuræ uteri indagine, primo utique loco commemoranda est notabilis immo mirabilis illa fibrarum musculosarum, nec non vasorum, è quibus uterina compages contexta, vis, seu potentia elastica, quæ in eo potissimum consistit, quod ejus fibræ & vasa incredibilem in modum distendi & explicari, iterumque contrahi & sponte ad pristinum statum redire possint. Patet id quam maxime in utero gerentibus, dum à foetu, nonnunquam gemino, cum magna secundinarum & liquidorum mole in uteri cavo concluso, mirum in modum officina hæc attollitur & ampliatur, exclusis autem sub partu contentis, subsidet rursus ac ita coarctatur, ut vix centesima ratione molis & magnitudinis pars remaneat. Et quamvis plures adhuc in animantium corporibus sunt solidæ partes, quæ nonnunquam à vi in-

Frid. Hoffmanni Oper. Tom. VI.

terius urgente mirifice distenduntur, & cessante eadem, iterum sese contrahendo, pristinum spatium & naturalem molem recipiunt, quemadmodum in cute & scroto hydropico tumore distentis, item in ventriculo & intestinis flatibus turgidis subinde observare licet; longe tamen major magisque conspicua tam dilatandi, quam corrugandi & contrahendi in utero humano est potentia. Accedit vero & illud, omnemque fere captum exsuperat, quod licet uterus, qui extra graviditatis statum, figura & magnitudine vix pyrum æquat, in tam eximiam molem excrescat, hac tamen ampliatione non tenuior reddatur, aur crassities tunicarum in incredibili ista expansione minuat, sed potius eadem maneat.

2. Deinceps nulla in universo corpore pars tam numerosa vasorum copia est instructa, quam uterus. Ex his enim primæ sunt arteriæ & venæ spermaticæ, quæ ovaria contingunt, ac in fundum uteri copiosissimis ramificationibus feruntur, ibique terminantur,

quod vel clare ex eo patet, quia flatu in spermatica hæc vasa immisso, ipse uteri fundus elevatur. Post spermaticas conspicui admodum sunt rami arteriæ & venæ hypogastricæ, qui ad partem mediam & inferiorem uteri, nec non vaginam excurrunt, ad quam etiam, maxime ubi recto connectitur, rami venarum hæmorrhoidalium externarum pertingunt, quæ cum ramis hæmorrhoidalium internarum per anastomosis junguntur. Et quod maxime notandum, hæc largissime per uteri corpus disseminata sanguifera vasa, non solum mirum, tortuoso ac serpentino quasi flexu, iter legunt & quaqua versum discurrent, sed etiam in virginibus, sterilibus & foetum non gestantibus exilia minorisque amplitudinis: conceptu facto, in gravidis ita diducuntur & tam in longitudinem, quam maxime latitudinem explicantur, ut minimi etiam vasorum ramuli talem nanciscantur capacitatem, quæ majorem stilum admittat.

3. Præter vasorum confertam in utero congeriem & flexuosum implexumque eorundem progressum, notatu etiam admodum dignus est concursus, tam singularis, ut nullibi tanta tamque frequens canaliculorum è diversis locis huc tendentium, tam arteriosorum, quam venosorum, anastomosis, qua invicem committuntur, reperiatur. Inflatis enim spermaticis, attolluntur quoque hypogastricæ, & vice versa: pariter hæmorrhoidales externæ flatu distentæ, diducunt quoque internas, ac vicissim hæc illas; quin spermaticæ dextri & sinistri lateris conspectius mutuam ostendunt nexum. Id vero peculiare sibi servat exquisita illa vasorum uteri connexio, quod in plurimas cavernulas sive cellulas mutuo communicantes diversæ magnitudinis canalium alvei definant, & cellulas ovalis figuræ efforment, quæ substantiam ipsius uteri spongiosam & fungosam reddunt, ac in gravidis mire ampliantur; quo fit, ut uterus, præsertim prægnans, transversim sectus, ampla & innumera ferme foramina exhibeat. Hac sinuosa & cavernosa vasorum commissura efficitur, non solum ut ipse uterus in prægnantibus à sanguine contento mirifice dilatetur, ejusque compages tensa antea & stricta, laxior ac mollior reddatur, sed etiam ut orificia extremitatum vasculosarum, quæ in cavo oblique sub membrana uteri hiant, & per quæ aer canali cuidam insufflatus in ipsam cavitatem haud difficulter transmittitur, magis diducantur, sicque perforata vasculosæ chorii membranæ filamenta, nutrimentum ex iis haurire & ad foetum traducere possint.

4. Neque etiam in anatomica hac fabricæ uteri, ac potissimum vasorum ejus, consideratione omittendum, quod non modo hypogastricæ venæ, quæ sanguinem revehunt, dimidio majorem capacitatem obtineant, quam arteriæ hypogastricæ, verum etiam quod venæ sic dictæ spermaticæ, non recto, sed anfractuoso admodum & in orbem quasi recurvo ductu porrigantur, ita prorsus, ut si easdem extricare, earumque longitudinem supputare luberet, aliquot ulnas æquarent, & arteriarum spermaticarum prolixitatem vel ter superarent. Quæ quidem omnia luculentum præbent judicium, tarde utique ac segniter per venas has succedere sanguinis cursum; præsertim quum eadem valvulis destituantur, quarum ministerio in aliis corporis partibus impeditior sanguinis regressus ad cor eximie promovetur & adjuvatur. Denique de uteri fabrica id quoque singulare & notatu dignum, quod omni penitus careat pinguedine, qua aliæ partes internæ largiter obducuntur; eam procul dubio ob causam, ne membrana adiposis vasculis instructa, liberiori laterum expansioni & contractioni obset.

5. Ex peculiari igitur hac vasorum ac funiculorum musculosorum, è quibus uteri corpus coagmentatum est, textura, & mira potentia elastica, qua

vasa adeo à sanguine contento, vel ipse etiam uterus à foetu, ampliantur, & propria virtute, sublata distensionis causa, iterum ad priorem statum & magnitudinem redeunt, nec non ex difficili sanguinis per venas uterinas progressu, plura utique alias difficilioris solutionis & indaginis phænomena, circa statum, vel naturalem, vel præternaturalem, foeminis solentem, occurrentia, clarius explicari, immo compluribus in pathologicis æque ac therapeuticis erroribus, hujus scientiæ ope detectis, certior & expeditior malis ex uteri vitio pullulantibus medendi via inveniri potest atque ostendi.

6. Et ut à maxime solenni initium capiamus, inter omnes constat, quod singulis mensibus in foeminis à pubertatis ad consistentis usque ætatis periodum, excretio sinceri sanguinis, ex apertis uterinis vasculis, sive per uterum, sive vaginam, dispersis, eaque saluberrima, secundum ordinarium naturæ cursum succedat; hac autem vel penitus subsistente, vel parcius aut male ad calculum contingente, difficiles valde & graves suboriri morbos, ut medici in omnibus, quibus muliebris sexus affligitur, morbosus insultibus, critici hujus fluxus merito rationem habere debeant curatissimam. Jam vero in evolvendis menstruæ hujus evacuationis causis, insignis inter medicos viget dissensus, dum alii specificum quoddam fermentum, alii determinatum quendam, nescio quem, principii intelligentis sensum, & quod molestum est, expellendi conatum; alii denique proximum efficacem astrorum ac potissimum lunæ influxum pro causa venditare non erubescunt. Plures etiam sunt, qui sanguinis abundantiam hunc fluxum suscitare contendunt: quod vicissim alii pernegant, eo quod per venæ sectionem, quæ plethoræ generationem impedit, minime excretio hæc penitus possit arceri ac cohiberi.

7. Quicumque autem mechanicam uteri, quoad vasa & fibras structuram curatius paullo considerat, is facili negotio, periodici hujus fluxus veras causas, immo effectus à sapientissimi opificis providentia dependentes, perspiciet. Nam quia uterus ob ingentem vasorum, quibus obitus est, copiam, eorumque sinuosum ac tortuosum ductum, nec non ob facilem & stupendam fere, quæ in ejus compagem incidit, distensionem, commodum sanguinis mole exundantis præbet diverticulum; hinc si liquor ille vitalis in foeminis, quæ nunquam non plethoræ ingenerandæ quam maxime aptæ sunt, lapsu temporis sensim in canalium uterinorum alveis accumulatur, & per venas difficilius debito gradu ac justa proportionem regreditur, fit, ut vasculosæ sinuositates eodem repleantur ac infarciantur, donec eorum extremitates, quæ oblique hiant, in uterum, nimium distentæ, apertæ tandem sincerum cruorem in cavum vel vaginam uteri effundant. Expulsa vero sanguinis superflui sufficienti copia, oscula iterum collabuntur, vasa coarctantur, & diminuta plethora, reliqui sanguinis circuitus liberior non modo per uterum, sed per universum etiam corpus redditur, sicque ob exquisitam omnium in machina animali ratione circuli sanguinis sympathiam, salutaris ad integritatis tutelam subsequitur effectus.

8. Quum itaque sanguinis redundantia, præcipua sit menstruæ, quam foeminæ experiuntur, evacuationis, quæ in salutem corporis cedit, causa; luculenter profecto patet, quod non leviter in artis exercitio ii medentium hallucinentur, qui, ubi ob morbos prægressos, aut nimias in aliis locis factas hæmorrhagicas evacuationes, purpureus latex exhaustus est, eamque ob causam menses substiterunt, vel parcius exsolvuntur, fortioribus pellentibus & emmenagogis fluxum sanguinis proritare nituntur; quum potius laborandum esset, ut superata valetudine, appetentia &

& digestio restitueretur, & alimentis eupeptis ac eu-chymis, quæ bonum & temperatum chylum ingig-nunt, depressa erigeretur sanguificatio, sponte utique, hac reparata, utero ad officium redeunte.

9. Quum vero porro uteri fabrica ratione textura, ratione virtutis expansivæ & contractilis, ratione quoque exilitatis & amplitudinis vasorum, non in omnibus una sit eademque, sed quoad ætatem, hæreditariam & nativam partium solidarum constructio-nem, vitæ quoque genus & victus multum varient: medici omnino est, in dijudicandis & curandis ex uteri vitio morbis, ipsius dispositionem & naturam probe scrutari, & cognita eadem, postea accommo-da præsidia opponere. Nihil certe in praxi medica solennius est, quam si tributum lunare à virginibus, vel tenerioribus foeminis male ad calculum solvitur, sanguinis missionem suadere, eaque admissa, medi-camenta menses pellentia, & quidem quæ vehemen-tiorem turgescientiam & commotionem in sanguine suscitant, præscribere; à quorum tamen usu in longe deteriorem statum subinde conjiciuntur miseræ, dum urgenti jam chlorosi subinde convulsiones & artuum distensiones, vel lentæ febres, graves cephalalgiae aliæ-que passiones associantur. Quod quidem ob nullam aliam rationem fieri arbitramur, quam quod defi-ciens, vel parvus menstrui fluxus successus sæpissime à tensa fibrarum uteri stricture vasorumque nimia exi-litate, ut ab allabente sanguine ægrius distendantur, ortum trahat. Id enim multiplici observatione in ar-tis exercitio compertum habemus, virgines juniores & tenellas, acetariorum abusu, nec non frigido aere liberius paulo ad inferiora admissio, dum sæpe nudis ferme natibus, frigido solo insident; difficulter sana-bilem & gravibus symptomatibus stipatam mensium anomaliam sibi contraxisse.

10. Proinde si hæc subest causa frustra utique, quin cum damno, propinantur pellentia, quippe co-arctatis & obferatis viis & in celerem motum ac ebul-litionem coacto sanguine, major adhuc obstructio, gravior infarctus sanguinisque ad partes nerveas nobi-liores regurgitatio, spasmodorum & convulsionum sæpe procreatrix, subsequitur. Neque venæ sectio in pe-de, quæ alias ad levanda symptomata admodum pro-ficua, multum confert, sed sæpius ob majorem, quem prorit ad uterum, appulsus, obstipationem obfir-mat, & quo minus è vasculorum extremis cruor ef-fluere possit, efficit. Unicum potius auxilium in fo-ribus & balneis tepidis emollientibus, strictas fibras laxantibus repositum, eumque in finem laudatissima est virtus balnei ex sola aqua pluviali, levissima & purissima parati, vel si naturale expetis, omnium ac-commodatissimum balneum ex aquis thermalibus Tœ-plicensibus, sulphuratis dictis, tempestive admissum. Interne vero, rejectis omnibus calidis, acrioribus, bal-samicis, optimum in potu thermarum erit præsidium; vel si occasio foterios fontes adeundi non suppetit, com-mendationem quam maxime merentur salia neutra in-cidentia, aperientia & blande urinæ & alvi fluxum simul elicientia, cum sufficiente liquido sumta. Quo-rum censum inprimis subeunt borra, sal Sedlicense, terra foliata tartari, solutio oculorum cancri, arcanum duplicatum; in biliosis nitri spectata est efficacia: sin vero acido obsessæ sunt primæ viæ, liquor salis tar-tari, in quo nonnihil massæ pilularum balsamicarum solutum, opem fert exoptatissimam.

11. Quemadmodum vero mensium defectus, vel eorum imminutus fluxus ex arteriolarum uteri potis-simum angustia, compressione & stricture proficisci-tur: ita immodica sanguinis è genitalibus effusio, à vasorum & sinuum, quos eadem in uteri substantia efformant, nimia amplitudine, relaxatione, tono de-jecto & impeditore inde facto sanguinis per venas

Frid. Hoffmanni Oper. Tom. VI.

ad cor reditu, ortum trahit. Neque enim ulla pars corporis hepate excepto est, ubi tam difficilis cur-sus & regressus ad fontem observatur, quam in ip-so utero, id quod non tantum ob perpendicularem hujus partis respectu cordis situm contingit, verum etiam maxime, quod vasa inprimis venosa, uti jam-jam meminimus, complicata quasi mirum tortuo-so reptatu per ejus compagem discurrunt. Quumque præterea tam propter extensionem uteri à foetu, quam venarum & spermaticarum & hypogastricarum an-fractuosum ductum, expeditus sanguinis reflui cur-sus admodum retardetur: facile jam patet ratio, cur diameter venarum uterinarum, duplo amplitu-dine arterias superet, ut prona adeo inde elici possit consequentia, quadruplo majorem quantitatem san-guinis venis uteri quam arteriis contineri. Quod si itaque venosi, quibus uteri compages referta est, sinus, plus justo à cruore crasso stagnante disten-duntur, obice hoc posito, sanguis per arterias va-lidius appulsus, præcluso in venas transitu, copia sua & impetu vasculorum orificia nimium distenta, tandem divellit, ut dehiscant, & contentus humor largiter effluat.

12. Ex hoc jam facile intelligi poterit; quare vir-gines rarius nimium mensium fluxum, foeminæ ve-ro, quæ pepererunt, item quæ foetum gestant, haud raro enormem uteri hæmorrhagiam patiantur, quæ etiam sæpissime in gravidis vera abortus causa est. Perquam enim notum est, non facile abortivam foe-tus exclusionem incidere, nisi præcedente largo & im-petuoso sanguinis profluvio. Scilicet quodcumque in gravidis vasa uteri venosa à copiosi sanguinis affluxu, ultra modum distenduntur, & sanguis in cellulis hæ-rens grumescit & coagulatur, non modo arteriarum orificia, sed etiam ipsi sinus nimium infarti, aperti, accedente simul convulsivo uteri & partium vicinarum motu, sine quo non facile abortus contingit, sangui-nem cum impetu eructant, uterus flaccescit, placen-ta ab ejus filamentis & vasorum hiatibus secedit, ac demum foetus secundo vel tertio ab hæmorrhagia die subsequitur exclusio.

13. Et hinc est, quod gravidæ, si ultimis gestatio-nis mensibus natura abortum cum enormi hæmorrha-gia molitur, summum sæpius vitæ discrimen incur-rant, quod etiam non raro accidit, si maturi jam foe-tus exclusionem præcedit largius sanguinis profluvium. Funestis enim quamplurimis exemplis confirmat ex-perientia, & matrem & infantem graviter inde pe-riclitari, quinimo nisi embryo è claustris prodeat, utrosque propter incompscibilem ac lethalem hæmor-rhagiam perire. Quamdiu enim infans partui ma-turus, vel immaturus adhuc embryo, in uteri lo-culamento detinetur, is non modo cum suis vasis admodum est distentus, sed & canalium orificia ab impetuosiori sanguinis eo appulsu latius adaper-ta, largiorem sanguinis copiam fundunt & cruor perpetim manat: contra vero enixo foetu, licet hiantia, ob avul-sam, qua antea obducebantur, secundinam, vasorum ora, sanguinem subinde copiose effundant, cessante tamen matricis expansione, diductæ antea aperturæ simul concidunt, oscula angustiora fiunt, iisdemque coeuntibus tandem ac clausis, sanguinis effluxus sisti-tur. Quare si ejusmodi in casu matrem servare & funestum vitalis liquoris profluvium compescere ani-mus est, nihil certe consilii superest, quam ut foetus mortuus aut chirurgico ministerio promte extrahatur, aut abortus medica arte tempestive procuretur: id quod etiam pluribus BOHNIIUS in *dissertatione de abortu salubri* confirmat.

14. Quamvis autem paulo vehementior animi affe-ctus, inque primis terror, vel impensior sanguinis à mo-tu fortiori, à balneo nimis calido, aut assumpto pharmaco

purgante, emetico, fudorifero, aut sic dicto emmenagogo, commotio & rarefactio, frequentes abortionis causæ sint: attamen nisi vasa uteri nimium à sanguine copioso laxata, distenta, infarcta, & matrix ad spastico-convulsivas motiones concipiendas valde prona existat, nullus facile metus erit abortus. Quapropter etiam erroribus, tam vulgi, quam plurimorum medicorum, is quoque annumerandus, quo autumant, dari certa & indubitatae efficaciae abortiva pharma; quum tamen experientia prorsus refragetur, qua constat, à prægnantibus meretricibus largas venæ sectiones, medicamina purgantia, emetica & menses pellentia, validiora etiam, sæpe sine ullo effectu, ad expellendum foetum adhiberi, ac vicissim, si matrix ad conceptum præmature exturbandum disposita, accedente levi tantummodo causa, istum protinus sequi. Et profecto singulare divinæ providentiæ atque sapientiæ documentum hoc præbet, quod in omni rerum universitate non absoluta ejusmodi, quæ semper abortum provocandi potentia pollet, reperiantur media, ea quod si essent, innumera utique in tanta hominum scelestorum multitudine patrerentur homicidia.

15. Nihil vero frequentius accidit, quam ut quæ abortum jam perpessæ sunt, levi de causa, eodem tempore recurrente, in eum rursus incidant. Pariter experientia compertum est, plerumque insignes sanguinolentas instar ovi gallinacei massas, una cum copioso cruore, ante abortivam exclusionem ex utero gravidarum elidi, luculento argumento, à præcedente abortu robur & elaterem uteri ejusque vasorum valde fuisse debilitatum, ut non tam cito in pristinum statum redire potuerit. Nam uteri ad tam frequentem abortum dispositio, unice in nimia relaxatione & dilatatione vasorum quærenda est, quæ ut tollatur vasorumque tonus reparetur, nisi cito prudens medicus primis diebus vel hebdomadibus post abortum aut legitimum partum, blandis videlicet laxantibus & temperatis balsamicis ac roborantibus, aliquoties reiteratis, aut congrua diæta, vel, si sanguinis copia urget, tempestiva ejusdem primis statim, si conceperunt, mensibus è vena secta imminutione, laboret; difficulter sane hæc vitiosa uteri constitutio tollitur ac emendatur. Plerumque enim, quod probe notandum, nimia quoad vasa & vires sanguinis redundantia, cui maxime omnium, quæ spongiosioris habitus corporis sunt, quæ segnioris sunt alvi & in otio degunt, foeminæ patent, causam omnino materialem præmaturæ expulsionis subministrat. Quapropter si non sapienti & quasi provido naturæ consilio primis imprægnationis mensibus sanguis, quod frequenter accidit, consueto tempore ex regione uteri exteriori profluat, vel ob inappetentiam, nauseam, ventriculi subversionem & præcordiorum anxietates, tanquam symptomata in principio valde familiaria, parciore fiat ciborum assumptio, vel nisi pro differenti exundantis sanguinis ratione, venæ sectio plus vel minus reiteranda instituat, ipsaque alvus congruis remediis solvatur, raro foetus ad maturitatem pertingit, & ad legitimum usque partus terminum in utero conservatur.

16. Accedit alius non minoris momenti & communis ferme in praxi vulgari & minus rationali medica eorum error, qui nimiam sanguinis menstrualis, vel etiam lochialis in puerperis aut abortientibus, per uterum profusionem, vel per crebrius in manu institutas venæ sectiones, vel per liberalius exhibita refrigerantia, positiva adstringentia aut opiata & narcotica, imprudenter ingenti cum agrotantium damno cohibere tentant. Hac enim perversa ratione medendi & remediis incongruis, naturale robur, tonus & elater non modo uteri, sed & solidorum universi cor-

poris valde minuitur, & major atonia inducitur, ut malum vel non sanetur, vel gravius fiat. Quin potius, quod quidem forsitan pluribus παραδόξον videbitur, qui non cum & ex ratione in medendo agere suescunt; confirmatius asserimus: eandem methodum eademque fere remedia, quibus menses imminutos & suppressos revocamus, ad eosdemque quoque nimium & supra modum fluentes compescendos, & ad naturalem statum traducendos, esse utilissima. Multiplici sane experientia confirmatum habemus, decenti usu thermarum, acidularum, balneorum ex herbis nervinis, vel etiam emollientibus concinnatorum, clysterum uterinorum, nec non medicamentorum ex marte paratorum pilularum sic dictarum balsamicarum, Becherianarum, vel ad earum imitationem paratarum, aut pediluviorum, item salis deterfivi nitrosi, mensium & nimium, & imminutum fluxum felicissime fuisse sanatum. Nam in utroque malo defectus uteri tonus est, vasa cruore distenta, circulus sanguinis per uterinos canales non liber & expeditus, sed infarctu, obstructione & stagnatione interceptus, quibus tollendis vel corrigendis, prædicta utique remedia admodum sunt idonea.

17. Sed pergimus ad aliud vitium uteri, quod ex eadem, quam memoravimus, matricis strictura, derivandum. Videlicet tortuosus implicatusque innumerorum in uteri compage vasorum est reptatus, lentus sanguinis admodumque difficilis per eadem cursus; eaque propter non mirandum, tot & tam variis diversæ figuræ, magnitudinis & structuræ excrescentiis, tam carneis, quam fungosis, ex prava nutritione oriundis, obnoxiam esse hanc præ aliis partem, quæ vel externam ejus superficiem, vel internam cavitatem, cervicem, aut etiam vaginam obsident, & nonnunquam adeo augescunt, ut graviditatem mentiantur. Crebrius etiam quam ullibi massæ fibrosæ sanguinolentæ, nec non ex membranis coagmentatæ polyposæ concretiones, in canalium uterinorum alveis gignuntur, quæ deinde vel enormi uteri hæmorrhagiæ, quam abortio sequitur, vel sterilitatis causam suppeditant. Communi nomine progenita ejusmodi in utero concrementa dicunt molas; quarum quidem plures oppido sunt species, à cl. LAMSWERDE in molas nutritionis & generationis distributæ; ne tamen, quod facile fit, confundantur, earundem discrimen paullo clarius hoc loco exponere non erit incongruum.

18. Ac primo quidem secundina, cum tenello unius, vel etiam duorum mensium foetu, per abortum exclusa, ab ignavis pro mola habetur, quia coagmentatum ex carne frustum refert. Deinde, utut rarius, massæ globosæ, in ipso utero enatæ, & quæ haud raro graviditatis suspicionem faciunt, ac sæpe in vita functis reperiuntur, vel etiam aucto peculiariter uteri motu & constrictione eliduntur. Porro nonnunquam accidit, ut perpeffo abortu, vel superato etiam legitimo partu, aliquot mensibus post, à foeminis, quæ gravidæ judicabantur, massæ solidæ carneæ, variæ magnitudinis & figuræ ejiciantur, quæ dum deforme corpus, & animalculi cujusdam, ut talpæ, muris majoris, aut alius speciem repræsentant, à superstitiosa plebe incantamento tribuuntur, ac molæ esse perhibentur, quin à plurimis medicorum pro præternaturali conceptu, ex semine imbecilli ac morbofo prognato, venditantur. Hæ sæpius per annum & longius in utero gestantur, & propter varia pathemata gravidis solennia, veri embryonis conjecturam cient, ac quandoque decimo demum vel undecimo mense extruduntur. Sed firmo utique fundamento cl. RUVSCHII nititur sententia, qui in *observat. anatomico-chirurg. XXVIII. & LVIII.* perhibet: uterina hæc concrementa, ex relictis post foetum exclusum secun-

secundinae frustulis, cum uteri vasis firmiter connexis, generari, quæ sanguinis appulsu nutrita, incrementum accipiunt, & lapsu temporis duriora & compactiora facta, pro varia uteri compressione diversas quoque figuras nanciscuntur. Sæpe enim fit, ut secundinae prodeant dilaceratae, quare non inconsultum est, ipsas post partum probe inspicere & examinare, an integræ, vel divulsæ sint; quandoquidem si portio quædam remaneat, gravibus pathematibus objicitur foemina, eaque propter tum maxime laborandum est, quo restitans frustum cito expellatur, quod nos sæpius aut convenienti clystere, aut pilulis balsamicis, felicissime præstitisse recordamur. Frequentioris tandem observationis sunt ex sanguine & fibris membranosis coagmentatae massæ, à nonnullis polypi dictæ, quæ in diductis ac dilatatis uteri gravidæ vasis prognatae, & demum fortiori matricis ac vicinarum partium nisu foras propulsæ, crebrius abortum causantur, eundemque vel antecedunt, vel comitantur, vel subsequuntur.

19. Cognito sic malorum discrimine, perspecta quoque earum origine, facilius nunc curiosam istam quæstionem, à pluribus acius agitatum, dirimere licet: num scilicet virgines molam gestare possint? Nam haud difficulter quisque intelliget, eas molas, sive massas carneas, quæ ex relicta secundinae parte aucta originem fortiuntur, in iis, quæ virginitatem illasam servarunt, neutiquam succrescere posse. Neque etiam frustra ista fibrosi & coagulati sanguinis, quæ molæ vel polypi censentur, in virgineo utero, cujus vasa valde exilia & angusta sunt, sed in gravidis potissimum generantur, & in parturientibus solenniter observantur. Minime vero insuetum aut impossibile est, fungosa corpora, tam in exteriori superficie, quam etiam in ipsa cavitate matricis virginum, perpessa videlicet prius externa quadam violentia, ut lapsu ex alto in abdomen, posse produci; quemadmodum constat fide BARTHOLINI cent. I. hist. 97. item HÖRSTII de morbis mulier. lib. IV. obs. 39. Pariter id quoque non negandum videtur, sed rationi utique nec non experientiæ admodum congruum est, conjugatas, vel etiam viduas, provecioris ætatis, quinquagenariis majores, sanguineas & εὐσπαρᾶς, subsistente dudum jam menstrua sanguinis per uterum purgatione carneas & sanguinolentas moleculas, pugno interdum æquales, molliores aut duriores, cum enormi sanguinis fluxu edere posse, ejusmodi exemplum prodidit MARCELLUS DONATUS lib. IV. cap. 25. pag. 451. JOH. RHODIUS cent. III. cap. 53. nec non RODERICUS à CASTRO de anu septuagenaria.

20. Ob difficiliorem & valde tardum sanguinis per uteri vasa, & maxime spermatica, quæ in varios cincinnos, pampinos vitium æmulantes, contortos implicatosque divaricantur, regressum, & hinc longissimum ad vitalem cordis fontem iter, fit, quoque, ut in utero & connexis ipsi partibus, tubis nempe & ovariiis, copiosæ interdum feri inundationes & tumores aquosi exoriantur. Nunquam enim citius & promptius fluida & aquosa pars à sanguine secedit, quam ubi lentior minusque expeditus ejus per viscera transitus est, quemadmodum id clare patet in hepate; & ob hanc causam etiam non facile numerosiora, quam in hepate ac uteri substantia & adjacentibus ei partibus, vasa lymphatica reperies, quæ à largiori decubitu & affluxu lymphæ distenta, magnas in vesicas, quæ hydatides Græcis dicuntur, explicantur, quibus demum disruptis, nonnunquam subito hydrops gignitur, & mira feri quantitas effusa cavitatem abdominis occupat. Ita permultas hydatides in uteri confiniis post partum difficilem reperit SALMUTHUS cent. I. obs. 38. & in hysterica foemina gravida dissecta PECHLINUS obs. 19. In cornubus ac tubis uteri ingentem aquæ copiam nonnunquam colligi, fidem facit TULPIUS, observatt. lib. IV. obs. 45. exemplo foe-

minæ, quæ in utroque uteri cornu, novem circiter aquæ purisque libras, inclusas innumeris vesicis, gestavit. Plura ejusmodi exempla vide apud SCHENCKIUM lib. III. obs. 6. 7. & ROLFINKIUM de organ. genital. cap. 20. nec non SYDENHAM de hydrope. Eandem quoque in rem apprime facit HARDERII observatio, perhibentis: in foemina rustica repertum esse non solum ovarium sinistrum aquæ subfalsæ & foetentis libris duabus oppletum, sed etiam annexam eidem tubam Fallopianam notabili hydatide obsessam. Et nosmetipsi ante viginti annos ex gravi in hypogastricam regionem lapsu, annotavimus in quadragenaria subortam ibi intumescantiam, cum dolore tensivo, quam aquæ limpidæ largum profluvium, cum sanguine menstruo primum prodiens, excepit, quod postea cessante etiam sanguinis stillicidio, per anni dimidium continuavit, ita, ut quotidie minimum libra una efflueret, donec ægra, incassum adhibitis variis medicaminum generibus, tabe lentaque febre penitus confecta, obdormisceret.

21. Neque etiam adeo insolens, sed aliquoties à nobis observatum est, sub ingravidatione simul occultari hydropem; & hinc fit, ut sæpius medici in dijudicatione fallantur. Vidimus vero ejusmodi foeminas gravidas, hydrope simul laborantes, post partum copiosioris feri effluxu servatas, alias autem humore scilicet in cavum abdominis jam effuso interiisse. In primis memoratu dignum est, quod PLATERUS lib. III. observat. pag. 620. prodidit de muliere quadam, quæ quoties uterum gessit, toties detenta fuit ascite. Quin immo ipse sæpius per Dei gratiam feliciter sanitati reddidi foeminas, ex cachexia, inordinata victus ratione & mensium defectu contracta, intumescantiam universi corporis prolapsas, & summa spirandi angustia, somnolentia viriumque defectione afflictas, quibus ab usu pilularum balsamicarum nostræ compositionis & salis aperitivi, non tam per alvum, quam per uterum, catameniorum tempore, & etiam extra illud, larga aquarum quantitas diu secessit, quæ exsoluta, sensim paullatimque gravia pathemata, à longo tempore ægras excruciantia, conquieverunt. Et hanc ob causam quoque in ea versamur sententia, hydropicos tumores in foeminis plus ex uteri, quam hepatis vitio subnasci, & facilius quoque abigi ac persanari, quam ubi hepar simul affectum est, eo quod liberior & apertus sero stagnanti per uteri ostia patet exitus.

22. Hisce jam expositis, facilius nunc erit perspicere rationem, quare virginēs æquæ ac conjugatæ, tam frequenti, & tam diuturno molestissimo feri variæ consistentiæ varique coloris, ex utero & ejus vagina profluvio, divexentur. Nam quia tonus & motus uteri, qui æquabili fibrarum ejus crispatura & remissione continetur, tam facile læditur, debilitatur & dejicitur, prætereaque tardus admodum per circumflexa & in serpentinos ductus porrecta uterina vasa sanguinis & humorum cursus, lentior quoque sanguinis per venas valvulis destitutas regressus est; perspicile utique, non solum infarctus & stagnationis sanguinis ac feri in matrice oboriuntur, sed ipse etiam serosus & lymphaticus humor segniori progressu lentescens, tandem exitum sibi parat, ac per passim in utero & vagina obvia orificia effunditur. Communis quidem plurimorum auctorum est sententia: ex lacunis GRAAFII, sive foveis circa urethram conspicuis, & parvis ibi consistentibus glandulis, humorem hunc excerni; at in his lacunis, nullum, quod setam admittat, foramen facile reperire licet, sed potius ad utrumque latum orificii & per totam vaginæ substantiam lacunæ apparent plures, quæ quam facile setæ ad digiti dimidium aditum concedunt, earumque ductus pressi liquorem femini haud dissimilem plorant.

Vid. HEISTERI *Compendium anatom.* pag. 81. & 82.

23. Verum enim vero, utut relaxatæ hæ glandulæ stillare possint humorem paullo copiosorem; tamen nequiquam hæ ipsæ unicam & genuinam fluoris albi sedem constituunt, sed longe plures dantur meatus, è quibus materia fluoris albi, nec non liquoris serosi impuri, in puerperis cum & post lochiorum fluxum manentis, ortum trahit. Et licet RUYSEHIUS glandulas in utero unquam visas esse, aut demonstrari posse neget, nullum tamen dubium est, quin ex istis ostiolis, quæ sub mensium fluxu sanguinem fundunt, serum etiam exitum moliri possit. Perquam enim notatu digna est, cel. FANTONI *anat. C. H.* pag. 186. observatio, qua fidem facit, quod status per venas uteri in cavum matricis & vaginæ, ac vicissim ex hoc in venas adigi possit atque transmitti. Deinde etiam teste GRAAFIO & HORNIO, pori & foraminula in cervice uteri conspiciuntur. Nec prætereunda sunt, quæ VERHEYEN in *Anatomia C. H. cap. 33. cf. tabul. XVII. fig. 2. 3.* prodidit, quod scilicet in utero, in aqua macerato & per aliquod temporis spatium in blando calore detento, in interiori non modo vaginæ superficie, plurima corpuscula globosa, & alibi quidem racematim ipsi in hærentia, alibi vero per eam disseminata, sed in inferiori quoque parte cavitatis uteri, similia corpuscula viderit, eademque pro glandulis, seroso pituitosi humoris secretioni inservientibus, non immerito habenda esse existimet.

24. Quam leve autem hoc malum primo intuitu videatur, ut tantum pro coryza habeatur, tam contumax est, tam ægre admittit curationem, ipsosque medicos torquet atque fatigat; quod quidem nostro iudicio hanc potissimum ob rationem fieri arbitramur, quia plerique medentur, causam tantummodo à depravata sanguificatione, depressa sanguinis spiritusascensu ac prædominio feri deducunt, & reparando, remisso uteri tono, ac promovendo expedito per hoc viscus sanguinis progressu minus intenti, nonnisi remediis anticachecticis & serum educantibus, purgantibus, contra illud pugnant, omissis roborantibus summo opere necessariis. Nos potius ad debellandum refractarium hunc affectum quam maxime commendamus usum pilularum balsamicarum, quæ ad imitationem Beccheri, ex amaris extractis, gummatis balsamicis temperatis, refracta dosi extracti aloes & hellebori nigri, concinnatæ sunt, præsertim si cum martiali medicamento propinentur. Suademus quoque ut loco potus ordinarii bibant ægræ decoctum ex ligno lentisci, radice sarsaparillæ, rasura fantali citrini & rubri, passulis minoribus, cornu cervi, & semine fœniculi paratum. Opus tamen etiam est, ut exterius vel suffitus balsamici ex mastiche, succino, olibano, tacamahaca & cinnabari artificiali mane & vesperi admittantur, vel etiam in ipsum uterum mediante siphone spargatur aqua sic dicta *d'arquebusade*, aut liquamen, ex radice aristolochiæ, herba artemisiæ, matricariæ, agrimonie, argentinæ, myrrha, mastiche, foliis myrthi, floribus rosarum rubrarum, cum vino rubro decoctis, quippe quod, non solum in uterum injectum, sed etiam frequentius regioni pubis cum linteis applicatum, admodum proficuum est. Hisce vero omnibus præferenda omnino sunt balnea illa nativa, quæ ob martiale, quo dotata sunt, elementum, roborandi facultate pollent, ut sunt maxime aquæ Lauchstadienses, præsertim si in illis herbæ nervinæ, uterum efficaciter roborantes, cujus generis sunt melissa, mentha, origanum, serpillum, horminum, chamomilla Romana, majorana, bulliant, quandoquidem hæc, post balsamicorum usum & corpus expurgatum, iterato usurpata, non modo in hoc affectu, sed & in aliis ex uteri vitio provenientibus, effectum præstant longe saluberrimum, eo præstabi-

liorem ac certiorum, si interius simul aquæ temperatæ minerales potentur.

25. Sed sicuti hætenus exposita uteri vitia, potissimum ejus atoniæ & laxitati ortum debent: ita certe plura etiam sunt mala, quæ ex nimia & spastica ejusdem stricture originem trahunt. Id enim matrix cum omnibus partibus, quæ eandem cum ipsa structuram, ex fibris scilicet musculosis & nerveis, obtinent, commune servat, ut subinde stringatur & ipsa mo corripitur, quin nonnunquam convulsivo plane motu agitur. Ut vero maxime omnium in orificio uteri interno, quod sensu exquisitiori præditum, motuum remissio, sic etiam intensus nimis ac præternaturalis rigor animadvertitur, utpote quod, ex fibris magis nerveis, spirali ductu connexis, contextum est. Nam interdum nimia ejus constrictio reddit difficilem & laboriosum partum, quæ nisi balneis, unguentis vel fotibus emollientibus prius tollatur, foetui exitus penitus præcluditur. Deinde admissio improvide ad inferiora, maximeque uteri confinia, in fluxu lochiali vel etiam mensium frigore, eundem illico non sine periculo sisti, indubiæ experientiæ est. Idem effectus incidit à terrore, cujus uti magna vis in constringendis, præsertim externarum partium fibris & tubulis est; ita maxime illa observatur in uteri nervoso-musculosa substantia ejusque partibus, & frequentissimam abortionis, vel etiam nimii, aut suppressi menstrui vel lochialis fluxus, causam suggerit. Emetica porro, purgantia acriora & omnis generis venena, magnam quoque utero mutationem inducunt, & spasmos in uterina compage suscitantia, in sensibilibus facile ad abortum disponunt.

26. Neque præterea dubium est, quin non modo ad foetum & secundinam, sed etiam ad molas & massas coagulati cruoris, ex sinu uteri exturbandas, opus sit intensiori uteri systaltico, seu constrictorio motu ac robore, ita nempe, ut fundo uteri arctius stricto ac corrugato, collum ejus & vagina dilatetur. Ubi itaque in parturientibus ex virium defectu hæc intensio motus & toni constrictorii vigor deficit, ibi utique analeptica, inter quæ eminet cinamomum & ejus oleum, aut aqua spiritiosa, & alia quoque roborantia, ut essentia succini, myrrhæ, balsamum nostrum vitæ, spiritus oleosus Sylvii, bezoardicus Bussii, vel pellentia, ut borra, apprime ex usu sunt, quinimo commendantur eum in finem à multis medentur vomitoria, quo iisdem fibræ ad motum auctiorem excitulentur. Contra vero quando spasmio & convulsivo motu, qui sæpe ante partum vel in ipso infelicissime situm foetus naturalem invertit, ante partum, vel in ipso concutitur uterus, & omnia æstu ac calore fervent, improvide admodum & cum damno à medicis ejusmodi spiritiosa ingeruntur, quia exclusionem magis impediunt, & febrem vel delirium puerperis accersunt: quin potius præstantissima est antispasmodicorum & sedativorum virtus, quæ motuum impetus placant atque componunt, è quorum numero sunt crocus, castoreum, sal anguillæ, pulvis viperarum, secundinæ humanæ, lumbricorum, massa pilularum Wildegansii, anthera liliorum alborum, aqua florum tilie, sambuci, acaciæ, liliorum alborum, primulæ veris, aliaque id genus plura. Juvat quoque in tali casu in sanguine plenis imminente partu venam secare, & quidem in brachio, ne compressis à redundante cruore in infimo ventre nervis, motus tam in utero, quam musculis ad foetus expulsionem facientibus, cohibeatur ac impediatur. Eadem ferme medendi ratio ineunda, si in doloribus à nimia stricture, quam dolores abdominis in puerperis indicant, fluxus lochiorum non sine summa perniciæ retinetur. Hoc enim si contigerit, nullo modo pellentibus, sed potius motus sedantibus profluvium elicien-

eliciendum, eoque nomine marito utique ETTMULLERUS ex opio præparata in docte & practice conscripta dissertatione *de vi opii diaphoretica* commendat. Si vero ob constrictoriam uterinarum fibrarum vim remissam ac deficientem, impurus & stagnans sanguis, post partum ex utero non rite expurgatur, præter interna excernendi humoris effluxum cientia, spectata certe est efficacia clysterum ex herbis uterinis, abrotano scilicet, pulegio, roremarino, artemisia, melissa, floribus cheiri concinnatorum, adjecto nonnihil massæ pilularum balsamicarum.

27. Viget itaque in uteri compage motus & constrictorius & relaxatorius, quem si quis appellare velit peristalticum, is, meo quidem iudicio, non errabit. Dum enim una pars corrugatur, altera explicatur, quo reciproco motu quam optime omne præternaturale in utero contentum excutitur. Certe quod mulieres de flatibus ex utero prorumpentibus sæpius conquerantur, indicio est, tenacem humorem, qui calore in vapores resolvitur, in uteri sinu hære, & adhuc in ejus substantia motum succedere. Deinceps hunc alternantem uteri motum, nonnunquam haud secus quam in ventriculo sub vomitu fit, inverti, ex eo patet, quod sanguis menstruus vel etiam lochiorum, per vaginam fluere solitus, quandoque per tubas Fallopias in abdominis cavitatem lethali eventu urgeatur ac effundatur; quale exemplum consignavit RUYSCHIUS in *observat. anatomico chirurg. obs.* 84. 85. Accedit & perquam notatu dignum illud est, quod stricto arctius uteri fundo, & relaxata nimis inferiori ejus cum vagina parte, matrix ipsa ita contorqueri ac subverti possit, ut sæpius obstetrices decipiantur, & conjecturam capiant, restare adhuc in sinu foetum, qua de re RUYSCHIUS *l.c. obs.* 93. legi meretur. Quin imo præternaturali & inverso uteri ab exterioribus ad interiora motui, mea quidem sententia, tribuenda utique sunt gravia illa & funesta symptomata, quæ puerperas sæpe exercent, ut febres, dolores acuti, convulsiones, deliria, lethales apoplexiæ, exanthemata purpurea, rubra & alba, eo quod cuncta hæc sanguini corrupto per uterum expurgando, ad interiora represso, & passim in partibus stagnante, ortum debent.

28. Dignus certe est, qui notetur locus HIPPOCRATIS, graphice satis mala hæc ex intercepto libero sanguinis per uterum transitu, delineans, & ita habens: *refluens sanguis ab utero & premens septum transversum, retracto utero, præfocationem, in caput irruens, insaniam, epilepsiam, catochos, apoplexiam, occupans thoracem, tussiculares affectus, irruens in cor, palpitationes & tremores cordis, nonnunquam syncopes, in nervos denique, facit stuporem, immobilitatem & resolutionem.* Atrocia enim illa pathemata, quæ hysterica vulgo dicta, gravius sæpe foeminas exercent & cum symptomatibus mali sic dicti hypochondriaci spasmodico-flatulenti admodum conveniunt, potissimum uteri vitio debentur; quandoquidem magnus omnino utero cum præcipuis corporis partibus intercedit consensus, qui non tam à nervorum communione & mutua conspiratione vitiosorum in nervosis partibus motuum, quam potius à vasorum sanguiferorum systemate, & turbato in eodem sanguinis itinere est accersendus. Nam quemadmodum in hypochondriacis, quando sanguis per hepatis viscus ægrius transiens, ad eas partes, ad quas venæ portæ rami pertingunt, præsertim nervosas, ventriculum & intestina redundat, pressione & distensione spasmos cum gravissimis symptomatibus suscitatur: ita etiam idem contingit in foeminis, quando per uteri compagem non libere fertur sanguis, sed stagnans tardius progreditur, & ad corporis penetralia, ventriculum & maxime intestina, thoracem, & caput regurgitat, ubi pro diversitate

partium, vehementer lædit earum functiones & varia, eaque satis atrocia symptomata inducit. Quapropter medici periti & sagaciores, in omnibus, quæ foemininum sexum affligunt, malis, maxime ad uterum & mensium successum, nec non qualis motus & cursus sanguinis per matricis vasa sit, respicere & eo potissimum curandi rationem dirigere debent; quum contra illi, quod communiter fere fieri affolet, perversa incedant via, qui ad tollenda hæc pathemata varia præscribunt remedia, negligendo causam & originem, unde ea proveniunt.

29. Restat adhuc ut de consensu uteri cum intestino recto & vasis hæmorrhoidalibus quædam addamus. Ac primo quidem in consideratione sympathiæ uteri cum hæmorrhoidalibus venis, notandus utique est anatomicus error, etiam illis communis, qui hæmorrhagias & hæmorrhoidale negotium ubique crepant, dum autumant, internas hæmorrhoides, quæ venæ portæ propagines sunt, ramos spargere ad ipsum uterum, & maxime ad vaginam; quum tamen autopsia anatomica, uti cl. SALTZMANNUS in *dissertatione de vena portæ* dilucide monstravit, falsam esse hanc assertionem doceat, & testatum faciat, hæmorrhoidales tantum externas ad matricem & vaginam copiosos dimittere furculos, cum internis per mutuam anastomosis connexos. Interim cognito hoc vasorum nexu, in proclivi est rationem reddere, quare in foeminis, quæ sanguine abundant, is non modo per uterum, sed etiam quandoque per ani venas exitum affectet, eodemque præcluso, à stagnante cruore non tantum tubercula, coecæ hæmorrhoides dicta, oriuntur, verum etiam plura incommoda, dolores scilicet pressorii fixi in ossæ sacro, aliaque symptomata, iis familiaria, qui suppresso hæmorrhoidum fluxu laborant; molestissima succedant. Deinde id quoque experientia compertum est, in foeminis annosioribus, quæ non amplius menstruam patiuntur purgationem, sæpenumero, si non venarum sedis stillicidium, conatum tamen & nisum ad illud variis malis, suppressa hac evacuatione, solennibus stipatum, suboriri. Eidem quoque vasorum connexioni tribuendum, quod frequentissime primis statim à partu diebus nodosæ protuberantiæ vasorum hæmorrhoidalium in ano ardentem dolorem excitantes prodeant, quæ omni procul dubio à nisu & pressione fortiori, quam parturientes sustinent, copiosius sanguinem ad uterum & ejus vasa urgente, originem trahunt.

30. Quod vero ad vaginæ consensum cum intestino recto attinet, is quidem clarius ex eo patescit, quod membranæ utriusque tam arcte connexæ ac plane concretæ sint, ut vix provida ac suspensa manu sine dilaceratione divelli possint ac separari. Et hinc utique ratio ducenda, quare tenesmus, qui dysenterici laborantibus solenne est symptoma, facile vaginam ad prolapsum disponat, quin ipsum abortum proritet. Hinc porro est, quod suppositoria acriora, præsertim ex validioribus purgantibus parata, ad abortum provocandum multum valeant, nec non quod molarum vel sanguinis grumescens ex utero exclusionem, imo ad revocandum suppressum mensium & lochiorum fluxum, clysteres ex uterinis, nervinis ac lenius stimulantibus concinnati, desideratissimam præstent opem.

31. Coronidis loco quasdam cautelas & regulas egregii in praxi usus subnectere lubet.

I. Nihil majorem usum præstat in gravidis, easque ab incursu magnorum morborum munit, ac foetum sanum vegetumque reddit, quam venæ sectio in sanguine plenis, aliquoties circa tertium, septimum & nonum mensem repetita.

II. Error est, venæ sectionem in pede gravidis esse perniciosam, eo quod abortum proritet.

III. Uti-

III. Utiliter sæpe sanguis mittitur, si dolores dorsi urgent, si pathemata hysterica, vel etiam dolores ischiatici affligunt.

IV. Venæ sectio in lochiorum fluxu suppresso, resistente etiam in corporis penetralibus, purpura, præstolans mortis periculum sæpe abigit.

V. Mensium & suppressorum ut & imminutorum causa sæpius est plethora, quæ sanguinis missione tollitur, ita, ut admissa ea, mox arteriæ validius pulsant, & sanguis liberius per uterum feratur.

VI. Quando febris sive continua, sive intermittens, gravidam vel puerperam corripit, sanguinis missio nunquam noxia, sed sæpius summe necessaria est.

VII. Primis statim à puerperio diebus, pilulas balsamicas exhibere convenit, quarum usu & lochialis fluxus promovetur, & multæ impuræ fordes tempore graviditatis collectæ, per alvi secessum exturbantur.

VIII. Passulata, mannata, rhabarbarina & tartarea, in gravidis magis locum inveniunt, quam alia laxantia.

IX. Ad tollendam sterilitatem, unica hæc est indicatio: ut tonus utero reddatur, & sanguinis motus per matricem cum mensium fluxu in ordinem redigatur.

X. Morbi fere omnes ex uteri vitio, si mitigandi vel sanandi, venæ sectionem, pilulas balsamicas leniter laxantes, balnea, tam nativa, quam artificialia, martialia recte præparata, lenia antispasmodica, carminativa, nec non usum temperatarum mineralium aquarum exigunt.

XI. Cortex chinæ, accommodis aliis, imprimis pulveri florum chamomillæ, nuptus, prudenter in febre intermittente & congruo tempore exhibitus, etiam gravidis non nocet, sed summo præsidio est.

XII. Refractarii morbi ex utero frequenter postulant externa, suffitus, injectiones, clysteres uterinos, fatus, epithemata, balnea, quo ad partem affectam virtus medicamentosa eo citius pertingere possit.

XIII. Gravidis & puerperis exquisita diætæ, vitæque ratio servanda.

XIV. Frigus & internam refrigerationem, per medicamina purgantia & omnia acida adstrictiva, nimios quoque cibos, omni studio, quæ uterum gerunt, vel partu defunctæ, evitent. Uti vero quies corporis puerperis amica, ita gravidis eadem inimica, & corpus subinde moderate exercere præstat.



D E

MORBIS CERTIS REGIONIBUS ET POPULIS PROPRIIS.

§. I.

AUreum certe monitum est magni illius HIPPOCRATIS, quod merito omnibus, qui praxi medicæ operantur, curæ cordique esse debet & in principio libri *de aere, aquis & locis* his verbis exstat, *quicumque artem medicam integre assequi velit, primum quidem temporum anni rationem habere debet, quantum potentia quodlibet eorum valeat; dein ventorum, qui in unaquaque regione sunt indigenæ; postea aquarum facultates cognoscere debet. Deinde urbium situs & natura aquarum nota sit. Porro consideranda terra ipsa nudane sit & æstiosa vel alta & frigida. Hominum insuper diætâ perquirenda; qua maxime capiantur, an bibuli sint & lurcones & otio dediti, aut exercitiis variis utentes & tolerantes laborum, ciborumque plus appetentes, quam poculorum; ex his enim singula sunt investiganda. Nam qui hæc omnia probe, quantum fieri potest, cognoverit, aut horum plurima, eum non latere possunt, cum in urbem etiam sibi ignotam venerit, neque morbi regioni peculiare & patrii, neque communis regionis natura, quacunque tandem ea fuerit, ut non possit in cognoscendis dubius hæreere aut errare, sicubi ad morborum medicationem adhibeatur.* Morbi videlicet sunt duplicis generis, quibus maxima pars hominum perit, alterum est epidemiorum, qui ex communi aeris vitio & tempestatum mutationibus trahunt originem, certisque temporibus grassantur & magnas edunt strages: alterum genus est endemiorum, qui certis populis & regionibus familiares sunt, vitæ generi, victui, aeri, exhalationibus, aquæ, vino, cerevisiis certis locis peculiaribus, adscribendi. Hæc duo morborum genera in eo conveniunt, quod in unoquoque plures simul eodem morbo corripantur; differunt vero, quod epidemici à mutatio-

ne tempestatum, ventorum potentia, & siderum influxu fiant, adeoque ad certum tantum tempus durent; endemii vero à causa patria, indigena, fixa nempe oriantur, unde etiam per complures annos iidem fixi perseverant. Placet in præsentia de endemiis morbis materiam pertractare, ubi non modo eos morbos, qui in Europa, sed & reliquis orbis terrarum partibus familiares sunt eo, quo fieri potest, compendio recensêbo.

2. Endemios morbos cuique regioni proprios exposituri initium merito capimus à nobilissima mundi, quam inhabitamus, parte Europa. Primum vero montes & excelsa loca examinabimus, ubi in considerationem merito strumosis colli tumor venit, montanis nonnullis populis frequentissimus. Oritur hic ipse non ut vulgaris est sententia, ex nivalibus aquis, quæ alibi etiam sunt, sed potius ex aquarum potu, quæ per calcarios montes transeunt atque rudes sunt, graves & copiosam calcariam terram intus recondunt, quare certi fontes dantur strumosi, ex quibus haustæ aquæ strumam colli producant. Huic malo vero imprimis sunt obnoxii Helveti, Rhæti, Vallesenses. MÜNSTERUS in *cosmograph. lib. 3.* scribit: *in Helvetia Vallesia adeo strumosi sunt homines, ut strumæ pondus sermonem impediât, ac feminae lactantes illas post tergum perinde ac saccum rejiciant, ut ne infantibus potum appetentibus sint impedimento; quod & cl. WAGNERUS in hist. nat. Helvet. p. 141. confirmat.* Apud Rhætos in vicis *Zicers vis Trimmis & Sonders* aquæ quoque reperiuntur, quarum potu monstrosus tumoribus seu strumis incolarum colla deformantur, & his gignendis aptissimæ sunt, sive potentur, sive cibis coquendis adhibeantur. Nec id tantum illic natis incolis vernaculum vitium est, sed etiam advenis, qui si collo etiam anserino graciliore advenerint, & aliquot annos de his aquis potaverint, guttura eos velut taurorum

taurorum colla, quibus palearia dependent, referre videbis. Ab his igitur homines maxime deturpantur, loquelæ etiam ipsa vitium infertur, ita, ut risum spectatoribus ac auditoribus movere soleant; verum infimæ sortis homines apud Rhætos vitium hoc naturæ decorum ducentes, cæteros struma carentes, colla anserina per sarcasum appellant. In pago *Flach*, Tigurinæ ditionis, fons reperitur, cujus aquæ potæ strumas colli producere solent, hinc vulgo strumarum fons, *der Kropff-Brunn* appellatur. Verum non tantum Alpium, sed & Pyræneorum montium accolis hic affectus accidit. Præterea Corinthiæ Syriæque accolis, teste ORTELIO *ad tab. 92*: familiaris est, item fudetum accolis in tractus Schmiedebergensis pago Steinseiffen. vid. BECMANN *in histor. geograph. n. 356*: apud quos tamen malum hoc fere desiit, dum fontibus quibusdam, quos caussam ejus senserunt, nunc abstinent. In urbibus quibusdam Hercyniæ metallicis, videlicet Wildemann & Andreasberg nulla fere observatur mulier, quæ non ex strumoso gutture laboret, utuntur nempe aquis metallicis crudis *Stoll-Wasser* stillatitium lapidem secum ferentibus. In Transylvaniæ urbe, dicta Cronstadt, strumæ ex potu aquarum sunt frequentissimæ. Confert multum ad generationem hujus mali aer frigidus in montosis regionibus penetrantissimus, qui succos, in glandulis cuti substratis, circa arteriam asperam facile increffat, eorumque liberum impedit transitum, unde tubuli, vascula & pori succo viscoso infarcta tam grandem sistunt tumorem. Fœminæ vero magis sunt obnoxie strumis quam viri, quia ordinario, præsertim si gravidæ existant, in puerperio laborent vel vasa & fibræ circa mammas & colla extendantur. Observatur & simile quid post ipsum conceptum, dum vasa circa collum ampliora fiunt, unde veteres novæ nuptæ exploraturi virginitatem thalamum ingressuræ collum filo metiebantur. Catullus in nuptiis Pelei:

*Non illam nutrix orienti luce revisens
Hesterno collum potuit circumdare filo.*

3. Ad Galliam jam nos conferimus & quidem Narbonensem, cujus incolis perquam familiare est hydrocele & sarcocele. Fiunt hi tumores, quando sanguis per venas spermaticas tardius recurrit, ibique stagnat, unde vel serum à sanguine separatur, & fit in scroto testiumque membranis decubitus, vel ex succo viscido feri carnosæ & fungosæ fit excrementia, unde melancholicis, senibus & vitæ sedentariæ deditis quandoque hic affectus accidit. Cur Narbonenses huic malo obnoxii, nucum castaneorum usus immodicus causa esse videtur, quarum in hac regione maximus est proventus; quorum alimentorum frequenti usu lymphæ & sanguis crassus fit, qui postea per venas tenues, quales spermaticæ sunt, situs perpendicularis tardissime circulatur. Cæterum Galliæ populis febres, tam intermittentes quam continuæ, malignæ, putridæ & lentæ, hæcticæ, familiares & plerumque feræ sunt. Multum quoque ad hos morbos contribuit cibus eorum valde humidus & carniū copiosus esus, nec non fructuum autumnalium liberalior ingurgitatio, victus salis expertus, aquæ potus parciorque vini usus: quibus rebus sanguis valde tenuis redditur, multæ serositates accumulantur, quæ si in corporibus spongiosis, robore fibrarum destitutis, & sub aere austrino non sufficienter purgantur, ibi stagnant, & ad febres, ulcera & phthisin disponunt. Præterea lumbrici immanis magnitudinis huncce populum adoriuntur, & non modo infantes, sed & adultos vexant, quorum causa victus est præhumidus, ciborum nutrientium copia atque aquarum potus.

4. Nunc quoque de Anglorum morbis vernaculis dicemus. Multa certe morborum genera præsertim autumnali tempore, hujus insulæ incolas invadunt;

maxime vero hanc nationem Londinum inhabitantes; gravedines, raucedines, tusses, fluores albi apud fœminas, dysenteriae malignæ, febres, variolæ familiariter adfligunt. Hisce malis, ingenerandis haud parum atmosphæra humidis vaporibus maris repleta, ut & cœlum nubilum confert; ex omnibus autem nil magis ipsis ferale est, quam tabes pulmonalis, & totius corporis fœda & miserabilis corruptio, cui consumptionis nomen imposuere, quo malo tertia fere pars hominum Londini è medio tollitur. Languent vires, respiratio est difficilis, tussis continua, & in dissectis cadaveribus pulmones, tuberculis scirrhosis repleti, observantur. Hujus mali generationi multum velificatur aer densus & fumo lithanthracum refertus, qui in ore tenerrimas nerveo-membranaceas pulmonum vesiculas receptus corrugat, constringit, ut facile ibi copiosus & viscidus sanguis hæere possit. Laborant vero hoc vitio item pulmonum inflammatione nobiles magis, divitiisque innutriti, quam è plebe homines; idque ea de causa, quia illi in otio altissimo & omnium rerum abundantia affluentes genio suo indulgent, carnes gratissimi saporis ac succi edunt, & vina è Canariensibus insulis advecta dulcia bibunt, unde regendo sanguini copioso, & secernendis inde excrementis, natura præsertim in spongiosiore imbecilliore corpore non sufficit; sanguis vero abundans viscidus & impurus in molli & vasculoso pulmonum viscere facillime decumbit & stagnat, modoque dicta mala progignit. Phthiseos enim & Anglicorum morborum causa à repletionem inprimis fluit, tanto magis, quanto minor sanguinis mittendi Anglis cura est. Præter talem pulmonalem alius adhuc morbus ipsis est patrius, rachitis dictus, in occidentalibus maxime Angliæ locis solemnis. Puerilem nempe ætatem invadit, adeo, ut in illis annis constituti macrocephali fiant, cum laxa compage membrorum, turgido abdomine, prominentibus oculis, imbecilli corpore, corpora porro sunt spongiosa atque incurvantur. Causa hujus maxime in systematis nervosi & membranosi imbecillitate, flacciditate, spirituum defectu & in succi nutritii distributione inæquali hæret. Hinc etiam rachitis dicitur, quasi spinæ dorsalis affectio, propterea quod præcipuam ibi sedem mali fixam esse existimant.

5. Progredimur nunc ad Italiam spectaturi ibi morbos patrios. Neapoli præter luem, quæ pro morbo non putatur, nisi per gummata sese exferat, morbi endemii sunt roseolæ sive maculæ rubræ, mox visibiles, mox invisibiles. Scorbutus alias in Italia non visitur, quia hic morbus impuræ falsæque lymphæ est progenies. *Bartholinus* cent. V. ep. 49. has maculas ædibus & victui adscribit, illis quidem celsioribus & à sole minus illustratis, huic vero ob carnem bubulam, suillam & brassicam, quam avidè incolæ ingurgitant. Venetiis hæmorrhoidali fluxu & hinc pendentibus incommodis, cœcis dolentibus varicibus, variscis, ficibus frequentius vexantur, inde sanguisugæ quam maxime in usu sunt, adeo, ut non raro ani fistulas sibi contrahant. Causa merito vinorum Italicorum liberaliori potationi adscribitur; & in genere illud tenendum est, earum regionum incolas, ubi vina maxime dulcia lætius proveniunt, hæmorrhoidibus fluentibus magis esse expositos, quam qui in terris vino sterilibus habitant, & in quibus aquæ vel cerevisiæ bibuntur. Sanguinem enim ejusmodi vina gignunt, eumque in orgasmum seu turgescientiam facile conjiciunt; unde ob distentas nimium vasorum tunicas per totius abdominis viscera tardior fit sanguinis progressio, & hinc ad venas sedis regurgitatio, per quas ordinario longus & perpendicularis ille ascensus difficilis est. Romanis febris semi-tertiana valde cognata est, notante id etiam suo jam tempore

GALENO *lib. I. de morb. vulg. comm. 2.* qui summa cum gloria Romæ vixit prope forum Agrippæ, quæ nunc itur ad Pantheon. Docta de hac febre sunt verba FONTANI in *schol. ad Dodon. de semitertiana*: per hanc febrem, inquit, læditur ventriculus & inprimis ejus partes nervosæ & hepar, ideo jure meritoque inter mortiferos morbos numeratur. Hæc sæpe degenerat in hecticam & hydropem propter obstructions magnas ut *Cous noster Epidem. 3. §. 1.* observat. In hanc febrem proclives sunt ecclesiastici, nobiles, aulici, juvenes, & qui desidem vitam luxuriosamque agunt, & cœlo calido fruuntur, ideoque frequentes sunt in Æthiopia. Victus omnis delicatus & lautus in otiosis hominibus sanguinis gignit abundantiam, à qua multæ eæque graviores, propter viscerum infarctus obstructionsque, passionibus oriuntur. *Asclepiades* apud *Cæl. Aureliani lib. 2. c. 10.* febres una cum mentis & corporis oppressione, nec non lethargicas contingere solitas refert. Aquæ enim Romano in agro parum etiam salubres sunt pater eas, quas per aquæ ductus Mæcenæ deduxit in urbem. Accedit quod ipsa Roma æstivo tempore salubritate cœli minus gaudeat, idque eo inprimis, quia urbs super antiquæ rudera Romæ exstructa est: illa autem multas cavernas comprehendunt, ubi ab antiquis Romanis non sine ingentibus sumptibus cloacæ fuerunt ædificatæ; si Tybris igitur sese effundit, aqua hæc cavernas intrat, ut ideo propter vapores aer minus salutaris esse possit. Serpentes quoque magno in numero in hisce inveniuntur cavernis, dein & tota Roma filice non est strata, sed adeo pulverulenta diebus canicularibus est, ut propter pulverem & muscas, quæ procul dubio ex cavernis prodeunt, in publicum prodire non liceat.

6. Hetururiæ incolis valde familiaris epilepsia est, ideoque recens natis infantibus inurunt caput, uti tradit BALTHASAR *de Vias in sylva regia*: qui mos etiam veteribus Thuscæ & Lybiæ populis jam olim fuit usitatus, teste *Mercuriali lib. 2. var. lect. c. 2.* Arabes quoque medici hodierno tempore gravissimos & fere incurabiles capitis morbos, ut apoplexiam, hemiplegiam, lethargum, omnibus aliis irritis, ferro candente tractant, quo in hoc vel illo capitis loco, non sine præstantissimo effectu inunctiones faciunt. Apuliæ incolæ, *Baglivo* teste, ardentissimis febribus, pleuritidi aliisque morbis inflammatoriis sunt obnoxii. Multum contribuit sanguinis copia, quæ ex victu lauto gignitur; incredibilis enim ibi est telluris ubertas, & carniū cujuslibet generis copia, qua nulli Italiæ parti est inferior. Vina ibi omnia, nigra, flagrantia ac potentia sunt, tantaque caloris in illis regionibus est vehementia, ut plurimos in summam impatientiam dementiamque sæpe actos videas. Specialis etiam Apuliæ morbus est morsus tarantulæ, qui æstivo, & præsertim eo tempore est noxiosissimus, quo hæc bestiolæ coeunt. Sequuntur hunc adfectum angor cordis, aphonia, pulsum oppressio, extremorum nigredo, frigidus sudor, quæ omnia symptomata ex truculenta nervosarum partium constrictione oriuntur; nam venenum tarantulæ in activissimæ ac perniciosissimæ motionis instar ignis materia consistit, quæ intime penetrando, motiones hinc inde in genere, nervoso spasmodicas violentas excitat. Quam optime hac de re scripsit BAGLIVUS in *dissert. de tarantula*.

7. Transeamus jam ad Hispaniam, præcipuam Europæ partem. Observatur hic valde familiaris melancholia hypochondriaca, quæ merito, summæ pigritiæ, otio, sedentariæ vitæ & profundis speculationibus adscribi debet; accedit & illud, quod veneri nimis immaturæ indulgeant, & parum vini bibant; unde sanguis crassus terreus, ablata parte subtiliore, qui in hypochondriis damna adfert, in capite vero

multa plantasinata & imaginationes efficit. Deinceps fluxus hæmorrhoidalis in viris, in fœminis mensium fluxus creberrime visitur, quod à sanguine crasso & fœculento viscera abdominis infarcta sunt; unde æqualis & libera sanguinis distributio impeditur, quo fit, ut cum impetu ruat, & in partibus extremis stagnet, ibique vasa disrumpat. Divitum & procerum plerique, quos Grandes vocant, apoplexia, procul dubio sanguinea, pereunt ob lautum victum, vini generosi potum & quotidianum succoladæ usum, quæ omnia sanguinis conciliant copiam. Notabile autem est, quod scabies & scorbutus ibi non reperiatur, ut carne suilla recenti quotidie vescantur; aer nempe in Hispania est subtilissimus & penetrantissimus, & aqua ibi levissima, ac victus salis expers. A transpiratione igitur laudabili, porisque apertis fit, ut rudes illæ crassæque feri particulæ exhalent, quæ intra poros & glandulas cutis alias stagnant, & pustulas illas efficiunt.

8. Pergimus ad Belgii fœderati provincias, inprimis Hollandiam, ubi scorbutus endemius morbus est, qui partim à victu duro, piscibus marinis, carnibusque infumatis, partim ab aere denso nimis humido & pessimis aquis suos mutuatur natales. Præter hunc morbum in hisce provinciis frequentissime ex renum & vesicæ calculo laborant, nec unquam ullibi tam creber hic adfectus in omni etiam ætate, visitur, quam in Belgio, nusquam etiam ob hanc causam meliores lithotomi propter operationis frequentiam degunt, quam ibi. Hujus calculi vesicæ causam in immoderatum lacticiniorum & caseorum cum acetariis abusum rejicimus, quæ fercula singulis fere diebus mensis apponuntur; quantum autem ad concretionem calculosam lacticiniorum & acidorum abusus faciat, medicæ artis peritis probe perspectum est, utpote calculi elementa & concretionis materia sunt terreum atque aqueum.

9. Accedimus ad maris Baltici incolas, Danos, Suecos, Norvvegos, Pomeranos, Livonos, Curlandos, ubi ceu communis morbus & fere inquilinus scorbutus grassatur, qui per dolores artuum, membrorum lassitudinem atque torporem, maculas, gingivas putridas & tumores sese manifestat. Hic adfectus quam notus est his populis, tam ignotus est antiquis; nec ullibi fit hujus mali mentio neque apud Arabes neque apud Græcos; & perperam locus *Hippocratis* *lic. 2.* prædict. ad hoc malum trahitur, ubi auctor de lienibus magnis, oris graveolentia, & tibiæ exulceratione agit. Minime tamen existimandum antiquis temporibus ipsum non existisse, sed de novo ante aliquot annos esse natum; credibile potius est, cœlum *Hippocratis* hunc morbum non agnovisse: ubi enim aer valde tenuis & calidus est, ubi dura & salsa exulat diætæ, ibi quoque hic morbus filet, unde in tota Græcia, Italia, Hispania, etiam Gallia fere incognitus est, nisi in quibusdam locis Galliæ Narbonensis, ad maris oram sitis; propter aquas impuras salas, palustres, & circa Ragusam Italiæ, quæ hujusmodi generis aquas alit, quandoque existit. Est igitur hic morbus frequens modo dictis populis & regionibus arcticis, quæ à gradu 55. usque ad polos porriguntur, propter aërem densum, frigidum, humidum, victum salum, durum, pisces marinos, aquas crudas, ex quibus omnibus sanguis fixus terrestris, balsamo & sulphure benigno destitutus elaboratur, qui ad obstructions corruptionemque valde est proclivis. Cæterum nullum dubium est, quin hic morbus jam inde ab antiquis temporibus in his terris regnaverit; licet historicorum testimoniis non probare possimus, quod nimirum nulla jam exstant scripta de hisce populis composita; sed veteres medici, qui in Græcia, Arabia & Italia vixerunt atque scripserunt, illarum saltem nationum

num morbos scriptis reliquerunt, horum populorum affectibus omiſſis. Quod vero marinus aer, craſſa diæta, otium ac impuræ aquæ ſcorbutum ingenerent, navigantes manuſcriptum præbent documentum, qui omnes fere hunc morbum reportant, licet ſub alterius climatis ſint incolæ, & ſub alio cœlo navi vehant. Neque prætereundum eſt hos populos arthritide etiam, paralyſi, hydrope infeſtari, quæ cuncta ſymptomata mali ſcorbutici ſunt fructus.

10. Illud vero admiratione dignum, quod præter ſcorbutum in Dania, Suecia & Livonia febres maxime ſint familiares, cum è contrario in Norwegia, Islandia, Lapponia & Finnia plane exulent, & fere ſint incognitæ. *Schefferus in deſcriptione Lapponiæ* cap. 7. ſcribit; quod Lappones commodiſſima utantur valetudine, & morbos pleroſque ignorent, nullaue peſtis, nullæ febres acutæ vel ardentes apud ipſos deprehendantur, cujus rei rationem reddere allaborabimus. Novimus nempe in calidiſſimis regionibus peſtem graſſari, ibique ordinario ſuos habere natales. Peſtis enim eſt penetrantiſſima putredo, quæ mirifice à motu activiſſimo calido, inteſtino, humidoque generatur & promovetur; ea propter quoque in frigidiffimis locis, ubi omnia ſunt concentrata, quæta, motu inteſtino activo deſtituta, putredo, nec radices agere, nec peſtis excitari atque propagari poteſt. Quod ad febres attinet, ſunt hæ ipſæ nihil aliud, quam intenſiores ſanguinis & humorum agitationes ac commotiones, à tono fibrarum motricium & muſculorum maxime cordis & arteriarum adaucto, factæ, unde quo fibræ ſunt ſenſibilioreſ, ad motum & impulſum aptæ, eo facilior ad febres eſt proclivitas. Et hæc eſt cauſſa cur cholerici temperamenti homines, juvenes viri, calidum clima inhabitantes, plus ſint obnoxii febribus quam ſenes phlegmatici, melancholici, & frigido ſub cœlo viventes, qui magis fibris tenſis, immobilibus, conſtrictis & inſenſibilibus gaudent. Facilis inde fluit ratio, cur in Lapponia, Islandia & Norwegia febres non obſerventur; immobilitas nempe & fibrarum rigiditas, quæ in horum corporibus eſt, minus apta ad tremulos & elatiſcos fibrarum motus & ſpaſmos exiſtit, quales ad generandam febrem, tam horrorem quam calorem requiruntur. Ratio quoque ex dictis evadet clarior, cur ad febres tam domandas quam ſupprimendas efficaciſſimus ſit internorum adſtringentium uſus, ex quorum claſſe ſunt china, parata vitriolata, martialia, aluminofa, radices vegetabilium ſtypticæ; item cur adſtringentia & in forma emplaſtri roborantia, v. g. mixta ex alumine, terebinthina, herba rutæ, aceto carpiſ manuū plantiſque pedum applicata, potenter febriculofos inſultus diſcutiant, quoniam nempe hæc omnia fibras valde rigidas efficiunt.

11. Præterea Lapponibus, Finnis, Norwegis, eodem *Scheffero* teſte, frequentes ſunt lippitudo & ophthalmia, unde non raro cœcitas evenit; quarum cauſſa eſt, quod à prima ætate in fumo verſari cogantur, quo tuguria illorum æſtate & hieme abundant; quam noxius autem ſit ſumus oculis, ſale acri plenus, eſt notiſſimum. Deinceps peripneumonia & dolor in dorſo & capite in his oris quam maxime dominari ſolet. Cauſſa tribuenda ſanguini craſſo & denſo, qui à frigore externo in minimis muſculorum tubulis, inque pulmonum vaſculis tenuiſſimis, facile ſiſtitur. Neque reticendum eſt in omnibus provinciis borealibus ſphacelum, ex levi etiam externa membrorum læſione, facillime generari. In promptu eſt ratio, ſphacelus nempe ex ſanguinis circulo in membro vel parte aliqua deſtructo naſcitur. Impeditur vero & deſtruitur ſanguinis progreſſus, ſi ipſe denſus eſt, craſſus, terreſtris, ſpiritu & virtute deſtitutus, qualis horum populorum ut & ſcorbuticorum eſt.

Frid. Hoffmanni Oper. Tom. VI.

12. Aliud adhuc malum vexat illos, qui boreales plagas incolunt, quibus Ruſſi, Tartari &c. annumerandi ſunt. Perniones nempe ibi ſunt ſeu ulcera & puſtulæ à frigore ſubortæ; non rarum quoque eſt à frigoris immanitate nares & aures decidere. Strictiſſimum enim gelu, motu rectilineo vehementiſſimo, omne, quod ſubtile quodque in fibris motricibus ſpirituofum eſt, exſtinguit; unde flaccidæ hæ ſiunt & ferme emoriuntur, ſtaſeſque humorum & inde perniones atque ſphacelationes naſcuntur. Solemne ipſis eſt remedium, partes frigore aduſtas nive fricare donec ſtupor ceſſet, & ſenſus redeat; tum demum ſucceſſive igni admovent, id quod, ſi prius accidit, valde eſt damnoſum. Frigus enim motu ſuo flaccidas fibras, ſi quidquam adhuc ſpirituofi ineſt, plus excitat, quam calor, qui reliquias elatiſcæ ſpirituofæ materiæ ulterius diſſipat. Cæterum notandum, quod hi populi exilioris ſint ſtaturæ, animalia etiam boves cornibus deſtituti, vix aſini magnitudine pares, propter immane gelu conſtringens, & ſucci nutritii æqualem diſtributionem impediens.

13. Polonicam gentem jam & illi vicinam Lithuaniam accedimus, ubi notiſſimus & vernaculus morbus eſt, qui plica appellatur. Conſiſtit hæc in magnitudine capillorum præter naturam aucta, qui, in ſcirrhos inexplicabiles concreti & conglutinati, monſtroſam præbent ſpeciem. Hos ſi ſecant, ſanguis cum dolore capitis, viſus læſione, & perſæpe cum vitæ periculo effluit; & hoc adfectu maxime Judæi laborant. Morbi hujus cauſſa valde perplexa & difficilis videtur, nihilo minus eam, quantum fieri poterit, indagare allaborabimus. Primo multum ſordidum vitæ genus confert, cui hi populi addicti ſunt; dum raro crines peſtunt, in humidis & depreſſis locis dormiunt, & ſpiritum vini liberaliſſime ingurgitant. Suum quoque ſymbolum aquæ contribuunt, hinc non male *Gehema in epiſt. ad Bontekoe de plica Polonica* pag. 10. ſentit, hæere vitium in nonnullis Poloniæ aquis, ut ſi vel potentur, vel corpus iis abluatur, plicam producant, quemadmodum id duorum militum exemplo comprobatur, qui cum in ſtagnum aliquod corporis lavandi cauſa ingreſſi eſſent, vix immerſo in undas capite, multas ibi plicas contraxerunt. Nos ſupponimus quoddam vitium hæreditarium, quod in nimia pororum & bulborum capillorum ſub cute in capite conſiſtit; unde ſuccus nutritius craſſus & glutinofus prava diæta ex crudis aquis productus, calore, quem potus ſpiritus vini conciliat, urgetur ad tubulos capillorum, ex quorum poris exſudat, & monſtroſam illam intricationem efficit.

14. Hungariam ingredimur, quam veteres Pannoniam & Illyricum appellaverunt. Graviter hæ gentes affligi ſolent podagra & arthritide, quæ ex abuſu vini ſpirituofi lautaque diæta naſcitur. Ingens quoque ibi pediculorum eſt copia, ut plebei & milites contra hoſce vermiculos ſeſe defendere nequeant. Multum ad hæc mala calida & humida ſoli natura confert. Obſervatu dignum *Conringius* ſcribit in *theſaur. rerum publ.* quod pene tota Hungaria præſertim inferior habeat ignem ſubterraneum, quod ex eo apparet, quando prope Drawum vel Danubium ſcrobis effodias, poteris ibi ſudare & balnea parare, & quoniam regio ſimul eſt aquoſa, perpetuæ ibi ſunt evaporationes, quæ faciunt, ut aer minus ſit ſalutaris, qui morbos putredini aptos creat, quæ & pediculorum generationi favet. Ex hoc fonte promanat etiam geneſis febris ſic dictæ Hungariæ, cum ſummo capitis dolore, agrypnia, cardialgia, deliriis & angina ſtipatæ. Milites ordinario hoc malo affligi ſolent, qui humi cubant, & diætam irregularem habent. Accedit, quod de die intenſus ſit æſtus, nocte autem ſummum frigus, unde tranſpiratione prohibita,

S

facilior

facilior ad corruptionem sanguinis fit transitus. Præterea ex alio morbo Hungari laborant, qui *Cremer* ipsis dicitur, quando nauseam vel ex cibo vario inordinate sumto, vel ex potu nimio sibi contrahunt, statim palmam manus in parte domestica fortiter fricant, hancque partem dolere dicunt. Interim si aqua cordiali reficiuntur, statim disparet. Alter quoque, quem *Strint* vocant, semper in ore est, & omnem vel in ore, gutture vel ano tumorem inflammationem, *Strint* vocant. vid. M. N. C. dec. I. an. I. p. 5. 6.

15. Jam nostram perlustrabimus Germaniam, quæ merito in eam, quæ septentrionem & quæ austrum spectat, partem debet distinguere; in illa scorbutus & ex eo pendentia mala dominari solent; nec ullus fere morbus est chronicus, cui sese nihil scorbutici adsociet. Valet hoc maxime de superiore Germania & Westphalia, ubi Batavorum more halecibus, petasonibus, ascellis, ostreis, piscibus marinis atque id genus pulpa mentis delectari cepimus. In Westphalia rarissime febres malignæ petechiales visuntur, frequens ibi est peripneumonia, scabies frequentissima, sanguinem alunt nimis crassum, qualis fit ex copiosa carne porcina infumata, tenui cerevisia, pane grossiori vulgo *Bonpournickel* & abusu spiritus vini; hic sanguis in pulmonibus stagnans inflammationes caussatur gravissimas, & minus à sordibus purgatus scabiolum efficit morbum: hisce morbis præ reliquis patent, qui otio sunt dediti & vitam nec motu nec labore exercent, qui egregium tam scorbuti quam scabiei est remedium. Holiatiam qui incolunt non longævi sunt; abundant enim soli ubertate, hinc lautior diæta ipsis copiosum ingenerat sanguinem. Verum paludosa est regio, præsertim Diemarfa, qua hinc inde aquæ sub agris stagnant, & crebras ex mari experiuntur inundationes, unde febres petechiales & malignæ complures homines corripunt atque auferunt. In parte australi Germaniæ Silesia, Franconia, Austria & Suevia, ubi tenerior est victus & vinum bibitur, phthisis, arthritis, febres ardentes, hæmorrhagicæ excretiones & inflammationes crebro observantur. In Misnia, præsertim Lipsiæ singularis est adfectus, qui aliis regionibus plane incognitus, familiarissime invadit incolas, præcipue foeminas puerperas, quibus sæpe est exitio. Dicitur is morbus purpura, quæ in rubram & albam dividitur, maculæ enim miliaceæ in cute summa rubræ vel albæ, pulicum morsibus similes, cum cutis asperitate, pruritu, præcedente febre, cum summis anxietatibus prorumpunt. Quandoque hoc malum petechiis, morbillis, variolis, febribus aliis continuis sese associat, ubi quando omnia circa declinationem videntur salva, demum hoc malum propullulans tragicum eventum ægroto adfert. Soboles est feri putridi vappidi, sique hariolari licet, culpa & causa delicato & tenero vivendi generi assignari potest, dum otium, dulcia & placentas amant, quæ nullibi majori in copia visuntur, quam in Misnia, & in iis, qui eam circumjacent, locis. Nullum enim dubium est, quin serum inde valde viscidum & impurum evadat. Et cum gravidæ sint ordinario plethorica & cacochymica, hinc in iis majorem tyrannidem similis victus exercet. In infantibus etiam peculiaris observatur valetudo: corripit nempe hanc ætatis tenebritudinem tabes, ut macie confecti tanquam simulacra hominum appareant, vulgo quidem fascino contactos pueros esse putant, sed qui naturæ abdita perscrutarunt, in cute vermes crinium nigrorum vel choridarum forma, latitare observarunt, & si cutis melle vel in balneo loco calido fricatur, prorumpunt, frigore si condensatur, intus se condunt, vocari solent comedones, quod quasi debitum naturæ nutrimentum intercipient. Legatur de hoc morbo *Sennertus lib. V. praxeos part. I. cap. 24.* Ulterius & illud notari me-

retur, quod in nulla regione tam superstitiosi & creduli sint, ubi adfectus præsertim atrophicos convulsivos à naturali causa, icorbuto vel vermibus proficiscentes, incantationibus & fascino dæmoniaco adscribere solent. In Hungaria etiam eadem superstitio hominum mentes tenet.

16. Germania jam perlustrata nos ad Græciam, Macedoniam & Thraciam convertimus: pauci ibi sunt morbi præsertim chronici, pauci etiam ibi reperiuntur medici. Tenuis enim cælum, & aquæ limpidissimæ obstructions, indurationes viscerum glandularumque infarctus minus ferunt; nihilominus tamen febres acutæ, aliæque, dysenteria, phrenitides sunt frequentissimæ, ad quas ingenerandas fructuum horæorum præstantissimorum item vini generosi suavissimi abusus multum confert. In mari Aegeo & ejus insulis epilepsia exercet imperium, quod etiam HIPPOCRATES in *lib. de morbo sacro* docet. Constantinopoli omnibus annis dira grassatur pestis, quæ ordinario verno incipit tempore, & circa menses autumnii frigidos Octobrem ac Novembrem definit. Causam & ortum indagaturis plurima nobis occurrunt, quæ hanc luem promovere videntur. Plurimum urbis amplitudo, quæ incredibilem hominum multitudinem continet, mari fere ubique cincta est, adeo, ut muri eo affundantur; aer itaque exhalationibus aqueis refertus valdeque humidus est, cælum vero & clima admodum calidum: humidum vero & calidum aerem sobolem esse putredinis adeoque pestis, quæ, omnibus consentientibus medicis, putredo est penetrantissima. Accedit incolarum detestanda sordities, dum squalores & omnis generis excrementa in plateas projiciunt, unde aeris infectio & exinde magna morborum vis oritur. Præterea à vino abstinencia, cujus usus Mahometana lege ipsis interdictus est, ad corruptionem corpus præparat; si ullum præstans datur alexipharmacum, & quod magis putredini resistit, certe moderatus vini usus est. Addimus & hoc, quod apud ipsos mos sit quotidie balneis & lavacris mollibus foveri, quæ quantum fibras relaxent corpusque humectent, & virtutem sanguinis suffocent, inter omnes constat. Accedente igitur miasmate in corporibus ad corruptionem dispositis & ad fomitem contagiosum recipiendum præparatis, truculentum hunc morbum propagari, facile potest intelligi. Eadem ratio est, cur Smyrnæ, Aleppi idem malum ferme perpetuum sit. Constantinopolios porro incolas continuo podagricis doloribus excruciarum ex Nicephoro Callisto HIER. MERCURIALIS *lib. V. c. 24.* tradit. Eodem morbo ceu peculiari malo Athenienses affici idem loco citato testatur. Illud vero admiratione dignum Constantinopoli luem veneream plane exulare; cum tamen hæc gens in libidinem sit effusissima, suæ alienæque pudicitia maxime prodiga. Damus vero hanc rationem, quod foemina, à quibus scaturigo mali fluit, post veneream *συμβολαν* semper se lavantes, impuras sordes eluant & abstergant. Idem veteres meretriculas in usu id habuisse vel ex MARTIALIS *lib. 2. epig. 50.* constat.

17. In Asiam trajicimus. Exordium vero à diffusis Indiæ regnis capimus, ubi magna morborum endemiorum est varietas. Notabilis est adfectus admodum molestus, *Berberi* dictus, qui species paralyseos seu tremoris est: motum enim sensumque manuum ac pedum, imo quandoque totius corporis depravat & tremere facit. Vitium hæret in nervis, quos lentus viscidusque humor implet, quod malum auctores à maxima inæqualitate aeris deducunt, quæ hic locorum observatur, de die existente intolerabili solis fervore, de nocte vero maximo frigore, dum nempe ex prima regione aeris vapores intensissimo calore per diem elevati nocte decidunt, qui sub dio cubantes idque sine tegmine vehementissime affligunt, in rarefactos

refectos per calorem poros frigore altius intrante, serum incrassante, porosque obstruente, unde fibris & musculis vigor & elater nonusque perit. Est etiam frequens his gentibus malum Mordehi dictum, quod nil nisi ventriculus depravatus est. Perpetuus aestus & inde excussus corpori sudor copiosus, & superveniens frigus ventriculum valde debilitat; jam si nimio cibo & potu maxime vesperi se implent, non possunt nisi depravate cibum concoquere: eandem ob causam diarrhoea vulgaris curatuque difficilis ibi morbus est. Denique spasmodica colica iis evenit, quia ingluviei & crebrae spiritus vini ingurgitationi plus justo indulgent, à qua aquas bibentes sunt immunes.

18. Singularis quoque spasmi species illis populis esse solet communis, dum subito homines rigidi & statuæ instar permanent, & vel in anteriorem vel posteriorem corporis partem musculi involuntario motu trahuntur. Accedit quandoque spasmus cynicus, dentium stridor inconditumque murmur; latius hac de materia BONTIUS *de medicina Indorum* videri potest. Quod mali genus ex copioso bilioso ac sulphureo sanguine venit, quia sanguinis missio & nitrosa sunt auxilio. Præterea hisce regionibus consueta est diarrhoea, quæ ut plurimum necat: hujus causam fructibus Indicis, quibus si quis oryza vel pane non caute vescatur, vix hocce defugiet malum, non secus ac in Gallia & Hispania, qui uvas sine pane avidius comedunt, statim dysenteriam incidunt. Præcipuam etiam causam hujus mali modo laudatus adserit BONTIUS *pag. 127.* potus adusti copiam, quem Arack appellant & quod Chineses ex oryza admixtis holothuriis in mari fluctuantibus, conficiunt, quæ Belgice Quaben & Quallen vocari solent. Hæc holothuria tam acris sunt caloris, ut tactu cutem exulcerent ac vesicas inducant. Notandum & illud, quod febres contagiosæ malignæ raro, pestis vero numquam visatur in India, variolæ autem ipsis sunt contagiosæ. Tertianæ simplices & duplices sunt communissimæ, carnes, juscula & ova summo studio febricitantibus interdiciunt. Aer valde subtilis temperatusque morbos ex putredine & pestem non admittit; intermittentes vero ex transpiratione prohibita à frigore nocturno fiunt, præsertim post vitia in diætâ.

19. In insula Ceylon & præcipue in regno Jafnapatnam hieme febres & ventris tumores, ex salsis crudis & calcareis aquis suborti, regnant: hiems ipsi valde est pluviosa, inde transpiratio impeditur. In Malabareses vero variolæ summa sævitia grassantur, BALDÆUS *in descriptione insulæ Ceylon & Malabaræ* ex humido anno & fructibus autumnalibus earum vehementiam atque malignitatem derivat. Apud Chineses Japponenses frequentia sunt oculorum vitia, lippitudines, cataracta, cæcitates, quæ mala ex oryza decocta calide sic devorata, quam loco panis quotidie comedunt, derivantur. Valde enim viscica sic generatur lymphæ crassusque sanguis, qui per tunicas & tubulos capillorum, quando cum impedimento circulator & stagnationem efficit, oculis varia inducit incommoda, cæcitatem, cataractam, lippitudines, & quæ alia sunt oculorum vitia. Et ut exemplum ab equis desumamus, constat sane, ex facili cæcos nimium avena & hordeo saginatos & post fortiorem laborem, nimiamque in cursu agitationem fieri. Arthritis & podagra rara in Sinenfium regione sunt, quod illi forsitan populi continuo calido potu fruuntur, qui aperta servat emunctoria, transpirationem promovet, & impura tartarea scorbutica salia e corpore ejicit. In insula Formosa, quæ calido & humido cælo tegitur, pestis est morbus periculosissimus, qua grassante incolæ ædes suas relinquunt, & in altissimos aviosque montes se recipiunt, qui immunes ab hoc malo propter subtiliorem aerem putantur; incolæ

bibunt aquas optimas, & nil nisi plantas & fructus comedunt, nec prius domos repetunt, donec aere correcto pestis desævierit. Vid. *Georg. Psamanna Zæcar descript. de l'Isle de Formosa en Asie cap. 27.* Clarissime ex dictis apparet, vappidum calidum neque ventis expurgatum aerem pestiferam corruptionem excitare posse, subtilem vero & serenum optime pesti resistere. Mirandum illud, quod arthritides & febres intermittentes, eodem auctore teste, plane ibi sunt incognitæ, quod forsitan temperantiam incolæ insigniter colant ab ingluvie luxuriaque longe remoti, à quibus has passiones oriri perquam notum est.

20. Eadem in insula variolæ vim suam adeo exerunt, ut raro quis existat, quin hocce malo corripatur. Plerumque fere tertio ætatis anno iis ita innoxie affliguntur, ut raro puer aliquis iis auferatur. Superatas variolas rubor per totum corpus reffusor diffusus, & incolis Schiptio dictus sequitur. Is morbus longe variolis ipsis est periculosior, cum vehementi aestu conjunctus, & ita infantibus infestus, ut ni probe curentur, in summum vitæ discrimen sæpius adducantur. Mulieres graviore cum periculo edunt partum, quam quidem Europæ puerperæ eam ob causam, quod corpus nunquam exerceant, sed ut Græcæ olim mulieres semper intra domos ac interiora latitent conclavia. Lues venerea ibi ignoratur, quia ipsis polygamia est concessa, & adulteria commissa graviter puniuntur.

21. Goæ urbe principe Lusitanorum in India morbus valet, Mordexyn vocatus, subitus ac improvisus cum nausea vomituque perpetuo, quod malum commune est multisque funestum. Venerea lues morbus ibi universalis & patrius est, sine ulla infamiæ nota. Calculo ac hernia plurimi item laborant, præsertim mariti, quod continuo aquam potant, milleque lascivias exercent cuticulam curantes. Crassum ibi ventrem foedo abdomine multi trahunt, reliquis, qui expertes sunt hujus dedecoris, illis irridentibus & per jocum Barrigos i. e. maximos ventres appellantibus. Causa hujus mali est sacchari dulciumque intemperans usus, cui hi homines adsueta, & quod plerumque semper nudi maxime post prandium in porticu sedent, de qua re fusius tractat LINSCHONT. *in itin. p. 44.*

22. In Armenia oculorum doloribus vehementissime incolæ affliguntur, cujus mali causa ea esse videtur, quod per totam hiemem, quæ per octo integros menses ibi extenditur, in fumo, fornacibus destituti, versantur, per quos fumus possit evolvi. Nocet igitur hic maxime illorum oculis, ut lippitudinibus, cataractis aliisque oculorum vitiis semper sint obnoxii, teste *Carolo de Piacenz missionario in Congo in itin. pag. 237.* Cæterum & illud monendum, quod nulli medici in Armenia inveniantur, sed si qui illis forte appulerint, maximi aestimentur suspicianturque. Podagra etiam exercentur Armenii, quia plus vini quam aquæ potant.

23. In Persia calculus & podagra vix observantur, quia ibi lege Mahometana vino plane abstinent Persæ: calculum vero ex potu vini immoderato nasci ii demonstrant, qui in regionibus vino fertilibus habitant, ut Rheni incolæ, Franci, Austriaci alique. In insula Laar, Gamro dracunculi inveniuntur, de quibus infra agemus.

24. De Tartaris ultimo loco aliquid addendum, quod nimirum cæci per aliquot à partu dies maneant, quod ita intelligendum, non quod vera cæcitas obducatur oculos, sed quod palpebra superior, propter musculos nimium laxos & extensos per aliquot dies oculos clausos teneat.

25. Progressum jam facimus ad Africam, ubi primum sese offert Ægyptus, cujus regionis morbi sunt sca-

bies, lippitudo & cœcitas. Alexandria multæ mali moris febres incolas autumnò extorrent; hieme vero oculi lippientes exercent, qui per totum annum durant. Alexandria variolæ grassantur valde contagiosæ. Vulgares etiam sunt hydroceles, pneumœces, item melancholia hypochondriaca. DAPPERTUS optimus de Africa scriptor p. 127. & seqq. optime hæc vitia, ex aeris intemperati squalidi, evaporationibus Nili repleti, usura deducit. Stagnantibus etiam impuris aquis, quas in cisternis habent, & turbidæ Nili aquæ potui, denique dulcibus fructibus crudis balneisque adscribit. Accedit diuturnus æstus, nocturnum vero frigus, quibus omnibus ventriculus depravatur, spirituosusque sanguis depresso ad corruptionem pronus fit. Hoc imprimis tenendum est, pestem raro in Ægypto vitio aëris inexistere, quæ potius ex nimia Nili inundatione originem trahit. Eo enim flumine per longius tempus obruente solum, tota regio paludosa stagnanti mari similis evadit, quod accedentibus austris & vehementiore solis æstu in putredinem abit, & modo dictam luem excitat. Accidit etiam, ut aer natura loci jam calidus, excedente alveum suum plus iusto Nilo, & altius terram tegente, nimis humidus fiat, & exinde pestis existat causa: tantum enim abesse credo, ut hæc lues ex aere nimium calido hac in regione oriatur, ut potius hoc ipso sæpe exstinguatur. Elephantiasis etiam, ALPINO teste, de medicina Ægyptiorum lib. I. cap. 4. est familiaris Ægyptiis, sicut etiam Arabibus & Javanis, de quibus videatur disputatio Dn. Albini; illud vero malum à victu infueto præsertim carnis asininæ & potu Nili turbido deducunt, cui sententiæ subscribit GALEN. I. de facult. aliment. it. Avicenna fen. 3. 4. tract. 3. c. 1. & Lucret. lib. VI.

Est elephas morbus, qui propter flumina Nili

Gignitur Ægypto in medio neque præterea unquam.

26. Circa Æthiopiam hoc memorabile, quod mulieres ibi facillime pariant, in genua procumbentes ad effundendum naturæ opus, uti diligentissimus rerum Æthiopiarum scriptor LUDOLFUS in hist. Æthiop. refert. Eandem fortitudinem & robur in Brassiliensibus fœminis laudat BARLÆUS in libr. de rebus in Brassilia gestis ita scribens: nec Europæ more in hebdomadas quinque aut sex puerperia trahuntur; verum altero à partu die ad opera laboresque firma, quamvis pusilla, corpora redeunt; sæpius audiui & legi de ancillis Indicis in Batavia Hollandis servientibus, quod post partum ipsæ in profluentem aquam abeant, seque infantesque suos sine ullo sanitatis periculo lavent.

27. Qui in Guineam navigant & in castello S. Joris de Mina degunt, per aliquot milliaria plerumque vermibus per totum corpus vexantur, magis tamen Æthiopes quam Germani. Tanta vero vehementia sævitiaeque hujus mali est, ut præternavigantes etiam affligat, quibus prurire statim incipit cutis, partim in brachiis & pedibus, partim in obesioribus corporis partibus multaque carne tectis. Prodit mox pustula modo unius modo trium pisorum magnitudinem exæquans, quæ ab ipso verme non perrumpitur, ab accersito tonfore rei hujus perito tempestive cognita dissecatur. Apparent tunc in aperta pustula duo parvi pili, qui cum candidi sint, & capiti inhæreant, barba vermis vocitantur. Excitata pustula aqua est referta, ex qua matutino vespertinoque tempore vermis extrahitur. Si obesiori loco infederit & ad membri longitudinem ex pustula prominuerit, sæpius accidit, ut totus & una quidem vice extrahatur. Ipsi illi vermes longitudinem sæpe unius ulnæ referunt, colore nivem exæquantes, tactu frigidi sunt, licet calida ex carne exeant, crafitudine filum paullo robustius exsuperant. Si in pedibus sedem fixerint, adeo musculis venisque involvuntur atque implicantur, ut non toti, sed per frustra edu-

cantur, colligente se exinde magno in cruribus tumore atque cutis materia. Quæ ut erumpere possit, fontanellæ incidendæ sunt, vel alio modo exitus puri parandus, quo fit, ut multa inde pedum vitia, sæpius etiam claudicantem ægri incurrant, vid. DEMMERSAN Itin. Indic. Meminit etiam hujus morbi PLUTARCHUS sympos. cap. 9. qui erudite admodum de hoc malo ita scribit: qui mare rubrum accolunt, ut Agatharchides testatur, novis affliguntur morborum symptomatibus, quæ parva sunt & dicuntur Draconia. Hæc suras & brachia exedunt & sese inclinant & prospiciunt, contractata vero sese rursus illatebrant ac fugiunt; complicata vero in musculis phlegmones intolerabiles excitant. Plura de hac materia legi possunt apud WELSCIUM in dissert. de vena Medinensi apud LUDOLF. in hist. Æthiop. & HIERON. MERCURIAL. V. L. lib. 2. cap. XX.

28. Dracunculorum causam invenire res certe est difficilior, paucis tamen ut nos expediamus, vero simile est à corruptione aquarum id fieri malum. Supponimus cum PISONE in H. N. l. 2. c. 16. sub æquatore & calidissimis locis aquam scatere omnis generis vermiculis, præsertim puteales stagnantes, quos sol fervore suo fovet atque excitat. Nullum inde dubium, quin quando aquæ hæ avidius potentur, vel etiam post æstum poris apertis aquæ immerguntur pedes, semina musculorum atque cutis intrent interstitia, quæ ibi quieta calore humido temperatoque foventur ac nutriuntur. Non novum apud nos quoque tale vermium genus est, qui sub cute in cervis, vitulis aliisque animantibus, germanice vocantur Engerling, hospitant, & cutim ita exedunt, ut tota inde fiat pervia. Tangit hoc malum juniora maxime animalia, quæ inde conficiuntur macie.

29. Restat adhuc America, de qua etiam pauca circa endemios morbos exponere licet. Memorabilia sunt, quæ nobiscum communicavit Baro de la HONTAN nouveau voyage dans l'Amerique septentrionale Tom. II. pag. 144. Incolæ Americani adeo robusto compactoque corpore sunt, ut paucis morbis sint obnoxii: nulla ibi membrorum resolutio, nullus calculus & hydrops observatur. Tanto major vero admiratio tam vegetæ sanitatis in agrestibus his corporibus est, quanto minor ipsis cura est servandæ valetudinis, quam etiam nimis corporis exercitationibus, saltatione, venatione, militia temperamentique per diem crebra mutatione debilitare videntur. Pleuritis interdum illos affligit, cujus curandi morbi norunt remedium: maxime vero variolæ in Canada versus septentrionem, & versus meridiem lues venerea grassantur; prior morbus per hiemale tempus propter impeditam transpirationem periculosus est, posterior per llinosensum fluviique Mississipi tractum vulgatum malum est. Magnam quoque hominum copiam in Canada spiritus vini abusus interimit; absumptus enim, ex nimia hujus potus ingurgitatione, nativus calor omnes fere illi morbo implicat, quem consumptionem vocant. Cæterum medicamenta non magni æstimant, vomitoriorum & venæ sectionis usum irridentes. Singulis autem fere hebdomadibus sudare solent, ita quidem, ut sani & diffuentes sudore per æstatem fluvios ingrediantur, & per hiemem in nivem se immergant.

30. In insula Cuba, Jamaica & Hispaniola serpentes & scorpiones morsu plurimis nocent, contra quod malum ita sese defendunt. Partem nempe adfectam ligant, ipsamque aliquando scarificant, imponentes postea theriacam, quam etiam intra corpus adsumunt, intus etiam pulverem ex corde & hepate serpentum ad scrupulum unum devorant, quibus non solum à morsu horum animalium sese præservant, sed & facile se curant. In Peruvia endemia est venerea lues,

lues, ibi primum excitata, post novi orbis inventionem inque Europam anno 1494. advecta, & primum in Neapolis obsidione visa est. Præter hanc turpitudinem accusant humanæ carnis, lacertarum, piscium frigide comestorum usum, qua de re legi potest Dn. TETRI *hystoir. des Antilles tom. II. Tract. V. cap. 2.*

31. Hæc sunt, quæ de morbis certis populis ac regionibus familiaribus ex nostris notatis & observationibus communicare volumus. Judicet lector benevolus physices studium, ad medicinam quam utile sit, & quod ex iis rebus, quibus vivimus corporeis nempe & mechanicis, ægrotemus, restituamur & moriamur.



D E

LÆSIONIBUS EXTERNIS, ABORTIVIS, VENENIS AC PHILTRIS.

TAnta artis salutaris dignitas est atque potestas, ut non modo ad vitam cum sanitate tuendam morbosæque afflictiones persanandas salutaria suppeditet consilia atque auxilia, sed & Jureconsultis, in gravioribus casibus, ubi de hominis vita & morte, fama & felicitate agitur, viam monstret & fundamentum suggerat, cui innitentes, ipsi postea, quod iustitia poscit, decernere possint & exsequi. Nemo enim non novit, Juris peritos semper, & quidem merito, medici exquirere judicium, quando tragicus quidam incidit casus, & delictum in vitam & sanitatem alterius admissum est, atque etiam prout medicum hoc fert decisum, pœnam à judice vel graviolem, vel mitiorem infligi. Quod quidem medicorum officium forense, quum versetur circa res maximi momenti, ipsi omnino serio sunt monendi, ne præcipitanter aut temerario, sed summa cum prudentia, circumspeditione ac deliberatione eodem perfungantur, neque etiam ex opinione aut hypothese quicquam decernant, sed ex certis & inconcussæ veritatis fundamentis, medicis æque ac chirurgicis judicent, omniaque firmis ac demonstrativis rationibus corroborent. Nam egregie non minus quam vere monet TULPIUS *lib. IV. cap. VII. plurimum*, inquit, *interest, sententiam suam haud leviter ferre, nedum in tam gravi casu amicitiae aut hostilitati quicquam dare, quin potius soli veritati litare, quæ ut semper recta sit, nunquam non iusta ac DEO grata est. Sit tibi religio nunquam judicem in fraudem elicere. Neque enim minores pœnas DEO dabit, qui infontem damnat, quam qui fontem dimittit.* Quare si forsan in re majoris momenti medici & physici ad judicandum requisiti minus aptos ad hoc sese sentiant, satius est & conscientiae melius consulunt, si aut peritiores simul in consilium vocant, aut judicium suspendunt & rogant, ut Facultati medicæ acta ad judicium ferendum tradantur. Non enim Jurisconsulti, ut iudices, sed ipsi medici per decisum suum absolvunt, aut condemnant, ac si in promendo hoc falluntur, ille supremus iudex non minus sanguinem, per injustam rei absolutionem, inultum, quam infontis perperam damnati effusum, certe vindicabit. Ipsi vero etiam Jureconsulti, ea propter sunt monendi, ne semper privatis medicorum & physicorum fidant responsis, quippe qui sæpe non sufficienter anatomica, chirurgica & rationali medica scientia sunt instructi, sed ut potius conscientiae rationem habentes, ab integro quodam collegio iudicium rogent, antequam decretoriam suam ferant sententiam. Deinceps medici in reddendis judiciis sæpe in eo delinquant, quod licet non falsa, ea tamen afferant, quæ minus ad rem faciunt. Evenit hoc, uti novimus, haud raro quando acta sine quaestionibus traduntur: medici autem attente acta non perlustrant, nec ea propter quid potissimum in quaestione sit & determinandum norunt, sed dubia dubiis, rationes

steriles rationibus, allegata allegatis cumulant & æquivoca dictione efferunt, quod tamen certo definendum, ut postea iudicibus, rerum medicarum plerumque ignaris, difficile sit, vel allata intelligere & ex ambagibus in viam redire, tantum abest, ut in usum suum inde quicquam depromere possint. Ex quo quum errores sæpe & confusiones oboriantur; semper omnino eo allaborandum est medico, ut post curatam actorum perlustrationem contentorumque considerationem, in quo cardo rei versetur, perspiciat, sententiam suam perspicue & succincte promat, eandemque solidis, claris & ad rem facientibus argumentis confirmet. Sed tum hæc, tum alia, medico forensi, tam facienda, quam vitanda, in hac dissertatione uberius evolvere & monstrare nobis constitutum est, ita tamen, ut selectas tantum observationes, de *læsionibus externis, abortivis, venenis ac philtris* excerpamus: omniaque luculentis ex experientia depromptis exemplis illustremus ac confirmemus.

Observatio I.

Cadaveris inspectio absolute est necessaria, quando homo aspectu sanus, ita ab altero læditur, aut vulneratur, ut paulo post, vel intra horæ spatium, è vita discedat.

Scholion.

Nonnulli quidem ex celeberrimis JCTis, ac inter hos etiam FELTMANNUS *de inspect. cadaver. cap. LIV. §. IV.* ea in opinione versantur, ac si tum non opus esset inspectione & iudicio de absoluta lethalitate, quum ipse effectus idem jam clarissime demonstraret. Sed tum etiam nihilo minus instituendam esse sectionem & in mortis causam inquirendum, rationes urgent graves. Agitur enim hic de hominis vita, in quo negotio probationes debent esse quam clarissimæ, oculis autem & manibus, plus credendum esse, quam opinionibus, perhibuit jam HIPPOCRATES. Deinceps utique accidere per experientiam constat, ut quispiam leviter, vel minimum non absolute lethali modo læsus; exacto tamen exiguo temporis spatio non ex læsione, sed delitescente interius alia causa intereat. Memini adhuc rustici Westphali, qui mensæ assidens, & ab uxore contumeliosis verbis exceptus, frustum panis Westphalici, quem vocant *Bonpurnickel*, iratus arripuit, & in uxoris triclinio exeuntis sinistram latus conjecit, eo cum effectu, ut illico malle haberet, & post aliquot horas inter animi deliquia obiret. Sectione facta, lien quidem disruptus & aliquot sanguinis coagulati & congrumati mensuræ in abdominis cavo comparuerunt: sed foemina diu jam antea aspectu fuerat pallida & in iram prona, ipse quoque lien disruptus ingentis & præternaturalis erat magnitudinis. Hinc recte à medico iudicatum: ob vasa adeo distenta, tunicamque per se tenuem nimium

expansam, facile diffiluisse lienem, nec ab ictu hoc, si status fuisset naturalis, potuisse disrumpi. Quo JCTi permoti, marito non ordinariam, sed extraordinariam, fustigationis poenam decreverunt. Alium in dextro latere baculo aliquoties percussum, postea in sinistrum latus cecidisse & brevi post obiisse, novi, ubi post mortem interius lien aliquot fissuris hians & copiosus coagulatus sanguis in ventre inventus, exterius autem in latere sinistro nulla sugillatio, sed in latere dextro apparuit. Neque tamen hæc mortis causa plagis, sed potius facto post eas lapsui tribuenda fuit, eo quod lien in homine totus ex vasis sanguiferis copiosis est coagmentatus & ob membranarum, quibus cingitur, tenuitatem facile potest rumpi, ex quo postea succedit sanguinis effusio lethalis. Halberstadii accidit, ut viro juveni, quadrato & robusto sanguineo, inter rixas cum sodalibus caput percuteretur cum cantharo ligneo, isque inde in lectum ob crapulam delatus mane inveniretur mortuus. Instituta sectione, vix levis sugillatio & cutis sauciatio à plaga observata, nec in capite, nec aliis corporis visceribus quicquam præter naturam inventum. Sed dissecto tandem corde, ingens in conspectum prodiit polyposum concrementum, arteriæ pulmonali firmiter impactum. Quod quia ostium pulmonali arteriæ clausit, per iram & crapulam sanguinem valide fuisse commotum, polypum e dextro cordis ventriculo abruptum, pulmonali arteriæ intrusum, sanguinis cursum interceptum, & sic subitam mortem inductam tuli iudicium. Caveant igitur medici, ne perfunctorie inspiciant cadavera, nec eas tantum partes, quas proxime tetigit vulneratio, sed ut vicinas etiam, imo totum corpus omnesque ipsius partes, examini subjiciant, quo sic tandem mortis veram & adæquatam causam inveniant.

Observatio II.

Læsiones absolute lethales, oppido paucae sunt in genere, sed plures in specie, in alio scilicet atque alio individuo.

Scholion.

Læsiō per se & absolute lethalis in genere ea dicitur, quæ vitam omnibus, semper & necessario adimit cujuscunque ætatis, temperamenti, sexus & corporis constitutionis ac roboris sint, licet etiam optima quævis tempestive adhibeantur præsidia. Sic lethiferæ sunt paucae læsiones & tantum eæ, quæ vasa sanguifera majora circa cor, pulmones & viscera interna afficiunt, quando cor ipsum perfoditur, caput & cerebrum circa nervorum principium, medullam oblongatam & spinalem, gravius læditur, aut ibi effusus humor colligitur, nec ulla arte discutiendus, nec educendus, sed putrescendo necans. Multæ vicissim occurrunt læsiones, quæ licet in genere non sint absolute mortiferæ; in illo tamen, in quod inciderunt, individuo, moriendi necessitatem imponunt absolutam. Nam ex vero scribit CELSUS lib. V. cap. XXVI. *confert etiam aliquid & ætas, & corpus, & vitæ propositum, & anni tempus. Quia facilius sanescit puer, vel adolescens, quam senior, valens, quam infirmus; neque nimis tenuis, neque nimis plenus, quam si alterum ex his est, integri habitus, quam corrupti.* Res patebit exemplis. Senex septuagenario major graviter in pede dextro, à glande plumbea trajecta vulneratur, tibiæ & fibulæ os frangitur, & insignis succedit hæmorrhagia. Adest quidem illico chirurgus peritus, qui sanguinis fluxum compescit, & vulnus secundum regulas artis tractat: nihilo minus accedit corruptio, sphacelatio & quinto die mors ipsa. Lethum igitur intulit vulnus; non tamen in genere fuit absolute lethale. Sphacelus enim externus efficacibus remediis cohiberi, vel etiam pars illo affecta amputari,

& sic, ne latius serpat putredo, potest impediri. At, in juvenili, robusto & valido corpore, id quidem commode perficitur, minime vero in sene, viribus fracto, cujus succi jam in putredinem proni, in quo sphacelati pedis amputationem ob virium defectum & hæmorrhagiam subsequuturam instituire non licet; quin licet operatio tentaretur, metus tamen esset, ne in tanta succorum impuritate, sphacelosa corruptio repullularet; quum non insolens sit, vel levem incisionem & læsionem tendinis, ex abscisso pedis clavo, sphacelationem attulisse lethalem. Quare rectum omnino iudicium: vulnus descriptum in hoc individuo fuisse absolute lethale, quia nulla certa demonstratione potest evinci, quod sanationem ullo modo fuisset admissurum. Eadem ratio etiam aliorum est vulnorum: neque enim medicus, nec chirurgus, vulnus tantum curant & vitam servant, sed ipsius corporis natura, sive partium solidarum & fluidarum dispositio, optima & potissima, uti morborum internorum, sic etiam læsionum externarum, est medicatrix; quam medens, si deficit, juvare, sublevare & impedimenta optati successus remove debet. Hæc si non satis valens est, sed per ætatem, nativam & hæreditariam dispositionem, per morbum prægressum crebrioresque animi affectus, languida est ac debilis, succi impuri, fibrarum robur remissum, corpus molle & spongiosum, læsiones inflictæ utique facile fiunt absolute lethales, licet medicus, chirurgus & adstantes omnia, quæ ex usu sunt, contulerint.

Observatio III.

Vulnera ut plurimum lethalia & propter naturæ bonitatem in quibusdam tantum sanata, in aliis cum lethali eventu occurrentia, non per accidens lethalia censenda.

Scholion.

Nihil in foro medico frequentius, quam ut mortuo vulnerato, rei defensor suspectam vulneris lethalitytem reddere nitatur, idque, quamvis gravissimum, per accidens lethale fuisse contendat, allegatis ex medicorum observatis multis raris, sanationis fere miraculosæ exemplis. Sed magna inter vulnus ut plurimum, & per accidens lethale intercedit differentia. Nam læsiō per accidens lethalis ex se & sua natura nunquam ad mortem inferendam est sufficiens, & in robustioribus æque ac infirmis sanationem recipere potest, ob intervenientes autem fortuitas quasdam causas, ad eventum lethalem deducitur. Causæ etiam, quæ mortem procurant, nec à læsionis, nec læsi natura dependent, sed non naturales sunt & ab extra accidunt. Sic quando musculus temporalis aut pericranium læditur, id quidem non moriendi infert necessitatem, sed sanationis commodissimus est locus. Interim quando læsus frigori, vel urenti calori affectam partem exponit, aut impetuosius animo movetur, nec non quando in plethorico venæsectio omittitur, aut chirurgus perperam medicationem instituit, & acria atque stimulantia admovet, mors excipit & læsiō fit per accidens lethalis. Longe vero alia ratio est illarum læsionum, quæ graves & ad interficiendum sunt sufficientes. Nam si quandoque sanatæ commemorantur, id non vulneris levitati sanitatem admittenti, sed peculiari prorsus naturæ robori essetribuendum. Contra ea, quando lethalem sortiuntur eventum, naturales & intrinsecæ indeclinabiles, à vulneris & corporis debilioris natura pendent, causæ subsunt, nec læsiō ea propter tantum per accidens lethalis est habenda. Extant exempla, qui à vulneribus intestinorum tenuium, ventriculi, diaphragmatis, hepatis, ob validum minusque exquisiti sensus corpus convalescerunt. Plures vicissim eodem modo vulne-

vulnerati occubuerunt, licet nec in curatione, nec vitæ victusque regimine quicquam utile omissum, & nocivum admissum est, ex quo lethalis eventus posset derivari, tantum quod non tam eminens fuerit virium robor, & superando tam gravi vulnere sufficiens. Miraculosa etiam sunt nonnulla exempla de cerebri cum membranis ipsius vulneribus, è quibus successive magna cerebri portio exiit, quæ tamen in plebeiis, & robustis hominibus sanationem recepit. Sed si ejusmodi vulnera corpori accidunt, solito tantum robore pollente, tanto magis senili, aut infantili infirmo, nunquam non necant, nec ob rata sanationis exempla in his propter accidens pro lethalibus venditanda.

Observatio IV.

Dantur læsiones in se & sua natura non, sed tamen absolute lethales, quia ad ipsas sanandas non est accessus.

Scholion.

Non quidem omnia insanabilia vulnera, sunt absolute lethalia. Prostant enim exempla eorum, qui in hepate & intestinis vulnerati, per longum adhuc vitæ tempus, læsionem non consolidatam circumtulerunt. Nihilo minus verum manet, quod læsiones insigniores, uti sunt in vasis sanguineis, nisi medicina admoventi possit, necessario fiant lethales. Nam si quis in suprema femoris parte profundius paullo fuerit fauciat, & vasa ibi discurrentia ampliora dissecta, omnino lethale est, quia ob profunditatem stipticum nec applicari, neque dissectum vas ligari potest, sed vitam cum sanguine effundi indeclinabile. Novimus etiam quendam tam leviter in abdomine fuisse fauciatum, ut vix pollicis crassitie penetrarit gladius, rite quoque vulnere tractato, bene habuisse, functionesque iterum expedite successisse; post quadriduum autem ex improvise languescere & animo linqui cœpisse, viribusque indies magis concidentibus, sexto die animam exspirasse. Dissecto post mortem cadavere, notabilis cruoris in abdominis cavo copia fuit inventa, quæ ex discisso omenti vase sensim profluxerat. Nemo sane vulnus hoc inflictum per se lethale, sed ampliari, sanguinis stillicidium compesci, vel vas fauciatum ligari potuisse judicabit. At chirurgus conjicere non potuit, inprimis in principio, quum nullum urgeret symptomata, quod & quale vas, in omento præsertim, fuerit læsum. Et licet etiam chirurgus sectione ampliationem tentare voluisset: procul tamen dubio æger, nihil mali præsentens, renuisset; ne dicam ejusmodi incisionem semper periculi expertem esse. Atque adeo in morali hac, non physica, sanandi impossibilitate, quid decernendum sit, quæstio altioris indaginis JCTis decidenda venit.

Observatio V.

Quandoque exigua admodum est læsionis nota: mors tamen inde subita sequitur.

Scholion.

Obversantur animo plures ejusmodi casus. Memini adhuc quendam pugno fortius in scrobiculo cordis percussum, qui illico concidens, adhibitis frustra analeptis, sub animi deliquiis periit. Post mortem, nec corruptio, nec sphacelus, nec sanguinis extravasatio, nec ulla vasis ruptura visa, sed tantum macula nigricans thaleri ambitu in diaphragmate fuit, ubi ensiformi cartilagini connectitur. Mors cito sequuta, plagam hanc ipsius causam fuisse prodit, sed quo pacto tam levis, uti visa fuit, læsio id efficere potuerit, primo intuitu in difficili esse videtur. Verum diaphragma pars exquisitius sentiens est, ejusdemque

actio ad respirationem, quæ cum vita pari passu ambulat, est absolute necessaria. Ob sensum igitur acutum pugni percussione spasmus septo laic est inductus, qui non modo ad universum nervolarum partium systema propagatus, sed & diaphragmatis motum sufflaminavit; quo cessante, necessario & pulmonum & cordis motus cum vita cessavit. Interim nequiquam absolute asserere vellem, ejusmodi ictum, semper eundem, vel similem tantum in corporibus producturum fore effectum, quæ, non adeo sunt sensibilia & ad spasmos concipiendos disposita. Leve etiam erat vulnus, quod militi in ventre circa umbilicum tantum per integumenta erat gladio inflictum, quod tamen intra quadriduum erat lethale. Nam quum, accepto ictu, vehementer adhuc cum adversario rixaretur & corpus commoveret, sub inspiratione fortiori omenti particula in vulnus fuerat intrusa. Chirurgus pinguedinem vulnus claudentem esse putans, non reposuerat, sed emplastrum tantum apposerat, nullumque periculum adesse declararat: hinc omenti incarcerata portio abiit in sphacelofam corruptionem, quæ latius serpens, eadem labe abdomen totum contentaque in ipso viscera tam subito affecit, ut æger quarto die interierit. Chirurgus culpam declinavit eo, quod omenti portio non ex vulnere apparuerit, sed inter membranas & musculos abdominis hæserit, ubi dijudicare & discernere non potuerit, an profunde penetrarit vulnus, an vero occlusum fuerit omento. Interim reus, quia læsio intra quartum diem & fatalem terminum mortem attulit, capitis ab JCTis est damnatus, juste, an injuste, nobis non est definiendum. Neque prætereundum leve illud aspectu diaphragmatis vulnus, quod inter binas ultimas costas in substantiam septi ibi accreti vix ad duos digitos transversos gladio obtuso fuerat inflictum, sine ipsius perforatione, & sine notabili sanguinis effusione, post aliquot tamen horas sub cœlo frigido lethale, eo quod violentus inde diaphragmati spasmus inductus, quo respiratio non modo interclusa, sed & vasa amplissima per diaphragma transeuntia compressa, ut sanguis in laxa mesenterii compage & inter adiposam renis dextri tunicam, perrumpere fuerit coactus. Quin quandoque nec læsio, nec instrumentum lædens, externo aspectu morti inferendæ videntur apta, & læsus tamen brevi periit. Novimus fistula tenui terrea fumigationi tabaci serviente, orbitam oculi inter pocula ex improvise fuisse pertusam, & quia os tibi tenuissimum, & cerebrum ejusque basis propinqua, citam à læsione subsequutam esse mortem.

Observatio VI.

Læsio per se non lethalis, sæpe ex ignorantia, aut defectu chirurgi, mortem infert.

Scholion.

Non adeo infrequens hoc est in foro & praxi medico-chirurgica, nec adeo multum temporis effluxit, quum facultati medicæ acta transmissa, de vulnere casum inflicto in externa parte cubiti, ita ut eminens ossis humeri portio abscissa, cum cute & carne esset pendula. Commode hæc læsio potuisset perfanari, si remota abscissa parte, hæmorrhagia in loco obvio cohibita, balsamum vulnerarium applicatum, & epithemata discutientia defensiva fuissent admota. Sed quia chirurgus frustum pendulum iterum adducendo, viam ad sistendum sanguinis stillicidium præclausit, emplasticis suppurationem impedivit, nec defensiva apposuit: non modo cum ingenti virium lapsu hæmorrhagia sæpius recrudit, sed & ob ligatam arctius, ne sanguis irrueret, supernam brachii partem, infra vulnus illud perfrigeratione & necrosi affectum est, ac læsus undecimo die exspiravit. Potest etiam contingere,

212 De læsionibus externis, abortivis, venenis ac philtris.

ut vas majus arteriosum, vel venosum discindatur, in tibia, aut brachio, ubi commodus alias delegandi locus est. Læsus autem quia extra urbem, aut in pago degit, ubi chirurgus, vel nullus, vel non peritus obtinendus erat, ob hæmorrhogiam, per remedia alias & artem compescibilem, sub his vero circumstantiis nimis effusum & lethalem, periit. Quæstio est, an percutiens plecti possit poena capitali? Interim si forsân chirurgus etiam nonnihil, quod utile esse potuisset, in vulnere lethum inferente omisisset, ea propter ipsi tamen soli non illico mortis causa tribuenda, sed semper læsi corporis constitutio consideranda, & videndum, an, etiamsi omnia ex arte exquisita fuerint confecta, ipse potuisset servari, vel secus? Atque etiam si casus fuerit dubius, utrum læsi naturæ, an chirurgi medicationi fatalis eventus sit adscribendus, medicum collegium, corporis vulnerati robur & rationem ignorans, in chirurgum mortis causam per accidens conjicere nequit; licet reprehensione & poena dignum judicet ipsum, quod non omnia, ad sanationem ex arte proficua, contulerit.

Observatio VII.

Lethalitas vulneris, ex temporis, quo læsus supervivit, diuturnitate æstimari nequit.

Scholion.

Est quidem secundum legum civilium constitutionem novum dierum spatium, ille fatalis terminus, ex quo absoluta vulneris lethalitas judicatur: vulnus vero per accidens lethale, interea mortem inferre posse, supra jam docuimus. Et quod in vulnere absolute lethali funestus eventus longius, ad aliquot interdum hebdomades, protrahi queat, uberius per experientiam constat. Exemplo sit vulnus vesiculæ felleæ, quod absolute est lethale, cito tamen non necat. Diu enim adhuc succedere possunt cordis, & arteriarum, vitam sustinentes, motus, & bilis exigua copia destillans aliquandiu in abdominis cavo, vita superstite, fluctuare. Sed quia vulnus nulla arte consolidandum & biliosus humor continuo in abdomen effunditur, temporis diuturnitate nimis augetur, & non modo tunicas intestinorum arrodit, sed & alia viscera corrumpit, atque adeo lentam mortem, post mensem & ultra necessitate affert indeclinabili. Nec dissimilis vulnere œsophagi, ventriculi & intestinorum est ratio, quæ quum non proxime vitalem sanguinis progressum turbent, non cita mors excipit, sed post aliquod demum tempus, ob sensim factam succi alimentosi & chylosi exsillationem, corruptionem cum morte inferentem, sequitur.

Observatio VIII.

Mortis causa in renunciatione curate distinguenda à causa lædente, semperque videndum, an illa, seu effectus, ita comparata, ut adæquata sit huic, tanquam causæ efficienti.

Scholion.

Hoc si observatur, facile patebit, an læsio per se attulerit mortem, an vero causa eandem induxerit alia. Nonnunquam enim læsis, eodem modo ac sanis, accidit morbus, ex quo, quum moriuntur, causa perperam læsioni tribuitur. Erat adolescens, qui baculo in pectore circa quartam & quintam costam, cum levi duntaxat sugillatione percussus, tertio die prævia horripilatione incidit in febrem; cui accessit tussis sicca, respiratio difficilis, & quarto die sanguinis sputum, quod tandem substitit & septimo die æger occubuit. Post mortem in dextro latere, ubi percussus erat, corruptus cruor & magna feri in pericardio colluvies inventa; orta inde disceptatio est, an

non ex illata læsione obierit. Sed per inquisitionem patuit, tum temporis epidemium fuisse inter juniores pleuriticum morbum, nec dubium esse, quin adolescentulus eodem decubuerit, quia non modo ordinarium pleuritidis veræ symptoma, sputum quarto die cruentum, adfuit, sed & causæ morbo huic inducendo aptæ, ut ira gravis & superingesta frigida larga potio, innotuerunt. Plurimum itaque refert, ut medicus probe in circumstantias inquirat omnes, quæ ad lethalem eventum conferre potuerunt, quo certus sit, nullam aliam causam, quam læsionem, intulisse lethum. Ante viginti circiter annos ordini medico hujus Academiae tradebantur acta, cum annexo baculo ex ligno betulæ, crassitie pollicis, quo foemina in collo & humeris percussa, paulo post interiërat; inventis quidem in collo & humeris plagarum vestigiis, sed in capitis exterioribus, nulla adfuit sugillatio, fissura vel fractura; in cerebri autem ventriculis aliquot cochlearia sanguinis extravasati visa sunt. Medicus, qui sectioni præfuerat, extravasationem absolute lethalem fuisse edixit, quia nec per remedia pharmaceutica, nec chirurgica, removeri potuerit. Defensor suspectam hanc relationem eam ob rationem reddidit, quia læsa viva & satis adhuc valida aliquot milliaria pedibus emensa sit, quod facere non potuisset. Quare judices à binis in Saxonia collegiis medicis academicis rogarunt judicium, quæ vero in partes transferunt, & absolutam lethaliatatem asseruerunt. Quum vero nobis tandem traderentur acta, vidimus, à testibus depositum fuisse, defunctam mensium suppressione, & sæpe etiam colica convulsiva laborasse, post verbera quoque de ingenti ventris dolore esse conquestam. Unde pronuntiavimus: mortis causam fuisse quidem sine dubio sanguinem in ventriculos cerebri effusum, sed quod hæc mortis causa, proxime & immediate à plagis fuerit inducta, id esse in quæstione, nec ullo modo posse demonstrari. Percussionem enim tantum in collo & humeris factam non tanti fuisse, ut potuerit in capitis interioribus tam lethiferum inducere effectum, sed foeminam procul dubio interiisse apoplexia; dum commoto per iram sanguine, eodemque per dolorificos in ventre spasmos ad caput impetuosius translato, tenera plexus choroidei vascula dissiluerint, sanguinemque effuderint.

Observatio IX.

Medicus in relatione sua claras tantum & certas sententiæ rationes allegare debet; neutiquam vero rerum conjecturis & præsumptionibus plus tribuere.

Scholion.

Nuperius admodum id factum esse à medico veterano ipse reminiscor. Secuerat is foetum per abortum septimo mense exclusum, jam tum quidem perfectum, sed flaccidum & quasi tabidum, comparente nulla in capite totoque corpore lethalis læsionis nota, pulmonibus etiam in aqua subsidentibus. Mater ex furtiva venere gravida oculuerat, & graviditatem negarat, quinto mense post frequentes vomitus & anxietates, ob diætam insalubrem inciderat in tertianam, eamque post binas hebdomades piperis, & radicis imperatoriae ex aqua ardenti usu profligarat. Postea carceri mancipata de capitis dolore, languore artuum, appetitus prostratione, nec non dolore ischii & siti fuerat conquesta, ad quam fallendam aquam frigidam copiose ingurgitarat. Elapsis aliquot diebus accesserant ventris tormina, & aquosus humor continuo è genitalibus stillarat, donec tandem foetum primum, ac postea secundinas, remotis arbitraris, sub atrocissimis doloribus excluderet. Medicus igitur in relatione sua judicavit, ex circumstantiis in foetu observatis probabili ratione esse concludendum

dum, matrem per multa pellentia foetum exturbare voluisse, hoc autem jam nimis adulto, irritum fuisse molimen, interim subtractum embryoni esse alimentum, ut contabuerit, tandemque vivere desierit. Sed in actis nihil plane fuit reperiundum, quo potuisset confirmari, matrem abortiva assumpsisse & veri potius fuit simillimum, ex insalubri diæta succos redditos impuros, & post tertianam non recte tractatam successisse lentum morbum, sanguinem & succos laudabiles consumentem, foetuique subtrahentem, demumque per terrorem & iram ob incarcerationem, abortum esse inductum. Quare ejusmodi in casibus omnino necessarium, ut inquisitione finita, acta collegio medico transmittantur. Sic enim ex testimoniis sæpe circumstantiæ innotescunt, quæ ad decisionem categoricam, absolutionem, aut condemnationem, multum faciunt, quæque medicum renunciantem à principio latuerunt.

Observatio X.

Medico, qui curationi læsi defuncti præfuit, in propria causa testanti, non semper fides habenda.

Scholion.

Medicus, qui læso medicatus est, hoc pereunte, absolutam plerumque inculsat vulneris lethalitatem, ne se ipsum inculpet, quasi quicquam ad vitam servandam omiserit, aut quod noxium admisit, licet sæpe culpa non expers sit, inprimis quum pauci ex junioribus, præsertim medicis ac physicis, sufficienti polleant experientia, ut sciant, quomodo graviter læsis per interna & externa recte sit succurrendum. Compertum id exemplo cujusdam habeo, in pectore, duobus transversis digitis infra mamillam dextram, vulnerati. Effluxerat ex hoc vulnere per aliquot dies sanguis purus, sanie postea remixtus, sed non adeo copiosus, medicus & chirurgus deficiente sputo cruento, non ex pulmonum viscere, sed ex vulnere in obeso corpore prodire materiam putarant, vulnusque post tertiam hebdomadam ad consolidationem deduxerant. Sed consolidato ipso, tussis successit, spiratio difficilis, cum lento calore, copiosis sudoribus matutinis, & æger post quartam hebdomadam fatis cessit. Diffecto cadavere, dextra thoracis cavitas magnam puris continuit copiam, totusque ibi pulmo fere corruptus, niger & putridus comparuit, & procul dubio sanies, per consolidationem exitu præclusa & sanguini remixta, mortis causam præbuit. Alius in pulmone vulneratus, parum sanguinis sputo rejecit, cui medicus decoctis traumaticis & adstringentibus occurrit, eoque cohibito & phthisis, pulmonis ulcus, tandemque post duos menses mors ipsa successit. Medicus curationis artifex insanabile fuisse malum testatus est; ego vero aliter sensi. Nam ea tantum pulmonis vulnera sunt lethalia, quæ vasa majora lædunt, non vero levia, minores canales fauciantia. Prostant potius exempla, de pulmonum vulneribus, subsequente sputo cruento, tussi & difficili respiratione, quæ tamen perfecte sanata sunt. Quin TULPIUS *lib. II. cap. XVII. pag. 219.* memorat: frustum pulmonis uncias tres pendens fuisse abscissum, sine vitæ dispendio. Et PECHLINUS *in hist. vuln. thor. art. XXIII.* non tantum vulnus pulmonum, sed & partem lobuli decisam observavit, ægro convalescente. Quare culpa potius in usurpata sputum cruentum sistentia rejicienda, quibus sanguis subsistens, in putredinem abiens phthisicum morbum genuit.

Observatio XI.

Pulmonis in aqua subsidentia, non est infallibile foetus in utero mortui signum.

Scholion.

Embryonem in utero non respirare, res est indubia. Pulmonis etiam vasculosum vesiculosumque viscus ab aere atmospherico expandi aptum, ea propter in uterino clausulo collapsum, minus spatium occupare, & ob id aqua specificè gravius in hac subsidere, & vicissim, postquam extra uterum aer gravitate & elasticitate sua irruens, compagem omnem diducit, majus spatium explere, aqua levius reddi ac supernatare, id pariter certum. Sed quod medici infanticidio imputato indubium venditarunt foetus in utero mortui signum, subsidentiam, id non adeo certum, sed fallax est. Novimus enim infantis jam per aliquot hebdomades extra uterum vivi, & à matre melancholica suffocati, pulmones, aquæ injectos fundum petiisse. Ratio hujus observationis in proclivi est: in suffocatis scilicet, ob interclusum spiritum, sanguis ex uno ventriculo non potest transferri ad alterum, sed in pulmone congeritur, vascula numerosa farcit; coagulatur & præternaturalem gravitatem visceri huic conciliat. Medici itaque, qui sectioni præest, officium est, ut pulmonum corpus probe perlustret, & dispiat, an vasa sanguine crasso sint facta, quod in embryone non accidit.

Observatio XII.

Non dantur pharmaca, simpliciter & absolute natura sua talia, quæ abortum procurant, sive foetum immaturum utero expellunt.

Scholion.

Abortiva pharmaca per se & sua natura talia, quæ si non in omnibus gravidis, tamen in plerisque foetum expellunt, ut purgans alvina stercorea, emeticum saburram è ventriculo & duodeno, diuretica urinam, sudorifera sudorem, plane negamus. Creditur hoc quidem vulgo & etiam à quibusdam medicis perhibetur; uti jam olim ab HIPPOCRATE, DIOSCORIDE & PLINIO factum fuisse, literarum monumenta docent. Passim etiam hoc nomine nota sunt varia pharmaca, maximeque sabina, ejus extractum & oleum, oleum terebinthinæ, balsamus sulphuris terebinthinatus, baccae lauri, myrrha, crocus, elixir proprietatis Paracelsi, nec non purgantia acriora & emetica, item sanguinis missiones iteratæ, & tertio præsertim & quarto mense institutæ. Neque negandum, ab his in copia usurpatis, proritatum quandoque fuisse abortum. Sed quod hoc non semper, sed raro & sub certa tantum corporis dispositione cooperante contingat, asserimus. Observarunt jam celeberrimi medici, ROLFINKIUS, LUDOVICI & B. WEDELIUS, multas vomitoriis, purgantibus, emmenagogis validioribus, nec non venæ sectione usas, foetum nihilo minus legitimo partus tempore sanum ac vegetum exclusisse. Quot sunt foeminae, quæ secundo vel tertio mense perpetuam vomitionem experiuntur, neque tamen abortiunt. De venæ sectione tertio mense instituta perhibet HIPPOCRATES, quod abortum cieat: sed multas novi foeminas, semper abortientes, nisi venæ sectionem sub graviditate bis vel ter instituunt. Abortus potius per convulsivum uteri motum succedit, nec unquam accidit, nisi hæmorrhagia ex ruptis in utero vasis præcesserit. Quare, nisi talis in utero adsit dispositio, ut fibræ ipsius ad concipiendos convulsivos motus sit apta, & vasa à stagnante & infarcto sanguine facile perumpantur, abortus fit nullus. Si vero vicissim adest hæc ad abortum dispositio, is levi ex causa, per impensiores corporis & animi commotionem, per oneris gestationem, lapsum in terram, usum medicamenti spirituosius exæstuantis, per morbum, præsertim febrem, sine causa alia manifesta, inducitur, tanto autem facilius;

cilius, si purgans, aut emmenagogum validius fuerit assumptum. Quin impotentiam hanc pharmacorum fœtum expellendi conspectius arguit, quod ne quidem ejusmodi medicamenta sint, quæ menses certo cieant, aut quacunque alia corporis ex parte sanguinem e-moveant, nisi intrinseca quædam adsit dispositio atque proclivitas. Atque adeo, quum abortus sine hæmorrhagia contingere nequeat, hanc autem in omnibus proritare non liceat, abortum etiam indiscretim provocari non posse, patet. Divinæ potius sapientiæ ac providentiæ tribuendum, quod non absoluta ejusmodi facultas & efficacia medicamentis indita, qua cædes innumeræ & infanticidia plurima patraturi fuissent homines improbi atque perversi. Posset quidem nostro huic asserto contrarium videri HIPPOCRATIS in *jurejurando* præceptum: ut medici à pefsis vulvæ subdititiis abortivis caveant. Verum nec HIPPOCRATES descripsit, nec nostro hoc tempore nota sunt medicamenta, quæ sine inflammatione & erosionem id præstare possent. Atque etiam credibile est, in Græcia & calidioribus regionibus, fœminas fuisse teneriores & ad abortum magis proclives, in nostris autem robustiores esse minusque exquisiti sensus. Notent autem hæcenus allata Jureconsulti ac Judices, qui secundum legum criminalium rigorem, abactionem partus vitalis studio patratam, infanticidium censent, eodemque modo utrumque delictum puniendum esse putant, quum licet animus malignus non abfuerit, ipsa etiam corporis natura & morbosa dispositio ad effectum obtinendum, plus contulerit, quam medicamentum ipsum. Teneant quoque in eodem hoc negotio, partum vitalem à medicis tantum haberi illum, qui vivus extra uterum aeris & alimentorum usu potest durare, non vero embryonem quinque aut sex mensium, cujus partes nondum eam firmitudinem & perfectionem adeptæ, quæ ad circulationem humorum, sive vitam sustinendam, sunt necessariæ. Si vero vita eo sensu accipienda, ut denotet illum cordis sanguinisque motum, quo fœtus in utero nutritur & augefcit, primo hic statim mense adest. Quod si per abortum ejicitur fœtus, an possit pro infanticidio haberi? nos quidem juris naturalis doctoribus determinandum relinquimus.

Observatio XIII.

Medicamina, quæ fœminis sterilitatem, aut viris impotentiam conciliare apta sint, in rerum natura non existunt.

Scholion.

Vulgaris, sed falsa est opinio, dari in rerum natura nonnulla, quæ generationem in utroque sexu impedire possint, seminis virilis vim extinguendo, & conceptionem fœminæ impediendo. Veteres jam naturæ consulti DIOSCORIDES, PLINIUS, PAULUS AEGINETA, nec non SCHOLA SALERNITANA, tribuerunt ejusmodi virtutem rutæ, agno perperam casto dicto, quum *αγνος* jam denotet castum, nec non camphoræ. Sed hæc inter fabulas veterum, solida & rationali physices scientia destitutorum sunt referenda. Saluberima potius & præstantissima esse hæc variis in morbis remedia, nec unquam hunc ab ipsis observatum esse effectum, per experientiam constat. Multo minus autem veritati respondet, quod de camphora circumfertur, quasi odore impotentiam conciliet, quum TACKENIUS fidem faciat, Venetiis pharmacopœum sublimasse camphoram; ipsius tamen uxorem præter morem crebrius peperisse. Neque etiam ullis medicamentis castitas, sed animi continentia & objectorum declinatione obtineri potest, quæ sensus movere & ad libidinosos actus pellicere apta est. Nec à contrario argumentari licet, quum medicamina venerem

excitantia & semen augentia proflent; ea propter etiam dari, quæ venerem extinguunt & semen minuunt. Illa enim, uti vinum generosum, decoctum succoladæ, piper, ostreæ, radix ninsi, satyrionis, ita sunt comparata, ut partim copiosum & spirituosum chylum, ex quo postea semen uberius & vividius, ingignant, partim etiam feminales vesiculas & partes genitales stimulent, ex quo coeundi cupido oritur. De his autem, licet non negandum sit, sine cere & baccho, veteri dicterio, frigere venerem, & esse nonnulla, ut nitrosa, acida & refrigerantia, quæ sanguinis intestinum motum & chyli proventum minuendo, veneris stimulos obtundunt; longe tamen alia ratio esse debet eorum mediorum, quæ viris impotentiam & fœminis sterilitatem afferre possunt. Ad hoc enim obtinendum non sufficit, ut seminis proventus minuatur, sed ut penitus per ea tollatur, quæ aut feminalia vasa cum testiculis prorsus constringunt, & paralytica resolutione afficiunt, & in fœminis, ut non modo sanguinis orgasmus sedetur, sed & ejus effluxus ad ovaria & uterum prorsus intercipiatur. Hujus virtutis media existere merito negatur, nisi forsan sint venena, quæ tamen non tantum generandi potentiam, verum etiam totius corporis integritatem labefactant & destruunt, idque morbis obnoxium reddunt, in quibus semper languet venus.

Observatio XIV.

Multa pro venenis habita, talia non sunt, & multa venenata non æstimantur, quæ tamen sunt.

Scholion.

Si relicta DIOSCORIDIS & PLINII monumenta evolvimus, plura in venenorum classem relata esse offendimus, quæ virulentam naturam non habent. Sic communiter toxicis annumerantur sanguis tauri, calx viva, vitriolum, antimonium crudum, auripigmentum, argentum vivum, nec non à quibusdam adamantis & vitri pulvis, quæ tamen sine noxa assumi possunt. Mercurius quippe currens non modo innoxie, vel ad libram, ingerendus, sed & præstabilis est virtutis, adversus truculentum passionis iliace malum, per ipsam constat experientiam. Antimonium crudum ad sanguinem repurgandum, sudorem movendum & arthriticos atque rheumaticos dolores abigendos, tam in pulvere, quam decocto oblatum, spectatæ virtutis est remedium. Sed quando ignem experitur, eoque sulphurea pars aufugit, & metallica mercurialis, in regulum & vitrum abiens, remanet; tum demum virulentam & emeticam facultatem nanciscitur. Calx viva ex aqua decocta, optimum præbet tam internum, quam externum remedium. Pulverem adamantis eodem modo intestinorum tunicas, ac vitrum discindere, eaque propter necare, sapit fabulam. Auripigmentum quod veteres dixere arsenicum, hodiernum à quibusdam perperam habetur pro arsenico flavo, quod ex cobalto & sulphure conficitur, quum hoc sit artificiale, illud nativum. Falso etiam hoc auripigmentum venenum censetur lethiferum, quum experientia doceat, illud innoxie ab animantibus & hominibus deglutiri posse: quod potius similis fere naturæ & crasseos cum antimonio crudo est, ipsiusque mineralis drastica portio ita particulis sulphureis ligata est ac involuta, ut fibras nerveas minus arrodere & lancinare queat: certum enim est, pingua, sulphurea & oleosa, intimius venenis, etiam corrosivis, mixta, deleteriam eorum vim prorsus curare. Summum illud venenum arsenicum, si cum æquali portione sulphuris vivi miscetur, ambo igne liquata abeunt in massam rubicundam, eoque adeo venenata virtute orbatur, ut cani sine damno possit offerri. Neque minus error est, fontes veneno posse infici

infici & venenatos reddi. Creditum id fuit, impetrante *Carolo IV.* quum pestis sæviret mirifice & imputatum est Judæis, quod fontes intoxicarint, qui ea propter Germania expulsi & in deserta relegati sunt. Sed physicarum, chymicarum & medicarum rerum gnarus, rerumque corporearum vires callens, ultro fatebitur, nec in rerum natura dari, nec per artificium ejusmodi res parari posse, quæ hunc præstent effectum. Falsissima etiam est traditio, tam penetrans & subtile venenum confici posse per artem, quod chartæ illitum, epistola huic inscripta resignata, legentem illico interficiat. Quod antiquissimis temporibus usuale fuit venenum, est cicuta ejusque succus inspissatus; ac nostro tempore in veneficiis plerumque adhibetur arsenicum: quod, quia insipidum, clanculum potest ingeri; quum sublimatus mercurius corrosivæ sit virtutis, eaque propter non commode occultandus. Deinceps sunt in rerum natura nonnulla, quæ quidem plerumque venena esse non putantur, sed tamen vim necandi habent præsentissimam. Horum in numero est maxima carbonum vivorum fumus, qui in loco humiliori conclusus, syncope, suffocatione & apoplexia, brevi, licet ratione fere insensibili, necat. Confirmata est deleteria hæc vis innumeris fere exemplis, incognitam vero etiam celebribus esse medicis, testatum fecit tragicus ille casus, qui Jenæ nostra memoria accidit, de quo meum de *vapore carbonum vivorum nocentissimo* schediaisma, nec non in *Tomo II. Medic. rat. system.* hoc de argumento exposita legi possunt. Eundem venenatorum, licet plerumque esse non credantur, censum subeunt, saturnina, saturnus ipse, ipsius fumus, lithargyrium, minium & cerussa. Quamvis enim non cito & in minori dosi interficiunt, lenti tamen veneni vim habent, & aliquoties data, certam adducunt mortem. Graves illi & atroces morbi, convulsiva colica, paralysis & asthma convulsivum, quibus metallurgi gravissime excruciantur, non aliam habent causam, quam fumum saturni cum aere haustum. Is enim non modo in pulmones descendit, eosdemque stringendo & exsiccando respirationi facit ineptos, sed & in ventriculum defertur, ibique cum acido primarum viarum permixtos, facultatem contrahit infestam, nervosas fibras & tunicas cum minimis vasculis constringentem, quæ graves morbos, ipsamque tandem mortem inducit, uti primus solide evicit *STOCKHAUSEN* de *noxiolithargyrii fumo*. Sunt quidem ex medicis nonnulli nocentissimæ in saturno virtutis ignari, qui ad cohibendum feminis stillicidium, ipsum quoque hecticum calorem, præparatum ex hoc metallo saccharum & antiphthasicam Grammanni tincturam laudant. Sed peritiores observarunt, inde alvum valide fuisse adstrictam, & colicam convulsivam cum atrophia inductam, eaque propter usus horum jam fere penitus exolevit. Ex omnibus autem hæctenus allatis, id teneant medici, ut circumspecti in ferendo de veneficiis sint judicio.

Observatio XV.

Arsenici validissimi specificum antidotum res simplicissima, pingua nempe & oleosa, cum lacticiiniis, sufficienti copia data.

Scholion.

Observatio hæc per ipsam experientiam est certissi-

ma. Ponamus vero, porrexisse malitiosum hominem cuidam cum alimentis arsenicum, licet non sufficiente ad necandum dosi, sed incipiente cum doloribus ventris & nausea veneni operatione, poenitentia duci, ad medicum currere, veneficium manifestare & impense rogare, ut suppetias ferat: medicum autem minus peritum ad exturbandum è stomacho venenum præbere emeticum sibi datum, eoque spasmodum ventriculi & veneni vim intendere, toxicatum tandem stomachi inflammatione & sphacelatione sic perire: quo in casu mors non tam veneno, quam medici ignorantia tribuenda. Tum enim opportune adhuc deleterius effectus per certissimum oleosorum antidotum potuisset præscindi, sed artifex ignarus vomitorio vim veneni adauxit potius, quin dubium omnino est, annon forsan sola natura veneni parce oblatis vim superasset, si non datum fuisset emeticum. Est igitur dignum meditatione Jctorum argumentum, quo cum certa demonstratione ex æquo decernant: an, & quali poena, tam medicus, quam veneficus, afficiendus?

Observatio XVI.

Pharmaca amorem conciliantia non dantur certa.

Scholion.

Vetus, sed erronea, in civili quoque Jure obvia, est opinio, dari philtra, five pocula amatoria, quæ etiam venenis à quibusdam annumerantur & præsci Poetæ effato;

Nocent animis vimque furoris habent.

Hujus virtutis varia à *RODERICO* à *CASTRO* in *Med. polit. pag. 218.* nec non à *SYLVESTR. RATTAI* in *adit. ad sympath. rer.* recensentur inter quæ potiora semen virile, sanguis menstruus, cerebrum felis, item pulli asinini, virga lupi, scincus marinus, spuma in equarum inguine ex sudore generata: verum hæc omnia non sunt venena, neque etiam ullo modo odium, vel amorem conciliare possunt. Nec in levi habendum hoc creatoris beneficium, quo res deficiunt, quarum abusus maximus & damna forent gravissima. Efficacissimum philtrum amabile objectum, quo adeo sæpe abripitur phantasia, ut amor sequatur plane insanus. Mirum certe, à solo aspectu, aut tantum concepta animo imagine, femellæ venustæ, illico genitales partes sanguine & succis copiose affluentibus irrigari & quasi animari. Quæ phantasie vis utique tanta est, quanta in medicamento nullo est ad cientes venereos stimulos. Non quidem negandum est, gloriari nonnunquam improbos homines, quod per media naturalia amorem procurare queant. Sed sublesta eorum fides, & dubitandum merito, quod unquam id effecerint, ac nonnisi ubi jam in cerebro dispositio quædam, & occultus quidam amor in animo delituerit. Belladonnæ etiam philtris conficiendis servire ferunt, quæ quia solani species, venenum omnino est narcoticum, animum obnubilans ac phantasiam pervertens. Unde, si forsan phantasie jam inhæret amoris idea, in insanum amorem, & præsertim in foeminis mobiliore phantasie, furorem uterinum eandem erumpere, veri est simile, & facinus hoc gravi poena dignissimum. Semper tamen necessarium est, ut à judice, qui inquisitioni veritatis præest, omnia investigentur cum cura, priusquam firmum quid statuatur.

METALLURGIA MORBIFERA.

§. I.

COrpus nostrum à fluido, qui sanguinem tam motu centrali, quam in lineam abeunte jugiter exagitat, sicque vitam tuetur & conservat, motore regi, nemo physiologorum ibit inficias; hujus motoris resectorium unice ex aere, qui catholicum fluidorum omnium seminarium & astralium corporum vehiculum est, petendum esse existimo: hinc fluidi istius aerei ad vitam instaurandam & servandam tanta est necessitas, ut homo & quicquid est animantium, sine ejus usura vix momentum vivere possit. Quocirca aer quo purior, sincerior inque singula momenta recens est, & ad vitam & sanitatem aptior est; & contra quo impurior, quoque magis inquinatus ac inveteratus; eo magis ad vitam & sanitatem labefactandam facit.

2. Unanimi autem physicorum consensu varioque experimento constat, aerem ex duplici conflatum esse substantia; una tenuiori subtilissima, veteribus astrali & ætherea dicta, altera crassiori aquea variisque particulis salino-sulphureis referta. Ætherea mobilior & activior quasi menstrui universalis est, quod in solidum assidue agit, illudque penetrando atterit, dividit, & secum, menstruorum more, in poros suos recipit. Menstrualem hanc vim luculenter illa, in nostro aere atmosphærico contenta, manifestant, quæ omnia ex solido & crassiori fluido suum petunt principium. Humiditas ejus ad oculum patet partim ex augmento & deliquio salium fixorum ad extremum calcinatorum, partim & acidi fortiter concentrati e. g. butyri antimonii, olei vitrioli & quæ hujus generis sunt. Saluginem in aere marino præter alia & scorbutus, genuina salis proles, illis familiaris, qui tali fruuntur aere, simul & rubigo metallorum abunde testantur. Mirabile est, quod JOSEPH à COSTA *Hist. Ind. occident. lib. 3. c. 9.* refert, metalla eo usque ab aere falso fuisse corrupta, ut inter digitos compressa foeni instar torrefacti dissoluta ac contrita fuerint. Circa Narbonensis Galliae littora salem candidum & sapidum arborum foliis & graminibus insidere auctor est DU HAMEL *lib. de consensu vet. & nov. philos. p. m. 742.* Nitrum, alumen, vitriolum nec non sal commune denuo progerminare, internis horum salium penitus exhaustis & quasi mortuis, ex solo aere, si huic satis diu fuerint exposita, quotidiana experientia confirmatum constat. Præter salia & bituminosa sulphurea aer vehit corpuscula. FRANCISCUS FERDINANDUS de TROILO *in itinerar. orientali p. 30. 31.* refert, in mari sic dicto mortuo se observasse ab ipso crassum, densum ac nigrum vaporem, propter bituminis copiam ibi contentam in altum ascendisse.

3. Majorem admirationem excitat, quod etiam compacta firma & densa corpora, ipsaque metalla *ἀναδομίζοντες* & effluvia de se emittant, quæ fluidissimo aere recepta mirabilem sæpe efficaciam & effectus, ad occlusas olim qualitates damnatos, in illo exercent. Miramur inprimis, quod Cel. BORRICHIVS *in Act. Hafniens. de negotiatoribus Indicis*, qui sine lapide lydio, sine lancibus, sine mordacibus aquis, solo nummorum ad nares admotu de præstantia eorundem statim judicare potuerant. Sulphur vulgare nec non antimonii, in substantiam fluidissimam in auras diffila-

bilem converti & facessere, eleganti spiritus fuman-
tis experimento, qui argentum etiam cistis ligneis inclusum fusco colore inducit, comprobatur. Hujus spiritus efficaciam porro mirabilem reddit ejus penetrantia, dum litteras certo liquore scriptas & centum chartis tectas nigricante colore tingit, ut atramento sympathetico vix detur præstantius. Plurima exempla de coelo lapforum non exigui ponderis aeris aut ferri corporum adfert JOH. AMOS COMENIUS *Synops. physic. ad lumen divinum reformat. p. 113.* Nec mirum hoc illi esse debet, qui metalla fixissima omnem vim ignis eludentia considerat, partim impetu menstruorum volatilifari, partim ignis vehementia in auras propelli posse, ipsa consentiente experientia. Aurum certo menstruo solutum & crebriori cohobatione sic subtilisatum totum in auras avolare sæpe observavi; & BOYLE, philosophiæ mechanicæ præstantissimus instaurator, *Tract. nov. experiment. physico mechan. exper. 22.* scribit, se sal quoddam subtilissimum & volatile possidere, quod solidum auri corpus in magna copia sub exhalationum forma evehat. Argentum aqua forti solutum & postmodum falsa aqua præcipitatum infusione semper de pondere aliquid amittit. Sub fusione metallorum intensissimo igne facta, portionem argenti simul in caminos avolare fuligo (*Hütten Rauch*) testatur, cujus collectæ, observantibus expertissimis Cheruscorum metallurgis, centenarius sæpius uncam unciam & ultra argenti adhuc largitur.

4. Ex his jam adductis plane intelligi posse existimo, aerem corpora nostra ambientem, & qui intro subit vitalia & respiratione ad ipsos pulmones ducitur, vectorem esse variarum exhalationum & diversissimorum corpusculorum, quæ pro diversitate illorum varie corpus nostrum adficere, illius humores præter naturam depravare & immutare possunt, id quod jam satis suo damno miseri illi homines experiuntur, qui metallorum ac mineralium effossioni, fusioni, separationi variæque tractationi inserviunt. Hi fane ab effluviis aeris nocivis durissimos patiuntur morbos, sævissimaque symptomata rarissime in alterius generis hominibus observanda. Bis enim metallurgi patiuntur morbos, nimirum ut alii homines, & ut sunt metallurgi; familiares utpote & sibi proprios habent morbos à mineralium seu metallorum, quæ continuo versant ac agitant, effluviis maximam partem derivandos. Et quoniam in medicorum scholis minus illi hæcenus fuerint tractati, quinimo plures medicorum de illis nec quicquam audiverint, vel in illorum tradenda explicatione mirum fuerint hallucinati, excepto STOCKHUSIO, qui solus ferme *de fumo lithargyrii noxio* solidi quid litteris prodidit; hinc in præsentiarum paullo penitus morbos metallicos quasi proprios tractare, illorum causas accuratius evolvere, & elegantiores observationes, & curandi modum sollicite annectere institui.

5. Antequam autem in horum morborum genesin & differentes illorum causas specialius indagandas descendam, primum operæ pretium erit dispicere, quæ ratione aer ambiens variis particulis heterogeneis confertus, corpus nostrum subire, ejusque humores attingere queat. Et primo hic notari velim, me minus illorum sententiæ adfentiri, qui censent aerem nostrum atmosphæricum densis sæpius effluviis stipatum, imme-

immediate cum sanguine communicare. Contrarium qui tuentur; non levium rationum momentis instructi sunt, dum vias in pulmonibus satis esse patulas putant, quibus aer ipsum sanguinem adire possit, cum per easdem etiam, per quas à sanguine secernendi vapores transeunt, aer ingredi possit. Dein suam assertionem experimento *Malachiae Thrustonis* Angli evincere student, utpote qui per arteriam pulmonalem animalis siphone liquorem injecit, quem partim per venam redire, partim per tracheam cum spuma erumpere observavit, quo ipso vias se tetigisse arbitrantur, quibus aer intra pulmones substantialiter sanguini admisceri possit. Verum enim vero quod primum concernit, numquam probari poterit humidum & vaporosum, quod aer in expirationis negotio secum evehit, immediate ex massa sanguinea fluere, sed potius tunicarum glandulosarum beneficio, quibus bronchia investuntur, illud absorberi ac imbibi, & sic in aerem recipi vero videtur simillimum. Ad alterum moneo, à violenta illa liquoris in pulmones infusione ad statum naturalem non concludendum esse, & si viæ & meatus ex trachea in pulmonales patentes essent, sequeretur, quod infusus liquor per tracheam & venam pulmonalem redire deberet, quod tamen minus fieri videmus.

6. Magis tamen illorum mihi arridet sententia, qui statuunt, subtiliorem aeris portionem, cui vis elastica simulque æthereae inest, tantum per vesicularem substantiam transcolari & sanguini intimari, non autem densiorem & crassiorem aeris substantiam, quæ magnas turbas & irregulares in humoribus vitalibus motus, & illorum mixturam destruendo concitare queat. Et ab hoc subtiliori aere coccineus sanguinis color, qui in pulmonibus & cordis sinistro sinu demum apparet, unice petendus est, quoniam ante aeris appulsionem satis atratus & crassus existit. Præterea continua effluviorum per cœca cutis foramina à sanguinis & humorum massa separatio, nec non notabilis quorundam animalium post mortem in vitro ab aere vacuo existentium inclusorum tumescencia sufficienter aeris expansivam elasticam vim humoribus insidentem produnt. Interim tamen non negabo, longe subtilissima effluvia cum aere vecta & naribus simul attracta fluido in nervis contento motum imprimere varieque illud alterare posse. Quantam in excitandis syncopis, in pathematibus sævissimis hysteris producendis odorifera habeant efficaciam, quotidianæ testantur observationes. Pulchre scribit *Helmontius in tract. qui Imago fermenti* p. 92. inscribitur: odore delectari spiritus, eo quod odor immediate attingat & illos penetret; sunt enim odores, qui pestem, dolores capitis & vomitus movent, suntque odores suffocantes convulsivi & infatuantes, sunt & alii, qui simili modo eadem sanant aut saltem mitigant. Aer effluviis narcoticis refertus quantum nervis noceat, & spirituum animalium motum intercipiat passim loquuntur historiae. A sola candelæ sebaceæ extinctione abortum, uteri suffocationem, epilepsiam & mortem ipsam *Ammannus in medic. critica* cas. 59. annotavit. Et tandem fumi mercuriales, quod ipsius aeris beneficio angustissimis nervorum porulis sese adfocient, & fluidum in ipsis contentum mirum exagitant, fufius infra docebo.

7. Ex hisce jam adductis satis apparere arbitror, effluvia peregrina subtilissima, quamvis non sanguini immediate communicentur, nervos tamen occupare, ibique perniciosam suam vim satis eminenter exercere posse. Deinceps exhalationes salinæ, sulphureæ & mercuriales, & quæ hujus sunt generis aliæ cum aere vectæ, dum pulmones in inspirationis actu intro subeunt, in cavernulis & cellulis pulmonum vesiculosi facile hæere possunt, quas corrodunt, exulcerant

& resolvunt. Ex omnibus enim pulmones labem patiuntur principaliter ab aere variis effluviis inquinato, uti hoc infra morbi metallici clarum facient, quorum plerumque in pulmonibus initia sunt. Porro & aer circumfusus, depravatis effluviorum qualitatibus refertus, in cutim ejusque poros ac spiracula magnum jus habet, imo illos subiens succis vitalibus noxam affricare & damnum adferre valet; quare sudores illorum, qui in calchanti mineris laborant, corrosivi, linteamina exedentes observati fuerunt, de quo infra plura dicemus.

8. Tandem effluvia mineralium & metallorum in aere soluta deglutitione maximam partem subeunt, ventriculo & intestinis intrinsece communicantur. Aerem ad os continuo appellere, & ibi salivalem latitem morantem afficere nullum amplius erit dubium. Spuma, quæ sæpius in morbis, ubi respiratio, adaucta vel citatior facta apparet, nil nisi saliva est, crebriori aeris appulsu sic agitata & conquassata in minimas bullulas, quæ ab omni latere lucis radios reflectentes niveum colorem efficiunt. Quanta aeris copia in saliva sit recondita, ejus intensa in vitro testatur ebullitio, si aer ope antliæ evacuetur, quod phænomenon ad solum aeris, ex poris salivæ egressum, referendum est. Quum itaque ipse substantialis salivæ sese immisceat, & cum ipso ad ventriculi & intestinorum canalem feratur, facile consequitur, effluvia varie heterogenea in aere contenta eodem modo ad corporis interiora descendere. Salivæ vehiculo miasma pestiferum ad primas vias ferri, inter alia, quæ ibi gignuntur, horrenda symptomata, cardialgiæ syncopicae, nausea, inflammatio sphacelosa testantur. Quo circa prudens nonnullorum medicorum est consilium, in subjectis vel contagiosis locis nunquam deglutire salivam, sed continuo illam excernere, quo infectio avertatur. Deinde nemo non fatebitur, ipsum aerem pondere suo intrare & ventriculi & intestinorum cavitatem replere, cujus præsentiam sufficienter & ructus & flatus magna vi nonnumquam prorumpentes comprobant. Tandem vero videtur simile, effluvia aeris ope ad ventriculum adducta, non tantum ibi manere, sed etiam interiora & massam sanguinis irreperere. *Kerckring in observ. p. 58.* de rustico fistula laborante in humero narrat, qui quoties cepas ore masticavit, statim illarum odorem per fistulam quoque percepit. Omne enim quod subtile est, corpus nostrum transpirabile, facile penetrat & pervolat. Sicque veneni in forma solidi adsumti vis extremas etiam corporis partes perungere ibique tyrannidem exercere valet, multo magis id efficiet, si illud in partes tenuissimas fluidas resolutum est.

9. Ex hætenus dictis clarissime apparere arbitror, effluvia, quibus aer repletus est, variis modis ac viis patulis ad corporis penetralia intime cum succis corporis nostri sese miscere, & partim fluidas partim solidas partes præter naturam adficere: quod ipsum jam sufficientissime historia morborum metallurgorum, quorum genesis & causæ ex mineralium noxiis effluviis foras intro haustis petendæ sunt. Cum autem mineralium classes diversissimæ sint, hinc etiam diversam ipsæ exhalationes fortiuntur naturam; siquidem unum minerale præ altero magis vel minus fixum est seu volatile, unum præ altero corpori magis est insensum, quo circa pro diversitate exhalationum varia propullulant mala & morbi. Demum observamus diverso tempore metallicolis contingere ipsa mala atque incommoda; alii labem sibi contrahunt in puteis & fodinis, dum ipsa eruunt metalla; alii extra illas, dum præparant, cremant, excoquunt vel separant. Primo loco placet mihi, illos in morbos inquirere, qui originem suam effluviis & exhalationibus tam copiosis quam pravis trahunt, quæ intra loca

subterranea suboriuntur & elewantur. Statuo nimirum, uti per totam mundi fabricam & omnium animantium corpora, sic quoque per subterranea loca diffusum esse æthereum quendam & tenuissimum spiritum, aerem communem subtilitate longe superantem, qui tam quantitate notabili, quam rapidissimo motu omnes subterraneas regiones subeat penetret, nec non vivifica & seminali quadam vi instructus, terras lapidesque imprægnat inque varias metallorum & mineralium species transmutet. Extra dubium enim est, naturam semper in productione corporum à fluido ad solidum procedere, quare & metalla eodem modo ex fluida quadam substantia generari haud improbabile videtur.

10. Consentiunt in hoc omnes veteres, & qui de metallorum solidi quid prodidere, statuentes: primam metallorum materiam fluidum esse quoddam unctuosum subtile, quod consistentiam seu coagulationem in aqua non in lapidibus & argilla acquirat, quare hæc pro principio vaporum metallicorum fixativo habetur. Et hæc jam est ratio, cur metalla illa, quæ intra aquam crescant longe meliora existant, quam quæ extra aquam superiori versus terram superficie posita sunt. Spiritum hunc ad naturam sulphuream acidam accedere multis ex argumentis colligere licet. Veteres chymicorum unanimiter crediderunt sulphur metallorum primum esse principium, eo quod assiduus illorum & mineralium comes sit. Omnes ferme mineræ à venis erutæ sulphur olent, & igni aperto commissæ stagma fundunt acidum, non secus ac sulphur in libero aere accensum. Præterea magna sulphureorum fumorum apparentium copia, vel in mineris vel extra illas evidens venarum ditissimarum latentium habetur indicium. Accidit sæpe, ut in locis sylvæ Hercyniæ de nocte flammulæ sulphureæ salientes circa terræ superficiem vagantes cernantur, procul dubio à metallorum effluviis sulphureis subterraneo calore in copia exhalantibus, & ex ipsa tellure sursum elevatis. KIRCHERUS in *Mundo subterraneo* lib. X. sect. 3. refert, in fodina Hungarica quadam tantam exhalationum sulphurearum esse copiam, ut facillime ab accenso lumine, in maximo cum fragore & ambustione operariorum, possint incendi, adeo, ut cutis facillime possit detrahi, ac si aqua fervente sit adusta. Simile contigit quoque aliquando Clausthali (in *den Rosenbüfcher Zug*) dum fossores locum pro relicto à veteribus habitum aperire volebant, ecce, magno cum impetu aqua sulphurei odoris erumpit, quæ in momento à flamma lampadum forsitan accensa, vestes ipsamque cutim mirum quantum amburebat, ut vix medicamentis præsentissimis ambusta restitui potuerint. Sulphur principium fluidum per totum terræ ambitum circulatur, perque omnes mineras, me iudice, dispersum est, à quo non immerito caloris subterranei effectus mirabiles, montium deflagrationes, & terræ incredibiles motus duci ac derivari possunt.

11. Menstruum itaque subterraneum seu solvens universale æthereum statuo, quod potenter dividendo, subtilizando, resolvendo terras præparat, imprægnat inque metalla vertit, nec non ipsa confecta non raro iterum destruit. Non infrequens enim est, venas metallis refertissimas, solvente hoc subterraneo metallo suo defraudari, uti id matrices conglomeratæ *Drüfen* ab apibus vel exsuctæ, nec non mineræ varii generis in calcem effoetam redactæ testantur, quibus visis, sero sese accessisse, protinus ipsi fossores conqueruntur. Hoc acido solvente sæpius durissimos lapides montanos, exesos & in calcem cretaceam redactos cernere licet. Tandem menstruum hoc subterraneum sulphureæ acidæ esse naturæ, liquidissime minerarum quarumvis præparationes patefaciunt, dum illæ alcalinis salibus fixis, sulphur & acidum ab-

forbentibus, institui debent quo fundi & purior metalli portio ab inutili sequestrari debet.

12. Solvens itaque hoc subterraneum sulphureum subtilissimum, rapidissimo suo vivifico motu continuo agit in ipsas telluris & mineralium partes, illas atterit & in altum secum evehit; unde non mirum effluvia tam sulphurea quam metallica ipsis in fodinis & puteis esse copiosissima. Quod si enim sola ignis vehementia & salinorum menstruorum activitate fixiores metallorum particule in auras propelli possunt, multo magis ope caloris & menstrui subterranei longe activissimi id fieri potuit. Ab his dictis itaque in fodinis surgentibus mineralium metallorumque sulphureis exhalationibus miseri ii operarii pessima incurrunt mala, inter quæ præcipua est respirandi difficultas & suffocatio. Sæpius reperiuntur in antris suffocati & extincti citra quandam interiorum læsionem, nisi quod extrinsecus tota fere cutis cœruleo colore tincta sit, quod pœnomenon illis, qui suffocatione nec non convulsione pereunt, familiare est. Notum est ab aere nimis denso & crasso, item à fumo carbonum seu vaporibus in fermentatione musti vel cerevisiæ elevatis suffocari & extinguere animalia, testantibus id *Marcello Donato Histor. medic. mirab. c. 6. lib. 1. & Platero obs. lib. 1. p. 16. 17. ut & Mercuriali de venenis lib. I. cap. 13*. Multo magis id accidit, si in fodinis subterraneis majori copia effluviis sulphureorum aer confertus est; hinc artifices in iis laborantes vehementi angustia pressi prope suffocantur, altoque & suspirioso spiritu aerem ducere contendunt. Adfectus hic perperam à venosa miasmata qualitate semper deducitur, utpote qui magis copiarum effluviis adscribendus est: ex commotis enim à fossoribus mineris, spissæ mineralium particularum nubes elevatæ, totum foveæ replent spatium, & posita cujuscvis materiæ impenetrabilitate, materiam aeris subtilem respirationi aptam expellunt, sicque loco laudabilis aeris effluvia sulphurea metallica inspiratione in tenuissimas vesiculas pulmonales illabuntur, quæ spirandi angustiam inferunt. Sanguis sic particulis subtilissimis suis elasticis orbatus, minus rarefactioni, expansioni seu spiritus vitalis sufficit; hinc cor languidius pulsatur, vires convelluntur, & retardato tandem vel penitus cessante humorum circuitu, tota corporis machina labefactatur, vel penitus corrumpitur. Notum est, ipsas gallinas, & volucres loco angustiori stricte oclusas vel etiam vapore sulphureo accenso admotas facillime suffocari posse, quod sub præparatione lactis sulphuris contigisse etiam vidi. Neapoli caverna est, ab indigenis *la Grotta del Cane* nuncupata, ex qua fumosa tenuis, sensibilis tamen emergit aura, manumque sentitur modicus calor, in hujus fundum, qui undecim pedes distat ab area soli, canes vel alia animalium viva immissa statim anhela in convulsivos motus, mox in spasmodum, tandem, prostratis viribus, in deliquium hiante ore, moribunda decidunt. Quod autem hic stupendus effectus saltem densato in fundo exhalationibus sulphureis copiosissimis debeatur, solide deduxit *Bernhardus Connor dissert. de mirabili viventium interitu*. Et notabile est non tantum in crypta hujus interiori, sed etiam in antris subterraneis, ubi aer effluviis refertus est, candelam accensam statim extinguere.

13. Accedit, quod aer in puteis & fossis mirum quoque à fumo pulveris pyrii condensetur, quo saxorum durities frangi solet, quare qui huic negotio sunt destinati, ut plurimum anhelosa respiratione nec non raucedine corripiuntur, maxime dum ignis vi subtiles virulentæ particule ex ipsis fossilibus exprimuntur, cum fumo sublevantur, hinc illi asthmate nec non contractura misere torqueri solent, qui Clausthali

thali in locis angustioribus crebrius mineras pulvere pyrio diffingere student: plumbeæ enim particulae ignis vi in altum rapiuntur, sicque eundem morbum, cui ustores vel separatores obnoxii sunt, sibi contrahunt. Simile quid contingit etiam in illis locis, ubi igne accenso, pro diruendis faxis & mineris utuntur, qui modus veteribus fuit in usu. vid. *Agricola de re metallica lib. VI.*

14. Præter copiam autem effluviorum in fossis & fodinis sulphureæ nocent illæ particulae, quæ tenuissimas pulmonum vesiculas constringunt, dilacerant, & spiritu suo rodente valde exulcerant, sicque tussim siccam, raucedinem & tabem excitant. Propter effluvia hæc sulphurea tam intra quam extra terram endemii ejusmodi in locis sunt morbi, & regionibus etiam certis proprii. Non minus autem dictis adfectibus sunt obnoxii, qui sulphuris mineras extra terram præparant, & sulphur ex iis elicere student, quod Brunsvicensis prope Goslarium maxima in copia efficiunt. Struunt ibi magnos acervos cum lignis in minimas partes discissis & mineris sulphureis; has postmodum accendunt, sic densæ sulphureæ exhalationes graveolentes nebularum instar exsurgunt, & purissimum sulphur rubinei coloris fluidum apparet, quod tandem in inferiorem locum in strias elegantissimas flavescentes exstillat. Fumum, qui copiose & assidue hauriunt, minus validæ sunt naturæ, vitium in pulmonibus concipiunt, tussi, aridura, anhelosa respiratione, & non raro pulmonum exulceratione, partiumque tabe corripuntur. Notabile hic est, fumum hunc sulphuris moderate naribus exceptum mirifice illis conferre, qui ex capitis dolore à levi quadam obstructione vel ebrietate laborant, dum penetrantia sua subtilissima humores stagnantes colliquat, & poros aperiendo evaporationem materiæ peccantis proritat.

15. Ad ipsius sulphuris naturam proxime accedit vitriolum, quod nil nisi spiritus sulphuris est coagulatus in terra vel martialis vel venereæ indolis. Ex spiritu enim sulphuris & ferro elegantissimum paratur vitriolum, nec non ex ipso vitriolo spiritus sulphuris acidus summe volatilis & genuini ferri portio haberi potest, si rite operatus fuerit. Abundantissime vitriolum Goslariæ in monte Rammelio vulgo *Rammelsberg* invenitur, ex quo per aliquot secula, ut litterarum monumentis consignatum est, illud fuit erutum. Qui id in profundis fodinis colligunt, nudi sine omni veste & indusio id facere debent, tam corrosivæ enim ibi sunt exhalationes, ut lintheamina non secus ac vestes corrodant ac dilacerent, adeo, ut in minutissimas partes facili negotio discerpi queant; ejusmodi quoque effectum spiritus vitrioli, nec non omnes spiritus mineralium acidi edunt, qui quicquid est linteï vel panni vel corii erodunt & destruunt. Memorabile est, effluvia hæc calchanti caustica ipsam etiam cutem aggredi & ejus minimis porulis sese insinuare, adeo, ut corpore aqua probe utut abluto, lintheamina tamen, quibus dormiunt vel sudant, à reliquiis vitriolicis in poris stabulantibus corrodantur.

16. Ratio jam in procinctu est, cur raro hi homines quadragesimum annum superent, nisi validioris sint naturæ: effluvia enim hæc caustica bronchiis & pulmonum cavis firmiter inhærescunt, dispnoeam, aliis suspiriosam orthopnoeam, exulcerationem, aliis ariduram & marasimum inducunt. Sic plures dira illa tabe brevi intereunt, ut inveniantur mulieres, quæ septem viris nubere possint, quod de Carpati montibus incolis scribit *Agricola de Re metallica lib. VI. p. 272.* Quanta vero noxa particulis calchanti insit, aqua testatur, quæ ex monte Rammelio scaturit, in qua nullus piscis vivus manere potest. Jam dudum annotavit Italus FALLOPIUS in *lib. de aquis medicat.*

Frid. Hoffmanni Oper. Tom. VI.

quod Ochra fluviis, qui est ad montem Ramebur, vulgo *Rammelsberg*, rivulum scatentem è monte illo in se recipiat, & quam primum rivulum illum receperit, statim omnes pisces necat, etiam si vix aquam istam attigerint. De vitrioli effectibus & noxa vid. Dn. TRUMPHII *scrutinium vitrioli*, quem librum Angli ob curiositatem in Acta sua referre dignati sunt.

17. His decursis, jam ad mineralia majoris virulentiae accedo, quorum primum est arsenicum, cujus genuina matrix est cobaltum. Reperitur illud in propriis suis fodinis larga satis copia, vel aliis argenteis & Jovialibus sese associat mineris. Quam causticam volatilem & corpori insensissimam qualitatem ipsum arsenicum custodiat, ejus vires testantur lethali-bus infamatae exemplis, de quibus legi meretur HELMONTIUS *Tract. de peste. Ephem. Germ. an. 9. p. 45.* HENRICUS ab Heer *obs. 16.* SALMULTH. *cent. 1. obs. 10.* Et HILDANUS *obs. p. 606.* ab arsenico extrinsece saltem applicato, syncopen, delirium, vigilias, febrem & mortem observavit. TIMÆUS à GULDENKLEE *lib. 7. cap. II.* meminit pharmacopœi in præparatione dealbationis veneris occupati, qui ab ejus venenatis fumis in lipothymiam incidit, cum præcordiorum angustia, spirandi difficultate, corporis jactatione, vigiliis, gulæ ariditate conjunctam, conf. quoque hac de re Cl. WALDSCHMIDIUS in *praxi 1080.* Sic & ego tristis casus memini, qui Lipsiæ contigit, dum in domo stannarii, qui arsenicum cum cupro admisceret, ab haustis ejus venenatis fumis, plures in eadem domo habitantes, maligno morbo adfecti & mortui sunt. De pictore scribit *Sennertus prax. med. lib. VI. part. 6. c. 9.* qui aperta capsula arsenico repleta diuque conclusa in lipothymiam incidit, ut exquisitissimis alexipharmacis vix liberari potuerit. Quocirca qui in arsenico vel à cobalto separando vel sublimando laborant, quique ex cobalto & sili-cibus conficiunt smultam germ. *Blaue Farbe*, vomitus, anxietates syncopticas, cardialgias, variaque patiuntur symptomata, longe autem magis id experiuntur ii, qui mineras tales legunt & effodiunt, maxime si igne seu pulvere pyrio ad diffringenda saxa opus habent, vel si vetustissima squalida loca aperiunt. Notabile est Kuttenbergæ in Bohemia, ubi minerae arsenicales saturninae & cadmia metallica (*Kobalt*) refertæ effodiuntur, in officinis, ubi venæ cremantur (*Röstofen*) laborantes respirationis difficultate, suffocatione, tremore artuum penitus confici, ita ut instar sceletorum vivorum appareant. Fovet arsenicum principium volatile summe tamen causticum, quod fibrillas corporis nostri tenuissimas tam nerveas quam musculosas subeundo, spasmos, convulsiones, contractiones dolorificas, violentas excretiones excitat & vitæ insensissimas fruit insidias.

18. Alterum summe virulentum minerale, quod arsenicum vi superat, est hydrargyrum: hujus effluvia nervis summe infesta & periculosa esse plures docent historiae. Compertum est, quam gravia incommoda fabri aurarii à foliis hydrargyri vapore sentiant; frequentes ipsis sunt sudores frigidi, lipothymia, convulsiones, lassitudines, tremores & ptyalismus. *Fernelius* mentionem injicit aurifabri, qui bis aut ter ad summum hydrargyri vapore imprudentius admisso, statim stupidus, vaternosus ac plane mutus evasit, quæ in os indebantur, devorabat quidem; stercus tamen & urinam minime exire sentiebat, neque ad aures inclamantem audiebat. Sex exactis mensibus in febrem incidit, à qua tandem liberato cerebrum grave torpidique sensus omnes remanserunt, mensque ex intervallis perturbata. Similem fere historiam lectu dignissimam de hydrargyri noxio vapore idem annotavit auctor *lib. de luis venereæ curat. 590.* Qui Venetiis in conficiendis speculis operantur, apoplexiæ maxime obnoxios esse testes sunt Acta Angli-

cana. Epilepsiam, aphoniam cum ptyalismo vehementi, gravissimis doloribus ab hydrargyri vaporibus in muliere Gallica observavit quoque Cl. *Stiffertus specira secundum laborat. chymic.*

19. Ex hisce facile conjici potest, quam deleteria mercuriales mineræ de se spargant miasmata, ipsis metallicolis nocentissima. *Fernelius loc. cit.* dicit, horrendis nervorum pathematibus nec non partium debilitate & tremore omnes illos corripit, quicumque argentum vivum in puteis legunt & effodiunt, vel illud in igne tractant, sicque & ore naribusque excipiunt. *Fallopianus de aquis medicat. p. 120.* tradit, illos qui mercurium effodiunt plumbei esse coloris, & brevi tempore in paralyfin vel in nervorum convulsiones incidere, tandemque suffocari; ita, ut raro quadragesimum annum transeant. E contrario scribit, inter illos, qui se in aliis fodinis exercent, reperiri homines, qui vixerunt supra quadraginta annos. In fodinis Italiae pro Julio moneta Italica, laborant integrum diem, sed non diu perseverant: nam quamquam nemo illorum maneat in fodina ultra sex horas, omnes tamen brevi fiunt paralytici & moriuntur hectici. Vir qui spatium saltem semestris fodinis fuerat addictus, tam plenus mercurio fuit, ut si frustum æris in os suum imponeret, aut digitis suis fricaret; extemplo illud instar argenti album redderet, quasi cum ipso mercurio esset fricatum. Erat præterea adeo paralyticus, ut manibus suis ambabus vitrum ad medietatem vino repletum ori sine profusione posset admoveere, referentibus sic *Actis Anglicanis an. 1665. mens. April. p. 18.* Iphis in fodinis Hungaricis & aurifodinis; ubi & mercurius prope Cremnitium foditur, odor virulentus contineri dicitur; qui metallicolos necet, ut aurum ibi in magna quantitate reconditum effodere non audeant, recensente *Edoardo Brovvn in Itiner. part. V. c. 2. pag. 180. 181.*

20. Duplici nimirum modo nocet lithargyrium, tam partium suarum tenuitate & gravitate, quam specifica textura acida spicula detinente. Spiritu quodam metallico subtilissimo ipsum præditum esse, inter alia vis ejus firmissimam metallorum compagem dissolvens comprobatur. Hic spiritus totam corporis sphaeram pervolando & minutissimos poros subeundo potentissime lentum mucum dissolvit, & totam sanguinis compagem discerpit & comminuit, ut elementa sanguinem constituentia ex facili relaxentur, & fugam à se invicem intendunt. Præterea membranas, nervos & fibrillas tenuissimas nimis aperit, laxat, & poros magnos conformat, ut sic peregrini facile ibi decumbant, & obstructions, rheumatismi, lymphæ effusiones, ptyalismi, paralyfes, summæ debilitates, & nervorum tremores inde nascantur; quinimo mercurii fumus ne ossibus quidem parcit, siquidem dentes inde vacillant & ossa cariem contrahunt. Dein mercurius præter partium tenuitatem maxima pollet gravitate, est enim fluidorum omnium gravissimus, quare etiam minutissimæ ejus moleculæ, respectu aliorum fluidorum semper specie sunt graviores, unde impetu quoque & vi tam fluidi particulas, quam ipsum solidum aggreditur. Singulari tandem specifica gaudet textura, qua salium aculeos promte imbibit arcteque detinet, ut sic harum unione corrosio, propter summam partium tenuitatem & gravitatem, augeatur, & brevi stamina fibrosa ventriculi & viscerum, corrodantur, dilacerentur vel fortiter irritentur; unde convulsiones, spasmi, hæmorrhagiæ, inflammationes, gangrænationes, excrementorum suppressiones oriuntur lethales.

21. Denique & antimoniales mineræ noxios quosdam vapores exhalant. Antimonium, quod ex substantia sulphurea & regulina mercuriali compositum est, non est venenum, simulac autem vinculum illud

solvitur vel igne vel variorum salium adjectione, separata à sulphuris consortio mercuriali parte, protinus drastica sese vis exserit. Pulvis reguli in substantia canibus oblatus, illos brevi necat, apparente in ventriculo nigricante macula. Fumum ejus imprudenter haustum, vomitus & purgationes excitare testantur *Ephemerid. Germ. dec. I. an. 3. obs. 31.* Illos, qui antimonii mineras versant & tractant, vomitione, ptyalismo, membrorum debilitate, animi deliquio corripit certior sum factus. Quod salivæ fluxum ab antimoniali medicamento concernit, existat hanc in rem elegans observatio in *jam citatis Ephemerid. dec. I. an. 3. obs. 270.* Incidit nimirum quidam ab adsumtis floribus antimonii in apoplexiam, qua durante, validissimus ptyalismus fuerit secutus, ita, ut per nares & os spumosi phlegmatis facile mensuram expuerit. Corpus defuncti apertum fuit, & pulmones totaque pectoris regio, stomachus, caputque materia ejusmodi plena fuere reperta; regulini enim antimonii pars magnam cum arsenico alit affinitatem. Antimonium drasticam suam virtutem à solo hoc reguli habet, & fumos emittit albicantes, metalla ipsa friabilia reddit more ipsius arsenici, ex quo arte etiam confici potest regulus. Tandem typographi ex suscepto antimoniali fumo, dum litteras suas fundunt & præparant, apoplexia sæpe, paralyfi & ventriculi subversione tentantur.

22. Tandem ad fumum noxium ipsius plumbi examinandum accedo. Nullum ex metallis tam promte in auras ignis violentia avolat, quam ipsum plumbum; totum enim in fumum subdulcem & crassum, coloris ex albo flavescentis faciscere & converteri potest. Videmus hoc maxime in sylvis Hercyniis, ubi mineras saturninas igne tractant, urunt, calcinant, fundunt & separant, appellatur hic fumus, *Hutten Rauch*, quod autem nil nisi plumbum in minutissimas particulas resolutum sit, exinde patet, quia ex fornacibus & officinarum parietibus separatus, verissimum plumbum citra notabilis ponderis diminutionem, debita liquefactione, reddit. Fumus hic tempore nebuloso minus & maxime circa noctem, propter insignem suam gravitatem descendit, aërem inferiorem replet, sicque per pulmones attractus, & in os cum saliva deglutitus, ubi instar sacchari saturni saporem dulcem præ se fert, abit ad ventriculum & intestina, ubi horrenda symptomata excitare solet. Præcipue autem morbum spasmodicum, tormina summe convulsiva cum alvi pertinacissima obstructione producit, qui morbus Germanice *die Hutten-Katze* dicitur, quod intolerabilis intestinorum cruciatus, ægro tantem nonnunquam rabiosæ felis circumgyrationem imitari cogat. Hisce hominibus aliquando nec standi nec sedendi datur potestas, inquieti huc atque illuc moventur, lecto si aliquantum incubuerint, terram vicissim repetunt, unguibus eam rodunt & immanes ventris dolores, cum sudore nonnunquam frigido & lipothymia patiuntur: quibus statim vehementissima alvi constipatio complicatur, ita, ut nihil flatuum nec excrementorum per anum habeat exitum. Purgantia omnia irrita effectum propinantur, & sæpius malum exasperant: superveniunt cardialgiæ syncopticæ, vomitus, febres lentæ, cum siti, urinæ suppressione, & tandem, si morbus diu duraverit, accedunt etiam convulsiones musculorum, contracturæ item partium externarum, crurum ac manuum paralyfes. Morbus hic quasi proprius est Clausthali, Zellerfeldi nec non Hartzerodæ & ubi mineræ Saturninæ tractari solent, omnibus operariis, qui vel in fodinis plumbarium metallicum lapidem pulvere pyrio separant, extra fodinas illum urunt & liquefaciunt vulgo *Hutten-Leuten*, & qui fornacibus separatoriis, *treibe Ofen*, præsent, vel magis adhuc illis, qui lithargyrium pon-

ponderant, vulgo *Glettvåger*; à cujus copioso fumo & polline per halitum excepto mirum in modum laeduntur & memoratum morbum incurrunt. Quæ dicta omnia sufficientissime demonstrant & comprobant, male horum symptomatum causam ab arsenicalibus vaporibus derivari, sed magis à solo lithargyrii fumo deglutito illam esse petendam.

23. Porro præter illa in officinis, ubi mineræ Saturninæ tractantur, observata phaenomena, fumum lithargyrii seu plumbi proximam morbi metallici causam evincunt. Plumbum interne adsumtum perniciosam vim habere loquuntur observationes, sic *Fernelius tract. de lue venerea cap. 7.* scribit de empirico, qui plumbi pulverem adversus arthritidem commendavit, quo ad sesqui libram adsumto, æger primum dysenteria crudeli, dein, hac cessante, ventris gravissimis rosionibus & torsionibus cum contumacissima ventris adstrictione, virium debilitate, appetitu dejecto, incendio interno, vigiliis & ictero tandem fuit correptus. Plura vid. in *Dioscoride lib. 6. cap. 27.* Deinde testatur experientia, figulos, qui in fictilibus lithargyrio incrustandis occupantur, simili fere morbo metallico infestari. Incidunt exinde in vehementissimos intestinorum dolores cum præcordiorum angustia & spirandi difficultate, membrorum tremore, contractura, articulorum debilitate, summa virium diminutione alvoque pertinacissime clausa. Maxime autem illud iis in locis fit, ubi ollis calidissimis lithargyrium agglutinant, ubi autem argilla bona est, quæ frigide lithargyrium admittit, non tanta figuli experiuntur symptomata.

24. Horum omnium recensitorum symptomatum, quæ fumus lithargyrii producit, ratio optime ex faturni singulari textura mechanica peti ac derivari potest; plumbum nimirum de mercurio multum participat, hinc etiam est gravissimum, quinimo verus mercurius vivus, beneficio variorum commixtorum salium, prævia quasi facta subtilisatione & fermentatione, ex plumbo destillari potest. Ob mercurialem hanc naturam facile in auram cedit, & vehementissimo ignis motu in minimas resolvitur partes, quæ tamen ob gravitatem suam & molem majorem non tam promte, ab aëre ambiente, sustentari possunt; hinc ad inferiora descendunt, & collectæ fumum flavescentem dulcis saporis constituunt, qui deglutitus ad ventriculum & intestina vehitur, & partim gravitate sua, partim tenuitate mercuriali, non tantum membranis seu illorum tunicis adhærescit, sed etiam intimius poros tunicarum nervearum & musculosarum penetrando obstructions in iis efficit, simul fibras illas nerveas & musculosas fortiter lancinat, irritat & rodit, ut adeo spiritus animales, fibras illas incolentes magno impetu & copia ad has partes ferantur, qui quoniam propter pororum obstructionem non æqualiter circulari & moveri possunt, fibras patentes mirum inflant, distendunt, contrahunt, sicque spasmus constrictionem harum partium, simulque crudelissimos dolores, qui harum fibrarum saltim spasmodicæ contractioni debentur, progenerant. Validissimæ huic tunicarum intestinorum & ventriculi constrictioni adscribenda etiam cætera symptomata, vomitus nimirum, cardialgia, anxietates, alvi, urinæ & flatuum suppressiones, intestinorum inflammationes &c.

25. Ulterius particulæ illæ Saturninæ continuo ore exceptæ, & ad ventriculum delatæ cum succo chyloso abeunt etiam per poros intestinales & venas lacteas ad ipsam cruoris & humorum massam; & in transitu vasa lactea & mesaraica cum tempore occludunt & obstruunt, & in sanguine & humoribus particulæ hæ Saturninæ ad partes vectæ, propter specificam suam gravitatem, qua omni fluido corporis no-

ftri præponderant, facile secedunt & præcipitantur, sicque tubulos partium solidarum vasorumque angustissimorum cutis poros constipant & obstruunt; unde atrophia, ariduræ partium & cachexia subnascuntur. Cum succo lymphatico ad nervos, tendines, ligamenta delatæ in angustissimis illorum tubulis ex facili quoque hærent, & ibidem flagrant, tam obstruendo quam irritando dolores, spasmos, spirituum animalium interceptiones, & inde paralytes & contracturas producant. Falsum enim est, in paresi vel contractura ventris doloribus superveniente, per consensum adfici nervos, vel ipsam peccantem materiam ex primis viis per nervos ad partes extremas deferri. Placent mihi hanc in rem THOMÆ ERASTI *disputatio quarta contra Paracelsum* verba: *satis, inquit, malæ causam non in nervorum, quibus distribuuntur, principio, sed in manibus ipsis existisse. Quoniam partes supra carpum optime se habent, quod esse non potuisset, si nervorum principia adfecta fuissent.* Existimandum itaque, particulas Saturninas cum sanguine & lymphâ in musculosas carneas & nerveas fibras influere, & pondere suo secedere, arctissimosque illarum poros occupare, ibique immanes dolores, & propter obstructions fluidi nervei interceptiones & spasmos parere, musculorum robur mirum in modum labefactare.

26. Quod autem substantialiter lithargyrii partes ex ventriculo ad ipsum sanguinem deducantur, inter alia elucet exinde, quod urinæ illorum, qui morbo metallico Clausthali laborant, incoctæ, prævia decenti tractatione & fusione: præbeant veri plumbi quantitatem sæpe observavi. Ulterius autem quod Saturninæ minutia, fibrarum nervearum poris innuatæ paralytin & contracturam partibus illis adferre queant, observationes testantur. Sic à sacchari Saturni immodico usu paralytin ortam lege ap. JON. RHODIUM *Cent. 3. obs. 10.* Notatu digna de sale Saturni communicat BORELLUS *cent. 4. obs. 32.* amicum, inquit, habui, qui sacchari Saturni hausit nimiam quantitatem, unde tanquam paralyticus & fere mortuus est factus, tandemque conclameretur, rigebant membra ejus, & tanquam congelatus & apoplecticus erat.

27. Quod reliqua concernit metalla, quæstio non inutilis oritur, an illa tractata de se emittant effluvia, item an hæc ipsa damnum adferre queant? Stannum si in igne fortiori detinetur, vel si mineræ ejus funduntur & præparantur, quod emittant etiam exhalationes, quamvis non tam copiosas, quam Saturnus, nemo negabit. Quod autem hæc non sint nocivæ confirmat BOYLE *tract. de salubrit. aeris*, dum scribit illos, qui in stanno Anglicano laborant sanos & vegetos esse, & raro morbis corripitur; plantas optimas illis in locis, ubi mineræ Joviales effodiuntur, crescere & progerminare. Denique metalla alias fixiora ferrum & cuprum tam igne quam calore & motu vehementiori tractata, effluvia quædam de se spargere haud improbabile videtur. Ex relatione Cel. KRUGII, viri, in scientia metallurgica curiosissimi habeo, illos, qui Schmalkaldiæ acuendo & poliendo ferro inserviunt, respiratione anhelosa laborare vulgo *die Schleifer-Kranckheit*. Quod cuprum attinet, notabile est monetarios, qui ex argenti & cupri mixtura *beschicket Gut* faciunt monetam levem & minus nobilem, contrahere sibi in manibus coeruleas multas maculas, quod non contingit, si purum argentum tractant: referri huc possunt quæ superius de effluviis metallorum dicta sunt.

28. Ex hisce itaque deductis satis liquido constare arbitror, metallicolas à miasmatibus variorum mineralium plurima pati ac perpeti mala & morbos gravissimos; præter hos autem adhuc plurima experiuntur incommoda. Omnia enim metalla tanto fanitatis & vitæ discrimine eruantur, ut tot hominum

millia huic negotio se se suosque devovere non frustra mireris; interdum de scalis in puteos delapsi, brachia, crura aut cervicem lethaliter frangunt, aut decedentes in lacunas suffocantur, aut denique ab accensione pulveris pyrii contusiones gravissimas patiuntur. Concidunt præterea montes, eaque ruina oppressi pereunt, uti id sæpius fit in Misnia, maxime in iis, quibus venæ sunt cumulatae, sicque fossiores, fornices crebros montibus sustinendis destinatos non relinquunt, aut substructiones faciunt. Patiuntur tandem damnum metalli fossiores à saxis abruptis, articuli sæpius mirum atteruntur & contunduntur, quod ne fiat, metallici structuris necessariis puteos, cuniculos & fossas latentes fulcire debent. Postea aqua fodinarum frigidissima nervis mirum in modum insensa est, hinc artubus non sufficienter munitis, facile nervorum resolutionem, contracturam ac paralyfin gignere potest. Tandem à vaporibus frigidis densis, quibus aer specuum subterraneorum repletus, itemque fumis lampadum densissimis inquinatus, transpirationem liberam impedit, cæca cutis spiracula obstruit, sanguinis subtilisationem ejusque motum promptiorem sufflammat, sicque morbos frigidos asthma vulgo *den Damff*, symptomata hypochondriaca frequentissime parit.

29. Recensitis sic variis & incommodis, quibus miseri illi metallici homines graviter divexari & affici solent, restat jam, ut medicationem illorum & ablationem, quantum fieri potest, meditemur. Nolo autem in præsentis in decernendis remediis & medicamentorum compilandis formulis copiosus esse, sed generatim, breviter tamen, quænam singulis malis conveniant remedia & præsidia exponam. In genere itaque moneo, præsertim ab hujusmodi incommodis quam optime institui, si, quantum possibile est, fumos istos noxios, densos, præprimis tempore existente nebuloso & coelo minus sereno, fugiant: dein ab inspiratione fumorum per os & nares, nec non ab illorum crebriori deglutitione caveant. Præstat enim, quando in ejusmodi locis inquinatis versantur, raro deglutire salivam, sed continuo fere illam exspuere. Deinde optimum est consilium, ipsas officinas exstruere, ubi cremantur, funduntur & separantur minerae, sub libero aëre & coelo etiam caminos satis patentes erigere. Porro optime se præservare possunt à noxa dictarum exhalationum, tam mercurialium, antimonialium, sulphurearum, arsenicalium, quam Saturninarum, aliarumque, oleosis nempe: butyrum scilicet parum salitum magna in copia adsumant, jusculis ex cerevisia Goslariensi, butyro non salito & saccharo confectis, admixta nonnunquam olei olivarum, amygdalarum dulcium sufficiente quantitate, probe se sæpius muniant. Accedit quod juscula hæc ex tali cerevisia spirituosa parata & aromatibus zingibere, floribus macis, cardamomo vel cinamomo condita transpirationem liberiores & motum celeriores sanguinis efficiant, sicque obstructionibus resistent.

30. Deinde omnibus metallicis præter dietam oleosam & pinguem, emollientia diluentia & temperantia commendantur. Humidis his efficitur, ut alvus eo rectius suum faciat officium, & ne partes nerveæ membranaceæ ab acerbis & calidis istis fumis nimium exsiccentur & contrahantur, his quoque efficitur, ut vehiculo horum diluentium & vi emollientium miasmata illa mineralia acuta rigida partim demulceantur, partim etiam ex corporis poris & emunctoriis eliminantur & proscribantur. Hunc in finem laudatissima sunt sequentia, infusum veronicæ, malvæ, hederæ terrestres, coffeæ nec non lac bubulum calide copioseque haustum, vel solum vel cum dictis infusis remixtum. Item juscula ex carnibus pingua, lardum, ova sorbilia, pruna Damascena, poma Borsdorffiana, ficus & passulæ crebriori sint ex usu. Fugiant diæ-

tam acidam, salitam, induratum, viscidam, aromaticam, spiritus vini nec non tabaci abusum. Ex fonte pharmaceutico ad præsertim à sævissimis his morbis multum conferre potest tale medicamentum, quod vim habet balsamicam, alexipharmacam, & tenuissimis particulis poros & vascula aperientem, quod componi potest ex nucifla, croco, myrrha, enula, corticibus aurantium, citri, zedoaria, theriaca, spiritu vini, spiritu salis ammoniaci, camphora, quale elixir balsamicum præstantissimæ virtutis est, & præsertim & curandi fine opem fert præsertim, si quotidie ad guttulas LX. cum juscule sumatur.

31. Quotiescunque ab haustis copiosis fumis arsenicalibus truculenta invadere solent symptomata, theriacalia antispasmodica, nervina cum oleosis, jusculis & decoctis mixta, hic omnibus palmam præripiunt: tinctura bezoardica, diascordium Fracastorii, Sylvii, theriaca cœlestis, essentia scordii succini, castorei, spiritus antispasmodicus nostræ præparationis, qui ex spiritu balsami Peruviani, succini, eboris, addita sufficiente castorei quantitate & croci constat; confert quoque pulvis Marchionis.

32. Ad intolerabiles & immanes intestinorum dolores conjunctos cum alvi suppressione pertinacissima, à copioso fumo lithargyrii feliciter abigendos & dissipandos, primo loco commendantur clysteres ex meris fere oleis parati, quo nimis fortiter contractæ & spasmodice contractæ intestinorum fibrillæ relaxentur, & pori intestinales aperiantur. Hisce clysteribus commode misceri possunt carminativa penetrantia, spiritus vini camphoratus, spiritus salis ammoniaci, vinum Hispanicum, qua simul ratione partes læsæ solatium recipiunt & blande demulcentur. Extrinsece vero unguenta ex oleo amygdalarum dulcium, carvi, hyoscyami parata juvant, quorum virtus egregie, addita sufficiente quantitate spiritus volatilis, exaltari potest; quibus totus venter calide sæpius inungendus est. Intrinsece singularem obtinent virtutem juscula oleo amygdalarum dulcium probe imbuta, in quibus essentia carminativa cum spiritu antispasmodico prædicto assumi potest, & urgentibus doloribus, addi possunt grana aliquot laudani opiatum nec non ipsius camphoræ. Omnia hic fortiora purgantia rejicio & damno, quæ spasmodicas constrictiones augere, & symptomata ut plurimum exasperare solent. Leniora autem e. g. infusum rosarum laxativum, syrupus mannæ, pilulæ ex gummatibus, scammonium per fermentationem paratum, cum tartareis & carminativis mixta, aliquando locum inveniunt. Quod si autem tanta est spasmodorum vehementia, ut medicamentis etiam generosissimis cedere nolit, commendanda sunt ex omnibus balnea, ex herbis emollientibus, nervinis antispasmodicis concinnata, quorum usum in nervis solandis, poris aperiendis & dolorum ferocia sistenda mirifice laudo.

33. Ad contracturam & paralyfin membrorum & artuum, quæ sæpius ipsos, qui cum fumo Saturni versant, exercere solet, præter jam dicta antispasmodica nervina emollientia & olea sudorifera, blanda tamen profunt v. g. spiritus eboris seu cornu cervi balsamicus, spiritus Buffii, spiritus cornu cervi succinatus, cum decocto enulæ vel vino enulato calide adsumpta. Externe inunctiones, liniamenta, balnea laudatissima sunt ex regno animali petita v. g. unguentum sequens Dn. *Herrstelle* Pharmacopæi Clausthalensis. recipe axungia humanæ unciam unam, olei cariophyllorum, cinamomi ana drachmam dimidiam. M. Hoc linimento calide contracta membra frequentissime inungantur: Deinde fots ex sanguine porcino item ex intestinis calidis proficiunt.

34. Tandem asthma metallicum morbo frequentissimo præter jam dicta opponi possunt elixiria pneumonica

monica cum balsamo sulphuris anisato nec non Peruviano roborata, elixir proprietatis sine acido; spiritus salis ammoniaci anisatus, essentia croci inspissata, essentia gummi ammoniaci, helenii, aqua hyssopi, & quæ omnibus palmam præripit aqua Tragopogoni cum vino parata, quam idem jam laudatus pharmacopæus in asthma inveterato tollendo commendat.

Vulgus contra hunc & alios morbos metallicos in usu habet alliacea, nec sine ratione; hæc enim sale volatili acri gaudent, quo amurcam viscidam, tartaream firmitus cellulis pulmonum inhaerentem detergunt & resolvunt, & transpirationem humorum incalescentia, & acrimonia humorum suorum volatili adaugent. Et hisce metallurgiæ morbiferæ impono finem.

D E

INFLAMMATIONE VENTRICULI
FREQUENTISSIMA.

§. I.

P Rincipum partium morbos vel omnino exitiales, vel ad curandum difficillimos esse, unum est ex publicis in medicina confessis etiam dudum in veterum scriptis celebratum. Jam vero ex omnibus corporis nostri partibus nullæ majoris sunt momenti, nec ullæ majorem merentur considerationem, quam quæ sensum ac motionum sunt instrumenta, quibus anima proxime utitur, & tales sunt nerveo-membranosæ. Principatum vero ex hisce merito obtinet ventriculus, ex membranis nerveo-fibrosis totus compositus, qui non modo exquisitissima sensatione pollet, sed & motu gaudet contractorio & dilatatorio, qui peristalticus dicitur. Et quoniam ob nervorum copiam hæc perquam nobilis pars fere cum toto corpore accuratam habet consensionem, & præter hæc succis & fluoribus corporis nostri commodam ad vitam præbet materiam; facile est colligere, omnem gravem morbum in eo consistentem magno cum vitæ discrimine esse conjunctum. Non dubitavit itaque *Helmontius* ob hujus visceris in corpore præstantiam sedem animæ ibi collocare: & quamvis hæc pars multis magnisque pateat morbis: non gravius tamen & quod magis terrere possit malum reperies, quam inflammationem. Inflammatio quidem, quæ stasis corruptiva est sanguinis, ubicunque sit, non sine periculo habenda; periculosior tamen, ubi membranaceas occupaverit partes, ob exquisitum, quo pollent, sensum ac consensum gravissima & funesta simul symptomata adfociantur. Qua de causa etiam meningum inflammationes, ventriculi & intestinorum in summum ægrotantes adducunt periculum. Plures harum partium inflammatione ceu primario morbo extinguuntur, alii ceu aliorum morborum symptomate. Illud vero mirandum est, quod cum frequentissimus sit adfectus ventriculi, à practicis tamen parum omnino observetur; & quod magis mirum videtur, illorum libri vel plane de hoc silent, vel negligentius curant. Multi ex iis rarum pronunciant adfectum, si tamen in praxi diligentius attenderis, frequentissime deprehenditur. Quod igitur in libris & scriptis medicorum tam rara hujus mali sit mentio; placet in præsentī utilissimam hancce materiam paullo curatius pertractare.

2. Prius vero quam in hujus adfectus indolem, causas ac ortum penitus descendamus, convenientissimum mihi videtur, ex anatomicis, quæ ad ventriculi structuram, situm ac officium pertinent, paullo curatius repetere. Situs est ventriculus sub diaphragmate, cujus posteriori parti etiam incumbit. Tres ferme partes sinistrum latus occupant, cum dextrum ab hepate cingatur. Orificium dextrum, quod pylorus vocatur, sub cordis scrobiculo juxta cartilaginem ensiformem jacet; sinistrum vero spinæ dorsī vicinum, & firmissime peritonæo adnexum, musculosam diaphragmatis in dorso partem percurrit, non vero nerveo-tendinosam,

utī vulgariter in tabulis depingitur. Substantia ventriculi mere est membranacea, utpote ex meris tunicis & lamellis membranaceis est compositus, quarum vulgo quatuor numerantur. Primæ originem à peritonæo deducunt, constantis fere ex fibris longitudinalibus, ab uno orificio ad alterum protensis: huic subjacet musculosa, quæ ex circularibus seu spiralibus carneis crassioribus componitur, quæ majore agmine collectæ circa dextram & inferiorem orificii partem pylorum nempe visuntur, quoniam hic loci majori motu & constrictione, ad propellenda versus intestina ejus contenta, opus est. In sinistro latere, ubi maxima ventriculi capacitas, tunica hæc valde rara & subtilis est: non enim hic opus erat insigni constrictione, cum ob situm altiore respectu dextri facile descendant alimenta. Extant ibi vasa brevia, quæ in cruento vomitu plerumque aperiuntur, quoniam fere nuda, & tenuissimis saltem membranulis communita jacent. Notabile est, quod in superiore parte ventriculi, ejus dorso nimirum fibræ carneæ ab uno orificio ad alterum secundum longitudinem sint exporrectæ, quæ in orificio sinistro in circulos abeunt; factum id esse à provida natura eum in finem credo, ut, facta constrictione, facilis ex uno orificio in alterum liquidorum fiat transfusio: sicut quandoque in vomitu videmus, ubi, quæ paullo ante fuerunt adsumta, & in fundo ventriculi adhuc resident, non ejiciuntur, sed quæ ante aliquot dies sumta in intestina jam transierunt. Tertia tunica dicitur nervea, quæ valde densa est, cui substernitur quarta, quæ glandulosa dicitur sive melius villosa, ex tenuissimis fibrillis & vasculosis ductibus contexta. Hæc lympham & mucum fundit, crassiorque est in ventriculi fundo & parte ejus dextra; defendit hæc quoque nerveam à molesta medicamentorum vel ciborum vellicatione. Accipit ventriculus nervorum ramificationes valde insignes à pari vago, quod constituto nervo cardio ac pneumonico juxta oesophagi latera descendit. Dividitur, in duos ramos interiorem nempe & exteriorem; ille rursus in nervum coalescit, qui juxta exteriorem partem orificii sinistri ad fundum ventriculi abit; hic vero exterior ad dorsum ventriculi fertur, & ab uno ad alterum orificium transit. Ex his duobus ramis varii propullulant furculi, qui per parietes orificii sinistri distributi, plexum nerveum instar reticulæ constituunt. Deinceps è nervis hepaticis alii in pancreas, alii in vasa cholodocha, duodenum & pylorum deflectunt, iisdemque densas propaginum series inferunt. Hisce ab utroque nervo stomachico aliæ uniuntur, unde ratio apparet, cur, vellicatione in ventriculo facta, bilis è cystide sua in duodenum effundatur, quæ postea, spasmodica intestini constrictione in ventriculum sublata, vomitu rejicitur.

3. Si qua proinde corporis pars exquisito & delicato sensu instructa est, certe est ventriculus. Hic

intus undiquaque membrana nervea cingitur, quæ sic appellatur, quod in hanc multi iique insignes nervi excurrant, imo cute, à cuticula separata multo sensibilibior animadvertitur. Sentit hæc ventriculi membrana spicula antimonii, quæ cutis etiam nuda sine noxa tolerat. Oculi admittunt in collyriis crocum metallorum, licet acutissime præ cute sentiant, imo apiculi nervei linguæ adæquati saporis organa minus ab ejus spiculis adficiuntur. Testis hujus rei est famosa cicuta aquatica, quæ intus sumta ob vehementem irritationem tunicæ, in ventriculo venenum est; exterius vero in forma cataplasmati vel emplastri leni tumido vel duris tumoribus applicata magna eaque innoxia est medicina. Subtiliori etiam sensu præditum esse ventriculum inter alii appetitus & sitis, varii dolores, ardores ab adsumtis medicamentis rebusque heterogeneis ac venenis declarant. Et quod maxime mirandum, dantur quædam medicamina, quæ simul ac ventriculum contingunt effectum etiam in dissitis partibus exserunt. Exemplo sit opium princeps remediorum sedantium; hujus vel dimidium saltem granum idque vel solum vel cum aliis mixtum, simul ac acceperis, & sedat dolores & dormiendi adfert cupidinem. Nitruum quo non clarius vel majus antispasmodicum, parva etiam dosi, in febris vel in ardore inflammatorio datum, mox refrigerationis sensum per universum corpus diffundit. In nimia fibrarum relaxatione serique vel sanguinis fluxu validius stypticum datum, dum adhuc in ventriculo versatur, etiam in remotioribus locis, constringentem ostendit effectum. Ex quibus abunde potest intelligi, quam subtili sensu polleat ventriculus, qui, si à corde discesseris, omnium in corpore partium princeps merito est appellandus. Et proinde non sine ratione, uti diximus, *Helmontius* in sinistro ventriculi orificio tanquam acutissimi sensus parte animi sedem collocavit. Eundem quoque ob summam præstantiam regem vocat nobilis poëta medicus *Serenus Sammonicus*. Verum non solum ventriculus sensu gaudet, sed & consensu; quoniam enim ex intercostali magno & pari vago accipit nervos, hinc cum cerebro, cum dura matre, cum spinali medulla, faucibus, aspera arteria, corde, pulmonibus, hepate, diaphragmate, renibus, ipsisque intestinis multo conspirat sensu. Si igitur hæ partes laboraverint vel irritatæ fuerint, laborat etiam ventriculus & socius fit periculi.

4. Præter sensationem acerrimam, quæ admirabilis inprimis, mirandus etiam in ventriculo singularis motus species, quo ceu futura egregie illius robur sustinetur; motus hic vocatur peristalticus, & simul intestinis est communis, qui in eo maxime consistit, ut una parte contracta altera dilatetur. Motus is reciprocus per totum intestinorum canalem eum in finem exercetur, ut contentorum & excrementorum fiat expulsio. Ut enim omnium fluidorum beneficio systoles & diastoles in vasis fit progressus; ita eadem motus specie in magno intestinorum ductu contenta ab uno intestino ad alterum promoventur. Sicuti vero cor principium est circuli sanguinis & motus systaltici, quo sanguis, contractione juvante, in arterias expellitur, quæ dilatantur, & post factam dilationem in venas propellitur: ita & mihi ventriculus principium videtur motus peristaltici, qui in intestinis viget. Tanta potentia, tanto robore hic motus instructus est naturæ providentia, ut merito in admirationem sui physicos rapiat. Maxime vero hujus motus peristaltici vis ex vomitu patet, in quo nimirum is invertitur, ut magnum sæpe humorum pondus, quasi vecte commotum, uno impetu magnæque vi extrudatur. Et quod mirabilius omnino, videmus argentum vivum ad dimidium libræ in iliis adsumtum, quod, excepto auro, cum sit gravissimum, nihi-

lo tamen fecius virtute & robore motus peristaltici ex fundo in pylorum & intestina premitur. Quodque magis advertendum putaverim, dum per alvum mox ejicitur, necesse est, ut per prolixos istos & anfractuosos intestinorum sinus modo descendat modo ascendat. Ad hunc ascensum magna vis certe & robur est necessarium, quod in intestinis systaltici motus est beneficium; qui etiam à purgantibus & emeticis vel etiam à venenis adsumtis valde augetur. *Cl. WEPFERUS*, qui compluribus artem nostram nobilitavit, in libro de cicuta aquatica p. 172. in animalibus naturam & diversitatem hujus motus, oblatis prius venenis, sollicite observavit. Inter alia experimenta è catello cui radicem napelli dederat, excidit ventriculum, inque ipso motum observavit vermicularem. Placet jam integra auctoris verba hic inferere: *integrum*, inquit, *excidi ventriculum movitque se motu vermiculari. Stomachus sive sinistrum orificium arctissime sese constrinxit, ut ne guttula quidem excideret. Quando vero ventriculus circa medium sese contraxerat, motus lente versus pylorum procedebat, illeque erigebatur, & liquor subpallidus, quandoque sensim, aliquando cum impetu protrudebatur. Constricto pyloro, ventriculus rursus intumuit totus, moxque rursus circa medium sese constrinxerat, novusque liquor per pylorum ejiciebatur. Hæc constrictionis in medio & inflationis alternatio per octavam horæ partem continuavit, stomacho semper clauso permanente. Postea ventriculus sese movere desit.* Plura vid. eod. libr. hæc de re lib. I. p. 262.

5. Officium ergo ventriculi secundum naturam & ordinem recte se habet; quando debitus & moderatus sanguinis per vasa in ejus membranas fit adfluxus & refluxus; ab hoc enim legitima liquoris gastrici in debita quantitate & temperie dependet secretio. Dein & in eo versatur, ut motus ejus peristalticus æquabilis & moderatus conservetur; hinc placida fit sensatio, nec molestus oritur dolor. Omnia itaque, quæ in ventriculum incidere possunt vitia, aut ex motu ejus peristaltico læso, aut circuitus sanguinis per ejus substantiam defectu, aut secretionem liquoris gastrici præternaturali, derivanda sunt. Ex multis vero magnique ventriculi morbis jam tractandum suscepimus, qui ex tono ventriculi fortius læso inprimis, & postea ex sanguinis circulo per hoc viscus impedito excitatur; hac ventriculi inflammatione certe nec quidquam periculosius nec feralius existimandum est. Prius vero quam ejus causas earumque ordinem persequamur, è re nostra esse arbitramur, signa, quibus cognoscitur, & quibus ab aliis morbis differt, breviter attingere.

6. Sunt vero inflammationis ventriculi notæ perpetuæ, & individui veluti comites, dolor immanis & fixus ardor circa præcordia & illam regionem, quæ cordis scrobiculum comprehendit: adest simul anxietas, ut maxima, ita molestissima, corporisque jactatio. Febris porro cum siti, vigiliis, pulsu duro, parvo frequenti & inæquali comitatur. Juncta sunt præterea vel ipsi vomitus vel ad vomendum proclivitas alvi, adstrictio, quandoque etiam inflammatio faucium anginæ speciem præ se ferens. Remittunt ad tempus hæc mala, mox vero cum impetu repetunt, suumque resumunt impetum: accedunt subinde singultus, extremorum refrigeratio cum sudore frigido, delirium, animi defectio & convulsio; & urina sæpe plane supprimitur. Hæc symptomata ubi accidunt, de ægro actum esse non obscure prædixeris. In corporibus dissectis ventriculus valde rubicundus, variis modo rubris modo nigris maculis distinctus, vasaque sanguinea & capillaria multo sanguine turgida reperiuntur; quandoque orificium sinistrum macula lata nigra notatum

tatum visitur. Interdum quoque hæc inflammatio, antequam aperiatur corpus, primo adspectui est exposita; sæpe extenditur ad duodenum, & paucis sæpe diebus occidit, quandoque longius protrahitur, imo in exulcerationem lentamque febrem terminatur. Non totus vero ventriculus semper, sed pars saltem, maxime vero fundus, inflammatur: nonnunquam tenuior sinistra nempe ejus pars, ubi vasa breviter sita sunt, sæpe dextra pylorum respiciens affligitur. Ventriculi orificium si inflammatio occupat, periculosissima est, & uti *Forestus* dicit, Jovis filii dicendi sunt, qui evaserint. Adfectus hic vel idiopathicus est & primarius, vel symptomatikus, quod aliis morbis accidit, maximeque pesti, variolis, febribus petechialibus, podagræ retro-pulsæ, febribus ardentibus & inflammatoriis & fo-cius.

7. Inflammatio ventriculi, ut adfectus est periculosissimus; ita & communissimus, qui plurimos opprimit atque præcipitat; mirum tamen, quod tam parca hujus tam apud veteres, quam recentiores fiat mentio. *Hippocrates* ni fallor nullibi inflammationis ventriculi, vel ejus orificii meminit, præcordiorum vero inflammatorum *de vict. acut.* §. 36. Et in *Coac. prænot.* §. 2. hæc habet: *oris ventriculi dolor & pulsus præcordiorum febre perfrigerata, malum, tum alias tum si insuper exsulant.* Item *præcordiorum dolores tum alias mali sunt, cum si alvos humectent.* Et *lib. I. Epidem.* exemplum inflammationis hujus cum febre in ægroto adfert. Hic quoque locus respicit in *Coac. prænot.* §. 317. *præcordiorum*, inquit, *dolores cum febre, si dolor intensus ad caput progressus fuerit, repente convulsivo modo occidunt.* *Galenus* in libris suis erysipelatis stomachi facit mentionem. Inflammationis quoque stomachi meminit *Celsus lib. IV. cap. 5. §. 15.* his verbis: *at si inflammatio ventriculi subest aliqua, hanc fere dolor & tumor sequitur.* Ex veteribus observat quoque hoc malum *Alexander Trallianus lib. 7. cap. 14.* & *Cælius Aurelianus* methodicorum summum decus *lib. 2. de morb. cap. 2.* sub nomine cardiacæ passionis hunc nostrum adfectum comprehendit atque confirmat, ejus essentiam in stomacho atque ore ventris esse quærendam, & emergere frequentius quinta vel sexta die in febribus ardentibus continuis vel inflammatis; & *cap. 32.* hanc sequi adferit febrem celerrimam & inflammatoriam, pulsum celerem cum siti modica, pulsu parvo, genuum gelido stupore & cum vigiliarum assiduitate.

8. Recentiores etiam raro hanc materiam in suis libris tractarunt. *Sennertus* brevis est in hoc malo exponendo; *Ettmüllerus* rarum appellat adfectum. Verum sæpissime occurrens adfectus vel pro inflammatione hepatis vel pro cardialgia illis accipitur. Jam dudum id notavit Gallia ille *Hippocrates Fernelius lib. VI. cap. 2. de part. inflammationi*, inquit, *ventriculi adfinis est inflammatio hepatis, quæ vel summum jecoris lobum, quo ventriculus obtegatur, vel incumbentem illi abdominis regionem occupat. Tumor enim prominens & circumscriptus cum dolore in ventriculo sito inest & febris & aliorum malorum plura, ut proinde vel experientissimos sæpe medicos fallat. Distinguitur autem sola symptomatum vehementia & perniciæ, quandoquidem in ventriculo omnium sævissimæ inflammationes incidunt.* Cardialgia vero & inflammatio ventriculi multum inter se conveniunt ob plurima symptomata, quæ utrumque horum adfectuum concomitantur. In eo tamen differentia est, quod in cardialgia febris deficiat, deficiat etiam ardor intensior, fixus in ventriculi regione, denique clementior benigniorque symptomatum sit accessio.

9. Jam non immerito quærendum mihi videtur, unde tantum periculi tantumque discriminis ven-

triculo inflammato immineat. Cum enim aliæ corporis partes profundioribus & gravioribus pateant inflammationibus, ut pulmones, mesenterium, uterus, renes, minus tamen habent periculi, nec tamen celeriter hominem conficiunt; eo magis igitur mirandum ac investigandum puto, unde hæc inflammatio tantum mali secum vehat. Minus enim credibile est, illam sanguinis paucitatem, quæ in ventriculi vasis residet, solum vitæ adeo periculose insidiari. Medici ab adsumto veneno propter inflammatum ventriculum absolutam lethalityatem judicant: sollicitius igitur indagandum, qua ratione inflammatoria stasis vitam tam celeriter opprimere possit. Vulnera ventriculi absolute lethalia non sunt, cujus rei testes cultrivori, quorum ex ventriculo vel dissecti cultri vel per suppurationem fuerunt expulsi. *Dolæus in Chirurgia cap. 49. lib. II.* expresse scribit, vulnera ventriculi non solum superficialia, sed & profundiora Limburgi curata fuisse. In ulcerationem & abscessum etiam abire ventriculum inflammatum, & in lentam hecticamque febrem tandem desinere experientia nos docuit; ejusmodi vero suppuratio, sine præcedente inflammatione consistere nequit.

10. Nostram itaque sententiam ut hac de re exponamus, ita nobis videtur, sanguinis in vasis stasin inflammatoriam in se spectatam non esse causam mortis & tam tristium symptomatum, à quacunque etiam causa proficiscatur. Longe alio ex fonte hæc derivanda esse liquido affirmamus. Duplex nempe mihi statuenda videtur causa tanti periculi in inflammato ventriculo: una scilicet est spasmus violentissimus, qui semper inflammationem præcurrit, & hic unus & solus fere est, qui inflammationem progenerat; altera est, quod ob flagrantem sanguinem spasmus adhuc augeatur, partesque inde nobilissimæ nerveæ irritentur. Inflammatio igitur per se non jugulat, sed spasmus potius, cujus sævitia post inflammationem magis cumulat. Spasmus vero ejus est naturæ, ut si partem sensibiliorem nerveam invadat, maximas in universo corpore perturbationes motusque vitæ inimicos atque adversos excitare possit. Et sane gravissimorum morborum ratio ex spasmo plerumque nervosarum partium est deducenda: passio iliaca, quæ cito hominem cum singultu, convulsione, delirio, extremorum frigore, doloris atrociam, alvique contumacissima obstipatione interficit. Causam tam subiti tamque vehementis mali si quæris; spasmus est intestinorum tenuium motusque peristaltici inversio, ob incarceratum & pondere fœcum intestinum oppressum. Passio colica, quæ spasmodica & convulsiva dicitur, immanibus ægrotos adficit tormentis, ut propter animi deliquium & summam anxietatem in vicinia mortis sint constituti. In medio uretherum calculus asperior vel grandior hærens spasmodicorum inde resultantium vehementia, vomitus, anxietates, corporis refrigerationes, calorem, animi deliquia, tremores, contractiones & convulsiones producit. Spasmus duræ matris convulsionem totius corporis musculorum universalem five epilepsiam excitat. Quam graves adfectiones spasmodicus dentium dolor producat, non modo infantes, quibus dentes erumpunt, sed & adultiores, quibus nerveæ dentium membranæ à sero acri vellantur, cum summo tædio molestiaque experiuntur. Tunica nervosæ vellicatio, quæ meatum auditorium tuetur, tantum dolorem & spasmus parit, ut cor præcordiaque constringendo anxietates, animi deliquia, deliria & quandoque convulsivos partium motus efficiat. Novius exemplum, ubi lapillus in meatum auditorium infantis intrusus solo spasmo epilep-

epilepsiam, anxietates, vigilias, calorem præternaturalem & miram anxietatem excitavit. Hæc omnia symptomata remiserunt, ubi inunctione olei anodynii à spasmo fibræ fuerunt relaxatæ; imo post hæc sterutinatione facta, lapillus, qui parum commode extrahi poterat, sponte fuit excussus. Silentio præterimus articuloſum dolores acerbissimos, qui similitudine universum corpus adficiunt, pulsu id celeri, febre, anxietate, vigiliis, mentisque perturbatione testantibus.

11. Ex his, quæ adduximus, abunde demonstratum arbitror, spasmodum vehementem in hac sensibillissima nervea, quæ cum tot partibus consentit, parte ventriculi, nempe inflammationem, tantumque symptomatum cumulum inducere. Certe enim hic omnes nobiliores corporis partes in consensum trahendo, omnem ordinem motuum, circuitus sanguinis nempe & excretiones ac secretiones turbat atque pervertit; atque adeo percommode ex spasmo symptomatum, quæ ventriculum inflammatum infesto agmine appetunt, ratio facile constabit.

12. Ac primum quidem sistit se nobis intolerabilis illa circa præcordia anxietas, quæ nil nisi species spasmi est existimanda. Hic spasmus ad diaphragma, pulmones & cor tendentes nervos comprimit, liberum sanguinis per has partes progressum retinet & intercipit; quam anxietatem variis denotat vocibus *Hippocrates*, & quidem talibus, quæ gravitatem hujus mali perquam eleganter exprimunt. Vocat nempe illam *δοσορία*, *πνιγμόν*, *ἐλκυσισμόν*, *ἀσπ*, *ἀλυσμόν* & *ἀπορία*. Quæ voces id symptomatis genus pulchre significant, cum ægri varias decubitus formas expetunt, & impatientes certi loci certæque sedis varie se jactant atque movent, modo se attollendo, modo dejiciendo, modo in latus, modo in ventrem vel in aliam figuram corpus doloribus fessum disponendo. Inquietudo enim anxietatis comes est, provenit identidem à vellicatione nervorum & circulo sanguinis per totum corpus inæquali atque impedito. Pulsus durus, parvus & frequens, qui omni graviore spasmo nostroque etiam morbo sese adsociat, à nimia strictione fibrarum cordis musculosarum provenit; qua ejus libera diastole & sanguinis receptio item expedita systole expulsioque impeditur. Hinc sanguinis progressus tardus est, lentiusque justo per cor & pulmones consuetum iter explicat, sique cordis nervi nimium spasmo stringuntur, cessat plane ejus debita systole atque diastole, & ad tempus circulus sanguinis suspenditur & animi fit defectio. Extremorum frigus partim strictionis, quæ meatus & vasa capillaria premit, partim languidiori sanguinis influxui est adscribenda; referendus huc sudor frigidus, & facies sub tali adfectu *Hippocratica*: concavi sunt oculi, nasus acutus, facies livida, tempora collabuntur, muscoli subsident, quæ cuncta vehementiæ sævitæque spasmi & spasmodicæ strictionis sunt tribuenda. Hoc enim modo fit, ut legitimus sanguinis adfluxus, à quo calor, color & faciei vigor dependet male intercipiatur.

13. Vomitus quoque inflammationi ventriculi jungitur ob fortissimam ventriculi constrictionem, & hanc orificii sinistri & œsophagi inde sequentem dilatationem: hac constrictione, quandocunque in ventriculo continetur, fortissimo motu impellitur, atque sursum ejicitur. Vomendi vero nifus, licet irritus, fit à constrictione utriusque orificii, unde denegato exitu nihil redditur. Neque minus formidanda alvi pertinax strictionis, quæ nihil ejicit, nec injectos admittit clysteres, dum membranæ intestinum spasmo contractæ cavitatem intestinum adeo coarctant, ut nihil possit in ipsa intestina penetrare. Alvi enim debita & ordinaria dejectio exi-

git tonum peristalticum intestinum saluum atque incolumem. Læditur plerumque hic tonus vel dilatatione nimia vel constrictione, utrumque vero in spasmo accidit, dum altera pars nimium contrahitur, altera relaxatur, & sic progressus eorum inhibetur, quæ intra intestina continentur.

14. Nec prætereundus est singultus, quo nil frequentius nilque magis minatur periculi, quam hoc inflammationi nostræ signum junctum. Hic si huic malo sese adsociat sinistram sane morbi eventum augurari licet, nec fallit augurium. Fatendum omnino singultum à diaphragmate edi, comprobante hoc vibratione, quæ circa præcordia observatur. Non raro etiam idem accidit cum respirationis vitio & sonitu, qui fit non tam à flatu per gulam emissio, quam ab aëre per asperam arteriam eliso atque in larynge fracto. Utcunque vero hoc concedamus, negari tamen non poterit, quin ipsum diaphragma ad hunc motum à ventriculo ventriculique orificio sinistro concitetur. Multos ego novi, qui ex nimia ciborum repletionem vel acriorum rerum, uti pipirisi usu, hoc malo graviter adficiantur. Et ne obiculus hocce esset remota causa, diluta nempe materia vel evacuato ventriculo, ipsum malum remouetur. Nec mirum esse videtur, cur diaphragma ex ventriculi adfectione, patiat; œsophagus enim mediante membrana ipsi cum pleura communi, & inferius juvante membrana cum peritonæo communi connectitur. Præterea à reliqua diaphragmatis parte, ubi gula illud transit, filamenta nerveæque membranæ arctissimo veluti vinculo conjunguntur, & ulterius progressæ cum rectis ventriculi fibris maxime coeunt.

15. Tumor quoque in præcordiis quandoque deprehenditur; qui nil nisi ventriculus est, quia fibræ circa utrumque orificium à flatibus contractis & contentis exitu præcluso, necessario ejusmodi exsurgit moles. Trahit hic tumor comites maximas angustias, dum nempe sursum premit diaphragma, ut libere moveri nequeat. Icterus quoque persæpe nostro adfectui adsociatur, præsertim si duodenum simul spasmo corripitur. Hujus enim tunicis violenter contractis, constringitur & ductus chodochus; qui per ejus membranas longa & obliqua fertur via: inde bilis infusione in intestina impedita necesse est, ut in lympham regurgitet, quæ dein totum corpus luteo colore inficit. Ulterius convulsiones non nisi ex spasmo sunt derivandæ: vehemens enim ventriculi spasmodica strictionis duram cerebri matrem in consensum trahit, quæ omnes nervos tam ex cerebro, quam spinali medulla molli sinu complectitur; hæc si spasmo infestatur, musculorum fit convulsio universalis sive epilepsia. Ultimo loco dicendum de delirio inflammationis nostræ non infrequenti symptomate. Nascitur hoc, dum sanguis propter contractam duram matrem in circulo sistitur, & inflammationem excitando mentis usum vel imminuit vel plane exstinguit.

16. Ipsa vero inflammatio ventriculi identidem spasmi soboles est: constat enim hanc ipsam à sanguine in vasis hærente & velut incluso fieri; unde venæ tument, ingens fit ardor, arteriæque pulsant. Namque spasmus ejus est indolis, ut constrictione venas, quæ minorem ob defectum pulsus habent resistentiam, facile comprimat & angustet; unde regressus ejus impeditur, & inflammationum fiunt natales. Dixerunt id veteres attrahere dolores & adfluxum humorum concitare; quod ipsum quidem ipsa comprobabat experientia ut & ratio: dolor enim fit ex spasmo, qui dum venas constringit, sanguis & humores, in arteriis residentes, congeruntur; unde turgent &

& tument à sanguine vasa, & nisi progressus illius adjuvetur, succedit inflammatio, & ea propter graviores dolores & inflammationem plerumque post se relinquunt. Et his intelligitur, ventriculi inflammationem, à veneno vel alia causa irritante exortam, spasmi esse effectum, testari de truculenta validissimaeque hujus tyrannide. Tollit itaque non tam inflammatio quam spasmus, qui causa illius est, ex qua inflammatio augetur & exasperatur; unde apparet, tonum & motum ventriculi in hoc maxime malo esse destructum.

17. Expofita sic adfectus nostri causa formali & proxima, quæ tam gravia progignit symptomata, jam ad eas investigandas causas nos convertimus, quæ spasmodicæ sævitæ in ventriculo lenocinantur. Et uti nostra methodo omnium morborum causæ in materiales & immateriales distinguuntur, sic ab his initium sermonis faciamus. Primum vero vehementissima animi commotio se sistit, quæ fit ex iracundia. Loquitur vulgaris experientia, excandescentiam nimiam plerumque suppressam consequi compressionem molestissimam circa scrobiculum cordis cum ardore præcordiorum, alvi adstrictione, oris amaritie ac vigiliis; succedit sæpe icterus itemque febris. Tam longum foret tot exempla repetere, qui ab ira misere sunt extincti, cum hæc ipsa abunde satis practico- rum libri suppeditent. Ipse sæpius ex ira inflammationem ventriculi observavi. Tale exemplum prodidit etiam HILDANUS *Cent. VI. Observ. 34.* Licet vero inflammatio ventriculi ex ira concitata periculosa admodum sit, periculosior tamen evadit, & parum læti promittit, si vomitoriis purgantibusque oppugnetur. Patet & hic dicendi campus de noxa horum medicamentorum, nisi ab instituto observationes me revocarent. Commode mihi in mentem venit elegans Canonici Halberstadiensis historia, quæ satis superque nostrum illustrabit institutum. Hic vir perfecte sanus, cum inter rixas atque jurgia vehementissime excandescens mox vinum calidum superbiberet, quod vulgo *Seßl.* appellant, insequenti die statim intra venas conceptum malum persentiit. Tum enim incredibiles dolores circa præcordia, horum angustiae & conatus vomendi sequebantur; ardor porro stomachi aderat, inque stomacho quicquam, quod exitum moliretur, inhærere videbatur. Vocatus in consilium medicus, vomitorium ex sulphure antimonii aurato compositum præscribit; sumit hoc æger, eoque sumto ter bene vomit, sed tantum aberrat ut symptomata levarentur, ut potius crescerent. Jam pulsus erat parvus & fere nullus, & frigus frigidusque sudor parum spei ad meliora ostendebant; namque intra decem horarum spatium, convulsionibus accedentibus, est extinctus. Dissecto post mortem cadavere, in fundo ventriculi plures videbantur maculae, partim nigrae partim rubrae, & nonnullæ etiam altiores, non obscuro indicio, spasmus tam ab ira quam ab emetico suscitatum inflammationis ac ipsius mortis existisse causam. Docet cæterum hæc historia, quantam ira in concitandis circa regionem ventriculi habeat potentiam.

18. Iram ut plurimum gravis circa illum locum excipit compressio, ubi pylorus & duodenum situm habent; nec infrequens est observatio iracundiae icterum succedere. Cujus rei non alia dari potest ratio, quam quod spasmus, qui ad ductum cholodochum pervagatus, illum constringit, & hoc ipso efficit, ut bilis in lympham regurgitet. Tali in casu minus aperientia, sed anodyna & sedativa summam adferunt opem; id quod suo jam tempore SYLVIVS observavit. Dein ira sursum protrudit bilem, unde os amaro sapore repletur, & ad movendum fit cupiditas, constricto nempe pyloro; unde facillimum erit

judicatu, in ejusmodi casu parum convenire vomitoria, cum ad spasmos teneras ventriculi fibrillas irritent, & ipsos spasmos augendo ad nostrum malum facile viam pandant. Eadem cautio tunc maxime adhibenda, si ventriculus ad spasmos proclivis est, ubi ab iis vel plane abstinendum, vel parvissima in dosi illis utendum. Funesti memini casus, quem vomitorii imprudens usus excitat. Balneator quidam, ultra sortem suam sapiens, uti genius est horum hominum, foeminae tertianæ laboranti vitrum antimonii in substantia ad grana VIII. dederat. Hoc cum adsumsisset mulier, accedente febre, insigni vomitus frequentia exercebatur, remittente illa, purgatio & vomitus identidem, cum magna tamen virium amissione, recedebant. Redeunte febre febrisque indivulso commite frigore purgatio vomitusque repetunt, idque cum summo mulieris dolore ac intoleranda prope anxietate. Cum tertia fieret febris accessio, accedebat rursus vomitus, dolor acerbissimus, & qui suprema instare non obscure significabat. Nec paulo post summa inquietudo, extremorum frigus, animi defectio & convulsio, postremoque omnium mors ægotam occupat. Apertum cadaver inflammata ostendebat partem ventriculi inferiorem, maculis hinc inde nigris ac rubicundis tam in duodeno, quam intestinis apparentibus. Et quod magis mirandum, antimonii pulvis crustaceæ adhuc tunicae inhærebat; unde causa mortis manibus fere tangi poterat. Ab adsumto croco metallorum puellam quinque annorum vomitu & convulsionibus vehementissimis præcedentibus fuisse extinctam BLASIVS refert in *observat. anatom.* Aperto cadavere angustus & contractus fuit repertus ventriculus, ut ovi magnitudinem vix referre videretur; vesica fellea præter modum turgida erat; ut ex facili ventriculi inflammatio deprehenderetur.

19. Summa proinde cura artem exercentibus est providendum, ne cum impetu quodam vomitoria rapiant, sed suspensa manu ægris exhibeant. De sanguinis missione in apoplexia adhibenda CELSVS dicit, illam vel occidere vel liberare. Idem ego adfirmaverim ut de cæteris medicamentis validioribus; ita etiam de iis, quibus vomitus excitari solet. Est quidem, quod nullum medicamentum ipsis sit præstantius, si tempestivus eorum est usus; & nullum sane perniciosius. & quod proinde formidandum, quam hoc ipsum auxilium. Viderint proinde medici, quam recte faciant, qui ventriculum ita commotum vomitoriis oppugnant ac exasperant: tantum enim abest, ut hæc remedia in hoc adfectu expediant, ut potius dolorem atque morbum reddant ferociorem. Prudentis potius medici est antispasmodicis rem aggredi, eoque inprimis adniti, ut spasmodorum violentia ac furor omni modo exarmetur. Demus hoc omnino, ipsam naturam pronam ac proclivem tunc ad vomitum videri, & ad hunc urgeri quasi ac stimulari, pyloro nempe fortiter se contrahente. Demus etiam ipsos ægros anceps sæpe hoc remedium deprecari; at hæc omnia, quæ medicum ad porrigendum vomitorium invitare possunt, ipsius potius sagacitatem commonere debet, ut omni modo illud respuat rejiciatque.

20. Non minus adfectui nostro adferunt periculum illa purgantia, quæ acriora & valentiora sunt; illis enim eadem est perimendi ratio; spasms nempe agendo inflammationes in ventriculo & intestinis excitant. Evenit id inprimis, iis quibus prima regio crebris spasms exercetur, vel qui ob bilem acriorem & copiosiore stomachi inflammationibus sunt expositi. Aliquot abhinc annis memorabile exemplum in chirurgo hujus loci observavi, qui accepto vehementi purgante ex elaterii helleborique nigri extrac-

extracto, nec non ex trochiscis alhandal & gummi guttæ statim cum magnis torminibus crebriorem alvum deiecit. Circa vesp̄eram frigida cerevisiæ aliquot mensuris in cella Senatus oppidani haustis, additisque aliquot taleolis raphani rusticani, nocte & inlequenti mane de ingenti dolore querebatur cum anxietate præcordiorum, inquietudine, vomendique cupiditate. Accessit paullo post febris, pervigilium, virium defectus, faucium inflammatio cum pituita acri viscida, glandulas obsidente; singultus tandem, supremæ horæ index, secutus ipsam mortem attulit. Nullum hic est dubium, quin inflammatio ventriculi adfuerit, suborta quidem ab acri caustica purgantium resina, firmiter ventriculi tunicis infixæ, quæ continua rosione ventriculum ad spasmos sollicitavit. Inde inflammatio, inde illi dolores, qui ex frigido potu semper morbis spasmodicis inimico facti sunt intensiores. Novimus etiam exempla, ubi in tertiana continua ex fortioribus purgantibus eadem fere symptomata necem intulerunt. Nam in omni tertiana sive simplex, sive duplex & continua sit, spasmi vexant ventriculi regionem, vomitu id ipsum testante. Idem patiuntur ductus biliarii, unde febre hac laborantes, non raro etiam ictero implicantur. Sedulo igitur monendi sunt, qui artem faciunt, præsertim tyrones, quibus salus ægrorum curæ cordique est, & qui conscientiæ consulere cupiunt, ut his medicamentis circumspecte utantur. Quod quidem diligentius ipsis observandum, ubi prima regio ad spasmos proclivis non mediocrem inflammationis metum injicit.

21. Nunquam vero solemnior frequentiorque inflammatio ventriculi occurrit, quam ubi fuerit venenum causticum adsumtum, præsertim ex minerali regno petatum. Et hoc nomine famosum est arsenicum, de cujus infelici effectu plures historiæ ac observationes à practicis commemorantur. Equidem non negari potest, mercurium sublimatum ipso arsenico vehementius potentiusque esse venenum; nihilo tamen secius, si frequentiam funerum spectes, quæ hoc ipsum dedit, adeo cum illo non certaverit solum, sed etiam facile superaverit. Rara enim sunt exempla, raraque in libris de mercurio sublimato fit mentio, quod homines interfecerit, cum contra de arsenico multæ & copiosæ essent observationes. Rationem hujus rei si expetis, non alia esse videtur, quam quod arsenici sapor nihil acre causticumque præ se ferat, & ipse hominum error est, quod sæpe propter similitudinem pro saccharo adsumant. Arsenico extincti, ubi illos aperueris, ventriculum inflammatum semper ostendunt, eumque variis maculis, aphthis ac ruboribus suffusum; atque adeo ventriculi inflammatio essentialis veneni corrosivi adsumti signum est habita & adhuc habetur; sed vix commemoratur etiam ab alia causâ proficiscens, nisi è veneno, licet illa sæpius ab internis causis excitetur. Illud tamen memorabile, has inflammationes non proximam mortis causam, sed potius de spasmis testari, qui per totum corpus se diffundentes ordinem vitalium motuum turbant, & hac ratione non dubiam mortem adferunt, ipsa celeritate conspicuam. Iterum hic ad partes mihi est vocandus; sed summa cum laude Cl. *Wepfferus*, qui in *libr. de cicuta aquatica* hanc rem variis pulcherrimisque comprobavit experimentis. Nam cum ex regno vegetabili & minerali varia venena, variis animantibus vel jam extinctis, vel cum morte adhuc conflictantibus, ventriculum arctissime constrictum atque inflammatum deprehendit.

22. Hactenus de venenis externis, quæ inprimis homines formidant, jam ad ea venena transimus, quæ intra corpus nostrum latent, inque ipso generantur.

Non minus ab his expectandum periculum sive vehementiam ac nocendi celeritatem, sive ipsa symptomata ac signa, quæ cum illis habent communia, spectes; ab his enim, uti à cæteris venenis inflammatio ventriculi non raro provenit. Ipsa certe pestis, quæ celerrime præcipitat, non alio modo hominem interimit, quam quod virulentum miasma cum saliva deglutitum, in ventriculo spasmos pariat, & ex spasmis dein inflammationem. Cujus quidem rei testes sunt dissecta cadavera, in quorum ventriculo eschæra quædam sphacelosis maculis obducta, plerumque invenitur. Porro & ipsa signa ac symptomata, ut animi deliquia, frigidi sudores, summæ anxietates, & denique singultus abunde id testantur.

23. Petechialibus febribus retrocedentibus, vel non expulsis petechiis, à sale acerrimo ortis crebro fertalis inflammatiō ventriculi sese adlociat, ex essentialibus signis probe cognoscenda. Idem malum quam sæpiissime accidit à podagra intra corpus remanente, cum nempe illa vel externis linimentis intra corpus compellitur, vel deficiente virium robore non foras ejicitur. Tum enim salia acria, intercluso ipsis consueto exitu, ad alias partes divertunt, & periculosa mala, inflammationem maxime ventriculi excitant. Pessima igitur consuetudo est, quæ inter nonnullos nostri sæculi medicos invaluit, qui externis linimentis sedativis ex camphora, spiritu vini & opio constantibus, vel etiam emplastris anodynis sævienti podagrico dolori occurrunt. At quam infelici sæpe successu ejusmodi remedia adhibeantur, à quibus omnino abstinendum erat, observationes confirmant. Multa novi exempla, quæ hic adferri possent, nisi sequentia sufficerent. Vir generosus non ita pridem in vicinia periit, qui cum per multos annos podagræ sævitiam sustinisset, multis frustra tentatis remediis, medici consilio tandem ad emplastrum Saturninum refrigerans confugit. Placuit quoque ipsi statim hoc dulce venenum, quod ingruentem dolorem in pedibus, pectore & dorso admodum egregie levare videretur, eoque ipso per biennium ceu singulari adversus imminentes dolores præsidio utebatur, donec illud tandem sefellit. Ille enim vehementiori ira commotus, statim dolores podagricos emicare sensit, qui jam non amplius pedes & exteriora occupabant, sed ad interiora remeasse videbantur. Nec in obscuro erat, ventriculum inprimis pati, ac ad inflammationem esse pronum. Miræ igitur jam anxietates, febris cum pulsu parvo & inæquali nulloque somno aderant; non multo post singultus per quinque dies continuus, item ardor faucium cum siti inextinguibili & anxietatibus, ab adsumto liquido auctis consequebatur. Qua ratione cum nulla spes salutis superesset, nonus ab invasione dies dolorum vitæque finem ægro attulit. Manifestum exinde erat non podagram, sed ventriculi inflammationem, quæ totum fere corpus in consensum trahit, ægrum extinxisse. Materia enim podagrici doloris serum biliosum causticum est, quod glandulosis articulorum membranis insidet, id si motu febrili critico non propellitur, sed spasmi justo maturius sedantur, in corpus regreditur, & in membranaceas inprimis partes furorem suum effundit, spasmos nempe concitando. Incredibile est, quantis tunc doloribus, quam sævis tormentis ventriculus & intestina torqueantur, ita, ut non raro inflammatio & ipsa mors inde sequatur.

24. Similis generosi cujusdam viri valetudo me recordantem in se morari cogit. Hic cum iniqua & longa podagra conflictatus remedium doloris in externis quærere cœpit; adnotis igitur linimentis, ex spiritu vini, camphora & opio paratis, egregie sibi alle-

allevatus videbatur, remittente nempe per aliquot annos dolorum inclementia; quantum vero hæc medicina frustrata fuerit, exitus docuit. Proxime enim in cachexiam, pedum tumorem &, quod cæteris pejus, asthma convulsivum, quod ægre curatur est, incidit. Discant exinde medici prudentiores temperare sibi ab ejusmodi remediis, ne pro medicina venenum ægroto adferant; discant quoque, summa cum cura ac sollicitudine opium adhibere: hoc enim in podagra imprudenter datum, quantum malorum excitet, præter adducta sequens docebit historia. Vitriarius quidam hujus urbis diu podagræ doloribus excruciat, opii essentiam adsumserat, sperans, hac ratione fractum iri mali vehementiam. Sed falso, paullo enim post podagra in corpore, velut vinculo quodam retenta, summos procreavit dolores, qui infixi velut præcordiis circa cordis scrobiculum, maxima cum anxietate, emicabant. Infirma mox crescebat valetudo, crescebant dolores &, accedente singultu, post gravissima tormenta ægrum conficiebant. Adeo opium non dolores, sed vitam potius exstinxit.

25. Ventriculi inflammatio quandoque etiam eos comitari solet, qui variolis vel morbillis decumbunt; hi enim vel retrocedentes vel ad exteriora minus recte exeuntes ad interiora serpunt, & præcordia ventriculumque maxime infestant. Solet hoc accidere, cum ob malignitatem tum ob molem peccantis materię, qua hæc exanthemata impedita intra corpus, cum maximo ægri detrimento, remanent. Vidimus non paucos variolis discessisse, quibus non alia mortis fuit causa, quam ventriculi inflammatio, quæ ex ardore circa præcordia, virium defectu, extremorum frigore, faucium inflammatione, & singultu denique cognoscebatur. Ita nobilem quandam virginem exspirasse novi, quam morbilli graviter affligerant, quibus menstruorum fluxus accedebat. Hunc medicus ceu minus salutarem sistere tentabat, & sistebat quoque additis volatilibus spiritibus ad promovendam exanthematum expulsionem. Prodierant quidem morbilli exigua levatione mali, quod hoc ipso magis accrevisse videbatur. Séptimo die magnus ardor & præcordiorum dolor agrum occupat, item pulsus inæqualis & frequens cum delirio & singultu, & his malis ægra occubuit.

26. Dicendum jam erit de bile magna & non infrequenti inflammati ventriculi causa: hæc enim in cystide fellea retenta, sive id ob calculum, ductum illum obsidentem, sive ob spasmus meatus hosce constringentem fiat, facillime adfectum nostrum progenerat. Multa & clara hujus rei exempla habuimus, & medicorum quoque commentarii habent; pauca tamen adducere sufficiat. Studiosus quidam temperamenti melancholici, paucis abhinc annis variolis corripiebatur. Erumpebant circa tempus ordinarium variolæ, sed sinistro statim augurio comitatæ, quippe nec attolli, nec in pus abire videbantur. Pauco interjecto tempore æger de anxietate pectoris, dolore exurente præcordia & summa lassitudine conquerebatur, ut non sine ratione inflammationem stomachi suspicari liceret; nec ita multo post ingravescit malum, fit singultus, & tandem convulsio fatalem adfert moriendi necessitatem. Dissectum corpus omni fere pinguedine destitutum apparebat, nisi quod membranæ, quibus illa alias adhæret, paucis oleosis globulis obsiderentur, idque tam externe super musculos, quam in abdomine, ubi ejus alias observatur copia. Musculosa contra solito durior & ultra modum grandior ac crassior videbatur; ventriculi fundus totus erat inflammatus, fellea vero vesicula materia, liquidam referente picem, turgescibat, velut cartilagine quadam meatibus occlusis. Hærebant

Frid. Hoffmanni Oper. Tom. VI.

porro multæ guttulæ acerrimæ bilis in hepatis concavo, quæ non minus vesicæ inspersæ erant, & vicinum colon dextrumque stomachi orificium, flavo eoque foedo colore infecerant. Ecquis igitur dubitaret, quin bilis malorum fuerit causa, tum variolarum male procedentium, tum feralis inflammationis & ipsius mortis hanc consecutæ.

27. Idem malum eodem ex fonte procurrens ante aliquod tempus virum egregium Comitum cujusdam moderatorem è medio sustulit; hic ex abusu fructuum horarum tertianam sibi contraxerat, cumque interea nec vacaret morbo, nec à profectionibus, frigidiore cælo, sibi temperaret, mox in pejorem morbum febris est mutata. Me igitur accedens de intolerabili circa præcordia æstu querebatur; hincque meum efflagitavit consilium. Neque vero causa hujus morbi mihi latere potuit, quin statim inflammationem ventriculi subesse deprehenderem, quam non obscure, præter ardorem summum, pulsus parvus durus & inæqualis significabat. Præterea ab omni liquido pejus se habuit, quibus omnibus & icterus se adjungebat cum sinistro sane omine exsuperandi morbi. Ut primum spectatis remediis obviam itum malo, remittebant modo dolores, modo vehementiores recurrebant. Altero vero die cum adventaret febris, cum majori impetu recrudescebant. Ego interim cum extra urbem excurrere cogerer, mox redux ægrum decessisse cognoscebam. Nec meum fefellit judicium: aperto enim cadavere, ventriculum, mire inflammatum inveni. Præter hæc ductus cholodochus multis iisque nigris calculis obstructus erat, ipsa vero vesicula bilioso humore repleta. Ex quibus facile intelligitur, non obstructionem solum, sed acrem etiam bilem, nervos hepatis ventriculique irritantem, causam ictero ac inflammationi dedisse. Adde, quod spasmos jam per se effrenes magis effraverit, & sumtum fortasse purgans ad causam morbi non parum contulerit.

28. Simile quid in Illustrissimo Comite observare mihi contigit, cum in thermis Carolinis versaretur. Hic summus vir, per biduum sumtis thermarum aquis, statim sentire coepit urinæ suppressionem. Conjectura fuit de calculo vel in ureteribus hærente, vel etiam de spasmò hos ductus coarctante. Optime proinde antispasmodicis & emollientibus ægotanti subvenire visum fuit. Interim alius adhibetur medicus, qui purgantibus & vomitoriis malum adgredi constituit, ratus nempe, viscidam saburram in ventriculo & intestinis delitescentem causam esse hujus lotii retentionis. Me igitur reclamante, propinat tamen vomitorium, mox satis validum purgans; purgatur æger vigesies, malo interim nihil imminuto. Emulsione tandem data, tanta copia ac vis urinæ instar loturæ carneæ profluxit, ut quinque mensuras impleret. Nonno morbi die omnia ingravescebant, summa anxietas, pulsus parvus celer ac inæqualis, & quod omnium pessimum, singultus per duos integros dies continuus. Præter hæc faucium inflammatio cum albissima viscida pituita, fauces obsidente, viriumque languor sequebantur, quibus malis confectus paullo post mortalitatem implevit. Post mortem tumor scirrhus instar fabæ interne in vesica apparuit, quo tumore ejus orificium obsidente, urinæ fluxus fuit impeditus. Ipsa urina, quæ retenta erat, similis erat loturæ carneæ, urethres erant extensi, renes flaccidi magni eorumque substantia mollis ac velut dissoluta. Ventriculus cum oesophago vehementi inflammatione erat adfectus; in vesicula vero fellea lapides viginti minores & duo majores in ductu cholodochō

V

hære-

hærebant ex eoque excindendi. Vesica urinaria valde erat turgida, in cuius orificio, uti diximus, corpus glandulosum non dissimilis cum prostatica naturæ, cum quibus quasi continuabatur. Hic tumor à pondere urinæ ex copia thermalis aquæ depressus, firmiter vesicæ ora claudens, contumaciter urinam supprimebat; inde urina refluens in renes & urethres regurgitans horum substantiam corruperat. His accessit supremum malum frequens ac intempestivus purgantium usus, quæ sine dubio ad flatum atque inflammationem non parum contulerunt. Cæterum vitium bilis ejusque suppressio ab obstructione ductus cholodochi utique ad ventriculi inflammationem multum contribuit. Bilis enim hac ratione acris reddita per poros vesicæ transudat, & subjectas partes vehementi adficit ardore. Pulchre RIOLANUS in *enchirid. lib. I. cap. 3.* scribit: *interdum cystis fellea vicina tangit, tingit ventriculum, ac si titione ardente ureretur.* Nec minus bene PLATERUS *lib. 2. præct. pag. 436.* observavit, ventriculum tingi macula lata lutea, unde perpetuus ventriculi ardor, cujus quidem ardoris causam in bilis vesicula multa bile turgente, & macula lutea deprehendit. Imo nec quidquam frequentius in praxi occurrit, quam ictericos à bile stagnante copiosa, plexus stomachicos & cardiacos arrodente, vomitus, anxietates & ardores experiri. Quæ cuncta symptomata à spasmis, qui ventriculi regionem lacerant, merito sunt deducenda. Eadem bilis caustica sæpe efficit, ut dysentericiæ malignæ, inflammatio ventriculi jungatur. Ita post dysenteriam malignam ventriculi fundum maculis oblitum repertum fuisse *Paterf. Hain in M. N. C. an. 1671. obs. 115.* scribit. Cavendum proinde in ictero, ne ea adhibeantur, quæ spasmos reddunt acerbiores; cujus generis vomitoria, purgantia, calidiora acria, frigus denique & frigida potiones sunt. Icterus enim sæpe præcedit inflammationem ventriculi, sæpius etiam sequitur. Sic ante aliquot annos generosus vir laborabat febre cum summa anxietate, extremorum frigore & tremore. Quarto die icterus, & septimo mors ipsa ægrum corripiebat. Neque dubium, duodenum inflammatione fuisse adfectum, unde ob stricturam vehementem ductus cholodochi bilis ad sanguinis & lymphæ massam regrediebatur.

29. Sunt & aliæ causæ maxime externæ, quæ ventriculum subita inflammatione adgrediuntur, inter quas frigidus potus inprimis est connumerandus: qui post calefactum prius corpus intemperantius ingestus, quantas excitet noxas, vulgari etiam opinione comprobatur. Nec vero alia hujus dari potest causa, quam quod sanguis motu prius concitatus, accedente frigore, mox in cursu suo sistatur, & intra venas resideat: unde stomacho inflammato, sanguis in copia in ejus vasis colligitur tumore, dolore variisque spasmodis inde concitatis. Omnes enim, qui ex frigido potu moriuntur, inflammatione ventriculi & spasmodis exstinguuntur. Memini adhuc quæstoris, qui in Carolinis morabatur. Hic cum contra medici monitum per duas horas balneo usus, dein una vice magnum acidularum poculum, quæ dicuntur BUCHSAVERLING exhaustisset; ex eo tempore, prospera antea fructus valetudine, pessime se habere coepit. Aderat enim summus ardor, extremorum frigus, somnus inquietus & plane nullus, virium debilitas, ad vomitum nilius, pulsus debilis & frequens. Hæc recensita symptomata ad sex vel septem dies grassata, medicamentorum tandem diaphoreticorum, item infusorum calidorum ope feliciter propellebantur. Simile exemplum vidi in studioso, qui post fortiores corporis in ludo gladiatorio commotionem, & dein

copiosius frigidum ingurgitatum potum gravissimis ventris torminibus, mox solenni præcordiorum aestu vexari coepit. Hinc quotidie in pejus abeunti malo tertio die delirium, & delirio convulsiones accesserunt; neque multo post æger occubuit, inter lulum jocum causa mortis inventa. Exstant de hoc malo historiae medicæ, ex quibus unam ex BLASIO in *observ. anat. p. 424.* adduxisse juvat. Juvenis, scribit, XXIV. annorum, cum motu vehementiori incaluisse, frigidum potum largius adsumerat; statim conqueri coepit de maximo dolore pectoris & ardore circa scrobiculum cordis, & post paucos dies exspiravit. In aperto corpore omentum gangranosum ventriculusque inflammatus reperiebatur.

30. A vermibus non raro nostrum adfectum provenire medicæ confirmant observationes. Refert HERCULES SAXONIA *part. 2. cap. 7. prælect. præct.* puerum sexennem ex dolore summo ventriculi obisse, & dissectum duos vermes in ventriculo exhibuisse. Superiori, pergit, orificio inusta erat macula ex rubro livescens, unguis in digito minori magnitudinem referens, orta à punctione majoris lumbrici, qui ventriculo adfixus causa fuit anxietatis. A causa externa violenta inflammatio ventriculi non nunquam gignitur. Et ne longi simus in enarrandis exemplis, suffecerit HILDANI diligentia, qui à deglutita acicula funesta symptomata suborta observavit, *vid. cent. I. obs. 64.* A morsu vel ictu bestiarum inflammationem ventriculi nonnunquam præferri, medicorum libri testantur. Non hic quoque reticendum ventriculi inflammationi admodum esse expositos, eaque periclitari maxime illos, qui spongioso laxoque corporis habitu gaudent; & quibus fibras teneras, vasa exilia ac copiosa, succorumque abundantiam dedit natura; in hisce enim ordinario sanguinis progressus est lentior, quippe in spongioso corpore propter fibrarum laxitatem necessarium deficit robur ad fluidorum cursum promovendum. Namque impetus & potentia impulsus in tot innumeris parvisque ramificationibus valde frangitur, indeque tardior fit progressio. Deinde ætas juvenilis & virilis plus cæteris apta est ad inflammationes omnis generis suscipiendas. Hæ enim ætates sensibiliores & ad spasmos maxime proclives sunt. Facit huc etiam succorum copia proveniens in foeminis ex menstruum vel hæmorrhagiæ criticæ suppressione, vel in iis, qui laute vivunt, ex intermissa sanguinis missione, cui alias adsueverunt. Constans enim est hæc regula, plethoricos magis obnoxios morbis, quam qui proportionatam ad vasa in venis alunt sanguinis copiam. Nam animi adfectus, spasmi & facilius in iis generantur & periculosiores concitantur commotiones.

31. Quod ad curationem hujus mali attinet, hæc ipsa facilius ex suppeditatis causis tradi potest: auxilia enim & remediorum genera & directe & indirecte morborum causis apposita esse debent. Primum itaque in quæstionem venit, num venæ sectio in hoc adfectu admittenda sit? cui quidem quæstioni ut satisfaciam, respondeo, illam magis præservationi quam curæ ipsi convenire; cum scilicet metus hujus adfectus est ex plethora aut ex mensium suppressione, maxime venæ sectio est amplectenda. Plethora etiam, si manifesta est, & si ex frigido potu vel febre ardente malum impendere videtur, in principio plane necessarium est, ut sanguis detrahatur. Hoc enim modo sanguinis stasis dissipatur, ipsique sanguini suus motus redditur; si vero à veneno vel maligno symptomate vel morbo introrsus pulso malum est, tum plus damno erit quam emolumento. Debilitat enim & vires jam imminutas magis imminuit. Idem tenendum in cachecticis corporibus & macie confectis.

32. Altera quaestio est de purgantibus, an nostro congruant morbo? Elegantissimus verò hac de re locus est HIPPOCRATIS *de vit. acut.* §. 36. qui sic se habet. *Maxime, inquit, inflammationes & supra septum transversum dolores ac morborum collectiones solvi non possunt, si quis prius medicamentis purgare adgrediatur. Nam venæ sectio in talibus principalis est, dein infusa per clysteres, si non magnus & vehemens fuerit morbus. Sin minus etiam postea medicamento purgante opus est, sed & post venæ sectiones, purgans medicamentum securitate ac moderatione opus habet. Quicumque vero ea, quæ inflammata sunt, statim in principio morborum medicamento solvere tentant (i.e. purgante, id enim Græcis est φάρμακον) hi de intento quidem & inflammato nihil auferunt; non enim remittit adfectio, quæ adhuc cruda est; quæ vero morbo resistunt ac sanâ sunt, colliquefaciunt. Debili vero evadente corpore, morbus invalescit. Quum autem morbus corpori prævaluerit, tale jam incurabiliter adfectum est.* Non piguit commemorasse longiorem hunc locum, qui omnia curationis momenta in compendio quasi completitur. Auctor nempe gravissimus experientia instructus copiosa pulchre demonstrat, neutiquam purgantia in adfectu nostro esse adhibenda; hæc enim medicamenta confringendo tunicas & glandulas; serum extrahunt, fæcesque alvi educunt. Minus vero ea facultate pollent, ut sanguinem hærentem in ventriculi vasis discutere possint, sed potius spasmos augendo malum exasperent. Unde uno quasi ore omnes veteres practici pronunciant; in hoc adfectu purgantia plane esse respuenda. vid. FORESTUS *lib. 4. obs. 31*. Si vero alvus adstrictior est, expedit adhibere clysteres molles ac lenientes. Quodsi vero ex iracundia bilis nimia in copia ad intestina fuerit præcipitata, quæ præsertim acris, materiam præbere potest malo, tunc necessarium omnino, ut illa expellatur, ac ejus acrimonia mitigetur. Quem in finem pulverem ex rhabbaro; lapidibus cancrorum & nitro compositum commendo.

33. De opiatibus & anodynis ita censemus omnia validiora ex iis præsertim opiata, uti in omni inflammatione, ita maxime in hac valde esse periculosa: facili enim negotio, sensum fibræ adimendo ad sphacelum disponunt. Correcta vero & cum diaphoreticis juncta; præterea principio circumspectius data, sæpe egregio sunt adjumento. Theriacam, quæ opium fermentatum alexipharmacis correctum est, non sine ratione ceu venenorum antidotum antiquitas deprædicavit, idque in ictibus inprimis animantium. Non alia vero ratione prodest, quam quod spasmos tollat, & tranquilliori facto corpore per debitas vias illud ejiciat. Quodsi itaque ex bilis acrimonia caustica; item in passione cholericâ; iliaca, cardialgia ex morfu virulenti animalis, nec non ex vomitoriis vel purgante vehementiori ventriculi inflammatio est metuenda, utique theriaca coelestis cum bezoardicis, cinnabarinis & nitrosis commixta, utilissima erit medicina.

34. Maxime omnium vero profunt in hoc malo, quæ spasmos leniter sistunt, sanguinemque & humores in circulo suo conservant; & acrimoniam, si qua subest, demulcent. Egregie hoc fine commendari merentur infusa ex herba veronica; scordii, floribus sambuci; bellidis, chamomillæ vulgaris & Romanæ, semine foeniculi, radice glycyrrhizæ; quæ calidissime, licet parcius hausta, egregium promit-

tunt levamen. Calida enim floribus roborata sanguinem in fluore servant & ejus stasim impediunt, unde hæc ipsa præsentissima sunt medicina in ventriculo inflammato ex frigido potu protinus exhibita. Denique nitrosa, quoniam sunt magna antispasmodica, moderata in dosi data in febribus inflammatoriis, ardentibus, cholericis; ipsa peste moribique retrocedentibus, ictero, bile acri causticâ egregio sunt auxilio & omnibus fere remediis anteponenda. HILDANUS *in observ.* nitro purificato, in decocto hordei exhibito, pylori inflammatione laborantes curavit.

35. Si inflammatio ex veneno caustico minerali accidisse videtur, tunc nihil præstantius, nihil utilius est lacte cum oleis expressis tamdiu epoto, donec vomitus desinat. Nulla enim exploratior medicina & præstantius antidotum, quam hoc ipsum est. Cujus excellentiam cum jam CELSUS prædicat, ipse ante aliquod tempus expertus sum. Hospes nempe quidam cum loco sacchari ex errore juscule arsenicum admiscuisset, appposito illo convictoribus suis, quorum non nulli clari & nobiles erant, in ultimum fere illos coniecit periculum. Omnes enim, qui degustaverant ossam, statim summa pectoris anxietate, angustis, dolore, & ad vomendum conatu se correptos sentiebant. Vocatus ego in consilium & cognita mali causa, insignem copiam lactis cum oleo amygdalarum dulcium cuique ægro exhiberi jussi, idque tamdiu, donec vomitus quiesceret. Vomebant ægri per diei dimidium, quidam vel centies, & ingerebatur tam diu lac, donec nihil amplius veneni superesse videretur. Quibus rebus fiebat, ut recreati anceps periculum, quod ipsis imminere videbatur, Deo juvante, evaserint. Nonnulli tamen, qui jussu parcius lac atque oleum potaverant, emollientibus ac oleosis clysteribus adjectis sunt restituti.

36. Ad præservandas inflammationes, à quacunque etiam oriuntur causa, nitrum camphoratum summo est præsidio, vel etiam sequens mixtura: recipe spiritus nitri vel vitrioli dulcis, spiritus cornu cervi volatilis, essentia castorei singulorum drachmam unam ad guttas XX. vel XXX. propinanda. Hæc tinctura valde est antispasmodica & in morbis malignis, & quando exanthemata recedunt vel podagra regreditur magna ex parte implet curationem. Externis quoque remediis nostro adfectui subveniendum. Quo nomine commendari meretur linimentum nervinum ex spiritu vini camphorato, oleo nucistæ, croco, castoreo & nitro volatili compositum, vel balsamum nostrum vitæ camphora mixtum; hæc ventri imposita non mediocriter adferunt levamen. Parari etiam potest epithema ex absynthio, mentha, floribus sambuci, rosarum rubrarum, chamomillæ vulgaris, lavendulæ, semine foeniculi, carvi, anisi & aceto rosaceo, quod calide ventriculo admotum egregie stagnationes discutit. Requiritur porro quies corporis & animi, & moderatus calor, victusque tenuis ac mollis. Abstinendum à carnibus, vino, spiritu vini & circumcidendus acidorum usus. Potui inservire potest cornu cervi cum hordeo decoctum. Meliora vero frigidis sunt calida. Quando extrema frigent, tunc calore atque frictione probe sunt fovendi pedes; & in calidam aquam immittendi. Hæc ubi rite observantur, multa sane præstare possunt, licet non negandum, hunc ipsum adfectum, si natura imbecillior, acutiorque morbus simul adsit, raro medicinæ viribus exsuperari.



D E

MORBIS HEPATIS EX ANATOMIA DEDUCENDIS.

§. I.

DUO nostro quidem sunt iudicio, ad tuto, certo & cum exquisita ratione excolendam artem nostram scitu summe necessaria, eaque propter omnibus, qui cum laude in ejus exercitio versari cupiunt, plurimum commendanda. Primum ac præcipuum est, exactior machinæ animalis omniumque ejus partium, quoad artificiosissimam structuram, connexionem & usum, per curate institutum anatomicum scrutinium, acquisita cognitio, qua simul motuum, qui ad corporis vitam & ad functionum integritatem conservandam faciunt, ratio, natura ac leges cognitæ fiunt atque perspectæ. Alterum accuratiori rerum naturalium, quæ corpori ingentem mutationem inferre possunt, & sine quibus istud durare plane nequit scientia; physica Græcis dicta, continetur, qua potissimum institutis variis experimentis, rerum corporearum affectiones, proprietates ac vires evolvuntur, quo eo melius salubria ab insalubribus, quod præcipuum artis conficit momentum, discerni queant. Binæ hæ disciplinæ, si quid aliud, firmum ac stabile artis præbent fundamentum, cui certo ac tuto, qui medicinam facit, inniti & potest & debet. Hæ enim experientiam, quæ sola facile fallit incautos ac decipit, rationalem, certam atque fundatam reddunt. Hæ errores in vulgari praxi medica admodum solennes manifestant, eorumque originem detegunt. Has qui penitus perspectas habet, quævis in morborum historiis obvia, ardua etiam & difficilioris solutionis phænomena, facili negotio explanare & ad rationes revocare poterit. His denique qui instructus est, in quibuscunque etiam ac difficilibus morbis, tutam ac facilem methodum, tam inveniendi quam applicandi congrua remedia, perspiciet & exploratam habebit.

2. Quo major itaque harum disciplinarum ad salutarem artem excolendam ac perficiendam præstantia est atque excellentia; eo magis utique est, quod miremur, tantum etiam hodiernum doctorum quorundam esse finistrum iudicium, ut physicas æque ac anatomicas doctrinas, proprie non ad medicum scopum ipsamque artem referendas esse, sed tantum ornare & garrulum reddere medicum acriter at frivole, contendant. Sed hi fere sunt, qui ex putridis scholasticorum lacunis hauserunt explosum dogma: corpus licet ex variis organis ad motum recipiendum aptis compositum, iners tamen ac mere passivum esse; & à principio, nescio quo, sensu & ratione prædito animari, ac certo ordine, tempore, gradu, ad determinatum finem moveri. Ingeniosa certe capita, quæ si philosophiæ naturalis præcepta & experimentalis producta cognita haberent, nosset utique, corporibus inesse activas motrices vires, & à materialibus rebus externis, alimentis scilicet, elementis, venenis ac medicamentis, magnas corpori humano accidere mutationes, has ad vitam, ad sanitatem, ad morborum dispositionem & generationem eorumque curationem, quin mortem ipsam inducendam, maximum & præcipuum conferre momentum, ab earundem viribus & effectibus actiones

in corpore nostro vivo unice causaliter dependere, ac medici officium in eo maxime esse positum, ut differentes valde pro varietate corporum earum virtutes & operationes longo usu & experientia addiscat atque pernoscant. Nostri autem instituti ratio jam non fert, ut nobile hoc argumentum pluribus copiose prosequamur, sed hoc duntaxat in præsentiarum asserere ac demonstrare animus est: ignoratam structuram & pensi habitum verum hepatis usum, plurimorum tam in causali deductione, quam practica tractatione morborum ex jecoris vitio, errorum esse originem; & vicissim, ex accuratiori consideratione fabricæ, officii nexus atque usus amplissimi hujus visceris, atque solidam affectuum, qui ejus labe nituntur, ætiologiam, ac facilem, certam ac tutam iisdem medendi methodum promi posse ac suppeditari.

3. Exposituris igitur utilitatem maximam, quæ ex penitiori cognitione fabricæ hepatis in praxin æque ac pathologiam medicam redundat, ordo rerum dicendarum exigere videtur, ut prius ex anatomicorum doctrinis, potiora ad hanc considerationem facientia delibemus & præmittamus. Est vero hepar viscus abdominis amplissimum, in dextro hypochondrio situm, irregularis & inæqualis figuræ, vasculosum, biliosi potissimum humoris secretioni dicatum.

4. Amplissimum diximus hepar abdominis viscus, eo quod non solum amplum occupat spatium, & reliquis fere omnibus imi ventris visceribus obvertitur, sed etiam eximiam obtinet gravitatem, quæ plerumque quatuor vel quinque libras æquat, & accedente præternaturali constitutione, in longe ponderosiores ac majorem molem excrescit. Abdominis autem viscus audit, quia in superiori dextri ejus lateris regione locatum est, ita quidem, ut à spuris costis, diaphragmate & spina, ad anteriorem ventriculi partem, pancreas, duodenum, jejunum, colon, renem dextrum & umbilicum usque protendantur, & à retinaculis quibusdam ligamentis dictis, suspensum in sede sua detineatur. Scilicet superius appensum est diaphragmati & sternum, illi arctius per ligamentum tendinoso-membranaceum robustum, in ipsa jecoris substantia firmatum, suspensorium vocatum, & huic per vinculum non adeo robustum, ensiformi cartilagini insertum. Interius vero dextrorsum ad costas spurias per plura ac brevissima stamina in unum demum fasciculum coeuntia amplæ peritonæi areæ laxius annectitur, & exterius sinistrorsum vena umbilicalis fissuræ hepatis implantata istud umbilico alligat, quo hac ratione undiquaque firmatum, sub quavis corporis positura & inclinatione, stationem suam servet, nec unquam in adversam partem nimis ruat. Connectitur tamen etiam vasorum ope cum confinibus partibus, & quidem venæ cavæ productione cum septo transversum; per portæ venam cum liene, pancreate, mesenterio, omento, ventriculo, & denique, interventu ductuum biliariorum, cum ipso duodeno.

5. Sic alligatum & ad diaphragmatis fornicem oblique positum hepaticum viscus, faciem exhibet exterius convexam, interius concavam, pluribus & variis eminentiis, fissuris ac sinibus distinctam, &

haud

haud incongrue in lobum dextrum majorem, & finistrum minorem dividitur. Tunicas, quibus obducitur & quæ firmitus ejus parenchymati concresecunt, interius à vasorum involucris, exterius à peritonæo nanciscitur, præter quas alia adhuc firmitus robusta musculosa tunica, pariter peritonæi soboles, canaliculi tam sanguiferorum ex vena porta, quam biliariorum, parietes investit, eosdemque una cum arteriarum ramis involvens, capsula vocatur, ab inventore Glissoniana. Utrum vero interior jecoris substantia glandulosa sit, an vasculosa? lis est auctoribus potissimum MALPIGHIO & RUYSCHIO acriter agitata; facile tamen dirimenda, si modo quis consideravit, glandulas sic dictas conglomeratas nonnisi congeriem esse ex variis implicatis & aggregatis canaliculis sub membranis serpentibus compositam, adeoque perinde esse, si quis hepar glandulam conglomeratam, vel viscus ex contortis innumeris majoribus, minoribus & minimis vasculis conflatum, appellet.

6. Nos cum RUYSCHIO hepar dicimus vasculosum, rimaturi jam: unde uber iste copiosissimorum in jecoris parenchymate vasorum concursus. De quo quidem in genere id tenendum: ex venæ portæ, cavæ & biliariorum ductuum ramis & furculis ipsum hepatis corpus penitus coagmentari. Nam licet dexter arteriæ coeliacæ ramus hepatis sese infuset & in omnem ejus ambitum discurrat; ipsius tamen propagines non ipsam visceris substantiam ingrediuntur, sed vasorum reliquorum involucra tantum irrigant, in iisdemque terminantur, aptum nutritioni sanguinem advehentes & per totam vasculosam texturam distribuentes. Venæ portæ autem, cavæ & canaliculi biliosorum ramificationes hepatis parenchyma confertim perreptant, implicatæ, junctæ, invicem sese decussantes mutuisque osculis unitæ atque concretæ, & sic vasculosum viscus efficiunt.

7. Ex his potiores & numerosiores sunt, quæ ortum debent venæ portæ, cujus tam quoad structuram, quam officium, plane singularis est ratio. Quum enim venæ reliquæ omnes ex minimis furculis in truncum abeant, porta id sibi peculiare servat, ut, priscis jam notantibus, arboris figuram apprimè referat, & innumeris ferme radiculis, venis scilicet mesaraicis, hæmorrhoidalibus internis, epiploicis, gastro-epiploicis, gastricis variis, vasis brevibus, pancreaticis, splenicis, omnibus propemodum abdominis visceribus implantata, in ampliores primum duos canales & demum truncum crassum coëat, qui denuo in quinque plerumque ramos divaricatus, hepar in centro concavæ partis, in sinu à duobus lobulis *ωλα* dictis efformato, ingreditur, ubi in quamplurimos furculos explicatur, qui universum parenchyma perreptant. Deinceps in eo quoque singularis venæ portæ est structura, quod licet valvulis destituatur; tunicam tamen venarum crassiorem & arteriarum æqualem, paullo antequam hepar subit, induat, eademque vestita quaquaversum feratur. Officium vero hujus venæ si expendimus, duplex est atque diversum ab aliarum venarum functione. Porta enim, non solum, quod omnium venarum est, sanguinem ex partium compage, intestinis nempe, ventriculo, liene, mesenterio, pancreate & omento, ad cor reducendum recipit, sed arteriæ etiam vices subit, dum collectum in sinum cruorem ad hepar advehit, eundemque ex protensis copiosis ramulis per totam jecoris substantiam iterum diffundit.

8. Post venam portæ cava contemplanda, cujus truncus foveam hepatis superiorem in postica parte, ubique parietibus illius annexus, trajicit, & sanguinem à nutritione residuum, nec non per portam advectum, à scoriis biliosis liberatum, ex hepatis

parenchymate colligit & ad cordis sinum revehit. Tendunt videlicet dimissi è cava ramuli è superiori hepatis parte ad inferiorem, & ascendentes portæ ipsis semper amplioribus ramis occurrentes, iisdem lateraliter inferuntur, & sanguinem puriorem ac fluidiorem ex his absorptum, ad trunci alveum transmittunt, cordi iterum infundendum. Accedunt biliarii ductus, per hepatis compagem numerosè disseminati, ac eadem qua portæ rami, firmitiori tunica per capsulam obducti. Sunt hi portæ propaginibus continui, iisdemque incumbentes, aut minimum proxime adjacentes, iter legunt, & exceptum osculis biliosum humorem ex minoribus in majores alveos trudent, ductuique hepatico infundunt, ex quo per communem cholodochum demum cystidem præterlabens in duodenum eructatur.

9. Præter uberem canaliculi sanguinem & biliosum liquorem vehentium apparatus, hepar quoque instructum est copiosissimis lymphaticis vasis, quæ tam interiorem, quam exteriorem ejus superficiem obsident. Hæc omnium optime & accuratissime post RUDBECKIUM & BARTHOLINUM exposuit NUCKIUS, qui se plusquam trecentos ejusmodi aquæ ductus in gibbosa parte numerasse testatur. Qui per convexam hepatis partem serpunt, ex sola extima hujus visceris membrana incunabula trahunt, & in pauciores alveos aggregati, per ligamentum suspensorium tendentes, ductui thoracico sese insinuant. Qui vero in concava parte observantur, ex infima & profundiori jecoris substantia, non vero glandulis conglomeratis in infima parte locatis emergunt, & hinc per pancreatis portionem, inter duplicaturam peritonæi in commune lymphæ receptaculum, cisternam, humorem exonerant.

10. Nervi denique per hepatis compagem distributi sunt pariter multi & eximii. Ortum hi ducunt, tam ab intercostali dextri lateris ramo, quam octavo vago pari. Illi quidem proxime, ubi diaphragma superarunt, divaricantur, & tam ad vesiculam fellis & ductus biliarios tendunt, quam juxta tractum arteriæ hepaticæ eandem cingentes, explicantur. Hi autem ab orificio ventriculi sinistro protensi, cum illis in ima parte uniti, plexum constituunt hepaticum, qui furculos quaquaversum dimittens, cum lienari, mesenterico, stomachico & orificio superiori ventriculi communionem alit haud exigua.

11. Jam si, perspecta hepatis artificiosa & peculiari plane fabrica, porro scrutamur finem, in quem hæc omnia ita efformata; is utique primarius est, humoris recrementitii sulphurei viscidum, biliosum dictum, è sanguinis massa secretio. Quum enim non solum per ingesta variæ heterogeneæ indolis materiæ nutritioni minus aptæ corpus ipsumque sanguinem subeant, sed etiam perenni & intestino & progressivo motu laudabiles quoque & utiles partes ita atterantur, discerpantur ac subtiliscentur, ut demum in recrementa fatiscant: necessarium utique erat, quo ad conservandam corporis integritatem jugiter è sanguinis connubio ista purgamenta segregarentur, succique intemerati præstarentur. Hoc itaque ut perficeretur, præter renale cribrum & sudoris colatoria, constructum etiam est hepar, viscidarum, pinguium & sulphurearum materialium separationi dicatum, tam amplum, quo universæ sanguinis massæ depurandæ sufficeret, tam numerosissimis vasis refertum, tam mira vasculorum advehentium, secretum suscipientium, & residuum purum sanguinem ad cor reducentium fabrica, connexion & distributione conspicuum, quo biliosum humoris non solum sufficiens, sed prompta etiam & expedita in ejus compage succederet secretio. Hunc in finem sanguis adducitur crassior, in pancreate, intestinis, mesenterio & per luxuriantes passim lymphaticos canales, fluida substantia

orbatus, quo recrementitia materia ad separationem magis congeratur & proprius coeat, quin tardo admodum itinere, post toties in alveorum curvaturis fractum impulsus, mediante vena pulsu carente sanguis advehitur, ne citatori transitu sordes simul abriperentur & secretionem subterfugerent.

12. Et hæc est primaria utilitas, quam corpori præstat hepaticum viscus, præter quam duo adhuc magis secundarii usus sunt, quorum primus, quod ventriculum calore fovens, digestionem secundet. Scilicet quamplurimis experimentis compertum est, miram caloris humidi arctius inclusi ad intime dissolvenda durissima etiam corpora esse efficaciam, adeoque, quin idem in stomacho succedat, non est quod dubitemus. Dum enim ventriculo ex una parte accumbit hepar, ex altera lien, calidissima ambo ob sanguinis copiam viscera, eundem quadantenus operiunt & orificiorum occlusionem proritant, halitus calidi humidi ab iisdem quo minus dissipentur cohibiti, efficacissime agunt in contenta eademque intimius recludunt, ut accedente peristaltico ipsius ventriculi motu, promptissime in pastam fatiscant chymosam. Et hinc est, quod animalia, quæ jecur majus, & ventriculum ejusdem lobulis strictius circumdatum gestant, voraciora magisque famelica esse observentur.

13. Deinceps utilissimum quoque hepatis est munus, quod sanguinis mole exundantis præbeat diverticulum. Amplum enim & capax ejus est corpus, expansibile & distensionem obsecundans ejus compages & ex quamplurimis corporis partibus per portam & coeliacæ arteriæ ramum ad istud affluxus, ut tertiam, & quod excedit, sanguinis in toto corpore partem comprehendat. Quare si sanguis copia redundat, aut nimis rarefactus in alveis æstuat, & periculum est, ne soluto vasorum elatere, ruptura fiat aut cursus intercipiatur, patent hepatis portæ, & moli facilius cedentes, aliis partibus molestum suscipiunt atque recondunt. Elucescit potissimum hoc hepatis officium ex eo, quod animalia, quæ copiosorem & calidiorum sanguinem in venis alunt, jecur majus obtineant; ac vicissim in quibus parcius est, vel abundans pinguedini infumitur, minorem ejus molem exhibeant. Neque minus experientia constat, crebrius sanguinis contingere stillicidia, si hepar obstructum, aut lien infarctu laborat, nullam aliam ob causam, quam quod obice hic posito, cruor ad alia loca impetuosius divertat ibique erumpat.

14. Quæ omnia uti tam clara atque perspicua patent, ut à nemine in dubium vocari possint; ita fictitium utique est officium, quod nonnulli comminiscuntur, qui antiquata recoquentes, cum veteribus hepatis sanguificationis tribuunt negotium. Nimirum autumant, venas mesaraicas haud multo minus chyli imbibere & ad hepar transmittere, ibi in sanguinem coquendum & cordi insinuandum, quam ipsa lactea, eaque propter hepar tantum non cordis & cerebri officium superare contendunt. At vero neminem certe, qui ipse cadavera curate lustravit, in assensum pertrahent, nisi prius vias, per quas chylus mesaraicas subit & sic ex intestinis ad hepar transfertur, in homine monstraverint. Nam notissimum est, omnia sanguifera intestinum vasa, in nervea eorundem tunica terminari, nerveæ infra tam adhuc esse villosam cum osculis lacteorum & excretoriorum. Si itaque, prout nonnulli haud exigui inter medicos nominis viri suspicantur, chylus per mesaraicas venas ad hepar transfret; necessarium utique foret, ut hic succus non solum villosæ tunicae poros permearet, & sic ad nerveam primum penetraret, sed etiam deinde per nerveam & mesaraicarum tunicas alveis ipsis sese

insinuaret, & demum ad hepar volveretur; quod vero de chylis crassioribus multisque rudioribus particulis referto liquore sibi persuadent, merito plane non probabile videtur. Quod si etiam quispiam opinari velit, forsitan chylum, haud secus quam ex quorundam mente sanguinem, interstitiis fibrarum insinuat, patulis venarum osculis, mediante tonico motu, intrudi & ad portæ venam agi: post toties tamen totiesque factas in vasa injectiones, in confesso est, arterias cum venis in universo corpore continuos constituere canales, & ex illis immediate in has sanguinem trajici, nisi quis evidentissimis veritatibus præfracte contradicere haud erubescat. Largiamur autem tantisper, venas mesaraicas chylum recipere; id omnino propterea inde fluere consequentia, easdem modo chylum, modo sanguinem vehere, quod tamen nemo unquam vidit. Posito porro mesaraicas ex intestinis chylum ad hepar traducere: longe utique promptius & copiosius ingestis largius potu imbibent tenui liquidum, id citissime ad jecur mittent, eoque bilis secretionem, ad quam crassior sanguis requiritur, eximie turbabunt & sanitas detrimentum capiet, quod dictu vix credibile.

15. Exposita sic hepatis fabrica & naturali constitutione, evoluto quoque genuino ejus usu atque officio; expedita nunc & facilis via est, ad præternaturalem statum pernoscendum & morbos, qui hujus visceris labe nituntur, ex allatis deducendos. Ex his enim cuivis innotescit, nullam corporis partem tam numerosissimis, majoribus, minoribus & minimis canalibus, maxime venosis, esse refertam penitusque compositam, quam hepar: unde patet, nullum aliud in corpore viscus tantam sanguinis copiam simul capere, ac ipsum jecur. Nunc exploratum est, tardius quam ullibi spissiorrem tantisper cruorem, per hepar trajici. In plano porro est, hepar amplissimum viscus, paucioribus pro mole sua instructum esse nervis, non per ipsam substantiam, sed arteriarum tantum & potissimum biliosorum ductuum tunicas distributis, eaque propter non adeo exquisito sensu pollere. Perspectum denique habemus, hepaticum viscus non solum ambitu suo quamplurimas abdominis partes propius contingere, sed etiam cum iisdem tam nervorum, quam inprimis vasorum intervntu, consensum alere exquisitissimum. Hæc qui explorata tenet, is certe facili negotio morborum, qui ex hepatis vitio ortum trahunt, causas & symptomata ad rationes solide revocare, accommodam iisdem medendi methodum poterit invenire.

16. Sunt vero permulta omnino vitia, quæ in jecur cadunt, & tam ipsum ejus corpus occupant, quam ex eodem tanquam sede in alias corporis partes redundant; omnia tamen, si violentiam illatam exceperis, intercepto fluidorum per ejus compagem cursu continentur ac foveantur. Et primo quidem frequentissimæ observationis est, sufflaminari in hepate sanguinis progressum. Nam licet succussoria hepatis à diaphragmate sub respiratione commotio, nec non communicatus venosis ductibus à discurrentibus per earum tunicas arteriarum ramificationibus impulsus, ipsumque robur tunicarum venæ portæ, sanguinis cursum haud leviter adjuvent; nihilo minus tamen, dum cruor lentescens appellitur, vena, pulsu & valvulis destituta, eundem advehit, isque in innumeros capillares ductus, per universam compagem dimittitur, insita jam certe haud levis ad stagnationem & infarctum est dispositio, cui si accedit redundantia, & ob parciorem potum, vitam sedentariam, ingesta liberalius acida & vini spiritum

spiritum lentor sanguinis, fractum quoque per animi ægritudines, mentis fatigationes morbosque prægressos, partium ipsiusque hepatis robur; ex facili utique vasa infarciuntur, & sublata proportionem ad motum, sanguis segniter trajicitur, & passim in canalium alveis stagnat. Et hæc morbosa hepatis constitutio plerumque comitatur, vel potius antecedit morbos chronicos, & nonnunquam ita increfcit, ut arteriarum ramuli in aneurismata, maxime vero venarum propagines in varices fornicentur, cujus rei exempla MORTONUS, VESALIUS nec non BIANCHI de arteriæ coeliacæ aneurismate memoriæ prodiderunt. Quin nonnunquam ob lentorem progressum sanguis plane in polypos concrefcit, & latius serpente obstructione, hepar adeo grandescit, ut duplo & quadruplo naturalem molem superet, & diaphragmate cum ventriculo deorsum coactis, dolores & spasmi, diaphragmatis tensiones, difficilis spiratio & inclinatio ad vomitum, cum magno sanitatis detrimento oboriantur.

17. Quo frequentior autem & familiarior hepatis est ejusmodi infarctus, sive frigida oppletio; eo rarius vel plane non in illud cadit calida obstructio, sive stasis inflammatoria. Sunt quidem inter veteres atque recentiores plurimi & tantum non omnes, qui de inflammatione hepatis multa sermocinantur, eandemque ex febre, ardore, dolore acuto circa regionem hepatis, dijudicare satagunt, autumantes, eandem admodum periculosam esse & facile in sphacelum abire, ideoque non tantum venæ sectione, sed etiam internis æque ac externis balsamicis, inflammationi & putredini resistentibus contra eandem pugnandum esse serio injungunt. At vero si paullo penitus hepatis fabricam contemplamur, eandem inflammationi concipiendæ plane non aptam esse deprehendimus. Nimirum hepar ob nervorum & membranarum nervosarum defectum, rudi admodum sensu præditum, ita ut etiam mirum in modum distento eodem & infarcto, præter gravitatem quandam nihil ferme doloris percipiatur: inflammationes autem nonnisi partes nerveo-membranaceas sensibiliores, cujus generis ventriculus, intestina, meninges ipsique pulmones sunt, corripunt, eo quod, si sanguis copiose cum impetu in vasa capillaria adactus & firmiter obhærescens, fibras & membranas nerveas premendo ac distendendo dolorem suscitatur, quem spasmus & strictura subsequitur, qua coarctati vasorum alvei, affluentem sanguinem non admittunt, eodemque ad majores canales represso, calor partis cum tumore ac dolore inducitur, quo demum totum genus nervosum in consensum trahitur & sic febris accenditur. Accedit, quod quum ad inflammationem ciendam fortiori opus sit sanguinis appulsu & congestione, quo vasa magis quam par est distendantur & distorqueantur: ad hepar vero sanguis tarde admodum per venam impulsu destitutam deducatur; clare pateat: hanc venam ad inducendas inflammationes plane non aptam esse, sed ob minorem renitentiam atque tensionem moliri cedere, ac potius infarctum & lentam stagnationem, quam stasim inflammatoriam contrahere.

18. Deinceps ipsi illi auctores, qui hepatitidis mentionem injecerunt, incomplete admodum & valde obscure acutas jecoris affectiones descripserunt, & minus curate discrimen notarunt inter inflammationem, quæ in ligamenti hepatis & reliquis externis jecori adjacentibus hypochondrii dextri partibus occurrit, & inter illam, quam in ipsum hepar cadere volunt, eaque propter haud injusta suspicio est, eosdem inflammationem in pleura & circa costas, vel in peritonæo & musculis abdominis, pro hepatis in convexa parte phlegmone habuisse, vel

etiam si duodenum & ipsi annexi ductus biliarii, nec non pylorus inflammati fuerunt, convexam hepatis partem sideratam falso credidisse; inprimis quum in tot auctorum monumentis nulla plane deprehendatur observatio, qua clare & sine dubitatione facta dissectione defuncti doceri possit, in antea sano viscere hepatis, subito inflammationem cum ingenti dolore, siti, æstu, febre acuta, lethalem fuisse obortam.

19. Nos igitur hepatis phlegmonem, si non in non entium, tamen rarissimorum affectuum classem merito referimus, & solícite externarum ab internarum partium inflammationem distinguendam esse inculcamus, ne recte monente FORESTO *lib. XIX. de hepat. affect.* imponat tumor dextri hypochondrii medico, tanquam sit in jecore affectus, quum tamen sit in musculis abdominis. Omnia enim illa symptomata, dolor scilicet dextri hypochondrii, cum anxietate spirandi, inquietudine & febre acuta, nonnisi inflammationem partium, quæ spurias costas cingunt & quibus hepar annexum obtegatur, produnt, & affectus recte ut pleuritis, sic etiam hepatitis spuria vocari potest. Neque etiam hæc inflammatio tam à sanguine stasim concipiente, quam potius à sero acri, nerveis his partibus firmiter inherescente, oboritur, & quasi rheumatismi species est. Et licet multum periculi alere videatur, quia ob dolorem in consensum trahit diaphragma cum musculis intercostalibus & febre continua stipata est: nihilo minus tamen, si prudenti medicatione excipitur, omnis periculi expers est, & tempestivo antispasmodicorum, blande diaphoreticorum, siquæ re est, venæ sectionis usu, junctis simul externis discutientibus ac emollientibus, intra septem vel undecim dies ut plurimum discedit.

20. Sed quia hæc à me in dissertat. *de hepatis inflammatione vera rarissima, spuria frequentissima*, fusius excussa sunt, pergo jam ad lustrandum abscessum & sphacelum hepatis; de quibus passim in scriptorum medicorum monumentis fit mentio. Utroque post hepatitidem in hoc viscere subnasci, communis quidem fert opinio; sed si modo memorata momenta curatius pensitamus, erroribus eandem accensendam & longe aliam horum vitiorum generationis rationem esse patet. Scilicet ne de illata externa violentia dicamus, nonnunquam evenit, ut ex hepatitide spuria, intra membranam peritonæi, vel musculos abdominis consistente, oboritur abscessus, quo rupto, pus in convexam hepatis partem effunditur, ipsumque hoc viscus, ni matura apertione evocetur, aggreditur, corrumpit & putrilagine inficit; id quod exemplis confirmant FORESTUS *lib. XIX. de hepat. affect. obs. 10.* M.N.C. *Dec. II. obs. 11.* nec non COITER *in obs. anatomico-chirurg.* Est tamen etiam ipsum hepar abscessibus producendis idoneum, qui vero lentius gignuntur & plerumque hepate obstructo & in tumorem elevato, sub chronicis potissimum morbis, ut hydrope & hectica, enascuntur, à sanguine lentescente parti inherente, sensim substantiam excavante & in pus abeunte, producti. Inprimis frequenter in observatis medicorum sunt casus, quod post graviora capitis vulnera, cum effusione humorum sub calvaria, post mortem in hepate abscessus reperiuntur, cujus phænomeni rationem hanc BIANCHI *in histor. hepat. pag. 147.* affert: quod absorpta in canales & sanguini insinuada purulenta materia & delata ad hepar, in quo lentior sanguinis cursus & viscidarum sordium solemnis secretio, sanies simul per idem colatorium alliciatur, & deficiente ad expulsionem potentia, in eodem obhærescat & abscessum formet. Insanabiles autem

plerumque quidem sunt hepatis abscessus, præsertim si intimius ipsum viscus obsideant, & ægris hectica febre tabescentibus, demum mortem inferunt: nihilo minus tamen TULPIUS, HARDERUS, BECKERUS aliique exempla consignarunt eorum, qui rupto abscessu & effuso per cholodochum in intestina pure eodemque per alvum aut vomitum excluso, convaluerunt.

21. Eadem ferme sphaceli in hepate est ratio. Hunc enim indivulsam magnæ inflammationis pedissequam esse, plurima medicorum turba censet. Verum frequentioris certe observationis est, sphacelofam corruptionem oboriri sine præcedente gravi æstu vel tumore, & sine causa externa violenta, & inprimis in senili imbecilli corpore extremos pedum apices corripere, funesto plerumque eventu. Quare quin etiam interne in visceribus idem sine prævia inflammatione, maxime in parte per quam tardius sanguis iter legit, & ubi ad corruptionem pronus est sanguis, fieri possit, non est quod dubitemus. Testatur sane experientia, haud raro sphacelofam corruptionem in corporibus, quæ graviore animi affectu, diuturno inprimis mœrore, confecta & viribus exuta, ex longa sanguinis in hepate à debito tono defecto stasi oboriri, & præcedente febre hecticam mentiente, demum cum summa virium prostratione & singultu mortem inferre. Ejusmodi exemplum narrat DODONÆUS *obs. cap. III.* Ante viginti, & quod excurrit, annos ipse vidi in consiliario. Is per diuturnum tempus mœrore nimium indulserat, & primum in virium jacturam cum appetitus prostratione incidebat. His complicabatur calor lentus cum pulsu celeri ac debili, donec accedente tandem singultu & conatu licet irritato ad vomendum, elapsis quatuor hebdomadibus placide exspiraret. Aperto post mortem cadavere, hepar corruptum, instar picis nigrum cum fœtore apparuit, infecta simili labe diaphragmatis, quæ hepati adhæret, nec non anteriore ventriculi parte.

22. Quemadmodum autem hæc hepatis vitia sanguini potissimum stagnanti & corrupto ortum debent; ita nonnulla etiam sunt, quæ ex intercepto lymphæ progressu natales ducunt. Rarioris paullo observationis casus sunt, ubi hepar à copiosius secreta lymphæ, & non in aquæ ductuum alveos recepta, sed per textentium fibrarum interstitia exundante, intumescit & tumore quasi œdematoso totum afficitur, quem jecoris affectum præter alios inprimis annotavit GLISSONIUS in *anatomia hepatis*. Frequentissimum autem hepatis appendi aquosos tumores, hydatides vocatos, dum scilicet aut remissæ lymphaticorum fibrillæ, à concluso inter binas valvulas humore, exterius urgentur, sensimque ampliatae, sacculos & vesicas efformant, aut ipsa lymphæ inter substantiam & tunicam hepatis effusa, membranam elevat & subtus colligitur, id quod plerumque, si majores paullo minusque pellucidi aquosi tumores jecur obsident, factum esse observatur.

23. Porro etiam lymphæ lentor & præternaturalis spissitudo, ejus per hepar iter, modo levius, modo gravius, remoratur. Videlicet non adeo insolitum, sed chronicis plerumque morbis complicatum, lymphaticum humorem sanguini adhuc permixtum, variis de causis spissescere, & secedentem ex ejus connubio, passim in hepate obhærescere, ita tamen, ut medicamentorum ope, vel temporis successu, iterum in motum cieri possit. Quod si non contingit, sed lymphæ, dissipata magis adhuc fluida substantia, ad majorem crassitudinem redigitur, concretiones fiunt irresolubiles, quas pro materiæ concretæ habitudine, atheromata, steatomata & melicerides vocant, quarum exempla notarunt, GLIS-

SONIUS *l. c.* SEGERUS, WELSCHIUS & BIANCHI *l. c. p. 153.* Gravissimum denique obstructionis lymphaticæ in hepate genus est induratio & scirrhus. Ambo oriuntur quando distentis nimium alveis, contentus humor quiescens omnem penitus fluiditatem exuit, ipsæque tunicæ crassescunt, ita tamen, ut induratio magis intimiora visceris occupet & latius porrigatur; scirrhus vero in exteriori parte membranacea vasisque extimis obhærescat, occallescentibus penitus ac in cartilagineam substantiam degenerantibus membranis.

24. Atque hæc sunt præcipua, quæ hepatis viscus infestant ac obsident, vitia. Quorum quum ea sit ratio atque indoles, ut ex intercepto humorum cursu pullulent, adeoque facili quidem negotio arceri aut prima statim in herba jugulari possint: contra vero invalescentia & confirmata, difficulter vel plane non sanationem recipiant: patet utique, palmariam medentis curam eo dirigendam esse, ne hostem tam periculosum admittat, sed inoffensum sanguinis reliquorumque succorum per hepar progressum præstando, tempestiva ope corpus ab ejus incursum muniat. Quemadmodum vero secundum GALENI edictum, omnis curatio per medicamenta etiam selectissima inanis & supervacua est, nisi recta atque exquisita victus ratio accedat, quæ profecto, tutissima ac certissima ratione, morbos averruncat; ita etiam perpauca hoc loco subicere è re erit, quanam ex rerum sic dictarum non naturalium censu ad hepatis vitia avertenda & viscus hoc salvum & integrum servandum salutaria sint atque idonea, & quanam vicissim evitanda.


25. In harum itaque numero, quum ad vires frangendas, tonum viscerum dejiciendum, functiones eorundem labefactandas, sicque ad chronicas passiones promte arcessendas, nihil perniciosius sit crebrioribus animi turbis ejusque fatigationibus & diuturnis ægreditudinibus; contra vero, ad motus, qui vitæ & sanitati præsent, integros servandos, robur fulciendum & incolumitatem custodiendam, nihil aptius magisque proficuum, quam mens tranquilla, sedata & ab omnibus curis affectuumque intemperantia immunis, huic ut summa opera studeant, omnibus serio est injungendum. Deinceps commendanda quam maxime aeris puri ac temperati usura, quippe qui genuinum pabulum fluido subtilissimo, quod motum corpori præstat, subministrat, fluidorum cursum moderatur, eorumque texturam illibatam servat. Fugiendus autem intemperatus, humidus & infestis exhalationibus refertus. Porro quia ad præcavendas, nec non referandas obstructiones, ipsumque sanguinis progressum per vasculosam structuram promovendum, nil utilius atque præstantius convenienti motu & exercitatione corporis, hæc pariter ad abigenda hepatis ex infarctu vitia, omnibus aliis aperitivis, laxantibus & sanguinem depurantibus, longe superior & anteferenda est. Præterea esculentorum delectus instituendus, in quo quidem non tam qualitatis, quam potius quantitatis rationem habendam esse censemus, quum, licet optimi sint cibi, copiosius tamen ingesti, mole stomachum aggravant, neque penitus comminuti, cruditates ingignunt naturæ infestissimas; ut adeo semper quantitas ingestorum ad corporis vires dinetenda sit, ne debiles & imbecilles ciborum copia gravius lædat, & digestionem vacillante, separatio utilis ab inutili ipsaque recrementorum egestio intercipiatur. Denique maximum certe ad sanitatem tuendam momentum in potu repositum, utpote qui fluiditatem succis concilians, sufficiens esse debet, quandoquidem ad bonum ac nutritioni accommodum chylum constituendum, fluidum septupla minimum portio-

portione solidam in alimentis massam superare debet, prout ex lactis examine patet. Sit vero etiam salubris, hoc est tenuis, qui neque ventriculum inflat, neque caput petat, sed expedite emunctoria subeat & secreciones cum excretionibus secundet.

26. Inter diætetica jam memorata sanitatis præsidia, referendus quoque aquarum foteriarum usus, de quo quidem candide & confirmatius asseverare possumus, eodem dextre atque prudenter instituto, ad declinandas omnes, quæ viscerum obstructione nituntur, passionibus, ipsumque infarctum submovendum, nihil esse præstantius, nihil certius, nihil efficacius. Quum vero non una eademque salubrium fontium ratione elementorum sit indoles atque virtus, sed aliæ aliis, pro diversitate corporum & dispositionis ad morbos, sint meliores ac præstabiliores; summopere utique necessarium, ut medicus antequam ad eorum usum descendat, plenam & exactam eorundem habeat cognitionem, quo in tam eximio mineralium aquarum proventu, certa cum ratione, quæ magis ex usu sint, suadere, & ad illum, quem intendit, scopum consiliis suis dirigere possit. Nos quidem ad referenda obstructionum in hepate repagula, hoc discrimen & hanc cautionem servamus, ut ad instituendas, prout solenne est, vere & autumnocurationes, acidularum vel thermarum, quæ paullo validioris sunt naturæ, uti ex acidulis Pyrmontanæ & Egranæ, ex thermis Carolinæ, usum ad aliquot hebdomades protractum injungamus: pro potu vero ordinario, si res postulat, per integrum annum, quæ mitioris sunt indolis, ut Selteranas, Wildungenses & Emsenses cum exoptatissimo successu commendemus. Est enim medicamentorum horum fontium ea vis atque facultas, ut non solum crudos & impuros ventriculi & intestinorum canali inhæres-

centes succos diluant, abstergant & per alvum exturbent, sed etiam tenaces & viscidos in sanguine, vel in viscerum penetralibus stabulantes humores dissolvant & fluidos reddant, partes simul excrementitias salino-sulphureas ipsis admixtas diluant & contemperent, tandemque, quæ crassioris sunt naturæ, per renale cribrum, quæ vero tenuioris indolis, per cutis spiracula eliminant.

27. Quum vero non omnibus foterios fontes adire integrum sit, neque etiam eorundem copia ubique obtineri queat; in quæstionem venit, quamnam alia præsidia horum in locum commode surrogari possint? Nos promimus consilium, ut exclusi ab hujus remedii usu, alias puras & leves, & si conditio locusque feret, martialis prosapie aquas seligant, easque vel calide herbis roborantibus & aperientibus loco thee infusas mane bibant, vel etiam easdem tepide ad aliquot libras mane potent; adjectâ drachma una vel altera salis aperitivi, quale confici potest, ex solutione oculorum cancri, terra foliata tartari, tartaro vitriolato, arcano duplicato, nitro antimoniato, sale Sedlicensi, polychresto, absynthii & quæ sunt hujus generis plura. Possunt quoque radices quinque aperientes, & ex herbis nasturtium aquaticum, beccabunga, chærefolium, sero lactis, vel jusculo carnis incoqui, ac ut eo certior atque præstantior effectus subsequatur, mitior martis tinctura, ut est pomata vel cydoniata, instillari decocto, idque sufficienti copia, subjuncto debito ratione motus & diætæ regimine, potari. E re tamen etiam est, ut his remediis interponatur interdum usus pilularum balsamicarum leniter aloëticarum & helleboratarum, quarum virtus in roborando dejecto viscerum tono, atque in promovendis excretionibus longe est spectatissima.



D E

PULSUM NATURA GENUINA DIFFERENTIA
ET USU IN PRA XI.

§. I.

Quemadmodum in medicina à multis retro seculis, tanta opinionum & interpretationum dissensio atque discordia fuit, ut nihil fere à dubiis & difficultatibus manserit intactum, nihilque constans ac firmum exstiterit: ita illud ipsum evidentissime cernere licet in practica illa de pulsibus materia; quæ quo utilior & magis nobilis est, eo majoribus etiam dubiis & dissidentibus opinionibus involvitur. Ita complures etiam ex recentioribus reperiuntur, qui circa pulsus physiologiam non similes, sed contrarios foveant conceptus, cum dubitent, an motus ille, qui tactu in arteriis percipitur, sit systole vel diastole, item, num cordis & arteriarum motus temporis momento sit unus idemque. Alii & maxime veteres innumerabilem pulsum differentiam insinuant, quæ plane inutilis, & subtilitatibus multis metaphysicis Herophilæis referta est, quarum plurimæ nec tactu percipi, nec intellectu possunt comprehendere. Alii ex adverso nimium constringunt pulsum differentias, & duas vel tres tantum in praxi admittere volunt. Nonnulli certas pulsum species pro una eademque habent, cum alii contra distinctionem harum in praxi pernecessariam & confusionem summe perniciosam urgeant. Res clara est de pulsu celeri & frequenti, ubi plurimi recentiorum; unum eundemque pulsum sic dici posse firmiter & constanter asseverant, alii contra in praxi maximum

momentum in horum distinctione versari contendunt. Pulsus vehemens, fortis, magnus & celer subinde ab autoribus pro una eademque specie habentur, quas tamen separatas esse, alii volunt. Pauci; si experientiam consulimus, raro duo medici ad lectum ægri circa pulsus denominationem inter se conveniunt. Quod ad pulsum in praxi usum attinet; & hic variæ se sistunt opiniones, dum quidam fallacissimum esse in morbis signum & tantum in quibusdam febribus, pulsum habere usum asseverant; alii autem tam necessariam practicis existimant pulsum notitiam, ut si quis in hac non excellat, certum circa morbos præsertim latentes prognosticon atque judicium formare nequeat; unde cum Chinesibus pulsum scientiam maximopere suspiciunt & æstimant, adeo ut per longum tempus variis in partibus accurate pulsus explorandos esse statuunt. Nostri opinione origo ac fons harum dissensionum ex eo videtur profluxisse, quod veteres sanguinis circulem ignoraverint motum, & pulsum differentes species excogitatas ex speculativis differentiis corporis cujusdam solidi impulsu desumerint. Recentiores autem sicuti utilissimum inventum circulationis rarius in pathologia & praxi applicaverunt; ita contenti veterum circa pulsus regulis, neque ex hoc invento recte pulsum naturam & differentias explicuerunt. Ut itaque aliquid firmi, constantis ac rati habeamus, quo dubia omnia remo-

removere possimus, ne amplius decipiantur magistri vel alios decipiant: placuit ex fundamentis & regulis mechanicæ, maxime autem ex sanguinis circulo, pulsum indolem & veras differentias statuere & usum practicum simul ostendere.

2. Antequam ad pulsum differentias & causas varias enodandas nos accingamus, pernecessarium esse arbitror, fundamenti loco, pulsum physiologiam, sive ejus constitutionem secundum naturam præmittere, ut eo melius postea reliqua connecti & ex iusta connexione veritates desideratæ detegi ac explicari possint. Controversia autem hoc loco occurrit; an motus cordis sit unus idemque cum pulsu, sive an uno eodemque tempore, quando cor est in systole, arteriæ etiam sint in systole, & systole cordis & arteriarum verus sit pulsus, an potius inversa ratione, systole cordis & diastole arteriarum reciprocent, sive quando cor est in systole, arteriæ sint in diastole, & pulsus, quem tangimus, non systole, sed potius diastole arteriarum sit. Jam autem magnus noster SENNERTUS, in *Institutionibus Lib. 3. part. 1. Sect. IV. cap. 1.* priorem amplectitur sententiam, & ibi docet eodem tempore cor & arterias dilatari & constringi, & temerarium esse dicit, his, quæ sensibus percipiuntur, non acquiescere. Et quamvis eodem in loco dubio valde nobili suam sententiam oppugnet, dum nempe scribit: *si eo tempore, quo cor constringitur & expellit, etiam arteriæ constringuntur, sequi, arterias non posse sanguinem recipere, & contra quò tempore cor & arteriæ simul dilatantur, cor non posse sanguinem ab arteriis trahere, cum mutua hæ tractiones sese impedirent*; nihilo minus ita huic dubio respondet, *nihil incommodi ex eo sequi, dum non ita arteriæ comprimuntur & clauduntur, ut plane nihil possint recipere, sed sufficiens adhuc sit cavitas, ad id, quod cor transmittit, recipiendum: Item cor ex pulmonibus trahere neque arterias solum ex corde, sed etiam ex vicinis partibus, & venis in dilatatione trahere posse.* At vero quod hæc sententia sano conceptui, de motu sanguinis circulari, quem suo tempore cæterum non satis laudandus vir ignoravit, adversetur, quivis facile perspicere poterit.

3. Non possumus autem satis mirari ex recentioribus, celeberrimos quosdam Sennerti vestigia premere, & quibus sanguinis circulus exactè cognitus est, adhuc non vereri hæc differere: cordis motum in systole ipsissimum esse cum motu arteriarum, qui sentiatur in pulsu, & systolen notare *κατ' ἐξοχὴν* pulsum, unde eos refutant, qui motum cordis & arteriarum non eundem sed alternatum statuunt. De cætero mirantur, tantum virum GALENUM & JOHANNEM BAPTISTAM MONTANUM *Lib. I. de pulsibus dignosc. cap. V.* scripsisse, non cujusvis pulsus posse systolen seu contractionem sentiri, imo rejicit plane eos, qui diastolen credunt, quando pulsus micet. At vero pace tanti viri, qui nobis charus & semper honorandus est, asserimus cum recentioribus ferme omnibus solidioribus, pulsum nihil aliud esse, quam arteriæ dilatationem sive expansionem à sanguine cordis contractione ex sinistro ventriculo protruso & expulso in arterias, quæ à sanguinis è corde exeuntis illisu, universo sanguinis fluido communicato extrorsum tenduntur & dilatantur, & postmodum dilatatæ omnes resiliunt, & in prislinam figuram non modo redeunt, sed & ultra, aliqua ex parte constringuntur, & sanguinem novo impulsu ulterius in extremas arteriolas inque venarum origines propellant. Duplici enim motu, ipsæ arteriæ gaudent, recte sentiente BELLINO in *Tract. de pulsibus*, uno extrorsum qui dilatatio est, seu incurfus in digitos, altero motu introrsum qui constrictio est, seu subductio digiti, quæ difficillime cognoscitur ac percipitur,

recte sentiente GALENO. Circulus enim sanguinis, à quo jugi ac perenni vita nostra pendet, sine mora & quiete ulla sit, & reciprocis istis cordis & arteriarum motionibus perficitur, nec sine illis intelligi potest. Quandocunque enim cor est in systole & expellit, arteriæ sunt in diastole & recipiunt, & quando arteriæ propter copiam fibrarum, quibus constant, spiralem & musculosarum sese contrahunt, venæ & cor sunt in diastole & ex arteriis sanguinem capiunt. Memorabile hoc loco est, ipsum GALENUM jam suo tempore eandem fovisse sententiam, quæ egregie cum circulo sanguinis convenit, dum *Libro VII. de Anatom. administr.* scribit: *pulsatio cordis & arteriarum ita se habet, ut, quando cor attollitur, arteriæ demittantur, & quando cor demittitur, arteriæ attollantur, quod ex anatome cognoscitur.* Egregie quoque conspirat hanc in sententiam FERNELIUS, p. 185. *pulsus ex diastole & systole constat. Diastole id est distractio est, qua arteria se quoquo versum diffundit; systole autem contractio est, qua in se ipso undique subsidet, seque submittit.*

4. Ratione hujus pulsus non levis inter medicos dissensio & opinionum divortium hinc inde deprehenditur. Veteres unanimi ferme ore has species inter sese distinctas volunt: ex recentioribus autem nonnulli frequentem & celerem pro uno pulsu æstimandum esse, quod passim ex scriptis eorum cognoscitur; à quorum tamen sententia nonnulli discedunt, præsertim qui præ aliis sapere volunt, & tantam distinctionem esse affirmant, ut practicus illum absurdum haberet, qui vellet hos pro uno pulsu venditare. Ut igitur ex hisce dubitationibus & difficultatibus emergamus: pretium operæ est, rem paulo clarius & plenius scrutari atque inquirere. Veneranda antiquitas hac fuit in constanti sententia, cum pulsus motus sit localis, hinc quodcunque ad motum localem requiritur, & quicquid de hoc motu in universum negari & affirmari potest, illud etiam de pulsu negari & concedi debere. Et cum juxta GALENUM & SENNERTUM quinque ad motum localem requirantur, nempe primo movens, 2) spatium, per quod fit motus, 3) tempus, quod confecerint, in spatii transitu, 4) si motus ex contrariis est compositus, quies & 5) instrumentum per quod motus perficitur. Ex hisce jam differentias pulsum simplices petunt. A motore pendet vehementia & debilitas, hinc pulsus vehemens & debilis: A spatio seu quantitate distensionis magnitudo & parvitas pulsus. Tempori, quod arteria in motu consumit, respondet ejus celeritas & tarditas. Et prout parum vel diu in quiete moratur, dicitur creber vel rarus. Ab organo autem pulsus, quod est arteria, quæ nunc est mollior, nunc durior, oritur pulsus mollis & durus.

5. Quamvis autem SENNERTUS in *Institutionibus* p. 576. celerem pulsum definiat, quando arteria brevi tempore spatium suum percurrit, ipse tamen postea cognoscit, celeritatem pulsus ad spatium applicari non posse; quoniam illud spatium tactu cognosci non possit; unde monet in definiendo pulsu celeri ad motus qualitatem, an nimirum incitatus vel remissus sit, respiciendum esse. Unde FERNELIUS & cum ipso complures pulsum celerem definiverunt, quod sit is, qui brevi tempore arteriam distendit, tardus contra, qui longo tempore hoc facit. Cl. BELLINUS in *tract. de pulsibus* pag. 75. ait: *celer ille pulsus dicitur, qui ad digiti pressionem minimum temporis persistit, tardus qui diutius.* Frequens autem pulsus appellatur ille secundum SENNERTI, FERNELII aliorumque sententiam, cui breve quietis tempus subest, id est modicum interpositum intra utramque diastolen tempus. Rarus cui longum quietis tempus est, vel in quo tempus inter unam & illi succedentem arte-

arteriæ distensionem longum est, five adhuc pressius; frequens dicitur, qui brevi quietis intervallo arteriam distendit, tactumque ferit, rarus, qui longioribus intervallis id facit. Paucis: frequentia non proprie de motu dici potest, celeritas autem vel tarditas five intensio vel remissio vis motricis proprie motui competit, cum quivis motus per se ratione celeritatis five intensiois & tarditatis five remissionis æstimandus sit. Non autem unus motus in se consideratus dici potest frequens vel rarus, sed hæc saltem differentia de pluralitate & numero pulsum in certo ac determinato tempore valet. Unde v. g. dicitur motus seu impulsus frequens, quando intra dimidium horæ ex siphone aqua centies ejicitur, rarus autem, quando trecies intra dimidium horæ emittitur, ubi nempe longa quietis intervalla manent. Rectissime itaque tali in casu, ubi globus v. g. impellitur, celeritas impulsus, quoad nempe singulos ictus, potest habere locum & tamen rarius id est longo temporis intervallo interposito quivis ictus fieri possunt. Ita enim remissus ratione vehementiæ potest esse quivis ictus globi, & tamen frequentius repeti.

6. Hæc omnia rite se habent quidem in motibus, qui non sunt continui, sed certa interposita quiete gaudent, & ubi utique differentia hæc insignem & egregium usum habet, neque ita invicem celer & frequens debet conjungi. At vero longe alia est ratio in arteriarum motus negotio: hic enim motus est continuus, nec ulla eget quiete, ut fluxus sanguinis jugiter sine ulla mora ac impedimento ex corde in arterias, & ex his in venas & rursus ex illis in eas transeat & circumvolvatur. Equidem minime existimandum est, quando, post pulsum seu dilatationem arteriæ extrorsum, nullus motus vel ictus amplius tactu percipitur, feriari arteriam & veram intercedere quietem, sed potius, ut in superioribus dictum, & res per se clara & perspicua est, statim post dilatationem arteriæ five pulsum nulla quies interponitur, sed mox arteria tum propria elastica vi, tum spirituum in fibras illarum musculosas influxu, introrsum, resilit, movetur & contrahitur, qua contractione ipse sanguis in venas, urgetur & hanc rursus mox dilatatio seu ictus extrorsum excipit. Unde pulsus perpulchre comparari potest cum pendulo, quod etiam perficit uno latere in alterum motum continuum, ne ulla sensibili quiete observabili. De tali motus continui specie, quem veteres non agnoverunt, sed recentiores optime capiunt, quæstio oritur, an inter sese celeritas & frequentia, quando de ipso prædicatur, res plane sit distinctissima. Et hoc est, quod jam sub examinis incudem revocabimus. Quodcumque itaque intra quadrantem horæ bis mille pulsus in ægotante subjecto annotat medicus, illum frequentem, id est naturali frequentiorum pronunciat; quando autem in alio subjecto intra idem tempus ictus tantum mille numerat, dicit illum rarum. Jam si alius medicus advocetur, & in iisdem subjectis frequentem denominet celerem, rarum autem tardum, inde quæritur, quis verum dixerit. Nos respondemus utrumque verum. Nam impossibile est, cum motus cordis & arteriarum semper in systole & diastole sit constitutus, ut pulsum numeros intra temporis spatium exiguum crescat & major observetur, nisi quævis systole & diastole arteriarum sit citatior & intensior, seu breviori tempore fiat, non secus ac in pendulis videmus, quæ quo numerosiores certo tempore faciunt vibrationes, eo breviores adeoque celeriores debent fieri. Probe enim hic notandum est, unus ictus celeritatem non posse per se sentiri, quoniam vix punctum temporis durat. Unde felicissimus ille practicus SYLVIVS in

praxi medica Lib. I. Cap. XIX. scribit, *celeritas pulsi adscripta mente quidem concipi potest, non item digitis tangi ac percipi*, id quod etiam confirmat ingeniosissimus medicus mathematicus BELLINUS in *tr. de pulsibus p. 75.* inquit: *celer pulsus, quia digito minimo temporis persistit, in statu à naturali parum recedente, vel non datur vel tactu distingui non potest, cum naturalis motus extrorsum arteriæ vix punctum temporis duret: multo minus in statu præternaturali id sensibile erit.* Ex quibus dictis liquido jam conflare arbitror, pulsum non dici posse frequentem, nisi celeritas sit conjuncta, & celerem non posse dici, nisi sit frequens, quoniam unus ictus non potest facile ratione celeritatis distingui, unde rectissime scribit Cl. SCHELHAMMERUS in *Tract. de pulsibus p. 73.* frequentem non citra celeritatem observari. Et jam perspicua erit ratio, qua de causa nunquam legitur in historiis morborum pulsus tardus & pulsus frequens conjunctus, vel pulsus celer & pulsus rarus simul, quas species in motu interrupto dari, nemo negabit, in non interrupto autem five continuo ac jugi non possunt coincidere. Ex eo jam liquido consequitur pulsus species minime referendas esse ad cujusvis motus localis five corporis impulsus naturam, ita ut quod de quovis motu locali prædicari possit, asserendum quoque sit de pulsu. Ignoravit enim cordata antiquitas circulum sanguinis seu motum continuum, ex quo merito omnes species & differentię pulsus peti ac explicari debent.

7. Haud ignotum est, quod omnes fere tam ex recentioribus, quam veteribus scriptores unanimi sententia peculiarem differentiam pulsus celeris & vehementis constituent, dum illum intensum citatum velocem, & contrarium remissum, hunc autem validum fortem, robustum & oppositum debilem, imbecillum, languidum denominent. Et quemadmodum celeritatem à motu brevi tempore facto; ita vehementiam à moventis virtute valida vel debili ducunt atque derivant. Verum enim vero non leve hic occurrit dubium, an non celer pulsus sit etiam dicendus vehemens, five pro uno eodemque habendus, quandoquidem celeritas, ut constans est mathematicorum sententia, nonnisi vis movens aucta & intensior est, five celeritas nunquam sine intensione virium motricium concipi potest. Virium autem intensio five celeritas magnos præstare potest effectus, five multum vincit resistentiæ; jam autem vehementia motus dicitur tantum respectu effectuum, quando nempe per actionem moventis magnum mobilis resistentis vincitur, unde omnes statici & mechanici in eo conveniunt, quod celeritas parvi corporis æquare & compensare possit magnum pondus, magnamque corporis molem, cum notum sit, globum duplo celerius motum plus effectus præstare, quam globum duplo majorem in tardiori motu existentem.

8. Conspicimus porro quam mirabiles effectus tenuissima corpora, aer, ather, ignis, in celerrimo motu constituta, præstent. Videtur etiam ipse GALENUS *Lib. III. de differentiis pulsum Cap. V.* in eam conspirare sententiam, quod celeritas & vehementia pulsum non multum inter se differat, id quod sequentibus declarat. Vulgo, inquit, *apud auctores vehementiæ nomen dicitur de contenta seu forti simulque celeri actione & homines ii σφοδρῶς dicuntur, in contentam & celerem edunt actionem.* Et propterea idem GALENUS ibidem scribit, si vocabula medica constituendi potestatem haberet, sibi que liberum esset, nomina pulsibus imponere, simplicem qualitatem ac differentiam renitentium ac tactum evertentium pulsum se nominaturum *vim vel robur vel contentionem vel simile quid, differentiam vero, ex hac &*

cele-

celeritate compositam vehementiam se appellaturum. Veruntamen quia nomen vehementiæ maxima pars medicorum de una ex simplicibus differentiis usurpat, illud retinendum nec mutandum esse censet. Ut autem hæc universa clara & perspicua evadant; pernecessarium est, ex staticis & mechanicis hoc loco supponere, vehementiam duplici modo considerari posse, vel respectu molis moventis, vel respectu intensiōis vis motricis. In genere vehementia de motu prædicatur, quando ille magnum valorem habet, sive magnos effectus præstat, multum resistentiæ corporum vincit; unde etiam vehemens pulsus dicitur, qui tangentis manum valide ferit, languidus autem & debilis, qui imbecilliter & remisse manum percutit. Jam autem vehementia respectu moventis est, si magna sit ejus moles, sive copia virium motricium; unde corpus magnæ molis seu quantitatis magnum in motu præstat valorem, seu vehementem motum efficit.

9. Deinceps vehementia quoque dicitur de ipsa motus intensiōe, quando nempe ille concitatus, intensus est, sive celeriter fit; unde patet minimæ molis corpus celeriter quidem moveri posse, & magnam quoque exercere efficaciam; longe autem validiorem & gradu vehementiorem exurgere potentiam, si utrumque concurrat, nempe moles moventis corporis & simul celeritas motus. Tametsi ergo celer pulsus in se consideratus, recte sentiente GALENO, nunquam vehementiæ sit expers, recte tamen ille pulsus tantum vocatus vehemens, quando spiritus copiosi adsunt, & fibras cordis animant, qui si sine celeritate est, dicitur robustus, si cum celeritate, vehemens & simul magnus, quando non parva, sed ingens sanguinis quantitas, una cordis systole, in arterias dejectur, & tunc, quod signum est vehementis pulsus, manus fortiter & cum violentia quadam percutit. Quoniam autem non opus est, ut sub celeri systole cordis semper adsit virium sive spirituum copia, neque sanguinis magna semper quantitas ejiciatur, sed sæpe pauci spiritus sufficiunt, unde non fortiter tunc arteria percutitur, licet celer sit pulsus.

10. Cum veteres, uti in superioribus monitum, species pulsum ex motus localis natura desumerint, & hinc quot species motus dantur, vel excogitari possunt, tot etiam pulsum species finxerunt, adeo, ut simplicium & compositarum innumeræ ratione temporis, spatii, instrumenti, ordinis, æqualitatis, proportionis rythmorum, virtutis moventis, descriptæ præsertim apud GALENUM differentiæ legantur. Postea autem factum est, ut speciose has confictas, cum non in praxi deprehenderent, vel inutiles vel incomprehensibiles, & propterea multas rejiciendas esse, solide ac docte monuerint. Ita Job. Bapt. MONTANUS *Consilio* 256. de minoribus pulsum differentiis in genere fatetur, se eas cognoscere non potuisse, & GALENUM hac in re nescio quid græci habuisse existimat, atque se credere, ait, GALENUM, cum ista scriberet & pulsum genera ad minimum divideret, risisse. Postea addit, utut istæ differentiæ ratione atque intellectu colligi possint, tamen procul dubio omnes tactu perceptibiles non sunt. Egregius quoque hanc in rem exstat locus in Caspari HOFFMANNI *Instit.* p. 650. dum scribit: *De pulsibus cum brevibus & nervose scripserit Goldaldinus putaverim præferendum, illud compendium esse tribus GALENI operibus, de differentia, causis & præsignis ex pulsibus. Quin puto subtilitates esse HEROPHYLEAS, quas in super habere possit, non tantum instituendus, sed & medicus exercitatus. Hujus opinionis semina iniecit mihi MONTANUS Consilio* 257. Confirmavit

amicus in Italia, qui ex ore D. D. Bartholomæi SCHWALBII medici Pragensis senis referebat, contentum se esse tribus differentiis, æquali & inæquali, veloci & tardo, valido & debili; momentum amplius dedit Plempius in *fundam. Medic. L. V. Sect. 2. Cap. 2.* Multa, inquit, medicos de pulsibus negari, multaque mentem ingeniosam fingere, quæ sensus nequeat assequi. Acutissimus WELSCHIUS in operibus pag. 285. talia prodidit: *In universa pulsum doctrina multa incerta, superflua, imo & rarissima ad lubitum excogitata jam dudum doctiores advertunt, qui longe alium sanguinis motum in circulum compererunt, quam facultati pulsificæ ac vitali plerique alii ad musicas notas potius, quam mechanicas rationes explicandum per somnium adscripsere.* SYLVIVS paucissimo numero inclusit prolixas alias veterum differentias pulsum, & ad tria tantum reduxit capita, nimirum ad pulsus robur, magnitudinem & frequentiam. Per pulsus robustum intelligit vehementem, qui vi quadam digitos tangentis ferit; debilis vero est, quando id leniter vel leviter contingit. Magnum definit, quando multo & amplo spatio, parvum quando paucio & angusto spatio arteria explicatur. Frequentem dicit, quando eodem temporis spatio sæpius quam alias vel in aliis pulsatur: rarum vero, quando minus sæpe, quam solebat, aut decebat arteriæ expansio & ictus observatur.

11. Ut autem hæc omnia in concinnum redigamus ordinem & genuinas, quæ in praxi occurrunt & in statu secundum & præter naturam deprehenduntur differentias adstruamus; primo omnium necesse est, ut ex mechanicis supponamus, omnem motum vel celerem esse vel tardum. Vera enim proprietas motus est celeritas vel tarditas. Qua de causa recte docuit GALENUS in *libello de pulsibus ad tyrones Cap. III.* proprie ad motum pertinere celeritatem & tarditatem, quorum hæc est motus remissus, illa incitatus: & de his faciendum esse judicium ex comparatione naturalis pulsus. Secundo, omnis motus vel in magna vel respective in parva mole fit, adeoque omnis motus est, vel vehemens vel languidus. Tercio, ratione ordinis motus est æqualis vel inæqualis, æqualitate intellecta tam ratione temporis sive celeritatis, quam ratione magnitudinis sive vehementiæ: & quarto respectu mobilis magnus vel parvus.

12. Supponimus autem, motum cordis & artiarum esse continuum ex systole & diastole reciproce constantem nulla quiete comprehensibili interjecta, quapropter omnis pulsus est vel magnus vel parvus. Magnus est, si multum sanguinis, unica cordis contractione, emittitur in arteriam, adeoque ejus distensio fit magna & ampla. Parvus est, si pauca sanguinis quantitas unica systole transit in arteriam, quæ parum nec in magno spatio distenditur. Deinceps pulsus est vel celer sive velox vel tardus. Celer est, quando cor celerrimo & brevi temporis spatio sese contrahit, & sanguinem in arteriam ejicit. Tardus est, quando longiori tempore eget cordis contractio, sive paulo longius durat evibratio sanguinis in arteriam. Cum autem in singulis pulsibus gradus celeritatis vel tarditatis non bene & accurate possit mensurari, quoniam momento temporis fit; hinc rectissime ex frequentia, id est, quando eodem temporis spatio sæpius, quam alias arteriæ expansio observatur, celeritas pulsum determinari debet, ita tamen, ut frequentia tantum signum, character & mensura celeritatis sit, & raritas tarditatis, cum frequentia de nullo motu in se considerato dici possit. Bene autem in continuo motu, qui tamen ex diversis speciebus systole & diastole constat, ubi una percipitur, altera non, celeritatem ex frequentia illo perceptorum motuum numero dijudicare debe-

debemus: Tertio pulsus est vel æqualis vel inæqualis, æqualis est, quando ratione celeritatis sive frequentiae pulsum succedentium, item magnitudinis & parvitas exacta est æqualitas. Inæqualis autem est, quando jam pulsus magnus existit, alter autem parvus debilis, sive unus celer, alter deinde valde tardus, ut quasi videatur pulsus intermittens, cum tamen intermissio pulsus, ad inæqualitatem, quæ in magna tarditate consistit, optime possit referri. Quarto, pulsus est vel vehemens sive fortis, robustus, aut debilis. Vehemens est, quando magna copia virium motricium, seu spirituum, systolem cordis parit; debilis est, quando cor contrahitur ab exigua spirituum quantitate.

13. Differentiæ istæ à veteribus descriptæ vermicularis, formicantis, tremuli, ferrati, caprizantis, partim ab inæqualitate pulsum, maxime omnium autem à tunicarum, quibus arteriæ constant, convulsione dependent, unde semper fere in acutis periculosa sunt judicandæ. Quod attinet ad pulsum durum & mollem, hic identidem tantum à constitutione arteriæ pendet. Quodcumque enim à nimio dolore, spasmo vel convulsione nimis tensæ, duræ & renitentes arteriolarum evadunt tunicae, ut renitentia quædam sensum tactus feriat, dicitur durus: mollis autem fit, si fibræ tunicarum in arteriis flaccidæ, remissæ, & humido obsessæ sunt; quando magnus & vehemens cum tali arteriarum molli statu concurrit, undosus vocatur, qui prodromus est imminētis magni sudoris.

14. Ex simplicibus hisce jam statutis differentiis liquido dijudicari poterit, quanam pulsum species invicem possint conjungi, & quanam non. Itaque pulsus ex magno & celeri compositus datur, item pulsus magnus & vehemens, robustus & celer, vehemens & parvus. Secundo datur etiam pulsus frequens & debilis, item celer & parvus. Tertio datur præterea pulsus tardus & magnus, qualis in statu naturali & senibus plethoricis contingit, item in melancholicis nec non scorbuticis quibundam: nunquam autem datur celer & tardus pulsus, neque tardus & rarus, neque vehemens & debilis, nisi vocabula invicem plane confundere velimus.

15. Quemadmodum motus cordis & pulsus arteriarum, à copia, robore spirituosæ elasticæ expansivæ substantiæ, quæ tam in sanguine, quam in liquido nervo existit. 2. à debito fibrarum musculosarum cordis & arteriarum tono. 3. à sanguinis debita temperie, quantitate & consistentia secundum naturam qui fit, ex eodem fonte derivari ac deduci debet. A circulo autem debito & æquabili sanguinis ac humorum per partes solidas, vitam & sanitatem pendere, ac universam regi corporis machinam, extra dubium est, adeo, ut non inconcinne motus hic sanguinis naturæ nomen mereatur, qui quo magis moderatus & ad legem compositus æquabilis, eo perfectior natura sui conservatrix & morborum medicatrix existit; & ex adverso, quo magis deflectit ab æqualitate, moderatione, eo debiliior dicenda est natura, variis incommodis & morbis obnoxia. Multum itaque interest, ut medicus cujusvis individui circulum, tam in statu secundum naturam, quam præter naturam, cognoscat, ut deinde eo melius iudicium de dispositione ad morbos, de ipsorum morborum natura & eventu ferre possit. Jam autem nullus ibit inficias, circulum sanguinis non meliori via investigari posse, quam per tactum arteriarum sive pulsum; non superficiale, sed crebrioribus vicibus & sufficienti & decenti tempore indagandum. Is enim non modo vitium & robur totius corporis, sed sanguinis naturam & constitutionem, nec non secretionum per necessariam conditionem refert & patefacit. Et sicuti inquires sive pendulum horologiis appositum motu suo æquabili

temperato, de horologii præstanti fabrica ac usu testatur: ita etiam pulsus totius hominis naturam omniumque functionum vigorem vel depravationem facit testatam.

16. His ita constitutis primum in pulsus moderati, constantis, æquabilis, qui cæterorum lex atque mensura sit, inquirendum est. Moderatus autem pulsus appellatur, qui magnus non autem celer vel tardus, nec durus nec inæqualis. Is est ad cujus comparationem cæteri omnes dijudicari debent, nonnisi optimam totius corporis harmoniam ac temperiem, & omnium rerum præternaturalium absentiam & moderatum ac temperatum calorem designat. Hic si adest, debitam spirituscentiæ præsentiam, fibrarum naturalem tonum, & sanguinem temperatum fluxilem denotat, adeoque liberam transpirationem, bonam nutritionem, vigorem actionum animalium, omnesque secretiones in debito statu existentes, paucis sanum corpus significat. Quodcumque autem plus solito est citatior, celerior, adeoque frequentior, cor præternaturaliter, uti veteres amant loqui, irritatum indicat, nisi à causis externis & non naturalibus oriatur; si vero diutius perseverat, certe morbum cum augmento caloris, imo febrem, denotat. Et oritur plerumque à motu sanguinis intestino inordinato & spirituum crasi ob admixtionem variarum heterogenearum sæpius causticarum partium immutata. Quando vehemens est & simul celer, indicat febriculosam intemperiem & heterogenei quid sanguini, lymphæ, & spiritibus immixtum; copiam tamen simul virium & spirituum patefacit. Si vehemens & celer simul est magnus, circulatio tunc intensior ac citatior sanguinis est, & calor & fitis, urget, habitusque totius corporis calore, rubore ac turgescencia est perfusus: ubi parvus autem pulsus adest, & exilis quantitas ex corde transit in arterias atque ex venis rursus in cor, debilis & imminutus sanguinis circulus præsto est, unde transpiratio, secretiones, imbecilles ac languidæ sunt, vires paucæ & infirmæ fiunt: si talis parvus simul debilis & frequens sive celer est, virium insignem languorem, motum intestinum præternaturalem & sanguinis circulum debilem arguit, qui, si talis diu persistit, malignitatem magnumque periculum denotat.

17. Tardus pulsus sanguinis ut plurimum visciditatem & crassitiem & parvum debilemque circulum & secretionum languorem indicat, si simul autem debilis est, non adeo tutus observatur, sed virium plane succumbentium suspicionem suppeditat. Tardus autem & magnus pulsus, virium adhuc robur, fibras cordis & arteriarum tensas & crassas & sanguinem tenacem viscidum arguit. Inæquales omnes pessimi sunt, nec æqualem spirituum influxum, & sanguinem in mixtura sua turbatum & inæqualem, denunciant; præsertim si debiles simul sunt, qui nihil unquam boni præfagiunt. Ita etiam pariter intermittentes, infausti omnis sunt, & vulgo pro lethalibus habentur. At vero non universale id est: sæpius enim sine periculo id observatur, ubi nempe prava sunt symptomata, & vires ægri adhuc constant, unde haud infrequens hypochondriacis & melancholicis est, ubi sanguinis motus intestinus ob ejus crassitiem depressus est. Si autem debilitas & celeritas juncta fuerit, plerumque mortem præfagit. Durus pulsus, dolorum, spasmodorum, convulsionum ut plurimum testis est, propter fibras cordis & arteriarum spasmodice constrictas. Irregulares, caprizantes, discreti, pessimum totius corporis statum, tam quoad partes fluidas & impetum facientes, quam solidas manifestant.

18. Probe hic notandum est, non unum eundemque pulsum in omnibus individuis observari, sed quoniam pulsus à tono fibrarum musculosarum à spiri-

tuum influxu, à sanguinis natura & temperie pendent, & hæc universa mirum variant in corporibus humanis ratione sexus, ætatis, temporum anni, regionum, vitæ generis, somni, animi pathematum; hinc etiam pro diversa harum rerum constitutione variat & differt multum inter se pulsus. Ita ordinario viri præ mulieribus pulsum habent longe maiorem, vehementiorem, foeminae autem tardiores & debiliores, utpote viri firmioribus fibris & sanguine calidiori præ foeminis instructi sunt. Quare etiam in viris sanguinis circulus auctior est; non tantum enim colluviem exsuperantis sanguinis & aliorum humorum generant, quam foeminae, quæ ordinario imbecilliores & morbis facilius subjiciuntur. Deinceps cholericis & sanguineo-cholericis pulsum maiorem, celeriores ac vehementiorem præ phlegmaticis & melancholicis habent, adeoque citatior in eis est motus, excretio promptior, sanguis fluxilior quam in hisce; utpote illorum sanguis majori copia partium oleosarum sulphurearum, quæ fons ac matrix caloris & spiritusascendiæ sunt, imbutus ac præditus est. Ita enim porro quoad habitum corporis macilentiores, & qui fibras strictiores habent, vasa majora, præ obesitas, qui laxis fibris gaudent, vasaque tenent angusta, maiorem & validiorem pulsum possident; unde etiam saniores, robustiores aptiores ad perferendos labores sunt illis, & hæc jam est ratio, quare natura crassi & obesi, citius quam graciles ægrotent atque intereant. vid. HIPPOCRATIS Sect. 2. aphor. 64.

19. In ætatibus infantis ac pueri pulsus creber atque mollis est, senis contra tardus ac magnus, juvenis ac viri pulsus magnus & vehemens. Ordinario enim pueri & infantes copiosos humores, qui etiam ad auctorem ipsis necessarii sunt, multasque sordes colligunt, quæ causa est, cur pueri & infantes facilius ægrotent ac moriantur, quam juvenes & viri. Senes crassum fovant sanguinem, sed rigidiore habent fibras; unde pulsus eorum durus est, & fortius manum percutit. Mollior autem in pueris & infantibus, ob fibrarum teneritudinem & laxitatem, deprehenditur. Pulsum porro anni tempora, corporis motus, ingesta, animique perturbationes immutant. Vere medio pulsus magni sunt & vehementes, ubi etiam vigor corporis tunc est maximus, unde rarius tunc ægrotant homines & citius convalescunt. In æstate media celeriores & debiliores sunt, quoniam à nimio calore languescit virtus, intestinus autem motus solito major est. In autumno autem pulsus tardiores, molliores & debiliores fiunt, in hieme duriores & paulo vehementiores, tardiores. E regionibus & coeli constitutionibus, quæcunque calida fuerit & æstuosa, æstati mediæ, quæ vero frigida hiemi, quæ temperata, veri simillima putetur.

20. Exercitatio pulsum, adeoque circulum sanguinis auget, otium autem ac torpor tardum, debilem ac segnem facit pulsum, sanguinisque circulum imminuit. Alimenta spirituosâ pulsus edunt magnos, vehementes, crebros. Dormientium tardi, parvi, ac languidi pulsus sunt: eorum vero, qui expergiscuntur, è vestigio magni fiunt, citatiores, robustiores. Iratorum pulsus magnus vehemens & celer est; terrore affectorum, frequens, parvus, inæqualis; tristium parvus, languidus & tardus, adeoque uti pulchre scribit FERNELIUS lib. III. de pulsibus pag. 160. *quotidianæ corporis affectiones pulsus immutant, sine quarum animadversione non certo possit pulsus percipi, nec quantum per morbos à naturali distet.* Itaque pulsus naturalis observandus est, neque mox ab exercitatione, balneis, à cibo immodico, à vino, aut ab aliis causis cor & spiritus agitantibus: de pulsu nihil quicquam statuendum antequam externarum causarum vis deferbuerit, omnisque sedata sit corporis pertur-

batio. Equidem pulsus certissimum quidem signum & index motus cordis & sanguinis est, sed si solus is spectetur, & non aliarum simul circumstantiarum ratio habeatur, fallere judicando potest. Quoniam vel mille rebus, ut ait CELSUS de medicina lib. III. cap. VI. potest turbari.

21. Non levis dissensio inter medicos semper fere fuit, qualis pulsus sit essentialis febribus, vel qui pathognomonicum earum signum præbeat. Plurimi ex veteribus, ex quibus GALENUS primus est, pulsum celerem & frequentem febrem denotare in scriptis suis prodiderunt. Ex recentioribus autem plurimi pulsum frequentem pro febris genuino signo allegant. SYLVIVS in praxi medica Lib. II. pag. 460. ingenue scribit: *hoc unicum febrim omni soli ac semper competens signum est, adeoque pathognomonicum, pulsus scilicet præter naturam frequentior, quo præsentem febrem adesse, absente autem, abesse febrim, certo pronunciari queat, nec enim aliud signum, quod competat omni febrim & semper, innotuit practicis.* Reliqua enim signa omnia non tam febrem quam febris speciem aut gradum aut tempus indicant & demonstrant. ETTMULLERUS si ullus, certe hic, solidus & accuratus in praxi, p. 284. hæc differit: *pulsus naturaliter frequentior recte statuitur signum pathognomonicum febrium à Sylvio tam in Dissertatione de natura febrium, quam in praxi, quicquid in contrarium scribit, DEUSINGIUS Tract. Disquisitione anti-Sylviana.* Be garum Practicus DECKERUS in notis ad Barbette p. 102. scribit: *ubicunque pulsus præter naturam frequentior observatur, ibi febris est.* SCHELHAMMERUS in tr. de puls. p. 47. frequentem in omni febrium genere nunquam non sese offerre scribit, & cum calore earum esse signum pathognomonicum. CL. BOHNIUS in Collegio M. S. semiotico sententiam hac de re fovet sequentem: *in frequenti pulsu, inquit, causæ morbi & cordis par robur videtur, si scilicet constans & uniformis permaneat, adeoque unicum febrium pathognomonicum signum; verum si debilitas celeritati superveniat, concidere vires indicium est, magis tamen vel minus, prout nunc vehementiores plures ictus notantur.* Alias auctoritates circa hanc rem adstruendam arcessere, nullius pretii foret, saltem in universum monemus, ex falsa hypothese veteres & plurimi recentiorum distinctionem fecerunt inter celerem & frequentem. Frequentem nempe ipsum dixerunt, si intra certum tempus crebræ pulsationes fierent, per celerem autem vehementem voluerunt intellectum, unde ipse WILLISIUS tract. de febribus p. 195. pulsum febrilem illum vocat, quando arteriæ vehementius & citatius vibrant, quo loco dicit, si pulsus debito est vehementior, febris intenditur. COELIUS AURELIANUS lib. I. p. 37. ait, *febrium ponunt signum fervorem plurimum, atque immutationem pulsus in vehementia, nisi hæc ex aliqua causa manifesta fiat.*

22. Quapropter Dn. BROWN in observationibus medicis in regii praxin passim confirmat, celerem & debilem, pulsus sibi esse contrarios, adeo ut pateat, per celerem sive velociorem intellexisse vehementiorem. Quamvis autores accuratum conceptum de pulsum speciebus hæcenus vix sibi formaverint; nihilo minus tamen in eo omnes tam antiquiores quam recentiores conveniunt, quod pulsum frequentem in omni febris specie sive continua sive intermittens sit, sive benigna sive maligna, sive ejus principium sive status sit, adesse pronuncient; unde illum semper vel cum celeri, vel cum debili conjungunt; idcirco in eo conveniunt, quod pulsus frequens magis secundum ipsorum sententiam, sit dicendum signum essentialiale febrium, quam celer, quoniam eum nec in febrium principio, tempore horroris, neque in malignis adesse, vix unus est, qui statuatur.

23. Ex nostris autem suppositis jam facile patet, has sententias discrepantes, optime posse conciliari, dum celer pulsus nullus alius est quam frequens, qui utique verum est febrium signum. Est autem hæc frequentia vel major vel minor & magno aut vehementi, vel parvo & debili sese associat, pro diversitate febrium ac temporum morbi. Frequens enim debilis & parvus nunquam febre bonus, & circulum sanguinis non auctum, sed languidum denunciat. Frequens autem magnus sive vehemens, qualis solet esse utplurimum in statu continuarum, intensiorem sanguinis circulum & auctum fervorem corporis denunciat. Pulsus autem frequentis, qui fere præternaturalis est, pluribusque morbis se se annectit, causam ut inquiramus, res poscere videtur. Sequemur autem ea in re BELLINUM medicum accuratissimum, qui in *tractatu de pulsibus* cordis motum, ex influxu sanguinis per coronarias & liquidi per nervos in fibras cordis deducit, vel concludit exinde cordis musculos frequentius moveri, quando in ipsis excidit liquidum nervorum frequentius, quod contingit, cum sanguinis apta quantitate fluente ad cerebrum validius hoc ipsum premitur. Per frequentiore autem constrictionem cordis fit pulsus frequentior, hic igitur indicare poterit aptam sanguinis quantitatem ad cerebrum fluere, & hoc ipsum premi validius, quod fiet, vel si sanguis ad cerebrum subsistat, obstructis solum venis ejus, vel si sanguis earum in reliquas refluere non possit, stagnante sanguine intraneo vel in pulmonibus; vel si sanguis effervescentiam conceperit, qua majori impetu, quaquaversum nitatur, & cerebrum premat validius. Rursus moventur muscoli frequentius, stimulo aliquo irritati; si igitur sanguis æquo acrior, calidior aut hujusmodi fuerit, ita, ut in cordis sinus derivatus, molestus sit illis, cor frequentius contrahetur, eritque propterea pulsus ille frequens sanguinis stimulantis index.

24. Cum ex superioribus satis, ut arbitror, deductum fuerit, pulsuum testari non modo de sanguinis circulo ejus constitutione ac temperie, sed & motu spirituum ac virium præsentia, hinc medicus in morbis cognoscendis, in formando circa eos prudenti iudicio, nec non in administrandis medicamentis, notitia & attentio pulsuum non potest non insignem utilitatem atque usum medentibus afferre. Præcipuos saltim hic usus attigisse sufficiat. Primo autem monendum hic merito est, sollicite esse scrutandum pulsuum, nec superficialiter. Chineses medici Europæis hac in re longe sunt attentiores, cum integram sæpius horam in hoc negotio consumant. Nostri autem medici ad lectum ægri accedentes vix duas pulsationes expectant, quod maxime culpandum est, utpote sæpenumero evenit, post decem demum vibrationes arteriarum, inæqualitatem vel intermissionem quandoque occurrere, quod fit, dum sanguis inæqualiter, mixtis partibus refertus, cordis transit penetrantia. Deinde tangendus quoque pulsus est in utroque carpo, in collo, temporibus, cum testetur experientia variare sæpius pulsuum in manuum carpis, & in uno commodius, quam in altero posse explorari. Deinceps perquam dignum notatu est, etiam certarum partium pulsus in considerationem venire debere. Ita nonnunquam hypochondriaci sub costis in sinistro latere magnum advertunt pulsuum, quod fit, dum sanguis crassus & viscosus calore vel ex alia causa exagitatus celeritatem per pancreas & lienem transitum urget, at hærens in angustiis pulsationem & punctationem efficit, unde pulchre *Job. Ant. van der LINDE in selectis medicis p. 253.* scribit: *seditionem facit lien pungendo pulsandoque.* Quam sint lienis punctationes aculeatæ, experiuntur aliqui etiam sanorum, quam primum incalescunt. Ita magna pulsatio fuit illi, cui

Frid. Hoffmanni Oper. Tom. VI.

Cent. II. obs. 28. meminit Nicolaus TULPIUS; pulsatio venarum capitis interna major in febribus continuis & malignis plerumque delirium subsequens designat. Judicium enim est, sanguinem ibi congestum impeditus circulari ibique hærentem tandem inflammationem meningum gravissimam causari. Præclara sunt, quæ scribit HIPPOCRATES in *Coac. prænot. 128.* *Pulsus magnus si à nimia & excessiva sanguinis ebullitione oriatur, ita ut venæ temporum in febribus pulsant & facies turgida absque præcordiorum mollitie, longum fore morbum metuere oportet, qui nec sine largiori naturæ hæmorrhagia aut singultu convulsione aut coxendicum dolore desinit.* Ratio nobis hæc est, sanguis exsuperans quærit exitum, sive per nares sive per inferiora seu sedis venas, qui quantocius accidit, eo citius liberatur æger à morbo & contra.

25. Deinceps si in parte quadam corporis pulsatio observatur, quæ alias non advertitur, inflammationi & suppurationi, præsertim si tumor & dolor adfuerit, partem affici certissime credendum est. Porro si pulsus durus percipitur, inflammationis in partibus membranaceis nervosis signum fere indivulsum esse solet. Durities enim hæc pulsus sive nimia arteriæ tensio vibratioque spasmodici quicquam, quod ex consensu inflammationis & doloris oritur, indicat. In genere autem omnis pectore affectorum pulsus, frequens inæqualis & languidus esse solet, quod etiam contingit in cordis palpitatione. Talis autem pulsus, nisi vehementia adjungatur, nullum habet comitem calorem præternaturalem, & fit, dum sanguis non recte ac libere per cordis thalamos pulmonum lobos pertransit. In virium debilitate, dispositione ad syncopen, pulsus parvi, rari ac languidi esse solent; si autem plane non possunt percipi, interea sudore frigido corpus diffuit, mentis tamen functiones non penitus destructæ, tunc per ipsam experientiam à nobis aliquoties observatum fuit, intra sex horarum spatium mortem certissime subsequi & tale quid, à corrosivo veneno assumpto, binis vicibus à nobis quoque notatum fuit. Præterea notabile est circa tempora critica in febribus, quando natura vel per alvum vel per sudorem emittit noxia & superflua, pulsuum quidem adhuc esse languidum, nihilo minus magis ordinatus nec tam creber observatur, id quod indubitatum convalescentiæ præbet indicium. Quod si autem mollis percipitur, qualis undosus dici solet, excretionem criticam per sudorem instare salubrem, prædicendum est.

26. Tandem nec silentio prætereundum, à medicamentis subire mutationem ipsum pulsuum. Ita post purgantia vehementiora nimias sedes causantia pulsus celerior esse solet. Post sanguinis missionem præsertim in plethoricis ordinario pulsus fieri solet citior, indicio circulationem sanguinis, facto spatio majori, auctam esse bono cum eventu, dum nempe suppressi menses vel hæmorrhoides hoc auxilii genere in ordinem utplurimum redire solent. Post martialium usum pulsuum citiorem evadere, faciem fieri rubicundiorum & calorem augeri, testis est ipse *Cl. SYDENHAMUS*, cui etiam experientia adstipulatur: sudorifera valentiora ex volatilibus oleosis conflata notabiliter cordis & pulsus motum intendunt ac augent. Ex adverso anodyna, opiata, nitrosa, pulveres præcipitantes, acida & quæ intestinum sanguinis motum depressunt, & sulphur ejus figunt atque enervant, moderatiorem & sedatiorem pulsuum in doloribus, inflammationibus ac febrili intemperie efficiunt. Talem effectum plus vice simplici notavimus quoque in praxi à nitri & camphoræ debita mixtura. Postremo loco in exhibendis medicamentis, quod etiam suo tempore WILLISIUS in *tract. de febribus* probe observavit, cautiones & regulæ non levis momenti à pulsuum de-

sumuntur. Ita prohibentur purgatio & vomitio à pulsu nimis citato & vehementi, etiam ab humili & depresso, utpote quando sanguis in vehementi motu ac ebullitione est, secretiones ut plurimum feriantur: si vires autem deficient, quod ex pulsu languido dignoscitur, pharmaca eas magis prosterunt atque convellunt, quamobrem medicus, qui vomitoria vel purgantia ægrotantibus propinare conatur, inprimis pulsum exploret. Quando enim pulsus est validus, & motus sanguinis sedati, excretiones dictæ artificiales optime quadrant. Eadem hac cautione opus est, in exhibitione sudoriferorum & analepticorum omniumque, quæ calorem & motum sanguini foenerant. Quod si enim pulsus validus & creber est, talis

modi spiritiosa, quoniam sanguinem nimis rarefaciunt, & intestinam ejus motionem accelerant, plus damni quam emolumenti afferre solent. Hoc pacto enim sæpe delirium aliæque inflammationes acceruntur. Adhuc magna circumspeditione opus est pulsumque exploratione in exhibendis narcoticis sive opiatibus. Hæc quoniam potentia gaudent motus sanguinis & spirituum nimium sistendi, adeoque vires infrigendi; hinc nunquam, ubi pulsus debilis languidus & parvus est, ea ipsa sunt exhibenda, sed potius cane pejus & angue vitanda. Si autem simul inæqualis intermittens est, somnum perpetuum facile accerunt.



D E

GENERATIONE MORTIS IN MORBIS.

§. I.

P Rinceps ac præcipuus professionis salutaris scopus, & unica medentium intentio, esse debet, ut mors, qua non datur terribilius hisce in terris malum, à corpore, velut mentis humanæ apto domicilio atque organo, omnibus modis propulsetur & jucundissima vita, quæ omnis felicitatis, quam in terra consequimur, fundamentum est, diu conservetur. Quum vero non propinquior via ad mortem sit, quam per morbum valde gravem & periculi plenum: hinc medici utique palmaria cura esse debet in sanandis morbis, providere ne mors ipsis superveniat, utut ex voto & penitus omnes expugnare in ipsius viribus minime sit positum. Ut autem hoc feliciter & fundata ratione præstet, maxime omnium non modo morborum, sed & mortis proximam & mediatas causas exquisite pernoscere debet. Atque ut verum, more nostro, non dissimulemus, perpauca medicorum sunt, qui mortis ingenium recte perspectum habent, ut, in quo consistat, & quo modo, & processu ex morbis successive producat, & qua methodo præcaveri possit, accuratam habeant notitiam. Neque hujus rei deficit ratio, quia perpauca genuinas morborum causas, & motus, qui ad mortem deducunt, habent perspectos, multo minus, quomodo eas averti possint, recte sciunt. Juvat itaque non parum, ad saluberrimam hujus rei notitiam acquirendam, diligentiori anatome corpora defunctorum scrutari, & feralem partium internarum læsionem annotare, & hinc, non sterilibus speculationibus, sed ex mechanico-physicis principiis, genuinas destructionis corporeæ causas eruere. Neque dubium est, quin, si paulo majori studio mortis in morbis accedentis, causas ac rationes investigemus, futuram sit, ut multi serventur, qui à morbis facile perituri essent.

2. Prima itaque nostra meditatio erit, ut, quid proprie mors sit & in quo ejus natura contineatur, perspiciamus. Neque vero felicius in hujus scrutinium descendere nos posse arbitror, quam si prius vitæ, cujus privatio mors est, rationem recte evolvam. Fatemur autem hic rursus ingenue & aperte, ex veterum monumentis, qui omni solida physica & medica theoria carebant, vitæ cognitionem depromi non posse: siquidem in universum fere omnes, non secus ac vulgus solet, in adsignandis vitæ, sanitatis, morborum ac mortis causis ad entia sensibus & rationi plane incognita naturam, spiritum, animam, calidum

innatum, energiam vitalem confugiebant, quæ nec explicari nec demonstrari, multo minus causis aliis & effectibus demonstrandis vel detegendis adplicari poterant, quia solum nomen, quod nihil significat, pro causa rerum venditari nequit. Communis veterum fuit sententia, vitam consistere in conjunctione animæ cum corpore: & mortem fieri, quando illa corpus deserit. Quid vero anima sit in sua natura atque essentia, quid ejus conjunctio cum corpore, & quomodo hæc corpora à putredine vindicare & ejus diffusio corruptionem inducere possit, minime ab illis explicatum legimus; unde meræ sunt fictiones, quibus nihil commercii cum intellectu humano intercedit. Quapropter ii aliquanto clarius procedunt, qui principium quoddam movens, quod animam vocant, in corpore admittunt, & hoc ipsum, mediante motu progressivo & excretorio, corruptibilem subinde materiam à corpore propulsare adserunt. Equidem non incongrue hic causa conservationis & durationis corporis, in se corruptibilissimi, motibus adscribitur; nihilo minus tamen causam motuum, quam maxime nosse debet medicus, nondum satis explicato vocabulo nobis tradunt. Scitissime HIPPOCRATES *Lib. de arte* §. 3. existimat: *ex nominibus species rerum minime provenire, quia nomina lege quadam naturæ insita sunt, res autem non lege sancitæ, sed naturæ germinant existunt.* Itaque ubi res pro causa allegatur, hæc demonstrari & definiri prius debet, cui deinde facile nomen imponitur. Namque ejus indolis debet esse definitio realis, ut ex hac vel axiomata vel theoremata profluant, quorum adplicatione & connexionem postea causæ & effectus incogniti detegi & demonstrari possint. Atque adeo, cum anima, item natura, principium motus corporis nostri dicitur, res non explicatur, sed tantum, quod ex hac definita profluere debebat, proponitur. Siquidem non aliter sese res habet cum hac definitione naturæ, ac si panem definire vellem per substantiam nutrientem, qua minime scio quid panis sit, sed quæ ejus sit efficacia. Deinceps, cum magna distinctio sit inter motus percipere eosque dirigere, & ipsos motus facere: necesse quoque est, ut non ab una, sed à diversa causa hæc dissimiles operationes proficiantur, quæ ideo etiam diversis nominibus, melioris doctrinæ gratia, debent insigniri. Jam vero corpora movent & moventur, & hi quoque motus certis fiunt legibus: anima vero percipit; secundum vero motuum leges nequaquam fiunt perceptiones. Hinc quoque anima ab eo, quod motum in corpore nostro præstat, est distincta.

3. Qui

3. Qui porro vitam conservationem corporis mixti à putredine, & mortem ejus corruptionem dicunt, hi effectum vitæ & mortis, non vero causam ponunt; siquidem experimento quotidiano compertum est, corpus in mixtione & structura sua integrum diu posse servari e. gr. intenso frigore exsiccatione humidi in putredinem admodum prout, aut balsamatione, ubi tamen vita non est præsens; sicut etiam contra mors recte prædicatur de corpore, quamvis ejus corruptio, ut videmus in iis, qui morte violenta pereunt, nondum adsit. Neque etiam motus excretorii directe & absolute vitam tuentur, utpote qui vitio laborantes potius ad morborum causas explicandas maximi sunt momenti.

4. Quum autem vera definitio vitæ & mortis sit genuinum demonstrationis & theoriæ medicæ fundamentum; hinc utique eam recte ponendam esse censemus. Nos vitam animantium dicimus esse cordis & arteriarum motum, cujus beneficio tota fluidorum massa per omnes corporis canales circumvehitur, ut totum corpus mixtum & structum à corruptione vindicetur. Primam vero motus cordis & solidorum causam dicimus esse liquidum purissimum & tenuissimum cerebri, nec non tenuem & spirituosam aëris & alimentorum portionem in sanguinem delatam, quorum influxu cor debito constrictionis & dilationis motu gaudet, quo vigente universa postea sanguinis & humorum massa in perennem orbem ac circulum volvitur; hoc vero præsentem, non modo anima in organis ipsi destinatis percipit & dirigit, sed & corpus nutritur & à corruptione præservatur. Hoc vero liquidum, secundum HIPPOCRATEM, *impetum faciens*, & humores mobiles aëre & alimentis ingestis sustentari, vel ex eo patet, quod harum materia penitus detracta vitam perire necesse sit, atque adeo patet, ut vita conservetur non tantum egestionibus, sed & ingestionibus opus esse.

5. Quapropter investiganda utique jam erit causa, quare homo non diu sine aëre & alimentis subsistere possit. Dicimus ob id perpetuo & indies necessarias esse ingestiones, quia corpus animantium ita constructum est, ut paucillum ejus, quod assumitur, remaneat, sed omne fere rursus per varia emunctoria ejiciatur. Nam quandocunque bene, calculo exquisito posito, perpendimus, quod robustum corpus vix ac ne vix quidem ultra triginta libras fluidorum in canalibus circumvehat: & ejusmodi quantitatem per potum & cibum intra duos minimum dies in corpus adsumi, hinc ex eo consequitur, excretiones fere ingestionibus debere esse proportionatas atque æquales. Cujus rei rationem adferimus, quod fluidæ in tubulis contentæ partes jugi intestino calido motu, qui individuus progressivi comes est, successive valde alterentur, & à naturali crassi discedant, ut motibus vitalibus continuandis, minus idoneæ atque effictæ reddantur, quare ut hæ excernantur, & novæ accedant necessarium est. Et animadvertimus quoque, novum semper vigorem, non solum universo corpori, sed & animo, mox ab adsumtis alimentis accedere, infallibili consequentia, cordis & omnium musculorum motui robur ac vim motricem ab aëre & alimentis, adeoque ab extra accedere, ut itaque non opus sit ad occultam & spiritualem quandam causam refugere.

6. Sanguinis vero circulus ad durationem & integritatem corporis humani conservandam summe necessarius est, quia hujus beneficio non tantum inutiles & in corruptionem fatiscientes salino-sulphureæ partes per congrua emunctoria jugi motu expelluntur: sed & recens & apta materia, tam ad alendas partes, quam ad secretionem spirituosam in cerebro & nervis liquidi, cujus vigore partes & sentiunt & moventur,

Frid. Hoffmanni Oper. Tom. VI.

adducitur. Uterius hic sanguinis circulus non invenisse vinculum animæ cum corpore dici potest. Nam quamdiu hic in corpore viget, & per cerebrum ac sensoria corporis bene fertur; tamdiu etiam anima suas functiones exsequitur, & simul ac sanguis cessat moveri ad cerebrum, nec liberum per ejus vasa transitum invenit, protinus omnis sensatio, cogitatio, memoria, ratio, motusque voluntarius expirant. Quicunque itaque vult vitam conservare & efficere, ut corpus non minus atque anima suis muneribus fungatur, is liberum sanguinis per omnes corporis partes, maxime vero earum nobilissimam, cerebrum, fluxum ac refluxum præstare ac tueri debet.

7. Explicata sic vera vitæ ratione, jam facillimum erit mortis naturam atque proximam causam investigare. Hanc itaque in plenaria cordis motus & sanguinis circuli destructione, optima ratione, ponendam esse censemus. Quare etiam secundum vulgi sensum is dicitur mortuus, ubi nullus amplius vel intra vel extra corpus animadvertitur motus. Et, quia cordis motus fluidorum progressum maxime regit atque moderatur; hinc quoque non sine ratione cor primum vivens ac ultimum moriens à veteribus salutatur. Quia vero interdum ad tempus motus cordis & sanguinis circulus suspenditur, ut sit in syncope; hinc cavendum est, ne hanc pro morte habeamus, cum hæc potius irrevocabilis motus cordis abolitio sit, qualis ex morbo præcedente & circumstantiis præsentibus facile poterit distingui atque dijudicari. Hunc circularem extinctum sanguinis motum, putredo, neque minus omnis sensus ac motus privatio, presso pede sequitur.

8. Ex quibus apparet, quod omnia ea, quæ cordis pulsus & circuli sanguinis progressionem plenarie auferunt, ad inferendam mortem potentissima sint, & quod in omnibus morbis lethalibus mortis causa unice in iis quærenda sit, quæ hos motus extinguendi facultate prædita animadvertimus.

9. Quamvis vero homo non uno morbo interimatur, sed tot viæ ad mortem, quot magni morbi sint: attamen id indubitata certitudinis est, quod omnes mortiferæ causæ eo conspirare debeant, ut fluidorum motus & cordis pulsus in corpore nostro ex toto deficiat. Atque ut hanc maximi momenti in medendo veritatem clarissime demonstramus, certe opera & labore dignum existimamus. Neque vero nobis melior ad detegendam hanc veritatem suppetit via, ac si funestis morbis defunctorum anatomicas observationes paulo majori cum cura ac studio intueamur, occurrentia ibi phænomena bene perpendendo. Hinc quoque accuratiora, quæ possunt haberi, observata anatomico-practica in præsentem contemplari institui-mus, quo facto clarissime apparebit mortis causam minime ab incorporea quadam re ac energia fieri; sed crasso & sensibili mechanismo, ad motus sanguinis omnimodam destructionem tendente, quem & sensus capere, & ratio perspicue intelligere poterit, proficisci.

10. Hisce diductis initium scrutinii mortis jure meritoque facimus à funestis capitis morbis, quo numero omnium consensu apoplexia, lethargus, epilepsia atque phrenitis continentur. Primo omnium itaque quærenda causa est, quare sæpe sani & robusti homines, in optimo vigore ætatis & virium constituti, ex apoplexia tam repentina morte occumbere debeant. Et hanc ipsam jam nobis accuratior anatomie hoc morbo defunctorum, quod sanguinis vel feri extravasatio in cerebro sit, clarissime suppeditabit. Et testatur de apoplecticis clarissimus WEPFERUS, quo nemo in hoc malum majori solertia inquisivit, se semper fere extravasatum sanguinem, ex plexu choroideo prodeuntem, reperisse. Videatur

tractatus de apoplexia. Deinde Cl. WILLISIUS refert *Lib. de anima brutor. cap. IX. pag. 222.* historiam, ubi juvenis sanguineus, plethoricus & vino indulgens, apoplexia correptus fuit, in cujus capite aperto anterior cerebri cavitas sanguine grumoso, cum feri copia, impleta viscebatur. WARTHONUS in *Adenograph. Cap. II.* narrat: se in iis, quos apoplexia subito abstulerat, ventriculos cerebri sanguine refertos deprehendisse. Haud dissimilis quoque observatio legitur in *M. N. C. D. II. A. X. obs. 161.* dum dissecto apoplectico multum saniosi feri ex cerebro diffluit, sinus falcatus cruore turgidus & ventriculi lymphâ repleti fuerunt. Alius apoplecticus in ventriculis copiosum sanguinem serosum extravasatum habuit, & grumus sanguinis ovi columbini forma ibi repertus fuit, nec non quartus ventriculus & infundibulum sanguine turgebant. *vid. M. N. C. D. III. A. I. obs. 154.*

11. Et quemadmodum ex extravasato sanguine apoplexia nascitur, ita in lethargo, paralyfi & hemiplexia, quæ sæpe diuturnis cephalalgis, scorbuto & aliis gravioribus affectibus chronicis lethales superveniunt, ingens feri copia in cerebro conspicitur. Sic in quodam post cephalalgiam diuturnam ex lethargo demortuo WILLISIUS *Lib. de anima brutor. p. 155.* cerebri anfractus tam exteriores, quam cavitatem internam aqua limpida impletam invenit. Puer trium annorum, ex ophthalmia & exanthematibus faciei soporosus & cæcus factus, sub meningibus ingentem vim limpida aquæ stagnantem habuit, cujus copia etiam ventriculos atque thalamos opticos implevit, quos comprimendo cæcitatem intulit. *vid. WILLISIUS de anima brutor. cap. IX. de paralyfi pag. 225.* Ex cephalalgia scorbutica demortuo ventriculi copiosiori & acriori lymphâ turgebant, adeo, ut uncia decem effluerint, ut *M. N. C. D. II. A. X. obs. 3.* testantur. Paralyticum sectum vasa cerebri atro sanguine turgentissima, & ventriculos ejus copioso sero distentos ostendisse, auctor est Cl. PEZOLDUS *vid. Obs. 60.* Idem confirmat Cl. HARDERUS *Obs. 34.* cum paralyticus & à longo tempore cachecticus sectus fuit, ubi versus ventriculos & prope basin cerebri & cerebellum serum copiosum occurrebat, ubi etiam polypus oblongiusculus extractus est.

12. Ex epileptico vero malo qui tolluntur, habent plerumque vasa cruore turgida, & serum, quod à sanguine secedit, in inferiori cerebri parte stagnans. Idem fit, quando quis ex phrenitide moritur, huic enim funesta epilepsia ordinario solet supervenire. Ita apud HARDERUM *obs. 34.* epilepticus quatuordecim annorum sanguine inflata cerebri habebat vasa, atque ejus ventriculi anteriores, vesicæ instar aqua distentæ, protuberabant, è quibus, incisione facta, ichor copiosissime profluxit, qui in tertia & quarta cavitate non minori quantitate stagnavit. Atque ejusdem tenoris est observatio, quæ à WILLISIO *Lib. de morb. convuls. pag. 504.* adducitur, ubi in foemina motibus convulsivis & epilepticis mortua vasa meningum ita sanguine turgebant, ut quasi tota cruoris massa in capite aggesta videretur, cerebri vero substantia humore aquoso supra modum irrigata fuit & ventriculi aqua limpida repleti. Similem historiam idem gravissimus auctor *cap. X. pag. 542.* describit: ubi in foemina, pathematibus convulsivis & hystericis oppressa, vasa cerebri mirum sanguine distenta fuerunt, ut ejus vix quicquam in reliquo corpore effluerit, omnes vero cerebri cavitates & recessus colluvie serosa pleni erant. Simili ratione solertissimus & anatomicus & medicus PETRUS PAW in *obs.* commemorat in epileptico & phrenitide demortuo *obs. 8.* vasa meningum sanguine atro & adusto distenta, & in cerebello putridum humorem fuisse repertum. Et Joh. RHODIUS in

phrenitide membranas cerebri cum rubore adeo tumentes invenit, ut venæ à cerebri substantia separari possent. In alio piæ matris vasa inflammata reperta fuerunt. *vid. Cent. I. obs. 39. & 40.*

13. Sequitur jam, ut, cur extravasatio sanguinis vel feri in capite tam subito mortem inferat, demonstramus. Cerebrum sanctius animæ domicilium & tenuissimi ac purissimi liquidi, quod vim, robur, tonum ac motum fibris & solidis corporis nostri partibus conciliat, secretorium ac officinam esse, & saniorum veterum fuit sententia & diligentior recentiorum observatio anatomica corroborat, siquidem corticem ejus & medullarem substantiam vasculosam, atque medullam oblongatam ac spinalem, principium nervorum & scaturiginem spirituosam, qui immittitur, liquoris esse, plurimis ratiociniis probatur, siquidem constricto vel dissecto membri cujusdam nervo, ejus sensus & motus protinus exspirat, diffracta vero vel discissa spinali medulla partes infra læsionem illico omni sensu & motu privantur, cervice vero fracta & læso vel obturato ejusdem spinæ principio, animans illico vita privatur. Quoniam vero ex medulla oblongata, in basi cerebri sita, decem nervorum paria oriuntur, quæ sensorii maxime præsumunt & ad præcipuas vitales partes, cor & pulmones, abeunt: facile patet, hac à sero vel sanguine extravasato obstructa vel compressa, influxum nervi mobilissimi liquidi intercipi debere, quare non mirum, animam nihil amplius percipere & cor atque arterias activo & vitali systoles motu privari & ita subito mortem accelerari.

14. A morbis capitis progredimur ad eos, qui in pectore sedem ac domicilium suum habent, atque interimendi potentia valent. Et hi sunt syncope sic dicta à veteribus cardiaca, asthma & catarrhus suffocativus, peripneumonia & phthisis. De hisce etiam experientia anatomica edocemur, quod non alio modo internecioni dent hominem, quam quod liberum circulum ac transitum sanguinis per cor & pulmones fiant atque intercipient. Testantur id polyposæ concretiones vasa obturantes, neque minus scirrhusi tumores & corruptiones saniosæ ac sphacelosæ, quæ pulmonum substantiam hisce in morbis infestant. Et quod attinet primo ad syncopen, quæ sæpius subito, & præter omnem opinionem, plures extinguunt, imo in lecto, quem sani firmique conscenderant, mane demortuos reperiri, non novum, sed res crebræ experientiæ est: causa tam subitæ mortis non alia, quam viscidior & coagulata membranacea compages, quam polypum vocamus, & quæ prius cordis columnis & lacertis, quasi radicitus implantata, tandem, vi dissoluta, ostia majoris vasis obturans, liberum iter ac motum sanguinis penitus intercludit, unde protinus tota sanguinis circulatio extinguitur. BARTHOLINUS *Lib. de lacteis thoracicis Cap. XIV.* scribit, se in iis, quos subito fato extinctos aperuerit, majora cordis vasa sanguine concreto repleta invenisse. Plura de hac re exempla legi possunt in *dissertat. Malpighii de polypo.* item in *Disputat. Cl. BERGERI de polypo cordis & in Boneti anatom. pract. L. I. S. II. & L. II. S. II. & dissert. nostra de subita morte præcavenda.* Solent vero polypi plerumque dextrum cordis ventriculum, eique adnexa vasa, occupare & ampliores quoque ibi esse, quam in sinistro: fortasse quia redux sanguis à nutritionis & transpirationis negotio multis particulis tenuibus liquidis, sulphureis & salinis depauperatus, viscidior est. Accedit, quod à chylo ex ductu thoracico adfuso, facile in coagulum filamentosum præcipitetur, quod in auriculæ finibus, vel amplis dextri ventriculi columnis, subsistens, ex adsociatis præterfluentibus feri viscidis partibus, paulatim & successive in magnam molem extenditur.

15. At vero polypus, vasa majora obstruens, non modo

modo syncopes & inopinatae mortis causa est : sed saepissime etiam aliis gravibus & periculi plenis pectoris malis sese adfoeciat, & cito suffocatione interimit, siquidem in iis, qui asthma & catarrho suffocativo tolluntur, plerumque polyposas in vasis cordis & pulmonum concrecentias repertas fuisse, observationum fide constat, ita D. GREISELIUS *M. N. C. A.* 1670. *obs.* 74. scribit : *quotquot catarrho suffocativo, quo homo frequentius morte decedit subita, mortuos aperui, in omnibus corpora callosa, viscida ac glutinosa in corde deprehendi.* Ita quoque Cl. PEZOLDUS *obs.* 61. in asthma suffocativo & pectoris hydrope cor magnum polypo solido repletum, cum magna in vasis copia atri coagulati cruoris observavit. In *M. N. C. D. II. A. X. Obs.* 174. asthma ex polypo cordis & pulmonum cum duro lobo sinistri pulmonis, descriptum nobis tradunt. Inter alia vero notabilis est observatio, quam citavimus in *diff. de asthma convulsivo*, ubi medicus castrensis Doct. GRÆVIUS vel quingentos milites asthma suffocatos incidit, atque semper vel hydropem pectoris vel polypum, cordis ventriculos & vasa obsidentem, adinvenit. Nos quoque ipsi testari possumus, quod aliquoties nobis obtigerit occasio asthma suffocatorum cadavera dissecandi, ubi polypus in vasis pulmonum & cordis, nec non serum foetidum, extravasatum, in thoracis cavo deprehendimus, cujus causa merito difficiliore sanguinis cursui per pulmones debetur, unde serum secedens per lymphatica vasa rupta exprimitur, inque pectus descendit, quare graviore asthma perpetuo fere hydrops pectoris junctus est. Qua de re vide egregias observationes collectas in CAROLI PISONIS libro *de morbis ex sero* pag. 217. item apud BAGLIVUM in *praxi* p. 107.

16. In peripneumoniis non modo pulmones materia crassa & cruore repletos ac inflammatos, sed & saepissime polyposas in vasis concrectiones exhiberi, anatoine addocemur. Tale exemplum recensuimus in *differt. de peripneumonia* §. 10. Dissecuimus nempe juvenem hoc malo demortuum, cujus exenti pulmones apparebant valde duri instar carnis, vesiculæ quasi carnea crassa rubicunda substantia fuerunt infarctæ & cum discinderetur, pauca quantitas ichoris putridi sanguinei effluebat, nullo præsentis pure : pendebant, libra examinati, V. pondo, & injecti in aquam constanter fundum petebant : in arteria aspera spumosa & tenax materia reperiebatur. Præterea erat memorabile, arteriam & venam pulmonalem, circa confinia cordis, continuasse polyposas concrectiones, quæ ex corde & auriculis, quarum columnis & fibris firmiter erant connexæ, ramisque horum vasorum, extractæ, ultra uncias duas pendebant. Cordis autem ventriculi cruore crasso, nigricante toti erant constipati, nec non in pericardio sex ad minimum cochlearia aqua instar carnis loturæ cernebantur.

17. Rara quidem sunt exempla eorum, qui hæmoptysi pereunt : attamen non ita pridem memorabilis casus hic loci evenit, ubi virgo octodecim annorum, teneræ constitutionis, ex mensium obstructione, diu respirandi difficultate premebatur, cui malo inopinato enormis sanguinis profusio, cum tussi, ex pulmonibus, aliquot reiteratis vicibus, superveniebat & tertia vice tanta copia erupit cruor, ut aliquot vasa repletet, ubi simul frustra magna, dura, carnea ex faucibus extrahebantur, quæ, examine à me instituto, postquam aqua calida sufficienter elota fuissent, non alia ac polyposæ & fibrosæ membranaceæ concrectiones erant, & ultra quatuor uncias pendebant, quæ in spiritu vini rectificato usque eo adservantur. Quia vero à tam immani sanguinis profluvio omnes vires penitus consumptæ erant, tertio die virgo honestissima animam placide efflavit. Rarissima hæc historia nos docet, anevrysmatibus vel varicosis

pulmonum vasis polyposæ hæc corpora infedisse, unde illis disruptis, in majores bronchiorum ramos, simul apertos, penetrarunt. Neque dubium est, gravem hæmoptysin saepissime ex magna obstructione, à polypo vel scirrhescentia lobi cujusdam pulmonalis, provenire, unde libero sanguinis itinere impedito, ipse magno impetu ad alia vasa ruit, quæ nimium distendendo, tandem aperit funestum fluxum producendo. Id quod singulari observatione WILLISIUS in opere posthumo *Sect. I. cap. VII.* confirmat, ubi totus lobus sinister à tumore scirrroso adeo obriguerat, ut penitus constrictus & quasi lapideus appareret : quare non mirum est, si cruor rapidissime per pulmones trahendus alicubi è vasis eruperit.

18. Qui palpitatione cordis detinentur, eos polypus cordis plerumque interficit, qua de re habemus egregium locum in BAGLIVI *prax. med. Lib. II. pag.* 229. ubi scribit : *sectis cadaveribus plurimis, observavimus in cordis ventriculis polypos, anevrysmata, grumos sanguinis ingentes & consimilia, inter quæ, elapso quinquennio, notavimus in cadavere sexagenarii, palpitatione demortui, anevrysmata ingentis magnitudinis in aorta ascendente, ubi proxime à corde exoritur & in cavitate anevrysmatis polypum magnitudine ovi anserini.* Jam facile patebit ratio, quare palpitatione sola corporis incurvatione vel capitis ad terram inclinatione, quoties redit, cohiberi possit. Quo spectat insignis observatio, quam Cl. NABOTH, *medicus & professor Lipsiensis* nobiscum communicavit, ubi juvenis, quoties in lecto lateri dextro incumberebat, spirandi difficultate, cum suffocationis metu cordisque palpitatione laboravit, quæ protinus decubitu in latus sinistrum cessabat, tandem, cum repletus mortuus dissecaretur, ingentis magnitudinis polypus auriculæ dextræ impactus inveniebatur. Ceterum in iis, qui palpitatione pereunt, ordinario ingens feri copia in pericardio observatur. Qua de re legi meretur PISO *de morbis à serosa colluvie oriundis* pag. 107. item OLAUS BORRICHIVS in *act. med. Hafn. pag.* 173. & TULPIUS *lib. IV. c. XX.* FERNELIUS *lib. V. patholog. cap. XI.* Neque alia hujus extravasati feri origo est, quam difficillimus sanguinis per cordis thalamos transitus; unde serum per meatus auriculæ dextræ nimium dilatatos expressum, intra pericardium descendit.

19. Accidit quoque interdum, ut quidam asthma te intereant, ubi pulmonum moles amplissima & ad sensum integra totam thoracis cavitatem replet : cujus mortis causa quærenda est in tunica illa glandulosa, quæ interius totum bronchiorum tractum investit, quæ, tumida vel scirrhusa, impedit, quo minus aer intrare & exire possit, unde sanguinis quoque liber per vasa pulmonum cursus intercipitur. Ejusmodi observationem habuimus ante aliquot annos in Theologo primario Cizensi, qui multos per annos ex difficili respiratione laboravit, tandem hac decessit; aperto thorace pulmones totum ejus spatium occupabant, & nihil præternaturale ibi viscebatur, præterquam quod multa scirrhusa tubercula & granula in ramis bronchialibus internis existerent. Huc quoque trahendam esse censeo *observ. XIX.* Cl. RUYSCHII, qui nobis proponit casum, ubi virgo per multos menses orthopnoea suffocativa laboravit, in qua culter anatomicus, in parte pulmonis, magnum pellucidarum vesicularum acervum detexit, quæ ab aere expansæ & ita obstructæ erant, ut levi compressione ab aere evacuari vix potuerint, neque impulsus per asperam arteriam flatus ullum commercium cum hisce expansis vesiculis habebat. Similem quoque casum in sequentibus observationibus XX. & XXI. refert, ubi in viro dispnoea mortuo observavit, totum malum hæsisse in obstructa pulmonis parte, in qua omnes vesiculæ opilatae & extensæ apparebant. Idem in puero octo

annorum observavi. Deinceps in demortuo principe stupendum in modum pulmo inflatus erat & universam thoracis cavitatem implebat: mortuus est orthopnoea & hæmoptysi; & arteria aspera sanguine grumoso & florido repleta erat, tota pulmonum superficies exterior innumeris ulculculis obiecta. vid. VERZASCHA in *obs.* pag. 307.

20. Ex affectibus chronicis ipsa phthisi pectorali & consummata nullus facile majoris periculi est, dum hominem omnibus viribus lente depauperat, & inopinato suffocat. In defunctis culter anatomicus sequentia detegit. Primo in omnium fere, qui phthisi decedunt, pulmonibus ingentes scirrhotitates vel dura tubercula, quæ partim pure scatent, partim instar steatomatum aliquid sebacei continent, reperiuntur. vid. *M. N. C. D. III. A. III. obs.* 188. PEZOLD. *obs.* 64. 74. *Act. Hafn. P. I. A. 1673. obs.* 4. HARDERUS *obs.* 46. Secundo in nonnullis pulmonum lobi, penitus abscessu & pure consumti; in quibusdam exsiccati, nullum amplius pus fundentes, visuntur, & propagationes asperæ arteriæ, aliaque vasa sanguinea, albescunt, ut, absque ulla dilaceratione, à pulmonum deperdita substantia solutæ cernantur. vid. PETR. PAW. *obs.* 22. *it. obs.* 25. & HARDERUS *obs.* 51. *it.* BARTHOL. *Cent. V. obs.* 7. Tertio in pericardio, in thorace, sæpe ingens feri impuri foetidi copia offenditur, qua de re consule HARDERUS *Anat. pract. obs.* 41. 45. *it.* 47. 51. & 52. *M. N. C. D. I. A. I. obs.* 15. & BLANCARD. in *anat. pract. p.* 189. *M. C. D. II. A. III. obs.* 199. PEZOLD. *obs.* 74. *it.* 92. PLATERUS in *obs. Lib. III. pag.* 689. Quarto observamus in dissectionibus phthysicorum, quod pulmones ut plurimum firmissime costis itemque diaphragmati adhæreant, quod passim fere in omnibus observationibus, quæ anatomen phthysicorum tradunt, legitur. Quinto polyposæ massæ, vel cruor coagulatus, sæpenumero in corde vel pulmonum vasis phthysico malo defunctorum subsistunt, de quo phænomeno consuli potest HARDERUS *Obs.* 45. *it.* 49. & 52. BARTHOLIN. *Hist. Cent. V. Obs. VII. it. M. N. C. D. II. A. V. obs.* 65. Sexto, concrementa calculosa tartarea interdum in exulceratis pulmonum sinuositatibus reperiuntur. vid. HARDERUS *Anatom. pract. obs.* 45. & *M. N. C. D. II. A. IV. obs.* 35. & *D. III. A. III. obs.* 188.

21. Hæc omnia & singula phænomena, in cadaveribus phthysi demortuorum conspicua, tum morbi genium & symptomatum rationem, tum interitus causam perspicue satis declarant. Siquidem prima phthysicos incunabula atque originem, qui ex obstructis minimis pulmonalibus vasculis tumefactis ac induratis deducunt, recte ii, mea quidem sententia, judicant. Hæc tubercula, quæ cum vesiculas pulmonales tum bronchiales ramos occludunt, impediunt, quo minus aer pulmones satis distendere possit, unde libero sanguinis itinere intercepto, cum difficultate, angustia atque anxietate fit respiratio, eoque gravior, quo majorem scirrhotitas pulmonalem substantiam occupat. Hæc quoque tubercula & mole sua, & acrimonia lymphæ vel purulentæ materiæ, quam fundunt, nervosas bronchiorum partes continuo irritando, continuæ, siccæ & ferinæ tussis causam subministrant. A libero vero sanguinis transitu per pulmones præpedito, regurgitat ille in cor, quod nimium distendendo, maximas anxietates, quæ phthysicis sæpissime superveniunt, parit, ubi etiam, facta accumulatione, in polyposam massam successive coalescit, qua postea difficilior adhuc sanguinis per pulmones & cor circuitus fit, unde in universo venarum systemate circulatio fit tardissima. Hinc serum secedens, inque porosam partium substantiam influens, facit tumores pedum & abdominis, qui subinde phthysicis junguntur & feralem catastrophem indicant. Simili ratione serum, secessum faciens à sanguine, in cordis au-

ricula, præsertim dextra, utpote tenuissimæ structuræ, hydropem pericardii facit, & tandem etiam ex ruptis vasis lymphaticis serum in thoracem exundat. Frequentior vero pulmonum ad pleuram adhæsiō sero, quod ex poris pulmonum, sub difficultate transitus, exprimitur, tribui debet. Hoc enim, exhalantibus partibus tenuioribus, tenax fit, quo partes conterminæ conglutinantur. Igitur quo gravior est læsiō pulmonum, consumptio, scirrhotitas & obstructio, eo majus, ob difficiliorem sanguinis transitum, suffocationis periculum imminet, qua plures phthysicorum intereunt. At phthysi perpetuo fere hecticus calor, cum ingenti virium defectu, jungitur, qui liquido nerveo à putredine inquinato jure est adscribendus. Quum vero continuo calore omnes succi & vires successive consumantur, lente sic cordis motus fatiscit & tandem extinguitur, atque mors, sine turbatione mentis, plerumque inexpectata & ex improvviso supervenit.

22. Ex chronicis malis vix ullum frequentius hydropem interimit, qui plerumque aliis gravibus affectionibus, ut asthmatis, quartanæ, cachexiæ, scorbuto supervenit. Causam mortis si inquiremus, inspectione cadaverum diligentiori, immanem copiam feri putridi, tam in abdominis cavitate, quam sæpissime etiam in pectore & pericardio deprehendimus, quod interiora, præsertim omentum, (quod nunquam non consumtum & putridum visitur) aliaque viscera corrupta, & ipsa adeo intestina, livida ac sphacelosa reddit. vid. BARTHOL. *Cent. III. Hist.* 81. *M. N. C. D. II. A. VII. obs.* 187. *it. obs.* 188. *D. III. A. III. obs.* 161. *D. I. A. IV. obs.* 3. *D. II. A. VI. obs.* 31. *D. I. A. VI. obs.* 165. PEZOLD. *obs.* 77. 88. 65. HARDERUS. *obs.* 72. PETR. PAW. *obs.* 5. *it.* 28. Et ubi hæc feri extravasatio in hydropem decumbentibus non observatur; ibi etiam nondum omnis spes salutis evanuit. Quod vero ut plurimum paracentesi factam mors subsequatur, in causa est aer admissus, quo accedente feri putrefactio multum promovetur. Hæc ubi incipit, non modo omnis appetitus tollitur & virium reliquiæ consumuntur, sed & calor præternaturalis, sine quo non facile hydropicus moritur, supervenit atque incenditur, qui penitus omnes vires & superstites vitales nervorum succos ita exhaurit, ut cordis musculus à motu suo vivifico in totum dejiciatur.

23. Fit quoque hic morbus sæpissime ex asthma, asthma vero ex polypo cordis, in cavitate ejus dextra detento, aut saltem tumore nodoso majorum vasorum ostia coarctante: qualis etiam in hydropicis dissectis non raro adhuc visitur. vid. *cent. III. Misc. N. C. observ.* 117. *it.* PEZOLD. *obs.* 77. *M. N. C. D. III. A. III. obs.* 161. *it. obs.* 65. & BONETUS in *Sepulchreto*. Neque rationem difficile est invenire, siquidem, retardato sanguinis per pulmones motu, is regurgitans ad venarum systema ibi tardius movetur atque subsistit, unde feri in partibus inferioribus, per quas semper adscensus sanguinis, quia perpendicularis, difficilis est, magna collectio fit. Ceterum difficilior illa naturalis sanguinis in hepate trajectio ex vase portæ venoso in venam cavam, præclare sentiente CL. STAHL in *diff. de vena portæ*, multarum chronicarum passionum, quam maxime hydropis, causa potentissima utique censetur. Nam sanguis ex hoc vase regurgitans in pancreas, lienem, mesenterium, intestina, hæc viscera multum infarcit, tumidaque reddit & minimos glandularum ductus occludendo, hæc omnia scirrhotica, dura efficit, sicuti etiam hoc modo semper fere, facta inspectione, oculis sese ingerunt. vid. *M. N. C. D. 2. A. 8. obs.* 100. *it.* *D. 2. A. 6. obs.* 73. *D. 1. A. 6. obs.* 68. *it. obs.* 165. & 221. HARDERUS *obs.* 71. & 72. PETR. PAW. *obs.* 5. & *obs.* 28. PEZOLD. *obs.* 88. *M. C. D. 3. A. 3. obs.* 161. *D. 1. A. 4. obs.* 3. BARTHOLIN. *Cent. 3. hist.* 81. *D. 2. A. 7.*

A. 7. *obs.* 187. & D. 2. A. 1. *obs.* 2. D. 2. A. 5. *obs.* 73. RIVERIUS *cent.* 2. *obs.* 53. RUYSCH. in *obs.* 45. & 46. Per indurata & obstructa vero viscera, libero sanguinis cursu prapedito, fit ejus stagnatio in vena portæ, & inde serum secedens ad vasa fertur lymphatica, quæ, nimium distenta & à tono suo dejecta, vergunt in hydatides, (quarum ingens sæpe copia in dissecctis visitur,) quæ disruptæ illam exitialem feri extravasationem efficiunt.

24. Est adhuc alia hydropis origo, ex sanguinis circulo per uterum, ob vasa, à materia polyposa vel cruore coagulato varicosa reddita, vel ob ejus scirrhescentiam impeditiori facto, quo fit, ut serum secedens copia & impetu in vasa lymphatica feratur, quæ in hydatides abeuntia tandem rumpuntur. *conf. M. N. C. D. 2. A. 9. obs.* 99. HARDERUS in *apiario obs.* 87. VESALIUS *Lib. V. de corp. human. fabrica cap. IX.* & MAURITIUS CORDÆUS *comment. in Lib. 1. HIPPOCRATIS de morb. mulier.*

25. Sæpissime quoque mors in cachecticis, tabidis & diuturna lenta ac hæctica febre detentis, ex ingenti abscessu interno rupto nascitur, ubi foetidissimum pus non modo viscus, cui insidet, penitus consumit, sed & vicinas partes, quas tangit, eadem corruptione inficit. Ejusmodi vero abscessus maxime mesenterium, hepar, uterum, renes occupant, & fiunt identidem à sanguinis libero circulo, propter magnas obstructiones & compressiones vasorum atque scirrhositates viscerum intercepto, unde stas sanguis concipiens vasorum tunicas perrumpit, ac cavitates sibi formans tandem in pus foetidum convertitur. Abscessibus autem plerumque jungi tumores & scirrhositates, fidem luculentam observationes anatomicae faciunt. PARÆUS *lib. 23. cap. 36.* in foemina mesenterium penitus scirrhosum observavit, quod libras decem cum dimidia pendebat, cui infiniti abscessus, sua quisque cystide, inclusi erant. Ita enim HILDANUS *cent. 1. obs.* 7. meminit puellæ, cujus mesenterium tumoribus duris scirrhis & steatomatibus refertum fuit, præcipue circa venas, quæ ad portam tendunt. Et COITER in *obs. anat.* in hydropico tumorem & magnam colluviem puris foetidi, quod hepar putredine infecerat, animadvertit. Plura vide in WARTHONI *tract. de glandulis pag. 50. it.* RAYER. *M. N. C. D. 3. ann. 3. obs.* 131. D. 3. A. 3. *obs.* 73. Hepar quoque interdum occupant & renes, qua de re vid. *M. N. C. D. 3. A. 3. obs.* 73. *it.* D. 1. A. 4. *obs.* 114. & HILDANUS *cent. 2. obs.* 39. *it.* HARDERUS *obs.* 76. Frequentius vero abscessus in musculis abdominis, præsertim à causa externa, residet, quo interius rupto mors ut plurimum subsequitur. vid. HILDANUS *cent. 2. obs.* 37. *it.* RIVERIUS *cent. 1. obs.* 92. *M. C. D. 2. A. 1. obs.* 88. Ab apostemate vero mors fit, quia febre lenta, quæ pedissequa abscessuum est, omnes paulatim vires exhauriuntur, & tota humorum massa successive in excrementa resolvitur. Abscessu autem rupto prodiens pus non modo conterminas partes simili corruptione inquinat; sed & foetore suo tenuissimum illud fluidum, quod fibris vim motricem confert, admixtione sua contaminat, unde recte HIPPOCRATES *S. VII. a. 8. Ex tuberculi intus ruptione exsolutio, vomitus & animæ deliquium fit.*

26. Qui ex calculo renum & vesicæ moriuntur, hos quoque corruptio putredinosa, vitali moventi insensibilissima, interimit. Nam si quando calculus in vesica vel uretere hæret, efficit, ut per renes transcolatum falsum serum immane quantum & ureteres & renes distendat, qua vehementi distensione & compressione vasorum illi inflammantur atque in abscessum vel putrilaginem, qua penitus tandem consumuntur, degenerant. vid. *M. C. D. 2. A. 8. obs.* 153. *it.* BARTHOLIN. in *cent. 3. hist.* 35. *it.* *M. C. D. 1. A. 2. obs.* 81. *it.* 2. A. 2. *obs.* 13. & PETR. PAW. *obs.* 3. *it.* D. 1. A. 4. *obs.* 23. *it.*

VERZASCHA *cent. 1. obs.* 2. *it.* FERNELIUS *de partium morbis & symptomat. lib. 6. cap. 12. pag.* 316. RIOLANUS *lib. 2. cap. 29.* NIC. TULPIUS *lib. 3. obs. cap. 6.* PANAROLUS *Pentecost. quart. obs.* 31.

27. Præterea plus vice simplici in iis, qui ex calculi tormentis & ischuria diem suum obierunt, ventriculi inflammationem, ex suis signis dignoscendam, nec non epilepticas convulsiones supervenientes animadvertimus, procul omni dubio ob atrocissimos spasmos in ventriculum per consensum, vel etiam ipsum in caput derivatos. Quare nihil dubitamus, quin, si in dissectione cadaverum etiam has partes maxime ventriculum & intestina, majori cura simul scrutemur, (id quod minus factum esse in iis, quas perlegi, observationibus vidi, dum dissectores, quando calculum invenerunt, veluti mortis causa deprehensa, aliarum partium inspectionem supervacaneam crediderunt) in inflammatione & sphacelatione, præsertim in senibus & debilitatis, proximioris mortis causam reperiamus.

28. Præsentior adhuc mortis causa inflammatione & sphacelatione ventriculi & intestinorum, qua plerique, qui morbis acutis & malignis decedunt, item ex veneno vel validiori medicina, nec non peste, morbo Hungarico, dysenteria, colica vel iliaca passione, aut acuta vel omnino alia febre succumbunt, in dissecctis reperitur. Siquidem in nullis corporis partibus spasmus, inflammatio vel sphacelatio periculiosior est, quam in iis, quæ nervosæ ac membranosæ texturæ sunt, ac exquisitiore sensu ac motu gaudent, neque minus cum universo nervorum genere consensionem fovent. Hujus vero generis esse ventriculum & totum intestinorum canalem, vix ullus addubitabit. Venena vim suam maxime exserere in ventriculum & vicina tenuia intestina sphacelo ea corripiendo, sectiones & observationes plures hinc inde prostantes declarant. Ex omnibus vero WEPFERUS in *tr. de cicuta aquatica*, qui plurima experimenta in animalibus instituta collegit, evolvendus est. Aquæ frigidæ potum, corpori calefacto copiose immissum, vel brevi mortem, vel alias ad mortem tendentes afflictiones invehere, res certæ, quotidianæ & indubitatae experientiae est. Neque alia tam subitæ & funestæ catastrophes suppetit ratio, quam quod frigidus potus celeriter ipsum sanguinem, in vasis ventriculi & intestinorum coagulet atque in motu sistat, unde, nisi mature discutatur, necesse est, ut in sphacelum abeat. Tristissimum ejusmodi exemplum in *dissect. de benignorum remediorum abusu & noxa* fuse recensuimus. Huc quoque referendam esse subitam sæpius existimo mortem, qua senio confectos & viribus orbatos ex usu fructuum refrigerantium, v. g. melonum, malorum persicorum, interdum defungi historiarum monumentis legimus: siquidem notum est, quam pronus senum, quin etiam scorbuticorum & imbecillium sanguis in sphacelositatem sit corruptionem, quæ in illis levissima sæpe ex causa quam facillime suscitatur. Quam graves etiam noxæ, immo ipsa mors haustum frigidum, post graviores iracundiam assumtum, excipiant, notissimum est.

29. Qui pestilentia & febribus malignis tolluntur, ventriculum & intestina sphacelata nunquam non exhibent; quod etiam ferme de omnibus febribus acutis, ardentibus, cholericis, semitertianis, variolis, aliisque intelligendum est. Nos plena fide attestari possumus, quod omnes eos, quos ex febre quadam acuta mortuos scimus, ex inflammatione ventriculi, intestinorum vel meningum supervenienti decessisse deprehenderimus; quod non modo ex symptomatibus dijudicavimus, sed & ex dissectionibus, quas ipsi habuimus, & de quibus alii fidem certam nobis fecerunt, apparuit. Legi possunt ejusmodi historiae apud

apud FORESTUM *lib. 6. obs. 13.* DIEMERBROCCIIUM *p. 273.* HELMONTIUM *p. 887.* BARTHOLINUM *cent. 3. historia 68. it. cent. 3. ep. 92. it. 29. M. N. C. dec. 3. anno 3. obs. 100. item PEZOLDUM obs. 87. BARTHOLINUM hist. anat. cent. 5. observ. 4. M. N. C. dec. 1. an. 6. obs. 161. BLANCARDUM obs. 67. & in Dissertatione nostra de inflammatione ventriculi.*

30. Neque alia morte diarrhœa vel dysenteria correpti, quam intestinorum sphacelatione, perimuntur, id quod non solum signa sed & sectiones nobis manifestant. Laborant vero maxime hisce in morbis crassa intestina sphacelationibus & multis tuberculis. vide *Misc. N. C. dec. 2. dec. 6. obs. 104. PLATER. lib. 3. p. 821. Acta Hafniens. p. 2. obs. 17. p. 40. & BARTHOLIN. cent. 6. hist. 2. BINNING. cent. 4. observ. 48.* Neque aliter mors colica spasmodica vel iliaca passione correptis, quam intestinorum inflammatione & sphacelatione contingit. *Vide M. N. C. decad. 2. ann. 3. obs. 193. item obs. 61. BLANCARD. anat. pract. cent. 5. obs. 2. HILDANUS obs. 61. centur. 2. KERCKRINGIUS obs. 42. WILLIS de medic. oper. p. 28.* Qui ex vermibus infantes moriuntur, eos identidem intestinorum sphacelatio ad lethum deducit. vide *Acta Hafniensia tom. 2. p. 88. & LENTILII Miscellan. medica p. 365.*

31. Illud ulterius notatu perquam dignum est, quod, qui colica spasmodica, vel veneno diutius morante, aut aliis atrocioribus tormentis moriuntur, plerumque intestina invicem connexa atque coalita habeant. Ejusmodi casus B. Dn. OCHLITZ Clausthalensium medicus, nec non Cl. NABOTH Lipsiensis retulit. Similes casus vide in JOH. RHODII *cent. 2. obs. 32. it. PETR. PAW. obs. V. & BARTHOL. hist. anatom. cent. 3. hist. 6. HOECHSTEDTERUS dec. 10. casu 6. M. N. C. decade 2. anni 7. obs. 15.* Causa hujus peculiaris phænomeni vix alia poterit reperiri, quam quod spastica vehementiori strictura serum ex intestinorum tunicis & vasculis minimis exprimitur, quod avolantibus partibus tenuioribus glutinosius redditum, illam coalescentiam efficit. Eadem ratio est, quare in pectoris affectibus, ubi difficillima est sanguinis per pulmones tractio, pulmones tam facile pleuræ & vicinis partibus adnascantur, de quo supra diximus.

32. Puerperas, quæ ex febre inflammatoria intereunt, uteri sphacelo tolli & symptomata & sectiones nos docent. *Evolve M. N. C. dec. 1. ann. 2. obs. 85. it. dec. 2. ann. 4. obs. 94. dec. 1. ann. 4. obs. 192. & dec. 3. ann. 3. obs. 123. ann. 1. obs. 22.* Infantes pusillos & adhuc fugentes ex torminibus ventris, nec non epileptici convulsionibus, ab acrimonia biliosa caustica mori, res vulgo notissima est; neque dubium, intestina, ex quibus non raro ad ultimum nigra secedunt, sphacelata in dissectionibus reperiri debere, modo frequentiores corporum & infantilium & omnis ætatis defunctorum, in foro medico fierent.

33. Ex hisce jam allatis historiis, & cadaverum variis morbis extinctorum dissectionibus, satis perspicue

edocemur, quomodo mors, sive omnimoda machinæ nostræ, quoad structuram & motus, destructio, ex morbo produci soleat. Et quamvis morborum causæ multiplices sint; attamen eas, quæ mortem proxime inferunt, quatuor potissimum generibus contineri, attentiori observationum anatomicarum consideratione certiores reddimur. Quandoquidem vel in capite cruoris aut feri extravasatio & stasis vel in pectore polypus aut tumor ostia viarum, per quas sanguis vel aer fertur, occludens subitæ mortis causa est. In reliquis morbis, iisque acutis, ex stasi sanguinis suborta sphacelatio sive corruptio putredinosa, fœtida, subito vires prosterbens; in morbis autem chronicis, stagnatio humorum, lente viscera & partes exedens, corrumpens vel exulcerans, genuinæ mortis causæ censendæ sunt. Absoluta itaque mors, sicut plenariam corruptionem corporis nostri organici post se trahit: ita quoque ejus principium corruptio existit, eaque primum particularis est, quæ successively universalis evadit. Etenim nihil in universa rerum natura è diametro magis durationi corporis nostri contrarium est, quam putredo, quæ ex quiete & motu progressivo humorum extincto numquam non prognascitur. Et ubi hæc incipit in corpore animantium, non modo ejus partis, cui insidet, structura ac mixtio dissolvitur, sed, quod maximum, illud, quod motum ac robur cordi, arteriis omnibusque fibris motricibus præstat, subito inficitur & illius admixtione corrumpitur. Quo magis vero putredo vires & incrementa sumit, & in nervosis, sensibilibus partibus residet, eo plus virium destructiva est. His vero destructis incipit sanguinis circulus per cor atque pulmones totumque corpus tardior fieri & tandem penitus exstingui. Et hæc est causa, quare respiratio cum stertore quodam intercepta, & membrorum convulsio mortem plerumque & proxime antecedere soleant, eo, quod sanguis in capite, æque ac in pulmonibus, incipiat in confiniis mortis subsistere ac motu privari.

34. Diductis hac ratione causis mortis proximis, promptum jam ac facile esset alias veritates felicissime inde, non sine magno in medendi scientia usu, deducere: videlicet, quid faciendum sit medico, ut in morbis ferales has mortis causas antevertat & depulset, item, quomodo temeraria medicina quam facile causa mortis accersi & procurari possit.

35. Illud vero ultimo loco non transmittendum esse censeo, quod vulgariter causa morbi cum causa mortis admodum confundi soleat. Fit quam maxime id à medicis in morbo defunctorum dissectionibus, ubi, occurrente magna extravasatione vel corruptione, protinus lethalitatem morbi exinde dijudicant. Adeoque sic perperam à causa mortis ad causam morbi argumentantur, quæ, annon potuisset ullo remedium genere tolli, & ne exinde mortis causa fieret, præcaveri, res sæpius adhuc in quæstione & indagatione versatur.



FRIDERICI HOFFMANNI

OPUSCULA MEDICO-PRACTICA,

QUÆ CURAM MORBORUM ET MEDENDI METHODUM,

NEC NON CIRCUMSPECTUM REMEDIORUM USUM SPECTANT.

P R Æ F A T I O.



ETIIT à me sæpius majorem in modum Vir egregius & de utilitate publica promovenda eximie meritis *Dnus Vick*, celebris nostræ Academiæ Bibliopola, ut ipsi selectiorum mearum, quæ ægrius nunc haberi possunt & valde desiderantur, exercitationum iteratam editionem concederem, quum olim Nobili Leydensium Bibliopolæ *Haackio* tres Decades dissertationum, quæ ad valetudinem tuendam maxime pertinent, recudendas permiserim, neque minus ante decennium insigni viro *Dno Bartholomæo*, industrio Ulmensium Biblio-

polæ duas earundem decades, quas inter eminent, quæ de saluberrimis aquarum mineralium viribus agunt, in lucem publicam denuo producendas concesserim. Nolui igitur honestis *Dni Vickii* desiderii deesse, sed potius omni modo satisfacere. Placuit vero ex ingenti dissertationum, quæ per quadraginta & ultra annos me Præsidente, ductore & directore habitæ sunt, apparatu & numero, eas potissimum seligere, quæ ad artem nostram circumspecte & cum bonis ægrorum rebus exercendam faciunt longèque utilissima themata complectuntur; quas non modo revidi, correxi, sed & optimis observationibus ac cautionibus adjectis hinc inde auxi & illustravi, certissima spe fretus, fore, ut, qui artem cum prudentia exercere sibi proposuerunt, fructum inde percipiant insignissimum.

Ego sane non possum, quin hoc loco ingenue profitear, me, postquam per dimidium sæculi & ultra artem exercendo & docendo innumerabiles in curandis morbis errores ac nocivos lapsus animadverti, nihil magis curæ cordique habuisse, quam ut pro virili & nulla unquam prætermissa occasione, medendi scientiam in meliorem ordinem redigere, ejusque fundamenta firmiora reddere, allaborarem. Equidem, pulcherrimæ illæ, quæ & medicum ornant & ad ipsam artem egregie faciunt scientiæ, cujus generis sunt, accuratior & curiosior per solertiolem anatomen corporis humani notitia, intima rerum naturalium per egregia & varia experimenta physica, chymica, & mechanica investigatio, itemque ars pharmaceutico-chymica, nostro tempore ad summum prope evectæ fastigium conspiciuntur; nihilo minus præcipuæ illæ, quæ primas in arte tenent partes longe præstantissimæ, quales sunt vera & rationalis pathologia ac therapia non satis excultæ multo minus omnibus numeris absolutæ habentur. Quod si enim iis, qui in Academiis cursu medico absoluto artis opus adgredi

parati

parati sunt, vel jam dum artem exercuerunt, morbi historia, ut eam resolvendo verum morbi genium, originem & causas demonstrare & remedia iis removendis idonea invenire debeant, offertur, nihil quod experientiæ respondeat, vel cum naturæ ordine conveniat, exercitatus medicus deprehendet. Quandocunque eadem morbi historia aliis, qui ad medicinam faciendam magis existimantur idonei, traditur, dici vix potest, quanta circa singula, tum ratione causæ morbi, indiciorum curandi ac remediorum, tum ratione judicii de morbi eventu dissensio observe-tur ac discrepantia, quæ indies fere, quod dolendum est, non minus animadvertitur, si quando duo vel tres medici ad lectum vocantur, adeo ut non vulgus solum, sed eruditi etiam nihil exinde firmi, nihil certi in arte salutifera esse judicandi ansam & occasionem arripiant. Cujus certe miserabilis status causam, si quis paulo pensu-liculatus scrutari velit, vix inveniet aliam, quam quod non adeo firmo & stabili morborum scientia, quæ pathologiæ nomine venit, & cui unica vera therapia superstru-cta est, fundamento nitatur. Equidem philosophia corporis humani vivi & sani, quæ physiologia dicitur, per incomparabile illud circuli sanguinis inventum & per tot egre-gia experimenta physico-mechanica ita perfecta & exculpta est, ut nihil fere amplius in ea desiderari videatur, sed dimidium fere sæculi effluxit, antequam divinum illud circuitus sanguinis inventum ad pathologiam rationalem reddendam introductum fuit. Prostant quidem nostro tempore à celebribus hinc inde Viris conscriptæ pathologiæ seu theoriæ morborum medicæ, quæ ab iis, quibus in verba jurare magistri solenne est, multum laudantur & supra modum ac suis absolutæ numeris efferuntur, quas ta-men si paulo accuratius consideramus, magna ex parte mancas & imperfectas conspi-cimus; siquidem nec perspicuas virium & imbecillitatis corporis humani, nec veras moriendi necessitatis causas reperire ibi licet: de morborum epidemiorum, qui mul-tum medentibus faceffunt negotii, origine altum est silentium: humorum intemperies & virulentæ qualitates propemodum relegantur: concretionum in vasis, quæ polypo-rum nomine veniunt & immedicabiles morbos producant, nulla fit mentio; de mi-rabili nervosarum partium consensu, sine cujus notitia vix ac ne vix quidem sympto-mata explicari possunt; ibi plane non agitur: corruptio partium sphacelosa, quæ ple-rumque mortis tam acutis quam chronicis passionibus supervientis causam consti-tuit, habetur rarissima: doctrina de pulsibus, magnæ in judicio de eventu morbi fe-rendo utilitatis, ibi neglecta aut penitus omissa animadvertitur; & si ad rationalem actionum corporis nostri præternaturalium explicationem respicimus, operationes ani-mæ cum causis physico-mechanicis & actiones morales cum physicis mirum quan-tum invicem confunduntur. Dantur adhuc alii doctissimorum & Celebrium Virorum pathologici libri, in quibus plus materiarum morbificarum, quam motuum vitioso-rum habetur ratio; quandoquidem diversissimæ intemperiei pro stabiliendis morbo-rum causis adducuntur humores, cum tamen ex motuum inæqualitate & vitio sive errore in locis, dum ex uno loco ad alienum humorum fit transitus, præcipua sympto-matum in morbis ratio deduci debeat.

Perversam vero theoriam minus rectam medendi methodum sequi, res in se est per-spiciua. Quod vero tam macra usque eo facie inceserit pathologiæ scientia, non alia, me judice, subest causa, quam quod, qui ejusmodi libros luci exposuerunt, medici falsis magis opinionibus & hypothesebus imbuti quam sufficienti historiarum morbi apparatu instructi eosdem conscripserunt, cum tamen sufficiens observationum clinicarum adparatus & exacta historiarum cujusdam morbi quoad omnes circumstan-tias delineatio & notitia præcipuum & verum tum pathologiæ tum therapiae rationa-lis sit fundamentum. Nam diligenter adnotatæ ejusmodi morborum historiæ conve-nienti meditationi accuratiorique scrutinio subjectæ non modo verum morbi genium, originem & causas, tam antecedentes quam proximas, perspicuas reddunt, verum etiam proprium cujusvis individui habitum, vires, consuetudines, quorum omnium consideratio maximum ad ferendum de morbi eventu & remediorum operatione judi-cium affert momentum, optime indicant & detegunt; & quemadmodum ex antece-dente morbi notitia pro causæ, naturæ ægrotantis & temporum morbi differentia, diversus remediorum observatur effectus: ita ex diligenter adnotatis ejusmodi morbo-rum relationibus, ad pleniorum remediorum quoad vires notitiam perveniri optime posse censendum est. Deinceps, ex diligenti historiarum morbi consideratione is pul-cherrimus nascitur fructus, ut discamus, non multis & variis magno pretio paratis, sed paucis, selectis, iisque facile parabilibus, diætericis magis, quam pharmaceuticis, clementioribus, quam valentioribus, simplicibus, quam compositis, domesticis, quam exoticis convenienti tempore, ordine, & dosi usurpatis, graves admodum & rebelles afflictio;

afflictiones sanari posse quam optime. Tum quoque id beneficii plenæ morborum historiæ afferunt, ut acres medentum dissensiones de certo medicamentorum in morbis effectu, partibus ad experientiam provocantibus, egregie possint componi, quum vix melior, vix præstantior via detur ac ratio de medicamentis, quibus virtutibus, verisne an falsis emineant, judicandi, quam per intimiorem historiarum morbi cognitionem. Quæ cum ita sint, ut ex observationum accuratiori studio descriptarum inopia & defectu tardus admodum segnisque artis salutaris huc usque fuerit progressus, sperare bono omine licet, ex meliori earundem descriptione & apparatu majus in dies certiusque pathologiæ futurum esse incrementum. Etenim, cum paucissimi medicorum sint, qui in morbis, iisque maxime chronicis curandis, ad historiam morbi & circumstantias, aut individui ægrotantis naturam cognoscendam respiciunt, fit profecto, ut plurimi in ceteris medicinæ partibus satis versati viri empirice artem exercent. Id quod vel ex eo liquido constare arbitror, quod nihil fere magis solenne habeant, ac innumera in uno morbo medicamenta præscribere, præscripta sæpius mutare, & aliis subinde formulis ægrotantem obruere, quarum ingredientia si quis paulo intuetur curatius, non tam ex simplicibus & usu satis cognitis, quam ex mirum ineptis veterum compositionibus ea confecta inveniet, unde difficillime sane, quem sibi præfixum medicus habeat medendi & juvandi scopum, cognoscere licet, tantum abest, ut ex tanta remediorum mole innotescat. Et si experientiæ credere fas est, certum ratumve habemus, vix quicquam, præter crebram remediorum mutationem, in perspicendis morborum causis medici arguere ignorantiam: hæ quippe ut plurimum non multiplices, sed simplices tam multa tamque varia ut removeantur haud desiderant. Vero enim verior est regula illa practica: quo medicamentum simplicius, eo est melius, quia indicationi magis satisfacit, & quod experientia edocti scribimus, quanto minor est simplicium in formula numerus, tanto medicamentum operatur potentius atque felicius. Sicut enim in omnibus, quos edit, effectibus simplex natura est; ita etiam in medendo simplicitate quadam gaudet. Multo vero magis empiricam praxin exercent ii, qui posthabita non minus morbi historia, quam neglecta plane vitæ victusque ratione spretisque simplicioribus, morborum, præcipue chronicorum, curationes variis specificis, ex auro & mineralibus paratis, metallorum sulphuribus aliisque chymicis moliuntur, aut qui nimium paucis universalibus excretiones naturales tantum promoventibus morborum contumaciam oppugnari posse sibi & aliis persuadent: qua perversa medendi methodo vel multum ægrotantibus damni inferunt, aut, si minus forte obsunt, parum tamen proficiunt.

Quum itaque à multis retro annis magna illa, quæ artis nostræ successum huc usque retardarunt impedimenta & communes in praxi medica errores animadverti, nihil mihi semper potius fuit, quam ut omnibus ingenii nervis ex magno & sufficienti historiarum morbi & veritatum facti apparatu ita studium medicum perficerem, ut cum certa & fundata ratione, citra magnos sumtus, tollendis morborum causis apta nata remedia medici invenire, inventa pro ægrotantium ac circumstantiarum varietate dextre applicare & sic commodis mortalium inservire tuto & recte possint. De qua methodo, modo & scopo rem medicam tractandi præsentibus, quas in lucem nunc correctas emitto, dissertationes, testimonium perhibere possunt plenissimum, quarum frequentem lectionem crebramque meditationem & imitationem non possum non omnibus, quibus caute & efficaciter sanare volupe est, commendare quam maxime.

Inveniet quippe primo omnium diligens & attentus lector, quid natura, quidve ars in medendo valeat, adeoque de utriusque effectu convictus optime cavebit, ne aut contraria naturæ moliatur, aut ne forsan, quod naturæ tribuendum est, id artis opus existimet. Dein, quum maximum medendi momentum in eo potissimum contineatur, ut varias morborum accessiones, status, periodos & declinationes recte quis advertere & certo ordine, tempore dosi & continuato usu morbo remediis occurrere sciat, iterum omnino in opere hoc perlegendo industrius artis indagator habebit, quem ducem eligat, quem tuto sequatur. Sed quid juvaret omnis de recte applicandis prudenterque continuandis remediis instructio, nisi scire simul liceat, quænam adplicare remedia ex usu sit, quibusque tuto subinde fidere possimus. Ad quod dijudicandum sicut solertior medicamentorum quoad vires exploratio multum affert momenti: ita nec huic scopo deesse volumus, sed remediorum virtutes tam à priori, quam à posteriori seu effectu cognoscendas monstravimus, ex his vero effectibus peculiarem ægrotantium naturam deducendam ostendimus. Pertinet huc quoque specialis medicamentorum quorundam simplicissimorum ratione operandi modi & ipsius usus tractatio, quo respiciunt maxime, quæ de medicina simplicissima, inedia, motu, aquæ potu, de

aquarum mineralium, de lactis, de feri lactis, de mannæ in medendo usu, nec non de medicamentis ex diverſi generis ſalibus depromptis agunt, quibus intentus rerum medicarum ſcrutator optime addiſcere poterit, ſimpliciſſima hæcce remedia in multis iisque graviſſimis morbis ſanandis plurima alia effectu longè ſuperare. Quas denique in fine adjeci diſſertationes, variam remediorum inepte adhibitorum noxam palam faciunt, ita ut alieno periculo ſapere aliorumque errores vitare facillimum ſit.

Ultimo loco & hoc utiliſſimum monitum in animum revocandum omnibus, qui circumſpecte artem exercere cupiunt, commendo, medendi artem non tam facilem, ut vulgo putatur, rem eſſe, ſed judicioſiſſimam & difficillimam, quin imo, ab imperitis ſi quando tractatur, periculi pleniffimam, quod jam olim antiquiſſimus artis noſtræ parens Hippocrates in aphorismo I. Sect. I. optime agnovit, dum *experientiam fallacem, judicium difficile, experimentum periculofum adſeruit, & ætatem longiſſimam arti perficiendæ vix ſufficientem exiſtimavit*. Quod vero ex difficillimis hæc noſtra diſciplina ſit non aliam reperire licet cauſam, quam quod tanta non modo morborum & cauſarum lædentium, ſed & naturarum ſ. corporum humanorum ratione virium, imbecillitatis, ſenſibilitatis, ſtructuræ & idioſyncraſiæ detur diverſitas, ita prorſus, ut pro varietate corporum non modo alimenta & medicamenta, ſed & cauſæ morbificæ, & ipſa venena plane diverſos & diſſidentes effectus producant. Quam arduum vero ſit, ſingula hæcce accuratius inveſtigare & certum de inveſtigatis judicium ferre, perſpicacioribus viris dijudicandum relinquo.

D I S S E R T A T I O

D E

NATURÆ ET ARTIS EFFICACIA IN MEDENDO.

§. I.

UO maxime ſunt medici, qui languenti corpori ſuccurrunt, & inſenſas vitæ ægritudines & moleſtias tollunt: alter eſt Natura, quæ à veneranda antiquitate non inepte morborum medicus ſalutatur: alter eſt artifex, qui ſolerti ratione cauſas morborum ſcrutatus, iisdem accommodata opponit auxilia. Horum vero ſummus & princeps eſt ipſa natura, quam ars humanaque ratio & imitari, & adjuvare debet; ſiquidem ſine natura i. e. ſine corporis viribus ais nihil plane præſtare poteſt. Ubi enim hæc deficit, ubi languet, ubi plane intermittit ſuas actiones, artis omne opus ceſſat. Felix itaque ille exiſtimatur medicus, qui ſub naturæ favore & energia operatur, & hac duce ſuas molitur curationes. Quin ipſa natura ſola & deſtituta externa medici ope, graves sæpe tollit ægritudines, præſidiis ac instrumentis communita præſtantiffimis. Sicut contra & plures dantur morbi, in quibus natura ſola parum valet, ſed manu & ope artificis adjuvari cupit, quo quidem in caſu & artis præſtantia & artificis ingenium cognoscitur. Sunt etiam nonnulla affectuum genera, quæ conjunctum naturæ & artis poſtulant officium, ubi natura quidem medetur, ſed cum difficultate, cum tempore. Quam in rem more ſuo pulchre effatur CELSUS l. 2. c. 14. p. 89. *Poteſt morbus, inquit, qui per ſe finem habiturus eſt, citius, adhibito auxilio tolli, ut quam primum bona valetudo contingat, & ne morbus, qui remanet, etiam exaſpere-tur*. Naturæ igitur & artis effectum & opus in medendo cognoscere & recte diſtinguere, non minima ſapientiæ pars eſt. Et quemadmodum in rebus ſpiritualibus, quæ ad ſalutem animæ pertinent, ardua res eſt, naturæ & gratiæ limites atque fines diſcernere; ita certe in medicina haud facile negotium eſt, naturæ vim & artis ſive remediorum effectus atque limites invicem diſtinguere. Quam quidem in rem quotidie peccatur, etiam ab ipſis medicis, dum quod tribuere debent naturæ, artis opus eſſe exiſtimant, quibus dum ſibi blandiuntur, non levis in explorandis

medicamentorum viribus error committitur. Non alienum itaque erit, hoc eximium in medicina argumentum paulo majori ſtudio agitare accuratiusque excutere.

2. Naturæ & artis in medendo effectus in conſpectum daturi, ut tam arti quam naturæ ſua conſtet laus, primum omnium utile erit, ex veterum monumentis, quid illi hac de re judicaverint, proponere. Utrique tam naturæ quam arti ſuas assignarunt laudes. Aper-te HIPPOCR. L. VI. Epid. *ῥεσάν*, inquit, *φύσει ἰατρίῃ*, naturæ morborum medici, quod libro de arte fuſius explicat: *Natura*, inquit, *ipſa ſibi per ſe non ex conſilio motiones ad actiones obeundas invenit, à nullo quidem edoctræ, citraque diſciplinam ea, quæ conveniunt, efficit*. Et alibi Lib. de Diætâ hæc prodidit idem graviſſime: *Ars medica*, inquit, *ab eo quod moleſtum eſt, liberat, & id, ex quo quis ægrotat, auferendo, ſanitatem reddit: idem & natura per ſe facere novit*. Artis vero præſtantiam in ſanando Lib. de Arte p. 21. in fine hiſce deprædicat: *Quando natura non ſponte excernenda dimittit, medicina neceſſitates ac vires invenit, quibus natura coacta indemnis dimittat ſive excernat, nam ſtimulata monſtrat medentibus, quæ ſint faciendæ*. Neque minus pulchre diſcrimen effectus artis & naturæ GALENUS L. de Conſtit. Artis c. 12. hiſce adſtruit: *Sunt alia naturæ, aliâ medicis negata & conceſſa. Natura quidem impoſſibile eſt, ita os conſractum, ut ejus partes à nativâ ſede aberrent, membrumque diſtortum ſit, corrigere & conſirmare, quod medicis poſſibile eſt: quemadmodum & luxatum medicus reponere poteſt, natura non poteſt. Contra cavum ulcus carne replere natura poteſt, medicus non poteſt, ſicuti ex ſemicoctis aut crudis aliquid concoquere: ſed in hiſ medicis natura famulatur*.

3. Equidem naturam medicum eſſe corporis noſtri, uno ore fere omnes profitentur, attamen quid per naturam intelligatur, nondum plenus adhuc inter medicos reperitur conſenſus. Sique ullum vocabulum variis patet explicationibus, certe hoc ipſum eſt. Verum enim vero cum vocabula in ſe nihil reale habeant, ſed tantum notæ ac ſigna ſint rerum, non alienum fore

fore putamus, omnis ambiguitatis & confusionis evitandæ causa quid per naturam velimus intellectum, breviter succincteque explicare. Primum vero monendum est, vocabulum naturæ confundendum non esse cum ipsa anima tam sensitiva quam rationali. Sæpius has voces inter se miscent autores; cum tamen distinctæ res sint, quæ denotantur naturæ & animæ utriusque vocabulo. Hinc etiam necesse est, quodvis gaudere suo sibi proprio charactere. Deprehendimus nempe in corpore animantium & maxime in humano, actiones, quæ solo motu perficiuntur, ubi corpora inter se mutuis viribus motricibus & innatis agunt, à quarum virium æqualitate seu æquali nisu, vi ac robore actione & pressione quies, ab inæquali vero, loci vel situs mutatio dependet. Ubi igitur corpus agit, & corpus patitur, & hæc invicem inter se viribus suis agunt, hæc actio dicitur naturalis & physica, recentioribus mechanica, it. necessaria. Nam necessarius semper sequi debet effectus certam corporum inter se actionem. Quam necessitatem effectuum ex necessariis causis nascentem *æternam immobilem naturæ legem* recentiores nominarunt. Naturæ vero vox inde videtur suam trahere originem, quoniam vis ista motrix activa, extenso à Deo innata & insita est, quo sensu etiam Aristoteles definit naturam principium motus & quietis. Qui motus aut quies inest, subsistit & inhæret per se, & non per accidens, adeoque naturam habent illa corpora, quæ motu aut quiete gaudent nativa à principio ipsis absolute immanente, non adventitia vel ab externis rebus arcessita. Actio itaque naturalis in corpore humano hæc celebratur, quæ absolvitur operatione & concursu solo corporum. Ita sanguinis & humorum circuitus, digestio, secretio, excretio, motus fibrarum intestinorum & aliorum canalium peristalticus à causis necessariis fluunt, sine concursu ordinario alterius substantiæ vel virtutis, & hujus gratia dicitur actio naturalis mechanica.

4. Sunt vero in corporibus animantium aliæ actiones & motus, qui non à sola vi & mutuo contactu corporum proficiuntur, sed sublimiori virtute instructi corpora vel eorum partes in motum excitant. Ita e. g. certa impressio ab objecto externo agente in animantibus suscepta, certa item idea, perceptio, cogitatio, quæ omnis extensionis & indolis corporeæ expers est, potentiam habet corpus animantis, vel certas ejus partes ad motum, certo gradu, proportionem, successu, durationem, certumque in finem concitandi. Cujus quidem rei testes sunt animi adfectus, qui universi corporis partes & nonnullas ex iis peculiariter agitare ac commovere solent. Confirmat id etiam vehemens ideæ certæ impressio, quæ quod incerta corporis membra pro indole sua agat, res est notissima. Ita fastidium cibi vel alicujus rei, ubi de eadem cogites, ventriculum ad vomitum concitat; firmior pulchræ mulieris contemplatio, ad venerem genitales partes stimulat; appetentia cibi grati, partes, quæ digestionem præsidet, contrahit, ipsisque vigorem, motum ac succum solvendis cibis convenientem subministrat. Sola porro imaginatione alvum moveri, corpus sudore digeri posse, experientia demonstrat. Ipse timor saltem à quodam morbo v. g. à variolis, pestilentia, epilepsia, ipsum morbum promte in corpore producit. Vehemens & subita impressio in gravidis quos mirificos characteres foetibus inducere idonea sit, vulgo notum. Quæ cuncta clarissime ostendunt, sublimiorem, omnisque extensionis indolis expertem adhuc virtutem inhærere animantium & maxime hominis corporibus, quæ anima solet appellari, & quidem sensitiva. Inde omnis actio, quæ ab ea proficitur, animalis nominatur, cujus generis sunt motus voluntarii, animi pathemata, & omnes motus qui sequuntur sensus, desideria, appetitus.

Frid. Hoffmanni Oper. Tom. VI.

5. Reperiuntur adhuc aliæ actiones non in omnibus animantibus, sed in solo homine, ubi nullus concursus corporum sit, nullus motus, nulla actio eorundem subsequitur, videlicet idearum sive impressionum, quæ objectorum externorum causa fiunt, abstractio, collatio, comparatio, connexio cum interna notitia, judicio & libertate agendi, unde nascitur ratio, veritas, quæ & alterius mentem convincere, instruereque apta est & valet; quæ justis & injustis internam cognitionem & sensum possidet. Hæc nullis mechanicis legibus adstricta, hæc cum corpore nullum habet commercium, nisi quod tantum corpus animatum sit ejus domicilium, & sensus materiam ratiocinationis subministrant. Hanc excellentem virtutem mentem, rationalem animam, radium divinæ imaginis, spiritum *κατ' ἐξοχήν* recepto sic vocabulo & Theologi & Philosophi appellant.

6. Rebus in se distinctis sic distincte propositis, judicare jam promptum & expeditum est, per naturam, quæ à medicis consideratur, & quæ corpus cum adfectum sanat, tum integrum conservat atque tuetur, minime intelligi mentem seu animam rationalem. Eodemque ex fonte discimus, neque animam sic dictam sensitivam eosdem motus qui in corpore accidunt, vel efficere vel moderari. Quamvis non negemus, hanc ipsam in corpus habere magnam, ut supra docuimus, potestatem, in pervertendis & turbandis motibus naturalibus, quorsum & pertinent vitales. De natura itaque humana, quæ secundum Hippocratem est omnis sermonis seu ratiocinationis in medicina fundamentum, nihil aliud intelligimus, quam mirabile illud ipsius corporis nostri artificium, cujus autor summus artifex est DEUS, cujus sapientiam immensam similis naturæ opus repræsentat. Effectus enim merito existimatur æqualis suæ causæ. Hæc naturæ definitio omnium antiquissima. A Platone venuste vocatur natura ars divina in materia. Et Asclepiades, teste CÆL. AURELIANO L. de acutis morbis, jam olim naturam nihil aliud esse quam corpus & ejus motum asseveravit. Haud igitur immerito quæritur, in quam hujus summi artificii ratio & indoles contineatur. Quod quidem paucis nos explicaturos confidimus, si demonstramus, in admirabili illa coordinatione motuum, quos ipsius corporis partes inter se locatæ ex se & sua natura suscitant, quique omnes nobilissimum in finem tendunt, naturæ vim positam esse. Neque enim ullus est artifex, cui non in opere, quod molitur, finis propositus sit, nullus porro est, qui non omnes partes machinæ omniaque instrumenta disponat ad certum scopum. Scopus vero creatoris fuit, ut corpus nostrum motibus excitatum, & virtute sublimiori, quæ percipiendi vi polleat, donatum sit instrumentum, imo domicilium ipsius mentis cœlestis originis, ut in illo habitet, ex illo ideas hauriat, & suas functiones ad quas destinata est, exercent. Essentia enim humanæ naturæ maxime in eo versatur, ut substantia à corpore maxime diversa unita sit ætissimo vinculo cum corpore vivo & animato. Ut itaque hæc conjunctio diu constet, opus est, ut corpus duret, quam corporis durationem & conservationem physico sensu vitam appellant.

7. At enim vero æque necessarium est, ut sensuum vis etiam in suis organis integra maneat ac illibata. Horum enim beneficio ipsa mens concipit ideas quæ cogitationum & rationis materia ac fundamentum sunt. Universi autem artificii in machina humana reconditi prima & præcipua ratio eo respicit, ut corpus in sua mixtione & structura, cum alioquin corruptioni maxime pateat, perduret atque conservetur, ut sensoriis etiam instructum sit, quibus objecta externa percipere & secundum perceptionem reagere motibus spontaneis possit. Quicquid vero eum in finem præstat,

id perficit solo motu, non confuso, sed bene ordinato, & regulari, qui à recentioribus nomine mechanismi insignitur. Sicuti enim ob motum regularem & in certum finem ordinatum omnes construuntur machinæ, quæ constructio mechanismus dicitur: ita etiam nostra omnibus machinis tam naturalibus quam manu factis superior, unice à DEO summo & sapientissimo corporis nostri opifice ob certum & specialem motum contexta atque excitata est, eademque, quemadmodum omnes machinæ accurate & secundum proportionem, tempus, gradu ac proportionem agunt, non ex sua notitia, ratione, consilio, intentione & directione aliquid præstat in actibus naturalibus & vitalibus, sed secundum intellectum & rationem summi artificis id exequitur. Ingens tamen in eo deprehenditur differentia, quod in machinis arte humana factis plerumque simplex semper & idem modus sit operandi, in machinis vero divinis, plantis & animantibus variet illa operatio. Et quidem ratio est in procinctu, siquidem in illis semper una eademque dispositio permanet causalis: v. g. in horologiis, machinis hydraulicis, hydraulicoque pneumaticis; in his vero variant causæ. Neminem enim rerum medicarum peritum ignorare oportet, res externas & inter has præcipue elementa, ætherem, aërem, aquam, alimenta cujuscunque generis & res non naturales varie disponere & afficere corpora & illorum motus. Vita enim machinæ, sanitas, morbus & mors unice à causis externis fluunt. Quapropter opus est, ut medicus naturæ rerum cognitionem compertam habeat, ut identidem bene intelligat, quos effectus, vel qua ratione eos exferant in corporibus humanis res naturales. In eo enim demum versari veram universæ scientiæ medicæ cognitionem existimo, & sine ea medicina manca, trunca ac debilis jure reputatur.

8. Quisque itaque clarissime perspiciet, ad motuum œconomiam, qui vitam & sanitatem tuentur, & morbos etiam depellunt, minime necessarium esse concursum entis cujusdam, quod notitia, perceptione, multo minus quod directione gaudeat. Ejus sententiæ quoque fuerunt veteres & prudentiores recentiorum. HIPPOCRATES L. I. de Diæta §. 6. hæc prodidit: *Corpora, quæ faciunt, non sciunt, quæ vero faciunt, scire sibi videntur, & quæ vident, non cognoscunt, attamen omnia in ipsis sunt per divinam necessitatem & quæ volunt & quæ non volunt. Accedentibus vero illis huc, his vero illuc & inter se permixtis unumquodque destinatum fatum explet, & ad majus & ad minus.* Referri huc meretur elegantissimus circa eandem rem locus qui exstat in Valleriola lib. I. locor. comm. cap. 5. *Indoctrinæ quidem animantium naturas dixit HIPPOCRATES, hoc est, non consilio, neque delectu agentes: sed profecto quasi edoctæ operantur, impellunturque ad id, quod usui sit animanti, ut artificiosa ipsa hominis, miraculum omne superans, structura facile declarat. Eam enim tam mirabili partium nexu, firmitudine, forma atque usu architectata natura est, ut neque ad usum accommodatius quicquam, neque ad speciem & ornatum pulchrius spectari possit: providam vero & sollicitam indicant ea, quæ in morbis gravissimis & exitalibus natura, ut servetur æger, molitur. Siquidem adversus morbosicam causam impetu valido assurgens, & decretoria, excretionisque vehementes molitur & concoctione, discretione, tandemque vacuatione à lethalibus morbis ægrum sæpe liberat. Idem sentit ex recentioribus SYDENHAMUS Sect. 2. de morb. acut. p. 158. Ego, inquit, quoties naturam nomino, toties causarum naturalium complexum quendam significari volo, quæ quidem causæ brutæ licet & omni consilio destitutæ, non tamen sine summo consilio reguntur, dum suas quæque operationes edunt suosque effectus exsequuntur. Nimirum supremum illud Numen, cujus vi producta sunt*

omnia, & à cujus nutu dependent, infinita sua sapientia sic disponit omnia, ut ad opera destinata se certo tempore quodam ordine atque methodo accingant, neque frustra quicquam molita, neque nisi quod optimum est ac toti rerum fabricæ suisque privatis naturis maxime accommodum exsequentia, perinde atque automata non pro suo, sed artificis consilio moventur. Et rectissime Baglivus p. 154. *Naturæ nomine non intelligo sapiens quoddam phantasma, vagans, & consilio singula dirigens, sed complexum quendam generalem causarum naturalium, quæ licet consilio destituantur, effectus tamen suos pariunt juxta leges à summo conditore inditas, atque ita ordinate, ut quasi summo regi consilio videantur.* Multo vero pressius & rectius magnus ille Romanorum medicus LANCISIUS in libro de natura corporis humani in hunc modum differit: *Natura est vox complexi & aggregati plurium causarum secundum æternas Dei regulas ad rerum conservationem agentium, non unum quid sive una causa, qua cunctæ animalis actiones sunt atque reguntur. Natura animantium nihil aliud est, quam organica constructio partium solidarum & peculiaris crasis fluidarum in vasis contentarum determinatis, ut congruo mutuo & plerumque alterno cum solidis motu cieantur subservientibus partibus, æthere, aëris pondere, elatere ac motu, unde dependet vita. In animantium machinis fluida contra solida & solida contra fluida nituntur. Iisdem legibus mechanicis natura & ars operatur & animantium machinæ iisdem legibus mechanicis subjectæ sunt ac artificiales & juxta HIPPOCRAT. lib. I. de diæta n. 13. ex manifestis ad obscura consideranda procedere debemus. Et ex recentioribus Doctiss. medicus Simson, Scotus, de re medica p. 81. de natura corporis humani ita philosophatur: Indefessus rerum naturalium contemplator omnia naturæ opera concinna, elegantia, utilia atque ex causarum, quamlibet, distantium mira tamen conspirantium serie ubique inter se apta & connexa comperit, inprimis vegetantia & animalia omnia singulasque eorum species propriis quibusdam certisque subjici legibus quarum fundamenta solertissimus rerum omnium architectus ut geometra optimus maximus in primis rerum seminibus ponere voluit; quorum vi sola & fecunditate insita è rudi primum & indigesta materiæ communis mole extructas perfectasque tot miras spectabilesque rerum formas deprehendit.*

9. Quum vero non satis sit, stabiliendæ hujus sententiæ causa allegare auctoritatem, convenientissimum erit, & ipsa ratione hujus rei veritatem confirmare. Quod si enim hæc ipsa, quæ vitæ, sanitatis & morborum ac curationis negotium spectant tantum ex corporum natura, motuum legibus & solo mechanismo perspicue possunt explicari, alienum certe est, in auxilium aliud quoddam Ens notitia imo ratione, consilioque præditum, advocare. Minus etiam congruum fuerit, id ipsum in fibris motricibus & habitu corporis nostri, ubi nullus idearum, sine quibus nec ulla scientia concipi potest, datur proventus, collocare. Quod si porro totius mundi machinæ solis mechanicis legibus ornatissime regitur, & tot mirabiles effectus producit, id ipsum aliis cur denegare machinis velimus, causam plane non video. Neque vero hoc loco quidquam prodest eorum objectio, qui non concipi posse existimant, quomodo cuncti, tam secundum quam præter naturam in corpore nostro motus fieri possint sub certo tempore, certis gradibus, certum in finem, per congrua evacuatoria ordine, siquidem hæc cuncta nempe tempus, successio, gradus, intensio, remissio, motui inhærent, & ad motus naturam spectant; directionem autem certam in organis cum notitia interna plane pernegamus, neque aliam agnoscimus, nisi quæ ex ipsa dispositione organorum profluit. Unde quod certa tempora requirantur

ad ortum & successivam perfectionem corporis nostri, quod certis & statis temporibus fiant excretiones, certis periodis redeant morbi & solvantur, certo tempore ad appetitum, somnum & vigilias incitemur, hæc omnia clarissime edocent, necessariis & corporeis ea fieri de causis. Id quod vel ex eo solo maxime judicandum, quod physicis causis, alimentorum & medicamentorum efficacia, hæc invicem immutari, crises morborum suspendi, periodi febrium accelerari, vigilie consuetæ imminui possunt. Neque vero nostra est sententia, ex eodem fundamento consuetudinis, quæ in actibus moralibus, inclinationibus, propensionibus, vitiis, virtutibus, moribusque locum habet, naturam deducere atque derivare. Non ignotum enim nobis sublimiorem virtutum & virium naturam actionem & agendi modum esse, quam ut humanæ mentis angustia eam comprehendere & adsequi possit.

10. Neque hic valet ille mirificus consensus inter notiones animæ & corporis intercedens, cujus beneficio discimus, ex sanguinis motu, similem motum animum trahere. Ita si cum impetu fertur sanguis, animus quoque præceps, impatiens, atque impetuosus animadvertitur. Idem si segni cunctantique alveo progreditur, eadem animo lassitudo, segnities par. Ex eo tamen minime colligendum, unum idemque esse principium, quod actibus moralibus & corporeis præfideat. Consensus utique apparet dilucide animæ & corporis, ex eo tamen minime evincitur, illud, quod cogitat, quod percipit, facere corporis motus; multo minus vero ex habitu animæ, præsertim rationalis, judicanda est motuum in corpore natura. Nam anima prudentissima & in summa tranquillitate constituta v. g. in senibus, non potest impedire graves ægritudines, viscerum obstructions, scirrhus, sanguinisque & feri stagnationes huic ætati perquam familiares. Deinde in turbulento statu motuum præternaturalium anima tranquilla & prudens subsistere & permanere potest. Quod vero in actibus naturalibus & vitalibus nulla præsens sit ratio, nulla consideratio, notitia, & directio, satis superque evincunt errores, qui subinde visuntur. In quem salutarem enim & rationalem finem spectant atroces illæ convulsiones? quid boni præstant funesti spasmi, qui à venenis excitati in ventriculo, pestem & perniciem corpori moliuntur? Quo spectant tot convulsionum genera, quæ à flatibus vel vermibus in intestinis stagnantibus fiunt? Quo summi acerbique dolores? Quo vehementes acutæque febres ad læsionem levissimam vel puncturam nervi tenduntque exorientes? Certe istæ enormes commotiones sunt peiores ipsa causa, cujus gratia secundum hypothesein à prudente natura instituuntur. Siquidem nisi arte succurratur exitium corpori & periculum vitæ afferunt, sique prudenti consilio & directione in morbis actiones & motus corporis administrantur, certe non perspicimus, quamobrem tam remotæ ab omni ratione alienæque in quibusdam affectibus motiones per incongrua loca, non debita proportionem instituantur. Deberet in corporibus impuro sero turgidis, cachecticis, viscerum obstructionibus, scorbuticis, concitatori ac celeriore motu sanguinis circumvolvi, ut sanguinis crassities attereretur, emunctoria aperirentur, & ita superfluum ex corporis sphaera ejiceretur, cum tamen ex pulsus debilitate contrarium observetur. Putredinosa quæ humoribus & sanguini in peste & malignis morbis imminet corruptio, requirit vigorem & intensiorem motus circulatorii, quo illud, quod corruptum est, auferatur, & corpus ab ulteriori labe præservetur; cum tamen & vigoris virium & motuum in his affectibus summa debilitas, & jactura deprehendatur. Ubi bilis acris exsuperans varias passionem, tertianas febres intermittentes, continuas, ar-

dentem, excitat, maximo cum æstu, siti inextinguibili, opus potius esset, si negotium cum prudentia gereretur, moderatori motu. In rheumatismis, catarrhis, arthriticis affectibus, materia peccans, acris falsa, tenuis vel etiam crassior, tartarea, per cutis meatum, aut renes eliminanda, ad articulos & fauces inclinatur, cum maxima molestia & sæpius periculo ægrotantis. Quæ porro prudentia est, quæ ratio, quare sanguis abundans magno cum impetu in apoplecticis, in paralyticis ad caput feratur, funesto frequentissime eventu? ex terrore quod abortus, quod epilepsia, cordis palpitatio, & convulsiones nascantur? quanam utilitas, quanam salus inde expectanda est? Sæpe etiam sanguis & humores ejiciuntur, qui servandi erant, uti accidit in hecticis, cachecticis, hydropicis. Et sunt utique adhuc plures vix enumerandi errores, ex quibus certe nec bona vel proficua intentio, quæ ex effectu debebat æstimari, multo minus ratio vel prudentia colligi potest. Rectissime itaque Asclepiades, referente Cœlio Aureliano dixit, *Naturam & prodesse & nocere.*

11. Neque majoris momenti æstimanda est eorum dubitatio, qui universum nostrum corpus ejusque partes tantum instrumenti & organi vices gerere, & hæc excitari moverique ab alia quam corporea substantia debere, profitentur. Sicuti accidit apud fabrum ferrarium, qui malleo pro arbitrio suo in varium utitur finem; at malleus ex toto non mere se habet passive, sed tantum respectu manus artificis, unaque concurrente sua reactione agit efficacissime. Concedimus quoque in unoquoque motu corpus mobile considerari posse passive, dum impellitur à movente: nihilo minus hoc ipsum reagit & effectum, qui moventi negatus est, auget atque modificat. Quæ cuncta etiam concedimus in corpore nostro. Neutiquam vero admittimus, dari in corpore nostro Ens quoddam, quod pro arbitrio, pro intentione sua sic utitur partibus musculosis ceu instrumento passivo ad motus vitales progressivos, secretorios & excretorios exercendos. Paucis ubi in physicis & medicis res & effectus rerum explicari & demonstrari possunt principiis, quæ in conceptum, quæ in sensum cadunt, quæ corporeis rebus propinqua sunt, insunt & quadrant, non confugiendum ad altius principium, cujus natura & proprietates directe non pertinent ad corpus vel ad ejus constitutionem aut operationem ordinario concurrunt. Longe aliter res se habet cum sensationibus, quæ in certis organis peculiari artificio constructis ab anima celebrantur, ita prorsus, ut hæc ipsa in organo auditus audiat, in oculo videat, in naribus odorem, in lingua gustum percipiat, ubi omnino hæc organa sese passive habent. Nihilo minus tamen si non recte constructa constitutaque sunt & vitium foveant, animæ operatio & sensatio cessat, donec sagax & peritus medicus arte per convenientia remedia administrata labem istam & vitium emendaverit atque correxerit.

12. Afferimus itaque corporis humani naturam nihil aliud esse, quam jugem & perennem sanguinis & fluidorum in debita quantitate, temperie ac proportionem existentium progressivum & in circulum abeuntem motum cum motibus convenientibus secretoriis & excretoriis junctum, qui primario ab alternativa cordis & arteriarum systole & diastole, neque minus à fibrarum universi corporis muscularium ac nervearum tensione, robore, tono, sive vi motrice elastica dependet atque efficitur, secundario vero à fluido tenuissimo aëreo æthereo calido spirituosissimo, quod in liquido cerebri & nervorum ipsoque sanguine continetur. Sanguinis igitur jam descriptus motus circularis est unicum illud & maximum fundamentum, cui universa œconomia animalis omnesque actiones, quæ in corpore accidunt, innituntur. Hic est fons, autor, causa omnium eorum,

quæ ad constitutionem perfectionemque corporis nostri pertinent. Quapropter non sine ingenti ratione hic in orbem motus, quoniam omnes actiones corporis moderatur, vitalis dicitur. Et vitam in motu consistere, ferme omnes uno ore medici affirmant. Neque opus est rationibus ad id confirmandum ex longinquo repetitis, quando experimentis exploratum est, quod simul ac vel in toto corpore plane cessat & extinguatur hic humorum circuitus, sensuum ac rationis usus cum ipsa vita intercipiatur, corpore, quod beneficio hujus motus alioquin securum est à putredine, eandem tunc subeunte. Quod si corporis meinbrum hoc sanguinis motu privatur, omnis confestim ejus perit usus & ad corruptionem inclinatur. Præterea circulus hic firmissimum vinculum est, quo sanctior nostri pars, animus scilicet, quem de cœlo decerpimus, amico fœdere cum corpore conjungitur. Hic circulus quoque sustinet omnes sensus eorumque exercitia, hic nutrit, perficit & restaurat corpus, hic denique tonum, robur, motum vigoremque omnibus partibus elargitur. Idem à corruptione corpus, quo non quicquam magis affligitur, præservat, quæ universa omnia vitæ nomine quatenus vel ad corpus vel simul ad totum hominem spectant, solent comprehendere. Hic quoque circulus est, qui moderatus, æquabilis, secundum ordinem & regulam omnium partium actiones administrat, i. e. sanitatem efficit. Hic turbatus, morbos progignit omnis generis, eodemque everso corpus emoritur. Perquam curiosa enim est observatio, neminem mori, quin cadavera incisa causam mortis manifestam in sublato hoc sanguinis motu repræsentent: hinc vel inflammatio partis nobilioris, vel sanguinis & feri extra vasa secessio, vel polyposa concretio in vasis majoribus hærens, vel visceris cujusdam ingens corruptio & putrefactio in defunctis clarissime visitur. Imo quoque in morbis ipsis ad hunc sanguinis circuitum omnis & ratio & cogitatio medentis tendere debet: Ita syncoptici, in quibus sensu & motu cessante, vita ad tempus desinit, iis remediis quæ motum collapsum restituant & revocant, ut sunt frictiones, V. S. spiritus fortes naribus & ori infusi, interna spirituosa data, aquæ aspersio frigida, à fatali meta retrahuntur. Crebriori vidimus experimento animantia, quibus nulla superesse videbatur vita, inflato aëre in tracheam vel ductum thoracicum, ad vitam mox fuisse reducta, cordis motu restituto.

13. Præterea circulus sanguinis non tantum avertit mala à corpore, sed sanat etiam corpus, & hic est ille medicus, qui languores corporis curat, hæc est illa natura, quæ ex veterum etiam sapientium sententia medetur morbis, ac ab omni labe corpus defendit, firmitatem eidem præstans sanitatem. Quamdiu enim sanguis justo & legitimo modo per corpus fertur, tamdiu omnis corruptionis vis, ad quam paratissimum est corpus animantium, etiam sub calido cœlo & humido, qui hanc maxime fovet, infringitur ac impeditur. Et quamdiu decenti modo per venas transit sanguis, nullus morbus subsistere, nulla peccans materia prognerari potest. Pleræque enim morborum causæ originem suam ex imbecilliori & male disposito sanguinis motu per viscera trahunt. Ratio vero quare sanguinis motus à corpore putredinem arceat, idemque à mixtionis suæ destructione, & læsione quasvis internas pernicies machinæ intendente, defendat, est, quod à jugi & perenni sanguinis progressionem & continua per innumeros canales ac tubulos multiplices pressione, diversa sanguinis elementa facili nexu in se coeuntia vel secedentia perpetuo & intime misceantur, uniantur, ut omnes & unum fluidum ex diversissimis particulis constans constituent, quod vel minimos canaliculos circuire, & non tantum omnes partes rigare & succos omnino utiles alendo, gignendo, sentiendo, movendo, necessarios

elargiri, sed & inutiles superfluos, agiles, ad corruptionem inducendam proclives, iniquas tandem ipso illo intestino, sed per poros in minimos tubulos transpressorio motu dissolvere & per varia congrua emunctoria expellere possit. Quin imo ipse motus humorum est ejus naturæ, ut non finat putrescere. Sola enim stasis, stagnatione & quiete humorum & mors & morbus præsentissime inducitur, sola stagnatione humor decedit à nativa sua crassi, mixtionem atque texture, motu vero unice conservatur. Neque vero vita directe & proxime à debita secretionem & excretionem pendet, sed à solo motu, ita etiam mors, quæ sæpius celerrime ab animi pathemate, à spasminis, à causa externa proxima ratione incidit, à defectu excretionum non dependet. Videmus enim corpora quorum succi impuritatibus & sordibus scatent, vivere. Videmus etiam corpora, motu celerrimo agitata sub magna copia excretionum perire. Formale itaque vitæ & mixtionis corporeæ non tam directe in excretionibus, sed potius in ipso motu intestino & progressivo versari judicamus, non negantes, excretionem suppressas morbos causasque morborum prognerare.

14. Cum itaque tota natura microscopica, quæ proxima actionum in corpore causa, nil nisi sanguinis circulum & motum denotet, quem medicus sive in statu sano sive morbofo homo versetur, perpetuo attendere, ac respicere debet, non immerito quaritur, quomodo & à qua causa præcipua motus iste & oriatur & conservetur. Nos itaque cum contemplamur corporum interiora, deprehendimus omnino motuum instrumenta, quibus partes fluidæ impelluntur & agitantur, esse maxime fibras & musculos vi commovendi præditos. Ubicunque proinde humores feruntur, sive utiles sive inutiles, ibi reperies musculosas fibras ac tunicas, ex quibus etiam vasa omnis generis constant. Est vero geometrico-mechanica harum fibrarum musculosarum constructio, ut irrigatæ tenuissimo aëreo-æthereo-elastica indolis liquido in justo motu se conservent, contrahantque, & hujus contractionis vigore ac robore instar emboli liquida contenta propellant, quem motum activum fibrarum proprium systolem Græci appellant. Quod vero contractivo motu gaudeant fibræ musculosæ, ex ipsa incisione musculorum in animalibus statim post mortem, vel in vivis etiam facta clarissime apparet. Et quod curiosum est: simul ac deserit calor corpus, cessat quoque illarum contractio. Alter motus musculorum, qui priorem subsequitur, & magis passive sese habet, est ipsorum expansio, & fit à copia & impetu sanguinis in partes musculosas illabentis. Hoc duplici musculorum partium motu systoles & diastoles simplicissimo, totus humorum circuitus & ex eo dependens secretionum, excretionum atque œconomiae vitalis & animalis universum negotium, continetur. Hic motus si salvus, integer & secundum regulam est, sanitatem efficit, turbatus vero morbos parit. Et mirabile est, quod infinitæ sapientiae artifex Deus, certe simplicissima methodo ac via, unico nempe systoles ac diastoles motu, fibrarum motricium constrictione, dilatatione & impulsu ac progressu liquidorum, omnes actiones universi corporis & animæ functiones sustineat atque perficiat, adeo ut hujus motus reciprocatione & debito successu perpetuitas sanguinis circuli, sive perpetuus & continuus motus, qui fatigavit tot nobilissima ingenia, continueatur. Ad duplicem vero hunc motum, qui & in corde & in reliquis musculis celebratur, ibique pulsus, hic tonus & tensio dicitur; duo fluida requiruntur, unum mobilissimum elasticum, quod cerebrum & nervi subministrant, & maxime moventis vices gerit, alterum crassius, quod mobiles partes tuetur, sanguinis nempe & humorum massa. Nerveum fluidum fibrarum contractionem, dilatationem vero earundem san-

sanguinis in vicinas partes appulsus magis efficit: qua distensione & mole sanguinis efficitur, ut nerveum majori copia in arteriam distentam influat, & restitutionem atque contractionem rursus urgeat; utpote dilatatio arteriæ ad promovendam systolen & restitutionem facit, sicuti systole dum liquidum expellit, in vicina arteriâ promovet diastolen.

15. Deinceps ad continuandum hunc duplicem & revera vitalem cordis & fibrarum musculorum motum observanda est mirabilis illa consensio, quæ est inter cor & cerebrum, & inter sanguinis & fluidi nervei motum. Quodcumque enim sanguis ministerio systoles cordis fertur ad caput per carotides, non modo ex sanguine subtilissimo fluidum nerveum generatur, sed & facto cerebri pulsû, arteriarum pressione influxus ejus in nervos promovetur. Inde evenit, ut si quando sanguinis motus sistitur in cerebro, eo ipso quoque nerveum fluidum deferat cor ac musculosas partes, syncope id docente: Contra, quo major est sanguinis appulsus ad cerebrum, sicuti fit in febribus à sudoriferis, à motu corporis, eo celerior quoque influxus succi nervei & appulsus ejus in cor fit, unde augetur hujus systole. Hac pulcherrima harmonia & consensu cordis ac cerebri efficitur, ut unus saltem cordis pulsus & motus, ad motus propagandos & continuandos sit idoneus, non interrupta serie in universo corpore etiam per centum annos. Qua de causa syncopticis, si saltem semel incipiat rursus cor moveri, mox toti corpori redit vita, sensus motusque. Hoc est illud artificium summum mechanicum in structura corporis nostri reconditum, quod motus vitales administrat, quod ex causis mere corporeis pendet, & natura à medicis appellatur, quæ maxime omnium in considerationem physico-medicam venire debet, si de vita, de sanitate, de morbis & illorum curatione quaestio incidit. Neque natura cum anima hoc in negotio est confundenda, quæ non motus ordinario efficit, sed potius illos percipit, æstimat, judicat, dirigit, per meras ideas & actus immateriales, non tamen sine ordine, sine proportionem. Quapropter non sine insigni ratione actiones naturales ab animalibus bene & recte veteres distinguunt.

16. Ita satis deducta & exposita natura corporis nostri, quæ etiam secundum Hippocratem medicinæ est principium ac fundamentum, facile jam intelligi poterit, quando sermo est de natura corporis robusta, imbecilli, sensibili, morbosa, quomodo hæc debeant explicari. Valida igitur, robusta, & ad vitam longam idonea natura ea est, ubi corpus fibris compactis copiosis valde tensis formatur, ubi fluidum nerveum copiosum, vasa majora & ampla, & sanguine temperato plena: ita expedita ac prompte sanguis & humores per totum corpus circulantur. Imbecillis contra natura dicitur, ubi fibræ laxioris & mollioris texturæ, non tanta copia adest nervei fluidi, vasa sunt minora: quæ omnia tardioris & languidiore humorum motum præstant. Sensibilis natura dicitur, quæ fibris subtilioribus, tensis tamen & vigore motus animatis constat, ut ad leviusculum etiam impulsu motum excitent. Et tam expedita ad motum fibrarum promptitudo efficit etiam animi habitum expeditum, celerem & promptum. Torpens natura est, in qua crassiores fibræ fluido elastico parcius imbutæ, ad motum & agilitatem parum promptæ sunt. Morbosa natura ita accipienda est, quando fibræ motrices ad anormales motus facile suscipiendos & propagandos quasi habitum nactæ sunt, ex repetito nempe exercitio, unde magna est vis hæreditariæ dispositionis, magna efficacia morborum pertinacium, qui quasi in habitum degenerarunt. Ita porro calida & sicca natura, sive secundum Galenum temperamentum Cholericum est, quando à fibrarum prompto ac celeri motu sanguinis massa celeriori & con-

citatiore motu per vasorum systema circumfertur. Si placidior & moderatior est fibrarum motus, & clementior sanguinis cursus per venas, sanguineum dicunt temperamentum. Si vero tonus fibrarum relaxatus, si debilis est, & segni itinere sanguis per tubulos migrat, phlegmaticum audit temperamentum. Melancholicum denique dixeris, sub quo densæ, crassæ & immobiliores fibræ tardioris sanguinis circuitum efficiunt. Sequitur vero sanguinis cursum & animi habitus. Rectissime Hippocrates L. de aëre, aquis & locis: *Mores naturæ compares sunt*, i. e. sanguinis circulo: sicuti id à me latius deductum est in *Diff. de Temperamento fundamento morum in gentibus*.

17. Denique hac doctrina de natura bene intellecta, jam facile intelligi poterit, quomodo ætas, quomodo victus imo aër naturam immutet, & corpus ad varios mores, variasque ægritudines disponat. Hæc enim sunt, quæ maxime fibrarum structuram, corporis habitum, adeoque & humorum temperiem & motum immutant. Unde Hippocrates passim dicit: *Natura à natura, corpus à corpore differt*: it. Sect. III. aph. 2. *Aliæ naturæ ad æstatem, aliæ ad hyemem bene vel male se habent*. Tandem etiam ex hac doctrina intelligi potest illud, consuetudinem esse alteram naturam, id quod & de moralibus & de naturalibus corporis actionibus valet. Si enim fibræ certæ partis semel iterumque à debito suo tono, tensione ac motu recesserunt, & vel spasimum vel atoniam passæ fuerunt, tunc rursus facile ex hac dispositione à leviori etiam causa incitata hunc motum repetere solent.

18. De hac itaque jam sufficienter descripta natura pronunciarunt veteres, & etiam nos pronunciamus, quod morborum sit curatrix, quod sæpe sola, nulla adjuncta medici ope, ægritudines depellat. Hæc vero summæ utilitatis res, quæ proxime spectat ad scopum medicum, ut paulo curatius expendatur, operæ esse pretium duco. Dicimus itaque, naturam non alio modo morbos curare quam motu & sanguinis circulo, sive in quibusdam partibus sive in universo corpore auctiore facto. Sicuti enim sanguinis motus proxime omnes actiones corporis dispensat, animæque operationes, inclinationes, mores efficit, sensum, motum & robur partibus elargitur, corpus nutrit, secretionem & excretionem producit, ita etiam hic sanguinis circulus corpus defendit à morbis, eosdemque tollit ac sanat. Diximus supra, motum sanguinis à cordis & arteriarum motu, systole & diastole, à musculorum tensione & relaxatione decenti, justa sanguinis & humorum copia ac temperie pendere: hinc quoque sanatio morborum per naturam ex eodem debet fundamento & ex iisdem causis explicari.

19. Natura vero morbis medetur motu progressivo auctiori, hoc ipso enim omnes stagnationes sanguinis & humorum, quæ vitæ perniciem struunt, quæ corruptionem moliuntur, remouentur & plethora, quæ foecunda morborum mater est, tollitur, dum auctiori progressivo intestino motu sanguis, imo ipsa pinguedo corporis in serum excrementitium dissolvitur, quod postea per sudorem & urinam evacuat. Motu quoque auctiori serum superfluum impurum viscidum hinc inde subsistens, & fibris ac vasis impactum attenuatur, funditur, & foras ejicitur. Motu auctiori contumaces obstructions referantur, vasa humoribus infarcta aperiuntur; motu quoque auctiori sanguinis ad peripheriam corporis facto, malignæ, salinæ acres sordes ex corpore propelluntur ad ejus ambitum. Ipse quoque sanguis purus mole peccans, ipsum serum quantitate exsuperans per congruas vias eliminatur, & hac ratione causis morbi sublatis, corpus ab interitu vindicatur atque defenditur.

20. Hæc omnia præstat mirifica vis naturæ solennibus maxime duabus motionibus, spasmo nempe ac

febri. Spasmus fibrarum certæ cujusdam partis, major tensio, & constrictio est. Febris vero magis spasmus est universalis totius corporis, fibras afficiens, in quo omnes fibræ majori tensione gaudent, unde celerior & frequentior sanguinis impulsus & ex hac motus celeritate intestina præcalida commotio: in spasmis, circuitus sanguinis maxime fit inæqualis. Dum enim ob majorem tensionem & contractionem fibrarum venæ comprimuntur, sanguinis transfluxus liberior inhibetur, unde sequitur in aliis & remotis partibus, major humorum confluxio, vasorum distensio & tandem, in iis locis ubi eminent, si minus membranis firmis subjacent, apertio, unde sanguis effunditur. Tales spontaneæ sanguinis effusiones cum levamento sæpius fiunt, & à practicis criticæ ac salutare vocantur, nullo modo vi vel subito cohibendæ. Ita sanguis per nares in juvenibus, in foeminis per uterum, in senibus per venas sedis utilissime profunditur, si nempe superfluum est, si peccat, si in debilibus naturis robore motus destitutis stagnat. Nam stagnatio maxime sanguinis, ex qua vasorum, membranarum ac nervorum pressio oritur, spasmus & consequentis hæmorrhagiæ causa existit. Et sanguine superfluo evacuato reliquus in venis cruor melius regitur, subigitur, ac depuratur.

21. Febrium quoque indoles soboles spasmus est, sed magis universalis: perficitur vero sequentem in modum. Incipit primo spasmus in exterioribus partibus à corde remotis & in integumentis corporis, cutis contrahitur, intremiscit, in monticulos attollitur, inalgescit, venæ disparent, hinc repressus sanguis ad interiora, ibique retentus, mole sua implet vasa pulmonum & cordis interiora, inde anxietates efficit, & majori impetu ac copia illapsus in caput, largiorem fluidi nervei in nervos cordis instillationem sollicitat. Quo fit, ut interiora pectoris viscera & mole sanguinis pressa, accedente crebriori succi nervei instillatione, vehementius se contrahant, cor systole aucta sanguinem impetu expellat, qui per tensas ubique in corpore fibras transfluens, attritione magna facta, calorem ingentem accendit. Hic motus auctus & calor dissolutoria virtute gaudens, minuit succorum quantitatem, ipsos in serum resolvendo & per evacuatoria copiosius excernendo. Quisque exinde facile perspiciet, febrem sæpius magnam esse corporis medicinam, præsertim plethorici, cachectici & sero impuro scatentis. Febrilis quoque motus præsidio est humidioribus, dum exsiccat, dum fibras laxas robustas efficit, & obstructa viscera referat. Magnum itemque febris est remedium adversus morbos, qui spasmis innituntur, quod spasmus ut plurimum fiunt ex sanguinis copia. Qua de causa tradente HIPPOCRATE L. V. aph. 70. *qui quartana corripuntur, liberantur à convulsionibus, epilepsia, melancholia.* Tum febris est medicina sanguinem depurans, quod sordes plurimas per emunctoria congrua liberalius ejicit. Memorabile est, quod scribit LANGIUS L. I. Ep. 16. p. 20. *Vidi, inquit, plus centies scabiem per aliarum febrium, præcipue quartanæ crisi exortam sponte exolescere citra omne medicamentorum subsidium.* Liberat etiam natura corpus per febriles commotiones & secretiones à sordibus malignis, & vitæ periculosis causticæ qualitatis, ipsas ex interioribus ad exteriora propellendo, sicuti videmus in variolis, morbillis, erysipelate, purpura, arthritide, variisque exanthematibus, pustulis, glandularum tumoribus, anthracibus, scabie. Simul ac enim hæc in habitu corporis apparent, protinus interiora fiunt pacata, anxietates, inquietudines cum febre sese remittunt. Si quando sanguis stasim concipit in vasculis, ibique impactus detinetur & ingentem dolorem ac inflammationem creat, ipsa febris, quæ ut symptoma consequitur, ejus est indolis, ut motu sanguinis ad partem citatiore facto, illud sanguinis, quod ibi hæret, quod

stagnat successive vel discutiat, vel ad motum ac ordinem reducat. Magna itaque præstat febris in medendo & sanum corpus reddendo, mirabilisque res est, infinitam sane divini opificis sapientiam ac providentiam declarans, quod ipse morbus remedio & præsidio corpori, quod ipsi causæ removendæ, à qua excitatur, idonea sit. Voluit nempe immensus Dei amor, ut perpetuo sub dolore afflictioneque lateat utilitas & salubritas. Equidem motus febrilis per se non bonus, non salutaris dicendus; nam per se & absolute nil nisi motus est deflectens à regula, qui exercitium actionum s. n. pervertit, turbat, qui quandoque etiam perpetuo fere noxius est, ut apparet in hecticæ: salutaris autem fit relative & per accidens, quando causa morbi ita comparata est, ut jugulari & corrigi ab auctiori sanguinis motu possit.

22. Neque vero natura vitia ex sanguine nata tantum tollit, & febre medetur, sed & superfluum & impurum serum magno cum emolumento educit. Quod ipsum videmus in coryza, in tussi, diarrhoeis, vomitu, sudoribus: quæ evacuationes consuetæ præservant sæpissime corpus à gravissimis morbis, quod vel ex eo patet, dum imprudenter suppressæ, vitæ periculum afferunt, & morbum futurum certo prænunciant. Fiunt & hæ evacuationum species non sine motu sanguinis concitatori, non sine extremorum strictura, nec sine motu peristaltico ventriculi & intestinorum aucto. Augetur hic motus, ubi tunicæ harum partium nerveæ, vel à mole materiæ vel ab ejus acrimonia premuntur & vellicantur. Is enim est omnium fibrarum & tunicarum nerveo-carnosarum genius, ut exterius mole nimia pressæ, vel à stimulo falso, acri, punctæ aut agitæ sese fortius contrahant, quam contractionem postea similis expansio sequitur, qua ratione per universum intestinorum volumen expedita & celerrima sordium fit dejectio. Præterea & alii chronici & veteres affectus sæpissime sponte tolluntur à natura, motu materia peccante vel extra corpus vel ad alias partes transmissa. Ita vidimus asthma suffocativum per erysipelas, per tumorem pedum œdematosum sublaturum. Vidimus epilepsiam & melancholiam curatam per scabiem, melancholiam & insaniam per varices, per hæmorrhoides, tumores pedum & ventris per largius urinæ profluvium.

23. Hisce dictis morbis natura sola medetur, parum juvantibus remediis; ita plebeji, rustici, & populi, qui medicis destituuntur, vel natura aversari solent remedia, solius naturæ beneficio convalescunt, restituntur, & sæpe longe felicius iis, qui pluribus medicis ac medicamentis usi fuerunt, dum varia moliendo potentioribus, remora potius injicitur efficaci naturæ operationi. Memorabile est, quod scribit SANCTORIUS Sect. I. aph. 139. *Nobilem fere nemo cum remediis sanatur, qui peste laborat, plebeji vero sine iis plures sanantur.* Id quod certissime etiam valet de aliis morbis, qui felicius curantur sine medicis, quam si à medicis tractentur.

24. Eget vero natura in sua curatione ordine, eget etiam tempore; unde observamus certo tempore prodire variolas, morbillos, erysipelas, certis temporibus recurrere sanguinis criticas per uterum & hæmorrhoides evacuationes; certo tempore, maxime septimo die, solvi graves inflammationes, septimo, undecimo vel decimo quarto die febres continuas & ardentes solvi; certis quoque temporibus fieri in febribus evacuationem per sudorem, per alvum; & in gravidis à vehementi uteri hæmorrhagia abortum fieri debito tempore. Certum etiam requiritur tempus, ut in coryza, in tussi, materia præparetur, quæ ad excernendum sit apta; destinatum etiam tempus desideratur ad materiam arthriticam podagricamque corrigendam, ut ad excussionem, ad transpirationem fiat idonea.

Certa

Certa etiam tempora observat natura in repetendis motibus spasmodicis item febrilibus, unde recursus & paroxysmi morborum fiunt statis periodis.

25. Verum enim vero hæc accurata temporum observatio minime designat superius quoddam libere, moraliter, cum prudentia & intentione agens principium, sed potius certum tempus, determinatos motus ceu effectus denotat, qui fiunt in corporibus & à corporibus. Quid enim aliud est tempus quam certus numerus, duratio & successus motuum. Quandounque itaque singularis effectus in corpore nostro fieri debet, ut vel materia maligna mitigetur vel corrigatur, vel certa moles humorum dissolvatur, & evacuetur, certus numerus, gradusque motuum necessarius est, consequenter etiam certum tempus. Deinde, ut materia peccans, horum morbosorum motuum causa, mole vel motu inimica generetur, opus etiam est tempore. Ut fibræ motrices à spasmis & vehementioribus motibus debilitatæ recipiant vigorem & robur, quo agitationem & impulsu causæ morbificæ vel mole vel qualitate agentis recipere, reagere & se rursus contrahere possint, opus pariter est certa temporis periodo. Ex quibus jam facillimum erit, paroxysmorum sive motuum morbosorum recurrentium rationes repetere.

26. Neque vero solum natura agit & sanat in tempore, & cum tempore, sed & per vias & emunctoria humori peccanti accommodata atque convenientia, quod excernendum est, ejicit: idque minus efficit directione motuum ad has partes vel consilio aut prudentia quadam, sed ex sola etiam mechanica ratione & necessitate. Rudes enim & crassi humores per ampliores tubulos ac meatus patentiores, tenuiores per angustiores poros sua sponte feruntur. Ita biliosæ & viscosæ in prima regione subsistentes sordes, commode per alvum eliminantur. Serum superfluum salino-crassum opportune per urinarias vias & itinera evocatur. Salivalis tenuis latex per salivæ fontes, mucus per narium ductum, bronchia pulmonum, fauces & crassiora intestina evacuatur. Subcutanei vero contracti tubuli tenuissimum falsumque vaporem exterminant. Prout igitur humor excrementitius crassior vel tenuior in morbo peccat, eo plus per hæc vel illa loca amat evacuari.

27. Quum itaque natura tam providus & sapiens multorum effectuum sit medicus, & sæpe sola sine alia externa ope feliciter illos tollat; merito talis modi in casibus medicum oportet esse plus spectatorem quam actorem. Plures enim dantur morbi ipsa teste experientia, qui sine medici ope sanescunt. Ita variolæ & morbilli certis temporibus tam benignæ indolis observantur, ut sine vehementia symptomatum decedant. Intermittentes febres, pleuritides, peripneumoniæ, catarrhales febres, nullam medici opem sæpe desiderant. Ardentes, rheumaticæ, erysipelaceæ febres felicius sanantur sine medico, quam eodem accedente. Quin etiam præstat non raro, si veritatem fateri velimus, soli naturæ committere curationis negotium, quam imperiti medici experimentis sese tradere. Is enim, cum minus intelligit naturæ salutarem sanandi vim vel non attendit, varias corpori & ejus motibus noxas molitur, magno cum ægrotantis detrimento. Id quod faciunt maxime ii, qui, antequam materia cocta & præparata ad exitum sit, eandem agitant, commovent, & expellere conantur, nec non ii, qui per alias & incongruas vias, quibus peccans humor non respondet, eum educere student, qui motus improvide & intempestive augent; cum potius sint pacandi; vel qui motus deficientes, qui excitandi maxime erant, supprimunt atque extinguunt. Peccatur hac in re toto die, quod admodum dolendum est, dum medici imperiti suis arcanis & generosis auxiliis

nimium fidentes, nulla causa morbi, nulla methodo, nullo tempore observato, multum ægrotantibus detrimenti afferre consuecunt, & quod victrix natura ex tot obstaculis eluctata salutariter effecit, arroganter plerumque ac proterve sibi tribuunt, magnamque inde gloriam ac præmium aucupantur. Non minimus igitur labor medici est, nosse naturæ ductum, genium, processum, vias & salutares motus curandi, ne illos turbet impediaturque, aut ubi ipse agere atque adjuvare naturam debet, id soli naturæ permittat.

28. Absolvimus jam laudes naturæ medicatricis, ordo nunc exigit, ut quid ars valeat, & efficere possit in medendo, dispiciamus. Non enim semper & ubique naturæ vires ad restitutionem & reparationem illius, quod læsum est, sufficiunt, sed interdum plus valet docta ars quam natura. Nam ubi gravior solidarum partium læsio, ubi insignis partis facta est jactura, vel prava dispositio aut conformatio membri, ibi naturæ vires plane deficiunt. Ita nullus à natura effectus expectandus in luxatis, in fractis membris reponendis, excrescentiis tollendis, & in surditate, quæ fit ab obturatione meatus auditorii, vel in cœcitate, quæ fit à panno pupillæ superincrecente, aut consummata cataracta. Nihil quoque præstare potest in uteri vel ani procidentia, in herniis, in extirpatione membri emortui, in calculo, secundinæ vel fœtus extractione. Idem evenit in curandis ulceribus fistulosis, absumendis tumoribus, evellendis scirrhis, removendo cancro, exedenda cariosa excrescentia, anevrismate curando, quibus in casibus natura parum valet, multum vero, imo plurimum ars sibi vindicat, & maxime ea artis pars, quæ manu curat, & omnibus medicis eo commendatior esse debet, quo evidentior ejus est effectus.

29. At vero non tantum magna artis in externis vitiis tollendis est præstantia, sed & ad internos sese extendit morbos. Ex quorum censu maxime eminent morbi sic dicti chronici, qui à natura vix tanguntur, sed artis exigunt necessitatem. Et ut exemplis rem declaremus, nunquam lues venerea solius vincitur naturæ viribus, sed validissima exigit remedium genera, quæ segnes motus excitent, obstructions contumaces glandularum excutiant, & impuram lympham per sudorem aut salivales fontes magna vi expellant. Quorsum spectant sudores largi & salivationes lignorum decoctis, inedia, mercurio bene præparato, antimonialibus essentiis excitatæ, quorum decenti usu certe morbus contumacissimus evinci potest. Scorbutus affectus est rebellis & symptomatum atrocitate fere infamis, tot regiones pervagans, qui à natura minus, heroicis vero auxiliis commo- distime depellitur. Qua laude pollent remedia sale volatili acri balsamico imbuta, decoct. ligni guajaci, sassaf. corylor. pini, summitatum centaurii min. essent. alexipharm. tinctura bezoard. volatil. spir. cochlear. cum oleo suo probe saturatus, tinctura antimonii acris, pilulæ ex gummatib. inedia, motus & exercitatio corporis. In juvenili ætate & corpore existente calidiore diluentia, ut serum lactis cum herbis antiscorbuticis mixtum, acidularum & aquarum salubrium potus valde proficiuus est. Phthisis ex pulmonum ulcere nata si sanationem adhuc recipit non à sola natura, sed ab arte maxime curatur. Neque ignotum est medentibus, quam insignem opem promittant hac in re lactis cura, balsamica temperata, decocta, quæ ingrediuntur scordium, hederæ terrestris, sanicula, herb. agrim. plantaginis, flores millefol. hyperici, rad. symphyt. major. emplastra balsamica toti thoraci applicata, non omisso victu ex cancris, cochleis, ostreis, moderatori corporis motu, inque principio mali leniori V. Sne. Foeda scabies, foedissima lepra, effectus naturæ prorsus eludunt, quæ tamen heroicis reme-

remediorum generibus decenter applicatis cedere solent. Hujus generis sunt mercurius dulc. regul. antim. medicinal. fl. & lac sulphuris, tinct. antimon. acris, tinct. sulphuris, cum decoctis emollientibus & diluentibus exhibita, non neglecto balneorum usu, sanguinis detractione & leniori alvi ductione. Podagra & arthritidis genera ex habitualibus sunt affectibus, nihilo minus si non curantur, tamen multum levantur lactis cura, hæmorrhoidum provocatione, temperantia in victu & venere & corporis motu usuque thermarum & aquarum salubrium. Ingens & diuturnum malum est, quo hypochondriaci torquentur, cuius vis tamen si non tollitur, attamen imminuitur recto usu thermarum, acidularum, martialium, temperate balsamicorum, sanguinis detractione, hæmorrhoidum fluxu, & pilularum balsamicarum, quæ intestinorum tonum roborant, usu. Desiderat quoque hic affectus motum corporis, justam diætam, abstinentiam à frigore, ab acidis, à leguminibus, à flatulentis.

30. Inveteratam epilepsiam, quæ etiam per XX. annos ægrum traxit, naturæ beneficio curatam ignoramus. Novimus vero id factum ab emeticorum usu, & specificis antepilepticis ex animali regno petitis. Colica convulsiva, præsertim quæ à saturni fumo improvide excepto metallurgos vexat, ad lethum vel insanabiles morbos deducit, nisi occurramus internis emollientibus, oleosis carminativis, extrinsecus balneis, & clysteribus mere oleosis ventri infundendis. Quis ignorat porro arsenici deleteriam vim tot funebribus famosam, si intus hauriatur, quod ut venenum omne cito jugulet, si naturæ expectes præsidium, quod promte contra præstat oleum & lac in copia haustum, quæ & defendunt ventriculi tunicas ab inflammatione ac erosione, & irritando vomitum virus è corpore rejiciunt. Morsus canis vel lupi rabidi ut plurimum funestus est, & omnem naturæ vim respuit, quam tamen ars suggerit, siquidem experimentis compertum est, frustum occisi illius animantis quod læsit impositum parti affectæ prodesse. Paralytes & nervorum resolutiones sensu & motu privant corpus & partium usum auferunt, nihilo minus, nisi inveteraverit malum, sub ætate florida, tempore verno curationem ab arte recipiunt, quam præstant præter linimenta ex oleis nervinis balsamicis parata, & spinali medullæ inuncta, laconica balnea ex formicis parata, decocta ex lignis balsamicis, herbis cephalicis, & purgantibus facta, pilulæ cephalicæ purgantes, succinata cum spirit. salis ammoniaci, & spiritu cornu cervi mixta. Guttam serenam incipientem discussam vidimus usu pilularum cephalicarum, & liquore spirituosissimo balsamico fronti & temporibus crebrius cum linteo imposito. Deperditus auditus ingens est vitium, nihilo secius purgante fortiori cum cephalicis nervinis mixto, inedia & sudoriferorum usu quandoque superatur. Cachexiæ, leucophlegmatiæ, anasarcae, tumoribus ventris & pedum oedematosis, quæ mala per se rarius aut nunquam sanescunt, magnum auxilium & spem valetudinis promittunt salia lixiviosa in copia sumta, extracta amara cum balsamicis, it. martialia cum debito regimine motuque corporis propinata. Quæ menstruorum difficili obstructione laborant, opem tandem inveniunt ex V. Sne. usu thermarum, pilularum balsamicarum, martialium, & motu corporis. Gonorrhœa exigit quoque artis opem, neque à natura sponte superatur, sed latius serpens etiam ipsam sanguinis massam inquinat, commode vero tollitur, si præmissa fuerint purgantia, balsamicis gummatibus & subadstringentibus pilularum forma exhibitis, it. injectionibus quæ & purificant consolidantque. Sævum & contumax malum fluor albus in foeminis est, qui artis multoque magis naturæ vires sæpius eludit, infu-

sis tamen purgantibus & roborantibus ex rhabarb. fibris helleb. nigri, meliss. cort. saffrafras, res. ligni aloes, guajaci paratis, it. suffimigiis ex tacamahaca cinnab. succino curationem tandem admittit. Lumbrici in intestinis hærentes, quam sæva nervoso generi inducere soleant pathemata, experientia docet quotidiana. Frustraneus hic est omnis naturæ conatus, qui magis adjuvandus est mercurialium & acriorum stimulantium, it. asæ foetidæ, myrrhæ, tanaceti, camphoræ, sem. santonici, quæ specifica adversus eos virtute gaudent, adsumptione. Viscosa materia ad calculosam concretionem vergens in renibus vel in vesica urinaria subsistens commodissime educitur sub sabuli vel mucii forma tinctura cantharid. tartarifata, clyffo antimonii tartarif. liquore filicum, usu thermarum Carolinarum, pulvere Volckammeri, & in plebeiis allii usu. Eximie vero mitigant cruciatus ex renum calculo oriundos fructus alkekengi, semen cumini, amygd. amaræ, usus thermarum Carolinarum, mel & ejus generis plura. In effræni maniacorum delirio compescendo omne naturæ molimen supervacuum est, sicuti contra pulvere ex herbis specificis parato, cum spiritu vini sumto, illud penitus sublatum animadvertimus. Imo vidimus quoque, ab epoto asinino sanguine cum lacte illud levatum ac egregie mitigatum. Periculosus apoplexiæ morbus sola sæpius sanguinis largiori detractione ex manu discutitur, quale auxilium natura non subministrat. Contracturæ partium omne naturæ auxilium renuunt, axungia vero animantium cum oleis nervinis mixtæ, item fots adfecti membri ex sanguine animantium calenti, potus aquarum salubrium acidularum integritatem quandoque partis restituunt. Tertianæ autumnalis & quartanæ contumax diutius protractæ viscera & inprimis hepar, unde hydrops nascitur, corumpunt: ad eas vero expugnandas multum faciunt mercurius dulcis & reguli antim. medicin. martialium ac chinæ chinæ opportunus usus.

31. At vero in allegandis curationibus, quas ars potius quam natura perficit, prolixiores esse nolumus, cum ex dictis clarissimum sit, medicum, arte sua, modo illam recte didicerit, corporis humani miseriis egregie posse succurrere. Et certe, quid medicus valeat, quid ejus ars efficiat, longe clarius in curandis passionibus chronicis manifestum sit, quam ex cura acutorum morborum apparet. Hic enim natura plus valet arte, ibi ars plus natura. In quam rem elegantia sunt verba, quibus Corn. Cels. libro tertio operis sui præfatur: *Magis tamen, inquit, ignoscendum est medico parum proficienti in acutis morbis, quam in longis. Hic enim breve spacium est, intra quod si quod auxilium non profuit, æger extinguitur. Ibi & deliberationi & remediorum mutationi tempus patet, adeo ut raro, si inter initia accessit medicus, obsequens æger sine illius vitio pereat.* Neque tamen existimandum, in hisce curationibus naturam plane non succurrere, sed potius ita sentiendum, naturam & horum morborum & harum passionum curam absolvere, non vero solam, sed arte adjutam. Unde etiam multum interest, quam naturam in hisce languoribus medendis nactus fuerit artifex, si enim plane imbecillis, debilis & languida fuerit, si motus naturales prorsus deficiunt, fibræ penitus tono ac robore exutæ, viscera obstructa & corrupta sunt, nihil efficere potest: ergo & ars sub favore naturæ militat, & sub ejus præsidio morbosas depellit ægritudines. Quin etiam quod maximum, in horum quoque morborum curatione imitari debet naturam. Hæc enim motu fibrarum auctiori, humorum motu intensiori facto, & excretionibus liberioribus & liberalioribus acutæ passionibus tollit. Et sane, quæ supra laudavimus medicamenta, non alio modo operantur, quam quod cunctantem, segnem & languidam natu-

naturam erigant, motus fuscitent in solidis & fluidis partibus majores, intensiores, excretoria aperiant, & ipsas excretiones adaugeant. Propterea & acutæ & chronicæ passiones motu adaucto curantur.

32. Verum enim vero neque in acutis passionibus natura semper sola bene peragit negotium suum, sed utique & ars ut ipsi subveniat eamque adjuvet necesse est. In inflammationibus præsertim viscerum & in corporibus sanguineis V. S. maximum & necessarium est præsidium, & sine ea sæpe etiam inter initia præcipue morbi repetenda vix peripneumonia, angina, uteri & renum inflammatio feliciter curantur. In febribus synochis & ardentibus magnum quoque à V. S. peti potest auxilium. In variolis, morbillis, imo intermittentibus febribus utile sæpius est sanguinem detrhere, si vasa nimium ipso turgent. Non directe quidem sanguinis missio tollit febrem vel inflammationem, sed tam symptomatum vehementiam avertendo, quam circulum humorum promptiorem efficiendo magnum in curando momentum affert. In sanguinis nimio per pulmones, per uterum, per hæmorrhoides profluvio sanguinem mittere convenit, ut impetus fluxionis à parte laborante avertatur. In gravioribus artuum vagis doloribus solamen ingens sæpe affertur, si sanguis mittitur.

33. Emeticorum quoque prudens usus multum naturam adjuvat in medendis acutis passionibus, ubi coluvies est ex intemperantia & diætæ vitio plurimarum sordium acidarum, biliosarum, viscidarum in febribus, siue malignæ fuerint, siue intermittentes, siue lentæ. Necessarium tum est, ex duodeni & ventriculi sinu has sordes exonerare, ne plus oneri sint naturæ, peccantem materiam foveant, augeant, & graviora symptomata inducant. In variolarum & morbillorum morbo emetica divinam sæpe ferunt opem, quippe natura sæpius in principio hanc evacuationem intendens medicis viam monstrat. Certissima & multiplici experientia compertum est, à medicis Berolinensibus peritissimis, secure non modo, sed cum magno etiam levamine & in principio & in medio ac declinatione morbi dari emetica, prudenti & parca manu porrecta. Experimentum id jam tribus vicibus fecimus felicissimo successu tribus in infantibus, periculose ex variolis decumbentibus. Hi maxime circa tempus suppurationis summa anxietate, inquietudine, difficultate spiritus cum suffocationis metu & virium jactura correpti, data quarta parte tartari emetici in liquido, per sedes & vomitum incredibilem viscerum humoris copiam excreverunt, unde mox cessantibus symptomatibus viribusque receptis vitæ periculo erepti fuerunt. Tentavimus id paucis abhinc diebus in infante trium annorum. Laborabat non ita pridem morbillis, qui quarto die, ipsis jam se ostendentibus mirum coepit languere cum spiritus difficultate, somno fere nullo eoque pavido. Mox algebat, mox incalescebat corpus, dedimus septimam partem grani tartari emetici cum aliquot guttulis essentiae castorei & cochleari aquæ menthæ, à cujus usu non vomuit, sed ter dejecit per alvum copiosam viscidam viridissimam male olentem materiam. Factum exinde, ut mox resumeret vires & meliuscule se haberet, largiter in cute protrusis maculis. Hæret ut plurimum, ut nostra fert sententia, fomes plurimorum exanthematum, variolarum, morbillorum, purpuræ primis in viis, & quam maxime in flexura duodeni, & ex lymphæ salivæ & bile corrupta producitur: quin etiam observavimus, insultus arthriticos consuetos perpetuo fere mitiores, quando statim inter initia leni emetico, vel solo vel cum laxante mixto prima regio sordibus evacuata fuerit. Novimus chronicam purpuram non prius corpus deseruisse, quam post simili modo factam per vomitum expurgationem. Faucium periculosa inflamma-

tiones, aphthæ sordidæ acutis & malignis febribus non raro supervenire consuecunt, nullam aliam ob causam, quam quod morbi tempore ob alvi per aliquot dies adstrictionem sordium corruptarum subnata fuerit in intestinis copia. Juvat ibi quoque lenioribus clysteribus, salibus abstersivis corruptam materiam detergere & educere. Contumacia intermittantium sæpius non nisi emeticis & ex metallorum familia sumtis purgantibus vincitur. Pestis, dysenteria etiam contagiosa ut plurimum mineram ac fomitem alit primo in intestino: unde quæ blando vomitu hanc ipsam evehunt dare consultum est, experientia id attenta ac frequenti confirmante. Sæpius factum, ut unico emetico & subsecuto sudorifico in principio febris malignæ dato, totius morbi vis & impetus simul & semel sublatus fuerit.

34. Magna quoque est vis & efficacia sudoriferorum & diaphoreticorum, quorum prudens usus naturam in morbis acutis egregie adjuvat. Unicum auxilium in peste in sudoriferi potentis, quale est acetum alexipharmacum, matura exhibitione positum esse, omnes uno ore affirmant. Malignæ quæcunque & quæ associantur inflammationibus, continuum eorum, quæ diaphoresin clementer movent, usum, quo nec quicquam datur præstantius, postulant. Blande enim & successive materia maligna corrigi, & stasis sanguinis dissolvi amat. Nitrosa etiam magna sunt remedia, quibus naturæ languenti in acutis, ubi ingens æstus & quasi interiorum incendium jungitur, succurrimus, id quod obtinet in ardentibus, cholericis, inflammatoriis febribus, nec non in tertiana continua æque ac intermittente: sedato sanguinis vehementiore æstu, omnia pacatiora fiunt & expeditius morbus procedit ejusque sanatio. Fixiora terrea, temperantia, diluentia, in acutis, quibus exanthemata sociantur, ab acri caustica materia subnata, admodum sunt proficua. Hujusmodi etiam in fluxionibus acribus, diarrhœa, dysenteria dare pernecessarium est. Neque anodynus, præcipue correctis carere potest peritus medicus in juvando naturæ opere circa sanationem acutorum occupatæ. Commendamus hujus scopi causa theriac. cœlest. Wildegansii pilulas, & emulsiva papaveracea. Ubi enim atrocitas dolorum & spasmodorum urget, & ex hac metus est febris gravioris, vigiliarum, delirii aut convulsionum, jucundissimum hæc ipsa afferunt allevamentum. In dysenterico etiam fluxu pulcherrima hæc sunt medicamenta.

35. Multum quoque medicus præstare & naturæ auxiliari potest commodo regimine, quod sæpius plus valet remediis pharmaceuticis. Ita non modo proficuum, sed & necessarium est in omnibus inflammationibus & febribus exanthematicis, præsertim in principio & statu, moderatori calore frui lecti & hypocausti, in puro & temperatiori aëre versari, in quiete & transpiratione fervare corpus, cavere affectus & omnem excessivum internum & externum calorem. Imperandus quoque semper tenuis victus, & humidum largius offerendum, circumcidendum vinum & excludenda omnia, quæ valde nutriunt. Expedit quoque nosse, quomodo æger se habere debeat circa morbi declinationem, circa critica tempora, quod excretiones non sint sistendæ nec ad inconvenientia loca urgendæ, sed immoderatiores placide moderandæ. In blanda diaphoresi corpus semper servandum, quam temperatioribus analepticis jusculisque calidis excitare convenit. Quæ cuncta satis superque declarant, utique & artem valere ac medicinam in acutis passionibus persanandis, non modo ad evitanda pericula, sed & ut celerius ac securiori via secunda recuperetur valetudo.

36. Ex his jam dictis clarissime intelligitur, naturam

ram in negotio sanandorum morborum corpori eximio esse præsidio, dum ipsa sola nonnullos curat. Vidimus quoque ingentem artis medicæ præstantiam in adjuvandis & moderandis naturæ conatibus, vel etiam in excitandis languentibus & quiescentis naturæ officiis, ut tam naturæ quam arti sua constet laus, sua gloria. Sequitur jam ut etiam de artis medicæ præstantia in avertendis morbis dicamus. Profecto hoc in negotio medicinæ usus eminentissimus. Cum enim certum sit & à rebus, quæ appellari solent à medicis non naturales, aëre, victu, motu, excretis, retentis, animi affectibus, & quæ sunt generis alia, pendere sanitatem & morbos proficisci; certe ut ea sciamus quæ profint & noceant humanis corporibus, & specialiter certis subiectis, pars medicina est utilissima. Natura hic nullum selectum novit, sed prudentiæ opus est, ut scrutemur eas res, ratione & experientia in consilium ducta. Et ita præscribere sanitatis leges convenit, ut imminetia mala avertere possimus, profecto enim medicinæ ingens usus est in præservandis adfectibus, & utinam majori studio ac labore hanc medicinæ partem agitent illi, qui medicinæ scientiam sibi vindicant, utinam etiam qui sanam & longam vitam ducere exoptant, medicos peritos consulere, vel sui ipsius corporis medici essent. Potest ars medicæ tollere morbos, sed longe potentior valet eos præcavere & ut ne fiant impedire. Est quoque tutius cavere, ne corpus in morbos proruat, quam ipsos præsentis depellere. Quid aër, quid aqua, motus, victus, animi tranquillitas, cibi quantitas & qualitas, quid V. S. purgatio, abstinencia, balneorum, aquarum salubrium, thermarum usus hac in re possit, iis non ignotum est, qui harum rerum naturam, operandi modum, vires, effectus & naturas hominum accuratius perspectas habent.

37. Neque etiam promiscue omnibus corporibus idem regimen vitæ convenit, sed etiam in eo necessa-

rium est distinguere subiecta. Rectissime enim Hippocrates: Corpus, inquit, à corpore, natura à natura differt, & sapissime quod alteri inimicum, alteri est amicum. Quam maximopere igitur in hac re commendamus, naturas hominum scrutari atque cognoscere. Omnes quidem hoc clamant uno ore, sed quid intellectum hoc ipso velint, destituti claris rationibus applicare non fatagunt. Ex iis vero, quæ supra posuimus, haud difficile erit ea explicare. Qua propter naturam corporis humani cognoscere significat, nosse vires, nosse robur partium, atoniam vel motuum ataxias. Ad cognitionem quoque naturæ humanæ pertinet, habitus corporis scientiam in numero habere, quænam sit vasorum copia, amplitudo, viscerum constitutio, qualis sanguinis copia, temperies, mixtio, qualis sit ejus motus & circuitus, quod ex pulsu, calore & transpiratione judicamus, qualis sit tonus ventriculi & intestinorum, quod ex appetitu, digestionem & alvi excretionibus patet, qualis habitus animi sit, & simul corporis, ad has vel illas passiones: quales ingenii vires, inclinationes; quæ etiam cuncta corporis naturam, fibrarum motum ac tonum & humorum circulum manifestant. Jungi hisce omnibus debet parentum constitutio, solum natale, ætas, vitæ genus, clima, victus, quæ universa mirifice naturam corporis immutant; Et ut rem in pauca contrahamus, cardo universæ scientiæ medicæ unice in eo versatur, ut naturam hominum in statu sano & ægroto perspectam habeamus, & quomodo arte, i. e. motus & medicamentorum præscriptione, nec non ipsa manuali operatione eam adjuvare debeamus.

Finire placet nostram dissertationem veteri medici Damasceni dicto: *aph. 23. 24. Victus & natura curant morbos, medicus utriusque minister est, proinde si naturam juveris, medici munus præstiteris. Id enim solum est officium medici. Si naturam succumbere permiseris, nihil egeris, & carnificem magis quam medicum representabis.*

D E

RECTA ET SIMPLICISSIMA NATURÆ
MEDENDI METHODO.

§. I.

Quemadmodum ineffabilis sapientia, in universa rerum naturalium oeconomia, cuncta certo numero, mensura ac pondere administrat, & nihil sine ordine, sine fine, sine causis fini proportionatis perficitur; ita quoque in oeconomia corporis nostri vivi & sani omnia, quæ fiunt, certo ordine certoque causarum nexu atque successu continentur. Vita & sanitas à convenienti structura solidarum & dispositione fluidarum partium, à certis quoque motibus, quibus separantur utilia & inutilia excernuntur, dependet. Neque aliter amissa sanitas recuperatur, vel morbus, interitum corpori minitans, profligatur, nisi sub certo motuum ordine, successu, seu tempore. Sive enim natura sola, quæ sæpe optime gravissimis morbis medetur, sive arte adjuta sanet morbos & ab interitu & causis lædentibus corpus vindicet: certa semper methodo, certo ordine, certo tempore, certis motibus causæ morbificæ oppositis id perficit. Hanc itaque methodum, qua ipsa natura felicissime utitur, hunc medendi ordinem, is, qui artis opera fe-

liciter exercere cupit, maxime omnium exquiste nosse debet, quia solidior medicus sine ejus cognitione nihil cum certitudine, cum securitate, cum promptitudine in curando expedire potest. Equidem nullus fere medentium est, qui sine methodo in curando se procedere fateatur, sed omnes eam summe esse necessariam asseverant. Quisque, qui rationalem medicinam profitetur, clamabit, causas morborum removendas & ob id apta remedia invenienda esse: sed sicuti in genere id recte dictum est: ita postmodum in applicatione miras hallucinationes & ingentes errores animadvertimus. Quisque enim fere, pro suo captu vel arbitrio aut hypothesibus, sive potius principiorum fictionibus & pro doctrina à præceptoribus hausta, dissidentes & quæ explicari minus queunt, morborum sibi fingit causas, unde non potest aliter fieri, quin etiam in remediis inveniendis, inque iis adplicandis non una & constans sit consensus, quod non in medio cre medentium, neutiquam vero in artis, quæ firmis gaudet fundamentis, opprobrium & ægrotorum damnum vergit. Recte enim, effato HIPPOCRATIS, *Lib. 1. de victus ratione §. 15. medicorum controversia justam* igno-

ignorantiæ suspicionem, eorum vero concordia magnam spem ostendit. Jam maxime id dictum valere debet de medendi morbis methodo, in qua si dissentiant medentes, non leve ignorantiae vel incertitudinis indicium est. Quis enim sibi persuadeat, sub tanto dissensionum numero & contraria sentientium divor- tio veritatem, quæ una est, non multiplex, quæ sim- plex & facilis, non conficta, non perplexa, consiste- re posse?

2. Nos itaque, sicuti non sine singulari auxilio di- vino didicimus in medicina, sive ad theoriam sive ad praxin pertineat, omnes hypotheses, quæ nonnisi prin- cipiorum fictiones sunt, & sub quibus veritas & cer- titudo stare nequit, contemnere, imo nihil habere: ita in pathologicis seu legitimis morborum causis ad- quirendis & remediorum prudenti administratione hoc tenendum esse plenissime statuimus. Et sicuti in to- ta medicina explicanda, sive in iis rebus, quæ ad interitum vel salutem corporis pertinent, nullo alio, quam unico, eoque verissimo, simplicissimo & quod in natura corporis nostri continetur, hæcenus usi su- mus principio & nihil aliud est, quam sanguinis & humorum liber & moderatus ex debita partium soli- darum constrictione & dilatatione proficiscens progres- sivus motus: ita etiam ex hoc ipso vera medendi via ac methodus est deducenda, imo rectissime inde de- ducitur. Quod si enim verum est, uti verissimum, quod sine arte & ope medicorum sæpius felicissime gravissimi morbi sanentur & ægotantes solius natu- ræ & corporis viribus sani fiant & ab interitu vindi- centur: quod si etiam verissimum est, naturam præ- valere arti, quæ tantum imitatrix & adiutrix esse de- bet: rectissime sane concluditur, eam methodum, qua natura sola curat morbos & cujus auctor sapientissi- mus Deus est, cognoscendam ac imitandam esse. Hanc itaque naturæ in morbis curandi methodum, quæ viam curandi artifici medico monstrat, invenire ac perscru- tari & certas inde medendi leges & regulas concin- nare, instituimus.

3. Prius vero quam certam & rectam morbis me- dendi viam ac methodum exponamus, scopo nostro maxime conveniens erit, eum ordinem ac modum ostendere, quo corpus nostrum, in se maxime cor- ruptibile, à corruptione præsentanea perpetuo vindi- cetur sive vivum ac integrum maneat: siquidem vix alia methodus, sed fere eadem est, qua corpus à morbis & morte præservatur, & qua ipsi morbi, si- ve potius eorum causæ, expugnantur & à corpore depelluntur. Consistit vero totum mysterium, arca- num & artificium quo conservatio corporis & mor- borum sanatio perficitur, in eo tantummodo machi- næ nostræ, ingeniosissime elaboratæ, apparatu atque structura, ut sanguis & reliqui fluores perenni ac li- bero inque orbem vergente motu ac cursu progre- diantur, eorumque utiles partes in usum segregentur, inutiles vero, excrementitiæ & superflue, per varia & convenientia loca atque emunctoria, foras ejician- tur, idque beneficio simplicissimi motus dilatationis & constrictionis, qui in motricibus & elasticis cordis & arteriarum atque fibrarum machinis viget. Quam- diu itaque hi motus integri sunt & recte procedunt, & vita & sanitas, sive vigor & integritas actionum, tam corporis quam animi adest; simul ac vero ii con- servatorii & vitales motus, vel in parte vel in toto corpore, exstinguuntur, mors & foeda corruptio se- quitur. Quapropter, si corpus ab excrementitiis sor- dibus non recte & sufficienter liberatur, morborum semina producuntur, quæ, ad ἀκμήν perducta, mo- tibus, qui fiunt secundum naturam, turbandis & per- vertendis, in quo morborum formalis ratio consistit, apta atque idonea fiunt.

4. Neque vero tantum vita & sanitas à debitis ege-

stionibus humorum impurorum dependet; sed & o- pus est, ut in eorum locum rursus benigni & tem- perati substituantur. Quod si enim corporis nostri con- servationem, sive vitam ejusque causas, paulo accu- ratius intueamur, continuo fluxu & refluxu, sive cir- culo; posthæc influxu & effluxu, sive ingestionibus & egestionibus eam contineri recte animadvertimus. Quid enim manifestius est, quam jugi illo & peren- ni progressivo & intestino calido sanguinis motu hu- mores benignos ac temperatos, quales ad naturam corporis integram servandam requiruntur, successive falsos, intemperatos adeoque inutiles & effoetos red- di & propterea è corpore eliminandos esse? Quid porro clarius est, quam quod in eorum locum rur- sus benigni, gelatinosi, blande temperati per alimen- torum ingestionem ac digestionem, surrogari debeant: quod si non accidit, totalis tandem virium defectus & postea pressio pede subsequens mors expectanda est; unde non sine magna ratione peritiores medentur, eos morbos, qui diuturnum internum calorem, cum plenaria appetitus destructione junctum habent, peri- culosissimos dijudicant.

5. Ecquis itaque est, qui non clarissime perspicit, integritatem corporis nostri in debitis ingestionibus & egestionibus unice consistere & ex hisce quoque ma- le se habentibus, morborum, imo mortis originem ac fontem esse derivandum? Cogitet itaque quisque velim, hominem robustum, qui ad debitum corpo- ris augmentum pervenit, sub tanta & quotidiana in- gestorum copia, quæ intra septimanam in nonnullis vel ad centenarium se extendit, pondere notabiliter non crescere. Quid aliud exinde dijudicare possu- mus, quam copiarum eorum, quæ ingeruntur, excre- tiones exquisite respondere debere. Structuræ itaque corporis nostri artificium eo maxime collineat, ut in- gestioni, digestionem alimentorum, utilium separationi & inutilium excretioni vacet, unde tantum colatorio- rum, excretoriorum & emunctoriorum apparatus un- diquaque conspiciamus.

6. Nihil itaque ex dictis clarius elucescit, quam plurimorum morborum originem ex eo petendam es- se, quod humores inutiles, impuri, superflui, non recte & convenienter ejiciantur, sed remaneant, & copia pariter ac perversa mixtione & temperie motus ordinatos turbent & benignos vitales succos contami- nent: ex copia enim & impuritate succorum pericu- losæ in vasis & visceribus stagnationes, infarctus, sta- ses, tubulorum minimorum obstructions, induratio- nes subnascuntur, quæ almæ morborum, tam acuto- rum quam chronicorum, genitrices fiunt, siquidem humorum stases acutas, eorum vero stagnationes & viscerum obstructions chronicas magis passiones in- generant & causarum morbificarum generationem ab- solvunt. Quid jam clarius & evidentius est, quam morborum præservationem in eo unico requiescere, ut ingestiones naturæ cujuscunque corporis conveni- entes fiant, evacuationes vero debito modo, quan- titate, proportionem, loco, perficiantur. Quapropter sapientissima natura, sive conditio & ordo motuum, quo natura morbos præcavet, præmonstrat quoque medico viam, quid in negotio præservationis à mor- bis agere, intendere vel moliri debeat. Quod si e- nim id consilio suo recte perficit, ut boni & tem- perati succi corpori accedant, omnes verò inutiles & superflui secedant, recte officio suo in eo func- tus est.

7. Operæ jam erit pretium perspicere, qua ratio- ne & qua methodo ac via ipsa natura, cui plane mi- rabilem in sanandis morbis energiam veteres adscrip- serunt, corpus à morbis & causis morbificis liberet: eo, quod cognitio hujus methodi, qua natura uti- tur, ad imitandum, vel ad naturam deficientem ad-

juvandam medico summe necessaria judicatur. Omnis autem perfecta morborum sanatio, & sana ratione id dictante, & auctoritate optimorum medicorum adficiente, hæc est, ut causæ, quæ œconomiam motuum naturalium turbant eamque prorsus pervertunt, è corpore removeantur atque ejiciantur. Rectissime enim, docente GALENO *Lib. I. methodi medendi: Perfecta curatio à causis exorditur*. Et secundum CELSUM, *is recte curat, quem causæ origo non fallit, quia causæ investigatio ejusque primordia & occasio in affectionis & remedium cognitionem amplissimam deducunt*. Et perite FERNELIUS *Lib. I. Cap. IV. methodi medendi* adferit: morbos absque causarum præcognitione nec præcaveri, nec feliciter curari posse.

8. Quod si itaque sola natura, sponte & suis viribus usa, sine ope & arte medici & sine medicamentorum apparatu, morbos subinde sanat, & ægros in integrum restituit, idque causas morborum in totum removendo præstat, jure meritoque quæritur: quænam sint illæ morborum causæ, & quo modo, & quo ordine ac methodo eæ à natura vincantur. Jam vero supra dictum est, & iterum monemus ac repetimus, sicuti naturæ nihil magis est ad conservationem corporis amicum, quam motus, tam progressivus, quam excretorius: ita ipsi nihil esse infestius & destructioni invehendæ aptius, quam sanguinis & humorum quietem, stasim, stagnationem, extravasationem, vasorum occlusionem, impurarum sordium retentionem, viscerum indurationem: siquidem hæ ipsæ causæ efficacissimæ sunt ad motus febriles, spasmodicos, convulsivos, in quibus cunctis maxime motuum morbosorum naturæ consistit, inducendos, neque minus illæ putredinem & corruptionem, quæ & mixtioni humorum & structuræ solidorum infensissima est, producant, quam recentiores medicorum malignitatis nomine insigniunt.

9. Hæ sunt præcipuæ, quibus corpus humanum affligitur, morbificæ causæ, quas utique remove oportet, si officio suo in curando natura recte perfungi velit. Jam vero ad id exsequendum non convenientius excogitari poterit medium & remedium, ipso motu tam solidorum, quam fluidorum auctiori facto. Is enim ejus indolis est, ut humores subsistentes, eorumque stases & stagnationes, è sede sua movere, revolvere, in motum redigere & obstructions vasorum freferare possit. Is quoque densos, crassos ac immobiles humores fluxiles mobilesque reddit: is denique valde idoneus est, ad copia delinquentes humores vel sanguinem per congrua loca evacuandum, neque minus ad excrementitios, serosos, falsos humores, per diversi generis emunctoria, proscribendos, biliosos & viscidos per alvum, falsos aquosos per urinam, subtiliores per universale illud cutis emunctorium excernendo.

10. Jam vero memoratu admodum dignum est, omnem morbificam causam; siue quantitate seu mole, siue temperie & activitate infensa sit, principaliter agere & afficere partes subtiliori sensu & motu præditas, quales nerveæ & membranaceæ sunt, quas moleste distendit, lacinat, vel erodit aut comprimit, & hac ratione in illis ipsis reactionem quandam siue motum, qui à naturali deflectit, intensiorem, qui in spastica fibrarum constrictione consistit, suscitare. Hæc spastica partium motricium & musculosarum ac nervearum constrictione veram motuum morbosorum, proximam & formalem causam fere unice constituit & absolvit. Hæc enim ipsa est, quæ omnibus motibus, qui alias secundum naturam & ordinem fiunt, turbandis & pervertendis apta est. Hæc functiones & actiones partium lædendi invertendique potentia valet: ex hac denique omnium symptomatum, quæ morbis sociantur, origo petenda est. Hic vero spasticus motus, quod plane mirabile, idem ille quoque est, quo na-

tura utiliter utitur ad ipsam causam morbi, quæ motus hos morbosos suscitatur, vincendam ac jugulandam, inque eo certe infinitam divini architecti sapientiam & providentiam in construenda machina nostra admirari oportet, quod motus morbosus subinde remedio & præsidio sint ipsis morborum causis corrigendis & removendis.

11. Cum vero hic magnum arcanum naturæ in medendo, & res maximi momenti proponatur, utique non alienum, sed scopo nostro maximè consentaneum fore judico, si mentem nostram circa hoc negotium paulo pressius explicemus. Observatur nempe in omnibus motibus morbosis & paroxysmis spasmus, & hic recte primo in universalem & particularem, deinde in salutarem & perniciosum dispescitur. Universalis, si totum vasorum genus, præcipue vero cor & articularum ac fibrarum systema, adffigit, & per constrictionem præternaturalem earum systole & diastole majori facta sanguinis progressionem velociorem reddit, recte dicitur febris, quam pulsuum frequentia, quæ ex singulorum celeritate nascitur, certissime indicat. Sæpe ille spasmus tantum in certis partibus consistit, quas constringendo coarctat, sanguinisque liberum progressum impedit, adeoque inæqualem sanguinis circuitum efficiendo, sanguinis copiam ad alias partes apertas magno cum impetu urget. Et hæc spastica affectio particularis maxime partes nervosas & membranaceas obsidet, ut sunt, ventriculus cum toto intestinorum volumine, in quo tragoediam suam frequentissime ludit, quod morbi illi spasmodici, qui mali hysterici vel hypochondriaci nomine veniunt, pathematum diversitate satis superque clarum ac perspicuum reddunt.

12. Visitur hic spasmus in omnibus hæmorrhagiis, nimis sanguinis ad partes congestionibus, humorum decubitu inque omnibus doloribus, anxietatibus, excretionibus suppressis. Hic spasmus vehementior, si duram matrem, quæ totum cerebrum ac cerebellum involvit & nervorum omnium, imo ossium membranas constituit, ferit, non modo celerrima fluidi nervei per totum membranarum & nervorum systema fit tractio, sed & citra voluntatem artus vel constringuntur, vel distenduntur, aut validissime commoventur, & sic epilepsia, siue convulsio universalis, nascitur. Hi sunt præcipui illi motus naturæ, qui in morborum impetu vel paroxysmo nunquam non advertuntur.

13. Sequitur jam, ut paulo accuratius intueamur, quinam ex hisce motibus morbosis salutis & causis morborum removendis apti sint, & quinam potius ad perniciem & corporis interitum; adeoque ad ipsam mortem, tendant. Error enim est ad praxin cum ratione exercendam valde noxius, omnes morbosos & maxime febriles motus esse in se & sua natura salutes. Salutes itaque spasmos & motus morbosos dicimus, qui ita sunt comparati, ut causam morborum; siue spasmodicorum motuum auferant, quod optime efficitur, si humores stasim vel stagnationem concipientes resolvuntur, acres, caustici temperantur & corriguntur, & qui ad excretiones peccantis materię vergunt eliminantur. Exitiosos vero & multum periculi habentes eos spasmos & motus judicamus, qui cutem & omnis generis emunctoria constringunt, materiam peccantem intus detinent & ad ima viscera & interiora vitalia pellunt neque eam evacuant. Et sicuti salutes sanitas, ita perniciosos mors subsequi solet.

14. Equidem ea indoles atque ingenium est omnium spasmodorum, ut ab ambitu corporis ad interiora sanguinem & humores pellant, ut emunctoriorum minimos ductus constringendo excretiones quodammodo sufflaminent, attamen hi salutes fiunt, si certa temporis periodo ac termino emunctoria antea constricta rursus relaxantur, plus aperiuntur & motus postea

postea sanguinis atque humorum major ad corporis ambitum & partes externas fit, transpiratio augetur, sudor fluit, urinæ crassæ minguntur & alvus excrementa biliosa viscida copiose deponit.

15. Ex his itaque excretionibus, quæ certis temporibus & diebus morbos & spasmos subsequuntur, salutarem horum motuum effectum & dextrum eventum dijudicamus; unde has excretiones medici criticas appellare solent, quia morbum judicant. Solent autem hæ ipsæ, si salutariter eveniant, die maxime impari, qui criticus dicitur, accedere, qualis est tertius vel dimidius septimi, septimus, nonus, undecimus, decimus tertius, siquidem in hisce diebus vel ad mortem, vel ad sanitatem morbi fit inclinatio. Quod si enim hisce diebus symptomatum notabilis est remissio & excretiones sequuntur, optimum salutis est signum: si vero symptomata adhuc persistunt, spasmi urgent & excretiones non animadvertuntur, certum periculum est expectandum. Quin imo hisce diebus mors ut plurimum morbi tragoediam claudere solet. Ex hisce itaque clarissime intelligimus, plures motuum morbosorum, quamvis in se & sua natura à regula deficient, dirigente sic divina providentia, sæpiissime esse salutes causasque morbificis expugnandis idoneos morbisque optime mèderi; hinc jam fit perspicuum, qua ratione recte natura morborum medicatrix à sapientioribus veterum medicorum salutetur.

16. Igitur arcana illa & à Deo corpori humano indita methodus, lex ac norma, qua & secundum quam ipsa natura medetur morbis, in eo maxime versatur, ut à causa morbi, sive mole sive virtute & potentia peccet, motus spastici in genere vasculoso & etiam membranoso excitentur, qui ad ipsam causam morbi removendam vel convenienti tempore ejiciendam spectent. Hi si felicissime succedunt, sola natura curat morbos & medicus tantum spectator est, si autem sola id non præstare potest, medicus illam viam ac methodum sequi, naturam adjuvare, impedimenta tollere, motus moderari vel excitare, ad convenientia loca materiam ducere, ab incongruis reducere, variis remediorum generibus debet. Et in eo jam unice medentis auxilium, intentio & sanandi ratio conquiescere & fundata esse debet, ut methodum naturæ, si occupata est, ad materiam subsistentem dissolvendam, removendam, corrigendam & per convenientia loca debito tempore expellendam, prudens medicus observet, sequatur, adjuvet, vel eandem in salutarem finem dirigat.

17. Quum autem verum fundamentum rationalis, certæ, tutæ & innoxie praxeos in hac naturæ methodo situm sit, non sine singulari fructu atque utilitate fore judico, si paulo specialius hic agamus & quibusdam exemplis sententiam nostram clariorem reddamus. Animadvertimus videlicet, sanguinem in vasis, præsertim in sexu sequiori, ætate juvenili, habitu corporis existente spongioso & molli, vitæ genere delicatiori & quietiori, statim temporibus vel temporum periodis, vere maxime & autumnis, redundare, stagnare, & hinc inde in vasis majoribus impeditius moveri, quo fit, ut excitetur spasmus, qui ima abdominis maxime petit, unde dolor circa lumbos, flatulentia in abdomine, alvi adstrictio, extremorum refrigeratio, urinæ tenuitas visitur, quo spasmo deinde & compressionem venarum in mesenterio & abdomine efficitur, ut sanguis majori nisu & impetu in foeminis ad uterum, in sexu nobiliori & provectiori ætate ad hæmorrhoides, in adolescentia ad caput & nares pellatur; hinc majori ibi facta collectione, vasa extrema intra tunicas teneriores narium, ani vel uteri jacentia, nimium distenduntur, & tandem aperiuntur atque notabilem sanguinis copiam effundunt. Ecquis est, qui non hic animadvertat, salutarem & utilissimam hanc sanguinis esse

excretionem, quia liberat corpus à sanguinis copia, quæ libero vitalis sanguinis progressui contraria fuit, ingens corpori periculum minitendo. Si itaque hic sola omnia natura recte in movendo & excernendo exsequitur, nihil moliri debet medicus. Quid enim imprudentius excogitari potest? quid magis methodo sanandi contrarium est, ac si medicus has excretiones salutiferas externis vel internis constringentibus, aut motus hos sistentibus, opiatibus, anodynis, cohibere velit? Nihil enim certius est, quam gravissimos & summe periculosos morbos apertissime inde generari. Et quoniam salutes ejusmodi sanguinis evacuationes sunt, quinimo à plurimis malis liberant, hinc si non recte procedant, quid faciendum sit medico, ipsius naturæ methodus sanæque ratio dicitur. Vel enim motus isti spastici non sunt sufficientes ad sanguinem expellendum, vel sanguis nimis crassus, tenax ac viscidus est, vel viæ, per quas debet fieri evacuatio, obstructæ aut constrictæ sunt: unde videmus emmenagogorum moderatiorum cum sufficienti humido, item potus thée, caffèe, balneorum, fotuum eò tempore, quo natura molitur excretionem, esse usum efficacissimum.

18. Quod si vero non sanguinis copia peccat, sed potius serum acre, causticum membranosis partibus insidet imi ventris, & enormes sanguinis profusiones in impuris, cachecticis corporibus concitat, quemadmodum id sæpius fieri animadverimus in purpura, variolis, morbillis, in corporibus potissimum scorbuticis & arthriticis, tunc minime salutes, sed potius exitiosæ excretiones habendæ sunt, eo quod non removendæ causæ morbificæ, quæ tenuissima materia acris est, accommodatæ sunt, sed sanguinem, qui potius servari debebat, una cum viribus effundunt. Tali itaque in casu medico omnino opera danda est, ut qua fieri potest celeritate, has perniciosas ejectiones compescat, quod tamen non violentia, non stypticis & constringentibus expedire consultum est, sed potius spastica stricturæ sunt relaxandæ, humor acris insidens temperandus, discutiendus, quod non commodius ac diaphoreticis cum anodyno junctis præstatur. Eadem ratio est excretionum sanguinearum, quæ ex obstructione, induratione, vel infarctu viscerum nascuntur in cachecticis, hydropicis, tunc enim sanguinis rejectiones per nares, per hæmorrhoides vel etiam per vomitum frequentiores maxime detrimentosæ esse solent, quia non auferunt morbi causam, sed potius vires consumendo tristiores morbi exitum procurant.

19. Maxime vero omnium febres tam acutæ, quam chronicæ ex eorum morborum numero sunt, qui frequentissime salutes corpus à præsentanea noxa vindicant. Febres enim sunt illud medium seu potius remedium, quo natura subinde ad depellendas morbificas causas feliciter utitur. Sunt vero identidem motiones febriles salutes probe distinguendæ à pernicialibus quæ magis interitum, quam salutem adferunt; siquidem illæ ejus sunt indolis, ut causis febrium expugnandis aptæ sint, hæ vero potius majorem corpori noxam vires detrahendo inferunt, tantum abest, ut causæ febrili auferendæ sufficiant. Pleræque ex febribus acutis inflammatoriæ sunt & fixam stasin sanguinis in tubulosa partium aut viscerum substantia pro causa agnoscunt, quæ dum spasmus in universo genere fibroso & vasculoso suscitatur, sanguinem per totum systema vasorum celerius pellit & majori copia ad partem affectam adducit, qua motus celeritate & majori sanguinis ad partem inflammatam adfluxu utique fit, ut sanguis subsistens & firmissime inclusus successive abstergetur, eluatur, resolvatur inque ordinem redigatur, quod plerumque circa septimum diem, si recte & ordine res procedit, accidit. Et si tunc spasmus cum omnibus symptomatibus ipsaque febre remittit,

cortex cutis glandulosus relaxatur, transpiratio restituitur, sudor fit liberior & hac ratione sub febrili commotione generatæ multæ excrementitiæ salino-sulphureæ fordes solius naturæ beneficio utiliter evacuantur. Et hac naturæ methodo plures, præsertim plebei, sine ullius medici ope, sæpe feliciter ex febribus, præsertim continuis, evadunt.

20. Hæc naturæ methodus curandi quam maxime medico monstrat viam, quid in hujus generis febribus facere vel omittere debeat. Lex enim curandi hæc est: impactus tubulis sanguis successive & paulatim citiori sanguinis appulsu resolvendus est. Ex eo jam facile colligitur, quia à sanguinis abundantia, qua nimium vasa distenta sunt & turgent, impeditur sanguinis per partem inflammata liberior transpulsum, ut potius exinde major sanguinis in parte inflammata fiat stagnatio, ipsaque inflammatio incrementum capiat, tali in casu nihil præsentius esse, quam providam sanguinis detractionem, eamque non procul à parte affecta institutam, partim ut major stasis & inflammatio impediatur, partim etiam ut liberior universo sanguini cursus & transgressio per partem affectam concilietur.

21. Tum & illud ex prima & principe morbis medendi lege naturæ addiscimus, non valde nimiam esse sanguinis quantitatem exhaustiendam, siquidem detracta nimia sanguinis copia non sufficiens fit ad partem affectam ejus appulsus, quo tamen stasis, quæ causa morbi est, dissolvi debeat. Quare graviter ii peccant medici, qui in febribus inflammatoriis, quando sanguis deficit, repetitas moliuntur venæ sectiones, quibus nihil aliud perficiunt, quam ut inflammata partem celerrime ad sphacelum perducant. Et quia sanguinis decenti & crebriori appulsu pars à periculosa stasi liberari debet, facile patet, eum medicum egregie naturæ auxiliari, qui partem affectam emolliente fotu, cataplasmate & temperato calore fovet: sicut contra ii gravissime delinquent, qui vel stupefacientia, sedativa, infrigidantia, vel etiam nimis calida spirituosa adplicant. Et cum in minimis & capillaribus vasculis sanguis & humores stasim ac inflammationem concipiunt atque ex his ipsis eluendi sunt, per hæc tamen sanguis crassus & densus difficillime transit, facile apparet, ea omnia, quæ humores fluxiles reddunt, quæ diluunt, humectant & immodicum calorem, quo serum tenue absumitur, contemperant, remedia esse convenientissima: contra omnia, quæ humores incrassant, quæ calorem augent, humidum absumunt, uti opiata & calidiora sudorifera in omni inflammationum genere noxiosissima esse.

22. In exanthematicis febribus, quæ jungi solent variolis, morbillis, purpuræ, petechiis, bubonibus pestilentialibus, serum sanguinis causticum, acre, tenue, in partibus membranaceis præsertim in ventriculo & intestinis acerbis spasticas constrictiones, nec non humorum ad varias partes congestionem efficit, simulque febrem accendit, cujus beneficio sanguis, à partibus exterioribus ad interiores, ubi materia peccans hæret, appellitur, ut copiosioris seris & sanguinis adfluxu materia acris caustica temperetur, corrigatur, resolvatur & apta ad excernendum fiat. Quod si naturæ beneficio id feliciter accidit, spasmodorum omniumque fere symptomatum fit remissio, pori & tubuli subcutanei relaxantur & sanguinis ad summam cutem & ambitum corporis fit major adfluxus, unde materia morbifica caustica ibi secernitur. Ita sæpe naturæ solius beneficio pestis & variolæ & morbilli citra singularem apparatus medicamentorum sanantur. Bene enim SANCTORIUS S. I. a. 139. monet: *plebejos magis liberari à peste, quam divites, qui multis medicamentis utuntur.* Quod si igitur hac via, quæ Deum auctorem agnoscit, natura sola hos morbos curat, utique

etiam medicus, qui naturæ minister nuncupatur, huic viæ insistere debet, si natura sola id perficere impeditur. Regula namque exanthematicis hisce febribus medendi hæc est: materia acris caustica vitalibus partibus inhærens, uberiori sanguinis appulsu contemperanda est, ut apta ad excretionem per ambitum corporis fiat.

23. Ex quo jam conficitur: omnia ea, quæ ad contemperandam materiam acrem faciunt, & quæ succos sanguini dulces, gelatinosos, benignos ingenerant, naturæ vacillanti egregie opitulari. Hinc patet, præstantissimum in hisce morbis usum esse decoctorum, quæ leniunt & demulcent acrimoniam, qualia parari solent ex dactylis, ficubus, radice scorzonæ, chinæ, rasura cornu cervi, glycyrrhizæ, floribus papaveris rhœados, semine fœniculi. Patet quoque porro, plane eximium esse usum bezoardicorum, quæ fixioris indolis sunt & acrimoniam humorum temperandæ egregie serviunt. Neque ex dictis amplius obsecurum esse poterit, quam valde graviter & perversè in curando procedant ii, qui statim ab initio, antequam materia cocta, temperata & ad exclusionem apta reddita fuit, sudoriferis valentioribus & expellentibus hos morbos tractant, quibus nihil aliud efficiunt, quam ut acerbiora symptomata ipsamque mortem funestam accersant. Ulterius ex jam dictis elucescit, cum materia excernenda sit per cutem, quæ ejus congruum est emunctorium, nefarios eorum esse ausus, qui eo tempore, quo transmitti ipsa debet ad habitum corporis, valentiora purgantia, diuretica aut emetica, vel etiam acida refrigerantia aut opiata propinant, aut corpora aëri libero exponunt.

24. Quod si quæstio moveatur: num in dictis morbis sanguinem mittere aut alvum ducere vel vomitum proritare conveniat? solvenda hæc ipsa identidem est ex naturæ solemnem curandi methodo. Nimium abundans sanguis quando ob spasmus febrilem ad interiora reprimatur, non modo liberior ejus transitus per partes membranaceas nervosas, quas materia morbifica occupat, necessarius impeditur, sed ulterius ingentes & periculosæ in capite inque pectore congestionem & exinde immodicæ hæmorrhagiæ vel inflammationes aut deliria oriri possunt; quare tali in statu ad hæc avertenda convenientissima utique erit sanguinis missio, quæ ipsa quoque, experientia teste, variolarum felicem exitum sæpius egregie secundat. Quod vero attinet ad emetica leniora & evacuantia, hæc quidem directe ad deliniendam & ad exitum disponendam materiam exanthematicam nihil faciunt; quod si vero prima regio saburra vitiosorum vel biliosorum vel acido-viscidorum humorum obfessa est, utique & hanc inter initia morbi expurgare oportet. Spectat huc *aphorismus* 22. HIPPOCRATIS l. I. materiam in principio morborum acutorum evacuandam esse si turgat, & quidem hanc ob rationem, ne ad massam sanguinis delata attemperationem materiæ causticæ ejusque exclusionem impediat.

25. Sunt quoque arthriticæ, rheumaticæ & catarrhales febres ejus ingenii, ut plerumque salutis & remediis quidpiam secum habeant. Peccat in his morbis maxime copiosum serum excrementitium, tenue, salsum, quod ob segniorem factam transpirationem retentum & ad interiora, atmosphæra præsertim per ventos boreales compressa, repulsum, in glandulosis asperæ arteriæ vel faucium locis vel membranis articulorum aut muscutorum hærens identidem ibi spasticas strictiones exercet, unde extremorum horripilatio, refrigeratio, lassitudo corporis gravativa, appetitus prostratio, alvi constructio, frequentior ad urinam stimulus, calor sub vesperam & noctem auctior, sternutatio, tussis, dolor artuum, subsequuntur. Nihilominus tamen sub hisce motibus contrariis, qui

vergunt.

vergunt ab ambitu corporis ad interiora, latitat quoddam remedium; nam largiori feri & sanguinis, ad partes quæ stimulo salino agitantur, adfluxu uberiori reddito, tubuli spasmo constricti ampliores fiunt & materia caustica attemperatur sive coquitur, atque adeo hæc ipsa ad excretionem cum copioso humore viscido in tussi & coryza, vel ad exhalationem per cutim in arthritide & variis rheumatismi speciebus idonea redditur.

26. Hic processus naturæ iterum monstrat medico, quid in ejusmodi morbis profit vel obsit, & quid facere aut omittere debeat. Prima enim & præcipua ejus cura esse debet, ut remediis acrem, falsam materiam contemperet, deinde ut non prius quam ea cocta & maturata fuerit, ejus ejectionem molietur. Tum ut per convenientia emunctoria ac loca ejus excretionem promoveat, minime vero eam ad alia incongrua excretoria per improvide adhibita moventia, purgantia, emetica trahat. Denique ut nullo modo peccantis materiæ excretionem, quæ optime per transpirationem transit imprudenti topicorum, adstringentium ac repellentium usu impediat.

27. Maxime omnium vero intermittentes febres remediū & præsidii quidpiam pro conservatione corporis complectuntur. Plerumque contumaces intermittentes, quales sunt quæ autumnō oriuntur vel hyeme adfligunt, & quartanæ domicilium ac sedem causæ altius in visceribus, in hepatis nempe, lienis ac pancreatis obstructione & infarctu infixam habent, quod vel ex eo cognoscitur, dum vel sponte vel improvida medicina tractatæ facile in icterum, anasarcam, ascitem, tumores pedum oedematosos, ingentem lienis tumorem transeunt, eaque corpora, quæ sanguine crasso abundant, maxime infestare solent. Jam vero nihil, quod magis idoneum sit ad obstructions has viscerum & infarctus resolvendos excogitari potest, quam celerior & citatior sanguinis ad hæc viscera abdominis appulsus ac motus, quo egregie obstructions expediti & humores in ordinem ac motum redigi possunt; hinc etiam fit, ut etiam felicissime sponte sapius definant ejusmodi febres. Quia vero obstructions graves à sanguine nimis copioso & crasso minus dextre superantur & sub frequentibus paroxysmis ipsa sanguinis & humorum massa valde consumitur, vel intemperiem calidam biliosam contrahit ipsæque vires simul exhauriuntur, utique medico incumbit, naturæ optimum processum opera & arte sua, quantum fieri potest, secundare omniaque auxiliorum genera eo dirigere, ut obstructions & infarctus viscerum beneficio febrilis motus melius expediantur.

28. Huc pertinet maxime prudens & circumspectus pro diversitate corporum usus salium aperientium, quæ humores colliquant & dissolvunt, decoctorum & infusorum, quæ ex radicibus & herbis amaris & aromaticis incidentibus balsamicis composita fuerunt, congruorum quoque evacuantium, ut sunt nostræ pilulæ balsamicæ, item mercurialium rite præparatorum usus: quæ debito tempore & ordine administrata medicamenta utique ad debellandas has contumaces febres & ad corpus ab imminentibus periculis præservandum magnæ efficaciam sunt. Contra vero clarissime quoque ex his dictis dilucescit, quam nefaria & perversa ea intermittentes contumaciores sanandi sit methodus, quæ mox in principio purgantia validiora & emetica, item sudorifera, opiata & adstringentia, in quorum classem rectissime etiam china chinæ refertur, in liberaliori dofi commendat. Nihil enim aliud inde efficitur, quam ut obstructions contumaciores reddant, pessimas recidivas vel mala longe graviora accersant, quæ nullam postea sanationem recipiunt.

29. Dantur vero adhuc aliæ & plures salutares motiones & egestioniones, quibus natura stimulata, ut sic

Frid. Hoffmanni Oper. Tom. VI.

loquar, à causis morbificis, eas foras ad habitum corporis felicissime protrudit, sicuti videmus in cutis defædationibus, in scabie, lepra, tinea capitis, achoribus faciei & variis exulcerationibus cutis, maculis ad cutem protrusis, tumoribus erysipelaceis, serpiginosis, in quibus affectibus sicuti felicissime caustica maligna materia à sanguine separatur & excluditur: ita infelicissime improvida medicina tam externa, quam interna repellitur, retrahitur, quod nunquam sine maximo vitæ periculo & gravissimis subsequens pathematibus fieri solet.

30. Febriles hætenus consideravimus motiones salutares, sive quæ in salutem corporis & causarum nocentium morbificarum propulsionem vergunt, præcipue si prudenti ratione & arte à medico secundentur. Sequitur nunc, ut eas, quæ potius damno & exitio sunt corpori & à quibus nihil boni vel salutaris expectandum est, accuratiori quadam indagine prosequamur. Cognoscuntur vero hæ ipsæ ex eo, si non removendis causis, à quibus febris oritur, serviunt, sed potius corporis destructionem promovent. Sicuti enim idoneum remedium & recta ac genuina medendi methodus hæc est, quæ ad causas morborum avertendas spectat: ita omne remedium præsertim valens, quod motus vehementes excitat & quod morbificis causis amoliendis minus quadrat, jure meritoque damnandum est. Quod si itaque intueamur eas febres sive febriles spasticas generis nervosi & vasculosi commotiones, quæ à sphacelo interno, ut sunt malignæ, vel à corruptione lenta viscerum, aut apostemate, ut sunt hecticæ, oriuntur, & quæ phthisicis, cachecticis ac hydropicis superveniunt, certissime eæ ad mortem ducunt, quia reliquias boni sanguinis & vires celeriter ac penitus tandem consumunt.

31. Dein quoque ab adsumto veneno caustico, à læsione vel punctura externa partium nervosarum ac tendinosarum, à calculo in uretheribus stagnante, à bile caustica, vermibus, ab intestino in hernia incarcerato, à gravissimo dolore febres fieri, quas veteres symptomaticas dixerunt, experientia in dies edocet. Sed ubicunque hæ ipsæ accedunt, certe nihil boni, sed plus damni inde expectandum est; unde qua fieri potest celeritate & dexteritate hi ipsi motus sistendi sunt, quia frustra causis, à quibus nascuntur, opponuntur, quas expugnare nulla ratione possunt, sed potius cum ad affectam & irritatam partem majorem sanguinis affluxum afferunt, ingentem inflammationem, postea sphacelationem concitant. Ita etiam res se habet cum intermittentibus quibusdam, videlicet iis, quæ à transpiratione prohibita, ab iracundia, à cibo cum nausea sumto & malè digesto, à saburra vitiosorum in prima regione humorum, à bile acri caustica proveniunt, ubi certe febriles isti impetus ac commotiones parum faciunt & juvant ad auferendum dictas has causas. Sed potius tunc expedit vel emetico, vel salibus deterisivis aut conveniente laxante & acrimoniam temperantibus has causas adgredi & postea, si sponte nolunt recedere motus omnino febriles roborantibus tonicis, inter quæ primum locum cortex chinæ tenet, sistere & componere. Neque semper inconsultum est, ante plenariam causarum febrium intermittentium expugnationem specifica antifebrilia, quæ motus cohibent, interponere, maxime si vires ægrotantis id urgent, & unus paroxysmus alterum brevi tempore excipit. At vero minime conquiescente sic paroxysmo mox desistendum est à remediis, quæ causis dicata sunt, sed potius tunc majori cura eas remove oportet.

32. Reliquum jam est, ut etiam eos naturæ motus validos, qui in membranis cerebri fortiter constrictis incipiunt & totum systema nervorum & musculorum in consensum rapiunt, consideremus, ut sunt epilepsia vel violenti certarum partium convulsivi motus,

ut singultus vehemens, immanis tussis, pertinax cordis palpitatio, vomitio inanis, quæ rarissime vel plane non utiles & salutiferæ sunt. Quandoquidem epilepsia, quæ ex doloris sævitia, difficultate dentitionis, torminibus atrocioribus infantum, calculi doloribus vel à vermibus intestinorum tunicas nerveas erodentibus, aut læsione cerebri vel fractura & fessuris cranii nascitur, quæ variolis in principio vel fine succedit, nullo modo causæ, à qua suscitatur, amovendæ idonea est. Neque cordis palpitatio, cujus causa ut plurimum polyposum intra cordis thalamos hærens concretum est, bono & salutari fine contingit, eo quod validissima hæc commotio hanc causam vincere minime valet.

33. Porro singultus & vomitus inanis à ventriculi inflammatione & virulenta insidente materia frequentius accidit & omni utilitate & medendi scopo destituitur, præsertim quando materia vellicans intra membranas ventriculi hæret, sicuti in purpura repulsa, variolis & morbillis recedentibus fieri solet. Ita etiam tussis illa ferina & sicca, quam dura pulmonis substantiæ inhærentia tubercula generant, nullam utilitatem habet, ut potius vires consumat, vigilias accersat & ventriculum ad vomitum concitet. Neque dejectionum copia cum ingentibus ventris torminibus in dysenteria vel à caustico acri purgante ullam habet utilitatem, quia non copia humorum, sed maligna qualitas nocet, cui frustra tanta sanguinis & feri expulsio opponitur, qua vires magis pereunt & boni ac temperati humores inutiliter excluduntur. At multo magis usu & fructu illi carent motus fortiores, qui gravem animi affectum, iracundiam vel terrorem subsequi solent, qui adeo intempestivi sunt, ut subinde vitam in summum discrimen conijciant.

34. Ex hisce jam deductis clarius apparere arbitror, motus morbosos salutare, à pernicioso & exitalibus cum insigni cura esse distinguendos, siquidem illi non facile sistendi, sed eo dirigendi sunt, ut felicius causam morbi oppugnent & corpus sanitati reddant; hi vero, quia bonos succos & vires exhauriunt & non nisi perniciem creant, artem & prudentiam medici utique desiderant, ita prorsus, ut, qua fieri potest celeritate, sistantur: quorum tamen causæ, ut simul remediis tollantur, minime negligi debent.

35. Consideravimus hæc sollicita indagine morbos, qui acuti vocari solent & spectavimus eorum motus, quomodo & quantum ad corporis restitutionem vel interitum tendant. Ostendimus quoque naturam solam hos morbos sæpe feliciter sanare. Sed alia jam est ratio chronicorum, qui à natura sola non vincuntur, sed utique medici opem ac medendi methodum atque scientiam desiderant. Recte enim in præfatione COELII AURELIANI adseritur: *Celeres passionēs sua sponte solvuntur, nunc fortuna, nunc natura favente, fluore sudoris, sanguinis vel ventris. Chronici vero solius medici peritiam poscunt, cum neque natura, neque fortuna solvantur.* Spectat huc quoque verissimum dictum CELSI Lib. III. Cap. I. p. 112. *Magis ignoscendum est medico, parum proficienti in acutis morbis, quam in longis. Id enim breve spatium est, intra quod, si auxilium non profuerit, æger exstinguitur. Ibi & deliberationi & mutationi remediorum tempus patet, adeo ut raro, si inter initia medicus accessit, obsequens æger sine illius vitio pereat.* Nam sicuti in morbis acutis vehementes & spastici motus observantur, qui celerius tempora decurrunt, ita in chronicis hi rarius, neque continuo, sed cum notabili intermissione visuntur.

36. Deinde morborum chronicorum generatio successiva, acutorum vero sæpe celeriter fit, & illorum causæ plerumque sunt obstructions & indurationes minimorum vasculorum in emunctoriis & glandulo-

sis visceribus, quorum munus potissimum hoc est, ut excrementitios, inutiles & superfluos pravos humores separent, eosque evacuent. At si horum excretio ab obstructionibus impeditur, ingens & continua impuritas succis infertur, unde cacochoymia, sive malum scorbuticum, quod cacochoymiae excellentior gradus est & plurimorum morborum chronicorum primaria & vera origo, provenit. Accedit, quod viscera & emunctoria glandulosa obstructa, indurata, tumefacta, perquam facile in corruptionem putridam, exulcerationem cancrasam, vel in abscessum abeant, aut funestis lymphæ extravasationibus occasionem subministrant. Quicumque itaque medicus hisce morbis mederi vult, id tempestive ut faciat & adhuc inter initia, quando inter obstructionem & remedii efficaciam datur proportio, necesse est. Et quia hos morbos natura motibus suis rarius adgreditur, dum languore potius, & motuum defectu ea corpora laborant, idcirco medicus potius sua arte ac opera & exquisitissimis remediis has longas & contumaces passionēs vincere & oppugnare debet.

37. Nunc vero quaestio oritur: qua methodo in sanandis hisce longis morbis uti, & qua via medicus procedere debeat? Hæc autem, ut paucis rem expediamus, est ipse ille motus, qui vitæ & sanitatis causa & auctor est, sive, ut cum veteribus loquar, ipsa natura, & secundum nostram sententiam liber per omnia vascula ac tubulos itus ac reditus sanguinis & humorum atque salva & illibata omnis generis fordium excretio, quæ functionum corporis nostri integritatem potissimum tuetur. Cum vero dicti morbi ab obstructionibus nascantur, quæ liberum sanguinis cursum ac iter interceptant & liberiores excrementorum sequestrationem & evacuationem impediunt, rectissime hinc concludit ratio, obstructions, ubicunque etiam consistant, quam fieri potest citissime esse solvendas, atque humores vitiosos & copia ac intemperie peccantes, per congrua emunctoria educendos. Jam vero ipsa sana ratio suggerit, non prius obstructions vasorum solvi & inutiles humores evacuari posse, antequam hi mobiles, fluxiles & ad excretionem apti redditi fuerint. Frustra enim materiæ motum & propulsionem tentamus, si inepta ad motum fuerit. Omnis itaque scopus, omnis methodus, omnis intentio medentium in sanandis perlongis morbis eo utique tendere debet, ut humores crassi fluxiles & mobiles efficiantur, durities emolliantur, viæ adstrictæ relaxentur, & postea validiori facto sanguinis impulsu & strictura partium solidarum majori impactu humores resolvantur & obstructa referantur.

38. Ex quibus jam manifestum apparet, quam potens & egregius hunc ad scopum obtinendum thermarum, acidularum & aliarum aquarum medicatarum, infusorum, decoctorum, fottuum, balneorum & omnium, quæ incidente, aperiende virtute prædita sunt, sit usus: & quod ante præparationem & mobilitatem materiæ nunquam validiora, purgantia, diuretica, sudorifera, salivantia, mercurialia, metallica locum inveniant. Quæ regula amplissimi usus in morbis chronicis, scorbuto, lue venerea, hydrope, quartana, melancholia hypochondriaca, calculo, asthma, sanandis magnopere tenenda & custodienda est. Siquidem nihil naturæ adversius & quod magis sanationem impediatur, excogitari potest, ac valentioribus evacuantibus uti, antequam viæ apertæ atque liberæ, & materia ad excernendum prompta ac parata fuerit. Quid enim imprudentius est, quam fecibus duris obstructa intestina forti purgante exercere: vel calculum fortiter pellere, ubi à doloris & spasmi atrocia uretheres & viæ urinariæ fuerint spasmis contractæ calculoque obsessæ; aut aquas hydropicas validiori purgante educere, si humores instar tra-

gacanthæ viscerum intra tunicas membranarum subsistant: vel sudorem pellere summa cute ex spasmo constricta.

39. Ex omnibus itaque huc usque diductis liquido constare existimaverim, medendi cujuscunque generis morbis methodum, quam omni studio & opere sequi & observare debet medicus, in eo maxime requiescere & fundari, ut vel natura vel artis motibus stases aut stagnationes humorum dissolvantur, obstructions viscerum referantur & humores impuri excrementitii, qui in vitio sunt, primo ad excretionem præparentur, & postea è corpore debito tempore & per convenientia loca sufficienter evacuentur: ut hac ratione sanguini & humoribus rursus liber cursus cum debitis excretionibus restituatur; quod si accidit, sanitas & integritas omnium actionum ægrotanti corpori rursus accedit.

40. Perspicimus exinde, quam simplex, quam facilis & compendiosa sit ea methodus sanandi morbos, qua ipsa natura sive coordinatio motuum, à structura machinæ nostræ dependentium, quæ infinitam sapientiam Dei ceu autorem agnoscit, utitur & quam identidem ars sequi, adjuvare & imitari debet. Quo facilius autem & simplicior hæc via sanandi est, eo minus cognita, imo abdita plurimis est, qui artem salutarem profitentur & exercent. Quam pauci sunt, qui unquam cogitarunt de naturæ curandi methodo? quare non sine ratione ipsam nos arcanam denominamus, quem titulum etiam maxime ob eam causam meretur, quod, ut omnia arcana, maximi æstinari debeat, quia amplissimi & plane eximii in medendo usus est. Quam plures sunt, qui infelicissimo ausu arcana ad certos morbos curandos, imo universalia remedia ad omnes expugnandos, magno studio ac labore conquirunt? quæ tamen accuratius re perpensa spem plerumque fallunt, imo medicorum ignorantiam manifesto coarguunt, eo quod nulla remedia dentur, quæ certis morbis semper cum fructu opponi possint, sed quæ potius tollendis causis, quarum ingens & diversa est ratio in tam diversis corporibus auferendis accommodata esse debent. Neque etiam medicamenta tantum curant, sed potius ipsa natura per medicamenta convenienter adjuta. Communiter vero medici, quod turpe & pessimum dictum, mysterium hoc naturæ in medendo ignorant, quod tamen ut arcanum esset amplectendum. Quapropter & olim peritiores medicorum methodum medendi verum arcanum nominare non dubitarunt. Cl. SCHERBIUS citante HOFFMANNO in *Institutionibus* pag. 20. hanc ipsam secretum secretorum secretissimum appellavit, & de CAPIVACCIO, eximio Italiæ aevi sui Medico, referunt, quod dicere solitus fuerit: discite meam medendi methodum, & habebitis omnia mea arcana. Et quemadmodum mechanici nihil absque norma & perpendicularo agere debent: ita medicum sine methodo nunquam adgredi debere morbum adseverabant.

41. Tametsi vero cordatiores veterum medicorum exquisita corporis humani scientia, tam mechanica quam anatomica destituti fuerint, nihilo minus valde semper in cura morborum erant solliciti, ut naturæ ordinem in ea sequerentur, & occasiones & tempora movendi & quiescendi convenientia observarent, adeo ut nostri temporis medicos hac in re non parum superaverint. Cum HIPPOCRATE semper urgebant: naturam optimam esse morborum medicatricem, eamque solam multos morbos vincere; item naturam impulsam artis peritis, quæ facienda sint, demonstrare: nihil salutariter fieri posse, nisi quod ipsi naturæ convenienter fiat. Et medicum naturæ ministrum, scribit *Henricus ab HEER obs. V.* motum naturæ dominæ suæ observare, nihil ea operante temere mutare debere, nisi ut vel effrenem frenet, vel ut pi-

griorem excitet. Et DURETUS de humorum purgatione pag. 17. prodidit: naturæ imitorem, observatorem & adiutorem fidelissimum præstare se is debet, qui artis magister præstantissimus dici & esse velit. Legem autem ac methodum naturæ eam esse dicebant, ut coctione & crisi morbos à corpore propulset: perpetuo enim urgebant coctionem, maturationem sive materiæ peccantis correctionem: & fluxilitatem excretionibus semper præcedere debere, hasque diversas operationes naturam statim temporibus perficere ac per convenientia quoque loca excretiones moliri. Motus vero naturæ perniciales habebant, quando illa nec ordinem, nec locum, nec tempus servabat.

42. Veram autem naturæ sanandi methodum, quæ etiam artis esse debet, perpaucis, sed præstantissimi usus aphorismis magnus noster HIPPOCRATES complexus est. Hi aphorismi autem auro cariores mere practici sunt sequentes; videlicet: *aph. 20. Sect. I. Concocta medicari oportet, non cruda, neque in principio, nisi materia turgeat.* Et *aph. 21. Sect. I. Quæ ducere oportet, quo maxime repant, eo ducenda sunt per convenientia loca.* Et *aph. 9. Sect. II. Corpora quæcunque quis purgare voluerit, fluida facere oportet.* Item *aph. 29. Incipientibus morbis, si quid movendum videtur move, vigentibus vero quiescere oportet.* Et *aph. 20. Sect. I. Quæ judicantur & judicata sunt integrè, neque movere oportet, neque novare, neque medicamentis, neque aliis irritamentis, sed sinere.*

43. Universalis vero regula practica, quam non satis possum omnibus, qui cum ratione artis opera exercere volunt, commendare, hæc est: quod medicus, quando natura est in motu, movere non debeat. Per motum vero naturæ intelligimus morborum paroxysmos, exacerbationes, spasmos & intentiones motuum in partibus solidis ac fluidis, item quæ ad excretionem nimias tendunt. Nam quando corpus nostrum spasmis & motibus vehementibus agitur, plerumque exteriores partes cum summa cute spasmo constrictæ sunt, & motus humorum à circumferentia ad centrum vergunt, alvus, renes & reliqua emunctoria propter nimiam constrictionem non rite munere suo funguntur. Nihil jam est imprudentius, quam tali in casu motus producere eosque augere & emetico & forti purgante aut sudorifero valide peccantes humores excludere velle. Quantum damni & periculi exinde miseris ægrotantibus accedat, si in paroxysmis, ubi omnia spasmo constricta sunt, ejusmodi pellentia & moventia adhibeantur, dici vix potest; nihil enim excernunt vel operantur, morbi vero & symptomatum vim certissime adaugent. Quiescendum tunc potius est, vel parum augendum, & tunc plus cunctando proficitur, quam maturando. Rei natura ipsaque ratio dicitur, effrenes motus potius tunc esse moderandos, violentos spasmos sedandos. Unde in omni morborum vigore & impetu diluentia, temperantia, humectantia, blanda diaphoretica & moderate nitrosa ac sedativa non sine eximio fructu exhibentur. Egregie huc quadrat illud OVIDII:

Dum furor in cursu est currenti cede furori;

Difficiles aditus impetus omnis habet.

Adgrediar melius tunc, cum sua vulnera tangi

Jam sinit, & veris vocibus aptus erit.


Opportunum vero tempus agendi vel movendi in acutis est principium, vel quando morbi magna est remissio, in reliquis & chronicis extra paroxysmum & quando spasmodum & motuum vehementium fit intermissio, tunc si opus est & materia turget, eam movere & evacuare oportet, & tunc etiam evacuantia operantur & faciunt, quod facere debent.

44. Postremo, id semper in omnibus evacuationi-

bus tenendum est, monente HIPPOCRATE, ut humores pro diversa eorum conditione per convenientia loca educantur. Nam si arte educendi sunt visceri, lenti, copia peccantes humores, ut in tussi humida, fluore albo, gonorrhœa benigna, purgante id fieri commode potest, quia coli mucosæ glandulæ congruum omnis muci emunctorium constituunt. Serum copiosius in habitu corporis collectum in cachecticis & hydropicis vel per urinam vel per alvum commodissime educitur, inopportune vero per cutem ejus excretio suscipitur. In hypochondriacorum prima regione ingens cruditas & humorum acido-bilioforum colluvies hæret, quæ perperam diureticis aut sudoriferis, optime vero clemente laxante per alvum egeritur. Humor biliosus copiosior mediante ira in intestina effusus & acredine dotatus pessimo consilio emetico aut sudorem pellente remedio, consultissime vero præmissa temperante per alvum educitur. Quandoquidem non semel, sed iteratis vicibus tali in casu à validioribus commoventibus funestas ventriculi inflammationes, hæcticas febres, partium contractu-

ras & tremores notavimus. Quodocunque fecibus alvini intestina turgent, perniciose admodum sunt vomitoria, aut quæ fortiter sudorem movent. Si vero excrementitium serum subtile acre eliminandum est, infelicissime ad alvinam regionem ducitur.

45. Ultimo loco & hanc magni usus regulam practicam notandam esse existimo: quando natura molitur excretionem per loca convenientia, eæ nullo modo sisti vel impediri, multo minus reprimi debent. Quantum periculi ægrotantibus ab imprudenti adstringentium vel repellentium usu in arthritide, podagra, erysipelate, scabie, variolis, antiquis ulceribus, diarrhœa vel catarrho suppresso, gonorrhœa vel fluore albo celeriter cohibito vel excretionibus per sudorem & alvum in febribus acutis interceptis, accedat, tristissima pro dolor indies sæpe in vulgari praxi exempla confirmant. Verum hac vice de medendo generaliter quæ dicta sunt, sufficiant, specialia enim & peculiariora, quæ in cujusvis morbi cura observanda veniunt, peculiarem quoque tractationem requirunt.



D E

MEDICAMENTORUM PRUDENTI APPLICATIONE IN TEMPORE.

§. I.

RECTissime agnovit sapientissimus Salomo, in universo omnia statuto tempore fieri & solere & debere, eaque arreptis quasi ex hujus alternatione occasionibus tandem fixam & propositam suæ quoque mutationis metam attingere. Neque minus inter salutaria & albo calculo notanda septem sapientum Græciæ apophthegmata illud Pittaci principem sibi vindicat locum: *Tempus cognosce*, quo ipse vult, ut in eo maxime mortales cogitationes defigant omnemque navent operam, quo omnes quas moliuntur actiones, desideratum ut finem attingant, justo & opportuno tempore fiant. Ea nempe est à sapientissimo universi conditore rerum omnium connexio, coordinatio & harmonia, qua singulæ ad certas statasque temporum vices suum ortum, incrementum, vigorem & statum imo quoque decrementum habeant, adeo ut res secundum diversa temporum momenta diversas nascantur ad certum finem & scopum aptitudines. Id quod uti ubique extra nos videmus, ita quoque in nobis animadvertimus, certum tempus requiri ad conceptionem, formationem, gestationem foetus in utero. Certo ac statuto tempore moveri incipit infans in utero, certo tempore affectat exitum: eruptio dentium sua habet tempora & hominis nutritio & auctio certis absolvuntur temporibus: intellectus & iudicium certa saltem ætate eminet: pubertas seu ad generationem aptitudo certo incipit & finitur spatio: in sanguine & humoribus certa temperies ac dispositio sub pueritia, sub adolescentia, sub virili & extrema ætate subnascitur: chylicatio, sanguinis circulatio, secretionem, quo spectant etiam menses, certa mensura motuum ceu statuto tempore continentur & absolvuntur.

2. Neque minus in statu præter naturam morbi alii infantili, alii juvenili, alii senili ætati sunt familiares omnesque definita & certa habent tempora & principium & incrementum, statum seu subsistentiam & denique decrementum & finem. Morbos recurrere certis horis, certo die, certo anni spatio & ac-

curatissime statas suas servare periodos res apertissima est. Porro omnes in morbis motus excretorios, quique vel ad salutem, vel ad mortem tendunt, natura certo tempore instituit: sic enim variolæ sua tempora habent eruptionis, suppurationis & deflorescentiæ, morborum solutiones per sudorem, urinam, diarrhœam justo fiunt tempore. Uno verbo: natura in omnibus operibus suis & maxime in sanitate hominis conservanda & morbis curandis mensuræ, numeri, ordinis & temporis est observantissima, decernente sic ex liberrima voluntate omnipotente naturæ Auctore, omniumque qui fiunt in universo, motuum causa prima & principali.

3. Quæ cum ita sint, Medicus, qui præter scientiam à prudentia maxime commendandus est in curationibus suis ad tempus respicere, illoque opportune uti debet. Id quod jam dudum antiquissimus sapientiæ medicæ parens HIPPOCR. confirmat, qui *Lib. IV. de rat. victus p. 56. scribit: In omnibus morbis præcipue in acutis, potissimumque in quibus vehementia febris subest, tempus adhibendi medicinam maximam habere facultatem.* Idem *Lib. I. aphor. I. conquestus est: Occasionem medendi esse celerem seu momentosam.* Vult Divus ille Senex momentum temporis ab ipso medico sapius tam in apti remedii præscriptione, quam in illius applicatione arripiendum esse: nam in momento, imo sapius in puncto vita & mors hominis consistit & magnum emolumentum, imo grande periculum corpori inde contingere potest; ut adeo occasio medendi curationis non inepte dici possit anima: deinde occasio præceps & momentosa est, quæ difficillime revocari potest, qua elapsa inclinatio nonnunquam fit vel ad mortem vel ad deterius; nam alium statim morem, aliam naturam, alium motum assumit ipse morbus, & alia subito mutatio in corpore nostro advertitur. Propterea sapienter, *Pindarus* *ιατρὸν ὀνυχοπόδην* appellat; nec inconcinne ait Poeta:

*Temporibus Medicina juvat, data tempore profunt,
Et data non apto tempore vana nocent.*

4. Et certe non minima prudentis medici nota est, si

si rationem temporis in applicatione medicamentorum habet sollicitam, maxime cum praesentissimum alias remedium hoc tempore prodest & proficiat, alio autem assumptum maximum damnum afferat morbumque deteriore reddat. Optimum hinc medicamentum est, quod opportune datur, & revera in apta remedia contra morbum inventionem & in legitima ejusdem ratione temporis applicatione vera medendi methodus, rectum medici judicium & felix curae successus consistit. Et quamvis sexcenta contra unum morbum habeamus remedia, nisi illorum applicationem ratione ordinis, doseos, & maxime ratione temporis compertam habeamus, certe nihil laude digni in medicationibus praestare valeamus. Sed mirandum est & turpe dictu, filere hic pene omnes medicorum & Practicorum libros, & quam scitu res est necessaria, tam profundo eam silentio esse sepultam.

5. Accedit adhuc: quum medicus naturae, quae effato magni HIPPOCRATIS *optima morborum est medicatrix*, sit minister & imitator, eo magis opus est ut ad ipsius motus, ad tempora, quibus illa ad sanandum uti solet, attendat & respiciat, ipsamque in operando juvet: *Nam felix medicatio cui adiutrix natura succurrit, irrita vero quae repugnante natura tentatur. Medicinae leges naturae legibus consentaneas esse debere jam dudum Fernelius in Praefat. Lib. 1. Therapeutices dixit.* Uti enim in macrocosmo solis, lunae, siderumque cursus & conversiones, tempestatum mutationes, oceanique aestus & reciprocatio ex ordine certo & constantia immutabili reguntur: sic etiam in microcosmo consilio rectaque ratione natura prudenter administrat & providenter tutatur omnia, ac stabili quadam & rata lege actiones suas perficit: quum autem naturae nulla cognitio vel voluntatis quoddam arbitrium insit, secundum quod omnia administret; facile apparet, naturae ordinatos motus & summam illam ipsi insitam vim, qua existunt, conservantur & administrantur singula, dependere à divina quadam mente architectrice & conservatrice, ut eo ardentius majorique cum sollicitudine medicus naturae salutarem ductum scrutari, illum sequi & imitari teneatur.

6. His decursis plenius jam ipsa adeunda est tractatio de medicamentorum secundum certa tempora applicatione. Et quoniam ex superioribus didicimus naturae ipsi inditam esse vim se conservandi & motus certos certo tempore efficiendi in sui conservationem & causae morbificae remotionem: medicus omnino ceu minister naturae ante omnia naturam aegrotantis corporis cognitam habere, motus naturae inordinatos sistere & nimis languentes promovere, impedimenta tollere & materiam motibus vitalibus convenientem suppeditare & praecipue tempora, quibus natura in morbis sanandis utitur, observare debet; secus si fecerit praeter & contra naturam facit & frustra tentat omnia. Primum itaque officium medici est, ut in tempore praeveniat morbo, nam in tempore hic praevenire omnium rerum est primum: Nimirum quia omne illud quodcunque temperiei, mixturae & motui partium mechanicae fluidarum incongruum, impropportionatum & inconvenientem, simulque activitate laedendi quadam imbutum est, causam morbificam constituit & motus naturae turbare morbumque producere aptum est, hinc medicus id ante intimam cum succis vitalibus mixtionem in principio avertere, sicque morbo praevenire studeat & allaboret. Natura enim adhuc viciens medicamento adjuncta facilius expugnare morbum poterit, ac si nimium morbo delassata ac fracta est: hinc affectus qui aliquantulum protrahitur & levioribus praesidiis tempestive sumtis sanari potuerat, vix nisi valentioribus & difficiliori negotio profligandus est.

7. Experti id saepius sumus in febre lenta & cor-

poris consumptione, quae post intermittentes diuturnas vel perperam curatas ex saburra vitiosorum humorum primas vias occupante nascitur: si protinus in initio leni quodam emetico depleamus ventriculum & primam regionem à colluvie vitiosorum humorum, praevenire possumus huic febre quae non raro periculum ingens habet conjunctum; quod si vero increverit, & sanguinis crasi destructa solidarum partium substantiam consumserit, & emetica & omnes purgationes adhibitae mortem citius accersere consuecunt. Miasma aëris vehiculo haustum & cum salivali humore in ventriculum delatum conveniente emetico alexipharmaci conjunctione nobilitato statim extirpari potest commodissime: ita plures à morbis contagiosis, peste, dysenteria maligna, morbo Hungarico servari & liberari possunt. Quod si autem jam vitales corporis humores, infecerit ac disturbaverit, abstinendum ab omni purgatione est ceu summe nociva, inordinatos magis motus in sanguine & genere nervoso excitante. Sicut enim in omnibus heroicis ac magnae activitatis remediis: ita maxime in emeticis usurpandis ratio temporis habenda est exquisitissima: Ita antimonialia emetica non multo post vehementem iram exhibitum lethale ut plurimum & instar veneni habendum est. Vidimus hoc modo plures in funestam ventriculi inflammationem vel in graves passionem chronicas, phthisin, hecticam praecipitatos. Idem vero remedium tertio vel quarto post iram die adhibitum tantum abest ut noceat, ut potius humorum colluviem biliosorum expellendo à febre lenta aliisque chronicis malis corpus immune praestet.

8. Maxime vero omnium dignitas & utilitas *ἰσχυρίσας* ex admirandis curationibus morborum praeservatoriis clarissime elucet. Hydrops, phthisis, hectica sunt omnium consensu ex insanabilibus praecipui, sed perfacili negotio, convenienti medicina in tempore adhibita, ut V. Sne & sufficienti diluentium, qui viscidos humores dissolvunt, usu averti possunt felicissime. Nam eorum originem si spectemus, ea potissimum ex plethora vel ex largiori potu frigido corpori ex fortiori motu vel iracundia incalescenti aut sudanti immisso repetenda est. Molestissima illa & contumax affectio, quae vulgo dicitur hypochondriaca, uti facillime praecaveri, ita difficillime si inveteraverit & radices egerit, curari potest; siquidem haec ipsa plerumque ex vita deside & immobili, nimia ciborum, qui flatus, cruditates ingenerant alvumque adstringunt, voracitate, vel ex perperam tractatis & male curatis febribus intermittentibus, aut excretionibus sanguinis aliorumque humorum criticis retentis prognoscitur. Quare solo motu & exercitatione corporis sufficienti, ciborum abstinentia, aquarum & maxime mineralium potu, sanguinis decenti missione, item rhabarbarinis & temperatis stomachicis roborantibus in tempore adhibitis certoque & longo satis tempore continuatis, eam optime vinci ac superari posse multiplici sane experientia confirmatum habemus. Sed dolendum magnopere est, quod plurimi aegrotantium non statim medicum accersant & consulant, imo magis adhuc dolendum, quod plures medicorum ex perversis suis ad usum nihil pertinentibus, quas in academiis à Professoribus in praxi minus versatis didicerunt, opinionibus gravissimorum affectuum initia, quae plerumque parva sunt & levia, non recte intelligant, adeoque *ἰσχυρίσας* salutaris & rectae medendi methodi ignari ex minori deterius subinde malum efficiant.

9. Notum porro medicis imo mulierculis notissimum est, quod gravidæ atque inprimis plethoricae quæque mobilioris animi sunt, si semel abortum passae fuerint, repetitis vicibus in eum facillime recidunt. Eundem tamen primis mensibus tempestivis remediis & crebriori, sed moderatori sanguinis in

super-

superioribus partibus missione, bono diætæ & vitæ regimine atque linimentis spirituosius roborantibus arceri posse, identidem experientia multiplici edocti sumus. Denique & medicis & mulierculis non ignotum esse arbitror, puerperis, maxime ex retentis vel suppressis lochiis, graves imo funestas sæpius affectiones, acutas nempe inflammatorias febres vel sine vel cum purpura junctas, affectiones cardialgicas, syncopicas, suffocativas supervenire, quibus tamen omnibus prudens & peritus medicus sectione venæ, blandis temperateque balsamicis laxantibus & antispasmodicis mature & tempestive, aliquot post partum diebus, exhibitis occurrere & prævenire potest quam felicissime.

10. Præstantissimum utique & magnæ efficaciæ præsidium ad morbos graves sanandos est V. S. opportuno tempore administrata, quæ neglecto tempore tanquam gladius est in manu furiosi. In acutis & inflammatoriis febribus, præsertim synochis, quæ mane exacerbationes suas habent, inter initia V. S. eaque, urgente necessitate, repetita faciliorem efficit morbi progressum provehitque in diebus criticis solutionem, cum contra ex præpostera ejus administratione quam facile circa diem criticum contentiones motuum hæmorrhagicæ sed irritæ & subsequentes mentis abalienationes tanquam mortis prodromi obtingant. Ad intermittentium tam tertianæ quam quartanæ contumaciam infringendam, non alienum est, ubi sanguis nimium abundaverit, venam secare, sed hac cautione, ut nunquam fiat circa frigoris & horripilationis, tempus, multo minus eo præsentem. Graves exinde convulsivas partium tractiones cum summa præcordiorum anxietate, difficili respiratione summoque virium lapsu multoties vidimus & observavimus. Affectus catarrhales, rheumaticos, arthriticos, erysipelaceos & ipsam quoque podagram, V. S. debito tempore ac mensura admissis, accedente simul accurata diætâ, potu diluenti & sufficiente nec non corporis motu, in totum averti posse tam certum est quam quod certissimum. Sed paucioribus minimeque iis, qui veræ pathologiæ & genuinæ *ινερπιας* in medendo ignari sunt, id capere concessum est.

11. Fluxus hæmorrhoidalis in consuetis, aut ubi natura jam jam inclinât, bene & sine turbatione procedens à gravibus omnino morbis corpus immune servat. Quum vero ex facili is ipse in ordine, tempore & mensura variis de causis turbari vel cohiberi possit, quam graves & sæpe immedicabiles inde affectus oriantur, dici vix satis potest. Nihilo minus pauca sunt remedia, modo debito tempore & ordine usurpentur, quæ salutarem hanc excretionem in ordine servant eamque aberrantem in ordinem redigunt. Ex quibus præcipue sanguinis detractio, conveniens vitæ & diætæ regimen, temperate balsamica & stomachica carminativa primum & principem locum obtinent. Quin imo hæc ipsa remedia, quod probe animadvertendum, prudenter & tempestive adhibita tantæ sunt virtutis & efficaciæ, ut molestissimum hunc fluxum, qui debilis & languidæ naturæ index est, declinare feliciter possint.

12. Porro medicus in morbis, qui evacuationibus criticis ab ipsa natura factis circa certa tempora terminari solent, exquisitè naturæ motus servare & tempora criticarum evacuationum in medicamentorum applicatione etiam atque etiam observare debet, ne præpostero illarum usu naturam turbet & à negotio suo avocet. Inter tales morbos criticos morbus variolarum meretur referri, qui distincta sua habet tempora, nimirum *ebullitionis*, *eruptionis*, *suppurationis* & *exsiccationis*. Eruptionem macularum ut plurimum circa tertium vel IV. diem natura instituit, occlusis tunc cæteris evacuatoriis, maxime alvo, quo vi unita ad cutis peripheriam materiam morbosam eo felicius

propellere possit: quod si quis tunc temporis purgantia & fibras intestinales irritantia adhibendo naturam avocare velit, in ingens vitæ discrimen ægros præcipitaret, plurimis lethalibus exemplis id satis testantibus: è contrario in principio statim morbi leniora purgantia, primam regionem ab impuris biliosis & viscidis sordibus expurgantia non nocent. Imo observati sæpius sunt sua sponte ægri in principio morbi maxima cum euphoria purgati: nam natura à copia humorum oppressa, jam liberata motus salutes criticos instituit expeditius ad cutis corticem. Atque porro, cum medicus ante ordinarium eruptioni à natura præfinitum tempus vel regimine calidiori, vel sudoriferis calidis & expellentibus materiam morbosam ad expulsionem foras vult cogere, tum majores turbas concitando, intensiores anxietates accersit & recessionem macularum, quæ vi expulsæ fuerunt, majori cum virium prostratione procreat: qua ratione necari quam officiosissime solent plures hoc morbo laborantes. Præstat potius semper ante eruptionem motus inordinatos sanguinis & humorum restinguere acrimoniamque humorum temperare terreis, anodynis, acidulis, quam regimine calidiori & calidis motus exorbitantes, ardorem & acrimoniam augere & sæpissime lethalia symptomata accersere. Unde quovis tempore variolarum cane & angue pejus fugiendum est regimen nimis calidum. Atque in eo genuina & methodica eaque felicissima variolarum curatio potissimum versatur. Quod si autem jam eruptio facta est & tumultus naturæ sedatus, non nocebit diaphoreticis blandioribus & absorbentibus, myrrha & croco in exili quantitate adjectis, naturam in excretionis negotio conservare & suppurationem promovere: circa diem autem nonum, cum de novo jam ab inflammatione & suppuratione fuscitentur in sanguine tumultus & motus inordinati, iterum ab omnibus calidis abstinere debemus; tunc enim calida etiam in minima dosi adhibita v. gr. Eff. myrrhæ ardorem, dolorem & symptomata exasperare solent.

13. In febribus malignis petechialibus & quæ conjunctæ sunt cum exanthematibus, medicus naturæ crises & tempora exactissime observare tenetur. Hic in morbis totum ferme negotium curandi incumbit naturæ, quæ si robusta est, si vires corporis conservatrices morbo vincendo pares sunt, si sanguis temperamento quasi alexipharmaco instructus est, sola felicissime sæpe citra medicam opem curare & absolvere sanationem solet. Quicquid enim medicus efficere poterit, id saltem in principio facere debet, plethoram minuendo, superfluos humores evacuando & emunctoria aperta servando: reliquo tempore naturam minime turbare, sed temperatis, terreis, absorbentibus, acidulis & vires reficientibus præsidii ejus motus circumspicere dirigere debet. Ante omnia autem circa dies criticos se prudenter debet gerere medicus, adjuvando & moderando, non impediendo ipsas criticas excretiones, ita quando circa illud tempus sudor contingit, ut ille moderate, quantum fieri potest, promovendus, vires roborandæ, & stimulus naturæ labascenti addendus sit. Quare circa tempus criseos medicamentum in pauca dosi datum alexipharmacum, diaphoreticum, quale est nitrum cum camphora mixtum, vel sola Essentia scordii, sudorem sæpe calidum copiosum cum virium notabili refectione, somno & pulsu subsequente naturali excitat. Non rarius etiam in febribus malignis solvitur morbus per alvum, quo tempore constringentia vel anodyna propinari nunquam debent, sed tantum confortantia præbenda sunt, ut cornu cervi vel ebur phil. præparatum, succinum, cinnamomum & hujus generis alia.

14. Ante omnia autem id medicus cavere debet, ne in

in febribus petechialibus medicamentis sudoriferis, volatilibus, calidis utatur; expulsionem enim nimium cum promovent, vidimus fere semper rem non bene successisse: apparent quidem petechiae, sed cum majori virium imminutione & graviore symptomatum saevitia, ac saepissime recedant; satius est itaque ipsi naturae relinquere negotium expulsionis & lenissime semper procedere. Firmissime enim convictus credo, plures à praeoptato calidorum & expellentium usu lethalem sibi diem accersere petechiis laborantes. Spectat huc illud *LIVII Lib. XXII. Cap. 18. Medicos interdum plus quiete, quam movendo atque agendo perficere.* Deinde cavendum, ne motus naturae per purgantia turbentur, ideoque petechiis comparentibus illa omittantur. Id quod locum habet non tantum in febribus acutis & ubi natura per metastasin aut evacuationem praeter alvinam adhuc aliam crisin molitur; sed in chronicis quoque v. g. lue venerea, scorbuto, si bubones aut qualescunque excretiones & efflorescentiae apparent.

15. Equidem multi sunt ex recentioribus, qui dierum criticorum, quos antiquissimi medici admodum respexerunt, existentiam penitus negandam esse sustinere volunt; sed hos ipsos in exercitio artis non satis esse versatos ego quidem convictus sum. Causam hujus praeposteræ adsertionis Clariss. BAGLIVUS Lib. 2. Prax. Cap. 12. egregiam allegare videtur: *Mirari, inquit, desinent Practicantes, si hodie nec frequenter, nec perfecte succedant crises, uti olim in Graecia; siquidem illi Graecarum legum ignari, vel obrectatores à principio morbi ad declinationem usque purgantibus, diaphoreticis, phlebotomiis, aliisque imprudenter & intempestive adhibitis, aegros suos fere conficiunt, unde impossibile est, ut humores per tam diversas remediorum seditiones distracti, ad critica despumationis negotium suo tempore disponantur, neque dierum criticorum regulae, ab antiquis traditae, observari queant.*

16. Notum est, intermittentes febres non raro spontaneis obortis sudoribus absque ullo medicamento terminari, imo paroxysmo remittente, maxime in tertianis subsequi blandum & calidum sudorem: & vice versa circa tempus horroris & in principio febris nunquam naturam instituire diaphoresin, sed firmissime tunc poros subcutaneos esse occlusos. Unde prudentis medici est, in sanatione harum febrium naturam ceu ducem & viam monstrantem sollicite sequi & imitari: siquidem haec sibi relicta raro evacuationem movet, nisi materia cocta fuerit. Nunquam itaque tempore inhorrescentiae vel mox ante illud tutum est, medicamentum sudoriferum idque calidum sulphureum propinare: utpote calor, ardor, oris siccitas, praecordiorum anxietas & irrequieta membrorum jactatio magis tunc incrementa capiunt, omniaque exasperantur: è contrario finito paroxysmo & diebus intercalaribus ubi cutis spiracula hiant, & sanguini circulus suus restituitur, diaphoretica cum amaris roborantibus vel specificis antifebrilibus nupta, abstinendo simul ab aëre frigido & humido, victu copioso & crasso, acido, saepius iterumque repetita, praemissa primae regionis expurgatione, sola frequenter citra recidivae metum febres etiam contumacissimas expugnant felicissime. Hunc in scopum laudatae virtutis deprehendi sequens elixir antifebrile, medicamentum in quartanis etiam diuturnioribus utilissimum. Recip. Extracti Scordii, Gentianae, Centaurii minoris, cascarillae ana drachmam j. Ess. chinae chin. Tincturae tartari ana unc. i. & dimid. Extract. croc. castorei ana gr. X. olei caryophyll. gutt. X. De hoc elixirio sumat aeger singulis tribus horis, incipiendo statim post paroxysmum, gutt. XL. cum vehiculo convenienti, ut vino cum aqua diluto.

17. Plures morbi dantur critici, qui cum praecedente horrore, subsequente sanguinis ebullitione, pulsu aucto & excretionem ad partes extremas fiunt, uti sunt erysipelas, arthritis, rheumatismi, pleuritis spuria, in quibus, ubi natura secretionem molitur, abstinendum est à V. S. evacuantibus medicamentisque acidis, quae cuncta perspirationem & motum sanguinis ad externas partes praepediendo materiam corpori insensam intus retinent & funesta symptomata accersere valent. Ad praecavendos vero hos morbos & statim in principio, si plethora adest, V. S. si colluvie vitiosorum humorum prima regio scatet, leniora emetica & per alvum evacuantia &c. locum omnino habere possunt, magis etiam tunc blandiora diaphoretica, uti est Diascord. Fracast. cum lap. cancr. & nitro mixtum, item Decoct. C. C. Scorzonerae, Rad. chin. chin. conducunt.

18. Ex his jam liquido constare potest, cur in arthritide, erysipelate, externa poros stipantia & evaporationem materiae peregrinae prohibentia, siue sint liquida, siue emplastra, tantam noxam creare & symptomata exasperare possint. Nota sunt exempla, quod materia caustica erysipelacea in transpiratione sua impedita medicamentis externis adstringentibus profundius serpsit, ulcera cacoethica, cancrofa, ipsamque gangranam produxerit. Magis ex usu & re hic sunt, quae blande poros aperiunt, spicula salina materiae morbosae temperant & corrigunt & transpirationem juvant. Talia maxime sunt ipsa sicca vel etiam liquida spirituosissima camphorata, non autem oleosa, quamvis sint destillata. Commendari merentur flores sambuci, chamom. vulgaris, melilot. sem. 4. carminat. myrrha, camphora, baccae juniperi, farina fabarum, crocus, nucifla &c. Exemplum aliquod referam. Nimirum vir obesus 40. annorum vivacissimi ingenii, muneri praepositus amplissimo, ex podagra laborans, ab empirico sumtum emplastrum ex alumine, albumine ovi & camphora tempore invasionis parti affectae applicabat, mox horror ingens, ardor, somnus turbulentus cum affectu comatoso sequebatur, in quo omnis ferine memoria periit. V. Sectione & sudoriferis adhibitis servatus quidem est, ast memoriae debilitate summa ad hunc usque diem laborat.

19. Constat satis, foeminas singulo mensis spatio, statim suo tempore & circa lunae phases purgari per uterum ingenti cum naturae levamine. Optimum itaque stratagemata practicum est in mensium evacuatione suppressa, circa tempus illud quo natura consuevit excernere, praemissis prius levibus evacuantibus propinare pellentia & specifica sic dicta emmenagoga. Deinde ut ductu ipsius naturae obtinere finem facilius possimus, caveant foeminae circa fluxus hujus ordinarii tempus, ne acidis, viscidis, infrigidantibus & instantibus cibis abutentes fluxum illum consuetum impendant; mille enim inde oriri solent mala: nec tunc temporis V. S. in manu instituenda est, quae sistere hunc fluxum protinus solet. Itaque tunc eo motum naturae dirigat medicus, quo hi fluant, secus frustra- nei erunt conatus.

20. Denique medicus si recte officio suo satisfacere velit, omni cura & consilio in id debet incumbere, ut sciat quo ordine causae morborum proximae vel remotae sint tollendae, in eo enim versatur magna medici prudentia & felix morborum medicatio. Sic v. g. in partu difficili pessime illi faciunt, qui non observantes legitimum partus tempus propinant confortantia, calida & irritantia sicque femellas saepe inebriant, ut deinde motus horrendi spasmodici, vel etiam febres inflammatoriae post partum invadant. Optimum contra est, expectare legitimum tempus, & cum ipsa natura inclinante promovere exclusionem foetus, datis tunc genuinis refocillantibus & antispasmodicis. Inter haec excellit maxime pulv. sequ. cujus usus est probatissi-

mus, v. g. R. succini drach. ij. Borracis Venetæ drach. j. & dimid. Croci, fell. anguill. Scrupul. j. Ol. Cinnamon. gut. viij.

21. Sic quoque porro calculus in renibus existens si intempestivo pellentium & acrium usu in urethres pellitur, illos pertransiens ingentes excitat torturas, totum nervorum systema sæpius in consensum rapiendo, imo lethalem urinæ suppressionem accersendo. Prima itaque & optima intentio medici hic est calculum illum solidum magnitudinis plus justo majoris prius atterere, comminuerè, & resolvere, viasque per quas transire debet emollientibus & lubricantibus probe disponere & aptas reddere, ut sic faciliorem lapidis inveniatur exitum. Talem in finem jam merentur laudari omnia emollientia, clysteres, oleum amygdalarum dulce, it. salina intrinsecus adhibenda v. g. solut. oc. cancr. terra foliata tartari, arcanum duplicatum, sal diureticum medium & neutrum ex sale succini & oc. cancr. paratum, aqua cochlearum, nec non decoctum hederæ terrestris, alkekengi, asparagi, aqua Scleri &c.

22. Affectus cutanei ex sale caustico erodente subnati, quales sunt scabies, lepra, mercurialibus extrinsece applicatis, item sulphuratis egregie sanantur; quod si autem quis illis uti velit ante diminutionem plethoræ & correctionem cacochymiae debitamque evacuationem, maxima oriuntur mala: observatum namque est malignas febres, paralyses, apoplexiam, lethargum exinde oriri.

23. China chinæ decantatum & revera divinum contra intermittentes præsidium est, præpostera autem applicatione ingentes sæpe noxas creat, dum intermittentes in continuas vel lentas vertit, & firmando obstructions, periculosiores recidivas, cachexiam, icterum, hydropem gignit, id quod satis historiæ morborum testantur. Et docet experientia, si mox ante paroxysmum, vel quando ægri inhorrescunt, ipsa china chinæ detur, semper exasperari febrem & sæviora fieri symptomata, ita ut hac ratione multos è medio tulerit, annotante sic Sydenhamio *Tract. de Febris*. Quod si autem præmissis primam regionem expurgantibus, quæ impuritate facile sordescens mali fomitem præbere solet, ac si vehementia hujus morbi prius infracta, transpiratio liberior reddita atque viscerum obstructio referata fuerit, laudatus cortex tempore intermissionis crebrius & repetitis vicibus exhibetur, incipiendo statim post paroxysmum & ad eundem ferme continuando, incredibilem in fuganda febre ostendit efficaciam. Tantum est legitimo tempore propinare remedia.

24. Opium divinas medentibus solet porrigere manus, improvide autem propinatum venenum non raro evadit. Sic in compescendis doloribus chronicis non nisi cute porisque apertis propinari, vel diaphoreticis conjungi debet. Notavi nuperrime sceminam, quæ ex cardialgia hysterica laborabat cum alvo clausa ac conscripta, cui dum propinabatur extractum opii solutum in essentia castorei, mox tentabatur respirationis difficultate, præcordiorum angustia, virium omnium defectu, pulsu debili, sudore frigido & internarum partium ardore: soluta autem alvo mox protinus remittebant atrocia hæc symptomata. Opiata arthriticorum solent esse solatium, inter initia morbi exhibita, nunquam autem, quando natura in excretionem est occupata juvant; dolorem quidem quodammodo mitigant, vires autem magis convellunt & fixiorem ac diuturniorem reddunt morbum. Opiata vigiliarum certum sunt remedium, horum nihilo minus tam pro his quam pro dolore curando administratio, inprimis intrinseca, singularem exigit prudentiam, ne scilicet adhibeantur in morbis acutis instante crisi, utpote quam turbant & inhibent, nec ubi

evacuatio quædam desideratur aut speratur, v. g. in pleuritide, ubi quidem in morbi principio refracta dosi talia conveniunt, progressu vero morbi & ubi expectoratio imminet, nocent & suffocant.

25. Res in foro medico notissima est, quantum in pellendis morbis chronicis medicamenta sale volatili oleoso instructa possideant; nihilo minus præpostere adhibita ingens damnum creare possunt: Sic sæpius observatum est in morbis, qui ex cruditatibus primarum viarum, humorum cacochymia & viscidarum particularum in sanguine abundantia oriuntur, ante debitam factam alterationem & expurgationem salia volatilia calida non tantum symptomata exasperasse; verum etiam affectus comatosos, imo paralyfin, apoplexiam excitasse, utpote quæ impuros humores magis in tubulos corporis tenuissimos intrudunt, & ebullitione intrinsecus aucta, venas dilatant & postmodum aperiunt. Id quod etiam atque etiam tenendum est circa sudorifera volatilia, humores exagitantia, quæ in omni sanguinis & feri impuri exuberantia v. g. in cachexia, in hydropè mirum nocere solent ante debitam evacuationem vel humorum correctionem. Sic quibque in hysteris caute uti debemus volatilibus. Elegantem hac de re historiam B. ERMÜLLERUS in Dissertatione de præcipitantium usu & abusu pag. 74. refert: *Fœmina hysterica scorbutica, inquit, simulque splenetica, præter sensibilia eaque spasmodica abdominis pathemata ad melancholiam declinabat, una cum mensium ultra tres menses suppressione. Hæc ab exhibito spir. salis Ammon. cum spir. cochleariæ commixto, mirum offendebar, omnibus symptomatibus notabiliter exasperatis, sed sepositis hisce & datis absorbentibus, martialibus, corallatis salibus fixis feliciter restituta.*

26. Eadem quoque tenenda est regula circa diureticorum usum, quæ consensu omnium Medicorum, quando ventriculus nimium repletus, vel intestina coluvie humorum consarcinata sunt, nocent: fuge itaque diuretica potentiora in febrium principio, augmento, statu, aut quavis crassorum humorum abundantia, crassos enim & crudos humores ad vias urinarias deturbant & febres, si quæ adsunt, intendunt vel novas pariunt. Sternutatoria in apoplexia ac reliquis soporosis affectibus, si à materia serosa aut pituitosa, circa cerebrum congesta dependent, mox quoque in paroxysmi principio conducunt; sin vero à plethora sanguinisque stagnatione oriuntur, non nisi sanguinis missione aliisque evacuationibus universalibus præmissis, in usum sunt vocanda. Molesti seminis fluxus præsidia certissima sunt os sepia, radix tormentillæ, viscus quercinus, succinum, alumen, terra catechu, quæ egregie sistunt hunc fluxum & fibras relaxatas constringunt, si convenientibus purgantibus, sudoriferis balsamicis ante tractati fuerint ægri, quod si autem prius dantur constringentia, bubones, tumores testium, appetitus prostratus, tormina ventris & varia incommoda oriri solent.

27. Tandem occurrit notabilis quæstio dudum inter medicos agitata, si nimirum indicationes adsint V. S. & purgationis, quodnam remedium sit præferendum? Galenus rectissime à phlebotomia semper incipiendum esse judicat, nec sine ratione; à purgante enim commotus sanguis abundans in motus inordinatos facilius exagitari potest. Nam quando per V. S. vasa sunt depleta, purgans felicius & comodiùs heterogeneas à sanguine segregare potest portiones. Hinc VALESIIUS in *methodo medendi* L. C. cap. 2. dicit: *Ego multo consultius puto ubi debilitas non obstat à missione sanguinis clystere uti: quo re jam circa V. S. bene gesta, quod per eam motum exagitatumque est, trabatur in intestina, per quæ & evacuetur, quod sæpius vidimus adeo feliciter cedere, ut evacuatus simul*

simul & expurgatus sine pharmaco homo sit. Laxantia vero commodè præmittuntur venæ sectioni.

28. Deinde medicus in curationibus suis tempora quoque anni observare debet; pro horum enim varietate ingens & varia alteratio totius corporis fit, medico scitu summe necèssaria: imo morbi uti certis anni temporibus saltem sunt familiares & exasperantur: sic etiam alii certis saltem temporibus sanabiles existunt. Omnes morbi fixiores, diuturniores v. g. paralysis, contracturæ, quartana, symptomata hysterica & hypochondriaca, arthritis, podagra, lues venerea facilius sunt curationis tempore vernali, quam autumnali vel brumali; aer enim subtilioribus particulis lucidis & elasticis instructus tunc temporis motum intestinum sanguinis auget, spiritibus materiam uberiores præbet & transpirationem magis promovet, quam hyeme, ubi omnia conspata sunt, motu partium fluidarum à centro ad circumferentiam labascente. Sic quoque febres tertianæ & omnes intermittentes citius curantur tempore verno & sub principium æstatis, quam autumno vel hyeme.

29. Deinde circa evacuationes observandum quoque est anni tempus. In morbis chronicis purgatio fiat vere, cui succedat autumnus, eo quod his temporibus peculiarem magis patiantur humores coctionem, & à se invicem fecernibiles magis sint, quam hyeme: æstate vero sanguinis massam jam in motu existentem dissolvant & fundant. Quidam in initio veris, quidam in fine purgandi sunt, seu mense Majo; quandoquidem pro varietate humoris peccantis, vitæ generis & subjectorum, omnibus eodem tempore haud convenit evacuatio, i. e. qui humoribus crassis scatent, in principio veris purgantur, antequam hi deliquescent & morbos pariant; quibus vero biliosi & tenues contigerunt humores, in fine veris purgationem commodè ferunt, ne succedente æstate commoveantur. Vomitoria aptius dantur vere & æstate, ubi agiliores sunt humores quam hyeme: Purgantia autem & maxime vehementia in nimio solis æstu vitanda sunt: sic quoque V. S. magis tempore verno & ante æquinoctia quam circa solstitia & media æstate conducit. HIPPOCRATES ipse S. 4. *aphor.* 4. æstate *ἀνω*, hyeme *κάτω* potius evacuare jubet. Salivatio mercurialis vere longe felicius instituitur ad curandam luem veneream, quam si nimius adest solis æstus & frigus intensissimum.

30. Observandum quoque est à medico ratione applicationis medicamentorum tempus diei, sic v. g. tempore matutino melius assumuntur vomitoria, quam tempore vespertino aut post meridiem: it. medicamenta stomachica melius operantur, quando ventriculus vacuus est, quam si cibus est repletus. Mane tunditur quoque vena melius, non tamen, nisi ob vires tunc temporis à peracta digestionem, item à somno refocillatas & magis vigentes, ita ut hoc diei tempus videatur correspondere verno. Opiata autem & quæ somnum producant, melius circa tempus nocturnum adhibentur, quod valet etiam de illis remediis, quæ pituitosorum humorum diffinitioni velificantur, quoniam circa noctem gravior & compressior atmosphæra transpirationem retardat & pituitosos in corpore humores accumulatur; quare etiam omnes catarrhales morbi circa tempus somni exacerbationes suas habent. Idem tenendum circa acidulas, martialia, quæ semper sub auroram felicius operationes suas exerunt, quam si natura jam cibus est fatigata. Diuretica itidem mane

exhibeantur, ne, si ventriculus nimium repletus, eorum vis obtundatur, aut si diuretica fortiora fuerint, crudiora alimenta quoque simul moveant. Diaphoretica mane & vesperi commodè dantur, hisce enim temporibus sudor facilius promanat, nec ventriculi coctio turbatur. Nec statim ab assumpto medicamine ad sudorem urgendum corpus est, sed ad minimum elapso horulæ spatio post, cum sudoriferum massam humorum subiit, illamque exagitavit, alias aut nullus, aut notabiliter enervans prodit sudor. Vomitoria, quarta vel quinta hora ante paroxysmum data cum salib. duplicat. antifebrilib. profunt: contra vero si bihorio vel ultima hora ante paroxysmum vomitorium exhibeamus, sæpe exasperamus paroxysmum.

31. Lunæ, quæ humorum dicitur domina, positiones & phases attendendæ quoque veniunt à medico, & quemadmodum illa pro diversitate situs varias vicissitudines & mutabilitates, ratione tempestatum, in macrocosmo facit; itemque ratione vegetabilium accretionis: sic quoque in microcosmo idem experiri licet. Docent id dies decretorii critici, qui plerumque circa lunæ mutationem accedunt, item paroxysmi epileptici, qui sæpius stata sua tempora circa lunæ mutationes habent: Morbi ex nervis obstructis, item ex decubitu pituitosorum humorum nati, vel ex glandulis tumefactis & obstructis proficiscentes circa plenam lunam ut plurimum incrementa sumunt, horum vero imminutio fit sub lunæ decremento. Quantum porro luna efficiat, luculenter apparet ex sanguinis fluxu, qui foeminis omni mensium spatio contingere solet, quique accurate suos servat rithmos, & quæ v. g. purgari solent circa novilunium, illis semper circa idem tempus recurrit fluxus & contra. Strumæ, scrophulæ & pedum tumores majores semper circa augmentum lunæ fiunt; decresciente vero luna decrescunt. Unde optime illi rem agunt, qui in cujusvis ætatis subjecto lunæ decrementum eligunt, si per inferiora evacuandum fuerit. Utur enim in augmento lunæ facilius videatur purgatio, quod humores tunc copiosiores magis existant; adeo tamen tuta non est, ne ad aliud quod corporis membrum illi cum impetu ruant.

32. Ultimo tandem circa diætam & victum ægrotum quædam annotanda erunt, nam victus ratio præscribenda etiam est ex morborum temporibus, secundum omnem saniorum practitorum sententiam. In acutarum initio debilis quodammodo esse debet, in incremento lenior, in statu tenuissimus. Bene dicit Fernellius in Libr. 1. methodi medendi p. 28. *Cum sævissima symptomata vigent & natura in morbi coctione tota incumbit, alio avertenda non est, neque plenioris cibi coctione distrahenda.* Et quo brevior futurus est morbus, eo victus tenuior pro cuiusque temporis conditione imperandus, quo vero longior, eo minus tenuis. Et cum plerique morbi, maxime febres certis horis concitentur vehementius & exasperentur, horum quoque non tantum in medendo, sed & in alendo summa habenda est ratio; verissime enim inquit HIPPOCR. *Aphor.* 2. libr. 1. *In accessionibus cibo abstinere oportet, nam illud adhibere noxium.* Natura enim cibi coctione avocatur à morbo, à causæ morbificæ coctione. Sic observatum sæpius in acutis & malignis est, juscula alimentosa & substantifica, nondum satis morbi vi labefactata, noxia fuisse, naturamque victam, & mortuos fuisse ægros: hinc magis vel in decessione vel in declinatione morborum cibus adhibendus est.

PRUDENTI MEDICAMENTORUM CONTINUATIONE.

§. I.

VEra medendi ægritudinibus humani corporis methodus uti maxime in eo consistit, ut ex accurate descripta & pleniori morbi historia causas morbi, ex quibus ortum duxit, perscrutetur medicus, postea iis tollendis apta remedia inveniat eaque convenienti tempore, proportionem & ordine adplicare sciat; ita sagacis & periti medentis officium in eo omnino versatur, ut pauca & selecta, usu longo cognita & præstantia medicamenta in familiari habeat usu, neque facile ea mutet, sed tempore, si opus est, satis longo & probe continuato iis utatur. Et profecto quando medicus, quamdiu cum convenienti & accommodato medicamento continuandum sit, recte didicit, optimus & præstantissimus artifex habendus est. Sæpiissime contingere vidimus, ut ex probe pensitata & perspecta morbi historia, quæ adhibenda sint ad morbum tollendum remedia, medicus cognoverit; sed tamen ipse nescius, quam diu usus eorum continuandus, sine exoptato plane frustratus est. In præsentia igitur, solidis non minus rationum momentis, quam selectioribus observationibus demonstratum dabimus, quam utile & necessarium sit, modum & tempus, per quod aptum remedium producendum sit, rite cognoscere.

2. Vulgaris & maxime detestandus mos est artem exercentium, ut, ad ægrum vocati, si minus statim singularem à medicamentis exhibitis effectum percipiunt, mox mutant remedia, & quasi per saltus, ex quatuor mundi angulis, uti loquitur WALDSCHMIDIUS in *Instit. ration. p. 134. remedia sibi invicem contraria accersant*, non absque magno & fontico ægrotantium damno, quos, si quid aliud, certe talis medicamentorum varietas deprimit atque pessundat. Ipse SENECA *Epist. II. Nil æque*, inquit, *sanitatem ægrotantium impedit, quam remediorum crebra mutatio*. Etenim diversæ activitatis, à diversa textura particularum, ratione figuræ, magnitudinis & motus variarum dependentis, medicamina, non semper principia custodiunt sanguinis mixturæ & motibus vitalibus congrua, sed frequentissime excessivis qualitatibus & virtutibus instructa, hinc nisi recte opponantur causæ morbificæ, contrarias potius, irregulares & anomalas in machina nostra suscitant motiones, benignum morbum in malignum non raro convertendo, ut hac ratione plus officiant ægrotis, quam profint tales medici. Frequentius etiam per experientiam constitit, ægros tali modo tractatos, cum sanitate redire in gratiam non potuisse, nisi seposito, quibus magis pessundata ac impedita hætenus natura fuerat, remediorum sibi invicem contrariantium usu, quæ deinde ultro ac sponte majores vires recuperans causæ morbificæ mitigandæ vel expellendæ maxime fuit idonea.

3. Præterea, hæc remediorum varietas, ignorantiam medici designat & palam facit certissimam: si enim morbi causam, quæ non diversimoda, sed unica sæpius est, viresque medicamentorum probe pernosceret medicus, non tam fluctuaret in ipsorum usu, sed multo magis iudicio practico, recta ratione & experientia suffulto, quod raro fallit, innixus, in circumspecta horum continuatione perseveraret atque persisteret. Hinc non minus eleganter, quam vere, VERULAMIUS: *Varietas*, inquit, *remediorum ignorantie filia est*. Præ-

stat itaque omnia remedia nosse, sed paucis, selectis & rite cognitis uti. Pulchra sunt, quæ hanc in rem scribit WEDELIUS *de Medic. Facult. cognosc. & applic. Res se habet hæc*, inquit, *instar amicorum: Magis æstimamus unum vel alterum amicum, quam centum notos, multi etiam amicitiam offerunt, pauci merentur. Ita etiam curiose selectum & expertum medicamentum reliquis omnibus præferendum est: qui omnes habet amicos, neutrum habet: qui omnia novit, neutrum novit*. Verum pace tanti viri dixerim, nec remediorum, etiam optimorum, delectum sufficere, sed multum adhuc interesse, ut noscat medicus iis recte uti, i. e. sciat, *qua dosi medicamentum sit offerendum; quamdiu sit continuandum, & quando ab huius usu desistendum*. In hisce maxime felicitis curationis cardo & arcum vertitur, & medicamentum tali modo administratum, merito manus Dei auxiliatrix; perverse vero exhibitum, gladius in manu furiosi iure appellatur.

4. Neque priscis medicis remediorum per longam temporis seriem continuatum in curatione morborum usum ignoratum, sed summopere potius commendatum fuisse, insignis præter alia locus apud COEL. AURELIANUM, antiquissimum & optimum historiæ morborum scriptorem, indicat, qui *Libr. de passionibus chronicis V. cap. II. p. 562. exstat*, ubi annalium medicamentorum, quæ continuo anno in arthriticis passionibus adhibenda sunt, meminit, egregiam in fine adiciens observationem & iudicium SORANI: *Non probandam esse diuturnam medicaminis in omnibus morbis sumtionem, quia nonnulli ex jugi medicamine poto in celeres vel acutas inciderunt passiones, alii apoplectici, alii pneumonici interierunt, quidam continua difficultate spiritus affecti fuerunt*. Sed hæc cuncta utique de remediis validis magnaue corporis nostri tum solida tum fluida alterandi potentia instructis valent, neutiquam vero de iis, quæ benigna sunt, quæ per epicrasin leniter operantur, intelligenda sunt. Idem laudatissimus Auctor eodem loco hæc habet: *In articulorum passione usus adhibendus aquarum, tum calidarum, tum frigidarum, ut sunt in Italia Albuleæ & Cotilie, sed earum affectanda repetitio*. Quæ verba quum nos ad verum & efficacem thermarum & acidularum usum in rebellibus morbis sanandis perducant, hunc ipsum exemplis rationibusque confirmare, haud erit inutile. Ita primo omnium occurrit egregia observatio de largissimo thermarum usu, quam nobis Decuria II. anni I. Ephem. N.C. subministrat: *Reverendus pater, multis ventris torminibus & compressionibus pectoris vexatus, suasu quorundam ad thermas Carolinas se contulit, fuit tum annorum XLVII. & bibere cepit thermæ aquas in tanta copia, ut fidem superasse videretur: bibebat nempe LXIV. diebus 26089. sextarios, sextarius autem unus erat unc. XII. Et addit, si citius discessisset, & humores commoti non expurgati fuissent, in pejorem corporis statum incidisset, & omnia media adhibita in cassum abiissent. Ab eo tempore curatus egregie fuit, & ter quaterque in anno thermas istas invisit, sex septimanarum spatium inibi commoratus*. Eadem observatio meminit Baronis cujusdam podagræ torminibus vexati, qui quovis anni tempore, in media etiam hyeme has thermas frequentans, pedes dolentes calidæ immisit aquæ, egregio cum levamine, bibens subinde calidæ immensam quantitatem,

tem, ad urceos quandoque XV. vel fœcilium ad potum usitatorum à ducentis ad quinquaginta. Regulæ vero instar sit medicis, qui has aquas assumendas aliis suadent, ut perpendendo corporis constitutionem judicent, num hoc ipsum tantæ aquarum quantitati perferendæ aptum sit atque idoneum, præsertim cum acidularum thermarumque usus viscera sana, robusta, non inflammata aut scirrhusa, inprimis autem robur ventriculi exposcat. Permittentia igitur & prohibentia inter se probe sunt conferenda & prudenter expendenda.

5. Sed rationem tam mirabilis aquarum salubrium effectus inquirentes facile perspicimus, nec soli aquæ, nec mineralibus, aut salibus in ea contentis tantam sanandi inesse vim & efficaciam, sed quicquid ad ægrotantes exinde redundat commodi, id potius multo & per multas hebdomadas dilato harum aquarum usui esse tribuendum: Neque deest ratio: Quum enim aqua particularum lubricitate & mobilitate omnis facile figuræ poros subeat, alcali suo, quod fovet, acidum vitiosum temperet, sanguinique humiditas partes restituat, non mirum est, quod magna in copia hausta viscerum infarctus eluendo, viscosaque & glutinosa vasorum obstacula promptissime dissolvendo tanta præstet, quanta alia, licet potentiora remedia efficere haud valeant, utpote quæ in parva dosi adsumta, partim in primis viis infringuntur, partim ad massam sanguinis delata ita immutantur, ut integris viribus ad locum adfectum penetrare vix queant.

6. Lac, asininum præsertim & lactis serum, quod adversus insultum arthriticum, phthisin & atrophiam, si ab acrimonia lymphæ originem ducunt, præstantissimum afferat remedium, CELSI lib. IV. cap. XXIV. & PLINII lib. XXIX. cap. IX. testimoniis atque elogiis firmum est ratumve. Omne vero quod præstat, præstat autem eximium, continuato, ut verissime scribit PECHLINUS, *Observ. XXIII. efficit usu, quo nempe, per iteratas circulationes, salis arthritici aculei, instar aliorum salium, quæ sæpius calcinata sæpiusve lota spicula sua amittunt, obtundantur & separato per alvum aut renes tartareo fermento, velut positis reduviis, novus recoctusque sanguis emergat.* At, recte subjungit, *hanc ego curam hoc absolutiorem fore confido, quo lactis usus est diuturnior & dieta in cæteris morosior.* Verum cum deficient statim ad prima experimenta delicatuli nostri, nec lactis usum cum decenti diætâ, quæ tamen hic omne fert punctum, continent, mirum non est, si desiderato effectû frustrati ægri sunt, fuerunt, erunt. Nec tamen omittendum arbitror, magna circa hoc remedium, inprimis ratione subjectorum aut individuum, opus esse cautione, in quibus medicus probe attendat, num ventriculus & primæ viæ, ipsaque vitæ ratio tale remedium permittant aut prohibeant. Merito enim, consensu peritissimorum medicorum, abstinemus à lacte, quandiu acore & coagulo prima regio obfessa, ventriculi adest debilitas & morbi magis ex-exsuperantia, quam defectu humorum videntur enati.

7. Lignorum & radicum appropriatarum decocta ex aqua, decenter usurpata, in rebellibus chronicis affectibus, qui à lenta, viscida pituita, viscera & minimos tubulos infarciendo nascuntur, cujus generis sunt cachexia scorbutica & lues gallica, vincendis & expugnandis mirabilem certe effectum præstant, sed tota encheiresis & artificium, ut longiore usu & largiori in quantitate adsumantur, consistit. Quod si non observatur, parum proficiunt. Species vero, quæ in hæc decocta recipiuntur, præstantissimæ sunt: guajacum & ejus cortex, lignum aloes, sassafras cum cortice, radix chinæ, sarsaparillæ, cichor. pimpinell. ex quibus aqua per coctionem subtile acre & resinofum, ex quibus constant, elementum extrahit & imbibit, quod cum

aqueo sufficienti vehiculo in massam sanguinis delatum lentos & glutinosos humores hinc inde in tubulosa partium substantia flagnantes potenter fundendo & resolvendo per corporis emunctoria, inprimis per subcutaneum cribrum sub forma madoris vel sudoris expellit. Conveniens autem hujus ad sanguinem depurandum efficacissimi remedii modus utendi hic est: duplex nimirum ex dictis ingredientibus parandum est decoctum, alterum valde saturatum & potentius, alterum magis temperatum & uberiori aquæ quantitate dilutum. Illo semel vel bis de die debita quantitate sumto cum regimine sudor est eliciendus, temperatum vero loco potus ordinarii liberaliter intra & extra cibum hauriendum est. Hac cura cum exacta victus ratione per sex vel septem hebdomadas usurpata atroces dolores scorbuticos, efflorescentias & tumores in cute pessimi moris, item exulcerationes, quæ ex lue vel Gallica vel scorbutica suboriuntur, aliosque graves affectus, longe felicius & securius sublatis vidimus, ac si minus tuta & suspecta mercuriali salivatione fuissent tractati.

8. Herbarum pro genio morbi accommodatarum infusa ex aqua calida, longiori tempore & majori quantitate exhibita, tantam profecto tum in avertendis, tum in sanandis, contumacibus etiam & longis morbis, ostendunt efficaciam, quæ ab aliis magnificæ alias famæ & ex regno minerali petitis remediis expectari non potest. Et utut non negandum sit, appropriato, quod infunditur, vegetabili e. g. veronica, hyssopo & marrubio in pectoris passionibus, melissæ, betonica, salviæ in capitis morbis, floribus tiliæ, primulæ veris, in nervorum affectibus, seminis fœniculi & rad. valerianæ in oculorum vitiis, summatibus millefol. in calculo, herbæ fumarie & scordii in scabie & impuritatibus cutis, arnicæ in stasi sanguinis à vehemente contusione producta, multum efficaciam tribui posse; nihilo minus tamen, si velimus eloqui, quod res est, maximam auxilii & allevamenti partem largiori aquæ calidæ potui in acceptis referendam esse, jure meritoque censendum est. Siquidem subtile, aqueum, calide in copia sumtum & particulis medicinalibus imbutum fluidum per intima corporis minimosque tubulos transiens, humores lentos, viscidos dissolvendo, stagnationes & obstructions, quæ fœcundæ morborum genitricæ sunt, removet falsosque & acres fluores inde dilutos ac temperatos tum per renale, tum per subcutaneum cribrum evacuat: qua ratione magnis omnino morbis præsidio & auxilio est.

9. Ego quidem sancte affirmare possum, quod gravia oculorum vitia, epiphoram, cataractam spuriam, ophthalmiam quoque, solo herbæ veronica & seminis fœnicul. infuso calido inter initia largissime ad octo vel decem libras quotidie hausto ad miraculum usque intra aliquot dies profligaverim: ita in psora quoque & scabie, quæ maligni quidpiam videbatur recondere, infuso herba veron. & rad. glycyrrh. diluto quotidieque ad aliquot mensuras exhibito, præmissis pilulis ex extracto fumarie, rhabarbari & mercurio dulci concinnatis, tantum profeci, ut vix quispiam ab aliis heroicis in his morbis alias consuetis remediis intra aliquot mensium spatium meliorem sibi effectum potuisset polliceri.

10. Neque in chronicis tantum passionibus, sed etiam in acutis magnum & præsidium & auxilium in diutius continuato remediorum, præsertim liquidorum, usu reponendum esse exercitatis medicis est comperitissimum. Nam acutæ febres, inflammatoriæ & sic dictæ causi, quæ ex commota nimis bile oriuntur, vel quæ pleuritidi veræ ac peripneumoniæ junguntur, vel variolis & morbillis superveniunt, vix per alia remediorum genera, sive diaphoretica, sive bezoardica,

levaminis quidpiam recipiunt, aut perfecte sanantur, nisi ptisanæ ex mundo hordeo, rasura C. C. rad. graminis & scorzoner. bene præparatæ largior & sæpe repetitus usus accesserit, cujus beneficio humorum peccantium acrimonia & visciditas corrigitur, stases, quæ inflammationes cient, solvuntur & totus humorum motus ad corporis peripheriam, ut melior procedat transpiratio, convertitur.

11. At vero, benigna & leniora remedia magna in quantitate & repetitis vicibus in usum trahi posse, haud quidquam superest dubii, sed alia adhuc incidit quæstio: num etiam medicamentorum validiorum, ut sunt emetica & purgantia, repetitus in morbis usus salutaris esse possit ac debeat. Utut vero rariora sint exempla, ubi frequens emetici usus indicetur; non tamen desunt, sed in ampliori praxi omnino occurrunt morbi, ad quos in prima herba extirpandos sagax peritusque medicus iis ab initio commode sæpius uti possit. Et scire licet, quod, uti emetica & purgantia tum tutiora, tum selectiora in sanandis morbis circumspectus medicus frequenti in usu habere debet, ita maxime hoc opus sit, ubi sæpius iterumque illa ipsa sunt propinanda. Quum vero nostris temporibus præter radicem Ipecacuannæ tartarumque emeticum, in forma præcipue liquida sumtum, aliud, quod majori efficacia & securitate se commendet remedium vix detur præstantius; his binis medicaminibus optimo cum successu in variis morborum generibus, non una, sed iteratis vicibus usus sum.

12. Ita, exemplo sit, in dysenteria ante decem abhinc annos hic loci & in comitatu Mansfeldensi graviter grassante, à Nobilibus quibusdam ego in consilium vocatus id potissimum omnibus viribus laboravi, ut inter initia protinus gravi morbo occurreretur. Qui vero, quum à valde acri, corrosiva, viscida, firmiterque duodeni plicis in hærente bile præcipuam causam duceret & originem, primum ordinavi aliquot pulveris absorbentis doses, quibus postea usum pulveris Ipecacuannæ ad scrupul. unum vel drachm. dimid. subjunxi, superbibendo lac calidum aqua dilutum, vel jusculum avenaceum, qua ratione dein faciles muci viscidum ex atro nonnunquam viridescentes sequebantur vomitus. Postremo, accessit quoque ex oleo amygd. dulcium cum aqua menthæ spirituoſa & aliquot guttulis laudani opiaty Sydenhami parata potio. Quibus medicamentis postero tertiove die iteratis, mox una cum omnibus symptomatibus sat diris & dejectione per alvum sanguinea, teter morbus quievit. Alio tempore eundem gravem morbum divina adjutus gratia sequenti methodo oppugnavi: Primo dedi rhabarbarum ad scrupul. duos cum guttulis VIII. olei nucis moschatæ expressi, itemque loco rhabarbari pilulas XV. Becherianas in lacte solutas propinavi. Circa vesperam vero guttas XL. essent. cascarill. aquosæ, probe saturatæ adhibui, quibus, interposito pro potu decocto C. C. cum lacte permixto, per quatuor vel quinque & ultra dies continuavi.

13. Ex intermittentibus febribus perperam & nimis festinanter chinæ chinæ cortice suppressis vel peiores recidivas, vel lentas febres subnasci, non novum nec insolitum est, ad quas inter initia statim extirpandas hac methodo felicissime usus sum: Dedi videlicet die intercalari tartari emetici grana II. in unc. I. aquæ menthæ soluta, idque repeti aliquot vicibus. Postea vel elixirium nostrum viscerale, vel aliud stomachicum cum ess. cascarillæ anatica portione remixtum porrexi sicque febrem feliciter discussi. Simili fere nec multum distant ratione intermittendum, tam tertianæ, quam quartanæ contumaciam electuario quodam ex Cort. Chin. rhabarb. mercur. dulci & rob Juniperi conflato, per integram & ultra septima-

nam dato non sine felici successu debellare molitus sum: nam, fomitem harum febrium bilem degenerem, viscidam, primis viis maximeque duodeni tunicis firmiter impactam præcipuam causam esse, recte judicavi, idque potissimum ex eo, quod ex præcedente voracitate & transpiratione prohibita, accedente simul iracundiæ affectu ejusmodi febres oriri frequenti observatione animadvertem.

14. Ex eorum remediorum numero, quæ repetitis vicibus usurpari & continuari debent, quando faustus ab ipsis sperandus est effectus, præcipuum fere locum sibi vendicant sic dicta diaphnoica, sive diaphoretica, quæ excretionem cuticularem, omnium saluberrimam promovendi insigni facultate prædita totam fluidorum massam ab alienis, excrementitiis & superfluis sordibus quam optime liberant; qua ratione sola sæpius natura, nulla peculiari arte adjuncta graves periculique plenas passiones persanat. Utut vero & varia & plura sint, quæ hoc nomine in medicorum scriptis & ubi de materia medica agitur, celebrantur; peritus tamen & rationalis medicus tantummodo & meliora & securiora ex tanta remediorum sylva feligere debet, quare perpauca commemorare volumus, quæ se nobis præstantissimo usu per multos annos comprobant.

15. Quam optime autem vel in liquida vel in sicca possunt distinguui. Ex illorum numero famigeratissima mixtura simplex bene præparata, nec, ut pessimo more fit, destillata, acetum theriacale vel bezoardicum, aqua theriacalis, spiritus noster anodynus, si ejus tres partes cum una spiritus C. C. vel eboris bene parati parte miscentur, liquor C. C. succinatus, ess. pimpinellæ & scordii probe saturatæ optime se commendat. Inter hæc vero, quæ sub sicca forma assumpta præ aliis efficaciam suam usque eo ostenderunt, pulveres sic dicti diaphoretici & bezoardici referendi sunt, qui ex antimonio diaphoretico, sive melius cerussa antimonii, C. C. uſto vel philos. præparato, unicornu fossili, cancrorum lapidibus, succino, cinnabari, flor. sulphuris, conficiuntur, addito pro re nata, ad augendam energiam, radice contraïervæ, vel pauxillo camphoræ. Possunt hi pulveres cum aquis identidem diaphnoica virtute splendentibus, Card. bened. galangæ, scordii, rad. scorzonæræ, florum sambuci exhiberi & sufficiunt omnino ad scopum, quem nobis præfigimus, salutarem obtinendum, ita ut pretiosioribus, qualia sunt pulvis Anglicanus, Sennerti, vel lapis bezoardicus, prorsus non opus habeamus.

16. Hæc lenissima in febribus acutis, malignis, exanthematicis omne fere in medendo absolvunt punctum. Sed opus est, ut moderata, sæpius autem repetita dosi, imo singulis tribus vel IV. horis propinentur & per totum morbi decursum ipsorum usus continetur, si modo potus congruus in sufficienti quantitate fuerit interpositus. Ego quidem bona fide confirmare possum, quod simplici & lenissima hac methodo, constanter eidem insistendo, omnis generis acutas vel benignæ, vel malignæ, aut anomalæ indolis febres, cum exanthematibus quoque junctas, felicissimo cum successu, divina adjuvante gratia propulsaverim.

17. Ex iis vero affectibus, qui ob ingens in mora periculum præsentissimum postulant auxilium & remediorum cessationem respuunt, præcipui sunt inflammationes externarum partium graviores, ubi sphacelosa corruptio pertimescenda, vel jam præsens est. Omnis spes salutis ejusmodi in casibus in efficacioribus remediis, quorum ope corruptio avertatur, præcipue autem in celeri auxilio, quin in temporis momento & opportunitate reposita est. Qua occasione præterlapsa, actum omnino de salute & vita hominis est. Ex magno vero illorum numero, quæ ad robur solidorum deperditum instaurandum, neque minus ad humores

res in putredinem pronos discutiendos celebrantur, mea quidem experientia, omnium optima & præstantissima comperi cataplasinata, quæ ex generoso vino, aqua calcis vivæ, radice angelicæ, levistici, herba rutæ, scordii, flor. sambuci per lenem coctionem parantur, addita in fine convenienti spiritus vini camphorati portione vel balsami nostri vitæ. Quorum applicatio circa temporis cessationem pernecessaria & quavis tertia vel quarta hora iteranda. Opus præterea est, ut interno alexipharmaco labascenti naturæ celeriter succurramus, quod ego subinde sequenti mixtura egregie præstiti. Cum libra nempe vini generosi Rhenani medica theriacæ Andromachi & lapidum cancrorum drachmas duas anatica portione admixtas exhibui, idque singulis quatuor horis iterandum suasi: quibus paucis, sed generosioribus remediis ex mortis faucibus plures ereptos novi.

18. Si ullus morbus rebellis & refractarius est, qui medentibus multum faceffit negotii & medicamentorum eludit effectum, certe est lues illa, quæ ab inquinamento venereo natales ducit suos, cujusque vehementia tanta est, ut non modo naturalem sanguinis & humorum, præcipue vero fluidi cerebri & nervorum subtilissimi, naturalem & benignam crasin plane pervertat, sed & solidorum structuram ac compagem ita lædat & labefactet, ut in foedam putredinem & corruptionem abeant, adeo ut, sunt verba SYDENHAMII, *ulceribus, carie & dolore inde exacerbatis per vices membra pereant*. Ut itaque subtile hoc ac corrosivæ indolis virus, tantorum malorum causa, cito medicamentis efficacibus e corpore eliminetur, periti ac sagacis medici præcipua cura ac intentio esse debet. Verum ad hunc scopum feliciter obtinendum, neququam blanda ac leniora, vulgo sic dicta Galenica remedia quadrare, sed generosiora, valentiora & ex minerali regno potissimum petita requiri, certa & infallibili experientia iis, qui hisce malis averrendis invigilant, compertissimum est. Neque nostro tempore ignotum esse potest, ad atrocem hunc morbum extirpandum, ipso argento vivo & medicamentis ex eo rite paratis vix certius aut efficacius remedium dari.

19. At vero, quum medicamentorum, quæ ex argento vivo parantur, ea sit natura & specifica fere facultas, ut in glandulas & lymphaticos salivales ductus fortiter agendo lymphæ motum mirum in modum augeant & ingentem salivalis laticis profusionem excitent, idque non sine magno incommodo, nec levi virium detrimento efficiant; hinc multo abhinc tempore & circumspecti & sagaces Chymiatři non sine ratione in eo desudarunt magnoque labore occupati fuerunt, ut ex argento vivo ejusmodi conficerent remedia, quæ quidem gravi huic morbo eradicando sufficiant, sine magna tamen virium jactura & detrimento corpori inferendo secure possint exhiberi. Sed nimis longum foret, has præparationes artificiose hoc fine excogitatas hoc loco recensere omnes; nihilo minus illud silentio non præterire oportet, mercurium bene purificatum & cum puro auro decenti modo amalgamatum certa que encheiresi per longiorem digestionem & cæmentationem fixatum drastica sua vehementerque salivam movente virtute multum spoliari & potius virtutem sudoriferam & potenter resolventem induere. Qua de re olim fusius actum est in *dissert. quæ agit de medicamentis mercurialibus, quæ sine salivatione operantur*. Quibus vero encheiresi ejusmodi medicamentum præparandi non suppetit, iis loco hujus facilem ac tutissimam mercurii sic dicti dulcis recte & cum euphoria usurpandi methodum in præsentī proponere non dubitavimus.

20. Consistit autem ea ipsa in ratione habenda cautionum, quæ sequuntur: Primo sciendum est, mer-

Frid. Hoffmanni Oper. Tom. VI.

curium probe edulcoratum & à spiculis corrosivis, quod optime fit per lenem coctionem cum aqua, liberatum in usum ducendum esse. Deinde ille ipse neququam largiori dosi, ut vulgaris eaque pessima est consuetudo, ad scrupulum vel ultra, sed valde moderata dosi ad IV. vel V. grana, per aliquot dies continuando exhiberi debet. Id quod longe succedit melius, si cum VI. vel VIII. granis pulveris cujusdam absorbentis, ut sunt cancrorum lapides, aut conchæ præparatæ misceatur. Tum cavendum, ne usurpetur prius, nisi corpore bene præparato & per sic dicta universalia probe disposito, ita tamen, ut ad unum quandoque alterumve granum, si fluxus salivalis minus recte procedat, dosi augeatur. Qua methodo si per X. aut XIV. dies propinetur, tum in gallica lue, tum in foedis faucium, nasi pedumque manantibus ulceribus, atroci cephalæa noctu potissimum infestante, scabie ferina vel ab hac retro pulsa ortis acribus ad oculos defluxionibus, aut glandularum in collo tumoribus sub blando ptyalifino per aliquot sæpius hebdomadas durante mirabilem edit operationem. Ad alvum aperiendam interponere per aliquot dies expedit ex Manna & Rhabarbaro conflatum blande laxans. Nec prætereundum arbitror, sub tali salivationis cura maxime omnium diætæ regiminisque rationem esse habendam. Injungendum itaque est, ut, quum hoc remedio utuntur ægrotantes, sub moderato calore cibum mollem & modicum, pro potu vero decoctum Sarsaparillæ & radice Glycyrrhizæ, item rasuræ C. C. adsumant & ab omni, sub cælo præsertim intempestuoso ac frigido, refrigeratione, nec non à cibis salitis & acribus plane se se abstineant.

21. Ad mercurialium medicamentorum familiam jure quoque pertinent cinnabarina, quæ ex argenti vivi & puri sulphuris, quod hoc minerale fluidum ligandi, figendi & eleganti rubicundo colore tingendi facultate pollet, decenti mixtura & præparatione conficiuntur. Inter hæc vero potissimum cinnabaris nativa, per rectificationem sublimata, cinnabaris antimonii & vulgaris, quo pictores utuntur, medicinali usu eminent. Et quamvis diversa videatur ingredientium in præparatione natura, in usu tamen & efficacia omnino ipsa conspirare, peritioribus medicis perspectum jamdudum est atque cognitum, adeo ut, quamcunque in usum recipere libuerit, tutissime id fiat. Medicamenta equidem hæc salivandi efficacia sunt spoliata, ut lui venereæ sanandæ vix sufficiant, attamen ob virtutem lymphæ stagnantis & corruptæ viscositates mucidas nervosis partibus & tubulis inhærescentes insigniter dissolvendi, gravissimis morbis, si accommodato usurpantur tempore, non sine successu mendentur felicissimo. Quorum medicamentorum efficaciam jam ante quadraginta annos in *Adnotat. in Poterium* p. 574. mentionem feci his verbis: *Præsentissimam opem ferunt in epilepsia, vertigine, affectibus capitis, qui à sero vel sanguine extravasato ortum ducunt, cinnabarina, quem egregie resolvunt; sed, quod bene notandum, in majori & sæpius repetita dosi. Aliquoties felicissimo cum successu, epilepsiam, ex gravissima capitis contusione, ortam expugnaui cinnabarinis, offerendo pro una dosi semper scrup. 1. cum aqua cephalica, bis de die, continuando per decem usque dies, sola saltim adhibita cucupha, ex caryophyll. aromaticis, cubeb. & cardamom.*

22. Maxime vero omnium Claußthalii, Silvæ Herciniæ oppido, metalli fodinis celebri, curatio isthæc cinnabarina, in epilepsia & convulsionibus truculentissimis metallurgorum, ex plagis capitis, quæ infausto lapsu in fodinis sæpe contingunt acerbissimæ, multis præfens tulit auxilium, & hinc miraculi instar passim celebratur. Similem effectum cinnabaris supra determinata dosi exhibita, præstitit in curatione viri sexagenarii Halberstadiensis, qui post gravissimam capitis

contusionem, per X. dies mutus, & plus quam tricies de die paroxysmo epileptico convulsus, sine omni rationis usu jacuit; sola tamen cinnabari, eaque ad scrupul. unum singulis diebus ter adsumta decem continuos dies, sine ullis aliis medicamentis, ita restitutus in pristinam sanitatem est, ut ad hunc usque diem vivat incolumis. Præsentissimam medelam, quam ita exhibita cinnabaris, vertigine caduca laborantibus aliquoties præstitit, propterea pluribus non commemoro, ut ne nimius videar in cinnabaris encomiis: quæ dosibus sufficientibus iisque pro re nata repetitis, propinata in casibus congruis, sua nunquam destituetur efficacia. Hac tamen occasione non possum non porismatis loco subungere, plurimorum timiditate præposita, præcipue in determinandis medicamentorum dosibus fieri, ut morborum chronicorum pertinacia adeo raro devincatur medicamentorum efficacia, quæ quidem adeo parce datis ut plurimum nulla est, sed potius obtundatur & defatigetur *expectatione* artificiosa & blandimentis artificiosis.

23. Uti vero cinnabaris, non nisi larga manu & dosibus sæpe repetitis exhibita, suam præstat efficaciam; ita hanc, ista sub mole, ferunt nonnisi ii, quibus primarum viarum robur satis constat: etenim si atonia vel flacciditate langueant ventriculi & intestinorum fibræ, adeoque peristalticus motus sit imminutus, accumulata cinnabaris, & lateribus harum partium, accedente muco, adhærens, pressione gravat insigniter. Præterea cum adeo fixatus sit mercurius substantia sulphuris, quæ ignis vi intime resoluta, ei arctissime & per minima commiscetur, languidioris paulo est ad morbos rebelles chronicos, effectus. Adeoque non immerito cinnabari præferri videas medicamentum illud, quod extemporanea commixtione sulphuris cum mercurio fit, & ob coloris convenientiam æthiops mineralis dicitur. Etenim sulphur quod ejusmodi commixtione singulis mercurii globulis interspergitur, abarceat quidem salium acriorum accessum; at vero quoniam illis non ita firmiter immixtum aut colligatum est; mobilitatem & penetrandi vim mercurii non adeo ligat & infringit.

24. Propterea suo merito à celeberrimis Angliæ medicis, MAYERNO, HARRISIO &c. istud medicamentum magni fit, non solum ad enecandos lumbricos, verum etiam in cachexia, scorbuto frigido, imo & lue venerea, aliisque affectibus, qui resolvendi vim mercurialium exposcunt; ubi sub minori dosi id, quod majori cinnabaris vix potest, re vera præstabit. Præsertim si ad illius confectionem adhibeatur sulphur purum & vivum, ex antris subterraneis exstillans, quod populari sermone *Tropf-Schwefel* vocari solet; idque prius abundante acido privetur, adeoque subtilius fiat, repetitis cum calce viva sublimationibus; quibus adeo corrigi & exaltari potest, ut per se edat effectum solventem & sudoriferum præ communi & impuriore sulphure longe præstantiorem. Mercurio igitur probe depurato coctione ex cera & sublimatione cum multa calce viva admixtum, medicamentum constituet, efficaciæ revera præstantis tutissimæque.

25. Martialia hypochondriacorum & cachecticorum panacæam à medicis appellari, non ignotum est. Neque minus constat, hæc ipsa, quando non ex chalybe, sed ex ferro, quod majori sulphuris metallici copia pollet, recte præparata convenienti tempore, dosi, ordine exhibita fuerint, insignem opem atque auxilium dictis in morbis conferre posse. Multa quidem ex eo in chymicis libris & pharmacopœis profant & obvia sunt adornata medicamenta, quorum quum ingens sit ratione virtutis discrimen, selectu omnino quodam opus esse & ratio experientiæ suffulta, & prudentia postulat. Nam uti ferrum inter metalla quidem vilissimum, attamen *ratione virtutis* saluberrimum

vires suas in corpore humano à duplici potissimum principio, ex quo compositum est, mutuatur, uno nempe sulphureo, metallico, subtilioris & activioris indolis, altero elemento magis fixiori, terreo, rudiori & adstringente, præsertim acidi accessione: ita omnia ex eo parata, quæ magis de subtiliori & sulphurea substantia, roborante tonica, quam ejus fixiori & constringenti participant & securitate & virtute, in morbis præsertim chronicis, qui ex vasorum, glandularum, nec non secretoriorum à crassis & viscidis humoribus intarctu & obstructione nascuntur, se commendant. Ex eorum vero numero, quæ adaperiendi & simul roborandi commendabilem virtutem possident, sunt quam maxime ea, quæ ex puro ferro cum tenuioribus ex regno vegetabili desumptis acidis præparantur succis, ut sunt succus pomorum Borstorffianorum, granatorum, corticum citri, aurantium, berberum, quippe qui subtiliorem partem extrahunt & in sal martis tenerrimum transeunt, ideoque revera iis tincturis & essentis quæ cum acido spiritu minerali, ut Salis, nitri, conficiuntur, longissime sunt præferenda.

26. Simili ratione, sola limatura ferri sine additione salium, sine reverberatione aut calcinatione, sola tantummodo irroratione aquæ pluvialis, accedente solari calore & libero aeris accessu successive in tenerrimum crocum redacta omnibus pulveribus & crocis, quorum abundantes in pharmacopœis passim descriptiones exstant, & tutiori & præstantiori usu longissime exsuperat. Totus vero cardo curationis in eo vere vertitur, ut in passionibus rebellibus & chronicis, præsertim cachexia hypochondriaca, icterica, vel etiam hysterica, profliganda his remediis medicus recte uti noverit. Quare primo non expedit talem pulverem martialem solum & seorsim exhibere, sed longe consultius est cum aliis accommodatis remediis eum permiscere. Ita ego crocum nostrum cum rad. Pimpinellæ, Ari, juxta exemplar Quercetani, cum cinnamomo acuto, sale absynthii, vel etiam thermarum Carolinarum & dimidio pondere sacchari miscere ac deinde non bis vel ter in septimana, sed ad continuos XIV. dies aut tres septimanas mane cum commodo vehiculo exhibere solitus sum, exactam simul diætam & exercitationem imperando.

27. Denique, quando ante hujus medicaminis usum primæ viæ convenienti purgante à saburra vitiosorum humorum deplentur, vel etiam quarto vel quinto die laxans, uti sunt passulæ rhabarbarinæ, subjungitur, longe auspiciorem inde successum expectari posse, certa fide adseverare possum. Simili modo, si quis imbecillioris paulo est stomachi, cum liquido martiali morbi ejusmodi inveterati curationem adgredi, inconsultum non est, ita, ut cum brodio carnis, in quo radices maxime aperientes, palato non ingrata, leniter decoctæ fuerint, singulis diebus tincturæ martialis drachma una vel binæ supra commemorato sumantur regimine. Qua methode si quis recte in his morbis uti sciat & agrotantes, qui patientiam & obedientiam in parato habent, nactus fuerit, mineralibus aquis, tum thermis, tum acidulis aliisque sumtuosis valde remediorum generibus carere omnino poterit.

28. Sunt adhuc alia remedia, quorum usus sat longo tempore continuari debet, si quis ab iis exoptatum expectare velit effectum. Quorum centum quam maxime subeunt ea, quæ alimentorum digestionem eorumque intimæ dissolutioni & excrementorum expulsionem promovendæ inserviunt. Nam, sicut plurimæ tam capitis, quam pectoris passionibus, ut sunt cephalalgia, hæmicrania, vertigo, auditus difficilis, tussis, asthma varique generis rheumatismi, in prima regione, qua ventriculum potissimum & duode-

num comprehendimus, suum habent fomitem atque hospitium, maximeque à vitiata diæta & virtutis digestivæ imbecillitate, qua minus laudabilis in sanguinem & nutrimentum convertendus chylosus succus generari solet, sustentantur: ita recte omnino colligitur, medicamenta, stomachum sic dicta roborantia & digestionem adjuvantia non modo dictis affectibus præservandis, verum etiam abigendis omnium esse aptissima.

29. At vero, hæc ipsa longe carent efficacia, nisi debita dosi debitoque tempore, ad mensem imo dimidium anni usus eorum ante vel post cibum institutus prorogetur. Splendet autem & eminet hac virtute valde commendabili inter alia elixirium nostrum stomachicum in *Notis ad Poterium* descriptum, quo per longum annorum decursum in artis exercitio optimo cum successu usi sumus, neque minus elixir nostrum sic dictum Viscerale, temperate balsamicum, quod sine ullo spirituosæ liquoris accessu paratum hypochondriaco malo affectis, in quibus ventriculi actio, digestio & robur, una cum toto intestinorum volumine vix unquam recte habent, favet & succurrit efficacissime.

30. Quando morbi per imprudentiam perperam tractati, febres præsertim, aut immoderatæ sanguinis profusiones diuturnique alvi fluxus in cachexiam hydropicam & anasarcam, quod usu sæpe evenit, vergunt atque inclinant, tum multa medicamentorum varietas & crebra mutatio nihil prorsus ægrum juvat, ut potius corpori insensibilissima in perniciem sæpius & lethalem statum eum præcipitet. Sed paucis, iisque causæ morbificæ accommodatis & efficacibus remediis uti expedit, quorum tamen usum, si proficere debet, & frequentiore esse, & sufficienti tempore continuari necesse est. Inter ea vero, quæ jure certaque fide laudare ac commendare possum, non reponenda solum volo, quæ lentos, viscidos humores dissolvendi, obstructa vasa referandi tonumque solidorum relaxatum roborandi facultate pollent, sed & quæ superfluos humores per convenientia emunctoria, alvum, renes, cutim, ejiciendo corpori languenti subveniunt.

31. Tam egregia vero virtute tamque præstanti effectu conspicua, quam maxime se mihi frequenti usu comprobarunt: Sal quoddam aperitivum, quod ex sale thermarum Carolinarum, vel hoc deficiente, ex sale Ebsoniensi, nitro purificato, cremore tartari & cancrorum lapidibus æquali pondere sumtis conficitur. Alterum est, massa pilularum balsamicarum, quæ ex extractis vegetabilium amaris & temperatis gummatibus resinoso-balsamicis, adjecta inrefracta dosi aloes gummosæ portione; ad imitationem Becheri componitur. Quoad modum autem utendi hisce medicamentis ita scire licet: Omni die mane drachma integra hujus salis soluta in vino cum aqua diluta, & pauxillo sacchari edulcorato præbenda, desuper bibendo aliquot pocula infusi Theæ aut Coffeæ. Hora quarta à prandio idem ita iterandum & ante decubitus XV. grana pilularis massæ sumenda sunt, habita simul ratione rerum sex non naturalium, adjunctoque potu & grato & salubri. Pro subjecti natura & circumstantiarum ratione, quas dignoscere prudentis medici est, ad mensem & ultra continuari hæc cura potest, modo hoc observetur, quod semel interdum vel bis intra hebdomadam ab eadem æger sese abstineat. Duobus hisce medicamentis præcipuis, nec tamen omissis stomachicis, clysteribus carminativis, & si opus est, fortioribus purgantibus intra IV. III. vel etiam II. mensium spatium tumores cachecticos, hydropicos, cum ægerrima respiratione, imo hydrocele, summaque virium jactura junctos divina ope sanatos fuisse sine gloriandi animo vere testari possum.

32. Dolorum rheumaticorum, arthriticorum & podagricorum si secuta & salutaris ex voto suscipienda est curatio, non multiplici medicamentorum apparatu, ex omnibus orbis angulis conquisito, opus esse, sed perpauca ac selectiora causæque morbificæ tollendæ apta nata remedia, quæ juxta proportionem, ordine & longo satis tempore adhibenda sunt, sufficere, perspicacioribus medicis & cognitum satis & exploratum esse arbitror. Nostra methodus est, ut, præter patientiam animique & corporis quietem ac exquisitam diætam, duo maxime, sed per longum satis spatium continuanda & repetenda hisce ægrotantibus commendemus, cujus generis sunt: pulveres blande diaphoretici & acrimoniam humorum corrigentes, quæ pro ingredientibus antimonium diaphoret. five melius cerussam antim. cancrorum lapides, C. C. phil. præparatum, nitrum purificatum, succinum & pauxillum castorei habent & ad drachmam dimidiam, semel vel bis in die sumi possunt. Alterum est decoctum, ex temperatis demulcentibus & resolventibus speciebus quod componitur, ut radice sarsaparill. cichorei, graminis, chinæ, glycyrrhizæ, quarum uncia cum duabus aquæ communis mensuris, quantum sufficit, decoquenda est. Hujus decocti vel frigide vel calide sumti usus mane, ac inter cibos quoque & liberior & frequentior est instituendus, ita ut per totum morbi decursum singulis diebus aliquot mensuræ hauriri debeant.

33. Ex omnibus, qui sequiorem sexum infestant morbis, nullus fere majori molestia & longiori tempore miseram femellam vexat atque exercet, quam ipse sic dictus fluor albus, qui etiam exercitatis medicis non parum negotii faceffere adsolet. Is ipse enim ejus est indolis, ut non modo vigorem omnibus functionibus adimat, sed & insuper uteros steriles reddat. Ego causam difficilioris sanationis morborum, qui ex uteri vitio proveniunt, in ejus plane peculiari structura quærendam esse existimo; quandoquidem pars in universo corpore nulla est, quæ tanta copia vasorum sanguiferorum eorumque innumerabilibus ramificationibus, quæ mirabili modo inter se convoluta & spiræ in modum contorta sunt, instructa sit, quam ipse uterus & ejus vagina. Quæ partes sicuti in gravidis mirabilem in modum expanduntur & explicantur: ita extra hunc statum contrahuntur & implicantur. Et hæc ipsa intricatorum vasculorum copia ægræ ac valde difficilis sanguinis per hoc viscus circuitus causa est, imò præcipuorum morborum, qui in eo sedem figunt, fons atque scaturigo.

34. Ex quo consequitur, præcipuum & floris albi & aliorum uteri affectuum curandi scopum ad liberiores sanguinis cursum directum esse debere, per ejusmodi remedia, quæ fibrarum robur & tonum labefactum instaurant, lentos, viscidos humores dissolvunt eosque fluxiles reddunt. Ego certe in ejusmodi morbis, qui omnem fere medendi modum alium eluserunt, feliciter vincendis nihil deprehendi optatius, nihilque efficacius, medicamentis balsamicis atque balneis, utpote hæc ex herbis roborantibus, nervinis & emollientibus parata humores viscidos dissolvunt & universum corpus perspirabile reddunt, seorsim vero circulum sanguinis per uteri vasa, eadem roborando, promovent. Temperate vero balsamica, ut est nostrum viscerale & pilulæ nostræ, quas à longo abhinc tempore in usu habui, non modo superfluos humores per omnis generis excretoria educunt mensiumque naturalem fluxum promovent, verum etiam meliori ciborum digestionem egregie velificantur. Totum autem medendi per hæc remedia negotium consistit in applicatione, ita ut alternatim hæc duo satis longo tempore usurpentur, initium faciendo à balneis, quæ per V. minimum dies continuandæ, tum balsamicis hisce medicamentis ad idem tempus inhærendum sæpiusque id ipsum iterandum est.

35. Actum nunc usque eo à nobis est de remediorum ex pharmacia desumptorum usu prudenter repetendo & protrahendo. Sed non alienum erit, hoc loco etiam meminisse remediorum diæticorum & naturæ magis familiarium, quæ ex rebus domesticis & cuique prope parabilibus parantur. Ex quorum classe præcipuam merentur considerationem alimenta liquida sive potulenta, qualia sunt juscula carniū, præsertim vitulinæ, decocta gallinarum, seu quod melius, caponis eviscerati, in quibus, si debito & longiori paulo tempore usurpantur, eximia sane, nec satis laudanda ad magnas & chronicas passiones tollendas vis & efficacia continetur; quandoquidem morbi, qui ex humorum visciditate ac lentore, qui ex falsa dyscrasia, qui ex minorum tubulorum & glandularum infarctu subnascuntur, cujus generis quam maxime sunt variæ cutis defœdatæ species & exulcerationes, ut psora, vari, gutta rosacea, herpes, scabies sicca, ferina cum prurigne, senibus potissimum infesta, horum usu longius paulo continuato multo facilius feliciusque sanescunt, ac si quis aliis pretiosis magnæque famæ remediis sanationem illorum moliri aggrediatur. Nec vero inficiandum est, quod horum jusculorum efficacia multo reddi possit insignior, quando decoctiones fiunt cum radicibus aperientibus, ut radice cichorei, petroselini, graminis, fœniculi, apii, asparagi &c. additis passulis minoribus, præsertim si sufficiens hujus decocti quantitas per aliquod tempus sorbenda offeratur, qua ratione in macie & atrophia infantum, ex glandularum mæsaraicarum infarctu & obstructione natis, præsentaneum sapius levamen & emolumentum quam plurimis allatum novimus. Præter hæc, juvabit quoque ex rei præsentis æstimatione, ejusmodi decocta blande laxandi viribus instruere, si inter decoquendum adjiciuntur agaricum, polypodium, cuscuta aliaque, vel etiam in fine coctionis folia sennæ. Constat enim, aperientium vires, admixtis lenioribus purgantibus mirifice intendi.

36. At vero, præter morbos ab humorum depravatione viscerumque obstructione oriundos, sunt quoque adhuc alii sat graves, qui medicamenta liquida & quasi domestica æque desiderant. Referendi huc præcipue sunt morbi, qui ex ingenti virium defectu atque inopia nascuntur, ut maxime fit, ubi vel ex gravi vulnere, vel ex abortu & partu in feminis, vel ex alia quacunque interna causa magnæ ac effrænes ad animi usque deliquium sanguinis profusiones contigerunt, in quibus, sicut functionum omnium, ita ventriculi maxime deprehenditur imbecillitas, adeo ut ex cibis, præsertim solidis, quæ difficilioris paulo sunt concoctionis, boni & laudabiles regenerari succi valde difficulter possint; &, quum ob nimiam sanguinis jacturam vasculorum extremitates & minimorum cana-

lium in secretoriis & excretoriis meatibus, qui à debita humorum copia aperta servari debent, angustentur & constringantur, adeoque nec robur, nec nutrimentum solidis suppeditetur partibus, ad tumores œdematosos, asciticos, ad lentas febres, exitialis sæpenumero fit transitus. Ad hæc igitur mala præcavenda & ad vires, quæ sanitatis sunt conservatrices, reparandas, omnis per medicamenta plane irritus & frustraneus medicorum est conatus, sed potius ex alimentis liquidis subsidium petendum est, utpote quæ sine longa mora in succorum vitalium amissorum substantiam abeunt & convertuntur. Ex horum genere palmam cæteris præripiunt, præter jam dicta juscula gelatinosa, ipsum quoque vinum, quod ad vires erigendas aptissimum, item succi ex carnibus assatis expressi, addito tantillo vini, succi citri. Pertinent huc quoque lac, præsertim asininum, ova sorbilia, potus Chocolate, emulsionem ex amygdalis, pinis, pistaceis confectæ, ptisane hordei excorticati, juscula ex flore farinæ triticeæ, vulgo *Stärke*, cum aqua & tertia parte vini confectæ, vel etiam quæ ex aqua, vino & pane grossiori furfuraceo vulgo *Pomurnickel*, in qua magna vis roborans consistit, addito pauxillo cinnamomi, parantur; sed opus est, ut ante usum per pannum fiat transcolatio, quo crassiores & rudiores furfuraceæ partes remaneant. Verum, requiritur etiam, ut hæc omnia recto usu administrantur, qui in eo consistit, ut non simul ac semel magnis hausibus, sed potius frequentius & repetitis vicibus moderatiori quantitate sumantur: Nam hanc regulam instar omnium tenere oportet: Quo est natura imbecillior & quo magis vires sunt consumptæ; eo pariori, sed frequentiori usu sunt reficiendæ: Docet id ipsum natura in animalibus recenter exclusis, quæ lacte materno vivunt: & quo crebrius hunc pastum parva quantitate expectant, eo facilius eundem perferunt & nutriuntur. Nam iusta requiruntur spatia, quibus medicamentum liquidum possit sanguini & succis assimilari. Idque eo magis est necessarium ut observetur, quo magis manifestum est, virtutem sanguificantem eo debiliorem esse, quo plus sanguinis amissum est. Præterea, utilissimum hoc monitum, alimenti copiam ad vires corporis æstimandam esse, uti communiter negligitur & despiciatui habetur: ita plus damni & detrimenti, quia gravissimi inde propullulant morbi, metuendum est.

37. Possemus adhuc plura de remediorum usu salutariter protrahendo & continuando in medium proferre, sed, ne nimis multi simus, finem dicendi hic constituimus, certo sperantes, ut, qui dicta recte tenere & applicare noverint, magnum in arte facienda percepturi sint fructum.



D E

PURGANTIBUS FORTIORIBUS EX PRAXI MEDICA MERITO EJICIENDIS.

§. I.

QUod multi ægrotantium ex medentium imperitia pereant, qui poterant servari, res pro dolor! per sollicitam peritorum observationem est certissima. Delinquunt autem potissimum in eo, quod, non motus naturæ conformes, quæ optima morborum medi-

catrix est, administrant, dum vel præter necessitatem nimios provocant, vel utiles intempestive sistunt, quocirca magna requiritur prudentia in exhibendis iis remediis, quæ insigni potentia prædita sunt, vel motum fortiolem provocandi, vel eundem cohibendi. Peccatur in eo ferme toto die: perpauci enim sunt, qui validissimis & heroicis hisce recte & convenienter utuntur. Passim enim tristissima exempla à longo tempore

tempore litterarum monumentis prodita loquuntur, ab improvide propinatis opiatis, purgantibus, vomitoriis, mercurialibus & volatilibus, multos ægrotos vel in ipsam mortem, vel in extremam miseriam & perniciem fuisse coniectos. Unde omnibus, qui praxin exercere cupiunt, hoc sedulo & perpetuo inculcandum, ut cum hisce memoratis cautissime agant atque mercentur, nisi homicidii crimine conscientias polluerent velint. Hoc autem deplorandum est, quod, quo periculosiora existunt, eo frequentius idiotæ & imperitissimi temerario & nefando ausu, sine ulla prudentia in usu promptissimo illa habeant: cum tamen, si exactius paulo expendimus, rarius ipsa in praxi locum inveniant, utpote ea naturæ microcosmicæ indoles est, ut non cogi sed duci velit.

2. Verum enim vero, non majores & frequentiores in praxi committuntur errores, attenta experientia teste, quam per purgantia validiora & drastica, quibus multæ ægritudines, vel in peiorem statum labuntur & exacerbantur, vel plane immedicabiles & funesti fiunt. Persuasio enim vulgo est perniciosissima, quasi noxii humores ex corpore fortiori purgatione optime possint eliminari, hinc non saltem præservationis causa, sed & curandi fine fine vehementi purgatione nihil solidi præstari posse existimant. Peritus autem & prudens medicus, qui causas morborum scrutatur, & methodum, qua natura adversus morbos propugnandos utitur, callet, per facile videt, iis rarius vel plane nunquam utendum esse. Placuit itaque perutile hoc thema in præsentis ventilare, & solido ratiocinio nec non irrefragabili experientia demonstrare, quod vehementioribus purgantibus penitus fere carere queamus in praxi.

3. Cum itaque nobis propositum sit hac disquisitione noxam & violentiam cathartorum vehementiorum exponere, & quod planè ab hisce infecuris abstinere possimus, ostendere, non abs re iudico, ut recenseamus & denominemus ea, quæ sub titulo horum velimus intellecta. Dicimus itaque, per potentia & drastica cathartica nos ea significare, quæ in parva dosi celeriter & fortiter humores per secessum vel alvum educunt, cum ventris torminibus viriumque lapsu. Ad hanc classem autem referimus nominatim colocynthidem, euphorbium, elaterium, succum & corticem rad. esulæ, helleborum alb. scammonium, g. guttæ, grana tilli, jalappæ resinam, helleborum nigrum, turbith, quorum usum vel plane nullum, vel minori dosi & corrigenti associatum esse debere statuimus.

4. Ut autem hanc nostram sententiam firmissimis rationum solidarum momentis corroboremus, primam rationem desumere placet ab eo, quod hæc recensita pharmaca, virulentum, quo agunt, in se custodiant principium. Videlicet, medicis audit hoc venenum, quod brevi tempore adeoque celerrime in exili dosi œconomiam motuum vitalium in corpore nostro turbare & pervertere aptum est. Quod attinet ad materiale principium venenorum, hoc ipsum maxime consistit in eo, ut sit indolis valde activæ subtilis, penetrantis, adeoque maximam potentiam & efficaciam motus in se contineat, deinde ut sit sal causticum, quod intimo in poros etiam angustissimos membrana-cearum & nervosarum partium sese insinuat, & vehementi irritatione, istius principii, quod regit & movet machinam nostram, nimias & inordinatas motiones provocat, quibus postmodum totus motuum naturalium ordo, & inde dependens usus & functio partium conturbatur & evertitur. Etenim, si ad examinis incudem revocare velimus venenorum, ex quibus partibus consent, mixtionem ac crasin, deprehendimus, eorum operationem à tenui penetrante sale sulphureo caustico dependere, uti arsenicum, mercurius sublimatus, antimonii vitrum: ex animalium regno, can-

tharides, morsus tarantulæ, viperarum, canis rabidi, vel miasmata peste vel aliis contagiosis morbis infectorum: ex vegetabilium regno, cicuta, napellus & variorum fungorum species hoc diserte testantur.

5. Jam vero, si paulo accuratius perlustremus purgantium dictorum elementa activa, non nisi sal tenuissimæ indolis, causticæ, septicæ invenimus, quod irritando, inflammando, spasmodyce convellendo sensibiles corporis nostri partes exercet, hoc est, quod virulentum effectum habet. Primo autem, quod sit volatilis & penetrantis naturæ purgantium principium, ex eo patet, quod eorum virtus non modo in ventriculi regionem, sed & in sanguinem immo remotissimas partes transeat. Non enim ignotum est, lacte nutritis, quæ purgans assumit, ipsum infantem purgari. Deinde sternutationem, ptyalismum, imo stimulum quandoque immodicum ad venerem ex purgante assumpto ortum fuisse variis observationibus proditum est. Memorabile est, quod refert hanc in rem LENTILIUS *Part. I. pag. 174.* dum Illustris Comes, quotiescunque assumeret electuar. lenitivum ex tamarindis, maricrostino, hermodactylo constans, semper ultra 20. sternutationibus vexatus fuerit. Tacemus, quod convulsiones epilepticæ, singultuosæ, cordis palpitationes, anxietates præcordiorum summæ, & efflorescentiæ incute variæ satis superque demonstrent, activitatem hujus principii intime cum succis corporis misceri. Notum etiam porro est, in quantum suam vim exterius tantum adhibita in corporis interiora evibrent. Veteres pedes suos decocto hellebori lavantes per alvum se purgabant, ut habet HEURNIUS *Comment. in Hipp. Helleborum fonticulis pro mundificatione impositum per vomitum & alvum purgare testatur WALÆUS meth. med. pag. 124.* Per unguenta ex colocynthide composita & umbilico inuncta purgari posse infantes, imo etiam adultos, in vulgus notum est. Ulterius subtilitatem & exiguitatem principii, quod in purgantibus residet activi, & odor gravis, & diffusus diuque perseverans ex gustu minimæ portionis, nauseosus & molestus sapor in lingua clarissime evincit.

6. Causticæ autem quod purgantium elementum sit indolis, irritatoria & inflammatoria efficacia, quam diversimode in corpus exserit, clarum facit fortis sternutatio, si naribus tenuis saltem horum purgantium portio attrahatur, irritationem satis vehementem arguit. Externe paralyticis partibus applicari solita cataplasmata ex purgantibus acrioribus concinnata vesiculas & pustulas ardentes copiosas progignunt, manifesto indicio inflammatorio-causticæ virtutis. Tormina truculenta & spasmi intestinorum & exinde proficiscentes nonnunquam graves dysenteriae, alvi que fluxiones, à nullo alio fonte, quam ex principio caustico irritante & vesicatorio derivari possunt. WEPFERUS in *Hist. Cic. aqu. p. 220. & seq.* curiosis experimentis cathartorum & speciatim helleb. albi & magist. gialap. inflammatoriam vim demonstrat: ipse enim catellis cum lacte hæc propinavit dosi certa; & secuti mox fuerunt vomitus, convulsiones & mors. Sectione facta ventriculus inflammatus & tenuia intestinorum maculis rubicundis hinc inde notata fuerunt. Similia effecta conspiciere licet in iis, qui arsenico, vel corrosivo veneno perierunt, quod patet per consensum variarum observationum; hinc præcedente experimento clarissime adstruitur virulenta in purgantibus qualitas.

7. Denique, pernicialem inesse vim purgantibus vel ex eo intelligitur, quod etiam sana & robusta corpora graviter ab iis assumtis afficiantur, unde HIPPOCRATES *sect. 2. art. 57.* prodidit: Qui sunt sano corpore dum purgantur, celeriter exsolvuntur; rationem addit HEURNIUS, quia medicamentum frustra exhibitum liquefacit & consumit ea, quæ morbo resistunt, i.e. patres solidas

das atterit. Nullum enim remedium observatur tam vehementer vires convellere & consumere, quam drasticum purgans, idque non tam ratione evacuationis, quam ratione virulentiae, quam partibus nostri corporis praesertim solidis nervosis & membranaceis infert, unde appetitus pervertitur, urina turbatur, pulsus fit major, lassitudo inducitur: qua de re judicandum, si robustis corporibus tam graviter noceant, quod multo magis offendere debeant infirmos & morbo oppressos. Quod autem partes tenues septicae, causticae purgantium in sanguinem transmissae ejus massam ac crasim, nec non spirituum indolem insigniter alterare & corrumpere possint, manifestissime comprobatur dispositio prava corporis, quae inde contrahitur, & causa fit gravium adfectionum. Non est de nihilo, quod vulgus adeo pertimescat, si quando pharmacum minus operetur, ne virulentia per moram contracta & derelicta, postquam diu in corpore delituit, tandem affectus aliquando malignos producat. A tali occasione interdum pathemata quasi leprosa excitari, scribit WILLISIUS, qui *Pharm. rat. sect. III. c. 1.* in hujus rei memorationem memorabilem refert historiam: Oxoniensis cujusdam filii duobus pulvis catharticus ab empirico exhibitus fuerat, unus eorum spatio 48. horarum centies ad minimum cum torminibus & magna spirituum fatiscencia purgabatur: alter autem aetate paulo majore nullam habuit sedem, verum intra paucos dies capilli ejus decidebant, ungues nigricabant, insuper & brevi postea pustulae aquosae in toto corpore erumpebant, quibus continue in scabiem crustosam induratis & subinde recidentibus statim novae repullulabant. Cujusmodi affectus ob sanguinis crasim summe vitiata & quasi venenata nullis remediis cedens ultra biennium, antequam sanari iterum potuit, misellum istum gravissime exercebat.

8. Tandem, virulenti principii energiam abunde accusat summum damnum ad mortem etiam quandoque ducens, quo creberrime afficiuntur ii, qui utuntur drasticis istis catharticiis. Quamvis autem hanc in rem complures à me notatae observationes possent adduci, sufficiet tamen paucas easque notabiles h. l. attingere. Aliquot abhinc annis contingebat hic loci, quod chirurgus assumeret purgans ex G. guttae, diagr. sulphurati an. gr. 12. refin. Jal. gr. 8. & tartari scrupulo uno compositum, dejecit inde 10. vicibus cum magna virium jactura, torminibus ac siti. Circa vesperam ad eam extinguendam duas mensuras cerevisiae Martisb. potabat. Mox ab eo tempore percipiebat nauseam, anxietates praecordiorum, abdominis intumescencia, in eo rosiones, sitim, calorem p. n. faucium inflammationem, virium summum defectum, quibus per 14. dies conflictatus, frustra omni medicina adhibita, extinctus fuit. Et quod memorabile, duo adhuc alii chirurgi eodem anno, unus ex vomitorio, alter ex purgante sumto vita privati sunt. Ex qua historia discimus, ventriculum & intestina, seu partes summe sensibiles à veneno purgantium corrosivo, texturae sensibilissimae admodum contrario facile periculosissime inflammari posse, praesertim quando frigidus potus, qui vires stasi inflammatoriae humorum semper addit, accedat.

9. Novi etiam in praxi multa exempla, ubi non modo adulti, sed & infantes à laxativis ex foliis sennae & rhabarbaro paratis per longum tempus sese male habuerint, appetitus & virium dejectione, calore p. n. diu perseverantibus, aliis eruperunt exanthemata per cutem. Merentur huc adduci casus quidam maxime notatu digni ex inconsiderata purgantium exhibitione oriundi, quorum mentionem faciunt *Eph. N. C. Dec. III. A. IV. Obs. II.* Quaedam lanionis vidua in contumacissima mensium suppressione ab opilione drasticum quoddam accepit catharticum, & tantum

non ob ejus vehementiam ad patres abiit. Itidem puella quaedam Wittembergae Ao. 1692. intempestiva matris sollicitudine ab agyrta vehemens purgans sumere cogeatur, quod atrocitate sua misellam ita exagitavit, ut intra paucas horas extrema liverent & frigerent cum naso, supervenirent tormina & jactitationes, ipsaque eodem die periret. Sic & studiosus à balneatore purgans acceperat, cujus tanta erat vehementia, ut non solum post 100. & plures dejectiones sincerus promanaret sanguis, sed & extrema frigerent, supervenientibus etiam lipothymia & convulsionibus; aegre tandem in amicitiam cum sanitate rediit. Notatu quoque digna sunt quae scribit COBERUS *Obs. 3. p. 16.* ubi ait: Plures & in his magni nominis heroes ex intempestive assumtis purgantibus in graviores morbos & mortem ipsam praecipites datos fuisse scimus: cum scil. turgens materia cathartici irritata bilis acredine intestina vellicans & pungens, primo diarrhoeas, tandem dysenterias lethales excitasset. DOLÆUS in *Encycl. chir. Libr. V. cap. 9. §. 19.* hæc affert. Novimus exemplum, quod viro 40. annorum scabioso pulveris jalappae scrup. 1. cum crem. tartari scr. semis fuerit exhibitus; eodem mane quo assumerat mors subsecuta est.

10. Verum enim vero, scammoniata & ex gialappa parata, tametsi vulgo credantur secunda & tuta purgantia, nihilo minus tamen & hæc ipsa caustico virulento, naturae humanae hostili principio imbuta sunt, attestantibus id ipsum observationibus. Placet ex pluribus ea quae scribit THONERUS *Obs. p. 357.* huc afferre, sequentis argumenti: Bona fide assero mihi cognita utriusque sexus exempla, quibus dyagryd. cum sulphure licet praeparati, & ut opinio correcti, gr. IX. ad XIII. tantum cum vino exhibita tam enormem hypercatharsin excitarunt, ut de vita periclitati & veriti, ne cum excrementis ipsam etiam animam exterminarent. Quidam medicus cuidam foeminae primariae illius scammonii cum sulph. praeparati gr. 21. haud pridem praescripsit, tanta cum hypercatharsi illo *ἀνω καὶ κάτω* evacuata, & ita debilitata, ut vix se recolligere potuerit. Cum ego ante 20. annos Advocato cuidam Ulmensi, corpore alias sat robusto praedito, ref. scam. gr. X. tantum obtulissem, hypercatharsis sat gravis caussata. Percontanti de nomine medicamenti cum respondissem, appellari scammonium, ille haud inscite regeffit, rectius *Schelmonium* (nebulonem intelligens) nuncupandum, ob exorbitantem operationem.

11. Notatu non minus digna sunt, quae passim clarissimorum virorum monumentis tradita reperiuntur de jalappa. Sic ex *Eph. Germ. Dec. II. A. 7. Obs. CLXII.* discimus, quod refina gialappae dissoluta in quinta ess. MATTHIOLI vel elixir citri, & rotulis manus Christi vel fyr. ros. edulcorata, licet non ingratiorem sua gratitudine apud multos praestiterit operationem, tamen & per plura exempla infelicem post se traxerit eventum, nimirum vomitus largos, aut tormina summe lancinantia, aut plane hypercatharsin; imo memorat ibidem gravissimus Autor, quod viderit generosam foeminam, quae biduo post idem assumtum ac toleratos dolores fere intolerabiles abdominis & copiosissimas excretiones alvi, pati demum coacta fuerit convulsionem epilepticam aliquot septimanis durantes, & quidem adeo, ut vix morti erepta fuerit. Idem alias gratissimum purgans alteri cuidam tormina creavit miseranda, & quidem sine ulla excretionem facum purgatoria; verum tertio tandem die sola per alvum excreta refina in globulum compacta & incrassata. Huc etiam trahendum quod HARDERUS *Obs. anatomico-practici p. 268.* memorat: Mirari subit, pulverem rad. gialapp. quibusdam saepius exhiberi, seu hydragogum ad ferositates evacuandas utilissimum & aptissimum; notavimus tamen dejectiones cre-

creberrimas inde subortas cum siti. Et Excell. WEPFERUS *Hist. cicut.* radicem hanc notissimam inflammatoriam quoque esse erudite demonstrat. Et porro scribit: Ex extr. cathol. cum mercurio dul. in pill. forma assumptione frequentissimi ipsi dejecimus cum subsequente febre synocha. Vir alius 30. circiter annorum ex el. de succo rosar. quod chirurgus imprudenter propinavit, ipseque incautus hausit, vomuit immaniter & creberrime per inferiora deiecit per triduum fere, concomitantibus primum horrore ac frigore, hinc nausea, singultu, deliriis, urgente juxta siti, viriumque prostratione, extremisque ad contactum frigentibus. Ex dictis & adductis liquidissime elucescet, virulentiae particeps esse elementum, quo fortiora purgantia operantur, adeoque insegura & periculosa esse remedia. Verum enim vero, inflare quis posset, in ipsis emeticis, praesertim antimoniatibus, simile quid virulentiae, septicæ, causticæ indolis deprehendi, quæ tamen ceu generosa magnificæ famæ remedia ab omnibus temporibus habita fuerunt, & quibus in praxi vix possumus carere. Quibus respondemus, nos neutiquam negare & ipsa vomitoria agere principio irritativo naturæ humanæ plane adverso venenatoque: at vero non ita nocivum est corpori, quam illud, quod operationis causa in purgantibus inest. Rationem in promptu hanc habemus: est emeticorum materia magis spirituosior, sui juris, non involucri fixi vel visceri principii obducta, uti est purgantium, quare non modo statim, antequam accedat in sanguinem vel per os evacuatur, vel delata ad fluores vitales facilius transpirat: secus autem se res habet cum purgantibus, quorum principium tenue quidem & causticum est, involutum tamen resinoso viscoso vehiculo, quod vim spirituosam elasticam textura sua ne facile aufugiat complectitur. Unde etiam pendet ratio, quare non dentur aquæ destillatæ purgantes, quoniam per alembicum non transit elementum illud viscosum, quod vim purgantis continet, quæ de re fusius legi mereatur PECHLINUS in *tract. de purgantibus & obs.* 58. 59. Igitur patet, posse diutius purgantium perniciosam vim in succis humani corporis permanere, majoremque noxam inde esse expectandam quam ab ipsis emeticis.

12. Altera ratio, quare in medicina facienda omnium validorum, five uti veteres nonnulli loquuti fuerunt, eradicativorum vacuantium usum dissuademus, est quod motus violentos in corpore efficiant, i. e. humores ex una parte in alteram impetuosissime commoveant, circuli que æquabilitatem & liberum transitum vehementer turbent. Videlicet, quando placidus, liber & æquabilis sanguinis per omnium partium tubulos cursus est, universum actionum vitalium sanitatisque negotium recte sese habet; simul ac vero hic motus sanguinis liber impeditur, aut inæqualis fit, actionum vitalium status mox turbatur & pervertitur & morbus præsto est. Jam autem nihil magis motum regularem placidum sanguinis evertit & cruoris translationes ad partes quasdam impetuosas efficit, quam spasmus. Hoc enim constringitur musculosa & membranosa partis substantia, & inter hanc interjacentes tubuli comprimuntur, quo fit, ut denegato sic libero transitu sanguis in alias partes copiose & impetuosè irruat, ubi stases, infarctus, distensiones, apertiones efficiendo causa & fons est dolorum, inflammationum, hæmorrhagiarum, variarumque fluxionum, nec non sensus, motusque in partibus aboliti. Cum autem purgantia fortiora sale suo caustico intestinum tunicas nerveas violenter vellicante spasmos in abdominis regione inque magno intestinum canale & mesenterio vehementer efficiant, testantibus id torminibus & rosionibus, quæ perpetui spasmodorum intestinalium comites sunt; perfacile apparet, purgantia, praesertim in

corporibus sanguine & succis impuris repletis, gravia machinari posse pathemata.

13. Propter violentum autem quem injiciunt spasmus, primo tonum ventriculi & intestinorum valde lædunt, unde etiam ii, quos purgantia fortiter exercuerunt, diu laborant appetitu dejecto & digestionem alimentorum depravata, id quod jam suo tempore notavit CELSUS *Lib. II. p. 90.* dum scribit: purgantia stomachum lædunt. Deducimus quoque ex læso intestinum tono adstrictionem alvi, quæ à forti purgatione diu cum maximo sanitatis incommodo remanere solet. Et observavimus sæpius in praxi, quod sani, qui vehementius pharmacis ventrem præservationis ergo agitare consueverunt, ad flatulentias & colicam passionem disponantur; unde non sine magna ratione ipse HIPPOCR. *aph. 16. lib. IV.* purgationem periculosam iis dicit esse, qui sunt integra valetudine, & addit in eundem aphorismum HEURNIUS sequentia: Vidi sanos, quos in perniciem traxit solum simplexque apozema purgatorium ex fumaria cum fennæ fol. temere exhibitum. *Misc. Dec. II. A. VIII. Obs. 72.* mentionem injiciunt rustici robusti, annorum 40. alias sani, qui ex pyris sylvestribus in tantam alvi stypticitatem incidit, ut nullo purgante referari posset. Quin imo, purgantibus fortioribus assumtis non solum in abdomine ingentes dolores & contorsiones sensit, verum etiam intestinum rectum ad spithamæ longitudinem ad extra protrusum fuit, constipatione alvi semper permanente ad 40. dies. Superveniebat inflammatio, gangræna & inter mille tormenta mors. Etenim magnus error est, alvum constrictam purgantibus solvere, docet enim praxis, si à principio acido terreo, vel à spasmò orta fuerit alvi stypticitas, sicut evenit in hypochondriacis, quartanariis, hysteriis feminis, vehementissima purgantia nihil operari, sed potius tormina ventris augere, & vires dejiciendo mirum in modum nocere. Tali in casu potius mucilaginosior, oleosa, & quæ relaxant spasmum contractas fibras, alvum expeditam & lubricam reddunt.

14. Propter eandem causam, nempe spasmum intestinale & mesenterii, à purgantibus, tumores aquosi abdominis sæpius crescunt & augmentum sumunt, id quod plus vice simplici observavi. Ita quoque referunt Eph. *N. C. Dec. III. A. IV. Obs. XI.* civem Wittenbergensem post sumtum à circumforaneo purgans drasticum, incidisse in hydropem ascitem & ægre tandem valetudini pristinae restitutum fuisse.

15. Propter spasmum, quem faciunt purgantia acriora, paralyxis non raro quoque invadit. Notum enim est, quod paralyxis ex colica, quæ paresis dicitur, frequens sit, quoniam nempe propter spasmos in intestinis & vicinis partibus non tantum per consensum afficiuntur nervi, verum etiam humores redundantes impuri motu illorum libero per abdomen impedito in cerebri medullam irruunt, ibique subsistentes hunc affectum procreant. Eodem modo ex torminibus & spasmis à purgantibus excitatis malum paralyticum prognascitur. Ita ante aliquot annos hic loci femina obesa resinæ gial. XII. gr. ad purgandum assumebat, & paulo post paralyxi totius dextri lateris corripiebatur cum aphonia, stupore mentis & maximis intestinum torminibus. Rein. SOLENER in *consiliis* refert: multos in uno latere paralyxi liberatos, si à principio fortiora purgantia exhibita fuerint, humoribus exagitatis, etiam in altero paralyxi tentatos & tandem extinctos. Ita etiam vir 40. annorum antea podagra & impetigine vexatus, postea autem ab his liber, nisi quod tempore autumnali gravissimo aliquando corripereetur catarrho cum febricula quadam, assumpto purgante ex G. guttæ, mox incidit in paralyxin dextri lateris cum dolore in occipitio. Post duos menses insultu corripitur apoplectico & moritur. Quod autem

autem purgantia spasmo agant & infensa machinæ microcosmicæ sint, vel ex eo clarissimum evadit, quod, qui moriuntur ex purgatione, teste HIPPOCRATE, convulsione pereant. Exemplum insinuat ipse HELMONTIUS, ubi Marchio scrupulo uno Helleb. alb. sumto convulsione totius corporis periit.

16. Tertia ratio quare purgantia fortiora exitiosa & inimica naturæ humanæ censenda sint, hæc est, quod defraudent sanguinem seroso & lymphatico succo, cujus tamen præsentia non modo ad sanum statum conservandum, sed & ad morbos curandos summe est utilis. Res nempe extra omnem dubitationem posita est, circulum sanguinis esse fundamentum sanitatis, & omnis curationis morborum: aucto enim circulo sanguinis stases humoresque resolvi, obstructiones referari, viscidum attenuari & omne superfluum & molestum per debita evacuatoria eliminari, nemo in dubium vertit. Certum & porro est, quod circulus sanguinis imminutus sit causa omnium morborum acutorum & malignorum, quorum nempe causa generatur intra corpus. Ad circulum autem sanguinis fluxilitas summe est necessaria, quæ dependet ab elemento aqueo; sanguis enim ex vena animantis emissus duplici constat substantia, una solida, altera fluida: solida est illa rubicunda, fibrosa, quæ sicca in cucurbita remanet, quando sanguis per Mariæ balneum destillatur, & hæc est paucissima, copiosa autem aquea, adeo, ut una pars sit sicca, decem autem humidæ, quæ vehiculum sicca, sulphureæ rubicundæ terrestris partis est & efficit, ut hæc solida moveri possit per angustissimos corporis canaliculos. Si itaque abundet crassa & sulphurea terrestris solida sanguinis substantia, ut ne sufficienti aquæ quantitate dilui possit, gravissimis iisque chronicis affectibus via panditur: stases enim, obstructiones emunctoriorum, & inde motus spasmodici violenti fiunt, quos non nisi magna copia aquarum ingesta in corpus vel mitigare vel tollere possumus; quare perspicua est ratio, quod in morbis rebellibus & chronicis curandis nunquam satis laudandus sit usus thermarum, acidularum aquarum salubrium, infusorum hb. Thee, veronicæ, scordii, betonicæ, & cur potius congrui liquidi copiosus in curandis morbis acutis febribus, inflammationibus avertendis, morbis chronicis, egregii sit usus. Ex eo, quod jam adduximus clarissime perspicui posse arbitror, purgantia, quoniam evacuant plus justo serum tam utile, maxima damna inducere posse.

17. Hactenus magnis rationum ponderibus stabilivimus exitialem potentium pharmacorum usum in medicina; è re præsentis fore arbitror, auctoritates & testimonia veterum, nec non recentiorum quorundam in medium afferre, ut iis roborata veritas eo minus dubitationis penes prudentem practicum relinquat. Primus autem sit PLUTARCHUS in præc. sanit. quem citat BEVEROVICIUS p. 185. qui ita scribit: Purgationes ventris per medicamenta turpia redundantia remedia sine magna necessitate non debent usurpari. Alvi conturbationes ubi medicamentis corrumpuntur atque liquantur certi humores, plus addunt superflui, quam educunt, & sicut Græcus gravissime erraret, qui Græcæ in urbe turbæ multitudinem moleste ferens Arabibus & Scythis convenis urbem impleret: ita nonnulli longissime à recta ratione absunt, qui ejiciendorum è corpore redundantium humorum causa, qui familiares & corpori consueti, in corpus injiciunt coccos gnidios, scammonium aliaque medicamenta à temperie corporis aliena & sæva, ac quæ expurgari debeant potius, quam corpus purgare possunt. Quibus verbis gravissimus Auctor vult innuere, purgantibus istis vehementioribus & virulentis in corpus assumptis plus addi ipsi materiæ peregrinæ hostilis è corpore potius eliminandæ, quam quod materiam peccantem è corpore evellant.

18. Ipse magnus medicinæ parens HIPPOCRATES in lib. IV. de morb. §. 31. edit. Lind. Quæcunque, inquit, medicamenta purgantia sunt, aut superne, aut inferne, aut utroque modo, hæc faciunt: omnia urunt valde, & fortiora quidem, si aliquam teneram corporis partem attigerint, exulcerant eam; mitiora vero turbulentum corporis motum faciunt, quodcunque occupaverint. Et in tractatu de purgantibus idem auctor hoc aureum litteris mandavit: medicamentorum purgantium res non ita se habet, quemadmodum vulgo putatur: eodem enim medicamento purgantur & non purgantur; quandoque vero alia purgat, quam quæ purgare solet, aliquando nimium purgat, aliquando ea, quæ debet, facit, quare fieri non potest, ut quis purgantibus confusus ea temere exhibeat. Hisce magnus Vir abunde declarat, quam intutum sit purgantia trahere in usum medendi sine, & quam parum ipsis fidere debeamus, dum præter intentionem medici ea non faciunt, quæ facere debebant. Et lib. II. aphor. 57. ait: Plurimum evacuare vel quovis alio modo corpus temere movere periculosum. Omne enim nimium naturæ bellum indicit. Ipse CELSUS damnat etiam validas purgationes. Hinc lib. II. c. 12. hæc habet: Alvus si vehementius fluit, aut sæpius ducitur, hominem infirmat: ergo nunquam in adversa valetudine medicamentum ejus rei causa recte datur. HELMONTIUS, acutus Scriptor venenosam laxantium & purgantium vim incusans sequentia prodit tractatu, cui titulus: respondet Auctor: Solutivum virus adhuc tantisper ac in stomacho detinetur, putrefacit, & contaminat, quicquid in mesenterio eminuit, ad meliores usus, erat depositum, trahique in vicem putrefacti thesauri depuratum cruorem è vena cava, eumque sensim contagio virulento contaminat, & foetido fermento cadaveris liquat. Hinc nempe virium jactura à laxantibus & monarchiæ vitalis turbatio, circa spem sanationis. Et Dispensat. moderno egregia hæc assert: Cum ea quæ nocent intus subinde vix pendeant drachmam, oportet omnem purgationem, quæ ad sanitatem terminatur, esse evacuationem, vel imperceptibilem, vel saltem valde moderatam, & cum restauratione virium.

19. Porro, Doctissimus FERNELIUS Pathol. Lib. III. c. 2. scribit: ut sanguis in plethora exsuperans non simul & semel affatim totus ex aperta vena: ita multus humor è corporis habitu non statim simul elabi profluereque potest. Atque, si id medicamento quopiam præstari possit, necesse tamen fuerit, corpus graviter concuti, humores varie permisceri, torsiones molestas inferri, ac spiritus dissipari: hinc tandem vires concidere, prosterni, ac plerumque exsolvi. WILLISIUS Pharmac. rat. Sect. 3. cap. I. ita sentiens hæc notabilia scribit: cathartica, uti gialappium, colocynthis, elaterium & quædam mercurialia præparata, particulis acrioribus & non raro quasi septicis constant, quæ ab intestinis suscepta & sanguini transmissa massam ejus insigniter fundunt, & in ferositatem valde præcipitant: imo interdum quasi venenant, & crasin corrumpunt. RIEDLINUS An. 1697. Obs. 16. hæc insinuat: à fortioribus, quantum licet, abstinendum, quibus non exigua non raro mala inducuntur. Sic novi quendam ex purgante fortiori ad mortem usque ischiadicis doloribus tortum fuisse. Et HARDERUS Obs. Anat. Pract. p. 268. in medicamentis catharticis exhibendis, si usquam alibi, medici prudentiam requiri, à nullo sanæ mentis negatum iri confidimus: circa hæc autem plures decipi autumamus, quod non examinatis medicamenti particulis, earumque genio ac indole, indeque neglecto operandi modo, ad illorum frequentiore propinationem satis proni sunt; contenti vel qualitate purgantis occulta, vel humorum in corpore stagnantium saburra, cui elective educendæ illa sufficere creditur:

ditur : equidem drastica, scammoniata, diagrydiata, hujusque generis medicamenta alia, omnibus fere ventribus suspecta sunt ob spicula acerrima & tantum non corrosiva.

20. Cum jam abunde à nobis demonstratum fuerit, exitialem perniciem tam sanis, quam ægrotis corporibus à vehementioribus vacuantibus introduci, hinc opus est, ut jam monstremus, quod dejectio copiosa & crebra ferme sit inutilis & potius noxia. Cum medicus per consensionem omnium saniorum medicorum tam veterum quam recentiorum, sit minister & imitator naturæ, quæ summa sapientia agendi & corpus conservandi causasque morbosas expellendi instructa est, & longe felicius sæpius sola sanat affectus prægraves, quam ipse medicus pharmacis suis: necesse etiam est, ut ipse medicus in expurganda alvo sese dirigat ad naturæ ductum. Jam autem certum est, quod pauci morbi ex acutis & chronicis critiche à natura solvantur per alvum, plerique per sudorem. Quin immo, illud ipsum, quod excernitur singulis diebus ceu superfluum & inutile per cutis meatus insensibili modo, secundum SANCTORII doctrinam, quadruplo magis est eo, quod indies per alvum simul & urinam ejicitur. Ex quo patet, sudore & transpiratione aucta, sive id fiat naturæ sive artis beneficio, longe plus superflui & morbosum humoris proscribi, quam per purgans; unde diaphoretica plus indicantur à natura quam purgantia, & transpiratio magis necessaria est ad sanitatem servandam quam alvi dejectio. Equidem, quandoque natura in febribus critiche movet alvum & in sanis quoque nonnunquam non sine magna euphoria per crebriores sedes ejicit illud, quod onerat primas vias, unde spontaneæ diarrhœæ sæpius sunt saluberrimæ. Discimus exinde, talis indolis sæpe sordes esse excrementitias in primis viis atque interioribus partibus, quæ commode per intestinalem canalem possunt eliminari, neque talem salubrem motum criticum naturæ esse sistendum.

21. At, quam difficile sit, nosse naturæ viam, modum & ductum, si ipsa eum non monstret, dici vix potest. Unde securius agunt, qui non naturam cogunt & irritant ad excretiones, quæ forsitan non sunt congruæ, sed potius expectant eas aut earum inclinationes à natura, & tunc si insufficientes sunt molitiones per alvum, eas ipsas promovent. Peccatur in eo toto die, quod nos pro lubitu sive ad præservandum, sive ad curandum excretiones quasdam efficiamus, quibus mirum in modum naturæ ordinem pervertimus & sanationem in longum protrahimus. Non autem nostra est sententia, quasi non plane sollicitare debeamus alvum, quod utique sæpius magnæ necessitatis est, ad eliminandos eos succos, qui debent & qui possunt per has vias transire; sed hoc volumus: quod cum ductu naturæ molienda sit evacuatio, idque fiat oportet per mitiora, neutiquam autem fortiora. Aureus est *aphor.* HIPPOCRATIS: quæ ducenda sunt, eo ducenda, quo maxime natura viam adfectat. Ejusdem valoris est *aphor.* 25. *lib.* 1. si qualia purgari oportet excludantur, confert, perferuntque alacriter, sin contra, difficulter ferunt. Item *aphor.* 22. Concocta medicamenta purgare & movere oportet, non cruda. Item *aph.* 10. *lib.* II. Si quispiam corpora purgare voluerit, meabilia ut reddat est necesse. Vult nempe hisce HIPPOCRATES, quod tunc purgatio per alvum locum habeat, quando humores viscosi, biliosi, serosi, quales ordinario per glandulas intestinales & bilis ductus fecernuntur, sint congrui atque convenientes alvino e-munctorio: secundo, nulla peregrina stimulante caustica qualitate debent esse stipata, quæ vacuari debent, sed prius ea ipsa est corrigenda, invertenda, id quod per coctionem innuunt veteres, ne ad intestinorum sensibiles partes pertracta ibi gravissima paret symptomata.

Frid. Hoffmanni Oper. Tom. VI.

22. Ante purgantium igitur exhibitionem quisque attendat, an adsit materia ducenda per alvum, eamque, si adsit, prius fluxilem, meabilem, correctam reddat, si vero hoc factum fuerit, certe non opus erit magno stimulo, aut enim tunc natura ipsa excernit, aut si vigor in motu deficit, parvo opus est stimulo; unde liquido constat, fortiorum purgantium plane nullum esse usum. Ponamus autem, humores evacuandos per alvum adesse debito modo constitutos; tamen nunquam repente simul & semel deijciendi foras sunt, natura enim ab omni saltu, & ab omni vehementia abstinet. Præclare HIPPOCRATES *aph.* 51. *sect.* 2. omne nimium, intelligit de vacuantibus, naturæ inimicum; item, plurimum & repente vacuare vel quovis modo temere corpus movere, periculosum est. Quod autem sit sensim ac vicissim, periculi expers est. Egregia quoque hanc in rem sunt, quæ habet SYLVIVS *lib.* III. c. 4. §. 125. Observandum, à purgantibus blandioribus, quantitati minore usurpatis corrigi humores noxios & ad sequuturam postea evacuationem præparari, adeo ut nunquam ægris noceat, semper ipsis prodest usurpatio purgantium parca, si præsertim brevibus aliquot horarum intervallis eadem repetantur, donec desideratus obtineatur evacuationis effectus. BAGLIVIVS in *Praxi* p. 246. idem sentit, & mirifice commendat laxantium usum, hisce verbis: A nullo remedium genere tantam utilitatem percipiunt urbis Romæ incolæ, quam ab exercitio & prudenter repetito lenium purgantium usu.

23. Verum enim vero, contra hæc dicta objici varia possunt. Qui enim liberaliorem *καθάρσιν* amant in praxi sua, hisce fundamentis nituntur. 1) Dicunt, variare invicem subjecta & ita etiam purgantium successum; quædam fluxiles, & mobiles habent humores, ac fibras intestinales valde teneras atque sensibiles, quæ à leviori stimulo fortiter commoventur. Alia corpora sunt succis crassis, viscosis repleta, quorum intestina obtusioris sensus non nisi majori stimulo obtemperant. In illis laxantia & leniora felicem præstare effectum, his autem hæc non sufficere, sed valentiora esse in usum trahenda, pronunciant. Deinceps, hoc inprimis urgent, corpora cachecticorum, hydropicorum, & qui feri vitiosi copiam in venis alunt, fortius purgari debere, cum non sufficiens tantæ moli humorum evellendæ sit parva dosis purgantis, vel mitior lenientium vis, unde hisce in casibus fortioribus purgationibus opus esse, communis practicum est opinio. Quibus reponimus, verissimum esse, differre inter se subjecta, quorum quibusdam facile movetur alvus, aliis difficilior, sed ex eo tamen minime evinci posse opinor, drastica in subsidium esse vocanda. Potius, qui humores foveant crassiores & tenuiores majorem quantitatem alterantium exposcunt, nec non majorem quantitatem lenientium & diuturniorem usum desiderant; & testatur certa observatio, quod in majori dosi eadem laxantia usurpata, plus in segnioribus præstent quam fortiora. Ad hydropicos autem tumores quod attinet, persuasissimi sumus, si ullo in affectu, certe in hoc enormiter peccari per violentas purgationes drasticis adornatas, utpote aqua non causam hydropis constituit, sed tantum productum est, & licet omnem auferamus aquam, tamen non curamus hydropem. Ego non semel sed sæpius, & ante biennium in Serenissimo Principe hydropico exitialem purgantium fortiorum abusum annotavi, cum non ita multo post hæc assumpta lethalis inflammatio cum febre secuta fuit, intestino ileo post sectionem sphacelofo reposito. Deinceps, si humores non sunt mobiles, si extra vasa positi sunt, frustra irritabis, etiam fortissimis, alvum; potius hujus naturæ remedia, cum tonum ventriculi & intestinorum hoc morbo jam la-

befactatum penitus lædant ac destruant & violenta constrictione flatulentis & lymphæ stagnationi magis occasionem præbeant, non possunt non irreparabile damnum hoc malo correptis inducere.

24. Et hæc palmaria nobis videtur ratio, cur tam pauci servantur hydropici, quoniam methodus, qua tractari solent, plerumque tantum dejectoria est, quæ tamen removendis istis magnis indurationibus & obstructionibus viscerum plane inidonea; potius amarificantibus, salibus aperitivis, & fixioribus metallicis crassities humorum resolvenda est, & obstructiones tollendæ, non omittis iis, quæ hoc, quod liquatum & resolutum est, per alvum, urinam & sudorem evehunt, qui scopo attingendo nulla violentia quadrat. Ita observavimus, à scrupulo uno Mechoacanæ, humoribus prius factis fluxilibus & maturis, hydropicos ultra X. sedes copiosissimas habuisse. Brevibus ut rem universam complectamur, peccant in eo practici quam sæpissime, quod non velint uti tempore & patientia, præsertim in rebellibus & chronicis affectibus, sed plerumque nimis præcipitanter, nimis violenter suscipiant curas, & quasi domini ac magistri morborum velint esse, cum tamen in universo sanationis negotio tantummodo sub favore, sub ductu, sub methodo naturæ, quæ optimus Doctor & Medicus est, agere & medicamina applicare debeat genuinus Practicus.

25. Ulterius patroni purgantium serosis & catarrhosis non modo subjectis, sed & morbis à colluvie feri ortis, majorem in modum cathartica fortiora commendant, quoniam serum vitiosum opportune per alvinas vias deduci solet. Verum enim vero, ubi serum est fluxile, per sudorem & urinam major copia ejus evacuatur, virtute cujusdam diaphoretici quam per alvum, & tunc quoque laxativa & citra noxam intestina stimulantia blandissime educunt magnam ejus copiam; si autem tenax serum est, neque tunc fortiora operam collocabunt, sed potius res conficienda est salinis abstersivis, & laxantibus mitioribus per aliquod tempus repetitis. Et utut non mox eorum usum sequatur effectus dejectorius, tamen egregiam utilitatem foenerabunt in corrigendis, resolvendis & præparandis, dum ad sanguinem eorum virtus abit, humoribus.

26. Neque etiam consultum semper est, vi, repente, & simul ac semel humores aptos ad purgandum per alvum ejicere, quoniam mox nimis vacuum factum in vasis spatium occupare solent ex cibo & potueductæ humiditates.

27. Exstat hanc in rem elegans locus in SANCTORIO *de statica Medicina, Sect. I. §. 48.* qui hic est: Cassiæ pauxillum non divertit perspirationem, non lædit vires, sed solum confert è corpore inutile pondus: aliæ vero medicinæ magis evacuant & remotiores partes attingunt, & corpus magis leve efficiunt. Cibus tamen & potus subsequentes implent evacuatōs meatus, inde alvus & vesica exsiccantur & paulo post corpus sæpe ponderosius redditur. Ex quo eleganti statico experimenro discimus, parum prodesse fortiorem & celeriolem evacuationem, cum potius ad cruditates & impuritates humorum in vasis accumulandas ansam præbeant. Nam, verissimum est, si nimia sit feri in vasis imminutio mox subsequentis cibi & potus portio eorum locum replet. Unde, uti recte SANCTORIUS observavit, alvus siccior fit, urina parcior & transpiratio difficilior. Possumus ex hisce clarissime deducere rationem experientiæ infallibilis, qua constat, à frequentioris sanguinis missione, & purgatione vehementiori, corpora admodum disponi ad febres intermittentes, hydropem, flatulentias, hypochondriacum malum.

28. Postquam itaque perspicue exposuimus causas, ob quas non valida purgantia in praxi possint servari, proximum jam erit, ut eos morbos, quibus præsentissime noceant, enumeremus. Sicuti autem semper venerabilis mihi existit summi HIPPOCRATIS auctoritas, ita etiam quæ de purgantium abusu nobis litteris reliquit, in medium afferre allubescit. Ipse autem ita scribit in libro *de veratri usu*: Vitare oportet in pharmacorum potionibus eos, qui bona habent corpora, maxime autem nigros & humida carne præditos, sed & subsecos; quibus rejicere videtur purgantia in omni temperamento habituque corporis. Quicunque autem, pergit, inflammata in principio morbi statim medicamento solvere adgrediuntur, sic de eo quidem quod distentum & inflammatum est, nihil auferunt, ea vero, quæ morbo resistunt & sana sunt, consumunt. Corpore vero debili fiente, morbus superat & immedicabile malum habent. Dæmnat his verbis in omnibus inflammationibus purgationem, quoniam nempe causam, quæ sanguinis infarctus & stasis est, non tollunt; auferunt autem id, quod morbo resistit, id est vires, & serum sanguinis tenue, quorum beneficio humor stagnans resolvendus est. Addit porro: Neque danda sunt decoloratis, raucosis, lienosis, exsanguibus, spirituosiss & siccum tussientibus, siticulosis & his, qui præcordia & latera ac dorsum distenta habent, & torpentibus & obscure videntibus & quibus aurium sonitus sunt, & urinæ meatus impotentibus: neque item morbo regio laborantibus aut ventre debilibus, aut his, qui sanguinis eruptiones aut tubercula habent.

29. Horum dictorum rationem facile quis inveniet, qui considerat, hos ab HIPPOCRATE recensitos affectus à viscositate, crassitie, infarctu & stasi humorum nasci, quibus tollendis minime aptum est purgans, quod fluidum subtile subtrahendo, quo vinci obstructiones debebant, hæc mala exasperat. Tandem subjicit hæc: Non sunt danda his, qui nigra evomunt, neque cibum averfantibus, neque deliris & parum dormientibus, neque dolore vexatis, neque visum temerarium inclinatum habentibus, neque tumefactis, neque vertiginosis, neque decoloratis, neque his, qui in febre æstuosi sunt & conflati. Videlicet, in nullo morbo spirituum, ubi vel ipsi deficient, vel inordinate moventur, sicuti fit in prædictis affectibus, purgantia locum habere possunt, quoniam magis frangere & labefactare vires solent.

30. Ulterius quæstio non immerito oritur, num in febribus locum inveniant purgantia? Id autem unus instar omnium definit summus quoque noster HIPPOCRATES, qui libro *de purgantibus* hæc præclara assert: Quicunque à febribus fortibus corripuntur, his medicamenta purgatoria dare non oportet, donec remiserit febris, sin minus, saltem non intra 14. dies. Carnes enim eorum & ventres quum calidi sint, medicamentum assument, & nihil depurgantur & febris major fit & color evertitur & morbi regii speciem præ se ferunt. Commota enim bile & non purgata, non forbere vult æger neque bibere, sed omnia abominatur, & plerumque perit.

31. Ratio quare noceat purgatio in febribus nulla alia est, quam hæc, quoniam serum, quod servandum erat, quod caloris temperans est, absumitur; unde calor augetur. Et quoniam plerumque febris materia magis qualitate nociva, quam quantitate & copia peccat & illa sanguineæ massæ altius immersa est, nihil proficies purgantibus, sed vel ægrotum jugulabis, vel febrem exacerbabis, sique fuerit simplex, duplicabis. Aureus aphorismus est HIPPOCRATIS 22. *Sect. I.* Concocta medicamento purgare & movere decet, non cruda, neque ineunte morbo, nisi materia turgat, pluri-

plurimum autem non turget. Mens hujus aphorismi est: rarius in febribus quantitatem materiæ morbificæ esse copiosam, sed potius qualitatem peccare, id est, subtilem acrem causticam, quæ quamdiu talis est, dicitur cruda; cocta autem vocatur, quando textura particularum oleosarum & terrearum sanguinis involuta est. Quapropter, si purgare in febribus acutis convenit, ante dies criticos neutiquam illud faciendum est.

32. Ultimo loco & hoc salutare monitum adjiciendum esse puto, omnibus debilibus, maxime senibus & infantibus teneris, drastica purgantia non secus ac ipsa venena habenda esse. Quam imprudenter & imperite se gesserit medicus, qui recens natis pulverem radicis jalappæ, quin imo resinam ejus mercurio dulci admixtam præbuerit, idipsum in med. ration. T. III. Sect. II. Cap. II. item Cap. V. §. 4. neque minus in Tom. I. Consultat. Dec. V. cas. viii. fufius demonstravi, cum hæc purgantia in infantibus dentitione difficili laborantibus tribus vicibus data fuerunt infecutis lethalibus convulsionibus. Sunt nonnulli medicorum, qui non lactantibus purgantia danda, sed nutriti catharticum devorandum præcipiunt, ut scilicet virulentum pharmacum à succis & robore nutritis cicuratum cum lacte demum communicetur, nec teneros facile lædat; nihilo minus valet etiam hic Galeni sententia, quando *Comment. II. in Hipp. de Rat. vict. in acut. xii.* inquit: contraria est natura omnium purgantium medicamentorum naturis corporum purgandorum, & ut diceret aliquis, perniciofa & lethalis ipsis; ab ipsis pur-

gantibus epilepticos quoque motus excitari posse, testis est Bonetus, qui in *Labyrinth. medic. lib. IX. §. 6. p. 514.* ex Ballonio scribit: nocent plurimum scammoniata nutritibus, lactique admixta aliquando exhibita puerum convulserunt. Sydenham. in morbor. curat. cap. de Epileps. puerorum p. 770. Epilepsia, scribit, puerorum primo mense aggreditur à frequentibus nimis alvi dejectionibus, quas etiam ope diascordii prohibere suadet. Idem à purgantibus crebro datis proficisci posse malum, facile quilibet perspiciet.

33. Coronidis loco adjicimus, ex tutioribus & mioribus laxantibus esse ante omnia mannam, rhabarbarum & folia sennæ, tamarindos, immo ipsam aloen coctione & separatione resinosi principii probe correctam; insuper notandum, quod folia sennæ & rhabarbarum optime per infusionem citra coctionem adhiberi possint, tamarindi in decocto, aloë in forma pilularum, nunquam autem sola exhiberi debeat, sed semper addenda amara roborantia & temperatiora balsamica gummata, quæ mirifice corrigendo humorum pravitatem, & tonum roborando divinam porrigunt medentibus manum. Denique pulverem mechoacannæ & gialappæ, item diagrydium sulphuratum pauca tamen & refracta dosi, cum admixtione salium admittimus quandoque in usum, qui modus applicandi purgantia tutissimus est; & felicius atque expeditius hoc modo sumta operantur, ac si magna dosis folius purgantis sit adhibita. Cum autem laxantium legitimus usus specialem tractationem efflagitet, hanc materiam pertractandam hic omittimus.



D E

M E D I C I N A E M E T I C A

ET PURGANTE POST IRAM VENENO.

§. I.

Quemadmodum in theoria medica sive rationali rerum, quæ ad medicinam pertinent, explicatione, plures adhuc deprehenduntur errores & longe inter se dissidentes opiniones: ita etiam in artis nostræ exercitio & usu communes & perversos curationum modos gravique in medendo errata non tantum ex improvviso committi, sed studio etiam foveari & ad humani generis perniciem sub veritatis aliquo prætextu propagari, vehementer sane dolendum esse existimo. Nam, quo facilius, si tantum in mente residet, inanis, confusa, solidæque rationis expers & mere speculativa opinio tolerari potest, eo difficilius & gravius ferenda est, si extra mentem in actum deducatur atque in hominum detrimentum non raro irreparabile impendatur. Turpe quidem dictum est, sed tamen verissimum, usu quasi receptos & summe perniciosos hinc inde in praxi medica committi errores non à vulgo solum Practicorum, sed & à doctis & in celebritate versantibus medicis. Hos inter mihi maxime is carpendus videtur, cum, si quis graviore ira commotus minus recte valet & de anxietate circa præcordialem regionem, nausea & vomendi dispositione conqueritur, protinus ad evacuandum biliosum humorem, qui horum symptomatum causa & fons censetur, vomitorium vel purgans medicamentum porrigitur. Solent id remedii genus ut plurimum urgere ipsi ægrotantes, dum nausea pressi persuasum sibi habent, evacuata bile, cujus sapor usque ad os sæpius adscendit, mox se meliuscule habituros.

Frid. Hoffmanni Oper. Tom. VI.

Neque facile denegare petentibus id auxilii genus observamus medicos, præsertim eos, qui sibi imaginantur, naturam, sapientissimam corporis nostri conservatricem, intentam esse materiæ biliosæ per superiora educandæ, unde putant, ejus ductum sequi & adjuvare debere medicum. Verum enim vero, quam funesto & fatali eventu istiusmodi vehemens medicina evacuatoria tali in casu exhibeatur, compluribus admodum tristibus exemplis, ubi lethalis ventriculi inflammatio brevi è medio ægrotantes sustulit, satis superque sumus edocti. Quamobrem non sine ratione, adserere contendimus, fortius emeticum & purgans pharmacum, post vehementiorem iram adsumtum, loco veneni esse habendum. Hanc itaque adsertionem in præsentis tractatione, accurate institutis observationibus, & solidis rationum momentis ac demonstrationibus, non sine singulari, quem inde accipient mortales, fructu stabilire ac firmare allaborabimus.

2. Ante vero, quam instituti nostri rationem persequamur, non alienum nobis visum fuit, canonem illum practicum, in se satis eximium, dextre explicare & quam turpiter eo in praxeos exercitio plures medicorum minus solide ratiocinantium maximo cum ægrotorum damno abutantur, proponere. Equidem, hic aphorismus practicus summum & antiquissimum professionis nostræ salutaris Parentem auctorem agnoscit, qui passim in iis, quæ posteritati reliquit, monumentis inculcat, inque primis *Sect. I. aph. 31. eo ducenda esse, quo maxime natura inclinatur, quæ ducere oportet per convenientes locos.* Quæ regula, insignis alias usus, male intellecta & adplicata solenne erran-

tium medicorum solet esse refugium. At vero, valor ejusdem non ultra terminos est extendendus, uti exemplis jam subjungendis patebit. In insultu apoplectico, aut gravi ac violenta partium capitis læsione stomachum ad vomitum irritari, quotidianæ experientiae res est. Si quis itaque medentium hanc ad vomitum inclinationem pro ductu naturæ habere eundemque vomitoria medicina secundare velit, is certe non absque insigni ægrotantis damno id conficiet.

3. Porro, atrocibus ex calculo tormentis ordinario vomitum jungi, notum identidem in praxi est; nihil vero nocentius excogitari poterit, quam si quis ad illum naturæ motum promovendum emeticam medicinam porrigere vellet. In principio quoque pestis, febrium malignarum & variolarum vel vomitus vel alvi fluxus ægrotantes infestant, ubi sane summæ esset res imprudentiæ, si quis hunc ductum naturæ vacuantibus & irritantibus adjuvare anniteretur. Cachecticis, qui labem in visceribus contraxerunt, & hepar vel lienem infarcta & obstructa habent, sanguinis per venas sedis fluxus valde familiaris est, & levi ex causa, animi nempe vel corporis motu, aut medicina quadam exagitante fuscitur: tantum vero abest, ut ægrotantes inde solamen quoddam suarum miseriarum accipiant, ut potius magnus virium languor conjungatur & vis morbi valde adaugeatur.

4. Ecquis itaque pro ductu naturæ salutaris, quem medicus omni modo secundare & promovere debeat, id genus excretionis æstimare velit? Tacemus sexcenta alia exempla male intellecti naturalis ductus, ubi medicus ministerio suo præcoci insigniter fallitur & fallit. Neque enim omnes excretiones vel motus, qui in corpore nostro contingunt, pro salutaribus naturæ ductibus à prudenti & perito medico haberi debent, quippe horum ea sæpe est natura, ut potius vergant ad damnum & destructionem corporis, quam ad ejusdem curationem & conservationem.

5. Maximam itaque partem prudentiæ medicæ in eo sitam esse arbitror, ut perniciosi & noxii motus apte probeque à salutaribus discernantur, utpote cum illi moderandi & sedandi sint, hi vero adjuvandi, imitandi & non sistendi, utique ex parte medici requiritur, ut motus hos sollicite ab invicem distinguat. Judicium vero hac de re est arduum atque difficillimum: nisi enim quis corporis ægrotantis naturam, partium solidarum ac fluidarum constitutionem, viscerum & generis nervosi dispositionem prius exacte cognoverit atque perspexerit, nisi etiam causam, quæ motus & excretionum est effectrix, ejusque indolem plane prius exploraverit, vix in exactam & distinctam horum motuum cognitionem perveniet. In morbis acutis salutes naturæ ductus atque vacuationes criticas & laudabiles ab ipso ordine, tempore & successu motuum & maxime omnium ab ipso effectu, qui est virium augmentum & morbi decrementum, addiscimus. Ex hisce omnibus jam clare conficitur, quam graviter delinquant illi medici, qui accuratiori cognitione morborum causarumque morborum neglectione & posthabita male fundatis & speculativis theorematibus inhærere malunt. Hi sane in perpetua ignorantia versantur & si ad lectum ægrotantis vocantur, ejusdemque corpus extraordinariis motibus vel excretionibus affectum vident, quid in cura faciendum vel omitterendum sit, raro penetrant.

6. Quod vero non omnis naturæ motus pro salutaris sit æstimandus, solenne satis & manifestum exhibet documentum ipsa præsens hæc, quam publicæ luci tradimus, dissertatio, ubi videbimus, à vehementiori animi motu provenientem constrictionem ductuum biliariorum & intestini duodeni, nec non dextræ & inferioris partis ventriculi cum inclinatione ad vomendum pessime pro salutaris & secundando natu-

ræ ductu atque conatu venditari. Equidem, negari minime potest, aliquando ventriculo & duodeno copiosa vitiosi, corrupti, viscida ac biliosi humoris saburra, quæ nauseam movet & appetentiam prostermit, obfesso, nihil utilius esse remedio emetico: sed longe diversa est ratio nostri argumenti, ubi in vitiosis istisque copiosis sordibus causa mali non residet, sed potius in magna agitatione generis nervosi & constrictione ductuum biliariorum atque ipsius ventriculi à valentiori animi motu inducta, unde bilis etiam commoveri & sursum adscendere nititur. Hoc igitur in casu omnia ea, quæ nervosas partes magis exagitant, earumque motus anomalos plus excitant, non possunt non esse summe noxia. Ponamus quoque, ira impetuosiori liquorem biliosum ingenti copia ex ductibus hepatis ad intestinorum volumen deferri, ibique exonerari atque adeo ejus evacuationem indicari, non tamen video, quare hæc ipsa per superiora insitenda sit, cum humoris biliosi superabundantis excernendi commodus & conveniens locus non sit œsophagus, sed potius alvina regio, per quam ordinario recrementa biliosa cum fecibus foras projiciuntur. Quapropter etiam in eo peccatur contra aphorismum egregii usus practicum, qui ab HIPPOCRATE lib. I. aph. 21. adducitur & sic se habet: *quæ ducere oportet, quo maxime repunt, eo ducere oportet per convenientes locos.*

7. Ut igitur is error communissimus æque ac perniciosissimus de administratione emeticorum ac purgantium drasticonum post iram paulo clarius eniteat & cuivis in oculos quasi incurrat, ea utique via nos procedere oportet, qua in demonstrandis veritatibus medicis omnes, qui non perfunctorie, sed solide & scientificè res tractare norunt, uti solent. Jam vero ad veritates medicas stabiliendas id maxime est necessarium, ut primo observationes & historiæ accuratæ & cum omnibus circumstantiis notatæ præmittantur, postea vero hæc ipsæ methodo analytica per connexa ratiocinia explanentur & resolvantur, ut hac ratione illud, quod demonstrandum erat, planum evadat. Inhærebimus itaque huic methodo & communicabimus potiores & notabiliores historias & observationes, quas hanc in rem collegimus & annotavimus. Singulas enim enumerare nimis longum foret, ut vastum opus vix sufficeret.

8. Prima igitur historia hæc esto. Juvenis nobilis, triginta annorum, temperamenti cholericis, inter rixas cum sodalibus suis vehemēti ira excanduit & vinum valde potens ac spirituosum, quod *Sect* vocant, superbibit; die sequenti intolerabiles præcordia obsident dolores, conatus perpetuus est ad vomendum & internum quendam sensum percipit, quasi aliquid ex ventriculo adscendere perque os exitum affectare vellet. Advocatur medicus, qui frequentius utebatur pharmacis chymicis in suis curationibus. Is sulphuris aurati antimonialis grana quinque porrigit in iusculo, quo adsumto medicamine terna quidem vice vomuit abunde, sed absque levamine, utpote anxietates & angustia circa præcordia augmentum cœpere, vomitio quoque ulterior protinus desinit. Jungebatur præterea internus incredibilis circa stomachi regionem ardor, partes externæ frigore, tremore & vellicatione quadam corripiebantur, ac sudor frigidus caput & pectus tenebat, pulsus percipiebatur nullus, mox ægrum mens deseruit, accesserunt convulsiones & intra decem horas mors vitam abstulit. Dissecto cadavere ventriculi fundus & duodenum valde inflammata conspiciebantur, maculis partim rubicundis, partim nigris hisce partibus inhærentibus; cætera viscera perfecte sana apparebant.

9. Ejusdem quoque tenoris est sequens historia. Vir in statu Ecclesiastico constitutus, quadraginta & aliquot

quot annos habens, indolis valde sensibilis & ad iram pronæ, faciei floridæ, rubicundæ, post vehementissimam iram conqueritur de anxietate & dolore pressorio ardente circa scrobiculum cordis versus latus dextrum, omnis ciborum appetentia est prostrata, noctem egit inquietam & facies incepit flavescere, adfuit perpetuus cum nausea conatus, sed tamen irritus ad vomendum. Hic petiit à medico consilium, qui grana tria tartari emetici præscribit in juscule pingui, calido sumenda: inde vero anxietates increſcunt, vomit aliquoties, sed parum, conqueritur de incendio circa cordis regionem, inquietus est, mox lectum petit, mox surgit, de consfrictione & summa anxietate præcordiorum lamentatio fere perpetua est. Præscribuntur antispasmodica castorina, clyster quoque adplicatur & nitrosa atque anodyna identidem in usum vocantur, sed citra omne levamen, increſcit potius virium languor, pulsus fit debilis & celer, extremæ partes inhorrescunt & frigidæ fiunt & tertio die æger misere periit, qui ante quatuor dies perfecta gaudebat sanitate.

10. Neque vero minoris considerationis sunt sequentes duæ historiæ. Fœmina in urbe finitima sana & vegeta, annorum quadraginta, ob damnum in re domestica perpeſsum vehementi ira exardescit & paulo post cibum adsumit. Ab eo tempore conquesta est de languore, impotentia & tremore artuum, pressione atque angustia præcordiali, nausea; os est amaricans, facies, quæ antea florida erat, contracta, pallida & livida fit; tertio die à medico quodam juniore accipit medicinam emetico purgantem in pulvere, qua sumpta dejectiones crebras per superiora & inferiora habuit, postea de summo incendio interno instituit querelas, nullus est somnus, corpus valde inquietum, corpore erecto animi obrepit defectio cum fastidio ciborum, præsertim carnis. Succedit postea respiratio difficilis, tussis & dejectio copiosa materiæ viscidæ, & lentus calor depascit vires & corpus. In consilium multos medicos adhibebat, per aliquot menses decumbens, tandem vero polychrestis & vulgaribus remediis, herbarum decoctis & pinguedine canina successu temporis convaleuit. Ante duos circiter annos vir primarius in vicinia æstate usus est acidulis Egranis, postea ob varias motas lites cum consanguineo vehementi afficitur ira, à quo tempore perit edendi desiderium, dolor anxius & pressorius sub scrobiculo cordis circa dextrum latus urget, qui sese extendit ad umbilici usque regionem: consulit chirurgum, qui medicum simul egit, cujus auxilio sæpe usus est. Hic cum percepisset, ægrum simul laborare alvo adstricta, habuit affectum pro colica, cujus, alvo aperta, mox remissio sit speranda. Ordinavit hinc pulverem salinum ex arcano duplicato, qui aliquot grana trochiscorum alhandal una complectebatur. Sex inde habuit dejectiones, sed dolor, ardor & anxietas circa præcordialem regionem mirifice increverunt. Tertio die summe debilitatus fuit æger, pulsus deprehensus est valde imbecillis, celer & inæqualis, & inquietissime sese gessit, nullo somno vel quiete succedente, tandem mente fuit alienatus, paucis post horis omnis sensus & motus ipsum destituit, sopore gravi detentus multa foetida & aquosa sine omni sensu per alvum reddidit, accesserunt convulsiones & quarto die vitam cum morte commutavit.

11. Cum hæc omnia hic loci acciderent, scriptum mihi est ex Silesia de simili casu, ubi puerpera, quæ bene lochiis purgata est, vehementi ira commota sumsit pulverem ex antimonio diaphoretico, arcano duplicato & granis tribus trochiscorum alhandal, inde præcedentibus summis præcordiorum anxietatibus, inquietudine, torminibus ventris cum dejectionibus, singultu, conatu ad vomendum, internorum ardore, ex-

tremorum frigore, tertio ab adsumto purgante die extincta est. Sic memini etiam, quendam ex præcipuis hujus civitatis chirurgis ante viginti aliquot annos intra breve temporis spatium à vita excessisse, quia post iræ affectum pulverem emeticum sumsit, eique, cum non sufficientem operationem exeruisset, aliquot horarum intervallo pilulas, ex purgantibus valde acribus compositas, superingessit. Nolo jam longius commemorare tristissimum casum, qui pronuper hic loci contigit, ubi virgo nobilioris conditionis, sanguinei temperamenti, ex mensibus non rite fluentibus plethorica, post animi graviolem commotionem suasu fœminæ cujusdam dosin sumsit pilularum purgantium, quæ vocantur *geschärffte Haupt-Pillen*, & ab extracto hellebori nigri & trochiscis alhandal acrem suam purgantem vim mutuatur: inde mox oborta est inflammatio ventriculi, anxietas, alvi adstrictio, accessit inquietudo, febris, summa virium prostratio, delirium & septimo die mors, & post mortem cum fœtore totius corporis intumescencia.

12. Ex hisce jam commemoratis historiis & observationibus practicis quisque medicorum, etiam qui judicio pollet non admodum acri, & levi tantum rerum medicarum notitia est imbutus, haud difficulter colliget, ægrotantes antea sanos, bene valentes nullaque labe in visceribus correptos, à nulla alia causa, quam ab ipsa ira & imprudentissima medicatione, partim per emetica, partim per aciora purgantia administrata, funestum effectum expertos fuisse. Ecquis enim hic non evidentissime per experientiam, optimam rerum magistram, hujus rei certitudinem ac veritatem perspicit? Si enim iram tam ingens turbatio functionum corporis, tamque gravia symptomata consequuntur, quæ à fortiori evacuante medicina non levantur, sed augmentum capiunt ac funestum sæpenumero eventum sortiuntur, quis non exinde satis firmiter argumentari posset, hujus catastrophes infelicis causas tam in iram, quam in hanc medicinam esse conjiciendas. Sed quia judicium, ex sola experientia & observatione desumptum, sæpe fallax est, hinc solidiores medici, ut certitudo & scientifica veritas emergat, exigunt, ut experientia firmis & inconcussis rationibus ac demonstrationibus stabiliatur, id quod etiam jam breviter strictimque exequi animus est.

13. Ut vero ordine procedamus, dicendum ante omnia erit de iræ effectu atque operatione in corpus humanum. Expodata enim iræ indole, facili opera postmodum rationes apparebunt, quare emetica & purgantia instar veneni sint habenda, si exhibeantur graviori ira correptis. Est vero ira ejus naturæ, ut vehementiori partium nervoso-musculosarum consfrictione totum systema nervosum celerrime commoveat & systolem cordis eique contiguum vasorum & tonum etiam partium fibrosarum universo in corpore mirifice adaugeat. Manifestum hujus rei, sanguinis nempe & fluidi nervei motus impetuosioris, testimonium & argumentum in ira percitis præbent pulsus intensio, respiratio concitior, sitis, calor, inflatio & rubor faciei, articularum capitis, præsertim circa tempora, major pulsatio & intumescencia, oculorum ferocia, tremor extremarum partium & actionum mentis præcipitantia. Quid quod, uti ex practicis observationibus habemus, nihil æque celeriter febres acutas, biliosas, intermittentes, inflammatorias concitare potest, ac ipsius iracundiæ vehementior affectus. Deinceps, ira spasmodica partium, qua agit, strictura vim suam inprimis in ventriculum & intestina, ceu partes valde nervosas & membranaceas exerit, unde tanto graviora exurgunt symptomata, quanto major est consensio ventriculi & intestinorum cum aliis partibus nervosis & universo fere corpore.

14. Peculiaris vero etiam iracundiæ vis est in ductus

biliosos & hepatis; siquidem eorum constrictione intensiori facile hepar scirrhum redditur, imo non raro calculi in cystide fellea ac ductibus biliariis generantur. Habent hæc accidentia vix aliam originem, quam à libero motu & effluxu bilis fortiori hac strictione impedito. Contingit autem hoc potissimum ab ira suppressa, *wen man das Aergerniss*, ut vulgo dicere amant, *gleichsam in sich fressen muss, und den Zorn nicht ausschütten kan*, ubi nimirum ultionis expetitæ deest occasio vel facultas, aut tristitia cum metu simul juncta est.

15. Propter constrictionem quoque horum ductuum icterus enascitur, qui facile postea temporis successu calculosæ in vesica biliaria concretioni velificatur. Quando etiam bilis ab iræ affectu vehementius commoveatur & copiose ex ductibus biliariis & cysticis in duodenum & ventriculum effunditur, ex ejus ibidem facta stagnatione & concepta per diuturniorem moram acredine, nausea, vomitiones, diarrhœæ, cholericæ passionis, cephalalgia, anxietates, febres biliosæ, continuæ & intermittentes suscitantur. Hinc est peculiare illud iracundorum symptoma, quod in latere dextro sub scrobiculo cordis sentiant dolorem quendam constrictivum, in ore autem amarorem. Originem suam hæc pathemata non aliunde ducunt, quam à motu bilis ejusque effusione in intestina impetuosiori, dum ductus biliarii, nervosis ac musculosis tunicis contexti, ab influxu spirituosissimi liquidi in nervis contenti citiori nimium compressi, ingentem quantitatem bilis exonerant & infundunt duodeno, unde etiam dependet inclinatio ad vomitum & diarrhœa, quam HILDANUS *Cent. VII. Obs. XVIII.* annotavit, cum affirmat, alvum subductam fuisse ab ira, ac si pharmacum adsumtum fuisset. Quod si bilis acrimonia delinquit & in hoc adfectu nimium effunditur, intestinorum & ventriculi erosiones cum lenta febre sequente non raro vidimus. Imo, quo acrior est bilis, quo magis à statu suo naturali desciscit, eo nocentior etiam est ira, eoque etiam sæviora juncta habet symptomata.

16. Denique, ab intensiori partium nervearum & fluidarum per iracundiæ affectum reddito motu sive spasmo sanguis copiosior cum impetu ad certas partes pellitur, unde accidit, ut eæ nimium distendantur & venarum ibi repentium orificia aperiantur. Constat experientia practica, iram maximam habere facultatem enormes sanguinis excretiones sive per nares, sive per arteriæ pulmonalis aperturam, sive per venas ani & in foeminis per uterum excitandi, cum primis in consuetis ac dispositis. Ita, si quis in juventutis annis hæmorrhagiis narium fuit adfuetus, is ira ardentiori in eandem promte potest incidere. Quis enim vel ex vulgo nescit, invadente hoc affectu vultum statim rubore suffundi & venas capitis, præsertim frontales, mirum quantum intumescere, non raro etiam illico sanguinem è naribus copiose effundi. Pariter vidimus, foeminas ab iracundia in uteri hæmorrhagias collapsas vel etiam hæmorrhagias narium fuisse passas. Et hæc quoque est ratio, quare in senibus & plethoricis vehemens ira apoplexiam sanguineam, quæ fit ab arteriolis plexus choroidæi in capite perruptis, subito sæpe producat. Jam vero nunquam gravis facile congestio sanguinis ejusque effrenis effusio fit nisi à spasmatica eaque fortiori constrictione partium nervosarum & musculosarum.

17. Evolutis hac ratione iræ effectibus modoque operandi, deveniendum jam etiam est ad præcipuum differtationis hujus momentum, ubi ostendendum, quare medicina purgans & emetica tantopere noceat in iræ affectu, ut veneni veri nomen jure obtinere queat. Prius vero, quam hanc rem plene decidamus, ratio tractationis nostræ exposulare videtur, ut de ve-

ri veneni indole ac modo operandi pauca adjiciamus, ne commoda explicatione neglecta variis confusionibus, à quibus omnium errorum origo permanere solet, causam atque occasionem subministremus.

18. Per venenum igitur hoc loco intelligimus materiam causticam, sale tenuissimo volatili acri instructam, quæ exigua in quantitate spasmos enormes in ventriculo & intestinis concitando sub truculentiorum symptomatum celerrimo decursu universam motuum vitalium œconomiam pervertit ac destruit, signis funestæ sphacelationis in cadavere relictis. Venena itaque vera pro fundamento suæ activitatis agnoscunt sal quoddam tenue, acre, summe causticum, quod membranaceo-nervis ventriculi & intestinorum fibrillis sese altius insinuat, illas lancinat, arrodit, inflamat & spasmotice contrahit. Celeriter vero & exigua in quantitate opprimit homines venenum: in causa hic absque dubio sunt vehementes spasticæ nervosi ac membranacei generis in universo corpore constrictiones, quibus fluidi nervei ac tenuioris sanguinis in organa motuum & sensuum influxus, quo cessante omne robur, tonus & motus partium perit, partim intercipitur, partim etiam ad alia loca majori copia compellitur.

19. Symptomata, quæ à veneno concitantur, longe sunt truculentissima & spasmis unice debentur, qui non modo in ventriculo & intestinis consistunt, sed & in remotas partes, subtiliori sensu ac motu præditas, propagantur, unde à veneno deglutito observantur anxietates cardialgicæ, nausea, vomitiones, tormina atrocissima, diarrhœæ, vel etiam alvus contumacissime clausa, singultus, constrictiones thoracis vehementes, angustia spirandi & summa præcordiorum anxietas, languor omnium virium, syncope cardiaca cum extremorum frigore & sudore frigido, debilis, celer planeque intermittens pulsus, convulsiones, epilepsia, inquietudines & deliria. Hæc sunt solennia ut plurimum venenorum symptomata. Cadavera si difsecantur post obitum, conspectui sese offert intumescencia totius abdominis, maculæque purpureæ aut nigrae in ventriculo cum erosione & quandoque perforatione, & quæ sunt alia, reperiuntur. Hæc de veneno proprie sic dicto memorasse sufficiant, prolixior qui desiderat hac de re explicationem, is consulere potest *Pathologiam nostram Rationalem Tom. II. Part. II. Cap. II.* ubi venenorum doctrina ex instituto pertractata est.

20. Quod si igitur effectus emeticorum, post iracundiæ affectum adsumptorum, probe pensitamus ac ponderamus, haud difficulter apparebit, illa ipsa non aliam, quam veri veneni operationem in corpore humano exerere; siquidem omnia emetica, præsertim quæ ex antimonio præparata sunt, sale pollent subtili, acri, caustico inflammante, quod ventriculi & duodeni tunicis membranaceo-nervis insidens, eas rodit ac spastice contrahit. Deinceps, paulo largiori dosi data homines jugulant, ubi ventriculus male affectus est, celerrime, qualia exempla passim prostant, quæ hic commemorare angustia temporis prohibet.

21. Si symptomata ipsa, quæ emeticorum deglutionem consequuntur, penitus inspiciamus, illa identidem ab iis, quæ venenum proprie sic dictum propinatum comitantur, plane non abludentia deprehenduntur. Adsunt enim protinus anxietates & præcordiorum constrictiones enormes, ardor circa stomachi regionem exquisitus, conatus ad vomendum inanes: partes extremæ refrigerant, tremere & convelli incipiunt, sudor frigidus caput vel pectus tenet, respiratio difficulter procedit, nullus est somnus, corpus jactitant agroti & valde inquieti sunt; virium summa jungitur prostratio, alvi advertitur vel ingens adstrictio vel fluxio

fluxio præter modum, pulsus est vel celer, debilis vel plane intermittens, mens alienatur, convulsiones oboriuntur, & quæ sunt hujuscemodi alia. Hæc, quæ lethum inferunt, symptomata à violentiori spasmo, qui universum fere partium membranacearum systema vehementius exagitat atque convellit, proficisci, nemo facile in dubium revocabit. Ex quo sane non fallax de venenata post iram vomitoriorum indole depromi potest argumentum. Accedit, quod post mortem aperto cadavere indubii virulentæ violentiæ characteres in conspectum veniant, uti ex sectione supra communicata patet, ubi ventriculi fundus & duodenum valde inflammata conspiciebantur, maculis partim rubicundis, partim nigris hisce partibus inhærentibus.

22. Non minus periculi adferunt post iram administrata purgantia acriora & valentiora. Est enim illis eadem cum emeticis, imo ipso proprie sic dicto veneno perimendi ratio, siquidem subtili itidem & caustico, penetrante sale sunt instructa, & spasmis agendo inflammationes in ventriculo & intestinis concitant, tragica producunt symptomata, celeriter interficiunt & post mortem sphacelationis funestæ signa in ventriculo ac intestinis relinquunt. Quoniam itaque emetica perinde ac purgantia, post iræ vehementiorem affectum intra corpus adsumpta, spasmos faciunt & adaugent atque inflammationem fuscitant, deinde symptomata veneno alias familiaria inferunt, prætereaque celerrime vitam finiunt & post mortem stigmata veneno demortuorum similia in cadaveribus relinquunt; hinc utique recte concluditur, jure meritoque medicinam & emeticam & purgantem veneni in numero esse habendam, præsertim si ira correptis exhibeatur.

23. Emetica igitur & purgantia drastica post iram cum primis sunt damnosa & ut plurimum morti tradunt ægrotantes. Quod si enim ex superioribus repetimus, iram in spasmos ventriculum, duodenum & ductus hepatis conjicere, jam ex hoc colligere erit facillimum, in ejusmodi casu nequaquam convenire vomitoria, cum ad spasmos teneras ventriculi fibrillas, ira modo laceffitas, magis irritent & inflammationem acerbioram inducant, vix ulla arte & ingenio medici expugnandam. Viderint proinde medici, quam recte, quam methodice, quamque prudenter faciant; si ventriculum ira commotum vomitoriis oppugnant atque exasperant. Tantum enim abest, ut hæc remedia in hoc adfectu aliquid expediant, ut potius ipsum dolorem atque morbum reddant longe ferociorem. Concedamus hoc omnino; ipsam naturam pronam ac proclivem tunc videri ad vomitum & ad hunc urgeri quasi ac stimulari, pyloro nempe fortiter se contrahente. Concedamus etiam, ipsos ægrotantes ut plurimum anceps hoc remedii genus anxie postulare & maximam in eo fiduciam ponere, dum sibi firmiter persuasum habent, evoluta è ventriculo hoc onere gravante & foras expulso, protinus se melius esse habituros. At vero, hæc omnia, quibus allici posset incautus medicus ad dandum vomitorium, sagacem, prudentem & singula summa cum ratione suscipientem philiatrum potius commonere debent, ut quovis modo emetica respuat & cane pejus ac angue illa ipsa tali in casu abhorreat.

24. Nocent autem ira, huicque subjuncta emetica & purgantia maxime omnium iis, qui spasmis sic dictis hypochondriacis atque hysteriis obnoxii sunt & doloribus cardialgicis multum vexantur. Ratio hujus rei non è longinquo petenda videtur, siquidem ejusmodi subiecta jam tum ob spasticam, qua premuntur interiores nervæ partes, strictionem infirmata sunt, vel ad inflammationem pronam ac dispositum habent ventriculum cum annexis intestinis. Quod si igitur

graviori ira, quæ spasmis suas tragoedias ludit, corripuntur, non possunt non spasmodicæ ventriculi contractiones augeri, quarum vero sævitia vomitorio vel purgante superingesto adeo non mitigatur, ut potius paratissima hoc modo ad insuperabile incendium & totalem corporis interitum sternatur via. Cavendum itaque cum primis est, ne ejusmodi personis ira debilitatis hujus generis remedia propinemus, ni funestum exinde expectare velimus eventum.

25. Ob eandem quoque rationem emetica & alia fortiora evacuantia insigniter nocent, si circa paroxysmos febrium intermittentium exhibeantur, præsertim si forte iræ affectus præcesserit, quia tunc temporis ventriculo & primis viis spasio exagitatis ad nauseam & vomitum est inclinatio. Obsunt præterea & ira & ejusmodi medicamenta omnibus debilioribus. Ita observavimus, eos, qui corpus antea per laxativa, purgantia, thermas & acidulas strenue purgaverant & hoc modo insignem ventriculi debilitatem sibi contraxerant, à sumptis post iram denuo emeticis vel purgantibus pessime se habuisse subque dirissima symptomatum facie non ita multo post exspirasse. Valet id etiam in puerperis. Notum enim mihi est præter superius allatum exemplum puerperæ, quæ tertio à partu die iracundia affecta fuisse purgans è drasticonum numero & intra duos dies, optimis quibuscumque remediis frustra adhibitis, misere periit.

26. Deinceps, & ira & emeticum vel purgans insignem noxam adfert foeminis circa mensium instans tempus, itemque viris, qui hæmorrhoidum fluxui adfuerunt & imminentem eum expectant. Quum enim solennes illæ & salutares per menses & hæmorrhoides fluxiones cum spasmis continuo fiant, facile patet, nocentissima tunc esse & purgantia & emetica, præsertim si post iram administrantur. Truculenta circa instans mensium tempus ab emeticis, etiam non adeo validis exhibitis, symptomata vidimus. In hæmorrhoidariis validior vomitus abscessus cum lenta febre excitavit. Ubi sanguinis congestio inclinatur ad pectus, periculosa à validiori vomitu nasci solet hæmoptysis. Tandem quoque ira & fortiora evacuantia potissimum iis nocent, qui paulo ante vino largius se inebriarunt incendiumque corporis copioso haustu frigido extinguere voluerunt: quandoquidem ex hisce facile spasmus accedit ventriculo & ejus dextræ parti pylori. Assumpto emetico intolerabiles statim fiunt anxietates, vigiliæ continuæ incommodant, virium ingens sequitur lapsus, jungitur inquietudo, jactatio corporis & partes extremæ valde frigidae fiunt.

27. Ultimo loco, paucula adhuc adjicere lubet de præservatione incommodorum, quæ iram sæpenumero, si is vehementior paulo fuerit, pressio pede insequuntur. Prudentis hoc in casu medici est, ut spasmos, in ventriculo & duodeno exortos, quovis modo leniat ac demulceat, sanguinem & humores in circulum æquabilem reducat & acrimoniam, si qua subest, corrigat. Commendari hunc in finem merentur præter infusa herbarum v. g. herbæ veronicæ, scordii, florum sambuci, bellidis, chamomillæ vulgaris & Romanæ, seminis foeniculi, pulveres bezoardici, nitroscinnabarini, vel etiam nitrum cum pauxillo camphoræ, aut sequens Mixtura: Recipe spiritus nitri vel vitrioli dulcis, essentiæ castorei ana drachmam unam, camphoræ grana tria, quæ ad guttas viginti vel triginta sumi potest. Hæc duo remedia ad inflammationes præservandas, à quacunque causa oriantur, summi sunt præsidii loco. Si ex iracundia bilis nimia in copia ad intestina præcipitata fuerit, tunc non inutilem, sed prorsus eximiam opem fert pulvis ex rhabarbaro, nitro & lapidibus cancrorum compositus. Hac enim ratione non modo bilis acrimonia mitigatur, sed & blandissime educitur; adjici huic quoque potest

magnesia alba, quæ non modo egregie corrigit acrimoniam humorum, sed & leviter subducit. Hisce in usum vocatis adjungi poterit Essentia cort. aurant. bene præparata, Elix. stomachale Michaelis, vel no-

strum cum liquore anodyno minerali nostro commixtum. Sed hæc hac vice circa nobilem hanc materiam sufficiant.

D E

IMPRUDENTI MEDICATIONE

MULTORUM MORBORUM ET MORTIS CAUSA.

§. I.

QUando imprudentem & præposteram medicationem multorum morborum, imo mortis causam statuo, verendum utique mihi est, ut nonnulli in id incidant, me vel universæ artis certitudinem in dubium vocare, vel in medicorum ordinem injurium esse velle. At vero, mihi nulla artium majori veritatis fundamento niti videtur, præterquam medicina, eo quod naturæ ordinem, qui nunquam non immutabilis est, pro principio agnoscit, & observatione eorum, quæ nocent vel prosunt, & denique solido medici judicio continetur. Cæterum, qui me measque vivendi rationes exploratas habent, optime sciunt, me ab ejusmodi criminandi moribus esse alienissimum, cum per omnem meam ætatem nihil magis optaverim, quam ut concordia in medicina valeat vigeatque. Hujus rei evidens testimonium non pauca numero scripta mea edent, clarissimeque comprobabunt, me nullius unquam opiniones acerbiori stylo perstrinxisse, sed potius ingentes inquietorum animorum insultus patienti & æquissimo animo semper tulisse. Neque unquam facile ulli practicum, propter errores in praxi admissos, gravis vel injurius fui, sed ubi vel officii, vel conscientiæ, aut summæ salutis ratio, ut de quibusdam monerem, deposcebat; erranti, qui potuit fieri, comitate, monstrare viam allaboravi, nunquam mihi persuadens, ex saluberrimis admonitionibus tantum periculi subnasci posse, quantum viri boni subinde experiuntur.

2. Illud tamen, si non dissimulare, sed libere dicere velimus, evidentissimum est & res ipsa monstrat, nullam artem tantæ hominum ignorantiae & tam magnis tanque ingentibus periculis & malis patere, quam eam, quæ mortalium vitam & sanitatem, qua nihil est præstabilius, procurat. Equidem, innumerabilis est practicum copia; sed paucissimi sunt re & opere medici. Plurimi, non tantum ex vulgo, sed etiam ex doctioribus, medicinæ summam nec capiunt, nec intelligunt. Omnes in suis operibus ad experientiam confugere cernimus, quæ ipsis talis est, ut, si quando semel vel iterum faustum à medicina in morbo propulsando effectum percipiunt, protinus remedio virtutem hunc morbum certo sanandi inesse, sibi persuasum habeant. Hinc, si quis simili morbo laborare dicitur, confestim eandem medicinam in usum adhibent: rarius tamen simili effectui. Nihil autem magis medicis imponere, quam experientiam, solere, res ipsa ostendit. Tot enim sunt diversi medicamentorum effectus & experientiæ, quot sunt corpora, quæ ratione temperamenti, ætatis, consuetudinis, victus, climatum, anni temporum, cæterorumque mirum inter se differunt; neque una semper ejusdem morbi est causa, status, conditio ac tempus. Et quid familiarius in praxi medica occurrit, quam quod duo medici circa idem remedium in morbo adhibendum diversas, imo plane contrarias habeant sententias, &

uterque ad experientiâ seu observationem crebriorem concurrat?

3. Tamen si vero experientia, accurate notatis circumstantiis omnibus, magni usus sit; quia tamen tantummodo particularis est, & tanta differentia individuorum & circumstantiarum observatur: hinc plures hominum ætates veræ in morbis experientiæ non sufficerent enodandæ. Potius itaque alia ineunda est in medicina via, quam pauci norunt & intelligunt. Videlicet ex iis, quæ sensu & experientia longa comperta sunt, ratio universales regulas & leges medendi elicere debet: deinde medicum accurate individuorum naturam, morborum statum, causas, tempora, virtutes alimentorum & medicamentorum exquisite pernoscere oportet. Tum omnibus circumstantiis, quas morborum historia accuratior communicabit, bene consideratis, prudenti deliberatione & solido judicio universalialia applicare & ex hisce methodum, qua æger sanandus est, invenire debet, quæ remediorum genera, dosin, ordinem, tempus adhibendi & regimen recte tradat ac explicet. Quam pauci vero sunt medici, qui ex particulari experientia universalialia extrahere norunt? quam pauci in praxi attendunt ad morborum historiam & exquisitam omnium circumstantiarum rationem? quam pauci differentiam corporum perspectam habent? quam pauci morborum causas & occasiones medendi norunt? quam pauci denique sunt, qui deliberatione, consilio ac judicio in curationibus utuntur & cum prudentia & solida ratione medicamenta adplicant? quam pauci numero rursus verum usum & abusum medicamentorum distinguere sciunt? & quam pauci sunt, qui leges, quibus natura in medendo utitur, accurate observant & imitantur.

4. Ex quibus intelligi potest, medicinam non tam facilem & experimenti rem esse, sed magnam scientiam & acre quoque judicium desiderare. Unde non mirum, quod his destituti vulgares illi practici perversa sua methodo & remediorum abusu tanta mala, morbos, imo & mortem miserrime subinde hominibus inferant. Scio atque non levi mœrore angor, quando animo perpendo, quam gravia mala, præstantissimis alias remediis, imprudentes practici ægotantibus invehant. Possem certe de morbis & damnis à medicis inductis, quæ mihi adhuc in recenti memoria hærent, ingens volumen componere, nisi res esset odiosissima; nihilominus tamen, secundum *Plautum Trinum.* Act. I. Scena II. *Nota mala res optimæ sunt*, quia quæ nocent, etiam prosunt & docent. Quare, utique ex iis observationibus, ubi male & non ex voto cessit medicina, ingens lumen & incrementum arti nostræ salutaris accedit. Ex aliorum enim periculis optime sapimus & cautiores reddimur. Igitur operæ pretium & non alienum à nostro instituto erit, in præsentem ostendere, quomodo imprudens medicatio multorum morborum origo & causa esse possit. Cum vero in quibusdam observationibus recensendis erimus occupati, studio speciales & quæ ad personas pertinent cir-

circumstantias præterire volumus, quia veritas in hisce tanto magis odiosa solet esse, quanto est plenior. Nunquam enim noster est animus in ullius hominis vel medici famam injuriam esse: errantibus tamen monstranda est via, salebræ in praxi detegendæ, & offusa menti caligo abstergenda est.

5. Ut vero in præsentis tractatione ordo quidam observetur, placet initium facere à recensendis iis damnis, quæ ex venæ sectione omissa vel male administrata suborta annotavimus. Si ullum auxilium tam operationis celeritate & securitate, quam utilitate & tolerantia facilitate commendandum est: certe est venarum sectio, cujus eximiam in medendo efficaciam præter veterum testimonia longus & comprobatus usus abundantissime ostendit. Nihilominus medicorum & imprudentia & temeritate subinde pervertitur, id quod sequentes observationes satis confirmare videntur. Fuit nempe vidua sanguine plena in optima ætatis flore constituta, habitus corporis spongiosi, facie rubicunda: hæc singulis annis per longum temporis spatium bis vel ter venam incidi curavit & optime se habuit, postea ex mensibus paucioribus redditis, pedes tumescere incipiunt, hinc venæ sectio, metu exinde secuturæ cachexiæ, dissuadetur. Elapso anno incidit in febrem cum magnis artuum doloribus, & dolore ac rubore fere totum corpus adficitur, interea venæ sectio omittitur, sequitur maxima sanguinis ad caput congestio, unde delirium, & mors. Quandoque itaque sagax & peritus medicus principales has circumstantias probe animo suo perpendit, vix aliter poterit concludere, quam omissam per annum & ultra venæ sectionem status plethorico-cachochymici & sequentis morbi fuisse causam, cujus vehementiæ sine dubio quoque matura venæ sectione medicus potuisset occurrere. Supervacaneus hic omnis fuit metus cachexiæ vel hydropis, quia pedum iste tumor à plethora & difficiliore sanguinis per pedes transitu ortus fuit.

6. Placet quoque ulterius ex sexu nobiliori utilem circa præsens negotium observationem inferere. Vir triginta & aliquot annorum, habitu corporis spongioso præditus, sanguineæ complexionis, ante anni dimidium incipientes habuit hæmorrhoides: diætæ lautiori & vinosæ deditus, tandem incidit in diros cruciatus ac dolores, quibus lumbaris & abdominis regio adfligitur, perit appetentia, percipitur quoque compressio circa præcordia, color faciei rubicundus mutatur in lividum & flavum, alvus est adstricta, caput dolet, manus tremunt, extrema refrigescunt. Nonnulli ex medicis affectum pro calculo, alii pro cachexia & obstructione hepatis, quidam pro malo hypochondriaco habuerunt. Et quamvis multo & vario medicamentorum usu mali vehementia aliquantum remiserit, majori tamen atrocità circa æquinoctia semper malum est reversum. Nunquam ipsi secta est vena, tandem vero prudentioris medici consilio quater de anno venam pedis incidi curavit & Carolinis usus est, unde per DEI gratiam longo tempore à vehementia mali immunis factus est. Ecquis est, qui re bene considerata addubitare velit, immanes hos, qui præcordialem & abdominis regionem fatigarunt, spasmos à plethora & sanguine in visceribus & plexibus mesaraicis stagnante, qui per sedis venas moliebatur exitum, subortas fuisse, quem utique & matura & crebrior venæ sectio potuisset avertere.

7. Rursus, vir plethoricus, quinquaginta annorum, scarificationibus & venæ sectioni olim adsuetus, quæ ob provectiorem ætatem, ne vires corporis depascantur, jam à medico dissuadentur, post annum fixum & acerbum dolorem in regione lumborum percipit, qui censebatur à calculo esse, ad hunc itaque depellendum varii generis diuretica, etiam calidiora & ju-

niperina & spiritus minerales acidi dati sunt. Secuta postea est lenta febris, cum ingenti virium languore, appetitū prostrato, urina purulenta. Post mortem ren dexter in abscessum abiisse inventus fuit, qui simul totum musculum psoas exulceravit. Discimus ex hac historia, quam male dolor lumborum, qui ut plurimum fit à sanguinis stagnatione, habeatur pro calculo, cum tamen hic majoris etiam magnitudinis in renem substantia subsistens, ne quicquam doloris procreet, sed tum demum, quando iter suum per ureteres conficit. Cuivis etiam prudentiori dijudicandum relinquimus, num venæ sectio maturior, subjunctis nitrosis & absorbentibus, hunc morbum & mortem non potuerit avertere.

8. Ad præsentis rei confirmationem pertinet quoque sequens observatio: Degit in vicina urbe generosus quidam vir, ætate quadragenarius, floridæ faciei, aulicæ vitæ addictus & lautiori victui ac vini generosioris potuit assuetus. Is currente autumnino incidit in vehementem in regione lumbari dolorem, qui ad coxas & genua porrigebatur, noctuque maxime ingravescebat, somnum impediebat atque quietem. Implorabat opem medici, qui affectum esse arthritico-scorbuticum & originem ex acri & scorbutica humorum dyscrasia trahere sategit; decocta antiscorbutica & sanguinem repurgantia ex radicibus & lignis ad sudorem mane eliciendum porrexit, pilulisque ex mercurio dulci, resina jalappæ, gummi ammoniaco extractoque panchymagogo Crollii, viscidos & tenaces humores per alvum exturbare contendit. Sed tantum abfuit, ut quicquam levaminis attulerit, ut potius dolores perseverarint in affecta non modo parte, sed & caput, collum manuumque articulos adhuc infestarent, cum notabili virium decremento. Alius itaque morbi artifex advocatus, qui curam per inediam, (*die Hunger-Cur*) ceu probatissimum præsidium in scorbuticis & arthriticis ejusmodi affectionibus, mire commendavit; tertius vero accitus hanc improbavit, & thermarum Tœplicesium usum unice proficuum fore edixit. Demum ad me re delata, de omnibus certior factus, judicavi, mali, quod jam per aliquot menses ægrum misere torserat, causam, neque in humorum tenacitate, neque scorbutica quadam acrimonia, esse querendam, sed potius in abundantia sanguinis, ejusdemque non modo stagnatione, in vasis mesaraicis, sed & lentiori circuitu per iliaca, ac secedente ob moram hanc ferosa parte atque ad articulationes ossis coxendicis descendente, fieri. Jussi igitur, ut, quam priores medici neglexerant, venæ sectio in pede, adornaretur, qua depletis canalibus per ilia excurrentibus, dolor in parte affecta ipsoque capite remisit ægerque insequentinocte melius dormivit. Ex medicamentis vero usurpata mixtura ex aqua florum sambuci, rob sambuci, antimonio diaphoretico & nitro, cum liquore anodynò minerali, nec non pulvis bezoardicus, sulphure antimonii correcto maritatus & potui data ptisana. Et quum pulsus validus ac venæ tumidæ essent, sanguinem exundare adhuc conjeci, eaque propter iteratam venæ sectionem tam salutari effectu institui, ut æger pristinam intra mensem perfecte reciperet sanitatem.

9. Eandem in rem apprime facit hic casus. Laborabat ante annum illustrissimus Comes immensis abdominis cruciatibus, qui ad vesicam & genitalia propagabantur, ac non modo lumbos, sed & ilia infestabant: aderat continuus ad mingendum stimulus, urina vero difficulter reddebatur, interdum tenuis, interdum rufa, quandoque sabulum ponens. Pugnabat contra hæc pathemata medicus ordinarius carminativis & discutientibus, nec non diureticis ad calculum cum urina pellendum, sed invalescebant inde magis symptomata. Quum vero ego quoque ipse in consilium voca-

rer, omiffam ab ordinario venæ fectionem cum primis necessariam effe edixi eamque in pede instituentam curavi, tam præfentaneo falutari effectû, ut illico æger notabile continui doloris perciperet levamentum. Adhibita præterea effentia corticum aurantiorum, liquori anodyno nupta, nec non pulvis præcipitans nitrofus, ac demum Carolinis interne & Tœplicesibus exterius ufurpatis, difparuit omnis dolor, nec poſtea rediit.

10. Quemadmodum vero ex intermiſſo venæ fectionis uſu, ita etiam ex ea largiori, vel intempeſtively celebrata, gravis morbus vel etiam ipſa mors conſequi poteſt. Laborabat vir quadraginta & aliquot annorum diu ex ventriculi inflatione, quam mala diæta ſibi contraxit, alvi que erat durioris, texturæ ſenſibilioris & natura debilis. Hic, propter graves occurrentes animi commotiones, per aliquot ſeptimanas quiete, appetentia & viribus privatus fuit, poſt varia data remedia, admiſſa tandem fuit venæ fectione, qua pejus ſe habuit & mox exſpiravit. Quid hic potuit imprudentius excogitari, quam in viro extreme debilitato venæ fectionem concedere, quæ virium reliquias una cum ſanguine ſimul ſuſtulit. Nunquam enim corporibus exhaustis ſuadenda eſt ſanguinis miſſio, ubi vires diuturno animi mœrore fractæ & enervatæ fuerunt.

11. Puerpera triginta annorum, manu obſetricis imperitæ in extrahenda ſecundina læſa, de dolore in pube conqueritur, accedebat febris, per lochia ſanguis ſufficienter purgatus fuit: ob inflammationem præcavendam intra ſex dies tribus vicibus & ſingulis largiſſimam venæ fectionem admiſit, remanſit lentus calor cum ſumma virium proſtratione, vigilia, poſt mortem nihil fere ſanguinis in vaſis majoribus fuit reperi- tum, ſed profundior tantum nigra macula in collo uteri. Quis non animadvertit? imprudentiſſime hic toties reiteratam fuiſſe ſanguinis miſſionem, quæ omnem fere ſanguinem conſumſit, quo tamen utique opus fuiſſet ad inflammationem reſolvendam: non ſtaſis ſanguinis in vaſis inflammatoria, non aliter, niſi ſanguinis & citatori & crebriori adfluxu removetur, unde ſanguine, plus quam par eſt, ſubtracto ſanguis ſubſiſtens ut putreſcat neceſſarium eſt. Alia puerpera triginta & aliquot annorum, obefa, nimio laborabat lochiorum fluxu, nihilo minus in manu aliquoties ſecta fuit vena & laxantia data, quibus ita emaciata & exhausta ſanguine ac viribus fuit, ut lentus calor, cachexia, tumor pedum per dimidium fere annum ipſam corripuerit, bona tandem diæta & cœli mutatione reſtituta. Quod ſi enim ſanguinis nimium ſubtrahitur, non tantum vires, quæ digeſtioni & excretionibus præſunt, conſumuntur, ſed & à nimium exinanitis vaſis pori ac meatus viſcerum & emunctoriorum ſubſident ac clauduntur; & hac ratione ex obſtructione & induratione viſcerum longus, gravis, periculi plenus morbus naſcitur.

12. Neque minus digni ſunt qui annotentur hac de re ſequentes caſus: Vir erat triginta & aliquot annorum, conſtitutionis admodum teneræ, hypochondriacis ſymptomatibus à prima juventute obnoxius, maximeque ventriculi inflationibus cardialgicis & aſthmaticis divexatus. Hic tempore hiemali, poſt intenſiorem corporis refrigerationem, peſſime ſe habuit ſummoque affectus eſt languore, & ſubito quodam ita afflictus dolore, ut per tres fere hebdomades ſomno plane caruerit, appetentia ſimul pereunte & corpore contabefcente. Medicus currente Martio menſe, quo agro antea ſanguinis miſſio ſemper ſolennis fuerat, eandem iterum ſuaſit & aliquot uncias extraxit, ſed longe alio quam ſperarat effectû, agro ſcilicet altero ſtatim die poſt placide exſpirante. Ex funeſto hoc eventu nemo non videt, ſumme pernicioſam eſſe ſanguinis miſſionem, ubi vires penitus ob inopiam

ſuccorum & ſanguinis exhaustæ, in cauſario jam & debilitato corpore, & tum potius analeptica, diæretica & pharmaceutica, vires & ſuccos roſcidos reſtaurantia, ex uſu eſſe. Et quamvis æger hic in Martio ſanguinem mittere ſuetus, perperam tamen medicus tempori adſtriſtum eſſe hoc auxilium iudicavit, eo quod venæ fectione non propter tempus juvat, ſed quia circa hoc ſanguis, calidiori aere factò, majus ſpatium affectat ſeſeque expandit, ac venis eodem nimium oppletis periculum minatur.

13. Idem fere contigit viro macilentæ & cholericæ conſtitutionis, qui ex hæreditaria quadam & nativa diſpoſitione pulmonum aluit vitium ac præterea ob nimias lucubrationes vitamque nimis ſedentariam variasque animi ex ira commotiones, corporis & ſtomachi ſibi contrahit imbecillitatem. Hic ab aliquot jam annis magnam pituitæ viſcidæ copiam ſcreatu e- jecerat, hæcque ejeſtio mirum demum copia increvit & per duos fere menſes cum lenta febre, ſpirandi difficultate viriumque jaſtura, nec non exquisito ſub urinæ emiſſione ardore, duravit. Tum quidem æger emulſionibus, juſculis medicatis & decoctis demulcentibus, interpoſitis clementer alvum laxantibus, cum ſanitate in gratiam rediit; exacto vero circiter anno, eidem malo denuo implicitus eſt. Alium igitur in conſilium adſcivit medicum, qui licet ſemper adſuiſſet anxia respiratio, tuſſim tamen non phthiſicam, ſed ex ſtomacho æſtuante & hypochondriacum ſymptoma eſſe iudicavit, putavitque, ceſſatura omnia, ſi tempeſtivus prodiret hæmorrhoidum fluxus. Variis demum incaſſum adhibitis, de vena ſecanda conſilium dedit, floridumque e pede extraxit ſanguinem. Sed eodem adhuc die, veſperi ægrum horror per univerſum corpus inceſſit, ſubſequenti intenſo æſtu, nocte inſomni, virium jaſtura gravi, & perfectæ acceſſit heſtica.

14. Eadem ratione, qua in priori caſu factum, medicum alium in pernoscenda vera cauſa morbi aberrare vidimus in generoſo quodam viro, quinquagenario majore. Solenne huic erat, ut vernali & autumnali tempore podagræ experiretur inſultum, cum febre catarrhali, appetentiæ defectu, torminibus ventris, doloribusque dorſi accedentem, ita ut his tres vel quatuor dies affligentibus, dolor poſtea & tumor in majoribus utriuſque pedis digitis prodiret. Licet autem nunquam hæmorrhoidum fluxum habuiſſet, medicus tamen hypotheſi addictus, quaſi omnis podagra à defectu hæmorrhoidum ortum traheret, autumnali tempore, quo podagra impetere ſolebat, paulo ante ſuetam periodum, venæ fectionem inſtituit, ſed paucos poſt dies atrocia tormina & dolores preſforii in latere ſiniſtro, cum appetitu proſtrato invaſerunt acceſſitque febricula circa tertium diem auctior facta. Erant qui morbum colicam eſſe aſſeverabant, ſed à carminativis internis & externis exacerbabatur, alii febrem vocabant; ego vero quum dolores ſubito ſæpe in digitum pedis tranſire exaudirem, ſubefſe materiam arthritico-podagricam intus retentam iudicavi, quæ ſymptomata ſuſcitet, febrem autem catarrhali ſimilem, à refrigeratione corporis poſt venæ fectionem, ortum ducere. Suaſi hinc liquorem anodynum mineralem, effentiæ ſcordii nuptum, cum aliquot granis extracti croci & guttis aliquot olei ſœniculi, exhibui quoque pulverem bezoardico-nitroſum, cum infuſo theiformi ex veronica, ſcordio & liquiritia, quietem & decubitus in lecto injunxi agro ac ut pediluvii uteretur. Ita demum comparuerunt dolores in pedibus & per aliquot hebdomades perſiſterunt, ceſſantibus penitus internis paſſionibus. Primus medicus ulterius quidem urgebat, adhuc ob hæmorrhoidale negotium venam eſſe ſecandam, ſed æger damno ſapiens conſtanter renuit: & recte quidem, quum ipſe non eſſet

effet plethoricus, sed ad cachecticum magis affectum inclinaret, neque dubium est, quin, si iterata sanguinis missione naturæ subtracta fuisset energia materiam nervis inimicam internis partibus altius infixam, ad exteriora pellendi, infelix subsequutus fuisset eventus.

15. Multa certe nobis nota sunt exempla, ubi inflante podagrico morbo, abortis torminibus in ventre & spastico dorfi dolore, affectus, præsertim in plethorico corpore, pro sanguinea, sive hæmorrhoidali colica fuit habitus, & ad provocandum fluxum, iterato venæ sectio administrata, oblata carminativa & pilulæ balsamicæ polychrestæ; quibus tamen nihil aliud effectum, quam ut dolores tensivi in abdomine, inflationes & anxietates mirum adauctæ fuerint; propinatis vero diaphoreticis fixioribus & mineralis prosapiæ, mox conquieverunt omnia, simul ac rubor ac tumor in extremis pedum prodiit. Sæpius tamen ejusmodi intus latitans arthritica acris materia medentibus imponit, ut omnia alia subesse putent, ac, ut subinde vidimus, abortito hinc asthma convulsivo, tumore pedum oedematoso abdominisque inflatione stipato, hydropem præscindere velint & fortiora purgantia, ex gummi guttæ, extracto esulæ aliisque offerant, invalescente inde malo, tumore crescente, anxietate adaucta, inquietudine, inappetentia, quin morte subsequente; quum alii, asthma ex hac causâ laborantes, potu thermarum Carolinarum tempestivo, facile convalescant, propulsa ad extrema ab interioribus perniciofa materia.

16. Ita vero est, ex speciali observatione, universalem formant inductionem plurimi medentum, alii ex sola scorbutica succorum dyscrasia, alii ex sola plethora morborum origines petunt; sed sicut illi, ita & hi maxime errant, quum plures morborum sint causæ, de quibus singulis, obveniente uno morbo, prudenti medico cogitandum. Licet enim non negandum sit, plethoricum statum, præsertim in spongioso corpore, sub lauto & vinoso victu, circa ætatem virilem, insignem morbos eosque graves inferendi vim habere, nisi tempestive, vel per sanguinis missionem, vel per abstinentiam, aut aquarum mineralium usum, medicus eosdem avertat, vel ipsa natura per salubres superflui sanguinis per sedis venas diminutiones sese levet: licet etiam longæ hinc oriundæ ægritudines, potissimum doloribus in intestinis viisque urinariis contineantur; neutiquam tamen, nec nephritici, nec ischiatici, aut colici dolores, semper à sanguinis mole exundante, sed sæpius à sero impuro tartareo, vel scorbutica humorum impuritate, incunabula trahunt. Hinc perperam medici horum affectuum curationes moliantur per repetitas venarum in pedibus sectiones, per crebriorem usum pilularum ex aloe & gummatibus resinosis extractisque amaris, atque adeo frustra hæmorrhoidum elicere nituntur fluxum, qui nunquam adfuit, neque per vias minus dispositas exitum habere potest. Vidimus certe gravia & diuturna mala hac medendi ratione inducta, dum intercepta per crebriorem sanguinis missionem sordium per cutis poros excretionem, sanguis impuris scorbuticis salibus conspurcatus, ad partes in pelvi fitas, vesicam & rectum intestinum allectus, intolerandos dolores in regione pubis, cum continuo ad meiendum & desidendum stimulo, urinæ difficili mictu, vel plane retentione, stipatos creavit. Quin occurrunt exempla, hac medendi ratione, inflammationes, exulcerationes & sphacelationes vesicæ & adjacentium partium lethales, fuisse productas.

17. Potissimum dolor ille intestinorum acerbissimus & per intervalla affligens, cum extremorum frigore summaque virium dejectione, sæpissime exercet scorbuticos, suamque trahit originem à sero acri impuro,

quod alias naturæ beneficio ad summam cutim sub forma exanthematis ablegatur, ac purpura dicitur. Quod si enim cuticularis hæc excretio, vel frigore, vel alia causâ intercipitur, inquinatus & falsus hic humor ad intestinorum tunicas, nec non vesicæ membranas, admodum nervosæ & sensibilis texturæ, recedit, iisdemque sese insinuans, acutum in abdomine dolorem & enormem simul dysuriam, qua urina difficillime & cum summo ardore ac dolore exprimitur, ingignit. Quam gravia damna sic laborantibus intulerint, qui molimina hæmorrhoidalia subesse rati, unico venæ sectionis in pede, hirudinum aliorumque huc facientium usu medicationem aggressi sunt, pluribus quidem confirmatum habemus exemplis, quæ tamen cum circumstantiis enarrare studio prætermittimus. Id tamen in genere asseverare licet, sopitum quidem subtracto sanguine, esse doloris ad tempus sensum, sed brevi post majori recruduisse atrociam, quin, quum ob crebram sanguinis depletionem, impulsus materiæ perniciosæ ad exteriora magis fuerit cohibitus, in humoribus vero impuritas falsa scorbutica magis adaucta, quandoque funestus plane est subsequutus eventus.

18. Veniunt nunc proxime quædam dicenda de insigni noxa, quæ ex inconsulto & præpostero eorum usu, quæ ventriculum utrumque, tam majorem, quam minorem, quo nomine duodenum insignimus, vitiosorum humorum illuvie deplent atque exinaniant, præsertim si fuerint prosapiæ antimonialis, resultat. Hanc per superiora evacuationem non sine inverso, tam stomachi, quam duodeni peristaltico motu, & convulsiva quadam harum partium contractione fieri posse, inter omnes constat; quod si vero paulo pensiculatorius causas, quæ eandem provocant inquirere lubet, varii eas generis esse inveniemus. Vel enim à mole, seu saburra humorum vitiosorum, præsertim acido-viscidorum, in his latibulis hærentium, vel à subtili acrimonia humoris caustica tunicis ventriculi inhærente, vel etiam à solo vitioso motu partium nervosarum, ventriculi & duodeni nervoso-musculosa systole & diastole gaudens machina ad inversionem, contenta cum violentia expellendi, exstimulatur. Jam facile quisque ex sagacioribus medicis perspiciet, si causam nauseæ & conatus ad vomendum humores mole & vitio peccantes præbent, salutarem quam maxime esse horum per vomitum excretionem, quam, si natura paulo languidior est, sublevare utique & adjuvare per idoneum emeticum oportet. Contra vero, quando dispositio ad motum harum partium inversum & molimen vomitorium ab exigua quidem, sed causticæ & virulentæ indolis materia, eaque intra tunicas ventriculi hærente, vel à solo animi perverso motu, vel à consensu partium nervosarum ex spasmò evenit, patet omnino, plane nullum locum habere, sed potius perniciosissima esse, quæ penetranti & valentiori stimulo, ut stibiata solent, ventriculum & totum systema nervosarum partium graviter afficiunt atque exagitant, ut tristissima etiam mortis exempla inde in promptu habeamus, quorum profecto singula asserti hujus veritatem abunde testantur atque confirmant.

19. Licebit proinde ex multis quædam tantummodo memoratu digna exempla enumerare, quæ aliis quam maxime in meliorem cautionem, cum deliberatione & prudentia exhibendi emetica, inservire poterunt. Vir triginta aliquot annorum, sanguineæ complexionis & habitudinis spongiosioris, liberaliori & continuato vini spirituosio potu se exercuit, aliquot post diebus corpori, propter incitationem motum sudore perfuso, copiosum frigidum potum immittit, à quo mox male se habuit, coorta febricula & anxietate, cujus avertendæ causa emeticum antimonialis prosapiæ sat potens oblatum fuit: vomuit,

sed

sed anxietas, inquietudo & ardor circa præcordia, cum summa virium prostratione, aliquot dies sequebatur, tandem convulsio & mors. Facta sectione ventriculus mire inflammatus repertus fuit. Quis non perspicit, nullam plane hic adfuisse propinandi emeticum indicationem, quod vel jam à frigidiori potione factam inflammationem exarcerbare, vel eam, in ventriculo ad illam disposito, excitare debebat.

20. Fœmina sensibilibioris & teneræ constitutionis, spasmodicis hysterice obnoxia, tumidam & cachecticam faciem habens, sumit emeticum, quod vehementes vomitiones movebat, non multo post caligant oculi & plenarie visio amittitur, neque restituta fuit. Quis non hic clarissime intelligit, pessimi hujus mali causam fuisse fortius vomitorium in fœmina, quæ jam laborabat spasmodicis, quibus ordinario sanguinis & feri copia ad caput fertur, quod, cum jam ipsa in operatione violentius factum fuit, à sanguine stagnante serum secessit per poros & descendens ad nervorum opticorum thalamos, eos comprimendo, immedicabilem hanc læsionem oculis attulit.

21. Quidam sanguine plenus, annorum quadraginta & simul hypochondriacus, spongiosi corporis habitus, vere, cum nondum sanguinem misisset, sumit purgans cum emetico, quod ultra viginti sedes excitavit, nox erat inquieta, mane cum surgeret & frigidus aëri sese exponeret, protinus in maximas anxietates, virium languorem, vertiginem cum extremorum refrigeratione & tremore, incidit, secta fuit vena & datis diaphoreticis & confortantibus paulatim symptomatum atrocitas sese remittit. Plethoricis atque hypochondriacis nunquam fortiora purgantia dare expedit, eo quod fortes spasmos concitando, cum vehementia sanguinem in partes pellant, ubi congestus magnis malis procreandis idoneus est. Virgini ex defectu mensium laboranti, eo tempore, quo natura incepit spasmodicis uti ad superfluum per uterum expurgandum, ex medici consilio datum fuit emeticum validum, à quo quidem vomuit, sed cruorem copiosum, cum lypothymiis; nihilo minus tamen, magna cura adhibita, vitam servavit. Non levis in praxi error est, dare eo tempore, exagitantia, emetica & purgantia, quo natura in motu est & molimina spastica facit ad sanguinis evacuationes, quæ nec turbari neque ad alia inconvenientia loca facile transferri debent.

22. De noxio emeticorum intempestivo usu notabilis porro sequens est historia. Vir circiter quinquagenarius, sanus & integer viribus, gravissima correptus ira, mox tremore, horrore & frigore extremorum, cum ingenti præcordiorum anxietate viriumque defectione tentabatur & sequentem noctem insomnem, persistentibus adhuc hisce symptomatibus, transigebat, continuam percipiebat nauseam & ad vomendum dispositionem atque conatum, una cum labiorum tremore & oris amaritie. His symptomatibus jactatus importune flagitabat à medico vomitorium, qui dare illud primum renuebat, victus tamen continuis precibus porrigebat, sed quia sumto pharmaco cum summa difficultate & anxietate bis, vel ter tantum, pauca mucosa & biliosa vomiebat, ad meliorem operationem efficiendam, aliam poscebat dosin, quæ ipsi etiam concessa. Hinc non ita multo post in deterius versa omnia, aderant quidem continui singultuosi ructus, sed nullæ rejectiones humoris: affligebat præterea summa inquietudo, oppressio, spiritus gravis, intolerabilis ardens & anxius dolor in epigastrio, una cum extremorum refrigeratione, pulsu parvo & nonnihil intermittente. Petitum demum à me auxilium, tum ego accedens, ægrum extrema fere agentem inveni, eo quod vehementia spasmodicorum omnes fere corporis nervosas sensui & motui vacantes partes occuparat. Et quum mecum perpenderem, à sumto veneno

arsenicali eadem suborta symptomata largiori potu lactis & olei cujusdam expressi, v. g. amygdalini, felicissime sæpe sublata & hominem ex mortis faucibus ereptum, pariter lac bubulum temperate calidum succellive, at copiose, ebibendum suasi. Inde insigniter quidem atrocitas hæc symptomata conquiescere & remittere per noctem videbantur, sed subsequenti mane ipse patiens, sine medici præscitu, unciam unam salis Ebshamensis ad aperiendam, quæ firmiter clausa, alvum flatuque & anxietates tollendas sumit, quo priora symptomata & majori adhuc atrocitas reversa, ut assumtis licet analepticis, antispasmodicis, animam, intra tertium à sumto primo emetico diem, efflaverit.

23. Est certe allata hæc historia vel hanc ob causam memoratu digna, ut quisque medicorum inde discat, innocens alias emeticum stibiatum, moderatori dosi, uti tartarus emeticus, ad grana duo datum, pro certa dispositione spasmodica, nempe ventriculi & partium nervosarum, veri veneni vim habere & lethalem effectum exserere posse. Qua de causa quisque circumspiciat medicus, non tam facilis ad dandum emeticum esse debet, nisi prius probe corporis ægrotantis natura, ventriculi dispositione & causa urgente ejusmodi remedium, perspecta. Deinceps illa quoque utilissima cautio ex funesto hoc casu elicienda: scilicet neutra eaque amaricantia, ut sal Egranum, Ebshamense, Sedlicense, ad deducendos efficaciter & sine molestia per alvum vitiosos humores egregia, tali in casu, ubi primæ viæ spasticis stricturis tenentur, neutiquam posse habere locum, adeo, ut præsentissimam etiam hoc modo & hac ratione possint noxiam inferre.

24. De eodem hoc incongruo & lethali emeticorum usu, ab medici errore, falso causam morbi judicantis, digna notatu hæc est historia, quo inde medici in inquirendis causis circumspiciat esse discant. Generosa erat puella, annos habens quindecim, tenerioris admodum ratione corporis constitutionis, sedati etiam valde & compositi animi, quæ nondum passa mensium profluvium, per aliquot hebdomades male habuerat & ingenti pressa fuerat languore, qui vires dejecerat, ad animi fere usque defectionem, una cum anxio quodam circa præcordia sensu, quam Germani dicunt, *das Ubelseyen*, defecerat præterea ciborum appetentia, & paucis sumto cibo, non tantum compressionem, sive pressorium dolorem in epigastrii regione senserat, verum etiam eructationem nauseosam & vomibundam, urgente simul tussi sicca, alvo clausa & paucis somno. Medicus consultus firmiter sibi persuadebat, contradicente licet matre, causam horum malorum esse pituitam tenacem, copiose ventriculo inhærescentem, quæ vomitu sit ejicienda, eamque excretionem ac viam quoque ipsam communstrare naturam. Annuit tandem mater assumtumque emeticum, nescio quod, quo puella ingentem quidem pituitæ viscidæ copiam multumque liquaminis pituitosi ejecit, sed tantum ab eo virium sensit decrementum, ut, quum erecta in statura esset, mox animo linqueretur, respuit simul omnem medicinam & cibum, eo quod anxius dolor inde augeretur, & tertio à sumto pharmaco die placide exspiravit.

25. Medicus in hoc casu ad menses, qui sub hac ætatis periodo erumpere solent, neutiquam respexit, & quod à sanguine per uteri ostiola liberum exitum non inveniente, sed refluyente ad superiora, præsertim ventriculum, illa symptomata, quibuscum conflictata fuit virgo, originem suam traxerint. Hoc enim si incidit, emetica omni modo evitare expedit, ne impetuosiori concitato sanguinis ad venas stomachi affluxu, vel ipsæ ruptæ cruentum cieant vomitum, vel sanguis, præsertim impurus, ibi incarceratus, lethalem sphacelum producat, maxime in tenerioribus, delicatis

tis & sensibilibus naturis. Vidimus quidem, emetica purgantibus in pilulari forma admixta, in habitioribus & plebeiis, ubi menses retardati fuerunt, non sine fructu data, sed tamen ubi nondum fluxerunt, vel per uteri vias exitum invenerunt, aliter longe procedendum, & hæc medendi ratio neutiquam locum invenit.

26. Pari ratione periculosum est, vomitoriam propinare medicinam, quando ventriculus citra materiam ibi inhærentem peccantem, solo motu per consensum & actu quodam, quasi immateriali, ad fastidium & vomendum lacescit. Memini pariter foeminæ, quæ post annum quinquagesimum, quo ordinario mensium finis esse solet, propter congestionem sanguinis circa venas & vasa majora in lumbis, & ob urinam secedentem fabulosam, quæ exquisitè sentientem uretherum substantiam arrodere & irritare solet, dolores pressorios in ventriculi regione usque ad dorsum pertingentes, cum nausea & stimulo ad vomitum subinde, præsertim noctu, patiebatur, sanguine nimium à situ in dorso incalescente. Medicus hujus symptomatis causam esse censebat cruditates in stomacho & suadebat mixturam, quæ grana duo tartari emetici habebat, quæ quidem vomuit multa cruda & pituitosa, ab eo vero tempore id consequutum est, ut gravissimi cardialgici dolores, five vehementes spasmi præcordialem regionem per intervalla sæpius tenuerint, quotiescunque vel dolor circa renes suscitaretur & fabulosa urina secederet, vel cibus difficilius solutionis, aut flatulentus assumeretur, vel foemina leviter ira commoveretur. Nam mira est consensus renum, seu potius uretherum, cum ipso stomacho, propter communem, valde nervosam harum partium texturam; quo etiam fit, ut, quod quotidianæ observationis, à calculo firmitus & diutius uretheri impacto, nulla cibi sit appetentia, sed continua nausea, ructatio & ad vomendum dispositio, cum summa molestia.

27. Neque minus crebriori experientiæ suffragio constat, quod ubi genus nervosum in quadam parte, etiam remota, in morbis patitur, ventriculus non modo inde afficiatur, sed & ipsa emetica & purgantia illum plus debilitent ejusque functionem lædant; id quod etiam sequens historia uberius confirmat. Novimus foeminam septuaginta annorum, quæ post refrigeratum nimis tempore hiemali corpus, in vertiginem incidebat, quam brevi post insultus sequebatur apoplecticus, convulsivis colli motibus stipatus. Venæ sectione in pede & antapoplecticis refocillata, conatum experiebatur ad vomitum, & assumpto calido iusculo, multum etiam pituitæ viscidæ eructavit. Medicus igitur causam hujus insultus in ventriculo delitescere ratus, ad hanc novique paroxysmi recursum præscindendum, postquam ægra noctu bene dormisset, sequenti mane porrexit emeticum, ex granis XX. radicis ipecacuanhæ & grano uno tartari emetici, quod tres provocati vomitus cum maximis cruciatibus & angustis, paulo vero post novus accessit insultus apoplecticus, cum intumescencia & magno circa oculum tumore, difficillima respiratione & stertore, donec post duodecim horas ægra animam efflaret, effluente post mortem ex naribus, auribus & oculis ingenti feri putridi copia. Perperam oblatum esse huic apoplexia tactæ vomitorium, merito judicandum; quandoquidem in ventriculo nec vomitus, nec apoplexiæ fuit causa, sed is potius fuit symptomaticus. Notum enim est, in omnibus capitis & nervorum, etiam à causa externa, morbis, stomachum in consensum trahi & ad vomendum adesse inclinationem, eaque propter sistendos potius esse hos spasmos, quam promovendos & intendendos. Comperit quoque ex pathologicis est, apoplecticum insultum à sanguinis & humorum congestionem ad caput, ob spasmos inferiorum partium obori-

ri, quumque hæc congestio sub vomitu augeatur, patet utique, novo insultui per emeticum ansam fuisse suppeditatam.

28. Porro, securus quidem emeticorum usus est in febribus, si prima regio sordium sentina scatet, ac remissionis tempore evacuatio instituitur; sed quando sub ipso paroxysmi cum frigore accessu, quo ventriculus & partes nervosæ spasmis afficiuntur, propinatur & corpus præterea commotum ira, quam semper spasmicæ circa ventriculum comitantur stricture & quæ totum nervorum systema præter naturam afficitur, veneni naturam & virtutem induunt. Confirmatum id habemus memorabili exemplo foeminæ viginti & quod excurrit annorum, ad iram admodum pronæ. Hæc quippe iracundiæ affectu percita, refrigerato simul corpore cibisque præviæ materiæ ingestis, incidit in tertianam, gravibus symptomatibus, horrore, rigore, stimulo ad tussim ac vomitum, nec non anxietate stipatam. Instante tertio paroxysmo, paulo ante ipsius accessionem à chirurgo tria tartari emetici sumit grana, sed adeo exasperata inde symptomata, cum extremorum frigore, horrore, rigore, vomitu alvique dejectione, ut lethalem adesse catastrophem putarent omnes, subsequente tamen æstu, atrociam remisit sensimque conquievit febris impetus. Interim remansit virium prostratio insignis, & redeunte nova accessione, eadem symptomata eadem reversa sunt vehementia, licet nullam plane interea assumeret medicinam, & plus quam decies vomuit totiesque etiam alvus secessit. Repetente æstu, iterum remiserunt symptomata, sed magis quam antea languit nihilque cibi vacuo die assumere potuit ægra, ac insultante vehementiori adhuc quam prius unquam paroxysmo, ob virium defectionem in lipothymiam incidit, cum sudore frigido, pulsu parvo & inæquali perpetuoque ad vomendum conatu, mens quoque emota ac demum mors successit, halitu ex ore reddito frigidissimo. Licet igitur ea motuum spasmicorum sit ratio, ut ab impetu ad tempus remittant ac postea iterum repetant; sumto tamen in paroxysmo emetico & introducto per illud pejore in nervorum & nervosarum partium systema ad spasmos dispositione, non mirandum, insigniter increvisse motuum febrilium vehementiam & junctas febrium insultui vomitiones alvique dejectiones adeo fuisse adauctas.

29. Luculenta porro de noxa emeticorum præpositere datorum hæc est observatio: Generosa quadam foemina sexaginta & quod excessit annorum, sanguinea, ob diuturnum mariti morbum ipsiusque obitum gravi & longo afflictæ fuit mœrore & ab aliquot hebdomadibus multum conquesta de summo languore virium, de tensivo circa hypochondrium sinistrum dolore, nec non ardore sub cordis scrobiculo. Alvus simul erat valde adstricta, noctes insomnes, appetentia dejecta, omnia cum nausea & fastidio ingerebat, neque propter impensam debilitatem lectum relinquere poterat per integrum mensem. Secta fuerat vena in pede; data analeptica temperata, quia calida ferre non poterat, alvus per clysteres aperta, liquor anodynus & pulveres temperantes nitrosi propinati, sed eo usque incassum. Visitabat autem interea ægram alius quispiam medicus, qui primum medicum malum non intelligere & ventriculum saburra vitiosa obpressum penitus esse asseruit, simulque se brevi tempore ægram sanaturum esse confidenter pollicitus est. Obtulit hinc postera die pharmacum, quo sumto mox ejecit miram cruoris nigri quantitatem, ita, ut sex vomitibus plus quam sex libræ eructarentur; videbatur etiam ægra à vomitu melius se habere, sed mox in tam grave animi incidit deliquium, ut paucis post horis obdormisceret. Foemina hæc, omni dubio procul cachectica, viscera, præsertim lienem & hepar, sanguine infarcta habuit;

vasaque ventriculi cruore turgida. Id enim post impensio-rem luctum ac diuturnum moerorem sæpe evenire solet in foeminis maxime debilibus & ætate gravibus, ut lenta gliscere videatur febris & quasi hectica, cum dolore circa hypochondrium sinistrum, languore & inappetentia. Licet igitur hæc foemina ab interitu vindicari non potuisset, medicus tamen mortem ex errore acceleravit, quia mali causam in ventriculo hære judicans, vomitus elicit, quibus vasa stomachi brevia rupta & cruor tam copiosus per os egestus est, cum lethali lipothymia.

30. De cruenta vomitione quoniam jam facta est mentio, incidit in memoriam observatione non indignus casus, de foemina idemtidem generosa, vix **XXII.** ætatis annum egressa, tenerioris & sensibilibioris constitutionis, à matre hysterica prognata & ipsa hystericis passionibus obnoxia alvique adstrictioris. Laborarat hæc duobus abhinc annis tertiana, quæ à medico, quibus nescio, abacta quidem fuerat, sed languerat ex eo ciborum appetentia, ægra male semper habuerat mensesque per tres menses restitabant. Primus in consilium vocatus medicus gravidam ipsam esse judicabat, quod tamen plane ipsa negabat; alter vero extraneus medicus ad menses emovendos misit elixirum quoddam aloeticum, succinatum, amarum, cum oleo sabinæ mixtum, quod ter quotidie ad gtt. **XXX.** sumsit, à quo tamen aucta circa præcordia anxietas & ardor cum virium languore. Accersor hinc ego ædesque intrans obvium habui in hypocaufti limine maritum, phialam argenteam liquamine instar loturæ carnis, innatantibus atris grumis, repletam, quod vomitu rejecerat ægra, manu gerentem, & lecto postea assidens, iterato ægram majorem grumosi & corrupti cruoris quantitatem eructare vidi, donec accedentibus lipothymiis pulsusque facto inæquali, viginti quatuor post horas, mors vitæ faceret finem. Scilicet, sæpe accidit, ut post febrem, præsertim male curatam, mensium subsistat fluxus, & regurgitante ab utero ad ventriculum, lienem & hepar sanguine, ejusmodi, quæ meminimus, ingruant pathemata. Sed hoc ubi contingit, perniciosum maxime est emmenagoga calida offerre, eo quod sanguinem exagitant eisdemque orgasmum & turgescientiam inducunt, qua facile ventriculi venæ demum rumpuntur.

31. A noxa emeticorum remediorum veniendum est ad damnum, quod validiora purgantia data adferunt. Foeminæ cachecticæ & valde repletæ, obesæ, quæ pedes habebat tumidos, exhibetur purgatio, quæ drachmam semis extracti panchymagogi Crollii & grana octo resinæ gialappæ habebat, quarum usum mox cum cardialgia atrociora tormina excipiebant, altero die nec manum nec pedem poterat movere, memoria quoque erat imminuta. Non aliunde hujus mali origo, quam à forti purganti petenda est, nam gialappæ resina firmiter intestinorum tunicis adhærescens, ingentes suscitât spasmodicas contractiones, quarum vehementia impurus & serosus sanguis ad caput & spinalis medullæ principium pellitur, ubi periculosa feri stagnationes hæc mala protulerunt. Foemina tenerioris & sensibilibioris texturæ, sub principium autumnii in febrem catarrhalem cum coryza, tussi, alvo adstricta & glandularum tumore incidit. Præter pectoralia & emollientia datur quoque purgans, quod mercurii dulcis grana decem & extracti panchymagogi Crollii grana viginti habebat, hoc sumtum de nocte incredibiles fecit anxietates cardialgicas cum vomitu viridi, ventrem quoque tormina fatigant, cum aspectu faciei miserrimo, ut crederes illam morti vicinam. Clystere infuso ex lacte & carminativis & supra dato cremore hordei cum diascordio Fracasiorii & oleo amygdalarum dulcium, sedibus aliquot subsecutis & sudore oborto melius se habuit. Non dubitandum

est, quin intempestive hoc casu datum purgans symptomatum horum gravium causa fuerit: nam, quandoque natura est in motu, & spasmi adsunt ad aliquid expellendum, alvusque simul ob spasmos dura & contracta est: tunc consultum nunquam, acri stimulo membranosas ventriculi & intestinorum partes exagitare. Multo vero deterior res est, ubi acidi corrosivi prima in regione humores resident, qui juncta acrimonia purgantium nervos præcordiales vehementer adfligunt, unde anxietates & id genus plura pathemata.

32. Infans aliquot mensium à nativitate bene se habuit, dormivit & per alvum excrementa reddidit. Mense septimo, sub accessu dentitionis, male se habet, alvus non bene respondet & excrementa secedunt viridia, corpus calet; inquietus est, ingeruntur multa & varia remedia, frequentius quoque offertur ad alvum laxandam pulvis radice gialappæ ad grana sex cum syrupo rhabarbari, clysteribus quoque crebrius alvus tentata, subsecutæ fuerunt cum febre convulsiones & mors. Tametsi dentitio in infantibus facile convulsiones producere possit, minime tamen adprobamus hanc methodum, quando omnia sunt propter dolorem in spasmo, motu & contractione, acria quod dentur purgantia & copia ingeratur medicamentorum, eo quod hæc spasmos graviores efficiant & naturæ vires mirum fatigent, potius dolor blande demulcendus est anodynis, diaphoreticis & nervinis & clysteres blandi ac oleosi injiciendi, hinc, remittente dolore & spasmo, sæva symptomata sponte quiescunt vel facile avertuntur. Auro enim carior debet esse hæc practica regula, naturam à morbo irritatam non ulterius acribus medicamentis esse irritandam. Novimus infantes, quibus, cum alvus non recte responderet, datum ex gialappa purgans aliquoties ita deiecit intestinorum tonum, ut alvus nunquam ad pristinum statum redierit. Nihil enim pejus est, quam ventriculi & intestinorum tonum infantium purgantibus pervertere, quo salvo & incolumi ipsi optime valent, quo deperdito semper eorum vita & sanitas periclitatur.

33. Sanus & robustus homo, tempore verno, post venæ sectionem petit, præservationis causa, à medico purgans, quod constabat ex extracto hellebori nigri, gummi guttæ, resina gialappæ, trochiscis alhandal anagranis octo: forma pilularum sumsit, inde anxietates passus est cum duobus vomitibus & quatuor sedibus, circa vesperam pulsus fit celer, siti afficitur, nox est inquieta. Medicus altero mane accersitus, existimans multos pravos succos in primis viis latere, qui non sufficienter evacuati essent, iterari hoc purgans jussit, sed secuta fuerunt ingentia tormina, cardialgiæ & colicæ inflationes, aliquot sedibus subsecutis: appetentia dejiciebatur & summus aderat virium languor, juscula data fuerunt hordeacea, melius quidem se habuit, sed ex eo tempore nunquam non de tensivis flatulentis, mala digestionem & alvo non recte respondente conquestus est. Hic casus nos docet & infimul admonet, purgantia fortiora, etiam in sanis corporibus, ventriculi & intestinorum morum peristalticum ac tonum ita lædere & invertere posse, ut ad eum reparandum non facile rursus locus detur: sique id præstant in sanis & robustis corporibus, multo magis offendunt imbecilliora. Et hæc quoque historia veritatem *aphorismi XVI. Sect. IV.* qui est: *veratrum periculosum est sanas carnes habentibus & aphorif. XXXVI. Sect. II. sana habentes corpora, dum medicamentis purgantur, cito exsolvuntur*, eximie corroborat.

34. Intempestive quoque data sudorifera morbo præbere posse causas; selectiores observationes & morborum clinicæ historiæ luculenter testantur. Vir sanguine plenus & robustus, quadraginta annos natus, ante sanguinis missionem vel alvi ductionem, cum

ex dolore tensivo scapulæ dextræ laboraret, sumsit à medico tincturam bezoardicam, cum spiritu cornu cervi succinato mixtam, paulo largiori dosi, lecto probe tectus circa noctem & summo mane, non sudavit, sed dolor scapularum non mitior, sed potius gravior redditus, in consensum pertraxit colli musculos, ut in nullum latus flectere posset, jungebatur ingens dolor capitis in latere dextro, quem postea sequebatur acris defluxio calida ex oculis cum rubore diuturna, adhibita venæ sectione & purgatione, nec non admotis pediluviiis & infusis herbarum calidis, quæ transpirationem movebant, se remiserunt quidem hæc symptomata, defluxio autem ex eo tempore mansit in palato per annum & ultra, cum perpetuo fere uvulæ delapsu, cui malo tabaci fumus tandem egregie succurrebat, nihilo minus, humida regnante tempestate, hæc relaxatio mox fauces & uvulam rursus petebat. Quæ vitia non aliam agnoverunt originem, quam quod sanguine & succis repleto datum fuit cum regimine forte sudoriferum, quod cum impetu tenacem sanguinem in angustias vasorum & glandularum protrudit, ut adeo, circulatione sanguinis ita impeditiori facta serum per poros secedere coactum acres has defluxiones concitaverit.

35. Fœmina præter morem gravi concitatur iracundia, sensit exinde anxietatem & constrictionem circa præcordia cum appetentiæ dejectione artuumque tremore. Sumsit ex consilio amicæ spiritum cornu cervi volatilem paulo liberaliori dosi & ad sudorem corpus composuit. Ab hoc tempore in artuum dolorem, universi corporis languorem ac lentum calorem diu adfligentem incidit, ut hæctica & phthisi laborare ab omnibus crederetur, lacte tandem caprino diluto cum infuso veronicæ & pulveribus nitrosis & bezoardicis & laxante ex manna vires, sed non in totum recuperavit. Quid absurdius hic potuit excogitari, quam calido sudorifero saburram biliosam primis viis inhærentem, quæ per sedes debebat vacuari, ad habitum corporis & nervorum systema propellere, ubi has torturas excitavit; saluberrimum enim est monitum sapientissimi medicinæ parentis HIPPOCRATIS *aph. 21. Sect. I.* per convenientia loca materiam, quæ educi debet, esse ducendam: sique loco remedii, quod sudorem movebat, oblatum fuisset clementer laxans cum temperante pulvere mixtum, immunis certe ægra à perniciosissimis hæc symptomatibus vixisset.

36. Neque vero facile majora damna ac detrimenta in medicina, quam per opiatorum abusum, fiunt, in quorum confirmationem perpaucas hoc loco observationes placet inferere. Vir triginta annorum sanguineo-phlegmatici temperamenti per omnem vitam integer, sanus ac incolumis, vino Rhenano per frequentes computationes se nimium opplevit, à quo tempore in alvi incidit fluxum aliquot septimanas durantem, cujus sistendi fine, medicus porrigit pulverem, qui opium torrefactum capiebat, de quo intra viginti quatuor horas duodecim sumsit doses, quarum quævis duo grana opii habebat, quo facto minuebatur quidem nimia alvi dejectio, sed ingentes passus fuit anxietates, abdominis flatulentias, spasmos, somnus erat inquietus, virium languor & digestio depravata fuit & subinde conquerebatur æger, totam ipsius naturam esse in pejus mutatam & mire debilitatam. Diu durarunt hæc symptomata, ad quorum vehementiam tollendam plures medicorum in consilium sunt adhibiti, qui morbum habebant pro hypochondriaco & variis usi sunt remediis, sed plane frustraneo effectu, siquidem perpetua aderat ructuum & flatuum copia, anxietas, inquietudo & alvi crebrior cum dolore dejectio & tantus in ventriculo & ore acor observatus, ut aquam fortem æmulari videretur; juncto calore præternaturali, urina rubicunda cum sedimento, extremæ partes

ut plurimum refrigerabant, & tunc in dorso sudor observatur. Laboravit ex hisce symptomatibus jam per plures annos, frustra adhibito thermarum & acicularum martialium, absorbentium, decoctorum ex lignis aliorumque usu. Evidentissime apparet ex hac morbi historia, quod copia vinorum acidorum, quæ tunicas intestinales læserunt, non minus, quam maxime per sinistram opii usum, ventriculi & intestinorum tonus ac motus ex toto fuerit destructus, cui unice gravia, quæ adfligunt, symptomata, accepta referenda sunt. Simili quoque ratione annotavimus in fœmina, quæ ex dysenteria laborans præpostere adstringentibus & opiatibus tractata fuit, eadem fere symptomata. Difficulus exinde, quam graviter opiata ventriculi & intestinorum tonum, quo nihil ad sanitatem tuendam est præstabilis, offendere possint.

37. Tametsi vero innumera, quæ minus prudens opiatorum usus intulit, mala compluribus observationibus à nobis notatis ostendere possemus, suffecerit tamen adhuc duas memorabiles attingere. Prima ita se habet: Vir quinquaginta annorum, sanguineus & bono corporis habitu præditus, podagra per multos annos detentus, incidit ob infortunium in diuturnum moerorem, cohibetur alvi fluxus cum virium languore, ciborum inappetentia. Medicus hisce malis opponit aquam liliorum convallium vinosam cum grano uno extracti opii quotidie sumendam, quod remedium per aliquot fere septimanas continuat propter somnum paulo quietiorem redditum, sed languor virium ingravescit, sudor fit frigidus, tandem pulsus fit celerior & simul debilis ac singultu accedente æger moritur. In dissectione corporis hepar, quoad concavam partem, nigrum, corruptum & sphacelosum inventum & latior macula nigra in dextro ventriculi latere, nec non in diaphragmate conspiciebatur, exiguis vero in vasibus sanguis reperiebatur. Quam inepte corpori raro ac spongioso, cujus robur ventriculi & universi corporis moerore fuit exhaustum, opiatum datum fuerit, saniorum judiciis relinquo.

38. Altera non minus notatū digna observatio hæc est. Alius vir triginta annorum, naturæ admodum imbecillis, sensibilis, hypochondriacus ob insalubrem diætam sæpe incidit in anxiam ventriculi & præcordiorum inflationem, alvi est segnioris, & incredibilis in ventriculo aderat acor, quem subinde absorbentibus contemperabat. Corripiebatur sæpius vere & autumnio tussi diuturna humida, cum inquietis noctibus & alvo tardius secedente; ad catarrhum itaque sistendum & somnum quietiorem reddendum, datur crebrius dosis pilularum de styrace cum vel etiam sine stimulo aloetico laxante. Neque male cessit medicina, nocte meliori secuta & tussi moderatiori. Non multo vero post conqueritur æger de maximis angustis circa præcordia, & vomitu spontaneo ejicit viscidam materiam bruni coloris, urgentibus anxietatibus affertur emeticum, quo ingens colluvies materiæ viscidæ, bruni coloris non sine euphoria ejicitur. A medicis hæc habita fuit pro atra bile veterum sive potius cruore ex vase brevi in ventriculum effuso & cum alimentis fermentatis permixto. Ejusmodi materiæ vomitiones etiam spontaneas postea semper fere incurrisse observatum fuit, quoties medicamentum, quod pauxillum opii continebat, sumsit, at color materiæ, quæ vomitu rejecta fuit, brunus, potuit succolada, quo non advertentibus medicis interdum usus fuit, debebatur. Nam sub febrili & catarrhali insultu ordinario strictior est alvus, quæ adhuc difficilior per opiatum facta est, unde ob ventriculi & duodeni atoniam auctam viscida & glutinosa, pinguis, qua gaudet succolada, massa diutius intestinorum tunicis adhærens, tandem naturæ robore & stimulo addito ejecta fuit. Nos admonere hæc observatio debet,

quod nec unquam, nisi vel cum magna cautione in omni febrium genere, nec non in corporibus hypochondriacis, opiata præbenda sint, ob id quod alvum retardando, impuras fordes in prima regione accumulent.

39. Ab opiatis ad mercurialia, salivationis fine adhibita deveniendum, utpote quæ proli dolor! haud levem corpori adfricare solent noxam, plurimorum malorum fundamentum constituendo. Quam in rem etiam juvat casum hoc loco proponere, qui adhuc sub nostris manibus versatur. Vir quadraginta annorum, macilentioris habitus, ob assuetam duram & falsam diætam, non adeo benignos succos in venis fovens, inficitur ex impuriori venere maligna lue, quæ artus & caput acerbissimis doloribus & tophis excruciat. Postquam plurima incassum data fuerunt, tandem ad salivationem devenit, quam argento vivo, intus & extus usurpato, promovere animum fuit, sed plane non fuit levatus, potius ab eo tempore de perpetua tensione, duritie abdominis, alvi tarditate & urinæ difficultate ac suppressione conqueritur, & nisi balneis emollientibus, nitrosis & balsamicis carminativis ac diureticis & laxantibus opem feramus, alvus dura, inflata & densa manet ac multum molestiæ procreat: reliqua symptomata, ut tophi, dolores acerbis capitis & artuum, remediorum à nobis datorum ope, sublata sunt, tantum quod illa noxia & spastica strictura, quæ in membranis intestinorum & vesicæ remansit, nondum ex toto vinci potuerit. Novi foeminam generosam, quæ à mercuriali salivatione per plures annos molesto ptyalismo laborat, capitis imbecillitate & dolore sæpius ad dentes atroci revertente, pedes plerumque sunt frigidi, parum appetit & corpus marcore conficitur. Atque adeo ex hisce vel satis evidenter apparet, mercurium non esse tam insens & innoxium remedium, ut imperiti volunt, sed satis potens & validum in concitandis gravibus malis, si eo velut heroico, cujus dexter usus magnam prudentiam desiderat, abutamur. Vix enim datur in rerum natura simile remedium, quod tam valide, stringendo nervos ac glandulas, humores lymphaticos in motum fortiolem ciere atque in palato & faucibus glandulosis, vel etiam capite congerere, præter argentum vivum potest, cujus operatio ex parte est constrictorio-spastica, ex parte relaxatoria, unde lymphæ congestio.

40. Dein, innumera mala sunt, quæ ab adstringentibus incaute adhibitis ad sistendos nimios sanguinis vel etiam alvi fluxus proficiscuntur. In memoriam incidit casus, ubi vir sanguine & succis plenus, Baccho & Veneri admodum deditus in nimium hæmorrhoidum, cui adætuus erat, profluvium dilapsus est. Medicus in consilium accitus ipsi præscribit electuarium ex conserva rosarum, semine hyoscyami, hæmate, semine papaveris albi, quod larga satis quantitate sumsit, sistitur fluxus & mens simul emovetur ac turbatur, non multo post incipit venter intumescere & verus fit hydrops. Ratio non adeo difficilis, sed in promptu est: nihil enim in lædendo ventriculi & viscerum tono potentius est narcotico, & quia jam in hæmorrhoidario nimia venere & vino debilitato, hepatis & omnium viscerum adfuit labes ac imbecillitas, effectum utique est, ut hepar & lien, quæ obstructionibus sunt opportunissima, crassis & lentis succis infarctæ, liberum lymphæ circulum ac iter intercipiendo, feri secessioni & vasorum lymphaticorum ruptioni causam atque occasionem præbuerint. Et, cum medicus curationem hujus morbi validioribus purgantibus adgredebatur, nostro quidem judicio plus detrimenti, quam emolumenti attulit: nam viscera indurata & infarctæ & vires imbecillæ medicamenta solventia, quæ vacuandis crassis & lentis humoribus idonea sunt, non facile admittunt, in minori vero dosi nihil aut pa-

rum opis ipsa conferunt, sed semper imbecillior ex horum usu fit corporis natura & ventriculus magis læditur.

41. Mensium fluxus & fluor albus in foeminis paulo fortioribus adstringentibus & externis & internis cohibitus, quæ non profert mala? gignuntur inde varia in uteris tumorum & ulcerum genera, scirrhi, phlegmones, cancri & hujus generis plura, quæ recensere nimis longum esset. Placet hanc in rem sequentem historiam adferre. Quadraginta annorum foemina, tenerioris & sensibilibioris texturæ, diætâ minus salubri & incauta utens, alvo laborat obstructa, capitis dolore & præcordiorum tensione, excernit instar albuminis ovi per uterum materiam singulis mensibus, quæ procedente tempore coloratior & acrior facta est. Medicus, præmissis purgantibus, utitur Grammaniana tinctura, quæ ob saturni saccharum & vitriolum martis sistebat hunc fluxum. Ab hoc vero tempore ingenti anxietate præcordiorum, languore, inquietudine & dolore lumborum premitur: accipit sudoriferum & inde universum corpus maculis rubris perfunditur, hinc anxietas præcordiorum & internus calor ex parte minuitur. Quando corpus frigore excipitur, purpura protinus recedit & pristina symptomata revertuntur. Tandem usu bezoardicorum purpura corpus deserit, & fluor albus revertitur. Quibus docemur, nunquam tuto adstringentibus sisti fluxum, sed materiam, quæ in vitio est, dum ad alia & interiora loca fertur, graviora suscitare pathemata. Discimus quoque ex præfata morbi historia, purpuram sexui foemino adeo familiarem morbum, ex lymphâ putrida & corrupta maxime suam originem & incunabula trahere.

42. Phthisis vera, quæ nunquam sine pulmonum exulceratione est, plerumque originem debet hæmoptysi, quando ipsa à medicis validioribus adstringentibus tractatur, quæ sanguinem ad hoc debile viscus ex inferioribus congestum, fortiter coagulant, inque motu ac circulo sistunt, unde dura oboriuntur tubercula, quæ cum tempore exulcerantur & instar carcinomatis pulmonum substantiam depascuntur. Temporis ratio non permittit per singula ire morborum genera & errores in praxi commissos ostendere; plures adhuc restarent detegendi, qui circa topicorum usum occurrunt: sed quia jam alio tempore pernobile hoc argumentum à nobis tractatum fuit, hinc candidum lectorem eo remittimus. Nihilo minus pauca tantum addemus.

43. Non minus censura digni sunt illi medentem, qui symptomata, neglecta morbi causa, oppugnant, & quando à solo motu per consensum vitiatum illa oboriuntur, causam eorundem materialem quærunt falsasque sibi formant medendi indicationes, in cujus confirmationem hanc adjicimus historiam. Foemina spongiosioris & sanguine turgidi corporis habitus, superato quinquagesimo ætatis anno subinde media nocte gravem dolorem pressorium ex dorso ad scrobiculum cordis excurrentem, cum summa anxietate, extremorum frigore & languore virium patiebatur, qui post quinque vel sex horas sponte iterum evanescebat, tertia vero, vel quarta quavis nocte iterum repetebat. Quum igitur ob victum lautum, vitam sedentariam ac cessans mensium profluvium, sanguis & humores nimium redundarent, idque si non causam, effectum tamen ipsa causa deteriore præstare posset, è pedis vena sanguinem detrahi jussimus, quo facto, exspiravit hic dolorifico spasmodicus affectus ac per mensem & quod excurrit siluit, postea vero recrudit, & non interrupta serie, non quidem interdiu, sed noctu, affluit. Stipabatur tamen longe aliis quam antea symptomatibus, continuo scilicet vomendi conatu, eructationibus & dolore, qui in regione lumbari incipiens,

incipiens, omnem abdominis regionem cum terminibus occupabat, aderat quoque ictericius faciei color. Medicus alius causam horum pathematum esse impeditum sanguinis per hepar infarctum vel obstructum, cursum autumans, elixiria & extracta amara, nec non salia aperitiva neutra & alcalia, pilulas etiam Becherianas frequentius obtulit, sed sæpius inde & sævior rediit affectus, appetentia penitus destructa, color ictericius intensior factus, vires quoque magis fractæ. Demum ego non modo in, sed & extra paroxysmum liquoris anodynus usum suasi, cum pulvere præcipitante nitroso, ter intra diem & noctem ex aqua menthæ & ceraforum nigrorum sumendum, quo etiam feliciter evanuerunt dolores cum vomitionibus, & urina prodiit rufa sabulumque crassum cum concrementis calculosis dimisit, disparente sensim flavescente faciei colore, licet postea ægra sæpius iisdem adhuc pathematibus fuerit attentata, quæ tamen, urina secedente sabulosa, iisdemque remediis semper iterum conquieverunt. Scilicet, ventriculi spasmi, sive dolor cardialgicus, nec non ictericius color, non modo à calculo & obstructione in receptaculis biliaris, sed & à rudiori sabulo, quod in angusto ureterum canali hæret, oboriri possunt. Accessit vero etiam in hac ægra nimia sanguinis congestio ad renes, ejusdemque regurgitatio ad ventriculum & intestina dolori in lumbis totoque abdomine, nec non vomitioni ansam præbuit, ipseque affectus hanc ob causam merito pro nephritide cardialgica & colica venditari potest. Pro præfervatione hujus mali venæ sectio cum fructu imperata fuit.

44. Et profecto mirandum est, adeo nonnunquam incuriosos esse in conquirenda morbi historia medentes, ut haud raro ne quidem de mali origine sint solliciti, sed pathemata vix inaudientes, cæco ausu medicationem aggrediantur non modo frustraneam, sed & perniciosam, cujus rei illustre præbuit exemplum vir generosissimus XXXVIII. annorum, aulæ Saxonicæ minister, sanguineæ constitutionis. Commotus hic fuerat gravi iracundia, & post hanc sumserat cibum in convivio simulque liberaliter hausserat vinum, ex eo vero pessime habuerat, asthma nempe convulsivo spasmodico oppressum fuerat pectus, noctu maxime ingravescente somnumque impediens, nil fere appetere potuerat, sed anxio pressus fuerat dolore, quotiescunque nonnihil assumerat, hinc corpus contabuerat, facies facta icteritia summaque imbecillitas subsequuta, ut medici ipsi ægrum pro conclamato habuerint. Demum accessit ad me formularumque medicamentosarum à variis medicis præscriptarum apparatus, ad octogenarium fere numerum ascendentem, mihi exhibuit, in quo nullum fere medicamenti genus omissum, sed purgantia, laxantia, emetica, salia aperientia, anodyna, carminativa, confortantia, stomachica, comprehensa, omnia tamen incassum usurpata. Etenim omnium, quotquot in consilium asciverat æger, indicationes & consilia, scripto etiam tradita, eo tendebant, ut crederent, hepar esse obstructum & sanguinis per hoc viscus progressum non recte succedere naturamque moliri hæmorrhoidalem fluxum, ideo promovendum; ut æger ne vestigium de hoc unquam percepisset. Ego vero, expensis curate singulis, in hanc ivi sententiam, ab ira sola subnatum fuisse hunc affectum & ex eo spasmodicas & convulsivas in nervis, qui ad ventriculum excurrunt, esse stricturas itemque in tunicis nervosis ductuum biliariorum, nec non in nervis diaphragmatis. Hinc medicationem aggressus sum pulvere diaphoretico, nitroso-cinabarino & liquore anodyno minerali, loco potus ordinarii suasi decoctum demulcens, una cum infuso theiformi ex summitatibus millefolii, floribus chamomillæ, cum semine fœniculi, post aliquod vero tem-

pus datum fuit sal nostrum aperitivum, cum pilulis balsamicis, & sic, adspirante divina gratia, intra mensem, derelictus ab omnibus æger, perfecte sanitati fuit redditus.

45. Perpauci etiam sunt medici, qui naturam & causas intermittentium, præsertim earum, quæ ex immoderata & diuturna aëris constitutione oboriuntur ac populares habent circuitus, recte perpendunt atque pernoscunt. Vidimus id elapsis aliquot abhinc annis, ubi ob tempestatem per totam æstatem & Septembrem nimis calidam & siccam, invaserunt intermittentes frequentissimæ, tertianæ, quartanæ, quotidianæ, mirum anomalæ & pertinaces, quippe quæ ex simplicibus in duplices, ex quartanis & tertianis in quotidianas degenerarunt, sæpe ac, ut annotavi, vel decies recidivarunt, nonnunquam etiam purpura chronica demum accedente. Causa vero hujus irregularis & refractariæ indolis, meo quidem judicio, vix alia esse videtur, quam quod medici firmiter perfliterunt in præjudicio pathologico-therapeutico, febrium causam esse humores tenaces primas vias obstruentes & in visceribus infimi ventris hærentes. Hinc enim factum, ut nonnisi evacuantibus, aperientibus & incidentibus totum curationis negotium conficere annisi sint, & datis liberali manu, vel quadragesies salibus neutris & absorbentibus, item pilulis ad imitationem Becherianarum confectis, alvinam evacuationem provocare voluerint, omisissis antispasmodicis & roborantibus, inter quæ utique chaccarillæ & chinæ cortex, crocus martis ignem non expertus, liquor noster anodynus mineralis, nec non extractum & pulvis florum chamomillæ, primas tenent, utpote quæ sanguinis motum ad corporis ambitum dirigunt & perspirationem, qua ad febres sanandas nihil salutaris, insigniter promovent. Sic igitur non mirum est, deteriores factas febricitantium res, ut diu & misere fuerint afflicti, quin novi exemplum tertianarii, qui mole absorbentium & incidentium obrutus, prævia li-
pothymia, plane fuit extinctus.

46. Detrimentosum non minus his in febribus eorum fuit molimen, qui autumarunt, declinante paroxysmo, sudorem, qui sponte prodit, medicamento sudorifero, tinctura, vel essentia alexipharmaca, esse eliciendum, quo natura in salutari hoc negotio adjuncta febrilem eo facilius è corpore proscribere possit materiam. Tametsi vero & rationis & experientiæ suffragio nitatur, tempore à febre vacuo, quo sanguinis progressus, pulsu teste, lentior, cum bonis ægrorum rebus perspirationem congruis præsidis secundari; nihilo tamen minus, quam superioris anni febres exvalde biliosa, salina sulphurea sanguinis & humorum intemperie ortum traxerunt, minus tutum ac è re fuit, medicamentis sanguinem commoventibus, nec non pulveribus stomachicis ex radice ari, punpinellæ, galangæ aliisque acrioribus compositis, extra paroxysmum exhibitis, magis adhuc rarefacere succos & ad progignendas ejusmodi acres biliosas fordes disponere, à quibus postea summæ virium dejectiones ad li-
pothymiam usque, sudores colliquativi cum purpura prognati. Magis potius rationi & experientiæ consentaneum fuit, succurrere pulveribus temperantibus, roborantibus nitosis & leniter evacuantibus mannatiss, una cum recto corticis chinæ usu, nec non leniter roborantibus salinis, cujus generis sunt mater perlarum & conchæ succo citri irroratæ, & quæ magni usus sunt, testæ ovorum in spiritu salis maceratæ.

47. Alii epidemicis his febribus decumbentibus incongruo corticis chinæ usu nocuerunt. Fuerunt enim, qui hunc in pulvere, una vel altera ante paroxysmi accessionem hora, plena dosi ad drachmam unam exhibuerunt, quum febris jam per aliquot menses corpus detinuisset. Tum quippe paroxysmus sequutus

longe acerbior, majori anxietate, inquietudine & corporis jactatione, ob auctos internos spasmos, stipatus, horror longe diutius perstitit viresque longe gravius fuerunt attritæ. Nihil enim perniciosius, quam chinam chinæ paullo ante paroxysmum, antequam fordes biliosæ in primis viis, vel sanguine contemperatæ & leniter expurgatæ sunt, offerre, eo quod hæc retinentur, & spasmi horum symptomatum auctores intenduntur.

48. Novimus sane præter hæc innumera adhuc exempla de intempestivo & imprudenti ad coercendum febrium intermittantium impetum chinæ chinæ abusu, cujus tamen usus tempestivus & prudens ob vim tonicam & roborantem, non modo in febribus, quæ intermittunt, verum etiam in aliis magnis vitiis plane mirabilem adfert opem. Et solemus sæpius hoc in sermone usurpare: nullum remedii genus melius, quid sit ars medica rationalis, ostendere, quam corticem istum febrifugum, qui, quando decenti ordine, dosi & tempore, habito respectu ad corpus & causam morbi, adhibetur, præstantissima est medicina; quibus non consideratis, quando sine discrimine & promiscue præbetur, innumerabilium malorum fit causa. Perpaucas saltem non ita pridem nobis obvias historias adjiciemus. Vir triginta sex annorum ante annum laborans tertiana, chinam chinæ copiosius sumsit: febris est suppressa, sed mensis spatio revertebatur & sæpius atque iterum ex eo tempore dolore circa costas spurias, ab uno hypochondrio ad alterum vergente, tentatus fuit, præterea cordis palpitatio, difficultas spirandi, oppressio constrictiva in pectore, conatus ad vomendum frequenter ægrum fatigant. Ira quando corripitur, ingens æstus, vertigo, gravitas capitis, caligo oculorum, quibus nihil ferme ob maculas exterius obversantes cognoscere potest, sopor & fluxus sanguinis quandoque è dextra nare accedunt. Quando dolor abdomen adfligit, ipse in regionem usque lumbarem pervadit, quæ quasi flatu impleta & tensa cum refrigeratione percipitur, & tunc flatibus abdomen intumescit, quibus per alvum transmissis malum mitescit. In artubus, item in humeris, sentit subinde dolorem vagum & ingentem in pedibus languorem & impotentiam. Theriacis Carolinis & pilulis nostris balsamicis & roborantibus stomachicis, Dei ope concurrente, tandem sanatus fuit. Affectus unanimi medicorum consensu habebitur pro hypochondriaco, neque is alius est, quia flatulentis & spasticis constrictionibus abdominis imo universi corporis, quibus natura hujus mali continetur, ægrum exercet; ob spasmos vero fiunt pressiones & congestiones sanguinis ad caput aliaque loca, unde symptomatum ratio petenda est. Ex quo apparet, turbatum febrilem motum per adstringentia, neque prius visceribus ab infarctu viscidorum humorum liberatis, neque materia febrili expulsa, chinam chinæ tam graviter tonum ventriculi & intestinorum lædere posse, ut affectus isti spasmodici, qui vulgo dicuntur hypochondriaci, resurgant, qui, si non matura succurras medicina, in viscerum inexpugnabiles obstructions vergunt & insanabiles fiunt.

49. Neque vero alienum, sed operæ potius pretium videtur hanc in rem adhuc unum casum in medium adducere. Foemina succi plena, sanguinea, in optimo ætatis flore constituta, quæ per omnem vitam alvum habuit adstrictiorem & acidis, præsertim ex citrio malo, multum delectabatur, ab insalubri diætâ & aura nocturna frigidiori, in febrem incidit tertianam, quæ post tertium paroxysmum china chinæ fuit sublata, remansit vero languor, inappetentia, dolor tensivus præcordiorum ac hypochondriorum, aspectus faciei miserabilis, pedes vero & abdomen ita successive pauco tempore intumuerunt, ut hydropica ab omnibus censèretur: tandem emeticis, amaris, diureticis

& roborantibus sanata fuit. Causam hujus mali in nihil aliud, quam in nimium & intempestivum chinæ chinæ usum rejiciendam puto, qui, præsertim in habitioribus, infarctus viscerum augendo & tonum partium debilitando sanguinis & lymphæ circulum, præcipue in pedibus & abdominis regione, segniorem & impeditiorem efficit, unde ingentes feri in habitum corporis porosum fiunt secessiones.

50. Majoris momenti est curatio intermittantium in gravidis, de qua bina notatu digna memoria tenemus exempla. Corripiebatur scilicet generosa foemina sanguinea, septimestrem foetum gerens, quartana, gravibusque jactabatur pathematibus, medicus tamen opinioni addictus, sanguinis missionem in intermittibus nunquam esse utilem, sed exacerbare febrem, ut vena pertunderetur admittere noluit, sed essentiis amaris, spiritu vini extractis, nec non pilulis balsamicis, iterato & larga manu datis, contra febrem pugnavit. Aegra vero inde ardorem persensit acriorem & calorem intensiorem, ad viginti horas durantem, cum exquisito dolore & ventris torminibus, præsertim paroxysmi tempore, ut metus etiam esset abortus. Secta demum tamen fuit vena & pulveres temperantes nitrosi cum aliquot granis corticis cascariellæ & chinæ fuerunt exhibiti, tam salubri effectu, ut febris omniaque symptomata brevi post evanuerint penitusque desierint. Etenim à nullo facile, vel efficacissimo remedio, tantum levaminis, in intermittibus, si manifesta plethoræ adsunt indicia, expectandum, quam à tempestiva venæ sectione, eo quod, exsuperante nimium sanguine & in majoribus ac mesaraicis abdominis vasis progressu libero intercluso, nec natura, nec ars, officio in curando morbo rite potest defungi.

51. Altera foemina, cholericæ constitutionis, octavo mense gravida, incidebat in tertianam simplicem, quæ illico quidem electuario cum cortice chinæ fitebatur, sed relinquebat pressorium & cardialgicum quendam circa præcordia dolorem, qui post sumtum cibum ingravescerebat. Paullo post rediit non tertiana simplex, sed quotidiana, longe acerbioribus symptomatibus stipata, dum continui vomitus sub paroxysmo urgerent æstusque nimium intensus corpus & vires mirum consumerent. Sanguinis missionem interdicebat virium defectus & crebra vomitio, optime vero profuerunt pulveres temperantes bezoardici nitrosi, infusum florum chamomillæ & externe cataplasma, quod ex fermento panis, aceto, spiritu vini, nucifla, caryophyllis & cardamomo paratum, calide ventriculo post paroxysmum impositum. Censura merito digna est prima medicatio, qua electuarium tempore quidem intermittente, sed non proportionata dosi propinatum, neque correctis prius & liberatis à saburra vitiosa primis viis. Nunquam enim hoc medicamentum antifebrile dare expedit, sub nimia sanguinis & humorum redundantia, nisi ubi prius omnia emunctoria sunt aperta & excretiones recte succedunt. Liberior etiam esse debet perspiratio, urina crassa & sedimentum ponens & viscidarum & biliosarum fordium prompta per alvum egestio, procurante hæc natura, sive sola, sive arte adjuta.

52. Ex hisce itaque adductis & probe perpensis liquidissime constat, nos non sine ratione medicos imperitos inter causas & fabros morborum constituisse. Optandum certe vehementer foret, ut res aliter sese haberet. At vero, de veritate rei luculentum præbent testimonium tot morborum historiae, si modo satis completæ paulo curatiori studio ac diligentia conficerentur. Nam sæpe sæpius facto ægrotantis scrutinio obtingit, ut mali, præsertim chronici, causa ac fundamentum medicus sua præpostera medicina & methodo fuerit. Et jam suo tempore hac de re conquestus est

est HIPPOCRATES, dum de victu acutorum §. XIV. prodidit. Novi medicos maxime contraria facere his, quæ fieri oportebant. Sicut vero nihil tam noxium & exitiosum est, ex quo non utilitatis quidam fructus peti possit: ita etiam non ferentior lux vel majus incrementum universæ praxeos studio accedere poterit, quam si quisque medicorum omni candore, fidelitate ac diligentia ejusmodi casus, ubi medicina male successit vel damnum intulit, observet, annotet ac citra ullius læsionem & cum silentio eorum, quos res tangit, in publicum proferat. Idem nobiscum sentit HIPPOCRATES L. de victu acutorum §. IV. Videntur mihi digna esse, quæ scribantur maxime hæc, quæ à medicis ignorantur scitu commoda & quæ magnas utilitates aut magna detrimenta adferunt. Etenim, ejusmodi observationum si copiam haberemus, certe futurum esset, ut longè majora incrementa ars & doctrina nostra salutaris ab hisce capere posset, quam ab ullo alio præsidio vel doctrinæ genere unquam factum fuit.

53. Reliquum jam est, ut causas explicem, quare medici tam facile & tam frequenter in medendo delinquant & noceant. Princeps quidem & primaria causa hæc procul omni dubio est, quod ea, quæ ad bene medendum pertinent, ignorent; & hæc quoque à sapientissimo nostro HIPPOCRATE lib. de vet. Medic. §. 16. allegatur, cum ait: *quapropter operosum est, ita exacte medicinam condiscere, ut parum in alterutram partem delinquas, quanquam ego etiam eum medicum vehementer laudarem, qui parum delinquat.*

54. Sunt vero maxime quædam præjudicia, quæ plurimorum animos invaserunt; causa multorum errorum. Plurimi sibi persuadent, medicamentum in se & sua natura quidpiam salutare custodire, quod salutem in morbis adferat ægris, unde non facile exitiale damnum ab ipso expectant, sed potius credunt, medicamenta pugnare adversus malum in corpore, neque ideo desistunt eorum copia ac varietate vim morbi expugnare. Denique & hoc malo præjudicio laborant, ac si dentur remedia certo morbo curando propria & accommodata. At vero, in iis omnibus toto cœlo errant: nam optimum etiam alimentum, & quod naturæ congruum & amicum est, imbecillo & in vigore morbi constituto corpori obest; quanto itaque magis, si non recte eo utamur, id præstabit medicamentum, quod neutiquam naturæ amicum est, sed eam alterat & corporis statum, ut HIPPOCRATES loquitur lib. de locis in homine, permutat. Neque ignorari debet, validiora & sic dicta heroica, quibus ars multum in retundenda rebellium morborum vehementia præstare potest, veneni quidpiam secum fovere, quod majori dosi celeriter universam motuum vitalium œconomiam penitus destruere valet; veluti res clara ac evidens est de acrioribus purgantibus, emeticis, narcoticis & de iis, quæ ex regno minerali mercurialis sunt prosapia.

55. Dein, non minimo præjudicio laborant medici, quod nimium fidant libris & auctoritatibus aliorum in praxi medica: nam quando perspiciunt, medicamenta in morbis mirifice laudata vel morborum adjectas curationes, statim hæc ipsa imitantur & similem sibi effectum pollicentur. Verum enim vero, provide certe & caute utendum libris practicis est, & magno judicio legi & ad severum unguem excuti debent, hinc doctissime à DAMASCENO aph. 2. & 3. dictum est: *operari secundum libros absque perfecta ratio-*

ne & solerti ingenio molestum est: quod videlicet ingenium solers ac perspicax juvet artem, ut idem ait, hebes vero ac torpidum contrarium omnino efficiet. Nam climata, eorum qui practica ediderunt, valde differunt, differt & hominum victus & vivendi ratio, differunt etiam anni tempora & morbus ipse, qui alio tempore alium induit morem ac genium, hinc non eodem modo cura vult tractari.

56. Denique inter causas, quare medicus multum damni sua medicina corporibus invehat & hæc non infimi momenti referenda est, quod pauci norint, naturam corporis nostri esse optimam morborum medicatricem, ut ab HIPPOCRATE in Epidem. præclare dictum est, quæ & sanitatem in nobis tuetur & morbos pellit & per convenientia loca debito ordine ac tempore, perniciosa quod est de corpore separat. Quare ob id HIPPOCRATES Lib. I. de arte: multos quidem sine medicis, verum non sine medicina curatos esse ingenue confitetur. Hanc vero methodum, hunc ordinem, has leges, hos motus, quibus natura sua sponte morbis medetur, paucissimi medicorum sciunt, observant, tuentur ac imitantur, alias non tam præcipitanter agerent, nec copia medicamentorum ægros obruerent & infirmarent, neque medicamentis vel arti effectum, qui solius naturæ opus est, tribuerent & sibi vendicarent.

57. Tum in eo admodum delinquere & nocere, qui medicinam faciunt, multoties observatum fuit, quod in medendo non tanta, quanta opus est, solertia & cura ad ægotantium vires, robur vel eorum imbecillitatem, aut sensibilitatem respiciant, in quo tamen innoxia & salutaris praxeos plane præcipuum momentum consistit, quod maxime HIPPOCRATES in suis curationibus urget, cum passim in scriptis suis velit, non tantum in medicina, sed etiam in victu administrando ad vires attendendum esse, adeo ut quod robusti superare & ferre possunt, debiliori natura præditos vehementer lædat, sicut id patet in lib. de victu acutorum, item de prisca medicina. Et Lib. de locis in homine in primis §. 55. solerter & expresse id monet, ut fortibus fortiora, debilibus debilia medicamenta exhibeantur. Multum quoque delinquere solent, quod, quando animadvertunt, medicamentum homini nihil grave patienti vel etiam in morbo chronico non nocere, idem velint dare, si vehementer viribus dejectus est, vel ex gravi morbo laborat. Et ut exemplo rem confirmemus, inter alimenta juscula nutritiva, vinum, inter medicamenta sal volatile oleosum, liquor spirituosus non facile illi, qui leviter vel etiam ex morbo chronico laborat, noxam adferunt, quæ tamen gravissima erunt, si homini debili & in acuto ac periculoso morbo constituto & ubi natura est in vehementi motu, hæc ipsa exhibeantur. Et placuit mihi hanc in rem bene quadrans insignis locus, qui extat apud HIPPOCRATEM Lib. de vet. medic. §. 17. *Non manifesti sunt mali & plurimi medici, quum curant homines, nihil grave patientes, in quos, si quis etiam maxime delinquat nihil grave faciat. Sunt autem multi tales morbi, & multo sæpius, quam graves, hominibus accidunt. In talibus sane delinquentes non sunt manifesti idiotis hominibus. Ubi vero obtigerit magnus & fortis & periculosus morbus, tunc ipsorum delicta & ars omnibus in conspicuo sunt.*


58. Ultimo loco & temperamentum medici, quo quisque gaudet, ad perversas morborum curationes multum contribuit, ut scite non minus ac vere BAGLIVIVS Lib. I. Cap. III. prodidit,

dum ait: sæpe medicus natura timidus & melancholicus, vel temperamento præditus, ut aiunt, frigido & humido, ob naturalem sui animi habitum, abhorret à remediis spirituosus, volatilibus, impetum facientibus, aliisque potentioribus; omniumque morborum curationem adgreditur per medicamenta humectantia, infrigidantia, pacem humoribus conciliantia & reliqua minus activa. Contra, qui temperamento fuerit calidus, biliosus, natura impatiens, ferox &c. posthabitis omnibus refrigerantibus ac levioribus remediis, nihil libentius præscribet quam volatilia, spirituosas, alcalia, aromatica, ferrum, ignem, vesicantia, purgantia vehementiora & similia maximi impetus & activitatis.

59. Ut itaque non nocëat, sed profit medicus opus est iudicio, quod secundum edictum HIPPOCRATIS *Lib. I. aph. 1.* non adeo facile, sed difficile est; & optime idem gravissimus Auctor *Lib. de victu acutor. §. 2.* *Mihi placet, ut in universa arte mentem adhibeamus.* Etenim, si ulla in arte accurata & longa deliberatione, consilio & circumstantiarum consideratione opus est, profecto est in arte medica: nisi enim quis in specie hominis, qui laborat, naturam, ætatem, consuetudinem, regionem, temporis statum, victum ac morbi indolem, morem ac statum accurate consideret, quæ ad morborum curationem necessaria esse, tum HIPPOCRATES *Lib. II. de rat. vict.* tum GALENUS in *Comment.* dixerunt, prorsus à scopo rectoque medendi fine aberrabit, cum non

omnes naturæ, ut belle dixit GALENUS in *Comment. & Libr. de componend. medicamen.* eadem medicamenta postulent, & quod uni salutare est, alteri noxium sit futurum.

60. Ex quibus omnibus clarissime constare arbitror, non sine ratione egisse nos, quando medici imprudentiam multorum & gravium morborum causam diximus. Nec illud quidem dissimulandum puto, plures hic bono animo errare medicos, neque ipsos animadvertere, quod, vel quantum sua medicatione damnum attulerint. Cum enim in morbis illud non assequantur, quod salutariter ipsa natura molitur, nec ad remediorum, quæ exhibuerunt, indolem & operandi rationes satis attendunt, nec tempora dignoscere laborant, sed ea promiscue exhibent, quæ ab aliis iusto loco & tempore exhibita profuerunt: facile hinc fit, ut securi ipsimet tum maxime noceant, quum minimum verentur, & morbi contumaciam aut alterius & novi propullulationem accenseant, quum tamen ipsi has tragoedias adornarint. Adeoque concludimus cum serio voto, ut omnes, qui salutem hominum procurare aliquando volunt, in id præcipue allaborent, ut sufficientem corporis humani & præsidiorum, quibus illud juvare & conservare student, cognitionem sibi acquirant vere fundamentalibus in hunc finem studiis anatomiae & solidioris physicae fideliter tractatis, ut ne cœci sint, sed cum optima conscientia optimos semper successus in praxi medica consequantur.



D E

MEDICAMENTIS INSECURIS ET INFIDIS.

S E C T I O I.

De infecuris remediis.

§. I.

NON minus vere quam sapienter monet Hippocr. lib. VI. *Epidem. Medicus se exerceat, ut vel profit vel saltem non noceat.* Scite hujus dicti addit rationem Celsus in *epist. ad Cajum Julium Calistum*, quia *scientia sanandi non nocendi est medicina.* Nam, ut optimi & prudentis oratoris est, omni ratione prodesse reo, imprudentis vero & prævaricatoris, causæ nocere (quemadmodum scribit Antonius apud M. Tullium) ita circumspecti est Medici, omni ratione ægrum juvare, & saltem non nocere. Veruntamen imperitissimi, ut testis est quotidiana experientia, nimis multa moliendo, morbos non profligant, sed sæpe numero augent, & temere etiam, quod mirum dictu est, interimunt, atque experimenta per mortes agunt. Turpe certe est & pudet talia de medicis, quorum officium est servare hominem, proponere, verissimum tamen pro dolor! est, multos imperitia medentium atque temeritate, vel tolli, vel in miserum valetudinis statum dejici. Et tametsi id consilio non intendant, multum tamen scientes conferunt, utpote qui bene norunt, remedia & multum nocere, & multum

prodesse posse. Sapientiores veterum, manus Dei remedia appellarunt, quia medicus instar Dei hisce præfens auxilium miseris ægrotantibus affert. At vero fiunt hæc ipsa sæpiuscule manus diaboli, quia omnis ignorantia & confusio à principe tenebrarum tanquam à prima origine derivari debet. Etenim nulla, optima etiam medicamenta sunt, quæ non imprudenti adhibita ratione noceant: multo magis vero præstant id ea, quæ activo admodum inque periculum prompto elemento instructa sunt, cujus generis heroica appellantur; quæ, ut à veteribus dictum, in manu imperiti, sunt uti gladius in dextra furiosi. Prudentis itaque & Christiani medici est, non modo omnia remediorum genera tam secunda, quam valentia & periculosa nosse, sed & eorum usum atque abusum eos, qui arti operam navant, fideliter docere, & medicos quoque imperitos sincere monere, neque ob id ullas calumnias, aut alia fortunæ detrimenta metuere, quemadmodum indoles miseriæ plus sæpe bestialis quam humanæ indigna hodie dignis tribuit. Etenim non negari potest plura ex remediorum generibus, infecunda & periculosa, virus habere, ideoque ne noceant, sed profint, summa utique & prudentia & moderatione opus est. Neque enim artis nostræ salutaris existentia commodius demonstrari potest, quam quod remedia & prodesse & nocere admodum possint. Cum vero utriusque tam damni quam salutis per

Veteres remedia manus Dei appellarunt. At hæc ipsa sæpiuscule fiunt manus diaboli.

Prudens medicus omnia Remedia noscere, eorum usum atque abusum arti operam navantibus docere & medicos imperitos monere debet.

Remedia & prodesse & nocere possunt.

Medici officium.

Imperiti morbos non profligant sed augent, &c.

medicamenta allatae dantur causae, quia nihil fit sine ratione sufficienti, itaque has evidenter explorare, indeque medicamentorum usum & abusum cognoscere, utique prudentia & ratio medici exigat. Quibus omnibus perspectis non alienum judicavimus, speciminis inauguralis loco, remediorum quae infecura & periculi plena sunt, classem dilucide proponere, ut quam insignis ad decentem eorum usum & abusum declinandum, circumscriptio requiratur, clarissime intelligi possit. Cui sincero & honestissimo instituto ut prosperos benignissimum numen successus elargiatur, est quod demissa prece efflagitamus.

Quid auctor per infecurum intellectum velit.

§. II. Cum itaque nobis propositum sit infecura maxime ex remediorum generibus indigere, opus primo omnium erit, ut quid per infecurum intellectum velimus, paulo clarius exponamus. Neque vero hoc ipso nomine infelicem remedii cujuscunque successum in genere exprimere animus est, adeo ut ob hunc, illud debeat in tutum appellari. Ita China Chinæ, qua non datur in rerum natura excellentius antifebrile, imprudenti methodo exhibitæ, in magnam sæpe miseriam conjicit ægrum, neque tamen ob id intuta dicenda est. Nullum datur nobilius ipso vino roborans, quod tamen in æstu febrili & interiorum partium inflammatione maximam multo sæpius affert perniciem. Nihil aqua communi est innocentius: quæ tamen liberalius frigide hausta corporis valde exercitati & calefacti per frequens mors est. Minerales optimæ & salutiferæ aquæ, debilitato cerebro, & pulmonibus spasmo laborantibus, periculum non mediocriter inferunt, minime tamen infecuri remedii titulum merentur.

Nulla in rerum natura datur summa agilitatis medicina, quæ non simul possit admodum nocere.

§. III. Neque per infecuritatem ingentem remedii activitatem, vel ad nocendum promptitudinem hoc loco indicamus: utpote nulla in natura rerum datur summae agilitatis medicina, quæ non simul possit admodum nocere. Ita salia animantium volatilia, olea destillata aromatica, spiritus oleosi volatiles, camphora, succinata, myrrhata tutissima omnium judicio, quin etiam balsamica audiunt, nihilo secius minus convenienti dosi, ordine, & tempore data, multum corpori possunt adferre periculi.

Nec auctor intelligit talia, quæ in se omni tempore noceant.

§. IV. Denique monendum est, per infecura medicamenta nos neutiquam intelligere talia, quæ in se absolute & nullo habito respectu, vel conditione omni tempore noceant; quo sensu utique tanquam in se perniciofa merito damnanda, & è pharmacopoliis expellenda essent, tantum abest ut in usum cedere, vel remedii titulo fulgere deberent: sed per infecura remedia hoc loco & tractatione ea designamur, quæ exquisitè venenum in se reconducunt, vel veneni indolem demum in corpore nostro induere possunt. Venenum autem illud nobis venit, quod omnium saniorum consensu & judicio, ob principium corpori valde inimicum mediocri dosi, celerrime œconomiam motuum vitalium, aut turbat, aut destruit, hominemque tollit.

Sed quæ exquisitè venenum in se reconducunt, vel veneni indolem demum in corpore nostro induere possint.

Dantur inter remedia vera venena.

§. V. Mirum vero plurimis videbitur, quod inter remedia dantur vera venena: sed indubitata id esse veritatis, insequentia clarissime edocebunt. Pleraque, nemine contradicente ex venenis agunt tenerissimo & subtilissimo causticæ indolis principio, quod altius membranarum aliarumque sensibilibus partium, poris sese insinuando, horrendos spasmos, generisque nervosi contorsiones, neque minus in interioribus, præsertim ventriculo inflammationes, lethali sæpe eventu susci-

tat. Inter quæ merito primum locum occupant acria & validiora purgantia, ut sunt, elaterium, colocynthis, gummi guttæ, esula, scammonium, hellebori species, semen cataputiæ, grana tili, resina gialappæ. Quæ cuncta ac singula ejus sunt indolis, ut virulento caustico tenuissimo elemento, excessiva dosi data, hominem interficiant, utpote nullum validioribus hisce purgantibus, veneni deest requisitum. Primo, sicuti omnia venena celerrime & paucò tempore decenti dosi data, sanum hominem quod venenorum proprium est, interimunt: ita etiam hoc accidit cum dictis purgantibus. Cujus rei testes sunt, tristissima in praxi sæpius occurrentia exempla, ubi imperitissimi medicastri, sanos sæpe & valentes ad summam sanitatis perniciem, vel ad ipsam necem perducunt. Volumen certe possemus componere de purgantium noxa, quam multorum annorum spatio in praxi notavimus. Maxime curiosum est notatu, quod chirurgi, medicastri & histriones pessimæ ignorantiae suæ poenas, intempestiva medicina luere sæpenumero ipsi debeant. Non ita pridem funestus etiam hic loci contigit casus, ubi empiricus pilulis ut visum fuit ex semine cataputiæ paratis, brevi tempore firmum & sanum senem trucidavit. Secundo purgantia fortiora non secus ac alia venena, vim suam primo exerunt in ventriculo, cujus tunicas inflammant, quod ex ardore, anxietate summa circa præcordia, ingenti inquietudine, extremorum frigore, pulsu exili, animi defectu cognoscitur. In hujus confirmationem *Wepfferus in tract. de cicuta aquatica* meretur legi, qui pulcherrimo instituto varii generis venena, purgantia fortiora quoque canibus obtulit devoranda, in quibus post mortem dissectis, fere semper ventriculum & intestina inflammata deprehendit. Terio, purgantia dicta æque ac alia venena, truculentis spasmis & nervorum convulsionibus interficiunt, quibus pulsus, & sanguinis, fluidique nervei cursus ac influxus periculose intercipitur, unde syncope, virium languor, sudor frigidus, nausea, vomitus, epilepsia, & atrocia tormina oriuntur. Tandem omnia mucilaginosa, oleosa, pingua, emulsiones, & lac animantium liberaliter hausta, ut omnis virulentiae corrosivæ vim, ita etiam purgantium horum vehementiam, efficaciter extinguunt: id quod commodius quam ulla cætera antidota, alexipharmaca, vel theriacalia efficiunt, eo, quod nihil melius illa subtilissima salina spicula involvat atque inviscet, quam ipsum mucilaginosa & oleosa principium. Quam ob causam aliquoties acriorum purgantium, vel casu vel consilio, nimia dosi oblatores vehementiam, calidum lac in copia præbendo, felicissime sustulimus.

§. VI. Causticum vero ac subtile purgantium sal non modo gustus & diuturna linguae vellitatio declarant: sed & sternutamentum vehemens, quod movent, neque minus vesicæ quas partibus externis admota excitant. Tenuitatem vero hujus salis inter alia exhalatio comprobatur. Percuriosa enim res est, purgantia ferme omnia calidiora, sola diuturna coctione vel evaporatione, purgante virtute posse privari, quod de helleboro albo & nigro, colocynthide, esula, asaro, scammonio, tabaco, semine cataputiæ & sennæ quoque foliis certum est, & quotidiano experimento facile potest confirmari. Post hæc, virulentam purgantium drasticonum vim, experimenta, quod purgantia sanguini injecta protinus animalia interficiunt, demonstrant. Ita

Inter quæ primò locum obtinent validiora purgantia. Ut sunt elaterium, colocynthis, gummi guttæ &c. Quæ virulento caustico hominem interficiunt. Hujus rei testes sunt, quam plurima tristissima exempla. Sed medicastri suæ ignorantiae poenas sæpe numero ipsi luunt.

Non ita pridem empiricus pilulis ex semine cataputiæ senem trucidavit. Eiusmodi purgantia ventriculi tunicas inflammant. Quod Wepfferus ex per. m. d. in canibus factis deprehendit. Etiam trunculentis spasmis interficiunt.

Mucilaginosa, oleosa, pingua, emulsa, lac animantium liberaliter hausta, omnium optime horum purgantium vehementiam extinguunt. Idque commodius quam ulla cætera antidota.

Omnia calidiora purgantia sola diuturna coctione purgante virtute possunt privari.

Horum virulentiam experientia quod sanguini

Clarissi-

infecta
promus
an malia
interfi-
cunt, de-
monstrant.
Succus
hellebori
albi lin-
gua degu-
stus nulli
est noxius,
est sangui-
ni commu-
nicatus,
est exitio-
sus.
Venena
non tam
vehementer
nocent in-
tus hausta,
quam san-
guini com-
municata.
Virus ha-
bent vehe-
mentiora
purgantia.
Qua prop-
ter Ascle-
piades pur-
gantia &
emetica e
medicina
expulit.

Platonis
de violentis
medica-
mentis mo-
nitum.
Ipse Hippo-
crates fa-
miliarem
suum hel-
leboro pur-
gare no-
luit.
Ut ab om-
nibus pur-
gantibus
fortioribus
abstinea-
mus monet
Crato.

Hippocrat.
caute pur-
gationes
prescribit.

Ex recen-
tioribus
idem sentit
Schulz.

Item Hoff-
mann. in in-
stitut. lib.
1. pag. 9.
Atque Ae-
tius.

Clarissimus Heyde *observ.* 99. pag. 7. solutionem Gum. gutta cum aqua pluviali lactam ad drachmas sex venæ canis iniecit, quæ motus convulsivos, ipsamque mortem protinus suscitavit. Per magna res est, Hispanos succo hellebori albi sagittas inficere & ita cervos occidere: neque minus notabile est quod scribit *Crato in epist. med. lib. 2. pag. 227.* si lingua hellebori albi succus degustetur, nulli noxius est, sanguini vero communicatus, est exitiosus, nam si quis acu saltim eo succo infecta, punctum lædatur, & exiguum vulnus accipiat, paucis horis post extinguitur. Ea enim, ut omnium venenorum, sic quoque purgantium indoles est, ut non tam vehementer noceant intus hausta, ac si sanguini, maxime vero nervosis partibus fauciat proxime insinuentur.

§. VII. His cognitis plenissime jam convincimur, utique & virus habere vehementiora purgantia, adeoque eorum usum summam prudentiam moderationemque desiderare, neque facile iis, nisi summa urgeat necessitas, utendum esse. Qua propter non sine summa ratione vetustissimi, iique optimi authores, præsertim methodicæ sectæ dediti, inter quos primus *Asclepiades* est, purgantia & emetica, solis lenientibus contenti, e medicina expulerunt, qua de re vid. *Celsus* qui rationem addit *lib. 5. pag. 241.* quoniam stomachum lædunt malique succi sunt. *Plato in Timæo* admonet, violentis medicamentis corpora non temere movenda esse. Et *Hippocrates Demetrium* amicum & familiarem suum, helleboro & similibus purgare noluit. Et *Crato consil. 5. lib. 5.* notavit: vehementia aliquid de viribus & substantia corporis auferre, hinc fortioribus rusticis, non vero tenerioribus esse adhibenda. Idem *Clariss. author consil. med. 24. lib. 2.* monet, ut ab omnibus purgantibus fortioribus abstineamus, quæ etsi videantur prodesse, coctionis tamen membra valde debilitant, ut paulo post non minus excrementorum intus colligatur, quam purgatione ademptum sit. Et quamvis *Hippocratis* tempore helleboris in usu quandoque fuerit, cum summus vir laxantia ignoraret, nihilo minus tamen caute purgationes præscribit, unde *Secl. 2. Aphor. 36.* docet, quod qui sano sunt corpore, dum pharmacia purgantur, celeriter exsolvantur. *Aurelianus lib. 5. chronicorum, cap. de Ictericis: Vitandam probamus frequentem & variam ventrifluorum potationem, quæ fella educere promittuntur. Etenim sitis intenditur, & solidioris cibi fastidium duplicatur, corporisque fortitudo minuitur, atque cibi accepti corumpuntur, & omnis corporis materia horum adulterio deterior fit. Hujus sententiæ rationem addit, insignis methodicorum sectator *Alpinus in medicina methodic. pag. 75.* Quia nempe purgantia propter vim molestam, qua ventriculum ejusque os maxime lædunt, medici inter venena adnumerarunt. Ex recentioribus idem sentit *Schulz.* qui prudentissimi medicorum *Cratonis* placita memoriæ prodidit *pag. 1076.* in consiliis: *Valida purgantia vires deiciunt, & sæpe graves exulcerationes tormina debilitatesque sequuntur, & maligna qualitas stomacho imprimitur, ut postea plura excrementa colligantur, quam evacuatio sustulerit. Quod si ob id rursus & sæpe ad purgandum redeundum est, cito vitam breviorē reddunt.* Consentit *Hoffmannus in instit. lib. 1. pag. 9.* Qui de fortioribus purgantibus hæc sentit: *Quot homines apud nos sunt lectularii, loquor de experientia 30. annorum, ob intempestivas venæ sectiones, vel purgationes ex esula cruda, quam cochlearibus admittuntur.* Et antiquissimus autor *Aetius* in operibus*

scribit. Scammonium ventriculo est inimicissimum, arcendum hinc ab illis qui stomachum habent debilem.

§. VIII. Quum itaque tam suspecta, propter virus quod fovet, sint drastica purgantia, hinc providendum omnino est, ne in ventriculi & nervorum imbecillitate, virium languore, interiorum partium læsione, vel inflammatione, febre, sique tonus intestinorum destructus est, ullus sit eorum usus. Exulent quoque in omni morbo ubi spasmodicæ & febriles commotiones sese exserunt. Multo magis vero in malignis & qui ex viriū debilitate aut graviore animi motu oriuntur affectibus, damnanda sunt. Et ut libere sentiamus, rarissimi casus sunt, ubi validius purgans opportuno datur. Non facile ea admittimus, nisi in robustioribus, & qui valido ventriculo sunt, ubi magna feri colluvies, quæ vere aut autumno à sanguine promte secedit, expurganda est. Evenit etiam, ut à liberaliori aquarum mineralium potu, multæ admodum intra intestina mucagines remaneant, quæ fortius utique stimulans exigunt. Idem fit, ubi in habitu corporis nimis seroso per inferiores partes aqua ferri inclinatur, quibus casibus rad. gialappæ vel mechoacannæ cum salibus aut in pilulis extractum panthymag. Crolli aqua portione nitro & mercurio dulci associatum satis erunt. In universum vero velim teneri, acriora purgantia, nunquam magna, sed refracta semper dosi esse propinanda, quibus, ut vis inflammatoria arceatur & purgansaugeatur, nitrum vel arcanum duplicatum cum momento camphoræ commodissime miscetur. In aliis vero casibus mallet, ut omnia vehementiora, quorum ingentem catalogum in medicorum & pharmacopœorum libris fastidiosè conspiciamus, removeantur. Si enim alvinæ sordes & mucositates expurgandæ, si humor in remotioribus partibus stagnans ad alvum revocandus est, securissime id efficitur iis, quæ blande & sine ullo periculo evacuant: quo nomine rhabarbarina, veteribus benedicta vocata, mannata, fennata, tamarindinata, cassia nec non aloetica, lotionelut vel coctione decenti prius ab alieno vaporoso sulphure depurata, laudem merentur, eo, quod medentium intentioni, & causis morborum plenissime satisfaciant. Hisce annumeranda quoque sunt salia neutra, seu duplicata, quorum ingens dosi, cum sufficienti aqueo vehiculo, primam regionem à cujuscunque generis sordibus sine virium aut appetitus deperditione liberat. Hujus assertionis clarissimo sunt argumento thermæ & acidulæ, quæ sale sine omni dubitatione, neutro vel alcalino foetæ commode & efficaciter per alvum omniaque emunctoria evacuant; & ob id magnæ efficaciam, tam præservandi quam sanandi sine undique celebrantur. Si quando autem & horum usum quædam prohibeant, clysteres per inferiores partes infundere tutissimum est. Perplacet nobis *Ægyptiorum*, *Itolorum*, & *Gallorum* mos, qui nunquam fere purgantibus, sed tantum lenientibus utuntur, sique multum evacuandum est, magnam dosin Cassiæ & mannæ cum salibus in decocto propinant, paulatim sic interposito tempore id ebibendo, quod in quibusdam decem vel quindecim sedes, si res exigit, sine ullo incommodo movet. Neque id vero in tenerioribus tantum hisce populis, sed etiam in nostri frigidioris & rigidioris coeli incolis quam felicissime procedere, usus factis jam docuit.

§. IX. Quod dictum est de purgantibus validioribus, id ipsum quoque valet de emeticis fortio-

Vitentur
præsertim
in ventri-
culi imbe-
cillitate,
virium
languore,
&c.
Exsulent
quoque in
omni mor-
bo spasmo-
dico.
In affecti-
bus malignis
dam-
nanda sunt.

Non facile
ea admitti-
mus, nisi
in robustio-
ribus.

In quibus
casibus so-
lum sunt
utenda.
Nunquam
magna sed
refracta
semper do-
si sunt pro-
pinanda.
Mallet ut
ex medico-
rum &
pharmaco-
pœorum li-
bris remo-
verentur.
Humores
blandiori-
bus ad al-
vum revo-
candi.
Aloinis vi-
delicet
rhabarba-
ro & simi-
libus.

Quibus
annume-
randa sa-
lia neutra
seu dupli-
cata.

Cujus as-
sertionis
argumento
thermæ &
acidulæ
sale neutro
foetæ, quæ
efficaciter
& commo-
de alvum
ducunt.
Clysteres
per inferio-
res partes
infundere
tutissimum
est.
Auctori
perplacet
Gallorum,
&c. mos,
qui nun-
quam fere
purganti-
bus sed
tantum le-
nientibus
utuntur.
Quod de
purganti-

bus validioribus dictum, id quoque valet de emeticis fortioribus.

Tutioribus tamen utendum. Sibiata veri veneni haud sunt expertia. Quod probatur. Ratione & exemplis.

Tartarus Emeticus animantium venis injectus ipsa trucidat.

Lac & oleosa discrimini exstibatis quoque operantur. Non tantum tamen habent periculum, quantum a violentioribus Catharticis est expectandum. Quia cum vomitu rursus e corpore paulatim ejiciuntur.

Veteres oxymelle squillitico, &c. utebantur.

Græci hodierni rad. Pulsatillæ utuntur. Nos non tutius excogitari posse, ipsa Ipecacuanæ radice, existimamus. Quæ laudatur.

fortioribus, quo nomine ipsa sibiata comprehendimus, quorum usus jam nostris temporibus increbuit, cum alias antiqua tempora ea ignorarent. Equidem negari nequit, emeticis nos carere non posse in praxi, utpote quæ venenum exterius admissum, aut corruptam bilem mucum vel cibum, magnorum morborum fomitem, intra ventriculi & duodeni flexuram versantem protinus expellunt, & hac ratione ingentem cito noxam ab universo corpore avertunt. Veruntamen tutioribus eundem posse præstari effectum, nullum amplius est dubium. Quis enim negat, sibiata veri veneni non esse expertia? siquidem hæc ipsa sale mercuriali valde subtili, caustico, erodente, in teneros villos, fibrasque ventriculi membranaceas agunt, vehementem in illis spasmus concitando, unde excessiva dosi data, non secus ac alia venena, certissime hominem interimunt. Plura in praxi notavimus exempla, ubi ventriculo valde existente languido, & ob iracundiam frequentem, & per abusum inebriantium, ad inflammationem prompto, sibiium paulo majori dosi datum mortiferam induxit inflammationem. Quale quid etiam contingit, si in ardentibus vel biliosis febribus, aut ubi natura malignas fordes ad habitum corporis propellere nititur, sinistre adhibentur. Novimus etiam exempla, ubi majores & frequentiores in interioribus abdominis partibus spasmi in hypochondriacis, & intermittentium paroxysmis fuerunt, antimonialia nimia dosi data immedicabilem perniciem ventriculo creasse.

§. X. Inesse vero dictis emeticis venenum, præter jam dicta plura adfunt, quæ comprobant. Notum enim est, croci metallorum aut tartari emetici, solutionem injectam animantium venis ipsa trucidare. Notum quoque est, antimonialia, sulphure suo orbata, exterius oculorum membranis applicata, spasmos effecisse in corpore. Deinceps, ut omnia venena caustica pinguiâ, oleosis & lacte cicurantur, quo innoxia fiant: ita etiam lac tepidum si quando major sibi dosi, inflammationis ventriculi, & mortis periculum intendit, præsentissimam opem fert. Non possumus tamen non hoc loco addere, quod virulenta hæc emetica, non tantum periculi habeant, quantum a vehementioribus purgantibus est expectandum. Ratio procul dubio est, quod cum vomitu, quem faciunt, ipsa rursus e corpore paulatim ejiciantur, cum purgantis virus tardius per intestina progrediens, cum succis corporis, longe magis se communicet, quod vel ex eo patet, dum lac nutritis, quæ validum purgans accepit, infantem purgat, ubi tamen non observatum, infantem vomuisse, si nutrix emeticum assumsit. Cum vero ut supra dictum, carere nequeamus emeticis, omnis opera danda est, ut securioribus ac blandioribus per superiora vacuationem peccantium humorum moliamur. Veteres oxymelle squillitico, rad. asari, julis juglandum utebantur, sique fortius dandum erat, helleborum album coctione cicurabant, & cum vino dulci incoquebant. Græci ut nobis relatum est, hodierno tempore rad. pulsatillæ utuntur; Nos vero non tutius excogitari posse emeticum, ipsa Ipecacuanæ radice, pronuper nobis ex America allata, existimamus. Hæc enim moderatori dosi vel sola vel cum salibus data, præterquam quod admodum celeriter operationem exserat, sine ullo detrimento, vel virium lapsu aut gravi spasmo vel convulsione, foras, quod in ventriculi & duodeni fundo versatur, ejicit. Videtur quoque hæc

radix singulari roborandi virtute instructa, unde virium ferme nullus fit à vomitu collapsus, quod ab antimoniatibus non potest expectari.

§. XI. Ex infecuris & virulento principio agentibus, non minimum quoque locum narcotica & anodyna, quæ somno dolorem levant, occupant. Illius generis sunt mandragora, radix & semen hyoscyami, semen daturæ, solani species ejusque fructus, nux vomica, quæ narcotica, quia torporem & stuporem sensibus & amentiam menti inferunt, Græcis appellari solent. Ex mitiorum classe sunt papaveracea, inque primis ejus refina opium. Hæc ob virtutem dolorum sedativam anodynorum nomine veniunt. Priora, tamen non tam frequentis usus sint quam opiata, non tamen penitus ab usu medico sunt exclusa, utpote multas compositiones semen hyoscyami ingreditur, mandragoræ vero radix & cortex, solani quoque baccae, & daturæ semen neque minus nux vomica, à medicis & aliis temerariis medentibus interne & externe subinde usurpantur. Opium vero non modo ab antiquis, maxime à recentioribus ita æstimatum fuit, ut ad nobilissimas medicinas fuerit relatum. Nos vero uti utilitatem atque usum ipsi non derogamus, non possumus tamen, quin inter infecura illud recenseamus, quod virus recondit eaque propter magnam quod praxin prudentiam desiderat. Etenim narcotica & ipsum quoque opium, non tantum sale acri naturæ inimico pungenti nauseoso, sed potius, quo copioso scatent, sulphure alieno graveolenti vaporoso agunt, quo minimos cerebri & nervorum tubulos replent, & fluidum istud benignum elasticum, quod maxime sensum & motum in membranis nervosis & fibris præstat, deturbant vel extinguunt. Accedit, quod arteriolarum cerebri tenuissimas tunicas vaporosum sulphur nimium expandat, ipsisque debitum elaterem tonum ac systolen auferendo, tardissimum sanguinis cursum per cerebrum efficiat, unde gravitas capitis, torpor atque sopor fit, sensuum motuumque vigor in universo corpore perit; ab immoderatiore vero dosi in debilitatis maxime, mentis alienatio, respiratio difficilis, vertigo, sopor gravis, delirium, convulsio, & non raro mors sequitur. Ab opiatis ordinario pulsum exiliorem, virium languorem & torporem capitis, observamus. Neque defunt in medicorum monumentis exempla, ubi opium, vel in inflammationibus vel febribus aut morbo debilitatis, item pectore laborantibus, neque minus senibus & infantibus, mortem intulit. Maxime omnium vero opium insensum est ventriculo & intestinis. Hæc enim omnium venenorum natura est, ut ventriculo insensa sint, atque facile eum ad inflammationem sphacelofam disponant, vel ejus convenientem tonum ac robur penitus dejiciant. Willisus narrat de viro robusto & mediocriter sano, qui ab usu opii illico circa ventriculum de gravamine intolerabili ac stupore conquestus, intra 4. horas mortuus est. Et addit hanc rationem: ut spirituosam ventriculo indita, item alimenta mox refectionem faciunt: ita etiam nervi facile imbibunt vim opii venenatam. Et idem Author de anima brutorum capite 3. de Lethargo pag. 179. hanc habet historiam: Vir robustus colica atroci vexatus, ingentem opii quantitatem incaute sumebat: paulo post conquestus est, onus ingens ventriculum aggravare, & durissime opprimere, secuta sunt deliria & mors. Existimat enim Clarissimus vir, opiata fibras ventriculi inanimas & velut

Ex infecuris Narcotica haud minimum locum occupant. Quæ enumerantur.

Opium ab antiquis & recentioribus ad nobilissimas medicinas est relatum.

Opii natura ac indoles.

Ab Opiatis virium languorem &c. observamus. Nec defunt exempla ubi opium mortem intulit. Ventriculo & intestinis est insensum, quæ omnium venenorum est natura. Vir Willisus teste ab usu opii intra quatuor horas mortuus.

Idem aliam habet historiam de viro robusto ab assumpto opio mortuo. In ventriculo in-

flamma-
tione nil
opio pejus
excogitari
potest.

Si Thonero
credimus,
omnes dy-
senterici,
qui lauda-
num opia-
tum acce-
perant,
mortui
sunt.
Enema in
quo opii
drachma
una soluta
dysenterico
mox mor-
tem attra-
xit.
Perniciosa
sunt opiata
ubi deli-
rium est
metuen-
dum.

Opiato-
rum non
modo ra-
rissimus,
sed & cau-
tissimus de-
bet esse
usus.

Quibus
auctor ma-
tur Opia-
tis.
Veteres A-
rabes non
facile
transcen-
debant pa-
paverina.
Celsi de A-
nodynii
oraculum.

Autor spi-
ritum ex
sulphure
vitrioli in
sp. vin. so-
luto para-
rum maxi-
mo præco-
nio laudat
ac com-
mendat.

Idem sal
ignem
nec non
sulphur
graveolens
quod in
plantis,
etiam in
minerali-
bus corpori

velut cadaverosas reddere. Illud certum est, quod, ubi metus inflammationis ventriculi est, nihil ipso opio pejus excogitari possit, utpote hanc facile promovet inque sphacelum convertit, singultu lethali superveniente. Valet quoque hoc ipsum de inflammatione intestinorum, quare observatio octava quam *Thonerus lib. 3.* communicat, maxi- mi momenti est: Omnes nempe dysentericos, qui laudanum opiatum acceperunt, mortuos fuisse: Et enema in quo opii drachma una soluta est, dysenterico statim mortem attraxit, observante id *Waldschmidio* in differt. de noxa opii. Latius quoque videri potest *Stalpartius van der Wiel centur. 1. observat. 44.* Perniciosa identidem opiata sunt, ubi delirium est metuendum, hinc in febribus acutis circa statum, nec non circa declinationem propter crisin, quam facile supprimunt, instar veneni sunt, id quod *Ballonius lib. 1. consil. cap. 65.* multis exemplis confirmat. Nos, ab opiatis, quocunque etiam modo correctis, in ventriculi & intestinorum affectibus majori sæpe & repetita dosi datis, immedicabilem ventriculi & intestinorum atoniam, neque minus digestionis vitia, & enormes cum spasimis flatulentias alvi- que suppressionem notavimus.

§. XII. Ex his omnibus jam dictis apparet, quod narcoticorum æque ac opiatorum non modo rarissimus, sed & cautissimus esse debeat usus. Nos autem, si dolores ingentes levandi sunt: si somnus placidus excitandus, si spasimorum sævitia sisti debet: longe tutioribus id ipsum præstamus, neque opio, nisi summe correcto, ut est massa pilularum *Starckii* & coelestis theriaca secundum nostram descriptionem in *Poterio* parata, in quibusdam casibus utimur. Veteres Arabes, item methodici non facile transcendebant ultra papaveracea, neque anodyna, nisi necessitas summa urgeret, propinabant. Insignis hac de re locus est apud *Celsum lib. 5. cap. 25. pag. 278.* Anodyna inquit vocant quæ somno dolorem levant. Quibus uti, nisi nimia necessitas urget, alienum est, sunt enim ex vehementibus medicamentis & stomacho alienis, refert vero maxime ad anodyna, papaveris lacrymam. Laudamus nos & maximopere commendamus spiritum saporis aromatici, odoris fragrantissimi & virtutis sedativæ atque anodynæ, ex sulphure vitrioli volatili in spir. vini rectificatissimo soluto paratum, qui omnia illa, quæ opiata præstant, abundantissime explet videlicet in dolore sistendo & somno conciliando: in eo tamen differt, quod nullum torporem in cerebro vel languorem in toto corpore relinquat: præterea mirifice spasmos dolores, & vomitus sedando adjuvat & faciliat in paroxysmo excretionem calculi, neque minus symptomata, quæ infantibus ex difficultate dentitionis obveniunt, mitigat, cujus inventionem nobis vindicamus. Sin autem securum externum desideres anodynum, sufficet spiritus vini super opium aliquoties rectificatus. Tacemus, nitrosa & cinnabarina, quatenus dolorum causis magis dicata sunt, sedativa virtute tuta quoque & eximia fulgere.

§. XIII. Diximus de virulentis & infecuris ex vegetabilium classe remediis, transitum jam facimus ad mineralium regnum. Primo vero omnium notandum est, quod, uti in illis sal subtilissimum acre & causticum igneum, nec non sulphur graveolens & vaporosum, nervis & corpori inimicum peccat: ita in mineralibus mercurialis maxime substantia, si soluta sit, corpori nostro infesta, ingentem vehementiam sapius exerceat. Purum & mercurialis elementi experts sulphur, quod

ex mineralibus elicitur, nihil alieni in se continet, sed potius roborando insignem vim habet in morbis. Metalla quoque sulphure copioso scæta, ut sunt stannum & ferrum, corpori nostro sunt amicissima. Ea vero, quæ multum mercurialis ponderosæ substantiæ continent, ut sunt antimonii regulus, mercurius vivus, plumbum, cuprum, argentum ipsumque aurum, quod non nisi summe depuratus maturus & fixus mercurius est, violentæ imo deleteriæ sunt operationis. Perquam vero notabile est illud axioma, à nemine, quod meminim, in scenam productum: metalla & mineralia in corpus nostrum non agere, nisi prius fuerint soluta, hinc in ingenti copia argentum vivum interius haustum, quoniam non solvitur, nihil excepto tantum pondere mercurii, quo operatur, efficit. Ea vero, quæ sunt facilioris à quovis acido solutionis, ut plumbum, ferrum, cuprum, nunquam sine effectu notabili sumuntur. Aurum vero, mercurius, luna, item antimonii regulus ubi operari debent, in pulverem, calcem vel crocum prius redigantur, quo salia in primis viis contenta in ea melius agere possint.

§. XIV. Jam vero rursus notabile est, quod mercurialis substantia soluta sal præbeat, quod corrosivæ & septicæ indolis est, in se & sua natura corpori nostro, maxime nervis & membranis infestum. Cujus rei clarissima testimonia habemus, dum auri, lunæ, cupri vel argenti vivi solutio, aut in solidi formam redactorum certæ præparationes, verum venenum, quo homo interim potest, exhibent. Infamatus ille virulentus mercurius sublimatus, quid aliud est quam salis spiritu concentrato solutus mercurius? quo præsentissime & homines & animantia necare possumus, quod identidem de solutionibus auri, argenti, & veneris in sal coagulatis, dici potest. Cum vero corrosivis non utamur interius, hinc necessarium tantum erit, ut de iis remediis, quæ ex metallorum genere in usu sunt, nostrum ratione securitatis judicium proponamus.

§. XV. Primum vero ex auro famigeratissimi usus prodit magisterium, fulminans dictum, quod evacuandi & roborandi fine nonnulli chymiatorum magnificiunt. Tametsi vero, si bene præparatum, præsertim in pilulis, cum aliis opportune detur, non omnimode illud deprimere, multo minus damnare animus sit, attamen illud inficiari nequimus, infecurum sæpenumero hoc ipsum inveniri, præsertim si non probe fuerit edulcoratum, deinde si paulo majori dosi in pulveris forma offertur, tertio, si teneritudo est ventriculi, & denique, si hic multis falsis, vel acidis corrosivis & biliosis succis scatet. Audivimus certe non sine dolore, infanti dimidii anni ad grana sex pro una dosi in pulvere aurum fulminans oblatum fuisse, præsertim in ventre lacte corrupto & fecibus viridibus, ubi protinus anxietas summa, inquietudo cum extremorum frigore, ventris torminibus & spasimis & brevi interjecto tempore mors infecuta fuit. Vidimus quoque, idem ad grana quatuor, hypochondriacis datum, ubi tormina, spasmi & anxietates, cum frigido sudore & animi deliquio successerunt. Observavimus quoque, à duobus granis auri fulminantis, fortiter cum arcano duplicato contritis, in foemina scorbutica sensibilibus texturæ, viginti secutas sedes, cum atrocibus torminibus atque intestinorum stricturis, nec mediocri ventriculi & intestinorum læsione. Memini me aliquando legisse in scripto *Cl. Rivini*, ab auri fulminantis abusu,

nostro est
infestum.

Purum
sulphur
mali ex-
pers.
Stannum
& ferrum
corpori no-
stro sunt
amicissi-
ma.
Antimonii
regulus,
mercurius
vividus,
plumbum,
&c. dele-
teriæ sunt
operatio-
nis.
Metalla
non nisi so-
luta in cor-
pus no-
strum a-
gunt.

Mercuria-
lis sub-
stantia so-
luta præbet
sal quod
corrosivæ
est indolis.

Mercurius
sublima-
tus est nil
aliud
quam salis
spiritu con-
centrato so-
lutus mer-
curius.

Aurum
fulminans.

Infecurum
sæpenu-
mero inven-
itur.

Quod in-
fantis ex-
emplo pro-
batur.

Nec non
hypochon-
driacorum.

Ac femi-
næ scorbu-
tica.

Funeftam quoque ab auri fulminantis abufu hiftoriam narrat Rivinus. Horum ratio.

abufu, mortuum infantem, in cujus intestino foramina reperta fuerunt. Rationem vero horum effectuum, peritus medicus facile penetrare poterit, utpote auri gravissimus nec facile è fede sua movendus pulvis, à corrosivis ventriculi succis quodammodo solutus, teneras nerveas fibrillas ubi jacet, adoritur, ipsasque lancinat, exedit, corrodit, & inflammationem & spasmus, qui in dispositis genus nervosum universum in consensum rapit, excitat.

Cryftallis lunæ ad hydropicorum aquas educendas nonnulli utuntur, sed interdum cruentas sedes successisse notavimus. Ex cupro parata merito suspecta sunt. Quo spectant Tincturæ lunares cœruleæ.

§. XVI. Ex argento, cryftallis lunæ præsentissimæ corrosivitatis non nulli pilularum forma, ad hydropicorum aquas educendas utuntur, quod etiam faciunt, si magna copia liquido, quo ejus corrosiva acrimonia diluatur, desuper hauriatur; cauto tamen hic opus est, notavimus enim ab ejusmodi pilulis repetita dosi datis, cruentas sedes, cum ingenti virium lapsu successisse. Ex cupro parata merito suspecta sunt. Huc spectant Tincturæ olim famigeratissimæ lunares cœruleæ, & sic dicta martis cœrulea, quæ nil aliud quam cupri tenuissimæ solutiones, à spiritu urinoso sunt, quæ in viscida admodum ex primis viis detergenda amurca, non penitus sua carent laude, nihilo minus majori dosi, inque sensibilibus nauseam movent & vomitum. Quod adhuc magis valet de tinctura sic dicta *Helvetii* contra vermes, quam vitriolum veneris ingreditur. Eodem caractere cryftalli sic dicti dulces veneris cœruleæ, adversus epilepticum morbum commendatæ, notari debent. Sunt Practicorum nonnulli, qui sal vitrioli Paracelsi, vel vitriolum Cyprium, ad scrupulum vel ultra cum aqua communi dilutum pro concitando vomitu laudant, quod singulari in intermittentibus, & ventriculi cruditatibus sit auxilio, sed præstat, cum meliora habeamus, istis abstinere, utpote in majori dosi nonnisi septicam vehementiam in ventriculi membranæ exferunt, neque minus pulmonibus infensa sunt.

A sale vitrioli Paracelsi pro vomitu concitando cum meliora habemus, abstinendum.

Saturnina interno usu admodum suspecta.

§. XVII. Progressum jam facimus ad saturninam, quæ, si ulla, interno usu suspecta admodum sunt, unde è praxi medica sacchari saturni internum usum, & Tincturam sic dictam antiphthificam Garmanni & omnia quæ plumbum habent, interna remedia merito releganda esse existimamus. Dicitur vix potest, quantum damni interius datum plumbum afferat. Neque tamen imprudentes chirurgi saturnina ad feminis fluxum compescendum, aut ad hæmorrhagias sistendas desistunt propinare. Vidimus exinde contumacissimas alvi adstrictiones, atrociam tormina, testiumque tumores exortos, quos tollendi non facile fuit negotium. Quod vero plumbum in se habeat virus, nervis & membranæ, quas vehementer constringit, inimicum; plura sunt quæ id docent. Videmus illud manifeste, ubi illi, qui mineras saturninas tractant, urunt, fundunt, ponderant, à fumo ad intestina descendente, in convulsiva tormina, alvi adstrictiones pertinacissimas, manuum paralyses, contracturas, asthma siccum periculose incidunt. Neque obscurum est, figulos à fumo lithargyri, membrorum tremore, contractura, sævisque intestinorum doloribus, & alvo pertinacissima frequentius corripiri. Præterea observationem eximiam de lithargyri noxa *Misc. curiosa D. III. obs. 30. item obs. 92.* nobiscum communicant, dum nempe quidam lucri cupidi, in vina acida lithargyri pulverem ea dulcificandi causa dimitte-

Quare omnia ejusmodi remedia merito releganda existimamus.

Languores exinde exorti. Plumbum virus in se habet. Quod apparet in illis qui mineras saturninas tractant.

Etiā in figulis à fumo lithargyri.

Pulvis lithargyri in vino ingentem ho-

Frid. Hoffmanni Oper. Tom. VI.

bant, quæ ingentem hominum copiam è medio tulerunt. Colicæ convulsivæ, nausæ, vomitus, icterus, contumax alvi strictura, pæsis, contractura, asthma eos infestabant: umbra hominum viscebantur, elumbes, pendulis artubus & resolutis enervati. Notatu deinceps digna sunt, quæ de sale saturni prodidit *BORELLUS cent. 4. obs. 32.* Amicum, inquit, habui, qui sacchari saturni hausit nimiam quantitatem, unde tanquam paralyticus & fere mortuus factus est, ut tandem conclamaretur, rigebant membra ejus & tanquam congelatus & apoplecticus erat.

minera copiam è medio tulit.

Quidem ex sacchari Saturni hausit paralyticus.

§. XVIII. Interne itaque omnes calces saturninæ, magisterium ejus, exulent. Neque sine ratione *CELSUS lib. 5. cap. 27. pag. 314.* cerussam venenis accenset, item *CÆSALPINUS lib. 3. cap. 24.* eandem & lithargyrum venenis annumerat. Sequentia vero ab iis notavit symptomata: horum usum insequuntur, gravitas in ventriculo, intestinis, visceribus, tormina vehementia, urinæ suppressio, corpus intumescit, color plumbeus est, volvulosa tormina, articuli incenduntur, alvus supprimitur. Et *SCRIBONIUS LARGUS de compositione medicamentorum, comp. clxxxiv. pag. mihi 101.* in hunc sensum scribit: cerussam qui bibunt, vertigine urgentur, asthma laborant, præfocantur: juvat oleum, lac cum melle, cremor ptisanæ, aqua mulsa, cetera.

Exulenti igitur omnes calces Saturninæ.

Celsus cerussam venenis accenset, item Cæsalpinus.

Et Scribonius Largus.

§. XIX. Sequitur, ut etiam de mercurialibus nostram sententiam interponamus. Mercurius vivus quod non sit venenum, interne in copia haustus, non modo à priori, verum etiam à posteriori convincimur; siquidem valde corrosivum & concentratum acidum exigit mercurius menstruum, ut dissolvatur, quale vix ac ne vix quidem in corpore nostro reperitur. Deinde propter mobilitatem & gravitatem non diu subsistit in uno loco, sed canales cito transiens, à salibus corporum intactus manet. Experientia id clarum fit, dum ab iliaceis, herniosis, & alvi pertinacia adfectis, ad aliquot libras intus, sine ullo damno, sed potius cum salutari effectum sumitur, sicuti innumeræ id confirmant observationes, in medicorum voluminibus notatæ. Alia vero ratio est, si cum pinguibus in minutissimos globulos comminutus, descendit in ventriculum, ubi hærens à succis salino-acidis facile solutus, vehementem induit naturam. Habemus hac de re notabilem historiam consignatam à *Cl. Beyero Profess. Altdorffino in dissertatione de mercurii crudi usu interno*, sumpsit nempe vir cum placenta aliquot drachmas mercurii vivi, qui ventriculi languorem, artuum imbecillitatem, dolorem & oris inflammationem, halitusque foetorem suscitavit. Longe magis vero mercurius in pulverem vel magisterium redactus, sicque in ventriculo hærens, & à salibus solutus, vehementiam exferit. Ita notavimus exempla, ubi ab arcano corallino, mercurio præcipitato albo, rubro, turpetho minerali, imprudenti ratione adhibitis, sæva symptomata secuta fuerunt, ut anxietates præcordiorum, nausæ, vomitiones, contorsiones ventriculi, alvi fluxus, molestæ salivationes, cum virium summa debilitate. Ita *Cl. HELVIGIUS de cur. 3. anno. 8. observ. 7.* à turpetho minerali, tormina & anxietates animo attonito spectavit. Retulit nobis celebris practicus *D. D. Naboth Lips.* foeminam ab assumpto mercurio

Mercurius vivus non est venenum.

A salibus corporum intactus manet.

Experientia id clarum fit.

Alia ratio est si cum pinguibus comminutus descendat in ventriculum.

Magis vero Mercurius in pulverem redactus & à salibus solutus vehementiam exferit.

Quorum exempla ab auctore commemorantur.

Helvigijs à turpetho minitormina, &c. animo attonito spectavit.

Ed

præcipi-

Fœminam
ab assum-
pto Mer-
curio præ-
cipitato
mortuam
auctori re-
tulit D.
Naboth.

præcipitato, quem empiricus aliquot diebus, ad 6. grana cum paucis potu obtulit, horrendis spasmodis fuisse affectam, & tandem mortuam: sectione facta, multæ rubræ maculæ in fundo ventriculi, duodeno, & jejunio repertæ fuerunt: ventriculus tumefactus: portio vero jejuni arctissime constricta fuit.

§. XX. Equidem corrosivum argentum vivum adjecta mercurii vivi decente quantitate sublimatione penitus mitigatur, & omnis virulentia expers redditur, unde etiam mercurii dulcis nomen accipit: nihilo minus heroicum est remedium, quod prudentiam applicandi moderationemque desiderat. Tutissimus à chymicis & practicis in eorum monumentis mercurius dulcis solet appellari, partim quod tutior sit aliis ex argento vivo præparatis, partim quod lenissime evacuet, nullasque hypercatharces, ut validiora purgantia faciunt, sufficit, denique quod respectu habito ad venenum, è quo paratur merito tutus dici debeat.

Mercurii
dulcis u-
sus com-
mendatis-
simus, sed
ejus abu-
sus admo-
dum est
pernicio-
sus.

Neque inficiamur, hoc remedii genus magnæ esse in chronicis rebellibus quibusdam passionibus, præsertim in gallica lue, efficaciam, neque minoris in vermibus expellendis, vel intermittentium contumacia expugnanda, virtutis existeret. Attamen ut ejus usus commendatissimus: ita ejus abusus admodum perniciosus est. Indubitata videlicet veritatis chymicæ & practicæ est, argentum vivum cum salibus intime sociatum, transire in venenum corrosivum.

Nova sa-
lium ad-
ditione
deleterea
spicula re-
assumit
mercurius
dulcis.

Clarissimum quoque est, dulcificatum mercurium salium nova additione deleteria spicula reassumere, quod vel ex eo apparet, dum, si lixivio salis tartari aut solutione salis communis vel salis ammoniaci leviter decoquitur, protinus corrosiva acrimonia nigri coloris liquor imprægnatur. Notavimus quoque non semel in praxi, à paucis mercurii dulcis quantitate, cum salibus incuria pharimacopœi valide contrita, in febricitantibus sævas salivationes & faucium exulcerationes ortas. *Wedelius in*

Hinc
haud te-
mere cum
salibus
neutris V.
Gr. Tartaro
vitriolato
est
maritan-
dus.
Et si simi-
les succos
in ventri-
culo offen-
dat corro-
sivam
rursum in-
dolem con-
trahit.
Monitum
in hanc
rem Pro-
fessoris Er-
fortensis.

Dissertatione de mercurio dulci, recte monet, in fine, quod cum salibus neutris v. g. arcano duplicato & tartaro vitriolato non temere sit maritandus mercurius dulcis, ne turbas majores in corpore excitet & spicula nova reinduat. Nullum hinc dubium est, quin etiam idem remedium in ventriculo primisque viis, si offendat succos similes solventes falsos, corrosivam rursus quodammodo indolem contrahat. Legi hanc in rem meretur monitum Professoris Erfortensis *Cl. Vesti in Dissert. de usu & abusu medicamentorum mercurialium. Per accidens*, scribit, fit, ut mercurius dulcis in venenum abeat, si scilicet ab imperitis & artis medicæ ignavis tonsoribus datur, non considerato prius an cruditates acide adsint, his enim accedentibus mercurius dulcis fit corrosivus, & interiores corporis partes, ut ossa, nervos &c. corrodit, quandoque etiam gangrænam & sphacelum in intestinis causatur, quo tandem egrotantes morbo succumbunt. Quapropter saniores medentium omni tempore hanc adhibuerunt observationem, ne ulla mercurialis medicina hypochondriacis scorbuticis, & febre cholericâ laborantibus, hysteriis quoque & lactantibus infantibus, ubi corrupti lactis, cujus virides feces indicia sunt, metus est, exhibeantur, utpote in hisce casibus ingens corrodentium succorum intra ventriculi & duodeni sinum copia solet versari.

Mercurius
dulcis

§. XXI. Deinceps, mercurius dulcis paulo

majori dosi datus præsertim in pulvere non tam innocens remedium est, ut quidam existimant. Legitur historia medica de mercurio dulci pulverisato anno 1702. typis Quædlinburgi mandata; ubi adolescens 15. annorum, sanus sumpsit 15. grana mercurii dulcis bene præparati pro una dosi, secutus fuit vomitus, anxietas, tremor manuum ac pedum, inquietudo corporis, jactatio, contractura manuum, & sexto die mors. *Et miscellan. naturæ curios. D. II. a. X. obs. 20.* referunt quendam errore sumpsisse unciam semis mercurii dulcis bene præparati simul & semel, qui intra viginti quatuor horas mortuus inde est. Præter hæc *Cl. Lentilius in*

paulo ma-
jori dosi in
pulvere
datus non
est inno-
cens reme-
dium.
Quod
multifa-
riis exem-
plis proba-
tur.

miscellaneis parte prima pag. 207. hanc habet observationem: factori verminoso præter alia anthelmintica mercurius dulcis ad 24. grana oblatus fuit, hunc pulverem hausit siccum absque ullo vehiculo atque mox in tumorem & dolorem faucium, dentium mobilitatem & ptyalismum vix coercibilem incidit. Novimus à medico celebris loci infanti duodecim annorum mercurii dulcis 15. grana pro dosi exhibita fuisse, unde summa secuta est anxietas, postea niger vomitus & mors. Eodem in loco medicus

Ex mis-
cellan. na-
turæ cu-
rios.

16. grana obtulit puellæ 15. annorum cum vermium aderat suspicio, sed incredibilis languor, cum extremorum frigore, appetitus prostratione, longo tempore durans infestabat, neque ullum mali præparati mercurii dulcis adfuit indicium. *Glauberus part. 2. Furni philosophici c. 38. pag. 82.* prodidit, quod mercurius dulcis paulo majori dosi infantibus datus pro vermibus, debilitatem & membrorum infirmitatem attulerit. Neque obscura nobis sunt exempla, quod ubi mercurius paulo majori dosi salivandi fine datus fuit, neglecto debito regimine, epilepticos motus, quos mors excipiebat, concitaverit. Quamobrem perite scribit *Bontekoe in fundamentis med. pag. 64.* mercurius dulcis non tam dulcis est, ut vulgo putant, quia in immodicâ dosi sumptus, in venenum degenerat. Neque prætereundum *Welschii quod habet de- cur. 3. curatione prima* judicium, quamvis optima omnium & securissima mercurii dulcis præparatio à plerisque putetur, attamen ne sic quidem aut alia quacunque ratione præparatus, malignitatem suam exuit, si vel aurum addatur, quin ad ingenium nequitiamque redeat.

Lentilii.

Cujusdam
Medici.

Alterius
Medici.

Glaberi
testimonio.

Nec non *Corn. Bontekoe.* Et *Welschii.*

§. XXII. His cognitis, omnia mercurialia, præsertim paulo majori dosi in pulvere oblata, merito pro suspectis & infidis remediis habemus, permoti maxime his rationibus, primo quod operationem suam à dispositione humorum in primis viis quatenus plus vel minus ibi solvuntur, accipiant, quo fit ut sæpissime paucæ grana mercurii dulcis, salivatione excitandæ sufficiant, cum alia subjecta ingenti quantitate ne moveantur quidem. Meretur hanc in rem adduci insignis apud *Danielem Sennertum* qui extat locus *lib. de consensu chymicorum cap. 18.* Mercurius dulcis in omnium chymicorum manibus hodie est, & tutissimum habetur medicamentum. Verum non semper sine damno exhibetur. Medicus quidam doctissimus, cum eum recte præparatum, & quamplurimis sine omni damno adhibitum, ipse usurpasset, in gravissimum periculum incidit. Gingivæ enim fauces & lingua intumescere, ac nigredinem contraxere, ut per integrum mensem nihil cibi solidi adsumere, imo nec jusculum cochleari

Omnia
Mercuria-
lia paulo
majori
dosi & in
pulvere
oblata pro
infidis &
suspectis
remediis
ab auctore
habentur.

Ratio.
Sennerti
de Mercurio
dulci
testimonium.

Mercurialia non secus ac alia metallica semper infecuriora sunt in pulvere.

Quam ob causam.

Mercurius igitur quocunque modo præparatus, non nisi forma pilulari est assumendus, teste Lemmery. In pulvere datus celeriter salivationem movet. Tutor utendi modus est si cum purgantibus in pilulis misceatur.

Cautissime danda sunt mercurialia inquit Wedelius. Quod historia à Ballonio confirmatur. Ac Dolæi.

Nec non Willisi testimonio demonstratur.

Quod de usu interno mercurialium dictum est, id quoque de externo est tenendum. Quæ in Priyalismo sunt observanda.

chleari forbere potuerit, accessit salivatio, aliaque symptomata, quæ mercurialem inunctionem consequuntur. De hinc omnia mercurialia, non secus ac alia metallica & drastica, semper infecuriora sunt in pulvere, quam si in pilulis fumantur, nam ob gravitatem dum descendunt in fundum ventriculi, non facile ex ejus plicis detergantur, sed firmiter dum adhærent & corrosiva fiunt, mire hanc partem, ubi sedent, rosione ac vellicatione exercent, ut inflammationis vel spasmodorum metuendum sit periculum. In pilulis vero hæc sumpta paulatim & successive non modo in ventriculo, sed & in intestinis solvuntur, unde activitas remedii dividitur, dispergitur, sicque evadit mitior: sicuti contra vis unita ac concentrata semper fortior est. Quamobrem bene monet *Dn. Lemmery in cursu chymico p. 235.* mercurius quocunque modo præparatus, non nisi forma pilulari est assumendus, nunquam in forma liquida vel in pulvere. Et testatur quotidiana experientia, quod dulcis mercurius pulvere datus celeriter salivationem moveat, cum contra tardissime hoc negotium procedat, ubi in pilulis assumitur. Tutor etiam utendi mercurialibus modus est, si cum purgantibus in pilulis, non æque bene in pulvere misceantur, ne diutius mercuriales particulæ intra primas vias morentur, sed mature ejiciantur. Tandem mercurialia infecura judicamus, quoniam ob elementum corrosivum & constringens, nervis imprimis ac cerebro sunt infesta, unde in morbis capitis & nervorum, & ubi spasmodicæ stricturæ genus nervosum torquent, vel etiam ubi tenella & debilia corpora sunt, secundum *Wedelium de theoria saporum sect. 2. p. 110.* cautissime danda sunt. Inde etiam est, quod intempestive adhibita, longa vitia sæpius inducant, quod complures practitorum observationes comprobant. Inter alias placet hoc loco inferere, quod *Ballonius lib. 2. epidem. pag. 263.* notavit. *Uxor, inquit, phar-macopæi consilio usa pilulas sumpsit ex hydrargyro, ab eo tempore caput doluit, ac cerebrum ita affectum fuit, ut perpetuo vacillare videatur. Cl. Dolæus in encyclopæd. cap. 15. de lue venerea p. 303.* hæc habet: *Aliquando mercurius post se relinquit indelebilem characterem, unde oriuntur convulsiones, & epileptica symptomata, quæ in Principe Nassovico observavi. Et Willis. de anima brutor. c. 9. de paralyti autor est, ut, qui cerebro debili aut nimis laxo præditi sunt, vel vertigini torpori & motibus convulsivis obnoxii, mercurialibus non temere utantur.*

§. XXIII. Quod vero de usu interno mercurialium dictum est, id quoque de illorum externo, inunctione mercuriali, salivationis causa, tenendum est. Quam gravissima symptomata minus dextre hæc applicata excitent, multis observationibus medicorum volumina plena sunt. Unde prudentiores magna cum circumspectione salivationem instituunt, probe enim observant subjectum, ut viscera adhuc sint integra, ut robur adhuc virium adsit. Deinceps sub cura omni modo frigus, omne acidum, salsum, animi affectum vehementem interdicunt, cerevisiæ quoque & vini usum circumcidunt, assiduum vero usum humectantium & balneorum suadent, ut humorum fiat edulcoratio, & nervearum fibrarum emollitio. Neque vero tam infecura est salivationis mercurialis cura in lue venerea infectis, qui plerumque antea fuerunt sani corporis, quam ubi ma-

Frid. Hoffmanni Oper. Tom. VI.

gna humorum dyscrasia, vel ingens in visceribus aut nervis latitaverit vitium.

§. XXIV. A metallis pergimus ad mineralia, quæ etiam minus tuta remedia nobis largiuntur. Invaluit & apud nonnullos practicos adhuc obtinet mos arsenicalibus interne utendi, iisque pugnandi, adversus morbos contumaces & rebelles. Vidimus à magnis chymicis eum in finem concinnatos pulveres, qui puri arsenici aliquot grana habebant, & magna violentia vomitiones ciebant: Quievit in nonnullis ab eorum usu febris, in aliis vero tenebrioribus digestionis actio ita vitiata fuit, ut longo tempore non potuerit reparari. Arsenicum esse præsentissimum venenum & innumeris fuestis exemplis infamatum, vel in vulgus notum est, suam vero vehementiam penetrante maxime corrosione in nerveas ventriculi membranas exercet, unde lethales inflammationes & spasmi fiunt. Neque datur excellentius præsidium quam in lacte, si liberalius hauriatur: ita enim erodens ejus virus mitigatur, & cum vomitu successive foras ejicitur. Cum itaque summum sit arsenicum venenum, summæ etiam temeritatis est, cum longe tutioribus vim morbi depellere possimus, eodem uti, nec mediocri periculo humana corpora objicere.

§. XXV. Ejusdem fere arsenicalis indolis sunt, quæ ex regulina antimonii portione parantur chymica emetica, ut sunt mercurius vitæ, pulvis Monckii Rammoneur dictus, antimonii croci, vitæ, & sulphura, quæ omnia drasticam & virulentam habent facultatem, sicque majori dosi in pulvere offeruntur, facile interficiunt hominem, vel immedicabilem ventriculo perniciem afferunt, tot historiis quotidie id docentibus. Habemus hæc pro infecuris admodum, & infidis, quoniam eorum operatio identidem ab humorum in primis viis dispositione, qui ea solvunt, dependet. Notavimus plus vice simplici, famigeratissimum illum Monckii pulverem datum fuisse, ubi in quibusdam ne ullum quidem vomitum suscitavit, in aliis vero sævissime cum spasimis vomitiones ortæ fuerunt, cujus diversæ operationis, nulla alia datur causa, quam quod in uno ventriculo ingens mucilaginis insipidæ copia, in altero vero, abundans salso-biliosus acidus succus minerales particulas dissolvens, offenditur. Panacæa sic dicta Glauberiana, quæ in pharmacopoliis Brunsvicensibus Connerdingiana vocatur, nihil aliud est quam sulphur ex lixivio scoriarum antimonii cum tartaro soluto præcipitatum. Hæc paulo minori dosi cum absorbentibus mixta, leniter provocat vomitum, diaphoresi insequente. Quæ medicina in variolarum & morbillorum principio olim non sine effectu data fuit, in majori vero dosi, ut alia antimonialia, vehementem vim habet emeticam, hinc sicuti reliquorum usus sit circumspetus, præsertim in debilioribus, author suus forque sum.

§. XXVI. Dicendum quoque est de Bismuthi magisterio, quod nonnulli chymicorum nostris temporibus ceu incomparabilem medicinam æstimant, ad febres maxime depellendas. Verum tamen cum bismuthum arsenicalis, licet mitioris sit naturæ, hinc ex eo parata remedia non vacant omni suspitione. Accepimus à fide dignis, qui hoc magisterio usi fuerunt, quod paulo majori dosi datum internas circa ventriculi regionem cum frigido sudore anxie-

Mineralia quoque minus tuta remedia nobis largiuntur.

Arsenicum est præsentissimum venenum & innumeris fuestis exemplis infamatum.

Neque datur præsentius remedium quàm in lacte.

Summa igitur temeritatis est eodem contra morbos uti.

Ejusdem fere arsenicalis indolis sunt, quæ ex regulina Antimonii portione parantur chymica emetica; ut Mercurius vitæ & Antimonii crocus, vitæ, sulphura, &c. Quæ majori dosi facile interficiunt hominem.

Panacæa Glauberiana quid sit.

Sit tamen ejus usus sicut reliquorum circumspetus.

Ex Bismutho parata remedia non vacant omni suspitione.

Spirituum acidorum superiori seculo ingens erat usus. Sed quia valde corrosiva, irritantia nec non coagulantia sunt, liquido constat corpori nostro magis esse inimica quam amica. Spiritus salis bronchiis nocet. Spiritus nitri intestinorum mucum detergit. Vitrioli humores nimium coagulat. Auctoris sententia est ut spiritibus istis plane abstineamus. Nitrosa in substantia exhibita idem quod hi spiritus efficiunt tutiori modo. Quæ ex regno animantium remedia intuta sunt. Insecta sale caustico penetrant abundant. Quo nomine maxime sunt celebres Cantharides. Quorum usus Anglis jam mirifice placet. Venenato tamen agunt principio. De eorum noxa habent Thonerus, Hildanus, Baglivus, Alpinus. Quod valet de Cantharidibus id quoque de omnibus aliis insectis tenendum est. Omnes caustico vesicante sale gaudent, cujus etiam in lacte est medicina. De topicorum acrepellentium abusu.

tates effecerit; tutius itaque est longo usu experta & comprobata, inexpertis hisce præferre.

§. XXVII. Nunc quoque ad minerales acidus spiritus, ut sunt oleum & spiritus vitrioli, salis, nitri, aqua fortis transeundum est. Superiori seculo, quo chymia & praxis chymica florere incipiebat, ingens eorum usus erat; non modo in julapiis refrigerandi causa, sed quod credebant spiritui salis inesse singularem virtutem stomachicam & antinephriticam, spiritui nitri, anticolicam & malignitati resistentem, ac spiritui vitrioli, sistentem hæmorrhagias. Verum enim vero non negandum est, hæc omnia non modo esse valde corrosiva, irritantia, sed etiam vim coagulantem, quo chylo & sanguini inimica est, possidere; hinc liquido constat, corpori nostro ea magis esse inimica quam amica, inque majori dosi & sæpius repetita, prorsus perniciofa. Frequens spiritus salis usus valde nocet bronchiis, dum tussim movet, renum quoque substantiam canaliculofam teneram facile lædit, unde frequens ejus usus in nephritide plus damni, quam utilitatis affert. Aqua fortis vel spiritus nitri mucum intestinis admodum amicum detergit, & vasa aperiendo cruentas sedes excitat. Spiritus vitrioli vero nimium coagulando humores parum proficere potest. Nostra itaque sententia est, ut spiritibus istis plane abstineamus, vel si ipsorum usus esse debet, ut cum liberali satis quantitate aquæ vel potus assumantur. Etenim incomparabilis virtutis nitrosa in substantia exhibita cum idem quod hi spiritus efficiant idque longe tutiori modo ac ratione, non video cur illorum amplius esse debeat usus.

§. XXVIII. Ultimum est, ut pauca etiam de iis, quæ ex regno animantium remedia intuta sint, dicamus. Amica ac blanda neque tam aliena nostræ naturæ hæc sunt quam metallica, ideoque non facile infecura in curando sunt, solis insectis exceptis, quæ in universum sale penetranti caustico abundant, unde etiam dolorem, rosionem, & vesicas partibus admota excitant. Hoc nomine maxime sunt celebres cantharides, quarum usus internus, præsertim si camphora & nitro corrigantur, in vesicæ & urinariorum ductuum vitis Anglis jam mirifice placet. Nos nolumus eorum decentem & providum usum damnare, illud tamen dicendum est, venenato agere principio, unde eorum usus tam interne quam externe, in gravioribus spasmodis, doloribus, convulsionibus, febribus esse debet cautissimus, maxime omnium vero in tenerioribus & sensibilibus. Quare de eorum noxa legi possunt auctores; & inter hos præcipue Thonerus lib. I. observ. 20. Hildanus cent. 6. obs. 96. Baglivus in praxi pag. 68. Alpinus de medicina methodic. pag. 130. Quod autem valet de cantharidibus, illud etiam de omnibus aliis insectis, quæ in usum medicum cedere possunt, ut sunt vermes majales, scorpiones, araneæ, bufones, millepedes, tenendum est. Nam omnia hæc acri caustico vesicante sale gaudent, cujus, ut omnis præsentis veneni, certissima in lacte est medicina.

§. XXIX. Restat quoque, ut de topicorum ac repellentium abusu sermonem instituamus, utpote quæ ejus sunt naturæ, ut intempestive admota, dum peregrinas fordes à vitali-

bus succis sequestratas ad interiora repellunt, venenum in corpus inferant, quod patet maxime ex symptomatibus gravioribus, quæ insequuntur, qualia sunt asthma spasmodicum, inflammatio ventriculi, epilepsia, febris, & ejus generis similia. Quoniam vero de hac materia latius egimus in disputationibus de conversione morbi benigni in malignum; item de abusu topicorum, merito hoc labore superfedemus.

§. XXX. Postremo de famigeratissima alexipharmaca, qualis jactatur & sermone, radice, quod valde intuta sit perpauca saltem memorare licet. Est illa ipsa radix anthoræ, quæ non modo napelli celebris veneni vera creditur antidotus, unde etiam nomen mutuatur, utpote thora Græcis napellus dicitur, verum etiam ab Antonio Gueynerino tract. de peste cap. 3. adversus omne venenum, præprimis morsum insectorum virulentum, mirifice laudatur. At si experientiam consulamus, intuta est, tantum abest ut summa sit alexipharmaca, nam sale, si ullum simplex, acerrimo caustico penetranti, assidue linguam vellicante, si degustetur, hæc radix constat, unde satis vehementer purgat, hinc recte monet Joh. Bauhinus histor. plantar. universa pag. 94. Considerent lectores an radix purgans conveniat cum morsis à viperis & cane rabido, itemque peste laborantibus. Clusius considerata diligenter partium hujus plantæ omnium cum napello similitudine, usum ejus suspectum habet & satius ducit ab eo abstinere, præsertim in tanta copia aliorum remediorum, quorum facultates jam sunt exploratæ, v. Bauhin. histor. plantar. part. 1. fol. 705. Dehinc recte monet de hac radice Dn. Pancovius in herbario p. 40. quam insignis virtutis radix hæc prædicatur, tam eximiam moderationem & prudentiam in usu desiderat. Meminimus olim à pharmacopæo Westphalo pulverem bezoardicum, qui habuit hanc radicem, variis in casibus usurpatum fuisse, ubi in plerisque magna perturbatio stomachi, cum ardore, siti, anxietate præcordiorum secuta fuit, neque mirum, nam sale caustico & inflammatorio hæc radix pollet, hinc remedium valde suspectum, præsertim si in pulvere majori dosi propinetur, hanc habemus atque dicimus. Ejusdem commatis est nux vomica quam arbor ligni Colubri proferit. Hæc à quibusdam etiam alexipharmacis annumeratur, unde electuarium de ovo ingreditur. At vero identidem suspectus hic fructus est, narcotico enim naturæ adverso sulphure gaudet, quo animalia certissime necat, & hominibus quoque periculum intendit, ut Matthiolus in commentario ad Dioscoridem lib. 4. cap. 73. & Fallopius tom. 1. tract. de tumoribus præternaturalibus cap. 27. testantur. Quamobrem CASPARUS HOFFMANNUS lib. 2. de medicamentis officinalibus pag. 102. noluit hoc electuario propter nucem vomicam uti: qua de re etiam conferri potest Crato lib. 1. de peste ejusque epistolæ med. ad Cameraarium lib. 5. Coronidis loco omnibus & singulis practicis, maxime vero temerariis, etiam atque etiam commendamus, quod habet Galenus lib. 4. method. medend. Medicamentum quod plures experti sunt, & natura est familiaris, longo intervallo illi est præferendum, quod non experientia satis est comprobatum.

Dum sequestratas fordes ad interiora repellunt, venenum in corpus inferunt.

Radix Anthoræ seu napelli adversus omne venenum mirifice laudatur.

Sed intuta est, tantum abest ut summa sit Alexipharmaca.

Bauhinus nec non Clusius sum ejus suspectum habuerunt.

Pancovii de hac radice monitum.

Atque auctoris observatio.

Ejusdem est commatis nux vomica.

Suspectus hic fructus est.

Ut Matthiolus & Fallopius testantur.

Galenus de hisce oraculum temerariis medicamentis ab auctore commendatur.

S E C T I O II.

De Infidis Remediis.

§. I.

Infida remedia quoniam sunt.

QUum etiam nostri instituti ratio sit, medicamenta infida, sive quæ malæ fidei sunt & medentis intentionem fallunt, atque destituunt, describere: primo omnium monendum est, ne quis existimet, nos per infida ea indigitare remedia, quæ nunquam non in se & absolute noceant, & ad medendum plane inidonea sint. Nullum enim, quod probe notandum, etiam venenum est, quod non possit certa ratione ad sanandum prodesse, nullum etiam tam præstans auxilium, quod non possit nocere, hoc tamen discriminis interest, quod unum remedium præ altero validiorem vim nocendi possideat, atque adeo majorem prudentiam, moderationemque medentis desideret. Quare non inficiandum est, etiam hæc, quæ inter infida recensimus, si sciens & sapiens Medicus iis recte utatur, usu suo atque utilitate minus destitui. Hisce præmissis melioris & facilioris doctrinæ causa infidi remedii genuina descriptio nobis constituenda est. Vocamus itaque infidum remedium illud, quod palliative curat vel mitigat morbum, sed causa relicta, vel sæpius aucta, pejorem efficit statum. Infidum vero ab infecuro distinguitur, quod hoc veneni quicquam in se recondat, vel tale in corpore assumere possit, illud vero veneni expers, & nihil in se, naturæ prorsus alienum, seu quod vitales motus celeriter & brevi tempore invertere possit, complectatur.

Infidi remedii descriptio ac definitio.

Infidorum primum locum obtinent fortiora adstringentia maxime vitriolica & aluminosa.

Adstringentium indoles.

Hæc remedia interiorius data corpori nostro minus sunt congrua.

Qua ratione ac causa.

Solutiones aluminis

§. II. Ex eorum vero numero, quæ nobis infida dicuntur, primum & principem locum merito obtinent omnia fortiora, adstringentia, & inter hæc maxime vitriolica & aluminosa. Est enim hæc adstringentium indoles, ut illud, quod agunt, principium, ex acido fixiori & terra crassiori sit compositum. Quare horum etiam minimæ particulæ immobiliore, non modo poros ac meatus corporis minimos fixa sede facile occupant, sed & fluidiores ac mobiliore in libera ac perpetua agitatione impediunt. Ex eo jam satis, ut opinor, intelligi potest ratio, qui fiat, ut vitriolica & aluminosa indita lacti, ovorum albumini, vel sanguini animalium, firmitus coagulum ipsis inducant, adeo, ut ob hunc etiam effectum in graviore sanguinis profusione & majorum vasorum apertione certissima sint auxilia. Hæc remedia interiorius data, præsertim abundantiori dosi, corpori nostro ejusque vitalibus motibus minus esse congrua, facile is intelligit, qui considerat, vitæ ac sanitatis nostræ rationem decenti fluidissimorum, quos *Hippocrates* impetum facientes, & recentiores spiritus vocant, in partes solidas actione, dein libero ac perenni sanguinis & humorum per tubulosam corporis compagem motu, denique necessario secretionis & excretionis negotio contineri. Nihil autem in rerum natura liberæ fluidorum progressionis æque resistit, nihil est, quod citius incrasset ac coagulet fluida, minimosque tubulos solidorum facilius obstruat, quam forte adstringens; quamobrem vitæ ac sanitati est insensissimum. Videmus solutiones aluminis vel vitrioli venis

Frid. Hoffmanni Oper. Tom. VI.

animalium injectas, ea subito enecare. At vero, præter virtutem hanc obstipantem incrassantem, qua imbuta sunt adstringentia, peculiarem adhuc in vivis corporibus operationem exserunt: dum videlicet naturalem fibrarum & membranarum, ex quibus muscoli & vasa contexta sunt motum nimia constrictione pervertunt, inque spasmos has partes conjiciunt; unde fluidorum progressio libera non modo turbatur, sed & conveniens ad nutriendum secretio, neque minus excretionis promptitudo, valde intercipitur. Veri namque simile est, adstringentia in vivo corpore non solum proximo contactu in illis partibus, ubi effectum produnt, agere, sed una parte affecta, reliquas facile in consensionem & similem effectum pertrahi. Quæ regula, in pathologicis & therapeuticis multæ utilitatis, perpetuo observetur necesse est. Nam consensus partium solidarum in vivo corpore, semper animadvertitur, hinc si in nervo, tendine, vel sensibili membrana, sive à causa interna sive externa, læsio fiat, gravissima protinus pathemata, per universi corporis œconomiam observantur. Nullum hinc quoque dubium est, quin id identidem contingat circa medicamentorum operationem, præsertim si ea paulo vehementius in ventriculum agant. Ita opiata, dum adhuc hærent in stomacho, mox per totum corpus suam spargunt virtutem. Venenum metallicum paullo fixioris naturæ, ventriculum cum arrodit, statim spasmos & convulsiones lethales, sine ullo materiali veneni ad cerebrum vel nervos accessu funestas, inducit. Ex nostra sententia etiam adstringentia motu, sive potius formali quam materiali actu in partes corporis operantur. Observamus enim à fortiter adstringentibus, ut sunt tinctura sulphuris, vitrioli, tinctura hæmatitis, brevi interjecto tempore miraculose internas hæmorrhagias pulmonum, uteri, narium, cohibitas fuisse & nimium quoque seminis profluvium in gonorrhœa incessasse. China Chinæ aliaque adstringentia principaliter in ventriculum ac intestina suam quam maxime spargunt efficaciam, & facta ibi fortiore constrictione reliquas corporis partes relaxatas adstringunt, quamvis non negandum sit, adstringentium etiam virtutem paulatim transire ad sanguinem. Summa igitur nostrarum cogitationum hæc est, adstringentia non tantum materialiter, sed, quod magis est, etiam formaliter & solo motu ac consensu corpus nostrum afficere & alterare.

vel vitrioli venis animalium injecta, ea subito enecant.

Opiata dum adhuc hærent in stomacho, mox per totum corpus suam spargunt virtutem.

Austoris à fortiter adstringentibus observationes.

Etiam China Chinæ.

Adstringentia non tantum materialiter, sed etiam formaliter corpus nostrum afficiunt & alterant.

§. III. Ob adstrictoriam vero facultatem nobis quam maxime infida habentur martialia: quorum usus quamvis à recentioribus Medicis ad cælum usque in sanando extollatur, tamen plurima, quæ in pharmacopoliis ex ea præparata prostant, plus exitii, quam utilitatis afferunt. Indubitata enim veritatis est, martialia in corpora non agere nisi soluta. Si vero interne à concursu acidorum vel externe à menstruo solvantur, mox vitriolicam & adstringentem naturam acquirunt. At vero inter solutiones magnam intercedere differentiam, cum alia longe subtilior, & ideo magis roborans, alia crassior fixior, & admodum contritiva sit, nullum est dubium. Quare remedia, quæ ex marte salutaria parari possint, & quæ facile nocere valeant, dispicere, utique non erit intempestivum.

Martialia ob adstrictoriam facultatem quam maxime infida habentur.

Plurima quæ ex eo præparata prostant, plus exitii quam utilitatis afferunt.

In corpora non agunt nisi soluta.

Monitum Autoris.

§. IV. Mars videlicet ex duplici compositus duplici

D d 3

*compositus
est sub-
stantia.*

*Nullum
metallum
santa sul-
phuris co-
pia gaudet
quam fer-
rum.*

*Experi-
mentum
cum mar-
te curiosa
& multi-
faria.*

*Qua mar-
tis præpa-
rationes
ad medi-
cinam sunt
optimæ.*

*Et quæ
contra
magna
cum cau-
tione sunt
exhiben-
da.*

*Et plus
exitii quæ
salutis in
medendo
promit-
tunt.*

*Nimis cito
cohibita
diarrhœe
vel dysen-
tericæ per-
niciosa se-*

positus est substantia, altera subtiliore & sulphurea, altera crassiore & terrestri. Illa roborantis & desideratissimæ est virtutis, hæc vero rudior cum acido juncta valde adstringens & styptica est. Ex omnibus vero metallis nullum est, quod tanta sulphuris copia gaudeat, quam ferrum, unde etiam à natura nostra non alienum, sed eidem peramicum est. Ob sulphuris igitur, qua gaudet, abundantem portionem, limatura ejus in ardentem ellychnii flammam conjecta, igneas scintillulas eleganti spectaculo exhibet, neque minus ferrum prægrandi speculo caustico fufum mirifice ebullit, perpetuoque igneas scintillulas ex se spargit. Præterea nitrum fufum limaturæ martis adjectum accenditur, more aliorum phlogistorum. Luculentissime vero sulphuream & inflammabilem, quo in phiola vitrea limaturæ ferri adjicitur olei vitrioli, cum dupla aquæ communis portione, quantitas, clauso pollice orificio, ita enim facta ingenti ebullitione vapor exurgit, qui remoto digito flammæ applicatus, magno cum fragore accenditur, & ardet tam diu, quam in phiola remanet ebullitio; Hujus vero phænomeni rationem à solo oleo vitrioli, quod sulphure minerali abundat, non esse unice arcendam, ex eo apparet, quod ubi experimentum cum alcalinis aliisque terreis instituitur, egrediens vapor minus est inflammabilis. Hoc vero sulphur in marte & subtilior ejus pars terrestris, quam optime usui medico inservit, propter roborantem & tonicam, qua inter mineralia omnia sulphur præcipue gaudet, virtutem singularem, quæ ad roboranda viscera & hinc fluidorum circulum promovendum semper est in praxi exoptatissima. Ex quo jam facile intelligitur, eas martis præparationes ad medicinam esse optimas, in quibus sulphur & subtilior ejus terrestris substantia à reliqua crassiore & terrestri, quæ cum acido juncta styptica fit, separatur: & contra illa ex marte parata remedia, ubi sulphuris textura destruitur & terrestre ejus elementum prædominatur, magna cum cautione esse exhibenda. Inde fit, ut omnes croci igne calcinati & exusti, ubi sulphur perit, & textura martis destruitur, non tam prompte acidum imbibant, parumque auxilii afferant. Deinde omnes tincturæ & liquores, præsertim cum acido salis communis confecti, ut est tinctura sulphuris, vitrioli, lapidis hæmatitæ, tinctura martis cum spiritu salis facta, liquor martialis ex capite mortuo florum salis ammoniaci martialium emergens, & ipsi quoque dicti flores propter insignem adstrictionem plus exitii quam salutis in medendo promittunt. Pertinet huc quoque liquor seu solutio mineræ martis Hassiacæ, item vitriolum martis, quorum usus ob ruditatem partium metallicarum parcius merito esse debet. Equidem hæc ex martialibus adstringentia immodicis sanguinis, per quæcunque etiam loca, profusionibus, in diarrhœis & dysentericis quoque, nec non in fluore fœminarum albo, item in virorum gonorrhœis subito sæpenumero fluxus hos cohibent, sed plerumque majori periculo, utpote frequens docet observatio, cito hac ratione suppressam hæmoptysin degenerare in phthisin, consuetam narium hæmorrhagiam in asthma, vel etiam apoplexiam; mensium vel hæmorrhoidum celeriter suppressum profluvium in hydro-

pem, asthma, vel spasmos hypochondriacos converti. His quoque nimis cito cohibita diarrhœæ vel dysentericæ, perniciose sæpe circa præcordia symptomata, ut singultum, ventriculi inflammationem & ingentem anxietatem, relinquunt: tristissimis subinde exemplis id in praxi comprobantibus. Idem valet de fluore albo vel gonorrhœa, quæ horum adstringentium usu nimis celeriter coercetur, siquidem usus id indies ostendit, tumores & scirrhus testium, bubones & perniciosam alvi constrictionem inde emergere. Quoniam vero hisce temporibus solemne admodum est intermittentium paroxysmos adstringentibus reprimere, hinc quoque id fit martialibus, quæ certe longe celeriores in sistendo impetu febrium ipso famigeratissimo chinæ cortice sunt effectus. Sed quæ mala inde eveniant, præsertim, ubi nec plethoræ nec cruditatum in primis viis, nec infarctus viscerum habitavit ratio, dici vix potest. Loquitur id pro dolor! quotidiana experientia, dum plures gravibus passionibus chronicis obnoxios videmus, qui mali hujus originem, examine instituto, male curatis per adstringentia febribus unice fere debere videntur. Insequuntur inde hysteriæ & hypochondriacæ affectiones, cordis palitationes, tumores pedum œdematosi, hydrops, colica, tormina ventris diuturna, artuum contracturæ, hæcticæ lentæque febres.

§. V. Deinceps martialia nocent & infida sunt, quia sua adstrictione visceribus abdominis hepatis, lienis, pancreatis obstructis sunt infecta, quod in cachexia, in ictero consummato & nigro, diuturnis febribus & in scorbuto subinde visitur. Utpote obstructions & schirrhositates, majori facta glandulosorum tubulorum obstipatione, inde facile capiunt incrementum, unde nihil aliud, quam tumor œdematosus pedum, & demum anasarca, vel ascites poterit expectari. Igitur cautissimus usus martialium in cachecticis hystericis & hydropicis fit. Equidem ad obstructionem mensium expugnandam magna passim laus martialium prostat, verum & in hoc malo magnam esse prudentiam adhibendam usu docemur. Observatum enim fuit, loco fluxus sperati plenariam sæpe hujus fluxus cessationem, indeque diuturna mala fuisse infecta.

§. VI. Verum enim vero neque martialibus omnis virtus potest adimi. Habent enim illa suum usum, & hinc suam laudem merentur. Primo omnium vero notandum est, ea esse optima, quæ adhuc sulphur suum integrum custodiunt, & salvam alcalinam texturam retinent, quæ cum subtilissimo acido confecta sunt liquida. Nam quo fortius acidum cum ferri corpore conjunxeris, eo major constrictione observatur, quo tenerius vero associatur, eo blandior & roborans tantum virtus emergit. Quapropter repudiatis omnibus cujuscunque nominis crocis, sola limatura ferri, veluti quæ propter rariorem texturam & copiam sulphuris nobilior est ipso chalybe, contenti esse possumus, modo eam libero aëri, rori, pluviis, radiisque solaribus in vase ad tempus exponamus, ut in subtilissimum pollinem & rubiginem redigatur, quæ omnibus crocis virtute longe superior est. Cavendum vero à grossiori limatura est, hæc enim descens

*pe sympto-
mata re-
linquunt.*

*Idem va-
let de fluo-
re albo vel
gonorrhœa.*

*Solemne
jam est in-
termitten-
tium paro-
xysmos ad-
stringenti-
bus reprimere.*

*Hinc quo-
que id fit
martiali-
bus.*

*Sed quæ
mala inde
eveniant,
dici vix
potest.*

*Malorum
enim ilias
insequi-
tur, quæ e-
numerantur.*

*Martialia
nocent &
infida sunt,
quia vis-
ceribus
abdominis
sunt infecta.*

*Sic igitur
cautissi-
mus mar-
tialium
usus.*

*Omnis ta-
men vir-
tus ipsis
adimi ne-
quit, ha-
bent enim
illa suum
usum.*

*Ea sunt
optima
quæ adhuc
suum sul-
phur inte-
grum cus-
todiunt.*

*Sola lima-
tura ferri
contenti
esse possumus.*

*Caven-
dum vero
à grossiori
limatura.*

cendens in ventriculum & fixius ejus membranis inhærens si solvitur, vehementer partem, cui inhæret, rodit, unde non semel, præsertim in delicatioribus, à liberaliori limaturæ martis dosi, anxietates, rosiones, nauseam, ac molestum ad tussim stimulum, & cephalalgias notavimus. Optime vero ejus pulvis cum aromaticis ut cinnamomo, caryophyllis, cortice Chacarillæ, radice ari, commode miscetur in pulverem cachecticum; vel etiam cum extractis amaris & aloë rosata, rhabbaro, gummi ammoniaco, croco, myrrha mixta, elegantissimas pilulas anticachecticas & anti-hypochondriacas constituit. Ex liquidioribus placet nobis solutio martis, quæ fit cum aceto destillato, cum succo cydoniorum vel malorum aurantiorum, quæ lenissima & laudatissima est, præsertim inspissatione concentrata. Pertinet huc quoque elegantissima tinctura aurei coloris, quæ fit, quando spiritus corticum aurantiorum infunditur floribus salis ammoniaci martialibus, ita enim extrahitur delicatissimum martis sulphur & odore sapore & virtute gratissimum. Remedia hæc misceri possunt optimo connubio cum aliis roborantibus, balsamicis, amaris, & leniter laxantibus: Ex. gr. cum elixirio proprietatis, elixirio nostro balsamico, extracto centaurii minoris, spiritu cochleariæ, essentia ligni aloës, succini, ita enim medicina paratur præstantissima, quæ in obstructione mensium, cachexia, uteri, ventriculi & intestinorum atonia, & flatulentis hypochondriacis, roborando viscerum tonum multum præstat. Commendari quoque meretur tinctura martis ZVVELFERI, quæ maximam partem ob admixtam terram tartari solitam crassiores terrestres vitrioli martis partes in fundum deprimit, subtilioresque sulphureas retinet. Hæc remedia magnæ efficaciam utique sunt, si in prudentem incidant Medicum. Generatim vero hoc loco sciendum est, quod martialia nunquam in nimis magna, melius in refracta, pariori & repetita dosi convenient: secundo caute cum his mercandum esse in siccioribus & ubi inveteratæ obstructiones vel scirrhusitates viscerum sunt, aut spasmodicis contractionibus primæ viæ admodum urgentur: tertio vernali tempore in ætate floridiori, inque subjectis vegetioris indolis & in sequiori sexu, & ubi post eorum usum corpus exercetur, vel movetur, ea longe felicioris operationis esse. Quarto si plethora urget, venæ sectio prius est instituenda, si spissi & visceri humores delinquant, vel præmittenda vel jungenda sunt infusa herbarum aperientium paulo liberalius haurienda, ut humores fiant fluidiores. Omnia enim pellentia, roborantia & deobstruentia suo munere melius funguntur, si materia movenda prius mobilis & fluida fuerit facta. Optime scribit MERCATUS in *methodo medendi de martialibus: horum usui præmittenda est humorum præparatio, ne obstructionibus nondum reſeratis, & humorum copia adhuc præſente, gravissima eveniant mala.* Quinto martialia pro diversitate primarum viarum & subjectorum modo alvum laxant, modo eam adstringunt, unde etiam aquam, in qua ferrum extinctum est, veteres ad reſerandas splenis obstructiones mirifice commendabant, è cujus usu observatum fuit, quod modo alvum turbet, modo eam sistat; nam in GALENI, CELSI

& AVICENNÆ libris nullum martiale exstat remedium præter solam aquam fabrorum, in qua candens ferrum subinde extinctum fuit. Hæcenim, ut ait CELSUS *cap. 9. lib. IV. vel præcipue lienem coërcet, quod animadversum est in his animalibus, quæ apud hos fabros educata, exiguos lienes habent.* Sexto optimum laudabile effectus martialium signum est, si ab eorum usu facies fiat coloratior, pulsus citior, appetitus erigatur, fæces tingantur, & alvus maneat aperta: malum vero est signum, alvus adstricta, gravitas stomachi & præcordiorum, nausea, appetentiæ dejectio, urina crudior, quo casu semper præstat eorum usum omittere.

§. VII. Expositis martialibus, eorumque usu & abusu perspecto accedimus jam ad cætera adstringentia, ut sunt ex mineralibus alumen, ex vegetabilibus radix tormentillæ, bistortæ, plantaginis, pentaphylli, sanguinis draconis, baccæ myrtilli, mala cydoniorum, granatorum flores, balauſtiorum, rosarum rubrarum, terra catechu, quorum usus non infrequens à veteribus in diarrhœis, in nimis sanguinis profluviiis, febrilibus quoque paroxysmis sistendis, nimiaque sudoris & urinæ profusione celebratur. Sed attenta quoque discimus experientia ab horum usu deteriores ut plurimum fieri hos morbos. Nam immodicæ sanguinis frequentioresque effusiones inveteratas viscerum obstructiones & infarctus plerumque pro causa agnoscunt, ubi omnia adstringentia, quia obstructa firmant, nullum possunt habere locum. De horum remediorum noxa vide egregium locum in AETIO *lib. 16. cap. 16. Communis error & muliercularum & barbitonforum est, qui & medicis fugiendus, exhibentium adstringentia, quæ nullo tempore nullaque occasione unquam in usum venire possunt. Adstrictis enim locis, aut nobiliora membra invadent molestia illa excrementa aut retenta, in malum habitum aut hydropem laborantes ducent.* vid. SEPTAL. in *Animadversionibus lib. 7. pag. 151.* Nihil in imprudenti praxi frequentius occurrit, quam ut in dysenteria maligna, vel diarrhœis, quoties præpostere dantur adstringentia, singultus, cardialgiæ & lethales ventriculi inflammationes perfacile excitentur. Cl. Wedel. in *Amœnitatibus Medicæ p. 115.* ex mictu cruento intempestive prohibito apoplexiam observavit. Mulieres si nimium mensium fluxum intempestive adstringentibus prohibent, plenariam mensium obstructionem, ut SOLENANDER in *Consilio med. 20. sect. IV.* & FORESTUS *lib. XIX.* observant, sibi attrahere possunt. Observavimus quoque hac ratione secutum fuisse cruentum vomitum. Narium solemnis hæmorrhagia adstringentium usu imprudenter cohibita facile cecidit in apoplexiam. Excretio vero sanguinis hæmorrhoidalis cum vehementia sedata, in anasarcam & ascitem ordinarie degenerat. Autor itaque suasorque sum, ut à validioribus adstringentibus, sibi plane temperet Medicus. At rectius consulet ægrotis, si in causas enormium fluxionum inquiret, & iis amovendis idonea opponat remedia, quorum virtus magis in temperando, aperiendo, roborando, & divertendo ex parte humorum impetum, quam in adstrictione consistat.

§. VIII. Ordo nostræ tractationis jam nos deduxit ad famigeratissimum illum febrifugum

Optimum laudabile effectus martialium signum est si ab eorum usu facies fiat coloratior, &c.

Enumerantur cætera adstringentia.

Ab adstringentium usu deteriores ut plurimum fiunt morbi.

Si Aëtiæ credimus,

Cui sententia Senpalius suffragatur.

Idem sentit Wedelius.

Ut & Solenander & Forestus.

Autoris observatio & monitum.

Optime ejus pulvis cum aromaticis miscetur.

Vel cum extractis amaris.

Ex liquidioribus placet solutio martis cum aceto destillato, cum succo cydoniorum &c.

Et Tinctura florum salis ammoniaci martialium mediantem spir. Cori. Aurant. extracta.

Medicina præstantissima in viscerum obstructionibus.

Commendari meretur Tinctura martis Zvvelferi.

Martialia nunquam in nimis magna melius in refracta, &c. dosi convenient.

In quibus, &c.

Quando potissimum.

Si plethora urget V. S. prius est instituenda.

Mercatus de martialibus optime scribit.

Martialia modo alvum laxant, modo adstringunt.

Olim nulum fere martiale remedium præter solam aquam fabrorum.

China Chi-
na lauda-
tur ab his
culpatur
ab illis.

Cum cura
& pruden-
tia adhi-
bita, di-
vinum
præbet au-
xilium.

Intempe-
stive vero
data in
magna
mala æ-
grotantes
præcipiat.
Quæ nu-
merantur.

Crugeri
observatio.

Nec non
Syden-
hamii.

Agit hoc
remedium
potissimum
adstrictio-
ne.

Quando
omnia ad-
stringentia
etiam
China Chi-
na cortex
quam ma-
xime no-
cent &
quando è
contrario
proficiunt.

Ad impe-
tus febri-
les coër-
cendos
nullum a-
liud ad-
stringens

chinae chinae corticem: de quo merito illud vulgare valet: laudatur ab his, culpatur ab illis. Ejus virtus in sistendis intermittentium paroxysmis utique certissima & celebratissima est, sed effectus, qui insequitur, non semper tutus & fidus. Profecto unicum hoc remedium artem esse medicinam evincit, qua subiecta & causas, usum & abusum remediorum, ratione modi utendi, temporis & doses invicem à se distinguere debemus. China Chinae, cum cura & prudentia adhibita, divinum præbet auxilium: intempestive vero data in magna mala ægrotantes præcipitat. Nihil enim in praxi attentiori frequentius occurrit, quod ex febribus China Chinae præpostere suppressis hypochondriorum spasmi, ventriculi & intestinorum toni dejectiones, perpetua ventris tormina, lentæ febres, cachexia, tumores œdematosi, hydrops, paralyfes, contracturæ membrorum infelicissimæ subnascuntur. CRUGERUS *Decur. III. An. 3. Miscell. Natur. Curiosor. Observat. 148.* lipothymiam observavit à drachma una corticis Chinae ante paroxysmum exhibita. Ubi quoque notabilem affert observationem, quod Pastor correptus epilepsia menstrua, quum tandem quartana afficeretur diuturna, liberatus sit ab epilepsia, curata vero quartana per corticem Chinae Chinae febris recessit, & epilepsia rediit. Et SYDENHAMIIUS in *methodo curandi febres* pag. 280. hoc pulvere ante paroxysmum dato è medio quendam sublatum fuisse memoriæ prodit. Agit nempe hoc remedium potissimum adstrictione, de qua re vid. *Dissert. nostra de China Chinae usu & abusu.* Unde si humor peccans, si ve in ventriculo si ve in visceribus, dissolvendus aut evacuandus, paullo copiosior resideat, tunc ea, quæ incrassant & constringunt, non possunt non esse noxia, eo quod obstructions contumaciores reddant, & quod humores peccantes in motu sistant. Nocent vero quam maxime omnia adstringentia tam martialia quam superius recensita, & Chinae Chinae cortex in febribus, quando corpora sunt plethorica, primæ viæ multis cruditatibus obfessa, & viscera infarctus & stagnationes occupant. Nocet itidem sequioribus torpidioribus & spongiosioribus, præsertim in majori dosi, & ante paroxysmum datus, proficit vero præmissis in plethoricis venæ sectione in ventriculi cruditatibus emetico, in obstructionibus viscerum & tenaci materia resolvenda, salinis absterfivis leniter purgantibus, balsamicis, amaris vel etiam diaphoreticis, aliquot horas ante paroxysmum oblati. Proficit quoque signis coctionis in urina apparentibus, præsertim si detur extra paroxysmum, paulo minori sed crebriori dosi. At vero ab ejus usu corpus in perspiratione motu ac exercitatione servandum est, ita enim sublatis primo obstructionibus, & fluxibilibus redditis humoribus, ex china data remedia labascentibus partibus insigne robur & tonum restitunt, & pulsus, qui extra paroxysmum ordinarie paulo tardior & imbecillior est, citatior & robustior fit, perspiratio insensibilis augetur, appetitus redit & febris constanter depellitur. Et quamvis alia adstringentia etiam febriles impetus coercendi facultate gaudeant, illud tamen certum est, quod cum cortice chinae nullum aliud possit comparari, quia particulis amaris &

simul balsamicis, quibus pollet, sociatis cum subadstringentibus, ex febrili impetu factam partium atoniam tollendi virtute egregia pollet.

§. IX. Ab adstringentibus deveniendum jam est ad alia infida, ex quorum censu sunt fortiora sudorifera, expellentia, & sic dicta alexipharmaca calidiora, ut sunt, quæ sale volatili & oleo nimis calido prædita sunt, E. G. spiritus Cornu Cervi, viperarum, fuliginis, volatiles, & oleosi, eorum salia volatilia, essentia ex radicibus alexipharmacis & calidis paratæ, E. G. ex radice angelicæ, petasitidis, zedoariæ, contrajervæ, serpentariæ, virginianæ, myrrha, camphora, ceterique spiritus & essentia theriacales. Hæc omnia, quamvis massam sanguinis & humorum commovendo, egregie transpirationem & sudorem promoveant, inque curatione nonnullarum chronicarum, multo magis vero ad præsertionem & acutarum & chronicarum passionum sua laude ac virtute non debeant defraudari: nihilo minus in omnibus morbis, si ve chronici si ve acuti & contagiosi fuerint, ubi materia tenuitate plerumque peccans ad habitum corporis deferenda & expurganda est, raro inveniunt, nisi magna cum cautione locum, præsertim ubi febris juncta fuit, & tali in casu utique pro infidis jure meritoque haberi & judicari debent. Quapropter certissima docet experientia, in variolis, morbillis, petechiis, purpura, malignis febribus etiam acutis, inflammatoriis, nil pejus esse ipsis his expellentibus calidis & positive sudoriferis, præsertim si dentur eo tempore quo materia nondum ad expulsionem est præparata, vel natura non talem excretionem instituit. Quare non potest fieri, quin præcordiorum anxietates, interni ardores cum virium majori lapsu, augeantur, inque nobilioribus partibus funestæ inflammationes & deliria concitentur. Equidem expulsionem in his morbis opus est materiæ putridæ, halituosæ, subtilis, quæ malignitatem causatur, sed paulatim, moderate, successive, & debito tempore id fiat, necesse est. Neutiquam vero vi, vel vehementia opus est, præsertim ubi jam intensior calor corpus occupat. In genere enim notari velim, omnem humorum secretionem sub motu sanguinis moderatiori longe melius semper succedere, quam sub vehementiori impetu & calore: natura enim hic non vult cogi, sed duci. Et quemadmodum nullus sudor febris superveniens, qui febrim non solvit, utilis est, ita etiam qui arte inducitur, inutilis est, ut passim HIPPOCRATES monet. Neque in morbis chronicis, ut scabie, gonorrhœa, cachexia, cum vehementia inductus sudor ullo modo utilis est: exasperari enim inde symptomata, usus atque experientia docet assidua.

§. X. Ex remediorum infidorum numero sunt quoque diuretica calidiora & fortiora, quæ potenti stimulo urinam cient, qualia sunt terebinthinacea, juniperina, olea juniperi, succini, petroselini, balsamus terebinthinæ sulphuratus. Equidem urinam provocare tutissimum est, ad præcavendos renum & vesicæ calculos: in affectibus quoque cutaneis, in arthriticis, rheumaticis & catarrhois defluxionibus id est proficuum: nihilo minus

cum Chin.
China po-
test com-
parari.

Remedia,
quæ præ-
terea infi-
da appel-
lari me-
rentur,
sunt for-
tiora su-
dorifera
& calidio-
ra alexi-
pharmaca.

Quamvis
hæc sua
laude ac
virtute
non debe-
ant de-
fraudari.

Nihilomi-
nus inter-
dum raro
inveniunt
nisi mag-
na cum
cautione
locum.

Quapropter
in va-
riolis,
morbillis,
petechiis,
&c. nil est
pejus his
sudoriferis.

Rationes
autoris.

Infida
quoque su-
diuretica
calidiora
& fortio-
ra.

Quæ dimi-
merantur.

Nisi magna cautio-
ne data
infidissima
sunt.

nus hæc calidiora, nisi magna cum cautione data, infidissima esse, experientia habemus exploratum, utpote in plethoricis & sanguineis renes facile ad inflammationem & consequenter exulcerationem disponunt, & sic calculosam quandam chronicam dispositionem renibus inferunt. Si vero calculus in renibus præsens est, vel in uretheribus hæret, majori facto impulsu dolores fiunt acerbiores, & hinc omnia augentur cum periculo symptomata, ubi potius ea, quæ dolores leniunt, demulcent, spasmos temperant, utilissima sunt. Rēte Grunlingius de calculo pag. 6. & 7. Comprobatum est, frustra adhiberi & omnino inaniter fatigari patientem usu medicamentorum diureticorum præsertim calidiorum, quorum usu præpostero plures ad cælum transmittuntur. Neque adeo tutus salino-causticorum usus est, si renes vitio laborant, & calculosæ sunt dispositionis, nam omnia ea, quæ tonum renum destruant, vel eorum substantiam lædunt, ad nephritidem & calculum viam parant. Multo magis vero ab iis omnibus abstinendum est, si dolor à calculo urget, quo etiam respexit *Matthias Unzerus lib. 1. de nephritide cap. 17. Inconsulto illi agunt practici, qui antequam emolliant vias, nimio diureticorum fortiori usu calculos propellere annituntur.* Neque immerito *Galenus* reprobabat eos, qui quovis tempore calculosis diuretica præscribunt attenuantia, incidentia, idque omnibus corporibus, *vid. Ballonius lib. de calculo pag. 79.*

Neque adeo tutus salino-causticorum usus est, si renes vitio laborant & calculosæ sunt dispositionis.

Ab iis omnibus abstinendum si dolor à calculo urget.

Infidus quoque in plurimis casibus lactis usus.

Variorum scriptorum de lactis usu encomia.

Vim habet diureticam & humorum acrimoniā temperat.

Nihilominus remedium est, cui non facile tuto fidere possumus.

Ob ventriculi acidum facile ab it in coagulū.

Lactis usus omnibus fere visceribus inimicus est.

§. XI. Infidum quoque in plurimis casibus habemus lactis usum. Veteres præsertim asinino ad lenem purgationem frequenter utebantur, ut docet *Hipp. de victu acuto p. 44.* Dolorum quoque arthriticorum magnum præsidium omni tempore habitum fuit. *Plinius refert lib. 28. C. 9.* plurimos asinini lactis usu ab articulari morbo liberatos. *Et Cornelius Celsus lib. 4. C. 24. & Sachsus in Miscell. Nat. Curios. D. 1. An. 1. Observ. 141.* plura exempla recenset talium qui solo lacte curati fuerunt. Hoc enim vim habet non modo diureticam, sed & mirifice humorum acrimoniā temperat. Verum enim vero utut iis in morbis, ubi ingens humorum adest acrimonia, præsertim biliosa, ventriculo tamen salvo, & visceribus liberis, magnum solatium in lacte, præsertim diluto & calide sumto, sit quærendum. Nihilominus remedium est, cui non facile tuto fidere possumus, sed præstat ab eo cum tutiora & meliora habemus, abstinere, vel cautissime illud ipsum usurpare. Utpote in ventriculo, ob ejus acidum, facile ab it in coagulū, quod demum tunicam villosam & venarum lactearum orificia facile obstruit, & quia bilis acrimoniā admodum infringit, alvum plerumque reddit adstrictiorem. Deinde lactis usus omnibus fere visceribus inimicus est, præsertim hepati, lienī, pancreati, renibus, utero, quorum vasculosa & glandulosa substantia facile obstruit, & ita indurat, ut ad contumaces chronicas affectiones, viscerum scirrhescentiam, & sic ad hydropem & hecticam disponat, ipsosque renes calculo obnoxios reddat. Maxime omnium vero in febre, & ubi caput dolēt, &

tonus ventriculi & intestinorum destructus est, nocet. Præstat ejus serum, quod insigni deterfiva virtute gaudet, & simul urinarias atque alvinas vias expurgat, inque morbis biliosis, & scorbuto sic dicto calido, laudatissimum est. Ad pulmonum vero, intestinorum, renum ac vesicæ ulcēra, ad omnes denique cutis asperitates, veteres lacte usi fuere. *vid. Aëtius lib. 2. cap. 92.* In tali casu consulo, ut lac misceatur cum aqua salubri minerali, quæ in majori copia sal alcali fovet, qualis est fons Selteranus, *Carolinus, Emsensis*, hac enim ratione præcavetur ea noxa, & obstructionis viscerum metus non modo avertitur, sed & ipsum lac demulcendi & aperiendi virtutem accipit. Ultimo sciendum est, quod uti docet *Aëtius lib. 2. cap. 92.* nunquam lactis cura suadenda iis sit, qui venas habent angustas & exiles. Qui enim lac assumere vult, habere debet venas latas, & apertos viscerum meatus.

§. XII. Persecuti sumus hætenus remedia interna, quibus parum fidendum & caute utendum sit, ultimum jam est, ut etiam de externis nostram sententiam proponamus, quorum maximam partem, infidam, noxiam, & calculosam pronunciamus. Nil tam familiare est, quam quod in variis vitiis subcutaneis exulcerationibus, scabie, variis pustulis, gutta rosacea, tinea capitis, externa adhibeantur repellentia, & constringentia, quibus fit, ut quidem cutis à vitiis iis liberetur, attamen reversa materia peccante ad interiores easque nobiliores partes, deteriora mala emergant. Novum enim non est, exinde febres lentas, continuas, asthmata, tumores oedematosos, cordis palpitationem, inflammationes ventriculi, in tenerioribus convulsiones & epilepsiam nasci, præsertim quando sulphure vivo & argento vivo linimenta constant, siquidem hæc insigni repellendi facultate gaudent. In vulgus quoque notum est, erysipelata perperam unguentis & constringentibus tractata, vel in mala ulcera abire, vel si ad interiora relabatur materia, ventriculi inflammationem & febres mali moris inde propullulare. Idem valet in affectibus arthriticis, ubi cataplasmata & emplastra repellentia & anodyna periculosas inflammationes ventriculi, intestinorum, spasmodicas generis nervosi affectiones, excitare solent: tot historiis & observationibus infelicem horum usum testantibus. Præterea infida sunt in immodicis sanguinis profusionibus externa adstringentia. Perfacile enim fit, ut sic sanguinis impetus ad caput & nares, si stypticis cohibetur, vel ad pectus vergat ac suffocationis metum quandoque inducat. Novimus quod styptica exterius admota utero ad reprimentam sanguinis immoderatam fluxionem ejus inflammationem, exulcerationem, cum febre lenta, ipsamque mortem concitaverint. In ophthalmia, quæ erysipelas oculi est, solemnis mos est applicare collyria frigida, sed quam malo successu, observationes ostendunt, cum frequentius exinde lippitudines immedicabiles, deperditio visus, ob humorum factam crassitiem, quin imo suppuratio, cum totali cœcitate sequatur.

Præstat ejus serum, quod insigni deterfiva virtute gaudet.

Ad pulmonum, renum ac vesicæ, &c. ulcēra, &c. veteres lacte usi fuere.

In tali casu lac cum aqua salubri minerali misceatur.

Nunquam lactis cura suadenda iis, qui venas habent angustas & exiles.

Remedia externa quorum maximam partem infidam, &c. pronunciamus.

Externa repellentia & constringentia proscribuntur.

Quam ob causam:

Erysipelata constringentibus tractata in mala ulcera, &c. abeunt.

Infida sunt in immodicis hæmorrhagiis externa adstringentia.

Narium & uteris Exemplum.

Quam malo successu in ophthalmia frigida applicentur collyria; observationes ostendunt.



D E

ERRORIBUS VULGARIBUS CIRCA USUM TOPICORUM IN PRAXI.

§. I.

NULLUM, elogio ipsius Galeni, generosum remedium est, quod non possit prodesse & simul etiam nocere. Valet hoc sapientia gravissimi auctoris edictum non modo de usu interno remediorum efficacissimorum; verum etiam de applicatione eorum, quæ vocantur externa seu *topica*. Non immerito universa auxiliorum pharmaceuticorum classis in duo dispesci potest genera; alterum complectitur ea, quæ intus assumuntur, & intimæ admissiōis sunt in vitalia corporis nostri, quam ob causam etiam plus efficaciae & virium secum recondunt: alterum est eorum, quæ extrinsecus affectis vel læsis partibus opem quandam afferunt. Utrisque sua laus, virtus, & gloria in medendi arte manet atque relicta est. Et tametsi interna longe majore prærogativa præ externis gaudeant, utpote eorum usus magis universalis & longe magis patens est; nihilo minus & externa in certis casibus non destituuntur suo usu & fructu, ita ut persæpe iis carere vix queamus. Verum enim vero, quemadmodum eorum quæ intus assumuntur maximus est abusus; ita etiam illud ipsum deprehendimus in exhibitione topicorum. Et sicuti rationalis medicina in vero usu inveniēdo remediorum tantummodo occupata est, eoque non tam generali, quam singulari & individuali: ita nihil magis ignorantiam, imperitiam, & temerariam empiriam facit & constituit, quam nocens & præposterus usus remediorum tam internorum quam externorum. Quapropter totus cardo & omnis nervus totius practicæ medicinæ in eo versatur, ut usum & abusum remediorum quoad morbos & individua, imo quoad omnes vel minimas circumstantias temporis, doses, ordinis probe ab invicem separemus ac disjungamus, & ubi prodesse & ubi nocere queant remedia, demonstramus. Noster labor in præsentī erit, ut externorum præcipuum in praxi vulgari abusum & communes circa eorum applicationem errores prosequamur atque indigemus, eo tamen, quo fieri poterit, brevitatis studio, cum alias ipsa tractatio, pro rerum varietate ac multitudine, nimis diffusam & laxam requirat ventilationem.

2. Cum itaque aggredimur *vulgares in Topicorum applicatione errores* ostendendos, pretium erit operæ prius, quam id faciamus, de *Topicorum* nomine, & quid eo significare velimus, quædam in medium proponere. Equidem vocabulum *topici* nimis est generale, dum omnia, quæ certis locis seu partibus exterius applicantur, sub se complectitur; & hac ratione, quæ in vulneribus, ulceribus, membrorum quibuscunque læsionibus contingunt, sive ea consistant in applicatione in-

strumentorum variorum chirurgicorum, sive in emplastris, unguentis, injectionibus, turundis, ad topica, generali vocabuli acceptione, referri queunt. Attamen, mens nostra hac vice ea attingere neutiquam potest, sed paulo strictiori acceptione vocabuli sub nomine topicorum ea tantum intellecta volumus, quæ in affectibus, qui proficiscuntur à causa interna, adeoque à Medicis potius, quam ab ipsis Chirurgis, commendari debent. Nolumus autem prolixiores esse aut magna uti ambage in recensenda ex variis naturæ regnis desumpta topicorum materia, vel enumerandis variis compositionibus, sed tantummodo ad rem ipsam nos accingimus & simplici via incedentes initium faciemus à capitis morbis, progrediendo sic ordine ad reliquorum membrorum affectus morbosos.

3. Primum autem locum teneant ipsa capitiluvia, quæ sive cum aqua simplici & lixivio, sive cum vino, variis herbis emollientibus & cephalicis incocto, composita sint, non sine gravi noxa à medicinæ imperitis sæpenumero usurpantur. Contingit autem hoc ipsum plerumque in omni capitis, cerebri vel nervorum vitio vel imbecillitate, maxime omnium autem nocentissima sunt in catarrhis, achoribus, aurium tinnitu, gravitate auditus, ophthalmiis, &c. Et nota nobis non pauca sunt exempla, ubi ex capitiluviorum præposuero usu in infantili ætate epileptica passio succrevit. Ut paucis mentem meam explicem, ego quidem existimo, à capitiluviiis plane nos abstinere, & in eorum locum surrogare potius posse frictiones capitis, & earum rerum, quæ siccant & roborant nobilissimam corporis partem, usum esse substituendum. Ratio autem dictorum in promptu est: videlicet progigni prægraves capitis memoratos morbos ex humorum ad caput delato impetu à partibus inferioribus, sanguinisque vel puri vel serosi inibi facto decubitu atque infarctu, res penes rationales pathologos extra controversiam posita est. Quid vero magis disponit caput ad recipiendum humorum impetum, ad detinendas ibi serositates, quam usus eorum, quæ calida vel tepida humiditate fibras relaxant, flaccidasque ac lubricas reddunt, quo minus congesti ibi humores iter suum per venas recipere possint? Potius in omnibus qui caput vel superiora petunt morbis, inferiores partes, nempe ipsos pedes, lavare & de vapore humido fibras subcutaneas & carneas relaxare oportet, ut sic ex superiori regione derivatio & diversio fiat ad inferiora; id quod etiam non sine maximo fructu & emolumento medentum peritiores norunt.

4. Improbamus adhuc ulterius *emplastrorum* sic dictorum *cephalicorum* in nonnullis capitis vitiis usum, eumque penitus è foro medico exesse posse censemus. Intelligimus autem
hoc

hoc emplastrorum genus, ubi raditur totum caput & emplastro quodam obtegatur; quale quid in usu solent habere in gravi hemicrania, in epilepsia quoque, vel aliis gravissimis pathematibus, quæ subsequi solent vehementes capitis à causa externa contusiones vel percussiones. Et quamvis nonnulli hic inter talia emplastra, quæ ex balsamis, gummatis composita sunt, & inter illa, quæ ex viscosis glutinosis parantur, distinctionem faciant: nostra tamen est sententia, cujusque naturæ vel generis sint, ea plus nocimenti quam utilitatis asferre, non excepto etiam famigeratissimo illo de betonica emplastro. Ratio autem hujus asserti hæc esse videtur, quod transpiratio in omni læsa vel affecta parte, quo magis libera est, eo felicius semper succedat curationis negotium, & contra ipsa testatur experientia, nihil magis officere & sanationem impedire, quam quod liberam lædit transpirationem. Addimus & hoc, quo magis sunt remotæ à fonte caloris partes, vel minori sanguinis quantitate perluuntur, in his ipsis certe transpirationem quavis ratione juvare & promovere res magnæ peritiæ ac prudentiæ est. Quivis autem, qui rationem cum experientia in consilium adhibet medicus facile perspiciet, emplastra, quæ totam cingunt calvariam, mirifice obstopando oblinendoque poros, aëris & subtilis fluidæ materiæ ex cœcis illis, quibus cranium & cutis capitis gaudet spiraculis, transitum interciperere ac præpedire.

5. Commendamus itaque eorum loco, ex ipsius experientiæ fide, pulveres siccos, vel ipsi capiti insperfos, vel sacculis inclusos, tales nempe, qui balsamica subtili blanda sulphurea entymias tam roborando quam demulcendo nerveas istas vel frigidas partes solantur, & liberum materiæ fluidæ & aëreæ transitum fartum tectumque servant. Vel si ipsa sicca ex usu secludere indicatio quædam foret, substitui possunt sacculi cum spec. cephalicis in vino decocti, aut linimenta, ex iis, quæ penetrantem indolem habent & sale gaudent oleoso volat. & resina balsamica pollent, conflata, inter quæ balsamus Peruv. camphora, spirit. vini rectificatus, sal amm. vel lumbricorum volat. cum ol. lavendul. majoran. anthos, nucistæ non adulteratis roboratus & castorei essentia nobilitatus eminet; qualia linimenta in omni capitis affectu, sive sit convulsionis, & epilepsiæ particeps, sive cum dolore aut sensus cujusdam interceptione conjunctus levamen inferunt commendatissimum. Nostra autem non est intentio omnia removere emplastra, quæ certis in casibus ad frontem, ad nucham posita, non sua privari virtute possunt: sed fermocinatio tantum nostra est de iis, quæ totam vel dimidiam calvariam tegunt. Insinuandum hoc quoque loco est, insersionem pulverum Cypriorum sic dictorum in caput receptissimam non sine noxa quandoque deprehendi, præsertim quando ex amylo sunt confecti & paulo immoderatus & crebrius crinibus ingeruntur: ita mihi conquestus est Halberstadii amplissimus consiliarius, quod ex frequenti in juventute usu horum pulverum miram debilitatem oculorum sibi contraxerit, quæ in senectute in perfectam cataractam, qua adhuc laborat, transivit; neque ratio hujus rei è longinquo petenda est, utpote talia tenacia poros capitis oblinendo transpiratum tam necessarium sanitati & robori partis vehementer cohibent.

6. Tandem attingere quoque communem in praxi errorem placet, videlicet applicationem variorum linimentorum & balsamorum in affectibus pleisque capitis, & nominatim in vertigine, capitis dolore gravativo, caro, apoplexia, sensuum torpore, & hemicrania quoque. Vulgaris praxis est, ut balsamis fragrantibus, quæ moschus, ambra, zibethum, oleum

rosarum ingreditur, tempora non modo & nares, sed & ipsum verticem & cervicem inungere soleant; quoniam magnum id præsidium adversus hos affectus reputant. Enim vero, admodum falluntur ii, qui talia tam amica hisce capitis & cerebri morbis credunt. Vaporosa hæc sunt auxilia & elastica expansiva vaporositate in poros vasorum sese insinuando; nimium ipsa distendunt, & sanguinis impetuosum motum quodammodo figunt, & sic sedativa & anodyna virtute, ad somnolentiam disponunt. At vero, nemo non cautus qui est, percipiet, caute mercandum esse etiam cum hoc auxilii genere, quod minime quadrat iis in morbis, ubi jam caput ejusque vasa infarcta sunt, nimisque distenta à sanguinis impetu & copia; quo casu certe dum majorem expansionem procurant, & consequenter humorum stasis periculi plenam adaugent, teste experientia, sæpius dolores, vertiginem, aurium tinnitum, somnolentiam, & gravitatem ac torporem mentis & sensuum majorem accerfunt. Et valet de iis remediis non secus ac de suffimentis scitum divi Coi edictum *sect. V. aphor. 28.* multis modis etiam ad alia commoda essent, si non capitis gravitatem inducerent. Quo circa præferimus hisce omnibus tunc temporis talia balsamica linimenta, quæ constant ex solo spiritu vini rectificatissimo, in quo camphora, olea majoran. lavendul. rutæ, sed non terebinthina adulterata, soluta sunt; hæc enim potius discutiendo, poros referando, quam replendo caput vaporositate operantur; hinc semper in cephalalgis & in gravi apoplectico insultu tutiora sunt.

7. Facimus jam accessum ad ea topica, quæ oculorum vitis opitulatur. Dici vix potest, quam perversus tam à chirurgis quam medicis indies notetur abusus, & quanta noxa inferatur miseris ægrotantibus à præpostera horum applicatione: ausim dicere, plures visu privari ex imperitia applicandi topica, quam ex ipsa morbi vi ac magnitudine. Vulgatissimus autem error est, oculis frigida esse amica, calida autem inimica. Valet hoc ipsum & verissimum est, si oculi sani sunt, ubi eos aqua frigida lavare consultius est quam calida, quoniam hæc fibras relaxando oculos ad fluxiones disponit, frigida autem poros tunicarum & parietes vasorum roborando nimium sanguinis & humorum fluxum abarctet, & ita oculos serenos, vividos & sanos servat. At vero, hæc regula haud procedit in oculorum constitutione, quæ est præter naturam; minime omnium autem in eorum inflammatione, quæ nomine venit ophthalmiæ, ubi frigidorum usus perniciosissimus est. Habet exemplum *FOREST. obs. chir. l. II. obs. 19.* de quadam muliere ophthalmia laborante, quæ collyrio ex lapide Talk dicto & aqua destillata utebatur, sed non diu post dolore & ardore adeo ingenti afficiebatur, ut etiam subsecutum fuerit ulcus. Vidimus hac ratione non semel, sed creberrimis vicibus ab instillatione collyriorum frigidorum in oculos æstu inflammatorio dolentes, turbidos factos fuisse oculos & inflammationem intensius auctam, adeo ut intra paucos dies penitus visus fuerit obscuratus, imo plane in defectu expertæ medicinæ abolitus. Nam, quemadmodum in omni inflammatione non sine fundamento exterius applicata frigida & constringentia, incrassantia, cordatiora medici acriter rejiciunt: ita cur talia admittere velimus in oculi inflammatione, cui vasa longe magis tenera capillaria insunt, quam in aliis partibus, equidem non pervideo. Causa enim & ortus omnis inflammationis est infarctus sanguinis vel humorum in vasis propter obstructionem in vicinis vasculis; jam autem obstructionem nihil magis firmat quam actu frigidum, dum fluiditatem liquidis succis demit, eosque spissos & crassos reddit.

8. Deinceps, non modo ex ipsis collyriis actu frigida in inflammatoriis vitiis repudiamus atque rejicimus, sed & omnia, quæ increassandi, condensandi, vel humores ulterius invitandi ad partem affectam, facultatem possident, qualia sunt omnes aquæ dictæ ophthalmicæ, uti aqua sperm. ran. rosar. plantag. sacchar. saturn. alumen, album ovi, bolus rubra, omniaque mucilaginosæ. Ita citatus FORESTUS lib. XI. obs. 26. de morbis ocul. annotat, oleosa & pinguiâ oculis nocere, referens ulcus à tonsore pessime tractatum cum oleo, quod calide applicatum fuit, adeo ut perrupta non solum tunica cornea, sed etiam uvea in callum denique abierit, qui dicitur clavus oculorum. Ego potius majorem efficaciam promittere possum talis modi in casibus de iis, quæ sine magna acrimonia & sine ardore, discussiva quadam pollent virtute, inter quæ laudem meretur camphora, quæ uti omnis inflammationis, ita & hujus antidotus certa & præsentissima est. Quod si itaque inflammatio levior & superficialis tantum est, aqua flor. sambuci, in qua croci momentum est solutum, adjectis quibusdam guttulis solutionis camphoræ valde saturatæ, tepide applicata, non erit sine magno fructu. Si acris lymphæ falsedo conjuncta est, mucilago sem. cydon. vel aqua rosarum cum croco vel camphor. eximio rem virtutem præstabit. Si autem gravior & profundior, neque periculo vacans est inflammationis species, oculo plane stupido & ferme sensibilitatis ac visus experte reddito, magnum solatium inveni in sola applicatione tepida spir. vini camphorati, qui balsami Peruviani adjunctione conditus est; sic successive & sensus, motus, ac tonus & color debitus ipsi oculo, maxima cum admiratione rediit; quale exemplum quondam hic locorum habui.

9. Notum porro est, vitriolum, præsertim quod veneris particeps est, inter ophthalmica à Practicis ceu summum arcanum prædicari. At vero, cum ferme promiscue inter omnium collyriorum formulas assumatur, maxima sæpius exinde resultat noxa. Abstinentium autem ab eo est in omni inflammatione, in falsis quoque præcalidis acris fluxionibus cum rubore, cum pruritu junctis, quoniam sua acrimonia hæc incommoda omnia auget. Datur tamen ipsi locus aptissimus, quando aut humores sunt crassiores & in lemas abeunt, aut quandocunque in tunica albuginea membranulas formare incipiunt, quod post morbillorum vel variolarum morbos, qui nimiam lymphæ introducunt lentescuntiam, non rarius contingit; tali itaque in casu mirabilis effectus remedium est vitrioli Cyprii gr. j. in Uncia i. aquæ chelidonii solutum, quo liquore subtili pluma crebrius de die affecta pars tangenda est: ubi autem manifesta corrodens & urens materia percipitur, temperantia demulcentia mucilaginosæ, inter quæ mucilago sem. psyll. & sieff. alb. sine opio splendet, & pulvis sarcocollæ, operam non satis colaudandam conferunt.

10. Monenda adhuc quædam sunt circa pinguedinem viperarum vel ascie piscis, quæ in panno, in ungue oculorum, inque eorum vulneribus maximopere prædicantur. At vero, intelligendum hoc ipsum est, si eæ fuerint recentes: quandocunque enim per vetustatem rancorem contrahunt, acrimonia sua non modo in dictis, sed & in aliis vitiis præsens damnum inferunt. Deinceps nullus vel plane perversus collyriorum usus est, quando ex vitio & dyscrasia totius lymphæ & sanguinis, uti sæpius fit in scorbuto & lue venerea, oculi rubent, dolent, stillant, & turbidi apparent; frustra hic est omnis topicorum usus, nisi internis prius emendemus succorum vitium ac labem, quod egregie præstant decocta tam lignorum, quam alia-

rum herbarum sanguinem edulcorantium. Accidit quandoque etiam, ut ob tumorem glandularum colli inveteratum, ob fluxionem in auribus cohibitam, vel post cosmetica faciei applicata, aut retropulsus achorem in capite, in oculis materia peccans sedem fixam recipiat; quo in casu solis topicis non est fidendum, nisi internis secudentur, & causa ac fons mali auferatur.

11. Quod attinet ad *otalgica*, aspiciamus & ibi non levem eorum abusum. Quid enim inconsultius est, quam olea, sive sint expressa, ut oleum amygd. dulc. sive remixta cum oleis cephalicis, in gravitate auditus auribus immittere? Commendatur hoc remedii genus à plurimis Practicorum, sed raro vidimus bonum successum. Si enim auditus gravitas est, ea fit vel ex nimia tympani relaxatione, vel humiditate membranæ organon auditus, labyrinthum nempe & cochleam cingentis; nihil hic faciunt olea, quam ut majore relaxatione affectum adaugeant: olea autem calida acria vel nimis spirituosæ in sensibilibus illa nervea meatum auditorium invellente membrana, nil nisi gravem dolorem & ardorem suscitant. Paucis, rarissima sunt exempla, (quando ad experientiam & praxin eorum, qui cum ratione & debita observatione illam exercent, confugio) ubi topica in auditus gravitate vel aurium tinnitu aliquid possunt, ut potius nocumentum magis inferant. Neque etiam video, qua ratione remedium virtus, sive sit oleosa, unctuosæ, sive sit spirituosæ, penetrare queat ad latifundium mali, quod intra cerebrum vel intimiores recessus & concavationes ossis petrosi reconditum est. Vidimus potius ex apophlegmatifantibus, & internis cephalicis majorem efficaciam.

12. Excipimus autem quosdam casus, ubi topica in aurium affectibus non sunt de nihilo, videlicet: quandoque cerumen auris ita induratur, ut gypseam ferme naturam induat, quod auditum non leviter impedit, ubi immixtum tepide factum oleum amygd. dulc. induratum cerumen emollit fluidumque reddit, ut auriscalpis commode extrahi queat. Subit quoque nos recordatio, ubi antè aliquot annos circumforaneus quidam furditatem se auferre singulari arcano posse gloriabatur; consistebat hoc in injectione per siphonem facta cum aqua foenicul. cui paucae guttulæ olei tartari erant instillatæ: aliquoties de die injectionem provide continuabat; & in quibusdam subjectis non male successit experimentum, in illis nempe, ubi intra meatum auditorium cerumen incrustatum sonum impediēbat. Simile quoque contingit nonnunquam ab usu aquarum salubrium, si calide in aurem sæpius immittantur, quod, uti diximus, tantum in eo casu procedit, quando vitium auditus enatum fuit à sordibus tympani membranam nimium incrustantibus.

13. Ulterius adhuc monendum quicquam est de perversa tractatione *abscessuum*, qui non raro in auris interioribus nascuntur. Exposcunt hi ipsi singularem medelam, quæ si non administratur, ulcera putrida cariosa cum totali auditus amissione tandem resultant. Est autem pessimus modus illorum, qui unguenta digestiva oleosa hic in usum trahere solent, qualia partes hæ siccae frigidae nerveæ sensibiles minus ferre possunt. Potius balsamica, uti est essentia myrrhæ, opobalsami, succini probe saturata & tepide gossypio immixta, omne in consolidando & præservando absolvunt punctum.

14. Præterea, *naribus* quoque sua debentur & conveniunt topica, quæ legitimo usu prodesse, præpostero autem mire nocere possunt. Exemplo nobis sunt ea, quæ sine *hæmorrhagiam* nimiam sistendi, exterius naribus

naribus intrudi solent. Quantus numerus quantaque copia formularum hinc inde profertur, dici vix potest; perpauca tamen sunt, quæ usu quodam sese commendant. Cum enim hæmorrhagia à causa interna, plerumque ex spasmo vel nimia constrictione, aut fortiori obstructione à partibus à fluxu longe remotis proficiscatur, & sanguis cum impetu ad vasa capitis feratur, ubi nimium congestus orificia vasorum nimium distendit, tandemque narium tunicas dirumpit, quis non videt exinde, non modo frustraneum, sed & sæpius periculosum esse usum tum temporis externorum, stypticorum & repellentium? Et nihil aliud obtinemus, quam quod, si orificia vasorum adstringentibus obturemus, in aliam partem capitis vel etiam ipsum pectus malum derivemus, manente interno illo impetu. Quod si orificia aperta, ex quibus stillat sanguis, in naribus paulo profundius sita sunt, ut styptica efficacia sua eo pertingere nequeant: interim nares obturantur, & exitus inde sanguini nullus patet, fit, ut è faucibus in arteriam asperam ruat, & in illam metu quandoque suffocationis dilabatur. Accedit & hoc, quod omnia styptica, cum membranis nerveis glandulosis valde sint inimica, si paulo profundius immittantur in nares, non leve iis partibus damnum inferant.

15. Si itaque dicere licet; quod res est, exiguum vel plane nullum habent ea usum, nisi ante omnia dirigamus curationis consilium ad derivationem sanguinis à capite per venæ sectionem, frictiones, immisiones pedum & manuum in aquam vel vinum calidum, per diaphoretica, quæ sine motu & magno calore sanguinem à centro versus corporis circumferentiam propellant; & tunc non opus est istis repellentibus frigidis, aut stypticis, sed sola essentia catechu, naribus excepta, omnibus palmam præripit. Vulgus in usu habet, in nimia hæmorrhagia nummum argenteum aqua frigida madidum vel fronti vel nuchæ applicare, linteam quoque frigida madidum fronti vel toti collo injicere: at vero, si tale quid factum fuerit in initio, non sine periculo apoplexiæ hoc instituitur. Interea non improbamus talis modi epithemata, quæ vi discutienti & simul roborandi instructa sunt; uti v. g. acetum rosaceum cum nitro, camphora, oleo ligni rhodii mixtum, quod tepide temporibus, collo applicatum non caret singulari fructu, sed cunctis merito præferendum est.

16. Accedimus jam ad ea topica, quæ communiter in ulceribus ossium squamosorum putridis & cariosis lue gallica vel scorbutica infectis perquam familiarius usurpari solent. Sunt autem ejusmodi ut plurimum aquæ, v. g. rosar. plantag. semperviv. cum bolo rubr. sacch. saturn. magisterio saturn. mixtæ: & si ad ossa faucium penetrando ulcera, vel ipsius uvulæ substantiam corrodendo & absumendo aggrediuntur, injectiones gargarismatum communi ex usu sunt. Sed hæc omnia nullius momenti censeo; plane enim inidonea sunt ista frigida corruptioni putredinosæ sistendæ. Potius hæc clades exposcit longe valentiora, majore penetrantia dotata, ex quibus magno encomio digna sunt, oleum caryophyll. quod præsentissimum est conservativum ossium, præsertim si cum balsam. Peruv. misceatur: deinde elixir propriet. sine acido, ess. succini, spirit. vin. camphor. mediante siphone in nares provide injectus, hæc pessimi moris ulcera, fœtida & venerea, sanare & sistere potens est; quam procedendi viam non sine summo emolumento optime aliquoties excogitavi & sæpius expertus sum. Multi venerei ob ignorantiam chirurgorum & pessimam remediorum applicationem diu gerunt talis modi ulcera sordidissima, quæ tandem & totam narium internam structuram, uvulam cum totius palati osse exedunt atque depascunt, non sine maximo vocis vitæque detri-

mento; nam ipsa gargarismata etiam ex præstantissimis parata, cum ad radicem mali partemque affectam, quæ est supra os palati, pertingere nequeant, frustra applicantur.

17. Superest adhuc *dolor odontalgicus* gravissimus, cui quanta topicorum à medicis & chirurgis, nec non ab ipso vulgo, dicata & consecrata sit sylloge; probatione ulteriori non eget. Sed & hic quoque frustranea ferme sunt omnia, ut potius majus damnum quam emolumentum inferant; & utut quandoque post leniora adstringentia & anodyna, inter quæ mihi præcipua semper fuit essentia catechu cum essentia anodyna mixta, aliquod doloris allevamentum sequatur, exiguum tamen est ad breve tempus, alio tempore plane infidum & nullius amplius effectus. Et cum sæpius dolor odontalgicus epidemicus sit, & rheumatismi seu defluxionis acris erysipelaceæ soboles, dentem cariosum maxime infestans, & cum catarrhali febricula juncta, ex facili apparet, quam inanis & inutilis sit applicatio immediate ad dentes; potius tunc, si expectandus quidam ab externis usus venit, sacculi paregorici ex discutientibus, carminativis, anodynis parati in usum sunt trahendi. Et quamvis ol. caryophyll. origani, essentia quoque acres odontalgicæ dentium cariei egregie dicata sunt: quæ tamen an tunc temporis, quando in dente carioso membrana nervea ab humido aqueo nimis distenta vel erosa est & inter angustias osseas pressa hæret, usum præstare queant, dubium est. Potius tunc balsamum meum apoplecticum liquidum seu vitæ naribus exceptum, vel lac tepidum cum flor. sambuci, & croco coctum & in ore detentum plus pacabit doloris illius sævitiam, quam quæcunque alia sine ulla ratione commendata & adhibita odontalgica externa. Et experientia scribimus, sola diaphoretica, v. g. tincturam bezoardicam, sulphur antimon. nostræ præparationis, spiritum C. C. succinatum cum spiritu nitri dulci nuptum, in graviore odontalgia cum regimine sudorifero usurpata, non omittis prius iis, quæ alvi laxationem conciliant, opem mirabilem præstitisse, adeo ut etiam ex hisce pateat, quam frustraneæ & quam perperam in istis affectibus præscribantur vel exhibeantur topica.

18. Tandem non silentio transmitti debet, cum potius primum tractationis locum postulare, vulgaris curatio eorum affectuum, qui in faciei & capitis cute observantur; cujus generis sunt achores & tineæ capitis, pustulæ & ulcera manantia in facie infantum, gutta rosacea & capitis erysipelas. Et quod attinet ad ipsos *achores vel tineam capitis* in infantibus, nil magis solenne est imperito vulgo, quam ut lotionibus cum variis lixivis & decoctis, inunctionibus, tam sulphure & oleo olivarum quam aliis unctuosus & linimentis remove queant hoc malum: nil vero est, quod, accuratiore observatione teste, majora incommoda post se trahat, quam hæc sanandi ratio; sequuntur enim exinde epilepsiæ, inflammationes oculorum, suppurationes eorum, epiphora, imo gutta serena quandoque, vel etiam graves peripneumoniæ, asthmata, & ejusmodi generis plura. Cautè itaque procedendum est cum omnibus externis, ne transpirationem impediamus; neque ea unquam porrigenda, nisi simul internis remediis correctioni & evacuationi humorum peccantium prospiciamus. Exulent autem omnia humida, exulent oleosa, exulent constringentia: sique externis datur locus, balsamum sulphuris antimoniale cum spiritu vini camphorato solutum & cum oleo amygd. dulc. mixtum, emolliendo, discutiendo, putredini ulteriori resistendo egregium præstabit officium. In pustulis venereis inque gutta rosacea, caute quoque cum cutis poros constringentibus & repellentibus est agendum; plus vice simplici observavimus exinde ortas ophthalmias, sero isto salso acri præcipitato ad oculorum

tunicas. Sed quantus abusus deprehendatur topicorum in erysipellate capitis, eloqui ex digno non possumus. Est certe erysipelas affectus, qui cautissimam externorum requirit applicationem, idque tanto magis, quo vicinior est cerebro & nervorum origini; nam non periculi expertem esse, præsertim in scorbuticis, hunc affectum in se consideratum, norunt Practici solidiores.

19. Quod si vero scripta evolvimus eorum, qui observationes practicas in publicum edere annisi sunt, ingens campus istorum, quæ noxium externorum abusus docent, nobis patebit. ROLFINKIUS *method. curandi affect. capit. p. 292.* anginae meminit ab erysipellate capitis ex intempestivo usu repellentium ortæ. Recte scribit AQUAPENDENS *lib. de tumoribus p. 633.* si erysipelas fuerit in facie aut in capite, localia medicamenta neque ante, neque post purgationem esse administranda; posset enim frigidis materia repelli ad cerebrum, unde phrenitis, aut ad fauces, unde angina. Nocentissima autem tunc sunt omnia unctuosa, omnia cataplasmata, humida aquea: potius sola sicca, sacculi nempe, ex herbis emollientibus & discutientibus parati, ut transpiratio maneat libera, apponendi erunt: interdum tamen spir. vin. camphoratus cum ess. castor. ol. nucist. sale volatil. lumbricorum, nitro & momento opii mixtum exteriusque inunctum, benignam medentibus porrexit manum. *Ad guttam autem rosaceam & pustulas* qui usurpare solent merc. subl. vel aquam merc. præcip. dilutam, mirum mihi peccare videntur; hæc ipsa enim interius recepta, ad graves dolores capitis, ad hemicranias disponunt, ipsisque dentibus vacillationem nimiamque laxitatem inferunt: potius essentia benz. cum magisterio saturni, camphora, saccharo saturni cum aq. sperm. ran. & fl. samb. remixta, perquam utilem locabit operam.

20. Memorandum adhuc aliquid est circa peculiarem gingivarum affectum, & talis est, quando caro *gingivalis* pene omnis exeditur, ita ut nudæ radices dentium appareant. Creditur id vulgariter fieri ex nimia fibrarum relaxatione; unde consuetudo est vulgarissima obviam eundi huic affectui per externa constringentia, nempe essentiam mastich. tormentillæ, alumen, essentiam catechu, &c. quæ nihil proficiunt, sed potius nocent; nam affectus hic est atrophia, & oritur ex defectu succi gingivas nutrientis propter obstructionem vasorum arteriosorum, quæ minima & copiosissima in gingivis existunt: jam autem si constringentibus ea obstructio firmatur, non poterit aliter fieri, quin plus defraudentur suo succo roscido alibili. Potius deprehendimus proficua decocta, ex vino cum herb. salv. organ. rosmarin., camph. nitro, adjecta portione spir. sal. ammon. parata, quibus collutiones fordidum & elutiones oris frequentissime calide instituendæ; sic vasa aperiuntur, invitatur succus & sanguis, fibræ gingivales roborantur, & redit hisce partibus suus usus & vigor.

21. Provolvitur jam ad thoracis affectus, in quibus quidem topicis sua constat laus & dignitas, licet non parvus quoque eorum in praxi medica deprehendatur abusus. Exemplum nobis præbent tumores illi pulmonum inflammatorii, qui *pleuritidis vel peripneumoniæ* nomine efferuntur. Quid autem usitatus est, quam in iis ipsis ad dolorem compescendum pingua oleosa unguenta exterius præscribere? Rarius autem ex iis secutum vidi bonum effectum: ut potius, cum in principio diaphoreticis & discutientibus debitis internis dissipari malum potuisset, discussionem impediant & malum ad suppurationem disponant, non secus ac fieri solet in aliis erysipelaceis affectionibus partium externarum, ubi similia unguenta, dum poros obstruunt & fibras nimium relaxant, sicque decu-

bitum humorum ulteriorem invitant, ad suppurationem & exulcerationem malum deducunt. Quod si igitur, uti sæpius accidit, pleuritis est spuria, id est, inter membranas muscutorum intercostalium serum acre falsum stagnat, ubi rheumatismi quædam species est, longe plus nocebunt memorata topica, dum transpirationem & liberam excreationem materiæ stagnantis, quæ tamen summe necessaria est, præpediunt. Habent quoque nonnulli in usu, ut sopiendi gravius doloris causa ol. hyoscyami addant: Fateor, dolorem exinde sopiri, sed non possum non simul monere, quod somnolentia, virium non levis languor, difficilior expectoratio subsequi soleant, non sine magno, præsertim in ætate senili languida, periculo. Deinceps, nonnulli Practici dictis in affectibus in usu habent, ut emplastra, etiam ipsum Vigon. cum mercurio, cum balsam. sulphuris & camphora mixtum, applicent: Deprehendimus vero, ab eo, si pleuritis fuerit spuria, quæ non pulmones, sed ipsos intercostales musculos & membranas infestavit, dolorem quidem fuisse dissipatum, sed ad alias partes detrusum; imo quoque aliquot experti vicibus sumus, in pulmonum substantiam materiam fuisse relegatam, ubi pulmonum vomica fatis chronicam & periculosam excitavit.

22. Sententia itaque nostra est, in inflammatoriis hisce thoracis affectibus vel plane abstinere ab omnibus topicis, vel, si quædam admittenda sunt, ipse spir. vin. camphorat. additione castor. croc. ol. nucist. destillati mitigatus & anodynus redditus, externa debita inunctione vel cum liniei applicatione omnibus aliis erit præferendus. Dantur tamen casus, ubi unguenta pingua, anodyna virtute prædita, fibras relaxantia, bonum effectum edunt, rarius vero in usum vulgo trahuntur. Talis affectus est *tussis sicca convulsiva*, ubi non tam materiæ quantitas, sed potius tenuis acris pauca materiæ qualitas vitiosa, nervos pneumonicos & thoracem ad violentos convulsivos & concussivos motus irritat; ubi sedare hos motus & partes thoracis nimium constrictas relaxare oportet, non neglecta humoris tenuis irritantis incrassatione & inviscatione. Talis tussis non raro contumacissima est, & vehementer sub certis tempestatibus orta, ætatem maxime puerilem & infantilem adoritur. Vidimus bonum successum; quando totum pectus inunctum fuit unguento ex unguento potabil. rubr. spermat. cet. axung. tax. unguent. popul. ol. anis. camph. in hunc finem composito.

23. Tandem, quoad externa in vera phthisi seu pulmonum exulceratione, subjicienda quædam esse monita arbitramur. Habemus varias observationes, ubi phthisici unguenta & emplastra alia bene, alia vero ægre ferre potuerunt. Explorandus itaque prius est cujusvis individui genius ratione causæ & morbi. Non inutilem eorum operam fore putamus, si duris quibusdam tuberculis pulmones obfessi sunt, quæ successive in suppurationem abire solent. Quapropter emplastra quædam non ex nimium calidis nec nimium inviscantibus unctuosius parari debent; illa enim dolorem & inflammationem exasperare solent, hæc transpirationem liberam lædunt. Omnium autem optimum est emplastrum diasulphuris Rulandi, omissa colophonia, quod ex balsam. sulphuris amygdalino, myrrha, terra vitrioli, cera & terebinthina confectum est, quibus etiam adjici potest bdellium; hoc impetum humorum à pectore roborando divertere, & stasin humorum discutere valet. Sed quod notabile est, si emplastra in pulmonum affectibus laudabile quid præstare debent, non sterno imponenda sunt, per hoc enim os cartilagineum non penetrare eorum virtus potest: sed potius dorso & costis, quoniam ibi major pororum est apertio, major copia sanguinis & vasorum, ut

fic recipi melius queant partes emplastri subtiliores & salutare.

24. Descendimus jam ad vitia quædam stomachi, in quibus locus ipsis quoque externis datur, modo fiat debitus eorum usus. Nullus dolor omnium confessione tam crudeliter exercet ægrotantes, quam is, qui fixus hæret in sensibilißimis ventriculi orificiis, dextro vel sinistro, & appellari solet cardialgia. Consuetudo hic est, varia dolorem placantia interne ingerere, externe quoque stomachalem regionem vel linimento spirituoso vel unguento quodam, ex carminativis anodynis composito illinire: at vero cum successu non adeo exoptato. Cum enim dolor in certa tantum parte, eaque exigua, nempe nervosis istis orificiis sæviat, facile patet, iis locis penetrans & efficax remedium & quantum fieri potest, proxime esse applicandum. Jam vero, si vel emplastrum vel linimentum vel unguentum toti regioni stomachali applicatur, exiguum est, quod penetrat ad orificium; quinimo cum notum ex anatomicis sit, quod superius ventriculi orificium dorso magis & vertebri propinquum jaceat, cum juxta arteriam asperam situm sit, facile elucet, ea remedia, quæ applicantur regioni sub scrobiculo cordis, minime eo posse penetrare. Potius itaque dorso circa octavam & nonam vertebra lateris sinistri applicandum erit, si pertinere debet ad locum affectum, remedium: quod si autem dextro orificio laboranti succurrere velimus, fiat illud sub scrobiculo cordis juxta latus dextrum. Minime autem hic ea, quæ nimis cito avolant, uti sunt spiritus, minimeque unctiosa vel emplastica, quæ nimis tardæ sunt operationis, indicantur: sed potius, ex quo ego levamen expertus fui, est linimentum crassiusculum in forma emplastri applicatum, & compositum ex theriac. croc. oleo nucist. camph. balsam. Peruv. & ol. hyoscyam. Quod si minus juvat, frustranea erunt omnia circa externa tentamina.

25. Ulterius eos, qui praxin frequentem exercent, non latet, in more quasi solenni esse positum, si quis ex debilitate ventriculi, ex vomitu, nausea laborat, quod tunc ordinario regioni sub sternum vel unguenta vel emplastra stomachalia applicentur in forma ovali. At vero, si quis dissecta corpora paulo inspicit accuratius, non ventriculus, sed saltim pauca ejus portio, atque hepar, intestinum colon & tenuia intestina ibi posita sunt: procumbit potius ventriculus ad latus sinistrum, sub costis, ubi tres ejus partes ad minimum delitescunt, versus spinam. Spuriis itaque costis lateris sinistri versus dorsum si generosa penetrantia quis applicat remedia, deprehendet effectum longe auspiciorem.

26. Dolor qui nascitur ex calculo truculentissimus, in principio vel in medio uretheris stagnante, exigit quoque, nec sine ratione, topica: sed ut legitime ea applicentur, prudentiæ est. Neutiquam autem ignotum, calculum etiam ultra modum grandem, quamdiu subsistit in renum substantia tubulosa & canaliculosa, ne ullam quidem molestiam creare, sed tum demum, quando descensus hæret in uretheribus valde angustis & simul exquisite sensibilibus. Videmus itaque exinde, non lumbis, ubi renes siti sunt, sed potius secundum ductum uretherum, qui est à lumbis versus inguina, applicari debere remedia. At vero, & hic quoque non levem errorem observamus, dum ut plurimum ipso in paroxysmo, nempe descensu calculi, unguentis admiscere solent pellentia calida, v. g. ol. succin. spiritum terebinth. ol. juniper. quod sane & consilio & effectum pessimum est; intendunt quidem plures hisce pulsionem calculi per angustias viarum ita promovendam, sed mirifice errant, infigitur potius hisce calculus, gravioraque symptomata, ut uri-

næ suppressio, vomitiones, convulsiones excitantur. Nam, quod in urethere fixus hæreat, nec è sede sua dimoveatur calculus, non tam culpa est moles calculi, quam potius dolorificus iste spasmus; & quum asperitate calculi ut plurimum fiat fibrarum nervearum insultatio, influxus fit spirituum, dolor, ipsumque dolorem comitatur spasmus & constrictio, & quo crudelior dolor, eo semper angustiores ac constrictiores fiunt viæ. Jam autem, si talia spiritiosa applicantur, irritamus influxum sanguinis & spirituum, intrudimus in partem calculum, dolorem augemus, calculum obturamus, & plura truculentiora producimus symptomata. Non negandum quidem est, si nec dolor, nec spasmus adest, aut si laxitas quædam & toni dejectio in fibris renum membranaceis & nerveis deprehenditur, talia externe adhibita ob id quod tonum roborant, urinæ fluxum promovere: sed neutiquam tunc temporis locum habent: potius sola emollientia, paregorica, & anodyna olea, v. g. ungent. popul. sem. papav. hyosc. lil. alb. axungia taxi, camphora, quæ ipsis penetrantiam conciliat &c. sufficiunt, modo fiat cum manu calida frequens circa situm uretherum frictio & inunctio: hæc enim, dum spirituum impetum refrænant & fibras contractas relaxant, efficiunt, ut longe expeditius & facilius patentem viam & descensum calculus obtineat. Qua de causa etiam infusus in balnea summe proficiuus & in instanti salutaris est iis, qui gravissime doloris truculentia divexantur.

27. In nimio sanguinis per uterum profluvio, in seminis involuntario effluxu, qui sexu masculino accidit, receptum in praxi est, ut regioni lumbari, ubi magni isti sanguiferorum vasorum rami situati sunt & paulo liberius patent, applicare externa soleant, quæ sanguinis impetum ad partes genitales quodammodo refrænant. Verum enim vero, multum interest, qualia & quo tempore tali in casu in usum arcessantur. Notavimus enim exemplum, ubi in foemina 40. annum excedente emplastrum sperm. ran. cum saccharo saturni & ol. hyoscyam. mixtum in nimio fluxu mensium, lumbris fuit applicatum, sed ab ipso temporis momento nunquam redierunt menses, magno cum sanitatis dispendio. Cavendum quoque ab omnibus actu frigidis, & multo magis à narcoticis, quoniam hæc omnia sanguinem, si nimium incumbit in has partes, cohibendo curam quidem palliativam exhibent, sed longe majora mala inferunt, quæ sunt inflammatio renum, colicæ convulsivæ, aut spastica abdominis pathemata. Unde tutissima via est, præsertim in hæmorrhagicis excretionibus, à talismodi topicis plane abstinere, & potius internis majori cum ratione & circumspectione uti.

28. Devenimus jam ad nonnullos affectus, qui ex nimia laxitate & resolutione ligamentorum, nec non defectu eorum roboris ac toni oriuntur; & sunt in infantibus maxime ani, in foeminis uteri prolapsus. Communiter ob laxi naturam strictis & adstringentibus tractare solent hæc vitia medici & chirurgi; unde decocta ex stringentibus concinnata applicare, iisque fovere partes fatagunt. At vero, cum ille prolapsus non tam ex ipsius uteri vel intestini recti, quam potius ex ligamentorum laxitate propter humidi succi inibi congestionem & accumulationem fiat, quisque inde perspicit, frustraneum & hoc curationis molimen esse, quoniam ad ipsa ligamenta, si usus foret adstringentibus, penetrare ac pertingere externa hæc nequeunt. Quapropter in uteri prolapsu, sive sit ipse uterus sive vagina, nihil conducunt talia utero immediate applicata: sed potius ipsa regio inguinalis fovenda erit seu linimentis seu emplastris, balsamicis & penetrantibus, quæ non tam terrea stypcitate, quam spiritiosa roborante virtute imbuta, vigorem, motum, & tonum reddunt humidis & relaxa-

tis partibus. Ubi tamen probe tenendum, uti in omnibus, ita in his non sola topica absolvere punctum, sed interna maxime requiri rectius & magis universali intentione, in quibuscunque corporis internis, imo externis vitiis. Interea tamen non rejicimus suffimigia, item fatus ex vino & herbis aromaticis ac sale volatili oleoso præditis & terreo quodam principio imbutis confectos, quibus & ipsæ hæ partes immediate affici possunt, cum vis suffimentorum paulo intimius penetret, & similis quoque effluviorum, quæ ex balneis nascuntur, natura sit.

29. Restat adhuc quidam affectus valde refractarius, imo dolorificus, qui sub nomine *hæmoirrhoidum cæcarum* describitur. Noto notius est, quam graves molestias creare soleat tumor hic venarum hæmorrhoidalium, à sanguinis vel etiam feri visceri nimio affluxu & stagnatione ortus. Innumera hic excogitantur, præsertim topica, Chirurghi & Medici remedia: sed quantum eludant & fallant omnem spem ac expectationem ægrotantium, notissima quoque res est. Etenim adstringentia, quæ commendantur, remorantur magis humores, qui tumorem efficiunt: emollientia & anodyna relaxant partes, & ulteriorem affluxum invitant, acria erosionem faciunt, & ad ulcera pessimi moris, imo ad fistulas disponere solent. Non minima igitur sapientia est medici, si pro circumstantiarum ratione horum usum probe distinguat, & quid agere vel non agere debeat, noscat. Paucis, si nimius dolor urget, utique anodyna & emollientia non sunt de nihilo; hinc ol. lini solum sufficienti in quantitate admotum, egregie dolores mulcet. Si autem nimius tumor permolestus est, utique & tunc non tam styptica crassa terrea, quam roborantia, ut fatus, ex vino, mastich. succin. flor. ros. balauft. thur. millefol. adornati conveniunt: neque suffimigia hoc loco veniunt excludenda, præsertim ex rebus quæ sale volatili oleoso foeta sunt; quorum indoles est, ut altius sese insinuent, poros firment, nimiumque humidum dissipent. Unde etiam mures marini, quorum virtus ceu peculiaris hodierno tempore jactatur, si usu quodam sese commendarunt, non alia ratione agunt, quam alia suffimenta sale oleoso quodam volatili imprægnata. Ex hisce dictis abunde constare arbitror, quam perversus possit enasci usus, si quis tum temporis in cœcis & dolentibus hæmorrhoidibus, quando dolor gravissimus adest, velit adstringentia, frigida quoque, imo acria adhibere: aut si deficiente dolore ingens tumor præsens sit, emollientia vel anodyna, relaxantia in usum trahere.

30. Hæc dum agitur, quæstio incidit, *num in nimio sanguinis vel lymphæ profluvio ex utero injectiones habere queant locum?* præsertim cum experiamur in feminis nimio profluvio non sine summo fructu tales institui. At vero, cum vulgus credat, fluxus non nisi adstringentibus sisti debere; hinc nihil est periculosius, quam si tales nimias fluxiones cohibere moliamur externis injectionibus, quæ constringendi facultate pollent. Memini fœminæ hujus loci, quæ injectione decocti millefol. cum alum. acuati, dum nimio mensium profluvio laborabat, ulcus cum tabe & hectica febre lethale sibi contraxit. Cautissime itaque cum talibus est mercandum, & videt quivis, quod externa hæc magis nocere quam prodesse possint.

31. Ordine jam devolvimur ad ea externa, quæ dolentibus artubus solent adhiberi, si vero ex topicis abusus & perversa applicatio sit, certe *in doloribus arthriticis & podagricis* id accidit; nam quoniam affectus est in parte externa, plurimi existimant parti affectæ immediate remedium esse admovendum, ut eo citius ad causam morbi perveniat. Sed in eo quoque mirifice falluntur; nam error est, ea in hisce affectibus ita requiri, quasi sine illis dolores nequeant de-

mulceri. Nam discimus ex experientia, longe felicius absque ullo topico, si æger obediens beneficio temporis atque patientia utatur, solis internis causæ morbi- ficæ recte oppositis ferociam horum dolorum mitigari posse, vel plane tolli. Ante omnia autem cavendum est, ne repellentia, maxime in principio morbi, adhibeantur; hæc enim, dum naturæ motum, qui est versus exteriora, turbant & materiam vitiosam ad interiora repellunt, gravissima mala excitant, vid. DRABIZIUS *de scorbut. tit. de arthrit. p. 62. & 63.* Experti sumus, in principio doloris podagrici cataplasma ex album. ov. cum alumin. compositum, in consiliario plethorico una nocte affectum soporosum secutum fuisse, qui vigorem ingenii & memoriam per totam vitam sustulit. Memorabilis est observatio, quam recenset HAGENDORN. *cent. 1. hist. 28.* ubi mercator ex dolore & tumore scorbutico laborans, applicato epithemate ex aq. destillatis cum ceruss. & camph. à balneatore, sedatis doloribus loquelam amisit, nec brachium sinistrum loco movere visus est. Non meliori sæpe successu procedit illa hodiernum tam frequens partium externarum cum spiritu vini camphorat. inunctio. Dicit vix potest, quanta ab hoc remedio sine subjecti & circumstantiarum ratione adhibito suscitata fuerint mala: ita non semel sed iterum observare licuit, ab ejus applicatione in pedibus podagra tactis enormes cardialgias, motum artuum convulsivos & epilepticos, paralytes aliaque horrenda auditu symptomata fuisse concitata. Experientia etiam constat, non omnia omnes juvare, sed quædam ex topicis dolores uni tollere, alteri augere, quosdam linimenta spirituosæ, quosdam emplastra anodyna, nonnullos etiam cataplasmata ex mica panis & lacte bene ferre posse, aliis autem hæc neutiquam convenire.

32. Causa horum effectuum peculiarium non sufficienter vulgo attenditur & inquiritur, cum & ipsis chirurgis notum sit, omnia individua non æque bene cuncta in externis vulnerationibus perferre posse. Est autem causa non tam dispositio peculiaris humoris peccantis, sed potius ipsa tensiva tonica fibrarum, pororum, & vasorum cutis constitutio? habent enim omnes partes, & maxime quæ emunctorii & colatorii vices gerunt, suum peculiare robur, tonum, tensionem, nec non dilatationem, quæ motus species ad excretionem & secretionem summe necessaria, potissimum à spirituum animalium influxu & nervearum membranarum tensione dependet: qualis itaque hæc ipsa sit in omnibus individuis, & morbis eorumque temporibus, in exhibitione topicorum provide animadvertendum est ab ipsis medentibus. Quis enim non videt, si pori nimis fuerint constricti à dolore & spasmo, neutiquam tunc spirituosæ calida conferre, sed potius ea, quæ blande constrictas partes relaxant? contra, si nimia est post dolorem relaxatio, quod apparet ex tumore, dolore mitiori reddito, omnia unguenta, humida, unctuosæ, anodyna valde nocere, & potius tunc linimentis spirituosis nervinis utendum esse. Deinde, utut quandoque topica egregie dolores mulceant & febrem mitiorem efficiant, nihilo minus non semper illud valet, etiam in eodem individuo. Paucis, quo robustior in expellendo est natura, quo major corporis vigor & motus internus, eo minus periculi inducunt externa decenter applicata, quæ tamen, si vigor motuum cessat, si ætas senilis vel affectus cachecticus supervenerit, plane sunt seponenda. Illud enim unice intendat medicus necesse est, ut externis ne sistat evaporationem materiæ peccantis, sed eam promoveat: verum, quoniam magna prudentia hac in re opus est, securius potius est abstinere ab omnibus externis & totum negotium curandi internis comittere, partesque affectas in blando tepore servare.

33. Deinde etiam observavimus, tophorum generationem, quæ maxime fit in arthritide fixa, plerumque deberi improvidæ externorum applicationi, præsertim stupefacientibus & infrigidantibus. Meretur hic adduci WEDELIUS qui in *medicament. Facultat.* scribit: *Frequenti experientia docti sumus, plus damni ipsos podagricos inde passos, imo plures ex arthritide vaga hoc modo fixam sibi accersivisse, plurimos vero tophos, quod usurpaverint unctuosæ & pinguiæ emplastica.* Hinc & ipse GALENUS *method. medend. lib. 4. c. 3.* tophos in articulari morbo produci recte memorat ex humore glutinoso & crasso, quando is non paulatim digestus, sed violentis remediis totus simul exsiccatus est: & FERNELIUS *consil. 12.* geminari inde dolores observat. Ceterum, non omnia topica plane exterminanda esse in externis articularum doloribus arbitramur, siquidem, quando dolor adest inveteratus cum torpore quodam & insensibilitate junctus, qualis in senili ætate sæpissime evenit, tunc sedata prius interna sanguinis & humorum ebullitione, ad roborandos nervos & invitandum spirituosæ elastici fluidi influxum in imbecilles partes, linimenta nervina balsamica vi nobilitata expectationi medici & miseri ægrotantis eximie satisfaciunt.

34. Non possumus quoque hoc loco silentio præterire in *arthritide vaga scorbutica* lumbricorum terrestrium vita adhuc fruentium dolentibus partibus applicationem. Dici vix potest, quanta encomia hujus remedii penes practicos extent, ex quibus maxime eminet WIERUS. Certum est, quod ob sal volat. abstersivum nitroso-sulphureum, & discutiendi & sedandi virtute egregia polleant, quam non tantum interne, sed & externe in variis dolorum speciebus, imo etiam in ipsa gallica lue præstant. Nihilominus tamen cautione quadam & hic opus est, utpote in ipso dolore sævissimo, ubi omnia sunt in motu, vires abundant & juvenilis ætas adest, hæc actu humida & frigida non facile nocebunt, sed id de quo dictum est exsequentur, aliter tamen res se habet, si in arthritide fixa inveterata iis quis uti velit, ubi plane contrarius sequetur effectus.

35. Ulterius subjienda quoque veniunt quædam de usu externorum in *affectu erysipelaceo*. Nil notius est, quam quod vulgus chirurgorum & medicorum mox hic confugiat ad ipsa externa, unde innumeræ passim prostant formulæ: nihilo minus innumeri & olim & nostro etiam tempore animadvertuntur indies errores, ad quos circumscribendos & particularibus observationibus stabiliendos vel ipsum tempus & charta deficeret. In universum autem hanc regulam velim teneamus, distinguere semper debere erysipelas, quod fit à causa externa, & quod ab interna; in illa, quæ ex contusionibus variisque læsionibus externis profiscitur, non tam facile nocebunt externa: quandoque autem ex organico humorum & febrili impetu materia heterogenea, acris & corrosivæ plerumque indolis, versus partes externas protruditur, ibi cautius procedere licet; facile enim sic repellitur materia, & dum prodesse volumus iis, quæ alias quandoque profunt topicis, plus nocemus, retropulsa nempe ad interiora materia, quæ veneni indolem tunc acquirit: quæ de re consuli potest *dissert. de conversione morbi benigni in malignum*. Nihil autem familiarius est, quam ut levius & superficiale erysipelas constringentibus, v. g. album ovor. cum alum. mixto fixum & profundum faciamus, & ulcus mali moris excitemus; qualia exempla quotidie in praxi medica occurrunt. Unde etiam prudenter faciunt, qui cujuscunque generis erysipelas saltem internis tractant, & externe sacculos tantum herbis paregoricis repletos imponunt, quæ blanda anathymiasia poros tenent apertos, constrictos relaxant, partesque fovēt.

36. Postea animadvertimus à chirurgis non levem

committi errorem in eo, quod farinam fabar. cum rad. glycyrrh. herbis emollientibus & discutientibus cum aquis in cataplasma redigant, & calide hoc ipsum applicent: at vero, cum calore humidum exsicceretur, & firmitus materia sese impingat cuti ejusque poris, ut cultro vix auferri possit, fit omnino, ut transpirationis negotium non leviter lædatur, & ita, quod discuti poterat erysipelas, in abscessum vel ulcus abeat. Enitendum itaque semper erit, ut libera evaporatio vel transpiratio constet & permaneat affectis partibus; id quod nec sub frigore, nec sub manifesto calore, nec sub onere multorum integumentorum, sed sub temperato calore, qui liberam evaporationem ac perspirationem fovet, egregie præstatur.

37. Simili ratione *bubonibus* caute debent applicari externa, quia plerumque repellentibus in malum morem degenerant; quod longe magis de malignis valet, ipsisque criticis, ubi non sine summo periculo ea, quæ exterius constringunt vel refrigerant, adhibentur. Cognoscuntur autem critici bubones, quando ad glandulam fuerit missus humor, si cum virium tolerantia, si in die critico fiunt, si concoctionis signa in urinis præcesserint; tunc temporis enim omnia, quæ retro pellunt, perniciosissima sunt: sed ut recte monet HIPPOCRATES, *in perfectis judicationibus nihil est innovandum, sed totum negotium naturæ committendum*. Quandoque etiam è sanguinis redundantia oritur bubo, ubi nullo pacto utendum esse repellentibus AVICENNA, ORIBASIUS, aliique monent. Quandocunque autem bubo in suppurationem tendit, emplastrum diachyl. cum gumm. cum opopan. mixtum, admodum proficuum erit.

38. In *variolarum* morbo num ipsa topica usum quandam habeant, non immerito quæritur. Dicimus in genere, quoniam hæc evacuatio critica est, magna circumspeditione opus esse. Interea, si ante eruptionem urget delirium, non sine fructu externe fronti applicamus spirit. rosar. cum camph. mixtum: ipsa autem in eruptione, vel etiam in suppuratione, plane abstinentum esse ab omnibus linimentis censemus: in declinatione & tempore exsiccationis, quando vis morbi fracta fuit, oleum amygd. dulc. cum camph. & sperm. cet. mixtum non improbandum est, ut eo ipso cutis defœdatio impediatur, & nimia acrimonia, quæ profundius serpere solet, mitigetur, vid. *Dissert. de variolis epidemicæ grassantibus*. Quapropter caute procedendum est cum topicis istis, v. g. spirit. vini myrrhato, sacch. saturni. aqu. rosar. mixto.

39. Restat adhuc familiarissimus ille affectus externus, nempe *scabies*, sive exulceratio pustulosa cutis, magis vel minus humida, quam nemo vix sanari posse credit sine usu topicorum; unde & posthabitis omnibus internis remediorum auxiliis, protinus ad ea ipsa confugiunt, variisque linimentis sulphuratis, mercurialibus vel toti cuti vel saltim articulis admotis ejus curationem moliuntur, sed sæpius non sine magno sanitatis vel vitæ periculo; utpote nunquam tuta est via, quæ affectus externos ad sanationem perducere tendit topicis, qui proveniunt à causa interna: potius cum natura heterogeneum & morbosum expellit, idem quoque agere & præstare debet medicus & nunquam contra intentionem naturæ, quod fit plerumque externis, retopellere. Quocirca sumus hac in sententia, horum affectuum subcutaneorum curam non modo auspicandam, sed & absolvendam esse internis, quæ corrigunt seu ad excretionem disponunt materiam peccantem, eamque una expurgant; quo spectant non modo diaphoretica, infusa emollientia laxantia, verum etiam, si inveterata & maligna scabies fuerit, mercurialia & antimonialia. Tandem subjungi possunt ad meliorem consolidationem & nitorem cuti restituendum balnea, unguenta sulphurata, ex-

ficcantia, saturnina : à mercurialibus autem externis linimentis plane & in universum abstinendum esse existimo, quoniam nunquam tuto & sine periculo talismodi uti possumus, attestante tanta observationum passim extantium, quæ mercurialium noxam loquuntur, sylloge.

40. Adjiciendum quoque hoc loco aliquid est de linimentis, de suffimigiis mercurialibus, quibus ad salivationem excitandam in *Gallica lue* vulgo uti solent. Notissimum est, quam gravia symptomata ex tali salivatione incurrant sæpissime miseri ægrotantes, & quam fallax institutum sit, rebellem hunc morbum ita curare velle. Ego quidem existimo, imo per multiplicem experientiam expertum habeo, tantummodo internis, nempe mercurialibus rite paratis, antimonialibus, & lignorum decoctis, interne decenti modo adhibitis (in qua applicatione totum arcanum consistit) luem venericam sine ullis externis mercurialibus, imo sæpissime sine ullo salivationis effectu subsequente, & sine magna symptomatum molestia, expugnari feliciter posse.

41. Ultimo loco, sententiam quoque nostram exponere placet circa applicationem topicorum in partibus, quæ *paralyti* tactæ sunt. Fatemur, non esse de nihilo hoc in affectu topica, sed egregie secundare usum interiorum: nihilo minus & decenter composita & decenter applicata esse debent. Qui solis pinguedinibus, axungis, & linimentis unctuosius uti, five ea applicentur immediate partibus affectis, five spinæ dorsi, nostra quidem opinione hallucinantur; nam hæc poros obstruunt, fibras, quæ jam à tono suo dejectæ sunt, ob elaterem cessantem magis relaxant, & ita ad tumorem disponunt. Ex parte autem adversa sola spirituosæ olea atque calida ætherea non id faciunt, quod facere debebant; utpote quæ maximam partem propter tenuitatem partium in auras avolant, fibrasque nerveas & musculosas nimis rigidas reddunt. Potius ex axungis animalium composita unguenta, quæ simul ingrediuntur olea destillata, ut oleum rutæ, lavend. majoran. junip. caryoph. anthos, aptiora & magis accommodata sunt; tonus enim partium nervosarum naturalis sit, ut nec nimia adsit relaxatio, humiditas, neque nimia constrictio vel ficitas. Deinceps probe notandum est, in paralyti, quæ fit ex vitio spinalis medullæ & nervorum origine, neutiquam hæc applicanda esse partibus sensu & motu privatis, sed potius ipsius mali fonti & principio, quod existit in spinali medulla: longe autem alia res est in ea paralyseos specie seu contractura, ubi certæ partis motus, non autem sensus privatus est, qualis metallifossoribus est familiaris; ubi nihil juvabit medullam spinalem inungere, sed ipsam laborantem partem prælaudatis medicamentis crebrius fovere atque solari proderit.

42. Dum hoc meditatur, recordatio etiam animi subit *tumorum œdematosorum*, qui pedes frequentius occupant. Etiam hic quadam opus est cautione in externorum applicatione; quandoquidem bal-

neis qui eos tractare suscipiunt, crassissimum errorem committunt. Vidimus, cachecticos immisione pedum in aquam calidam, una nocte sibi contraxisse insignem pedum tumorem, qui non tam facile rursus poterat auferri. Ratio in procinctu est: hæc enim humido, quod propter calorem valde se poris insinuat, fibras jam tum à tono dejectas ulterius relaxant flaccidasque reddunt, ut decumbant nimium humores, nec tam promte rursus per venas & vasa lymphatica recipiantur. Idem quoque factum experientur ii, qui unguentis vel emplastris talismodi tumores dissipare aggrediuntur, ob rationem quæ ex dictis facile poterit inveniri. Nonnulli consueverunt herbas discutientes, v. g. chelidon. maj. fumar. absinth. rut. pedibus alligare: at vero, si eæ ipsæ humidæ sunt & frigidæ, plus sæpius tumorem augent quam ipsum tollunt. Consultius itaque est, ab omnibus hisce abstinere, & potius ligare debita ligatura tumidos pedes decet, præsertim circa nocturnum tempus, quo augmentum perpetuo tumoris cernitur, ut roborentur fibræ sic & firmentur: deinde fots cum aceto fortissimo cum essentia succini remixto & lateribus ignitis instillato instituti, non semel egregium effectum ostenderunt.

43. Restant examinanda *epithemata*, item *emplastra*, quæ ad *pulsus* variis in affectibus commendare mos est. Visitur & ibi non infrequens abusus, tametsi eorum vires, quæ in vero usu consistunt, non improbemus. Et peccat in eo maxime vulgus, & muliercularum quæ ægrotantibus adsistunt cohors, quæ mox, five affectus sit frigidus five calidus, communissime ad aquam istam famigeratissimam carbunculi concurrunt, quam ad reparandas vires incredibilis efficaciam esse credunt: sed quis non perspicit, minime istud procedere, si quis febre ardente vel acuta laboret, aut in æstu febris intermittens jaceat? ubi potius acida, penetrantia, ut poma citri, acetum rosaceum, locum habent. Carpis quoque manuum applicare solent epithemata & emplastra, ad submovendos febriles paroxysmos in intermittentibus; quem in finem miscent alumen, acetum, rutam, sedum majus, & araneorum telas, item emplastrum ex terebinthina, alumine, pulvere araneorum conficiunt; quæ ipsa teste veritate sæpius egregium levamen in mitigandis paroxysmis, imo in iis tollendis, si maximam partem materia febrilis est evacuata, exhibent.

44. Ratio autem operandi paulo difficilior est, & secundum nostram sententiam, tale experimentum ad intimiorem febris generationem explicandam, viam & occasionem non levem subministrat. Ut paucis, quid statuamus explicemus, cor & arteriæ, quæ nervis suis ac motu dia- & systaltico gaudent, instrumentum istud sunt, in quo intensus ille & concitissimus motus celebratur: quod si itaque talia, quæ nimium spirituum in has partes motum quodammodo sistunt & impediunt, ipsis arteriis immediate applicentur, necesse est, ut febrilis ille calidissimus sanguinis motus ad tempus sistatur.

D E

REMEDIORUM BENIGNORUM ABUSU ET NOXA.

§. I.

Attentione maxime digna sunt summi medicorum HIPPOCRATIS verba *Lib. de arte §. 7.* *Quæ pro fuerunt ob rectum usum profuerunt; quæ vero nocuerunt, ob id, quod non recte usurpata sunt, nocuerunt. Nam non minus ea, quæ damno sunt, quam ea, quæ opem ferunt, testantur, quod ars sit. Ubi enim rectum & non rectum utrumque suum habet sinem, quomodo quis hoc artem esse neget.* Hisce vir sapientissimus universæ artis & exercitationis fundamentum compendiose & dilucide complexus est. Nam quicumque in auxilium prona remedia probe callet & prudenter iis uti scit, eorumque noxam atque exitium, quod improvida adplicatio adfert, intelligit, is certe in artis exercitio magna cum felicitate versabitur. Neque enim in natura, sicut perversa cum vulgi, tum indoctorum medicorum fert opinio, dantur adversus morbos certi effectus remedia, quin potius, ea tam ad salutem, quam ad damnum inferendum parata esse, censendum sit. Etenim omnia remediorum genera ejus virtutis ac indolis sunt, ut cum prudentia ac solida ratione data saluti & præsidio sint, incaute vero, turbulenter & temerarie exhibita præsentissimum damnum adferant. Præcipuum itaque artis salutis momentum est, usum & abusum remediorum probe addiscere: quamobrem, quo quis majori experientia hac in re versatus est, eo melior certe medicus est habendus.

2. Quemadmodum vero non unius ejusdemque indolis sunt remedia, sed ingens ratione virtutis & potentiae in ipsis discrimen annotatur: ita etiam eorum incauta adplicatio plus vel minus damni aut periculi habet. Non igitur sine ratione remediorum genera in blanda & benigna, vel in fortiora & valentiora, sive securiora & minus secura solent dispesci. Equidem, nec ullum in se & sua natura absolute tutum vel intutum, id est, quod semper & omni tempore profit vel noceat dicendum est, nam posterius è foro medico esset proscribendum, sed tutum illud medicis vocatur, quod temperatum & naturæ conveniens est, neque multum corporis vim alterat; insegurum vero illud dicimus, quod validiori naturæque minus amico principio instructum vehementer commovet, fortes evacuationes vel provocando vel valide motus naturæ sistendo, in quorum classem omnia validiora purgantia, vomitoria, salivantia, narcosin inferentia & fortiter adstringentia sunt referenda, eo quod magna hisce vis insit in corporis nostri tam solidas, quam fluidas partes agendi, unde vulgo generosa & heroica audiunt, quibus, si quid eximii ars præstare debet, non facile possumus carere.

3. Ex quo unusquisque, nisi penitus judicii expertus sit, clarissime intelligit, validiorum usum majorem attentionem & prudentiam, quæ praxeos & rerum medicarum optima est moderatrix, desiderare, quam circa tutiora & benigniora opus sit, utpote quod illorum abusus vehementius noceat. Quum vero de medicamentis inseguris, eorumque ex male administratis noxa alio tempore dictum fuerit, idcirco jam opere non in-

dignum fore existimaverim, si de nocumentis, quæ à remediis mitioribus atque benignioribus male adhibitis profluant, sermonem faciamus, idque laboris in præfens suscepimus.

4. Acturi itaque de benignis remediis & de noxa, quæ ab eorum improvida adplicatione proficiscitur, non sine fructu arbitramur, ante, quam ulterius progrediamur, exponere, nos per remedia non tantum intelligere stricte medicamenta è pharmacis petita, sed omnia ea, quæ ad salutem & auxilium idonea & morbis oppugnandis apta existunt, sive ad alimentorum, sive pharmacorum, vel etiam elementorum classem, vel alias res externas sint referenda, complecti. Per id benignum vero indigitamus illud, quod moderate agit, blandum est, neque facile, majori etiam quantitate exhibitum, corpus sanum & validum afficit, quibus ea, quæ minori dosi magnas turbas excitant & vehementiora ac validiora jure dicuntur, opponimus. Nostri igitur jam instituti erit, breviter & dilucide ostendere, benigna sic dicta remedia, alias non facile nociva, citra rationem tamen adhibita ad ingens damnum inferendum esse paratissima. Id quod observationibus atque experimentis non minus quam solidis ratiociniis confirmare jam contendimus.

5. Non vero displicet, hujus tractationis exordium capere ab iis, quibus etiam pro alimentis uti solemus, ut sunt aqua, vinum, dulcia, lac, juscula, infusa herbarum calida & id genus plura. Quid aqua dulci pura ad sanitatem est innocentius? nam communissimus & velut universalis multarum nationum potus est, quo ad ciborum dissolutionem sanguinisque circulum & excretionem tuendas non facile datur præstantior: neque ipsam frigidissime, etiam copia ingestam in se noxiam esse, acidularum potatores clarum edunt exemplum, qui summo mane in jejunum stomachum ex intervallo non adeo longo aliquot harum aquarum mensuras sine omni sanitatis offensa gelidissime hauriunt: si modo non ventriculus ipsorum infirmior fuerit: nihilo secius aquæ frigida tanta est vis, ut non modo irreparabilem corpori noxam inferre, sed & hominem brevi è medio tollere possit. Quid enim magis experimentis compertum est, quam, cum corpori motu intensiori calefacto frigida aquæ ingens quantitas immittitur, statim in extremam perniciem hominem antea sanum conjici? collabuntur exinde protinus vires, languor omnes artus occupat, ciborum cupiditas exstinguitur, vomitus, distentio & anxietas circa præcordia oritur maxima, ut huc & illuc agitent corpus; vigilia adest assidua, interiora uruntur, exteriora frigent. Quæ cuncta feralia pathemata non aliorum, quam ad ruinam & interitum corporis, nisi principio statim convenienti medicina succurramus, sunt comparata. Plures novimus hoc modo præmatura discessisse morte, alios immedicabilem contraxisse labem, ut tota ætate cum morbis fuerit colluctandum. Nihil certe frequentius in praxi medica occurrit, quam si medicus contumacium morborum originem scrutetur, laborantes edicant: *ich habe es von einem kalten Trunk bekommen.*

6. Neque vero extat eadem apud omnes symptomatum ratio idemque visitur periculum. Nam, qui

venas latiores habent & macilentioris habitudinis sunt, non tam graviter à frigido potu adfliguntur, quam qui spongiosam carnem, laxas ac copiosas fibras à natura obtinent, siquidem in his sanguinis & humorum cursus longe facilius quam in illis intercipitur, unde ad sphacelofam viscerum corruptelam paratior etiam est via. In hujus rei illustrationem placuit notabilem sed tristissimum casum ad publici saltem utilitatem communicare. Princeps excelsa indole non minus, quam corporis habitu elegantissimus, sanguine & succis redundans, paullo obesior, non ultra viginti quinque annos natus, perfecte antea sanus, ex vehementi corporis motu ferventior redditus ingentem cerevisiæ ebibit haustum & frigido & aperto cælo corpus objicit, ex quo mox de languore, horrore, calore intensiori, vigilia conquerebatur: quæ symptomata postea adhuc atrociora excipiebant, virium nempe prostratio tanta fuit, ut non sine lipothymia metu corpus erigere potuerit: pulsus languidus, inæqualis & celer fuit, conatus ad vomendum perfrequens, perpetuaque ipsum premebat anxietas, quæ ex intervallis increpescens tanta fuit, ut huc & illuc non modo agigaret membra, sed in uno loco diu detineri non potuisset. Oris halitus extra ordinem foetens notabatur. Die demum septimo cum summo suorum luctu præmatura morte infelicitè vitæ finem clausit Princeps ob rarissimæ indolis dotes longævitate dignissimus. Sequenti die facultas medicis concessa est corpus aperiendi, ubi sequentia notatu admodum digna observabantur: ventriculus propemodum totus inflammatus videbatur, inque eo, quod rarius usu venit, aliquot cochlearia foetidi & corrupti sanguinis continebantur, lien ultra modum erat extensus, flaccidus, male colorato sanguine impletus & corruptioni tam propinquus, ut ad levem digitorum contactum ejus substantia dissolveretur, dein totus sinister pulmonis lobus niger, corruptus, foetidissimus erat, à quo summe putridus, intolerabilis foetoris similisque coloris humor in thoracis cavum descendit, qui, quod mirandum, tam erodentis erat indolis, ut spongiam, qua detergebatur, atramento simili penetranti colore tingeret, ut nullo artificio nigra inde macula elui potuisset. De reliquo vasa sanguinea maxima ex parte inanita, cor minoris magnitudinis erat.

7. Ecquis vero repentinam & feralem hanc viscerum catastrophem tam brevi temporis intervallo inductam non mirabitur? hanc enim corruptivam lienis & pulmonum labem firmo atque alacri Principi de nullo unquam incommodo conquerenti ante morbi accessionem jam dum adfuisse nequaquam vero simile est. Igitur, frigidam cerevisiæ potionem celerrime ex ventriculo ad sanguinem translatam hanc corruptelam præcipue jam dictis visceribus attulisse, plane censendum est. Quod si enim sanguis sine motu in partibus extremis subsistens non multo adeo tempore corrumpitur, iisque cadaverosam naturam inducit, quidni etiam cruor in visceribus sanguineis, neque adeo ob relaxatas fibras robustis, ut sunt lien & pulmo, hærens & motu exutus aliquot dierum spatio in putrilaginem abire, ipsaque viscera eadem labe adfligere poterit? Nihil certe impedit, quo minus statuamus, in eundem modum viscerum perinde ac membrorum externorum sphacelationem procedere. Quid autem ipso frigido potu copiose & celeriter admissio citius sanguinem in coagulum mittere & progressivo motu ipsum privare possit, equidem nescio. Intelligimus exinde, quam brevi & quam facile funesta corruptio visceribus inferri, ipsaque mors robusto & vegeto homini parari possit. Huic vero internæ putredini summam virium ad animi usque deliquium prostrationem debilemque atque exilem arteriarum pulsum nec non ex ore foetorem adscri-

bimus. Maximas vero cum inquietudine anxietates, quibus indies magis magisque premebatur, & insequentes convulsivas artuum tractiones præcordiorumque æstus & tam subitam mortem inflammati ventriculi foetum fuisse jure censendum est.

8. Ceterum, quam exitiosa ventriculo sit frigida potio, innumeris aliis notis exemplis confirmatum habemus. Is enim paullo post à frigido potu, præsertim vehementi animi excandescencia prægressa, vel validiore purgante aut vomitorio dato, læssitus inflammatione, quæ singultum, anxietatem, inquietudinem & summam infirmitatem comitem habet, corripitur; idem fit in illis, qui diuturno mœrore aut spirituosorum abusu, inclinante præsertim ætate, robur corporis & ventriculi minuerunt, ubi, si excandescunt & frigidam potionem hauriunt, lethalem facile inflammationem internam sibi contrahunt, quod plurimis exemplis, si instituti ratio permetteret, possemus corroborare.

9. Recensitis sic magnis varique generis noxis, quæ frigida interne sumpta inferat aqua, videndum nunc quoque proxime erit, quid mali ex eadem perverso modo externe adhibita propululet. Permulti vero numero sunt morbi, qui hanc noxam abunde comprobant, ex quibus paucos tantum in conspectum daturi primo omnium producimus erysipelas. Quid in hoc affectu possit aqua frigida, testatur HAGEDORN *Hist. Med. phys. Cent. I. Hist. 38.* ubi foemina inflammatione faciei laborans, pessimo ausu linæteamina aqua frigida imbuta parti affectæ applicaverat, inde quidem dolor sopitus, at malum interiora petens, delirium tam horrendum causavit, ut mortem inferret. Idem auctor gangrænam ex applicatione aquæ frigidæ faciei observavit. Et ego ex hacce eadem methodo periculosam faucium inflammationem ortam fuisse recordor, quæ adeo increvit, ut deglutitionis actum impediret. Nec præterire licet alium in applicanda aqua frigida errorem communissimum, quo multi in inflammatione gingivarum & inde proveniente dolore sic dicto dentium, temerario consilio & infausto plane successu parti affectæ applicant sive nivem sive aquam frigidam: nam inde oris abscessus satis ingratos, molestos & dolentes sæpe sæpius ortos observavimus.

10. Posthæc considerandæ veniunt hæmorrhagiæ, quæ plus, quam optandum est, perversis consiliis obnoxia sunt & quotidie fere inconsulto adstringentibus, repellentibus, refrigerantibus, inter quæ aqua frigida merito referenda, tractantur. Exemplo sit hæmorrhagia narium, salutaris sæpe sanguinis excretio, quæ uti variis aliis modis, ita præcipue quoque aqua frigida ab imperitis medicastis reprimitur. Sistitur ut plurimum quidem inde fluxus, sanguis autem huc translatus exitu prohibitus, ad alia loca transit & ibi sæpius tragœdias suas ludit. Si ad interiora cerebri ruit, cephalalgias, phrenitidem & apoplexias; si ad aures, surditates aut surditatem, quod in puero 12. annorum vidi; si ad oculos, dolorificas inflammationes, sive cecitates; si ad fauces, inflammationes anginodes, vel dolores dentium, si ad pectus, summam anxietatem præcordiales, quin in magis succulentis catarrhum suffocativum causat, quod in puella irregulariter menstruata aliquando annotavi.

11. Nec inconsuetus vulgo mos est hanc excretionem sanguinis per terrorem sistere, ad quem excitandum inter varia subsidia, ut est applicatio ferri candentis in nucha, adhibent quoque aquam frigidam, quam improvise capiti superfundunt, aut nivem, vel glaciem adplicant. Methodus vero hæc æquales sæpius habet eventus, quos superiori loco enumeravimus, imo interdum periculosiores, diuturniores, per-

facile

facile etiam lethales. Cœcitatem ex hæmorrhagia per terrorem obstructa observarunt *Annal. Uratisl. an. 1726. April. Cl. IV. p. 503.* Valent hi errores etiam in aliis hæmorrhagiis, de quibus singulis exempla proponere nimis prolixum foret.

12. Nunc me accingam ad affectus, qui cum dolore fiunt, ex quibus dolores arthriticos & podagricos præ ceteris nominare arridet. Incredibile est, quantis hi damnis obnoxii fiant ab imperitissimis juvantibus. Primarium quod censendum venit, est, quod præcipua fere intentio vulgi sit, quo dolores sopiantur, materia, morbi fomitem præbente, in corpore relicta, & tantum à partibus ignobilioribus ad magis nobiliores protrusa, à qua curatione maximum inferitur sanitati corporis damnum. Proveniunt inde periculosissima interdum mala. Si materia morbi protruditur ad caput, facit epilepsiam, uti habet RIVER. *Cent. III. obs. 85.* vel apoplexiam, vid. WEPFERUS *de apoplexia p. 2. 3.* Si fluit ad pectus, oriuntur inde anxie pressiones, respiratio difficilis, tussis feroces, sicca, & nonnunquam catharrhus suffocativus; si ruit ad ventriculum, fiunt inde singultus, cardialgiæ, inflammationes, si ad intestina, creat dolores colicos immanes, si ad renes, producit calculum, quid quod plures alios facit sinistros eventus, uti infarctus viscerum, inflammationes, & non raro heclicas febres. Subsidia vero, quibus vulgus ad sistendos demulcendosque dolores uti solet, innumera fere sunt. Nos transimus varia vario modo ex alumine, aceto, farina fabarum, succo citrorum in hunc finem composita linteamenta parti adfectæ applicata, mentionem tantum injicientes noxæ ex aqua frigida oriundæ. Præcipue vero solennis compluribus est pedum immissio in aquam frigidam, vel in nivem, vel in aquam, in qua plumbum ustum solutum est. Sed quanto cum detrimento ægrotantium id ipsum fiat, dici vix potest. Nam à methodo priori immanes dolores colicos, à posteriori vero tumores pedum aquosos, quibus ulcera mali moris supervenerunt, sæpissime in artis exercitio adnotavi.

13. Verum enim vero, non tantum frigidus aquæ usus, sed & calidus, alias corpori nostro longe amicior, detrimentum quoddam sanitati adfert. Neque alienum à scopo nostro erit, nonnullis observationibus id ipsum illustrare. Notavimus videlicet plus vice simplici in hypochondriacis, quibus in prima regione multus & perpetuus acidi proventus est, ortas fuisse in facie ardentes rosaceas pustulas, in aliis os & fauces ulcusculis ferventissimis, erodentibus, quæ Græci *ἀφιδας* adpellant, obsessas fuisse, alios pruritu in toto corpore fuisse vexatos. Quorum vitiorum vix alia subsuit causa, quam liberalis & fere assidua infusi herbæ Thee potio. Quæ cum pariori manu concessa fuerit, indies molestiæ hæceperunt decrementum, siquidem primarum viarum acidum, quod corrigi potius & alvo exturbari debebat, cum calidissima aqua volatile fit, inque sanguinis massam translatum valente natura ad circuitum corporis, ubi hærens partes erodit, deijcitur.

14. Notavimus præterea in variolarum morbo, item in purpura, quæ nostræ regionis incolis est endemia, idem infusum, paulo largius exhibitum male habuisse laborantes, quod non modo purpura inde contumacior & ardentior facta fuerit, sed pustulæ in variolis suppurari renuerint, anxietate præcordiali cum febre aucta & diutius persistente: Hos enim morbos à sale subtili erodente ad habitum corporis diffuso subnasci, quod roscido temperato lymphæ succo, qui calido hoc potu nimis dissolvitur, temperandum erat, nemo facile medicorum in dubium revocabit.

15. Atque minus feliciter infusi hujus potum ingenti copia datum in tertiana & biliosa febre cessasse annotavimus. Cum enim harum febrium causa ex consensu plurimorum medicorum sit bilis corrupta in primo intestino hærens, quæ convenienti medicina prius cum corrigi tum expurgari debet, non potest aliter fieri, quin illa nimio calore aquæ ad interiora sanguinis transvecta non modo fervorem & vigiliam, sed & anxietates adaugeat. Neque minus molestiæ imo periculi oboritur, si quando post vehementem animi excandescentiam, quæ biliosum humorem cum impetu ad duodenum præcipitat, calidissimus potus usurpatur, inde tremores & dolores artuum, cephalalgia quandoque non sine magna corporis infirmitate sequuntur. Præstat potius biliosam colluviem absorbente pulvere prius temperare & postea per alvum ceu congruum ejus emunctorium foras exterminare.

16. Potum Cossée nemo facile in se noxium pronuntiabit, utpote cum non modo Turcarum, sed & Germanorum nostris temporibus solemnibus mos sit, & summo mane & mox à cibo sumto eum in maxima copia adsumendi, nihilominus non sine noxa sæpenu-mero id fieri, experientia multiplici habemus confirmatum. Ejus enim nimius & fere quotidianus usus, infirmioribus maxime fœminis valde nocet, quæ nervorum & virium insignem inde debilitatem reportant, dum morbo vel puerperio accedente tam notabilis languor oritur, ut vires symptomatibus evincendis vix ac ne vix quidem suffecerint. Novimus complures quoque viros à frequentiori ejus usu tremorem manuum contraxisse, alios vigilia & sensuum imbecillitate pressos fuisse, siquidem fabæ hæ Arabicæ perinde ac aliæ fabarum species oleo non adeo nervis blando & amico, sed gravi & adverso sunt imbutæ, quod jam debiles & languidos nervos plus debilitat.

17. Succolada ex Hispania ad nos delata deliciosum constituit potum: qui ob præstantissimæ virtutis & temperationis naturæ ingredientia corpori plus amicus, quam insensus est, attamen, quo plus ab hypochondriacis assumitur, eo majori ipsis est malo, fiunt inde ructus, appetentia dejicitur, dolor & anxietas circa præcordia oritur, procul dubio ob ventriculi inde factam inflationem. Etenim acidum fortius, quo primæ viæ hypochondriacorum nunquam non sunt obsessæ, cum substantia hujus remedii terreo-oleosa congregiens massam parit lentam, viscosam minusque mobilem, quæ plicis ventriculi & duodeni firmiter adhærens amplam ad dicta mala suscitanda causam & occasionem subministrat. Eo casu moderatum emeticum præsentaneam opem tulisse vidimus, utpote quod miram paulo nigricantem humorum colluviem ab aliquo tempore jam contractum insigni cum virium tolerantia & laborantis allevatione rejectavit. Evenit id facilius, ubi ingenti ventriculus laborat atonia atque alvus difficiliter descendit.

18. Jura carniū & quæ ex illis cum ovis, vino & saccharo mulierculæ parare solent roborantia juscula ad restaurationem sanguinis, morbo & diuturna abstinentia absumpti, multum contribuunt, nihil tamen nocentius est, ac si intempestive, inprimis in febrium statu vel etiam sub earum declinatione dentur, ægerrime enim inde ægri revalescunt, interdum etiam recidivæ fiunt, vel lenta insequitur febris diutius adfligens. Longe vero plus periculi talis modi carniū jura in febribus putridis & malignis largius data habere percrebra experientia testatur, qua de re inprimis *Idea febris petechizantis* D. DONCKERS meretur evolvi, qui pluribus observationibus confirmat, pessime inde habuisse etiam eos, qui in declinatione morbi versabantur, secuta inde vel recidiva vel morte.

19. Hujus finistri effectus rationem invenire haudquaquam difficile erit. Ecquis enim est, qui ignoret, nihil promptius, quam quod animantibus inest humidum, putrescere, quare ob id malignarum vis, quæ potissimum in putredine tam partium solidarum, quam fluidarum sita est, multum augetur. Accedit, quod tam forte alimentum in convalescentibus natura & ventriculus adhuc infirmior non satis subigere possit; unde cruditates, novorum morborum fomites, generantur. Et hæc quoque procul dubio est causa, cur jura carniū saturata puerperis primis diebus non bene proficiant, eo quod impuratum, quibus scatet prima regio, majorem faciant proventum.

20. Neque jura carniū convenire iis, qui graviter in capite vulnerati sunt, auctor est ARCÆUS egregius Auctor, quo non facile quis curatius de recta curandorum vulnerum ratione scripsit, qui *Lib. I. p. 53.* in hæc verba erumpit: *jure carniū interdicendum omnibus, qui gravia capitis vulnera patiuntur, utpote quod nocere vehementer soleat.* Effectus vero tam noxii ratio nobis hæc videtur, quod jura ejusmodi valde alimentosa nimis nutrant & abundantiam sanguinis faciant, quæ ob graviores stasim humorum metuendam in talibus capitis læsionibus plus nocet, quam prodest, eaque propter peritos medicos hisce in casibus victum tenuem, nec non sanguinis missionem ac alvum leniter ducentia prudenter suadere arbitramur.

21. Vinum generosum & vetus ad fovendas & augendas vires magno esse præsidio, quo non datur excellentius, neminem inficias facile ire arbitror. Neque illud tam alienum naturæ nostræ esse vel ex eo constat, quod citra sanitatis singulare dispendium, quidam aliquot ejus mensuras quotidie ebibant; nihilo secius vel parca etiam manu in ardentibus febribus & quæ internas inflammationes junctas habent datum, gravibus noxis corpora adfligit: poris enim oclusis, ubi interiora fervent, non modo major ardor, sed & periculum vehementioris inflammationis fit. Et hæc est ratio, quare in omni acutarum genere à peritioribus plane interdicatur. Novimus in variolis ac morbillis & pectoris inflammationibus à vini improvido hauſtu phrenitides ortas. Recordamur quoque talismodi tristis hoc loco casus, ubi, cum ante aliquot annos spectatissimus vir ex peripneumonia fere convaluit & vinum *Secl.* adsumsit, recidivam lethalem inde sibi contraxit. In omnibus quoque capitis morbis, epilepsia, convulsionibus, affectibus soporosis, vel externis ejus læsionibus, vulneribus, usus vini nocentissimus est. Etenim omnia spirituosā, cum sanguinis & humorum impetum urgeant ad caput, læsiones ibi factas deteriores reddunt.

22. Dulcia, sive quæ multum mellis ac sacchari habent remedia impune & sine noxa à compluribus maxima in copia devorantur, eorum tamen in morbis usum ab omni damno non esse plane immunem, complura nos edocent experimenta. Nil in praxi solemnius est, quam quod in pectoris morbis, tussi & acribus ad asperam arteriam delabentibus humoribus dulcia eclegmata acrimoniæ deliniendæ causa præscribantur, sed quam infelici successu id sæpius fiat, haud incognitum est: ventriculi enim inde digestio invertitur & liquor fermentalis enervatur, unde ingens cruditas fit proventus, quæ ad massam sanguinis delatæ viscera infarciunt, obstruunt, & hac ratione ad cachexiam, vel hydropem viam parant expeditissimam. Elegans hanc in rem extat apud MONTANUM locus *Consult. 77.* qui sic scribit: *Ego maxime abhorreo ab electuariis, ubi imbecillitas ventriculi suspecta est. Vidi homines sæpe dum illis volumus catarrhum curare, ex frequenti & nimio usu electuaria incidere in hydropem, dum enim illa frequenter sumunt die nocteque,*

impeditur inde concoctio & augetur catarrhus, observavimus malum ex pulmonibus hac ratione ad abdominis partes præcipitatum, ubi quidem respiratio liberior redita fuerit: at ingens tumor pedes & abdomen occupavit. Neque hac de re aliter sentit prudentissimus ille trium Imperatorum Archiater CRATO, qui *Lib. V. Consil. 7.* hæc promit. *Videmus, inquit, propter nimis frequentem usum eclegmatum, eos, qui pectoralibus morbis laborant, interdum in hydropem incidere, nam dulcia rapta ad hepar, obstructions pariunt.*

23. Etenim, dulcia sive alimentorum, sive medicamentorum locum subeant, utut in sanis corporibus non adeo sint formidanda, cum summa tamen cautione, ubi lentior sanguinis per viscera præsertim abdominis cursus, tardiusque humorum iter & transitus est, iis est utendum: prompte enim ac perfacile ob lentorem, quo gaudent, viscera hæc infarciunt & ad obstructions graves longorum morborum genitrices expeditam viam parant, vel eas jam præsentis obfirmant. Qua de causa etiam jam olim excelsi ingenii medicus CELSUS *Lib. IV. Cap. 23. in lienis morbis vel ubi viscera scirrhus laborant, dulcia non tuta esse pronuntiavit.* Maxime omnium vero hypochondriacis sic dictis eorum usus insensibilis est. Vidimus frequentius à fructuum saccharo conditorum modica parte adsumta in foeminis sic dictis hysteriacis ingentes cardialgias, præcordiorum angustias & ventris borborygmos subortos non sine magna virium & appetitus depressione, ubi enim in prima regione fortior succorum ab exsuperante acido assumentorum est fermentatio, qualis in hypochondriacis visitur, ibi omnia, quæ facilem fermentationis motum subeunt, ut sunt dulcia, in acidissimum liquamen convertuntur, quod vehementius laceſcendo nervosas ventriculi sensu præditas tunicas jam recensita mala concitat.

24. Præterea, dulcium usus in febribus, quibus sedes & domicilium primis in viis vel visceribus est, insigniter omnino nocet, unde non injuria hunc in modum conqueritur *Henricus ab HEER, Lib. I. Obs. 5. multos agrorum divitum interire in febribus propter abusum syruporum & dulcium saccharatorum utpote quod nimium febres exasperent.* Hujus rei ratio in procinctu est, nam in omni febris genere natura corporis occupata est, illud, quod superfluum, quod ipsi inimicum, quod stagnat, obstruit aut putrescit; auctiori motu resolvere, amovere & foras eliminare. Jam vero per talismodi dulcia viscidioris & immobilioris indolis natura in resolutionis & excretionis desiderato negotio non modo multum impeditur, quin potius etiam novus quasi fomes & materia febrium hac ratione subministratur. Neque adeo diversa, sed eadem fere est ratio, quare omnia quæ valde nutriunt, ut sunt carnes quadrupedum & ex iis parata valde alimentosa juscula nulla in febre proficua sint & recte à sagacioribus practicum interdicuntur.

25. Ceterum non exiguum damnum est, quod saccharata & dulcia largius exhibita in contumaci tussi, cujus causa prima in regione residet, infeliciter adferunt. Utpote cum viscidam, acrem, quæ nervosas partes stimulat, pituitam adaugeant, plus detrimento, quam emolumento sunt. Præter enim id, quod cupiditatem ciborum & digestionis vim imminuant ac gravitatis sensum in præcordiis generent, simul amplam flatuum materiam ac causam suppeditant. Potius tussis ex stomacho orta prætermittis dulcibus temperantia & clementer evacuantia carminativa, blanda aromatica, balsamica & roborantia desiderat. Denique in genere notari velim, ubi humorum stagnationes vel in primis viis vel in visceribus sunt, minus commode & proficue dulcia offerri.

26. Lac naturæ humanæ non adversum, sed perquam ami-

amicum esse, tenerrimi infantes, qui hoc nutriuntur, suo exemplo comprobant, nihilo minus tamen cum ipsi infanti, tum adultiori etiam homini sæpenumero sit venenum. Lactantium gravissimas, imo funestas, quibus colluctantur, ægitudines potissimum à nutricis lacte in infantis ventriculo coagulato, corrupto & in corrosivam acredinem mutato proficisci, nemo facile in dubium revocabit. Etenim, quo natura infantis tenerior & ventriculus est imbecillior, eo plus molestiæ lac crassum, butyrosus, in coagulum primum ipsi facere jure censendum est, utpote si diu prima in regione stagnet nec promte per canalem alimentarium transeat, ex mora acescit, corrumpitur, & bile admixta viridescit & valde corrosivam indolem, tunicas ventriculi erodentem induit, unde torminum, anxietatum, convulsionum, asthmatis, inflationis ventris, epilepsiæ origo. Multum itaque peccant, qui imbecillos & teneros adhuc infantes subinde ipsis mammas præbendo lacte alias optimo nimium adimplent. Non dissimili ratione lactis usus in adultioribus, si ventriculus debilis est, inque eo largus acidi proventus gignitur, miras turbas, anxietates, flatulentias, borborygmos, nauseas, tormina excitat, atque adeo, quo naturæ blandius & amicus hoc medicamentum, imo alimentum sit, eo majori cum cautione atque prudentia administrari debeat. Laborabat nuper admodum egregius vir stomachali febre cum vomitione acidorum succorum, & ipse cum adfuetus esset potum Cossée cum lacte præparatum usurpare, insignem die quodam ejus quantitatem hausit, à cujus vero usu protinus pessime se habuit, maxima præcordiorum angustia & anxietate cum extremorum frigore inde consecuta: demum tam per superiora, quam per inferiora materia instar coagulati casei secessit magna cum allevatione. Novimus etiam dysenterico non sine magna offensa lac datum fuisse; ab ejus enim usu mox cardialgia, singultus & magna circa præcordia anxietas cum vomendi desiderio sequebantur, tandem lac coquebatur, & aqua calida affundebatur, qua ratione non nocuit, sed valde potius profuit. Est quoque lactis usus multum infensus hypochondriacis, quorum ventriculus exsuperante acido onustus male alimenta digerit, unde lac cum primum descendit, protinus coagulatur & inflationi ventriculi ac intestinorum, à qua plurimorum pathematum ipsis familiarium ratio pendet, mirifice lenocinatur.

27. Lactis curam, in qua nihil solidi vel fluidi præter hoc ipsum adsumitur, veluti summum ad dolores podagricos tollendos & deliniendos nostro tempore celebrari remedium notissimum est. Novimus quoque tali afflictionum genere pressos per biennium, quamdiu nempe id remedii genus usurparunt, ab omni dolore fuisse liberatos. Quamprimum vero vitum mutarunt, remoto lactis usu, mox in alios morbos graviores, cachexiam, stranguriam & vesicæ calculum inciderunt & brevi diem obierunt supremum. Nam, qui viscera non habent sana, integra & aperta penitus ab hoc remedio abstineant auctor suasorque sum; nihil enim ad eorum obstructions & fovendas & firmandas, nihil quoque ad calculi generationem aptius & convenientius ipso lactis usu observatur. Verum enim vero, quo magis noxium & infensum lac est cachecticis, calculosis & scorbuticis, eo utilius & salubrius ejus serum, præsertim si cum succis herbarum antiscorbuticarum & aperientium coquitur, dictis in morbis notatur. Equidem, sicuti lac infarcit, obstruit, excretionem retardat: ita ejus serum potius alvum laxat, viscerum & meatuum obstructions refert, acrimoniam humorum, nec non interiorum partium fervorem attemperat. Utpote crassa illa, caseosa & butyrofa materia, facile coagulabilis & minores canaliculos obstruens naturæ corporis nostri inimicissima

est, quare quo tenuius lac est, eo salubrius recte existimatur.

28. Et hanc ob causam veteres lac asinum tantopere æstimarunt, quia tenuissimum est, nec multum crassæ caseosæ materiæ habet, & ob nitrosam, qua pollet, detergendi vim, egregie humectat, neque minus clementer laxat. Ad purgandum enim lacte asinino veteres usos fuisse ex HIPPOCRATIS monumentis *lib. de victu p. 44.* evidentissimum est. Et, quia pulmonum scirrhusa tubercula, quæ exulcerata instar canceri maximam pulmonis partem in phthificis consumunt, virtute sua absterforia præ aliis remediis eximie solet referare, hinc istud magno cum fructu, teste PLIN. *Hist. Nat. Lib. XXIV. cap. 9.* & CELSO *Lib. IV. cap. 24.* in phthisi usurpatum legimus. Optimus vero modus est, si qui morbi lactis curam desiderant, illud miscendi cum aquis mineralibus, inprimis iis, quæ sale alcalino fixo, ut Selteranæ acidulæ, thermæ Embenses & Carolinæ imbutæ sunt: in harum vero defectu infuso Veronicæ oleum tartari per deliquium commodissime additur, qua mixtura efficitur, ut lac primis in viis nec facile coaguletur, nec diutius ibi subsistat, sed meatus corporis subeundo obstructions partium feliciter referet.

29. Quæ de sinistro lactis usu jam commemoravimus, ea quoque jure meritoque ad emulsionem, quæ nil nisi lac artificiale sunt, & quarum frequentior in medicina usus, possunt adplicari; & quamvis ex tenuioribus seminum vel nucleorum oleosis vel mucilaginosi partibus consent, nec tantum crassæ substantiæ quantum animantium lac obtineant, nihilo minus earum incautum usum in cachecticis, hypochondriacis, & ubi insignis ventriculi debilitas vel atonia est, plus nocuum quam emolumentum attulisse experientiæ fide comprobatum habemus.

30. Pinguia & oleosa, quæ ex fructibus artificiali expressione eliciuntur, præterquam quod locum in alimentis teneant, in medicamine, præsertim ad partes spasmo contractas relaxandas & vias lubricandas mirabilem utilitatem præstant. Etenim, in atrocioribus abdominis tormentis in colica sic dicta convulsiva, qualis frequens est in metallurgis, qui improvide faturninos fumos hausserunt, neque minus in truculentis ex calculo doloribus oleo amygdalino dulci paulo largius tam interne, quam externe adhibito nihil quidem præsentius exhibetur, eo quod ab ejus usu mox dolorum sævitia quadantenus sese remittat. At vero, quam proficius pinguium usus dictis in morbis est, tam nocivus est apud hypochondriacos, quorum ventriculi actio admodum languida est. Nam acidum, quo abundant, corrosivum cum pinguibus congregiendo non modo propter effluvia acrida calida ingentem ardorem in œsophago & faucibus excitat, sed & in coagulum paulo firmiter, multis modis nocivum, degenerat.

31. In hujus vero adsertionis evidentioris confirmationem sequens historia multum facit. Juvenis quidam, vix trigessimum annum transgressus, structuræ gracilioris & naturæ sensibilibioris, à multo jam tempore hypochondriaca symptomata passus est. Is ex mutato potu & aperto paulo frigido coelo in gravem ilei dolorem, quem vulgo colicam adpellant, incidit, utpote circa umbilici regionem intolerabili cruciatu premebatur, alvus aderat tensa, dura, valde adstricta, nulli clysteri obediens, & potius dolores & anxietates augebat, interne vero maxima copia oleum amygdalarum dulcium, quod alias in hujusmodi doloribus miras suppetias fert, sed sine omni allevamento hausit. Tandem ex consilio meo mannam paulo liberaliori dosi ad uncias nempe quatuor in cremore avenæ solutam, modica nitri & salis tartari adjecta portione, ex intervallis adsumsit, à cu-

jus usu mirabilem durorum globulorum avellanæ minoris crassitiem æquantium copiam per inferiora excrevit, quorum mox ingens adhuc quantitas secuta fuit. Globuli tactu duri erant, instar sevi coagulati, quos cum paululum siccati essent, facto experimento, candelæ admovi, tum ardebant & lucidissimam dabant flammam; aquæ communi injecti innatabant. Vacuata hac copiosa sebacea materia melius habere æger coepit, interim amygdalini olei usum continuabat, & pingua carniū juscūla alimentosa adsumebat, inde protinus atroces abdominis dolores resurgebant, & cum ventrem inferiorem tangeret, ecce ipsa manu duos illos globulos in intestinis reflagrantes, præsertim cum macilentius erat corpus, deprehendebat, unde superius decoctum mannatum rursus propinari jussi, quo denuo excreta ingenti horum globulorum copia ulterius abstinendo ab omnibus pinguibus æger omni dolore vacuus incolumisque jam vivit.

32. Horum vero globulorum genesin ex nulla alia causa, quam quod oleosum tam alimentum, quam medicamentum cum acido fortiori primarum viarum congregiens coagulum tale produxerit, non secus ac cum commixtione spiritus acidi & olei fieri contingit, esse derivandam duxi. Notavi quoque simili ratione in hypochondriacis vomitus pure sebaceos, eo quod materia flammæ admota, lucidissime exardeceret. Neque pro re insueta habendum est, quod in infantibus, quandoque ex lacte nimis pingui, concursu acidi, tales globuli non sine vitæ periculo progenerentur. In hujus rei confirmationem juvat egregiam historiam à B. Laurentio HOFFMANNO de vero usu & abusu medicamentorum chymicorum pag. 38. consignatam adducere: Matrona quædam obesioris constitutionis, quatuor enixa partu est filiolas, quæ omnes vix annum egressæ interventu epilepsiæ vitam cum morte commutarunt. Neque adeo medicus, nec mater hujus interitus causam adæquatam pernoscere potuit. Cumque tandem quintum partum edidisset, isque primum ætatis annum fere complevisset, non dissimilia motibus convulsivis se præbuerunt indicia. Medicus in consilium vocatus advertebat granā butyracea instar ceraforum vel pisorum copiose fuisse excreta, qualia mater quoque in filiolis quatuor antecedentibus observaverat, unde solis clysteribus abstergentibus & liquore hordeaceo usus est HOFFMANNUS, & sic sanitati ægrum restituit & epilepsiæ truculentiam avertit. Ratio procul omni dubio hæc est, quod infantes tenerrimi circa ablactationis tempus pultibus pascantur, quæ ex lacte, butyro & similia paratæ sunt, ubi ista lactis pinguedo non cedit in alimentum, sed ab acido in coagulum concrevens in intestinorum cellulis ex diuturna mora corrumpitur, acefcit & convulsionum ac dolorum occasionem præbet amplissimam.

33. Non minor est, quæ corpori subinde inducitur labes ab usu pinguium & oleosorum externo. Cujus rei luculento potest esse testimonio curatio illa symptomatum, quæ variolis superveniunt. Inprimis vero quotidie delinquitur in præservandis cicatricibus. Sic enim ex mediis istis unguinosis & butyraceis in puero quodam octo annorum post retrocessionem exanthematum epilepsiam; in alio post illinitas in facie pustulas cum butyro insulso catarrhum suffocativum ortum memini. Cui adjungo observationem, quam *Annal. Uratislav. Ann. 1721. Cl. IV. p. 320.* habent, ubi parentes puero variolis confluentibus laboranti totam superficiem cutis, pustulis nondum maturatis, oleo olivarum illiverunt, unde ipse catarrho suffocativo mortuus. Pari ratione, eadem hæc remedia male cessisse constat in erysipelate: ita nos quondam per inunctionem faciei inflammata, catarrhum suffo-

cativum productum novimus. Neque silentio prætereunda est insignis illa noxa, quæ pleuriticis ut plurimum infertur topicis oleosis & unguinosis. Inde enim malum eorum mirum augetur, aut in majora sæpius mala transmutatur.

34. Pauca hisce addenda sunt de perniciofa pinguium applicatione in morbis serosis, & primario quidem in affectibus, qui exanthemata seroso-lymphatica juncta habent, uti est scabies. Dici vix potest, quam incongruis hujus sanatio suscipiatur medicationibus, quarum fere singulæ, omisiss internis, solam excretionem pustularem per externa removendam respiciunt. At præter innumera alia, quæ censuram mererentur, remedia, ut sunt mercurialia, adstringentia, refrigerantia hoc loco unguenta maxime improbamus & oleosa, utpote quæ ingentem in modum nocent. Proveniunt enim inde pessimæ morbi transformationes, quales sunt angustia præcordiorum, asthmata, cardialgiæ, catarrhus suffocativus, tussis, febres intermittentes, tormina colica, inflammationes, deliria, febres hecticæ, cachexia, tumores pedum oedematosi, quin hydrops universalis, anasarca, quemadmodum post inunctionem butyri sulphurati tumorem totius corporis & in foemina asthma humidum observare mihi evenit.

35. Aliæ adhuc dantur excretiones exanthematicæ, speciatim capitis, quæ sub nomine achorum & tineæ capitis veniunt. Quanto in his æque oleosa sint nocumento, sequentia docent exempla: Ipse in puero ex tineæ capitis per butyrum majale, cui creta admiscebatur retropulsa, notavi insequentem graviolem oculorum inflammationem. Ab oleo olivarum capiti inuncto originem traxit in puella achorosa surditas per VII. menses durans. Digna dein est quæ legatur de achorum repulsum noxa observatio apud HAGENDORN. *Cent. I. hist. 8. l.c.* quæ ab inunctione olei amygdalarum dulcium provenit.

36. Quid pediluvii potest tutius atque innocentius excogitari? siquidem cum cursum sanguinis expeditionem reddendo perspirationem in universo corpore adjuvant, tum humorum & sanguinis impetum à capite & pectore revocando & ad inferiora incitando in omnibus fere, qui pectus & caput obsident, morbis, præsentissimi effectus præsidia observantur: sed tamen plures sunt casus, ubi eorum minus dexter usus ingenti nocumento est. In corporibus videlicet præhumidis & spongiosis, declinante præsertim ætate, perquam facile pedum tumores arcessunt, eo quod fibrarum tonum nimis relaxando efficiunt, ut sanguinis cursus per inferiores partes, per quas semper difficilior est, segnior atque impeditior fiat, unde tam prompte fit seri à sanguine in habitum carnis porosum secessio. In morbis quoque catarrhalibus, ubi natura superfluum serum per faucium & asperæ arteriæ glandulas critico veluti motu exonerare nititur, non semper tutus pediluviorum usus est, quod aliorum invitando & quasi retrahendo materiam, salutare hoc secretionis negotium perturbent, unde languor & lassitudo corporis facile consequuntur. Neque eo tempore, quo menses fluere incipiunt, pediluvii uti expedit, ut quæ plus eos sistunt, quam promovent, dum sanguinis motum ad uterum quasi revocant inque porosa pedum substantia blando humido calore majus pro divertendo ipso spatium efficiunt. Sic quoque in affectibus quibusdam spasmodicis observare licuit, quod ab usu pediluviorum horripilatio & frigus universum corpus pervadat. In pedum foetore nunquam non mala sunt: ita exinde hypochondriorum tensiones, cordis palitationes, gravissimos artuum rheumatismos & ingentes capitis dolores subnatos fuisse vario exemplo edocti sumus. Nam quemadmodum capitiluvia

in tinea capitis vel aliis exanthematibus materiam peccantem ingenti sæpius cum vitæ periculo, præsertim in infantibus, repellunt: ita etiam pediluvia ad sudorem foetidum repulsandum magnæ sunt efficaciæ. Videtur enim aqueum humidum ejus esse naturæ, ut cutis tonum secundum naturam & glandularum subcutanearum vim, quibus excretio sudoris fit, minuat atque destruat. Ad probandam talis noxæ veritatem facit huc sequens notatu digna historia: Patiebatur studiosus quidam continuas pedum excretiones cum foetore ingratissimo, quæ magno ipsi erant incommodo. Impatiens igitur morbi consilium petit à contubernali, qui pediluvia, multæ, ut jactabat, experientiæ, ex aqua simplici, in qua alumen dissolutum erat, commendat. Probato consilio curam cum pediluviiis per duas septimanas instituit, unde pedetentim sudores supprimuntur & emanent. Succedunt vero vertigines capitis, foetor oris intolerabilis, & sæpius in die tremor artuum gravis, quæ multis patientem negotiis ineptum faciunt. Qui mali genii effectus adhuc usque durant, cum nulla hæctenus arte sudor pedum prolici denuo potuerit.

37. A pediluviiis ad balnea devenimus, quorum usus in medicina, ubi dura & cōstricta sunt mollienda & laxanda, obstructio removenda, atque viæ ad excretionem præparandæ, incomparabilis est; unde in atrocioribus doloribus colicis & calculosis, in spasimis, contracturis partium, corporis & membrorum languore divinam ferre solent opem. Quodsi vero sine prudentia & sine debita cautione usurpantur, sæpe accidit, ut irreparabilis noxa inde consequatur. Primo corporibus cachecticis & repletis nunquam fere proficua sunt. WELSCHIUS in *hypomnematis* p. 39. notavit hydropicum, qui balnei usu fufis humoribus in epilepsiam incidit. Postea plethorici & cacochymici, vel quibus naturales sanguinis excretiones suppressæ sunt, quandoque capitis & nervorum læsiones, affectus etiam soporosos sibi contrahunt. Laborabat non ita pridem vir sanguine redundans ex calculi doloribus, medicus præscripsit balneum, quo cum nimis calide uteretur, protinus citior cum aucta respiratione redditus fuit ipsius pulsus, fervore totius corporis ac capitis dolore vehementi insequente, ut febre correptus ab omnibus haberetur: quem in finem etiam missus sanguis fuit, & pulveres ex nitro & præcipitantibus non sine fructu oblatis. In gonorrhœa inque fluore albo & catarrhosis affectibus nunquam non balnea nocuisse observatum est, utpote cum glandulosas partes jam nimis relaxatas & à tono suo dejectas plus resolvant atque emolliant, ut majori humorum adfluxui atque congestioni pateant. Quæ vero jam diximus de balneis, ea multo magis circa thermas earumque usum externum tenenda sunt, utpote quarum incautus usus ingentem corpori noxam adfricat. Instar omnium exemplo sint Carolinæ, quæ incautius & nimis calide à plethoricis usurpatæ acutas febres cum deliriis accendunt, tum maxime cordis palpitationes, asthmata, cephalalgias & graves sopores, membrorum languores sæpe non sine periculo concitant.

38. Ab usu externorum atque eorum, quæ etiam alimenti vice funguntur, magis ad medicamenta nos convertimus, & quidem primo ad absorbentia seu sic dicta præcipitantia, quibus terrea, quæ acidum humidum imbibunt ac invertunt, intelligimus. Horum usus amplissimus & maxime saluberrimus deprehenditur, eo quod motui sanguinis progressivo nihil magis quam coagulans & obstruens sit infensum. Nihilominus & horum exhibitio non parum prudentiæ desiderat; sub ventriculi enim atonia, si is viscidorum colluvie scatet, & falsi magis, quam acidi ibi hærent humores, eorum usus plus nocuisse, quam profuisse observatus est: appetitus exinde magis dejicitur,

Frid. Hoffmanni Oper. Tom. VI.

gravativus & compressivus sensus præcordiorum exinde infertur, præsertim in sensibilibus. Nam ardor quidem ad tempus mitigatur, sed mox vehementior resurgit, doloribus & tormentis inferioris ventris sæpe insequentibus. Igitur tutior iis utendi via ac ratio est, si salibus neutris admisceantur vel leniora laxantia, rhabarbarina, mannata, aut modeste aloetica iis subjungantur, ut acidum primarum viarum ab iis castigatum vel per urinarias vel per alvinas vias simul educatur.

39. Sunt quoque exempla, ubi in lentis & hecticis febribus absorbentes & præcipitantes pulveres largiori dosi atque intempestive dati fuerunt, qui postea in ventriculo per sectionem aperto magno pondere fuerunt inventi. Horum quoque immoderatus usus intermittentem perfacile in lentam continuam cum anxietate corporis, languore & copioso sudore febrem permutat. Maxime omnium vero in quartana horum usus esse debet circumspectior, quod acidum primarum viarum cum hisce terreis concretescens paulo adstrictior fiat indolis, postea ad massam sanguinis & viscera delatum, obstructionem hepatis, quæ quartanam potissimum fovet, augendo, ad hydropem, non raro male curatæ hujus febris symptomata, viam sternit paratissimam. Multo minus vero hæc præcipitantia terrea ad febrem sopiendam invenient locum, ubi corpora sunt infirma & colluvie humorum vitiosorum primæ viæ scatent. Ita novi, ea puerperæ, quæ mox à partu febre intermittente corripiebatur, largiori & crebriori dosi oblata, sævissima hysterica spasmodica, convulsiva pathemata concitasse, ut mors in propinquo visa fuisset, quæ acerbæ vero symptomata clementiori laxante & clystere adplicato protinus à vehementia sua remiserunt. Caveant quoque sibi à nimio præcipitantium usu omnes, qui sunt obesi, otiosi, cachectici & qui alvo adstrictiori laborant, eo quod ventriculum, qui alias in ejusmodi subjectis valde debilitatus est, magis infirmant. Ceterum, ad œsophagi ardorem temperandum nil præsentius est absorbentibus pulveribus, quia acidum, confligens cum acri bile, veluti hujus ardoris causam, edomant.

40. Nitrum si ullum sane hoc magnum & certum in medicina effectum præstat, qualem de paucioribus remediis nobis vix possumus polliceri, utpote ingentem interiorum ardorem ipsamque sitim exstinguit, & gustu non modo, sed & virtute evidenter refrigerat. Quare ejus usu in omni calore febrili deprimendo nihil potentius est. Præterea flatus valide discutit, atque in doloribus & spasimis sedandis non mediocrem fert opem. At vero, quam nobilis & valens est medicina, tam nocentis quoque est facultatis, si non rite ipso utamur. Etenim, ubi natura infirma ac debilis est, & eget robore ac interno motu ad expellendum illud, quod infensum corpori est, ibi magna cum prudentia, ut nitrosa adhibeantur, necessarium est. Id potissimum fit in febribus malignis, petechialibus, peste, sique variolæ & morbilli mali moris corpora obesa, spongiosa vel cachectica invadunt, his enim robur ad sanguinem regendum & expellendum ab eo superfluum deficit; quibus casibus cautissime utique cum nitrosis mercandum est, quia, cum vim fibrarum motricium nimis deprimunt, nocent. In genere enim notandum hoc est: ubi metus est stagnationis, corruptionis humorum vel sphacelationis partium, ibi convenit plus progressum humorum promovere, quam eundem sistere. Ceterum, ad arcendas inflammationes ipso nitro nihil est præstantius, id quod experientia indies confirmat. At, ubi inflammatio magna, præsertim corpora præhumida & cachectica occupat & ubi illa in sphacelum inclinat, nitrosa omnisque generis refrigerantia amovere oportet, hanc nimirum ob-

F f

causam;

causam, quia sanguinis stasim corruptivam non tollunt, sed potius promovent. Notavimus quoque, ex nitro parata medicamenta in variolis, morbillis, purpura, vitæ exitum attulisse, ab eorum enim usu aucta mox diuresis fuit, ut claram & aqueam urinam in insolita quantitate emiserint: unde suppuratio variolarum periculose fuit impedita.

41. Neutra salia, qualia sunt arcanum duplicatum, tartarus vitriolatus, tartarus tartarizatus, sal polychrestum, sal Epsoniense eximias in medendo præstant vires; dum aperta servant omnis generis emunctoria, obstructions referant, tenacem viscidam humorum massam colliquant, quare in chronicis passionibus submovendis operam laudatissimam collocant. Attamen hæc ipsa præpostere adhibita sæpenumero insigni esse nocumento, plura sunt, quæ id nos docuerunt. Ita, qui cardialgia gravi premuntur, hypochondriaci & hystericae foeminae, & quorum cuticula acribus succis quasi erosa est, caute hæc ipsa usurpent, necesse est: ingentes enim exinde sequuntur præcordiorum anxietates, magni ad vomitum conatus cum extremorum frigore. Simile quid haud raro visitur in febribus tertianis continuis, ubi talismodi salini pulveres repetita & majori dosi exhibiti in magnam perniciem ægros adduxerunt, adeo ut inflammationis metus ventriculi adfuerit. Neque eorum usus in variolis, morbillis, purpura, rheumatismis, arthritide, catarrhis, tussi, optatos effectus producit, siquidem hi morbi à sale proficiunt, quod magis magisque exasperando, symptomatum vehementiam non mediocriter adauget.

42. Acidorum, quibus inter alimenta & medicamenta utimur, non adeo formidabilis videtur effectus, nam inter cibos succi citri & aceti frequentior est usus: attamen, qua potest fieri solertia, ab hisce sibi caveant necesse est omnes, in quorum ventriculo adsumta facile inacescunt, sive in corrosivum liquamen abeunt, ut sunt hypochondriaci, calculosi & podagrici, quorum nonnulli, ubi acidum quoddam vel modicum Rhenani vini adsumserint, protinus inde molestias in universo corpore percipiunt. Novimus quoque ab acidis doloris sopiendi causa externe adplicatis in deterius plane conversam miserandam podagricorum conditionem. Nam supervenerunt non raro vomitus, cum enormi anxietate præcordiorum & ventriculi inflammatione, orta dysuria cum mictu cruento, subnatae sunt febres, deliria & denique mors. Sinister identidem acidorum usus est in cohibendis alvi fluxionibus. Sic memoriae succurrit casus, ubi faber quidam ferrarius ab ingurgitato ad diarrhoeam sistendam aceto pedes sibi contraxit oedematosos. Notabile est, quod plures qui fontanellas gestant, ab acidorum usu non ita longe post pruritum & dolorem ibi sentiant. Spiritus salis bene præparatus est egregium stomachicum, appetitum erigens, est quoque optimum diureticum & calculosis non incongrua medicina. At vero, illud peculiare habet, quod pectori sit inimicus, hinc tussim facile provocat, quare in omnibus morbis, qui pulmones & asperam arteriam obsident, cautissime debet usurpari. Reliqui minerales spiritus acidi inter julapia exhibiti ad ardorem febrilem compescendum, celeberrimi semper usus fuerunt, cum quibus tamen provide etiam & caute procedendum esse non sine ratione auctor suasorque sum.

43. Spirituosa, ut inflammabiles vegetabilium spiritus & ex ipsis cum saccharo paratae aquae vitæ ad acuendum sanguinis motum & calorem in humidis subjectis neque minus ubi multa cruda, difficilioris coctionis adsumta fuerunt, quo digestio eorum promoveatur, in frequentissimo nunquam non sunt & fuerunt usu. Non levis tamen ab his fit sanitatis jactura, si iis vel nimium vel non convenienti tempore utamur.

Quemadmodum enim, ubi pituita & ingens humiditas primas vias obsidet, non sunt spernendi effectus: ita vero sub adsumptione eorum, quæ multum chyli suppeditant, horum usus plus nocet, quam prodest, quia nihil tam celeriter chylo coagulum inducit, quam spirituosum. Vidimus à talismodi aquis vitæ stomachicis, ventriculi roborandi causa circa lecti ingressum frequentius adsumtis, digestionem potius turbatam, quam adjutam fuisse, cum flatulentiae & ructus, vomitusque inde facti fuerint crebriores, forsitan, quod chylosum alimentorum extractum coagulaverint. Pessimus etiam error est & detestandus mos, quod post adsumpta duriora & compactiora, velut carnes infumatas sale conditas, pisces marinos, spiritum vini vel spirituosas aquas ingenti haustu ingurgitent, eo nempe fine, ut facilior inde fiat digestio; sed plures hac ratione valide lædi multiplici experientia convictus sum. Ortæ enim exinde fuerunt magnæ viscerum obstructions, ex quibus postea cachexia, phthisis, hydrops alique lethales & funesti morbi propullularunt. Prætermittimus jam ejusmodi spirituosa & vaporosa, capiti totique nervorum generi valde infensa, atque adeo in morbis cerebri vel nervorum, parcissima manu ea concedenda esse statuimus.

44. Quid nuce moschata inter aromata potest esse innocentius, cujus quotidianus fere inter cibos usus est? quod tamen ejus abusus valde noceat ex sequenti observatione, quam doctissimus SCHMIDIUS in *miscell. curios. A. 11. Dec. 11. Obs. 120.* communicat, clarissimum est. Quidam nobilis triginta sex annorum, vegetus alioquin ac sanus, nisi quod ventris torminibus per aliquot dies afflictus fuisset, ad quos sopiendos quatuor nucistas inter cerevisiæ pocula comedit: quibus adsumtis mox calore præternaturali, capitis dolore, vertigine, mentis alienatione, ac stupore corripitur & visu penitus ac loquela privatur, comatè vigili simul laborans; exhibitis cephalicis volatilibus die quarto paulisper ad se rediit, relicta tamen memoriæ abolitione & postremo paralyti membrorum, octiduo sermonis usum recuperavit, referens, primis quatuor diebus se nil nisi densum glaucoma vidisse scintillis continuis innumeris oculos infestantibus: ab hisce malis omnibus ac singulis post delapsum trium mensium spatium demum liberatus est. Ex hac historia facile intelligi posse arbitror, cum omnibus sedativis etiam naturæ amico principio instructis caute, præsertim in corporibus repletis & atonia laborantibus, agendum esse. Nec approbanda est illa vulgaris methodus, qua nucem moschatam cum vitello ovorum incoquere & ad sistendam diarrhoeam adsumere solent. Non raro enim pariter ac post alia cohibentia periculosa sequuntur symptomata, ut dolores colici acutissimi, translationes materiæ ad alia loca, caput & pectus, unde catarrhi suffocativi, tusses, vertigines & innumera adhuc alia.

45. Discussis hisce pervenimus ad alia efficacia remedia, quæ vaporoso sulphureo elemento exorbitantes in nerveis & membranaceis fibrillis motus sistendo, doloribus & spasms egregie medentur. Ex quibus castoreum principem jure meritoque locum obtinet. Quam magnificæ famæ sit medicina non modo medicis, sed & vulgo ipsisque mulierculis non est incognitum, utpote cum in omni convulsivo & spasmotico affectu ad hoc tanquam ad sacram anchoram confugiant. Novimus tamen Castorina, promiscue & sine discrimine exhibita damno non fuisse exiguo. Ita scimus in hysterice ea fuisse usurpata, ubi quidem cardialgiae & præcordiorum spasmi primo intuitu videbantur imminuti, ast diutius persistebant. Quamprimum vero prima regio à vitiosa humorum saburra per balsamica temperata laxantia fuit liberata, protinus dolorum vis exspiravit. Scimus etiam castoreum, puerperis paulo liberalius & frequentius adhibitum,

adhibitum, insignem torporem capitis reliquisse & somnum gravem & turbulentum effecisse. Et quamvis omnia, quæ sulphure blando constant, ubi ingens dolorum ferocia urget & spasmi intensiores adlunt, laudabilem edant effectum, certum tamen est, quod, ubi malignitas præsens, i. e. ubi viscera sphacelo corripitur & putrescere incipiunt, vel inflammationes nobiles partes ut ventriculus occupant, aut ubi caput torpet & grave est, lenissima etiam non sine noxa fuisse: nam ubi motus excitandi sunt, ibi vix ullum anodynum vel sedativum locum invenit.

46. Denique inter ea, quæ satis clementer & benigne inferiorem ventrem expediunt, alvinas sordes educendo, rhabarbarina & mannata primi potissimum ordinis sunt. Nam ubi alias tuto purgare non licet, sicuti in puerperis & gravidis vel catarrhosis & pectoris affectibus, ibi tamen jam commemorata laxativa suum officium egregie faciunt: interea tamen dantur casus, ubi iis abstinere consultissimum est. Id vero accidit non tantum, ubi ad corporis circuitum è sanguinis massa peregrinum expellitur, ut in morbil-

lis, variolis & petechiis; sed & in hecticis morbis, ubi magna intestinorum atonia est: tunc enim lenissimum purgans sæpenumero officit, nam quia natura sponte ad alvi fluxum inclinatur, creberrimæ sedes fiunt, quas summa virium prostratio insequi solet, unde medicus perperam suæ famæ & existimationi consulit, si quando talia præscribit. Sic novimus hecticis desperato diagrydii sulphurati unum saltem granum cum antimonio diaphoretico & cremore tartari datum ita ipsum per aliquot dies exagitasse, ut vel centum sedes spatio duorum dierum non sine virium maxima diminutione habuerit.

47. Ex hisce jam dictis & adductis clarissime intelligi posse arbitror, nullum in rerum natura extare remedium genus, quod & prodesse & nocere non possit: si enim ea quæ naturæ amica & congrua sunt à noxa minus sint immunia, perverso usu, multo magis validiora, quæ multum corporis motus alterant id præstabunt, quare majori prudentia ut adhibeantur necessum est.

VENÆ SECTIONIS ABUSU.

P R O Æ M I U M.

Quemadmodum certa & rationalis, morbis, qui in corpus incidunt humanum, recte medendi methodus, in exquisita causarum, quæ motus præter naturam efficiunt, & corporis ægrotantis, in quo vires suas exercent, notitia, præcipuum suum habet fundamentum; ita vicissim empirica, incerta, fallax, intuta, imo noxia, medendi via hæc est, quæ sine vera morborum theoria & exacta naturæ corporis ægrotantis, imprimis quoad solidorum & fluidorum ad certos motus dispositionem, cognitione adornatur. Jam quidem nullus facile eorum, qui medicinam tractant & facit, confitebitur, se sine theoriæ medicæ & pathologiæ veræ fundamento sua perficere; quin potius omnes rationales, & esse, & haberi, volunt. Ast si curatius paulo, theoria ipsa, quam jactitant, medicæ examini subjicitur, loco verarum & sufficientium causarum, nomina perorant sterilia, quæ nec claram explicationem, neque realem ad quicquam demonstrandum vel inveniendum applicationem admittunt; vel plane insufficientia principia, adeoque meras hypotheses, non omnibus casibus atque phænomenis applicandas, obtrudunt, ac præterea dum physico-mechanicas ex necessitate agentes causas in conservatione corporis vitali, plane excludere nituntur, remediorum vires & operandi modum demonstrare & intelligenter exponere prorsus nequeunt. Verum itaque ac firmum morborum curationis ac præservationis fundamentum, in veritate theoriæ medicæ, quæ exactam corporis humani in individuo, morborum omniumque earum rerum, quæ corporis statum meliorem, vel deteriore reddere possunt, notitiam, requirit & habet, ita unice positum esse judicamus, ut omnes errores, hallucinationes, quæ in praxi non sine vitæ & sanitatis dispendio sæpe, pro dolor! occurrunt, ex falsa, vel minus perfecta, hypothesibus nitente, theoria medica, proxime & immediate originem suam mutuentur. Falsam autem, inutilem, imo interdum noxiam, non dubitamus pronuntiare illam theoriam, quæ ex historiis morbo-

rum minus completis, neglectis maxime principiis anatomicis & physico-mechanicis, quæ sola demonstrationi in medicina apta sunt, desumitur & adjuvante speculatione metaphysica consuitur. Totum enim medendi ars in judicando, quid bonum, vel malum? quid salutare, vel noxium? certis & constantibus nititur relationibus; nec ullum datur in rerum natura remedium absolute in certo morbo proficuum, aut vicissim noxium. Ad has autem relationes, quæ artem, & difficilem, & judiciosam reddunt, penitus intelligendas, plures observationes, & ad has explicandas plures scientiæ, cum methodo analytica, utique sunt necessariae. Atque etiam ex neglectu harum relationum & theoriæ specialissimæ factum esse arbitramur, quod tantæ, inter medicos circa remediorum, in hoc, vel illo morbo, salutarem, vel minus talem, operationem, vigeant dissensiones; ita prorsus, ut quod alter in certis morbis miris encomiis celebrat, alter vicissim damnet penitus & ceu noxium rejiciat. Sed omnia hæc, divinæ arti tam opprobriosa dissidia, quam facile ad factum historiæ morbi, si quis anatomicis physico-mechanicis principiis instructus, dijudicari possunt & dubitationes decidi. Id enim pro certo habendum, nullum generosæ & præstantissimæ virtutis remedium dari, quod minus recte applicatum, non possit nocere graviter. Exemplo nobis jam erit sanguinis missio, sive per venam sectam subtractio. Hujus utique in praxi medica manifestissima sunt commoda, adeo, ut non tantum ad arcendos à corpore morbos, verum etiam ad periculum in iis si præsto sunt avertendum ipsosque sanandos, præsidium sit summum. Vicissim si promiscue, si empirice, nullo individui, causæ morbi, temporis, virium habito respectu, admittitur, tam grave, quam ullum aliud remedium, damnum inferre potest. Quæ quod ita sint, & quam graviter subinde morborum artifices in præcipienda venæ sectione delinquant, id jam fusius paullo atque curatius deducere & demonstrare constituimus.

§. I.

Prius vero, quam ipsam nobilis hujus argumenti tractationem ordiamur, tenendum: eadem quam alia præstantia & efficacia remedia, inter varias medicorum sectas, venæ sectionem expertam esse fata. Fuerunt enim, qui sanguinis artificialem per venam sectam subtractionem, damnarunt plane, & ceu viribus ipsique vitæ admodum infensam, penitus tollere haud sunt veriti, quorum classem ducunt HELMONTIUS & plures ex Chymicorum schola, in Anglia THOMSONIUS, & superiori adhuc seculo, in Belgio BONTEKOE, BLANCARDUS, OVERCAMP, GEHEMA alique plures. Putabant quippe, laudabiles succos in corpore redundare vix posse, sanguinem ipsum esse virium ac vitæ thesaurum, & proximum animæ ad exsequendas suas operationes instrumentum, vires autem in morbis nunquam esse labefactandas ac minuendas, sed custodiendas potius & firmandas; adeoque sanguinem neutiquam subtrahendum. Et si forsan contingeret, ut humor superfluous, qui ad morbos ansam dare posset, gigneretur, longe tutius & rectius eundem inedia, abstinentia aliquot dierum, nec non motu & exercitatione corporis, vel remediis diaphoreticis vel laxantibus absumi, quam inimica naturæ venæ sectione. At vero & nos & STAHLIUS, nostris in scriptis passim sufficientibus & gravibus argumentis hanc sententiam refutavimus, ac demonstravimus: etiam ex optimis per digestionem præparatis succis, abundantiam boni sanguinis generari, vitæ & sanitati insidias frueri, morbos efficere, eos etiam graviores reddere, optimumque in se ac temperatum sanguinem, per copiam difficulter circumeuntem in pravum & impurum converti, & hinc saluberrimo instituto, in fœminis æque ac viris, per nares, uterum, hæmorrhoides statis & certis periodis, sanguinis emissionem fieri spontaneam. Ac licet non negandum sit, temperantia in victu, abstinentia, motu & labore, superfluum humorum & sanguinis generationem prohiberi, veramque etiam consumptionem procurari posse; frustranea tamen esse ejusmodi media, quæ tempore egent, & dimitti iis præcipitem quandoque medendi occasionem, ubi ex plethora periculum actu imminet, atque id nullam moram patitur, sed præsens auxilium postulat.

§. II.

Contrariam huic, ob defectum notandæ merito, sententiam, æque noxiam professi sunt, qui ad alterum extremum, excessum, delapsi, omnium fere morborum ortum & causas, ex nimia sanguinis abundantia deducunt atque derivant, eaque propter liberales nimium sunt in sanguine profundendo, ac in omnibus tantum non morbis venam secandam esse præcipiunt prætereaque sciunt fere nihil. Etenim sanguinis & bonorum succorum in vasis copiam, hæc nimium distendendo, lentius justo progredi, spissescere, imminutis excretionibus sordibus inquinari & vitalibus motibus infensam fieri, eaque propter subtractionem exigere, est utique certum. Sed pari ratione vicissim firmum est ratumque: sanguinis & bonorum succorum defectum ac inopiam, sive parciorem justo quantitatem, cum vitæ & sanitatis periculo junctam esse & fœcundam morborum suppetitare matrem, ac ob id conservationem potius, quam consumptionem sanguinis poscere. Vires enim quæ functionibus, & vitalibus, & animalibus & naturalibus, præsent, sufficientem omnino sanguinis & humorum, ad facilem & liberam circulationem, quantitatem postulant; hæc autem imminuta ad solidorum robur naturale, vim motricem ac tonum non

sufficit, his vero elanguescentibus, labascit illico humorum progressus, sanitas ipsaque vita. Testes hujus sunt ii, qui sanguinem non adeo copiosum in venis alentes, eundem subtrahi patiuntur, inprimis paullo largius, quippe qui, haud raro sub ipsa missione, suspensio cordis & arteriarum motu, animo deficiunt, in animalibus postea æque ac voluntariis motibus, notabilem persentiscunt languorem, & oppressis viribus, de digestionem languente & stomachi gravitate justas edunt querimonias. Quid? quod etiam in vulgus notum est, effuso nimium ex vasorum systemate sanguine, cum viribus vitam & animam effundi. Ut adeo, vel ex hisce tantum, abusum etiam in sanguinis missione frequentissime committi posse, pateat abunde.

§. III.

Sed quia nostro hoc ævo mirum quantum invalescit sanguinem indiscretim, subinde non sine summo ægrotantium damno profundendi mos; dignitas rei utique postulat, ut argumentum hoc excutiamus uberius. Inducuntur autem plerumque morborum artifices ad præposterum ejusmodi consilium falsa illa hypothese: quasi morbi tantum non omnes orirentur ex plethora. Quare ipsa demonstrandi methodus primò omnium exigit, ut hanc confutemus, & evictum demus: plurimos & præcipuos morbos, non à sanguinis & humorum abundantia, sed ex longe aliis causis, maximeque virium & succorum inopia, ortum ducere. In quo quidem recte perficiendo, ex veræ pathologiæ principiis in genere repetendum erit: nullum morbum, sive præternaturalem in solidis & fluidis corporis nostri partibus mutationem, sine præcedente violenta quadam, in nervo-musculosas, quæ motibus præsent membranas, actione contingere; hanc actionem, vel augendo & intendendo, vel minuendo & destruendo, vel etiam varie alterando & determinando vim motricem, morbosam illam mutationem inducere, idque vel per nimiam harum exquisitoris sensus partium distensionem, vel compressionem, tractionem, puncturam, laciniationem, rosionem aut continui læsionem ac dilacerationem. Causas vero hos naturæ humanæ adeo inimicos effectus præstantes, non unius ejusdemque indolis ac generis esse; alias mole & quantitate nimia; alias mole exili & varia particularum perversa figura & qualitate acri, falsa, caustica; alias materia crassiori; alias subtiliori; alias exhalatione putrida, sulphurea, vaporosa; alias nimium relaxando & colliquando; alias nimium constringendo & exsiccando, calore aut frigore impensiore, noxium edere hunc effectum. His vero omnibus tam diversi generis morbificis causis tollendis, an ullo modo satisfacere queat sanguinis missio, nemo, quantumvis perspicax & acutus, capere valet.

§. IV.

Jam, si specialius ipsas morborum origines disquirimus; stupendæ profecto exiguitatis sunt illæ exhalationes, quæ malignos, pestilentes, petechiales, dysentericos, exanthematicosque morbos inducunt, ac quæ intima corporis subeundo iisdemque adhærendo, motuum in solidis & fluidis æconomiam graviter pervertunt; ita vero comparatæ, ut neutiquam sanguinis subtractione amoveri queant & eliminari, sed potius eo firmitus impingantur. Quantumtopere solus immaterialis actus, ob commercium animam inter & corpus, sine ulla materiali, quantitate, vel qualitate delinquente causa, universum partium nervosarum systema afficiat & præter naturam commoveat, quamque graves & exitiales sæpe, chronicæ

nictæ æque ac acutæ passiones, inde accersantur, testantur animi affectus, mœror impensus, angor, motus gravis, cura ac sollicitudo, terror, ira vehemens, cum profundis assiduis meditationibus. Quæ omnia, ubi accidunt, sanguinis missio, nisi eminens concurrat plethora, utique plus detrimenti affert, quam emolumenti.

§. V.

Populares dein morbi, qui uno tempore, ob insolitam temporum constitutionem diuturnam subitæque tempestatum vicissitudines, infestant plures, uti sunt ex febribus maxime catarrhales, benignæ & malignæ, intermittentes, tam quotidianæ, tertianæ, quartanæ, quam anomalæ, arthriticæ, synochæ cum cacochymia complicatæ, rheumaticæ, pleuriticæ spuria & hujus generis aliæ, longe frequentiores & periculosiores sunt iis, quibus sanguis & succi laudabiles deficiunt, quam quibus abundant, ac sanguinis missionibus ut plurimum & graviores redduntur, & contumaciores. Qui milites, ob perperam in castris interdiu æstum, noctu frigus, toleratam famem, vigilias, victum & potum insalubrem, nec non inquinatum putridis effluviis haustum aërem, affligunt autumno & in hiberna concedentes, graves morbi, tanto magis si putridorum genium habent & suminum spirituum & boni sanguinis defectum arguunt, tantum abest, ut venæ sectionem ferant, ut potius inde exacerbentur ac teste RAMAZZINI *de morb. artif. pag. 292.* id remedii genus suspectum semper fuerit observatum, quin funestum.

§. VI.

Quæ biliosus humor, vehementi ira subito & cum impetu ex universo ductuum biliariorum systemate in duodenum exturbatus, mora acrior & corrosivus factus, ventriculi & aliarum partium nervosas sentientes exquisite membranas, lancinando, vellicando & spasmodice confringendo, suscitatur mala, cardialgiæ syncopticæ, febres inflammatoriæ, cholericæ, tertianæ continuæ, causi, ictericæ, lentæ & hecticæ, omnis fere generis evacuationes, maxime omnium vero sanguinis, respuunt, ac potius demulcentia, diluentia, & sedativa poscunt. Morbi, qui ex vitio digestionis & dejecto intestinorum & ventriculi tono oriuntur, multi & graves, ac colluvie crudorum acido-viscidorum succorum nerveis tunicis inhærentium, has rodendo, vel ubi in flatu resolvuntur, distendendo sunt molestissimi, maxime iis, qui natura debiliores, à morbo diuturno convaluerunt, otio & gulæ indulgentibus, senibus, etiam lactentibus, colicæ flatulentæ, plurima hypochondriaco affectui juncta pathemata, vomitiones, diarrhœæ, phlogosæ, eruptiones, tussis, cephalalgia, interdum etiam convulsiones, tantum abest, ut à sanguinis subtractione quicquam levaminis accipiant, ut potius imminuto inde plus robore, magis ingravescant.

§. VII.

Mitto jam illos atrocibus symptomatibus stipatos morbos, qui à morfu vermium in intestinis, à calculo asperiori & grandiori in uretheribus & biliaris ductibus, nec non urinariæ vesicæ collo, à materia arthritica articularum membranas tendinosa rodente, à punctura tendinis, aut alia externa violenta causa accidere solent, quibus omnibus nihil plane cum sanguinis plenitudine commercii, ac proinde etiam cum ejusdem subtractione, nisi admodum per accidens, ut symptomatibus occurratur, sed longe

Frid. Hoffmanni Oper. Tom. VI.

alia indicantur auxilia. Neque etiam dicam de contumacibus ac gravibus, quin funestis sæpe occurrentibus passionibus, asthma humido, suffocativo catarrho, pectoris aliisque hydropis speciebus, syncope, cordis palpitatione, quæ a polyposis in corde & majoribus vasorum concrementis, post mortem reperiundis, ortum ducunt. In his enim cunctis, venæ sectio, nisi forsitan ad præservationem, locum invenit nullum, ac potius est detrimento. Neque minus quotidiana & funesta sunt exempla eorum, qui ex haustu potus frigidi, corpori sudanti ingesto, ventriculi inflammationem, phthisin, lentam & hecticam febrem, hydropem, hypochondriacos sic dictos spasmodicos morbos incurrerunt. Sed quid etiam his in morbis à sanguinis missione expectari queat auxilii, nec ego, nec quisquam alius in arte exercitatus, perspicere valet.

§. VIII.

Præter hos autem, à causis, figura irregulari, subtilitate inimica & mole parva nocentibus, inductos morbos, sunt adhuc alii, qui non tam à sanguinis & feri corrupti copia, quam potius delibatissimæ succorum substantiæ defectu ingignuntur, ac venæ sectionem ea propter minus commode ferunt. Hos inter primum merito locum obtinere videtur, venerea & scorbutica lues, cui variæ morborum externorum cutem defœdantium species, accedunt, lepra, herpes, scabies, furunculi, tumores in ulcera mali mores desinentes. Omnia enim hæc vitia, nequam à sanguinis & humorum plenitudine fiunt, neque etiam, ut in simplici cacochymia accidit, intemperie sive dyscrasia viscida, aut falsa nituntur, sed potius in defectu spirituscentiæ succorum, sive inopia subtilioris, purioris & spirituosissimi elementi, quod in sanguine à Veteribus vitalis, & in cerebro animalis spiritus, nomine fuit insignitum, suum habent fundamentum. Hujus quippe si sufficiens adest quantitas, humores in crasi, consistentia & mixtione naturali servantur quam optime, ac à corruptela vindicantur; ubi vero deficit, fluida corporis à naturali *σχολή*, unione & mixtione perquam facile desciscunt & in corruptionem ac vappescunt abeunt. Et certe quantum ad servandam fluidorum integritatem conferat nobile hoc subtile elementum, in physicis testimonio sunt aquæ, tam pluviales, quam fontanæ, minerales quoque & medicinales, quippe quæ aufugiente ab ipsis subtili æthere elastica materia, non modo saporem genuinum cum virtute medicamentosa amittunt, sed & facile corrumpuntur atque putrescunt. Idem vino accidit, quod subtili & spirituosissima sua parte orbatum, vappam contrahit, ac immutata plane pristina mixtione ac unione, sub leni digestionem degenerat in acetum. Atque etiam ex his facile repetenda ratio ingentis illius in malo scorbutico corruptionis. Causæ enim ipsius ut plurimum sunt aer densus, humidus, materia elastica in locis humidioribus cassus, cibi exsuccis, indurati, crassioris compagis, subtili elemento orbi, potus aquarum stagnantium, crudarum spirituosissima parte destitutarum, cum vita otiosa motusque experte. Quæ omnia, junctim sumpta, corpus non modo viribus defraudant, sed & succos à naturali indole desciscientes & in corruptionem pronos ingignunt, unde postea gravissimi memorati morbi ducunt originem.

§. IX.

Demum in perquirenda morborum genesi & hoc memorabile occurrit, quod plures ex iis, ut apoplexia, deliria, phrenitides, ventriculi inflammatio-

nes, hæmoptyses, peripneumoniæ, paralyfes, neque à sanguinis & humorum abundantia, neque intemperie ac dyscrasia, in se spectata, originem ducant, sed potius incusandus sit error quasi loci incongrui in quem succi & sanguis delati. Id enim non infrequens est, per aliarum, etiam sæpe remotarum partium strictionem, spasmos, flatum, animi affectus, corporis exæstuationem, calorem & factam postea refrigerationem, aliasque causas, sanguinem propelli in capillares tubulos, qui secundum naturam sanguinem nec capiunt, nec ferunt, sed tenuiorem humorem, cruorem in eos actum hæere ibi, colligi & impactum suscitare mala tam atrocia. Sanguis autem sic in angustissimis vasis incarceratus, neutiquam evacuatione artificiali facta liberatur, eaque propter venæ sectionis auxilium afferre valet, directe nullum, licet, si plethora urget, ad intercipiendum majorem ad partem laborantem affluxum, & impediendum inflammationis incrementum, derivandi fine usum habere queat. Nec aliter de sanguinis missionis usu in intermittentibus sentiendum. Si enim in earum genesin inquirimus, eas plerumque vitii in aëre, aut pravi victus, foetus esse constat. Nihil autem ipsis commercii cum sanguinis plenitudine, eaque propter ejusdem subtractione neutiquam tolluntur, sed experientia teste redduntur chronicæ, nisi in reservatis quibusdam casibus, ex accidenti, plethora eminente, eadem judicetur necessaria.

§. X.

Destructa sic momentosis rationibus falsa illa hypothesis: plurimos morbos à plenitudine sanguinis & inde oriunda humorum spissitudine, originem ducere; in genere utique evictum est: institutam ad ipsius ductum venæ sectionem, subinde vel plane noxiam, vel minimum inutilem, esse. Ut vero dein in specialiori disquisitione hujus damni, omnia innotescant eo clarius & scrupulis eximantur; paucis adhuc prius indicandum: quando sanguinis missio sit opportuna ac utilis. Jam experientia, certissima veritatum medicarum parente, constat: corpora habitus spongiosioris, copiosis & tenerioribus vasis, qualis ut plurimum esse solet feminis, dotati, accedente lauta diætâ & vita otiosa, succos, sanguinem lymphamque nutritiam gelatinosam longe uberius gignere atque in vasorum systemate supra modum colligere, quam quidem illa corpora, quibus strictior fibrarum contextus, venæ ampliores tendinesque robustiores, tanto magis si labore exercentur, nec victus adeo lautus est ac liberalis.

§. XI.

Dein ex principiis mechanicis est notum: eo plus decedere virtuti motrici illius corporis, quod movere debet aliud, quo major movendi, sive materiæ mobilis, est resistentia. Unde extra omnem dubitationem positum, in corpore etiam humano, aucta nimis sanguinis & humorum copia resistente, imminui ac debilitari cordis & arteriarum systolen, cum fibrarum musculosarum tono, hoc facto, tardior fieri fluidorum cursum atque progressum, impeditiorem quoque partium, tam utilium, quam inutilium, secretionem & excretionem. Atque adeo nequaquam dubitandum, quin sanguis hoc modo, ratione spissitudinis, cursus impeditioris, stagnationis, infarctus & obstructionis, vitium capere & morbos ingignere possit.

§. XII.

In ejusmodi itaque corporis constitutione, nisi consultius abstinentia, aut motu corporis auctiori succorum redundantia consumatur, sanguinis per artem subtractio præsertim si ex mora periculum, necessaria est & ad arcendos morbos perutilis; tanto magis, si suetæ sanguinis per nares, hæmorrhoides, uterum, venæ sectionem & scarificationem, evacuationes retardatæ, cessarint plene, aut fuerint intermissæ, & ex laborioso vitæ genere, in sedentarium atque tranquillum, facta fuerit mutatio. Quod si etiam sanguis copiosus, facta ad vasorum amplitudinem & solidarum partium robur relatione, ad stagnationem, maxime in visceribus infimi ventris, ob peculiarem venæ portæ fabricam ac functionem, proclivis est, eaque propter, uti ex variis colligi potest symptomatibus, chronici metuendi sunt morbi, venæ sectionis usus est certe præstans atque incomparabilis. Quin, quodcumque corpora manifesto plethorica, variis ex causis subito incidunt in morbos, quibus etiam alias venæ sectio directe non convenit, semper omnino primo omnium solvenda plethora, tum ad præscindenda symptomata truculenta, tum etiam faciliorem sanationem & expeditiorem remedium operationem.

§. XIII.

Nunc, viso breviter genuino venæ sectionis usu, facili negotio ob oculos poni possunt luculenter, gravia illa damna, quæ, si, uti hodie ubique fere fit, sanguinis missio, indiscretim perperam instituitur, excipere solent. In quo exsequendo, primo omnium censuram meretur, illa erronea, tam vulgi, quam chirurgorum, ipsorum etiam medicorum minus peritorum, opinio, qua omnibus ferme hominibus, ad corpus à morbis vindicandum, venæ sectionem verno tempore utilem ac necessariam esse putant. Id quidem certum, quod ineunte vere, quo sanguis, hieme ad corporis exercitationem minus apto, sub impeditiore perspirationis successu, uberius collectus, atmosphæra iterum calidiori reddita, expandit sese majusque affectat spatium, iis, præsertim qui ad generationem copiosi sanguinis proclives sunt, ad præscindendos ex succorum plenitudine imminentes morbos, utile ac necessarium sit, ut copia exundans subtrahatur. Interim tamen id neutiquam censendum universale. Non enim in omnibus tum adeo sanguine plena vasa, ut depletionem poscant, quin quandoque plane virium languor adest atque debilitas, sive per morbum prægressum, immoderatos animi affectus, vigilias nimias, aut digestionis & appetentiæ vitio fuerit inducta. Quod ubi accidit, sanguinem non perdere, sed potius ingignere & longe aliis præsidiiis servare decet. Vidimus certe plures, corporis tenuioris ac debilioris, post sanguinis, imprimis paullo liberalius, institutam vere missionem, in majorem virium prostrationem, gravativum & pressorium artuum dolorem, neque minus in rheumaticas & catarrhales incidisse febres, quæ, accedente medentis errore, desierunt tandem in lentas.

§. XIV.

Pari ratione falsa est opinio illa pervulgata: nonnisi circa æquinoctium, ante, aut post illud proxime, venæ sectionem esse adornandam. Nam licet plurimi medicorum mirabilem prorsus æquinoctii in corpus humanum influxum esse credant; is tamen alius est plane nullus, quam qui à calore solis pen-

pendet, neque certa semper tempestatum ratio, sed interdum plurimis ante æquinoctium diebus, interdum circa illud, mitior & calidior atmosphæra est constitutio. Quare nos, ex mente ipsius HIPPOCRATIS, qui in omni magna ac subita tempestatum vicissitudine, quæ æquinoctii tempore est maxima, dissuadet medicationes magnas, venæ sectionem, cum ipsis Helvetiis, tutiorem judicamus Februario mense, si serenum est cælum, ubi non tantæ aëris sunt mutationes, quæ perspirationem mire lædunt. Atque etiam si aliquot ante æquinoctium hebdomadibus, incidat insuetus calor, minime expectandum æquinoctiale tempus, sed plethoram citius solvendam esse censemus, ne sanguis ob expansionem in venis, periculum intentet.

§. XV.

Non autem frequentiora sunt medicorum in præcipienda venæ sectione delicta, quam in femellis. His enim quia solennis spontanea sanguinis per uterum emissio, hujus successum, nunquam fere non urgent morborum artifices, & sanguinis missione in pede proritare nituntur. Si forsan occurrit virguncula ægrotans, agens decimum circiter quartum ætatis annum, quo plerumque erumpere solet primum uterina purgatio, in hac provocanda illico sunt tota. Licet autem in iis, quæ angusta & exilia habent in utero vasa, ac ceterum natura sunt sensibilibus, difficulter admodum succedere soleat eruptio prima, multaque valetudinis afferre incommoda; pessime tamen sanitati consulunt ii medentur, qui menses moventibus & sanguinis missionibus, fluxum procurare pertinaciter & vi contendunt. Lenissime enim & circumspecte tractanda sunt tenera ejusmodi corpora, tam medicamentis, quam ipsa venæ sectione, quæ, nisi manifesta plethora & vasorum turgescencia poscat, plus erupturi sanguinis effluxum impendit, quam adjuvat. Longe vero melius balnea, infusus aquarum mineralium potus, frictiones, balsamica temperata & potus ordinarius accommodatus, desideratum hunc mensium fluxum eliciunt.

§. XVI.

Multo magis adhuc, vel conscientia causa, notandum illud præposterum quorundam molimen, quo, ubi mensium defectus adest, ut hunc restituant, omnibus viribus, reluctante ipsa natura, pugnant. Evenit enim sæpius, ut à puerperio, largiori lochiorum fluxu stipato, à prægresso diuturno succos consumente morbo, mensium profluvii statuta periodo, bis, vel ter observetur defectus, aut parior successus. Quod ubi animadvertunt illi plethoram ubique crepantes medici, ad majus, ut putant, avertendum periculum, repetitis venæ sectionibus instant, quin quandoque emmenagogis paullo fortioribus, ex radice bryoniæ, croco, sabina, myrrha, baccis lauri, cum vino aut aqua infusis, aut etiam in elixirii formam redactis, nec non balsamicis pilulis, motum simul corporis quantum fieri potest validum, imperantes, menses iterum emovere conantur; quum tamen potius imbecillia ejusmodi, succis bonis viribusque exhausta, ac malis ex vacillante digestionem succis referta corpora, clementioribus laxantibus, stomachicis temperatis & jusculis nutritivis fuissent excipienda. Unde non mirum, ex præpostera ejusmodi medicatione, miseras in longe majorem conjici miseriam, in cachexiam, lentas febres, quin ipsam hæcticam funestam. Nos certe novimus complura, veritatem hanc, licet odiosam, confirmantia exempla, è quibus etiam est,

quod in femina, tenerioris & debilioris constitutionis, vidimus. Profuderat hæc post partum sanguinem largiter, cum tanta virium prostratione, ut nec caput, nec corpus, sine metu animi deliqui erigere posset. Perit postea appetentia, successit lenta febris & calor cum ventris torminibus, simulque elapsis sic aliquot mensibus, substitit, ob sanguinis inopiam, mensium fluxus. Ad quem revocandum, instituta aliquoties sanguinis missio & data pilulæ sic dictæ balsamicæ, eo cum effectu, ut virium decrementum increaseret, febris purpurea & petechialis succederet, & hac depulsa, hæctica pressio pede obreperet febris, ac intra mensis spatium, sanguinem cum ipsa vita absumeret.

§. XVII.

Non leviora sunt intempestivæ venæ sectionis damna, iis in morbis, qui ex imminuta, aut resistente plane uterina purgatione, sensim succrescunt & diu extrahuntur, chlorosis, cachexia, virium & appetitus prostratio, lentus calor, cum atrophia. Enimvero primordia horum morborum ex menstrui fluxus vitio repetenda esse notum est quidem ac certum. Neque etiam negandum, venæ sectionem, mature & circumspecte administratam, interpositis aliis congruis remediis, egregie prodesse. Sed quando res eo devenit, ut elapso jam aliquot mensium, aut longiori temporis spatio, infectis magna labe humoribus, atrophiciæ phthiciæ & hæcticiæ sit suspicio, cum eminentiori virium defectu stipatæ; perperam ad primam illam causam dirigitur medicatio, ac ut menses extendantur, iterata adornatur in pede venæ sectio. Nam hac methodo fieri aliter nequit, quam ut malum præsens increseat, & consumtis cum sanguine viribus, mors acceleretur. Atque etiam sic omnino evenire, testatur experientia, qua novimus, complures feminas, ob impensum diuturnum animi moerorem & angorem, incidisse in insuetam ipsis mensium difficultatem, sanguinem misisse, eoque adeo debilitasse stomachum, ut vomitu rejecerint omnia; sedato vomitu, successisse dein erraticam febrem, cum quotidiana quadam intermissione, mensibus tum penitus retentis, ut redirent, iterum venæ sectionem admisisse miseras, sed pejus habuisse, & lentam febrem, in phthisin & hæcticam veram degenerantem, incurrisse, cum vitæ jactura. Quare firmiter omnino, ceu practicum axioma, tenendum inculcamus: in lentis feminarum febribus, multo magis hæcticis ipsaque phthisi, licet ex mensium defectu primam traxerint originem, menstrui fluxus per venæ sectiones aliaque remedia revocationem, molientem esse nunquam.

§. XVIII.

Eadem ferme ratio illius feminis adeo frequentis passionis hystericae, quæ universum nervosarum partium systema male afficit & multis gravibusque symptomatibus stipatur. Nam hujus quoque incubula ex deficiente sanguinis superflui per uterum excretionem; atque etiam si recens malum est, sanguinis missio, cum judicio adornata, præsidio est egregia, tanto magis, si ipsius operatio postea medicamentis roborantibus, sanguinis spiritualescentiam & circulationem liberiores promoventibus, secundetur. At, si jam anno, aut longiori tempore, firmas egit radices & in feminis porosi corporis habitus eo processit, ut à magna stomachi inflatione syncopes, facies pallida, cordis palpitationes, artuum tremores & quæ alia gravitatem mali indicantia pathemata, accesserint, vena secanda cautione summa,

ne, uti sæpius, si inconsiderato fit, accidit, symptomata aliquantisper inducias dare visa recrudescant, sed potius thermalium aquarum potu & balneo, junctis balsamicis, medicatio perficienda.

§. XX.

Quæ omnia sicuti de foemini sexus ex mensium vitio morbis ubertim constant; ita non minus obvia medica peccata, quæ in virili sexu, ex præjudicio de salubritate hæmorrhoidalis fluxus, subinde committuntur. Eadem autem tenenda de his, quam quæ modo inculcavimus. Scilicet quamvis in morbis, qui post resistentem consuetum hæmorrhoidum fluxum impetunt, in cachexia, hydropo, tympanitide, atrophia cum lenta febre & virium prostratione, statim ab initio cum coeperunt gigni, proficuum esse potuisset, si vena secta fuisset & usurpata ea, quæ sanguinis cursum ad intestina crassa maximeque rectum placide direxissent; frustra tamen non modo, sed & cum certo damno postea in his quaeritur auxilium, quum mala longiori mora invaluerunt & jam insignem viscerum labem introduxerunt. Tantum interest, ut medicus observet opportunitatem & medendi occasionem, qua dimissa, priora, quantumvis egregia præsidia, postea juvant nihil, quin nocent.

§. XXI.

Inprimis severa censura dignus, pathologicus ille, qui sectariis multorum animis altius infidet error: hypochondriaci mali originem unice fere petendam esse ex plethora & sanguinis spissitudine, nec non deficiente hæmorrhoidalis fluxus successu. Quo inducti, ruunt dein in errorem therapeuticum: sanguinem esse subtrahendum, ani stillicidium proritandum & corpus valide movendum. Ast tot & tam gravia à venæ sectionis in hypochondriacis abusu damna notavimus, ut per ipsam conscientiam, perversam ejusmodi medicationem non possimus non detestari magnopere & ab eadem serio dehortari. Enim vero si originem hujus passionis dispicimus, naturæ ut plurimum debetur infirmitati, sive nativa sit à parentibus accepta, sive studiorum & animi intemperantia, aut aliis vires attenuantibus contracta. Quæ etiam detinet corpora, bonis succis & sanguine plerumque sunt destituta, ac præterea ipsis illis gravibus spasmodicis pathematibus, animi ut plurimum impotentia ac in mœrorem proclivitate stipatis, longe magis adhuc infirmantur. Unde non mirum est, sic afflicti & jam debiles, crebris venæ sectionibus crebrisque per pilulas fortioribus purgationibus, in pejorem valetudinis statum adduci, & succedere majorem virium languorem, inappetentiam, animi & præcordiorum angustiam, melancholicas mentis turbas, cum pulsu debili & inæquali. Quæ autem circa portæ venam in mesaraicis & hæmorrhoidalibus vasis adsunt stagnationes, neque spissitudini sanguinis, qui emissus plerumque apparet tenuissimus, neque copiarum boni, cujus magis præsto est defectus, unice tribuendæ, sed potius virium imbecillitati solidorumque robori dejecto, fluida contenta minus efficaciter propellente; eaque propter liberaliori sanguinis subtractione obfirmantur potius, quam solvuntur. Et illa hypochondriacos in infimo ventre subinde male habentia symptomata, tormina, dolores prefforii ac tensivi à lumbis ad sacrum os excurrentes, quibus quandoque jungitur dolens venarum in ano protuberantia ac humoris sanguinolenti viscidum tenesmo secessus, effectus sæpius atque producta sunt spasmodorum intestina gravius detinentium, quam solius plethoræ indicia.

§. XXII.

Præterea ultro quidem largimur, in morbis qui à sanguine in vasis maxime abdominis stagnante oriuntur, spasmodicis scilicet intestinorum doloribus, vesicæ urinariæ miclum sufflaminante spasmio, indeque pendente dysuria contumaci, nec non doloribus tensivis dorso, ischii atque etiam intestini recti, sanguinis missionem in pede utilissimam esse iis, quorum corpus succis plenum & vasis non adeo minutis dotatum. Sed ubi tenerior corporis habitus, vasa exiliora, nec vires adeo vegetæ, idem hoc remedium, licet symptomata primum minuere videatur, curam præstat mere palliativam, ac pathematum atrocia sensim non modo iterum postea succrescit, sed & increfcit. Quin, ipsa venæ sectio, crebro & intempestive instituta, ad ejusmodi stagnationes ac inde oriundos morbos disponit, tanto certius, si corpora imbecillia sunt atque tenuia. Etenim illæ sanguinis & humorum stagnationes, non semper à copia ipsorum pendent, sæpe potius à deficiente vaporum vi motrice, progressum humorum servante, quam vero sanguis nimium subtractus magnopere labefactat. Vehementer igitur delinquant ii medici, qui in hisce morbis nonnisi ad sanguinis abundantiam, quæ tantum particularis ob deficientem ibi virtutem motricem est, medicationem venæ sectione dirigunt, non vero, ut roborantibus ac diluentibus solidis robur reddant propellens, ac liberum & expeditum sanguinis procurent comineatum, quo tamen omnes hæc passionis quam optime aut penitus tolluntur, aut minimum multum levantur.

§. XXIII.

Neque hac occasione reticendum, crebram & inconsulto institutam venæ sectionem, corpora ad affectus subcutaneos, & qui ex feri acrioris impuritate fiunt, reddere disposita. Nostro hoc tempore inter exanthematicos hos morbos maxime frequens est purpura, quæ vario colore, maculis ac pustulis etiam subinde prodit non modo sola, sed & aliis morbis complicatur, ac insuetis plane gravibus symptomatibus ut stipentur, facit. Causam autem hujus frequentiar nullam aliam subesse autumamus, quam quotidianum intemperatum, calidorum potuum, maxime ex fabis coffee usum, cum sanguinis missionibus, jam nostris plus quam septentrionalium regionum incolis familiaribus. Illis enim calidis potibus sanguinis & humorum massa multis heterogeneis, salino-alcalinis, ex parte empyreumaticis, inficitur particulis, & calor ipse motum intestinum intendendo in corporis succis alienas multas gignit materias, ac præterea quæ insunt subtiliores reddit simulque deteriores. Venæ sectiones autem crebriores in omnibus fere, debilibus & foeminis maxime, sedentariæ vitæ sub potu parciore diluente addictis, sanguinis ad capillaria subcutanea vascula affluxum minuendo, perspirationem impeditionem ac ut retineantur illæ sordes, faciunt. Cui, si accesserit alvi segnities, magis adhuc inquinatur humorum massa, nec mirum, constari sic fermentum quasi exanthematicum, demum prorumpens & morbum inducens. Idem vero etiam cum aliis cutis defœdationibus succedere, ipsius experientiar fide constat. Novimus, in corporibus à febre chronica restitutis, adhuc tamen languentibus, instituta æquinoctii tempore sanguinis missione consuetata, erupisse brevi post per omnem ambitum ulcera & abscessus tetros, quorum coalitus, recrudescente sæpe exulceratione, medentibus multum faceffivit negotii.

negotii. Ratio hujus in proclivi. Febrili quippe intestino motu diu perseverante, ipse sanguis in tenue, impurum, salum serum est resolutus, simul atque solidorum robur morbo ita attritum, ut fordidum genitarum per convenientia emunctoria non rite perfici potuerit excretio. Detracta dein per venam sectam adhuc sanguinis parte, reliquus intus contenta ætherea elastica materia, facto spatio, impensius agitata, utique plus in serum impurum est dissolutus, quod retentum pariter, excludit materiam inducendæ scabiei aliisque cutis defœdationibus idoneam.

§. XXIV.

Quod si etiam jam in corporis succis præsto est ejusmodi materia sanguinis mixtioni & nervosis partibus infesta, eaque propter extus pellenda, podagrica, arthritica, erysipelacea, purpuracea, varicellæ & morbillos faciens, cum venæ sectione mercandum est cautissime. Quando enim vasa repleta sunt sanguine crasso, in quo genuina plethoræ missionem urgentis continetur ratio, neutiquam sub initium statim si vena pertunditur nocet, sed potius inimicæ illius materiæ ad corporis ambitum secessum adjuvat. Verum si venæ plus sero sanguineo, quam ipso consistente sanguine sunt oppletæ, viresque imbecilles, sanguinis subtractione nihil est deterius atque nocentius. Hoc etenim facto impeditur excretio, ac potius retrocessio fit materiæ, quæ ad interiores nobiliores exquisitoris sensus partes delata, suscitât ibi pathemata ac damna gravissima. De quo obvia passim sunt exempla, facile recensenda, si tempus ferret & occasio. Inprimis de purpureo exanthemate est in comperto, id difficulter penitus eradicari, sed relinquere quasi fermentum, quod reviviscens, crebro morbum inducit eundem. Interim si placida ipsius ad cutem fit emissio & debito regimine excipitur, vacat periculo & postea redit sanitas; si autem præpostera sanguinis missione, illud retinetur exanthema, atrocia symptomata, melancholici, maniacy & apoplectici insultus ac suffocativi catarrhi cum convulsivis quandoque motibus, succedunt, tanto certius in tenerioribus ac animo mobilioribus.

§. XXV.

Mitto jam turbulentos illos sanguinis motus & perniciosas sanguinis congestiones inflammatorias, quas venæ sectio, liberalius justo minusque opportune instituta adducere valet, de quo noxio effectui sanguinis missionis, non in uno, sed duobus locis adornatæ, tres consignavit observationes HILDANUS *cons. VI. obs. XCII.* Is autem non prætereundus venæ sectionis abusus, qui subinde committitur in iis, qui pathematibus spasmodicis, convulsivis & epilepticis detinentur. Recte enim jam pridem dixit HIPPOCRATES: spasmos & convulsiones non tantum à repletionem fieri, verum etiam ab inanitione. Quæ posterior causa ubi subest, ac morbus non ex nimis aucta sanguinis bene consistentis copia, sed serosi potius atque attenuati nimium vitio accidit, pertusa vena, nunquam non augetur & contumacior redditur.

§. XXVI.

Ceterum in genere de venæ sectionis in ipsum sanguinem effectui, inter omnes qui rationem sequuntur ducem, est pro certo: post eam relictum in vasis cruorem magis attenuari, eo quod parti-

culæ aëreo-elastica, quæ nunquam non in ipsius sinu hospitantur, mole nimia antea compressæ, facta ventilatione, in vacuum cedunt locum, sese expandunt & irrequieto suo motu sanguinem interfluum agitando, crassiores moleculas discerpunt, attritu attenuant eoque majorem ipsi conciliant tenuitatem. Unde, nostra quidem sententia, vix certior sanguinem mittendi est indicatio, quam ubi viscidus is & crassus comparet, à colore obscuro veteribus dictus atrabilarius, qui in aqua multum substantiæ gelatinosæ dimittit cujusque serum mox post emissionem in offam supranatantem densatur. Sic enim comparato sanguine, utilissima ipsius missio, tum ut tenuior reddatur atque fluxilior; tum etiam ut eo promptius circumagi & solidis robur fœnerare possit. Contra ea, si sanguis jam tenuis nimium est atque serosus, ac deficientibus moleculis solidescens, plus aëris, quam sanguinis venis inest, ipse quoque sanguis emissus & frigidatus respuit coagulum, venam secare damnosum est atque perniciosum. Quam ob rem atro merito carbone notandus ille nonnullorum passim obviis practicus error, quo nimium sanguinis, per tussim, sputum, narium, uteri, aut ani venas, fluxum, iterata sanguinis, non bis, sed vel quinquies & sexies intra mensem subtractione, cohibere nituntur. Nam licet profluvium ad tempus conquiescat & pallietur quādamtenus, neutiquam tamen tollitur, sed sanguis inde tenuior factus simulque imminuta perspiratione acrior, eo magis per apertos tubulos exitum affectat & malum vehementia recrudescit majori.

§. XXVII.

Sed nolumus diutius immorari enumerandis hisce tædiosis medicorum delictis; inprimis quum jam passim in variis scriptis hæc cum aliis perstrinxerimus, maximeque in *dissert. de imprudenti medicatione multorum morborum causa*, nec non ea, quæ de *medicis morborum causa*, inscribitur. Subjiciemus potius tantum ex pluribus utilissimas cautelas, ad evitanda damna in suadenda venæ sectione servandas.

I. Magis proficua est sanguinis subtractio carnosio corporis habitu præditis, quam obesius ac pinguibus. Hi enim ab illis probe sunt distinguendi. In obesius quippe vasa exilia sunt, progressus humorum lentus & perspiratio impeditior; in carnosius autem omnia secus. Unde venæ sectio illis longe facilius nocet, quam his.

II. Errorem committunt, qui artes operosas exercentibus plus sanguinis subtrahunt, quam sellularias tractantibus. Motus enim & exercitatio corporis ipsis quotidiana, ad justam quantitatem sanguinis in corpore servandam, & nimiam absumendam, jam est sufficiens. Sanguinis autem missio, vires labefactando, eodem ad labores reddit minus aptos.

III. Perperam instituitur venæ sectio, ubi primæ viæ vitiosorum succorum colluvie scatent. Hac enim facta, sordes sanguinem subeunt ac retinentur facilius, ob imminutam ipsam ventriculi & intestinorum vim expultricem. Quare consultius est, præmittere sanguinis missioni ea, quæ alvum blande ducunt & canalem intestinorum à sordibus liberant. Nil tamen est deterius, quam in crasso sanguine turgidis impetuosas ac vehementes per inferiora, vel superiora moliri purgationes, quibus sanguis exagitatus, cum impetu ad incongrua loca propellitur, consequentibus morbis gravissimis.

IV. Macilentiores natura sæpe plus sanguinis alunt in venis quam obesi & corporis habitu spongiosi. Unde liberaliorem his ferunt & poscunt sanguinis imminutionem. Sed distinguendi natura graciliores, ab iis,

iis, qui victus parsimonia, morbis, studiis, animi affectibus, veneris exercitio, tales facti; quia his damnoſa eſuſior ejuſmodi ſanguinis ſubtractio.

V. Neque etiam in ſenibus reformidanda ſanguinis miſſio. Sunt enim inter illos, qui appetentia integra laudabili victu uſi, ſanguinis maiorem quam par eſt in vaſis colligunt quantitatem. Unde in ſenili ætate interdum magis neceſſaria, quam alia, ad morbos grandævus familiares arcendos ipſamque mortem aliquamdiu protelandam.

VI. Cum ſanguinei temperamenti corpora etiam multum inter ſe differant, dum alia carnoſiora, robuſtiora & majoribus vaſis inſtructa, alia vero teneriora, cum valde exilibus & anguſtis vaſis, atque in illis pulſus plenus & magnus, in his autem debi-

lior, oportet etiam medicum hoc diſcrimen in ſanguinis miſſione inſtituenda attendere, quia in illis venarum apertio plus utilitatis & ſecuritatis, quam in hiſce habet, ſi e. g. menſium ita, ut vel hæmorrhoidum, ſuetus fluxus ſubſtiterat, non ſemel, ſed aliquoties brevi poſt venam ſectam in corporibus plenioribus ſanguinis fluxum fuiſſe reſtitutum obſervaverimus.

VII. Summa prudentia ac iudicio opus eſt, ut juſta & corpori proportionata ſanguinis quantitas emitatur. Sive enim nimium, ſive, parcius juſto ſubtrahatur, nocet utrumque. Quapropter in definienda quantitate, exacta habenda eſt ratio ætatis, ſexus, corporis habitus, pulſus, vitæ generis, conſuetudinis, morbi ipſius, maximeque omnium virium.

F I N I S.



